



Nduudu n'dai ye^{n'}e Ndyuūs
ye^{n'}e cuicateco
ye^{n'}e Tepeuxila

Tepeuxila Cuicatec New Testament

Contents

NDUUDU N'DÁÍ CHÍ DÍNGUŪ ⁿ APÓSTOL MATEO	1
NDUUDU N'DÁÍ CHÍ DÍNGUŪ ⁿ APOSTÓL MARCOS	66
NDUUDU N'DÁÍ CHÍ DÍNGUŪ ⁿ APÓSTOL LUCAS	106
NDUUDU N'DÁÍ CHÍ DÍNGUŪ ⁿ APÓSTOL JUAN	173
CHUŪ CHI DII ⁿ APÓSTOLES	214
PABLO IDINGUŪ ⁿ YĀ CARTA 'CŪŪ YE ⁿ E 'II ⁿ YĀ ⁿ CHI SNÉE YĀ YĀĀ ⁿ ROMA	268
CARTA VMNÁÁ ⁿ VMNAA ⁿ YE ⁿ E 'II ⁿ YĀ ⁿ YE ⁿ E YĀĀ ⁿ CORINTO	297
CARTA CUAYIIVI YE ⁿ E 'II ⁿ YĀ ⁿ CHI SNÉE YĀ YĀĀ ⁿ CORINTO	326
CARTA YE ⁿ E 'II ⁿ YĀ ⁿ YE ⁿ E YĀĀ ⁿ GALACIA	345
CARTA YE ⁿ E 'II ⁿ YĀ ⁿ YE ⁿ E YĀĀ ⁿ EFESO	356
CARTA YE ⁿ E 'II ⁿ YĀ ⁿ YE ⁿ E YĀĀ ⁿ FILIPOS	367
CARTA YE ⁿ E 'II ⁿ YĀ ⁿ YE ⁿ E YĀĀ ⁿ COLOSAS	375
CARTA VMNÁÁ ⁿ VMNAA ⁿ YE ⁿ E 'II ⁿ YĀ ⁿ YE ⁿ E YĀĀ ⁿ TESALÓNICA	382
CARTA CUAYIIVI YE ⁿ E 'II ⁿ YĀ ⁿ YE ⁿ E YĀĀ ⁿ TESALÓNICA	388
CARTA VMNÁÁ ⁿ VMNAA ⁿ YE ⁿ E SA ⁿ 'Ā TIMOTEO	392
CARTA CUAYIIVI YE ⁿ E TIMOTEO	401
CARTA YE ⁿ E SA ⁿ 'Ā TITO	407
CARTA YE ⁿ E SA ⁿ 'Ā FILEMÓN	411
CARTA YE ⁿ E 'II ⁿ YĀ ⁿ HEBREOS	413
CARTA YE ⁿ E SANTIAGO	435
CARTA VMNÁÁ ⁿ VMNAA ⁿ YE ⁿ E SAN PEDRO	443
CARTA CUAYIIVI YE ⁿ E SAN PEDRO	451
CARTA VMNÁÁ ⁿ VMNAA ⁿ YE ⁿ E SAN JUAN	456
CARTA CUAYIIVI YE ⁿ E SAN JUAN	462
CARTA NDÍÍ 'IINŪ YE ⁿ E SAN JUAN	463
CARTA YE ⁿ E JUDAS	464
APOCALIPSIS, NDUUDU CHÍ CH'I ⁿ I NDYUŪS YE ⁿ E JESUCRISTO	467



Nduudu n'dai yeⁿe Ndyuūs yeⁿe cuicateco yeⁿe Tepeuxila

New Testament in Cuicatec, Tepeuxila (MX:cux:Cuicatec, Tepeuxila)

Language: Cuicatec, Tepeuxila

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 1974 Wycliffe Bible Translators, Inc.

Copyright © 1974 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

3828db24-4ddd-56aa-b0eb-0178327243b4

ISBN: 978-1-5313-0185-9

NDUUDU N'DÁÍ CHÍ DÍNGUŪⁿ APÓSTOL MATEO

Yeⁿé 'iiⁿyāⁿ chi ndaata yeⁿē
Jesucristo chí vmnááⁿ vmnaaⁿ

(Lc. 3.23-38)

1 Chuū chí lista yeⁿe ndaata yeⁿe Je-
sucristo, ndíí na ndaata Abraham
ndíí na ndaata David ndíí tiempo chi
ch'iindiyááⁿ Jesucristo.

²Abraham miiⁿ ch'iindī daiya sa chi
nguuvi Isaac. Isaac miiⁿ ní ch'iindī daiya
sa chi nguuvi Jacob. Jacob miiⁿ ní
ch'iindī daiya sa Judá ndúúcu tanáⁿā
'dífnu yā. ³Judá miiⁿ ní ndúúcu Tamar
chi n'daataá yeⁿē sa ch'iindī daiyá yā
chi cuates chi nguuvi Fares ndúúcu Zara.
Fares miiⁿ ní ch'iindī daiya sa Esrom.
Esrom miiⁿ ní ch'iindī daiya sa Aram.
⁴Aram miiⁿ ní ch'iindī daiya sa Ami-
nadab. Aminadab miiⁿ ní ch'iindī daiya
sa Naasón. Naasón miiⁿ ní ch'iindī daiya
sa Salmón. ⁵Salmón ndúúcu Rahab chi
n'daataá yeⁿē sa ní ch'iindī daiyá yā
Booz. Booz miiⁿ ndúúcu Rut chi n'daataá
yeⁿē sa ní ch'iindī daiyá yā Obed. Obed
miiⁿ ní ch'iindī daiya sa Isaf. ⁶Isaf miiⁿ
ní ch'iindī daiya sa rey David. Rey David
miiⁿ ní ch'iindī daiyá yā Salomón taachi
caneé yā ndúúcu n'daataá chi vmnááⁿ
vmnaaⁿ ní n'daataá yeⁿe saⁿā Urías.

⁷Salomón miiⁿ ní ch'iindī daiya sa
Roboam. Roboam miiⁿ ní ch'iindī daiya
sa Abías. Abías miiⁿ ní ch'iindī daiya
sa Asa. ⁸Asa miiⁿ ní ch'iindī daiya sa
Josafat. Josafat miiⁿ ní ch'iindī daiya sa
Joram. Joram miiⁿ ní ch'iindī daiya sa
Uzías. ⁹Uzías miiⁿ ní ch'iindī daiya sa
Jotam. Jotam miiⁿ ní ch'iindī daiya sa
Acáz. Acáz miiⁿ ní ch'iindī daiya sa Eze-
quías. ¹⁰Ezequías miiⁿ ní ch'iindī daiya
sa Manasés. Manasés miiⁿ ní ch'iindī
daiya sa Amón. Amón miiⁿ ní ch'iindī
daiya sa Josías. ¹¹Josías miiⁿ ní ch'iindī

daiya sa Jeconías. Jeconías miiⁿ ndúúcu
tanáⁿā vi'i yā ch'iindiyááⁿ yā taachi chi-
idá yā ndúúcu cheecú yā ní preso yā
ndúúcu tanáⁿā 'iiⁿyāⁿ yeⁿe ndaata Israel
ní taachi cueⁿé yā na cyúúni na yáⁿāa
Babilonia.

¹²Cuayiiwi chi cho'ó yā na yáⁿāa Ba-
bilonia, Jeconías miiⁿ ní ch'iindī daiya sa
Salatiel. Salatiel miiⁿ ní ch'iindī daiya sa
Zorobabel. ¹³Zorobabel miiⁿ ní ch'iindī
daiya sa Abiud. Abiud miiⁿ ní ch'iindī
daiya sa Eliaquim. Eliaquim miiⁿ ní
ch'iindī daiya sa Azor. ¹⁴Azor miiⁿ ní
ch'iindī daiya sa Sadoc. Sadoc miiⁿ ní
ch'iindī daiya sa Aquim. Aquim miiⁿ ní
ch'iindī daiya sa Eliud. ¹⁵Eliud miiⁿ ní
ch'iindī daiya sa Eleazar. Eleazar miiⁿ ní
ch'iindī daiya sa Matán. Matán miiⁿ ní
ch'iindī daiya sa Jacob. ¹⁶Jacob miiⁿ ní
ch'iindī daiya sa José, 'iiⁿyāⁿ chi isáⁿā
yeⁿe María. Ní daiya ta ní Jesús chi ngu-
uvi Cristo.

¹⁷'Tíicā nducuéⁿē ndaata yeⁿe Abra-
ham ndíí rey David ní ndiichicúúuⁿ
ndaata yeⁿé yā o generaciones. Ní
ndíí rey David miiⁿ ndíí taachi cueⁿe
nducyáácá 'iiⁿyāⁿ ndaata yeⁿe yā na país
Babilonia ní ndiichicúúuⁿ ndaata yeⁿé
yā. Ní ndíí taachi cheⁿe yā na yáⁿāa Ba-
bilonia ndíí taachi ndaá Cristo iⁿ'yéeⁿdi
'cūú ní ndiichicúúuⁿ ndaata yeⁿé yā.

'Túúca ch'iindiyááⁿ Jesucristo

(Lc. 2.1-7)

¹⁸'Túúca ch'iindiyááⁿ Jesucristo.
Taachí María miiⁿ chí cheecu Jesús miiⁿ
caⁿa yā chí 'caandavaacú yā ndúúcu
José níicú taachi 'āa cuéé 'caandavaacú
yā ndúúcu vi'i, véé 'áámá daiya yā cheetí
yā cucáávā Espíritu N'dai yeⁿé Ndyuús.
¹⁹José miiⁿ ní neⁿé yā 'caandavaacu
yā ndúúcu María miiⁿ. Ní José miiⁿ
ní néené n'dai yā. Ní cuayiiwi nguéé
neⁿé yā 'caandavaacú yā ndúúcu táⁿā
cucáávā chí véé dacua'a cheetí yā. Ní
nguéé neⁿé yā yaa'vi yā 'iiⁿyāⁿ yeⁿe yááⁿ

miiⁿya yeⁿe María chi nguéeⁿ n'daācā ti nguéeⁿ neⁿé yā chi María cuuviⁿ 'cuinaaⁿ yā. ²⁰Ní taachí José miiⁿ nacadínuuⁿ yā chi cu'neeⁿ yā María miiⁿ, cuayiivi ní taachí cyaadu yā, 'áámá ángel yeⁿe Señor Ndyuūs che'enaāⁿ yā yeⁿé yā ní caⁿa yā chii yā José miiⁿ: Díí, José, saⁿa yeⁿe ndaata rey David, nguéeⁿ 'va'a di cuuvi n'daataá yeⁿe di María, ti dacuáⁿ yeⁿe tá chi véé cheeti tá nguéeⁿ yeⁿe 'iiⁿyāⁿ ti yeⁿe Espíritu N'dai yeⁿe Ndyuūs. ²¹Ní táⁿa miiⁿ ní 'cuundiyaāⁿ daiya tá 'áámá saⁿa lííⁿ. Díí ní cu'neeⁿ di chí nguúví sá JESÚS caati cucáávā Jesús miiⁿ ní nadanguáⁿai 'iiⁿyāⁿ yeⁿe íⁿye'eⁿdí 'cūū ní nadich'εεcú yā nuuⁿndi yeⁿe nducyaaca 'iiⁿyāⁿ.

²²Tanducuéⁿe chuū ní 'tíicā chii ndúúcu María ní 'íicú cuuvi cuaacu chí caⁿa profeta yeⁿe nduudu yeⁿé Ndyuūs ndíí cuaaⁿ vmnaaⁿ, nduudu chi canéé nguūⁿ na libro yeⁿé Ndyuūs 'tíicā:

²³Níicú n'diichí nī. Tá 'cūū 'áámá chí cuiinuú tá 'cuūndí daiya tá. Taachí 'cuundiyaāⁿ 'áámá daiya tá ní cu'neeⁿ chi duuchi Emanuel chí neⁿe caaⁿmaⁿ Ndyuūs ndúúcu 's'uūúⁿ.

²⁴Cuayiivi miiⁿ ní taachí José miiⁿ nanduuchí yā, tuuⁿmi ní díí yā tan'dúúca chí ngaⁿa ángel yeⁿe Señor Ndyuūs níicú ch'iindivaacú yā ndúúcu María miiⁿ.

²⁵Naati José miiⁿ nguéeⁿ n'diichí sá María miiⁿ ndíí ch'iindiyaāⁿ daiya tá, ní José s'neeⁿ sá chí nguúví dacuaⁿāa miiⁿ dúúchí JESÚS.

Yeⁿé 'iiⁿyāⁿ magos chi cheⁿe sa n'diichi sa Jesús

2 Taachi Jesús ch'iindiyāaⁿ yā na yāāⁿ Belén yeⁿe yāⁿāa Judea, tiempo miiⁿ ní saⁿa Herodes miiⁿ ní rey yeⁿe yāⁿāa Judea. Ní n'duuví magos, 'iiⁿyāⁿ chí déenu ca yā yeⁿe 'ííⁿnyúⁿ ndiicá yaⁿáí yā ndíí cuaaⁿ ná ícan'daā 'yáⁿā. Ní magos ndaa yā na yāāⁿ Jerusalén. ²Magos ní ndaa yā nanááⁿ rey Herodes

miiⁿ ní ntiinguuneeⁿ yā rey: ¿Tíí canéé 'iiⁿyāⁿ chí rey yeⁿe 'iiⁿyāⁿ Israel chí 'ni-indiyāaⁿ yā? Nús'uú ní n'diichí 'nū 'áámá 'ííⁿnyúⁿ ch'εete cuááⁿ ná ícan'dáá 'yáⁿā 'íicú chííⁿ chí cuchíí 'nū. Níicú ndaaⁿ 'nū chí cu'téenuⁿ 'nū saⁿa lííⁿ rey miiⁿ.

³Taachí rey Herodes miiⁿ ch'iindiveéⁿ yā chuū, chistaⁿa vaanicadínuuⁿ yeⁿe yā. 'Tiicá ntúūⁿ nducyaaca 'iiⁿyāⁿ yeⁿe yāāⁿ Jerusalén taachi ch'iindiveéⁿ yā.

⁴Ní rey Herodes miiⁿ ní nádaamā yā nducyaaca chiidūu n'geeté chí ngaⁿa ntiiⁿnyúⁿ yā yeⁿe yaācū Israel ndúúcu 'iiⁿyāⁿ chí ngi'cuééⁿ ley 'iiⁿyāⁿ yeⁿe Israel. Ní itinguuneeⁿ yā 'iiⁿyāⁿ s'eeⁿ: ¿Tíí 'niindiyāaⁿ Cristo? ⁵'Iiⁿyāⁿ s'eeⁿ ní caⁿa yā chii yā rey miiⁿ: 'Cuundiyaāⁿ yā na yāāⁿ Belén yeⁿe yāⁿāa Judea caati 'tíicā canéé nguūⁿ na libro yeⁿe Ndyuūs cucáávā saⁿa profeta:

⁶Ndíis'tii 'iiⁿyāⁿ yeⁿe yāāⁿ Belén yeⁿe yāⁿāa Judá, ¿'áá nguéeⁿ yāāⁿ yeⁿe nī chí 'lííⁿ cá nguaaⁿ nducuéⁿe yāāⁿ yeⁿe yāⁿāa Judá naachi 'iiⁿyāⁿ ndíí tiiiⁿ ngaⁿa ntiiⁿnyúⁿ yā? Nguéeⁿ chí 'tíicā, caati nguaaⁿ ndís'tii chí yeⁿe yāāⁿ Belén can'dáá 'áámá sáⁿa chí ngaⁿa ntiiⁿnyuⁿ sá yeⁿe nducyáacá 'iiⁿyāⁿ Israel chí judíos chí 'iiⁿyāⁿ s'eeⁿ chí Ndyuūs nndeeye yā.

⁷Tuuⁿmi ní rey Herodes yaaⁿvi n'dé'í yā saⁿa magos ní ntiinguuneeⁿ cá yā saⁿa s'eeⁿ: ¿Dε'ε tiempo n'diichi nī 'ííⁿnyúⁿ miiⁿ? ⁸Ní rey miiⁿ ní caⁿa yā chii yā saⁿa s'eeⁿ: Ndíis'tii magos, cueⁿe nī na yāāⁿ Belén ní in'nuūⁿ n'daāca nī dacuaⁿa lííⁿ miiⁿ. Ní taachí ndaaca nī dacuaⁿa mííⁿ, nanguεεcuneeⁿ nī ní caaⁿmaⁿ nī yeⁿé. Maaⁿ níicú 'úú ntúūⁿ ní cuuvi caⁿa cu'teenú dacuaⁿa lííⁿ miiⁿ.

⁹Magos ní ch'iindiveéⁿ yā nduudu yeⁿe rey miiⁿ ní cūnaⁿa yā. Cuin'diichí nī. 'Ííⁿnyúⁿ chí 'iiⁿyāⁿ magos n'diichi yā cuaaⁿ na ícan'daa 'yáⁿā, 'ííⁿnyúⁿ mííⁿ cueⁿé nanááⁿ yeⁿe magos taandu-véeⁿ ndaa ní cānee lugar naachi canéé

dacua'a lííⁿ. ¹⁰Ní taachi magos 'āā n'diichí yā líí'nyúⁿ miiⁿ, yéénú taaví yā. ¹¹Ní taachi sndaá yā va'āi miiⁿ, n'diichí yā saⁿā lííⁿ dacua'ā miiⁿ ndúúcu chεecu sá María. Ní chíntií'yā yā nanááⁿ dacua'ā miiⁿ ní s'téenu yā. Taachi n'guaaⁿ yā caja naachi snéé regalos yeⁿe yā, tuu'mi ní ca'á yā yeⁿe dacua'ā miiⁿ. Regalos ní 'díí'nguaāⁿ ndúúcu yāⁿā chí n'déeve ngééⁿ ndúúcu mirra chí diitú taaví n'dai ngééⁿ. ¹²Cuayiivi miiⁿ ní Ndyuūs yaa'vi yā magos na 'yúúdíyaaⁿ yeⁿe yā chí 'āā ntéé naⁿa yā nanááⁿ rey Herodes miiⁿ. Níicú magos cunaⁿa yā na vaacu yā na taama yúúni.

Cueⁿe yā ngéenu yā na yáⁿāa Egipto

¹³Taachi magos cunaⁿa yā, tuu'mi ní Ndyuūs dicho'ó yā 'áámá ángel níicú ángel miiⁿ ní ndaá yā nanááⁿ José miiⁿ taachi cyaadú yā ní caⁿa yā chii yā José: Díí José, nducueeⁿ di ní cuta'a di saⁿā lííⁿ ní cueⁿe di cáanu di ndúúcu chεecu sa ndíí yáⁿāa Egipto. Ní 'cuεetinée nī miiⁿ ndíí taachi 'úú caaⁿmáⁿ caati canéé chí rey Herodes miiⁿ ní nan'nuúⁿ yā saⁿā lííⁿ chí 'caaⁿnuⁿ yā saⁿā.

¹⁴José miiⁿ ní nanduuchí yā. 'Tiicá ntúúⁿ chεecu sa. Ní sta'a yā saⁿā lííⁿ miiⁿ ní nguiinū mííⁿ nūuⁿ cueⁿe yā ndúúcu chεecu sa na yáⁿāa Egipto. ¹⁵Níicú miiⁿ ch'εetinée yā ndíí chí ch'ií rey Herodes. Níicú cúunú ca'a chííⁿ chí Señor Ndyuūs caⁿa yā na libro yeⁿe yā ndii cuááⁿ vmaⁿaaⁿ cucáávā saⁿa profeta miiⁿ taachi caⁿa yā 'tíicā: Ná yáⁿāa Egipto 'cai daíyā.

Rey Herodes caⁿa ntiíⁿnyúⁿ yā chí 'caaⁿnuⁿ yā dacua'āa ngaiyāā

¹⁶Taachí rey Herodes miiⁿ tuumi-cadínuuⁿ yā chí 'iiⁿyāⁿ magos chinche'éei yā 'iiⁿyāⁿ, tuu'mi ní nduuví taáⁿ n'dai yā. Ní rey miiⁿ ní caⁿa ntiíⁿnyuⁿ yā ní dich'ó yā soldados chí ch'iíⁿnuⁿ yā nducyáácá dacua'āa chí saⁿā ndíí cuaacu 'uúvi nduūyū chí véé na yāāⁿ

Belén ndúúcu tanáⁿā yāāⁿ chí na niⁿnuúⁿ. 'Tíicā rey miiⁿ diiⁿ cuenta yā ti cho'oo 'uuví nduūyū chí magos n'diichí yā 'líí'nyúⁿ ch'εete miiⁿ yeⁿe nanguuvi. ¹⁷Tuu'mi ní cho'oo chuū chí cuuvi cuaacu tan'dúúcā chí canéé nguūⁿ na libro yeⁿe Ndyuūs cucáávā chí caⁿa saⁿā profeta Jeremías cuááⁿ vmaⁿaaⁿ 'túúcā:

¹⁸Na yāāⁿ Ramá ch'iindiveeⁿ 'iiⁿyāⁿ chí ngeecu yā ní n'gái yā ndúúcu 'áámá vaadi yā'ai ch'εeté cucáávā daiya yā chí ch'ií. N'daataá yeⁿe Israel s'eeⁿ ngeecu yā cucáávā daiya yā chí ch'iíⁿnuⁿ rey tan'dúúcā chí táⁿā Raquel ngeecu yā cucáávā daiya yā chí ch'ií. Ní nguéé chíi ndaacā n'daataa s'eeⁿ 'viich'εetínūuⁿ miiⁿ.

¹⁹Cuayiivi taachí ch'ií rey Herodes miiⁿ, José miiⁿ ní 'āā canee yā na yáⁿāa Egipto. Tuu'mi ní Señor Ndyuūs dicho'o yā 'áámá ángel ní ángel che'enaáⁿ yā yeⁿe José taachi cyaadú yā. ²⁰Ní ángel miiⁿ caⁿa yā chii yā José: Díí José, nducueeⁿ di ní cuta'a di saⁿā lííⁿ dacua'āa ní cuinaⁿa di ndúúcu chεecu sa na yáⁿāa Israel caati ch'ií 'iiⁿyāⁿ chí neⁿe yā 'caaⁿnuⁿ yā saⁿā lííⁿ.

²¹Tuu'mi ní José ncueeⁿ yā. 'Tiicá ntúúⁿ chεecu sa. Ní sta'a yā saⁿā lííⁿ miiⁿ ní cueⁿe yā ndúúcu chεecu sa na yáⁿāa yeⁿe 'iiⁿyāⁿ Israel. ²²Taachí José miiⁿ ch'iindiveeⁿ yā chí saⁿā Arquelao canéé lado yeⁿe rey Herodes chí chiida sa, tuu'mi ní José miiⁿ ní 'va'á yā chí caⁿa yā na yáⁿāa Judea chí yáⁿāa yeⁿe 'iiⁿyāⁿ Israel. Naati tan'dúúcā chí ángel che'enaáⁿ yeⁿe yā na 'yuudiyaaⁿ yeⁿe yā, cueⁿe yā yáⁿāa Galilea chí yáⁿāa yeⁿe 'iiⁿyāⁿ Israel ntúúⁿ. ²³Ní ndaá yā na yáⁿāa mííⁿ ní cueⁿe yā ch'εetinée yā na yáⁿāa Nazaret yeⁿe yáⁿāa Galilea. Ní 'licu cuuvi cuaacu chí caⁿa profetas vmaⁿaaⁿ vmaⁿaaⁿ yeⁿe Jesús chí 'túúcā: Canéé chí cuuvi nguúví yā 'iiⁿyāⁿ nazareno yā cucáávā chí cueⁿe yā na yáⁿāa Nazaret.

**Yeⁿe chi Juan cueēdínuūⁿiⁿ yā ní
ngaⁿa yā nduudu cuaacu**

(Mr. 1.1-8; Lc. 3.1-9, 15-17; Jn. 1.19-28)

3 Tiempo miiⁿ chiicá Juan chí cueēdínuūⁿiⁿ yā na lugar naachi nguéé ch'ēetinéé 'iiⁿyāⁿ. Lugar miiⁿ chi yeⁿe yáⁿāa Judea ní míⁿ ngaⁿa Juan nduudu cuaacu. ²Juan miiⁿ ní ngaⁿa yā chí 'túúcā: Ndís'tiī, ndaacadaamí ní yeⁿe chí díⁿ ní chí nguéé n'dai caati 'āā ndāā niiⁿnuúⁿ nguuvi miiⁿ naachi Ndyuūs ngaⁿa ntiīⁿnyúⁿ yā na va'ai chēeti nguuvi. ³Níⁿíⁿ yēⁿe Juan 'cūū ní saⁿa profeta Isaías caⁿa yā yeⁿe yā vmnááⁿ vmnaaⁿ taachí caⁿa yā 'túúcā: 'Caandiveéⁿ ní. 'Áámá saⁿā ngaⁿā yuudu sa 'túúcā na yáⁿāa cuūⁿmáⁿ naachi nguéé ch'ēetinéé 'iiⁿyāⁿ: 'Cuundiyaáⁿ ní yúúní yeⁿe Señor Ndyuūs caati cúchii yā. Nan'guáaⁿ ní yúúní cuaacu caavá yā. Dideévé ní staava yeⁿe ní ní cuuvi cuaáⁿ ní 'iiⁿyāⁿ miiⁿ taachi ndaa yā.

⁴Catecai Juan miiⁿ ní nin'dai ndúúcū yuūdū yeⁿe 'iiti camello. Ní cinturón yeⁿe sa ní diiⁿmaⁿ 'iiti. Níⁿíⁿ chí cheⁿe sa ní 'iiti langostas ndúúcū n'di'i yeⁿe 'iiti 'yáaiⁿ chí vεε cuēeti. ⁵N'deeé 'iiⁿyāⁿ can'daa yā chí 'caandiveéⁿ yā nduudu yeⁿe Juan miiⁿ. Ní can'daa yā yeⁿe yāāⁿ Jerusalén, yeⁿe yáⁿāa Judea, ní yeⁿe yáⁿāa chí cuaaⁿ 'diituú yeⁿe yíⁿcú Jordán. ⁶'Iiⁿyāⁿ ní caⁿa yā nuuⁿndi yeⁿe yā nanááⁿ Ndyuūs níⁿíⁿ Juan miiⁿ ní chēēdínuūⁿiⁿ sá 'iiⁿyāⁿ miiⁿ na yíⁿcú Jordán miiⁿ.

⁷Taachí Juan miiⁿ n'diichí sa chí neené 'yaaⁿ 'iiⁿyāⁿ fariseos ndúúcū 'iiⁿyāⁿ saduceos neⁿe yā chí cueēdínuūⁿiⁿ sa 'iiⁿyāⁿ, Juan miiⁿ caⁿa sa chí sa 'iiⁿyāⁿ miiⁿ: Ndís'tiī tan'dúúcā cúú, 'tíicā ndís'tiī. ¿Du'ú chí 'cuééⁿ ndís'tiī chí cuuvi cáanu ní yeⁿe castigo taaⁿ chí cuchii? ⁸N'daāca díⁿ ní maaⁿ níⁿíⁿ 'cuuⁿmíⁿ ní 'iiⁿyāⁿ chí 'āā

ndaacadaamí ní yeⁿe nuuⁿndi yeⁿe ní. ⁹Ndís'tiī ní 'āā ntéé nadacádínuuⁿ ní chí n'dai ní caati ndaata yeⁿe Abraham ndís'tiī. Naati 'úú ní ngaⁿā ngii ndís'tiī chí Ndyuūs cuuvi díⁿ yā chí tuūu s'tiī ní cuuvi daiya Abraham. ¹⁰Cutíiⁿ míⁿ 'āā canéé na diiⁿyu yáⁿā. Nducyaaca yáⁿā chí nguéé n'dāacā ngii n'gui'i yeⁿe canee chí 'caata yáⁿā míⁿ ní cūnuuⁿ na yaⁿā. ¹¹'Úú ní cuaacu níⁿnyúⁿ chí ngeēdínuūⁿiⁿ ndís'tiī ndúúcū nuūⁿiⁿ caati 'āā ndaacadaamí ní yeⁿe nuuⁿndi yeⁿe ní. Naati ndāá táámá 'iiⁿyāⁿ cuayiivi yeⁿe 'úú chí ch'ēete taavi cá poder yeⁿe yā nguéé ti 'úú. 'Úú ní nguéé neené n'dai 'úú chí cuuvi candeé ndaacuú yeⁿe yā. 'Iiⁿyāⁿ miiⁿ ní n'dai taavi cá yā chí cuuvi 'úú. 'Iiⁿyāⁿ miiⁿ ní cueēdínuūⁿiⁿ yā ndúúcū Espíritu N'dai yeⁿe Ndyuūs ndúúcū yaⁿā. ¹²Ní taachi ndaa 'iiⁿyāⁿ miiⁿ chí nguuvi Jesús díⁿ yā tan'dúúcā 'áámá 'iiⁿyāⁿ chí dideévé yā trigo 'tíicā díⁿ yā ndúúcū 'iiⁿyāⁿ. Ní sta'á yā zaranda yeⁿe yā ní nadidaamá yā trigo na chēeti díⁿnuūⁿ. Ní deēcú miiⁿ ni'neeⁿ yaⁿa yā ná nguuchí yaⁿā chí 'āā ntéé n'tuūvi. Deēcú miiⁿ ní tan'dúúcā 'iiⁿyāⁿ chí nguéé i'téenu yā Ndyuūs.

Juan chēēdínuūⁿiⁿ sa Jesús

(Mr. 1.9-11; Lc. 3.21-22)

¹³Tuu'mi ní Jesús chiicá yā na yáⁿāa Galilea ní ndaa yā na yíⁿcú Jordán naachi canee Juan chí Juan miiⁿ ní cueēdínuūⁿiⁿ sa Jesús miiⁿ. ¹⁴Juan miiⁿ ní nguéé 'cuuⁿ sa. Ní caⁿa sa chí sa Jesús miiⁿ: 'Úú ní neⁿe chí dii cueēdínuūⁿiⁿ di 'úú. ¿Áá dii cuchii di nanáaⁿ 'úú?

¹⁵Jesús nan'gueēcútaⁿa yā: Diiⁿ dí maaⁿ 'tíicā; ní diiⁿ yú tan'dúúcā chí Dendyuūs neⁿe yā chí diiⁿ yú. Tuu'mi ní Juan 'cuūⁿ sa.

¹⁶Cuayiivi taachi 'āā chēēdínuūⁿiⁿ Juan miiⁿ Jesús miiⁿ, tuu'mi ní Jesús ní nan'daa yā na nuūⁿiⁿ. Cuayiivi ní nanguaāⁿ nanguuvi. Ní Juan n'diichí sa

Espíritu N'dai ye"é Ndyuūs mii"n chi tan'dúucā paloma 'tíicā. Chiica ye"ē na va'ai chēeti nguuví ní ndaā vmaā"n ye"e Jesús mii"n. ¹⁷ Tuu'mi ní n'giindiveé"n yā 'áámá nduudu ye"ē nanguuvi chí nga"á: Sa"á 'cūū Daiyá chí ne"e taaví. Ní yeenú taaví cáávā sá"á 'cūū.

Yáá"n'guiinū"n ne"e sa tuu"vi nee"n sa Jesús

(Mr. 1.12-13; Lc. 4.1-13)

4 Tuu'mi ní Espiritu N'dai ye"é Ndyuūs candéē Jesús mii"n ná yá"áa cuū"má"n naachi nguéé ch'etinéé 'ii"yā"n chí yáá"n'guiinū"n ne"e sa chí Jesús díf"n yā nuu"ndi.

² Jesús canée yā mii"n 'uūvū ngeecu nguuví ní 'uūvī ngeecu n'gaa"n ní nguéé che'é yā. Ní cuayiivi ní cuiicú yā. ³ Yáá"n'guiinū"n ní ndaā sa nanaá"n Jesús chí n'diichinee"n sa 'ii"yā"n. Ní ca"á sa: Dii Jesús, nduuti chí dii chí Daiya Dendyuūs dii, caa"ma"n dí cuuvi dí tuūu 'cūū chí nduuví pan. Ní nduuví pan ní cuuvi che'e di.

⁴ Jesús mii"n nan'gueécúta"á yā ní ca"á yā: 'Túucā canee nguū"n na libro ye"é Ndyuūs: Nguéé dámaā"n pan che'é 'ii"yā"n ní cunduūchí yā caati ndúucū tandu-cué"ē nduudu chí nga"á Ndyuūs ní 'ii"yā"n cunduūchí yā nduuti chí cu'téenu yā.

⁵ Tuu'mi ní yáá"n'guiinū"n mii"n candéē sa Jesús na yáá"n Jerusalén chí yáá"n ye"e Ndyuūs. Ní chin'duu sá 'ii"yā"n na yáacú ye"e yaácū. ⁶ Ní yáá"n'guiinū"n ca"á sa chí sa Jesús: Nduuti chí dii chí Daiya Dendyuūs dii, cáávā di ndii 'múú"n ndii na yá"áa; caati 'túucā canéé nguū"n na libro ye"é Ndyuūs:

Ndyuūs dichó'o yā ángeles ye"e yā chí dii"n yā cuidado ye"ē di. Ní ángeles cundéē yā dii ndúucū ta'á yā, ní nguéé cuuvi ya'ai ca'a di na tuūu.

⁷ Jesús nán'gueécúta"á yā: 'Tuucá ntúú"n canéé nguū"n na libro ye"é

Ndyuūs: Nguéé dii"n di mar 'áámá cosa chí n'diichinee"n di Señor Ndyuūs ye"ē di.

⁸ Tuu'mi candéē yáá"n'guiinū"n mii"n Jesús mii"n na 'áámá yíicū yáacú ní ch'i"ni sa tandu-cué"ē naciones ye"ē i"yee"dí 'cūū ndúucū chí nga"á nti"nyu"n sa ye"ē ndúucū dendú'ū chí n'geete chí véé ye"ē. ⁹ Ní ca"á sa chí sa Jesús mii"n: Tanducué"ē chuū teé dii nduuti chí caantí'ya dí nanaá"n ní cu'téenu di 'úú.

¹⁰ Tuu'mi ní Jesús mii"n ca"á yā chí yā sa"á mii"n: Díf' yáá"n'guiinū"n, cuví di nanaá"n caati 'túucā canéé nguū"n na libro ye"e Dendyuūs: Cu'téenu di Señor Ndyuūs ye"ē di ní 'caandivee"n di ye"e 'ii"yā"n míf"n nūu"n.

¹¹ Tuu'mi ní yáá"n'guiinū"n mii"n di-ví sa ye"e Jesús, ní nínndaā ángeles ní dichí'f'vē yā Jesús mii"n.

Jesús tucá'a yā nti"nyu"n ye"e yā na yá"áa Galilea

(Mr. 1.14-15; Lc. 4.14-15)

¹² Taachi ch'iindiveé"n Jesús mii"n chí Juan chí ngeedinuū"n'ni"n 'ii"yā"n canúú"n sá vácūū, nanguuecunée yā cuna"á yā na yá"áa Galilea. ¹³ Chiicá yā na yáá"n Nazaret ní ndaa yā canee yā na yáá"n Capernaum. Yáá"n mii"n ní ni"nuú"n na nuū"ni"nyá"á canee, ní canee na yá"áa ye"e Zabulón ndúucū yá"áa ye"e Nef-talí. ¹⁴ Ní cuuvi cuaacu nduudu ye"e sa"á profeta Isaías chí ca"á sa cuáá"n vmaā"n 'tíicā:

¹⁵ Ná yá"áa ye"ē Zabulón ndúucū na yá"áa ye"e Nef-talí chí canéé na yúúni chí nge"e ná nuū"ni"nyá"á ndúucū na yá"áa chí canee taama lado ye"e yíicú chí nguuví Jordán. Míf"n canéé yá"áa Galilea ye"e 'ii"yā"n chí nguéé ye"ē ndaata 'ii"yā"n Israel.

¹⁶ 'ii"yā"n chí snéé na maái"n ti nguéé ye"e Ndyuūs, 'ii"yā"n s'ee"n n'diichí yā 'áámá deēve ch'ēete. Ní chíi deēve mii"n naachi snéé 'ii"yā"n s'ee"n.

¹⁷ Ndíí tuu'mi tucá'á Jesús ca"á yā nduudu cuaacu ní ca"á yā: Ndaacadaamí nī ye"e nuu"ndi ye"é nī caati tiempo chi Ndyuūs nga"á nti"nyú"n yā na va'ai chæti nguuvi 'áā ndaa ni"nuú".

**Jesús yaa'vi yā cuūu"n sa"n
chí itungáá"n 'yaācā**

(Mr. 1.16-20; Lc. 5.1-11)

¹⁸ Cuayiivi ní Jesús mii" cachiicá yā cuaa" 'diituú nuū"ni"yá"á chí nguuvi Galilea, ní n'diichí yā na 'uuví sa"á 'dínu sa ví. 'Áámá sa"á ní Simón Pedro nguuvi sa. Táámá sa"á ní 'diinu sa ní Andrés nguuvi sa. Sa"á s'uu" ní n'gaa nuu" sa yáanā ye"é 'yaācā mii" na nuū"ni"yá"á ti sa"á s'ee" itungáá"n sa 'yaācā na nuū"ni"yá"á ti nti"nyu"n ye"é sa. ¹⁹ Jesús ca"á yā chí yā sa"á s'ee": Cuchí nī nduucú, ní 'úú ní dí" chí in'nuú"n nī 'ii"yā"n chí cuuvi ca"á yā nduucú. Ní tan'dúucā chí tungaá"n nī 'yaācā ye"e nuū"ni"yá"á, 'tíicā in'nuú"n nī 'ii"yā"n chí ca"á yā nduucú.

²⁰ Hora mí"n nūu" ní sa"á s'ee" s'nee" sa yaānā ye"é sa ní cue"e sa ndúucū Jesús mii".

²¹ Tuu'mi ní Jesús mii" cue"e ca yā ní n'diichi yā taama 'uuví sa"á chí 'diinu sá ví chí nguuvi sa Jacobo ndúucū Juan. Ní sa"á s'uu" ní daiya Zebedeo. Ní snee sa na barco mii" ndúucū chiida yā Zebedeo mii" ní n'diyaatá yā yáanā ye"e yā. Jesús 'cai yā Juan ndúucū Jacobo mii". ²² Tuu'mí nūu" ní sa"á s'uu" ní s'nee" sa barco mii" ndúucū chiida sa, ní cue"e sa"á s'uu" ndúucū Jesús mii".

Jesús ngi'cuée"n yā 'yaa"n taavi 'ii"yā"n

(Lc. 6.17-19)

²³ Jesús cachiicá yā núu"má"n ná yá"áa ye"e Galilea ní ngi'cuee"n yā na yaacū sinagogas na yáa"n ye"é yá"áa mii". Ní ca"á yā nduudu cuaacu ye"é naachi Ndyuūs nga"á nti"nyú"n yā. Jesús mii" ní dí" yā chí nduūvā ye"é 'ii"yā"n ye"e nducué"e

naa" ca'ái ndúucū 'ii"yā"n ye"e nducué"e chí ya'ai ye"e yā. ²⁴ Ní nducyáácá 'ii"yā"n ye"e núu"má"n yáa"n ye"e yá"áa Siria ch'iindiveé"n yā ye"e Jesús mii". Ní candée yā 'ii"yā"n chí ya'ai ye"é, ndúucū 'ii"yā"n chí n'dee náa"n ca'ai ndii yā, ndúucū 'ii"yā"n chí canee yā ndúucū espíritus ye"e yáa"n'guinūu", ndúucū 'ii"yā"n chí ndistá"á vaanicádiinūu" ye"é, ndúucū 'ii"yā"n ndúucū ca'ái chí in'dúuví cuerpo ye"e yā. Ní Jesús dí" yā chí nducyaaca 'ii"yā"n nduūvā ye"é yā. ²⁵ Neené 'yaa"n 'ii"yā"n cue"é yā ndúucū Jesús mii". 'Ii"yā"n s'ee" ní ye"e yá"áa Galilea, ndúucū distrito ye"é Decápolis chí véé ndíichi yáa"n ye"é, ndúucū yáa"n Jerusalén, ndúucū yá"áa ye"e Judea, ndúucū yá"áa chí snéé táamá lado ye"é yíicú Jordán.

**Jesús nga"á yā nduudu
cuaacu na 'áámá yiicu**

(Lc. 6.20-23)

5 Taachi Jesús n'diichí yā chí n'dee n'dái 'ii"yā"n cue"e yā ndúucū yā tuu'mi ní Jesús cue"e yā 'áámá yiicū. Taachi Jesús mii" ch'iindí yā tuu'mi ní discípulos ye"e yā ní ndaa yā nanáa"n yā. ² Jesús ní ca"á yā ní ngi'cuée"n yā 'ii"yā"n s'ee".

³ De'e chúucā n'dái 'ii"yā"n chí deenú yā na staava ye"é yā chí ne"e deenu cá yā ye"e Ndyuūs, caati cuuvi ye"é yā ye"e naachi Ndyuūs nga"á nti"nyú"n yā ná va'ai chæti nguuvi.

⁴ De'e chúucā n'dai 'ii"yā"n chí ndaachi 'iinú yā cáavā chí i'téenu yā Ndyuūs maa"n, caati cuayiivi ní Ndyuūs ca'á yā 'viich'ætiinūu" 'ii"yā"n.

⁵ De'e chúucā n'dai 'ii"yā"n chí ndiicúu"n yā na staava ye"e yā, ti 'ii"yā"n s'ee" cuuvi ndaācā yā de'ē chí cuuvi ye"e yā chí Ndyuūs ca"á yā chí ca'á yā 'ii"yā"n s'ee".

⁶ De'e chúucā n'dai 'ii"yā"n chí ne"e ca yā dii"n yā chí n'daācā tan'dúucā chí ne"e

Ndyuūs. Ní Ndyuūs cúnnee yā 'iiⁿ'yāⁿ s'eeⁿ.

⁷De'e chúúcā n'dai 'iiⁿ'yāⁿ chi 'nuūⁿ ndii ya'ai 'iinú yā cáávā tanáⁿ'ā 'iiⁿ'yāⁿ, caati Ndyuūs 'nuūⁿ ndii ya'ai 'iinú ntúuⁿ yā cáávā 'iiⁿ'yāⁿ s'eeⁿ.

⁸De'e chúúcā n'dai 'iiⁿ'yāⁿ chi dēeve staava yeⁿ'é yā, ti 'iiⁿ'yāⁿ s'eeⁿ ní snaaⁿ yā Ndyuūs.

⁹De'e chúúcā n'dai 'iiⁿ'yāⁿ chi diiⁿ yā chi nguéé 'caa'vá 'iiⁿ'yāⁿ, ti tanáⁿ'ā 'iiⁿ'yāⁿ caaⁿ'máⁿ yā yeⁿ'é 'iiⁿ'yāⁿ chi daiyá Dendyuūs 'iiⁿ'yāⁿ.

¹⁰De'e chúúcā n'dai 'iiⁿ'yāⁿ chi n'geenú yā ngii cáávā chi dífⁿ yā chífⁿ chi Ndyuūs neⁿ'é yā, caati véé parte yeⁿ'e yā naachi Ndyuūs ngaⁿ'a ntiⁿ'nyúⁿ yā ná va'ai chēeti nguuví.

¹¹De'e chúúcā n'dai ndís'tiī taachi 'iiⁿ'yāⁿ dífⁿ yā chi ndís'tiī 'cueenú nī cuuvi cucáávā 'úú, ní taachi 'iiⁿ'yāⁿ taáⁿ yā ndúúcū ndís'tiī ní n'dee n'dái caaⁿ'máⁿ yā nduudu yaadi yeⁿ'e ndís'tiī cucáávā 'úú. ¹²Cuuvi yeenu taaví nī caati cuuvi ndaācā nī chí ch'ēete yeⁿ'é nī ná va'ai chēeti nguuví. 'Túúcā 'iiⁿ'yāⁿ can'daa yā ndíí cuaaⁿ vmnaaⁿ 'iiⁿ'yāⁿ profetas chi ndéé yā nduudu yeⁿ'e Ndyuūs. Ní profetas ch'eenú yā chii.

Yiimā yeⁿ'ē yáⁿ'āa

(Mr. 9.50; Lc. 14.34-35)

¹³Jesús caⁿ'a yā: Ndís'tiī, nduuti chi i'téenu nī chi 'úú chí Cristo, tuuⁿ'mi nī ndís'tiī, tan'dúúcā yiimā yeⁿ'ē yáⁿ'āa 'tiicá nī. Nduuti chí yiimā nguéé n'daācā sabor yeⁿ'ē, ¿de'ē cuuvi dífⁿ nī? Nguéé de'ē vee dichí'vē yiimā miiⁿ. 'Āā taanduu rá chí cungeé 'iiⁿ'yāⁿ na yáⁿ'āa ní n'diivi neeⁿ ca'a yā.

Déévé yeⁿ'e iⁿ'yeeⁿ'dí 'cūū

¹⁴Ndís'tiī chi i'téenu nī chi 'úú chí Cristo, tan'dúúcā dēeve yeⁿ'e iⁿ'yeeⁿ'dí 'cūū 'tiicá nī, ti caⁿ'á nī ch'iⁿ'i nī dēeve yeⁿ'é Ndyuūs nanááⁿ 'iiⁿ'yāⁿ. 'Áámá yááⁿ

chi canduūu na 'áámá yiicū nguéé cúuví cuuuⁿ n'de'ēi. ¹⁵Ndíí nguéé ndúú 'iiⁿ'yāⁿ ra 'cuuⁿ'miⁿ yā 'áámá lámpara ní cuⁿ'nuúⁿ yā maaⁿ 'áámá caja; naati cun'duúⁿ yā na 'áámá mesa, ní ícú cuuví dēeve yeⁿ'ē nducyaaca 'iiⁿ'yāⁿ chi snée yā chēeti va'āi. ¹⁶Tan'dúúcā 'áámá lámpara chí ngii ndēeve, 'tíícā cuuvi n'daācā vida yeⁿ'é nī nanááⁿ 'iiⁿ'yāⁿ chí snée yā iⁿ'yeeⁿ'dí 'cūū. Ní 'íícú 'iiⁿ'yāⁿ s'eeⁿ cuuvi snaaⁿ yā ntiⁿ'nyuⁿ chí n'daācā chí idiíⁿ nī. Ní 'iiⁿ'yāⁿ s'eeⁿ caaⁿ'máⁿ yā: De'e chúúcā ch'ēete Ndyuūs chí Chiidá nī, Ndyuūs chí canéé yā ná va'ai chēeti nguuví.

Jesús ngaⁿ'a yā yeⁿ'e ley yeⁿ'e 'iiⁿ'yāⁿ Israel

¹⁷Nguéé nadicádíínuuⁿ ndís'tiī chí 'úú chí Jesús ní cúchíí chí divií ley yeⁿ'e Moisés ndúúcū nduudu yeⁿ'e profetas chí canéé nguūⁿ ndíí cuaaⁿ vmnaaⁿ. 'Úú nguéé ndaá chí divií ti ndaá chí dicuaācú yeⁿ'ē. ¹⁸Ti cuaacu níⁿ'nyúⁿ ngaⁿ'á ngii ndís'tiī: Neⁿ'e chí canéé cá nanguuvi ndúúcū iⁿ'yeeⁿ'dí 'cūū nguéé cuuvi chó'ōo mar 'áámá punto 'lííⁿ ndíí nguéé ndúú mar 'áámá coma yeⁿ'e ndúúdú yeⁿ'e ley, nuuⁿ'maⁿ neⁿ'e chí tanducueⁿ'ē 'āā cuéé cuuvi cuaacu taanduvee chí canéé nguūⁿ na libro yeⁿ'e Ndyuūs. ¹⁹'Tíícā 'āā du'ú nūuⁿ 'iiⁿ'yāⁿ chí nguéé dífⁿ yā cumplir 'áámá mandamiento 'lííⁿ ní 'tíícā ngi'cueeⁿ yā 'iiⁿ'yāⁿ chí dífⁿ yā tan'dúúcā maáⁿ yā diiⁿ yā, 'lííⁿ 'lííⁿ cá nūuⁿ cuuvi tuneeⁿ yā naachi Ndyuūs ngaⁿ'a ntiⁿ'nyúⁿ yā na va'ai chēeti nguuví nguéé tan'dúúcā tanáⁿ'ā 'iiⁿ'yāⁿ. Naati 'iiⁿ'yāⁿ chí n'daāca idiíⁿ yā ní ngi'cueeⁿ yā 'iiⁿ'yāⁿ táácā chí cuuvi diiⁿ n'daācā yā, 'iiⁿ'yāⁿ miiⁿ cuuvi tuneeⁿ yā dendu'ū chí n'daācā ná va'ai chēeti nguuví naachí Ndyuūs ngaⁿ'a ntiⁿ'nyuⁿ yā. ²⁰'Úú ní ngaⁿ'á ngii ndís'tiī: Nduuti chí ndís'tiī nguéé n'daācā ca idiíⁿ nī chí cuuvi 'iiⁿ'yāⁿ chí ngi'cueeⁿ ley ndúúcū 'iiⁿ'yāⁿ fariseos, tuuⁿ'mi ní ndís'tiī nguéé cuuví cundaa nī na va'ai

chex̄ti nguuv̄i naachí Ndyuūs ngaⁿa nti-
iⁿnyúⁿ yā.

**Jesús ngaⁿa yā yeⁿe
chi nduuv̄i tááⁿ 'iiⁿyāⁿ**

(Lc. 12.57-59)

²¹ Maaⁿ ní ch'íindiveéⁿ nī chí caⁿ'a yā
chii yā 'iiⁿyāⁿ ndii cuááⁿ vmnaaⁿ chí
'túúca: Nguéé 'caaⁿ'nuⁿ di 'iiⁿyāⁿ. Du'u
chí 'caāⁿ'nūⁿ 'iiⁿyāⁿ véé nuuⁿ'ndi yeⁿe yā
nguuv̄i chí Ndyuūs caaⁿ'maⁿ yā yeⁿe nu-
uⁿ'ndi. ²² Naati 'úú ní ngaⁿ'á ngíi ndís'tii
'tíicā: 'Āā du'ú nūⁿ chí nduuv̄i taaⁿ yeⁿe
vi'i, véé nuuⁿ'ndi yeⁿe yā nguuv̄i chí
Ndyuūs caaⁿ'maⁿ yā yeⁿe nuuⁿ'ndi. 'Āā
du'ú nūⁿ chí caaⁿ'maⁿ cuuvi vi'i 'tíicā:
De'ē chúúca chēx̄hí tiiⁿ di, véé nuuⁿ'ndi
yeⁿe yā nanááⁿ juez. 'Āā du'ú nūⁿ 'iiⁿyāⁿ
chí caaⁿ'maⁿ yā 'tíicā: De'ē chúúca zozzo
dii, caⁿ'á yā na infierno naachi canéé
'áámá nguuchi yaⁿā.

²³ Nduuti chí diiⁿ di tan'dúúca costum-
bre yeⁿe di ní ndēx̄ di ofrenda yeⁿe di ní
ca'a di Ndyuūs vmnááⁿ nátaí yeⁿe yaacū
templo, ní hora mífⁿ nūⁿ ninán'gaacu
di chí vi'i di ní véé vaadī 'caaⁿ'va yeⁿe
di ndúúcu sa; ²⁴ tuuⁿ'mi ní cu'neeⁿ di
ofrenda yeⁿe di niiⁿ'nuúⁿ nátaí. Ní cueⁿ'e
di ntun'dáá n'dai di ndúúcu vi'i di. Cuayi-
ivi ní cuuv̄i nguēecundí di ní ca'a di
ofrenda yeⁿe di nátaí.

²⁵ Tun'dáá n'dai di ndúúcu 'āā du'u
nūⁿ 'iiⁿyāⁿ chí taaⁿ yeⁿe di maāⁿ'nchēx̄é
nūⁿ taachi canúu di yúúní ndúúcu yā,
'aatii caⁿ'a yā canguu yā dii nanááⁿ
juez. Ní juez mífⁿ nca'a yā dii ta'ā
policía. Ní policía miiⁿ ní cu'nuúⁿ sa dii
vácūū. ²⁶ Cuaacu níⁿ'nyúⁿ ngaⁿ'á ngii dii
chí nguéé nan'daā di vácūū neⁿe chí
nguéé 'cuiinu nadífⁿ'vē di tanducuéⁿ'ē chí
can'diicu di.

Jesús ngaⁿa yā yeⁿe adulterio

²⁷ N'giindiveéⁿ nī chí caⁿ'a 'iiⁿyāⁿ yeⁿe
nuuⁿ'ndi chí adulterio 'túúca: Ndís'tii
chí n'giindivaacú nī, nguéé in'nuúⁿ nī

n'daataá o isaⁿ'ā chí nguēx̄ yeⁿe di.
²⁸ Naati 'úú, Jesús ní ngaⁿ'á ngíi ndís'tii
'tíicā: 'Āā du'ú nūⁿ chí n'giiⁿ'nyūⁿ
ndúúcu 'áámá saⁿ'ā o n'daataá ní neⁿ'e yā
cuuvi n'dái yā ndúúcu vi'i, 'āā diiⁿ nu-
uⁿ'ndi yā na staava yeⁿe yā tan'dúúca chí
'āā 'tíicā yā ndúúcu vi'i. Ní 'āā diiⁿ yā
adulterio.

²⁹ Chuū ngaⁿ'á: Nduuti chí nduutináaⁿ
di lado tá cuaacú di diiⁿ chí diiⁿ di nu-
uⁿ'ndi, 'caaca di nduutinaaⁿ di ní cun'dáa
di. Ti n'dáacā ca chí cuuvi ndai di 'áámá
parte yeⁿe cuerpo yeⁿe di, nguéé ti tan-
ducuéⁿ'ē cuerpo yeⁿe di caⁿ'a na infierno.
³⁰ Ndúúti chí ta'ā cuaacú di idiiⁿ chí diiⁿ
dí nuuⁿ'ndi, 'caaca di ní cun'dáa di. Ti
n'dáacā ca chí cuuvi ndai 'áámá parte
yeⁿe cuerpo yeⁿe di, nguéé ti núúⁿ'máⁿ
ch'ēx̄te cuerpo yeⁿe dii caⁿ'a na infierno.

Jesús ngaⁿa yā yeⁿe chí i'tēx̄chi vi'i yā

(Mt. 19.9; Mr. 10.11-12; Lc. 16.18)

³¹ Tiempo chí chó'ōo 'iiⁿyāⁿ caⁿ'a yā
'túúca: 'Āā du'ú nūⁿ 'iiⁿyāⁿ chí 'tēx̄chi
n'daataá yeⁿe yā, canéé chí ca'a yā 'áámá
caaca yeⁿe chí 'tēx̄chí vi'i yā. ³² Naati 'úú
ní ngaⁿ'á ngíi ndís'tii 'tíicā: Nduuti chí
'áámá saⁿ'ā chí 'tēx̄chi sá n'daataá yeⁿe
sa, nguéé cáávā chí véé saⁿ'ā chí n'dai
ndúúcu tá, tuuⁿ'mi ní diiⁿ sa chí n'daātāa
cuuvi adulterio tá. 'Āā du'ú nūⁿ saⁿ'ā
chí 'caandavaacu sá ndúúcu n'daataa chí
i'nééⁿ isaⁿ'ā yeⁿe ta tá'ā, saⁿ'ā miiⁿ idiiⁿ
ntūⁿ sa nuuⁿ'ndi chí adulterio.

**Jesús ngaⁿa yā yeⁿe nduudu
chí 'tíicā o nguēx̄ 'tíicā**

³³ Ndís'tii ní ch'íindiveéⁿ nī chí caⁿ'a
yā chii yā 'iiⁿyāⁿ tiempo chí 'āā chó'ōo
'tuuca: Nguéé caaⁿ'maⁿ nī nduudu, “por
Ndyuūs”, cáávā cosa chí cuaacu níⁿ'nyúⁿ
chí diiⁿ nī ní nguéé 'tíicā diiⁿ nī. Taachi
caaⁿ'máⁿ nī nduudu, “por Ndyuūs”, diiⁿ
cuaacú nī tan'dúúca chí diiⁿ nī cáávā
Ndyuūs. ³⁴ Naati 'úú ní ngaⁿ'á ngíi
ndís'tii: Nguéé caaⁿ'máⁿ nī nduudu, “por

Ndyuūs”, yeⁿē mar 'áámá naaⁿ. Ndíí nguéé caaⁿmáⁿ nī nduudu, “cucáávā nanguuvi”, ti miiⁿ canéé trono yeⁿe Dendyuūs. ³⁵Ndíí nguéé ndúú caaⁿmáⁿ nī nduudu, “cáávā yáⁿāa 'cūū”, ti chííⁿ chí banco 'lííⁿ yeⁿē ca'a Ndyuūs; ndíí nguéé ndúú 'áámá nduudu, “cáávā yááⁿ Jerusalén”, ti chííⁿ chí yááⁿ yeⁿē Rey Ndyuūs chí ch'ēete yā. ³⁶Ndíí nguéé ndúú caaⁿmáⁿ nī nduudu, “cáávā tííⁿ nī”, ti nguéé cúúví dííⁿ nī chí cuuvi cuéé naachi cuáfⁿ mar 'áámá yuūdū tííⁿ nī. Ní nguéé cuuvi dííⁿ nī chí cuuvi cuáfⁿ naachi cuéé mar 'áámá yuūdū tííⁿ nī. ³⁷Naati ndís'tíí caaⁿmáⁿ nī, “tíicā”, nduuti chí 'tíicā; o nduuti chí nguéé 'tíicā, tuu'mi ní caaⁿmaⁿ nī, “nguee 'tíicā”, caati nduuti chí caaⁿmáⁿ nī nduudu, “por Ndyuūs” o cáávā táámá yeⁿe chuū, tuu'mí ní nduudu miiⁿ ní nguéé n'daācā chí caaⁿmaⁿ nī.

Dinéⁿe nī 'iiⁿyāⁿ chí nguéé ngíí n'diichí yā ndís'tíí

(Lc. 6.29-30)

³⁸Jesús caⁿa yā: Ndííⁿ chí ch'iindiveéⁿ nī chí caⁿa 'iiⁿyāⁿ tiempo chí ch'ó'oo yeⁿe ley chí 'tíicā: Nduuti chí 'áámá 'iiⁿyāⁿ tun'dáa yā nduutinaaⁿ taama 'iiⁿyāⁿ, 'tíicā ntúūⁿ 'iiⁿyāⁿ miiⁿ ní cuuví tun'daá yā nduutináaⁿ 'iiⁿyāⁿ chí dííⁿ nduucú yā 'tíicā. Ní 'áámá 'iiⁿyāⁿ chí tun'dáa yā 'diiⁿyuⁿ táámá 'iiⁿyāⁿ, 'tíicā ntúūⁿ cuuvi tun'daa yā 'diiⁿyuⁿ 'iiⁿyāⁿ chí dííⁿ nduucú yā 'tíicā. ³⁹Naati 'úú ní ngaⁿá ngíí ndís'tíí: Nguéé 'cuuⁿmaⁿ nī ndúúⁿ 'iiⁿyāⁿ chí yaādii'yá yā. 'Āā du'ú nūūⁿ 'iiⁿyāⁿ chí 'cueⁿé yā tiicūnáaⁿ nī ti duchineéⁿ yā yeⁿe nī 'cuuⁿ nī chí dííⁿ yā taama vmnéⁿēe nduuti chí neⁿe yā. ⁴⁰Ní nduuti chí 'aama 'iiⁿyāⁿ chí in'nuúⁿ yā vaadi 'caaⁿva ndúúⁿ nī, ní neⁿe yā divíí yā tiinuuⁿ yúudūū yeⁿe nī, ca'a ntúūⁿ nī cotón yeⁿe nī. ⁴¹Ní nduuti chí 'aama 'iiⁿyāⁿ chí cuuvi yā ndís'tíí chí a fuerza canéé chí cándēe nī ch'édíí yeⁿe

yā tan'dúúⁿ 'uūví kilómetros 'tíicā yaⁿai ca candēe nī yeⁿe yā ndii cuūūⁿ kilómetros. ⁴²Taachí caaca 'iiⁿyāⁿ ndís'tíí 'āā de'é nūūⁿ cosa ca'a nī 'iiⁿyāⁿ cosa miiⁿ. Nguéé nguēcundíí nī cuadáámí nī yeⁿé yā.

Dinéⁿe nī 'iiⁿyāⁿ chí taaⁿ ndúúⁿ nī

(Lc. 6.27-28, 32-36)

⁴³Ndííⁿ chí ch'iindiveéⁿ nī chí caⁿa 'iiⁿyāⁿ tiempo chí 'āā ch'ó'oo: Dinéⁿe di 'iiⁿyāⁿ na niiⁿnuúⁿ vaacu dí. Nguéé dinéⁿe di 'iiⁿyāⁿ chí taáⁿ yā ndúúⁿ di. ⁴⁴Naati 'úú ní ngaⁿá ngíí ndís'tíí: Dinéⁿe nī 'iiⁿyāⁿ chí taaⁿ yā ndúúⁿ nī. N'dáacā caaⁿmaⁿ nī yeⁿe 'iiⁿyāⁿ chí nguéé n'daācā ngaⁿa yā yeⁿe nī. N'daācā dííⁿ nī ndúúⁿ 'iiⁿyāⁿ chí nguéé neⁿe yā ndís'tíí. Caaⁿmáⁿngua'a nī yeⁿe 'iiⁿyāⁿ chí 'cueⁿe ndís'tíí ní nguéé n'daācā idiíⁿ yā ndúúⁿ nī ní idiíⁿ yā chí ndís'tíí n'geenú nī ngii. ⁴⁵Ní ndís'tíí ní 'cuuⁿmiⁿ nī 'iiⁿyāⁿ s'eeⁿ chí ndís'tíí ní daiya Dendyuūs ndís'tíí. Chiida yú chí cánéé na va'ai cheeti nguuvi idiíⁿ yā chí ican'daa 'yáⁿā naachi snéé 'iiⁿyāⁿ chí n'dai ndúúⁿ 'iiⁿyāⁿ chí nguéé n'daācā dííⁿ yā. Ní Ndyuūs idiíⁿ yā chí ngeeⁿ cuūví yeⁿé 'iiⁿyāⁿ chí n'daācā idiíⁿ yā ndúúⁿ 'iiⁿyāⁿ chí nguéé n'daācā idiíⁿ yā. ⁴⁶Ndúúⁿ chí ndís'tíí dinéⁿe nī 'iiⁿyāⁿ chí neⁿe yā ndís'tíí, ¿d'ē premio chí ndaacá ní? ¿Áá nguéé 'tíicā ntúūⁿ idiíⁿ 'iiⁿyāⁿ chí cobrador yā? ⁴⁷Nduuti chí ndís'tíí dííⁿ nī saludar dámaāⁿ hermanos yeⁿe nī, ¿d'ē premio chí ndaacá ní? ¿Áá nguéé 'tíicā ntúūⁿ idiíⁿ 'iiⁿyāⁿ chí nguéé yeⁿē ndaata Israel chí nguéé i'téenu yā Ndyuūs? ⁴⁸N'daācā n'dai ca dííⁿ ndís'tíí chí dííⁿ nī tan'dúúⁿ chí dííⁿ Dendyuūs, Chiida yú, chí cánéé na va'ai cheeti nguuvi.

Jesús ngaⁿa yā yeⁿe chí nginnee yú 'iiⁿyāⁿ

6 Ndííⁿ chí nguéé dííⁿ nī dendu'ū chí n'daācā yeⁿe yaacū nanááⁿ 'iiⁿyāⁿ

caati snaaⁿ yā chí diiⁿ nī chi nadacadi-inúúⁿ yā chí ndís'tií ní n'daāca nī. Nduuti chí 'túúcā idiiⁿ nī, tuu'mi ní Ndyuūs Chiida yú nguéé téé yā chí cuuvi yeⁿe nī yeⁿe chí diíⁿ nī taachi ndaa nī ná va'ai cheeti nguuví. ²Taachi ndís'tií ca'a nī ofrenda yeⁿe nī, nguéé diíⁿ yuudú nī nífcú nguéé cuuvi cadífnuuⁿ 'iiⁿyāⁿ. 'Tífcā idiiⁿ náⁿā 'iiⁿyāⁿ chí 'uūví naaⁿ 'uūví cheendí yā taachi snée yā na yaacū sinagoga ndúúcu na cuaaⁿ cyúúfní. Ní 'ífcú 'iiⁿyāⁿ ní cuuvi snaaⁿ yā ní caaⁿmaⁿ yā chí 'iiⁿyāⁿ s'eeⁿ ní nn'dai yā. Cuaacu nífn'nyúⁿ 'úú ngaⁿá ngii ndís'tií, chí 'iiⁿyāⁿ s'eeⁿ ní vee chí 'āā ndaāca yā yeⁿe chí diíⁿ yā na iⁿ'yeeⁿdí 'cūū. ³Taachi ndís'tií ní ca'á nī cosas chí inneé nī 'iiⁿyāⁿ chí nguéé yeⁿe yā, nguée ca'a nī chí tuumícádiin-uúⁿ ta'á 'cueé nī chí diíⁿ tá'ā cuaacu nī. ⁴'Tífcā ca'a n'de'éf nī cosas miíⁿ yeⁿe nī ní 'iiⁿyāⁿ nguée cuuvi snaaⁿ yā; 'ífcú Chiida yú chí cánée ná va'ai cheeti nguuví inaáⁿ yā chí nguéé n'diichi 'iiⁿyāⁿ s'eeⁿ. Ní Chiida yú téé yā chí cuuvi yeⁿe nī nanááⁿ 'iiⁿyāⁿ.

**Jesús ngi'cueeⁿ yā yeⁿe
chí ngaⁿanguá'āa**

(Lc. 11.2-4)

⁵Taachi ndís'tií caaⁿmaⁿngua'á nī, nguéé dííⁿ nī tan'dúúca 'iiⁿyāⁿ chí 'uūví naaⁿ 'uūví cheendí yā, caati 'iiⁿyāⁿ s'eeⁿ inee yiínú yā chí n'gēetíndii yā na yaacū sinagogas ndúúcu cuaaⁿ cyúúfní ní 'ífcú 'iiⁿyāⁿ ní snaaⁿ yā 'iiⁿyāⁿ s'eeⁿ. Cuaacu nífn'nyúⁿ ngaⁿá ngii ndís'tií, chí 'iiⁿyāⁿ s'eeⁿ ní 'āā véé chí cuuvi yeⁿe yā na iⁿ'yeeⁿdí 'cūū. ⁶Ndís'tií, taachi caaⁿmaⁿngua'á nī, cundáa nī na cuarto 'lífⁿ yeⁿe va'ai yeⁿe nī ní n'gaadí nī cheendi va'āi cuarto 'lífⁿ miíⁿ. Ní caaⁿmaⁿngua'á nī ndúúcu Chiida yú chí inaaⁿ n'de'ei yā. Ní Chiida yú ntée yā chí cuuvi yeⁿe nī nanááⁿ 'iiⁿyāⁿ.

⁷Ní taachi caaⁿmaⁿngua'á nī, nguéé dachíⁿ dachíⁿ caaⁿmaⁿ nī tan'dúúca chí diíⁿ náⁿā 'iiⁿyāⁿ chí 'uūví naaⁿ 'uūví cheendí yā chí nguéé i'téenu yā Ndyuūs ní nguée yeⁿe ndaata Israel yā. Ní 'iiⁿyāⁿ s'eeⁿ nadicadífnuuⁿ yā chí Ndyuūs caⁿá yā 'caandiveéⁿ yā nduudu yeⁿe yā ti neené n'deé nduudu ngaⁿa yā. ⁸Nguéé dííⁿ nī tan'dúúca chí idiiⁿ 'iiⁿyāⁿ s'eeⁿ ti Chiida yú 'āā déenu yā denduⁿ chí neⁿe nī taachi 'āā cuéé caaca nī. ⁹Ní taachi ndís'tií caaⁿmaⁿngua'á nī, 'túúcā caaⁿmaⁿngua'á nī:

N'dií Chiida nducyaaca 'nū, n'dií chí caneé nī ná va'ai cheeti nguuví. Dē'e chúúca dēeve chí ngúúví nī.

¹⁰Canéé chí ndaa tiempo naachi chí ngaⁿa ntiíⁿnyuⁿ nī. Cúúví tan'dúúca chí n'dií neⁿe nī tan'dúúca ná va'ai cheeti nguuví 'tiicá ntúúⁿ na yáⁿāa 'cúú.

¹¹Tée nī chí cuuví che'é 'nū nguuví 'cūū.

¹²Nadich'ēecú nī nuuⁿndi yeⁿe 'nū tan'dúúca chí nús'uu inadich'ēecú 'nū yeⁿe 'iiⁿyāⁿ chí nguée n'daāca dííⁿ yā nduucú 'nū.

¹³Nguéé 'cuáaⁿ nī chí ndaa nanaáⁿ 'nū cosas chí cheechi ca chí diíⁿ chí dííⁿ 'nū nuuⁿndi naati nadanguáⁿai nī nús'uu yeⁿe nducuéⁿe chí nguée n'daāca. Ti yeⁿe nī naachi ngaⁿa ntiíⁿnyúⁿ nī ndúúcu poder ndúúcu dēeve chí n'dái taavi ca yeⁿe nī ndúúcu nducuéⁿe nduuyū cueⁿe daāⁿmaⁿ. 'Tífcā cuuvi.

¹⁴Nduuti chí ndís'tií nadich'ēecú nī yeⁿe 'iiⁿyāⁿ chí nguéé n'daāca idiiⁿ yā nduucú nī, tuu'mi ní Chiida yú chí cánée yā ná va'ai cheeti nguuví nadich'ēecú ntúúⁿ yā yeⁿe nī. ¹⁵Ndúúti chí ndís'tií nguéé nadich'ēecú nī yeⁿe 'iiⁿyāⁿ chí nguéé n'daāca idiiⁿ yā ndúúcu nī, 'tiicá ntúúⁿ Chiida yú nguéé nadich'ēecú yā nuuⁿndi yeⁿe nī.

Jesús ngaⁿa yā yeⁿe chi 'iiⁿyāⁿ nguéé ca'diinú yā tiempo chi ngaⁿanguaⁿá yā

¹⁶Taachi nguéé nga'dííⁿnúⁿ nī caati ngaⁿanguaⁿá nī nguéé nduuví ndaachíí naáⁿ nī tan'dúúⁿcā 'iiⁿyāⁿ chi 'uúvī naaⁿ 'uúvī cheendí yā chí neⁿe yā chí tanáⁿā 'iiⁿyāⁿ snaaⁿ yā. 'Iiⁿyāⁿ s'eeⁿ idivíí yā catecai vmnááⁿ yā ní 'cuuⁿmíⁿ yā tanáⁿā 'iiⁿyāⁿ chí nguéé nga'diiⁿnúⁿ yā. Cuaacu níⁿnyúⁿ ngaⁿá ngíí ndís'tií, chí 'iiⁿyāⁿ s'eeⁿ ní 'āá véé chí ndaācā yeⁿe yā na iⁿyeeⁿdí 'cūū. ¹⁷Naati ndís'tií, ní taachi nguéé nga'diiⁿnúⁿ nī, 'cuiimí aceite tííⁿ nī ní nááⁿnúⁿ nī naaⁿ nī. ¹⁸Ní nguéé 'cuuⁿmíⁿ nī nanááⁿ 'iiⁿyāⁿ chí nguéé ngeⁿé nī naati Chiida yú chí cánuuⁿ yā nán'de'ei snaáⁿ yā. Ní Chiida yú chí snáaⁿ yā chííⁿ chí diiⁿ nī taachi cánúúⁿ nī nán'de'ei ní téé yā nanááⁿ 'iiⁿyāⁿ de'ē chí cuuví yeⁿe nī.

Véé vaadi 'cuiica ná va'ai cheeti nguuvi

(Lc. 12.33-34)

¹⁹Caⁿa Jesús: Ndís'tií ní nguéé dííⁿ nī chí cuuvi 'cuiica nī ná iⁿyeeⁿdí 'cūū naachi véé i'yéevē chí di'tuuví tī ndúúⁿcū che'e yáⁿāa chí tuuvíí ní naachi véé chí duucu ní diduucú sa. ²⁰Naati n'dáacā chí dííⁿ nī chí 'cuúndí yeⁿe nī ná va'ai cheeti nguuvi naachi nguéé véé i'yéevē chí di'tuuví tī ndíí nguéé ndúú che'e yáⁿāa chí tuuvíí, ndíí nguéé ndúú cuuvi cundaā chí duucu ní diduucú sa. ²¹Caati naachí canéé vaadi 'cuiica yeⁿe nī, miiⁿ canee staava yeⁿe nī chí nadicadiinúúⁿ nī yeⁿe tanducuéⁿē.

Chidéeve yeⁿe cuerpo yeⁿe yú ní nduutinaaⁿ yú

(Lc. 11.34-36)

²²Caⁿa Jesús chí chidéeve yeⁿe cuerpo yeⁿe yú chííⁿ chí nduutinaaⁿ yú. Ndúúⁿ chí nduutinaaⁿ nī n'daācā, tuu'mi ní núúⁿmáⁿ ncheete cuerpo yeⁿe nī ní inaaⁿ chí deeve. ²³Ní nduuti chí nduuti-

naáⁿ nī nguéé n'dai, tuu'mi ní núúⁿmáⁿ ncheete cuerpo yeⁿe nī cunéé na maāiⁿ. 'Tíicā nduuti chí deeve chí cánee nduucú nī nguéé n'daācā, tuu'mi ní canéé nī na maāiⁿ chí díítúu n'dái.

Jesús ngaⁿa yā yeⁿe chí 'cuiica 'iiⁿyāⁿ

(Lc. 16.13)

²⁴Mar 'áámá 'iiⁿyāⁿ nguéé cuuvi dichííⁿve yā 'uúvī 'iivi yā caati dinéⁿe yā 'aama yā ní nguéé dinéⁿe yā taama yā. Ní n'dáacā nadicádíínuuⁿ yā yeⁿe 'aama yā ní nguéé n'daācā nadicádíínuuⁿ yā yeⁿe taama yā. Nguéé cuuvi in'nuúⁿ nī vaadi 'cuiica yeⁿe nī ní dichííⁿve nī 'iivú Ndyuūs.

Ndyuūs idiíⁿ yā cuidado yeⁿe 'iiⁿyāⁿ yeⁿe yā

(Lc. 12.22-31)

²⁵Chuū ngaⁿá ngíí ndís'tií: Nguéé nadicádíínuuⁿ nī yeⁿe vida yeⁿe maaⁿ nī, o yeⁿe chí che'é nī, o yeⁿe chí cu'u nī, ndíí nguéé ndúú cáávā chí neⁿe cuerpo yeⁿe nī chí 'cuéetinúu nī. ¿Áá nguéé yaⁿai ca vida yeⁿe nī nguéé ti chí ngé'e nī? ¿Áá nguéé yaⁿai ca chííⁿvē cuerpo yeⁿe nī nguéé ti catecai nī? ²⁶Cuin'diichí nī 'yaada yeⁿe nanguuvi. Nguéé ngiinú tī ndaata, ndíí nguéé ngii cosecha yeⁿe tī, ndíí nguéé ndúú ín'guain'daí tī yeⁿe tī. Chiida yú chí cánéé ná va'ai cheeti nguuvi ngá'a yā chí nge'e tī. ¿Áá nguéé yaⁿai cá chííⁿvē ndís'tií nguéé ti 'yaada? ²⁷¿Cheé ndís'tií chí nééné n'dai tííⁿ nī cúvúí iintiineeⁿ nī 'áámá yuúchí yeⁿe chí yaācu nī?

²⁸¿De'ē cáávā chí ínadicádíínuuⁿ nī yeⁿe catecai nī? Nadicádíínuuⁿ nī yeⁿe naāndā cuéé yeⁿe cuéeti táacā chí n'giita. Nguéé dííⁿ ntiíⁿnyuⁿ ndíí nguéé ndúú idin'daí hilo. ²⁹Naati 'úú ní ngaⁿá ngíí ndís'tií, chí rey Salomón miiⁿ ní ndúúⁿcū tanducuéⁿē catecaí yā chí n'déévé n'dai ndii tuunu ngii 'yáⁿā naati nguéé neené n'deevéé tan'dúúⁿcā yeⁿe

naandā s'eeⁿ. ³⁰Ndúúti chí Ndyuūs idiíⁿ yā cuidado yeⁿē yáatā chí vεε cuēeti chí maāⁿ ní canee ní cavyaaⁿ ní ntiⁱ ní n'nee yaⁿā 'iiⁿyāⁿ. ¿Áá nguéé diiⁿ cá Ndyuūs cuidado yeⁿe ndís'tií, 'iiⁿyāⁿ chí duū'vii i'téenu nī Ndyuūs? ³¹Nguéé nadicádíínuuⁿ ndís'tií, ní caaⁿmaⁿ ní 'tíicā: ¿Dē'ē che'ē nū? o ¿dē'ē cu'ú nū? o ¿dē'ē 'cuēetinúu 'nū? ³²'Iiⁿyāⁿ chí nguéé yeⁿe ndaata Israel in'nuúⁿ yā dendu'ū chí 'túúca. Chiida yú chí cánéé yā ná va'āi chēeti nguuvī déenu yā tanducuéⁿē dendú'ū chí necesidades neⁿe yú. ³³Naati ndís'tií ní canee chí in'nuúⁿ nī vmnááⁿ vmaaaⁿ yeⁿé naachi Ndyuūs ngaⁿa ntiíⁿnyúⁿ yā ndúúcu vaadi cuaacu yeⁿé Ndyuūs, ní 'íicú tanducuéⁿē dendu'ú 'cūū ní ntiineeⁿ yā yeⁿé nī. ³⁴Nguéé nadicádíínuuⁿ nī yeⁿē cavyaaⁿ caati cavyaaⁿ ní táámá nguuvī ndúúcu yeⁿē, ní 'íicú nguuvī ní 'āā véé nūuⁿ chí véé. Dámaāⁿ nadacádíínuuⁿ nī yeⁿē maaⁿnguuvī, 'āā 'tiicá nūuⁿ.

'Túúca ngaⁿa Jesús: Nguéé tun'daá nī nuuⁿndi yeⁿe táámá 'iiⁿyāⁿ

(Lc. 6.37-38, 41-42)

7 Jesús caⁿa yā: Ndís'tií ní nguéé caaⁿmaⁿ néeⁿ nī yeⁿe táámá 'iiⁿyāⁿ maaⁿ ní 'íicú Ndyuūs nguéé caaⁿmáⁿ yā nuuⁿndi yeⁿe nī. ²Caati ndúúti chí ndís'tií caaⁿmaⁿ nī nuuⁿndi yeⁿe 'iiⁿyāⁿ, 'tiicá ntúūⁿ Ndyuūs caaⁿmáⁿ yā nuuⁿndi yeⁿe nī. Nduuti chí n'dee n'dái caaⁿmáⁿ nī, 'tiicá ntúūⁿ caaⁿmáⁿ Dendyuūs yeⁿe nī. Nduuti chí duu'ví nūuⁿ, 'tiicá ntúūⁿ Ndyuūs caaⁿmáⁿ yā yeⁿe nī. ³¿Dē'ē cúúvī chí maaⁿ nch'εetē nūuⁿ n'gíínu nī nuuⁿndi chí diiⁿ tanáⁿā 'iiⁿyāⁿ ní nguéé inaaⁿ nī nuuⁿndi ch'εetē chí diiⁿ nī? ⁴¿Dē'ē cúúvī chí caaⁿmáⁿ nī 'iiⁿyāⁿ yeⁿe chí diiⁿ yā chí nguεε n'daācā nduuti chí ndís'tií diiⁿ nī cosas chí nguéé n'daācā? 'Caandivééⁿ nī. Véé nuuⁿndi yeⁿé nī chí ch'εetē chí nguéé ndaacadaamí nī yeⁿē. ⁵Ndís'tií 'iiⁿyāⁿ 'uúvī naaⁿ 'uuvī cheendi

nī. Dííⁿ cā maáⁿ nī ndaacadaamí nī yeⁿe nuuⁿndi chí diiⁿ nī ní 'íicú cuuvi caaⁿmáⁿ nī yeⁿe 'iiⁿyāⁿ chí cánéé chí din'daācā yā ní ndaacadaamí yā yeⁿe nuuⁿndi chí diiⁿ yā.

⁶Nguéé ca'a nī dendu'ū chí yeⁿe Ndyuūs 'yaānā s'eeⁿ ti 'yaānā s'eeⁿ cuuvi contra yeⁿe nī. Ní caⁿá tī che'e tī ndís'tií chí pedazos cánéé nī. Nguéé 'cuí nī cosas yeⁿe nī chí dichí'lvεε tan'dúúca perlas nanááⁿ puercos ti cuuvi nanguεεcúndii tī ní ca'a ta'á tī ní ndís'tií cánéé nī maaⁿ ca'a tī.

Caacá nī, in'nuúⁿ nī, ní yaa'ví nī cheendi va'ai

(Lc. 11.9-13; 6.31)

⁷Caⁿa Jesús: Caacá nī Ndyuūs, ní Ndyuūs téé yā yeⁿe nī. In'nuúⁿ nī ní ndaāca nī. Yaa'ví nī cheendi va'āi ní nan'guaaⁿ yeⁿé nī. ⁸Caati nducyaaca 'iiⁿyāⁿ chí ngiica Ndyuūs ní Ndyuūs ca'a yā yeⁿe yā. Ní nducyaáca 'iiⁿyāⁿ chí in'nuuⁿ yā, ní inndaaca yā. Ní nducyaáca 'iiⁿyāⁿ chí yaa'ví yā cheendi va'āi, ní nan'guaaⁿ yeⁿé yā.

⁹¿Che'ē yeⁿe ndís'tií taachi caaca daiya nī 'aama pan, ca'a nī 'áámá tuūu? ¹⁰O nduuti chí caaca daiyá nī 'áámá 'yaācā, ¿'áá ca'á nī 'áámá cúú? ¹¹Nduuti chí ndís'tií chí cú'ncheeⁿ nī deenú nī ca'a nī cosa chí n'daācā daiya nī, ndii 'teε cá Chiida yú chí cánéé yā na va'ai chēeti nguuvī ca'á yā cosas chí n'dáácā n'dai cá 'iiⁿyāⁿ chí caaca yā Ndyuūs.

¹²'Tíicā chí tanducuéⁿē chí neⁿé nī chí diíⁿ 'iiⁿyāⁿ ndúúcu nī, chuū ntúūⁿ dííⁿ nī ndúúcu 'iiⁿyāⁿ. Chuū chí ley yeⁿe Moisés ndúúcu chí cánéé nguūⁿ yeⁿe profetas s'uuⁿ ndíí cuááⁿ vmaaaⁿ.

Cheendi va'āi chí 'tuūcuú

(Lc. 13.24)

¹³Caⁿa Jesús: Cundáa nī chééndí va'āi chí 'tuūcuú, tí cheendi va'ai ch'ε'ē'nū ndúúcu yúúní ch'ε'ē'nū, chííⁿ chí candéé

'iiⁿyāⁿ chí caⁿa yā na infierno. Néené 'yaaⁿ 'iiⁿyāⁿ chí ndaa yā chééndí va'ai chí ch'èē'nū miiⁿ. ¹⁴Naati chééndí va'āi 'tu-ucū miiⁿ ní yúúni cuéēⁿ miiⁿ chí can-déē 'iiⁿyāⁿ chí caⁿa yā na vida cueⁿe daāⁿmaⁿ. Ní duuⁿví 'iiⁿyāⁿ chí ndaāca yā chééndí va'āi miiⁿ.

**Yáⁿá ní cucáāvā n'gui'i
yeⁿe tuumicádíínuuⁿ nī**

(Lc. 6.43-44)

¹⁵Caⁿa Jesús: Díⁿ nī cuidado ndís'tií yeⁿe 'iiⁿyāⁿ profetas chí falsos yā chí ngaⁿa yā chí ndéē yā nduudu cuaacu yeⁿe Ndyuūs naati nguee 'tíicā. Taachi ndaa yā nanááⁿ ndís'tií cuaaⁿ dáámí 'iiⁿyāⁿ miiⁿ tan'dúúicā catecai 'iiti cuūchí naati cuááⁿ cheēti yā tan'dúúicā 'yááⁿyāⁿ ngaātáá chí taaⁿ tí. ¹⁶Ní yeⁿe chí díⁿ yā tuumicádíínuuⁿ nī yeⁿe yā. ¿Áá cuta'a 'iiⁿyāⁿ uvas yeⁿe yááⁿ? o ¿áá cuta'a 'iiⁿyāⁿ n'guidií yaaⁿ nguuví yeⁿe yááⁿ? Nguée 'tíicā. ¹⁷'Tíicā, nducyaaca yáⁿá chí n'dái, n'daācā ngí n'gui'i n'dáacā yeⁿe, naati yáⁿá chí nguéé n'daācā ní nguéé n'dai n'gui'i yeⁿe. ¹⁸'Áámá yáⁿá chí n'dáacā nguéé 'cuūndi n'gui'i chí nguéé n'daācā, ndíí nguéé ndúú yeⁿe chí nguéé n'daācā 'cuūndi n'gui'i chí n'daācā yeⁿe. ¹⁹Nducyaaca yáⁿá chí nguéé n'daācā ngí n'gui'i yeⁿe, 'iiⁿyāⁿ ní 'cáaca yā ní 'cuii yā na yaⁿā. ²⁰'Tíicā ntúúⁿ ndís'tií tuumicádíínuuⁿ nī yeⁿe 'iiⁿyāⁿ cáāvā cosas chí díⁿ yā yeⁿe chí n'daācā o yeⁿe chí nguéé n'daācā.

**Nguéé cuuví cundaa nducyaaca
'iiⁿyāⁿ na va'ai cheeti nguuví**

(Lc. 13.25-27)

²¹Jesús ngaⁿa yā 'tíicā: Nguéé nducyaaca 'iiⁿyāⁿ chí ngaⁿá yā yeⁿe 'úú: N'díí Señor, Señor, ní cuuví cundaa yā naachí Ndyuūs ngaⁿa ntiíⁿnyuⁿ yā, dámaāⁿ 'iiⁿyāⁿ chí díⁿ yā tan'dúúicā chí

neⁿe Chiidá chí canee yā na va'ai cheeti nguuví. ²²Néené 'yaaⁿ 'iiⁿyāⁿ caaⁿmaⁿ yā cuuvi yā 'úú nguuví yeⁿe juicio N'díí Señor, Señor, ¿áá nguéé caⁿa 'nū nduudu cuaacu ndúúicū chí duuchí nī ní tun'dáa 'nū yááⁿn'guiniūⁿ yeⁿe 'iiⁿyāⁿ ndúúicū chí duuchí nī? Ní néené n'deēē vaadí n'gínú idíⁿ 'nū ndúúicū chí duuchí nī. ²³Tuuⁿmi ní 'úú Cristo caaⁿmáⁿ cuaacú cuuví 'iiⁿyāⁿ s'eeⁿ: 'Úú nguéé n'diichí tandíí ndís'tií. Cuví nī yeⁿe 'úú, ndís'tií chí nguéé n'daācā díⁿ nī.

**Yeⁿe ndúú 'uúví
cimimiento yeⁿe va'ai s'eeⁿ**

(Lc. 6.47-49; Mr. 1.22)

²⁴Ní caⁿa ntúúⁿ Jesús: 'Āā du'ú nūⁿ 'iiⁿyāⁿ chí n'giindiveéⁿ yā ndúúú 'cūú yeⁿe níicú idíⁿ yā chee chí 'úú ngaⁿá, 'iiⁿyāⁿ miiⁿ ní tan'dúúicā 'áámá saⁿā chí n'dēēvee nadicádíínuuⁿ sa. Saⁿā miiⁿ din'dái sa vaacu sá na 'áámá yáávā. ²⁵Níicú chééⁿ cúúví naⁿā ní ch'iita yíicú. Ní chéénū 'yúúné taaⁿ contra yeⁿe va'āi miiⁿ ní nguéé chindeeve caatí n'daacā chééndii na yáávā miiⁿ. ²⁶'Āā du'ú nūⁿ 'iiⁿyāⁿ chí n'giindiveéⁿ yā nduudú 'cūú yeⁿe ní nguéé idíⁿ yā tan'dúúicā chí ngaⁿá, 'iiⁿyāⁿ miiⁿ ní tan'dúúicā 'aama saⁿā chí nguéé n'daācā inadícádíínuuⁿ sa. Saⁿā miiⁿ ní din'dái sa vaacu sa na yáⁿāa ndúútí. ²⁷Ní cheeⁿ cuuví naⁿā ní ch'iita yíicú miiⁿ. Ní chéénū 'yúúné taaⁿ contra yeⁿe va'āi miiⁿ ní va'āi chidēvee ní ntuūví.

²⁸Taachí Jesús miiⁿ ch'iinu caⁿa yā ndúúú 'cūú, 'iiⁿyāⁿ míⁿ cheⁿe yí-ínú yā yeⁿe chíⁿ chí ngi'cueeⁿ Jesús. ²⁹Caati Jesús miiⁿ ngi'cueeⁿ yā 'iiⁿyāⁿ s'eeⁿ tan'dúúicā 'áámá 'iiⁿyāⁿ chí déenu o 'áámá 'iiⁿyāⁿ chí ngaⁿa ntiíⁿnyuⁿ yā nguéé tan'dúúicā 'áámá maestro chí ngi'cueeⁿ ley yeⁿe yā.

Jesús idiiⁿ yā chi nduūvā yeⁿē 'áámá saⁿā yeⁿe ca'āi chi nguuvi lepra chí ín'duuti yuūtē yeⁿē sa

(Mr. 1.40-45; Lc. 5.12-16)

8 Taachí Jesús cuch'eeⁿ yā na 'áámá yiicū, nééné 'yaaⁿ 'iiⁿyāⁿ cueⁿé yā ndúúcu yā. ²N'diichí nī. Nanááⁿ Jesús ndaā 'áámá saⁿā chí ndí sa 'áámá ca'ai chí nguuvi lepra chí índuuti yuūtē yeⁿē sa. Ní chintii'ya sa nanááⁿ yā ní s'teenu sá ní caⁿa sa chíi sa 'iiⁿyāⁿ: N'dii Señor, nduuti chí neⁿe nī, ní díⁿ nī chí nduūvā yeⁿé.

³Jesús ní n'doó yā ta'á yā ní tuu'ví yā saⁿā miiⁿ ní caⁿa yā chíi yā saⁿā: 'Úú neⁿé. Nduūvā yeⁿē di. Tuu'mí nūuⁿ ndúúvā n'daācā yeⁿē sa ní nduūví dēeve sa. ⁴Tuu'mi ní Jesús ní caⁿa yā chíi yā saⁿā miiⁿ: Cuéⁿe di ní 'cuuⁿmiⁿ dí cuerpo yeⁿē di nanááⁿ chiiduú ní ca'a di ofrenda nanááⁿ Ndyuūs tan'dúúccā chí ngaⁿa na ley chí dinguuⁿ Moisés. 'Tíicā ní chiiduú caaⁿmaⁿ cuaacú yā yeⁿē di nanááⁿ nducyaaca 'iiⁿyāⁿ, ní nguéé 'cuuⁿmiⁿ di yeⁿē chí chíi ndúúcu di mar 'áámá 'iiⁿyāⁿ.

Jesús díⁿ yā chí nduūvā yeⁿe 'aama mozo yeⁿe capitán romano

(Lc. 7.1-10)

⁵Taachí Jesús cáámá ndaa yā na yáāⁿ Capernaum, ndaā 'áámá saⁿā capitán yeⁿe ndaata yeⁿe 'iiⁿyāⁿ romanos nguéé yeⁿe ndaata Israel. Ní ndaā sa nanááⁿ Jesús miiⁿ ní di'cuítu sa 'iiⁿyāⁿ. ⁶Ní caⁿa sa chíi sa Jesús: N'díⁿ Señor, mozo yeⁿé candíítí sá na cama ndúúcu ca'āi chí ín'dúúví cuerpo yeⁿē sa. Nééné ya'āi ngiitā sa.

⁷Jesús caⁿa yā chíi yā saⁿā: 'Úú ní caⁿá ní díⁿ chí saⁿā ní nduūvā yeⁿē sa.

⁸Saⁿā capitán nan'guēecútaⁿ sa ní caⁿa sa chíi sa Jesús miiⁿ: N'díⁿ Señor, 'úú nguéé neené n'dai 'úú chí cundaa nī chéétí va'āi yeⁿé. Dámaāⁿ chí caaⁿmaⁿ

núuⁿ ní ní saⁿā mozo yeⁿé ndúúvā yeⁿē sa. ⁹'Úú ní saⁿā chí véé saⁿā ndíⁿ tíiⁿ yeⁿé, ní ngaⁿā ntiⁿnyúⁿ yā yeⁿē 'úú. 'Úú ntúúⁿ ní ngaⁿā ntiⁿnyúⁿ yeⁿē cien soldados chí maaⁿ poder yeⁿé. 'Úú ní ngaⁿā ngí 'aama sa: Cúnaⁿā di, ní inaⁿā sa. Ní ngaⁿā ngí taama sa: Cuchí di, ní chíi sa. Ní ngaⁿā ngí mozo chí díⁿ mandato yeⁿé: Díⁿ di ntiⁿnyúⁿ 'cūū, ní díⁿ sa.

¹⁰Taachí Jesús ch'iindiveéⁿ yā chuū cheⁿé yiinú yā. Ní caⁿa yā chíi yā 'iiⁿyāⁿ chí ndúúcu yā: Cuaacu níⁿnyúⁿ ngaⁿā ngí ndis'tii chí 'úú nguéé indaacá 'iiⁿyāⁿ chí i'téenu n'dai yā mar 'áámá 'iiⁿyāⁿ yeⁿe ndaata Israel tan'dúúccā saⁿā 'cūū. ¹¹Ní ngaⁿā ngí ndis'tii, chí neené 'yaaⁿ yā chí caaca yā cuaaⁿ ná ícan'daa 'yáⁿā ndúúcu cuaaⁿ na ngiia 'yáⁿā ní 'cuēetē yā ná va'ai cheeti nguuvi ndúúcu Abraham, ndúúcu Isaac, ndúúcu Jacob. ¹²Naati n'dee n'dái daiyá 'iiⁿyāⁿ yeⁿe ndaata Israel chí canéé chí 'cuēetinēe yā naachí Ndyuūs ngaⁿa ntiⁿnyuⁿ yā ná va'ai cheeti nguuví, Ndyuūs tun'dáa yā 'iiⁿyāⁿ s'eeⁿ ch'ua'āi naachí maāiⁿ. Míⁿ ní cuēecu yā ní che'e 'diiⁿyuⁿ yā ti nguéé i'téenu yā Dendyuūs.

¹³Tuu'mi ní Jesús miiⁿ caⁿa yā chíi yā capitán miiⁿ: Cunaⁿā di. Tan'dúúccā chí i'téenu di chí 'úú idíⁿ chí nduūvā yeⁿe mozo yeⁿē di, 'tíicā cuuví ndúúcu mozo yeⁿē di. Ní hora míⁿ nūuⁿ nduūvā yeⁿe mozo yeⁿē sa.

Jesús díⁿ yā chí nduūvā yeⁿe indáⁿā Pedro

(Mr. 1.29-31; Lc. 4.38-39)

¹⁴Cuayiivi ní ndaā Jesús ná va'ai yeⁿē Pedro miiⁿ ní n'diichí yā chí indáⁿā Pedro miiⁿ candiiti yā na cama. Ndeē 'iiⁿnūⁿ taāⁿ táⁿā miiⁿ. ¹⁵Jesús tuu'ví yā ta'á tá ní 'iiⁿnūⁿ míⁿ ní chivii. Tuu'mi ní táⁿā miiⁿ ní nducueeⁿ tá ní díⁿ ta mandato yeⁿé 'iiⁿyāⁿ s'eeⁿ ní ca'a ta chí che'e yā.

**Jesús diiⁿ yā chi nanduūvā
yeⁿē n'deeē n'dáí 'iiⁿyāⁿ**

(Mr. 1.32-34; Lc. 4.40-41)

16 Taachi chi 'da'a nguuvi miiⁿ, tuu'mi ní 'iiⁿyāⁿ yeⁿē yááⁿ miiⁿ ndaa yā chi ndée yā 'yaaⁿ n'dáí 'iiⁿyāⁿ nanááⁿ Jesús. Ndee yā 'iiⁿyāⁿ chi snée yā ndúúcu espíritu yeⁿē yááⁿ'n'guiinūⁿ. Jesús caⁿ'a yā 'áámá nduudu nūⁿ ní tun'dáa yā espíritu yeⁿē yááⁿ'n'guiinuuⁿ yeⁿē 'iiⁿyāⁿ. Ní diíⁿ yā chi nduuva yeⁿē nducyáácá 'iiⁿyāⁿ s'eeⁿ chi ngíta yā. 17 'Tíicā ní cuuví cuaacu chí caⁿ'a saⁿ'ā profeta Isaías ndí cuaaⁿ vmaⁿ'naaⁿ taachí caⁿ'a yā 'túúcā: 'iiⁿyāⁿ maáⁿ yā sta'á yā ca'ái yeⁿē yú ní candée yā vaadi ya'ai yeⁿē yú.

**'iiⁿyāⁿ 'āā neⁿē yā caⁿ'a
yā ndúúcu Jesús**

(Lc. 9.57-62)

18 Taachi Jesús n'diichi yā nducyaaca 'iiⁿyāⁿ cuaaⁿ 'diitú yā caⁿ'a yā chii yā discípulos yeⁿē yā chí cho'ó yā táámá lado yeⁿē nuūⁿ'niⁿ'yáⁿ'ā. 19 'Áámá saⁿ'ā chí ngí'cueeⁿ ley ndaā sa nanááⁿ Jesús ní caⁿ'a sa chii sa 'iiⁿyāⁿ: N'díí Maestro, caⁿ'á ndúúcu nī 'āā tíí nūⁿ naachi cáⁿ'a nī.

20 Jesús caⁿ'a yā chii yā saⁿ'ā miiⁿ: 'Yunéēⁿ ní véé yiivi yáává yeⁿē tī. 'Yáádá yeⁿē nanguuvi véé 'déece tī naati 'úú chí Saⁿ'ā chí Daiya Dendyuūs nguéeⁿ va'ai chí vaacú naachi cundiití tīⁿ.

21 Táámá discípulo yeⁿē yā caⁿ'a sa chii sa Jesús: N'dii Señor, vmaⁿ'naaⁿ téē nī lugar 'úú tī caⁿ'á 'cuuchí chiidá ní caⁿ'a yú.

22 Jesús ngaⁿ'a yā ngii yā saⁿ'ā: Cuchí di ndúúcu 'úú. Cu'neeⁿ dí 'iiⁿyāⁿ chí nguéeⁿ i'téenu yā chí 'cuuchí yā tináⁿ'ā chí chiida di. Tí 'iiⁿyāⁿ s'eeⁿ tan'dúúcā tináⁿ'ā 'tíica yā.

**Jesús chi'neeⁿ 'diíⁿ yā olas yeⁿē
nuūⁿ'niⁿ'yáⁿ'ā nduūcu 'yúúné chí tááⁿ**

(Mr. 4.35-41; Lc. 8.22-25)

23 Jesús sndaa yā na 'áámá barco ní discípulos yeⁿē yā cueⁿē yā ndúúcu yā ní sndaa yā na barco miiⁿ. 24 Hora mííⁿ nūⁿ ní ndaā 'áámá 'yúúné tááⁿ chí olas yeⁿē nuūⁿ'niⁿ'yáⁿ'a miiⁿ ní ch'eeⁿte cá chí ndaā nuūⁿ'niⁿ'yáⁿ'a chheeti barco miiⁿ. 'Téé 'téé nuūⁿ nguéeⁿ cánduūu ná barco. Jesús miⁿ ní cyaadu yā. 25 Discípulos yeⁿē yā ndaa yā nanááⁿ Jesús ní nanduūchí yā 'iiⁿyāⁿ miiⁿ ní ngaⁿ'a yā ngii yā Jesús: N'dii Señor, nadanguáⁿ'ai ní s'uúúⁿ caati 'cuūvi yú. 'Áā 'cuēechi yú cuaaⁿ maaⁿ nuūⁿ'niⁿ'yáⁿ'ā.

26 Jesús caⁿ'a yā chii yā discípulos yeⁿē yā: ¿De'ē cúúví chí 'va'á ní? Ndís'tií ní dúú'vii i'téenu nī. Tuu'mi ní Jesús nducueeⁿ yā ní yaa'vi yā 'yúúné mííⁿ ndúúcu nuūⁿ'niⁿ'yáⁿ'ā chí cu'neéⁿ 'diiiⁿ. Ní hora mííⁿ nūⁿ canee 'diiiⁿ. 27 Discípulos ní cheⁿ'e yiinú yā ní caⁿ'a yā nguaaⁿ vi'i: ¿Du'u sáⁿ'ā chí 'túúcā, tī ndii 'yúúné ndí nuūⁿ'niⁿ'yáⁿ'ā n'giindiveeéⁿ yeⁿē sa?

**Saⁿ'ā s'eeⁿ yeⁿē yáⁿ'āa Gadara
chí véé espíritu yeⁿē
yááⁿ'n'guiinūⁿ ndúúcu sa**

(Mr. 5.1-20; Lc. 8.26-39)

28 Taachi Jesús ndúúcu discípulos yeⁿē yā cho'ó yā nuūⁿ'niⁿ'yáⁿ'ā miiⁿ ní ndaā yā niiⁿnuúⁿ na yáⁿ'āa Gadara miiⁿ, snée na 'uuvi saⁿ'ā chí snée sa ndúúcu espíritu yeⁿē yááⁿ'n'guiinūⁿ ní nacan'dáa sa na yiive yáává chí nguaaⁿ yáinyāⁿ. Ní néené taaⁿ sa chí mar 'áámá 'iiⁿyāⁿ nguéeⁿ ngí ngo'ó yā yúúni miiⁿ. Saⁿ'ā s'eeⁿ ní ndaa sa nanááⁿ Jesús. 29 Ní 'cai yicu sa: N'dii Jesús Daiya Dendyuūs, ¿d'éé canéé yeⁿē nī ndúúcu nús'uu? ¿'Áá ndaā nī 'muuⁿ chí di'vaachí nī yeⁿē nús'uu taachi 'āā cuéeⁿ cúúnú ca'a tiempo taachi Dendyuūs ca'a yā castigo?

30 Ní naachi snée saⁿ'ā s'eeⁿ ní yaⁿ'ai 'téé na 'áámá yiicū. Ní niiⁿnuúⁿ saⁿ'ā

s'eeⁿ snéé 'yaaⁿ n'dái puercos, chi nge'é tī. ³¹Ní espíritus yeⁿe yááⁿ'nguiinūⁿ miiⁿ ní di'cuíútu sa Jesús miiⁿ: N'dii Jesús, ndúúti chi tun'dáa ní nús'uu yeⁿe saⁿa s'uuⁿ, 'cuáaⁿ ní chi cun-daa 'nū cheeti puercos miiⁿya. ³²Jesús miiⁿ caⁿa yā chii yā espíritus yeⁿe yááⁿ'nguiinūⁿ: Cuéⁿe ní. Tuu'mi ní es-píritus yeⁿe yááⁿ'nguiinūⁿ cán'daa sa ní cueⁿe sa cheeti puercos. Cuin'diichí ní. Nducyaaca puercos chéenu tī na yīcū miiⁿ ní chingéé nuúⁿ tī nguááⁿ nuūⁿnī'yáⁿa ní ch'íi nuúⁿ tī nguááⁿ nuūⁿnīⁿ miiⁿ.

³³Iiⁿ'yāⁿ chi diiⁿ cuidado puercos miiⁿ cunaⁿ'á yā ngéenu yā na yááⁿ miiⁿ ní caⁿa yā tanducuéⁿ'ē chí chii tan'dúúca chí ch'ó'oo yeⁿe 'iiⁿ'yāⁿ chi snéé ndúúcu espíritus yeⁿe yááⁿ'nguiinūⁿ. ³⁴Nducyaaca 'iiⁿ'yāⁿ yeⁿe yááⁿ miiⁿ cheⁿe yā n'diichi yā Jesús. Taachí ndaa yā naachi canéé Jesús miiⁿ, 'iiⁿ'yāⁿ s'eeⁿ ní di'cuíútu yā Jesús miiⁿ chí cuéeví yā yeⁿe yááⁿ vaacú yā.

Jesús diiⁿ yā chi nduuvā yeⁿe 'áámá saⁿa ndúúcu ca'āi chi in'dúuví sá

(Mr. 2.1-12; Lc. 5.17-26)

9 Tuu'mi ní Jesús miiⁿ sndáa yā na barco, ní cueⁿ'é yā táamá lado yeⁿe nuūⁿnī'yáⁿa ní cueⁿ'e yā ní ndaa yā yááⁿ vaacú yā. ²Tuu'mi ní ndaa nanááⁿ Jesús 'iiⁿ'yāⁿ ní ndeⁿ yā 'áámá saⁿa ndúúcu ca'āi chi in'dúuví cuerpo yeⁿe sa. Candúu sa na 'áámá yiive. Taachí Jesús miiⁿ tuumicadínuuⁿ yā chi saⁿa s'eeⁿ i'téenu sa yeⁿ'é yā, tuu'mi ní caⁿ'a yā chii yā saⁿa miiⁿ: Nduuví tiinú di daiyá. 'Úú 'āā nadach'ēecú nuuⁿndi yeⁿ'ē di.

³Tuu'mi ní náⁿ'ā saⁿa s'eeⁿ chi ngi'cueeⁿ ley chi snee sa miiⁿ tucá'a sa nadacadínuuⁿ sa nguuaⁿ maāⁿ sa: Sáⁿ'a 'cūū ní ngaⁿ'a taaⁿ sa contra yeⁿ'e Ndyuūs. ⁴Jesús miiⁿ tuumicadínuuⁿ yā vaanicadínuuⁿ yeⁿ'ē sa ní caⁿ'a yā chii yā saⁿa s'eeⁿ: ¿De'ē cuuvi chi nguéé

n'daācā inadicadínuuⁿ ní na staava yeⁿ'e ní? ⁵¿Chee cá chi nguéé ngíⁿ'i chi caaⁿ'máⁿ cuuvi sáⁿ'a 'cūū: Nuuⁿndi yeⁿ'ē di nch'ēecū o chi caaⁿ'máⁿ: Ndúcuééⁿ dí ní caaca dí? ⁶Tíicā ngaⁿ'á chi ndís'tií cadínuuⁿ ní chi Saⁿ'ā chi Daiya Dendyuūs ní véé poder yeⁿ'ē sa na iⁿ'yeeⁿ'dí 'cūū chi nadach'ēecú sa nuuⁿndi yeⁿ'é 'iiⁿ'yāⁿ. Tuu'mi ní caⁿ'a yā chii yā saⁿa ndúúcu ca'āi chi in'dúuví sá: Nducueeⁿ di ní nta'a di yiive yeⁿ'e di ní cunaⁿ'ā di na vaacu di.

⁷Tuu'mi ní saⁿ'ā miiⁿ ní nducuééⁿ sá ní cunaⁿ'ā sa na vaacu sa. ⁸Taachí 'iiⁿ'yāⁿ s'eeⁿ n'diichí yā chuū cheⁿ'e yiinú yā ní caⁿ'a yā: De'ē chúúca ch'ēete Dendyuūs chí ca'á yā poder 'cūū saⁿ'ā iⁿ'yeeⁿ'dí cūū.

Jesús yaa'vi yā saⁿ'ā chi nguuví Mateo

(Mr. 2.13-17; Lc. 5.27-32)

⁹Jesús cho'ó yā miiⁿ, ní cachiicá yā ní n'diichí yā 'áámá saⁿ'ā chi nguuví sa Mateo. Mateo miiⁿ ní vee sa na cuarto naachi nadí'vē 'iiⁿ'yāⁿ yeⁿ'ē yá'āa yeⁿ'e yā. Jesús caⁿ'a yā chii yā saⁿ'ā: Díi, cuchí di caⁿ'ā di nduucú. Ní Mateo miiⁿ nducueeⁿ sa ní cueⁿ'e sa ndúúcu Jesús.

¹⁰Taachí Jesús vee yā na mesa ná va'āi yeⁿ'e Mateo miiⁿ, hora míⁿ néené 'yaaⁿ 'iiⁿ'yāⁿ publicanos chi cobradores chí inn'guee yā yeⁿ'e impuesto ndúúcu 'iiⁿ'yāⁿ nuūⁿndíi ní ndaa yā ní ch'ēēté yā na mesa ndúúcu Jesús ndúúcu discípulos yeⁿ'e yā. ¹¹Taachí 'iiⁿ'yāⁿ fariseos n'diichí yā chuū, caⁿ'a yā chii yā discípulos yeⁿ'e Jesús: ¿De'ē cúvíví chí nge'e maestro yeⁿ'e ní ndúúcu saⁿ'ā publicanos chí cobradores chí inn'guee yā yeⁿ'e impuesto ndúúcu 'iiⁿ'yāⁿ nuūⁿndíi?

¹²Taachí Jesús ch'iindiveeⁿ yā chuū, caⁿ'a yā chii yā 'iiⁿ'yāⁿ s'eeⁿ: 'Iiⁿ'yāⁿ chí nguéé ngiitā nguéé neⁿ'e yā 'aama médico, dámaaⁿ 'iiⁿ'yāⁿ chí ngiitā. ¹³Cueⁿ'e ní ní tuumicadínuuⁿ ní de'ē chí canéé nguūⁿ na libro yeⁿ'e Ndyuūs ndúúcu chí neⁿ'ē caaⁿ'maⁿ chí 'tíicā:

'Úú neⁿé chi 'iiⁿyāⁿ nduuví ya'āi 'iinú yā ndúúcu vī. 'Úú ní nguéé neⁿé chi 'caaⁿnuⁿ yā 'iiti ní ca'á yā 'iiti tan'dúúca ofrenda cucááva 'úú. Ní 'úú ní nguéé cuchii iⁿyeeⁿdí 'cūú chí yaaⁿví 'iiⁿyāⁿ chí nadacádíinuⁿ yā chí n'dáaca yā ti nguéé dinuuⁿndí yā, naati 'iiⁿyāⁿ chí véé nuuⁿndi yeⁿe yā ní 'ícu ndaacadaamí yā yeⁿe nuuⁿndi yeⁿe yā.

'Iiⁿyāⁿ ntinguuneeⁿ yā yeⁿe chí nguéé ca'diiⁿnúⁿ yā ti caaⁿmaⁿngua'a yā

(Mr. 2.18-22; Lc. 5.33-39)

¹⁴ Tuu'mi ní discípulos yeⁿe Juan chí chædínúⁿniⁿ yā ndaá yā nanááⁿ Jesús miiⁿ ní caⁿa yā: N'dií Jesús, ¿de'ē cúví chí nús'uu ndúúcu 'iiⁿyāⁿ fariseos néené n'dee cuví nguéé nga'diiⁿnúⁿ n'ú ní discípulos yeⁿe ní nga'dííⁿnúⁿ yā?

¹⁵ Jesús caⁿa yā chí yā 'iiⁿyāⁿ s'eeⁿ: ¿'Áa cuví 'cuætinéé 'iiⁿyāⁿ ndúúcu catecai 'cuáiⁿ tinaⁿā taachí caⁿá yā naachi n'giindivaacu 'iiⁿyāⁿ neⁿe chí saⁿā chí n'giindivaacu miiⁿ canéé sá? Naati ndaá nguuví chí isaⁿā yeⁿe yā ní cuaví sa yeⁿe yā ti 'cuúví sa; tuu'mi ní nguee ca'diiⁿnúⁿ yā.

¹⁶ Mar 'áamá 'iiⁿyāⁿ nguéé cúví cuta'á yā 'áamá tiinúⁿ ngai chí nguéé naaⁿnu yā chí n'dyaatá yā na catecai ndiicúú yeⁿe yā. Nduuti chí 'tíca dííⁿ yā, caatā ndu'ū tiinúⁿ ndiicúú. Ní cuuví ch'æte ca naachí ndíí nteeⁿ tiinúⁿ ndiicúú. ¹⁷ Ndíí nguéé ndúú caaⁿyúⁿ 'iiⁿyāⁿ vino ngai chééti bolsa yiiⁿmaⁿ ndiicúú tan'dúúca chí diiⁿ 'iiⁿyāⁿ tiempo chí ch'óo caati yiiⁿmaⁿ ndiicúú miiⁿ ní cúteeⁿ ní vino miiⁿ ní cungéé. Ní cuuví ndáí yiiⁿmaⁿ. Caaⁿyúⁿ yā vino ngai cheeti bolsa yiiⁿmaⁿ ngai; ní cuavíⁿ nduu 'uúví n'dáaca canéé yeⁿe.

Jesús dííⁿ yā chí nanduúvā yeⁿe 'uúví n'daataá

(Mr. 5.21-43; Lc. 8.40-56)

¹⁸ Taachí Jesús miiⁿ ngaⁿa yā ndúúdu 'cūú, 'áamá saⁿā chí ngaⁿa ntiiⁿnyúⁿ yā yeⁿe yáacū sinagoga ndáa sa nanááⁿ Jesús, ní chiintiiⁿya sá ní chíteenu sa. Ní caⁿa sa chí sa 'iiⁿyāⁿ: N'dií Jesús, miniiⁿyuⁿ chíi daiyá; naati cuchíí ní ní cun'duu ní ta'a ní vmnaaⁿ yeⁿe tá ní nduuchi tá.

¹⁹ Ní Jesús nducueeⁿ yā ní cueⁿe yā ndúúcu discípulos yeⁿe yā ní ndáa yā ndúúcu saⁿā miiⁿ na vaacu sá. ²⁰ Tuu'mi ní 'áamá n'daataa chí canéé ndúúcu 'áamá ca'ai, chí ican'dáa yuuúⁿ yeⁿe cuerpo yeⁿe tá 'āā ndiichúúví nduūyū ndaa niiⁿnuⁿ tá cuaaⁿ dáámí Jesús. Tuū'vi tá naachí ndættúú yeⁿe catecai Jesús miiⁿ. ²¹ Ti taⁿā miiⁿ maāⁿ tá nadicádiinuⁿ tá 'tíca: Ndúúti chí 'úú tuū'ví dámaaⁿ catecai yā, tuu'mi ní nduúvā yeⁿe. ²² Tuu'mi ní Jesús ngueecúndii yā ní n'diichi yā táⁿā, ní caⁿa yā chí yā táⁿā: Cúví dítiinúⁿ di, díí daiyá; 'āā nanduuvā yeⁿe di ti i'téenu di 'úú. Hora mííⁿ nūuⁿ táⁿā miiⁿ nanduúvā yeⁿe tá.

²³ Taachí Jesús miiⁿ sndaá yā na va'ai yeⁿe sáⁿā chí ngaⁿa ntiiⁿnyuⁿ yā yeⁿe yáacū sinagoga tuu'mi ní n'diichí yā 'iiⁿyāⁿ chí i'tiiví yā flauta, ndúúcu 'iiⁿyāⁿ chí n'gai yā, ndúúcu 'iiⁿyāⁿ chí ngæcú yā ní snéé yā naachi candííⁿ tináⁿā. ²⁴ Ní Jesús caⁿa yā chí yā 'iiⁿyāⁿ s'eeⁿ: Cuví ní; ti ta'díí miiⁿ nguéé n'dií tá, cyaadu tá. 'Iiⁿyāⁿ s'eeⁿ ní chííⁿnyuⁿneeⁿ yā Jesús miiⁿ. ²⁵ Taachi tun'dáa yā 'iiⁿyāⁿ miiⁿ cheeti va'āi, Jesús ndaa yā va'āi ní sta'á yā ta'ā n'daataa 'lííⁿ miiⁿ, ní n'daata 'lííⁿ miiⁿ ní nducueeⁿ tá. ²⁶ Chuū chí diiⁿ Jesús ní ndōō fama miiⁿ nuuⁿmaⁿ ná yáāⁿ naachí chí chuū.

**Jesús dífⁿ yā chi nanduūvā
'uuvi 'iiⁿyāⁿ chi ngeuenááⁿ**

²⁷ Taachi Jesús cho'ó yā yeⁿē miiⁿ, ní 'uuví saⁿā chi ngeuenááⁿ can'dáa sa 'iiⁿyāⁿ. 'Cai yíicú sá ní caⁿa sa: N'díí Daiya David, cuneé ya'ai 'iinu ní nús'uu.

²⁸ Taachi Jesús cueⁿé yā ndaa yā na va'ai tuu'mi ní ndaa ndúú 'uūví saⁿā ngeuenááⁿ miiⁿ nanááⁿ Jesús. Jesús caⁿa yā chíí yā saⁿā s'eeⁿ: ¿'Áá i'téenu ní chi 'úú cuuvi dífⁿ chi nanduūvā yeⁿé ní? Saⁿā s'eeⁿ ní caⁿa sa: 'Tíicā Señor.

²⁹ Tuu'mi ní Jesús tuu'ví yā nduutinááⁿ saⁿā s'eeⁿ ní caⁿa yā: 'Tíicā cuuvi tan'dúúcā chi i'téenu ní yeⁿé.

³⁰ Nduutinááⁿ saⁿā s'eeⁿ ní n'guaaⁿ ní nduuvā yeⁿē sa. Ní Jesús caⁿa yā chíí yā saⁿā s'eeⁿ: Nguéé ca'a ní chi cadíínúuⁿ 'iiⁿyāⁿ yeⁿe chuū.

³¹ Naati saⁿā s'eeⁿ ní cueⁿe sa núúⁿmáⁿ ná yáⁿáa miiⁿ, ní caⁿa sa nducueⁿē chí Jesús miiⁿ dífⁿ yā.

**Jesús dífⁿ yā chí nduūvā
yeⁿē 'áámá 'dífⁿmí**

³² Taachi Jesús ndúúcu 'iiⁿyāⁿ s'eeⁿ nan'daa yā na va'ai miiⁿ, ndaa saⁿā s'eeⁿ nanááⁿ Jesús ní ndéé sa 'áámá 'dífⁿmí chi canee sa ndúúcu espíritu yeⁿe yááⁿn'guiinūuⁿ. ³³ Ní taachi Jesús miiⁿ tun'dáa yā espíritu yeⁿe yááⁿn'guiinūuⁿ miiⁿ, tuu'mi ní 'dífⁿmí miiⁿ ní chíí caⁿa sa. 'Iiⁿyāⁿ ní cheⁿe yiinú yā ní caⁿa yā: Nguéé in'diichí dendu'ū chi 'túúcā nguaaⁿ 'iiⁿyāⁿ yeⁿe Israel.

³⁴ Naati 'iiⁿyāⁿ fariseos caⁿa yā: Saⁿā miiⁿ ní tun'dáa sa espíritu yeⁿe yááⁿn'guiinūuⁿ cáávā saⁿā chi ngaⁿa ntiiⁿnyuⁿ sa yeⁿe espíritus yeⁿe yááⁿn'guiinūuⁿ.

Jesús ya'ai 'iinú yā 'iiⁿyāⁿ

³⁵ Jesús cachiica yā nuuⁿmáⁿ na yááⁿ n'geete ndúúcu yaáⁿ n'gaiyáá, ní

ngi'cueeⁿ yā na yáacū sinagogas yeⁿe 'iiⁿyāⁿ Israel. Ní ngaⁿa yā nduudu cuaacu yeⁿē naachí Ndyuūs ngaⁿā ntiiⁿnyúⁿ yā na va'ai cheeti nguuvi. Ní dífⁿ yā chi nduūvā yeⁿē nducyaaca 'iiⁿyāⁿ yeⁿe nducueⁿē naaⁿ ca'ai yeⁿe yā ndúúcu 'iiⁿyāⁿ chi ya'ai yeⁿé yā. ³⁶ Ní taachi Jesús n'diichi yā nducyaaca 'iiⁿyāⁿ s'eeⁿ, tuu'mi ní yá'ai 'iinú yā caava 'iiⁿyāⁿ s'eeⁿ, ti 'iiⁿyāⁿ s'eeⁿ ndicúúnu yā ní snéé yā tan'duucā 'iiti cuūchí chi nguéé du'ū chi idiiⁿ cuidado 'iiti. 'Tiicā yā. ³⁷ Tuu'mi ní Jesús miiⁿ caⁿa yā chíí yā discípulos yeⁿe yā: Cuaacu níⁿnyúⁿ chí ngíí yeⁿē néené n'deēe chí díí yú cosechar naati 'iiⁿyāⁿ chí idiiⁿ ntiiⁿnyuⁿ nguéé 'yaaⁿ yā. ³⁸ Cáávā chuū cáácá ní Ndyuūs chí véé cosecha yeⁿe yā chí dicho'ó yā mozos ní nadidáámá yā cosecha yeⁿé yā.

**Jesús yaa'vi yā ndu'u
ndiichúúví discípulos**

(Mr. 3.13-19; Lc. 6.12-16)

10 Tuu'mi ní Jesús yaa'vi yā ndu'ū ndiichúúví discípulos yeⁿe yā chí ndaa yā nanááⁿ yā. Ní Jesús miiⁿ ca'a yā poder discípulos chí tun'dáa yā espíritus yeⁿe yááⁿn'guiinūuⁿ yeⁿé 'iiⁿyāⁿ, ní dífⁿ yā chí nduūvā yeⁿé 'iiⁿyāⁿ chí ngiitā yeⁿe nducueⁿē naaⁿ ca'ai yeⁿe yā ndúúcu 'iiⁿyāⁿ chí ya'ai yeⁿé yā.

² Túúcā duūchi ndu'u ndiichúúví apóstoles; Simón chí nguuvi Pedro ndúúcu Andrés 'díinu sa, Jacobo ndúúcu Juan 'diinū sa chí daiya Zebedeo; ³ ndúúcu Felipe, ndúúcu Bartolomé, ndúúcu Tomás, ndúúcu Mateo chí sáⁿa publicano chí cobrador; ndúúcu Jacobo saⁿā daiya Alfeo; ndúúcu Lebeo chí nguuvi Tadeo; ⁴ ndúúcu Simón yeⁿe yáⁿáa Caná; ndúúcu Judas Iscariote saⁿa miiⁿ chí cuayiivi chíⁿi sá du'u chí Jesús miiⁿ chí cuuvi 'caaⁿnúⁿ ya 'yā.

Ntiiⁿnyuⁿ yeⁿē ndiichúúví apóstoles

(Mr. 6.7-13; Lc. 9. 1-6)

⁵ Jesús dicho'ó yā ndu'ū ndiichúúví apóstoles ní caⁿa yā chii yā 'iiⁿyāⁿ taacā chi canee chí díⁿ yā. Ní Jesús caⁿa yā: Nguée caⁿá ní cuaaⁿ yúúní yeⁿé 'iiⁿyāⁿ chí nguée ndaata yeⁿē Israel chí judíos. Nguée cundaa ní yāāⁿ vaacú 'iiⁿyāⁿ Samaritanos. ⁶ Naati ndís'tií ní caⁿa ní nanááⁿ 'iiⁿyāⁿ Israel s'eeⁿ tí 'iiⁿyāⁿ s'eeⁿ tan'dúúca 'ítí cuuchi chí nínáí tí na icyáⁿā, 'tíca yā. ⁷ Ní taachi caⁿá ní 'túúca caaⁿmaⁿ ní nduudu cuaacu ní caaⁿmaⁿ ní yeⁿē naachí Dendyuūs ngaⁿa ntiíⁿnyúⁿ yā na va'ai cheeti nguuví chí 'āā ndaa niiⁿnuúⁿ. ⁸ Díⁿ ní chí nduūvā yeⁿé 'iiⁿyāⁿ chí ngíita. Díⁿ ní chí nduuchi 'iiⁿyāⁿ chí n'díí chí tináⁿā. Díⁿ ní chí nduūvā ní nduuví dēeve cuerpo yeⁿe 'iiⁿyāⁿ chí véé vaadī ya'ai chí nguuví lepra chí in'duuti yuūtē yeⁿe yā. Ní díⁿ ní chí divíí ní espíritus yeⁿē yááⁿ'nguiinūuⁿ chí snéé ndúúcu 'iiⁿyāⁿ. Ndís'tií ndaacá ní poder 'cūū yeⁿé Dendyuūs, ní nguée cuta'a ní tumí cáāvā chuū. Chuū chí díⁿ ní ndúúcu 'iiⁿyāⁿ nguée cuuvi cún'di'i yeⁿé yā.

⁹ Nguée candée ní 'díⁿ'nguaaⁿ, ndíí nguée ndúú 'díⁿ'nguae, ndíí nguée ndúú tuūmí cheyé yā. ¹⁰ Nguée candée ní moral yeⁿe ní cuaaⁿ cyúúní chí cáⁿa ní. Ndíí nguée ndúú 'uūví ra catecai ní candée ní. Ndíí nguée ndúú candu ndaacúú yeⁿé ní, ndíí nguée ndúú in'daacúú rá yeⁿe ní, tí 'iiⁿyāⁿ chí díⁿ ntiíⁿnyuⁿ, na ntiíⁿnyúⁿ chí díⁿ yā ní ndaacā chí ché'e yā ndúúcu necesidades chí neⁿe yā.

¹¹ 'Āā tíí nūuⁿ yāāⁿ n'geete ndúúcu yāāⁿ n'gaiyāā naachí cundāā ní tínguuneeⁿ ní du'ú 'iiⁿyāⁿ yeⁿē yāāⁿ miíⁿ chí n'dai yā ní cunée ní na vaacú yā ndii n'dáá cá ní. ¹² Taachí ndaá ní na vaacu 'iiⁿyāⁿ: Ndaí ndís'tií, caaⁿmáⁿ ní, tan'dúúca costum-bre yeⁿe ní. ¹³ Ndúúti chí 'iiⁿyāⁿ yeⁿé va'āi miíⁿ n'dai yā tuu'mi ní vaadī 'di-

íⁿ yeⁿe ní cunée ndúúcu yā. Nduuti chí nguée n'dai yā o nguée vaadī 'di-íⁿ ndúúcu yā, nacan'dāā ní va'āi miíⁿ ndúúcu 'áamá nduudu n'dai. ¹⁴ Nduuti chí 'iiⁿyāⁿ s'eeⁿ nguée 'cuaaⁿ yā ndís'tií ndíí nguée ndúú 'caandiveeⁿ ra yā nduudu yeⁿe ní nan'dāā ní va'ai miíⁿ o yeⁿe yāāⁿ miíⁿ ní n'dáá ní iyaácāā yeⁿe ca'á ní tí nguée n'giindiveeⁿ yā yeⁿé ní. ¹⁵ Cuaacu níⁿnyúⁿ cuaacu níⁿnyúⁿ ngaⁿá ngii ndís'tií chí taachi ndaá ngu-uví chí Ndyuūs n'diichí yā nuuⁿndi yeⁿe yāāⁿ, castigo yeⁿe 'iiⁿyāⁿ yeⁿe yāāⁿ 'cūū cunncaá ca chí cuuví castigo yeⁿe 'iiⁿyāⁿ yeⁿe yāāⁿ Sodoma ndúúcu yāāⁿ Gomorra chí yāāⁿ s'eeⁿ yeⁿé 'iiⁿyāⁿ chí nguée díⁿ yā chí n'dai ndíí nguée 'iiⁿyāⁿ yeⁿe ndaata Israel yā.

Ndaá nguuví chí 'iiⁿyāⁿ dín'gínú yā nduucú ní

¹⁶ Cun'diichí ní. 'Úú ní dicho'ó ndís'tií tan'dúúca chí ndís'tií ní 'iiti cuūchí nááv-taⁿā yeⁿē 'yáaⁿyāāⁿ n'gaātāā, 'tiicá ní. Canée chí díⁿ ní chí listo ní tan'dúúca 'aama cúú. Ní canée chí din'daacá ní ní canée manso ní tan'dúúca 'áamá paloma. 'Tíicā díⁿ ní. ¹⁷ Candée ní cuidado caati 'iiⁿyāⁿ s'eeⁿ ní nca'á yā ndís'tií nanááⁿ 'iiⁿntyēⁿē yeⁿe yaacū sinagoga. Ní cúúví 'cueⁿé yā ndís'tií na yaacū sinagoga miíⁿ. ¹⁸ Ní 'iiⁿyāⁿ s'eeⁿ candée yā ndís'tií nanááⁿ gobernadores ndúúcu nanááⁿ reyes cucáāvā 'úú. Ní 'íicú ndís'tií cu-uví caaⁿmáⁿ ní nduudu cuaacu yeⁿē 'úú nanááⁿ 'iiⁿyāⁿ s'eeⁿ ndúúcu 'iiⁿyāⁿ chí nguée yeⁿe ndaata Israel. ¹⁹ Ní taachi 'iiⁿyāⁿ nca'a yā ndís'tií nanááⁿ 'iiⁿyāⁿ s'eeⁿ, nguée nadicááínuuⁿ ní yeⁿe chí caaⁿmáⁿ ní tí hora míⁿ nūuⁿ ní Ndyuūs téé yā nduudu chí caaⁿmáⁿ ní. ²⁰ Tí nguée ndís'tií chí caaⁿmáⁿ ní naati Espíritu N'dai yeⁿé Ndyuūs Chiida yú. Espíritu miíⁿ caaⁿmáⁿ yā cáāvā ndís'tií tí canée yā nduucú ní.

²¹ Nguaaⁿ 'dínū sa caⁿa sa caaⁿ'maⁿ sa contra yeⁿ'ē v'í' chi canéé chí 'cuūvi sa. 'Tiicá ntúūⁿ chiidá yā caⁿ'a yā caaⁿ'maⁿ yā contra yeⁿ'ē daiya yā chi canéé chí 'cuūvi yā. 'Tiicá ntúūⁿ daiyá yā ní caⁿ'á yā diiⁿ yā ndúúcu chiidá yā ti ndís'tií candéé nī nduudu yeⁿ'é. ²² Ní nducyáácá 'iiⁿ'yāⁿ nguéé cuuvi n'diichí yā ndís'tií cucáávā 'úú ti cueⁿ'é nī nduucú. 'Iiⁿ'yāⁿ chi cuchéé yā tanducuéⁿ'ē chuū nducuéⁿ'ē nguuvi yeⁿ'é yā 'iiⁿ'yāⁿ miiⁿ chí nanguaⁿ'ai yā. ²³ Taachí 'iiⁿ'yāⁿ can'daá yā ndís'tií chí neⁿ'e yā chi ndís'tií 'cuenú nī cuuvi, na 'áámá yáāⁿ, tuu'mi ní caⁿ'ā nī cáánu nī ná taama yáāⁿ ti cuaacu níⁿ'nyúⁿ ngaⁿ'á ngí ndís'tií chí Saⁿ'ā chí Daiya Ndyuūs miiⁿ ndaa sá taama vmnéⁿ'ēe vmnaaⁿ chí ndís'tií cuuvi caaⁿ'maⁿ nī nduudu cuaacu yeⁿ'é nuuⁿ'maⁿ na yáⁿ'āa Israel.

²⁴ Mar 'áámá discípulo ní nguéé n'geete ca ntiíⁿ'nyuⁿ sá chí cuuvi maestro yeⁿ'ē sa, ndíí nguéé ndúú mar 'áámá mozo ní n'geete ca sa chí cuuvi 'iivi sa. ²⁵ N'dáacā chí discípulo miiⁿ diiⁿ sa tan'dúúccā chí idiiⁿ maestro yeⁿ'e sa ní mozo miiⁿ diiⁿ sa tan'dúúccā chí diiⁿ 'iivi sa. Ndúúti chí 'iiⁿ'yāⁿ chí ngaⁿ'a ntiíⁿ'nyuⁿ yeⁿ'e va'ai chí nguuví Beelzebú chí yááⁿ'nguiinūⁿ, tuu'mi ní tanáⁿ'ā 'iiⁿ'yāⁿ chí nguéé yeⁿ'e familia yeⁿ'e Beelzebú miiⁿ cunncaā caⁿ'a yā caaⁿ'máⁿ yā yeⁿ'e 'iiⁿ'yāⁿ yeⁿ'e Beelzebú.

Du'ū chí cuuvi 'va'ā yú

(Lc. 12.2-9)

²⁶ Tuu'mi ní ndís'tií nguéé 'va'á nī 'iiⁿ'yāⁿ ti nguéé 'áámá chí canúúⁿ n'de'ei chí nguéé cuuví snaaⁿ yú, ndíí nguéé ndúú canee 'áámá secreto chí 'iiⁿ'yāⁿ nguéé cuuvi cadíinuⁿ yā. ²⁷ 'Iicu chíiⁿ chí 'úú ngaⁿ'á ngí ndís'tií yeⁿ'e nduūdū n'de'ei chí nguéé ituumicádíinuⁿ 'iiⁿ'yāⁿ, ndís'tií caaⁿ'maⁿ nī nduudu chí túmícádiinuⁿ 'iiⁿ'yāⁿ. Níícu de'e chí ngaⁿ'á ngí ndís'tií ní 'cuai nī ndii na yaacú yeⁿ'ē tiiⁿ va'āi ní túmícádiinuⁿ

'iiⁿ'yāⁿ nduudú 'cūū. ²⁸ Nguéé 'va'á nī 'iiⁿ'yāⁿ chí 'caāⁿ'nūⁿ cuerpo yeⁿ'e nī ní nguéé cuuvi 'caaⁿ'núⁿ yā alma yeⁿ'e nī. Di'va'á ca nī Dendyuūs chí cuuvi 'caaⁿ'núⁿ yā alma yeⁿ'e nī ndúúcu cuerpo yeⁿ'e nī chí caⁿ'á nī na infierno.

²⁹ 'Áá nguéé in'díicui yā na 'uūvi 'yaada cáávā 'aama tuūmí? Mar 'áámá 'yáádá s'éeⁿ nguéé 'cuuvá tī na yáⁿ'āa 'cūū núúⁿ'máⁿ neⁿ'e chí nguéé déenu Ndyuūs Chiida yú. ³⁰ Níícu nducyaaca yuudu tíí nī ní ndii dúúché ndúúcu Ndyuūs. ³¹ Nguéé di'vá'a ndís'tií caati ch'ete cá nī chí cuuvi 'yaaⁿ n'dáí 'yaada.

'Iiⁿ'yāⁿ chí ngaⁿ'á yā iintiiⁿ'naáⁿ yā Cristo nanááⁿ 'iiⁿ'yāⁿ

(Lc. 12.8-9)

³² 'Āā du'ú nūⁿ chí ngaⁿ'a chí iintiiⁿ'naaⁿ 'úú nanááⁿ 'iiⁿ'yāⁿ, 'úú ntúūⁿ ní caāⁿ'máⁿ chí iintiiⁿ'naáⁿ 'iiⁿ'yāⁿ s'eeⁿ nanááⁿ Chiidá chí canée yā na va'ai cheeti nguuvi. ³³ 'Āā du'ú nūⁿ chí caāⁿ'máⁿ chí nguéé in'diichi 'úú nanááⁿ 'iiⁿ'yāⁿ, 'úú ntúūⁿ ní caāⁿ'máⁿ chí nguéé in'diichí 'iiⁿ'yāⁿ s'eeⁿ nanááⁿ chiidá chí canée yā na va'āi cheeti nguuví.

Cáávā Jesús miiⁿ véé divisiones nguaaⁿ 'iiⁿ'yāⁿ

(Lc. 12.51-53; 14.26-27)

³⁴ Nguéé nadicádíinuⁿ nī chí 'úú, Jesús, ndaá chí ndéé vaadi 'diiíⁿ 'iiⁿ'yāⁿ na iⁿ'yeeⁿ'dí 'cūū. Nguéé ndaá chí ndéé vaadi 'diiíⁿ caati ndéé vaadi 'caaⁿ'va ní tan'dúúccā chí candéé 'áámá machete chí 'caāiⁿ nduu 'uuví lados. ³⁵ Tí ndaá chí 'iiⁿ'yāⁿ ní nguéé cuuvi n'diichí yā chiidá yā, ní n'daataá nguéé cuuvi n'diichi tá cheecu tá, n'daataá nguéé cuuvi n'diichi ntúūⁿ tá indáⁿ'a tá. ³⁶ Caati 'áámá 'áámá yā ní enemigos yā yeⁿ'e yā v'í' na vacu yā.

³⁷ 'Iiⁿ'yāⁿ chí neⁿ'e cá yā chiidá yā o cheecu yā nguéé ti 'úú, nguéé neene n'dai yā chí cuuvi yeⁿ'é 'iiⁿ'yāⁿ. 'Iiⁿ'yāⁿ chí neⁿ'e

cá yā daiyá yā saⁿā o daiyá yā n'daataá nguéé ti 'úú, nguéé neene n'dai yā chi cuuvi yeⁿé 'iiⁿyāⁿ. ³⁸ Ní 'iiⁿyāⁿ chí nguéé neⁿe yā 'cueenú yā cuuvi cucááavā 'úú chí tan'dúúcā chí cuta'á yā cruz yeⁿe yā ní caⁿa yā nduucú, nguéé neenē n'dai yā chí cuuvi yeⁿé 'iiⁿyāⁿ. ³⁹ 'Iiⁿyāⁿ chí neⁿe cá yā vida yeⁿe yā cááavā cosas chí vée ná iⁿ'yeeⁿdí 'cūú nguéé ti 'úú, tuu'mi ní táámá vida ní dindaí yā. 'Iicú 'iiⁿyāⁿ chí dindaí yā vida yeⁿe yā na iⁿ'yeeⁿdí 'cūú cucááavā 'úú, ti díiⁿ yā chí 'úú neⁿé ní ndaacá yā táámá vida yeⁿé yā.

Yeⁿe chí ndaacā yeⁿe yú

(Mr. 9.41)

⁴⁰ 'Iiⁿyāⁿ chí 'cuaaⁿ yā ndís'tií, 'cuaaⁿ yā 'úú. 'Iiⁿyāⁿ chí n'gúuⁿ yā 'úú, n'gúuⁿ yā 'iiⁿyāⁿ chí dichó'o yā 'úú. ⁴¹ 'Iiⁿyāⁿ chí n'gúuⁿ yā 'áámá saⁿa profeta caati profeta miiⁿ chíí yā lado yeⁿe Ndyuūs 'iiⁿyāⁿ ní cuta'á yā premio chí ndaacā yeⁿe chí tunééⁿ 'iiⁿyāⁿ chí profeta. 'Iiⁿyāⁿ chí n'gúuⁿ yā 'áámá 'iiⁿyāⁿ chí n'dai caati 'iiⁿyāⁿ miiⁿ ní n'dai yā, 'iiⁿyāⁿ ní cuta'á yā premio chí tunééⁿ 'iiⁿyāⁿ chí n'dai. ⁴² 'Áā du'ú nuūⁿ 'iiⁿyāⁿ chí ca'a 'áámá vaso nuūⁿniⁿ 'liche 'áámá 'iiⁿyāⁿ caati i'téenu yā 'úú, cuaacu níⁿnyúⁿ ngaⁿá ngií ndís'tií chí vée premio yeⁿe 'iiⁿyāⁿ miiⁿ chí cuuvi ndaacā yā yeⁿe yā.

Juan chí cheédínúⁿniⁿ sa dichó'o sa 'iiⁿyāⁿ nanááⁿ Jesús

(Lc. 7.18-35)

11 Taachí Jesús chííⁿú chíí yā ndu'u ndiichúví discípulos yeⁿe yā táácā chí canéé chí díiⁿ yā tuu'mi ní Jesús chíicá yā yááⁿ miiⁿ ní cueⁿé yā na tanáⁿā yááⁿ s'eeⁿ chí ca'cueeⁿ yā ní caaⁿmaⁿ yā nduudu cuaacu yeⁿé Ndyuūs.

² Juan chí cheédínúⁿniⁿ sa 'iiⁿyāⁿ canúúⁿ sá vácūú. Ní taachí chíiⁿdivéeⁿ sá taacā idiíⁿ Jesús miiⁿ, tuu'mi ní dichó'o sa ná 'uuvi discípulos yeⁿe sa nanááⁿ Jesús.

³ Ní 'iiⁿyāⁿ s'eeⁿ ndáa yā ní ntingu-ueeⁿ yā Jesús miiⁿ: ¿'Áá n'dií chí Cristo chí canee chí ndaa o cunee ngíⁿúⁿ nū taama yā?

⁴ Jesús miiⁿ nán'gueecútaⁿa yā yeⁿe 'iiⁿyāⁿ s'eeⁿ ní caⁿa yā: Ndís'tií cúnaⁿa ní ní cuuvi ní Juan miiⁿ yeⁿé dendu'ú chí inaaⁿ ní ndúúⁿcú chí n'giindiveeⁿ ní. ⁵ 'Iiⁿyāⁿ chí n'gueenááⁿ ní inaaⁿ yā, 'iiⁿyāⁿ chí nguéé ngii ngiicá ní ngiicá yā, 'iiⁿyāⁿ chí ndíí ca'ai lepra chí in'duuti yuútē yeⁿe yā ní nduuva dēve yeⁿé yā, 'iiⁿyāⁿ chí cheetúú ní n'giindiveeⁿ yā, 'iiⁿyāⁿ chí n'díí ní nnduuchí yā yeⁿe nguaaⁿ tináⁿā, níicú 'iiⁿyāⁿ chí ndaachí snee yā chíiⁿdivéeⁿ yā nduudu cuaacu yeⁿé Ndyuūs chí nadanguáⁿai 'iiⁿyāⁿ ti 'iiⁿyāⁿ candēe yā nduudu cuaacu miiⁿ nanááⁿ yā. ⁶ De'ē chúúⁿcā n'dai 'iiⁿyāⁿ chí nguéé cunncaáⁿ ch'eenú yā 'úú ndúúⁿcú nduudu yeⁿé.

⁷ Taachi cuinaⁿa yā 'iiⁿyāⁿ s'eeⁿ, Jesús tucá'a yā caⁿa yā chíí yā 'iiⁿyāⁿ yeⁿe Juan chí cheédínúⁿniⁿ miiⁿ: ¿De'ē cheⁿe ndís'tií n'diichi ní na yáⁿāa cuūⁿmáⁿ naachi nguéé ch'etinéé 'iiⁿyāⁿ? ¿'Áá 'áámá ndúú chí n'giidí 'yúúné? ⁸ O ¿de'ē tuu'mi cheⁿe ní n'diichi ní? ¿'Áá 'áámá saⁿā chí cánuⁿ sa catecái n'dai sa? Cuin'diichí ní. 'Iiⁿyāⁿ chí snúuⁿ yā catecai n'dai yā snee yā ná va'ai yeⁿe rey. ⁹ Tuu'mi ní ¿d'ē cheⁿé ní n'diichi ní? ¿'Áá 'aama profeta chí ngaⁿa nduudu cuaacu yeⁿe Ndyuūs? 'Tíicā nduudu cuaacu. Ní 'úú ní ngaⁿá ngii ndís'tií 'tíicā. Cheⁿé ní n'diichi ní 'áámá 'iiⁿyāⁿ chí ch'ete ca yā chí cuuvi profeta. ¹⁰ Chuú cánéé nguūⁿ yeⁿe Juan miiⁿ náⁿ libro yeⁿé Ndyuūs ndii cuááⁿ vmnaaⁿ: Cuin'diichí ní. 'Úú ní dichó'o 'áámá saⁿā chí caaⁿmaⁿ sa nduudu cuaacu yeⁿé nanááⁿ di. Saⁿā miiⁿ ní nuūⁿnūⁿ cuaacú sa yúúⁿi cááavā di.

¹¹ Cuaacu níⁿnyúⁿ ngaⁿá ngií ndís'tií: Nguááⁿ nducyaaca 'iiⁿyāⁿ chí n'giindiyáaⁿ yā yeⁿe n'daataá nguéé

taama yā chi ch'ēete ca yā ti Juan miiⁿ chí chēédínūⁿniⁿ sa. Naati 'iiⁿyāⁿ chi ndiicuúⁿ ca yā naachi Ndyuūs ngaⁿa ntiiⁿnyuⁿ yā ní ch'ēete ca yā nguéé ti Juan miiⁿ.

¹²Caati ndí tiempo chi ch'iindiyaāⁿ Juan chi chēédínūⁿniⁿ sa ndí maaⁿ yeⁿe naachi Ndyuūs ngaⁿa ntiiⁿnyuⁿ yā ndúúcuⁿ 'iiⁿyāⁿ chí yeⁿé Ndyuūs ní n'geenu cá yā ngii. Ní 'iiⁿyāⁿ chí nguⁿu yā contra yeⁿe Ndyuūs neⁿe yā caaⁿmaⁿ ntiiⁿnyúⁿ yā yeⁿe naachi Ndyuūs ngaⁿa ntiiⁿnyúⁿ yā. ¹³Ní nducyaaca 'iiⁿyāⁿ profetas ndúúcuⁿ ley yeⁿe Moisés ngaⁿa nduudu cuaacu yeⁿé naachi Ndyuūs ngaⁿa ntiiⁿnyuⁿ yā ndí tiempo chi ndaā Juan miiⁿ ná iⁿyeedí 'cūū. ¹⁴Ndúúti chí ndís'tiī neⁿe nī 'caandiveeⁿ nī nduudu yeⁿe profetas ndúúcuⁿ nduudu yeⁿe ley miiⁿ, tuu'mi ní cadínuuⁿ nī chí Juan miiⁿ ní saⁿá chí profeta Elías dinguuⁿ yā chí canéé chí ndaa sa. ¹⁵Ndís'tiī chí véé veéⁿ nī 'caandiveeⁿ nī yeⁿé.

¹⁶¿De'é tan'dúúca 'iiⁿyāⁿ chí snéé yā na iⁿyeedí 'cūū maaⁿ? 'Iiⁿyāⁿ s'eeⁿ tan'dúúca saⁿá n'gaiyāá chí n'geēte niⁿvēé ní duūchi sa ní n'gai sa compañeros yeⁿe sa. ¹⁷Ní ngaⁿa sa: 'Tiiví 'nū flauta cáávā baile naati nguéé inde'í nī. Ní chiita 'nū canción chí ndaachí tan'dúúca canciones cáávā tináⁿā naati nguéé chēēcu nī. ¹⁸Juan chí chēédínūⁿniⁿ sa ndaā sa. Nguéé che'e sa pan, nguéé chí sa vino ní ndís'tiī ngaⁿá nī chí saⁿá miiⁿ ní canee sa ndúúcu espíritu yeⁿe yáá'n'guinūⁿ. ¹⁹Úú ní ndaá, 'úú chí Saⁿá chí Daiyá Ndyuūs 'úú. Ní nge'é ní ngí'í. Tuu'mi ní ndís'tiī ngaⁿa nī yeⁿé: Cuiⁿdí'í nī. 'Áamá saⁿá chí n'deēe n'dái nge'e sa ní ngí'í taavi sá vino. Ní ngaⁿá nī chí 'úú ní saⁿá chí n'dai ndúúcu 'iiⁿyāⁿ publicanos chí cobradores chí inn'guēe yā yeⁿe yáⁿāa ndúúcu 'iiⁿyāⁿ chí dinuuⁿndi yā. Nducyaaca 'iiⁿyāⁿ deenu yā chí

vaadí deenu miiⁿ ní yeⁿé Ndyuūs. Ní 'iiⁿyāⁿ chí'í yā vaadí deenu miiⁿ cáávā dendu'ū chí n'daāca chí dí'í yā ti yeⁿé Ndyuūs 'iiⁿyāⁿ.

**De'e chúúca ya'ái 'iiⁿyāⁿ yeⁿe yááⁿ
naachi nguéé indaacadaamí
yā yeⁿe nuuⁿndi yeⁿé yā**

(Lc. 10.13-15)

²⁰Jesús tucá'a yā dí'í yā regañar 'iiⁿyāⁿ s'eeⁿ na yááⁿ s'eeⁿ naachi dí'í yā néené n'deēe vaadí n'giinu ti 'iiⁿyāⁿ yeⁿe yááⁿ miiⁿ 'āā cuéé ndaacadaamí yā yeⁿe núú'ndi yeⁿe yā. Ní ngaⁿa yā 'tí'íca: ²¹De'ē chúúca ya'ái yeⁿé ndís'tiī 'iiⁿyāⁿ yeⁿe yááⁿ Corazín. De'ē chúúca ya'ái yeⁿe ndís'tiī 'iiⁿyāⁿ yeⁿe yááⁿ Bet-saida ti ndúúti chí chí vaadí n'giinu na yááⁿ Tiro ndúúcu yááⁿ Sidón tan'dúúca chí chí nguaaⁿ ndís'tiī, tuu'mi ní 'iiⁿyāⁿ yeⁿe yáⁿāa s'eeⁿ 'āā 'naaⁿ tiempo ndaacadaamí yā yeⁿe nuuⁿndi yeⁿé yā. Ní chí'í yā 'iiⁿyāⁿ tan'dúúca costumbre yeⁿé yā chí neené ya'ai yā. Ní ch'ēetinúⁿ yā catecaí yā yeⁿe chí dí'ínūⁿ ní ch'ēeté yā nguaaⁿ yaiyáá. ²²Úú ngaⁿá ngí ndís'tiī ti nguuvi chí Ndyuūs caaⁿmáⁿ yā nuuⁿndi yeⁿé 'iiⁿyāⁿ nguéé ya'ái ca 'cuenú yā cuuvi 'iiⁿyāⁿ yeⁿe yáⁿāa Tiro ndúúcu 'iiⁿyāⁿ yeⁿe yáⁿāa Sidón nguéé ti ndís'tiī. ²³Ndís'tiī 'iiⁿyāⁿ yeⁿe yááⁿ Capernaum, ¿'áá cuuvi caⁿá nī na va'ai chēeti nguuvi? Nguéé cuuvi. Caⁿá nī infierno ti nguéé i'téenu nī nduudu cuaacu yeⁿé ndúúcu vaadí n'giinu chí dí'í Ndyuūs. Ndúúti chí chí vaadí n'giinu na yááⁿ Sodoma tan'dúúca chí chí nguaaⁿ ndís'tiī tuu'mi ní 'iiⁿyāⁿ yeⁿe yááⁿ 'cūū 'āā i'téenu yā. Ní yááⁿ 'cūū 'āā canéé ndí maaⁿ. ²⁴Úú ngaⁿá ngí ndís'tiī ti nguuvi chí Ndyuūs caaⁿmáⁿ yā nuuⁿndi yeⁿe 'iiⁿyāⁿ nguéé ya'ái ca 'cuenú yā cuuvi 'iiⁿyāⁿ yeⁿe yáⁿāa Sodoma nguéé ti ndís'tiī.

**Cuchíí nī nanaaⁿ 'úú
ní ntaavi'tuunúúⁿ nī**

(Lc. 10.21-22)

²⁵Ní tiempo miiⁿ ní Jesús nan'guεεcútaⁿa yā yeⁿe yā ní caⁿa yā: N'dií Chiidá chí 'iiví nī yeⁿe va'ai cheεti nguuví ndúúcu yáⁿāa 'cúú, 'úú ca'á gracias n'dií caati snuuⁿ n'dé'ei nī nduudu 'cúú yeⁿe 'iiⁿyāⁿ chí déénu ca yā ndúúcu 'iiⁿyāⁿ chí n'dee n'dái tuumicádínuuⁿ yā, ní ca'a nī chí cadfínuuⁿ 'iiⁿyāⁿ chí ndiicúuⁿ yā chí nguéé n'deee cá déénu yā. ²⁶T'ífcā dífⁿ nī Chiidá ti 'tífcā neⁿe nī chí n'daācā diiⁿ nī ti n'daācā.

²⁷Ní Jesús caⁿa yā chíi yā discípulos yeⁿe yā: Chiidá ní teé yā 'úú tanducueⁿe dendu'ū. Mar 'áámá 'iiⁿyāⁿ nguéé deenu yā táácā 'áámá n'dyáⁿā Daiya Dendyuūs, dámaāⁿ Chiidá yā. Mar 'áámá 'iiⁿyāⁿ nguéé deenu yā táácā Dendyuūs Chiida yú, dámaāⁿ 'áámá n'dyáⁿā Daiyá yā ndúúcu 'āā du'ú nūⁿ 'iiⁿyāⁿ chí Daiyá Ndyuūs neⁿe yā 'cuuⁿmiⁿ yā Chiida yā. ²⁸Cuchíí nī nanaaⁿ 'úú, ndís'tií, chí véé n'deēe n'dái cuidado yēⁿe nī chí tan'dúúcā 'áámá carga yeⁿe nī ní 'úú ní dífⁿ chí ntaavi'tuunúúⁿ nī. ²⁹Ní dífⁿ nī tan'dúúcā chí can'déε nī yugo yeⁿe chí 't'ífcā. 'Cueeⁿ nī yeⁿe 'úú caati 'úú ní ndiicúúⁿ 'úú ní nééné n'dai staava yeⁿe, tuuⁿmi ní ndaācā nī vaadi ntaavi'tuunúúⁿ yeⁿe alma yeⁿe nī. ³⁰Caati yugo yeⁿe chí teé ndís'tií nguéé ngiⁿií. Candéε nī cheεdí yeⁿe ní nguéé cuuví n'gii yeⁿe nī.

**Discípulos yeⁿe Jesús sta'á
yā trigo nguuví chí
ntaavi'tuunúúⁿ 'iiⁿyāⁿ Israel**

(Mr. 2.23-28; Lc. 6.1-5)

12 'Áámá nguuví sábado chí ntaavi'tuunúúⁿ 'iiⁿyāⁿ Israel, Jesús cueⁿe yā ndúúcu discípulos yeⁿe yā cuaaⁿ naachí 'iiⁿyāⁿ 'āā ndííⁿ ntiíⁿnyúⁿ yā ní mííⁿ ní véé trigo.

Discípulos yeⁿe Jesús miiⁿ chíi cuiicú yā ní sta'á yā trigo ní che'e yā. ²'Iiⁿyāⁿ fariseos n'diichí yā chuū, ní caⁿa yā chíi yā Jesús miiⁿ: Cuin'diichí nī, discípulos yeⁿe nī ní nguéé dífⁿ yā tan'dúúcā chí ngaⁿa ley yeⁿe nguuví chí ntaavi'tuunúúⁿ 'iiⁿyāⁿ.

³Jesús caⁿa yā chíi yā 'iiⁿyāⁿ s'eeⁿ: ¿'Áá nguéé n'geeⁿ nī táácā diiⁿ David miiⁿ ndúúcu 'iiⁿyāⁿ chí cueⁿe ndúúcu sa taachí chíi cuiicú yā? ⁴David miiⁿ sndáa yā ná yáacū yeⁿe Ndyuūs ní sta'á yā pan chí canéé na mesa yeⁿe nátaí. Ní che'é yā ní ca'a yā chí che'e 'iiⁿyāⁿ chí nduucú yā. Pan miiⁿ dámaāⁿ chiduuⁿ s'eeⁿ cuuví che'é yā. Ní tan'dúúcā chí ngaⁿa na ley miiⁿ nguéé canéé chí che'e rey David ní nguéé cánéé chí che'é 'iiⁿyāⁿ chí ndúúcu yā. ⁵¿'Áá nguéé n'geeⁿ ndís'tií na ley yeⁿe Moisés chí diiⁿ chííduú s'eeⁿ? Nguéé ntaavi'tuunúúⁿ yā yeⁿe ntiíⁿnyuⁿ yeⁿe yaacū tínūⁿ nguuví chí ntaavi'tuunúúⁿ 'iiⁿyāⁿ. Chiidu s'eeⁿ nguéé dífⁿ yā tan'dúúcā chí ngaⁿa ley yeⁿe Moisés ní nguéé nuuⁿndi yeⁿe yā. ⁶'Úú ngaⁿá ngii ndís'tií chí véé 'áámá 'iiⁿyāⁿ chí ch'εεte ca yā chí yaacū templo ní canee yā ndúúcu ndís'tií. ⁷Ndís'tií nguéé déénu nī de'ε chí neⁿe caaⁿmaⁿ chí canéé nguūⁿ na libro yeⁿe Ndyuūs yeⁿe chuū: Neⁿe chí 'iiⁿyāⁿ ya'āi 'iinú yā 'iiⁿyāⁿ caavā 'úú. Nguéé neⁿe chí caaⁿnuⁿ yā 'iiti ní téε yā 'iiti caavā ofrenda yeⁿe 'úú. Nduuti chí cadfínuuⁿ nī tuuⁿmi ní nguéé dífⁿ nī condenar 'iiⁿyāⁿ chí nguéé nuuⁿndi yeⁿe yā. ⁸T'ífcā Saⁿā chí Daiyá Dendyuūs miiⁿ véé ntúúⁿ poder yeⁿe sa yeⁿe nguuví chí ntaavi'tuunúúⁿ 'iiⁿyāⁿ.

Saⁿā chí ntí'i ta'ā sa

(Mr. 3.1-6; Lc. 6.6-11)

⁹Cuayiivi ní Jesús cheⁿe yā na yáacū sinagoga yeⁿe 'iiⁿyāⁿ yeⁿe yaāⁿ miiⁿ. ¹⁰Cuin'diichí nī. Miiⁿ ní canéé 'áámá saⁿā chí ntí'i ta'ā sa. Snéé 'iiⁿyāⁿ miiⁿ chí tiinguunéε yā Jesús miiⁿ ní caⁿa yā:

¿'Áá canéé na ley yeⁿe yú chí nduuvā yeⁿé 'iiⁿyāⁿ nguuvī chí ntaavi'tuunúúⁿ 'iiⁿyāⁿ? Chuū ní caⁿa yā ti neⁿé yā cuuvi caaⁿmaⁿ yā núúⁿndí yeⁿe Jesús miiⁿ.

¹¹ Jesús caⁿa yā chíi yā 'iiⁿyāⁿ s'eeⁿ:

¿Dú'u 'aama saⁿā nguaaⁿ ndíⁿtī chí vée 'áámá 'iiti cuūchī yeⁿé sa? Ní ndúúti chí cun'daa núúⁿ ti na 'áámá yīvi yáⁿāa nguuvī chí ntaavi'tuunúúⁿ 'iiⁿyāⁿ, ¿'áá nguéeé ntuun'dáa sa 'iiti nguuvī miiⁿ? ¹² ¿'Áá nguéeé yaⁿai ca chíiⁿvē 'áámá 'iiⁿyāⁿ nguéeé ti 'áámá 'iiti cuūchī? 'Tífcā diiⁿ yú chí n'daācā nguuvī chí ntaavi'tuunúúⁿ 'iiⁿyāⁿ.

¹³ Tuu'mi ní Jesús caⁿa yā chíi yā saⁿā chí yaⁿāi yeⁿé sa: N'doo dí ta'a dí. Saⁿā miiⁿ ní n'doō sá ta'ā sa ní ta'ā sa nduūvi n'dáácā tan'dúúccā taama.

¹⁴ 'iiⁿyāⁿ fariseos nan'dáa yā chēeti yaācū ní nduuvidaamā yā chí caⁿa yā contra yeⁿe Jesús miiⁿ ti neⁿé yā 'caaⁿnúⁿ yā 'iiⁿyāⁿ.

'Áámá nduudu chí caaⁿmaⁿ yeⁿe Jesús

¹⁵ Taachí Jesús chicadínuuⁿ yā chuū nan'daa yā miiⁿ. Neené 'yaaⁿ 'iiⁿyāⁿ cueⁿe yā ndúúccū Jesús miiⁿ ní Jesús miiⁿ idiⁿ yā chí nduūvā yeⁿe nducyáácá 'iiⁿyāⁿ. ¹⁶ Ní caⁿa yā chíi yā 'iiⁿyāⁿ s'eeⁿ chí nguéeé caaⁿmaⁿ yā cuuví yā tanáⁿā 'iiⁿyāⁿ du'u yā. ¹⁷ Ní 'iicu cuaacu chí profeta Isaías miiⁿ caⁿa yā ndii cuááⁿ vmaⁿaaⁿ taachí dinguuⁿ yā 'tífcā. Ndyuūs ngaⁿa yā:

¹⁸ Sáⁿa 'cūū ni idichíⁿvē 'úú. 'Úú chín-deēvē saⁿá 'cūū chí neⁿé ní neene yeenú ndúúcu sa. 'Úú ní cuⁿheéⁿ Espíritu N'dai yeⁿé vmaⁿááⁿ yeⁿe sa. Saⁿá 'cūū caaⁿmaⁿ sa yeⁿe ley yeⁿé nanááⁿ nducyáácá naciónes na iⁿyeeⁿdí 'cūū.

¹⁹ Nguéeé 'cuuⁿmaⁿ sa ndíi nguéeé ndúú 'cuāi ra sa. Mar 'áámá 'iiⁿyāⁿ na yúúni nguéeé 'caandiveéⁿ yā nduudú

yeⁿe sa ti nguéeé caaⁿmaⁿ yúúdu sa cuaaⁿ na yúúni.

²⁰ Saⁿá 'cūū nginee sa 'iiⁿyāⁿ chí vée ca cuidados yeⁿe yā, 'iiⁿyāⁿ chí tan'dúúccā 'áámá taaⁿ ndúú chí 'aa ndeētúú 'tee 'téé, 'tiicá yā. Ndíi nguéeé ndúú chí ntuūvi sa 'aama mecha yeⁿe quinque chí ican'dáa ca 'yaaⁿmíⁿ yeⁿe. Ndíi nguéeé candée sa nduudu cuaacu yeⁿé Ndyuūs ndii taachi a fuerza 'āa cuéeé de'ē vee chí cuchee sa ndúúccū vaadi cuaacu miiⁿ yeⁿe tanducuéⁿē.

²¹ Ní 'ífcū nducyáácá 'iiⁿyāⁿ yeⁿe naciónes yeⁿe iⁿyeeⁿdí 'cūū cūnee ngíúnyā yeⁿe saⁿá 'cūū chí cu'téenu yā yeⁿe sa.

'Iiⁿyāⁿ ngaⁿa yā chí Jesús vée poder yeⁿe yááⁿ'guiinūⁿ ndúúcu yā

(Mr. 3.19-30; Lc. 11.14-23; 12.10)

²² Tuu'mi ní 'iiⁿyāⁿ ndaa yā nanááⁿ Jesús ní ndéé yā 'áámá saⁿā chí canee sa ndúúccū espíritu yeⁿe yááⁿ'guiinūⁿ yeⁿé chí ngeenaáⁿ sa ndúúccū chí nguéeé ngii ngaⁿa sa. Jesús miiⁿ diiⁿ yā chí nduūvā yeⁿé sa. Ní saⁿā chí ngeenaáⁿ miiⁿ ní inaaⁿ sa ní ngí ngaⁿā sa. ²³ Nducyaaca 'iiⁿyāⁿ ngeⁿe yiinú yā ní ngaⁿa yā: ¿'Áá sáⁿa 'cūū Daiya 'iiⁿyāⁿ chí ndaataá yeⁿé David?

²⁴ Ní taachi 'iiⁿyāⁿ fariseos ch'iindiveéⁿ yā chuū ní caⁿa yā: Sáⁿa 'cūū nitun'dáa sa espíritu yeⁿe yááⁿ'guiinūⁿ cáávā Beelzebú, chí Satanás chí ngaⁿā ntiⁿnyuⁿ sa yeⁿe espíritus yeⁿe yááⁿ'guiinūⁿ.

²⁵ Jesús miiⁿ déenu yā chí nada-cadínūⁿ 'iiⁿyāⁿ s'eeⁿ ní caⁿa yā chíi yā 'iiⁿyāⁿ s'eeⁿ: 'Áámá gobierno chí ngaⁿa ntiⁿnyúⁿ yā yeⁿe yáⁿāa chí vée 'uūvi partido yā chí nguⁿu yā 'áámá yā ndúúccū taama yā, tuu'mi ní nguēe cuuvi 'naaⁿ chí 'iiⁿntyéⁿe yā. Ní nducuéⁿē yáⁿāa o va'ai naachi 'iiⁿyāⁿ vée 'uūvi vaanicadínūⁿ yeⁿe yā nguéeé cu-

uvi nduuvidaamá yā. ²⁶ Tiicá ntúūⁿ nduuti chí yááⁿnguiniūⁿ tun'dáa sa espíritus yeⁿe yááⁿnguiniūⁿ véé 'uūví vaanicádiiniūⁿ yeⁿe sa ní cuáácú chí nguⁿu sa yeⁿe maaⁿ sa ní véé 'uūví partido yeⁿe sa ní 'cuiinu sa. ²⁷ Ndís'tii ní ngaⁿa nī chí 'úú itun'daá espíritu yeⁿe yááⁿnguiniūⁿ yeⁿe 'iiⁿyāⁿ ndúúcu poder yeⁿe Beelzebú chí Satanás chí ngaⁿa ntiiⁿnyuⁿ sa yeⁿe espíritus yeⁿe yááⁿnguiniūⁿ. Ndúúti chí 'tífca tuuⁿmi ní, ¿ndúúcu duⁿú rá poder yeⁿe tun'daá 'iiⁿyāⁿ chí ndúúcu nī espíritu yeⁿe yááⁿnguiniūⁿ? Chífⁿ chí diiⁿ 'iiⁿyāⁿ chí ndúúcu nī n'giⁿi yā chí nguéé 'tífca chí ngaⁿá nī. ²⁸ Ndúúti chí 'úú itun'daá espíritus yeⁿe yááⁿnguiniūⁿ cáávā poder yeⁿe Espíritu N'dai yeⁿe Dendyuūs, cuaacu níⁿnyúⁿ naachí Ndyuūs ngaⁿa ntiiⁿnyúⁿ yā ndaā nanááⁿ ndis'tii.

²⁹ Mar 'áámá 'iiⁿyāⁿ nguée cuuví cundaa yā va'ai yeⁿe 'aama saⁿā chí véé fuerzas yeⁿe sa ní divíi yā chí veé yeⁿe sa. ¿Canéé chí cachiichí yā saⁿa vmnááⁿ vmnaaⁿ? Cuayivi ní cuuví díⁿ yā tun'dáa yā denduⁿú chí snúūⁿ va'ai yeⁿe sa.

³⁰ 'iiⁿyāⁿ chí nguéé canéé yā lado yeⁿé, 'iiⁿyāⁿ miiⁿ canéé yā contra yeⁿé. 'iiⁿyāⁿ chí nguéé dáámá díⁿ yā cosechar nduucú, tuuⁿmi ní díⁿ yā tan'dúúca chí ingée tanducueⁿé cosecha.

³¹ Chífⁿ chí nduudu cuaacu chí 'úú ngaⁿá ngíi ndís'tii: Tanducueⁿé nuuⁿndi chí díⁿ 'iiⁿyāⁿ ndúúcu nduudu taaⁿ chí nguéé n'dáacā chí ngaⁿa yā contra yeⁿe Ndyuūs, Ndyuūs nadach'ēecū yā yeⁿe yā. Naati 'iiⁿyāⁿ chí ngaⁿa yā nduudu taaⁿ chí nguéé n'dáacā chí contra yeⁿe Espíritu N'dai yeⁿe Ndyuūs ní nguéé nch'ēecū yēⁿe yā maaⁿ ní tiempo chí cuchii. ³² 'Áā duⁿú nūūⁿ chí caaⁿmaⁿ nduudu chí nguéé n'dáacā contra yeⁿe Saⁿā chí Daiyá Ndyuūs ní cuuvi nach'ēecu yeⁿe yā. Naati 'iiⁿyāⁿ chí nguéé n'daācā ngaⁿa yā contra yeⁿe Espíritu N'dai yeⁿe

Ndyuūs ní nguéé cuuvi nach'ēecū yeⁿe yā ndíi nguéé ndúú na iⁿ'yeeⁿdí 'cūū ndíi nguéé ndúú táámá iⁿ'yeeⁿdi chí cuchii.

**'Áámá yáⁿá ní ngiⁿi
cucáávā n'guiⁿi yeⁿe**

(Lc. 6.43-45)

³³ Tiicá ntúūⁿ caⁿa Jesús: Ndúúti chí véé 'áámá yáⁿá chí n'dáacā yeⁿé nī tuuⁿmi ní cuuvi n'guiⁿi n'dáacā yeⁿé. Nífcú ndúúti chí véé 'áámá yáⁿá chí nguéé n'daācā yeⁿé nī nguée n'dáacā cuuvi n'guiⁿi yeⁿé. Cáávā n'guiⁿi yeⁿe yáⁿá ituumicadínuuⁿ yā táacā yáⁿá nduuti chí n'dai o nduuti chí nguéé n'dai. ³⁴ Ndís'tii, tan'dúúca ndaata yeⁿe cúú 'tiicá nī. ¿Táacā ngaⁿa nī cosas chí n'daācā ní idíⁿ nī chí nguée n'daācā? Ti chíⁿ chí ngaⁿa nī ndúúcu cheendí nī ngiica na staava yeⁿé nī. ³⁵ Saⁿā chí n'dái idiiⁿ sa dendúⁿú chí n'daācā chí nadacadínuuⁿ sa na staava yeⁿe sa chí n'daācā. Saⁿa chí cunncáā idiiⁿ sa tanducueⁿé chí nguée n'daācā nadacadínuuⁿ sa caati staava yeⁿe sa nguéé n'dáacā. Nduudu chí ngaⁿā sa ngiica sa yeⁿe chí ndiituú na staava yeⁿe sa. ³⁶ Naati 'úú ní ngaⁿá ngíi ndís'tii: Nducueⁿé nduudu chí nguéé deⁿé veé chíⁿvé chí 'iiⁿyāⁿ ngaⁿa yā, nducyááca yā ní cánéé chí ncaⁿá yā cuenta yeⁿe nduudu chí nguée n'daācā chí caⁿa yā nguuvi chí Ndyuūs caaⁿmaⁿ yā yeⁿe nuuⁿndi yeⁿe yā. ³⁷ Ti cáávā nduudu yeⁿe nī chí n'daācā nduuví n'dai nī ní 'iicu cáávā nduudu yeⁿé nī nduuti chí nguéé n'dáacā cuuví nī castigo.

**'iiⁿyāⁿ chí nguéé n'daācā néⁿe
yā snaaⁿ yā señales**

(Mr. 8.12; Lc. 11.29-32)

³⁸ Tuuⁿmi ní n'duuvi maestros yeⁿe ley ndúúcu n'duuvi saⁿā fariseos ngaⁿa sa ngii sa Jesús miiⁿ ní caⁿa sa: N'díi maestro, néⁿe 'nū snaaⁿ 'nū 'áámá señal chí díⁿ nī.

³⁹ Jesús nán'guēcúta^a yā yeⁿe saⁿā s'eeⁿ ní caⁿa yā: 'Iiⁿyāⁿ cunnccāā ndúúccū 'iiⁿyāⁿ chi nguéé i'téenu yā Ndyuūs neⁿe yā snaaⁿ yā señaal naati señaal nguéé snaaⁿ yā. Dámaaⁿ snaaⁿ yā señaal yeⁿe profeta Jonás chi ndíí cuaaⁿ vmnaaⁿ canee nguūⁿ na libro yeⁿe Ndyuūs. ⁴⁰ Ti tan'dúúccā Jonás canúúⁿ sá chēeti 'yaācā ch'ēete 'iinū nguuvi 'iinū n'gaaⁿ 'tííccā canee chí cūnee Saⁿā chi Daiyá Ndyuūs mááⁿ yáⁿāa 'cúū 'iinū nguuvi 'iinū n'gaaⁿ. ⁴¹ Na nguuvi yeⁿe juicio 'iiⁿyāⁿ chí ch'ēetinēe yā na yááⁿ chi nguuvi Nínive nducueeⁿ yā contra yeⁿe 'iiⁿyāⁿ chí snéé maaⁿnguuvu taachí Ndyuūs caaⁿmáⁿ yā yeⁿe nuⁿndi yeⁿe 'iiⁿyāⁿ, ní cuuví yā condeñado. 'Tííccā tí 'iiⁿyāⁿ yeⁿe yááⁿ Nínive ní ndaacadaamí yā taachi profeta Jonás miiⁿ ndii cuááⁿ vmnaaⁿ caⁿa sá nduudu cuaacu yeⁿe Ndyuūs. Cuin'diichí nī 'áámá saⁿā chí ch'ēete ca nguéé tí profeta Jonás miiⁿ canee sa 'muuⁿ na lugar 'cūū. ⁴² 'Tiicá ntúūⁿ nguuvi yeⁿe juicio n'daataá reina chí tiempo chí chó'oo ngaⁿā ntiⁿnyuⁿ tá yeⁿe lado yeⁿe Sur caⁿa tá nducueeⁿ tá contra yeⁿe 'iiⁿyāⁿ chí snéé yā maaⁿnguuvu taachi Ndyuūs caaⁿmáⁿ yā nuⁿndi yeⁿe 'iiⁿyāⁿ. Ní táⁿā miiⁿ ní diiⁿ tá condenar 'iiⁿyāⁿ chí snéé yā maaⁿnguuvu ti táⁿā miiⁿ ndaā tá ndíí na yaⁿai taavi yeⁿe yáⁿā. Ní ngiica tá ní ch'iindiveeⁿ tá yeⁿe vaadi deenu yeⁿe rey Salomón. Cuin'dííchí nī 'áámá saⁿā chí ch'ēete ca vaadi deenu yeⁿe sa canee sa 'muuⁿ nguéé ti Salomón miiⁿ.

**Espíritu yeⁿe yááⁿn'guiniūⁿ
chí nanguēcunee na saⁿā**

(Lc. 11.24-26)

⁴³ Caⁿa Jesús: Taachí espíritu yeⁿe yááⁿn'guiniūⁿ nacan'daa na 'áámá saⁿā cachiica na yáⁿāa cuūⁿmáⁿ naachi nguēe ch'ēetinēe 'iiⁿyāⁿ ní n'nuūⁿ naachi cuuvi ntaavi'tuunúⁿ ní nguéé ndaācā. ⁴⁴ Tuuⁿmi ní espíritu yeⁿe yááⁿn'guiniūⁿ ngaⁿa: Nanguēcuneeé na vaacú naachi

chiicá. Taachí nguēecūnee ní ndaā na vaacu miiⁿ ndaācā saⁿa miiⁿ ní tan'dúúccā 'aama va'āi chí n'dai ní nduuvu dēevé ndúúccū nducueeⁿ na lugar yeⁿe. ⁴⁵ Tuuⁿmi ní espíritu miiⁿ cueⁿe ní in'nuuⁿ tá ná ndēēchē espíritu chí cunnccāā ca chí cuuví maāⁿ. Ní ndaā espíritu miiⁿ ndúúccū ndēēchē espíritu ní ch'ēetinēe na saⁿā miiⁿ. Cuayiivi ní n'geenu sa ngii taavi ca ní cunnccāā ca canee sa nguéé ti vmnaaⁿ. 'Tiicá ntúūⁿ 'cuenú yā cuuvi 'iiⁿyāⁿ chí snéé yā maaⁿ ti nguēe n'dáacā idifⁿ yā.

Chēcú Jesús miiⁿ ndúúccū 'dífínu yā

(Mr. 3.31-35; Lc. 8.19-21)

⁴⁶ Taachí Jesús miiⁿ índee yā ndúúccū 'iiⁿyāⁿ, tuuⁿmi ní ndaā niiⁿnuúⁿ chēcú yā ndúúccū 'dífínu yā ní snéé yā chuva'āi. Ní neⁿe yā ndee yā ndúúccū Jesús miiⁿ. ⁴⁷ 'Áámá 'iiⁿyāⁿ caⁿa yā chii yā Jesús miiⁿ: N'dií Jesús, cuin'dííchí nī. Chēcú nī ndúúccū 'dífínu nī snéé yā chuva'āi ní neⁿe yā ndee yā ndúúccū nī.

⁴⁸ Jesús nan'guēcúta^a yā ní caⁿa yā chí yā saⁿa miiⁿ: ¿Dú'ū chí chēcú miiⁿ? o ¿dú'ū chí 'diinú miiⁿ?

⁴⁹ Ní n'doó yā ta'á yā naachi snéé discípulos ní caⁿa yā: Cuin'diichí nī, 'iiⁿyāⁿ s'ūuⁿ ní tan'dúúccā chí chēcú ndúúccū 'diinú, 'tííca yā. ⁵⁰ Tí 'āā du'ú nuūⁿ 'iiⁿyāⁿ chí dííⁿ yā tan'dúúccā chí neⁿe Chiidá chí canee yā ná va'ai chēeti nguuvi tuuⁿmi ní 'iiⁿyāⁿ s'eeⁿ chí 'diinú ndúúccū víí ndúúccū chēcú.

**'Áámá ejemplo yeⁿe
sáⁿā chí ngiiniū ndaata**

(Mr. 4.1-9; Lc. 8.4-8)

13 Nguuvi miiⁿ Jesús can'daa yā va'āi miiⁿ ní ch'iindi yā niiⁿnuúⁿ ná nuūⁿníⁿyáⁿā. ² Ní néené n'deēe 'iiⁿyāⁿ ndúúvidaamá yā naachi canee Jesús. Tuuⁿmi ní Jesús ndaa yā na 'áámá barco ní ch'iindi yā. Nducyáacá 'iiⁿyāⁿ snéé yā 'diituu núuⁿníⁿ naachi vee yáⁿā

ndúútii. ³ Ní Jesús ca" a yā nééné n'deēe náá" ndúúcū paráblas chí ejemplos tan'dúúcā dendu'ū chí véé i"yee"dí 'cūū. Ní ca" a yā chuū: 'Áámá sa"ā chí ngiinū ndaata can'dáa sa chíinū sa ndaata. ⁴ Taachí chíinū sa, 'áámá duutu ndaata mii" ní chíiya cyúúní. Ndaā 'yaadá ní chíiinu che'e tí. ⁵ Ná"ā duutu ndaata mii" ní chíiya na tuūu naachi nguéeé ch'ete yá"āa. Maa"ncheeté nūu" can'dáa tí nguéeé ch'ete yá"āa ye"ē. ⁶ Can'dáa 'yá"ā ní yaata mii" ní tí'í tí nguéeé dii'yu ye"ē. ⁷ 'Iicu ná"ā duutu ndaata mii" ní chíiya nguaa" yáá". Yáá" mii" ní chíita ní dí'vaachí ye"ē yaata mii". ⁸ 'Iicu ná"ā duutu ndaata mii" ní chíiya na yá"āa n'dáacā ní n'dáacā chíi cosecha ye"ē. 'Áámá ní chíi 'áámá ciento ye"ē, taama ní chíi 'iinū ngeecu ye"ē, ní táámá ní chíi ndífcú ndiichi ye"ē. ⁹ 'Ii"yā" chí véé veé" yā ní 'caandiveé" yā nduudu ye"é.

Chí" chí ne"ē ca"mā" ejemplo mii"

(Mr. 4.10-20; Lc. 8.9-15)

¹⁰ Tuu'mi ní discípulos ndaá yā nanáá" Jesús mii" ní ca" a yā chíi yā Jesús: ¿De'e cáávā chí ndúúcū ejemplos ngi'cuee" ní 'ii"yā"?

¹¹ Jesús nan'gueecúta" a yā ní ca" a yā chíi yā discípulos ye"e yā: 'Áā ndís'tíí nūu" ndaācā chicadínuu" ní dendu'ū chí canúú" n'de'ei ye"e naachí Ndyuūs nga" a ntii"nyú" yā ná va'ai cheeti ngu-uví, naatí taná"ā 'ii"yā" s'ee" nguéeé canéé chí cadínuu" yā. ¹² 'Ii"yā" chí véé ye"e yā Ndyuūs ca' a cá yā ní n'deēe cá cuuvi ye"e yā. 'Ii"yā" chí nguéeé véé ye"e yā, 'áará chí dúú'ví nūu" chí nadacádínuu" yā chí véé ye"e yā chuū ní Ndyuūs ndivíi yā ye"e yā. ¹³ Cáávā chí" chí nga" á ngii' 'ii"yā" ndúúcū ejemplos caati inaa" yā naati n'geetinée yā tan'dúúcā chí nguéeé inaa" yā. Ní n'giindiveé" yā naati n'geetinee yā tan'dúúcā chí nguéeé n'giindiveé" yā ndíí nguéeé ndúú tuumicadiinuu" yā. ¹⁴ Ní

'ífcú cuuvi cuaacu ye"e 'ii"yā" s'ee" chí" chí ca" a profeta Isaías ndii cuáá" vmnaa" taachi ca" a yā 'túúcā ní canéé nguū" na libro ye"e Ndyuūs:

Ndúúcū veé" yā 'caandiveé" yā ní nguēe tuumicadínuu" yā; ní snaa" yā ní nguéeé ca' a yā cuenta ye"ē.

¹⁵ Caati staava ye"e 'ii"yā" s'ee" ní cheechi. Ndúúcū veé" yā n'giindiveé" yā naati nguéeé tuumicadínuu" yā n'daācā. 'Ii"yā" s'ee" ní n'gaadí yā nduutinaa" yā caati nguéeé snaa" yā ndúúcū nduutinaá" yā; ní nguéeé 'caandiveé" yā ndúúcū veé" yā, ndii nguēe ndúú ituumicadiinúú" yā ndúúcū staava ye"é yā, ndii nguéeé ndúú ndaacadaamí yā ye"ē nuu"ndi ye"e yā chí 'úú cuuvi nadich'ēécú nuu"ndi ye"é yā.

¹⁶ De'e chúúcā n'dai ndís'tíi tí véé nduutinaa" ní chí inaa" ní ní veé" ní chí n'giindiveé" ní. ¹⁷ Tí cuaacu ní"nyú" 'úú Jesús nga" á ngii ndís'tíi chí neené 'yaa" 'ii"yā" profetas ndúúcū 'ii"yā" chí n'dai ne"é yā snaa" yā chí" chí ndís'tíi inaa" ní naati nguéeé n'diichi yā. Ne"e yā 'caandiveé" yā chí" chí ndís'tíi n'giindiveé" ní naati nguéeé chíindiveé" yā.

¹⁸ 'Caandivee" ndís'tíi ejemplo ye"e sa"ā chí ngiinū ndaata. ¹⁹ 'Ii"yā" chí n'giindiveé" yā nduudu ye"e naachí Ndyuūs nga" a ntii"nyú" yā ye"ē va'ai cheeti nguuvi ní nguéeé ituumicadínuu" yā, 'ii"yā" s'ee" tan'dúúcā duutu ndaata chí chíiya cuaa" cyúúní. Ndaa yáá"n'guiniūu" ní sta"ā sa nduudu ye"é Ndyuūs chí canéé na staava ye"é yā. ²⁰ Ndaata chí chíiya nguaa" tuūu ní tan'dúúcā 'ii"yā" chí n'giindiveé" yā nduudu ye"é Ndyuūs. Ní taachí n'giindiveé" yā nduudu mii" ní yeenú n'dai yā, ²¹ naati nguéeé 'áámá cānee na staava ye"é yā ní nguéeé 'náá" tiempo cūnee. Taachí n'géenu yā ngii tí 'ii"yā" cán'daa yā 'ii"yā" s'ee" cáávā nduudu

yeⁿé Ndyuūs, tuu'mí nūⁿ divíi yā nduudu miiⁿ ní nguéé canée na staava yeⁿé yā. ²²Ndaata chí chiiya nguaaⁿ yááⁿ ní tan'dúúca 'iiⁿyāⁿ chí ch'iindiveéⁿ yā nduudu miiⁿ naati neⁿe cá yā nducuéⁿé yeⁿé iⁿ'yeeⁿdí cūū ndúúcu chí véé. Ní nginnche'él yā 'iiⁿyāⁿ. Ní vaadi 'cuiica miiⁿ di'vaachíi yeⁿé nduudu miiⁿ ní diiⁿ chí nguéé dichí'vē nduudu miiⁿ na vida yeⁿe 'iiⁿyāⁿ s'eeⁿ. ²³Ndaata chí chiiya na yáⁿáa n'dáacáa chíⁿ chí tan'dúúca 'iiⁿyāⁿ chí n'giindiveéⁿ yā nduudu yeⁿé Ndyuūs ní tuumicadiinúúⁿ yā ní i'téenu yā nduudu miiⁿ. Ní n'daācā idiíⁿ yā. Ní nduudu miiⁿ tan'dúúca chí chíi 'aama ciento yeⁿé o chí chíi 'iinū ngeecu yeⁿé o chí chíi ndiicú ndiichi yeⁿé. 'Tíicā chíi cosecha yeⁿé nduudu miiⁿ.

Ejemplo yeⁿé yaātā chí nguéé n'daācā chí véé nguaaⁿ trigo

²⁴ Jesús miiⁿ ngaⁿa yā ngii yā 'iiⁿyāⁿ s'eeⁿ: Cuuví ndis'tii táamá ejemplo. Ní caaⁿmáⁿ yeⁿe naachí Ndyuūs ngaⁿa nti-iⁿnyúⁿ yā yeⁿé na va'ai cheeti nguuví ní tan'dúúca 'áámá saⁿā chí ngiinū sa ndaata yeⁿe trigo chí n'daācā na campo yeⁿé sa. ²⁵Taachí mozos cyaadu sa, tuu'mi ní saⁿā chí enemigo yeⁿé sa ndaā sa ní chiinū sa 'daaⁿnuⁿ trigo na campo yeⁿe saⁿā miiⁿ nguaaⁿ trigo chí n'daācā miiⁿ, ní cúnaⁿa sa. ²⁶Taachí can'daa yaata yeⁿé ní chíi trigo, tuu'mi ní can'daā nguuví 'daaⁿnuⁿ trigo miiⁿ. ²⁷Tuu'mi ní mozos chí idiíⁿ sa nti-iⁿnyuⁿ na campo miiⁿ ndaa sa nanááⁿ saⁿa chí 'iivi yeⁿe campo miiⁿ ní caⁿa sa chíi sa 'iivi: N'díi Señor, ¿'áá nguéé chiinū ndaata yeⁿe trigo chí n'daācā na campo yeⁿe ní? ¿Tíi chíicā ndaata 'daaⁿnuⁿ trigo? ²⁸Saⁿā 'iivi miiⁿ ní caⁿa sa chíi sa mozos chí idiíⁿ nti-iⁿnyuⁿ: 'Áámá saⁿā enemigo yeⁿé niinū sa. Mozos ní caⁿa sa chíi sa 'iivi sa: ¿'Áá neⁿe ní chí caⁿa 'nū ní tiicu 'nū yaātā miiⁿ chí nguéé n'daācā? ²⁹'Iivi miiⁿ ní

caⁿa sa chíi sa mozos chí idiíⁿ nti-iⁿnyuⁿ: Nguéé tiicū di 'daaⁿnuⁿ trigo miiⁿ caati cuuví tiicú ntúuⁿ di trigo chí n'daācā miiⁿ. ³⁰Ca'a di lugar chí dáámá 'cuiita ndíi taachi ndaa tiempo yeⁿe cosecha miiⁿ, tuu'mi ní 'úu caaⁿmáⁿ cuuví 'iiⁿyāⁿ chí 'caacá yā trigo miiⁿ chí 'caacá yā vmnááⁿ vmnaaⁿ 'daaⁿnuⁿ trigo miiⁿ ní dichichi yā caadi ticuaá ní 'neeⁿ yaⁿa yā. 'Cuiinu maaⁿ ní nandéé yā trigo miiⁿ ní 'cuíi yā cheeti dínnūⁿ.

'Áámá ejemplo yeⁿé ndaata yeⁿé yivē ntí'yā

(Mr. 4.30-32; Lc. 13.18-19)

³¹ Táamá ejemplo Jesús caⁿa yā chíi yā 'iiⁿyāⁿ s'eeⁿ: Naachí Ndyuūs ngaⁿa nti-iⁿnyúⁿ yā na va'ai cheeti nguuví ní tan'dúúca 'aama nduutíi yeⁿe yivē ntí'yā chí 'áámá saⁿā staⁿa sa ní chiinū sa na yáⁿáa yeⁿé sa. ³²Ndaata yivē ntí'yā 'cūū ní 'liiⁿ ca nguéé ti tanducuéⁿé ndaata. Taachí n'giita yaātā miiⁿ, tuu'mi ní ch'ete ca chí cuuvi tanáⁿā yaātā. Ní chíi yáⁿá. Ní ndaa 'yáádá yeⁿé nanguuvi ní din'dái tí 'dece tí na dúuⁿné yáⁿá miiⁿ.

Ejemplo yeⁿe levadura yeⁿe pan

(Lc. 13.20-21)

³³ Táamá ejemplo Jesús caⁿa yā chíi yā 'iiⁿyāⁿ s'eeⁿ: Naachí Ndyuūs ngaⁿa nti-iⁿnyúⁿ yā yeⁿé na va'ai cheeti nguuví ní tan'dúúca 'áámá tááⁿ levadura yeⁿe pan. 'Áámá n'daataá sta'a tá levadura miiⁿ ní chistaⁿā tá nguaaⁿ 'iinū medida yeⁿe harina ndíi chí nan'guiita tanducuéⁿé yāachí yeⁿé.

Chuū chí ngaⁿā Jesús miiⁿ ndúúcu ejemplos

(Mr. 4.33-34)

³⁴ Tanducuéⁿé chuū ngi'cueeⁿ Jesús ní caⁿa yā chíi yā 'iiⁿyāⁿ s'eeⁿ ndúúcu ejemplos. Ní nduuti chí nguéé ndúúcu ejemplos yeⁿe chí véé iⁿ'yeeⁿdí 'cuū, nguéé

ngi'cueeⁿ yā 'iiⁿ'yāⁿ s'eeⁿ. ³⁵ Ní 'iicu cuuvi cuaacu chí caⁿ'a profeta ndii cuááⁿ vmnaaⁿ taachi caⁿ'a yā 'túúcā. Ní canééⁿ nguúⁿ ná libro yeⁿ'é Ndyuūs 'túúcā:

Caaⁿ'māⁿ ndúúcū ejemplos. Ca'cueéⁿ dendu'ū chí canúúⁿ n'de'ei ndíi taachi Ndyuūs din'dái yā iⁿ'yeeⁿdí.

**Jesús ngaⁿ'a yā yeⁿ'e chí neⁿ'e
caaⁿ'māⁿ ejemplo yeⁿ'e trigo**

³⁶ Tuu'mi ní Jesús yaa'vi yā 'iiⁿ'yāⁿ s'eeⁿ chí cunaⁿ'á yā na vaacú yā. Jesús ntúúⁿ cunaⁿ'a yā ní sndaá yā 'áámá va'ai. Discípulos yeⁿ'e yā nndaá yā nanááⁿ Jesús, ní caⁿ'a yā chíi yā 'iiⁿ'yāⁿ: N'díi, Jesús, ca'cuééⁿ ní chí neⁿ'e caāⁿ'maⁿ ejemplo yeⁿ'e 'daaⁿ'nuⁿ trigo chí vééⁿ nguaaⁿ trigo na campo.

³⁷ Jesús nan'güecútaⁿ'a yā ní caⁿ'a yā chíi yā 'iiⁿ'yāⁿ s'eeⁿ: 'Iiⁿ'yāⁿ chí ngiinu ndaata chí trigo chí n'dáacā, 'iiⁿ'yāⁿ miiⁿ chí Saⁿ'ā chí Daiya Ndyuūs.

³⁸ Campo miiⁿ ní tan'dúúcā iⁿ'yeeⁿdí 'cūū. Ndaata chí n'dáacā miiⁿ ní tan'dúúcā nducyáácá 'iiⁿ'yāⁿ chí daiya Ndyuūs ní yeⁿ'e naachi Ndyuūs ngaⁿ'a ntiiⁿ'nyúⁿ yā. Yaātā yeⁿ'e ndaata chí nguééⁿ n'daācā ní tan'dúúcā 'iiⁿ'yāⁿ chí nguééⁿ n'daācā idiíⁿ yā, 'iiⁿ'yāⁿ s'eeⁿ chí daiya yááⁿ'n'guiinūⁿ.

³⁹ Saⁿ'ā chí chíinū sa 'daaⁿ'nuⁿ trigo miiⁿ ní tan'dúúcā maāⁿ yááⁿ'n'guiinūⁿ. Ní cosecha yeⁿ'e miiⁿ ní tan'dúúcā chí 'cuiinu iⁿ'yeeⁿdí. Saⁿ'ā s'eeⁿ chí ita'a sa cosecha miiⁿ ní tan'dúúcā ángeles.

⁴⁰ Tan'dúúcā chí tiícú yā 'daaⁿ'nuⁿ trigo ní nadidáámá yā ní 'neeⁿ yaⁿ'a yā, 'tíicā cuuvi tiempo taachi 'cuiinū iⁿ'yeeⁿdí 'cūū. ⁴¹ Saⁿ'ā chí Daiya Ndyuūs ní dichó'o yā ángeles yeⁿ'e yā chí nadidáámá yā 'iiⁿ'yāⁿ chí yeⁿ'e naachí Ndyuūs ngaⁿ'a ntiiⁿ'nyúⁿ yā. Niicú tun'dáa yā nducyaaca 'iiⁿ'yāⁿ chí dííⁿ yā chí náⁿ'a yā idiíⁿ nuuⁿndí yā ndúúcū 'iiⁿ'yāⁿ chí idiíⁿ chí nguεε n'daācā. ⁴² Ní cu'nuúⁿ yā 'iiⁿ'yāⁿ na nguuchí yaⁿ'ā. Mííⁿ 'iiⁿ'yāⁿ s'eeⁿ ní cueεcú yā ní che'e 'diiⁿ'yúⁿ yā. ⁴³ Tuu'mi

ní 'iiⁿ'yāⁿ chí n'dái nanááⁿ Ndyuūs cuuvi deevé yā ngii tan'dúúcā 'yáⁿ'ā taachi 'āā snée yā naachi Ndyuūs Chiidá yā ngaⁿ'a ntiiⁿ'nyúⁿ yā na va'ai cheeti nguuvi. Ndís'tii chí vééⁿ veéⁿ ní 'caandiveéⁿ ní nduudu yeⁿ'é.

**Ejemplo yeⁿ'e vaadi
'cuiica chí canúúⁿ n'de'ei**

⁴⁴ Caⁿ'a ca Jesús miiⁿ táámá ejemplo: Naachí Ndyuūs ngaⁿ'a ntiiⁿ'nyúⁿ yā yeⁿ'e va'ai cheeti nguuvi ní tan'dúúcā vaadi 'cuiica chí canúúⁿ n'de'ei na 'áámá campo. 'Áámá saⁿ'ā ní ndaācā sa vaadi 'cuiica miiⁿ ní cunuuⁿ n'dé'ei ntúúⁿ sa lugar miiⁿ. Yeenú taavi sa. Cunaⁿ'a sa ní n'diicui sa tanducueéⁿ chí vééⁿ yeⁿ'e sa ní cuái sa campo miiⁿ.

**Ejemplo yeⁿ'e 'áámá perla
chí yaⁿ'ai taavi chíi'vē**

⁴⁵ 'Tiicá ntúúⁿ. Naachí Ndyuūs ngaⁿ'a ntiiⁿ'nyúⁿ yā na va'ai cheeti nguuvi ní tan'dúúcā 'áámá saⁿ'ā chí n'diicui sa chí in'nuuⁿ sa perlas chí yaⁿ'ai taavi chíi'vē. ⁴⁶ Taachí ndaācā sa 'áámá perla chí n'deeveé ní yaⁿ'ai taavi chíi'vē, tuu'mi ní cuinaⁿ'ā sa ní n'diicui sa tanducueéⁿ chí vééⁿ yeⁿ'e sa níicú cuai sa perla miiⁿ.

Yeⁿ'e ejemplo yeⁿ'e yaānā

⁴⁷ 'Tiicá ntuūⁿ. Naachí Ndyuūs ngaⁿ'a ntiiⁿ'nyúⁿ yā na va'ai cheeti nguuvi ní tan'dúúcā 'áámá yaānā chí saⁿ'ā n'gaa nuúⁿ sa na nuūⁿ'niⁿ'yáⁿ'ā ní ita'āa nducueéⁿ naaⁿ 'yaācā. ⁴⁸ Taachí 'āā ndiituuⁿ yaānā miiⁿ, intun'dáa yā cuaaⁿ 'diituuⁿ nuūⁿ'niⁿ'yáⁿ'ā miiⁿ. Ní n'daaviyaí yā ní nan'guaáⁿ yā 'yáacā chí n'daācā. N'gii yā 'iiti 'cuééⁿtē. Ní 'iiti chí nguééⁿ n'daācā miiⁿ nginngée yā 'iiti. ⁴⁹ 'Tiicā cuuvi taachi 'cuiinū iⁿ'yeeⁿdí 'cūū. Nandaā ángeles ní tun'dáa yā 'iiⁿ'yāⁿ chí n'dai yā nguaaⁿ 'iiⁿ'yāⁿ chí nguεε n'daācā idiíⁿ yā. ⁵⁰ Ní 'cuií yā 'iiⁿ'yāⁿ chí nguééⁿ n'daācā ná nguuchi yaⁿ'ā. Mííⁿ 'iiⁿ'yāⁿ s'eeⁿ cueⁿ'e

daāⁿmaⁿ cuēcú yā ní cueⁿe daāⁿmaⁿ ché^é 'diiⁿyuⁿ yā.

**Ejemplo yeⁿē vaadi 'cuíca
ngai ndúúcū chí ndiicū**

⁵¹ Jesús tiinguuneeⁿ yā 'iiⁿyāⁿ s'eeⁿ: ¿'Áá tuumicádíinuⁿ ndís'tií tanducuéⁿe dendu^ū chí 'túúcā? 'Iiⁿyāⁿ s'eeⁿ ní n'guecútaⁿa yā: 'Tífcā Señor.

⁵² Jesús ní caⁿa yā chii yā 'iiⁿyāⁿ s'eeⁿ: 'Áámá 'aama maestro yeⁿē ley chí'neeⁿ yā yeⁿe naachi Ndyuūs ngaⁿa ntiíⁿnyúⁿ yā na va'ai chēeti nguuví, maestro miiⁿ ní cuuví yā tan'dúúcā 'áámá patrón chí véé vaadi 'cuiica yeⁿe sa na va'ai yeⁿē sa. Ní deenu sa táácā tun'dáa sa yeⁿe vaadi 'cuiica yeⁿē sa dendu^ū cosa chí ngai ndúúcū cosa chí ndiicū.

Jesús canee yā na yāāⁿ Nazaret

(Mr. 6.1-6; Lc. 4.16-30)

⁵³ Taachí Jesús miiⁿ ch'íínú caⁿá yā nduudu 'cūū, cueⁿé yā yeⁿē miiⁿya. ⁵⁴ Ní ndaá yā yāāⁿ vaacú yā chí nguuví Nazaret ní ngí'cueeⁿ yā yaācū sinagoga miiⁿ. 'Iiⁿyāⁿ s'eeⁿ ní cheⁿe yiinú yā yeⁿe chí chí'cueeⁿ Jesús. Ní ngaⁿa yā: ¿Tíí ndiicá vaadi déenu yeⁿē saⁿá 'cūū? ¿Táácā cuuví diiⁿ sa vaadi n'giinu chí idiíⁿ sa? ⁵⁵ Sáⁿa 'cūū chí daiya 'viichiyáⁿá ní María nguuví chēecu sa. Ní 'díínú sa ní Jacobo, ndúúcū José, ndúúcū Simón, ndúúcū Judas. ⁵⁶ V'í ntúúⁿ sa snee yā ndúúcu yú. ¿Tíí ndiicá tanducuéⁿē vaadi deenú 'cūū chí ngí'cuééⁿ sa? ⁵⁷ Ní cáávā chuū 'iiⁿyāⁿ yeⁿe yāāⁿ miiⁿ cunncaā caⁿa yā yeⁿe Jesús miiⁿ, ní nguéé i'téenu yā yeⁿe yā. Naati Jesús ní caⁿa yā chii yā 'iiⁿyāⁿ s'eeⁿ: Nguéé véé mar 'áámá profeta chí candēe nduudu yeⁿé Ndyuūs chí 'iiⁿyāⁿ yeⁿē yāāⁿ vaacú yā ndúúcū 'iiⁿyāⁿ na vaacu yā dinéⁿe yā profeta miiⁿ.

⁵⁸ Jesús miiⁿ nguéé neené n'deēe vaadi n'giinu dííⁿ yā miiⁿ caati 'iiⁿyāⁿ s'eeⁿ nguéé s'téenu yā yeⁿe Jesús miiⁿ.

Ch'iiⁿnúⁿ yā Juan chí ngeedínuūⁿníⁿ

(Mr. 6.14-29; Lc. 9.7-9)

14 Tiempo 'cūū saⁿa rey Herodes, chí gobernador yeⁿe yāⁿā Galilea, ch'iindiveeⁿ sá tan'dúúcā chí 'iiⁿyāⁿ ngaⁿa yā yeⁿe Jesús miiⁿ. ² Ní rey miiⁿ caⁿa sa chii sa mozos yeⁿē sa: Sáⁿā Jesús 'cūū ní Juan chí ngeedínuūⁿníⁿ chí nduuchi sá yeⁿē nguaaⁿ tináⁿā. Ní cáávā chuū véé poder yeⁿē sa chí idiíⁿ sa vaadi n'giinu.

³ Rey Herodes miiⁿ ní 'iiⁿyāⁿ chí caⁿa ntiíⁿnyúⁿ yā chí soldados sta'a sa Juan miiⁿ ní cāchiichí sa Juan ndúúcū cadenas ní chí'nuuⁿ sa Juan vácūū. 'Tífcā dííⁿ rey miiⁿ cucáávā n'daataá yeⁿe yā chí nguuví Herodías ti vmnááⁿ vmnaaⁿ n'daataá miiⁿ ní n'daataá yeⁿē Felipe chí 'díínú rey miiⁿ. Ní divíí rey miiⁿ táⁿā miiⁿ yeⁿe Felipe. ⁴ 'Tífcā dííⁿ rey ndúúcū Juan chí ngeedínuūⁿníⁿ ti Juan miiⁿ ngaⁿa sá ngii sa Herodes miiⁿ chí tan'dúúcā chí ngaⁿa na ley, nguéé canee chí cuuví n'daataá yeⁿé yā n'daataá miiⁿ.

⁵ Rey Herodes miiⁿ ní neⁿe yā 'caaⁿnuⁿ yā Juan miiⁿ, naati 'va'á yā 'iiⁿyāⁿ yeⁿe yāāⁿ miiⁿ; ti 'iiⁿyāⁿ s'eeⁿ ní s'téenu yā chí Juan miiⁿ ní 'iiⁿyāⁿ profeta chí dichó'o Ndyuūs. ⁶ Taachí 'iiⁿyāⁿ dííⁿ yā 'viicu yeⁿē cumpleaños yeⁿe Herodes miiⁿ, n'daataá 'lífⁿ daiya táⁿā Herodías miiⁿ nde'ei tá naavtaⁿā yeⁿe 'iiⁿyāⁿ s'eeⁿ. Ní rey Herodes miiⁿ ní chii yeenú yā chí nde'ei tá ní caⁿa yā: ⁷ Dii, n'daataá 'lífⁿ. 'Úú ngaⁿá ndúúcū nduudu, “por Dios”, chí teé dii 'āā de'é nūū chí neⁿe di. ⁸ Chēecu tá ní caⁿa yā chii yā n'daataa 'lífⁿ miiⁿ de'ē chí caaca tá. Ní n'daata 'lífⁿ caⁿa ta chí tá rey miiⁿ: N'dií rey, téé ní 'úú tíí Juan chí ngeedínuūⁿníⁿ cu'nuúⁿ chēeti 'áámá cu'.

⁹ Tuu'mi ní rey Herodes miiⁿ s'neeⁿ ndaachii yiinú yā; naati rey miiⁿ caati 'āā caⁿa yā ndúúcū nduudu, “por Dios”, ní ch'iindiveeⁿ 'iiⁿyāⁿ chí snee yā ndúúcū

yā na mesa miiⁿ, caⁿa yā chí 'āā ca'a núúⁿ yā chíⁿ chí ngiica táⁿā miiⁿ.¹⁰ Caⁿa ntiiⁿnyúⁿ yā chí 'caātā daandu Juan chi ngeedinuūⁿnīⁿ chí canúⁿ sa vácuū. ¹¹Ní ndee sa tiiⁿ yā miiⁿ sn'núúⁿ cheeti cu'u ní ca'a sa n'daata lífⁿ miiⁿ. Ní táⁿā miiⁿ ní ca'a tá cheecu tá.

¹²Tuuⁿmi ní discípulos yeⁿe Juan chi ngeedinuūⁿnīⁿ ndaá yā ní sta'á yā cuerpo yeⁿe Juan miiⁿ ní chíichi yā. Ní cheⁿe yā chíi yā Jesús miiⁿ tan'dúúca chí chíi.

Jesús ca'á yā che'e nyuⁿu mil 'iiⁿyāⁿ

(Mr. 6.30-44; Lc. 9.10-17; Jn. 6.1-14)

¹³Taachí Jesús miiⁿ chíiindiveéⁿ yā chuū, cueⁿé yā ní sndáa yā na 'áámá barco, ní cueⁿe yā na 'áámá lugar cueti naachi nguéé 'iiⁿyāⁿ. Taachí 'iiⁿyāⁿ s'eeⁿ chíiindiveéⁿ yā chuū, can'dáa yā yeⁿe yááⁿ s'eeⁿ ní cueⁿe yā ndúúcu Jesús. ¹⁴Ní taachí Jesús miiⁿ nan'dáa yā ná barco miiⁿ, n'diichí yā n'dee n'dái 'iiⁿyāⁿ, ní nnee ya'ai 'iinu yā 'iiⁿyāⁿ s'eeⁿ. Ní díⁿ yā chí nduūvā yeⁿé 'iiⁿyāⁿ chí ngítā chí ndaā ndúúcu 'iiⁿyāⁿ chí candee yā 'iiⁿyāⁿ s'eeⁿ. ¹⁵Ní taachí 'āā chíinu discípulos yeⁿe Jesús miiⁿ ndaá yā nanááⁿ Jesús ní caⁿa yā chíi yā 'iiⁿyāⁿ: 'Āā chí chífnū maaⁿ, ní 'muuⁿ nguéé n'geetinéé 'iiⁿyāⁿ. Yaa'ví ní 'iiⁿyāⁿ s'tíi chí caⁿá yā cuááⁿ na yááⁿ n'gaiyáá ní cuái yā chí che'e yā.

¹⁶Jesús caⁿa yā chíi yā discípulos: 'Iiⁿyāⁿ s'tíi nguéé cánéé chí náⁿa yā. Nds'tíi ca'a ní chí che'e yā.

¹⁷Discípulos ní caⁿa yā: Nguéé tunééⁿ chí che'e yā. Dámāāⁿ nyuⁿu panes ndúúcu na 'uūvi 'yaacā véé.

¹⁸Jesús caⁿa yā chíi yā discípulos: Candéé ní panes ndúúcu 'yaacā 'muuⁿ.

¹⁹Cuayiivi ní Jesús chíi yā 'iiⁿyāⁿ s'eeⁿ chí chíeéte yā ná yaātā miiⁿ. Jesús ní sta'á yā nduu nyúⁿú panes miiⁿ ndúúcu 'uūvi 'yaaca ní n'diichí yā nanguuvi ní ca'a yā gracias Ndyuūs Chiidá yā. Cuayiivi ní n'dee yā panes ní ca'a yā discípulos yeⁿe yā. Discípulos miiⁿ ní ca'a

yā 'iiⁿyāⁿ chí snéé miiⁿ.²⁰ Nducyáácá yā che'e yā ní chíitu 'iiⁿyāⁿ. Ní discípulos nān'guaáⁿ yā chí nángaāva panes yeⁿe miiⁿ ndúúcu 'yaacā miiⁿ ní chíitu tá ndiichúví 'cueéte. ²¹'Iiⁿyāⁿ chí che'e miiⁿ nyuⁿu mil ngii yā, ndii nguéé chiduūche n'daataá, ndíi nguéé ndúú da'caiyāa ra.

**Jesús ngiicá yā cuááⁿ
vmnaaⁿ nuūⁿnīⁿyáⁿā**

(Mr. 6.45-52; Jn. 6.16-21)

²²Cuayiivi ní Jesús caⁿa yā chíi yā discípulos yeⁿe yā chí cundaa yā na barco ní caⁿá yā táamá 'dítuú nuūⁿnīⁿyáⁿā, 'naaⁿ chí Jesús miiⁿ díⁿ yā despedir yeⁿé 'iiⁿyāⁿ. ²³Jesús díⁿ yā despedir yeⁿé 'iiⁿyāⁿ s'eeⁿ ní dívi yā yeⁿe yā ní cuché yā na 'áámá yíicū ní caⁿ'angua'á yā. Taachí chíi 'da'a, 'āā dámaaⁿ Jesús canéé yā miiⁿ. ²⁴Barco miiⁿ ní 'āā cánduū naavtaⁿā yeⁿe nuūⁿnīⁿyáⁿā miiⁿ naachi olas yeⁿe nuūⁿnīⁿ miiⁿ neⁿe 'cuuchii na yaānūⁿ yeⁿe nuūⁿnīⁿ miiⁿ. 'Yúúné ní ngeēnū taaⁿ ní díitu n'dái n'geⁿe na barco miiⁿ. Ní barco miiⁿ nguéé ngii ngiicá. ²⁵Taachi 'da'a ca táamá nguuvi tan'dúúca n'geecu cuūⁿ o n'geecu nyuⁿu, Jesús ndaá yā nanááⁿ discípulos ní ngiicá yā cuaaⁿ vmnaaⁿ nuūⁿnīⁿyáⁿā miiⁿ. ²⁶Taachí discípulos ní n'diichí yā Jesús miiⁿ chí ngiicá yā cuaaⁿ vmnaaⁿ nuūⁿnīⁿyáⁿā miiⁿ ní díi'yá yā chíi. Ní chistaⁿa vaanicadiinūⁿ yeⁿé yā. Ní 'cai yā: Chuū ní 'áámá bulto. Ní caⁿá yā ndúúcu vaadi 'va'a.

²⁷Cuayiivi miiⁿ ní Jesús yaa'ví yā discípulos ní caⁿa yā: Nds'tíi cúúví ditiinú ní caati 'úú. Nguéé di'va'á ní.

²⁸Tuuⁿmi ní Pedro nán'guēcútaⁿa sa ní caⁿa sa: N'díi Señor, ndúúti chí n'díi caaⁿmaⁿ ntiiⁿnyúⁿ ní chí caⁿá naachi canee ní ní caacá cuaaⁿ vmnaaⁿ nuūⁿnīⁿyáⁿā.

²⁹Jesús miiⁿ ní caⁿa yā chíi yā: Pedro, cuchíi di. Pedro miiⁿ ní nan'dáa sa na barco miiⁿ ní tucá'a sa ngiica sa cuaaⁿ

vmnaaⁿ nuūⁿnīⁿ miiⁿ. Ní cueⁿē sa naachi canéé Jesús miiⁿ. ³⁰Taachí Pedro miiⁿ n'diichi sa 'yúúné taaⁿ miiⁿ di'vá'a sa ní 'āā tucá'ā cheechi sa nguuaaⁿ nuūⁿnīⁿ miiⁿ. Tuu'mi ní 'cái yiicu sa ní caⁿ'a sa: Señor, nadanguáⁿai nī 'úú.

³¹Hora mífⁿ nūuⁿ, Jesús miiⁿ n'doó yā ta'a yā ní sta'á yā ta'a Pedro ní caⁿ'a yā chii yā Pedro: Dii saⁿ'ā chi dúú'vii i'téenu di, ¿de'ē cúúví chí nadi'uúví di staava yeⁿ'ē di ní nguéé i'téenu di?

³²Ní taachí Jesús ndúúcu Pedro sndáa yā na barco miiⁿ, canee 'diiⁿ 'yúúné mífⁿ.

³³Tuu'mi ní discípulos chi snúuⁿ yā na barco miiⁿ ní ndaá yā nanááⁿ Jesús ní s'téenu yā 'iiⁿyāⁿ. Ní caⁿ'a yā: N'dii Jesús, cuaacu níⁿnyúⁿ chí Daiya Ndyuūs n'dii.

**Jesús diíⁿ yā chi nduuvā yeⁿ'e
'iiⁿyāⁿ yeⁿ'e yáⁿ'āa Genesaret**

(Mr. 6.53-56)

³⁴Tááchí ch'iinu cho'ó yā táámá lado yeⁿ'e nuūⁿnīⁿ'yáⁿ'ā miiⁿ ní ndaá yā na yáⁿ'āa Genesaret. ³⁵'Iiⁿyāⁿ s'eeⁿ yeⁿ'e yáⁿ'āa miiⁿ taachi tuumicádíinuⁿ yā chí Jesús canéé yā miiⁿ, tuu'mi ní 'iiⁿyāⁿ s'eeⁿ caⁿ'á yā ní chii yā 'iiⁿyāⁿ yeⁿ'e núúⁿmáⁿ cuaaⁿ yáāⁿ n'gaiyāā chí snéé niiⁿnuúⁿ chí Jesús canéé yā miiⁿ. Nífcú 'iiⁿyāⁿ s'eeⁿ cándéé yā nducyaaca 'iiⁿyāⁿ chí ngííta yā nanááⁿ Jesús miiⁿ. ³⁶Ní 'iiⁿyāⁿ s'eeⁿ di'cuúftu yā Jesús miiⁿ chí 'cuááⁿ yā chí 'iiⁿyāⁿ s'eeⁿ tuu'ví yā naachi n'déétií yeⁿ'ē catecái yā. Ní nducyaaca 'iiⁿyāⁿ chí tuu'ví yā catecai Jesús miiⁿ ní nduūvā yeⁿ'e yā.

**Yeⁿ'e chi diiⁿ chí vee
nuuⁿndi yeⁿ'e 'iiⁿyāⁿ**

(Mr. 7.1-23)

15 Tuu'mi ní duu'vi maestros chí ngi'cueeⁿ ley ndúúcu 'iiⁿyāⁿ fariseos chí chiicá yā yáāⁿ Jerusalén ndaá yā nanááⁿ Jesús miiⁿ, ní caⁿ'a yā chii yā 'iiⁿyāⁿ: ²¿De'ē cúúví chí discípulos yeⁿ'e nī nguéé diíⁿ yā

tan'dúúcā costumbre yeⁿ'ē 'iiⁿyāⁿ ndiicúú? ¿De'ē cúúví chí nguéé inaaⁿnu yā ta'á yā taachi 'āā cuéé che'e yā pan?

³Jesús nan'guuecútaⁿ'a yā ní caⁿ'a yā chii yā 'iiⁿyāⁿ s'eeⁿ: ¿De'ē cúúví chí ndís'tií ní nguéé diíⁿ nī tan'dúúcā chí ngaⁿ'a ley yeⁿ'é Ndyuūs ní diíⁿ nī tan'dúúcā costumbre yeⁿ'ē 'iiⁿyāⁿ ndiicúú? ⁴Ti Ndyuūs ní ca'á yā ley yeⁿ'e yā ní caⁿ'a yā: Diíⁿ nī honrar chiidá nī ndúúcu cheecú nī. 'Iiⁿyāⁿ chí nguéé n'dáacā ngaⁿ'a yā yeⁿ'e chiidá yā o yeⁿ'ē cheecú yā ní 'cuúvi yā. ⁵Naati ndis'tií ní ngaⁿ'a nī chí 'āā du'ú nūuⁿ 'iiⁿyāⁿ chí caaⁿ'máⁿ yā cuuvi yā chiidá yā ndúúcu cheecú yā 'tíicā: Nducuéⁿ'ē chí teé n'dii maaⁿ ní ca'á lado yeⁿ'é Ndyuūs caava ofrenda yeⁿ'e yā. ⁶'Iiⁿyāⁿ 'āā ntéé idiíⁿ yā chí neⁿ'é yā chiida yā ndúúcu cheecú yā. 'Tíicā caavā costumbre yeⁿ'é nī diíⁿ nī chí 'āā ntéé idichí'vē ley yeⁿ'é Ndyuūs yeⁿ'e yú. ⁷Ndís'tií 'uúvi naaⁿ 'uuvi cheendí nī. N'daācā caⁿ'a profeta Isaías miiⁿ yeⁿ'é nī taachi caⁿ'a sa ndí vmnaaⁿ ní canéé nguūⁿ na libro yeⁿ'e Ndyuūs 'tíica:

⁸'Iiⁿyāⁿ s'uūⁿ ní i'téenu yā 'úú ndúúcu nduudu yeⁿ'e yā, naati staava yeⁿ'é yā yaⁿ'ai canee yeⁿ'ē 'úú.

⁹Nguéé de'ē vee dichí'vē chí i'téenu yā 'úú, caati chí ngi'cueeⁿ yā ní ley yeⁿ'e saⁿ'ā yeⁿ'e iⁿ'yeeⁿdí 'cūu nguéé yeⁿ'é Ndyuūs.

¹⁰Jesús n'gai yā n'dee n'dái 'iiⁿyāⁿ chí ndaa yā nanááⁿ yā. Ní caⁿ'a yā chii yā 'iiⁿyāⁿ s'eeⁿ: 'Caandivééⁿ nī ní tuumicadíinuⁿ nī. ¹¹Nguéé tanducuéⁿ'ē chí nge'e saⁿ'ā chí ndaā cheendi saⁿ'ā idivaatí saⁿ'ā naati nduudu chí ican'daā cheendi saⁿ'ā, chíⁿ chí diiⁿ chí véé nuūⁿndi yeⁿ'ē saⁿ'ā.

¹²Tuu'mi ní discípulos yeⁿ'e Jesús ndaá yā nanááⁿ yā ní caⁿ'a yā chii yā Jesús miiⁿ: ¿'Áá nguéé déenu nī chí 'iiⁿyāⁿ fariseos taachí ch'iindiveéⁿ yā nduudú 'cūu nduuvi taáⁿ yā?

¹³ Naatí Jesús miiⁿ nan'gueecútaⁿ a yā ní caⁿ a yā: Taanduvéé yaáta chi nguée chiichi Chiidá chi canée yā na va'ai cheeti nguuví canee chí tiicúu ndii dí'yú. ¹⁴ 'Áā s'nééⁿ rá 'iiⁿ yāⁿ s'eeⁿ chi tan'dúucā 'iiⁿ yāⁿ chi ngeenááⁿ chi candée yā táámá 'iiⁿ yāⁿ chi ngeenááⁿ ndúúcu yā. Nduuti chí 'áámá 'iiⁿ yāⁿ chí ngeenááⁿ candée yā táámá 'iiⁿ yāⁿ chí ngeenááⁿ ndúúcu yā, nduu 'uuví yā cungeé nuúⁿ yā na yiivi yáⁿ ā.

¹⁵ Tuu'mi ní Pedro miiⁿ ní nan'gueecútaⁿ a sa ní caⁿ a sa chii sa Jesús miiⁿ: Cúuví ní nús'uu de'e néⁿ é caāⁿ māⁿ ejemplo 'cūū.

¹⁶ Jesús caⁿ a yā: ¿'Áā tiicá ntūⁿ nguée ituumicadínuuⁿ ní? ¹⁷ ¿'Áā nguée ituumicadínuuⁿ ní chí tanducuéⁿ chí indaā cheendi saⁿ ā ngeⁿ e cheēti sa ní cungeé cuaaⁿ chuva'āi? ¹⁸ Naati nduudu chí ícan'daa cheendi sa chí níngica na staava yeⁿ ē sa, chuū idiíiⁿ chí véé núúⁿ ndí yeⁿ ē sáⁿ ā. ¹⁹ Caati yeⁿ e na staava yeⁿ e 'iiⁿ yāⁿ ngiicá dendú'ú chí nguée n'dáacā chí inadicadínuuⁿ yā. Chuū ní inadicadínuúⁿ yā yeⁿ ē chí 'caāⁿ nuⁿ yā 'iiⁿ yāⁿ, ndúúcu yeⁿ ē chí caⁿ á yā ndúúcu isaⁿ ā o n'daataá chí nguée yeⁿ e yā, ndúúcu chí n'diichí yā 'aama saⁿ ā o n'daataá chí duuchí vi'í, ndúúcu yeⁿ ē chí ididuucú yā, ndúúcu yeⁿ ē chí testigo yā ní caaⁿ máⁿ yā nduudu yaadi, ndúúcu yeⁿ ē chí caaⁿ maⁿ taáⁿ yā contra yeⁿ e Ndyuús. ²⁰ Dendú'ú 'cūū chí ídiíiⁿ chí véé nuuⁿ ndi yeⁿ ē sa naati chí che'e sa taachi nguée naaⁿ nú sa ta'a sa, chíiⁿ ní nguée idinuⁿ ndi sa.

Yeⁿ e 'áámá n'daataá chí nguée yeⁿ e ndaata Israel ní i'téenu tá Jesús

(Mr. 7.24-30)

²¹ Jesús chiicá yā yeⁿ ē yáāⁿ miiⁿ ní cueⁿ e yā na yáⁿ āa yeⁿ e Tiro ndúúcu Sidón. ²² Cuin'diichí ní. 'Áámá n'dáátāa yeⁿ e yáⁿ āa Canaán chí can'daā tá yeⁿ e yáāⁿ vaacu tá. N'gai yiicu tá ní ngaⁿ a tá

ngii tá Jesús miiⁿ: N'díí Señor chí Daiya David, nnée ya'ai iinu ní 'úú. 'Áámá es-píritu yeⁿ e yááⁿ guinuū idindú'ú taavi táⁿ ā daiyá.

²³ Jesús nguée nan'gueecútaⁿ a yā yeⁿ ē tá. Tuu'mi ní discípulos yeⁿ ē Jesús miiⁿ ndaá yā nanáaⁿ yā ní di'cuítu yā Jesús ní caⁿ a yā chíi yā 'iiⁿ yāⁿ: N'díí Jesús, dííⁿ ní despedir yeⁿ ē ta ti táⁿ a 'cūū ní n'gai tá cūchiitá cuaaⁿ daami yú.

²⁴ Jesús nan'gueecútaⁿ a yā ní caⁿ a yā: Dendyuús dicho'ó yā 'úú cucáávā 'iiⁿ yāⁿ yeⁿ e Israel chí tan'dúucā 'iiti cuūchí chí nindái, 'tiicá yā.

²⁵ Tuu'mi ní taⁿ ā miiⁿ ndaā ta nanáaⁿ Jesús ní chiintí'ya tá ní caⁿ a tá chíi tá 'iiⁿ yāⁿ: N'díí Señor, cunnee ní 'úú.

²⁶ Jesús miiⁿ ní nan'gueecútaⁿ a yā yeⁿ ē tá ní caⁿ a yā chíi yā táⁿ ā: Nguée n'daācā chí divíí pan yeⁿ ē daiyá 'nū ní ca'á chí che'e 'yaānā.

²⁷ Táⁿ ā miiⁿ ní caⁿ ā ta: 'Tíicā Señor, naati 'yáanā miiⁿ ng'é e tí yeⁿ ē cheeyéé chí ngéé yeⁿ ē na mesa yeⁿ ē 'iiví tí.

²⁸ Tuu'mi ní Jesús miiⁿ nan'gueecútaⁿ a yā ní caⁿ a yā chíi yā táⁿ ā: Díí n'daataá, dé'e chúúccā ch'ete vaadi i'téenu yeⁿ ē di. Cuuví ndúúcu di tan'dúucā chí neⁿ ē di. Daiya tá miiⁿ ní hora mííⁿ nūūⁿ nduuva yeⁿ ē ta.

Jesús idiíⁿ yā chí nduūvā yeⁿ e 'yaaⁿ n'dai 'iiⁿ yāⁿ

²⁹ Jesús chiicá yā yeⁿ ē yáⁿ āa miiⁿ ní ndaá yā 'diituú nuūⁿ niⁿ yáⁿ ā Galilea. Cuayiivi ní cuchée yā ná yiicū miiⁿ ní ch'iindi yā. ³⁰ Nééne 'yaaⁿ 'iiⁿ yāⁿ ndaā niiⁿ nuúⁿ yā nanáaⁿ Jesús miiⁿ ní ndée yā 'iiⁿ yāⁿ chí ngaā yó'oo, ndúúcu 'iiⁿ yāⁿ chí ngeenááⁿ, ndúúcu 'iiⁿ yāⁿ 'dí'mí, ndúúcu 'iiⁿ yāⁿ chí ló'ō ta'á yā o ca'a yā, ndúúcu 'yaaⁿ n'dái 'iiⁿ yāⁿ chí véé cá tanáⁿ ā ca'ai chí ndíi yā. Ní s'neeⁿ yā 'iiⁿ yāⁿ s'eeⁿ nanáaⁿ Jesús miiⁿ. Ní Jesús dííⁿ yā chí nduūvā yeⁿ e 'iiⁿ yāⁿ s'eeⁿ. ³¹ Nducyáácá 'iiⁿ yāⁿ cheⁿ e yiinú yā

taachí n'diichi yā chí 'iiⁿyāⁿ 'díⁿmī ní ngíí ngaⁿa, ní 'iiⁿyāⁿ chí ló'ō ta'á yā o ca'a yā nduuva yeⁿe yā, ní 'iiⁿyāⁿ chí nguéé ngii ngiicá, ngiica yā; ní 'iiⁿyāⁿ ngueenááⁿ, inaaⁿ yā; ní tucá'a yā caⁿa yā: De'ē chúuca ch'ēete Ndyuūs yeⁿe 'iiⁿyāⁿ Israel.

**Jesús ca'a yā chí che'e
cuūⁿ mil 'iiⁿyāⁿ**

(Mr. 8.1-10)

³² Jesús 'caí yā discípuos yeⁿe yā ní caⁿa yā chíi yā discípuos: Ya'ái cáávā 'iiⁿyāⁿ s'tíi tí 'āā 'iinū nguuvī snée yā nduucú ní 'muuⁿ ní nguéé de'ē vee chí che'e yā. Nguéé neⁿe nadicho'ó 'iiⁿyāⁿ chí nguéé che'e yā. 'Áátii cuuví cúunu yā cuaaⁿ cyúúní chí náⁿa yā.

³³ Tuu'mi ní discípuos yeⁿe yā caⁿa yā chíi yā Jesús: ¿Tíí cáⁿa 'nū nguaí 'nū pan chí n'dee n'dái chí ché'é nducyaaca 'iis'tíi na lugar 'cūū naachi nguē ch'ēetinéé 'iiⁿyāⁿ?

³⁴ Jesús caⁿa yā chíi yā discípuos: ¿'Áá 'yaaⁿ ca pan yeⁿe ní vee? Discípuos caⁿa yā: Ndeēchē panes ndúucū n'duuví 'yaacā n'gaiyāá vee.

³⁵ Jesús ca'a yā orden 'iiⁿyāⁿ s'eeⁿ chí 'cueté yā na yáⁿāa miiⁿ. ³⁶ Tuu'mi ní Jesús sta'á yā ndu'ū ndeēchē panes miiⁿ ndúucū 'yaacā miiⁿ. Ní ca'a yā gracias Ndyuūs cáávā panes miiⁿ. Ní n'dee yā panes miiⁿ ní ca'a yā discípuos yeⁿe yā. Ní discípuos ní ca'a yā 'iiⁿyāⁿ chí snéé miiⁿ. ³⁷ Nducyáaca yā che'e yā ní chíitu 'iiⁿyāⁿ. Discípuos ní nān'guaáⁿ yā chí nángaāva ní chíitu tá ndeēchē 'cuéētē. ³⁸ 'Iiⁿyāⁿ chí che'e yā miiⁿ ní taanduu cuūⁿ mil ngii sáⁿā. Nguéé diduuche yā n'daataá ndíí nguéé ndúú da'caiyā. ³⁹ Tuu'mi ní Jesús yaa'ví yā 'iiⁿyāⁿ s'eeⁿ chí cunaⁿá yā. Ní Jesús ndaá yā na barco miiⁿ ní cueⁿe yā na yáⁿāa yeⁿe Magdala.

'Iiⁿyāⁿ s'eeⁿ ngiica yā vaadi n'giinu

(Mr. 8.11-13; Lc. 12.54-56)

16 'Iiⁿyāⁿ fariseos ndúucū 'iiⁿyāⁿ saduceos ndaá yā nanááⁿ Jesús chí neⁿe n'diichíneeⁿ yā Jesús. Ní chíica yā Jesús 'áamá vaadi n'giinu yeⁿe va'ai cheeti nguuvi.

² Naati Jesús nan'guēcútaⁿa yā yeⁿe 'iiⁿyāⁿ s'eeⁿ ní caⁿa yā: Taachí ngii chíinū ní nanguuvi ní ndíí cuá'āa, ndís'tíi ní ngaⁿá ní chí n'dáacā díiiⁿ tiempo. ³ Ní cuááⁿ ná nguētyaaⁿ taachí meēeⁿ ngíí cuá'á, ndís'tíi ngaⁿa ní chí nguéé n'dáacā díiiⁿ tiempo maaⁿ. Nds'tíi 'uūví naaⁿ 'uūví cheendí ní chí déenu ní de'ē chí cúuví yeⁿe nanguuvi naati nguéé tumicadínuuⁿ ní de'ē chí cuuvi tiempo 'cūū ndúucū señales chí inaaⁿ ní. ⁴ 'Iiⁿyāⁿ chí cunncāá idiíⁿ yā ndúucū 'iiⁿyāⁿ chí nguéé i'téenu yā Ndyuūs 'iiⁿyāⁿ miiⁿ néⁿe yā snaaⁿ yā 'áamá vaadi n'giinu naati señal miiⁿ nguéé ndaāca yā. Dámaāaⁿ cánéé señal yeⁿe profeta Jonás chí ndíí cuaaⁿ vmaaaⁿ chí canéé nguuⁿ na libro yeⁿe Ndyuūs. Jesús s'néeⁿ yā 'iiⁿyāⁿ s'eeⁿ ní cueⁿe yā.

Levadura yeⁿe 'iiⁿyāⁿ fariseos

(Mr. 8.14-21)

⁵ Discípuos yeⁿe Jesús ndaá yā táámá lado yeⁿe nuūⁿniⁿyáⁿá ní chinaáⁿ yā chí cāndēe yā pan. ⁶ Jesús ca'a yā chíi yā 'iiⁿyāⁿ s'eeⁿ: Cundéē ndís'tíi cuidado yeⁿe levadura yeⁿe 'iiⁿyāⁿ fariseos ndúucū 'iiⁿyāⁿ saduceos ti levadura miiⁿ ní chíiⁿ chí chí'cueeⁿ yā.

⁷ Discípuos ní tuca'á yā caⁿa yā nguuaⁿ maaⁿ yā. ¿'Áá chí nguéé ndee yú pan chíiⁿ chí 'tíicā ngaⁿa yā?

⁸ Jesús miiⁿ tumicadínuuⁿ yā yeⁿe chí inadacádiinūⁿ discípuos ní caⁿa yā chíi yā discípuos: ¿De'ē cúuví chí inadacádiinūⁿ ní 'túucā na staava yeⁿe ní chí cáávā chí nguéé ndee ní pan? Nds'tíi ní dúú'vii i'téenu ní. ⁹ ¿'Áá nguéé

ituumicádíinuⁿ nī, ndii nguεε ndúú inan'gaacú nī yeⁿē nyuⁿu panes chí che'e nyuⁿu mil saⁿā? ni ¿'áá n'deēe 'cuéétēe ca panes nángaáva? ¹⁰ ¿'Áá ndíi nguéé nduu inan'gaacú nī yeⁿē ndēēchē panes chí che'ē cuūⁿ mil saⁿā? ni ¿'áá n'deēe 'cuéétēe ca panes nángaáva? ¹¹ ¿De'e cuuvi chí nguεε ituumicádíinuⁿ nī chí nguéé cáávā pan miiⁿ chí caⁿá chí cundee nī cuidado yeⁿe levadura yeⁿe 'iiⁿyāⁿ fariseos ndúúcu 'iiⁿyāⁿ saduceos?

¹² Tuu'mi ní discípulos tuumicadíinuⁿ yā chí Jesús miiⁿ nguéé caⁿa yā chíi yā chí discípulos nguéé cundee yā cuidado yeⁿe levadura yeⁿe pan ti yeⁿe chí chí'cueeⁿ 'iiⁿyāⁿ fariseos ndúúcu 'iiⁿyāⁿ saduceos.

**Pedro miiⁿ caⁿa sa nduudu
cuaacu chí Jesús chí Cristo yā**

(Mr. 8.27-30; Lc. 9.18-21)

¹³ Jesús ndaá yā yeⁿe yáⁿāa yeⁿe Cesearea yeⁿe yáⁿāa yeⁿe Filipo ní itinguuneéⁿ yā discípulos yeⁿe yā ní caⁿa yā: ¿Du'ú 'úú ngaⁿa 'iiⁿyāⁿ yeⁿē 'úú chí Saⁿā chí Daiya Dendyuūs 'úú?

¹⁴ Discípulos ní caⁿa yā: Náⁿa yā ní ngaⁿa yā chí díí chí Juan chí cheedinuūⁿ díí. Náⁿa yā ní ngaⁿa yā chí díí chí profeta Elías miiⁿ díí. Níícu náⁿa yā ní ngaⁿa yā chí díí profeta Jeremías o 'āā du'ú nūⁿ profeta.

¹⁵ Jesús caⁿa yā chíi yā discípulos: ¿Du'ú 'úú ngaⁿa ndís'tii?

¹⁶ Simón Pedro miiⁿ nan'guεécútaⁿ a sa ní caⁿa sa: N'dií ní Cristo chí Daiya Dendyuūs chí cánduuchí cueⁿe daāⁿmaⁿ.

¹⁷ Tuu'mi ní Jesús miiⁿ nan'guεécútaⁿ a yā yeⁿē sa ní caⁿa yā: De'ē chúúcā n'dai díi Simón, daiya Jonás, ti 'úú nguéé chí'iⁿí díi ndii nguεε nduu táámá 'iiⁿyāⁿ, naati Chiidá chí canee yā ná va'ai cheeti nguuvu chí'iⁿí yā díi. ¹⁸ 'Úú ntúúⁿ ngaⁿá ngíí díi chí díi ní nguuvu Pedro díi ní nguuvu di neⁿe caaⁿmaⁿ tuūu. Ní vmaāⁿ 'áámá tuūu ch'εeté' cūū chí neⁿe caaⁿmaⁿ

Cristo, ní 'úú din'daí yaācū yeⁿé. Ní ndíi mar 'áámá poder yeⁿe yááⁿguuinūⁿ nguéé cuuvi din'nú'u tuūu miiⁿ. ¹⁹ 'Úú teé díi, Pedro, poder tan'dúúcā chí teé díi llaves yeⁿe va'ai cheeti nguuvu yeⁿe naachí Ndyuūs ngaⁿa ntiiⁿnyuⁿ yā 'tíicā dííⁿ. Ní tanducuéⁿē chí cachíichí díi na iⁿyeeⁿdi cūū cuchiichi ntúúⁿ ná va'ai cheeti nguuvu. Ní tanducuéⁿē chí n'gúúⁿ díi na iⁿyeeⁿdí cūū 'cuaāⁿ ntúúⁿ ná va'ai cheeti nguuvu.

²⁰ Tuu'mi ní Jesús caⁿa yā chíi yā discípulos yeⁿe yā chí nguéé caaⁿmaⁿ yā cuuvi yā mar 'áámá 'iiⁿyāⁿ chí Jesús miiⁿ chí Cristo yā.

Jesús caⁿa yā chí canee chí 'cuūvi yā

(Mr. 8.31-9.1; Lc. 9.22-27)

²¹ Tuu'mi ní Jesús miiⁿ tucá'a yā chí'cueeⁿ yā discípulos yeⁿe yā. 'Úú cánéé chí caⁿá na yáāⁿ Jerusalén ní cánéé chí 'cueenu taaví cuuvi nééné n'deēe dendu'ū yeⁿé 'iiⁿyāⁿ ndiicúū chí ngaⁿā ntiiⁿnyuⁿ yeⁿe yaācū miiⁿ, ndúúcu chíiduú n'gεeté, ndúúcu yeⁿe maestros yeⁿe ley. Cuayivi ní 'iiⁿyāⁿ s'eeⁿ 'caaⁿnúⁿ yā 'úú. Ní 'cuūví. Ndiichi ndii 'íínú nguuvu ní 'úú nduūchí yeⁿe nguaaⁿ tináⁿā.

²² Tuu'mi ní Pedro miiⁿ ní cueⁿe sa ndúúcu Jesús 'áámá lado ní caⁿa sa chíi sa Jesús: N'dií Señor, nguéé 'cuáāⁿ nī Ndyuūs 'iivi yú ndii mar 'áámá naaⁿ chí cuuvi chuū ndúúcu ní.

²³ Jesús nan'guεécútaⁿ a yā yeⁿe Pedro miiⁿ ní caⁿa yā chíi yā saⁿā: Divíi di nanaáⁿ, díi chí tan'dúúcā yááⁿguuinūⁿ. Díi ní nguéé nadicádíinuⁿ di tan'dúúcā Ndyuūs nadicádíinuⁿ yā ti nadicádíinuⁿ di yeⁿe dendú'ū yeⁿe iⁿyeeⁿdí cūū.

²⁴ Tuu'mi ní Jesús caⁿa yā chíi yā discípulos yeⁿe yā: Nduuti chí 'áámá 'iiⁿyāⁿ néⁿe yā caⁿá yā nduucú, canéé chí cu'neeⁿ maāⁿ yā tanducuéⁿē dendu'ū chí véé yeⁿe yā ní cuta'á yā cruz yeⁿe yā chí tan'dúúcā chí 'cueenu taaví yā cu-

uvi cucáavā 'úú. Ní 'íicú ca"n a yā ndu-
ucú. ²⁵Tí nducyáácá 'ii"yā"n chi ne"e yā
nadanguá"ai maá"n yā vida ye"e yā na
i"nyee"dí 'cūú ní dindaí yā táámá vida
ye"e yā nanáá"n Ndyuūs. Ní nducyáácá
'ii"yā"n chi dindaí yā vida ye"e yā
cucáavā 'úú ní nandaācá yā táámá vida
ye"e yā nanáá"n Ndyuūs. ²⁶¿De'e dichí'vē
ye"e sa"ā ndúúti chi dii"n sa ganar ndu-
cué"ē chi véé núú"má"n i"nyee"dí 'cūú ní
dindaí sa alma ye"e sa? ¿'Áá n'deēe
cuuvi nadí'v'e sa 'áámá 'ii"yā"n cucáavā
alma ye"e sa? ²⁷Naati 'úú chí Sa"á chi
Daiya Dendyuūs 'úú ní ndaá ndúúcu
deēve ch'ēte n'dai ye"e Chiidá chi canée
yā na va'ai cheeti nguuví. Ní ndaá
ndúúcu ángeles ye"é. Tuu'mi ní 'úú dí"n
chi nadí'v'e ca'áámá ca'áámá yā tuunu
tuunu ca chi ndí"n yā. ²⁸Cuaacu ní"nyú"n
nga"á ngíi ndís'tii chi véé ná"n a ní chi
snée ní 'muu"n chi nguéé 'cuūvi ní taan-
duvéé ndíi snaa"n ní Sa"n a chi Daiya
Dendyuūs ndaa sá chi caa"ma"n ntii"nyu"n
sa ye"e tanducué"ē.

Jesús n'dáa"n yā cuerpo ye"e maa"n yā

(Mr. 9.2-13; Lc. 9.28-36)

17 Chó'oo jaā"n nguuví, ní Jesús can-
dēe yā Pedro ndúúcu Jacobo
ndúúcu Juan chi 'dínū Jacobo. Ní
Jesús cue"é yā ndúúcu sa"ā s'ee"n na
'áámá yiicū yaacu. ²Ní Jesús n'dáa"n
yā cuerpo ye"e maá"n yā nanáá"n sa"ā
s'ee". Ní chín'gai naa"n yā tan'dúúcā
'yá"ā 'iicu catecai yā ní nduuví cuéē
tan'dúúcā deēve. ³Cuín'diichí ní. Tuu'mí
nūu"n che'enaā"n Moisés ndúúcu profeta
Elías. 'ii"yā"n s'ee"n chi n'díi ndíi cuaa"n
vmnaa"n ní nndeé yā ndúúcu Jesús mii"n.
⁴Tuu'mi ní Pedro ca"n a sá chii sa Jesús:
Señor, de'e chúucā n'dáacā ye"e yú chí
'cuētinée yú 'muu". Ndúúti chí ne"é ní
dín'daí nū ná 'iinū va'ai n'gaiyāā, 'áámá
ní ye"é n'diī, táámá ní ye"e Moisés,
táámá ní ye"e profeta Elías.

⁵Taachí Pedro nga"n a sá chuū, 'áámá
meēe"n cuéē chí ngii yá"āa ndii sn'díi
'ii"yā"n s'ee"n ní discípulos ch'iindivee"n yā
'áámá nduudu ná meēe"n mii"n chí nga"n a:
Sá"n a 'cūú Daiyá chí ne"e taaví ní yeenú
cáávā sá"n a 'cūú. 'Cu'nee"n veé"n ní ye"ē sa.

⁶Taachí discípulos ch'iindivee"n yā
nduudu 'cūú candiitín'dii yā ní dii'yaa
n'dái yā chiī. ⁷Tuu'mi ní Jesús mii"n ndaa
nii"nuu"n yā ní tuu'ví yā discípulos ní ca"n a
yā: Nducuee"n ní. Nguéé 'va'a ní.

⁸Taachí nducuee"n discípulos 'āā ntéé
n'diichí yā du'ū vee caati 'āā dámaāa"n
Jesús mii"n n'diichi yā.

⁹Taachi nangua'á yā ye"e yiicū mii"n ní
na yúúni naachí cuna"n a yā, Jesús ca"n a
yā chii yā 'ii"yā"n s'ee"n chí nguéé cuuví
yā mar 'áámá 'ii"yā"n ye"e chí n'diichí yā
ndíi taachi Sa"ā chí Daiya Ndyuūs ndu-
uchí yā ye"e nguua"n tiná"ā.

¹⁰Tuu'mi ní discípulos ntiinguunée"n
yā Jesús ní ca"n a yā: ¿De'e cúúví chí
nga"n a maestros ye"e ley chí canée chí
profeta Elías mii"n ndaa sa vmnaa"n?

¹¹Jesús mii"n nán'gueēcúta"n a yā ní
ca"n a yā chii yā discípulos: Cuaacu
ní"nyú"n profeta Elías mii"n ndaa sá vm-
náá"n vmnaa"n ní 'cuundiyaā"n sa tandu-
cué"ē. ¹²Naati 'úú ní nga"n a ngíi ndís'tii
chí profeta Elías mii"n ní 'āā ndaá yā.
Ní 'ii"yā"n s'u"n nguéé tuumicadímuu"n yā
ye"e yā du'u chí Elías mii"n naati dí"n
yā ndúúcu Elías mii"n tan'dúúcā chí ne"e
yā ní n'geenu sá ngii. 'Tiicá ntúū"n Sa"ā
chí Daiyá Ndyuūs 'cueenu sá cuuvi ye"e
'ii"yā"n s'u"n.

¹³Tuu'mi ní discípulos tuumicadínuu"n
yā chí Jesús nga"n a yā ngii yā discípulos
ye"e Juan chí chēdínū"n ní.

**Jesús idi"n yā chí nduūvā ye"e 'áámá
sa"ā 'díi"n chí ndii sa ataques**

(Mr. 9.14-29; Lc. 9.37-43)

¹⁴Taachí ndaá Jesús ndúúcu discipu-
los ye"e yā naachi snée n'dee n'dái
'ii"yā"n, tuu'mi ní ndaa 'áámá sa"ā nanáá"n

Jesús ní chiintii'ya sá ní caⁿa sá: ¹⁵ Señor, mnée ya'ai iinú nī daiyá ti sta'a ataques daiyá ní neené n'geenu sá ngii. Néené n'deeē cuūvi in'dáa nuūⁿ sa na yaⁿā ní 'āā neené n'deēē cuūví chí in'dáa nuūⁿ sa nguaaⁿ nuūⁿnīⁿ. ¹⁶ Ní 'āā chí nguú saⁿā nanááⁿ discípulos yeⁿe nī naati nguéeⁿ ngii díⁿ yā chí nduūvā yeⁿe sa.

¹⁷ Jesús nan'gueecútaⁿa yā ní caⁿa yā chíi yā saⁿā: Ndís'tii 'iiⁿyāⁿ chí nguēē i'téenu nī ndíí nguéeⁿ ndúú idiiⁿ n'daacá nī. ¿'Áá 'naaⁿ tiempo cánée chí cuneé ndúúcu nī? ¿'Áá 'naaⁿ cuheé ndúúcu ndís'tii? Candéē nī 'muuⁿ saⁿā 'dííⁿ.

¹⁸ Jesús miiⁿ yaa'vi neeⁿ yā espíritu yeⁿe yááⁿ'nguiinūⁿ ní espíritu miiⁿ nan'dáa yeⁿe saⁿā 'dííⁿ miiⁿ ní tuu'mí nūuⁿ ndúuvā yeⁿe sa.

¹⁹ Tuu'mi ní discípulos ní ndaa yā nanááⁿ Jesús na 'áámá lado naachi nguéeⁿ snéeⁿ 'iiⁿyāⁿ ní caⁿa yā chíi yā Jesús: ¿De'ē cúúví chí nús'uū nguéeⁿ chíi tun'dáa 'nū espíritu yeⁿe yááⁿ'nguiinūⁿ miiⁿ yeⁿe saⁿā 'díí?

²⁰ Jesús miiⁿ ní caⁿa yā chíi yā discípulos: Nguéeⁿ ch'ēete vaadi i'téenu yeⁿe nī. Cuaacu níⁿnyúⁿ ngaⁿ'á ngíí ndís'tii chí nduuti chí véé vaadi i'téenu yeⁿe nī ní tan'dúúca 'áámá duuti yeⁿe yíivē ntíi'yaá chí 'lííⁿ ca cuuvi nī yíicū 'cúú: Yíicū, cuví ndii 'muuⁿ nī cuéⁿé ndíí taama lugar. Ní yíicū ní caⁿā. Tanducuéⁿē cuuvi dííⁿ nī nduuti chí cuaacu chí i'téenu nī. ²¹ Naati tanducuéⁿē espíritu yeⁿe yááⁿ'nguiinūⁿ chí 'túúca nguéeⁿ nan'daa yeⁿe 'iiⁿyāⁿ chí 'tiicá nūuⁿ caati dámaaⁿ ndúúcu chí ngaⁿ'angua'a yā ndúúcu chí nguēē 'āā ca'diiⁿnúⁿ yā nguuvi chí ngaⁿ'angua'á yā.

**Jesús caⁿa ntuúⁿ yā
táámá yeⁿe chí 'cuūvi yā**

(Mr. 9.30-32; Lc. 9.43-45)

²² Taachi 'iiⁿyāⁿ s'eeⁿ snéeⁿ yā na yáⁿ'āa Galilea Jesús caⁿa yā chíi yā discípulos

yeⁿe yā: Saⁿā chí Daiya Ndyuūs ní 'iiⁿyāⁿ canéeⁿ chí ca'a yā saⁿā na tá'ā 'iiⁿyāⁿ. ²³ Ní 'iiⁿyāⁿ 'caaⁿ'nuⁿ yā saⁿā miiⁿ naati saⁿa miiⁿ ndii chííⁿ ndii 'íínú nguuvi nduuchi sa yeⁿe nguaaⁿ tináⁿā. Discípulos ní s'neeⁿ ndaachi yíinú yā.

**Yeⁿe chí nadíí've yā
yeⁿe yáacū templo**

²⁴ Taachí ndaa Jesús ndúúcu discípulos yeⁿe yā na yááⁿ Capernaum, 'iiⁿyāⁿ s'eeⁿ chí indaaca tuumi yeⁿe yáacū templo ní ndaa yā nanááⁿ Pedro miiⁿ. Ní caⁿa yā chíi yā saⁿā: ¿'Áá nguéeⁿ nadíí'vē maestro yeⁿe nī tuūmí chí cáávā yeⁿe yáacū templo?

²⁵ Pedro miiⁿ ní caⁿā sa chí 'tíicā va. Taachí sndaā yā va'ai yeⁿe sa Jesús miiⁿ caⁿa yā ndúúcu Pedro: ¿Táácā chí ngíí yeⁿe di, díí Simón Pedro? ¿Du'ú nadíí'vē impuestos yeⁿe yáⁿ'āa nanááⁿ reyes yeⁿe iⁿ'yeeⁿdí 'cūú? ¿'Áá daiya 'iiⁿyāⁿ yeⁿe yáⁿ'āa naachi rey ngaⁿ'a ntiⁿ'nyúⁿ yā nadíí've sa o 'iiⁿyāⁿ chí cuchii táámá lado?

²⁶ Pedro miiⁿ nan'gueecútaⁿa sa ní caⁿa sa chíi sa Jesús: 'Iiⁿyāⁿ chí ch-ica táámá lado nadíí've yā. Jesús caⁿa yā chíi yā Pedro: Daiya 'iiⁿyāⁿ yeⁿe yáⁿ'āa naachi rey ngaⁿ'a ntiⁿ'nyúⁿ yā miiⁿ ní nguéeⁿ canéeⁿ chí nadíí've sa. ²⁷ Nguéeⁿ neⁿe yú chí nduuvi taaⁿ yā. Maaⁿ ní cueⁿe di ná nuūⁿnīⁿ'yáⁿā ní caⁿ'nuuⁿ di 'áámá gancho yeⁿe 'yaacā nguaaⁿ nuūⁿnīⁿ. 'Yaacā chí ndaacā di vmnááⁿ vmaaaⁿ cutá'a di ní nn'guaaⁿ di cheendí tī. Mííⁿ ní ndaacā di 'aama tuūmí. Ndúúcu tuūmí miiⁿ ní caⁿ'a di cá'ā di yeⁿe 'úú ndúúcu yeⁿe maaⁿ di chí nadíí've yú yeⁿe yáacū templo.

¿Du'u 'iiⁿyāⁿ chí ch'ēete ca yā?

(Mr. 9.33-37; Lc. 9.46-48)

18 Nguuvi mííⁿ discípulos yeⁿe Jesús ndaa yā nanááⁿ yā ní caⁿ'a yā chíi yā Jesús: N'dii Jesús, ¿du'u cá

chi ch'ete cá naachi Ndyuūs nga^a ntiinyuⁿ yā na va'ai cheeti nguuví?

² Jesús 'cai yā 'áámá saⁿā 'lífⁿ chí 'lífⁿndí yā saⁿā 'lífⁿ náávtaⁿa yeⁿe dis-cípulos. ³ Ní caⁿa yā: Cuaacu níⁿnyúⁿ ngaⁿá ngí ndís'tií. Ndúúti chi ndís'tií nguéé diíⁿ nī tan'dúúca 'áámá saⁿā 'lífⁿ nguéé cuuvi ndaa nī naachí Ndyuūs ngaⁿa ntiinyuⁿ yā na va'ai cheeti nguuví. ⁴ 'Tífca 'āa du'ú nūuⁿ 'iiⁿyāⁿ chí ndiicúuⁿ maáⁿ yā tan'dúúca saⁿa 'lífⁿ 'cūū, 'iiⁿyāⁿ 'cūū chí ch'ete ca yā naachí Ndyuūs ngaⁿa ntiinyuⁿ yā na va'ai cheeti nguuví. ⁵ 'Āā du'ú nūuⁿ 'iiⁿyāⁿ chí 'cuaáⁿ yā 'áámá saⁿā 'lífⁿ ndúúcu chí du-uchí, tuuⁿmi ní 'cuaáⁿ yā 'úú.

Dendu'ū chí idiíiⁿ chí 'iiⁿyāⁿ dinuuⁿndí yā

(Mr. 9.42-48; Lc. 17.1-2)

⁶ Ní caⁿa Jesús: 'Āā du'ú nūuⁿ 'iiⁿyāⁿ chí diíⁿ yā chí 'áámá chee chí n'gaiyāá chí i'téenu yā 'úú dinuuⁿndí yā n'daācā ca cáāvā 'iiⁿyāⁿ miiⁿ chí 'iiⁿyāⁿ s'eeⁿ cāchiichí yā 'áámá tuūu yúúdu chí íngúú 'iiⁿyāⁿ na daandú yā ní canuúⁿ yā 'iiⁿyāⁿ miiⁿ naachi yāanūuⁿ yeⁿe nuuⁿn'nyáⁿā ní 'iiⁿyāⁿ miiⁿ cun'dáá nuúⁿ yā. ⁷ De'e chúúca ndaachí yeⁿe 'iiⁿyāⁿ yeⁿe iⁿ'yeeⁿdí 'cūū cáāvā dendu'ū chí 'túúca chí diíⁿ chí cuuvá yā na nuuⁿndí. 'Āā véé nūuⁿ cosas chí 'tífca naati de'e chúúca ndaachí yeⁿe 'iiⁿyāⁿ chí diíⁿ yā chí táámá 'iiⁿyāⁿ cuuva yā na nuuⁿndí.

⁸ Ní nduuti chí ta'a di o ca'a di idiíiⁿ chí dinuuⁿndí nī, 'caacá nī ta'a di o ca'a di ní diví di. N'daācā ca chí ndaa di ló'ō ta'a di o ló'ō ca'a di na vida cueⁿe daāⁿ-maⁿ ní nguéé chí caⁿa di ndúúcu 'uūvi ta'a di o nduu 'uūvi ca'a di na infierno naachí nguuchi yaⁿā chí 'áámá cūnee. ⁹ Nduutí chí nduutináaⁿ di idiíiⁿ chí idinuuⁿndí di, tun'dáa di ní diví di. N'daācā ca chí cunee di ndúúcu 'áámá nduutináaⁿ di nguéé ti chí cunee di ndúúcu nduu

'uūvi nduutináaⁿ di ní caⁿa di ná nguuchi yaⁿā chí 'áámá cūnee cueⁿe daāⁿmaⁿ.

'Áámá ejemplo yeⁿe 'iiti cuūchí chí nindái

(Lc. 15.3-7)

¹⁰ Ní caⁿa Jesús: Tandii ra diíⁿ nī ndúúcu mar 'áámá da'caiyāa n'gaiyāá ní diíⁿ nī chí cuuvi dinuuⁿndí nī. Nguéé cunncāa diíⁿ nī yeⁿe^ē ti 'úú ngaⁿá ngí ndis'tií chí ángeles yeⁿe^ē da'caiyāá snée yā ná va'ai cheeti nguuví nanááⁿ Chiidá nī inaaⁿ yā cucáávā da'caiyāá. ¹¹ Ti Saⁿā Daiyá Ndyuūs miiⁿ ní ndaa sa chí nadinguáⁿai sa chíⁿ chí nindái.

¹² ¿De'e inadicádinuuⁿ ndís'tií? Nduuti chí 'áámá saⁿā véé 'áámá ciento 'iiti cuūchí yeⁿe^ē sa ní cuuvi ndái 'áámá tí ¿'áá nguéé cū'neeⁿ sa 'iiti chí cuūⁿ ngeecú ndítiiⁿyuⁿ cuúⁿ tí ní caⁿa sa cuaáⁿ yīicū miiⁿ ní cun'nuuⁿ sa 'áámá 'iiti chí nindái miiⁿ. ¹³ Ndúúti chí ndaācā sa 'iiti, cuaacu níⁿnyúⁿ ngaⁿá ngí ndís'tií ti yeenú taavi sa cáāvā 'iiti chí nindai nguéé ti ndu'ū chí cuūⁿ ngeecú ndítiiⁿyuⁿ cuúⁿ tí chí nguéé chí nindái tí. ¹⁴ 'Tífca Chiidá yú chí canée yā ná va'ai cheeti nguuví nguéé neⁿe yā chí mar 'áámá chí n'gaiyāá s'ūuⁿ cuuvi ndái.

'Iiⁿyāⁿ canee chí nadich'eecú yā yeⁿe^ē vi'i

(Lc. 17.3)

¹⁵ 'Tiicá ntúūⁿ ngaⁿá ngí ndís'tií: Ndúúti chí 'dínū di diíⁿ sa chí nguéé n'daācā ndúúcu di, cueⁿe di ní ndee di ndúúcu sa nguaaⁿ maáⁿ nī yeⁿe chí nguee n'daācā chí diíⁿ sa. Nduuti chí cu'neeⁿ veeⁿ sa yeⁿe di, 'āā nan'dáā n'dái di ndúúcu 'dínū di. ¹⁶ Naati nduuti chí nguéé cu'neeⁿ veeⁿ sa yeⁿe di 'cuai di ná 'uūvi o 'iinu 'iiⁿyāⁿ. Ní chíi yā na 'uūvi yā o na 'iinu yā chí 'caandiveéⁿ yā tanducueⁿē chí caaⁿmaⁿ di ní véé testigos yeⁿe^ē di tan'dúúca chí canée nguūⁿ na

ley. ¹⁷ Nduúti chi 'dínu di nguéé cu'nēēⁿ veeⁿ sa yeⁿ'é yā ndúúcu yeⁿ'e di cúúví dí 'iiⁿ'yāⁿ chi ngaⁿ'a ntiiⁿ'nyúⁿ yā yeⁿ'ē 'iiⁿ'yāⁿ chi i'téenu yā Ndyuūs. Nduúti chi 'dínu di miiⁿ nguéé cu'nēēⁿ veeⁿ sa yeⁿ'é 'iiⁿ'yāⁿ chi ngaⁿ'a ntiiⁿ'nyúⁿ yā yeⁿ'ē 'iiⁿ'yāⁿ chi i'téenu yā Ndyuūs, cu'neeⁿ di 'dínū di tan'dúúcā 'áámá 'iiⁿ'yāⁿ ndiica yāⁿ'ái chi nguéé yeⁿ'ē ndaata yeⁿ'e di o tan'dúúcā chi 'aama saⁿ'ā chi inn'guee sa yeⁿ'ē yáⁿ'āa.

¹⁸ Cuaacu níⁿ'nyúⁿ ngaⁿ'á ngí ndís'ti: Tanducuéⁿ'ē chi nguéé 'cuaaⁿ nī chi 'iiⁿ'yāⁿ díⁿ yā na iⁿ'yeeⁿ'dí 'cūū Ndyuūs chi canéé ná va'ai cheeti nguuvi nguéé 'cuaaⁿ ntuúⁿ yā. Tanducuéⁿ'ē chi 'cuáaⁿ nī chi 'iiⁿ'yāⁿ díⁿ yā na iⁿ'yeeⁿ'dí 'cūū Ndyuūs chi canéé ná va'ai cheeti nguuvi 'cuaaⁿ ntuúⁿ yā.

¹⁹ Taama vmnéⁿ'ēe ngaⁿ'á ngí ndís'ti: Nduuti chi ná 'uūvi ndís'ti nduuvidaamá nī ná yáⁿ'āa 'cūū yeⁿ'e 'āā de'é nūⁿ chi caacá nī yeⁿ'ē Chiidá chi canéé yā na va'ai cheeti nguuvi, Chiidá téé yā ndís'ti. ²⁰ Tiī naachí snéé 'uūvi o 'iinu 'iiⁿ'yāⁿ chi nduuvidaama yā cucáāvā chi duuchí, miiⁿ canéé nduucú yā.

²¹ Tuu'mi ní ndaā Pedro miiⁿ nanááⁿ Jesús ní caⁿ'a yā chii yā 'iiⁿ'yāⁿ: N'dí Señor, ¿'áá n'deēe cuūví canéé chí nádich'eécú yeⁿ'ē 'diínú chi nguéé n'daācā idiiⁿ sa nduucú? ¿'Áá ndēēchē cuūví?

²² Jesús caⁿ'a yā chii yā Pedro: Nguéé ngaⁿ'á ngí dii chi ndēēchē cuuvi tiī 'iinū ngeecu ndiichi veces chi ndēēchē ngaⁿ'á ngí dii.

Ndúú 'uūví 'iiⁿ'yāⁿ chí sn'diicu yā

²³ Ní caⁿ'a Jesús: 'Tíicā naachí Ndyuūs ngaⁿ'a ntiiⁿ'nyúⁿ yā ná va'ai cheeti nguuvi ní tan'dúúcā 'áámá rey chí neⁿ'e yā tun'dáa yā cuenta ndúúcu mozos yeⁿ'é yā. ²⁴ Taachí neⁿ'e yā tuca'a yā tun'daa yā cuenta, candéé yā 'áámá mozo yeⁿ'é rey nanáaⁿ yā chi can'diicū sa n'dee n'dái

mil tuūmī. ²⁵ Mozo miiⁿ ní nguéé cuuvi diiⁿ sá nadí'vē sa. Tuu'mi ní rey chí 'iiví sa caⁿ'a yā chii yā táámá mozo miiⁿ chí n'diicui sa mozo ndúúcu n'daatā yeⁿ'ē sa ndúúcu daiya sa ndúúcu tanducuéⁿ'ē chí véé yeⁿ'ē sa ní nadí'vē mozo miiⁿ chí can'díicū sa yeⁿ'é yā. ²⁶ Tuu'mi ní mozo miiⁿ candiitin'dí sa nanááⁿ 'iivi sa ní d'cuútu sa 'iiⁿ'yāⁿ ní caⁿ'a sa chí sa 'iiⁿ'yāⁿ: N'dí Señor, cunee ngínú nī 'áámá tiempo ní 'úú ní nadí'vē tanducuéⁿ'ē yeⁿ'é nī. ²⁷ 'Iivi sa miiⁿ ní nnee ya'ai 'iinu yā saⁿ'ā ní caⁿ'a yā chii yā saⁿ'ā: Cunaⁿ'ā di ní 'āā ntéé cun'diicū di yeⁿ'é. ²⁸ Sáⁿ'a 'cūū cúinaⁿ'a sa ní nan'daā sa ní ndaācā sa mozo chí daama idiiⁿ sa ntiiⁿ'nyuⁿ ndúúcu sa. Táámá mozo miiⁿ can'díicū ntúūⁿ sa 'aama ciento tuūmī yeⁿ'ē sa. Ní mozo miiⁿ chitaⁿ'ā sa daandu sáⁿ'ā miiⁿ ní tucá'a sa chí sa yaācū sa ní caⁿ'a sa: Nadí'vē di chí can'díicū di. ²⁹ Tuu'mi ní mozo miiⁿ candiitin'dí sa nanáaⁿ sa ní caⁿ'a sa chí sa: Cunee ngínú dí 'téé ní nadii'vé yeⁿ'ē di. ³⁰ Naati saⁿ'ā miiⁿ nguéé 'cuūⁿ sa. Cheⁿ'e sa chiica sa nuūⁿ'ndí yeⁿ'e mozo miiⁿ ndúúcu sa ní s'nutⁿ yā mozo vácūū ndí nadí'vē sa chí can'díicū sa. ³¹ Tanáⁿ'ā mozos ndúúcu sa n'diichi yā chí chí ní s'neeⁿ ndaachi yi-inú yā. Ní cheⁿ'e yā nanááⁿ 'iivi yā ní caⁿ'a yā chí yā 'iiví yā tanducuéⁿ'ē chí chí. ³² Tuu'mi ní 'iiví mozos 'cai yā mozo 'cūū chí ndaa sa nanáaⁿ yā. Ní caⁿ'a yā chí yā mozo miiⁿ: Dii mozo, nguéé n'daācā di. Tanducuéⁿ'ē chí can'díicū di yeⁿ'é 'āā chí dii chí 'āā ntéé nadí'vē di ti d'cuútu di 'úú. ³³ ¿'Áá nguéé nnee ya'ai 'iinu di mozo ndúúcu di tan'dúúcā chí 'úú nnee ya'ai 'iinú dii? ³⁴ Tuu'mi ní nduuvi taáⁿ 'iivi sa ní chiicá yā nuūⁿ'ndí yeⁿ'ē sa. Ní cueⁿ'e sa vácūū chí ch'eⁿ'é yā saⁿ'ā ní miiⁿ canee sa ndii nadí'vē sa tanducuéⁿ'ē chí can'díicū sa yeⁿ'é yā.

³⁵ 'Tiicá ntúūⁿ Chiidá chí canéé na va'ai cheeti nguuvi 'tíicā díⁿ yā ndúúcu ndís'ti nduuti chí ndís'ti ní nguéé

nadich'εεcú nī ndúúcu nuuⁿmaⁿ staava yeⁿe nī yeⁿe 'áámá 'áámá 'díínu nī yeⁿe chí nguéeⁿ n'daācā ndííⁿ yā ndúúcu nī.

**Jesús ngi'cueeⁿ yā yeⁿē
chí 'tēechí vi'i 'iiⁿyāⁿ**

(Mr. 10.1-12; Lc. 16.18)

19 Taachí Jesús ch'íínú caⁿa yā ndúúduⁿ 'cūū chiicá yā na yáⁿāa Galilea ní cueⁿe yaⁿai cá yā na yáⁿāa yeⁿe Judea chí táámá lado yeⁿe yífcú Jordán. ²Nééné 'yaaⁿ 'iiⁿyāⁿ cueⁿé yā n'daa yā Jesús miiⁿ ní Jesús dííⁿ yā chí nduūvā yeⁿe 'iiⁿyāⁿ s'eeⁿ chí ngiitā.

³Tuuⁿmi ní 'iiⁿyāⁿ fariseos ndaa yā nanááⁿ Jesús miiⁿ ti neⁿé yā chí n'diichíneeⁿ yā Jesús miiⁿ. Ní ngaⁿa yā ngii yā 'iiⁿyāⁿ: N'dií Jesús, ¿'áá canéé ná ley chí saⁿā ní cu'neeⁿ sa n'daataá yeⁿē sa chí nguéeⁿ ch'εete de'ē chí ndiíⁿ tá?

⁴Jesús miiⁿ nan'guεεcútaⁿa yā ní caⁿa yā chí yā 'iiⁿyāⁿ s'eeⁿ: ¿'Áá nguéeⁿ n'geeⁿ nī naachi canéé nguūⁿ na libro yeⁿé Ndyuūs naachí ngaⁿā chí Ndyuūs din'dái yā taanduvéé cosas ndíí cuááⁿ vmaāⁿ ní din'dái yā saⁿā ndúúcu n'daataá? ⁵Ní caⁿa yā: Chííⁿ chí saⁿā cu'neeⁿ sá chiida sa ndúúcu chεecu sá ní nduūvidaama sa ndúúcu n'daataá yeⁿē sa ní nduu 'uuví yā ní nduūvī 'aama yā nduucū vi'ī. ⁶Tuuⁿmi ní 'āā ntéé 'uuví ngii yā tí 'āā 'aama núúⁿ yā. Chííⁿ chí Ndyuūs nádaama yā, 'iiⁿyāⁿ nguεε cánéé chí idivíí yā.

⁷'Iiⁿyāⁿ fariseos caⁿa yā chí yā Jesús: ¿De'ε cáávā chí Moisés caⁿa ntiiⁿnyuⁿ sa chí ca'á yā carta chí i'tēechi vi'í yā ní cu'neéⁿ yā n'daataá yeⁿe yā?

⁸Jesús caⁿa yā chí yā 'iiⁿyāⁿ fariseos: Moisés miiⁿ ní 'cuūⁿ sa chí s'neeⁿ saⁿā n'daataá yeⁿe sa cucáávā chí staava yeⁿe sa ní nééné chεechi. Naati cuááⁿ vmaāⁿ naachí chí nga'a, nguεε 'tíicā chíí. ⁹Úú ní ngaⁿá ngíí ndí's'tií chí 'āā du'ú nūuⁿ saⁿā chí cu'neeⁿ sa n'daataá yeⁿē sa ndúúti chí

nguéeⁿ cáávā chí cueⁿe tá ndúúcu taama saⁿā ní saⁿā miiⁿ cunee sa ndúúcu taama tá, véé nuūⁿndí yeⁿē sa. Sáⁿā chí 'caandavaacu sa ndúúcu n'daataá chí s'neeⁿ tá isaⁿā yeⁿē tá, véé ntúūⁿ nuuⁿndí yeⁿē sa chí adulterio.

¹⁰Tuuⁿmi discípulos yeⁿe Jesús ní caⁿa yā chí yā Jesús: Ndúúti chí saⁿā miiⁿ cú'neeⁿ sa n'daataá yeⁿē sa tuuⁿmi ní n'daācā ca chí nguéeⁿ caandavaacu sa.

¹¹Tuuⁿmi ní Jesús miiⁿ caⁿa yā chí yā discípulos: Nguéeⁿ nducyaaca 'iiⁿyāⁿ cuuvi deenu yā chuū naati 'āā dá-maāⁿ 'iiⁿyāⁿ chí Ndyuūs nca'a yā chuū. ¹²Véé 'yaaⁿ razones chí nguéeⁿ caandavaacu saⁿā. Véé saⁿa chí ndií taachi n'giindiyāaⁿ sa yeⁿē chεecu sa 'āā nguéeⁿ cuuvi caandavaacu sa. Ní véé ntúūⁿ saⁿā eunucos chí 'iiⁿyāⁿ idiíⁿ yā chí nguéeⁿ cuuvi caandavaacu sa. Véé ntúūⁿ saⁿā chí maaⁿ sa nguéeⁿ neⁿe sa caandavaacu sa cáávā chí diíⁿ sa ntiiⁿnyuⁿ yeⁿe naachí Ndyuūs ngaⁿa ntiiⁿnyúⁿ yā. Nduuti chí 'iiⁿyāⁿ cuuvi ca'cueeⁿ yā nduudú 'cūū tuuⁿmi ní 'āā deenú yā.

Jesús idi'viicú yā dá'caiyāa

(Mr. 10.13-16; Lc. 18.15-17)

¹³Tuuⁿmi ní ndaa 'iiⁿyāⁿ chí ndεε yā da'cáiyāa nanááⁿ Jesús. Ní 'íicú Jesús miiⁿ cun'du'ú yā ta'a yā vmaāáⁿ yeⁿē da'caiyāa s'eeⁿ ní caⁿ'angua'á yā yeⁿē dá'caiyāa. Discípulos yaa'vi néeeⁿ yā 'iiⁿyāⁿ chí índaa ndúúcu dá'caiyāa. ¹⁴Jesús miiⁿ ní caⁿa yā chí yā discípulos: 'Cuaáⁿ nī chí chíí da'caiyāa nanaáⁿ. Nguéeⁿ caaca taaⁿ nī yeⁿē da'caiyāa s'tíí ti naachí Ndyuūs chí canéé na va'ai chεeti nguuvi ngaⁿa ntiiⁿnyúⁿ yā ní yeⁿē da'caiyāa s'tíí. 'Tííca chíí.

¹⁵Ch'iinu chin'du'ū ta'á yā vmaāⁿ yeⁿē da'caiyāa s'eeⁿ ní chíicá yā lugar miiⁿ.

**Saⁿā 'díⁿ chí 'cuiica
ní indeē sa ndúúcu Jesús**

(Mr. 10.17-31; Lc. 18.18-30)

¹⁶ Tuu'mi ní ndaā 'áamá saⁿā 'díⁿ nanááⁿ Jesús miiⁿ ní caⁿa sa chii sa Jesús: N'dii maestro chí n'dai, ¿de'ē chí n'dáacā chí cuuví díⁿ ní cuuví ndaācā vida cueⁿe daāⁿmaⁿ chí cuuvi yeⁿé?

¹⁷ Jesús caⁿa yā chí yā saⁿā 'díⁿ miiⁿ: ¿De'ē cúúví chí ngaⁿā di chí n'dai 'úú? Mar 'áamá 'iiⁿyāⁿ nguéé n'dai yā ti dá-maáⁿ Ndyuūs. Naati ndúúti chí neⁿe di cundaā di na va'ai cheeti nguuvi naachí Ndyuūs ngaⁿa ntiⁿnyuⁿ yā, idiiⁿ di tan'dúúcā chí ngaⁿa mandamientos.

¹⁸ Saⁿā 'díⁿ míⁿ ní caⁿa sa: ¿Cheé chíí? Jesús caⁿa yā: Nguéé 'caāⁿnūⁿ di. Nguéé caⁿa di ndúúcu 'aama n'daatáá chí nguéé yeⁿē di. Nguéé diduucú di. Nguéé caaⁿmaⁿ di nduudu yaadi yeⁿé mar 'áamá 'iiⁿyāⁿ. ¹⁹ Dinéⁿe di cheecu di ndúúcu chiida di. Dinéⁿe di 'iiⁿyāⁿ na niiⁿnuúⁿ vaacú di tan'dúúcā chí neⁿe di maāⁿ di.

²⁰ Saⁿā 'díⁿ miiⁿ ní caⁿā sa: Tanducuéⁿē chuū 'āā idiⁿ ndíⁿ taachi saⁿā 'líⁿ 'úú. ¿De'ē cá indai yeⁿé?

²¹ Jesús caⁿa yā chí yā saⁿā: Ndúúti chí neⁿe di chí cúúví n'dai ca di tuu'mi ní cueⁿe di ní n'diicui di tanducuéⁿē chí véé yeⁿē di ní caⁿa di 'iiⁿyāⁿ chí nguéé yeⁿe yā. Tuu'mi ní ndaācā chí véé vaadi 'cuiica yeⁿē ná va'ai cheeti nguuvi chí cuuví yeⁿē di. Ní cuchí di ní caⁿa di nduucú.

²² Taachí saⁿā 'díⁿ miiⁿ ch'iindiveeⁿ sa chuū, cunáⁿa sa ní s'neeⁿ ndaachi yiinú sa ti neené 'cuiica sa.

²³ Tuu'mi ní Jesús caⁿa yā chí yā discípulos yeⁿe yā: Cuaacu níⁿnyúⁿ ngaⁿá ngí ndís'tií chí ngíⁿii chí cundaā 'áamá saⁿā 'cuiica naachí Ndyuūs ngaⁿa ntiⁿnyúⁿ yā na va'ai cheeti nguuvi. ²⁴ Táamá cosa ngaⁿá ngí ndís'tií chí 'áama iti camello chí ch'ete ca nguéé ti 'yuudúu 'tiicá ti, nguéé ngíⁿii ca chí

cho'ó ti na nduutinááⁿ 'iini chí cheendi va'ai 'líⁿ nguéé ti 'áamá 'iiⁿyāⁿ 'cuiica cutéenu yā Ndyuūs ní cundáa yā naachí Ndyuūs ngaⁿa ntiⁿnyúⁿ yā na va'ai cheeti nguuvi.

²⁵ Taachí ch'iindiveeⁿ discípulos yeⁿé yā chuū, néené nadicádínmuuⁿ yā ní caⁿa yā nguááⁿ maaⁿ yā: ¿Du'u cuuví nanguaⁿāi?

²⁶ Jesús ch'ínu yā discípulos ní caⁿa yā: Saⁿā yeⁿe iⁿ'yeeⁿdíⁿ cūú ní nguéé cuuví díⁿ sa chuū naati Ndyuūs cuuví díⁿ yā tanducuéⁿē.

²⁷ Tuu'mi ní Pedro miiⁿ ní nan'gueecútaⁿa sa ní caⁿa sa chí sa Jesús: N'dii Señor, cuin'diichí nī. Nús'ūú ní sn'neeⁿ 'nū tanducuéⁿē chí véé yeⁿé 'nū ní cuchí 'nū ndúúcu n'dii. ¿De'ē ndaācā yeⁿé 'nū?

²⁸ Jesús caⁿa yā chí yā discípulos: Cuaacu níⁿnyúⁿ, ngaⁿá ngí ndís'tií, chí tiempo chí cuchí taachí nducuéⁿē nduuví ngai ní Saⁿa chí Daiyá Dendyuūs 'cuúndi sa na trono yeⁿē sa ndúúcu deeve ch'ete yeⁿe maaⁿ sa ní 'cuai sa ndís'tií chí cueⁿe nī ndúúcu sa. Ní ndís'tií ní 'cueté nī na ndiichuuví tronos ní díⁿ nī juzgar ndu'u ndiichúúví ndaata yeⁿe 'iiⁿyāⁿ Israel chí judíos yā. ²⁹ 'Áā du'ú nūuⁿ chí cu'neeⁿ ná vacu yā o 'd'ínu yā o 'v'í yā o chíidá yā o cheecú yā o n'daataá yeⁿe yā o daiya yā o yáⁿāa yeⁿe yā cáávā chí duuchí, 'iiⁿyāⁿ miiⁿ ndaāca cá yā táamá ciento más cá. Ní Ndyuūs ca'á yā 'iiⁿyāⁿ miiⁿ vida cueⁿe daāⁿmaⁿ yeⁿe yā ná va'ai cheeti nguuvi. ³⁰ Néené 'yaaⁿ 'iiⁿyāⁿ chí maaⁿ snée yā cuááⁿ chí vmnaaⁿ ní 'iiⁿyāⁿ s'eeⁿ 'cuēetinée yā cuaaⁿ chí cuayiivi ní néené 'yaaⁿ 'iiⁿyāⁿ chí maaⁿ snée yā cuaaⁿ chí cuayiivi ní 'iiⁿyāⁿ s'eeⁿ 'cuēetinée yā cuaaⁿ chí vmnaaⁿ.

**Ejemplo yeⁿe 'iiⁿyāⁿ
chí díⁿ yā ntiⁿnyuⁿ**

20 Caⁿa Jesús: Naachí Ndyuūs ngaⁿa ntiⁿnyúⁿ yā yeⁿe na va'ai

cheeti nguuvi ní tan'dúucā 'áámá dueño chi véé yá'āa yeⁿe yā. Dueño miiⁿ ní can'dáa yā cuaaⁿ ná nguēetiyaaⁿ chí in'nuuⁿ yā mozos chi diiⁿ ntiiⁿnyuⁿ naachi véé dí'f'ú yvas yeⁿé yā. ²Ní indeé yā ndúucú mozos taaca chí nadí'v'e yā mozos. Ní caⁿ'a yā chí ca'a yā 'aama caadi plata nguuvi miiⁿ ní dicho'ó yā mozos miiⁿ chí diiⁿ sa ntiiⁿnyuⁿ naachi véé dí'f'ú yvas yeⁿé yā. ³Dueño miiⁿ can'dáa yā na vaacu yā taandúú cuááⁿ nááⁿ n'g'eecú nuuuⁿ nguēetiyaaⁿ ní cuéⁿe yā cuaaⁿ nii'v'ēē ní n'diichi yā ta n'duuvi sáⁿā chí snée sa chí nguéé ndaācā ntiiⁿnyuⁿ yeⁿe sa. ⁴Ní caⁿ'a yā chí yā saⁿā s'eeⁿ: Ndí's'tiī, cuéⁿe ní díⁿ ní ntiiⁿnyuⁿ yeⁿé naachi véé dí'f'ú yvas yeⁿé. 'Úú ní nadí'v'e ndí's'tiī tan'dúucā chí tuumicadiinúúⁿ chí n'daācā. Saⁿā s'eeⁿ ní cueⁿe sa diiⁿ sa ntiiⁿnyúⁿ miiⁿ. ⁵Ní can'dáa ntuuⁿ yā taandúú cuááⁿ naaⁿ ingyá'ā. 'Tiicá ntúūⁿ cun'daa yā táanduú cuaaⁿ nááⁿ n'g'eecú 'línú chíinū, 'tiicá ntúūⁿ díⁿ yā n'nuúⁿ yā mozos chí diiⁿ sa ntiiⁿnyuⁿ. ⁶Ní taandúú n'g'eecu juⁿ'u chíinū cueⁿe ntúūⁿ yā ní ndaācā yā taanduú 'uuví saⁿā chí nguéé índaācā ntiiⁿnyuⁿ yeⁿe sā. Ní caⁿ'a yā chí yā saⁿā s'eeⁿ: ¿De'ē cúúv'í chí ndí's'tiī snée ní 'muuⁿ ní núú'máⁿ nguuvi chí nguéé ntiiⁿnyuⁿ chí idíⁿ ní? ⁷Saⁿā s'eeⁿ caⁿ'a sa: Tí mar 'áámá 'iiⁿ'yāⁿ nguéé tee yā ntiiⁿnyuⁿ yeⁿé 'nū. Dueño miiⁿ caⁿ'a yā chí yā saⁿā s'eeⁿ: Ndí's'tiī, cueⁿé ní díⁿ ní ntiiⁿnyuⁿ naachi véé dí'f'ú yvas yeⁿé ní nadí'v'e ndí's'tiī tan'dúucā chí ituumicadiinúúⁿ chí n'daācā. ⁸Taachí cueⁿe yā 'yá'āa, dueño miiⁿ naachí véé dí'f'ú yvas miiⁿ caⁿ'a yā chí yā saⁿ'a chí ngaⁿ'a ntiiⁿnyuⁿ sa yeⁿe mozos: 'Cuai dí mozos ní nadí'v'e di mozos chí ndaa sa cuayiivi. 'Cuiinu maaⁿ ní nadí'v'e di mozos chí ndaa sā cuayiivi. 'Cuiinu maaⁿ ní nadí'v'e di mozos chí ndaa sā cuayiivi 't'e 'téé. 'Cuiinu maaⁿ ní nadí'v'e di mozos chí

ndaa sā vmnaaⁿ. ⁹Ndaa mozos chí cheⁿe sā na ntiiⁿnyuⁿ miiⁿ taanduú na n'g'eecú juⁿ'u chíinū ní nadí'v'e sa mozos. 'Áámá 'áámá sā ndaāca sā 'áámá caadi plata yeⁿé sā. ¹⁰Taachí ndaa mozos chí cheⁿe sā vmnaaⁿ ná ntiiⁿnyuⁿ miiⁿ, nadacádiinuuⁿ sā n'deēe cá tuūmí ndaāca sā. Mozos ntúūⁿ ndaāca sā 'áámá caadi tuūmí yeⁿe sā. ¹¹Taachí nadí'v'e sā mozos ní neenē n'deēe caⁿ'a mozos yeⁿe dueño yeⁿe naachi véé dí'f'ú yvas miiⁿ. ¹²Mozos ní caⁿ'a sa: Sáⁿ'a s'tiī tí 'āā 'ai chíinū ndaā sa ní 'áámá hora nūⁿ diiⁿ sa ntiiⁿnyuⁿ ní dáámá nūⁿ nadí'v'e ní sáⁿ'a s'tiī ndúucú nús'uū. Nús'uū ní díⁿ 'nū ntiiⁿnyuⁿ ní ch'ēetinēe 'nū na 'yá'ā. ¹³Dueño miiⁿ ní nan'g'eecútaⁿ'á yā ní caⁿ'a yā chí yā 'áámá chee mozos: Ndí's'tiī saⁿā chí n'dai nduucú, nguéé nduuví taaⁿ di nduucú. Nguéé cuncnáā idiíⁿ nduucú ndí's'tiī. ¿'Áá nguéé ndeē ndúucú ní chí nadí'v'e ndí's'tiī 'áámá caadi plata ní 'āā canéé yiinú ní? ¹⁴Cuta'á ní chí tunééⁿ ndí's'tiī ní cunaⁿ'a ní. 'Úú ní nadicádiinúúⁿ chí nadí'v'e mozos chí ndaā sa cuayiivi tan'dúucā chí nadí'v'e ndí's'tiī. ¹⁵¿'Áá nguéé cuuvi diiⁿ 'úú tan'dúucā chí neⁿé ndúucú tuūmí yeⁿé? ¿'Áá ngíⁿ g'uee ní tí 'úú ní n'dai? ¹⁶Túúca 'iiⁿ'yāⁿ chí snée cuááⁿ vmnááⁿ 'cuetinēe yā ndii cuaaⁿ cuayiivi. 'Iiⁿ'yāⁿ chí snée cuayiivi ní 'cuetinēe yā cuáaⁿ vmnaaⁿ tí neéné 'yaaⁿ n'deēé 'iiⁿ'yāⁿ chí 'cai Ndyuūs naati duu'vii 'iiⁿ'yāⁿ chí ndēeve Ndyuūs.

**Jesús ngaⁿ'a ntuuⁿ yā
yeⁿé chí 'cuūvi yā**

(Mr. 10.32-34; Lc. 18.31-34)

¹⁷Jesús cuchee yā na yááⁿ Jerusalén ní cueⁿé yā ndúucú ndu'ū ndiichúúv'í discípulos yeⁿé yā 'áámá lado. Ní Jesús caⁿ'a yā chí yā discípulos taachi ngi-icá yā: ¹⁸Ndí's'tiī ní maaⁿ ní cuchee yú na yááⁿ Jerusalén miiⁿ. 'Úú chí Saⁿ'ā chí Daiya Dendyuūs 'iiⁿ'yāⁿ s'eeⁿ nca'á yā 'úú

tá'āa chiiduú n'g'eeté ndúúcu maestros chí ngi'cueeⁿ ley. 'Iiⁿyāⁿ s'eeⁿ ní dífⁿ yā condenar 'úú ní 'cuúví. ¹⁹ Ní nca'a yā 'úú ta'a 'iiⁿyāⁿ chí nguéeⁿ ndaata yeⁿe 'iiⁿyāⁿ Israel. 'Iiⁿyāⁿ s'eeⁿ ní 'cááⁿnyuⁿneeⁿ yā 'úú ní 'cueⁿe yā 'úú ní cu'neeⁿnga'á yā 'úú. Ní 'úú chí Saⁿā chí Daiya Ndyuús miiⁿ nanduuchí ndiichi ndii 'íínuⁿ nguuvi yeⁿe nguaaⁿ tináⁿā.

**Chí cheecu Jacobo ndúúcu Juan
chiica tá yeⁿe 'áámá naaⁿ**

(Mr. 10.35-45)

²⁰ Tuu'mi ní ndaā n'daataá yeⁿe saⁿā Zebedeo nanááⁿ Jesús miiⁿ ndúúcu daiya tá ní chiintiiⁿya tá nanááⁿ Jesús miiⁿ ní dich'ēete tá 'yā ní chiica ta 'áámá favor.

²¹ Jesús ní caⁿa yā: ¿D'é'e neⁿe di? Táⁿā miiⁿ ní caⁿa tá: Taachí ndaa di naachí caaⁿmaⁿ ntiiⁿnyuⁿ di, caaⁿmaⁿ ntiiⁿnyuⁿ di chí ndúú uúví saⁿā daiyá 'cuēete sa 'diituu dí, 'aama sa ní lado tá cuaacu di ní taama sa ní lado tá 'cuéé di.

²² Tuu'mi ní Jesús nan'g'uecútaⁿa yā ní caⁿa yā chí yā 'iiⁿyāⁿ: Nguéeⁿ déenu nī de'ē chí ngiica nī. ¿'Áá cuuvi diiⁿ nī chí cú'u nuúⁿ nī yeⁿe chí n'geeⁿ yeⁿe vaso chí yeⁿe chí 'cuenú cuuvi? ¿'Áá cuuvi cuta'á nī maaⁿ ngeédínuúⁿnī chí cuta'á? Juan ndúúcu Jacobo miiⁿ ní ngaⁿa yā chí cuuvi dífⁿ yā. ²³ Jesús miiⁿ caⁿa yā chí yā 'iiⁿyāⁿ s'eeⁿ: Cuaacu níⁿnyúⁿ canéé chí cu'ú nī yeⁿe vaso yeⁿe yeⁿe chí 'cuenú cuuvi ní canéé chí cuta'á nī chí cheédínuúⁿnī chí 'úú ita'á. Naati nguéeⁿ tunééⁿ 'úú chí ca'á du'ú chí 'cuundi lado tá cuaācú o lado tá 'cuēe. Lugar 'cūú ní Ndyuús ca'á yā 'iiⁿyāⁿ chí Ndyuús 'cu-undiyaáⁿ yā cáāvā 'iiⁿyāⁿ.

²⁴ Taachí ndu'u ndííhí discípulos chí'iindiveeⁿ yā chuū, nduuvi taáⁿ yā yeⁿe nduu 'uúví discípulos chí daiya saⁿā Zebedeo. ²⁵ Tuu'mi ní Jesús yaa'ví yā discípulos ní caⁿa yā chí yā 'iiⁿyāⁿ

s'eeⁿ: 'Āā deenu ndís'tii chí 'iiⁿyāⁿ yeⁿe naciones chí ngaⁿa ntiiⁿnyuⁿ vee poder yeⁿe yā nguaaⁿ 'iiⁿyāⁿ yeⁿe naciones yeⁿe yā. Ní 'iiⁿyāⁿ chí n'g'eete cá yeⁿe naciones ní ngaⁿa ntiiⁿnyúⁿ yā yeⁿe tanáⁿa yā. ²⁶ Naati nguéeⁿ 'tíicā cuuvi nguaaⁿ ndís'tii. Saⁿā chí neⁿe sa cúúví ch'ēete sa nguaaⁿ ndís'tii canéé chí dichííⁿve sa ndís'tii. ²⁷ Saⁿā chí neⁿe sa cūnee cuaaⁿ vmnaaⁿ ca yeⁿe ndís'tii canéé chí dichííⁿve ca sa ndís'tii. ²⁸ Naati Saⁿā chí Daiya Ndyuús nguéeⁿ ndaā sa chí 'íínyāⁿ dichííⁿve yā saⁿā ti maāⁿ sa dichííⁿve sa 'iiⁿyāⁿ, ní chí ca'a sa vida yeⁿe maaⁿ sa tan'dúúcā chí precio yeⁿe nuuⁿndi cáāvā chí nadanguaⁿai yā 'yaaⁿ n'dái 'iiⁿyāⁿ.

'Uúví chí ngueenááⁿ nduūvá yeⁿe sa

(Mr. 10.46-52; Lc. 18.35-43)

²⁹ Taachí Jesús ndúúcu discípulos yeⁿe yā can'daa yā yeⁿe yāáⁿ Jericó néenéⁿ 'yaaⁿ 'iiⁿyāⁿ can'daa yā 'iiⁿyāⁿ s'eeⁿ. ³⁰ Uuvi saⁿā chí ngueenááⁿ chí vēēte sa niiⁿnuúⁿ cyúúniⁿ taachí chí'iindiveeⁿ sa chí Jesús cho'ó yā miiⁿ, 'cai yíicú sa ní caⁿa sa: N'dii Señor, Daiya David, nneéⁿ ya'ai 'iinu nī nús'uu.

³¹ Néenéⁿ 'yaaⁿ 'iiⁿyāⁿ yaa'viⁿ neeⁿ yā saⁿa s'eeⁿ chí cunēē 'diiⁿ cheendi sa naati saⁿa s'eeⁿ ní n'gai yíicú cá sa: N'dii Señor, Daiya David, nnééⁿ ya'ai 'iinu nī nús'uu.

³² Jesús miiⁿ cheendii yā ní 'cai yā saⁿā s'eeⁿ ní caⁿa yā chí yā saⁿā s'eeⁿ: ¿D'e'ē neⁿe nī chí 'úú dífⁿ ndúúcu nī?

³³ Saⁿā s'eeⁿ ní caⁿa sa: N'dii Señor, dífⁿ nī chí snaaⁿ 'nū.

³⁴ Tuu'mi ní Jesús, Daiya David, nnééⁿ ya'ai 'iinu yā saⁿā s'eeⁿ ní tuu'ví yā nduutináaⁿ sa. Ní hora mífⁿ nūuⁿ nduutináaⁿ sa nguuaaⁿ ní chí snaaⁿ sa. Saⁿā s'eeⁿ ní cueⁿe sa ndúúcu Jesús.

**Jesús sndaa yā na yáāⁿ Jerusalén
tan'dúúcā 'áámá rey**

(Mr. 11.1-11; Lc. 19.28-40; Jn. 12.12-19)

21 Taachi Jesús ndaa niiⁿnuúⁿ yā na yáāⁿ Jerusalén ní ndaa yā ná yīicū chi nguuví Olivos chí yeⁿē yáāⁿ 'lífⁿ chí nguuví Betfagé, dichó'o yā na 'uúví discípulos yeⁿé yā. ² Ní caⁿa yā chíi yā discípulos: Cueⁿe ní na yáāⁿ 'lífⁿ chí canéé niiⁿnuúⁿ. Miiⁿ ní ndaaca ní 'áámá burra chí n'deēchiichí ti ndúúcu daiya ti. Ndís'tií ní n'daatí ní 'iiti ní candée ní 'iiti 'muuⁿ. ³ Ní ndúúti chí 'áámá 'iiⁿyāⁿ yaa'vi yā ndís'tií yeⁿe 'iiti miiⁿ, caaⁿmaⁿ ní cuuvi ní 'iiⁿyāⁿ ti Señor yeⁿe yú neⁿe yā 'iiti miiⁿ. Ní 'iiⁿyāⁿ miiⁿ caama nadicho'ó yā 'iiti.

⁴ Tanducuéⁿē 'túúca chíi ní 'iicu cuuvi cuaacu chí caⁿa profeta chí ndeē yā nduudu yeⁿé Ndyuūs ndii cuááⁿ vmaanaⁿ taachí dinguúⁿ yā chuū na libro yeⁿe Ndyuūs:

⁵ Cuuví ní 'iiⁿyāⁿ chí snée yā na yáāⁿ Sión 'tíicā. Cun'diichí ní, Rey yeⁿe ní cuchíi yā nanáaⁿ ní. Rey miiⁿ ní ndiicuúⁿ yā ní canduú yā burra 'lífⁿ. Ní burra 'lífⁿ ní daiya 'iiti chí candée.

⁶ Discípulos cueⁿe yā ní dííⁿ yā tan'dúúca chí Jesús miiⁿ dichó'o yā 'iiⁿyāⁿ s'eeⁿ. ⁷ Ní candee yā burra miiⁿ ndúúcu daiyá ti. Ní sn'duú yā cotón yeⁿé yā vmaááⁿ yeⁿē burra 'lífⁿ. Ní Jesús miiⁿ ní canduú yā 'iiti. ⁸ 'Iiⁿyāⁿ chí n'dee n'dái n'doo yā cotón yeⁿé yā cuaaⁿ cyúúni. Tanáⁿa yā ch'iica yā dúuⁿnē yáⁿá ní n'doo yā cuaaⁿ cyúúni. ⁹ 'Iiⁿyāⁿ chí cueⁿe yā cuááⁿ vmaanaⁿ ndúúcu 'iiⁿyāⁿ chí cueⁿe yā cuaaⁿ dáámí yā tucá'a yā 'cai yīicú yā, ní caⁿa yā: De'ē chúúca ch'ete n'dai 'iiⁿyāⁿ chí Daiya rey David. De'e chúúca n'dai 'iiⁿyāⁿ chí cuchii ndúúcu chí duuchi Señor miiⁿ. Dich'ete yú Ndyuūs chí snée ná va'ai cheēti nguuví.

¹⁰ Taachí Jesús miiⁿ sndaa yā na yáāⁿ Jerusalén nducyáácá 'iiⁿyāⁿ yeⁿe yáāⁿ miiⁿ tuumicadínuuⁿ yā ní caⁿa yā nguaaⁿ maaⁿ yā: ¿Du'u rá sá'a 'cūū?

¹¹ 'Iiⁿyāⁿ mííⁿ ngaⁿa yā: Sá'a 'cūū saⁿa profeta Jesús chí cuchii sá cuaaⁿ na yáāⁿ Nazaret yeⁿe yáⁿāa Galilea.

Jesús inadideevé yā yaacū templo

(Mr. 11.15-19; Lc. 19.45-48; Jn. 2.13-22)

¹² Jesús miiⁿ sndaa yā ná yaacū templo yeⁿé Ndyuūs ní tun'dáa yā nducyaaca 'iiⁿyāⁿ chí in'diicui yā ndúúcu 'iiⁿyāⁿ chí ngái yā na yaacū miiⁿ. Ní cheecundaa yā mesas yeⁿe 'iiⁿyāⁿ chí n'dáa yā tuumí yeⁿe 'iiⁿyāⁿ. Ní cheecú yā sillas yeⁿé 'iiⁿyāⁿ s'eeⁿ chí in'diicui yā 'yáádá palomas. ¹³ Ní Jesús caⁿa yā chíi yā 'iiⁿyāⁿ s'eeⁿ: Na libro yeⁿe Ndyuūs naachi canéé nguúⁿ 'túúca ngaⁿa: Vá'ai yeⁿé canéé chí duuchi va'ai naachi 'iiⁿyāⁿ caaⁿmaⁿngua'á yā, naati ndís'tií ní dííⁿ ní chí yīivi yáává yeⁿe 'iiⁿyāⁿ chí díduucu.

¹⁴ Ní cheeti yaacū miiⁿ ndaa nanáaⁿ Jesús 'iiⁿyāⁿ chí ngueenáaⁿ ndúúcu 'iiⁿyāⁿ chí ngaā yó'oo, ní Jesús miiⁿ dííⁿ yā chí nduūvā yeⁿe nducyaaca yā.

¹⁵ Naati chiiduu n'geetēē ndúúcu maestros yeⁿe ley nduuví taáⁿ yā taachí n'diichi yā chí 'tíicā idiíⁿ Jesús miiⁿ ní ch'iindiveⁿ yā chuū. Ní saⁿa dá'caiyāa n'gai sa ní caⁿa sa: De'ē chúúca ch'ete saⁿa chí Daiya rey David miiⁿ. ¹⁶ Ní 'iiⁿyāⁿ s'eeⁿ caⁿa yā chíi yā Jesús miiⁿ: ¿'Áá n'giindiveⁿ ní chí saⁿa dá'caiyāa ngaⁿa sa? Jesús caⁿa yā: N'giindiveⁿ. ¿'Áá nguéé n'geeⁿ ndís'tií Nduudu yeⁿe Ndyuūs naachi canéé nguúⁿ? Ní ngaⁿa 'túúca:

'Áā dííⁿ di chí da'caiyáá ndúúcu dacua'áa caata yā chí n'daāca n'dai yeⁿé Ndyuūs.

¹⁷ Jesús ní nan'daa yā yeⁿe yaacū miiⁿ. Ní nan'daa yā yeⁿe yáāⁿ miiⁿ ní cueⁿe yā na yáāⁿ 'lífⁿ chí nguuví Betania. Ní mííⁿ canee yā nguūnū miiⁿ.

**Jesús nga^a yā chi nguεε
n'dáacā yá^a yeⁿe n'guíidii yaaⁿ
nguuví chi nguεé n'gui'i yeⁿe**

(Mr. 11.12-14, 20-26)

¹⁸ Chídéévé táámá nguuví, ní Jesús ndaa ntúuⁿ yā ná yááⁿ miiⁿ ní chíi cuiicú yā. ¹⁹ Cuaaⁿ cyúúni ní n'diichi yā 'áámá yá^a yeⁿe n'guíidii yaaⁿ nguuví níiⁿnuúⁿ cyúúni, ní cueⁿe yā naachí cutá'a yā n'guiidii miiⁿ, ní nguεé ndaaca yā n'gui'i yeⁿe, dámaāⁿ tá'aa. Ní Jesús caⁿa yā chíi yā yá^a 'túúcā: Dii yá^a, 'āā ntéé nguεε-cunéé 'cuūndi n'gui'i yeⁿe di. Tuu'mí nūuⁿ ya^a miiⁿ nti'i. ²⁰ Taachí discípulos n'diichí yā chuū, ngeⁿe yiinú yā yeⁿe ní caⁿa yā: ¿De'ē cúúví chí maāⁿcheeti nuūuⁿ nti'i n'guíidii yaaⁿ nguuví?

²¹ Jesús nán'guεεcúta^a yā ní caⁿa yā chíi yā discípulos: Cuaacu níⁿnyúⁿ ngaⁿá ngí ndís'tií, ndúúti chí ndís'tií i'téenu ní ní nguεé n'deē nadicádínuuⁿ ní, nguεé dámaāⁿ chuū cuuví díⁿ ní yeⁿe n'guíidii yaaⁿ nguuví naati cuuví díⁿ ní ndúúcu yīicū 'líⁿ 'cūú chí caaⁿmaⁿ ní cuuvi ní: Dii yīicū, cuví dí 'múúⁿ ní cueⁿe di cundáá nuūⁿ di ná nuūⁿniⁿyaⁿā, ní cuuvi. ²² Tanducueⁿe chí caaca ní naachí caaⁿmaⁿngua^a ní, ndúúti chí cu'téenu ní, ní ndaācā yeⁿe ní.

**Jesús nga^a ntiíⁿnyúⁿ yā
tan'dúúca 'iiⁿntyéⁿe**

(Mr. 11.27-33; Lc. 20.1-8)

²³ Taachí Jesús miiⁿ ndaá yā cheeti yaācū templo miiⁿ, chíiduú n'geeté ndúúcu 'iiⁿyāⁿ ndiicūú chí ngaⁿa nti-iⁿnyúⁿ yā yeⁿe yaācū ndaá yā nanááⁿ Jesús miiⁿ taachí ngi'cueⁿe yā, ní caⁿa yā chíi yā Jesús: ¿Du'ú 'íⁿntyéⁿe ngaⁿa yā chí 'túúcā idiíⁿ ní? ¿Du'ú 'iiⁿyāⁿ tee yā poder chí caaⁿmaⁿ ntiíⁿnyúⁿ ní 'túúcā?

²⁴ Nan'guεεcúta^a Jesús miiⁿ ní caⁿa yā chíi yā 'iiⁿyāⁿ s'eeⁿ: 'Úú ntúúⁿ ní intiinguuneeⁿ ndís'tií. Nduuti chí nan'guεεcúta^a ní yeⁿe, tuu'mí ní cuuví

ndís'tií du'ú 'iiⁿntyéⁿe tee yā poder 'úú chí idiíⁿ dendú'u chuū. ²⁵ Yeⁿe chí cheεdinúuⁿniⁿ Juan, ¿tíí chíicā? ¿'Áá yeⁿe Nduuús chí canéé na va'ai cheeti nguuví o yeⁿe saⁿā iⁿ'yeeⁿdí 'cūú? Tuu'mí ní 'iiⁿyāⁿ s'eeⁿ ndeé yā nguááⁿ maáⁿ yā ní caⁿa yā: Nduuti chí caaⁿmaⁿ yú chí yeⁿe n'anguuvi, tuu'mí ní Jesús caaⁿmaⁿ yā cuuví yā s'uūuⁿ: ¿De'ē cuuví chí nguεé s'teenu ní yeⁿe chí ngaⁿa Juan miiⁿ? ²⁶ Ní nduuti chí caaⁿmaⁿ yú chí yeⁿe saⁿā iⁿ'yeeⁿdí 'cūú, 'va'a yú 'iiⁿyāⁿ yeⁿe yáāⁿ ti nducyaaca yā ní déenu yā chí Juan chí cheεdinúuⁿniⁿ ní 'aama profeta yeⁿe Nduuús.

²⁷ Ní nan'guεεcúta^a yā yeⁿe Jesús miiⁿ ní caⁿa yā: Nguεé déenu 'nū. Jesús miiⁿ ní caⁿa ntúuⁿ yā: 'Tiicá ntúuⁿ 'úú ní nguεé cuuví ndís'tií du'ú 'íⁿntyéⁿe tee yā poder 'úú chí idiíⁿ chuū.

'Áámá ejemplo yeⁿe 'uuví daiya yā

²⁸ Jesús caⁿa yā: ¿De'ē inadacadinúuⁿ ndís'tií yeⁿe chuū? Caⁿá caaⁿmaⁿ ndúúcu ndís'tií yeⁿe 'áámá saⁿā chí véé 'uūví daiya sa. Ndaā sa nanááⁿ 'áámá daiya sa ní caⁿa sa: Díí daiyá, cueⁿe di ní diiⁿ dí ntiíⁿnyuⁿ naachi véé díⁿyú uvas yeⁿe. ²⁹ Daiya sa ní nan'guεεcúta^a sa ní caⁿa sa: Nguεé neⁿe. Ch'iinu maaⁿ ní nadicádínuuⁿ sa chí nguεé n'daācā diiⁿ sa ní cueⁿe sa diiⁿ sa ntiíⁿnyuⁿ miiⁿ. ³⁰ Ní cueⁿe ntúuⁿ saⁿā miiⁿ ní yaaⁿvi sa táámá daiya sa, ní 'tiicá ntúuⁿ caⁿa sa chíi sa daiya sa. Ní daiya sa míⁿ nán'guεεcúta^a sa ní caⁿa sa: 'Tíicā, n'dií chíidá, caⁿá. Naati nguεé cueⁿe sa diiⁿ sa ntiíⁿnyuⁿ. ³¹ ¿De'ē inadacadinúuⁿ ndís'tií? Naachi 'uūví daiya yā ¿cheε chí diiⁿ tan'dúúca chí neⁿe chíidá yā? 'Iiⁿyāⁿ s'eeⁿ caⁿa yā: Saⁿā chí yaaⁿvi yā vmnaaⁿ. Jesús caⁿa yā chíi yā 'iiⁿyāⁿ s'eeⁿ: Cuaacu níⁿnyúⁿ ngaⁿá ngí ndís'tií, chí 'iiⁿyāⁿ chí inn'guεé yeⁿe impuestos ndúúcu n'daataá chí véé cá saⁿā yeⁿe tá caⁿá yā vmnaaⁿ yeⁿe ní

naachí Ndyuūs ngaⁿa ntiiⁿnyúⁿ yā. ³²Ti Juan chí chædínuūⁿnīⁿ ndaā sa vmnááⁿ ndís'tiī. Chiica sá na 'áámá yúúni cuaacu ní ngaⁿa sa yeⁿe yúúni cuaacu yeⁿe Ndyuūs ní nguéé s'téenu ní yeⁿe sa. Naati saⁿā publicanos chí inn'guéé yeⁿe impuestos ndúúcu n'daataá chí véé saⁿā s'ee ndúúcu tá s'téenu yā nduudu yeⁿe sa. Ndís'tiī, taachí n'diichí ní chuū chí 'áā diiⁿ Juan, nguéé ndaacadaamí ní yeⁿe nuuⁿndi yeⁿe ní nguéé s'téenu ní chiiⁿ chí ngaⁿa Juan miiⁿ.

'Áámá ejemplo yeⁿe 'iiⁿyāⁿ chí nguæe n'dáacā idiīⁿ yā ntiiⁿnyuⁿ

(Mr. 12.1-12; Lc. 20.9-19)

³³Tuu'mi ní caⁿa Jesús: 'Caandiveéⁿ ní táámá ejemplo chí 'tæ nguæe dáámá. Canéé 'áámá 'iiⁿyāⁿ chí véé yáⁿāa yeⁿe yā ní chiīnu yā diiⁿyu yeⁿe uvas na yáⁿāa yeⁿe yā. Ní din'dái yā 'áámá cheeⁿ yeⁿe yáⁿá 'líⁿ núúⁿmáⁿ cuaaⁿ 'diituú. Din'dái yā 'aama tanque naachi cuuví tun'dáa yā nuūⁿnīⁿ yeⁿe uvas miiⁿ. Ní din'dái yā 'áámá torre nguaaⁿ diiⁿyu uvas naachi mozos yeⁿe yā 'cuætinéⁿ sa diiⁿ sa cuidado n'guiⁿi uvas miiⁿ. Dueño miiⁿ ca'a yā yáⁿāa yeⁿe yā saⁿā s'eeⁿ chí diiⁿ sa ntiiⁿnyuⁿ miiⁿ ní cueⁿe yā táámá país.

³⁴Taachí snuū ca'a yeⁿe tiempo yeⁿe n'guiⁿi uvas miiⁿ chí túúmá yā, dueño dicho'ó yā mozos yeⁿe yā chí saⁿā s'eeⁿ nca'a sa n'guiⁿi uvas yeⁿe yáⁿāa, parte yeⁿe n'guiⁿi chí tuneⁿ dueño. ³⁵Saⁿā chí diiⁿ ntiiⁿnyuⁿ na yáⁿāa miiⁿ sta'a sa mozos. 'Áámá ní ch'eⁿe sa, táámá ní ch'iiⁿnuⁿ sa ní táámá ní chiituu sa. ³⁶Dueño miiⁿ dicho'ó yā taandúú 'uūvi mozos, 'āā vi'í mozos chí cheⁿe vmnaaⁿ. 'Tiicá ntúúⁿ diiⁿ sa ndúúcu mozos.

³⁷Cuayiivi míⁿ dichó'o yā daiya yā ti dueño miiⁿ ní ngaⁿa yā: Saⁿā s'eeⁿ ní diiⁿ sa honrar daiyá. ³⁸Taachí saⁿā s'eeⁿ chí diiⁿ sa ntiiⁿnyuⁿ yeⁿe yáⁿāa miiⁿ n'diichi sa daiya dueño miiⁿ, caⁿa sa

nguááⁿ maaⁿ sa: Sáⁿa 'tī chí cuuví yeⁿe sa yáⁿāa 'cūū. 'Caaⁿnuⁿ yú sáⁿā miiⁿ ní ndúúcu chí véé naaⁿ chí cuuví yeⁿe sa ní cuuví yeⁿe yú. ³⁹Ní sta'a sa daiya dueño miiⁿ ní tun'daa sa saⁿā 'áámá lado yeⁿe chééⁿ yeⁿe díⁿyú uvas miiⁿ ní ch'iiⁿnuⁿ sa saⁿā.

⁴⁰Taachí ndaā dueño yeⁿe díⁿyú uvas ¿de'e díⁿ yā ndúúcu saⁿā chí idiīⁿ ntíⁿnyuⁿ na yáⁿāa yeⁿe ya?

⁴¹'Iiⁿyāⁿ s'eeⁿ ní caⁿa yā: Dueño miiⁿ ní 'caaⁿnúⁿ yā saⁿā chí cúúncheeⁿ sa diiⁿ sa. Ní ca'á yā yáⁿāa yēⁿe yā naachi véé díⁿyú uvas táámá 'iiⁿyāⁿ chí díⁿ yā ntiⁿnyuⁿ na yáⁿāa miiⁿ, 'iiⁿyāⁿ chí ntée yā uvas chí tuneⁿ yā na tiempo yeⁿe n'guiⁿi.

⁴²Jesús caⁿa yā chí yā 'iiⁿyāⁿ s'eeⁿ: ¿'Áá nguéé n'geēⁿ ndís'tiī naachi canéé nguūⁿ na libro yeⁿe Ndyuūs chí ngaⁿa 'túúca:

Tuū chí 'iiⁿyāⁿ chí idin'dái yā va'ai sta'a yā ní ch'æcú yā 'áámá lado ti nguéé neⁿe yā. Tuūⁿ 'cūū tuūⁿ ch'æte ní dichíⁿvē ca ní canéé tuū ch'æte esquina yeⁿe va'āi. Chuū ní Señor Ndyuūs díⁿ yā. Chuū ní 'áámá chí ngeⁿe yīnu yú taachí inaaⁿ yú yeⁿe.

⁴³Chíⁿ chí 'túúca nga'á ngíⁿ ndís'tiī, chí naachí Ndyuūs ngaⁿa ntiiⁿnyúⁿ yā diví yā yeⁿe ndís'tiī ní ca'á yā táámá 'iiⁿyāⁿ chí ca'á yā n'guiⁿi chí tuneⁿ lado yeⁿe Ndyuūs. ⁴⁴'Āā du'ú nūuⁿ 'iiⁿyāⁿ chí cun'dáa nduū yā vmnaaⁿ na tuū 'cúú ní caātú 'íⁿi yeⁿe yā. Naati 'āā du'ú nūuⁿ 'iiⁿyāⁿ chí cun'dáa nduū tuū 'cúú vmnaaⁿ yeⁿe yā, 'cuíⁿú ndúúví yuūni yā.

⁴⁵Taachí 'iiⁿyāⁿ chiiduú n'geeté ndúúcu 'iiⁿyāⁿ fariseos ch'iindiveéⁿ yā chuū, 'iiⁿyāⁿ s'eeⁿ tuumicadíⁿnuuⁿ yā chí yeⁿe yā ngaⁿa Jesús miiⁿ. ⁴⁶Nadicadíⁿnuuⁿ yā taacā chí cuta'á yā Jesús miiⁿ naatí 'va'a yā 'iiⁿyāⁿ yeⁿe yáⁿ tí 'iiⁿyāⁿ s'eeⁿ i'téenu yā Jesús miiⁿ tan'dúúca chí 'áámá profeta chí ngaⁿa nduudu yeⁿe Ndyuūs.

**'Áámá ejemplo ye^mē 'viicu
chí n'giindivaacú yā**

22 Jesús tuca'á yā ndee yā taama v^mnéⁿēe ndúúcu ejemplos, ní caⁿa yā: ²Naachí Ndyuūs ngaⁿa ntiⁿnyúⁿ yā ye^mē va'ai cheeti nguuví tan'dúúca 'áámá rey chí chiica yā 'viicu chí ch'iindivaacu saⁿa daiya yā. ³Ní dichó'o yā mozos ye^me yā chí yaa'vi sa 'iiⁿyāⁿ chí ndíi yā invitado naati 'iiⁿyāⁿ s'eeⁿ nguéé néⁿe yā caⁿa yā. ⁴Ní dichó'o yā tan'duuví mozos ní caⁿa yā chíi yā mozos: Caaⁿmaⁿ ní cuuvi ní 'iiⁿyāⁿ chí ndíi yā invitado 'tíicā. 'Āā véé yaāaⁿ comida miiⁿ. 'Āā ch'iⁿnuⁿ i'tiindu ye^mé ní 'iiti chí 'viicheé. Tanducuéⁿē 'āā véé yaāaⁿ. Cuchíi ní 'viicu. ⁵Naatí 'iiⁿyāⁿ s'eeⁿ nguéé diiⁿ yā cuenta. 'Áámá yā ní cueⁿe yā cuéé^ti ye^me yā. Taama yā ní cueⁿe yā negocio ye^me yā. ⁶Tanáⁿa yā ní sta'á yā mozos. Cuⁿu yā ndúúcu sa ní ch'iⁿnuⁿ yā mozos. ⁷Taachi rey miiⁿ ch'iindiveⁿ yā chuū, ndúúvi taaⁿ yā. Ní dichó'o yā soldados ye^mé yā ní caⁿa ntiiⁿnyúⁿ yā chí 'caaⁿnuⁿ sá 'iiⁿyāⁿ chí ch'iⁿnuⁿ yā mozos ye^mé yā. Ní 'neeⁿ yaⁿā sa yāāⁿ vaacú 'iiⁿyāⁿ s'eeⁿ. ⁸Tuu'mi ní caⁿa yā chíi yā mozos ye^mé yā: Cuaacu níⁿnyúⁿ 'viicu miiⁿ ní 'āā véé yaāāⁿ caavā 'iiⁿyāⁿ chí chíi yā invitado naati nguéé n'dai taaví yā chí cuchii yā. ⁹Maaⁿ ní cueⁿe ní na yúúni chí can'daā ye^me yáⁿā yāāⁿ ní díiⁿ ní invitar 'iiⁿyāⁿ chí chíi yā na 'viicu, 'iiⁿyāⁿ chí ndaāca ní. ¹⁰Mozos ní can'daa sa ní cueⁿe sa cuaaⁿ cyúúni ní nadaama sa nducyaaca 'iiⁿyāⁿ chí ndaāca sa, 'iiⁿyāⁿ chí cúuncheeⁿ yā ndúúcu 'iiⁿyāⁿ chí n'dai yā. Ní ndaā nducyaacá 'iiⁿyāⁿ s'eeⁿ chí mozos 'cai sa ní n'deēe n'dái 'iiⁿyāⁿ ndaá yā 'viicu miiⁿ.

¹¹Ní rey miiⁿ cheⁿe yā n'diichi yā 'iiⁿyāⁿ chí ndii yā invitado ní ndaācá yā 'áámá saⁿā chí nguéé cánúúⁿ sá catecai sa ye^mē naachi n'giindivaacu yā. ¹²Ní caⁿa yā chíi yā saⁿā: N'dii amigo, ¿taāca

chí ndāa ní 'muuⁿ chí nguéé canúúⁿ ní catecai ní ye^mē chí n'giindivaacú 'iiⁿyāⁿ? Saⁿā miiⁿ ní nguéé nan'guēecútaⁿa sa ye^me yā. ¹³Tuu'mi ní rey miiⁿ caⁿa yā chíi yā mozos ye^me yā: 'Caāchiichí ní ca'la sa ndúúcu ta'a sa ní divíi ní saⁿā ndii 'múúⁿ ní 'cuecú ní saⁿā cuaaⁿ chuvá'āi na maāiⁿ. Mííⁿ cuecú sa ní ché'é diiⁿyuⁿ sa cueⁿe daāⁿmaⁿ. ¹⁴Jesús caⁿa ntúúⁿ yā chuū: Nééné 'yaaⁿ yā chí Ndyuūs 'cuai yā naati duu'ví yā chí Ndyuūs ndeēv yā.

**Chíⁿ chí ntinguuneeⁿ yā
ye^me asunto ye^me impuestos**

(Mr. 12.13-17; Lc. 20.20-26)

¹⁵Tuu'mi ní 'iiⁿyāⁿ fariseos cueⁿé yā ní nduuvidaamá yā. Ní ndeé yā nguaaⁿ maáⁿ yā táacā cuuvi díiⁿ yā chí Jesús miiⁿ cástaⁿa nduudú ye^me yā chí caaⁿmáⁿ yā 'áámá nduudu yaadi. ¹⁶Ní fariseos dichó'o yā 'iiⁿyāⁿ ye^me yā ndúúcu 'iiⁿyāⁿ ye^me Herodes miiⁿ chí caaⁿmáⁿ yā Jesús: N'dii maestro, déenu 'nū chí n'dii ní 'áámá saⁿā chí n'dai. N'dii ní díiⁿ ní chí n'dáacā. Ní cuaacu níⁿnyúⁿ ngi'cueeⁿ ní yúúni ye^me Ndyuūs. Ní nguéé 'va'a ní 'iiⁿyāⁿ ti nguéé indeé ní cuidado táaca 'iiⁿyāⁿ. ¹⁷Maaⁿ ní cúúví ní nús'uu: ¿De'ē inadacádínnuⁿ ní? ¿'Áá canéé nguúⁿ na ley chí nadí'v'e 'nū emperador César tuūmi ye^mé 'nū o nguéé?

¹⁸Jesús tuumicádínnuⁿ yā chí 'iiⁿyāⁿ s'eeⁿ ní díiⁿ yā chí nguéé n'daācā ní caⁿa yā chíi yā 'iiⁿyāⁿ s'eeⁿ: ¿De'ē cúúví chí neⁿe ní n'diichineéⁿ ní 'úú? Ndís'tii ní v'e 'uúví chí nadacádínnuⁿ ní. ¹⁹Téé ní tuūmi chí nadí'v'e ní ye^me impuesto. 'Iiⁿyāⁿ s'eeⁿ ní ch'iⁿi yā 'áámá tuūmi Jesús miiⁿ. ²⁰Tuu'mi ní Jesús miiⁿ caⁿa yā chíi yā 'iiⁿyāⁿ s'eeⁿ: ¿Du'u nááⁿ chí canéé ná tuūmi? ¿Du'ū chí nguúví canéé nguūⁿ?

²¹'Iiⁿyāⁿ s'eeⁿ ní caⁿa yā: Naaⁿ emperador César cānee. Ní Jesús caⁿa yā chíi yā 'iiⁿyāⁿ s'eeⁿ: Nca'a ní tuūmi emper-

ador César chííⁿ chí yeⁿē sa ní ca'a ní Ndyuūs chí yeⁿe Ndyuūs.

²² Taachí ch'iindiveéⁿ yā chuū, cheⁿe yiinu yā ní cueⁿe yā.

Chiiⁿ chí ntiinguuneeⁿ yā yeⁿe chí 'iiⁿyāⁿ nduuchi yā yeⁿe nguaaⁿ tináⁿā

(Mr. 12.18-27; Lc. 20.27-40)

²³ Nguuvi miiⁿ 'iiⁿyāⁿ saduceos ndaá yā nanááⁿ Jesús miiⁿ. 'Iiⁿyāⁿ saduceos ngaⁿa yā chí nguééⁿ índuuchi 'iiⁿyāⁿ yeⁿē nguaaⁿ tináⁿā. Ní ntiinguuneeⁿ yā Jesús, ²⁴ ní caⁿa yā: N'dií maestro, Moisés miiⁿ caⁿa sá chí 'āā du'ú nūⁿ saⁿā chí 'cuūvi sa ní nguééⁿ ch'iindí daiya n'daataá yeⁿē sa tuu'mi ní 'diinū sa 'caandavaacu sa ndúúcu n'daataá míⁿ. Ní saⁿā miiⁿ ní 'cuūndí daiya sá lado yeⁿē 'díinu tináⁿā. ²⁵ Maaⁿ ní véé ndēēchē sáⁿa nūⁿ yeⁿē cheécú sa yeⁿē chiidá sa. Sáⁿā vm-naaⁿ miiⁿ ní ch'iindivaacu sa ní ch'ií sa. Ní nguééⁿ daiya n'daataá yeⁿē sa. Ní canee n'daataá yeⁿē sa. Ní 'díinu sa ní canee sá ndúúcu tá. ²⁶ 'Tiicá ntúūⁿ ch'ó'oo yeⁿē ndii chiiⁿ ndii 'uuvi saⁿā. 'Tiicá ntúūⁿ ch'ó'oo yeⁿe saⁿā chí ndii 'iinū. 'Tiicá ntúūⁿ ch'ó'oo yeⁿē saⁿa s'eeⁿ nduu ndēēchē sa. ²⁷ Ndíí ná ch'iinú ní ch'ií ntúūⁿ n'daataá miiⁿ. ²⁸ Taachí nduuchi 'iiⁿyāⁿ yeⁿe nguaaⁿ tináⁿā, naachí ndēēchē saⁿā s'eeⁿ ní ¿chee sa chí n'daataá yeⁿē sa táⁿā caati nducyaaca sá canee sá ndúúcu tá?

²⁹ Tuu'mi ní Jesús miiⁿ ní nan'guēcútaⁿa yā ní caⁿa yā chii yā 'iiⁿyāⁿ s'eeⁿ: Ndís'tií ní nguééⁿ n'daācā nadicádiinuuⁿ ní, ti nguééⁿ déenu ní taacā ngaⁿa na libro yeⁿé Ndyuūs naachi caneeⁿ nguūⁿ. Ndíí nguééⁿ ndúú déenu ní poder yeⁿé Ndyuūs. ³⁰ Ti naachí nduuchi 'iiⁿyāⁿ yeⁿe nguaaⁿ tináⁿā, nguééⁿ 'caandavaacú yā. Ndíí nguééⁿ ca'a ra yā chí 'caandavaacu daiya yā ti cuuvi yā tan'dúúca ángeles chí dichí'vē Ndyuūs chí canee yā na va'ai cheetí nguuvi. ³¹ Naati yeⁿē chí nduuchi

yā yeⁿe nguaaⁿ tináⁿā, ¿'áá nguééⁿ n'geeⁿ ní chí maáⁿ Ndyuūs caⁿa yā yeⁿē taachí caⁿa yā 'túúca?: ³² 'Úú ní Ndyuūs yeⁿē Abraham ndúúcu Isaac ndúúcu Jacob. Ndyuūs miiⁿ ní nguééⁿ Ndyuūs yeⁿe tináⁿā ti yeⁿé 'iiⁿyāⁿ chí sндуuchi.

³³ Taachí nducyaaca 'iiⁿyāⁿ ch'iindiveéⁿ yā chuū, cheⁿe yiinú yā yeⁿē nduudu yeⁿē Jesús miiⁿ tan'dúúca chí ngi'cueeⁿ yā.

Mandamiento chí ch'ete ca

(Mr. 12.28-34)

³⁴ Tuu'mi ní saⁿā fariseos taachí ch'iindiveéⁿ yā yeⁿe chí Jesús díⁿ yā, 'iiⁿyāⁿ saduceos 'āā ntéé caⁿa yā ndúúcu Jesús miiⁿ, fariseos miiⁿ nduuvidaamá yā. ³⁵ 'Áamá saⁿa fariseo abogado chí ngi'cueeⁿ sa chí ngaⁿā ley miiⁿ eⁿe sa n'diichinééⁿ sa Jesús ní ntiinguuneeⁿ sa 'iiⁿyāⁿ. Ní caⁿa sá chii sa Jesús: ³⁶ N'dií Maestro, ¿cheé mandamiento chí ch'ete n'dai ca yeⁿē na ley yeⁿē Moisés?

³⁷ Jesús caⁿa yā chii yā saⁿā: Dinéⁿe di Señor Ndyuūs yeⁿē di ndúúcu núúⁿmáⁿ stáává yeⁿē di ndúúcu núúⁿmáⁿ alma yeⁿē di ndúúcu núúⁿmáⁿ vaanicadínūⁿ yeⁿē di. ³⁸ Chuū chí vmnaaⁿ ní ch'éētē ca chí cuuvi tanáⁿā mandamientos. ³⁹ Ndi-ichi ndii 'úúví tan'dúúca chí vmnááⁿ vmnaaⁿ: Dinéⁿe di 'iiⁿyāⁿ na niⁿnuúⁿ vaacú di tan'dúúca chí neⁿe dí maáⁿ di. ⁴⁰ Yeⁿē ndúú 'uūvi mandamientos miiⁿ canee tanducueéⁿ yeⁿe ley Moisés miiⁿ ndúúcu nduudu chí ngaⁿa profetas ndii cuááⁿ vmnaaⁿ.

¿Du'u 'iiⁿyāⁿ chíí daiya Cristo?

(Mr. 12.35-37; Lc. 20.41-44)

⁴¹ Taachí 'iiⁿyāⁿ fariseos ndiidáámá yā Jesús ntiinguuneeⁿ yā fariseos, ⁴² ní caⁿa yā chii yā 'iiⁿyāⁿ s'eeⁿ: ¿De'ē nadicádiinuuⁿ ndís'tií yeⁿe Cristo? ¿Du'ú daiyá 'iiⁿyāⁿ 'cúú? Ní fariseos caⁿa yā chii yā: Daiya David miiⁿ.

⁴³ Ní Jesús caⁿa yā chii yā fariseos: ¿Táacā cuuvi David miiⁿ na espíritu yeⁿe sa ní caⁿa sa chi Cristo ní Señor? Ní caⁿa yā chuū:

⁴⁴ Caⁿa Señor Ndyuūs miiⁿ chii yā Señor Cristo yeⁿé: 'Cuūndi di lado tá cuaacú chi lado yeⁿe honor ndíí 'úú cuⁿééⁿ 'iiⁿyāⁿ chi contra yeⁿé di cuaaⁿ ndii yā na ca'a di tan'dúúca chi enemigos ní 'áámá banco 'líí.

⁴⁵ Maaⁿ ní nduuti chi David miiⁿ caⁿá yā yeⁿe Cristo chi Señor yeⁿé yā, ¿táacā cuuvi chii chi Señor miiⁿ ní daiya David 'iiⁿyāⁿ?

⁴⁶ Mar 'áámá 'iiⁿyāⁿ nguéé cuuvi nan'guécútaⁿa yā yeⁿé mar 'áámá. Ndíí nguuví miiⁿ s'neeⁿ naaⁿ yā ntinguuneeⁿ yā Jesús miiⁿ.

Jesús ngaⁿa yā chi dííⁿ yā cuidado yeⁿe maestros chi ngi'cueeⁿ ley ndúúcu 'iiⁿyāⁿ fariseos

(Mr. 12.38-40; Lc. 11.37-54; 20.45-47)

23 Jesús yaaⁿvi yā 'iiⁿyāⁿ ndúúcu discípulos yeⁿe yā ní caⁿa yā: ² Maestros chi ngi'cueeⁿ ley ndúúcu 'iiⁿyāⁿ fariseos, 'iiⁿyāⁿ s'uuⁿ deenu n'dai yā ní ngi'cueeⁿ yā ní caaⁿmaⁿ cuaacú yā ley yeⁿe Moisés. ³ 'Tiicā ntúūⁿ cu'téenu ndís'tií ní dííⁿ nī tan'duucā 'iiⁿyāⁿ s'eeⁿ ngaⁿa yā, naati nguéé dííⁿ nī tan'dúúca 'iiⁿyāⁿ s'eeⁿ idííⁿ yā tí 'iiⁿyāⁿ s'eeⁿ ní ngaⁿa yā yeⁿe ley naati nguéé 'tíicā idííⁿ yā. ⁴ 'Iiⁿyāⁿ s'eeⁿ ní dííⁿ yā tan'dúúca chi 'caachiichí yā chēdi chi n'gii taaví chi 'iiⁿyāⁿ nguéé cuchée yā ní ngaⁿá yā chi 'iiⁿyāⁿ canée chí cuchée yā. Naati 'iiⁿyāⁿ s'eeⁿ maáⁿ yā ndíí nguéé neⁿé yā 'neeⁿ nduutitáⁿ yā chi tuuⁿvi yā chēdi miiⁿ ní dííⁿ yā. ⁵ 'Iiⁿyāⁿ s'eeⁿ ní idííⁿ yā nducueⁿé n'tiíⁿnyuⁿ yeⁿe yā caati tanáⁿā 'iiⁿyāⁿ snáaⁿ yā ní n'diichí yā táacā idííⁿ yā. Neⁿé yā candē yā chí canée nguⁿ chi yeⁿé Nduudu yeⁿe Ndyuūs ní s'neeⁿ yā 'áámá caja 'lííⁿ ní dich'iichí yā 'áámá yiⁿmaⁿ ní s'neeⁿ yā maaⁿ ta'a yā ní ncheeté

yā. Ní n'geēti núuⁿ yā vestido yeⁿe yā chí n'geē 'núuⁿ ca. ⁶ 'Iiⁿyāⁿ s'eeⁿ ní neⁿe yā 'cuundí yā sillás chí yeⁿe 'iiⁿyāⁿ ch'ēte taachi caⁿá yā 'áámá 'viicu chí che'é yā. Ní neⁿe yā 'cuundí yā sillás yeⁿe honor chí vnnááⁿ vnnaaⁿ ná yáacu sin-agogas. ⁷ Ní neⁿe yā chí tanáⁿā 'iiⁿyāⁿ dííⁿ n'daacá yā ní dííⁿ yā saludar 'iiⁿyāⁿ taachi sneé yā cuaaⁿ nī'vēē ní neⁿe yā chí 'iiⁿyāⁿ caaⁿmaⁿ yā, maestro, maestro, taachi dííⁿ yā saludar 'iiⁿyāⁿ.

⁸ Naati ndís'tií ní nguéé neⁿe nī chí caaⁿmaⁿ 'iiⁿyāⁿ yeⁿe nī maestro ti 'áámá 'iiⁿyāⁿ núuⁿ chí maestro ní 'iiⁿyāⁿ miiⁿ chí Cristo. Ní nducyaaca ndís'tií ní hermanos yeⁿe nī vi'í. ⁹ Nguéé caaⁿmaⁿ nī yeⁿé mar 'áámá 'iiⁿyāⁿ yeⁿe yáⁿāa 'cúú: N'dií chiiduú padre, ti dámaāⁿ 'áámá chí Chiida yú chí Ndyuūs chí canée na va'ai chēeti nguuvi. ¹⁰ Ndíí nguéé ndúú caaⁿmaⁿ rá yā yeⁿe nī: Maestro, ti 'áámá chí maestro yeⁿe nī chí Cristo. ¹¹ 'Iiⁿyāⁿ chí ch'ēte ca yā yeⁿé nī canee chí dichíí'vē yā ndís'tií. ¹² Ní 'iiⁿyāⁿ chí dííⁿ yā chí cuuví ch'ēte maáⁿ yā, 'iiⁿyāⁿ miiⁿ cuuví ndiicuúⁿ yā. 'Iiⁿyāⁿ chí idííⁿ yā chí maáⁿ yā ndiicuúⁿ yā, cuuví ch'ēte yā.

Jesús caaⁿmaⁿ yā yeⁿe nuuⁿndi yeⁿe 'iiⁿyāⁿ fariseos

(Mk. 12.40; Lc. 11.39-42, 44, 52; 20.47)

¹³ Naati de'e chúúca ya'ai yeⁿé ndis'tií, maestros chí ngi'cueeⁿ ley ndúúcu 'iiⁿyāⁿ fariseos, ndís'tií uúvī naaⁿ uúvī cheendí nī, ti nguéé ngi'cueeⁿ nī yeⁿe naachí Ndyuūs ngaⁿa n'tiíⁿnyúⁿ yā nanááⁿ 'iiⁿyāⁿ yeⁿe iⁿ'yeeⁿdí 'cúú. Ndíí nguéé ndúú maaⁿ ndís'tií cundáa nī va'ai chēeti nguuvi. Ndíí nguéé n'guúⁿ nī tanáⁿā 'iiⁿyāⁿ chí neⁿe ndaá yā chí cūndaa yā.

¹⁴ De'e chúúca ya'ai yeⁿé ndís'tií, 'iiⁿyāⁿ chí dingúúⁿ ní ngi'cueeⁿ nī ley ndúúcu 'iiⁿyāⁿ fariseos, ti ndís'tií uúvī nááⁿ uúvī cheendí nī, ti ndivíí nī va'ai yeⁿé n'daataá nguáⁿā. Ní néené n'deēe ngaⁿa nī taachi ngaⁿanguaⁿá nī nanááⁿ

nducyaaca 'iiⁿyāⁿ. 'Úú ngaⁿá chi ch'εete ca castigo yeⁿe nī nguuvi yeⁿe juicio.

¹⁵ De'ε chúúcā ya'ai yeⁿe ndís'tiī, maestros chi ngi'cueeⁿ ley ndúúcu ndís'tiī 'iiⁿyāⁿ fariseos ti ndís'tiī 'uūvi naaⁿ 'uūvi cheendí nī. Nds'tiī ní chiicá nī ndíf yáⁿāa yaⁿai táamá lado nuūⁿnīⁿyáⁿā ní díⁿ nī chi 'áamá 'iiⁿyāⁿ i'téenu yā tan'dúúca ndís'tiī. Ní taachí 'iiⁿyāⁿ cu'téenu yā tan'dúúca ndís'tiī neⁿé nī, idíⁿ nī chi 'iiⁿyāⁿ miiⁿ ní 'uūvi tanto cuuvi yā yeⁿe daiya infierno nguéé ti chi ndís'tiī. ¹⁶ De'ε chúúcā ya'ai yeⁿe ndís'tiī, chi ngi'cueéⁿ nī tan'dúúca 'iiⁿyāⁿ chi ngueenááⁿ. De'ε inadacádíinuⁿ ndís'tiī. Nduuti chi 'áamá 'iiⁿyāⁿ caⁿa yā chi díⁿ yā 'áamá cosa ní 'cuai yā, “cáávā yaācū templo”, tuuⁿmi ní nguéé de'ε vee nacádíinuⁿ nī yeⁿe chuū, naati nduuti chi 'iiⁿyāⁿ 'cuai yā, “cáávā 'diiⁿnguaaⁿ” chi véé cheeti yaācū templo miiⁿ, tuuⁿmi ní 'iiⁿyāⁿ miiⁿ canee cuuⁿmiⁿ chi díⁿ yā chi caaⁿmáⁿ yā chi caⁿa yā chi díⁿ yā. ¹⁷ Nds'tiī ní 'iiⁿyāⁿ chi nguεε deenu ti tan'dúúca 'iiⁿyāⁿ ngueenááⁿ 'tiicá nī. ¿Cheε cá ch'εete ca? ¿'Áá 'díⁿnguāāⁿ miiⁿ o yáacū miiⁿ chí díiⁿ chi didεεve 'díⁿnguāāⁿ miiⁿ cucááva Ndyuūs? ¹⁸ 'Tiicá ntúūⁿ ndís'tiī: Ndúúti chi 'áamá 'iiⁿyāⁿ caⁿa yā chí díⁿ yā 'áamá cosa, ní n'gai yā, “cáávā nátaī”, nguéé de'ε vee nacadíinuⁿ nī yeⁿe. Naati ndúúti chi 'iiⁿyāⁿ n'gai yā, “cáávā ofrenda” chi candúú vmnááⁿ yeⁿe nátaī, tuuⁿmi ní 'iiⁿyāⁿ miiⁿ canee cúúⁿmíⁿ chí díⁿ yā chí caⁿa yā chí díⁿ yā. ¹⁹ Nds'tiī ní tan'dúúca 'iiⁿyāⁿ chí chechí tiiⁿ o 'iiⁿyāⁿ chí ngueenááⁿ, 'tiicá nī ti ¿cheε ca chí ch'εete ca? ¿'Áá ofrenda miiⁿ o nátaī chí díiⁿ chí ofrenda miiⁿ ní didεεve cucáávā Ndyuūs? ²⁰ 'Tíicā. 'iiⁿyāⁿ chí n'gai yā, “cáávā nátaī”, n'gai yā cáávā nátaī ndúúcu tanducuéⁿe chí cánduū nátaī. ²¹ 'iiⁿyāⁿ chí n'gai yā, “cáávā yaācū templo”, nguéé dámaāⁿ ngaⁿa yā cáávā yaācū templo miiⁿ naati cáávā

maáⁿ Ndyuūs chí canéé na yaācū templo miiⁿ. ²² 'iiⁿyāⁿ chí n'gai yā, “cáávā va'ai cheeti nguuvi”, n'gai yā cáávā trono yeⁿe Ndyuūs ní cáávā Ndyuūs chí véé yā na trono miiⁿ.

²³ De'ε chúúcā ya'ai yeⁿe ndís'tiī, maestros chí ngi'cueéⁿ yā ley ndúúcu 'iiⁿyāⁿ fariseos, ndís'tiī 'uuvi naaⁿ 'uūvi cheendí nī. Nds'tiī ní nga'á nī Ndyuūs 'áamá ndi-ichi parte yeⁿe yaāta chí yiivií, ndúúcu yaāta anís, ndúúcu yaāta comino. Ní ndís'tiī ní s'néeⁿ nī 'aama lado cosas chí n'gεete ca yeⁿe na ley, chíⁿ chí n'diichí nī nuuⁿndi yeⁿe 'iiⁿyāⁿ ndúúcu vaadi cuaacu ndúúcu vaadi ya'ai 'iinu ndúúcu vaadi i'téenu. Chuū canee chí díⁿ nī ní díⁿ nī táamá naaⁿ dendu'ū. ²⁴ Nds'tiī 'iiⁿyāⁿ chí tan'dúúca chí ngueenááⁿ chí candεε nī 'iiⁿyāⁿ. Díⁿ nī tan'dúúca chí i'yááⁿ nī 'áamá 'yaācū yeⁿe nuūⁿnīⁿ chí cu'ú nī naati cu'ú nī 'iiti camello chí ch'εete.

²⁵ De'ε chúúcā ya'ai yeⁿe ndís'tiī, maestros yeⁿe ley ndúúcu 'iiⁿyāⁿ fariseos, ndís'tiī ní 'uūvi naaⁿ 'uūvi cheendí nī, ti inadεεvé nī cuaaⁿ daami yeⁿe vaso ndúúcu cu'u, chí tan'dúúca cuerpo yeⁿe maáⁿ nī, naati cuááⁿ cheētí nī ní ndiituú ndúúcu chí diduucú nī ndúúcu tanducuéⁿe chí nguεε n'daācā. ²⁶ 'Caandiveⁿ nī ndís'tiī 'iiⁿyāⁿ fariseos chí tan'dúúca chí ngueenááⁿ. Díiⁿ cá nī chí didεεvé nī chí cuaaⁿ cheeti vaso ní 'tiicá ntúūⁿ cu'u, tuuⁿmi ní cuuvi dεεvé nī cuaaⁿ chuváⁿāi vaso miiⁿ.

²⁷ De'ε chúúcā ya'ai yeⁿe ndís'tiī, maestros yeⁿe ley ndúúcu 'iiⁿyāⁿ fariseos, ndís'tiī 'uuvi naaⁿ 'uūvi cheendí nī, ti ndís'tiī ní tan'dúúca yaīnyāⁿ 'cuéé chí cuaaⁿ daami míⁿ n'dεεvéé chí nneⁿe yaāchí caaca, ti cuaacu níⁿnyúⁿ cuááⁿ cheētí miiⁿ ndiituú 'iini yeⁿe tináⁿā ndúúcu taanduvéé cosas chí vaati. ²⁸ 'Tíicā ndís'tiī ti cuaacu níⁿnyúⁿ n'giⁿi nī 'iiⁿyāⁿ chí ndís'tiī ní saⁿā chí n'dai

ndís'tií naati cuaaⁿ cheētí nī ndiituú ndúúcu nduudu yaadi ndúúcu nuuⁿndi.

²⁹ De'e chúúca ya'ai yeⁿe ndís'tií, maestros yeⁿe ley ndúúcu 'iiⁿyāⁿ fariseos, 'iiⁿyāⁿ 'uúví naaⁿ 'uúví cheendí nī, ti idin'dái nī yaínyāⁿ yeⁿe profetas ní n'deève nī yaínyāⁿ yeⁿe 'iiⁿyāⁿ chí n'dai taachi snēe yā iⁿ'yeeⁿdí 'cūú. ³⁰ Nds'tií ní ngaⁿ'á nī 'tíicā: Ndúúti chí nús'uu ch'etinée nū tiempo chí ch'etinée chidá nū cuááⁿ vmnaaⁿ, nguéé chinnee 'nū ch'iiⁿ'núⁿ nū profetas taachi cungéé yuúuⁿ yeⁿe yā. ³¹ 'Tíicā ndís'tií ní ngaⁿ'á nī nduudu cuaacu yeⁿe maáⁿ nī ti ndís'tií ní dáíyá 'iiⁿyāⁿ chí ch'iiⁿ'nuⁿ yā profetas. ³² Nds'tií ní canéé chí díiⁿ nī tan'dúúca chiidá nī.

³³ Nds'tií ní tan'dúúca cúú 'tíicā ndáátá yeⁿe nī. ¿Táácā cuuvi nguáⁿ'ai nī yeⁿe castigo yeⁿe infierno? ³⁴ Cáávā chuú 'úú ní dicho'ó nanááⁿ ndís'tií profetas chí candee yā Nduudu yeⁿe Ndyuús, ndúúcu 'iiⁿyāⁿ chí déenū, ndúúcu 'iiⁿyāⁿ chí ngi'cueeⁿ ley. N'dúúví 'iiⁿyāⁿ s'eeⁿ ní ndís'tií ní chita'á nī 'iiⁿyāⁿ ní chí'nee'nga'á nī 'iiⁿyāⁿ. Tá n'duuví yā ní ch'eⁿ'é nī 'iiⁿyāⁿ na yaācū sinagogas yeⁿe nī ní can'dáa nī 'iiⁿyāⁿ ndii na 'áámá yááⁿ táámá yááⁿ chí ch'eenú yā chii. ³⁵ Ní ndís'tií ní ca'á nī cuenta yeⁿe nducuéⁿe yuúúⁿ yeⁿe 'iiⁿyāⁿ chí n'dai chí 'iiⁿyāⁿ yeⁿe nī ch'iiⁿ'núⁿ yā 'iiⁿyāⁿ na yáⁿ'āa 'cūú ndii yuúúⁿ yeⁿe Abel chí saⁿ'ā n'dai ndii yuúúⁿ yeⁿe Zacarías daiya saⁿ'ā Berequías chí ndís'tií ch'iiⁿ'nuⁿ nī náávtaⁿ'ā yeⁿe yaācū miiⁿ ndúúcu nátaí miiⁿ. ³⁶ Cuaacu níⁿ'nyúⁿ ngaⁿ'á ngií ndís'tií: Castigo yeⁿe tanducuéⁿ'ē chuú canee vmnaaⁿ 'iiⁿyāⁿ chí snēe yā maaⁿ tiempo 'cūú.

**Jesús ngeecu yā cáávā 'iiⁿyāⁿ
yeⁿe yááⁿ Jerusalén**

(Lc. 13.34-35)

³⁷ Ní ngaⁿ'a Jesús: Nds'tií 'iiⁿyāⁿ yeⁿe yááⁿ Jerusalén, ndís'tií 'iiⁿyāⁿ yeⁿe yááⁿ

Jerusalén, chí ch'iiⁿ'núⁿ nī 'iiⁿyāⁿ profetas ní chí chiituú nī 'iiⁿyāⁿ chí Ndyuús dicho'ó yā nanáaⁿ nī. Néené n'deēe 'cuúví neⁿ'é nadaamá daiya nī tan'dúúca tūú chí inadáámá tī daiya tī maaⁿ ngeechi tī ní nguéé 'cuuⁿ nī. ³⁸ Nds'tií, n'diichí nī. Ndyuús chí'neeⁿ yā ndís'tií ndúúcu vaacu nī dámaāaⁿ. ³⁹ Tī 'úú ní ngaⁿ'á ngií ndís'tií, ti ndii maaⁿ ní 'āā ntéé snaaⁿ nī 'úú ndíí ndaa tiempo taachí caaⁿ'maⁿ nī: De'e chúúca n'dai 'iiⁿyāⁿ chí cuchii yā ndúúcu chí duuchi Señor chí Daiyá Dendyuús miiⁿ.

**Jesús ngaⁿ'a yā chí yaācū
templo miiⁿ ní ntuuví**

(Mr. 13.1-2; Lc. 21.5-6)

24 Taachí Jesús miiⁿ nan'dáa yā yeⁿe yaācū templo cueⁿ'é yā. Discípulos yeⁿ'é yā ní ndaa yā nanáaⁿ yā ní n'giⁿ'i yā Jesús miiⁿ va'ai s'eeⁿ yeⁿe yaācū templo miiⁿ. ² Jesús miiⁿ ní n'guεεcútaⁿ'a yā ní caⁿ'a yā: ¿'Áá inaaⁿ ndís'tií nducyáácā chuú? Cuaacu níⁿ'nyúⁿ ngaⁿ'á ngií ndís'tií, chí nguéé cunee tuúu cuaaⁿ vmnaaⁿ yeⁿe víⁱ chí nguéé ntuuví.

**Jesús ngi'cueeⁿ yā de'ē chí
cuuvi taachi 'āā ndaa niiⁿ'nuúⁿ
nguuví chí 'cuiinu iⁿ'yeeⁿ'dī**

(Mr. 13.3-23; Lc. 21.7-24; 17.22-24)

³ Jesús vée yā ná yiicū chí nguuví Olivos. Discípulos ndaa yā nanáaⁿ yā taachi canee yā damáaⁿ yā ní caⁿ'a yā chii yā Jesús: Cúúví nī nús'uu tíí cuaⁿ'ā cuuví chuú. ¿De'e señal 'cuuⁿ'miⁿ nī taachi 'āā ndaa nī taama vmnéⁿ'ēe nī taachí 'cuiinu iⁿ'yeeⁿ'dī?

⁴ Jesús nan'guεεcútaⁿ'a yā yeⁿe yā ní caⁿ'a yā: Cundée nī cuidado chí mar 'áámá 'iiⁿyāⁿ nguéé canche'éeⁿ yā ndís'tií. ⁵ Yááⁿ n'dái 'iiⁿyāⁿ ndaa yā ndúúcu chí duuchí ní caaⁿ'maⁿ yā 'tíicā: 'Úú chí Cristo 'úú. Ní canche'éeⁿ yā 'yaaⁿ n'dái 'iiⁿyāⁿ. ⁶ Ní 'caandiveéⁿ nī chí véé caan-

daá ní 'caandiveéⁿ nī chi 'cuūndī caandaá. Cundéé nī cuidado chi 'iiⁿ'yāⁿ s'eeⁿ nguéé castaⁿ'a vaanicádiinúⁿ yeⁿ'e nī ti canéé chi chíⁿ nducuéⁿ'ē dendu'ū chi 'túúcā cuuvi, naatí 'āā cuéé chí 'āā 'cuiinu iⁿ'yeeⁿ'dī. ⁷Ti 'áámá nación 'cuuⁿ'maⁿ ndúúcu taama nación, ní 'áámá rey ndúúcu nducuéⁿ'e país naachi ngaⁿ'a ntiiⁿ'nyuⁿ yā contra yeⁿ'e taama rey ndúúcu nducuéⁿ'e país naachi chí ngaⁿ'a ntiiⁿ'nyuⁿ yā. Ndaá tiempos chi cuicu ndúúcu tiempos chí 'iiⁿ'yāⁿ 'cueenú yā cuuvi cáávā chí ya'ai yeⁿ'é yā, ní ndúúcu tiempos chí inuⁿ'u yáⁿ'āa n'deeé cuááⁿ n'dai. ⁸Taachí cuuví dendú'ū chí 'túúcā ní chíi tuu'mi ní cáámá cúuⁿ'nga'a vaādi ya'ai.

⁹Tuu'mi ní 'iiⁿ'yāⁿ s'eeⁿ ní nca'a yā ndís'tiī na ta'a 'iiⁿ'yāⁿ chí 'cueenu nī cuuvi ní 'caaⁿ'núⁿ yā ndís'tiī. Ní nducyáácá 'iiⁿ'yāⁿ nguéé cuaaⁿ yā ndís'tiī caavā chí ngaⁿ'a nī chí duuchí. ¹⁰Ní tiempo miiⁿ neené 'yaaⁿ 'iiⁿ'yāⁿ chí 'āā i'téenu yā yeⁿ'e 'úú ní 'cueenú yā cuuvi. Ní 'áámá yā caaⁿ'máⁿ yā contra yeⁿ'e taama yā chí i'téenu yā. Ní 'āā ntéé neⁿ'é yā vi'ī. ¹¹Ní néené 'yaaⁿ 'iiⁿ'yāⁿ profetas falsos chí nguéé ngaⁿ'a yā nduudu cuaacu yeⁿ'é Ndyuūs ndaa yā ní cannche'éí yā 'yaaⁿ n'dái 'iiⁿ'yāⁿ. ¹²Ní cáávā chí 'iiⁿ'yāⁿ neené dinuuⁿ'ndí yā. 'Āā ntéé neⁿ'e yā 'áámá yā táámá yā vi'ī. ¹³'Iiⁿ'yāⁿ chí cuchéé yā ní 'áámá i'téenu yā yeⁿ'é Ndyuūs ndii tiempo chí 'cuūvi yā ní nguáⁿ'ai yā. ¹⁴Ní nduūdū cuaacú 'cūū chí ngai yeⁿ'é naachi Ndyuūs ngaⁿ'a ntiⁿ'nyúⁿ yā 'iiⁿ'yāⁿ canéé chí caaⁿ'maⁿ yā nanááⁿ nducuéⁿ'ē iⁿ'yeeⁿ'dī. Ní nduudu cuaacu yeⁿ'é Ndyuūs ní cūnee chí 'caandiveéⁿ 'iiⁿ'yāⁿ yeⁿ'e tanducuéⁿ'ē nación yeⁿ'e núúⁿ'máⁿ iⁿ'yeeⁿ'dī tuu'mi ní ndaa chí 'cuiinu iⁿ'yeeⁿ'dī.

¹⁵Taachí ndís'tiī snaaⁿ nī tanducuéⁿ'ē chí cunncaā ca tan'dúúcā chí dinguuⁿ profeta Daniel ndii cuááⁿ vmnaaⁿ taachi cheendíí yā na cuaaⁿ chí santo tuu'mi

ní ndís'tiī ndúúcu 'iiⁿ'yāⁿ chí n'geeⁿ yā túúmícadíinuⁿ yā yeⁿ'ē. ¹⁶Ní tiempo yeⁿ'e chúú, 'iiⁿ'yāⁿ chí snée yā na yáⁿ'āa Judea cáanu yā caⁿ'á yā cuaaⁿ yíicū. ¹⁷Ní 'iiⁿ'yāⁿ chí sndúu yā tíiⁿ va'āi nguéé ngua'ái yā chí cuta'á yā 'tee chí snúúⁿ cheeti va'āi ti cáanu yā. ¹⁸'Iiⁿ'yāⁿ chí canéé yā cueeti nguéé nguēcundí yā na vaacu yā chí cuta'á yā tiiⁿnuⁿ yeⁿ'e yā ti cáanu yā. ¹⁹Dē'e chúúcā ya'ai yeⁿ'ē n'daataá chí véé daiya tá cheeti tá ndúúcu n'daataá chí ngiicu dacua'āa yeⁿ'ē tá nguuvi s'eeⁿ chí cáanu yā. ²⁰Caaⁿ'maⁿ'ngua'á nī chí taachí ndaa nguuvi chí cáanu nī, nguéé tiempo chí 'iiche ndíí nguéé ndúú nguuvi sábado chí ntaavi'tuunúúⁿ nī. ²¹Tuu'mi ní ndaa nguuvi chí néené 'cueenu cá nī cuuvi chí nguéé n'diichi nī, ndíí nguéé ndúú ndíí naachi chinga'ā yeⁿ'e iⁿ'yeeⁿ'dī, ndíí mááⁿ, ndíí nguéé ndúú snaaⁿ ra nī cuayiivi. ²²Ndúúti chí Ndyuūs nguéé 'āā diduu'ví yā tiempo chí 'cueenu cá nī cuuvi mar 'áámá 'iiⁿ'yāⁿ nguéé nguaⁿ'ai yā. Naati cáávā 'iiⁿ'yāⁿ chí Ndyuūs deeve yā, Ndyuūs diduu'ví yā tiempo miiⁿ.

²³Tuu'mi ní ndúúti chí 'áámá 'iiⁿ'yāⁿ caaⁿ'maⁿ yā cuuvi yā ndís'tiī: Cuin'diichí nī, 'muuⁿ canee Cristo, o cuin'diichí nī, miiⁿ canéé Cristo miiⁿ'ya, nguéé cu'teenú nī 'iiⁿ'yāⁿ miiⁿ. ²⁴Ti ndaa 'yaaⁿ n'dái 'iiⁿ'yāⁿ chí ngaⁿ'á yā chí Cristo yā naati nguéé Cristo 'iiⁿ'yāⁿ s'eeⁿ. Ndaá 'yaaⁿ n'dái profetas falsos chí nguéé caaⁿ'máⁿ yā nduudu cuaacu yeⁿ'é Ndyuūs. Ní 'iiⁿ'yāⁿ s'eeⁿ idíⁿ yā señales chí n'geete ndúúcu vaadi n'giinu. Ní cannche'éí yā 'iiⁿ'yāⁿ ndíí 'iiⁿ'yāⁿ chí Ndyuūs ndēeve yā nduuti chí cuuvi yā. ²⁵'Caandiveéⁿ nī. Āā ndíí vmnaaⁿ, 'āā ngaⁿ'á ngíí chuū ndís'tiī. ²⁶Ndúúti chí 'iiⁿ'yāⁿ caaⁿ'maⁿ yā cuuvi yā ndís'tiī 'tíicā: Cuin'diichí nī, Cristo canéé yā na yáⁿ'āa cuūⁿ'máⁿ, nguéé caⁿ'á nī miiⁿ. O nduuti chí caaⁿ'máⁿ yā: Cuin'diichí nī, Cristo canéé yā ná 'aama cuarto cheeti va'ai, nguéé cu'téenu

nī. ²⁷ Tan'dúúcā 'cuai chí ngiia cuááⁿ naachi ican'daa 'yáⁿā ní inaaⁿ yú ndíf taachi ndaā cuaaⁿ na ngiia 'yáⁿā, 'tí-icá ntúúⁿ cuuvi taachí 'úú ndaá, 'úú chí Saⁿā chí Daiya Ndyuūs. ²⁸ Tí 'āā tíí nūuⁿ naachi candiiti cuerpo yeⁿe tináⁿā, míⁿ nduuvidaama luutí.

Taaca ndaá Saⁿa chí Daiya Ndyuūs

(Mr. 13.24-37; Lc. 21.25-28)

²⁹ Jesús caⁿa yā: Tuu'mi ní taachi 'cui-inu 'cueenu yā cuuvi ní ch'ó'oo tiempo miiⁿ, tuu'mi ní 'yáⁿā ní cuuví maāⁿ, ní 'i'iyū miiⁿ ní nguéé cunuūⁿ dæve. 'Iiⁿnyuⁿ ní cun'daā yeⁿe nanguuvi ní nanguuvi ní nuⁿu ndúúcu poder yeⁿe. ³⁰ Tuu'mi ní snaáⁿ yā señales nanguuvi chí yeⁿe Saⁿā chí Daiya Ndyuūs. Ní nducyáácá 'iiⁿyāⁿ yeⁿe nducuéⁿe nación yeⁿe iⁿ'yeeⁿdi ní cuεεcú yā ní snaaⁿ yā chí ndaá Saⁿā chí Daiya Ndyuūs na meéⁿ yeⁿe nanguuvi ndúúcu poder yeⁿe yā ndúúcu chídæve n'dai yeⁿe maáⁿ yā. ³¹ Taachí dich'ó'o yā ángeles yeⁿe yā, tuu'mí nūuⁿ áámá yā ní dí'cuεεcú yā trompeta yeⁿe yā. Ní ángeles miiⁿ nadáámá yā 'iiⁿyāⁿ chí yeⁿe Cristo chí Cristo ndæve yā yeⁿe cuaaⁿ núúⁿ máⁿ 'yáⁿā 'cūū ndii 'áámá 'diituú ndii táámá 'diituú yeⁿe nanguuvi.

³² Cuayiivi miiⁿ ní Jesús caⁿa yā: 'Cueéⁿ nī ejemplo yeⁿe yáⁿá yeⁿe n'guífídi yaaⁿ nanguuvi taachí ínguaaⁿ nu duúⁿnē n'gaiyáá ní ican'daā tá'āā 'āā déénu nī chí 'āā cuchii yáāⁿ. ³³ 'Tiicá ntúúⁿ, ndís'tií, taachí snaaⁿ nī tanducuéⁿe chúu, 'āā deenú nī chí 'āā cháā ndaa Saⁿā chí Daiya Dendyuūs. Ní 'āā neené niiⁿnuúⁿ cánéé tiempo chí ndaa sa. ³⁴ Cuaacu níⁿnyúⁿ ngaⁿá ngii ndís'tií, chí 'iiⁿyāⁿ chí snée yā maaⁿ nguéé 'cuūvi yā neⁿe chí 'āā cuéé cuuvi tanducuéⁿe chúu. ³⁵ Nanguuvi ndúúcu 'yáⁿā 'cūū ch'ó'oo naati nduudu yeⁿe nguεε ch'ó'oo.

³⁶ Naati nanguuvi miiⁿ ndúúcu hora miiⁿ taachí ndaa Saⁿā chí Daiya Dendyuūs, nguεε véé mar 'áámá 'iiⁿyāⁿ chí deenú yā

yeⁿe, ndíf nguéé ndúú ángeles yeⁿe va'ai cheeti nguuvi, ti dámaaⁿ Ndyuūs Chiidá deenú yā.

³⁷ Tan'dúúcā chí chií tiempo chí 'āā ch'ó'oo taachi canéé Noé miiⁿ tiempo taachi ch'ó'oo diluvio, 'tíicá cuuvi taachí ndaā Saⁿā chí Daiya Dendyuūs. ³⁸ Ní tiempo taachi 'āā cuéé ch'ó'oo diluvio chí cueeⁿ taaⁿ cuūvi, 'iiⁿyāⁿ ní ngé'e yā, ní ngi'í yā, ní n'giindivaacu yā, ní nga'a yā daiya yā chí n'giindivaacu, ndíf nguuvi chí Noé miiⁿ sndaá yā na arca chí barco ch'εete ca chí din'dái yā. ³⁹ Ní 'iiⁿyāⁿ yeⁿe tiempo yeⁿe Noé nguéé s'neeⁿ veéⁿ yā ndíf taachi cheeⁿ taaⁿ cuūvi ní ch'iinū nducyáácá 'iiⁿyāⁿ ti chíi yā. 'Tiicá ntúúⁿ cuuvi taachí ndaa Saⁿā chí Daiya Ndyuūs. ⁴⁰ Tuu'mi ní nanguuvi taachi ndaa Daiya Ndyuūs snéé 'uūvi saⁿā na cuεeti. 'Aama saⁿā ní Cristo candée yā saⁿā, taama saⁿā ní cūnee sa. ⁴¹ Ní na 'uūvi n'daataá snee ta ingúú tá 'áámá va'ai naachi ingúú yā. 'Aama tá ní candee yā táⁿā, taama ta ní cūnee ta.

⁴² Ndís'tií cundée nī cuidado, ti nguεε déénu nī de'ē hora chí ndaá Señor yeⁿe nī. ⁴³ Naati déénu nī chuū. Ndúúti chí saⁿā n'dai chí vaacu sa miiⁿ déénu sa de'ē hora ndaa chí duucu tuu'mi ní canduuchi sa. Ní nguéé ca'a sa lugar chí diduucú yā chí véé cheeti vaacu sa. ⁴⁴ Chífⁿ chí ndís'tií ní 'cuεetinéé yaaⁿ nī ti Saⁿā chí Daiya Ndyuūs miiⁿ ndaa yā hora chí ndís'tií nguéé déénu nī.

Ejemplo yeⁿe mozo chí n'daācā ní yeⁿe mozo chí nguéé n'daācā

(Lc. 12.41-48)

⁴⁵ Caⁿa Jesús: ¿Du'ú dueño caⁿa yā ntiíⁿnyuⁿ chí s'nee yā vmnaaⁿ yeⁿe va'ai yeⁿe yā nduuti chí nguéé 'aama mayor-domo chí n'daācā n'dai ní deenu sa ní ca'a sa chí che'e mozos yeⁿe yā hora chí che'e sa? ⁴⁶ De'e chúúca n'dai mayor-domo miiⁿ chí dííⁿ sa ntiíⁿnyuⁿ taachi dueño miiⁿ ní ndāa yā ní ndaaca yā

mayordomo chí diiⁿ sa tan'dúúca chí neⁿe yā. ⁴⁷ Cuaacu níⁿnyúⁿ nga'á ngí ndís'tií, chí dueño miiⁿ cu'néeⁿ yā mayordomo miiⁿ chí caaⁿmaⁿ ntiíⁿnyuⁿ sa yeⁿe chí véé yeⁿe yā. ⁴⁸ Ndúúti chí mayordomo miiⁿ ní nguéeⁿ n'dáacā idiiⁿ sá ní 'ífcú nacádínuuⁿ sa na staava yeⁿe sa chí dueño cuuvi 'náaⁿ yā ní ndaa yā. ⁴⁹ Ní tucá'a sa ch'eⁿe sa mozos chí idiiⁿ sa ntiíⁿnyuⁿ ndúúcu sa ní ngé'e sa ní ngíⁿ sa ndúúcu amigos yeⁿe sa ní cuu'vi sa. ⁵⁰ Dueño miiⁿ ní ndaa yā nguuví chí nguē canéé ngíⁿú sa ní hora chí nguē deenu sa. ⁵¹ Ní dueño miiⁿ ní ca'á yā 'aama castigo ch'eete mayordomo miiⁿ. Ní 'caacá yā mayordomo chí cheeyē ní cu'neeⁿ yā mayordomo miiⁿ chuva'āi ndúúcu 'iiⁿyāⁿ 'uuvi nááⁿ 'uúví cheendi yā. Lugar miiⁿ ní cuēcu sa ní che'e 'diiⁿyuⁿ sa cueⁿe daāⁿmaⁿ.

Ejemplo yeⁿe ndiichi n'daataá chí cuíⁿnuú

25 Jesús caⁿa yā taama ejemplo: Naachí Ndyuūs ngaⁿa ntiíⁿnyúⁿ yā na va'ai cheeti nguuví tan'dúúca ndiichi n'daataa chí cuíⁿnuú chí sta'á yā lámparas yeⁿe yā ní can'dáa yā. Ní cueⁿe yā ndaāca yā saⁿā chí 'caandavaacú sa. ² Ní nyuⁿu yā candēē n'daāca yā cuidado ti lista yā. Tá nyuⁿu yā nguéeⁿ candēē yā cuidado ní diíⁿ yā tan'dúúca chí n'daataá tonta yā. ³ N'daataa chí cuíⁿnuú chí nguéeⁿ candēē yā cuidado, candēē yā lámparas yeⁿe yā ní nguéeⁿ candēē yā petróleo yeⁿe. ⁴ Ní nyuⁿu yā ní candēē n'daāca yā cuidado, candēē yā botellas yeⁿe petróleo ndúúcu yā ndúúcu lámparas yeⁿe yā. ⁵ Ní chí'naaⁿ saⁿā miiⁿ chí ndaa sa chí 'caandavaacu sa. Ní taachi 'āā cuéé ndaa sa, n'daataá s'eeⁿ chí ndaa yááⁿ nááⁿ yā ní ch'eeti yaadú yā. ⁶ Chí maⁿā yaaⁿ, chí'indiveéⁿ yā 'áámá nduudu chí 'caí. Ní ngaⁿa yā: Ndaa sáⁿā chí 'caandavaacu sa. Can'dáa nī ní diíⁿ nī recibir saⁿā. ⁷ Tuu'mi ní nducyaaca

chí cuíⁿnuú s'éeⁿ nducueⁿ yā ní nuuⁿmí yā lámparas yeⁿe yā. ⁸ Chí cuíⁿnuú chí nguéeⁿ lista yā caⁿa yā chíi yā chí cuíⁿnuú chí lista yā: Téé nī 'téé petróleo yeⁿe nī nús'uu ti lámparas yeⁿe 'nū 'āā cháā 'āā n'tuuvi. ⁹ Chí cuíⁿnuú chí candēē yā petróleo n'guēcútaⁿa yā ní caⁿa yā chíi yā tanáⁿa yā: Nguéeⁿ cuuvi teéⁿ nū ndís'tií. Nús'uū ní neⁿe cá 'nū petróleo chí candēē 'nū ní 'ífcú 'áátii nguéeⁿ cuuvi falta yeⁿe yú. N'dáaca ca yeⁿe ndís'tií chí caⁿa nī naachí in'diicuí yā petróleo ní cuái nī yeⁿe ní. ¹⁰ Neⁿe chí n'daātā s'eeⁿ chí nguē lista yā cueⁿe yā cuái yā petróleo miiⁿ, saⁿā chí 'caandavaacu sa ndaa sa ní chí cuíⁿnuú chí candēē n'daāca yā cuidado cueⁿe yā ndúúcu saⁿā naachí n'giindivaacu 'iiⁿyāⁿ. Ní saⁿā miiⁿ nan'gaādí sá cheendi va'āi miiⁿ. ¹¹ Cuayivi miiⁿ ní ndaa tanáⁿā chí cuíⁿnuú s'eeⁿ ní caⁿa yā: N'dií Señor, Señor, nan'guaaⁿ nī yeⁿe 'nū. ¹² Naati saⁿā miiⁿ chí 'caandavaacu sa ní nan'guēcútaⁿa yā ní caⁿa yā: Cuaacu níⁿnyúⁿ nga'á ngí ndís'tií, 'úú ní nguéeⁿ n'diichí ndís'tií.

¹³ Maaⁿ ní nducyaaca ndís'tií candēē nī cuidado ti nguéeⁿ déenu nī de'ē nguuví o de'ē hora chí Saⁿā chí Daiya Dendyuūs ndaa sa.

Ejemplo yeⁿe tuūmí

¹⁴ Tuu'mi ní caⁿa Jesús: Naachí Ndyuūs ngaⁿa ntiíⁿnyuⁿ yā na va'ai cheeti nguuví tan'dúúca 'áámá saⁿā chí caⁿā yaⁿái yā ndii táámá yaⁿāa ní 'cai yā mozos yeⁿe yā ní nca'a yā mozos miiⁿ dendúⁿ chí véé yeⁿe yā, chí diiⁿ sa cuidado yeⁿe.

¹⁵ 'Aama mozo ní ca'a yā nyuⁿu mil caadi, táámá mozo ní 'uúví mil caadi, táámá mozo ní 'aama mil caadi. Ní ca'a yā 'áámá 'áámá mozo tan'dúúca chí chee sa. Ní cueⁿe yaⁿái yā. ¹⁶ Mozo chí sta'ā nyuⁿu mil caadi cunaⁿā sa ní diiⁿ sa negocio ndúúcu tuumí miiⁿ. Ní ndaāca sa tá nyuⁿu mil caadi yeⁿe daiya túmí

miiⁿ. ¹⁷ Tiicá ntúūⁿ mozo chí sta'a sa ná 'uūvi mil caadi miiⁿ ndaācā sa ná 'uūvi mil caadi yeⁿē daiya tuumi miiⁿ. ¹⁸ Mozo chí sta'ā sa 'aama mil caadi cheⁿe sa ní s'neeⁿ sa tuūmī miiⁿ chēti 'áámá 'cuutíí cuééé ní ch'i sa maaⁿ yáⁿā. 'Tíicā chin-uuⁿ n'dé'ei sa tuumī yeⁿe 'iiví sa.

¹⁹ Chí 'naáⁿ ní ndaā 'iivi mozos miiⁿ ní tun'dáa yā cuenta ndúúcu mozos. ²⁰ Ndaā mozo chí nca'a yā nyuⁿu mil caadi nanáaⁿ yā. Ndēē sa ta nyuⁿu mil caadi yeⁿē daiya tuūmī miiⁿ. Ní caⁿa sa chí sa 'iiví sa: N'diī señor, nyuⁿu mil caadi tee ní 'úú. 'Íngaā. Ndaācā ta nyuⁿu mil caadi daiya tuūmī yeⁿe ní. ²¹ 'Iivi mozo miiⁿ ní caⁿa yā chí yā saⁿā: Dii mozo yeⁿé chí n'daācā ní n'dai, n'daācā n'dai ndííⁿ di. Maaⁿ ti 'āā n'daācā diiⁿ di ndúúcu chí duū'vi, maaⁿ ní caaⁿmaⁿ nti-nyuⁿ di yeⁿe n'dēē cá teé dii. Cho'o di cuaaⁿ chēti va'āi ní cueⁿe daāⁿmaⁿ cuuvi yeenú di nduucú. ²² Ndaā ntúūⁿ nanáaⁿ yā mozo chí nca'a yā na 'uūvi mil caadi. Mozo miiⁿ ní caⁿa sa chí sa 'iivi sa: N'diī señor, 'uūvi mil caadi tee ní 'úú. 'Íngaā tuumi yeⁿe ní. Ndaācā ta na 'uūvi mil caadi daiya tuūmī miiⁿ. ²³ 'Iivi sá caⁿa yā chí yā saⁿā: Díí mozo yeⁿé chí n'daācā ní n'dai, ní n'daācā idiíⁿ di. Nguéé ch'ēte teé dii ní n'daācā dííⁿ di. Maaⁿ ní caaⁿmaⁿ ntiinyuⁿ yeⁿe n'dēē ca chí teé dii. Cho'o di cuaaⁿ chēti va'āi ní cueⁿe daāⁿmaⁿ cuuvi yeenú di nduucú. ²⁴ Ndaa nanáaⁿ yā mozo chí nca'á yā 'áámá mil cáádí, ní caⁿa sa chí sa 'iivi sa: N'diī Señor, deenú tí n'diī ní chēché ní, ní dííⁿ ní cosechar ndúúcu tuumi yeⁿé ní chí nguéé ngiinu ní, ní 'naaⁿ trigo ngááⁿ ní naachí nguéé ngiinu ní ti yeⁿe ní. ²⁵ Chííⁿ chí dííⁿ ti 'va'á. Ní cheⁿé ní s'nuuⁿ n'de'ei tuūmī yeⁿe ní na 'áámá yiivi yáává maaⁿ yáⁿā. 'Íngaā tuūmī yeⁿe ní chí tee ní 'úú. ²⁶ 'Iivi sa mííⁿ nan'guēcútaⁿ a yā ní caⁿa yā chí yā mozo miiⁿ: Díí mozo chí nguē n'dáacā ní 'daān'di dii. Ní nguéé n'dáacā ídiíⁿ. Díí ní

déenu di chí ntā'a cosecha naachi nguéé ndííⁿ ntiinyuⁿ ní n'guaáⁿ trigo naachi nguéé ngiínú ti yeⁿé. ²⁷ ¿Dē'ē cúvíí chí nguéé s'neeⁿ di tuūmī yeⁿé na banco? Ní taachi 'úú ndaā cuuvi ntee di tuūmī yeⁿé ndúúcu daiya tuūmī miiⁿ. ²⁸ 'Iivi miiⁿ caⁿa yā ndúúcu 'iiⁿyāⁿ chí snéé miiⁿ: N'diī, dííí ní tuūmī yeⁿé sa ní ca'a ní tuūmī mozo chí ndēē ndiichi míl caadi. ²⁹ Ti 'iiⁿyāⁿ chí véé yeⁿe yā, ní ndaācā ca yeⁿe yā. Ní 'iiⁿyāⁿ miiⁿ n'dēē cá véé yeⁿe yā. 'Iiⁿyāⁿ chí nguéé yeⁿe yā, ta 'lííⁿ duū'vi chí véé yeⁿe yā ní dívíí yā yeⁿe yā. ³⁰ Mozo chí nguēe dichíí'vē ní cuta'á ní ní cu'nuuⁿ ní cuaaⁿ chuva'āi ná maafⁿ. Mííⁿ cuēecu sa ní che'ē 'dííⁿyúⁿ sá cueⁿe daāⁿmaⁿ.

N'diichí Jesús nuuⁿndi yeⁿē naciones

³¹ Ní caⁿa Jesús: Taachí ndaa Saⁿā chí Daiyā Dendyuūs tan'dúúca Rey chí ch'ēte ca ní n'dēēve taavi ndúúcu tanducueⁿē ángeles yeⁿe yā, tuu'mi ní saⁿā miiⁿ 'cuúndi sa na trono yeⁿe sa. ³² Ní nduuvidaama nanáaⁿ Rey miiⁿ 'iiⁿyāⁿ yeⁿe nducyaaca naciones ní Rey miiⁿ dívíí yā 'iiⁿyāⁿ, 'áámá yā yeⁿe táámá yā tan'dúúca chí 'iiⁿyāⁿ pastor chí idiíⁿ yā cuidado yeⁿe 'iiti cuūchí dívíí yā chí-ivu nguaaⁿ 'iiti cuūchí. ³³ Ní cu'neeⁿ yā 'iiti cuūchí lado tá cuacú yā ní chí-ivú miiⁿ lado ta 'cueé yā. ³⁴ Tuu'mi ní Rey miiⁿ caaⁿmáⁿ yā cuuvi yā 'iiⁿyāⁿ lado ta cuaacu yā: Nds'tií chí Chidá ngaⁿa yā yeⁿe ní n'dái taavi ní. Cuchí ní. 'Íngaā parte chí ituneⁿ nds'tií yeⁿē naachí Ndyuūs ngaⁿa ntiinyuⁿ yā ní nguaiⁿ'n'dai yā yeⁿē nds'tií ndíí taachi Ndyuūs 'āa cuéé din'dái yā iⁿ'yeeⁿdí. ³⁵ Tí taachí cuiicú, ní tee ní chí che'é. Ní taachí chí yaācá, ní tee ní chí chíí. Ní taachí canuúⁿ yúúní tan'dúúca 'iiⁿyāⁿ chí ndiicá yā táámá yáāⁿ, nds'tií 'cuúⁿ ní 'úú. ³⁶ Ní taachi 'āā ntéé catecaí, ní tee ní catecaí. Ní taachi chíítā 'úú, dicuéénaaⁿ ní 'úú. Ní taachi cheⁿé vácūū, ní ndaa

nī n'diichi nī 'úú. ³⁷Tuu'mi ní 'iiⁿyāⁿ chi n'dái yā nan'guēcútaⁿa ní caⁿa yā cuuvi yā 'iiⁿyāⁿ: N'diī seño^r, ¿tíí cuaⁿā n'diichí 'nū n'diī chí cuiicu nī ní tee 'nū chí che'é nī, o yaacá nī ní tee 'nū chí chí'i nī? ³⁸¿Tíí cuaⁿā n'diichí 'nū n'diī cuaaⁿ cyúúní ní nta'á 'nū n'diī na vaacú 'nū, o nguée catecaí nī ní tee 'nū catecaí nī? ³⁹O ¿tíí cuaⁿā n'diichí 'nū n'diī chí ngííta nī o vácūū canuuⁿ nī, ní nínndaá 'nū nanáaⁿ nī? ⁴⁰Rey miiⁿ ní nan'guēcútaⁿa yā ní caⁿa yā chíí yā 'iiⁿyāⁿ s'uuⁿ: Cuaacu níⁿnyúⁿ 'úú ngaⁿá ngíí ndís'tií, ti taachi dííⁿ nī 'tíicá ndúúú 'áámá hermano 'áará chí ndíficúúⁿ cá yā, tuu'mi ní 'tiicá ntúúⁿ dííⁿ nī nduucú.

⁴¹Tuu'mi ní Rey caaⁿmaⁿ ntúúⁿ yā cuuvi yā 'iiⁿyāⁿ chí snée lado ta 'cueé yā: Cuvíí nī yeⁿe 'úú, ndís'tií, 'iiⁿyāⁿ condenado chí nguée n'daācā idiíⁿ nī. Ní caⁿa nī ná nguuchi yaⁿā chí 'áámá ngiichi cueⁿe daāⁿmaⁿ. Lugar 'cūū ní n'dai cááva yááⁿnguiinūⁿ ndúúúcū ángeles yeⁿe sa. ⁴²Tí taachí cuiicú, nguée tee nī chí che'é. Chíí yaācá, ndíí nguée ndúú tee nī chí chí'í. ⁴³Canuúⁿ yúúní, ndíí nguée ndúú 'cuúⁿ nī 'úú. 'Áā ntée catecaí, ndíí nguée ndúú tee nī catecaí. Chíítā 'úú ní canuúⁿ vácūū, ndíí nguée ndúú dicuéénaaⁿ nī 'úú. ⁴⁴Tuu'mi ní 'iiⁿyāⁿ s'eeⁿ nan'guēcútaⁿa yā ní caⁿa yā: N'diī seño^r, ¿tíí cuáⁿā n'diichí 'nū n'diī chí cuiicú nī, o yaacá nī, o canúⁿ nī yúúní, o nguē catecaí nī, o ngííta nī, o vácūū cánuuⁿ nī, ní nguée dichí'íve 'nū n'dií? ⁴⁵Tuu'mi ní Rey miiⁿ nan'guēcútaⁿa yā ní caaⁿmaⁿ yā cuuvi yā 'iiⁿyāⁿ s'eeⁿ: Cuaacu níⁿnyúⁿ ngaⁿá ngíí ndís'tií, tan'dúúúcā chí nguée dííⁿ nī ndúúúcū 'áámá chí ndíficúúⁿ cá 'tiicá ntúúⁿ 'úú, nguée dííⁿ nī nduucú. ⁴⁶'Iiⁿyāⁿ s'eeⁿ ní caⁿa yā na 'áámá castigo chí 'áámá canee ní 'iiⁿyāⁿ chí n'dái yā caⁿá yā ná vida cueⁿe daāⁿmaⁿ.

'Iiⁿyāⁿ ní n'nuuⁿ yiinú yā táacā cuta'á yā Jesús

(Mr. 14.1-2; Lc. 22.1-2; Jn. 11.45-53)

26 Taachí Jesús chíinu caⁿa yā tan-ducuéⁿe nduudú 'cūū, caⁿa yā chíí yā discípulos yeⁿe yā: ²Áā déenu ndís'tií ná 'uúví nguuvi maaⁿ cuúvā 'vi-icu yeⁿe pascua. 'Íicu 'úú Saⁿā chí Daiya Dendyuús 'úú ní 'iiⁿyāⁿ ncaⁿa yā 'úú ní cu'nééⁿnga'a yā 'úú.

³Tuu'mi ní chíiduú n'geete ndúúúcū maestros yeⁿe ley ndúúúcū 'iiⁿyāⁿ ndi-icúú s'eeⁿ chí ngaⁿa ntiiⁿnyuⁿ yeⁿe yācū nduuvidaamá yā na palacio yeⁿe chíiduú ch'etē ca chí nguuvi Caifás. ⁴Ní ndeé yā taacā cuuvi canche'éí yā Jesús ní cuta'á yā 'iiⁿyāⁿ ní 'caaⁿnúⁿ yā 'iiⁿyāⁿ. ⁵Ní caⁿa yā: Nguée dííⁿ yú nguuvi 'viicu ti 'iiⁿyāⁿ yeⁿe yááⁿ Jerusalén miiⁿ didáⁿa yā ní dííⁿ yā vaadí 'caa'va ndúúúcū nús'uu.

Ch'eëndáa yā aceite vmnaaⁿ tiiⁿ Jesús na yááⁿ Betania

(Mr. 14.3-9; Jn. 12.1-8)

⁶Jesús canée yā na yááⁿ Betania ná va'ai yeⁿe Simón chí canée ca'ai lepra chí in'duuti yuútē yeⁿe sa. ⁷Ní ndāá 'áámá n'daataá nanááⁿ Jesús miiⁿ chí ndēē tá 'áámá frasco tuúu alabastro chí s'néēⁿ aceite perfume chí yaⁿai n'dai chí'ívé. Ní ch'eëndáa ta perfume miiⁿ na tííⁿ Jesús taachí vee yā na mesa. ⁸Ní discípulos taachi n'diichí yā chíú nduuvi taáⁿ yā. Ní caⁿa yā: ¿De'ē cúví chí chingéē aceite 'cūū? ⁹Cuuví n'diicu ta chuú ti yaⁿai n'dai chí'ívé chuú ní ca'a tá tuúmí miiⁿ 'iiⁿyāⁿ chí nguée yeⁿe yā.

¹⁰Jesús tuumicadínuuⁿ yā chí discípulos ngaⁿa yā 'tíicā, ní caⁿa yā chíí yā discípulos: ¿De'e cúví chí n'gaa'va nī ndúúúcū n'daataá 'tíí? Táⁿa 'tíí n'dáacā dííⁿ tá nduucú. ¹¹Ti 'iiⁿyāⁿ chí nguée véé yeⁿe yā ní 'áámá canée yā nduucú nī, naati 'úú ní nguée 'aama cuneé nduucú nī. ¹²Taachi tá 'tíí ch'eëndáa ta perfume

vmnááⁿ cuerpo yeⁿé, ndaā ta 'úú tí taachí 'cuūví 'āā canee listo cuerpo yeⁿé chí 'cuaeēchí. ¹³ Cuaacu níⁿnyúⁿ ngaⁿá ngí ndís'tií, chí 'āā tíí nūuⁿ chí caaⁿmaⁿ yā ndúúúú ngai yeⁿe chí nanguaⁿai 'iiⁿyāⁿ na núúⁿmáⁿ iⁿyeēⁿdí, caaⁿmaⁿ ntuúⁿ yā chí tá 'tíí diiⁿ tá chuū ní n'gaacu yā yeⁿe tá.

**Judas miiⁿ ngaⁿa maaⁿ
sa chí nca'a sa Jesús**

(Mr. 14.10-11; Lc. 22.3-6)

¹⁴ Tuu'mi ní 'áámá discípulo yeⁿé naachi ndiichúúví yā chí nguuví sa Judas Iscariote, cheⁿe sá nanááⁿ chiiduú n'geeté. ¹⁵ Ní caⁿa sa chí sa 'iiⁿyāⁿ s'eeⁿ: ¿De'ē téé ní 'úú ní 'cuuⁿmiⁿ ndís'tií du'u chí Jesús? 'Iiⁿyāⁿ s'eeⁿ ní caⁿa yā chí nadii'vé yā Judas miiⁿ ndiicū ndiichi caadi 'dííⁿnguee. ¹⁶ Ndíí tuu'mí nūuⁿ in'nuuⁿ yíínú Judas miiⁿ de'ē tiempo ní táácā chí nca'a sa Jesús miiⁿ.

**Jesús yaa'ví yā yeⁿé chí che'e
nguiínú yā 'viicu pascua**

(Mr. 14.12-25; Lc. 22.7-23;
Jn. 13.21-30; 1 Co. 11.23-26)

¹⁷ Nguuví vmnááⁿ vmnaaⁿ yeⁿe 'viicu pascua, nguuví yeⁿe pan chí nguéé levadura yeⁿé, discípulos ní ndaa yā nanááⁿ Jesús ní caⁿa yā chí yā 'iiⁿyāⁿ: ¿Tíí neⁿe ní chí in'nuúⁿ 'nū chí che'e nguiínú yú mááⁿ yeⁿe 'viicu yeⁿe pascua?

¹⁸ Níícu Jesús caⁿa yā chí yā discípulos: Cueⁿé ní na yááⁿ Jerusalén ni ndaacá ní 'áámá saⁿā ní caaⁿmaⁿ ní cuuvi ní saⁿā: Maestro yeⁿe yú caⁿa yā 'túúca: Tiempo yeⁿe chí 'cuūví 'āā snee níⁿnuúⁿ ní neⁿé dííⁿ 'viicu yeⁿe pascua ndúúúú discípulos yeⁿé na va'ai yeⁿé ní.

¹⁹ Discípulos dííⁿ yā tan'dúúca chí Jesús dicho'ó yā chí diiⁿ yā. Ní in'nuúⁿ yā chí che'e yā yeⁿe 'viicu yeⁿe pascua.

²⁰ Taachi 'āā chíí chiínú miiⁿ, Jesús chíiíndí yā na mesa ndúúúú ndu'u ndi-

ichúúví discípulos. ²¹ Ní taachí veeté yā ní nge'e yā Jesús caⁿa yā: Cuaacu níⁿnyúⁿ ngaⁿá ngí ndís'tií, chí 'áámá chéé ndís'tií díí ní entregar 'úú.

²² Discípulos s'neeⁿ ndaachi yiinú yā. 'Áámá 'áámá yā ní tucáá yā caⁿa yā: N'díí Señor, ¿'áá 'úú?

²³ Tuu'mi ní Jesús nan'gueecútaⁿa yā ní caⁿa yā: 'Iiⁿyāⁿ chí nduucú ní dí'caandá yā pan yeⁿé yā na cú'ú 'cūú nduucú, 'iiⁿyāⁿ 'cúú ní nca'a yā 'úú. ²⁴ Cuaacu níⁿnyúⁿ cuuvi ndúúúú Saⁿā chí Daiya Dendyuūs tan'dúúca chí canéé nguūⁿ yeⁿé sa na libro yeⁿé Ndyuūs, naati de'e chúúca ya'āi yeⁿe saⁿā chí nca'a sa 'úú chí Saⁿā chí Daiya Dendyuūs. N'dáaca ca yeⁿé sa nduuti chí nguéé chíiíndiyáaⁿ sa.

²⁵ Tuu'mi ní Judas, saⁿa chí neⁿe nca'a sa Jesús, ní caⁿa sa: ¿'Áá 'úú, Maestro? Jesús caⁿa yā chí yā Judas: Díí, ngaⁿa di 'tííca.

²⁶ Taachí 'iiⁿyāⁿ s'uuⁿ nge'e yā, Jesús miiⁿ sta'á yā pan ní ca'á yā gracias Ndyuūs cáávā pan miiⁿ. Ní n'deé yā pan ní ca'a yā discípulos yeⁿe yā. Ní caⁿa yā: Cuta'á ní, che'e ní pan caati tan'dúúca cuerpo yeⁿé 'tííca.

²⁷ Ní Jesús sta'á yā taza ndúúúú jugo yeⁿe uvas ní ca'á yā gracias Ndyuūs cáávā nuūⁿníⁿ uvas miiⁿ, ní ca'a yā discípulos yeⁿe yā. Ní caⁿa yā: Nducyaaca ndís'tií, cu'u ní nuūⁿníⁿ uvas yeⁿe taza 'cūú, ²⁸ ti jugo nuūⁿníⁿ uvas miiⁿ ní tan'dúúca yuūuⁿ yeⁿé ní yeⁿé compromiso chí ngai yeⁿé. Yuūú yeⁿé chí cungeé cáávā 'yaaⁿ n'dai 'iiⁿyāⁿ, 'tííca. Yuūúⁿ yeⁿé chííⁿ chí nch'ēcú nuuⁿndi yeⁿe nducyaaca 'iiⁿyāⁿ. ²⁹ 'Úú ní ngaⁿá ngí ndís'tií chí 'āā ntéé cu'ú jugo nuūⁿníⁿ yeⁿé uvas na iⁿyeēⁿdí 'cūú ndii nguuví chí cu'ú ndúúúú ndís'tií naachi Chiidá ngaⁿa ntiiⁿnyúⁿ yā.

**Jesús nga^{na} yā Pedro miiⁿ
chí cuééⁿdíitu sa chí
nguéeⁿ n'diichi sa Jesús**

(Mr. 14.26-31; Lc.
22.31-34; Jn. 13.36-38)

³⁰ Taachí ch'iinu chiita yā 'áamá canción ye^{ne}é Ndyuūs nan'dáa yā va'āi ní cue^{ne}é yā na yīcū chí nguuvi Olivos. ³¹ Tuu'mi ní Jesús ca^{na} yā chí yā discípulos: Nducyáácá ndís'tii cuuví 'cuináaⁿ ní ye^{ne}e 'úú maaⁿnguínū. Caati nga^{na} naachi canéé nguūⁿ na libro ye^{ne}é Dendyuūs 'túúcā: 'Úú Ndyuūs 'nuucá'ai ní 'caaⁿnúⁿ saⁿā chí idiiⁿ sa cuidado 'iiti cuūchī, ní 'iiti s'eeⁿ ní ca^{na}á 'múúⁿ ca^{na}á miiⁿ tī ní cuuví ndai tī. ³² Taachí 'úú nduuchí nguaaⁿ tináⁿā, ca^{na}á vmnaaⁿ ye^{ne}e ndís'tii na yāⁿā Galilea.

³³ Tuu'mi ní Pedro miiⁿ ní nan'guεεcútaⁿ sa ní ca^{na} sa chíi sa Jesús: 'Áará chí nducyaaca yā cuuví 'cuinaaⁿ yā cáávā n'dii 'úú nguéeⁿ cuuví 'cuinaáⁿ mar 'aamá naaⁿ.

³⁴ Tuu'mi ní Jesús ca^{na} yā chí yā Pedro: Cuaacu níⁿnyúⁿ nga^{na}á ngíi díi chí maaⁿnguínū taachi 'āā cuéé 'cuaī túsāⁿā, díi ní 'āā 'iinū cuuvi cueeⁿdiitū di ye^{ne}e 'úú chí nguéeⁿ in'diichi di 'úú.

³⁵ Naati Pedro miiⁿ ca^{na} sa: Ndúúti chí canéé chí 'cuūví nduucú ní maestro ní 'cuūví. Nguéeⁿ caaⁿmáⁿ chí nguéeⁿ n'diichí n'dii. Ní nducyaaca discípulos ní 'tiicá ntúūⁿ ca^{na} yā.

**Jesús nga^{na}angua'á yā na
jardín chí nguuvi Getsemaní**

(Mr. 14.32-42; Lc. 22.39-46)

³⁶ Tuu'mi ní ndaā Jesús ndúúcū discípulos ye^{ne}é yā na 'áamá cuaaⁿ chí nguuvi Getsemaní ní ca^{na} yā chí yā discípulos ye^{ne}e yā: 'Cuεεtē ní 'muuⁿ. 'Úú ní ca^{na} níⁿnuúⁿ miiⁿ ní caaⁿmaⁿngua'á.

³⁷ Jesús miiⁿ cue^{ne}e yā ndúúcū Pedro ndúúcū nduu 'uuvi saⁿā daiya Zebedeo.

Tuu'mi ní Jesús s'neeⁿ ndaachi yiinú yā. ³⁸ Ní ca^{na} yā chí yā 'iiⁿyāⁿ s'uuⁿ: Alma ye^{ne}é ní nééé ndaachí yiinú chí ya'āi chí 'cuūví. 'Cuεetinée ní 'muuⁿ ní 'cuεeti nduuchí ní nduucú.

³⁹ Jesús ní cue^{ne}é yā ta 'lííⁿ cuááⁿ vmnaaⁿ. Candiitin'dii yā ní caⁿangua'a yā ní ca^{na} yā: N'dii Chiidá, ndúúti chí cuuvi, nguéeⁿ dííⁿ ní chí 'cuenú cuuvi prueba 'cūú naati nguéeⁿ cuuvi tan'dúúcā chí 'úú ne^{ne}é naati tan'dúúcā chí n'dii ne^{ne}é ní.

⁴⁰ Tuu'mi nūuⁿ ndaá yā naachi snéé discípulos ye^{ne}e yā ní ndaāca yā 'iiⁿyāⁿ chí stiyaadú yā. Ní ca^{na} yā chí yā Pedro: ¿'Áá 'túúcā nguéeⁿ íchéé dí chí induūchi dí nduucú 'áamá hora? ⁴¹ Ndís'tii ní candée ní cuidado ní caaⁿmaⁿngua'á ní nífcú nguéeⁿ dííⁿ ní nuuⁿndi. Cuaacu níⁿnyúⁿ espíritu ye^{ne}e ní ne^{ne}e díiⁿ n'daacā naati cuerpo ye^{ne}é ní 'āā dūūvā.

⁴² Jesús che^{ne}e chí ndii 'úúví cuuvi ní caⁿangua'á yā ní ca^{na} yā: N'dii Chiidá, ndúúti chí ne^{ne}é ní, dííⁿ ní chí nguéeⁿ 'cuenú cuuvi prueba 'cuu chí n'daācā tuu'mi ní 'túúcā dííⁿ ní, naati cuuvi tan'dúúcā chí ne^{ne}e ní.

⁴³ Jesús nndaa ntuuⁿ yā táámá vmnéⁿéé naachi snéé discípulos ye^{ne}é yā ní ndaaca ntúuⁿ yā 'iiⁿyāⁿ stiyaadú yā ti 'iiⁿyāⁿ s'eeⁿ 'āā ntéé ícheε yā nduutináaⁿ yā chí yaāⁿnnáaⁿ yā. ⁴⁴ Jesús miiⁿ ní nguéeⁿ yaa'vi yā discípulos ní s'neeⁿ yā 'iiⁿyāⁿ chí stiyaadú yā. Ní cue^{ne}e ntúuⁿ yā ní caⁿangua'á ntúuⁿ yā ndii chíi ndiiⁿ 'ínú cuuvi ní ca^{na} ntuuⁿ yā tan'dúúcā chí 'āā nga^{na} yā. ⁴⁵ Cuayivi ní ndaa ntuuⁿ yā nanááⁿ discípulos ní cá^{na} yā chí yā discípulos: 'Cuεetiyaadú ní ní ntaaviⁿtuunúúⁿ ní. Quin'diichí ní tī 'āā ndaā hora ye^{ne}e 'úú chí Saⁿā chí Daiya Dendyuūs. 'Iiⁿyāⁿ nca'a yā 'úú tá'a saⁿā s'eeⁿ chí véé nuuⁿndi ye^{ne}e sā. ⁴⁶ Nducueeⁿ ndís'tii ní cú'u yú. 'Āā cuchii níⁿnuúⁿ saⁿā chí nca'a 'úú.

**Sta'á yā Jesús ní candée
yā 'ii'yān presos**

(Mr. 14.43-50; Lc. 22.47-53; Jn. 18.2-11)

⁴⁷ Naa chí Jesús indeé yā, ndaā Judas miiⁿ, 'áámá saⁿā yeⁿē ndu'u ndiichúúví discípulos. Ní neéné 'yaaⁿ 'ii'yāⁿ ndaa yā ndúúú Judas miiⁿ ndúúú machetes 'uúví lados 'caāiⁿ ndúúú yāⁿá. Chiiduú n'geeté ndúúú 'ii'yāⁿ ndiicúú s'eeⁿ chí ngaⁿa ntiíⁿnyuⁿ yeⁿe yaācū dichó'o yā 'ii'yāⁿ s'eeⁿ. ⁴⁸ Judas miiⁿ chí nca'a sá Jesús 'ii'yāⁿ s'eeⁿ, ca'a sa 'áámá seña ní 'túúca caⁿa sa: 'Ii'yāⁿ chí 'úú chí'neeⁿ cheendí, 'ii'yāⁿ miiⁿ chí 'ii'yāⁿ chí cuta'a ní chí preso yā.

⁴⁹ Tuu'mi ní Judas miiⁿ ní ndaa sa nanááⁿ Jesús miiⁿ ní caⁿa sa: Tava-cho'onoó ní, n'dií Maestro. Ní 'neeⁿ cheendi sá Jesús. ⁵⁰ Jesús miiⁿ ní caⁿa yā chí yā Judas: Díí, amigo yeⁿé, ¿de'ē cáávā chí cuchii dí? Tuu'mi ní 'ii'yāⁿ s'eeⁿ ní ndaa yā nanááⁿ Jesús miiⁿ ní sta'á yā Jesús ní candée yā 'ii'yāⁿ preso.

⁵¹ Naati 'áámá saⁿā chí canéé sá ndúúú Jesús miiⁿ ní tun'dáa sa machete 'uúví lados 'caāiⁿ ná cheēti vaacu ní 'nuūcá'ai sa 'áámá mozo yeⁿē chiiduú ch'ēeté ca ní chí'ica sa veēⁿ mozo miiⁿ. ⁵² Tuu'mi ní Jesús caⁿa yā chí yā saⁿā: 'Nuūⁿ dí machete 'uúví lados 'caāiⁿ yeⁿē di vaacu. Nduyaaca 'ii'yāⁿ chí ita'á yā machete 'uúví lados 'caāiⁿ ní ndúúú machete 'uúví lados 'caāiⁿ 'cuúví. ⁵³ ¿Áá nguéé déénú dí chí 'úú cuuvi caaⁿmaⁿnguā'á ní caacá Chiidá ní miⁿníf'yúⁿ miⁿniiⁿyuⁿ cho'ó yā nanááⁿ 'úú taanduu ngo'oo ndiichúúví taāⁿ ángeles ní chiidá cuuvi díⁿ yā? ⁵⁴ Naati maaⁿ ní nduuti chí díⁿ chuu ¿táácā cuuvi cúúnú ca'a naachi canéé nguūⁿ na libro yeⁿé Ndyuūs, chí canéé chí cuuvi 'tíicā?

⁵⁵ Hora miiⁿ Jesús caⁿa yā chí yā 'ii'yāⁿ s'eeⁿ: ¿De'ē cúúví chí can'daa ní ndúúú machetes 'uúví lados 'caāiⁿ ndúúú yá'á s'eeⁿ tan'dúúú chí 'úú

'ii'yāⁿ chí duucu 'úú chí sta'á ní 'úú? Nguuvi nguuvi chí'indí ndúúú ndís'tií na yaācū templo ní ngi'cueeⁿ ndís'tií ní nguéé sta'á ní 'úú. ⁵⁶ Tanducueⁿē chuū cuuvi ní cúúnú ca'a yeⁿē chí canéé nguūⁿ na libro yeⁿé Ndyuūs cáávā profetas ndii cuááⁿ vmaaaⁿ. Tuu'mi ní nducyaaca discípulos s'neeⁿ yā Jesús miiⁿ ní chéenu yā.

**Jesús nanááⁿ 'ii'ntyéⁿe
yeⁿe yaācū templo**

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ 'Ii'yāⁿ chí sta'á yā Jesús miiⁿ candee yā 'ii'yāⁿ miiⁿ nanááⁿ chiiduú ch'ēeté ca chí nguuvi Caifás. Mííⁿ nduuvídáámá maestros yeⁿe ley ndúúú 'ii'yāⁿ ndiicúú s'eeⁿ chí ngaⁿa ntiíⁿnyuⁿ yā yeⁿe yaācū. ⁵⁸ Pedro miiⁿ cueⁿe ntúúⁿ sa ní n'dáa yaⁿai sa cuaaⁿ dáámí Jesús ndíí ch'eva'āi yeⁿē va'ai ch'ēete yeⁿē chiiduú ch'ēete cá. Ní ndaa sa na patio ní chí'indí sa ndúúú policías chí dííⁿ yā cuidado yeⁿe va'āi miiⁿ. Pedro neⁿe sa snaaⁿ sa táácā chí dííⁿ yā ndúúú Jesús miiⁿ.

⁵⁹ Chiiduú n'geeté ndúúú 'ii'yāⁿ ndiicúú s'eeⁿ chí ngaⁿa ntiíⁿnyuⁿ yā yeⁿe yaācū ndúúú nducyaaca 'ii'yāⁿ chí ngaⁿa ntiíⁿnyuⁿ yā in'nuúⁿ yā 'áámá testigo chí nguéé ngaⁿa cuaacu yeⁿē Jesús miiⁿ. Ní 'íicú cuuvi nca'a yā Jesús miiⁿ chí 'cuuvi yā. ⁶⁰ Nguéé ndaaca yā mar 'áámá naaⁿ taacā chí 'caaⁿnuⁿ yā Jesús miiⁿ. 'Áará chí neené 'yaaⁿ 'ii'yāⁿ caⁿa yā nduudu yaadi yeⁿe Jesús miiⁿ. Cuayiivi miiⁿ ní ndaa ntúúⁿ tanaaⁿ 'uúví testigos chí ngaⁿa yā nduudu yaadi. ⁶¹ Testigos ní caⁿa yā: Sáⁿa 'cūú ní caⁿa sa: 'Úú ní cuuvi dííⁿ chuū. Natuúví yáacū templo 'cūú chí yeⁿé Ndyuūs naati cheēti 'iinú nguuvi nadan'daí.

⁶² Chiiduú ch'ēete cá miiⁿ ní ncueeⁿ yā ní caⁿa yā chí yā Jesús: ¿Áá nguéé nan'gueecútaⁿa ní mar 'áámá nduudu yeⁿe de'ē chí ngaⁿa 'íís'tií yeⁿe ní?

⁶³ Naati Jesús nguéé de'ē vee ca" a yā. Tuu'mi ní chiiduú ch'ēete cá mii" ca" a yā: 'Úú ní n'gaí, “por Ndyuūs chi canduuchi”. Cuuvi nī nūs'uu ndúúti chi n'dií chí Cristo, Daiya Ndyuūs chi cánduuchi.

⁶⁴ Jesús mii" ní ca" a yā chii yā chiiduú ch'ēete cá mii": 'Úú tan'dúúca chi n'dií nga" a nī. Nga" á ca ngí ndís'tií, chí ndii maa" snaa" nī Sa" á chi Daiya Ndyuūs 'cuúndi sa lado ye" e honor ye" é Ndyuūs chi véé tanducué" ē poder ye" é yā ní ndaa sa na meēe" ye" ē nanguuvi.

⁶⁵ Tuu'mi ní chiiduú ch'ēete cá mii" chífn'cuú" yā catecai yā ní ca" a yā: Sá" a 'cūū ní nga" ā sa contra ye" é Ndyuūs. ¿De'ē ca dii" yú testigos chi in'nuu" yú? Cuin'díichí nī. Maa" ní ndís'tií ní n'giindiveé" nī táácā nga" a sa contra ye" e Ndyuūs. ⁶⁶ ¿De'ē nadacádífnuu" ndís'tií? 'Ii" yā" s'ee" ní nan'guuecúta" a yā ní ca" a yā: Véé nuu" ndi ye" e sa chi canéé chí 'cuúvi sa.

⁶⁷ Tuu'mi ní ca' a nee dai" yā naa" Jesús mii" ní ch'e" é yā Jesús. Ní n'gaadi yā nduutináa" sa ndúúcu tiinūu". Ní taná" a yā ch'e" é yā 'ii" yā" ndúúcu ta' á yā.

⁶⁸ 'Ii" yā" s'ee" ní ca" a yā: N'dií chí Cristo, cuuvi nī nūs'uu, ¿du'ú chí ch'e" é n'dií?

Pedro mii" ní nga" a sa chí nguéé n'diichi sa Jesús mii"

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedro mii" ní vee sa na patio ye" e va'āi ch'ēete chiiduú ch'ēete cá ní ndaa nii" nuú" áámá tá" ā chi canéé caadi 'iyyū. Ní tá" ā mii" ní ca" a tá chii tá Pedro mii": Dii ntúū" ni canee di ndúúcu Jesús ye" e yā" āa Galilea.

⁷⁰ Naati Pedro mii" ní chéé" diitu sa nanáá" 'ii" yā" s'ee" ní ca" a sa: Nguue deenú chí nga" ā di.

⁷¹ Ní taachí ndaā Pedro mii" cheendi va'āi ye" e patio mii", táámá tá" ā chí canéé caadi 'iyyu n'diichi ntúū" tá sa" ā mii" ní ca" a tá chii tá 'ii" yā" chí snéé

mii": 'Tiicá ntúū" sá" a 'cūū ní canee sa ndúúcu Jesús ye" e yā" ā Nazaret.

⁷² Pedro mii" ní chee" diitu ntúū" sa, ndíi túúnú 'caí sa, “por Ndyuūs”. Ní ca" a sa: 'Úú ní nguéé in'diichi sá" a 'cūū.

⁷³ Cuayiiivi 'tee 'téé ní 'ii" yā" chí snée yā cuaa" na nii" nuú" mii" ndaa yā nanáá" Pedro mii". Ní ca" a yā chii yā Pedro: Cuaacu nífn'nyú" dii ntúū" ní cachiica dí ndúúcu 'ii" yā" s'ee" ti tan'dúúca chí nga" a di ní n'gi" i di ye" e di chí dii ní nguaa" 'ii" yā" s'ee".

⁷⁴ Tuu'mi ní Pedro mii" ní tucá' a sa ca" a taa" sa, ní 'caí sa, “por Ndyuūs”, ní ca" a sa chii sa 'ii" yā" mii": Nguéé in'diichi sá" a 'cūū. Tuu'mi nūu" 'caí tusá" ā. ⁷⁵ Tuu'mi nūu" ní Pedro mii" ní n'gaācū sa nduudu ye" é Jesús taachí ca" a yā 'túúca: Taachi 'āā cuéé 'cuai tusá" ā, 'āā chee" diitū di 'iinū cuuvi chí nguéé n'diichi di 'úú. Ní Pedro mii" ní can' daa sa na lugar 'cūū ní cheecu taavi sa ti ya' ai staava ye" e sa.

Jesús nanáá" Pilato

(Mr. 15.1; Lc. 23.1-2; Jn. 18.28-32)

27 Taachí 'āā chídeeve, nducyáácá chiiduú n'geete ndúúcu 'ii" yā" ndiicúú chí nga" a nti" nyu" ye" e yaācū nduuvidaamá yā chí ndeé yā taācá dífn yā ndúúcu Jesús mii" ní nca' a yā 'ii" yā" chí 'cuúvi yā. ² Ní n'deéchiichí yā Jesús mii" ní candée yā ní nca' a yā Jesús mii" Poncio Pilato, 'ii" yā" gobernador.

Judas mii" ch'ii sa

³ Tuu'mi ní Judas mii", sa" a chí nca' a Jesús mii", taachí n'diichi sa chí Jesús mii" chí yā condenado chí 'cuuvi yā, ndaacadaamí sá ye" e nuu" ndi chí dii" sa. Ní che" e sa nanáá" chiiduú n'geeté ndúúcu 'ii" yā" ndiicúú chí nga" a nti" nyu" ye" e yaācū ní nca' a sa ndu' u ndiicu ndíichí caadi 'dii" nguue 'ii" yā" s'ee". ⁴ Ní ca" a sa chii sa 'ii" yā" s'ee": 'Úú ní dífn 'áámá nuu" ndi. Ncā' á 'áámá 'ii" yā"

chi nguée nuuⁿndi yeⁿe yā. 'Iiⁿyāⁿ s'eeⁿ caⁿa yā: ¿Dé'ē ínneeⁿ nús'uū chiiⁿ? Chuū chí maaⁿ di can'díicu di.

⁵Tuuⁿ'mi ní Judas chingée sa tuūmī miiⁿ cheeti yaācū ní cunaⁿa sa. Ní dicuái yaacu sa maaⁿ sa. Ní Judas ní ch'iī sa.

⁶Chiiduú n'geetē n'guáaⁿ yā tuūmī ní caⁿa yā: Na ley miiⁿ ní ngaⁿā chi nguée 'cuī yú túumi 'cūū na caja yeⁿe ofrendas yeⁿe yaācū, ti túumi 'cūū ní túumi yeⁿe yuūúⁿ yeⁿe 'aama 'iiⁿyāⁿ.

⁷Ch'iinu chuū ní nduuvidaama yā chi cái yā 'áamá tááⁿ yáⁿāa ndúucū tuūmī chí cuuvi panteón cáávā 'iiⁿyāⁿ chi snúúⁿ yúúni. Miiⁿya yaⁿāa chi nguuvi Alfarero chi neⁿe caaⁿ'maⁿ yáⁿāa yeⁿe chi 'iiⁿyāⁿ din'dái 'cuūtí cueēe. ⁸Chíⁿ chí yáⁿāa chí panteón cánée chí dúúchí ndí mááⁿ, Yáⁿāa yeⁿe Yuūuⁿ. ⁹Tíicā ní cuunúū ca'a chí profeta Jeremías caⁿa yā chuū ndii cuááⁿ vmnaaⁿ taachí dinguúⁿ yā na libro yeⁿe Ndyuūs 'tíicā: Ní sta'á yā ndu'ū ndicu ndíichí caadi 'diiⁿnguee. Tuūmī miiⁿ ní saⁿā s'eeⁿ canée yīnu sa chí ca'a sa Judas cucáávā chí ch'iīⁿnūⁿ sa Cristo. ¹⁰Ní ca'a yā tuūmī miiⁿ yeⁿe yáⁿāa chí nguuvi Alfarero, tan'dúucā Señor yeⁿe yú caⁿa yā chí yā 'úú.

Pilato intínguuneeⁿ yā Jesús

(Mr. 15.2-5; Lc. 23.3-5; Jn. 18.33-38)

¹¹Jesús chéendii yā nanááⁿ gobernador Pilato ní gobernador intínguuneeⁿ yā 'iiⁿyāⁿ ní caⁿa yā chí yā 'iiⁿyāⁿ: ¿'Áá dí chí Rey yeⁿe 'iiⁿyāⁿ Israel chí judíos? Jesús caⁿa yā chí yā gobernador: N'dii ngaⁿa cuaacú nī ti 'tíicā.

¹²Chiiduú n'geetē ndúucū 'iiⁿyāⁿ ndicuú chí ngaⁿa ntiíⁿnyúⁿ yā yeⁿe yaācū caⁿa yā chí véé nuuⁿndi yeⁿe Jesús naati Jesús miiⁿ ní nguée nan'gueecútaⁿa yā mar 'áamá nduudu. ¹³Tuuⁿ'mi ní Pilato miiⁿ caⁿa yā chí yā Jesús: ¿'Áá nguée n'giindiveeⁿ di tanducuéⁿe chí ngaⁿa yā yeⁿe di?

¹⁴Naati Jesús miiⁿ nguée nan'gueecútaⁿa yā mar 'áamá nduudu. Tuuⁿ'mi ní gobernador miiⁿ cheⁿe yīnu taavi yā yeⁿe Jesús ní nguée déenu yā táácā nadacádíinuⁿ yā yeⁿe.

Jesús canée chí 'cuūvi yā

(Mr. 15.6-20; Lc. 23.13-25;

Jn. 18.38-19.16)

¹⁵Maaⁿ ní nguúvī 'viicu miiⁿ véé 'áamá costumbre chí gobernador miiⁿ canée chí ín'dééchéⁿ yā 'áamá saⁿā chí canúⁿ sa vácūū 'viicu yeⁿe pascua 'aama saⁿā chí preso sa chí 'iiⁿyāⁿ Israel neⁿe yā. ¹⁶Ní canúⁿ 'aama saⁿā vácūū chí nguuvi Barrabás. Nducyáácā 'iiⁿyāⁿ ní déenu yā táácā idiiⁿ Barrabás miiⁿ. ¹⁷Ní taachi 'iiⁿyāⁿ yeⁿe yááⁿ Jerusalén miiⁿ nduuvidaamá yā, gobernador Pilato miiⁿ ní caⁿa yā chí yā 'iiⁿyāⁿ s'eeⁿ: ¿Du'ú neⁿe nī chí 'úú n'dēechí? ¿'Áá neⁿe nī Barrabás o Jesús chí nguuvi Cristo chí 'úú caⁿ'á libre 'iiⁿyāⁿ?

¹⁸Pilato miiⁿ ní deenu yā chí cáávā vaadi ngueee 'iiⁿyāⁿ s'eeⁿ nca'a yā Jesús chí preso yā.

¹⁹Taachí Pilato miiⁿ ní vee yā na silla yeⁿe juez miiⁿ, n'daataa yeⁿe yā ní dich'ó tá 'áamá 'iiⁿyāⁿ chí caⁿa yā chí yā Pilato miiⁿ nduudú 'cūū: Nguée de'ē vee díⁿ nī ndúucū saⁿā n'dái 'cūū ti taachí cyaadú néené n'deēe ch'eenú chí taachí ch'iīnū cáávā sáⁿa 'tīi.

²⁰Naati chiiduú n'geete ndúucū 'iiⁿyāⁿ ndiicúú chí ngaⁿa ntiíⁿnyúⁿ yā yeⁿe yaācū néené n'deēe caⁿa yā chí yā 'iiⁿyāⁿ yeⁿe yááⁿ Jerusalén miiⁿ chí caaⁿ'maⁿ yā chí Pilato miiⁿ n'dééchii yā Barrabás miiⁿ ní 'cuūvī Jesús miiⁿ. ²¹Gobernador miiⁿ caⁿa yā chí yā 'iiⁿyāⁿ s'eeⁿ: ¿Naachí na 'uuvi yā ní cheé yā chí neⁿe nī chí n'dēechí? 'Iiⁿyāⁿ s'eeⁿ ní caⁿa yā: Barrabás.

²²Pilato miiⁿ ní caⁿa yā chí yā 'iiⁿyāⁿ s'eeⁿ: ¿De'ē díⁿ ndúucū Jesús chí nguuvi

yā Cristo? Nducyaa ca yā nan'gueecúta²⁴a yā ní 'cai yā: Cu'nééⁿnga'á yā.

²³ Gobernador miiⁿ caⁿa yā chii yā 'iiⁿyāⁿ s'eeⁿ: ¿De'ē nuuⁿndi yeⁿe yā vee? Naati 'iiⁿyāⁿ s'eeⁿ ní n'gái yiicú yā ní caⁿa yā: Cu'nééⁿnga'á yā.

²⁴ Taachi Pilato miiⁿ n'diichí yā chi nguéé de'ē vee chi díⁿ yā ndúúcu 'iiⁿyāⁿ ti yuudu n'dái ca n'gai yā, tuuⁿ'mi ní sta'á yā nuuⁿ'nīⁿ ní naaⁿ'nu yā ta'a yā nanááⁿ nducyaaca 'iiⁿyāⁿ yeⁿe yááⁿ Jerusalén miiⁿ. Ní ngaⁿ'a yā: Limpia canéé 'úú yeⁿ'ē asunto 'cūú. 'Úú ní nguéé nuuⁿndi yeⁿ'é chi 'cuūví sáⁿ'a 'cūú ti n'dai sa. Ndís'tii deenu nī táácā diiⁿ nī ndúúcu sa.

²⁵ Nducyaa ca 'iiⁿyāⁿ nan'gueecúta²⁵a yā ní caⁿ'a yā: Yuuúⁿ yeⁿ'ē sáⁿ'a 'cūú 'āā cūnee dáámí rá 'nū ndúúcu daiya 'nū.

²⁶ Tuuⁿ'mi ní Pilato miiⁿ ní n'dēēchii yā Barrabás miiⁿ ní caⁿ'a ntiiⁿ'nyuⁿ yā chi soldados ch'eⁿ'é yā Jesús. Ch'ínú ch'eⁿ'e yā ní nca'a Pilato miiⁿ Jesús miiⁿ 'iiⁿyāⁿ chi cu'neeⁿnga'á yā 'iiⁿyāⁿ.

²⁷ Tuuⁿ'mi ní soldados romanos yeⁿ'e gobernador can'dée sa Jesús na vaacuyááⁿ yeⁿ'e gobernador ní nducyáácá soldados nduuvidaama sa nanááⁿ Jesús miiⁿ. ²⁸ Ní diví sa catecaí vmnaaⁿ Jesús ní s'nuuⁿ sa tínūuⁿ morado cuá'āa Jesús miiⁿ. ²⁹ Ní s'nuuⁿ sa tiiⁿ Jesús 'áámá corona chi ndeenyú ndúúcu yaaⁿ. Ní sn'duuⁿ sa 'áámá taaⁿ ndúú ná ta'ā cuaacú Jesús. Tuuⁿ'mi ní chiintiiⁿ'ya sa nanááⁿ Jesús miiⁿ ní ch'íⁿ'nyuⁿ'neeⁿ sa 'iiⁿyāⁿ. Ní caⁿ'a sa: Cūnduuchí nī n'dii Rey yeⁿ'e 'iiⁿyāⁿ yeⁿ'e Israel.

³⁰ Ní ca'a nee daiⁿ sa cuerpo yeⁿ'ē Jesús ní sta'a sa 'áámá táán ndúú chí ndēe sa ní ch'eⁿ'e sa tiiⁿ Jesús. ³¹ Ch'ínú ch'iiⁿ'nyuⁿ'neeⁿ sa Jesús miiⁿ ní ndiví sa tínūuⁿ yā chi morado cuá'āa ní ch'i'nuuⁿ sa catecaí yā. Ní candēe sa Jesús chi cu'nééⁿnga'a sa 'iiⁿyāⁿ.

S'nééⁿnga'á yā Jesús miiⁿ ní ch'ii yā

(Mr. 15.21-32; Lc.

23.26-43; Jn. 19.17-27)

³² Taachí can'daa yā ní cueⁿ'e yā na yúúni naachi cu'nééⁿnga'á yā ndaaca yā 'áámá saⁿ'ā yeⁿ'e yááⁿ Cirene chí nguuvi sa Simón. Ní a fuerza soldados di'cuiitu sa Simón 'cūú chí candēe sa cruz yeⁿ'e Jesús.

³³ Ní taachi ndaá yā na táámá lado yeⁿ'e yááⁿ Jerusalén lugar chí nguuvi Gólgota chí neⁿ'e caaⁿ'maⁿ, Lugar yeⁿ'ē 'ini Nga'ai Tiiiⁿ, ³⁴ saⁿ'ā ca'a sa Jesús vinagre ndístaⁿ'a ndúúcu nuuⁿ'nīⁿ yeⁿ'ē yáatā yaāa cáávā chí nguēe cueenu cá cuuvi Jesús chí chí'í Jesús miiⁿ. Taachí Jesús n'diichineeⁿ yā, nguéé 'cuuⁿ yā chí'í yā.

³⁵ Taachí 'āā s'neeⁿnga'a sa Jesús, soldados ní tun'dáa sa suertes na catecai Jesús miiⁿ chí ca'a sa 'áámá sa nduūcū taama sa. Ní 'iicu cúúnúú ca'a tan'dúúcā chí caⁿ'a profeta ndii cuááⁿ vmnaaⁿ ní canéé nguúⁿ na libro yeⁿ'é Ndyuūs 'túúcā: Tun'daá yā suerte na catecai Jesús miiⁿ ní nca'á yā nguaaⁿ 'iiⁿyāⁿ s'eeⁿ. ³⁶ Miiⁿ ch'eētēe soldados ní diiⁿ sa cuidado 'iiⁿyāⁿ chí s'nééⁿnga'a. ³⁷ Ní 'áámá nduudu naaⁿ tíⁿ cruz miiⁿ chí canéé nguūⁿ 'túúcā: Jesús miiⁿ chí Rey yeⁿ'e 'iiⁿyāⁿ yeⁿ'e ndaata Israel. Ní nduudu miiⁿ ngaⁿ'ā de'ē cáávā chí ch'ii Jesús miiⁿ.

³⁸ Tuuⁿ'mi ní miiⁿ ntúúⁿ s'neeⁿnga'á yā ndúúcu Jesús miiⁿ 'uūví chí duucu, 'áámá ní lado ta cuaacú yā, taama ní lado tá 'cuee yā. ³⁹ 'iiⁿyāⁿ chí cho'ó yā naachi canee cruz miiⁿ ch'iiⁿ'nyuⁿ'neeⁿ yā Jesús miiⁿ. Ní idiⁿ'núⁿ'u yā tíⁿ yā. ⁴⁰ Ní caⁿ'a yā: N'dii chí ngaⁿ'á nī chí maáⁿ nī cuuvi nada'tuūví nī yaacū templo ní cheēti 'iinū nguuvi nadan'dái nī, nadinguáⁿ'āi maáⁿ nī maaⁿ. Ndúúti chí Daiya Dendyuūs n'dii, nch'éeⁿ nī yeⁿ'ē na cruz.

⁴¹ Tiicá ntúuⁿ chiiduú n'geete ndúúcū 'iiⁿyāⁿ fariseos chí dingúuⁿ yā ní ngi'cueeⁿ ley, ndúúcū 'iiⁿyāⁿ ndiicúú chí ngaⁿa ntiinⁿnyúⁿ yā yeⁿe yaacū templo chí ííⁿnyuⁿneeⁿ yā Jesús miiⁿ ní ngaⁿa yā yeⁿe yā: ⁴² Tanáⁿā 'iiⁿyāⁿ ní nadinguáⁿai yā naati nguéé cuuvi maaⁿ yā nguáⁿai yā. Nduúti chí 'iiⁿyāⁿ miiⁿ ní Rey yeⁿe 'iiⁿyāⁿ Israel maaⁿ ní nch'éeⁿ yā yeⁿe na cruz ní cu'téenu nū 'iiⁿyāⁿ miiⁿ. ⁴³ Jesús miiⁿ ní it'éenu yā Ndyuūs. Maaⁿ ní Ndyuūs nadinguáⁿai yā 'iiⁿyāⁿ nduuti chí cuaacu chí 'cuaáⁿ yā 'iiⁿyāⁿ. 'Iiⁿyāⁿ ngaⁿá yā t'icā ti Jesús ngaⁿa yā: 'Úú ní daiya Dendyuūs 'úú.

⁴⁴ Tiicá ntúuⁿ ch'iiⁿnyuⁿneeⁿ chí du-ucu s'eeⁿ chí s'neéⁿnga'a sa dáámá ndúúcū Jesús.

Jesús ch'ii yā

(Mr. 15.33-41; Lc.

23.44-49; Jn. 19.28-30)

⁴⁵ Ndíí maⁿa nguuvi miiⁿ ndíí taan-duú n'geecu 'iinu chiinū chíí maāiⁿ núuⁿmáⁿ iⁿ'yeeⁿdí. ⁴⁶ 'Āā táanduú n'geecu 'iinu, Jesús 'caí yiicú yā: Elí, Elí, ¿lama sabactani? Nduudu hebreo 'cūū ní neⁿē caaⁿmaⁿ Ndyuūs yeⁿé, Ndyuūs yeⁿé, ¿de'ē cuuvi chí s'neéⁿ ní 'úú damaáⁿ?

⁴⁷ N'duuvi 'iiⁿyāⁿ chí snée yā 'miiⁿ taachí ch'indiveéⁿ yā chí caⁿa Jesús miiⁿ ní caⁿa yā: Sáⁿa 'cūū n'gāi sa profeta Elías.

⁴⁸ Hora míⁿ nūuⁿ 'áámá ch'éé 'iiⁿyāⁿ s'eeⁿ ch'éⁿe yā ngeenu yā sta'a yā 'áámá esponja ní di'caandá yā ndúúcū vina-gre ní s'neeⁿ yā esponja miiⁿ na 'áámá tááⁿ ndúú ní ca'a yā chí chí'í Jesús miiⁿ. ⁴⁹ Tanáⁿa yā ní ngaⁿa yā: 'Āā canee ra yā. N'diichi yú ¿'áá chíí Elías miiⁿ nadinguáⁿai yā 'iiⁿyāⁿ?

⁵⁰ Naati Jesús miiⁿ 'caí ntúuⁿ yā taama vmnéⁿēe ní maaⁿ yā nca'a yā espíritu yeⁿe yā na ta'a Ndyuūs ní ch'ii yā. ⁵¹ Hora míⁿ nūuⁿ chí ch'ii Jesús, cortina yeⁿe yaacū templo s'teeⁿ naavtáⁿā ndii

cuaaⁿ 'niiⁿnuúⁿ ndíí cuááⁿ ndiyyā. Ní n'nuⁿu yáⁿāa ní tuūu ní índee. ⁵² Tuu'mi ní yáinyāⁿ s'eeⁿ ní nguaaⁿ ní néené 'yaaⁿ cuerpos yeⁿe 'iiⁿyāⁿ chí n'díí chí it'éenu yā Ndyuūs ndii cuááⁿ vmnaaⁿ nan'dáa yā cheeti yáinyāⁿ s'eeⁿ. ⁵³ Ní 'iiⁿyāⁿ s'uuⁿ chí 'āā n'dii miiⁿ taachi 'āā nduuchi Jesús miiⁿ yeⁿē nguaaⁿ tináⁿā 'iiⁿyāⁿ s'uuⁿ ní nan'daa yā cheeti yáinyāⁿ s'eeⁿ ní cueⁿe yā cachiica yā na yāāⁿ Jerusalén chí Ndyuūs deeve yā. Ní 'yaaⁿ n'dáí 'iiⁿyāⁿ chinaáⁿ yā 'iiⁿyāⁿ chí 'āā n'dii.

⁵⁴ Saⁿa capitán ndúúcū soldados chí snée yā ndúúcū yā ní díⁿ yā cuidado yeⁿe cuerpo yeⁿe Jesús taachi s'neeⁿ yā na cruz. Soldados miiⁿ, taachi n'diichi yā chí n'nuⁿu yáⁿāa ndúúcū dendu'ū chí chíí, neené di'va'a yā ní caⁿa yā: Cuaacu níⁿnyúⁿ, sáⁿa 'cūū ní Daiya Dendyuūs saⁿā.

⁵⁵ 'Yaaⁿ n'dáí n'daataa snée yaⁿai yā ní n'gíinu yā tanducueⁿē chí chó'ōo yeⁿe Jesús. N'daataa s'eeⁿ cachiica yā ndúúcū Jesús ndii na yáⁿāa yeⁿe Galilea ní dichíí'v'e yā Jesús miiⁿ. ⁵⁶ Ní nguaaⁿ n'daataa s'eeⁿ, miiⁿ canéé ta María Mag-dalena ndúúcū María chí cheecu Jacobo ndúúcū José. Ní canéé ntúuⁿ tá cheecuú da'caíyā yeⁿe sáⁿā Zebedeo.

Ch'íichí yā cuerpo yeⁿe Jesús cheeti yáinyāⁿ

(Mr. 15.42-47; Lc.

23.50-56; Jn. 19.38-42)

⁵⁷ Taachí chíinu nguuvi miiⁿ ndaā 'áámá saⁿā chí nguuvi José chí yeⁿē yāāⁿ Arimatea. Saⁿā miiⁿ ní 'cuiica sa ní discípulo yeⁿe Jesús. ⁵⁸ Sáⁿa 'cūū ní cheⁿe sa nanááⁿ Pilato miiⁿ ní chíica sa cuerpo yeⁿe Jesús miiⁿ. Tuu'mi ní Pi-lato caⁿa ntiinⁿnyúⁿ yā chí caⁿa capitán yeⁿe soldados chí ca'á yā cuerpo yeⁿe Jesús miiⁿ José miiⁿ. ⁵⁹ Tuu'mi ní José sta'a sa cuerpo yeⁿe Jesús ní ch'ēcū sa 'áámá sávana deeve tan'dúúcā chí cos-tumbre yeⁿe 'iiⁿyāⁿ s'eeⁿ. ⁶⁰ Ní s'nuūⁿ sa

cuerpo yeⁿe Jesús na 'áamá yáinyāⁿ yeⁿe maaⁿ sa chí ngai chí maaⁿ sa níⁿnuⁿ sa na 'aama yaava. Ch'íínú ch'iíchi sa cuerpo yeⁿe Jesús, s'neeⁿ sa 'áamá tuúu chí néené ch'ēete naachí nínⁿdaa yā yeⁿe cheendi yáinyāⁿ miiⁿ. Ní cunáⁿa sa. ⁶¹Míⁿ véé María Magdalena ndúúcu táámá María niiⁿnuúⁿ ná yáinyāⁿ.

Soldados ní idiíⁿ yā cuidado yáinyāⁿ miiⁿ

⁶²Chó'oo nguuvi chí in'nuúⁿ yā yeⁿe 'viicu yeⁿe Pascua ní chideeve táámá nguuvi chí sábadó ní chiidúú n'geeté ndúúcu 'iiⁿyāⁿ fariseos ní nduuvidaamá yā ní cheⁿe yā nanááⁿ Pilato miiⁿ. ⁶³Ní caⁿa yā chíi yā Pilato: N'dií Pilato, n'gaacú 'nū chí saⁿā chí n'dií chí chincheⁿei sa taachí canee sa iⁿ'yeeⁿdí 'cūú ní caⁿa sa 'túúcā: 'Cuiínū 'iinū nguuvi ní nduúchí nguaaⁿ tináⁿā. ⁶⁴Maaⁿ ní dich'óo ní soldados chí diiⁿ yā cuidado yáinyāⁿ miiⁿ ndí 'cuiinu 'iinū nguuvi. ¿Áátíi ndaá discípulos yeⁿe yā n'gaaⁿ ní diiⁿ iduucú yā cuerpo yeⁿe Jesús? Ní caaⁿmaⁿ yā cuuvi yā 'iiⁿyāⁿ chí sáⁿā miiⁿ ní nanduuchi sá yeⁿe nguaaⁿ tináⁿā. Ní cuncnáā ca nduudu yaadi miiⁿ nguéé ti chí 'āá chó'oo.

⁶⁵Pilato miiⁿ ní caⁿa yā chíi yā 'iiⁿyāⁿ s'eeⁿ: 'Ingaā 'áamá taaⁿ soldados. Cueⁿe ní ní diiⁿ ní cuidado yáinyāⁿ miiⁿ tan'dúúcu chí déenu ní chí n'daācā.

⁶⁶Tuu'mi ní 'iiⁿyāⁿ s'eeⁿ ní cheⁿe yā yáinyāⁿ miiⁿ ní diíⁿ yā cuidado yáinyāⁿ miiⁿ. S'neeⁿ yā 'áamá sello na tuúu ch'ēeté ní s'neeⁿ yā soldados chí diiⁿ sa cuidado yáinyāⁿ miiⁿ.

Jesús nduuchi yā yeⁿe nguaaⁿ tináⁿā

(Mr. 16.1-8; Lc. 24.1-12; Jn. 20.1-10)

28 Chó'oo nguuvi sábadó chí ntaaviⁿtuunúⁿ yā ní chideeve táámá nguuvi chí domingo, nguuvi chí ngaⁿa yú chí nguuvi vmnⁿááⁿ vmnaaⁿ

yeⁿe ndeetē, ní tá María Magdalena ndúúcu taama tá María cheⁿe ta n'diichí tá na yáinyāⁿ yeⁿe Jesús. ²Ní néené díítúu nuⁿu yáⁿāa ti 'aama ángel yeⁿe Señor Nduuús chíiya yā yeⁿe va'ai cheeti nguuvi. Ní taachi ndaa yā, divíi yā tuúu ch'ēete miiⁿ yeⁿe cheendi yáinyāⁿ ní ch'iindi yā vmnaaⁿ yeⁿe tuúu miiⁿ. ³Angel miiⁿ tan'dúúcu chí inááⁿ 'cuai 'tíicā máaⁿ yā chí deeve yā. Ní catecai yā ní cuéé tan'duucā yaāⁿ. ⁴Soldados chí idiíⁿ yā cuidado yáinyāⁿ miiⁿ in'dúúví yā chí 'va'a yā. Ní nduuví yā tan'dúúcu chí chíi yā. ⁵Naati ángel miiⁿ caⁿa yā chíi yā n'daataá s'eeⁿ: Nguéé 'va'a ndís'tií; ti 'úú ní deenú ti in'nuúⁿ ní Jesús chí cā'neeⁿnga'a. ⁶'Āā ntéé 'iiⁿyāⁿ miiⁿ ti nduuchi yā yeⁿe nguaaⁿ tináⁿā tan'dúúcu chí caⁿa yā. Cuchíi ní ní n'diichí ní naachí cānuuⁿ cuerpo yeⁿe Señor miiⁿ. ⁷Cuayivi ní ngaⁿa ángel chíi yā n'daataá s'eeⁿ: Cuinaⁿa núuⁿ ní maāⁿncheetē ní caaⁿmaⁿ ní cuuvi ní discípulos yeⁿe yā chí nduuchi Jesús miiⁿ yeⁿe nguaaⁿ tináⁿā. Cuin'diichí ní. Jesús miiⁿ caⁿa yā vmnⁿááⁿ ndís'tií na yáⁿā Galilea. Míⁿ snaaⁿ ní 'iiⁿyāⁿ. Chúú chí ngaⁿá ngí ndís'tií.

⁸Tuu'mi ní n'daata s'éeⁿ nan'dáa yā cheeti yáinyāⁿ miiⁿ ní dii'yá yā chíi ní duuvi yeenú yā. N'daata s'éeⁿ ní cueⁿe yā ngéenu yā ní caⁿa yā chíi yā discípulos yeⁿe Jesús tan'dúúcu chí n'diichí yā. ⁹Tuu'mi ní taachi cueⁿe yā chí yaa'ví yā discípulos cuin'diichí ní, Jesús miiⁿ ndaá yā chí nndaacá yā n'daata s'eeⁿ ní caⁿa yā: Tavacho'onoó ní ndís'tií n'daata s'eeⁿ. Ní n'daata s'eeⁿ ní ndáá niiⁿnúⁿ yā Jesús miiⁿ ní túmaⁿa yā ca'a Jesús miiⁿ ní s'téenu yā 'iiⁿyāⁿ. ¹⁰Tuu'mi ní Jesús caⁿa yā chíi yā n'daataá s'éeⁿ: Nguéé 'va'a ní. Cuéⁿe ní cuuvi ní hermanos yeⁿe chí n'diichí ní 'úú. Ní hermanos caⁿa yā na yáⁿā Galilea ní miiⁿ snaaⁿ yā 'úú.

**Soldados nga^a yā ngii yā chiiduú
n'geete s'eeⁿ tan'dúucā chí chii**

¹¹ Nchó'oo n'daata s'uuⁿ cuna^a yā ní n'duuvu soldados chí díⁿ yā cuidado yeⁿe yáinyāⁿ cheⁿ'é yā na yááⁿ Jerusalén ní caⁿ'a yā chí yā chiiduú n'geete yeⁿ'é tánducueⁿ chí chí. ¹² Chiiduú n'geete nadidaamá yā ndúucū 'iiⁿ'yāⁿ ndífcuū chí nga^a n'tiiⁿ'nyuⁿ yeⁿ'e yaācū. Ní nduuvidaamá yā ní nééné n'deéé túumí ca'a yā soldados. ¹³ Ní caⁿ'a yā chí yā soldados: Ndís'tií ní 'túucā caaⁿ'maⁿ ní: Taachi yaaⁿ stiyaadú 'nū discípulos yeⁿ'e Jesús ndaá yā ní diduucú yā cuerpo yeⁿ'e Jesús. ¹⁴ Ní nduuti chí gobernador 'caandíveéⁿ yā chíⁿ chí ndís'tií caaⁿ'maⁿ ní, nús'uu yaaⁿ'vi neeⁿ 'nū 'iiⁿ'yāⁿ ní nguaⁿ'āi ndís'tií. ¹⁵ Soldados ní sta'á yā tuūmí miiⁿ ní díⁿ yā tan'dúucā chí chiiduú n'geete caⁿ'á yā chí yā soldados. Chíⁿ chí ndii maaⁿ ní 'iiⁿ'yāⁿ yeⁿ'e ndaataá Israel nga^a yā 'tíicā.

Jesús idichó'o yā discípulos yeⁿ'e yā

(Mr. 16.14-18; Lc.

24.36-49; Jn. 20.19-23)

¹⁶ Ndu'ū ndiicháámá discípulos cueⁿ'é yā na yáⁿ'āa Galilea ní ndaá yā ná yīcū

naachí Jesús miiⁿ dichó'o yā 'iiⁿ'yāⁿ s'eeⁿ. ¹⁷ Taachí discípulos n'diichí yā Jesús miiⁿ, s'téenu yā 'iiⁿ'yāⁿ 'áará chí ná^a yā ní 'uūvi vaanicádiinūⁿ yeⁿ'e yā. ¹⁸ Jesús ní ndaa níⁿ'núⁿ yā ní yaaⁿ'vi yā discípulos ní caⁿ'a yā: Chiidá ní tee yā 'úú nducueⁿ'e poder chí caaⁿ'maⁿ n'tiiⁿ'nyúⁿ na va'āi chēeti nguuvi ndúucū na iⁿ'yeeⁿ'dí 'cūū. ¹⁹ Maaⁿ ní cueⁿ'e ní ni ca'cueéⁿ ní nuuⁿ'maⁿ naciones, ní cuuvi ní discípulos yeⁿ'é. 'Iiⁿ'yāⁿ chí i'téenu yā nduudu cuaacu yeⁿ'é, ndís'tií cuedínuūⁿ'niⁿ ní 'iiⁿ'yāⁿ miiⁿ ndúucū chí duuchi Ndyuūs Chiida yú, ndúucū Daiya yā, ndúucū Espíritu N'dai yeⁿ'é Ndyuūs. ²⁰ Cá'cueeⁿ ní 'iiⁿ'yāⁿ s'eeⁿ chí díⁿ yā tanducueⁿ'é dendu'ū chí 'úú nga^a ngii ndís'tií. Ní cadíinuūⁿ ní chí 'úú ní caneé ndúucū ndís'tií nducueⁿ'é tiempo ndíí ntuuvi iⁿ'yeeⁿ'dí. Tíicā cuuvi.

NDUUDU N'DÁÍ CHÍ DÍNGÚŪⁿ APOSTÓL MARCOS

**Yeⁿe chi ngaⁿa Juan
chi ngeédínuūⁿniⁿ**

(Mt. 3.1-12; Lc. 3.1-9,
15-17; Jn. 1.19-28)

1 "Túucā chí ngaⁿa nduudu ngai yeⁿe Jesucristo chí Daiya Dendyuūs.

² 'Iiⁿyāⁿ profeta Isaiās miiⁿ chí ngaⁿa nduudu yeⁿé Ndyuūs ndíí cuááⁿ vmnaaⁿ dinguúⁿ yā tan'dúucā chí caⁿa Ndyuūs, 'tíicā:

'Úú dicho'ó 'aama 'iiⁿyāⁿ chi caaⁿmáⁿ yā nduudu yeⁿé nanááⁿ ndís'tií.

³ 'Iiⁿyāⁿ miiⁿ ní caⁿa yā ndúúúú ngai na yáⁿāa cuūⁿmáⁿ naachi nguéé ch'ēetinéé 'iiⁿyāⁿ. Ní caⁿa yā: Cuundiyaáⁿ nī yúúni yeⁿe Señor Ndyuūs caati cuchii yā. Nan'guáaⁿ nī yúúni cuaacu caavá yā Dideevé nī staava yeⁿé nī ní cuuvi 'cuaáⁿ nī 'iiⁿyāⁿ miiⁿ taachi ndaa yā.

⁴ 'Tíicā Juan miiⁿ ní cheédínuūⁿniⁿ sa 'iiⁿyāⁿ s'eeⁿ na yáⁿāa cuūⁿmáⁿ naachi nguéé ch'ēetinéé 'iiⁿyāⁿ. Ní caⁿa cuáácú sá chí 'iiⁿyāⁿ ndaacadáámí yā yeⁿé nuuⁿndi yeⁿé yā ní cueédínúūⁿniⁿ sa 'iiⁿyāⁿ chí n'giindiveéⁿ yā nduudu yeⁿe sa, naati Ndyuūs nadich'ēecú yā nuuⁿndi yeⁿé yā. ⁵ Ní n'dee 'iiⁿyāⁿ yeⁿe yáⁿāa Judea ndúúúú 'iiⁿyāⁿ yeⁿe yááⁿ Jerusalén can'dáa yā chí 'caandiveéⁿ yā chí ngaⁿa Juan miiⁿ. Ní taachi 'iiⁿyāⁿ s'eeⁿ caⁿa yā nuuⁿndi yeⁿé yā nanááⁿ Ndyuūs níicú Juan miiⁿ ní cheédínuūⁿniⁿ sa 'iiⁿyāⁿ miiⁿ na yíicú Jordán.

⁶ Catecai Juan miiⁿ ní nín'dai ndúúúú yuúúú yeⁿe 'iiti camello. Ní cinturón yeⁿé sa ní dííⁿmáⁿ 'iiti. Ní chí cheⁿe sa ní 'iiti langostas ndúúúú n'di'í yeⁿé 'iití 'yáaiⁿ chí véé cueeti. ⁷ Juan miiⁿ ngaⁿa sa nduudu cuaacu yeⁿé Ndyuūs. Ní caⁿa sa: Cuayiivi yeⁿe 'úú cuchii 'áámá 'iiⁿyāⁿ

chí ch'ēete taavi cá poder yeⁿé yā nguéé ti 'úú. 'Úú ní nguéé neené n'dai 'úú chí cuuvi dííⁿ n'daatií yííⁿmáⁿ yeⁿé ndaacuú yeⁿe yā. ⁸ 'Úú ní ngeédínuūⁿniⁿ ndís'tií ndúúúú nuūⁿniⁿ naati 'iiⁿyāⁿ miiⁿ ní cueédínuūⁿniⁿ yā ndúúúú Espíritu N'dai yeⁿé Ndyuūs.

Juan miiⁿ cheédínuūⁿniⁿ sa Jesús

(Mt. 3.13-17; Lc. 3.21-22)

⁹ Nguuvi s'eeⁿ Jesús miiⁿ chiicá yā yeⁿe yááⁿ Nazaret yeⁿe yáⁿāa Galilea ní ndaa yā na yíicú Jordán. Ní Juan miiⁿ ní cheédínuūⁿniⁿ sa Jesús miiⁿ na yíicú Jordán. ¹⁰ Taachi Jesús can'daa yā na nuūⁿniⁿ miiⁿ, cuin'diichí nī. N'diichí yā chí nanguaaⁿ nanguuvi ní Espíritu N'dai yeⁿé Ndyuūs ní cuch'éeⁿ vmnaaⁿ yeⁿé yā tan'dúúúú 'áámá paloma 'tíicā. ¹¹ Ch'iindiveeⁿ Jesús 'áámá nduudu chí chiicá yeⁿé nánguuvi chí caⁿa: Díí Daiyá chí neⁿe taaví ní yeenú taavi cáávā dii.

**Yááⁿ'nguiinūⁿ neⁿe sa
n'diichineeⁿ sa Jesús**

(Mt. 4.1-11; Lc. 4.1-13)

¹² Cuayiivi miiⁿ ní Espíritu N'dai yeⁿé Ndyuūs candēé Jesús na 'áámá yáⁿāa cuūⁿmáⁿ naachi nguéé ch'ēetinéé 'iiⁿyāⁿ. ¹³ Jesús miiⁿ ní canée yā miiⁿ 'uuvi ngeecu nguuvi naachi véé 'iiti chí taaⁿ. Ní yááⁿ'nguiinūⁿ miiⁿ ní n'diichineeⁿ sa Jesús chí dííⁿ yā nuuⁿndi naati nguéé dinuūⁿndí yā. Níicú ángeles ndaa yā ní dííⁿ yā cuidado Jesús miiⁿ.

**Jesús tucá'a yā ntiíⁿnyuⁿ
yeⁿé yā na yáⁿāa Galilea**

(Mt. 4.12-17; Lc. 4.14-15)

¹⁴ Cuayiivi taachi s'nuúⁿ yā Juan chí cheédínuūⁿniⁿ 'iiⁿyāⁿ vácūū, Jesús miiⁿ ndaa yā na yáⁿāa Galilea, ní caⁿa yā nduudu cuaacu chí ngai yeⁿe naachi Ndyuūs ngaⁿa ntiíⁿnyuⁿ yā. ¹⁵ Jesús miiⁿ ní caⁿa yā: 'Áā snuū ca'a tiempo naachí ngaⁿa ntiíⁿnyuⁿ Ndyuūs ní 'āā ndaa ni-

iⁿnuúⁿ. Nandaacadaamí ní yeⁿē nuuⁿndi yeⁿé ní ní cuⁿteenú ní nduudu cuaacu chí ngai chí yeⁿe Cristo.

**Jesús yaa'ví yā cuúúⁿ saⁿā
chí itungááⁿ 'yaacā**

(Mt. 4.18-22; Lc. 5.1-11)

¹⁶ Jesús miiⁿ ní cachiicá yā cuaaⁿ 'di-ituú nuúⁿníⁿyáⁿā chí nguuvi Galilea, taachí n'diichí yā Simón ndúú^cú díⁿíⁿ sa Andrés. Sáⁿā s'eeⁿ ní saⁿā chí itungááⁿ 'yaacā, ní ngí sa yaānā yeⁿē sa cheeti nuúⁿníⁿyáⁿā ti saⁿā s'eeⁿ itungááⁿ sa 'yaacā na nuúⁿníⁿyáⁿā. ¹⁷ Ní Jesús ngaⁿa yā ngii yā saⁿā s'eeⁿ: Cuchí ní, caⁿá ní nduú^cú ní 'úú ní díⁿ chí inⁿnuúⁿ ní 'iiⁿyāⁿ chí cuuvi caⁿá yā nduucú. Ní tan'dúú^cā chí ndís'tii tungaáⁿ ní 'yaacā yeⁿe nuúⁿníⁿyáⁿā 'tíicā ngaⁿa ní ndúú^cú 'iiⁿyāⁿ chí caⁿá yā nduucú.

¹⁸ Hora míⁿ nūⁿ saⁿa s'uuⁿ s'neeⁿ sa yaānā yeⁿē sa ní cueⁿe sa ndúú^cú Jesús.

¹⁹ Tuu'mi Jesús miiⁿ ní cueⁿé yā 'tēé ní ndaacá yā saⁿa chí nguuvi Jacobo ndúú^cú Juan chí 'diinū sa. Saⁿā s'eeⁿ ní daiya Zebedeo ní snee sa na 'aama barco ní n'diyaata sá yaānā yeⁿē sa. ²⁰ Jesús 'caí yā saⁿā s'eeⁿ. Saⁿā s'eeⁿ ní nan'dáa sa na barco naachi sné sa ndúú^cú chiida sa n'diyaata sá yaānā yeⁿē sa. Ní s'neeⁿ sa chiida sa Zebedeo ndúú^cú mozos yeⁿe yā ní cueⁿe sa ndúú^cú Jesús.

**'Áamá saⁿā chí vee espíritu
yeⁿe yááⁿ'guiinūⁿ**

(Lc. 4.31-37)

²¹ Jesús miiⁿ ní ndaa yā na yááⁿ Capernaum ndúú^cú saⁿā s'eeⁿ. Ní ca'áámá ca'áámá sábadu, nguuvi chí ntaaviⁿtuunúúⁿ 'iiⁿyāⁿ s'eeⁿ, Jesús cueⁿé yā na yaacū sinagoga ní chí'cueeⁿ yā 'iiⁿyāⁿ. ²² 'Iiⁿyāⁿ s'eeⁿ ngeⁿe yiinu yā yeⁿe chí Jesús ngaⁿa yā; tí ngí'cueeⁿ yā tan'dúú^cā 'iiⁿyāⁿ chí ngaⁿā ntiiⁿnyúⁿ yā, nguéé tan'dúú^cā 'áámá maestro yeⁿe ley. ²³ Ní cheeti yaacū sinagoga míⁿ

canéé 'áámá saⁿā chí vee espíritu yeⁿe yááⁿ'guiinūⁿ ndúú^cú sa. Ní espíritu miiⁿ n'gai yeⁿē sá: ²⁴ N'dií Jesús yeⁿe yááⁿ Nazaret, cuⁿneeⁿ ní nús'uu. ¿Dé'ē canéé yeⁿé 'nū nduucú ní? ¿'Áá ndaa ní chí di'cuinú ní nús'uu? 'Úú ní n'diichí du'ú n'dií. N'dií ní 'iiⁿyāⁿ chí n'dai chí daiya Dendyuús n'dií.

²⁵ Jesús miiⁿ ní yaa'vi néesⁿ yā espíritu yeⁿe yááⁿ'guiinūⁿ, ní caⁿa yā: Dii espíritu n'gáádí dí cheendi di, nífcú nan'dáa di yeⁿe saⁿá tii.

²⁶ Tuu'mi ní espíritu yeⁿe yááⁿ'guiinūⁿ diíⁿ chí chitá'aa 'áámá ataque sáⁿa 'cūú. Ní 'cai yiicú espíritu miiⁿ, ní nan'daa espíritu miiⁿ ná cuerpo yeⁿe sáⁿa 'cūú. ²⁷ Ní nducyáácá 'iiⁿyāⁿ cheⁿe yiinu yā yeⁿe chuú ní tiingūneeⁿ yā nguaaⁿ maaⁿ yā ndúú^cú vi'i: ¿Dé'ē chuú? ¿Dé'ē chí ngai chí ngi'cueeⁿ 'íiⁿyāⁿ 'cúú? 'Íiⁿyāⁿ 'cúú ní vee poder ca yeⁿé yā ní ngí ngaⁿa ntiiⁿnyúⁿ yā yeⁿē espíritu yeⁿe yááⁿ'guiinūⁿ ní n'giindivééⁿ espíritu yeⁿé yā.

²⁸ Maā'nch'eté nuúⁿ nducyaaca 'iiⁿyāⁿ n'giindivééⁿ yā yeⁿe chí dií Jesús miiⁿ, 'iiⁿyāⁿ yeⁿe núúⁿ máⁿ ná yáⁿāa yeⁿe yáⁿā Galilea.

**Jesús díⁿ yā chí nduū^vā
yeⁿé indáⁿā Simón Pedro**

(Mt. 8.14-15; Lc. 4.38-39)

²⁹ Taachí n'daa Jesús na yaacū sinagoga Jesús miiⁿ ní cueⁿe yā ndúú^cú Jacobo, ndúú^cú Juan ná vaacu Simón ndúú^cú Andrés. ³⁰ N'daataá chí indáⁿā Simón miiⁿ ní ngíta yā. Ndéé 'íiⁿnūⁿ 'iiⁿyāⁿ miiⁿ ní candiití yā. Ní 'iiⁿyāⁿ na vaacu yā caⁿa yā chí yā Jesús miiⁿ chí n'daataá miiⁿ ní ngíta yā. ³¹ Tuu'mi ní Jesús miiⁿ ní ndaa yā nanááⁿ n'daataá míⁿ ní sta'á yā ta'á tá ní nadicuééⁿ yā táⁿā. Nífcú chivii 'iiⁿnūⁿ miiⁿ hora miiⁿ taachi nadicuééⁿ yā n'daataa miiⁿ, ní tucá'a tá díⁿ tá mandados yeⁿé 'iiⁿyāⁿ s'eeⁿ chí cheⁿe yā.

**Jesús miiⁿ ní diiⁿ yā chi nééné
'yaaⁿ 'iiⁿyāⁿ nduūvā yeⁿe yā**

(Mt. 8.16-17; Lc. 4.40-41)

³² Cuayiivi taachí 'āā chiya 'yāⁿā ní 'āā 'da'a miiⁿ, 'iiⁿyāⁿ s'eeⁿ ní ndaa yā nanááⁿ Jesús miiⁿ ndúúcu nducyaaca 'iiⁿyāⁿ chí ngíta yā ndúúcu 'iiⁿyāⁿ chí véé espíritus yeⁿe yááⁿ'guiinūⁿ ndúúcu yā. ³³ Ní nducyáácá 'iiⁿyāⁿ yeⁿe yááⁿ miiⁿ ní ndaa yā na cheendi va'āi naachi canéé Jesús miiⁿ. ³⁴ Ní Jesús miiⁿ ní diiⁿ yā chi nanduuva yeⁿe 'yaaⁿ n'dái 'iiⁿyāⁿ chí véé n'dee nááⁿ n'dai ca'ai yeⁿe yā. Ní diví yā n'dee n'dái espíritus yeⁿe yááⁿ'guinuuⁿ yeⁿe 'iiⁿyāⁿ s'eeⁿ. Nguéé 'cuúⁿ yā chí espíritus s'uuⁿ caāⁿmaⁿ, caati espíritus s'uuⁿ ní deenu du'ū chí Jesús miiⁿ.

**Jesús ngaⁿa yā nduudu cuaacú yeⁿe
Dendyuūs na yáⁿā Galilea**

(Lc. 4.42-44)

³⁵ Táámá nguētiyaaⁿ 'da'ā ca, Jesús miiⁿ ní ncuéeⁿ yā ní can'dáa yā na yááⁿ Jerusalén miiⁿ ní cueⁿe yā 'áámá lado yeⁿe yááⁿ miiⁿ naachi nguéé 'iiⁿyāⁿ ní miiⁿ caaⁿmaⁿngua'á yā. ³⁶ Simón miiⁿ ndúúcu tanáⁿā compañeros yeⁿe sa cheⁿe yā n'nuúⁿ yā Jesús. ³⁷ Taachí ndaaca yā Jesús miiⁿ, tuu'mi ní caⁿa yā chí yā Jesús: N'dii Jesús, nducyáácá 'iiⁿyāⁿ in'nuúⁿ yā n'dii.

³⁸ Jesús miiⁿ ní caⁿa yā chí yā 'iiⁿyāⁿ s'eeⁿ: Caⁿā yú tanáⁿā yááⁿ chí snéé na niiⁿnuúⁿ, ní tiicá ntúúⁿ caaⁿmaⁿ yú nduudu cuaacu yeⁿe Ndyuūs miiⁿ ti cáávā chuu chí cuchí.

³⁹ Jesús miiⁿ ní cachiicá yā núúⁿmáⁿ yááⁿ cuaaⁿ na yáⁿā Galilea. Ní ngaⁿa yā nduudu cuaacú yeⁿe Ndyuūs miiⁿ na yáacū sinagogas yeⁿe yááⁿ s'eeⁿ. Ní diví yā espíritus yeⁿe yaaⁿ'n'giinūⁿ yeⁿe 'iiⁿyāⁿ.

**Jesús diiⁿ yā chi nduūvā yeⁿe
'áámá saⁿā ndúúcu ca'ai lepra**

(Mt. 8.1-4; Lc. 5.12-16)

⁴⁰ 'Áámá saⁿā chí canéé ca'ai chí in'duuti yuutē yeⁿe sa ndaa sa nanááⁿ Jesús, ti neⁿe sa caaca sa 'áámá favor yeⁿe yā. Ní chíintii'ya sa ní caⁿa sa: N'dii Jesús, ndúúti chí n'dii neⁿe ní, diiⁿ ní chí nduūvā yeⁿe.

⁴¹ Jesús ní nduuvi ya'āi 'ínu yā saⁿā miiⁿ, ní tuu'ví yā saⁿā ndúúcu ta'a yā ní caⁿa yā: Táácā nguē. 'Úú neⁿe. Dii saⁿā, 'āā nduuvā yeⁿe di.

⁴² Taachí caⁿa Jesús 'tuucā, chivii ca'ai chí in'duuti yuute yeⁿe sa ní nduūvā yeⁿe sa, ní deēve sa. ⁴³ Tuu'mi ní Jesús miiⁿ ní yaa'vi yā saⁿā miiⁿ chí cunaⁿa sa na vaacu sa, naatí néé ca'á yā cuidado saⁿa miiⁿ ní yaa'vi yā saⁿa miiⁿ: ⁴⁴ Díí, cun'díichí dí, nguéé cuuvi di mar 'áámá 'iiⁿyāⁿ chí nanduūvā yeⁿe di. Cueⁿe di ní 'cuuⁿmiⁿ di maaⁿ cuerpo yeⁿe di nanááⁿ chíiduú chí nduūvā yeⁿe di. Ní ca'a di ofrenda tan'dúúcā chí ngaⁿa ley yeⁿe Moisés miiⁿ cáávā chí nduūvā yeⁿe di ní cáávā chí deēve cuerpo yeⁿe di. 'Tíicā nducyáácá 'iiⁿyāⁿ snaaⁿ yā chí 'āā nduuvā yeⁿe di.

⁴⁵ Tuu'mi ní saⁿā miiⁿ ní cunaⁿa sa ní caⁿa sa chí sa n'dee n'dái 'iiⁿyāⁿ tan'dúúcā chí chí ndúúcu sa. Ní cáávā chí diiⁿ sa 'túúcā, Jesús miiⁿ ní 'āā ntéé cheⁿe nguūvi yā mar 'áámá yááⁿ, ti 'iiⁿyāⁿ s'eeⁿ snaaⁿ yā 'iiⁿyāⁿ. Ní Jesús cueⁿe yā yeⁿe yááⁿ miiⁿ, ní cachiicá yā 'áámá lado yeⁿe yááⁿ s'eeⁿ naachi nguéé ch'ētinéé 'iiⁿyāⁿ; naati 'iiⁿyāⁿ yeⁿe nducuéⁿe yááⁿ ní n'daa yā chí n'diichi yā Jesús miiⁿ.

**Jesús diiⁿ yā chí nduūvā yeⁿe 'áámá
saⁿā chí nguéé ngii inuⁿu sa**

(Mt. 9.1-8; Lc. 5.17-26)

2 Cho'oo nguuvi s'uuⁿ, Jesús miiⁿ ní nguēcunéé yā nndaa yā na yááⁿ Ca-

pernaum. Ní 'iiⁿ'yāⁿ ngaⁿa yā chi Jesús canéé yā na va'ai miiⁿ. ²Maaⁿnch'εεté nūuⁿ na va'ai naachi canéé Jesús miiⁿ nduuvidaamá 'yaaⁿ n'dái 'iiⁿ'yāⁿ, ní 'āā ntéé tunéé cheendi va'āi miiⁿ chí ch'εeti nūuⁿ 'iiⁿ'yāⁿ s'eeⁿ. Ní Jesús miiⁿ ngaⁿa yā nduudu yeⁿe Ndyuūs. ³Tuu'mi ní ndaā na cuūuⁿ sáⁿā ndεε yā 'áámá saⁿā ndúúcu ca'āi chi in'dúuví cuerpo yeⁿe sa. ⁴Nguéé chii sndaā yā naachi canéé Jesús miiⁿ ti neené n'deēe 'iiⁿ'yāⁿ snúuⁿ yā. Cuchéε yā cuaaⁿ tíⁿ va'ai ní nadi-ví yā na n'duuvi táátá tíⁿ va'āi miiⁿ. Ch'íínú n'guaaⁿ yā miiⁿya dich'ó'o yā saⁿā ndúúcu ca'āi chi in'dúuví cuerpo yeⁿe sa na yiive yeⁿe sa ní ndεē sa naachi cheendii Jesús miiⁿ. ⁵Taachi Jesús n'diichí yā chi 'iiⁿ'yāⁿ s'eeⁿ véé vaadi i'téenu nanáaⁿ yā, caⁿa yā chii yā saⁿā ndúúcu ca'āi chi in'dúuví cuerpo yeⁿe sa: Díí, daiyá, núúⁿndí yeⁿe dī 'úú ní nch'εēcú.

⁶N'duuvi maestros yeⁿe ley miiⁿ chí vεεté yā miiⁿ, nadacádínnuⁿ yā 'tíicā na staava yeⁿe ya. ⁷¿De'ε cúuví chí 'tíicā ngaⁿa sáⁿa 'tíi? Ngaⁿa sa yeⁿe dendu'ū chi nguéé n'daācā chi contra yeⁿe Ndyuūs, ti mar 'áámá 'iiⁿ'yāⁿ nguéé cuuví díiⁿ yā nadach'εēcú yā nuuⁿndí yeⁿe 'iiⁿ'yāⁿ, ti dámaaⁿ Ndyuūs. ⁸Jesús miiⁿ ní deenu yā de'ε chí nadacádínnuⁿ saⁿā s'eeⁿ, ní caⁿa yā chii yā 'iiⁿ'yāⁿ: ¿De'ε cúuví chí 'tíicā nadacádínnuⁿ ndís'tíi na staava yeⁿe ní? ⁹¿'Áá nguéé ngiⁿíi ca chí caaⁿmáⁿ cuuvi saⁿa ndúúcu ca'āi chí in'dúuví cuerpo yeⁿe sa: Nuⁿndí yeⁿe di ní 'āā nchεēcú yeⁿe di, o 'úú caaⁿmáⁿ: Ndúcuééⁿ di, ní nadícuééⁿ di yiive yeⁿe di ní caaca dí? ¹⁰Ní caāvā chí ndís'tíi in-aáⁿ ní chuū, níicú cadínnuⁿ ní chí Saⁿā chí Daiya Dendyuūs ní véé poder yeⁿe yā na iⁿ'yeeⁿdí cūū chí nadach'εēcú ya nuuⁿndí. Tuu'mi ní caⁿa yā chii yā saⁿā ndúúcu ca'āi chí in'dúuví cuerpo yeⁿe sa: ¹¹Díí saⁿā, nducueéⁿ di, ní nadacuééⁿ di yiive yeⁿe di ní cunaⁿa dí na vaacu dí.

¹²Saⁿa chí ngiitā miiⁿ nducueeⁿ sa, ní nadacuééⁿ sa yiive yeⁿe sa, ní nan'daa sa miiⁿ. Ní nducyaaca 'iiⁿ'yāⁿ n'diichí yā chuū ní cheⁿe yiinú yā ní dich'εεté yā Ndyuūs. Ní ngaⁿa yā: Mar 'áámá vmnéⁿεε nguéé n'diichi yú dendu'ū chí 'tuucā.

Jesús yaa'ví yā 'áámá saⁿā chí nguuvi Leví

(Mt. 9.9-13; Lc. 5.27-32)

¹³Cuayivi Jesús miiⁿ cheⁿe yā cuaaⁿ 'díftuú nuūⁿniⁿ'yāⁿā. Ní taachi nducyaaca 'iiⁿ'yāⁿ ndaá yā nanáaⁿ yā, ní Jesús miiⁿ ní chí'cuééⁿ yā 'iiⁿ'yāⁿ s'eeⁿ. ¹⁴Ní taachi cachiicá Jesús miiⁿ, n'diichí yā 'áámá saⁿā chí nguuvi Leví, chí daiya Alfeo. Véé sá naachi véé 'iiⁿ'yāⁿ chí ínn'gueε yeⁿe impuestos. Ní Jesús caⁿa yā chí yā saⁿā miiⁿ: Díí saⁿā, cuchí di caⁿā di nduucú. Tuu'mi ní Leví miiⁿ nducueeⁿ sa ní cueⁿe sa ndúúcu Jesús miiⁿ.

¹⁵Tuu'mi ní Leví miiⁿ díiⁿ sa invitar Jesús miiⁿ chí caⁿá yā na vaacu sa ní che'e yā ndúúcu sa. Neené 'yaaⁿ 'iiⁿ'yāⁿ chí ínn'gueε yeⁿe impuestos ndúúcu 'iiⁿ'yāⁿ chí véé nuuⁿndí yeⁿe yā ndaā ntúuⁿ yā. Ní 'yaaⁿ n'dái yā ch'εεté yā na mesa daama ndúúcu Jesús ndúúcu discípulos yeⁿe yā ti neené 'yaaⁿ 'iiⁿ'yāⁿ chí cueⁿe yā ndúúcu yā. ¹⁶Ní taachi maestros yeⁿe ley ndúúcu 'iiⁿ'yāⁿ fariseos n'diichí yā chí Jesús ní nge'e yā ndúúcu nducyaaca 'iiⁿ'yāⁿ s'eeⁿ, tuu'mi ní caⁿa yā chí yā discípulos yeⁿe Jesús: ¿De'ε cúuví chí maestro yeⁿe ní véε yā nge'e yā ní ngi'i yā ndúúcu 'iiⁿ'yāⁿ chí inn'gueε yeⁿe impuestos ndúúcu 'iiⁿ'yāⁿ nuuⁿndí?

¹⁷Taachí Jesús ch'iindiveéⁿ yā chuū, tuu'mi ní caⁿa yā chí yā 'iiⁿ'yāⁿ s'eeⁿ: 'Iiⁿ'yāⁿ chí nguéé ngíita yā nguéé neⁿe yā 'aama médico. Dámaaⁿ 'iiⁿ'yāⁿ chí ngiitā neⁿe yā chí cuuvi yíicú yā. 'Úú ní nguéé cuchí chí yaa'ví 'iiⁿ'yāⁿ chí nadacadi-inúúⁿ yā chí ch'εete maaⁿ yā chí nguéé

dinuuⁿndí yā caati chí yaa'ví 'iiⁿyāⁿ chí
véé nuuⁿndi yeⁿe yā.

**'Iiⁿyāⁿ nítínguuneeⁿ yā Jesús miiⁿ
yeⁿe chí nguēe ca'diinú yā**

(Mt. 9.14-17; Lc. 5.33-39)

¹⁸Áámá tiempo taachi discípulos yeⁿe
Juan miiⁿ ndúucū fariseos ca'diinúⁿ yā,
náⁿá 'iiⁿyāⁿ ndaa yā nanááⁿ Jesús miiⁿ
ní ntinguuneeⁿ yā Jesús: ¿De'ē cuuvi
chí ca'diinúⁿ discípulos yeⁿe Juan miiⁿ
ndúucū 'iiⁿyāⁿ fariseos miiⁿ naati dis-
cípulos yeⁿe ní nguéé ca'diinúⁿ yā?

¹⁹Jesús nan'guēcútaⁿa yā 'iiⁿyāⁿ
s'eeⁿ: ¿Áá ca'diinúⁿ 'iiⁿyāⁿ chí ndíí yā
invitado naachí n'giindivaacu 'iiⁿyāⁿ
'naaⁿ chí sáⁿá chí n'giindivaacu sa canéé
sá ndúucu yā? Ndúuti chí canéé saⁿá
chí n'giindivaacu sa miiⁿ, nguéé cuuvi
ca'diinúⁿ yā. ²⁰Naati cuchii tiempo
taachí ch'ii saⁿá chí n'giindivaacu sa
tuuⁿmi ní cuuvi ca'diinúⁿ yā.

²¹Mar 'áámá 'iiⁿyāⁿ nguéé cuta'á yā
'áámá tááⁿ tiinūⁿ ngai chí 'āā nguéé
naaⁿnu yā chí 'iindi'yaatá yā yeⁿe na
catecai ndiicúú yeⁿe yā. Ndúuti chí
díⁿ yā 'tíicā, maáⁿ tiinūⁿ ngai miiⁿ ní
cáancuūⁿ cúⁿteeⁿ tiinūⁿ ndiicúú miiⁿ.
Níicú cuuvi ch'ēete ca naachí ndíí n'teeⁿ.

²²Tiicā ntuūⁿ mar 'áámá 'iiⁿyāⁿ nguéé
caaⁿn'yúⁿ yā vino ngai na bolsa yíⁿmáⁿ
ndiicúú yeⁿe vino tan'dúucā chí diiⁿ
'iiⁿyāⁿ ndiicúú. Nduuti chí díⁿ yā 'tíicā
vino ngai miiⁿ ní di'cuuní yíⁿmáⁿ ndi-
icúú miiⁿ ní cuuvi ndai vino miiⁿ ndúucū
yíⁿmáⁿ. Chíⁿ chí vino miiⁿ canéé chí
'cueēⁿ na bolsa yíⁿmáⁿ ngai.

**Discípulos yeⁿe Jesús miiⁿ ní tiicú
yā trigo nguuvi sábadó chí
ntaavi'tuunúúⁿ 'iiⁿyāⁿ Israel**

(Mt. 12.1-8; Lc. 6.1-5)

²³Áámá nguuvi chí sábadó chí
ntaavi'tuunúúⁿ 'iiⁿyāⁿ Israel Jesús
miiⁿ ndúucū discípulos yeⁿe yā cho'ó
yā 'áámá campo naachi véé trigo ní

discípulos yeⁿe yā ní tucá'a yā tiicú yā
yááⁿ miiⁿ yeⁿe trigo taachi cho'ó yā.
²⁴Tuuⁿmi ní 'iiⁿyāⁿ fariseos ní caⁿa yā
chii yā Jesús miiⁿ: N'dií cuin'díichí ní,
¿d'é'ē cúúví chí díⁿ discípulos yeⁿe ní
chí nguēe canéé chí diiⁿ yú nguuvi chí
ntaavi'tuunúúⁿ 'iiⁿyāⁿ?

²⁵Naati Jesús miiⁿ ní caⁿa yā chii yā
saⁿá fariseos: ¿Áá nguéé n'geēⁿ ndí's'tií
chí diiⁿ David miiⁿ ndúucū 'iiⁿyāⁿ chí
cachiica ndúucu yā taachi cuicu yā?
²⁶David miiⁿ ní sndáa yā ná yáacū yeⁿe
Ndyuūs taachi saⁿá chí nguuvi Abiatar
ngaⁿa ntiíⁿnyuⁿ sa yeⁿe chiidúú ch'ēete
ca. Ní David che'é yā panes yeⁿe nátai
yeⁿe Ndyuūs chí dámaaⁿ chiidúú s'eeⁿ
cuuvi che'é yā. Ní David miiⁿ ca'a yā pan
miiⁿ 'iiⁿyāⁿ chí snéé ndúucu yā. Ní che'e
yā.

²⁷Jesús miiⁿ ní caⁿa yā chii yā 'iiⁿyāⁿ:
Nguuvi chí ntaavi'tuunúúⁿ yā canéé chí
cuuvi yeⁿe saⁿá yeⁿe iⁿ'yeeⁿdí 'cūū naati
nguéé saⁿá chí cuuvi yeⁿe nguuvi chí
ntaavi'tuunúúⁿ saⁿá. ²⁸Cáávā chuū chíⁿ
chí Saⁿá chí Daiyá Dendyuūs cuuvi
caaⁿmaⁿ ntiíⁿnyúⁿ ntúúⁿ sa yeⁿe nguuvi
chí ntaavi'tuunúúⁿ 'iiⁿyāⁿ.

Saⁿá chí ntí'í ta'a sa

(Mt. 12.9-14; Lc. 6.6-11)

3 Jesús miiⁿ ní chindáā ntúúⁿ yā na
yáacū sinagoga. Ní miiⁿ canee 'áámá
saⁿá ndúucū ta'ā sa chí ntí'í. ²'Iiⁿyāⁿ
fariseos ní neⁿe yā n'diichi yā nduuti chí
Jesús miiⁿ chí ndúuvā yeⁿe saⁿá miiⁿ
caati nguuvi sábadó chí ntaavi'tuunúúⁿ
'iiⁿyāⁿ. Ní fariseos cuuvi caaⁿmáⁿ yā nu-
uⁿndi yeⁿe Jesús. ³Tuuⁿmi ní Jesús miiⁿ
ngaⁿa yā ngii yā saⁿá chí ntí'í ta'ā sa
miiⁿ: Nducuééⁿ dí ní cueendii di naav-
taⁿa yeⁿe 'iiⁿyāⁿ.

⁴Jesús miiⁿ ní ntinguuneeⁿ yā saⁿá
s'eeⁿ ní caⁿa yā: ¿D'é'ē diiⁿ yú nguuvi
chí ntaavi'tuunúúⁿ yú? ¿Áá cuuvi chí
diiⁿ yú cosas chí n'daācā o cosas chí
nguéé n'daācā? ¿Áá n'daācā chí nguaⁿāi

yú vida yeⁿe 'iiⁿ'yāⁿ o chi 'caaⁿnūⁿ yú 'iiⁿ'yāⁿ? 'Iiⁿ'yāⁿ s'eeⁿ ní ch'εεtinéé 'diiⁿ yā. ⁵Tuu'mi ní Jesús miiⁿ ní n'diichi yuudú yā saⁿ'ā s'eeⁿ ní s'neeⁿ ndaachi yiinú yā ti nguéé neⁿe cu'téénu sá yeⁿe yā. Ní Jesús caⁿ'a yā chii yā saⁿ'ā miiⁿ: N'doó di ta'a di. Ní saⁿ'ā miiⁿ n'doó sa ta'ā sa, ní ta'ā sa ní nduuvā n'daaca tan'dúucā taama. ⁶Tuu'mi ní can'dáa 'iiⁿ'yāⁿ fariseos ní ndeé yā ndúucú 'iiⁿ'yāⁿ yeⁿe Herodes ní 'ífcú n'diichí yā táacā diiⁿ yā ní 'ífcú cuuvi 'caaⁿnúⁿ yā Jesús miiⁿ.

Nééné 'yaaⁿ 'iiⁿ'yāⁿ snée yā na 'diituú nuūⁿnī'yáⁿ'ā

⁷ Jesús miiⁿ ndúucú discípulos yeⁿe yā cueⁿ'é yā cuaaⁿ na 'diituú nuūⁿnī'yáⁿ'ā. Nééné 'yaaⁿ 'iiⁿ'yāⁿ yeⁿe yáⁿ'āa Galilea ndúucú yáⁿ'āa Judea cheⁿe yā can'dáa yā Jesús miiⁿ. ⁸ Taachi 'iiⁿ'yāⁿ yeⁿe yáⁿ'āa Galilea chicadínuuⁿ yā yeⁿ'é denduⁿú chi n'gεete n'dai chi Jesús diiⁿ yā, nééné 'yaaⁿ 'iiⁿ'yāⁿ ndaa yā n'diichi yā Jesús miiⁿ. 'Iiⁿ'yāⁿ s'eeⁿ ní 'iiⁿ'yāⁿ yeⁿe yáⁿ'āa Judea, ndúucú 'iiⁿ'yāⁿ yeⁿe yáⁿ'āa Jerusalén, ndúucú 'iiⁿ'yāⁿ yeⁿe yáⁿ'āa Idumea, ndúucú 'iiⁿ'yāⁿ yeⁿe yáⁿ'āa 'diituú yífcú Jordán, ndúucú 'iiⁿ'yāⁿ yeⁿe yáⁿ'āa Tiro ndúucú yáⁿ'āa Sidón. ⁹ Cáávā chi ndaa n'dee n'dái 'iiⁿ'yāⁿ, Jesús caⁿ'a yā chii yā discípulos yeⁿe yā chi cu'nee yaáⁿ yā 'áamá barco yeⁿe yā, nífcú cuuví cuchée yā barco miiⁿ chi 'yaaⁿ n'dái 'iiⁿ'yāⁿ nguéé 'cuεeti núūⁿ chiichi yā yeⁿe Jesús miiⁿ. ¹⁰ Ní Jesús diiⁿ yā chi 'yaaⁿ n'dái 'iiⁿ'yāⁿ nduuvā yeⁿe yā. Ní nducyáácá 'iiⁿ'yāⁿ chi ngiitā neⁿ'é yā tuu'ví yā Jesús. ¹¹ Ní 'iiⁿ'yāⁿ chi canee yā ndúucú espíritu yeⁿe yáⁿ'ān'guinūⁿ, espíritu miiⁿ diiⁿ chi 'iiⁿ'yāⁿ s'uuⁿ ndaa yā nanááⁿ Jesús ní espíritu ní 'cai yeⁿe 'iiⁿ'yāⁿ: Díí ní Saⁿ'a chi Daiya Dendyuūs.

¹² Jesús caⁿ'a yuudu yā espíritu s'uuⁿ 'túucā: Nguéé caaⁿ'maⁿ dí du'u 'iiⁿ'yāⁿ 'úú.

Jesús ndeeye yā ndu'u ndiichúví discípulos

(Mt. 10.1-4; Lc. 6.12-16)

¹³ Cuayiivi miiⁿ ní Jesús cuchée yā na 'áamá yiicú, naachí yaa'ví yā 'iiⁿ'yāⁿ chí neⁿ'e yā, ní 'iiⁿ'yāⁿ s'eeⁿ ndáa yā nanááⁿ Jesús miiⁿ. ¹⁴ Ní nduudaaamā ndu'ú ndiichúví discípulos chi canee yā ndúucú yā. Ní dicho'ó yā 'iiⁿ'yāⁿ s'eeⁿ chí caaⁿ'máⁿ yā nduudú yeⁿe Ndyuūs chí nduudu cuaacu yeⁿe yā. ¹⁵ Ní Jesús ca'a yā poder discípulos yeⁿe yā chí cuuvi diiⁿ yā chí nduuvā yeⁿe 'iiⁿ'yāⁿ ní chí diví yā espíritu yeⁿe yáⁿ'ān'guinūⁿ yeⁿe 'iiⁿ'yāⁿ. ¹⁶ 'Iiⁿ'yāⁿ s'eeⁿ ní ndiichúví discípulos: Simón, chí duuchi ntúúⁿ sa Pedro, ¹⁷ ndúucú Jacobo ndúucú Juan 'diinú sa ní 'uūví sáⁿ'a s'eeⁿ chí daiya Zebedeo, ní saⁿ'ā s'eeⁿ ní Jesús s'neeⁿ yā nguuvi sa Boanerges chí neⁿ'e caaⁿ'maⁿ Daiya Deevé; ¹⁸ tanáⁿ'a yā ní nguuvi Andrés, ndúucú Felipe, ndúucú Bartolomé, ndúucú Mateo, ndúucú Tomas, ndúucú Jacobo chí daiya Alfeo, ndúucú Tadeo, ndúucú táamá Simón chí yeⁿe 'iiⁿ'yāⁿ yeⁿe yáⁿ'āa Canaan, ¹⁹ ndúucú Judas Iscariote, saⁿ'ā chí cuayiivi míⁿ chí iⁿ'i sá du'u chí Jesús miiⁿ chí cuuvi 'caaⁿnúⁿ yā 'yā. Ní Jesús ndúucú ndiichuuví discípulos yeⁿe yā cueⁿ'e yā ní ndaa yā na 'áamá va'āi.

Ngaⁿ'a yā chí Jesús canee yā ndúucú poder yeⁿe yáⁿ'ān'guinūⁿ

(Mt. 12.22-32; Lc. 11.14-23; 12.10)

²⁰ Cuayiivi ní Jesús cueⁿ'e yā na vaacu yā. Táamá vmnéⁿ'ēe nééné n'deēe 'iiⁿ'yāⁿ ndaa yā nanááⁿ Jesús miiⁿ chí nguéé véé yaáⁿ chí che'e yā pan. ²¹ Taachí 'iiⁿ'yāⁿ yeⁿe familia yeⁿe Jesús chicadínuuⁿ yā yeⁿe Jesús, yeⁿe chí 'iiⁿ'yāⁿ ngaⁿ'a yā chí Jesús ní nduuví loco yā, ndaa yā chí nandée yā Jesús.

²² 'Tiicá ntúūⁿ maestros chí ngi'cueeⁿ ley chí chiicá yā yeⁿe na yáⁿ'āa Jerusalén

ní caⁿa yā: Sáⁿa 'cūū canéé sá ndúúcu espíritu chi nguuví Beelzebú chi Satanás chí ngaⁿa ntiⁿnyuⁿ sa yeⁿe espíritu yeⁿe yááⁿ'nguiinūⁿ, ní cáávā poder yeⁿe espíritu miiⁿ chí tunⁿdaá yā espíritu yeⁿe yááⁿ'nguiinūⁿ yeⁿe 'iiⁿ'yāⁿ.

²³Tuuⁿ'mi ní Jesús miiⁿ ní yaaⁿ'vi yā 'iiⁿ'yāⁿ s'eeⁿ ní s'neeⁿ yā 'áámá ejemplo. Ni caⁿa yā: ¿Táácā cuuví diiⁿ yááⁿ'nguiinūⁿ diví sa yááⁿ'nguiinūⁿ? ²⁴Ndúúti chí 'áámá gobernador chí ngaⁿa ntiⁿnyúⁿ yā yeⁿe yááⁿ naachi véé 'uūví partido chí n'guⁿ'u ná 'aamá yā ndúúcu yeⁿe taama yā 'iiⁿ'ntyéⁿ'ē miiⁿ nguéé cuuvi 'nááⁿ yā chí 'iiⁿ'ntyéⁿ'ē yā. ²⁵Ndúúti chí n'deēe nadacádínuuⁿ yā na 'áámá familia chí véé partido yeⁿ'ē, familia miiⁿ ní nguéé cuuvi nduvidáámá yā. ²⁶Tiicá ntūⁿ, ndúúti chí yááⁿ'nguiinūⁿ diiⁿ sa contra yeⁿe maaⁿ sa, nguéé cuuví cūnee sa ti chúū diiⁿ chí 'cuiinu sa.

²⁷Mar 'áámá 'iiⁿ'yāⁿ nguéé cuuvi cundaa yā na vaacu 'áámá saⁿ'ā chí véé fuerzas yeⁿ'ē sa ní diví yā dendu'u yeⁿ'ē sa. Canéé chí caachiichí yā saⁿ'ā vmnááⁿ vmnaaⁿ. Cuayiivi ní cuuvi díⁿ yā diví yā dendu'ū chí snúūⁿ va'ai yeⁿ'ē sa.

²⁸Nduudu cuaacu 'úú ngaⁿ'á ngí ndís'tií. Tanducuéⁿ'e nuuⁿ'ndi chí díⁿ 'iiⁿ'yāⁿ yeⁿ'e iⁿ'yeeⁿ'dí 'cūū ndúúcu nduudu taaⁿ chí 'iiⁿ'yāⁿ s'eeⁿ ngaⁿ'a yā contra yeⁿ'e Ndyuūs, Ndyuūs nadich'ēcú yā nuuⁿ'ndi yeⁿ'é yā. ²⁹Naati 'iiⁿ'yāⁿ chí ngaⁿ'a yā nduudu taaⁿ chí nguēe n'dáacā yeⁿ'e Espíritu N'dai yeⁿ'é Ndyuūs, ní nguéé nch'ēcú yeⁿ'é yā maaⁿ ní tiempo chí cuchii.

³⁰Tiicā Jesús ngaⁿ'a yā ti náⁿ'ā 'iiⁿ'yāⁿ ngaⁿ'a yā chí Jesús míⁿ ní véé espíritu yeⁿ'e yááⁿ'nguiinūⁿ nduucú yā.

Cheecú Jesús ndúúcu 'dínu yā

(Mt. 12.46-50; Lc. 8.19-21)

³¹Cuayiivi ní ndaā cheecuú Jesús miiⁿ ndúúcu 'dínu yā, ní ch'ēetinée yā cuaaⁿ

chuva'āi. Ní dichó'o yā 'áámá saⁿ'ā chí yaaⁿ'vi sa Jesús chí cuchí yā nanáaⁿ yā. ³²'Yááⁿ 'iiⁿ'yāⁿ ní veteé yā cuaaⁿ 'diituú Jesús miiⁿ ní caⁿa yā: Cheecú ní ndúúcu 'diinú ní ní inⁿ'nuúⁿ yā n'dií cuaaⁿ chuva'āi.

³³Jesús miiⁿ ní caⁿa yā chí yā saⁿ'ā miiⁿ: ¿Dú'ū chí cheecú miiⁿ? o ¿dú'ū chí 'diinú miiⁿ?

³⁴Tuuⁿ'mi ní Jesús n'gínu yā 'iiⁿ'yāⁿ chí veteé yā cuaaⁿ 'diituú yā ní ngaⁿ'a yā ngii yā 'iiⁿ'yāⁿ s'eeⁿ: N'diichí ní. 'Iiⁿ'yāⁿ chí snée yā nduucú miiⁿ, 'iiⁿ'yāⁿ s'eeⁿ tan'dúúcā chí cheecú ndúúcu 'diinú. ³⁵Ní 'āá du'ū nūⁿ chí diiⁿ chíiⁿ chí Ndyuūs neⁿ'e yā chí díⁿ yā, 'iiⁿ'yāⁿ s'eeⁿ chí ví'í, 'iiⁿ'yāⁿ s'eeⁿ chí 'diinú, ndúúcu cheecú.

'Aama ejemplo yeⁿ'e 'aama saⁿ'ā chí ngiinū sá ndaata

(Mt. 13.1-9; Lc. 8.4-8)

4 Taama vmnéⁿ'ēe Jesús miiⁿ ní tucá'a yā chí'cueeⁿ yā cuaaⁿ 'diituú nuūⁿ'niⁿ'yáⁿ'ā. Ní nduvidáámá n'deēe n'dái 'iiⁿ'yāⁿ naachi canéé Jesús miiⁿ ndí 'āá ntéé lugar chí cuéndii Jesús. Ní chindáa yā na 'aama barco chí canuuⁿ vmnaaⁿ nuūⁿ'niⁿ'yáⁿ'ā miiⁿ. Ní miiⁿ ch'iindí yā chí ca'cueeⁿ yā. Nducyáácá 'iiⁿ'yāⁿ ch'ēetinée yā na 'diituú nuūⁿ'niⁿ miiⁿ. ²N'deēe n'dái parábolas caⁿ'a Jesús 'iiⁿ'yāⁿ s'eeⁿ chí ejemplos chí tan'dúúcā dendu'u chí véé iⁿ'yeeⁿ'dí 'cūū. Ní taachí ngi'cueeⁿ yā caⁿ'a yā ndúúcu 'iiⁿ'yā s'eeⁿ 'tíicā. ³Ndís'tií ní 'caandiveeⁿ ní chuū. 'Áámá saⁿ'ā chí ngiinū ndaāta ní cuéⁿ'e sá cuūnū sa ndaata miiⁿ. ⁴Taachi chíinū sa ní 'áámá duutu ndaata míⁿ chíiya na 'diituú yúúní ní ndaā 'yáádá ní che'e tí. ⁵Náⁿ'ā duutu ndaata ní chíiya nguaaⁿ tuūū naachi nguéé dáana n'deēe yáⁿ'āa véé. Duutu ndaata miiⁿ núúⁿ cān'daa tí yáⁿ'āa miiⁿ nguēe daanáá yáanūⁿ. ⁶Ní taachi can'daā yaatū miiⁿ ní tí'i caati nguéé yaanūⁿ snúū dí'yú. ⁷Náⁿ'ā duutu ndaata miiⁿ chíiya nguaaⁿ

yááⁿ. Yááⁿ s'eeⁿ ní ch'iita ní di'vaāchi yeⁿē. Chíⁿ chí ndaata miiⁿ ní nguéé dichí'vē. ⁸Náⁿā duutu ndaata míⁿ na yáⁿāa n'dáacā chiiyā. Can'dāā ní ch'iita n'deeē n'dái cosecha yeⁿē. N'duuvi ní ch'etinéé tanduu ndiicu ndiichi ndaata yeⁿē. Tan'duuvi ní iinū ngeecu ndiichi ndaata yeⁿē ní tan'duuvi ní 'áámá ciento ndaata yeⁿē.

⁹Tuu'mi ní Jesús caⁿa yā chii yā 'iiⁿyāⁿ s'eeⁿ: Ndís'tií chí véé veéⁿ ní, 'caandiveéⁿ ní.

Chíⁿ chí neⁿē caāⁿmāⁿ ejemplo miiⁿ

(Mt. 13.10-23; Lc. 8.9-15)

¹⁰Cuayiivi taachí nduūví dámaáⁿ yā ndaa nanááⁿ Jesús náⁿā 'iiⁿyāⁿ chí snéé niiⁿnúⁿ yā ndúúú ndiichúúví discípulos ní ntinguunéⁿ yā Jesús: ¿De'ē neⁿe caaⁿmaⁿ ejemplo 'cūū?

¹¹Ní Jesús caⁿa yā chii yā 'iiⁿyāⁿ s'eeⁿ: Ndís'tií ní canéé chí cadiinuuⁿ ní chí canúúⁿ n'de'ei yeⁿé naachi Ndyuūs ngaⁿa ntiiⁿnyúⁿ yā. Naati tanáⁿā 'iiⁿyāⁿ chí nguéé sneé yā nduucú, 'úú ní ngaⁿá ngii tanducuéⁿē 'iiⁿyāⁿ s'eeⁿ ndúúú ejemplos. ¹²Ní'cú 'iiⁿyāⁿ s'eeⁿ snaaⁿ yā naati ch'etinéé yā tan'dúúú cá chí nguéé inaaⁿ yā, ní 'caandiveéⁿ yā naati ch'etinéé yā tan'dúúú cá chí nguéé 'caandiveéⁿ yā, ní nguéé tuumicadínuuⁿ yā. Ndíí nguéé ndaacadáámí yā ní cu'téénu yā Ndyuūs ní nch'eēcu nuuⁿndi yeⁿe yā.

¹³Tuu'mi ní Jesús caⁿa yā chii yā discípulos yeⁿe yā: ¿'Áá nguéé ituumicadínuuⁿ ní yeⁿē ejemplo 'cūū? ¿Táácā, túú'mí, cadínuuⁿ ní yeⁿē tanáⁿā ejemplo? ¹⁴'Iiⁿyāⁿ chí ngiinú yā ndaata miiⁿ tan'dúúú cá 'iiⁿyāⁿ chí candee yā nduudu cuaacu yeⁿé Ndyuūs. ¹⁵N'dúúví 'iiⁿyāⁿ ní tan'duūcā ndaata chí chiiya cyúúní míⁿ, 'tiicá yā ch'iindiveéⁿ yā nduudu yeⁿé Ndyuūs. Ní cuayiivi taachí ch'iindiveéⁿ yā, chíi yááⁿnguiinūⁿ ní diví sa nduudu chí ch'iindiveéⁿ yā chí canéé na staava yeⁿe yā. ¹⁶Tán'duuvi yā

ní tan'dúúú cá ndaata chí chiiya nguaaⁿ tuúú, 'tiicá yā. N'giindiveéⁿ yā nduudu cuaacu yeⁿé Ndyuūs ní yeenú n'dái yā nduūcú. ¹⁷Naati nguéé 'áámá cānee na staava yeⁿe yā ní nguéé 'nááⁿ tiempo cūnee. Taachi ndaa tiempo chí 'cueenu yā cuuvi o neⁿe chí n'gíⁿnyuⁿneeⁿ 'iiⁿyāⁿ yeⁿé yā cáávā nduudu cuaacu miiⁿ, 'āā ntéé candii yā chí n'daacā miiⁿ. ¹⁸Tán'duuvi yā ní tan'dúúú cá ndaata chí chiiya nguaaⁿ yááⁿ miiⁿ, 'tiicá yā. N'giindiveeⁿ n'daacá yā nduudu cuaacu yeⁿé Ndyuūs. ¹⁹Naati neenē neⁿe cá yā denduú yeⁿe iⁿyeⁿé'dí 'cūū ndúúú chí véé. Ní nginche'éí yā 'iiⁿyā. Ní 'iiⁿyāⁿ s'eeⁿ ní dineⁿe yā cosas chí véé yeⁿe taama 'iiⁿyā. Tanducuéⁿē chuú ní ndaa ní di'vaachí yeⁿe nduudu cuaacu yeⁿé Ndyuūs. Ní diiⁿ chí nguéé dichí'vē nduudu miiⁿ na vida yeⁿe 'iiⁿyāⁿ s'eeⁿ. ²⁰Naati tán'duuvi yā ní tan'dúúú cá ndaata chí chiiya na yáⁿāa n'daacā, 'tiicá yā. N'giindiveéⁿ yā nduudu cuaacu yeⁿé Ndyuūs ní i'teenu n'daaca yā, ní véé n'gui'i yeⁿē. N'duuví yā ní tan'dúúú cá ndaata chí chíi ndiicú ndiichi yeⁿē yeⁿe 'aama 'aama. N'duuví yā tan'dúúú cá chí chíi 'iinu ngeecu ndiichí yeⁿē, o tan'dúúú cá chí chíi 'aama ciento yeⁿē.

Tanducuéⁿē chí cunuúⁿ n'de'ei cunduú nguuví

(Lc. 8.16-18)

²¹'Tiicá ntúūⁿ caⁿa Jesús táámá ejemplo chí 'téé nguéé dáámá. ¿'Áá ndee yā 'áámá lámpara chí cu'neeⁿ yā maaⁿ 'aama caja o maaⁿ 'aama cama? ¿'Áá nguéé cu'neeⁿ yā lámpara miiⁿ na yaacu, 'í'cú 'iiⁿyāⁿ cuuvi snaaⁿ yā? ²²Mar 'áámá cosa chí canúúⁿ n'de'ei nguéé cunee chí nguéé snaaⁿ 'iiⁿyāⁿ, ndíí nguéé ndúú 'áámá cosa chí canúúⁿ n'de'ei chí nguéé cadínuuⁿ 'iiⁿyāⁿ. ²³Du'ú chí véé veéⁿ ní 'caandiveéⁿ.

²⁴Ní Jesús caⁿa ntúūⁿ yā 'iiⁿyāⁿ s'eeⁿ: Cunndéé ndís'tií cuidado yeⁿe chí

n'giindiveéⁿ nī. Ndúúcu caādī chi ndís'tiī idifⁿ nī juzgar 'iiⁿyāⁿ, caadi mifⁿ ntúú Dendyuūs idifⁿ yā juzgar ndís'tiī. Ní n'deēe cá n'daācā yeⁿē ndís'tiī taachi Ndyuūs idifⁿ yā juzgar ndís'tiī. ²⁵ 'Iiⁿyāⁿ chi véé yeⁿe yā Ndyuūs ca'a cá yā 'yā. 'Iiⁿyāⁿ chi nguéé ca yeⁿe yā, Ndyuūs ndi-vī yā 'téé chi 'āā véé yeⁿe yā.

Ejemplo yeⁿe ndaata chí ngiita

²⁶ Jesús caⁿa ntúuⁿ yā: Naachi Ndyuūs ngaⁿa ntiiⁿnyúⁿ yā ní tan'dúúca 'áamá saⁿā chi ngiinu sa ndaata na yáⁿāa yeⁿe sa. ²⁷ Saⁿā miiⁿ ngiinu sa ndaata na yáⁿāa. Ni chii maāⁿ ní cyaadú sa ní nducueeⁿ sa taachí chidēve. Cuayi-ivi ní cho'ōo nguūvi cho'ōo n'gááⁿ ní ndaata miiⁿ ní can'daa ní ch'iita naati saⁿā miiⁿ ní nguéé deenu sa táacā ch'iita. ²⁸ Yáⁿāa miiⁿ ngii maāⁿ yeⁿē. Vmnaáⁿ vmnaaⁿ ican'dáa ta'ā n'gaiyāā. Cuayiivi ní can'daa yááⁿ miiⁿ yeⁿe. Cuayiivi ní n'giita ní ngii trigo chí ndiitūu n'daāca na yááⁿ miiⁿ. ²⁹ Taachí trigo miiⁿ 'āā ntí'i, tuu'mi ní ngeⁿe 'iiⁿyāⁿ chí yeⁿē ní n'giica yā, ti 'āā snuū ca'a chí 'caatā.

Tan'dúúca ejemplo nduutií yeⁿe yiivē ntíf'yāa

(Mt. 13.31-32; Lc. 13.18-19)

³⁰ Jesús miiⁿ ní ca'a ntúuⁿ yā: ¿De'é tan'dúúca naachí ngaⁿa ntiiⁿnyuⁿ Ndyuūs miiⁿ? o ¿de'é nduucū chi nadidáamá yú? ³¹ Chuū tan'dúúca nduutií yeⁿe yiivē ntíf'yāa chi 'lífⁿ cá yeⁿē tanducuéⁿē nduutií chi véé iⁿyeedí 'cūū. Chífⁿ chi chiinu 'iiⁿyāⁿ na yáⁿāa yeⁿé yā. ³² Taachí 'āā niinú yā ndaata miiⁿ ní ngíi n'geete yeⁿē tanducuéⁿē yaatā. Ní dúuⁿnē miiⁿ ní n'geete n'dái ngii chi 'yáádá ngíi í'neeⁿ tí 'dééce tí na 'cuutií yeⁿē.

Taama ejemplo chi ngi'cueeⁿ Jesús

(Mt. 13.34-35)

³³ 'Tíicā ngi'cueeⁿ Jesús 'iiⁿyāⁿ s'eeⁿ nduudu cuaacu yeⁿé Ndyuūs ndúúcu n'deēe n'dái ejemplos tan'dúúca chuū, tanducuéⁿē chi cuuvi cadiinuuⁿ yā. ³⁴ Ní ngaⁿa yā ngii yā nducyaaca 'iiⁿyāⁿ ndúúcu ejemplos, naati taachi canee yā dámaāⁿ ndúúcu discípulos yeⁿe yā tanducuéⁿē miiⁿ n'giⁿi yā discípulos yeⁿe yā de'e chí neⁿe caaⁿmaⁿ ejemplos chí 'āā caⁿa yā.

Jesús chí'neeⁿ 'dííⁿ yā 'yúúné ndúúcu nuūⁿní'yáⁿā

(Mt. 8.23-27; Lc. 8.22-25)

³⁵ Taachi chí'da'á nguuvi miiⁿ, Jesús miiⁿ ngaⁿa yā ngii yā discípulos yeⁿe yā: Caⁿā yú táamá 'diituú nuūⁿní'yáⁿā.

³⁶ Tuu'mi ní s'neeⁿ yā miiⁿ ní discípulos ní candéé yā Jesús miiⁿ na barco chí 'āā canéé na 'diituú nuūⁿní'yáⁿā ní cueⁿé yā. Miiⁿ ntúuⁿ canéé tanáⁿā barcos. Ní 'iiⁿyāⁿ yeⁿe tanáⁿā barcos cueⁿé ntúuⁿ yā. ³⁷ Tuu'mi ní chéenu 'áamá 'yúúné taaⁿ ní nuūⁿní'yáⁿā miiⁿ sndaā yaacú. Ní sndaā yaanūuⁿ barco miiⁿ, ní chiitūu nuūⁿníⁿ barco naachi canéé Jesús miiⁿ. ³⁸ Ní Jesús miiⁿ ní cyáádu yā cuaaⁿ 'diituú barco miiⁿ, ní candiitinee yā na co-jín. Ní discípulos ní nanduúchí yā Jesús miiⁿ ní caⁿa yā chii yā: N'dii Maestro, ¿'áá nguéé de'é veē inee ní chí 'cuuvi yú?

³⁹ Tuu'mi ní Jesús miiⁿ ní nducueeⁿ yā ní yaa'vi yā 'yúúné miiⁿ ní caⁿa yā chii yā nuūⁿní'yáⁿā miiⁿ 'túúca: 'Diifⁿ nūuⁿ cunee di. Hora mifⁿ nūuⁿ 'yúúné miiⁿ ní canee 'diifⁿ ní nducuéⁿē canee 'diifⁿ 'diifⁿ. ⁴⁰ Tuu'mi ní Jesús miiⁿ ní caⁿa yā chii yā discípulos yeⁿe yā: ¿De'é cuuvi tátii 'va'a ní? ¿De'é cúví chí nguéé cu'téenu cá ní?

⁴¹ Ní discípulos yeⁿé yā neenē dii'yā yā chii, ní ngaⁿa yā ngii yā nguaaⁿ maáⁿ yā ndúúcu ví'i: ¿Du'u rá 'iiⁿyāⁿ

'cūū, chí ndii 'yúúné ndíí nuū'nī'yá"ā ch'iindivee"n ye"e yā?

Sa"ā ye"e yá"āa Gadara chi canéé sá ndúúcu espíritus ye"e yáá"n'guiniū"n

(Mt. 8.28-34; Lc. 8.26-39)

5 Jesús ndúúcu discípulos ndaa yā na táamá lado 'diituú nuū'nī'yá"ā mii"n ye"e yá"āa chi nguuvi Gadara. ²Tuu'mi ní Jesús nan'dáa yā na barco mii", ní ndaa 'áamá sa"ā chi canéé ndúúcu espíritus ye"e yáá"n'guiniū". Ní ngiicá sa ná vaacu sa chi 'áamá yiivi yáává chi canéé nguua"n yaínyā" ní ndaa sa nanáá" Jesús. ³Sa"ā mii" ní mar 'áamá 'ii"yā"n nguée chi cuuví cuta'á yā sa"ā ní cachiichí yā sa"ā, ndii nguée ndúúcu cadenas. ⁴Nééné n'deēe cuuví 'ii"yā"n s'ee"n cachiichí yā sa"ā mii"n ndúúcu cadenas ca'a sa ndúúcu ta'ā sa, náátí ch'iica sa cadenas mii", ní dicheeyéi sa cadenas mii". Ní mar 'áamá 'ii"yā"n nguée ichée yā ndúúcu sa. ⁵Cué"é daā"ma"n cachiica sá n'gai sa cuua"n ná yiicū ndúúcu cuua"n nguua"n yáinyā" ndíí nguuvi ndíí n'gaa", ní 'nuu cá'ai maā" sa sá"ā ndúúcu tuū. ⁶Ní taachi n'diichi yá"ái sa Jesús mii", cue"e sa ngéenu sā nanáa" yā ní chíin-tii'ya sa nanáa" yā. ⁷Ní ca"ā sa chii sa Jesús mii" ní 'cái yiicu sá: ¿De'ē cuuvi chi ndaa ní nanáa", n'dii Jesús, Daiya Dendyuūs chi canee yā na va'ai cheeti nguuvi? Ngicá cáávā chi dúúchí Ndyuūs chi nguée téé ní vaadi 'caa'va 'úú.

⁸Sa"ā mii" ní ca"ā sa chuū caati Jesús mii" ní ca"ā yā chíi yā espíritus ye"e yáá"n'guiniū": Ndís'tii, nan'dáa ní ye"e sá"ā 'cūū.

⁹Jesús mii" tiinguunee"n yā sa"ā: ¿De'ē nguuví dí? Ní espíritus ye"e yáá"n'guiniū"n chi canéé ndúúcu sá"ā 'cūū nan'gueecúta"n sa: Legión nguúvī, caati neené 'yaa"n' nū.

¹⁰Ní espíritus neené di'cuítuū ca Jesús mii" chi nguée tun'dáa yā espíritus chi ca"ā ya"ai ye"e yá"āa mii". ¹¹Ní

neené n'deēe puercos nge'e tí cuaa"n na ní"nú"n yiicū mii". ¹²Ní espíritus ye"e yáá"n'guiniū"n idi'cuiitu Jesús: N'dii, di-cho'ó ní nús'uu chi ca"ā 'nū cheeti puercos mii".

¹³Tuu'mi ní Jesús ní ca'a yā permiso, ní espíritus ye"e yáá"n'guiniū"n chínan'dáa sa ye"e sa"ā mii" chí ndaa sa cheeti puercos. Ní véé tan'duu 'uúvi mil puercos mii". Ní taachi espíritus ye"e yáá"n'guiniū"n sndáa sa cheeti puercos tuu'mi ní cheenu nducyaaca tí ní chingéé nuú"n ti cheeti yaái mii". Ní chingéé tí nguua"n nuu"nī'yá"ā. Ní chíitu nuū'nī" veé"n tí duutu tí cheendi tí ní ch'ií tí nguua"n nuū'nī" mii".

¹⁴'Ii"yā"n chi idii"n cuidado puercos cue"e yā ngéenu yā chi cuuvi yā 'ii"yā"n ná yáá"n mii"n ndúúcu 'ii"yā"n chi snéé na cuéetí chí chíi mii". Ní 'ii"yā"n s'ee"n can'daa yā n'diichi yā chí chíi. ¹⁵Taachí ndaa yā nii"nuú"n nanáá" Jesús mii", ní taachí n'diichí yā sa"ā chi canéé sá ndúúcu espíritus ye"e yáá"n'guiniū"n chi maa" ní vee sa 'diii"n ndúúcu catecai sa ní 'aā n'daācā sa tuu'mi ní dí'va'a yā. ¹⁶'Ii"yā"n s'ee"n chi n'diichí yā chí dii"n Jesús mii", ní ca"ā yā chíi yā táacā chíi ndúúcu sa"ā mii"n chí canéé sá ndúúcu espíritus ye"e yáá"n'guiniū"n, ní tan'duucā chí chíi ndúúcu puercos. ¹⁷Tuu'mi ní 'ii"yā"n s'ee"n di'cuítu yā Jesús mii" chí cá"ā yā táamá lado ye"e yáá"n mii"ya.

¹⁸Jesús cue"e yā. Ní taachi ndaa yā na barco mii"n ndaa sa"ā chíi vmnaa"n canéé sá ndúúcu espíritus ye"e yáá"n'guiniū"n. Ní sa"ā mii"n chíiica sa Jesús chí ca"ā sa ndúúcu yā na barco mii". ¹⁹Jesús ní nguée 'cuu"n yā naatí ca"ā yā: Cuna"n dí ná vaacu di ndúúcu 'ii"yā"n ye"e di, ní cuuvi di 'ii"yā"n chí ch'εεte n'dai dendu'ū chí Señor 'iivú Ndyuūs mii" dí"n yā ndúúcu dii, ní tan'dúucā Señor 'iivú Ndyuūs mii" chí nduuvi ya'ái 'iinú yā dii.

²⁰ Saⁿā miiⁿ ní cunaⁿā sa, ní tucá'a sa chii sa 'iiⁿyāⁿ nuuⁿmaⁿ yáaⁿ cuaaⁿ 'diituú chí nguuvi Decápolis yeⁿe dendu'ú chí n'geete n'dai chí Jesús díⁿ yā ndúúcu sa. Ní nducyaaca yā che'e yiinú yā.

Táⁿā daiya sáⁿā Jairo, ndúúcu n'daataá chí tuū'vi tá catecai Jesús

(Mt. 9.18-26; Lc. 8.40-56)

²¹ Taachí Jesús miiⁿ nanguεεcunée yā ní cho'ó yā táámá lado yeⁿē nuūⁿnūⁿyáⁿā ní ndaa yā na yáⁿāa 'diituú nuūⁿnūⁿyáⁿā, neené n'deēe 'iiⁿyāⁿ ndaa yā naachi Jesús canee yā. ²² Ní ndaa 'áámá saⁿā chí nguuvi sa Jairo, saⁿa chí ngaⁿa ntiⁿnyuⁿ sa yeⁿe yáacū sinagoga. Taachí n'diichi sa Jesús miiⁿ candiitin'díi sa na ca'a yā. ²³ Ní neené di'cuíftu sa Jesús miiⁿ ní caⁿa sa: Daiyá ní neⁿē 'cuūvi tá. Cuchíi ní ní cún'du'u táa ní vmnaaⁿ yeⁿē tá, ní cuuví nduūvā yeⁿe tá ní nguéé 'cuūvi tá.

²⁴ Tuu'mi ní Jesús miiⁿ ní cuéⁿe yā ndúúcu sa. Neené 'yaaⁿ 'iiⁿyāⁿ can'daa yā Jesús ní néené chiiⁿnu chiichí yā Jesús. ²⁵ Ní nguaaⁿ nducyaaca 'iiⁿyāⁿ miiⁿ canéé 'áámá n'daataá chí ngítā tá, chí 'āā ndiichúúví nduūyū canee tá ndúúcu ca'ai chí nguuvi nguuví ngee yuuúⁿ yeⁿe cuerpo yeⁿe tá. ²⁶ Néené n'geenu tá ngii ndúúcu médicos, ní 'āā ch'iinu díⁿ tá gastar tanducuéⁿe chí véé yeⁿē tá, naati nguéé du'ū vεε dichí'vε yeⁿē tá ti dáyífcándí cá ca'ai yeⁿē ta cuaaⁿ vmnaaⁿ. ²⁷ 'Āā ch'iindiveeⁿ tá yeⁿe Jesús miiⁿ chí díⁿ yā chí nduūvā yeⁿe 'iiⁿyāⁿ chí ngiitā. Ní cueⁿe tá nguaaⁿ 'iiⁿyāⁿ s'eeⁿ cuaaⁿ daamí Jesús ní tuū'vi tá catecai yā. ²⁸ Caati nadicádíínuuⁿ tá maāⁿ tá 'tífcā. Ndúúti chí dámaāⁿ tuū'vi catecai yā, ní nduūvā yeⁿé. ²⁹ Hora míⁿ nūuⁿ chí tuū'vi tá catecai Jesús miiⁿ 'tífcā canéé naaⁿ chí ngeε yuuúⁿ yeⁿē tá. Ní chicadiinuⁿ tá na cuerpo yeⁿe tá chí 'āā nduūvā yeⁿē tá. ³⁰ Tuu'mi ní Jesús miiⁿ tuumicádíínuuⁿ yā chí 'āā nduūvā yeⁿē

'áámá 'iiⁿyāⁿ ndúúcu poder yeⁿé yā. Ní nguεεcundíi yā ní n'diichi yā náávtaⁿā yeⁿe 'iiⁿyāⁿ ní ntinguuneeⁿ yā: ¿Du'u túu'vii catecai?

³¹ Tuu'mi ní discípulos yeⁿe yā caⁿa yā: Cuin'diichí ní 'iiⁿyāⁿ chí i'nūuⁿ chi-ichí yā s'uūúⁿ miiⁿ ní maaⁿ ní ntinguuneeⁿ ní: ¿Du'u tuū'vii 'úú?

³² Naati Jesús ní nguεεcúndii yā n'giinu yā 'áámá lado taama lado, ní 'icu cuuvi snaaⁿ yā du'ū tuu'vi 'iiⁿyāⁿ. ³³ Tuu'mi ní n'daataá miiⁿ, ní in'duuví tá chí 'va'ā tá. Deenū tá de'ē chí chii. Cheⁿe tá ní chiintii'ya tá nanááⁿ Jesús. Ní caⁿa tá chí tá 'iiⁿyāⁿ tanducuéⁿe chí nduudu cuaacu. ³⁴ Jesús ngaⁿa yā ngii yā táⁿā: Díi daiyá, nduūvā yeⁿē dí cáávā chí i'téenu di 'úú. Díi 'diifⁿ nūuⁿ cunáⁿa di, ní ndúúvā yeⁿē di yeⁿē ca'ai chí ndii di.

³⁵ Ngaⁿa Jesús miiⁿ ndúúcu táⁿā miiⁿ, taachí ndaa yā ná va'ai yeⁿe saⁿā Jairo chí ngaⁿa ntiⁿnyuⁿ sa yeⁿē 'iiⁿyāⁿ na yáacū sinagoga miiⁿ. Ní 'iiⁿyāⁿ yeⁿē va'ai miiⁿ ní caⁿa yā Jairo: Daiya dí 'āā n'dii tá. ¿Dé'ē cuuví chí idindú'ū ca di maestro?

³⁶ Naati Jesús miiⁿ, ní ch'iindiveeⁿ yā chí caⁿa yā yeⁿē saⁿā chí ngaⁿa ntiⁿnyuⁿ sa. Ní caⁿa yā chí yā saⁿā miⁿ chí ngaⁿā ntiⁿnyuⁿ sa yeⁿe 'iiⁿyāⁿ na yáacū sinagoga: Nguéé 'va'a di naati cu'téenu dí.

³⁷ Jesús nguéé 'cuuⁿ yā nducyaaca 'iiⁿyāⁿ chí cueⁿe ca yā cuaaⁿ cheeti va'ai ndúúcu yā, ti dámaāⁿ Pedro, ndúúcu Jacobo, ndúúcu Juan, saⁿā 'diinū Jacobo. ³⁸ Taachí ndaa yā va'ai yeⁿe sáⁿā chí ngaⁿa ntiⁿnyuⁿ yeⁿe 'iiⁿyāⁿ yeⁿe yaacū sinagoga miiⁿ, n'diichí yā 'iiⁿyāⁿ. Ní ch'iindiveeⁿ yā chí n'gai yā ní ngeεcu yā. ³⁹ Tuu'mi ní taachi sn'daa yā cuaaⁿ cheeti va'āi miiⁿ, caⁿa yā: ¿De'ē táti yu-udu idiⁿ ní? ¿De'ē cúúví chí ngeεcu ní? Tá'díiⁿ nguéé n'dii tá, tí cyaadu tá.

⁴⁰ 'Iiⁿyāⁿ s'eeⁿ ní n'gíiⁿnyūⁿneeⁿ yā yeⁿe Jesús miiⁿ. Tuu'mi ní Jesús miiⁿ díⁿ yā chí can'daa nducyaaca yā. Ní Jesús can'dεε yā chiida tá ndúúcu cheεcu tá

ndúucū discípułos chí canéé ndúucu yā ní sndaa yā naachi candíítí ta'dííⁿ chí n'dii tá ní tináⁿā. ⁴¹ Ní sta'á yā ta'ā tá ní caⁿa yā: Talita cumi, chí neⁿe caāⁿmaⁿ na nduudu yeⁿe yú, díí n'daata lííⁿ, 'úú ngaⁿá ngíí díí, ndúucueeⁿ di.

⁴² Hora mííⁿ nūuⁿ ta'dííⁿ miiⁿ ní nduucueeⁿ tá ní cachiica tá. N'daata lííⁿ miiⁿ ní ngii tá ndiichuuvi nduuyū. Tuu'mi ní 'iiⁿyāⁿ s'eeⁿ cueⁿe yiinú yā. ⁴³ Jesús mííⁿ yaa'vi yuudú yā 'iiⁿyāⁿ chí nguéé caaⁿmaⁿ yā cuuvi yā chííⁿ mar 'áámá 'iiⁿyāⁿ. Ní caⁿa Jesús chí ca'a yā yuündū chí che'e n'daata lííⁿ miiⁿ.

Jesús canee yā na yāāⁿ Nazaret

(Mt. 13.53-58; Lc. 4.16-30)

6 Jesús ní ndaācá yā miiⁿ ní cunaⁿá yā na yāāⁿ Nazaret chí yāāⁿ vaacú yā, ní discípułos yeⁿe yā ní cueⁿe yā ndúucu yā. ² Taachí ndaā nguuvi sábadó chí ntaavi'tuunúúⁿ 'iiⁿyāⁿ, Jesús tucá'a yā chí'cueeⁿ yā na yaācū sinagoga miiⁿ. Néené 'yaaⁿ 'iiⁿyāⁿ ch'iindiveeⁿ yā chí caⁿa Jesús, ní cheⁿe yiinú yā. Ní caⁿa yā: ¿Tíí ch'eⁿ sáⁿa 'cūū tanducueⁿe chūū? ¿De'é vaadí déénú chí ca'a yā 'iiⁿyāⁿ miiⁿ, ndúucū vaadí n'giinu chí dííⁿ yā chūū? ³ ¿Áá nguéé sáⁿa 'cūū daiya saⁿā 'viichiyáⁿá miiⁿ, daiya María miiⁿ, saⁿā chí 'díínū Jacobo, ndúucū José, ndúucū Judas, ndúucū Simón, ndúucū v'í yā chí snée yā miiⁿ nguaaⁿ s'uūuⁿ? Cáāvā chí yeⁿe yāāⁿ miiⁿ chííⁿ chí nguéé s'teenú yā 'iiⁿyāⁿ. ⁴ Tuu'mi ní Jesús caⁿa yā chíí yā 'iiⁿyāⁿ s'tíí: Nducyáácá 'iiⁿyāⁿ dinéⁿe yā profetas naati nguéé dinéⁿe yā 'áámá profeta yeⁿe yāāⁿ vaacú yā. Ní nguéé dinéⁿe 'iiⁿyāⁿ yeⁿe yā ndúucū 'iiⁿyāⁿ na vaacu yā profeta miiⁿ. ⁵ Jesús ní nguéé chidííⁿ yā mar 'áámá vaadí n'giinú miiⁿ, dámaaⁿ chí sn'duú yā ta'a yā vmnaaⁿ yeⁿe n'duuvi 'iiⁿyāⁿ chí ngííⁿá ní nduūvā yeⁿe yā. ⁶ Ní cheⁿe yiinú Jesús tí 'iiⁿyāⁿ s'eeⁿ ní nguéé s'téenu yā. Cuayiivi miiⁿ

ní Jesús cachiicá yā cuaaⁿ na yāāⁿ na ní iⁿnuúⁿ ní ngí'cueeⁿ yā 'iiⁿyāⁿ.

Jesús dichó'o yā discípułos yeⁿe yā chí caaⁿmaⁿ yā nduudu yeⁿe Nduyuūs

(Mt. 10.5-15; Lc. 9.1-6)

⁷ Ní Jesús yaa'vi yā ndu'ū chí ndiichuuvi discípułos, ní tucá'a yā dichó'o yā 'iiⁿyāⁿ 'uuvi yā 'áámá 'áámá yāāⁿ. Ní ca'a yā poder discípułos chí tun'dáa yā espíritus yeⁿe yááⁿnguiinūⁿ yeⁿe 'iiⁿyāⁿ. ⁸ Ní caⁿa yā chíí yā discípułos chí nguéé de'é vee candéé yā chí cuuví yeⁿe yúuní yeⁿe yā, dámaaⁿ in'daacuú. Nguéé canéé chí candéé yā ndii mar 'áámá moral, ndíí nguéé ndúú pan ra, ndíí nguéé ndúú tuūmí ra na bolsa. ⁹ Cunúúⁿ ca'a yā ndaacuú ndaachíí, ní 'áámá nūuⁿ catecai yā, nguéé u'ūvī. ¹⁰ Ní caⁿa Jesús: Ndís'tíí, taachi cúndaa ní cheeti 'áámá va'āí, 'cuētinée ní miiⁿ taanduvéé ndii taachí nan'dáa ní yeⁿe yāāⁿ miiⁿ. ¹¹ Nduuti chí ndaá ní 'áámá yāāⁿ ní 'iiⁿyāⁿ s'eeⁿ nguéé 'cuaáⁿ yā 'cuētinée ní miiⁿ, ndíí nguéé ndúú neⁿe ra yā chí 'caandiveeⁿ yā yeⁿe ní, tuu'mi ní nan'dáa ní yeⁿe yāāⁿ miiⁿ. Ní n'dáadí ní yaācāá yeⁿe ca'a ní. Chuū ní 'áámá señal chí 'cuuⁿmiⁿ ní chí nguéé n'daācá idííⁿ yā ti contra yeⁿe ní. Cuaacu nííⁿnyúⁿ ngaⁿá ngíí ndís'tíí, chí nguuvi yeⁿe juicio duu'vi cá castigo yeⁿe 'iiⁿyāⁿ yeⁿe yāāⁿ Sodoma ndúucū 'iiⁿyāⁿ yeⁿe yāāⁿ Gomorra, chí ndíí cuááⁿ vmnaaⁿ, ní nguéé ti 'iiⁿyāⁿ yeⁿe yāāⁿ naachí nguéé 'cuúⁿ yā ndís'tíí.

¹² Tuu'mi ní discípułos ican'dáa yā, chí caⁿa yā nduudu cuaacu yeⁿe Nduyuūs yeⁿe chí ndaacadáámí 'iiⁿyāⁿ yeⁿe nuⁿndi yeⁿe yā. Ní chí n'daaⁿ yā chí cuuvi 'cuētinée n'daāca yā. ¹³ Tuucá ntúúⁿ discípułos divíí yā neené n'dee espíritus yeⁿe yááⁿnguiinūⁿ yeⁿe 'iiⁿyāⁿ. Ní chíí yā aceite n'dee n'dáí 'iiⁿyāⁿ chí ngííⁿá ní nduūvā yeⁿe 'iiⁿyāⁿ.

Juan chi ngeēdinuūⁿ ní ch'ii sa

(Mt. 14.1-12; Lc. 9.7-9)

¹⁴ Rey Herodes ch'iindiveéⁿ ntúuⁿ yā chuū chi núuⁿmáⁿ íⁿyeēⁿdí miiⁿ ní ch'iindiveéⁿ yā chí diiⁿ Jesús miiⁿ. Rey Herodes míⁿ caⁿ'a yā: 'Āā nduūchi Juan chi ngeēdinuūⁿ ní nguaaⁿ tináⁿā, chíⁿ chí saⁿ'ā ní véé taavi poder yeⁿ'ē sa.

¹⁵ Naⁿ'a 'iiⁿyāⁿ ní ngaⁿ'a yā: Jesús miiⁿ ní Elías chi profeta ndíⁿ vmnaaⁿ. Naⁿ'a 'iiⁿyāⁿ ní ngaⁿ'a yā: Jesús miiⁿ ní 'áámá profeta tan'dúucā profetas chi ch'etinéé ndii cuaaⁿ vmnaaⁿ.

¹⁶ Taachí Herodes miiⁿ ch'iindiveéⁿ yā chuū, tuuⁿmi ní caⁿ'a yā: Juan sáⁿ'a 'cūū, chi 'úú chi caⁿ'a ntiiⁿnyúⁿ chi chiicá yā daandu sá ní 'āā nduuchi sa yeⁿ'e nguaaⁿ tináⁿā.

¹⁷ Ti Herodes miiⁿ caⁿ'a ntiiⁿnyúⁿ yā soldados chí sta'a sa Juan ní chiicā chi-ichi sa ndúucū cadenas ní chi'nuuⁿ sa saⁿ'ā vácūū cáávā n'daataá Herodías. Táⁿ'ā miiⁿ chí chíi n'daataá yeⁿ'ē Felipe cuááⁿ vmnaaⁿ ní canéé tá ndúucū sa. Ní Felipe miiⁿ ní 'diinu Herodes. ¹⁸ Juan miiⁿ ní caⁿ'a sa chíi sa Herodes miiⁿ: N'dii rey nguéé canéé chi cunee ní ndúucū n'daataá yeⁿ'ē 'diinu ní.

¹⁹ N'daataá yeⁿ'e Herodes miiⁿ nguéé canee yīnū tá ndúucū chi caⁿ'a Juan miiⁿ. Ní neⁿ'e tá 'caaⁿ'nuⁿ tá Juan miiⁿ naati nguéé ngii diiⁿ tá. ²⁰ Herodes miiⁿ ní deenu yā chí Juan ní n'dai sa ní yeⁿ'e Ndyuūs saⁿ'ā miiⁿ. Ní rey miiⁿ 'va'á yā Juan miiⁿ. Chíⁿ chí nguéé n'guuⁿ rey miiⁿ chí táⁿ'ā miiⁿ diiⁿ daño tá ndúucū Juan. Ní rey miiⁿ s'neeⁿ veéⁿ yā n'daacā ní ch'iindiveéⁿ yā yeⁿ'ē nduudu Juan 'áará chí nguéé tuumicadi-inúuⁿ yā nducuéⁿ'ē chí ngaⁿ'a Juan miiⁿ. ²¹ Naati n'daataá yeⁿ'e rey miiⁿ nguuví tá Herodías ní ndaāca tá táácā chí diiⁿ tá. Herodes miiⁿ díⁿ yā 'áámá 'viicu nguuví cumpleaños yeⁿ'é yā. Díⁿ yā 'áámá 'viicu yeⁿ'ē chí nge'é yā chí che'é 'iiⁿyāⁿ

chí ngaⁿ'a ntiiⁿnyuⁿ, ndúucū saⁿ'ā s'eeⁿ chí 'neéⁿ vmnaaⁿ yeⁿ'e soldados, ndúucū 'iiⁿyāⁿ yuudu yeⁿ'ē yáⁿ'āa Galilea. ²² Ní taachí nge'e yā n'daatāa líⁿ'a daiya táⁿ'ā Herodías miiⁿ sndaā tá naachi nge'e yā. Ní nde'ei tá. Rey Herodes ndúucū 'iiⁿyāⁿ chí snée yā ndúucū sa chíi yeenú yā chí nde'ei tá. Ní miiⁿ caⁿ'a yā chíi yā n'daataa líⁿ'a miiⁿ: Dii, n'daataa líⁿ'a, caaca di 'úú chí neⁿ'e dí ní 'úú ní teé dii.

²³ Ní caⁿ'a yā, “por Ndyuūs” chí ca'a yā n'daatāa líⁿ'a miiⁿ 'āā dē'é nūuⁿ chí neⁿ'e tá, 'áará chí ná maⁿ'a yeⁿ'ē yáⁿ'āa chí ngaⁿ'a ntiiⁿnyúⁿ yā. ²⁴ N'daatāa líⁿ'a míⁿ ní can'daā tá ní caⁿ'a tá chíi tá chēecu tá: Mamá, ¿dē'ē caacá? Ní chēecu tá ní caⁿ'a yā chíi yā tá'a: Caaca di tíⁿ Juan chí chēedinuūⁿ ní.

²⁵ Maaⁿncheēté nūuⁿ sndaā ta'díⁿ'a miiⁿ naachi canúuⁿ rey miiⁿ, ní caⁿ'ā tá: Neⁿ'é chí maaⁿnguuví nūuⁿ teé ní 'úú chēeti 'áámá cu'u tíiⁿ Juan chí chēedinuūⁿ ní. ²⁶ Tuuⁿmi ní rey miiⁿ ní s'neeⁿ ndaachi nuúⁿ yā naati cáávā chí caⁿ'a yā, “por Ndyuūs”, ní cáávā 'iiⁿyāⁿ chí snée yā ndúucū rey miiⁿ, nguéé chí diiⁿ nuuⁿ yā cheeⁿ'diitú yā yeⁿ'ē chí ngiica ta'díⁿ'a miiⁿ. ²⁷ Hora míⁿ'a nūuⁿ caⁿ'a ntiiⁿnyuⁿ rey miiⁿ 'áámá soldado chí cheⁿ'e sa 'caāca sa daandu Juan chí chēedinuūⁿ ní nguai sa tíⁿ yā. ²⁸ Soldado miiⁿ ní cheⁿ'e sa ná vácūū ní chíica sá daaⁿ'ndu Juan miiⁿ. Ní saⁿ'nuuⁿ sa tíiⁿ Juan miiⁿ chēeti 'áámá cu'u. Ní ndēε soldado miiⁿ ní ca'a sa ta'díⁿ'a miiⁿ. Ní ta'díⁿ'a miiⁿ ní ca'a tá chēecu tá.

²⁹ Taachí discípulos yeⁿ'e Juan miiⁿ ch'iindiveéⁿ yā chuū, cheⁿ'é yā chí nguai yā cuerpo yeⁿ'e Juan miiⁿ. Ní candēε yā chí 'cuuchi yā.

Jesús ca'a yā chí che'e nyuⁿ'u mil 'iiⁿyāⁿ

(Mt. 14.13-21; Lc. 9.10-17; Jn. 6.1-14)

³⁰ Cuayivi miiⁿ ní apóstoles ní nduuvídaamā yā ndúucū Jesús miiⁿ ní caⁿ'a

yā chii yā Jesús tanducuéⁿē chí diiⁿ yā, ndúú^cú chí chí'cueeⁿ yā. ³¹ Jesús caⁿa yā chii yā apóstoles: Cuchíⁿ nī, ní caⁿa yú ntaavi'tuunúⁿ yú na 'aama lugar chí 'aama lado yeⁿe yááⁿ naachi nguéé 'iiⁿyā. Ngaⁿa yā 'tíicā, caati n'deeⁿ n'dái 'iiⁿyāⁿ indaá yā nanááⁿ Jesús ndúú^cú n'deeⁿ n'dái 'iiⁿyāⁿ chí inaⁿa, ndíí maaⁿ rá chí nge'e yā, nguéé ngii. ³² Tuu'mi ní Jesús miiⁿ ndúú^cú apóstoles yeⁿe yā cueⁿé yā dámaáⁿ yā na 'áámá barco na 'áámá lugar chí nguéé snéé 'iiⁿyā. ³³ Naati néené 'yaaⁿ 'iiⁿyāⁿ n'diichí yā Jesús ndúú^cú apóstoles, ní déénu yā du'u yā ní taachí cueⁿe yā. Ní nducueⁿé 'iiⁿyāⁿ yeⁿe yááⁿ s'eeⁿ cueⁿe yā chiicá yā na yáⁿáa naachi ndaá Jesús ní vmnaaⁿ cá ndaa yā. Ní cuayiivi ndaa Jesús miiⁿ ndúú^cú apóstoles yeⁿe yā. ³⁴ Taachí Jesús nan'dáa yā na barco, n'diichí yā neené n'deeé 'iiⁿyāⁿ ní neené ya'ai iinú yā 'iiⁿyāⁿ s'eeⁿ, ti sneé yā tan'dúú^cā 'iiti cuūchí chí nguéé du'ú chí idiiⁿ cuidado 'iiti, 'tíica yā. Ní Jesús tucá'a yā chí'cueeⁿ yā 'iiⁿyāⁿ s'eeⁿ n'deeⁿ n'dái dendu'ú. ³⁵ Taachí chí chiinū, discípulos yeⁿe yā ní ndaá yā nanáaⁿ yā ní caⁿa yā: N'dii Jesús, 'āā chiinū ní mar 'áámá 'iiⁿyāⁿ nguéé snéé yā na yáⁿáa 'cūū. ³⁶ Yaa'ví ní 'iiⁿyāⁿ, ní caⁿ'á yā yááⁿ n'gaiyáá ndúú^cú yááⁿ n'gēete chí snéé na niiⁿnuúⁿ ní cuái yā pan, ti nguéé ndéé yā chí che'e yā.

³⁷ Naati Jesús ní nan'guēecútaⁿ a yā yeⁿe yā ní caⁿa yā: Ndís'tiī, ca'á ní che'e yā. Discípulos ní caⁿa yā: ¿Áá cuuvi diiⁿ nús'uu chí caⁿa nū cuái nū 'uuvi ciento caadi pan, ní ca'á nū che'e yā?

³⁸ Jesús caⁿa yā chii yā discípulos: ¿Áá n'deeⁿ panes yeⁿe ndís'tiī vee? Cuéⁿe nī n'diichi nī. Taachí 'āā n'diichí yā, tuu'mi ní yaa'ví yā: Véé nyuⁿu panes ndúú^cú 'uuví 'yaācā.

³⁹ Tuu'mi ní caⁿa ntiⁿnyuⁿ Jesús chí ch'ēte 'iiⁿyāⁿ s'eeⁿ caadi cuááⁿ caadi cuááⁿ naachí vee yuuni cueēe. ⁴⁰ Ní naachí ch'ēte yā 'áámá ciento yā ní

naachi ch'ētéē tá 'uūví ngeecu ndiichí yā. ⁴¹ Tuu'mi ní Jesús miiⁿ ní sta'á yā ndu'ú nyuⁿu panes miiⁿ ndúú^cú 'uuví 'yaācā. Ní cheenaⁿ yā nanguuvi ní ca'a yā gracias Ndyuūs cáāvā pan miiⁿ ndúú^cú 'yaācā. Ni ch'iinu ní n'dee yā panes miiⁿ ní nca'a yā discípulos yeⁿe yā chí ca'a yā che'e 'iiⁿyāⁿ s'eeⁿ. Discípulos ca'a yā nducyaaca 'iiⁿyāⁿ s'eeⁿ 'yaācā miiⁿ ndúú^cú pan miiⁿ. ⁴² Nducyaáácā yā che'e yā ní chiitu 'iiⁿyāⁿ. ⁴³ Ní nanngaáⁿ yā chí ningaavā miiⁿ ní chiitu ndiichúúví 'cueētēē ndúú^cú chí ningaáva miiⁿ yeⁿe pan ndúú^cú 'yaācā miiⁿ. ⁴⁴ Nducyaaca saⁿ'á chí che'e sa panes miiⁿ ní ngii nyuⁿu mil sa.

Jesús ngíica yā vmnááⁿ nuūⁿnīⁿyáⁿā
(Mt. 14.22-27; Jn. 6.16-21)

⁴⁵ Tuu'mi ní caⁿa Jesús chí yā discípulos yeⁿe yā chí cundaa yā na barco miiⁿ ní ndaá yā táámá lado yeⁿe nuūⁿnīⁿyáⁿā miiⁿ vmnaaⁿ yeⁿe yā chí caⁿa yā na yááⁿ Betsaida, nuuⁿmaⁿ neⁿe chí Jesús díⁿ yā despedir 'iiⁿyāⁿ s'eeⁿ. ⁴⁶ Taachí Jesús díⁿ yā despedir yeⁿe 'iiⁿyāⁿ s'eeⁿ, cueⁿé yā na yiicū miiⁿ chí caaⁿmaⁿngua'á yā. ⁴⁷ Taachí chí 'da'a miiⁿ, barco miiⁿ ndúú^cú discípulos 'āā cachíicá vmnaaⁿ yeⁿe nuūⁿnīⁿyáⁿā miiⁿ ní náávtaⁿa nuūⁿnīⁿyáⁿā miiⁿ canéé. Ní 'āā dámaāⁿ Jesús miiⁿ canee yā na yáⁿáa miiⁿ. ⁴⁸ Ní Jesús n'diichí yā chí discípulos ní ch'eenu yā chí chí díⁿ yā chí chíica barco miiⁿ ti 'yúúné miiⁿ ní contra yeⁿe naachí cachiica barco miiⁿ. Na nguētiyaaⁿ 'da'a ca, Jesús ndaa yā nanááⁿ discípulos, ní ngiicá yā vmnaaⁿ nuūⁿnīⁿ miiⁿ. Ní neⁿé yā cho'o daamá yā. ⁴⁹ Taachí discípulos yeⁿe yā n'diichí yā Jesús chí ngiica yā cuaaⁿ vmnaaⁿ nuūⁿnīⁿ miiⁿ, discípulos nadacádíínuuⁿ yā chí 'áámá bulto ch'ēete ní 'cai yiicu yā. ⁵⁰ Ti nducyaáácā discípulos n'diichí yā Jesús, ní dii'yá yā chí. Naati Jesús ní

yaa'ví yā 'iiⁿyāⁿ s'eeⁿ ní caⁿa yā: Ndís'tii saⁿā, nguéé 'va'á nī ti 'úú.

⁵¹ Ní Jesús miiⁿ cuchée yā na barco miiⁿ naachi snúuⁿ discípulos. Ní canée 'diiⁿ 'yúúné. Ní discípulos nadicádínuuⁿ yā. De'ε chúúca ch'εεε Ndyuūs. Ní che'e yiinú yā. ⁵² Vaanicadínūuⁿ yeⁿe discípulos ní cheechí caati nguéé tumicádínuuⁿ yā vaadi n'giinu yeⁿe panes miⁿ.

Jesús díⁿ yā chi nduūvā yeⁿe 'iiⁿyāⁿ chi ngítā na yāⁿāa Genesaret

(Mt. 14.34-36)

⁵³ Cho'ó barco miiⁿ ndúúcu yā táamá lado yeⁿe nuūⁿnīⁿyāⁿā miiⁿ ní ndaa yā ná yāⁿāa Genesaret, naachí cachiichí yā barco miiⁿ cuaaⁿ 'diituú nuūⁿnīⁿyāⁿāa. ⁵⁴ Ní taachi nacan'daa yā na barco miiⁿ, 'iiⁿyāⁿ s'eeⁿ chi 'āā ndaa yā miiⁿ ní nti-inaáⁿ yā Jesús miiⁿ. ⁵⁵ Ní 'iiⁿyāⁿ s'eeⁿ caⁿá yā chii yā 'iiⁿyāⁿ yeⁿe núúⁿmáⁿ cuaaⁿ na yāāⁿ n'gaiyāā chi snée niiⁿnuúⁿ chi Jesús canée yā. Ní 'iiⁿyāⁿ s'eeⁿ chinguai yā 'iiⁿyāⁿ chi ngítā. Ní tuca'a yā ndaa yā ndúúcu 'iiⁿyāⁿ chi ngítā na cama yeⁿé yā ní candee yā 'iiⁿyāⁿ nanááⁿ Jesús miiⁿ. ⁵⁶ Ní 'āā de'ε nūuⁿ lugar naachí cueⁿe Jesús miiⁿ, nduuti chi na yāāⁿ n'gaiyāā, o na yāāⁿ n'geete, o na campo, 'iiⁿyāⁿ ní íneeⁿ yā 'iiⁿyāⁿ chi ngítā cuaaⁿ cyúúní. Ní di'cuítu yā Jesús chi ca'á yā lugar 'iiⁿyāⁿ chi ngítā chi cuuví tuu'ví yā maaⁿ rá naachí ndeetií yeⁿe catecai Jesús. Ní nducyaaca 'iiⁿyāⁿ chí tuu'ví yā tiinūuⁿ yeⁿe yā, nduūvā yeⁿe yā.

Chíⁿ chí diiⁿ chí ngii nuuⁿndi 'iiⁿyāⁿ

(Mt. 15.1-20)

7 Tuu'mi ní 'iiⁿyāⁿ fariseos ndúúcu n'duuvi maestros yeⁿe ley n'daa yā na yāāⁿ Jerusalén, ní ndaa yā nanááⁿ Jesús. ² 'iiⁿyāⁿ s'eeⁿ ní n'diichí yā chí discípulos yeⁿe Jesús miiⁿ ngé'e yā ndúúcu ta'a yā chí vaatí, ní vee nuuⁿndi yeⁿe yā

ti nguéé inaaⁿnu yā ta'a yā taachí āā cuéé che'e yā tan'duucā chi ngaⁿa ley yeⁿé yā. ³ Chúu chii caati 'iiⁿyāⁿ fariseos ndúúcu nducyáácá 'iiⁿyāⁿ Israel candíi yā costumbres yeⁿé 'iiⁿyāⁿ ndiicúú s'eeⁿ chi nguéé che'e yā ndúúti chi nguéé n'deēe cuuví nnaaⁿnu yā ta'a yā. ⁴ Taachí indaa yā niiⁿvēē, nguéé che'e yā nduuti chi nguéé nnaaⁿnu yā ta'a yā n'deēe cuuví. Véé cá costumbres chi 'iiⁿyāⁿ s'eeⁿ icandica yā, chi nnaaⁿnu yā vasos chi n'geē chí ngíⁿi yā, ndúúcu jarros, ndúúcu taza yeⁿe cūū, ndúúcu mesas. ⁵ Tuu'mi ní 'iiⁿyāⁿ fariseos ndúúcu maestros yeⁿe ley miiⁿ itiinguuneeⁿ yā Jesús: ¿De'ē cúúví chí nguéé candíi discípulos yeⁿe ní costumbres yeⁿe 'iiⁿyāⁿ ndiicúú s'eeⁿ? Nge'é yā ndúúcu ta'a yā chí vaatí.

⁶ Jesús nan'guεεcútaⁿa yā: N'dáacā caⁿa profeta Isaías miiⁿ ndii cuááⁿ vmn-aaⁿ yeⁿe ndís'tii chí 'uūvi naaⁿ 'uūvi cheendí nī. Chuū caⁿa yā taachí dingúuⁿ yā 'túúca:

'Iiⁿyāⁿ s'uúⁿ ní dich'εεé yā 'úú ndúúcu cheendi yā, naati staava yeⁿe yā yaⁿāi canee yeⁿe 'úú.

⁷ Nguéé de'ε vee dichíⁿvē chí diiⁿ yā chí dich'εεé yā 'úú, ti chíⁿ chí ngíⁿcueeⁿ yā ní ley yeⁿe saⁿā yeⁿe iⁿ'yeeⁿdí 'cūū.

⁸ Naati ndís'tii ní chíⁿneeⁿ nī leyes yeⁿe Ndyuūs ní candíi ní costumbres yeⁿe saⁿā yeⁿe iⁿ'yeeⁿdí 'cūū. Chíⁿ chí neené n'deēe cuuví nnaaⁿnu yā jarros ndúúcu vasos naachi ngíⁿi nuúⁿ yā, ndúúcu chí díⁿ yā ndúúcu neené n'deēe cá dendu'ū. Tanducuéⁿe chuū ní nguéé dichíⁿvē.

⁹ Tíicā caⁿa Jesús chii yā 'iiⁿyāⁿ s'eeⁿ: Ndís'tii ní cándii nī costumbres maáⁿ nī ní cáāvā chuū i'neeⁿ nī 'áámá lado ley yeⁿé Ndyuūs. ¹⁰ Moisés caⁿa yā ley 'cūū: Díⁿ nī honrar chiidá nī ndúúcu cheecú nī ní 'iiⁿyāⁿ chí nguéé n'dáacā ngaⁿa yā yeⁿe chiidá yā o yeⁿe cheecú yā canée chí 'cuūvi yā. ¹¹ Naati ndís'tii ní ngaⁿa nī chí nga'a nī permiso 'aama

saⁿā chí caaⁿmaⁿ sá cuuvi sa chiida sa o cheecu sa, 'tíicā: 'Úú ní nguéeⁿ cuuvi nneeⁿ n'dií, caati nducueⁿē chi yeⁿé ní Corbán. (Nduudu Corbán miiⁿ ní neⁿe caaⁿmaⁿ chí ca'á yā Ndyuūs.)¹² Nduúti chí saⁿā ngaⁿa sa 'túucā, tuu'mi ní ndís'tií ngaⁿa nī chí 'āā ntéé nga'a nī lugar chí cunnee sá chiida sá ndúucū cheecu sá.¹³ Ndis'tií ní díⁿ nī chí 'āā ntéé dichí'vē Nduudu yeⁿé Ndyuūs cáāvā costumbre chí ngo'ó yeⁿē 'áámá nī taama nī. Nééné n'deēe dendú'ū díⁿ nī tan'dúucā chuū.

¹⁴ Caⁿa ntúūⁿ Jesús chíi yā 'iiⁿyāⁿ taama vnnéⁿēe ní caⁿa yā: Cu'neeⁿ veeⁿ nducyaaca nī yeⁿé, ní tuumicadiinuuⁿ nī.¹⁵ Mar 'áámá dendu'ū chí nge'e saⁿā chí 'āā cuéé che'e sa cuuví diiⁿ chí 'āā ntéé deēve sa. Chíⁿ chí nadicádíinuuⁿ saⁿa na staava yeⁿē sa ní ican'daā na staava yeⁿē sa chíⁿ idiíⁿ chí 'āā ntéé deēve sa.¹⁶ Ndis'tií chí véé veéⁿ nī, 'caandiveⁿ nī.

¹⁷ Taachí Jesús s'neeⁿ yā 'iiⁿyāⁿ miiⁿ ní sndaa yā va'ai yeⁿé discípulos yeⁿe yā, discípulos yeⁿé yā ní itinguuneeⁿ yā: ¿De'e néⁿé caaⁿmaⁿ ejemplo 'cūū?

¹⁸ Ní caⁿa Jesús chíi yā discípulos: ¿'Áá 'tiicá ntuūⁿ ndís'tií nguéeⁿ ituumicadíinuuⁿ nī? ¿'Áá nguéeⁿ deenu nī chí tanducueⁿē chí nge'e saⁿā ní cungéē cuaaⁿ chufa'āi ní nguéeⁿ cuuví diiⁿ chí saⁿā miiⁿ ní vaati sa,¹⁹ ti nguéeⁿ indaā na staava yeⁿē sa naati na cheēti sa? Ní cuayiivi míⁿ nan'daā na cuerpo yeⁿē sa. 'Tíicā ní nducueⁿē chí ngéé saⁿā ní deēve. Ní nguéeⁿ diiⁿ chí dinuuⁿndí yā.²⁰ Ní caⁿa Jesús: Chíⁿ chí can'daā na staava yeⁿē sa chíⁿ chí diiⁿ chí véé nuuⁿndi yeⁿē sa.²¹ Ti chíiⁿ cuaaⁿ cheēti sáⁿā chí neⁿe caaⁿmaⁿ chí yeⁿē na staava yeⁿē sa, ican'daā yeⁿē vaanicadíinūⁿ yeⁿe sa chí nguéeⁿ n'daācā. Nadacadíinuuⁿ yā yeⁿe chí caⁿa sa ndúucū 'aama n'daataá o isáⁿā chí nguéeⁿ yeⁿe yā, ndúucū yeⁿe chí n'diichí yā 'áámá saⁿā o n'daataá ní duuch-

inéⁿ vi'í yā, ní ndúucū chí 'caaⁿnúⁿ yā 'iiⁿyāⁿ,²² ndúucū yeⁿē chí ididucú yā, ndúucū yeⁿe chí neⁿe yā cosas chí véé yeⁿē taama yā, ndúucū yeⁿē dendú'ū chí yeⁿe yááⁿguiinūⁿ, ndúucū yeⁿe chí nginnche'él yā 'iiⁿyāⁿ, ndúucū vicios, ndúucū n'daataá chí caⁿā tá ndúucū n'daataá chí duuchinee tá vi'í, ndúucū yeⁿē sáⁿā chí caⁿa sa ndúucū saⁿā chí duuchinee sa vi'í, ndúucū yeⁿē chí n'diichí yā cosas chí nguéeⁿ n'daācā, ndúucū yeⁿē chí caaⁿmaⁿ taáⁿ yā contra yeⁿe Ndyuūs, ndúucū yeⁿe chí dich'eté maáⁿ yā 'iiⁿyāⁿ, ndúucū nduudu chí nadicádíinuuⁿ yā tan'duucā chí loco yā.²³ Tanducueⁿē dendú'ū 'cūū chí nguéeⁿ n'daācā ican'daā yeⁿē na staava yeⁿé yā. Chíⁿ chí diiⁿ chí véé nuuⁿndi yeⁿé yā.

'Áámá n'daataá chí nguéeⁿ n'daataá Israel tá chí i'teenu tá Jesús

(Mt. 15.21-28)

²⁴ Nan'dáa Jesús miiⁿ ní cunaⁿa yā na yáⁿāa Tiro ndúucū Sidón. Ní chindáa yā na 'áámá va'ai. Ní nguéeⁿ neⁿé yā chí 'iiⁿyāⁿ s'eeⁿ cadíinuuⁿ yā naachi cánéé yā naati nguéeⁿ chíi canúⁿ n'de'ei yā.²⁵ Maaⁿncheeté tuumicadiinuuⁿ 'áámá n'daataá chí véé 'áámá n'daataá líⁿ daiya tá chí cánéé ndúucū espíritu yeⁿe yááⁿguiinūⁿ. N'daata míⁿ ní ndaā tá ní chiinti'yā tá ná ca'a Jesús miiⁿ.²⁶ N'daata míⁿ ní nguéeⁿ yeⁿē ndaata yeⁿe 'iiⁿyāⁿ Israel naati yeⁿe ndaataá yeⁿe 'iiⁿyāⁿ yeⁿe yáⁿāa Sirofenicia. Ndaā tá ní chiica tá Jesús miiⁿ chí tun'dáa yā espíritu yeⁿe yááⁿguiinūⁿ yeⁿē n'daataá líⁿ daiya tá.²⁷ Naati Jesús miiⁿ ní caⁿa yā chíi yā n'daataá miiⁿ: Ca'a di lugar chí che'e daiyá 'iiⁿyāⁿ Israel vnnááⁿ vnnaaⁿ ti nguéeⁿ cánéé chí diví pan yeⁿe daiyá 'nū ní ca'á 'nū chí che'e 'yaānā.

²⁸ Táⁿā miiⁿ ní nan'guēcútaⁿā tá: 'Tíicā, Señor, naati 'yaānā chí snéé ti

maaⁿ mesa miiⁿ nge'é tī cheeyéi pan chi ngéé yeⁿē da'caiyáa.

²⁹ Tuu'mi ní Jesús miiⁿ ní caⁿ'a yā chii yā táⁿā: Dii n'daataa n'daaca ngaⁿ'a di. 'Aā cuuvi naⁿ'a di. Espíritu yeⁿe yááⁿ'nguiinūⁿ 'āā nan'dáa yeⁿē daiya di.

³⁰ Taachí ndaā tá na vaacu tá, n'daataa 'lííⁿ miiⁿ yeⁿē tá canee tá na cama ní candiiti tá. Ní espíritu yeⁿe yááⁿ'nguiinūⁿ ní 'āā nan'dáa yeⁿē n'daata 'lííⁿ miiⁿ.

Jesús dííⁿ yā chi nduūvā yeⁿe 'áámá sáⁿ'ā chi nguéeé ngaⁿ'a sa ndíí nguéeé ndúú n'giindiveeⁿ rá sá

³¹ Jesús nan'daa ntuuⁿ yā yeⁿe yáⁿ'āa Tiro ndúúcu yáⁿ'āa Sidón ndúúcu na yááⁿ s'eeⁿ yeⁿe yáⁿ'āa Decápolis. Ní ndaa yā na yáⁿ'āa chi 'díítūu nuūⁿ'niⁿ'yáⁿ'ā Galilea. ³² Miiⁿ ní ndaā 'iiⁿ'yāⁿ ndúúcu 'áámá saⁿ'ā chi chēetūū chi nguéeé ngii ngaⁿ'ā sa n'daaca. Ní chiicá sá Jesús chi cun'duú yā ta'a yā vmaanaⁿ yeⁿē sa.

³³ Jesús candée yā saⁿ'ā miiⁿ 'áámá lado naachi 'āā ntéé snée 'iiⁿ'yāⁿ ní tingúúⁿ ndutá'a yā na veeⁿ sá ní chiidaiⁿ yā ní s'neeⁿ nduta'á yā na ch'iya sa. ³⁴ Ní ch'íínu yā nanguuvi, ní ndaa niiⁿ'núⁿ yā ní caⁿ'a yā: Efata, chi neⁿe caaⁿ'maⁿ na nduudu yeⁿ'é, n'guaaⁿ di.

³⁵ Ndúúcu chuū ní n'guaaⁿ veeⁿ sá ndúúcu ch'iya sa ní nduūvā yeⁿē sa. Ní 'āā chí caⁿ'a n'daaca sá. ³⁶ Jesús ní caⁿ'a yā chii yā 'iiⁿ'yāⁿ s'eeⁿ chi nguéeé cuuvi yā mar 'áámá 'iiⁿ'yāⁿ. 'Áará chi neené ca'a cuidado yā 'iiⁿ'yāⁿ s'eeⁿ chi nguéeé cuuvi yā 'iiⁿ'yāⁿ, 'iiⁿ'yāⁿ s'eeⁿ ní caⁿ'a yā chii yā n'dee n'dái 'iiⁿ'yāⁿ. ³⁷ Ní 'iiⁿ'yāⁿ s'eeⁿ ní neene cheⁿe yiinú yā, ní caⁿ'a yā: 'iiⁿ'yāⁿ miiⁿ ní tanducuéⁿē idin'daaca yā, ndíí 'iiⁿ'yāⁿ chi chēetūū ní idíí yā chí n'giindiveeⁿ yā. Ní 'iiⁿ'yāⁿ chi nguéeé ngaⁿ'á yā ní dííⁿ yā chí ngíí ngaⁿ'a yā.

Jesús ca'á yā che'e cuūⁿ mil 'iiⁿ'yāⁿ
(Mt. 15.32-39)

8 Tiempo 'cūū neené 'yááⁿ 'iiⁿ'yāⁿ ndu-uvidaama yā ndúúcu Jesús. Nguéeé de'ē chi ca'á yā chí che'e 'iiⁿ'yāⁿ s'uuⁿ. Tuu'mi Jesús 'caí yā discípulos yeⁿe yā, ní caⁿ'á yā chii yā discípulos: ² 'Úú ní ya'ái cáávā 'iiⁿ'yāⁿ s'tíí, tí 'āā 'iinu nguūvi snée yā nduucú na lugar 'cūū ní nguéeé de'ē vee chi che'é yā. ³ Ndúúti chi nadicho'ó 'iiⁿ'yāⁿ na vaacu yā ní nguéeé che'é yā, 'áátii cuuvi cúúnú yā cuaaⁿ cyúúni chi naⁿ'a yā ti náⁿ'a yā ní yaⁿ'āi ndiicá yā.

⁴ Discípulos ní nan'gueecútaⁿ'a yā: ¿Taaca ca'á ní chi ch'éé 'iiⁿ'yāⁿ na lugar naachi nguéeé ch'ēetinée 'iiⁿ'yāⁿ?

⁵ Jesús miiⁿ ntinguunéeⁿ yā discípulos: ¿'Áá n'dee cá panes yeⁿ'é ní véé? Discípulos ní caⁿ'a yā: Tá ndeēchē vee.

⁶ Tuu'mi ní chii Jesús 'iiⁿ'yāⁿ s'eeⁿ chi 'cueté yā na yáⁿ'āa miiⁿ. Ní Jesús sta'á yā ndeēchē panes miiⁿ. Ca'á yā gracias Ndyuūs cáávā panes miiⁿ. Ní n'dee yā panes miiⁿ ní ca'á yā discípulos yeⁿ'é yā. Ní discípulos ca'á yā che'e 'iiⁿ'yāⁿ s'uuⁿ. ⁷ Véé ntúūⁿ n'duuvi 'yaacā. Jesús sta'á yā 'yaacā ní ca'á yā gracias Ndyuūs cáávā 'yaacā ní ca'a yā discípulos chi ca'a ntúū yā 'yaacā 'iiⁿ'yāⁿ s'uuⁿ. ⁸ Nducyaaca 'iiⁿ'yāⁿ che'e yā ní chiitu 'iiⁿ'yāⁿ. Ní nin'guaáⁿ yā tá ndeēchē 'cuetēē chí nán-gaava. ⁹ 'iiⁿ'yāⁿ chi che'e yā ní ngii yā tan'dúú cuūⁿ mil 'iiⁿ'yāⁿ. Tuu'mi ní Jesús miiⁿ ní dííⁿ yā despedir yeⁿ'é 'iiⁿ'yāⁿ s'uuⁿ. ¹⁰ Ní Jesús ndaa yā na 'aama barco ndúúcu discípulos yeⁿe yā ní cueⁿ'é yā na yáⁿ'āa chi nguuvi Dalmanuta.

'iiⁿ'yāⁿ fariseos chiica yā Jesús chi ch'iⁿ'i yā 'aama vaadí n'giinu

(Mt. 16.1-4; Lc. 12.54-56)

¹¹ Tuu'mi ní ndaā 'iiⁿ'yāⁿ fariseos ní tucá'a yā caⁿ'a yā n'dee n'dái ndúúcu Jesús. Neⁿ'é yā n'diichi yā táaca caaⁿ'maⁿ

Jesús. Chiica yā Jesús 'áámá vaadi n'giinu ye^{ne} na va'ai cheeti nguuvi. ¹² Jesús nandaa yiinu yā tí ndaachí 'iinu yā na staava ye^{ne} yā, ní ca^{na} yā: ¿De'ē cúuví chí ngiica 'ii^{nyā} s'uuⁿ 'áámá señal ye^{ne} vaadi n'giinu? 'Úú nga^{na} 'á cuaacu chi nguéé ca'á mar 'áámá señal 'ii^{nyā} s'uuⁿ.

¹³ Cuayiivi chí ca^{na} yā chí yā 'ii^{nyā} s'uuⁿ chuū, Jesús nangeecunée yā snda yā na barco miiⁿ. Ní cue^{ne} yā taama lado nuuⁿniⁿyá^{na} miiⁿ.

Levadura ye^{ne} 'ii^{nyā} fariseos

(Mt. 16.5-12)

¹⁴ Discípulos chinaáⁿ yā chí candee yā chí che'e yā, naati ndée yā 'aama n'dyá^{na} pan ndúucū 'ii^{nyā} s'eeⁿ na barco miiⁿ. ¹⁵ Tuu'mi ní Jesús ca^{na} yā chí yā discípulos: Cuiⁿdiichí nī, cundée nī cuidado ye^{ne} levadura ye^{ne} 'ii^{nyā} fariseos ndúucū levadura ye^{ne} rey Herodes. Levadura miiⁿ ní chíⁿ chí dííⁿ yā chí nguéé n'daācā.

¹⁶ Discípulos ní tucá'a yā ca^{na} yā nguuaⁿ maáⁿ yā: ¿'Áá chí nguee ndée yú pan chíⁿ chí 'tiicā nga^{na} yā?

¹⁷ Jesús miiⁿ ní déenu yā chí nga^{na} discípulos nguuaⁿ maáⁿ yā ní ca^{na} yā: ¿De'ē cúuví chí nga^{na} nī chí cáávā chí nguéé ndeé nī pan? ¿'Áá cuéé tumicadiinúⁿ nī? ¿'Áá cuéé itéenu nī na staava ye^{ne} nī? ¹⁸ ¿'Áá nguéé inaaⁿ ndís'tií ndúucū nduutináⁿ nī, ndí nguéé ndúú n'giindiveeⁿ rá nī ndúucū veéⁿ nī? ¿'Áá nguéé inan'gaacú nī? ¹⁹ Taachí n'deé ndu'u nyu^{nu} panes miiⁿ chí che'e nyu^{nu} mil 'ii^{nyā}, ¿'áá n'deé 'cuéētē ca pan nángaāva? ¿'Áá nin'guaáⁿ nī? 'ii^{nyā} s'eeⁿ ní ca^{na} yā: Ta ndiichuuví.

²⁰ Ní ca^{na} Jesús: Taachí ca'á ndeēchē panes miiⁿ che'e cuūⁿ mil 'ii^{nyā}, ¿'áá n'deé 'cuéētē ca nin'guaáⁿ nī? Discípulos ní ca^{na} yā: Tá ndeēchē.

²¹ Tuu'mi ní Jesús ca^{na} yā: ¿'Áá cuéé tumicadiinúⁿ nī?

Jesús dííⁿ yā chí nduūvā ye^{ne} 'áámá 'ii^{nyā} chí ngeuenááⁿ na yāⁿ Betsaida

²² Cuayiivi miiⁿ mí ndaā Jesús ndúucū discípulos ye^{ne} yā na yāⁿ Betsaida. Ná^{na} 'ii^{nyā} ní ndée yā 'áámá chí ngeuenááⁿ nanááⁿ Jesús ní ngiicá yā Jesús chí tuu^{vi} yā 'ii^{nyā} chí ngeuenááⁿ. ²³ Jesús sta'á yā ta'á chí ngeuenááⁿ ní tun'dáa yā 'ii^{nyā} 'áámá lado ye^{ne} yáⁿ 'líⁿ miiⁿ. S'neeⁿ yā nuuⁿniⁿ dáⁿ yā na nduutinááⁿ sa ní sduu tá'a yā vma^{na} ye^{ne} sa^{na} miiⁿ ní itinguunéeⁿ yā sa^{na} ndúuti chí 'āā inaaⁿ sa 'tē. ²⁴ Chí ngeuenááⁿ miiⁿ ní chíⁿ sa, ní ca^{na} sa: Inaaⁿ 'áámá sa^{na} tan'dúucā chí 'áámá yá^{na} 'tíicā sa^{na}, naati ngiicá sa.

²⁵ Tuu'mi ní Jesús miiⁿ ní sn'duu ntúuⁿ yā ta'a yā na nduutináⁿ sa^{na} miiⁿ. Sa^{na} miiⁿ ní chíⁿ n'daācā sa ní nduuví n'dai nduutináⁿ sa. 'Áā tanducué^{ne} inaaⁿ n'daācā sa. ²⁶ Tuu'mi ní Jesús miiⁿ dich'ó yā sa^{na} chí cuina^{na} sa na vacu sa. Ní ca^{na} yā: Díí, nguéé cundaā di núú^{na} máⁿ na yāⁿ miiⁿ ní cuuvi di chuū mar 'áámá 'ii^{nyā}.

Pedro ní ca^{na} cuaacu sá chí Jesús chí Cristo yā

(Mt. 16.13-20; Lc. 9.18-21)

²⁷ Cuayiivi miiⁿ Jesús ndúucū discípulos ye^{ne} yā che^{ne} yā na yāⁿ s'eeⁿ ye^{ne} yá^{na} Cesarea ndúucū yāⁿ s'eeⁿ ye^{ne} yá^{na} Filipo. Taachí snúuⁿ yā yúúní ntinguuneeⁿ Jesús miiⁿ discípulos ye^{ne} yā, ní ca^{na} yā: ¿Du'ū 'úú nga^{na} 'ii^{nyā}?

²⁸ Discípulos nan'guēcúta^{na} yā: Ná^{na} 'ii^{nyā} ní nga^{na} yā chí díí chí Juan chí cheedínuⁿ díí. Ná^{na} yā ní nga^{na} yā chí díí chí profeta Elías díí. Ná^{na} yā ní nga^{na} yā chí díí chí 'áámá profeta díí.

²⁹ Tuu'mi ní Jesús ntinguuneeⁿ yā discípulos: ¿Du'ū 'úú nga^{na} ndís'tií? Tuu'mi ní Pedro miiⁿ ní ca^{na} sa: N'dii chí Cristo chí ye^{ne} Ndyuūs.

³⁰ Jesús ní caⁿa yā chí nguéé cuuvi yā mar 'áámá 'iiⁿyāⁿ chuū.

**Jesús ngaⁿa yā yeⁿe
vaadí n'gii yeⁿe maáⁿ yā**

(Mt. 16.21-28; Lc. 9.22-27)

³¹ Tuu'mi ní Jesús tuca'á yā chí'cueeⁿ yā yeⁿe Saⁿā chí Daiya Dendyuūs. Ní neené 'cueenu sa cuuvi. 'Iiⁿyāⁿ chiiduú n'geeté ndúúcu 'iiⁿyāⁿ ndiicúú chí ngaⁿā n'tiiⁿnyuⁿ yeⁿe yáacu miiⁿ ndúúcu maestros yeⁿe ley, 'āā ntéé neⁿe yā saⁿā. Ní caⁿa yā chí yā 'iiⁿyāⁿ s'eeⁿ chí 'caaⁿnúⁿ yā saⁿā, naati saⁿā miiⁿ ní chēeti 'iinū nguuvi nduuchi sa yeⁿe nguuaⁿ tináⁿā. ³² 'Úú ní ngaⁿā cuaācú chuū. Tuu'mi ní Pedro miiⁿ ní cueⁿe sa ndúúcu Jesús 'áámá lado ní tucá'a sa yaa'vi neeⁿ sa Jesús. ³³ Naati Jesús nan'guēcundí yā ní n'diichí yā discípulos ní yaa'vi neeⁿ yā Pedro ní caⁿa yā: Díí, Pedro, tan'dúúca yáá'n'guinūⁿ, 'tíicā dii. Cuví di yeⁿe 'úú, ti dii ní nguéé nadicádíinuⁿ di tan'dúúca Ndyuūs nadicádíinuⁿ yā, ti nadicádíinuⁿ di yeⁿe dendu'ū yeⁿe iⁿ'yeeⁿdí'cū.

³⁴ Tuu'mi ní Jesús yaa'vi yā discípulos yeⁿe yā ndúúcu tanáⁿā 'iiⁿyāⁿ, ní caⁿa yā chí yā 'iiⁿyāⁿ s'uuⁿ: Ndúúti chí 'áámá 'iiⁿyāⁿ neⁿe yā caⁿa yā nduucú, canéé chí cu'nééⁿ maáⁿ yā tanducuéⁿe dendu'ū chí véé yeⁿe yā ní cuta'á yā cruz yeⁿe yā chí tan'dúúca chí 'cueenu taaví yā cuuvi cucáá'vā 'úú 'iicu caⁿá yā nduucú. ³⁵ Tí nducyáácá 'iiⁿyāⁿ chí neⁿe yā nadanguáⁿāi yā vida yeⁿe maáⁿ yā na iⁿ'yeeⁿdí'cūú ní dindaí taama vida yeⁿe yā nanááⁿ Ndyuūs. Ní nducyáácá 'iiⁿyāⁿ chí dindaí yā vida yeⁿe yā cucáá'vā 'úú ní cucáá'vā nduudu cuaacu chí nguaⁿ'ai 'iiⁿyāⁿ, tuu'mi ní nandaacá yā vida yeⁿe yā nanááⁿ Ndyuūs. ³⁶ ¿De'ē dichí'vē yeⁿe saⁿā ndúúti chí diiⁿ sa ganar nducuéⁿe chí véé iⁿ'yeeⁿdí'cūú ní dindaí sa alma yeⁿe sa? ³⁷ ¿'Áá n'deēē cuuvi nadí'vē sa 'áámá 'iiⁿyāⁿ cucáá'vā alma yeⁿe sa?

³⁸ Nduuti chí 'áámá 'iiⁿyāⁿ cuuvi 'cuinaáⁿ yā yeⁿe 'úú ndúúcu nduudu yeⁿe nanááⁿ 'iiⁿyāⁿ chí véé nuuⁿndi yeⁿe yā, ní nguéé n'daācā idiíⁿ yā, 'tiicā ntūūⁿ 'úú chí Saⁿa chí Daiyá Ndyuūs, cuuví 'cuinaáⁿ yeⁿe yā taachi ndaá ndúúcu dēēve ch'ēete n'dai yeⁿe Chiidá ndúúcu ángeles chí dēēve yā.

9 Jesús ní caⁿa yā chí yā 'iiⁿyāⁿ s'eeⁿ: Cuaacu níⁿnyúⁿ ngaⁿá, chí véé ná'a ní chí snéé nī 'muuⁿ chí nguéé 'cuuví ní taanduvéé ndii snaaⁿ ní naachí Ndyuūs ngaⁿa n'tiiⁿnyúⁿ yā yeⁿe chí ndaa yā ndúúcu poder yeⁿe yā.

Jesús n'daaⁿ yā cuerpo yeⁿe maáⁿ yā

(Mt. 17.1-13; Lc. 9.28-36)

² Cho'ó jaāⁿ nguuvi, ní Jesús candéé yā Pedro, ndúúcu Jacobo, ndúúcu Juan. Ní cheⁿe yā ndúúcu 'iiⁿyāⁿ s'eeⁿ na 'áámá yíicū yaacu. Ní miiⁿ ní Jesús n'daaⁿ yā cuerpo yeⁿe yā nanááⁿ 'iiⁿyāⁿ s'eeⁿ. ³ Catecai yā nguēcundáā ngii n'gai ní cuéé tan'dúúca nieve. Mar 'áámá 'iiⁿyāⁿ yeⁿe iⁿ'yeeⁿdí'cūú nguéé cuuvi naáⁿnú yā 'áámá tীনūⁿ táatiū cuéé. ⁴ Ní che'enaāⁿ sáⁿā profeta Elías ndúúcu Moisés, 'iiⁿyāⁿ s'eeⁿ chí ch'ií ndíí cuááⁿ vmaāⁿ. Ní ndeé yā ndúúcu Jesús. ⁵ Tuu'mi ní Pedro miiⁿ ní caⁿa sá chí sá Jesús: N'dií Maestro, de'e chúúca n'daācā yeⁿe yú chí 'cuēt-inee yú 'muuⁿ. Din'dái nū 'iinū va'ai lííⁿ: 'Áámá yeⁿe ní, táámá yeⁿe Moisés, táámá yeⁿe profeta Elías.

⁶ Discípulos ní di'yáá yā chí. Ní Pedro miiⁿ nguē deenu sa de'ē chí ngaⁿa sa. ⁷ Tuu'mi ní ndaā vmaáⁿ yeⁿe 'iiⁿyāⁿ s'eeⁿ 'áámá meēⁿ ní sn'dii 'iiⁿyāⁿ s'eeⁿ. Ní discípulos ch'iindiveēⁿ yā 'áámá nduudu chí ngaⁿa nguuaⁿ meēⁿ miiⁿ chí ngaⁿā: Sáⁿa 'cūú Saⁿā Daiyá chí neⁿe n'dái. Cu'neeⁿ veēⁿ ní yeⁿe sa.

⁸ Hora míⁿ nūⁿ, taachi discípulos n'diichí yā, 'āā ntéé du'ū vee snéé ndúúcu yā, 'āā dámaāⁿ Jesús miiⁿ nduucú yā.

⁹Taachí nangua'á yā yeⁿe yiicū miiⁿ na yúúni miiⁿ naachi cunaⁿa yā Jesús caⁿa yā chii yā 'iiⁿyāⁿ s'eeⁿ chi nguée caaⁿmaⁿ yā yeⁿe chi n'diichi yā, ndíi taachi Saⁿa chi Daiya Ndyuūs nduuchi sa yeⁿe nguaaⁿ tináⁿā. ¹⁰Cáávā chuū nanguáin'daí yā chi canúⁿ n'de'ei nguaaⁿ maáⁿ yā, naati ntiinguunéeⁿ yā nguaaⁿ maáⁿ yā ¿de'ē chi 'túúca chi nduuchi sa yeⁿe nguaaⁿ tináⁿā? ¹¹Tuu'mi ní discípulos ntiinguunéeⁿ yā Jesús ní caⁿa yā: ¿De'ē cúúví chí ngaⁿā maestros yeⁿe ley chí Elías miiⁿ canéeⁿ chi ndaa vmnaaⁿ sa?

¹²Jesús miiⁿ nan'guæcútaⁿa yā ní caⁿa yā chii yā discípulos: Cuaacu níⁿnyúⁿ chí Elías miiⁿ 'āā ndaá sá vmnááⁿ vmnaaⁿ ní diiⁿ sa n'nee sa tanducuéⁿē yeⁿe Ndyuūs. ¿De'ē ngaⁿā naachi canée nguūⁿ na libro yeⁿe Ndyuūs yeⁿe Saⁿā chí Daiya Ndyuūs? Ngaⁿa chí canée chi 'cueenu sá cuuvi ní 'iiⁿyāⁿ s'eeⁿ diíⁿ yā despreciar saⁿā ní nguée neⁿe yā saⁿā. ¹³Naati maaⁿ ní ngaⁿá chí 'āā ndaā profeta Elías miiⁿ ní 'iiⁿyāⁿ s'eeⁿ 'āā dííⁿ yā chí neⁿe yā ndúúcu sa, tan'dúúca chí ngaⁿa naachi canée nguūⁿ na libro yeⁿe Ndyuūs yeⁿe chí canée chí chó'oo.

**Jesús divii yā espíritu yeⁿe
yááⁿ'nguiinūⁿ yeⁿe 'aama saⁿā 'dííⁿ
(Mt. 17.14-21; Lc. 9.37-43)**

¹⁴Cuayiivi míⁿ Jesús ndaa yā naachi snée discípulos yeⁿe yā. N'diichí yā neené n'dee 'iiⁿyāⁿ cuaaⁿ 'diituú discípulos yeⁿe yā. Véé ntúūⁿ maestros yeⁿe ley miiⁿ chí ndeé yā n'deē n'daí ndúúcu discípulos. ¹⁵Ní taachi n'díichi nducyaaca yā Jesús miiⁿ cueⁿe yiinu yā ní ngéenu yā ní ndāa yā nanááⁿ Jesús chí dííⁿ yā saludar Jesús. ¹⁶Tuu'mi ní Jesús ntiinguuneeⁿ yā 'iiⁿyāⁿ s'eeⁿ: ¿De'ē ngaⁿa ní ndúúcu 'iiⁿyāⁿ s'tíí?

¹⁷'Áamá chéé 'iiⁿyāⁿ s'eeⁿ chí snée yā miiⁿ nn'guaacútaⁿa yā: N'díí Maestro, ndeé 'aama daiyá, chí canée sá ndúúcu 'áamá espíritu yeⁿe yááⁿ'nguiinūⁿ chí

diiⁿ chí nguée ngíí ngaⁿā sa. ¹⁸'Āā tíí nūⁿ naachi canée sá espíritu 'cūū ní sta'a sáⁿā ní n'geēcu sáⁿā ná yáⁿā. Ní saⁿā miiⁿ ní ican'dāá yáíⁿ cuaaⁿ cheendi sa. Ní n'geēcu r'ííí 'dííⁿyúⁿ sá. Chííⁿ chí neené nduuví duūvā sa. 'Āā ngíí discípulos yeⁿe ní chí tun'dāa yā espíritu yeⁿe yááⁿ'nguiinūⁿ, naati nguée cuuvi dííⁿ yā.

¹⁹Jesús nan'guæcútaⁿa yā yeⁿe 'iiⁿyāⁿ s'eeⁿ: Ndí'stíí, 'iiⁿyāⁿ chí nguée i'téenu ní. ¿Áá 'naaⁿ tiempo canée chí cuneé ndúúcu ndí'stíí? ¿Áá 'naaⁿ tiempo canée chí cucheé ndúúcu ní? Candéē ní 'muuⁿ saⁿā 'dííⁿ.

²⁰Cheⁿe yā nguai yā saⁿā 'dííⁿ miiⁿ. Ní taachí n'diichi espíritu yeⁿe yááⁿ'nguiinūⁿ Jesús miiⁿ, yááⁿ'nguiinūⁿ miiⁿ chindæeve saⁿa 'dííⁿ miiⁿ. Cheēcu ndāā sa ní n'gee yáíⁿ cuááⁿ cheendi sa. ²¹Tuu'mi ní Jesús ntiinguuneeⁿ yā chiida saⁿā 'dííⁿ: ¿'Áá 'naaⁿ canee sa ndúúcu ca'ai 'cūū? Chiida sa miiⁿ ní caⁿa yā: Ndií chí lííⁿ sa. ²²Nééné n'deē cuuvi espíritu yeⁿe yááⁿ'nguiinūⁿ miiⁿ ní n'gaanuuⁿ saⁿā nguaaⁿ nguuchi yáⁿā ní nguaaⁿ nuūⁿníⁿ va, chí neⁿe 'caāⁿnūⁿ saⁿā. N'dií Jesús, ndúúti chí cúúví diíⁿ ní 'tæ de'ē chí cunnee ní nús'uu, ní nuuⁿ nnee ya'āi 'iinú ní nús'uu ní cunnee ní nús'uu.

²³Jesús caⁿa yā chii yā saⁿā miiⁿ: Nduuti chí cuuvi cu'téenu di, tuu'mi ní tanducuéⁿē ní cuuvi cáávā 'iiⁿyāⁿ chí i'téenu yā.

²⁴Tuu'mi ní chiida sa nééné 'caí ní ngeécú yā. Ní caⁿa yā: 'Úú cu'teenú. Cunnee ní 'úú ní cuuvi cu'teenú ca.

²⁵Taachí Jesús n'diichí yā chí neené n'deē 'iiⁿyāⁿ nduuvidaamá yā, ngaⁿa diitú yā ndúúcu espíritu yeⁿe yááⁿ'nguiinūⁿ ní caⁿa yā: Dii espíritu chí diiⁿ chí nguée ngíí ngaⁿa ní nguée n'giindiveéⁿ 'úú cuuvi dii chí nan'dāa di yeⁿe cuerpo yeⁿe saⁿā 'dííⁿ 'cūū, ní 'āā

ntéé nguεεcunée di cundaā di na cuerpo yeⁿē sa.

²⁶ Espíritu miiⁿ ní chindeeve saⁿā 'dííⁿ miiⁿ ní cheεcundáa saⁿā taama vmnéⁿēe ní nan'daā yeⁿē sa. S'neeⁿ saⁿā 'dííⁿ miiⁿ tan'dúucā chí ch'ii sa. Taachí 'iiⁿyāⁿ s'uuⁿ n'diichí yā saⁿā 'dííⁿ miiⁿ neenē 'yaaⁿ yā caⁿa yā chí n'díí sá. ²⁷ Naati Jesús miiⁿ ní sta'á yā ta'a sa, ní nadicuéeⁿ yā saⁿā. Saⁿā 'díí miiⁿ ní chéendii sa.

²⁸ Cuayiivi ní Jesús sndaā yā na 'áámá va'ai, ní discípulos yeⁿe yā ntiinguunéeⁿ yā Jesús taachi snée yā 'áámá lado: ¿De'ē cúuví chí nús'uu nguéeé chitun'dáa 'nū espíritu yeⁿe yááⁿnguiniūⁿ yeⁿe saⁿā 'dííⁿ?

²⁹ Ní Jesús caⁿa yā: Espíritu 'cūú chí 'túucā nguéeé nan'daā yeⁿe 'iiⁿyāⁿ chí 'ticá nūuⁿ caati dámaāⁿ chí ngaⁿ'angua'á yā ndúucū chí nguéeé 'āā ca'diinú yā nguuví chí ngaⁿ'angua'á yā.

**Jesús ngaⁿa ntúuⁿ yā yeⁿe
vaadi n'gii yeⁿe yā**

(Mt. 17.22-23; Lc. 9.43-45)

³⁰ Taachí can'daā Jesús ndúucū discípulos na yáāⁿ miiⁿ, cho'ó yā na yáⁿāa Galilea. Jesús miiⁿ nguéeé neⁿe yā chí cadiinuuⁿ mar 'áámá 'iiⁿyāⁿ chí canee yā miiⁿ, ³¹ ti Jesús miiⁿ ní ngi'cueeⁿ yā discípulos yeⁿe yā chí Saⁿa chí Daiya Dendyuūs miiⁿ ní canée chí ca'a yā sáⁿā na ta'aa 'iiⁿyāⁿ. Ní canée chí 'caaⁿnúⁿ yā saⁿā. Ní taachí 'āā cuuví sa cheeti 'iinū nguuví canée chí nduuchi sa yeⁿē nguuaⁿ tináⁿā. ³² Naati discípulos ní nguéeé túumicádíinuuⁿ yā chí ngaⁿa Jesús. Ní 'va'a yā chí ntíinguuneeⁿ yā yeⁿe chúú.

¿Du'ū cá chí ch'εete ca?

(Mt. 18.1-5; Lc. 9.46-48)

³³ Tuuⁿmi ní ndaa Jesús ndúucū discípulos yeⁿe yā na yáāⁿ Capernaum; ní taachí ndaa yā 'áámá va'ai, Jesús nti-

inguuneeⁿ yā discípulos: ¿De'é ngaⁿa ndís'tii cuaaⁿ cyúúni?

³⁴ Discípulos ní 'āā ntéé caⁿa yā mar 'áámá ti cuaaⁿ cyúúni mííⁿ ntíinguuneeⁿ vi'i yā cheé ca yā chí ch'εete ca yā.

³⁵ Tuuⁿmi ní Jesús miiⁿ ch'iindí yā ní yaa'ví yā ndiichúví discípulos yeⁿe yā chí cuchii yā nanáaⁿ yā. Ní caⁿa yā: Ndúúti chí 'áámá ndís'tii neⁿe ní cuuví ní cuááⁿ vmaaⁿ, canée chí cuuví ní ndii cuayiivi yeⁿē nducyáácá yā ní ndiicuuⁿ ca ní. Ní canée chí dichí'vē nducyaaca 'iiⁿyāⁿ.

³⁶ Tuuⁿmi ní Jesús sta'á yā 'áámá saⁿā 'lííⁿ ní s'neeⁿ yā naavtáⁿā yeⁿe discípulos. Ní sta'á yā saⁿa 'lííⁿ miiⁿ ní caⁿ'nuúⁿ yā saⁿā. Ní caⁿa yā chí yā discípulos yeⁿe yā: ³⁷ 'Iiⁿyāⁿ chí 'cuaáⁿ yā saⁿā 'lííⁿ 'túucā, nduūcū chí duuchí, 'iiⁿyāⁿ miiⁿ ní 'cuaáⁿ yā 'úú. 'Iiⁿyāⁿ chí 'cuaáⁿ yā 'úú, nguéeé dámaāⁿ 'úú cuaáⁿ yā, naati 'cuaáⁿ ntúuⁿ yā 'iiⁿyāⁿ chí dich'ó yā 'úú.

Yeⁿe 'iiⁿyāⁿ chí lado yeⁿe Jesús

(Mt. 10.42; Lc. 9.49-50)

³⁸ Tuuⁿmi ní Juan miiⁿ ní caⁿa sa chí sa Jesús: N'díí Maestro, n'diichí 'nū 'áámá saⁿā chí divíi sa espíritus yeⁿe yáán'guiniūⁿ yeⁿe 'iiⁿyāⁿ ndúucū chí dúuchí ní, naati sáⁿā miiⁿ ní nguéeé cachi-icá sá ndúucū nús'uu. Nguéeé 'cuúⁿ 'nū chí diiⁿ sa 'tíicā.

³⁹ Jesús caⁿa yā chí yā discípulos: Ndís'tii 'cuáaⁿ ní chí diiⁿ sa 'túucā; ti nguéeé véé mar 'áámá 'iiⁿyāⁿ chí dííⁿ yā vaadi n'giinu ndúucū chí duuchí, ní cuayiivi cúuví caaⁿmáⁿ yā chí 'úú ní nguéeé n'daācā 'úú. ⁴⁰ Ti 'iiⁿyāⁿ chí nguéeé idiíⁿ yā contra yeⁿe s'uūuⁿ, ní yeⁿé yā favor yeⁿē yú. ⁴¹ 'Āā du'ú nūuⁿ 'iiⁿyāⁿ chí téé yā ndís'tii 'áará chí 'áámá vaso nuūⁿnīⁿ ndúucū chí duuchí, ti ndís'tii yeⁿe Cristo ndís'tii, cuaacu nííⁿnyúⁿ 'iiⁿyāⁿ miiⁿ ní véé chí ndaācā chí cuuvi yeⁿe yā ná va'ai cheeti nguuví.

**Yeⁿe dendu'ū chi diiⁿ chi
'iiⁿyāⁿ diiⁿ nuuⁿndí yā**

(Mt. 18.6-9; Lc. 17.1-2)

⁴²Tuu'mi ní caⁿa Jesús: 'Āā du'ú nūuⁿ 'iiⁿyāⁿ chi diiⁿ yā chi 'áámá chee chi n'gaiyáā chi i'téenu yā 'úú diiⁿ yā nuuⁿndí, n'daacā ca cáāvā 'iiⁿyāⁿ miiⁿ chi 'iiⁿyāⁿ s'eeⁿ cāchiichí yā 'áámá tuūu yúúúú chí inguú 'iiⁿyāⁿ na daandu yā ní canuúⁿ yā 'iiⁿyāⁿ miiⁿ naachí yaānuúⁿ yeⁿe nuūⁿniⁿyáⁿā. ⁴³Ní ndúúti chi ta'ā di idiíiⁿ chí dinuuⁿndi di, n'daacā ca chí 'caaca di ta'a di ní divíi di. N'daacā ca chí ndaā di ndúúúú 'aama ta'á nūuⁿ di ná vida cueⁿe daāⁿmaⁿ, ní nguéé chi caⁿā di ndúúúú 'uūvi ta'a di na infierno, naachí nguūchí yaⁿā miiⁿ ní nguéé ín'tuūvi. ⁴⁴Lugar miiⁿ naachi nguéé n'gii n'daāā ní nguuchi yaⁿā miiⁿ ní 'āā ntéé ín'tuūvi. ⁴⁵Ndúúti chi ca'a di idiíiⁿ chí dinuuⁿndi di 'caaca ntúuⁿ di ní divíi di. N'daacā ca chí ndaa di lo'ō di na vida cueⁿe daāⁿmaⁿ miiⁿ, nguéé ti chí caⁿā di ndúúúú 'uūvi ca'a di na infierno naachí nguuchi yāⁿā miiⁿ chí nguéé ín'tuūvi. ⁴⁶Lugar miiⁿ ní naachi nguéé n'gii n'daāā ní nguuchi yāⁿā miiⁿ 'āā ntéé ín'tuūvi. ⁴⁷Ndúúti chi nduutináāⁿ di diiⁿ chí idinuuⁿndí di, tuu'mi ní tun'dáa di; ti n'dáácā ca chí ndáa di ndúúúú 'áámá nduutináāⁿ naachí Ndyuūs ngaⁿa ntiiⁿnyúⁿ yā, nguéé ti chí caⁿā di ndúúúú nduu 'uūvi nduutináāⁿ di na infierno, ⁴⁸naachi n'daāā míⁿ nguéé n'gíi tī ní nguuchi yāⁿā miiⁿ 'āā ntéé ín'tuūvi tan'díi nūuⁿ.

⁴⁹Ti nducyaaca 'iiⁿyāⁿ chi i'téenu yā canéé chí n'diichi néⁿe yā 'cuenú yā cuuvi tan'dúúúú chí cho'ó ná nguuchi yaⁿā, ní tanducuéⁿe 'iiti chí 'iiⁿyāⁿ 'caaⁿnúⁿ yā cáāvā ofrenda yeⁿe Ndyuūs, diiⁿ yā preparar 'iiti miiⁿ ndúúúú yīimā. ⁵⁰Yīimā ní n'dai. Ní nduuti chí nguēē ndaacā sabor yeⁿe, ¿d'é'ē cuuvi diiⁿ nī, ní cuuvi nndaacā sabor yeⁿe? Ndís'tií cunee ní tan'dúúúú chí yīimā, 'tíica cunee nī,

ní canéé n'daaca nī 'aama nī taama nī ndúúúú ví'i.

**Jesús ngi'cueeⁿ yā yeⁿe divorcio
chi i'teechií ví'i 'iiⁿyāⁿ**

(Mt. 19.1-12; Lc. 16.18)

10 Jesús can'daa yā yeⁿe yāāⁿ Capernaum, ní cueⁿe yā na yāⁿāa Judea ndúúúú yāⁿāa chí canee táámá lado yeⁿe yíúú Jordán. Miiⁿ ní nduvidaama ntúuⁿ 'iiⁿyāⁿ naachi canéé Jesús miiⁿ. Jesús tuca'a yā chí'cueeⁿ yā 'iiⁿyāⁿ s'eeⁿ tan'dúúúú costumbre yeⁿe yā. ²Tuu'mi ní n'duūvi 'iiⁿyāⁿ fariseos ndaā yā nanááⁿ Jesús ti neⁿe yā n'diichíneeⁿ yā Jesús miiⁿ. Ní ntiinguuneeⁿ yā Jesús ndúúti chí n'daacā chí saⁿā n'teechi sá n'daataá yeⁿe sa. ³Jesús miiⁿ ní nangueécútaⁿa yā: ¿D'é'ē caⁿa Moisés chíi sa ndís'tií na ley yeⁿe yú?

⁴Fariseos ní caⁿa yā chíi yā Jesús: Moisés miiⁿ ní 'cuūⁿ sa chí ca'a sá n'daataa miiⁿ 'áámá caaca yeⁿe chí i'teechi ví'i yā. Tuu'mi ní cu'neeⁿ sa táⁿā sa.

⁵Tuu'mi ní Jesús caⁿa yā chíi yā fariseos: Moisés miiⁿ tee sa mandamiento 'cūū, ndís'tií, caati ndís'tií ní neené cheechi staava yeⁿe nī. ⁶Naati ndíi cuaaⁿ vmnaaⁿ, taachi Ndyuūs din'dái yā tanducuéⁿe dendu'ū, din'dái yā sáⁿā ndúúúú n'daataá. ⁷Chíiⁿ chí saⁿā miiⁿ cun'nééⁿ sa chíida sa ndúúúú cheecu sá ní ndūūvidaama sa ndúúúú n'daataá yeⁿe sa, ⁸ní nduu 'uūví yā ní nduūvi 'aama yā ndúúúú ví'i. Chíiⁿ chí 'āā ntéé 'uūvi yā tí 'āā 'aama núúⁿ yā. ⁹Chíiⁿ chí saⁿā miiⁿ nguéé canee chí nadívíi sa chí Ndyuūs nadaamā yā.

¹⁰Cuayiivi miiⁿ taachí 'āā snée Jesús ndúúúú discípulos yeⁿe yā cheetí 'áámá va'āi, miiⁿ discípulos nguēēcunee yā ntinguuneeⁿ yā Jesús yeⁿe nduudu 'cūū. ¹¹Jesús caⁿa yā chíi yā discípulos: Saⁿā chí cu'neeⁿ sá n'daataá yeⁿe sa ní 'caan-divaacu sa ndúúúú táámá n'daataá, saⁿā

miiⁿ ní idinuuⁿndi sa chi véé táámá n'daataa yēⁿe sa. ¹²Ní ndúúti chi 'áámá n'daataa cu'neeⁿ ta isáⁿā yeⁿe tá ní 'caandivaacu tá ndúúcu táámá saⁿā, 'tiicá ntúúⁿ n'daataa miiⁿ idinuuⁿndi tá chi véé taama isáⁿā yeⁿe tá.

Jesús di'viicú yā dá'caiyāa

(Mt. 19.13-15; Lc. 18.15-17)

¹³Tuu'mi ní 'iiⁿyāⁿ s'eeⁿ níndeé yā dá'caiyāa nanááⁿ Jesús, chi Jesús tuu'ví yā dá'caiyāa miiⁿ; naati discípuos ní yaa'vi néeⁿ yā 'iiⁿyāⁿ s'eeⁿ chí ndéé dá'caiyāa s'eeⁿ. ¹⁴Taachí Jesús n'diichi yā chuū, yaa'vi néeⁿ yā ní caⁿa yā chí yā discípuos: 'Cuaaⁿ nī chí dá'caiyāa nanaáⁿ, ní nguéeⁿ ndivíi nī yeⁿé, ti na va'ai cheeti nguuvi naachi Ndyuūs ngaⁿa ntiiⁿnyúⁿ yā ní yeⁿé dá'caiyāa s'tíi, 'tíicā. ¹⁵Cuaacu níⁿnyúⁿ ngaⁿa ngíi ndís'tii, 'iiⁿyāⁿ chi nguéeⁿ cu'téenu yā yeⁿe naachi Ndyuūs ngaⁿa ntiiⁿnyúⁿ yā tan'dúúca chi i'teenú 'aama dá'caiyāa, nguéeⁿ cuuví cundaa yā naachi Ndyuūs ngaⁿa ntiiⁿnyúⁿ yā.

¹⁶Ní Jesús sta'á yā dá'caiyāa miiⁿ ní ca'nuú yā ní di'viicú yā. Ní s'neeⁿ yā sn'duú tá'a yā vmnaaⁿ yeⁿé.

Yeⁿe saⁿa 'díⁿ chi 'cuiica

(Mt. 19.16-30; Lc. 18.18-30)

¹⁷Taachí Jesús candíi yā yúúni yeⁿé yā, ndaā 'áámá sáⁿā. Ngeenu sa nanááⁿ Jesús ní chíntii'ya sa nanááⁿ yā ní ntínguuneēⁿ sa: N'dii Maestro chí n'dái nī, ¿de'e díⁿ ní ndaacá vida cueⁿe daāⁿmaⁿ chi cuuvi yeⁿé?

¹⁸Jesús caⁿa yā chí yā saⁿā: ¿De'ē cúúví chí ngaⁿā dí chí n'dai 'úú? Mar 'áámá 'iiⁿyāⁿ nguéeⁿ n'dai yā tí dámaaⁿ Ndyuūs. ¹⁹Dii ní deenu di chí canéé nguūⁿ na ley chí 'tuucā: Nguéeⁿ caⁿa di ndúúcu tááma n'daataa chi nguéeⁿ yeⁿe di. Nguéeⁿ 'caāⁿnuⁿ di. Nguéeⁿ diduucú di. Nguéeⁿ caaⁿmaⁿ nduudu yaadi yeⁿé mar

'áámá 'iiⁿyāⁿ. Nguéeⁿ canche'ei di 'iiⁿyāⁿ. Dinéⁿe di chiida di ndúúcu cheecu di.

²⁰Saⁿā miiⁿ ní nan'guuecútaⁿā sa: N'dii Maestro, tanducuéⁿē chuū 'āā idiⁿ ndíi taachi saⁿā 'líⁿ 'úú.

²¹Jesús ní ch'iinu yā saⁿā 'díⁿ ní dinéⁿe yā saⁿā. Ní caⁿa yā: Véé táámá chí indái yeⁿé di. Cuéⁿé dí n'diicu dí tanducuéⁿē chí véé yeⁿé di, ní ca'a di 'iiⁿyāⁿ chí nguéeⁿ yeⁿe yā. Tuu'mi ní ndaācā chí véé vaadi 'cuiica yeⁿe na va'ai cheeti nguuvi chí cuuvi yeⁿé di. Tuu'mi ní cutá'a di cruz yeⁿé di chí yeⁿé chí 'cueenu di cuuvi ní cuchii di ní caⁿa di nduucú.

²²Naatí taachi ch'iindiveeⁿ sá chuū, néené s'neeⁿ ya'āi 'iinu sa ní neene ndaachi 'iinú sa. Ní cunaⁿa sa ti neené 'cuiica sa.

²³Tuu'mi ní Jesús ch'iinu yā cuaaⁿ 'di-itúú yā ní caⁿa yā chí yā discípuos yeⁿe yā: De'ē chúúca ngíⁿ'ii chí cundaa 'iiⁿyāⁿ 'cuiica naachí Ndyuūs ngaⁿa ntiiⁿnyúⁿ yā.

²⁴Discípuos ní nge'e yiinu yā yeⁿe nduudu yeⁿe yā; naati Jesús ní caⁿa ntúúⁿ yā: Ndís'tii daiyá, de'e chúúca ngíⁿ'ii chí 'iiⁿyāⁿ chí idinéⁿe ca yā chí véé yeⁿe yā chí cundaa yā naachí Ndyuūs ngaⁿa ntiiⁿnyúⁿ yā. ²⁵Nguéeⁿ ngíⁿ'ii cá chí 'áámá 'iiti camello, chí ch'eete cá nguéeⁿ ti 'yúúúúú chí cho'ó ti na nduutinááⁿ 'iini, chí cheendi va'ai 'líⁿ nguéeⁿ ti 'áámá 'iiⁿyāⁿ 'cuiica i'téenu yā Ndyuūs ní cundaa yā naachí Ndyuūs ngaⁿa ntiiⁿnyúⁿ yā.

²⁶Taachí discípuos ch'iindiveeⁿ yā chuū, nadicádíinuⁿ taavi ca yā ní nguaaⁿ maaⁿ yā ntínguuneeⁿ yā vi'i. Tuu'mi ní ngaⁿa yā: ¿Du'ú cuuvi nanguaⁿāi?

²⁷Jesús miiⁿ ch'iinu yā discípuos ní caⁿa yā: Saⁿā iⁿ'yeeⁿdí 'cūú nguéeⁿ cuuvi diiⁿ sa chuū, naati Ndyuūs cuuvi díⁿ yā caati nanááⁿ Ndyuūs nguéeⁿ de'ē vee chí nguéeⁿ cuuvi díⁿ yā.

²⁸ Tuu'mi ní Pedro miiⁿ tuca'a sa caⁿa sa ní caⁿa sa chii sa 'iiⁿyāⁿ: Nús'uu ní s'neéⁿ 'nū tanducuéⁿē chí véeⁿ yeⁿé 'nū, ní cuchí 'nū nduucú nī.

²⁹ Jesús nan'gueécútaⁿa yā: Cuaacu níⁿnyúⁿ ngaⁿá ngí ndís'tií. 'Āā du'ú nūuⁿ 'iiⁿyāⁿ chí cu'neéⁿ yā vaacu yā, o 'dínu yā, o víⁱ, o cheécú yā, o chiidá yā, o n'daataá yeⁿé yā, o daiya yā, o yáⁿāa yeⁿe yā, cáávā 'úú ní cáávā chí candēe yā nduudu chí nguaⁿ'ai 'iiⁿyāⁿ, ³⁰ cuta'á yā na iⁿ'yeeⁿdí' cūū 'áámá ciento cúvív cá chí n'dee ca dendu'ū yeⁿe va'ai s'eeⁿ ndúúⁿcū 'dínu yā ndúúⁿcū 'cē'vē yā ndúúⁿcū víⁱ yā, ndúúⁿcū chiidá yā, ndúúⁿcū cheécú yā, ndúúⁿcū daiya yā, ní yeⁿé yáⁿāa yeⁿe yā. Ní canéé chí n'géénú yā ngii chí 'iiⁿyāⁿ idiíⁿ yā naati ná iⁿ'yeeⁿdí chí cuchii ndaācā vida cueⁿe daāⁿmaⁿ yeⁿe yā. ³¹ Nééné 'yaaⁿ 'iiⁿyāⁿ chí maaⁿ snée yā cuaaⁿ vmnaaⁿ 'iiⁿyāⁿ s'eeⁿ 'cuētinée yā cuaaⁿ chí cuayiivi. Ní neené 'yaaⁿ 'iiⁿyāⁿ chí maaⁿ snée yā cuaaⁿ chí cuayiivi, 'iiⁿyāⁿ s'eeⁿ 'cuētinée yā vmnaaⁿ.

**Jesús ngaⁿa ntúuⁿ yā
yeⁿe chí 'cuūví yā**

(Mt. 20.17-19; Lc. 18.31-34)

³² Jesús ndúúⁿcū discípuos yeⁿe yā snúúⁿ yā yúúmí ní cuhēe yā na yāāⁿ Jerusalén. Jesús cueⁿé yā vmnáāⁿ discípuos. Ní discípuos nadicádínuuⁿ yā ní cueⁿe yiinú yā ní 'va'á yā. Tuu'mi ní Jesús miiⁿ nguēecunée yā ní yaaⁿ'vi ndiichúvív discípuos yeⁿe yā ní tuca'a yā caⁿa yā chii yā discípuos yeⁿe chí canéé chí 'cuūví yā. ³³ Ní caⁿ'a yā Cun'diichí nī, caa yú na yāāⁿ Jerusalén, naachí 'úú chí Saⁿ'a chí Daiya Dendyuūs miiⁿ ní 'iiⁿyāⁿ nca'a yā 'úú chiiduú n'geete ndúúⁿcū maestros yeⁿe ley. Ní 'iiⁿyāⁿ s'eeⁿ caacá yā yeⁿe 'úú chí 'cuūví. Ní nca'á yā 'úú 'iiⁿyāⁿ chí nguée ndaata yeⁿé Israel. ³⁴ Ní 'caaⁿnyuⁿ néeⁿ yā 'úú. Ní 'cueⁿé yā 'úú ní ca'a neeⁿ daiⁿ yā 'úú. 'Cuiinu chuū

ní 'caaⁿ'núⁿ yā 'úú. Naati ndiichi ndii 'íínú nguuví miiⁿ, nduuchí yeⁿé nguaaⁿ tináⁿā.

**Jacobo ndúúⁿcū Juan
ngíicá sá 'áámá favor**

(Mt. 20.20-28)

³⁵ Tuu'mi ní Jacobo ndúúⁿcū Juan, chí daiya Zebedeo, ndaá yā nanááⁿ Jesús miiⁿ ní caⁿ'a sa: N'dii Maestro, neⁿé 'nū chí díⁿ nī 'áámá favor chí ngiica 'nū.

³⁶ Tuu'mi ní Jesús ntinguuneeⁿ yā: ¿De'ē neⁿe nī chí díⁿ?

³⁷ Tuu'mi ní caⁿ'a sa chii sa Jesús miiⁿ: 'Cuááⁿ dí chí 'cueēté 'nū 'áámá 'nū lado tá cuaacú di ní táámá 'nū ní lado tá 'cueēe di taachi 'āā ndaá hora yeⁿe chí ngaⁿ'a ntiiⁿnyuⁿ dí yeⁿe nducuéⁿē.

³⁸ Tuu'mi ní Jesús miiⁿ caⁿ'a yā: Ndis'tií nguée déénu nī de'ē chí ngiica nī. ¿'Áá cuuvi díⁿ di cu'u nuúⁿ nī yeⁿé chí n'geēⁿ cheeti vaso chí yeⁿe chí 'cuenú cuuvi? ¿'Áá cuuvi cuta'á nī maaⁿ chí ngeedínúⁿnī chí cuta'á?

³⁹ Juan ndúúⁿcū Jacobo miiⁿ ní nan'gueécútaⁿa yā: Cuuvi díⁿ 'nū. Tuu'mi ní Jesús caⁿ'a yā chii yā 'iiⁿyāⁿ s'eeⁿ: Cuaacu níⁿnyúⁿ canéé chí cu'ú nī yeⁿe vaso chí yeⁿe chí 'cuenú cuuvi ní canéé chí cuta'á nī chí ngeedínúⁿnī chí 'úú ita'á. ⁴⁰ Caati nguée ituneeⁿ 'úú chí ca'á du'ū chí 'cuūndí lado tá cuaacú o lado ta 'cueēe. Lugar 'cūū ní Ndyuūs ca'á yā 'iiⁿyāⁿ chí Ndyuūs díⁿ yā 'cundiyaáⁿ yā cáávā 'iiⁿyāⁿ.

⁴¹ Taachí ch'iindiveéⁿ ndu'u ndiichí discípuos chuū, nduuví taáⁿ yā ndúúⁿcū Jacobo ndúúⁿcū Juan miiⁿ. ⁴² Jesús ní yaaⁿ'vi yā discípuos ní caⁿ'a yā: Tan'dúúcā chí ndís'tií deenu nī, 'iiⁿyāⁿ chí ngaⁿ'a ntiiⁿnyúⁿ yā yeⁿe naciones vée poder yeⁿé yā nguaaⁿ 'iiⁿyāⁿ yeⁿe nación yeⁿe yā ní 'iiⁿyāⁿ chí n'geete cá yeⁿé naciones ngaⁿ'a ntiiⁿnyúⁿ yā 'iiⁿyāⁿ s'eeⁿ. ⁴³ Naati nguaaⁿ ndís'tií, nguēe 'tíicā. 'Iiⁿyāⁿ chí neⁿe cuuvi ch'ēete yā

nguaaⁿ ndís'tií canéé chi dichí'vé yā 'iiⁿyāⁿ. ⁴⁴ 'Āā du'ú nūuⁿ ndís'tií chi neⁿe nī cunee nī cuaaⁿ vmaaaⁿ yeⁿe ndís'tií canéé chí dichí'vé nī nducyaaca 'iiⁿyāⁿ. ⁴⁵ Naati Sáⁿā chi Daiya Dendyuūs nguéé ndaā sa chi 'iiⁿyāⁿ dichí'vé yā saⁿā, ti maaⁿ sa dichí'vé sa nducyaaca 'iiⁿyāⁿ, ní caⁿa sa vida yeⁿe maāⁿ sa tan'dúúca precio yeⁿe nuuⁿndi cáávā chí nanguaⁿ'ai yā n'deee n'daí 'iiⁿyāⁿ.

**Jesús n'guaáⁿ yā
nduutinááⁿ saⁿā Bartimeo**

(Mt. 20.29-34; Lc. 18.35-43)

⁴⁶ Tuu'mi ní ndaā Jesús ndúúcu discípulos na yāāⁿ Jericó. Ní taachí can'daa yā yāāⁿ Jericó ndúúcu 'yaaⁿ n'daí 'iiⁿyāⁿ 'áámá sáⁿā chí ngeuenááⁿ chi nguuví Bartimeo, daiya Timeo, véé sá ni-iⁿnuúⁿ cyúúni ní ngiica sá limosnas. ⁴⁷ Ní taachí ch'iindiveeⁿ sa chí Jesús yeⁿe yāāⁿ Nazaret cho'o yā miiⁿ, saⁿa ngeuenááⁿ miiⁿ tuca'a sa 'caí sa ní caⁿa sa: Jesús, Daiya David, nnéé ya'āi 'iinú ní 'úú.

⁴⁸ Nééné 'yaaⁿ yā yaa'vi neeⁿ yā saⁿā miiⁿ chí cunēē 'diiⁿ sa cheendí sa, naati saⁿā miiⁿ ní n'gai yiicú cá sá: N'dii Daiya David, nnéé ya'āi 'iinú ní 'úú.

⁴⁹ Tuu'mi ní Jesús cheendii yā ní caⁿa yā: Yaa'vi ní saⁿā chi cuchii sa 'muuⁿ. Ní cheⁿé yā ní chii yā saⁿā chi ngeuenááⁿ miiⁿ: Canéé diitu di ní cáániicú di ndúcueeⁿ di ti Jesús n'gai yā dii.

⁵⁰ Tuu'mi ní sn'dáa sa cotón yeⁿe sa ní nadacueeⁿ sa ní chéⁿé sa ndaā sa nanááⁿ Jesús miiⁿ. ⁵¹ Tuu'mi ní Jesús ntinguuneeⁿ yā saⁿā: ¿De'ē neⁿé di chi díⁿ ndúúcu dii? Sáⁿā chi ngeuenááⁿ miiⁿ ní caⁿa sa: N'dii Maestro díⁿ ní chi snaáⁿ.

⁵² Jesús caⁿa yā: Cunaⁿā di. 'Āā in-aaⁿ di, ti s'téenu di. Hora 'cūū nūuⁿ chi ngeuenááⁿ miiⁿ ní snaaⁿ sa ní cueⁿe sa ndúúcu Jesús miiⁿ na yúúni.

Jesús ndaa yā na yāāⁿ Jerusalén

(Mt. 21.1-11; Lc. 19.28-40; Jn. 12.12-19)

11 Taachí Jesús ndúúcu discípulos los ndaa yā niiⁿnuúⁿ na yāāⁿ Jerusalén, ndaa yā na yāāⁿ Betfagé, ndúúcu yāāⁿ Betania, niiⁿnuúⁿ na yiicú chí nguuví Olivos. Ní Jesús dichó'o yā na 'uúví discípulos yeⁿe yā. ² Ní caⁿa yā: Cuéⁿe ní na yāāⁿ 'líⁿ chí canéé ni-iⁿnuúⁿ ní taachí ndaa ní miiⁿ ndaaca ní 'áámá burro n'dééchiichí ti. Burro miiⁿ ní mar 'áámá 'iiⁿyāⁿ 'āā cuéé cunduú yā 'iiti. N'daatí ní 'iiti ní candéé ní 'iiti 'múúⁿ. ³ Ndúúti chí 'áámá 'iiⁿyāⁿ tínguuneeⁿ yā ndís'tií: ¿De'ē cúúví chí 'tíicā idiⁿ ní? Caaⁿmaⁿ ní cuuvi ní 'iiⁿyāⁿ tí Señor yeⁿe yú neⁿe yā 'iiti miiⁿ. Ní caama nadicho'ó yā 'iiti.

⁴ 'Iiⁿyāⁿ s'eeⁿ ní 'tíicā cheⁿe yā, ní ndaāca yā burro miiⁿ n'dééchiichí ti na cyúúni niiⁿnuúⁿ cheendiva'āi. Ní n'daátí yā 'iiti. ⁵ N'dúúví 'iiⁿyāⁿ chí snée yā miiⁿ ní caⁿa yā chii yā discípulos: ¿De'ē idiⁿ ní? ¿De'ē cúúví chí in'daatí ní burro?

⁶ Tuu'mi ní discípulos ní nan'gueecútaⁿa yā tan'dúúca chí Jesús caⁿa yā chii yā 'iiⁿyāⁿ. Ní 'cuuⁿ yā chí discípulos cueⁿe yā ndúúcu burro miiⁿ.

⁷ Tuu'mi ní cueⁿe yā ndaá yā ndúúcu burro miiⁿ nanááⁿ Jesús miiⁿ. Ní sn'duú yā cotón yeⁿe yā vmaáⁿ yeⁿe burro miiⁿ ní Jesús canduú yā 'iiti. ⁸ Taachí 'āā cueⁿe yā cuaaⁿ cyúúni miiⁿ, nééné 'yaaⁿ 'iiⁿyāⁿ n'doó yā cotón yeⁿe yā cuaaⁿ cyúúni miiⁿ. Taná'a yā ch'iicá yā dúuⁿnē yá'á ní chintaaví yā cuaaⁿ cyúúni.

⁹ Nééné 'yaaⁿ ca yā chí cueⁿe yā cuááⁿ vmaaaⁿ miiⁿ yeⁿe Jesús ndúúcu 'yaaⁿ n'daí yā chí cuchii yā cuaaⁿ daami yā 'caí yā: De'ē chúúca ch'εεε Ndyuūs. Ndyuūs di'viicú yā 'iiⁿyāⁿ chí cuchii yā ndúúcu chí dúúchí Señor miiⁿ. ¹⁰ De'ē chúúca n'dai naachi ngaⁿa ntiⁿnyuⁿ Ndyuūs. Cúchii tiempo maaⁿ chí tan'dúúca yeⁿe chiida yú David ngaⁿa ntiⁿnyúⁿ yā ndii

cuááⁿ vmnaaⁿ. Hosanna. Nduudu miiⁿ ní nduudu Israel chí neⁿe caaⁿmaⁿ na nduudu yeⁿe yú, chí ch'εεte n'dai Ndyuūs chí canéé na va'ai cheeti nguuvi.

¹¹ Tíicā sndaā Jesús na yáāⁿ Jerusalén. Ní ndaá yā na yaacū templo yeⁿe yáāⁿ Jerusalén miiⁿ. Ch'íinu yā tanducuéⁿē dendu'ū nuuⁿmáⁿ cuaaⁿ 'diituú yā. Cueⁿe ntúuⁿ yā na yáāⁿ Betania ndúúcu ndu'ū ndiichuuví discípulos caati 'āā chí chiiⁿnū.

**Jesús ngaⁿa yā ngii yā yáⁿá
n'guíidii yaaⁿ nguuví miiⁿ**

(Mt. 21.18-19)

¹² Chidεeve táamá nguuvi miiⁿ, taachí Jesús ndúúcu discípulos yeⁿe yā can'daa yā na yaāⁿ Betania, Jesús miiⁿ chí cui-icu yā. ¹³ Ní n'diichi yaⁿáí yā 'áámá yáⁿá yeⁿe n'guíidii yaaⁿ nguuvi chí véé táāa. Ní cueⁿe yā n'diichi yā chí 'áá snéé n'gui'i yeⁿe. N'diichi yā chí nguéé ndaācā n'gui'i yeⁿe ti ta'á nūuⁿ, ti nguéé tiempo yeⁿe. ¹⁴ Tuu'mi ní Jesús miiⁿ caⁿa yā chíi yā yáⁿá mííⁿ, 'túúcā: Dii yáⁿá, mar 'áámá 'iiⁿyāⁿ nguéé ch'ée yā n'gui'i yeⁿe di, tanducuéⁿē tiempo. Discípulos yeⁿe yā chí'indiveéⁿ yā tanducuéⁿē chí caⁿa yā.

Jesús nadεevé yā yaacū ch'εete

(Mt. 21.12-17; Lc. 19.45-48; Jn 2.13-22)

¹⁵ Cuayiivi mííⁿ 'iiⁿyāⁿ s'eeⁿ ndaá yā na yáāⁿ Jerusalén miiⁿ. Taachí Jesús ndaá yā na yaacū templo miiⁿ, tucá'a yā tun'dáa yā 'iiⁿyāⁿ na yaacū miiⁿ, 'iiⁿyāⁿ chí in'diicui yā ndúúcu 'iiⁿyāⁿ chí ngai yā. Ch'εecundáa yā mesas yeⁿe 'iiⁿyāⁿ chí n'dáaⁿ yā tuūmí. Ní ch'εecundáa yā sillas yeⁿe 'iiⁿyāⁿ chí in'diicui yā palomas. ¹⁶ Ní dííⁿ yā chí 'āā ntéé candéé 'iiⁿyāⁿ na yaacū miiⁿ mar 'áámá cosa. ¹⁷ Ní chí'cuéⁿ yā 'iiⁿyāⁿ ní caⁿa yā: Naachi canéé nguūⁿ na libro yeⁿe Ndyuūs ní 'túúcā ngaⁿā: Va'ai yeⁿe canéé chí duuchi va'ai naachi caaⁿmaⁿnguaⁿá 'iiⁿyāⁿ yeⁿe nducuéⁿē nación. Naati

ndís'tii ní dííⁿ nī chí yiive yáává yeⁿe 'iiⁿyāⁿ chí diduucu.

¹⁸ Chiiduú n'gεete chí ngaⁿa ntiiⁿnyuⁿ ndúúcu maestros yeⁿe ley chí'indiveéⁿ yā chuū, ní tucá'a yā n'nuuⁿ yiinú yā taacā chí 'caaⁿnuⁿ yā Jesús, naati 'va'á yā 'iiⁿyāⁿ. Ní nducyaaca 'iiⁿyāⁿ ngeⁿe yiinú yā yeⁿe chí ngi'cueeⁿ Jesús miiⁿ. ¹⁹ Taachí chí 'da'a, Jesús miiⁿ can'dáa yā na yáāⁿ Jerusalén miiⁿ ní cueⁿe yā táámá yáāⁿ 'lííⁿ chí niⁿnuúⁿ.

Yáⁿá in'guíidii miiⁿ ntí'i

(Mt. 21.20-22)

²⁰ Chidεeve táamá nguuvi, ní Jesús ndúúcu discípulos cho'ó yā na yúúni ní n'diichi yā 'áámá yáⁿá n'guíidii yaaⁿ nguuvi chí 'āā ntí'i ndii díí'yú yeⁿe. ²¹ Tuu'mi ní Pedro miiⁿ ní nn'gaacu sa chí 'āā chó'oo ní caⁿa sa chíi sa Jesús miiⁿ: N'dii Maestro, cuin'diichi nī. N'guíidii chí nguéé n'daācā caⁿa nī yeⁿe 'āā ntí'i.

²² Jesús miiⁿ nan'gυεεcútaⁿa yā ní caⁿa yā: Ndís'tii, cuuvi cūnee chí véé confianza yeⁿe nī ndúúcu Ndyuūs. ²³ Cuaacu níⁿnyúⁿ ngaⁿá ngii ndís'tii: 'Āā du'ú nūuⁿ 'iiⁿyāⁿ chí caaⁿmáⁿ yā cuuvi yā yīicú 'cúú 'tíicā: Dii yīicú, cuví di 'muuⁿ ní cundaā di nguuaⁿ nuūⁿ'nⁿyáⁿā. Ní nduuti chí nguéé 'uūvi vaanicádiinūuⁿ yeⁿe yā ní i'téenu yā chí chííⁿ chí ngaⁿá yā chí cuuví cuaacu, tuu'mi ní cuuvi 'tíicā. ²⁴ Chííⁿ chí maaⁿ ngaⁿá ngii ndís'tii: Tanducuéⁿē chí ndís'tii ngi-icá nī Ndyuūs taachi ngaⁿanguaⁿá nī, nduuti chí cu'téenu nī chí ndaācā yeⁿe nī, tuu'mi ní tanducuéⁿē ní ndaāca nī. ²⁵ Ní taachí ngaⁿanguaⁿá nī, nduuti chí 'áámá 'iiⁿyāⁿ idinuuⁿndí yā contra yeⁿe nī, nadach'εecú nī yeⁿe yā, 'tiicá ntúūⁿ Chiida yú chí canéé yā na va'ai cheeti nguuvi nádich'εecú yā nuuⁿndi yeⁿe nī. ²⁶ Ndúúti ndís'tii nguéé nadich'εecú nī nuuⁿndi yeⁿe 'iiⁿyāⁿ, 'tiicá ntúūⁿ Chiida yú chí canéé yā na va'ai cheeti nguuvi nguéé nadich'εecú yā nuuⁿndi yeⁿe nī.

Jesús ní ngaⁿa ntiⁿnyúⁿ yā

(Mt. 21.23-27; Lc. 20.1-8)

²⁷ Tuu'mi ní Jesús ndúúcu discípu-
los ndaa yā na yāā Jerusalén. Taachí
Jesús chiicā yā na yaācú templo, chiiduú
n'geete ndúúcu maestros chí ngi'cuéeⁿ
ley ndúúcu 'iiⁿyāⁿ ndiicúu chí ngaⁿa nti-
iⁿnyúⁿ yā yeⁿe yaācú miⁿ chindaá yā
n'diichí yā Jesús. ²⁸ Ní ntiinguuneeⁿ yā
Jesús: ¿Du'ú 'iiⁿntyéⁿē diiⁿ nduucú ní
chuū? O ¿du'ú tee poder dii chí idiⁿ ní
chuū?

²⁹ Jesús nan'guēcútaⁿa yā: 'Úú ntúūⁿ
ní tiinguuneeⁿ ndís'tiⁿ, ní ndúúti chí cu-
uví n'guēcútaⁿa ní yeⁿé, tuu'mi ní cuuví
ndís'tiⁿ du'ú 'iiⁿntyéⁿē tee yā poder 'úú
chí idiⁿ dendú'u 'cūū. ³⁰ Chí ngeēdínu-
uⁿnⁱ Juan miiⁿ ¿tí chíicā chí? ¿'Áá yeⁿe
sáⁿā iⁿ'yeeⁿdí 'cūū o yeⁿé va'ai chēti
nguuví? Nan'guēcútaⁿa ní yeⁿé.

³¹ Tuu'mi ní tucá'a yā caⁿa yā nguááⁿ
maáⁿ yā ní caⁿa yā chí yā vi':
¿Taacá caaⁿmaⁿ yú? Ndúúti chí caaⁿmaⁿ
yú chí yeⁿé nanguuvi, 'iiⁿyāⁿ miiⁿ ní
nan'guēcútaⁿa yā yeⁿé yú 'tíicā: ¿De'ē
cúúví chí nguéé i'téenu ní? ³² Ní ndúúti
chí caaⁿmaⁿ yú, chí yeⁿé saⁿā iⁿ'yeeⁿdí
'cūū tuu'mi ní 'va'a yú 'iiⁿyāⁿ s'eeⁿ caati
nducyáácā 'iiⁿyāⁿ deenu yā chí Juan
chí cheēdínuūⁿnⁱ miiⁿ ní 'áámá profeta
chí cuaacu. ³³ Ní nan'guēcútaⁿa yā yeⁿe
Jesús miiⁿ ní caⁿa yā: Nguéé cuuví ní
n'diⁿ. 'Tíicā caⁿa yā chí yā Jesús: Nguéé
deenú 'nū. Tuu'mi ní Jesús caⁿa yā chí
yā 'iiⁿyāⁿ s'eeⁿ: 'Tiicā ntúūⁿ 'úú nguéé cu-
uví ndís'tiⁿ du'ú 'iiⁿntyéⁿē idiⁿ ndúúcu
chuū.

Ejemplo yeⁿe 'iiⁿyāⁿ chí nguéé n'daācā diiⁿ yā ntiⁿnyuⁿ

(Mt. 21.33-46; Lc. 20.9-19)

12 Jesús miiⁿ tucá'a yā caⁿa yā
'iiⁿyāⁿ s'eeⁿ ndúúcu ejemplos chí
'téé nguéé dáámá. Ní caⁿa yā: Véé 'áámá
'iiⁿyāⁿ chí chíinu yā dí'yú uvas na yáⁿā

yeⁿé yā. Ní din'dái yā 'áámá cheēⁿ yeⁿé
yáⁿā lífⁿ. Ní din'dái yā 'áámá tanque
naachí cuuvi tun'dáa yā nuūⁿnⁱ yeⁿe
uvas miiⁿ. Ní din'dái yā 'áámá torre
nguaaⁿ yáⁿā uvas naachi mozos yeⁿé
yā 'cuetinée sa diiⁿ sa cuidado n'gui'i
uvas miiⁿ. Cuayiivi ní ca'a ya yáⁿā miiⁿ
mozos chí diiⁿ yā ntiⁿnyuⁿ yeⁿe yáⁿā,
ní cueⁿe yáⁿái yā. ² Taachí ndaa tiempo
yeⁿe cosecha yeⁿe uvas miiⁿ, dueño miiⁿ
dichó'o yā 'aama mozo yeⁿé yā nanááⁿ
mozos chí idiⁿ sa ntiⁿnyuⁿ yeⁿe yáⁿā
yeⁿé yā chí nguai nca'a sa n'gui'i uvas
parte yeⁿe cosecha chí ítoneeⁿ dueño
miiⁿ. ³ Mozo miiⁿ ní cueⁿe sa, naati mo-
zos ní sta'a sa mozo miiⁿ ní ch'eⁿe sa
ní nadacho'o sa mozo miiⁿ ní nguéé de'ē
vεε ca'a sa mozo. ⁴ Tuu'mi ní dueño
yeⁿé yáⁿā miiⁿ nguēcunée yā dichó'o
yā taama mozo. Mozos ní chíi tuu sa
mozo miiⁿ ní 'nuūca'ai sa tiⁿ sa ní chíi
taaⁿ sa saⁿā miiⁿ. ⁵ Dueño yeⁿe yáⁿā
miiⁿ dichó'o yā táámá mozo. Mozo miiⁿ,
mozos chí diiⁿ ntiⁿnyuⁿ na yáⁿā miiⁿ
ch'iiⁿnuⁿ sa. Cuayiivi miiⁿ ní 'yaaⁿ n'dái
mozos dichó'o yā. Mozos ní náⁿa mozos
miiⁿ ní ch'eⁿe sa saⁿā, tanáⁿā sa ní mo-
zos miiⁿ ch'iiⁿnuⁿ sa saⁿā.

⁶ Cánéé cá daiya yā chí neⁿe taavi yā.
Cuayiivi míⁿ ní dueño miiⁿ dichó'o yā
daiya yā ní nadicadínmuⁿ yā 'tíicā. Saⁿā
daiyá ní diiⁿ sa honrar daiyá. ⁷ Naati mo-
zos chí idiⁿ sa ntiⁿnyuⁿ na yáⁿā yeⁿé
yā caⁿa sa nguaaⁿ maaⁿ sa: Sáⁿa 'cūū
chí canee chí cuuví yeⁿé sa yáⁿā heren-
cia 'cūū. 'Caāⁿnuⁿ yú saⁿā ní cúúví yeⁿé
yú yáⁿā ndúúcu chí véé yeⁿé. ⁸ 'Tíicā
ní sta'a sa saⁿā ní ch'iiⁿnuⁿ sa saⁿā ní
tun'daa sa cuerpo yeⁿé sa 'áámá lado
yeⁿe yáⁿā miiⁿ.

⁹ Tuu'mi ní Jesús ntiinguuneeⁿ yā
'iiⁿyāⁿ s'eeⁿ: ¿De'ē ra diiⁿ dueño yeⁿé
yáⁿā 'cúú? Ndaá yā ní 'caāⁿnúⁿ yā mo-
zos chí idiⁿ ntiⁿnyuⁿ, ní ca'á yā yáⁿā
tánaⁿa 'iiⁿyāⁿ.

¹⁰ ¿'Áá nguéé n'geeⁿ ndís'tií naachi canéé nguūⁿ na libro yeⁿe Ndyuūs? Ngaⁿa 'túucā:

Tuūu chi 'iiⁿyāⁿ din'dái yā va'ai miiⁿ ní sta'á yā ní ch'eećú yā 'áámá lado ti nguéé neⁿe yā. Tuūu 'cúu chí tuūu ch'eeće ní canéé tuūu ch'eeće yeⁿe na esquina yeⁿe va'ai.

¹¹ Chuū ní Señor Ndyuūs díⁿ yā, chuū ní 'áámá cosa chí ngeⁿe yīnu yú taachi inaaⁿ yú yeⁿe.

¹² Tuu'mi ní 'iiⁿyāⁿ s'eeⁿ nadacádíínuuⁿ yā chi cuta'á yā Jesús miiⁿ ní díⁿ yā preso 'iiⁿyāⁿ ti déenu yā chi Jesús miiⁿ caⁿa yā ejemplo 'cúu chí 'téé nguéé dáámá chí yeⁿe yā. Naati 'va'á yā 'iiⁿyāⁿ yeⁿe yááⁿ miiⁿya, ní s'neeⁿ yā Jesús ní cueⁿe yā.

Chúu chí yeⁿe impuestos

(Mt. 22.15-22; Lc. 20.20-26)

¹³ Cuayiivi miiⁿ 'iiⁿyāⁿ chí ngaⁿa nti-iⁿnyuⁿ yeⁿe yaacū dicho'ó yā 'iiⁿyāⁿ yeⁿe Herodes ndúucū n'duuvi 'iiⁿyāⁿ fariseos nanááⁿ Jesús miiⁿ. Ní neⁿe yā chí Jesús castáⁿa yā nduudu yeⁿe yā ní caaⁿmáⁿ yā 'áámá nduudu yaadi. ¹⁴ 'Iiⁿyāⁿ s'eeⁿ ndaá yā nanááⁿ Jesús miiⁿ, ní caⁿa yā: N'dii Maestro, déenu nū chí n'dii ní ngaⁿa nī nduudu cuaacu ní nguéé díⁿ nī cuenta yeⁿe chí ngaⁿa 'iiⁿyāⁿ yeⁿe. Ní nguéé ndéé nī cuidado táácā id-inááⁿ 'iiⁿyāⁿ iⁿ'yeeⁿdí 'cūu naati ngi'cueeⁿ nī ndúucū nduudu cuaacu yúúⁿí yeⁿe Ndyuūs. ¿'Áá canéé chí nadíí've 'nū na emperador César tuūmī yeⁿe recaudación yeⁿe yáⁿāa o nguéé?

¹⁵ Jesús miiⁿ ní déenu yā chí nguéé n'daaca chí 'iiⁿyāⁿ s'eeⁿ díⁿ yā. Ní caⁿa yā chí yā 'iiⁿyāⁿ s'eeⁿ: ¿De'e cúvív chí neⁿe nī chí casta'á nī nduudu yeⁿe? Candéé nī 'áámá tuūmī, chí snaáⁿ.

¹⁶ 'Iiⁿyāⁿ ndéé yā tuūmī. Ní Jesús miiⁿ n'diichí yā ní tiinguuneeⁿ yā 'iiⁿyāⁿ s'eeⁿ: ¿Dú'u naaⁿ chuū? ¿Du'ū chí duuchi canéé

nguūⁿ? 'Iiⁿyāⁿ s'eeⁿ ní n'guεεćútaⁿa yā: Nááⁿ emperador César cānee.

¹⁷ Tuu'mi Jesús miiⁿ ní caⁿa yā chí yā 'iiⁿyāⁿ s'eeⁿ: Nca'á nī tuūmī yeⁿe re-caudación o impuestos chí yeⁿe emperador César miiⁿ chíⁿ chí yeⁿe sa, ní nca'á nī Ndyuūs chí yeⁿe yā. 'Iiⁿyāⁿ s'eeⁿ ní cueⁿe yīnū yā yeⁿe chí n'guεεćútaⁿa Jesús miiⁿ.

'Iiⁿyāⁿ ntínguúneeⁿ Jesús yeⁿe chí 'iiⁿyāⁿ nnduuchi yā nguaaⁿ tináⁿa

(Mt. 22.23-33; Lc. 20.27-40)

¹⁸ Tuu'mi ní ndaā n'duuvi 'iiⁿyāⁿ s'eeⁿ nduceos nanááⁿ Jesús. 'Iiⁿyāⁿ s'eeⁿ ní nguéé s'teenū yā chí tináⁿa ní nduuchi yā. Ní ntiinguuneeⁿ yā Jesús chuū: ¹⁹ N'díí Maestro, Moisés miiⁿ ní s'neeⁿ nguūⁿ yā yeⁿe s'uúúⁿ tí chuū: Nduuti chí 'áámá saⁿā 'cuūví sa ní cu'neeⁿ sa n'daataá yeⁿe sa ní nguéé daiya sa, tuu'mi ní 'dínū sā cuuví 'caandavaacu sá ndúucū n'daataá miiⁿ. Ní saⁿā miiⁿ ní 'cuūndí daiya sa lado yeⁿe 'dínū tináⁿa. ²⁰ 'Áámá saⁿā véé ndēēchē 'dínū sa ndúucū sa. Saⁿā miiⁿ chí vmnááⁿ vmnaaⁿ ch'iidivaacu sá ní ch'ií sa ní nguéé ch'iindí daiya sa ndúucū n'daataá yeⁿe sa. ²¹ Saⁿā ndii chíⁿ ndii 'úúví mífⁿ ch'iindivaacu sa ndúucū n'daataá yeⁿe tináⁿa ní saⁿā miiⁿ ch'ií ntúuⁿ sa ní nguéé ch'iindí daiya sá ndúucū n'daata miiⁿ. 'Tiicá ntúuⁿ ch'eenu saⁿā ndii chíⁿ ndii 'ínú. ²² Ndu'ū ndēēche sá ch'iindivaacu sá ndúucū tá ní mar 'áámá sá nguéé s'neeⁿ sa daiya sa ndúucū tá. Cuayiivi ní ch'ií ntúuⁿ n'daataá miiⁿ. ²³ Tuu'mi ní taachí nduuchi yā nguaaⁿ tináⁿa, ¿cheé yā chí n'daataá yeⁿe yā taⁿā miiⁿ, caati ndu'ū ndēēche yā ch'iindivaacu yā ndúucū tá?

²⁴ Tuu'mi ní Jesús mífⁿ nan'guεεćútaⁿa yā 'iiⁿyāⁿ s'eeⁿ: Nds'tií ní nguéé déenu nī chí ngaⁿa nī, ti nguéé n'diichí nī naachi canéé nguūⁿ na libro yeⁿe Ndyuūs yeⁿe chuū, ndíí nguéé ndúu n'diichi rá ní poder yeⁿe Ndyuūs. ²⁵ Taachí 'iiⁿyāⁿ

nanduuchi yā yeⁿē nguaaⁿ tináⁿā, ndíí nguéé ndúú n'daataá rá, ndíí nguéé ndúú saⁿā rá 'caandavaacu sa. 'Iiⁿyāⁿ s'eeⁿ 'cuuetinée yā tan'dúúca ángeles yeⁿē va'ai cheeti nguuvi chi nguéé ch'iindivaacu yā. ²⁶ Chuū chi yeⁿē tináⁿā miiⁿ chí nanduuchi yā nguaaⁿ tináⁿā, ¿'áá nguéé n'geeⁿ ndís'tiī na libro yeⁿē Ndyuūs chí dinguuⁿ Moisés tan'dúúca Ndyuūs yaa'ví yā Moisés, ndíí taachi canee sa nanááⁿ yá'á 'lífⁿ chí ngiichi? Ní 'túuca caⁿa Ndyuūs chii yā Moisés miiⁿ: 'Úú ní Ndyuūs yeⁿe Abraham, ndúúcu Isaac, ndúúcu Jacob. ²⁷ Ndyuūs miiⁿ nguéé Ndyuūs yeⁿē tináⁿā ti yeⁿe 'iiⁿyāⁿ chí sduuchi. Chífⁿ chí ndís'tiī nguéé déenu ní chi ngaⁿa nī.

Mandamiento chí ch'ete ca

(Mt. 22.34-40)

²⁸ Áamá maestro yeⁿe ley chí ch'iindiveeⁿ yā chí ndeē 'iiⁿyāⁿ saduceos s'eeⁿ, déenu yā chí Jesús miiⁿ nan'guuecútaⁿa n'daaca yā. 'Iiⁿyāⁿ miiⁿ ní ntiinguuneeⁿ yā Jesús: ¿Cheé mandamiento chí canee nguūⁿ chí ch'ete n'dai ca?

²⁹ Jesús nan'guuecútaⁿa yā: Mandamiento vmnááⁿ vmnaaⁿ miiⁿ ní chuū: 'Caandiveeⁿ nī, ndís'tiī 'iiⁿyāⁿ yeⁿe Israel miiⁿ, Señor Ndyuūs yeⁿē yú ní 'áamá n'dyáⁿā Señor miiⁿ. ³⁰ Canéé chí dineⁿé nī Señor Ndyuūs yeⁿé nī ndúúcu nuuⁿmaⁿ staava yeⁿé nī, ndúúcu nuuⁿmaⁿ alma yeⁿe nī, ndúúcu nuuⁿmaⁿ vaanicadínūⁿ yeⁿe nī, ndúúcu nducuéⁿē fuerzas yeⁿe nī. Chuū chí mandamiento chí vmnááⁿ vmnaaⁿ. ³¹ Mandamiento chí canéé nguūⁿ chí ndii chífⁿ ndii 'úúví mífⁿ tan'dúúca chí vmnááⁿ vmnaaⁿ 'āā 'tiicá ntúúⁿ: Dinéⁿe di 'iiⁿyāⁿ na niiⁿnuúⁿ vaacú di tan'dúúca chí neⁿe dí maáⁿ di. Nguéé 'áamá mandamiento chí canéé nguūⁿ chí ch'ete ca nguéé ti mandamientos s'uuⁿ.

³² Tuu'mi ní maestro yeⁿe ley caⁿa yā chii yā Jesús miiⁿ: N'diī Maestro, cuáacú ngaⁿa nī. Cuaacu níⁿnyúⁿ chí ngaⁿa nī chí vee 'aama n'dyáⁿā Ndyuūs. Nguéé táamá 'āā tanduu rá 'iiⁿyāⁿ miiⁿ. ³³ Níicú 'iiⁿyāⁿ canéé chí dinéⁿe yā Ndyuūs ndúúcu nuuⁿmaⁿ staava yeⁿe yā, ndúúcu nuuⁿmaⁿ vaanicadínūⁿ yeⁿe yā, ndúúcu nuuⁿmaⁿ alma yeⁿe yā, ndúúcu tanducuéⁿē fuerzas yeⁿe yā. Ní dineⁿe yā 'iiⁿyāⁿ na niiⁿnuúⁿ vaacú yā tan'dúúca chí neⁿé yā maáⁿ yā. Chuū chí n'daāca ca nguéé ti n'giiⁿnúⁿ 'iiti chí nga'a yā 'iiti lado yeⁿe ofrenda yeⁿé Ndyuūs ní yeⁿé tanducuéⁿē ofrenda chí ngicyáⁿā nátai.

³⁴ Tuu'mi ní taachi ch'iindiveeⁿ Jesús tan'dúúca chí n'guuecútaⁿa cuaacu sa chí caⁿa sa, Jesús caⁿa yā chii yā saⁿā miiⁿ: Nguéé yaⁿai canee di yeⁿē naachi Ndyuūs ngaⁿa ntiⁿnyuⁿ yā. Cuayiivi miiⁿ ní 'iiⁿyāⁿ 'āā ntee candii cá yā ntiinguuneeⁿ ca yā Jesús mar 'áamá.

¿Du'u chíí Daiya Cristo miiⁿ?

(Mt. 22.41-46; Lc. 20.41-44)

³⁵ Jesús ngi'cueeⁿ yā cheeti yaācū templo ní ngaⁿa yā: ¿De'e cúúví chí maestros yeⁿe ley ngaⁿá yā chí Cristo miiⁿ ní daiya David? ³⁶ Caati maaⁿ David miiⁿ caⁿa sá taachi yaa'ví Espíritu N'dai yeⁿé Ndyuūs chuū chí canéé nguūⁿ na libro yeⁿe Ndyuūs:

Señor miiⁿ caⁿa yā chii yā Señor yeⁿé: 'Cuundi dí lado ta cuaacú chí lado yeⁿe honor, ndíí taachi 'úú cu'neéⁿ 'iiⁿyāⁿ chí contra yeⁿé di ndii cuaaⁿ ndiyya maaⁿ ca'ā di tan'dúúca chí 'aama banco 'lífⁿ, 'tiicá yā.

³⁷ David miiⁿ ngaⁿa sa chuū yeⁿe Señor yeⁿé yā. Maaⁿ ní ¿táacā cuuví chíí chí Cristo miiⁿ ní daiya David miiⁿ? Néené n'deē 'iiⁿyāⁿ ch'iindiveeⁿ yā yeⁿe Jesús ndúúcu vaadi yeenú.

**Jesús ngaⁿa yā nuuⁿndi yeⁿe 'iiⁿyāⁿ
chi ngi'cuééⁿ yā yeⁿe ley**

(Mt. 23.1-36; Lc. 11.37-54; 20.45-47)

³⁸ Jesús ngaⁿa yā chuū taachi ngi'cuééⁿ yā: Cundéé di cuidado yeⁿe maestros yeⁿe ley. 'Iiⁿyāⁿ s'eeⁿ ní n'geētínéé yiinú yā chí n'geenūu catecai yā. Ní taachi chiicá yā cuaaⁿ cyúúni neⁿe yā chí 'iiⁿyāⁿ dííⁿ yā saludar yā ndúúcu respeto n'daaca. ³⁹ Ní neⁿé yā sillas vmnááⁿ vmnaaⁿ yeⁿe honor taachí 'cuundí yā na yaacū sinagogas ndúúcu lugar chí ch'ēete taachi cheⁿe yā naachi véé 'viicu chí cheⁿé yā. ⁴⁰ Ní ndiví yā va'ai yeⁿe n'daataá nguá'aa. Ní 'íicú cuunuuⁿ n'dé'ei yā chí idííⁿ yā miiⁿ nduucú néené n'deēe ngaⁿ'angua'á yā. 'Iiⁿyāⁿ s'eeⁿ ní ch'ēete ca castigo yeⁿé yā nguuvi yeⁿe juicio.

Ofrenda yeⁿe n'daataá nguá'aa

(Lc. 21.1-4)

⁴¹ 'Áámá vmnéⁿēe Jesús véé yā na yāacū templo niiⁿnuúⁿ na cajas naachí 'iiⁿyāⁿ n'gíi yā ofrendas. N'gíinu yā tan'dúúca chí dííⁿ 'iiⁿyāⁿ táácā n'gíi yā tuumí lado yeⁿe ofrenda na cajas. N'diichí yā chí 'yaaⁿ n'dái 'iiⁿyāⁿ 'cuiica neené n'deēe tuumí ca'a yā. ⁴² Tuuⁿ'mi ní ndaā 'áámá n'daataá nguá'aa chí neene ndaachíí canee tá. Táⁿā miiⁿ ní s'nuúⁿ tá na caja miiⁿ na 'uúvi centavos chí cobre. ⁴³ Tuuⁿ'mi ní Jesús yaaⁿ'vi yā discípulos yeⁿe yā ní caⁿ'a yā chíi yā 'iiⁿyāⁿ s'eeⁿ: Cuacu níⁿ'nyúⁿ ngaⁿ'á ngíi ndís'tii chí n'daataá nguá'aa 'cúu ch'ēete ca nga'ā tá, nguéé ti tanáⁿ'a yā chí s'nuúⁿ yā tuumí na cajas. ⁴⁴ Tí 'iiⁿyāⁿ s'eeⁿ ní nga'a yā yeⁿe chí ngaava yeⁿe yā; naati n'daataá mííⁿ ní neené ndaachíí canee tá ní ca'ā tá tanducuéⁿē chí yeⁿé tá chí che'e tá.

**Jesús ngaⁿa yā chí yaacū
templo miiⁿ ní ntúúví**

(Mt. 24.1-2; Lc. 21.5-6)

13 Taachí Jesús miiⁿ nan'dáa yā yaacū templo miiⁿ 'áámá discípulo yeⁿe yā ní caⁿ'a yā chíi yā Jesús: N'díí Maestro, n'diichí ní de'ē chúúca n'geete tuúu s'eeⁿ ní de'ē chúúca n'geete va'ai s'eeⁿ yeⁿe yaacū templo.

² Jesús nán'gueécútaⁿ'a yā: ¿'Áá inaaⁿ ní va'ai templo? 'Muuⁿ ní nguéé cunee mar 'áámá tuúu cuaaⁿ vmnááⁿ yeⁿe vi'í ti tanducuéⁿē ní cundéve.

**Jesús ngaⁿa yā yeⁿe chííⁿ chí 'cuuⁿ'miⁿ
taachí 'āa cuéé 'cuiinu iⁿ'yēēⁿ'dī**

(Mt. 24.3-28; Lc. 21.7-24; 17.22-24)

³ Tuuⁿ'mi ní cheⁿ'é yā 'áámá yíicú chí nguuvi Olivos, chí canéé niiⁿnuúⁿ na yaacū templo miiⁿ. Ní taachi Jesús véé yā miiⁿ, Pedro ndúúcu Jacobo, ndúúcu Juan, ndúúcu Andrés ndaa yā nanáⁿ yā chí caⁿ'a n'de'ei yā 'áámá nduudu ndúúcu Jesús. ⁴ Ní caⁿ'a yā: N'díí Señor, néⁿe 'nū chí cuuví ní nús'uu ¿tíí cuaⁿ'ā cuuví chuú? ¿De'ē senal 'cuuⁿ'míⁿ ní nús'uu yeⁿe tiempo chí cuuvi tanducuéⁿē 'túúca?

⁵ Jesús nan'gueécútaⁿ'a yā: Cundéé ní cuidado chí mar 'áámá 'iiⁿyāⁿ nguéé canche'ei yā ndís'tii. ⁶ Ti néené 'yááⁿ 'iiⁿyāⁿ chíi yā ndúúcu chí duuchí ní canche'ei yā 'iiⁿyāⁿ ní caaⁿ'máⁿ yā: 'Úú Cristo 'úú. 'Iiⁿyāⁿ s'eeⁿ ní canche'ei yā 'yaaⁿ n'dái 'iiⁿyāⁿ.

⁷ Taachi ndís'tii 'caandiveⁿ ní caandaá ní 'iiⁿyāⁿ 'va'a yā chí chíi caandaá nguéé idii'yá ní cuuvi ti 'tíicā canéé chí cuuvi. Naati chíiⁿ ní 'āa 'cuéé tiempo chí ntuuví iⁿ'yēēⁿ'dī. ⁸ Ti 'áámá nación ní 'cuuⁿ'maⁿ ndúúcu táámá nación ní 'áámá gobierno ní 'cuuⁿ'maⁿ yā ndúúcu táámá gobierno. Ní néené n'deēe cuaaⁿ nuⁿ'u yáⁿ'āa. Ní ndaā vaadi 'cuiicu ndúúcu dendu'u chí di'vaachíí. Taachí cuuví dendu'u chí

'túucā ní chiiⁿ ní cáámá cuunngá'á vaadi ya'ai.

⁹ Díiⁿ ní cuidado maáⁿ ní ndís'tií ti 'iiⁿyaⁿ nca'a yā ndís'tií tá'āa 'iiⁿntyéⁿē. Tuu'mi ní 'cueⁿé yā ndís'tií na yaācū sinagogas. Ndís'tií ni canee chi caⁿá ní nanááⁿ 'iiⁿyaⁿ chi ngaⁿa ntiíⁿnyuⁿ yā ndúúcu reyes caávā ntiíⁿnyuⁿ yeⁿé. Ní 'íicú cuuvi caaⁿmáⁿ ní yeⁿé ní 'caandiveⁿ yā nduudu cuaacu. ¹⁰ Taachí 'āa cuéé ndaa chí 'cuiinu iⁿ'yeēⁿdí, nduudu cuaacu 'cūū canéé chi caaⁿmaⁿ nanááⁿ nducyaaca 'iiⁿyaⁿ yeⁿe naciones yeⁿe núúⁿmáⁿ íⁿ'yeēⁿdí. ¹¹ Taachí candéé yā ndís'tií chi nca'a yā ndís'tií vmanááⁿ 'iiⁿntyéⁿē, nguéé nadicádíinuⁿ ní yeⁿé chi caaⁿmaⁿ ní. Nguéé diiⁿ núúⁿ yiⁿnuⁿ ní yeⁿé. Caaⁿmaⁿ ní tan'dúúca Espíritu N'dai yeⁿé Ndyuūs caaⁿmaⁿ cuuvi ndís'tií hora miiⁿ; ti nguéé ndís'tií chi caaⁿmáⁿ ní ti Espíritu N'dai yeⁿé Ndyuūs. ¹² Ní yeⁿe tiempo miiⁿ nguaaⁿ 'díinu yā nca'a vi'i yā chí 'caáⁿnúⁿ yā 'iiⁿyaⁿ. Ní 'íicú chiidá yā ní ca'a yā daiya yā. Ní daiya yā ní ca'a yā chiidá yā ndúúcu cheécú yā ní 'caaⁿnúⁿ yā 'iiⁿyaⁿ. ¹³ Nducyaáca 'iiⁿyaⁿ nguéé cunee yíinú yā chí ndís'tií díiⁿ ní ntiíⁿnyuⁿ caavā 'úú. Naati 'iiⁿyaⁿ chi cuchéé yā ní 'aama canéé yā ndúúcu chi íteenu yā yeⁿe Ndyuūs ndíí tiempo chi 'cuúvi yā ní nnguáⁿai yā. ¹⁴ Taachí ndís'tií 'āa snaaⁿ ní dendu'ū chi 'túucā chi saⁿā profeta Daniel dinguúⁿ yā na libro yeⁿe Ndyuūs tiempo chi ch'ó'oo tuu'mi ní 'iiⁿyaⁿ chi snéé yā na yáⁿāa Judea canéé chi caⁿá yā caanu yā ná yíicū n'geete. ('iiⁿyaⁿ chi 'cueēⁿ chuū canéé chi cuuvi deenú yā yeⁿe chuū.) ¹⁵ Nguuvi miiⁿ ní ndúúti chi 'áámá 'iiⁿyaⁿ candúú yā tíiⁿ va'āi ní nguéé cuuvi núúⁿ nch'eeⁿ yā ní ndaa yā va'ai ní tun'dáa yā dendu'ū yeⁿe yā. ¹⁶ Ní ndúúti chi 'áámá 'iiⁿyaⁿ canéé yā na campo, ní nguéé cuuvi núúⁿ ndaa yā va'ai yeⁿe yā ní nta'a yā cotón yeⁿe yā. ¹⁷ De'e chúúca ya'ai

yeⁿe n'daataá chi véé daiya tá cheeti tá ndúúcu n'daataá chí ngiicu dacuá'āa yeⁿe tá nguuvi chi cáanu yā. ¹⁸ Ndís'tií, caaca ní Ndyuūs chi nguéé ch'ó'oo chuū tiempo chi 'iiche. ¹⁹ Ti nguuvi miiⁿ ní nééné 'cueenu 'iiⁿyaⁿ cuuvi tan'dúúca chi mar 'áámá vmnéⁿē 'āa cuéé cuuvi 'tíicā ndíí taachí Ndyuūs din'dái yā íⁿ'yeēⁿdí. 'Āa ntéé ndúú cuuyiivi ra chí snaaⁿ yā dendu'ū chi 'tíicā. ²⁰ Ndúúti chi Señor miiⁿ nguéé nadidúú'vi yā tiempo miiⁿ mar 'áámá 'iiⁿyaⁿ nguéé nnguaⁿai yā. Naati ndiiⁿ nadidúú'vi yā caávā 'iiⁿyaⁿ chi yeⁿé yā ti 'iiⁿyaⁿ miiⁿ Señor ndeeve yā.

²¹ Tuu'mi ní ndúúti chi 'áámá 'iiⁿyaⁿ caaⁿmaⁿ yā cuuvi yā ndís'tií: Cuín'díichí ní, 'íngāa Cristo miiⁿ, o cuín'díichí ní, miiⁿ canee Cristo miiⁿya, nguéé cu'téenu ní 'iiⁿyaⁿ miiⁿ. ²² Ti ndaa 'iiⁿyaⁿ chí cristos chí falsos yā ndúúcu 'iiⁿyaⁿ chí profetas chí falsos yā. Ní díiⁿ yā señales ndúúcu vaadi n'giinu. Ní 'íicú cuuvi canche'éí yā 'iiⁿyaⁿ, ndíí 'iiⁿyaⁿ chí Ndyuūs ndeeve yā ndúúti chí chuū cuuvi díiⁿ yā. ²³ Naati ndís'tií ní 'cuetinéé yaaⁿ ní. Ngaⁿá ngíí ndís'tií tanducueⁿē chuū 'nááⁿ chí 'āa cuéé ndaa.

Táacā ndáá Saⁿa chí Daiya Ndyuūs

(Mt. 24.29-35, 42-44; Lc. 21.25-36)

²⁴ Cho'oo chúú ní nguuvi miiⁿ chí 'cueenu ní cuuvi, 'yáⁿāa miiⁿ ní cúúvi maáiⁿ ní 'íiyū miiⁿ ní 'āa ntéé cuuvi deeve. ²⁵ 'Iiⁿnyuⁿ miiⁿ ní cun'dáa yeⁿé nanguuvi ní nducueⁿē chí véé nanguuvi ní nuⁿu. ²⁶ Tuu'mi ní snaaⁿ yā Saⁿā chí Daiya Ndyuūs chí ndaa sa nguaaⁿ meēⁿ ndúúcu poder yeⁿé sa chí ch'ete taavi ní ndeevé n'dai ngíí n'gai maāⁿ sa. ²⁷ Tuu'mi ní Ndyuūs dicho'ó yā ángeles yeⁿe yā chí nadidáámá 'iiⁿyaⁿ yeⁿé yā chí Ndyuūs ndeeve yā yeⁿé núúⁿmáⁿ íⁿ'yeēⁿdí, ndiiⁿ na yáⁿāa nducueⁿē n'dai yeⁿe yáⁿāa ndúúcu ndiiⁿ na nducueⁿe nanguuvi.

²⁸ Maaⁿ ní 'cueéⁿ nī yeⁿ e ejemplo yeⁿ e n'guíidii yaaⁿ nguuvi: Taachí inguaaⁿ nu duúⁿ nē n'gaiyáa ní ican'daā tá'āa, 'āa déenu nī chí 'āa cuchii tiempo yaáaⁿ. ²⁹ 'Tiicá ntúuⁿ taachi snaaⁿ ndís'tii chí cuuvi dendú'ū chí 'túucā, 'āa deenú nī chí 'āa sneeⁿ niiⁿ nuⁿ tiempo chí ndaa Saⁿ ā chí Daiya Ndyuūs. Ní 'āa nééné niiⁿ nuúⁿ cánee tiempo 'cūū. ³⁰ Cuaacu níⁿ nyúⁿ ngaⁿ á ngí ndís'tii: 'Iiⁿ yāⁿ s'eeⁿ chí snée yā maaⁿ 'āa cuéé 'cuúví yā neⁿ e chí 'āa cuéé cuuvi tanducuéⁿ e chuū. ³¹ Nángu- uvi ndúúcu ná yáⁿ āa 'cūū ní chó'oo, naati nduudu yeⁿ e nguéé cho'oo.

³² Naati yeⁿ e nguuvi miiⁿ ndúúcu hora miiⁿ nguéé véé mar 'áámá 'iiⁿ yāⁿ chí deenu yeⁿ e. Ndíí nguéé ndúú ángeles, yeⁿ e va'ai cheeti nguuvi ndíí nguéé ndúú Sáⁿ ā chí Daiya Dendyuūs deenú yā yeⁿ e. Dámaāⁿ Chiida yú chí canée yā na va'ai cheeti nguuvi deenu yā.

³³ Chííⁿ chí ndís'tii ní 'cuëtinéé yaaⁿ nī. Dicuéénaaⁿ nī ní caaⁿ maⁿ nguaⁿ á nī, ti nguéé déenu nī tíí cuaⁿ ā ndaa hora miiⁿ. ³⁴ Ejemplo chuū tan'dúucā 'áámá 'iiⁿ yāⁿ chí caⁿ a yā yaⁿ ai. Taachi 'āa cuéé can'dáa yā na vaācu yā, caⁿ a yā chíí yā mozos yeⁿ e yā chí caⁿ a yā ntiiⁿ nyuⁿ 'áámá 'áámá mozo yeⁿ e sa. Ní cuuvi yā saⁿ ā chí idiiⁿ cuidado yeⁿ e cheendi va'āi miiⁿ chí cunéé yaaⁿ sa. Ní cueⁿ e yā. ³⁵ Maaⁿ ní ndís'tii 'cuëtinéé yaáⁿ nī, ti nguéé déenu nī tíí cuaⁿ ā ndaa dueño yeⁿ e va'āi miiⁿ. Nguéé déenu nī nduuti chí ndaa yā n'gaaⁿ, o yaaⁿ cheete, o taachí 'cuaí tú'u, o cuaaⁿ na nguëtiyaaⁿ. ³⁶ 'Áa tíí dácanaaⁿ ndaa yā ní nndaāca yā ndís'tii chí styaađu nī. ³⁷ Chííⁿ chí ngaⁿ á ngí ndís'tii, ní ngí nducyaaca 'iiⁿ yāⁿ: 'Cuëtinéé yaáⁿ yā.

**Saⁿ ā s'eeⁿ nadacádiinūⁿ sa
taacā cuta'a sa Jesús**

(Mt. 26.1-5; Lc. 22.1-2; Jn. 11.45-53)

14 Ná 'uūví nguūví ní cuuvā 'viicu yeⁿ e pascua chí 'viicu yeⁿ e pan

chí nguéé levadura yeⁿ e. Chiiduú n'geete ndúúcu maestros yeⁿ e ley 'nuúⁿ yā taacā chí cuuvi cannche'éei yā Jesús ní cuta'á yā 'iiⁿ yāⁿ ní 'caaⁿ núⁿ yā yā. ² Naati caⁿ a yā: Nguéé diiⁿ yú nguuvi 'viicu tí 'iiⁿ yāⁿ yeⁿ e yāáⁿ Jerusalén miiⁿ didáⁿ a yā ní diiⁿ yā vaadi 'caaⁿ va ndúúcu nús'uu.

**'Áámá n'daataá n'gii tá aceite
na cuerpo yeⁿ e Jesús**

(Mt. 26.6-13; Jn. 12.1-8)

³ Jesús canee yā na yāáⁿ Betania na vaacu Simón chí canéé sá ndúúcu ca'ai chí nguuvi lepra chí in'duuti cuerpo yeⁿ e sa. Taachí Jesús miiⁿ véé yā na mesa, ndaa 'áámá n'daataá nanáaⁿ yā. Táⁿ ā miiⁿ ní ndeē tá 'áámá frasco yeⁿ e al- abastro ndiituú ndúúcu aceite perfume yeⁿ e nardo chí ndeēve ngeeⁿ ní neené ya'ai chíí'vē. Ní 'cuūⁿ tá frasco miiⁿ ní ch'endáa tá aceite miiⁿ na tíí Señor Jesús miiⁿ. ⁴ N'duuvi discípulos chí snée yā miiⁿ nduuvi táaⁿ yā ní caⁿ a yā nguaaⁿ maaⁿ yā: ¿De'ē cuuví chí chingéeⁿ ta aceite 'cūū? ⁵ Ti cuuvi n'diicui yú ní ngo'o 'iinū ciento caadi ní cuuvi ca'a yú 'iiⁿ yāⁿ chí nguéé yeⁿ e yā. Ní nduuvi taáⁿ yā ndúúcu tá.

⁶ Naati Jesús miiⁿ ní caⁿ a yā: 'Āa canee ra tá. Nguéé yaa'vi nī táⁿ ā. ¿De'ē cúúví chí yaa'ví nī táⁿ ā? Tá 'tii ní n'daacā idiiⁿ tá nduucú. ⁷ 'Iiⁿ yāⁿ chí nguéé yeⁿ e yā ní 'aama ca cánée yā ndúúcu nī. Ní ndís'tii ní cuuvi din'daacā nī nduucú yā taachi neⁿ e nī; naati 'úú nguéé 'aama cunéé ndúúcu nī. ⁸ Tá 'cūū ní diiⁿ tá tan'dúucā chí chíí tá perfume cuerpo yeⁿ e maaⁿ chí 'āa cuéé 'cuúví, 'tíicā diiⁿ tá. Ní 'āa nnee 'cuii ta chuū 'úú taachí 'āa cuéé 'cuëchí. ⁹ Cuaacu níⁿ nyúⁿ ngaⁿ á ngí ndís'tii: 'Āa tíí nūⁿ chí 'iiⁿ yāⁿ caaⁿ máⁿ yā nduudu ngai yeⁿ e yeⁿ e chí nanguaⁿ ai 'iiⁿ yāⁿ na núúⁿ máⁿ íⁿ yeeⁿ dī caaⁿ maⁿ ntuúⁿ yā chí diiⁿ n'daataá 'cūū ní n'gaacú yā yeⁿ e tá.

Judas Iscariote nca'a sa Jesús

(Mt. 26.14-16; Lc. 22.3-6)

¹⁰ Tuu'mi ní Judas Iscariote, 'áámá chéé 'ii'yāⁿ naachi ndiichuuví discipulos, cheⁿe sá nanááⁿ chiiduú n'geete. Ní ngaⁿa sa táácā chí cuuvi nca'ā sa Jesús miiⁿ ná ta'a 'ii'yāⁿ s'eeⁿ. ¹¹ Taachí 'ii'yāⁿ s'eeⁿ ch'iindiveéⁿ yā chuū, neené yeenú yā, ní caⁿ'a yā chí ca'a yā tuumí Judas miiⁿ cáávā chuū. Judas ní in'nuuⁿ sa de'ē hora chí nca'a sa 'ii'yāⁿ s'eeⁿ Jesús miiⁿ.

Naachí che'e nguiinū yeⁿe Señor Jesús miiⁿ

(Mt. 26.17-29; Lc. 22.7-23;
Jn. 13.21-30; I Co. 11.23-26)

¹² Ndaā nguuví vmnááⁿ vmnaaⁿ yeⁿe 'viicu chí che'é yā pan chí nguéé levadura yeⁿe, 'viicu taachi n'giinúⁿ yā 'iiti cuūchí yeⁿe pascua miiⁿ. Ní discipulos yeⁿe Jesús miiⁿ ntiinguuneéⁿ yā Jesús: ¿Tíí neⁿe dí chí ca'ⁿá 'nū in'nuúⁿ 'nū chí che'e nguiinū yú yeⁿe 'viicu pascua?

¹³ Tuu'mi ní Jesús dicho'ó yā na 'uūví discipulos yeⁿe yā, ní caⁿ'a yā chí yā 'ii'yāⁿ: Nds'tií cueⁿé ní yáāⁿ Jerusalén. Miiⁿ ní ndaacaⁿ ní 'áámá sáⁿā chí ndéé sa 'áámá 'cuuti cuééé nuūⁿnī. Can'dáa ní saⁿā. ¹⁴ Naachí ndaa sa va'ai miiⁿ, ní cuuví ní sáⁿā chí yeⁿe va'ai miiⁿ: Maestro yeⁿe yú ngaⁿa yā 'tífca: ¿Tíí canéé cuarto naachi che'e nguiinúⁿ yeⁿe pascua ndúúⁿcū discipulos yeⁿe? ¹⁵ Tuu'mi ní ch'iⁿi yā 'áámá cuarto ch'eete ná ndiichi ndii 'úúví piso miiⁿ chí 'áá véé yaāⁿ. Miiⁿ ní in'nuúⁿ ní chí che'e yú.

¹⁶ Discipulos cueⁿé yā ní ndaa yā ná yáāⁿ Jerusalén miiⁿ ní ndaaca yā tanducuéⁿe tan'duucā chí Jesús ngaⁿa yā. Ní 'ii'yāⁿ s'eeⁿ in'nuúⁿ yā chí che'e nguiinū yā yeⁿe 'viicu yeⁿe pascua miiⁿ.

¹⁷ Taachí 'āa chíi chíinū mííⁿ ndaā Jesús ndúúⁿcū ndiichuuví discipulos yeⁿe yā. ¹⁸ Taachí veteé yā na mesa miiⁿ chí che'e yā Jesús caⁿ'a yā chíi yā 'ii'yāⁿ

s'eeⁿ: Cuaacu níⁿnyúⁿ ngaⁿ'á ngíí nds'tií, chí 'áámá chéé nds'tií chí nge'é ní nduucú dííⁿ ní entregar 'úú.

¹⁹ Tuu'mi ní discipulos ní s'nee ndaachi núúⁿ yā ní tuca'a yā tiinguuneeⁿ yā Jesús ca'áámá ca'áámá yā: ¿'Áá 'úú? Ní táámá yā ngaⁿ'a ntúuⁿ yā: ¿'Áá 'úú rá?

²⁰ Jesús nan'guεεcútaⁿ a yā: 'Áámá chee naachi ndiichúúví chí dí'caandá yā pan yeⁿe yā na cú'ú 'cuū nduucú ca'ⁿá yā díiⁿ yā 'tífca. ²¹ Cuaacu, chí Saⁿā chí Daiya Dendyuūs caⁿ'a sa 'cuenú sa cuuvi tan'dúúⁿcā chí ngaⁿ'a yeⁿe yā naachi canéé nguūⁿ na libro yeⁿe Ndyuūs. De'e chúúⁿcā ya'ai yeⁿe saⁿā chí nca'a sa 'úú chí Saⁿā chí Daiya Ndyuūs. N'dáácā ca yeⁿe sa ndúúⁿti chí nguεε ch'iindiyāⁿ sa.

²² Taachí veteé yā nge'e yā, tuu'mi ní Jesús sta'á yā pan, ní nca'a yā gracias Ndyuūs cáávā pan miiⁿ. Ní n'deé yā pan ní ca'a yā discipulos. Ní caⁿ'a yā: Che'é ní pan caati tan'dúúⁿcā cuerpo yeⁿe 'tífca.

²³ Ní Jesús sta'á yā taza ndúúⁿcū nuūⁿnī yeⁿe uvas. Ní taachi nca'a yā gracias Ndyuūs, ca'a yā discipulos yeⁿe yā. Ní caⁿ'a yā. Nducyaaca nds'tií cu'ú ní nuūⁿnīⁿ uvas yeⁿe taza 'cūū. ²⁴ Ní caⁿ'a yā chíi yā 'ii'yāⁿ s'eeⁿ: Nuūⁿnīⁿ uvas miiⁿ tan'dúúⁿcā yuūuⁿ yeⁿe, ní yeⁿe 'áámá compromiso chí ngai yeⁿe. Yuūuⁿ yeⁿe chí cungeeⁿ ní cáávā 'yaaⁿ n'dái 'ii'yāⁿ. ²⁵ Cuaacu níⁿnyúⁿ ngaⁿ'á ngíí nds'tií, chí 'āa ntéé cu'ú nuūⁿnīⁿ yeⁿe uvas na iⁿ'yeeⁿdí 'cūū ndíí nguuví chí cu'ú naachi Ndyuūs ngaⁿ'a ntiiⁿnyúⁿ yā.

Jesús ngaⁿ'a yā chí Pedro ní caaⁿmaⁿ sa chí nguéé in'diichi sa Jesús

(Mt. 26.30-35; Lc.
22.31-34; Jn. 13.36-38)

²⁶ Taachí ch'iinu chíita yā himno, chí canción yeⁿe Ndyuūs nan'dáa yā va'āi ní cueⁿé yā na yiicū chí nguuví Olivos. ²⁷ Tuu'mi ní Jesús caⁿ'a yā chíi yā discipulos: Nducyaaca nds'tií cuuví

'cuinaáⁿ nī yeⁿē 'úú maaⁿnguínū caati ngaⁿa naachi canéé nguūⁿ na libro yeⁿé Ndyuūs 'túúcā: 'Nuúca'ai yā 'caaⁿnúⁿ yā saⁿā chi idiiⁿ sa cuidado 'iiti cuūchī ní 'iiti cuūchī s'eeⁿ ní caⁿá 'muuⁿ caⁿá miiⁿ tī. ²⁸Taachi 'úú nduuchí yeⁿe nguaaⁿ tináⁿā, caⁿá vmnaaⁿ yeⁿé ndís'tiī na yāⁿā Galilea.

²⁹Tuu'mi ní Pedro miiⁿ ní caⁿa sa chii sa 'iiⁿyāⁿ: 'Áará chí nducyaaca yā cuuví 'cuinaáⁿ yā, 'úú ní nguéé cuuví 'cuinaáⁿ.

³⁰Tuu'mi ní Jesús ní caⁿa yā chiiya Pedro: Cuaacu níⁿnyúⁿ ngaⁿá ngíí dii chi maaⁿnguiinu taachi 'āā cuéé 'cuāi tusáⁿā 'uūvi cuuvi, 'iinū cuuvi cueeⁿdíitu di ngaⁿa di yeⁿē 'úú chi nguéé in'diichi di 'úú.

³¹Naati Pedro miiⁿ ní cheeⁿdiitū caⁿa sa: 'Áará chí 'cuūví ndúúcu nī, Maestro, nguéé ngaⁿá chí nguéé in'diichi N'diī. Ní nducyaaca discípulos ní 'tiicá ntúūⁿ caⁿa yā.

Jesús ngaⁿangua^a yā na jardín chi nguuví Getsemaní

(Mt. 26.36-46; Lc. 22.39-46)

³²Tuu'mi ní ndaá yā na 'áámá jardín chi nguuví Getsemaní, ní Jesús caⁿa yā chii yā discípulos yeⁿe yā: 'Cueeté nī 'muuⁿ, neⁿe chí 'úú caⁿá caaⁿmāⁿngua^a.
³³Ní Jesús candée yā Pedro, ndúúcu Jacobo, ndúúcu Juan. Ní neené nadicádinuuⁿ Jesús ní neéné s'neeⁿ ndaachí yiinú yā. ³⁴Ní caⁿa yā chii yā 'iiⁿyāⁿ s'eeⁿ: Alma yeⁿé neené ndaachi yiinú chí ya'āi chí 'cuūví. 'Āā snéé núúⁿ nī 'muuⁿ, ní nguéé 'cueeti yaadú nī.

³⁵Tuu'mi ní Jesús cueⁿe yā ta 'lííⁿ cuááⁿ vmnaaⁿ, ní candiitín'dii yā na yāⁿā ní caⁿangua^a yā ní caⁿa yā: N'diī Chiidá, ndúúti chí cuuví ní nguéé dííⁿ nī yeⁿe chí 'cuenú cuuvi yeⁿe prueba 'cūū chí canéé chí cuuví hora chí cuchii.
³⁶Tuu'mi ní naachí caⁿangua^a yā ní caⁿa yā: N'diī Chiidá, n'diī cuuvi dííⁿ nī tanducuéⁿē. Nadinguáⁿai nī 'úú yeⁿe

chí 'cuenú cuuvi prueba 'cūū. Naati nguéé cuuví tan'dúúca chí 'úú neⁿé, naati tan'dúúca chí n'diī neⁿe nī.

³⁷Tuu'mi ní ndaa ntúūⁿ yā naachi snee discípulos yeⁿé yā, ní ndaāca yā discípulos chí stiyaadú yā. Ní Jesús caⁿa yā chí yā Pedro miiⁿ: Díí Simón, ¿Áá cyaadu dí? ¿'Áá nguéé ichēē di cánduuchi di mar 'áámá hora? ³⁸Ndís'tiī 'cuetēi nduuchí nī ní caaⁿmaⁿngua^a á nī ní nguéé dííⁿ nī nuuⁿndi. Cuaacu níⁿnyúⁿ espíritu yeⁿe nī neⁿe diiⁿ n'daacaá, naati cuerpo yeⁿé nī ní 'āā duūvā.

³⁹Tuu'mi ní Jesús cueⁿe ntúūⁿ yā ní ngaⁿangua^a yā, ní caⁿa ntúūⁿ yā tan'dúúca chí caⁿa yā vmnaaⁿ. ⁴⁰Ní nguēecunée yā ndaa ntúūⁿ yā naachi snéé discípulos, ní ndaaca ntúūⁿ yā 'iiⁿyāⁿ s'eeⁿ stiyaadú yā. Ní 'āā ntéé ngii ichēē yā ndúúcu yaaⁿ ti nduutináaⁿ yā chí yaaⁿ náaⁿ yā. Ní 'iiⁿyāⁿ s'eeⁿ ní nguéé déénu yā chí n'guēecútaⁿa yā. ⁴¹Cueⁿé yā ndii chiiⁿ ndii 'ínú cuuvi, ní ngaⁿangua^a yā. Ní taachi ndaa yā naachi snee discípulos, caⁿa yā: Ndís'tiī 'cuetiyaadú nī ní ntaavi'tuunúúⁿ nī. 'Āā tiiní cā. 'Āā ndaā hora chí 'iiⁿyāⁿ ncaⁿa yā 'úú Saⁿā chí Daiya Dendyuūs na tá'á saⁿā s'eeⁿ chí dinuuⁿndi. ⁴²Nducueeⁿ ndís'tiī ní cuⁿú yú. 'Āā cuchii niiⁿnuúⁿ saⁿā chí ncaⁿa 'úú.

Chiichí yā Jesús ní candée yā 'iiⁿyāⁿ preso

(Mt. 26.47-56; Lc. 22.47-53; Jn. 18.2-11)

⁴³Naaⁿ chí Jesús indée yā ndaa Judas chí saⁿā 'áámá yeⁿē ndiichuuví discípulos. Ní ndaa sa ndúúcu n'dee n'dái 'iiⁿyāⁿ ndúúcu machete 'uūvi lados 'caāiⁿ ndúúcu yáⁿá. Chiiduú n'geete ndúúcu maestros yeⁿe ley, ndúúcu 'iiⁿyāⁿ ndiicúú chí ngaⁿa ntiiⁿnyuⁿ yeⁿe yaācú dichó'lo yā 'iiⁿyāⁿ s'eeⁿ. ⁴⁴Judas miiⁿ chí ncaⁿa sa Jesús 'iiⁿyāⁿ s'eeⁿ, ní caⁿa sa 'aama seña. Ní caⁿa sa 'túúcā: 'Iiⁿyāⁿ chí 'úú chí'neeⁿ cheendí, 'iiⁿyāⁿ miiⁿ chíí.

Cuta'á nī 'iiⁿyāⁿ ní candéé nī 'iiⁿyāⁿ ní din'daacá nī seguro 'iiⁿyāⁿ.

⁴⁵Taachí ndaā Judas nanááⁿ Jesús ní caⁿ'a sa: N'díí Maestro, Maestro. Ní 'neeⁿ cheendi sa 'iiⁿyāⁿ. ⁴⁶Tuu'mi ní sta'á yā Jesús ní candéé yā preso 'iiⁿyāⁿ. ⁴⁷Naati 'áámá chéé 'iiⁿyāⁿ chí snéé miiⁿ itun'dáa yā machete chí 'uuvi lados 'caāiⁿ yeⁿ'e yā ní 'nuucá'ai yā mozo yeⁿ'e chi-iduú ch'ēete ca ní ch'iica sa veéⁿ mozo miiⁿ. ⁴⁸Tuu'mi ní Jesús caⁿ'a yā chíi yā nducyaaca 'iiⁿyāⁿ s'eeⁿ: ¿'Áá can'daā ndís'tií ndúúcu machete chí 'uūvi lados 'caāiⁿ ndúúcu yáⁿ'á chí cuta'á nī 'úú tan'dúúca chí 'úú 'áámá duucu 'úú? ⁴⁹Nguuvi nguuví caneé na yáacū templo miiⁿ nguaaⁿ ndís'tií chí ngi'cueéⁿ ní ndís'tií ní nguue sta'á nī 'úú. Chúú canéé chí cuuvi ní cuuvi cunnuū ca'ā naachi canéé nguūⁿ na libro yeⁿ'é Ndyuūs.

⁵⁰Tuu'mi ní nducyaaca discípulos s'neeⁿ yā Jesús miiⁿ dámaáⁿ yā ní cheenu yā.

Saⁿ'ā 'díí chí cueⁿ'e ngéenu

⁵¹Naati 'áámá saⁿ'ā 'dííⁿ ndaā sa ní cueⁿ'e sa ndúúcu 'iiⁿyāⁿ s'eeⁿ. Ndæecu sa 'áámá n'dyáⁿ'ā sávana. 'Áámá yā sta'á yā saⁿ'a 'díí miiⁿ. ⁵²Naati saⁿ'ā 'dííⁿ miiⁿ ní s'neeⁿ sa sávana ní cueⁿ'e sa dácaa yuúcu sa.

Jesús nanááⁿ 'iiⁿntyéⁿ'ē chí n'gēete ca yeⁿ'e yaācū

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³Tuu'mi ní candéé yā Jesús miiⁿ nanááⁿ chiiduú ch'ēete ca. Ní miiⁿ ndu-vidaamá yā nducyaaca chiiduú n'gēeté ndúúcu 'iiⁿyāⁿ ndiicū chí ngaⁿ'a nti-iⁿnyuⁿ yeⁿ'e yaācū ndúúcu maestros yeⁿ'e ley. ⁵⁴Pedro miiⁿ ní cueⁿ'e yaⁿ'ai sa n'dáa sa Jesús miiⁿ. Ní ndaa sa ndii ch'ua'āi yeⁿ'e va'ai chiiduú ch'ēete ca ní ch'iindi sa ndúúcu policías ní in'taavi cuutú sa

dáámá ndúúcu yā ti miiⁿ ní ngiichi yaⁿ'ā yeⁿ'é yā.

⁵⁵Chiiduú n'gēete ndúúcu nducyaaca yā chí nduvidaama in'nuúⁿ yā 'áámá prueba contra yeⁿ'e Jesús miiⁿ chí dííⁿ yā condenar Jesús chí 'caaⁿ'núⁿ yā Jesús; naati nguéé ndaaca yā. ⁵⁶Neené 'yaaⁿ 'iiⁿyāⁿ ngaⁿ'a yā nduudu yaadi yeⁿ'e Jesús miiⁿ naati mar 'áámá yā nguéé dáámá ngaⁿ'a yā. ⁵⁷N'duuví yā ní ncueeⁿ yā ní caⁿ'a yā nduudu yaadi, ní caⁿ'a yā: ⁵⁸Nús'uu ní ch'iindiveéⁿ 'nū chí Jesús caⁿ'a yā 'túúca: 'Úú ní nadituúví yáacu 'cūú chí saⁿ'ā yeⁿ'e iⁿ'yeeⁿ'dí 'cūú din'dái sa. Ní ch'eti iinū nguuví nadin'dai taama chí nguéé saⁿ'ā iⁿ'yeeⁿ'dí 'cūú din'dái sa.

⁵⁹Naati nguéé nduvidáámá nduudu yā yeⁿ'e chí ngaⁿ'a yā.

⁶⁰Tuu'mi ní chiiduú ch'ēete ca chí ngaⁿ'a ntiⁿ'nyuⁿ yeⁿ'e tanáⁿ'ā chiidūu, ndúcueeⁿ yā nguaaⁿ nducyáácá 'iiⁿyāⁿ s'eeⁿ ní ntiinguuneeⁿ yā Jesús miiⁿ: ¿'Áá nguéé de'ē vee nan'guēecútaⁿ'a ní? ¿De'ē chí ngaⁿ'á yā yeⁿ'e ní? ¿De'é ngaⁿ'a ní maáⁿ ní yeⁿ'e ní?

⁶¹Jesús míⁿ 'āā ntéé caⁿ'a yā. Ní nguéé n'guéécútaⁿ'a yā yeⁿ'e mar 'áámá. Chi-iduú ch'ēete ca miiⁿ ntiinguunééⁿ ntúuⁿ yā Jesús, ní caⁿ'a yā: ¿'Áá dii Cristo, Daiya Dendyuūs chí n'dai taavi?

⁶²Jesús caⁿ'a yā chíi yā 'iiⁿyāⁿ s'eeⁿ: 'Tíicā 'úú. Ndís'tií ní caⁿ'a ní snaaⁿ ní Saⁿ'ā chí Daiya Dendyuūs chí 'cuūndí sa lado yeⁿ'e honor yeⁿ'é Ndyuūs chí véé tandu-cuéⁿ'e poder yeⁿ'e yā. Ní ndaa sa nguaaⁿ meééⁿ yeⁿ'e nanguuvi.

⁶³Tuu'mi ní chiiduú ch'ēete ca chíiⁿ'cuūⁿ sa catecai sa, ní caⁿ'ā sa: ¿De'ē ca diiⁿ yú testigos chí n'nuuⁿ yú? ⁶⁴'Áā ch'iindiveéⁿ ní dendu'ū chí ngaⁿ'ā sa contra Ndyuūs. ¿Táácā tuumicadínuuⁿ ní? Nducyaaca 'iiⁿyāⁿ ngaⁿ'a yā chí condenado Jesús chí 'cuuví yā.

⁶⁵Tuu'mi ní n'duuví yā ní ca'a nee daⁿ yā Jesús ní n'gaadí yā nduutináaⁿ yā ndúúcu tíinūⁿ. Ní policías ndúúcu

ta'á yā ch'eⁿe yā naaⁿ Jesús. Ní caⁿa yā:
Caaⁿmaⁿ dí ¿du'ū ch'eⁿe dii?

**Pedro miiⁿ ní ngaⁿā sa chi
nguée n'diichi sá Jesús**

(Mt. 26.69-75; Lc. 22.56-62;
Jn. 18.15-18, 25-29)

⁶⁶ Pedro miiⁿ ní canee sa chuva'ai cuaaⁿ ndiiyā. Ní ndaā 'áámá n'daataá chí díⁿ mandado yeⁿē chiiduú ch'ēete ca nanááⁿ Pedro miiⁿ. ⁶⁷ Ní n'diichi tá chí in'taavi cúutū sa na yaⁿā. Ní cānee táⁿā miiⁿ ní ch'iinu tá Pedro. Tuu'mi ní caⁿa tá: Dií ntúūⁿ di canee dí ndúúⁿcū Jesús yeⁿe yāⁿ Nazaret.

⁶⁸ Naati Pedro miiⁿ cheeⁿdiitū sa, ní caⁿā sa: 'Úú ní nguée in'diichí 'iiⁿyāⁿ, ndí nguée deenú chí ngaⁿā di. Ní can'dáa sa cuaaⁿ chuva'āi naachi indaa yā. Tuu'mi ní 'cai tusáⁿā. ⁶⁹ Táⁿā chí idiⁿ mandado miiⁿ ch'ínú ntuūⁿ ta sáⁿā, ní caⁿa tá chí tá 'iiⁿyāⁿ chí snée yā miiⁿ: Sáⁿa 'cūū 'áámá chéeⁿ saⁿā chí cachiica ndúúⁿcū Jesús.

⁷⁰ Naati Pedro miiⁿ ní nngueēcunée sa cheeⁿdíⁿtu sa. Cuayiivi miiⁿ ní 'iiⁿyāⁿ chí snée yā miiⁿ ní caⁿa ntúⁿ yā Pedro: Cuaacu chí dii ní dáámá chí cachiica di ndúúⁿcū Jesús ti dii ní yeⁿē yāⁿā Galilea, ní nduudu yeⁿē di tan'dúúⁿcā 'iiⁿyāⁿ s'eeⁿ.

⁷¹ Tuu'mi ní Pedro miiⁿ ní 'caaⁿva sa, ní cuncnáⁿ caⁿā sa. Ní 'cái sa “por Ndyuūs”: Nguée n'diichí 'íⁿyaⁿ 'cūū.

⁷² Tuu'mi ní túsāⁿā miiⁿ 'cai ntúⁿ tī ndii 'úúví cuuvi. Ní Pedro miiⁿ ní n'gāacu sa chí Jesús caⁿa yā chí yā saⁿā: Naaⁿ chí 'āa cuée 'cuai túsāⁿā 'uúví cuuvi, 'āa 'ínú cuuvi cheeⁿdiitū di chí ngaⁿa di chí nguée n'diichi di 'úú. Taachi n'adícādínúⁿ sa chuū, ní cheēcū sa.

Jesús nanááⁿ Pilato

(Mt. 27.1-2, 11-14; Lc.
23.1-5; Jn. 18.28-38)

15 Taachí chideeve, chiiduú n'geetē ní nduuvi daamá yā ndúúⁿcū 'iiⁿyāⁿ ndiicū chí ngaⁿa ntiⁿnyuⁿ yeⁿe yaācū, ndúúⁿcū maestros yeⁿe ley, ndúúⁿcū nducyaaca 'iiⁿyāⁿ n'geete. Ní ndē chí chí yā Jesús ní candée yā 'iiⁿyāⁿ nanááⁿ gobernador Pilato. ² Tuu'mi ní Pilato miiⁿ intiinguuneeⁿ yā Jesús: ¿'Áá díⁿ Rey yeⁿe 'iiⁿyāⁿ Israel s'eeⁿ chí judíos? Ní Jesús nan'gueecútaⁿa yā: N'dii ngaⁿa cuaacú ní ti 'tíicā. ³ Chiiduú n'geete ní neenē n'dee nááⁿ chí ngaⁿá yā contra yeⁿe Jesús naati Jesús nguée nan'gueecútaⁿa yā yeⁿē mar 'áámá. ⁴ Tuu'mi ní Pilato miiⁿ ní nan'gueecunée yā ntiinguuneeⁿ yā Jesús miiⁿ: ¿'Áá nguée de'ē veē nán'gueecútaⁿá ní? 'Cuiⁿdíⁿ chí ní yeⁿé tanducueⁿē chí nguée n'daacā ngaⁿá yā yeⁿe ní.

⁵ Naati Jesús miiⁿ ní nguée de'ē veē nan'gueecútaⁿá yā. Chíⁿ chí Pilato miiⁿ cheⁿe yiinú yā ní nguée déenu yā de'ē n'adícādínúⁿ yā.

**Pilato caⁿa yā chí 'íⁿyāⁿ s'eeⁿ candée
yā Jesús chí 'caaⁿnúⁿ yā 'iiⁿyāⁿ**

(Mt. 27.15-31; Lc. 23.13-25;
Jn. 18.38-19.16)

⁶ Canée 'áámá costumbre yeⁿe 'iiⁿyāⁿ Israel s'eeⁿ chí n'dēechi yā 'áámá saⁿā chí canuuⁿ vácūū nguuvi 'viicú yeⁿe pas-cua. 'Áámá saⁿā chí preso sa chí 'iiⁿyāⁿ Israel neⁿe yā, 'tíicā canee chí diiⁿ Pilato miiⁿ. ⁷ Ní canuuⁿ 'áámá saⁿā vácūū chí nguuvi Barrabás ndúúⁿcū ta n'duuvi saⁿā chí 'niiⁿnuⁿ sa 'iiⁿyāⁿ taachi 'āa diiⁿ caandá yā contra gobierno miiⁿ. ⁸ Ní 'iiⁿyāⁿ Israel s'eeⁿ ní ndaa yā nanááⁿ Pilato miiⁿ, ní chíca yā chí Pilato ní díⁿ yā tan'dúúⁿcā costumbre yeⁿe yā. ⁹ Ní Pilato miiⁿ nan'gueecútaⁿa yā: ¿'Áá neⁿe ní chí n'dēechí Rey yeⁿē 'iiⁿyāⁿ Israel?

¹⁰Tí Pilato miiⁿ deenu yā chí chiiduú n'geete nca'á yā Jesús miiⁿ cáávā vaadi nguēé. ¹¹Naati chiiduú n'geete chinuú yā 'iiⁿyāⁿ yeⁿe yāáⁿ Jerusalén chí caaca yā Barrabás ti n'daacā chí n'deēchii yā saⁿā chí nguuvi Barrabás. ¹²Tuu'mi ní Pilato miiⁿ intiinguunéⁿ yā: ¿De'é neⁿe ní chí dííⁿ ndúúcu 'iiⁿyāⁿ chí ndís'tii ngaⁿ'a ní Rey yeⁿe 'iiⁿyāⁿ Israel?

¹³'Iiⁿyāⁿ s'eeⁿ nan'guēcútaⁿ'a yā ní 'cai yíicú yā: Cu'neeⁿnga'á ní 'iiⁿyāⁿ.

¹⁴Pilato miiⁿ ní caⁿ'a yā chí yā 'iiⁿyāⁿ s'eeⁿ: ¿De'ē chí nguéé n'daacā ndííⁿ sáⁿ'a 'cūú? Naati 'iiⁿyāⁿ s'eeⁿ ní nan'guēcúnée yā 'cai yā: Cu'neeⁿnga'á ní 'iiⁿyāⁿ.

¹⁵Tuu'mi ní Pilato miiⁿ chí nguéé neⁿe yā chí nduuvi táaⁿ 'iiⁿyāⁿ s'eeⁿ yeⁿ'é yā, n'deēchii sá Barrabás miiⁿ. Cuayiivi ní caⁿ'a ntiⁿ'nyuⁿ sa chí 'cueⁿ'é yā Jesús miiⁿ. Ch'iinu ch'eⁿ'é yā Jesús miiⁿ ní nca'a sa Jesús miiⁿ 'iiⁿyāⁿ chí cu'nééⁿnga'á yā.

¹⁶Tuu'mi ní soldados romanos candée sa Jesús vaacuyááⁿ na cuarto yeⁿe palacio miiⁿ chí nguuvi Pretorio, ní yaa'ví yā tanáⁿ'ā soldados ní nduuvidaamá yā miiⁿ. ¹⁷Ní s'nuúⁿ yā catecai morado cuá'aa Jesús miiⁿ. Ní s'nuúⁿ yā tiiⁿ Jesús miiⁿ 'áámá corona chí ndeenyú ndúúcu yaaⁿ. ¹⁸Tuu'mi ní tucá'a yā 'cai yā: Cunduuchi ní n'dii, Rey yeⁿe 'iiⁿyāⁿ Israel.

¹⁹Ní ch'eⁿ'é yā tííⁿ yā ndúúcu 'áámá taaⁿ nduu. Ní ca'a nee dáíⁿ yā Jesús ní nchiinti'yá yā nanáaⁿ yā, ní dííⁿ yā honrar 'iiⁿyāⁿ. ²⁰Ch'iinu ch'iⁿ'nyuⁿ'néⁿ yā yeⁿe Jesús 'tíica, ndiví yā catecai chí morada ní 'nuuⁿ 'nuūⁿ ntúuⁿ yā catecai maáⁿ yā. Cuayiivi tun'dáa yā Jesús ní s'neeⁿnga'á yā 'iiⁿyāⁿ.

S'nééⁿnga'á yā Jesús

(Mt. 27.32-44; Lc.

23.26-43; Jn. 19.17-27)

²¹'Áámá saⁿ'ā yeⁿe yáⁿ'āa Cirene chí nguuvi sa Simón, chí chiidá Alejandro ndúúcu Rufo, ndáa sa cheⁿ'e sa cuēti.

Taachí cho'o sa cyúúni miiⁿ, soldados a fuerza di'cuítu yā saⁿ'ā chí candēe sa cruz yeⁿe Jesús miiⁿ.

²²Ní candēe yā Jesús 'áámá lado yeⁿe yāáⁿ Jerusalén na lugar chí nguuvi Gólgota chí neⁿ'e caaⁿ'maⁿ nduudu yeⁿ'e yú, Lugar ní 'Iini Nga'ai Tiiíⁿ. ²³Ní ca'á yā chí chí'i Jesús vino chí staⁿ'a yā ndúúcu yaatā yaāa chí nguuvi mirra, naati Jesús nguéé chí'i yā. ²⁴Tuu'mi ní chí'neeⁿnga'á yā Jesús. Ní soldados ní tun'dáa yā suertes yeⁿ'é yā ndúúcu na catecai Jesús miiⁿ, ní n'diichí yā cheē chí candēe 'aama 'aama yā.

²⁵N'geécú nuuⁿ yeⁿ'ē ngētiyaaⁿ miiⁿ taachí s'neeⁿnga'á yā 'iiⁿyāⁿ. ²⁶Ní s'néⁿe yā 'áámá letrero na tiiⁿ cruz yeⁿ'e Jesús miiⁿ. Ní letra chí cánéé nguūⁿ na tabla miiⁿ ní ngaⁿ'ā yeⁿ'e nuūⁿndi yeⁿ'e yā. Ní cánéé nguūⁿ chuū: Rey yeⁿ'e 'iiⁿyāⁿ yeⁿ'e ndaata Israel. ²⁷Dáámá ndúúcu Jesús s'neeⁿnga'á yā 'uūvi sáⁿ'ā chí duucu. 'Áámá ní lado tá cuaacú yā táámá ní lado ta 'cueⁿ'é yā. ²⁸Tíicā ní chí cuaacu naachi canéé nguūⁿ na libro yeⁿ'é Ndyuús 'tíicā: Chídídúúché yā ndúúcu 'iiⁿyāⁿ chí véé nuuⁿndi yeⁿ'e yā.

²⁹'Iiⁿyāⁿ chí ngo'ó yā nanááⁿ cruz miiⁿ cunncáa ngaⁿ'a yā yeⁿ'ē Jesús. Idi'núⁿ'u yā tiiⁿ yā ní cunncáa n'dai cheendi yā ní ngaⁿ'a yā: Díí chí ndiituúví di yaacú ní nadacueéⁿ di cheeti 'iinū nguuvi, ³⁰nadanguáⁿ'āi maáⁿ di. Dii ní nch'eeⁿ di na cruz.

³¹'Tiicā ntúūⁿ chiiduú n'geete ndúúcu maestros yeⁿ'e ley duuchinéeⁿ yā Jesús. Ní ngaⁿ'a yā nguaaⁿ maáⁿ yā: 'Iiⁿyāⁿ miiⁿ nadinguáⁿ'ai yā táámá 'iiⁿyāⁿ naati maaⁿ ní nguéé ngíi nadinguáⁿ'ai yā maáⁿ yā 'iiⁿyāⁿ. ³²Ndúúti chí 'iiⁿyāⁿ miiⁿ chí Cristo miiⁿ snaaⁿ yú 'iiⁿyāⁿ nch'éeⁿ yā na cruz maaⁿ. Tuu'mi ní cu'téenu yú. Ní ndíí 'iiⁿyāⁿ chí ca'neeⁿnga'á yā daama ndúúcu Jesús miiⁿ ní cunncáa ngaⁿ'a yā yeⁿ'e yā.

Jesús ch'ii yā

(Mt. 27.45-56; Lc.
23.44-49; Jn. 19.28-30)

³³Taachí chii maⁿa nguuvi miiⁿ chi maāíⁿ núúⁿ máⁿ íⁿyeeⁿ dī ndii ná n'gēecu 'íínú chiinū. ³⁴'Āā tááanduū n'gēecu 'íinu Jesús miiⁿ ní 'cai yiicú yā: Eloi, Eloi, ¿lama sabactani? (chí neⁿe caaⁿmaⁿ nduudu yeⁿē yú: N'díí Ndyuūs yeⁿé, n'díí Ndyuūs yeⁿé, ¿dēē cuuvi chí s'neé ní maaⁿ 'úú dámaáⁿ?)

³⁵N'dúú'ví 'iiⁿyāⁿ chi snee yā miiⁿ ní ch'iindiveéⁿ yā ní caⁿa yā: 'Caandiveéⁿ nī, n'gai yā yeⁿe profeta Elías miiⁿ.

³⁶Ní ndaā 'áamá soldado ngeenu yā ní taachi chiitu 'áamá esponja yeⁿe vinagre s'neéⁿ yā esponja miiⁿ na 'áamá ndúú ní ca'a yā chí chí'í Jesús. Ní caⁿa yā: 'Āā canee rá yā. N'diichi yú nduuti chí 'áá chí profeta Elías miiⁿ ní nádich'eēⁿ sa 'iiⁿyāⁿ.

³⁷Tuu'mi ní Jesús 'cai yiicú yā ní ch'íi. ³⁸Ní cortinas yeⁿe yaacū templo chí 'uuvi taāⁿ, steēⁿ naavtáⁿā ndíí cuááⁿ 'niⁿnúⁿ ndíí cuááⁿ ndiiyā. ³⁹Ní 'áamá saⁿā romano chí ngaⁿa ntiiⁿnyuⁿ yeⁿē cien soldados chééndii sa nanááⁿ Jesús miiⁿ. Taachí n'diichi sa ní ch'iindiveéⁿ sa taacá 'cai Jesús ní taacá ch'íi yā, soldado miiⁿ ní caⁿa sa: Cuaacu níⁿnyúⁿ chí sáⁿa 'cūū ní Dáiyá Dendyuūs saⁿā.

⁴⁰Snée ntūūⁿ n'duuvi n'daataá n'giinu yaⁿai tá. Ní ndúúⁿcū n'daata s'éeⁿ mífⁿ canee ta María yeⁿe yāāⁿ Magdala, ndúúⁿcū tá María chí chēecuú José ndúúⁿcū Jacobo chí nguuvi Menor, ndúúⁿcū n'daataá chí nguuvi Salomé. ⁴¹N'daata s'éeⁿ ní can'dáa yā Jesús miiⁿ ní dichí'íve yā Jesús taachi cachiicá yā yáⁿā Galilea. Ní neené 'yaaⁿ ca n'daataá snée yā miiⁿ, n'daataá chí ngaⁿa yā daama ndúúⁿcū Jesús miiⁿ na yāāⁿ Jerusalén.

Ch'iichí yā cuerpo yeⁿe Jesús miiⁿ

(Mt. 27.57-61; Lc.
23.50-56; Jn. 19.38-42)

⁴²Taachí chiinū nguuvi miiⁿ chí viernes chí ch'iindiyaáⁿ yā cáávā 'viicu pascua miiⁿ nguuvi chí cuuvi dēeve nguuvi chí ntaavi'tuunúúⁿ yā 'iiⁿyāⁿ, ⁴³ndaā José yeⁿe yāāⁿ Arimatea. Saⁿā miiⁿ ní saⁿa ch'ēete yeⁿe Junta Ch'ēete yeⁿe 'iiⁿyāⁿ Israel. Ní cunee ngiinu sa nguuvi chí Ndyuūs ndaa yā ní ngaⁿa ntiiⁿnyuⁿ yā. Ní ndúúⁿcū valor ndaa sa nanááⁿ gobernador Pilato miiⁿ. Ní caⁿa sa Pilato miiⁿ chí nca'a yā cuerpo yeⁿe Jesús. ⁴⁴Pilato miiⁿ ní cueⁿe yiinú yā chí 'āā chí'í Jesús miiⁿ ní yaa'vi yā saⁿā chí ngaⁿa ntiiⁿnyuⁿ yeⁿe soldados chí cuchii sa nanáaⁿ yā. Taachí ndaa sa ní 'iicu tiinguuneeⁿ yā saⁿā: ¿'Áá cuaacu chí chí'í Jesús? ⁴⁵Taachí soldado centurión miiⁿ ngaⁿa sa chí cuaacu, tuu'mi ní Pilato miiⁿ ca'a yā orden chí ca'a sa cuerpo yeⁿe Jesús miiⁿ José miiⁿ. ⁴⁶Quayivi ní José cáí sa 'áamá sávana chí fina ní nadicheeⁿ sa cuerpo miiⁿ ní sta'a sa ní ch'ēēcū sa cuerpo miiⁿ ná sávana miiⁿ. Ch'íinu maaⁿ ní s'nuūⁿ sa cheeti 'áamá yáinyāⁿ ní níⁿnuūⁿ canee 'áamá tuūu ch'ēetē. Ní s'nuūⁿ yā tuūu ch'ēete cheendi yáinyāⁿ miiⁿ. ⁴⁷Tá María Magdalena ndúúⁿcū María chí chēecuú José cueⁿé yā ní n'diichí yā naachí ch'ēēchi Jesús miiⁿ.

Jesús nduuchi yā yeⁿē nguuaⁿ tináⁿā

(Mt. 28.1-10; Lc. 24.1-12; Jn. 20.1-10)

16 Taachi chó'ōo sábadu, nguuvi chí ntaavi'tuunúúⁿ yā, María yeⁿe yāāⁿ Magdala, ndúúⁿcū María chí chēecuú Jacobo, ndúúⁿcū n'daata chí Salomé cai yā perfumes chí cueendái yā vmnááⁿ yeⁿē cuerpo yeⁿē Jesús miiⁿ ní cueⁿé yā. ²Neené tyaaⁿ yeⁿē nguuvi vmnááⁿ vmaaaⁿ yeⁿé ndēēte chí domingo taachí can'dáá 'yáⁿā n'daata s'eeⁿ ndaa yā na

yáinyāⁿ miiⁿ. ³Ní ngāⁿa yā nguááⁿ maáⁿ yā: ¿Du'ū ndivíi tuūu yeⁿē yú taachí ndaā yú cheendi yáinyāⁿ?

⁴Taachí ndaa yā, tuu'mi ní n'diichi yā chi tuūu ch'etē n'dai miiⁿ 'āā ntéé canéé na lugar yeⁿē. ⁵Ní taachí ndaa yā cheeti yáinyāⁿ, miiⁿ n'diichí yā 'áámá saⁿā 'díⁿ vee sa lado tá cuaācú ní canúúⁿ sá cate-cai ch'éenūu sa ní cuéé. Ní n'daata s'eeⁿ dii'yā yā chíi. ⁶Sáⁿā miiⁿ ní caⁿā sa: Nguéé dii'yā ní cuuvi. Ndís'tii ní in'nuúⁿ ní cuerpo yeⁿe Jesús yeⁿe yááⁿ Nazaret, 'iiⁿyāⁿ chí iiⁿyāⁿ s'eeⁿ ca'nééⁿnga'a yā. Nááti 'iiⁿyāⁿ miiⁿ ní 'āā ndúúchí yā yeⁿē nguuaⁿ tináⁿā ní nguéé yā 'muuⁿ. Cuin'diichí ní naachí canuúⁿ yā. ⁷Ndís'tii cuinaⁿá ní ní cuuvi ní discípulos yeⁿe yā, ndúúcu Pedro, chí Jesús miiⁿ ní caⁿá yā vmnááⁿ ndís'tii na yáⁿā Galilea. Mííⁿ snaáⁿ ní 'iiⁿyāⁿ tan'dúúca chí Jesús caⁿa yā chíi yā ndís'tii ndúúcu tanáⁿā 'iiⁿyāⁿ.

⁸N'daata s'eeⁿ ní cunaⁿá yā ngeenu yā yeⁿe na yáinyāⁿ, ti neené cueⁿe yiinú yā ní yiinduuví yā. Nguéé de'ē vee caⁿá yā chíi yā mar 'áámá 'iiⁿyāⁿ, ti 'va'á yā.

Jesús che'enaáⁿ yā yeⁿe ta María Magdalena

(Jn. 20.11-18)

⁹Taachí Jesús nduuchi yā chidēeve nguuvi domingo chí nguuvi vmnááⁿ vmnaaⁿ yeⁿe ndēētē miiⁿ, vmnááⁿ vmnaaⁿ che'enaáⁿ yā nanááⁿ María Magdalena, n'daataá chí nn'divíi yā ndēēchē espíritus yeⁿe yááⁿnguiniūu yeⁿē ta. ¹⁰Táⁿā miiⁿ ní caⁿa tá ní chíi tá 'iiⁿyāⁿ chí chíicá yā ndúúcu Jesús miiⁿ. Ní ngeecú 'iiⁿyāⁿ s'eeⁿ chí neené ndaachíi yiinu yā. ¹¹Ní taachí 'iiⁿyāⁿ s'eeⁿ ch'iindiveéⁿ yā chí Jesús miiⁿ nduuchi yā yeⁿe nguuaⁿ tináⁿā ní chí táⁿā miiⁿ n'diichi tá Jesús, nguéé s'teenú yā.

Jesús che'enaáⁿ yā yeⁿē 'uúvi discípulos yeⁿe yā

(Lc. 24.13-35)

¹²Cho'ōo chúu, ní Jesús che'enaáⁿ yā yeⁿē 'uuvi 'iiⁿyāⁿ chí cueⁿé yā na yúúni. Ní Jesús dííⁿ yā tan'dúúca chí nguee déenu yā yeⁿe chí chó'ōo. ¹³Ní cuayi-ivi 'iiⁿyāⁿ s'eeⁿ ní cunaⁿá yā ní caⁿa yā chíi yā tanáⁿā discípulos. 'Tiicá ntúúⁿ discípulos ní nguéé s'teenú yā.

Jesús idichó'o yā 'iiⁿyāⁿ apóstoles yeⁿe yā

(Mt. 28.16-20; Lc.

24.36-49; Jn. 20.19-23)

¹⁴Chii ch'íinū nguuvi domingo miiⁿ, ní Jesús che'enaáⁿ yā yeⁿē ndu'ū ndi-icháámá discípulos yeⁿe yā, taachi 'iiⁿyāⁿ s'eeⁿ vēētē yā na mesa. Ní Jesús tuúvi iinú yā ndúúcu yā ti discípulos nguéé s'teenú yā ní cheechi staava yeⁿé yā ti discípulos nguéé s'teenú yā 'iiⁿyāⁿ chí ngaⁿa yā chí n'diichí yā Jesús chí 'āā nduuchi yā yeⁿē nguuaⁿ tinaⁿā. ¹⁵Ní caⁿa yā chíi yā discípulos: Cuéⁿe ní núúⁿmáⁿ nación yeⁿe íⁿyeedi ní caaⁿmáⁿ ní ndúúdu cuaacu yeⁿē chí nanguáⁿai yā nanááⁿ nducyaaca 'iiⁿyāⁿ. ¹⁶'Iiⁿyāⁿ chí i'teenú yā ní ngeedínuúⁿniⁿ yā, ní nanguaⁿai yā yeⁿe nuuⁿndi yeⁿe yā. Naati 'iiⁿyāⁿ chí nguéé i'téenu yā cuuví yā condenado. ¹⁷Níicú señales yeⁿe poder miiⁿ canéé ndúúcu 'iiⁿyāⁿ chí i'téenu yā 'úú. Ndúúcu chí duúchí tun'daa yā espíritus yeⁿe yááⁿnguiniūu yeⁿe 'iiⁿyāⁿ ní cuuví caⁿá yā táámá davaacu chí ngai. ¹⁸Ní nduuti chí cuta'á yā ndúúcu ta'a yā 'áámá cúú ní nguéé de'ē daño dííⁿ ti ndúúcu yā. Ní nduuti chí cu'ú yā de'ē chí veneno miiⁿ nguéé diiⁿ daño 'iiⁿyāⁿ. Ní cun'duú yā ta'a yā vmnaaⁿ yeⁿē 'iiⁿyāⁿ chí ngíítá ní 'iiⁿyāⁿ s'eeⁿ ní nduūvā yeⁿe yā.

Jesús cundáa yā va'ai cheeti nguuvi*(Lc. 24.50-53)*

¹⁹ Ch'íínú caⁿa Señor Jesús ndúúdú 'cūū ndúúcū discipulos yēⁿe yā ní cundáa yā na va'ai cheeti nguuvi. Ní ch'iindí yā lado yeⁿe honor yeⁿé

Ndyuūs. ²⁰ Discipulos ní cueⁿe yā, ní caⁿa yā nduudu cuaacu yeⁿē chí nanguaⁿai yā ndu'ū cuaaⁿ. Maaⁿ Señor Jesucristo ngiinnee yā discipulos 'íicú canee n'daācā ndúúdú yeⁿe yā cáāvā señales ndúúcū vaadī n'giinu chi dííⁿ yā. 'Tíicā chí.

NDUUDU N'DÁI CHÍ DÍNGUŪⁿ APÓSTOL LUCAS

Yeⁿe cáávā chí idingúuⁿ yā carta 'cūū

1 Nééné 'yaaⁿ 'iiⁿ'yāⁿ nguaaⁿ s'uuúⁿ neⁿ'é yā idingúuⁿ yā dendú'ū chí chíi, chííⁿ chí s'uuúⁿ deenu yú chí nduudu cuaacu. ²Tíicā tan'dúúicā chí 'iiⁿ'yāⁿ s'eeⁿ n'diichí yā tanducuéⁿ'ē ndíí taachí chí nga'á, 'iiⁿ'yāⁿ s'eeⁿ ní chí'cueeⁿ yā s'uuúⁿ. 'Iiⁿ'yāⁿ s'eeⁿ candée yā nduudu cuaacu yeⁿ'é Ndyuūs ní ngaⁿ'á yā nduudu miiⁿ. ³Úú, Lucas, idingúuⁿ yeⁿ'é díí Teófilo cáávā chí deenú chí díí ní n'dai di. 'Ticā ntúūⁿ 'úú ní nadicádiinúúⁿ chí idingúuⁿ yeⁿ'é di tanducuéⁿ'ē chí chíi. Diiⁿncā n'diichí tanducuéⁿ'ē ndúú'cū cuidado ndíí taachí nga'á. ⁴Túúicā idingúuⁿ ní tuumicadíinuⁿ di chee chí nduudu cuaacu yeⁿ'é dendú'ū chí 'iiⁿ'yāⁿ chí'cueeⁿ yā dii.

**Yeⁿe chí ángel yaa'vi yā
chí ch'iindiyāⁿ Juan**

⁵Tiempo miiⁿ chí 'iiⁿ'yāⁿ Herodes miiⁿ chí chíi yā rey yeⁿ'e yáⁿ'āa Judea, canéé 'áamá chiiduú chí nguuví yā Zacarías. Chiiduú miiⁿ ní yeⁿ'e grupo yeⁿ'e Abías. Ní n'daataá yeⁿ'e Zacarías ní nguuví tá Elisabet. Ní Elisabet miiⁿ ní yeⁿ'e ndaata yeⁿ'e Aarón. ⁶Ndúú 'uuví yā ní n'dai taaví yā nanááⁿ Ndyuūs. 'Iiⁿ'yāⁿ s'eeⁿ nguéé de'ē vee dííⁿ yā chí nguéé n'daacā ndúú'cū 'iiⁿ'yāⁿ caati s'neeⁿ veéⁿ yā nducuéⁿ'ē nduudu chí ngaⁿ'a 'iivú Ndyuūs. ⁷'Iiⁿ'yāⁿ s'eeⁿ nguéé daiyá yā, ti Elisabet miiⁿ nguéé taaví yā daiyá yā. Ní nduu 'uuví yā ní 'āā ndiicú yā.

⁸'Áamá nguuvi, taachi tuneⁿ turno yeⁿ'e grupo yeⁿ'e Zacarías chí diiⁿ ntiinyuⁿ yeⁿ'e chiiduú chí dichí'íve yā na yáacū templo yeⁿ'é Ndyuūs, 'tíicā dííⁿ Zacarías ntiinyuⁿ yeⁿ'e chiiduú nanááⁿ Ndyuūs. ⁹Ní tan'dúúicā costumbre yeⁿ'e chiiduú s'eeⁿ, tuneⁿ Zacarías miiⁿ chí

cunndaa yā na yáacū templo yeⁿ'e Ndyuūs ní 'neeⁿ yaⁿ'a yā incienso. ¹⁰Ní nducyaaca 'iiⁿ'yāⁿ snée yā cuaaⁿ chuva'āi yáacū templo ní ngaⁿ'angua'á yā neⁿ'e chí ngiichi incienso cheeti yaacū templo. ¹¹Zacarías miiⁿ canee yā na yaacū. Ní che'enaāⁿ yeⁿ'e Zacarías miiⁿ 'áamá ángel chí Ndyuūs dichó'o yā. Ní ángel mííⁿ chééndii yā lado tá cuaacu yeⁿ'é ná-tai naachi n'giichi incienso miiⁿ. ¹²Ní taachi Zacarías miiⁿ n'diichí yā ángel miiⁿ 'āā ntéé deenú yā de'ē chí dííⁿ yā ní dii'ya taaví yā chíi. ¹³Naati ángel miiⁿ ní caⁿ'a yā: N'dii Zacarías, nguéé 'va'á nī, ti Ndyuūs ní ch'iindiveéⁿ yā chí caⁿ'angua'á nī. Ní 'cuúndiyāⁿ 'áamá daiya n'daataá yeⁿ'é nī Elisabet miiⁿ, ní cu'neéⁿ nī nguuvi sa Juan. ¹⁴Ní cuuvi yeenu taaví nī cáávā saⁿ'ā lííⁿ. Ní 'yaaⁿ n'dái 'iiⁿ'yāⁿ cuuvi yeenu yā cáávā chí 'cuúndiyāⁿ dacua'á miiⁿ. ¹⁵Caati daiyá nī miiⁿ ní cuuvi ch'eeⁿ sa nanááⁿ Ndyuūs. Nguéé cu'u sa vino ndíí nguéé ndúú cu'u sa de'ē vee chí cuuvi cuú'vi sa. 'Āā canee sa ndúú'cū Espíritu N'dai yeⁿ'é Ndyuūs ndíí taachi 'āā cuéé 'cuúndiyāⁿ sa. ¹⁶Saⁿ'ā miiⁿ ní diiⁿ sa chí 'yaaⁿ taavi ca daiyā 'iiⁿ'yāⁿ Israel nguécuneé yā ní i'téenu yā Ndyuūs yeⁿ'e yú. ¹⁷Daiyá nī, Juan 'cūū, ní caⁿ'a sa vmnaaⁿ yeⁿ'é Señor Jesucristo. Ní canee sa ndúú'cū espíritu ndúú'cū poder tan'dúúicā chí canee profeta Elías ndii cuááⁿ vmnaaⁿ. Saⁿ'ā miiⁿ ní diiⁿ sa chí 'cuéetinéé n'daacā 'iiⁿ'yāⁿ chí n'geete ndúú'cū daiya yā. Níicú 'iiⁿ'yāⁿ cuuvi cu'téenu yā tan'dúúicā Ndyuūs neⁿ'é yā chí cu'téenu yā, ní tan'dúúicā tanáⁿ'ā 'iiⁿ'yāⁿ chí n'dai i'téenu yā. Ní 'tíicā caⁿ'a sa diiⁿ sa chí 'iiⁿ'yāⁿ s'eeⁿ 'cuéetinéé yaáⁿ yā chí cuuvi cu'téenu yā Señor Jesús taachi ndaa yā.

¹⁸Tuu'mi ní Zacarías miiⁿ ní tiinguunéⁿ yā ángel miiⁿ: ¿Táácā cu'teenú chí ngaⁿ'a nī? caati 'úú ní 'āā ndiicúú 'úú, 'ticā ntúūⁿ n'daataá yeⁿ'é.

¹⁹ Angel miiⁿ n'guēcútáⁿa yā ní caⁿá yā: 'Úú ángel chi nguuví Gabriel chi canéé chi díiⁿ ntiiⁿnyuⁿ nanááⁿ Ndyuūs. Dendyuūs dichó'o yā 'úú. Ní 'úú yaa'ví n'dií ní cuuví nduudu n'dái' cūū n'dií. ²⁰Maaⁿ ní cuuvi 'díi'mi nī ní 'āā ntéé cuuvi caaⁿmáⁿ nī ndií chó'oo chúū taachi cunuū ca'ā tiempo yeⁿē, ti nguéé chi'teenú nī nduudu yeⁿē taachi ngaⁿá chi chuū chí cuuvi.

²¹ Neⁿe chí chii chuū, 'iiⁿyāⁿ s'eeⁿ chi snée yā chūva'ai yāacū templo chi snée ngiinu yā Zacarías miiⁿ cueⁿe yíínú yā chí Zacarías miiⁿ ní chi'naáⁿ yā cheeti yaacū templo yeⁿē Ndyuūs. ²²Taachi Zacarías miiⁿ ní nan'dáa yā cheeti yaacū 'āā ntéé ngii ngaⁿa yā. 'Iiⁿyāⁿ s'eeⁿ ní tuumicadínuuⁿ yā chi véé 'áámá visión chi n'diichí Zacarías miiⁿ taachí canéé yā cheeti yaacū templo. Zacarías miiⁿ díta'á yā de'ē chí neⁿe caaⁿmáⁿ yā ti chii 'díi'mí yā.

²³Taachí ch'iinū turno chi 'áámá ndeete yeⁿe servicio chí diiⁿ yā ntiiⁿnyuⁿ cheeti yaacū templo Zacarías miiⁿ ní cunaⁿá yā na vaacu yā. ²⁴Cho'ō tiempo 'cūū ní n'daataá yeⁿē yā chí Elisabet miiⁿ ní ch'iindi dácu'a yeⁿē yā ní 'áámá canúuⁿ ta na vaacu ta nyuⁿu 'iyyū. Ní neené nacadínuuⁿ ta. Ní ngaⁿa ta maaⁿ ta: ²⁵Chuū chí Señor Ndyuūs miiⁿ ní díiⁿ yā nduucú na nguuví 'cūū ní díiⁿ yā chí 'āā ntéé 'cuinaáⁿ nanááⁿ 'iiⁿyāⁿ.

Angel caⁿá yā chí 'cuundiyaáⁿ Jesús

²⁶Cuayiivi chí ch'íínú jaaⁿ 'iyyū chí Elisabet miiⁿ ch'iindi dácu'a yeⁿe tá ní Ndyuūs dichó'ó yā ángel Gabriel taama vmnéⁿēe. Ní cueⁿé yā na 'áámá yāáⁿ chí nguuví Nazaret chí yeⁿē yáⁿāa Galilea. ²⁷Ndyuūs dichó'ó yā ángel Gabriel miiⁿ nanááⁿ 'áámá n'daataá chí cuiinú chí nguuví tá María. María miiⁿ ní caⁿá yā chí 'caandavaacú yā ndúúcu 'aama saⁿā chí nguuví José. Saⁿá 'cuū ní yeⁿe ndaata yeⁿe rey David chí ndíi tiempo

chí 'āā chó'oo. ²⁸Angel miiⁿ ní sndaá yā naachi canéé María ní caⁿa yā: N'dií, María, yeenú taavi nī chí Ndyuūs neⁿe taavi yā n'dií. Señor Ndyuūs canéé yā ndúúcu n'dií. Ndyuūs di'viicu cá yā n'dií nguaaⁿ nducyaaca n'daataá yeⁿē iⁿ'yeeⁿdí'cūū.

²⁹Taachi María miiⁿ ch'iindiveéⁿ yā chuū, cueⁿē yíínú yā ní chistaⁿa vaadi cadínuuⁿ yeⁿé yā yeⁿe nduudu yeⁿe ángel miiⁿ. Ní nadicadínuuⁿ yā: ¿D'ēé neⁿe caaⁿmaⁿ nduudú 'cūū? ³⁰Tuu'mí ángel miiⁿ ní caⁿa yā: N'dií, María, nguéé 'va'a nī, ti véé taavi favor yeⁿé nī nanááⁿ Ndyuūs, ti Ndyuūs dineⁿé yā n'dií. ³¹Ní cuuvi daiyá nī ní 'cuūndi 'áámá saⁿā daiyá nī, ní cuuvi nguuví yā JESÚS. ³²Daiyá nī cuuvi ch'ete n'dái yā ní 'iiⁿyāⁿ s'eeⁿ ngaⁿá yā chí daiyá nī ní Daiyá Dendyuūs chí ch'ete taavi ca. Ní Señor Ndyuūs caⁿa yā díiⁿ yā chí daiyá nī ní cuuví yā rey lado yeⁿe rey David tan'dúúca nguuví chí 'āā cho'oo. ³³Ní caaⁿmaⁿ ntiiⁿnyúⁿ yā yeⁿe 'iiⁿyāⁿ yeⁿe Israel cueⁿe daāⁿmaⁿ. Ní naachi caaⁿmaⁿ ntiiⁿnyúⁿ yā ní 'áámá cūnee.

³⁴Tuu'mi ní María caⁿá yā chí yā ángel: ¿Taaca cuuví chuū, ti 'úú ní nguéé isaⁿā yeⁿé?

³⁵Angel miiⁿ ní nan'guēcútaⁿá yā: Ndúúcu poder yeⁿé Ndyuūs chí canéé na va'ai cheeti nguuví Espíritu N'dai yeⁿé Ndyuūs ní ndaá yā vmaaaⁿ yeⁿé n'dií. Ní cu'neéⁿ yā 'daaⁿnúⁿ yā tan'dúúca meéⁿ vmaaaⁿ yeⁿé n'dií ní 'iicu cuuvi chó'oo yeⁿé nī chí dacua'ā 'líiⁿ chí 'cuundiyaáⁿ miiⁿ 'tíicā cunée yā yeⁿé Ndyuūs ní cuuvi nguuví yā 'iiⁿyāⁿ chí dæeve chí Daiya Dendyuūs 'iiⁿyāⁿ. ³⁶Ní n'diichí nī. Prima yeⁿe nī chí nguuví Elisabet miiⁿ, 'cuundii ntúūⁿ 'áámá daiyá yā maaⁿ chí 'āā ndiicú yā. 'Āā jaaⁿ 'iyyu daiyá yā cheeti yā, n'daataa miiⁿ chí 'iiⁿyāⁿ s'eeⁿ ngaⁿa yā chí nguéé 'cuūndi daiya yā. ³⁷'Tíicā diiⁿ Ndyuūs caati 'iivú Ndyuūs cuuvi díiⁿ yā tanducueⁿē chí neⁿé yā díiⁿ yā.

³⁸ Tuu'mi ní María miiⁿ ní caⁿá yā: 'Úú criada chí ngaⁿā ntiⁿnyuⁿ 'iivú Ndyuūs yeⁿé. Maaⁿ ní Ndyuūs díⁿ yā nduucú tan'dúucā chí caⁿa yā chí díⁿ yā. Taachi chíinu caⁿa yā chuū, ángel miiⁿ ní cunaⁿa yā.

**María miiⁿ cheⁿé yā
n'diichi yā Elisabet**

³⁹ Nguuvi s'eeⁿ María miiⁿ nūuⁿ cueⁿé yā na yúúni ní ndāa yā na yāāⁿ Judá. ⁴⁰ Ní ndāa yā na vaacu Zacarías miiⁿ ní yaa'ví yā Elisabet. ⁴¹ Taachi Elisabet miiⁿ ch'iindiveéⁿ yā nduudu yeⁿe María dacuá'āā miiⁿ ní nuⁿu cheeti Elisabet miiⁿ. Ní Elisabet míⁿ chiitu Espíritu N'dai yeⁿé Ndyuūs táⁿā. ⁴² Ní caⁿa yā ndúucū nduudu díftúú: De'ē chúucā n'dai n'dii nguaaⁿ nducyaaca n'daataá. Ní n'dai taavi daiyá nī chí 'cuúndi yā. ⁴³ ¿Du'ú 'úú chí ndāa cheecu Señor Ndyuūs yeⁿé chí yaa'ví yā 'úú? ⁴⁴ Ti taachí ch'iindiveéⁿ nduudu yeⁿe nī, dacua'ā yeⁿé nuⁿu cheetí tan'dúucā chí yeenu taavi yeⁿé. ⁴⁵ De'ē chúucā n'dai díi chí chí'téenu dí caati cúúví cuaacu tan'dúucā chí Señor Ndyuūs caⁿa yā.

⁴⁶ Tuu'mi María ní caⁿa yā:

Alma yeⁿé i'teenú taavi Ndyuūs ní dich'eté Ndyuūs.

⁴⁷ Ní staava yeⁿé ní yeenú n'dai chí i'teenú Ndyuūs. Ní Ndyuūs nadinguáⁿai yā 'úú yeⁿe nuuⁿndi yeⁿé.

⁴⁸ Ti Ndyuūs n'diichí yā 'úú chí pobre 'úú ní dichii'vé Ndyuūs, ti ndíí maaⁿ nducyáácá 'iiⁿyāⁿ caaⁿmaⁿ yā yeⁿe 'úú: De'e chúucā n'dai 'úú.

⁴⁹ Ti Ndyuūs chí véé taaví poder yeⁿé yā díⁿ yā nduucú cosas chí ch'etete n'dai. Ní Ndyuūs ní deēvē taaví yā.

⁵⁰ Ní Ndyuūs ya'ai 'iinu taaví yā caavā nducyaaca 'iiⁿyāⁿ chí i'téenu yā yeⁿe yā tiempo chí chó'oo, 'tiicá ntúúⁿ tiempo maaⁿ, ní 'tiicá ntúúⁿ tiempo chí cuchii.

⁵¹ Dendyuūs 'āā díiⁿ yā vaadī n'dai ch'etete ndúucū poder yeⁿé yā, níícu díⁿ yā ganar yeⁿe staava yeⁿé 'iiⁿyāⁿ chí dich'etete yā maáⁿ yā.

⁵² Ndyuūs diví yā 'iiⁿntyéⁿē chí ngaⁿa ntiⁿnyuⁿ yeⁿe trono yeⁿé yā, ní dich'etete yā 'iiⁿyāⁿ ndiicúúⁿ.

⁵³ Ndyuūs ca'á yā cosas chí n'dai taavi 'iiⁿyāⁿ chí ch'iindiveéⁿ yā yeⁿe yā. Ní nguéé díⁿ yā de'ē vee cáávā 'iiⁿyāⁿ s'eeⁿ chí nguéé neⁿé yā chí Ndyuūs nneé yā 'iiⁿyāⁿ s'eeⁿ.

⁵⁴ Ndyuūs chinneeé yā s'uúúⁿ chí 'iiⁿyāⁿ yeⁿe Israel ti dichí'íve yú 'iiⁿyāⁿ. Ní nn'gaacú yā yeⁿe s'uúúⁿ ní nduuví ya'ái taaví yā yeⁿe s'uúúⁿ.

⁵⁵ Ndyuūs cueⁿe daāⁿmaⁿ idiíⁿ yā tan'dúucā chí caⁿa yā 'iiⁿyāⁿ yeⁿe ndaata yeⁿe yú, ní ndúucū chíida yú Abraham ndúucū 'iiⁿyāⁿ yeⁿé yā ndíí cuaaⁿ vmaaaⁿ.

'Túucā ngaⁿa María miiⁿ.

⁵⁶ Tuu'mi ní María miiⁿ canée yā ndúucū Elisabet tan'dúucā 'íínú 'iiyū. Cuayiivi ní cunaⁿá yā na vaacu yā.

**Yeⁿé chí ch'iindiyaāⁿ
Juan chí cheedínuuⁿníⁿ**

⁵⁷ Taachí snuū ca'ā 'iiyū yeⁿe dacua'ā miiⁿ, Elisabet miiⁿ ch'iindiyaāⁿ 'áámá daiya yā chí saⁿā. ⁵⁸ 'iiⁿyāⁿ na niiⁿnuúⁿ va'ái ndúucū 'iiⁿyāⁿ yeⁿé yā yeenú n'dai yā ndúucū yā taachí ch'iindiveéⁿ yā chí Ndyuūs ní ya'ai taaví yā Elisabet miiⁿ. ⁵⁹ Ch'iinū dacua'ā 'lííⁿ niiⁿníⁿ nguuví, ní 'iiⁿyāⁿ ndāa yā na vaacú Elisabet chí díⁿ yā circuncidar dacua'ā miiⁿ. Níícu 'iiⁿyāⁿ s'eeⁿ neⁿé yā cu'neeⁿ yā chí cuuvi nguuví sá Zacarías tan'dúucā chí nguuví chíida sa Zacarías. ⁶⁰ Naati cheecu sa míⁿ caⁿa yā: Nguéé 'tíicā. Juan cuuvi ngúúví sá.

⁶¹ Tuu'mi caⁿa 'iiⁿyāⁿ s'eeⁿ chíí yā cheecu sá miiⁿ: ¿Dé'e cáávā? Mar 'áámá 'iiⁿyāⁿ yeⁿe nī nguéé nguuví yā 'tíicā.

⁶² Ndúucū chí ditá'a yā ntiinguuneeⁿ yā chíidá sa taacā néⁿe yā chí cuúví

ngúuví sá. ⁶³ Zacarías miiⁿ ní 'neeⁿ ta'á yā naachi canee 'áámá caaca ní dingúuⁿ yā chuū: Chí Juan duuchi sa. Tuu'mi ní nducyaaca 'iiⁿyāⁿ ní cueⁿe yiinú yā. ⁶⁴ Caati hora míⁿ nūuⁿ, Zacarías miiⁿ nacan'dāā nduudu yeⁿe yā. Nífcū tuu'mi tuca'á yā caⁿa yā: De'ē chúúcā ch'ēete Dendyuūs. ⁶⁵ Ní nducyáácá 'iiⁿyāⁿ ni-iⁿnuúⁿ va'ai 'diiⁿ'ya taavi cá yā chii. Ní yeⁿe chí ch'ó'oo, chuū ní caⁿa nducyáácá 'iiⁿyāⁿ na yáā chí snúūⁿ cuaaⁿ yaⁿāi yeⁿe chí snéé na yiicū s'eeⁿ yeⁿe yáⁿāa Judea. ⁶⁶ Ní nducyáácá 'iiⁿyāⁿ chí cadi-inuuⁿ yā yeⁿe chuū ní nacádiinuuⁿ yā na staava yeⁿe yā. Ní caⁿa yā 'áámá yā ndúúcu taama yā: ¿De'ē cuuvi ndúúcu dacua'a líⁿ chí 'tífcā? Caati 'tífcā Dendyuūs miiⁿ ní canéé ndúúcu dacua'a miiⁿ.

Zacarías caⁿa yā yeⁿe chí Dendyuūs caⁿá yā diiⁿ yā ndúúcu dacua'āa miiⁿ

⁶⁷ Zacarías, chífdāa dacua'āa miiⁿ, chí-itúú 'iiⁿyāⁿ ndúúcu Espíritu N'dai yeⁿe Ndyuūs ní caⁿa Zacarías nduudu chí caⁿa Ndyuūs chí caaⁿ máⁿ yā. Ní caⁿa yā tan'dúúca 'áámá profeta chí candee nduudu yeⁿe Ndyuūs:

⁶⁸ De'ē chúúcā n'dai Señor Ndyuūs yeⁿe 'iiⁿyāⁿ Israel chí ndāa yā nanaaⁿ s'uúúⁿ chí nadinguáⁿ ai yā s'uúúⁿ, ní yeⁿe yā s'uúúⁿ.

⁶⁹ Ní tee yā s'uúúⁿ 'áámá 'iiⁿyāⁿ chí nééné vee poder yeⁿe yā chí nadinguáⁿ ai yā s'uúúⁿ chí 'iiⁿyāⁿ miiⁿ yeⁿe ndaata yeⁿe rey David chí dichí'vē Ndyuūs ndíí cuaaⁿ vmnaaⁿ.

⁷⁰ Ní Ndyuūs díⁿ yā chí cuaacu tan'dúúca chí caⁿa yā cáávā nduudu yeⁿe profetas chí caⁿa yā tiempo chí 'āā 'naaⁿ n'dai.

⁷¹ Ní caⁿa yā chí Ndyuūs nadinguáⁿ ai yā s'uúúⁿ yeⁿe 'iiⁿyāⁿ chí taáⁿ yā yeⁿe yú. Ní nadinguáⁿ ai yā s'uúúⁿ yeⁿe nducyáácá 'iiⁿyāⁿ chí nguéé ngii n'diichí yā s'uúúⁿ.

⁷² Ní neene ya'ai 'iinú Ndyuūs 'iiⁿyāⁿ yeⁿe yú ndíí cuaaⁿ vmnaaⁿ, ní nan'gaacú yā yeⁿe chí caⁿa yā chí diiⁿ yā chí n'daacā ndii cuááⁿ vmnaaⁿ.

⁷³ Chuū ní compromiso chí Ndyuūs caⁿa cuaacu yā ndúúcu chiida yú Abraham chí tee yā s'uúúⁿ.

⁷⁴ Taachi Ndyuūs nadanguáⁿ ai yā s'uúúⁿ yeⁿe 'iiⁿyāⁿ chí nduuví tááⁿ yā yeⁿe yú, díⁿ yā 'túúca caati dichí'vē yú Ndyuūs ní nguéé nduúcu vaadi 'va'a.

⁷⁵ Tanducuéⁿ e vida yeⁿe yú ní dichí'vē yú Ndyuūs, ní diiⁿ yú tan'dúúca 'iiⁿyāⁿ chí deeve ní n'dai nanááⁿ Ndyuūs.

⁷⁶ Díí, saⁿā líⁿ chí daiyá, cūnee chí dúúchí dí profeta yeⁿe Ndyuūs chí ch'ēete n'dai chí canéé na va'ai cheeti nguuví caati caⁿa di cuááⁿ vmnaaⁿ yeⁿe Señor Jesucristo. Ní 'cuúndiyāⁿ di 'iiⁿyāⁿ s'eeⁿ chí 'cuēetinéé ngiinu yā taachi ndaa Jesús.

⁷⁷ Ní diiⁿ di chí 'iiⁿyāⁿ cadiinúúⁿ yā yeⁿe chí nguaⁿ ai yā yeⁿe nuuⁿ ndi yeⁿe yā ní Ndyuūs nadich'ēecú yā yeⁿe yā.

⁷⁸ Ní cucáávā Ndyuūs yeⁿe yú nééné ya'ai 'iinú yā s'uúúⁿ tee yā 'áámá deeve yeⁿe yā s'uúúⁿ, deeve chí chíicā yeⁿe va'ai cheeti nguuví.

⁷⁹ Ní chí deeve miiⁿ chíí Ndyuūs ní cuuvi deevé yā yeⁿe nducyaaca 'iiⁿyāⁿ chí snéé yā na maaiⁿ ndúúcu nuuⁿ ndi yeⁿe yā. Ní Ndyuūs nacandée yā s'uúúⁿ na yúúni yeⁿe vaadi 'diííⁿ.

⁸⁰ Ní saⁿā líⁿ ní chí'ita sa ní 'āā deenú sa ní ditiinú sa na espíritu yeⁿe sa. Ní taachi 'āā ch'ēete sa, saⁿā miiⁿ ní cueⁿe sa cuēeti ní canee sa miiⁿ ndii ndaa tiempo taachi caⁿa sa nduudu cuaacu yeⁿe Ndyuūs nanááⁿ 'iiⁿyāⁿ yeⁿe Israel.

Yeⁿe chí ch'iindiyáaⁿ Jesús

(Mt. 1.18-25)

2 Nguuvi s'eeⁿ emperador Augusto César caⁿa ntiiⁿnyúⁿ yā chí

'cueetinéé nguūⁿ nducyaaca 'iiⁿyāⁿ yeⁿe núúⁿmáⁿ yáⁿāa naachi caⁿa ntiiⁿnyúⁿ yā. ²Ní taachi Cirenio ní gobernador yā yeⁿe yáⁿāa Siria, 'āā díⁿ yā chuū chí n'gēetinéé nguūⁿ yā. ³Ní nducyaaca 'iiⁿyāⁿ snaⁿa yā na yāāⁿ naachi ch'iindiyāⁿ yā ní ca'a yā chi ngúúví yā. ⁴'Tíicā chii José miiⁿ ní n'dāa yā na yāāⁿ Nazaret miiⁿ yeⁿe yáⁿāa Galilea ní ndāá yā na yaāⁿ Belén yeⁿe yáⁿāa Judea. Yāāⁿ miiⁿ ní duuchi Yāaⁿ yeⁿe David caati José miiⁿ ní na ndaata yeⁿe rey David miiⁿ 'iiⁿyāⁿ. ⁵Cueⁿe José miiⁿ ndúúcu María ti chiida tá ndúúcu cheecu tá diiⁿ yā prometer chi 'caandavaacu tá ndúúcu José miiⁿ. María miiⁿ ní véé daiya tá cheeti tá. Miiⁿ ní ndāá yā ca'a yā ngúúví yā. ⁶Taachi miiⁿ snée yā, snuū ca'a nguuví yeⁿe María miiⁿ chi 'cuundiyaāⁿ daiya yā. ⁷Miiⁿ ch'iindiyāāⁿ saⁿa 'líⁿ, daiya tá chi vmnááⁿ vmnaaⁿ, ní cheecú yā tínnūⁿ saⁿa 'líⁿ, ní sn'diití yā saⁿa 'líⁿ miiⁿ naachi snúúⁿ 'iiti. Ní ch'etinee yā miiⁿ caati nguéé ndaacá yā va'ai chi n'dai.

Angeles ndeé yā ndúúcu 'iiⁿyāⁿ chí diiⁿ cuidado 'iiti cuūchí

⁸Ná campo yeⁿe yāāⁿ Belén miiⁿ véé 'iiⁿyāⁿ chí snée cuidado 'iiti cuūchí. Ní n'gēetí nduuchí yā n'gaaⁿ na cueeti cucáávā 'iiti cuūchí miiⁿ. ⁹Ní n'gaaⁿ miiⁿ 'áámá ángel chí Señor Ndyuūs dichō'o yā che'enaáⁿ yā nanááⁿ 'iiⁿyāⁿ s'eeⁿ chí snée cuidado 'iiti cuūchí. Ní chí dēeve ch'ete n'dai yeⁿe Ndyuūs chiiya nanááⁿ yā ní 'dii'yā n'dái yā chii. ¹⁰Angel miiⁿ ní caⁿa yā chii yā 'iiⁿyāⁿ s'eeⁿ. Ndís'tií, nguēe va'á ní ti 'úú nindeé 'áámá nduudu chí n'dai nífcú cuuvi yeenu taavi ndís'tií ndúúcu nducyaaca 'iiⁿyāⁿ. ¹¹Tí maaⁿ ní na yāāⁿ yeⁿe David ch'iindiyāāⁿ cááva ndís'tií 'áámá saⁿa 'líⁿ chí nadanguáⁿai yā 'iiⁿyāⁿ yeⁿe nuuⁿndi yeⁿe yā. Saⁿa 'líⁿ míⁿ ní CRISTO chí Señor chí Ndyuūs dichó'ó yā. ¹²Ní deenú ní chí cuaacu

ndúúcu señaⁿl 'cūū. Ndís'tií ní mndaaca ní dacua'a míⁿ ndeecu tínnū ní candiiti sa na lugar naachi snúúⁿ 'iiti.

¹³Hora míⁿ nūūⁿ n'dee n'dái ángeles yeⁿe va'ai cheeti nguuvi che'enaáⁿ yā naachi canéé ángel miiⁿ. Angeles ní ngaⁿa yā chí ch'ete n'dai Ndyuūs miiⁿ. 'Tíicā ngaⁿa yā:

¹⁴Ch'ete n'dái Ndyuūs chí canéé na va'ai cheeti nguuvi. Ní véé vaadi 'diiⁿ na yáⁿāa nguaaⁿ 'iiⁿyāⁿ chí cunéé n'daacā n'dai ti snée yā ndúúcu favor yeⁿe Ndyuūs.

¹⁵Cho'oo chúú ní ángeles s'eeⁿ cunaⁿá yā va'ai cheeti nguuvi. Saⁿa chí snée cuidado 'iiti cuūchí miiⁿ caⁿa sa chí sa vi'i: Cú'u yú maaⁿ na yāāⁿ Belén ní n'diichi yú chuū chí Señor Ndyuūs miiⁿ chí yā s'uúúⁿ.

¹⁶Maaⁿnch'etéé nūūⁿ cueⁿe yā. Ní ndaacá yā María ndúúcu José, ndúúcu saⁿa 'líⁿ dacua'a miiⁿ cándiiti sa na lugar naachi snúúⁿ 'iiti. ¹⁷Ní taachi n'diichí yā saⁿa 'líⁿ míⁿ, caⁿa yā chí yā 'iiⁿyāⁿ tan'dúúca ángel caⁿa yā chí yā maáⁿ yā yeⁿe dacua'a miiⁿ. ¹⁸Nducyáácá 'iiⁿyāⁿ chí ch'iindiveéⁿ yā chuú chí caⁿa 'iiⁿyāⁿ chí snée cuidado 'iiti cuūchí cueⁿe yinu taaví yā yeⁿe chuū. ¹⁹Naati María miiⁿ ní nguain'dai yā nducuéⁿe chuū na staava yeⁿe tá. Ní nacadínūⁿ yā de'e cuuvi. ²⁰'Iiⁿyāⁿ chí snée cuidado 'iiti cuūchí cuínaⁿa yā ní ngaⁿa yā chí ch'ete n'dai Dendyuūs. Ní s'téenu yā Ndyuūs yeⁿe tanducuéⁿe chí ch'iindiveéⁿ yā ní n'diichi yā ti tan'dúúca chí ángel miiⁿ caⁿa yā chí yā 'iiⁿyāⁿ.

Yeⁿe saⁿa chí nguuvi Simeón ní yeⁿe 'áámá n'daataá chí nguuvi tá Ana

²¹Ch'iinu dacua'a miiⁿ níⁿníⁿ nguuvi ní ndāa nguuvi chí díⁿ yā circuncidar dacua'a miiⁿ. Ní s'néeⁿ yā chí nguuvi JESÚS, tan'dúúca chí caⁿa ángel miiⁿ cuááⁿ vmnaaⁿ ndíí taachi 'āa cuéé sa cheeti María.

²² Taachí snuū ca'a niiⁿniⁿ nguuví chi 'aama n'daataá ní canéé dēve taachi véé dacua'a 'lííⁿ yeⁿe tá tan'dúucā chi canéé nguūⁿ na ley yeⁿe Moisés, tuuⁿmi ní José ndúucū María candéé yā dacua'ā miiⁿ na yáaⁿ Jerusalén. Candéé yā chí dííⁿ yā presentar dacua'ā miiⁿ nanááⁿ Señor 'iivú Ndyuūs. ²³ Tíicā caⁿa yā dííⁿ yā tí canéé nguūⁿ na ley yeⁿe 'iiví Ndyuūs chí tanducuéⁿē dacua'āa, chí vmnááⁿ vmaaaⁿ chí 'cuundiyááⁿ yeⁿē chéécūu chí sáⁿā canéé lado yeⁿé Ndyuūs. 'Tíicā chíiⁿ chí dííⁿ yā chuū. ²⁴ Ní cheⁿe yā ca'a yā ofrenda yeⁿe 'áámá n'daataá chí 'cuundiyááⁿ daiya tá tan'dúucā chí ngaⁿa ley yeⁿe Señor 'iivú Ndyuūs. Ofrenda miiⁿ ní ná 'uūví 'yaada palomas o na 'uūví 'yaada pichones.

²⁵ Na yáaⁿ Jerusalén miiⁿ canee 'aama saⁿā chí nguuví sa Simeón. Sáⁿa 'cūū ní nééné n'dai sa ní chíⁿi sá chí i'téenu sa Ndyuūs, ní yeⁿé Ndyuūs saⁿā. Canéé Espíritu N'dai yeⁿé Ndyuūs ndúucū sa. Ní cánéé ngiinu sa 'áámá 'iiⁿyāⁿ chí nadanguáⁿāi 'iiⁿyāⁿ yeⁿe ndaata Israel. ²⁶ Espíritu N'dai yeⁿé Ndyuūs chíi yā saⁿā 'cūū chí nguéé canéé chí 'cuūví sa neⁿe chí 'āā cuéé n'diichi sá Cristo chí Señor Ndyuūs dichó'ó yā iⁿyeⁿeⁿdí 'cūū. ²⁷ Ní Espíritu N'dai yeⁿé Ndyuūs canéé ndúucū Simeón miiⁿ. Ní díiⁿ guiar Simeón miiⁿ. Ní cueⁿé yā na yaacū templo taachi José miiⁿ ndúucū María ndāa yā na yaacū templo ndúucū saⁿa 'lííⁿ Jesús miiⁿ. Ní 'íicū cuuvi dííⁿ yā presentar dacua'a miiⁿ nanááⁿ Ndyuūs tan'dúucā chí ngaⁿa ley miiⁿ. ²⁸ Tuuⁿmi ní Simeón miiⁿ caⁿnuúⁿ yā Jesús ní caⁿa yā chí ch'ete n'dai Dendyuūs. 'Túucā caⁿa yā:

²⁹ Maaⁿ ní n'dii Señor Ndyuūs, dííⁿ nī chí cuaacu tan'dúucā chí ngaⁿā nduudu yeⁿe nī. Maaⁿ ní dííⁿ nī chí cuuví 'cuūví nduucú n'dai, 'úú chí dichii'vé n'dii.

³⁰ Caati 'āā n'diichi ndúucū nduutinaáⁿ 'iiⁿyāⁿ chí dichó'o nī chí inadanguáⁿāi nús'uu.

³¹ 'Iiⁿyāⁿ miiⁿ chííⁿ chí s'néeⁿyaáⁿ nī chí cáávā nducyaaca 'iiⁿyāⁿ chí nadanguáⁿai yā 'iiⁿyāⁿ yeⁿe nuuⁿndí yeⁿé yā.

³² 'Iiⁿyāⁿ miiⁿ chí dēve ní cuuví dēve yeⁿē nducyaaca 'iiⁿyāⁿ chí nguéé yeⁿē ndaata Israel. Ní ca'a yā honor 'iiⁿyāⁿ yeⁿe nī chí 'iiⁿyāⁿ Israel yā.

³³ José ndúucū María ngeⁿe yiinu yā yeⁿe chí Simeón ngaⁿa yā yeⁿe saⁿā 'lííⁿ Jesús miiⁿ. ³⁴ Simeón miiⁿ di'viicū yā María ndúucū José. Ní caⁿa yā chíi yā chēcu sa María: 'Caandiveéⁿ nī. Saⁿā 'lííⁿ 'cūū ndāa sa chí neené 'yaaⁿ 'iiⁿyāⁿ na yáⁿāa nguéé i'téenu yā ní 'tiicá ntúūⁿ 'yaaⁿ 'iiⁿyāⁿ cu'téenu yā. Ní saⁿa 'lííⁿ 'cūū 'áámá seña ti nééné 'yaaⁿ 'iiⁿyāⁿ caaⁿmaⁿ yā contra yeⁿē sa. ³⁵ Chuū ní díiⁿ chí 'iiⁿyāⁿ cuuvi cádiinuⁿ yā yeⁿe ca'áámá cā'aama 'iiⁿyāⁿ taacā nadicádiinuⁿ yā na staava yeⁿe yā. Chuū ní tan'dúucā 'áámá machete 'uūví lados 'caāiⁿ chí cho'ōo alma yeⁿe n'dii María.

³⁶ Ná yaacú templo 'cūū, mííⁿ ntúūⁿ canee 'áámá n'daataá n'dai chí nguuví Ana. Ní ngaⁿa tá dendu'ū chí cuchii. N'daataá miiⁿ ní daiya Fanuel, chí yeⁿe ndaataá yeⁿe Aser. Ní Ana miiⁿ 'āā neené ndiicúu ta. Ch'iindivaacu tá taachi 'lííⁿ tá ní ndēēchē ndúuyū nūuⁿ cánee tá ndúucū isaⁿā yeⁿe tá. Maaⁿ ní 'āā n'daataá nguáⁿā tá. ³⁷ 'Āā cuūuⁿ ngeecú cuūuⁿ nduuyūú chí nduuví tá n'daataá nguáⁿāa. 'Áámá canee tá na yāacū templo yeⁿé Ndyuūs ní canéé tá ndíí nguuví ndii n'gaaⁿ ní dichí've tá Ndyuūs. Ní ndii nguee nga'diinú tá ti dámaāⁿ chí ngaⁿāngua'a tá. ³⁸ Hora mííⁿ nūuⁿ Ana miiⁿ cheⁿe tá yaacū templo ní ndee tá nduucú Dendyuūs, 'tíicā ngaⁿa ta: N'dii, Ndyuūs teé gracias n'dii cáávā dacua'a 'lííⁿ miiⁿ. Cuayiivi ní caⁿa ta chíi ta nducyáácá 'iiⁿyāⁿ chí canéé ngiinu 'áámá 'iiⁿyāⁿ chí nadinguáⁿai yā 'iiⁿyāⁿ Israel yā yeⁿē saⁿā 'lííⁿ miiⁿ.

**José ndúúcu María ndúúcu dacua'a
líí nandaá yā na yāā Nazaret**

³⁹Taachi José ndúúcu María ch'iuu díí yā nducuéⁿē chi ngaⁿa ley yeⁿe Señor Dendyuūs, tuu'mi ní cueⁿe ntuúⁿ yā ndúúcu saⁿā lííⁿ na yāāⁿ vaacú yā chi nguuví Nazaret yeⁿe yāⁿāa Galilea. ⁴⁰Saⁿā lííⁿ Jesús miiⁿ ngiita sa ní ngii ditiinu sa. Nééné deenu sa. Ní Ndyuūs dí'viicú taavi cá yā saⁿā lííⁿ miiⁿ.

**Saⁿā lííⁿ Jesús cheeti yáacú yeⁿe
Ndyuūs ndúúcu maestros**

⁴¹Nduuyu nduuyu taachi ndaā tiempo yeⁿe 'viicu yeⁿe pascua, tuu'mi ní chiida Jesús ndúúcu cheecu sa ngeⁿe yā yāāⁿ Jerusalén. ⁴²Ní taachi Jesús chii yā ndiichúúví nduūyū, 'iiⁿyāⁿ s'eeⁿ cueⁿe ntúuⁿ yā na yāāⁿ Jerusalén ndúúcu Jesús miiⁿ tan'dúúcā chi 'āā ngeⁿe yā nduuyu nduuyu cáāvā 'viicú mííⁿ. ⁴³Cho'ōo 'viicú miiⁿ, ní José ndúúcu María miiⁿ ní cunaⁿa yā. Nguéé tuumicadiínuuⁿ yā chi saⁿā lííⁿ Jesús miiⁿ canee sá na yāāⁿ Jerusalén. ⁴⁴'Iiⁿyāⁿ s'eeⁿ ní nadicadíínuuⁿ yā chi Jesús miiⁿ ní cunaⁿa sa ndúúcu 'iiⁿyāⁿ parientes yeⁿe yā. 'Iiⁿyāⁿ s'eeⁿ núúⁿmáⁿ nguuví ní chiica yā. Tuu'mi nan'nuúⁿ yā Jesús nguaaⁿ 'iiⁿyāⁿ yeⁿe yā ndúúcu 'iiⁿyāⁿ chi n'dai nduucú yā, ⁴⁵naati nguéé ndaacá yā saⁿā lííⁿ Jesús miiⁿ. Ní nguēcunéé yā snaⁿa yā na yāāⁿ Jerusalén miiⁿ chi n'nuúⁿ yā Jesús miiⁿ.

⁴⁶Ndíí ch'iuu iinū nguuví ní ndaacá yā Jesús na yáacú templo. Véé sá ndúúcu maestros chí ngi'cuéⁿe yā ley. Jesús miiⁿ ní íneeⁿ veeⁿ sa chí ngaⁿa yā ní tiinguuneeⁿ sá maestros yeⁿe chi ngaⁿa yā. ⁴⁷Nducyáácá 'iiⁿyāⁿ chi n'giindiveéⁿ yā chí ngaⁿā saⁿa lííⁿ Jesús miiⁿ ngeⁿe yíínú yā yeⁿe sa chí déenu sa ní nan'guēcútaⁿā sa chí ítiingúúneeⁿ yā saⁿa lííⁿ miiⁿ. ⁴⁸Taachí chíídá sá ndúúcu cheecu sa n'diichí yā Jesús miiⁿ cueⁿe

yiinú yā yeⁿe sa. Tuu'mi ní cheecu sa ní caⁿá yā chíi yā saⁿā lííⁿ: Díí, daiyá, ¿de'ē cuuvi chí 'tíicā dííⁿ di nduucú 'nū? Cuin'dííchí dí. Chiida di ndúúcu 'úú ya'āi n'dai staava yeⁿe 'nū 'íicú chíicá 'nū in'nuúⁿ 'nū díi.

⁴⁹Tuu'mi ní nan'guēcútaⁿā sa yeⁿe yā: ¿Dé'ē vee? ¿Dé'ē cúuví chí in'nuúⁿ ní 'úú? ¿'Áá nguéé deenu ndís'tii chí 'úú ní canéé chí cūnéé ndúúcu dendu'ū yeⁿe Chiidá?

⁵⁰'Iiⁿyāⁿ s'eeⁿ ní nguéé tuūmicadiínúúⁿ yā nduudu chí caⁿa daiyá yā Jesús miiⁿ chíi sá 'iiⁿyāⁿ.

⁵¹Tuu'mi ní cunaⁿa Jesús nduucú yā na yāāⁿ Nazaret miiⁿ ní 'neeⁿ veeⁿ sa yeⁿe yā. Cheecu sa miiⁿ ní nadacadiínúúⁿ yā tanducuéⁿē na staava yeⁿe yā. ⁵²Jesús miiⁿ ní n'giita sa ndúúcu n'dee n'dái vaadi deenu, níicú véé favor yeⁿe sa nanááⁿ Ndyuūs ní nanááⁿ 'iiⁿyāⁿ na iⁿ'yeeⁿdí 'cūú. Níicú 'āā ngeénū nduuyu yeⁿe sa.

**Juan chí ngeédínuūⁿ ní sa
ngaⁿa sa chí ndaacadaamí
'iiⁿyāⁿ yeⁿe nuuⁿndi yeⁿe yā**

(Mt. 3.1-12; Mr. 1.1-8; Jn. 1.19-28)

3 Saⁿa chí nguuví Tiberio César, 'āā ndíftiiⁿ'yuⁿ nduūyū chí ngaⁿa ntiinyúⁿ yā chí emperador yā. Ní saⁿā chí nguuví Poncio Pilato, ní gobernador yā yeⁿe yāⁿāa Judea. Saⁿā chí nguuví Herodes ní rey yā yeⁿe yāⁿāa Galilea. 'Íicú 'diinū Herodes miiⁿ chí nguuví Felipe ní rey yā yeⁿe yāⁿāa Iturea ndúúcu yāⁿāa Trachonite Ní saⁿā chí nguuví Lisaniás ní rey yā yeⁿe yāⁿāa Abilinia. ²Ní saⁿa Anás ndúúcu Caifás, saⁿā s'uuⁿ ní chiiduú n'geete ca yeⁿe yaacú yeⁿe 'iiⁿyāⁿ Israel. Tiempo miiⁿ ní Ndyuūs ní ca'á yā 'áámá nduudu n'dai Juan, chí daiyá Zacarías. Juan miiⁿ canee sa na yāⁿāa cuūⁿmáⁿ naachi nguéé ch'ēetinéé 'iiⁿyāⁿ. ³Juan miiⁿ ní cachii ca sa nducuéⁿē yāⁿāa chí snéé niiⁿnuúⁿ ná yíicú

Jordán. Ní Juan miiⁿ chii sá 'iiⁿyāⁿ chi canéé chi cuēdínuūⁿniⁿ yā nícu ndaacadaamí yā yeⁿe nuuⁿndi yeⁿé yā, nícu Ndyuūs nadich'ēécú yā nuuⁿndi yeⁿé yā. ⁴Chuū ní chii tan'dúúca chi profeta Isafas dingúuⁿ yā ndii cuaaⁿ vmaaⁿ na libro yeⁿe Ndyuūs yeⁿé:

'Caandiveeⁿ yú nduudu yeⁿe 'áamá 'iiⁿyāⁿ chi caaⁿmáⁿ yā yuudu na yáⁿaa cuūⁿmáⁿ naachi nguéé ch'ēetinéé 'iiⁿyāⁿ ní caⁿa yā 'tuuca: Cuundiyaáⁿ ní yúúni yeⁿe Señor Ndyuūs caati cuchii yā; nan'guáaⁿ ní 'aama yúúni cuaacu caavá yā. Didēevé ní staava yeⁿe ní ní cuuvi 'cuaáⁿ ní 'iiⁿyāⁿ miiⁿ taachi ndaa yā.

⁵Naachi yaanúū ní nduūti, núúⁿmáⁿ icyaⁿā ndúúcu nducyaaca yiicū nduuví neⁿe, yúúni 'cuéé nduuví cuaacu, yúúni chi nguéé neⁿe ní nduuví neⁿe.

⁶Nducyaaca 'iiⁿyāⁿ snaaⁿ yā 'iiⁿyāⁿ yeⁿe Ndyuūs, 'iiⁿyāⁿ chí nadinguáⁿai yā nducyaaca 'iiⁿyāⁿ.

⁷Juan miiⁿ ní ngaⁿa sá ngii sa 'iiⁿyāⁿ chí ndaa yā chí cuēdínuūⁿniⁿ sa 'iiⁿyāⁿ: Nds'tii ní tan'dúúca cúú 'tíicā nds'tii. ¿Du'ú chi 'cueeⁿ nds'tii chi cuuvi cáanu ní yeⁿe castigo taaⁿ chí cúchi? ⁸Diⁿ ní dendu'ú chi n'dáacā maaⁿ nícu 'cuuⁿmí ní 'iiⁿyāⁿ chí 'āā ndaacadaamí ní yeⁿe nuuⁿndi yeⁿé ní. Nguēe tucá'a ní caaⁿmaⁿ ní nguaaⁿ maaⁿ ní chi Abraham miiⁿ ní chiidá ní caati 'úú ngaⁿá ngii nds'tii chi Ndyuūs ní cuuvi díⁿ yā chí tuū s'eeⁿ ní chí cuuvi daiya Abraham. ⁹Ní cutiiiⁿ míⁿ ní 'āā canéé na díi'yu yáⁿá. Nducyaaca yáⁿá chí nguéé ngii n'guiⁿ n'daacā yeⁿe canee chi 'caaca yáⁿá míⁿ ní cūnuuⁿ na yaⁿā. 'Tiicá ntúúⁿ Ndyuūs díⁿ yā juzgar nducyaaca 'iiⁿyāⁿ.

¹⁰'Iiⁿyāⁿ s'uuⁿ ntiinguuneeⁿ yā Juan miiⁿ: ¿De'ē cuuvi díⁿ nū?

¹¹Juan miiⁿ ní nan'gueēcútaⁿā sa: 'Iiⁿyāⁿ chí 'uuví catecai yā, canéé chí ca'a yā 'áamá catecai 'iiⁿyāⁿ chí nguéé yeⁿe

yā. 'Iiⁿyāⁿ chí véé chí nge'e yā, canéé chí ca'a yā 'iiⁿyāⁿ chí nguéé yeⁿé yā.

¹²Ndaá ntúúⁿ 'iiⁿyāⁿ chí inn'guēe yeⁿe yáⁿaa chí Juan miiⁿ cuēdínuūⁿniⁿ sa 'iiⁿyāⁿ. Ní 'iiⁿyāⁿ s'eeⁿ caⁿa yā chí yā Juan: N'díi, maestro, ¿de'ē cuuvi díⁿ nū?

¹³Juan miiⁿ ní caⁿa sa chí sa 'iiⁿyāⁿ: Nguéé caaca ní chí mar 'aama ndo'lo tan'dúúca chí ngaⁿ la ley.

¹⁴Tuu'mi ní soldados tiinguunééⁿ sá Juan: Nús'uu, ¿de'ē cuuvi díⁿ nū? Ní Juan caⁿa sa chí sa 'iiⁿyāⁿ: Nguéé diduucú ní yeⁿe mar 'áamá 'iiⁿyāⁿ. Nguéé cunncaá caaⁿmaⁿ ní yeⁿe tanáⁿā 'iiⁿyāⁿ. Nícu 'cuēetinéé ní ndúúcu vaadi yeenú ndúúcu chí inadí've yā nds'tii.

¹⁵'Iiⁿyāⁿ s'uuⁿ snee yiinu yā Juan ní nducyaaca yā ní nadicádínuuⁿ yā na staava yeⁿe yā chí ¿'áá nguéé Juan chí Cristo? ¹⁶Tuu'mi ní Juan miiⁿ ní caⁿa sa chí sa nducyaacá yā: Cuaacu níⁿnyúⁿ 'úú ní ngeedínuūⁿniⁿ ndúúcu nuūⁿniⁿ; naati cuayiivi cuchii taamá yā chí n'dáacā n'dai ca ndúúcu poder yeⁿé yā chí ch'ēete taavi nguéé ti 'úú. Ní 'úú ní nguéé n'daācā ca chí cuuvi díⁿ n'daatií yíⁿmáⁿ yeⁿe ndaacuú yeⁿé yā. 'Iiⁿyāⁿ miiⁿ ní cuēdínuūⁿniⁿ yā ndúúcu Espíritu N'dai yeⁿé Ndyuūs ndúúcu yaⁿā. ¹⁷'Iiⁿyāⁿ miiⁿ ndēe yā ní díiⁿ yā tan'dúúca 'iiⁿyāⁿ chí didēevé yā trigo. 'Tíicā díⁿ yā ndúúcu 'iiⁿyāⁿ. Ndāa yā ndúúcu zaranda na ta'a yā. Naachí nadeevé yā trigo miiⁿ, divíi yā trigo miiⁿ ní nguain'dai yā chēeti dínnūⁿ. Ní 'neeⁿ yáⁿa yā deecú miiⁿ na nguuchí yaⁿā chí 'āā ntēe n'tuúvi. Deecú miiⁿ ní tan'dúúca 'iiⁿyāⁿ chí nguéé i'téenu yā Ndyuūs.

¹⁸Túúca ní ndúúcu n'dee n'dái ca chí caⁿā Juan miiⁿ, caⁿa sá chí 'cueeⁿ sa nduudu n'dai chí ngai 'iiⁿyāⁿ s'eeⁿ. ¹⁹Tiempo miiⁿ Juan miiⁿ ní yaa'vi neeⁿ sa rey Herodes miiⁿ chí canéé sá ndúúcu n'daataá yeⁿe 'dínnū sa ní yeⁿe tanducuéⁿe chí nguēe n'daācā chí díⁿ yā. N'daataá miiⁿ ní nguuvi tá Herodías.

²⁰Tuu'mi ní rey Herodes miiⁿ ní dífⁿ yā táámá nuuⁿndi chi ch'ete ca ní s'nuūⁿ chiichí yā Juan vácū.

Juan miiⁿ cheedinūⁿniⁿ yā Jesús

(Mt. 3.13-17; Mr. 1.9-11)

²¹ Cuayiivi taachí Juan ngeedinūⁿniⁿ yā n'dee n'dáí 'iiⁿyāⁿ, cheedinūⁿniⁿ ntūⁿ yā Jesús miiⁿ. Ní taachi Jesús miiⁿ ngaⁿangua'á yā nánguvi ní nánguāⁿ. ²²Ní ndaā Espíritu N'dai yeⁿé Ndyuūs vmnaaⁿ yeⁿé yā tan'dúúca'áámá paloma. Ní 'iiⁿyāⁿ s'eeⁿ ch'iindivéeⁿ yā 'áámá nduudu yeⁿé va'ai ch'eti nguvi chí ngaⁿá: Díí, daiyá chi neⁿe taaví ní yeenú taavi cáávā dii.

'iiⁿyāⁿ vmnááⁿ vmnaaⁿ yeⁿe ndaata yeⁿé Jesús

(Mt. 1.1-17)

²³ Jesús miiⁿ ní chíí yā ndíicú ndiichi ndúuyū taachí tuc'á yā ntíⁿnyúⁿ yeⁿé yā. Ndaata yeⁿe Jesús ní 'tíicā: 'iiⁿyāⁿ nadicádíinuⁿ yā chí Jesús miiⁿ ní daiya José. José miiⁿ ní daiya Elí. ²⁴Elí miiⁿ ní daiya Matat. Matat miiⁿ ní daiya Leví. Leví miiⁿ ní daiya Melqui. Melqui miiⁿ ní daiya Jana. Jana miiⁿ ní daiya José. ²⁵José miiⁿ ní daiya Matatías. Matatías miiⁿ ní daiya Amós. Amós miiⁿ ní daiya Nahum. Nahum miiⁿ ní daiya Esli. Esli miiⁿ ní daiya Nagai. ²⁶Nagai miiⁿ ní daiya Maat. Maat miiⁿ ní daiya Matatías. Matatías miiⁿ ní daiya Semei. Semei miiⁿ ní daiya José. José miiⁿ ní daiya Judá. ²⁷Judá miiⁿ ní daiya Joana. Joana miiⁿ ní daiya Resa. Resa miiⁿ ní daiya Zorobabel. Zorobabel miiⁿ ní daiya Salatiel. Salatiel miiⁿ ní daiya Neri. ²⁸Neri miiⁿ ní daiya Melqui. Melqui miiⁿ ní daiya Adi. Adi miiⁿ ní daiya Cosam. Cosam miiⁿ ní daiya Elmodam. Elmodam miiⁿ ní daiya Er. ²⁹Er miiⁿ ní daiya Josué. Josué miiⁿ ní daiya Eliezar. Eliezar miiⁿ ní daiya Jorim. Jorim miiⁿ ní daiya Matat. ³⁰Matat miiⁿ ní daiya Leví. Leví

miiⁿ ní daiya Simeón. Simeón miiⁿ ní daiya Judá. Judá miiⁿ ní daiya José. José miiⁿ ní daiya Jonán. Jonán miiⁿ ní daiya Eliaquim. ³¹Eliaquim miiⁿ ní daiya Melea. Melea miiⁿ ní daiya Mainán. Mainán miiⁿ ní daiya Matata. Matata miiⁿ ní daiya Natán. ³²Natán miiⁿ ní daiya David. David miiⁿ ní daiya Isaí. Isaí miiⁿ ní daiya Obed. Obed miiⁿ ní daiya Booz. Booz miiⁿ ní daiya Salmón. Salmón miiⁿ ní daiya Naasón. ³³Naasón miiⁿ ní daiya Aminadab. Aminadab miiⁿ ní daiya Aram. Aram miiⁿ ní daiya Esrom. Esrom miiⁿ ní daiya Fares. Fares miiⁿ ní daiya Fares. Fares miiⁿ ní daiya Judá. ³⁴Judá miiⁿ ní daiya Jacob. Jacob miiⁿ ní daiya Isaac. Isaac miiⁿ ní daiya Abraham. Abraham miiⁿ ní daiya Taré. Taré miiⁿ ní daiya Nacor. ³⁵Nacor miiⁿ ní daiya Serug. Serug miiⁿ ní daiya Ragau. Ragau miiⁿ ní daiya Peleg. Peleg miiⁿ ní daiya Heber. Heber miiⁿ ní daiya Sala. ³⁶Sala miiⁿ ní daiya Cainán. Cainán miiⁿ ní daiya Arfaxad. Arfaxad miiⁿ ní daiya Sem. Sem miiⁿ ní daiya Noé. Noé miiⁿ ní daiya Lamec. ³⁷Lamec miiⁿ ní daiya Matusalén. Matusalén miiⁿ ní daiya Enoc. Enoc miiⁿ ní daiya Jared. Jared miiⁿ ní daiya Mahalaleel. Mahalaleel miiⁿ ní daiya Cainán. ³⁸Cainán miiⁿ ní daiya Enós. Enós miiⁿ ní daiya Set. Set miiⁿ ní daiya Adán. Adán miiⁿ ní yeⁿe Dendyuūs.

Yáá'n'guiinūⁿ neⁿé sá tuu'vineeⁿ sa Jesús

(Mt. 4.1-11; Mr. 1.12-13)

4 Jesús ní ndiitúú yeⁿe Espíritu N'dai yeⁿé Ndyuūs 'iiⁿyāⁿ ní n'daa yā na yíicú Jordán. Espíritu N'dai yeⁿe Ndyuūs candéé yā Jesús na yáⁿáa cuū'máⁿ naachi nguéé ch'etinéeé 'iiⁿyāⁿ. ²Uūvi ngeecu nguvi caneeé yáá'n'guiinūⁿ nanááⁿ Jesús miiⁿ chí n'diichineeⁿ sa 'iiⁿyāⁿ. Nguéé de'ē vee che'é Jesús nguvi s'eeⁿ. Cuayiivi míⁿ chíí cuiicú yā.

³ Tuu'mi ní yáá'n'guiniūu" ca"na sa chii sa Jesús: Dii Jesús, ndúúti chi dii chi Daiya Dendyuūs dii caa"ma" dí cuuvi dí tuūu 'cūū chi nduuví pan. Ní nduuví pan ní cuuvi che'e di.

⁴ Jesús nan'güecútá"na yā: 'Túúca cánéé nguū" ná libro ye"é Dendyuūs: Nguéé dámaā" pan che'é 'ii"yā" ní cunduúchí yā caati ndúúcu tanducué"ē nduudu chi nga"á Ndyuūs cunduuchí yā nduuti chi cu'téenu yā.

⁵ Yáá'n'guiniūu" candée sa Jesús na 'áamá yiicū yáacú. Maa" nch'eté nūu" ch'i"i sa Jesús tanducué"ē naciones ye"ē f"yee"dí 'cūū. ⁶ Tuu'mi ní yáá'n'guiniūu" ca"na sa chii sa Jesús. 'Úú ní teé dii nuu"ma" i"yee"dí 'cuū chi cuuvi ye"ē di chi caa"ma" ntíi"nyu" dí ye"ē ndúúcu nuu"má" ch'etē naciones 'cūū ndúúcu chi nga"na ntii"nyu" ye"ē caati poder 'cūū ye"é. 'Áā du'ú nūu" chi ne"é chí" chí ca'á. ⁷ Ndúúti chi caantii"ya di nanaá" níícu cu'téenu di 'úú cuuvi ye"ē di tanducué"ē chuū.

⁸ Jesús ca"na yā chii yā sa"ā mii": Dii yáá'n'guiniūu" cuví di nanaá" caati 'túúca cánéé nguū" na libro ye"e Dendyuūs: Cu'téenu di Señor Ndyuūs ye"ē di, ní dámaā" 'caandivee" di ye"é 'ii"yā" mí" nūu".

⁹ Cuayivi candée yáá'n'guiniūu" Jesús mii" na yāā" Jerusalén ní cuhē sá ndúúcu yā na yáacú ye"ē yáacū templo. Ní ca"na sa: Nduuti chi dii chi Daiya Dendyuūs dii, cáávā di ndii 'múú" ndii na yá"āa. ¹⁰ Caati 'túúca cánéé nguū" cuáá" vmnaa" na libro ye"é Ndyuūs:

Ndyuūs dich'ó yā ángeles ye"e yā chi dí" yā cuidado ye"ē di.

¹¹ Ní ángeles cundée yā dii ndúúcu ta'á yā, ní nguéé cuuvi ya'ai ca'a di na tuūu.

¹² Jesús mii" nán'güecúta"na yā: 'Tucá ntúu" cánéé nguū" na libro ye"é Ndyuūs: Nguéé dii" di mar 'áamá cosa chí n'diichinee" di Señor Ndyuūs ye"ē di.

¹³ Taachí ch'iinu chi dii" yáá'n'guiniūu" chi n'diichinee" sa Jesús diví sa ye"é yā 'áamá tiempo.

Jesús tucá'a yā ntii"nyu" ye"é yā na yá"āa Galilea

(Mt. 4.12-17; Mr. 1.14-15)

¹⁴ Jesús mii" nngüecúnée yā na yá"āa Galilea ní canéé poder ye"e Espíritu N'dai ye"e Ndyuūs ndúúcu yā. Nducyáacá 'ii"yā" chicadímnuu" yā na nuu"má" na yá"āa cuua" 'diitúú ye"e chi n'daācā n'dai idif" Jesús. ¹⁵ Ní Jesús ng'icuee" yā na yaācū sinagogas ye"e 'ii"yā" Israel ye"e nducué"ē yáā" ní nducyaaca 'ii"yā" idich'eté yā Jesús.

Jesús canee yā na yāā" Nazaret

(Mt. 13.53-58; Mr. 6.1-6)

¹⁶ Ndaá Jesús na yāā" Nazaret naachí ch'iita yā. Ní tan'dúúca chi costumbre ye"é yā, nguuvi sábadó chí ntaavi'tuunúú" 'ii"yā" ye"e ndaata Israel ndáa yā na yaācū sinagoga mii" ní Jesús chééndii yā ní ch'ee" yā ye"e libro ye"e Ndyuūs. ¹⁷ Ní nan'guáa" yā libro mii" naachi nga"na ye"ē profeta Isaiás. Taachí nan'guaa" yā libro mii", ndaacá yā naachi cánéé nguū" chúu:

¹⁸ Espíritu ye"é Ndyuūs cánée yā nduucú, tí Espíritu N'dai ye"é Ndyuūs ndéevé yā 'úú chi 'úú ní caa"má" nduudu chí ngai ye"é Ndyuūs nanaá" 'ii"yā" chí ndaachí snee" ndúúcu nuu"ndi ye"e yā. Dich'ó yā 'úú chí dí" chí nduivā yen"e 'ii"yā" chí ya"ai staava ye"e yā, ní caa"má" chí nángua"ai 'ii"yā" ye"e nuu"ndi ye"é yā chí tan'duucā chí ca'á libertad 'ii"yā" chí snúu" vácūū, ní dí" chí inaa" 'ii"yā" cosa chí n'daācā chí nguéé déenu yā ye"ē caati maa" canee yā tan'dúúca 'ii"yā" chí ngueenáá", 'tiicá yā. Ní nadan'guaf 'ii"yā" chí

nguée n'daacā idiiⁿ ndúucu yā caati cuuvi n'daacā idiiⁿ ndúucu yā.

¹⁹Ní caaⁿmáⁿ yeⁿe tiempo chi n'dai taavi chi Ndyuūs ndeévé yā chi caaⁿmáⁿ, yeⁿe vaadi n'dai taavi yeⁿe yā.

²⁰Tuuⁿmi ní Jesús nan'gaadí yā libro yeⁿe Ndyuūs ní nanca'a yā 'iiⁿyāⁿ chi díⁿ yā ntiⁿnyuⁿ yeⁿe yaacū sinagoga miiⁿ. Ní cuayiivi Jesús ch'iindí yā. Nducyaaca 'iiⁿyāⁿ snee yā n'gínu yā yeⁿe Jesús. ²¹Jesús tucá'a yā caⁿa yā 'iiⁿyāⁿ s'eeⁿ: Maaⁿ cuuuⁿ ca'a chuū chi canee nguūⁿ cuááⁿ vnaaⁿ chi yeⁿe ndís'tii, chuū chi ch'iinu ch'iindiveéⁿ nī.

²²Nducyaáca 'iiⁿyāⁿ n'dáacā ngaⁿa yā yeⁿe Jesús. Ngeⁿe yínú yā yeⁿe nduudu chí n'dai chí ngaⁿa Jesús miiⁿ ní ngaⁿa yā: ¿Áá nguée sáⁿa 'cūū daiya José?

²³Ní caⁿa Jesús miiⁿ: Ndís'tii ní cuuvi nī nduudu 'cūū 'úú. N'dii 'iiⁿyāⁿ chi déenu nī diiⁿ yiicú nī 'iiⁿyāⁿ, diiⁿ yiicú maáⁿ nī n'dii. Tanducuéⁿe chi ch'iindiveéⁿ 'nū chi díⁿ nī na yááⁿ Capernaum, 'tiicá ntúūⁿ díⁿ nī 'muuⁿ yááⁿ vaacú nī.

²⁴Naati 'uu ní caⁿa chíí ndís'tii: Cuaacu níⁿnyúⁿ mar 'áámá profeta ní nguée ngíí inee yā na yááⁿ vaacú yā.

²⁵Cuaacu níⁿnyúⁿ ngaⁿa ngii ndís'tii: Tiempo chi chó'oo neené 'yaaⁿ n'daataá nguá'aa vee tá nguuaⁿ 'iiⁿyāⁿ Israel taachi profeta Elías cāneé yā iⁿyeedí 'cūū ní 'āā ntéé cheeⁿ cuuvi 'iinu ndúuyū canéé maⁿa tiempo miiⁿ. Ní ch'iidi cuiicu nuuⁿmáⁿ yáⁿaa yeⁿe 'iiⁿyāⁿ Israel.

²⁶Ní Ndyuūs nguée dichó'o yā Elías miiⁿ nanááⁿ nducyaaca n'daataá nguá'aa, dámaaⁿ 'áámá n'daataá nguá'aa yeⁿe táámá nación. Ní canee tá na yááⁿ Sarepta chi niiⁿnuúⁿ na yáⁿaa Sidón.

²⁷Ní tiempo taachi canéé profeta Eliseo na iⁿyeedí 'cūū, 'tiicá ntúūⁿ néené 'yaaⁿ 'iiⁿyāⁿ ndúúcū ca'ai chi lepra chí in'duuti yúutē yeⁿe yā naati nguée nducyaaca 'iiⁿyāⁿ s'eeⁿ nduuva yeⁿe yā, dámaaⁿ

saⁿā Naamán yeⁿe táámá nación chi yeⁿe yáⁿaa Siria.

²⁸Taachí 'iiⁿyāⁿ ch'iindiveéⁿ yā chuū nducyaaca yā na yaacū sinagoga miiⁿ neené nduuvi taaⁿ yā. ²⁹Ní ch'etti ndii yā tí neⁿe yā tun'daa yā Jesús cuaaⁿ chuva'āi yááⁿ miiⁿ ní candée yā Jesús miiⁿ ndii na yaacu n'dai yeⁿe yiicú chi yaacú ca yeⁿe yááⁿ miiⁿ. Ní 'iicu cuuvi cun'dáa yā Jesús miiⁿ. ³⁰Naati nguée cuuvi díⁿ yā ti Jesús miiⁿ ní cho'ó yā náavtaⁿa yeⁿe 'iiⁿyāⁿ s'eeⁿ ní cunaⁿa yā na vaacu yā.

'Áámá saⁿā chi canéé sa ndúúcū espíritu chi nguée n'daacā yeⁿe yááⁿn'guiinūⁿ

(Mr. 1.21-28)

³¹Cuayiivi Jesús nangua'ái yā na yááⁿ Capernaum yeⁿe yáⁿaa Galilea ní miiⁿ ngi'cueeⁿ yā 'iiⁿyāⁿ nguuvi sábadō chi nguuvi chí ntaavi'tuunúⁿ yā. ³²Ní 'iiⁿyāⁿ na yááⁿ miiⁿ ngeⁿe yiinú yā yeⁿe chi ngi'cueeⁿ Jesús, ti ngi'cueeⁿ yā ndúúcū poder tan'dúúcā 'áámá 'iiⁿyāⁿ chí ngaⁿa ntiⁿnyúⁿ yā.

³³Ní taachi snee Jesús na yaacu sinagoga míⁿ canee 'áámá saⁿā ndúúcū espíritu yeⁿe yááⁿn'guiinūⁿ. Espíritu miiⁿ diiⁿ chí saⁿā miiⁿ neené yuudu 'caí sa. ³⁴Ní espíritu miiⁿ ní caⁿa: N'dii, Jesús, yeⁿe yááⁿ Nazaret, cu'néeⁿ nī nús'uu. ¿D'éē canee yeⁿe 'nū nduucú nī? ¿'Áá ndāa nī chí di'cuiinú nī nús'uu? 'Úú n'diichí du'ú n'dii. N'dii ní 'iiⁿyāⁿ chí N'dai chí Daiya Dendyuūs n'dii.

³⁵Jesús ní yaa'vineeⁿ yā ní caⁿa yā: Dii espíritu n'gáadí dí cheendi di ní nan'dáa di yeⁿe sá 'tī. Tuuⁿmi ní espíritu yeⁿe yááⁿn'guiinūⁿ chindeēve sa sáⁿa 'cūū náavtaⁿa yeⁿe 'iiⁿyāⁿ s'eeⁿ ní nan'daā sa yeⁿe sáⁿa 'cūū. Nguée de'ē vee diiⁿ sa ndúúcū sáⁿa 'cūū.

³⁶Nducyaaca yā ní ngeⁿe yiinú yā ní ngaⁿa yā ngii yā vi: ¿D'éē nduudu chí 'túuca? 'iiⁿyāⁿ 'cúú ngaⁿa ntiⁿnyúⁿ yā es-

píritu yeⁿe yááⁿn'guiinūⁿ ndúú^c poder tan'dúú^cá 'áámá 'iiⁿntyéⁿē. Ngaⁿá yā chí nan'daá espíritu yeⁿe yááⁿn'guiinūⁿ ní nacan'daá.

³⁷ Ní nducyaaca 'iiⁿyāⁿ ngaⁿa yā yeⁿe Jesús miiⁿ nducueⁿē cuaaⁿ nducueⁿē yááⁿ cuááⁿ 'diituú.

**Jesús dííⁿ yā chi nduū^vā
yeⁿe indáⁿa Simon Pedro**

(Mt. 8.14-15; Mr. 1.29-31)

³⁸ Tuu'mi ní Jesús miiⁿ nan'dáa yā yaācū sinagoga miiⁿ ní ndaa yā va'ai yeⁿē Simón Pedro. Ní indáⁿā Simón Pedro miiⁿ ndéē 'aama 'iiⁿnūⁿ taaⁿ n'daataá ní 'iiⁿyāⁿ yeⁿe vaacu tá di'cuútu yā Jesús miiⁿ chí cunée yā ní nanduū^vā yeⁿē tá.

³⁹ Jesús can'dii yā naachi canée n'daataa miiⁿ ní caⁿa yā chí cuavii 'iiⁿnūⁿ miiⁿ. Hora miiⁿ 'iiⁿnūⁿ miiⁿ chivii yeⁿē tá. N'daataa miiⁿ ní hora miiⁿ ncueeⁿ nuuⁿ tá ní diiⁿ tá mandados yeⁿé 'iiⁿyāⁿ s'eeⁿ ní ca'a tá chí che'e yā.

**Jesús dííⁿ yā chi nduū^vā yeⁿe
'yaaⁿ n'dái 'iiⁿyāⁿ chí ngiitā**

(Mt. 8.16-17; Mr. 1.32-34)

⁴⁰ Taachí chiiya 'yáⁿā, 'yááⁿ n'dái 'iiⁿyāⁿ ndéē yā 'iiⁿyāⁿ chí ngiitā nanááⁿ Jesús. Nééné n'dee naaⁿ ca'ai ndii yā. Jesús miiⁿ ní yiin'duu tá'a yā vnaaⁿ ca'áámá ca'áámá 'iiⁿyāⁿ ní 'tífca nduuvā yeⁿe yā. ⁴¹ Ní yeⁿē 'yaaⁿ 'iiⁿyāⁿ chí ngiitā yā yinan'dáa espíritus yeⁿe yááⁿn'guiinūⁿ chí 'caí yā ní ngaⁿa yā: N'dii ní Daiya Dendyuūs n'dii. Tuu'mi ní Jesús miiⁿ ní yaa'vineeⁿ yā espíritus yeⁿe yááⁿn'guiinūⁿ ní nguéé 'cuúⁿ yā chí caaⁿmaⁿ sa ti espíritus yeⁿe yááⁿn'guiinūⁿ ní deenu sá chí Jesús miiⁿ chí Cristo.

**Jesús ní caⁿa yā nduudu
yeⁿé Ndyuūs na yāⁿāa Judea**

(Mr. 1.35-39)

⁴² Chidēeve táámá nguuvi Jesús miiⁿ ní cueⁿe yā chufa'ai yááⁿ miiⁿ na 'áámá lugar naachi nguéé ch'etinéé 'iiⁿyāⁿ. Ní 'iiⁿyāⁿ s'eeⁿ yeⁿe yááⁿ miiⁿya in'nuúⁿ yā Jesús ní ndaa yā naachi canée Jesús miiⁿ. Ní di'cuiitú yā chí nguéé cuvii Jesús yeⁿe yā. ⁴³ Naati Jesús miiⁿ ní ngaⁿa yā ngii yā 'iiⁿyāⁿ s'eeⁿ: Canée chíⁿ chí 'úú ní caaⁿmáⁿ yeⁿe nduudu ngai yeⁿē naachi Ndyuūs ngaⁿa ntiⁿnyúⁿ yā, nanááⁿ 'iiⁿyāⁿ yeⁿe tanáⁿā yááⁿ ti yeⁿē chúú chí Dendyuūs dicho'ó yā 'úú.

⁴⁴ Ní Jesús miiⁿ cueⁿé yā yááⁿ ndíí yááⁿ yeⁿe yáⁿāa Galilea ní ngaⁿá yā nduudu yeⁿé Ndyuūs na yaācū sinagogas naachi cueⁿé yā.

**Nduú^cū vaadi n'giinu yeⁿē
chí itungaaⁿ yā 'yaācā**

(Mt. 4.18-22; Mr. 1.16-20)

5 'Áámá tiempo taachi Jesús canée yā niiⁿnuúⁿ ná nuūⁿnīⁿyáⁿā chí nguuvi Genesaret, nééné 'yaaⁿ 'iiⁿyāⁿ ndaa yā nanáaⁿ yā ní chiitu yā chí cuuvi 'caandiveeⁿ yā nduudu yeⁿe Dendyuūs. ² Jesús n'diichi yā ná 'uū^vi barcos chí snée níⁿnuúⁿ na nuūⁿnīⁿyáⁿā. 'iiⁿyāⁿ chí itungaaⁿ 'yaācā miiⁿ 'āā nan'daá yā na barco s'eeⁿ ní cueⁿé yā naaⁿnuⁿ yā yáanā yeⁿe 'yaācā na nuūⁿnīⁿyáⁿā. ³ Tuu'mi Jesús sndáa yā na 'áámá barco chí yeⁿe Simón Pedro miiⁿ ní chii yā Simón Pedro chí 'āā caⁿa rá barco miiⁿ ndíí niiⁿnuúⁿ 'diituú nuūⁿnīⁿ miiⁿ. Tuu'mi ní Jesús ch'iindii yā na barco miiⁿ ní chí'cuaeⁿ yā 'iiⁿyāⁿ. ⁴ Taachi Jesús ch'iinu chí'cuaeⁿ yā 'iiⁿyāⁿ, tuu'mi ní caⁿa yā chii yā Simón: Cueⁿe di ndúú^cū barco ndíí ná yáanūⁿ ní 'caanuⁿ dí yaanā yeⁿe di nguaaⁿ nuūⁿnīⁿ ní tungaaⁿ dí 'yaācā.

⁵ Simón miiⁿ ní nan'guēcútaⁿa yā ní caⁿa yā chí yā Jesús: N'dii Maestro,

'āā nūúⁿmáⁿ yaaⁿ ch'æeti nduuchí 'nū ní dííⁿ ntiíⁿnyúⁿ 'nū ní nguéé d'ē væ ndaāca 'nū; naati ndúú^{cū} nduudu yeⁿe ní 'caanuúⁿ 'nū yaānā yeⁿé 'nū chæeti nuūⁿnīⁿ miiⁿ.

⁶Taachi 'caanuúⁿ yā yaānā miiⁿ chiitu 'yaācā chæeti yaānā miiⁿ chí yaānā miiⁿ ndiitúúⁿ nūūⁿ chííteeⁿ. ⁷Tuu'mi ní dita'a yā yeⁿé tanáⁿa 'iiⁿyāⁿ chí snúúⁿ yā chæeti taamá barco miiⁿ chí caⁿa yā ní cunneé yā Simón. 'Iiⁿyāⁿ s'eeⁿ ní ndaa yā ní chiitu 'yaācā nduu 'uuvi barcos chí nduu 'uuvi barcos neⁿe 'cuæchi ndii mááⁿ nuūⁿnīⁿ. ⁸Taachi Simón Pedro n'diichí yā chuū chííntii'yá yā nanááⁿ Jesús miiⁿ ní caⁿa yā chii yā Jesús miiⁿ: N'dii Señor, 'úú nguéé n'daācā 'úú chí cuchíí nanááⁿ n'dií, ti 'úú ní 'iiⁿyāⁿ nuūⁿndi 'úú.

⁹Simón Pedro miiⁿ ní néené ngeⁿe yinú yā. 'Tiicá ntúúⁿ 'iiⁿyāⁿ chí snéé yā ndúú^{cū} sa ngeⁿe yiinú yā cáávā yeⁿé chí diiⁿ Jesús chí 'iiⁿyāⁿ s'eeⁿ itúngaáⁿ yā 'yaācā chí 'yaaⁿ taaví tí. ¹⁰'Tiicá ntúúⁿ Jacobo ndúú^{cū} Juan, chí daiya Zebedeo, chí dáámá diiⁿ yā ntiíⁿnyuⁿ ndúú^{cū} Simón, dii'yá yā chíí. Ní Jesús caⁿa yā chíí yā Simón: Díí, Simón, nguéé 'va'a dí; ndii maaⁿ ní tan'dúú^{cā} chí ituungaaⁿ di 'yaācā yeⁿe nuūⁿnīⁿ, 'tíicā maaⁿ ní 'úú idííⁿ chí in'nuuⁿ dí 'iiⁿyāⁿ chí cuuvi caⁿá yā nduucú.

¹¹Taachi ndaa yā ndúú^{cū} barco miiⁿ niíⁿnuúⁿ 'diitúúⁿ nuūⁿnīⁿ, tuu'mi ní 'iiⁿyāⁿ s'eeⁿ s'neeⁿ yā ntiíⁿnyuⁿ yeⁿé yā ndúú^{cū} barco miiⁿ ndúú^{cū} nducuéⁿe chí snúúⁿ chæeti barco miiⁿ ní cueⁿe yā ndúú^{cū} Jesús.

**Jesús diiⁿ yā chí nduūvā yeⁿe
'áámá saⁿā ndúú^{cū} ca'ai lepra**

(Mt. 8.1-4; Mr. 1.40-45)

¹²Taachi Jesús miiⁿ ndaa yā na 'áámá yáāⁿ ní canéé yā miiⁿ, ndaa nanááⁿ Jesús 'áámá saⁿā chí ndii sa 'áámá ca'ai chí nguuvi lepra chí ín'duuti yuūtē yeⁿé sa. Taachí saⁿā miiⁿ n'diichi sa Jesús miiⁿ,

chííntii'ya sa can'dií sa ndii na yáⁿāa nanááⁿ Jesús miiⁿ. Ní chíica sa Jesús: N'dií Señor, ndúú^{ti} chí n'dií neⁿe ní, ní dííⁿ ní chí nduūvā yeⁿé.

¹³Tuu'mi ní Jesús miiⁿ n'doo ta'á yā ní tuu'ví yā saⁿā ní caⁿa yā: 'Úú ní neⁿé chí nduūvā yeⁿé di. Tuu'mi nūūⁿ nduūvā yeⁿé sa ní nduūví dæeve sá. ¹⁴Ní Jesús caⁿa yā chíí yā saⁿā miiⁿ: Nguéé cuuvi di mar 'áámá 'iiⁿyāⁿ chí nduuva yeⁿé di. Cueⁿe di ní 'cuuⁿmiⁿ di maaⁿ cuerpo yeⁿe di nanááⁿ chíiduú. Ní ca'a di nanááⁿ Ndyuūs ofrenda yeⁿé di yeⁿe chí nandu- uva yeⁿé di tan'dúú^{cā} chí ngaⁿa ley yeⁿe Moisés. Ní 'iicu cadíínuúⁿ nducyaaca 'iiⁿyāⁿ chí nduūvā yeⁿe di.

¹⁵Yeⁿe chí dííⁿ Jesús miiⁿ dāndoō ca, ní neené 'yaaⁿ 'iiⁿyāⁿ ndaa yā chí 'caan- diveéⁿ yā nduudu yeⁿe Jesús miiⁿ. Ní Jesús dííⁿ yā chí nduūvā yeⁿe 'iiⁿyāⁿ. ¹⁶Jesús cueⁿe yā na lugar naachi nguéé ch'æetinéé 'iiⁿyāⁿ chí caaⁿmaⁿngua'á yā.

**Jesús diiⁿ yā chí nduūvā yeⁿe 'áámá
saⁿā chí in'dúúví cuerpo yeⁿe sa**

(Mt. 9.1-8; Mr. 2.1-12)

¹⁷'Áámá nguuvi Jesús ní ngi'cueeⁿ yā 'iiⁿyāⁿ ní miiⁿ véé 'iiⁿyāⁿ fariseos chí dingúuⁿ leyes ndúú^{cū} maestros chí ngi'cueeⁿ ley. 'Iiⁿyāⁿ s'eeⁿ ní ngiicá yā yeⁿe táámá yáāⁿ ní yeⁿé nducyáácá yaāⁿ yeⁿe yáⁿāa Galilea ndúú^{cū} yáⁿāa Judea, níicú yeⁿe yáāⁿ Jerusalén. Jesús miiⁿ cuuvi dííⁿ yā chí nduūvā 'iiⁿyāⁿ s'eeⁿ ti poder yeⁿe Ndyuūs canéé nduucú yā. ¹⁸Tuu'mi ní ndaa ntúúⁿ n'duuvi saⁿā chí n'diichí yā Jesús. Ní saⁿā s'eeⁿ ní ndeé yā 'áámá saⁿā ndúú^{cū} ca'āi chí in'dúúví cuerpo yeⁿe sa na 'áámá camilla. Ní n'diíⁿ yā chí ndaa saⁿā miiⁿ chæeti va'āi nanááⁿ Jesús miiⁿ. ¹⁹Nguéé ndaāca yā taacā cundāa yā ndúú^{cū} saⁿa miiⁿ ti neené n'deéé 'iiⁿyāⁿ snuuⁿ yā. Tuu'mi ní 'iiⁿyāⁿ s'eeⁿ ní chæe yā tííⁿ va'āi ni divíi yā n'duuvi táátá tííⁿ va'āi. Ní di'cua'ái yā saⁿā na yiive naachi candííⁿ saⁿā miiⁿ

nanááⁿ Jesús. ²⁰ Taachí Jesús miiⁿ tuumi-cadífínuuⁿ yā chi véé vaadi i'teenu yeⁿé saⁿā s'eeⁿ caⁿā yā chii yā saⁿā: Díí saⁿā, 'úú nadach'ēecú nuuⁿndí yeⁿe di.

²¹ Tuu'mi ní 'iiⁿyāⁿ chi ngi'cueeⁿ ley ndúúcū 'iiⁿyāⁿ fariseos tuca'a yā nadi-cadífínuuⁿ yā ní caⁿā yā: ¿Du'u sáⁿa 'cūū chi duuchineeⁿ yā yeⁿe Ndyuūs? ¿Du'ū nadich'ēecu nuuⁿndi yeⁿē yú? Dámaaⁿ Ndyuūs cuuvi díⁿ yā 'tífca.

²² Jesús tuūmicadiinúⁿ yā chi nadicadífínuuⁿ 'iiⁿyāⁿ s'eeⁿ. Tuu'mi ní caⁿā yā chii yā 'iiⁿyāⁿ s'eeⁿ: Ndis'tiī, ¿dē'ē cúúví chí 'tífca inadícadífínuuⁿ ndís'tiī na staava yeⁿé ní? ²³ ¿Chee cá nguéé ngíⁿiī chí caaⁿmáⁿ: 'Āā nuuⁿndi yeⁿe di ní nch'ēēcū o ndúúncuééⁿ dí ní caaca dí? ²⁴ 'Túúca caⁿā chíí saⁿā chí ndís'tiī cuuvi déénu ní ti 'úú ní Saⁿa chí Daiyá Dendyuūs 'úú. Ní véé poder iⁿ'yeeⁿdí 'cūū chí inadach'ēēcú nuuⁿndi. Tuu'mi ní Jesús caⁿa yā chii yā saⁿa miiⁿ: Ncueeⁿ di, nta'a di yiive yeⁿē di ní cunaⁿā di na vaacu di.

²⁵ Tuu'mi ní saⁿā miiⁿ chí ndii chí ca'āī sa 'āā ndúúvā yeⁿē sa ní sta'ā sa yi-ive yeⁿē sa naachi cándiiti sa ní ngaⁿa sa: De'e chúúca ch'ēete Dendyuūs. Ní cunaⁿā sa naavtaⁿā yeⁿe 'iiⁿyāⁿ s'eeⁿ.

²⁶ Nducyáácá 'iiⁿyāⁿ cheⁿe yiinú yā ní neene dí'va'á yā ní caⁿa yā: De'ē chúúca ch'ēete Dendyuūs. Ní caⁿa yā: Maaⁿ ní n'diichi yú dendu'ū chí nguéé ta nn'diichi yú chí caⁿa yiinu yú.

Jesús yaa'ví yā saⁿā chí nguuvi Leví

(Mt. 9.9-13; Mr. 2.13-17)

²⁷ Cho'oo chúū, ní Jesús miiⁿ can'daa yā cachiicá yā ní n'diichi yā 'áámá saⁿā chí inn'guee yeⁿē impuestos yeⁿe yáⁿāa chí nguuvi sa Leví. Saⁿā miiⁿ ní vee sa naachí n'geeteé saⁿā chí inn'guee yeⁿē impuestos. Jesús miiⁿ ní yaa'ví yā: Dii, sáⁿā, cuchíí di caⁿa di nduucú.

²⁸ Tuu'mi ní s'neeⁿ sá ntiⁿnyuⁿ yeⁿē sa ndúúcū nducuéⁿē dendu'ū ní ndúccueⁿ sá ní cueⁿē sa ndúúcū Jesús.

²⁹ Saⁿa Leví miiⁿ caⁿa ntiⁿnyuⁿ sá chí in'nuūⁿ 'áámá comida ch'ēete n'dai na vaacu sa. Na vaacu sa miiⁿ véé 'yááⁿ saⁿā chí inn'guee yeⁿē impuestos ndúúcū tanáⁿā saⁿā. Nducyaa ca yā ní vee'tē yā ndúúcū Leví na mesa miiⁿ. ³⁰ Tuu'mi maestros chí ngi'cueeⁿ ley miiⁿ ndúúcū 'iiⁿyāⁿ fariseos chí díⁿ yā ley cunncā caⁿa yā yeⁿe discípulos yeⁿe Jesús ní caⁿa yā: ¿Dē'ē cúúví chí ndís'tiī ndúúcū Jesús nge'é ní ní ngi'i ní ndúúcū 'iiⁿyāⁿ chí inn'guee yeⁿe impuestos ndúúcū 'iiⁿyāⁿ nuuⁿndi? Chuū nguéé n'daācā.

³¹ Jesús ní n'gueecútaⁿa yā: 'iiⁿyāⁿ chí nguéé ngiitā nguéé neⁿe yā chí cuuvi yíícú yā. Dámaaⁿ 'iiⁿyāⁿ chí ngiitā neⁿe yā chí cuuvi yíícú yā. ³² 'Úú nguéé cuchíí chí yaa'ví 'iiⁿyāⁿ chí nadacadiinúⁿ yā chí n'dáaca yā chí nguéé dinuuⁿndí yā naati 'iiⁿyāⁿ chí véé nuuⁿndi yeⁿe yā ní 'íícú ndáácádáámí yā yeⁿe nuuⁿndi yeⁿe yā.

Jesús ngaⁿa yā yeⁿe chí nguéé ca'diinú 'iiⁿyāⁿ

(Mt. 9.14-17; Mr. 2.18-22)

³³ Tuu'mi ní 'iiⁿyāⁿ s'eeⁿ tiingūnéeⁿ yā Jesús: ¿Dē'ē cúúví chí discípulos yeⁿē Juan chí ngeedfínuūⁿ ní ndúúcū discípulos yeⁿē fariseos nééné n'deēe cuūví ní ca'diiⁿnúⁿ yā ní ngaⁿangua'á yā ní discípulos yeⁿe ní ní nge'e yā ní ngi'i yā?

³⁴ Jesús ní caⁿa yā chii yā 'iiⁿyāⁿ: ¿Chee yeⁿē maáⁿ ní cuuvi díⁿ ní chí nguéé che'e 'iiⁿyāⁿ chí nandaa naachi n'giindivaacu saⁿā neⁿe chí canéé saⁿā chí n'giindivaacu sa miiⁿ ndúúcú yā? Nguéé cuuvi ní. ³⁵ Naati ndaá nguuvi chí 'cuūví sā ní 'āā ntéé sa ndúúcú yā, tuu'mi ní 'iiⁿyāⁿ ca'diiⁿnúⁿ yā nguuvi miiⁿ.

³⁶ Caⁿa ntūūⁿ Jesús chíí yā 'iiⁿyāⁿ táámá ejemplo chí tēe nguēe daama: Mar 'áámá 'iiⁿyāⁿ nguéé 'caaca yā 'áámá

'taaⁿ tiinūⁿ ngai chí nguéeⁿ 'āā naaⁿnu yā chí n'dyaatá yā 'áámá catecaí yā ndicúú caati tiinūⁿ ngai miiⁿ ní cū'teeⁿ tínnūⁿ ndiicúú. Ní ndiicúú miiⁿ nguéeⁿ n'daacā dinááⁿ diiⁿ naachi n'dyaatá ndúúⁿcū chí ngai miiⁿ. ³⁷Tiicá ntúúⁿ mar 'áámá 'iiⁿyāⁿ nguéeⁿ ca'nuúⁿ yā vino ngai cheeti bolsa dífⁿmáⁿ 'iiti chí ndiicúú tan'dúúⁿcā chí diiⁿ 'iiⁿyāⁿ ndiicúú ti vino ngai miiⁿ ní chó'oo yaadi yeⁿ'ē ní diiⁿ chí 'cááncuúⁿ yíⁿmáⁿ ndiicúú. Ní vino miiⁿ ní cungéé ndíí yíⁿmáⁿ miiⁿ tuuví. ³⁸Cáávā chuū ca'nuúⁿ yā vino ngai miiⁿ cheeti bolsa dífⁿmáⁿ ngai ní nduu 'uuvi ní n'daacā canee yeⁿ'ē. ³⁹Mar 'áámá 'iiⁿyāⁿ chí ngi'i yā vino ndiicúú neⁿ'é yā cu'u yā vino ngai cuayiivi caati ngaⁿ'a yā chí vino chí ndiicúú chíⁿ chí n'dai nguéeⁿ ti vino ngai.

Discípulos yeⁿ'e Jesús sta'á yā trigo nguuvi chí ntaavi'tuunúúⁿ 'iiⁿyāⁿ Israel

(Mt. 12.1-8; Mr. 2.23-28)

6 'Áámá nguuvi sábadó chí ntaavi'tuunúúⁿ 'iiⁿyāⁿ Israel, Jesús cho'ó yā ndúúⁿcū discípulos yeⁿ'é yā 'áámá campo naachi véé trigo. Discípulos yeⁿ'e yā ní sta'á yā trigo ní chí yā tíiⁿ ndúúⁿcū ta'á yā ní che'e yā trigo. ²Tuu'mi ní n'duuví fariseos caⁿ'a yā chí yā discípulos yeⁿ'e Jesús: ¿De'ē cúúví chí ndíⁿstíi díⁿ ní cosas chí nguéeⁿ canee chí díⁿ ní ti contra yeⁿ'e ley yeⁿ'e nguuvi chí cánéé chí ntaavi'tuunúúⁿ?

³Jesús nan'guēcútaⁿ'a yā: ¿'Áá nguéeⁿ n'geēⁿ ndíⁿstíi na libro yeⁿ'é Ndyuūs tan'duucā chí diiⁿ rey David ndúúⁿcū 'iiⁿyāⁿ chí snéé ndúúⁿcū yā taachi cuūcu yā? ⁴David sndáa yā yaacū ndúúⁿcū 'iiⁿyāⁿ chí snéé ndúúⁿcū yā ní David sta'a yā pan chí canéé nátaí yeⁿ'e Ndyuūs ní che'e yā ní ca'á yā chí che'e 'iiⁿyāⁿ chí snéé ndúúⁿcū yā. David miiⁿ nguéeⁿ canee chí che'e yā pan ndúúⁿcū 'iiⁿyāⁿ chí snéé ndúúⁿcū yā ti dámaāⁿ chiiduú s'eeⁿ canee chí che'e yā pan miiⁿ.

⁵Ní Jesús caⁿ'a yā chí yā 'iiⁿyāⁿ s'eeⁿ: 'Úú ní Saⁿ'ā chí Daiya Dendyuūs ní 'úú ngíí ngaⁿ'á ntiíⁿnyuⁿ yeⁿ'e nguuvi chí ntaavi'tuunúúⁿ 'iiⁿyāⁿ.

Jesús diiⁿ chí nduuvā yeⁿ'e saⁿ'ā chí ndíí cheechi ta'ā sa

(Mt. 12.9-14; Mr. 3.1-6)

⁶Táámá nguuvi sábadó chí ntaavi'tuunúúⁿ 'iiⁿyāⁿ Israel, Jesús miiⁿ ní ndaa yā na yaacū sinagoga ní chí'cueeⁿ yā 'iiⁿyāⁿ. Míⁿ canee 'áámá saⁿ'ā chí ntíⁿ ta'a sa ta cuaacū sa. ⁷Maestros yeⁿ'e ley ndúúⁿcū 'iiⁿyāⁿ fariseos ngeenu yā Jesús miiⁿ caati neⁿ'e yā n'diichi yā nduuti chí idiíⁿ Jesús chí nduuva yeⁿ'e sa nguuvi chí intaavi'tuunúúⁿ yā, ní 'tíicā cuuvi caaⁿ'máⁿ yā nuuⁿndi yeⁿ'e Jesús miiⁿ. ⁸Naati Jesús miiⁿ déénu yā yeⁿ'ē chí nadicádiinuⁿ 'iiⁿyāⁿ ní caⁿ'a yā chí yā saⁿ'a chí ntíⁿ 'áámá ta'ā sa: Díí saⁿ'ā, nducueeⁿ dí ní cuééndii di náávtaⁿ'ā yeⁿ'e 'iiⁿyāⁿ s'eeⁿ. Saⁿ'ā miiⁿ ní cuééndii sa náávtaⁿ'ā yeⁿ'e 'iiⁿyāⁿ s'eeⁿ. ⁹Tuu'mi ní Jesús miiⁿ caⁿ'a yā chí yā 'iiⁿyāⁿ s'eeⁿ: 'Úú intiinguuneeⁿ ndíⁿstíi. ¿De'ē chí cuuvi diiⁿ yú nguuvi chí ntaavi'tuunúúⁿ 'iiⁿyāⁿ? ¿'Áá diiⁿ yú cosas chí n'daacā o cosas chí nguéeⁿ n'daacā? ¿'Áá n'daacā chí nanguaⁿ'āi yú vida yeⁿ'e 'iiⁿyāⁿ o 'caaⁿ'nuⁿ yú 'iiⁿyāⁿ?

¹⁰Jesús chíinu yā nducyaaca 'iiⁿyāⁿ chí snéé yā cuaaⁿ 'diitú yā ní caⁿ'a yā chí yā saⁿ'ā: N'doo di ta'ā di. Saⁿ'ā miiⁿ ní n'doo ta'ā sa ní ta'ā sa míⁿ 'āā nduūvā yeⁿ'ē sa. ¹¹'Iiⁿyāⁿ s'eeⁿ ní n'duuví taaⁿ n'dai yā ní yaaⁿ'vi yā ví'i: ¿D'éⁿ diiⁿ yú chí cuuvi tun'daa yú nuuⁿndi yeⁿ'e Jesús miiⁿ?

Jesús ndeéve yā ndu'u chí ndiichúúví discípulos yeⁿ'e yā

(Mt. 10.1-4; Mr. 3.13-19)

¹²Nguuvi s'eeⁿ Jesús cueⁿ'e yā 'áámá yīcū chí caaⁿ'maⁿ'nguaⁿ'á yā ní Jesús

miiⁿ ní núúⁿmáⁿ yaaⁿ caⁿangua^a yā. ¹³Ní taachi chideeve Jesús yaaⁿvi yā discipulos yeⁿe yā ní ndeeve yā ndiichúúví 'iiⁿyāⁿ yeⁿe nguaaⁿ discipulos s'uuⁿ ní caⁿa yā chi ndiichúúví 'iiⁿyāⁿ s'eeⁿ chi apóstoles. ¹⁴'Iiⁿyāⁿ s'eeⁿ ní 'túúcā nguuví yā: Simón chi nguuví ntúúⁿ yā Pedro; ndúúcu Andrés chi 'dínú Simón Pedro míⁿ, ndúúcu Jacobo, ndúúcu Juan, ndúúcu Felipe, ndúúcu Bartolomé, ¹⁵ndúúcu Mateo, ndúúcu Tomás, ndúúcu Jacobo chi saⁿa daiya Alfeo, ndúúcu Simón chi nguuví sa Zelote, ¹⁶ndúúcu Judas chi 'dínú Jacobo ndúúcu Judas Iscariote chi cuayivi chíⁿi sá duⁿú chí Jesús miiⁿ chi cuuvi 'caaⁿnúⁿ yā 'yā.

Jesús chi'cuéeⁿ yā 'yaaⁿ tááví 'iiⁿyāⁿ

(Mt. 4.23-25)

¹⁷Jesús nangua^aí yā yeⁿe yiicū miiⁿ ndúúcu apóstoles yeⁿé yā ní ndúúcu n'deēe n'dái discipulos yeⁿe yā ní cueⁿe yā 'áámá yáⁿaa chí yúúduu. Ní canee ntúúⁿ nduucú yā n'dee n'dái 'iiⁿyāⁿ yeⁿe yáⁿaa Judea ndúúcu yáⁿ Jerusalén ní yeⁿe yáⁿ s'eeⁿ 'diitúú nuuⁿniⁿyáⁿ ní yeⁿe yáⁿaa Tiro ndúúcu yáⁿaa Sidón. 'Iiⁿyāⁿ s'eeⁿ ní 'āā ndāa yā chí 'caandiveéⁿ yā yeⁿe chí ngi'cueeⁿ Jesús miiⁿ. Ní 'iiⁿyāⁿ chí ngííta yā neⁿé yā chí Jesús diiⁿ chí nduūvā yeⁿe yā. ¹⁸Ní 'iiⁿyāⁿ chí snéé yā ndúúcu espíritu yeⁿe yáⁿnguiinūⁿ ní Jesús diiⁿ yā chí nacanⁿdáa yeⁿe 'iiⁿyāⁿ s'eeⁿ ní ch'εnuu chií yeⁿé 'iiⁿyāⁿ s'eeⁿ. Ní 'iiⁿyāⁿ s'eeⁿ nduuvā yeⁿé yā. ¹⁹Ni nducyáácá 'iiⁿyāⁿ chí ngiita neⁿe yā tuuⁿvi yā Jesús miiⁿ ti véé cá poder yeⁿe yā chí diiⁿ yā chí nanduūvā yeⁿe yā.

Yeⁿé vaadi yeenú ndúúcu yeⁿe chí nguéé vaadi yeenú

(Mt. 5.1-12)

²⁰Tuuⁿmi ní Jesús n'diichí yā discipulos yeⁿe yā ní caⁿa yā chií yā 'iiⁿyāⁿ

s'eeⁿ: Dé'ε chúúca n'dai ndís'tií chí nguéé de'ε vee yeⁿe ní ti yeⁿe ndís'tií cuuvi naachí Ndyuūs ngaⁿa ntiíⁿnyúⁿ yā na va'ai cheeti nguuví.

²¹De'ε chúúca n'dai ndís'tií chí 'cueeⁿ cá ní libro yeⁿé Ndyuūs chí n'daācā ca canee staava yeⁿé ní. De'ε chúúca n'dai ndís'tií chí maaⁿ ní ngeecu ní nanááⁿ Ndyuūs ti neⁿe díⁿ ní nducuéⁿe chí cuaacu ti Ndyuūs ya'āi 'iinú yā ndís'tií.

²²De'ε chúúca n'dai ndís'tií taachi 'iiⁿyāⁿ yeⁿe iⁿyeedí 'cūú nguéé cuuvi snaaⁿ yā ndís'tií ní taachi 'iiⁿyāⁿ s'eeⁿ cuvii yā yeⁿe ndís'tií. Ní cunncaā díⁿ yā ndúúcu ndís'tií. Ní 'āā ntéé neⁿe yā 'caandiveéⁿ yā chí duuchí ní. Caaⁿmáⁿ yā chí nguéé n'daaca ndís'tií cucáāv 'úú chí Saⁿā chí Daiyá Ndyuūs. ²³Ndís'tií canéé chí yeenú n'dai ní nguuví miiⁿ cuuvi yeenú n'dai ca ní caati Ndyuūs téé yā chí cuuvi yeⁿé ní denduⁿ chí ch'εete n'dai taachi ndaa ní na va'ai cheeti nguuví. Ti ndii cuááⁿ vmnaaⁿ 'tiicá ntúúⁿ idiíⁿ 'iiⁿyāⁿ cosas chí nguéé n'daācā ndúúcu 'iiⁿyāⁿ profetas chí candéé yā nduudu yeⁿe Ndyuūs.

²⁴De'ε chúúca ndaachii yeⁿe ndís'tií chí véé cá yeⁿe ní caati 'āā yeenú ní yeⁿe nducuéⁿe yeⁿe iⁿyeedí 'cūú.

²⁵De'ε chúúca ndaachii yeⁿe ndís'tií chí nadacádínnuⁿ ní chí n'daācā canee ní nanááⁿ Dendyuūs ní nguéé n'giindiveéⁿ ní nduudu yeⁿé Ndyuūs ti cuayivi naachi neⁿé ní 'caandiveéⁿ ní ní nguéé cuuvi 'caandiveéⁿ ní. De'ε chúúca ndaachii yeⁿe ndís'tií chí maaⁿ ní n'gíⁿnyuⁿ ní ti cuayivi ní cuēcú ní ti ndaāchii ní.

²⁶De'ε chúúca ndaachii yeⁿe ndís'tií taachi nducyaaca 'iiⁿyāⁿ caaⁿmaⁿ n'daācā yeⁿe ní. Caati ndíí cuááⁿ vmnaaⁿ 'tíicá ngaⁿa 'iiⁿyāⁿ yeⁿe 'iiⁿyāⁿ profetas chí falso yā ní nguéé profetas yeⁿé Ndyuūs, ní nguéé candee yā nduudu yeⁿé Ndyuūs.

**Dineⁿe yú 'iiⁿyāⁿ chi
taaⁿ yā nduucú yú
(Mt. 5.38-48; 7.12)**

²⁷ Úú, Jesús, ní ngaⁿá ngii ndís'tií chi n'giindiveéⁿ nī nduudu chi ngaⁿá: Dinéⁿe ntúúⁿ nī 'iiⁿyāⁿ 'áará chi taāⁿ yā yeⁿe nī. Ní diiⁿ n'daacá nī ntúúⁿ ndúúcu 'iiⁿyāⁿ 'áará chi nguéé neⁿe yā ndís'tií. ²⁸ Di'viicú nī 'iiⁿyāⁿ 'áará chi caⁿa cuncáa yā ndúúcu nī. Ní caaⁿ'maⁿngua'a nī caavā 'iiⁿyāⁿ 'áará chi nguéé n'daacá díⁿ yā ndúúcu nī. ²⁹ Nduuti chi 'áamá 'iiⁿyāⁿ duuchineeⁿ yā yeⁿe nī ní n'geⁿe yā 'áamá tiicuaa náaⁿ nī, 'cuúⁿ nī chi díⁿ yā táamá vmnéⁿ'ēe nduuti chi neⁿ'é yā. 'Iiⁿyāⁿ chi divíi yā cotón yeⁿe nī, ca'ā ntúúⁿ nī catecai nī. ³⁰ Āā du'ú nūuⁿ 'iiⁿyāⁿ chi caaca yā cosa yeⁿ'é nī caavā necesidades yeⁿe yā, ca'á nī. 'Iiⁿyāⁿ chi cuta'á yā chi yeⁿe nī, 'āā ntéé nguεεcunée nī ndaaca nī. ³¹ Tan'dúúca chi ndís'tií neⁿe nī chi tanáⁿ'ā saⁿ'ā miiⁿ n'daacá diiⁿ sa nduucú nī, 'tiicá ntúúⁿ diiⁿ ndís'tií ndúúcu saⁿ'ā s'eeⁿ.

³² Ndúúti chi ndís'tií dinéⁿe nī 'iiⁿyāⁿ chi neⁿe ndís'tií, ¿dé'ē chi n'daacā idiíⁿ nī? Caati 'iiⁿyāⁿ chi nguéé n'daacā, 'tiicá ntúúⁿ idiíⁿ yā. ³³ Ndúúti chi ndís'tií n'daacā idiíⁿ nī ndúúcu 'iiⁿyāⁿ chi diⁿ'ndaacā nduucú nī, ¿dé'e chi n'daacā idiíⁿ nī? Caati 'iiⁿyāⁿ chi nguéé n'daacā, 'tiicá ntuúⁿ idiíⁿ yā. ³⁴ 'Tiicá ntúúⁿ, nduuti chi díⁿ nī prestar chiiⁿ chi yeⁿ'é nī 'iiⁿyāⁿ ní cunee ngiinú nī chi 'iiⁿyāⁿ miiⁿ caⁿ'á yā tee yā chiiⁿ chi yeⁿ'é nī, ¿dé'ē cuuvi chi 'iiⁿyāⁿ téé yā gracias ndís'tií? 'Tiicá ntúúⁿ idiíⁿ 'iiⁿyāⁿ chi nguεε n'daacā. ³⁵ Ndís'tií dineⁿ'é nī 'iiⁿyāⁿ s'eeⁿ chi taāⁿ yā yeⁿe nī. 'Tíicā diⁿ'ndaacá nī ndúúcu 'iiⁿyāⁿ chi nguéé ngii n'diichí yā ndís'tií. Díⁿ nī prestar cosa chi yeⁿ'é nī ní nguéé de'ē vee nadacadiinuⁿ cá nī yeⁿ'ē. Ní Ndyuūs téé yā ndís'tií cosas chi dendu'ú chi ch'εete ca yeⁿ'é yā taachi caⁿ'ā nī

na va'ai chēeti nguuvi ní cuuví ndís'tií daiyá Dendyuūs chi ch'εete taavi ca. 'Tíicā Ndyuūs téé yā cosas chí n'daacā 'iiⁿyāⁿ chi cuncáa chi nguéé caaⁿ'máⁿ yā: N'dii Ndyuūs gracias. ³⁶ 'Tiicá ntúúⁿ yá'ai 'iinú nī cááva 'iiⁿyāⁿ tan'dúúca Chi- idá nī Ndyuūs ya'ái 'iinú yā ndís'tií.

**Nguéé caaⁿ'maⁿ nī nuuⁿ'ndi
yeⁿe mar 'áamá 'iiⁿyāⁿ**

(Mt. 7.1-5)

³⁷ Nguéé caaⁿ'máⁿ nī nuuⁿ'ndi yeⁿ'é 'iiⁿyāⁿ ní Ndyuūs ní nguéé caaⁿ'maⁿ ntúúⁿ yā yeⁿ'é nī. Nguéé díⁿ nī condenar 'iiⁿyāⁿ ní Ndyuūs nguéé díⁿ yā condenar ndís'tií. Nadich'εécú nī nuuⁿ'ndi yeⁿ'e 'iiⁿyāⁿ ní Ndyuūs nadich'εécú yā nuuⁿ'ndi yeⁿ'e nī. ³⁸ Ca'á n'daacá nī 'iiⁿyāⁿ chi véé necesidades yeⁿ'é yā ní 'íicú Ndyuūs téé yā ndís'tií ní dicaadi n'dáaca yā chi cúunú chiichi ndíí tuunu cungéé na morral yeⁿ'é nī, caati Ndyuūs dicaadí yā ndís'tií ndúúcu maaⁿ caadi chí dicaadí nī.

³⁹ Jesús ngii yā 'iiⁿyāⁿ s'eeⁿ 'áamá ejemplo yeⁿ'e 'áamá nduudu chi 'téé nguεε daama. ¿'Áá cúuví diiⁿ 'áamá chi ngueenááⁿ candēē táamá chi ngueenááⁿ? ¿'Áá nguεε cun'dáá nūuⁿ nduu 'uuví yā na yiivi yá'āa? ⁴⁰ 'Áámá discípulo miiⁿ ní nguéé ch'εete cá yā nguéé ti maestro yeⁿ'e yā. 'Āā du'ú nūuⁿ chí neⁿ'e cuuvi Maestro, canee chí 'cuiinu 'cueeⁿ yā diⁿ'ndaaca yā ní cuuví yā tan'dúúca maestro yeⁿ'e yā.

⁴¹ Táacá cuuví chi maaⁿ nch'εeté nūuⁿ n'gíinu nī nuuⁿ'ndi chi diiⁿ tanáⁿ'ā 'iiⁿyāⁿ ní nguéé inaaⁿ nī nuuⁿ'ndi ch'εete chi díⁿ ni. ⁴² Nguéé n'daacā chi caaⁿ'máⁿ nī 'iiⁿyāⁿ yeⁿ'e chi díⁿ yā chi nguéé n'daacā nduuti chi ndís'tií diiⁿ nī cosas chi nguεε n'daacā. N'daacā ca chi ndaacadaamí nī yeⁿ'ē nuuⁿ'ndi chi diiⁿ nī ní 'íicú cuuvi caaⁿ'máⁿ nī yeⁿ'e 'iiⁿyāⁿ chi canéé chí diⁿ'ndaacá yā.

**'Áámá yá"á ní ngi"í
cucáávā n'gui'i ye"ē**

(Mt. 7.17-20; 12.34-35)

⁴³ N'gui'i ye"e yá"á chí n'dai, n'daacā chí cuuví n'gui'i ye"ē ní yá"á chí nguéé n'dai ní nguéé n'daacā n'gui'i ye"ē. Naati yá"á chí nguéé n'daacā nguéé cuuvi n'gui'i chí n'daacā ye"ē. ⁴⁴ Tíicá ti tuunu tuunu ca yá"á n'gi"i n'gui'i ye"ē. Nguéé n'giichi yā yaa" chí 'cuündi n'guífúii yaa" nguuví ye"ē, ndíí nguéé ndúú tuū"má yā uvas ye"ē dii"yu nduuti yaa". ⁴⁵ Tíicá ntúū" sa"ā chí n'dai idii" sa dendu'ú chí n'daacā chí nadacadíínuu" sa na staava ye"ē sa chí n'daacā. Sa"ā chí cunncaā idii" sa tanducué"ē chí nadacadíínuu" sa na staava ye"ē sa caati staava ye"ē sa nguéé n'daaca. Nduudu chí nga"á sa ngiica ye"e chí ndiituu na staava ye"ē sa.

**Ye"ē ndúú 'uúví cimientos
ye"é nduu 'uuví va'āi**

(Mt. 7.24-27)

⁴⁶ Ca"na ntúū" Jesús: ¿De'e cúúví chí ndís'tií nga"á ní ngi"i ní 'úú: N'dií, Señor ye"é, n'dií, Señor ye"é, ní nguéé 'caandiveé" ní chí nga"á? ⁴⁷ 'Úú cuuvi ndís'tií, du'ú 'ii"yā" chí chíi nanaá" ní n'giindiveé" nduudu ye"é ní n'daacā idii" yā tan'dúúca chí nga"á, ⁴⁸ 'ii"yā" mii" tan'dúúca 'áámá sa"ā chí din'dái sa vaacu sá. Chiinú yáanuū" n'daaca sá ní s'nuū" sa cimientos ye"ē vmnaa" 'áámá yáává. Ní taachi chíi ya 'áámá cuuvi na"ā ní ch'iita yíicú ní diituu n'dái che"ē nuū"ni" mii". Ní nuū"ni" mii" nguéé cuuvi dii" di'nú"u va'āi mii" ti n'daacā candúúu na yáává mii". ⁴⁹ Naati 'ii"yā" chí nguéé ch'iindiveé" yā nduudu ye"é ní nguéé idii" yā tan'dúúca chí nga"á 'ii"yā" mii" tan'dúúca 'áámá sa"ā chí din'dái sa vaacu sa na ya"á ndúútií ní nguéé ndúúcu cimientos. Ní diituu n'dai che"é nuū"ni" mii" ní va'āi mii" maa"nch'eté

nūu" chindeeve ní cunncaā ntuūvii va'āi mii".

**Jesús idii" yā chí nduuvā ye"e 'áámá
mozo ye"e capitán romano**

(Mt. 8.5-13)

7 Taachí Jesús ch'ínú ngi'cuee" yā 'ii"yā", tuu'mi ní cue"é yā na yaā" Capernaum. ² Ná yāā" mii"ya canéé 'áámá sa"ā capitán romano ye"ē soldados. Ní na vaacu capitán mii" cánéé 'áámá sa"ā mozo chí idii" mandado ye"ē sa. Néené ne"e sa mozo ye"ē sa ní néené ya'āi 'iinu sa ti mozo ní neené ya'āi ngiitā sa. 'Āā cháā 'cuūví sa. ³ Taachi capitán mii" ch'iindivee" sa chí Jesús mii" díí" yā vaadi n'giinu, capitán mii" dicho'o sa n'dúúví 'ii"yā" Israel chí caa"ma" nti"nyú" yā na yaacū ye"e 'ii"yā" Israel chí 'ii"yā" s'ee" di'cuíftu yā Jesús mii" chí ca"na yā na vaacu sa ní díí" yā chí nduuvā ye"e mozo ye"ē sa. ⁴ 'ii"yā" s'ee" cue"e yā nanáá" Jesús mii". Ní di'cuíftu yā Jesús, ní ca"na yā chíi yā 'ii"yā": N'dií Jesús, 'caandiveé" ní caati capitán ye"é 'nū ní neené n'dai yā chí díí" ní chí nduuvā ye"e mozo ye"e yā. ⁵ Caati capitán romano mii" ní idiné"e yā 'ii"yā" ye"e yú chí ye"e ndaata Israel, ní din'dái yā yáacū sinagoga ye"e yú.

⁶ Tuu'mi ní Jesús mii" cue"e yā ndúúcu 'ii"yā" s'ee". Ní taachi 'āā cháā ndaa ni"nuú" yā ná va'ai ye"ē sa, capitán mii" dicho'o sa n'duuví amigos ye"e sa chí caa"má" yā cuuvi yā Jesús mii: N'dií, Señor, nguéé tuuviinú" ní ti 'úú nguéé neené n'dai 'úú chí cundaa ní ch'eti va'ai ye"é. ⁷ Maa" ní deenú chí mar 'áámá 'ii"yā" ní neené n'dai chí cuuvi ndaá nanáa" ní. Dámaa" chí caa"ma" nti"nyu" núú" ní ní nduuvā ye"e mozo chí dii" mandado ye"é. ⁸ 'Āā de'e nuū" chí caa"ma" nti"nyú" ní ye"ē tuu'mi ní cuuvi ch'ó'oo. Tíicá ntúū" 'úú ní véé 'ii"yā" chí nga"na nti"nyú" yā ye"é. 'Úú ní capitán ní nga"na nti"nyú" ye"e solda-

dos chi canee maaⁿ poder yeⁿé. Ngaⁿá ngíí 'áamá sa: Cunaⁿa di, ní inaⁿa sa. Ní ngaⁿá ngíí taama sa: Cuchíí di, ní chii sa. Ní ngaⁿá ngíí mozo chi diiⁿ mandado yeⁿé: Diiⁿ di ntiíⁿnyúⁿ cūū, ní diiⁿ sa.

⁹ Ní taachí Jesús ch'iindiveéⁿ yā nduudu yeⁿé sa chi ngaⁿa amigos yeⁿe capitán miiⁿ chéⁿé yiinu yā yeⁿe capitán. Ní nguēcundíí yā n'diichi yā 'iiⁿyāⁿ chi snée yā cuaaⁿ daami yā ní caⁿa yā. 'Úú ní ngaⁿá ngíí ndís'tii: 'Úú nguéé indaacá mar 'áamá 'iiⁿyāⁿ yeⁿe ndaata Israel chi i'teenú n'dai cá yā Ndyuūs tan'dúucā capitán miiⁿ.

¹⁰ Taachí ndaa 'iiⁿyāⁿ s'eeⁿ va'ai chi capitán miiⁿ dichó'o sa, 'iiⁿyāⁿ s'eeⁿ n'diichí yā chí mozo miiⁿ chi nééné ngííta sa ní 'āā nduuvá yeⁿé sa.

Jesús nadanduuchí yā daiya 'áamá n'daata nguá'āa chi 'āā tiná'ā sa

¹¹ Cuayiivi, Jesús miiⁿ cheⁿe yā na yāā Nain ndúucū discípulos yeⁿe yā ndúucū 'yaaⁿ n'dái 'iiⁿyāⁿ chi cueⁿe ndúucu yā. Ní chúú chii. ¹² Taachí Jesús ndaa yā niiⁿnuúⁿ ná cheendi va'āi yeⁿe yāā miiⁿ, n'diichí yā chi ndēē 'iiⁿyāⁿ 'áamá caja tiná'ā canuúⁿ yúúní chí cueⁿe yā cuēchi yā. Tiná'ā miiⁿ 'áamá n'dyá'ā sa yeⁿé chēcú sá. Ní n'daata miiⁿ ní n'daataá ngua'a yā. Ní neené 'yaaⁿ 'iiⁿyāⁿ yeⁿe yāā miiⁿ snee yā ndúucu yā. ¹³ Taachí Jesús n'diichi yā n'daataá miiⁿ, nééné yā'ai 'iinú yā n'daataá ní caⁿa yā chii yā n'daataá miiⁿ: Nguéé cuēcú di.

¹⁴ Tuu'mi ní Jesús miiⁿ ní cueⁿe ndaa yā ní tuu'ví yā caja yeⁿe tina'ā. Ní 'iiⁿyāⁿ chi ndēē yā caja miiⁿ ch'etindii yā. Ní Jesús caⁿa yā: Saⁿā 'díí' 'úú yaa'ví dii, nducueⁿ di.

¹⁵ Tuu'mi ní 'nuūⁿndi saⁿā 'díí' chí n'dii ní tucá'a sa ndēē sa. Ní Jesús miiⁿ ní nca'á yā saⁿa 'díí' chēcú sa. ¹⁶ Nducyaaca 'iiⁿyāⁿ di'va'á yā yeⁿe chí n'diichi yā ní caⁿa yā: De'ē chúucā ch'ēete Ndyuūs. Ní caⁿa yā chí 'áamá profeta ch'ēete ndāa

yā nguaaⁿ nús'uu chí Ndyuūs dicho'ó yā caati ya'ai 'iinú yā yeⁿé s'uuúⁿ chí nación yeⁿé yā.

¹⁷ 'Tíicā ngaⁿa 'iiⁿyāⁿ s'eeⁿ yeⁿe Jesús miiⁿ. Ní caⁿa yā chuū núú'máⁿ na yáⁿāa Judea ndúucū nuuⁿmáⁿ yāāⁿ cuaaⁿ 'diituú.

Juan chi ngēédínuūⁿniⁿ dichó'o yā nduu 'uuvi 'iiⁿyāⁿ nanááⁿ Jesús

(Mt. 11.2-19)

¹⁸ Discípulos yeⁿe Juan chi ngēédínuūⁿniⁿ caⁿa yā chii yā Juan miiⁿ yeⁿé tanducueⁿē dendu'ū chí diiⁿ Jesús. Tuu'mí Juan miiⁿ yaa'vi yā 'uuvi discípulos yeⁿe yā nanááⁿ yā. ¹⁹ Ní dichó'o yā discípulos s'eeⁿ chí ntinguuneeⁿ yā Jesús miiⁿ chuū: ¿'Áá n'dii Cristo chí canéé chí ndaa o 'āā cūnee ngínú 'nū taama yā? ²⁰ Discípulos yeⁿe Juan miiⁿ cueⁿe yā ní ndaa yā nanááⁿ Jesús miiⁿ ní caⁿa yā chí yā Jesús: N'dii Señor, Juan chí ngēédínuūⁿniⁿ dichó'o yā nús'uu chí ntingúúneeⁿ 'nū n'dii: ¿'Áá n'dii chí canéé chí ndaa o 'āā cūnee ngínú 'nū taama yā?

²¹ Tiempo miiⁿ Jesús dííⁿ yā chí nduuvá yeⁿe 'yaaⁿ n'dai 'iiⁿyāⁿ yeⁿé ca'ai chí ndíí yā ní yeⁿe ca'ai chí véé espíritu yeⁿe yāā'n'guiinūⁿ ndúucu yā. 'Tiicā ntúūⁿ dííⁿ yā chí snaaⁿ 'iiⁿyāⁿ chí nguēenááⁿ. ²² Tuu'mi Jesús nán'guēcútaⁿa yā yeⁿe nduu 'uuvi discípulos yeⁿe Juan miiⁿ ní caⁿa yā: Ndís'tii, cunaⁿa ní ní cuuvi ní Juan miiⁿ yeⁿe nducueⁿē chí n'diichi ní ndúucū chí n'giindiveéⁿ ní. 'iiⁿyāⁿ chí nguēenááⁿ ní inaaⁿ yā, 'iiⁿyāⁿ chí nguéé ngii ngíicá yā ní ngiica yā, 'iiⁿyāⁿ chí ndíí ca'ai chí lepra chí in'duuti yuūtē yeⁿé yā ní nduuva yeⁿé yā, 'iiⁿyāⁿ chí chētúú ní n'giindiveéⁿ yā, 'iiⁿyāⁿ chí ndíí ní nduuchí yā yeⁿé nguaaⁿ tiná'ā, ní 'iiⁿyāⁿ chí ndaachí snee yā 'úú ní ngaⁿá nanááⁿ yā nduudu yeⁿé Ndyuūs, nduudu ngai

chí yeⁿē chí nanguaⁿāi 'iiⁿyāⁿ. ²³De'ē ch'úucā n'dai 'iiⁿyāⁿ chí nguéé cunnchá ch'eenú yā 'úú ndúúcu nduudu yeⁿé.

²⁴Taachi cueⁿe discípulos yeⁿe Juan chí dicho'ō Juan miiⁿ, tuu'mi ní Jesús tucá'a yā caⁿa yā chíi yā 'iiⁿyāⁿ chí snee yā ndúúcu yā yeⁿe Juan chí ngeedínuūⁿniⁿ miiⁿ: ¿De'ē cheⁿe ní n'diichi ní na yáⁿāa cuuⁿmaⁿ naachi nguéé ch'etinéé 'iiⁿyāⁿ? ¿'Áá 'áámá ndúú chí idin'núⁿu 'yúúné? Nguéé 'tíficā.

²⁵¿Du'ú cheⁿe ní n'diichi ní tuu'mi? ¿'Áá 'aama saⁿā chí canúuⁿ sa catecai n'dai sa? Deenu ní chí 'iiⁿyāⁿ chí n'daācā catecai yā nguéé n'geenu yā ngii ní snée yā na va'ai yeⁿē rey. ²⁶¿Du'ú cheⁿé ní n'diichi ní tuu'mi? ¿'Áá 'áámá profeta chí ngaⁿa nduudu cuaacu yeⁿé Ndyuūs? 'Úú ní ngaⁿá ngii ndís'tií chí 'tíficā. Cheⁿé ní n'diichi ní 'áámá 'iiⁿyāⁿ ch'ēete ca yā nguéé ti tanáⁿā profetas.

²⁷Chuū canéé nguūⁿ yeⁿe Juan miiⁿ na libro yeⁿé Ndyuūs ndii cuááⁿ vmaaⁿ: Cun'diichi ní. 'Úú ní dicho'ó 'áámá saⁿā chí caaⁿmaⁿ sā nduudu cuaacu yeⁿé nanááⁿ dii. Ní saⁿā miiⁿ ní 'cu- undiyaáⁿ sa yúúni cáávā dii.

²⁸'Úú ní ngaⁿá ngii ndís'tií chí nguaaⁿ nducyaaca saⁿā chí ch'iindiyaāⁿ sa na iⁿ'yeeⁿdí 'cūū nguéé táámá saⁿā chí ch'ēete ca sa ti 'āā Juan miiⁿ chí ch'eedínuūⁿniⁿ sa. Naati 'iiⁿyāⁿ chí ndi- icuúⁿ ca yā naachí Ndyuūs ngaⁿa nti- iⁿ'nyúⁿ yā ní ch'ēete cá yā nguéé ti Juan miiⁿ.

²⁹Neené n'dai 'iiⁿyāⁿ ndúúcu 'iiⁿyāⁿ chí inn'guéé yeⁿē yáⁿāa ch'iindivééⁿ yā nduudu chí ngaⁿa Jesús. Ní 'iiⁿyāⁿ s'eeⁿ chí'téenu yā nduudu yeⁿe Juan miiⁿ ní diíⁿ yā tan'duucā Ndyuūs neⁿe yā. Ní Juan miiⁿ ch'eedínuūⁿniⁿ yā 'iiⁿyāⁿ.

³⁰Naati 'iiⁿyāⁿ fariseos miiⁿ ndúúcu maestros yeⁿe ley, 'iiⁿyāⁿ s'eeⁿ nguéé neⁿe yā Juan ndíi nguéé s'téenu yā ndu- udu yeⁿe Juan miiⁿ. Ní nguéé ch'eedin- uūⁿniⁿ yā. ³¹Jesús miiⁿ caⁿa yā chíi yā

'iiⁿyāⁿ: ¿De'ē cuuví nadidaamá ndúucu tan'dúucā 'iiⁿyāⁿ chí snée yā na iⁿ'yeeⁿdí 'cūū maaⁿ? ¿De'ē tan'duucá yā? ³²'Iiⁿyāⁿ s'eeⁿ tan'dúucā saⁿā ngaiyāá chí n'geēte sa niiⁿvēē ní duūchī sa ndúúcu ví'i ní n'gai sa compañeros yeⁿe sa. Ní ngaⁿá sa ngii sa ví'i: Tiiví 'nū flauta cáávā baile ní nguéé nde'éi ní. Ngiiita 'nū canciones chí ndaachíí ní nguéé ch'ēcu ní. ³³Ní ndaā Juan chí ngeedínuūⁿniⁿ chí 'aama 'iiⁿyāⁿ chí nguéé cheⁿe yā pan ní nguéé chí'i yā vino ní ndís'tií ní ngaⁿa ní yeⁿe yā: Juan miiⁿ ní cánée yā ndúúcu espíritu yeⁿe yááⁿ'n'guiniūⁿ. ³⁴'Úú ní ndaá, 'úú Saⁿā chí Daiya Dendyuūs 'úú. Ní nge'é ní ngii'í ní ndís'tií ngaⁿa ní yeⁿe 'úú: 'Cuiⁿdííchí ní, 'iiⁿyāⁿ chí n'deē nge'é yā ní yaāⁿ n'dái ngii'í taaví yā vino. Ní ngaⁿa ntuúⁿ ní chí 'úú 'áámá amigo yeⁿe 'iiⁿyāⁿ chí inn'guéé yeⁿe yáⁿāa ndúúcu 'iiⁿyāⁿ chí diiⁿ nuuⁿndi. ³⁵Caati nducyaaca 'iiⁿyāⁿ deenu yā chí vaadi deenu miiⁿ ní yeⁿe Ndyuūs. Ní 'iiⁿyāⁿ ch'iⁿ'í yā vaadi deenu miiⁿ cáávā dendu'ū chí n'daācā chí diíⁿ yā ti yeⁿe Ndyuūs 'iiⁿyāⁿ.

Jesús cueⁿe yā na vaacu Simón chí saⁿā fariseo

³⁶'Áámá saⁿā fariseo di'cuítu sa Jesús chí ch'éé yā ná váacu sá. Tuu'mi ní Jesús sndaá yā ná va'ai yeⁿe saⁿā fariseo miiⁿ ní ch'iindi yā na mesa ndúúcu sa. ³⁷Tuu'mi ní 'áámá n'daataá chí véé nu- uⁿndi yeⁿe ta chí canee tá yeⁿe yááⁿ miiⁿ, taachí chicadíínuuⁿ tá chí Jesús miiⁿ canée yā na va'ái yeⁿe saⁿā fariseo ní vee yā na mesa, n'daataá míⁿ ndaa ta ní ndéé ta 'áámá caja yeⁿē aceite perfume. ³⁸N'daataa míⁿ chííntii'ya tá na ca'a Jesús ní ngeécu tá. Ní ndúúcu nuūⁿniⁿ nduutináaⁿ tá naaⁿnu tá ca'a yā ní nadideēve tá ca'a yā ndúúcu yuūdū tiíⁿ tá. Ní 'neeⁿcheendi ta ca'a yā ní chíi tá aceite perfume ca'a yā. ³⁹Taachí sáⁿā fariseo miiⁿ n'dííchi sa chí diiⁿ n'daataá miiⁿ, tuu'mi nadicadíínuuⁿ sa ní caⁿā sa

nguáán maān sa 'tíicā: Ndúúti chi sá"n'a 'cūu profeta sa, tuu'mi ní deēnū sa du'ū n'daāta 'cūu chi ituu'vī tá sa"ā ti véé nuu"ndi ye"ē tá. ⁴⁰ Tuu'mi ní Jesús mii" ca"n'a yā chiī yā sa"n'a fariseo mii": Dii, Simón, véé de'ē chi cuuvi dii. Simón mii" ní n'gueecúta"n'a sa ní ca"n'a sa: Maestro, caa"ma"n nī.

⁴¹ Jesús ca"n'a yā ejemplo 'cūu: 'Uūvi 'ii"yā"n can'dícu yā ye"e 'áámá sa"ā. 'Áámá yā ní can'dícu yā nyu"u ciento caadi, taama yā ní 'uūvi ngeecu ndi-ichi caadi. ⁴² Naati 'ii"yā"n s'ee" ní nguéé tuūmī mii" ye"e yā chí nadí'v'e yā. 'Āā ntéé ndaaca yā tuūmī. Sá"ā chí chinnee mii" ní nadach'ēcú sa ye"ē ndúú 'uuvi sa. Maa"n ní cuuvi di 'úú, ¿cheē cá sa"ā s'ee" ne"e cá yā 'ii"yā"n mii"?

⁴³ Simón mii" nan'gueecúta"n'a yā: 'Úú inadacádiinúú" chi diné"e ca yā sa"ā chí n'deēe ca can'dícu mii". Jesús nan'guaacúta"n'a yā: N'daācā inadacadínuu" di.

⁴⁴ Tuu'mi ní nguēcundí Jesús naachi canéé n'daataá mí"n ní ca"n'a yā chiī yā Simón: ¿'Áá ínaa" di chi dii" n'daātā 'cúu? 'Úú indaá na vaacu di ní nguéé tee di nuū"nī" chi naa"nú ca'á tan'dúúcā costumbre ye"ē yú naati n'daātā 'cūu ní cheendāa tá nuū"nī" nduutinaa" tá ca'á ní nadideeve tá ca'á ndúúcu 'yuūdū tiī" ta. ⁴⁵ Taachí ndaá ní nguéé 'nee"cheendi di 'úú tan'dúúcā costumbre ye"e yú naati n'daātā 'cūu 'áámá i'nee"cheendi tá ca'á, ndíí taachi sndaá. ⁴⁶ Ndíí nguéé ndúú cheendāa di aceite perfume tí" tan'dúúcā costumbre ye"e yú naati n'daātā 'cūu cheendaa tá aceite perfume na ca'á chi dii" tá honrar 'úú. ⁴⁷ Chuū nga"á ngí, dii Simón; ti tanducué"e nuu"ndi chi n'deēe n'dái ye"e tá nadach'ēcú ye"ē tá caati neené ne"e ta 'úú, ní dii" tá 'túúcā cáāvā chi nadach'ēcú ye"ē tá. Ní 'ii"yā"n chí duū'vī ne"e yā 'úú ní duū'vī nadich'ēcú ye"e yā.

⁴⁸ Tuu'mi Jesús ca"n'a yā chiī yā tá"n'a: Díí n'daataá 'úú nadich'ēcú nuu"ndi ye"ē di.

⁴⁹ 'Ii"yā"n chi vēēté yā na mesa mii" tucá'a yā ca"n'a yā chiī yā vi'i: ¿Du'u sá"ā chuū chi nadicadínuu" sa chí cuuvi nadich'ēcú sa nuu"ndi ye"e 'ii"yā"n?

⁵⁰ Tuu'mi Jesús mii" ca"n'a yā chiī yā n'daataá mí: Cáāvā chi i'téenu di 'úú, ndii" chí nanguá"ai di. Maa"n ní cuna"ā di ndúúcu vaadi 'dii".

N'daataa s'ee" chí chinnee yā Jesús

8 Cuayiivi mii", ní che"e Jesús nuu"má"n yáā"n n'geete ndúúcu nuu"má"n yáā"n lí"n ní nga"n'a yā nduudu cuaacu ye"é Ndyuūs ye"e naachi Ndyuūs nga"n'a ntii"nyú"n yā. Ní ndu'u ndiichúúví apóstoles ye"e Jesús mii" cue"e yā ndúúcu yā. ² Tiicá ntúū"n n'duuvi n'daataá chí Jesús dii"n yā chí nanduūvā ye"e ca'ai ye"e yā ní chí dí"n yā chí nacan'dáá espíritu ye"e yáá"n'guiinū"n ye"e ná"ā n'daataa s'ee". Ní nguaa"n n'daataa s'ee" canee María ye"e yáā"n Magdala. N'daata mii" ní Jesús dí"n yā chí nán'daā ndēēchē espíritus ye"e yáá"n'guiinū"n ye"ē ta. ³ Cue"e ntúū"n Juana chí n'daataa ye"e sa"ā chí nguuvi Chuza chí nga"n'a nti-i"nyu"n sá ye"e cosas ye"e rey Herodes, ndúúcu tá"n'a Susana, ndúúcu 'yaa"n n'dái ca n'daataá chí ca'a tá tuumī ye"ē tá ní cuaí tá 'āā de'ē nūu"n chí ne"e Jesús.

'Áámá ejemplo chi nguuvi parábola chi ye"e 'áámá sa"ā chí ngiinū sa ndaata

(Mt. 13.1-9; Mr. 4.1-9)

⁴ Taachí nduuvidaama 'yaa"n n'dái 'ii"yā"n chí chiica yā ye"e 'yaa"n n'dai yáā"n tuu'mi ní ndaa yā nanáá"n Jesús. Ní Jesús yaa'vi yā 'ii"yā"n s'ee" ndúúcu 'áámá ejemplo tan'dúúcā 'áámá dendu'ū chí véé i"nyéé"ndi 'cūu. Ní ca"n'a yā 'tíicā: ⁵ 'Áámá sa"ā chí cuūnū ndaata mí"n cué"e sa cuūnū sa. Taachí chiinū sa

'áamá duutu ndaata chiiya 'diituú cyúúni ní ch'iinca'a 'iiⁿyāⁿ ní 'yaada ní che'e tī. ⁶Duutu ndaata ní chiiya naachi véé n'dee n'dái tuú. Taachí can'daā, ní tī'i ti nguéé ya'ai yeⁿē. ⁷Duutu ndaata ní chiiya nguaaⁿ yááⁿ. Yááⁿ miiⁿ chí dáámá ch'iita ndúúcu yaatá ní di'vaāchí yeⁿē viī. ⁸Náⁿā duutu ndaata ní chiiya na yáⁿā n'dáacá ní taachí can'daā n'dee n'dái cosecha chí yeⁿē. Ní yeⁿē 'áamá ndaata ní chí 'aama ciento ndaata yeⁿē. Taachí Jesús caⁿa yā nduudú 'cūū, yuūdū n'dái caⁿa yā, ní caⁿa yā: Ndís'tii chí véé vééⁿ nī, ní 'caandiveéⁿ nī.

**Jesús caⁿa yā yeⁿe chí neⁿē
caāⁿmāⁿ ejemplo miiⁿ**

(Mt. 13.10-23; Mr. 4.10-20)

⁹Tuu'mi ní discípulos yeⁿe Jesús caⁿa yā chí yā Jesús: ¿DÉ'ē neⁿē caāⁿmaⁿ nduudú 'cūū?

¹⁰Jesús miiⁿ ní caⁿa yā: Ndís'tii ní maaⁿ ní cuuvi déénu nī chí cánuuⁿ n'de'ei yeⁿe Ndyuūs naachi ngaⁿa ntiiⁿnyúⁿ yā naati 'úú ní ngaⁿá ndúúcu nduudu chí 'tēe nguēé dáámá. Ní taachi 'iiⁿyāⁿ s'eeⁿ snaaⁿ yā nguéé cuuvi snaaⁿ n'daaca yā, ní taachí 'caandiveeⁿ yā nguéé tuumicadífínuuⁿ yā yeⁿē.

¹¹Chuū chí neⁿe caāⁿmāⁿ ejemplo miiⁿ. Ndaata miiⁿ ní chíⁿ chí tan'dúúca nduudu yeⁿe Ndyuūs. ¹²Duutu ndaata chí chiiya ná 'diitū cyúúni, chíⁿ chí tan'dúúca nduudu cuaacu yeⁿé Ndyuūs chí 'iiⁿyāⁿ ch'iindiveeⁿ yā. Daacá nūuⁿ ndaa yááⁿn'guinuuⁿ miiⁿ ní diví sa nduudu miiⁿ na staava yeⁿe 'iiⁿyāⁿ ti nguéé cuuvi cu'téenu yā ní nguéé ndúú cuuvi nnguaⁿai yā. ¹³Ndaata chí chiiya nguaaⁿ tuūu chí nguéé dii'yu yeⁿē ní tan'dúúca nduudu cuaacu yeⁿé Ndyuūs chí 'iiⁿyāⁿ n'giindiveeⁿ yā ní yeenú taavi yā. Cánéé yā tan'dúúca 'áamá milpa chí nguéé véé dii'yu yeⁿē. 'Iiⁿyāⁿ s'eeⁿ ní 'áamá tiempo nūuⁿ i'téenu yā ní taachí ndaa nguuvi chí chíⁿnyúⁿnéⁿ 'iiⁿyāⁿ yeⁿe yā chí 'cuināaⁿ

yā cáávā nduudu miiⁿ ní 'iiⁿyāⁿ s'eeⁿ diví yā nduudu miiⁿ na staava yeⁿe yā. ¹⁴Dúútú ndaata chí chiiya nguaaⁿ yááⁿ tan'dúúca nduudu cuaacu yeⁿé Ndyuūs chí 'iiⁿyāⁿ ch'iindiveeⁿ yā. Ní 'iiⁿyāⁿ s'eeⁿ damāaⁿ nadacadiinúúⁿ yā yeⁿe vaadi 'cuiica ndúúcu dendu'ú chí idi'vaachí yeⁿe iⁿyeⁿdí 'cūū ndúúcu dendu'ú chí vicio yeⁿe yā. Nducuéⁿē di'vaachi nduudu miiⁿ ní diiⁿ chí nguéé dichí'vé nduudu miiⁿ na vida 'iiⁿyāⁿ s'eeⁿ. ¹⁵Duutu ndaata chí chiiya na yáⁿā n'dáacá chíⁿ chí tan'dúúca nduudu cuaacu yeⁿé Ndyuūs chí 'iiⁿyāⁿ ch'iindiveeⁿ yā ní din'daacá yā ndúúcu 'viich'ēstínūⁿ. Ní i'téenu yā nduudu miiⁿ na staava yeⁿé yā. Ní ch'iⁿi yā tanáⁿā 'iiⁿyāⁿ chí i'téenu yā nduudu cuaacu miiⁿ.

'Áámá ejemplo yeⁿe 'áámá lámpara

(Mr. 4.21-25)

¹⁶Ní Jesús chí'cueeⁿ yā 'túúca: 'Áámá 'iiⁿyāⁿ nguéé ngi'i yā 'áámá lámpara ní cu'nuuⁿ yā maaⁿ 'áámá 'cuéé'tēe o cu'nuúⁿ yā maaⁿ 'áámá cama ti cu'nuúⁿ yā na 'áámá mesa ní 'iiⁿyāⁿ chí cundáa yā ní snaaⁿ yā. ¹⁷Tiicá ntúúⁿ, nducuéⁿē chí nguéé deenu 'iiⁿyāⁿ yeⁿe chí cunúúⁿ n'de'ei nguéé cunee chí nguéé snaaⁿ yā. Ní nguéé chí cunúúⁿ n'de'ei chí nguēe cadífínuuⁿ 'iiⁿyāⁿ yeⁿē.

¹⁸'Caandiveeⁿ n'daacá nī cáávā chí cuuvi deenu nī ti 'iiⁿyāⁿ chí véé yeⁿe yā ní Ndyuūs ca'a cá yā ní n'deē cá cuuvi yeⁿe yā. Ní 'iiⁿyāⁿ chí nguéé yeⁿe yā 'áará chí dúú'ví nūuⁿ chí nadacadiinúúⁿ yā chí véé yeⁿe yā, chuū ní Ndyuūs diví yā yeⁿe yā.

**Chēecu Jesús miiⁿ ndúúcu
'díínu yā chí ndāa yā**

(Mt. 12.46-50; Mr. 3.31-35)

¹⁹Tuu'mi ní 'díínu Jesús ndúúcu chēecu yā neⁿe yā ndaa yā nanááⁿ Jesús naati nguéé cuuvi ndaa yā caati neené 'yaaⁿ n'dai 'iiⁿyāⁿ snéé yā miiⁿ. ²⁰Ní

'áamá 'iiⁿ'yāⁿ cueⁿ'e yā nanááⁿ Jesús ní caⁿ'a yā: N'dii Jesús, cheecú ní ndúúcú 'díínu ní snée yā cuaaⁿ chuvaⁿ'āi ní neⁿ'e yā snaaⁿ yā n'dií.

²¹ Tuuⁿ'mi ní Jesús miiⁿ caⁿ'a yā chii yā 'iiⁿ'yāⁿ s'ee: 'Iiⁿ'yāⁿ chí n'giindiveéⁿ yā nduudu yeⁿ'é Ndyuūs ní i'téenu yā 'iiⁿ'yāⁿ, 'iiⁿ'yāⁿ s'eeⁿ chí chēecú ní 'iiⁿ'yāⁿ s'eeⁿ chí 'diinú.

Jesús chin'neeⁿ 'díiⁿ yā 'yúúné ndúúcú nuūⁿ'niⁿ'yáⁿ'ā

(Mt. 8.23-27; Mr. 4.35-41)

²² Chūú chíi. 'Áamá nguuvi Jesús miiⁿ sndaā yā na 'áamá barco ndúúcú discípulos yeⁿ'e yā ní caⁿ'a yā chíi yā 'iiⁿ'yāⁿ s'eeⁿ: Cho'o yú táamá 'díítuú nuūⁿ'niⁿ'yáⁿ'ā. Ní cueⁿ'e yā. ²³ Taachí chiica yā na barco miiⁿ, Jesús miiⁿ ní cyaadu yā. Chéenū 'aama 'yúúné taaⁿ ní diiⁿ chí chindaā nuūⁿ'niⁿ cheeti barco miiⁿ ti barco miiⁿ neⁿ'e 'cueechi nguááⁿ nuūⁿ'niⁿ. Ní discípulos 'va'a yā. ²⁴ Tuuⁿ'mi ní discípulos s'eeⁿ ndaa yā naachi canéé Jesús miiⁿ ní nadin'duuchí yā 'iiⁿ'yāⁿ ní caⁿ'a yā: N'dii Maestro, n'dii Maestro, 'cueechi yú nguááⁿ nuūⁿ'niⁿ. Taachi Jesús miiⁿ nduuchi yā, tuuⁿ'mi ní caⁿ'a yā chí cūnéé 'diinⁿ 'yúúné miiⁿ ndúúcú nuūⁿ'niⁿ, ní canéé 'diinⁿ. Tuuⁿ'mi ní 'āā ntéé chéenū 'yúúné miiⁿ ní canéé 'diinⁿ ní n'daacā cueⁿ'e yā ndúúcú barco miiⁿ. ²⁵ Jesús ní caⁿ'a yā: ¿De'e cúúvī chí nguéé cu'téenu cá ní? Discípulos ní 'va'a n'daí yā ní cheⁿ'e yiinú yā ní ngaⁿ'a yā ngii yā viⁿ: ¿Du'u sáⁿ'a 'cūú chí ngaⁿ'ā ntiinⁿ'nyu' sa yeⁿ'ē 'yúúné ndúúcú nuūⁿ'niⁿ ní n'giindiveéⁿ yeⁿ'ē sa?

Jesús díiⁿ yā chí nanduūva 'áamá saⁿ'ā yeⁿ'e yáⁿ'āa Gadara chí canéé sá ndúúcú espíritus yeⁿ'e yááⁿ'n'guuinūⁿ

(Mt. 8.28-34; Mr. 5.1-20)

²⁶ Jesús ndúúcú discípulos yeⁿ'e yā cueⁿ'e yā na yáⁿ'āa Gadara. Yáⁿ'āa miiⁿ ní canee 'diítuú nuūⁿ'niⁿ'yáⁿ'ā Galilea. ²⁷ Taachí Jesús nacan'dáa yā na barco

miiⁿ ní ndaa yā na yáⁿ'āa, ndaā niiⁿ'nuúⁿ Jesús miiⁿ 'áamá saⁿ'ā yeⁿ'e yáⁿ'āa miiⁿ. 'Āā 'naaⁿ tiempo canéé sá ndúúcú espíritus yeⁿ'e yááⁿ'n'guuinūⁿ. Nguéé catecai sa ndíi nguéé ndúú canúúⁿ rá sá va'āi ti na yiivi yáává cānuuⁿ sa. Ní ndaā sa ní ndaāca sa Jesús miiⁿ. ²⁸ Ní taachi sáⁿ'a 'cūú n'díichi sa Jesús miiⁿ chiintiⁿ'ya sá nanáaⁿ yā ní 'caí yiicú sa: N'dii Jesús, Daiya Ndyuūs chí ch'ēete n'dai poder yeⁿ'e ní, ¿de'ē díiⁿ ní nduucú? 'Úú dí'cuítú n'dii chí nguéé díiⁿ ní chí díiⁿ sufrir.

²⁹ 'Túúca caⁿ'a sa ti Jesús caⁿ'a ntiinⁿ'nyúⁿ yā chí nan'daā espíritus yeⁿ'e yááⁿ'n'guuinūⁿ yeⁿ'e sáⁿ'ā miiⁿ. 'Āā néené 'naaⁿ tiempo chí espíritus ichéé ndúúcú saⁿ'ā miiⁿ. 'Iiⁿ'yāⁿ s'eeⁿ yeⁿ'e yáāⁿ miiⁿ ní ngaā chiichí yā saⁿ'ā miiⁿ ndúúcú cadenas naati chíiica sá cadenas ní espíritu yeⁿ'e yááⁿ'n'guuinūⁿ candéé sa saⁿ'ā naachi nguéé 'iiⁿ'yāⁿ. ³⁰ Tuuⁿ'mi ní Jesús tiinguunéⁿ yā saⁿ'ā miiⁿ: ¿De'ē nguuvi dí? Saⁿ'ā miiⁿ ní caⁿ'a sa: Legión nguūví. 'Tíicā ngaⁿ'a 'iiⁿ'yāⁿ yeⁿ'ē sa ti neené 'yaaⁿ espíritus yeⁿ'e yááⁿ'n'guuinūⁿ canee ndúúcu sa. ³¹ Ní espíritus idí'cuítú Jesús chí nguéé dichó'o yā na abismo chí canéé cuaaⁿ maaⁿ yáⁿ'āa. ³² Ní niinⁿ'nuúⁿ ná snée yā néené n'deēe cuuchí veeⁿ ti 'cueti miiⁿ chí in'nuúⁿ ti chí ché'e ti. Ní espíritus dí'cuítú Jesús miiⁿ chí ca'á yā lugar chí cundáa cheēti cuuchí s'eeⁿ. Jesús miiⁿ ní 'cuúⁿ yā. ³³ Tuuⁿ'mi ní espíritus yeⁿ'e yááⁿ'n'guuinūⁿ nan'dáa na cuerpo yeⁿ'e saⁿ'ā miiⁿ ní sndaā na cuerpo yeⁿ'e cuuchi s'eeⁿ. Ní 'iiti s'eeⁿ ní chéenu ti na yiivi yaavā yeⁿ'e yiicū miiⁿ ní chingéé nuúⁿ ti nguaaⁿ nuūⁿ'niⁿ ní chíi nuúⁿ ti nguaaⁿ nuūⁿ'niⁿ miiⁿ.

³⁴ 'Iiⁿ'yāⁿ chí idiiⁿ cuidado cuuchí s'eeⁿ taachí n'diichí yā chuū, cueⁿ'é yā ngéenu yā ní cuuvi yā 'iiⁿ'yāⁿ na yáāⁿ ndúúcú 'iiⁿ'yāⁿ chí snée na 'cueti nducuéⁿ'ē chí chíi. ³⁵ 'Iiⁿ'yāⁿ yeⁿ'e yáāⁿ miiⁿ ní cheⁿ'e yā n'diichi yā chí chíi. Ndaá yā nanááⁿ Jesús

miiⁿ ní n'diichí yā saⁿa chi nacan'daā espíritus yeⁿe yááⁿ'nguiinūⁿ. Saⁿ'ā miiⁿ ní véé sa na ca'a Jesús. Canúⁿ sá catecai sa ní 'āā n'daāca idiⁿ sa. 'Iiⁿ'yāⁿ s'eeⁿ ní dii'yā yā chiī. ³⁶Ní 'iiⁿ'yāⁿ s'eeⁿ chi n'diichí yā nducuéⁿē chi chó'oo caⁿ'a yā 'iiⁿ'yāⁿ chi caama ndaa yā tááca espíritus yeⁿe yááⁿ'nguiinūⁿ nan'dáā na cuerpo yeⁿe saⁿ'ā miiⁿ. ³⁷Tuu'mi ní nducyáácá 'iiⁿ'yāⁿ yeⁿe yáⁿ'āa Gadara di'cuíftu yā Jesús chi cueví yā yeⁿe 'iiⁿ'yāⁿ s'eeⁿ ti neené 'va'á yā. Tuu'mi ní Jesús ndaa yā barco miiⁿ. ³⁸Ní saⁿ'ā chí nān'daa espíritus yeⁿe yááⁿ'nguiinūⁿ di'cuíftu sa Jesús miiⁿ chí cundáa sa na barco miiⁿ ndúúcu yā. Jesús yaa'vi yā saⁿ'a miiⁿ ní caⁿ'a yā: ³⁹Cunaⁿ'ā di ná vaacu di ní caaⁿ'maⁿ di cuuvi di 'iiⁿ'yāⁿ dendu'ū chí ch'ēete n'dai chí Ndyuūs diⁿ yā ndúúcu di. Saⁿ'ā miiⁿ ní cunaⁿ'a sa ní caⁿ'a sa chii sa 'iiⁿ'yāⁿ núúⁿ'máⁿ na yááⁿ dendú'ū chí ch'ēete n'dai chí Jesús diⁿ yā ndúúcu sa.

Yeⁿe daiya Jairo chí ngítā ní yeⁿe n'daataá chí tuu'vi tá catecai Jesús

(Mt. 9.18-26; Mr. 5.21-43)

⁴⁰Taachí Jesús cueⁿe yā cho'o yā táámá 'diituú nuūⁿ'nīⁿ'yáⁿ'ā, ní ndaa yā yááⁿ miiⁿ, 'iiⁿ'yāⁿ 'cuúⁿ yā Jesús ndúúcu vaadi yeenú ti n'dee n'daí 'iiⁿ'yāⁿ ní snee ngiinu yā Jesús miiⁿ. ⁴¹Miiⁿ cánéé 'aama saⁿ'a chí nguuvi sa Jairo. Saⁿ'a miiⁿ ngaⁿ'a ntiiⁿ'nyuⁿ sa yeⁿ'ē yaācū sinagoga ní ndaā sa nanááⁿ Jesús ní chiintiiⁿ'ya sa na ca'a Jesús miiⁿ. Ní di'cuíftu sa 'iiⁿ'yāⁿ chí cundáa yā na vaācū sa, ⁴²caati 'áámá n'dyáⁿ'ā daiya sa 'āā n'ááⁿ tá tan'duu ndiichúví nduūyū tá 'āā cháá 'cuuvi tá. Taachí cueⁿe Jesús miiⁿ neené n'dee 'iiⁿ'yāⁿ cueⁿe yā ndúúcu yā ní ndii tuunúⁿ ngēenū chiichi yā.

⁴³Nguaaⁿ 'iiⁿ'yāⁿ s'eeⁿ canéé 'áámá n'daataá chí 'āā ndiichúví nduūyū canee tá ndúúcu 'áámá ca'āi chí ngēé yuutⁿ yeⁿ'e cuerpo yeⁿ'ē ta. 'Āā diiⁿ tá gashtar ndúúcu médicos tanducuéⁿ'ē chí vez

yeⁿ'ē tá. Mar 'áámá médico nguéé ngii diyicú yā táⁿ'ā miiⁿ. ⁴⁴Ndaā niⁿ'nuⁿ tá cuaaⁿ daami Jesús ní tuū'vi tá naachi n'dee tíi yeⁿ'e catecai Jesús miiⁿ. Tuu'mi nūuⁿ canéé naaⁿ chí ingéé yuuúⁿ yeⁿ'e cuerpo yeⁿ'e tá.

⁴⁵Tuu'mi ní Jesús miiⁿ caⁿ'a yā: ¿Du'u tuū'vi 'úú? Nducyáácá 'iiⁿ'yāⁿ ní caⁿ'a yā: Nguēé 'úú. Pedro miiⁿ ní caⁿ'a sa: N'dii Maestro, 'iiⁿ'yāⁿ miiⁿ ní i'nuuⁿ chiichí yā n'dii ní tááca chí ngaⁿ'a ní: ¿Du'ú tuū'vi 'úú?

⁴⁶Jesús caⁿ'a yā: Véé du'ū chí tuū'vi 'úú. 'Úú ní deenú chí ndúúcu poder yeⁿ'ē nduūvā yeⁿ'e 'áámá 'iiⁿ'yāⁿ.

⁴⁷Taachi n'daata míⁿ tuumicádiinuⁿ tá chí Jesús deenú yā in'duuví n'dai tá ní ndaā tá nanááⁿ Jesús miiⁿ ní chiintiiⁿ'yā ta nanááⁿ yā. Ní caⁿ'a cuaacu tá nanááⁿ nducyáácá 'iiⁿ'yāⁿ de'ē cáávā chí tuū'vi tá catecai Jesús. Ní hora míⁿ nūuⁿ chí tuu'vi ta nduūvā yeⁿ'ē tá. ⁴⁸Jesús miiⁿ ní caⁿ'a yā: Díi, daiyá, cáávā chí i'teenú di 'úú, ní nduūvā yeⁿ'ē di. Maaⁿ ní cunaⁿ'a di na vaacu di ndúúcu vaadi 'diíⁿ.

⁴⁹Ní taachi Jesús ngaⁿ'a yā chuū ndaā 'áámá saⁿ'ā yeⁿ'e na vaacu saⁿ'ā chí ngaⁿ'a ntiiⁿ'nyuⁿ yeⁿ'ē yaācū sinagoga. Ndaā sa nanááⁿ Jairo ní caⁿ'a sa: 'Āā chí daiya di. 'Āā ntéé yaa'vi di Maestro.

⁵⁰Jesús miiⁿ ch'iindiveéⁿ yā nduudu 'cūū ní caⁿ'a yā: Nguéé 'va'ā di. Cu'téenu di 'úú ní nanduūchi ta yeⁿ'ē nguaaⁿ tináⁿ'ā.

⁵¹Tuu'mi ní Jesús sndaā yā na vaacu Jairo. Nguéé 'cuuⁿ yā chí nducyaaca 'iiⁿ'yāⁿ sndaā yā ndúúcu yā cuaaⁿ cheeti va'āi miiⁿ, dámaaⁿ Pedro ndúúcu Jacobo, ndúúcu Juan, ndúúcu cheecu n'daata lííⁿ, ndúúcu chiida tá. ⁵²Nducyaaca yā cuaaⁿ ch'vāi ch'ēetinée yā ní ngēecu yā ní n'gai yā ti ya'ái yā caavā tá. Ní Jesús caⁿ'a yā: Nguéé cueecu ní. Nguéé n'dii tá ti cyaadu tá.

⁵³'Iiⁿ'yāⁿ s'eeⁿ ní taachi n'giindiveéⁿ yā nduudu yeⁿ'e Jesús miiⁿ chí i'nyuⁿ'neeⁿ

yā yeⁿe Jesús miiⁿ ti 'āā deenú yā chí 'āā n'dií tá. ⁵⁴Tuu'mi ní Jesús ndaa yā cuaaⁿ cheeti va'āi ní sta'á yā ta'á tá ní caⁿa yu-udú yā: Dii, ta'dííⁿ, nducueeⁿ di.

⁵⁵Hora mííⁿ nūuⁿ espíritu yeⁿe ta'dííⁿ mííⁿ nngueecunéé ndúúcu ta. Tuu'mi nūuⁿ nducueⁿe tá. Jesús caⁿ'a ntiiⁿnyúⁿ yā chí ca'á yā chí che'e tá. ⁵⁶Chiida tá ndúúcu cheecu tá neené ngeⁿe yiinu yā ní Jesús caⁿ'a yā chíi yā 'iiⁿyāⁿ s'eeⁿ chi nguéé cuuví ní chi nduuchi tá yeⁿe nguuaⁿ tináⁿā.

Jesús dich'o yā ndu'u ndiichúví discípulos yeⁿe yā

(Mt. 10.5-15; Mr. 6.7-13)

9 Jesús yaa'ví yā ndu'u ndiichúví discípulos yeⁿe yā ní ca'a yā poder. Ní caⁿ'a yā chí tun'dáa yā espíritus yeⁿe yááⁿnguiinūuⁿ yeⁿe 'iiⁿyāⁿ ní dííⁿ yā chí nduūvā yeⁿe 'iiⁿyāⁿ chí ngiitā. ²Ní Jesús dich'o yā discípulos chí caaⁿmaⁿ yā nduudu n'dai yeⁿe naachí Ndyuūs ngaⁿ'a ntiiⁿnyúⁿ yā ní dííⁿ yā chí ndu-uvā yeⁿe 'iiⁿyāⁿ chí ngiitā. ³Ní caⁿ'a yā chíi yā discípulos yeⁿe yā: Ndís'tií nguéé de'ē vee candéé ní cuaaⁿ cyúúní. Nguéé ndúú in'daacuú, ndíí nguéé ndúú morral, ndíí nguéé ndúú pan ra, ndíí nguéé ndúú tuūmí ra, ndíí nguéé nduu candéé ní uūví catecai. ⁴Ní 'āā tíí nūuⁿ va'ai naachi ndaa ní 'cuuetinée ní miiⁿ ní ndíí taachi ndaa ní ndíí taachi nan'dáa ní yeⁿe yaāⁿ miiⁿ. ⁵Ní naachi ndaa ní 'áámá yáāⁿ ní 'iiⁿyāⁿ nguéé 'cuaáⁿ yā ndís'tií, tuu'mi ní nan'dáa ní yeⁿe yáāⁿ miiⁿ ní n'dáádi ní yaácāa yeⁿe ca'a ní. Chuū ní 'áámá señal chí 'cuuⁿmiⁿ ní chí nguéé n'daacā idííⁿ yā ti contra yeⁿe ní.

⁶Discípulos ican'dáa yā ní cheⁿe yā nuuⁿmáⁿ cuaaⁿ yáāⁿ s'eeⁿ ní nduu cuaáⁿ ní ngaⁿ'a yā nduudu ngai yeⁿe Ndyuūs, nduudu chí nanguaⁿ'āi 'iiⁿyāⁿ. Ní dííⁿ yā chí nduūvā yeⁿe 'iiⁿyāⁿ chí ngiitā.

Rey Herodes nguéé s'teenu yā yeⁿe Jesús

(Mt. 14.1-12; Mr. 6.14-29)

⁷Ch'iindiveeⁿ rey Herodes tanducueⁿe chí Jesús miiⁿ idííⁿ yā ní 'āā ntee déenu yā de'ē nadicadínuuⁿ yā. Ní véé 'uūví vandiicadínúúⁿ yā caati náⁿā 'iiⁿyāⁿ ní ngaⁿ'a yā chí Jesús chí Juan miiⁿ chí nduuchi yā yeⁿe nguuaⁿ tináⁿā. ⁸Náⁿa yā ní ngaⁿ'a yā chí profeta Elías miiⁿ ní 'āā che'enaáⁿ yā. Náⁿa yā ní ngaⁿ'a yā chí 'áámá profeta chí n'dií yā ndíí yeⁿe tiempo chí 'āā 'naaⁿ nandúúchi yā yeⁿe nguuaⁿ tináⁿā. ⁹Ní rey Herodes miiⁿ ní caⁿ'a yā: 'Úú caⁿ'a ntiiⁿnyúⁿ chí 'chiitá daandu saⁿ'ā chí Juan chí cheedínúúⁿníⁿ sa. ¿Dú'ú chí saⁿ'ā miiⁿ chí ch'iindiveeⁿ tanducueⁿe yeⁿe sa? 'Úú neⁿe cadíinúúⁿ ní neⁿe snaáⁿ sáⁿa 'c'úú.

Jesús ca'a yā che'e nyuⁿu mil 'iiⁿyāⁿ

(Mt. 14.13-21; Mr. 6.30-44; Jn. 6.1-14)

¹⁰Taachi discípulos ndaa yā naachí canee Jesús, tuu'mi ní caⁿ'a yā Jesús tanducueⁿe chí diiⁿ yā. Cuayivi ní Jesús cueⁿe yā ndúúcu discípulos yeⁿe yā níⁿnuúⁿ na yáāⁿ Betsaida ní cueⁿe yā cueti yeⁿe yáāⁿ miiⁿya. ¹¹Taachí 'iiⁿyāⁿ cadíinuuⁿ yā yeⁿe Jesús miiⁿ, cueⁿe yā n'dáa yā 'iiⁿyāⁿ. Ní Jesús 'cuuⁿ yā 'iiⁿyāⁿ s'eeⁿ ní caⁿ'a yā chíi yā 'iiⁿyāⁿ s'eeⁿ yeⁿe naachí Ndyuūs ngaⁿ'a ntiiⁿnyúⁿ yā. Ní dííⁿ yā chí nduūvā yeⁿe 'iiⁿyāⁿ chí ngiita yā.

¹²Taachí chí chiinū, ndu'u chí ndiichúví yā ndaa yā nanááⁿ Jesús ní caⁿ'a yā chíi yā Jesús: Yaa'ví ní 'iiⁿyāⁿ s'eeⁿ chí caⁿ'a yā cuaaⁿ yáāⁿ s'eeⁿ, ní cuaaⁿ yáāⁿ lííⁿ naachi snéé 'iiⁿyāⁿ ní véé naachi 'cuuetinée yā ní ndaaca yā chí che'e yā, ti nguéé de'ē vee naachi snéé yú.

¹³Jesús caⁿ'a yā chíi yā discípulos: Ndís'tií ní ca'a ní chí che'e yā. Discípulos ní caⁿ'a yā: 'Áā ntéé n'deé yeⁿe nū véé ti táá nyuⁿu nūuⁿ pan ndúúcu 'uūví

'yaacā. Nguéé cuuvi díf' nū cuái 'nū chi che'e nducyaaca 'ii'nyā' s'tíi.

¹⁴Mii' ní snéé taanduu nyu'u mil sa'ā. Tuu'mi ní Jesús mii' ca'á yā chii yā discípuulos ye'e yā: Caa'ma' n'tii'nyú' nī 'ii'nyā' s'ee' chí 'cuéeté yā 'uúvi ngēecu ndiichí yā 'aama 'áámá cuaa'.

¹⁵Tíicā díf' discípuulos ní ch'eté nducyaaca 'ii'nyā' s'ee'. ¹⁶Tuu'mi ní Jesús mii' sta'á yā ndu'u nyu'u pan ndúúcu nduu 'uuví 'yaacā. Ní 'iicu n'diichí yā nanguuvi ní ca'á yā gracias Dendyuūs cáávā pan ndúúcu 'yaacā mii'. Cuayiivi ní Jesús n'deé yā pan ndúúcu 'yaacā ní ca'a yā discípuulos ye'e yā. Ch'iinu ní discípuulos ca'a ntúu' yā 'ii'nyā' s'ee' chi che'e yā. ¹⁷Che'e nducyaaca yā ní chiitúú 'ii'nyā'. Cuayiivi ní discípuulos nan'gaá' yā chí ningaavā ní chiitúú tá ndiichuuvi 'cuéētē chí ningaāvā.

Pedro mii' ní ca'ā cuaacu sa chí Jesús mii' chí Cristo yā

(Mt. 16.13-19; Mr. 8.27-29)

¹⁸Áámá nguuvi taachí Jesús ndúúcu discípuulos ye'é yā canéé yā 'aama lado ní nga'āngua'á yā, tuu'mi ní Jesús itiinguuné' yā discípuulos: ¿Du'ú 'úú nga'ā 'ii'nyā'?

¹⁹'Ii'nyā' s'ee' ní n'guécúta'a yā: Ná'ā yā ní nga'ā yā chí díf' Juan chí cheēdfnúū'nī' sa díf'. Ná'ā yā ní nga'ā yā chí díf' ní profeta Elías díf'; ní ná'ā yā ní nga'ā ntúú' yā chí díf' ní 'aama profeta chí 'āa' naa' tiempo chí n'dii' ní nnduuchí yā ye'e nguua' tina'ā.

²⁰Jesús mii' ní ca'ā yā: Ndí's'ti, tuu'mi, ¿du'ú 'úú nga'ā ní? Tuu'mi ní Simón Pedro nan'guécúta'a yā ní ca'ā yā: N'dii' chí Cristo ye'é Ndyuūs.

²¹Jesús chii' yā 'ii'nyā' s'ee' chí nguéé cuuvi yā chuū mar 'áámá 'ii'nyā'.

Jesús nga'a yā ye'e chí taacā 'cuuvi yā

(Mt. 16.20-28; Mr. 8.30-9.1)

²²Tuu'mi ní Jesús ca'ā yā: Cánéé chí 'úú chí Sa'ā chí Daiyá Ndyuūs n'dee n'dái' cueenú cuuvi ní 'íicú sa'ā ndiicúu chí nga'ā n'tii'nyu' ye'e yaacú ndúúcu chíiduu' n'geete chí nga'ā n'tii'nyú' yā ndúúcu maestros ye'e ley ní nguéé ne'e yā snaa' yā 'úú chí Sa'ā chí Daiyá Ndyuūs. Ní canéé chí 'caa'nú' yā 'úú. Ní 'úú nduuchí ye'e nguua' tiná'ā ndii' cuínú 'iinū nguuvi.

²³Cuayiivi ní Jesús nga'ā yā ngii yā nducyáácá 'ii'nyā': Ndúúti chí 'áámá 'ii'nyā' ne'e yā ca'ā yā nducú, canéé chí cu'néé' maán' yā tanducué'e dendu'ú chí véé ye'e yā, ní nguuvi nguuvi cuta'á yā cruz ye'e yā chí tan'dúúca chí 'cueenu taaví yā cuuvi cucáávā 'úú ní ca'ā yā nduúcu. ²⁴Caati nducyaaca 'ii'nyā' chí ne'e cá yā nadanguá'ai yā vida ye'e maa' yā na i'nyee'dí 'cūú dindaí yā táámá vida ye'e yā nanáá' Ndyuūs. Ní nducyaaca 'ii'nyā' chí dindaí yā vida ye'e yā cucáávā 'úú ndaāca yā táámá vida ye'é yā nanáá' Ndyuūs. ²⁵¿De'e dichí'vē sa'ā ndúúti chí dii' sa ganar nducué'e chí véé na i'nyee'dí 'cūú ní díf' sa chí dindaí sa vida cue'e daā'ma' chí táámá vida ye'e yā ní idituuví sa maā' vida ye'e sa? ²⁶Ní 'ii'nyā' chí cuuvi 'cuináa' yā ye'e 'úú nanáá' 'ii'nyā' ndúúcu nduudu ye'é tuu'mi ní 'úú chí Sa'ā chí Daiyá Dendyuūs cuuví 'cuináa' ye'é 'ii'nyā' 'cūú taachi 'úú ndaá' taama vmné'e tan'dúúca Rey ndúúcu poder ye'e Chiidá ndúúcu poder ye'e maán' ní ndúúcu ángeles. ²⁷'Úú nga'ā cuaacú ndúúcu ndí's'ti, chí véé ná'ā ní chí snee ní 'muu' chí nguéé 'cuuvi ní taanduvéé ndíi' snaa' ní ye'e naachi Ndyuūs nga'ā n'tii'nyú' yā.

Jesús n'daaⁿ yā cuerpo yeⁿe maáⁿ yā
(Mt. 17.1-8; Mr. 9.2-8)

²⁸ Ch'íinú níⁿnⁿ nguuví chí Jesús caⁿa yā nduudu 'cūū, Jesús cueⁿe yā ndúú^{cū} Pedro, ndúú^{cū} Juan ndúú^{cū} Jacobo ní chee yā na yīcū chí caaⁿmaⁿnguaⁿá yā. ²⁹ Ní taachi Jesús ngaⁿanguaⁿá yā, n'dááⁿ naaⁿ yā ní catecai yā nduuví cuéé ní ngii n'gai. ³⁰ Ní tuuⁿmi nūⁿ che'enaáaⁿ na 'uuví saⁿá ndúú^{cū} Jesús. Saⁿá s'eeⁿ chiiⁿ Moisés ndúú^{cū} profeta Elías chí 'āā 'naaⁿ tiempo chí n'dií yā. ³¹ Nduu 'iinú yā ní na chideeve chí ngí n'gai yeⁿe va'ai cheeti nguuví snée yā. Ní ngaⁿa yā yeⁿe chí 'cuūví Jesús ní 'cueenu taaví yā na yāāⁿ Jerusalén. ³² N'dáá rá chí cyaadu Pedro ndúú^{cū} Juan ndúú^{cū} Jacobo nadacueéⁿ yā ní n'diichi yā chí ngí n'gai naaⁿ Jesús ndúú^{cū} saⁿá s'eeⁿ chí canee ndúú^{cū} yā. ³³ Ní taachí Elías ndúú^{cū} Moisés chiví yā yeⁿe Jesús ní 'āā cuéé caⁿa yā, tuuⁿmi ní Pedro miiⁿ ní caⁿa yā chii yā Jesús: N'dií Maestro, de'ε chúú^{cā} n'daācā yeⁿe yú chí 'cuetinee yú 'muuⁿ. Ní din'dái 'nū 'iinū va'ai n'gaiyāā; 'áámá yeⁿe nī, 'áámá yeⁿe Moisés, nī 'áámá yeⁿe Elías. Pedro miiⁿ ní nguéé déenu yā de'ε chí ngaⁿa yā. ³⁴ Ní neⁿe chí ngaⁿa Pedro miiⁿ ndaā 'áámá meēeⁿ ní sn'dí 'iiⁿyāⁿ s'eeⁿ ní 'va'a yā chí ndaa meēeⁿ vmaaaⁿ yā. ³⁵ Tuuⁿmi ní ch'iindiveéⁿ yā 'áámá nduudu chí ngaⁿá nguuaⁿ meēeⁿ: Sáⁿa 'cūū ní Daiyá chí neⁿe taaví. Cu'neeⁿ veéⁿ nī nducuéⁿe chí ngaⁿa sa.

³⁶ Ch'íinú ch'iindiveéⁿ yā nduūdū miiⁿ ní discípulos n'diichí yā chí Jesús miiⁿ canee yā dámaaⁿ yā nduucú yā. Ní discípulos ch'etinee 'diíⁿ cheendí yā nguuví s'eeⁿ ní nguéé chii yā mar 'áámá 'iiⁿyāⁿ yeⁿe chí n'diichi yā.

Jesús diíⁿ yā chí nanduūvā
yeⁿe 'áámá saⁿá 'lííⁿ yeⁿe
espíritu yeⁿe yááⁿn'guiinūⁿ

(Mt. 17.14-21; Mr. 9.14-29)

³⁷ Táámá nguuví cuayiivi, 'iiⁿyāⁿ s'eeⁿ ní nanguaⁿá yā yeⁿe yīcū miiⁿ ní néené 'yaaⁿ 'iiⁿyāⁿ can'dáa yā na yāāⁿ ní cueⁿe yā chí ndaacá yā Jesús. ³⁸ Tuuⁿmi ní 'áámá saⁿá chí canee ndúú^{cū} 'iiⁿyāⁿ s'eeⁿ 'cái sa: N'dií Maestro di'cuíftūu n'dií chí snaaⁿ nī daiyá tí 'áámá n'dyáⁿá daiyá. ³⁹ Tí 'áámá espíritu yeⁿe yááⁿn'guiinūⁿ ita'a saⁿá ní ndááca naāaⁿ nn'gai sa ní 'caí diitú sa ní ican'daā yáiⁿ cuaaⁿ cheendi sa ní n'dee n'dái tiempo chí néené taaⁿ idiiⁿ espíritu yeⁿe yááⁿn'guiinūⁿ ndúú^{cū} sa ní nguéé ngii vii espíritu yeⁿe yááⁿn'guiinūⁿ yeⁿe sa. ⁴⁰ Ní 'āā diíⁿ 'cuíftúu discípulos yeⁿe nī chí diví yā espíritu miiⁿ yeⁿe daiyá naati nguéé cuuvi diíⁿ yā.

⁴¹ Jesús nan'guēcútaⁿa yā: Ndis'tií, 'iiⁿyāⁿ chí nguéé i'téenu nī ndí nguéé ndúú idiiⁿ n'daacá nī. ¿'Áá 'naaⁿ tiempo canee chí cuneé ndúú^{cū} ndis'tií? ¿'Áá 'naaⁿ tiempo ní canee chí cuheé ndúú^{cū} ndis'tií? Ní ngaⁿa yā ngii yā sáⁿá miiⁿ: Cuchí di nanaáⁿ ndúú^{cū} daiya di.

⁴² Taachí saⁿá 'dííⁿ miiⁿ ndaa niiⁿnuúⁿ sá nanááⁿ Jesús miiⁿ, espíritu yeⁿe yááⁿn'guiinūⁿ miiⁿ chindeeve saⁿá 'díí miiⁿ ní ch'ēcundáa saⁿá. Ní Jesús yaa'vinéeⁿ yā espíritu yeⁿe yááⁿn'guiinūⁿ chí diví yeⁿe saⁿa 'díí miiⁿ, ní nanduūvā yeⁿe sa. Tuuⁿmi ní Jesús ncaⁿá yā saⁿá 'díí miiⁿ chiida sa. ⁴³ Nducyáácá 'iiⁿyāⁿ ngeⁿe yiinu yā yeⁿe poder yeⁿe Dendyuūs chí ch'ete n'dai. Ní taachi nducyaaca yā cheⁿe yiinu yā yeⁿe tanducueⁿe chí diíⁿ Jesús miiⁿ, Jesús caⁿa yā.

**Jesús caⁿa yā táamá
cuuvi yeⁿē chi 'cuuvi yā**

(Mt. 17.22-23; Mr. 9.30-32)

44 Ní chii yā discipulos yeⁿe yā: 'Caandiveéⁿ nī n'daācā yeⁿe tanducueⁿē nduudu chí caaⁿmaⁿ ní nguéé cuuvi naáⁿ nī yeⁿē. 'Úú Saⁿā chí Daiya Ndyuūs 'úú ní 'iiⁿyāⁿ canee chí naca'a yā 'úú ta'ā 'iiⁿyāⁿ.

45 Discipulos ní nguéé tuumicádiinuuⁿ yā nduudu chí ngaⁿa Jesús. Canúⁿ n'de'ei nduudú 'cūū yeⁿe yā. Ní nguéé túúmícađiinuunⁿ yā. Ní 'va'á yā chí ntiinguuneeⁿ yā Jesús de'ē neⁿe caaⁿmaⁿ nduudú 'cūū.

Nduudu yeⁿe du'ū chí ch'ēete ca

(Mt. 18.1-5; Mr. 9.33-37)

46 Tuu'mi ní discipulos yeⁿe yā tucá'a yā caⁿa yā ndúúcu v'i: ¿Du'ū ca chí ch'ēete ca nguaaⁿ s'uúúⁿ? 47 Jesús tumicadíinuunⁿ yā táacā chí discipulos nadicáđiinuunⁿ yā na staava yeⁿe yā ní sta'á yā 'áámá saⁿā 'lííⁿ ní s'neeⁿ yā saⁿā nanáaⁿ yā. 48 Ní caⁿa yā chii yā discipulos yeⁿe yā: 'Áā du'ú nūūⁿ 'iiⁿyāⁿ chí 'cuaaⁿ yā saⁿā 'lííⁿ 'cūū ndúúcu chí duuchí 'cuaáⁿ yā 'úú. 'Áā du'ú nūūⁿ 'iiⁿyāⁿ chí 'cuaáⁿ yā 'úú 'cuaáⁿ yā 'iiⁿyāⁿ chí dichó'o yā 'úú. 'Iiⁿyāⁿ chí ndiicuuⁿ ca yā nguaaⁿ ndis'tiiⁿ ní 'iiⁿyāⁿ 'cūū, ní ch'ēete ca yā nguaaⁿ ndis'tii.

**'Iiⁿyāⁿ chí nguéé contra yeⁿē yú
ní snée yā favor yeⁿē yú**

(Mr. 9.38-40)

49 Tuu'mi ní Juan caⁿa yā chii yā Jesús: N'díí, Maestro, 'āā n'diichí 'nū 'áámá saⁿā chí divíi sa espíritus yeⁿē yááⁿnguiinūūⁿ yeⁿe 'iiⁿyāⁿ ndúúcu chí duuchí nī; ní nguéé cuúⁿ 'nū ti nguéé canee sa ndúúcu yú.

50 Jesús caⁿa yā chii yā Juan: 'Cuaáⁿ nī chí diiⁿ sa 'túúcā; ti 'iiⁿyāⁿ chí nguéé diíⁿ yā contra yeⁿe s'uúúⁿ, 'iiⁿyāⁿ miiⁿ snée yā favor yeⁿē yú.

**Jesús yaa'vineeⁿ yā
'uūvi discipulos yeⁿe yā**

51 Taachi snūū ca'a nguuvi miiⁿ chí Jesús miiⁿ canéé chí caⁿá yā na va'ai cheeti nguuvi, Jesús 'āā deenú yā de'ē chí diíⁿ yā ní cueⁿe yā ndúúcu valor na yāáⁿ Jerusalén. 52 Ní dicho'ó yā na 'úúví saⁿā vmnááⁿ yeⁿe yā. Saⁿā s'eeⁿ ní cueⁿē sa ní sndāā sa na 'áámá yāāⁿ yeⁿe yā'āa Samaria chí in'nuuⁿ sa nááchí 'cuetinée yā. 53 Ní 'iiⁿyāⁿ samaritanos nguéé 'cuuⁿ yā Jesús miiⁿ ti chicadiinuunⁿ yā chí Jesús caⁿa yā yāāⁿ Jerusalén. 54 Taachí discipulos yeⁿe yā n'giindiveéⁿ yā chuū, Jacobo ndúúcu Juan caⁿa yā: N'díí, Señor, ¿'áá neⁿe nī chí caaⁿmaⁿ ntiin'nyuⁿ yú chí cun'geēⁿ yaⁿā yeⁿē nanguuvi ní di'cuiniú yú 'iiⁿyāⁿ 'muuⁿ tan'dúúca chí diiⁿ profeta Elías miiⁿ tiempo chí ch'ó'oo caati 'iiⁿyāⁿ s'eeⁿ nguéé neⁿé yā 'cuaāⁿ yā s'uúúⁿ?

55 Tuu'mi ní Jesús miiⁿ yaa'vineeⁿ yā Jacobo ndúúcu Juan ní caⁿa yā chii yā saⁿā s'eeⁿ: Ndís'tii ní nguéé tuumicáđiinuunⁿ nī de'ē espíritu yeⁿē chí ngaⁿa nī. 56 'Úú, ní Saⁿā chí Daiyá Ndyuūs. 'Úú ní nguéé chúchí chí dindaí vida yeⁿe 'iiⁿyāⁿ s'eeⁿ naati chí nadinguaⁿáí vida yeⁿe 'iiⁿyāⁿ s'eeⁿ. Tuu'mi ní cho'ó yā yāāⁿ miiⁿ ní cueⁿe yā táámá yāāⁿ.

**Yeⁿe 'iiⁿyāⁿ chí neⁿe
yā caⁿa yā ndúúcu Jesús**

(Mt. 8.19-22)

57 Taachi snūūⁿ yā yúúní, 'áámá saⁿā ní caⁿa sa chí sa Jesús miiⁿ: N'díí, Señor, caⁿá nduucú nī 'āā tíí nūūⁿ naachi caⁿa nī.

58 Jesús caⁿa yā chii yā saⁿā miiⁿ: 'Yuunéē nī véé yiivi yáává yeⁿe tí ní 'yaada ní véé 'dééce tí; naati 'úú, Saⁿā chí Daiya Dendyuūs, nguéé mar 'áámá cuaaⁿ naachi cundiití tíⁿ.

59 Ní caⁿa yā chii yā 'áámá saⁿā: Cuchí nī nduucú. Ní saⁿā miiⁿ ní caⁿa sa: N'dííⁿ

Señor, téé nī lugar 'úú ti ca"á 'cuūchí chi-ida ní ca"ā yú.

⁶⁰ Jesús ca"ā yā: Cu'nee" dí 'i"yā" chi nguéé i'téenu yā chi 'cuūchí yā tina"ā ye"e yā ti 'i"yā" s'ee" chi tan'dúúca tina"ā mii", 'tiicá yā. Dii ní cue"e di ní caa"ma" di nduudu ye"é Ndyuūs ye"e naachi Ndyuūs nga"ā ntii"nyú" yā.

⁶¹ Tuu'mi ní táamá sa"ā ca"ā sa chii sa Jesús mii": N'dí, Señor, 'úú ne"é ca"á nduucú nī naati téé nī lugar 'úú ti ca"á yaa'ví 'i"yā" chi snúu" yā ndavaacú chi ca"á ndúúcu nī.

⁶² Jesús ca"ā yā chii yā sa"ā mii": 'Āā du'ú nūu" sa"ā chi cuūndū tá'a sa na laatu ní 'cuínu sa cuaa" dáámí sá, nguéé dichí'vē sa chi cuuvi sa ca"ā sa nduucú ní dii" sa ntii"nyu" ye"é naachi Ndyuūs nga"ā ntii"nyú" yā.

**Jesús dich'ó yā 'iinū ngeecu
ndiichi discípulos ye"e yā
chí nga"ā nduudu cuacu**

10 'Cuiinú chúu ní Jesús nandeeve yā tá 'iinū ngeecu ndiichi discípulos ye"e yā ní dich'ó yā cá'uūví ca'uuví yā. Ní cue"e yā cuáá" vmaaa" ye"e Jesús cuaa" nducyáácá yáā" ndúúcu nduu cuaa" naachi Jesús canéé chi cá"ā yā. ²Ní Jesús nga"ā yā ngii yā 'i"yā" s'ee": 'Cuaacu ní"nyú" chi nééné n'deēe cosecha véé chi nééné n'deēe 'i"yā" chi canéé chi 'caandivee" yā nduudu ye"é Ndyuūs naati sa"ā chi idii" ntii"nyu" nguéé 'yaa" sa. Cáāvā chuū di'cuítu nī 'iiví Ndyuūs chí dich'ó yā 'i"yā" chi caa"ma" yā nduudu cuacu ye"é Ndyuūs ní nadacuée" yā cosecha ye"é Ndyuūs. Cosecha mii" ní tan'dúúca 'i"yā" chi cu'téenu yā Ndyuūs. ³Ndís'tii cue"e nī caati 'úú dich'ó ndís'tii chi ndís'tii ní ca"ā nī tan'dúúca 'iiti cuūchí ca"ā tī nguua" lobos. ⁴Nguéé candée nī bolsa ndúúcu tuūmī, ndíi nguéé nduu moral, ndíi nguéé ndúú ndaacuú ye"e nī. Ní taachi díi" nī saludar 'i"yā" cuaa"

cyúúni, ní nguéé cuuvi 'naa" nī. ⁵Ní tanducué"ē va'āi chi ndaa nī caa"má" nī vmaaa" vmaaa" túúca: Cuneé 'i"yā" ye"e va'ái 'cūū ndúúcu vaadi 'dii". ⁶Ní nduuti chi 'i"yā" ní ndiicúu" yā na va'ai mii", tuu'mi ní vaadi 'dii" cunéé ndúúcu yā. Ní nduuti chi nguéé véé 'i"yā" ndiicúu" na va'ai mii", vaadi 'dii" nguéé cunéé ndúúcu yā. ⁷'Cuētínée núu" nī va'āi naachi 'i"yā" 'cuaá" yā ndís'tii. Che'é nī ní cu'u nī chi téé yā caati 'i"yā" chi idii" ntii"nyu" canéé chi nduuvi 'í'vē yā. Ndís'tii nguéé ca"ā nī nduu va'āi nduu va'āi. ⁸'Āā tíi nūu" yáā" naachi cūndaa nī ní 'i"yā" míi" 'cuaá" yā, che'é nī 'āā de'é nūu" chi téé yā chi che'é nī. ⁹Idii" nī chi índuūvā ye"é 'i"yā" chi ngiitā chi sneé yā na yáā". Ní cuuvi nī 'i"yā" ye"é naachi Ndyuūs nga"ā ntii"nyú" yā ní 'āā ndaa nii"nuú" naachi sneé yā. ¹⁰Naati 'āā tíi nūu" yáā" naachi ndaa nī ní 'i"yā" ní nguéé 'cuáa" yā ndís'tii, tuu'mi ní can'daa nī cuaa" cyúúni ní caa"ma" nī túúca: ¹¹Ndii yaācāā ye"é yáā" 'cūū chí caí na ca'á 'nū n'dáadi 'nū ti nguéé cu'teenu nī ye"é 'nū. Naati cadínuu" nī chuū chí ye"é naachi Ndyuūs nga"ā ntii"nyú" yā ní 'āā ndaa nii"nuú" naachi sneé nī. ¹²'Úú, Jesús, nga"á ngii ndís'tii chi nguuvi taachi Ndyuūs caa"má" yā nuu"ndi ye"e 'i"yā", castigo ye"e 'i"yā" ye"e yáā" s'tii ní diitu cá ní nguéé ti chi cuuvi ye"e 'i"yā" chi nguéé din'daacā ye"e yáā" Sodoma.

**Ye"e yáā" s'ee" naachi 'i"yā"
ngee i'téenu yā Ndyuūs**

(Mt. 11.20-24)

¹³Ca"ā Jesús: De'ē chúúca ya'ai ye"e 'i"yā" ye"e yáā" Corazín. De'ē chúúca ya'ai ye"e 'i"yā" ye"e yáā" Betsaida. Tí ndúúti chí 'i"yā" na yá"āa Tiro ndúúcu 'i"yā" na yá"āa Sidón n'diichi yā vaadi n'giinu chí chíi nguua" ndís'tii, 'i"yā" ye"e yá"āa s'ee" 'āā 'naa" ndaacādaamí yā ye"é nuu"ndi ye"e yā. Ní ch'ēetinúu"

yā catecai yā tan'dúúccā dínnūuⁿ ní ch'εεté yā nguaaⁿ yaíyāā tan'dúúccā costumbre yeⁿe 'iiⁿ'yāⁿ miiⁿ ndíí vmnaaⁿ taachi chíⁿ'i yā chí neené yaⁿ'ai yā. ¹⁴ Cáávā chuū ní 'iiⁿ'yāⁿ yeⁿe yáⁿ'āā Tiro ndúúccū 'iiⁿ'yāⁿ yeⁿe yáⁿ'āā Sidón 'duūⁿ'vī cá castigo yeⁿ'é yā nguéé ti yeⁿe ndís'tiī taachí ndaā nguuvi chí Ndyuūs caaⁿ'maⁿ yā nuuⁿ'ndi yeⁿe 'iiⁿ'yāⁿ. ¹⁵ Ndís'tiī, 'iiⁿ'yāⁿ yeⁿe yāā Capernaum, neⁿ'é ní díiⁿ ní chí maáⁿ ní n'gεεté ní naati caⁿ'á ní na infierno.

¹⁶ 'Iiⁿ'yāⁿ chí n'giindiveéⁿ yā nduudu yeⁿ'ē ndís'tiī ní nduudu yeⁿ'ē 'úú n'giindiveéⁿ yā. 'Iiⁿ'yāⁿ chí nguéé neⁿ'e yā ndís'tiī, nguεε neⁿ'e yā 'úú. Ní nguéé neⁿ'e yā Ndyuūs ti 'iiⁿ'yāⁿ miiⁿ dichó'o yā 'úú.

Nanguεεcuunéé 'iinū ngeεcu ndííchí discípulos yeⁿ'é Jesús

¹⁷ Nguεεcuunéé ndu'ū 'iinū ngeεcu ndííchí discípulos ndúúccū vaadi yeenú. Ní caⁿ'a yā: N'díí, Señor, espíritus yeⁿ'e yááⁿ'nguiinūuⁿ n'giindiveeⁿ sa yeⁿ'e 'nū chí caaⁿ'maⁿ n'tiīⁿ'nyúⁿ 'nū ndúúccū chiduchí ní.

¹⁸ Jesús caⁿ'a yā: Cuáácú 'úú ní in-ááⁿ yááⁿ'nguiinūuⁿ tan'dúúccā chí sn'daā sa yeⁿ'ē nanguuvi tan'dúúccā 'cuai. ¹⁹ Ní Jesús caⁿ'a yā chíi yā discípulos yeⁿ'e yā: 'Úú ní teé poder ndís'tiī chí cun-ncáⁿ ní cúú ndúúccū 'iiti dáⁿ'āi, nífcu cuchéé ní ndúúccū 'iiⁿ'yāⁿ chí contra yeⁿ'e ní. Ní nguéé du'ū veε cuuvi cuchéé yeⁿ'e ndís'tiī. Ní nguéé idiiⁿ daño ndís'tiī. ²⁰ Ndís'tiī nguéé ngii yeenú ní taachi caaⁿ'máⁿ ní n'tiīⁿ'nyuⁿ yeⁿ'ē espíritus yeⁿ'e yááⁿ'nguiinūuⁿ ní n'giindiveeⁿ yeⁿ'e ní naati yeenú ní chí canéé nguūⁿ chí dúúchí ní na libro yeⁿ'é Ndyuūs na va'ai cheeti nguuvi.

Jesús chíi yeenú yā

(Mt. 11.25-27; 13.16-17)

²¹ Hora mííⁿ nūuⁿ Jesús yeenú n'dai yā cáávā Espíritu N'dai yeⁿ'é Ndyuūs ní caⁿ'a yā: N'díi, Chiidá, 'úú ní teé gra-

cia n'díi chí 'iiví ní yeⁿ'e va'ai cheeti nguuvi ndúúccū yáⁿ'āā 'cúú caati snuuⁿ n'déⁿ'ei ní nduudú 'cúú yeⁿ'e 'iiⁿ'yāⁿ chí déénu ca yā ndúúccū 'iiⁿ'yāⁿ chí n'deé n'dái túúmícádínnuuⁿ yā. Ní ca'á ní chí cadínnūuⁿ 'iiⁿ'yāⁿ chí ndiicúuⁿ yā chí nguéé n'deé cá déénu yā caati 'tíicā neⁿ'e ní díiⁿ ní ti n'daācā.

²² N'díi Chiidá, 'āā tee ní tanducueⁿ'ē 'úú. Mar 'áámá 'iiⁿ'yāⁿ nguéé déénu yā du'ū chí 'aama n'dyaⁿ'ā Daiya Dendyuūs, dámaaⁿ n'díi Chiidá. Mar 'aama 'iiⁿ'yāⁿ nguéé déénu yā du'ū chí n'díi Chiidá dá-maāⁿ 'áámá n'dyaⁿ'ā daiyá ní, ndúúccū 'āā du'ú nūuⁿ 'iiⁿ'yāⁿ chí Daiyá Dendyuūs neⁿ'é yā 'cuuⁿ'míⁿ yā.

²³ Tuuⁿ'mi ní Jesús ngaⁿ'a yā ngii yā dis-cípulos yeⁿ'e yā: Dε'ε chúúccā n'dai ndís'tiī chí ngii naaⁿ ní dendu'ū chí ndís'tiī n'gíínu ní. ²⁴ 'Úú ní ngaⁿ'á ngii ndís'tiī chí neené 'yaaⁿ profetas ndúúccū reyes chí yeⁿ'ē ndii cuááⁿ vmnaaⁿ neⁿ'e yā snaaⁿ yā chí ndís'tiī ínaaⁿ ní naati nguéé n'diichí yā. Ní neⁿ'é yā 'caandiveeⁿ yā chí ndís'tiī n'giindiveeⁿ ní naati nguéé ch'iindiveeⁿ yā.

Saⁿ'ā samaritano chí n'dai

²⁵ 'Áámá maestro yeⁿ'e ley chí neⁿ'e sa n'diichineeⁿ sa Jesús ndaa sa nanáaⁿ yā ní n'tiinguuneeⁿ sa Jesús: N'díí, Maestro, ¿dε'ε chí canee chí díiⁿ chí ndáácā vida cueⁿ'e daāⁿ'maⁿ?

²⁶ Jesús nan'gueεcútaⁿ'a yā: ¿Taacā canéé nguūⁿ na ley yeⁿ'é chuū? ¿Dε'ε tu-umicadiinuuⁿ di yeⁿ'e ley yeⁿ'e chuū?

²⁷ Maestro yeⁿ'e ley miiⁿ nan'gueεcútaⁿ'ā sa: 'Túúccā canéé nguūⁿ: Dinéⁿ'e di Señor Ndyuūs yeⁿ'ē di ndúúccū n'úúⁿ'máⁿ staava yeⁿ'ē di, ndúúccū n'úúⁿ'máⁿ alma yeⁿ'ē di, ndúúccū tanducueⁿ'ē fuerzas yeⁿ'ē di, ndúúccū tanducueⁿ'ē vaadi cadínnūuⁿ yeⁿ'ē di. Ní dinéⁿ'e di nducyaaca 'iiⁿ'yāⁿ na níiⁿ'nuúⁿ va'āi yeⁿ'e di tan'dúúccā chí neⁿ'e di maāⁿ di.

²⁸ Jesús nan'gueecútaⁿa yā: N'dáacā nan'gueecútaⁿā di. Diiⁿ di chuū, ní cunduūchi di cueⁿe daāⁿmaⁿ.

²⁹ Saⁿā miiⁿ neⁿe sa cunéé n'daāca sa ní caⁿa sa chii sa Jesús: ¿Dú'ū chi 'iiⁿyāⁿ chi canéé chí neⁿé chi niiⁿnuúⁿ va'āi yeⁿé?

³⁰ Tuu'mi ní Jesús miiⁿ nán'gueecútaⁿā yeⁿé sa ndúúcu 'áámá cuento chi ejemplo chi tíicā: 'Áámá saⁿā ngua'āi sa yeⁿé yāāⁿ Jerusalén miiⁿ ní cūnaⁿa sa na yāāⁿ Jericó. Taachi canúúⁿ sá yúúni 'iiⁿyāⁿ duucu ní sta'á yā saⁿā miiⁿ ní diví yā ndii catecai sa ní ch'eⁿe yā saⁿā ndíí chi ya'āi ca yeⁿé sa ní t'ee t'ée nguéé ch'ii sa ní cunaⁿa yā. ³¹ Tuu'mi ní 'áámá chiiduú cho'ó yā yúúni miiⁿ ní taachi n'diichi yā saⁿā miiⁿ, diví yā cuááⁿ 'diituú yúúni ní cho'ó yā ní cueⁿé yā. ³² Tiicā ntúúⁿ saⁿā levita chi chiiduú chi diiⁿ ntiiⁿnyuⁿ yeⁿe nátaí cho'ó yā naachi candíítí saⁿā miiⁿ. N'diichi yā saⁿā miiⁿ ní diví yā cuaaⁿ 'diituú yúúni. Ní cho'ó yā ní cueⁿé yā. ³³ Cuayivi ní 'áámá saⁿā yeⁿe yáⁿāa Samaria cho'ó sa yúúni miiⁿ. Taachí ndaa niiⁿnuúⁿ sa naachi candíítí saⁿā miiⁿ, n'diichi sa saⁿā nnee ya'āi 'iinu sa saⁿā.

³⁴ Ní ndaā sa naachi candíítí saⁿā miiⁿ ní idiíⁿ yiicú sá naachi ya'āi ndúúcu aceite ndúúcu vino ní ch'eeu sa tínūuⁿ naachí ya'āi yeⁿé sa. Ní sn'duū sa saⁿā 'yúúduu yeⁿe sa ní candē sa saⁿā na yāāⁿ. Ní nuūⁿ sa 'áámá va'ai naachí cuuvi cu'neeⁿ sa saⁿā miiⁿ naachi 'iiⁿyāⁿ dííⁿ yā cuidado saⁿā miiⁿ. ³⁵ Chidēve táámá nguuvi, taachi neⁿe caⁿa sa tun'daa sa na 'uūvi caadi yeⁿe bolsa ní ca'ā sa saⁿā vaacu miiⁿ. Ní caⁿa sa chii sa saⁿā: N'dii, dííⁿ ní cuidado saⁿā, ti 'āā taa véé nūuⁿ chi dííⁿ ní gastar ndúúcu sa, taachí nguēecunéé nadí'vé yeⁿe ní. ³⁶ Maaⁿ ní Jesús ntiinguunéⁿ yā saⁿā miiⁿ: Naachi 'iinū saⁿā s'eeⁿ ¿chē sá chi saⁿā chi neⁿe sa saⁿā na niiⁿnuúⁿ ya'āi chi nuū cá'ai chi duucu miiⁿ?

³⁷ Saⁿā miiⁿ ní caⁿā sa: Saⁿā chi nnee ya'āi 'iinu sa. Tuu'mi ní Jesús miiⁿ caⁿa yā: Díí, cueⁿe di, ní diiⁿ ntúúⁿ di 'túúca.

Jesús canéé yā na vaacu Marta ndúúcu María

³⁸ Cuayivi ní cueⁿe Jesús na 'áámá yāāⁿ lííⁿ ní ndaa yā na vaacu 'áámá n'daataá chi nguuvi tá Marta. Ní 'cuūⁿ tá chi canee yā na vaacu tá. ³⁹ Ní Marta miiⁿ ní véé 'aama v'í yā chi nguuvi tá María. Ní María miiⁿ ch'iindí tá ná ca'a Señor Jesús miiⁿ, ní ng'iindiveeⁿ tá nduudu chí ch'icueeⁿ yā. ⁴⁰ Marta miiⁿ ní néené n'deēe ntiiⁿnyuⁿ idiíⁿ tá ní ndaā tá nanááⁿ Jesús ní caⁿa tá: N'díí Señor, ¿'áá nguéé inadicádiinūⁿ yeⁿé chi dámaaáⁿ n'nééⁿ v'í 'úú chí dííⁿ mandado? Cuuvi ní táⁿā ní cunnee tá 'úú.

⁴¹ Jesús caⁿa yā: Dii, Marta, Marta, néené n'deēe dendu'ū chi nadicádiínūⁿ di yeⁿé dendu'ū chí idi'vaachíí. ⁴² Véé 'áámá nūuⁿ dendu'ū chi n'daacā ca. Tá María miiⁿ ndēeve tá chí n'daacā ca. Ní chuū nguéé ndiví 'iiⁿyāⁿ yeⁿé tá.

Jesús ng'icueeⁿ yā táacā chi 'iiⁿyāⁿ cuuvi caaⁿmaⁿngua'á yā

(Mt. 6.9-15; 7.7-11)

11 'Áámá vmnéⁿēe ní Jesús ngaⁿangua'á yā 'áámá cuaaⁿ, ní taachí ch'iinu caⁿangua'á yā, discípulos yeⁿe yā caⁿa yā chii yā Jesús: N'díí Señor, ca'cuéⁿ ní nús'uu taacá chi cuuvi caaⁿmaⁿngua'á 'nū tan'dúúca chi Juan chi cheédínūⁿniⁿ ch'icueeⁿ yā discípulos yeⁿe yā.

² Tuu'mi ní Jesús caⁿa yā chii yā discípulos yeⁿe yā: Taachí ndí'stíí caaⁿmaⁿngua'á ní 'túúca caaⁿmaⁿ ní: N'dii, chí Chiidá 'nū chí canéé na va'ai cheeti nguuvi. N'daacā n'dai chí 'iiⁿyāⁿ dich'eté yā n'dii. Cuchií tiempo chí ngaⁿa ntiiⁿnyúⁿ ní yeⁿe tanducuéⁿe. Cúví tan'dúúca chí n'dii neⁿe ní tan'dúúca ná va'ai

cheeti nguuvi, 'tiicá ntuūn ná yáⁿ'áa 'cúū.

³Tée nī chi cuuvi che'é 'nū maaⁿnguuvi.

⁴Nadich'εecú nī nuuⁿndi yeⁿ'é 'nū, tan'dúucā chi nús'ūū nadach'εecú 'nū yeⁿ'e 'iiⁿ'yāⁿ chi nguεε 'ndaācā díⁿ yā nduucú 'nū. Nguéé 'cuááⁿ nī chi ndaā nanaáⁿ 'nū cosas chi cheεchi ca chi diiⁿ chi díⁿ 'nū nuuⁿndi naati cunneé nī nús'uu chi nguéé díⁿ 'nū nuuⁿndi ní cucheé 'nū.

⁵Tuuⁿmi ní Jesús caⁿ'a yā 'áámá ejem-plo. ¿Du'ú ndís'tii chi véé amigo yeⁿ'e nī ní caⁿ'á nī nduu vaacu amigo ná maⁿ'a yaaaⁿ ní caaⁿ'máⁿ nī: N'dií amigo, teé nī 'iinū panes yeⁿ'e nī 'úú, ⁶caati 'áámá amigo yeⁿ'é chi canuuⁿ sa yúúní ndaā sa na vaacú ní nguéé de'ε vεε chi ca'á chi che'e sa? ⁷Ní 'iiⁿ'yāⁿ chi canúuⁿ yā va'ai miiⁿ nán'guεεcútaⁿ'a yā: Nguéé díⁿ ndu'ú nī 'úú. 'Áā nduudí cheendi va'āi ní dá'caiyāá yeⁿ'é ní candiití yā nduucú na cama. 'Úú nguéé cuuví nducueéⁿ ní teé n'dií chiiⁿ chi neⁿ'e nī. ⁸Jesús ngaⁿ'á yā: 'Úú ngaⁿ'á ngií ndís'tii. 'Áará chi nguéé nducueeⁿ amigo yeⁿ'e sa chi ca'a yā pan saⁿ'ā miiⁿ cááva chi amigo yeⁿ'e sa, naati nducueeⁿ yā ní ca'a yā amigo miiⁿ ti amigo miiⁿ nguéé 'cuinaaⁿ sa chi ngiica sa n'deeε n'dái vueltas. ⁹Ní 'úú ní ngaⁿ'á ngií ndís'tii: Cáácá nī ní Ndyuūs ní téε yā yeⁿ'é nī, in'nuúⁿ nī ní ndaāca nī, 'yááví nī cheendi va'āi ní nan'guaaⁿ yeⁿ'é nī. ¹⁰Nducyáácá 'iiⁿ'yāⁿ chi ngiica yā Ndyuūs ní Ndyuūs ca'á yā yeⁿ'e yā. Ní nducyáácá 'iiⁿ'yāⁿ chi in'nuúⁿ yā ní ínndaaca yā. Ní nducyáácá 'iiⁿ'yāⁿ chi yaaⁿ'vi yā cheendi va'ai, ní nan'guaaⁿ yeⁿ'e yā.

¹¹Maaⁿ ní cheé ndís'tii chi véé daiya nī, ndúúti chi daiya nī caaca pan, ¿'áá ca'á nī lado yeⁿ'e pan 'áámá túūu? O ndúúti chi caaca daiyá nī 'aama 'yaācā, ¿'áá ca'a nī lado yeⁿ'e 'yaācā miiⁿ ní 'áámá cúú? ¹²O ndúúti chi caaca 'áámá dūtu'u, ¿'áá

ca'á nī lado yeⁿ'e dūtu'u 'áámá 'iitidaⁿ'ái? ¹³Ndúúti chi ndís'tii chi cúncheeⁿ nī déénu nī ca'a nī dendu'ū chi n'dáacā daiya nī, tuuⁿ'mi ní Chiidá nī chi canéé na va'ai cheeti nguuvi n'deēε cá cá'a yā caati cá'a yā Espíritu N'dai yeⁿ'é Ndyuūs 'iiⁿ'yāⁿ chí caaca yā chiida yā.

'Iiⁿ'yāⁿ s'eeⁿ ngaⁿ'a yā chi Jesús miiⁿ véé poder yeⁿ'e yááⁿ'n'guiinūⁿ ndúúcu yā
(Mt. 12.22-30; Mr. 3.19-27)

¹⁴Jesús miiⁿ tun'daa yā yeⁿ'e 'áámá saⁿ'ā lífⁿ 'áámá espíritu yeⁿ'e yááⁿ'n'guiinūⁿ chi diiⁿ chi nguéé ngii ngaⁿ'ā sa. Ní taachí nan'daa espíritu yeⁿ'e yááⁿ'n'guiinūⁿ saⁿ'ā 'díⁿ'mī miiⁿ, ní caⁿ'a sa. Nífcú 'iiⁿ'yāⁿ s'eeⁿ n'diichí yā chuū ní chéⁿ'é yiinú yā yeⁿ'e. ¹⁵Náⁿ'ā 'iiⁿ'yāⁿ ní caⁿ'a yā: Sáⁿ'a 'cūū ní nitun'dáa sa espíritu yeⁿ'e yááⁿ'n'guiinūⁿ cáávā poder yeⁿ'e Beelzebú chi Satanás chí ngaⁿ'ā ntiíⁿ'nyuⁿ sa yeⁿ'e espíritus yeⁿ'e yááⁿ'n'guiinūⁿ.

¹⁶Tanáⁿ'a yā ní neⁿ'e n'diichineeⁿ yā Jesús ní ngiica yā Jesús chi diiⁿ yā 'áámá señal yeⁿ'e na va'ai cheeti ngu- uvi chi cuuvi n'diichí yā. ¹⁷Jesús déénu yā chi nacádífnuuⁿ 'iiⁿ'yāⁿ s'eeⁿ ní caⁿ'a yā chii yā 'iiⁿ'yāⁿ s'eeⁿ: 'Áámá gob- ernador chi ngaⁿ'ā ntiíⁿ'nyúⁿ yā yeⁿ'e yáⁿ'āa naachi véé 'uuví partido yā chi nguⁿ'u 'aamá yā ndúúcu táámá yā, tuuⁿ'mi ní nguéé cuuvi 'naaⁿ tiempo chi 'iiⁿ'n- tyéⁿ'e yā. 'Tiicá ntūūⁿ naachi 'áámá familia yā ndúúti chi n'deēε nada- cadífnuuⁿ yā chi véé partido yeⁿ'e fa- milia miiⁿ nguεε cuuvi nduuvidaamá yā. ¹⁸'Tiicá ntūūⁿ nduuti chi yááⁿ'n'guiinūⁿ 'cuuⁿ'maⁿ sa ndúúcu maaⁿ sa, ¿táácā ca- nee naachí ngaⁿ'ā ntiíⁿ'nyuⁿ sa? Caaⁿ'máⁿ nī 'úú: ¿De'ε cáávā chi ngaⁿ'a ndís'tii chi caavā yááⁿ'n'guiinūⁿ chi duuchi Beelzebú chi Satanás itun'daá espíri- tus yeⁿ'e yááⁿ'n'guiinūⁿ yeⁿ'é 'iiⁿ'yāⁿ? ¹⁹Nduuti chi 'úú idivií espíritus yeⁿ'e

yáá'n'guiinūuⁿ cáávā Beelzebú, tuu'mi ní 'ii'yāⁿ ndúúcu ní ní ǰdu'u poder itun'dáa yā espíritus yeⁿe yáá'n'guiinūuⁿ? Chiiⁿ chi diiⁿ 'ii'yāⁿ chi ndúúcu ní n'giⁿ'í yā chi nguεε 'tíicā chi ngaⁿa nī. ²⁰Ndúúti chi cáávā poder yeⁿe Ndyuūs 'úú itun'daá espíritus yeⁿe yáá'n'guiinūuⁿ yeⁿe 'ii'yāⁿ, tuu'mi ní cuaacu níⁿ'nyúⁿ chi naachi Ndyuūs ngaⁿa ntiiⁿ'nyúⁿ yā nndaā nanááⁿ ndíⁿs'tiī.

²¹Taachi saⁿā dítiiⁿú diiⁿ cuidado sa ná vaacu sa ndúúcu íngaatu, tuu'mi ní na vaacu sa canéé seguro. ²²Taachí ndaa táámá saⁿā chí véé fuerzas yeⁿe sa ní ichεε sa nduucú yā ní idiví sa tanducuéⁿe íngaatu yeⁿe yā chi ngii chεεtinúⁿ yā yeⁿe va'āi miiⁿ tuu'mi ní diiⁿ sa repartir íngaatu s'eeⁿ ndúúcu compañeros yeⁿe sa.

²³'Ii'yāⁿ chi nguéeⁿ canée yā lado yeⁿe, 'ii'yāⁿ miiⁿ ní canée yā contra yeⁿe. 'Ii'yāⁿ chi nguéeⁿ daama diiⁿ cosechar nduucú tuu'mi ní diiⁿ yā tan'dúúca chi ingéε tanducuéⁿe cosecha.

Espíritu yeⁿe yáá'n'guiinūuⁿ chi inguεεcunéé na saⁿā

(Mt. 12.43-45)

²⁴Caⁿa Jesús: Taachí espíritu yeⁿe yáá'n'guiinūuⁿ nacan'daa na 'áámá saⁿā, cachiica na yáⁿ'āa cuuⁿ'maⁿ naachi nguéeⁿ ch'εεtinee 'ii'yāⁿ ní in'nuūuⁿ naachi cuuvi ntaaviⁿ'tuunuuⁿ ní nguéeⁿ ndaācā. Tuu'mi espíritu miiⁿ nadicádíⁿnuuⁿ ní ngaⁿa: Nanguεεcunéé na vaacú naachi chiicá. ²⁵Taachí ndaa na vaacu miiⁿ ndaācā chi saⁿā miiⁿ tan'dúúca 'áámá va'ai chi 'āa déévé n'dai ndúúcu nducuéⁿe na lugar yeⁿe. ²⁶Tuu'mi ní espíritu miiⁿ cueⁿe ní in'nuūⁿ tá ndεéⁿchεε espíritus chi cunncaá ca chí cuuví maāⁿ. Ní ndaā espíritus ní ch'εεtinee na saⁿā miiⁿ. Cuayiivi ní n'geenu sa ngii ca ní cunncaá ca canéé sá nguéeⁿ ti cuááⁿ vmnaaⁿ.

Véé vaadi yeenu yeⁿe 'ii'yāⁿ chi i'téenu yā Ndyuūs

²⁷Taachí Jesús ngaⁿa yā dendúuⁿ 'cūú 'áámá n'daataá 'caí yuudu tá nguaaⁿ 'ii'yāⁿ s'eeⁿ: Dε'ε chúúca n'dai n'daataá chi ch'iindiyáaⁿ ní ní ntaavi tá n'diī.

²⁸Jesús ní caⁿa yā: N'daacā ca yeⁿe 'ii'yāⁿ chi n'giindiveéⁿ yā nduudu yeⁿe Ndyuūs, ní i'téenu yā nduudu miiⁿ.

'Ii'yāⁿ chi nguéeⁿ n'daāca yā ngiica yā 'áámá señal

(Mt. 12.38-42; Mr. 8.12)

²⁹Taachí nduuvidaama 'ii'yāⁿ ndúúcu Jesús, Jesús tucá'a yā caⁿa yā nduudu miiⁿ: 'Ii'yāⁿ chi véε yā ngúúví 'cūú nééné cúncheeⁿ yā. In'nuūⁿ yā señales naati nguéeⁿ ndaācā táámá señal caati dámaāⁿ snaaⁿ yā señal chi diiⁿ Ndyuūs ndúúcu profeta Jonás tiempo chi 'āa chó'oo. ³⁰Tan'dúúca Ndyuūs diiⁿ yā señal ndúúcu profeta Jonás yeⁿe 'ii'yāⁿ na yāāⁿ Nínive, 'tiicá ntuūⁿ Saⁿā chi Daiya Ndyuūs cuuvi cunée yā lado yeⁿe señal tiempo 'cūú. ³¹Taachi ndaa nguuvi yeⁿe juicio chi Ndyuūs caaⁿ'máⁿ yā yeⁿe nuuⁿ'ndi yeⁿe 'ii'yāⁿ, n'daataá reina chi tiempo chi chó'oo ngaⁿa ntiiⁿ'nyuⁿ tá yeⁿe lado yeⁿe sur chi caⁿa ta ní nducueeⁿ tá contra yeⁿe 'ii'yāⁿ chi snée yā maaⁿ'nguuví. Ní táⁿ'ā miiⁿ ní diiⁿ tá condenar 'ii'yāⁿ chi snée yā maaⁿ'nguuví caati táⁿ'ā miiⁿ yaⁿ'āi n'dai ngiica tá chi neⁿe tá ch'iindivee tá yeⁿe vaadi deenu yeⁿe rey Salomón. Maaⁿ ní 'muuⁿ canéé 'áámá yā chi ch'εεte ca vaadi deenu yeⁿe yā nguéeⁿ ti rey Salomón. ³²'Ii'yāⁿ chi ch'εεtinéé na yāāⁿ Nínive ndii cuááⁿ vmnaaⁿ nducueeⁿ yā ní caaⁿ'máⁿ yā nuuⁿ'ndi yeⁿe 'ii'yāⁿ chi snée yā maaⁿ caati 'ii'yāⁿ yeⁿe yāāⁿ Nínive ndaacadaamí yā yeⁿe nuuⁿ'ndi yeⁿe yā cáávā nduudu yeⁿe Ndyuūs chi caⁿa profeta Jonás miiⁿ. 'Tíicā caⁿ'á yā diiⁿ yā nguuví chi Jesús caaⁿ'máⁿ yā nuuⁿ'ndi yeⁿe 'ii'yāⁿ. 'Caan-

diveéⁿ nī. 'Múúⁿ ní véé 'áámá saⁿā chi ch'ēete ca sa nguéé ti profeta Jonás.

'Áámá ejemplo chi tan'dúúcā 'áámá deeve yeⁿe cuerpo yeⁿe yú

(Mt. 5.15; 6.22-23)

³³ Caⁿa Jesús: Mar 'áámá 'iiⁿyāⁿ nguéé cunuuⁿ n'déⁿei yā 'aama lámpara chí ngi-ichi ní nguéé ndúú i'nuūⁿ ra yā maaⁿ 'aama caja naati s'nuúⁿ yā na 'áámá mesa ní 'iiⁿyāⁿ chí cundaa yā ní snaaⁿ yā deeve miiⁿ. ³⁴ Ndúútinaáⁿ yú chiiⁿ chí tan'dúúcā 'aama lámpara yeⁿe cuerpo yeⁿe yú. Taachí n'dái nduutináaⁿ nī 'ti-icá ntúūⁿ n'dái cuerpo yeⁿe nī ní inaaⁿ chí deeve. Naati taachí nguēē n'daacā nduutináaⁿ nī tan'dúúcā lámparas chí nguéé ngiichi ní 'tiicá ntúūⁿ cuerpo yeⁿe nī cunee ná maāiⁿ. ³⁵ N'diichi nī, cundeé nī cuidado nduutináaⁿ nī chí deeve yeⁿe cuerpo yeⁿe nī chí nguéé canee nī na maāiⁿ. ³⁶ 'Tiicá ntúūⁿ inaaⁿ n'dáaca nī ní nguéé maāiⁿ naachi canee nī nduuti chí candéē nī cuidado nduutinaaⁿ nī. Ní véé deeve nanáaⁿ nī tan'dúúcā 'áámá lámpara ngiichi ní naáⁿ nī chí deeve yeⁿe.

Jesús ngaⁿa nuuⁿndi yeⁿe maestros yeⁿe ley ndúúcū 'iiⁿyāⁿ fariseos

(Mt. 23.1-36; Mr.

12.38-40; Lc. 20.45-47)

³⁷ Taachí Jesús miiⁿ ch'iinu cāⁿa yā chuū, 'áámá saⁿā fariseo ndaa sá nanááⁿ Jesús ní dí'cuítu sa Jesús chí ch'éē yā ndúúcū sa. Ní cueⁿe yā ndúúcū sa. Ní ndaa yā na vaacu sa ní chēetē yā na mesa. ³⁸ Taachí ndaa tiempo chí che'e yā ní saⁿa fariseo miiⁿ n'diichi sa chí nguéé naāⁿnū Jesús ta'á yā, (tan'dúúcā costumbre yeⁿe 'iiⁿyāⁿ Israel) tuuⁿmi ní cueⁿe yīinu sa. ³⁹ Ní Señor Jesús caⁿa yā chiiⁿ yā saⁿa fariseo: Díí ndúúcū tanáⁿā saⁿā fariseos inadéévé nī cuāāⁿ daami vaso ndúúcū cu'u chí tan'dúúcā cuerpo yeⁿe nī naati cuááⁿ chēēti chí tan'dúúcā staava yeⁿe nī ndiituú ndúúcū

vaadi 'caa'va ndúúcū dendúū chí nguēē n'daacā. ⁴⁰ Ndís'tií chí chēechi tiíⁿ nī, ¿'áá nguéé deenú nī chí Ndyuūs din'dái yā 'iiⁿyāⁿ ndúúcū staava yeⁿe yā ndúúcū cuerpo yeⁿe yā, ní neⁿe yā 'iiⁿyāⁿ chí nadeevé cuerpo yeⁿe yā ndúúcū staava yeⁿe yā ndúúcū taanduvéé chí vee chēeti cuerpo yeⁿe yā? ⁴¹ Ndís'tií canéé chí ca'á nī limosnas yeⁿe nī ndúúcū nuuⁿmaⁿ staava yeⁿe nī caati chuū ní cosa chí n'daacā.

⁴² De'e chúúcā ya'āi yeⁿe ndís'tií 'iiⁿyāⁿ fariseos caati nadicádíinuⁿ nī chí n'daacā nī chí dííⁿ nī chí ngaⁿā ley yeⁿe Ndyuūs ti ca'a nī Ndyuūs décima chí ndiichi parte yeⁿe nducuéⁿe cosecha yeⁿe nī chí yīiví ndúúcū 'iicudaáⁿ ndúúcū tanducuéⁿe yaātā ngaiyāā. Nguéé véé vaadi neⁿe yeⁿe Ndyuūs ndúúcū nī ndíí nguéé dííⁿ nī dendu'ū chí cuaacu. Canéé chí dííⁿ nī tanducuéⁿe chí ngaⁿā ley yeⁿe Ndyuūs ní dinéⁿe nī nducyaaca 'iiⁿyāⁿ ní ca'á nī décima dendu'ū.

⁴³ De'e chúúcā ya'āi yeⁿe ndís'tií chí neⁿe nī 'cuēetē nī na silla yeⁿe 'iiⁿyāⁿ chí ngaⁿa ntiíⁿnyuⁿ yeⁿe yaacū sinagogas. Ní ndís'tií neⁿe nī chí 'iiⁿyāⁿ dííⁿ yā saludar ndís'tií taachi snéē nī na yúúni.

⁴⁴ De'e chúúcā ya'āi yeⁿe ndís'tií chí ngi'cueeⁿ nī ley ndúúcū 'iiⁿyāⁿ fariseos. Ndís'tií ngaⁿa nī chí n'daacā idifⁿ nī ní nguéé n'daacā idifⁿ nī. Ndís'tií ní tan'dúúcā 'áámá yáinyāⁿ chí 'iiⁿyāⁿ nguéé inaaⁿ yā ní nguéé déenu yā yeⁿe ní chiicá yā vmnááⁿ yeⁿe yáinyāⁿ, 'tiicá nī.

⁴⁵ Tuuⁿmi ní nan'gueecútaⁿa 'áámá abogado, chí maestros yeⁿe ley. N'dií, Maestro, taachí ngaⁿa nī chuū, ídiiⁿ nī chí induuvi táaⁿ nū.

⁴⁶ Naati Jesús caⁿa yā: De'e chúúcā ya'āi ntúūⁿ yeⁿe ndís'tií, abogados, maestros yeⁿe ley. Ndís'tií idifⁿ nī n'deeē cá leyes chí chēechi cá ní nga'a nī tan'dúúcā chí chēēdi chí saⁿā nguéé cuuvi candéē sa. Ní ndís'tií ní ndii mar 'áámá ta'a nī ní

nguée ituu'ví nī chéédí miiⁿ. Ní nguée dííⁿ nī, ní nguée nginnee nī 'iiⁿ'yāⁿ.

⁴⁷ De'e chúúcā ya'āi yeⁿe ndís'tií chi nadin'dái nī yaínyāⁿ yeⁿe saⁿā profetas chi 'āā candée yā nduudu yeⁿé Ndyuūs tiempo chi 'āā ch'ó'oo. Ní 'iiⁿ'yāⁿ yeⁿe ndaata yeⁿé nī ndii cuááⁿ vmnaaⁿ ch'iiⁿ'nuⁿ yā saⁿā profetas. ⁴⁸ Cuaacu níⁿ'nyúⁿ chí ndís'tií ní n'g'iⁿ'i nī chi yeenú nī yeⁿe chi 'iiⁿ'yāⁿ yeⁿe nī ndii cuááⁿ vmnaaⁿ ti cuaacu níⁿ'nyuⁿ 'iiⁿ'yāⁿ yeⁿe ndaata yeⁿe nī ch'iiⁿ'núⁿ yā saⁿā profetas ní maaⁿ ní ndís'tií idin'dái nī yaínyāⁿ yeⁿe profetas.

⁴⁹ Ní cáávā chuū ní cáávā chi Ndyuūs deenú yā tanducuéⁿē, Ndyuūs caⁿa yā 'tíicā: 'Úú dicho'ó profetas ndúúcu apóstoles ní náⁿa yā 'caaⁿ'núⁿ yā 'iiⁿ'yāⁿ ní tanáⁿa yā can'dáa yā 'iiⁿ'yāⁿ ní dííⁿ yā chi 'iiⁿ'yāⁿ s'eeⁿ n'geenú yā ngii. ⁵⁰ Ndyuūs caⁿá yā dííⁿ yā castigar 'iiⁿ'yāⁿ chi maaⁿ snée iⁿ'yeeⁿdí 'cūū ti 'iiⁿ'yāⁿ yeⁿe ndaata yeⁿé yā ch'iiⁿ'núⁿ yā profetas ndíí tiempo taachí Ndyuūs din'dái yā iⁿ'yeeⁿdí. ⁵¹ Ní ndii tiempo taachi ch'iiⁿ'nuⁿ yā Abel ní chingéē yuuúⁿ yeⁿe sa, ndíí taachi ch'iiⁿ'nuⁿ yā Zacarías miiⁿ naavtaⁿā yeⁿē nátaí ndúúcu yeⁿé yaacu templo. Chuū ní ngaⁿá ngíí ndís'tií, caati Ndyuūs caⁿá yā dííⁿ yā castigar 'iiⁿ'yāⁿ chi maaⁿ snee iⁿ'yeeⁿdí 'cūū cáávā yuuúⁿ yeⁿe 'iiⁿ'yāⁿ s'eeⁿ.

⁵² De'e chúúcā ya'āi yeⁿe ndís'tií chi 'cuéⁿ nī ley ní nguée ca'cuaeⁿ nī chi cadíínúúⁿ 'iiⁿ'yāⁿ vaadi deenu yeⁿé Ndyuūs, ní nguée dííⁿ nī tan'dúúca chi deenu nī chi canée chi dííⁿ nī.

⁵³ Taachí Jesús ch'iinu caⁿa yā dendu'u 'cūū, tuu'mi ní maestros yeⁿe ley ndúúcu 'iiⁿ'yāⁿ fariseos nduuvi taáⁿ yā yeⁿe Jesús ní tucá'a yā itinguunéeⁿ yā n'dee n'dái ní caⁿa yā chii yā Jesús. ⁵⁴ Ní n'diichineeⁿ yā Jesús ndúúcu nduudu yeⁿe yā. Ní canée ngiinu yā Jesús miiⁿ chi cucáávā nduudu yeⁿe yā

ní Jesús cásta'a yā vaanicadíínūⁿ yeⁿe yā ní caⁿa yā nduudu chi nguée cuaacu. Ní 'íicú cuuvi caaⁿ'máⁿ yā nuuⁿndi yeⁿé Jesús.

Levadura yeⁿé 'iiⁿ'yāⁿ fariseos

12 Tuu'mi ní neené 'yaaⁿ 'iiⁿ'yāⁿ ndu-uvidaama yā chi tá tīí n'dee 'iiⁿ'yāⁿ miiⁿ chingúúⁿndai yā 'aamá yā taamá yā. Tuu'mi ní Jesús miiⁿ tucá'a yā caⁿa yā chii yā discípulos yeⁿe yā: Dííⁿ nī cuidado yeⁿe chi ca'cuaeⁿ 'iiⁿ'yāⁿ fariseos ti tan'dúúca levadura yeⁿe pan. Nguée dííⁿ n'daaca yā yeⁿe chi ngi'cuaeⁿ yā. ² Ti nguée de'e vee chi nin'díí naaⁿ chi nguée cuuvi nánguaaⁿ naaⁿ. Ní nguée 'áamá dendú'ū chi cánúⁿ n'de'ei chi nguée cuuvi cadíínuuⁿ yā. ³ Tíicā ntúūⁿ dendu'ū chí ngaⁿa n'de'ei ndís'tií, tuu'mi ní 'iiⁿ'yāⁿ ní 'caandiveéⁿ yā. Ní chííⁿ chí ndís'tií ngaⁿa nī ndúúcu 'iiⁿ'yāⁿ cheeti va'āi tuu'mi ní 'iiⁿ'yāⁿ caaⁿ'maⁿ yā cuuvi yā nducyáácá 'iiⁿ'yāⁿ ndíí na yaacū yeⁿe va'āi.

Du'ū di'va'a yú

(Mt. 10.28-31)

⁴ Caⁿa Jesús: Nds'tií chi n'dai nduucú, 'úú ngaⁿá ngíí ndís'tií chi nguée 'va'á nī 'iiⁿ'yāⁿ chí 'caaⁿ'nuⁿ yā cuerpo yeⁿe 'iiⁿ'yāⁿ, ti 'āā ntée cuuvi dííⁿ yā cosa chi nguée n'daacā ca ti chuū. ⁵ Úú ní cuuví ndís'tií du'ū chi dííⁿ 'va'á nī: Nds'tií ní 'va'á nī Ndyuūs chi taachí 'āā n'díí 'iiⁿ'yāⁿ, Ndyuūs cuuví dííⁿ yā 'caanuúⁿ yā 'iiⁿ'yāⁿ infierno. 'Túúca ngaⁿá ngíí ndís'tií 'iiⁿ'yāⁿ miiⁿ chí di'va'a nī.

⁶ ¿'Áá nguée in'diicuú yā na 'uúvi 'yáádā cáávā 'uúvi taaⁿ tuúmi? Ndyuūs ní nguée ngiinaáⁿ yā mar 'áamá 'yáádá. ⁷ Níicú ndíí nducyaaca yuúdu tiiⁿ ndís'tií ndii dúúché ndúúcu Ndyuūs. Cáávā chuū nguée 'va'á ndís'tií. ¿'Áá nguée ya'ai ca chíí've ndís'tií nguée ti 'aama 'yáádá?

Yeⁿe 'iiⁿyāⁿ chi i'teenú yā Cristo ní ngaⁿa yā yeⁿe chuū nanááⁿ 'iiⁿyāⁿ

(Mt. 10.32-33; 12.32; 10.19-20)

⁸ Caⁿa Jesús: 'Úú ngaⁿá ngii ndís'tií chi nducyaaca 'iiⁿyāⁿ chi ngaⁿa yā chi yeⁿe 'úú nguaaⁿ 'iiⁿyāⁿ 'tiicá ntúúⁿ 'úú Saⁿā chi Daiya Ndyuūs caaⁿ máⁿ nanááⁿ ángeles yeⁿe Ndyuūs chi 'iiⁿyāⁿ s'eeⁿ ní yeⁿe 'úú. ⁹ Nducyaaca 'iiⁿyāⁿ chi nguéeⁿ ngaⁿa yā chi yeⁿe 'úú nguaaⁿ 'iiⁿyāⁿ 'tiicá ntúúⁿ 'úú Sáⁿā chi Daiya Ndyuūs caaⁿ máⁿ nanááⁿ ángeles yeⁿe Ndyuūs chi 'iiⁿyāⁿ s'eeⁿ ní nguéeⁿ yeⁿe 'úú.

¹⁰ Nducyáacá 'iiⁿyāⁿ chí caⁿa yā nduudu taaⁿ chi nguéeⁿ n'daacā chi contra yeⁿe 'úú chí Sáⁿā chí Daiya Dendyuūs, Ndyuūs nadach'εecú yā yeⁿe yā. Nducyáacá 'iiⁿyāⁿ chí caⁿá yā nduudu taaⁿ chí nguéeⁿ n'daacā chí contra yeⁿe Espíritu N'dai yeⁿe Ndyuūs, Ndyuūs nguéeⁿ nadach'εecú yā yeⁿe yā. Ndíí nguéeⁿ ndúú iⁿ'yeeⁿ dí 'cūū, ndíí nguéeⁿ ndúú táamá iⁿ'yeeⁿ dí chí cuchíí.

¹¹ Taachí 'iiⁿyāⁿ ndée yā ndís'tií na yaacū sinagogas nanááⁿ 'iiⁿntyéⁿe ndúúcū jueces, nguéeⁿ nadicádíinuⁿ ní de'ē chí nan'gueecútaⁿ a ní o de'ē chí caaⁿ maⁿ ní. ¹² Espíritu N'dai yeⁿe Ndyuūs cuuvi ndís'tií hora mífⁿ nūuⁿ de'ē chí caaⁿ maⁿ ní.

Jesús ngi'cueeⁿ yā yeⁿe peligró yeⁿe vaadí 'cuiica

¹³ 'Áamá saⁿā caⁿa sa ngii sa Jesús: N'díí, Maestro, cuuvi ní 'diinú chí ntée sa vaadí n'gua'aá yeⁿe chiidá 'nū cuuvi yeⁿe.

¹⁴ Jesús miiⁿ ní caⁿa yā chíí yā saⁿā: N'díí, sáⁿā, ¿du'ú s'neeⁿ 'úú vmnaaⁿ yeⁿe n'díí tan'dúucā juez chí nca'á chí cuuvi yeⁿe ní yeⁿe 'taa chí véé yeⁿe chíidá ní?

¹⁵ 'Úú ní ngaⁿá ngii nducyáacá ndís'tií: Cuin'diichí ní ní cundée ní cuidado yeⁿe chí neⁿe ní yeⁿe vaadí 'cuiica caati

'iiⁿyāⁿ nguéeⁿ ndaaca yā vida cueⁿe daāⁿ-maⁿ cáávā chí véé n'dee n'dái yeⁿe yā.

¹⁶ Tuu'mi ní Jesús miiⁿ caⁿa yā chíí yā ejemplo 'cūū 'iiⁿyāⁿ: 'Áamá saⁿā 'cuiica véé yá'āa yeⁿe sa chí neené n'dee chíinu sa. ¹⁷ Sáⁿā miiⁿ ní nadicádíinuⁿ sa ní caⁿā sa: ¿Táacā dííⁿ tí nguéeⁿ cuescomate ch'εete naachi nadidaamá cosecha yeⁿe? ¹⁸ Ní caⁿa sa: 'Túucā dííⁿ. Cúndεevé cuescomate yeⁿe ní ndíí taama chí ch'εetε ca ní miiⁿ nadaamá tандucuéⁿe cosecha yeⁿe ndúúcū dendú'ú yeⁿe. ¹⁹ Tuu'mi ní caaⁿ máⁿ māaⁿ cuuvi alma yeⁿe. Díí alma yeⁿe de'e chúucā n'dai díí. Nééné n'dee vεe yeⁿe di chí nguáin'dai chí nááⁿ n'dai cuchéé. Maaⁿ ní ntaavi'tuunúūⁿ cuchéé, cu'u, ní cuuvi yéénú. ²⁰ Naatí Ndyuūs caⁿa yā chíí yā saⁿā: Díí saⁿā chí chεεchi tííⁿ di. Maaⁿ-nguiinú 'cūū caⁿa di 'cuūvī di. Ní chííⁿ chí nguáin'dai di chí vaadí 'cuiica yeⁿe di, ¿du'ú cuuvi yeⁿe? ²¹ Ní Jesús ngaⁿa yā: 'Tíicā 'iiⁿyāⁿ chí nguain'dai yā chí véé yeⁿe maáⁿ yā cáávā maaⁿ yā naati 'iiⁿyāⁿ s'eeⁿ ní nguéeⁿ véé yeⁿe yā nanááⁿ Ndyuūs.

Ndyuūs idiíⁿ yā cuidado nducyaaca 'iiⁿyāⁿ chí daiyá yā

(Mt. 6.25-34)

²² Jesús ngaⁿa yā ngii yā discípulos yeⁿe yā: Cáávā chuū chí ngaⁿá ngii ndís'tií. Nguéeⁿ nadicádíinuⁿ ní yeⁿe vida yeⁿe maaⁿ ní yeⁿe chí nge'e ní cáávā vida yeⁿe ní ndíí nguεε ndúú cáávā catecaí ní yeⁿe cuerpo yeⁿe ní. ²³ Vida ní ya'ai ca chíí'vε nguéeⁿ tí chí nge'é ní. Ní cuerpo ní ya'ai ca chíí'vε nguéeⁿ tí catecaí ní. ²⁴ Nadicádíinuⁿ ní yeⁿe 'yaadā chí nguuvi tí cuervos. 'Yaada s'eeⁿ ní nguéeⁿ ngiinu tí ndaata; ndíí nguéeⁿ ndúú ingii cosecha yeⁿe tí chí che'e tí; ndíí nguéeⁿ ndúú véé ra vaacú tí chí nguain'dai tí; ndíí nguéeⁿ ndúú cuescomates yeⁿe tí. Ní Ndyuūs nga'a yā chí nge'e tí. ¿'Áa yaⁿ'ai ca chíí'vε ndís'tií nguéeⁿ tí 'yaada s'eeⁿ?

²⁵ ¿Du'u 'áamá chéé ndís'tií cuuví cundéé nī cuidado ní n'dee n'dái nacadiinúúⁿ nī ní ntiinee ní maⁿ'a metro yeⁿ'ē chí yaacu nī? ²⁶ Ndúúti chí nguεε cuuvi dííⁿ nī chuū chí 'lífⁿ ¿de'ē cúúví chí indeé nī cuidado ní n'dee n'dái nadicadínuuⁿ nī yeⁿ'e dendu'ū chí n'gεεte cá?

²⁷ Cuin'diichí nī naāndā táacā n'giita. Nguéé din'dái tínūuⁿ, ndíf nguéé ndúú idin'dái hilo. 'Úú ngaⁿ'á ngíí n'dís'tií ti rey Salomón canúuⁿ yā catecái yā chí n'dεεveé n'dai yeⁿ'e rey nguéé neené n'dεεveé tan'dúúcā 'áamá naāndā s'eeⁿ. ²⁸ Nduuti chí Ndyuūs nga'a yā catecai n'daacā naāndā chí maaⁿ ní snéé cuēti ní cavyaaⁿ ní nti'í ní 'iiⁿ'yāⁿ 'neeⁿ yāⁿ'a yā, n'deē cá Ndyuūs téé yā ndís'tií ti Ndyuūs dííⁿ yā cuidado yeⁿ'e ndís'tií chí dúu'vii i'téenu nī Ndyuūs. ²⁹ Ndís'tií ní nguéé in'nuúⁿ nī chí che'e nī o cu'ú nī. Nguéé nadicadínuuⁿ nī yeⁿ'e ní 'cuεεt-inéé 'diiíⁿ nī. ³⁰ Ti 'iiⁿ'yāⁿ chí nguéé yeⁿ'e ndaata Israel o judíos in'nuúⁿ yā tanducuéⁿ'ē dendu'ú 'cūū. Naati ndís'tií ní véé 'aama Chiidá nī chí 'āā déenu yā yeⁿ'e tanducuéⁿ'ē dendu'ū chí necesidades yeⁿ'e ndís'tií. ³¹ Vmnaáⁿ vmnaaⁿ ndís'tií ní cánéé chí in'nuúⁿ nī Ndyuūs ní yeⁿ'e nducuéⁿ'ē yeⁿ'e chí Ndyuūs ngaⁿ'a ntiíⁿ'nyúⁿ yā, ní 'íicú Ndyuūs téé yā ndís'tií tánducueⁿ'ē dendu'ū.

**Vaadi 'cuiica chí véé
na va'ai cheeti nguuvi**

(Mt. 6.19-21)

³² Caⁿ'a Jesús: Ndís'tií chí tan'dúúcā 'iiti cuūchí yeⁿ'é 'tiicá nī. Nguéé 'va'á nī ti Ndyuūs Chiida yú neⁿ'é yā téé yā ndís'tií dendu'ū yeⁿ'e naachí ngaⁿ'a nti-íⁿ'nyúⁿ yā. ³³ Cuin'dífcui nī chí véé yeⁿ'e nī ní ca'á nī 'iiⁿ'yāⁿ chí nguéé véé yeⁿ'e yā. Dííⁿ n'daacá nī caati cuuvi yeⁿ'é nī vaadi 'cuiica yeⁿ'e va'ai cheeti nguuvi naachi 'iiⁿ'yāⁿ duucu nguéé cuuvi cundaa yā, ndii nguεε nduu í'yéevē cuuvi di'tuuví tí. ³⁴ Caati naachi canéé vaadi 'cuiica yeⁿ'e

nī, miiⁿ canee staava yeⁿ'é nī chí nadi-cadiinúúⁿ nī yeⁿ'e nducuéⁿ'ē.

**Canéé chí candéé ní
cuidado yeⁿ'e nducuéⁿ'ē**

³⁵ 'Cuεεtinee chiichi n'daacā ndúúcu catecai nī. Cuεεchiichí nī paño cheēti nī 'íicú candéé nī lámparas yeⁿ'e nī chí ngiichi. ³⁶ 'Cuεεtinéé ndís'tií tan'dúúcā 'áamá saⁿ'ā chí snéé ngiinu sa chí ndaa patrón yeⁿ'e sa naachi n'giindivaacú 'iiⁿ'yāⁿ. Ní maaⁿ nda'ai sa cheendi va'āí ní taachi ndaá yā chí di'cuεεcú yā tuu'mí nūuⁿ nn'guaaⁿ sa yeⁿ'e yā. ³⁷ De'ē chúúca n'dai mozos chí dííⁿ mandado ní taachi ndaa Señor miiⁿ ní ndaaca yā mozos chí sндуuchí yā. Cuaacu níⁿ'nyúⁿ ngaⁿ'á ngíí ndís'tií chí Señor miiⁿ ní cuεεchiichí n'daacá yā paño cheēti yā. Ní Señor miiⁿ ní dííⁿ yā chí mozos 'cuεεte sa na mesa. Tuu'mi ní Señor miiⁿ 'cuíí yā cu'u che'e mozos. ³⁸ 'Áará chí Señor miiⁿ ndaa yā maⁿ'a yaaaⁿ o taachi 'āā cuéé chidεeve nguuvi ní ndaacá yā mozos chí sндуuchi sa. De'e chúúca n'dai mozos ti sндуuchí yā. ³⁹ Ndís'tií ní cadínuuⁿ nī chuū. Ndúúti chí 'iiⁿ'yāⁿ vaacu déenu yā de'ē hora chí ndaa chí duucu, cuaacu níⁿ'nyúⁿ 'cuεεtí nduuchí yā ní nguéé 'cuaaⁿ yā chí duucu na vacú yā. ⁴⁰ 'Tiicá ntúúⁿ ndís'tií 'cuεεtinéé yaáⁿ nī ti hora chí nguéé in-acadínuuⁿ nī 'úú chí Saⁿ'ā chí Daiyá Dendyuūs ní ndaá taama vmnéⁿ'ē.

**Yeⁿ'e mozo chí din'daacā ndúúcu
mozo chí nguεε din'daacā**

(Mt. 24.45-51)

⁴¹ Tuu'mi ní Pedro miiⁿ ní caⁿ'a yā chii yā Jesús: N'díí, Señor, ¿'áá caⁿ'a nī ejemplo 'cūū caavā nús'uu o caavā nducyaaca 'iiⁿ'yāⁿ?

⁴² Jesús miiⁿ ní caⁿ'a yā: ¿Du'ú dueño ca'a yā ntiíⁿ'nyuⁿ chí s'neeⁿ yā vmnaaⁿ yeⁿ'e va'ai yeⁿ'e yā 'áamá mayordomo nduuti chí nguεε ca'a sa chí che'e mozos yeⁿ'é yā hora chí che'e sa? ⁴³ De'e

chúucā n'dai mayordomo chi diiⁿ sa nti-
iⁿnyuⁿ taachí dueño miiⁿ ní ndaa yā
ní nandaaca yā mayordomo chi diiⁿ
sa tan'dúucā chi neⁿe yā. ⁴⁴Cuaacu
níⁿnyúⁿ ngaⁿá ngí ndís'tií chi dueño
miiⁿ ní cuⁿneeⁿ yā mayordomo miiⁿ chi
caaⁿmaⁿ ntiⁿnyuⁿ sa yeⁿe tanduvéé chi
vee yeⁿe yā. ⁴⁵Ndúuti chi mayordomo
miiⁿ nadicádiinuuⁿ sa na staava yeⁿe sa
chí dueño cuuvi náaⁿ yā nndaa yā tuuⁿmi
ní tuca'a sa 'cueⁿe sa mozo ndúucū
n'daataá chi snéé caadi 'iyyū ní nge'e
sa ní ngi'i sa ndúucū amigos yeⁿe sa
ní cuuⁿvi sa. ⁴⁶Tuuⁿmi ní dueño miiⁿ ní
ndaa yā nguuvi chi mayordomo nguéé
cānee ngíinu sa ní 'áamá hora chi nguéé
déenu sa. Ní dueño miiⁿ ca'á yā castigo
ch'ete ca mayordomo miiⁿ tan'dúucā chi
Ndyuūs ca'a yā castigo 'iiⁿyāⁿ chi nguéé
i'téenu yā 'yā. ⁴⁷Mayordomo chi deenu
sa chí neⁿe dueño yeⁿe sa naati nguéé
véé yaaⁿ sa ndíí nguéé ndúú diiⁿ sa chi
ngaⁿa dueño yeⁿe sa cuuvi sa casti-
gado ndúucū neenē n'dee cuūví 'cueⁿé
yā saⁿā. ⁴⁸Naati mayordomo chi nguéé
déenu sa taacā neⁿe dueño yeⁿe sa chí
diiⁿ sa, ní diiⁿ sa chí nguéé n'daacā chi cu-
uvi sa castigado, tuuⁿmi ní cuuvi sa cas-
tigado ndúucū 'téé nūuⁿ cuūví cueⁿé yā
saⁿā. 'Āā du'ú nūuⁿ saⁿā chí n'deeé nga'a
dueño yeⁿe sa, dueño miiⁿ ní n'deēē cá
caaca yā cuenta yeⁿe chí diiⁿ sa. 'Iiⁿyāⁿ
chi nga'a n'deēē cá táámá yā, 'iiⁿyāⁿ miiⁿ
n'deēē cá caaca yā cuenta yeⁿe chí diiⁿ
taamá yā.

**Véé 'áamá 'uūví taaⁿ
'iiⁿyāⁿ cáávā Jesús miiⁿ**
(Mt. 10.34-36)

⁴⁹Úú Jesús ní ndāa chí cuⁿneeⁿ yaⁿā
ná iⁿyeeⁿdí 'cūū. De'ē ca neⁿé diiⁿ nduuti
chí 'āā ngiichi. ⁵⁰Canéé chí 'úú 'cuenú
cuuvi n'dee n'dái ní neⁿé chí 'cuenú
cuuvi ndíí taachi 'āā cuuvi cuaacu tan-
ducuéⁿe. ⁵¹¿'Áá nadicadínuuⁿ nī chí
'úú ndaa chí ndéé vaadi 'diíⁿ 'iiⁿyāⁿ

yeⁿe iⁿyeeⁿdí 'cūū? 'Úú ní ngaⁿá ngí
ndís'tií chí nguéé cuaacu caati ndéé
vaadi 'caa'va, ní 'iiⁿyāⁿ 'caa'vá yā ndúucū
táámá 'iiⁿyāⁿ. ⁵²Ndíí tiempo miiⁿ ndíí
tiempo chí cuchii, nduuti chí nyuⁿu
'iiⁿyāⁿ na 'áamá va'āi ndúucū vaadi
'caa'va 'cuetinée yā, 'iinu yā ní caⁿa
yā contra yeⁿe na 'uuvi yā ní 'uuvi
yā ní caⁿa yā contra yeⁿe ná 'iinú yā.
⁵³Saⁿā chí véé daiya sa ní 'caa'va sa
ndúucū daiya sa, 'íicú daiya sa ní 'caa'vá
sa ndúucū chiidá sa. Ní 'áamá n'daataá
nguéé cuuvi n'diichi tá daiya tá, 'íicú
daiya ntúūⁿ tá nguéé cuuvi n'diichi tá
cheecu tá. Ní taⁿā indá'ā tá ní 'caa'vá
yā ndúucū dicuūnú ta, ní dicuūnú ta ní
'caa'vá yā ndúucū táⁿā indá'a tá.

Señales yeⁿe tiempo 'cūū

(Mt. 16.1-4; Mr. 8.11-13)

⁵⁴'Tiicá ntúūⁿ ngaⁿa Jesús ngii yā
'iiⁿyāⁿ: Taachí ndís'tií inaaⁿ nī méēeⁿ
chí íneeⁿ naachí ngiia 'yáⁿā, tuuⁿmi ní
ngaⁿa nī chí 'cueeⁿ cúúví. Ní 'tíicā ngii.
⁵⁵Ní taachí ngéenu 'yúúné cuááⁿ ndiyyā
ngaⁿa nī chí cuuvi yāāaⁿ 'iicu ní ngii.
⁵⁶Ndís'tií chí 'uūví naaⁿ 'uūví cheendi nī
déenu nī taaca canéé nānguuvi ndúucū
na yaⁿá, taachi ndaa 'íínūuⁿ nī taachi cu-
uvi 'cueeⁿ cuuvi. ¿De'ē cúúví chí nguéé
déenu nī yeⁿe señales chí inaaⁿ nī yeⁿe
tiempo 'cūū?

**Diiⁿnú yiiⁿnu di tun'dáá n'dai di
ndúucū 'iiⁿyāⁿ chí táaⁿ yā yeⁿe di**

(Mt. 5.25-26)

⁵⁷Tuuⁿmi ní caⁿa Jesús: ¿Dé'ē cúúví
chí nguéé indéē ndís'tií cuidado chee chí
n'daacā chí diiⁿ ní? ⁵⁸Taachi caⁿá nī
ndúucū sáⁿā chí táaⁿ ndúucū nī nanááⁿ
juez, n'diichí nī chí indee nī ndúucū
vi'í cuaaⁿ cyúúni ní diiⁿ nī chí 'cuet-
inéé n'dáaca nī ndúucū vi'í nī 'iicu nguéé
caⁿa nī nanááⁿ juez. Ní juez miiⁿ nca'á
yā ndís'tií ta'ā policía, ní policía miiⁿ ní
cuⁿuūⁿ sá ndís'tií vácūū. ⁵⁹Úú ngaⁿá

ngii ndís'tiī ti nguéé nan'dáa nī vácūu neⁿe chí nguéé 'cuiinu nadí'vē tandu-cuéⁿe chí ndiicú nī.

**N'dáacā n'dai chí ndaacadaamí nī
yeⁿe nuuⁿndi yeⁿe nī**

13 Ndáa n'duuvi saⁿa nanááⁿ Jesús ní caⁿa sa chíi sa Jesús tan'dúucā chí diiⁿ gobernador Pilato. Ca'a yā orden chí ch'iīⁿnuⁿ sa n'dúúvī 'iīⁿyāⁿ yeⁿe yāⁿāa Galilea ní staⁿa yā yuúⁿ yeⁿe 'iīⁿyāⁿ s'eeⁿ ndúúcu yuúⁿ yeⁿe 'iiti chí 'āā níⁿíⁿnúⁿ 'iīⁿyāⁿ Israel s'eeⁿ chí ca'a yā ofrenda yeⁿe Ndyuūs. ²Jesús ní caⁿa yā chíi yā 'iīⁿyāⁿ s'eeⁿ: ¿Áá nadicádínuuⁿ ndís'tiī chí 'iīⁿyāⁿ s'eeⁿ yeⁿe yāⁿāa Galilea ch'eenu yā 'tíicā ti véé ca nuuⁿndi yeⁿe yā nguéé ti tanáⁿā 'iīⁿyāⁿ yeⁿe yāⁿāa Galilea? ³Úú ngaⁿá ngii ndís'tiī: Nguéé 'tíicā. Nduúti chí ndís'tiī nguéé ndaacadaamí nī yeⁿe nuuⁿndi yeⁿe nī, tuuⁿmi ní nducyaaca ndís'tiī 'cuūvi ntúuⁿ nī cueⁿe daāⁿmaⁿ. ⁴¿De'e nadicádínuuⁿ ndís'tiī yeⁿe ndu'ū ndítiiⁿyuⁿ 'iīnu 'iīⁿyāⁿ chí ndíi cuaaⁿ vmnaaⁿ sndaā nduū torre na yāāⁿ Siloé vmnááⁿ yā ní nducyáácā yā chíi yā? ¿Áá nadicádínuuⁿ ndís'tiī chí 'iīⁿyāⁿ s'eeⁿ véé ca nuuⁿndi yeⁿe yā nguéé ti tanáⁿā yā chí snée yā na yāāⁿ Jerusalén? ⁵Úú ní ngaⁿá ngii ndís'tiī chí nguéé 'tíicā. Nduuti chí ndís'tiī ntúuⁿ nguéé ndaacadaamí nī yeⁿe nuuⁿndi yeⁿe nī, tuuⁿmi ní nducyaaca ndís'tiī 'cuūvi nī cueⁿe daāⁿmaⁿ.

**Ejemplo yeⁿe yáⁿá yeⁿe n'guídii
yaaⁿ nguuví chí nguéé n'gui'i yeⁿe**

⁶Tuuⁿmi ní Jesús caⁿa yā ejemplo 'cūu: 'Áámá saⁿā ní catá'āi 'áámá yáⁿá yeⁿe n'guídii yaaⁿ nguuví yeⁿe sa naachi véé yāⁿāa chēti chééⁿ yeⁿe sa. Chó'oo tiempo ní cheⁿe sa in'nuuⁿ sa n'gui'i yeⁿe yáⁿá yeⁿe sa ní nguéé ndaacā sa n'gui'i yeⁿe. ⁷Tuuⁿmi ní caⁿa sa chíi sa 'iīⁿyāⁿ chí díiⁿ yā ntiīⁿnyuⁿ yeⁿe yāⁿāa yeⁿe sa: 'Áā 'iīnu nduūyū chí

ichii ní nguéé indaāca n'gui'i na yáⁿá 'cūu. 'Caaca nī yáⁿá. ¿De'e cuuvi chí yáⁿá dí'vaachi na yáⁿāa naachi snée yáⁿá 'cūu? ⁸Naati saⁿā chí idiiⁿ ntiīⁿnyuⁿ na yaⁿā miiⁿ nán'guēcútaⁿā sa: N'díi, señor, 'āā canéé rá nduuyú 'cūu ní 'úú nadidevéé yáⁿá yeⁿe ní ca'á taavi abono yeⁿe. ⁹Ní nduuti chí 'cuūndi n'gui'i yeⁿe ní n'daacā. Nduuti chí nguéé, ní 'caaca nī.

**Jesús díiⁿ yā chí nduūvā yeⁿe 'áámá
n'daataá chí neenē n'guutíi**

¹⁰Nguuvi sábadu chí ntaaviⁿtuunúⁿ 'iīⁿyāⁿ Israel s'eeⁿ, Jesús ngi'cueeⁿ yā na 'áámá yaacū sinagoga. ¹¹Miiⁿ ní canéé 'áámá n'daataá chí 'āā ndítiiⁿyuⁿ 'iīnu nduūyū chí ndii n'guuti ta cáāvā chí diiⁿ espíritu yeⁿe yááⁿnguiinūⁿ 'tíicā ndúúcu ta. Ndíi mar 'áámá naaⁿ nguéé ngii ndaa cuaacú ta. ¹²Taachí Jesús n'diichí yā n'daata miiⁿ yaaⁿví yā táⁿā ní caⁿa yā chíi yā táⁿā: N'díi, n'daataá, ¿'áá neⁿe nī chí nduuvi cuaacú nī?

¹³Jesús sn'duú yā ta'a yā vmnaaⁿ yeⁿe n'daātā miiⁿ. Tuuⁿmí nūuⁿ ndaā cuaacu n'daataá míⁿ ní n'daataá míⁿ ní ngaⁿa yā: De'e chúucā ch'ēte Ndyuūs. ¹⁴'Iīⁿyāⁿ chí ngaⁿā ntiīⁿnyúⁿ yā yeⁿe yaacu sinagoga nduuvi taáⁿ yā ti Jesús miiⁿ ní diyi-icú yā n'daataá míⁿ nguuví chí 'iīⁿyāⁿ ntaaviⁿtuunúⁿ yā. Ní ngaⁿa yā ngii yā nducyaaca 'iīⁿyāⁿ: Jaāⁿ nguuví nūuⁿ canee chí diiⁿ 'iīⁿyāⁿ ntiīⁿnyuⁿ ní nguuví s'eeⁿ 'iīⁿyāⁿ cuuvi chíi yā nanááⁿ Jesús miiⁿ ní cuuvi diiⁿ yīicú yā 'iīⁿyāⁿ s'eeⁿ, naati nguéé cuuvi díiⁿ yā 'tíicā nguuví chí ntaaviⁿtúunūⁿ 'iīⁿyāⁿ.

¹⁵Tuuⁿmi ní Jesús nan'guēcútaⁿā yā yeⁿe sa: Ndís'tiī saⁿā 'uūvī naaⁿ 'uūvī cheendí nī, ¿'áá nguéé in'daatí ndís'tiī 'iiti yeⁿe nī naachi snée 'iīⁿyuⁿ tī ní ngeⁿe nī nga'a nī nuūⁿnīⁿ 'iiti nguuví chí ntaaviⁿtuunúⁿ nī? ¹⁶N'daataa 'cūu ní yeⁿe ndaata yeⁿe Abraham. 'Áā ndítiiⁿyuⁿ 'iīnu nduūyū ncachiichí

yáá'n'guiinūuⁿ tá'nā. ¿Áá nguéé canee chí n'daatíí tá'nā miiⁿ yeⁿe ca'ai nguuvi chí ntaaví'tuunúúⁿ ní?

¹⁷ Taachí Jesús miiⁿ caⁿa yā chuū, taanduvéé yā chí taaⁿ yā yeⁿe yā ní 'cuināaⁿ yā. Nducyáácá 'iiⁿ'yāⁿ yeⁿe yááⁿ miiⁿ'ya yeenú n'dai yā yeⁿe tanducuéⁿe dendu'ú chí n'gēete chí diiⁿ Jesús miiⁿ.

Ejemplo yeⁿe nduuti yéⁿe yíivē ntí'yāa

(Mt. 13.31-32; Mr. 4.30-32)

¹⁸ Jesús caⁿa yā: ¿Dēē tan'dúucā naachí Ndyuūs ngaⁿa ntiⁿ'nyúⁿ yā? ¿Dēē nadádaamā nduucū? ¹⁹ Tan'dúucā nduutiⁿ yeⁿe yíivē ntí'yā chí 'áámá saⁿā ní sta'ā sa ní chiinū sa na yáⁿāa yeⁿe sa. Yaāta miiⁿ ní ch'iita tan'dúucā 'áámá yáⁿā ch'ēete. 'Yáádá yeⁿe nanguuvi din'dái tí 'dēecé tí na dúuⁿnē.

Ejemplo yeⁿe levadura yeⁿe pan

(Mt. 13.33)

²⁰ Jesús ní caⁿa ntúūⁿ yā: ¿Dēē tan'dúucā naachí Ndyuūs ngaⁿā ntiⁿ'nyúⁿ yā? ²¹ Tan'dúucā 'aama tááⁿ levadura yeⁿe pan chí 'áámá n'daataá chistaⁿā tá nguaaⁿ 'iinū medidas harina ndíí chí nan'guiita tanducuéⁿe yāachi yéⁿe.

Cheendi va'āi 'tuucúu

(Mt. 7.13-14; 21-23)

²² Taachí Jesús canúúⁿ yā yúúⁿ chí cho'ó yā na yááⁿ Jerusalén cueⁿé yā tanáⁿā yááⁿ n'gēete ndúucū yááⁿ n'gaiyāá ní ngí'cueeⁿ yā 'iiⁿ'yāⁿ. ²³ Tuu'mi ní 'áámá saⁿā ndā sa nanááⁿ yā ní ntingu- uneeⁿ sa: N'díí, Señor, ¿áá duú'ví 'iiⁿ'yāⁿ chí nnguaⁿ'ai yā? Jesús miiⁿ ní caⁿ'a yā chí yā saⁿā miiⁿ: ²⁴ Dííⁿ nī tanducuéⁿe chí cuuví nī chí cundaá nī cheendi va'āi 'tuucúu caati ngaⁿ'á ngíí ndís'tií chí néené 'yaaⁿ 'iiⁿ'yāⁿ neⁿe yā cundaá yā cheendi va'ai 'tuucúu chí candéé naachi Ndyuūs nadanguaⁿ'ai yā 'iiⁿ'yāⁿ

naati nguéé cuuvi diiⁿ yā. ²⁵ Taachi 'iiⁿ'yāⁿ yeⁿe va'ai nducueeⁿ yā ní n'gaadí yā cheendi va'āi yeⁿe ndís'tií, tuu'mi ní ndís'tií snee nī cuaaⁿ chuva'āi. Ní di'cueecú nī cheendi va'āi ní caaⁿ'máⁿ nī: Señor, Señor, nn'guaáⁿ nī yeⁿe 'nū. 'Iiⁿ'yāⁿ yeⁿe va'ai ní nan'gueecutaⁿ'a yā: Nguéé in'diichí ndís'tií ndii nguēe deenú tī ndiicá nī. ²⁶ 'Áará chí ndís'tií ní tucá'a nī caaⁿ'maⁿ nī 'tíicá: Che'é nū ní chí'i nū ndúucu nī taachi n'dií ní chí'cueeⁿ nī 'iiⁿ'yāⁿ na yúúⁿ yeⁿe yááⁿ vaacú 'nū. ²⁷ 'Iiⁿ'yāⁿ yeⁿe va'ai miiⁿ ní caaⁿ'maⁿ yā cuuvi yā 'iiⁿ'yāⁿ s'eeⁿ: 'Úú ngaⁿ'á ngíí ndís'tií ti nguéé in'diichí ndís'tií ndíí nguéé deenú tí ndiica nī. Cueevii nī yeⁿe nducyaaca ndís'tií ti nguéé n'daācā idiíⁿ nī. ²⁸ Cuaacu chí ndís'tií snaaⁿ nī chíida yú s'eeⁿ Abraham, ndúucū Isaac, ndúucū Jacob, ndúucū nducyaaca profetas chí ndii cuááⁿ vmaaaⁿ snée yā naachí Ndyuūs ngaⁿ'a ntiⁿ'nyuⁿ. Ní ndís'tií ní 'cueetinée nī cuááⁿ chuva'āi. Miiⁿ ní cueecú nī ní che'é nī 'diiⁿ'yúⁿ nī. ²⁹ 'Iiⁿ'yāⁿ s'eeⁿ chíi yā yeⁿe nducueeⁿ cuaaⁿ yeⁿe iⁿ'yeeⁿ'dí 'cūū ní ndaa yā nanááⁿ Ndyuūs. Chíi yā ndíí cuaaⁿ na ican'dáá 'yáⁿā, ndii cuaaⁿ na ngiiya 'yáⁿā, ndíí cuaaⁿ 'níf'núⁿ, ndíí cuaaⁿ ndiyya, ní 'cueeté yā na mesa yeⁿe banquete naachí Ndyuūs ngaⁿ'a ntiⁿ'nyúⁿ yā. ³⁰ Tuu'mi ní náⁿ'ā 'iiⁿ'yāⁿ chí n'gēete chí ngaⁿ'a ntiⁿ'nyúⁿ yā maaⁿ na iⁿ'yeeⁿ'dí 'cūū ní cuuvi ndiicuuⁿ cá yā naachi snée Ndyuūs ní naⁿ'a 'iiⁿ'yāⁿ chí ndiicuuⁿ cá maaⁿ na iⁿ'yeeⁿ'dí 'cūū ní cuuvi n'gēeté yā naachi snée Ndyuūs.

Jesús cheecú yā cáávā 'iiⁿ'yāⁿ yeⁿe yááⁿ Jerusalén

(Mt. 23.37-39)

³¹ Nguuví 'cuu nūⁿ 'áámá chéé 'iiⁿ'yāⁿ fariseos ndāa yā nanááⁿ Jesús ní caⁿ'a yā: N'dií, Jesús, cueⁿe nī ti rey Herodes neⁿ'é yā 'caaⁿ'núⁿ yā n'dií.

³² Naati Jesús caⁿ'a yā chíi yā 'iiⁿ'yāⁿ s'eeⁿ: Cunaⁿ'á nī nanááⁿ rey miiⁿ ní

caaⁿmaⁿ nī cuuvi nī: N'diī rey, tan'dúúcā 'yuunéé, 'tiicá nī. Cuin'diichí nī, Jesús miiⁿ ngaⁿá yā 'túúcā: 'Úú itun'daá es-píritu yeⁿe yááⁿnguiinūⁿ yeⁿé 'iiⁿyāⁿ ní díⁿ chí nduūvā yeⁿe 'iiⁿyāⁿ maaⁿnguuvu ndúúcū cavyaaⁿ, tuuⁿmi ní 'cuinu nti-iⁿnyuⁿ yeⁿé damáⁿ. 'Tíicā canee chí díⁿ ná 'iinū nguuvu. ³³Naati 'úú ní canéé chí caacá cuaaⁿ cyúúni ní díⁿ ntiⁿnyuⁿ yeⁿé maaⁿ ndúúcū cavyaaⁿ ndúúcū damáⁿ, caati nguéé canéé chí 'cuuvi 'áámá saⁿā profeta ch'ete chí díⁿ ntiⁿnyuⁿ yeⁿé Ndyuūs 'áámá lado yeⁿe yááⁿ Jerusalén ti na yááⁿ Jerusalén chí 'caaⁿnúⁿ yā saⁿā profetas.

³⁴Jesús caⁿa yā chí yā 'iiⁿyāⁿ yeⁿe yááⁿ Jerusalén: Ndíⁿtií chí 'muuⁿ n'giiⁿnuⁿ nī 'iiⁿyāⁿ profetas ní ngíⁿtuú nī 'iiⁿyāⁿ chí Ndyuūs dicho'ó yā chí ndeé yā nduudu yeⁿé yā. Ní Jesús caⁿa yā: Neené n'deéé cuúví neⁿé nadaamá daiyá 'iiⁿyāⁿ yááⁿ Jerusalén miiⁿ tan'dúúcā 'áámá tú'u nadaamá tí daiya tí mááⁿ ngeéchi tí, ní nguéé 'cuúⁿ nī. ³⁵Túúcā caⁿa yā: N'diichí ndíⁿtií. Vaacú nī cuⁿnééⁿ maáⁿ. Ní ngaⁿá ngí ndíⁿtií chí 'āā ntéé snaaⁿ nī 'úú ndíí ndáá tiempo chí caaⁿmaⁿ nī yeⁿé: De'e chúúcā n'dai 'iiⁿyāⁿ chí cuchii yā ndúúcū chí duuchi Señor 'iivú Ndyuūs ti 'iiⁿyāⁿ yeⁿé Ndyuūs.

Jesús díⁿ yā chí nduūvā yeⁿe 'áámá saⁿā

14 'Áámá sábado, nguuvu chí ntaavi'túúnuuⁿ 'iiⁿyāⁿ, Jesús sndaá yā ní cheⁿe yā 'áámá va'ai yeⁿe 'áámá saⁿā fariseo chí ngaⁿa ntiⁿnyuⁿ sa. Ní tanáⁿā saⁿā fariseos canee ngiinu sa Jesús de'ē chí caⁿá yā chí díⁿ yā. ²Tuuⁿmi ní ndaā nanááⁿ Jesús 'áámá saⁿā chí ngiitā ní ndiitúú núúⁿmáⁿ ch'ete sa. ³Jesús caⁿa yā chí yā maestros yeⁿe ley ndúúcū saⁿā fariseos: ¿'Áá' cuaaⁿ ley miiⁿ chí cuuvi

díⁿ chí nduūvā yeⁿe 'iiⁿyāⁿ nguuvu chí ntaavi'tuunúúⁿ yā?

⁴Saⁿā s'eeⁿ ní 'diiⁿ 'diiⁿ ch'etinee sa ní nguéé nan'gueecutaⁿ sa. Tuuⁿmi ní Jesús sta'á yā ta'a saⁿā chí ndiitúú ní díⁿ yā chí nduūvā yeⁿe saⁿā miiⁿ. Ni yaa'vi yā saⁿā chí cunaⁿ sa. ⁵Cuayiivi ní Jesús yaa'vi yā saⁿā s'eeⁿ ní caⁿa yā: ¿Cheé ndíⁿtií ndúúti chí 'áámá burro o 'áámá itiindu yeⁿe ní cun'dáá nuúⁿ tí na 'áámá viini ní nguéé tuuⁿmi nūuⁿ ntun'dáa ní 'iiti 'áará chí nguuvu chí ntaavi'tuunúúⁿ 'iiⁿyāⁿ?

⁶Saⁿā s'eeⁿ nguéé chíi nan'gueecútaⁿ a sa cucáávā nduudu chí ngaⁿa yā.

'Iiⁿyāⁿ chí invitado yā naachi ngiindivaacu 'iiⁿyāⁿ

⁷Taachí Jesús n'diichí yā táacā díⁿ 'iiⁿyāⁿ chí invitados chí ndeéve yā silla yeⁿe mesa chí lugar chí n'daacā ca, tuuⁿmi ní caⁿa yā 'áámá ejemplo chí 'tee nguéé dááma ndúúcū 'iiⁿyāⁿ chí díⁿ yā invitados. ⁸Ngaⁿa yā 'tíicā. Taachi 'áámá 'iiⁿyāⁿ díⁿ yā invitar díi naachí n'giindivaacu 'iiⁿyāⁿ nguéé 'cuúndi di na silla vmnááⁿ vmnaaⁿ caati cuuvi ndaa táámá 'iiⁿyāⁿ invitado chí ch'eté yā nguéé ti díi. Ní silla miiⁿ ní caava 'iiⁿyāⁿ miiⁿ. ⁹Ní taachí ndaa 'iiⁿyāⁿ chí ch'ete ca yā, tuuⁿmi ní 'iiⁿyāⁿ chí díⁿ yā invitar di ndaa yā nanááⁿ di ní caaⁿmáⁿ yā cuuvi yā díi: Cu'neeⁿ di lugar 'cúu yeⁿe 'iiⁿyáⁿ 'cúu. Tuuⁿmi ní cuuvi 'cuináⁿ di ní 'cuúndi di na silla n'díí naaⁿ n'giinu. ¹⁰Taachí 'iiⁿyāⁿ díⁿ yā invitar díi caⁿa di 'cuúndi di na silla ndíí naaⁿ n'giinu. Ní taachi ndaa nanááⁿ díi 'iiⁿyāⁿ chí díⁿ yā invitar díi, tuuⁿmi ní caaⁿmáⁿ yā cuuvi yā díi: Díí sáⁿā chí n'dai nduucú, caaca dí cuaaⁿ 'niⁿnuⁿ. Ní 'āā n'daacā cuuvi yeⁿe di nanááⁿ 'iiⁿyāⁿ chí veeté yā na mesa. ¹¹'Iiⁿyāⁿ chí dich'eté mááⁿ yā táámá 'iiⁿyāⁿ ní díⁿ yā chí ndiicuuⁿ yā. Ní 'iiⁿyāⁿ chí maaⁿ yā díⁿ chí ndiicuuⁿ yā tááma 'iiⁿyāⁿ ní díⁿ yā chí ch'eté yā.

¹²Tuu'mi ní Jesús nga^a yā ngii yā sa^a chi diiⁿ invitar 'iiⁿyāⁿ s'eeⁿ: Dii taachí in'nuuⁿ di chí che'e nguaiⁿ di o chi che'e nguínū di, nguéé 'cuai di 'iiⁿyāⁿ chi n'dai ndúúcu di, ndíí nguéé ndúú ví'i rá di, ndíí nguéé ndúú 'iiⁿyāⁿ yeⁿē di, ndíí nguéé ndúú 'iiⁿyāⁿ na niⁿnuúⁿ va'āi yeⁿē di chí 'cuííca yā caati 'iiⁿyāⁿ s'uuⁿ ní diíⁿ ntúúⁿ yā invitar dii chi che'e di nduucú yā. 'Tíicā ní nadíí've yā diiⁿ cáávā chi ca'a di chi che'e yā. ¹³Naatí taachí idin'dái di 'aama comida n'dai, 'cuai dí 'iiⁿyāⁿ chi ndaachí snee yā, ndúúcu 'iiⁿyāⁿ chi nguéé ngii ngiicá yā, ndúúcu chí ngāi yó'o, ndúúcu 'iiⁿyāⁿ chi ngeenaáaⁿ. ¹⁴Ní caaⁿmaⁿ 'iiⁿyāⁿ s'eeⁿ yeⁿē di: De'e chúúca n'dai di. Ti 'iiⁿyāⁿ s'eeⁿ nguéé nteé yā dii. Naati Ndyuūs nadíí've yā dii taachí ndaa nguuvi chí 'iiⁿyāⁿ chí n'dai nduuchí yā yeⁿē nguaaⁿ tináⁿā.

Ejemplo yeⁿe 'iiⁿyāⁿ chi che'e yā cena chi ch'ete

¹⁵Taachi 'áamá 'iiⁿyāⁿ chí véé yā na mesa miiⁿ ch'iindiveéⁿ yā chuū, caⁿa yā chíi yā Jesús: De'e chúúca n'dai chí caⁿá yā che'e yā pan naachí Ndyuūs ngaⁿa ntiiⁿnyúⁿ yā.

¹⁶Tuu'mi ní Jesús caⁿa yā ejemplo 'cūū: 'Áamá saⁿā ca^a sa chí din'dái yā 'áamá chí che'e nguínū 'yaaⁿ 'iiⁿyāⁿ, ní idiiⁿ sa invitar n'deeé n'dái 'iiⁿyāⁿ. ¹⁷Ní taachi 'āā chaa che'e nguínū yā dicho'o yā 'áamá mozo chí caⁿa sa cuuvi sa 'iiⁿyāⁿ chí ndii yā invitado: Cuchíí ní. 'Āā véé tanducuéⁿē chí che'e nguínū yū. ¹⁸Nducyaa ca yā ní tucá'a yā caⁿa yā 'tíicā: Ch'etínúuⁿ ní yeⁿé. Ní 'áamá saⁿā ní caⁿā sa: Cáámá ch'iinūⁿ 'caí 'áamá finca ní cánéé chí caⁿá n'diichí finca, chíiⁿ chí ch'etínúuⁿ ní yeⁿé. ¹⁹Táámá yā ní caⁿa yā: 'Caí nyuⁿu yáandā itiindu ní neⁿé dííⁿ ntiiⁿnyuⁿ ndúúcu tí. Ngiiicá favor. Ch'etínúuⁿ ní yeⁿé. ²⁰Táámá yā ní caⁿa yā: Cáámá ch'iinu ch'iindivaacú chí chíiⁿ nguéé cuuvi caⁿá. ²¹Taachí nguéé

cunéé mozo, caⁿa sa chuū chíi sa 'iivi sa. Tuu'mi ní 'iivi miiⁿ nduuci taáⁿ yā ní caⁿa yā chíi yā mozo miiⁿ: Cueⁿe di cuaaⁿ ní'vēē ndúúcu cuaaⁿ cyúúni yeⁿe yááⁿ ní candéé di 'iiⁿyāⁿ ndaachí, ndúúcu 'iiⁿyāⁿ chí nguéé ngii ngiicá yā, ndúúcu 'iiⁿyāⁿ chí ngāi yó'o, ndúúcu 'iiⁿyāⁿ chí ngeenaáaⁿ. ²²Sáⁿā mozo ní cueⁿē sa. Cuayiivi ní ndaa sa ní caⁿā sa chíi sa 'iivi sa: N'díí, señor, 'āā dííⁿ tan'dúúca chí ngaⁿa ní ní véé cá lugar chí 'cueéteé 'iiⁿyāⁿ na mesa. ²³Caⁿa señor miiⁿ chíi yā saⁿā mozo miiⁿ: Cueⁿe di cuaaⁿ cyúúni n'geete ndúúcu yúúni chí véé chí neēⁿ cuááⁿ 'diitū ní di'cuítu di 'iiⁿyāⁿ chí chíi yā na vaacú ní 'íicú cuuvi diitúu na vaacú. ²⁴Ti 'úú ní ngaⁿá ngii ndís'tii chí mar 'áamá saⁿā chí dííⁿ invitar saⁿā vmnaaⁿ nguéé 'cuúⁿ ndaa sa che'ē nguínū sa nduucú na mesa yeⁿé.

'Iiⁿyāⁿ chí caⁿa yā ndúúcu Jesús caneé chí 'cuéenu yā cuuvi

²⁵Cuayiivi mííⁿ nééné n'deeé 'iiⁿyāⁿ cueⁿe yā ndúúcu Jesús. Ní Jesús miiⁿ ní caⁿa yā chíi yā 'iiⁿyāⁿ s'eeⁿ 'áamá ejemplo: ²⁶Ndúúti chí 'áamá 'iiⁿyāⁿ neⁿe ca yā chíidá yā o cheécú yā o n'daataá yeⁿe yā o daiya yā o 'díínu yā o ví'i yā o vida yeⁿē maáⁿ yā nguéé ti 'úú chí Jesús, nguéé cuuvi discípulo yeⁿé. ²⁷'Āā du'ú nūuⁿ chí caⁿa yā nduucú ní nguéé ndéé yā cruz yeⁿe yā chí tan'dúúca nducuéⁿē chí 'cueenu taavi yā cuuvi cucáávā 'úú nguéé cuuvi discípulo yeⁿé. ²⁸¿'Áá cheé nūuⁿ 'áamá ndís'tii taachí neⁿe ní din'dái ní 'áamá torre, ¿'Áá nguéé n'geeté ní ní ididuuché ní? ¿'Áá n'deēé dííⁿ ní gasto ndúúti chí tu'néé chí'veé yeⁿe ní chí 'cuiinu din'dái ní torre yeⁿe ní? ²⁹Ní nduuti chí cu'nuúⁿ ní cimientos yeⁿē torre ní cuayiivi nguéé cuuvi din'dái ní torre yeⁿe ní, tuu'mi ní nducyaaca yā chí snaaⁿ yā 'cáiⁿnyūⁿneeⁿ yā ndís'tii. ³⁰'Iiⁿyāⁿ s'eeⁿ ní caaⁿmaⁿ yā: Sáⁿa 'cūū tucá'a sa din'dái sa ní nguéé ch'iinu di'cuiinū sa. ³¹Ní Jesús

nga^a yā 'tíicā: ¿Du'ú rey ndúúti chi canee chi díⁿ yā caandaá ndúúcu táámá rey, 'áá nguéé n'giindi yā ndúúcu táámá saⁿá ní ididuuché yā? Nduuti chi tunééⁿ ndiicu mil soldados ní 'iicu ndúúcu chuú nūuⁿ cuuvi 'cuuⁿmaⁿ yā ndúúcu soldados chi ndiichi mil yeⁿé táámá rey. ³²Ní nduuti chi nguéé cuché yā, taachi cuchí yā táámá rey ndúúcu soldados yeⁿe yā chi díⁿ yā caandaá ní canéé yaⁿai ca yā miiⁿ tuuⁿmi ní rey miiⁿ dicho'ó yā 'iiⁿyāⁿ chi candéé nduudu miiⁿ. Ní 'iicu caaca yā taama rey chi 'cuéetinéé 'diifⁿ yā. Ní nguéé díⁿ yā caandaá ndúúcu rey yeⁿe yā. ³³'Tiicá ntúūⁿ. 'Áā chéé nūuⁿ ndís'tii nduuti chi nguéé cu'nee ní tanducueⁿé chi véé yeⁿe ní, nguéé cuuví cuuvi ndís'tii discípulos yeⁿé.

Jesús nga^a yā yeⁿé yiima chi nguéé n'daācā sabor yeⁿé

(Mt. 5.13; Mr. 9.50)

³⁴Jesús nga^a yā: Yiima ní n'dai. Nduuti chí nguéé n'daācā sabor yeⁿé, ¿de'é ca'ā sabor yeⁿé? ³⁵Nguéé dichí'vē, ndii nguée cáávā yāⁿā, ndii nguée ndúú naachi véé abono, caati canangée yā yiima miiⁿ. 'Iiⁿyāⁿ chi véé veéⁿ yā, 'caandi-veéⁿ yā yeⁿé.

Ejemplo yeⁿé 'íití cuūchí chi nindai

15 Nducyáácá saⁿá chí ínn'guée sa yeⁿe yāⁿā ndúúcu 'iiⁿyāⁿ nuuⁿndi ndaá yā nanááⁿ Jesús chí 'caandi-veéⁿ yā nduudu yeⁿe yā. ²Cáávā chuū 'iiⁿyāⁿ fariseos ndúúcu maestros chi ngi'cueeⁿ ley nga^a yā n'de'ei yā nguááⁿ maáⁿ yā contra yeⁿe Jesús. 'Túúca nga^a yā: Jesús miiⁿ n'gúuⁿ yā chí ndaá nanááⁿ yā 'iiⁿyāⁿ chi véé nuuⁿndi yeⁿe yā. Ní 'iiⁿyāⁿ miiⁿ ngé^e yā ndúúcu yā.

³Tuuⁿmi ní Jesús miiⁿ ní caⁿa yā 'aama chi 'téé nguée daama ndúúcu 'iiⁿyāⁿ miiⁿ. ⁴Chéé ndís'tii ndúúti chi véé 'áámá ciento 'iiti cuūchí yeⁿe ní ní nduuti chí 'áámá chéé 'iiti s'uuⁿ cuuví ndái tí, ¿'áá nguéé

cu'nee ní ndu'u chí cuūⁿ ngeécú nditiiⁿ yú cuuúⁿ tí na 'cuéétí? Ní caⁿá ní in'nuúⁿ ní 'iiti chí nindái miiⁿ ndíi taachí ndaacá ní 'iiti miiⁿ. ⁵Ní taachí ndaacá ní 'iiti miiⁿ cun'duú ní 'iiti ná 'diimi ní ní candéé ní 'iiti cuūchí miiⁿ naachi canéé tanáⁿá 'iiti cuūchí. Ní yeenú n'dai ní. ⁶Ní taachi ndaa ní na vaacu ní, tuuⁿmi ní nadi-daama ní 'iiⁿyāⁿ chí n'dai ndúúcu ní ndúúcu 'iiⁿyāⁿ na niiⁿnuúⁿ na va'ai yeⁿe ní. Ní caaⁿmaⁿ ní cuuvi ní, 'iiⁿyāⁿ s'eeⁿ: Ndís'tii cuuvi yeenú n'dai ní nduucú ní di'viicu yú tí 'áā n'daacá 'iiti cuūchí yeⁿé chí nindái. ⁷Tuuⁿmi ní Jesús nga^a ntúuⁿ yā, 'úú nga^a ngii ndís'tii: 'Tíicā véé vaādí yeenú taavi na va'ai chéeti nguuvi yeⁿé 'áámá 'iiⁿyāⁿ chí véé nuuⁿndi yeⁿe yā ní ndaacadaami yā yeⁿé nuuⁿndi yeⁿe yā nguéé tí yeⁿé cuūⁿ ngeécú nditiiⁿ yu cuūuⁿ 'iiⁿyāⁿ chí n'dai chí nguéé canee cuumi chí ndaacadaami yā yeⁿé nuuⁿndi yeⁿe yā.

Ejemplo yeⁿé 'áámá cáadí chí nindái

⁸Ní caⁿa Jesús: Du'u 'áámá n'daataá chí véé ndiichi cáadí yeⁿé ta nduuti chí dindai tá 'áámá ¿'áá 'cuuⁿmiⁿ tá lámpara ní n'daaca tá va'āi, ní in'nuuⁿ tá ndúúcu cuidado taanduvéé ndíi ndaacā ta tuūmí miiⁿ? ⁹Taachí ndaacā tá nadaama tá 'iiⁿyāⁿ chí n'dai ndúúcu ta ndúúcu 'iiⁿyāⁿ na niiⁿnuúⁿ va'ai yeⁿe ta ní caⁿa tá: Cuuvi yeenú ní nduucú ní di'viicu yú tí 'áā ndaacá 'áámá cáadí yeⁿé chí chindái miiⁿ. ¹⁰'Úú nga^a ngii ndís'tii caati 'ti-icá ntúūⁿ véé vaadi yeenú nguaaⁿ ángeles yeⁿé Ndyuūs cucáávā 'áámá 'iiⁿyāⁿ nuuⁿndi chí nandaacadaami yā yeⁿé nuuⁿndi yeⁿe yā.

Ejemplo yeⁿe saⁿá n'gaiyāá pródigo chí s'neeⁿ sa chiida sa

¹¹Jesús nga^a ntúuⁿ yā ejemplo 'cūu: 'Áámá saⁿá véé 'uūvi daiya sa. ¹²Saⁿá n'gaiyāá daiya sa chí 'líiⁿ ca miiⁿ caⁿa sá chíi sá chiida sa: N'dii, chiidá, téé ní

parte chi ituneeⁿ 'úú yeⁿe vaádi ngua'aá yeⁿe nī. Chiida sa ní nacaⁿá yā ní nca'a yā saⁿā chi parte yeⁿe sa. ¹³Nguéé chi 'naaⁿ, saⁿā 'lírⁿ ca miiⁿ ní nadidaamá sá tanducuéⁿe dēndu'ū yeⁿe sa. Ní cueⁿe yaⁿai sa táámá país. Mííⁿ ch'iinu diiⁿ sa gastar tanducuéⁿe ti diiⁿ sa nducuéⁿe chi nguεε n'daac. ¹⁴Ní taachi ch'iinu tuūmi yeⁿe sa tanducuéⁿe chi ca'a chiida sa, ndaā 'áámá cuiicu ch'εete na país miiⁿ. Sáⁿā miiⁿ ní ch'eenū n'dai sa chii caati nguéé chí che'e sa. ¹⁵Saⁿā miiⁿ ní ndaā sa nanááⁿ 'áámá 'iiⁿyāⁿ yeⁿe país miiⁿ. Ní caⁿa sa chi neⁿe sa diiⁿ sa nti- iⁿnyuⁿ. 'iiⁿyāⁿ miiⁿ ní caⁿa yā chii yā saⁿa miiⁿ chi cueⁿe sa tan'dúúca mozo yeⁿe yā ní diiⁿ sa cuidado cuúchí s'eeⁿ yeⁿe yā. ¹⁶Saⁿā miiⁿ ní nacádiinuⁿ sa chí neⁿe sa che'e sa chi yeⁿe cuuchí s'eeⁿ caati mar 'áámá 'iiⁿyāⁿ nguéé ca'a yā de'ē vεε saⁿā. ¹⁷Tuu'mi ní n'gaācu sa ní caⁿā sa nguaaⁿ maaⁿ sa: N'dee n'dái mozos yeⁿe chiidá chí nge'e yā pan ní neenē n'dee chí nge'e yā vεε, 'iicu 'muuⁿ 'úú ní idiíⁿ ntiⁿnyuⁿ ní neⁿe 'cuúvi chi cuiicú. ¹⁸N'daa cá 'muuⁿ. Naⁿá n'diichí chiidá ní caaⁿmáⁿ cuuví 'iiⁿyāⁿ: N'dii chiidá véé nuūⁿndi yeⁿe nanááⁿ Ndyuūs chi canéé na va'ai chεeti nguuví ní nanááⁿ n'dii. ¹⁹Áā ntéé n'dai ca 'úú chi tuneⁿ 'úú chi caaⁿmaⁿ nī chi daiya ní 'úú. Cu'neéⁿ nī 'úú tan'dúúca 'aama mozo yeⁿe nī. ²⁰Tuu'mi ní cunaⁿā sa ndaā sa nanááⁿ chiidā sa. Taachi indái ca ndaa sa, tuu'mi ní chiida sa ní n'diichí yā saⁿā ní nnee ya'āi 'iinú yā saⁿā. Chiida sa ní cueⁿe yā ngeenu yā naachi canéé sá ní tumaⁿá yā daiyá yā ní tuu'vi yā cheendi sa. ²¹Daiya yā miiⁿ ní caⁿa sa chii sa chiida sa: N'dii, chiidá, véé nu- uⁿndi yeⁿe nanááⁿ Ndyuūs chi canee na va'ai chεeti nguuví ndúúcu nanááⁿ n'dii. 'Áā n'téé n'dai ca 'úú chí ituneeⁿ 'úú chi caaⁿmáⁿ nī chi daiya ní 'úú. ²²Naati chiida sa mííⁿ ní caⁿa yā chii yā mozos yeⁿe

yā: Dii mozos, maaⁿ nch'εeté nū tun'dáa di tīnūⁿ chí n'dai ca ní cu'nuúⁿ di saⁿā daiyá. Ní ca'a di chiinūta'āa cunuuⁿ ta'ā sa ndúúcu ndaacuú chi cunuuⁿ ca'ā sa. ²³Cuéⁿe di canguaiⁿ di itiindu 'lírⁿ chí 'viicheé. Ní 'caaⁿnuⁿ di 'iiti chí che'é nū. Ní dííⁿ nū 'viicu. ²⁴Ti sáⁿa 'cūū daiyá cueⁿe sa yaⁿai ní 'āā tan'dúúca chí n'díí sá. Maaⁿ ní navaacuneⁿ sa ní nduuchi sa. Ní tan'dúúca chí nindái sá ní ndaacā sa. Ní 'iiⁿyāⁿ s'eeⁿ ní yeenú taavi yā ní dííⁿ yā 'áámá 'viicu.

²⁵Ní saⁿā daiyá yā chí vmnaaⁿ canee sa cueeti. Ní taachí ndaā ní nūⁿ sa ná va'ai, ch'iindiveeⁿ sa chí itiivi saⁿā flauta ní 'iiⁿyāⁿ nde'ei yā. ²⁶Tuu'mi ní saⁿā miiⁿ ní 'caí sa 'aama mozo ní itiingu- uneeⁿ sa mozo miiⁿ de'ē chí véé. ²⁷Mozo miiⁿ ní caⁿā sa chii sa 'iiⁿyāⁿ: 'Áā ndāā 'dīinu nī. Ní nguéé de'ē vεε yeⁿe sa. Ní chiidá nī ní caⁿa ntiⁿnyuⁿ yā chí ch'ií itiindu 'lírⁿ chí 'viiche. ²⁸Saⁿā miiⁿ ní nduuví taaⁿ sa. Nguéé 'cuuⁿ sa ndaā sa va'āi. Tuu'mi ní chiida sa miiⁿ ní cun'dáa yā va'āi ní di'cuíútu yā daiya yā chí nuūⁿ ndaā sa va'āi. ²⁹Naati saⁿā miiⁿ ní nán'guεécútaⁿā sa yeⁿe chiida sa: 'Áā 'naaⁿ n'dái idichí'vε 'úú n'dii, ní diiⁿ tanducuéⁿe chí ngaⁿa nī ní mar 'áámá vm- néⁿee nguéé tee nī mar 'áámá 'iiti cuúchí 'lírⁿ chí 'caaⁿnúⁿ ní dííⁿ 'viicu. Ní 'úú cu- uvi yeenú ndúúcu amigos yeⁿe. ³⁰Naati taachi ndaā daiya ní sáⁿa 'cūū, 'nífⁿnuúⁿ 'tuū'vi sa tanducuéⁿe chí vaadi n'guá'āa yeⁿe sa ndúúcu n'daataa s'eeⁿ chí véé saⁿā s'eeⁿ yeⁿe. Ní ngaⁿa ntiⁿnyúⁿ nī chí mozos ch'iíⁿnúⁿ yā itiindu 'lírⁿ chí 'viicheé chí che'e sa. ³¹Tuu'mi ní chiida sa miiⁿ caⁿa yā chii yā saⁿā: Díí, daiyá, 'áámá canee di nducú ní tanducuéⁿe dēndu'ū chii yeⁿe ní yeⁿe di. ³²Canéé chí diiⁿ yú 'viicu ti saⁿā 'diinu di chí 'úú nacadiinú chí tan'duucā chí 'āā n'díí sá ní nduuchí sa. 'Áā nindāa sa na vacu yú ní maaⁿ ní ndaacā yú saⁿā.

Ejemplo ye^{ne} 'áamá patrón chi nguéé n'daacā diiⁿ yā ndúúcū mozos ye^{ne} yā

16 Jesús ní ca^{na} ntúuⁿ yā chii yā discípulos ye^{ne} yā: 'Áamá dueño 'cuiica s'nééⁿ 'áamá mayordomo ye^{ne} yá^{na} ye^{ne} yā. Ná^{na} mozos ndaa sa nanááⁿ dueño ní tun'dáá nuuⁿndi sa ye^{ne} mayordomo miiⁿ ní nga^{na} sa de'ē chi diiⁿ mayordomo chi nguēē n'daacā ndúúcū dendu^ū chi ye^{ne} dueño. ²Tuu'mi ní dueño miiⁿ ní yaa'vi yā mayordomo ye^{ne} yá^{na} ní ca^{na} yā chii yā sá^{na}: N'diī, ¿de'ē 'túúcā n'giindiveéⁿ ye^{ne} ní? Teé ní cuenta 'úú ye^{ne} n'tiiⁿnyuⁿ chi diiⁿ ní tí 'āā ntéé cuuvi ní mayordomo. ³Sa^{na} mayordomo ye^{ne} yá^{na} miiⁿ nadicááinuⁿ sa 'túúcā: ¿Taācā diiⁿ maaⁿ caati dueño ye^{ne} yá^{na} ndivií yā 'úú ye^{ne} chi mayordomo 'úú ye^{ne} n'tiiⁿnyuⁿ? Nguéé di-tiīnu 'úú chí diiⁿ n'tiiⁿnyuⁿ chi n'gii ní nduuti chi caācā limosnas, 'cuinaáⁿ. ⁴'Āā deenú de'ē chi diiⁿ ní taachi 'āā ntéé nga^{na} n'tiiⁿnyúⁿ ye^{ne} mayordomo tuu'mi ní amigos ye^{ne} 'cuaáⁿ yā 'úú na vaacu yā. ⁵Tuu'mi ní mayordomo miiⁿ yaa'vi sa nducyáácā 'iiⁿyāⁿ chí cán'dífcu yā ye^{ne} dueño ye^{ne} yá^{na} ye^{ne} yā ní ca^{na} sa chii sa 'iiⁿyāⁿ vmnááⁿ vmnaaⁿ: ¿'Áá n'deēe cán'dífcu di ye^{ne} dueño? ⁶Sa^{na} miiⁿ ní ca^{na} sa: 'Úú can'diicú 'áamá ciento toneles aceite. Tuu'mi ní mayordomo miiⁿ ní ca^{na} sa sa^{na}: Cuta'a dí caaca naachi canéé nguūⁿ ye^{ne} di. Cuundi dí ní n'nee nguūⁿ di 'uūvi ngeecu ndiichí toneles aceite. ⁷Ch'iīnu maaⁿ ní ca^{na} sa chii sa taama sa^{na}: Díí, ¿'áá n'deēe cán'dífcu di? Sa^{na} miiⁿ ní ca^{na} sa: 'Úú can'diicú 'áamá ciento maquilas ye^{ne} trigo. Tuu'mi ní mayordomo miiⁿ ca^{na} sa: Cuta'a dí caaca naachi canéé nguūⁿ ye^{ne} di ní 'neeⁿ nguūⁿ di cuūuⁿ ngeecú maquilas. ⁸Tuu'mi ní dueño miiⁿ tuumicááinuⁿ yā ye^{ne} mayordomo chi nguéé n'daacā ní chuuné listo sa ndúúcū asuntos ye^{ne} sa. Ní dueño míⁿ ca^{na} yā chii yā sa^{na}:

Tiempo miiⁿ sá^{na} chi snéé iⁿ'yeeⁿdí 'cūū nguéé n'daacā sa ní neene listo ca sa ndúúcū asuntos ye^{ne} sa ndúúcū vaadi 'cuiica chi véé iⁿ'yeeⁿdí 'cūū nguéé ti 'iiⁿyāⁿ chi diiⁿ yā chiiⁿ chi Ndyuūs ne^{ne} yā chi snéé yā na deēe.

⁹Cáāvā chuū 'úú ní nga^{na} ngii ndís'tiī: Ndúúcū vicios ye^{ne} vaadi 'cuiica chi véé iⁿ'yeeⁿdí 'cūū diiⁿ ní n'daacā ndúúcū 'iiⁿyāⁿ ti véé amigos ye^{ne} ní caati taachi 'cuūvi ní 'iiⁿyāⁿ s'eeⁿ chi nnee ní ní nga^{na} yā: N'dai ndís'tiī ¿'áá cuuvi ndaa ní na va'ai chēeti nguūvi 'tífcā?

¹⁰'Iiⁿyāⁿ chi n'daacā idiíⁿ yā ndúúcū cosas chi 'lííⁿ 'tiicā ntúūⁿ n'daacā idiíⁿ yā ndúúcū cosas chi n'deēe n'dái ní n'geete.

¹¹Nduuti chi ndís'tiī nguéé n'daacā idiíⁿ ní ndúúcū tuūmī chi véé iⁿ'yeeⁿdí 'cūū, ¿du'ú 'iiⁿyāⁿ cuuvi teé yā ndís'tiī n'ti-iⁿnyuⁿ ye^{ne} Ndyuūs chi n'tiiⁿnyuⁿ ye^{ne} vaadi 'cuiica chi véé chi ye^{ne} Ndyuūs?

¹²Ndúúti chi ndís'tiī nguēē n'daacā idiíⁿ ní ndúúcū dendu^ū chi véé ye^{ne} taamá yā, ¿du'ú 'iiⁿyāⁿ téé yā chi véé ye^{ne} ní?

¹³Mar 'áamá sa^{na} nguéé cuuvi diiⁿ sa mandados ye^{ne} 'uūvi 'iivi sa; ti ne^{ne} ca sa 'aama yā nguéé ti taama yā, o n'daacā ca diiⁿ sa n'tiiⁿnyuⁿ ye^{ne} 'aama yā nguéé ti taama yā. Ndís'tiī ní nguéé cuuvi dichí'vē Ndyuūs nduuti chi ne^{ne} ca ní vaadi 'cuiica chi véé iⁿ'yeeⁿdí 'cūū.

¹⁴'Iiⁿyāⁿ fariseos n'giindiveéⁿ ntúuⁿ yā dendu^ū chi 'túúcā nga^{na} Jesús miiⁿ ní 'iiⁿyāⁿ s'eeⁿ dinéⁿ n'dai yā tuūmī ní yaa'vi neeⁿ yā Jesús. ¹⁵Jesús miiⁿ ní ca^{na} yā chii yā 'iiⁿyāⁿ fariseos: Ndís'tiī ní nadicááinuⁿ ní chi ndís'tiī ní 'iiⁿyāⁿ n'dai ndís'tiī nanááⁿ sa^{na} iⁿ'yeeⁿdí 'cūū naati Ndyuūs ní n'diichí yā staava ye^{ne} ndís'tiī. Chííⁿ chí 'iiⁿyāⁿ nadicááinuⁿ yā chí ch'ēete ca, chiiⁿ chi Ndyuūs diiⁿ yā cuenta chi nguéé de'ē vēe.

Jesús nga^{na} yā chí ley ní n'daacā

¹⁶Ley ye^{ne} Moisés ndúúcū chííⁿ chí chí'cueeⁿ profetas canee nanááⁿ ndís'tiī

ndíí taachi ndaā Juan chi cheedínuūⁿníⁿ na iⁿ'yeeⁿdí 'cūū. Ndíí tiempo miiⁿ 'iiⁿ'yāⁿ caⁿ'a yā nduudú n'dai chí ngai yeⁿe naachi Ndyuūs ngaⁿ'a ntiⁿ'nyúⁿ yā ní nducyáácá 'iiⁿ'yāⁿ neⁿ'e yā cu'téenu yā nduudu miiⁿ.

¹⁷Ngíⁿ'ii ca chí 'cuiinu nanguuvi ndúúcu na yáⁿ'aa nguéé ti 'cuiinū 'áámá letra 'lín' yeⁿ'e ley.

Jesús ngi'cueeⁿ yā yeⁿ'e divorcio

(Mt. 19.1-12; Mr. 10.1-12)

¹⁸'Āā du'ú nūuⁿ sáⁿ'ā chí cū'neeⁿ sa n'daataá yeⁿ'e sa ní 'caandivaacu sá ndúúcu taama tá diiⁿ nuuⁿ'ndí sa. Sáⁿ'ā chí cunee sá ndúúcu n'daataá chí s'neeⁿ tá isaⁿ'ā yeⁿ'e tá 'āā dinuuⁿ'ndí ntúuⁿ sa.

Yeⁿ'e sáⁿ'ā 'cuiica ndúúcu sáⁿ'ā chí nguuvi Lázaro

¹⁹Caⁿ'a Jesús: Tiempo chí chó'ōo canéé 'áámá saⁿ'ā 'cuiica chí 'nuuⁿ sa catecai n'dai sa ní diiⁿ sá 'viicu. Ní nge'e sa cosas chí n'dai nguuvi nguvi. ²⁰Canéé ntúūⁿ 'áámá saⁿ'ā chí nguvi sa Lázaro chí ngiica limosnas. Ní diituú n'duu'vi núúⁿ'máⁿ cheete sa. Ní vee sa cheendi va'āi yeⁿ'e saⁿ'ā 'cuiica miiⁿ. ²¹Saⁿ'ā miiⁿ ní neⁿ'e sa che'e sa cosas chí ingéé yeⁿ'e mesa yeⁿ'e saⁿ'a 'cuiicá miiⁿ. Ndaā 'yaānā s'eeⁿ naachi véé sa ní yaā'vi née ti naachí ya'āi yeⁿ'e Lázaro miiⁿ. ²²Cuayiivi miiⁿ ní ch'ii Lázaro. Ángeles yeⁿ'e Ndyuūs candéé yā Lázaro naachi canéé chiida yú Abraham na lugar paraíso chí yeⁿ'e 'iiⁿ'yāⁿ chí n'dái. Ch'ii ntúūⁿ saⁿ'a 'cuiica miiⁿ ní ch'iichi yā saⁿ'ā. ²³Taachi sáⁿ'ā 'cuiica miiⁿ ch'eenu sa chíi na infierno n'diichi sa cuaaⁿ 'niiⁿ'nuⁿ ní n'diichi sa chiida yú Abraham ndúúcu Lázaro miiⁿ. ²⁴Tuu'mi ní 'caí saⁿ'ā 'cuiica miiⁿ: N'díí, chiidá Abraham, inneé ya'ai 'iinú nī 'úú, ní dichó'o nī Lázaro chí di'caandá yā tii nduuti tá'ā nguaaⁿ nuūⁿ'nīⁿ ní cun'duú yā na ch'i'yá ní di'caanda ch'i'yá ti

neené n'geenu ngii ná nguuchi yaⁿ'ā 'cūū. ²⁵Abraham miiⁿ ní caⁿ'a yā chíi yā saⁿ'ā: Díí, daiyá, n'gaacú di tí taachí canee dí iⁿ'yeeⁿdí miiⁿ ch'liindí ndii n'dee n'dái chí n'daācā yeⁿ'e di. Lázaro miiⁿ nguéé vee yeⁿ'e sa naati maaⁿ ní 'muuⁿ ní véé 'viich'ēētínūuⁿ yeⁿ'e sa ní díí ní 'cuéenu dí cuuvi miiⁿ. ²⁶Mííⁿ véé 'áámá yíívi yáⁿ'āa chí neene ch'ēete nguaaⁿ nús'uu ndúúcu ndís'tii. 'Iiⁿ'yāⁿ chí neⁿ'e yā chó'o yā ndii 'muuⁿ ndíí naachi snéé ndís'tii nguéé cúví diíⁿ yā. Ndíí nguéé ndúú 'iiⁿ'yāⁿ chí snéé yā taa nguéé cuuvi cho'o yā ní ndaá yā naachi snéé 'nū. ²⁷Tuu'mi ní saⁿ'ā 'cuiica mííⁿ ngaⁿ'ā sa: N'díí, chíidá Abraham, idi'cuiítú n'dii chí dichó'o nī Lázaro iⁿ'yeeⁿdí ndii vaacu chiidá, ²⁸ti véé nyuⁿ'u 'diinú chí saⁿ'ā miiⁿ ní Lázaro cuuvi sa 'diinú chí nguéé ndaa yā lugar 'cūū chí 'cuenú yā cuuvi. ²⁹Abraham miiⁿ ní caⁿ'a yā chíi yā saⁿ'a: Canee nguūⁿ na libro yeⁿ'e Ndyuūs naachi canee nguūⁿ yeⁿ'e Moisés miiⁿ ndúúcu profetas ní cuuvi yā 'iiⁿ'yāⁿ chí 'caandiveéⁿ yā yeⁿ'e 'iiⁿ'yāⁿ s'eeⁿ. ³⁰Tuu'mi ní saⁿ'ā 'cuiica miiⁿ ní caⁿ'ā sa: N'díí, chíidá Abraham, nguéé n'giindiveéⁿ yā yeⁿ'e yā. Ndúúti chí 'áámá 'iiⁿ'yāⁿ chí 'āā n'dii caⁿ'a yā nanááⁿ 'diinú, tuu'mi ní 'caandiveéⁿ yā yeⁿ'e 'iiⁿ'yāⁿ miiⁿ ní ndaacadaamí yā yeⁿ'e nuuⁿ'ndí chí dííⁿ yā. ³¹Abraham miiⁿ ní caⁿ'a yā chíi yā saⁿ'a 'cuiica: Ndúúti chí nguéé cu'téenu yā chí canéé nguūⁿ na libro yeⁿ'e Ndyuūs yeⁿ'e Moisés ndúúcu 'iiⁿ'yāⁿ profetas ndíí cuááⁿ vmaaⁿ, nguéé cu'téenu ntúuⁿ yā yeⁿ'e 'iiⁿ'yāⁿ 'cúú chí cuuvi yā 'iiⁿ'yāⁿ s'eeⁿ 'áará chí 'iiⁿ'yāⁿ 'cúú ncuééⁿ yā yeⁿ'e nguaaⁿ tinaⁿ'ā.

Jesús ngi'cueeⁿ yā chí nguéé canee chí diiⁿ yú nuuⁿ'ndí

(Mt. 18.6-7; 21-22; Mr. 9.42)

17 Jesús caⁿ'a yā chíi yā discípulos yeⁿ'e yā: Cuaacu nííⁿ'nyúⁿ chí véé de'e cáávā chí dííⁿ chí 'iiⁿ'yāⁿ dinuuⁿ'ndí yā naati de'e chúúcā ya'ai yeⁿ'e 'iiⁿ'yāⁿ

chi dííⁿ yā chi taama 'iiⁿyāⁿ dinuuⁿndi yā. ²N'daacā ca chí cuuvi 'túú^{cā} ndúú^{cū} 'iiⁿyāⁿ miiⁿ. 'Iiⁿyāⁿ s'eeⁿ caāchiichí yā 'áámá tuūu yúú^{dú} chi inguúⁿ 'iiⁿyāⁿ na daandu 'iiⁿyāⁿ miiⁿ ní 'caanuú yā 'iiⁿyāⁿ miiⁿ naachi yáānūⁿ yeⁿē nuuⁿ'ni'yáⁿ'ā ní nguéé cuuvi dííⁿ 'iiⁿyāⁿ miiⁿ chi taama da'caiyāā idinuuⁿndi yā.

³Cundéé ndís^{tii} cuidado. Ndúú^{tí} 'dííⁿu nī dinuuⁿndí sa contra yeⁿe 'aama ní, yaa^{'vi} neéⁿ nī saⁿ'ā. Ndúú^{tí} chi ndaacadaami sa yeⁿē nuuⁿndi yeⁿē sa nadich'ecúⁿ nī yeⁿē sa. ⁴'Áará chí ndēēchē cuuvi idinuuⁿndí sa contra yeⁿe nī 'áámá nguuvi ní ndēēchē cuuvi ndaa sa nanááⁿ ndís^{tii} ní caaⁿ'maⁿ sa cuuvi sá ndís^{tii}: Ndaacadaamí yeⁿē nuuⁿndi yeⁿé, tuu^{'mi} ní nadich'eēcu nī yeⁿē sa.

Poder yeⁿē vaadí i'teenu

⁵Apóstoles caⁿ'a yā chii yā Señor Jesús: N'dií, Señor, dííⁿ nī chi nús^{'uu} cuuvi cu^{'téenu} cá nū.

⁶Tuu^{'mi} Jesús caⁿ'a yā chii yā apóstoles: Ndúú^{tí} chí ndís^{tii} duu^{'vi} i'téenu nī, tuu^{'mi} ní vaadí i'teenu yeⁿé nī ní tan'dúú^{cā} 'áámá nduutí yeⁿē yiivē ntíí^{'yá}. Ní cuuvi caaⁿ'maⁿ nī 'tíicā ndúú^{cū} yá^{'á}: Díí yá^{'á} cuví dí 'muuⁿ ní cueⁿe di ná nuūⁿ'ni'yáⁿ'ā. Ní 'caandiveeⁿ yá^{'á} miiⁿ yeⁿe díi.

Yeⁿe táácā cuuvi dííⁿ yú ntiíⁿnyuⁿ ndúú^{cū} Ndyuūs 'iivu yú

⁷Nga^{'n}a Jesús: Du^{'u} ndís^{tii} ndúú^{tí} chí vee 'áámá mozo chí di'cuú^{ndú} 'iiti o dííⁿ sa cuidado 'iiti cuū^{chí} yeⁿe nī taachi nguēecunée sa yeⁿe campo miiⁿ, ¿'áá hora mííⁿ nūⁿ caaⁿ'maⁿ nī cuuvi nī saⁿ'ā?: Cho'o di 'cuú^{ndí} di na mesa. ⁸¿'Áá nguéé vmnááⁿ vmnáaⁿ caaⁿ'maⁿ nī cuuvi nī mozo miiⁿ 'tíicā?: N'nuuⁿ di chí che'e nguū^{inu} yú. Ní 'cuiinduū di yeⁿé na mesa, 'cuií di ní 'úú cu'ú che'é. 'Cuiinu che'é 'cuiinu cu'ú tuu^{'mi} ní díi cuuvi

ché'e di cu'ú di. ⁹¿'Áá aama patrón nca'a yā gracias mozo miiⁿ ti dííⁿ sa mandados chí cāⁿ'a patrón yeⁿē sa? Nguéé dííⁿ yā 'tíicā. ¹⁰Tiicá ntúūⁿ, ndís^{tii}, taachí 'cuiinu dííⁿ nī tanducuéⁿē ntiíⁿnyuⁿ chí ngaⁿ'á Ndyuūs ndís^{tii}, tuu^{'mi} ní caaⁿ'maⁿ nī 'tiicā: Ndyuūs, nús^{'uu} ní mozos yeⁿe nī naati nús^{'uu} ní dííⁿ 'nū dámaāⁿ chí canee chí dííⁿ 'nū.

Jesús idiíⁿ yā chí nduū^{vā} yeⁿe ndiichi 'iiⁿyāⁿ yeⁿe ca'āi lepra chí ín^{'duuti} yuūtē yeⁿe yā

¹¹Taachí Jesús miiⁿ canúⁿ yā yúú^{ní} chí cueⁿe yā na yáāⁿ Jerusalén, cho'ó yā naavtaⁿ'ā yeⁿe na 'uuví yáⁿ'āa chí Samaria ndúú^{cū} Galilea. ¹²Ní taachí Jesús sndaa yā 'áámá yáāⁿ 'lífⁿ snéé ndiichi saⁿ'ā chí induuti yuūtē yeⁿē sa chí ndii sa ca'ai lepra. Ndaā sa nanááⁿ Jesús miiⁿ ní ch'éétí^{ndii} ya^{'ai} sa. ¹³Ní 'cai sa: N'dií, 'iivú Jesús, nnéé ya'ai 'iinu nī nús^{'uu}.

¹⁴Taachí Jesús n'diichi yā saⁿ'ā s'eeⁿ, tuu^{'mi} ní yaa^{'vi} yā: Ndís^{tii}, cueⁿe nī ní 'cuuⁿ'miⁿ nī nanááⁿ chiiduú s'eeⁿ. Ch'íínú caⁿ'a Jesús ndúú^{dú} 'cūū saⁿ'ā s'eeⁿ ní nduuvá yeⁿe sa. ¹⁵Tuu^{'mi} 'áámá chéé saⁿ'ā s'eeⁿ taachí n'diichi yā chí 'āā nduuvá yeⁿe yā, nguēecunée yā ní cheⁿ'e yā naachi canéé Jesús miiⁿ ní caⁿ'a yuudu yā: Dē'ē chúú^{cā} ch'ēete Ndyuūs. ¹⁶Ní ch'intíí^{'yá} yā nanááⁿ Jesús ní chí snaaⁿ na yáⁿ'āa, ní ca'a yā gracias 'iiⁿyāⁿ. Saⁿ'ā miiⁿ ní 'áámá saⁿ'ā yeⁿe yáⁿ'āa Samaria. ¹⁷Tuu^{'mi} ní Jesús miiⁿ caⁿ'a yā: ¿'Áá nguēe ndiichi saⁿ'ā chí nduū^{vā} yeⁿē sa? Ta nuuⁿ sa, ¿tíi snéé sa? ¹⁸¿'Áá nguēe táámá yā chí canéé chí caaⁿ'maⁿ yā chí ch'ēete Dendyuūs? Dámaāⁿ saⁿ'ā miiⁿ chí canuuⁿ yúú^{ní} chí ca'a sa gracias.

¹⁹Tuu^{'mi} ní Jesús caⁿ'a yā chii yā saⁿ'ā chí ngiita miiⁿ: Nducueeⁿ dí. Cúnaⁿ'ā dí. 'Áā nanduuva yeⁿē di caati i'téenu nī.

Yeⁿe taaca Ndyuūs ngaⁿa ntiⁿnyúⁿ yā
(Mt. 24.23-28, 36-41)

²⁰ Taachí 'iiⁿyāⁿ fariseos intúnguúneeⁿ yā Jesús miiⁿ: ¿Tií cua'a ndáá naachí Ndyuūs ngaⁿa ntiⁿnyúⁿ yā? Jesús miiⁿ ní nan'gueécútaⁿa yā: Naachí Ndyuūs ngaⁿa ntiⁿnyúⁿ yā nguéé ndaa tan'dúúcā 'áámá manera chi ndís'tií cunee ngiinú ní yeⁿe. ²¹ Ní nguéé ndúú 'iiⁿyāⁿ caaⁿmaⁿ ra yā 'tíicā: 'Muuⁿ canee o miⁿ canee ti Ndyuūs 'āā ngaⁿa ntiⁿnyúⁿ yā nguaaⁿ ndís'tií.

²² Tuu'mi ní Jesús caⁿa yā chii yā discípulos yeⁿe yā: Tiempo miiⁿ ndaa nguuví taachi ndís'tií neⁿe ní snaaⁿ ní taachi canéé Saⁿā chi Daiya Dendyuūs, naati nguéé snaaⁿ ní saⁿā miiⁿ. ²³ Ní 'iiⁿyāⁿ caaⁿmaⁿ yā cuuvi yā nduudu yaadi ndís'tií: 'Muuⁿ canéé Saⁿa chi Daiya Dendyuūs, o miiⁿ canee sa. Nguéé caⁿa ní ndíí nguéé ndúú can'dáa ní 'iiⁿyāⁿ cuayivi. ²⁴ Tan'dúúcā chi inaaⁿ yú chí ngéⁿé 'cuai maaⁿ ncheeté nūuⁿ ngiyyā, 'tiicá ntúūⁿ cuuvi taachi 'úú chi Saⁿā chi Daiya Dendyuūs ndaa nguuví miiⁿ. ²⁵ Naati vmnááⁿ vmnaaⁿ 'úú chi Saⁿā chi Daiya Ndyuūs ní neené 'cuenú cuuvi. Ní 'iiⁿyāⁿ chí maaⁿ snéé iⁿ'yeeⁿdí 'cūú díⁿ yā condenar 'úú. ²⁶ Tan'dúúcā chí canee tiempo chí 'āā chó'oo taachí canee saⁿā Noé iⁿ'yeeⁿdí 'cūú, 'tiicá ntúūⁿ cuuvi tiempo yeⁿe Saⁿa chí Daiyā Dendyuūs taachí ndaa sa. ²⁷ Tiempo yeⁿe Noé 'iiⁿyāⁿ s'eeⁿ ngé'e yā ngi'i yā ní n'gíindivaacu yā. Ní ca'a yā daiya yā chí n'gíindivaacu ndii nguuví chí Noé sndaá yā na arca. Tuu'mi ní chee taaⁿ cuūví ní chiitu iⁿ'yeeⁿdí 'cūú ndúúcū nuūⁿniⁿ ní ch'ií nducyaaca 'iiⁿyāⁿ. ²⁸ 'Tiicá ntúūⁿ chií tiempo chí 'āā chó'oo taachi canee saⁿa Lot iⁿ'yeeⁿdí 'cūú. 'Iiⁿyāⁿ s'eeⁿ nge'e yā ngi'i yā. Ngai yā ní n'diicui yā. Ní ngiinú yā ní idin'dái yā vaacu yā. ²⁹ Taachi can'daá saⁿā Lot miiⁿ ná yāáⁿ Sodoma chí cheeⁿ nguuchi yaⁿā ndúúcū azufre

chí tuūú chí ngiichi chí yeⁿe nanguuvi. Cáávā chuū ch'ií nducyaaca 'iiⁿyāⁿ na yāáⁿ miiⁿ. ³⁰ 'Tíicā cuuvi nguuví miiⁿ taachi 'úú Saⁿā chí Daiya Dendyuūs ndaa taama vmnéⁿēe.

³¹ Ní nguūví chí ndaa, taachí 'iiⁿyāⁿ chí snée yā tiíⁿ va'āi n'daacā ca chí 'iiⁿyāⁿ miiⁿ ní nguéé nch'éeⁿ yā ní cuta'a yā dendu'ú chí v'éé yeⁿe yā cheetí va'āi. 'Tiicá ntúūⁿ 'iiⁿyāⁿ chí snée yā cuetí n'daacā ca chí nguéé naⁿa yā nduvaacu yā. ³² Nan'gáácú ní tan'dúúcā chí ch'ií n'daataá yéⁿe saⁿā Lot. ³³ 'Āā du'ú nūuⁿ 'iiⁿyāⁿ chí neⁿe cá yā vida yeⁿe yā nguéé ti 'úú, dindaí yā táámá vida yeⁿe yā. 'Āā du'ú nūuⁿ 'iiⁿyāⁿ chí dichí'v'e yā 'úú ní dindaí yā vida yeⁿe maáⁿ yā cucáávā 'úú, ní ndaacá yā táámá vida yeⁿe yā.

³⁴ 'Úú ngaⁿá ngí ndís'tií chí nguūnū miiⁿ 'uuví yā chí ndiiti yā na 'áámá cama, 'aama yā ní ndaa naáⁿ ní taama yā ní canéé yā. ³⁵ Níicú naachi 'uuví n'daataá daama snée ta ingúu tá, 'aama ta ní ndaa naáⁿ tá ní taama tá ní canee ta. ³⁶ Naachí 'uūví yā snée yā cuetí, 'áámá yā ní ndaa naáⁿ yā, níicú taama yā ní canee yā.

³⁷ Taachí 'iiⁿyāⁿ s'eeⁿ ch'iindiveéⁿ yā chuū itinguuneéⁿ Jesús: Señor, ¿tií cuuví chuū? Jesús miiⁿ ní caⁿa yā yeⁿe tiempo miiⁿ: Naachi candiití cuerpo yeⁿe tináⁿā, miiⁿ ní nduuvidaamá luutí ní che'e ti, tuu'mi ní cuuví chuū.

Ejemplo yeⁿe n'daataa nguá'āa
chí cueⁿe tá nanaaⁿ juez
ndúúcū 'áámá asunto

18 Jesús caⁿa yā 'aama ejemplo chí 'téé nguéé daama yeⁿe chí 'iiⁿyāⁿ canéé chí caaⁿmaⁿnguaⁿ'á yā cuéⁿé daáⁿ-maⁿ nguéé ndúúcū vaadi 'daan'di. ² Ní caⁿa yā chí yā 'iiⁿyāⁿ s'eeⁿ ejemplo 'cūú: Canéé 'áámá juez na 'aama yāáⁿ chí nguéé 'va'a sa Dendyuūs. Ní ndíí nguéé ndúú idiiⁿ rá yā respetar 'iiⁿyāⁿ chí ch'iindiveéⁿ yā asuntos yeⁿe yā. ³ Canéé ntúūⁿ na yāáⁿ miiⁿ 'áámá

n'daataa nguá'aa chi ndaa yā nguuvi nguuvi nanááⁿ juez miiⁿ ní ngiica tá justicia juez yeⁿe 'iiⁿ'yāⁿ chi taaⁿ ndúúcu tá. ⁴ Juez miiⁿ ní nguééⁿ 'cuuⁿ yā 'naaⁿ tiempo naati cuayivi nadicádiinuuⁿ yā: 'Áará chi nguééⁿ 'va'á Dendyuūs ndíi nguééⁿ ndúú idiíⁿ rá respetar 'iiⁿ'yāⁿ, ⁵ naati n'daata nguá'aa 'cūū néené ididú'ū ta 'úú ní maaⁿ ní caⁿ'a díⁿ n'daacā ndúúcu tá chi 'āā ntéé candii tá dindú'ū ta ti 'cuiinu paciencia yeⁿ'é.

⁶ Naati Señor miiⁿ caⁿ'a yā: 'Caandiveéⁿ nī chi ngaⁿ'ā juez chi nguééⁿ n'daacā táácā idiíⁿ yā. ⁷ ¿'Áá Ndyuūs nguē nnee ntúuⁿ yā 'iiⁿ'yāⁿ chí ndeēve yā, 'iiⁿ'yāⁿ chí caaⁿ'maⁿ'ngua'á yā ndii nguuvi ndíi n'gaaⁿ ní Ndyuūs díⁿ yā castigar 'iiⁿ'yāⁿ chi contra yeⁿe 'iiⁿ'yāⁿ chí ndeēve yā? ¿'Áá cuuvi 'naaⁿ Ndyuūs chi cunnee yā 'iiⁿ'yāⁿ? Nguééⁿ 'tíicā. ⁸ 'Úú ní ngaⁿ'á ngii ndís'tií chí Ndyuūs maaⁿ nch'etéⁿ nadanguáⁿ'ai yā 'iiⁿ'yāⁿ. Naati taachi 'úú chí Saⁿ'ā chí Daiya Dendyuūs ndaá, ¿'áá nndaaca ntuúⁿ 'iiⁿ'yāⁿ chí i'téenu yā Ndyuūs ná iⁿ'yeeⁿ dí 'cūū?

Saⁿ'ā fariseo ndúúcu saⁿ'ā chí inn'guē yeⁿ'e yáⁿ'āa

⁹ Jesús caⁿ'a yā ejemplo 'cūū chí 'téé nguéé dáámá caava n'dúúví 'iiⁿ'yāⁿ chí idin'geetéⁿ maáⁿ yā ní nguééⁿ díⁿ yā respetar tanáⁿ'ā 'iiⁿ'yāⁿ. Ní caⁿ'a yā: ¹⁰ Na 'úúví saⁿ'ā cheⁿ'e sa yáacū templo chí caaⁿ'maⁿ'ngua'ā sa. 'Aama sa ní saⁿ'ā fariseo, taama sa ní saⁿ'ā chí inn'guē yeⁿ'e yáⁿ'āa. ¹¹ Saⁿ'ā fariseo chí ndii sa ní 'túucā caⁿ'angua'a sa: N'díi Señor, nteé gracias n'dii ti 'úú ní nguééⁿ tan'dúucā tanáⁿ'ā saⁿ'a 'cūū. 'Úú nguééⁿ ididuucú, nguéé yáádíⁿ'yā 'úú, nguéé caⁿ'á ndúúcu taama n'daataá chí nguē n'daataa yeⁿ'é, nguéé idiíⁿ tan'dúucā chí idiíⁿ saⁿ'a 'cūū chí inn'guē sa yeⁿ'e yáⁿ'āa. ¹² 'Úú ní nguéé nga'diiⁿ'núⁿ 'uūví cuuvi 'áámá ndeete taachi caaⁿ'maⁿ'ngua'á. 'Úú ní teé décima yeⁿ'e tanducueⁿ'ē chí véé

yeⁿ'é chí lado yeⁿ'e Ndyuūs chíiⁿ chí tunéⁿ Ndyuūs. ¹³ Naati saⁿ'ā chí inn'guē yeⁿ'e yáⁿ'āa yaⁿ'ai canee sa ní nguééⁿ neⁿ'e sa snaaⁿ sa nánguuví. Dámaāⁿ chí n'geⁿ'e sá niiⁿ'nuⁿ sa ní ngaⁿ'ā sa: N'díi Ndyuūs, ya'ai 'iinu nī 'úú, ti 'úú 'iiⁿ'yāⁿ nuūⁿ'ndī 'úú. ¹⁴ 'Úú ngaⁿ'á ngii ndís'tií: Sáⁿ'a 'cūū cúnaⁿ'ā sá ndavaacu sa ní Ndyuūs nadich'ēecú yā nuuⁿ'ndi yeⁿ'ē sa. Saⁿ'ā fariseo miiⁿ nguééⁿ 'tíicā. 'Áā du'ú nuūⁿ 'iiⁿ'yāⁿ chí dich'etéⁿ maāⁿ, cuuvi yā ndicúúⁿ nanááⁿ Ndyuūs. Ní 'iiⁿ'yāⁿ chí nguééⁿ dich'etéⁿ maáⁿ yā 'iiⁿ'yāⁿ, Ndyuūs dich'etéⁿ yā 'iiⁿ'yāⁿ miiⁿ.

Jesús idi'viicú yā da'caiyāa

(Mt. 19.13-15; Mr. 10.13-16)

¹⁵ 'Iiⁿ'yāⁿ ní candee yā da'cáiyāa nanááⁿ Jesús ní 'iicu Jesús tuu'ví yā da'cáiyāa. Taachí discípulos yeⁿ'e Jesús n'diichi yā chuū, yaa'vi née yā 'iiⁿ'yāⁿ s'eeⁿ chí indáa yā ndúúcu dá'caiyāa. ¹⁶ Tuu'mi ní Jesús yaa'vi yā discípulos yeⁿ'e yā ní caⁿ'a yā: 'Cuááⁿ nī chí dá'caiyāa chíi yā nanaáⁿ. Nguééⁿ 'caaca taaⁿ nī caati naachí Ndyuūs ngaⁿ'a ntiiⁿ'nyuⁿ yā ní yeⁿ'e 'iiⁿ'yāⁿ chí ndiicuúⁿ yā tan'dúucā dá'caiyāa. ¹⁷ Cuaacu níⁿ'nyuⁿ ngaⁿ'á ngii ndís'tií: 'Iiⁿ'yāⁿ chí nguééⁿ cu'téenu yā Ndyuūs tan'dúucā 'áámá dá'caiyāa i'téenu yā nguééⁿ cuuvi ndaa yā naachí ngaⁿ'a ntiiⁿ'nyuⁿ yā.

'Áámá saⁿ'ā chí 'cuiica ndeē sa ndúúcu Jesús

(Mt. 19.16-30; Mr. 10.17-31)

¹⁸ 'Áámá saⁿ'ā chí ngaⁿ'ā ntiiⁿ'nyuⁿ sa itínguuneeⁿ sa Jesús miiⁿ: N'díi, Maestro chí n'dai, ¿de'ē cuuvi díⁿ ní ndaacá vida cueⁿ'e daāⁿ'maⁿ chí cuuvi yeⁿ'é?

¹⁹ Jesús ní caⁿ'a yā chíi yā saⁿ'ā: ¿De'ē cúuví chí ngaⁿ'a di ngii di 'úú chí 'úú n'daí 'úú? Mar 'áámá 'iiⁿ'yāⁿ nguééⁿ n'dai yā, dámaāⁿ Dendyuūs. ²⁰ Dii ní déenu di chí canéé nguūⁿ na ley 'tíicā: Nguééⁿ 'caāⁿ'núⁿ di; nguééⁿ caⁿ'a di ndúúcu táámá n'daataá

chi nguεε yeⁿē di; nguεε diduucú di; nguéé caaⁿmaⁿ di nduudu yaadi ndúúcu mar 'áámá 'iiⁿyāⁿ; dinéⁿe di ch'εεcu di ndúúcu chiida di.

²¹ Saⁿā miiⁿ n'nguεεcútaⁿā sa ní caⁿā sa: Tanducuéⁿē chuū 'āā idiíⁿ taachi saⁿā 'lííⁿ 'úú.

²² Taachí Jesús ch'iindiveéⁿ yā chuū, caⁿa yā chii yā saⁿā: Véé 'áámá cosa nūuⁿ chi canéé chí diiⁿ di. N'diicui dí tanducueⁿē chi véé yeⁿē di ní ca'a di 'iiⁿyāⁿ chi nguéé yeⁿe yā, ní nndaācā chi véé vaadi 'cuiica na va'ai cheeti nguuvu chi cuuvi yeⁿē di. Ní cuchí di ní caⁿa di nduucú.

²³ Taachí saⁿā miiⁿ ch'iindiveeⁿ sá chuū, neené s'neeⁿ ndaachíí yiinú sa, ti neené 'cuiica sa. ²⁴ Ní taachí Jesús n'diichi yā saⁿā miiⁿ chi neené s'neeⁿ ndaachi yiinú sa, tuu'mi ní caⁿa yā: De'ē chúúca ngíⁿ'ii chí cundaa 'iiⁿyāⁿ chi 'cuiica naachí Ndyuūs ngaⁿa ntiíⁿnyúⁿ yā. ²⁵ Ní tan'dúúca ejemplo 'cūū 'tíicā. Nguéé ngíⁿ'ii cá yeⁿe 'áámá 'iiti camello chí ch'εete cá ti 'yúúduu chí cho'ó ti nduutinááⁿ 'iini chi cheendi va'ai 'lííⁿ nguéé ti 'aama saⁿā chi 'cuiica it'éénu sa Ndyuūs ní cundáa sa na va'ai cheeti nguuvu.

²⁶ Taachi discípulos n'giindiveéⁿ yā chuū, caⁿa yā: ¿Du'ū cuuví nánguaⁿāi?

²⁷ Ní Jesús caⁿa yā: Saⁿā iⁿ'yeeⁿdí 'cūū nguéé ngíí diiⁿ sa chuū naati Ndyuūs cuuvi dííⁿ yā tanducuéⁿē.

²⁸ Tuu'mi ní Pedro miiⁿ ní caⁿa yā: Señor, cuin'dííhí nī. Nús'uu ní s'neeⁿ 'nū chi véé yeⁿé 'nū, ní cuchíí 'nū ndúúcu nī.

²⁹ Jesús miiⁿ ní caⁿa yā chii yā 'iiⁿyāⁿ s'eeⁿ: Cuaacu nííⁿnyúⁿ ngaⁿá ngíí ndís'tii chí 'āā du'ú nūuⁿ 'iiⁿyāⁿ chí cu'nee yā vaacu yā, o chiidá yā, o cheécú yā, o 'díínu yā, o n'daataa yeⁿe yā, o daiya yā, cáávā chí dííⁿ yā ntiíⁿnyuⁿ yeⁿé naachí Ndyuūs ngaⁿa ntiíⁿnyúⁿ yā, ³⁰ 'iiⁿyāⁿ miiⁿ n'deēe ca ndaācā yeⁿe yā ná iⁿ'yeeⁿdí 'cūū. Ní cuayiivi ní ndaaca

yā vida cueⁿe daāⁿmaⁿ ná va'ai cheeti nguuvu.

Jesús ngaⁿa yā chí 'cuūvi yā

(Mt. 20.17-19; Mr. 10.32-34)

³¹ Jesús cueⁿe yā 'áámá lado ndúúcu ndu'ū ndiichúúví discípulos yeⁿe yā ní caⁿa yā chí yā 'iiⁿyāⁿ s'eeⁿ: Maaⁿ ní caⁿā yú na yāāⁿ Jerusalén ní miiⁿ cúnuuⁿ ca'a tanducueⁿē chí profetas dingúuⁿ yā ndíí cuááⁿ vmnaaⁿ yeⁿe 'úú chí Saⁿā chí Daiya Dendyuūs. ³² Ní 'iiⁿyāⁿ s'eeⁿ dííⁿ yā entregar 'úú 'iiⁿyāⁿ chí nguéé yeⁿe ndaata Israel. Ní 'iiⁿyāⁿ s'uuⁿ ní dūūchinéeⁿ yā 'úú ní diiⁿ taaⁿ yā nduucú nífcú ca'a neeⁿ daíⁿ yā 'úú. ³³ 'Cuíínú 'cueⁿé yā 'úú ní 'caaⁿnúⁿ yā 'úú naati 'cuíínū 'iínū nguuvu ní nnduūchí yeⁿe nguuaaⁿ tináⁿā.

³⁴ Discípulos s'eeⁿ nguéé tuumicádíínuuⁿ yā yeⁿé dendū'u 'cūū ti canúúⁿ n'de'ei yeⁿe 'iiⁿyāⁿ s'eeⁿ. Nguéé tuumicádíínuuⁿ yā de'ē chí caⁿa Jesús.

Jesús diiⁿ yā chí nduūvā yeⁿe 'áámá saⁿā chí nguenaááⁿ yeⁿe yāāⁿ Jericó

(Mt. 20.29-34; Mr. 10.46-52)

³⁵ Taachí Jesús ndaā niiⁿnuúⁿ yā na yāāⁿ Jericó, 'áámá saⁿā nguenaááⁿ véé sa niiⁿnuúⁿ cyúúní. Ngíica sá limosnas. ³⁶ Sáⁿa 'cūū tááchí ch'iindiveeⁿ sa chí cho'ó n'deēe n'dái 'iiⁿyāⁿ, itinguunééⁿ sá: ¿D'é chí chíí?

³⁷ Ní 'iiⁿyāⁿ caⁿa yā chí yā saⁿā chí nguenaááⁿ chí chó'oo Jesús chí yeⁿē yāāⁿ Nazaret. ³⁸ Tuu'mi ní saⁿā nguéénaaⁿ miiⁿ 'caí sa: N'díí Jesús, Daiya David, nneé ya'ai 'iinu nī 'úú.

³⁹ 'Iiⁿyāⁿ chí cueⁿe vmnaaⁿ yeⁿe Jesús ngaⁿa yā ngii yā saⁿā miiⁿ chí 'āā ntéé 'cuaí sa, naati saⁿā miiⁿ ní n'gai yiicu ca sa: N'díí, Daiya David, nnéé ya'ai 'iinu nī 'úú.

⁴⁰ Tuu'mi ní Jesús miiⁿ chééndii yā ní caⁿa yā chí canguai yā saⁿa chí nguéé inaaⁿ. Taachí saⁿā miiⁿ ndaā sa nanááⁿ Jesús, Jesús miiⁿ ní itinguunééⁿ yā saⁿā:

41 ¿De'ē ne'e di chi dífⁿ ndúúcu díi? Saⁿā miiⁿ ní caⁿā sa: Señor, dífⁿ nī chi snāⁿ.

42 Jesús caⁿa yā chíi yā saⁿā: Cáávā chí i'téenu di nduūvā yeⁿē di.

43 Tuu'mí nūuⁿ snaāⁿ sa ní cuéⁿe sa ndúúcu Jesús. Ní ngaⁿa sa: De'e chúúca ch'ēete Ndyuūs. Ní nducyaaca 'iiⁿyāⁿ yeⁿe yāāⁿ miiⁿ chí n'diichí yā chuū ní caⁿa yā: De'ē chúúca ch'ēete Dendyuūs.

Jesús ndúúcu saⁿā chi nguuví Zaqueo

19 Taachí Jesús sndaa yā na yāāⁿ Jericó, cánúuⁿ yā yúúní ní cho'ó yā náavtaⁿā yāāⁿ Jericó miiⁿ. ²Na yāāⁿ miiⁿ canee 'áámá saⁿā chí 'cuiica sa chí nguuví sa Zaqueo. Saⁿā miiⁿ, ní saⁿā ndíí tiiⁿ yeⁿé 'iiⁿyāⁿ chí inn'guεε yeⁿe impuestos yeⁿe yáⁿāa. ³Saⁿa miiⁿ ní neⁿe sa snaaⁿ sa cheé yā chí Jesús miiⁿ naati nguéé ngii inaaⁿ sa ti neené n'deēe 'iiⁿyāⁿ ti nguéé yaacu sá. ⁴Tuu'mí ní cueⁿe sa ngéenu sa cuááⁿ vmaāⁿ ní cucheε sá 'áámá tiiⁿ yáⁿá sicómoro caati cuuvi sa snaaⁿ sa 'iiⁿyāⁿ, ti Jesús miiⁿ canee chí cho'ó yā miiⁿ. ⁵Taachí Jesús miiⁿ ndaa yā miiⁿ, n'diichí yā Zaqueo miiⁿ, ní caⁿa yā chíi yā saⁿā: Díí, Zaqueo, maaⁿ nch'ēeté nūuⁿ nch'ééⁿ dí ti maaⁿ ní neⁿe cuneé na vaacu dí.

⁶Tuu'mí ní Zaqueo miiⁿ maaⁿ nch'ēeté nūuⁿ nch'ēéⁿ sa ní 'cuuⁿ sa chí cueⁿe Jesús miiⁿ ndúúcu sa na vaacu sa. Ní yeenú taavi sa. ⁷Taachí 'iiⁿyāⁿ n'diichí yā chuū, nducyaaca yā ní neené n'deēe caⁿa yā. Ní caⁿa yā chí Jesús miiⁿ ní chinndaá yā chí cunee yā ndúúcu 'aama saⁿā chí véé nuuⁿndi yeⁿē sa. ⁸Tuu'mí ní taachi ch'iindiveeⁿ Zaqueo chuū, chééndii sa nanááⁿ Jesús miiⁿ ní caⁿa sá chíi sa 'iiⁿyāⁿ: Señor, 'caandiveéⁿ nī yeⁿé. Ná maⁿa chí véé yeⁿé ca'á 'iiⁿyāⁿ chí nguéé yeⁿe yā. Ndúúti chí de'ē ndivií yeⁿé 'áámá 'iiⁿyāⁿ, tuu'mí ní n'guεεcunee cuūuⁿ tanto yeⁿe yā.

⁹Jesús caⁿa yā chíi yā saⁿā: Maaⁿ ní nnguá'āi 'iiⁿyāⁿ yeⁿe va'ai Zaqueo

yeⁿe nuuⁿndi yeⁿe yā ti Zaqueo miiⁿ ní yeⁿe ndaata Abraham. ¹⁰Ti 'úú chí Saⁿā chí Daiya Dendyuūs ní ndaa chí in'nuúⁿ ní 'úú nadinguaⁿáí 'iiⁿyāⁿ chí nindái ndúúcu nuuⁿndi yeⁿe yā.

Ejemplo yeⁿe dueño chí ca'a tuumí mozos yeⁿé yā chí cuuvi díiⁿ sa negocio

¹¹Taachí Jesús miiⁿ 'āā canéé ni-iⁿnúⁿ yā na yāāⁿ Jerusalén, 'iiⁿyāⁿ chí ch'iindiveéⁿ yā chuū nadicádíínuuⁿ yā chí 'āā maáⁿ nūuⁿ ndaa naachi Ndyuūs ngaⁿa ntiíⁿnyuⁿ yā. Tuu'mí ní Jesús miiⁿ ní caⁿa yā 'áámá ejemplo. ¹²'Áámá saⁿā chí n'dai chí yeⁿe familia chí ngaⁿā nti-iⁿnyuⁿ cueⁿe sa na 'aama país chí yaⁿai chí cunéé sa rey yeⁿē país miiⁿ. Cueⁿe sa ní cuayiivi nguεεcunee sa. ¹³Taachi 'āā cháá caⁿā sa, yaaⁿvi sa ndiichi saⁿā mozos yeⁿé sa ní ca'a sa 'áámá cáádí 'diiⁿnguāⁿ 'áámá 'áámá mozo yeⁿé sa. Ní caⁿa sa chíi sa mozos: Dífⁿ nī negocio ndúúcu tuumí 'cūū nuuⁿmaⁿ neⁿe chí caⁿá. ¹⁴'Iiⁿyāⁿ yeⁿe país chí yaⁿai nguéé neⁿe yā saⁿa miiⁿ ní nguéé neⁿé yā chí cuuví rey yeⁿé yā saⁿā. Dichó'o yā n'duuví 'iiⁿyāⁿ chí caaⁿmaⁿ ya 'túúca: Nguéé neⁿe 'nū chí saⁿá 'cūū ní cúuví sá rey yeⁿé nús'uu. ¹⁵Saⁿā miiⁿ chí rey chí ngaⁿa ntiíⁿnyúⁿ yā cueⁿe yā ní nguεεcunee yā ndaa yā na vaacu yā. Dichó'o sa 'iiⁿyāⁿ chí yaaⁿvi yā mozos chí ca'a sa tuumí miiⁿ chí ndaa sa nanááⁿ yā ní cuuvi cadíínuuⁿ yā, ¿'áá n'deēe daiyā tuumi ndaacá 'aama 'aama yā? ¹⁶Ndaa saⁿā chí vmaááⁿ vmaāⁿ ní caⁿa sa chíi sa 'iiⁿyāⁿ: N'dií, señor, yeⁿe 'aama caadi 'dífⁿnguāⁿ yeⁿe nī, daiya túumí miiⁿ díiⁿ ganar ndiichi caadi 'dífⁿnguāⁿ. ¹⁷'Iiⁿyāⁿ 'cuiica miiⁿ ní caⁿa yā chíi yā mozo miiⁿ: Díí, n'daacā idiíⁿ di; ní díí 'áámá mozo chí n'dai. Tan'dúúca chí n'daacā chí díiⁿ di ndúúcu chí 'téé chí téé díi maaⁿ ní díí ní caaⁿmaⁿ ntiíⁿnyuⁿ di yeⁿé ndiichi yāāⁿ. ¹⁸Cuayiivi ndaa táámá sá ní caⁿā

sa: N'diī, señor, yeⁿe 'aama caadi 'dííⁿ-guāaⁿ yeⁿe nī, daiya tuūmī miiⁿ diiⁿ ganar nyuⁿu cáádí 'dííⁿnguāaⁿ. ¹⁹Tuu'mi ní caⁿ'a 'iiⁿ'yāⁿ 'cuiica miiⁿ chii yā mozo 'cūū: 'Tiicá ntuūⁿ dii ní caaⁿ'maⁿ ntiīⁿnyuⁿ di yeⁿe nyuⁿu yāāⁿ. ²⁰Ndaā táámá mozo ní caⁿ'ā sa chii sa 'iiⁿ'yāⁿ 'cuiica miiⁿ: N'diī, señor, ingāā tuumī yeⁿe nī chí cachiichí na pañuelo ní chíⁿeeⁿ n'dai. ²¹Úú ní 'va'á n'diī ti neené cheechí n'diī chí nanguai nī cosas naachi nguéé idííⁿ nī ntiīⁿnyuⁿ ní ndúúcu tuūmī yeⁿe nī dííⁿ nī cosechar naachi nguéé niiⁿ'nuⁿ nī ti yeⁿe nī. ²²Tuu'mi ní 'iiⁿ'yāⁿ 'cuiica miiⁿ caⁿ'a yā chii yā mozo miiⁿ: Díí, mozo chí nguéé n'daacā diiⁿ di, cáávā nduudu chí ngaⁿ'a di canee di condenado. Dii ní déénu di chí cheēchi 'úú ní nanangaáⁿ chí nguéé yeⁿe nī idííⁿ cosechar chí nguéé dííⁿ ntiīⁿnyuⁿ ti yeⁿe. ²³¿De'ē cúúví chí nguéé s'nuūⁿ di tuūmī yeⁿe nī na banco? Maaⁿ níícu taachi nindaá nī cuta'á tuūmī yeⁿe ndúúcu daiya. ²⁴Tuu'mi ní 'iiⁿ'yāⁿ 'cuiica caⁿ'a yā chii yā 'iiⁿ'yāⁿ s'eeⁿ chí snée yā miiⁿ: Divíí nī tuūmī yeⁿe sa ní ca'á nī saⁿ'a chí véé n'diichí caadi 'dííⁿ-guāaⁿ yeⁿe sa. ²⁵'Iiⁿ'yāⁿ s'eeⁿ ní caⁿ'a yā: N'diī, señor, saⁿ'ā miiⁿ ní 'āā véé ndiichi cáádí 'dííⁿnguāaⁿ yeⁿe sa. ²⁶'Iiⁿ'yāⁿ 'cuiica nan'guēecútaⁿ'a yā ní caⁿ'a yā: 'Úú ní ngaⁿ'á ngíí ndís'tiī chí 'iiⁿ'yāⁿ chí véé yeⁿe yā cuta'a cá yā chí cuuvi yeⁿe yā naati 'iiⁿ'yāⁿ chí dúú'vi vεe yeⁿe yā 'téé chí véé yeⁿe yā ní 'iiⁿ'yāⁿ ndivíí yā yeⁿe yā. ²⁷'Tiicá ntúūⁿ, 'iiⁿ'yāⁿ chí nguéé neⁿe n'diichí yā chí táaⁿ yā nduucú, ní nguéé neⁿe yā chí 'úú cuuvi rey yeⁿe yā, tuu'mi ní candée nī 'iiⁿ'yāⁿ s'eeⁿ nanaáⁿ 'muuⁿ ní 'caaⁿ'nuⁿ nī 'iiⁿ'yāⁿ 'muuⁿ.

Jesús ndáa yā na yāāⁿ Jerusalén

(Mt. 21.1-11; Mr. 11.1-11; Jn. 12.12-19)

²⁸Ch'íínú caⁿ'a yā chuū, Jesús cueⁿe yā cuááⁿ vmaaaⁿ ní cueⁿe yā ní ndaa yā na yāāⁿ Jerusalén. Cuayiivi cueⁿe ntúūⁿ discípulos yeⁿe yā. ²⁹Taachí ndaā ni-

iⁿ'núⁿ yā yeⁿe yāāⁿ Betfagé ndúúcu yāāⁿ Betania niiⁿ'nuúⁿ naachi canee yiicū chí nguuví Olivos, tuu'mi ní Jesús dichó'o yā ná 'uūví discípulos yeⁿe yā vmaaaⁿ yā. ³⁰Ní Jesús caⁿ'a 'túúca: Cueⁿe nī na yāāⁿ 'lííⁿ chí canéé niiⁿ'nuúⁿ ní taachí cundaá nī yāāⁿ miiⁿ ndaacá nī 'áámá burro 'lííⁿ chí n'déechiichí tí. Mar 'áámá 'iiⁿ'yāⁿ 'āā cuéé conduú yā 'iiti. N'daatí nī 'iiti ní candée nī 'iiti 'muuⁿ. ³¹Ní nduuti chí 'áámá 'iiⁿ'yāⁿ tiinguuneeⁿ yā 'túúca: Ndís'tiī, ¿de'ē cúúví chí n'daatí nī 'iiti? 'Túúca nan'guēecútaⁿ'a nī chí Señor yeⁿe yú ní neⁿe yā 'iiti.

³²Discípulos chí dicho'o Jesús cueⁿe yā ní ndaacá yā 'iiti tan'dúúca chí Jesús miiⁿ caⁿ'a yā. ³³Taachí n'daati yā burro 'lííⁿ miiⁿ, 'iiví tí ní caⁿ'a yā chii yā 'iiⁿ'yāⁿ s'eeⁿ: ¿De'ē cúúví chí n'daatí nī burro 'lííⁿ yeⁿe?

³⁴Ní 'iiⁿ'yāⁿ s'eeⁿ ní caⁿ'a yā: Señor yeⁿe yú ní neⁿe yā 'iiti.

³⁵Tuu'mi ní candée yā 'iiti nanaáⁿ Jesús. 'Iiⁿ'yāⁿ s'eeⁿ sn'dúu yā cotón yeⁿe yā vmaaaⁿ yeⁿe tí ní Jesús candúu yā 'iiti miiⁿ. ³⁶Ní taachí Jesús cho'o yā cyúúní miiⁿ, 'iiⁿ'yāⁿ s'uuⁿ ní n'doo yā cotón yeⁿe yā cuaaⁿ cyúúní mííⁿ. ³⁷Taachí Jesús ndaa niiⁿ'núⁿ yā naachi nga'ái yúúní mííⁿ yeⁿe yiicū chí nguuví Olivos, nducyáácá discípulos yeⁿe yā ní yeenú taavi yā. Ní tuca'á yā caⁿ'a yā chí ch'εete n'dai Ndyuūs cucáávā chí vaadi n'giinu chí n'diichí yā chí Jesús dííⁿ yā. Níícu diitūu n'dai 'cai yā ti yeenu taavi yā. ³⁸Ní 'cai yā: De'ē chúúca n'dai Rey chí cuchii yā ndúúcu chí duuchi Señor Ndyuūs. Ní cuneé vaadi 'diiíⁿ ná va'ai cheeti nguuvi. Ní caⁿ'á yā ndúúcu vaadi yeenú. De'ē ch'εete ca n'dai Ndyuūs chí de'εvé n'dai yā ndúúcu poder yeⁿe yā.

³⁹Tuu'mi ní n'duuví 'iiⁿ'yāⁿ fariseos chí snée yā nguaaⁿ 'iiⁿ'yāⁿ caⁿ'a yā chii yā Jesús miiⁿ: N'diī, Maestro, yaa'vi neeⁿ 'iiⁿ'yāⁿ s'eeⁿ chí nguéé caaⁿ'maⁿ yā tíicā.

⁴⁰ Jesús miiⁿ ní nán'guεεcútaⁿa yā yeⁿe fariseos ní caⁿa yā: Ndúúti chi 'iiⁿyāⁿ s'uuⁿ ní 'túicā nguéeⁿ caaⁿmaⁿ yā, tuuⁿmi ní tuūu miiⁿ ní caaⁿmaⁿ 'túicā.

⁴¹ Taachí ndaa niiⁿnúⁿ yā chí n'diichí yā yáāⁿ Jerusalén miiⁿ, tuuⁿmi ní Jesús cheεcú yā cucáávā 'iiⁿyāⁿ yeⁿe yáāⁿ miiⁿ ti ya'ai 'linu yā caavā 'iiⁿyāⁿ s'eeⁿ. ⁴² Ní caⁿa yā 'túucā: Ndís'tií, 'iiⁿyāⁿ yeⁿe yáāⁿ Jerusalén, nduuti chi incheenaáⁿ ní yeⁿe nguuví 'cūū chí cuuvi nanguaⁿai ní tuuⁿmi ní 'úú cuuví teé ndís'tií vaadi 'diifⁿ. Naati maaⁿ ní Ndyuūs canuuⁿ n'de'éeí yā yeⁿe ní ní nguéeⁿ cuuvi deenu ní. ⁴³ Ti ndaa nguuvi taachí 'iiⁿyāⁿ chí taaⁿ ndúúcu ní chééndii yā núúⁿmáⁿ 'di-ituú yáāⁿ yeⁿe ní ní nguéeⁿ cuuví cáánu ní yeⁿe yā. ⁴⁴ Ní dífⁿ yā chí cundee ní ti nguεε cuheé ní ndúúcu yā. Ní 'caaⁿnúⁿ yā nducyaaca ndís'tií ndúúcu daiyá ní, ní dituuví yā yáāⁿ Jerusalén yeⁿe ní ti 'iiⁿyāⁿ nguéeⁿ deenu yā chí tiempo maaⁿ ní nguuvi chí Ndyuūs s'neeⁿ yā chí cuuvi nanguaⁿai yā.

Jesús nadideevé yā yaacū templo

(Mt. 21.12-17; Mr. 11.15-19; Jn. 2.13-22)

⁴⁵ Tuuⁿmi ní Jesús sndaá yā na yaacū templo ní tucá'a yā tun'dáa yā nducyaaca 'iiⁿyāⁿ chí in'diicui yā ní ngái ntúuⁿ yā miiⁿ. ⁴⁶ Jesús caⁿa yā chí yā 'iiⁿyāⁿ s'eeⁿ: 'Túucā canée nguūⁿ na libro yeⁿe Ndyuūs: Yáacū yeⁿe ní naachi caaⁿmaⁿngua'a 'iiⁿyāⁿ naati ndís'tií ní dífⁿ ní tan'dúucā chí yiive yaava yeⁿe 'iiⁿyāⁿ chí diduucu.

⁴⁷ Jesús miiⁿ nguuvi nguuvi ngí'cúeeⁿ yā ná yáacū templo; naati 'iiⁿyāⁿ chí-iduú n'geeté, ndúúcu 'iiⁿyāⁿ chí ngí'cúeeⁿ ley, ndúúcu 'iiⁿyāⁿ chí ngaⁿa ntiíⁿnyuⁿ yeⁿe yáāⁿ miiⁿ nduuvidaamá yā ti neⁿe yā n'diichí yā táacā chí cuuvi 'caaⁿnúⁿ yā Jesús miiⁿ. ⁴⁸ Nguéeⁿ indaacá yā táacā chí 'caaⁿnúⁿ yā Jesús, ti nducyáacá 'iiⁿyāⁿ

s'nee veeⁿ n'daacá yā yeⁿe chí ngí'cúeeⁿ Jesús miiⁿ.

Jesús ngaⁿa ntiíⁿnyúⁿ yā

(Mt. 21.23-27; Mr. 11.27-33)

20 'Áámá nguuví taachí Jesús miiⁿ ngí'cúeeⁿ yā cheeti yaacū templo ní ngí'cúeeⁿ yā nduudu chí ngai yeⁿe Ndyuūs, ndaa nanááⁿ Jesús miiⁿ chí-iduú n'geeté ndúúcu maestros yeⁿe ley, ndúúcu 'iiⁿyāⁿ ndiicúú chí ngaⁿa nti-íⁿnyuⁿ yeⁿe yaacū. ² Ní ntiinguunéeⁿ yā Jesús: ¿Du'ú caⁿa ntiíⁿnyuⁿ chí ca'cúeeⁿ ní déndu'ú chí 'tuucā? O ¿du'ú 'iiⁿntyéⁿe tee yā orden chí dífⁿ ní 'túicā?

³ Tuuⁿmi ní Jesús miiⁿ nan'guεεcútaⁿa yā: 'Úú ntúūⁿ ní ntiinguunéeⁿ 'áámá ndís'tií. Nan'guεεcútaⁿa ní yeⁿe: ⁴ ¿Dú'u ca'a orden Juan chí cheedínuūⁿniⁿ yā 'iiⁿyāⁿ? ¿'Áá yeⁿe Ndyuūs o saⁿa íⁿ'yeeⁿdí 'cūū?

⁵ 'iiⁿyāⁿ s'eeⁿ nduuvidaamá yā ní caⁿa yā nguaaⁿ maaⁿ yā: Ndúúti chí caaⁿmaⁿ yú chí yeⁿe Ndyuūs, Jesús miiⁿ ní cuuvi yā s'uūúⁿ: ¿De'ē cuuvi chí nguéeⁿ chí'téenu ní? ⁶ Nduuti chí caaⁿmaⁿ yú chí yeⁿe saⁿa íⁿ'yeeⁿdí 'cūū, nducyaaca 'iiⁿyāⁿ ní cuiituú yā s'uūúⁿ ti 'iiⁿyāⁿ s'eeⁿ nadicádínuuⁿ yā chí cuaacu níⁿnyúⁿ Juan miiⁿ ní 'áámá profeta chí Ndyuūs dicho'ó yā.

⁷ Tuuⁿmi ní 'iiⁿyāⁿ s'eeⁿ nan'guεεcútaⁿa yā yeⁿe Jesús chí nguéeⁿ déenu yā tíí ndi-icá yeⁿe chí ngeedínuūⁿniⁿ Juan miiⁿ. ⁸ Tuuⁿmi ní Jesús caⁿa yā chí yā 'iiⁿyāⁿ s'eeⁿ: Ndíí nguéeⁿ ndúú 'úú ra cuuvi ndís'tií du'u 'iiⁿntyéⁿe tee yā orden 'úú chí idifⁿ chuū.

Yáⁿāa yeⁿe saⁿa chí diiⁿ cuidado dí'yú uvas

(Mt. 21.33-44; Mr. 12.1-11)

⁹ Jesús tucá'a yā caⁿa yā chí yā 'iiⁿyāⁿ s'eeⁿ 'áámá ejemplo chí 'téé nguéeⁿ dáámá: 'Áámá saⁿa chíinū sa dí'yú uvas ná yáⁿāa yeⁿe sa. Dueño miiⁿ

ca'a yā n'duuvī saⁿā chi idiiⁿ sa nti-
iⁿnyuⁿ ní nadíí'v'e yā saⁿā. Ní chiica yā
yááⁿ vaacú yā ní cueⁿe yā chí cuuvi
'náaⁿ yā. ¹⁰Taachí ndaā tiempo yeⁿe
cosecha yeⁿe uvas miiⁿ, dueño miiⁿ
dichó'o yā 'aama mozo yeⁿe yā chí cueⁿe
sa cuta'a sa parte yeⁿe cosecha chí tuneⁿ
dueño miiⁿ. 'Iiⁿyāⁿ chí idiiⁿ ntiⁿnyuⁿ
yeⁿe yáⁿāa ch'eⁿé yā mozo ní nadichó'o
yā mozo miiⁿ. Ní nguéé de'ē vee ca'a
yā mozo miiⁿ. ¹¹Dueño nguεεcunéé yā
dichó'o yā táamá mozo nanááⁿ saⁿā chi
idiiⁿ ntiⁿnyuⁿ na yáⁿāa yeⁿe yā. 'Tiicá
ntúūⁿ nguéé n'daacá diiⁿ sa ndúúcu mozo
miiⁿ. Ch'éⁿé sa saⁿa ní nadicáanu sa saⁿā
miiⁿ. Ní nguéé de'ē vee ca'a sa saⁿā mozo
miiⁿ. ¹²Dueño yeⁿe yáⁿāa miiⁿ nguεε-
cunéé ntúūⁿ yā dicho'o yā táamá mozo
nanááⁿ 'iiⁿyāⁿ chí idiiⁿ ntiⁿnyuⁿ na yáⁿāa
yeⁿe yā naati 'nuucá'a sa saⁿa ní nadi-
caanu sa saⁿā.

¹³Tuu'mī ní dueño yeⁿe yáⁿāa miiⁿ
caⁿa yā: ¿Táacā dííⁿ? Dicho'o saⁿā daiyá
chí neⁿe taaví. ¿Áá nguéé taachí snaaⁿ sa
saⁿā diiⁿ sa honrar saⁿā daiyá? ¹⁴'Iiⁿyāⁿ
chí idiiⁿ ntiⁿnyuⁿ na yáⁿāa miiⁿ taachí
n'diichi sa saⁿā daiya dueño yeⁿe yáⁿāa
miiⁿ nadicáadiinuⁿ sa ní caⁿa sa chii
sa v'í: Sáⁿa 'cuu chí cuuví yeⁿe sa
yáⁿāa 'cūū. 'Caāⁿnuⁿ yú saⁿā ní yáⁿāa
ndúúcu chí véé naaⁿ cuuvi yeⁿe yú.
¹⁵Tuu'mí tun'dáa sa saⁿā daiya dueño
'áamá lado yeⁿe chéeⁿ yeⁿe díí'yú uvas
ní ch'iⁿnuⁿ sa saⁿā. Jesús caⁿa yā: Maaⁿ
ní, ¿de'ē dííⁿ dueño yeⁿe yáⁿāa nduucú
saⁿā s'eeⁿ chí diiⁿ 'tíficā? ¹⁶Dueño miiⁿ
taachi ndaa yā ní diví yā saⁿā chí idiiⁿ
ntiⁿnyuⁿ na yáⁿāa yeⁿe yā ní 'caaⁿnúⁿ
yā saⁿā s'eeⁿ. Ní ca'á yā yáⁿāa miiⁿ yeⁿe
yā táamá 'iiⁿyāⁿ. Taachí 'iiⁿyāⁿ fariseos
ch'iindiveéⁿ yā chuū, tuu'mí ní caⁿa yā:
N'daacā chí Ndyuūs nguéé 'cuaaⁿ yā chí
'tíficā.

¹⁷Jesús ch'iinú yā 'iiⁿyāⁿ s'eeⁿ, ní caⁿa
yā: ¿De'ē neⁿe caaⁿmaⁿ nduudu chí

canéé nguūⁿ na libro yeⁿe Ndyuūs chí
'tuucá?

Tuūu ch'εεté chí 'iiⁿyāⁿ chí din'dái yā
va'āi miiⁿ ní sta'á yā ní ch'εécú yā
'áamá lado, ní tuūu 'cūū chí tuūu
ch'εete miiⁿ dichíí'v'e ca ní canéé
tuūu ch'εεté yeⁿe esquina yeⁿe va'āi.
¹⁸'Áā du'ú nūuⁿ 'iiⁿyāⁿ chí cun'daa nduú
yā vmnaaⁿ na tuūu 'cūū ní caatū 'ííni
yeⁿe yā. Naati 'āā du'ú nūuⁿ 'iiⁿyāⁿ chí
cun'dáá nduūu tuūu 'cūū vmnaaⁿ yeⁿe
yā, 'cuíínú ndúúví yuūni yā.

Yeⁿe tuumí chí ca'á yā emperador César

(Mt. 21.45-46; 22.15-22; Mr. 12.12-17)

¹⁹'Iiⁿyāⁿ chiiduú n'gεεté ndúúcu mae-
stros yeⁿe ley neⁿe yā cuta'á yā Jesús
ní dííⁿ yā chí preso yā naati di'va'a yā
'iiⁿyāⁿ yeⁿe yááⁿ miiⁿ. Tuu'mí nūuⁿ tu-
umicáadiinuⁿ yā chí Jesús miiⁿ caⁿa yā
ejemplo 'cūū chí 'téé nguéé dáamá ní
yeⁿe yā. ²⁰Tuu'mí ní dicho'o yā 'iiⁿyāⁿ
chí 'cueenuúⁿ Jesús miiⁿ. 'Iiⁿyāⁿ s'eeⁿ ní
ndaacá yā táacā chí cástaⁿa yā ndu-
udu Jesús miiⁿ chí Jesús cuuví caaⁿmáⁿ
yā 'aama nduudu yaadi. 'Tíficā ní cu-
uvi dicho'o yā Jesús nanááⁿ gobernador.
²¹Chiiⁿ chí 'iiⁿyāⁿ s'eeⁿ ní ntiinguunéⁿ
yā Jesús nduudú 'cūū: N'díí, maestro,
déenu nū chí ngaⁿa ní ní ngí'cueeⁿ ní
chiiⁿ chí n'daacā. Ní nguéé dííⁿ ní juz-
gar 'iiⁿyāⁿ tan'dúúca chí n'gee ní chí
n'daacā o nguéé, naati ngí'cueeⁿ ní yúúni
yeⁿe Ndyuūs ndúúcu nduudu cuaacu.
²²Maaⁿ ní cuuví ní chuū: ¿Áá n'daacā
chí nadíí'v'e 'nū emperador César tuumí
yeⁿe yáⁿāa o nguéé?

²³Jesús tuumicadíínuⁿ yā chí 'iiⁿyāⁿ
s'eeⁿ ní nguéé n'daacā chí dííⁿ yā ní
caⁿa yā chii yā 'iiⁿyāⁿ s'eeⁿ: ¿De'ē
cúúví chí neⁿe ní castaⁿá ní nduudu
yeⁿe? ²⁴'Cuuⁿmiⁿ ní 'áamá tuumí. Jesús
n'diichí yā tuumí ní caⁿa yā: ¿Du'ú
naaⁿ ndéé tuumí miiⁿ? ¿Du'ú chí ngu-
uví canee nguūⁿ naaⁿ? Tuu'mí ní saⁿa

s'uuⁿ nan'guεécútaⁿā sa: Naaⁿ emperador César cānee.

²⁵ Tuu'mi ní Jesús caⁿa yā chii yā 'iiⁿyāⁿ s'eeⁿ: Nca'a nī tuūmī emperador César miiⁿ chíⁿ chi yeⁿé yā ní ca'á nī Ndyuūs chíⁿ chi yeⁿé yā.

²⁶ Nguéé cuuvi díⁿ yā chistaⁿa mar 'áámá nduudu yeⁿe Jesús miiⁿ ní cheⁿe yiinú yā yeⁿé chí nan'guεécútaⁿā Jesús. Ní 'āā ntéé caⁿa yā mar 'áámá.

**'Iiⁿyāⁿ itinguuneeⁿ yā Jesús yeⁿé
chi nduuchi tináⁿā**

(Mt. 22.23-33; Mr. 12.18-27)

²⁷ Cuayiivi ní n'duuvi 'iiⁿyāⁿ saduceos ndaa yā nanááⁿ Jesús. Saduceos nguéé s'téenu yā chí nduuchi tináⁿā. Ní caⁿa yā chii yā Jesús: ²⁸ N'díí, Maestro, Moisés dingúuⁿ yā na ley 'tííca: Ndúúti chí 'áámá saⁿā 'cuuvi sa ní cu'neeⁿ sa n'daataá yeⁿé sa ní nguéé daiya tá, tuu'mi ní 'díínu sa cuuvi 'caandavaacu sa ndúúcu n'daataá miiⁿ ní 'cuundi daiya sa lado yeⁿe 'díínū tináⁿā. ²⁹ Maaⁿ ní véé ndεēche 'díínu yā. Saⁿā vmnaaⁿ míⁿ canee sa ndúúcu n'daataá yeⁿé sa ní ch'ii sa. Nguéé ch'εetinéé daiya sa. ³⁰ Saⁿā 'díínu sa ndiichi ndii 'úúví canee sá ndúúcu n'daataá yeⁿé tináⁿā. 'Diinu sa miiⁿ ch'ii ntúūⁿ saⁿā miiⁿ. Nguéé ch'εetinéé ntuūⁿ daiya sa. ³¹ Saⁿā 'diinū sa ndiichi ndii 'íínú canéé ntúūⁿ sa ndúúcu n'daataá míⁿ. 'Tiicá ntúūⁿ ch'ii sa ní nguéé ch'εetinéé ntúūⁿ daiya sa. Nduu ndεēche yā ch'εetinéé yā ndúúcu n'daataá míⁿ ní ca'áámá ca'áámá yā ch'ii yā ní nguéé ch'εetinéé mar 'áámá daiya yā. ³² Cuayiivi miiⁿ ní ch'ii n'daataá míⁿ. ³³ Taachí ndaa nguuvi chí nduuchi 'iiⁿyāⁿ chí n'díí, ¿cheé saⁿā s'eeⁿ n'daataá yeⁿé sa táⁿā? Tí nduu ndεēche yā ch'εetinéé yā ndúúcu n'daataá míⁿ.

³⁴ Tuu'mi ní Jesús miiⁿ nan'guéécútaⁿa yā yeⁿe 'iiⁿyāⁿ s'eeⁿ ní caⁿa yā: 'Iiⁿyāⁿ chí

snée yā iⁿyeeⁿdí 'cūū n'giindivaacu yā ní 'iiⁿyāⁿ yeⁿe yā nga'a yā chí n'giindivaacu yā. ³⁵ 'Iiⁿyāⁿ chí túneeⁿ chí ndaá yā na táámá iⁿyeeⁿdí, taachi nduuchí yā yeⁿé nguaaⁿ tináⁿā, na yáⁿāa miiⁿya ní nguεε 'caandavaacu yā, ndíí nguéé ndúú chí ca'a 'iiⁿyāⁿ yeⁿe yā chí 'caandavaacu yā. ³⁶ Yáⁿāa miiⁿya 'āā ntéé 'cuuvi yā ti daama yā ndúúcu ángeles. 'Iiⁿyāⁿ s'eeⁿ chí daiya Ndyuūs tí induuchi yā yeⁿé nguaaⁿ tináⁿā. ³⁷ Ndíí cuaaⁿ vmnaaⁿ ndíí taachi maaⁿ Moisés miiⁿ dingúuⁿ yā yeⁿé yáⁿá 'lífⁿ chí ngiichi iteé cadínnuⁿ yú caati tináⁿā ninduuchi yā. Ní Moisés miiⁿ ngaⁿá yā chí Señor Ndyuūs miiⁿ ní Ndyuūs yeⁿe Abraham, ndúúcu Isaac, ndúúcu Jacob. ³⁸ Tí Ndyuūs ní nguéé Ndyuūs yeⁿe tináⁿā ti yeⁿe 'iiⁿyāⁿ chí sduuchí yā. Caati nanááⁿ Ndyuūs miiⁿ nducyaaca 'iiⁿyāⁿ ní sduuchí yā cueⁿe daāⁿmaⁿ.

³⁹ Tuu'mi ní n'duuvi maestros chí ngi'cueeⁿ ley caⁿa yā chii yā Jesús miiⁿ: N'díí, Maestro, n'daacā ngaⁿa nī.

⁴⁰ 'Iiⁿyāⁿ s'eeⁿ 'āā ntéé neⁿe yā ntinguuneeⁿ ca yā.

¿Du'ū 'iiⁿyāⁿ chí Cristo?

(Mt. 22.41-46; Mr. 12.35-37)

⁴¹ Jesús caⁿa yā chii yā 'iiⁿyāⁿ s'eeⁿ: Ndís'tii, ¿táácā chí ngaⁿa nī chí Cristo miiⁿ ní daiya David? ⁴² Maāⁿ David miiⁿ ní ngaⁿa yā na libro yeⁿé Ndyuūs chí Salmos 'túúca:

Caⁿa Señor Ndyuūs chii yā Señor yeⁿé: 'Cuundi di lado tá cuaācū yeⁿé chí lado yeⁿe honor,

⁴³ ndíí taachi 'úú cu'neéⁿ 'iiⁿyāⁿ chí enemigos chí contra yeⁿé di cuaaⁿ ndii yā ca'a di tan'dúúca chí 'aama banco 'lífⁿ.

⁴⁴ Ndúúti chí David miiⁿ caⁿa yā chí Cristo miiⁿ ní Señor yeⁿe yā, ¿táácā cuuvi chí chí Cristo miiⁿ ní daiya David?

**Jesús ngúicá nuuⁿdi yeⁿe
maestros chi ngí'cueeⁿ ley**

(Mt. 23.1-36; Mr.
12.38-40; Lc. 11.37-54)

⁴⁵ Nducyáacá 'iiⁿyāⁿ n'giindiveéⁿ yā taachi Jesús caⁿa yā ndúucū discipulos yeⁿe yā ní tuca'á yā caⁿa yā chuū: ⁴⁶ Díⁿ ní cuidado, ndís'tiī, yeⁿe maestros chi ngí'cueeⁿ ley. 'Iiⁿyāⁿ s'eeⁿ ní neⁿe yā 'cuēti núuⁿ yā catecai n'geēnúú yā, ní neⁿe yā chi ndís'tiī ní díⁿ ní saludar 'iiⁿyāⁿ s'eeⁿ taachi snée yā nii'vee ní neⁿe yā chi díⁿ ní respetar 'iiⁿyāⁿ s'eeⁿ. Ní neⁿe yā 'cuēté yā na sillas vmnááⁿ vmnāaⁿ yeⁿe honor ná yaacū sinagogas ní sillas yeⁿe honor yeⁿe 'viicu naachi ch'ée yā. ⁴⁷ 'Iiⁿyāⁿ s'eeⁿ ní ndivíi yā va'ai yeⁿe n'daataá nguá'āa. Ní neéne n'deēe nga'angua'á yā ní neⁿe yā chi snaaⁿ tanáⁿā 'iiⁿyāⁿ chi diiⁿ yā 'tíicā. 'Iiⁿyāⁿ s'eeⁿ ní neene ch'ēete ca castigo yeⁿe yā nguuvi yeⁿe juicio.

Ofrenda yeⁿe n'daataá nguá'āa

(Mr. 12.41-44)

21 Jesús snée yā na yaācu templo ní n'diichi yā chi 'iiⁿyāⁿ 'cuiica ngii yā ofrendas yeⁿe yā na cajas naachi inúuⁿ ofrendas. ² N'diichí ntúuⁿ yā 'áámá n'daataá nguá'āa chí neene ndaachíi cānee tá. Táⁿā miiⁿ ní s'nuūⁿ tá chēeti caja miiⁿ uūvi centavos chí cobre. ³ Jesús miiⁿ ní ngaⁿa yā ngii yā 'iiⁿyāⁿ s'eeⁿ: Cuaacu níⁿnyuⁿ 'úú ngaⁿá ngii ndís'tiī chí n'daataá nguá'āa 'cūū ch'ēete ca tuūmí chii tá, nguéé ti tanáⁿā 'iiⁿyāⁿ. ⁴ Tí 'iiⁿyāⁿ s'eeⁿ ní nga'a yā yeⁿe chí nngaāva yeⁿe yā chí cuuvi ofrenda yeⁿe Ndyuūs; naati n'daataá 'cūū chí neene ndaachíi canee tá ní ca'ā tá tanducuéⁿe chí véé yeⁿe ta chí che'e tá.

**Jesús nn'geeⁿ yā táámá ejemplo
chí yeⁿe yaācá chí ntuvíi**

(Mt. 24.1-2; Mr. 13.1-2)

⁵ Náⁿā 'iiⁿyāⁿ ní ngaⁿa yā yeⁿe yaācū templo miiⁿ chí yaāva canéé ndúucū tuūu n'dēē cheeⁿ ndúucū adornos yeⁿe regalos chí lado yeⁿe ofrenda. Jesús caⁿa yā chíi yā 'iiⁿyāⁿ s'eeⁿ: ⁶ Ndís'tiī ní inaaⁿ ní dendú'ū chí 'túucā. Ndáá nguuvi taachí nadituuvi yā yaācū miiⁿ ní 'āā ntéé cūnee tuūu cuaaⁿ vmnááⁿ yeⁿe vi'i chí nguéé ntuuvií.

**Ejemplo yeⁿe tiempo taachi 'āā cuéé
ndaá nguuvi chí 'cuiinū íⁿ'yeēⁿdí**

(Mt. 24.3-28; Mr. 13.3-23)

⁷ Tuu'mi ní 'iiⁿyāⁿ s'eeⁿ ntinguunéⁿe yā Jesús miiⁿ: N'diī, Maestro, ¿tíi cuaⁿā cuuví chuū? ¿Dē'ē señaal 'cuuⁿmíⁿ ní taachi 'āā cuuvi chí 'tiicā?

⁸ Jesús caⁿa yā: Cundéé ní cuidado chí 'iiⁿyāⁿ nguéé canche'éi yā ndís'tiī caati neene n'deēe 'iiⁿyāⁿ chíi yā caaⁿmáⁿ yā ndúucū chí duuchí 'tíica: 'Úú chí Cristo; ní 'āā snée nguuvi chí 'cuiinū íⁿ'yeēⁿdí. Naati ndís'tiī, nguéé caⁿá ní ndúucū yā. ⁹ Ní taachí 'caandiveeⁿ ní chí veē caandaá ní 'iiⁿyāⁿ 'cuuⁿmaⁿ yā contra yeⁿe taama yā nguéé dii'yá ní cuuvi. Tanducuéⁿe chuū canéé chí cuuvi vmnááⁿ vmnāaⁿ naati 'āā cuee 'cuiinū iⁿ'yeēⁿdí.

¹⁰ Tuu'mi ní Jesús caⁿa yā chíi yā 'iiⁿyāⁿ s'eeⁿ: 'Áámá nación ní 'cuuⁿmáⁿ contra yeⁿe taama nación ní 'iiⁿyāⁿ yeⁿe 'áámá país ní 'cuuⁿmáⁿ yā contra yeⁿe 'iiⁿyāⁿ yeⁿe taama país. ¹¹ Ní n'deēe cuuvi nuⁿ'u taaⁿ yáⁿāa, ndúucū tiempos chí 'cuūndí cuiicu, ndúucū ca'ai taaⁿ n'deēe cuaaⁿ n'dai, ní 'iiⁿyāⁿ snaaⁿ yā dendu'ū chí vaadi n'giinu yeⁿe va'ai chēeti nguuvi ní dii'yá yā cuuvi.

¹² Ní taachi 'āā cuéé cuuvi tanducuéⁿe dendu'ū chí 'túucā, 'iiⁿyāⁿ ní cuiítuú yā ndís'tiī ní cuta'á yā ndís'tiī chí presos ní. Ní nca'á yā ndís'tiī 'iiⁿyāⁿ chí

nga^a ntiⁿnyuⁿ yeⁿe yaācū sinagogas ní cuii yā ndís'tiī vácū. Cuayivi ní candée yā ndís'tiī nanááⁿ 'iiⁿ'yāⁿ reyes ndúúcu gobernadores cáāvā chí nga^a nī chí duuchí. ¹³ Chuū 'cueenu ndís'tiī cuuvi ti cueⁿé nī nduucú ní nanááⁿ 'iiⁿ'yāⁿ s'eeⁿ cuuvi caaⁿ'máⁿ nī nduudu cuaacu yeⁿé. ¹⁴ Cundée n'daaca nī cuidado ná staava yeⁿe nī ní nguéeⁿ nadacádfínuuⁿ nī vmaāⁿ yeⁿe taacā nán'guēcútaⁿ a nī yeⁿe 'iiⁿ'yāⁿ s'eeⁿ. ¹⁵ Ti hora mífⁿ nūuⁿ 'úú ní yaa'ví ndís'tiī nduudu chí caaⁿ'máⁿ nī. Ní teé ndís'tiī vaadi deenu yeⁿé ní 'iiⁿ'yāⁿ s'eeⁿ nguéeⁿ cuchee yā ndúúcu ndís'tiī, ndí nguéeⁿ ndúú cuuvi caaⁿ'maⁿ yā contra yeⁿe ndís'tiī. ¹⁶ Naati chiidá nī, ndúúcu 'dífnu nī, ndúúcu 'iiⁿ'yāⁿ yeⁿe nī, ndúúcu amigos yeⁿe nī ní caaⁿ'máⁿ yā contra yeⁿe ndís'tiī chí 'iiⁿ'yāⁿ 'caaⁿ'núⁿ yā náⁿā ndís'tiī. ¹⁷ Ní nducyaaca 'iiⁿ'yāⁿ nguéeⁿ cuuvi n'diichí yā ndís'tiī cucáāvā 'úú ti cueⁿé nī nduucú. ¹⁸ Naati mar 'áámá yuūdū tíⁿ nī nguéeⁿ cuuví ndái. ¹⁹ Nduuti chí ndís'tiī ngiinū ngiinū cuchée nī na staava yeⁿé nī ní 'cuetinéé n'daāca nī, tuu'mi ní ndáá nguuvi chí ndaaca nī vida cueⁿe daāⁿ'maⁿ yeⁿe nī.

²⁰ Taachi ndís'tiī snaaⁿ nī soldados nuuⁿ'maⁿ ndífví yā yāāⁿ Jerusalén, tuu'mi ní cadiinuuⁿ nī chí yāāⁿ Jerusalén miiⁿ 'āā ntuví. ²¹ Tuu'mi ní n'daaca chí 'iiⁿ'yāⁿ chí snée yā na yáⁿ'āa Judea caⁿ'á yā cáānu yā cuaáⁿ yīcú. Ní 'iiⁿ'yāⁿ chí snée yā na yāāⁿ Jerusalén miiⁿ ní nan'dáa yā miiⁿ. Ní 'iiⁿ'yāⁿ chí snée yā campo nguéeⁿ nguēcunee nndaa yā na yāāⁿ Jerusalén. ²² Ti nguuvi s'eeⁿ ní nguuví chí cuchii 'cueenú yā cuuvi cáāvā nuuⁿ'ndí yā. Nífcú canée chí cuuvi cuaacu tanducuéⁿ chí canée nguūⁿ na libro yeⁿé Ndyuūs. ²³ Naati de'ē chúcā ya'āi yeⁿe n'daataá chí véé daiya tá cheeti tá ndúúcu n'daataá chí ngiicú da'cua'āa daiya tá nguuvi chí cáānu yā. Ní 'iiⁿ'yāⁿ miiⁿ néené 'cueenu yā cuuvi na yáⁿ'āa 'cúu. ²⁴ Ní 'yááⁿ 'iiⁿ'yāⁿ ní 'cuūvi

yā ndúúcu machete 'uūvi lados 'caāiⁿ taachi dífn yā caandaá. Ní candee yā 'yaaⁿ 'iiⁿ'yāⁿ chí presos yā ní caⁿ'á yā ndí nducyaaca países. Nífcú yāāⁿ Jerusalén miiⁿ cūnee ndúúcu 'iiⁿ'yāⁿ gentiles chí 'iiⁿ'yāⁿ chí nguéeⁿ yeⁿe ndaata Israel ní 'iiⁿ'yāⁿ s'eeⁿ canée yā na yáⁿ'āa miiⁿ ndí tiempo chí Ndyuūs 'cuaaⁿ yā 'iiⁿ'yāⁿ gentiles cuuvi yeⁿé yā.

Táacā ndaá Saⁿ'ā chí Daiya Dendyuūs

(Mt. 24.29-35, 42-44; Mr. 13.24-37)

²⁵ Tuu'mi ní Ndyuūs 'cuuⁿ'miⁿ yā ndúúcu vaadi n'giinu señales ná yáⁿ'āa, ndúúcu ná 'iiⁿ'yu, ndúúcu na 'íⁿ'nyúⁿ. Néené ya'āi 'cueenu 'iiⁿ'yāⁿ yeⁿe tanáⁿ'ā naciones ni nducyaaca 'iiⁿ'yāⁿ diiⁿ'ya cá yā cuuvi. Ní nguéeⁿ déenu yā taacā chí idiiⁿ yā cucáāvā chí 'yuudu n'dai 'cuēcu nuūⁿ'nī'yáⁿ'ā ní can'dái yaacu nuūⁿ'nī miiⁿ. ²⁶ 'iiⁿ'yāⁿ s'eeⁿ cuuvi cúunu yā chí 'va'á yā ndúúcu dendu'ū chí ndaa vmaāⁿ yáⁿ'āa 'cúu ní cucáāvā nducuéⁿ nanguuvi ní 'nuⁿ'u. ²⁷ Tuu'mi ní 'iiⁿ'yāⁿ snááⁿ yā 'úú chí Saⁿ'ā chí Daiya Dendyuūs chí ndaá na 'áámá meēeⁿ ndúúcu poder ch'ete yeⁿé ndúúcu chí deevé n'dai yeⁿe maáⁿ cuerpo yeⁿé. ²⁸ Taachí cungaⁿ'ā tanducuéⁿ chuū cu'neeⁿ diitú nī na staava yeⁿé nī tí ndaā nguuvi chí nnguaⁿ'āi ndís'tiī ní canée niiⁿ'nuúⁿ.

²⁹ 'Úú ní ngaⁿ'á ngí ndís'tiī 'áámá ejemplo: Cuiⁿ'diichí nī yáⁿ'á yeⁿe n'guídii yaaⁿ nguuvi ndúúcu nducyaaca yáⁿ'á. ³⁰ Taachí snaaⁿ nī chí 'āā ndaa tá'āa yáⁿ'á mífⁿ, tuu'mi ní 'āā deenú nī ti 'āā snee niiⁿ'nuúⁿ tiempo chí cuchii yáāaⁿ. ³¹ Tiicá ntúūⁿ cuuvi taachi snaaⁿ nī dendu'ū chuū chí ngaⁿ'á, 'āā deenú nī chí naachí Ndyuūs ngaⁿ'a ntiⁿ'nyúⁿ yā 'āā snee niiⁿ'nuúⁿ.

³² 'Úú ngaⁿ'á ngí ndís'tiī, chí cuaacu níⁿ'nyúⁿ 'iiⁿ'yāⁿ chí snée yā maaⁿ 'āā cuéeⁿ 'cuuví yā nenⁿe chí 'āā cuéeⁿ cuuví tanducuéⁿ chuū. ³³ Nanguuvi ndúúcu

yáⁿāa ní chó'ōo naati nduudu yeⁿé nguéé chó'ōo.

³⁴Ndís'tií ní cundéε nī cuidado chi staava yeⁿe nī nguéé nduuvi cheéchi ndúúcu vicios chi véé iⁿ'yeeⁿdí 'cūū. Nguéé nadicádiinúⁿ ca nī yeⁿe chi che'é nī o cu'ú nī o yeⁿē n'deeε yeⁿe vida yeⁿe nī ti nguuvi miiⁿ ní dácanaāⁿ ndaá nanááⁿ yeⁿe ndís'tií. Ní canéé chi canéé listo nī. ³⁵Ti nguuvi s'eeⁿ ní ndaa nanááⁿ ndís'tií ndúúcu 'iiⁿ'yāⁿ chi snéε yā iⁿ'yeeⁿdí 'cūū ní nducyaacá yā ní 'cuenú yā cuuvi tí ndaā nguuvi s'eeⁿ tan'dúúca 'áámá tuūvi dácanaāⁿ índuudi. ³⁶Cuεeti nduuchi nī ní caaⁿmaⁿnguaⁿá nī nguuvi nguuvi chi cuuví nnguaⁿai nī yeⁿe dendu'ū vaadi ya'ai chi cuchii. Ní cuuvi ndaa nī nanááⁿ 'úú, Saⁿā chi Daiya Ndyuūs.

³⁷Nguuvi nguuvi Jesús miiⁿ ngí'cueeⁿ yā na yáacū templo ní n'gaaⁿ ní nn'daa yā ná yiicū 'líf' chi nguuvi Olivos. ³⁸Ní nguuvi nguuvi cuaaⁿ ná nguεetiyaⁿ ní nducyaaca 'iiⁿ'yāⁿ ndaa yā na yaacū templo nanááⁿ Jesús miiⁿ chí 'caandivéεⁿ yā nduudu yeⁿe yā.

'iiⁿ'yāⁿ chi contra Jesús ngaⁿa yā táácā chi díiⁿ yā chi cuuvi cutaⁿá yā Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

22 'Āā snee niiⁿnuúⁿ nguuví yeⁿe 'viicu yeⁿe pascua chi 'viicu chi che'é yā pan chi nguéé levadura yeⁿē. ²Ní 'iiⁿ'yāⁿ chiiduú n'gεeté ndúúcu maestros yeⁿe ley nduuvidaamá yā ní ngaⁿá yā taacā chi cuuví 'caaⁿnúⁿ yā Jesús naati 'va'á yā 'iiⁿ'yāⁿ yeⁿe yāāⁿ Jerusalén miiⁿ.

³Espíritu yeⁿe yāáⁿn'guiinūⁿ sndáa na staava yeⁿe saⁿā chi nguuvi Judas Iscariote chi 'aama discípulo yeⁿe Jesús naachi ndiichuuví yā. ⁴Judas miiⁿ cheⁿe sa nanááⁿ chiiduú n'gεeté ndúúcu capitanes ní yaaⁿvi sá 'iiⁿ'yāⁿ táácā chi cuuví díiⁿ sa chi naca'a sa Jesús miiⁿ 'iiⁿ'yāⁿ

s'eeⁿ. ⁵'Iiⁿ'yāⁿ s'eeⁿ ní yeenú n'dai yā ní nduuvidaamá yā chí ca'a yā tuūmī Judas miiⁿ. ⁶Judas sta'a sa tuūmī ní caⁿa sa. Nadacádiinuuⁿ sa táácā cuuvi nta'a sa Jesús miiⁿ na ta'a 'iiⁿ'yāⁿ s'eeⁿ manera chi 'iiⁿ'yāⁿ yeⁿe yāāⁿ Jerusalén miiⁿ nguéé ntuumicadiinúⁿ yā yeⁿē.

N'nuúⁿ yā chi che'e yā cáávā 'víúcu yeⁿe pascua

(Mt. 26.17-29; Mr. 14.12-25; Jn. 13.21-30; I Co. 11.23-26)

⁷Ndaā nguuvi yeⁿe pascua, 'viicu chi nducyaaca 'iiⁿ'yāⁿ che'e yā pan chi nguéé levadura yeⁿē. Nguuvi miiⁿ ní 'iiⁿ'yāⁿ 'caaⁿnúⁿ yā 'áámá 'iiti cuūchi 'líf' chí sacrificio yeⁿe pascua. ⁸Jesús dicho'ó yā Pedro miiⁿ ndúúcu Juan ní caⁿa yā chii yā 'uuvi yā: Cuéⁿé nī ní n'nuúⁿ nī naachi che'e nguiinū yú yeⁿe 'viicu yeⁿe pascua.

⁹'Iiⁿ'yāⁿ s'eeⁿ ní caⁿa yā chii yā Jesús miiⁿ: ¿Tíí neⁿe nī chi in'nuúⁿ 'nū chi che'e nguiinū yú?

¹⁰Jesús n'guεεcútaⁿa yā: Taachí cundaa nī na yāāⁿ Jerusalén miiⁿ ndaāca nī 'áámá saⁿā chi ndéε sa 'cuuti cuéé nuūⁿnī. Caⁿá nī ndúúcu sa ndíí ná va'ai naachi ndaā sa. ¹¹Ní caaⁿmaⁿ nī cuuvi nī saⁿā chi va'ai yeⁿē miiⁿ: N'dii, señor Maestro yeⁿe yú ngaⁿá yā 'túúca: ¿Tíí cánéé cuarto chi che'é nguiinū yeⁿe pascua ndúúcu discípulos yeⁿé? ¹²Saⁿā miiⁿ ní 'cuuⁿmiⁿ sa ndís'tií 'áámá cuarto ch'εete yeⁿe va'āi chí ndii 'uūvi piso ní 'aa véé yaāⁿ. Miiⁿ in'nuúⁿ nī chi che'e yú yeⁿe pascua.

¹³Apóstoles ní cueⁿe yā ní ndaaca yā tanducuéⁿē tan'dúúca chi Jesús ngaⁿa yā ngii yā, ní n'nuúⁿ yā chí che'e yā yeⁿe pascua.

¹⁴Taachí ndaā snuū ca'a hora chi che'e nguiinū yā, Jesús miiⁿ ndúúcu apóstoles yeⁿe yā ch'εeté yā na mesa chi che'e nguiinū yā. ¹⁵Jesús caⁿa yā chii yā 'iiⁿ'yāⁿ s'eeⁿ: De'e chúúca neⁿé che'é ndúúcu ndís'tií 'viicu yeⁿe pascua 'cūū

neⁿe chí 'āā 'cuéé 'cuūví. ¹⁶Caati ngaⁿá ngíí ndís'tií ti 'úú ní 'āā ntéé che'é ndúúcu nī táámá 'viicu pascua ndíí taachi cuuvi cuaacu chí neⁿe caaⁿmaⁿ yeⁿē naachí Ndyuūs ngaⁿa ntiíⁿnyúⁿ yā.

¹⁷Tuu'mi ní Jesús sta'á yā taza ndúúcu vino ní ca'a yā gracias Ndyuūs. Ní caⁿa yā chíi yā apóstoles yeⁿe yā: Cuta'á nī chuū ní cu'ú nī nguaaⁿ nducyaaca nī.

¹⁸Ti 'úú ní ngaⁿá ngíí ndís'tií, chí 'āā ntéé cu'ú jugo yeⁿe uvas, ndii ndaá nguuví yeⁿe naachí Ndyuūs ngaⁿa ntiíⁿnyúⁿ yā.

¹⁹Tuu'mi ní sta'a Jesús pan miiⁿ ní ca'a yā gracias Ndyuūs. Ní n'déé yā ní ca'a yā apóstoles ní caⁿa yā: Chuū chí tan'dúúca cuerpo yeⁿe 'tíicā. Ní teé lugar 'iiⁿyāⁿ chí 'caaⁿnúⁿ yā 'úú cáávā ndís'tií. Dííⁿ nī chuū taachi n'gaacu nī yeⁿe 'úú.

²⁰'Tiicá ntúūⁿ dííⁿ yā ndúúcu taza. Taachí ch'íínú che'e yā ní caⁿa yā: Jugo yeⁿe uvas yeⁿe taza chí cuuvi cuaacu ní chuū tan'dúúca chí yuūⁿ yeⁿe chí cugéé cáávā ndís'tií.

²¹Maaⁿ ní saⁿā chí naca'ā 'úú vee sa ndúúcu yú na mesa. ²²Saⁿā chí Daiya Dendyuūs chí 'úú cuaacu nííⁿnyúⁿ caⁿa sa 'cuūví sa tan'dúúca chí neⁿe Dendyuūs. De'e chúúca ya'ai yeⁿē saⁿā chí naca'ā sa 'úú.

²³Tuu'mi ní apóstoles tucá'a yā ntingūneeⁿ vi'i yā: ¿Du'u ra chí diiⁿ chuū?

**Ngaⁿa yā nguaaⁿ maaⁿ yā:
¿Du'ū chí ch'ēete ca?**

²⁴Tuu'mi ní apóstoles tuca'a yā caⁿa yā nguaaⁿ maaⁿ yā cheé yā chí ch'ēete ca yā. ²⁵Tuu'mi ní Jesús miiⁿ caⁿa yā chíi yā 'iiⁿyāⁿ s'eeⁿ: Reyes yeⁿe tanáⁿā naciones ngaⁿa ntiíⁿnyuⁿ yā tan'dúúca chí 'iivi cheechi ní 'iiⁿyāⁿ yeⁿe naciones ní ngaⁿa yā chí rey yeⁿe yā n'daacā idiíⁿ yā. ²⁶Naati nguaaⁿ ndís'tií nguéé 'tíicā. 'Iiⁿyāⁿ chí ch'ēete ca nguaaⁿ ndís'tií canéé chí dííⁿ yā tan'dúúca saⁿā da'caiyāa chí diiⁿ mandados. 'Iiⁿyāⁿ chí ngaⁿa nti-

iⁿnyúⁿ yā nguaaⁿ ndís'tií canee chí dííⁿ yā tan'dúúca 'áámá 'iiⁿyāⁿ chí dichí'vē 'iiⁿyāⁿ. ²⁷Cheē cá yā chí ch'ēete yā. ¿'Áá 'iiⁿyāⁿ chí n'giindí yā na mesa o 'iiⁿyāⁿ chí n'gíi chí cho'o chí cu'u? ¿'Áá nguéé 'iiⁿyāⁿ chí n'giindí na mesa? N'diichí nī. 'Úú ní canee nguaaⁿ ndís'tií tan'dúúca 'iiⁿyāⁿ ndíicūⁿ chí dichí'vē.

²⁸Ndís'tií ní ch'ēetinēe nī nduucú nguuví nguuví taachi 'úú n'geenú ngi tan'ducuéⁿē. ²⁹Ní tan'dúúca Chiidá tee yā 'úú naachí ngaⁿā ntiíⁿnyúⁿ 'tiicá ntúūⁿ 'úú ní teé ndís'tií 'áámá chí caaⁿmaⁿ nti-iⁿnyúⁿ nī. ³⁰Ní ndís'tií 'cuēete nī na mesa nduucú chí che'é nī ní cu'ú nī naachi 'úú ngaⁿá ntiíⁿnyuⁿ. Ní 'cuēete nī na sillas yeⁿe juez ní n'diichí nī nuuⁿndi yeⁿē ndichúúví ndaata yeⁿe 'iiⁿyāⁿ Israel chí judíos.

**Jesús caaⁿmaⁿ yā chí Pedro caaⁿmaⁿ
yā chí nguéé deenu sa Jesús**

(Mt. 26.31-35; Mr.

14.27-31; Jn. 13.36-38)

³¹Jesús yaa'ví yā Pedro ní caⁿa yā: N'dii, Simón Pedro, Simón Pedro, cuin'diichí nī ti yááⁿnguiniūⁿ ngiicá sa yeⁿe ndís'tií chí cuuvi diiⁿ sa. N'diichineeⁿ sa ndís'tií tan'dúúca 'iiⁿyāⁿ ndáádi yā trigo 'tíicā diiⁿ sa. Ní véé permiso yeⁿe sa. ³²Naati 'úú ní ngaⁿangua'á cáávā dii, Pedro, chí cu'téenu ca di. Ní taachi ndaacadaamí di yeⁿē nuuⁿndi yeⁿe di ní cu'téenu ca di tuu'mi ní cunnee di tanáⁿā hermanos yeⁿe di chí cu'téenu cá yā.

³³Simón caⁿa yā chíi yā Jesús miiⁿ: Señor, 'āā véé yaáⁿ chí caⁿá nduucú nī ndíí vácūū; ní ndúúti chí 'cuuví nī, 'úú ní 'cuuví ndúúcu nī.

³⁴Jesús caⁿa yā chíi yā Pedro: Ngaⁿá ngíi dii chí tusáⁿā ní nguéé 'cuai ti ndíí taanduvéé cueeⁿdiitú di 'iinū cuuvi yeⁿe 'úú chí nguéé in'diichi di 'úú.

Jesús ngaⁿa yā yeⁿe chí cuchii.

³⁵Tuu'mi ní Jesús itiinguunéeⁿ yā apóstoles: Taachí dicho'ó ndís'tií nguéeé cándee ní bolsa yeⁿe tuumi ní, ndíí nguéeé ndúú morral yeⁿe ní, ndíí nguéeé ndúú ndaacuú yeⁿe ní, ¿'áá véé de'ē vee chí chii faltar yeⁿe ní? Apóstoles ní caⁿa yā: Nguéeé de'ē vee.

³⁶Ní Jesús caⁿa yā: Maaⁿ ní ndís'tií chí véé bolsa yeⁿe ní, candee ní. 'Tiicá ntúúⁿ ndís'tií chí véé morral yeⁿe ní, candee ní. Ndís'tií chí nguéeé 'aama machete 'uúví lados 'caāiⁿ yeⁿe ní, n'diicúí ní cotón yeⁿe ní ní cuái ní. ³⁷Ti ngaⁿ'á ngíí ndís'tií chí canéeé chí cuuvi cuaacú tanducuéⁿ chí canéeé nguūⁿ yeⁿé: Ní 'iiⁿyāⁿ caⁿa yā chí véé nuūⁿndí yeⁿe 'úú tan'dúúca tanáⁿ'ā 'iiⁿyāⁿ chí véé nuuⁿndi yeⁿe yā. Tí tanducuéⁿ chí canéeé nguūⁿ yeⁿe 'úú canéeé chí cuuvi cuaacu.

³⁸Tuu'mi ní discípulos ní caⁿa yā: N'dií, Señor, íngáā na 'uuvi machete 'uúví lados 'caāiⁿ. Jesús ní caⁿa yā: Ndúúcú stíí 'āā véé.

Jesús ngaⁿangua'á yā na jardín chí nguuvi Getsemaní

(Mt. 26.36-46; Mr. 14.32-42)

³⁹Cuayiivi ní can'daā Jesús tan'dúúca costumbre yeⁿe yā ní cueⁿé yā na yīcú yeⁿe Olivos. Ní discípulos yeⁿe yā cueⁿé yā ndúúcu yā. ⁴⁰Ní taachí ndaa yā na lugar miiⁿ, tuu'mi ní Jesús miiⁿ ní caⁿa yā chí yā discípulos yeⁿe yā: Ndís'tií caaⁿmaⁿgua'á ní chí yáá'n'giinūuⁿ nguéeé n'diichineeⁿ sa ndís'tií chí dííⁿ ní nuuⁿndi.

⁴¹Jesús ní cueⁿe yā yeⁿe discípulos yeⁿe yā tanduu naaⁿ chí naachi ndaa 'áámá tuūu chí ngii ya ní Jesús caantii'yá yā ní caⁿangua'á yā. ⁴²Ní caⁿa yā: N'dií, Chiidá, ndúúfí chí neⁿe ní ní divíí ní yeⁿe chí canee chí 'cueenú cuuvi yeⁿe prueba 'cūū. Naati nguéeé cuuví tan'dúúca

chí 'úú neⁿé naati tan'dúúca chí n'dií neⁿe ní.

⁴³Ní che'enaāaⁿ 'áámá ángel yeⁿe nanuguuvi ní ca'á yā fuerzas Jesús miiⁿ. ⁴⁴Ti neené ya'ai Jesús miiⁿ ní ndiituu n'dai ca ngaⁿangua'á yā. Ní nuuⁿni'yaaⁿ yeⁿe yā tan'dúúca yuuúⁿ chí ndii na yáⁿ'āā íngéé.

⁴⁵Nducueeⁿ yā naachí ngaⁿangua'á yā ní ndaa yā nanááⁿ discípulos yeⁿe yā ní ndaa yā chí styaadú yē, ti discípulos ní neené ndaachi núúⁿ yā ti ya'ai yā cáávā Jesús miiⁿ. ⁴⁶Tuu'mi ní Jesús caⁿa yā chí yā discípulos: ¿De'ē cúúví chí styaadú ní? Nducueeⁿ ní ní caaⁿmaⁿgua'á ní ní yáá'n'giinūuⁿ nguéeé n'diichineeⁿ sa ndís'tií chí dííⁿ ní nuuⁿndi.

Sta'a yā Jesús miiⁿ ní candeeé yā preso

(Mt. 26.47-56; Mr.

14.43-50; Jn. 18.2-11)

⁴⁷Taachí Jesús índee yā neené n'deeé 'iiⁿyāⁿ ndaa yā ní saⁿ'ā chí nguuvi Judas miiⁿ chí 'áámá chéeé naachí ndiichuuví discípulos yeⁿé yā cueⁿé yā vmnááⁿ yeⁿe 'iiⁿyāⁿ s'eeⁿ ní ndaa niiⁿnuúⁿ yā Jesús miiⁿ chí 'neeⁿcheendí yā. ⁴⁸Tuu'mi ní Jesús miiⁿ ní caⁿa yā chí yā saⁿ'ā: Díí, Judas, ¿'áá ndúúcu 'áámá beso ínaca'a di 'úú chí Saⁿ'ā chí Daiya Ndyuūs 'iiⁿyāⁿ?

⁴⁹Discípulos chí snée yā ndúúcu Jesús taachí snaaⁿ yā chí cuuvi, tuu'mi ní caⁿa yā chí yā Jesús: N'dií, Señor, ¿'áá 'caaca taaⁿ 'nū ndúúcu machete 'uúví lados 'caāiⁿ yeⁿé yú?

⁵⁰Tuu'mi ní 'áámá chéeé discípulos 'nuūcá'ai yā 'áámá mozo yeⁿe chíidúú ch'eté ca ní ch'iica yā veeⁿ sa lado tá cuaacú sa. ⁵¹Ní Jesús caⁿa yā: 'Āā ntéeé 'cuuⁿmiⁿ dí. 'Āā snéeé ra yā. Ní Jesús tuu'ví yā veeⁿ sa ní nduūvā yeⁿe sa. ⁵²Cuayiivi ní Jesús caⁿa yā chí yā chíidúú n'geete ndúúcu soldados chí capitanes chí dííⁿ sa cuidado yaacú templo ndúúcu 'iiⁿyāⁿ ndicúú chí ngaⁿ'ā ntiⁿnyúⁿ yā yeⁿe yaacú chí ndaa yā ndúúcu

Judas miiⁿ: ¿'Áá ndaā ndís'tiī ndúúcu machetes 'uūví lados 'caāiⁿ ndúúcu yáⁿá yeⁿe soldados tan'dúúca chi caⁿa nī cutá'a nī 'áámá chi duūcū? ⁵³Taachí canee ndúúcu ndís'tiī nguuvī nguuvī ná yaācū templo nguée neⁿé nī cutá'a nī 'úú. Naati maaⁿ ní hora 'cūū chí yeⁿe ndís'tiī ti hora taachí maāiⁿ miiⁿ, chíⁿ chí yááⁿ'nguiinūuⁿ ngaⁿa ntiīⁿnyuⁿ sa.

Pedro miiⁿ ní ngaⁿa sa chi nguée in'diichi sa Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴Tuu'mi ní 'iiⁿyāⁿ s'eeⁿ sta'a yā Jesús miiⁿ ní candée yā Jesús va'ai yeⁿe chi iduú ch'eté ca. Pedro miiⁿ ní ndáá yaⁿai sa 'iiⁿyāⁿ. ⁵⁵Náⁿá 'iiⁿyāⁿ tiiví yā yaⁿá náávtaⁿá chuva'ai ní ch'eté yā cuaaⁿ 'diituú yaⁿá miiⁿ chí dicuutú yā. Pedro miiⁿ ní ch'iindi sa ntúuⁿ sa ndúúcu 'iiⁿyāⁿ s'eeⁿ. ⁵⁶Tuu'mi ní 'áámá táⁿá chí cánée caadi 'iīyū, n'diichi tá Pedro miiⁿ chí vee sa 'diituú na yaⁿá. Ní n'giinu n'dai tá saⁿá ní caⁿa tá: Sáⁿa 'cūū ní canee sa ndúúcu 'iiⁿyāⁿ chí preso yā.

⁵⁷Pedro miiⁿ ní caⁿa sa chii sa n'daātā miiⁿ: 'Úú nguée in'diichí 'iiⁿyāⁿ miiⁿ.

⁵⁸Cuayivi miiⁿ ní 'aama saⁿá n'diichi n'dai sa ní caⁿa sa chii sa Pedro miiⁿ: Dii, ní ndúúcu di nguaaⁿ 'iiⁿyāⁿ s'eeⁿ. Pedro miiⁿ ní caⁿa sa chii sa saⁿá miiⁿ: Nguée 'úú.

⁵⁹Cho'ōo 'áámá hora, ni táámá yā ní caⁿa yā: Cuaacu níⁿnyúⁿ sáⁿa 'cūū ní canee sa ndúúcu 'iiⁿyāⁿ chí preso yā ti sáⁿa 'cūū ní yeⁿe yáⁿáa Galilea ntúuⁿ.

⁶⁰Pedro miiⁿ ní caⁿá sa chii sa saⁿá miiⁿ: Díí, sáⁿá, nguée deenú chí ngaⁿá di. Taachí Pedro miiⁿ 'āā cuée 'cuiinu sa caⁿa sa chúú, tusáⁿá miiⁿ ní 'cai tí. ⁶¹Tuu'mi ní Jesús miiⁿ nguēcundí yā ní n'diichi yā Pedro. Pedro miiⁿ nán'gaācū sa nduudu chí caⁿa Jesús miiⁿ chí yā saⁿá 'túúca: 'Áā 'iinu cúúví caaⁿmaⁿ dí

chí nguée n'diichi di 'úú, taachi 'āā cuée 'cai 'áámá vmnéⁿēe tusáⁿá. ⁶²Tuu'mi ní Pedro miiⁿ ní can'dáa sa cuaaⁿ va'ai, ní cheecu taaví sa ti ya'ai staava yeⁿe sa.

Saⁿá s'eeⁿ ch'eⁿe sa Jesús

(Mt. 26.67-68; Mr. 14.65)

⁶³Sáⁿá s'eeⁿ chí diiⁿ cuidado Jesús miiⁿ chíⁿnyuⁿneeⁿ sa Jesús miiⁿ ní ch'eⁿe sá 'iiⁿyāⁿ. ⁶⁴Ní n'gaadi sa nduutináⁿ yā ndúúcu 'aama tínuuⁿ. Tuu'mi ní ch'eⁿe sá naaⁿ Jesús ní ngaⁿa sa ngii sa 'iiⁿyāⁿ: Dii, caaⁿmaⁿ di, ¿du'ú ch'eⁿe dii?

⁶⁵Ní neene cunncaā nduudu ngii sá Jesús.

Jesús nanááⁿ 'iiⁿntyéⁿe yeⁿe yaācū templo

(Mt. 26.59-66; Mr. 14.55-64; Jn. 18.19-24)

⁶⁶Taachí chideeve táámá nguuvī, 'yaaⁿ n'dái 'iiⁿyāⁿ ndiicúú yeⁿe yááⁿ miiⁿ chí ngaⁿa ntiīⁿnyuⁿ yā yeⁿe yaācū, ndúúcu chiiduú n'geeté, ndúúcu maestros chí ngi'cueéⁿ ley miiⁿ candée yā Jesús nanááⁿ 'iiⁿntyéⁿe yeⁿe yaācū templo.

⁶⁷Mííⁿ íntiinguuneeⁿ yā Jesús: ¿'Áá díí chí Cristo? Jesús miiⁿ nan'guēcutaⁿa yā yeⁿe 'iiⁿyāⁿ s'eeⁿ: Ndúúti chí caaⁿmáⁿ chí 'tíicā, ní nguée cu'téenu nī yeⁿe. ⁶⁸Nduuti chí 'úú ntiinguuneeⁿ ndís'tiī, nguée n'guēcútaⁿa nī yeⁿe, ndíí nguée ndúú n'deēchi ra nī 'úú. ⁶⁹Naati hora chí cuchii ní Saⁿá chí Daiya Ndyuūs ní 'cuūndi sa lado yeⁿe honor yeⁿe Ndyuūs chí véé tanducuéⁿe poder yeⁿe yā.

⁷⁰Tanducuéⁿe 'iiⁿyāⁿ s'eeⁿ caⁿa yā: ¿'Áá dii Daiya Dendyuūs miiⁿ? Ní Jesús ní caⁿa yā: Ndís'tiī maáⁿ nī ngaⁿa nī chí 'úú ní 'tíicā.

⁷¹Tuu'mi ní 'iiⁿyāⁿ s'eeⁿ ní caⁿa yā: ¿De'ē cá nduudu cuaacu yeⁿe 'iiⁿyāⁿ chí neⁿe yú? Tí maáⁿ yú chí'indiveeⁿ cuaacú yú nduudu chí caⁿa sa.

Jesús nanáán gobernador Pilato

(Mt. 27.1-2, 11-14; Mr. 15.1-5; Jn. 18.28-38)

23 Tuu'mi ní nducyaaca 'iiⁿ'yāⁿ ní candee yā Jesús miiⁿ nanáán gobernador Pilato. ²Ní tuca'a yā caⁿ'a yā nuuⁿ'ndi yeⁿ'ē Jesús miiⁿ ní caⁿ'a yā: Inndaacá 'nū sáⁿ'a 'cūū chi diiⁿ sa chí 'iiⁿ'yāⁿ nguéé i'téenu yā chí ngaⁿ'a ley yeⁿ'é 'nū. Ní nguéé neⁿ'e sa chí nadí've 'nū yeⁿ'e yáⁿ'aa emperador César tan'dúucā chí ngaⁿ'a ley yeⁿ'é nī. Ní sáⁿ'a 'cūū ní ngaⁿ'ā sa chí maāⁿ sa chí Cristo, chí Rey yeⁿ'é 'nū.

³Tuu'mi ní saⁿ'ā Pilato miiⁿ ní itiinguuneeⁿ sa Jesús: ¿'Áá dii chí Rey yeⁿ'e 'iiⁿ'yāⁿ Israel s'eeⁿ? Jesús nan'gueecútaⁿ'a yā: N'dii ngaⁿ'á cuaacú nī ti 'tíficā.

⁴Pilato miiⁿ ní caⁿ'a yā chii yā chiiduú n'geeté ndúucū 'iiⁿ'yāⁿ s'eeⁿ: 'Úú nguéé inndaacá mar 'áámá nuuⁿ'ndi yeⁿ'e sáⁿ'a 'cūū.

⁵'Iiⁿ'yāⁿ s'eeⁿ ní diitu n'dái 'cai yā: Sáⁿ'a 'cūū ní idiiⁿ sa chí 'iiⁿ'yāⁿ n'g'éécú cheendi yā nguaaⁿ maaⁿ yā ndúucū chí ngi'cueeⁿ yā ní ngi'cueeⁿ yā nuuⁿ'máⁿ yáⁿ'aa Judea ndíí na yáⁿ'aa yeⁿ'ē Galilea ndii 'muuⁿ'.

Jesús nanáán rey Herodes

⁶Tuu'mi ní Pilato, taachi ch'iindiveéⁿ yā chí Jesús cheⁿ'e yā ndii yáⁿ'aa yeⁿ'e Galilea, ní ntiinguuneeⁿ yā Jesús nduuti chí yeⁿ'e yáⁿ'aa yeⁿ'e Galilea. ⁷Ní taachí Pilato ch'iindiveeⁿ sa chí Jesús miiⁿ ní yeⁿ'ē yáⁿ'aa Galilea yeⁿ'e yáⁿ'aa naachi rey Herodes ngaⁿ'a ntiiⁿ'nyúⁿ yā, Pilato miiⁿ ngaⁿ'a ntiiⁿ'nyúⁿ yā chí Jesús caⁿ'a yā nanáán rey Herodes tii canée yā na yááⁿ Jerusalén nguuvi miiⁿ.

⁸Taachí rey Herodes n'dííchi sa Jesús miiⁿ, neené yeenú sa ti 'āā 'náán n'dai tiempo néⁿ'é sá snaaⁿ sa Jesús. Tí neéné n'deēe 'náán chí ch'iindiveeⁿ sa yeⁿ'é yā ní canée ngíínú sá chí snaaⁿ sa 'áámá vaadi n'giinu chí diíⁿ Jesús miiⁿ.

⁹Neéné n'deēe 'naaⁿ chí ntiingūneeⁿ sa Jesús miiⁿ, naati nguéé de'ē veē nan'gueecútaⁿ'a Jesús. ¹⁰Tuu'mi ní miiⁿ canee ntuuⁿ chiiduú n'geeté ndúucū maestros chí ngi'cuéeⁿ ley miiⁿ chí n'deēe 'náán n'dai ngaⁿ'a yā chí nuuⁿ'ndi yeⁿ'ē Jesús. ¹¹Tuu'mi ní Herodes ndúucū soldados yeⁿ'e yā chí nuuⁿ' yā 'áámá tiinūⁿ n'dái tan'dúucā catecai rey Jesús miiⁿ ní chíⁿ'nyuⁿ'neeⁿ yā Jesús miiⁿ ní cuncāā caⁿ'a yā yeⁿ'e Jesús miiⁿ. Cuayivi ní dicho'o ntúⁿ yā Jesús nanáán Pilato miiⁿ. ¹²Ndíí nguuvi miiⁿ tuu'mi ní Pilato ndúucū Herodes naaⁿ n'daá n'dai yā ndúucū vi'i ti cuááⁿ vmnaaⁿ ní nguéé n'diichí yā vi'i.

Pilato nca'a sa Jesús chí 'cuūvi

(Mt. 27.15-26; Mr. 15.6-15; Jn. 18.39-19.16)

¹³Tuu'mi ní Pilato nduuvidaamaⁿ yā chiiduú n'geeté ndúucū 'iiⁿ'ntyéⁿ'e ndúucū nducyaaca 'iiⁿ'yāⁿ yeⁿ'ē yáāⁿ Jerusalén miiⁿ. ¹⁴Ní caⁿ'a yā chii yā 'iiⁿ'yāⁿ s'eeⁿ: Ndíⁿ'tīí ní ndaá nī chí 'cúúⁿ nī sáⁿ'a 'cūū chí diiⁿ sa chí 'iiⁿ'yāⁿ ní nguéé n'geetinéeⁿ 'diiⁿ yā ndúucū chí ngi'cueeⁿ sa. Taachí intiinguuneeⁿ saⁿ'ā nanáán ndíⁿ'tīí nguéé nindaacá mar 'áámá nuuⁿ'ndi yeⁿ'ē sa chí ngaⁿ'a ndíⁿ'tīí yeⁿ'ē sa. ¹⁵Ndíí nguéé ndúú rey Herodes miiⁿ ndaāca yā nuuⁿ'ndi yeⁿ'ē sáⁿ'a 'cūū chí canée chí 'cuūvi sa ti Herodes 'āā dicho'ó yā sáⁿ'a 'cūū nanaáⁿ. Sáⁿ'a 'cūū nguēe diiⁿ sa nuuⁿ'ndi ch'ēete chí 'cuūvi sa. ¹⁶Maaⁿ ní díⁿ' 'cueⁿ'é saⁿ'ā miiⁿ ní cuáyíví n'deēchi saⁿ'ā.

¹⁷Canée 'áámá costumbre yeⁿ'é nī chí gobernador canee chí n'deēchi yā 'áámá preso 'viicu pascua ní gobernador Pilato miiⁿ ní canée yā diiⁿ yā 'tíficā. ¹⁸Nducyáácá 'iiⁿ'yāⁿ 'cai yā: N'deēchii nī saⁿ'ā chí ngúúví Barrabás. Ní 'āā 'cuuvi rá sáⁿ'a 'cūū.

¹⁹Barrabás miiⁿ canúúⁿ sá vacūū chí diiⁿ sa chí 'iiⁿ'yāⁿ yeⁿ'e yáāⁿ Jerusalén

miiⁿ ní 'cuuⁿmiⁿ yā contra yeⁿe go-
bierno ní ch'iiⁿnuⁿ sa 'áámá tináⁿā.
²⁰ Gobernador Pilato miiⁿ ní neⁿe sa
n'deexchi sa Jesús, ní caⁿa sa chiiⁿ sa
'iiⁿyāⁿ s'eeⁿ taama vmnéⁿēe chi n'deexchi
sá Jesús. ²¹ Naati 'iiⁿyāⁿ s'eeⁿ 'cai ntúuⁿ
yā: Cu'nééⁿnga'á ní saⁿā, cu'nééⁿnga'á ní
saⁿā.

²² Gobernador Pilato miiⁿ ní caⁿa
ntúuⁿ yā ndii chiiⁿ ndii 'ínú cuuvi:
¿Dē'ē chi nguéé n'dáacā ndífⁿ sáⁿa 'cūū?
'Úú nguéé inndaacá mar 'áámá núúⁿndí
ch'eete yeⁿe sa chi 'cuūvi sa. 'Úú ní ca'
orden chi ch'eⁿé yā sáⁿa 'cūū ní n'deexchí
sáⁿa 'cūū.

S'nééⁿnga'á yā Jesús

²³ 'iiⁿyāⁿ s'eeⁿ chi canndii cá yā 'cai
yā chí chiica yā chí cu'neeⁿngá'āa Jesús
miiⁿ. Ní 'iiⁿyāⁿ s'eeⁿ ndúúcu chiiduú
n'geetē diituú n'dáí ca 'cai yā. ²⁴ Tuu'mi
ní gobernador Pilato miiⁿ ní ca'a yā or-
den chí dííⁿ yā tan'dúúca chí neⁿe 'iiⁿyāⁿ
s'eeⁿ. ²⁵ Ní n'deexchi yā saⁿā chí nguuvi
Barrabás miiⁿ chí canúúⁿ vácūū. Sáⁿā
miiⁿ ní diiⁿ sa chí 'cuuⁿmiⁿ 'iiⁿyāⁿ yeⁿe
Israel contra yeⁿe gobierno ní 'niiⁿnuⁿ sa
'áámá tináⁿā. Sáⁿa 'cūū chí chiica 'iiⁿyāⁿ
s'eeⁿ chí n'deexchí yā saⁿā. Ní nca'a yā
Jesús miiⁿ chí soldados cu'neeⁿnga'a sa
tan'dúúca chí neⁿe 'iiⁿyāⁿ s'eeⁿ.

Yeⁿe chí cu'neeⁿnga'á yā Jesús

(Mt. 27.32-44; Mr.

15.21-32; Jn. 19.17-27)

²⁶ Taachí cueⁿe yā cuaaⁿ cyúúni miiⁿ
ndúúcu Jesús miiⁿ, soldados sta'á yā
'áámá saⁿā yeⁿe yáⁿāa Cirene chí ngu-
uvi sa Simón. Saⁿā miiⁿ ní yúúni canuuⁿ
sa chí cueⁿe sa cuēeti. Soldados a fuerza
dí'cuífú yā Simón miiⁿ chí candéē sa
cruz yeⁿe Jesús miiⁿ ní cueⁿe sa cuaaⁿ
daami Jesús miiⁿ.

²⁷ Néééⁿ 'yaaⁿ 'iiⁿyāⁿ yeⁿe yááⁿ
Jerusalén miiⁿ cueⁿe yā n'dáa yā Jesús
miiⁿ ndúúcu n'daataá chí diituu ngeecu

yā ní ya'ai yā cáavā Jesús miiⁿ. ²⁸ Jesús
miiⁿ ní ch'ínú yā n'daataá s'ééⁿ ní caⁿa
yā chí yā táⁿā s'eeⁿ: Ndís'tii, daiya
'iiⁿyāⁿ yeⁿe yááⁿ Jerusalén, nguéé
cuecú ní cáavā 'úú, naati cuecú ní
cáavā maáⁿ ní ní caavā daiya ní. ²⁹ Ti
ndaá nguuvi chí caaⁿmaⁿ 'iiⁿyāⁿ: ¿De'ē
chúúca n'dai n'daataá chí nguéé ncuuvi
daiya tá ní n'daataá chí nguéé ntaavi
daiya tá ní n'daataá chí nguéé daiya tá
chí ca'a ta daiya tá chí chiicu? ³⁰ Tuu'mi
ní 'iiⁿyāⁿ s'eeⁿ tuc'á yā caⁿa yā 'tuucā:
Díí yīcū cun'daá nduú ní vmaaⁿ
yeⁿe 'nū. Caⁿa ntúuⁿ yā chí yā yīcū
n'gaiyā: Cun'díí neeⁿ dí nús'uu. ³¹ Caati
ndúúti chí 'iiⁿyāⁿ chí taaⁿ yā 'caaca
yā yáⁿā cueé chí tan'dúúca 'úú, ¿áá
nguéé caniicu cá yā 'caaca yā yáⁿā chí
cuuⁿmaⁿ chí tan'dúúca ndís'tii? 'Tíicā
ngaⁿa Jesús.

³² Nguuvi miiⁿ ní candéē ntúuⁿ yā
na 'uuvi saⁿā chí n'giiⁿnuⁿ 'iiⁿyāⁿ chí
cu'neeⁿnga'a yā saⁿā s'eeⁿ dáámá ndúúcu
Jesús miiⁿ. ³³ Taachí ndaa yā lugar yeⁿe
'áámá yīcū 'lífⁿ chí nguuvi Calavera, mi-
iⁿya chí nééⁿnga'a yā Jesús miiⁿ ndúúcu
nduu 'uúví saⁿā chí n'giiⁿnúⁿ 'iiⁿyāⁿ,
'áámá sa lado ta cuaacú Jesús miiⁿ, ní
táámá sá lado tá 'cueé yā. ³⁴ Tuu'mi
ní taachi snée yā i'neeⁿnga'á yā, Jesús
miiⁿ caⁿa yā: N'dií, Chiidá, nadich'ēcú
ní yeⁿe saⁿā s'uuⁿ caati nguē déenu
sá dē'ē chí 'túúca idiiⁿ sa. Tuu'mi ní
soldados tun'dáa sa suerte na cate-
cai Jesús chí ca'ā sa 'áámá sá ndúúcu
taama sa. ³⁵ 'iiⁿyāⁿ yeⁿe yááⁿ Jerusalén
miiⁿ snée yā n'giinu yā nícú 'iiⁿntyēⁿē
n'giiⁿnyuⁿneéⁿ yā Jesús miiⁿ. Ní ngaⁿa yā
ngii yā yeⁿe Jesús: Sáⁿa 'cūū ní nadan-
guáⁿai sa tanáⁿā 'iiⁿyāⁿ. ¿De'ē cuuvi chí
nguéé nadinguáⁿai maāⁿ sa saⁿā nduuti
chí saⁿā miiⁿ chí Cristo chí Ndyuūs di-
cho'ó yā?

³⁶ 'Tiicā ntúuⁿ soldados n'giiⁿnyuⁿneeⁿ
sa Jesús miiⁿ. Cheⁿe niiⁿnúⁿ yā ní ca'a yā
vinagre. ³⁷ Ní caⁿa yā chí yā Jesús miiⁿ:

Ndúúti chi díí chi Rey yeⁿe 'iiⁿyāⁿ Israel, nadanguáⁿai maāⁿ di díí.

³⁸ Ní canéé nguūⁿ na tiiⁿ cruz yeⁿe Jesús miiⁿ nduudu griego ndúúcu nduudu latín ndúúcu nduudu hebreo, chí ngaⁿa: Sáⁿa 'cūū Rey yeⁿe 'iiⁿyāⁿ yeⁿe ndaata Israel.

³⁹ Áámá chee saⁿā chi véé nuuⁿndi yeⁿe sa chi caⁿnééⁿnga'a yā 'áámá lado yeⁿe Jesús cunncaā caⁿa sa ní caⁿa sa chii sa Jesús: Ndúúti chi dii chi Cristo miiⁿ nadinguáⁿai di maaⁿ di ní nadinguáⁿai ntuuⁿ di nús'uu. ⁴⁰ Táámá saⁿā chi cuⁿnééⁿnga'a yā táámá lado yeⁿe Jesús 'caa'va sa ndúúcu sáⁿa 'cūū ní caⁿa sa chii sa saⁿā: Díí ¿'áá nguéé 'va'a di Ndyuūs? Dii ní dáámá condenado ndúúcu nús'uu. ⁴¹ S'uuⁿ ní cuaacu níⁿnyúⁿ n'geenu yú ngii ti véé nuuⁿndi yeⁿe yú chi nadíí'vē yú nuuⁿndi yeⁿe yú naati sáⁿa 'cūū nguéé de'ē vee nuuⁿndi dííⁿ sa.

⁴² Saⁿā miiⁿ ní caⁿa sa chii sa Jesús miiⁿ: N'dií, Jesús, n'gaacú nī yeⁿe 'úú taachí ndaá nī naachi caaⁿmaⁿ ntiiⁿnyuⁿ yeⁿe.

⁴³ Tuu'mi ní Jesús miiⁿ caⁿa yā chii yā saⁿā: Cuaacu níⁿnyúⁿ ngaⁿ'á ngii dii, ti maaⁿ ní cunee di nduucú na lugar chi nguuvi paraíso.

Jesús ch'ii yā

(Mt. 27.45-56; Mr.

15.33-41; Jn. 19.28-30)

⁴⁴ Taachí chii maⁿa nguuvi chii maāiⁿ núúⁿmáⁿ íⁿyeedi ndíí taanduū n'geecu 'íínú chiinū. ⁴⁵ 'Yáⁿā ní nduuvi maāiⁿ ní cortina yeⁿe yaācū templo nda'ai náávtáⁿā. ⁴⁶ Tuu'mi ní Jesús miiⁿ 'cai yā: N'dií, Chiidá, na ta'á nī cuⁿnééⁿ espíritu yeⁿé. Ch'íínú caⁿa yā chuū, ní Jesús ch'ii yā.

⁴⁷ Taachí saⁿā chi ngaⁿa ntiiⁿnyuⁿ yeⁿe soldados romanos n'diichi sa chí ch'ii Jesús, tuu'mi ní caⁿa sa: De'e chúúca

ch'ete Ndyuūs. Cuaacu níⁿnyúⁿ sáⁿa 'cūū saⁿā chi nguéé nuuⁿndi yeⁿe sa.

⁴⁸ Nducyáácá 'iiⁿyāⁿ chí cheⁿe yā ní n'diichi yā chí chií, nguēcundíí yā ch'eⁿe niⁿnuⁿ yā taachi cueⁿé yā vaacu yā. ⁴⁹ Ní nducyáácá 'iiⁿyāⁿ chi n'diichi yā Jesús miiⁿ, ndúúcu n'daataá chí cheⁿe ndúúcu Jesús miiⁿ ndii yáⁿāa yeⁿe Galilea, ch'etinéé yaⁿai yā ch'íínú yā dendu'ú chi 'túúca.

Ch'iichi yā Jesús

(Mt. 27.57-61; Mr.

15.42-47; Jn. 19.38-42)

⁵⁰ Véé 'áámá saⁿā chí n'dai ní n'daacā sa chi ngúúví sá José. Sáⁿā miiⁿ ní saⁿā ch'ete yeⁿé 'iiⁿntyéⁿe ch'ete yeⁿé 'iiⁿyāⁿ Israel. ⁵¹ Saⁿā miiⁿ ní yeⁿe yáāⁿ Arimatea chí yáⁿāa yeⁿe 'iiⁿyāⁿ Israel. Ní saⁿā nguéé ndúúvídaama sa ndúúcu tanáⁿā 'iiⁿntyéⁿe ti nguéé canee yiínú sa ndúúcu chí dííⁿ yā. Tí saⁿā miiⁿ canee ngíínú sá tiempo chí Ndyuūs ndaa yā iⁿ'yeeⁿdí 'cūū ní ngaⁿa ntiiⁿnyúⁿ yā. ⁵² Ní cueⁿe sa ndaa sa nanááⁿ gobernador Pilato ní ch'ica sa cuerpo yeⁿe Jesús miiⁿ. ⁵³ Cuayi-ivi taachi José ndiví sa cuerpo yeⁿe Jesús na cruz ní ch'e'ecu sa áámá sávana na cuerpo yeⁿe yā tan'dúúca costumbre yeⁿe 'iiⁿyāⁿ Israel ní ch'iichi sa na 'áámá yáinyāⁿ ngai chí din'dái yā cheeti yiivi yaava naachí mar 'áámá 'iiⁿyāⁿ nguéé nnúuⁿ yā. ⁵⁴ Nguuvi miiⁿ ní nguuvi viernes chí 'iiⁿyāⁿ ch'iindiyaáⁿ yā tandu-cuéⁿe cáávā 'viicu pascua ní cáávā ngu-uvi chí cuchii chí sávido chí nguuvi chí ntaaviⁿtuunúúⁿ 'iiⁿyāⁿ Israel.

⁵⁵ N'daata s'eeⁿ chí can'daa Jesús ndii na yáⁿāa Galilea, cueⁿe tá ní n'diichi tá yáinyāⁿ ní táácā canuúⁿ cuerpo yeⁿe Jesús. ⁵⁶ Ní taachí n'daataá s'eeⁿ ndaa tá vaacu tá, n'nuuⁿ tá perfumes ndúúcu pomadas chí n'deevé ngeeⁿ. Ní nguuvi cuayiivi, ní nguuvi sávido chí ntaaviⁿtuunúúⁿ 'iiⁿyāⁿ tan'dúúca chí ngaⁿa ley yeⁿe yā.

**Jesús nanduuchi yā
yeⁿe nguaaⁿ tináⁿā**

(Mt. 28.1-10; Mr. 16.1-8; Jn. 20.1-10)

24 Nguuvi domingo chi maaⁿ ní ngu-
uvi vmnááⁿ vmnaaⁿ yeⁿe ndeete,
tyaaⁿ n'dái cueⁿe n'daataá s'ééⁿ ní cueⁿe
yā ndúúcu tanáⁿā n'daataá. Candéé yā
yēspeci chí dēevé ngeéⁿ chí 'āā véé yaáⁿ
yā. ²Taachí ndāa yā na yáinyāⁿ miiⁿ,
'āā ntéé tuúú ch'ēeté miiⁿ na cheendi
yáinyāⁿ ti canee 'aama lado. ³Tuu'mi
ní taachí sndaa yā chēeti yáinyāⁿ miiⁿ,
nguée ndaacá yā cuerpo yeⁿe Jesús.
⁴Taachí n'diichi yā chuū, ní dii'yá yā
chii, tuu'mi ní neéⁿ na 'uuvi saⁿā 'di-
ituú yā ndúúcu catecai chí dēevé ngii.
⁵Ní n'daataá s'eeⁿ dii'ya n'dai yā chii ní
n'diichi yā ndii na yáⁿā. Saⁿā s'eeⁿ ní
caⁿā sa: ¿De'ē cuuvi chí in'uúⁿ ní 'iiⁿyāⁿ
chí candúúchí yā yeⁿe nguaaⁿ tináⁿā?
⁶'Iiⁿyāⁿ miiⁿ ní 'āā ntéé canee yā 'muuⁿ.
'Āā nnduuchi yā nguaaⁿ tináⁿā. N'gáacú
ní yeⁿe nduudu chí caⁿā yā taachi canee
yā ndúúcu ní na yáⁿā Galilea taachí
'āā cuéé 'cuuvi yā. ⁷Ní Jesús miiⁿ ní
caⁿā yā chii yā ndís'tii: 'Úú Saⁿā chí
Daiya Ndyuūs ní 'iiⁿyāⁿ canee chí ncaⁿá
yā 'úú ta'ā 'iiⁿyāⁿ chí dinuuⁿndí yā. Ní
'iiⁿyāⁿ s'eeⁿ cu'nee'nga'á yā 'úú; naati
ndiichi ndii 'ínú nguuvi 'úú nduuchi
yeⁿe nguaaⁿ tinaⁿā.

⁸Tuu'mi ní n'daata s'eeⁿ n'gaacu tá
yeⁿe nduudu yeⁿe Jesús miiⁿ. ⁹Ní cueⁿe
tá yeⁿe yáinyāⁿ ní cunaⁿā ta ní caⁿā
tá chii tá ndu'u ndiicháámá apóstoles
ndúúcu tanáⁿā 'iiⁿyāⁿ chí snée yā mi-
i'ya. ¹⁰N'daata s'eeⁿ chí caⁿā ta chii tá
apóstoles ní ta María yeⁿe yáāⁿ Magdala,
ndúúcu ta Juana, ndúúcu tá María chí
chēecuú Jacobo, ndúúcu tanáⁿā n'daata
s'eeⁿ. ¹¹Apóstoles ní nadicadiinúⁿ yā
chí táⁿā s'eeⁿ ní loca tá cáāvā chí ngaⁿā
tá. Ní nguée s'téenu yā nduudu yeⁿe tá.

¹²Tuu'mi ní Pedro miiⁿ ní ncueⁿ sa ní
cueⁿe sa ngeenū sa na yáinyāⁿ. Taachí

ndaā sa, tuu'mi ní n'diichi núúⁿ sa chēeti
yáinyāⁿ ní 'āā dámaāⁿ sábanas canee
miiⁿ. Saⁿā ní cueⁿe yinu sá yeⁿe chí
chó'oo ní cunaⁿā sa na vaacu sa.

**Saⁿā s'eeⁿ ní cueⁿe sa cuaaⁿ cyúúni
chí ngeⁿe cuaaⁿ na yáāⁿ Emaús**

(Mr. 16.12-13)

¹³Nguuvi míⁿ nūuⁿ, 'uuvi saⁿā s'eeⁿ
cueⁿe yā 'áámá yáāⁿ 'líⁿ chí nguuvi
Emaús chí canee taanduū ndiichúúví
kilómetros yeⁿe yáāⁿ Jerusalén. ¹⁴Ní
taachí cueⁿe yā cuaaⁿ cyúúni ní indeé
yā yeⁿe tanducueⁿe dendu'ū chí chii.
¹⁵'Nááⁿ chí indeé yā ní itinguuneeⁿ vi'i
yā, maaⁿ Jesús miiⁿ ndaa niiⁿnúⁿ yā ní
cueⁿe yā ndúúcu 'iiⁿyāⁿ s'eeⁿ. ¹⁶Taachí
n'diichi yā Jesús miiⁿ nguée iintiinaaⁿ yā
'iiⁿyāⁿ. ¹⁷Jesús caⁿā yā chii yā 'iiⁿyāⁿ
s'eeⁿ: ¿De'ē indeé ndís'tii? ¿De'ē cuuvi
tátii ndaachi yiinú ní?

¹⁸Saⁿā chí nguuvi Cleofas
nan'gueecútaⁿā yā. ¿'Áá díí, 'áámá
n'dyáⁿā dii chí canuuⁿ di yúúni na yáāⁿ
Jerusalén chí nguée déenu di de'é chí
nguuvi s'eeⁿ na yáāⁿ Jerusalén miiⁿ?

¹⁹Tuu'mi ní Jesús caⁿā yā chii yā
'iiⁿyāⁿ s'eeⁿ: ¿De'é chí yáāⁿ miiⁿya?
'Iiⁿyāⁿ s'eeⁿ ní caⁿā yā: Jesús yeⁿe yáāⁿ
Nazaret, chí 'áámá saⁿā profeta ní díí
yā 'áámá nti'nyuⁿ n'dai ndúúcu poder.
Ní díí yā n'dee n'dái vaadi n'giinu ní
ngaⁿā yā nduudu yeⁿe Ndyuūs nanááⁿ
Ndyuūs ní nanááⁿ nducyaaca 'iiⁿyāⁿ.
²⁰Chiiduú n'geeté ndúúcu 'iiⁿntyéⁿe yeⁿe
yú tun'dáa nuuⁿndi yeⁿe Jesús ní ncaⁿā
yā Jesús 'iiⁿyāⁿ ní caⁿā yā chí 'cuuvi
yā. Níicú s'nee'nga'á yā Jesús. ²¹Nús'uu
ní snée yúúni 'nū ní cunee ngiinú 'nū
chí sáⁿā 'cūú ní nadinguáⁿai sa 'iiⁿyāⁿ
yeⁿe nación Israel chí nación yeⁿe 'nū.
Maaⁿ ní 'iinū nguuvi chí chii chuū.
²²Ní ná n'duuvi n'daataá chí chiicá yā
dáámá nduucú 'nū cheⁿe yā tyaaⁿ na
yáinyāⁿ ní cueⁿe yíinú 'nū. ²³Ní ndaá yā
nanaáⁿ 'nū ní caⁿā yā chí nguée ndaaca

yā cuerpo yeⁿe Jesús miiⁿ. Ní n'diichí yā n'duuvi ángeles chí caⁿa yā chii yā 'iiⁿyāⁿ s'eeⁿ chí Jesús miiⁿ 'āā nduuchí yā yeⁿe nguaaⁿ tináⁿā. ²⁴ Ní cheⁿ'é n'duuvi saⁿā chí chiicá nduucú 'nū na yáinyāⁿ ní ndaāca sa tan'dúúca chí ngaⁿa n'daataá s'eeⁿ naati nguéé n'diichi sa Jesús.

²⁵ Tuu'mi ní Jesús caⁿa yā chí yā saⁿā s'eeⁿ: De'ē chúúca vaadicadínūⁿ yeⁿe ndís'tií ndúúcu staava yeⁿe ní chí cheⁿchi chí nguéé s'téenu ní tanducuéⁿē chí caⁿa saⁿā profetas. ²⁶ ¿'Áá nguéé canee nguūⁿ na libro yeⁿ'é Ndyuūs chí Cristo miiⁿ canéé chí 'cuenú yā cuuvi cosas chí 'túúca ní cuayiivi mífⁿ cunaⁿá yā ná va'ai cheeti nguuví?

²⁷ Tucá'a Jesús caⁿa yā yeⁿe tanducuéⁿē chí canéé nguūⁿ na libro yeⁿ'é Ndyuūs ndí taachí dinguuⁿ Moisés ndúúcu chí dingúúⁿ nducyaaca profetas. Ní ngaⁿa Jesús yeⁿe chí dingúúⁿ yā yeⁿ'é Cristo ndí cuááⁿ vmnaaⁿ yeⁿe chí canéé chí chó'oo yeⁿ'é yā.

²⁸ Tuu'mi ní taachi ndaá yā na yāāⁿ 'lífⁿ chí cueⁿe yā, Jesús miiⁿ ní dífⁿ yā chí candiicá ca yā. ²⁹ Saⁿā s'eeⁿ di'cuítu sa Jesús chí canee yā ndúúcu sa, ní caⁿa sa chí sa Jesús: N'dií cuneé ní nduucú 'nū, ti cuuvi chífínū yeⁿe ní. 'Áā cuéé cuuvi 'da'ā. Tuu'mi ní Jesús cueⁿe yā ndúúcu saⁿā s'eeⁿ cuaaⁿ cheeti va'āi ní canéé yā ndúúcu sa. ³⁰ Taachí Jesús miiⁿ vεe yā na mesa ní che'é yā ndúúcu 'iiⁿyāⁿ s'eeⁿ, tuu'mi ní sta'á yā pan ní caⁿ'angua'á yā ní ca'a yā gracias Ndyuūs caavā pan miiⁿ. Ní n'dee yā pan ní ca'a yā 'iiⁿyāⁿ s'eeⁿ. ³¹ Tuu'mi nūuⁿ saⁿā s'eeⁿ iintiinaaⁿ sa Jesús miiⁿ, naati Jesús ndaanaáⁿ yā yeⁿe saⁿā s'eeⁿ. ³² Ní saⁿā s'eeⁿ ngaⁿa sa ngii sa vi': ¿'Áá nguéé chicadiinuⁿ yú na staava yeⁿe yú chí ya'ai taachi snúuⁿ yú yúúni taachí índeé yā ndúúcu yú, ní ngi'cueéⁿ yā nduudu yeⁿ'é Ndyuūs s'uuúⁿ?

³³ Hora mífⁿ nūuⁿ nducueeⁿ sa ní cunaⁿá sa na yāāⁿ Jerusalén. Ní ndaaca

sa ndu'ū ndiicháamá apóstoles ndúúví-daama yā ndúúcu tanáⁿā 'iiⁿyāⁿ chí snée yā ndúúcu yā. ³⁴ 'Iiⁿyāⁿ s'eeⁿ ní ngaⁿa yā nguaaⁿ maáⁿ yā: Cuaacu nífⁿnyúⁿ Jesús nduuchi yā nguaaⁿ tináⁿā ní che'enaáⁿ yā yeⁿ'e Simón.

³⁵ Tuu'mi ní 'uuvi saⁿā s'eeⁿ ní caⁿa yā táácā chí yúúni chí cueⁿe yā. Tií ní iintiinaáⁿ Jesús miiⁿ taachí n'dee yā pan.

Jesús che'enaáⁿ yā yeⁿ'e discípulos yeⁿ'e yā

(Mt. 28.16-20; Mr.

16.14-18; Jn. 20.19-23)

³⁶ Taachí saⁿa s'eeⁿ ngaⁿa sa chuū, Jesús miiⁿ ní cheⁿ'e naáⁿ yā naavtaⁿa 'iiⁿyāⁿ s'eeⁿ ní caⁿ'á yā chí yā 'iiⁿyāⁿ s'eeⁿ: Cuuvi 'diifⁿ ndúúcu ndís'tií.

³⁷ Tuu'mi ní 'iiⁿyāⁿ s'eeⁿ dii'yá yā chí ti nadicádínūⁿ yā chí n'diichi yā 'aama espíritu. ³⁸ Naati Jesús miiⁿ caⁿ'á yā chí yā 'iiⁿyāⁿ s'eeⁿ: ¿De'ē cúúví chí dii'yá ní chí? ¿De'ē cúúví chí 'tífcā nadacádínūⁿ ní na staava yeⁿe ní? ³⁹ Cuin'diichí ní ta'á ndúúcu ca'á. 'Úú maáⁿ chuū. Cuituu'ví ní 'úú. Cuin'diichí ní. 'Úú nguéé 'aama espíritu tan'dúúca chí nadacádínūⁿ ní. 'Áamá espíritu nguéé 'iini ní nguéé yuutē tan'dúúca chí inaaⁿ ndís'tií chí véé yeⁿ'e 'úú.

⁴⁰ Taachi Jesús caⁿa yā nduudú 'cūū, ch'iⁿi yā ta'a yā ndúúcu ca'a yā. ⁴¹ Naati 'iiⁿyāⁿ s'eeⁿ ní nguéé s'téenu yā ti yeenú n'dai yā ní ngeⁿe yiinu yā. Ní cáávā chuū Jesús caⁿa yā chí yā 'iiⁿyāⁿ s'eeⁿ: ¿'Áá nguéé de'ē vεe 'muuⁿ chí che'e yú?

⁴² Tuu'mi ní ca'a yā 'áamá tááⁿ 'yaācā ndúúcu 'aama taaⁿ va'ai ndi'i. ⁴³ Cristo miiⁿ ní sta'a yā ní che'e yā nanááⁿ 'iiⁿyāⁿ s'eeⁿ. ⁴⁴ Ní caⁿa yā chí yā 'iiⁿyāⁿ s'eeⁿ: Ndúúdu 'cūū caⁿ'á taachi canéé ndúúcu ndís'tií. Canéé chí cúúví cuaacu tanducuéⁿē dendu'ū chí canéé nguūⁿ yeⁿ'é 'úú na libro yeⁿ'é Ndyuūs chí canéé nguūⁿ na ley yeⁿ'é Moisés ndúúcu yeⁿ'e profetas ndúúcu yeⁿ'e salmos.

⁴⁵Tuu'mi ní Jesucristo diiⁿ yā chi tuumicadiinuuⁿ 'iiⁿyāⁿ s'eeⁿ chi canéé nguūⁿ na libro yeⁿé Ndyuūs. ⁴⁶Ní caⁿa yā chii yā 'iiⁿyāⁿ s'eeⁿ: 'Tíicā canéé yeⁿé 'úú chí Cristo 'úú. 'Tíicā canee chí 'cueenú cuuvi ní 'cuūví. Ní nduuchí yeⁿe nguuaⁿ tináⁿā ndii chíí ndii 'íínú nguuvi. ⁴⁷Ní 'iiⁿyāⁿ s'eeⁿ canéé chí caaⁿmaⁿ yā nduudu miiⁿ chí ndaadaami 'iiⁿyāⁿ yeⁿé nuuⁿndi yeⁿe yā vmnaaⁿ núúⁿmáⁿ na yááⁿ ní Ndyuūs nadach'ēcú yā nuuⁿndi yeⁿe yā cáávā chí duuchí. Ní vmnááⁿ vmnaaⁿ nanááⁿ 'iiⁿyāⁿ yeⁿe yááⁿ Jerusalén. Cuayiivi yeⁿe 'iiⁿyāⁿ yeⁿe núúⁿmáⁿ naciones yeⁿe íⁿyeeⁿdí. ⁴⁸Ndís'tií ní cuuví nī testigos yeⁿe chuū ti n'diichí nī chuū ní canéé chí caaⁿmáⁿ nī 'iiⁿyāⁿ. ⁴⁹Cuin'diichí nī. 'Úú dicho'ó Espíritu N'dai yeⁿé Ndyuūs

chí caⁿā Chiidá chí ndaā nanááⁿ ndís'tií. 'Cuëtinéé nuúⁿ nī na yááⁿ Jerusalén ndíí chí ndaāca nī poder yeⁿe Ndyuūs, poder chí cuchii yeⁿé cuaaⁿ 'níⁿnúⁿ.

Jesús cunaⁿa yā va'ai chëeti nguuvi

(Mr. 16.19-20)

⁵⁰Cheⁿe Jesús ndúúⁿcū 'iiⁿyāⁿ s'eeⁿ na yááⁿ 'Ííⁿ Betania ní d'iviicú yā 'iiⁿyāⁿ s'eeⁿ. ⁵¹Taachí ch'iinu d'iviicú yā 'iiⁿyāⁿ s'eeⁿ, cueⁿé yā yeⁿe 'iiⁿyāⁿ s'eeⁿ ní cundaa yā va'ai chëeti nguuvi. ⁵²Cuayiivi 'iiⁿyāⁿ s'eeⁿ dich'ëté yā Ndyuūs ní cunaⁿa ntuúⁿ yā na yááⁿ Jerusalén. Ní neené yeenu taavi yā. ⁵³Ní 'áámá chëetinée yā na yaacū templo ní ngaⁿá yā chí ch'ëté Ndyuūs. Ní i'téenu yā Ndyuūs. 'Tíicā chii.

NDUUDU N'DÁÍ CHÍ DÍNGÚŪⁿ APÓSTOL JUAN

N'dii ní saⁿā chi Nduudu

1 Cuááⁿ nááchí chínɡa'a 'āā ngaⁿa Dendyuūs ndúúćū Nduudu, ní Nduudu míⁿ 'āā ngaⁿā ndúúćū Dendyuūs, ní Nduudu miiⁿ ní Dendyuūs. ²Chuū chíí naachi chínɡa'a ndúúćū Dendyuūs miiⁿ. ³Tanducuéⁿē chi vee ní cucááwā 'iiⁿyāⁿ miiⁿ din'dáí yā chi véé. Nduuti chi nguée yā, nguée véé mar 'aama cosa chi véé. ⁴'Iiⁿyāⁿ miiⁿ canée ndúúćū vida cueⁿe daāⁿmaⁿ ní vida miiⁿ ní deeve yeⁿe 'iiⁿyāⁿ. ⁵Níćú deeve chídeevé na maaiⁿ, chí maaiⁿ míⁿ 'iiⁿyāⁿ nguēe tumicadífínuⁿ yā.

⁶Dendyuūs nidichó'o yā 'áámá saⁿā, chí nguuvi sa Juan. ⁷Saⁿā miiⁿ ndaa sa chí caⁿa sa nduudu cuaacu. Ní caaⁿmáⁿ sá nduudu cuaacu yeⁿe chi deeve caati nducyaacá yā cu'téenu yā cááwā saⁿā miiⁿ. ⁸Nguée saⁿā miiⁿ chí deeve; naati chí ngaⁿā sa nduudu cuaacu yeⁿe deeve. ⁹Chíⁿ chí nduudu cuaacu chí deeve. Chíⁿ ngaⁿā deeve yeⁿe nducyáácá yā chí sneé yā íⁿyeeⁿdí 'cūū.

¹⁰'Iiⁿyāⁿ miiⁿ chí deeve ní canée yā iⁿyeeⁿdí 'cūū, ní din'dáí yā iⁿyeeⁿdí, ní 'iiⁿyāⁿ yeⁿe íⁿyeeⁿdí nguée n'diichi yā 'yā. ¹¹Ndaá yā caavā ndaata yeⁿe yā 'íćú 'iiⁿyāⁿ yeⁿe yā nguée 'cuúⁿ yā chí canēe yā. ¹²Nducyáácá 'iiⁿyāⁿ chí 'cuúⁿ yā chí 'iiⁿyāⁿ miiⁿ canēe yā nduucú yā, Ndyuūs ca'a yā poder 'iiⁿyāⁿ miiⁿ chí cuuvi daiya Dendyuūs 'iiⁿyāⁿ, 'iiⁿyāⁿ chí i'téenu yā chí ngúúví yā. ¹³Nguée cuuvi yā daiya yā cááwā yuūúⁿ, ní nguée caava yuūtē, ní nguée caavā isáⁿā, caati cááwā 'iivú Ndyuūs.

¹⁴Níćú Nduudu miiⁿ ní ch'iindiyáaⁿ yā tan'dúúćā s'uuúⁿ ní canēe yā ndúúćū s'uuúⁿ. N'dáí taavi yā ndúúćū favor ndúúćū nduudu cuaacu. Ní n'diichi

yú poder yeⁿe yā, poder tan'dúúćā yeⁿe 'áámá n'dyáⁿā yeⁿe Chiidá yā chí Dendyuūs miiⁿ. Ndiituú taavi yā ndúúćū favor ndúúćū nduudu cuaacu. ¹⁵Juan caⁿa sa nduudu cuaacu yeⁿe yā ní 'caí sa ní ngaⁿā sa yeⁿe 'iiⁿyāⁿ 'cūū: 'Iiⁿyāⁿ chí cuchíí yā cuaaⁿ daamí ní vmnaaⁿ cá yā yeⁿe 'úú caati 'āā 'naaⁿ cá yā niicu 'úú.

¹⁶Níćú nducyaaca yú ita'a yú favor ndúúćū favor yeⁿe Jesús chí ndiituú yā ndúúćū favor. ¹⁷Caati véé ley miiⁿ cucááwā Moisés ca'a yā naati véé favor ndúúćū nduudu cuaacu cucááwā Jesu-cristo ca'a yā. ¹⁸Mar 'áámá 'iiⁿyāⁿ nguée n'diichi yā Dendyuūs miiⁿ. Jesús 'áámá n'dyáⁿā yeⁿe Chiidá yā chí canēe nduucú yā, Jesús míⁿ díⁿ yā chí 'iiⁿyāⁿ deenú yā yeⁿe Chiidá yā.

Nduudu cuaacu yeⁿe Juan chí ngeedinuūⁿníⁿ

(Mt. 3.11-12; Mr. 1.7-8; Lc. 3.15-17)

¹⁹Taachi 'iiⁿyāⁿ Israel yeⁿe yáāⁿ Jerusalén dichó'o yā chiiduú s'eeⁿ ndúúćū 'iiⁿyāⁿ levitas s'eeⁿ ní ndaá yā nanááⁿ Juan miiⁿ chí itiinguunéeⁿ yā: ¿Díí, du'ū díí? chuū chí nduudu cuaacu chí n'güecútaⁿā Juan. ²⁰Ní Juan miiⁿ ntumiiⁿnúⁿ yā ní nguée cheeⁿdiitú yā ní caⁿa cuaacú yā: Nguée 'úú chí Cristo.

²¹Ní natiinguunéeⁿ yā saⁿā: ¿Du'ū díí, tuu'mi? ¿'Áá díí profeta Elías? Ngaⁿā Juan: Nguée 'úú. Ní natiinguunéeⁿ yā saⁿā: ¿'Áá díí chí profeta? Ngaⁿā ntúúⁿ sa: Nguée 'úú.

²²Ngaⁿā ntúúⁿ yā ngii yā saⁿā: ¿Du'ū díí, tuu'mi? Ní 'tíćā caaⁿmáⁿ 'nū cuuvi 'nū 'iiⁿyāⁿ chí dichó'o yā nús'uu. ¿De'é ngaⁿā díí yeⁿe maāⁿ díí?

²³Tuu'mí caⁿa Juan: 'Úú nduudu chí caⁿa na yáⁿāa naachi nguée ch'ēetinée 'iiⁿyāⁿ: Nan'guáaⁿ ní yúúní cuaacu yeⁿe Dendyuūs, tan'dúúćā chí ngaⁿa profeta Isaías miiⁿ naachi canēe nguūⁿ na libro yeⁿe Ndyuūs.

²⁴ 'Ícú 'i'nyā' s'ee' chi ndaá yā mii' ní 'i'nyā' ye'ē fariseos. ²⁵ Ní'cú ntingu-uneé' yā sa'ā ní nga'a yā ngii yā sa'ā: ¿De'ē cúúví chí ngeedinú'ni' di, ndúúti chí dii nguéé Cristo dii, ní nguéé Elías dii, ní nguéé profeta 'cūú dii?

²⁶ Ní'cú Juan nan'gueécúta'a yā ye'ē yā ní ca'a ya: 'Úú ní ngeedinú'ni' ndúúcu nuū'ni'; naati nguaa' ndís'tii ní canéé 'áámá yā ní nguéé ináa' ní 'i'nyā'.

²⁷ 'I'nyā' 'cūú chí cuchii cuayiivi ní vmaaa' ca yā ye'ē 'úú. Niicu 'úú nguēe n'dai 'úú, chí cuuvi dí' n'daatiií yí'ímá' ye'ē ndaacuú ye'ē yā.

²⁸ Cosa 'cūú chí chii ná yá'āa Betábara na táámá lado ye'e yí'cú Jordán, naachi Juan chéédinuū'ni' sa 'i'nyā'.

'Íti cuūchí ye'e Dendyuūs

²⁹ Chi deeve táámá nguuvi ní Juan n'diichí sa Jesús ndaá yā naachi canee sa, ní'cú nga'ā sa: Cun'diichí nī. 'Íngaā Jesucristo chí nguuví yā 'Íti Cuūchí ye'ē Dendyuūs chí nadvíí yā nuū'ndí ye'ē 'i'nyā' ye'ē í'nye'ē'dí. ³⁰ Chuū chí nga'á ye'ē yā: Cuchii 'áámá sa'ā cuayi-ivi ye'ē 'úú ní'cú 'āā vmaaa' sa ye'ē 'úú, caati 'āā 'naa' ca sa niicu 'úú. ³¹ 'Úú ní nguéé n'diichí 'i'nyā' naati deenú chí snaa' 'i'nyā' Israel 'yā. Cáávā chuū 'úú cuchí ní ngeedinuū'ni' ndúúcu nuū'ni'.

³² Juan mí' ní nga'ā sa nduudu cuaacu: 'Úú ní n'diichí Espíritu N'dai ye'ē Dendyuūs chí cuch'ée' nanguuvi tan'dúúcā paloma ní ndaa vmaaa' ye'ē yā ní canéé yā ndúúcu yā. ³³ 'Úú nguéé n'diichí 'i'nyā' mii' naati 'i'nyā' chí dichó'o yā 'úú chí ngeedinuū'ni' ndúúcu nuū'ni', 'i'nyā' mii' chí nga'a yā ngii yā 'úú: Du'ū chí n'diichí di chí ndeē Espíritu N'dai ye'ē Ndyuūs ní canéé yā nduucú yā, 'i'nyā' 'cūú chí ngeedinú'ni' ndúúcu Espíritu N'dai ye'ē Ndyuūs. ³⁴ 'Úú ní n'diichí ní nga'a cuaacú chí chuū chí Daiya Dendyuūs.

Discípulos chí vmnáá' vmaaa'

³⁵ Chi deeve táámá nguuvi canéé ntuū' Juan ndúúcu 'uuvi discípulos ye'ē sa. ³⁶ Ní inaa' sa Jesús mii' chí cachiicá yā cuaa' mii'. Ní nga'ā sa: N'diichí nī. 'Íngaā Jesucristo chí nguuví yā 'Íti Cuūchí ye'ē Dendyuūs.

³⁷ Ndúú 'uuvi discípulos ye'e Juan chí ch'iindive'ē yā chí' chí nga'ā sa, ní cue'ē yā ndúúcu Jesús. ³⁸ Nguēecundí Jesús ní n'diichí yā chí n'dáa yā 'yā. Ní nga'a yā ngii yā 'i'nyā' s'ee': ¿D'ē in'nuu' dí? Nga'ā 'i'nyā' s'ee' ngii yā 'yā: Rabí (nduudu mí' ne'ē caa'ma' chí Maestro), ¿tí' canéé' vaacu dí?

³⁹ Tuu'mi nga'a yā ngii yā sa'ā: Cuchí nī ní'cú n'diichí nī. Ní ndaá yā ní n'diichí yā tii canéé yā. Ní ch'ētinéé yā nduucú yā nguuvi mii' caati 'āā tandúú n'geécú cuū' chíinū.

⁴⁰ Ní ye'ē 'uuví yā chí ch'iindive'ē yā ye'ē Juan ní cue'ē yā ndúúcu Jesús. 'Áámá sa'ā mii' ní nguuvi sa Andrés 'diinū Simón Pedro. ⁴¹ Ní Andrés mii' ndaacá sa maa' 'dí'nu sa Simón ní nga'a sa ngii sa sá'ā: Nndaaca 'nū Mesías mii' (ne'ē caa'ma' nduudu mii' chí Cristo).

⁴² Ní candēē sa Simón nanáá' Jesús. Ní taachi Jesús mii' n'gí'nu yā sa'ā mii', ní nga'á yā: Dí' Simón Pedro, daiya Jonás mii'. Máá' ní cu'nee' yú chí duuchi Cefas (nduudu mí' ne'ē caa'ma' tuúú).

Jesús yaa'ví yā Felipe ndúúcu Natanael

⁴³ Chi déévé táámá nguuvi Jesús ne'ē yā ca'a yā na yá'āa Galilea, ní cue'ē yā. Ndaaca yā Felipe ní nga'a yā ngii yā sa'ā: Cuchí di nduucú.

⁴⁴ Ní yáā' vaacú Felipe ní ye'ē yáā' Betsaida ní dáámá yáā' vaacú sa ndúúcu Andrés ndúúcu Pedro. ⁴⁵ Felipe mí' ndaacá sá Natanael, ní'cú nga'ā sa ngii sa sá'ā: 'Áā ndaacá 'nū Jesús daiya José

yeⁿe yáaⁿ Nazaret. Dingúúⁿ Moisés yeⁿe 'iiⁿyáⁿ 'cūū na ley, ní dingúúⁿ profetas yeⁿe 'iiⁿyáⁿ 'cūū.

⁴⁶ Ní ngaⁿa Natanael: ¿'Áá véé cosa chi n'daacá na yáaⁿ Nazaret? Ní ngaⁿa Felipe miiⁿ: Cuchí di ní n'diichi di.

⁴⁷ Jesús miiⁿ ní n'diichi yā Natanael chi cuchii sa nanáaⁿ yā. Ní ngaⁿa yā yeⁿe sa: N'díichí nī 'áámá saⁿa chi cuaacu níⁿnyúⁿ yeⁿe ndaata Israel miiⁿ. Ní nguéé ngincheⁿei sa 'iiⁿyāⁿ.

⁴⁸ Ngaⁿa Natanael ngii sa 'iiⁿyāⁿ: ¿Tíí n'diichi di 'úú? Ní ngaⁿa Jesús ngíí yā saⁿa: Taachi 'āā cuéé yaaⁿví Felipe dii ní taachi canéé dí maaⁿ yáⁿá yeⁿe n'guíídi yaaⁿ nguuví, 'āā n'diichi díí.

⁴⁹ Ní nan'gucutáⁿa Natanael miiⁿ ni ngaⁿa sa ngii sa 'iiⁿyāⁿ: Maestro, n'dií chí Daiya Dendyuūs miiⁿ. N'dií chí Rey yeⁿe Israel.

⁵⁰ Ní ngaⁿa Jesús ngii yā saⁿa: ¿'Áá cáávā chí ngaⁿa ngíí dii chí n'diichi dii maaⁿ n'guíídi yaaⁿ nguuví chí 'āā i'teenu di 'úú? Ch'ete n'dai ca n'diichi dí dendúⁿ nguéé ti chūū.

⁵¹ Ní ngaⁿa yā ngii yā saⁿa: Cuaacu níⁿnyúⁿ cuācū níⁿnyuⁿ ngaⁿa ngii dii. Ngúúví maaⁿ ní ngúúví chí cuíchi cunéé chí n'diichi di chí nanguaaⁿ nanguuví níⁿcú ángeles yeⁿe Dendyuūs miiⁿ ní ngeé yā ní nguaⁿá yā nanááⁿ Saⁿa chí Daiya Dendyuūs.

Ch'iindivaacu 'iiⁿyāⁿ yeⁿe yáaⁿ Caná

2 Chii ndii chíⁿ ndii 'ínú nguuví miiⁿ ní ch'iindivaacú 'áámá 'iiⁿyāⁿ na yáaⁿ Caná yeⁿe yáⁿaa Galilea. Ní miiⁿ cánéé cheécú Jesús. ² Ní idiíⁿ yā invitar Jesús ndúúⁿcú discípulos yeⁿe yā nááchí ch'iindivaacú 'iiⁿyāⁿ. ³ Ní ch'iinu vino yeⁿe yā. Ní cheécú Jesús ngaⁿa yā ngii yā Jesús: 'Āā ntéé vino yeⁿe yā.

⁴ Ní ngaⁿa Jesús ngii yā cheécú yā: ¿Deⁿe canéé yeⁿe ndúúⁿcú dii n'dataá? 'Āā cuéé ndaa hora yeⁿe miⁿniiⁿyuⁿ.

⁵ Cheécú yā miiⁿ ngaⁿa yā ngii yā saⁿa s'eeⁿ chí diiⁿ mandado: Dii sáⁿa s'eeⁿ, diiⁿ di tan'dúúⁿcā chí Jesús caaⁿmáⁿ yā cuuví yā ndis'tíí.

⁶ Miiⁿ snéé níyaaⁿ 'cuutíí n'geete chí nin'dai ndúúⁿcū tuūu chí ngeé nuūⁿnīⁿ. 'Iiⁿyāⁿ naaⁿnú yā 'cuutíí s'eeⁿ tan'dúúⁿcā costumbre yeⁿe 'iiⁿyāⁿ Israel. 'Aama 'aama 'cuutíí ch'ete tunééⁿ nn'geéⁿ nduuví cuūuⁿ ngeecu ndii 'áámá ciento litros yeⁿe nuūⁿnīⁿ.

⁷ Ní ngaⁿa Jesús ngii yā saⁿa chí idiíⁿ mandado: Diicuutú ní ndúúⁿcū nuūⁿnīⁿ 'cuutíí n'geete chí nin'dai ndúúⁿcū tuūu. Ní 'iiⁿyāⁿ s'eeⁿ diicuutú yā ndiitúú n'dai ndúúⁿcū nuūⁿnīⁿ. ⁸ Ní ngaⁿa Jesús ngii yā saⁿa s'eeⁿ chí idiíⁿ mandado: Tun'dáa ní naachi s'nééⁿ nuūⁿnīⁿ, ní tun'dáa ní nuūⁿnīⁿ, ni candéé ní nanááⁿ 'iiⁿyāⁿ chí chééⁿ ndii vmnaaⁿ yeⁿe 'viicū. Ní candéé yā chíⁿí yā na 'iiⁿyāⁿ chí chééⁿndii vmnaaⁿ yeⁿe 'viicū. ⁹ Ní taachi 'iiⁿyāⁿ chí chééⁿndii vmnaaⁿ yeⁿe 'viicū canéé yiinú yā nuūⁿnīⁿ chí 'āā ndii vino naati nguéé déénú yā tii ngiica vino miiⁿ. Naati 'iiⁿyāⁿ chí idiíⁿ mandado ní déénú yā caati cheⁿe yā nguai yā nuūⁿnīⁿ. Tuuⁿmi ní yaaⁿví yā saⁿa chí n'giindivaacu miiⁿ. ¹⁰ Ní ngaⁿa yā ngii yā saⁿa chí n'giindivaacu: Tanducueⁿe saⁿa miiⁿ díncā vino chí n'dai ca ngaⁿa sa vmnaaⁿ 'iiⁿyāⁿ. Ní taachi 'āā ndiitú yeⁿe yā, tuuⁿmi nngaⁿa sa vino chí nguéé n'dai ngíⁿi. Naati dii ní nnguain'dai di vino chí n'dai ndíí maaⁿ.

¹¹ Chiiⁿ ní vmnááⁿ vmnaaⁿ señal chí diiⁿ Jesús ná yáaⁿ Caná yeⁿe yáⁿaa Galilea. Ní chíⁿí yā poder yeⁿe yā. Ní discípulos yeⁿe yā chí'teenú sa 'yā.

¹² Cho'o chuū ní cuinaⁿa Jesús ndúúⁿcú cheécú yā, ndúúⁿcú 'díínu yā ndúúⁿcú discípulos yeⁿe yā na yáaⁿ Capernaum. Ní duuⁿví nguuví canéé yā miiⁿ.

Jesús didéevé yā yāacū templo

(Mt. 21.12-13; Mr.
11.15-18; Lc. 19.45-46)

¹³ Ní 'āā snee niiⁿnuúⁿ nguuví chi ndaā 'viicū yeⁿē pascua yeⁿē 'iiⁿyāⁿ Israel, ní cuheē Jesús na yāāⁿ Jerusalén. ¹⁴ Ní ndaacā yā chēeti cheendi chēēⁿ yāacu templo 'iiⁿyāⁿ s'eeⁿ chi ch'etē yā n'diicuí yā 'itiindu ndúú^{cū} 'iiti 'cuūchi ndúú^{cū} palomas, ní ndaacā yā 'iiⁿyāⁿ chi inñⁿdaaⁿ tuūmí. ¹⁵ Taachí Jesús din'dái yā cuerda ní dichó'o yā nducyáácá 'iiⁿyāⁿ chuva'āi cheendi chēēⁿ yāacū templo miiⁿ, ndúú^{cū} 'iiti 'cuūchi s'eeⁿ ndúú^{cū} 'itiindu s'éeⁿ. Ní ch'iinu ngéé yā tuūmí yeⁿé 'iiⁿyāⁿ s'eeⁿ chi inñⁿdaaⁿ tuūmí ní chingúúⁿndaa yā mesas yeⁿé yā. ¹⁶ Níicú ngaⁿa Jesús ngii yā saⁿā chi n'diicuí palomas: Divíi nī chuū 'muuⁿ ni nguéé dííⁿ nī va'āi yeⁿe Chiidá va'ai chi n'diicui 'iiⁿyāⁿ.

¹⁷ Tuu'mí ní n'gaacu discípulos yeⁿé yā yeⁿe chi cánéé nguūⁿ na libro yeⁿe Ndyuūs chi vaādi n'diitē yeⁿē vaacu di, ní dī'cuuinú 'úú.

¹⁸ Níicú 'iiⁿyāⁿ Israel nan'gueecutaⁿá yā ní caⁿa yā Jesús: ¿De'ē señal chí cu'neeⁿ di nús'uū chi véé poder yeⁿē di chí diiⁿ di 'túú^{cā}?

¹⁹ Nan'gueecútaⁿā Jesús ní caⁿa yā: Nadtuuví nī yāacū templo 'cūū ní 'iinū nguuví 'úú nadācueéⁿ.

²⁰ Tuu'mí caⁿa 'iiⁿyāⁿ Israel: Ch'ēeti na 'uūvi ngeecu jaaⁿ ndúuyū chi n'dai yāacū templo 'cūū. Níicú dii, ¿'áá na 'iinū nguuví neⁿe di nādācueeⁿ di?

²¹ Naati Jesús caⁿa yā yeⁿē yāacū templo chí cuerpo yeⁿē maáⁿ yā. ²² Taachi Jesús nanduuchí yā yeⁿē nguaaⁿ tináⁿā tuu'mí discípulos yeⁿé yā nan'gaacú yā chí caⁿa yā chuū. Ní i'téenu yā chí cánéé nguūⁿ na libro yeⁿé Dendyuūs ndúú^{cū} nduudu chí ngaⁿa Jesús miiⁿ.

Jesús deenú yā nducyáácá saⁿā

²³ Taachi Jesús canée yā yāāⁿ Jerusalén, nguuví 'viicú yeⁿe pascua neenē 'yaaⁿ yā chí'téenu yā Jesús caati 'āā n'diichí yā señales chí dííⁿ yā. ²⁴ Naati maaⁿ Jesús miiⁿ ní nguéé ngí chētinuúⁿ yā 'iiⁿyāⁿ s'eeⁿ caati déénú Jesús yeⁿe nducyáácá yā. ²⁵ Ní nguéé neⁿé yā chí ndii 'áámá 'iiⁿyāⁿ caaⁿmaⁿ cuaacu yeⁿe saⁿā ti deenú yā de'e chí canée ndúú^{cū} saⁿā.

Jesús ndúú^{cū} Nicodemo

3 Níicú canee 'áámá sáⁿā yeⁿē fariseos chí nguuví sa Nicodemo. Saⁿā miiⁿ, saⁿā chí chééⁿndii vmnááⁿ 'iiⁿyāⁿ Israel. ² Sáⁿa 'cūū nndaa sa nanááⁿ Jesús nguiinū miiⁿ. Níicú ngaⁿa sa ngii sá 'iiⁿyāⁿ: N'dií Maestro, déénú 'nū chí ndaá nī yeⁿé Dendyuūs chí lado yeⁿe maestro caati mar 'áámá 'iiⁿyāⁿ nguéé cuuvi dííⁿ yā señales chí idiíⁿ nī ndúú^{tí} chí nguéé canee Dendyuūs ndúú^{cū} yā.

³ Jesús ní nan'gueecútaⁿá yā ní ngaⁿa yā ngii yā saⁿā: Cuaacu níⁿnyúⁿ cuāacū níⁿnyuⁿ ngaⁿá ngí dii, du'ū chí nguéé ngeecundí 'cundiyaāⁿ táámá vmnéⁿēe nguéé cuuví n'diichí yā naachi 'iivú Dendyuūs ngaⁿa ntiⁿnyúⁿ yā.

⁴ Ní ngaⁿā Nicodemo ngii sa Jesús: ¿Táácā nanguuecundí 'áámá 'iiⁿyāⁿ saⁿā ndiicúⁿ 'cuundiyáaⁿ ntuúⁿ yā? ¿Táácā cuuví nuuⁿ ndáá ntuúⁿ yā na chēeti chēcú yā ní 'cuundiyáaⁿ ntuúⁿ yā?

⁵ Jesús ngaⁿa yā ngii yā saⁿā: Cuaacu níⁿnyúⁿ cuāacū níⁿnyuⁿ ngaⁿá ngí dii, du'ū chí nguéé 'cuundiyáaⁿ yā cáávā nuūⁿnīⁿ ní cáávā Espíritu N'dai yeⁿe Ndyuūs nguéé cuuvi cundáa yā naachi canée 'iivú Dendyuūs. ⁶ Du'u chí ch'iindiyáaⁿ yeⁿe 'iiⁿyāⁿ, 'iiⁿyāⁿ canee ndúú^{cū}. Níicú du'ū chí ch'iindiyáaⁿ yeⁿē Espíritu, espíritu canee ndúú^{cū}. ⁷ Nguéé caⁿā yiinu di chí ngaⁿá ngí dii chí nducyaaca 'iiⁿyāⁿ cánéé chí 'cuundiyáaⁿ

ntúuⁿ yā taama. ⁸Yúúné ní na neⁿe miiⁿ ngeénū. Níícú n'giindiveeⁿ di chi ngeénū. Ní nguée déenu di tí chiicā tíí caⁿā. "Tíicā nducyáácá 'iiⁿyāⁿ chi 'niindiyááⁿ yā yeⁿe Espíritu N'dai yeⁿe Ndyuús.

⁹Ní nan'gueecútaⁿā Nicodemo yeⁿé yā ní ngaⁿa sa ngii sa Jesús: ¿Táácā cuuvi chuū?

¹⁰Nan'gueecútaⁿā Jesús ní ngaⁿá yā ngii yā sáⁿā: ¿Áá díí maestro yeⁿe 'iiⁿyāⁿ Israel ní nguée deenu di chuū? ¹¹Cuaacu níⁿnyúⁿ cuuācū niiⁿnyuⁿ ngaⁿá ngii díí chi déenu 'nū chii chi ngaⁿa 'nū. Níícú chi n'diichí 'nū chii chi ngaⁿa cuaacu 'nū ní nguée n'diichí 'nu chii chi ngaⁿā cuaacu 'nū. Níícú nguée 'caandiveeⁿ di chi caaⁿmaⁿ 'nū nduudu cuaacu. ¹²Nduuti chi ngaⁿá cosa chi véé iⁿyeeⁿdí 'cūū niicu nguée i'téenu dí, ¿táácā cu'téenu di nduuti chi caaⁿmaⁿ cosa chi véé na va'ai chæeti nguūví?

¹³Ndii 'áámá 'iiⁿyāⁿ nguée chee yā na va'ai chæeti nguuvi nduuti chi nguée 'iiⁿyāⁿ chi ch'eēⁿ yeⁿe va'ai chæeti nguuvi. 'Iiⁿyāⁿ miiⁿ, Sáⁿā chi Daiya Dendyuús, chi canéé na va'ai chæeti nguuvi. ¹⁴Tan'dúúcā Moisés miiⁿ chinadācuéeⁿ sa cúú na yāⁿāa cuūⁿmáⁿ naachi nguée ch'æetinée 'iiⁿyāⁿ 'tíicā canee chí nicueēⁿ Saⁿa chi Daiyá Dendyuús. ¹⁵Caati nducyaaca 'iiⁿyāⁿ chi cu'téenu yā 'iiⁿyāⁿ nguée cuuvi ndái yā caati cunduuchí yā cueⁿe daāⁿmaⁿ.

"Tíicā Dendyuús díneⁿé yā 'iiⁿyāⁿ yeⁿe íⁿyeeⁿdí

¹⁶Caati chuū díneⁿe Dendyuús 'iiⁿyāⁿ yeⁿe íⁿyeeⁿdí chí dich'ó yā 'aama n'dyáⁿā Daiya yā, caati nducyáácá 'iiⁿyāⁿ chí cu'téenu yā 'iiⁿyāⁿ nguée cuuvi ndái yā. Níícú cunduuchí yā cueⁿe daāⁿmaⁿ. ¹⁷Caati Dendyuús ní dich'ó yā Daiyá yā iⁿyeeⁿdí chí Daiyá yā nguée díí yā juzgar 'iiⁿyāⁿ chí snée iⁿyeeⁿdí, naati chí cuchii yā nadanguáⁿai yā 'iiⁿyāⁿ yeⁿe íⁿyeeⁿdí cááva yā.

¹⁸Du'u chi i'téenu 'iiⁿyāⁿ nguée condenado yā, niicu du'u chi nguée i'téenu 'iiⁿyāⁿ 'āā condenado yā caati nguée chi'teenu chi nduuchi 'áámá n'dyáⁿā yeⁿe Chiidá yā chí Dendyuús. ¹⁹Níícú chuú ní condenación. Chí ðeeve 'cūū ndaá iⁿyeeⁿdí 'cūū naati saⁿā yeⁿe iⁿyeeⁿdí 'cūū díneⁿe sa na maaiⁿ nguée ti chí ðeeve caati díí sa chí nguée n'daacā. ²⁰Caati nducyáácá 'iiⁿyāⁿ chí díí yā chí nguée n'daacā, nguée díneⁿe yā chí ðeeve. Ní nguée indaá yā chí ðeeve miiⁿ caati nguée neⁿe yā chí cuuvi déenu 'iiⁿyāⁿ ní caaⁿmaⁿ 'iiⁿyāⁿ chí nuuⁿndí yā. ²¹Naati 'iiⁿyāⁿ chí díí yā ntiíⁿnyuⁿ chí n'daacā, indaá yā naachi chí ðeeve caati 'iiⁿyāⁿ snáaⁿ yā ntiíⁿnyuⁿ yeⁿé yā chí yeⁿe Dendyuús.

Juan chí ngeedínúⁿniⁿ ngaⁿa sa ndúúcu Jesús táámá vmnéⁿēe

²²Cho'oo chúú, ndaā Jesús ndúúcu discípulos yeⁿé yā na yáⁿāa Judea. Ní cunée yā ndúúcu 'iiⁿyāⁿ s'eeⁿ. Níícú Jesús cheedinúⁿniⁿ yā 'iiⁿyāⁿ. ²³Ní Juan mííⁿ ngeedinúⁿniⁿ ntúuⁿ yā na yáⁿā Enón niiⁿnuúⁿ na yaāⁿ Salim ti mííⁿ neené vee ca nuūⁿniⁿ. Ní ndaā 'iiⁿyāⁿ ní cheedinúⁿniⁿ yā. ²⁴Caati Juan miiⁿ 'āā cuéeⁿ cunúuⁿ yā vácūū.

²⁵Discípulos yeⁿe Juan ch'æecu cheendí yā ndúúcu 'iiⁿyāⁿ Israel yeⁿé táácā 'iiⁿyāⁿ nduuvi ðeevé yā. ²⁶Níícú ndaa sá nanááⁿ Juan ní ngaⁿa sa ngii sa saⁿā: Díí, Maestro, 'iiⁿyāⁿ chí canéé ndúúcu di na táámá lado yeⁿe yíícú Jordán 'iiⁿyāⁿ chí díí caaⁿmaⁿ cuaacu di yeⁿé yā; n'diichi di, 'iiⁿyāⁿ miiⁿ ngeedinúⁿniⁿ yā. Niicu nducyáácá 'iiⁿyāⁿ ndaa yā nanáaⁿ yā.

²⁷Nan'gueecútaⁿā Juan ní caⁿa sa: Nguée cúúví cuta'a 'iiⁿyāⁿ de'ē vee nduuti chí nguée cuchii yeⁿe va'ai chæeti nguuvi. ²⁸Ndíⁿtíí testigo yeⁿé chí caⁿá: 'Úú ní nguée Cristo 'úú, caati dich'ó Dendyuús 'úú vmnaaⁿ yeⁿé yā. ²⁹Du'ū chí véé

n'daataá yeⁿe yā, 'iiⁿ'yāⁿ miiⁿ ní isáⁿā yeⁿe tá. Amigo yeⁿe isáⁿā miiⁿ ní 'iiⁿ'yāⁿ chí cánéé ndúúcu yā ní n'giindiveéⁿ yā yeⁿe yā. Yeenu taavi yā cáávā nduudu yeⁿe isáⁿā miiⁿ. 'Tíicā vaadi yeenu yeⁿe ní 'áámá ndiitúu taavi ca. ³⁰ 'Iiⁿ'yāⁿ miiⁿ ní canéé chí ch'eté yā, niicu 'úú dán-duu'vi 'lífⁿ 'úú.

'Iiⁿ'yāⁿ chí cuchii yā yeⁿe va'ai cheeti nguuví

³¹ Du'ú chí ndaā yeⁿe va'ai cheeti nguuví ch'ete ca yeⁿe nducyaaca 'iiⁿ'yāⁿ. Du'ú chí yeⁿe yáⁿā ní yeⁿe yáⁿā ní ngaⁿa yeⁿe cosas yeⁿe yáⁿā. 'Iiⁿ'yāⁿ chí nndaā yā yeⁿe va'ai cheeti nguuví, ch'ete cá yā yeⁿe nducyáacá 'iiⁿ'yāⁿ. ³² 'Iiⁿ'yāⁿ miiⁿ ngaⁿa cuaacú yā yeⁿe chí n'diichí yā ndúúcu chí ch'iindiveéⁿ yā ní mar 'áámá 'iiⁿ'yāⁿ ní nguéé neⁿe yā 'caandiveéⁿ yā nduudu cuaacu yeⁿe yā. ³³ 'Iiⁿ'yāⁿ chí n'gúuⁿ yā nduudu cuaacu yeⁿe Jesús nduuvidaamá yā ndúúcu yā ní ngaⁿa yā chí Dendyuūs miiⁿ chí cuaacu. ³⁴ Du'ú chí Dendyuūs dichó'o yā, 'iiⁿ'yāⁿ miiⁿ ngáⁿa yā nduudu yeⁿe Dendyuūs miiⁿ, caati Dendyuūs nga'a yā 'iiⁿ'yāⁿ Espíritu N'dai yeⁿe Ndyuūs nguéé ndúúcu caadi. ³⁵ Dendyuūs Chida yú dinéⁿe yā Daiyá yā. Níicú tanducuéⁿe dendu'ú ca'á yā ta'ā Daiyá yā. ³⁶ 'Iiⁿ'yāⁿ chí i'téenu yā Daiya Dendyuūs miiⁿ canéé yā ndúúcu vida cueⁿe daāⁿ-maⁿ. Naati 'iiⁿ'yāⁿ chí nguéé i'téenu yā Daiya Dendyuūs miiⁿ nguéé snaaⁿ yā vida cueⁿe daāⁿ-maⁿ miiⁿ naati caⁿá yā cuta'á yā castigo yeⁿe Dendyuūs chí di-itúu n'dai.

Jesús ndúúcu n'daataá yeⁿe yáⁿā Samaria

4 Tááchí Jesús ituumicádiinuuⁿ yā 'tíicā chí saⁿā fariseos ch'iindiveeⁿ sa chíⁿ chí Jesús díⁿ yā ní chí cheedinuūⁿniⁿ yā 'yaaⁿ ca 'iiⁿ'yāⁿ ní véé 'yaaⁿ ca discípulos yeⁿe yā nguéé ti Juan miiⁿ;

² 'áará chí nguéé Jesús chí ngeedinuūⁿniⁿ yā caati discípulos yeⁿe yā ngeedinuūⁿniⁿ yā; ³ Jesús s'néeⁿ yā yáⁿā Judea ní cheⁿe ntuúⁿ yā yáⁿā Galilea.

⁴ Ní canéé chí cho'ó yā yáⁿā Samaria. ⁵ Ní ndaá yā na 'áámá yáⁿā yeⁿe Samaria chí nguuví Sicar, niiⁿnuúⁿ ná yáⁿā chí ca'a Jacob yeⁿe daiya sa José. ⁶ Ní míⁿ canéé vaacunuūⁿniⁿ yeⁿe Jacob. Jesús chicúúⁿnu yā chí ngiica yā ní ch'iindí yā niiⁿnuúⁿ na vaacunuūⁿniⁿ. Ní 'āā tanduu n'geecu ndiichuuví. ⁷ Ndaā 'áámá n'daataá yeⁿe yáⁿā Samaria chí sta'a tá nuūⁿniⁿ. Ní Jesús caⁿa yā chí yā táⁿā: Díí n'daataá, téé dí tíí nuūⁿniⁿ cu'ú.

⁸ Discípulos yeⁿe yā cueⁿe sa yáⁿā Sicar chí cuai sa chí che'é yā. ⁹ Ní n'daataá yeⁿe yáⁿā Samaria ngaⁿa tá ngii tá Jesús: ¿Táácā chí ngiica di nuūⁿniⁿ chí cu'ú di 'úú ti díí ní 'iiⁿ'yāⁿ Israel díí niicu 'úú yeⁿe yáⁿā Samaria 'úú? Saⁿā Israel s'eeⁿ ní nguéé n'diichi sa 'iiⁿ'yāⁿ yeⁿe yáⁿā Samaria. ¹⁰ Ní n'guēcútaⁿa Jesús, ní ngaⁿa yā ngii yā táⁿā: Ndúúti chí n'diichi di regalo yeⁿe Dendyuūs miiⁿ, ní du'ú chí ngaⁿā ngii díí, tee di nuūⁿniⁿ cu'ú, tuu'mi ní caaca di nuūⁿniⁿ yeⁿe yā. Ní 'iiⁿ'yāⁿ miiⁿ caⁿa yā téé yā nuūⁿniⁿ chí cu'ú di, nuūⁿniⁿ chí díí chí canduuchi 'iiⁿ'yāⁿ.

¹¹ N'daataa míⁿ ní ngaⁿa tá ngii tá Jesús: Señor, nguéé de'ē chí cuta'á nducú ní tíí vaacunuūⁿniⁿ yáanūⁿ. ¿Tíí cuuvi canguai nuūⁿniⁿ yeⁿe ní chí díí chí canduuchi 'iiⁿ'yāⁿ? ¹² ¿Áá vmaⁿ ca n'dií yeⁿe chíida 'nū Jacob? 'Iiⁿ'yāⁿ miiⁿ din'dái yā vaacunuūⁿniⁿ 'cūú cáávā nús'uu. 'Múúⁿ sta'á yā nuūⁿniⁿ ndúúcu daiya yā ndúúcu 'iiti yeⁿe yā.

¹³ Nan'guēcútaⁿa Jesús ngaⁿa yā ngii yā táⁿā: Nducyáacá 'iiⁿ'yāⁿ chí ngi'i yā nuūⁿniⁿ 'cūú canéé chí cuuvi yaaca ntúuⁿ yā. ¹⁴ Naati du'ú 'iiⁿ'yāⁿ chí cú'u yā nuūⁿniⁿ chí 'úú chí ca'á, 'āā ntéé cuuvi yaacá yā. Nuūⁿniⁿ chí 'úú ca'á 'iiⁿ'yāⁿ míⁿ, nuūⁿniⁿ miiⁿ tan'dúúca chí cu-

uvi nduucú yā 'áámá vaacunuūⁿniⁿ chi ngááa nuūⁿniⁿ miiⁿ yeⁿ'é yā caavā vida cueⁿ'e daāⁿmaⁿ.

¹⁵ N'daataá miiⁿ ní ngaⁿ'a tá ngii tá Jesús: Dii Señor, tée nī 'úú nuūⁿniⁿ 'cūū. Cu'ú ní 'aa ntéé cuuvi yaacá, ní 'aa ntéé chíi cuta'á nuūⁿniⁿ.

¹⁶ Jesús ngaⁿ'a yā ngii yā táⁿā: Cuéⁿ'é dí ní cananguai di isaⁿ'ā yeⁿ'ē di. Ní cuchii di ndúúcu sa 'muuⁿ.

¹⁷ N'guēcútaⁿ'a n'daataa míⁿ ní ngaⁿ'a tá ngii tá 'iiⁿyāⁿ: Nguéé isaⁿ'ā yeⁿ'é. Ngaⁿ'a Jesús ngii yā táⁿā: N'daacā chi ngaⁿ'a di chi nguéé isaⁿ'ā yeⁿ'e di. ¹⁸ Caati nyuⁿ'u isaⁿ'ā canéé ndúúcu dii, ní saⁿ'ā chi canéé ndúúcu dii miⁿniiⁿ'yuⁿ nguéé isaⁿ'ā yeⁿ'e di. Chiiⁿ chuū ní ngaⁿ'ā cuaacú dí.

¹⁹ Ngaⁿ'a n'daataá ngii ta Jesús: N'dii Señor, deenú chi n'dií ní 'áámá profeta n'dii. ²⁰ Chiida 'nū ní diíⁿ yā adorar ná cuééti 'cūū naati 'iiⁿyāⁿ Israel chi judíos ngaⁿ'ā ntuuⁿ yā chí na yáāⁿ Jerusalén chi cánéé chi diíⁿ yā adorar Ndyuūs.

²¹ Ní ngaⁿ'ā Jesús ngii yā táⁿā: N'daataá, cu'téenu di 'úú. Ndaā hora taachi ní nguéé cueeti 'cūū ní nguéé yáāⁿ Jerusalén 'iiⁿyāⁿ diíⁿ yā adorar Chiida yú. ²² Ndís'tií ní diíⁿ nī adorar chi nguéé deenú nī. Nús'uū ní idiíⁿ 'nū adorar chi déenu 'nū naati vaadi nguaⁿ'ai ndaā lado yeⁿ'e 'áámá 'iiⁿyāⁿ chi nadanguáⁿāi ní yeⁿ'e 'iiⁿyāⁿ Israel. ²³ Naati hora miiⁿ ní cúchii nífcú hora miiⁿ ní ndaā, taachi cuaacu nífcúnyúⁿ 'iiⁿyāⁿ s'eeⁿ diíⁿ yā adorar Dendyuūs Chiida yú ndúúcu chideeve yeⁿ'é yā ndúúcu vaadi cuaacú. Caati 'tífcā Chiida yú míⁿ in'nuúⁿ yā 'iiⁿyāⁿ chi diíⁿ yā adorar 'yā ni cu'téenu yā 'yā. ²⁴ Dendyuūs ní Espíritu 'yā. Ní 'iiⁿyāⁿ cánéé chi diíⁿ yā adorar 'yā cánéé chi diíⁿ yā adorar 'yā ndúúcu chideeve yeⁿ'é yā ndúúcu vaadi cuaacu.

²⁵ N'daataá míⁿ ngaⁿ'a ta ngii ta Jesús: Deenú chí Mesías canéé chí ndaá chi du-

uchi Cristo. Taachí 'iiⁿyāⁿ miiⁿ ndaá yā, tuuⁿ'mí caaⁿ'maⁿ yā nducuéⁿ'ē cosas.

²⁶ Ní ngaⁿ'a Jesús ngii yā táⁿā: 'Úú chi Cristo chi indeé ndúúcu di.

²⁷ Taachí indeé yā ndúúcu n'daataá míⁿ, ndaa discípulos yeⁿ'é yā. Ní cueⁿ'e yínu sá chi indeé yā ndúúcu n'daataá miiⁿ. Mar 'áámá saⁿ'ā nguéé natiingu- uneeⁿ sa Jesús: ¿De'ē iⁿ'nuuⁿ dí? ¿De'ē cu- uvi chi ndee di ndúúcu tá? ²⁸ Ní n'daataá míⁿ ní s'neeⁿ tá 'cuuti cuééé yeⁿ'e tá ní cueⁿ'ē tá ná yáāⁿ miiⁿ. Ní caⁿ'a tá chíi tá 'iiⁿyāⁿ s'eeⁿ: ²⁹ Cuchíí nī ní n'diichí nī 'áámá saⁿ'ā chi caⁿ'a sa chíi sa 'úú tandu- cuéⁿ'ē chi ndiíⁿ. ¿'Áá nguéé 'iiⁿyāⁿ miiⁿ chi Cristo?

³⁰ Ní 'iiⁿyāⁿ s'eeⁿ can'dáa yā na yáāⁿ miiⁿ. Cueⁿ'e yā n'diichí yā Jesús. ³¹ Ní taachi cueⁿ'ē n'daataa míⁿ na yáāⁿ tuuⁿ'mí ní discípulos yeⁿ'é yā ngaⁿ'a sa ngii sá Jesús: N'dii Maestro, che'ē nī yuūdú nduucú 'nū.

³² Ní Jesús miiⁿ ngaⁿ'a yā ngii yā saⁿ'ā s'eeⁿ: 'Úú ní véé 'áámá comida yeⁿ'é chi che'é. Ndís'tií nguéé déenu nī.

³³ Nífcú discípulos ngaⁿ'a sa ngii sa vi'i: ¿'Áá ndaā 'iiⁿyāⁿ chi cuú yā chí che'é yā?

³⁴ Ní ngaⁿ'a Jesús ngii yā saⁿ'ā s'eeⁿ: Co- mida yeⁿ'é chíⁿ chí cuuví diíⁿ tan'dúúcā chí neⁿ'ē 'iiⁿyāⁿ chi dichó'o yā 'úú. Ní di'cuiinu ntiíⁿ'nyuⁿ yeⁿ'é yā. ³⁵ Ngaⁿ'a ndis'tií: ¿'Áá nguéé véé cá tá cuūⁿ 'iiyū taachi ndaá tiempo yeⁿ'ē cosecha? N'diichí nī. 'Úú ngaⁿ'á ngii ndís'tií: N'diichí nī cuaaⁿ 'niiⁿ'nuⁿ. Snaāⁿ nī cuééti yeⁿ'é nī. 'Áā ndaa nguuvi chi diíⁿ nī cosechar. ³⁶ 'Iiⁿyāⁿ chi nadacuéeⁿ yā cosecha vεe chíi'vεe yeⁿ'é yā. Ní véé n'gui'i yeⁿ'é yā chi cūnee cueⁿ'e daāⁿ- maⁿ. Nífcú 'iiⁿyāⁿ chí niinu yā ndúúcu 'iiⁿyāⁿ chi nadacuéeⁿ yā cosecha ní nduu 'uuví yā yeenú taaví yā. ³⁷ Caati chuū chi cuaacu nífcúnyúⁿ chi nduudu cuaacu: 'Áámá 'iiⁿyāⁿ ní ngiinu yā ni táámá yā ní nadacuéeⁿ yā. ³⁸ 'Úú nidicho'ó ndís'tií ní nadacuéeⁿ nī cosecha chi nguéé ndiíⁿ

nī ntiiⁿnyuⁿ. Táámá yā dííⁿ yā ntiiⁿnyuⁿ. Ní ndís^{tii} chí ndaá nī tuu^{ví} nī ntiiⁿnyuⁿ ndííⁿ yā.

³⁹ Ni neené 'yaaⁿ 'iiⁿyāⁿ samaritanos yeⁿé yāáⁿ miiⁿ s'teenú yā Jesús cucáá^{vā} nduudu yeⁿe n'daātāⁿ miiⁿ chí caⁿa yā nduudu cuaacu: 'Iiⁿyāⁿ mííⁿ ní caⁿa yā chíi yā 'úú tanducuéⁿé cosa chí ndííⁿ. ⁴⁰ Ndaa saⁿā samaritanos nanááⁿ Jesús. Dí'cuífú sa 'iiⁿyāⁿ chí canéé yā ndúúcu sa. Ní canéé yā miiⁿ 'uuvi nguuvi. ⁴¹ Neené 'yaaⁿ cá yā s'teenú yā cucáá^{vā} nduudu yeⁿe Jesús. ⁴² Níícu 'iiⁿyāⁿ s'eeⁿ ngaⁿa yā ngii yā n'daataá miiⁿ: 'Āā ntéé cu'teenú 'nū caavā chí ch'iindiveéⁿ 'nū chí cuaacu nííⁿnyúⁿ nguéé dámaaⁿ yeⁿe chí ngaⁿā di. Caati maáⁿ 'nū n'diichí 'nū ní ch'iindiveéⁿ 'nū chí cuaacu nííⁿnyúⁿ chí 'iiⁿyáⁿ 'cūū nguuvi Cristo chí in-adan^{guá}'ai yā 'iiⁿyāⁿ yeⁿe iⁿ'yeeⁿdí 'cūū.

Jesús dííⁿ yā chí nduuvā yeⁿe daiya 'áámá rey

⁴³ Ch'íínú 'uuvi nguuvi ní Jesús cueⁿé yā yáⁿā Galilea. ⁴⁴ Caatí maaⁿ Jesús miiⁿ caⁿa cuaacú yā chí 'iiⁿyāⁿ nguéé dííⁿ yā honrar 'áámá 'iiⁿyāⁿ profeta taachi ngaⁿa yā yāáⁿ vaacú yā. ⁴⁵ Ní ndaá yā yáⁿā Galilea ní 'iiⁿyāⁿ yeⁿe yáⁿā Galilea miiⁿ tuu^{mi} dí'cuúⁿ yā chí canéé yā. 'Āā n'diichí yā tanducuéⁿé chí dííⁿ yā na yááⁿ Jerusalén, nguuvi yeⁿe 'vi-icu yeⁿe pascua, caati 'iiⁿyāⁿ s'uúⁿ cheⁿe ntuúⁿ yā 'viicu miiⁿ.

⁴⁶ Ndaa ntūⁿ Jesús na yááⁿ Caná yeⁿe yáⁿā Galilea naachi díⁿdái yā vino ndúúcu nuūⁿní. Mííⁿ canéé 'áámá rey yeⁿe yááⁿ Capernaum. Ngiitā 'áámá daiya rey miiⁿ. ⁴⁷ 'Iiⁿyáⁿ 'cūū mííⁿ ch'iindiveéⁿ yā chí ndaá Jesús yeⁿé yáⁿā Judea na yáⁿā Galilea. Cheⁿé yā nanááⁿ Jesús ní dí'cuífú yā 'yā chí caⁿa yā n'diichí yā daiya sa chí nanduū^{vā} yeⁿé caati 'aa cháá 'cuuvi. ⁴⁸ Tuu^{mi} ní ngaⁿā Jesús ngii yā saⁿā: Ndúúti chí

nguéé snaaⁿ di señales ndúúcu milagros chí vaadi n'giinu nguéé cu'téenu di.

⁴⁹ 'Iiⁿyāⁿ yeⁿe rey ngaⁿá yā ngii yā Jesús: Señor, cú'u yú caati 'āā cuéé 'cuūví saⁿā 'lííⁿ yeⁿé.

⁵⁰ Ngaⁿā Jesús ngii yā 'iiⁿyāⁿ: Cúnaⁿa di, daiya dí cánduuchi sa. Ní saⁿā miiⁿ ní chítéenu sa nduudu chí caⁿā Jesús miiⁿ. Ní cuinaⁿa sa. ⁵¹ Taachi 'āā ndaa niiⁿnuúⁿ vaacu sa 'iiⁿyāⁿ chí idiíⁿ mandado yeⁿé sa can'dáa yā n'diichi yā saⁿā. Ní ngaⁿa yā ngii yā saⁿā: Daiyá ní miiⁿ candúúchi sa.

⁵² Tuu^{mi} ní itinguunéⁿ sa 'iiⁿyāⁿ s'eeⁿ: ¿Deⁿé hora naachi cuaáⁿ yeⁿé sa? Níícu ngaⁿa yā ngii yā saⁿa: 'Iicu taachi n'geecu 'áámá ní ch'iinu 'iⁿnūúⁿ miiⁿ sáⁿā.

⁵³ Tuu^{mi} ní chiida saⁿā 'lííⁿ miiⁿ tu-umicádíínuuⁿ yā chí hora miiⁿ chí ngaⁿa Jesús ngii yā: Daiya dí ní cánduuchi sa. Ní 'iiⁿyāⁿ miiⁿ ndúúcu nducyaaca familia yeⁿe yā s'téenu yā Jesús.

⁵⁴ Chuū ndii 'úúví señal chí Jesús dííⁿ yā cuayiivi chí ndáa yā yeⁿe yáⁿā Judea ndii yáⁿā Galilea.

Saⁿā chí nguée ngii ngíicá

5 Chó'oo tanducuéⁿé cosa 'túúca. Véé 'áámá 'viicu yeⁿé 'iiⁿyāⁿ Israel. Níícu Jesús cuchée yā yááⁿ Jerusalén. ² Mííⁿ canéé 'áámá viini ch'εεte niiⁿnuⁿ cheendi chéeⁿ, cuaaⁿ naachí indáa yā ndúúcu 'iiti cuūchí chí n'diicui yā na yááⁿ Jerusalén. Viini ch'εεte miiⁿ nguuvi Betesda na nduudu hebreo. Véé nyuⁿu corredor nuuⁿ-maⁿ ndiivi viini ch'εεte. ³ Na corredor miiⁿ ndiitú ndúúcu n'deée n'dái 'iiⁿyāⁿ ngítá; 'iiⁿyāⁿ n'gueenááⁿ, ndúúcu 'iiⁿyāⁿ chí nguéé ngii ngiicá yā, ndúúcu 'iiⁿyāⁿ chí ntíⁿ ta'á yā o ca'a yā. 'Iiⁿyāⁿ miiⁿ canéé ngíínú yā chí inⁿnuⁿ nuūⁿní. ⁴ Caati veε tiempo chí 'áámá ángel nch'eéⁿ yā níícu idiⁿúⁿu yā nuūⁿní chí snéé ná viini ch'εεte. Ní cuayiivi 'iiⁿyāⁿ chí ndáa yā vmnááⁿ vmnaaⁿ cheetí viini

míiⁿ nanduuva yeⁿé yā yeⁿē 'āā de'é nūuⁿ ca'āi chi ndii yā. ⁵ Ní miiⁿ canéé 'áámá sáⁿā ndiicú nditiⁿyuⁿ 'iinu ndúuyū chí ngiitā sa. ⁶ Taachí Jesús n'diichí yā saⁿā chí candíití sá, nífcú 'āā deenú yā chí 'āā 'naáⁿ ngiitā sa, tuuⁿmi ní ngaⁿa yā ngii yā saⁿā: ¿'Áá néⁿé dí chí nduūvā yeⁿē dí?

⁷ Ní saⁿā chí ngiitā miiⁿ nan'guēcútaⁿā sa yeⁿé yā: Señor, nguéé mar 'áámá saⁿā chí cu'nuūⁿ sa 'úú chééti viini taachi f'nuⁿu nuūⁿniⁿ. Caati taachí ndaá, 'āā ndāā taamá yā chéeti viini.

⁸ Ní ngaⁿa Jesús ngii yā saⁿā: Nacuéeⁿ di. Nadacuéeⁿ di yiive yeⁿē di ní cunaⁿa di.

⁹ Tuuⁿmi nūuⁿ nduūvā yeⁿē sa. Ní nadacuéeⁿ sa yiive yeⁿē sa. Ní cunaⁿa sá. Ní nguuví miiⁿ ní sábadó nguuví chí ntaaviⁿtuunúuⁿ 'iiⁿyāⁿ Israel. ¹⁰ Nífcú 'iiⁿyāⁿ Israel ngaⁿa yā ngii yā saⁿā chí 'āā nanduuvá yeⁿē sa: Caati maaⁿ ní sábadó miiⁿ, tan'dúucā chí caⁿa ley, nguéé cuuví nandéé di yiive yeⁿē di.

¹¹ Ní n'guēcútaⁿā sa yeⁿé yā: 'Iiⁿyāⁿ chí díⁿ yā chí nduūvā yeⁿé, 'iiⁿyāⁿ miiⁿ ní ngaⁿa yā ngii yā 'úú: Nadacuéeⁿ di yiive yeⁿē di. Ní cuinaⁿa di.

¹² Tuuⁿmi ní tiinguunééⁿ 'iiⁿyāⁿ Israel saⁿā: ¿Du'ú chí 'tífcā ngaⁿā ngii di: Nadacuéeⁿ di yiive yeⁿe di, ní cuinaⁿa di?

¹³ Nífcú saⁿā chí 'āā nduūvā yeⁿē sa nguéé déenú sá du'ū 'iiⁿyāⁿ miiⁿ, caati Jesús diví yā yeⁿe saⁿā miiⁿ. Ní neené n'deēē 'iiⁿyāⁿ snéé yā miiⁿ. ¹⁴ Cuayivi Jesús nandaacá yā saⁿā na yáácū templo. Ní ngaⁿa Jesús ngii yā saⁿā: Cun'díichí dí maaⁿ 'āā nduūvā yeⁿē di. 'Aa ntéé díⁿ di nuuⁿndi niicu nguéé cuta'āa táámá ca'ai chí más cā taaⁿ di.

¹⁵ Tuuⁿmi saⁿā miiⁿ cunaⁿā sa ní caⁿa sa chí sa 'iiⁿyāⁿ Israel chí Jesús chí díⁿ yā chí ndúūvā yeⁿe sa. ¹⁶ Ni cáávā chuū ní can'dāā 'iiⁿyāⁿ Israel Jesús miiⁿ chí neⁿé sa 'caaⁿnúⁿ sa 'iiⁿyāⁿ caati díⁿ yā cosa chí 'tífcā miiⁿ ngu-

uvi chí sábadó chí ntaaviⁿtúúnuuⁿ 'iiⁿyāⁿ. ¹⁷ Jesús nan'guēcútaⁿa yā yeⁿē sa: Chiidá ní ndíi maaⁿ chí idiíⁿ cá yā ntiiⁿnyuⁿ. Ní 'úú idiíⁿ ntiiⁿnyuⁿ dendu'ū.

¹⁸ Tuuⁿmi ní 'iiⁿyāⁿ Israel neⁿe taaví sa 'caaⁿnúⁿ sa Jesús, caati nguéé damaāⁿ chí nguéé díⁿ yā cumplir chí ngaⁿā na ley yeⁿe sábadó, caati ngaⁿā yā chí Dendyuūs Chiidá yā, ní díⁿ yā chí nduvidáámá yā ndúúcu Dendyuūs.

Dendyuūs dicho'ó yā Daiya yā

¹⁹ Nan'guēcútaⁿā Jesús ní ngaⁿa yā ngii yā saⁿā: Cuaacu níⁿnyúⁿ, cuāácū niⁿnyuⁿ chí ngaⁿā ngii ndis'tií chí nguéé cuuvi díⁿ Daiyá Dendyuūs mar 'áámá cosa dámaāⁿ ndúúti chí nguéé n'diichí yā chí díⁿ Chiidá yā. Caati tanducuéⁿē chí díⁿ Chiidá yā, 'tiicá ntúūⁿ díⁿ Daiyá yā. ²⁰ Caati Dendyuūs Chiidá ní dinéⁿe yā 'úú chí Daiya yā. Ní n'giⁿi yā 'úú tanducuéⁿe dendu'ū chí díⁿ yā. Niicu Chiidá n'giⁿi cá yā 'úú ntiiⁿnyuⁿ n'geete ca nguéé tii chuū. Nífcú ndis'tií caⁿa yífnú nī yeⁿē. ²¹ Tan'dúucā Chiidá nadacuéeⁿ yā 'iiⁿyāⁿ chí 'āā n'dii ní nga'a yā vida yeⁿé yā, 'tiicá ntúūⁿ 'úú Daiyá yā ní nadacuéeⁿ 'iiⁿyāⁿ chí 'āā n'díí ní nga'á vida 'iiⁿyāⁿ miiⁿ chí neⁿé nga'á. ²² Caati Chiidá nguéé díⁿ yā juzgar mar 'aama 'iiⁿyāⁿ naatí ca'á yā 'úú chí Daiya yā chí díⁿ juzgar tanducuéⁿē. ²³ Caati tanducuéⁿē 'iiⁿyāⁿ díⁿ yā honrar 'úú chí Daiyá yā tan'dúucā tanducuéⁿē 'iiⁿyāⁿ díⁿ yā honrar Chiidá. Du'ū chí nguéé idiíⁿ yā honrar 'úú chí Daiyá Dendyuūs ní nguéé idiíⁿ yā honrar Chiidá chí dicho'ó yā 'úú.

²⁴ Cuaacu níⁿnyúⁿ, cuāácū niⁿnyuⁿ ngaⁿā ngii ndis'tií: 'Iiⁿyāⁿ chí n'giindiveéⁿ yā nduudu chí ngaⁿā, ní i'téenu yā yeⁿe 'iiⁿyāⁿ chí dicho'ó 'úú, véé vida cueⁿe daāⁿmaⁿ yeⁿé yā. Niicu nguéé condenado yā. Nguéé canee yā dácaā yeⁿē chí n'gii caati véé vida cueⁿe daāⁿmaⁿ yeⁿé yā. ²⁵ Cuaacu níⁿnyúⁿ, cuāácū niⁿnyuⁿ ngaⁿā ngii

ndís'tii: Cuchii hora ní hora miiⁿ chuū taachi 'iiⁿyāⁿ s'eeⁿ chi 'āā n'díí yā, 'caandiveéⁿ yā nduudu yeⁿe 'úú chi Daiyá Dendyuūs. 'Iiⁿyāⁿ chí i'teenu yā nduudu yeⁿe cunduuchí yā cueⁿe daāⁿmaⁿ.²⁶ Tan'dúúca Chiidá véé vida yeⁿe maáⁿ yā, 'tíicá ntúúⁿ ca'a yā 'úú chi Daiya yā vida yeⁿe maáⁿ.²⁷ 'Tíicā ca'á yā poder 'úú chi dííⁿ juzgar 'iiⁿyāⁿ caati 'úú Saⁿā chi Daiya Dendyuus 'úú.²⁸ Nguéé caⁿā yiinu di yeⁿe chūū, caati cuchii hora taachi nducyáacá 'iiⁿyāⁿ chi chinúu yā maaⁿ yaⁿā 'caandiveéⁿ yā nduudu yeⁿe.²⁹ Ní nadacuéⁿ yā yeⁿe nguuaⁿ tináⁿā. 'Iiⁿyāⁿ chi dííⁿ yā chi n'daacā, ní caⁿá yā cuneé yā ndúúcu vida cueⁿe daāⁿmaⁿ yeⁿe yā. Ní 'iiⁿyāⁿ chi nguéé n'daacā idííⁿ yā, caⁿá yā na condenación.

'Iiⁿyāⁿ s'eeⁿ caⁿa cuaacú yā yeⁿe Jesús

³⁰ Ní caⁿa Jesús: 'Úú ní damaáⁿ ní nguéé deⁿe veé cuuvi dííⁿ. Tan'dúúca chi n'giindiveéⁿ, 'tíicā dííⁿ juzgar. Ní chi dííⁿ juzgar ní cuaacu caati nguéé in'nuúⁿ chi neⁿe maáⁿ naati chi neⁿe maāⁿ Chiidá chi dichó'o yā 'úú.³¹ Ndúúti chi yeⁿe maaⁿ chi ngaⁿá cuaacu ní nguéé cuaacu.³² Táamá 'iiⁿyāⁿ chi dííⁿ yā caaⁿmaⁿ cuaacú yā yeⁿe 'úú. 'Úú ní deenú tii chí ngaⁿa yā yeⁿe 'úú chi cuaacu.³³ Ní ndís'tii ní dichó'o ní 'iiⁿyāⁿ s'eeⁿ nanááⁿ Juan. Ní Juan miiⁿ caⁿa sa nduudu cuaacu yeⁿe 'úú.³⁴ Caati 'úú nguéé ita'á nduudu cuaacu yeⁿe sáⁿā yeⁿe iⁿ'yeeⁿdí 'cūū naati ngaⁿá tanducueⁿe chuū caati ndís'tii ní cuuvi nanguáⁿai ní.³⁵ Níicú Juan chi cheédínuⁿniⁿ yā 'iiⁿyāⁿ miiⁿ tan'dúúca 'áámá chi deeve ngiichi ní ngíí n'gai, 'tíica yā. Ní ndís'tii ní dinéⁿe ní vaadi yeenú yeⁿe ní 'áámá tiempo ndúúcu chi deeve yeⁿe yā.³⁶ Naati 'úú ní ngaⁿá nduudu cuaacu chi ch'ete ca chi caⁿa Juan miiⁿ caati ntiⁿnyuⁿ chi teé Chiidá 'úú, ní chuū idííⁿ. Tan'dúúca maāⁿ ntiⁿnyuⁿ chi dííⁿ

ní ngaⁿā nduudu cuaacu yeⁿe chí Chiidá dichó'o yā 'úú.³⁷ Níicú maaⁿ Chiidá chí dichó'o yā 'úú ngaⁿa yā nduudu cuaacu yeⁿe 'úú. Nds'tii mar 'áámá vmnéⁿeé nguéé n'giindiveéⁿ ní nduudu yeⁿe chiidá, ndíí nguéé ndúú n'diichí ní 'iiⁿyāⁿ taacá yā.³⁸ Ní ndís'tii ní nguéé 'áámá canéⁿ ní ndúúcu nduudu yeⁿe yā caati ndís'tii nguéé s'téenu ní chí 'úú ní 'iiⁿyāⁿ chí Dendyuūs dichó'o yā.³⁹ In'nuúⁿ ní naachi cánéé nguūⁿ na libro yeⁿe Ndyuūs, níicú cadiinúúⁿ ní chí véé vida cueⁿe daāⁿmaⁿ yeⁿe ní. Ní mííⁿ ngaⁿā cuaacu yeⁿe 'úú.⁴⁰ Nds'tii nguéé neⁿe ní chí ní nanaáⁿ tii cuūví vida cueⁿe daāⁿmaⁿ yeⁿe ní.

⁴¹ 'Úú ní nguéé cuta'á honra yeⁿe saⁿā yeⁿe iⁿ'yeeⁿdí 'cūū.⁴² Naati 'úú ideenú táácā ndís'tii ní nguéé neⁿe ní Dendyuūs.⁴³ 'Úú ní cuchii ndúúcu chí duuchi Chiidá. Ní nguéé 'cuaaⁿ ní ndís'tii 'úú. Ndúúti chí taamá yā cuchii yā ndúúcu nduudu yeⁿe maáⁿ yā, tuuⁿmi ní 'cuaáⁿ ní 'iiⁿyāⁿ miiⁿ.⁴⁴ ¿Táácā cu'téenu ndís'tii chí dííⁿ ní honrar 'áámá ní yeⁿe taamá ní ní nguéé neⁿe ní chí Dendyuūs dííⁿ yā honrar n'dii? ⁴⁵ Nguéé nadacadínuuⁿ ndís'tii chí 'úú ngaⁿá nuuⁿndi yeⁿe ndís'tii nanááⁿ Chiidá. Véé 'áámá 'iiⁿyāⁿ chí ngaⁿa nuuⁿndi yeⁿe ndís'tii chí Moisés chí 'iiⁿyāⁿ chí i'téenu ní.⁴⁶ Ndúúti chí ndís'tii chí'téenu ní yeⁿe Moisés miiⁿ tuuⁿmi ní cu'téenu ní 'úú caati yeⁿe 'úú chí dingúuⁿ sa.⁴⁷ Ndúúti chí nguéé i'téenu ní chí dingúuⁿ Moisés, ¿táaca cu'téenu ní nduudu yeⁿe 'úú?

Jesús ca'á yā chí che'é nyuⁿu mil saⁿā
(Mt. 14.13-21; Mr. 6.30-44; Lc. 9.10-17)

6 Cho'o cosa chuū, ní cueⁿe Jesús taama lado yeⁿe nuuⁿniⁿyāⁿ Galilea chí nguuvi ntúūⁿ Tiberias.² Néené n'deé 'iiⁿyāⁿ cueⁿe yā n'dáa yā Jesús caati n'diichí yā señales yeⁿe yā chí dííⁿ yā ndúúcu 'iiⁿyāⁿ chí ngiitā.³ Ní cuchee Jesús 'áámá cuéeti ní mííⁿ

ch'iindí yā ndúúcū discípuos yeⁿé yā. ⁴Ní chinee niiⁿnuúⁿ nguuví yeⁿe pascua yeⁿé 'iiⁿyāⁿ Israel s'eeⁿ. ⁵Tuu'mí n'diichi Jesús cuaaⁿ 'niiⁿnuúⁿ níícú snaaⁿ yā chí n'dee n'dáí 'iiⁿyāⁿ cuchíí yā nanáaⁿ yā. Ní Jesús ngaⁿa yā ngii yā Felipe: ¿Tíí caⁿa yú cuaí yú pan chí che'e 'iiⁿyāⁿ s'tíí?

⁶Ní chuū Jesús ngaⁿa yā ti dííⁿ yā probar saⁿā miiⁿ táácā dííⁿ sá maāⁿ sa, caati Jesús maáⁿ yā deenú yā de'ē chí dííⁿ yā. ⁷Nan'guēcútaⁿa Felipe miiⁿ yeⁿé yā: Ndúúcū nyuⁿu ciento caadi tuūmí chí caⁿá nguaí pan nguéé tunééⁿ chí cuta'á 'iiⁿyāⁿ s'tíí 'aama taaⁿ chí che'e yā.

⁸'Áámá discípuo yeⁿé yā chí ngúúví Andrés chí 'díínu yā Simón Pedro, ngaⁿa sá ngii sa Jesús: ⁹'Áámá saⁿā 'lííⁿ chí canee 'muuⁿ ndéé sa nyuⁿu panes cebada ndúúcū na 'uuví 'yaācā n'gaiyáá. ¿De'ē tunééⁿ chuū chí che'e 'iiⁿyāⁿ s'tíí?

¹⁰Tuu'mi ní nan'guēcútaⁿā Jesús miiⁿ ngaⁿa yā ngii yā saⁿā: Cúúví ní 'iiⁿyāⁿ s'tíí ní 'cuēeté núúⁿ yā. Nééné véé yuune lugar miiⁿ níícú ch'ēete 'áámá número tan'duucā nyuⁿu mil saⁿā. ¹¹Ní Jesús miiⁿ sta'á yā panes miiⁿ níícú taachi ngaⁿa yā ngii yā: Gracias N'dii Ndyuūs, tucá'a yā ca'a yā discípuos, ní discípuos ní ca'á yā 'iiⁿyāⁿ chí veēté miiⁿ. 'Tíicá ntúūⁿ dííⁿ Jesús ndúúcū 'yaācā. Ní 'iiⁿyāⁿ miiⁿ sta'á yā 'yaācā. Sta'á yā nducuéⁿē chí neⁿé yā. ¹²Taachi 'āā nteé véé chí neⁿe yā, Jesús ngaⁿa yā ngii yā discípuos yeⁿé yā: Nadicuééⁿ di nducuéⁿē tááⁿ panes chí nángaāva caati nguéé cuuvi ndáí de'ē vee.

¹³Nadicuééⁿ yā tanducuéⁿē taaⁿ panes chí nángaāva. Níícú chiitu ndiichúúví 'cuēetē naachi nyuⁿu pan cebada chí nángaāva naachí che'e 'iiⁿyāⁿ s'eeⁿ. ¹⁴Taachi n'diichi 'iiⁿyāⁿ s'eeⁿ seña chí dííⁿ Jesús miiⁿ tuu'mi ní ngaⁿa yā ngii yā ví'í: Cuaacu nííⁿnyúⁿ 'iiⁿyāⁿ 'cúú chí profeta chí canee chí ndaá yā iⁿyééⁿdi 'cūú.

¹⁵Taachí tuumicádíínuuⁿ Jesús chí 'iiⁿyāⁿ s'eeⁿ neⁿé yā cuta'á yā 'yā ní cu'néeⁿ yā 'yā lado yeⁿé rey tuu'mi ní cueⁿé máaⁿ yā na 'áámá cuēeti.

Jesús ngiica yā vmnaaⁿ nuūⁿníⁿyáⁿā

(Mt. 14.22-27; Mr. 6.45-52)

¹⁶'Āā chíí chíínū miiⁿ ní cueⁿe discípuos yeⁿé yā na nuūⁿníⁿyáⁿā. ¹⁷Ní chí ndaa yā 'áámá barco ní cueⁿé yā ná nuūⁿníⁿyáⁿā. Ní 'āā ntéé ndaá yā na yāāⁿ Capernaum. 'Āā chíí 'da'a ní nguéé ndāā Jesús naachi snée yā. ¹⁸Ní cho'ō 'aama 'yúúné taaⁿ ní nadācuééⁿ n'dai nuūⁿníⁿyáⁿā. ¹⁹Taachí 'āā cueⁿé yā tanduu nyuⁿu candúú nyaaⁿ kilómetros, tuu'mí n'diichí yā chí cúchii Jesús miiⁿ. Ngicá yā cuaaⁿ vmnaaⁿ nuūⁿníⁿ. Ní taachi 'aa cháá ndaa Jesús niiⁿnuúⁿ na barco miiⁿ discípuos díí'yā sá chíí. ²⁰Ní Jesús ngaⁿa yā ngii yā saⁿā s'eeⁿ: Nguéé 'va'ā ndís'tíí ti 'úú.

²¹Tuu'mí ngaⁿa sá ngii sa Jesús: Cho'ó ní cuaaⁿ cheeti barco. Yeenú n'dai sa chí sndaā Jesús na barco. 'Āā nuúⁿ ndaa barco miiⁿ na yáⁿāa naachí cuéⁿē.

'Iiⁿyāⁿ in'nuúⁿ yā Jesús

²²Chí deeve táámá nguuvi ní 'iiⁿyāⁿ chí snée yā táámá lado yeⁿe nuūⁿníⁿyáⁿā n'diichí yā 'áámá barco nūuⁿ, barco miiⁿ chí 'āā cueⁿē discípuos. Ní n'diichí yā chí nguéé cueⁿe Jesús ndúúcū discípuos yeⁿé yā. Ní discípuos yeⁿé yā cuinaⁿá yā dámaáⁿ yā. ²³Tan'duuví barcos yeⁿé Tiberias ndaā niiⁿnuúⁿ na lugar naachi ch'ēeté yā chí che'é yā pan 'iicū cuayivi chí Jesús ngāⁿa yā: Gracias n'dii Dendyuūs Chiidá. ²⁴Taachí 'iiⁿyāⁿ n'diichi yā chí nguéé Jesús miiⁿ ndíí nguéé ndúú discípuos yeⁿé yā, tuu'mi ní chí ndaá yā cheeti barcos. Ní cueⁿé yā na yāāⁿ Capernaum. N'nuūⁿ yā Jesús miiⁿ.

Jesús tan'dúucā yuündū chi ca'a vida

²⁵ Taachí 'iiⁿyāⁿ s'eeⁿ ndaacá yā Jesús táamá lado yeⁿē nuūⁿnīⁿyáⁿā tuuⁿmi ní ngaⁿa yā ngii yā 'iiⁿyāⁿ: N'diī Maestro, ¿tíí cuaⁿa ndaá nī 'muuⁿ?

²⁶ Nan'gueecútaⁿa Jesús yeⁿe yā ní ngaⁿa yā ngii yā: Nds'tiī, cuaacu níⁿnyúⁿ cuāacū nīⁿnyuⁿ nguéé in'nuúⁿ nī 'úú ti n'diichí nī chi díⁿ señales naati chí teé pan, ní che'é nī ní chiitu ndis'tiī. ²⁷ Nguéé díⁿ nī ntiīⁿnyuⁿ yeⁿe comida chí chó'oo ti yeⁿe comida chí cunéé cueⁿe daāⁿmaⁿ, chæ chí tee Saⁿā chí Daiya Dendyuūs ndis'tiī caati Dendyuūs Chiidá ca'á yā poder Daiyá yā.

²⁸ Tuuⁿmi ní ngaⁿa saⁿā s'eeⁿ ngii sá 'iiⁿyāⁿ: ¿Taacā díⁿ 'nū chí cuuví díⁿ 'nū ntiīⁿnyuⁿ chí ntiīⁿnyuⁿ yeⁿé Dendyuūs miiⁿ?

²⁹ Nan'gueecutáⁿā Jesús yeⁿē sa ní ngaⁿá yā ngii yā saⁿā: Chuū chí ntiīⁿnyuⁿ yeⁿe Dendyuūs miiⁿ chí cu'téenu di yeⁿē 'iiⁿyāⁿ chí Ndyuūs dichó'o yā 'iiⁿyāⁿ.

³⁰ Tuuⁿmí ngaⁿa sa ngii sa 'iiⁿyāⁿ: ¿De'e señal chí cu'neeⁿ nī chí snaáⁿ 'nū, ní cu'téenu 'nū n'diī? ¿De'e ntiīⁿnyuⁿ idiíⁿ nī? ³¹ Chiida yú ní che'é yā yuündū maná na yāⁿāa naachi nguéé ch'ëetinéé 'iiⁿyāⁿ tan'dúucā chí canéé nguūⁿ na libro yeⁿe Ndyuūs 'tíicā: Yuündū yeⁿē nanguuvi Ndyuūs ca'á yā chí che'é 'iiⁿyāⁿ s'eeⁿ.

³² Nan'gueecutáⁿā Jesús yeⁿē sa: Cuaacu níⁿnyúⁿ, cuāacū nīⁿnyuⁿ ngaⁿá ngii ndis'tiī: Nguéé teé yā Moisés miiⁿ yuündū chí maná chí yeⁿē nanguuvi, naati Chiidá teé yā n'diī pan chí cuaacu níⁿnyúⁿ chí yeⁿe va'ai chæti nguuvi. ³³ Caati pan chí yeⁿé Dendyuūs ní 'iiⁿyāⁿ miiⁿ chí inch'eléⁿ yā yeⁿe va'ai chæti nguuvi ní nga'á yā vida cueⁿe daāⁿmaⁿ yeⁿē 'iiⁿyāⁿ yeⁿeⁿ iⁿ'yeēⁿdī.

³⁴ Tuuⁿmi ní ngaⁿā sa ngii sa Jesús: Señor, téé nī pan 'cūū nús'uu cueⁿe daāⁿmaⁿ.

³⁵ Jesús ngaⁿa yā ngii yā saⁿā: 'Úú ní tan'dúucā pan 'tíicā 'úú ní ca'á vida cueⁿe daāⁿmaⁿ. Du'u chí chii nanaáⁿ nguéé cúuví cuiicú yā. Ní du'ú chí cu'teenu 'úú 'āā ntéé cuuví yaacá yā. ³⁶ Naati 'úú ní ngaⁿá ndis'tiī: 'Āā n'diichí nī 'úú, níicú ndí nguéé s'téenu ní 'úú. ³⁷ Tanducueⁿē 'iiⁿyāⁿ chí itée Chiidá 'úú, 'iiⁿyāⁿ s'tíí cuchii nanaáⁿ. Du'ú chí chii nanaáⁿ nguéé tun'daá 'iiⁿyāⁿ chuva'ai. ³⁸ Caati 'úú chiicá yeⁿē na va'ai chæte nguuvi ní nguéé díⁿ chí 'úú neⁿé maáⁿ, caatí díⁿ chí neⁿe maāⁿ 'iiⁿyāⁿ chí dichó'o yā 'úú. ³⁹ Chuú chí neⁿē Chiidá chí dichó'o yā 'úú, caati 'úú ní nguéé nindaí mar 'áamá yeⁿē tanducueⁿē chí tee yā 'úú. 'Úú ní nadin'duuchí tanducueⁿē 'iiⁿyāⁿ yeⁿe nguaaⁿ tináⁿā nguuvi chí 'cuiinū iⁿ'yeēⁿdī. ⁴⁰ Chuū chí neⁿe 'iiⁿyāⁿ chí dichó'o yā 'úú: Nducyaaca 'iiⁿyāⁿ chí n'diichí yā Daiya Ndyuūs, ní i'téenu yā 'iiⁿyāⁿ, véé vida cueⁿe daāⁿmaⁿ yeⁿé yā. Niicu 'úú ní nadicueⁿē 'iiⁿyāⁿ s'eeⁿ nguuvi chí 'cuiinū iⁿ'yeēⁿdī.

⁴¹ Tuuⁿmí ngaⁿā 'iiⁿyāⁿ Israel yeⁿé yā: Nguéé n'daacā chí ngaⁿa yā: 'Úú tan'dúucā pan chí cuch'eléⁿ nanguuvi, 'tíicā 'úú. ⁴² Ní ngaⁿa yā: ¿'Āā nguéé sáⁿa 'cūū chí Jesús daiya José? Ní n'diichi yú chiidá yā ndúucū chæcú yā. ¿Taacā chí ngaⁿā sa: 'Úú chí cuch'eéⁿ yeⁿe na va'ai chæti nguuvi?

⁴³ Ní Jesús nan'gueecútaⁿá yā yeⁿē sa, ní ngaⁿa yā ngii yā saⁿā: Nguéé caaⁿmáⁿ ndis'tiī nguááⁿ maáⁿ nī. ⁴⁴ Mar 'áamá 'iiⁿyāⁿ nguéé cuuvi ndaá yā nanaáⁿ ndúútí chí Chiidá chí dichó'o yā 'úú nguéé nndéé yā 'iiⁿyāⁿ. 'Úú nadan'duuchí 'yā nguuvi chí 'cuiinū iⁿ'yeēⁿdī. ⁴⁵ Canéé nguūⁿ na libro yeⁿē Ndyuūs naachi ngaⁿa profetas 'tíicā: Dendyuūs ca'cuaeⁿ yā nducyaaca yā. Nducyaaca 'iiⁿyāⁿ chí ch'iindiveéⁿ yā yeⁿē Chiidá ní 'āā cueⁿe yā yeⁿē Chiidá, cuchíí yā nanááⁿ 'úú.

⁴⁶ Mar 'áamá 'iiⁿyāⁿ 'āā n'diichí yā Chiidá, dámaaⁿ Cristo chí yeⁿe Dendyuūs

ti Daiyá Ndyuūs. 'Iiⁿyāⁿ 'cūū dámaaⁿ n'diichí yā Chiidá. ⁴⁷ Cuaacu níⁿnyúⁿ, cuāācū niiⁿnyuⁿ ngaⁿ'á ngii ndis'tíi: Du'ú chi i'téenu yā 'úú cunduuchí yā cueⁿe daāⁿmaⁿ. ⁴⁸ 'Úú tan'dúúca pan chi canduuchi, 'tíicá 'úú. ⁴⁹ Chiidá nī che'é yā pan maná na yáⁿā naachi nguéé 'iiⁿyāⁿ ní ch'ii yā. ⁵⁰ Chūū chi pan chi cuch'ééⁿ na va'ai cheeti nguuvi caatí 'iiⁿyāⁿ chi che'é yā yeⁿ'ē nguéé cuūvi yā. ⁵¹ 'Úú tan'dúúca pan chi canduuchi chí cuch'ééⁿ na va'ai cheeti nguuvi. Du'u 'iiⁿyāⁿ chí che'e yā pan 'cūū, cunduuchí yā cueⁿe daāⁿmaⁿ. Níicú pan miiⁿ chí 'úú caⁿ'á ní yuūtē yeⁿ'é maáⁿ. Chuū chí ca'á cáāvā vida yeⁿ'é 'iiⁿyāⁿ yeⁿ'e iⁿ'yeeⁿdí 'cūū.

⁵² Tuu'mi ní 'iiⁿyāⁿ Israel ch'ēccu cheendí sá nguuaⁿ maāⁿ sa: ¿Táácá cuuvi téé sá cuerpo yeⁿ'ē sa chí che'é 'nū?

⁵³ Tuu'mí ngaⁿ'a Jesús ngii yā saⁿ'ā: Cuaacu níⁿnyúⁿ, cuāācū niiⁿnyuⁿ ngaⁿ'á ngii ndis'tii: Nduuti chí nguéé che'e nī cuerpo yeⁿ'e Saⁿ'ā chí Daiya Dendyuūs ní nduuti chí nguéé cu'ú nī yuuúⁿ yeⁿ'ē sa, nguēē cūnee vida cueⁿe daāⁿmaⁿ ndúúcu nī. ⁵⁴ Du'u chí che'e cuerpo yeⁿ'é ní cu'u yuuúⁿ yeⁿ'é, cunéé vida cueⁿe daāⁿmaⁿ ndúúcu. Níicú 'úú nadicueéⁿ 'iiⁿyāⁿ s'eeⁿ nguuvi chí 'cuiinū iⁿ'yeeⁿdí.

⁵⁵ Caati cuerpo yeⁿ'é, cuaacu níⁿnyúⁿ yuūtē chí che'e yā. Ní yuuúⁿ yeⁿ'é, cuaacu níⁿnyúⁿ chí yuuúⁿ chí cu'u yā. ⁵⁶ Du'u chí che'e cuerpo yeⁿ'é ní cu'ú yuuúⁿ yeⁿ'é cunee yā nduucú, ní 'úú cunéé ndúúcu yā. ⁵⁷ Tan'dúúca chí Chiidá canduuchí yā ní dichó'o yā 'úú, ní 'úú canduuchí cáāvā 'iiⁿyāⁿ miiⁿ. 'Tiicá ntúūⁿ 'iiⁿyāⁿ chí che'e yā 'úú, 'iiⁿyāⁿ miiⁿ ní cunduuchi ntúúⁿ yā cáāvā 'úú. ⁵⁸ Chūū pan chí cuch'ééⁿ yeⁿ'ē na va'ai cheeti nguuvi. Nguéé tan'dúúca pan maná chí che'e chiidá nī miiⁿ tiempo chí 'āā chó'oo ní ch'ii yā. Du'u chí che'e pan 'cūū canduuchí yā cueⁿe daāⁿmaⁿ.

⁵⁹ Chuū chí caⁿ'a Jesús na yáacū sinagoga taachi cueⁿ'é yā na yáāⁿ Capernaum.

Nduudu yeⁿ'e vida cueⁿ'e daāⁿmaⁿ

⁶⁰ Tuu'mi n'deeē n'dái discípulos yeⁿ'é yā taachi ch'iindiveéⁿ yā chuū ní caⁿ'a yā: Cheechí 'téē nduudu 'cūū. ¿Du'ú rá 'caandiveeⁿ rá?

⁶¹ Taachí déenú maāⁿ Jesús chí discípulos yeⁿ'é yā indeē sa nguááⁿ maāⁿ sa yeⁿ'e chūū tuu'mi ní ngaⁿ'á yā ngii yā saⁿ'ā s'eeⁿ: ¿'Áá chuū chí nguēē ineéⁿ nūⁿ ndís'tii? ⁶² ¿De'ē ca díⁿ ndis'tii, taachí n'diichí nī Saⁿ'ā chí Daiya Dendyuūs chí che'e sa na va'ai cheeti nguuvi naachí canéé sa vmnááⁿ vmnaaⁿ? ⁶³ Espíritu chuū chí nga'a vida yeⁿ'é 'iiⁿyāⁿ ní 'iiⁿyāⁿ canéé ndúúcu espíritu yeⁿ'é yā. Yuūtē miiⁿ nguéé de'ē vee idiiiⁿ. Nduudu chí ngaⁿ'á ngii ndis'tii, ní yeⁿ'ē espíritu ní ca'a vida 'iiⁿyāⁿ. ⁶⁴ Véé n'duuvi ndís'tii chí nguéé i'téenu nī. Caati Jesús ndíi cuaaⁿ vmnaaⁿ 'āā deenú yā du'ú 'iiⁿyāⁿ s'eeⁿ chí nguéé cu'téenu yā, níicú du'ú 'iiⁿyāⁿ chí díⁿ yā entregar 'iiⁿyāⁿ. ⁶⁵ Ní Jesús ngaⁿ'a yā: Cáāvā chuū chí ngaⁿ'á ngii ndís'tii, caati mar 'áámá 'iiⁿyāⁿ nguéé cuchíí yā nanaáⁿ ndúúti chí nguéé cáāvā chí Dendyuūs 'cuúⁿ yā 'iiⁿyāⁿ. ⁶⁶ Ndií tuu'mi, neené 'yaaⁿ discípulos yeⁿ'é yā ndaacadáámí sá ní 'āā ntéé cachiica sa ndúúcu Jesús. ⁶⁷ Tuu'mí ní ngaⁿ'a Jesús ngii yā saⁿ'ā chí ndiichúví: ¿'Áá neⁿ'é nī ntuūⁿ ndís'tii ndaacadáámí nī yeⁿ'é?

⁶⁸ Tuu'mi ní nan'gueécútaⁿ'ā Simón Pedro: Señor, ¿du'u chí caⁿ'ā ndúúcu 'nū? N'dií ní canéé nī ndúúcu nduudu yeⁿ'ē vida cueⁿ'e daāⁿmaⁿ. ⁶⁹ Nús'uu i'téenu 'nū ní deenú 'nū chí n'dií chí Cristo, Daiya Dendyuūs chí canduuchi cueⁿ'e daāⁿmaⁿ.

⁷⁰ Ní Jesús nan'gueécútaⁿ'á yā: ¿'Áá nguéé 'úú chí ndeēvé ndís'tii ndiichúví nī? Ní 'áámá chéé ndís'tii ní yááⁿ'guiniūⁿ.

⁷¹ Ní ngaⁿ'a yā yeⁿ'e Judas Iscariote, daiya Simón caati sáⁿ'a 'cūū chí canee chí

diiⁿ sa entregar 'iiⁿyāⁿ. Saⁿā miiⁿ 'áámá sá yeⁿē naachi ndiichúúvⁱ sá.

'Diinū Jesús nguée' i'teenú yā

7 Cho'ōo tanducueⁿē chuū, Jesús cachiicá yā na yáⁿāa Galilea. Nguée neⁿé yā cuchiicá yā na yáⁿāa Judea caati saⁿā Israel s'eeⁿ canée ngiinu sa chí 'caaⁿnúⁿ sa Jesús. ²Ní 'āa chinee niⁿnuúⁿ nguuvi 'viicu yeⁿē va'āi chí 'neeⁿ n'dáí yā arco yeⁿē testamento yeⁿē 'iiⁿyāⁿ Israel s'eeⁿ. ³Tuu'mí ní ngaⁿa 'dífnu yā ngii yā 'iiⁿyāⁿ: Nan'dáa di 'múúⁿ ní cueⁿe di na yáⁿāa Judea caati discípulos yeⁿē di cuuví snaaⁿ yā dendu'ū ntiiⁿnyuⁿ chí idiiⁿ di. ⁴Caati ndii 'áámá 'iiⁿyāⁿ nguée dífn yā 'áámá chí canúúⁿ n'de'ei. Nífcú maáⁿ yā ní neⁿé yā chí 'iiⁿyāⁿ n'diichí yā 'yā. Ndúúti chí dii chí diiⁿ di cosa chí 'tífcā tuu'mi ní 'cuuⁿmiⁿ di maáⁿ di nanááⁿ 'iiⁿyāⁿ yeⁿe iⁿ'yeeⁿdí 'cūū.

⁵Ní mar 'áámá 'dífnu yā nguée chí'teenú yā 'iiⁿyāⁿ. ⁶Tuu'mí ngaⁿa Jesús ngii yā saⁿā: 'Aa ntée véé chí 'aacu hora yeⁿé, caati tiempo yeⁿé nī 'āa canée. ⁷'iiⁿyāⁿ yeⁿē iⁿ'yeeⁿdí cuuvi n'diichí yā ndís'tiī. Nguée cuuvi n'diichí yā 'úú caati 'úú ní ngaⁿá cuaacú chee chí nguée n'daacā idiiⁿ 'iiⁿyāⁿ yeⁿe iⁿ'yeeⁿdí 'cūū. ⁸Ndís'tiī caⁿa nī 'viicú 'cūū. 'Úú ní nguε caⁿá maaⁿnguuví, caati 'āa cuée cunuūⁿ ca'a hora yeⁿé.

⁹Taachi ch'iinu caⁿa yā chii yā nduudú 'cūū 'dífnu yā, tuu'mi Jesús canée ca yā yáⁿāa Galilea.

Jesús cueⁿe yā 'viicu yeⁿē va'āi chí 'nee n'dáí yā arco yeⁿē testamento

¹⁰Taachi cueⁿé saⁿa 'dífnu yā 'viicu, 'tiicá ntúūⁿ miiⁿ ní cueⁿé Jesús cuayivi. Nguée ch'iⁿí yā chí Jesús miiⁿ. Cheⁿe n'de'ei núuⁿ yā. ¹¹Tuu'mi ní saⁿa Israel s'eeⁿ ní in'nuuⁿ sa 'iiⁿyāⁿ na 'viicu miiⁿ. Ní ngaⁿa sa: ¿Tífcánée 'iiⁿyāⁿ miiⁿ?

¹²'iiⁿyāⁿ yááⁿ miiⁿ neené n'deēe ngaⁿa yā yeⁿé yā. N'duuví yā ngaⁿa yā: 'Iiⁿyāⁿ miiⁿ n'dai taavi yā. Ta n'duuví yā ngaⁿa yā: Nguée, caati nginnche'í yā 'iiⁿyāⁿ.

¹³Mar 'áámá saⁿā chí cheⁿe sa 'viicu nguée caⁿa sa yeⁿé yā ti 'va'a sa 'iiⁿyāⁿ Israel.

¹⁴Chí maⁿā 'viicu, tuu'mi ní Jesús cucheé yā cheeti yáacū templo ní chí'cueeⁿ yā. ¹⁵Nífcú saⁿa Israel ngeⁿe yiinu sa ní ngaⁿā sa: ¿Táácā déenu sáⁿa 'cūū letras caati sáⁿa 'cūū nguε 'née sa?

¹⁶N'guεcútaⁿa Jesús ní caⁿa yā: Chiiⁿ chí ngí'cueéⁿ chí deenú ní nguée yeⁿé, ti yeⁿe 'iiⁿyāⁿ chí dichó'o yā 'úú. ¹⁷Ndúuti chí 'iiⁿyāⁿ neⁿé yā dífn yā voluntad yeⁿé Dendyuūs, tuu'mi ní deenú yā chí ngí'cueéⁿ nduuti chí yeⁿé Dendyuūs o nduuti chí 'úú ngaⁿá yeⁿē maáⁿ. ¹⁸'iiⁿyāⁿ chí ngaⁿa yā yeⁿē maáⁿ yā in'nuúⁿ yā poder yeⁿē maáⁿ yā. Naati 'iiⁿyāⁿ chí in'nuúⁿ yā poder yeⁿe 'iiⁿyāⁿ chí dichó'o yā 'yā, 'iiⁿyāⁿ miiⁿ ní cuaacú yā. Ní nguée chí nguée cuaacu nduucú yā.

¹⁹¿'Áá nguée ca'a Moisés ndís'tiī yeⁿē ley? Ní mar áámá ndís'tiī nguée idífn nī chí ngaⁿa ley miiⁿ. ¿De'ē cáávā chí neⁿe 'caaⁿnuⁿ ndís'tiī 'úú?

²⁰N'guεcútaⁿā 'iiⁿyāⁿ ní caⁿa yā Jesús: Yááⁿn'guiinūūⁿ canée ndúucú di. ¿Du'ū idiiⁿ núúⁿ yiinu chí neⁿé 'caaⁿnūⁿ dii?

²¹Jesús ní n'guεcútaⁿa yā ní ngaⁿa yā ngii yā 'iiⁿyāⁿ: Dífn 'áámá ntiiⁿnyuⁿ ní nducyaaca ndís'tiī ngeⁿe yiinu nī. ²²Cuaacu chí Moisés miiⁿ tee sa ley yeⁿe circuncisión ndís'tiī. (Nguée chífn yeⁿē Moisés miiⁿ chí yeⁿē chiidá nī.) Ní sábadó chí nguuvi chí 'iiⁿyāⁿ Israel ntaavi'tuunúúⁿ yā, ndís'tiī idífn nī circuncidar saⁿā 'lífⁿ. ²³Ndúuti chí cuaáⁿ nī chí dífn yā circuncidar saⁿā 'lífⁿ nguuvi sábadó caati ley yeⁿē Moisés canée chí dífn nī cumplir, ¿de'ē induuvi táaⁿ nī nduucú caati sábadó idífn chí nduūvā

n'dáacā ye^{ne} 'áamá sa^{na}? ²⁴ Nguéé dííⁿ nī juzgar tan'dúúcā chi nadacadíínuuⁿ nī naati dííⁿ nī juzgar chi cuaacu ndúúcū chi n'daí miiⁿ.

¿'Áá sa^{na} miiⁿ chi Cristo?

²⁵ Tuu'mí nga^{na} n'duuví 'ii^{nyā} ye^{ne} yáāⁿ Jerusalén: ¿'Áá nguéé 'ii^{nyā} 'cúū chí ne^{ne} 'caaⁿnúⁿ yā? ²⁶ N'diichí nī. Jesús nguéé 'va'á yā nga^{na} yā nanááⁿ nducyáácā 'ii^{nyā}. Ní nguéé du'ū vee 'ii^{nyā} nga^{na} yā ngii yā yā. ¿'Áá cuaacu níⁿnyúⁿ chí 'ii^{nyā} n'geete chi nga^{na} nti- iⁿnyúⁿ yā ní déenú yā chí 'ii^{nyā} 'cúū chí cuaacu níⁿnyúⁿ chí Cristo? ²⁷ 'ii^{nyā} 'cúū deenu yú tíí ndiicá yā naati taachi ndi- icá Cristo miiⁿ, mar 'áamá 'ii^{nyā} n'guee deenú yā tíí ndiicá yā.

²⁸ Tuu'mí ní nga^{na} yuudu Jesús taachí chí'cueeⁿ yā na yáacu templo ní nga^{na} yā: Ndístíí, ní 'āā n'diichí nī 'úú. Ní 'āā deenú nī tíí yáāⁿ ye^{ne}. Nífcú 'úú ní nguéé cuchíí ye^{ne} maáⁿ, naati 'ii^{nyā} chí dichó'o yā 'úú ní cuaacú yā. Ndístíí nguéé n'diichí ní 'ii^{nyā} miiⁿ. ²⁹ Naati 'úú ní n'diichí 'ii^{nyā} miiⁿ caati 'úú ndiicá ye^{ne} yā, ní 'ii^{nyā} miiⁿ dichó'o yā 'úú.

³⁰ Tuu'mí ní idiíⁿ núuⁿ yiinu 'ii^{nyā} chí cuta'á yā Jesús naati mar 'áamá 'ii^{nyā} nguéé che'e ta'á yā Jesús, caati 'āā cuéé ndaa hora ye^{ne} yā. ³¹ Nífcú 'yaaⁿ n'daí 'ii^{nyā} ye^{ne} 'ii^{nyā} chí snéé miiⁿ chí'téenu yā Jesús. Ní nga^{na} yā ngii yā 'ii^{nyā} s'eeⁿ: Taachi ndaá Cristo miiⁿ, ¿'áá nguéé cuuvi dííⁿ yā más cā señales chí dííⁿ sá^{na} 'cūū?

Sa^{na} fariseos dicho'ó yā policías chí sta'á yā Jesús

³² Tuu'mí ní sa^{na} fariseos chí'iindiveeⁿ sa ye^{ne} 'ii^{nyā} chí neené n'dee nga^{na} yā 'túúcā ye^{ne} Jesús miiⁿ. Chiiduú n'geeté ndúúcū sa^{na} fariseos dicho'ó yā policías chí cuta'a sa Jesús. ³³ Tuu'mí ní Jesús nga^{na} yā ngii yā sa^{na} s'eeⁿ: 'Áā ntee 'nááⁿ cuneé ndúúcū ndístíí ní na^{na} 'n'diichí

'ii^{nyā} chí dichó'o yā 'úú. ³⁴ In'nuúⁿ nī 'úú ní 'āā ntéé ndaacá nī 'úú. Ní naachi 'úú caneeé, ndístíí ní nguéé cuuvi ndaa nī.

³⁵ Tuu'mí ní nga^{na} 'ii^{nyā} Israel nguaaⁿ maáⁿ yā: ¿Tíí cá^{na} 'ii^{nyā} 'cúū chí nguéé nindaaca yú 'ii^{nyā}? ¿'Áá ca^{na} yā n'diichi 'ii^{nyā} Israel chí cue^{ne} yā 'muuⁿ cue^{ne} yā miiⁿ yā nguaaⁿ 'ii^{nyā} chí n'guee ye^{ne} ndaata Israel ní ca'cueeⁿ yā 'ii^{nyā} miiⁿ? ³⁶ ¿De'e chí ntúúⁿ nga^{na} Jesús: In'nuúⁿ nī 'úú ní nguéé nindaaca nī 'úú; ní naachi 'úú caneeé, nguéé cuuvi cundaā ndístíí?

Yífcú ye^{ne} nuūⁿ chí canduuchi

³⁷ Ngúúví chí ch'iinū 'viicu chí'ete miiⁿ, Jesús cheendii yā ca^{na} díitú yā: Du'u chí yaaca chíí nanaáⁿ ní 'úú ca'á chí cu'u yā. ³⁸ Du'ū chí i'teenu 'uú, véé vida ye^{ne} yā. Ní vida caneeé tan'dúúcā 'áamá yífcú nuūⁿ chí ca'a vida cue^{ne} daāⁿ- maⁿ 'ii^{nyā} miiⁿ. Chuū canee nguūⁿ na libro ye^{ne} Dendyuūs.

³⁹ Ní chuū nga^{na} yā ye^{ne} Espíritu N'dai ye^{ne} Ndyuūs. 'ii^{nyā} chí cu'téenu yā Jesús caneeé chí cuta'á yā Espíritu N'dai ye^{ne} Ndyuūs. Ní Dendyuūs nguéé ca'a yā Espíritu N'dai ye^{ne} yā ti Jesús miiⁿ ní 'āā cuéé che^{ne} yā na va'ai cheeti nguuvi.

Véé división nguaaⁿ 'ii^{nyā}

⁴⁰ Tuu'mí ní neené 'yaaⁿ 'ii^{nyā} taachí chí'iindiveeⁿ yā chuū nga^{na} yā: Cuaacu níⁿnyúⁿ 'ii^{nyā} 'cúū chí profeta.

⁴¹ Ta n'duuví yā nga^{na} yā: 'ii^{nyā} 'cúū chí Cristo. Naati n'duuví yā nga^{na} yā: ¿'Áá ye^{ne} yā^{na} Galilea chí cánée chí ndaa Cristo? ⁴² ¿'Áá nguéé nga^{na} naachi caneeé nguūⁿ na libro ye^{ne} Ndyuūs chí Cristo ní cuchíí yā ye^{ne} ndaata ye^{ne} rey David, ní ye^{ne} yā^{na} 'lífⁿ Belén, yáāⁿ chí chíica David miiⁿ?

⁴³ Tuu'mí neene vee división nguaaⁿ 'ii^{nyā} cucáāvā Jesús miiⁿ. ⁴⁴ N'duuví 'ii^{nyā} ne^{ne} yā cuta'á yā Jesús naati mar 'áamá sa^{na} miiⁿ nguéé tuu'vi sa 'ii^{nyā}.

**Mar 'áamá sa"ā ndii tii"i
nguée i'téenu sa Jesús mii"**

⁴⁵ Policías ndaa sa nanáá"n chiiduú n'geeté ndúúcu sa"n'a fariseos. Ní 'ii"yā"n s'ee" ní nga"n'a yā ngii yā policías: ¿De'ē cuuvi chi nguée candéé nī sa"ā?

⁴⁶ Policías n'guēcutá"n'a yā 'ii"yā": Mar 'áamá sa"ā nguée nga"n'a sa tan'dúúca chi nga"ā 'ii"yā"n 'cúu.

⁴⁷ Tuu'mí sa"ā fariseos n'guēcuta"n'a sa policías: ¿'Áá nginnche'éi yā ntúu" ndis'tii"? ⁴⁸ ¿'Áá i'teenu n'duuví 'ii"yā"n chi ca"ā ntii"nyu"n yā o sa"ā fariseos nduudu Jesús mii"? ⁴⁹ 'Ii"yā"n chí nguée déenu yā chi cánéé nguū"n na ley, 'āā condenado 'ii"yā"n.

⁵⁰ Sá"ā mii"n nguuvi Nicodemo chi 'āā ndaa nanáá"n Jesús n'gaa"n, sa"ā mii"n cánéé sa ndúúcu yā. Tuu'mí nga"n'a Nicodemo ngii sa 'ii"yā": ⁵¹ ¿'Áá ley ye"ē yú cuuvi caa"ma"n nuu"ndi ye"n'e 'ii"yā"n, ndúúti chi nguée n'diichi di 'ii"yā"n, ní 'caandivee" dí ye"n'e 'ii"yā"n ní túúmícadínuu"n di chi dii"n yā?

⁵² Nan'guēcutá"n'a yā ní nga"n'a yā ngii yā sa"ā: ¿'Áá 'ii"yā"n ye"n'e yá"āa Galilea ntúu"n dii"? In'núú"n dí nícu' n'diichi di chi cánéé nguū"n na libro ye"n'e Ndyuūs caati ye"n'e yá"āa Galilea mar 'áamá vmné"ēe nguée can'dáá 'áamá profeta.

⁵³ Ní cuna"n'a nducyaacá yā na vaacu yā.

**'Áamá n'daataá chí
cue"n'e tá ndúúcu sa"ā**

8 Jesús mii"n ní cue"n'e yā cuééti chi ngu-
uvi Olivos. ² Tyaa"n tyaa"n chi dæeve
táámá nguuvi ndáa ntúu"n yā yaacū tem-
plo. Nuu"má"n yáā"n 'ii"yā"n ndaa yā nanáá"n
yā. Ch'iindí yā ní ca'cueé"n yā 'ii"yā"n
s'ee". ³ Tuu'mí ní ndaa n'duuvi sa"ā
chí ngi'cuee"n ley ndúúcu n'duuvi sa"ā
fariseos. N'dée sa nanáá"n Jesús 'áamá
n'daataá chí cyaadu tá ndúúcu 'aama
sa"ā chí 'āā 'niinivaacu. Níicú chí ca-

nee sa chi nuu"n sa tá"ā náávta"ā ye"n'e
'ii"yā"n s'ee". ⁴ Nga"n'a sa"ā s'ee": Maestro,
n'daataá 'cūú ní tunéé 'nū tá"ā ndúúcu
táámá sa"ā. ⁵ Naachi cánéé nguū"n ley
ye"n'e Moisés mii"n ní nga"n'a chí cuíttuú
'nū n'daataá chí 'tíicā. N'dií túúmi, ¿de'ē
nga"n'a n'dií?

⁶ Chuū nga"n'a sa"ā s'ee" chí ne"n'e sá
n'diichi sa táacā dii"n Jesús 'iicu tun'dáá
nuu"ndi sa ye"é yā. Jesús ní can'dii yā ní
dingúu"n yā na yá"āa mii"n ndúúcu ndu-
uita'á yā. Dií"n yā tan'dúúca chí nguée
ch'iindivee"n yā ye"n'e 'ii"yā"n mii". ⁷ Taachí
nitiinguunéé"n ntuū"n sá"ā 'ii"yā"n, tuu'mí
nanguaacundii yā ní nga"n'a yā ngii yā:
Du'ū ndis'tii chí nguée nuu"ndi ye"é nī,
cuta'á ní vmnáá"n vmaaa"n 'áamá túúu ní
ca'á ní tá"ā.

⁸ Can'díí ntuu"n yā ní dingúu"n ntúu"n yā
ná yá"āa. ⁹ 'Ii"yā"n chí ch'iindivee"n yā
chuu tuumicádínuu"n yā chí véé nuu"ndi
ye"é yā. Ní ca'áámá ca'áámá inan'daá yā,
'ii"yā"n ndiicúú 'āā ndíí ná ch'iinuu maa".
Nan'daā nducyaacá yā. Ní 'aa dámaa"n
Jesús canee yā ndúúcu tá"ā chí cánéé
naavta"ā. ¹⁰ Nacuee"n Jesús ní n'diichí yā
'āā ntéé du'ū vee ti 'āā dámaa"n n'daataá
mii". Ní nga"n'a yā ngii yā tá"ā: Dii
n'daataá, ¿tíí cánéé 'ii"yā"n chí tun'dáá
nuu"ndi yā ye"n'e di? ¿'Áá ndii 'áámá
'ii"yā"n nguēe nga"n'a yā nuu"ndi ye"n'e di?

¹¹ N'daata míf"n ní nga"n'a tá: Señor, mar
'áámá 'ii"yā". Tuu'mí ní Jesús nga"á yā
ngii yā tá"ā: 'Úú nguée caa"má"n nuu"ndi
ye"n'e di. Cuna"ā di ní 'āā ntéé dii"n nu-
u"ndi di.

Jesús chí dæeve i"yee"ndi

¹² Cuayiiivi Jesús ní nga"n'a ntúu"n yā
ngii yā 'ii"yā": 'Úú tan'dúúca dæeve ye"n'e
i"yee"ndi 'cūú, 'tíicā 'úú. Du'u chí can'daá
'úú nguée ca"n'a yā na maa"n caati cunéé
yā ndúúcu chí dæeve ye"n'e vida.

¹³ Tuu'mí ní nga"n'a sa"ā fariseos ngii
sa Jesús: Dii ní ye"n'e maa"n di nduudu

cuaacu chí ngaⁿā di. Nduudu chí ngaⁿā di nguée nduudu cuaacu.

¹⁴ Nan'gueecútaⁿā Jesús ngaⁿa yā ngii yā saⁿā: 'Úú ní ngaⁿā nduudu cuaacu yeⁿé maáⁿ. Nduudu chí ngaⁿā ní nduudu cuaacu miiⁿ. Deenú tíí ndiicá ní tíí caⁿá. Naati ndís'tií nguée déenu nī tíí ndiicá ní nguée déenu nī tíí caⁿá. ¹⁵ Ndis'tií ní ngaⁿa nī nuuⁿndi yeⁿe 'iiⁿyāⁿ dacaā 'iiⁿyāⁿ. Naati 'úú nguée ngaⁿā nuuⁿndi yeⁿe mar 'áámá 'iiⁿyāⁿ. ¹⁶ Nduúti chí 'úú ngaⁿā nuuⁿndi yeⁿe 'iiⁿyāⁿ, nduudu yeⁿé ní nduudu cuaacu chii, caati 'úú ní nguée damaāáⁿ ti 'úú ní ndúúcu Chiidá chí dichó'o yā 'úú. ¹⁷ Caati naachi canée nguūⁿ na ley yeⁿe nī naachi ngaⁿā na 'uuvi 'iiⁿyāⁿ, chii chí nduudu cuaacu. ¹⁸ 'Úú chí ngaⁿā nduudu cuaacu yeⁿé māaⁿ. Ní Chiidá chí dichó'o yā 'úú ngaⁿā yā nduudu cuaacu yeⁿé.

¹⁹ Tuu'mí ngaⁿā sáⁿā s'eeⁿ ngii sa Jesús: ¿Tíí canée Chiida dí? Nan'gueecútaⁿā Jesús: Nduuti chí nguée 'āā n'diichi nī 'úú, ndíí nguée ndúú 'āā n'diichi nī Chiidá. Nduúti chí 'āā n'diichi nī 'úú, 'tiicá ntúūⁿ 'āā n'diichi nī Chiidá.

²⁰ Nduúúú 'cūū ngaⁿā Jesús taachi canée yā naachi snūūⁿ cajas yeⁿe ofrendas. Tuu'mi ní taachí ngi'cueéⁿ yā cheeti yáácū templo mar 'áámá 'iiⁿyāⁿ inátuu'vi yā Jesús caati 'āā 'cuée cunuūⁿ ca'a hora yeⁿé yā.

Naachi 'úú caⁿá ndís'tií ní nguée cuuvi ndaá nī

²¹ Jesús ngaⁿa ntúūⁿ yā ngii yā saⁿā: 'Úú ní caⁿá ní ndís'tií in'nuúⁿ nī 'úú. Ná nuuⁿndi yeⁿe nī 'cūūvi nī. Naachi 'úú caⁿá ndís'tií ní nguée cuuvi ndaá nī.

²² Tuu'mi saⁿā Israel s'eeⁿ ngaⁿa sa: ¿'Áá 'caaⁿnuⁿ maáⁿ yā 'iiⁿyāⁿ caati ngaⁿa yā: Naachi 'úú caⁿá, ndís'tií nguée cuuvi ndaa nī?

²³ Tuu'mi ní Jesús ngaⁿa yā ngii yā saⁿā: Ndis'tií ní yeⁿe cuaaⁿ ndiia ndís'tií niicu 'úú ní yeⁿe cuaaⁿ 'niiⁿnuⁿ 'úú.

Ndis'tií ní yeⁿe iⁿ'yeeⁿdí 'cūū ndís'tií naati 'úú ní nguée yeⁿe iⁿ'yeeⁿdí 'cūū 'úú. ²⁴ Caavā chúū chí ngaⁿā ngii ndís'tií chí 'cuūvi nī na nuuⁿndi yeⁿe nī. Nduúti chí nguée cu'téenu nī chí 'úú chí Cristo miiⁿ tuu'mi ní na nuuⁿndi yeⁿe nī ní 'cuūvi nī.

²⁵ Ní ngaⁿa sa ngii sa 'iiⁿyāⁿ: ¿Díí du'ū díí? Tuu'mi ní Jesús ngaⁿa yā ngii yā saⁿā: Tan'dúúca nūūⁿ chí ngaⁿā ndii cuaaⁿ vmaaaⁿ, 'tíicā 'úú. ²⁶ Nééné n'deée dendú'ū chí canée chí caāⁿmaⁿ ndúúcu ndis'tií ní dííⁿ juzgar ndis'tií. 'iiⁿyāⁿ chí dichó'o yā 'úú, 'iiⁿyāⁿ mífⁿ chí cuaacu yā. Chífⁿ chí n'giindiveéⁿ yeⁿe yā, chiiⁿ ngaⁿā na iⁿ'yeeⁿdí 'cūū.

²⁷ 'iiⁿyāⁿ s'eeⁿ nguée tuumicádíinuⁿ yā chí 'iiⁿyāⁿ miiⁿ ní ngaⁿā yā yeⁿe Chiidá yā. ²⁸ Tuu'mí ngaⁿā Jesús ngii yā saⁿā: Taachí nadacuéⁿ nī Saⁿā chí Daiya Dendyuūs, tuu'mi ní cuuvi déenu nī chí 'úú. Nguée du'ū vee chí dííⁿ chí yeⁿe maáⁿ naati Chiidá chí'cueé yā 'úú. Ní chífⁿ chí ngaⁿā. ²⁹ Ní 'iiⁿyāⁿ chí dichó'o yā 'úú canée yā nduucú. Chiidá ní nguée chí'neeⁿ yā 'úú dámaáⁿ. Naati 'úú ní dííⁿ tanducuéⁿ chí neⁿ yā.

³⁰ Taachí ngaⁿā Jesús chuū nééné 'yaaⁿ 'iiⁿyāⁿ chí'téenu yā yeⁿé yā.

Nduūdū Cuaacu chí nanguaⁿai 'iiⁿyāⁿ

³¹ Tuu'mí ngaⁿā Jesús ngii yā saⁿā Israel seⁿe chí i'téenu sa 'yā: Nduúti chí ndís'tií cunée nī ndúúcu nduudu yeⁿé tuu'mi ní cuaacu chí ndis'tií discípulos yeⁿé. ³² Ní n'diichí nī nduudu cuaacu. Ní caavā nduudu cuaacú miiⁿ ndís'tií nanguáⁿai nī.

³³ Nan'gueecútaⁿā saⁿā yeⁿé yā: Nús'uu ní ndaata yeⁿe Abraham. Níicú mar 'áámá 'iiⁿyāⁿ nguée dichii've 'nū. ¿Táácā chí ngaⁿa dí chí ndís'tií ní canee chí nanguáⁿai nī?

³⁴ Jesús ní nan'gueecutáⁿa yā yeⁿe sa: Cuaacu ní'nyúⁿ, cuāácū nii'nyuⁿ ngaⁿā ngii ndís'tií chí nducyáácá 'iiⁿyāⁿ chí dííⁿ yā nuuⁿndi, 'iiⁿyāⁿ s'tíí dichíí've yā

yeⁿē nuuⁿndi. ³⁵Iiⁿyāⁿ chi diiⁿ mandado yeⁿē iiví yā nguéé 'áámá ineéⁿ yā ndúúcu familia yeⁿe iiví yā naati daiya iiví miiⁿ ní 'áámá cuneéⁿ yā. ³⁶Ndúúti chi Daiyá yā nadinguáⁿai yā, cuaacu níⁿnyúⁿ chí ndís'tií ní nínguaⁿai nī. ³⁷Úú deenú chi ndís'tií chi ndaata yeⁿé Abraham. Naati dinúúⁿ yiinu nī chí neⁿe 'caaⁿnúⁿ nī 'úú, caati nduudu yeⁿé nguéé ngii neé ndúúcu ndís'tií. ³⁸Chiiⁿ chi n'diichí ndúúcu Chiidá, chiiⁿ chí 'úú ngaⁿá. Ndís'tií ní díⁿ nī chí n'diichí nī chiidá nī.

Ndís'tií yeⁿē yááⁿn'guiinūuⁿ chi chiidá nī

³⁹Iiⁿyāⁿ s'eeⁿ nan'güecutáⁿa yā yeⁿé yā ní ngaⁿá yā: Chiidá 'nū Abraham. Ngaⁿa Jesús ngíi yā saⁿá: Nduuti chí daiya Abraham ndís'tií tuu'mi ní nti-iⁿnyuⁿ yeⁿē sa idíⁿ nī.

⁴⁰Naati maaⁿ ní idinúúⁿ yiinu nī chí 'caaⁿnuⁿ nī 'úú, caati 'úú saⁿá chí ngaⁿa nduudu cuaacu chí ch'iindiveéⁿ yeⁿē Dendyuūs. Abraham nguéé diiⁿ sa chuū. ⁴¹Ndís'tií ní díⁿ nī ntiⁿnyuⁿ yeⁿe chí idá nī. Tuu'mi ní ngaⁿa sa ngii sa Jesús: Nús'uū nguéé ch'iindiyáaⁿ 'nū yeⁿē daiya sa saⁿá cyúúní. Canéé 'áámá chiidá 'nū chí Dendyuūs miiⁿ.

⁴²Tuu'mi ní ngaⁿa Jesús ngii yā saⁿá s'eeⁿ: Ndúúti chí chiidá nī chí Dendyuūs miiⁿ cuaacu níⁿnyúⁿ chí dinéⁿe nī 'úú, caati 'úú ní yeⁿé Dendyuūs chiicá ní ndaá. Ní nguéé ndaá yeⁿé mááⁿ ti Ndyuūs maáⁿ yā dich'ó yā 'úú. ⁴³¿De'e cuuvi chí nguéé n'gúuⁿ nī nduudu yeⁿé? Tí nguéé n'giindiveéⁿ nī nduudu yeⁿé. ⁴⁴Ndís'tií ní yááⁿn'guiinūuⁿ chiidá nī. Ndís'tií ní neⁿé nī díⁿ nī tanducueⁿé chí neⁿé chíida nī. Yááⁿn'guiinūuⁿ chí n'giⁿnūⁿ 'āā canéé núuⁿ yā ndíi naachi ngaⁿá. Nguéé 'áámá canéé yā na nduudu cuaacu ti nguéé nduudu cuaacu nduucú yā. Taachí yááⁿn'guiinuuⁿ ngaⁿá sa nduudu yaadi yeⁿē maaⁿ sa ngaⁿa

sa ti saⁿá yeⁿē nduudu yaadi ní chíida nduudu yaadi sáⁿá. ⁴⁵Naati 'úú ní ngaⁿá nduudu cuaacu ní nguéé i'téenu nī yeⁿé. ⁴⁶¿Du'u yeⁿē ndís'tií ngaⁿa chí idíⁿ nuuⁿndi? Ní nduuti chí 'úú ní ngaⁿá nduudu cuaacu, ¿de'ē chí nguéé i'téenu nī 'úú? ⁴⁷Du'u chí yeⁿē Dendyuūs miiⁿ nduudu yeⁿē Dendyuūs n'giindiveéⁿ yā. Chiiⁿ chí ndís'tií ní nguéé n'giindiveéⁿ nī ti nguéé yeⁿé Dendyuūs ndís'tií.

Jesús canéé yā vmnááⁿ vmnaaⁿ chí iⁿyeⁿēⁿdí

⁴⁸Tuu'mi ní nan'güecútaⁿā saⁿa Israel s'eeⁿ ní ngaⁿa sa ngii sa Jesús: ¿'Áá nguéé cuaacu ngaⁿá nús'uū chí samaritano dii, ní cánéé dí ndúúcu yááⁿn'guiinūuⁿ?

⁴⁹Nan'güecútaⁿā Jesús: 'Úú nguéé cánéé ndúúcu yááⁿn'guiinūuⁿ. 'Úú díⁿ honrar Chiidá. Ndís'tií nguéé i'téenu nī 'úú. ⁵⁰'Úú ní nguéé in'nuúⁿ honra yeⁿé māāⁿ. Véé 'iiⁿyāⁿ chí in'nuúⁿ yā honra yeⁿé ní díⁿ yā juzgar 'iiⁿyāⁿ. ⁵¹Cuaacu níⁿnyúⁿ, cuāācū niiⁿnyuⁿ ngaⁿá ngíi ndís'tií: Du'u chí n'giindiveéⁿ nduudu yeⁿé nguéé n'diichí yā vaadi n'gii taanduvéé nguuvi.

⁵²Tuu'mi ní saⁿa Israel s'eeⁿ ngaⁿá sa ngii sa Jesús: Maaⁿ ní tuumicádfínuuⁿ 'nū yeⁿē dí. Canéé dí ndúúcu yááⁿn'guiinūuⁿ. Abraham miiⁿ ní chíi ndúúcu profetas 'iicu díⁿ ní ngaⁿá dí: Du'u chí n'giindiveéⁿ nduudu yeⁿé nguéé n'diichíneéⁿ yā vaadi n'gii taanduvéé nguuvi. ⁵³¿'Áá vmnaaⁿ ntuūⁿ ca dii yeⁿē chíida yú Abraham chí chíi yā ní yeⁿe profetas chí chíi yā? ¿Du'u nadacádiinuuⁿ dí chí máāⁿ dí?

⁵⁴Nan'güecútaⁿā Jesús: Ndúúti chí 'úú díⁿ honrar māāⁿ tuu'mi ní honra yeⁿé ní nguéé de'ē vee. Chiidá míⁿ chí idíⁿ yā honrar 'úú. Ní yeⁿe chíidá chí ngaⁿá ndís'tií chí Dendyuūs yeⁿé nī. ⁵⁵Ní nguéé 'āā n'diichí nī 'iiⁿyāⁿ naati 'úú 'āā nin'diichí 'iiⁿyāⁿ. Ndúúti chí ngaⁿá

chi nguée nin'diichí 'iiⁿyāⁿ tan'dúúca chí yaadi ndís'tií, 'tíicā ntúúⁿ 'úú. Caati 'āā n'diichí 'iiⁿyāⁿ ní n'giindiveéⁿ nduudu yeⁿé yā. ⁵⁶Chiidá nī Abraham yéénú taavi sa chí 'āā n'diichí sa nguuví yeⁿé. Ní 'āā n'diichí sa. Ní yéénú taavi sa.

⁵⁷Tuu'mi ní ngaⁿa 'iiⁿyāⁿ Israel s'eeⁿ: ¿'Áá 'āā cuée cuuvi 'uuvi ngeecu ndiichi nduuyú ní 'āā n'diichi di Abraham?

⁵⁸Ní ngaⁿa Jesús ngii yā saⁿa: Cuaacu níⁿ'nyúⁿ, cuāacū niiⁿ'nyuⁿ ngaⁿá ngí ndís'tií chí 'úú vmnááⁿ vmaaⁿ chí Abraham.

⁵⁹Tuu'mi ní saⁿā s'eeⁿ sta'á sa tuūu chí ca'a sa Jesús, naati Jesús ní canúúⁿ n'de'ei yā ní nan'dáa yā cheeti yáacū templo ní cho'ó yā náavtaⁿ'á yā 'íⁿyāⁿ s'eeⁿ. Ní cunaⁿ'á yā.

**Jesús ca'á yā vista yeⁿe 'áámá sáⁿā
chí ngeenááⁿ ndii
taachi chí ch'iindiyāⁿ sa**

9 Níicú taachi cho'oo Jesús ní n'diichí yā 'áámá saⁿā chí ngeee nduutináaⁿ sa ndí taachí ch'iindiyáaⁿ sa. ²Níicú discípulos yeⁿé yā ntinguuneeⁿ yā Jesús ní ngaⁿa yā ngii yā 'iiⁿyāⁿ: N'dii Maestro, ¿du'u dínúⁿndí? ¿'Áá chiida sa ndúúcu cheecu sa vee nuuⁿndí yeⁿé yā? ¿'Áá maaⁿ sa 'tíicā sa chí ngeee nduutináaⁿ sa taachí ch'iindiyáaⁿ sa?

³Nan'geecútaⁿā Jesús ní nguée ndúú sáⁿa cūú ní nguée chiida sa ndúúcu cheecu sa vee nuuⁿndí yeⁿé yā chí ngeee nduutináaⁿ sa. 'Tíicā saⁿā ní 'cuuⁿmiⁿ chí diiⁿ Déndyuús miiⁿ nduucú yā. ⁴Cánée chí díⁿ ntiⁿ'nyuⁿ chí idiiⁿ 'iiⁿyāⁿ chí dicho'ó yā 'úú neⁿe chí vée nguuvi. Ndaá chí cuuvi 'da'a taachi mar 'áámá 'iiⁿyāⁿ ní nguée díⁿ yā ntiⁿ'nyuⁿ. ⁵Nu-uma neⁿe chí cuneé iⁿ'yeēⁿdí 'úú chí cuneé tan'dúúca dæeve yeⁿé iⁿ'yeēⁿdí 'úú.

⁶Taachí níngaⁿa yā chuú chiidaiⁿ yā na yāⁿāa níicú in'dái yā incheetí ndúúcu nuuⁿniⁿ daíⁿ yā. Níicú s'néeⁿ yā ncheetí nduutináaⁿ saⁿā ngeenáaⁿ. ⁷Ní ngaⁿa

yā: Cúnaⁿā dí. Nááⁿnú dí nduutináaⁿ di na cheendi yíive yeⁿé Siloé. (Nduudu miiⁿ neⁿe caaⁿmaⁿ Dich'ó Yā.) Tuu'mi ní cunaⁿā sa ní naāⁿnu sa ní ngeecundí sa 'āā inaaⁿ sa. ⁸Tuu'mi ní 'iiⁿyāⁿ na níⁿnúⁿ va'ai yeⁿé sa ndúúcu 'iiⁿyāⁿ chí 'āā ndí vmaaⁿ n'diichí yā saⁿā chí ngeenáaⁿ ní ngaⁿa yā: ¿'Áá nguée sáⁿa 'cūú n'giindí ngiica limosna?

⁹N'duuví yā ngaⁿa yā: Sáⁿa 'cūú. Ta n'duuví yā ní ngaⁿa yā: Tan'dúúca saⁿā miiⁿ, 'tíicā saⁿā. Saⁿā miiⁿ ngaⁿa sa: 'Úú.

¹⁰Ngaⁿa yā ngii yā saⁿā: ¿Taaca nínguaaⁿ nduutináaⁿ di?

¹¹N'geecútaⁿā sa ní ngaⁿā sa: Saⁿā chí nguuvi Jesús miiⁿ din'dái sa ncheetí ní chí'neeⁿ sa nduutináaⁿ. Ní ngaⁿā sa ngii sa 'úú: Cueⁿe di cheendi yi-ive nuuⁿniⁿ yeⁿé Siloé. Naaⁿnu di nduutináaⁿ di. Níicú cheⁿé, ní naāⁿnu nduutináaⁿ, ní 'āā inaaⁿ.

¹²Tuu'mi ní ngaⁿa yā ngii yā saⁿā: ¿Tii canée saⁿā miiⁿ? Tuu'mí ngaⁿā sa: Nguée deenú.

**Fariseos itinguuneeⁿ yā saⁿā
ngueenaaⁿ chí 'āā nduuva yeⁿé sa**

¹³Tuu'mi ní candée yā saⁿā chí ngeenaáⁿ ndí cuaaⁿ vmaaⁿ nanááⁿ saⁿā fariseos. ¹⁴Ni sábadu miiⁿ nguuvi chí ntaavi'túúnuuⁿ 'iiⁿyāⁿ Israel chí Jesús idin'dái yā ncheetí míⁿ. Ní nin'guáaⁿ yā nduutináaⁿ sa. ¹⁵Tuu'mi ní ntinguuneeⁿ ntúuⁿ yā fariseos: ¿Táacā 'āā inaaⁿ di? Tuu'mi ní ngaⁿā sa: S'néeⁿ yā ncheetí na nduutináaⁿ, níicú naāⁿnú. Maaⁿ ní inaaⁿ.

¹⁶Tuu'mi ní 'áámá saⁿā fariseo ngaⁿa sa: Sáⁿa 'cūú ní nguée yeⁿé Dendyuús saⁿā caati nguée diiⁿ sa nguuvi sábadu tan'dúúca chí ngaⁿa ley yeⁿe yú. Ta n'duuví sa ngaⁿa sa: ¿Táacā saⁿā chí vée nuuⁿndí yeⁿé sa diiⁿ sa señales chí 'tuucá? 'Uuvi nuúⁿ díiⁿ sa vaanicadínúⁿ yeⁿé sa. ¹⁷Ngeecundí ntúuⁿ sa ní ngaⁿa sa ngii sa saⁿā chí ngeenáaⁿ sa: Díí, ¿de'é ngaⁿa di yeⁿé saⁿa chí

nan'guaaⁿ nduutináaⁿ di? Saⁿā miiⁿ ngaⁿā sa: 'Iiⁿyāⁿ miiⁿ profeta.

¹⁸ Saⁿa Israel s'eeⁿ nguéeⁿ i'téenu sa yeⁿe saⁿā chí chingueenáaⁿ sa ní inaaⁿ sa ndíⁿ 'cai yā chiida sa ndúúcu chεecu sa yeⁿe sáⁿā chí 'āā inaaⁿ sa. ¹⁹ Ní ntinguunééⁿ saⁿā s'eeⁿ 'iiⁿyāⁿ, ní ngaⁿā sa: ¿'Áá sáⁿa 'cūū daiyá nī, saⁿā chí ngaⁿā ndís'tií chí ch'iindiyáaⁿ sa 'āā ngeenáaⁿ sa? ¿Tááca chí maaⁿ inaaⁿ sa?

²⁰ Nan'gueecutáⁿa yā chiida sa ndúúcu chεecu sa ní ngaⁿa yā 'iiⁿyāⁿ: Déenu 'nū daiya 'nū saⁿā 'cūū 'āā ngeeeé nduutináaⁿ sa taachi ch'iindiyáaⁿ sa. ²¹ Maaⁿ ní inaaⁿ sa. Nguéeⁿ déenu 'nū táácā inaaⁿ sa. Du'ú yā chí nin'guaaⁿ yā nduutináaⁿ sa nús'uu nguéeⁿ déenu 'nū. Saⁿā tii 'āā 'naaⁿ sa, ntiingúúneeⁿ nī saⁿā. Saⁿā tii caaⁿmaⁿ sa yeⁿe maaⁿ sa.

²² Chuū chí nan'gueecutáⁿa sa chiida sa ndúúcu chεecu sa, caati 'va'á yā 'iiⁿyāⁿ Israel s'eeⁿ. Caati 'iiⁿyāⁿ Israel s'eeⁿ 'āā indeē sa chí du'ú chí caaⁿmaⁿ chí Mesías chí Cristo miiⁿ chuū ní tun'daa yā chεeti yaācū. ²³ Chii chí 'tíicā caⁿā chiida sa ndúúcu chεecu sa: Sáⁿā 'caa 'āā 'nāaⁿ sa. Ntíingúúneeⁿ nī saⁿā.

²⁴ 'Tíicā ní 'caí ntúuⁿ yā saⁿā chí ngeenáaⁿ níicú ngaⁿa yā ngii yā saⁿā: Dii, ní ca'a di honra Dendyuūs. Nús'uu deenu 'nū chí sáⁿa 'cūū véé nuuⁿndi yeⁿe sa.

²⁵ Tuuⁿmi ní nan'gueecutáⁿa sa ní caⁿā sa: Ndúúti chí nuuⁿndi yā o nguéeⁿ nuuⁿndi yā nguéeⁿ deenú. 'Áámá chí deenú chí ngeeeé nduutinaáⁿ ní maaⁿ ní ināaⁿ.

²⁶ Ní ngaⁿā ntúuⁿ yā ngii yā saⁿā: ¿Dé'ē díⁿ yā ndúúcu dii? ¿Tááca 'āā inaaⁿ di?

²⁷ Nan'gueecutáⁿa sa yeⁿe yā: 'Āā ngaⁿā ngii ndís'tií ní nguéeⁿ ch'iindiveéⁿ nī. ¿De'ē cúúví chí neⁿe ntúuⁿ nī 'caandiveéⁿ nī? ¿'Áá neⁿe nī ntúuⁿ ndís'tií chí cuuvi discípulos yeⁿe yā ndís'tií?

²⁸ Ní 'caa'vá yā ndúúcu sa ní caⁿā yā: Díí, chí discípulo yeⁿe yā dii, naati nús'uū discípulos yeⁿe Moisés nús'uu.

²⁹ Nús'uu ní déenu 'nū chí Dendyuūs ní yaa'vi yā Moisés naati nguéeⁿ déenu 'nū tíí ndiica sáⁿa 'cūū.

³⁰ Nan'gueecutáⁿa saⁿā miiⁿ ní caⁿā sa: Chuū ní cuaacu ní cosa chí 'āā ngeⁿe yiinu yú caati ndís'tií nguéeⁿ déenu ní tíí ndiica yā ní nn'guaaⁿ yā nduutinaáⁿ. ³¹ Ní deenu yú chí Dendyuūs ní nguéeⁿ n'giindiveéⁿ yā yeⁿe 'iiⁿyāⁿ nuuⁿndi. Du'ú 'iiⁿyāⁿ chí neⁿe Dendyuūs níicú idiíⁿ yā chíⁿ chí neⁿe Dendyuūs, tuuⁿmi ní Dendyuūs míⁿ nn'giindiveéⁿ yā yeⁿe 'iiⁿyāⁿ 'cūū. ³² Ní taachi chí nga'ā iⁿ'yeeⁿdí 'cūū, nguéeⁿ ch'iindiveeⁿ yú chí mar 'áámá 'iiⁿyāⁿ nn'guaaⁿ yā nduutinaáⁿ 'iiⁿyāⁿ chí ngeenáaⁿ ndíí ch'iindiyáaⁿ yā. ³³ Ndúúti chí 'iiⁿyāⁿ 'cūū chí nguéeⁿ yeⁿe Dendyuūs 'iiⁿyāⁿ, tuuⁿmi ní nguéeⁿ du'ú véε cuuvi díⁿ yā.

³⁴ Nan'gueecutáⁿa 'iiⁿyāⁿ s'eeⁿ ní caⁿā yā chíⁿ yā saⁿā: Dii ní na nuuⁿndi ch'iindiyáaⁿ di. ¿'Áá dii ngi'cuééⁿ dí nús'uū? Ní tun'daa yā saⁿa chεeti yaācū.

Ngeenáaⁿ yeⁿe cosa chí yeⁿe Espíritu

³⁵ Jesús ch'iindiveéⁿ yā chí 'āā tun'daa yā saⁿā chiva'āi yaacu templo. Taachi nindaaca yā saⁿā ní ngaⁿa yā ngii yā saⁿā: ¿'Áá i'téenu dí Daiya Dendyuūs miiⁿ?

³⁶ Tuuⁿmi ní nan'gueecutáⁿa sa ní caⁿā sa: Señor, ¿du'ú míⁿ, ní 'tíicā cu'teenú?

³⁷ Ní ngaⁿa Jesús ngii yā saⁿā: In'diichi dí 'iiⁿyāⁿ ní 'iiⁿyāⁿ miiⁿ ní 'iiⁿyāⁿ chí indeé yā ndúúcu di.

³⁸ Tuuⁿmi ní ngaⁿā sa ngii sa Jesús: Señor, cu'teenú n'dii. Ní diiⁿ sa adorar yā.

³⁹ Ní ngaⁿā Jesús: 'Úú nindaá iⁿ'yeeⁿdí 'cūū chí caaⁿmáⁿ nuuⁿndi yeⁿe 'iiⁿyāⁿ caati 'iiⁿyāⁿ chí nguéeⁿ inaáⁿ yā ní naáⁿ yā. Ní 'iiⁿyāⁿ chí cuuvi inaáⁿ yā cuuvi ngeenáaⁿ yā.

⁴⁰ N'duuvi 'iiⁿyāⁿ fariseos chí canée yā ndúúcu yā ch'iindiveéⁿ yā chuū ní caⁿā

yā Jesús: ¿Áá n̄gueēe ntúuⁿ nduutináaⁿ 'nū tuu'mi?

⁴¹ Tuu'mi ní ngaⁿa Jesús ngii yā saⁿā s'eeⁿ: Ndúúti n̄gueenáaⁿ nī nguéeⁿ nuⁿndi yeⁿe nī. Naati maaⁿ ní ngaⁿa nī: Inaaⁿ 'nū. Chiiⁿ chí nuuⁿndi yeⁿé nī 'áámá canéé nūⁿ.

Cuenta yeⁿe 'iiⁿyāⁿ chí véé 'iiti yeⁿe yā

10 Cuaacu níⁿnyúⁿ cuāacū niiⁿnyuⁿ ngaⁿá ngí ndís'tii: Du'u chí nguéeⁿ indā cuaaⁿ cheendi chéēⁿ yeⁿe 'iiti cuūchī naati n̄gēⁿé yā na chéēⁿ táámá lado, tuu'mi ní 'iiⁿyāⁿ 'cūú duucú yā ní diduucú yā. ²Du'ú 'iiⁿyāⁿ chí indāa yā cuaaⁿ cheendi chéēⁿ miiⁿ, 'iiⁿyāⁿ miiⁿ ineenaáⁿ yā 'iiti. ³'Iiⁿyāⁿ ineenaáⁿ yā cheendi chéēⁿ ní inin'guaáⁿ yā cheendi chéēⁿ caavā 'iiⁿyāⁿ miiⁿ ní 'iiti cuūchī n'giindiveéⁿ tī nduudu yeⁿé yā. Ní n'gaí yā duuchi 'iiti cuūchī yeⁿé yā. Ní n'daá tī saⁿā. ⁴Taachi intuun'dáa yā tanducuéⁿe 'iiti yeⁿé yā cuaaⁿ dáámí cheēⁿ candée tī vmnaaⁿ yeⁿé tī. Níicú 'iiti cuūchī cueⁿé tī cuayiivi 'iiví tī. Caati 'caandiveéⁿ tī nduudu yeⁿé yā. ⁵Nguéeⁿ can'dáa tī 'iiⁿyāⁿ chí nguéeⁿ 'iiví tī níicú ngéenu tī yeⁿé yā caati nguéeⁿ 'caandiveéⁿ tī nduudu yeⁿé yā chí nguéeⁿ 'iiví tī 'iiⁿyāⁿ.

⁶Chuū cuenta chí caⁿa Jesús 'iiⁿyāⁿ ní 'iiⁿyāⁿ miiⁿ nguéeⁿ tuumicadínuuⁿ yā de'ē chí caⁿā Jesús miiⁿ.

Jesús chí n'dai ca pastor yā

⁷N̄gueecúndíí ntuūⁿ Jesús ní ngaⁿa yā: Cuaacu níⁿnyúⁿ, cuāacū niiⁿnyuⁿ ngaⁿá ngí ndís'tii: 'Úú tan'dúucā cheendi cheēⁿ naachi cho'ō 'iiti cuūchī. ⁸Tanducuéⁿe 'iiⁿyāⁿ chí ndaá yā vmnaaⁿ yeⁿe 'úú, 'iiⁿyāⁿ s'eeⁿ ní duucu yā ní diduucúú ntúuⁿ yā. Caati nguéeⁿ ch'iindiveéⁿ yā 'iiti cuūchī miiⁿ yeⁿé yā. ⁹'Úú tan'dúucā cheendi cheēⁿ 'úú. Du'ú 'iiⁿyāⁿ chí indāa caavā yeⁿé, ninguaⁿ'ai yā. Ní can'dáa yā. Ní ndaa ntuúⁿ yā. Ní ndaacá yā chí che'é yā.

¹⁰Duucú míⁿ taachi ndaa sa miiⁿ, iduucu sa. Ní n'giiⁿ'nuⁿ sa ní nadi'tuuvi sa. 'Úú nindāa chí ca'á vida níicú ca'á vida chí yeenu taavi yā. ¹¹'Úú 'iiví 'iiti cuūchī chí n'dai taaví. 'Iiví 'iiti cuūchī chí n'dai taaví yā, nga'á yā vida yeⁿe maáⁿ yā caavā 'iiti. ¹²'Iiⁿyāⁿ chí canee naáⁿ 'iiti cuūchī chí nguéeⁿ yeⁿé yā 'iiti ní nguéeⁿ 'iiví tī 'iiⁿyāⁿ. Taachí ináaⁿ yā yáá'yāaⁿ ngaátāa chí cuchíí tī ní cu'neéⁿ yā 'iiti cuūchī ní n̄gēⁿe yā ngéenu yā. Ní yáá'yāaⁿ ngaátāa cúchíí tī miiⁿ ní cuta'á tī 'iiti cuūchī ní 'iiti cuūchī miiⁿ idi'yāa tī ngii ní ngéenu tī. ¹³'Iiⁿyāⁿ chí nguéeⁿ yeⁿe yā 'iiti ngéenu yā caati nguéeⁿ yeⁿé yā 'iiti. Ní nguéeⁿ idíⁿ yā cuidado 'iiti cuūchī.

¹⁴'Úú 'iiví n'dai taavi 'iiti cuūchī. Ní canúnaáⁿ 'iiti cuūchī yeⁿé. Ní 'iiti cuūchī yeⁿé ní canúnaáⁿ tī 'úú. ¹⁵Tan'dúucā chí Chiidá in'diichí yā 'úú, 'tíicā 'úú in'diichí Chiidá. Ní nga'á vida yeⁿé cucaava 'iiti cuūchī. ¹⁶Véeⁿ ntúūⁿ ta n'duuví 'iiti cuūchī yeⁿé chí nguéeⁿ yeⁿe cheēndí chéēⁿ 'cūú 'iiti. 'Iiti miiⁿ ntúūⁿ ní cánéé chí candéé 'iiti. Ní 'caandiveéⁿ tī chí caaⁿmáⁿ níicú 'áámá cheēⁿ nduuví tī ní 'áámá nūuⁿ 'íiví 'iiti.

¹⁷Caavā chíⁿ chí neⁿe Chiidá 'úú caati 'úú ca'á vida yeⁿe maáⁿ chí ní n̄gueecundíí ntuúⁿ cuta'á. ¹⁸Mar 'áámá 'iiⁿyāⁿ nguéeⁿ cuuvi 'caaⁿ'núⁿ yā 'úú naati 'úú ca'á vida yeⁿe maáⁿ. Cuuví díⁿ cu'neéⁿ vida yeⁿé ní cuuví díⁿ cuta'á. Chuū mandamiento chí díⁿ chí ngaⁿā Chiidá.

¹⁹Ch'íindí ntúūⁿ vaadí 'caa'va nguaaⁿ náⁿā 'iiⁿyāⁿ Israel s'eeⁿ cáavā nduudú 'cūú. ²⁰Nééné 'yaaⁿ 'iiⁿyāⁿ Israel caⁿ'a yā chuū: Canée yā ndúucú yáá'n'guiinūuⁿ ní n̄gueeⁿ ndéé yā vaanicadiinúúⁿ yeⁿé yā. ¿De'ē cúvíví chí n'giindiveéⁿ nī yeⁿe yā?

²¹Tá n'duuví yā ní ngaⁿa yā: Ndúúdú 'cāa ní nguéeⁿ yeⁿe 'iiⁿyāⁿ chí canéé ndúucú yáá'n'guiinūuⁿ. ¿Áá cúvíví

nan'guaaⁿ yáá'n'guiinūⁿ nduutinaáⁿ 'iiⁿyāⁿ chi ngeuenááⁿ?

'Iiⁿyāⁿ Israel s'eeⁿ nguééⁿ 'cuúⁿ yā Jesús

²² Ch'iindī 'v'íicú yeⁿē dedicación na yáāⁿ Jerusalén tiempo chi 'iichee. ²³ Níicú Jesús cachiicá yā cheeti yaacū templo na corredor chi nguuvi Salomón. ²⁴ 'Iicu saⁿa Israel s'eeⁿ ní cheⁿe sa nduuvidaama sa nanáaⁿ yā ní caⁿ'a sa chii sa Jesús: ¿Tíi cuaⁿ'ā castaⁿ'ā di chídeeve yeⁿe 'nū? Ndúúti chi dii chi Cristo miⁿ, caaⁿ'maⁿ cuaacú dí cuuvi dí nús'uū.

²⁵ Nan'gueecútaⁿ'a Jesús yeⁿē sa: 'Āā ngii ndís'tií ní nguéé i'teenu nī. Ntiiⁿ'nyuⁿ chi dííⁿ ndúúcu chi dúúchī Chiidá, chuū ngaⁿ'ā nduudu cuaacu yeⁿé. ²⁶ Ndís'tií nguéé i'téenu nī caati nguéé 'iiti cuūchī yeⁿ'é ndís'tií, tan'duucā 'āā ngaⁿ'á. ²⁷ 'Iiti cuūchī yeⁿ'é n'giindiveéⁿ tī nduūdū yeⁿ'é ní 'úú in'diichí ntúuⁿ 'iiti. Ní 'iiti miⁿ can'daa tī 'úú. ²⁸ 'Úú ní nga'á vida cueⁿe daāⁿ'maⁿ yeⁿ'é tī ní nguéé 'cūūvi tī. Nī mar 'áámá 'iiⁿ'yāⁿ cuuvi cuta'á yā 'iiti s'eeⁿ taachí 'āā canéé ta'á. ²⁹ Chiidá chi téé yā 'iiⁿ'yāⁿ s'eeⁿ 'úú vmaáⁿ yā yeⁿē nducyáácá 'iiⁿ'yāⁿ. Mar 'áámá 'iiⁿ'yāⁿ cuuvi cuta'á yā taachi 'āā canéé ta'ā Chiidá. ³⁰ 'Úú ndúúcu Chiidá 'áámá núúⁿ 'nū.

³¹ Tuu'mi ní sta'ā ntúuⁿ saⁿ'a Israel s'eeⁿ tūūu chi neⁿe ca'a sa Jesús. ³² Nan'gueecútaⁿ'a Jesús 'iiⁿ'yāⁿ: Nééné n'deēe n'daacā ntiⁿ'nyuⁿ chí n'giⁿ'i yeⁿē Chiidá. ¿Chéé ntiⁿ'nyuⁿ chi nguéé innéé yiinú ndís'tií chi ngiitúú nī 'úú?

³³ Nan'gueecútaⁿ'a saⁿ'a Israel s'eeⁿ ní ngaⁿ'ā sa ngii sá Jesús: Nguéé caavā ntiⁿ'nyuⁿ n'daacā chi ngiitúú 'nū dii naati cáávā chi ngaⁿ'ā di chi nguéé n'daacā, ní caati dii chí saⁿ'ā iⁿ'yeeⁿ'dí 'cūū ní diiⁿ di chi Dendyuūs dii.

³⁴ Nan'gueecútaⁿ'a Jesús yeⁿē sa: ¿'Áá nguéé canéé nguūⁿ na ley 'tíicā: 'Úú ningaⁿ'á chi ndyuūs s'eeⁿ ndís'tií? ³⁵ Ndúúti chí ngaⁿ'á yā chi 'iiⁿ'yāⁿ miⁿ

ní ndyuūs s'eeⁿ, 'iiⁿ'yāⁿ chi sta'á yā nduudu yeⁿe Dendyuūs níicú naachi canéé nguūⁿ canéé chí cuuvi cuaacu. ³⁶ Chiidá indēeve nuúⁿ yā 'úú ní dicho'ó yā 'úú iⁿ'yeeⁿ'dí 'cūū. ¿'Áá ndís'tií ní ngaⁿ'a nī chi nguéé n'daacā yeⁿ'é chi 'úú nduuvidaamá ndúúcu Dendyuūs caati caⁿ'á chi 'úú Daiy Dendyuūs 'úú? ³⁷ Nduuti chi nguéé dííⁿ ntiⁿ'nyuⁿ yeⁿē Chiidá, nguéé cu'téenu di 'úú. ³⁸ Naati ndúúti chí dííⁿ ntiⁿ'nyuⁿ miⁿ 'áárá chí nguéé i'téenu di 'úú, cu'téenu di na ntiⁿ'nyuⁿ chí dííⁿ. 'Iicu cuuvi deenu di ní cu'téenu di chí Chiidá canee nduucú níicú 'úú ní canéé ndúúcu Chiidá.

³⁹ Ní neⁿe ntuuⁿ sa cuta'a sa Jesús, naati Jesús miⁿ ní nan'dáa yā na ta'a sa s'uuⁿ.

⁴⁰ Níicú nguēecúndii yā taama lado yeⁿē yíicú Jordán na yáⁿ'āa miⁿ naachi vmaáⁿ vmaaaⁿ nachēedinúⁿ'nī Juan. Níicú canéé yā miⁿ. ⁴¹ Níicú nééné 'yaaⁿ 'iiⁿ'yāⁿ ndaa yā nanáaⁿ yā, ní ngaⁿ'á yā: Nduudu cuaacu tii Juan miⁿ ní 'áámá señal nguéé diiⁿ sa naati tanducuéⁿ'ē chí caⁿ'ā Juan yeⁿ'é yā, chuū nduudu cuaacu.

⁴² Níicú nééné 'yaaⁿ 'iiⁿ'yāⁿ miⁿ ní chí'téenu yā Jesús na yáⁿ'āa miⁿ.

Lázaro ch'ii yā

11 Véé 'áámá saⁿ'ā ngiitā sa chí ngu- uvi sa Lázaro na yááⁿ Betania. Yáāⁿ miⁿ vaacú tá María nduucū v'i tá Marta. ² Niicu tá María ní v'i ta Lázaro. N'daataa miⁿ ch'eendái tá aceite Jesús ní nāt'í tá ca'a yā ndúúcu yuūdū tiiⁿ tá. ³ V'i sa miⁿ ní dicho'ó ta 'áámá 'iiⁿ'yāⁿ chí yaa'ví yā yeⁿē Jesús miⁿ chí caⁿ'a yā: Señor, n'diichí nī. Saⁿ'ā chí néⁿ'e nī ní ngiitā sa.

⁴ Taachi ch'iindiveeⁿ Jesús chuū, ní caⁿ'a yā: Ca'āi miⁿ ní nguéé ca'āi chí 'cuūvi sa, naati ca'āi chí diiⁿ honrar Dendyuūs, níicú cuuvi yā honrar Daiyá Dendyuūs caava ca'ai 'cūū.

⁵Niicu Jesús ní ya'ái 'iinu yā Marta ndúúcū vi'i tá María ndúúcū vi'i tá Lázaro. ⁶Taachí Jesús ch'iindiveéⁿ yā chí ngiitā saⁿā miiⁿ canée yā tá 'uuvi nguuvi lugar naachi canée yā. ⁷Cho'o 'uuvi nguuvi ngaⁿa Jesús ngii yā discípulos yeⁿé yā: Cuⁿu ntuūⁿ yú na yáⁿāa Judea.

⁸Ní discípulos ní ngaⁿá yā ngii yā 'iiⁿyāⁿ: N'dii Maestro, ngiituūu 'iiⁿyāⁿ Israel s'eeⁿ n'dii. ¿Áá neⁿe ntúuⁿ ní caⁿā ní miiⁿ?

⁹Nan'guēcútaⁿā Jesús: ¿Áá nguéé ndēē nguuvi ndiichúví hora? 'iiⁿyāⁿ chí chiicá yā nguuvi nguéé indēē ca'a yā tii inaaⁿ yā chí dēeve yeⁿé iⁿ'yeeⁿdí 'cūū. ¹⁰'iiⁿyāⁿ chí ngiica na māāiⁿ indēē ca'á yā, ti nguéé chí dēeve ndúúcu yā.

¹¹Caⁿa yā chuū, ní caⁿa yā chii yā 'iiⁿyāⁿ s'eeⁿ: Lázaro amigo yeⁿe yú cyaadu sa. Caⁿá nanduūchí saⁿā chí cyaadu sa.

¹²Tuu'mí caⁿá discípulos yeⁿé yā: Señor, ndúúti chí cyaadu sa ní 'āā ninguaⁿāi sa.

¹³Chuū ngaⁿā Jesús miiⁿ yeⁿē vaadi n'dii yeⁿē Lázaro nífcú 'iiⁿyāⁿ s'eeⁿ ní cadífnuuⁿ yā chí ngaⁿa yā chí cyaadu n'dai Lázaro. ¹⁴Tuu'mi ní Jesús caⁿa cuaacú yā: Lázaro miiⁿ ch'ii sa. ¹⁵Úú ní yeenú cáávā ndí'stíi chí nguéé caneé miiⁿ ní 'ífcú cu'téénú ní. Naati caⁿā yú n'diichi yú saⁿā.

¹⁶Tuu'mi ní caⁿā Tomás, saⁿā chí duuchi Dídimo chí Gemelo ní ngaⁿa sa ngii sa saⁿā s'eeⁿ chí discípulos ndúúcū sa: Cúⁿu ntúúⁿ s'uúⁿ ní 'cuūví yú ndúúcu yā.

Jesús chí nanduuchi niicu teé yā vida yeⁿé yā

¹⁷Taachi ndaā Jesús miiⁿ ní 'āā cuūⁿ nguuví n'dii Lázaro canúúⁿ sa na cheeti yáinyāⁿ. ¹⁸Ní yāāⁿ Betania 'āā ni-iⁿnuúⁿ ná yāāⁿ Jerusalén tan'dúúca 'iinu kilómetro. ¹⁹Neené 'yaaⁿ 'iiⁿyāⁿ ndaá yā na vaacu Marta ndúúcū María chí nica'á yā 'viicheetínūuⁿ n'daata s'eeⁿ yeⁿē

vi'i yā Lázaro. ²⁰Tuu'mi ní Marta miiⁿ taachí ch'iindiveéⁿ yā chí ndaā Jesús miiⁿ can'dáa yā chuva'ai ní nandaaca yā 'iiⁿyāⁿ. Naati María miiⁿ canúuⁿ yā cheeti va'ai. ²¹Ní Marta miiⁿ ní ngaⁿa yā ngii yā Jesús: Señor, ndúúti chí canée ní ndúúcu 'nū nguéé ch'ii vi'í. ²²Naati maaⁿ deenú chí tanducueⁿé chí caaca di Dendyuūs miiⁿ ní téé yā dii.

²³Tuu'mí ngaⁿa Jesús ngii yā Marta: Nnduuchi ntuūⁿ v'í di.

²⁴Marta ngaⁿa ta ngii ta Jesús: 'Úú ní deenú chí nduuchi ntúūⁿ sa ní nacueⁿ sa nguuvi chí 'cuiinu iⁿ'yeeⁿdí.

²⁵Ní ngaⁿa Jesús ngii yā táⁿā: 'Úú chí nanduuchi niicu 'úú teé vida yeⁿé yā. Du'ú chí i'téénú 'úú 'aara n'dí yā, 'tífcā nduuchi yā. ²⁶Ní nducyáácá 'iiⁿyāⁿ chí véé vida yeⁿe yā chí i'téénú yā 'úú, nguéé 'cuūví yā cueⁿe daāⁿmaⁿ. ¿Áá i'teenu di chuū?

²⁷Tuu'mi ní Marta ngaⁿa yā: I'teenú Señor. 'Úú i'teenú dii chí Cristo Daiya Dendyuūs chí ndaá ní iⁿ'yeeⁿdí 'cūū.

Cueecu Jesús taachi snée yā na yáinyāⁿ yeⁿē Lázaro

²⁸Taachi Marta ch'iinu caⁿa ta chuū cueⁿe tá ní yaa'vi n'd'éi ta vi'í María ní ngaⁿa ta: Dii María, Maestro caneé yā ní n'gai yā dii.

²⁹Taachi María ch'iindiveeⁿ ta chuū ní ncueeⁿ ta ngééniicu tá ní ndaa ta nanááⁿ Jesús. ³⁰Jesús miiⁿ 'āā cuéé nindáa yā yaaⁿ miiⁿ. Naati canée yā miiⁿ naachi nandaaca María 'iiⁿyāⁿ. ³¹Tuu'mi ní 'iiⁿyāⁿ Israel s'eeⁿ chí snée yā na vaacu tá ndúúcū tá ní inca'á yā 'viicheetínūu María. Taachi n'diichi yā chí María miiⁿ ní nnicueeⁿ tá ngééniicu tá, tuu'mi ní can'dáa yā cuaaⁿ chuva'āi. 'Iiⁿyāⁿ s'eeⁿ cueⁿé yā ndaá yā ní ngaⁿa yā: Táⁿā 'cáá ní caⁿa tá na yáinyāⁿ. Caⁿa tá cueecu ta.

³²María miiⁿ taachi ndaa ta nanááⁿ Jesús ní n'diichi ta 'iiⁿyāⁿ ní chiiⁿtiiya tá ná ca'á Jesús. Ní ngaⁿa ta ngii ta

Jesús: Señor, ndúúti chi caneé ní 'muu', ní nguéé ch'ii vií.

³³ Tuu'mi ní taachi n'diichi Jesús mii' chí ngeecu María ndúúcu 'ii'yā' Israel s'ee' chí ndaá yā ndúúcu María ngeecu ntuú' yā ní neené ya'āi 'iinu Jesús ndii Espíritu ye'é yā. ³⁴ Ní nga'a yā: ¿Tíí s'nee' yā sa'ā? Ní nga'a yā ngii yā 'ii'yā': Señor, cuchí ní ní n'diichí ní.

³⁵ Ní che'ecu Jesús. ³⁶ Tuu'mi ní 'ii'yā' Israel s'ee' ní ca'a yā: Cún'dííchí ní tan'dúúca chí diné'e yā sa'ā.

³⁷ Ní n'duuví 'ii'yā' s'ee' ní ca'a yā: ¿'Áá nguéé ngii dii' 'ii'yā' 'cūú chí inin'guaá' yā nduutináa' 'ii'yā' chí ngueenáá', nguéé cuuvi dii' yā chí sa'ā 'cūú nguéé ní ch'ii sa?

Nanduuchi Lázaro ye''ē nguua' tiná''ā

³⁸ Ní Jesús neené ya'ai 'iinu ntuú' yā maá' yā ní ndaá yā na yáinyā'. Ní yáinyā' mii' 'áamá yiivi yáává. Níícu canee 'aama túúu vmnaa' ye''ē. ³⁹ Nga'ā Jesús mii': Ndivíí ní túúu. Marta vi'í sa'ā chí ch'ii nga'a ta ngii ta Jesús mii': Señor, 'āā ngeé' sá. 'Áā cuúú' nguuvi ndii sa.

⁴⁰ Jesús ní nga'a yā ngii yā Marta: ¿'Áá nguéé ngii dii chí nduuti chí cu'téénú dí tuu'mi ní n'diichi di poder ye''ē Dendyuūs?

⁴¹ Tuu'mi ní ndivíí yā túúu naachi canéé tiná''ā. Níícu Jesús ní n'diichí yā cuua' 'nii'nu' ní ca'a yā: N'dii Chidá, 'úú ca'á gracias n'dii Dendyuūs chí n'giindiveé' ní ye''é. ⁴² 'Úú ní deenú chí 'āā cue'e daa'má' nūu' n'giindiveé' ní ye''é ti cáávā 'ii'yā' chí snéé nanaá' cuuvi cu'téénú yā chí n'dii dicho'ó ní 'úú.

⁴³ Ní ch'iinú ca'a yā chuū néené yuudu ca'a yā: Lázaro, cuchí di.

⁴⁴ Sa'ā chí n'dii mii' ní nan'dáa sa. Nandéécú sá ndíí ta'ā sa ndíí ca'ā sa ndúúcu cintas tiinūu'. Ndeecuú nuu'má' cuerpo ye''ē sa ndii naa' sa. Níícu pañuela canee naa' sa. Tuu'mí nga'a

Jesús míí' 'ii'yā': Nn'daatíí ní sa'ā ní 'āā na'ā sa.

Nduuvidaamá yā chí dií' yā 'caa''nú' yā Jesús

(Mt. 26.1-5; Mr. 14.1-2; Lc. 22.1-2)

⁴⁵ Néené 'yaa' 'ii'yā' Israel s'ee' chí ndaá yā ndúúcu María ní n'diichí yā chí dií' Jesús mii' chí'teenú yā 'ii'yā'. ⁴⁶ Taná'a yā ní che''é yā nanáá' sa''ā fariseos ní chii yā sa'ā s'ee' chí dií' Jesús mii'. ⁴⁷ Tuu'mi ní sa'ā chiiduú n'geeté ndúúcu sa''ā fariseos nduuvidaamá yā ndeé yā. Ní nga'a yā: ¿De'ē dii' yú? Tíí sá''a 'cūú caati neené n'deé chí n'gi'i sa señales nanáa' yú. ⁴⁸ Ndúúti chí cu'nee yú sa'ā chí 'tííca nūu' nducyáacá yā ní cu'téénú yā sa'ā. Ní ndaa sa''ā romanos ní ndivíí yā lugar ye''ē yáacū ye''ē yú ndúúcu nación ye''ē yú.

⁴⁹ 'Áámá chéé sa'ā s'ee' chí nguuvi Caifás mii', sa''ā chí chiiduú ch'ēete ca ye''ē nduuyu mii' ca''a sa chí sa sa''ā s'ee': Ndís'tií ní nguéé du'ū veē deenú ní. ⁵⁰ Ní nguéé nacádiinúú' ní chí 'áámá sa''ā 'cuúvi sa ye''e nducyaa' yā níícu nguéé ti nación ye''ē yú cuuvi ndái.

⁵¹ Chuū ní nguéé ca'a yā ye''ē maá' yā caati 'ii'yā' mii' chiiduú ch'ēeté ca ye''ē nduuyu mii'. Ca''ā cuaacú sa chí cuchí chí 'cuúvi Jesús cáávā nación 'cūú. ⁵² Ní Jesús nduuvidaamá yā nguéé damaá' 'ii'yā' nación mii' naati ndúúcu taná''ā daiyá Dendyuūs mii' chí snéé 'muu' chí snéé mii'. ⁵³ Tííca ndíí tuu'mi ndeé yā chí 'caa''nu' yā Jesús.

⁵⁴ Tuu'mi ní 'aa ntéé cuhiica nguuvi Jesús nguua' 'ii'yā' Israel s'ee' naati cue''é yā na 'áámá yáá' nii'nuú' yá''āa cuu'má' naachi nguéé ch'ēetinéé 'ii'yā' chí nguuvi Efraín. Ní canéé yā mii' ndúúcu discípulos ye''é yā.

⁵⁵ Ní 'viicu pascua ye''ē 'ii'yā' Israel s'ee' 'āā chí néé nii'nuú' nguuvi. Néené 'yaa' yā cuchéé yā ye''e yáá' ye''é yā na yáá' Jerusalén, vmnaa' tiempo ye''ē

'viicu pascua. Ní 'iiⁿyāⁿ s'eeⁿ didεevé yā vida yeⁿé yā tan'dúucā costumbre yeⁿé yā. ⁵⁶Ní in'nuúⁿ yā Jesús miiⁿ. Ní 'iiⁿyāⁿ s'eeⁿ indeé yā ndúucū viⁱ naachi caneeé yā cheeti yaacū templo taacā chí ngii yā yeⁿé ndís'tii: ¿Áá nguéeé chii Jesús 'viicu?

⁵⁷'Iiⁿyāⁿ chiiduú n'geeté ndúucū saⁿā fariseos 'āā s'neeⁿ yā caaca 'tíicā. Ndúuti du^u chí déénú tíí caneeé Jesús miiⁿ caaⁿmaⁿ yeⁿé chiiduú n'geeté nífcú cuta'á yā 'iiⁿyāⁿ.

**Cheendáa yā aceite
Jesús na yāāⁿ Betania**

(Mt. 26.6-13; Mr. 14.3-9)

12 Nífcú indaa cá taaⁿ jááⁿ nguuví chí ndaa 'viicu yeⁿé pascua. Ndaā Jesús yāāⁿ Betania naachi canee Lázaro, saⁿā chí 'āā ch'ii ní n'duuchí ntuūⁿ Jesús miiⁿ saⁿā yeⁿe nguuaⁿ 'iiⁿyāⁿ chí n'dii. ²Ní miiⁿ ca'a yā chí che'e nguūn Jesús. Marta miiⁿ ní n'gii yā cu'u na mesa. Ní Lázaro miiⁿ vee sa ndúucū Jesús na mesa. ³Tuu'mi ní sta'ā María miiⁿ 'áámá libre yeⁿé aceite perfume yeⁿé nardo nūⁿ chí yaⁿai chíi'vē. Ní cheendáa tá ca'a Jesús miiⁿ. Ní ndúucū yuūndū tíiⁿ tá miiⁿ nadeeve tá ca'ā Jesús miiⁿ. Niicu nuuⁿmaⁿ chí'εete cheeti va'āi cheē perfume yeⁿe aceite miiⁿ. ⁴'Áámá chéé discípulo yeⁿé yā chí nguuví Judas Iscariote chí daiya Simón chí saⁿā chí caneeé chí díiⁿ sa entregar Jesús, ngaⁿa sa: ⁵¿De'ē cúúví chí nguéeé n'diicui yú aceite 'cūū ndúucū ndεēchē ciento caadi caneeé 'uūvi ngeεcu ndiichi centavo ní ca'a yú 'iiⁿyāⁿ chí nguéeé yeⁿe yā?

⁶Ní caⁿ'a sa chuū ní nguéeé chí ya'āi sa 'iiⁿyāⁿ chí ndaachí snée yā, naati cáávā chí duucu sa. Ní ndεē sa bolsa miiⁿ snúúⁿ tuūmí. ⁷Tuu'mi ní ngaⁿ'ā Jesús: 'Áā caneeé 'nū tá, taachi n'dai tá chuū cáávā nguuví chí caⁿ'á 'cuεechí. ⁸Caati 'iiⁿyāⁿ chí nguéeé yeⁿe yā 'āā canee nūúⁿ nī nduucú yā cueⁿe daāⁿmaⁿ, naati 'úú ní nguéeé 'áámá cuneé nūúⁿ nduucú nī.

Nduuvidaamá yā contra yeⁿe Lázaro

⁹Tuu'mi neené 'yaaⁿ 'iiⁿyāⁿ yeⁿé 'iiⁿyāⁿ Israel tuumicadiínuuⁿ yā chí Jesús miiⁿ ní cunée yā na yāāⁿ Betania. Ní nindaá yā nguεε cáávā damaāⁿ chí neⁿe n'diichi yā Jesús miiⁿ ti neⁿe n'diichi yā Lázaro, saⁿā chí 'āā n'dii ní nduuchi. ¹⁰Saⁿā s'eeⁿ chí chiiduú n'geeté nduuvidaáma yā chí neⁿé 'caaⁿnuⁿ ntúuⁿ yā Lázaro. ¹¹Ti neéneé 'yaaⁿ 'iiⁿyāⁿ Israel s'eeⁿ ngeⁿe yā ní i'téenu yā Jesús miiⁿ caavā Lázaro.

**Jesús ndaa yā yāāⁿ
Jerusalén lado yeⁿe rey**

(Mt. 21.1-11; Mr. 11.1-11; Lc. 19.28-40)

¹²Chí dεeve táámá nguuví ní neené 'yaaⁿ 'iiⁿyāⁿ ndaa yā 'viicu taachi chíi'ndiveéⁿ yā chí Jesús miiⁿ ndaa yā Jerusalén. ¹³Sta'á yā n'duuví tiicuáá yíⁿyúⁿ ní can'daa yā Jesús. Ní ndaacá yā Jesús ní 'cai yā: Hosanna. N'dái taavi 'iiⁿyāⁿ chí cuchii yā ndúucū chí dúuchí Señor chí Rey yeⁿé Israel ntúuⁿ.

¹⁴Ní ndaācā Jesús 'aama burro líiⁿ ní canduú yā 'iiti tan'dúucā chí caneeé nguūⁿ na libro yeⁿe Ndyuūs 'tíicā:

¹⁵Táⁿā daiya Sión nguéeé 'va'a di. N'dífcí dí, cuchii Rey yeⁿé di. Canduú yā 'aama daiya burro.

¹⁶De'ε ndúucū chí 'tuucā nguéeé tuumicadiínúúⁿ yā discípulos yeⁿé yā nguuví miiⁿ. Taachi Jesús cánéeé yā na va'ai cheeti nguuví tuu'mi ní discípulos yeⁿe yā nn'gaacú yā tanducueⁿé de'ε chí caneeé nguūⁿ yeⁿé yā, 'ífcú díiⁿ yā de'ε ndúú chí 'túucā.

¹⁷'Iiⁿyāⁿ chí caneeé yā ndúucū Jesús ngaⁿ'a cuáácú yā: Taachí yaa'ví yā Lázaro na yáinyāⁿ ní nnduuchi sa nguuaⁿ tinaⁿā.

¹⁸Cáávā chuū ní n'daa 'yaaⁿ 'iiⁿyāⁿ caati n'giindiveéⁿ yā chí Jesús ní díiⁿ yā señal miiⁿ. ¹⁹Saⁿā fariseos ní ngaⁿ'a sa nguuaⁿ maāⁿ sa: Inaaⁿ nī ti nguéeé de'ε vee idiiⁿ nī aprovechar yeⁿe asunto 'cūū.

N'díichí nī. Núúⁿmaⁿ iⁿ'yeeⁿdi ní caⁿ'ā can'dáa Jesús.

Saⁿ'ā griegos in'nuúⁿ yā Jesús

²⁰Iicu véé 'iiⁿyāⁿ griegos chí chee yā yeⁿ'ē 'viicū miiⁿ ní diiⁿ yā adorar. ²¹'Iiⁿyāⁿ s'uúⁿ ndaá yā nanááⁿ Felipe yeⁿ'ē yāāⁿ Betsaida chí yeⁿ'ē yáⁿ'āa Galilea. Ní di'cuutú yā 'iiⁿyāⁿ, ní ngaⁿ'a yā ngii yā 'iiⁿyāⁿ: Señor, neⁿ'ē 'nū n'diichí 'nū Jesús.

²²Ndaā Felipe miiⁿ ni ngaⁿ'a yā ngii yā chuū Andrés. Tuuⁿmi ní Andrés ndúúcu Felipe ngaⁿ'a yā ngii yā Jesús. ²³Tuuⁿmi ní Jesús nan'güecutáⁿ'a yā, ní ngaⁿ'a yā ngii yā saⁿ'ā s'eeⁿ: Hora míⁿ cuchii taachi Saⁿ'ā chí Daiya Dendyuūs cánéé chí caⁿ'ā yā na va'ai cheeti nguuvi. ²⁴Cuaacu níⁿ'nyúⁿ cuāācū niiⁿ'nyuⁿ ngaⁿ'ā ngii ndís'tii: Nduuti chí 'áamá trigo nguéé cuuvā na yáⁿ'āa ní 'cuūvi damaāⁿ canee. Naati ndúúti chí trigo 'cuūvi neené n'dee nduuví trigo 'cúuⁿndi. ²⁵Du'u chí neⁿ'e vida yeⁿ'é yā na iⁿ'yeeⁿdí 'cūū n'dái yā vida yeⁿ'e yā cueⁿ'e daāⁿmaⁿ. ²⁶Du'u 'iiⁿyāⁿ chí dichíⁿ'vé yā 'úú ní chíi yā can'daa yā 'úú, naachi 'úú chí canéé, míⁿ' ntúúⁿ snée 'iiⁿyāⁿ chí dichíⁿ'vé 'úú. Nduuti 'áamá 'iiⁿyāⁿ chí dichíⁿ'vé yā 'úú, Chiidá ní diiⁿ yā honrar 'iiⁿyāⁿ.

Jesús yaa'ví yā yeⁿ'ē vaadi n'gii yeⁿ'é yā

²⁷Ní caⁿ'a Jesús: Maaⁿ ní neené ndís-taⁿ'ā alma yeⁿ'é. ¿De'é caāⁿmaⁿ? N'dii Chiidá, ¿'áá nadanguáⁿ'ai nī 'úú yeⁿ'e hora 'cūū? Cáāvā chuū chí cuchii hora 'cūū. ²⁸N'dii Chiidá, chíⁿ'i nī poder yeⁿ'e chí duuchi yeⁿ'é nī. Tuuⁿmi ní cuchii 'áamá nduudu yeⁿ'ē nanguuvi chí ngaⁿ'a: 'Úú ní 'āā chíⁿ'i poder yeⁿ'é ní cuuvi 'cuuⁿmíⁿ poder yeⁿ'é ntúuⁿ taama vmnéⁿ'ēe.

²⁹'Iiⁿyāⁿ chí chinée yā miiⁿ ní chí'iindiveéⁿ yā 'áamá nduudu ní ngaⁿ'a

yā: Daavi miiⁿ. Ta n'dúúvi yā ní ngaⁿ'a yā: Angel yaa'ví yā 'iiⁿyāⁿ.

³⁰Nan'güecutáⁿ'ā Jesús ní caⁿ'a yā: Nguéé ndaā nduudu 'cūū caavā 'úú, tí cáāvā ndís'tii. ³¹Maaⁿ ní véé chí diiⁿ juzgar 'iiⁿyāⁿ yeⁿ'e iⁿ'yeeⁿdí 'cūū. Maaⁿ ní 'aama saⁿ'ā chí ch'eeⁿte yeⁿ'é iⁿ'yeeⁿdi 'cūū 'cúeⁿcú yā cuaaⁿ chuvaⁿ'āi. ³²Ndúúti chí 'úú chí ncueéⁿ yeⁿ'ē yáⁿ'āa 'cūū tuuⁿmi candéé nducyaaⁿ yā nanáaⁿ 'úú.

³³Ní chuū ngaⁿ'a Jesús ngii yā 'iiⁿyāⁿ chí ngaⁿ'ā yā de'é vaadi n'gii 'cuuvi yā. ³⁴Nan'güecutáⁿ'ā 'iiⁿyāⁿ s'eeⁿ yeⁿ'é yā: Nús'uú ní n'giindiveéⁿ 'nū chí canéé nguūⁿ na libro yeⁿ'e Ndyuūs chí Cristo cuneé yā cueⁿ'e daāⁿmaⁿ. ¿Táācā chí ngaⁿ'ā dii, cánéé chí níncueeⁿ Saⁿ'ā chí Daiya Dendyuūs? ¿Du'ū chí Saⁿ'ā chí Daiya Dendyuūs?

³⁵Tuuⁿmí ngaⁿ'a Jesús ngii yā 'iiⁿyāⁿ s'eeⁿ: 'Téé nūⁿ chí canéé chí deeve nanáaⁿ nī. Cúchiicā nī naachi canéé chí deeve neⁿ'e chí canéé chí deeve nduucú nī, ní nguéé ndaā maāⁿ'i naachi canéé yā. 'Iiⁿyāⁿ chí cachiicā yā na maāⁿ'i nguéé deenú yā tí caⁿ'a yā. ³⁶Naachi canéé chí deeve ndúúcu nī cu'téenu nī chí deeve miiⁿ ní cuuvi daiya chí deeve ndís'tii. Chuū caⁿ'a Jesús, ní cueⁿ'e yā ní canúⁿ'i n'de'ei yā maāⁿ yā yeⁿ'ē 'iiⁿyāⁿ s'eeⁿ.

'Iiⁿyāⁿ Israel s'eeⁿ nguéé i'téenu yā

³⁷Nééné chíⁿ'i Jesús señales denduⁿ'i nanáaⁿ 'iiⁿyāⁿ s'eeⁿ naati nguéé chí'teenú yā 'iiⁿyāⁿ. ³⁸Iicu cuuvi cuaacu chí caⁿ'ā saⁿ'ā profeta Isaías naachi canéé nguūⁿ na libro yeⁿ'e Ndyuūs 'tíicā:

Señor, ¿du'ū i'teenú chí ngaⁿ'a yā? ¿Du'ū n'diichi chí n'giⁿ'i yā poder yeⁿ'e Señor?

³⁹Cáāvā chuū chí nguéé i'téenu yā chí táamá vmnéⁿ'ēe caⁿ'a Isaías naachi ndii nguūⁿ na libro yeⁿ'e Ndyuūs 'tíicā:

⁴⁰Nan'gaadi yā nduutinaáⁿ 'iiⁿyāⁿ s'eeⁿ ní diiⁿ cheechí yā staava yeⁿ'é yā, caati nguéé inaaⁿ yā ndúúcu

nduutináaⁿ yā, ní nguéé deenú yā yeⁿē staava yeⁿé yā, ndíí nguéé ndúú cu'téenu yā, ní 'úú diyiicú 'iiⁿyāⁿ s'eeⁿ.

⁴¹ Chuū caⁿa Isaías miiⁿ taachí n'diichi sa Dendyuūs ndúúcú poder yeⁿé yā ní caⁿa sa yeⁿé yā ní 'āā dinguūⁿ sa yeⁿē.

⁴² Caavā yeⁿē nducuéⁿē chuū neéné 'yaaⁿ 'iiⁿyāⁿ chí n'geete ca chi'téenu yā Jesús naati nguéé ntumiiⁿndúⁿ yā chi chi'téenu yā ti 'va'a yā chi nan'daa yā yaacū cáavā saⁿā fariseos. ⁴³ Caati neⁿé ca yā honra yeⁿe saⁿā iⁿ'yeeⁿdí 'cūū, nguéé ti honra yeⁿē Dendyuūs miiⁿ.

Nduudu yeⁿē Jesús diiⁿ juzgar saⁿā s'eeⁿ

⁴⁴ Naati Jesús ní caⁿa yuudú yā: Du'ū chi i'téenu 'úú, nguéé 'úú i'téenu yā ti 'iiⁿyāⁿ chi dichó'o yā 'úú. ⁴⁵ Du'ú 'iiⁿyāⁿ chi inaaⁿ yā 'úú, inaaⁿ yā 'iiⁿyāⁿ chi dichó'o yā 'úú. ⁴⁶ 'Úú tan'dúúcā deeve ní ndaá iⁿ'yeeⁿdí 'cūū. Ní 'iicu nducyáacá 'iiⁿyāⁿ chi cu'téenu yā 'úú nguéé cunee yā ndúúcú maāⁿ. ⁴⁷ 'Iiⁿyāⁿ chi n'giindiveéⁿ yā nduudu yeⁿé ní nguéé i'téenu yā nduudu yeⁿé, 'úú nguéé díⁿ juzgar 'iiⁿyāⁿ miiⁿ. Caati nguéé ndaá díⁿ juzgar 'iiⁿyāⁿ yeⁿe iⁿ'yeeⁿdí 'cūū, ti ndaá chi nadanguaⁿáí 'iiⁿyāⁿ yeⁿe iⁿ'yeeⁿdí. ⁴⁸ Du'ū chi nguéé neⁿē 'úú, ní nguéé n'gúuⁿ yā nduudu yeⁿé. Véé 'iiⁿyāⁿ chí díⁿ yā juzgar 'iiⁿyāⁿ s'eeⁿ nguuvi chí 'cuiinu iⁿ'yeeⁿdí. ⁴⁹ Caati 'úú nguéé ngaⁿá yeⁿe maāⁿ. Chiidá chí dichó'o yā 'úú, 'iiⁿyāⁿ míⁿ teé yā nduudu cuaacu chí ngaⁿá ní yeⁿē chí canéé chí caaⁿmaⁿ. ⁵⁰ 'Úú deenú chí cucáavā nduudu cuaacu yeⁿé yā cúnduuchi yú cueⁿe daaⁿmaⁿ. 'Tíicā ngaⁿā 'úú, tan'dúúcā chí ngaⁿa Chiidá ngii yā 'úú.

Jesús naaⁿnú yā ca'a discípulos yeⁿé yā

13 Ní vmnááⁿ vmnaaⁿ 'viicu yeⁿe pascua 'āā deenu Jesús chí hora 'āā cuéé ndaa chí cho'ó yā yeⁿe iⁿ'yeeⁿdí

'cūū chí ndaá yā nanááⁿ Chiidá yā. Tan'dúúcā chí dineⁿe Jesús 'iiⁿyāⁿ yeⁿé yā chí snée yā iⁿ'yeeⁿdí 'cūū, 'āā dinéⁿe núúⁿ yā 'iiⁿyāⁿ ndii cuááⁿ ná ch'iinu.

² Ch'íínú che'e nguiinú yā. Yááⁿn'nguiinūⁿ 'āā s'neeⁿ sa na staava yeⁿē Judas Iscariote chí daiya Simón chí canéé chí díⁿ yā entregar Jesús. ³ Déénú Jesús chí tanducuéⁿē ní ca'a Chiidá yā ta'a daiyá yā ní chí nan'dáa yā yeⁿé Dendyuūs ní duu'vī tiempo tuu'mí naⁿá yā nanááⁿ Dendyuūs. ⁴ Nadacuéⁿ yā naachi chí che'e nguiinú yā ní ndiví yā catecaí yā. Ní sta'á yā 'aama toalla cheecu vmnaaⁿ cuerpo yeⁿe yā. ⁵ Ní ch'iinuúⁿ yā nuūⁿnīⁿ cheeti tina ní tucá'a yā naaⁿnu yā ca'a discípulos. Ní nat'í yā ndúúcú toalla chí ndeecu yā.

⁶ Ndaá yā naachi canéé Simón Pedro ní sáⁿa 'cūū ngaⁿa sa ngii sa 'iiⁿyāⁿ: Señor, ¿'áá n'dii ntúūⁿ naaⁿnú nī ca'á?

⁷ Nan'gueecútaⁿā Jesús ní ngaⁿa yā ngii yā saⁿā: 'Úú ní chí díⁿ nguéé deenu di maaⁿ naati cadíinuⁿ di cuayiivi.

⁸ Ngaⁿā Pedro ngii sa 'iiⁿyāⁿ: N'dii, nguéé nááⁿnú nī ca'á mar 'áámá tiempo. Nan'gueecútaⁿā Jesús yeⁿē sa: Ndúúti chí nguée naaⁿnú yeⁿē di nguéé 'áámá parte yeⁿē di nduucú.

⁹ Tuu'mi ní ngaⁿa Simón Pedro: Señor, nguéé dámaāⁿ ca'á ti ndii ta'á ntúūⁿ ndúúcú tíⁿ.

¹⁰ Tuu'mi ní ngaⁿa Jesús ngii yā saⁿā: Du'u chí chiinē nguéé neⁿē sa chí naaⁿnu sa cuerpo yeⁿe sa ti dámaāⁿ ca'a sa caati tanducuéⁿē cuerpo yeⁿē sa ní deeve. Ndís'tii ní 'āā deevé nī 'āā n'dáá rá chí nguéé nducyaaca nī.

¹¹ Ti deenú yā du'u chí díⁿ entregar 'iiⁿyāⁿ ní cáavā chíⁿ chí caⁿa yā: Nguéé nducyaacá nī deeve nī.

¹² Taachí ch'iinu naaⁿnú yā ca'a discípulos, ní sta'á yā catecaí yā nguécundíⁿ ntúúⁿ yā 'cuundi yā. Ngaⁿa yā ngii yā saⁿā s'eeⁿ: ¿'Áá déénú nī de'e chí idíⁿ nduucú nī? ¹³ Ndís'tii ngaⁿa nī

chi 'úú ni Maestro, chi 'úú ni Señor. N'daācā nga^a nī caati 'tíicā 'úú. ¹⁴ 'Úú ní Señor yeⁿé nī, 'úú ni Maestro yeⁿé nī. 'Úú inaaⁿnú ca'a nī. Ndí's'tiī canéé nī ntúūⁿ chi naaⁿnu nī 'aama nī ca'a taama nī. ¹⁵ Caneéⁿ chi díⁿ chuū. Tan'dúúicā chi 'úú chi díⁿ 'tíicā nī ntúūⁿ diiⁿ ndí's'tiī. ¹⁶ Cuaacu níⁿnyúⁿ cuāācū nī- iⁿnyuⁿ nga^a ngíⁿ ndí's'tiī: 'Iiⁿyāⁿ chí diiⁿ mandado nguéé 'āā 'naaⁿ ca yā chí 'iiⁿyāⁿ chí nga^a ntiⁿnyūⁿ yeⁿé yā. Ndíⁿ nguéé ndúú 'iiⁿyāⁿ chí dicho'ó yā nguéé 'āā 'naaⁿ cá yā chí 'iiⁿyāⁿ chí dicho'ó yā 'iiⁿyāⁿ. ¹⁷ Nduuti chi deenu nī taanduvéé dendu'ū ní yeenu taaví nī ndúúti chi díⁿ nī chuū.

¹⁸ Nguéé nga^a yeⁿé nducyaaca ndis'tiī. 'Úú ní deenu 'iiⁿyāⁿ chí ndeévé. Ní 'iicu canéé chí cuuví cuaacu chí canéé nguūⁿ. Du'ū chí nge'é pan nduucú, canéé chí caⁿá yā contra yeⁿé 'úú. ¹⁹ Ndíⁿ maaⁿ 'āā nga^a 'aara chí 'āā cuéé cuuvi níⁿnuúⁿ. Taachi 'āā cho'oo chuū cuuví cu'téenu nī chí 'úú. ²⁰ Cuaacu níⁿnyúⁿ cuāācū níⁿnyuⁿ 'úú nga^a ngíⁿ ndí's'tiī: 'Iiⁿyāⁿ chí 'cuáaⁿ yā 'iiⁿyāⁿ chí 'úú dicho'ó 'cuáaⁿ yā 'úú. Ní 'iiⁿyāⁿ chí 'cuáaⁿ yā 'úú 'cuáaⁿ yā 'iiⁿyāⁿ chí dicho'ó yā 'úú.

**Jesús díⁿ yā anunciar chí
Judás díⁿ yā entregar 'iiⁿyāⁿ**

(Mt. 26.20-25; Mr.

14.17-21; Lc. 22.21-23)

²¹ Taachí nga^a Jesús chuū ya'ai 'iinú yā na espíritu yeⁿé yā ní caⁿá cuaacú yā: Cuaacu níⁿnyúⁿ cuāācū níⁿnyuⁿ nga^a ngíⁿ ndí's'tiī chí 'áámá chéé ndí's'tiī díⁿ nī entregar 'úú.

²² Tuu'mi discípulos n'gínú yā na 'áámá yā na táámá yā. Nguéé tu- umicadiinúúⁿ yā du'u yeⁿé chí nga^a yā. ²³ 'Áámá discípulo, chí nééné neⁿé Jesús, candiítí neeⁿ yā na níⁿnuúⁿ Jesús.

²⁴ Simón Pedro ca'a yā señas saⁿá 'cūū ní nga^a yā saⁿá chí natiingúúneeⁿ sa yeⁿé sáⁿá chí nga^a Jesús. ²⁵ Níicú taachi candiítí neeⁿ yā níⁿnuúⁿ Jesús, tuu'mí nga^a yā: Señor, ¿du'ū chíi?

²⁶ Nan'guēecútaⁿā Jesús: Caⁿá di'caandá pan ní ca'á 'iiⁿyāⁿ ní 'iiⁿyāⁿ miiⁿ chíⁿ. Ní di'caandá yā pan ní ca'á yā Judas Iscariote, daiya Simón. ²⁷ Ch'ínú che'e sa pan miiⁿ ní yááⁿ guuinūⁿ ndaa sa na staava yeⁿé sa. Tuu'mí Jesús ní nga^a yā ngii yā saⁿá: Chíⁿ chí neⁿe di diiⁿ dí miiⁿ, diiⁿ núúⁿ yiiⁿnu nuuⁿ di.

²⁸ Naati mar 'áámá 'iiⁿyāⁿ chí véé na mesa miiⁿ nguéé tuumicadiinúúⁿ yā de'e chúú chí 'tíicā caⁿá yā. ²⁹ N'duuví yā nnacadíinuuⁿ yā chí caati Judas ndée sa bolsa chí Jesús ní 'āā nga^a yā ngii yā saⁿá: Cuái di chí neⁿe yú yeⁿé 'viicu o cuica'a dí 'tēe 'iiⁿyāⁿ chí ndaachí snée yā. ³⁰ Ch'íinú che'é yā pan can'daā núúⁿ Judas chuva'ai ní 'āā chí 'da'a.

Mandamiento chí ngāi

³¹ Taachí Judas miiⁿ can'daā sa miiⁿ tuu'mi ní nga^a Jesús: Maaⁿ ní canéé chí cuuvi ch'ēete Saⁿá chí Daiya Dendyuūs. Ní Dendyuūs miiⁿ canéé chí ch'ēete ndúúcu yā. ³² Nduúti chí Dendyuūs canéé chí ch'ēete yā, 'tiicá ntúūⁿ díⁿ yā chí ch'ēete maáⁿ yā. Ní 'cuiinu ní díⁿ yā chí ch'ēete 'iiⁿyāⁿ. ³³ N'diī daiya n'gaiyáá 'téé 'téé nuúⁿ cuneé ndúúcu ndis'tiī. In'nuúⁿ nī 'úú tan'dúúicā chí 'úú chí nga^a ngíⁿ 'iiⁿyāⁿ Israel s'eeⁿ: Naachi 'úú caⁿá ndí's'tiī ní nguéé cuuvi ndaa nī. 'Tíicā nga^a ndis'tiī maaⁿ. ³⁴ 'Áámá ley ngai iteé ndis'tiī chí diiⁿ yá'āi 'iinú nī vi'í 'aama nī taama nī tan'dúúicā chí idiⁿ yá'āi 'iinú ndis'tiī. 'Tiicá ntúūⁿ diyá'ai 'iinú nī vi'í 'aama nī taama nī. ³⁵ 'Íicú chúú tuumicadiinuuⁿ nducyaaca 'iiⁿyāⁿ chí ndí's'tiī ní discípulos yeⁿé ndúúti chí neⁿé nī 'áámá nī taama nī.

**Jesús ngaⁿa yā chi Pedro caaⁿ máⁿ yā
chi nguēe n'diichí yā Jesús**

(Mt. 26.31-35; Mr.

14.27-31; Lc. 22.31-34)

³⁶Tuu'mí ngaⁿā Simón Pedro ngii sa Jesús: Señor, ¿tíí cáⁿa dí? Nan'guēecútaⁿā Jesús miiⁿ: Naachi 'úú caⁿá nguéé cuuví chii ndís'tií can'dáa ní 'úú. Naati canéé chí chii ní can'dáa ní 'úú cuayiivi.

³⁷Tuu'mí ngaⁿā Pedro miiⁿ: Señor, ¿de'ē cuuví chí 'āā ntee cuuví chí can'daá díi maaⁿ? Vida yeⁿé cu'neéⁿ lugar yeⁿē dí.

³⁸Nan'guēecútaⁿā Jesús miiⁿ: ¿'Áá 'cuūví di lado yeⁿe 'úú? Cuaacu níⁿnyúⁿ cuāācū niiⁿnyuⁿ ngaⁿá ngíí díi chí nguéé 'cai tusáⁿā taachi nguéé cueeⁿdítú di 'úú 'iinū cuuvi vuelta.

**Jesús ní tan'dúúca yúúní chí
candéé 'iiⁿyāⁿ nanááⁿ Chiidá yā**

14 Caⁿa Jesús: Nguéé ndii 'úúví staava yeⁿé ní. Cu'téenu ní Dendyuūs. Cu'téenu ní 'úú dendu'ū. ²Na vaacu Chiidá véé taavi naachi 'cuēetinée yú. Ndúúti chí nguéé nduudu cuaacu, tuu'mi ní 'úú nguéé caaⁿ máⁿ 'tiicā. Caⁿá nanguain'daí naachi 'cuēetinée ndís'tií. ³Ndúúti chí naⁿá ní nnguain'daí 'áamá cuaaⁿ yeⁿē ndís'tií chí 'cuēetineé ndís'tií, cuchii ntuúⁿ táámá vmnéⁿēe ní candéé maaⁿ ndís'tií. Naachí cuneé miiⁿ ndís'tií ní 'cuēetinée ní ntúuⁿ ní. ⁴Ní déénú ní naachi caⁿá míⁿ, ní n'diichí ní yúúní.

⁵Tuu'mi ní ngaⁿa Tomás ngii sa Jesús: Señor, nguéé déenu 'nū tíí caⁿá ní. ¿Táácā n'diichí 'nū yúúní?

⁶Jesús nan'guēecutáⁿa yā yeⁿe sa: 'Úú tan'dúúca yúúní, 'úú ngaⁿá nduudu cuaacu, 'úú teé vida. Nguéé du'ū vee ndaá nanááⁿ Chiidá ndúúti chí nguēe cáāvā 'úú. ⁷Ndúúti chí n'diichí ní 'úú in'diichí ní ntúuⁿ Chiidá. Ní ndii maaⁿ ní n'diichí ní 'iiⁿyāⁿ. Ní n'diichí ní ntúuⁿ 'iiⁿyāⁿ.

⁸Tuu'mí ngaⁿa Felipe miiⁿ ngii sa 'iiⁿyāⁿ: Señor, 'cuuⁿmiⁿ ní Chiida yú ní 'cuēetinée 'nū ndúúcu vaadi yeenú.

⁹Jesús ní ngaⁿa yā ngii yā saⁿā: Díi Felipe, 'naaⁿ n'daí ntúuⁿ caneé ndúúcu ndís'tií ní ¿'áá nguéé nin'diichí di 'úú, Felipe? Du'ú 'iiⁿyāⁿ chí n'diichí yā 'úú, n'diichí yā Chiidá. ¿Táácā caaⁿmaⁿ dí: 'Cuuⁿmiⁿ ní Chiida yú? ¹⁰¿'Áá nguéé i'téenu di chí 'úú ní caneé ndúúcu Chiidá ní Chiidá caneé yā nduucú? Nduudu chí ngaⁿá nanááⁿ ndís'tií nguéé ngaⁿá yeⁿé maáⁿ ti yeⁿē Chiidá chí canéé yā nduucú. 'Iiⁿyāⁿ miiⁿ díⁿ yā ntiíⁿnyuⁿ.

¹¹Cu'téenu di 'úú ti 'úú caneé ndúúcu Chiidá ní Chiidá míⁿ canéé yā nduucú, o cu'téenu di 'úú cáāvā ntiíⁿnyuⁿ chí díⁿ. ¹²Cuaacu níⁿnyúⁿ cuāācū niiⁿnyuⁿ ngaⁿá ngíí ndís'tií: Du'ú chí i'teenu 'úú, ní ntiíⁿnyuⁿ chí 'úú idiíⁿ, 'tiicā ntúuⁿ díⁿ yā. Ní ch'ēete ca ntiíⁿnyuⁿ nidiíⁿ yā nguéé ti chuū caati 'úú ní caⁿá nanááⁿ Chiidá. ¹³Ní tanducuéⁿē chí caaca ní Chiidá ndúúcu chí duuchí, chuū 'úú idiíⁿ niicu Chiidá miiⁿ ní 'cuuví 'cuuⁿmíⁿ yā poder caavā 'úú. ¹⁴Ndúúti chí de'ē chí caaca ní ndúúcu chí duuchí, 'úú ní díⁿ.

**Jesús caⁿa yā dicho'ó yā
Espíritu N'dai yeⁿe Dendyuūs**

¹⁵Ndúúti chí neⁿe ní 'úú, díⁿ ní chí ngaⁿa ley yeⁿé. ¹⁶'Úú dí'cu'fítu Chiidá ní teé yā taama yā chí teé yā poder ndís'tií. Ní cuneé yā ndúúcu ní cueⁿe daāⁿmaⁿ. ¹⁷Espíritu ngaⁿa yā vaadi cuaacu. Chiiⁿ chí nguéé 'cuúⁿ 'iiⁿyāⁿ yeⁿe iⁿyeēⁿdí caati nguéé 'iiⁿyāⁿ s'eeⁿ inaaⁿ yā ní nguéé ntúuⁿ ní n'diichí yā Espiritu miiⁿ. Naati ndís'tií n'diichí ní ti Espiritu miiⁿ canéé ndúúcu ndís'tií ní cunéé ntúuⁿ yeⁿē ndís'tií. ¹⁸Nguéé cu'neéⁿ ndís'tií da'caiya nguáⁿā. Ndaá nanaáⁿ ndís'tií. ¹⁹'Tee 'téé nūⁿ 'āā ntéé snaāⁿ iⁿyeēⁿdí 'úú. Ndís'tií ní snaáⁿ ní 'úú. Caati 'úú ní canduūchí, ní ndís'tií canduuchi ntuúⁿ ní. ²⁰Tuu'mí nguuvi miiⁿ ní canéé chí n'diichí ní

'úú chi caneé ndúúcu Chiidá. Ní ndís'tií caneé nī nduucú. Ní 'úú caneé ndúúcu nī. ²¹ Du'ú 'ii'nyā' chi caneé yā ndúúcu ley ye'ne ní díf' yā tan'dúúca chi nga'na ley ye'ne, 'ii'nyā' mii' chi ne'ne yā 'úú. Ní 'ii'nyā' chi ne'ne yā 'úú, Chiidá ne'ne ntúu' yā 'ii'nyā' mii' ní 'úú ní ne'ne ntuú' 'ii'nyā' mii'. Ní 'úú 'cuu'mi' maá' nanáá' 'ii'nyā' mii'.

²² Tuu'mí nga'nā Judas ngii sá Jesús (nguée sa'nā Judas Iscariote): Señor, ¿de'e véé chi 'cuu'mi' nī nanáá' nús'uu ní nguée nanáá' 'ii'nyā' ye'ne i'nyee'di?

²³ Nan'guεcúta'nā Jesús ní ca'na yā: Dú'ú 'ii'nyā' chi ne'ne yā 'úú, nduudu ye'ne n'giindivee' yā. Ní Chiidá míf' ne'ne yā 'ii'nyā'. Ní ndaa' 'nū nanáa' yā. Ní ndaāca 'nū naachi 'cuetinée' nū nduucú yā. ²⁴ Du'u 'ii'nyā' chi nguée ne'ne yā 'úú ní nguée n'giindivee' yā nduudu ye'ne. Nduudu chí n'giindivee' nī nguée ye'ne caati ye'ne Chiidá chi dichó'o yā 'úú.

²⁵ Chuū nga'á taachi caneé ndúúcu ndís'tií. ²⁶ 'Ii'nyā' chi téé yā poder s'uuú', 'ii'nyā' mii' ní Espíritu N'dai ye'ne Ndyuūs. Chuū chi dichó'ó Chiidá ndúúcu chi duuchí. 'Ii'nyā' míf' ca'cuee' yā ndís'tií tanducue'ne dendu'ū. Ní nin'gaacú yā ndís'tií tanducue'ne chi ca'na nanáá' ndís'tií.

²⁷ Chí cunee 'dii' cu'neé' ndúúcu ndís'tií. Chi cu'neé' 'dii' ye'ne máa' teé ndís'tií. Nguée tan'dúúca chi i'nyee'di teé chi 'úú teé ndís'tií. Nguée 'cuūdi daānā ye'ne staava ye'ne nī, ndíf' nguée ndúú 'va'a rá nī. ²⁸ Ch'iindivee' nī chi 'úú nga'á: Ca'na ní cuchii ntúu' nanáá' ndís'tií. Ndúúti chí ne'ne nī 'úú, tuu'mi ní cuaacu níf'nyú' chi yeenú taavi nī ti nga'á chi ca'na nanáá' Chiidá. Ní Chiidá vmnaa' cá yā ní chi cuuvi 'úú. ²⁹ Maa' ní nga'á ye'ne chi cuuvi, ní 'iicu taachi chó'oo chuū cuuvi cu'téenu nī.

³⁰ 'Aā ntée 'yaa' ca'na ndúúcu ndís'tií caati ndaa sa'nā chi 'iintye'ne ye'ne i'nyee'di 'cūū. Ní nguée du'ū vee caneé

ye'ne yā nduucú. ³¹ 'Iicu cuuvi cu'téenu 'ii'nyā' ye'ne i'nyee'di chí 'úú ne'ne Chiidá. Ní tan'dúúca chí Chiidá ca'á yā mandamiento 'úú 'tiicá chí díf'. Ncuee' yú ní ca'na yú maa'.

Jesús tan'dúúca 'áamá dii'yu dúnde'e chí cuaacu

15 Ca'na Jesús: 'Úú tan'dúúca dii'yu dúnde'e chí cuaacu, ní Chiidá díf' yā cuidado ye'ne dii'yu dúnde'e. ² Tanducue'ne duu'nē ye'ne chí nguée de'ē vee n'gui'i ye'ne 'caacá yā ní divi' yā. Ní nducue'ne duu'nē chí véé n'gui'i ye'ne ní didεevé yā 'iicu cuuvi n'deē ca n'gui'i ye'ne. ³ Ndís'tií 'āā dεevé nī cáāvā nduudu chí nga'á. ⁴ Ndís'tií cunee nī nduucú ní 'úú cunee ndúúcu nī. Tan'dúúca duu'ne nguée 'cuetinée' n'gui'i ye'ne nduūti chí nguεe canée na dii'yu dúnde'e, 'tiicá ntúu' ndís'tií nduuti chí nguée cunee nī nduucú.

⁵ 'Úú tan'dúúca dii'yu dúnde'e ní ndís'tií ní dúu'nē. 'Ii'nyā' chí caneé yā nduucú ní 'úú caneé nduucú yā, 'ii'nyā' mii' néene n'deē n'gui'i candée yā. Ndúúti chí nguée 'úú nduucú yā ní nguée de'ē vee cuuvi díf' yā. ⁶ Du'u 'ii'nyā' chí nguεe canee yā nduucú cun'dáa yā tan'dúúca dúu'ne chí nguée n'gui'i ye'ne ní ntí'i. Ní 'ii'nyā' ita'á yā ní ngii yā na ya'nā. Ní ngiichi.

⁷ Ndúúti chí canee nī nduucú, ní nduudu ye'ne canee nduucú nī, caaca nī tanducue'ne chí ne'ne nī ní cuuvi. ⁸ Taachi candé nī n'deē n'dái n'gui'i ye'ne nī, ní ch'i'í nī chí discípulos ye'ne tuu'mi ní ndúúcu chuū ní ch'i'í nī poder Chiidá. ⁹ Tan'dúúca chí ne'ne Chiidá 'úú 'tiicá ntúu' 'úú ne'ne ndís'tií. Cunee nī ndúúcu vaadi ne'ne ye'ne. ¹⁰ Ndúúti chí díf' nī tan'dúúca chí nga'na ley ye'ne, tuu'mi cunee nī ndúúcu vaadi ne'ne ye'ne. Ní chuū tan'dúúca chí 'úú idif' nducue'ne chí nga'na ley ye'ne Chiidá ní caneé ndúúcu vaadi ne'ne ye'ne yā.

11 Dendú'ú chi 'tuucā nga'á. Ní'cú vaadī yeenú ye'é cunee nduucú nī. Ní vaadī yeenú ye'é nī dii' cumplir. 12 Chuū ley ye'é chi dine'é nī vi'í 'aama nī taama nī tan'dúucā chi 'úú ne'é ndis'tiī. 13 Mar 'áámá sa'ā nguéeé vaadī ne'e chi ch'ēete cá ye'ē chi 'cu-uví 'áámá sa'ā caavā amigo ye'ē sa. 14 Ndis'tiī nī amigos ye'ē ndis'tiī ndúúti chi dí' nī cosa chi 'úú nga'á. 15 'Āā ntéé caa'má' chi ndis'tiī ní mozos ye'é ti mozos nguēe deenu sa de'ē chi dii' 'ii'yā' chi nga'a ntiī'nyú' yā ye'ē sa. Naati nga'á chi ndis'tiī ní amigos ye'ē ti tanducue'ē chi n'giindivee' ye'ē Chi-ida, nga'á ngí ndis'tiī. 16 Ndis'tiī nguéeé ndēeve nī 'úú, naati 'úú nindēevé ndis'tiī. Ní 'neé' ndis'tiī caati cuuvi candéē nī n'gui'i. Ní n'gui'i ye'ē nī 'áámá cūnee. Ní tanducue'ē chi caaca nī Chiidá ndúúcu chi duuchí, 'ii'yā' mii' ní tēe yā ndis'tiī. 17 Chuū ní nga'á ndis'tiī chi diné'ē nī vi'í 'áámá nī táámá nī.

'Ii'yā' ye'ē i'nyee'di nguéeé n'diichi ndis'tiī

18 Ndúúti chi 'ii'yā' ye'ē i'nyee'di nguéeé ne'e yā ndis'tiī 'āā déenu nī chi vmnáá' vmnaa' nguéeé ne'e yā 'úú. 19 Ndúúti chi canée nī ní dí' nī cosas ndúúcu 'ii'yā' ye'ē i'nyee'di, 'ii'yā' ye'ē i'nyee'di diné'ē yā ndis'tiī, naati ndis'tiī nguéeé ye'ē i'nyee'di ndis'tiī. Ndēevé ndis'tiī vmnaá' ye'ē chi dí'ndá' i'nyee'di. Cáavā chuū chi i'nyee'di nguéeé ne'e ndis'tiī. 20 N'gaacu nī ye'ē nduudu chi 'úú nga'á ngí ndis'tiī: Nguéeé vmnaa' ca 'ii'yā' chi dii' mandado ti 'ii'yā' chi nga'a ntiī'nyu'. Ndúúti chi 'ii'yā' s'tí' ní can'daa yā 'úú 'tiicá ntúú' can'daa yā ndis'tiī. Nduuti chi dí' yā tan'dúucā chi nga'á 'tiicá ntúú' dí' yā tan'dúucā chi nga'á nī. 21 Tanducue'ē chuū dí' yā ndúúcu ndis'tiī caavā chi duuchí ti nguéeé n'diichí yā 'ii'yā' chi dichó'o yā 'úú.

22 Ndúúti chi nguéeé ndaá ndí' nguéeé ndúú yaa'ví rá 'ii'yā' tuu'mi 'ii'yā' ní nguéeé déenu yā chi véé nuu'ndi ye'ē yā. Maa' ní nguéeé mar 'áámá yā chi cu-uví caa'má' yā chi nguéeé véé nuu'ndi ye'ē yā. 23 'Ii'yā' chi nguéeé ne'ē yā 'úú 'tiicá ntúú' Chiidá mí' ní nguéeé ne'ē yā 'ii'yā'. 24 Ndúúti chi 'úú nguéeé dí' nguuaa' yā ntiī'nyu' chi mar 'áámá 'ii'yā' nguéeé dí' yā, nguéeé déenu yā chi véé nu-uví ye'ē yā. Naati maa' ní n'diichí yā 'úú, ní nguéeé ne'ē yā 'úú ndúúcu Chiidá. 25 'Iicu cuuvi cuaacu nduudu chi canéeé nguū' na ley ye'ē yā: Nguéeé de'ē caavā chi nguēe ne'ē yā 'úú.

26 Naati taachi ndaá yā 'ii'yā' chi Es-píritu N'dai ye'ē Dendyuūs ní tēe yā poder s'uuú'. Ní 'úú ní dichó'o Espíritu N'dai chi ye'ē Chiidá. Espíritu N'dai ye'ē Dendyuūs ní cuaacu ní cuchii ye'ē Chiidá. Espíritu mii' caa'ma' cuaacú yā ye'ē 'úú. 27 'Iicu ndis'tiī ní caa'ma' cuaacú nī ye'ē 'úú caati canée nī ndu-ucú ndii cuáá' naachi chi nga'á.

16 Ca'a Jesús: Chuū nga'á ngí ndis'tiī 'iicu nguéeé nduuvi taá' nī. 2 'Ii'yā' ní 'cueecú yā ndis'tiī cuaa' chuva'āi yaacū. Ní taachí ndaá hora chi 'caa'nú' yā ndis'tiī, nacádiinúú' yā chi n'daacā idí' yā ntiī'nyu' ye'ē Dendyuūs. 3 Ní 'ii'yā' s'tí' ní 'tíicā idí' yā ti nguēe n'diichí yā Chiidá, ndii nguéeé nduu 'úú ra. 4 Maa' ní nga'á ngí chuū ndis'tiī caati taachí ndaa hora mii' n'gáacú nī ti 'úú ní 'āā ca'á. Chuū nī nguéeé ca'á ndí' cuaa' vmnaa' ti 'úú caneeé ndúúcu ndis'tiī.

Ntiī'nyu' ye'ē Espíritu N'dai ye'ē Ndyuūs

5 Ca'a Jesús: Naati maa' ní ca'á n'diichí 'ii'yā' chi dichó'o 'úú. Ní mar 'áámá ndis'tiī nguéeé ntiinguunee' nī 'úú: ¿Tí' ca'a nī? 6 Chii' chi ca'á chi 'túúca, ní néené chii ndaachí' staava ye'ē nī. 7 'Úú nga'á nduudu cuaacu mii': N'daacā

caávā ndís'tiī chi caⁿá. Ndúúti chi 'úú nguéé caⁿá tuu'mi ní Espíritu N'dai yeⁿe Dendyuūs chi tée yā poder ndís'tiī nguéé ndai yā nanáán ndís'tiī. Ndúúti chi 'úú caⁿá ní 'úú dicho'ó 'iiⁿyāⁿ. ⁸ Taachí 'iiⁿyāⁿ miiⁿ ní ndāa yā, ní caaⁿmáⁿ yā ndúúcu 'iiⁿyāⁿ yeⁿe iⁿ'yeēⁿdí yeⁿe nuuⁿndi, ní yeⁿe vaadi cuaacu, ní yeⁿe 'iiⁿyāⁿ chi diiⁿ juzgar. ⁹ Caaⁿmáⁿ yā yeⁿe nuuⁿndi chi nguéé i'téenu yā 'úú. ¹⁰ Caaⁿmáⁿ yā yeⁿe vaadi cuaacu chi 'úú caⁿá nanáán Chiidá ní 'āā ntéé n'diichí yā 'úú. ¹¹ Caaⁿmáⁿ yā nuuⁿndi yeⁿe 'áámá 'iiⁿntyēⁿe ch'ēte yeⁿe iⁿ'yeeⁿdí 'cūū 'āā canéé juzgado sa.

¹² Nééné n'dee dendu'ū chi véé chi cuuvi ndis'tiī naati maaⁿ ní nguee cuuvi cūnee ná vaanicadiinūⁿ yeⁿe nī. ¹³ Taachí ndaá Espíritu yeⁿe vaadi cuaacu, 'iiⁿyāⁿ miiⁿ ní ca'cuéēⁿ yā ndís'tiī na tanducuéⁿe vaadi cuaacu. Ni nguéé caaⁿmáⁿ yā yeⁿe maán yā ti caaⁿmáⁿ yā tanducuéⁿe chi n'giindiveēⁿ yā. Ní ch'iⁿi yā ndís'tiī de'ē chí cuchii. ¹⁴ 'Iiⁿyāⁿ miiⁿ ní ch'iⁿi yā poder yeⁿe ti cuta'á yā poder yeⁿe 'úú ní ch'iⁿi yā ndis'tiī. Ní cuuvi cádiinúⁿ nī. ¹⁵ Nducuéⁿe chí véé yeⁿe Chiidá, chuū ní yeⁿe. Cáávā chuū ngaⁿá chi Espíritu yeⁿe vaadi cuaacu cuta'á yā yeⁿe 'úú ní ch'iⁿi yā ndis'tiī. Ní cádiinúⁿ nī.

Chi ndaachí yeⁿe nī ní nduuvi vaadi yeenu

¹⁶ Caⁿa Jesús: Taa lífⁿ ní 'āā ntéé snaán nī 'úú. Taama vmnéⁿee, taa lífⁿ ní snaán nī 'úú ti 'úú ní caⁿá nanáán Chiidá.

¹⁷ Tuu'mi caⁿa n'duuvi discípulos yeⁿe yā ngii yā 'áámá yā táámá yā: ¿De'e chi 'tíficā ngaⁿa yā ngii yā s'uúuⁿ taaⁿ lífⁿ ní 'āā ntéé chinaán nī 'úú ní taama vmnéⁿee taaⁿ lífⁿ ní chinaán nī 'úú, ti 'úú ní caⁿá nanáán Chiidá? ¹⁸ Tuu'mi ní ngaⁿa yā. ¿De'e chi 'tíficā taaⁿ lífⁿ? Nguéé tuumi-cadiinuuⁿ yú.

¹⁹ Ní tuumicádíinuⁿ Jesús chi neⁿe ntiinguuneeⁿ saⁿā s'eeⁿ, ní ngaⁿa yā: ¿'Áá ntúnguúneeⁿ vi'í nī chi 'túucā caⁿá chí taaⁿ lífⁿ ní 'āā ntéé chí naaⁿ nī 'úú, ní taama vmnéⁿee, taa lífⁿ ní chí naaⁿ nī 'úú? ²⁰ Cuaacu níⁿnyú cuāacū níⁿnyuⁿ ngaⁿá ngii ndis'tiī: Maaⁿ ní cuēecu nī ní ya'ai nī. Ní iⁿ'yeeⁿdí ní cuuvi yeenu naati ndís'tiī ní chí n'daaⁿ chí ya'ai nī ndúúcu vaadi yeenu. ²¹ N'daataá chí canee chí 'āā 'cuundiyāāⁿ daiyā tá, véé vaadi ya'ai yeⁿe ta, ti 'āā chéé ndaa hora yeⁿe tá. Taachí 'āā véé daiya tá 'āā ntéé n'gaacu tá yeⁿe vaadi ya'ai yeⁿe tá chí yeenu tá chí véé 'áámá daiya tá yeⁿe iⁿ'yeeⁿdí. ²² 'Tiicā ntúūⁿ ndís'tiī ní canéé vaadi ndaachí nanáán nī. Naati taama vmnéⁿee ní n'diichí ntuúⁿ ndís'tiī. Ní cuneé nī vaadi yeenu na staava yeⁿe nī. Ní mar 'áámá 'iiⁿyāⁿ ní nguéé divi yā vaadi yeenu yeⁿe ndis'tiī.

²³ Ní nguuvi miiⁿ nguéé ntiinguuneeⁿ nī du'ū vee yeⁿe. Cuaacu níⁿnyúⁿ cuāacū níⁿnyuⁿ ngaⁿá ngii ndís'tiī chí tanducuéⁿe chí caaca nī Chiidá ndúúcu chí duuchí ní Chiidá tée yā ndis'tiī. ²⁴ Ndi maaⁿ nguéé du'ū vee ngiica nī ndúúcu chí duuchí. Caaca nī ní Chiidá tée yā ndis'tiī. Ní vaadi yeenu yeⁿe nī cuuvi yeenu taavi.

Jesús chicheé yā ndúúcu iⁿ'yeeⁿdí

²⁵ Chuū chí ngaⁿá ndúúcu cuentas yeⁿe ndúúcu ndís'tiī. Maaⁿ ní ndaa hora chí 'āā ntéé caⁿá yeⁿe ndis'tiī ndúúcu cuentas naati caaⁿmáⁿ cuaacu yeⁿe Chiidá. ²⁶ Nguuvi miiⁿ ní caaca nī ndúúcu chí duuchí. Ní 'úú nguéé ngaⁿá chí 'úú nídi'cuíftú Chiidá cáávā ndis'tiī. ²⁷ Maaⁿ Chiidá neené neⁿe yā ndís'tiī caati ndís'tiī neⁿe nī 'úú. Ní i'teenu nī chí 'úú chíicá yeⁿe Chiidá. ²⁸ Chíicá yeⁿe Chiidá ní ndaa iⁿ'yeeⁿdí 'cūū. Cu'neeⁿ ntuúⁿ iⁿ'yeeⁿdí. Ní naⁿá n'diichí Chiidá.

²⁹ Tuu'mi ngaⁿa discípulos yeⁿe yā: Cun'díichí dí maaⁿ ní ngaⁿā cuaacu dí

nguée ndúúcu cuentas. ³⁰ Maaⁿ ní tuumi-cadiinúúⁿ 'nū chi deenú nī tanducueⁿē dendu'ū. Ní nguéeⁿ canee ngiinú nī chi ntinguuneeⁿ 'iiⁿyāⁿ n'diī. Cáávā chuū i'teenú nū chi chiica nī yeⁿé Dendyuūs.

³¹ Nan'gueecútaⁿā Jesús: ¿Áá i'téenu nī maaⁿ? ³² Cun'diichí nī. Hora miiⁿ ní cuchii. Ní 'āā ndaā chí caⁿā 'muuⁿ caⁿā miiⁿ ndí'stīi na vaacú nī. Ní cu'neéⁿ nūuⁿ nī 'úú dámaaⁿ. Naati nguéeⁿ canee dámaaⁿ ti Chiidá canee yā nduucú. ³³ Chuū nī ngaⁿá ngí ndis'tiī chi cucáávā 'úú canee 'diīⁿ nī. Iⁿyeēⁿdī ní 'cuenú nī cuuvi. Cuuvi ch'ētiinúu nī. 'Úú ní chicheé ndúúcu iⁿyeēⁿdī.

Jesús ndee yā ndúúcu Chiidá yā caavā discípulos yeⁿé yā

17 Chuū caⁿa Jesús ní n'diichí yā cuaaⁿ nanguuvi ní caⁿa yā: N'diī Chiidá, hora yeⁿé ní 'āā ndaā. Díⁿ nī dich'eté nī Daiya nī. 'Tiicā ntúūⁿ 'úú chi Daiya nī cuuvi dich'eté n'diī. ² Tan'dúúca chí tee nī poder 'úú chi Daiya nī yeⁿe de'ē chí díⁿ nducyaaca 'iiⁿyāⁿ cáávā chí ca'á vida cueⁿe daāⁿ-maⁿ 'iiⁿyāⁿ chí tee nī 'úú. ³ Chuū chí vida cueⁿe daāⁿmaⁿ chí n'diichí yā n'diī chí 'áámá n'dyaⁿā Dendyuūs chí cuaacu níⁿnyúⁿ chí Dendyuūs ndúúcu Jesu-cristo chí dich'ó nī.

⁴ 'Úú ní dich'eté n'diī na yáⁿāa 'cūū. 'Āā ch'īnū díⁿ ntiīⁿnyuⁿ chí tee nī chí díⁿ. ⁵ Maaⁿ ní n'diī, Chiidá, dich'eté nī 'úú, n'diī ndúúcu maáⁿ nī, ndúúcu poder chí canee nduucú maáⁿ taachi 'āā 'cuéeⁿ cunee iⁿyeēⁿdī.

⁶ Ngaⁿa cuaacú yeⁿē chí duuchi yeⁿé nī nanááⁿ saⁿā s'eeⁿ yeⁿe iⁿyeēⁿdī 'cūū chí tee yā 'úú. Saⁿā s'eeⁿ yeⁿé nī. Ní tee nī 'úú. Ní n'giindiveéⁿ yā nduudu yeⁿé nī. ⁷ Maaⁿ ní déenú yā chí tanducueⁿē dendu'ū chí tee nī 'úú ní yeⁿé nī. ⁸ Ti ndúúdu chí tee nī 'úú ní caⁿá nanááⁿ 'iiⁿyāⁿ ní 'iiⁿyāⁿ s'eeⁿ ní n'giindiveéⁿ yā nduudu miiⁿ. Ní deenu cuaacu yā chí

chiicá nanááⁿ n'diī. Ní i'téenu yā chí n'diī dich'ó nī 'úú.

⁹ 'Úú ngiicá caavā 'iiⁿyāⁿ s'eeⁿ. Nguéeⁿ nidí'cuítu cáávā iⁿyeēⁿdī ti cáávā 'iiⁿyāⁿ chí tee nī 'úú, ti yeⁿé n'diī. ¹⁰ Ní taanduvéé dendu'ū yeⁿé ní yeⁿé nī. Ní taanduvéé dendu'ū yeⁿé nī ní yeⁿé. Ní chuū ch'iⁿi poder yeⁿé.

¹¹ Ní 'āā ntéé cūneé iⁿyeēⁿdī naati 'iiⁿyāⁿ s'eeⁿ snée yā iⁿyeēⁿdī. 'Úú ní cuchí nanááⁿ nī. N'diī Chiidá chí deēve, díⁿ nī cuidado 'iiⁿyāⁿ chí tee nī 'úú ndúúcu chí duuchi nī. Ní chí cuuvi 'áámá yā tan'dúúca s'uuúⁿ ní 'áámá yú. ¹² Taachí canee ndúúcu 'iiⁿyāⁿ iⁿyeēⁿdī ní diīⁿ cuidado 'iiⁿyāⁿ ndúúcu chí duuchi nī, 'iiⁿyāⁿ chí ntee nī 'úú. 'Úú ní diīⁿ cuidado 'iiⁿyāⁿ ní mar 'áámá yā nguéeⁿ chindai yā. 'Áámá nūuⁿ saⁿā daiya yááⁿnguiinūuⁿ chindai sa. Ní 'iicu naachi cánée nguūⁿ ní cúví cuaacu.

¹³ Naati maaⁿ ní cuchí nanááⁿ nī. Ní ngaⁿá chuū taachi cunee iⁿyeēⁿdī 'cūū caati vaadī yeēnu yeⁿé canee nduucú yā, ní cuuvi yeenu taavi yā. ¹⁴ 'Úú ní ca'á 'iiⁿyāⁿ nduudu yeⁿe nī. Iⁿyeēⁿdī nguéeⁿ dinéⁿe 'iiⁿyāⁿ ti nguéeⁿ yeⁿe iⁿyeēⁿdī 'iiⁿyāⁿ. 'Tiicá ntúūⁿ nguéeⁿ yeⁿe iⁿyeēⁿdī 'úú. ¹⁵ Nguéeⁿ di'cuítūu chí ndiví nī 'iiⁿyāⁿ yeⁿē iⁿyeēⁿdī. Díⁿ nī cuidado 'iiⁿyāⁿ s'eeⁿ yeⁿe yááⁿnguiinūuⁿ. ¹⁶ Nguéeⁿ yeⁿe iⁿyeēⁿdī 'iiⁿyāⁿ s'eeⁿ tan'dúúca chí nguéeⁿ yeⁿe iⁿyeēⁿdī 'úú. ¹⁷ Díⁿ nī didēvé nī 'iiⁿyāⁿ cucáávā nduudu cuaacu yeⁿé nī. Nduudu yeⁿé nī ní nduudu cuaacu. ¹⁸ Tan'dúúca chí dich'ó nī 'úú iⁿyeēⁿdī 'tiicá ntúūⁿ dich'ó 'iiⁿyāⁿ s'eeⁿ iⁿyeēⁿdī. ¹⁹ Cáávā 'iiⁿyāⁿ s'eeⁿ 'úú māaⁿ didēvé maáⁿ. Ní 'iiⁿyāⁿ s'eeⁿ cuuví yā deēve nā nduudu cuaacu.

²⁰ Nguéeⁿ di'cuítu dámaaⁿ caavā 'iiⁿyāⁿ miiⁿ ti cáávā 'iiⁿyāⁿ chí cu'téenu yā 'úú cáávā nduudu yeⁿē 'iiⁿyāⁿ s'eeⁿ. ²¹ Ní nducyaaca yā ní 'áámá nūuⁿ cuuví yā tan'dúúca n'diī canee nī nduucú, ní

caneé nduucú nī. Níicú 'iiⁿyāⁿ s'eeⁿ ní canéé ntúuⁿ yā 'áámá nūuⁿ ndúúcu yú. Ní 'iicu cu'téénú 'iiⁿyāⁿ yeⁿe iⁿ'yeēⁿdī chí n'diī dichó'ó nī 'úú. ²²Ní poder chí téé nī 'úú, miiⁿ ni ca'á 'iiⁿyāⁿ. Ní 'áámá nūuⁿ cuuví yā tan'dúúcā chí 'áámá nus'úu. ²³'Úú ní ndúúcu 'iiⁿyāⁿ s'eeⁿ. Ní n'diī ní ndúúcu 'úú. Níicú 'áámá nūuⁿ chí n'daaca cuuví yā. Ní iⁿ'yeēⁿdī ní cuuvi deenu chí dichó'ó nī 'úú ní chí dínéⁿe nī 'iiⁿyāⁿ s'eeⁿ tan'dúúcā chí neⁿ'é nī 'úú.

²⁴N'diī Chiidá, 'iiⁿyāⁿ s'eeⁿ chí teé nī 'úú, neⁿ'é chí naachi 'úú cuneéⁿ, 'iiⁿyāⁿ s'eeⁿ cūnéé yā nduucú. Ní cuuvi n'diichí yā poder yeⁿ'é chí teé nī 'úú caati n'diī ní neⁿ'é nī 'úú ndiī taachi 'āā'cuéé iⁿ'yeēⁿdī. ²⁵N'diī Chiidá chí dæve, 'aa ntéé rá chí iⁿ'yeēⁿdī nguéé n'diichí n'diī 'úú n'diichí n'diī. Ní 'iiⁿyāⁿ s'tfí ní deenu yā chí n'diī dichó'ó nī 'úú. ²⁶'Úú ní ngaⁿ'á yeⁿe chí duuchí nī, ní caⁿ'á ngāⁿ'a yeⁿe chí duuchí nī. Níicú maaⁿ vaadí neⁿ'e chí néⁿe nī 'úú cuuvi cunéé ndúúcu yā. Ní 'úú caneé ndúúcu yā.

Sta'á yā Jesús

(Mt. 26.47-56; Mr.

14.43-50; Lc. 22.47-53)

18 Taachí Jesús caⁿ'á yā chuū, can'dáa yā ndúúcu discípulos yeⁿ'é yā táámá lado yíicú 'lííⁿ chí nguuvi Cedrón naachi canéé 'áámá cheēⁿ yeⁿe naandā. Ní miiⁿ sndaā Jesús ndúúcu discípulos yeⁿ'é yā. ²Judas chí diiⁿ sa entregar Jesús ní n'diichi ntúūⁿ saⁿ'ā na cheēⁿ miiⁿ ti 'āā cánéé n'dee cuuví nduuvídáámá yā Jesús ndúúcu discípulos yeⁿ'é yā na cheēⁿ miiⁿ. ³Saⁿ'ā chiiduú n'gæté ndúúcu saⁿ'ā fariseos teé yā Judas Iscariote soldados ndúúcu policías ní Judas cueⁿ'e sa ndúúcu 'aama taaⁿ soldados ndúúcu policías. Ndaa yā na cheēⁿ miiⁿ ndúúcu lámparas, ndúúcu antorchas, ndúúcu armas. ⁴Naati Jesús chí déénú yā tanducuéⁿ'ē dendu'ū chí

cuchíi, cueⁿ'e yā ní ndaa yā nanáⁿ 'iiⁿyāⁿ s'eeⁿ ní caⁿ'a yā: ¿Du'u in'nuúⁿ ní?

⁵Ní nan'guæcutáⁿ'a sa yeⁿ'e yā: Jesús yeⁿ'ē yāā Nazaret miiⁿ. Tuu'mí ngaⁿ'a Jesús ngii yā 'iiⁿyāⁿ s'eeⁿ: 'Úú 'iiⁿyāⁿ miiⁿ. Canéé ntúūⁿ Judas miiⁿ, saⁿ'ā chí dííⁿ nca'a sa 'iiⁿyāⁿ. ⁶Taachí Jesús caⁿ'a yā: 'Úú 'iiⁿyāⁿ miiⁿ, tuu'mí ní saⁿ'ā s'eeⁿ ndaacadaamí yā ní ch'æetindiití yā na yáⁿ'āa. ⁷Nan'guæcúnéé ntuūⁿ yā tiingu-uneēⁿ yā: ¿Du'u ra in'nuúⁿ ní? Ní 'iiⁿyāⁿ s'eeⁿ ní caⁿ'a yā: Jesús yeⁿ'ē yāā Nazaret miiⁿ.

⁸Nan'guæcútaⁿ'ā Jesús: 'Āā ngaⁿ'á ngii ndís'tií chí 'úú. Ndúúti chí 'úú chí in'nuúⁿ nī, 'cuáaⁿ nī chí naⁿ'a 'iiⁿyāⁿ s'tfí.

⁹Ní cuuvi cuaacu chí 'úú chí caⁿ'á: 'Iiⁿyāⁿ chí teé nī 'úú, mar 'áámá yā nguéé chí ndai yā. ¹⁰Tuu'mí Simón Pedro chí ndéé sa espada ní tun'dáa sa ní 'nuucá'ai sa ní chí'ica sa veeⁿ sa lado tá cuaacu yeⁿ'ē sáⁿ'ā chí diiⁿ mandado yeⁿ'e chiiduú ch'æete ca. Ní saⁿ'ā miiⁿ ní nguuvi sa Malco. ¹¹Tuu'mí Jesús ngaⁿ'a yā ngii yā Pedro: N'nuūⁿ dí espada vaacu. Prueba chí teē Chiidá 'úú, ¿'áá nguéé cánéé chí 'cueenú cuuvi yeⁿ'ē?

Jesús nanáⁿ chiiduú ch'æeté ca

(Mt. 26.57-58; Mr. 14.53-54; Lc. 22.54)

¹²Tuu'mí ní 'iiⁿyāⁿ yeⁿ'ē 'áámá taaⁿ soldado ndúúcu soldado chí yuudu ndúúcu policías yeⁿ'ē 'iiⁿyāⁿ Israel s'eeⁿ ní sta'á sa Jesús ní cachiichí sa 'iiⁿyāⁿ. ¹³Ní candéé sa vmnáⁿ vmnaaⁿ nanáⁿ saⁿ'ā chí ngu- uvi Anás, tii sáⁿ'ā miiⁿ ní nchaⁿ'ā ndiicú Caifás miiⁿ. 'Iiⁿyāⁿ miiⁿ ní chiiduú ch'æeté ca nduuyu miiⁿ. ¹⁴Ní Caifás miiⁿ ca'a sá consejo saⁿ'ā Israel s'eeⁿ chí canéé chí 'cuūvi 'aama saⁿ'ā cáávā 'iiⁿyāⁿ.

Pedro canéé yā chuva'ai yeⁿ'ē Anás

(Mt. 26.69-70; Mr.

14.66-68; Lc. 22.55-57)

¹⁵Ní n'daā Simón Pedro Jesús miiⁿ ní táámá discípulos. Ní chiiduú ch'æeté ca

n'diichí yā discípulos miiⁿ chí sndaá sa ndúúcu Jesús corredor yeⁿē va'ai yeⁿē chiiduú ch'eté ca miiⁿ. ¹⁶Naati Pedro miiⁿ canéé sá cuaaⁿ dáámí cheendi va'āi. Ní can'dāa taama discípulo chi chiiduú ch'eté ca n'diichí yā 'iiⁿyāⁿ. Ní yaa'ví yā n'daataá chi canéé cheendi va'āi. Ní di-i'yúⁿ yā Pedro míⁿ cheeti va'āi. ¹⁷Tuu'mi ní n'daataá chi diiⁿ mandado chí canéé cheendi va'āi ngaⁿa tá: ¿'Áá nguéé dí ntúūⁿ 'áámá discípulo yeⁿē saⁿa 'cūū? Tuu'mí Pedro ngaⁿā sa: Nguéé 'úú.

¹⁸Ní chéendii saⁿā chi dichí'vē ndúúcu policías, saⁿā miiⁿ tiivi sa yaⁿā yeⁿe yíyū ti 'áámá 'iichee. Saⁿā miiⁿ nga'a tavii'nu sa. Ní canéé nī ntúūⁿ Pedro ndúúcu sa. Ní chéendii sa nga'a tavii'nu sa ca'a sa.

Anás tiinguunéⁿ sa Jesús

(Mt. 26.59-66; Mr. 14.55-64; Lc. 22.66-71)

¹⁹Ní chiiduú ch'eté cá miiⁿ nítiinguuneeⁿ sa Jesús yeⁿe discípulos yeⁿé yā ndúúcu yeⁿe chi Jesús chí'cueéⁿ yā.

²⁰Jesús nan'guēcutáⁿa yā yeⁿē sa: 'Úú ní ngaⁿá cuaacú nanááⁿ 'iiⁿyāⁿ yeⁿe iⁿ'yeeⁿdí. 'Úú ní chí'cueéⁿ na yaacū sinagogas ní na yaacū templo ntúūⁿ naachí nduuvidaama nducyaaca 'iiⁿyāⁿ Israel s'eeⁿ ní nguéé de'ē vee chí ngaⁿa n'de'éi.

²¹¿De'ē tíngúúneeⁿ di 'úú? Tíngúúneeⁿ dí 'iiⁿyāⁿ chí ch'iindiveéⁿ yā chí caⁿá chí 'iiⁿyāⁿ. N'diichi nī. 'Iiⁿyāⁿ s'eeⁿ déénú yā chí caⁿá.

²²Taachí Jesús ch'iinu caⁿá yā chuū, 'áámá policía chí canéé miiⁿ ch'éⁿe sá Jesús, ní caⁿa sa: ¿'Áá 'tíicā nan'guēcutáⁿa di yeⁿē chiiduú ch'ete ca?

²³Nan'guēcutáⁿā Jesús: Ndúúti chí nguē n'daacā chí ngaⁿá caaⁿmaⁿ di de'ē chí nguē n'daacā chí ngaⁿá. Ndúúti chí n'daacā, ¿de'ē cuuvi chí n'geⁿē di 'úú?

²⁴Anás miiⁿ ní dichó'o sa Jesús ch'eechiichí yā nanááⁿ saⁿā chí nguuvi

Caifás miiⁿ, saⁿā chí chiiduú ch'eté cá miiⁿ.

Pedro miiⁿ ngaⁿa sa taama vmnéⁿēe chí nguéé n'diichi sa Jesús miiⁿ

(Mt. 26.71-75; Mr. 14.69-72; Lc. 22.58-62)

²⁵Chéendii Simón Pedro miiⁿ ní nga'a tavii'nu sa saⁿā. Ní nga'a yā ngii yā saⁿā: ¿'Áá nguéé 'tíicā chí dí ní discípulo yeⁿé yā? Pedro cheeⁿdítu sa ní ngaⁿā sa: Nguéé 'úú.

²⁶'Áámá saⁿā chí diiⁿ mandado yeⁿē chiiduú ch'eté cá ní saⁿā miiⁿ ní 'iiⁿyāⁿ yeⁿe saⁿā chí chiica Pedro miiⁿ veeⁿ sa. Ngaⁿa sa ngii sa saⁿā: ¿'Áá nguéé n'diichi dii cheeti chééⁿ naāndā miiⁿ ndúúcu yā?

²⁷Taama vmnéⁿēe ní cheeⁿdítu táaⁿ Pedro: Nguéé 'úú. Ní miⁿ'niiⁿ'yu miⁿ'niiⁿ'yu ní tusaⁿā chiita tí.

Jesús nanááⁿ Pilato

(Mt. 27.1-2, 11-14; Mr. 15.1-5; Lc. 23.1-5)

²⁸Ní candéé sa Jesús miiⁿ tyaaⁿ tyaaⁿ yeⁿē nanááⁿ Caifás miiⁿ ndii naachi canéé cuarto yeⁿē juzgado. Ní 'iiⁿyāⁿ s'eeⁿ ní nguéé chí ndaá yā cuaaⁿ cheeti va'ai ch'ete miiⁿ cáāvā chí nguéé neⁿe yā chí cunedáámí yā nuuⁿndi taachi ch'éⁿe yā nguiinú yeⁿē pascua. ²⁹Tuu'mi ní can'dāa Pilato chuva'ai nanááⁿ 'iiⁿyāⁿ s'eeⁿ ní caⁿa sa: ¿De'ē nuuⁿndi yeⁿē saⁿa 'cūū vee?

³⁰Nan'guēcutáⁿa yā ní caⁿá yā 'iiⁿyāⁿ: Ndúúti chí saⁿa 'cūū chí nguē du'ū vee diiⁿ sa, nguéé teé 'nū saⁿā n'dii.

³¹Tuu'mi ní ngaⁿā Pilato ngii sa 'iiⁿyāⁿ s'eeⁿ: Cuta'á ní 'iiⁿyāⁿ. Ní n'diichí yā de'ē nuuⁿndi yeⁿe yā véé tan'dúúcā chí canéé na ley yeⁿé nī. Níicú 'iiⁿyāⁿ Israel s'eeⁿ ní caⁿa yā: Nús'uu ní nguéé cánéé chí 'caaⁿ'nuⁿ 'nū mar 'áámá 'iiⁿyāⁿ.

³²Ní cuuví cuaacu chí caⁿa Jesús miiⁿ. Ní caⁿa yā chí cadiinuuⁿ 'iiⁿyāⁿ de'ē vaadi n'gii 'cuuvi yā. ³³Níí'nuuⁿ ndáá

ntúuⁿ Pilato cuarto yeⁿē juzgado. Ní cáí sa Jesús miiⁿ ní caⁿa yā: ¿'Áá díí chí Rey yeⁿē 'iiⁿ'yāⁿ Israel s'eeⁿ chí judíos?

³⁴ Nan'gueecútaⁿā Jesús: ¿'Áá ngaⁿa díi chuū yeⁿe maāⁿ di o 'iiⁿ'yāⁿ 'cúú chíⁿ'i yā ní ngaⁿa yā n'dií yeⁿē 'úú?

³⁵ Pilato miiⁿ ní n'gueecutáⁿa sa: ¿'Áá 'úú chí saⁿa Israel 'úú? 'Iiⁿ'yāⁿ yeⁿe nación yeⁿē di ndúúcu chíduú n'geeté nteé yā díi 'úú. ¿De'ē ndiíⁿ di?

³⁶ Nan'gueecútaⁿā Jesús: Cuaaⁿ naachi 'úú chí 'iiⁿ'ntyeⁿe nguéé canéé iⁿ'yeeⁿdí 'cūú. Ndúúti chí yeⁿē iⁿ'yeeⁿdí 'cūú naachi caaⁿ'maⁿ ntiíⁿ'nyúⁿ tuu'mi ní 'iiⁿ'yāⁿ chí díiⁿ mandado yeⁿé ní 'cuuⁿ'maⁿ yā cáávā 'úú ní nguéé nica'á yā 'úú 'iiⁿ'yāⁿ Israel s'eeⁿ. Maaⁿ ní cuaaⁿ naachi 'úú chí 'iiⁿ'ntyeⁿe nguéé yeⁿē iⁿ'yeeⁿdí 'cūú.

³⁷ Tuu'mi ngaⁿa Pilato ngii sa 'iiⁿ'yāⁿ: Tuu'mi, ¿'áá díí chí rey miiⁿ? Nan'gueecútaⁿā Jesús: Díí ngaⁿa di chí rey 'úú ní 'tíicā 'úú. 'Úú ní cáávā chuū chí'iindiyaáⁿ, ní cáávā chuū chí ndaá iⁿ'yeeⁿdí 'cūú, caavā chí caaⁿ'maⁿ cuaacú yeⁿē nduudu cuaacu. Nducyáácá 'iiⁿ'yāⁿ chí yeⁿē vaadí cuaacu miiⁿ, n'giindiveéⁿ yā nduudu yeⁿé.

Jesús canéé chí 'cuūvi yā

(Mt. 27.15-31; Mr.

15.6-20; Lc. 23.13-25)

³⁸ Tuu'mí ngaⁿā Pilato: ¿Chē chí vaadí cuaacu? Taachí caⁿa Pilato chúū ní can'dáá ntuúⁿ sa nanááⁿ 'iiⁿ'yāⁿ Israel s'eeⁿ ní caⁿa sa 'iiⁿ'yāⁿ Israel s'eeⁿ: 'Úú ní nguéé ndaācá mar 'áámá nuuⁿndi yeⁿé yā. ³⁹ Naati cáávā costumbre yeⁿe ndís'tií ní 'úú canecúúⁿmíⁿ chí ín'deēchí 'áámá saⁿā chí preso sa 'viicu yeⁿe pas-cua. ¿'Áá neⁿé ní chí ín'deēchí Rey yeⁿē 'iiⁿ'yāⁿ Israel s'eeⁿ?

⁴⁰ Tuu'mi ní 'cai ntúuⁿ nducyaaca yā, ní ngaⁿa yā: Nguéé 'iiⁿ'yáⁿ 'cūú ti Barrabás. Níicú saⁿā Barrabás miiⁿ ní neené duucu sa.

19 Tuu'mi ní sta'āa Pilato Jesús miiⁿ ni ch'eⁿe sa 'iiⁿ'yāⁿ. ² Ní soldados ní din'dáa sa 'áámá corona yeⁿē yááⁿ ní chí n'duu sá na tíⁿ yā. Ní chí'nuúⁿ sa 'áámá catecai morado 'iiⁿ'yāⁿ. ³ Ní caⁿa sa: Néené 'nááⁿ cānee di iⁿ'yeeⁿdi, díi, Rey yeⁿe 'iiⁿ'yāⁿ yeⁿe Israel. Ní n'geⁿé sa 'iiⁿ'yāⁿ.

⁴ Tuu'mí can'dáa ntuúⁿ Pilato chuva'āi. Ní caⁿā sa chíi sa 'iiⁿ'yāⁿ s'eeⁿ: Cuin'diichí ní, tun'daá 'iiⁿ'yāⁿ chuva'āi niicu tuumi-cadiinúúⁿ ní chí nguéé n'diichí mar 'áámá nuuⁿndi yeⁿé yā.

⁵ Ní can'daā Jesús chuva'āi. Can'déc yā corona yeⁿe yááⁿ ndúúcu cate-cai morado yā. Ní ngaⁿa Pilato miiⁿ: Cun'díichí ní saⁿā.

⁶ Taachí n'diichí yā 'iiⁿ'yāⁿ tuu'mi ní chíduú n'geeté ndúúcu policías n'gai yiicu sa: Cu'nééⁿnga'á ní 'iiⁿ'yāⁿ. Cu'nééⁿnga'á ní 'iiⁿ'yāⁿ. Tuu'mi ngaⁿā Pilato ngii yā 'iiⁿ'yāⁿ s'eeⁿ: Cuta'a ndis'tií 'iiⁿ'yāⁿ, ní cu'nééⁿnga'á ní 'iiⁿ'yāⁿ, ti 'úú ní nguéé indaacá mar 'áámá nuuⁿndi yeⁿé yā.

⁷ Nan'gueecútaⁿā 'iiⁿ'yāⁿ Israel s'eeⁿ: Nús'uú ní cánéé ley yeⁿé 'nū. Ní tan'dúúcā chí ngaⁿa ley miiⁿ canee chí 'cuuvi caati caⁿa yā chí maáⁿ yā Daiya Dendyuús 'iiⁿ'yāⁿ.

⁸ Taachí chí'indiveeⁿ Pilato chuū díi'yā ca sá chíi. ⁹ Chindáa ntuúⁿ sa cuarto yeⁿē juzgado ní caⁿá yā chíi yā Jesús: ¿Tíí 'iiⁿ'yāⁿ díi? Naati Jesús ní nguéé caⁿa yā.

¹⁰ Tuu'mi ní caⁿa Pilato Jesús: Díi, ¿'áá nguéé ngaⁿā di yeⁿé? ¿'Áá nguéé deenu dí chí 'úú ní cúúví caaⁿ'maⁿ ntiíⁿ'nyúⁿ chí cu'nééⁿnga'á ní díi, ní cuuvi n'teēchí ntúuⁿ díi?

¹¹ Nan'gueecútaⁿā Jesús miiⁿ: Nguéé du'ū vee cuuvi díiⁿ di ndúúcu 'úú ndúúti chí nguéé du'ū vee ndii ca'a yeⁿē di yeⁿē va'ai chēeti nguuvi. 'Iiⁿ'yāⁿ chí tee yā 'úú chí preso 'úú nanáá n'dií, 'iiⁿ'yāⁿ miiⁿ dich'ēete ca nuuⁿndi yeⁿé yā.

¹² Ndíí tuu'mi ní neⁿe Pilato n'teēchi sa 'iiⁿyāⁿ. Naati 'iiⁿyāⁿ Israel s'eeⁿ n'gai yicú yā ní ngaⁿa yā: Ndúúti chi saⁿá 'cūū n'teēchi di, nguéé dii amigo yeⁿē César. Nducyáácá 'iiⁿyāⁿ chi ngaⁿa yeⁿé yā chi maáⁿ yā rey ngaⁿa yā contra César.

¹³ Tuu'mí Pilato, taachi ch'iindiveeⁿ sa chuū, candée sa Jesús ch'uvāⁿ. Ní ch'iindí sa ná silla yeⁿe juzgado chi nguuvi Enlosado, ní nduudu hebreo neⁿe caaⁿmaⁿ Gabata. ¹⁴ Ní nguuvi chi díⁿ yā ntiⁿnyuⁿ yeⁿē 'viicu yeⁿē pas-cua, tan'dúúca ndiichúúví na nguuvi. Tuu'mí ngaⁿa Pilato 'iiⁿyāⁿ Israel s'eeⁿ: Quin'diichí ní Rey yeⁿé ní.

¹⁵ Naati 'iiⁿyāⁿ s'eeⁿ 'caí yā diitú yā: Diví ní 'iiⁿyāⁿ, diví ní 'iiⁿyāⁿ, cu'nééⁿnga'á ní 'iiⁿyāⁿ. Tuu'mí ngaⁿa Pilato: ¿Áá rey yeⁿé ní chi cu'nééⁿnga'á ní? Tuu'mí nan'guēcútaⁿā saⁿā chiiduú n'geeté: Nguéé rey yeⁿē 'nū caati 'āā César nuúⁿ.

¹⁶ Tuu'mi ní Pilato ca'á yā Jesús miiⁿ 'iiⁿyāⁿ s'eeⁿ ní 'iicu cu'nééⁿnga'á yā. Ní 'iiⁿyāⁿ s'eeⁿ sta'á yā Jesús miiⁿ ní candée yā 'iiⁿyāⁿ.

Cu'nééⁿnga'a yā Jesús ní ch'ii yā

(Mt. 27.32-44; Mr.

15.21-32; Lc. 23.26-43)

¹⁷ Ní Jesús candée yā cruz yeⁿe yā. Ní can'dáa yā na lugar chi 'áámá lado yeⁿe yāⁿ Jerusalén chi nguuvi Calavera chi lugar 'Ini Nga'ai Tiiⁿ, 'iicu nduudu hebreo neⁿe caaⁿmaⁿ Gólgota. ¹⁸ Naachí cu'nééⁿnga'á yā Jesús ndúúcu taa na 'uuví yā. 'Áámá yā 'áámá 'áámá lado 'iicu Jesús miiⁿ ní naavtáⁿā canuúⁿ yā. ¹⁹ Ní 'neeⁿ Pilato miiⁿ 'áámá letra chi n'duu sá nanááⁿ cruz ní canéé nguūⁿ miiⁿ, Jesús yeⁿē yaāⁿ Nazaret, Rey yeⁿe 'iiⁿyāⁿ yeⁿe ndaata yeⁿe Israel. ²⁰ Ní neenéⁿ yaaⁿ 'iiⁿyāⁿ Israel s'eeⁿ ch'eeⁿ yā letra 'cūū ti nááchí cu'nééⁿnga'a yā Jesús miiⁿ niⁿnuúⁿ na yāⁿ Jerusalén miiⁿ. Canéé nguūⁿ miiⁿ na nduudu hebreo ndúúcu nduudu griego ndúúcu nduudu latín.

²¹ Ní ngaⁿa saⁿā chiiduú n'geeté yeⁿē 'iiⁿyāⁿ Israel s'eeⁿ ngii sa Pilato: Nguéé 'neeⁿ di Rey yeⁿē 'iiⁿyāⁿ yeⁿe ndaata yeⁿe Israel naati maáⁿ yā ngaⁿa yā: 'Úú Rey yeⁿe 'iiⁿyāⁿ yeⁿe Israel 'úú.

²² Nan'guēcútaⁿā Pilato saⁿā miiⁿ: Chiiⁿ 'neéⁿ 'āā 'neéⁿ.

²³ Taachi soldados chi'neeⁿngaⁿā sa Jesús, sta'á sa catecai yā ní diiⁿ sa repar-tir catecai yā. Niicu 'áámá 'áámá tááⁿ catecai yā 'aama soldado. Abrigo catecai yā miiⁿ nguéé n'deenyú ndii 'níⁿnuúⁿ ndíí cuaaⁿ ndiia. ²⁴ Ní caⁿa sa nguaaⁿ maáⁿ sa: Nguéé 'canuu cuūⁿ yú naati tun'dai yú suerte yeⁿē yú nduūcū. Du'ú yeⁿē cuuvi. Ní 'iicu cuuví cuaacu naachí canee nguūⁿ chi ngaⁿā:

Nca'á yā catecai nguaaⁿ maáⁿ yā, ní na catecaí ch'íí yā suerte.

Ní soldados ní diiⁿ sa chuū.

²⁵ Ní cheecuú Jesús miiⁿ canéé yā niiⁿnuúⁿ ná cruz yeⁿe Jesús ndúúcu vi'í cheecuú yā chi nguuvi María chi n'daataá yeⁿē Cleofas, ndúúcu María Magdalena. ²⁶ Taachí n'diichi Jesús cheecú yā ndúúcu discípulos chi ya'āi 'iinú yā chi canéé niiⁿnuúⁿ tuu'mi ní Jesús ngaⁿā yā ngii yā cheecú yā: N'dií n'daataá, cun'díichí ní daiya ní.

²⁷ Tuu'mi ní ngaⁿa yā ngii yā discípulo: Cun'diichi di, 'íngaā cheecu di. Ndíí tuu'mi ní discípulo miiⁿ ní dichēecú yā 'iiⁿyāⁿ.

Jesús ch'ii yā

(Mt. 27.45-56; Mr.

15.33-41; Lc. 23.44-49)

²⁸ Cho'ó tanducueⁿē chuū ní déénú Jesús chi tanducueⁿē dendu'ū ní 'āā chii cuaacu. Niicu naachi canéé nguūⁿ níícu cuuvi cuaacu. Ngaⁿa Jesús: Yaacá.

²⁹ Míⁿ canéé 'áámá vaso ndiitu vina-gre. Tuu'mi ní 'áámá soldado dicuutu yā 'áámá esponja ndúúcu vinagre. Ní chi'neeⁿ yā na áámá yáⁿá hisopo. Ní s'neeⁿ yā na cheendi Jesús. ³⁰ Taachí

Jesús chí'í yā vinagre, caⁿa yā: Ch'íínú tanducuéⁿē dendu'ū. Ní nadicua'á yā tiiⁿ yā chí n'nééⁿ maáⁿ yā espíritu yēⁿe yā.

**Soldado n'da'ai yā 'iini 'tiicua
Jesús ndúúcu 'aama lanza**

³¹ Tuu'mi ní caati nguuvi viernes chí díⁿ yā ntiíⁿnyuⁿ yeⁿē 'viicu pascua miiⁿ, ní 'iiⁿyāⁿ Israel s'eeⁿ dí'cuíⁿtu sa Pilato chí 'cúuⁿmāⁿ sa 'ííní ca'a saⁿā s'eeⁿ ní candéé sa cuerpo yeⁿé yā. Caati nguéé neⁿé sa chí canéé cuerpo yeⁿé yā na cruz nguuvi sábadó miiⁿ caatí sábadó ní nguuvi ch'ēete yeⁿe 'viicu pascua. ³² Ní ndaā soldados ní ndaa sa nanááⁿ saⁿā chí vmnááⁿ vmnaaⁿ. 'Tíicā 'cuúⁿ sa ca'a sa. 'Tíicā 'cuúⁿ ntúúⁿ sa ca'ā taama sa. ³³ Naati taachí ndaa sa nanááⁿ Jesús miiⁿ, ní caati n'diichí yā chí 'āā n'dii Jesús nguéé 'cuúⁿ sa ca'a yā.

³⁴ Naati 'áámá soldado n'da'ai sa tiicua Jesús ndúúcu 'aama lanza ní can'daā yuuúⁿ ndúúcu nuūⁿníⁿ. ³⁵ 'Iiⁿyāⁿ chí n'diichí yā ngaⁿá yā nduudu cuaacu. Níicú chíⁿ chí ngaⁿá yā. Miiⁿ ní cuaacu chíⁿ. 'Iicu déenu yā chí ngaⁿá yā nduudu cuaacu níicú ndís'tii ntúúⁿ ní cu'teenú ní. ³⁶ Níicú chuū cho'oo ní cúúví cuaacu chí canéé nguūⁿ na libro yeⁿe Ndyuūs: Mar 'áámá 'iini yeⁿé yā nguéé 'cuúⁿ sa. ³⁷ Ní taama naachi canéé nguūⁿ ní ngaⁿā: N'diichí yā 'iiⁿyāⁿ chí cho'oo nééⁿ tiicua yā.

S'nuúⁿ yā Jesús cheeti yáinyāⁿ

(Mt. 27.57-61; Mr.

15.42-47; Lc. 23.50-56)

³⁸ Cho'oo chuū. José yeⁿē yáāⁿ Ari-matea chí 'áámá discípulo yeⁿe Jesús n'de'ei n'de'ei nūⁿ ti 'va'a sa 'iiⁿyāⁿ Israel s'eeⁿ, dí'cuíⁿtu sa Pilato miiⁿ chí cuuví candéé sa cuerpo yeⁿē Jesús. Ní 'cuūⁿ Pilato saⁿā miiⁿ. Tuu'mi ní ndaā sa ní nadi-víi sa cuerpo yeⁿē Jesús miiⁿ ní candéé sa cuerpo miiⁿ. ³⁹ Ndaa ntúúⁿ Nicodemo, saⁿā chí vmnaaⁿ indaá sá nanááⁿ Jesús

miiⁿ 'aama n'gaaⁿ, ní ndéé sa 'áámá perfume chí ndístaⁿā perfume yeⁿē mirra ndúúcu áloes. Ngíi tanduu 'áámá ciento libras. ⁴⁰ Sta'á yā cuerpo yeⁿe Jesús ní ch'ēcú yā ná tiinūⁿ ndúúcu perfume miiⁿ, tan'dúúcā costumbre yeⁿē 'iiⁿyāⁿ Israel s'eeⁿ taachí n'giichí yā tinaⁿā. ⁴¹ Ní lugar miiⁿ naachi chí'neeⁿnga'a yā, miiⁿ canéé 'áámá chééⁿ naandā. 'Íicú cheeti chééⁿ miiⁿ canéé 'áámá yáinyāⁿ ngai. Mar 'áámá 'iiⁿyāⁿ nguéé in'nuúⁿ yā cheeti. ⁴² Cáávā chí nguuvi viernes chí ch'iindiyaáⁿ yā yeⁿe 'viicú yeⁿe pascua yeⁿē 'iiⁿyāⁿ Israel s'eeⁿ, s'nuúⁿ yā cuerpo Jesús miiⁿ cheeti yáinyāⁿ miiⁿ chí canee niiⁿnuúⁿ.

Jesús nduuchi yā yeⁿe nguaaⁿ tináⁿā

(Mt. 28.1-10; Mr. 16.1-8; Lc. 24.1-12)

20 'Áámá domingo chí nguuvi vmnááⁿ vmnaaⁿ yeⁿe ndéetē miiⁿ tá María Magdalena néené 'da'a ca ndaā tá na yáinyāⁿ. Ní n'diichi tá tuū miiⁿ chí ndiivíi na yáinyāⁿ. ² Tuu'mi ní n'daataá ngéenu tá nanááⁿ Simón Pedro ndúúcu táámá discípulo, 'iiⁿyāⁿ chí dinéⁿe taavi yā Jesús. Tuu'mí ngaⁿā tá ngii tá saⁿā s'eeⁿ: 'Áā ndiivíi yā Jesús miiⁿ ná cheeti yáinyāⁿ, ní nguéé deenu yú tíí n'nééⁿ yā 'iiⁿyāⁿ.

³ Ní can'daā Pedro miiⁿ ndúúcu taama discípulo ní ndaā yā na yáinyāⁿ. ⁴ Ngéenu, ngéenu nduu 'uuví yā. Táámá discípulo diitu cá chéenu sa nguéé ti Pedro, ní ndaā vmnaaⁿ sa na yáinyāⁿ. ⁵ Can'díi sa ní n'diichi sa. Ní n'diichi sá chí 'aa dámaaⁿ tiinūⁿ miiⁿ snúúⁿ naati nguéé chí ndaa sa cheeti yáinyāⁿ. ⁶ Simón miiⁿ ní sndaā sa cheeti yáinyāⁿ. Ní n'diichi sa tiinūⁿ miiⁿ naachi snúúⁿ. ⁷ Niicu pañuelo ch'ēete ca tiiⁿ nguéé dáámá tiinūⁿ lino. Ndéetií nduu cánéé táámá cuaaⁿ. ⁸ Tuu'mi ní sndaā ntúúⁿ táámá discípulo chí ndaā vmnááⁿ vmnaaⁿ ná yáinyāⁿ ní n'diichí yā ní chí'téenu yā. ⁹ Tii nguéé déenu yā

chi canéé nguūⁿ chí Jesús miiⁿ cuuvi nduuchí yā ye^mē nguaaⁿ tináⁿā. ¹⁰Ní nguεεcundíí discipulos na vaacu yā.

Jesús ndaaca yā María Magdalena

(Mr. 16.9-11)

¹¹Naati tá María canee ta chúva^{āi} yáinyāⁿ. Neené ngeεcu tá. Ní dí'cua'áfí naaⁿ tá n'diichi tá cheeti yáinyāⁿ. ¹²Ní n'diichi tá na 'uuvi ángeles ndúúcu catecaí yā cuéé. 'Áámá ángel miiⁿ vee yā cuaaⁿ tiíⁿ naachi canúúⁿ cuerpo Jesús miiⁿ ní táámá yā vee yā cuaaⁿ ndiyya. ¹³Ní caⁿá yā: Díí n'daataá, ¿de'ē cúúví chí ngeεcu di? Tuu'mí ngaⁿa tá: Caati candée yā Señor ye^mé, ní nguéé deenú tí s'néeⁿ yā 'iiⁿyāⁿ.

¹⁴Taachi caⁿa tá chuū, ndaacadaami tá. Ní n'diichi ta Jesús chi canéé yā miiⁿ naati nguéé deenu tá chí Jesús miiⁿ. ¹⁵Tuu'mí ngaⁿa Jesús ní ngii yā táⁿā: Díí n'daataá, ¿de'ē cúúví chí ngeεcu di? ¿Du'ū in'nuuⁿ di? 'Iicu n'daataá miiⁿ ní nacadínuuⁿ tá chí 'iiⁿyāⁿ 'cúú ní 'iiⁿyāⁿ chí diiⁿ cuidado ye^mé chééⁿ ye^me naāndā miiⁿ. Ní caⁿa tá: Señor, ndúúti chí dii candée di 'iiⁿyāⁿ cuuvi di 'úú tí chí'neeⁿ dí 'iiⁿyāⁿ ní 'úú ní candéé 'iiⁿyāⁿ.

¹⁶Tuu'mí ngaⁿa Jesús miiⁿ: María. Nguεεcundíí ntuūⁿ ta ní ngaⁿā ta: Raboni. (Nduudu 'cúú ne^me caaⁿmaⁿ, Maestro.)

¹⁷Tuu'mí ngaⁿa Jesús: Nguéé tuū'vi di 'úú caati 'āā cuéé caⁿá nanááⁿ Chiidá. Naati dii, cué^me di n'diichi di hermanos ye^me yú ní caaⁿmaⁿ di cuuvi di 'iiⁿyāⁿ: Caⁿá nanááⁿ Chiidá ní nanááⁿ Chiida yú, nanááⁿ Ndyuūs ye^mé ní nanááⁿ Ndyuūs ye^mé yú.

¹⁸Che^me tá María Magdalena nanááⁿ discipulos ní caⁿa tá chí n'diichi tá Jesús miiⁿ. Caⁿa tá chí tá discipulos nduudu chí Jesús miiⁿ caⁿa yā chí yā táⁿā.

Jesús ndaacá yā discipulos

(Mt. 28.16-20; Mr.

16.14-18; Lc. 24.36-49)

¹⁹Chii chí nguūnū ye^me maāⁿ nguuvi domingo míⁿ, nguuvi vmnááⁿ vmnaaⁿ ye^mé ndeete miiⁿ ní naachi snúūⁿ discipulos ní nduudí cheendi va'āi miiⁿ caati 'va'á yā 'iiⁿyāⁿ Israel s'eeⁿ. Ndaa Jesús miiⁿ. Ní canéé yā naavtaⁿā 'iiⁿyāⁿ s'eeⁿ. Ní caⁿa yā: Cuuvi diiⁿ ndúúcu ndís'tii.

²⁰Taachí caⁿa yā chuū, ní chíⁿi yā ta'á yā ndúúcu tiicuáá yā. Ní discipulos yeenú taavi yā chí n'diichí yā Jesús. ²¹Tuu'mí ngaⁿā ntúūⁿ Jesús ngii yā 'iiⁿyāⁿ: Cuuvi diiⁿ ndúúcu ndís'tii. Tan'dúúca chí dichó'o Chiidá 'úú, tiicá ntúūⁿ 'úú dicho'ó ndis'tii.

²²Taachí caⁿa yā chuū tiivineeⁿ yā 'iiⁿyāⁿ ní caⁿa yā: Cuta'á ní Espiritu N'dai ye^mé Ndyuūs. ²³'Iiⁿyāⁿ chí ndís'tii nadich'εεcú ní nuūⁿndi ye^mé yā, ní 'āā nach'εεcu ye^mé yā. 'Iiⁿyāⁿ chí nguéé nadich'εεcu ní nuūⁿndi ye^mé yā, 'āā nguéé nach'εεcu ye^mé yā.

Nguéé chí'teenú Tomás

²⁴Naati Tomás 'áámá discipulo chí nguuvi Dídimó chí Gemelo nguéé cúnéé sá ndúúcu saⁿā s'eeⁿ taachi Jesús miiⁿ ndaá yā. ²⁵Chíí tan'duuví discipulos miiⁿ ngaⁿa yā ngii yā saⁿā: N'diichí 'nū Señor miiⁿ. Saⁿā miiⁿ ní ngaⁿa sa ngii sá 'iiⁿyāⁿ s'eeⁿ: 'Úú ní nguéé cu'teenú ndúúti chí nguéé n'diichí, ní nguéé tiinguú nduutita'á naachí ch'εεchi clavos, ní tiinguú ta'á ná tiicuáá yā.

²⁶Ch'iinu niini nguuvi vete ntúūⁿ discipulos snée yā cheeti va'āi. Mííⁿ canéé Tomás ndúúcu yā. Ní nduudí cheendi va'āi miiⁿ. Ndaa ntúūⁿ Jesús miiⁿ. Ní canúuⁿ yā naavtaⁿā ní caⁿa yā: Cuuvi diiⁿ ndúúcu ndís'tii.

²⁷Tuu'mí ní Jesús ngaⁿa yā ngii yā Tomás miiⁿ: Tiinguú nduutitá'a di 'muuⁿ ní n'diichi di ta'á. Ní tiinguú ta'a di ndii

'muuⁿ ní tiingúú ta'a di tiicuáá. Ní nguéé chí nguéé cu'téenu dí, canéé chi cu'téenu dí.

²⁸ Tuu'mi ní Tomás miiⁿ ní caⁿā sa: N'dií Señor yeⁿé. N'dií Dendyuūs yeⁿé.

²⁹ Tuu'mi ní ngaⁿa Jesús miiⁿ: Tomás, díí ní chi'téenu di tii n'diichi di 'úú. N'daí 'iiⁿyāⁿ chi nguéé n'diichi yā 'úú ní chi'téenu yā.

¿De'e cúuví chi véé libro 'cūú?

³⁰ Ní nééné n'deēe ca señales chi chiⁿi Jesús nanááⁿ discípulos yeⁿé yā chi nguéé canéé nguūⁿ na libro 'cūú. ³¹ Naati chuū ní canéé nguūⁿ níicú cuuvi cu'téenu di chi Jesús miiⁿ chi Cristo chi Daiya Dendyuūs. Ní chi cu'téenu di 'iiⁿyāⁿ ní cunee ndúúcu vida cueⁿe daaⁿmaⁿ cáávā chi duuchi yā.

Jesús nndaacá yā ndeēchē discípulos yeⁿé yā

21 Cuayiivi chi cho'oo chuū chi-ináāⁿ ntúūⁿ maaⁿ Jesús miiⁿ yeⁿé discípulos yeⁿé yā niiⁿnuúⁿ ná yaana nuuⁿniⁿyáⁿā chi nguuvi Tiberias ní 'túúca chiinaáⁿ yā. ² Ndidama yā Simón Pedro ndúúcu Tomás miiⁿ chi nguuvi Dídimó chi Gemelo, ndúúcu Natanael saⁿā yeⁿe yāāⁿ Caná yeⁿé yāⁿā Galilea, ndúúcu na 'úúví saⁿā daiya Zebedeo ndúúcu táá na 'uuvi discípulos yeⁿe Jesús. ³ Tuu'mí ngaⁿa Simón Pedro: Caⁿā tungaaⁿ 'yaācā. Tuu'mí ngaⁿā 'iiⁿyāⁿ s'eeⁿ ngii yā saⁿā: Caⁿā ntúúⁿ nús'uu ndúúcu di. Ní cueⁿe yā ní chindāa yā na 'áámá barco. Nguūiūⁿ miiⁿ nguéé sta'á yā mar 'áámá tī. ⁴ Chi deēve táámá nguuvi, Jesús ní canéé yā cuaaⁿ 'diitú yā yaana nuuⁿniⁿyáⁿā naati discípulos nguéé túmicadínuuⁿ yā chi Jesús miiⁿ. ⁵ Ní caⁿa yā chii yā saⁿā s'eeⁿ: Ndís'tii, saⁿā n'gaiyāāⁿ ¿'áá véé chi tungaaⁿ di chi che'e yú? Nan'gueecutáⁿa yā yeⁿe yā: Nguéé.

⁶ Tuu'mi ní ngaⁿa yā ngii yā saⁿā s'eeⁿ: Ca'nuúⁿ ní yaāna lado ta cuaacu yeⁿé barco miiⁿ ní ndaacá nī. Tuu'mi ní chi'nuúⁿ yā yaāna tíí ní 'āā ntee ngii díí yā tun'dāa yā chi neené tááⁿ n'gii 'yaācā. ⁷ Tuu'mi ní discípulo chi neené diya'āi 'íinu Jesús ngaⁿā sa ngii sa Pedro: Señor miiⁿ 'iiⁿyāⁿ s'tíí. Ní Simón Pedro, taachi ch'iindiveeⁿ sa chi Jesús miiⁿ nuⁿnuúⁿ sá catecai sa ti dámaāⁿ ngāaⁿ sa, ní chindāa sa cheeti yaana nuuⁿniⁿyáⁿā. ⁸ Ní tanduu 'uuvi discípulos ndaá yā ndúúcu barco ti nguéé dáanā yaⁿāi chi chinée yā yeⁿe yāⁿā miiⁿ ti tandúú na cuúúⁿ ngeecu ndiichi metros. Ngii n'daā yā yaāna yeⁿe 'yaācā. ⁹ Taachí n'cheéⁿ yā yáⁿā miiⁿ n'diichí yā n'giichi yáⁿā. Ní 'áámá 'yaācā nduú ti nanááⁿ nduucyáⁿā. Ní n'diichí yā pan. ¹⁰ Tuu'mí ngaⁿa Jesús ngii yā saⁿā: Teé nī ta n'duuvi 'yaācā chí caama sta'á nī maaⁿ.

¹¹ Cucheē Simón Pedro ní nandéē sa yaāna na yáⁿā miiⁿ ndiitúú 'yaācā n'geeté, ngii 'áámá ciento 'uuvi ngeecu n'diichi 'íinú, ní yaāna miiⁿ nguéé chi teēⁿ n'dáá rá chi n'deeē taaví 'yaācā. ¹² Tuu'mi Jesús ngaⁿa yā ngii yā saⁿā s'eeⁿ: Cuchíí nī ca'diinú nī. Mar 'áámá discípulo miiⁿ nguéé tiinguuneéⁿ yā 'iiⁿyāⁿ: ¿Du'u rá díí? Tí 'āā deenú yā chi Jesús miiⁿ. ¹³ Ndaā Jesús miiⁿ ní sta'á yā pan ní ca'a yā 'iiⁿyāⁿ. 'Tííca nī ntúúⁿ díí yā ndúúcu 'yaācā.

¹⁴ 'Āā chíí 'iinu cuuvi chi n'geenaāⁿ Jesús yeⁿé discípulos yeⁿé yā taachí 'āā nduuchi yā nguaaⁿ tináⁿā.

Ca'a di chi chéé 'iiti cuūchí yeⁿé

¹⁵ Taachí ch'iinu ca'diinú yā, Jesús ngaⁿa yā ngii yā Simón Pedro: Simón, díí daiya Jonás, ¿'áá neⁿe ca di 'úú, nguéé ti chuū? Tuu'mí ngaⁿa sa ngii sa Pedro: 'Tííca, Señor, n'dií ní déenú nī chi neⁿé n'dií. Ngaⁿa yā ngii yā saⁿā: Ca'a di 'iiti cuūchí 'líí yeⁿé chí che'é tī.

¹⁶ Jesús ní ntinguuneeⁿ ntuúⁿ yā yeⁿe saⁿā naachi ndii 'uuvi cuuvi: Simón, díí daiya Jonás, ¿'áá neⁿe di 'úú? Nan'gueecútaⁿ a sa yeⁿe yā: "Tííca, Señor, n'dií ní déénú nī chi neⁿ'é n'dií. Tuu'mí ngaⁿa yā ngii yā saⁿā: Ca'á dí 'iiti cuúchi yeⁿ'é chi che'é tí.

¹⁷ Tuu'mí ngaⁿa yā ngii yā saⁿā naachi ndii chííⁿ ndii 'ínú cuuvi: Simón, dii saⁿā daiya Jonás, ¿'áá neⁿe di 'úú? Canéé ndaachi yiinú Pedro chí 'āā naachi ndii chííⁿ ndii 'ínú cuuvi yaa'ví yā saⁿā: ¿'Áá neⁿe di 'úú? Tuu'mí ngaⁿa sa ngii sa 'iiⁿyāⁿ: Señor, n'dií déénú nī tanducuéⁿē dendu'ū. Maaⁿ ní deenu nī chi neⁿ'é n'dií. Tuu'mí ngaⁿa Jesús ngii yā saⁿā: Ca'á dí 'iiti cuúchi yeⁿ'é, chi che'é tí. ¹⁸ Cuaacu níⁿnyúⁿ cuāācū niiⁿnyuⁿ ngaⁿ'á ngii dii: Taachi saⁿā 'lífⁿ dii in'nuuⁿ canúúⁿ dí catecai di ní cheⁿe di naachi neⁿe di. Naati taachí 'āā cuuvi ndiicú di ndoo tá'a di ní táámá 'iiⁿyāⁿ in'nuúⁿ yā catecai di ní candée yā dii naachi nguéé neⁿ'ē di.

¹⁹ Ní chuū Jesús caⁿa yā ní ngá'a yā chí cádiinuuⁿ sa de'é vaadi n'gii diiⁿ honrar Dendyuūs miiⁿ. Ch'iinu caⁿa yā chuū, tuu'mí ngaⁿa yā ngii yā Simón Pedro: Can'dáa di 'úú.

Discípulo chi neⁿe taavi Jesús

²⁰ Nguēcundí Pedro miiⁿ n'diichi sá discípulo chí dineⁿ'é Jesús, discípulo chí

cueⁿe sa ndúúⁿcū Jesús. Sáⁿā chí can-diitínee sa 'iiⁿyāⁿ taachi 'āā caama chí che'e nguiinú yā. Ní 'āā caⁿa yā chíi yā saⁿā: Señor, ¿du'ū chí canéé chí diiⁿ entregar n'dií? ²¹ Taachi Pedro miiⁿ n'diichi sa discípulo miiⁿ tuu'mí ngaⁿa yā ngii yā Jesús: Señor, ¿de'é idiiⁿ sáⁿā tíí?

²² Tuu'mí ngaⁿa Jesús ngii yā saⁿā: Ndúúti chí 'úú chí neⁿ'é chí cunee sá ndii taachi nindaá, ¿de'é ineeⁿ di chííⁿ? Díí can'dáa di 'úú.

²³ Caāvā nduudu 'cūū tuumicadiinuuⁿ vi'í s'eeⁿ chí discípulo miiⁿ nguéé canéé chí 'cuūví sa. Naati Jesús ní nguéé caⁿ'á yā chí nguéé 'cuūví sa, naati Jesús caⁿa yā: Ndúúti chí 'úú chí neⁿ'é chí cunee sá ndii taachi nindaá, ¿de'é ineeⁿ di chííⁿ?

²⁴ Saⁿ'á 'cūū discípulo chí ngaⁿ'ā cuaacu sa yeⁿ'ē chúū. Ní idingúuⁿ sa chuū. Ní deenu yú chí chíiⁿ chí ngaⁿ'a sa ní nduudu cuaacu ní cuaacu níⁿnyúⁿ chí nduudu cuaacu.

²⁵ Neenē n'deēē n'dái cosa chí dííⁿ Jesús miiⁿ. Ndúúti chí canéé nguūⁿ 'áámá 'áámá cosa 'úú nadacadíinúúⁿ chí maaⁿ rá iⁿ'yeēⁿdí 'cūū nguéé tunééⁿ libros chí canéé nguūⁿ yeⁿ'e chuū. "Tííca chíi.

CHUŪ CHI DIIⁿ APÓSTOLES

Dendyuūs caⁿa yā chi tée yā Espíritu N'dai

1 Dii Teófilo, taachí vmnááⁿ vmnaaⁿ dinguúⁿ yeⁿe di, caⁿá yeⁿe tanducuéⁿē chi 'túucā diiⁿ Jesús ní ca'cueéⁿ yā, ²ndii nguuvi chí cunaⁿā Jesús va'ai cheeti nguuvi. Vmnááⁿ vmnaaⁿ chí cunaⁿā Jesús miiⁿ ch'íínú ca'a yā orden yeⁿé yā apóstoles caava Espíritu N'dai yeⁿe Ndyuūs. Jesús ndeévé yā ní dichó'o yā apóstoles. ³Jesús ch'eenú yā chii ní ch'i yā. Cuayiivi taachi 'āā ch'i yā néené n'dee nááⁿ chíⁿ ch'iⁿi maáⁿ yā yeⁿé yā tan'dúucā chí 'āā cuēē 'cuūvi yā vmnááⁿ apóstoles caati apóstoles cuuvi déénu yā chí cánduuchi ntuuⁿ yā. Canée yā ndúucū apóstoles yeⁿé yā 'uuvi ngæcu nguuvi ní caⁿa yā yeⁿē chí Dendyuūs ngaⁿa ntiiⁿnyúⁿ yā. ⁴Taachí ndii dáámá yā tuuⁿmi ní Jesús caⁿa ntiiⁿnyúⁿ yā apóstoles. Nguéé náⁿa nī yeⁿe yááⁿ Jerusalén naati cunee ngíínú nī yeⁿē chí caⁿa Chiida yú chí tée yā. Chuū chí 'āā ch'iindiveéⁿ nī yeⁿē 'úú. ⁵Juan cuaacu níⁿnyúⁿ chí ndúucū nuūⁿnīⁿ cheedinuūⁿnīⁿ sa naati ndís'tii ní cuēedinuūⁿnīⁿ nī ndúucū Espíritu N'dai yeⁿe Ndyuūs.

Jesús cuchée yā

⁶Tuuⁿmi ní saⁿa chí ndúúvídáámá nitinguunéeⁿ yā 'iiⁿyāⁿ ní ngaⁿá yā: Señor Jesús, ¿'áá nadicuééⁿ ntuuⁿ nī taama saⁿā Israel chí caaⁿmaⁿ ntiiⁿnyuⁿ sa yeⁿe 'iiⁿyāⁿ Israel maaⁿ nguuví 'cūū? ⁷Ní ngaⁿa Jesús ngii yā 'iiⁿyāⁿ: Nguéé ituneeⁿ ndís'tii chí cadíínuuⁿ nī de'e tiempo o de'e nguuvi yeⁿē chuū chí Chiida yú s'neeⁿ yā na poder yeⁿe maáⁿ yā. ⁸Naati cutaⁿá nī poder chí diitú nī taachi 'āā ndaa Espíritu N'dai yeⁿe Ndyuūs vmnaaⁿ yeⁿé nī. Ní ndís'tii ní caaⁿmáⁿ nī nduudu cuaacu yeⁿé na yááⁿ Jerusalén

ndii nuuⁿmaⁿ yáⁿā Judea, ndii yáⁿā Samaria, ndii núúⁿmáⁿ iⁿyeēⁿdí. ⁹Ní ch'íínú caⁿa yā chuū taachi n'diichi saⁿā s'eeⁿ Jesús cuchée yā ní che'enaāⁿ sa 'iiⁿyāⁿ ná meēⁿ. Ní 'āā ntéé snaaⁿ saⁿa s'eeⁿ 'iiⁿyāⁿ.

¹⁰Ní saⁿā s'eeⁿ ní n'g'íínú sá nanguuvi. Taachí 'āā cuchée Jesús, n'diichi sa na 'uuvi saⁿā chí ángel chineē ndúucu sa ndúucū catecai cuēē sa. ¹¹'Úuvi 'iiⁿyāⁿ miiⁿ ní ngaⁿa yā ngii yā saⁿā s'eeⁿ: Ndís'tii saⁿa yeⁿe yáⁿā Galilea, ¿de'e n'g'íínú nī nanguuvi? Maāⁿ Jesús chí cunaⁿā yā yeⁿe ndís'tii nanguuvi 'tíicā ndaa túuⁿ yā tan'dúucā chí n'diichi nī 'iiⁿyāⁿ cuinaⁿá yā nanguuvi.

Ndeeve yā saⁿā lado yeⁿe Judas

¹²Can'dáa yā ná yiicū 'lín chí nguuvi Olivos chí canéé niiⁿnuⁿ ná yááⁿ Jerusalén ní ndáá yā na yááⁿ Jerusalén. Distancia 'cūū chí ngaⁿa ley chí cuuvi caacá yā sábado nguuvi chí ntaaviⁿtuunuúⁿ yā. ¹³Ndaá yā na yááⁿ miiⁿ. Cheé yā na cuarto yaacu naachi cānee Pedro, ndúucū Jacobo, ndúucū Juan, ndúucū Andrés, ndúucū Felipe, ndúucū Tomás, ndúucū Bartolomé, ndúucū Mateo, ndúucū Jacobo dáiyā saⁿā chí nguuvi Alfeo, ndúucū Simón Zelote, ndúucū Judas chí 'diinū Jacobo. ¹⁴Nducyáácá 'iiⁿyāⁿ s'eeⁿ ndúucū n'daata s'eeⁿ ndúucū María chí checu Jesús ndúucu 'dífnu Jesús nduuvidaamá yā ní 'áámá vaādī cadiinúúⁿ yeⁿé yā ní ngaⁿanguaⁿá yā ní di'cuiitú yā Dendyuūs. ¹⁵'Iiⁿyāⁿ chí nduuvídaama miiⁿ ngii yā tan'dúucā 'áámá ciento canee ndiicú yā. Hora miiⁿ nacueéⁿ Pedro naavtaⁿa yeⁿe 'iiⁿyāⁿ s'eeⁿ chí i'téenu yā Cristo ní caⁿa sa: ¹⁶Ndís'tii hermanos, canee cuuⁿmiⁿ chí cuuvi cuaacu Escritura chí Espíritu N'dai yeⁿe Ndyuūs caⁿa David cuaaⁿ vmnaaⁿ ní David miiⁿ dinguúⁿ yā yeⁿe Judas. Judas miiⁿ ch'iⁿi sá du'u chí Jesús. Maaⁿ

níicú chiī chita'á yā Jesús. ¹⁷ Judas miiⁿ ní ndúúcu nús'uu ní diiⁿ sa ntiiⁿnyuⁿ ndúúcu nús'uu.

¹⁸ Sáⁿa miiⁿ ní cái sa 'áámá táán yáⁿáa ndúúcu tuūmī yeⁿē nuuⁿndi yeⁿē sa. Ní chinⁿdaā sa dácaā n'díi sa ní nda'ai naavtaⁿa cuerpo yeⁿē sa ní tanducueⁿē ngeeti sa ch'iinu cān'daa. ¹⁹ Nducyáácá 'iiⁿyāⁿ yeⁿe yāāⁿ Jerusalén chicadínuuⁿ yā chuū. Ní yáⁿáa miiⁿ ní 'tíicā canee chi duuchi Acéldama davaacu yeⁿé yā chí neⁿe caaⁿmaⁿ campo yeⁿē yuúúⁿ.

²⁰ Ti canéé nguūⁿ na libro yeⁿe Ndyuūs naachi chi duuchi Salmos:

Naachí navaacu sa mífⁿ nduuvi díyáaí.

Ndíi nguéé 'iiⁿyāⁿ chi 'cuetinée yā miiⁿ.

Níicú canéé nguūⁿ:

Cuta'a taamá yā ntiiⁿnyuⁿ yeⁿe saⁿā ndíi tiiⁿ.

²¹ 'Iiⁿyāⁿ sáⁿā miiⁿya canee cuuⁿmiⁿ chi canéé yā ndúúcu 'nū nducueⁿe tiempo chi Señor Jesús canéé yā ndúúcu 'nū. ²² 'Iiⁿyāⁿ miiⁿ canee cuuⁿmiⁿ chi canéé yā ndúúcu 'nū taachi tucá'a yā cheedinuūⁿnī Juan ndíi nguuvi chi Jesús cunaⁿá yā cuaaⁿ 'niiⁿnuⁿ nanguuvi. 'Túúicā canee cuuⁿmiⁿ chi 'áámá yā caaⁿmaⁿ yā ndúúcu nús'uu nduudu cuaacu yeⁿē chí nduuchi Jesús ngaaⁿ tináⁿā. ²³ Ní 'neeⁿ ndutá'a yā ná 'uuvi 'iiⁿyāⁿ. 'Áámá saⁿā miiⁿ ní nguuvi sa José Barsabás chi nguuvi Justo ndúúcu taama saⁿā miiⁿ chi nguuvi sa Matías. ²⁴ Ní caⁿangua'á yā ní caⁿa yā: N'díi, Señor Ndyuūs, chi n'diichi ní staava yeⁿē nducyáácá yā, 'cuuⁿmíⁿ ní nús'uu 'áámá chéé sáⁿā s'uuⁿ chí 'āā ndeēvé ní. ²⁵ Níicú cunee ndúúcu sa ntiiⁿnyuⁿ ndúúcu apóstoles lado yeⁿe Judas. Ní diiⁿ sa ntiⁿnyuⁿ yeⁿē Judas ntiiⁿnyuⁿ chí nguéé diiⁿ sa cumplir cucáāvā nuuⁿndi yeⁿē sa. 'Tíicā ní Judas cúnaⁿa sa na lugar naachí tuneⁿ saⁿā. ²⁶ Níicú dinguúⁿ yā na 'úúví caaca ndúúcu 'uuvi chí nguuví 'iiⁿyāⁿ, José miiⁿ ndúúcu Matías. Ní

tun'dáá yā 'áámá chi nguuvi Matías ní Matías miiⁿ tuneⁿ. Ní nduuvidaama sa chíi ndicháámá apóstoles chí 'iiⁿyāⁿ chí dichó'ó Dendyuūs.

Ndaa Espíritu N'dai

2 Nducyáácá yā nduuvidaamá yā taachi ndaā nguuvi yeⁿe Pentecostés chí 'viicu yeⁿe cosecha. ² Tuuⁿmí nūⁿ tucá'a ch'éecu ruuⁿ cuchii nanguuvi tan'dúúicā 'áámá 'yúúiné táán chí ngéenu. Ch'iindiveéⁿ yā ruūⁿ miiⁿ chí chíitú va'āi naachi snée yā miiⁿ. Ní 'iiⁿyāⁿ s'uúⁿ vεεté yā. ³ Ní che'enaāāⁿ n'dee n'dai cosas tan'dúúicā ch'ííyā yeⁿe yaⁿā n'gaiyāā. Ní ch'eete ndúúu vmnaaⁿ yeⁿē 'iiⁿyāⁿ. ⁴ Níicú canéé yā nducyáácá yā chiitu ndúúcu Espíritu N'dai yeⁿe Ndyuūs. Níicú Espíritu N'dai miiⁿ díiⁿ yā chí tucá'a yā caⁿa yā táámá naaⁿ davaacu s'eeⁿ tan'dúúicā nduudu chí ca'ā Espíritu N'dai miiⁿ.

⁵ Tuuⁿmi ní na yāāⁿ Jerusalén ch'etinéé 'iiⁿyāⁿ yeⁿe Israel chí saⁿā chí it'éenu Dendyuūs yeⁿē nducyaaca naciones yeⁿe iⁿyeeⁿdí 'cūū. ⁶ Taachí ndaā chí 'eecu ruuⁿ míⁿ nduuvidaamá n'dee n'dái yā ní chidáanā yeⁿé yā ti ca'áámá ca'áámá yā ch'iindiveéⁿ yā chí ngaⁿā davaacu yeⁿe maáⁿ yā. ⁷ Nducyáácá yā 'áámá cheⁿe yiinu yā ní 'áámá nínacadínuuⁿ yā, ní ngaⁿā yā: N'diichí ní, ¿'áá nguéé yeⁿē yáⁿáa Galilea nducyaaca saⁿā s'eeⁿ chí ngaⁿā sa? ⁸ ¿'Taacā chíⁿ n'giindiveeⁿ yú nduudu yeⁿē yú tan'dúúicā naachí ch'iindiyāāⁿ yú? ⁹ Véé 'iiⁿyāⁿ yeⁿe país Partia, 'iiⁿyāⁿ país Media, país Elam, ndúúcu 'iiⁿyāⁿ chí snée yā na país Mesopotamia, 'iiⁿyāⁿ yáⁿáa Judea, yáⁿáa Capadocia, yáⁿáa Ponto, yáⁿáa Asia, ¹⁰ 'iiⁿyāⁿ yáⁿáa Frigia ndúúcu país Panfilia, país Egipto, yáⁿáa s'eeⁿ yeⁿe Africa chí canee cuaāⁿ 'diituú 'áámá lado cuaaⁿ yeⁿē yáⁿáa Cirene, ndúúcu 'iiⁿyāⁿ yeⁿe yāāⁿ Roma chí snée yā miiⁿ.

Tan'dúucā ntúūⁿ 'iiⁿyāⁿ Israel s'eeⁿ 'tiicá ntúūⁿ 'iiⁿyāⁿ chi 'āā maaⁿ 'iiⁿyāⁿ Israel. ¹¹Níicú 'iiⁿyāⁿ isla Creta, ndúucū 'iiⁿyāⁿ país Arabia snée yā miiⁿ. Nducyaaca yú n'giindiveeⁿ yú davaacu yeⁿe yú. Ngaⁿá yā yeⁿe chi ch'ēete taavi cá yeⁿe Dendyuūs. ¹²Nducyaacá yā ní 'áámá cheⁿé yeⁿe yā, ní ndiīⁿ 'uuví yā vaanicadiinuuⁿ yeⁿe yā. Ní ngaⁿá yā 'aamá yā ndúucū taamá yā: ¿D'éé neⁿe caaⁿmaⁿ chuū? ¹³Tanáⁿa yā ní staⁿá yā tan'dúucā 'áámá duuchi ní ngaⁿa yā: 'Āā chí yā.

Chuū ngaⁿa Pedro vmnááⁿ vmnaaⁿ

¹⁴Tuuⁿmi ní Pedro míⁿ cheendii sa ndúucū ndiicháámá yā ní caⁿa yuudu sá ní ngaⁿa sā ngii sa 'iiⁿyāⁿ: Ndís'tiī saⁿā s'eeⁿ yeⁿe Israel ndúucū nducyaaca chí snée yā na yāāⁿ Jerusalén. Ní cánée chí 'cuuⁿmíⁿ ndís'tiī ní tumicadiīnuuⁿ nī chuū. Ní 'caandiveeⁿ nī nduudu yeⁿe 'úú. ¹⁵Sáⁿa s'uuⁿ nguéé cúúví sá tan'dúucā chí nadacádiinúⁿ ndís'tiī caati maaⁿ ní n'geecu nuuⁿ 'yáⁿā. ¹⁶Chuū canée nguūⁿ na libro yeⁿe Ndyuūs naachi caⁿa profeta Joel chí ngaⁿa chí cuchii:

¹⁷Ndyuūs ní caⁿa yā taachi ndaā nguuví cuayiivi chí cuchii, chí teé Espíritu yeⁿe vmnaaⁿ nducyaacá 'iiⁿyāⁿ. Ní daiyá nī saⁿā ndúucū daiyá nī n'daataá caaⁿmáⁿ yā nduudu yeⁿe. Ní saⁿā n'gaiyāā n'deēe nááⁿ chí 'cuuⁿmíⁿnáāⁿ yeⁿe sa. Ní 'iiⁿyāⁿ ndiicū yeⁿe nī n'deeē nááⁿ chí 'cuífnu yā.

¹⁸Tíicā yeⁿe nguuví miiⁿ, 'úú teé Espíritu yeⁿe vmnaaⁿ yeⁿe saⁿā chí dichí'vē 'úú ndúucū n'daataa chí dichí'vē 'úú. Ní caaⁿmaⁿ yā nduudu yeⁿe.

¹⁹Níicú 'cuuⁿmíⁿ vaadi n'giinu yeⁿe cuaaⁿ 'niiⁿnuⁿ nanguuvi, ndúucū señales yeⁿe cuaaⁿ ndiīyā na yáⁿā, ndúucū yuūúⁿ, ndúucū yaⁿā, ndúucū yaaⁿmi,

²⁰'iicu 'yáⁿā miiⁿ nduuví maāⁿ. Níicú 'iīyū míⁿ ndúucū yuūúⁿ, taachi 'aa cuéé ndaa nguuví yeⁿe Señor. Nguuvi miiⁿ ch'ēete ní chí 'cuuⁿmíⁿ yā.

²¹Níicú nducyaaca 'iiⁿyāⁿ chí caaca: Señor 'iivú, ní Ndyuūs nanguáⁿai yā.

²²Ndís'tiī saⁿā yeⁿe 'iiⁿyāⁿ Israel, 'caandiveeⁿ nī nduudu 'cūū: Jesús yeⁿe yāāⁿ Nazaret ní 'áámá saⁿā chí Dendyuūs n'diichí yā chí n'daacā sa nguaaⁿ ndís'tiī. Ní Dendyuūs díⁿ yā vaadi n'gínú ndúucū señales ndúucū ntiīⁿnyuⁿ ch'ēete cáávā saⁿā miiⁿ nguaaⁿ ndís'tiī tan'dúucā ndís'tiī deenú nī. ²³Sáⁿa 'cūū Ndyuūs ní ca'a yā saⁿā cáávā voluntad yeⁿe maaⁿ yā tan'dúucā chí déenú n'dai yā ndíí vmnaaⁿ. Ndís'tiī ní chíicá nī chí staⁿá yā sáⁿa 'cūū chí'neé'ngaⁿá yā saⁿā. Ní chí'iiⁿnúⁿ yā saⁿā cucáávā 'iiⁿyāⁿ s'eeⁿ chí nguéé n'daacā. ²⁴Sáⁿa 'cūū Ndyuūs nadacuééⁿ yā saⁿā yeⁿe nguaaⁿ tináⁿā. Sáⁿa 'cūū nguéé cuuví cunée sa nguaaⁿ tináⁿā. Cáávā chuū ní Dendyuūs nadacuééⁿ yā saⁿā nguaaⁿ tináⁿā. ²⁵David caⁿa sá yeⁿe sáⁿa 'cūū:

Ti cueⁿe daāⁿmaⁿ inaáⁿ Señor 'iivú Ndyuūs vmnááⁿ yeⁿe. Ní canée yā lado yeⁿe honor, ní mar 'aamá 'iiⁿyāⁿ nguéé cuuví di'vaachí yā 'úú.

²⁶Cáávā chuū caaⁿmáⁿ ndúucū 'áámá vaadi yeenú yeⁿe staava yeⁿe ndúucū vaadi yeenú yeⁿe cheendí. 'Iicu cuerpo yeⁿe 'intaavi'tuunúūⁿ ndúucū chí canee ngiinú yeⁿe Ndyuūs.

²⁷Ti nguéé cuⁿéeⁿ nī alma yeⁿe na lugar Hades chí lugar yeⁿe alma. Ní nguéé 'cuaaⁿ nī 'úú chí daiyá nī 'úú chí 'iiⁿyāⁿ chí nguéé nuuⁿndí 'úú chí choō cuerpo yeⁿe.

²⁸Díⁿ nī chí n'diichí chí yúúní cuaacu yeⁿe vida. N'diī dích'ēetē nī vaadi yeenú 'úú ti canee nī nducú.

²⁹Ndís'tiī ví'í, cuuví caaⁿmaⁿ cuaacú ndís'tiī yeⁿe chiida yú David. Ch'ii yā ní ních'ēechí yā na yáinyāⁿ. Ní yáinyāⁿ

yeⁿé yā canee ndúúcu yú ndii ngu-
uví 'cūū. ³⁰ Saⁿa miiⁿ saⁿā profeta miiⁿ
chi ngaⁿa nduudu yeⁿe Dendyuūs. Ní
deenū sa chi Ndyuūs ngaⁿa cuaacú
yā ndúúcu nduudu cuaacu chi 'áámá
'iiⁿyāⁿ chí cuchii na ndaata yeⁿé yā. Ní
Dendyuūs nadacuéeⁿ yā Cristo chi 'cu-
undi yā na trono yeⁿé yā ní caaⁿmaⁿ nti-
iⁿnyúⁿ yā. ³¹ David déenu sa chi cuaaⁿ
vmnaaⁿ ní caⁿa sa chi Cristo nandu-
uchí yā yeⁿe nguuaⁿ tináⁿā. Nguéé cunee
alma yeⁿé yā na lugar Hades chi lugar
yeⁿe alma ní nguéé yúute yeⁿé yā chí
choo. ³² Ndyuūs nadin'duuchí yā Jesús
yeⁿe nguuaⁿ tináⁿā ní cáávā 'iiⁿyāⁿ miiⁿ
nducyaaca 'nū cuuví caaⁿmaⁿ 'nū ndu-
udu cuaacu yeⁿé yā. ³³ Tíicā Jesús canée
yā ná yaacu na lado yeⁿe honor yeⁿe
Dendyuūs ní díiⁿ yā recibir yeⁿe Chiidá
yā miiⁿ yeⁿe chi caⁿā Chiidá yā chí ca'a
yā Espíritu N'dai. Chuū ní Jesús teé yā
ndís'tií ní inaáⁿ ní ní n'giindiveéⁿ ní. ³⁴ Ti
David miiⁿ nguéé cuhee sa nanguuvi; ti
maāⁿ sa ngaⁿa sa:

Caⁿa Señor chíi yā Señor yeⁿé: 'Cuundi
dí lado yeⁿe honor,

³⁵ ndíí cu'neéⁿ 'iiⁿyāⁿ chí taaⁿ yā yeⁿe
di chi tun'dáá n'dai di ndúúcu yā ní
cunée yā na poder yeⁿe di.

³⁶ Cuaacu niⁿnyuⁿ cádiinuuⁿ
nducyáácá 'iiⁿyāⁿ yeⁿe ndaata Israel
chí Jesús chí ndís'tií ní chí'neé'ngaⁿá
ní 'iiⁿyāⁿ, Ndyuūs díiⁿ yā chí Señor ní
Cristo yā ní 'iiⁿyāⁿ ch'εete taavi.

³⁷ Taachí ch'iindiveéⁿ yā chuū ní néené
ya'ai chíi staava yeⁿé yā. Ní caⁿa yā chíi
yā 'iiⁿyāⁿ s'eeⁿ Pedro ndúúcu taa na 'uuví
apóstoles: Nds'tií saⁿā ví'í, ¿de'ē díiⁿ 'nū?

³⁸ Pedro miiⁿ ngaⁿa sa ngii sa 'iiⁿyāⁿ
s'eeⁿ: Nguεεcúndií ní yeⁿe nuuⁿndi yeⁿé
ní ní cuεεdinúⁿníⁿ ca'áámá ca'áámá ní
cucáávā chí chí duuchi Jesús. Níicú
Ndyuūs nadach'εecú yā nuuⁿndí yeⁿe
ndís'tií; ní cuta'á ní chí tee Ndyuūs
miiⁿ chí Espíritu N'dai yeⁿé yā. ³⁹ Caati
Espíritu N'dai caⁿā Chiida yú chí teé

yā cucáávā ndís'tií ndúúcu daiya ní ní
cucáávā nducyaaca 'iiⁿyāⁿ chí snée yā
yaⁿai, ní cucááva nducyaaca 'iiⁿyāⁿ chí
'cuai Señor 'iivú Ndyuūs yeⁿe yú 'iiⁿyāⁿ.

⁴⁰ Pedro miiⁿ ngaⁿá yā nduudu cuaacu
nanááⁿ na 'uuví yā ndúúcu n'dee taaví
nduudu ní ngaⁿa diitú yā 'iiⁿyāⁿ s'eeⁿ ní
ngaⁿa yā: Nanguáⁿai ní yeⁿe 'iiⁿyāⁿ chí
nguéé n'daacā.

⁴¹ Tíicā 'iiⁿyāⁿ chí 'cuúⁿ yā nduudu
yeⁿe yā chεεdinúⁿniⁿ yā, ní chí 'yaáⁿ
yā nguuvi miiⁿ tan'dúúcā 'iiⁿnūⁿ mil
'iiⁿyāⁿ. ⁴² Ní 'áámá canee yā ndúúcu chí
chí'cuaeⁿ apóstoles ní nduuvidaama yā
ní n'dee yā pan ní caⁿangua'á yā.

Vida yeⁿe 'iiⁿyāⁿ s'eeⁿ yeⁿe Evangelio yeⁿe Jesucristo vmnááⁿ vmnaaⁿ

⁴³ Ní vaadi 'va'a níndaā nanááⁿ
nducyaaca yā. Néené n'deēe vaadi
n'giinu ndúúcu señales chí díiⁿ apóstoles
chí dich'óó Dendyuūs. ⁴⁴ Ní nducyáácá
yā chí i'téenu yā nduuvidaama yā. Ní
nducuéⁿe chí véé yeⁿé yā canée yeⁿe
nducyaaca yā. ⁴⁵ Ní n'diicuí yā yáⁿāa
yeⁿé yā ndúúcu chí vεe yeⁿe yā ní nga'a
yā 'téé 'téé nducyáácá 'iiⁿyāⁿ tuunu
tuunu cá chí ngi'vaachí 'iiⁿyāⁿ. ⁴⁶ Áámá
ninduuvidaamá yā na yáacu nguuvi
nguuvi. Ní ninduuvidaamá yā ní yeenú
taaví yā staava yeⁿé yā ndúúcu 'áámá
vaanicadiinúⁿ yeⁿe yā taachi n'deé
yā pan ní taachí che'é yā na vaacú yā.
⁴⁷ 'Iiⁿyāⁿ miiⁿ dich'εeté yā Dendyuūs. Ní
véé favor yeⁿé yā ndúúcu 'iiⁿyāⁿ yeⁿe
yááⁿ miiⁿ. Ní Señor Ndyuūs nguuvi
nguuvi idi'yáaⁿ yā 'iiⁿyāⁿ chí i'teenú yā
'iiⁿyāⁿ.

Saⁿā chí nguéé ngii ngíicá sá ní nānduūvā yeⁿe sa

3 Pedro míiⁿ ndúúcu Juan dáámá
cueⁿe yā cuhee yā na yaacū templo
cuaaⁿ nan'gεecú 'íiⁿnúⁿ chíinu, hora chí
caⁿangua'á yā. ² Ní ná'a yā ndéε yā 'áámá
saⁿā chí ndii dúúvā sá ndíí cheeti cheecu

sa. Saⁿā miiⁿ ni nguúví nguúví i'néeⁿ yā saⁿā cheendi yaācū chi nguuvi Hermosa o N'deēveé. Saⁿa miiⁿ ngiica sa limosna 'iiⁿyāⁿ chi ngeⁿe yaācū templo. ³Sáⁿa 'cūū taachi n'diichī sa Pedro ndúúcu Juan chí chindáa yā yāacū ch'εεte, chiica sá limosna 'iiⁿyāⁿ s'eeⁿ. ⁴Pedro ndúúcu Juan ch'εetinée yā ch'ínu yā saⁿā miiⁿ, ní caⁿá yā chii yā saⁿā: Cun'diichi dí nús'uu.

⁵Tuu'mi ní saⁿā miiⁿ ch'ínu sa 'iiⁿyāⁿ s'eeⁿ chi canee ngínu sá dε'ε ca'á yā saⁿā. ⁶Naati Pedro miiⁿ caⁿá yā: Nguéé tuūmī 'díf'nguee yeⁿé ni nguéé 'dii'nguāⁿ yeⁿé chí canee yeⁿé chi teé dii, cucáāvā Jesucristo yeⁿe yāāⁿ Nazaret miiⁿ, nacuééⁿ dí ní caaca di.

⁷Ní sta'á yā ta'ā sa lado tá cuaācū sa ní nadacuééⁿ yā saⁿā. Hora míⁿ nūⁿ ní ndaā ditiinú ca'a sa ndúúcu 'ííní ruundi ca'a sa. ⁸Ní caí yaācū sa, ní chééndii sá, ní chiicā sa. Sndáa sa ndúúcu Pedro ndúúcu Juan chēeti yaācū templo miiⁿ. Ngiica sá ní ngái yaācū sa ní i'téenu sá Dendyuūs. ⁹Núú'máⁿ yāāⁿ 'iiⁿyāⁿ n'diichī yā saⁿā chi ngiica sa ní i'téenu sa Dendyuūs. ¹⁰Ní nntí-naaⁿ yā chí saⁿā miiⁿ chí saⁿā chí n'giindī cheendi yaācū templo chí nguuvi Hermosa, ní ngiica sa limosnas. Ní cheⁿe yinu yā ní 'iiⁿyāⁿ s'eeⁿ dii'yā yā chii chí 'tíicā nanduuvá yeⁿé sa.

Pedro ngaⁿá yā na corredor chí nguuvi Salomón

¹¹Saⁿā chí nguee ngiica ní chí nduūvā yeⁿé sa sta'ā sa Pedro ndúúcu Juan ní nuuⁿmaⁿ yāāⁿ yā ngeⁿe yiinú yā 'iiⁿyāⁿ. Ní cueⁿé yā na corredor chí nguuvi Salomón chí 'áámá corredor yeⁿe yaācū ch'εεte. ¹²Taachi Pedro n'diichi sa 'iiⁿyāⁿ s'uúⁿ Pedro nan'gueecútáⁿa sa yeⁿé 'iiⁿyāⁿ yāāⁿ: Ndis'tiī saⁿā yeⁿe Israel, ¿de'ε cuuvi chí ngeⁿe yiinú ní yeⁿe chúú? O ¿de'ε cuuví chí n'gínu ní nús'uú? ¿Áá caava chí diitú 'nū o

chí n'dái 'nū chí diíⁿ 'nū chí ngíicá sáⁿa 'cūū? ¹³Ndyuūs yeⁿe saⁿā s'eeⁿ, Abraham ndúúcu Isaac ndúúcu Jacob ní Ndyuūs yeⁿe chiida yú, Ndyuūs diíⁿ yā honrar Daiyá yā Jesús. Ndis'tiī ní ca'á ní 'iiⁿyāⁿ miiⁿ ní cheeⁿdiitú ní nanááⁿ Pilato miiⁿ taachi Pilato neⁿé yā ca'á yā libertad yeⁿé yā. ¹⁴Ndis'tiī ní cheeⁿdiitú ní chí Jesús chí n'daaca yā, Jesús chí n'dai taaví yā, ní chiica ní chí canee libre 'áámá saⁿā chí 'níf'núⁿ 'iiⁿyāⁿ. ¹⁵Ní ch'iiⁿnuⁿ ní Jesús chí cā'a yā vida yeⁿe 'iiⁿyāⁿ. 'iiⁿyāⁿ miiⁿ ní nadin'duūchí Dendyuūs 'iiⁿyāⁿ yeⁿe nguuaⁿ tináⁿā ní nús'uú caaⁿmaⁿ cuaacú 'nū yeⁿé yā. ¹⁶Sáⁿa 'cūū chí nguee ngiica chí ndis'tiī inaáⁿ ní ní n'diichī ní, sáⁿa 'cūū ní ditiinú sa cucáāvā chí i'téenu sa Jesús. Ndúúcu vaadi i'téenu chí ca'a Jesús, sáⁿa 'cūū 'āā nduuví n'dái sá tan'dúúca chí n'diichī nducyaacá ndis'tiī.

¹⁷Naati maaⁿ ní, ndis'tiī ví'í, deenú chí ndis'tiī diíⁿ ní chuū cucáāvā chí nguee déenu ní tan'dúúca chí díⁿ 'iiⁿyāⁿ s'eeⁿ chí ngaⁿa ntiiⁿnyúⁿ yā yeⁿe ndis'tiī. ¹⁸Tíicā Dendyuūs ní snuūⁿ ca'a chí caⁿa yā vmnááⁿ vmnaaⁿ cáāvā cheendi nducyaaca profetas chí n'dai chí caⁿa nduudu yeⁿe Dendyuūs yeⁿe chí Cristo Daiyá yā. Ní cánéé chí Cristo ní 'cuenú yā cuuvi. ¹⁹Tíicā maaⁿ ní nacadínuuⁿ ní ní ndaacadáámí ní yeⁿe nuuⁿndi yeⁿé ní ní cu'téenu ní. Níicú Ndyuūs nadví yā nuuⁿndi yeⁿé ní. Níicú ndaa tiempo chí ntaaviⁿtuunúⁿ ní nanááⁿ Señor 'iiví Ndyuūs. ²⁰Ndyuūs ní ndeévé yā Jesucristo ndíí vmnaaⁿ níicú caⁿa yā chí dich'ó yā Jesucristo tan'dúúca chí caⁿa yā ndíí cuááⁿ vmnaaⁿ. ²¹Cuaacu níⁿnyúⁿ chí 'iiⁿyāⁿ miiⁿ canee cúúⁿmíⁿ chí canee yā va'āi chēeti nguuvi ndíí taachi ndáá nguuvi chí Dendyuūs diíⁿ yā taanduvéé dendúⁿ chí Dendyuūs caⁿá yā vmnááⁿ vmnaaⁿ cucáāvā cheendi profetas yeⁿe yā. Profetas chí n'dai caⁿa yā chí cuchii ndíí cuááⁿ vmnaaⁿ. ²²Caati Moisés miiⁿ

ní caⁿa yā chii yā chiida yú s'eeⁿ ndíí vmnaaⁿ: Señor Ndyuūs yeⁿē yú nadacuéeⁿ yā 'áámá profeta nguaaⁿ 'iiⁿ'yāⁿ yeⁿē yú tan'dúúca 'úú. Ní yeⁿé 'iiⁿ'yāⁿ miiⁿ 'caandiveéⁿ nī yeⁿē taanduvéé dendu'ū chi caaⁿmaⁿ yā ndúúcu ndís'tií. ²³ Ní cuuvi chí nducyaaca yā chi nguéé 'caandiveéⁿ yā yeⁿē 'iiⁿ'yāⁿ profeta miiⁿ canéé chí can'dáa yā yeⁿē nguaaⁿ 'iiⁿ'yāⁿ.

²⁴ Tanducuéⁿe profetas ní ndii tiempo yeⁿe Samuel ndii tiempo chí cuchíí 'yaaⁿ n'dáí yā ní caⁿa yā, ní 'áa caⁿa ntúuⁿ yā yeⁿē nguuvi 'cūú. ²⁵ Ndís'tií daiya profetas chí caⁿa nduudu yeⁿé Dendyuūs ní yeⁿe compromiso chí Dendyuūs caⁿa cuaacú yā ndúúcu chiida yú s'eeⁿ ní caⁿa yā chii yā Abraham: Ná ndaatá yeⁿē di cuchíí 'áámá saⁿā cuayiivi, caati sáⁿā miiⁿ cúúví di'viicú sa tanducuéⁿē 'iiⁿ'yāⁿ yeⁿe iⁿ'yeeⁿdí 'cūú. ²⁶ Ndyuūs nadicuéeⁿ yā Daiyá yā vmnááⁿ vmnaaⁿ cáávā ndís'tií. Ní dich'ó yā 'iiⁿ'yāⁿ miiⁿ chí di'viicú yā ndís'tií chí 'áámá 'áámá nī ndaacadaamí nī yeⁿē nuuⁿndí yeⁿé nī.

Pedro ndúúcu Juan nanááⁿ 'iiⁿ'ntyéⁿē Concilio

4 Taachi Pedro ndúúcu Juan yaa'ví yā nanaaⁿ 'iiⁿ'yāⁿ miiⁿ chí nduuvídáámá yā tuu'mí ndaá nanááⁿ 'iiⁿ'yāⁿ s'eeⁿ chiduú s'eeⁿ yeⁿé Israel ndúúcu soldados ndíí tiií yeⁿē soldados chí diiⁿ cuidado yeⁿe yáacú templo yeⁿe 'iiⁿ'yāⁿ Israel ndúúcu 'iiⁿ'yāⁿ saduceos chí nguéé i'teenú yā chí nnduuchí 'iiⁿ'yāⁿ yeⁿe nguaaⁿ tináⁿā. ² 'Iiⁿ'yāⁿ s'eeⁿ miiⁿ ya'āi chíí yeⁿe staava yeⁿé yā taachi ch'iindiveéⁿ yā chíí chí Pedro ndúúcu Juan caⁿa yā chí chí'cuééⁿ yā 'iiⁿ'yāⁿ yááⁿ miiⁿ. Ní caⁿa yā chí Dendyuūs nadacuéeⁿ yā 'iiⁿ'yāⁿ s'eeⁿ yeⁿe nguaaⁿ tináⁿā cucáávā Jesús miiⁿ. ³ Ch'íinú nguuvi mííⁿ ní 'iiⁿ'yāⁿ s'eeⁿ chita'á yā Pedro ndúúcu Juan ní chinuúⁿ yā saⁿa s'eeⁿ vácūú ndíí chideeve miiⁿ. ⁴ Naati nguaaⁿ tanducuéⁿe yā neené 'yaaⁿ yā chí ch'iindiveéⁿ yā ní n'dee

taaví yā chí chí'teenú yā, ní 'iiⁿ'yāⁿ s'eeⁿ ní ngii yā taanduu nyuⁿu mil.

⁵ Chideeve táámá nguuvi miiⁿ nduuvidaamá na yááⁿ Jerusalén 'iiⁿ'yāⁿ s'eeⁿ chí ngaⁿā ntiiⁿ'nyuⁿ ndúúcu 'iiⁿ'yāⁿ ndicúú chí ngaⁿā ntiiⁿ'nyuⁿ yeⁿē yáacú ndúúcu maestros yeⁿe ley, ⁶ ndúúcu chiduú ch'ēte cá yeⁿē Israel chí nguuví Anás, ndúúcu Caifás, ndúúcu Juan, ndúúcu Alejandro, ndúúcu nducyáacá 'iiⁿ'yāⁿ yeⁿe familia chiiduú ch'ēte cá yeⁿe Israel. ⁷ Ní ch'íinú yā Juan ndúúcu Pedro naavtaⁿā, ní ntiinguunéⁿ yā saⁿā s'eeⁿ: ¿De'ē poder, o de'ē duuchí 'iiⁿ'yāⁿ chí te'ē poder chí dííⁿ nī chuú?

⁸ Tuu'mi ní Pedro miiⁿ ní diituú Espíritu N'dai yeⁿe Ndyuūs 'iiⁿ'yāⁿ caⁿa yā chí yā saⁿa: Ndís'tií 'iiⁿ'yāⁿ chí ngaⁿā ntiiⁿ'nyuⁿ yā ndúúcu 'iiⁿ'yāⁿ ndicúú chí ngaⁿā ntiiⁿ'nyuⁿ yā yeⁿē yáacú yeⁿē 'iiⁿ'yāⁿ Israel; ⁹ ndúúti chí ndís'tií maaⁿ ní dííⁿ nī juzgar nús'uu yeⁿe saⁿā chí ngiitā miiⁿ ní n'daacá 'nū ndúúcu sa, ní sáⁿa 'cūú miiⁿ nanduuva yeⁿē sa, ¹⁰ cadíinuⁿ nducyaaca ndís'tií ndúúcu nducyáacá 'iiⁿ'yāⁿ yeⁿē Israel miiⁿ chí saⁿa 'cūú chí canéé sá ndúúcu yú nanduuvá yeⁿē sa cucáávā Jesucristo yeⁿē yááⁿ Nazaret. 'Iiⁿ'yāⁿ miiⁿ ndís'tií ní s'nééⁿnga'á nī 'iiⁿ'yāⁿ ní Dendyuūs nadicuéeⁿ yā 'iiⁿ'yāⁿ yeⁿe nguaaⁿ tináⁿā. ¹¹ Jesús tan'dúúca tuúú 'cūú chí ndís'tií 'iiⁿ'yāⁿ chí din'dái va'ai ní nguéé canee yiinú nī, naati maaⁿ ní Ndyuūs chí cu'néeⁿ yā tuúú 'cūú yeⁿē lado tuúú ch'ēte yeⁿē esquina yeⁿe va'ai. ¹² Véé dámaaⁿ 'áámá n'dyáⁿā sáⁿa 'cūú chí cuuvi nadanguáⁿai sa 'aa du'ú nūuⁿ 'iiⁿ'yāⁿ. Neⁿe chí nguéé ndúúcu 'iiⁿ'yāⁿ miiⁿ nguéé nínguaⁿāi yú, ti nguéé táámá 'iiⁿ'yāⁿ ná iⁿ'yeeⁿdí 'cūú chí nadanguáⁿai yā s'uuúⁿ.

¹³ Tuu'mi ní taachí n'diichi yā chí Juan ndúúcu Pedro ditiinú taavi sa, nguéé di'vá'a sa ní cudéenu yā chí nguéé saⁿā chí deenu sa letra ti tonto sa, cheⁿe yiinú yā chíí. Ní deenú yā chí saⁿā s'eeⁿ

ch'ëetinéé sa ndúúcu Jesús. ¹⁴Taachí n'diichí yā chi chééndii sa^{na} chi 'āā nnduuvā ye^{ne} ndúúcu 'ii^{nyā} s'eeⁿ nguéé ngíi nga^{na} yā contra ye^{ne} sa. ¹⁵Tuu'mi nga^{na} 'ii^{nyā} s'eeⁿ ngii yā sa^{na} s'eeⁿ miiⁿ chí nacan'dáa sa nguaaⁿ 'ii^{nyā} s'eeⁿ. Ní 'ii^{nyā} s'eeⁿ chí nndeé yā nguaaⁿ maáⁿ yā. ¹⁶Ní nga^{na} yā: ¿De'ē diiⁿ yú ndúúcu sa^{na} s'eeⁿ? Cuaacu níⁿnyúⁿ chí vëe 'aama señal caavā sa^{na} s'eeⁿ diiⁿ sa 'tíicā ní cadíinuⁿ nducyaaca yā na yāāⁿ Jerusalén miiⁿ. Ní nguéé cuuvi 'cucëcutáⁿ a yú ye^{ne} chúu. ¹⁷Naati chí 'aa ntéé caa^{na} maⁿ sa chí 'yaaⁿ cá chuū nguaaⁿ yāāⁿ, tuu'mi ní 'ii^{nyā} chí nga^{na} ntiⁿnyúⁿ yā ye^{ne} yāāⁿ miiⁿ nga^{na} yā: Yáá'ví yúúdu yú ye^{ne} sa^{na} s'eeⁿ chí 'aa ntéé caa^{na} maⁿ sa mar 'áamá ye^{ne} Jesús ndii mááⁿ ndíi nguuvi chí cuchii.

¹⁸Ní 'cai yā sa^{na} s'eeⁿ ní ca^{na} yúúdu yā chii yā sa^{na} s'eeⁿ chí 'āā ntéé caa^{na} maⁿ sa ní 'aa ntéé ca'cuéⁿ sa ye^{ne} Jesús miiⁿ. ¹⁹Naati Pedro ndúúcu Juan nán'guëcutáⁿ a sa ye^{ne} yā ní ca^{na} sa ye^{ne} yā: Canéé chí tuumicadiinuⁿ nī nanááⁿ Dendyuūs. ¿'Áá canéé chí cu'téenu 'nū ye^{ne} ndís'tii vmnááⁿ vmnāaⁿ o cu'teenú 'nū ye^{ne} Dendyuūs? ²⁰Ti nguéé cuuvi chí 'aa ntéé caa^{na} máⁿ nús'uū de'ë chí n'diichi 'nū o chííⁿ chí ch'iindiveéⁿ 'nū.

²¹Tuu'mi ní taachi yaa'vi yuudú yā sa^{na} s'eeⁿ ní nadich'ó yā sa^{na} s'eeⁿ cáávā nducyáácā yā i'téenu yā Dendyuūs cucáávā chíí 'āā chíi. Ní nguéé indaacá yā mar 'áamá nuuⁿndi ch'ëete ye^{ne} sa^{na} s'eeⁿ chí cuuvi dííⁿ yā castigar sa^{na} s'eeⁿ cáávā chí 'va'á yā 'ii^{nyā} yāāⁿ miiⁿ. ²²Níicú dííⁿ yā 'áamá milagro ndúúcu sa^{na} miiⁿ chí nduūvā ye^{ne} sa. Sa^{na} miiⁿ 'āā ngo'ó sá uūvi ngeëcu nduūyū ye^{ne} sa.

'Ii^{nyā} chí i'teenu caacá yā confianza ndúúcu ánimó

²³Taachí 'āā nduuví yā libre cue^{ne}é yā nanááⁿ compañeros ye^{ne}é yā. Tuu'mi ní

ca^{na} yā nducué^{ne} chí nca^{na} chíiduú n'gëeté ye^{ne} Israel ndúúcu 'ii^{nyā} ndiicúú chí nga^{na} ntiⁿnyuⁿ ye^{ne} yāacú. ²⁴Ní 'ii^{nyā} s'eeⁿ ní taachí ch'iindiveéⁿ yā chuū, nduuvidaamá yā ní ca^{na} yā ndúúcu Dendyuūs: N'díi, Señor Dendyuūs chí ch'ëete n'dai ca, n'dii 'ii^{nyā} chí din'dái ní nanguuvi ndúúcu yā^{na} ndúúcu nuūⁿniⁿyā^{na} ndúúcu tanducue^{ne} chí vëé. ²⁵Caati ndúúcu cheendi David, sa^{na} chí n'dii chí 'āā diiⁿ mandado ye^{ne}é ní ní 'āā ca^{na} ní:

¿De'ē cuchí chí rebelde 'ii^{nyā} chí nguéé 'ii^{nyā} ye^{ne}é ndaata Israel? Níicú 'ii^{nyā} ye^{ne}é naciones miiⁿ inacáidinúúⁿ yā cosa chí nguéé dichiiⁿ vë.

²⁶Nduuvidaamá reyes ye^{ne}é yā^{na} 'cúu, 'íicú sa^{na} n'gëete chí nga^{na} ntiⁿnyúⁿ yā nduuvidaamá yā contra ye^{ne} Señor Dendyuūs, ndúúcu Cristo ye^{ne}é yā.

²⁷Maaⁿ ní cuaacu níⁿnyúⁿ chí nduuvidaamá yā Herodes ndúúcu Poncio Pilato, ndúúcu 'ii^{nyā} chí nguéé 'ii^{nyā} ye^{ne}é ndaata Israel ndúúcu 'ii^{nyā} ye^{ne}é Israel na yāāⁿ 'cūu contra ye^{ne} Jesús chí Daiya nī chí n'dai. Ní n'díí ca'á nī ntiⁿnyuⁿ chí dííⁿ yā. ²⁸'Ii^{nyā} miiⁿ dííⁿ yā chí cuuvi tan'dúúcā chí ne^{ne}é nī vmnááⁿ vmnāaⁿ chí cuuvi 'tíicā. ²⁹Maaⁿ ní n'dii Señor, n'diichí nī chí tan'dúúcā chí chidúú n'gëeté ye^{ne}é Israel nga^{na} taáⁿ yā ndúúcu nús'uu. N'dii Señor, teé nī nús'uu chí idiiⁿ mandado ye^{ne}é ní chí nguéé 'va'á 'nū ní caa^{na} máⁿ 'nū nduudu ye^{ne}é nī. ³⁰Ch'íⁿí maáⁿ nī chí diitú nī chí 'ii^{nyā} dííⁿ yā chí náanduūvā ye^{ne}é 'ii^{nyā}, ní dííⁿ yā señales ndúúcu vaadi n'giinu cucáávā Daiyá nī chí Jesús chí n'dai taavi.

³¹Taachí ch'iinu ca^{na} ángua'á yā naachi nduuvidaámā yā, nuⁿu va'āi miiⁿ. Ní nducyaaca yā ní chiitu Espíritu N'dai ye^{ne}é Ndyuūs 'ii^{nyā}. Nguéé 'va'á yā chí ca^{na} yā nduudu ye^{ne}é Dendyuūs.

Nducuéⁿē chi véé yeⁿē nducyáácá 'iiⁿyāⁿ

³² 'Iiⁿyāⁿ n'dee n'dái chí ch'itéenu yā nduuvidaamá yā ní 'áámá staava yeⁿē yā, 'áámá alma yeⁿē nducyaaca yā. Mar 'áámá 'iiⁿyāⁿ nguεε caⁿa yā chi yeⁿē yā dendu^lū chi véé yeⁿē yā ti nducuéⁿē chi véé ní yeⁿē nducyáácá yā. ³³ Apóstoles chi dichó'ó Ndyuūs ngaⁿá yā nduudu cuaacu ndúúcu poder ch'εεte yeⁿē Señor Jesús chi nadacuéⁿē yā yeⁿe nguaaⁿ tináⁿā. Níciú favor ch'εεte taavi cá yeⁿē Dendyuūs cánéé nanááⁿ 'iiⁿyāⁿ s'eeⁿ. ³⁴ Mar 'áámá 'iiⁿyāⁿ nguεε ngii 'vaachí yā. Nducyáácá 'iiⁿyāⁿ chi véé yeⁿē ch'idá yā chí yeⁿe yā ndúúcu dendu'u yeⁿē yā ín'diicuí yā. Ní ndéε yā chi ndāāca yā chi n'diicui yā chiiⁿ. ³⁵ Ní 'neeⁿ yā na ca'a apóstoles chi dichó'ó Dendyuūs. Ní nga'á yā ca'áámá 'iiⁿyāⁿ tuunu tuunu ca ngii 'vaachí 'iiⁿyāⁿ. ³⁶ Tuu'mi ní José, ní 'iiⁿyāⁿ chi s'neeⁿ apóstoles chi duuchi Bernabé (chi neⁿe caaⁿmaⁿ, 'Iiⁿyāⁿ chi ngaⁿa 'viich'εεtínūⁿ). José miiⁿ 'iiⁿyāⁿ yeⁿe ndaata yeⁿe levita ní ch'iindiyáaⁿ yā na isla Chipre. ³⁷ 'Iiⁿyāⁿ miiⁿ véé 'áámá vaadi ngua'áa yeⁿē yā. N'diicui yā ní ndéε yā tuumi yeⁿē miiⁿ, ní s'neeⁿ yā na ca'a apóstoles chi dichó'ó Ndyuūs.

Ananías ndúúcu Safira

5 Véé 'áámá saⁿā chi nduuvi sa Ananías ndúúcu Safira n'daataá yeⁿē sa chi n'diicui sá 'áámá vaadi ngua'áa yeⁿē sa. ² Nguéé tanducuéⁿē tuumi chi sta'a sa yeⁿe yáⁿāa ndee sa, ní n'daatáa yeⁿē sa chicadínúúⁿ tá chuū. Saⁿā miiⁿ ní 'téé nūu ndéε sa chi 'neeⁿ sa na ca'ā apóstoles chi dichó'ó Dendyuūs. ³ Tuu'mí ngaⁿā Pedro miiⁿ: Díi, Ananías, ¿de'ē cuuví chi yáá'n'guiinūⁿ chistaⁿa sa na staavá yeⁿē di, ní nguéé caⁿa cuaacú dí nanááⁿ Espíritu N'dai yeⁿe Ndyuūs, ní nguéé ndéε di tanducuéⁿē tuumi yeⁿē yáⁿāa miiⁿ? ⁴ Naaⁿ chi cánéé ta'á di,

¿'áá nguéé yeⁿē di? Ni taachi 'āā n'diicuí di, ¿'áá nguéé yeⁿē di dendu'ū? ¿De'e cúuví chí ch'neeⁿ di na staava yeⁿē di? Nguéé caⁿa di nduudu yaadi miiⁿ ná saⁿā iⁿ'yeeⁿdí 'cūū naati nanááⁿ Dendyuūs.

⁵ Taachi Ananías ch'iindiveeⁿ sa nduudú 'cūū sndεeve sá ní ch'iī sa. Ní nducyáácá yā chí ch'iindiveeⁿ yā chuū dii'yā taaví yā chii. ⁶ Ní saⁿā da'cáiyāa chí s'neeⁿ miiⁿ nadicuéⁿ sa 'iiⁿyāⁿ, ní ch'εecu sa tínūuⁿ 'iiⁿyāⁿ, ní tun'dáa sa 'iiⁿyāⁿ chuva'āi. Ní ch'iichi sá 'iiⁿyāⁿ na panteón.

⁷ Cho'ōo tan'dúúca 'iiⁿnūⁿ hora chi ndāā n'daataá yeⁿē sa cheeti yaācū. Táⁿa 'cūū ní nguéé deenū tá de'ē chí chii. ⁸ Tuu'mi ní Pedro ngaⁿa sa ngii sa táⁿā: Cuuvi di 'úú, ¿'áá n'deεε tuumí sta'a di yeⁿe yáⁿāa miiⁿ chí n'diicui sa? Ní tá miiⁿ ní caⁿa tá: 'Tíicā. ⁹ Pedro miiⁿ ngaⁿa sa ngii sa táⁿā: ¿De'ē cáavā chí diiⁿ di ndúúcu isaⁿa yeⁿē di chí chinnche'ei dí Espíritu yeⁿe Señor 'iivú Ndyuūs? N'diichí dí. 'Iiⁿyāⁿ chí cheⁿe chí n'guuchi isaⁿa yeⁿē di sneé yā cheendi yaācū ní canéé chí tun'dáa ntúuⁿ yā dii. ¹⁰ Tuu'mi ní chí ndeεévé túúⁿ tá 'cūū na ca'a Pedro ní ch'iī tá. Taachi ndāa saⁿā s'eeⁿ yāacū ní ndaaca sa táⁿa 'āā n'dii ntúúⁿ tá. Ní tun'dáa nī ntúúⁿ saⁿā da'caiyāa s'eeⁿ táⁿā. Ní ch'iichi sa táⁿā niiⁿnuúⁿ ná yáinyāⁿ yeⁿē saⁿa yeⁿē tá. ¹¹ Nducyáácá 'iiⁿyāⁿ yeⁿē yāacū ndúúcu 'iiⁿyāⁿ chí ch'iindiveeⁿ yā chuū neené dii'yā yā chii.

N'dee taaví señal s'eeⁿ ndúúcu vaadi n'giinu s'eeⁿ

¹² Cáavā ta'a apóstoles neené n'dee nááⁿ señales ndúúcu vaadi n'giinu s'eeⁿ díiⁿ yā na yáāⁿ miiⁿ. Ní nducyáácá yā 'áámá nduuvidaamá yā corredor chí nguuví Salomón yeⁿe yaācū templo yeⁿe 'iiⁿyāⁿ Israel. ¹³ 'Iiⁿyāⁿ chí nguéé nduuvidaamá yā ndúúcu 'iiⁿyāⁿ yeⁿe yāacū 'va'á yā chí nduuvidadāma yā nduucú yā. Naati 'iiⁿyāⁿ yeⁿe yáāⁿ miiⁿ diiⁿ yā

honrar 'iiⁿyāⁿ yeⁿe yáacū. ¹⁴ 'Iiⁿyāⁿ chi i'téénú Señor 'iivú Ndyuūs chi 'yaaⁿ cá yā tan'dúucā chi 'yaaⁿ sáⁿá 'tiicā ntúúⁿ n'daataa; ¹⁵ tun'dáa yā 'iiⁿyāⁿ s'eeⁿ chi ngíita miiⁿ cyuuni. Ní sn'duú yā 'iiⁿyāⁿ na cama, ní sn'duú yā 'iiⁿyāⁿ na colchones, ti taachi cho'ó Pedro miiⁿ ní 'aa cunee 'cuutií yeⁿe Pedro miiⁿ vmaaaⁿ yeⁿe 'áamá chee 'iiⁿyāⁿ s'eeⁿ. ¹⁶ Níicú 'iiⁿyāⁿ yáaⁿ na niiⁿnuúⁿ míⁿ neené 'yáaⁿ yā ndaaⁿ yā yáaⁿ Jerusalén ndúúcu 'iiⁿyāⁿ chi ngíita ndúúcu 'iiⁿyāⁿ chí staⁿá 'yúúné chí nguéé n'dāacā yeⁿe yáaⁿ n'guuinūⁿ. Nducyaáca yā nduuva yeⁿe yā.

**'Iiⁿyāⁿ s'eeⁿ can'dáa yā chi n'nuuⁿ
cáai yā Pedro ndúúcu Juan**

¹⁷ Tuu'mi ní chiiduú ch'ēete ca yeⁿe Israel ndúúcu 'iiⁿyāⁿ chi snée yā ndúúcu yā chi yeⁿe saduceo s'eeⁿ chi nguéé i'téenu yā chi nduuchi 'iiⁿyāⁿ nguaaⁿ tináⁿá díⁿ yā contra yeⁿe 'iiⁿyāⁿ s'eeⁿ. Ní díⁿ nguéé yā. ¹⁸ Ní staⁿá yā apóstoles chí dichó'ó Ndyuūs ní s'nuúⁿ yā saⁿá s'eeⁿ vácū yeⁿe yáaⁿ miiⁿ. ¹⁹ Naati 'áamá ángel yeⁿe Señor 'iivú Dendyuūs miiⁿ ní nn'guaaⁿ yā cheendi vácū miiⁿ n'gaaⁿ, ní tun'dáa yā 'iiⁿyāⁿ s'eeⁿ ní caⁿa yā: ²⁰ Cunaⁿá nī, ní 'cuetíndí nī na yáacū templo ní caaⁿmaⁿ nī tanducueⁿe nduudu yeⁿe vida ngái 'cūū nanááⁿ nducyaaca 'iiⁿyāⁿ yeⁿe yáaⁿ miiⁿ.

²¹ Taachí ch'iindiveéⁿ yā chuū ní snaa yā yaacū templo miiⁿ tyaaⁿ tyaaⁿ ní ca'cueeⁿ yā. 'Naaⁿ chí snée yā chēeti yaacū miiⁿ ní nduuvíáamá chiiduú ch'ēete ca yeⁿe Israel ndúúcu 'iiⁿyāⁿ chí snée nduucú yā. Ní 'cai yā 'iiⁿyāⁿ chí ngaⁿa ntiiⁿnyuⁿ ndúúcu nducyaaca 'iiⁿyāⁿ ndicúū yeⁿe 'iiⁿyāⁿ Israel. Ní dichó'ó yā soldado s'eeⁿ chí caⁿá sa na vácū chí canguái sa 'iiⁿyāⁿ. ²² Taachi ndaaⁿ soldado s'eeⁿ nguéé indaāca sa 'iiⁿyāⁿ s'eeⁿ vácū tuu'mi ní nguēcundí sa ní yaaⁿvi sa 'iiⁿyāⁿ s'eeⁿ. ²³ Ní ngaⁿá sa: Cuaacu níⁿnyúⁿ taachí ndaaⁿ nū, ní ndu-

udí vácū ní canéé candado, ní 'iiⁿyāⁿ chí snée cuidado vácū snée yā cheendi vácū. Taachí nan'guaaⁿ nū míⁿ, mar 'áamá 'iiⁿyāⁿ nguéé yā chēeti vácū miiⁿ. ²⁴ Taachi chiiduú ch'ēete ca yeⁿe Israel miiⁿ ndúúcu soldado ndíitiiⁿ yeⁿe soldado s'eeⁿ chí idiiⁿ cuidado yaacū templo miiⁿ ndúúcu chiiduú n'gēete ch'iindiveéⁿ yā nduudu 'cūū, néené nadacáínuuⁿ yā chí chíi chuū. ²⁵ Naati 'áamá 'iiⁿyāⁿ ndaaⁿ yā ní chíi yā 'iiⁿyāⁿ s'eeⁿ chuū: Cun'diichí nī, sáⁿá chí s'nuúⁿ ní vácū miiⁿ yáacū templo snúuⁿ sa. Ní ngi'cuééⁿ sa 'iiⁿyāⁿ yáaⁿ.

²⁶ Tuu'mi ní cueⁿe soldado ndíiⁿ tiiⁿ yeⁿe soldado s'eeⁿ chí díiⁿ cuidado yeⁿe yáacū ndúúcu soldado s'eeⁿ ní nguéé ndúúcu vaadí caaⁿva chí nguái yā saⁿá, ti 'vaⁿá yā chí cuíftuū 'iiⁿyāⁿ yáaⁿ miiⁿ.

²⁷ Taachi ndéé yā saⁿá s'eeⁿ ní díⁿ yā presentar saⁿá s'eeⁿ nanááⁿ 'iiⁿntyéⁿe yeⁿe concilio tuu'mi ní chiiduú ch'ēete cá yeⁿe Israel miiⁿ ntiinguunéⁿ yā saⁿá s'eeⁿ.

²⁸ Ní ngaⁿa yā saⁿá s'eeⁿ: ¿Áa nguéé caⁿa nū chíi nū diituú ndís'tii chí nguéé ca'cueéⁿ nī yeⁿe Jesús? Maaⁿ ní 'aa dicutúu ntúuⁿ nī na yáaⁿ Jerusalén ndúúcu nduudu náⁿá yeⁿe nī. Ní neⁿe cu'neéⁿ nī nuuⁿndi nús'uu ndúúcu nuuⁿndi yeⁿe vaadí n'gii yeⁿe sáⁿa 'cūū. ²⁹ Nanguēcútaⁿá Pedro ndúúcu apóstoles ní caⁿa yā: Canee chí díⁿ nū o cu'téenu nū yeⁿe Dendyuūs vmaááⁿ vmaaaⁿ chí 'cuinu ní cu'téenu nū yeⁿe saⁿá iⁿyeedíⁿ 'cūū.

³⁰ Dendyuūs yeⁿe chiida yú nadacúeéⁿ yā Jesús. Ní ndís'tii ní ch'iinúⁿ nī 'iiⁿyāⁿ ní dicuái nī 'iiⁿyāⁿ ná 'áamá yáⁿá.

³¹ Ndyuūs nadicúeéⁿ yā Jesús lado yeⁿe honor. Ní chí'nééⁿ yā 'iiⁿyāⁿ chí ch'ēete ní Salvador chí nadach'ēecu Jesús 'iiⁿyāⁿ yeⁿe nuuⁿndi yeⁿe yā. Ní chuū ní cáavā chí Jesús caⁿa yā 'iiⁿyāⁿ Israel chí cuuvi ndaacadáámí yā yeⁿe nuuⁿndí yeⁿe yā. Níicú Dendyuūs nadach'ēecú yā nuuⁿndi yeⁿe yā. ³² Níicú nús'uū ní tes-tigo nū yeⁿe yā yeⁿe cosa 'cūū ndúúcu

Espíritu N'dai yeⁿe Ndyuūs. Dendyuūs miiⁿ ca'a yā Espíritu N'dai miiⁿ 'iiⁿ'yāⁿ chi ch'iindiveéⁿ yā yeⁿe yā.

³³Taachí 'iiⁿ'yāⁿ s'eeⁿ ch'iindiveéⁿ yā chuū neenē nduuvi taáⁿ yā ní neⁿe 'caaⁿ'núⁿ yā saⁿ'ā s'eeⁿ. ³⁴Tuu'mi ní nguuaaⁿ 'iiⁿ'ntyéⁿe yeⁿe concilio ncuéeⁿ 'áámá saⁿ'ā yeⁿe 'iiⁿ'yāⁿ fariseo s'eeⁿ chi nguuvi sa Gamaliel, chi saⁿ'ā chi déénú taavi yeⁿe ley. Saⁿ'ā miiⁿ 'áámá sá chi neenē induuví 'iiⁿ'yāⁿ yááⁿ sáⁿ'ā. Caⁿ'a ntiiⁿ'nyuⁿ sa chi can'daa apóstoles chi dichó'ó Ndyuūs chuva'ai miiⁿ 'áámá rato 'lífⁿ. ³⁵Tuu'mi ní caⁿ'a sa: Ndís'tii, 'iiⁿ'yāⁿ Israel, cuin'dífichí nī chi dífⁿ nī ndúúcu sáⁿ'a s'eeⁿ. ³⁶Caati nguuvi chí 'āā chó'oo nācuéeⁿ saⁿ'ā chi nguuvi Teudas chi caⁿ'a sá 'iiⁿ'yāⁿ chí 'áámá 'iiⁿ'yāⁿ ch'ēete. Ní nduuvidaamá 'iiⁿ'yāⁿ ndúúcu saⁿ'ā miiⁿ tan'dúúca cuuⁿ ciento 'iiⁿ'yāⁿ. Sáⁿ'a 'cūū ní ch'ii sa, ní 'iiⁿ'yāⁿ chí ch'iindiveéⁿ yā yeⁿe sa, tuunu tuunu ca na vaacú yā cuináⁿ'a yā. Mar 'áámá yā 'āā ntéé ch'ēetinée yā. ³⁷Chó'oo chúū ní nācuéeⁿ Judas, saⁿ'ā yeⁿe yáⁿ'āa Galilea taachí nduūví duuché 'iiⁿ'yāⁿ. Ní neenē 'yaaⁿ 'iiⁿ'yāⁿ n'dáa yā saⁿ'ā. Saⁿ'ā miiⁿ ní ch'ii ntúuⁿ sa ní nducyaaca 'iiⁿ'yāⁿ chi ch'iindiveéⁿ yā cueⁿe 'múúⁿ cueⁿe miiⁿ yā. ³⁸Maaⁿ ní ngaⁿ'á ngii ndís'tii: Cuvíⁿ nī yeⁿe sáⁿ'ā s'eeⁿ. Ní 'āā snée ra sa ti ndúúti chí consejo 'cūū o ntiiⁿ'nyuⁿ 'cūū yeⁿe saⁿ'ā iⁿ'yeeⁿdí 'cūū tuu'mi ní nguéé de'ē veē dichí'vē. ³⁹Nguéé cuuvi dífⁿ nī chí nadituuví nī chuū ndúúti chí yeⁿe Dendyuūs ní nguéé dífⁿ nī chí cuuvi cuuⁿ'máⁿ nī ndúúcu Dendyuūs.

⁴⁰Canee yiinú yā chi caⁿ'a sa. Ní 'cai yā apóstoles chi dichó'ó Dendyuūs ní cheⁿ'é yā saⁿ'ā s'eeⁿ. Ní yaa'vi yuudu yā saⁿ'ā s'eeⁿ chi nguéé caaⁿ'maⁿ sa yeⁿe Jesús miiⁿ. Ní n'dēechí yā saⁿ'ā s'eeⁿ. ⁴¹Saⁿ'ā s'eeⁿ ní nan'dáa sa nguuaaⁿ 'iiⁿ'yāⁿ concilio s'eeⁿ, ní yeenú taaví sa caati Dendyuūs 'cuúⁿ yā chí ch'ēenu sa chii cucáávā Jesús. ⁴²Nguéé i'neeⁿ naaⁿ yā chí ndii

ngi'cueeⁿ yā, ní ngaⁿ'a yā yeⁿe Jesu-cristo miiⁿ cheeti yáacū templo ndúúcu ná vaacú 'iiⁿ'yāⁿ nguuvi nguuvi.

Dífⁿ yā votar ndēechē sáⁿ'ā diáconos

6 Nguuvi miiⁿ chí'yááⁿ 'iiⁿ'yāⁿ s'eeⁿ chí i'téenu yā Jesús. Ch'iindiveéⁿ yā nduudú vaadi caa'va nguáaⁿ yā. 'Iiⁿ'yāⁿ s'eeⁿ chí griego yā caⁿ'a yā chí 'iiⁿ'yāⁿ Israel s'eeⁿ nguéé dífⁿ yā cuenta ndii nguēē ca'á yā nguuvi nguuvi n'dáataa nguá'āa chí cuta'ā tá cheē chí che'ē tá. ²Tuu'mi ní ndiichúúví apóstoles nadidaama yā nducyáácá 'iiⁿ'yāⁿ chí i'téenu yā Jesús, ní caⁿ'a yā: Nguéé n'daacā chí cu'neeⁿ 'nū chí caaⁿ'máⁿ 'nū yeⁿe nduudu yeⁿe Dendyuūs ní ca'á 'nū chí che'ē 'iiⁿ'yāⁿ. ³Ndís'tii hermanos, in'nuúⁿ nī nguuaaⁿ s'uuúⁿ ndēechē saⁿ'ā chí n'daacā vida yeⁿe yā ní chí diitú yā ndúúcu Espíritu N'dai yeⁿe Ndyuūs ndúúcu vaadi cadínūⁿ. Saⁿ'ā s'eeⁿ ca'ā yú ntí'nyúⁿ 'cūū saⁿ'ā. ⁴Ní nús'uú 'cuēetinée 'nū caaⁿ'ma'ngua'á 'nū ní 'cuēetinée 'nū lado yeⁿe chí caaⁿ'máⁿ 'nū nduudu yeⁿe Dendyuūs.

⁵Nducyáácá yā ní canee yiinú yā chuū. Ní dífⁿ yā votar Esteban saⁿ'ā chí i'teenu taavi ní ndiitúú ndúúcu Espíritu N'dai yeⁿe Ndyuūs, ndúúcu Felipe, ndúúcu Prócoro, ndúúcu Nicanor, ndúúcu Timón, ndúúcu Parmenas, ndúúcu Nicolás 'aama chí i'teenu yeⁿe yááⁿ Antioquía ní maaⁿ ní 'āā saⁿ'ā Israel. ⁶Nducyaacá yā chí'néeⁿ yā saⁿ'ā s'eeⁿ ní cueⁿe sa nanááⁿ apóstoles chí dichó'ó Dendyuūs. Ní cuayíví chí caⁿ'angua'á yā tuu'mi ní sn'dúu yā ta'á yā vmnááⁿ yeⁿe saⁿ'ā s'eeⁿ cáávā ntiiⁿ'nyūⁿ chí ca'a yā saⁿ'ā.

⁷Níicú chii 'yaaⁿ 'iiⁿ'yāⁿ chí chí'teenú yā nduudu yeⁿe Dendyuūs miiⁿ. Ní 'iicu 'iiⁿ'yāⁿ s'eeⁿ chí i'teenú yā Jesús neenē chii 'yaaⁿ taaví sá ná yááⁿ Jerusalén. Neenē 'yááⁿ chiidúú s'úúⁿ yeⁿe Israel

chi'téenu yā tan'dúucā chi 'ii'nyā'n s'ee'n
chi'téenu yā.

Sta'á yā Esteban

⁸ Esteban mii'n ní 'áamá 'ii'nyā'n chi i'teenú taavi yā nícu chi diitú yā ndúucú poder. Ní neene n'geete vaadi n'giinu ndúucú señales dí' yā nguaa'n 'ii'nyā'n yāá'n. ⁹ Tuu'mi ní taná'nā 'ii'nyā'n chi ca'ná yā yaacū sinagoga ye'e yāá'n ye'e yā 'ii'nyā'n chi nguuvi Libertos, ndúucú 'ii'nyā'n ye'e yāá'n Cirene, ndúucú 'ii'nyā'n ye'e yāá'n Alejandría, ndúucú dendu'ū 'ii'nyā'n ye'e yā'āa Cilicia, ndúucú 'ii'nyā'n ye'e yāá'n Asia, 'ii'nyā'n s'ee'n ch'ēcu cheendí yā ndúucú Esteban. ¹⁰ Naati nguéé chi chéé yā ndúucú Esteban cáávā vaadi deenu ye'é yā ndúucú chii Espíritu N'dai ye'e Ndyuūs ca'nā chi caa'ma'n Esteban. ¹¹ Tuu'mi ní n'de'ei n'de'ei ca'nā yā chii yā ná'nā 'ii'nyā'n chi caa'má'n yā chi 'āā n'giindiveé'n yā chi Esteban mii'n ca'nā yuudú yā contra Moisés ndúucú Dendyuūs. ¹² 'Ii'nyā'n s'ee'n ní chiacadiinu'u yā chi nducyaaca 'ii'nyā'n ye'e yāá'n mii'n ní nééné ch'ēcu cheendí yā ní ndásta'nā vaadi cadiinú'ū ye'é 'ii'nyā'n ndicú'ū ndúucú maestros ye'e ley. Ní nducyáácá 'ii'nyā'n s'ee'n ndaacá yā Esteban, ní sta'á yā 'ii'nyā'n, ní ndée yā nanáá'n 'ii'ntyé'nē concilio. ¹³ Ní 'nēe'n yā testigos chí nga'nā nduudu yaadi ní nga'nā sa: Esteban 'cū'ū ní nguéé f'nēe'nnaa sa chí nga'nā taa'n sá ye'e lugar 'cū'ū ye'é Dendyuūs ní contra ye'e ley. ¹⁴ N'giindiveé'n 'nū chi nga'nā sa chi Jesús mii'n ye'e yāá'n Nazaret nadatuuví yā lugar 'cū'ū ní n'daá'n yā costumbre chi teé Moisés s'uú'ū.

¹⁵ Tuu'mi ní nducyaacá 'ii'ntyé'nē concilio vεtεé yā ní n'diichí yā sa'nā mii'n. N'diichí yā naa'n sa tan'dúucā naa'n ángel chi sa'nā ye'e va'ai chεeti nguuvi chi dii'n ntii'nyu'n ye'é Ndyuūs.

Esteban ca'ná yā ye'e maá'n yā nī ch'ii yā

7 Tuu'mi ní nga'nā chiidu'u ch'εete cá mii'n ye'e Israel: ¿'Áá 'tíicā chu'ū? ² Ní Esteban mii'n ní nga'nā sa: Ndís'ti' sa'nā ví'í ndúucú chiida yú s'ti'í, 'caandiveé'n nī ye'e 'ú'ú: Chiida yú Abraham n'diichí yā Ndyuūs chi dεeve taavi ca taachi canée yā na yá'āa Mesopotamia taachi 'āā cuéé cuneé yā na yāá'n Harán. ³ Ní Ndyuūs ca'nā yā chii yā 'ii'nyā'n: Can'dáa di ye'e yāá'n vaacú di ndúucú ye'e 'ii'nyā'n ye'e di, ní cuchii di na yá'āa chi 'cuu'mí' dii. ⁴ Tuu'mi ní Abraham mii'n nan'dáa yā ye'e ná yá'āa ye'e 'ii'nyā'n s'ee'n ye'e yá'āa Caldea ní canée yā na yāá'n Harán. Cuayiivi chi ch'ii chiidá yā, tuu'mi ní Ndyuūs nadach'ó'o yā 'ii'nyā'n mii'n ná yá'āa 'cū'ū naachi snée ndís'ti' maa'n. ⁵ Tiempo mii'n Ndyuūs nguéé ca'a yā Abraham dε'ε vεε chi cuuvi ye'é yā ye'e na yá'āa mii'n, mar 'aama naachi 'canca'á yā naati ca'nā Ndyuūs chi ca'á yā cuayiivi yá'āa 'cú'ū chi ye'e Abraham, ní ye'e daiyá yā chi cuchii'ca ndí' cuayiivi ca taachi 'āā cuéé daiya yā. ⁶ Ní Ndyuūs ní 'túucā ca'nā yā chii yā: Daiyá nī chi cuchii ní 'ii'nyā'n chi snú'ū yú'úní ca'nā yā yāá'n vaacú 'ii'nyā'n. Ní 'ii'nyā'n yá'āa mii'n ní cuta'á yā daiyá yā chí dichí'vε 'ii'nyā'n yá'āa mii'n. Ní 'ii'nyā'n yá'āa mii'n ní nguéé n'daacá ti 'cuenenu yā cuuvi chεeti cu'ū' ciento ndu'ūyū. ⁷ Tuu'mí ca'nā Ndyuūs: 'Ú'ú ca'á castigo 'ii'nyā'n na yá'āa chi cuuvi yā mozos ye'e yá'āa mii'n. Ní cuayiivi chí ch'ó'oo chú'ū, ní nan'dáa yā. Ní'cú cu'téenu yā 'ú'ú na lugar 'cū'ū ní dí'í yā chεé chi ne'é. ⁸ Ní Ndyuūs dí'í yā 'áamá compromiso ye'e circuncisión ndúucú Abraham. Circuncisión mii'n 'áamá señal chí 'caacá yā na cuerpo. Ní Abraham mii'n véé daiyá yā chí nguuvi Isaac, ní dí'í yā circuncidar daiyá yā Isaac nguuvi chí niini' nguuvi sa. 'Tiicá ntú'ū Isaac ndúucú daiyá yā Jacob, ní Jacob ndúucú

ndichúuvi daiyá yā chi saⁿā patriarcas chi chiida yú s'eeⁿ.

⁹ Ní chiida yú s'eeⁿ chinn'gueé yā yeⁿe 'dínu yā José. Ní n'diicui yā 'dínu yā José miiⁿ na 'iiⁿyāⁿ yeⁿe yáⁿāa Egipto. Ní cueⁿē José na yáⁿāa Egipto naati Dendyuūs canée yā ndúúcu yā. ¹⁰ Dendyuūs nadanguáⁿai yā saⁿā yeⁿe tanducueⁿē chi ch'eēnu sa chii na yáⁿāa Egipto. Ní Dendyuūs díⁿ yā chi rey Faraón yeⁿe yáⁿāa Egipto n'diichí yā José chí saⁿā n'dai ní saⁿā chi déenu taavi ndúúcu taanduvéé vaadi deenu chí ca'a Dendyuūs. Ní cucáāvā chuū rey Faraón chi'neeⁿ yā José lado yeⁿe gobernador nanááⁿ yeⁿē yán'āa Egipto ndúúcu taanduvéé chi véé na vaacú yā.

¹¹ Ndaā cuiicú ní nuuⁿmán na yáⁿāa Egipto ndúúcu yáⁿāa Canaán, ní nch'eenu n'dái yā chii. Chiida yú s'eeⁿ ní nguéé índaāca yā chi che'e yā. ¹² Taachí ch'iindiveeⁿ Jacob miiⁿ chi véé trigo ná yáⁿāa Egipto, dich'ó'o yā daiyá yā chi chiida yú s'eeⁿ ndíí vnmááⁿ vnmāⁿ ní cueⁿé yā 'áámá viaje. ¹³ Ndiichi ndii 'úúví viaje ntiinaaⁿ sá chi José miiⁿ ní 'diinū sa cáāvā chi José ch'iⁿi maāⁿ sa chi 'diinū sa. Tuuⁿmi ní rey Faraón miiⁿ ní n'diichí yā ti 'iiⁿyāⁿ yeⁿē José saⁿā s'eeⁿ. ¹⁴ José miiⁿ ní díiⁿ sa chí ndaā chiidá sa Jacob ndúúcu nducyaaca 'iiⁿyāⁿ yeⁿē sa. 'Iiⁿyāⁿ yeⁿē sa ní ngii yā 'iiⁿnūⁿ ngæecu ndítiiⁿyu yā. ¹⁵ 'Tíicā cueⁿe Jacob na yáⁿāa Egipto naachí ch'íí yā ndúúcu chiida yú s'eeⁿ. ¹⁶ Ní cuerpo yeⁿē tináⁿā s'eeⁿ candée yā 'iiⁿyāⁿ na yááⁿ Siquem ní ch'iichí yā 'iiⁿyāⁿ na yáinyāⁿ chi caí Abraham. Abraham miiⁿ ní ndúúcu túumí yeⁿé yā caí yā yáⁿāa miiⁿ na yááⁿ Siquem yeⁿē daiya saⁿā s'eeⁿ Hamor yeⁿē yááⁿ Siquem miiⁿ.

¹⁷ Ní taachi 'āā snee niiⁿnuúⁿ nguuví chi Dendyuūs díⁿ yā chi cā'a yā chii yā Abraham, ch'iitá 'iiⁿyāⁿ Israel ní chii 'yááⁿ yā na yáⁿāa Egipto. ¹⁸ Ní nducueēⁿ

táámá rey na yáⁿāa Egipto chi nguéé in'diichí yā José. ¹⁹ Ní rey miiⁿ ní nguéé n'daacā díⁿ sa ndúúcu ndaata yeⁿe yú ndúúcu chiida yú s'eeⁿ. Ní chí cu'neeⁿ sa daiyá yā na peligro chí 'cuūvī. Ní nguéé cuuvi 'yááⁿ yā. ²⁰ Tiempo miiⁿ ní ch'iindiyáāⁿ Moisés, ní Ndyuūs n'diichí yā saⁿā 'lííⁿ chí n'daacā sa. Ch'iita sá na vaacu chiida sa 'iiⁿnuⁿ 'iivy taaví yā saⁿā. ²¹ Ní taachí chiida Moisés chí cu'neeⁿ yā saⁿā 'lííⁿ na peligro chí 'cuūvī sa, tuuⁿmi ní táⁿā 'díí daiya rey Faraón chinguai tá saⁿā 'lííⁿ ní taavi tá saⁿā tan'dúúcā 'áámá daiya tá. ²² Ní Moisés miiⁿ ní ch'eēⁿ sa yeⁿē taanduvéé vaadi deenu yeⁿē yáⁿāa Egipto. Ní diitinū taavi sa ndúúcu nduudu yeⁿē sa ndúúcu ntiⁿnyuⁿ yeⁿē sa.

²³ Taachi chii sá 'uuvi ngæecu ndúuyū, nacádiinuⁿ sa na staava yeⁿē sa chi caⁿa sa n'diichi sa 'iiⁿyāⁿ yeⁿē sa chí saⁿā Israel miiⁿ. ²⁴ Taachí n'diichí yā 'áámá saⁿa yeⁿē yáⁿāa Egipto chí nguæ n'daacā idiiⁿ sa ndúúcu 'áámá 'iiⁿyāⁿ yeⁿē ndaata yeⁿé yā, Moisés miiⁿ ní dííⁿ yā nadanguáⁿai yā 'iiⁿyāⁿ. Ní ch'eⁿe ca yā ní 'nuucáⁿai yā saⁿā Egipto 'cūū ní ch'ii sa. ²⁵ Moisés miiⁿ nacadínuⁿ sa chí 'iiⁿyāⁿ yeⁿē sa tuumicadiinúⁿ yā chí Dendyuūs caⁿá yā ca'a yā libertad 'iiⁿyāⁿ s'eeⁿ cáāvā ta'a sa. 'Iiⁿyāⁿ s'eeⁿ ní nguéé tuumicadiinúⁿ yā chí 'tíicā. ²⁶ Táámá nguuví miiⁿ ní Moisés cueⁿē sa naachí nguⁿu 'iiⁿyāⁿ yeⁿē sa. Neⁿe sa chí ntun'dáá n'dai yā ndúúcu paz. Ní ngaⁿa sa ngii sa 'iiⁿyāⁿ: Ndís'tii saⁿā 'di-inú, nguéé 'cuuⁿmáⁿ nī, ¿de'ē cáāvā chí nguⁿu nī ndúúcu v'í? ²⁷ 'Áámá saⁿā Israel chí n'geⁿe v'íⁿ miiⁿ chingúúⁿ ndaā sa Moisés ní nadiví sa 'iiⁿyāⁿ 'áámá lado ní ngaⁿa sá ngii sa 'iiⁿyāⁿ: ¿Du'ú s'neeⁿ n'dii tan'dúúcā 'iiⁿntyéⁿē o juez nanááⁿ nús'uú? ²⁸ ¿'Áá neⁿé nī 'caāⁿnuⁿ nī 'úú tan'dúúcā chí ch'iiⁿnuⁿ nī saⁿā yeⁿe yáⁿāa Egipto 'iicu? ²⁹ Táachí Moisés ch'iindiveeⁿ yā nduudú 'cūū, chéenu yā ní chindaa sa na yáⁿāa Madián. Cánée

yā tan'dúúca 'áamá sá"ā canuu" yúúni. Ní ch'iindi na uúvi daiyá yā.

³⁰ Cho'ōo 'úúvi ngeecu ndúuyū, ni 'áamá ángel che'enaá" yā ye"ē Moisés ní 'cai yā 'ii"yā" naachi ngiichi ya"ā 'líi" na yūcū 'líi" chi nguuvi Sinaí. ³¹ Moisés mii" n'diichi yā ní cue"ē yínu yā ye"ē chi n'diichi yā mii". Ndaa nii"nú" yā chi cuuvi n'diichi yā. Sa"ā mii" ch'iindiveé" yā nduudu ye"ē Dendyuūs mii" chi nga"ā: ³² 'Úú Ndyuūs ye"ē chiidá ní s'ee", Ndyuūs ye"ē Abraham, Ndyuūs ye"ē Isaac, ní Ndyuūs ye"ē Jacob. Moisés mii" ní nééné dii'yá yā chii ndíi 'āā ntéé nē"e yā n'diichi yā. ³³ Ní ca"ā Señor Ndyuūs chii yā 'ii"yā": Tun'dáá ca'a di ndaacuú ye"ē di caati naachi canéé dí chí chééndii di nanáá" Dendyuūs. ³⁴ Cuaacu ní"nyu" chí n'diichi chí ch'eēnu taavi chí 'ii"yā" ye"é chí snée yā yá"āa Egipto. N'giindiveé" chí n'gai ya'ái yā. Ní ca"ā chí nadingua"ái 'ii"yā". Maa" ní cuchíi di. 'Úú dicho'ó dii na yá"āa Egipto.

³⁵ Moisés mii" ní 'ii"yā" chí sa"ā dii" sa chí cheenú yā chuya'āi yá"āa mii" taachi ca"ā sa: ¿Dúú s'nee" n'dii tan'dúúca 'ii"ntyé"e o juez? Maa" ní Moisés mii" Ndyuūs dichó'o yā chí cuuvi yā sa"ā ntyé"ē, ní nadingua"ai yā 'ii"yā". Dendyuūs dii" yā chí canéé Moisés ndúúcu nduudu ye"é yā cucááva ángel chí che'enaá" yā ye"ē Moisés na yá"ā 'líi". ³⁶ Moisés cuayiivi taachi díi" yā vaadi n'gíínú ndúúcu señales na yá"āa Egipto, na nuu"ni"yá"ā chí nguuví Cu'ā, ní na yá"āa cuu"má" cheeti 'uuvi ngeecu ndúuyū, ní tun'dáa yā 'ii"yā". ³⁷ Moisés mii" chii" chí ngā"ā yā ngíi yā 'ii"yā" Israel: Señor Dendyuūs ye"ē yú ca"ā yā s'neé" yā profeta chí caa"ma" nduudu ye"é yā nguaa" vi'í yú. 'Ii"yā" mii" tan'dúúca 'úú. Ní caandiveé" ní ye"ē 'ii"yā" profeta mii". ³⁸ Sá"ā 'cūú Moisés 'cūú chí canee sa naati nduuvidaamá yā na yá"āa cuu"má" ndúúcu án-

gel chí yaa'vi yā sa"ā na yūcū chí nguuví Sinaí, ní canee sa ndúúcu chiida yú. Ní Dendyuūs ca'á yā nduudu ye"ē vida chí tee sa s'uuú". ³⁹ Chiida yú ní nguéé ch'iindiveé" yā ye"ē Moisés mii" ní chí'neé" yā sa"ā 'áamá lado, ní divíi yā vaanicadínuu" ye"ē yā, ní ne"é yā nanguuecúndíi yā yá"āa Egipto. ⁴⁰ Ní ca"ā yā chíi yā Aaron 'ii"yā" chí chiida yú: Din'dái ní nús'uu dendyuūs s'ee" chí cuuvi ca"ā yā vmnáá" ye"ē yú caati Moisés 'cūú chí tun'dáa sa nús'uu ye"ē yá"āa Egipto, nguéé deenu yú de'ē chí ndúúcu sa. ⁴¹ Tuu'mi ní din'dái yā 'áamá ídolo 'itiindu 'líi" ye"ē 'díi"nguāa" chí n'duú" yā 'iiti nátaí ní 'caa"nú" yā 'iiti cuúchí 'líi" ní ca'a yā ídolo mii" tan'dúúca sacrificio. Ní yeenú taaví yā caavā ntii"nyu" ye"ē ta'ā sa"ā s'ee". ⁴² Níicú Ndyuūs chivíi yā ye"ē 'ii"yā" s'ee". Ní chí'neé" yā 'ii"yā" s'ee" chí i'teenú yā tanducué"ē cosa chí véé nanguuvi tan'dúúca 'yá"ā ndúúcu 'iyyū, ndúúcu 'íi"nyú". 'Tíicā canee ngúú" na libro ye"ē Ndyuūs naachi ngúú" profetas:

N'dii 'ii"yā" Israel mii", ¿'áá tee ní 'úú 'iiti sacrificio chí 'āā 'níi"nú" ní ndúúcu dendú'ū na ya"āa cuu"má" cheeti 'uuvi ngeecu ndúuyū?

⁴³ Nguéé de'ē veē tee ní 'úú. Candée ní yaacū tínūu" ye"ē ídolo Moloc, ndúúcu 'íi"nyú" ye"ē ndyuūs ye"é ní chí nguuví Renfán, ndúúcu cosa chuú chíi" chí din'dái ní chí cu'téenu ní. Níicú 'úú dichó'ó ndis'tii táámá lado ye"ē yá"āa Babilonia.

⁴⁴ Chiida yú s'ee" ní canéé ye"é yā na yáacū tiinūu" ye"é Ndyuūs chí ca"ā nduucú yā na yá"āa cuu"má". Ní ca"ā Ndyuūs chíi yā Moisés mii" chí din'dái sa yáacū tiinūu" tan'dúúca chí n'diichi sa. ⁴⁵ Chíi" yáacū tiinūu" mii" ní sta'a chíida yú s'ee" ní candée yā ndúúcu Josué tiempo mii" taachi sta'á yā yá"āa ye"ē 'ii"yā" chí nguéé 'ii"yā" ye"ē ndaata Israel. Ndyuūs nadacaanú yā 'ii"yā"

s'eeⁿ chi nguée 'iiⁿ'yāⁿ yéⁿē ndaata Israel nanááⁿ chiida yú s'eeⁿ. Ní yaācu tīnūuⁿ snee ndúúcu yā ndii nguuví yeⁿē David miiⁿ. ⁴⁶David miiⁿ nandaāca sa favor nanááⁿ Dendyuūs ní chiica sa chi din'dái sa yaācū ch'ēte yeⁿē Ndyuūs chi i'téénú Jacob miiⁿ. ⁴⁷Salomón nídín'dái sa yaācū ch'ēte yeⁿē Dendyuūs. ⁴⁸Naati Ndyuūs chi canée yā na va'ai chēeti nguuví, nguée canée yā na yaācu chi din'dái 'iiⁿ'yāⁿ ndúúcu ta'á yā, ti tan'dúúca chi ngaⁿā profeta nduudu Dendyuūs tiempo chi chó'oo:

⁴⁹Nángúúví mífⁿ chí tan'dúúca trono yeⁿé, ní yáⁿāa miiⁿ ní tan'dúúca banco yeⁿē ca'á. ¿D'éé va'āi idin'dái dí yeⁿé? ngaⁿa Señor 'iivú Ndyuūs. O ¿de'e lugar chi ntaavi'tuūnuúⁿ?

⁵⁰¿'Áá nguée 'úú din'dái ndúúcu ta'á tan-ducuéⁿē dendu'ū?

⁵¹Chéechí tífⁿ ní ní chēechí staava yeⁿé ní ní nduudí veéⁿ ní. Ndís'tií ní nguée díiⁿ díveéⁿ ní yeⁿe Espíritu N'dai yeⁿe Ndyuūs cueⁿē daāⁿmaⁿ. Tan'dúúca chi-ida ní 'tiicá ntúūⁿ ndís'tií. ⁵²¿Du'u profeta chi caⁿa nduudu yeⁿe Dendyuūs chi chiidá ní nguée can'dáa yā chi ya'ái yā 'iiⁿ'yāⁿ? Ní ch'iiⁿ'nuⁿ yā 'iiⁿ'yāⁿ chí caⁿa yā vmnááⁿ vmaⁿ chí cuchiiⁿ 'iiⁿ'yāⁿ chí n'dai taavi. Ní 'iiⁿ'yāⁿ miiⁿ chí n'dai taavi ndís'tií ní sta'á ní 'iiⁿ'yāⁿ ní ch'iiⁿ'núⁿ yā 'iiⁿ'yāⁿ. ⁵³Ndís'tií ní sta'á ní ley chí tee ángeles ní nguée díiⁿ ní cumplir.

⁵⁴Taachi ch'iindiveeⁿ saⁿā s'uuⁿ chuū chí caⁿa Esteban nduuví taaⁿ n'dái sa na staava yeⁿe sa ní ndiitunuúⁿ ng'éé 'diiⁿ'yuⁿ sa contra yeⁿe Esteban. ⁵⁵Naati Esteban miiⁿ ndiitu Espíritu N'dai yeⁿe Ndyuūs che'enaáⁿ yā nanguuvi ní n'diichi yā Dendyuūs chí neené ngii 'yáⁿā ní n'diichi yā Jesús miiⁿ chí canée yā lado yeⁿē honor yeⁿe Dendyuūs. ⁵⁶Tuu'mi ní Esteban caⁿa yā: Cuin'díichí ní, inaáⁿ nanguuvi canda'āi 'íicú Daiyá Dendyuūs canée lado yeⁿe honor yeⁿe Dendyuūs. ⁵⁷Tuu'mi ní

'iiⁿ'yāⁿ s'eeⁿ ní 'cai yiicú yā ní n'gaadí yā veéⁿ yā ní tanducuéⁿē yā ndaá yā nanááⁿ Esteban. ⁵⁸Ní tun'dáa yā saⁿā yááⁿ miiⁿ ní chíitúú yā saⁿā. Ní 'iiⁿ'yāⁿ testigos s'néeⁿ yā cotón ná ca'a 'áamá saⁿā 'dííⁿ chí nguuví Saulo. ⁵⁹Tuu'mi ní nga'a yā tuūu Esteban. 'Iicu Esteban miiⁿ ní 'cai sá Ndyuūs ní ngaⁿā sa: Señor Jesús, nán-guái ní espíritu yeⁿé.

⁶⁰Chiintii'ya sá ní 'cai yiicu sá: Señor, nguée díiⁿ cuenta ní núúⁿndí 'cúu yeⁿē 'iis'tí. Ní taachi caⁿā sa chuū, ní ch'ii sa.

Saulo díiⁿ sa chí 'iiⁿ'yāⁿ yeⁿe yaācū chéenu yā

8 Ní Saulo miiⁿ canee yiinú sa chí 'cuūví Esteban miiⁿ. Nguuvi miiⁿ n'dee n'dái 'iiⁿ'yāⁿ ní nduuví taáⁿ yā yeⁿe 'iiⁿ'yāⁿ ná yācū chí canée yááⁿ Jerusalén ní nducyaaca yā chí i'teenu Jesús cueⁿē 'muuⁿ cueⁿé miiⁿ'yā. Chéenu yā cuaaⁿ na yáⁿāa Judea ndúúcu yáⁿāa Samaria. Dámaaⁿ apóstoles chí dichó'ó Dendyuūs nguē chéenu yā. ²Saⁿā s'eeⁿ chí n'dai nanááⁿ Dendyuūs candéε sa Esteban. Ní ch'iichi sá 'iiⁿ'yāⁿ ní chēcu taavi sá yeⁿe yā. ³Saulo mífⁿ ní can'dáa sa 'iiⁿ'yāⁿ chí ngeⁿe yaācū chí n'nuūⁿ cá'ai sa 'iiⁿ'yāⁿ. Cheⁿe sa ndúú va'ai nduu va'āi ní candéε sa 'iiⁿ'yāⁿ ndíí n'daataá ndíí saⁿā. Ní n'gíí sa 'iiⁿ'yāⁿ vácúū.

Caⁿa yā ndúúdu ngai na yááⁿ Samaria

⁴'Iiⁿ'yāⁿ chí chéenu miiⁿ cheⁿé yā nduu yááⁿ nduu yááⁿ ní caⁿa yā ndúúdu ngai yeⁿe Jesucristo chí evangelio. ⁵Tuu'mi ní Felipe miiⁿ can'dáa sa na yááⁿ Samaria ní ngaⁿa sa yeⁿe Cristo. ⁶Ní nducyáacá 'iiⁿ'yāⁿ ch'iindiveeⁿ niiⁿ'nyúⁿ yā de'e ndu'ū chí ngaⁿā Felipe miiⁿ. Ch'iindiveeⁿ yā ní inaaⁿ yā señales chiiⁿ idiiⁿ sa. ⁷Neené 'yaaⁿ 'iiⁿ'yāⁿ chí snée yā ndúúcu 'yúúné chí espíritus chí nguē n'daacā yeⁿe yááⁿ'guiniūⁿ taachí can'daa 'yúúné na cuerpo yeⁿé yā neené 'cai espíritus. Ní neené 'yaaⁿ 'iiⁿ'yāⁿ ndúúcu ca'āi chí

in'dúuví cuerpo yeⁿé yā ndúúcū 'iiⁿyāⁿ chi nguéé ngíicá ní nducyaacá yā nandúuvā yeⁿé yā. ⁸'Iiⁿyāⁿ yeⁿé yāāⁿ miiⁿ ní yeenú taaví yā.

⁹Cánée 'áámá saⁿā chi nguuvi Simón chi déenu sa magia chi cuaaⁿ vmnaaⁿ neené diiⁿ sa na yāāⁿ miiⁿ. Ní nginnche'ei sá 'iiⁿyāⁿ na yāāⁿ Samaria. Ngaⁿā sá ngii sa 'iiⁿyāⁿ chi ch'εete sa. ¹⁰Chi'neeⁿ veeⁿ ndii n'gaiyāā ndii n'gεete yā 'iiⁿyāⁿ miiⁿ. 'Iiⁿyāⁿ s'eeⁿ ní caⁿá yā: Chuū poder ch'εete yeⁿe Dendyuūs.

¹¹Ní s'neeⁿ veéⁿ yā yeⁿé sa ti ndúúcū artes magias yeⁿé sa neené 'hááⁿ chinnche'ei sá 'iiⁿyāⁿ. ¹²Taachi 'iiⁿyāⁿ s'eeⁿ chi'téenu yā yeⁿé Felipe miiⁿ chi ngaⁿá yā ndúúúdu ngai yeⁿe chi Ndyuūs ngaⁿá yā ntiiⁿnyuⁿ ní yeⁿé ndúúúdu ngai yeⁿe Jesucristo miiⁿ, tuuⁿmí cheēdinúuⁿniⁿ ndii n'daataá ndii sáⁿā 'iiⁿyāⁿ. ¹³S'teenú ntúūⁿ Simón. Cheēdinúuⁿniⁿ sa. 'Áámá cānee sa ndúúcū Felipe. Taachi n'diichi sa señales ndúúúcu vaadi n'giinu ch'εete chi diiⁿ Felipe miiⁿ tuuⁿmi ní cheⁿe yiinu sá.

¹⁴Taachi ch'iindiveéⁿ apóstoles chi dichó'ó Dendyuūs chí snée yā yāāⁿ Jerusalén chi 'iiⁿyāⁿ yeⁿé yāāⁿ Samaria i'téenu yā nduudú yeⁿe Dendyuūs miiⁿ, dicho'ó yā Pedro ndúúcū Juan miiⁿ. ¹⁵Taachí ndaa 'iiⁿyāⁿ s'eeⁿ tuuⁿmi caⁿangua'á yā cáávā 'iiⁿyāⁿ s'eeⁿ chi cuuvi díiⁿ yā recibir Espíritu N'dai yeⁿe Ndyuūs, ¹⁶ti Espíritu N'dai yeⁿe Ndyuūs miiⁿ 'āā cuéé caⁿā nanááⁿ ndii 'áámá 'iiⁿyāⁿ s'eeⁿ. Dámaāⁿ chi cheēdinuūⁿniⁿ núuⁿ yā ndúúcū chi duuchi Jesús miiⁿ. ¹⁷Apóstoles sn'duú yā ta'a yā vmnaaⁿ yeⁿé 'iiⁿyāⁿ s'eeⁿ ní díiⁿ yā recibir Espíritu N'dai yeⁿe Ndyuūs.

¹⁸Taachi Simón n'diichi sa chi cáávā chi sn'duu tá'ā apóstoles díiⁿ yā recibir Espíritu N'dai yeⁿe Ndyuūs, tuuⁿmi ní caⁿā sa chi ca'a sa tuumí. ¹⁹Ní caⁿā sa: Tée ntúuⁿ nī poder 'cūū 'úú ní 'āā du'ú nūuⁿ chi cun'duū ta'á vmnaaⁿ yeⁿé,

'iiⁿyāⁿ miiⁿ cunéé yā ndúúcū Espíritu N'dai yeⁿe Ndyuūs.

²⁰Tuuⁿmi ní Pedro míiⁿ caⁿā sá chii sa 'iiⁿyāⁿ: Túumí yeⁿé di 'cuiinú ndúúcū di caati nacádiinuuⁿ di chi regalo yeⁿé Ndyuūs ní ndúúcū tuūmí cuai di. ²¹Nguéé ítuneeⁿ di ndíi nguéé ndúú suerte yeⁿé di na asunto 'cūū ti staava yeⁿé di nguéé n'daacá nanááⁿ Dendyuūs. ²²Ndáacádáámí dí yeⁿé nuuⁿndi yeⁿé di, ní caaca di Dendyuūs ti neⁿe Ndyuūs nadäch'εecú yā yeⁿé di chí nacádiinuuⁿ di na staava yeⁿé di. ²³Ti 'úú inaáⁿ dii ní cunee di na vaadi nguéé yeⁿé di. Ní n'dεē chiichí di ndúúcū nuuⁿndi yeⁿé di.

²⁴Tuuⁿmi ní Simón nan'guεecútaⁿā sa yeⁿé yā ní caⁿā sa: N'dií caacá nī Señor caavā 'úú chi nadach'εecú yā nuuⁿndi yeⁿé ti mar 'áámá chi ngaⁿā nī nguéé chii nanááⁿ yeⁿé 'úú.

²⁵'Iiⁿyāⁿ s'eeⁿ caⁿā cuaacú yā nduudu yeⁿe Ndyuūs miiⁿ. Ní caⁿā yā yeⁿé evangelio chi ndúúúdu ngai yeⁿe Cristo. Ní cueⁿe yā ndíi néené n'deeé yāāⁿ yeⁿe yáⁿāa Samaria. Ní ndaa ntúuⁿ yā na yāāⁿ Jerusalén miiⁿ.

Felipe ndúúcū saⁿā yeⁿe yáⁿāa Etiopía

²⁶'Áámá ángel yeⁿe Señor miiⁿ yaa'vi yā Felipe ní caⁿā yā: Nducuééⁿ dí ní cuéⁿé dí ndii cuaaⁿ ndiia sur na yúúní chi nga'ai yeⁿé yāāⁿ Jerusalén ndii yāāⁿ Gaza. Yúúní miiⁿ ní cho'ó na yáⁿāa cuūⁿmáⁿ. ²⁷Tuuⁿmi ní Felipe miiⁿ nducueeⁿ sá ní cueⁿe sa. Ní chó'oo chi 'áámá saⁿā yeⁿé yáⁿāa Etiopía canuuⁿ sa yúúní ní sáⁿā miiⁿ eunuco. Saⁿā miiⁿ chi idiiⁿ sá ntiiⁿnyuⁿ yeⁿe n'daataá reina chi duuchi Candace. Saⁿā miiⁿ ní diiⁿ sa cuidado nducuéⁿé tuūmí yeⁿe reina. Ndaa sa yāāⁿ Jerusalén miiⁿ chi diiⁿ sa chi cu'teenu sá Ndyuūs. ²⁸Nanguεecunééⁿ sá yāāⁿ yeⁿé yā ní ch'iindi sa na carreta yeⁿé sa. Ní n'geeⁿ sa libro yeⁿe Ndyuūs naachi profeta Isaías chi caⁿā

nduudu Dendyuūs tiempo chi ch'ó'oo. ²⁹Ní Espíritu miiⁿ ní ngaⁿa yā ngii yā Felipe miiⁿ: Cueⁿe di ní ndaa niiⁿnūⁿ di na carreta 'cūū.

³⁰Ní Felipe miiⁿ cueⁿē sa ngeēnū sa ni ch'iindiveeⁿ sa chi n'geēⁿ saⁿa miiⁿ naachi dinguūⁿ profeta Isaías miiⁿ. Ní caⁿa sa: ¿Áá túúmícadíinuⁿ nī chi n'geēⁿ nī?

³¹Saⁿā miiⁿ caⁿa sa: ¿Taacā cuuvi dííⁿ ti mar 'áámá 'iiⁿyāⁿ nguéé ngi'cueeⁿ yā 'úú? Ní neⁿe sa chi Felipe miiⁿ caa sa ní 'cuúndi sa ndúúcu sa.

³²Naachí n'geēⁿ sa yeⁿē Escritura, chuū chii:

Tan'dúúca 'iiti cuūchi candéē yā 'iiti ní 'caaⁿnúⁿ yā 'iiti. Tan'dúúca 'iiti cuūchi 'lífⁿ nguéé ngii n'gai tī taachi ngii yā duudú tī 'tífca nguéé n'dai yā cheendi yā.

³³Caati ndiicuuⁿ yā 'iiⁿyāⁿ n'dái yā ní nguéé ca'a sa justicia yeⁿé yā; ¿du'u caaⁿmaⁿ yeⁿe ndaatá yeⁿé yā? Caati diví 'iiⁿyāⁿ vida yeⁿé yā na iⁿyeēⁿdí.

³⁴Saⁿā eunuco nan'gueécútaⁿā sa ní caⁿa sa chii sa Felipe miiⁿ: Ngiiá chi cuuvi nī 'úú: ¿Du'ú yeⁿē chi caⁿa profeta 'túúca? ¿Áá yeⁿē maáⁿ yā o yeⁿē taama 'iiⁿyāⁿ?

³⁵Tuu'mi ní Felipe miiⁿ nan'gueécútaⁿā sa. Tucáⁿā sa yeⁿē libro 'cūū ní caⁿa sa yeⁿē evangelio chi ndúúdu ngai yeⁿē Jesús. ³⁶Canúⁿ yā yúúní chíí cueⁿé yā ndaa yā naachi veē nuūⁿnīⁿ. Ní caⁿa saⁿā eunuco: 'Muuⁿ ní veē nuūⁿnīⁿ. ¿De'ē cucáávā chi nguéé cueēdinúⁿnīⁿ?

³⁷Felipe miiⁿ ngaⁿā sa: Nduuti chi i'téénú nī ndúúcu núúⁿmáⁿ staava yeⁿé nī tuu'mí cuuvi cueēdinuūⁿnīⁿ nī. Nan'gueécútaⁿā sa yeⁿé yā ni ngaⁿā sa: I'teenú chi Jesucristo miiⁿ ní Daiyá Dendyuūs 'iiⁿyāⁿ.

³⁸Ní caⁿa sa chi cuéndii carreta. Nduu 'uuví yā, Felipe ndúúcu eunuco

cueⁿe yā naachi véé nuūⁿnīⁿ ní cheēdinuūⁿnīⁿ sa. ³⁹Taachí cuícheē yā naachi véé nuūⁿnīⁿ Espíritu N'dai yeⁿe Ndyuūs candéē Felipe miiⁿ. Ní saⁿā eunuco 'āā ntéé n'diichi sa saⁿā. Ní cuinaⁿā sa ní yeenú taavi sa. ⁴⁰Felipe miiⁿ ndaaca sa na yáāⁿ Azoto. Cho'o sá nduu yáāⁿ nduu yáāⁿ ndii ndaa sa yáāⁿ Cesarea ní caⁿa sa yeⁿē evangelio chi ndúúdu ngai yeⁿe Jesucristo nanááⁿ tanducuéⁿē 'iiⁿyāⁿ yeⁿe yáāⁿ miiⁿ.

Saulo ndaacadaami sa yeⁿe nuūⁿndi yeⁿē sa ní i'téenu sa

(Hch. 22.6-16; 26.12-18)

9 Taachi Saulo taaⁿ sa ní yaāⁿvī yuudu sa yeⁿe chí 'cuūví 'iiⁿyāⁿ chi i'téenu yā Señor Jesucristo, ndaa sá nanááⁿ chi- iduú ch'ete cá yeⁿe 'iiⁿyāⁿ Israel. ²Ní chiica sa carta s'eeⁿ chí 'cuuⁿmiⁿ sá nanááⁿ 'iiⁿyāⁿ yeⁿe yaācu sinagogas yeⁿe yáāⁿ Damasco chí ndúúti chi ndaācā sa saⁿā o n'daataá miiⁿ yeⁿe Yúúní yeⁿē vaadi i'téenu yeⁿe Jesucristo miiⁿ cúúví diiⁿ sa nandéē sa 'iiⁿyāⁿ chi preso yā ní ndaa yā na yáāⁿ Jerusalén. ³Taachi canúⁿ sá yúúní míⁿ taachi 'āā cháā ndaa sa yaāⁿ Damasco dácānaāⁿ chiiya 'áámá deēvé yeⁿē nanguuvi naachi canée sa. ⁴Taachí sndeeve sá ná yaⁿā miiⁿ ch'iindiveeⁿ sa 'áámá nduudu chi ngaⁿā: Saulo, Saulo, ¿de'ē cúúví chí nn'daa di 'úú?

⁵Saⁿā miiⁿ ní caⁿā sa: ¿Du'ú n'dii, Señor? Tuu'mi ní ngaⁿá yā: 'Úú Jesús chi n'daa di. Nguéé n'daacā chi diiⁿ di tī diiⁿ di tan'dúúca 'iiti chi ca'a ca'a tī na yáⁿá cuiiⁿnyuⁿ.

⁶Saulo miiⁿ ní in'duuví sa, ní 'va'a sa, ní caⁿa sa: Señor, ¿de'ē néⁿe nī chí dííⁿ? Señor Jesús miiⁿ ngaⁿá yā ngii yā saⁿā: Nducueeⁿ dí ní cueⁿe di yáāⁿ, ní cuuví yā dii de'ē diiⁿ di.

⁷Ní 'iiⁿyāⁿ chí cuéⁿē ndúúcu Saulo neé yā n'giinu yā. N'giindiveeⁿ cuaacu yā nduudu tī nguéé du'ū veē inaaⁿ yā.

⁸ Tuu'mi ní Saulo nducueēⁿ sá ná yáⁿáa miiⁿ naachi chí ndeeve sá. Nán'guaaⁿ sa nduutináaⁿ sa naati nguéeⁿ inaaⁿ sa. Candééⁿ neeⁿ yā ta'a sa, ní ndaā sa yāaⁿ Damasco. ⁹ Miiⁿ ní canee sa 'iiⁿyāⁿ nguuvi ní nguéeⁿ inaaⁿ sa, ní nguéeⁿ che'e sa, ní nguéeⁿ chí'i sa.

¹⁰ Na yāaⁿ Damasco canéé 'áamá saⁿā chí n'geeⁿ chí i'téénú sa Jesucristo chí nguuvi sa Ananías. Tuu'mi ní Señor Jesús miiⁿ ní caⁿ'a yā chí yā saⁿā na visión yeⁿē sa: Dii Ananías. Ananías miiⁿ nan'guēcutáⁿa sa: Señor, 'úú canee.

¹¹ Ní Señor Jesús miiⁿ ngaⁿ'a yā ngii yā saⁿā: Nadacueeⁿ di ní cueⁿ'e di yúúní chí nguuvi Cuaācú miiⁿ ní in'nuuⁿ dí vaacu Judas. Miiⁿ canéé 'áamá saⁿā chí nguuvi sa Saulo ní sáⁿ'ā yeⁿē yāaⁿ Tarso. N'diichí ní, saⁿ'ā miiⁿ ngaⁿ'angua'ā sa. ¹² Ní Saulo miiⁿ n'diichi sa na visión yeⁿē sa 'áamá saⁿā chí nguuvi sa Ananías. Ní Ananías miiⁿ cho'o sá cuaaⁿ cheeti va'āi ní chí n'duūⁿ sá tá'a sá vmnááⁿ yeⁿ'e Saulo, ní n'inguaaⁿ nduutináaⁿ sa. 'Tíicā n'diichi Saulo miiⁿ na visión yeⁿē sa.

¹³ Naati Ananías miiⁿ nan'guēcutáⁿa sa: Señor Jesús, n'giindiveéⁿ chí neené ngaⁿ'a 'iiⁿyāⁿ yeⁿ'e sáⁿ'a 'cūū. Saⁿ'ā miiⁿ ní nguéeⁿ n'daacā díⁿ sa ndúúⁿcū 'iiⁿyāⁿ chí i'téénú Jesucristo na yāaⁿ Jerusalén. ¹⁴ Chiiduú n'geete yeⁿ'e Israel ca'á yā poder Saulo miiⁿ chí cuta'a sa ní candéé sa vácūū 'iiⁿyāⁿ chí ngaⁿ'angua'á yā ndúúⁿcū chí duuchi Cristo.

¹⁵ Señor miiⁿ ngaⁿ'a yā ngii yā saⁿā: Cunaⁿ'ā di. Saⁿ'ā miiⁿ 'úú ndeēvé saⁿā chí cándeē sa chí duuchí nanááⁿ 'iiⁿyāⁿ s'eeⁿ chí nguéeⁿ 'iiⁿyāⁿ yeⁿ'ē ndaata Israel ndúúⁿcū rey s'eeⁿ ndúúⁿcū 'iiⁿyāⁿ Israel. ¹⁶ Ti 'úú 'cuuⁿ'míⁿ naaⁿ sa chí cánéé chí 'cueenu sa cuuvi caavá 'úú.

¹⁷ Tuu'mi ní cueⁿ'ē Ananías ní chin-dā sa va'ai ní sn'duū sa ta'a sa vmnááⁿ yeⁿ'ē Saulo. Ní caⁿ'a sa: Díí, Saulo hermano, Señor Jesús miiⁿ chí che'enaáⁿ yā yeⁿ'ē di na yúúní chí cuchii di. 'Iiⁿyāⁿ

miiⁿ dichó'o yā 'úú 'íicú cuuvi n'inguaaⁿ nduutináaⁿ di. Ní cuuvi cuūtū di ndúúⁿcū Espíritu N'dai yeⁿ'e Nduyūs.

¹⁸ Hora miiⁿ chíiyya na nduutináaⁿ sa cosa tan'dúúⁿcā díí'máⁿ 'yaācā ní inguaaⁿ nduutináaⁿ sa. Nacueeⁿ sá ní cheēdin-uūⁿníⁿ sa. ¹⁹ Taachí che'e sa yuūndū miiⁿ nndaaca tiinú sa. Saulo miiⁿ cánéé sá nguuvi chí ch'ēetinee sa ndúúⁿcū 'iiⁿyāⁿ s'eeⁿ chí i'teenú yā Cristo chí snée yā yāaⁿ Damasco.

Saulo ngaⁿ'a sa nduudu cuaacu na yāaⁿ Damasco

²⁰ Cuayiivi míⁿ chí'cueeⁿ sa yeⁿ'e Cristo na yaācū sinagoga. Ní ngaⁿ'ā sa 'iiⁿyāⁿ miiⁿ chí Cristo ní Daiya Dendyuūs. ²¹ Nducyáacá 'iiⁿyāⁿ chí ch'iindiveéⁿ yā cheⁿ'e yiinú yā ní ngaⁿ'á yā: ¿Áá nguéeⁿ sáⁿ'a 'cūū chí n'gaā'vā sa ndúúⁿcū 'iiⁿyāⁿ chí ngaⁿ'āngua'á yā ndúúⁿcū chí duuchi Cristo na yāaⁿ Jerusalén? ¿Áá nguéeⁿ cáavā chíⁿ chí cuchii sáⁿ'a 'cūū chí candéé sa 'iiⁿyāⁿ 'cuee chíichí yā nanááⁿ chíiduú n'geete yeⁿ'e Israel?

²² Saulo miiⁿ ditiinú taavi sa. Ní véé 'uuvi nadacádiinūū 'iiⁿyāⁿ yeⁿ'e Israel yeⁿ'ē yāaⁿ Damasco. Saⁿ'ā miiⁿ ní chí'i sá chí Jesús miiⁿ chí Cristo.

Saulo nanguáⁿ'ai yā yeⁿ'e 'iiⁿyāⁿ Israel s'eeⁿ

²³ Cheēnū n'deēe nguuví ní 'iiⁿyāⁿ Israel s'eeⁿ nduuvidaamá yā ní nndeé yā chí 'caaⁿ'nuⁿ yā Saulo. ²⁴ Saulo 'āa deenu sa de'ē chí neⁿ'e dííⁿ yā. 'Iiⁿyāⁿ s'eeⁿ ní ch'ēetinée yā cuidado cheendi va'ai yeⁿ'e pared yeⁿ'e yāaⁿ miiⁿ ndii nguuvi ndíí n'gaaⁿ ti cuuvi 'caaⁿ'núⁿ yā sáⁿ'ā. ²⁵ Tuu'mi ní 'iiⁿyāⁿ s'eeⁿ chí i'teenú yā Cristo ní tun'dáa yā saⁿ'ā cheeti va'ai n'gaaⁿ. Ní s'núūⁿ yā saⁿ'ā cheeti 'áamá 'cuééⁿtē. Tun'dáa yā saⁿ'a na tiiiⁿ pared yeⁿ'e yāaⁿ miiⁿ i'cuáa yā saⁿ'ā ndúúⁿcū 'cuééⁿtē.

Saulo na yáaⁿ Jerusalén

²⁶ Taachi ndaā Saulo na yáaⁿ Jerusalén neⁿe sa nduuvidaama sa ndúucū 'iiⁿyāⁿ s'eeⁿ chi i'téenu yā Cristo. Nducyáácá yā ní 'va'a yā saⁿā ti nguéé i'téenu yā chi i'teenu saⁿā miiⁿ. ²⁷ Tuu'mi ní Bernabé ndáa yā ndúucū sa nanááⁿ apóstoles chi dichó'ó Dendyuūs. Ní chii yā 'iiⁿyāⁿ s'eeⁿ táácá n'diichi Saulo miiⁿ Señor Jesús na yúúní. Ní Señor yaa'vi yā saⁿā. Ní 'túuca caⁿā Saulo miiⁿ nduudu cuaacu yeⁿé Jesús miiⁿ na yáaⁿ Damasco, ní nguéé ndúucū vaadi 'va'a. ²⁸ Saulo miiⁿ canee sa ndúucū 'iiⁿyāⁿ s'eeⁿ yáaⁿ Jerusalén miiⁿ. ²⁹ Caⁿa sa nduudu cuaacu yeⁿe Señor Jesús nguéé ndúucū vaadi 'va'a. Ní n'dee n'dái ngaⁿā sa ndúucū 'iiⁿyāⁿ chi nguéé ndaata Israel naati 'iiⁿyāⁿ s'uúⁿ nacádiinúúⁿ yā chi 'caⁿnúⁿ yā Saulo. ³⁰ Taachi hermanos chicádiinuuⁿ yā chuū, candée yā Saulo ndii yáaⁿ Cesearea, ní dichó'ó yā saⁿā yáaⁿ Tarso.

³¹ Tuu'mi ní nducyaaca yáacū canéé 'diiⁿ tan'dúuca ná yáⁿāa Judea ndúucū yáⁿā Galilea ndúucū yáⁿā Samaria. Ní ngi'cueeⁿ yā ná nduudu cuaacu ní chi chiicá yā ná vaadi i'teenu yeⁿe Señor Jesús miiⁿ. Ní Espíritu N'dai yeⁿe Ndyuūs miiⁿ ca'á yā vaadi diituú 'iiⁿyāⁿ s'eeⁿ, ní chi'yaaⁿ yā.

Saⁿā Eneas nanduuvá yeⁿe sa

³² Chiī chúū Pedro miiⁿ ní cueⁿe yā nduu cuáaⁿ ndaa yā ntúuⁿ yā naachi snéé 'iiⁿyāⁿ chi i'téenu na yáaⁿ Lida. ³³ Ní ndaaca yā 'áamá saⁿā chi nguuvi sa Eneas. 'Áa níⁿniⁿ nduuyū chi canee sa na cama. Ní saⁿā canee sa ndúucū ca'āi chi in'dúuví cuerpo yeⁿe sa. ³⁴ Ní caⁿa Pedro miiⁿ: Eneas, Jesucristo miiⁿ ní diíⁿ yā chi nduūvā yeⁿe di. Nacueeⁿ di ní cuta'a di yivē yeⁿe di. Hora míⁿ nūuⁿ nacueeⁿ sá. ³⁵ Nducyáácá 'iiⁿyāⁿ chi snéé yā na

yáaⁿ Lida ndúucū yáaⁿ Sarón n'diichi yā sáⁿa 'cūū. 'Iiⁿyāⁿ s'eeⁿ ndaacadaamí yā ní chi'téenu yā Ndyuūs Señor.

Nadacuéⁿ yā táⁿā Dorcas yeⁿe nguaaⁿ tinaⁿa

³⁶ Canéé 'áamá n'daataá chi i'teenu Jesucristo na yáaⁿ Jope chi nguuvi tá Tabita chi neⁿe caaⁿmaⁿ ndúucū dávaacu griego Dorcas. Tá 'cūū neené n'daacá diiⁿ tá ní ca'á tá limosnas. ³⁷ Nguuvi miiⁿ ní chiitā tá ní ch'i ta. Ch'inu naaⁿnú yā cuerpo yeⁿe táⁿā ní chin'diiti yā cuerpo yeⁿe táⁿā na 'áamá sala. ³⁸ Yáaⁿ Lida miiⁿ canéé niiⁿnuúⁿ ná yáaⁿ Jope. 'Iiⁿyāⁿ s'eeⁿ chí i'téenu Jesucristo ch'iindiveeⁿ yā chi Pedro canéé sá miiⁿ. Dichó'ó yā na 'uuvi sáⁿā chi caⁿa sa cuuvi sa Pedro. Nguéé cuuvi 'naaⁿ di ní chiī di naachi sneé 'nū.

³⁹ Tuu'mi ní Pedro miiⁿ ní ncueeⁿ sa ní cueⁿe sa ndúucū yā. Taachi ndaā sa miiⁿ candée yā saⁿā na sala naachi ndúuvídaama nducyaaca n'daataá nguá'aa. Ngæecu yā ní n'giⁿi yā ntúuⁿ yā camisas yeⁿe yā ndúucū vestidos yeⁿe yā chi Dorcas miiⁿ din'dái tá taachi canduūchi tá. ⁴⁰ Tun'dáá Pedro nducyaaca yā chuva'āi. Pedro miiⁿ chiintii'yā yā ní caⁿ'angua'á yā, ní nguæcundíi yā naachi canéé cuerpo yeⁿe tinaⁿā ní caⁿ'a yā: Tabita, nacuééⁿ di. Taⁿā miiⁿ ní m'guaaⁿ tá nduutinaaⁿ tá ní taachi n'diichi tá Pedro, 'nuūⁿ ndii tá. ⁴¹ Pedro miiⁿ ní ca'á sa ta'á sa táⁿā miiⁿ ní nadacuéⁿ sa táⁿā. Tuu'mi ní n'gaī sa 'iiⁿyāⁿ chi i'téenu yā Ndyuūs miiⁿ ndúucū n'daataá nguá'aa. Ní ch'iⁿi sa táⁿā nááⁿ 'iiⁿyāⁿ chi 'āā canduūchi ta. ⁴² Nducyáácá 'iiⁿyāⁿ yáaⁿ Jope ch'iindiveeⁿ yā chuū. Ní neené 'yaáⁿ yā s'téenu yā Señor miiⁿ. ⁴³ Ní chó'oo chí Pedro miiⁿ canéé yā 'áamá tiempo na yáaⁿ Jope na vaacu 'áamá saⁿā chi nguuvi Simón chi idicuuⁿnuⁿ sa díⁿmáⁿ iiti.

Pedro ndúúcu Cornelio

10 Cánéé 'áámá saⁿā na yáāⁿ Cesaarea chi nguuvi sa Cornelio. Saⁿā miiⁿ capitán yeⁿē 'áámá taaⁿ soldado chi nguuvi Italiano. ²Saⁿā miiⁿ ní n'dai taavi sa ní i'téenu sa Dendyuūs ndúúcu nducyaaca 'iiⁿyāⁿ na vaacu sá. Saⁿā miiⁿ néénéé nga'a sa limosnas yeⁿe 'iiⁿyāⁿ chí nguá'aa yeⁿe na yáāⁿ. Cueⁿé daāⁿmaⁿ ngaⁿanguaⁿ sa Ndyuūs. ³Sáⁿa 'cūū ní claro n'diichi cuaacú sa ná 'áámá visión tan'dúúca chi n'gæcu 'iiⁿnuⁿ yeⁿē nguuvi miiⁿ. 'Áámá ángel yeⁿē Dendyuūs chindáa yā naachi cánéé sa miiⁿ. Ní ngaⁿa ángel ngii yā saⁿā: Díí, Cornelio.

⁴Sáⁿa miiⁿ ní ch'íínú cuaacú sa ndúúcu vaadi 'va'ā, ní caⁿa sa: ¿Du'u n'dii, Señor? Ní ngaⁿa ángel ngii yā saⁿā Cornelio: Chífⁿ chi ngaⁿangua'a di ndúúcu limosnas chi nga'ā di, Dendyuūs n'giindiveeⁿ yā ní nan'gaacú yā dii. ⁵Ángel ngaⁿa yā ngii yā Cornelio: Dicho'ó di 'iiⁿyāⁿ s'eeⁿ na yáāⁿ Jope ní diiⁿ di chi cuchii saⁿā Simón chi nguuvi sa Pedro. ⁶Sáⁿa 'cūū ní canee sa na vaacu sáⁿā chi nguuvi Simón, saⁿā chi idicúúⁿnuⁿ sa dííⁿmáⁿ 'iiti. Va'ai yeⁿe saⁿā miiⁿ canéé niⁿnuúⁿ na nuūⁿniⁿyáⁿā. Saⁿā miiⁿ cuuvi sa díí de'ē chi diiⁿ di.

⁷Cueⁿe ángel chi caⁿa yā ndúúcu Cornelio, nífcú Cornelio miiⁿ ní 'cai sa 'uuvi saⁿā chí diiⁿ mandado yeⁿē sa ndúúcu 'áámá soldado chi i'téenu Dendyuūs chí snéé ndúúcu sa. ⁸Dicho'ó sa 'iiⁿyāⁿ s'eeⁿ yáāⁿ Jope taachí ch'íínú caⁿa sa tanducueⁿē chi chó'oo.

⁹Chideeve táama nguuvi taachí snúuⁿ yā yúúni ní taachí snee niⁿnuúⁿ yā yáāⁿ miiⁿ Pedro miiⁿ nchee sa tiiⁿ va'āi chí caaⁿmaⁿngua'ā sa tan'dúúca chi n'gæcu ndichúúví nguuvi. ¹⁰Saⁿā miiⁿ ndaa cui-icú sá. Ní neⁿe sa che'e sa naati nuuⁿmáⁿ ne'ē chi idin'dái yā chí che'e sa miiⁿ, n'diichi sa 'áámá visión. ¹¹N'diichi sá nanguuvi chí candá'āi ní cuich'ééⁿ

nanguuvi 'áámá cosa tan'dúúca 'áámá tiinūⁿ ch'ete chí n'déé chiichí nduú cúuⁿ esquinas cuch'ééⁿ cuaacu na yáⁿāa miiⁿ. ¹²Ní miiⁿ ní n'diichi sa nducyaaca naaⁿ 'iiti chí cuuúⁿ ca'a tī chí véé ná yáⁿāa ndúúcu nducyaaca naaⁿ cúú ndúúcu 'yaada chí véé nanguuvi. ¹³Ní ndaā 'áámá nduudu ní caⁿa: Díí Pedro, nducueeⁿ di, 'caaⁿnuⁿ di ní che'e di.

¹⁴Tuu'mi ní Pedro miiⁿ ní caⁿā sa: Nguéé, Señor. Mar 'áámá chí vaatfí ndúúcu chí nguæ n'daacā, nguéé che'é.

¹⁵Yáá'ví ntuūⁿ nduudu miiⁿ ndiichi ndii 'úúví cuuvi ní ngaⁿā: Chuū chí nadindeevé Ndyuūs miiⁿ, nguéé caaⁿmaⁿ di yeⁿē chí vaatfí.

¹⁶Chuū ní chii 'iiⁿnūⁿ cuuvi ní tiinūⁿ miiⁿ cuinaⁿā ntúūⁿ nanguuvi. ¹⁷Naachí Pedro miiⁿ nadacadínnuⁿ sa yeⁿē visión de'e chí neⁿē caaⁿmaⁿ, tuu'mi ní 'iiⁿyāⁿ s'eeⁿ chí nadicho'ó Cornelio, 'iiⁿyāⁿ s'eeⁿ itiingúúnéeⁿ yā tíí va'ai yeⁿe Simón. Ní ndaa yā cheendi va'āi. ¹⁸Ní 'cai yā ní ntúnguuneeⁿ yā: ¿Áá miiⁿ canee Simón chí nguūví sa Pedro? ¹⁹Taachi 'āa chiacadínnuⁿ Pedro yeⁿē visión chí n'diichi sa Espíritu N'dai yeⁿe Ndyuūs miiⁿ ngaⁿa ngii saⁿā: Cun'diichí dí. 'Iiⁿnūⁿ saⁿā in'nuuⁿ sá dii. ²⁰Nducueeⁿ dí ní nangua'ai di ní nguéé n'deēe nacadínnuⁿ di chí caⁿā di nduucú yā, ti 'úú dicho'ó 'iiⁿyāⁿ.

²¹Tuu'mi ní ca'āi Pedro miiⁿ ní cueⁿē sa naachí snéé 'iiⁿyāⁿ s'eeⁿ chí dicho'ó Cornelio, ní caⁿa sa: N'diichi ní. 'Úú saⁿā chí in'nuúⁿ ní. ¿De'ē cáávā chí cuchíí ní?

²²'Iiⁿyāⁿ s'eeⁿ ní caⁿa yā: Cornelio, capitán romano, 'áámá saⁿā chí n'dái taavi ní i'téenu sa Dendyuūs. Sáⁿā miiⁿ, 'iiⁿyāⁿ Israel s'eeⁿ déenu yā chí saⁿā miiⁿ n'daacā n'dai sa. Saⁿā miiⁿ ní caⁿa 'áámá ángel yeⁿē Ndyuūs chí yā saⁿā, chí neⁿe yā chí ndaa ní na vaacú yā ní 'caandiveeⁿ yā nduudu yeⁿé ní.

²³Tuu'mi ní Pedro miiⁿ 'cai yā saⁿā na vaacú yā ní canee sa ndúúcu yā.

Chidεεve táamá nguuvi miiⁿ nacueeⁿ sá ni cueⁿe sa ndúúcu yā. Ní cueⁿe n'duuvi hermanos yeⁿe yáāⁿ Jope miiⁿ ndúúcu sa.

²⁴ Táamá nguuvi míⁿ ndaá yā yáāⁿ Cesare. Ní Cornelio cunee ngíⁿú yā. Ní 'cai yā 'iiⁿyāⁿ yeⁿe yā ndúúcu nducyaaca 'iiⁿyāⁿ chi amigo chi n'dai ndúúcu yā ní nduuviaaama nducyaaca yā. ²⁵ Taachí ndaā Pedro miiⁿ, can'daā Cornelio miiⁿ ní díⁿ yā recibir saⁿā s'eeⁿ. Chintii'yá yā na ca'a Pedro míⁿ ní chi'téénú yā 'iiⁿyāⁿ. ²⁶ Pedro miiⁿ nadacuéⁿ sa Cornelio miiⁿ ní caⁿa sá chíi sa 'iiⁿyāⁿ: Nacueeⁿ dí. 'Úú saⁿā ntúúⁿ 'úú.

²⁷ Ní neⁿe chí indeé yā ndúúcu sa ní candéε yā saⁿā cheeti va'āi. Néené 'yaaⁿ yā nduuviaaamá yā miiⁿ. ²⁸ Ní caⁿā Pedro: Ndís'tii ní deenu ní chí nguéé n'daacā chi 'áámá saⁿā Israel nduuviaaamá sá o ndaa niⁿnuúⁿ sá ndúúcu 'iiⁿyāⁿ chi nguéé 'iiⁿyāⁿ yeⁿe ndaata Israel. Ndyuūs ní ch'iⁿi yā 'úú chi nguéé canéé chi caaⁿmaⁿ yā mar 'áámá saⁿā vaatí sa o chí nguéé n'daacā sa. ²⁹ Taachí Dendyuūs 'cai yā 'úú, núúⁿ ndaá. Maaⁿ ní intínguuneéⁿ ndís'tii: ¿De'ε neⁿe ní 'úú chí cuchii? ³⁰ Tuu'mi ní Cornelio caⁿā yā: Maaⁿ cuūuⁿ ngūúví chí 'āā hora 'cūū nūuⁿ chi n'gεεcu 'iiⁿnúⁿ chiinū taachi 'āā cuéé ca'diinú, cucáāvā chí ngaⁿangua'á na vaacú. N'dííchí 'áámá saⁿā. Neené ngii 'yáⁿā catecai sa. ³¹ Ní ngaⁿā sa ngii sa 'úú: Díí Cornelio, chíⁿ chí caⁿangua'a di ndúúcu limosnas yeⁿe di Dendyuūs n'giindivééⁿ yā ní nan'gaacu yā. ³² Díí, dichó'o di saⁿā na yáāⁿ Jope ní diiⁿ di chí chíi Simón chi nguuvi Pedro miiⁿ. Saⁿā miiⁿ cánéé sa na vaacu sa Simón, saⁿā chi idicúⁿnuⁿ díⁿmáⁿ 'iiti. Vaacu sa niⁿnuúⁿ ná nuūⁿniⁿyáⁿā. Taachí ndaa saⁿā miiⁿ ní yaa'vi sa díí. ³³ Tuu'mi ní Cornelio ngāⁿa yā ngii yā Pedro: Hora miiⁿ dicho'ó 'iiⁿyāⁿ cáāvā di. N'dááca diiⁿ di chí cuchii di. Maaⁿ ndúcyaaáⁿ nū ní snéé 'nū 'muuⁿ ndúúcu Dendyuūs. Ní

sneé 'nū chi 'caandivééⁿ 'nū tanducuéⁿe chí Dendyuūs caⁿā yā chíi yā dii.

³⁴ Tuu'mi ní Pedro ngaⁿa sa ngii sa: Maaⁿ ní, 'úú tuumicadiinúⁿ chí Ndyuūs ní neⁿe yā nducyaaca 'iiⁿyāⁿ daama daama. ³⁵ Nducyáácá 'iiⁿyāⁿ yeⁿe nducyaaca yáⁿā chí i'téenu yā Dendyuūs ní díⁿ yā n'daacā ní Ndyuūs ní 'cuaáⁿ yā 'iiⁿyāⁿ. ³⁶ Ndyuūs ní dicho'ó yā 'áámá nduudu yeⁿe yā nanááⁿ 'iiⁿyāⁿ yeⁿe Israel. Caⁿa yā nduudú ngai yeⁿe evangelio ní véé vaadi 'diiⁿ cucáāvā Jesucristo. 'Iiⁿyāⁿ 'cúū Señor 'iivú Ndyuūs yeⁿe nducyáácá 'iiⁿyāⁿ. ³⁷ Ndís'tii ní déénú ní nduudu chí caⁿa yā nuuⁿmáⁿ yáⁿā Judea. Tucá'a yā ndii yáⁿā Galilea, cuayiivi ch'iinu chí caⁿa Juan yeⁿe chí cheedinuūⁿniⁿ yā. ³⁸ Tíicā Dendyuūs tee yā Jesús yeⁿe yáāⁿ Nazaret Espíritu N'dai ndúúcu poder. Jesús miiⁿ ní chiica yā díⁿ yā chí n'daacā. Ní diiⁿ yā chí nduuvā yeⁿe nducyáácá 'iiⁿyāⁿ chí canéé yā ndúúcu espíritus yeⁿe yááⁿnguiinūuⁿ caatí Ndyuūs miiⁿ canéé yā ndúúcu Jesús. ³⁹ Ní nús'uū ní testigo 'nū yeⁿe tanducuéⁿe chí Jesús díⁿ yā na yáⁿā Judea ndúúcu na yáāⁿ Jerusalén. 'Iiⁿyāⁿ s'eeⁿ miiⁿ ní ch'iⁿnuⁿ yā 'iiⁿyāⁿ. Ní chí'nééⁿnga'á yā 'iiⁿyāⁿ na 'áámá yáⁿā. ⁴⁰ Jesús 'cūū Ndyuūs nadicuéⁿ yā 'iiⁿyāⁿ yeⁿe nguaaⁿ tináⁿā ndiichi ndii 'íⁿnúⁿ nguuvi miiⁿ ní díⁿ yā chí che'enaáⁿ yā nguaaⁿ 'iiⁿyāⁿ. ⁴¹ Nguéé che'enaáⁿ yā yeⁿe nducyaaca 'iiⁿyāⁿ caati yeⁿe testigo chí Dendyuūs ndεεve yā cuááⁿ vmaaaⁿ. Nús'uū ní che'é 'nū ní chí'í 'nū nduucú yā cuayiivi taachí nducueeⁿ yā yeⁿe nguaaⁿ tináⁿā. ⁴² Ní dicho'ó yā nús'uū chí caaⁿmáⁿ 'nū evangelio chí nduudú ngai nanááⁿ 'iiⁿyāⁿ. Ní ngaⁿa cuaacú 'nū chí Cristo miiⁿ ní s'neéⁿ Ndyuūs 'iiⁿyāⁿ lado yeⁿe Juez yeⁿe 'iiⁿyāⁿ chí nduuchi ndúúcu 'iiⁿyāⁿ chí n'díí. ⁴³ Nducyaaca profeta s'eeⁿ chí caⁿa nduudú yeⁿe Dendyuūs

caⁿa yā yeⁿe 'iiⁿyāⁿ miiⁿ. Nducyáácá 'iiⁿyāⁿ chí cu'téenu yā 'iiⁿyāⁿ, véé vaadi nadich'εécú nuūⁿndí yeⁿé yā cucaavā Jesús miiⁿ.

⁴⁴Taachi ngaⁿā Pedro nduudú 'cūū, Espíritu N'dai yeⁿe Ndyuūs ní ndaaⁿ vmnaaⁿ yeⁿé nducyaaca 'iiⁿyāⁿ chí ch'iindiveéⁿ yā nduudu 'cūū. ⁴⁵Ní 'iiⁿyāⁿ yeⁿe Israel chí'téénú yā chí ndaaⁿ yā ndúúcu Pedro, 'iiⁿyāⁿ s'eeⁿ ch'εetinéé n'giinu yā chí vmnaaⁿ yeⁿe 'iiⁿyāⁿ s'uūⁿ chí nguéé 'iiⁿyāⁿ yeⁿe ndaata Israel, Dendyuūs ca'a ntuúⁿ yā regalo yeⁿe Espíritu N'dai yeⁿe Ndyuūs, ⁴⁶caatí ch'iindiveéⁿ yā chí ngaⁿā 'iiⁿyāⁿ s'eeⁿ tanáⁿā davaacu. Ní ngaⁿá yā chí ch'εete taaví Dendyuūs. ⁴⁷Tuu'mi ní nan'guεεcútaⁿā Pedro: ¿Áá cúúví chí 'āā du'ú nūⁿ 'iiⁿyāⁿ chí nguéé 'cuáaⁿ yā yeⁿé nuūⁿníⁿ chí cuεedinúⁿníⁿ 'iiⁿyāⁿ chí díiⁿ yā recibir Espíritu N'dai yeⁿe Ndyuūs tan'dúúca s'uūⁿ?

⁴⁸Ní dichó'o yā 'iiⁿyāⁿ chí cuεedinuūⁿníⁿ yā ndúúcu chí duuchi Jesús. Tuu'mi ní 'iiⁿyāⁿ s'eeⁿ chiica yā Pedro chí cunéé yā 'áámá tiempo ndúúcu yā.

Pedro caⁿa yā chuū ná yaācū templo yeⁿe yáāⁿ Jerusalén

11 Ch'iindiveeⁿ apóstoles chí dichó'ó Dendyuūs ndúúcu hermanos chí snée yā na yáⁿāa Judea chí 'tiicá ntúūⁿ 'iiⁿyāⁿ s'eeⁿ chí nguéé 'iiⁿyāⁿ yéⁿe ndaata Israel chí díiⁿ yā recibir nduudu yeⁿe Dendyuūs. ²Taachí Pedro miiⁿ cuheε sa yáāⁿ Jerusalén, hermanos yeⁿe 'iiⁿyāⁿ Israel chí'εecu cheendí yā ndúúcu Pedro. ³Ngaⁿá yā: ¿De'ε cúúví chí sndáa di va'ai yeⁿe 'iiⁿyāⁿ chí nguéé yeⁿe 'iiⁿyāⁿ Israel, ní che'e di ndúúcu yā?

⁴Tuu'mi ní Pedro miiⁿ ní tuca'a sa chíi sa 'iiⁿyāⁿ s'eeⁿ táácā chíi. Ní caⁿa sa: ⁵Caneé na yáāⁿ Jope ní ngaⁿ'anguā'á ní nnduūchí ní n'diichí 'áámá visión dácaā 'áámá tiinūⁿ ch'εeté cuch'ééⁿ nanguuvi ní déé chíichí nduū cúúūⁿ esquinas ndaaⁿ

ndii vmnááⁿ. ⁶Taachi n'diichí, nacádi-inúúⁿ. Tuu'mi ní n'diichí yeⁿé icyáⁿā 'iiti chí cuūⁿ cá'a tí ndúúcu 'iiti taaⁿ ndúúcu cúú ndúúcu 'yaada yeⁿe nanguuvi. ⁷Ní ch'iindiveéⁿ 'áámá nduudu chí caⁿā chíi 'úú: Díí Pedro, nacueeⁿ di. 'Caaⁿnuⁿ dí 'iiti, ní ch'éé dí 'iiti. ⁸Ní caⁿá chuū: Señor, nguéé; tí mar 'áámá chí vaatí chí nguεε n'daacā che'é. ⁹Tuu'mi ní nduudu yeⁿe nanguuvi caⁿa ntuūⁿ ndiichi ndii 'úúví: Chífⁿ chí Ndyuūs nádindeεvé yā, nguéé caaⁿmaⁿ di yeⁿe chí vaatí. ¹⁰Chuū ní 'iiⁿnuⁿ cúúví chíi. Cuinaⁿā ntúūⁿ tanducueⁿé nandéε yā cuááⁿ 'niiⁿnuⁿ nanguuvi. ¹¹Ní n'diichí ní. Hora miiⁿ ndaaⁿ na 'iiⁿnuⁿ saⁿā na va'āi naachi 'úú caneé. 'Áámá 'iiⁿyāⁿ chí nguuvi Cornelio dichó'o yā saⁿā yeⁿe yáāⁿ Cesarea ndí naachi caneé. ¹²Ní Espíritu N'dai yeⁿe Ndyuūs ngaⁿā ngii 'úú chí caⁿá ndúúcu sa. Ní nguéé de'ε véε nadicádiinúúⁿ. Cheⁿé ndúúcu niyaaⁿ hermanos ní sndáa 'nū vacu Cornelio. ¹³Saⁿā miiⁿ caⁿa sá chíi sá nús'uū, tááca n'diichí sa 'áámá ángel vaacū sa chí cheendii yā ní caⁿa yā: Díí Cornelio, dicho'ó dí saⁿā s'eeⁿ yáāⁿ Jope ní díiⁿ dí chí ndaa sáⁿā Simón chí nguuvi Pedro mífⁿ. ¹⁴Saⁿā miiⁿ ní caaⁿmaⁿ sá nduudu chí nanguaⁿāi díi ndúúcu nducyáácá 'iiⁿyāⁿ yeⁿe di na vacu di. ¹⁵Ní taachí tucá'á caⁿá, ndaa Espíritu N'dai yeⁿe Ndyuūs yeⁿe cuaaⁿ 'niiⁿnuⁿ vmnaaⁿ yeⁿe nducyaaca 'iiⁿyāⁿ s'eeⁿ dendu'ū, tan'dúúca chí chíi ndúúcu s'uūⁿ vmnááⁿ vmnaaⁿ. ¹⁶Tuu'mi ní nn'gaácú chí caⁿa Señor miiⁿ, chí caⁿa yā: Juan mífⁿ chεedinuūⁿníⁿ yā ndúúcu nuūⁿníⁿ naati ndís'tií ní cuéédinuūⁿníⁿ ní ndúúcu Espíritu N'dai yeⁿe Ndyuūs. ¹⁷Nduuti chí Dendyuūs chí ca'a yā regalo miiⁿ 'iiⁿyāⁿ tan'dúúca chí teé yā s'uūⁿ chí i'teenu yú Señor Jesucristo, ¿du'ū 'úú chí dí'vaachí yeⁿe Dendyuūs miiⁿ?

¹⁸Tuu'mi ní ch'iindiveéⁿ yā nduudu miiⁿ ní ch'etinéé 'díiⁿ yā ní cāⁿa yā chi ch'etéⁿ yā Ndyuūs, ní caⁿa yā: 'Ticá ntúⁿ ca'a Dendyuūs 'iiⁿyāⁿ s'eeⁿ chi nguéé 'iiⁿyāⁿ yeⁿe ndaata Israel chi ndaacadamí yā yeⁿe nuuⁿndi yeⁿe yā ní ndaāca yā vida cueⁿe daāⁿmaⁿ.

Yáacū yeⁿe yááⁿ Antioquía

¹⁹Maaⁿ ní 'iiⁿyāⁿ chi cueⁿe 'múúⁿ cueⁿe miiⁿ yā cucáávā chiiⁿ chi díiⁿ 'iiⁿyāⁿ ndúúⁿcū Esteban, 'iiⁿyāⁿ miiⁿ cho'ó yā ndii yáⁿaa Fenicia, ndúúⁿcū isla Chipre, ndii yaāⁿ Antioquía. Ní nguéé cāⁿa yā nduudu yeⁿe Dendyuūs ndúúⁿcū nducyáácá 'iiⁿyāⁿ, dámaāⁿ 'iiⁿyāⁿ Israel s'eeⁿ caⁿa yā nduucú yā. ²⁰Nguaaⁿ 'iiⁿyāⁿ s'eeⁿ ni snéé saⁿa yeⁿe isla Chipre yeⁿe yááⁿ Cirene. Saⁿa s'eeⁿ ní taachi ndaā sa yááⁿ Antioquía yaaⁿvi sá 'iiⁿyāⁿ s'eeⁿ chi nguéé 'iiⁿyāⁿ yéⁿe ndaata Israel dendúⁿú ní caⁿa sa evangelio chi ndúúⁿdú ngai yeⁿe Señor Jesús. ²¹Ní taⁿa Señor 'iivú Ndyuūs miiⁿ canéé ndúúⁿcū sa. Chii 'yaaⁿ n'dáí 'iiⁿyāⁿ chi'téenu yā Señor miiⁿ. Ní can'dáa yā Señor miiⁿ.

²²Cho'oo chi 'iiⁿyāⁿ yeⁿe yáacū chi snéé yā yááⁿ Jerusalén ch'iindiveéⁿ yā chuū. Ní dichó'o yā Bernabé chi caⁿa sa yááⁿ Antioquía. ²³Sáⁿa cūū taachi ndaā sa ní n'diichi sa favor ch'ete taavi yeⁿe Dendyuūs miiⁿ, yeenú taavi sa. Ní ch'icueeⁿ sa chí nducyáácá yā 'cuetinéé yā ndúúⁿcū nuuⁿmaⁿ staava yeⁿe yā ndúúⁿcū Señor 'iivú Dendyuūs miiⁿ. ²⁴Saⁿa Bernabé miiⁿ ní n'dai sa, ní ndituú saⁿa Espíritu N'dai yeⁿe Ndyuūs ní i'téenu sá ndúúⁿcū núúⁿmáⁿ staava yeⁿe sa. Chii 'yaaⁿ n'dáí 'iiⁿyāⁿ chi'téenu yā Señor miiⁿ.

²⁵Cuayiivi miiⁿ ní cueⁿe Bernabé na yááⁿ Tarso chi in'nuuⁿ sa Saulo miiⁿ; ní ndaācā sa saⁿa ní nandē sa saⁿa na yááⁿ Antioquía. ²⁶Ní nduuidaamá yā 'áamá nduuyu na yaacū miiⁿ, ní ch'icuééⁿ yā neené 'yaaⁿ 'iiⁿyāⁿ. Chíí vmnááⁿ vmnaaⁿ

na yááⁿ Antioquía 'iiⁿyāⁿ s'eeⁿ yeⁿe yááⁿ miiⁿ caⁿa yā chi duuchi cristiano s'eeⁿ, 'iiⁿyāⁿ chi i'teenu Cristo.

²⁷Nguuvi s'uúⁿ tanáⁿa profetas chi ngaⁿa nduudu yeⁿe Dendyuūs can'dáa yā na yááⁿ Jerusalén. Ndaá yā na yááⁿ Antioquía. ²⁸Nadacueeⁿ 'áamá yā chi nguuví yā Agabo ní díiⁿ yā chí inadacádinūⁿ 'iiⁿyāⁿ s'eeⁿ cáávā Espiritu N'dai yeⁿe Ndyuūs chí ndaa 'áamá cuicu ch'ete núúⁿmáⁿ yáⁿaa chi véé 'iiⁿyāⁿ. Cho'oo chuū nguuvi yeⁿe saⁿa Claudio. ²⁹Tuu'mi ní 'iiⁿyāⁿ s'eeⁿ chi i'téenu Cristo díiⁿ yā chí dicho'ó yā ofrendas yeⁿe hermanos chi snéé yā yáⁿaa Judea. 'Áamá 'áamá yā tuunu tuunu ca tan'dúúⁿcā chi cuuvi ca'á yā. ³⁰Chuū ní díiⁿ yā ní ca'á yā 'iiⁿyāⁿ ndiicúū. Ní 'iiⁿyāⁿ ndiicúū dichó'o yā limosna ndúúⁿcū Bernabé ndúúⁿcū Saulo.

Herodes 'caaⁿnúⁿ yā Jacobo, ní s'nuúⁿ yā Pedro vácūū

12 Tiempo miiⁿ ní rey Herodes diⁿi'yuⁿ ta'á yā chi neⁿe 'caaⁿnúⁿ yā náⁿa 'iiⁿyāⁿ chi ngeⁿe yaacū. ²Níicú ch'iiⁿnuⁿ rey miiⁿ ndúúⁿcū machete chí 'caáíⁿ ndúú 'uuví lados Jacobo chí 'dínū Juan. ³N'diichí yā chí 'iiⁿyāⁿ Israel s'eeⁿ canee yiinú yā chuū. Dichó'o yā saⁿa s'eeⁿ chí cutaⁿa ntúⁿ sa Pedro denduⁿū. Nguuvi míⁿ ní nguuvi yeⁿe pan chí nguéé yiinūⁿ levadura miiⁿ. ⁴Sta'á yā Pedro ní s'nuúⁿ yā saⁿa vácūū naachi snéé cuūⁿ taáⁿ soldado, 'áamá taáⁿ soldado miiⁿ cuūⁿ ngí sa. Soldado s'eeⁿ cunun'dai sa Pedro ní cho'ó yeⁿe pascua ní rey Herodes tun'dái yā saⁿa. ⁵Cunun'dai sa Pedro miiⁿ chí canuuⁿ sa vácūū. 'Iiⁿyāⁿ chí ngeⁿe yaacū miiⁿ ngáⁿánguāⁿ yā ní ngíicá yā Dendyuūs ndii nguuvi ndíí n'gaaⁿ cucáávā Pedro miiⁿ.

Nanguaⁿai Pedro yeⁿe vácūū

⁶Taachi neⁿe ntun'dáa Herodes miiⁿ Pedro miiⁿ, nguiinū míⁿ nūⁿ ní cyaadu

Pedro miiⁿ naavtaⁿa yeⁿe 'uuví soldado s'eeⁿ. Ndeē chiichí sa ndúucū 'uuví cadena s'eeⁿ. Saⁿā s'eeⁿ chi diiⁿ cuidado vácū míⁿ snée sa cheendi vacū miiⁿ.⁷ Caandiveéⁿ nī, ndaā 'áámá ángel yeⁿe Señor. Ní 'áámá deevé canée na vácū. Tuu'vi yā tífcuaa Pedro ní nanduuchí yā Pedro. Ní caⁿa yā: Nacueeⁿ di cánicū di. Cadena s'ūuⁿ ní chiví na ta'ā sa.⁸ Tuu'mi ní ngaⁿa ángel miiⁿ ní ngii yā saⁿā: Cu'neeⁿ di cinto yeⁿe di ní cunuúⁿ cá'a di ndaacuú yeⁿe di ní diiⁿ chiichí di cinta yeⁿe. 'Tífcā diiⁿ sa. Ní caⁿa yā: Nunúúⁿ dí catecai vmaāⁿ di ní cuchí di, ní can'daā di 'úú.

⁹Ní n'daa sa ní cueⁿe sa n'daā sa 'iiⁿyāⁿ. Pedro miiⁿ ní nguéeⁿ deenu sa chi cuaacu chi diiⁿ ángel miiⁿ. Nadacádiinuⁿ sa chi 'áámá visión chi n'gíⁿnuⁿ sa nguaaⁿ na 'yúúduyāⁿ yeⁿe sa.¹⁰ Cho'ó yā, yeⁿe 'áámá táán soldado s'eeⁿ, ní cho'ó yā ndii chiiⁿ ndii 'úúví táán soldado s'eeⁿ. Ní ndaā yā ná cheendi va'ái cūú chí canée cuaaⁿ na yāāⁿ miiⁿ. Chii ní nánguáán máāⁿ cheendi va'ai yeⁿe yā. Can'dáa yā ní cho'ó yā 'áámá yúúní, ní ángel miiⁿ ní chiví yā yeⁿe yā.¹¹ Tuu'mi ní Pedro miiⁿ ní nduuchi sa. Ní caⁿā sa: Maaⁿ ní ituumicadiinúⁿ chí Ndyuūs miiⁿ nidicho'ó yā ángel yeⁿe yā ní nangúⁿai yā 'úú yeⁿe ta'a rey Herodes. Nífcú yeⁿe tanducueⁿe yāāⁿ chí yāāⁿ yeⁿe 'iiⁿyāⁿ Israel s'eeⁿ chí snée ngiinu yā chi 'cuúvi 'úú.

¹²Taachí Pedro nacadínuuⁿ yā yeⁿe chuū cueⁿé yā, ní ndaa yā na vacu María cheecu Juan, chi ngúúví ntúúⁿ sa Marcos, naachí neení 'yaaⁿ yā snée yā chi nduuvidáámá yā ní ngaⁿangua'á yā.¹³ Taachí di'cuēcū Pedro cheendi va'āi yeⁿe patio, can'dáā 'áámá n'daataá chi nguuvi tá Rode.¹⁴ Tá 'cūú ní 'naanaveeⁿ tá nduudu yeⁿe Pedro ní chii yeenú tá. Ní nguéeⁿ nn'guaaⁿ tá cheendi va'āi. Cunaⁿā tá ngeenū tá chēti va'āi ní caⁿa tá chí Pedro miiⁿ canee sa cheendi va'āi.

¹⁵'iiⁿyāⁿ s'eeⁿ ní ngaⁿá yā ngii yā táⁿā: Loca dii. Taⁿā miiⁿ dicuaācu tá saⁿā miiⁿ. Tuu'mí 'iiⁿyāⁿ s'eeⁿ caⁿa yā: Angel chí diíⁿ cuidado saⁿā.

¹⁶Pedro miiⁿ ní iyaa'vi ca sá. Taachí nn'guaaⁿ yā ní n'diichi yā saⁿā dii'yā yā chíi.¹⁷ Pedro miiⁿ ní ditá'a sa yeⁿe yā chí 'cuētinéé 'diíⁿ cheendi yā. Ní chíi sa 'iiⁿyāⁿ táácā ángel yeⁿe Señor ntun'dáa yā saⁿā vácū. Pedro ní caⁿa sa: Diíⁿ ní chí cadiinuuⁿ Jacobo ndúucū hermanos. Pedro can'dáa sa ní cueⁿe sa taama lugar.

¹⁸Chí deeve míⁿ ní dii'yā n'dái soldado s'eeⁿ chí chii ndúucū Pedro.¹⁹ Herodes miiⁿ ní n'nuúⁿ yā saⁿā. Nguéeⁿ ndaaca yā saⁿā. Ch'iinu maaⁿ ní tiinguuneéⁿ yā saⁿā s'eeⁿ chí diiⁿ cuidado. Caⁿa yā chí 'cuúvi saⁿa s'eeⁿ. Cuayivi cueⁿe Herodes miiⁿ yáⁿā Judea ná yāāⁿ Cesarea ní canee yā miiⁿ.

Ch'ii rey Herodes

²⁰Herodes miiⁿ taaⁿ n'dai yā yeⁿe 'iiⁿyāⁿ yāāⁿ Tiro ndúucū 'iiⁿyāⁿ yāāⁿ Sidón. Naati 'iiⁿyāⁿ yeⁿe yāāⁿ s'eeⁿ ní ndaā yā nanáāⁿ rey Herodes miiⁿ chí neⁿe taaví yā chí canée 'diíⁿ, ti chí nge'é yā chí yeⁿe yáⁿā yeⁿe rey. Cuta'á yā tan'dúucā amigo yeⁿe yā saⁿā chí nguuvi Blasto chí diiⁿ cuidado va'ai yeⁿe rey, cuarto naachi cyaadú yā. Neⁿé yā chí cuuví caaⁿmaⁿ sa ndúucū rey cáava yā.²¹ 'Áámá nguuvi chí diiⁿ señalado cáavā chuū, Herodes canuuⁿ yā catecai rey. Ch'iindí yā na trono yeⁿe yā ní caⁿa yā chíi yā 'iiⁿyāⁿ 'áámá nduudu.²² Ní 'iiⁿyāⁿ yāāⁿ miiⁿ 'cai yiicú yā ní caⁿa yā: Ndúúdu miiⁿ yeⁿe Dendyuūs, nguéeⁿ yeⁿe saⁿā iⁿ'yeeⁿdí 'cūú.

²³Hora miiⁿ ní 'áámá ángel yeⁿe Señor miiⁿ n'nuuⁿ cá'ai yā saⁿā Herodes caati nguéeⁿ caⁿa sa chí yeⁿe Dendyuūs chí ch'ēte taavi chí ngaⁿa sa. Ní che'e taavi n'dáa rey miiⁿ ní ch'ii sa.

²⁴ Nduudú yeⁿē Señor Jesucristo miiⁿ ndíí ch'ēete ca ní 'iiⁿyāⁿ chi i'téenu ngíí 'yaaⁿ cá yā.

²⁵ Bernabé ndúúcu Saulo miiⁿ ndaá ntúuⁿ yā yááⁿ Jerusalén ti 'āā dííⁿ yā cumplir ntiiⁿnyuⁿ yeⁿé yā. Ndeē ntúuⁿ yā Juan chi nguuví Marcos.

Bernabé ndúúcu Saulo tucaⁿá yā viaje vmnááⁿ vmaaaⁿ

13 Véé 'iiⁿyāⁿ profetas chi caaⁿmaⁿ nduudu yeⁿe Dendyuūs ndúúcu maestros yeⁿe yaācū yeⁿe yáāⁿ Antioquía. 'Iiⁿyāⁿ s'eeⁿ ní Bernabé, ndúúcu Simón chi nguuví sa Niger, ndúúcu Lucio yeⁿē yáāⁿ Cirene, ndúúcu Manaén saⁿā chi dáamá chiita sá ndúúcu rey Herodes, ndúúcu Saulo. ² 'Iiⁿyāⁿ s'eeⁿ ní taachí snée yā i'téenu yā Señor Jesucristo. Ní taachí 'āā cuéé che'é yā tuu'mí Espiritu N'dai yeⁿe Ndyuūs caⁿa yā: Cu'neeⁿ víi ní 'āā víi Bernabé ndúúcu Saulo cáāvā ntiiⁿnyuⁿ chi 'úú ca'á saⁿā s'eeⁿ. ³ Taachi 'āā cuéé che'é yā ní ngaⁿāngua'á yā nícu sn'duúⁿ yā ta'á yā vmaaaⁿ yeⁿe saⁿā s'eeⁿ ní dííⁿ yā despedir yeⁿē sa.

Apóstoles caⁿa yā nduudu cuaacu na isla Chipre

⁴ Espiritu N'dai dichó'o yā 'iiⁿyāⁿ s'eeⁿ ní cueⁿé yā yáāⁿ Seleucia. Ndií miiⁿ ní cueⁿé yā na barco isla Chipre. ⁵ Ndaá yā na yáāⁿ Salamina ní ngaⁿa yā nduudu yeⁿe Dendyuūs miiⁿ na yāacū sinagogas yeⁿe 'iiⁿyāⁿ Israel s'eeⁿ. Ní canéé ntúuⁿ yā ndúúcu Juan miiⁿ chí nginee sá 'iiⁿyāⁿ. ⁶ Ní ch'iinu snee yā cheⁿe yā núúⁿmáⁿ yáāⁿ yeⁿe isla Chipre ní ndaá yā na yáāⁿ Pafos, ní ndaacá yā 'áámá saⁿā Israel chi nguuví Barjesús. Saⁿā miiⁿ saⁿā chí idin'dái magia ní profeta chi nguéé ngaⁿā nduudu cuaacu yeⁿe Dendyuūs nanááⁿ 'iiⁿyāⁿ. ⁷ Saⁿā miiⁿ canéé sá ndúúcu saⁿā gobernador Sergio Paulo ní 'áámá saⁿā chi déenu sa. Sergio Paulo miiⁿ ní 'cai sa Bernabé

ndúúcu Saulo. Neⁿe sa 'caandiveeⁿ sa nduudú yeⁿe Dendyuūs. ⁸ Sáⁿā Elimas (nguuví sá neⁿe caaⁿmāⁿ davaacú 'cūū saⁿā chí idin'dái magia) nguéé 'cūū sa saⁿā. Neⁿe sa divíi sa chí i'teenu Sergio Paulo chí gobernador. ⁹ Tuu'mí ní Saulo chí nguuví Pablo dendúū, ndituú sa ndúúcu Espiritu N'dai ní n'gíínu sa saⁿā Elimas miiⁿ. ¹⁰ Pablo caⁿa sa: Dii, sáⁿā diitú yeⁿe tanducueⁿē vaadi nginnche'í ndúúcu nducueⁿē chí nguē n'daācā, daiya yááⁿnguiniūⁿ ní contra yeⁿē tanducueⁿē vaadi cuaacu. ¿'Áá nguéé cu'nēēⁿ 'naaⁿ di chí di'vááchí di yeⁿe yúúni cuaacu yeⁿē Señor Jesucristo? ¹¹ Maaⁿ ní ta'ā Señor miiⁿ canee contra yeⁿe di ní cúúví nngueenāⁿ di. Nguéé n'díichi di 'yáⁿā 'áámá tiempo. Tuu'mí nūⁿ chí nngueenāⁿ sa ní 'áámá chí maāi yeⁿē sa. Ní cachiica 'múúⁿ cachiicá miiⁿ sa ní in'nuūⁿ sa du'ū chí cundéé neeⁿ ta'ā sa. ¹² Tuu'mí ní gobernador Sergio Paulo n'diichi sa chí chíi, ní s'teenu sa. Ngeⁿe yíínú sá yeⁿē nduudu yeⁿē Señor Ndyuūs.

Pablo ndúúcu Bernabé cuēⁿe yā na yáāⁿ Antioquía yeⁿē distrito Pisidia

¹³ Pablo ndúúcu 'iiⁿyāⁿ chí ndúúcu sa cueⁿé yā na barco yeⁿē yáāⁿ Pafos ní cueⁿé yā na yáāⁿ Perge yeⁿē país Panfilia. Naati Juan miiⁿ ní cueⁿe sa yēⁿe yā na yáāⁿ Jerusalén. ¹⁴ 'Iiⁿyāⁿ s'eeⁿ ní cueⁿé yā yeⁿē yáāⁿ Perge ní ndaá yā yáāⁿ Antioquía yeⁿē distrito Pisidia. Ní ndaa yā na yaacu sinagoga nguuví sábadu, 'áámá nguuví chí ntaavi'tuunúⁿ yā tiempo miiⁿ. Ní ch'ēetē yā na silla. ¹⁵ Cuayivi chí saⁿa ch'ēete yeⁿē yaācū sinagoga ch'eeⁿ sa ná libro yeⁿe ley ndúúcu ná libro yeⁿe profetas, saⁿā ch'ēete dichó'o sa saⁿā s'eeⁿ chí caāⁿmāⁿ sa ní caⁿa sa: Ndís'tií saⁿā víí, ndúúti chí canee 'áámá nduudu yeⁿē chí ca'cueⁿ di 'iiⁿyāⁿ 'cūū, caaⁿmaⁿ di.

¹⁶ Tuu'mi ní Pablo miiⁿ ní nacueeⁿ sa. Diiⁿ sá ndúúcū ta'a sa chi cuuvi 'diiⁿ. Ní caⁿa sa: Ndis'tii saⁿa yeⁿe Israel ndúúcū 'iiⁿyāⁿ chi i'téénú Ndyuūs, 'caandivééⁿ nī. ¹⁷ Ndyuūs yeⁿe 'iiⁿyāⁿ yeⁿe yú Israel ndéevē yā chiida yú s'eeⁿ ní dífⁿ yā chi 'iiⁿyāⁿ ch'ēete. Ní 'iiⁿyāⁿ s'eeⁿ snéé yā yāⁿaa Egipto tan'dúúcā 'iiⁿyāⁿ snúúⁿ yúúni. Ní Ndyuūs ndúúcū poder yeⁿe yā ndúúcū ta'á yā ní tun'dáa yā 'iiⁿyāⁿ. ¹⁸ Ní taandúú 'úúví ngēecu nduūyū dífⁿ yā cuidado 'iiⁿyāⁿ na yāⁿaa cuūⁿmaⁿ. Ní chi chéé yā taanduvéé chí 'iiⁿyāⁿ s'eeⁿ dífⁿ yā. ¹⁹ Ní taachí Ndyuūs diiⁿ tuuví yā ndéechē nación yeⁿe 'iiⁿyāⁿ chi nguéé ndaata Israel na yāⁿaa Canaán, ca'á yā yāⁿaa miiⁿ chí cuuvi yeⁿe 'iiⁿyāⁿ Israel. ²⁰ Cho'ó chuū cheeti cuūⁿ ciento canéé 'uūví ngēecu ndiichi ndúuyū ca'a yā juez yeⁿe yā ndii nguuví profeta Samuel miiⁿ chi caⁿa nduudu Ndyuūs. ²¹ Tuu'mi ní tiempo miiⁿ chiica yā rey ní Ndyuūs ní ca'á yā Saúl miiⁿ chi cuuvi sa rey. Cheeti 'uuví ngēecu nduūyū Saúl miiⁿ rey miiⁿ. Saúl miiⁿ saⁿa daiya Cis, 'áámá saⁿa yeⁿe 'iiⁿyāⁿ yeⁿe Benjamín. ²² Diví yā saⁿa ní Ndyuūs nadicueéⁿ yā táámá rey chi David chí caⁿa yā nduudu cuaacu yeⁿe yā. Ní Ndyuūs ngaⁿá yā: 'Úú ndaacá David daiya Isaí miiⁿ 'áámá saⁿa tan'dúúcā chi neⁿe staava yeⁿe. Saⁿa miiⁿ ní diiⁿ sa tanducuéⁿ chí neⁿe. ²³ Yeⁿe ndaata sáⁿa 'cūū miiⁿ tan'dúúcā chi Ndyuūs ngaⁿa chi cā'a yā, Ndyuūs nadicueéⁿ yā Jesús yeⁿe 'iiⁿyāⁿ Israel lado yeⁿe Salvador chi 'iiⁿyāⁿ chi nadanguáⁿai yā 'iiⁿyāⁿ yeⁿe nuuⁿndi yeⁿe yā. ²⁴ Taachí 'aa cuéé ndaá Jesús miiⁿ, caⁿa Juan miiⁿ chi cuēedinuūⁿniⁿ yā yeⁿe chi nducyaaca 'iiⁿyāⁿ yeⁿe Israel ndaacadaamí yā yeⁿe nuuⁿndí yeⁿe yā. ²⁵ Juan miiⁿ taachi ch'iinu diiⁿ sa ntíⁿnyūⁿ yeⁿe sa, caⁿa sa: ¿Du'ú 'úú nadicádinuuⁿ ndis'tii? Nguéé 'iiⁿyāⁿ miiⁿ 'úú. Cun'diichí nī. Cuchii 'áámá na cuaaⁿ daami 'úú ní 'úú nguéé n'daacā 'úú chi

cuuví dífⁿ n'daatií yíⁿmáⁿ naaⁿ ndaacuú yeⁿe chí cánúúⁿ ca'a.

²⁶ Ndis'tii saⁿa víⁿ, daiya 'iiⁿyāⁿ yeⁿe Abraham ndúúcū 'iiⁿyāⁿ chi snéé yā ndúúcū ndis'tii chi i'téénú yā Ndyuūs, caavā ndis'tii dicho'o Ndyuūs nduudu chí nnguaⁿai 'iiⁿyāⁿ. ²⁷ 'iiⁿyāⁿ chí snéé yā na yāⁿ Jerusalén miiⁿ ndúúcū nducyáácá yā chí ngaⁿa ntiⁿnyuⁿ yeⁿe yā nguéé n'diichí yā Jesús ní nguéé nduudu yeⁿe profetas chí n'geeⁿ yā nducuéⁿ nguuví sábadó chí intaaviⁿtuunúⁿ yā. Ní 'iiⁿyāⁿ s'eeⁿ dífⁿ yā condenar Jesús. ²⁸ 'Ícu ní nguéé ndaacá yā falta yeⁿe yā chí 'caaⁿnuⁿ yā 'iiⁿyāⁿ. Chiica 'iiⁿyāⁿ nanááⁿ Pilato miiⁿ ní 'iiⁿyāⁿ s'eeⁿ ngaⁿa yā chí Pilato 'caaⁿnuⁿ yā Jesús ní 'cuūvi yā. ²⁹ Taachí ch'iinu chii tánducuéⁿ chí canéé nguūⁿ yeⁿe yā, 'iiⁿyāⁿ diví yā Jesús na yáⁿa cruz ní s'nuúⁿ yā 'iiⁿyāⁿ na yáinyāⁿ. ³⁰ Ndyuūs nadicueeⁿ yā 'iiⁿyāⁿ yeⁿe nguaaⁿ tinaⁿa. ³¹ Jesús miiⁿ ch'iⁿí maáⁿ yā nééné n'deēe nguuví nanááⁿ 'iiⁿyāⁿ chí dáámá cuhéé yā ndúucu yā yeⁿe yáⁿaa Galilea ní ndaá yā yáaⁿ Jerusalén. 'iiⁿyāⁿ s'uuⁿ testigos yeⁿe yā nanááⁿ 'iiⁿyāⁿ.

³² Nús'uú ntuūⁿ ngaⁿa 'nū ndúúdu ngai. Chuū chí nduudu chí Ndyuūs ca'a yā chiida yú s'eeⁿ taachi Ndyuūs caⁿa yā chí dífⁿ yā. ³³ Chuū chí Ndyuūs miiⁿ ní dicuaacú yā ní Ndyuūs dífⁿ yā cáávā s'uuúⁿ chí 'iiⁿyāⁿ daiyá chiida yú s'eeⁿ yeⁿe Israel táachí Ndyuūs nadacueéⁿ yā Jesús miiⁿ. Chuū chí canéé nguūⁿ na libro yeⁿe Ndyuūs naachi nguūⁿ salmo ndii 'úúví chí ngaⁿa: Dii daiyá dii, maaⁿ nguuví 'úú n'g'iⁿ chí daiyá dii 'tíicā. ³⁴ Ndyuūs nadacueéⁿ yā 'iiⁿyāⁿ yeⁿe nguaaⁿ tináⁿa. 'Áa ntéé nguēecunéé choó yā. 'Túúcā caⁿa yā: 'Úú teé dii cosa chí n'dai chí cāⁿa chí ca'á David. Chuū chí cuaacu. ³⁵ Cáávā chuū ngaⁿa yā na táámá salmo: Nguéé 'cuaáⁿ ní chí Daiyá ní chí n'dai chí nguēecunéé choó cuerpo yeⁿe yā. ³⁶ Cuaacu níⁿnyúⁿ chí

David miiⁿ táachí dichí'v'e yā 'iiⁿ'yāⁿ yēⁿe yā tan'dúúcā chi neⁿe Dendyuūs, ch'ii yā nífcú ch'ēechí yā naachi ch'ēechi chiidá yā. Ní choo yā. ³⁷Naati 'iiⁿ'yāⁿ chí Dendyuūs nadacuéeⁿ yā yeⁿe nguaaⁿ tináⁿā ní nguéeⁿ choo yā. ³⁸Nadacadínuuⁿ nī chuū, ndís'tiī saⁿā ví'í. Caⁿ'a nū ndís'tiī nduudu yeⁿ'é Ndyuūs chi Ndyuūs nadach'ēecú yā nuuⁿndi yeⁿ'e nī cucáávā 'iiⁿ'yāⁿ 'cūū. ³⁹Cucáávā 'iiⁿ'yāⁿ miiⁿ Ndyuūs nadach'ēecú yā nducuéⁿ'ē nuuⁿndi yeⁿ'ē nducyáácá 'iiⁿ'yāⁿ chí i'téenu yā Dendyuūs. 'Iiⁿ'yāⁿ miiⁿ ní dífⁿ yā chí nduuví n'dai dii nanááⁿ Dendyuūs, naati ley yeⁿ'e Moisés nguéeⁿ cuuví nach'ēecu nuuⁿndi yeⁿ'é 'iiⁿ'yāⁿ. ⁴⁰Cuin'dííchí nī chí nguéeⁿ chíi nanááⁿ ndís'tiī chí cánéé nguūⁿ cáávā profetas chí caⁿ'a nduudu yeⁿ'e Dendyuūs, ní canéé nguūⁿ na libro yeⁿ'e Ndyuūs:

⁴¹Cuin'dííchí nī ndís'tiī chí taaⁿ nī, ní ngeⁿ'e yiiⁿ'núúⁿ nī, ní 'cuuví nī; caati 'úú ní dífⁿ 'áámá ntiíⁿ'nyuⁿ neⁿ'e chí ndís'tiī snée nī iⁿ'yeeⁿ'dí 'cūū, 'Áámá ntiíⁿ'nyuⁿ chí nguéeⁿ i'téenu nī ndúúti chí du'ū 'iiⁿ'yāⁿ caaⁿ'maⁿ yā yeⁿ'e chuū.

⁴²Taachí nan'daa yā na yaácū sinagoga yeⁿ'ē 'iiⁿ'yāⁿ Israel s'eeⁿ, 'iiⁿ'yāⁿ s'eeⁿ chí nguéeⁿ yeⁿ'e ndaata Israel dí'cuúftu yā 'iiⁿ'yāⁿ, chí cúúví dēeve táámá nguuví sábadu, nguuví chí ntaavi'tuunúúⁿ nī chí caaⁿ'máⁿ nī yeⁿ'e chuū. ⁴³Ní taachi 'āā dífⁿ yā despedir 'iiⁿ'yāⁿ yeⁿ'e yaácū sinagoga neené 'yaaⁿ 'iiⁿ'yāⁿ yeⁿ'e Israel ndúúcu 'iiⁿ'yāⁿ chí n'daacā chí 'āā maaⁿ ní 'iiⁿ'yāⁿ Israel s'eeⁿ, can'dáa yā Pablo ndúúcu Bernabé. Pablo ndúúcu Bernabé ní caⁿ'a yā 'iiⁿ'yāⁿ s'eeⁿ chí 'áámá 'cuēt-inéé yā na favor ch'ēete yeⁿ'é Dendyuūs.

⁴⁴Chidēeve táámá nguuví sábadu, nguuví chí ntaavi'tuunúúⁿ yā, nduuví dáámá yā n'dee taaví 'iiⁿ'yāⁿ 'téé nuuⁿ'maⁿ yáaⁿ yā chí 'caandiveéⁿ yā nduudu yeⁿ'e Dendyuūs. ⁴⁵Naati 'iiⁿ'yāⁿ Israel s'eeⁿ taachi n'diíchí yā chí n'dee

n'dai 'iiⁿ'yāⁿ miiⁿ ní ndiítu yā ndúúcu vaadi ngueēe, caⁿ'a yā chí nguéeⁿ n'daacā chí ngaⁿ'ā Pablo miiⁿ. Ní caⁿ'a taáⁿ yā contra yeⁿ'é yā ní contra yeⁿ'e Dendyuūs. ⁴⁶Tuuⁿ'mi ní Pablo ndúúcu Bernabé miiⁿ caⁿ'a yā nguéeⁿ ndúúcu vaadi 'va'a caⁿ'a yā: Nds'tiī cuaacu níⁿ'nyúⁿ cánéé chí caaⁿ'máⁿ 'nū ndúúcu ndís'tiī nduudu yeⁿ'é Dendyuūs vmnááⁿ vmnaaⁿ naati ndís'tiī ní divíi nī yeⁿ'ē veéⁿ nī. Ní túúmícadíinúúⁿ maáⁿ nī chí nguéeⁿ n'daacá nī chí tuneⁿ nī vida cueⁿ'e daāⁿ'maⁿ. Cáávā chí dífⁿ nī, Ndyuūs nguéeⁿ teé yā ndís'tiī vida cueⁿ'e daāⁿ'maⁿ ndís'tiī. Cuin'diíchí nī. Nguēecunée 'nū caⁿ'a ntuúⁿ 'nū ndúúcu 'iiⁿ'yāⁿ s'eeⁿ chí nguéeⁿ yeⁿ'ē ndaata Israel. ⁴⁷Caati 'tíicā chidich'ó Señor 'iivú Ndyuūs miiⁿ nús'uu, ní Ndyuūs cáⁿ'a yā chíi yā nús'uu: 'Úú chí'neéⁿ ndís'tiī tan'dúúcā chidēeve yeⁿ'ē 'iiⁿ'yāⁿ s'eeⁿ chí nguéeⁿ yeⁿ'e ndaata Israel, chí cuuvi caaⁿ'máⁿ nī nduudu chí nanguaⁿ'āi 'iiⁿ'yāⁿ ndii núúⁿ'máⁿ iⁿ'yeeⁿ'dí.

⁴⁸Taachí ch'iindiveéⁿ 'iiⁿ'yāⁿ s'eeⁿ chí nguéeⁿ yeⁿ'e ndaata Israel chuū ndiítu yā ndúúcu vaadi yeenú ní caⁿ'a yā chí ch'ēete taavi Ndyuūs cáávā nduudu yeⁿ'e Señor Ndyuūs miiⁿ. Ní s'teenú yā nducyáácá 'iiⁿ'yāⁿ s'eeⁿ chí Ndyuūs ch'índēeve yā ní tee yā vida cueⁿ'e daāⁿ'maⁿ. ⁴⁹Ní nduudu Señor miiⁿ 'āā chí chíicadínuuⁿ 'iiⁿ'yāⁿ ti cheⁿ'e núúⁿ'máⁿ yááⁿ estado miiⁿ. ⁵⁰Naati 'iiⁿ'yāⁿ Israel s'eeⁿ dífⁿ yā chí nguéeⁿ snée 'dífⁿ yā n'daataá chí n'dai taaví chí n'dáaca taavi ndúúcu 'iiⁿ'yāⁿ chí ngaⁿ'a ntiíⁿ'nyuⁿ yeⁿ'e yááⁿ miiⁿ. 'Iiⁿ'yāⁿ miiⁿ ndúúcu n'daataá ndúúcu 'iiⁿ'ntyéⁿ'ē nadacuéeⁿ yā vaadi 'caaⁿ'va contra yeⁿ'e Pablo ndúúcu Bernabé ní ndivíi yā 'iiⁿ'yāⁿ yeⁿ'ē na yááⁿ naachí snée yā. ⁵¹Pablo ndúúcu Bernabé ní n'dáadi yā iyaacá yeⁿ'e ca'a yā ti 'iiⁿ'yāⁿ yeⁿ'e yááⁿ miiⁿ ní contra yā. Cueⁿ'e yā ní ndaa yā yááⁿ Iconio. ⁵²'Iiⁿ'yāⁿ s'eeⁿ chí i'téenu yā Cristo ní yeenú taavi

yā ndúúcū vaadī yeenú ndúúcū Espíritu N'dai.

Pablo ndúúcū Bernabé na yáāⁿ Iconio

14 Chiī na yáāⁿ Iconio chi Pablo ndúúcū Bernabé sndaā yā daama daama na yaācū sinagoga yeⁿē 'iⁿyāⁿ Israel s'eeⁿ. Ní 'túúca caⁿa yā. Ní neené n'dai 'iⁿyāⁿ Israel s'eeⁿ s'téenu yā. 'Ticá ntúūⁿ 'iⁿyāⁿ s'eeⁿ chi nguéé yeⁿē ndaata Israel. ²Naati 'iⁿyāⁿ Israel s'eeⁿ chi nguéé i'téenu yā, n'gæcu cheendí yā ndúúcū 'iⁿyāⁿ s'eeⁿ chi nguéé yeⁿē ndaata Israel ní díⁿ yā chi 'iⁿyāⁿ s'eeⁿ chi nguéé yeⁿē ndaata Israel nguéé nacadínuuⁿ yā n'daacā yeⁿe 'iⁿyāⁿ chi i'téenu yā. ³Tuu'mi ní Pablo miiⁿ ndúúcū Bernabé 'naaⁿ n'dái ch'ætinée yā miiⁿ ní Señor Jesucristo díⁿ yā chí 'iⁿyāⁿ s'eeⁿ nguéé 'va'á yā caⁿa yā yeⁿē Señor Jesucristo. Señor Jesucristo miiⁿ ní chíⁿi yā chi nduudu cuaacu miiⁿ chi nduudú yeⁿé yā yeⁿē favor ch'æte yeⁿé yā. Ní Señor miiⁿ diiⁿ yā chuū ní cā'a yā poder chi Pablo ndúúcū Bernabé díⁿ yā señales ndúúcū vaadī n'giinu. ⁴Níicú 'iⁿyāⁿ s'eeⁿ yeⁿē yáāⁿ miiⁿ ní 'uūvi vaanicadiinúúⁿ yeⁿé yā. Náⁿa yā ní lado yeⁿe 'iⁿyāⁿ Israel s'eeⁿ ní tanáⁿa yā ní lado yeⁿē apóstoles chí dich'ó Dendyuūs. ⁵'iⁿyāⁿ Israel s'eeⁿ ndúúcū 'iⁿyāⁿ s'eeⁿ chí nguéé yeⁿē ndaata Israel ndúúcū 'iⁿyāⁿ chí ngaⁿa ntiⁿnyūⁿ in'núúⁿ yā vaadī 'caa'va chí tun'dáa yā Pablo ndúúcū Bernabé ní chí cuituú yā 'iⁿyāⁿ s'eeⁿ. ⁶Taachí chicadínuuⁿ saⁿā s'eeⁿ chuū, cueⁿé yā ngeenu yā na yáāⁿ Lистра ndúúcū yáāⁿ Derbe chí distrito yeⁿe Licaonia ndúúcū nducyaaca yáāⁿ nuuⁿmaⁿ ndiiví ná yáⁿāa. ⁷Ní miiⁿ caⁿa yā evangelio chí ndúúcú ngai yeⁿe Jesucristo miiⁿ.

'iⁿyáⁿ ca'ā tuú yā Pablo na yáāⁿ Lистра

⁸Cánée 'áamá saⁿā yeⁿe yáāⁿ Lистра chí véé sá ti mar 'áamá fuerza yeⁿē ca'a

sa. Nguéé ngiica sa ndíí ch'iindiyaāⁿ sa. ⁹Sáⁿa 'cūū ní ch'iindiveeⁿ sa chí caⁿa Pablo. Ní Pablo miiⁿ ní n'gínu yā saⁿā miiⁿ ní nacadiinúúⁿ yā yeⁿē saⁿā miiⁿ ti i'téenu sa chí cuuvi nduūvā yeⁿē sa. ¹⁰Ní caⁿa yuudú yā: Nducueeⁿ cuaacú di ndúúcū ca'a di. Hora miiⁿ ní saⁿā miiⁿ nducueeⁿ sa ní chiica sa. ¹¹'iⁿyāⁿ chí n'diichí yā chí diiⁿ Pablo 'cai diitú yā ní caⁿá yā ndúúcú davaacu yeⁿe yāⁿāa Licaonia chí ndyuūs s'eeⁿ ndáa yā nanáāⁿ yā tan'dúúca saⁿā iⁿ'yeeⁿdí 'cūū.

¹²Caⁿa yā yeⁿe Bernabé chí Júpiter, ní Pablo miiⁿ ní Mercurio ti Pablo miiⁿ ní chindéé yā nduudu. ¹³Yáacū yeⁿē Júpiter cánée chuva'āi yáāⁿ miiⁿ. Chiduú yeⁿē Júpiter ndéé yā itiindu s'ééⁿ ndúúcú corona s'eeⁿ yeⁿe naāndā nanáāⁿ chééndí cheeⁿ yáāⁿ miiⁿ. Ní neⁿe yā 'caaⁿnúⁿ yā iití chí ca'a yā sacrificios. 'Tiicá ntúūⁿ n'dee taaví 'iⁿyāⁿ yeⁿe yáāⁿ miiⁿ neⁿe yā diiⁿ yā. ¹⁴Ní naachí ch'iindiveeⁿ apóstoles Bernabé ndúúcū Pablo chuū chíin'cuuⁿ yā catecai yā tí neené ndachí ní cueⁿé yā nguaaⁿ 'iⁿyāⁿ. Ní 'cai yā. ¹⁵Ní caⁿa yā: Ndís'tii saⁿā, ¿d'éⁿ cuuvi chí 'tíicá idiíⁿ ní? Nús'uú saⁿā ntuuⁿ nús'uu tan'dúúca ndís'tii. Ní ngaⁿa 'nū nduudu cuaacu chí divíⁿ ní yeⁿē nducueⁿé dendu'ū ní cu'téenu ní Ndyuūs chí cánduuchi chí díⁿdái yā nanguuvi ndúúcú yáⁿā ndúúcú nuuⁿniⁿyáⁿā ndúúcú nducyáácá dendu'ū chí véé. ¹⁶Nguuvi chí 'āa cho'oo Ndyuūs s'neeⁿ yā nducyaaca 'iⁿyāⁿ s'eeⁿ chí cáⁿa yā yúúni damaáⁿ yā. ¹⁷Nguéé s'neeⁿ yā ti nguéé cosa chí chíⁿi dú'uu 'iⁿyāⁿ yā. Din'daacá yā. Ní teé yā cuuvi yeⁿé nanguuvi ndúúcú tiempo yeⁿē n'deē taaví n'gui'i o cosecha. Ní di'cuiitá yā staava yeⁿé yú ndúúcú vaadī yeenú ti teé yā chí neⁿē cuerpo yeⁿē yú.

¹⁸Caⁿa yā chuū, ngii n'dái naati idiíⁿ yā chí 'iⁿyáⁿ yáāⁿ miiⁿ nguéé idiíⁿ yā sacrificio.

¹⁹Tuu'mi ní ndaā ná^a 'iiⁿyāⁿ Israel s'eeⁿ yeⁿe yáāⁿ Antioquía ní yeⁿe yáāⁿ Iconio chi yaa'ví yā nducyáácá yā contra yeⁿe Pablo. Ní ca'a tuú yā saⁿā ní chí n'dai yā saⁿā 'áámá lado chuva'ai yáāⁿ miiⁿ ní 'áácú yā chí 'āā n'dii sa. ²⁰'Iiⁿyāⁿ s'eeⁿ chí i'téenu yā Cristo ní nuuⁿmaⁿndi-iví nanáāⁿ yā. Pablo miiⁿ ní nacueeⁿ sá ní nuuⁿ ndáá tuuⁿ sa na yaāⁿ miiⁿ. Ní chideeve táámá nguuví cueⁿe sa ndúúcu Bernabé na yáāⁿ Derbe.

²¹Ní caⁿa yā evangelio chí ndúúdu ngāi yeⁿe Jesucristo yáāⁿ miiⁿ. Ní díⁿ yā chí néené 'yaaⁿ 'iiⁿyāⁿ chí i'teenu. Pablo ndúúcu Bernabé nguēcunee yā yáāⁿ Lистра, yáāⁿ Iconio, ndúúcu yáāⁿ Antioquía. ²²Ní díⁿ yā chí ditiinú yā ndúúcu vaadí i'teenu na alma yeⁿe 'iiⁿyāⁿ s'eeⁿ chí i'téenu yā Cristo ndúúcu staava yeⁿe yā. Ní ngi'cueéⁿ yā 'iiⁿyāⁿ chí 'áámá cunee yā ndúúcu vaadí i'teenu. Ní caⁿa yā ndúúcu 'iiⁿyāⁿ s'eeⁿ: Cánéé chí néené n'deēe chí cho'o núuⁿ yú maaⁿ níícu ndaā yú va'ai chēeti nguuví. ²³S'nééⁿ yā 'iiⁿyāⁿ ndiicúú chí saⁿa ndii tíiⁿ yeⁿe 'áámá 'áámá yaācú ní caⁿ'angua'á yā taachi 'āā cuee ca'diinú yā. Ní s'nééⁿ yā na ta'a Señor 'iivú Ndyuūs 'iiⁿyāⁿ chí i'téenu.

Nguéecundí yā ní cueⁿe yā yáāⁿ Antioquía yeⁿe yáⁿāa Siria

²⁴Cuayiivi chí cho'ó yā distrito yeⁿe Pisidia ní ndaā yā yáⁿāa Panfilia. ²⁵Taachi caⁿa yā nduudu cuaacú miiⁿ na yáāⁿ Perge cunaⁿ'á yā na yáāⁿ Atalia. ²⁶Yeⁿe yáāⁿ miiⁿ cunaⁿ'á yā na barco na yaāⁿ Antioquía. Miiⁿ ní naachí hermanos s'eeⁿ vmnááⁿ vmnaaⁿ tucá'a yā Pablo ndúúcu Bernabé na ta'a Dendyuūs ndúúcu favor yeⁿe Dendyuūs cáāvā nti-iⁿnyūⁿ chí 'āā díⁿ yā. ²⁷Ní ndaā yā na yáāⁿ Antioquía. Ní taachi nduuvidaamá yā na yaacú caⁿa yā tanducueⁿe cosa ch'ēete chí 'āā díⁿ Dendyuūs ndúúcu yā. Ní táácā Dendyuūs ca'á yā permiso 'iiⁿyāⁿ chí nguéé yeⁿe ndaata Israel chí

cu'téenu yā nduudu yeⁿe yā. ²⁸Nááⁿ tiempo canéé yā ndúúcu 'iiⁿyāⁿ s'eeⁿ chí i'téenu yā Cristo.

Concilio na yáāⁿ Jerusalén

15 Tuu'mi ní ná^a yā chí ndaá yā yeⁿe yáⁿāa Judea chí'cueéⁿ yā hermanos chuū: Ndúúti chí nguéé díⁿ di circuncidar 'iiⁿyāⁿ tan'dúúcā chí ngaⁿa 'áámá ley yeⁿe Moisés tuu'mi ní nguéé cuuvi nínguaⁿ'ai di. ²Pablo ndúúcu Bernabé ch'ēecu cheendí yā ndúúcu 'iiⁿyāⁿ yeⁿe yáāⁿ miiⁿya ní néené n'deēe caⁿa yā. Ní 'iiⁿyāⁿ yeⁿe yáāⁿ miiⁿ caⁿa yā chí caⁿa Pablo ndúúcu Bernabé ndúúcu tan'duuví 'iiⁿyāⁿ s'eeⁿ na yáāⁿ Jerusalén. Ní caⁿ'á yā ní tiinguuneeⁿ yā yeⁿe chuū nanáāⁿ 'iiⁿyāⁿ ndiicúú chí 'iiⁿyāⁿ ndí tíiⁿ yeⁿe yaācú ndúúcu apóstoles chí dichó'ó Dendyuūs.

³'Iiⁿyāⁿ s'eeⁿ yeⁿe yaācú ch'ēetinúúⁿ yúuní yā ndúúcu 'iiⁿyāⁿ s'eeⁿ. Ní cho'ó yā 'iiⁿyāⁿ s'eeⁿ na yáⁿāa Fenicia ndúúcu yáⁿāa Samaria. Ní 'iiⁿyāⁿ s'eeⁿ caⁿa yā taacā chí i'teenu 'iiⁿyāⁿ s'eeⁿ chí nguéé yeⁿe ndaata Israel. Ní nducyaaca hermanos miiⁿ yeenu taaví yā.

⁴Ní ndaā yā na yáāⁿ Jerusalén. Ní apóstoles ndúúcu 'iiⁿyāⁿ ndiicúú ndúúcu 'iiⁿyāⁿ yeⁿe yaācú miiⁿ díⁿ yā recibir 'iiⁿyāⁿ s'eeⁿ. Ní 'iiⁿyāⁿ s'eeⁿ caⁿa yā tanducueⁿe chí Dendyuūs díⁿ yā ndúúcu yā. ⁵Naⁿa 'iiⁿyāⁿ yeⁿe fariseos chí s'teenu yā ní díⁿ yā costumbre yeⁿe yā nacueéⁿ yā ní caⁿa yā: Canéé chí díⁿ yú circuncidar 'iiⁿyāⁿ ní canee cúúⁿmíⁿ yā díⁿ yā chí ngaⁿ'á ley yeⁿe Moisés.

⁶Ní nduuvidaamá yā apóstoles ndúúcu 'iiⁿyāⁿ ndiicúú chí 'iiⁿntyéⁿe yeⁿe yaācú chí n'diicíⁿ yā yeⁿe chuū. ⁷Ní ch'iinu caⁿa yā n'deēe n'dái, ní Pedro miiⁿ ní ncueeⁿ sá ní caⁿ'ā sa: Ndís'tii, saⁿ'ā hermanos, deenú ní tan'dúúcā 'āā 'naaⁿ tiempo chí Dendyuūs ndeēvé yā 'úú nguaaⁿ s'uúúⁿ ní cáāvā cheendí ní 'iiⁿyāⁿ s'eeⁿ chí nguéé yeⁿe

ndaata Israel ch'iindiveéⁿ yā nduudu cuaacu ní s'téenu yā. ⁸Ní Ndyuūs chi inaaⁿ yā staava ye^mē yú ch'iⁿi yā chi i'téenu 'iiⁿyāⁿ s'eeⁿ. Ní ca'a yā Espíritu N'dai 'iiⁿyāⁿ s'eeⁿ chi nguéé ye^mē ndaata Israel tan'dúucā s'uúúⁿ. ⁹Dáamá nducyaaca yú ndúucū 'iiⁿyāⁿ s'eeⁿ ní Ndyuūs nadideevé yā staava ye^me 'iiⁿyāⁿ s'eeⁿ cáávā chi i'téenu yā. ¹⁰Maaⁿ ní ¿de'ē cáávā chi di'vaachi ní ye^me Ndyuūs, ní s'néeⁿ ní na tiiⁿ 'iiⁿyāⁿ s'eeⁿ chi i'téenu yā Cristo tan'dúucā 'áamá yugo chi s'uúúⁿ nguéé cuuvi candē yú ndii nguēe chii candē yā chiida yú s'eeⁿ dendú'ú? ¹¹Maaⁿ ní i'téenu yú cucáávā favor ch'ēete taavi ye^me Señor Jesús cuuví nanguaⁿāi yú dáamá dáamá ndúucū 'iiⁿyāⁿ s'eeⁿ chi nguéé ye^mē ndaata Israel.

¹²Tuu'mi ní nducyaaca 'iiⁿyāⁿ s'eeⁿ 'aa ntéé caⁿá yā mar 'áamá. Ní ch'iindiveéⁿ yā ye^me Bernabé ndúucū Pablo chi caⁿa yā n'dee n'dái señales ndúucū vaadi n'giinu chí Ndyuūs díⁿ yā cáávā 'iiⁿyāⁿ miiⁿ nguááⁿ 'iiⁿyāⁿ s'eeⁿ chi nguéé ye^mē ndaata Israel. ¹³Taachí 'iiⁿyāⁿ s'eeⁿ miiⁿ snéé 'díⁿ yā tuu'mi Jacobo nan'guēcutaⁿā sa ní caⁿa sa: Ndís'tii saⁿā hermanos cu'neeⁿ veeⁿ ní ye^mē.

¹⁴Simón miiⁿ 'āa caⁿa sá táaca Dendyuūs vmnááⁿ vmnaaⁿ n'diichí yā 'iiⁿyāⁿ s'eeⁿ chi nguéé ye^mē ndaata Israel ní sta'á yā 'iiⁿyāⁿ nguaaⁿ 'iiⁿyāⁿ s'eeⁿ chí 'iiⁿyāⁿ ye^mē yā cáávā chi i'téenu yā Jesucristo. ¹⁵Ndúucū nduudu 'cūū ní ndí tiempo vmnaaⁿ cunee yiinú profetas chi caⁿa chi cuchii tan'dúucā chi cunee nguūⁿ na libro ye^me Ndyuūs:

¹⁶Cho'oo chúū nanguēcúndií ní nadin'dái va'ai ye^me David chí sndēve ní nadin'dái to'o ndiicúū, ní va'ai miiⁿ nanguēcunee nádacuééⁿ ntuúⁿ.

¹⁷Ní taná'a yā 'iiⁿyāⁿ n'nuuⁿ ntuúⁿ yā Señor Jesucristo, ní ye^mē nducyaaca 'iiⁿyāⁿ chi nguéé ye^mē ndaata Israel

miiⁿ chi Dendyuūs caⁿa yā chi cuuvi déenu yā.

¹⁸Chuū ngaⁿa Señor miiⁿ chi din'dái tuuū ndeévéé ní dendú'ú díⁿ yā chi cadiiuuⁿ 'iiⁿyāⁿ chúū ndí tiempo ndii cuaaⁿ vmnaaⁿ.

¹⁹Maaⁿ ní 'úú díⁿ inacádiinúúⁿ ye^me chuū, chi nguéé di'vaachi yú ye^mē 'iiⁿyāⁿ s'eeⁿ chi nguéé ye^me ndaata Israel chi cu'téenu yā Dendyuūs. ²⁰Míⁿ dingúuⁿ yú ye^mē 'iiⁿyāⁿ chi cūvii yā ye^mē tanducué^mē chi ye^mē ídolos ndúucū ye^mē 'áamá saⁿā 'áamá n'daataá chi nguéé sneé yā ndúucū vi'í ní nguéé n'giindivaacu yā, ndí nguéé che'é yā yuutē ye^mē 'áamá 'iiti chi idi'núú yā daandú tī, ndí nguéé che'é yā ingee yā yuuúⁿ ye^mē tī. ²¹Ndí tiempo ye^mē Moisés miiⁿ ní ndí cuááⁿ vmnaaⁿ ndí nducyáacá yáāⁿ véé 'aama yā chí ngaⁿa yā ye^mē Dendyuūs na yaacū sinagoga naachí n'geeⁿ yā libro ye^me Dendyuūs nguuvi nguuvi chi in-taavi'tuunúúⁿ yā chi sábadu.

²²Apóstoles chi dichó'ó Dendyuūs ndúucū 'iiⁿyāⁿ ndiicúū chí ngaⁿa nti-i'nyuⁿ ye^me yáacu ndúucū nducué^mē 'iiⁿyāⁿ na yaacū canéé yiinú yā chí n'daac chí níndeve yā ye^mē nguááⁿ yā 'uuvi saⁿā. Ní dicho'ó yā saⁿā s'eeⁿ ndúucū Pablo ndúucū Bernabé na yáāⁿ Antioquía. Ní ndēve yā Judas chí ngu-uví sa Barsabás, ndúucū Silas. Saⁿā s'eeⁿ n'gēete sá nguaaⁿ hermanos. ²³Ní dicho'ó yā caaca ndúucū 'iiⁿyāⁿ s'eeⁿ. Apóstoles ndúucū 'iiⁿyāⁿ ndicúū ndúucū hermanos níngúuⁿ yā chuu ye^mē hermano chí nguéé ye^mē ndaata Israel chí snéé yā na yáāⁿ Antioquía, na yáⁿāa Siria, ndúucū na yáⁿāa Cilicia: N'dai n'dii.

²⁴Nús'uū ní n'giindiveéⁿ 'nū chí náⁿa yā cueⁿé yā ye^mē 'nū ní díⁿ yā chí ndís'tii nguéé ch'ēetinéé 'díⁿ ní ndúucū nduudu ye^mē yā. Ní nguéé caⁿa nti'nyuⁿ 'nū chí can'dáa yā. 'Iiⁿyāⁿ miiⁿ díⁿ yā chí staⁿa yā alma ye^mē ní ní chí'cueeⁿ yā chí diiⁿ circuncidar 'iiⁿyāⁿ ní díⁿ yā chí ngaⁿa

ley yeⁿe Moisés. ²⁵ N'daacā n'dai canéé nus'uú chi 'āā ndúúvídaama nducyáácá 'nū chí dæeve 'nū saⁿ'ā s'eeⁿ ní dicho'ó 'nū nanááⁿ ndís'tiī saⁿ'a s'eeⁿ ndúúcu Bernabé ndúúcu Pablo, 'iiⁿ'yāⁿ s'eeⁿ chi neⁿe taavi yú. ²⁶ Saⁿ'ā s'eeⁿ n'deēe cuví cueⁿ'é yā naachi deenú yā chi vee peligro chi 'cuúvi yā cáávā Señor Jesucristo yeⁿ'ē yú. ²⁷ Chíⁿ chí dicho'ó 'nū Judas ndúúcu Silas. 'Iiⁿ'yāⁿ s'eeⁿ ní 'tiicá ntúúⁿ caaⁿ'máⁿ yā chí cuuvi deenú nī. ²⁸ Chuū ní n'daacā canee ndúúcu Espiritu N'dai ndúúcu nús'uu díⁿ 'nū chí nguéé i'neeⁿ 'nū vmaaⁿ ndís'tiī mar 'áámá carga chí ngo'o ca ndís'tiī caati 'āā chí neⁿ'e nūⁿ. ²⁹ Nguéé tuu'ví nī cosa chí nga'á yā na ídolos ndí nguéé yeⁿ'e yuúúⁿ ndí nguéé yuute yeⁿ'e 'iiti chí nge'e yícu ndí nguéé díⁿ nī chí cunee nī ndúúcu 'áámá 'iiⁿ'yāⁿ chí nguéé n'giindivaacu ndúúcu nī. Ndúúti chí díⁿ nī chuū tuu'mi ní n'daacā idíⁿ nī. N'dáácā cho'ó nī. Chuū chí nga'á.

³⁰ 'Tíicā chí 'iiⁿ'yāⁿ chí dichó'o yā cueⁿ'é na yáāⁿ Antioquía. Ní nduuvidaamá yā ndúúcu nducyaaca hermanos. Ní nica'á yā carta 'iiⁿ'yāⁿ. ³¹ Taachí ch'eeⁿ yā carta miiⁿ ní yeenú taavi yā cáávā nduudu 'viich'etínūⁿ. ³² Judas ndúúcu Silas chí profetas ntúúⁿ chí caⁿ'a nduudu yeⁿ'e Dendyuūs ní ca'a yā 'viich'etínūⁿ ní didiitú yā hermanos ndúúcu neene n'dái nduudu. ³³ Canéé yā 'áámá tiempo miiⁿ ní hermanos díⁿ yā despedir 'iiⁿ'yāⁿ ní neⁿ'é yā chí n'daacā canéé yā chí 'cuetinéé 'díⁿ yā ndúúcu vaadí 'diiⁿ. Ní 'iiⁿ'yāⁿ miiⁿ nguεεcunéⁿ yā na yáāⁿ naachi snéé 'iiⁿ'yāⁿ chí dichó'o yā. ³⁴ Silas miiⁿ canéé yínu sa chí canéé sa miiⁿ. ³⁵ Pablo ndúúcu Bernabé miiⁿ canee yā na yáāⁿ Antioquía. Ngí'cuéⁿ yā nduudu Dendyuūs miiⁿ ní ngaⁿ'a yā evangelio chí ndúúdu ngai yeⁿ'e Jesucristo ndúúcu náⁿ'ā 'yááⁿ 'iiⁿ'yāⁿ.

Pablo divíi yā yeⁿ'ē Bernabé ní cueⁿ'é yā ndii 'uuvi viaje

³⁶ Cuayiivi chí cho'ō tan'duuvi nguuvi, Pablo ngāⁿa yā ngii yā Bernabé: Nanguεεcunéé ntuúⁿ yú, caⁿ'ā yú n'diichi yú hermano s'eeⁿ yeⁿ'ē nducyaaca yáāⁿ naachí cheⁿ'e yú, ní caⁿ'a yú nduudu yeⁿ'ē Señor. Ní n'diichi yú táácā snéé yā.

³⁷ Ní Bernabé miiⁿ neⁿ'ē sa chí caⁿ'á Juan chí nguuvi Marcos ndúúcu sa. ³⁸ Naati Pablo miiⁿ ní nguéé canee yínu sa chí candéé sa 'iiⁿ'yāⁿ chí divíi yā yeⁿ'ē saⁿ'ā s'eeⁿ ndii yáⁿ'āa Panfilia. Ní 'iiⁿ'yāⁿ miiⁿ nguéé cheⁿ'é yā chí díⁿ yā nti-iⁿ'nyuⁿ. ³⁹ Nguéé canéé yínu yā nguaaⁿ maáⁿ yā ní ndaacādamí yā hermanos Bernabé ndúúcu Marcos ní cueⁿ'é yā isla Chipre na barco. ⁴⁰ Pablo miiⁿ ní ndæeve sa saⁿ'ā Silas ní náⁿ'ā hermanos caⁿ'a yā chíi yā chí vaadí ch'εete yeⁿ'e Dendyuūs cunéé ndúúcu Pablo ndúúcu Silas miiⁿ. ⁴¹ Ní cuayiivi cho'ó yā yáⁿ'āa Siria ndúúcu yáⁿ'āa Cilicia. Ch'εetinéé chíichi yā 'iiⁿ'yāⁿ yeⁿ'e yaacū.

Timoteo cueⁿ'é yā ndúúcu Pablo ndúúcu Silas

16 Cuayiivi miiⁿ índaa sa yáāⁿ Derbe ndúúcu yáāⁿ Lистра, ní 'caandiveéⁿ nī. Canee 'áámá saⁿ'ā discípulo chí ch'eeⁿ chí nguuvi sa Timoteo, daiya 'áámá n'daataá 'iiⁿ'yāⁿ Israel chí i'téenu tá Dendyuūs, ní chíidá sa miiⁿ nguéé yeⁿ'ē ndaata 'iiⁿ'yāⁿ Israel. ² Ní hermanos chí snéé yā yáāⁿ Lистра ndúúcu yáāⁿ Iconio ngaⁿ'a cuaacú yā yeⁿ'ē sáⁿ'ā miiⁿ chi neené n'dai sa. ³ Pablo miiⁿ ní neⁿ'e yā chí caⁿ'a sa nduucú yā. Ní sta'á yā saⁿ'ā ní díⁿ yā circuncidar saⁿ'ā miiⁿ caavā 'iiⁿ'yāⁿ Israel s'eeⁿ ti déenú yā nducyaaca 'iiⁿ'yāⁿ yeⁿ'e yáāⁿ miiⁿ chí saⁿ'ā miiⁿ daiya sa saⁿ'ā chí nguéé yeⁿ'ē ndaata Israel. ⁴ Ní taachi cho'ó yā yáāⁿ s'eeⁿ caⁿ'a yā orden chí n'ngaacú yā chí caⁿ'a apóstoles chí caⁿ'a nduudu yeⁿ'e Dendyuūs

ndúúcu 'iiⁿyāⁿ ndiicúu chi ngaⁿa nti-
iⁿnyuⁿ yeⁿe yáacū chi snée yā na yáāⁿ
Jerusalén chi díⁿ yā nducuéⁿe chuū.
5 'Iiⁿyāⁿ s'eeⁿ yeⁿe yaacū s'eeⁿ 'āā neē
chiichí yā ndúúcu vaadí i'teenu. Ní ngíí
'yaaⁿ ca yā 'áámá nguuví taama nguuví.

Pablo n'diichí yā na visión yeⁿé yā 'áámá saⁿā yeⁿe yāⁿā Macedonia

6 Ní cho'ó yā yāⁿā Frigia ndúúcu
yāⁿā Galacia. Espíritu N'dai yeⁿe
Ndyuūs miiⁿ nguéé 'cuūⁿ chi caⁿá yā
caaⁿ máⁿ yā nduudu cuaacu na yāⁿā
Asia. 7 Ndaá yā yāⁿā Misia ní neⁿe
caⁿa yā yāⁿā Bitinia naati Espíritu
miiⁿ nguéé 'cuūⁿ. 8 Ní cho'ó yā 'diitúú
yāⁿā Misia ní cueⁿé yā na yáāⁿ Troas.
9 Nguinū miiⁿ ní Pablo miiⁿ ní ch'iⁿi
'yúúdiyaaⁿ sáⁿā na yaāⁿ yeⁿe sa. Ní
n'diichí sa 'áámá saⁿā yeⁿe yāⁿā
Macedonia chééndii sa ní di'cuítu
sa Pablo ní caⁿa sa: Cho'o dí yāⁿā
Macedonia miiⁿ ní cunnee di nús'uū.
10 Ní Pablo miiⁿ taachi n'diichí sa
na 'yúúdiyaaⁿ yeⁿe sa, cuayiivi míⁿ
nacadíinuⁿ 'nū chi caⁿa 'nū yāⁿā
Macedonia. Déénú 'nū chi Dendyuūs
ndeévé yā nús'uū chi caaⁿmaⁿ 'nū
yeⁿe evangelio chi ndúúdu ngai yeⁿe
Jesucristo.

Cueⁿé yā vácūu na yáāⁿ Filipos

11 Cheⁿé 'nū na barco yeⁿe yáāⁿ Troas
ní ndaá 'nū yúúní cuaacu na isla Samo-
tracia. Chidēve táámá nguuví ní ndaá
'nū yáāⁿ Neápolis. 12 Ndií míⁿ cueⁿé
'nū na yáāⁿ Filipos chi yeⁿe 'iiⁿyāⁿ ro-
manos ní yáāⁿ miiⁿ vmnáāⁿ vmaāⁿ
yeⁿe yāⁿā Macedonia. Ní ch'ēetinée 'nū
'aama tiempo yáāⁿ miiⁿ. 13 'Áámá nguuví
sábado chi intaavi'tuunuúⁿ yā tan'dúúca
ley yeⁿé yā can'daa 'nu cuaaⁿ dáámí
cheendi va'āi yeⁿe yáāⁿ miiⁿ niiⁿnuuⁿ
yíícú naachi caⁿangua'á yā ní ch'ēté 'nū.
Ní caⁿa n'deéé 'nū ndúúcu n'daataá chí
nduuvidaama.

14 Miiⁿ canée 'áámá n'daataá chí ngu-
uvi tá Lidia. N'diicui tá tínūuⁿ morada
cua'á yeⁿe yáāⁿ Tiatira. Ní i'téenu tá
Dendyuūs. Táⁿā miiⁿ ní n'giindiveeⁿ
tá. Ní Señor miiⁿ ní nda'ai yā vaan-
icadiinúⁿ yeⁿe tá chí cu'neeⁿ veeⁿ tá
chi caaⁿmaⁿ Pablo. 15 Ní taachí chēd-
inuūⁿniⁿ tá ndúúcu 'iiⁿyāⁿ yeⁿe tá,
di'cuítu tá nús'uū ní ngaⁿa tá: Ndúúti
chi deenu ní chí 'úú 'áámá canee ndúúcu
Dendyuūs, cundáa ní vaacú ní 'cuetinée
ní. Ní di'cuítu tá nús'uū ní ch'ēetinée
'nū. 16 Taachí cueⁿe 'nū na lugar chí
caⁿangua'a 'nū tuu'mi ní ndaacá 'nū
'áámá n'daata 'líⁿ chí canee tá ndúúcu
espíritu yeⁿe yáāⁿnguiniūⁿ chí diiⁿ
adivinar. Ní ndaā tá nanáaⁿ 'nū. N'daata
míⁿ nééné n'deéé idiiⁿ tá ganar yeⁿe 'iivi
tá ndúúcu espíritu yeⁿe chí diiⁿ adivinar.
17 Tá 'cūu ní cán'daā tá Pablo ndúúcu
nús'uū ní n'gai yiicu ta ní caⁿa tá: Saⁿā
s'uū ní saⁿā chí dichí'vē Dendyuūs chí
ch'ēete n'dai chí canee na va'ai chēeti
nguuví. Saⁿā s'eeⁿ n'giⁿi sa yúúní chí
nanguaⁿāi yú.

18 N'daata miiⁿ diiⁿ tá 'túúca neené
'yaaⁿ nguuví. Pablo miiⁿ ní nguéé canee
yiinū sa ní caⁿa sá chí sa espíritu
miiⁿ: 'Úú dicho'ó dii ndúúcu chí du-
uchi Jesucristo chí nan'dáa di yeⁿe tá
'tíi. Ní nan'dáa espíritu miiⁿ hora miiⁿ.
19 Taachí n'diichí 'iivi tá chí cueⁿe es-
píritu yeⁿe adivinanza chí diiⁿ tá ga-
nar cáava yā, tuu'mi sta'á yā Pablo
ndúúcu Silas. Ní candé yā saⁿā s'eeⁿ na
vaacūyáāⁿ nanáāⁿ 'iiⁿntyéⁿe. 20 Ní ch'iⁿi
yā saⁿā s'eeⁿ nanáāⁿ 'iiⁿntyéⁿe ní caⁿa yā:
Sáⁿa s'uū, 'iiⁿyāⁿ Israel s'eeⁿ díⁿ yā chí
véé vaadí 'caa'va na yáāⁿ yeⁿe yú. 21 Ní
ngi'cueeⁿ yā s'uúúⁿ costumbre chí nguēe
'cuaaⁿ yú ní nguéé canee chí diiⁿ yú, caati
s'uúúⁿ ní 'iiⁿyāⁿ romanos s'uúúⁿ.

22 Ní 'iiⁿyāⁿ yeⁿe yáāⁿ miiⁿ nduu-
vidáama yā ndúúcu 'iiⁿntyéⁿe. Ní 'iiⁿ-
tyéⁿe s'eeⁿ chíⁿcuúⁿ yā catecai sa ní
ca'á orden yā chí 'cueⁿé yā saⁿā ndúúcu

nduucu. ²³ Ch'íínú ch'e^{né} yā sa^{nā} s'eeⁿ n'dee taaví vueltas ní s'nuúⁿ yā sa^{nā} s'eeⁿ vácūū. Ní chii yā sa^{nā} chíⁿ idíⁿ yā cuidado chééndí vácūū chi díⁿ yā cuidado n'daacā sa^{nā} s'eeⁿ. ²⁴ Taachí ch'iindiveéⁿ yā chuū s'nuúⁿ yā sa^{nā} s'eeⁿ vácūū chí yáanūu ca ní snuuⁿ chiichí yā ca'a sa na cepo.

²⁵ Ma^{nā} yáāⁿ míⁿ taachi Pablo ndúúⁿcū Silas ngáⁿ ánguáⁿ yā ní ngiita yā canciones ye^{né} Dendyuūs ní 'iiⁿyāⁿ chi snúⁿ vácūū miiⁿ ní n'giindiveéⁿ yā. ²⁶ Hora miiⁿ diituú nuⁿu yá^{nā} ní cimientos ye^{né} vácūū miiⁿ ní nuⁿu. Ní hora míⁿ nūⁿ nducyaaca cheendi vácūū míⁿ ní nánguāⁿ. Ní ndaatí ca'a yā ndúúⁿcū ta'a yā nducyáácá 'iiⁿyāⁿ chi snúⁿ vácūū. ²⁷ Sa^{nā} soldado chi canéé cuidado vácūū miiⁿ taachí nduuchi sa chí cyaadu sa, ní n'diichi sa chí sdá'āi nducyaaca cheendi vácūū. Tuu'mi ní nntun'dáa sa espada ye^{né} sa ní neⁿe sa 'caaⁿnuⁿ maaⁿ sa sa^{nā}, caati nadacadínuuⁿ sa chí 'iiⁿyāⁿ chi snúⁿ vácūū miiⁿ cheenú yā. ²⁸ Pablo miiⁿ 'cai yiicu sa ní nga^{nā} sa: Nguéé diiⁿ di ndúúⁿcū di 'tíicā. Nducyaacá 'nū snéé 'nū.

²⁹ Tuu'mi ní sa^{nā} miiⁿ ngiica sa deeve. Chindáa sa ngeenū sa cheeti cuarto miiⁿ. Ní yinduuví sa ní chíntii'ya sa na ca'a Pablo ndúúⁿcū Silas. ³⁰ Ní tun'dáa sa sa^{nā} s'eeⁿ ní ca^{nā} sa: Ndís'tii Señores, ¿táácá díⁿ ní 'iicu nanguaⁿái?

³¹ Sa^{nā} s'eeⁿ ní ca^{nā} sa: Cu'téénú dí Señor Jesucristo níicú nanguaⁿái di ndúúⁿcū 'iiⁿyāⁿ ye^{né} di ná vaacu di.

³² Ní ca^{nā} yā nduudu ye^{né} Señor sa^{nā} miiⁿ ndúúⁿcū nducyaaca 'iiⁿyāⁿ ná vaacu sa. ³³ Sa^{nā} miiⁿ ní hora míⁿ nūⁿ ye^{né} yáāⁿ sta'a sa 'iiⁿyāⁿ ní naāⁿnū sa chí ya'āi ye^{né} yā. Cuayiivi miiⁿ ní cheedinuūⁿniⁿ sa^{nā} miiⁿ ndúúⁿcū nducyaaca 'iiⁿyāⁿ ye^{né} sa. ³⁴ Ní candéé sa 'iiⁿyāⁿ na vaacu sa ní ca'a sa chí che'e yā. Nducyáácá yā navaacu sa yeenú taaví yā chí s'téenu yā Dendyuūs miiⁿ.

³⁵ Chidēeve táámá nguuví miiⁿ 'iiⁿntyé^{né} s'eeⁿ dich'ó yā policía chí yaa'ví sa sa^{nā} ní ca^{nā} sa: N'dēechi yā sa^{nā} s'eeⁿ.

³⁶ Ní sa^{nā} soldado chí canee cuidado cheendi vácūū chí sa Pablo nduudú 'cūū: 'Iiⁿntyé^{né} yaa'ví yā 'úú chí 'úú tun'dáá ndís'tii. Maaⁿ ní cho'ó ní ca^{nā} ní ndúúⁿcū cuidado. ³⁷ Naati Pablo miiⁿ ní nga^{nā} sa sa ngiⁿ sa 'iiⁿyāⁿ: Cuayiivi chí ch'íínú ch'e^{né} yā nús'uu nanááⁿ 'iiⁿyāⁿ ndí nguéé itiinguuneéⁿ yā ye^{né} asunto miiⁿ de'ē chí caaⁿmáⁿ 'nū ní candéé yā nús'uu vácūū, ¿'áá ntun'dáá n'de'éi yā nús'uu, tí nús'uu 'iiⁿyāⁿ romanos s'uuuⁿ ní s'nuúⁿ yā nús'uu vácūū?

³⁸ Ní soldado s'eeⁿ ní ca'a sa chí cádi-inuuⁿ 'iiⁿntyé^{né}. Taachí ch'iindiveéⁿ yā chuū ní dii'yá yā chí taachi chicadínúⁿ yā chí romanos 'iiⁿyāⁿ s'eeⁿ. ³⁹ Ní 'iiⁿntyé^{né} ndaá yā ní di'cuiitú yā 'iiⁿyāⁿ. Ní tun'dáa yā 'iiⁿyāⁿ vácūū. Ní chí yā sa^{nā} s'eeⁿ chí nan'daa sa na yáāⁿ miiⁿ.

⁴⁰ Tuu'mi ní taachi nan'dáa yā vácūū sndaa yā na vaacu 'áámá n'daataá chí nguuví Lidia. Ní n'diichí yā hermanos ní chí yā 'iiⁿyāⁿ chí ca^{nā} yā ndúúⁿcū cuidado. Ní cuna'a yā.

Nduuvitaáⁿ yā na yáāⁿ Tesalónica

17 Cho'ó yā yáāⁿ Anfípolis, cho'ó yā yáāⁿ Apolonia ní ndaá yā na yáāⁿ Tesalónica. Naachi véé 'áámá yaacū sinagoga ye^{né} 'iiⁿyāⁿ Israel s'eeⁿ. ² Ní Pablo miiⁿ tí 'áā ndii níⁿnuⁿ yā chēⁿe yā naachi snéé 'iiⁿyāⁿ. Ní 'iiⁿnuⁿ sábadó chí ntaavi'tuunúⁿ yā, ca^{nā} yā ndúúⁿcū nducyaaca yā nduudú ye^{né} Dendyuūs. ³ Chi'cueeⁿ sá ní ca^{nā} sa ye^{né} chí neené nguūⁿ na Escrituras. Nga^{nā} sa chí canéé chí Cristo 'cuuvi yā ní nnduuchí yā nguaaⁿ tiná^{nā}. Ní Jesús ye^{né} chí 'úú chí nga^{nā}, Jesús miiⁿ chí Cristo chí Ndyuūs deeve yā.

⁴ Ná^{nā} 'iiⁿyāⁿ s'eeⁿ s'téenu yā ní nduuvídaamá yā ndúúⁿcū Pablo ndúúⁿcū Silas ndúúⁿcū n'dee n'dái 'iiⁿyāⁿ s'eeⁿ chí

nguéé yeⁿē ndaata Israel chi 'iiⁿyāⁿ n'dai taavi, ndúúcu n'dee n'dái n'daataá chi n'dái taavi, nguée duu'ví yā. ⁵Tuu'mi ní 'iiⁿyāⁿ Israel s'eeⁿ chi nguée i'téenu yā ní ngueé yā sta'á yā náⁿā saⁿā chi nguée n'daacá saⁿā chi 'daān'dí. Ní n'deeé nduvidaamá yā ní nduuví taáⁿ yā 'iiⁿyāⁿ yāáⁿ miiⁿ ní ndaa staⁿa vaadicadiinuⁿuuⁿ yeⁿé yā. Ní sta'á yā 'iiⁿyāⁿ yeⁿe vaacu Jasón. Ní neⁿé yā tun'dáa yā Pablo ndúúcu Silas nanááⁿ 'iiⁿyāⁿ yāáⁿ miiⁿ. ⁶Naati nguée nindaāca yā 'iiⁿyāⁿ s'eeⁿ. Candée yā Jasón ndúúcu náⁿā hermanos nanááⁿ 'iiⁿntyéⁿē yeⁿe yāáⁿ miiⁿ. Ní 'cai yiicú yā: Sáⁿā s'ūūⁿ nidi'vaachi sā nducyáacá 'iiⁿyāⁿ yeⁿē núúⁿmáⁿ iⁿ'yeēⁿdí ní ndaa sa ndii 'múúⁿ. ⁷Ní Jasón miiⁿ snée yā 'iiⁿyāⁿ s'eeⁿ na vaacu sa. Ní nducyaaca yā nguée idiⁿ yā tan'dúúca chi ngaⁿā César. 'Iiⁿyāⁿ s'eeⁿ ngaⁿá yā ti véé táamá rey chi Jesús.

⁸Ní 'iiⁿyāⁿ s'eeⁿ ndúúcu 'iiⁿntyéⁿē yeⁿe yāáⁿ 'cūū nduuví taáⁿ yā taachí ch'iindiveⁿ yā chuū. ⁹Tuu'mi ní sta'á yā tuumi yeⁿē Jasón ndúúcu náⁿa yā ní n'deechi yā 'iiⁿyāⁿ.

Pablo ndúúcu Silas na yāáⁿ Berea

¹⁰Tuu'mí nūūⁿ hermanos dichó'o yā Pablo ndúúcu Silas ndii yāáⁿ Berea. Ní taachí ndaa yā miiⁿ ní sndaá yā na yaacū sinagoga yeⁿe 'iiⁿyāⁿ Israel s'eeⁿ. ¹¹'Iiⁿyāⁿ s'uuⁿ n'daacá yā nanááⁿ Dendyuūs nguée tan'dúúca 'iiⁿyāⁿ chi snée yā na yaáⁿ Tesalónica. Sta'á yā nduudu miiⁿ ndúúcu vaadi yeenú ní ch'eeⁿ yā nguuví nguuví Escrituras. Neⁿé yā n'diichí yā, ¿áá cuaacu chi 'tíicá? ¹²Neené 'yaaⁿ yā s'téenu yā, n'daataá chi nguée yeⁿe ndaata Israel chi táⁿā n'dai taavi ndúúcu néené 'yaaⁿ saⁿā. ¹³Taachi 'iiⁿyāⁿ Israel s'eeⁿ yeⁿe yāáⁿ Tesalónica chicadínuuⁿ yā chi 'iiⁿyāⁿ yeⁿe yāáⁿ Berea 'aa deenú ntúuⁿ yā yeⁿē nduudu yeⁿe Dendyuūs cáāvā chi ngaⁿa Pablo, tuu'mi ní cheⁿé yā miiⁿ. 'Tíicá ntúuⁿ ca'á

yā vaadi 'caa'va 'yaaⁿ 'iiⁿyāⁿ. ¹⁴Hora míⁿ nūūⁿ hermanos dichó'o yā Pablo ndíⁿ na nuūⁿníⁿyáⁿā. Ní Silas ndúúcu Timoteo ch'etinee yā miiⁿ. ¹⁵'Iiⁿyāⁿ chí cánée chi can'dáa yā Pablo, candée yā saⁿa miiⁿ na yāáⁿ Atenas. Ní Pablo ca'á sa orden 'iiⁿyāⁿ s'eeⁿ chí dichó'o yā Silas ndúúcu Timoteo naachi cunée sa chinúúⁿ cueⁿé 'nūūⁿ. Ní cueⁿé 'iiⁿyāⁿ s'eeⁿ.

Pablo na yāáⁿ Atenas

¹⁶Pablo miiⁿ canee ngiinu sa 'iiⁿyāⁿ na yāáⁿ Atenas. Ní neené ndaachi ndíⁿ espíritu yeⁿē sa taachí n'diichi sa nducyaaca 'iiⁿyāⁿ yeⁿē yāáⁿ chí néené i'téenu yā ídolos. ¹⁷Caⁿa yā n'dee n'dái ná yaacū sinagoga ndúúcu 'iiⁿyāⁿ Israel s'eeⁿ ndúúcu 'iiⁿyāⁿ chí i'téenu yā chí maaⁿ ní 'iiⁿyāⁿ Israel. Ní nguuví nguuví caⁿa ntuúⁿ yā ndúúcu 'iiⁿyāⁿ chí sneé yā nii'vēē. ¹⁸Ní náⁿā 'iiⁿyāⁿ chí ch'eeⁿ chí neené n'dái tiiⁿ, 'iiⁿyāⁿ s'eeⁿ yeⁿe 'iiⁿyāⁿ epicúreos, yeⁿē 'iiⁿyāⁿ estoicos ní n'geecú cheendí yā ndúúcu yā. Ní n'dúúví 'iiⁿyāⁿ ngaⁿá yā: ¿De'e neⁿé caaⁿmaⁿ sáⁿa 'cūū chí tá'tii n'deéé ngaⁿā sá? Ní náⁿa yā ní caⁿa yā: Ngaⁿā sa tan'dúúca chí 'iiⁿyāⁿ chí ngaⁿa yeⁿé ndyuūs ngai. Pablo miiⁿ caⁿa yā yeⁿē evangelio chí ndúúdu ngai yeⁿē Jesucristo ní yeⁿē 'iiⁿyāⁿ chí nnduuchí yā nguaaⁿ tináⁿā. ¹⁹Ní sta'á yā saⁿā ní ndaa yā nanááⁿ 'iiⁿntyéⁿē ndúúcu sa yiicū chí nguuví Areópago. Ní caⁿa yā: ¿Áá cuuvi cádínuuⁿ 'nū de'ē chí ca'cueéⁿ ní chí ngai chí ngaⁿa ní? ²⁰Ngaⁿa ní dendu'ū chí n'daaⁿ ní neⁿé 'nū cadiinuⁿ 'nū de'ē neⁿe caaⁿmāⁿ chuū.

²¹(Naati 'iiⁿyāⁿ yeⁿe yāáⁿ Atenas ndúúcu 'iiⁿyāⁿ chí snúuⁿ yúúní chí snée yā miiⁿ, nguée tuumicadínuuⁿ yā yeⁿē taama naaⁿ, caati dámaaⁿ neⁿe yā caandiveéⁿ yā ní caaⁿmaⁿ yā cosa chí ngai.)

²²Tuu'mi ní Pablo míⁿ chéendii sa náávtaⁿā 'iiⁿntyéⁿē yiicū chí nguuví Areópago, ní caⁿa sa: Ndís'tii saⁿa yeⁿe

yāⁿ Atenas, 'úú tuumicadiinúúⁿ yeⁿe nī chí neené i'téenu nī ndyuūs s'eeⁿ.²³ Cho'ó ní n'diichí lugar naachi cu'téenu nī ndyuūs s'eeⁿ yeⁿ'é nī. Ndaacá 'áámá na santo naachi canéé nguūⁿ nduudu 'cūū, NDYUŪS CHI NGUÉÉ N'DIICHI YŪ. Ndyuūs chí ndís'tiī nguéé n'diichí nī ní i'téenu nī, Ndyuūs miiⁿ chí 'úú ní ngaⁿ'á.

²⁴ Ndyuūs chí din'dái yā iⁿ'yeeⁿdi ndúúcu tanducueⁿ'ē chí véé iⁿ'yeeⁿdi, Señor miiⁿ chí yeⁿ'é yā nanguuvi ndúúcu yeⁿ'ē na yáⁿ'āa miiⁿ. Ní nguéé canúuⁿ yā yaacū chí nín'dai ta'á 'iiⁿ'yāⁿ.²⁵ Ndíí nguéé ndúú chí neⁿ'é yā dē'ē vεε yeⁿ'e 'iiⁿ'yāⁿ caati 'iiⁿ'yāⁿ miiⁿ ní ca'a yā vida nducyaaca 'iiⁿ'yāⁿ yeⁿ'e iⁿ'yeeⁿdi ndúúcu 'yúúné chí yíicú yā ndúúcu tanducueⁿ'ē dendu'ū.

²⁶ Ndyuūs diiⁿ yā chí 'áámá ndaata nducyáácá 'iiⁿ'yāⁿ chí 'cuetinéé yā vmnaaⁿ yáⁿ'āa. Ní vmnááⁿ vmnaaⁿ diíⁿ yā señalar yáⁿ'āa naachi 'cuetinéé yā ndúúcu tiempo chí 'cuetinéé yā na yáⁿ'āa.²⁷ Dendyuūs s'neéⁿ yā 'iiⁿ'yāⁿ na yáⁿ'āa chí n'nuúⁿ yā Dendyuūs miiⁿ ndúúti chí cuuvi ndaā niiⁿ'núⁿ yā níicú ndaacá yā 'iiⁿ'yāⁿ, 'áará chí cuaacu níⁿ'nyúⁿ nguéé yaⁿ'ai canéé yā yeⁿ'e ca'áámá ca'áámá s'uuuⁿ.²⁸ Ní cucáávā 'iiⁿ'yāⁿ miiⁿ canduuchi yú ní inuⁿ'u yú ndúúcu yā ní s'uuuⁿ 'cuetinéé yú ndúúcu yā. Tan'dúúcā chí caⁿ'a tanáⁿ'ā 'iiⁿ'yāⁿ poetas yeⁿ'é nī: Tí ndáátá yeⁿ'ē Ndyuūs s'uuuⁿ.²⁹ Canee yú na ndaata yeⁿ'é Dendyuūs. Nguéé cánéé chí nadacadínuuⁿ yú chí Dendyuūs miiⁿ tan'dúúcā 'díⁿ'nguaaⁿ 'iiⁿ'yāⁿ, tan'dúúcā 'díⁿ'nguae 'iiⁿ'yāⁿ, tan'dúúcā tuúú 'iiⁿ'yāⁿ, tan'dúúcā chí saⁿ'ā din'dái ndúúcu vaadi cadíinūⁿ yeⁿ'ē sa.³⁰ Tuuⁿ'mi ní Dendyuūs nguéé diíⁿ cuenta yeⁿ'ē tiempo yeⁿ'e vaadi tonto yeⁿ'e 'iiⁿ'yāⁿ. Maaⁿ ní Ndyuūs ca'á yā orden nducyaaca 'iiⁿ'yāⁿ nducueⁿ'ē cuaaⁿ chí 'iiⁿ'yāⁿ ndaacadáámí yā yeⁿ'ē nuuⁿ'ndí yeⁿ'é yā.³¹ Cáávā chuū Dendyuūs

'cuuⁿ'miⁿ yā 'áámá nguuvi chí diíⁿ yā juzgar 'iiⁿ'yāⁿ yeⁿ'e iⁿ'yeeⁿdi ndúúcu justicia cucáávā saⁿ'ā miiⁿ chí ndeeve. Cáávā saⁿ'ā miiⁿ Dendyuūs diíⁿ yā chí nducyaaca 'iiⁿ'yāⁿ deenú yā chí cuaacu chí Dendyuūs nadacueéⁿ yā saⁿ'ā nguaaⁿ tináⁿ'ā.

³² Taachí ch'iindiveéⁿ yā chí nnduuchi yā nguaaⁿ tináⁿ'ā, náⁿ'ā yā diíⁿ duuchi yā 'iiⁿ'yāⁿ. Níicú náⁿ'a yā caⁿ'a yā: 'Āā 'caandiveeⁿ ntúuⁿ 'nū yeⁿ'é nī ndii táámá.

³³ Pablo miiⁿ nan'daa sa naavtaⁿ'ā yeⁿ'é yā.³⁴ Náⁿ'a yā chí'téenu yā ní nduuvidaamá yā ndúúcu Pablo miiⁿ. Nguaaⁿ 'iiⁿ'yāⁿ miiⁿ canee 'áámá saⁿ'ā Dionisio yeⁿ'ē 'iiⁿ'ntyéⁿ'ē concilio chí nduuvidaamá yā na lugar Areópago ndúúcu 'áámá n'daataá chí nguuvi tá Dámaris, ndúúcu táámá 'iiⁿ'yāⁿ s'eeⁿ ndúúcu 'iiⁿ'yāⁿ miiⁿ.

Pablo na yáā Corinto

18 Cuayiivi chí chó'oo chúū Pablo miiⁿ ní nan'dáa sa yeⁿ'ē yáāⁿ Atenas ní cueⁿ'e sa na yáāⁿ Corinto.² Ní ndaaca sa 'áámá saⁿ'ā Israel chí nguuvi sá Aquila. Saⁿ'ā miiⁿ yeⁿ'e yáⁿ'āa Ponto chí cáámá ndaā sa yeⁿ'e yáⁿ'āa Italia ndúúcu táⁿ'ā sa chí nguuvi Priscila ti Claudio miiⁿ chí rey ch'ēete ní ca'a sa orden chí nan'daā nducyaaca 'iiⁿ'yāⁿ Israel s'eeⁿ yeⁿ'e yáāⁿ Roma. Pablo cueⁿ'e sa naachi canéé 'iiⁿ'yāⁿ s'eeⁿ.³ Saⁿ'ā miiⁿ ní dáámá diiⁿ sa ntiiⁿ'nyūⁿ ní canéé sá ndúúcu yā. Dáámá nūu diíⁿ yā ntiiⁿ'nyuⁿ. Ntiiⁿ'nyuⁿ yeⁿ'e 'iiⁿ'yāⁿ s'eeⁿ chí din'dái yā va'ai tínūⁿ.⁴ Ní nguuvi nguuvi sábado miiⁿ Pablo n'dee indeé yā na yáacū sinagoga. Ní diíⁿ yā chí nduuvidaamá yā 'iiⁿ'yāⁿ Israel s'eeⁿ ndúúcu 'iiⁿ'yāⁿ s'eeⁿ chí nguéé yeⁿ'ē ndaata Israel lado yeⁿ'é yā.

⁵ Taachi Silas ndúúcu Timoteo ndaā yā yeⁿ'ē yáⁿ'āa Macedonia, Pablo miiⁿ 'aama canéé sá chí ngaⁿ'ā sa nduudu yeⁿ'é Dendyuūs. Ní ngaⁿ'ā sa nduudu cuaacu ní ngaⁿ'a sa ngii sa 'iiⁿ'yāⁿ Israel s'eeⁿ chí

Jesús miiⁿ chi Cristo. ⁶Ní 'iiⁿ'yāⁿ s'eeⁿ ngaⁿá yā contra yeⁿe Pablo ní 'caa'va yā yeⁿē sa. Pablo ch'íidí sa tiinuúⁿ yeⁿē sa. Ní Pablo caⁿa sa chii sa 'iiⁿ'yāⁿ: Ndis'tií ní canéé chí 'āā maáⁿ nī can'dícu nī chi cuuvi ndúúcu nī. 'Úú nguéé can'diicú yeⁿē chuū. Maaⁿ ní caⁿá ndúúcu 'iiⁿ'yāⁿ s'eeⁿ chi nguéé yeⁿē ndaata Israel.

⁷Nan'dáa sa miiⁿ ní cueⁿe sa na vaacu 'áámá saⁿā chi nguuvi Justo chi i'téenu sa Dendyuūs. Vaacu sa canéé sá na niⁿnuúⁿ na yaācū sinagoga. ⁸Níicú saⁿā Crispo saⁿā chi ndii tiiⁿ yeⁿē yāacū sinagoga s'téenu sa Señor 'iivú Ndyuūs ndúúcu nducyaacá yā na vaacu sa. Ní neenē 'yaaⁿ 'iiⁿ'yāⁿ yeⁿe yāāⁿ Corinto miiⁿ ch'indiveéⁿ yā. Ní s'téenu yā ní cheɛdinuūⁿniⁿ yā. ⁹Tuu'mi ní Señor caⁿa yā ndúúcu Pablo na 'yúúduyaaⁿ yeⁿē sa: Nguéé 'va'a di caāⁿmaⁿ di. Nguéé cunēé 'diiⁿ cheendí di. ¹⁰Caati 'úú canéé ndúúcu di ni mar 'áámá 'iiⁿ'yāⁿ nguéé diíⁿ n'gíinu yā ndúúcu di. Ti 'úú neenē n'deeé 'iiⁿ'yāⁿ chi véé ní yeⁿé na yāāⁿ 'cūū.

¹¹Ní canee sá miiⁿ 'áámá nduūyū canee maⁿā. Chi'cueeⁿ sa nduudu yeⁿe Dendyuūs 'iiⁿ'yāⁿ s'eeⁿ.

¹²Taachi saⁿā Galión canéé sá 'iiⁿntyéⁿē gobernador yeⁿe yāⁿāa Acaya, tuu'mi ní 'iiⁿ'yāⁿ Israel s'eeⁿ ní nducueeⁿ yā ti nduuidaamá yā contra Pablo. Ní candéé yā saⁿā nanááⁿ silla yeⁿe juez miiⁿ. ¹³Ní caⁿa yā: Saⁿa 'cūū ngaⁿa sa chi 'iiⁿ'yāⁿ s'eeⁿ cu'téenu yā Dendyuūs nguéé tan'dúucā chi ngaⁿa ley.

¹⁴Taachí Pablo miiⁿ ní tuca'a sa caⁿa sa, tuu'mí saⁿa Galión ngaⁿa sa ngii sa 'iiⁿ'yāⁿ Israel s'eeⁿ: Ndis'tií 'iiⁿ'yāⁿ Israel s'eeⁿ, ndúúti chi 'áámá cosa chi ya'ai n'dai chii o 'áámá tinaⁿā n'dii yā tuu'mi ní cuaacu cucheé ndúúcu nī. ¹⁵Ndúúti chí vaadī tiinguuneéⁿ yeⁿē nduudu yeⁿé nī ndúúcu chi duuchi 'iiⁿ'yāⁿ ndúúcu yeⁿē ley yeⁿé nī, tuu'mi ní, ndis'tií, diíⁿ nī juzgar chuū. Ti 'úú nguéé neⁿé diíⁿ juzgar chi 'túucā.

¹⁶Tuu'mi ní tun'dáa yā 'iiⁿ'yāⁿ chuva'ái yeⁿe cuarto yeⁿe juez. ¹⁷Tuu'mi ní nducyaacá 'iiⁿ'yāⁿ chi nguéé yeⁿe ndaata Israel sta'á yā saⁿā Sóstenes chí chéendii vmnaaⁿ yeⁿē yāacū sinagoga ní ch'eⁿé yā saⁿā nanááⁿ silla yeⁿē juez. Naati Galión miiⁿ nguéé diíⁿ yā cuenta yeⁿe nducueⁿē chuū.

¹⁸Níicú Pablo miiⁿ neenē 'naaⁿ canee sa miiⁿ'ya ní caⁿa sa hermanos: Cuidado 'cuetinéé nī. Cueⁿe sa na barco na yāⁿāa Siria ndúúcu 'áámá táⁿā chi nguuvi Priscila ndúúcu 'áámá saⁿā chi nguuvi Aquila. Vmnaáⁿ vmnaaⁿ na yāāⁿ Cencrea Pablo miiⁿ 'chiica sa yuudū tiiⁿ sa ti 'áámá seña chi diiⁿ sa compromiso ndúúcu Dendyuūs. ¹⁹Tuu'mi ní ndaā sa yāāⁿ Efeso ní Pablo s'neeⁿ sá 'iiⁿ'yāⁿ miiⁿ. Ní sndaa maāⁿ sa na yāacū sinagoga miiⁿ. Ní caⁿa sa ní n'deéé ndeē sa ndúúcu 'iiⁿ'yāⁿ Israel s'eeⁿ. ²⁰'iiⁿ'yāⁿ s'eeⁿ di'cuítu yā saⁿā chi 'nááⁿ cunee sa ndúúcu yā naati nguéé chii 'tuucā. ²¹Naatí yaa'vi sá 'iiⁿ'yāⁿ ní caⁿa sa: Cánéé chí nguεεcúndií na yāāⁿ Jerusalén caāvā 'viicu chi cuchū. Nguεεcunéé ntuúⁿ n'diichí ndis'tií ndúúti chí Dendyuūs neⁿe yā. Ní chiica sá yeⁿē yāāⁿ Efeso ní cueⁿe sa ná barco.

Pablo ndaá yā yāāⁿ Antioquía ní cueⁿe yā ndii chí 'iiⁿnūⁿ viaje

²²Cucheé sá na yāāⁿ Cesarea ní cheⁿe sá diiⁿ sa saludar hermanos chí caⁿá yā na yaācū. Tuu'mi ní cueⁿe sa na yāāⁿ Antioquía. ²³Canéé sá míⁿ 'áámá tiempo. Cun'dáa sa ní cueⁿe sá na orden yeⁿē nducyaaca yāⁿāa Galacia ndúúcu yāⁿāa Frigia. Ní s'neeⁿ chiichi sa nducyaaca 'iiⁿ'yāⁿ chí i'téenu yā Cristo ná vaadī i'teenu.

Apolos ngaⁿá yā nduudu cuaacu na yāāⁿ Efeso

²⁴'Áámá saⁿā Israel chí nguuvi sa Apolos ndáa sa yāāⁿ Efeso yeⁿe yāāⁿ vaacú sa chí nguuvi Alejandría. Saⁿā miiⁿ saⁿā

chi deenú taavi sa. Neené n'deëve ndu-
 udu ye"ē sa ní véé valor sa chi caā"mā"
 sa Escrituras chi canéé nguū". ²⁵ Sa"ā
 mii" ní 'áamá 'ii"yā" chi 'cueé" yā sa"ā
 yúúni ye"ē Señor mii". Ní sa"ā mii" ní
 dii" sa ndúúcu núú"má" espíritu ye"ē
 sa. Ní nga"ā sá ngí'cueé" sa cué"e daā"-
 ma" nduudu ye"ē Dendyuūs mii", 'áará
 chí dámaā" deenu sa ye"ē chí chēed-
 inuū"ni" Juan. ²⁶ Ní Apolos mi" tucá'a
 sa ca"ā sa nguéé ndúúcu vaadi 'va'a
 chēeti yaācū sinagoga taachí sa"ā Aquila
 ndúúcu tá"ā sa Priscila ch'iindiveé" yā,
 s'néé" vi'í yā sa"ā ní chí'cuéé" cá yā
 sa"ā más ca ye"ē yúúni cuaacu ye"ē
 Ndyuūs. ²⁷ Apolos ne"e sa cho'o sa yá"āa
 Acaya, ní hermanos ní ca"ā yā chí
 ca"ā sá"ā mii"ya. Ní hermanos dingúu"
 yā ye"e 'ii"yā" s'ee" chí i'téenu yā
 Cristo chí 'cuaá" yā sa"ā. Tuu'mi ní
 ndaā sa mii" ní chinnee taavi sa 'ii"yā"
 chí i'téenu yā cáávā favor ch'ēete ye"e
 Dendyuūs. ²⁸ Ndúúcu nducue"ē poder
 n'deéé ch'éécū cheendi sa ndúúcu 'ii"yā"
 Israel s'ee" nanáá" nducyaaca 'ii"yā" s'ee"
 ní ngi"i sa chí Jesús mii" chí Cristo chí
 nndeëve Dendyuūs cáávā Escrituras.

Pablo na yáā" Efeso

19 Taachí canéé Apolos mii" yāā"
 Corinto, Pablo mii" chí'ínú che"e
 sa yá"āa ye"e distrito cuaa" nii"nuú"
 ní ndaa sá yāā" Efeso. Ní ndaaca sá
 n'dúúví sa"ā chí i'téenu yā Cristo. ² Ní
 ca"ā sa: ¿'Áá dii" di recibir Espíritu
 N'dai ye"e Ndyuūs taachí chí'teenu di?
 Ní 'ii"yā" s'ee" mii" ní ca"ā yā: Nguéé
 n'giindivee" 'nū chí véé Espíritu N'dai
 ye"e Ndyuūs.

³ Tuu'mi ní ca"ā sa: ¿Du'u chēedin-
 uū"ni" dii? 'Ii"yā" s'ee" ní cā"ā yā: Chēed-
 inuū"ni" 'nū cucáávā nduudu Juan.

⁴ Pablo mii" ní ca"ā sa: Juan mii"
 chēedínú"ni" sa chí cuēedínú"ni"
 'ii"yā" ye"ē chí indaacadaamí yā ye"ē
 nuu"ndi ye"e yā, ní Juan nga"ā sa ngii

sa 'ii"yā" chí cu'téenu yā 'ii"yā" chí
 cuchii yā cuaa" dáámí sá. 'Ii"yā" 'cúu
 chí Cristo Jesús mii".

⁵ Taachí ch'iindiveé" yā chuū chēed-
 inuū"ni" yā ndúúcu chí duuchi Señor
 Jesús mii". ⁶ Taachí Pablo s'nduu" ta'á
 yā vmnaa" ye"e 'ii"yā" s'ee" tuu'mi ní
 ndaá vmnaa" ye"e 'ii"yā" s'ee" Espíritu
 N'dai ye"e Ndyuūs. Ní ca"ā yā davaacu
 chí n'dáá" ní ca"ā yā chí" chí Dendyuūs
 yaa'vi yā. ⁷ Sa"ā s'ee" ní ngii sa tan'dúúca
 ndiichúví sá.

⁸ Sndáá Pablo mii" na yaācū sinagoga
 mii" ní ca"ā cuaacú sá taandúú cuuvi
 'ii"nu" 'iyū, nguéé ndúúcu vaadi 'va'a.
 Ní n'cuee" sa ní nga"ā sa ndíí ne"e sa
 chí cu'téenu yā ye"ē chí Dendyuūs nga"ā
 yā ntii"nyu". ⁹ Naatí dii" chēechí ná"ā
 yā na staava ye"é yā ní nguéé chí'téenu
 yā. Nguéé ca"ā yā n'daacā ye"e yúúni
 ye"e Dendyuūs mii" nanaa" nducyaaca
 'ii"yā". Ndaacadaamí Pablo ye"é yā ní
 snee vi'í sa 'ii"yā" chí i'teenú yā Cristo.
 Ngí'cuee" sá nguuvi nguuvi ná escuela
 chí nguuvi Tiranno. ¹⁰ Canéé sá taan-
 duu 'úúvi nduūyū. 'Tíicā chí nducyaaca
 'ii"yā" chí snée yā na yá"āa Asia, 'ii"yā"
 Israel s'ee" ndúúcu 'ii"yā" s'ee" chí nguéé
 ye"ē ndaata Israel ch'iindivee" yā ndu-
 udu ye"ē Señor Jesús. ¹¹ Dendyuūs mii"
 dí" yā vaadi n'giinu ch'ēete n'dai cáávā
 ta'a Pablo mii". ¹² Manera chí 'tíicā sta'á
 yā paños ndúúcu delantales chí tuu'vi
 cuerpo ye"e Pablo ní candée yā nanáá"
 'ii"yā" ngiita. 'Iicu ndiiví ca'ai ye"é yā
 ndúúcu 'yúúné s'ee" chí nguéé n'daacā
 ye"é yáá"nguiinūu".

¹³ Tuu'mi ní ná"ā 'ii"yā" Israel s'ee" chí
 ngiicá yā ndíí mii" ndíí 'muu" chí nga"ā
 yā ndúúcu espíritu chí nguéé n'daacā
 ye"ē yáá"nguiinūu" ne"é yā caa"má" yā
 chí ye"ē Jesús mii". Ní nga"ā yā: 'Úú ní
 caacá cáávā Jesús mii", 'ii"yā" chí nga"ā
 Pablo ye"ē chí can'daā na cuerpo mii".

¹⁴ 'Áamá sa"ā chí nguuvi Esceva
 véé ndēēchē daiya sa chí sa"ā s'ee".

Saⁿā miiⁿ ní saⁿā Israel ní saⁿā chi ngaⁿa ntiiⁿnyuⁿ yeⁿe chiiduú s'eeⁿ yeⁿē Israel. Ní daiya sa díⁿ yā chuū. ¹⁵Nan'guēcútaⁿā espíritu chi nguéé n'daacā yeⁿe yáá'n'guiinūuⁿ ní caⁿá yā: 'Úú ní n'diichi Jesús miiⁿ ní deenú ntúuⁿ du'ū chi Pablo. Ndís'tiī, ¿du'u ndís'tiī?

¹⁶Ní 'iicu saⁿā chi canee sa ndúucu es- píritu chi nguéé n'daacā cúⁿu sá ndúúcū 'iiⁿyāⁿ s'eeⁿ, ní chíchee sa ndúúcū 'iiⁿyāⁿ s'eeⁿ ní diiⁿ ca sá ndúúcū 'iiⁿyāⁿ s'eeⁿ. 'Iiⁿyāⁿ s'eeⁿ ní chéenu yā yeⁿé va'āi miiⁿ. 'Āā ntéé snúúⁿ yā catecai vmnáaⁿ yā ní nca'ái yā. ¹⁷Chuū chicadiinúúⁿ nducyaaca 'iiⁿyāⁿ chi snee na yáāⁿ Efeso, tan'dúúcā 'iiⁿyāⁿ Israel s'eeⁿ 'tiicá ntúuⁿ 'iiⁿyāⁿ s'eeⁿ chi nguéé yeⁿe ndaata Israel. Ní nducyaaca yā dii'yá yā chii. Ní chíí ch'ēete ca Señor Jesús miiⁿ.

¹⁸Neené 'yaaⁿ yā chi s'téenu yā ní ndaá yā. Ní caⁿa yā chi véé nuuⁿndi yeⁿé yā. ¹⁹Neené 'yaaⁿ 'iiⁿyāⁿ chi ch'ēeⁿ yā cosas magias ndéé yā libros yeⁿé yā ní chicyáⁿa yā nanááⁿ nducyaaca 'iiⁿyāⁿ. Ntun'dáa yā cuenta yeⁿe libros ní ch- cadiinúúⁿ yā chí ngíí 'uūvi ngeecu ndi- ichi mil tuūmi yeⁿe 'díⁿnguee. ²⁰'Tíicā chíi 'yaaⁿ 'iiⁿyāⁿ chi chíteenu nduudu yeⁿe Señor 'iivú Dendyuūs miiⁿ. Ní 'áámá canéé chíichi yā nduudú Dendyuūs miiⁿ.

²¹Cho'oo chúū ní Pablo miiⁿ nacadi- inu sa na staava yeⁿē sa chí cho'o sa na yáⁿā Macedonia ndúúcū yáⁿā Acaya ní cuayiivi caⁿā sa na yáāⁿ Jerusalén. Ní ngaⁿā sa: Cuayiivi chí 'āā cheⁿé yáāⁿ s'eeⁿ canee chí n'diichi ntúuⁿ yáāⁿ Roma. ²²Ní dicho'o na yáⁿā Macedonia 'uūvi saⁿa, Timoteo ndúúcū Erasto chí cun- née yā 'iiⁿyāⁿ. Pablo miiⁿ canee sa 'áámá tiempo na yáⁿā Asia.

'Caa'vá yā na yáāⁿ Efeso

²³Tiempo miiⁿ ch'iindī 'áámá vaadi 'caa'va ch'ēete yeⁿē yúúni yeⁿe Dendyuūs miiⁿ. ²⁴Caati cunee 'áámá saⁿā chí nguuvi sa Demetrio chí

din'dái sa yaācū n'gaiyāā yeⁿe imagen chí nguuvi Diana. Dámaāⁿ 'diiⁿnguee din'dái sa. Ní diiⁿ sa ganar n'dee taavi tuūmi yeⁿē ntiiⁿnyuⁿ yeⁿē sa ndúúcū saⁿā s'eeⁿ chidin'dái yā yaācū n'gaiyāā s'eeⁿ. ²⁵Demetrio míⁿ ní diiⁿ sa chí nduuvidaamá saⁿā s'eeⁿ chí idiiⁿ ntíⁿnyuⁿ miiⁿ. Caⁿa Demetrio: Ndís'tiī saⁿā, déenu ní chí véé tuumí yeⁿē yú yeⁿē ntiiⁿnyuⁿ 'cūū. ²⁶Naati inaáⁿ ní ní n'giindiveéⁿ ní chí Pablo 'cūū taanduvéé diiⁿ sa chí neené n'dai 'iiⁿyāⁿ s'téenu yā. Nguéé dámaaⁿ yáāⁿ Efeso ti nuuⁿmaⁿ yáⁿā Asia. Ní ngaⁿā sa chí nguéé dendyuūs s'eeⁿ chí din'dái yā ndúúcū ta'á yā. ²⁷Nguee dámaāⁿ negocio yeⁿē yú chí véé peligro yeⁿē chí 'aa ntéé du'ū vee. 'Tiicá ntúuⁿ yáacū yeⁿē imagen Diana chí ch'ēete míⁿ, mar 'áámá 'iiⁿyāⁿ 'āā ntéé neⁿe yā. Ní tuca'á yā natuuví yā chí ch'ēete yeⁿē Diana miiⁿ chí i'teenu nuuⁿmaⁿ nación yeⁿe yáⁿā Asia ndúúcū núúⁿmáⁿ iⁿ'yeeⁿdí 'cūū.

²⁸Taachí ch'iindiveéⁿ yā chuū nduuvi taáⁿ yā ní 'cai yā, ngaⁿa yā: Ch'ēete n'dai tá táⁿā imagen Diana yeⁿe 'iiⁿyāⁿ yeⁿē yáāⁿ Efeso.

²⁹'Iiⁿyāⁿ yáāⁿ miiⁿ chíidáánā yeⁿé yā. Ní sta'á yā saⁿā chí nguuvi Gayo ndúúcū saⁿā chí nguuvi Aristarco ní candéé yā saⁿā s'eeⁿ na teatro. Saⁿā miiⁿ ní yeⁿē yáⁿā Macedonia ní compañeros yeⁿe Pablo. ³⁰Pablo miiⁿ neⁿe sa can'dáa sa nanááⁿ 'iiⁿyāⁿ yáāⁿ miiⁿ naati 'iiⁿyāⁿ s'uúⁿ chí i'téenu yā Cristo nguéé 'cuúⁿ yā. ³¹Dendú'ū náⁿa 'iiⁿntyéⁿē saⁿā yeⁿe yáⁿā Asia, saⁿā chí amigo yeⁿē Pablo dich'oⁿ yā caaca yeⁿē chí ngaⁿá yā chí nguéé caⁿā sa na teatro. ³²Náⁿa yā n'gai yā 'áámá cosa, náⁿa yā táámá cosa ti ngi- idáánā yeⁿé yā. Náⁿa yā miiⁿ ní nguéé déenú yā de'ē cáāvā nduuvidaamá yā. ³³Ní 'iiⁿyāⁿ yeⁿe Israel tun'dáa yā Ale- jandro nguaaⁿ 'iiⁿyāⁿ chí n'dee n'dái. 'Iiⁿyāⁿ Israel s'eeⁿ ingúúndaí yā saⁿā. Tuuⁿmi ní Alejandro míⁿ ca'a sa ndúúcū

ta'a sa chi cunee 'diiñ. Ne'e sa caa'ma'n sa ye'e maa'n sa nanáa'n 'ii'nyā'n yáa'n mii'n. ³⁴Taachí tuumicadiinú'u'n yā chi sa'n'a Israel sa'n'a mii'n nducyáacá yā 'caí yā taanduu 'uuví hora: Ch'etete n'dai imagen ndyuūs Diana ye'e 'ii'nyā'n ye'e yáa'n Efeso.

³⁵Tuu'mi ní sa'n'a 'ii'ntyé'nē chi id-ingú'u'n dii'n sa chí 'caadii nducyaaca yā cheendi yā ní ca'n'a sá: Ndís'tii sa'n'a s'ee'n ye'e yáa'n Efeso, ¿du'u sa'n'a chi nguéé deenu sa chí 'ii'nyā'n ye'e yáa'n Efeso dii'n yā cuidado yaacū ye'e tá'a ch'etete n'dai chí imagen Diana ní imagen ye'e tá chí ndaa ye'e nanguuvi? ³⁶Deenu yú chuū chí mar 'áamá 'ii'nyā'n nguéé cuuvi caa'má'n yā contra ye'e chuū. Ndís'tii canéé chi 'cuetinéé 'díñ nī ní inada-cadiinú'u'n nī. Ní nguéé díñ nī de'e vee. ³⁷Naatí candéé nī sa'n'a s'ee'n ti nguéé dii'n duucú sá 'áamá cosa ye'e yáacū ndíí nguéé ndúú nga'n'a rá yā chi nguee n'daaca lado ye'e imagen dendyuūs n'daataa ye'e yú. ³⁸Nduuti chí Demetrio mii'n ndúúcu taná'a 'ii'nyā'n chí díñ yā nti-i'nyu'n mii'n véé vaadi 'caa'va ndúúcu sa o dendú'u contra 'áamá 'ii'nyā'n, tuu'mi ní, can'déé yā sa'n'a vaacuyáa'n ní véé sa'n'a 'ii'ntyé'nē. Míñ ní cuuvi caa'ma'n 'áamá yā táamá yā. ³⁹Ndúúti chí ngiicá nī ye'e táamá naa'n dendu'u 'ii'ntyé'nē s'ee'n cuuvi cāa'ma'n yā chéé chí cuaacu. ⁴⁰Tí cáandá ye'e yú chí caaca nuu'ndí yā ye'e yú ní cadiinú'u'n yā ye'e chí 'caí yú 'maa'n. Nguéé mar 'áamá nduudu chí caa'ma'n yú ye'e chuū.

⁴¹Taachí ca'n'a yā chuū ní díñ yā des-pedir nducyaaca yā.

Pablo cue'e yā yá'aa Macedonia ndúúcu yá'aa Grecia

20 Taachí canee 'díñ 'ii'nyā'n, yaa'vi Pablo mii'n 'ii'nyā'n s'ee'n chí i'téenu yā Cristo. Ní taachí Pablo ca'a sa consejo 'ii'nyā'n s'ee'n ní 'cuetinéé n'daaca yā ndúúcu Dendyuūs mii'n. Ní dii'n sa des-

pedir ye'e yā ní tu'ma'n'a sá 'ii'nyā'n s'ee'n. Tuu'mi can'dáa sa ní cue'e sa yá'aa Macedonia. ²Cuayiivi míñ che'nē ntúu'n sa yáa'n s'ee'n chí chí'cuee'n taavi sa 'ii'nyā'n ye'e ndúúcu ye'e Dendyuūs mii'n ní ndaa sa yá'aa Grecia. ³Cuayiivi taachi 'aa cānee sa 'ii'nyā'n 'ii'yū mii'n ní cuayiivi taachí nadicadínuu'n sa chí 'ii'nyā'n Israel s'ee'n chí díñ n'gíinu yā ndúúcu sa hora chí ne'e sa tucá'a sa sndaa sa na barco mii'n na yá'aa Siria, tuu'mi ní nada-cadínuu'n sa chuū chí cho'o ntúu'n sa na yá'aa Macedonia. ⁴Ní sá'n'a s'uu'n che'e sá ndúúcu Pablo ndii yá'aa Asia. Sá'n'a s'uu'n ní Sópater ye'e yáa'n Berea, ndúúcu Aristarco ní sa'n'a chí nguuvi Segundo sa'n'a s'ee'n ye'e yáa'n Tesalónica, ndúúcu sa'n'a chí nguuvi Gayo ye'e yáa'n Derbe, ndúúcu Timoteo, ndúúcu sa'n'a s'ee'n ye'e yá'aa Asia chí sá'n'a Tíquico ndúúcu sá'n'a Trófimo. ⁵'ii'nyā'n s'ee'n néé can'dáa naa'n yā ní canéé ngíinu yā nús'uu'n na yáa'n Troas chí nii'nuú' nuu'n'nyá'a. ⁶Taachi 'aa chó'oo nguuví ye'e pan chí nguéé levadura, tuu'mi cue'e 'nū na barco ye'e yáa'n Filipos. Cho'oo nyu'u ngu-uvi ní ndaa 'nū ní nduuvidaamá 'nū ndúúcu 'ii'nyā'n s'ee'n ye'e na yáa'n Troas. Ní ch'etinéé 'nū ndeéchē nguuvi mii'n.

Pablo na yáa'n Troas

⁷Nguuví domingo vnaá'n vnaa'n ye'e ndaata mii'n nduuvidaamá 'ii'nyā'n s'ee'n chí i'téenu yā Cristo chí n'deé yā pan. Pablo mii'n ní ngi'cuee'n sa 'ii'nyā'n. Canéé chí can'dáa sa nguuvi chí cuchii. Ní chí'cuee'n sa taanduu ndíí ma'n'a yaa'n. ⁸Ní na cuarto yaacū naachi nduuvidaama yā néené n'deé lámparas vee. ⁹Náa tiempo ca'n'a Pablo mii'n ní 'áamá sa'n'a 'díñ chí nguuví sá Eutico chí véé sá na ventana, cyaadú n'dai sa. Sa'n'a mii'n chin'dáa sa ndiichí ndii 'ii'nyā'n piso. Taachí nadacué'e yā sa'n'a mii'n ní 'aa n'dii sa. ¹⁰Tuu'mi ní nangua'āi Pablo mii'n ní tu'ma'n'a yā sa'n'a ní can'nuu yā sa'n'a. Ní

caⁿa Pablo chiī yā saⁿā s'uuⁿ: Nguéé 'va'á nī. Canduuchi ntúūⁿ staava yeⁿē sa taama vmnéⁿēe. ¹¹ Ch'iinu maáⁿ ní Pablo cuindáá tuuⁿ yā cuaaⁿ 'niīⁿnuúⁿ. Ní n'dee yā pan. Ní che'é yā ndúucu yā chi candíí yā ch'icueeⁿ ntúuⁿ yā nuuⁿmaⁿ yaaⁿ ndii chidēēve. Nífcú cuēⁿe yā. ¹² Candéē yā saⁿā 'dííⁿ miiⁿ ní candúúchi sa. Ní yéénú n'dai yā ndúúcū 'viich'etífínūuⁿ ch'etete.

Cueⁿé yā yeⁿe yāāⁿ
Troas ndii yāāⁿ Mileto

¹³ Nús'uū ni can'dáá naaⁿ 'nū ní cueⁿe 'nū na barco na yāāⁿ Asón chi ndaacá 'nū Pablo yāāⁿ miiⁿ. Pablo miiⁿ 'āā neⁿe sa chí caaca sa na yāⁿāa. ¹⁴ Taachí Pablo nduuvidaama sa nduucú 'nū na yāāⁿ Asón miiⁿ, ní cueⁿé 'nū na barco miiⁿ, ní ndaa 'nū na yāāⁿ Mitilene. ¹⁵ Cueⁿé 'nū na barco miiⁿ ní chidēēve táámá nguuví ndaa 'nū niīⁿnuúⁿ na isla Quío. Ní chidēēve táámá nguuví chi ndaa 'nū isla Samos. Ní cueⁿé 'nū ndaa 'nū na yāāⁿ Trogilio. Ch'etetineé 'nū nguiinū miiⁿ. Chidēēve táámá nguuví cueⁿé 'nū na barco ní ndaa 'nū yāāⁿ Mileto. ¹⁶ Pablo miiⁿ nacadínuuⁿ sa chí ch'óo sa yāⁿāa Asia. Canéé chí cacyiinu sa chí cunee ngiinu sa nguuví yeⁿē Pentecostés chí 'viicu yeⁿe cosecha na yāāⁿ Jerusalén ndúúti chí cuuvi.

Pablo ngaⁿa sa nduudu cuaacu ní diiⁿ sa despedir 'iiⁿyāⁿ yeⁿe yāāⁿ Mileto

¹⁷ Pablo dich'óo sa 'iiⁿyāⁿ yeⁿē yāāⁿ Mileto ndii yāāⁿ Efeso chí 'cái yā 'iiⁿyāⁿ ndiicúú chí ngaⁿa ntiīⁿnyuⁿ yeⁿē yaacū. ¹⁸ Taachí ndaa 'iiⁿyāⁿ s'eeⁿ nanááⁿ Pablo, caⁿa sá chíi sa 'iiⁿyāⁿ s'eeⁿ: Ndí's'tiī deenú nī ti ndii nguuví vmnááⁿ vmnaaⁿ chí ndaa yāⁿāa Asia táácā dííⁿ ní canéé nduucú nī tanducuéⁿē tiempo. ¹⁹ Dííⁿ ntiīⁿnyuⁿ yeⁿe Señor ndúúcū vaadī ndiicúúⁿ taavi. Ch'eenú chíi taanduvéé chí nguéé n'daacā chí diiⁿ 'iiⁿyāⁿ Israel s'eeⁿ nduucú. Ch'ēcú nífcú tun'daa nuūⁿnīⁿ

nduutinaáⁿ. ²⁰ Ní 'áámá ngaⁿa tanducuéⁿē dendúú chí n'daacā yeⁿé nī. Ní chí'cueéⁿ nanááⁿ nducyaaⁿ 'iiⁿyāⁿ nduu va'ai nduu va'ai. ²¹ Ní caⁿa nduudu cuaacu 'iiⁿyāⁿ Israel s'eeⁿ ndúúcū 'iiⁿyāⁿ s'eeⁿ chí nguéé yeⁿē ndaata Israel yeⁿē chí ndaacādaamí yā yeⁿé nducuéⁿē nuuⁿndi yeⁿé yā nanááⁿ Dendyuūs. Ní cu'téenu yā yeⁿē Señor Jesucristo yeⁿē yú. ²² Maaⁿ ní cun'diichi nī. Canéé chí dííⁿ cucaava espíritu yeⁿé. Caⁿa na yāāⁿ Jerusalén ní nguéé deenú d'ē 'cueēnú miiⁿ. ²³ Maaⁿ deenú chí Espíritu N'dai yeⁿe Ndyuūs miiⁿ ngaⁿa yā ngii yā 'úú na nducyáácá yāāⁿ chí caⁿa cunee ngiínú chí 'cueēnú cuuví ní caⁿa vácūú. ²⁴ Naati mar 'áámá naaⁿ nguéé idifⁿ cuenta ndii nguéé ndúú ya'ái 'úú vida yeⁿé maáⁿ. Canee ngiínú chí di'cuiínú ntiīⁿnyūⁿ yeⁿé, ntiīⁿnyuⁿ chí teē Señor Jesús 'úú chí caaⁿmaⁿ nduudu cuaacu yeⁿé yā yeⁿē evangelio chí ndúúdú ngai ndúúcū vaadī yeenú. Nduūdū miiⁿ yeⁿe favor ch'etete yeⁿé Dendyuūs. ²⁵ Maaⁿ ní 'caandiveⁿ nī. 'Úú ní deenú ti mar 'áámá ndí's'tiī nguaaⁿ 'iiⁿyāⁿ naachí ch'óo ní caⁿa yeⁿe chí Dendyuūs ngaⁿa yā ntiīⁿnyuⁿ mar 'áámá nī 'aa ntéé n'diichí nī naáⁿ. ²⁶ Tanducuéⁿē chuū ngaⁿa ngí ndí's'tiī maaⁿnguuví caati 'úú nguéé canee chí dííⁿ responder yeⁿē mar 'áámá nī yeⁿē tanducuéⁿē vida yeⁿē tanducuéⁿē 'iiⁿyāⁿ. ²⁷ Nguéé chee'diití ti caⁿa tanducuéⁿē consejo yeⁿe Dendyuūs ndúúcū ndí's'tiī. ²⁸ Tuu'mi ní cundēē nī cuidado yeⁿē maáⁿ nī ndúúcū nducyáácá 'iiⁿyāⁿ chí i'téenu yā ti Espíritu N'dai yeⁿe Ndyuūs chí'neéⁿ yā ndí's'tiī cáávā chí cuuvi diiⁿ nī cuidado yeⁿe 'iiⁿyāⁿ chí i'téenu Señor, 'iiⁿyāⁿ chí caⁿa yā yaacū yeⁿe Señor. Señor miiⁿ ní cai yā 'iiⁿyāⁿ ndúúcū yuuúⁿ yeⁿē maáⁿ yā. ²⁹ 'Úú ní deenú chí cuayiivi taachí 'āā ntéé canduuchi ní ndaa 'iiⁿyāⁿ tan'dúúcā lobos nguaaⁿ ndí's'tiī ní dííⁿ yā chí nguéé diiⁿ n'daacā nī ndúúcū tanducuéⁿē 'iiⁿyāⁿ. ³⁰ Nguaaⁿ

ndís'tiī nūⁿ nacueeⁿ sáⁿá s'eeⁿ chi ngaⁿa nduudu chi nguéeⁿ n'daacā chi cuuvi candéé sa 'iiⁿyāⁿ s'eeⁿ chí i'téenu yā Cristo ndúucu sa. ³¹ Cáávā chuū cuin'diichi n'daacā nī. N'gáácú nī ti cheeti 'iiⁿnūⁿ nduuyū ndii nguuvi ndii n'gaaⁿ nguéeⁿ chí'neéⁿ naáⁿ caⁿá ndúucū nuūⁿnīⁿ nduutinaáⁿ 'áámá 'áámá ndís'tiī. ³² Maaⁿ nī ndís'tiī hermanos, i'neéⁿ ndis'tiī yeⁿe Dendyuūs ndúucū nduudu yeⁿe favor ch'ete taavi yeⁿe yā. Nduudu miīⁿ diitu ch'etéⁿ chí 'cuiitá ndis'tiī ní teē ndís'tiī 'áámá cosa chí véé chí cuuví yeⁿe nī ndúucū nducyaaca 'iiⁿyāⁿ chí Dendyuūs didεevé yā. ³³ Nguéé díⁿ n'gueēē ndíⁿ nguéeⁿ tuumi 'díⁿnguēē ndíⁿ nguéeⁿ ndúú catecai 'iiⁿyāⁿ. ³⁴ Ndís'tiī ní deenú nī chí ta'á dichí'vē 'úú ndúucū 'iiⁿyāⁿ chí snéé nducú yeⁿe nducuéⁿ chí neⁿe 'nū. ³⁵ Tanducuéⁿ chuū chí'cueéⁿ ndís'tiī chí diīⁿ yú ntiīⁿnyuⁿ 'túucā. Caneé chí cuuvi cunnee yú 'iiⁿyāⁿ chí ngi'vaachí. Ní n'ngaacu yú nduudu yeⁿe Señor Jesús miīⁿ chí caⁿa yā: N'daí taavi ca chí ca'a yú nguéeⁿ tí chí cuta'á yú.

³⁶ Taachi caⁿa yā chuū chiintii'yá yā ní caⁿangua'á yā ndúucū nducyaaca 'iiⁿyāⁿ s'uúⁿ. ³⁷ Tuu'mi ní nducyaaca yā cheecu taaví yā ní tú'ma'á yā Pablo, maaⁿ ní 'neeⁿ cheendi yā 'iiⁿyāⁿ. ³⁸ Néené ya'ai taaví yā cáávā nduudu chí caⁿā Pablo miīⁿ chí 'āā ntéé nanguεεcuneeⁿ n'diichi nī naáⁿ. Ní cueⁿe yā canguu yúúni yā saⁿā ndii na barco.

Pablo cueⁿe sa na yáāⁿ Jerusalén

21 Cuayiivi chí n'daā cá 'nū yeⁿe 'iiⁿyāⁿ s'eeⁿ, cueⁿe 'nū na barco ní cueⁿe 'nū yúúni cuaacu ní ndaá 'nū na isla Cos. Chidεeve táámá nguuvi cueⁿe 'nū na barco ní cho'ó 'nū na isla Rodas ní ndii yeⁿe isla miīⁿ ndaá 'nū na yāā Pátara. ² Ní ndaacā 'nū 'áámá barco chí caⁿa na yáⁿāa Fenicia, cuch'éé 'nū cueⁿe 'nū na barco. ³ Ní n'diichí 'nū

isla Chipre chí snee lado tá 'cueēē. Ní cueⁿe 'nū na yáⁿāa Siria, ní ndii miīⁿ ndaá 'nū na yāā Tiro tí barco miīⁿ míⁿ cu'neeⁿ carga yeⁿe. ⁴ Nndaacá 'nū 'iiⁿyāⁿ s'eeⁿ chí i'téenu Cristo ní canéé 'nū miīⁿ ndeēchē nguuvi. 'Iiⁿyāⁿ s'eeⁿ ní ngaⁿa yā ngiī yā Pablo miīⁿ cáávā Espíritu N'dai yeⁿe Ndyuūs chí nguéeⁿ caⁿa sa yáāⁿ Jerusalén. ⁵ Taachi snuūⁿ ca'ā nguuvi miīⁿ nan'dáa 'nū nducyaaca 'iiⁿyāⁿ ndaá yā chí cunee ngínú yā nús'uu ndúucū n'daataá yeⁿe yā ndúucū daiya yā ndii 'áámá lado yeⁿe yāāⁿ. Ní nducyaaca yā chiintii'yá yā na 'diituú nuūⁿnī'yáⁿā. ⁶ Ní tu'maⁿa 'nū hermanos 'áámá 'nū taama 'nū ní cueⁿe 'nū na barco. Ní 'iiⁿyāⁿ s'eeⁿ ní cunaⁿa yā na vaacu yā.

⁷ Nús'uú ní ch'iinu cheⁿe 'nū na barco. Cueⁿe 'nū yeⁿe yāāⁿ Tiro ní ndáa 'nū yāāⁿ Tolemada. Ní taachí yaa'vi hermanos nús'uu ch'εetineé 'nū ndúucu yā 'áámá nguuvi. ⁸ Chidεeve táámá nguuvi miīⁿ ní Pablo ndúucū nús'uu chí snéé 'nū ndúucu sa, can'dáa 'nū. Cueⁿe 'nū na yāāⁿ Cesarea. Ní sndāa 'nū va'āi yeⁿe Felipe chí ngaⁿa sa evangelio chí ndúúdu ngai yeⁿe Jesucristo. Felipe miīⁿ 'áámá saⁿā naachi ndeēchē diáconos. Ní canéé 'nū ndúucu sa. ⁹ Saⁿā miīⁿ cuūⁿ n'daataá n'gá'yāa daiya sa chí ngaⁿā tá chí Ndyuūs yaa'ví yā. ¹⁰ Ch'εetinéé 'nū n'deeé nguuví. Cuch'ééⁿ 'áámá saⁿā profeta chí caaⁿmaⁿ chí cuchí chí yeⁿe yáⁿāa Judea. Saⁿā miīⁿ nguuvi sa Agabo. ¹¹ Saⁿā miīⁿ ní n'diichi sá nús'uū. Sta'ā sá cinta yeⁿe Pablo miīⁿ ní ca'ā chiichi sá ca'a Pablo ndúucū ta'á yā. Ní caⁿā sá: Chuū ngaⁿa Espíritu N'dai yeⁿe Ndyuūs: 'Tíicā 'iiⁿyāⁿ Israel s'eeⁿ yeⁿe yāāⁿ Jerusalén ca'ā chiichí yā saⁿa yeⁿe cinta 'cūū. Ní nca'á yā sa'ā ta'a 'iiⁿyāⁿ s'eeⁿ chí nguéeⁿ yeⁿe ndaata Israel.

¹² Taachí ch'iindiveéⁿ 'nū ndúucū 'iiⁿyāⁿ yāāⁿ miīⁿ nducyáacá 'nū chiica 'nū Pablo miīⁿ chí nguéeⁿ caⁿa sa yáāⁿ Jerusalén. ¹³ Tuu'mi ní Pablo miīⁿ

nan'gueεcútaⁿā sa: ¿De'ē cúvíví chí ngeεcú ndís'tií ní neéné i'neeⁿ ya'ai nī staāvā yeⁿé? Ti 'úú ní nguéé dámaāⁿ chí 'caāchiichí yā 'úú caati canéé chí 'cuuví na yāāⁿ Jerusalén cucáāvā Jesús miiⁿ.

¹⁴ Nguéé cuuvi di'cuítu 'nū 'iiⁿyāⁿ chí cu'neeⁿ 'nū 'iiⁿyāⁿ ní ngaⁿá 'nū: Cuuví tan'dúúca chí neⁿe Señor.

¹⁵ Cho'ōo ngúvíví miiⁿ cúcheε 'nū na yāāⁿ Jerusalén ndúúcu dendu'u yeⁿé 'nū.

¹⁶ Ní ndaa ntúuⁿ yā ndúúcu nús'uu náⁿa yā chí i'téenu Jesucristo yeⁿe yāāⁿ Cesarea. Ní 'iiⁿyāⁿ s'eeⁿ ndéε yā nús'uu na vaacu 'áámá saⁿā chí nguuvi Mnasón chí yeⁿe isla Chipre. Saⁿā miiⁿ i'teenu sa cuaaⁿ vmnaaⁿ ní nús'uu ch'εetinée 'nū ndúúcu sa.

Sta'á yā Pablo na yaācū templo

¹⁷ Taachí ndaaⁿ 'nū na yāāⁿ Jerusalén, hermanos yeenú taavi yā taachi sndaa 'nū. ¹⁸ Chideεve táámá nguuvi Pablo miiⁿ cueⁿe sa ndúúcu 'nū ní snaáⁿ 'nū Jacobo ndúúcu nducyáácá 'iiⁿyāⁿ ndiicúú s'eeⁿ chí 'āā nduuvidaama yā. ¹⁹ Taachi diiⁿ sa saludar 'iiⁿyāⁿ s'eeⁿ, Pablo caⁿa sá chii sa 'iiⁿyāⁿ ca'áámá ca'áámá nducueⁿē dendu'u chí Dendyuūs dííⁿ yā nguaaⁿ 'iiⁿyāⁿ s'eeⁿ chí nguéé yeⁿē ndaata Israel caavā ntiⁿnyúⁿ yā. ²⁰ Taachí 'iiⁿyāⁿ s'eeⁿ ch'iindiveéⁿ yā chuū, s'téenu yā Dendyuūs ní caⁿa yā chii yā saⁿā: 'Caandiveéⁿ nī, hermanos. Véé cá 'iiⁿyāⁿ Israel s'eeⁿ chí s'téenu yā tan'duucā 'yaaⁿ millares. Ní nducyaaca yā ní neené chí'téenu yā ley yeⁿe Moisés. ²¹ Naati 'āā caⁿa yā chii yā 'iiⁿyāⁿ s'eeⁿ yeⁿē ndís'tií chí ndís'tií ca'cuééⁿ nī nducyaaca 'iiⁿyāⁿ Israel s'eeⁿ chí snée yā nguaaⁿ 'iiⁿyāⁿ s'eeⁿ chí nguéé yeⁿē 'iiⁿyāⁿ Israel. Ca'cueéⁿ nī chí 'iiⁿyāⁿ Israel s'eeⁿ nguéé cánée chí dííⁿ yā chí ngaⁿa ley yeⁿē Moisés ndíí nguéé dííⁿ yā circuncidar daiya yā, ndíí nguéé ndúú dííⁿ yā costumbres yeⁿe Moisés. ²² ¿D'éε chíi tuu'mí? Neené n'deéé 'iiⁿyāⁿ caⁿá yā

ní nduuvidáámá yā taachi ch'iindiveéⁿ yā chí ndaaⁿ nī. ²³ Dííⁿ dí chuū chí ngaⁿa 'nū ndúúcu dii: Véé cuūuⁿ saⁿā nguaaⁿ nús'uū chí véé compromiso yeⁿē sa ndúúcu Dendyuūs. ²⁴ Candée di saⁿā s'eeⁿ. Tan'dúúca costumbre yeⁿe religión yeⁿē di, nīnduuví deevé di ndúúcu yā yeⁿe nducueⁿē. Niicú cuayiivi nadíí've di saⁿā chí cuū tiⁿ sa. Ní nducyáácá 'iiⁿyāⁿ tuumícadíinúúⁿ yā ti nguéé de'ē vee chí caⁿá yā cucaavā yeⁿē di. Ní tuumícadíinúúⁿ yā chí ngíca cuaacu di ní chí diiⁿ di chí ngaⁿa ley. ²⁵ Naati 'iiⁿyāⁿ s'eeⁿ chí nguéé yeⁿe ndaata Israel chí i'téenu yā nguéé canéé chí dííⁿ yā chúu. Nús'uū ní idingúuⁿ 'nū chí nguéé du'ū chí canéé chí diiⁿ chuū. Dámaāⁿ chí nguéé cuta'á yā yuute yeⁿē 'iiti chí 'caaⁿnúⁿ yā caavā ídolos, ndíí nguéé ndúú yuuúⁿ yeⁿé tí, ndíí nguéé ndúú yuuúⁿ yeⁿe 'iiti chí nduuchi dííⁿ yā daandu tí. Ní nguéé cánée chí cunéé sa ndúúcu 'áámá n'daata chí nguéé n'daataá yeⁿē sa.

²⁶ Tuu'mi ní Pablo miiⁿ nícāndée sa 'iis'uūⁿ. Ní chideεve táámá nguuvi tan'dúúca costumbre yeⁿé yā Pablo 'āā nidideevé sa maaⁿ sa ndúúcu saⁿā s'eeⁿ. Ní sndaa yā yaācū templo chí caaⁿmáⁿ yā chí cúunú ca'ā nguuvi yeⁿē compromiso yeⁿé yā, chí cánée chí ca'a yā 'áámá 'aama yā ofrenda yeⁿé yā.

²⁷ Taachi cánée chí cúunú ca'ā chí ndeεchē nguuvi, taachí 'iiⁿyāⁿ Israel yeⁿē yāⁿā Asia n'diichí yā Pablo cheeti yaācū templo n'gaā'vá yā ndúúcu sa. Ní dííⁿ yā chí nduuvi taáⁿ yā nducyaaca yā. Ní sta'á yā Pablo. ²⁸ N'gai yiicú yā: Ndís'tií saⁿā Israel, cúnnéé nī. Sáⁿa 'cūú chí nduu cuaaⁿ ngi'cueeⁿ sa nducyaaca 'iiⁿyāⁿ contra yāāⁿ miiⁿ ndúúcu yeⁿē contra yeⁿe ley ndúúcu yeⁿē contra yeⁿe lugar 'cūú. N'déε ca nguéé ti chuū. Ní candée sa 'iiⁿyāⁿ chí nguéé yeⁿe ndaata Israel cheeti yaācū templo. Ní divaatí sa yaācū templo chí deεve.

²⁹Tii cuáán vmaaⁿ ní náⁿá 'iiⁿyāⁿ n'diichí yā ndúucu sa sáⁿā chi nguuvi Trófimo yeⁿē yáāⁿ Efeso. Ní nadacádínuuⁿ yā chi Pablo miiⁿ nicandéē sa saⁿā cheeti yaacū templo. ³⁰Nducyáácá 'iiⁿyāⁿ miiⁿ n'gēecú cheendí yā ní ch'ii dáanā yeⁿē yā. Ní din'gínú yā ní sta'á yā Pablo miiⁿ ní tun'dáa yā saⁿa cheeti yaacū templo. Ní hora míⁿ nūuⁿ n'gaadí yā cheendi va'ai yáacū templo. ³¹Ní diiⁿnú yinu yā chi 'caaⁿnuⁿ yā Pablo. 'Áámá yā caⁿa yā yeⁿē comandante, chi nducyáácá 'iiⁿyāⁿ yáāⁿ Jerusalén nguē 'diiiⁿ snéē yā. ³²Tuu'mí nūuⁿ comandante sta'á yā soldado s'eeⁿ ndúucū capitán ní chéenu yā 'iiⁿyāⁿ s'eeⁿ naachi canéé Pablo miiⁿ. Taachí nducyaaca yā n'diichí yā comandante ndúucū soldado s'eeⁿ tuu'mi s'neeⁿnaaⁿ yā chi n'geⁿé yā Pablo miiⁿ. ³³Taachí ndaā comandante tuu'mi ní sta'á yā Pablo ní caⁿá yā orden chí cheē chiichí sá ndúucū 'uuvi cadenas. Ní comandante tiinguuneeⁿ yā: ¿Du'u rá saⁿā miiⁿ ní de'ē vee miiⁿ ní de'ē idiiⁿ sa? ³⁴Naachi n'deeē n'dai 'iiⁿyāⁿ, náⁿa yā ní n'gai yā 'aama naaⁿ, náⁿa yā n'gai yā taama naaⁿ, ní 'iiⁿyāⁿ s'eeⁿ nguéé itumicádiinúúⁿ yā yeⁿē sa chi tátii n'gai yā. Ca'á yā orden chí cho'ó yā saⁿā na vácūu naachi sneé soldado s'eeⁿ. ³⁵Taachi Pablo miiⁿ cúcheē sa nandéē, candéē yā yaacū soldado s'eeⁿ saⁿa cáávā chí taāⁿ 'iiⁿyāⁿ s'eeⁿ ndúucu sa. ³⁶Ti n'deēē n'dái 'iiⁿyāⁿ yeⁿē yaāⁿ miiⁿ cueⁿē yā cuaaⁿ dáámí saⁿā miiⁿ ní n'gai yā: 'Cuuvi sa.

**Pablo ngaⁿa sa yeⁿē maaⁿ
sa na yáāⁿ Jerusalén**

³⁷Taachí tucá'a yā diiⁿyú yā na vácūu tuu'mi ní Pablo miiⁿ ngaⁿa sa ngii sa comandante: ¿'Áá 'cuáán nī chí caaⁿmáⁿ 'tēē ndúucū n'dii? Ní comandante caⁿā sa: ¿'Áá déénú dí davaacu griego? ³⁸¿'Áá nguéé dí saⁿā yeⁿē yáⁿāa Egipto chí

diiⁿ di chí nduuvi taáⁿ yā 'iiⁿyāⁿ vmaaⁿ yeⁿē nguuvi miiⁿ ní tun'dáa di cuūⁿ mil 'iiⁿyāⁿ chí duucu na yáⁿāa cuuⁿmáⁿ?

³⁹Tuu'mi ní caⁿā Pablo: 'Úú ní saⁿā Israel yeⁿē yáāⁿ Tarso, saⁿā yeⁿē 'áámá yáāⁿ ch'ēetē yeⁿē yáⁿāa Cilicia. Ngiicá nanáāⁿ nī, 'cuaaⁿ nī chí yaaⁿ'ví 'iiⁿyāⁿ.

⁴⁰Taachí saⁿā miiⁿ ca'a sa lugar, Pablo miiⁿ chéendii sa nandéē ní ca'a sa señal 'iiⁿyāⁿ ndúucū ta'á sa, ní taachí 'diiiⁿ ní caⁿa sa ndúucū davaacu hebreo. Ní caⁿa sa:

22 Ndis'tii saⁿā ní ndis'tii ví'í ndúucū 'iiⁿyāⁿ ndicúu, 'caandiveéⁿ nī chí ngaⁿá yeⁿē maáⁿ nanáāⁿ ndis'tii.

²Taachí ch'iindiveéⁿ yā chí ngaⁿā sa davaacu hebreo, ch'ēetinéē 'diiiⁿ cá yā. Pablo miiⁿ ní caⁿā sa: ³Cuaacu níⁿ'nyúⁿ saⁿā Israel 'úú. Ch'iindiyáāⁿ na yáāⁿ Tarso yeⁿē yáⁿāa Cilicia, naatí ch'iitá na yaáⁿ 'cūu. Ch'eeⁿ ndúucū maestro Gamaliel miiⁿ. Tan'dúucā chí ngaⁿā na ley yeⁿē chiida yú. 'Úú chí díⁿ ndúucū núúⁿmáⁿ staava yeⁿē tan'dúucā chí maaⁿ nducyaaca nī díⁿ nī ndúucū Dendyuūs. ⁴'Iiⁿyāⁿ chí cueⁿē Yúúní 'cūu 'úú can'daá 'iiⁿyāⁿ miiⁿ. Ní sta'á ndii n'daataá ndí saⁿā ní nca'á 'iiⁿyāⁿ chí cuētinúúⁿ yā vácūu chí 'cuuvi yā. ⁵'Tiicá ntúuⁿ chiduuⁿ ch'ēete cá yeⁿē Israel miiⁿ testigo yeⁿē ndúucū nducyaaca 'iiⁿyāⁿ ndiicúu. 'Tiicá ntúuⁿ 'úú sta'á carta ndúucū orden chí 'cuuⁿmíⁿ 'iiⁿyāⁿ s'eeⁿ ní cueⁿé naachi snéé hermanos. Ní cueⁿé yáāⁿ Damasco ní cueⁿé chí candéē presos hermano s'eeⁿ ndii yáāⁿ Jerusalén. 'Tiicá ntúuⁿ 'iiⁿyāⁿ chí sneé yā miiⁿ ní cuuvi yā castigados.

Pablo ngaⁿa yā taacā 'iteenú yā

(Hch. 9.1-19; 26.12-18)

⁶Naatí chi taachi yúúní canuúⁿ, ndaá niiⁿnuúⁿ yáāⁿ Damasco tan'dúucā maⁿa nguuvi dáácánaāⁿ nndaā 'áámá deēve yeⁿē nanguuvi naachi 'úú canéē. ⁷Ní sndeēvé ná yáⁿāa. Ní ch'iindiveéⁿ 'áámá nduudu chí ngaⁿa ngii 'úú:

Saulo, Saulo, ¿de'ē cúu chi nn'daā di 'úu chi néené ya'ai 'úu? ⁸Tuu'mi nan'guεεcuta^a: ¿Du'ú n'diī, Señor? Ní caⁿa yā chii yā 'úu: 'Úú Jesús yeⁿe yāā Nazaret miiⁿ chí n'daā di 'úu ní nguéé neⁿē di n'diichi di 'úu. ⁹'Iiⁿyāⁿ chí snéé nduucú cuaacu níⁿnyúⁿ n'diichi yā deeve miiⁿ. Ní dii'yā yā chii. Naati nguéé ch'iindiveéⁿ yā nduudu chí ngaⁿa Señor Jesús nduucú. ¹⁰Ní caⁿa: ¿De'ē díⁿ, Señor? Señor miiⁿ ngaⁿa yā ngii yā 'úu: Nducueeⁿ dí ní cueⁿe di na yāāⁿ Damasco. Miiⁿ cadiinuuⁿ di tanducuéⁿē chí canee chí diiⁿ di. ¹¹'Úú ní nguéé inaáⁿ cáávā chí ch'εedi nduutinaáⁿ yeⁿē vaadi deeve ch'εete ca chí deeve miiⁿ. 'Iiⁿyāⁿ chí snéé yā nduucú candéé nee yā ta'á ní ndaá yāāⁿ Damasco.

¹²Tuu'mi ní miiⁿ canee 'áamá saⁿā chí nguuvi Ananías, saⁿā chí diiⁿ sa tan'dúúca chí ngaⁿa ley miiⁿ. Ní nguaaⁿ nducyaaca 'iiⁿyāⁿ Israel s'eeⁿ chí snéé yā, ngaⁿa yā chí saⁿā miiⁿ n'dai taavi sa. ¹³Ndaá yā nanaáⁿ ní ndaa niiⁿnúⁿ yā ní caⁿa yā: Dii hermano Saulo, nan'guaaⁿ nduutináaⁿ di. Ní hora miiⁿ nūuⁿ n'guaaⁿ nduutinaáⁿ ní snaáⁿ. ¹⁴Saⁿā miiⁿ ní caⁿā sa: Ndyuūs yeⁿē chiida yú ndeeve yā dii chí cuuvi déénú dí chí neⁿe yā. Ní cuuvi n'diichi di Jesús chí n'dai taavi. Ní caandiveeⁿ di chí ngaⁿa yā. ¹⁵Ti cuuvi di caaⁿmaⁿ di nduudu cuaacu yeⁿé yā yeⁿē cosa chí 'aa n'diichi di ndúúcu chí 'aa ch'iindiveeⁿ di nanaáⁿ nducyaaca 'iiⁿyāⁿ. ¹⁶Maaⁿ ní ¿de'ē ínee ngiinu di? Cuééndii di ní cuεdinuūⁿniⁿ di ní didéevé di dii yeⁿē nuuⁿndi yeⁿē di. Caaⁿmaⁿngua'a di nanaáⁿ Señor Jesús.

Dicho'ó yā Pablo nanaaⁿ 'iiⁿyāⁿ s'eeⁿ chí nguéé yeⁿē ndaata Israel

¹⁷Túúca chíi. Taachí nanguεεcúndií na yaāⁿ Jerusalén miiⁿ ní taachí caⁿangua'á na yaácū templo n'diichi 'áamá visión, cosa tan'dúúca chíiⁿ ch'iíⁿnú. ¹⁸Ní n'diichi 'iiⁿyāⁿ ní caⁿa

yā chíi yā 'úu: Diinú yiiⁿnu di ní cueenu di yeⁿe yāāⁿ Jerusalén, ti nguéé 'cúaaⁿ yā nduudu cuaacu yeⁿé. ¹⁹'Úú ní caⁿa: Señor 'iiⁿyāⁿ s'eeⁿ deenú yā yeⁿē nducyáácá yā chí snúuⁿ yā yaácū sinagoga s'eeⁿ ti 'úu ní chíi 'iiⁿyāⁿ vácūú ní ch'eⁿé 'iiⁿyāⁿ chí i'teenú yā n'dii. ²⁰Ní taachi ch'iī Esteban saⁿā chí caⁿa nduudu cuaacu yeⁿé ní, 'úu ntúúⁿ ní canee nanáaⁿ sa. 'Úú ní 'cuúⁿ chí chíi sa. Ní nguain'daf cotón yeⁿe 'iiⁿyāⁿ chí ch'iíⁿnú saⁿā. ²¹Tuu'mi caⁿa Jesús chíi yā 'úu: Cuéⁿé dí, ti 'úu idicho'ó dii yáⁿái n'dai ndúúcu 'iiⁿyāⁿ s'eeⁿ chí nguéé yeⁿē ndaata Israel.

Pablo nanaáⁿ comandante

²²Ní taachi 'iiⁿyāⁿ s'eeⁿ ch'iindiveéⁿ yā ndii nduudú 'cūú tuu'mi ní caⁿa yuudú yā: Divíi di sáⁿa 'cūú na yáⁿāa ti nguéé canéé chí cunduuchi sa.

²³Taachí 'cai yā ní chíin'cuuⁿ yā catecai yā ní chingée yā iyaácá na 'yúúné, ²⁴comandante chí ngaⁿa ntiíⁿnyuⁿ caⁿā sa chí cuⁿnuúⁿ yā Pablo vácūú. Ní caⁿā orden chí caⁿa yā tiingúúneeⁿ yā Pablo ní ch'eⁿé yā Pablo, maaⁿ niicu cadiinuuⁿ yā de'ē cáávā chí n'gāi yā contra yeⁿē sa. ²⁵Taachí dichiichi yā Pablo ndúúcu yiiⁿmaⁿ, Pablo miiⁿ ní caⁿā sa capitán chí sneé yā miiⁿ: ¿'Áá canéé chí 'cueⁿé ní 'áamá saⁿā romano ndúúti chí nguéé ndaaca ní nuuⁿndi yeⁿē sa?

²⁶Taachí capitán miiⁿ ch'iindiveeⁿ sa chuū, cueⁿe sa nícuⁿ caⁿa sa yeⁿe comandante ní yaa'vi sa: N'diichi ní, ¿de'ē díⁿ ní caati sáⁿa 'cūú ní saⁿā romano sa?

²⁷Ndaa comandante ní caⁿa sa: Cuuvi di 'úu. ¿'Áá díⁿ saⁿā romano? Pablo miiⁿ ní caⁿa yā: 'Tíicā.

²⁸Nan'guεεcútaⁿā comandante: 'Úú caí māaⁿ 'úu. N'deéé tuūmí ca'á ní ndii chíi saⁿā romano 'úu. Tuu'mi ní Pablo miiⁿ ní caⁿa sa: 'Úú ní ch'iindiyāáⁿ na yáⁿāa romano 'tíicā.

²⁹ Ní cueⁿé yā yeⁿē sa 'iiⁿ'yāⁿ chi sta'a orden chi 'cueⁿé yā saⁿā. Taachí comandante tuumicádiinuuⁿ sa chi saⁿā romano sa, tuuⁿmi dii'yá ntúuⁿ sa chií, chi dichíichí sa Pablo.

Pablo nanááⁿ concilio

³⁰ Chidēeve táámá nguuvi sáⁿā miiⁿ neⁿe sa cadíinuuⁿ sa de'ē cáāvā chi tun'dáá nuuⁿndi 'iiⁿ'yāⁿ Israel s'eeⁿ. Diví yā cadenas yeⁿē Pablo miiⁿ ní ca'a yā orden chi cho'ó yā Pablo nanááⁿ chiduuⁿ n'gēetē yeⁿe Israel ndúúcu nducuéⁿē 'iiⁿ'ntyéⁿē yeⁿe concilio. Ní tun'dáá yā Pablo miiⁿ. Ní ch'iⁿi yā saⁿā nanááⁿ 'iiⁿ'yāⁿ s'eeⁿ.

23 Tuuⁿmi ní Pablo miiⁿ ch'íinú cuaacu sa saⁿā s'eeⁿ yeⁿē concilio. Ní caⁿa sa: Ndís'tii saⁿā vi'í, Ndyuūs ní n'diichí yā taanduvéé chi 'úú dííⁿ ní nguéé dííⁿ 'uúvī staava yeⁿé yeⁿe cosa chi dííⁿ.

² Ananías, saⁿā chi chiiduuⁿ ch'ēete cá yeⁿe Israel caⁿa yā chii yā 'iiⁿ'yāⁿ chi canee daama yā ndúúcu sa chí 'cueⁿe yā cheendi sa. ³ Tuuⁿmi ní Pablo mííⁿ ní caⁿa sa: Ndyuūs 'cueⁿé yā dii, saⁿā chi tan'dúúca 'aama cheeti cuéē. ¿Áá dííⁿ di juzgar 'úú tan'dúúca ley miiⁿ, 'iicu nguéé idiiⁿ di cumplir chi ngaⁿā ley, níicú maaⁿ ní ngaⁿā di chi 'cueⁿé yā 'úú?

⁴ 'Iiⁿ'yāⁿ chi snée yā nanááⁿ Pablo caⁿa yā: ¿Áá chiiduuⁿ ch'ēete ca yeⁿé Dendyuūs ngaⁿā taaⁿ di ngii di 'tífca?

⁵ Pablo miiⁿ ní caⁿa sa: Ndís'tii vi'í, 'úú ní nguéé deenú chi sáⁿa cāā chi chiiduuⁿ ch'ēete cá yeⁿe Israel. Naati cánéé nguūⁿ. Nguéé caaⁿmaⁿ taaⁿ di yeⁿē 'áámá saⁿā ch'ēete yeⁿe Israel yeⁿé 'iiⁿ'yāⁿ yeⁿē di.

⁶ Tuuⁿmi Pablo miiⁿ tuumicádiinuuⁿ sa chi 'áámá taaⁿ yā yeⁿē 'iiⁿ'yāⁿ saduceo s'eeⁿ chi nguéé i'téenu yā chi nanduuchi 'iiⁿ'yāⁿ ní táámá taaⁿ yā yeⁿē 'iiⁿ'yāⁿ fariseos chi i'téenu chí nanduuchi 'iiⁿ'yāⁿ. Ní 'cai yuudu sa nanááⁿ nducyaaca 'iiⁿ'yāⁿ yeⁿē concilio: Ndís'tii

saⁿā vi'í, 'úú ní saⁿā fariseo 'úú ní daiyá saⁿā fariseo 'úú. Dííⁿ yā juzgar 'úú yeⁿē chi canee ngíinú yā chí nadacuéⁿ yā yeⁿē nguaaⁿ tináⁿā.

⁷ Taachí caⁿa yā chuū véé 'uuvī vaanicadiinūⁿ yeⁿe saⁿā fariseos ndúúcu saⁿā saduceos. Ní 'iiⁿ'yāⁿ s'eeⁿ ní diví yā 'áámá taaⁿ. ⁸ Caati 'iiⁿ'yāⁿ saduceos ngaⁿā yā chi nguéé iniduuchi 'iiⁿ'yāⁿ ndii nguéé nduu ángel ra ndíí nguéé nduu espíritus. 'Iiⁿ'yāⁿ fariseos ngaⁿā yā ti véé 'tífca. ⁹ Ní n'dee n'dái caⁿa yā 'iiⁿ'yāⁿ s'eeⁿ. Ní nacuéⁿ 'iiⁿ'yāⁿ chi déenu taavi ley lado yeⁿē fariseos ní caⁿa yā chi chuū chi cuaacu. Ní ngaⁿa yuudu yā: Nguéé de'ē vee chi nguéé n'daacā inndaacā 'nū yeⁿe saⁿā miiⁿ. Ndúúti 'áámá espíritu o 'áámá ángel yaaⁿvi yā Pablo miiⁿ nguéé n'daacā chi 'cuuⁿmaⁿ yú ndúúcu Dendyuūs.

¹⁰ Taachi véé vaadi 'caaⁿva chi ch'ēete ca tuuⁿmi ní comandante 'va'á yā chí 'caaⁿnúⁿ yā Pablo. Ní comandante miiⁿ dicho'ó yā soldado s'eeⁿ chi cueⁿē sa ní cuta'a sa Pablo miiⁿ nguaaⁿ 'iiⁿ'yāⁿ s'eeⁿ ní candéé sa Pablo na vácū. ¹¹ Táámá nguiinū miiⁿ ndaā Señor Jesús nanááⁿ yā ní caⁿa yā: Pablo, nguéé cu'neeⁿ duuva di. Tan'dúúca chi ngaⁿa di nduudu cuaacu yeⁿe 'úú na yááⁿ Jerusalén 'tiicá ntúuⁿ caaⁿmaⁿ di yeⁿē 'úú na yááⁿ Roma.

'Iiⁿ'yāⁿ s'eeⁿ dííⁿ yā compromiso chí 'caaⁿnúⁿ yā Pablo

¹² Chidēeve táámá nguuvi, náⁿā 'iiⁿ'yāⁿ Israel s'eeⁿ nduuvidaamá yā ní dííⁿ yā compromiso chí nguéé che'e yā ndíí nguéé cu'ú yā neⁿe chí 'āā cuéé 'caaⁿnúⁿ yā Pablo miiⁿ. ¹³ Ngo'o 'úúvi ngēecu 'iiⁿ'yāⁿ chi nduuvidaamá yā yeⁿe chúú. ¹⁴ 'Iiⁿ'yāⁿ s'uúⁿ ní cheⁿé yā nanááⁿ chiduuⁿ n'gēetē yeⁿe Israel ndúúcu 'iiⁿ'yāⁿ ndiicúú ní caⁿa yā: Nús'uu ní nduuvidadáámá 'nū ní dííⁿ 'nū compromiso chí dííⁿ 'nū sufrir ní nguéé du'ú vee 'nuú 'nū che'é 'nū taanduvéé ndíí 'caaⁿnúⁿ

'nū Pablo. ¹⁵Maaⁿ ní ndís'tiī ndúúcu 'iiⁿyāⁿ yeⁿe concilio, cavyaaⁿ cáácá yā nanááⁿ comandante chi candée yā Pablo ní chicuú yā nanááⁿ nús'uú. Dííⁿ nī tan'dúúcā chi neⁿe di tiinguuneeⁿ di cosa chi cuaacu yeⁿé yā. Niicu nús'uu, 'aa snée ngiinú 'nū chi 'caaⁿnúⁿ 'nū saⁿā taachí ndaa sa.

¹⁶Tuu'mi ní 'áámá saⁿā daiya táⁿā vi'í Pablo, taachí ch'iindiveéⁿ sá chí caⁿa yā de'e chi dííⁿ yā, cheⁿe sa ní chi ndaa sa cheeti vácuū miiⁿ ní caⁿa sa chii sa Pablo miiⁿ. ¹⁷Pablo miiⁿ 'cai sa capitán ní caⁿa sa: Candée di saⁿā 'dííⁿ 'cūū nanááⁿ comandante ti canée chi cuuvi sa 'iiⁿyāⁿ de'ē chi deenu sa.

¹⁸Saⁿā miiⁿ sta'a sa saⁿā 'dííⁿ ní candee sa saⁿā nanááⁿ comandante ní caⁿa sa: Pablo chi canúúⁿ vácuū di'cuifú sa 'úú chí candee saⁿā 'dííⁿ 'cūū nanááⁿ nī. Véé chí déénú sá chí caaⁿmaⁿ sa ndúúcu nī.

¹⁹Comandante miiⁿ ní sta'á yā ta'ā sa ní cueⁿé yā taama lado ndúúcu sa ní ntiinguuneeⁿ yā saⁿā: ¿De'ē chí cuuvi di 'úú?

²⁰Ní caⁿa sa chii sá 'iiⁿyāⁿ: 'Iiⁿyāⁿ Israel s'eeⁿ ní chíí yā ní caacá yā nanááⁿ nī chi cavyaaⁿ ní candée nī Pablo nanááⁿ 'iiⁿyāⁿ yeⁿe concilio. 'Iiⁿyāⁿ s'eeⁿ nduvidaamá yā ní itingúuneéⁿ yā Pablo miiⁿ 'áámá chi cuaacu ní'nyúⁿ yeⁿé sa. ²¹Naati n'dií, nguéeⁿ cu'téenu nī. Ngo'ō 'uuvi ngeecu saⁿā s'eeⁿ yeⁿe 'iiⁿyāⁿ Israel chi 'cuētínúⁿ n'de'ei yā 'diitúú cyúúní. 'Iiⁿyāⁿ s'eeⁿ nduvidaama yā chí dííⁿ yā compromiso ní cadínnuⁿ yā chí nguéeⁿ n'daacā chí nguéeⁿ ndúú che'e yā ndíí nguéeⁿ ndúú cu'u ra yā taanduvéé ndii yā chí 'caaⁿnúⁿ yā Pablo. Maaⁿ ní listos canee yā ní canee ngínú yā cáávā chí caaⁿmáⁿ n'dií.

²²Tuu'mi ní comandante dichó'o sa saⁿa 'dííⁿ chí nguéeⁿ caaⁿmaⁿ sa cuuvi sa mar 'áámá 'iiⁿyāⁿ chí caⁿa sa chii sa 'iiⁿyāⁿ yeⁿé chūū.

Dicho'ó yā Pablo nanááⁿ Félix saⁿa gobernador

²³Comandante miiⁿ 'cai yā na 'uuvi capitán. Ní caⁿá yā chíí yā saⁿa soldados chí nduvidáamá sá taanduu n'geecu nuúⁿ yaaaⁿ na 'uuvi ciento soldado s'eeⁿ ndúúcu 'iiⁿnūⁿ ngeecu ndiichi soldados chí sndúú sa 'yúúúúú ndúúcu 'uuvi ciento soldado chí véé lanza yeⁿé yā. Ní cho'ó nducyaaca yā yāáⁿ Cesarea. ²⁴Ní cundiyaáⁿ nī 'iiti ti cunduū Pablo ní candée ní saⁿā ndúúcu cuidado nanááⁿ Félix chí gobernador. ²⁵Ní dingúuⁿ sa 'áámá carta ndúúcu nduudú 'cūū:

²⁶'Úú Claudio Lisias idinguúⁿ yeⁿé nī Félix saⁿā gobernador chí n'dai taavi: N'dái nī. ²⁷Saⁿa 'cūū ní sta'a 'nū saⁿā caava 'iiⁿyāⁿ Israel s'eeⁿ chí neⁿe 'caaⁿnuⁿ yā saⁿā. 'Úú ninguáⁿái saⁿā miiⁿ ndúúcu soldado s'eeⁿ tí deenú chí saⁿā romano saⁿā miiⁿ. ²⁸Ní neⁿé deenú de'ē cáávā tun'dáa yā nuuⁿndi yeⁿé sa. Candee saⁿā nanááⁿ 'iiⁿntyéⁿé yeⁿé concilio yeⁿé yā. ²⁹Ní táácā chí tun'dáa nuuⁿndi yā yeⁿé sa caavā ley yeⁿé yā naati mar 'áámá nuuⁿndi ch'ete yeⁿé sa chí 'caaⁿnúⁿ yā saⁿā o cunúúⁿ sa vácuū.

³⁰Taachí 'úú chicadiinúⁿ chí nduvidaamá yā contra yeⁿé saⁿā 'cūū, hora miiⁿ dicho'ó saⁿā nanááⁿ n'dií. Ní ngaⁿá ngíí saⁿā chí tun'dáa nuuⁿndi yeⁿé sa chí chíí yā nanááⁿ nī. Ní cuuví yā n'dií de'ē chí canee yā ndúúcu sa. N'dáácā canee nī.

³¹Soldado s'eeⁿ sta'á yā Pablo tan'dúúcā chí caⁿa yā chíí yā saⁿā ní nguiinū miiⁿ candée yā saⁿā ná yāáⁿ Antípatris. ³²Chideeve táámá nguuvi ní soldado chí sndúú 'yuúúúú cueⁿé yā ndúúcu Pablo ní náⁿa yā ngeecunee yā na va'āi ch'ete naachi canee vácuū.

³³Taachí ndaa yā 'iiⁿyāⁿ s'eeⁿ na yāáⁿ Cesarea, ca'á yā carta gobernador Félix ní dííⁿ yā presentar ntúuⁿ Pablo nanááⁿ gobernador. ³⁴Gobernador miiⁿ ch'eeⁿ

yā carta ní tiinguunéeⁿ yā: ¿Tíí yáⁿāa saⁿā? Ní tumicadínuuⁿ yā chi saⁿā ní yeⁿe yáⁿāa Cilicia. ³⁵Ní caⁿa yā chii yā Pablo: Cuⁿeeⁿ veéⁿ yeⁿe di taachi ndaa sa chi tun'dáa nuuⁿndi yeⁿe di. Ní dicho'ó yā 'áamá saⁿā soldado chi diiⁿ cuidado saⁿā na váacū Herodes naachi diiⁿ juzgar 'iiⁿyāⁿ.

**Pablo caⁿa sa yeⁿe
maaⁿ sa nanááⁿ Félix**

24 Cho'ō nyuⁿu nguuvi ní ca'ai chi iduú ch'εete ca yeⁿe Israel chi nguuvi Ananías ndúúcu náⁿā 'iiⁿyāⁿ ndiicū ndúúcu 'áamá saⁿā chi nguuvi sa Tértulo. Saⁿā miiⁿ neené n'dεevé indee sa. 'Iiⁿyāⁿ s'eeⁿ chii yā nanááⁿ gobernador ní caaⁿmaⁿ yā contra yeⁿe Pablo miiⁿ. ²Taachí gobernador Félix 'cai yā Pablo miiⁿ tuuⁿmi ní saⁿā chi nguuvi Tértulo caⁿa sa nuuⁿndí yeⁿe Pablo miiⁿ ní caⁿa sa: Déenu 'nū ti cáava nī, n'dií Félix, véé vaadi yeenú 'nū ní 'āā nin'guetinée 'nū ndúúcu vaadi 'diíⁿ ch'εete. Néené n'dee n'dái dendu'ū chi n'dai na yāⁿ vaacú 'nū cáavā vaanicadiinúⁿ n'dái yeⁿe nī. ³N'dií, Félix chi n'dai taavi n'dií, nús'uū ní ch'iindiveéⁿ 'nū nduudu yeⁿe ní nducuéⁿe tiempo nducuéⁿe cuaaⁿ ní caⁿá 'nū Ndyuūs nadíⁿve n'dií cáavā chi diíⁿ nī. ⁴Chi 'āā ntéé tee 'nū vaadi 'caaⁿva n'dií 'naaⁿ tiempo ngiicá nanááⁿ n'dií chi n'dai chi 'caandiveeⁿ nī yeⁿe 'nū ndúúcu vaadi n'dai yeⁿe nī. ⁵Sáⁿa 'cūū néené itee sa vaadi 'caāⁿvā nús'uū yāāⁿ vaacú 'nū. Nífcú ididáⁿa sa 'iiⁿyāⁿ nguaaⁿ nducyáácá 'iiⁿyāⁿ Israel s'eeⁿ chi snée yā núdeⁿmaⁿ iⁿyeⁿe dī. Ní saⁿā miiⁿ ngaⁿā ntiinⁿnyuⁿ sa yeⁿe 'iiⁿyāⁿ chi nazarenos chi i'téenu yā Jesús. ⁶Ní neⁿe ntúuⁿ sa divaatí sa yaacū templo. Sta'á 'nū saⁿā ní neⁿe 'nū cadínuuⁿ 'nū yeⁿe sa tan'dúúca ley yeⁿe 'nū. ⁷Comandante yeⁿe 'áamá taaⁿ soldado chi nguuvi Lisias ndáa sa naachi snée 'nū ni sta'a sa Pablo ndúúcu vaadi diitúu yeⁿe sa ni divíi sa Pablo

na ta'á 'nū. ⁸Dicho'ó yā saⁿā s'eeⁿ chi tun'dáa nuuⁿndi yeⁿe Pablo chi ndáa sa nanááⁿ n'dií. Maaⁿ ní taachi diiⁿ nī juzgar cadínuuⁿ nī yeⁿe nducuéⁿe dendu'ū de'ē cáavā chi tun'dáa 'nū nuuⁿndi yeⁿe sa.

⁹'Iiⁿyāⁿ Israel s'eeⁿ ngaⁿá yā chi 'tíicā chi caⁿa Tértulo miiⁿ. ¹⁰Tuuⁿmi ní ca'a gobernador señal Pablo chi caaⁿmaⁿ sa. Pablo miiⁿ n'guεεcútaⁿā sa: 'Úú deenú ti 'āā néené 'āā 'naaⁿ canee nī juez yeⁿe nación 'cūū. 'Úú ngaⁿá yeⁿe maáⁿ ndúúcu confianza. ¹¹Ti ní deenu nī maaⁿ taandúu ndichúvíi nguuvi chí ché na yāāⁿ Jerusalén chi cuuvi cu'teenú Dendyuūs. ¹²Nguéé ndaāca yā 'úú chi ngu'ú ndúúcu mar 'áamá 'iiⁿyāⁿ, ní nguéé diíⁿ chi n'dee n'dái 'iiⁿyāⁿ nguεε snée 'diíⁿ yā, ní nguéé ndúú ná yāacū templo miiⁿ, ní nguéé ndúú ná yaacū sinagoga, ní nguéé na yāaⁿ 'cūū. ¹³Ní nguéé cuuví caaⁿmaⁿ yā chi chuū idiíⁿ. ¹⁴Chuū ngaⁿá ngií n'dií. Tan'dúúca chi 'iiⁿyāⁿ s'eeⁿ ngaⁿá yā chi nguéé cuaacu, 'tíicā 'úú i'teenú Ndyuūs yeⁿe chiidá 'nū s'ééⁿ. Ní 'úú i'teenú tanducuéⁿe dendu'ū chi cánéé nguūⁿ na ley ndúúcu nduudu yeⁿe profetas chi caⁿa nduudu yeⁿe Ndyuūs. ¹⁵Véé chi cānee ngiinú 'áamá cosa yeⁿe Dendyuūs tan'dúúca 'iiⁿyāⁿ s'eeⁿ canee ngiinú ntúuⁿ yā, chi Dendyuūs nduuchí yā 'iiⁿyāⁿ yeⁿe nguaaⁿ tinaⁿā, tan'dúúca 'iiⁿyāⁿ chi n'dai taavi ndúúcu 'iiⁿyāⁿ chi nguεε n'dai taavi. ¹⁶Cáavā chuū cueⁿe daāⁿmaⁿ deenú chi nguéé véé nuuⁿndi na staava yeⁿe nanááⁿ Dendyuūs ndíí nguéé ndúú nanááⁿ 'iiⁿyāⁿ.

¹⁷Cho'ó 'áamá na 'uuvi nduūyū ndaā ní nga'á limosnas 'iiⁿyāⁿ vaacú ní nga'á ofrenda. ¹⁸Cunee na yaacū templo taachi náⁿā 'iiⁿyāⁿ Israel s'eeⁿ yeⁿe yáⁿāa Asia ndáácá yā 'úú ná yaacū templo ndúúcu compromiso chi nadidεevé tan'dúúca costumbre yeⁿe religión yeⁿe. Nguéé diíⁿ ndúúcu n'dee n'dái 'iiⁿyāⁿ ní nguéé n'dee n'dái 'caí 'iiⁿyāⁿ s'eeⁿ.

¹⁹ 'Iiⁿ'yāⁿ s'eeⁿ cánéeⁿ chíⁿ cuuviⁿ yāⁿ n'diíⁿ níⁿ caaⁿ'maⁿ yāⁿ nuuⁿ'ndiⁿ yeⁿ'éⁿ, ndúútiⁿ vééⁿ deⁿ'éⁿ chíⁿ canéeⁿ yāⁿ nduucúⁿ. ²⁰ Níⁿ canéeⁿ cúúⁿ'míⁿ yāⁿ chíⁿ caaⁿ'máⁿ maáⁿ yāⁿ ndúútiⁿ chíⁿ ndaacáⁿ yāⁿ chíⁿ nguééⁿ n'daacāⁿ chíⁿ díⁿ' taachíⁿ caneeⁿ ndúúcuⁿ saⁿ'āⁿ 'iiⁿ'ntyéⁿ'ēⁿ concilio s'eeⁿ. ²¹ Ndúútiⁿ chíⁿ chuūⁿ chíⁿ 'caíⁿ yiicúⁿ, caⁿ'áⁿ yeⁿ'ēⁿ chíⁿ nduuchíⁿ yāⁿ yeⁿ'ēⁿ nguaaⁿ tináⁿ'āⁿ taachíⁿ caneeⁿ nanaáⁿ 'iiⁿ'yāⁿ s'eeⁿ. Cáávāⁿ chuūⁿ maaⁿ'nguuviⁿ díⁿ' yāⁿ juzgarⁿ 'úúⁿ.

²² Tuuⁿ'mi níⁿ Félixⁿ ch'iindiveeⁿ yāⁿ chuūⁿ. Déénúⁿ cuaacúⁿ yāⁿ yeⁿ'ēⁿ Yúúniⁿ cuaacuⁿ yeⁿ'eⁿ Ndyuūsⁿ níⁿ s'nééⁿ caⁿ yāⁿ chíⁿ caāⁿ'māⁿ saⁿ níⁿ caⁿ'a yāⁿ: Taachíⁿ ndaaⁿ Lisiasⁿ miiⁿ chíⁿ comandanteⁿ 'cuiinuⁿ tuumicáⁿdiinuúⁿ yeⁿ'ēⁿ asuntoⁿ yeⁿ'eⁿ diⁿ.

²³ Félixⁿ cho'óⁿ yāⁿ chíⁿ yāⁿ capitánⁿ chíⁿ diiⁿ saⁿ s'neeⁿ saⁿ Pabloⁿ presoⁿ níⁿ caⁿ'a saⁿ duuⁿ'vi libertadⁿ yeⁿ'ēⁿ saⁿ naatiⁿ s'néeⁿ saⁿ Pabloⁿ arrestadoⁿ. Níⁿ capitánⁿ miiⁿ cuuviⁿ yāⁿ Pabloⁿ chíⁿ cuchiiⁿ 'iiⁿ'yāⁿ yeⁿ'ēⁿ saⁿ nanaáⁿ saⁿ ndúúcuⁿ 'iiⁿ'yāⁿ chíⁿ dichíⁿ'veⁿ yāⁿ yeⁿ'ēⁿ saⁿ níⁿ caⁿ'áⁿ yāⁿ chíⁿ neⁿ'e saⁿ.

²⁴ N'duuviⁿ nguuviⁿ cuayiiⁿvi ndaāⁿ Félixⁿ ndúúcuⁿ n'daataáⁿ yeⁿ'éⁿ yāⁿ chíⁿ nguuviⁿ Drusilaⁿ chíⁿ ndaataáⁿ yeⁿ'ēⁿ Israelⁿ. 'Caiⁿ saⁿ Pabloⁿ níⁿ ch'iindiveeⁿ saⁿ yeⁿ'eⁿ vaadiⁿ i'teenuⁿ yeⁿ'ēⁿ Jesucristoⁿ. ²⁵ Taachíⁿ caⁿ'a Pabloⁿ yeⁿ'ēⁿ nduuduⁿ cuaacuⁿ yeⁿ'eⁿ chíⁿ díⁿ' yāⁿ chíⁿ nguééⁿ n'daacāⁿ níⁿ yeⁿ'ēⁿ juicioⁿ chíⁿ cuchiiⁿ, tuuⁿ'mi níⁿ Félixⁿ miiⁿ diiⁿ'yāⁿ sáⁿ chíⁿ níⁿ caⁿ'a saⁿ: Cunaⁿ'a diⁿ maaⁿ. Níⁿ taachíⁿ vééⁿ cuaáⁿ tuuⁿ'mi níⁿ 'cuafíⁿ.

²⁶ Félixⁿ caneeⁿ ngíⁿfnúⁿ yāⁿ chuūⁿ chíⁿ Pabloⁿ miiⁿ níⁿ caⁿ'a saⁿ tuumíⁿ yeⁿ'éⁿ yāⁿ tuuⁿ'mi níⁿ n'deēchiⁿ yāⁿ saⁿ'āⁿ. Caavāⁿ chuūⁿ chíⁿ neeneⁿ n'deēéⁿ cuuviⁿ 'caiⁿ yāⁿ níⁿ ndaāⁿ saⁿ níⁿ ndeeⁿ saⁿ nduucúⁿ yāⁿ. ²⁷ Ch'iinuⁿ 'uúvīⁿ nduuyūⁿ miiⁿ níⁿ nan'daāⁿ Félixⁿ miiⁿ yeⁿ'ēⁿ ladoⁿ gobernadorⁿ níⁿ sndaāⁿ saⁿ'āⁿ chíⁿ nguuviⁿ Porcioⁿ Festoⁿ. Naatiⁿ Félixⁿ miiⁿ níⁿ neⁿ'e saⁿ cunéeⁿ saⁿ chíⁿ ch'ēeteⁿ saⁿ ladoⁿ yeⁿ'e 'iiⁿ'yāⁿ Israelⁿ s'eeⁿ níⁿ snuūⁿ ntuūⁿ saⁿ Pabloⁿ vácūⁿ.

Pablo ngaⁿ'a sa chíⁿ caⁿ'ā sa nanaáⁿ César

25 Taachíⁿ ndaāⁿ saⁿ'āⁿ Festoⁿ na yáⁿ'āaⁿ yeⁿ'éⁿ yāⁿ cho'ōoⁿ 'iiⁿ'nūⁿ nguuviⁿ níⁿ cuchééⁿ yāⁿ yeⁿ'ēⁿ yāāⁿ Cesareaⁿ níⁿ ndaaⁿ yāⁿ na yāāⁿ Jerusalénⁿ. ² Níⁿ 'iiⁿ'yāⁿ chiiduúⁿ ch'ēeteⁿ ca yeⁿ'eⁿ chiiduúⁿ n'gēeteⁿ yeⁿ'e Israelⁿ ndúúcuⁿ 'iiⁿ'ntyéⁿ'ēⁿ yeⁿ'e 'iiⁿ'yāⁿ Israelⁿ s'eeⁿ cheⁿ'e yāⁿ nanaáⁿ Festoⁿ miiⁿ níⁿ ngaⁿ'áⁿ yāⁿ contraⁿ yeⁿ'e Pabloⁿ miiⁿ. Níⁿ chíⁿ cáⁿ'áⁿ yāⁿ saⁿ'āⁿ. ³ Ngaⁿ'áⁿ yāⁿ contraⁿ Pabloⁿ miiⁿ níⁿ ngiicaⁿ yāⁿ 'áámáⁿ favorⁿ chíⁿ nandééⁿ yāⁿ Pabloⁿ na yāāⁿ Jerusalénⁿ. Tiⁿ 'iiⁿ'yāⁿ s'eeⁿ níⁿ canéeⁿ listoⁿ yāⁿ níⁿ nadicadínuuⁿ yāⁿ chíⁿ 'caaⁿ'núⁿ yāⁿ saⁿ'āⁿ cuaaⁿ cyúúniⁿ. ⁴ Naatiⁿ Festoⁿ míⁿ nan'gueécútaⁿ'āⁿ saⁿ chíⁿ Pabloⁿ miiⁿ canuuⁿ saⁿ vácūⁿ na yāāⁿ Cesareaⁿ níⁿ 'úú cáámáⁿ can'daáⁿ yeⁿ'ēⁿ yāāⁿ 'cūⁿ. ⁵ Tuuⁿ'mi níⁿ ngaⁿ'āⁿ saⁿ: Ndís'tiiⁿ chíⁿ ngiiⁿ díⁿ' nīⁿ, caⁿ'áⁿ níⁿ nduucúⁿ na yāāⁿ miiⁿ níⁿ nduutiⁿ chíⁿ vééⁿ nuūⁿ'ndiⁿ yeⁿ'ēⁿ saⁿ'áⁿ 'cūⁿ tuuⁿ'mi caaⁿ'máⁿ níⁿ cheēⁿ nuuⁿ'ndiⁿ yeⁿ'ēⁿ saⁿ.

⁶ Níⁿ canéeⁿ chíⁿ Festoⁿ cuuviⁿ 'náaⁿ yāⁿ ndúúcuⁿ 'iiⁿ'yāⁿ s'eeⁿ tan'dúúcaⁿ níⁿniⁿ nguuviⁿ ndíⁿchíⁿ nguuviⁿ. Níⁿ ndaáⁿ yāⁿ na yāāⁿ Cesareaⁿ. Chideeveⁿ táámáⁿ nguuviⁿ níⁿ Festoⁿ ch'iindíⁿ yāⁿ na sillaⁿ yeⁿ'ēⁿ juezⁿ níⁿ caⁿ'áⁿ yāⁿ chíⁿ cinguaiⁿ yāⁿ Pabloⁿ. ⁷ Sáⁿ'a 'cūⁿ taachíⁿ ndaāⁿ saⁿ, 'iiⁿ'yāⁿ Israelⁿ s'eeⁿ chíⁿ ndaáⁿ yāⁿ yeⁿ'ēⁿ yāāⁿ Jerusalénⁿ 'iiⁿ'yāⁿ miiⁿ nanguēcundíⁿ yāⁿ Pabloⁿ miiⁿ níⁿ caⁿ'a yāⁿ neenéⁿ n'deēeⁿ nuuⁿ'ndiⁿ yeⁿ'ēⁿ saⁿ. Marⁿ 'áámáⁿ 'iiⁿ'yāⁿ cuuviⁿ ngaⁿ'a yāⁿ cheēⁿ chíⁿ cuaacuⁿ. ⁸ Tuuⁿ'mi níⁿ Pabloⁿ miiⁿ níⁿ caⁿ'a maāⁿ saⁿ yeⁿ'ēⁿ saⁿ: Nguēeⁿ nuūⁿ'ndiⁿ yeⁿ'éⁿ marⁿ 'áámáⁿ, ndiiⁿ nguééⁿ ndúúⁿ yeⁿ'ēⁿ leyⁿ yeⁿ'e 'iiⁿ'yāⁿ Israelⁿ s'eeⁿ ndiiⁿ nguééⁿ ndúúⁿ yeⁿ'ēⁿ costumbreⁿ yeⁿ'ēⁿ yaācūⁿ temploⁿ ndíⁿ nguééⁿ ndúúⁿ yeⁿ'ēⁿ reyⁿ Césarⁿ.

⁹ Naatiⁿ Festoⁿ miiⁿ neⁿ'e saⁿ caⁿ'a saⁿ favorⁿ yeⁿ'ēⁿ 'iiⁿ'yāⁿ Israelⁿ s'eeⁿ. Níⁿ nan'gueécútaⁿ'āⁿ saⁿ yeⁿ'ēⁿ Pabloⁿ, níⁿ caⁿ'āⁿ saⁿ: ¿'Ááⁿ neⁿ'e diⁿ caⁿ'āⁿ diⁿ na yāāⁿ Jerusalénⁿ níⁿ míⁿ' cuundicaadiⁿ yeⁿ'ēⁿ diⁿ deⁿ'e nduⁿ'u miiⁿ

nanáán 'úú níicū cádiinuuⁿ de'e falta yeⁿé di?

¹⁰ Pablo miiⁿ ni caⁿa sa: Nanáán saⁿā ntyeⁿé caneeⁿ na juzgado yeⁿe César naachi caneeⁿ, chí 'cuúndicaadi yeⁿé. 'Iiⁿyāⁿ Israel s'eeⁿ nguéeⁿ de'ē veeⁿ ñdiíⁿ ndúucu yā, tan'dúucā chí n'dai deenú nī.

¹¹ Caati nduutí chí de'ē chí 'áámá ch'ēētē ñdiíⁿ o n'niíⁿnúⁿ tinaⁿā, nguéeⁿ 'va'á chí 'cuúví. Ndúuti chí nguéeⁿ de'e veeⁿ ñdiíⁿ yeⁿé chí ngiica 'iiⁿyāⁿ s'tíi, mar 'áámá 'iiⁿyāⁿ nguéeⁿ cuuvi ca'a yā 'úú saⁿa s'tií. 'Úú neⁿé caⁿá caaⁿmáⁿ nanáán César.

¹² Tuu'mi ní Festo miiⁿ taachí caⁿa sá chii sa saⁿā ntyeⁿe yeⁿé concilio, ní n'guecútaⁿā sa: Ngaⁿa ntúuⁿ di chí naⁿa di nanáán César miiⁿ tuu'mi ní naⁿa di.

Pablo nanáán Agripa ndúucū Berenice

¹³ Cho'ōo 'áámá nduu 'úúví nguuví ní rey Agripa ndúucū táⁿā Berenice ndaá yā yāāⁿ Cesarea chí diíⁿ yā saludar Festo. ¹⁴ Naaⁿ 'tē ch'ēetinée yā ndúucu Festo miiⁿ ní Festo miiⁿ caⁿa cuáácú sá rey yeⁿé nuuⁿndi yeⁿé Pablo ni ngaⁿā sa: 'Áámá saⁿā canúⁿ sa vácūū caavā Félix miiⁿ. ¹⁵ Chuū chí yeⁿé saⁿā miiⁿ. Taachí cheⁿé na yāāⁿ Jerusalén tuu'mi ní chiiduú n'geetē yeⁿe Israel ndúucū 'iiⁿyāⁿ ndiicúū yeⁿé 'iiⁿyāⁿ Israel s'eeⁿ ndaá yā nanaán ní chiica yā chí 'úú diíⁿ condenar saⁿā. ¹⁶ Nan'guecútaⁿá yeⁿé 'iiⁿyāⁿ s'eeⁿ. Nguéeⁿ costumbre yeⁿe 'iiⁿyāⁿ romano s'eeⁿ chí 'caaⁿnúⁿ yā 'áámá 'iiⁿyāⁿ neⁿe chí 'āā cuéé 'cuúndicaadi yeⁿé yā ní caaⁿmáⁿ yā yeⁿé maán yā nanáán 'iiⁿyāⁿ chí ngiica nuuⁿndi yeⁿé yā. ¹⁷ Nguéeⁿ chí 'naán. Nduuvidaamá yā 'muuⁿ. Chideeve táámá nguuví 'úú ch'iindí na silla yeⁿe juez ní ca'á orden, ní dicho'ó chí canguai saⁿā miiⁿ. ¹⁸ 'Āā snéeⁿ saⁿā chí ngiica nuuⁿndi yeⁿé sa. Nguéeⁿ caⁿa yā mar 'áámá nuuⁿndi tan'dúucā chí 'úú nacádiinuúⁿ. ¹⁹ Ti véé

vaadi 'caa'va yeⁿé yā ndúucu sa lado yeⁿé religión yeⁿe 'áámá Jesús chí 'āā n'dii yā. Ní Pablo miiⁿ ngaⁿa cuaacu sa chí nguéeⁿ n'dii yā. ²⁰ 'Úú nguéeⁿ deenú de'e ra idiíⁿ yeⁿé chuū ní tiinguúneeⁿ saⁿā miiⁿ: ¿'Áá neⁿe di chí caⁿa di na yāāⁿ Jerusalén ní miiⁿ 'cuúndicaadi yā nuuⁿndi yeⁿé di? ²¹ Naati Pablo miiⁿ chica sa chí 'cuēetinéeⁿ ngínú sa saⁿā Augusto ní saⁿā miiⁿ ní cadíinuúⁿ sa nuuⁿndi yeⁿé sa. 'Úú ní chiicá chí cu'núuⁿ yā saⁿā vácūū neⁿe chí caⁿá dicho'ó saⁿā nanáán César Augusto.

²² Tuu'mi ní Agripa ngaⁿā sa ngii sa Festo: 'Úú ní neⁿé 'caandiveeⁿ yeⁿé sa. Saⁿā miiⁿ ngaⁿa sa ngii sa saⁿā: Cavyaaⁿ ní 'caandiveeⁿ di.

²³ Chideeve táámá nguuví Agripa ndúucū táⁿā Berenice ndaá yā tan'dúucā costumbre yeⁿé rey. Ní sndaa yā naachi snéeⁿ 'iiⁿyāⁿ ndúucū comandante ndúucū saⁿā n'geete yeⁿe yāāⁿ miiⁿ. Ní Festo miiⁿ caⁿa yā chí dicho'ó yā Pablo miiⁿ, ní caⁿá yā nguai yā saⁿā. ²⁴ Tuu'mi ní Festo miiⁿ ní caⁿā sa: N'dii rey Agripa ndúucū nducyáácá ndis'tií 'iiⁿyāⁿ chí snéeⁿ nī nduucú 'nū. 'Muuⁿ caneeⁿ sáⁿa 'cūū. Nducyáácá 'iiⁿyāⁿ Israel s'eeⁿ yeⁿé yāāⁿ Jerusalén ní yeⁿé yāāⁿ 'cūū ngiicá yā nuuⁿndi yeⁿé sáⁿa 'cūū. N'gai yuudú yā chí 'cuūvi sa. Ní 'āā ntéé cunéeⁿ sá. ²⁵ Nguéeⁿ ndaacá mar 'áámá falta yeⁿé sa chí 'cuūvi sa. Maaⁿ sa ngiica sa chí caⁿā sa nanáán yeⁿé sáⁿā Augusto César. Ní 'úú dicho'ó saⁿā. ²⁶ 'Úú nguéeⁿ de'ē veeⁿ chí deenú chí dinguúⁿ yeⁿé Augusto César yeⁿé saⁿā miiⁿ. Candeé saⁿā nanáán ndis'tií ní vmnáán vmaaaⁿ nanaán n'dii saⁿā rey Agripa ti taachí 'cuiinu tascaadí yeⁿé sa, canee chí dinguúⁿ. ²⁷ Caati deenú chí nguéeⁿ n'daacā chí 'úú dicho'ó saⁿā ndíi nguéeⁿ cadíinuúⁿ nuuⁿndi yeⁿe sa chí diíⁿ nguúⁿ tandii ra.

**Pablo caⁿa sa yeⁿe maaⁿ
sa nanááⁿ rey Agripa**

26 Tuuⁿmi ní rey Agripa ngaⁿa sa ngii sa Pablo: Teé lugar chi caaⁿmaⁿ di yeⁿe maaⁿ di. Tuuⁿmi ní Pablo miiⁿ ndo^o sa ta'a sa. Tucá'a sa caⁿa sa yeⁿe maáⁿ sa: ²N'dií rey Agripa, deⁿe chúúca n'daacá chi cuuvi caaⁿmaⁿ yeⁿe maáⁿ nanááⁿ ní yeⁿe tanducuéⁿe nuuⁿndi chi ngaⁿa 'iiⁿyāⁿ Israel s'eeⁿ. ³N'dií ní deenú ní tanducuéⁿe costumbre ndúúcu chi itinguuneeⁿ yeⁿe chi véé nguuaⁿ 'iiⁿyāⁿ Israel s'eeⁿ. Ní ngiicá n'dií chi 'caandiveéⁿ ní yeⁿe ndúúcu n'dai.

Vida yeⁿe Pablo

⁴Ndií cuááⁿ vmaaⁿ ndii saⁿá lífⁿ 'úú canéé na yááⁿ Jerusalén ndúúcu 'iiⁿyāⁿ Israel. N'diichi 'iiⁿyāⁿ Israel s'eeⁿ 'úú. ⁵'iiⁿyāⁿ s'eeⁿ ntúúⁿ déenu yā yeⁿe ndíí cuaaⁿ vmaaⁿ. Ní nduuti chi neⁿe yā caaⁿmaⁿ cuaacú yā, canéé tan'dúúca saⁿá fariseo chi chæchi taavi yeⁿe religión yeⁿe 'nū ndúúcu costumbre yeⁿe 'nū. ⁶Maaⁿ ní caavā chi 'úú i'teenú chi Dendyuūs caⁿá yā nadacuéeⁿ yā 'iiⁿyāⁿ yeⁿe nguuaⁿ tináⁿā tan'dúúca chi ngaⁿa yā ngii yā chiida 'nū 'iiⁿyāⁿ s'eeⁿ n'gai yā 'úú nanááⁿ juez. ⁷'iiⁿyāⁿ yeⁿe ndiichúúví daiyá yā 'iiⁿyāⁿ Israel yeⁿe 'nū i'teenú yā chi Ndyuūs caⁿa yā chi diíⁿ yā. Ní cáavā chuū cueⁿe daáⁿmaⁿ idiíⁿ yā ntiiⁿnyuⁿ yeⁿe Dendyuūs ndii nguuví ndii n'gaaⁿ. N'dií rey Agripa, caati cáavā chuū chi cunee ngíínú ntuúⁿ 'iiⁿyāⁿ Israel ngiicá yā yeⁿe. ⁸¿Deⁿe nacadiinúúⁿ ní yeⁿe chúú? ¿Deⁿe cuuvi chí ndís'tií nacadiiinúúⁿ ní chi Dendyuūs nguéé cuuvi nadin'duuchí yā 'iiⁿyāⁿ yeⁿe nguuaⁿ tináⁿā?

Pablo ditaáⁿ yā ndúúcu 'iiⁿyāⁿ

⁹'Úú ní cuaacu níⁿnyúⁿ s'teenú chi canéé chi n'deé n'dái dííⁿ contra yeⁿe Jesús yeⁿe yááⁿ Nazaret. ¹⁰Tiicá ntúúⁿ

dííⁿ na yááⁿ Jerusalén. 'Úú ch'íí 'iiⁿyāⁿ chi i'teenú Jesús vácúú. Chiiduú n'geeté yeⁿe Israel tee yā poder 'úú. Ní taachi ch'iiⁿnuⁿ yā 'iiⁿyāⁿ, 'úú caⁿá ti 'tíicā. ¹¹Neené n'deé cuuvi ch'íí 'iiⁿyāⁿ s'eeⁿ chi i'teenú na nducyáácá yaácú sinagoga na vácúú. Dííⁿ chi 'iiⁿyāⁿ cuuvi caaⁿmaⁿ yā chi nguéé i'teenú yā Jesús. Neené taaⁿ dííⁿ ndúúcu 'iiⁿyāⁿ s'eeⁿ chí i'teenú yā Jesús. Ní can'daá 'iiⁿyāⁿ ndíí na yááⁿ chi nguéé n'diichí.

Pablo caⁿa yā taacá chi i'teenú yā

(Hch. 9.1-19; 22.6-16)

¹²Taachi dííⁿ chuū cueⁿe na yááⁿ Damasco ní candéé caaca ndúúcu orden yeⁿe chiiduú n'geeté yeⁿe Israel. ¹³N'dií rey, taachi canuúⁿ yúúní taanduú ná maⁿa nguuvi n'diichí 'áamá deéve nanguuvi chi ch'æte n'dái cá deéve nguéé tii dééve yeⁿe 'yáⁿā. Deéve miiⁿ ní nuuⁿmaⁿ ndiivii 'úú ndíí 'iiⁿyāⁿ chi sneé yā nduucú. ¹⁴Chindeéve nducyaaca nús'úu na yáⁿā. 'Úú ch'iindiveéⁿ 'áamá nduudu chi yaáⁿvi 'úú ndúúcu davaacu hebreo chi ngaⁿá: Saulo, Saulo, ¿deⁿe cáavā n'daá di 'úú? Chééchi taavi chí diíⁿ di tan'dúúca 'áamá 'iiti ca'a ca'a tí na yáⁿā cuiiⁿnyuⁿ. ¹⁵'Úú ní caⁿá: ¿Du'ú n'dií, Señor? Ní Señor miiⁿ ní caⁿa yā: 'Úú Jesús chi n'daá di. ¹⁶Naati nacuééⁿ di, ní cueendi di. Cáavā chuū che'enaáⁿ yeⁿe di. Ní cu'neéⁿ dii lado yeⁿe 'iiⁿyāⁿ ndíí tiiⁿ chí diiⁿ ntiiⁿnyuⁿ yeⁿe ní caaⁿmaⁿ di nduudu cuaacu yeⁿe dendúⁿ chi n'dííchi di yeⁿe dendúⁿ chi 'úú dííⁿ chi 'cuuⁿmíⁿ nááaⁿ yeⁿe di. ¹⁷Maaⁿ ní 'úú ní dicho'ó dii nanááⁿ 'iiⁿyāⁿ yeⁿe di ndúúcu yeⁿe 'iiⁿyāⁿ s'eeⁿ chí nguéé yeⁿe ndaata Israel. Ní taachi neⁿe yā sta'a yā dii ní 'úú nneé dii. ¹⁸Ní cuuvi diiⁿ di chí 'iiⁿyāⁿ chí nguéé snaaⁿ yā ní snaaⁿ yā ní tun'dáa di 'iiⁿyāⁿ s'eeⁿ ná maáiⁿ ní naⁿá yā na deéve. Ní tun'dáa di 'iiⁿyāⁿ yeⁿe poder yeⁿe yááⁿnguiniúⁿ ní naⁿá yā lado yeⁿe Dendyuūs. Ní ndaácá yā 'úú ní 'úú in-

adach'εεcú nuuⁿndi yeⁿé yā ní caavā chi cu'téenu yā yeⁿé. Ní véé herencia yeⁿé yā ndúúcū 'iiⁿyāⁿ chi Dendyuūs dindεeve yā.

Pablo díⁿ yā tan'dúúccā visión

¹⁹ Cáávā chuū, n'dií rey Agripa, nguée díⁿ chi cheeⁿdiitú díⁿ n'diichí cosa yeⁿé Dendyuūs. ²⁰ Naati caⁿá vmnaaⁿ vmnaaⁿ 'iiⁿyāⁿ chi snéé na yāāⁿ Damasco, ní cuayiivi caⁿá na yāāⁿ Jerusalén ndúúccū nuuⁿmaⁿ na yāⁿāa yeⁿe Judea ndúúccū 'iiⁿyāⁿ s'eeⁿ chi nguée yeⁿé ndaata Israel chi canee cuuⁿmíⁿ yā chi ndaacadaamí yā yeⁿé nuuⁿndi yeⁿé yā nícu cu'téenu yā Dendyuūs. Ní díⁿ yā ntiíⁿnyuⁿ chí n'daacā n'dai ní ch'íⁿí yā tanáⁿā 'iiⁿyāⁿ chi ndaacadaamí yā yeⁿé nuuⁿndi yeⁿe yā. ²¹ Cáávā chuū 'iiⁿyāⁿ Israel s'eeⁿ sta'á yā 'úú na yáacū templo ní nadacadiínuuⁿ yā chí 'caaⁿnuⁿ yā 'úú. ²² Ndyuūs chinnee yā 'úú chí cheé ndíí maaⁿ ní caⁿá nduudu cuaacu ndúúccū 'iiⁿyāⁿ ndiicúúⁿ ní 'iiⁿyāⁿ chí ngaⁿa ntiíⁿnyúⁿ yā. Nguée n'deée cá caⁿá yeⁿe dendu'ú chí caⁿa profetas ndúúccū Moisés yeⁿé dendu'ú chí canéé chí chíí. ²³ Caati Cristo miiⁿ cánéé chí 'cueenu yā cuuvi ní 'iiⁿyāⁿ miiⁿ vmnááⁿ vmnaaⁿ nnduuchí yā yeⁿe nguaaⁿ tináⁿā. Ní ngaⁿa cuaacú yā yeⁿé deeve nanááⁿ 'iiⁿyāⁿ Israel yeⁿé ndúúccū 'iiⁿyāⁿ s'eeⁿ chí nguée yeⁿé ndaata Israel.

Pablo ngaⁿa sa Agripa chí canéé chí cu'téenu yā

²⁴ Caⁿa Pablo chúú cáávā maāⁿ sa. Festo gobernador miiⁿ ní caⁿa yuudu sa: Loco dii, Pablo. Cáávā chí n'geēⁿ taaví dí chííⁿ chí nduuví loco dí.

²⁵ Naati saⁿā miiⁿ ní caⁿā sa: Nguée loco 'úú, n'dií Festo, chí n'dai taavi. Ngaⁿá nduudu cuaacu chí n'dai. ²⁶ Rey Agripa miiⁿ deenú ntúuⁿ yā chuū. 'Úú ngaⁿá nduucú yā yeⁿé tanducuéⁿé ndúúccū confianza. 'Úú nadacadiiⁿúúⁿ chí déenu yā chuū. Nguεε chó'oo chuū

ná n'de'ei. ²⁷ N'dií rey Agripa, ¿'áá i'téenu ní 'iiⁿyāⁿ profetas chí caⁿa nduudu yeⁿé Dendyuūs? 'Úú deenú chí i'téenu ní.

²⁸ Tuu'mi ní Agripa miiⁿ caⁿa sa chíí sa Pablo: 'Tεε 'tεε nūuⁿ diiⁿ di chí cu'teenú ndaacá Dendyuūs.

²⁹ Pablo miiⁿ ní caⁿā sa: 'Úú ngiicá Dendyuūs ndii talííⁿ o ndii ch'εete, nguée dámaaⁿ n'dií ti 'tiicá ntúuⁿ nducyaaca 'iiⁿyāⁿ chí n'giindiveeⁿ yā yeⁿé, cuuvi cu'téenu ntuuⁿ yā Ndyuūs miiⁿ tan'dúúccā 'úú, naati nguée cuneé yā ndúúccū cadenasⁿ 'cūú.

³⁰ Taachí caⁿa sa chuū ncueeⁿ rey ndúúccū gobernador ndúúccū Berenice ndúúccū 'iiⁿyāⁿ chí canéé yā ndúúccū 'iiⁿyāⁿ s'eeⁿ. ³¹ Taachí 'iiⁿyāⁿ s'uuⁿ cueⁿé yā 'áámá lado caⁿá yā nguaaⁿ maáⁿ yā: Mar 'áámá nuuⁿndi ch'εete nguée véé yeⁿé sa 'cūú nguεε chí 'caaⁿnuⁿ yú saⁿā, ndíí nguée chí caⁿa sa vácūú.

³² Níicú Agripa ngaⁿā sa ngii sa Festo: Sá 'cūú cúví nguáⁿai sa nduuti chí nguée caⁿā sa 'tíicā: 'Úú caⁿá nanááⁿ César.

Dicho'ó yā Pablo na yāāⁿ Roma

27 Taachí Festo ca'á yā orden chí cueⁿé 'nū na barco na yāⁿāa Italia, díⁿ yā entregar Pablo ndúúccū tanáⁿā 'iiⁿyāⁿ chí preso yā capitán chí nguuvi sa Julio. Capitán miiⁿ chí yeⁿé 'áámá taaⁿ soldados chí nguuvi Augusto. ² Cueⁿé ntúuⁿ 'nū na 'aama barco yeⁿe yāāⁿ Adramitio chí caama cáácá ní caⁿā ná cheendi va'ai s'eeⁿ yeⁿé nuūⁿníⁿyáⁿā na yāāⁿ s'eeⁿ yeⁿe yāⁿāa Asia. Sndaá 'nū na barco ní cueⁿé 'nū. Ní canéé sa ndúúccū nús'uu 'áámá saⁿā chí nguuvi Aristarco yeⁿé yāⁿāa Macedonia chí yeⁿé yāāⁿ Tesalónica. ³ Táámá nguuvi ndaá 'nū cheendi va'ai yeⁿe nuūⁿníⁿyáⁿā niiⁿnuúⁿ na yāāⁿ Sidón. Julio miiⁿ díⁿ yā ndúúccū Pablo miiⁿ tan'dúúccā amigo n'dai. 'Cuúⁿ yā chí cueⁿe sa naachi canee amigos yeⁿé sa. Amigos ca'á yā chí neⁿé

Pablo miiⁿ. Ní Pablo miiⁿ ntaavi'tuunúúⁿ sa. ⁴ Ní cueⁿ'e ntúuⁿ 'nū na barco ní cho'ó 'nū cuaaⁿ ndiia lado sur yeⁿ'ē isla Chipre caati 'yúúné ní contra yeⁿ'ē barco miiⁿ. ⁵ Taachi cho'oo cuaacú 'nū nuūⁿniⁿ'yáⁿ'ā cueⁿ'é 'nū niiⁿnuúⁿ 'yáⁿ'ā Cilicia ndii 'yáⁿ'ā Panfilia. Ndaá 'nū na yáaⁿ Mira chi 'áámá yáaⁿ yeⁿ'ē yáⁿ'ā Licia.

⁶ Ní capitán chi ngaⁿ'a ntiiⁿnyúⁿ yā nndaaca yā 'áámá barco yeⁿ'ē yáaⁿ Alejandría chi naⁿ'ā yáⁿ'ā Italia. Cucheé 'nū na barco miiⁿ ní cuinaⁿ'a 'nū. ⁷ Ní ngínū ngiínū cueⁿ'é 'nū na barco chi 'nááⁿ taavi n'deēe nguuví. Ní cueⁿ'é 'nū ndúúcu nééné n'deēe peligro na barco niiⁿnuúⁿ ná yaaⁿ Gnido ní 'āā ntéé 'cuūⁿ 'yúúné chi caⁿ'á 'nū cuááⁿ vmnaaⁿ. Tuu'mi ní cueⁿ'é 'nū na nduu 'uuvi isla, isla Salmón chi canee niiⁿnuúⁿ ndúúcu isla Creta caati nguéé 'yúúné taaⁿ miiⁿ. ⁸ Níícu a fuerza dííⁿ 'nū ndaaⁿ 'nū niiⁿnuúⁿ 'áámá yáaⁿ chi nguuvi Buenos Puertos ní niiⁿnuúⁿ yáaⁿ miiⁿ canéé yáaⁿ Lasea.

⁹ Taachí cho'oo 'naaⁿ tiempo cueⁿ'é 'nū na barco ndúúcu nééné n'deēe peligro. 'Āā cho'oo nguuvi yeⁿ'ē 'viicu chi nguéé che'é 'nū. Tuu'mi ní Pablo caⁿ'a yā chii yā 'iiⁿ'yāⁿ s'uuⁿ. ¹⁰ Ní caⁿ'a yā: Ndís'tii saⁿ'ā, 'úú inaaⁿ chi 'āā nééné n'deēe peligro cueⁿ'ē ndúúcu yú chi cuuvi ndaa yú. Nguéé dámaāⁿ carga yeⁿ'ē barco cuuvi ndái caati ndii s'uuúⁿ cuuvi ndai yú.

¹¹ Naati capitán miiⁿ ní n'giindiveéⁿ yā nduudu yeⁿ'ē saⁿ'ā chi ndeēe barco ndúúcu saⁿ'ā chi ngaⁿ'a ntiiⁿnyuⁿ yeⁿ'ē barco miiⁿ ti 'āā chí caaⁿ'maⁿ 'nūū Pablo miiⁿ. ¹² N'deēe n'dái inaaⁿ yā chí 'āā ntéé n'daacā chi canee barco na cheendi va'āi yeⁿ'e nuūⁿniⁿ'yáⁿ'ā miiⁿ tiempo chi 'iiche. Ní n'deēe n'dái 'iiⁿ'yāⁿ nduuvidaamá yā chí caⁿ'a yā nuūⁿniⁿ'yáⁿ'ā yeⁿ'ē miiⁿ. Ní neⁿ'é yā chí ndaaⁿ yā na yáaⁿ Fenice chi 'áámá cheendi va'āi yeⁿ'e nuūⁿniⁿ'yáⁿ'ā yeⁿ'e isla Creta chi canee cuaaⁿ ndiia sur, cuaaⁿ naachi n'giia 'yáⁿ'ā. Ní miiⁿ canéé tiempo chi 'iiche.

'Yúúné tááⁿ na nuuⁿniⁿ'yáⁿ'ā

¹³ Ndaā 'yúúné ngínu yeⁿ'ē cuaaⁿ ndiia tan'dúúca chí nacadiinuuⁿ yā chí n'daāca. Candée yā anclas cūū chí 'caanu barco miiⁿ ní cueⁿ'é yā canéé diitúú nuūⁿniⁿ'yáⁿ'ā niiⁿnuúⁿ isla Creta. ¹⁴ Nguéé neé 'naaⁿ ndaaⁿ táámá 'yúúné taāⁿ taavi chí nguuvi Euroclidón tan'dúúca ciclón chí contra yeⁿ'ē barco miiⁿ. ¹⁵ Taachi 'yúúné mííⁿ dííⁿ chí barco 'āā ntéé cuuvi caⁿ'a barco miiⁿ contra yeⁿ'ē 'yúúné, tuu'mí s'neeⁿ maáⁿ 'nū candéē 'yúúné barco miiⁿ naachi neⁿ'ē. Ní nús'uu cueⁿ'é 'nū 'tíicā.

¹⁶ Ndaá 'nū na 'áámá isla chí nguuvi Clauda naachi nguéé véé 'yúúné taaⁿ. 'Āā nééné ngⁿ'ii candée yā barco 'liiⁿ vmnaaⁿ barco ch'ete ní dichichí yā barco 'lííⁿ miiⁿ. ¹⁷ Taachi 'āā chí n'daí yā dichichí yā barco 'lííⁿ ndúúcu 'ii'yū cuaaⁿ náávtaⁿ'ā, tuu'mi ní 'va'á yā chí ndaaⁿ yā Sirte chí 'áámá cuaaⁿ cheeti nuūⁿniⁿ'yáⁿ'ā naachi canéé yáⁿ'āa dúúⁿ naachí 'āā ntéé cuuvi caaca barco miiⁿ. Tuu'mi di'cua'á yā tíínūⁿ yeⁿ'e barco miiⁿ. Tuu'mi ní chí 'néeⁿ yā barco miiⁿ chí cueⁿ'e maáⁿ ntúūⁿ. ¹⁸ Ní dííⁿ 'yúúné miiⁿ chí cueⁿ'ē barco ndúúcu peligro ti 'yúúné tááⁿ. Chideeve táámá nguuvi tuc'á yā ndaavi yaí yā carga yeⁿ'ē barco na nuūⁿniⁿ'yáⁿ'ā. ¹⁹ Ndiichí ndii 'ííⁿ'núⁿ nguuvi miiⁿ ndúúcu ta'á yā chí yā nducuéⁿ'ē dendúúⁿ chí ndeēe barco na nuūⁿniⁿ'yáⁿ'ā. ²⁰ Nguuvi nguuvi s'eeⁿ 'āā ntéé n'diichí 'nū 'yáⁿ'ā ndii nguēē ndúú 'ííⁿ'nyúⁿ cucáávā 'yúúné tááⁿ mííⁿ chí nuuⁿ'maⁿ ndiiví 'nū. Tuu'mí 'āā ntéé nacadiinúúⁿ 'nū chí nanguáⁿ'ai 'nū.

²¹ 'Āā 'nááⁿ nguuvi chí nguéé nge'é 'nū. Tuu'mi Pablo miiⁿ cheendii yā naavtaⁿ'ā yeⁿ'é nducyaaca 'nū ní caⁿ'a yā: Ndúúti chí ndís'tii chí chí'téenu ní yeⁿ'é ní nguéé cueⁿ'ē yú na barco yeⁿ'ē isla Creta chí cutaⁿ'ā yú peligro miiⁿ ndúúcu denduⁿ'ú chí dindeē yú. ²² Maaⁿ ní cuuví ndis'tii.

Canee cúú^{mí} nī más cā ánimo caati nguée mar 'áamá 'iiⁿyāⁿ chi dindaí yā vida yeⁿé yā nguaāⁿ yú, dámaāⁿ barco miiⁿ chi cuuvi ndái. ²³Caati maaⁿ ngui-inú 'cūū canéé ángel yeⁿe Dendyuūs nduucú. 'Úú ní yeⁿe Dendyuūs 'úú ní 'úú dichii^lvé 'iiⁿyāⁿ. ²⁴Caⁿa ángel miiⁿ chii yā 'úú: Pablo, nguée 'va'a di. Canee chi cueéndii di nanááⁿ César. Nducyáácá 'iiⁿyāⁿ chi caⁿá yā na barco ndúúcu di cunduúchí 'iiⁿyāⁿ. ²⁵N'diichí ní compañeros. Cuneé ngínú ní ánimo caati 'úú i'teenú Dendyuūs. Canéé chi cuuvi tan'dúúca chi chii yā 'úú. ²⁶Canéé chí ca'ā naaⁿ yú na 'áamá isla.

²⁷Chii ndiichí cuūⁿ yaaⁿ ní cúcu tan'dúúca chi cuchí 'nū na nuūⁿniⁿyáⁿā chi nguuvi Adriático, ní cúchii ná maⁿa yaaⁿ ní saⁿā s'eeⁿ chi diiⁿ manejar barco chí tuumicádfínuuⁿ sa chi 'āā snée 'nū niⁿnuúⁿ na yáⁿā. ²⁸Tuu'mi ní ca'a nuuⁿ sá sonda ní ndaaca sa ngii ndiicú 'ya'āa chí yáánūⁿ ní cho'ō ca talíⁿ cuaaⁿ vmnaaⁿ nngueεcunée sa ca'a nuuⁿ ntúuⁿ sa sonda. Ndaaca ntuuⁿ sa ndítiiⁿyu 'ya'āa chí yáánūⁿ. ²⁹'Va'á yā chí ca'a naáⁿ yā na 'vaachí. Tuu'mi ní ca'ā nuúⁿ ya ná cuūⁿ ancla cūū yeⁿe cuaaⁿ dáámí, cosa chi cueendii barco miiⁿ ní 'āā ntée caaca. Ní snee ngínú yā chí cúúví deεve. ³⁰Tuu'mi ní saⁿā chí díⁿ yā manejar barco ch'εeti yaaⁿ sá chí cáanu sa yeⁿe barco. Ní ca'a nuúⁿ yā barco 'líⁿ na nuūⁿniⁿyáⁿā. Díⁿ yā tan'dúúca chí cangúu yā ancla cūū yeⁿe cuaaⁿ vmnaaⁿ barco miiⁿ. ³¹Pablo miiⁿ caⁿa yā chii yā capitán: Ndúúti chí saⁿā s'eeⁿ nguée canee sa na barco miiⁿ ndís'tii ní nguée cuuvi nanguaⁿai ní.

³²Tuu'mi ní soldados ch'iica sa lazo yeⁿe barco 'líⁿ. Diiⁿ sá chí cueⁿe maāⁿ ní chindai.

³³Taachí caama chideεve Pablo caⁿa yā chii yā nducyáácá 'iiⁿyāⁿ chí che'é yā. Ní caⁿa yā: Maaⁿ ní ndiichi cuūⁿ ngu-uví chí 'āā ntée che'é ní ní 'cuεetinée ní

ndúúcu cuidado. Ní nguée che'é ní mar 'áamá yuūdū. ³⁴Úú ngiicá ndis'tii chí che'é ní maaⁿ ní cúcu véé fuerza yeⁿé ní ti mar 'áamá yuūdū tíⁿ ní nguée cuuvi ndai.

³⁵Taachí caⁿa yā chuū, sta'á yā pan. Ca'á yā gracia Nduyūs nanááⁿ nducyaaca yā ní taachi ndéé yā pan tucá'a yā che'é yā. ³⁶Tuu'mi ní nducyaaca yā canee cúú^{mí} yā más ca ánimo ní che'é ntuúⁿ yā. ³⁷Nducyáácá 'nū chí snúuⁿ 'nū na barco tan'dúúca 'uūví ciento canéé 'iiⁿnūⁿ ngeεcu nditiiⁿyu 'áamá 'nū. ³⁸'Āā nduuví ditiinú yā. Díⁿ yā chí nan'daa ca'ái barco miiⁿ. 'Canuúⁿ yā trigo chí ndéé barco miiⁿ na nuūⁿniⁿyáⁿā.

Chindaí barco

³⁹Taachí chideεve táamá nguuví nguée 'íntinaáⁿ 'nū tíí yáⁿā naachi snée 'nū naati n'diichí 'nū 'áamá lugar naachi vee 'áamá playa o yáⁿā ndúúti. Nduuvidáámá 'nū neⁿe 'nū cundaa 'nū na playa miiⁿ ndúúcu barco. ⁴⁰Ní chiica ntúuⁿ yā 'iiⁿyu yeⁿe cucáávā chí ancla cūū chí canuúⁿ na nuūⁿniⁿyáⁿā. Tuu'mi ní cuaaⁿ dáámí barco miiⁿ nadatí yā remos chí tan'dúúca 'áamá tabla chí diiⁿ guiar barco miiⁿ. Ní che'eⁿ yā tiinūⁿ miiⁿ yeⁿé cuaaⁿ vmnaaⁿ barco miiⁿ na 'yúúné ní cueⁿé 'nū na playa chí yáⁿā ndúúti. ⁴¹Caⁿa naaⁿ 'nū naachi 'áamá lugar chí 'uūví nuūⁿniⁿ ní díⁿ yā chí ndaā barco miiⁿ na yáⁿā cuaaⁿ diitúú cheeti nuūⁿniⁿ. Díⁿ yā chí nacan'dáā barco 'iicu cuááⁿ vmnaaⁿ yeⁿe barco miiⁿ chí canuúⁿ ca nguaaⁿ nuūⁿniⁿ 'āā na yáⁿā canéé cheechi. Chééndii chí 'āā ntée chiicā 'iicu cuaaⁿ dáámí barco miiⁿ neⁿe nda'ai ndúúcu fuerza yeⁿe nuūⁿniⁿ miiⁿ. ⁴²Tuu'mi ní soldado s'eeⁿ caⁿa yā chí 'caaⁿnuⁿ yā preso s'uuⁿ ní cúcu mar 'áamá yā nguée cuuvi cáaⁿyuūⁿ yā nuūⁿniⁿ ní cúcu cunaⁿa yā na yáⁿā. ⁴³Naati capitán miiⁿ neⁿe sa dinguáⁿai sa Pablo miiⁿ. Tuu'mí chícataáⁿ yā

chí neⁿe soldado s'uuⁿ. Tuu'mi ní capitán chi ngaⁿā ntiⁿnyuⁿ caⁿá sa chi nducyáácá yā chi cuuvi 'caaⁿyuuⁿ yā nuūⁿnīⁿ níícú chi cun'daa yā vmnaāⁿ nuūⁿnīⁿ ní 'caaⁿyuuⁿ yā ní nandaá yā na yáⁿāa ní nnguaⁿái yā. ⁴⁴Níícú tanáⁿa yā ní na tablas yeⁿē barco ndúúúⁿ yáⁿá yeⁿē barco cuuví nangan'dáa yā. 'Tíicā chií nducyáácá yā nanguáⁿai yā nandáa yā na yáⁿāa cuūⁿmáⁿ.

Pablo snée yā na isla Malta

28 Taachi 'āa nnguaⁿái 'nū chi-cadínuuⁿ 'nū isla miiⁿ nguuví Malta. ²Iiⁿyāⁿ chi snée na isla miiⁿ díⁿ yā tratar nús'uu n'daacā caati tiiví yā yáⁿā ní díⁿ yā recibir nducyaaca 'nū cáávā chí 'iiche miiⁿ ndúúúⁿ chi ngeeⁿ cúúvī. ³Tuu'mi ní Pablo miiⁿ nanguáiⁿ yā nduuví táā dúuⁿnē yáⁿá cuuⁿmaⁿ ní chíⁿ yā na yáⁿā. Ní 'áámá cúú cueⁿe tí chéenu tí caavā chí 'íⁿnūⁿ ní chēcú tí na tá'a Pablo miiⁿ. ⁴Taachi 'iiⁿyāⁿ chi snée miiⁿyā n'diichí yā cúú can'díícu tí na taⁿā Pablo tuu'mi ní caⁿa yā nguááⁿ maáⁿ yā: Nduudu cuáácú sáⁿa 'cūū 'níⁿnúⁿ sa 'iiⁿyāⁿ. 'Áará chí nanguáⁿāi sa na nuūⁿnīⁿyáⁿā nguéé 'cuááⁿ chí cunduūchi sa.

⁵Naati Pablo miiⁿ chíⁿídi sa cúú miiⁿ na yaⁿā. Nguéé deⁿē vee díⁿ tí ndúúúⁿ sa. ⁶Iiⁿyāⁿ s'uuⁿ snée ngínú yā chí n'diichí yā chí cundiitu taⁿā sa o cundéévé sá chí 'cuúvī. 'Iiⁿyāⁿ s'ééⁿ ní ch'etinéé ngínú yā deⁿē cuuví ndúúúⁿ sa. Ní n'diichí yā chí nguē deⁿē vee chií ndúúúⁿ sa. Tuu'mi ní na'dááⁿ yā vaanicadínūⁿ yeⁿé yā cucáávā chí n'diichí yā. Tuu'mi ní caⁿa yā: Pablo miiⁿ ní dendyuūs saⁿā.

⁷Na yááⁿ miiⁿ véé yáⁿāa yeⁿe 'iiⁿyāⁿ chí ngaⁿā ntiⁿnyúⁿ yā chí ngúúvī yā Publio. 'Iiⁿyāⁿ yááⁿ miiⁿ diiⁿ yā recibir nus'uū. Ní tee yā naachí ch'etinéé 'nū 'iiⁿnūⁿ nguuví. ⁸Ní chiida Publio canée

yā na cama chí ngííta yā yeⁿē ca'ai 'íⁿnūⁿ ndúúúⁿ ca'ái yuuúⁿ. Tuu'mí chí ndaā Pablo ní n'diichí yā 'iiⁿyāⁿ. Ní chíⁿíⁿú caⁿangua'á yā niicu s'néeⁿ Pablo miiⁿ ta'á yā cuerpo yeⁿé yā. Níícú ndu-uva yeⁿé yā. ⁹Ch'íⁿú chí díⁿ yā chíuú tuu'mi ní cuchíⁿ tanáⁿa yā chí snée yā na isla chí vee ntúúⁿ ca'ai yeⁿé yā. Ndaá yā naachi canée Pablo ní nduuva ntúúⁿ yeⁿe yā. ¹⁰'Iiⁿyāⁿ s'úúⁿ díⁿeⁿe yā nús'uu ní díⁿ yā n'daacā nduucúⁿ 'nū. Taachí chí ndaá 'nū na barco tee yā taanduvéé cosa chí neⁿe 'nū.

Pablo ndaá yā na yááⁿ Roma

¹¹Ch'etinééⁿ 'nū 'iiⁿnūⁿ 'iiyu miiⁿ ní cueⁿé 'nū na barco chí yeⁿē yááⁿ Alejandría chí ch'etinéé 'áámá tiempo 'iiche na isla miiⁿ. Barco miiⁿ ní cuaaⁿ vmnaaⁿ canée imágenes yeⁿe Cástor ndúúúⁿ Pólux chí dendyuūs s'eeⁿ yeⁿe 'iiⁿyāⁿ miiⁿ. ¹²Ní ndaa ntúúⁿ 'nū na yaāⁿ Siracusa ní ch'etinéé ntuuⁿ 'nū yááⁿ miiⁿ na 'iiⁿnūⁿ nguuví. ¹³Yeⁿe yááⁿ miiⁿ cueⁿe ntúúⁿ 'nū na barco niiⁿnuúⁿ ná 'diitúú nuūⁿnīⁿyāⁿā miiⁿ. Ndaa ntúúⁿ 'nū níⁿnuúⁿ na yaāⁿ Regio. Táámá nguuví cuayiiví chí ndáá 'yúúné yeⁿē cuaaⁿ ndi-ya sur ní ndii chíⁿ ndii 'úúvī nguuví ndaa ntúúⁿ 'nū na yááⁿ Puteoli. ¹⁴Miiⁿ ní naachi ndaāca 'nū hermanos chí i'téenu yā Cristo díⁿcuítu yā nús'uu ní 'cueⁿetinéé 'nū ndúúúⁿ yā ndeēchē nguuví. Chíⁿinu ní cueⁿe 'nū chíicá 'nū yááⁿ Roma. ¹⁵Taachi chíⁿindiveeⁿ hermano s'uuⁿ yeⁿé 'nū ní can'dáa yā ní díⁿ yā recibir nús'uu ndíⁿ yááⁿ Apio naachi vee niiⁿvēē ní ndii yááⁿ chí nguuví Tres Tabernas. Taachí Pablo n'diichí yā 'iiⁿyāⁿ, ca'á yā gracias Ndyuūs níícú vee ca ánimo yeⁿe yā. ¹⁶Taachí ndaá 'nū yaāⁿ Roma, capitán diiⁿ sa entregar preso s'eeⁿ jefe. Níícú jefe miiⁿ 'cuuⁿ yā chí cunée 'āa víⁿi Pablo ndúúúⁿ 'aama soldado chí diiⁿ sa cuidado 'iiⁿyāⁿ.

**Pablo nga^{na} yā nduudu
cuaacu na yāaⁿ Roma**

¹⁷ Ch'íinú tá 'iⁿnūⁿ nguuví Pablo miiⁿ ní ca'á yā chí cádiinuuⁿ saⁿā n'geete yeⁿē 'iⁿyāⁿ Israel s'eeⁿ. Nífcú taachi nduuvídaama sa Pablo miiⁿ caⁿá yā chíi yā saⁿā: Ndí'stíi v'í, 'úú ní nguéé de'ē vee díⁿ ndúúcu 'iⁿyāⁿ ndíí nguéé ndúú contra yeⁿe costumbre yeⁿe chíidá yú chí yeⁿē ndíí vmnaaⁿ. Ní 'iⁿyāⁿ díⁿ yā entregar 'úú ndíí yāaⁿ Jerusalén na ta'ā saⁿā romano s'uuⁿ. ¹⁸ Saⁿā s'eeⁿ, ní taachi tuumicadiinúúⁿ sa yeⁿé chí nguéé nuúⁿndí ch'ete yeⁿé neⁿe sa nn'deéchii sa 'úú caati nguéé indaaca sa mar 'áamá nuúⁿndí yeⁿé chí 'cuúví. ¹⁹ Naati 'iⁿyāⁿ Israel s'eeⁿ snéé yā contra yeⁿé, chíí obligado chí canéé chí caⁿá n'diichí saⁿā chí rey César. Nguéé de'ē caavā chí caacá contra 'iⁿyāⁿ yeⁿé. ²⁰ Ch'íⁿ chí cucáavā 'úú chíicá n'diichí ndis'tíi maaⁿ nífcú snaaⁿ nī, nífcú ndee nducú nī. Caati cucáavā chí canee ngiinú cosa yeⁿē Israel, canéé chí díⁿ sufrir ndúúcu cadena 'cūú.

²¹ Tuu'mí caⁿa sa chíi sa Pablo: Nús'uu ní nguéé ndííⁿ 'nū recibir carta yeⁿe yāⁿā Judea cucáavā díi, ndíí nguéé ndúú chíiⁿ ndaá mar 'áamá v'í yú chí caaⁿmaⁿ yā nuuⁿndí yeⁿē dí. ²² Naati neⁿé 'nū 'caandiveéⁿ 'nū chí nadicadiinuuⁿ dí caati cucáavā chí i'téenu dí. Nús'uu ní déenu 'nū chí nducuéⁿe cuaaⁿ ngaⁿa yā contra cosa chí i'téenu dí.

²³ Tuu'mi ndeève yā 'áamá nguuví ní ndaā taaví 'iⁿyāⁿ na vaacu sa. Ní Pablo miiⁿ caaⁿmaⁿ cuaacú yā ní ch'iⁿí yā 'iⁿyāⁿ yeⁿe chí Ndyuūs ngaⁿa yā ntiⁿnyúⁿ yā ndíí naachi ngíí ndeève ndíí naachi ngíí 'da'a. Ní ngaⁿa yā nduudu cuaacu yeⁿé Jesús tan'dúúca chí yeⁿē Moisés. 'Āā 'tíica nūuⁿ yeⁿē profetas

chí ca'ā nduudu yeⁿé Dendyuūs. ²⁴ 'Iicu náⁿa yā ní i'téenu yā chí caⁿa sa. Niicu náⁿa yā nguéé i'téenu yā. ²⁵ Naati nguéé nduuvídaamá yā. Ní cuindaacadáámí yā naati vmnááⁿ vmnaaⁿ chí cuindaacadaamí yā Pablo miiⁿ caⁿa sa nduudu 'cūú ndúúcu 'iⁿyāⁿ s'eeⁿ tan'dúúca chí caⁿa cuaacu Espíritu N'dai yeⁿe Ndyuūs cucáavā profeta Isaías ndúúcu chíidá yú. Ní caⁿa Espíritu N'dai chuú:

²⁶ Cueⁿe dí yāaⁿ 'cūú nífcú cuuvi dí 'iⁿyāⁿ: N'giindiveéⁿ dí ndúúcu veeⁿ dí ní nguéé tuumicadiinuuⁿ dí; inaaⁿ dí ndúúcu nduutináaⁿ dí ní nguéé i'téenu dí;

²⁷ caati staava yeⁿe 'iⁿyāⁿ yāaⁿ 'cūú néené ch'echi, nífcú nguéé cuuvi tuumicadiinuuⁿ yā ndúúcu staava yeⁿe yā ndúúcu veeⁿ yā nguéé n'dáacā ch'iindiveéⁿ yā, ndíí nguéé n'giindiveéⁿ yā ndúúcu veeⁿ yā, nduutináaⁿ yā ní nduudí maaⁿ, tí nguéé chinaáⁿ yā ndúúcu nduutinaaⁿ yā, ndíí nguéé nanguuecundí yā yeⁿē nuuⁿndí yeⁿé yā caatí 'úú idiíⁿ chí nduuví n'dái yā nanduūvā yeⁿé yā.

²⁸ Maaⁿ ní cádiinúúⁿ nī chíiⁿ chí Ndyuūs nadach'ecú yā nuuⁿndí yeⁿē nducyáacá 'iⁿyāⁿ s'eeⁿ chí nguéé yeⁿē ndaata Israel cáavā chí 'tíica 'iⁿyāⁿ s'eeⁿ 'caandiveéⁿ yā yeⁿe chuú.

²⁹ Nífcú taachi caⁿa sa nduudu 'cūú, 'iⁿyāⁿ Israel s'eeⁿ caⁿa yā. Néené n'deeé caⁿa yā nguaaⁿ maáⁿ yā.

³⁰ Pablo miiⁿ ní canéé yā 'uúví ndúuyú na 'áamá va'ai chí nadí'v'e yā. 'Iiⁿyāⁿ míⁿ díⁿ yā recibir ndúcyáacá yā chí ndaā na vaacú yā. ³¹ Caⁿá yā yeⁿē chí Dendyuūs ngaⁿā ntiⁿnyúⁿ yā nífcú chí'cueeⁿ yā yeⁿē Señor Jesucristo. Caⁿa yā ndúúcu nducyaaca 'iⁿyāⁿ. Mar 'áamá 'iⁿyāⁿ nguéé chíicatóaⁿ yā yeⁿē yā.

**PABLO IDINGUÚⁿ YĀ CARTA
'CŪŪ YEⁿE 'IIⁿYĀⁿ CHI
SNĒE YĀ YĀĀⁿ ROMA**

**Pablo idinguúⁿ yā yeⁿe 'iiⁿyāⁿ
yeⁿe yaacū yeⁿe yāāⁿ Roma**

1 'Úú Pablo 'úú ní 'úú dichí'vē Señor Jesucristo. Ndyuūs yaa'ví yā 'úú ni ndeévē yā 'úú. Ní dich'ó yā 'úú chi cuuví apóstol chi candéé nduudu yeⁿé Ndyuūs chi nduudu yeⁿe evangelio yeⁿe chi nanguaⁿ'ai 'iiⁿyāⁿ.

²Ndyuūs ní caⁿa yā n'dee n'dái tiempo chi 'āā ch'ó'ōo chi ca'a yā evangelio chí nduudu cuaacu chi nadanguáⁿ'ai yā taachi profetas ngaⁿ'á yā yeⁿē. Ní dingúⁿ yā na libro yeⁿe Dendyuūs yeⁿē chūū. ³Nduudu 'cūū chi evangelio ní yeⁿe Señor Jesucristo yeⁿe yú chi Daiya Dendyuūs. Cristo ní ndāa yā iⁿ'yeeⁿ'dí 'cūū ndúúⁿcū cuerpo tan'dúúⁿcā s'uuúⁿ cáāvā na ndaata yeⁿē rey David. ⁴Ní cucááva Espíritu chi n'dai taavi yeⁿe Cristo, Cristo dicuaacú yā chí Daiyá Ndyuūs ndúúⁿcū poder yeⁿé Ndyuūs chi ch'ēete taavi ca taachi nducueéⁿ yā yeⁿe nguaaⁿ tináⁿ'ā. ⁵Ní cáāvā Cristo miiⁿ Ndyuūs tee yā 'aama favor 'úú ti dich'ó yā 'úú chi 'úú cuuvi apóstol yeⁿé yā cáāvā chi duuchi Cristo. Ní cáāvā chi 'úú cuuvi 'cuuⁿ'míⁿ 'iiⁿyāⁿ yeⁿe nducueéⁿ n'ción táácā cuuvi cu'téenu yā Ndyuūs. Ní 'caandiveéⁿ yā nduudu yeⁿe yā. ⁶Ní ndís'tií ní yeⁿe 'iiⁿyāⁿ chi i'téenu yā Jesucristo caati Ndyuūs yaa'ví yā ndís'tií chi cuuvi yeⁿé Cristo ndís'tií.

⁷'Úú idinguúⁿ carta 'cūū yeⁿe nducyáácā ndís'tií chi sné nī na yāāⁿ Roma, ndís'tií chi Ndyuūs neⁿe yā ní yaa'ví yā ndís'tií chi cuuví yeⁿé yā ndís'tií. Neⁿé chi Ndyuūs Chiida yú ndúúⁿcū Señor Jesucristo téé yā ndís'tií vaadi n'dai ca yeⁿé yā ndúúⁿcū vaadi 'diiⁿ yeⁿé yā.

Pablo neⁿe yā caⁿ'á yā yāāⁿ Roma

⁸Vmnaáⁿ vmnaaⁿ ca'á gracias Ndyuūs cáāvā Jesucristo cucáāvā nducyaaca ndís'tií caati 'iiⁿyāⁿ yeⁿe núúⁿ'máⁿ iⁿ'yeeⁿ'dí ch'iindiveéⁿ yā tan'dúúⁿcā chi ndís'tií i'téenu nī Jesucristo ní ngaⁿ'á yā yeⁿe ndís'tií. ⁹'Úú ndúúⁿcū nuuⁿ'maⁿ staavā yeⁿé dichii'vé Ndyuūs. Ní candéé nduudu ngai yeⁿe evangelio yeⁿe Daiyá yā. Ndyuūs deenú yā chí 'úú cueⁿ'e daāⁿ'maⁿ nan'gaacú yeⁿe ndís'tií ní taachí ngaⁿ'āngua'á ní ngaⁿ'āngua'á cucáāvā ndís'tií. ¹⁰Ní ngiicá Ndyuūs chi nduuti chi neⁿé yā chí téé yā lugar 'úú chi tiempo 'cūū cuuví ndaá nanááⁿ ndís'tií. ¹¹Neⁿe cá snaáⁿ ndís'tií ní cunneé ndís'tií ndúúⁿcū Espíritu N'dai yeⁿé Ndyuūs chi cu'téenu cá nī ní 'íicú ndís'tií diitūu 'cuēetinéé nī ndúúⁿcū chi i'téenu nī. ¹²Ní 'íicú ndís'tií ndúúⁿcū 'úú ca'á díttuu yú 'aama yú taama yú ndúúⁿcū chi i'téenu yú ti daama daama i'téenu yú.

¹³Ndís'tií hermanos yeⁿé, neⁿé chí cádiinuuⁿ ndís'tií chí neené n'dee cuuví neⁿé chíí n'diichí ndís'tií naati ndii mááⁿ nguéé ngii chí chíí. Neⁿé n'diichí ndís'tií caati tan'dúúⁿcā chí véé n'gui'i yeⁿe cosecha 'tiicá ntúūⁿ ndís'tií cuuvi tan'dúúⁿcā n'gui'i yeⁿe cosecha yeⁿe nti-iⁿ'nyuⁿ yeⁿé caati 'tíicā véé n'gui'i yeⁿé nguaaⁿ 'iiⁿyāⁿ yeⁿe tanáⁿ'ā naciones yeⁿe iⁿ'yeeⁿ'dí 'cūū. ¹⁴Ní 'úú cánéé chí cunneé 'iiⁿyāⁿ chí yeⁿe ndaata yeⁿé ndúúⁿcū 'iiⁿyāⁿ chí yeⁿe tanáⁿ'ā naciones, 'iiⁿyāⁿ chí deenu ndúúⁿcū 'iiⁿyāⁿ chí nguéé deenū. ¹⁵Ni 'tiicá ntúūⁿ 'úú caneé listo chí caaⁿ'máⁿ nduudu cuaacu yeⁿe evangelio chí nanguaⁿ'ai 'iiⁿyāⁿ. Ní caaⁿ'máⁿ nanááⁿ ndís'tií chí snee nī na yāāⁿ Roma.

**Poder yeⁿe evangelio chí
nduudu ngai yeⁿé Cristo**

¹⁶Ní nguéé 'cuinaáⁿ chí caaⁿ'máⁿ nduudu cuaacu yeⁿe evangelio ti nduudu

miiⁿ ní poder yeⁿé Ndyuūs. Ní nanguaⁿāi nducyáacá 'iiⁿ'yāⁿ chi i'téenu yā Cristo, vmnááⁿ vmaaⁿ 'iiⁿ'yāⁿ chi 'iiⁿ'yāⁿ Israel chi judío s'eeⁿ. 'Tiicá ntúūⁿ 'iiⁿ'yāⁿ s'eeⁿ chi nguéeⁿ yeⁿe ndaata Israel. ¹⁷Ní nduudu cuaacu yeⁿe evangelio míiⁿ ní n'giⁿi chi Ndyuūs ní diiⁿ yā aceptar s'uúúⁿ chi cuuvi yeⁿé yā s'uúúⁿ cáávā chi i'téenu yú Jesucristo, ni dámaaⁿ cáávā chí i'téenu yú Jesucristo. 'Tíicā canee nguúⁿ na libro yeⁿé Ndyuūs: 'Iiⁿ'yāⁿ chi Ndyuūs díiⁿ yā aceptar chi cuuvi yeⁿé yā, 'cuetineé yā cucáávā chi i'téenu yā.

**Núúⁿndí yeⁿe 'iiⁿ'yāⁿ chi snee
yā na iⁿ'yeeⁿdí 'cūū**

¹⁸ Déenu yú chi Ndyuūs ca'á yā castigo chi neené díitū nducyaaca 'iiⁿ'yāⁿ chi nguéeⁿ n'daacā idiíⁿ yā ndúúⁿcū 'iiⁿ'yāⁿ chi dinuuⁿndí yā. Ní cucáávā nuuⁿndí yeⁿé yā nguēe n'gúúⁿ chi 'iiⁿ'yāⁿ cuuvi deenú yā nduudu cuaacu yeⁿé Ndyuūs. Castigo yeⁿé yā ngíicá ndíi na va'ai chēeti nguuvi. ¹⁹ Ní 'iiⁿ'yāⁿ s'eeⁿ chi deenu n'dái yā cuuvi cadíinuⁿ yā chí yeⁿe Ndyuūs caati Ndyuūs chíⁿi yā 'iiⁿ'yāⁿ s'eeⁿ chuū. ²⁰ Dendu'ū chi yeⁿé Ndyuūs chi nguéeⁿ inaaⁿ yú cuuvi déenu yú cucáávā nducueⁿē chi Ndyuūs din'dái yā ndúúⁿcū poder yeⁿé yā chí 'áámá cānee. Ní chuū cuuvi snaaⁿ 'iiⁿ'yāⁿ ndii tiempo chi Ndyuūs din'dái yā iⁿ'yeeⁿdí. Ní deenú yā chi Ndyuūs ní Ndyuūs nuuⁿmáⁿ cuaacu. Ní nguéeⁿ cuuvi caaⁿmáⁿ yā chi nguéeⁿ cuuvi n'diichí yā Ndyuūs. ²¹ 'Iiⁿ'yāⁿ s'eeⁿ n'diichí yā Ndyuūs naati nguéeⁿ chí'tēenu yā Ndyuūs miiⁿ chí ch'ēete yā ní nguéeⁿ ca'á yā gracias Ndyuūs. Nguéeⁿ 'tíicā díiⁿ yā. Naati nadicádíinuⁿ yā yeⁿe dendu'u chi nguéeⁿ dichí'vē chi yeⁿe maāiⁿ. Ní cáávā chi necio yā ch'ēetinēe yā na maāiⁿ. ²² 'Iiⁿ'yāⁿ s'eeⁿ ní ngaⁿa yā chi deenu ca yā naati díiⁿ yā chi tonto yā. ²³ Ní n'daáⁿ yā vaadi dēeve ngii yeⁿé Ndyuūs chi canduuchí yā cueⁿe daāⁿ-maⁿ cáávā santos ídolos o imágenes

chi idin'dái 'iiⁿ'yāⁿ, santos chi tan'dúúⁿcā 'iiⁿ'yāⁿ chi n'díi. 'Tíicā santos miiⁿ ndúúⁿcū ídolos yeⁿe 'yáádā, ndúúⁿcū ídolos yeⁿé cúú ndúúⁿcū ídolos yeⁿe 'iiti chi cuūū cá'a tí.

²⁴ Ní cáávā chi 'iiⁿ'yāⁿ s'eeⁿ ni nguéeⁿ neⁿe yā tuumicadíinuⁿ yā ní Ndyuūs s'neéⁿ yā chí díiⁿ yā dendu'ū chi nguéeⁿ n'daacā chi neⁿe diiⁿ cuerpo yeⁿé yā. Ní díiⁿ yā ndúúⁿcū cuerpo yeⁿé yā nguááⁿ maáⁿ yā dendu'ū chí vaadi 'cuíinuúⁿ. ²⁵ Ní díiⁿ yā 'túúⁿcā ti nguéeⁿ i'téenu yā nduudu cuaacu yeⁿe Ndyuūs ti i'téenu yā nduudu yaadi. Ní dich'ēeté yā dendu'ū chi Ndyuūs din'dái yā naati nguéeⁿ dich'ēeté yā maáⁿ Ndyuūs chi din'dái yā dendu'ū. Nducyáacá 'iiⁿ'yāⁿ cueⁿé daāⁿ-maⁿ canéé chi dich'ēeté yā Ndyuūs. 'Tíicā canee chí díiⁿ yā.

²⁶ Ní cáávā chí díiⁿ yā 'tuucā Ndyuūs díiⁿ yā chí'neéⁿ maáⁿ yā 'iiⁿ'yāⁿ chí díiⁿ yā dendu'ū chí nguēe n'daacā chí 'cuináaⁿ yā. Ní n'daataá s'eeⁿ nguéeⁿ ca'á yā ndúúⁿcū saⁿ'a naati ca'á yā ndúúⁿcū n'daataá ní díiⁿ yā tan'dúúⁿcā chí ch'iindivaacú yā ndúúⁿcū ví'i. ²⁷ 'Tiicá ntúūⁿ saⁿ'ā s'eeⁿ nguéeⁿ ca'á yā ndúúⁿcū n'daataá naati ca'á yā ndúúⁿcū saⁿ'ā ní díiⁿ yā tan'dúúⁿcā chí ch'iindivaacú yā ndúúⁿcū ví'i. Díiⁿ yā nguaaⁿ maáⁿ yā cosas chí vaadi 'cuíinuúⁿ ní sta'á yā castigo na cuerpo yeⁿé yā yeⁿe chí nguēe n'daacā chí díiⁿ yā.

²⁸ Ní cáávā chí nguéeⁿ neⁿé yā ntiinaáⁿ yā Ndyuūs, Ndyuūs chí'neéⁿ yā 'iiⁿ'yāⁿ chí díiⁿ yā nducueⁿē chí 'iiⁿ'yāⁿ s'eeⁿ nadacadíinuⁿ yā chí nguēe n'daacā. Ní díiⁿ yā cosas chí nguéeⁿ canee chí díiⁿ yā. ²⁹ 'Iiⁿ'yāⁿ s'eeⁿ néené nadacadiinuⁿ yā yeⁿe nducueⁿē chí nguēe n'daacā. Ní ca'á yā ndúúⁿcū n'daataá o saⁿ'ā chí nguēe yeⁿe yā. Ní neené yaadii'yá yā ní díiⁿ yā cosas yeⁿe yáá'n'guíinuúⁿ. Ní neⁿé yā dendu'ū chí nguēe yeⁿe yā. Ní neene idiíⁿ yā cosa chí nguēe n'daacā ti neⁿe yā diiⁿ yā 'tíicā. Ní neené nnguéeⁿ

yā. Ní n'gii'núⁿ yā 'iiⁿyāⁿ. Ní neené n'gæecu cheendí yā ndúúcu 'iiⁿyāⁿ, ní nginnche'etí yā 'iiⁿyāⁿ. Ní néené nguæ n'daacā staava yeⁿé yā. Ní neené n'gæecu cheendí yā yeⁿe chi 'iiⁿyāⁿ diiⁿ yā yeⁿe chi nguæ n'daacā. ³⁰ Ngaⁿá yā yeⁿe chi nguéé n'daacā yeⁿe taama yā. Nguéé neⁿé yā Dendyuūs. Ngaⁿá yā nanááⁿ 'iiⁿyāⁿ yeⁿe s'uuúⁿ ní ngii 'cuinááⁿ 'iiⁿyāⁿ yeⁿe s'uuúⁿ. Maáⁿ yā dich'etété yā 'iiⁿyāⁿ. Ní idiyaadí taaví yā ní nadacadífnuuⁿ yā cosa chí ngai chí nguæ n'daacā. Ní nguéé i'téenu yā yeⁿe chæcú yā yeⁿe chiida yā. ³¹ Nguéé itúúmícadífnuuⁿ yā, nguéé idiíⁿ yā chí ngāⁿa yā chí díⁿ yā. Nguéé idinéⁿe yā 'iiⁿyāⁿ ní nguéé déenu yā nadach'æcú yā nuuⁿndi yeⁿe 'iiⁿyāⁿ 'áará chí ngaⁿa yā chí nadach'æcú yā yeⁿe yā. Ní nguéé ya'ái 'iinú yā 'iiⁿyāⁿ. ³² 'iiⁿyāⁿ s'eeⁿ néené déenu yā chí Ndyuūs ngaⁿa yā chí canéé chí diiⁿ yā. Ni déenu yā chí 'iiⁿyāⁿ chí nguéé díⁿ 'tíicā, tuuⁿmí chí 'cuúvi yā naati icandíicá yā chí idiíⁿ yā 'tíicā. Yeenú taaví yā taachi inaaⁿ yā 'iiⁿyāⁿ chí díⁿ yā 'tíicā.

Ndyuūs ináaⁿ yā 'iiⁿyāⁿ yeⁿe nuuⁿndi ní yeⁿe chí cuaacu

2 Ndís'tií amigos yeⁿé, ¿'áá n'diichí ní de'ē chí idiíⁿ taamá yā o 'áá du'ú nūuⁿ 'iiⁿyāⁿ? Véé nuuⁿndi yeⁿe maáⁿ yā taachi díⁿ yā 'tíicā. Taachi n'diichí yā nuuⁿndi chí idiíⁿ taamá yā, ní maáⁿ yā díⁿ yā 'tíicā, tuuⁿmi ní dich'etété maáⁿ yā nuuⁿndi yeⁿé yā. ² Deenu yú chí Ndyuūs díⁿ yā cosa chí cuaacu taachi díⁿ yā condenar 'iiⁿyāⁿ chí díⁿ yā chí 'túúca. ³ ¿'Áá 'aacu ní chí Ndyuūs nguéé inaaⁿ yā nuuⁿndi yeⁿe 'iiⁿyāⁿ chí idiíⁿ yā 'túúca taachi n'diichí yā nuuⁿndi yeⁿe taamá yā? Nguæ 'tíicā. ⁴ ¿'Áá nguéé inee yiinú ní yeⁿé Ndyuūs cucááⁿ chí ya'ai 'iinú yā ndís'tií ní ndai yā ndúúcu ndís'tií ní téé yā ndís'tií n'dee n'dái favores yeⁿé yā ndúúcu vaadí 'diiíⁿ yeⁿe yā? Ní nguéé díⁿ ní cuenta chí Ndyuūs tee

yā ndís'tií favores yeⁿe yā ní n'giⁿí yā ndís'tií taaca cuuvi ndaacadaamí ní yeⁿe nuuⁿndi chí idiíⁿ ní. ⁵ Naati 'iiⁿyāⁿ chí díⁿ yā 'túúca ní dichæechi yā staava yeⁿe yā. Ní nguéé ndaacadaamí yā yeⁿe nuuⁿndi yeⁿé yā. Cááⁿvā chí idiíⁿ yā 'tíicā ní nduuvidáámá castigo yeⁿe maáⁿ yā nguuví taachi Ndyuūs díⁿ yā juzgar nuuⁿndi yeⁿe yú ní téé yā castigo yeⁿe chí diiⁿ yú ndúúcu vaadí cuaacu. ⁶ Ní Ndyuūs ní ca'a yā ca'áámá cá'aama 'iiⁿyāⁿ nadíí'vè yā yeⁿe chí díⁿ yā. ⁷ Ní ca'a yā vida cueⁿe daáⁿmaⁿ 'iiⁿyāⁿ chí chéé yā chí díⁿ yā nducuéⁿé chí n'daacā, ní n'nuúⁿ yā, ní díⁿ yā nducuéⁿé chí yeⁿe va'ai chæti nguuví, ní díⁿ yā chí honrado yā. ⁸ Naati 'iiⁿyāⁿ chí neⁿe nducuéⁿé yeⁿe maáⁿ yā ní nguéé i'téenu yā nduudu cuaacu yeⁿé Ndyuūs naati díⁿ yā nducuéⁿé chí nguæ n'daacā, Ndyuūs nguéé canee yiinú yā yeⁿe 'iiⁿyāⁿ s'eeⁿ. Ní ca'á yā castigo 'iiⁿyāⁿ s'eeⁿ. ⁹ Ní nducyáácá 'iiⁿyāⁿ chí nguéé n'daacā idiíⁿ yā canéé chí n'dee n'dái 'cuéénú yā cuuvi, vmnááⁿ vmnaaⁿ 'iiⁿyāⁿ chí yeⁿe ndaata Israel chí judíos ní cuayiivi ní 'iiⁿyāⁿ chí nguéé yeⁿe ndaata Israel. ¹⁰ Naati Ndyuūs díⁿ yā chí deévé 'iiⁿyāⁿ ní dich'etété yā 'iiⁿyāⁿ ní ca'a yā vaadí 'diiíⁿ yeⁿé nducyáácá 'iiⁿyāⁿ chí din'daacá yā, vmnááⁿ vmnaaⁿ 'iiⁿyāⁿ yeⁿe ndaata Israel ní cuayiivi 'iiⁿyāⁿ chí nguéé yeⁿe ndaata Israel.

¹¹ Caati nanááⁿ Ndyuūs ní 'áá daamá nūuⁿ nducyaaca 'iiⁿyāⁿ. ¹² Ní 'iiⁿyāⁿ chí idinuuⁿndí yā chí nguéé ndúúcu ley yeⁿe Moisés miiⁿ ní cuuvi ndái yā nguéé ndúúcu ley miiⁿ. Ní 'iiⁿyāⁿ chí idinuuⁿndí yā ní ndæ yā ley yeⁿe Moisés miiⁿ tuuⁿmi ní ley miiⁿ nūuⁿ ní cuuvi yā castigo. ¹³ Caati nguéé cuaáⁿ Ndyuūs 'iiⁿyāⁿ chí dámaaⁿ chí n'diichí yā ley miiⁿ naati Ndyuūs cuaáⁿ yā 'iiⁿyāⁿ chí díⁿ yā tan'dúúca chí ngaⁿa ley miiⁿ. ¹⁴ Ní taachi 'iiⁿyāⁿ chí nguéé yeⁿe ndaata Israel s'eeⁿ ní nguéé déenu yā yeⁿe ley Moisés, naati neⁿe yā cadiinúⁿ yā díⁿ

yā cosa chi cuaacu tan'dúúicā chi ngaⁿa ley miiⁿ, 'áará chí nguéé ndúúicū ley miiⁿ véé 'aama ley yeⁿé yā chi 'āā vií cā nguaaⁿ maáⁿ yā. ¹⁵ Ní ch'iⁿí yā cáávā chi idiiⁿ yā chi ley yeⁿé Ndyuūs tan'dúúicā chi canéé nguūⁿ na staava yeⁿé yā 'tíicā canéé. Ní chiiⁿ chi dííⁿ yā ní 'áámá prueba yeⁿe chuū ní chiiⁿ chi nada-cadiinúúⁿ yā dííⁿ yā condenar maáⁿ yā o caaⁿmaⁿ cuaacu yeⁿé maáⁿ yā. ¹⁶ Ní taachi ndaá nguuví chi Ndyuūs dííⁿ yā juzgar cáávā Jesucristo miiⁿ nducyáácá 'iiⁿyāⁿ ndúúicū nducuéⁿé chi yeⁿe 'iiⁿyāⁿ maáⁿ yā canúúⁿ n'de'ei na staava yeⁿé yā, tuu'mi ní Ndyuūs dííⁿ yā chuū ndúúicū nduudu cuaacu yeⁿe yā chi nadanguaⁿai 'iiⁿyāⁿ. Chuū ní nduudu cuaacu chi 'úú Pablo ngaⁿá.

'Iiⁿyāⁿ Israel s'eeⁿ ndúúicū ley yeⁿe Moisés

¹⁷ Diiⁿ ní ngaⁿa di chi 'iiⁿyāⁿ Israel di. Ní ngaⁿa di chi i'téénú dí ley yeⁿe Moisés ní dich'etē maāⁿ di dii. Ní dii ngaⁿa di chi yeⁿé Ndyuūs dii. ¹⁸ ¿'Áá déénú di de'ε chi neⁿe Ndyuūs ní ley chi 'cuuⁿmiⁿ di chi cuuvi in'nuuⁿ di dendu'ū chi n'daacā ca chi diiⁿ di? ¹⁹ ¿'Áá déénu di chi cuaacu chi cuuvi ca'cueeⁿ di 'iiⁿyāⁿ chi ngueenááⁿ o 'iiⁿyāⁿ chi nguéé de'ε vee deenu, ní ndeε di nduudu chi tan'dúúicā chideeve nanááⁿ 'iiⁿyāⁿ chi ngiica yā na maāiⁿ? ²⁰ ¿'Áá i'teenu di chi cuuví diiⁿ di ca'cueeⁿ di 'iiⁿyāⁿ chi tonto yā ní táácā chi ngi'cueeⁿ di da'caiyáá? ¿Ní ndúúicū ley yeⁿe di véé nducuéⁿé chi diiⁿ chi cuuví deenu di vaadi cuaacu? ²¹ Díí chi ngi'cueeⁿ di tanáⁿa yā, ¿de'ε cáávā chi nguéé ngi'cueeⁿ maāⁿ di dii? Díí chi ngaⁿa di 'iiⁿyāⁿ chi nguéé canéé chi didu-ucú yā, ¿de'ε cáávā chi diduucú di? ²² Díí saⁿā o n'daataá chi ngaⁿa di chi 'iiⁿyāⁿ nguéé caⁿá yā ndúúicū isaⁿā o n'daataá chi nguéé yeⁿé yā, ¿de'ε cáávā chí maaⁿ dí caⁿa di ndúúicū n'daataá o isaⁿā chi nguéé yeⁿe di? Díí chi nguéé ngii n'diichí

di santos ídolos, ¿de'ε cáávā chi didu-ucu di vaadi 'cuiica yeⁿe yáacú yeⁿe santos ídolos? ²³ Díí chi ngaⁿa maaⁿ di yeⁿe di chi ch'etē di cucáávā chi canee di ndúúicū ley yeⁿé Ndyuūs ¿de'ε cáávā chi nguéé diiⁿ di honrar Ndyuūs? 'Tiicá diiⁿ di caati nguéé diiⁿ di tan'dúúicā chi ngaⁿa ley chi Ndyuūs tee yā dii. ²⁴ Canéé nguūⁿ na libro yeⁿé Ndyuūs 'tiicā: 'Iiⁿyāⁿ chi nguéé yeⁿe ndaata Israel nguéé n'daacā ngaⁿa yā yeⁿe chi duuchi Ndyuūs. Ní chuū ni nuuⁿndi yeⁿe di.

²⁵ Cuaacu níⁿnyúⁿ chí ley yeⁿe circuncisión yeⁿe saⁿa Israel s'eeⁿ ní dichíⁿvē cáávā di nduuti chi diiⁿ di chi ngaⁿa ley yeⁿe Moisés. Ní ndúúiti chi nguéé diiⁿ di chi ngaⁿa ley miiⁿ, tuu'mi ní canee di tan'dúúicā saⁿā chi nguéé circuncidado di. 'Tíicā canee di. ²⁶ Ní ndúúití chi 'áámá saⁿā chi nguéé yeⁿe ndaata Israel ní nguéé circuncidado yā tan'dúúicā chi ngaⁿa ley yeⁿe Moisés, naati saⁿā miiⁿ diiⁿ sa chi ngaⁿa ley miiⁿ, saⁿā miiⁿ 'aara chi nguéé circuncidado sa, Ndyuūs dííⁿ yā cuenta yeⁿe saⁿā miiⁿ chí tan'dúúicā chi circuncidado, 'tiica sa. ²⁷ Saⁿā chi nguéé circuncidado na cuerpo yeⁿe sa ní diiⁿ sa tan'dúúicā chi ngaⁿa ley, saⁿā miiⁿ diiⁿ sa condenar dii chi nguéé diiⁿ di tan'dúúicā chi ngaⁿa ley 'áará chí véé ley yeⁿe di ní canee circuncidado di na cuerpo yeⁿe di. ²⁸ Cuaacu níⁿnyúⁿ nguéé nduudu cuaacu chi 'áámá saⁿā ní saⁿā Israel chi ndíí sa circuncidado ndúúicū seña na cuerpo yeⁿe sa. Ndíí nguéé ndúú chi nduudu cuaacu chi circuncisión chi seña chi canee na cuerpo yeⁿe sa diiⁿ chi Israel sa. ²⁹ Nguéé 'tíicā. Saⁿā chi cuaacu níⁿnyúⁿ chi saⁿā Israel miiⁿ, saⁿā miiⁿ ní saⁿā chí circuncidado na staava yeⁿe sa. Chuū ní circuncisión chi cuaacu níⁿnyúⁿ chi cuaacu. Nguéé tan'dúúicā chi canee nguūⁿ na ley yeⁿe sa naati chi yeⁿe Espíritu N'dai yeⁿé Ndyuūs. Saⁿā chi circuncidado na staava yeⁿe sa, Ndyuūs n'diichinee yā chi saⁿa

n'dai sa. Nguéé cuuvi n'diichinee saⁿā s'eeⁿ yeⁿē iⁿ'yeeⁿdí 'cūū.

3 Tuuⁿmi ní ¿de'ē chíí'vē cáávā chi saⁿā miiⁿ chi saⁿā yeⁿe ndaata Israel? ¿O dé'ē dichíí'vē nduuti chi saⁿā ní circuncidado sa? ²N'dáacā n'dai dichíí'vē cáávā n'dee n'dái razones. Vmnááⁿ vmaaaⁿ Ndyuūs s'neeⁿ yā nduudu cuaacu yeⁿe ley yeⁿé yā vmaaaⁿ ndís'tií chi 'iiⁿ'yāⁿ Israel. ³Ní nduuti chi náⁿā 'iiⁿ'yāⁿ Israel nandaacadaamí yā yeⁿe chi i'téenu yā, ¿'áá cucáávā chiiⁿ chí dííⁿ Ndyuūs chi nguéé dichíí'vē chiiⁿ chi Ndyuūs ngaⁿa yā chi caⁿá yā diiⁿ yā? Nguéé 'tíicā. ⁴Ndyuūs ní cuaacu ní dííⁿ yā nducuéⁿē chi cuaacu naati nducyaaca 'iiⁿ'yāⁿ yeⁿe iⁿ'yeeⁿdí 'cūū ngaⁿa nduudu yaadi. Canéé nguūⁿ na libro yeⁿe Dendyuūs ní Ndyuūs ngaⁿá yā 'tíicā:

Canee chi 'cuuⁿ'miⁿ di 'iiⁿ'yāⁿ cáávā nduudu chi ngaⁿa di chí díí diiⁿ di chi cuaacu ní naachi n'diichí yā dii, deenú yā chí díí ní diiⁿ di chi cuaacu.

⁵Ní taachi diiⁿ yú cosas chi nguεε n'daacā, tuuⁿmi ní más ca 'cuuⁿ'miⁿ chi Ndyuūs chí cuaacu, ¿de'ē cuuvi caaⁿ'maⁿ yú? ¿'Áá caaⁿ'maⁿ yú chí Ndyuūs nguéé dííⁿ yā cosas chí cuaacu taachi dííⁿ yā castigar s'uūuⁿ? Nguéé 'tíicā. ('Úú ngaⁿá tan'dúúicā chí ngaⁿa 'iiⁿ'yāⁿ yeⁿe iⁿ'yeeⁿdí 'cūū.) ⁶Nduuti chí Ndyuūs nguéé dííⁿ yā tanducuéⁿē chí n'daacā, ¿táácā cuuvi diiⁿ yā juzgar nuuⁿndi yeⁿe 'iiⁿ'yāⁿ yeⁿe iⁿ'yeeⁿdi? Dííⁿ yā juzgar 'iiⁿ'yāⁿ caati dííⁿ yā tanducuéⁿē chí n'daacā.

⁷Ní ndúúti chí nduudu yaadi miiⁿ yeⁿe yú dichíí'vē chí cuuvi dich'εete ca yú Ndyuūs, ¿de'ē cúúvī chí Ndyuūs dííⁿ yā juzgar nuuⁿndi yeⁿe yú chí nuuⁿndi yú? ⁸¿De'ē cúúvī chí nguéé ngaⁿa yú 'tíicā? S'uuúⁿ ní diiⁿ yú cosas chí nguεε n'daacā ní cuuvi candεε cosas chí n'daacā yeⁿē. 'Tíicā ngaⁿa tanáⁿ'a yā chí s'uuúⁿ ngi'cueeⁿ yú 'tíicā ní nguéé n'daacā yeⁿe yú. 'Iiⁿ'yāⁿ s'eeⁿ ní canee chí condenado yā.

Nducyaáacá 'iiⁿ'yāⁿ ní dinuuⁿndi yā

⁹¿De'ē tuuⁿmi ngaⁿa yú? ¿'Áá n'daacā ca s'uuúⁿ chí 'iiⁿ'yāⁿ Israel s'uuúⁿ nguéé ti 'iiⁿ'yāⁿ chí nguéé 'iiⁿ'yāⁿ Israel? Nguéé 'tíicā. Ndís'tií deenu ní tan'dúúicā chí ngaⁿá chí s'uuúⁿ dinuuⁿndi yú tan'dúúicā 'iiⁿ'yāⁿ chí nguéé yeⁿe 'iiⁿ'yāⁿ Israel dinuuⁿndi yā. Ní nducyaaca 'iiⁿ'yāⁿ dinuuⁿndi yā ní na poder yeⁿe nuuⁿndi snée yā. ¹⁰Canéé nguūⁿ na libro yeⁿe Dendyuūs 'tiicā:

Nguéé 'iiⁿ'yāⁿ chí n'dái yā, nguéé mar 'áámá yā.

¹¹Nguéé véé mar 'áámá 'iiⁿ'yāⁿ chí tuumicadínuuⁿ yā, nguéé véé mar 'áámá 'iiⁿ'yāⁿ chí in'nuúⁿ yā Ndyuūs.

¹²Nducyaáacá yā ndaacadaamí yā yeⁿe Ndyuūs, nducyaáacá yā dííⁿ yā cosas chí nguεε n'daacā. Nguéé 'áámá yā chí n'daacā idiíⁿ yā, nguéé ndíí mar 'áámá yā.

¹³Daandú yā canéé tan'dúúicā 'áámá yáinyāⁿ chí candá'lāi, 'tíicā daandú yā; ní nginche'élí yā 'iiⁿ'yāⁿ ndúúicū cheendi yā. Ní chεeti cheendí yā ní snúú tan'dúúicā chí veneno yeⁿē cúú 'tíicā cheendí yā ndúúicū nduudu chí tan'dúúicā veneno, 'tíicā.

¹⁴Dámaaⁿ ngaⁿá yā ndúúúdu taaⁿ contra yeⁿe 'iiⁿ'yāⁿ ndúúicū nduudu chí nguéé n'daacā.

¹⁵Ní neene nadacadínuuⁿ yā chí 'caaⁿ'nuⁿ yā 'iiⁿ'yāⁿ.

¹⁶Ní nducuéⁿē cuaaⁿ naachí caⁿ'á yā, dííⁿ yā chí 'iiⁿ'yāⁿ cunncáa 'cueenú yā cuuvi ní dituúví yā nducuéⁿē dendu'ú ndúúicū vaadi cadíínuuⁿ yeⁿé 'iiⁿ'yāⁿ s'eeⁿ.

¹⁷Ní nguéé déenu yā yeⁿe yúúni chí candεε na vaadi 'diiiⁿ yeⁿé Ndyuūs.

¹⁸Ní nguéé nadacadínuuⁿ yā chí canee chí 'va'a yā Ndyuūs.

¹⁹Maaⁿ ní s'uuúⁿ deenu yú chí tanducuéⁿē chí canéé nguūⁿ na ley yeⁿe Moisés ní cáávā 'iiⁿ'yāⁿ chí n'gεεtinee

yā ndúúcu ley miiⁿ. Ní cáávā 'iiⁿyāⁿ s'eeⁿ 'āā ntéé caaⁿmaⁿ yā nanááⁿ Ndyuūs chi nguεε deenú yā yeⁿē. Ní 'íicú ley miiⁿ diiⁿ chi Ndyuūs caⁿá yā n'diichi yā nuuⁿndi yeⁿé nducyaaca 'iiⁿyāⁿ yeⁿe núúⁿmáⁿ iⁿ'yeeⁿdī. ²⁰Ní Ndyuūs nguéé díⁿ yā recibir 'iiⁿyāⁿ cáávā chi díⁿ yā tan'dúúca chi ngaⁿa ley miiⁿ caati ley miiⁿ n'g'iⁿi s'uúúⁿ chi véé nuuⁿndi yeⁿe yú nanááⁿ Ndyuūs.

Ndyuūs nadinguaⁿai yā 'iiⁿyāⁿ caati i'téenu yā Jesucristo

²¹Maaⁿ ní nduudu cuaacu yeⁿé Ndyuūs n'giⁿi s'uúúⁿ chi Ndyuūs díⁿ yā recibir s'uúúⁿ manera chi 'āā vi'í cā yeⁿe ley miiⁿ. Ní canéé nguūⁿ na libro yeⁿé ley yeⁿe Ndyuūs yeⁿe chuū naachi saⁿa profetas ngaⁿa yā nduudu cuaacu yeⁿe chuū. ²²Ndyuūs díⁿ yā recibir nducyáácá 'iiⁿyāⁿ dámaāⁿ cáávā chi i'téenu yā Jesucristo ní nanááⁿ Ndyuūs nducyáácá 'iiⁿyāⁿ yeⁿe núúⁿmáⁿ iⁿ'yeeⁿdī 'āā daamá nūⁿ. Ndyuūs nguéé n'dáaⁿ yā. ²³Ní nducyáácá 'iiⁿyāⁿ yeⁿe núúⁿmáⁿ iⁿ'yeeⁿdī ní dinuuⁿndí yā ní nguéé cuuvi diiⁿ 'iiⁿyāⁿ s'eeⁿ chi dēeve n'dai tan'dúúca Ndyuūs chi dēeve n'dai. ²⁴Naati Ndyuūs cáávā chi n'dai taavi yā díⁿ yā recibir 'iiⁿyāⁿ cucáávā Jesucristo chi nadanguáⁿai yā 'iiⁿyāⁿ. Ní Jesucristo nadí'vε yā nuuⁿndi yeⁿé 'iiⁿyāⁿ lado yeⁿé 'iiⁿyāⁿ. ²⁵Ní Ndyuūs dicho'ó yā Jesucristo iⁿ'yeeⁿdí 'cūū lado yeⁿe ofrenda chi ch'iī yā caava nuuⁿndi yeⁿe nducyáácá 'iiⁿyāⁿ. Ní cáávā chi ch'iī Cristo, Cristo cuuvi nadach'εεcú yā nuuⁿndi yeⁿe nducyaaca 'iiⁿyāⁿ chi i'téenu yā Jesucristo. 'Tíicā Ndyuūs ch'iⁿi yā 'iiⁿyāⁿ táácā cuuvi ndaa yā nanááⁿ Ndyuūs. Ní tiempo chi chó'oo ní Ndyuūs chi n'dai taavi ch'iⁿi yā 'iiⁿyāⁿ chi Ndyuūs díⁿ yā cosas chi cuaacu taachi nguéé díⁿ yā cuenta yeⁿe nuuⁿndi yeⁿe 'iiⁿyāⁿ taachi 'āā 'cuéé dicho'ó yā Cristo. ²⁶Ní 'tiicá

ntúūⁿ tiempo 'cūū Ndyuūs cáávā chi nadach'εεcú yā nuuⁿndi yeⁿe 'iiⁿyāⁿ ní ch'iⁿi yā chi caⁿá yā chi díⁿ yā recibir 'iiⁿyāⁿ chí cuuvi yeⁿé yā 'iiⁿyāⁿ. 'Tíicā Ndyuūs ch'iⁿi yā chi cuaacu yā. Ní díⁿ yā chi nducyáácá 'iiⁿyāⁿ chi i'téenu yā Cristo ní yeⁿe yā 'iiⁿyāⁿ.

²⁷Maaⁿ ní ¿dē'ε cúúvi chi 'iiⁿyāⁿ cuuvi caaⁿmáⁿ yā chi ch'εεtε yā? Nguéé cuuvi yā. ¿Dē'ε cáávā? ¿'Áá cáávā chi diiⁿ yā tan'dúúca chi ngaⁿa ley miiⁿ? Nguéé 'tíicā. Naati maaⁿ ní Ndyuūs díⁿ yā recibir s'uúúⁿ dámaāⁿ cáávā chi i'teenu yú Jesucristo. ²⁸Maaⁿ ní n'diichi yú chi Ndyuūs díⁿ yā recibir 'iiⁿyāⁿ caati cucáávā chi i'téenu yā Jesucristo ní nguéé caavā chi díⁿ yā chi ngaⁿa ley miiⁿ.

²⁹¿'Áá Ndyuūs ni dámaāⁿ Ndyuūs yeⁿe 'iiⁿyāⁿ Israel s'eeⁿ chi judíos? ¿'Áá nguéé Ndyuūs ní yeⁿe 'iiⁿyāⁿ chi nguéé yeⁿe ndaata Israel? Cuaacu chi Ndyuūs ní Ndyuūs dendú'ū yeⁿe 'iiⁿyāⁿ chi nguéé yeⁿe ndaata Israel. ³⁰Cuaacu chí véé 'áámá n'dyáⁿā Ndyuūs. Ní Ndyuūs díⁿ yā recibir nducyáácá 'iiⁿyāⁿ chí i'téenu yā Cristo 'iiⁿyāⁿ chí Israel s'eeⁿ ní 'tiicá ntuūⁿ 'iiⁿyāⁿ chí nguéé yeⁿe ndaata Israel. ³¹Maaⁿ ní ¿'áá cucáávā chí i'téenu yú Jesucristo chí diiⁿ yú chí nguéé 'caandiveeⁿ yú tan'dúúca chí ngaⁿa ley miiⁿ? Ní ley miiⁿ 'āā vi'í cā yeⁿe yú. Ní nguéé dichí'vε s'uúúⁿ. Mar 'áámá naaⁿ, nguεε 'tíicā. N'giindiveeⁿ ca yú chí ngaⁿā ley miiⁿ.

Tan'dúúca chí diiⁿ Abraham

4 ¿Dē'ε ngaⁿa yú yeⁿe chiida yú Abraham chí chiida ndaata yeⁿe yú? ¿Dē'ε nndaacá yā nanááⁿ Ndyuūs? ²Nduuti chí Ndyuūs díⁿ yā recibir Abraham miiⁿ cáávā cosa chí díⁿ yā, tuu'mi ní Abraham cuuvi caaⁿmáⁿ yā chí ch'εεtε maáⁿ yā. Nguéé cuuvi caaⁿmáⁿ yā chí ch'εεtε maáⁿ yā nanááⁿ Ndyuūs. ³Canéé nguūⁿ na libro yeⁿe Dendyuūs 'tíicā:

Abraham i'téenu yā Ndyuūs ní cáávā chi i'téenu yā Ndyuūs, Ndyuūs dífⁿ yā recibir Abraham miiⁿ chi yeⁿé yā 'iiⁿyāⁿ.⁴ Maaⁿ ní 'iiⁿyāⁿ chi idiiⁿ ntiⁿnyuⁿ ní sta'a yā chí'vē yeⁿe ntiⁿnyuⁿ yeⁿé yā. Nguéé nadacadínuuⁿ yā chí'vē yeⁿe ntiⁿnyuⁿ yeⁿé yā ní 'aama regalo naati tan'dúucā 'áámá cosa chi can'diicú yā.⁵ Maaⁿ ní nduuti chí 'áámá 'iiⁿyāⁿ i'téenu yā Jesucristo ní nguéé cuuvi dífⁿ yā ntiⁿnyuⁿ cáávā chi cuuvi cu'téenu yā. Ní Ndyuūs dífⁿ yā recibir 'iiⁿyāⁿ nuuⁿndi chí cuuvi yeⁿé yā, tuu'mi ní Ndyuūs dífⁿ yā recibir 'iiⁿyāⁿ miiⁿ caati i'téenu yā Jesucristo.⁶ 'Tiicā ntúūⁿ tiempo chí 'āā ch'ó'oo David ngaⁿá yā 'tíicā yeⁿe chuū. N'dai saⁿā chí Ndyuūs dífⁿ yā recibir chí yeⁿé yā saⁿa. Ní saⁿā miiⁿ ní n'dai sa n'dáá rá chí nguéé idiiⁿ sa ntiⁿnyuⁿ chí cuuvi yeⁿé Ndyuūs.⁷ 'Tíicā ngaⁿa sa: De'e chúucā n'dai 'iiⁿyāⁿ chí Ndyuūs nadach'ecú yā nuuⁿndi yeⁿe yā ní divíi yā nuuⁿndi yeⁿé yā chí 'āā ntéé vεε.⁸ De'ē chúucā n'dai 'iiⁿyāⁿ chí Ndyuūs diiⁿ cuenta yā chí nguεε véé nuuⁿndi yeⁿé yā.⁹ Ní yeⁿe chí ngaⁿa David yeⁿe chí de'ē chúucā n'dai 'iiⁿyāⁿ, ¿'áá dámaaⁿ caava 'iiⁿyāⁿ Israel chí yeⁿe na circuncisión? Nguεε 'tíicā, ti cáávā 'iiⁿyāⁿ chí nguéé yeⁿe 'iiⁿyāⁿ Israel ní nguéé véé ley yeⁿe circuncisión yeⁿe yā. 'Āā ngaⁿa 'nū chí canéé nguuⁿ na libro yeⁿé Ndyuūs 'tíicā. Abraham i'téenu yā Ndyuūs ní cáávā chí i'téenu yā Ndyuūs, Ndyuūs dífⁿ yā recibir Abraham miiⁿ chí yeⁿé yā 'iiⁿyāⁿ.¹⁰ ¿De'ē tiempo chí Ndyuūs dífⁿ yā recibir Abraham miiⁿ? ¿'Áá taachi 'āā cuéé cuuvi circuncidado o cuayiivi taachi chíi yā circuncidado? Ndyuūs 'āā dífⁿ yā recibir 'iiⁿyāⁿ taachi 'āā cuéé cuuvi yā circuncidado.¹¹ Cuayiivi chí Abraham i'téenu yā Ndyuūs, tuu'mi ní chíi yā circuncidado. Ní chuū ní 'áámá seña chí Ndyuūs dífⁿ yā recibir Abra-

ham miiⁿ cáávā chí i'téenu yā Ndyuūs. Ní chuū ní dífⁿ yā chí Abraham miiⁿ ní cuuvi yā chíidaá nducyáácá 'iiⁿyāⁿ chí i'téenu yā Ndyuūs 'áará chí nguéé chíi yā circuncidado. Ní 'tíicā Ndyuūs ngaⁿá yā chí dífⁿ yā recibir 'iiⁿyāⁿ chí nguéé circuncidado yā.¹² Cuaacu chí Abraham ní chíidaá 'iiⁿyāⁿ circuncidado yā chí Israel. Naati 'tíicā chíidaá 'iiⁿyāⁿ s'eeⁿ nguéé dámaaⁿ cáávā chí circuncidado yā naati cáávā chí i'téenu yā Ndyuūs tan'dúucā chí Abraham chí'téenu yā Ndyuūs vmnááⁿ vmnaaⁿ taachi 'āā cuéé cuuvi yā circuncidado yā.

Compromiso chí dífⁿ Ndyuūs ní chíi cucáávā chí chí'téenu 'iiⁿyāⁿ

¹³ Ndyuūs caⁿa yā chíi yā Abraham chí iⁿyeⁿdí 'cūū cuuvi yeⁿe Abraham ndúucú 'iiⁿyāⁿ yeⁿé yā chí cuchii cuayiivi ní Ndyuūs caⁿa yā chíi yā Abraham 'tíicā. Ní nguéé cáávā chí idiiⁿ Abraham chí ngaⁿa ley caati cáávā chí i'téenu yā Ndyuūs. Ní cáávā chí i'téenu yā Ndyuūs, Ndyuūs dífⁿ yā cuenta chí saⁿā Abraham miiⁿ ní yeⁿé yā.¹⁴ Ní nduuti chí 'iiⁿyāⁿ chí véé ley yeⁿe yā ní dífⁿ yā chí ngaⁿa ley miiⁿ ní cuuvi yeⁿé yā chíi chí Ndyuūs caⁿa yā chí ca'a yā, tuu'mi ní nguéé dichí'vē yeⁿe 'iiⁿyāⁿ chí i'téenu yā Ndyuūs. Ní nguéé dichí'vē chíi chí Ndyuūs caⁿa yā chí ca'a yā chí cuuvi yeⁿé yā cáávā chí i'téenu yā.¹⁵ Naachi véé ley, véé castigo cáávā 'iiⁿyāⁿ chí nguéé dífⁿ yā chíi chí ngaⁿā. Naachi nguéé véé ley, 'iiⁿyāⁿ nguéé cuuvi diiⁿ yā nuuⁿndi chí contra ley.

¹⁶ Ndyuūs caⁿa yā chí ca'a yā compromiso yeⁿé yā, compromiso chí n'dai taavi 'iiⁿyāⁿ chí cuuvi yeⁿé yā cucáávā chí i'téenu yā Ndyuūs ní nguεε nadí'vε yā yeⁿé. Ni 'tíicā seguro cānee chí Ndyuūs caⁿa yā chí ca'a yā chí cuuvi yeⁿe nducyáácá 'iiⁿyāⁿ chí yeⁿe ndaata Israel ní nguéé dámaaⁿ caava 'iiⁿyāⁿ chí véé ley yeⁿé yā ní dífⁿ yā chí ngaⁿa ley

miiⁿ, naati cáávā nducyaaca 'iiⁿyāⁿ chi i'téenu yā Ndyuūs tan'dúúicā chi Abraham chi'téenu yā Ndyuūs. 'Tíicā Abraham miiⁿ ní cuuvi chiidaá nducyaaca s'uuúⁿ. ¹⁷Ní canéé nguūⁿ na libro yeⁿé Ndyuūs 'tíicā. Ndyuūs ngaⁿa yā ngii yā Abraham: Díí Abraham, 'úú idiíⁿ chí díí cuuvi chiidaá 'yaaⁿ n'dáí naciones. Ní nanááⁿ Ndyuūs chuū ní n'daacā canee, ní Abraham ní i'téenu yā Ndyuūs chi cuaacu ca'á yā vida 'iiⁿyāⁿ chi n'díí. Ní caⁿá yā din'dai yā cosas chi 'āā cuéé snaaⁿ yú.

¹⁸Abraham miiⁿ taachi 'āā cuéé de'ē vee chi cānee ngíínú yā, chi'teēnu yā Ndyuūs. Ní Ndyuūs ní dííⁿ yā chí cūnee ngíínú yā yeⁿé chi Ndyuūs caⁿa yā ca'a yā chi cuuví yeⁿe yā. Ní cáávā chuū ní Abraham miiⁿ ní chií chiidaá 'yaaⁿ n'dáí naciones tan'dúúicā chi Ndyuūs 'āā ngaⁿa yā yeⁿe yā. Ní Ndyuūs ngaⁿá yā: 'Tíicā cuuví 'yaaⁿ taavi ndaata yeⁿé dii. ¹⁹Saⁿa Abraham miiⁿ 'āā ngii sa tan'dúúicā 'aama ciento nduūyū yeⁿe sa. Ní 'tiicá ntúūⁿ véé nduūyū yeⁿe Sara chi n'daata yeⁿé sa. Ní canéé yā tan'dúúicā 'iiⁿyāⁿ chi n'díí caati Abraham ndúúicū Sara miiⁿ nguéé ch'iindí daiya tá. 'Áárá chi 'tíicā ní nguéé ch'iindí daiya yā Abraham miiⁿ chi'téenu yā Ndyuūs. ²⁰Ní nguéé dííⁿ yā 'uūví vaanicadíínuūⁿ yeⁿe yā yeⁿe chi Ndyuūs caⁿa yā chí diiⁿ yā cááva yā naati chi'teēnu cá yā ní véé ca confianza yeⁿé yā ndúúicū Ndyuūs. Ní dich'eté yā Ndyuūs. ²¹Ní deenú n'dai yā chí Ndyuūs cuuví dííⁿ yā nducuéⁿé chí caⁿa yā chí cuuví dííⁿ yā. ²²Ní cucáávā chí Abraham i'téenu yā 'tíicā Ndyuūs dííⁿ yā chí cuuvi yeⁿé yā 'iiⁿyāⁿ.

²³Ní nduudu chí canéé nguūⁿ chí Ndyuūs ngaⁿa yeⁿe Abraham miiⁿ chí dííⁿ yā chí cuuví yeⁿé yā cáávā chí i'téenu yā Ndyuūs nguéé dámaāⁿ caavā Abraham. ²⁴Tiicá ntúūⁿ ní cáávā s'uūūⁿ cānéé nguūⁿ. Ndyuūs dííⁿ yā recibir s'uuúⁿ chí cuuvi yeⁿé yā s'uuúⁿ chí

cu'téenu yú Ndyuūs chí nadicuéeⁿ yā Señor Jesucristo yeⁿe yú yeⁿe nguaaⁿ tináⁿā. ²⁵Ndyuūs dicho'ó yā Jesucristo caati chíi yā cucáávā nuuⁿndi yeⁿe yú. Ní nadicuéeⁿ yā Jesucristo yeⁿe nguaaⁿ tináⁿā caati Ndyuūs cuuvi dííⁿ yā recibir s'uuúⁿ ní yeⁿé Ndyuūs s'uuúⁿ.

**Véé chí cuuvi yeⁿe yú taachi
Ndyuūs ngaⁿa yā chí nguéé
véé nuuⁿndi yeⁿe yú**

5 Maaⁿ ní chí Ndyuūs dííⁿ yā recibir s'uuuⁿ cáávā chí i'téenu yú Jesucristo véé vaadí 'diiíⁿ yeⁿe yú ndúúicū Ndyuūs caava Señor Jesucristo yeⁿe yú. ²Ní cáávā Señor Jesucristo ndaa yú nanááⁿ Ndyuūs. Ní Ndyuūs itée yā s'uuúⁿ dendu'ū chí n'dai taavi yeⁿé yā. Ní díítú i'téenu yú ndúúicū dendu'ū chí n'dai yeⁿé yā chí itée yā s'uuúⁿ. Ní yeenú n'dai yú ní canéé ngiiⁿ yú chííⁿ chí cuuvi yeⁿe yú na va'ai cheeti nguuvi naachi canéé Ndyuūs chí deevé n'dai. ³Ní 'tiicá ntúūⁿ yeenú taavi yú taachi n'geenu yú ngii caati deenu yú chí taachi n'geenu yú ngii ní n'daacā ca yeⁿe yú ti véé cá paciencia yeⁿe yú. ⁴Ní taachi cuchee yú yeⁿe nducuéⁿé, tuu'mi ní deenu yú chí diiⁿ yú chí Ndyuūs neⁿe yā chí diiⁿ yú 'túúicā. Ní cūnee ngiiⁿ yú chí cuuvi yeⁿe yú chí Ndyuūs caⁿá yā téé yā s'uuúⁿ. ⁵Ní deenu yú chí cuaacu chí cuuvi yeⁿe yú chí cūnee ngiiⁿ yú. Ní nguéé 'cuināaⁿ yú caati Ndyuūs 'āā tee yā s'uūūⁿ na staava yeⁿe yú vaadí neⁿe yeⁿé yā cucáávā Espíritu N'dai yeⁿé yā chí 'āā tee yā s'uūūⁿ.

⁶Taachi 'āā cuéé cuuvi nanguaⁿāi yú cucáávā maaⁿ yú, tuu'mi ní Ndyuūs dicho'ó yā Cristo tiempo chí neⁿe yā caati Cristo chíi yā cáávā 'iiⁿyāⁿ chí véé nuuⁿndi yeⁿe yā. ⁷Nguéé n'gíⁿii chí 'áámá 'iiⁿyāⁿ 'cuūvi yā cucáávā táámá 'iiⁿyāⁿ chí nguéé nuuⁿndi yeⁿe yā. Ní n'dáá rá chí 'áámá 'iiⁿyāⁿ 'cuūvi yā cáávā táámá 'iiⁿyāⁿ chí n'daacā dííⁿ yā, 'áárá chí 'iiⁿyāⁿ chí cuaacu chí n'daacā yā.

⁸ Ní Ndyuūs ch'i'ni yā chi ne'ē yā s'uuū' taachi dicho'ó yā Cristo i'nyee'dí 'cūū chi ch'ii yā cáávā s'uuū' caati s'uuū' véé nuū'ndi ye'e yú. ⁹ Maa' ní Ndyuūs dí'ni yā recibir s'uuū' cáávā Cristo chi ch'ii yā chi nadanguá'ai yā s'uuū'. Ní Ndyuūs ca'á yā nadangua'ai cá yā s'uuū' ye'e castigo cucáávā Cristo. ¹⁰ Ní taachi s'uuū' 'āā cuéé cuuvi n'diichi yú Ndyuūs, Ndyuūs dí'ni yā chi cuuvi ye'ē yā s'uuū' cáávā Jesucristo chi ch'ii yā. Maa' ní s'uuū' ní ye'e Ndyuūs s'uuū' ní nangua'ai cā yú cáávā chi Cristo cánduuchi yā ní ye'e yā s'uuū'. ¹¹ Ní yeenu ca yú nanáá' Ndyuūs nguéé damaā' cáávā chuū ti ye'ē Ndyuūs s'uuū' cáávā Señor Jesucristo ye'e yú. Ní cáávā Cristo mii' véé vaadi 'diini ye'e yú nanáá' Ndyuūs.

Ye'e sa'ā Adán ndúúcu Cristo

¹² Tíicā caati cáávā 'áámá sa'ā chi duuchi Adán ndaā nuu'ndi i'nyee'dí 'cūū. Ní cáávā nuu'ndi mii' 'ii'nyā' n'dii yā. Maa' ní chí'ni chi nducyaaca 'ii'nyā' ní 'cuūvi yā caati nducyáaca yā ní dinuu'ndi yā. ¹³ Ní nuu'ndi mii' canéé i'nyee'dí 'cūū. Ní 'ii'nyā' idinuu'ndí yā vmnaa' chi ndaā ley ye'e Moisés. Ní nguéé dí'ni yā cuenta ye'e nuu'ndi taachi nguéé ley mii' chi ch'i'ni 'ii'nyā' ye'e nuu'ndi. ¹⁴ ¿D'ē ye'e chuū? Ndi tiempo chi canéé Adán ní dinuu'ndi sa ndii tiempo chi canéé Moisés. Ní Moisés ca'á yā ley mii' 'ii'nyā' s'ee' chi dinuu'ndí yā ní canéé chi 'cuūvi yā. Ní ch'ii yā 'áará chi nguéé dinuu'ndí yā tan'dúúca Adán chi nguéé n'giindivee' yā chi nga'a Ndyuūs. Ní cáávā chi Adán mii' dinuu'ndí yā, chuū ch'i'ni 'ii'nyā' chi Daiyá Ndyuūs canéé chí cúchi ní 'ii'nyā' s'ee' 'caandivee' yā nduudu ye'ē Ndyuūs.

¹⁵ Ní nguéé cuuvi nduuvídáámá cosa chi Ndyuūs tee yā s'uuū' ndúúcu nuu'ndi chi dii' Adán mii'. Cáávā chi 'áámá sa'ā Adán mii' idinuu'ndí yā, nducyaaca 'ii'nyā' canéé chi 'cuūvi yā caati conde-

nado yā. Ní cáávā 'áámá sa'ā Jesucristo, Ndyuūs dátēe yā s'uuū' chi nadingua'ái yā s'uuū' ní nguéé nadí'vē yú ye'ē yā. Ní chuū chi tee Ndyuūs ní n'daacā ca ní cáávā n'deēe n'dái 'ii'nyā'. ¹⁶ Ní 'āā vi'í cā nuu'ndi chi dii' Adán ye'e chii' chi Ndyuūs tee yā 'ii'nyā' chi nadinguá'ai yā 'ii'nyā'. Cuayiivi chi Adán idinuu'ndí yā nducyaaca 'ii'nyā' ní canéé yā condenado. Maa' ní Ndyuūs nadinguá'ai yā 'ii'nyā' chi cuuvi ye'ē yā 'ii'nyā'. Ní 'ii'nyā' s'ee' nguéé nadí'vē yā ní Ndyuūs nadinguá'ai yā 'ii'nyā' chi n'deēe n'dái nuu'ndi idi'ni yā. ¹⁷ Cuaacu chi 'ii'nyā' canéé chi 'cuūvi yā cáávā chi 'áámá sa'ā dinuu'ndi sa. Ní maa' ní n'daacā ca chi dii' 'áámá 'ii'nyā' chi Jesucristo mii'. Ní cucáávā Jesucristo mii' Ndyuūs dí'ni yā recibir 'ii'nyā' s'ee' chi cuuvi ye'ē yā. Ní 'ii'nyā' s'ee' nguéé nadí'vē yā ye'e chuū. 'Ii'nyā' s'ee' ní véé poder ye'ē Ndyuūs ndúúcu yā chi 'cuētineé n'dáaca yā na vida ye'ē yā chi ngai.

¹⁸ Tíicā nducyáaca 'ii'nyā' canee condenado yā cáávā 'áámá sa'ā Adán chi dinuu'ndí yā. Naati cáávā Jesucristo mii' chi dí'ni yā chi ne'e Ndyuūs, Ndyuūs dí'ni yā recibir nducyaaca 'ii'nyā' chi cuuvi ye'ē yā ní véé vida cue'e daā'ma' ye'ē yā. ¹⁹ Chuū ní ne'e caa'ma' tíicā. Cáávā chi 'áámá sa'ā Adán nguéé ch'iindivee' sa nduudu chi nga'a Ndyuūs nducyaaca 'ii'nyā' snéé yā maa' poder ye'e nuu'ndi. Tíicā ntúū'. Cáávā chi 'áámá sa'a Cristo ch'iindivee' yā nduudu chi nga'a Ndyuūs néené 'yaa' 'ii'nyā' cuuví ndaa yā nanáá' Ndyuūs, ní cuuvi ye'ē Ndyuūs 'ii'nyā' s'ee'.

²⁰ Ndyuūs tee yā ley mii' caati 'ii'nyā' cuuvi n'diichi cá yā chi dinuu'ndi cá yā. Ní taachi dinuu'ndi cá yā Ndyuūs tee yā vaadi n'dai ca ye'e yā chí ch'ēte ca chi nadanguá'ai yā 'ii'nyā' nguéé ti nuu'ndi mii'. ²¹ Maa' ní cho'ó chuū caati taachi 'ii'nyā' idinuu'ndí yā ní canéé chi 'cuūvi yā cáávā poder ye'e nuu'ndi. Tí-

icá ntúūⁿ vaadi n'dai ca yeⁿé Ndyuūs ndúúcu poder yeⁿé yā diiⁿ chi diiⁿ yā aceptar s'uuúⁿ chi cuuvi yeⁿé yā s'uuúⁿ ní diiⁿ chi véé vida cueⁿe daāⁿmaⁿ yeⁿe yú cucáávā Señor Jesucristo yeⁿe yú.

N'dii yú cucáávā nuuⁿndi yeⁿe yú naati canduuchi yú cucáávā Cristo

6 Maaⁿ ní ¿de'é caaⁿmāⁿ yú? ¿'Áá din-uuⁿndi yú caati Ndyuūs cuuvi téé yā s'uuúⁿ vaadi n'dai ca yeⁿé yā? ²Nguéé diiⁿ yú 'tíicā. 'Āā ch'iī yú yeⁿe nuuⁿndi chi diiⁿ yú, ¿táácā cuuvi 'cuetinéé ch-ichi yú ndúúcu nuūⁿndi chi diiⁿ yú? ³¿'Áá nguéé déenu ndís'tiī chi nducyaaca s'uūuⁿ chi cheēdínūⁿ'niⁿ yú cáávā chi s'uuúⁿ ní yeⁿe Cristo s'uuúⁿ, ní véé 'aama parte yeⁿe yú ndúúcu Cristo taachi ch'iī yā? ⁴Ní caavā chí cheēdinuūⁿ'niⁿ yú tan'dúúca chi daama ch'eēchi yú ndúúcu Cristo, ní tan'dúúca chi ch'iī yú ndúúcu yā caati cuuvi nnduuchi yú yeⁿe nguaaⁿ tináⁿā ndúúcu Cristo. Ní tiicá ntúūⁿ véé vida ngai yeⁿe yú ti 'tíicā Cristo nduuchi yā yeⁿe nguaaⁿ tinaⁿā cáávā poder chi ch'eté ca yeⁿe Chiida yú.

⁵Ní nduuti chi tan'dúúca chi daama cueⁿe yú ndúúcu yā taachi ch'iī yā, 'tiicá ntúūⁿ cuaacu níⁿnyúⁿ chi dáámá cunee yú ndúúcu yā. Ní nnduuchi yú tan'dúúca chí maáⁿ yā nnduuchi yā yeⁿe nguaaⁿ tináⁿā. ⁶Ní chuū ní deenu yú vida ndiicū yeⁿe yú tan'dúúca chi dáámá ca'neeⁿngá'āa na cruz ndúúcu Señor Jesucristo yeⁿe yú caati vida ndiicū yeⁿe yú ndúúcu chi neⁿe chi diiⁿ yú ní canee tan'dúúca chi n'dii ndúúcu poder yeⁿe nuuⁿndi caati nguéé cuuvi caaⁿmaⁿ nti-iⁿnyuⁿ vida yeⁿe yú chi dinuuⁿndi yú. ⁷Deenu yú chi taachi 'iiⁿyāⁿ 'āā ch'iī yā 'āā ntéé cuuvi dinuuⁿndí yā. ⁸Ní nduuti chi s'uuúⁿ ní 'āā ch'iī yú dáámá ndúúcu Cristo miiⁿ, tuuⁿ'mi ní i'téenu yú chi canduuchi yú ní cunee yú ndúúcu Cristo. ⁹Deenu yú chi taachi Cristo 'āā ch'iī yā ní nnduuchi yā yeⁿe nguaaⁿ tináⁿā, 'āā ntéé

ngueecunée yā 'cuuvi yā caati vaadi n'gii míⁿ nguéé de'ē vee cuuvi diiⁿ ndúúcu yā. ¹⁰Taachi Cristo ch'iī yā, ch'iī yā 'áámá vmneⁿé nūuⁿ ní cáávā nducyáácá 'iiⁿyāⁿ ní cáávā nuuⁿndi yeⁿé yā. Maaⁿ ní nnduuchi yā ní vida yeⁿe yā nnduuchi yā cáávā Ndyuūs. ¹¹'Tiicá ntúūⁿ ndís'tiī diiⁿ ní cuenta chi n'dii ní ndúúcu nuuⁿndi yeⁿe ní maaⁿ ní canduuchi ní cáávā Ndyuūs caati ndís'tiī ní yeⁿe Jesucristo ndís'tiī ní Señor yeⁿe yú.

¹²Ní cáávā chuū ndís'tiī nguéé ca'á ní lugar chi nuuⁿndi caaⁿmaⁿ ntiⁿnyuⁿ yeⁿe cuerpo yeⁿe ní ti ndís'tiī diiⁿ ní nuuⁿndi tan'dúúca chi neⁿe cuerpo yeⁿé ní. ¹³Ní nguéé nca'á ní cuerpo yeⁿe maaⁿ ní na poder yeⁿe nuuⁿndi chi cuuvi dinuuⁿndí ní tan'dúúca chi neⁿe cuerpo yeⁿé ní. Nguéé diiⁿ ní 'tíicā. Nca'á ní vida yeⁿe maáⁿ ní ndúúcu cuerpo yeⁿe maáⁿ ní maaⁿ poder yeⁿe Ndyuūs tan'dúúca chí 'āā n'dii ní ní 'āā nnduuchi ní ndúúcu 'áámá vida ngai. Maaⁿ ní cuuvi din'daacá ní. ¹⁴Ní nuuⁿndi ní nguéé véé poder yeⁿe nanááⁿ ndís'tiī caati nguéé canee ní maaⁿ yeⁿe ley miiⁿ naati canee ní maaⁿ nducuéⁿe vaadi n'dai yeⁿé Ndyuūs.

Yeⁿe ejemplo yeⁿe 'iiⁿyāⁿ chi 'áámá idiīⁿ yā ntiⁿnyuⁿ yeⁿé Ndyuūs

¹⁵¿Tuuⁿ'mi ní de'ē diiⁿ yú? ¿'Áá diiⁿ yú nuuⁿndi caati 'āā ntéé canee yú maaⁿ ley miiⁿ naati canee yú maaⁿ denduū chí n'dai taavi chí yeⁿé Ndyuūs? Nguéé yeⁿe mar 'áámá naaⁿ. ¹⁶Ndís'tiī ní deenu ní chi nduuti chí ca'á ní vida yeⁿe maáⁿ ní na ta'a 'áámá patrón yeⁿe ní ní 'áámá canee ní chí diiⁿ ní ntiⁿnyuⁿ chí ngaⁿa 'iiví ní, tuuⁿ'mí ndís'tiī ní esclavos ndís'tiī yeⁿe 'iiví ní. Ní canee chí diiⁿ ní nducuéⁿe chí ngaⁿa 'iiví ní chí diiⁿ ní. 'Tiicá ntúūⁿ nduuti chí diiⁿ ní chí ngaⁿa nuuⁿndi chí diiⁿ ní tuuⁿ'mi ní canee ní tan'dúúca chí nuuⁿndi miiⁿ patrón yeⁿe ní. Ní cuuvi 'cuuvi ní cueⁿe daāⁿmaⁿ. Ní nduuti chí diiⁿ ní chí ngaⁿa Ndyuūs,

tuu'mi ní n'daacā díf' nī nanáá' Ndyuūs. ¹⁷ 'Úú ní ca'á gracias Ndyuūs caava ndís'tiī caati ndís'tiī 'áará chi tiempo chi ch'ó'oo ní ndís'tiī esclavos ye'"e nuu"ndi ndís'tiī naati maa" ní ch'iindiveé" nī ndúúcu nuu"ma" staava ye'"é nī nduudu cuaacu ye'"é Ndyuūs chi 'ii"yā" s'ee" 'āā chi'cueé" yā ndís'tiī. ¹⁸ Ní taachi canee libre nī ye'"e poder ye'"e nuu"ndi, tuu'mi ní ndís'tiī díf' nī nducueé" chi n'daacā cáávā poder ye'"é Ndyuūs chí nga" a nti-i"nyu" ye'"é nī. ¹⁹ Nga"á ndúúcu ndís'tiī ndúúcu nduudu chi tuumicadiinúú" nī caati ndís'tiī cuuvi tuumicadiinuu" cá nī. Tiempo chi ch'ó'oo ndís'tiī s'neé" nī cuerpo ye'"é nī cáávā nuu"ndi ní dinu-u"ndi nī tan'dúúca chi maa" cuerpo ye'"é nī ne"e chi díf' nī. Ni dii" cá nī chi nguéé n'daacā. Maa" ní 'āā 'neé" nī cuerpo ye'"e nī cáávā chi díf' nī cosa chi n'daacā ní nducueé" chi díf' nī, dii" nī cáávā Ndyuūs.

²⁰ Taachi ndís'tiī canee nī maa" poder ye'"e nuu"ndi, nguéé cuuvi díf' nī dendu'ū chi n'daacā. ²¹ Ní ¿de'ē chi n'daacā chi díf' nī aprovechar ye'"e nuu"ndi chi díf' nī chí ngii 'cuināa" nī ye'"é? Chíf' chi dii" chi ca"á nī 'cuuvi nī cue"e daā"ma". ²² Naati maa" ní nguéé canee nī maa" poder ye'"e nuu"ndi caati dichí'v'e nī Ndyuūs chi díf' nī nti"nyu" ye'"é Ndyuūs. Ní cuayiivi ní véé vida cue"e daā"ma" chi ye'"e nī. ²³ Chí chii'v'e ye'"e nuu"ndi mii" ní dii" chi 'ii"yā" ch'iī yā cue"e daā"ma" naati chii" chi Ndyuūs téé yā 'ii"yā" s'ee" ní regalo chi vida cue"e daā"ma" ti 'ii"yā" s'ee" ní ye'"e Jesucristo chi Señor ye'"e yú.

Ejemplo ye'"e 'ii"yā" chi n'giindivaacu yā

7 Ndís'tiī hermanos ye'"é chi véé ley ye'"é nī, deenu nī chi 'ii"yā" canéé chi 'caandiveé" yā ley mii" nuu"má" ne"e chí canduuchí yā. ² Maa" ní ca'á 'aama ejemplo. 'Áámá n'daataá chi

n'giindivaacu tá nī véé isa"ā ye'"e tá, n'daataá mii" ní n'daataá ye'"e isa"ā tá tanducueé" tiempo chi canduuchi sa tan'dúúca chi nga" a ley. Ní taachi ch'iī isa"ā ye'"e tá canee tá libre ye'"e ley mii" chi nga" a ye'"e isa"ā ye'"é tá. ³ Naati taachi canduuchi isa"ā ye'"e tá ní ca" a tá ndúúcu táámá sa"ā, tuu'mi ní idinuū"ndi ta. Ní nduuti chi ch'iī isa"ā ye'"e tá, nguéé canee yā maa" ley ye'"e 'ii"yā" chi n'giindivaacú yā ní cuuvi 'caandavaacú yā ndúúcu táámá sa"ā ní nguéé dinu-u"ndi tá.

⁴ Ní 'tiicá ntúū" ndís'tiī hermanos ye'"é chi ye'"e Cristo, ley mii" tan'dúúca esposo ye'"e nī chi 'āā n'díí, ní 'āā n'diī ley mii" cáávā ndís'tiī. Ní maa" ní cuuvi ye'"e táámá yā ndís'tiī ní ye'"e Cristo ndís'tiī. 'Ii"yā" mii" ní nducueé" yā ye'"e nguaa" tiná"ā ní cucáávā 'ii"yā" mii" dichii'v'e yú Ndyuūs. ⁵ Ní tiempo chi ch'ó'oo taachi dii" yú tan'dúúca chi ne"e maa" cuerpo ye'"e yú tuumicadiinuu" yú chi véé nuu"ndi ye'"e yú cáávā chi nga" a ley mii" chi dii" yú 'tíicā. Ní nuu"ndi chi dii" yú dii" chi 'cuuvi yú cue"e daā"ma". ⁶ Naati maa" ní dii" yú cuenta chi n'diī yú ye'"e ley mii". Ní nguéé canee yú maa" poder ye'"é ley mii". Maa" ní libre canee yú chi dichii'v'e yú Ndyuūs ndúúcu vida ye'"e yú chí ngai. Ní vida ye'"e yú ní ye'"e Espíritu N'dai ye'"é Ndyuūs. Ní nguéé canee yú maa" poder ye'"e ley ndiicúú chi canéé nguū".

Nuu"ndi chi idii" yú

⁷ Maa" ní ¿de'ē caa"ma" yú? ¿'Áá ley mii" chi nuu"ndi? Nguéé ye'"é mar 'áámá naa". 'Úú ní nguéé n'diichí nuu"ndi nduuti chi nguéé cáávā ley mii". Ní 'tiicá ntúū", 'úú ní nguéé deenú chi nuu"ndi 'úú nduuti chi ne"é dendu'ū chi véé ye'"e taná"ā 'ii"yā" nduuti chi ley mii" nguéé 'tíicā nga" a: Nguéé diné"e nī dendu'ū chi véé ye'"e taná"ā 'ii"yā". ⁸ Ní cáávā ley mii" tuumicadiinúú" nuu"ndi mii" chi

cuuvi neⁿé dííⁿ tanducuéⁿē dendu'ū chi nuuⁿndi. Ní ndúúti chi nguée cáávā ley miiⁿ, nuuⁿndi miiⁿ canée tan'dúúca chi n'dii. Ní nguée deenú yeⁿē. ⁹ Tiempo chi ch'ó'oo 'úú ní nadacadínuúⁿ chi n'daacā canée nguée ndúúcu ley miiⁿ naati taachi n'diichí ley miiⁿ, tuu'mi n'diichí nuuⁿndi, ní 'úú ní canee tan'dúúca chi ch'íí. ¹⁰ Ní 'tíicā ley miiⁿ ch'iⁿi 'iiⁿyāⁿ táacā cuuvi cunduuchí yā cueⁿe daāⁿ-maⁿ, naati cucáávā 'úú n'giⁿi chi idíⁿ nuuⁿndi tuu'mi ní cuuvi 'cuúví cueⁿe daāⁿ-maⁿ. ¹¹ Ní cáávā ley miiⁿ deenú chi nuuⁿndí chi dííⁿ chííⁿ chí chinnche'ei 'úú ti nguée dííⁿ tan'dúúca chi ch'iindiveéⁿ ley miiⁿ. Naati cáávā ley miiⁿ, deenú nuuⁿndi chi dííⁿ ní diiⁿ chi ch'íi cueⁿe daāⁿmaⁿ.

¹² Ní ley miiⁿ ní deeve ní yeⁿe Ndyuūs. Ní mandamiento yeⁿe ley miiⁿ 'tiicā ntúúⁿ ní deeve ní cuaacu ní n'dáacā. ¹³ Tuu'mi ní ley 'áá cucáávā chi n'daacā diiiⁿ chi 'úú 'cuúví cueⁿe daāⁿmaⁿ? Nguée 'túúca. Nuūⁿndi chi dííⁿ, diiiⁿ chi 'úú 'cuúvi. Ní 'tíicā cuuvi deenú nuuⁿndi ti nuuⁿndi miiⁿ ch'iⁿi chi cuáacú chí nuuⁿndi cáávā ley miiⁿ chi cosa chi n'daacā. Ní cosa chi n'daacā miiⁿ ní mandamiento chi ch'iⁿi chi nguée n'daacā chí nuūⁿndi miiⁿ.

¹⁴ Deenu yú chi ley miiⁿ ní yeⁿe Espíritu N'dai yeⁿé Ndyuūs. Naati 'úú ní saⁿā yeⁿe iⁿyeeⁿdí 'cūū. 'Úú chi dinuuⁿndí ní canee maaⁿ poder yeⁿe nuuⁿndi chi idíⁿ nuuⁿndi. ¹⁵ 'Úú nguée deenú de'e cáávā chi dííⁿ chiiⁿ chi dííⁿ. 'Úú nguée dííⁿ chi neⁿé dííⁿ naati dííⁿ chi nguée neⁿé dííⁿ ti nguée neⁿé dííⁿ. ¹⁶ Ní nduuti chi nguée neⁿé dííⁿ ní chííⁿ chí dííⁿ, tuu'mi ní deenú chi ley miiⁿ ní n'dai. ¹⁷ 'Tíicā nguée 'úú chi dííⁿ, naati nuuⁿndi chi canee nduucú chííⁿ diiiⁿ chi dinuuⁿndí. ¹⁸ Caati deenú chi maaⁿ 'úú chi cuerpo yeⁿé nguée vee mar 'áamá dendu'ū chi n'daacā. Cuaacu chi 'úú neⁿé dííⁿ chi n'daacā naati nguée deenú táacā cuuvi

dííⁿ chi n'daacā. ¹⁹ Dendu'ū chi n'dai chi neⁿé dííⁿ, nguée dííⁿ naati chi nguée n'daacā chi nguée neⁿé dííⁿ, chííⁿ chí dííⁿ. ²⁰ Maaⁿ ní nduuti chi dííⁿ chi nguée neⁿé dííⁿ, tuu'mi nguée 'úú chi dííⁿ naati nuuⁿndi ndúúcu poder yeⁿē chi canee nduucú chííⁿ diiiⁿ chi dinuuⁿndí.

²¹ Ní 'tíicā canee nduucú. Taachi neⁿé dííⁿ chi n'daacā miiⁿ, dámaaⁿ chi nguée n'daacā canee nduucú. ²² Cuáacú chi neⁿé dííⁿ chiiⁿ chi ngaⁿā ley yeⁿé Ndyuūs. ²³ Naati deenú chi vée táamá cosa na cuerpo yeⁿé chi nguée neⁿé chi 'úú idíⁿ cosa chi n'daacā tan'dúúca chi nadacadiiⁿúúⁿ chi dííⁿ. Chuū ní ley yeⁿe nuūⁿndi chi vée na cuerpo yeⁿé. Ní 'úú canee tan'dúúca preso yeⁿe ley yeⁿe nuuⁿndi. 'Tíicā 'úú.

²⁴ Dé'e chúúca ndaachiiⁿ yeⁿé maaⁿ. ¿Du'ú cuuvi nadanguáⁿai 'úú yeⁿe cuerpo yeⁿé chí diiⁿ chi 'cuúví cueⁿe daāⁿmaⁿ? ²⁵ Maaⁿ ní 'úú ní ncā'a gracias Ndyuūs chí dámaaⁿ Ndyuūs cuuvi nadinguáⁿai yā 'úú cáávā Jesucristo Señor yeⁿe yú. 'Úú ní dichíí'vē 'úú ley yeⁿe Ndyuūs ndúúcu núúⁿmáⁿ staāvā yeⁿé naati cuerpo yeⁿé ní neⁿe dinuuⁿndi cáávā ley yeⁿe nuuⁿndi chi canee nduucú.

Vida chi vée cáávā Espíritu N'dai yeⁿé Ndyuūs

8 Maaⁿ ní 'iiⁿyāⁿ s'eeⁿ chi yeⁿe Señor Jesucristo nguée condenado yā. Ní 'iiⁿyāⁿ s'eeⁿ nguée n'geetineé yā chi dííⁿ yā chiiⁿ chi neⁿe cuerpo yeⁿe maáⁿ yā naati n'geetineé yā tan'dúúca chi neⁿe Espíritu N'dai yeⁿé Ndyuūs. ² Caati ley yeⁿe Espíritu N'dai yeⁿé Ndyuūs chiiⁿ diiiⁿ chi vée vida cueⁿe daāⁿmaⁿ yeⁿe 'iiⁿyāⁿ chi yeⁿe Jesucristo. Ní diiiⁿ chi 'úú canee libre yeⁿē nuuⁿndi chi diiiⁿ chí ch'íí cueⁿe daāⁿmaⁿ. ³ Ní Ndyuūs dííⁿ yā chiiⁿ chi nguée cuuvi diiiⁿ ley yeⁿe Moisés miiⁿ caati 'iiⁿyāⁿ ní duūvā yā na cuerpo yeⁿe yā. Ní Ndyuūs dííⁿ

yā condenar nuuⁿndi chi véé na cuerpo yeⁿé 'iiⁿ'yāⁿ yeⁿe iⁿ'yeeⁿdí 'cūū taachi di-cho'ó yā 'áámá n'dyáⁿā Daiya yā ndúúcu cuerpo tan'dúúcā s'uúúⁿ cáávā chi diví yā nuuⁿndi yeⁿé 'iiⁿ'yāⁿ. ⁴Ní chúū Ndyuūs diiⁿ yā cáávā chi s'uūūⁿ cuuvi ch'εetinee yú tan'dúúcā chí ngaⁿa ley miiⁿ ti yeⁿe Espíritu N'dai s'uúúⁿ. Ní nguéé diiⁿ yú chiiⁿ chi neⁿe maaⁿ cuerpo yeⁿe yú ti diiⁿ yú tan'dúúcā chí neⁿe Espíritu N'dai yeⁿé Ndyuūs.

⁵'Iiⁿ'yāⁿ chi n'geetinée yā ní díⁿ yā chí neⁿe maaⁿ cuerpo yeⁿé yā nacadiinúⁿ yā ní díⁿ yā dendu'ū chí neⁿé yā. 'Iiⁿ'yāⁿ chí yeⁿe Espíritu N'dai yeⁿé Ndyuūs nadacadiinúⁿ yā ní díⁿ yā chí neⁿe Espíritu N'dai yeⁿe Ndyuūs. ⁶Ní 'iiⁿ'yāⁿ chí nadacadiinúⁿ yā ní díⁿ yā de'ē chí cuerpo yeⁿe maáⁿ yā neⁿe, ní 'cuūvi yā cueⁿe daāⁿmaⁿ naati 'iiⁿ'yāⁿ chí nadacadiinúⁿ yā ní díⁿ yā dendu'ū chí neⁿe Espíritu N'dai yeⁿe Ndyuūs ní veε vida cueⁿe daāⁿmaⁿ yeⁿe yā ní n'geetinée yā ndúúcu vaadi 'diiⁿ. ⁷'Iiⁿ'yāⁿ chí nadacadiinúⁿ yā dendu'ū chí yeⁿe cuerpo yeⁿé yā, 'iiⁿ'yāⁿ s'eeⁿ ní contra yeⁿé Ndyuūs 'iiⁿ'yāⁿ ti nguéé neⁿé yā díⁿ yā chí ngaⁿa ley miiⁿ, ní nguéé cuuvi díⁿ yā. ⁸Ní cáávā chuū 'iiⁿ'yāⁿ s'eeⁿ chí díⁿ yā tan'dúúcā chí neⁿe cuerpo yeⁿe yā Ndyuūs nguéé inee yiinú yā chíⁿ chí díⁿ yā.

⁹Naati maaⁿ ní ndís'tiī nguéé díⁿ nī tan'dúúcā chí neⁿe cuerpo yeⁿe maáⁿ nī naati díⁿ nī tan'dúúcā chí neⁿe Espíritu N'dai yeⁿé Ndyuūs ti maaⁿ ní Espíritu N'dai yeⁿé Ndyuūs cánée yā ndúúcu ndís'tiī. Ní nduuti chí 'áámá 'iiⁿ'yāⁿ nguéé cánée yā ndúúcu Espíritu yeⁿé Cristo, tuu'mi ní 'iiⁿ'yāⁿ 'cūū nguéé yeⁿe Cristo 'iiⁿ'yāⁿ. ¹⁰Ní nduuti chí ndís'tiī ní yeⁿe Cristo ndís'tiī, 'áará chí cuerpo yeⁿé nī cuuvi n'diī cucáávā nuuⁿndi yeⁿé nī, tuu'mi ní canduuchí nī cáávā Espíritu N'dai yeⁿe Ndyuūs miiⁿ caati Ndyuūs diiⁿ yā aceptar ndís'tiī chí yeⁿé yā ndís'tiī.

¹¹Ní ndúúti chí canée nī ndúúcu Espíritu N'dai yeⁿé Ndyuūs, Espíritu N'dai yeⁿé Ndyuūs chí nadacuéⁿ yā Cristo yeⁿe nguaaⁿ tináⁿā, tuu'mi ní maaⁿ Ndyuūs miiⁿ chí nadacuéⁿ yā Cristo caⁿa yā chí téé yā cáávā Espíritu N'dai yeⁿé Ndyuūs chí canée nduucú nī vida ngai na cuerpo yeⁿé nī chí 'āā n'díí.

¹²Ní cáávā chuū, ndís'tiī hermanos yeⁿé, véé chí canée chí diiⁿ yú naati nguéé 'cuetinee yú ní nguéé diiⁿ yú tan'dúúcā chí neⁿe cuerpo yeⁿe yú. ¹³Caati ndúúti chí diiⁿ yú tan'dúúcā chí neⁿe cuerpo yeⁿe maaⁿ yú, tuu'mi ní cuuvi 'cuūvi yú cueⁿe daāⁿmaⁿ. Naati nduuti chí nguéé diiⁿ yú cuenta chí diiⁿ cuerpo yeⁿe yú, tuu'mi ní cáávā Espíritu N'dai yeⁿé Ndyuūs chí canee ndúúcu yú 'cuetinee yú.

¹⁴Ní nducyáácá 'iiⁿ'yāⁿ chí Espíritu N'dai yeⁿé Ndyuūs ngaⁿa yā chí cuuvi díⁿ yā 'iiⁿ'yāⁿ s'eeⁿ ní daiya Dendyuūs 'iiⁿ'yāⁿ. ¹⁵Ní Ndyuūs 'āā tee yā s'uúúⁿ Espíritu N'dai yeⁿé yā nguéé cáávā chí diiⁿ yú ntiⁿnyuⁿ yeⁿé yā chí dí'va'a yú ley cáávā chí condenado yú taama vmnéⁿēē naati cáávā chí s'uúúⁿ ní daiya Ndyuūs s'uúúⁿ. 'Ícú cucáávā Espíritu N'dai yeⁿé Ndyuūs ní s'uúúⁿ ní cuuvi caaⁿmaⁿ yú: N'diī, Ndyuūs ní Chiidá. ¹⁶Ní maaⁿ Espíritu N'dai yeⁿé Ndyuūs ngaⁿá yā ndúúú cuacu ndúúcu espíritu yeⁿe yú chí s'uúúⁿ ní daiya Dendyuūs s'uúúⁿ. ¹⁷Ní nduuti chí s'uúúⁿ ní daiyá Ndyuūs s'uúúⁿ, tuu'mi ní véé chí cuuvi yeⁿe yú chí Ndyuūs caⁿa yā chí téé yā s'uúúⁿ. Ní cuta'a yú chí cuuvi yeⁿe yú ndúúcu Cristo maáⁿ yā nduuti chí s'uúúⁿ ní 'cueenu yú cuuvi maaⁿ cáávā chí yeⁿe Cristo s'uúúⁿ. Cuayiivi ní véé parte yeⁿe yú ndúúcu Cristo ndúúcu vaadi deεve n'dái taavi yeⁿé yā.

¹⁸Maaⁿ ní inadacadiinúⁿ chí dendu'ū chí n'geenu yú ngii maaⁿ nguéé dé'ē veε chí ch'εete nguéé tan'dúúcā dendu'ū chí deεve ca ní ch'εete ca chí Ndyuūs

'cuu^mmiⁿ yā s'uuúⁿ.¹⁹ Tanducuéⁿē yeⁿe iⁿ'yeeⁿdī chi din'dái Ndyuūs cuáacú cunee ngiinu tiempo chi cuuvi n'diichi 'iiⁿyāⁿ s'eeⁿ chi daiya Ndyuūs. ²⁰ Caati tanducuéⁿē chi din'dái Ndyuūs ndáā nguuvi chi 'āā ntéé n'daacā. Ní nguéé cucáāvā chi maāⁿ néⁿe naati cucáāvā chi Ndyuūs neⁿē yā chi 'tífca. Ní maaⁿ ní tanducuéⁿē tiempo miiⁿ ní tanducuéⁿē dendu'ū cunee ngiinu chi Ndyuūs diíⁿ yā chi canéé n'daacā cáāvā yeⁿē. ²¹ Ní tanducuéⁿē chi din'dái Ndyuūs canéé chi natuuví. Naati ndāā tiempo chi nguéé natúúví caati véé parte yeⁿē ndúúcu libertad chí n'dai taavi chi yeⁿē 'iiⁿyāⁿ s'eeⁿ chi daiyá Dendyuūs. ²² Ní s'uuúⁿ ní deenu yú chi ndíí nguuvi maaⁿ tanducuéⁿē chi din'dái Ndyuūs ní n'gai ya'āi ngeecū yeⁿē tan'dúúca 'áamā n'daataá ndúúcu vaadi ya'ai yeⁿē chi 'cundiyáaⁿ daiya tá. ²³ Ní nguéé dámaāⁿ tanducuéⁿē chi din'dái Ndyuūs ní n'gái ya'āi naati 'ticá ntúūⁿ s'uuúⁿ n'geenu yú ngii. 'Áará chi canee yú ndúúcu Espíritu N'dai yeⁿé Ndyuūs chi Ndyuūs datee yā s'uuúⁿ chi vmnááⁿ vmnaaⁿ sta'a yú yeⁿé Ndyuūs. Ní 'cueenu taavi yú cuuvi 'naaⁿ chi canéé ngiinu yú tiempo chi Ndyuūs cuta'á yā s'uuúⁿ chi daiyá Ndyuūs s'uuúⁿ. Ní nanguaⁿái yā s'uuúⁿ yeⁿe cuerpo yeⁿe yú chi véé maaⁿ. Ní 'āā ntéé véé cuerpo ndífcuū yeⁿe yú naati véé cuerpo chí ngai yeⁿe yú. ²⁴ Ní s'uuúⁿ nguaⁿai yú cáāvā chi canee ngiinu yú chi Ndyuūs caⁿa yā chi téé yā s'uuúⁿ. Nduuti chi 'āā inaaⁿ yú de'ē chi canee ngiinu yú 'āā ntéé canee ngiinu yú yeⁿē. Chííⁿ chi 'āā inaaⁿ 'iiⁿyāⁿ 'āā ntéé canéé ngiinu yā yeⁿē. ²⁵ Naati nduuti chi canéé ngiinu yú chi 'āā cuéé snaaⁿ yú canéé chi cunee ngiinu yú ndúúcu 'víich'etíínūⁿ.

²⁶ Ní Espíritu N'dai yeⁿé Ndyuūs nnginnéé yā s'uuúⁿ taachi dúuvā yú. S'uuúⁿ nguéé deenu yú táacā canéé chí caaⁿmaⁿngua'a yú tan'dúúca chi Ndyuūs neⁿé yā, ní maaⁿ ní Espíritu N'dai

yeⁿé Ndyuūs inneé yā s'uuúⁿ taachi ngaⁿangua'a yú nanááⁿ Ndyuūs taachi n'gai ya'ái yā ní nguéé cuuvi caaⁿmaⁿ yú chuū ndúúcu nduudu. ²⁷ Ní Ndyuūs chi n'diichi yā staava yeⁿe yú deenú yā chi nadacadiinuuⁿ Espíritu N'dai yeⁿé Ndyuūs caati Espíritu N'dai yeⁿe Ndyuūs ngiica yā dámaāⁿ yeⁿe chi neⁿe Ndyuūs ní cáāvā 'iiⁿyāⁿ chi yeⁿe Ndyuūs.

Cuchē ca yú yeⁿe nducuéⁿē

²⁸ Ní deenu yú chi Ndyuūs diíⁿ yā chi tanducuéⁿē chi chó'oo yeⁿe s'uuúⁿ chí yeⁿe s'uuúⁿ ní cáāvā chi n'daacā yeⁿe yú caati neⁿe yú Ndyuūs. Ní Ndyuūs yaa'ví yā 'iiⁿyāⁿ s'eeⁿ chi cuuvi yeⁿé yā 'iiⁿyāⁿ s'eeⁿ. ²⁹ Ní Ndyuūs ndēeve yā 'iiⁿyāⁿ chi cuuvi yeⁿé yā ní diví yā 'iiⁿyāⁿ s'eeⁿ lado yeⁿé yā ndii vmnááⁿ vmnaaⁿ caati 'iiⁿyāⁿ s'eeⁿ cuuvi daiyá yā tan'dúúca Daiyá yā Jesucristo. Ní 'íicú Cristo chi Daiya Ndyuūs ní Daiyá yā vmnááⁿ vmnaaⁿ nguaaⁿ n'dee n'dái vi'í yā.

³⁰ Ní 'iiⁿyāⁿ s'eeⁿ chi Ndyuūs chindēeve yā ndíí vmnááⁿ vmnaaⁿ Ndyuūs yaa'ví yā 'iiⁿyāⁿ s'eeⁿ chi cuuvi yeⁿé yā 'iiⁿyāⁿ s'eeⁿ. Ní yaa'ví yā 'iiⁿyāⁿ chí sta'á yā 'iiⁿyāⁿ s'eeⁿ chi cuuvi daiyá yā. Ní Ndyuūs chí sta'a yā 'iiⁿyāⁿ s'eeⁿ chi cuuvi yeⁿé yā ní cuayiivi dich'eté yā 'iiⁿyāⁿ s'eeⁿ.

³¹ ¿D'éē cuuvi caaⁿmaⁿ yú yeⁿé dendú'ū s'eeⁿ? Dámaāⁿ cuuvi caaⁿmaⁿ yú chuū. Nduuti chi Ndyuūs canéé yā ndúúcu s'uuúⁿ, ¿du'ū cuchéé cūnee contra yeⁿe s'uuúⁿ? ³² Ní Ndyuūs nguéé diya'ái 'íinu yā Daiya yā cáāvā s'uuúⁿ naati dicho'ó yā Daiyá yā caati chíi Daiya yā caavā nducyaaca s'uuúⁿ. Ní nduuti chi 'tífca diíⁿ yā ndúúcu Daiya yā, ¿'áá nguéé tee Ndyuūs tanducuéⁿē s'uuúⁿ daama ndúúcu Daiyá yā ní n'dee n'dái yeⁿé? ³³ ¿Dú'ū cuuvi caaⁿmaⁿ nuuⁿndi yeⁿé 'iiⁿyāⁿ chi Ndyuūs ndēeve yā? Ndyuūs maáⁿ yā diíⁿ yā aceptar 'iiⁿyāⁿ chi yeⁿé yā. ³⁴ ¿Dú'ū tuu'mi

cuuvi dífⁿ yā condenar s'uuúⁿ? Cristo ní 'iiⁿyāⁿ chi ch'iⁱ yā cáávā nuuⁿndi yeⁿe yú ní nduuchí yā yeⁿe nguuaⁿ tinaⁿā. Ni maaⁿ ní Cristo canee yā na lado yeⁿe honor yeⁿe Chiidá yā. Ní ngaⁿanguaⁿá yā cáávā s'uuúⁿ. ³⁵ ¿Duⁿu cuuvi diví yā s'uuúⁿ yeⁿe Cristo chi neⁿé yā s'uuúⁿ? ¿'Áá chiiⁿ chi n'geenu yú ngii, 'áá cuuvi nadví s'uuúⁿ, o denduⁿu chi diiiⁿ chi idiⁿvaachi yú o denduⁿu chi diiⁿ 'iiⁿyāⁿ chi 'cueenu yú cuuvi o taachi cuuví cuuca yú o taachi 'āā ntéé catecai yú o cáánda yeⁿe yú o taachi ch'iinⁿúⁿ yā s'uuúⁿ ndúúⁿcū machete chi 'uúvi lados 'caāiⁿ? ¿'Áá cuuvi diiiⁿ nducueⁿéⁿ chuú nadví s'uuúⁿ ná vaadi neⁿe yeⁿe Cristo? Nguéé cuuvi. ³⁶ 'Tíicā canéé nguúⁿ na libro yeⁿe Ndyuūs:

Cáávā chi s'uuúⁿ ní yeⁿe di s'uuúⁿ nuⁿmaⁿ nguuvi canee yú listo chi 'caaⁿnúⁿ yā s'uuúⁿ cáávā di. Ní 'iiⁿyāⁿ diiⁿ cuenta yā chi s'uuúⁿ tanⁿdúúⁿcā 'iiti cuūchí chi caⁿá yā 'caaⁿnuⁿ yā, 'tíicā s'uuúⁿ.

³⁷ Naati yeⁿe nducueⁿéⁿ denduⁿu cucheé cá yú cáávā Cristo chi dinéⁿe yā s'uuúⁿ.

³⁸ 'Tíicā 'úú ní deenú chi cuaacu chi mar 'áámá 'iiⁿyāⁿ nguéé cuuvi diví yā s'uuúⁿ yeⁿe Ndyuūs chi dinéⁿe yā s'uuúⁿ. Ndíí nguéé ndúú vaadi n'gii, ndíí nguéé ndúú chi cunduūchi yú, ndíí nguéé ndúú ángeles, ndíí nguéé ndúú espíritus chi ngaⁿa ntiiⁿnyuⁿ ndúúⁿcū poder yeⁿe espíritus, ndíí nguéé ndúú denduⁿu chi véé maaⁿ, ndíí nguéé ndúú denduⁿu chi cuchii, ³⁹ ndíí nguéé ndúú yeⁿe chi véé chí na yáácú, ndíí nguéé ndúú yeⁿe chi véé ndii na yáanūuⁿ, ndíí nguéé ndúú táámá naaⁿ chi véé, tanducueⁿéⁿ chuú nguéé cuuví diví s'uuúⁿ yeⁿe Ndyuūs chi dinéⁿe yā s'uuúⁿ caati s'uuúⁿ ní yeⁿe Jesucristo s'uuúⁿ.

Ndyuūs ndæeve yā 'iiⁿyāⁿ Israel chí judíos chi cuuvi 'iiⁿyāⁿ yeⁿe yā

9 'Úú Pablo ní ngaⁿá nduudu cuaacu ti 'úú ní yeⁿe Cristo 'úú, ní nguéé ngaⁿá nduudu yaadi. Chííⁿ chi nadacádiinúⁿ na staava yeⁿe ní yeⁿe Espíritu N'dai yeⁿe Ndyuūs. Cáávā chuú cuaacu niⁿnyúⁿ deenú chi ngaⁿá nduudu cuaacu. ² Neené ndaachií yiinú ní neené ya'ai staava yeⁿe cáávā 'iiⁿyāⁿ yeⁿe ndaata yeⁿe, ³ ndíí chí 'úú maáⁿ neⁿé chí cuneé condenado 'úú ní canee 'aama lado yeⁿe Cristo nduuti chí chiiⁿ cuuví dífⁿ, ní cuuví 'cuætinéé n'daacā 'iiⁿyāⁿ yeⁿe ndaata yeⁿe, ní cuuví yā yeⁿe Cristo 'iiⁿyāⁿ. ⁴ 'iiⁿyāⁿ s'eeⁿ ní yeⁿe 'iiⁿyāⁿ yeⁿe ndaata Israel. Ní Ndyuūs staⁿá yā 'iiⁿyāⁿ s'eeⁿ chí cuuvi daiyá yā. Ní Ndyuūs chí deæve n'dái taavi ca canéé yā nguuaⁿ 'iiⁿyāⁿ s'eeⁿ. Ní dííⁿ yā 'áámá compromiso ndúúⁿcū yā. Ní caⁿá yā 'iiⁿyāⁿ s'eeⁿ ley yeⁿe yā chí ley yeⁿe Moisés. Ní 'iiⁿyāⁿ s'eeⁿ canéé yā ndúúⁿcū ntiⁿnyuⁿ yeⁿe yaacū ní ndúúⁿcū compromiso yeⁿe Ndyuūs chí Ndyuūs caⁿa yā chí ca'a yā 'iiⁿyāⁿ s'eeⁿ. ⁵ Ní 'iiⁿyāⁿ s'eeⁿ ní daiya chiida yú cuááⁿ vmaaaⁿ ní yeⁿe ndaata 'iiⁿyāⁿ s'eeⁿ. Ní yeⁿe ndaata 'iiⁿyāⁿ s'eeⁿ Cristo ní ndaa yā ndúúⁿcū cuerpo tanⁿdúúⁿcā 'iiⁿyāⁿ s'eeⁿ. Ní Cristo miiⁿ ní Ndyuūs, ní ch'æete taavi yā yeⁿe nducueⁿéⁿ. Cueⁿe daaⁿmaⁿ dich'æete yú Ndyuūs. 'Tíicā.

⁶ 'Úú nguéé ngaⁿá chí compromiso chí ngaⁿa Ndyuūs nanááⁿ 'iiⁿyāⁿ Israel chí nguéé dichííⁿvē. N'daacā ca chí ngaⁿá chí nducyaaca 'iiⁿyāⁿ yeⁿe ndaata Israel miiⁿ cuaacu chí nguéé yeⁿe 'iiⁿyāⁿ Israel. ⁷ Naati nguéé nducyaaca 'iiⁿyāⁿ yeⁿe ndaata Israel ní daiya Abraham 'iiⁿyāⁿ. Naati 'túúⁿcā ngaⁿa Ndyuūs: Dii Abraham, cáávā saⁿā daiya di chí nguⁿuvi Isaac véé 'iiⁿyāⁿ yeⁿe di cuayiivi. ⁸ Ní cáávā nduudu chí ngaⁿa Ndyuūs cuuvi deenú chí mar 'áámá 'iiⁿyāⁿ cuuvi

daiya Ndyuūs cáávā chi ch'iindiyáaⁿ yā na ndaata yeⁿé Abraham. Nguēé 'tíicā. 'Iiⁿyāⁿ s'eeⁿ ní daiya Dendyuūs nduuti chi cucáávā compromiso yeⁿe Ndyuūs, 'iiⁿyāⁿ s'eeⁿ cuaacu chi daiyá Ndyuūs. ⁹Nduudú 'cūū nduudu chi canéé nguūⁿ yeⁿe compromiso miiⁿ chi Ndyuūs ca'a yā Abraham: Tiempo chi ch'i'í, 'úú nndaá ní ch'i'í poder yeⁿé ní Sara chi n'daataá yeⁿe di ní 'cuundi 'aama daiya tá.

¹⁰Ní nguéé dámaaⁿ chuū. Nduu 'uuvi daiya táⁿā Rebeca mífⁿ ní cuaāchi. Ní nguuvi yā Esaú ndúucū Jacob ní yeⁿe 'áamá chiidaá ní chiidá yā ní Isaac chi yeⁿe ndaata yeⁿe 'iiⁿyāⁿ vmnááⁿ vmaaaⁿ yeⁿe yú. ¹¹⁻¹³Ní taachi daiyā Rebeca miiⁿ chi cuaāchi 'āā cuéé 'cuētiyáaⁿ yā ní 'āā cuéé dífⁿ yā cosa chi n'daacā o cosa chi nguéé n'daacā, Ndyuūs yaa'ví yā táⁿā Rebeca miiⁿ 'tíicā: Daiya di chi saⁿā vmaaaⁿ chí Esaú dífⁿ sa servir daiya di chi saⁿā chí cuchii cuayiivi chi Jacob. Ní chuū ní tan'dúucā chi canéé nguūⁿ naachí Ndyuūs ngaⁿa yā 'tíicā: 'Úú dineⁿé saⁿa Jacob miiⁿ, naati saⁿā Esaú miiⁿ 'úú nguéé neⁿé. Déenu yú chi canéé cuaacu chi Ndyuūs cuuvi ndēeve yā 'āā du'ú nūuⁿ 'iiⁿyāⁿ chi neⁿe yā tan'duucā chi neⁿe yā. Ní cuuvi yaa'vi yā 'iiⁿyāⁿ chi neⁿé yā yaa'ví yā chi cuuvi yeⁿe yā. Ní nguéé dífⁿ yā cuenta chiiⁿ chi diiⁿ 'iiⁿyāⁿ chi yaa'ví yā. Ní ndēevé yā Jacob.

¹⁴¿De'ē cuuvi caaⁿmaⁿ s'uūuⁿ yeⁿe chi diiⁿ Ndyuūs? ¿'Áá diiⁿ Ndyuūs cosa chi nguéé cuaacu? Nguéé mar 'áamá naaⁿ. ¹⁵Ndyuūs ní caⁿa yā chii yā Moisés miiⁿ 'tíicā: 'Úú ní ya'ái cáávā 'iiⁿyāⁿ chi 'úú neⁿé chi caⁿá chí ya'ái yeⁿe yā; ní 'úú ya'ái 'iinú cáávā 'iiⁿyāⁿ chi 'úú neⁿé chi caⁿá chí ya'ái 'iinú cááva yā. ¹⁶Maaⁿ ní nguéé tan'dúucā chi 'iiⁿyāⁿ s'eeⁿ neⁿé yā o dífⁿ yā chi cuuví yeⁿé Ndyuūs 'iiⁿyāⁿ, naati dámaaⁿ tan'dúucā chi Ndyuūs ya'ai 'iinú yā caava 'āā du'ú nūuⁿ chi neⁿé yā chi cuuvi yeⁿé yā. ¹⁷Ní canéé nguūⁿ

na libro yeⁿe Ndyuūs taachi Ndyuūs yaa'ví yā rey yeⁿe yáⁿāa Egipto 'tíicā: Dii Faraón, 'úú s'neéⁿ dii rey caati 'úú cuuvi 'cuuⁿmíⁿ poder yeⁿé cucáávā dii. Ní 'iiⁿyāⁿ yeⁿe núúⁿmáⁿ íⁿ'yeeⁿdí cuuvi déenu yā chi duuchí ní caaⁿmáⁿ yā chi duuchí. ¹⁸Ní 'tíicā diiⁿ Ndyuūs. Ya'ái yā cáávā 'iiⁿyāⁿ s'eeⁿ chi maáⁿ yā neⁿé yā, ní 'tiicá ntúūⁿ Ndyuūs dichēechí yā staava yeⁿe 'iiⁿyāⁿ s'eeⁿ chi maáⁿ yā neⁿé yā dichēechí yā.

¹⁹Tuuⁿmí ní 'aamá ní caⁿa ní chii ní 'úú 'tíicā: Nduuti chi 'tíicā, ¿de'e cúuvi chi Ndyuūs ngaⁿá yā chi nuuⁿndi ní yeⁿe saⁿā? Ní ¿dú'ú cuuvi diiⁿ cosa chi contra yeⁿe chi Ndyuūs neⁿé yā chi diiⁿ? ²⁰'Úú ní ngaⁿá ngii díf saⁿā: ¿Dú'ú dii chi díf cuuvi n'guēcútaⁿa di yeⁿé Ndyuūs? ¿'Áá cuaacu chi 'áamá 'cúutii yeⁿe íncēētí cuuvi caaⁿmaⁿ ndúucū 'iiⁿyāⁿ chi din'dái yā 'cúutii miiⁿ ní caaⁿmaⁿ 'tíicā: ¿De'ē cúuvi chi din'dái ní 'úú 'túucā? ²¹Deenu yú chi 'iiⁿyāⁿ chi din'dái yā 'cúutii cuuvi din'dái yā yeⁿe íncēētí tan'dúucā chi neⁿé yā din'dái yā. Cuuvi din'dái yā yeⁿe 'áamá taaⁿ íncēētí 'uūvi 'cúutii, 'áamá chí yaⁿai chí'vē ní táamá chii nguéé yaⁿai chí'vē.

²²Ní 'tiicá ntúūⁿ chi diiⁿ Ndyuūs. Ndyuūs neⁿé yā 'cuuⁿmíⁿ yā 'iiⁿyāⁿ táacā cuuvi dífⁿ yā castigar 'iiⁿyāⁿ ní ch'i'í yā poder yeⁿé yā. Ní n'deeē 'nááⁿ tiempo Ndyuūs cheé yā ndúucū vaadi ngiinu yeⁿé yā ndúucū 'iiⁿyāⁿ s'eeⁿ chi nguéé n'daacā idifⁿ yā. Ní Ndyuūs canéé chí dífⁿ yā castigar 'iiⁿyāⁿ s'eeⁿ. Ní Ndyuūs dituūví yā 'iiⁿyāⁿ s'eeⁿ. ²³Ní Ndyuūs neⁿé yā ch'i'í yā s'uūuⁿ chí cheete ca vaadi deeve taavi yeⁿé yā ní néené ya'ai 'iinú yā cááva s'uūuⁿ. Ní ndii vmnááⁿ vmaaaⁿ dífⁿ yā chí s'uuúⁿ ní véé parte yeⁿe yú ndúucū yā ndúucū deeve taavi ca yeⁿé yā. ²⁴Ní Ndyuūs yaa'ví yā s'uūuⁿ chi cuuvi yeⁿé yā s'uūuⁿ, náⁿā s'uūuⁿ chi 'iiⁿyāⁿ Israel s'eeⁿ chí judíos s'uūuⁿ ní tanáⁿa s'uūuⁿ chí nguéé 'iiⁿyāⁿ Israel s'eeⁿ chí judíos

s'uuúⁿ. ²⁵Tan'dúúccā chi canéé nguūⁿ na libro yeⁿé Ndyuūs naachi dinguūⁿ profeta Oseas ní Ndyuūs ngaⁿá yā 'tíicā:

'Iiⁿyāⁿ chi nguéé yeⁿe ndaata yeⁿé, 'úú yaa'ví 'iiⁿyāⁿ s'eeⁿ chi cuuvi yeⁿé; 'iiⁿyāⁿ chi nguéé dineⁿé vmaáⁿ ti nguéé 'iiⁿyāⁿ yeⁿe 'úú maaⁿ ní ngaⁿá 'iiⁿyāⁿ s'eeⁿ chi neené neⁿé 'iiⁿyāⁿ s'eeⁿ.

²⁶Ní lugar mífⁿ nūuⁿ naachi Ndyuūs caⁿa yā chíi yā 'iiⁿyāⁿ s'eeⁿ 'túúccā: Ndís'tií ní nguéé 'iiⁿyāⁿ yeⁿé ndís'tií, mífⁿ nūuⁿ ní ngaⁿá 'iiⁿyāⁿ s'eeⁿ ní chi duuchí yā daiya Dendyuūs chí canduuchi.

²⁷Ní saⁿa profeta Isaías caⁿa sá yeⁿe 'iiⁿyāⁿ Israel 'tíicā: 'Áará chí 'iiⁿyāⁿ yeⁿe ndaata Israel ní n'dee n'dái yā tan'dúúccā yáⁿāa ndúútii yeⁿe yíicu dá-maaⁿ n'duu'vi núúⁿ yā nnguaⁿ'ai yā. ²⁸Ní Señor Ndyuūs dífⁿ yā chí cuuvi cuaacu nduudu chí 'āā caⁿa yā yeⁿe yáⁿāa 'cūū ní nuuⁿ dífⁿ yā nducueⁿē. ²⁹Ní 'tíicā ngaⁿa profeta Isaías cuaaⁿ vmaaaⁿ:

Nduuti chí Señor chí ngaⁿa ntiíⁿnyúⁿ yā yeⁿe nducueⁿē nguéé s'neéⁿ yā 'iiⁿyāⁿ yeⁿe yú ndúúcu yú, tuu'mi ní s'uuúⁿ canee yú tan'dúúccā nducyááccá 'iiⁿyāⁿ yeⁿe yááⁿ Sodoma ndúúccū yááⁿ Gomorra chí ch'ii yā cucááavā nuuⁿndi yeⁿé yā. 'Tíicā s'uuúⁿ.

Yeⁿe 'iiⁿyāⁿ Israel s'eeⁿ ní yeⁿé nduudu cuaacu yeⁿé evangelio

³⁰¿De'ē cuuvi caaⁿ'maⁿ yú tuu'mi? 'Tíicā cuuvi caaⁿ'maⁿ yú. 'Iiⁿyāⁿ chí nguéé yeⁿe ndaata Israel chí judíos 'iiⁿyāⁿ s'eeⁿ nguéé in'nuúⁿ yā Ndyuūs ní nguéé dífⁿ yā chí canee n'daāca yā nanááⁿ Ndyuūs. Naati cuayiivi mífⁿ ní 'iiⁿyāⁿ s'eeⁿ canee n'daāca yā nanááⁿ Ndyuūs cáávā chí i'téenu yā Ndyuūs. Ní Ndyuūs dífⁿ yā aceptar 'iiⁿyāⁿ s'eeⁿ chí yeⁿé yā 'iiⁿyāⁿ s'eeⁿ. ³¹Nguéé 'tíicā ndúúccū 'iiⁿyāⁿ chí yeⁿe ndaataá Israel. Caneé yā

ndúúccū ley yeⁿe Moisés chí cuuvi di-iiⁿ chí n'daacā canee yā nanááⁿ Ndyuūs. Ní 'áará chí neⁿé yā canee n'daacā nanááⁿ Ndyuūs naati nguéé cuuvi dífⁿ yā cumplir chíiⁿ chí ngaⁿ'a ley miiⁿ. ³²¿De'ē cúúvi chí 'tíicā? 'Tíicā canee, caati 'iiⁿyāⁿ yeⁿe ndaata Israel nguéé n'daacā canee yā nanááⁿ Ndyuūs cáávā ntiíⁿnyuⁿ chí dífⁿ yā cáávā ley yeⁿé yā, ní nguéé neⁿé yā cu'téenu yā Jesucristo. Ní cáávā chuū 'iiⁿyāⁿ s'eeⁿ canee tan'dúúccā chí candéé ca'a yā ná tuūu chí Jesucristo chí diiiⁿ chí indē ca'a 'iiⁿyāⁿ. ³³Ní 'tíicā canee nguūⁿ na libro yeⁿe Ndyuūs yeⁿe tuūu miiⁿ:

'Úú Ndyuūs ní cu'neéⁿ na yāáⁿ Sión 'áamá 'iiⁿyāⁿ chí Jesucristo chí ngu-uví tuūu chí cuundē ca'a 'iiⁿyāⁿ ní tuūú miiⁿ ní 'áamá tuūú ch'ēete chí diiiⁿ chí cundēve 'iiⁿyāⁿ; ní nducyááccá 'iiⁿyāⁿ chí cu'téenu yā 'iiⁿyāⁿ miiⁿ, nguéé cuuvi 'cuiááⁿ yā.

10 Ndís'tií hermanos yeⁿé, neⁿé ndúúccū núúⁿmáⁿ staava yeⁿé chí nducyaaca 'iiⁿyāⁿ Israel yeⁿe ndaata yeⁿé cuuvi nnguaⁿ'ai yā. Ní 'úú ní ngaⁿ'angua'á cáávā yā. ²Deenú chí cuaacu chí 'iiⁿyāⁿ yeⁿe ndaataá yeⁿé ní neⁿé yā dich'ēete cá yā Ndyuūs naati nguéé dífⁿ yā tan'dúúccā chí neⁿe Ndyuūs caati nguéé déenu yā tááccā cuuvi diiⁿ yā. ³Ní nguéé déenu yā tááccā Ndyuūs dífⁿ yā aceptar 'iiⁿyāⁿ chí cuuvi yeⁿé yā 'iiⁿyāⁿ. Ní dífⁿ yā chee chí nadacádíínuuⁿ yā chí n'daacā. Ní nguéé neⁿé yā dífⁿ yā tan'dúúccā chí Ndyuūs neⁿe yā chí diiⁿ yā caati n'daacā canee yā nanááⁿ Ndyuūs. ⁴Ní taachi ndaā Cristo dífⁿ yā chí 'āā vi'í cā ley yeⁿe Moisés. Ní maaⁿ ní nducyááccá 'iiⁿyāⁿ chí i'téenu yā Cristo, 'iiⁿyāⁿ s'eeⁿ n'daacā canee yā nanááⁿ Ndyuūs.

⁵Ní Moisés miiⁿ dinguuⁿ yā yeⁿe 'iiⁿyāⁿ chí neⁿé yā canee n'daāca yā nanááⁿ Ndyuūs cáávā chí dífⁿ yā chí ngaⁿ'a ley miiⁿ. 'Tíicā dinguúⁿ yā: 'Iiⁿyāⁿ chí diiⁿ yā tanducueⁿē dendu'ú chí ngaⁿ'a

ley ye^{ne} Moisés canduuchí yā cue^{ne} daa^{ma} cucáāvā ley miiⁿ. ⁶Naati chuū ní nga^a ye^{ne} 'iiⁿyāⁿ chi canee n'daacā nanááⁿ Ndyuūs cáāvā chi i'téenu yā Jesucristo. Díí nguéé nga^a di na staava ye^{ne} di 'tíicā: ¿Du'u ca^{nā} na va'ai cheeti nguuví? Taachi nga^a di 'tíicā, nadicua'ái di Cristo ye^{ne} va'ái cheeti nguuví. ⁷Ní nguéé caa^{ma} di na staava ye^{ne} di 'tíicā: ¿Du'ū cuuví ca^{nā} yā iⁿ'yee^{ndi} chí yāanūⁿ tan'dúucā chi che^{ne} Cristo? Taachi diiⁿ di 'tíicā, diiⁿ di chi Cristo nadacuéⁿ yā ye^{ne} nguaaⁿ tiná^{nā}. ⁸Chuū chi canee chi caa^{ma} yú: Nduudu cuaacu ye^{ne} Ndyuūs 'āā niiⁿnuúⁿ canee ye^{ne} ní ní canee na cheendí ní ní canee na staava ye^{ne} ní. Nduudu cuaacu miiⁿ ní nduudu chi nga^a 'nū nanááⁿ ndís'tií cááva chi cuuví cu'téenu ní. ⁹Nduuti chi caa^{ma} ní ndúucū 'iiⁿyāⁿ ní nga^a ní 'tíicā chi Jesús miiⁿ chíⁿ chí 'iiví ní ní i'téenu ní ndúucū núúⁿmáⁿ staava ye^{ne} ní chi Ndyuūs nadicuéⁿ yā Cristo miiⁿ ye^{ne} nguaaⁿ tiná^{nā}, tuu'mi ní díí nanguaⁿai di. ¹⁰Canéé chi cu'teenú ní ndúucū núúⁿmáⁿ staava ye^{ne} ní ní Ndyuūs cuaaⁿ yā ndís'tií. Canéé chi caa^{ma} ní ndúucū 'iiⁿyāⁿ ní nga^a ní chi i'téenu ní Jesucristo ní cuuví nanguaⁿai ní.

¹¹Ní canéé nguūⁿ na libro ye^{ne} Ndyuūs 'tíicā: Nducyáácā 'iiⁿyāⁿ chi cu'téenu yā Cristo nguéé cuuví 'cuináaⁿ yā. ¹²Nguéé n'dáaⁿ yā 'iiⁿyāⁿ Israel s'eeⁿ ndúucū 'iiⁿyāⁿ ye^{ne} taná^{nā} naciones. Maaⁿ Señor Jesucristo miiⁿ ní maaⁿ Señor ye^{ne} nducyáácā 'iiⁿyāⁿ. Ní Señor miiⁿ itée yā ye^{ne} nducué^{ne} chi n'dai ye^{ne} yā nducyaaca 'iiⁿyāⁿ chi nga^a angua'á yā nanááⁿ Ndyuūs cáāvā chi duuchi yā. ¹³Caati 'tíicā canéé nguūⁿ na libro ye^{ne} Ndyuūs: Nducyáácā 'iiⁿyāⁿ chi nga^a yā ngii yā: “N'díí Señor Jesucristo ye^{ne},” ní cuuví nanguaⁿai yā. ¹⁴¿Táácā cuuví caa^{ma} yā ndúucū Señor miiⁿ nduuti

chi nguεε i'téenu yā 'iiⁿyāⁿ? ¿Ní táácā cuuví cu'téenu yā ye^{ne} 'áámá 'iiⁿyāⁿ chi nguéé n'giindiveéⁿ yā ye^{ne} yā? ¿Ní táácā cuuví caandiveéⁿ yā nduuti chi nguéé 'aama 'iiⁿyāⁿ chi caa^{ma} yā nduudu cuaacu ye^{ne} Ndyuūs? ¹⁵¿Ni táácā cuuví caa^{ma} yā nduudu cuaacu ye^{ne} Ndyuūs miiⁿ nduuti chi nguéé du'ū vee dicho'ó? 'Tíicā canéé nguūⁿ na libro ye^{ne} Ndyuūs: De'e chúucā n'daacā chi ndāá 'iiⁿyāⁿ s'eeⁿ chi candée yā nduudu cuaacu ye^{ne} vaadi 'diiiⁿ ní nga^a yā nduudu ngai ye^{ne} Cristo.

¹⁶Naati nguéé nducyaaca 'iiⁿyāⁿ i'téenu yā nduudu cuaacu ye^{ne} Cristo. Ní tan'dúucā chi nga^a profeta Isaías ndii cuááⁿ vmaaⁿ taachi nga^a 'tíicā: N'dií Señor, ¿du'ū i'téenu nduudu cuaacu chí nga^a cuaacu yú? ¹⁷'Tíicā tuu'mi, 'iiⁿyāⁿ i'téenu yā nduudu cuaacu ye^{ne} Jesucristo cáāvā chi n'giindiveéⁿ yā nduudu miiⁿ, ní n'giindiveéⁿ yā nduudu cuaacu ye^{ne} Cristo.

¹⁸Naati 'úú itiinguuneéⁿ ndís'tií: ¿'Áá cuaacu chi nguéé n'giindiveéⁿ yā nduudu cuaacu ye^{ne} Ndyuūs? Cuaacu chi n'giindiveéⁿ yā. 'Tíicā canéé nguūⁿ na libro ye^{ne} Ndyuūs:

Nduudu cuaacu chi nga^a yā, nga^a yā na núúⁿmáⁿ iⁿ'yee^{ndi}. Ní nduudu ye^{ne} yā ní nga^a yā ní ndíí núúⁿmáⁿ cuaaⁿ chi yaⁿai ca ye^{ne} iⁿ'yee^{ndi}.

¹⁹Táámá vmné^{ne} itiinguuneéⁿ ndís'tií: ¿'Áá nguéé dííⁿ cuenta 'iiⁿyāⁿ Israel chi judíos s'eeⁿ ye^{ne} nduudu cuaacu ye^{ne} Ndyuūs? Moisés miiⁿ, 'iiⁿyāⁿ chi vmnááⁿ vmaaⁿ nguεεcuneeé yā ye^{ne} chuū, ní 'tíicā canéé nguūⁿ:

'Úú ní dííⁿ chi cuuví nngueé ní ye^{ne} 'iiⁿyāⁿ ye^{ne} táámá nación chi nguéé vée nación ye^{ne} Ndyuūs. 'Úú ní dííⁿ chi nduuví táaⁿ ní ndúucū 'iiⁿyāⁿ chi nguéé ye^{ne} chí ye^{ne} táámá nación caati ca^{nā} dííⁿ cosa chi n'daacā nducú yā.

²⁰Ní profeta Isaías miiⁿ claro ca chi nga^{ná} yā ndúúcu nduudú 'cūū. Ndyuūs nga^{ná} yā 'tíicā:

'Iiⁿyāⁿ chi nguéeⁿ n'nuúⁿ yā 'úú ní in-daacá yā 'úú. 'Iiⁿyāⁿ chi nguéeⁿ itiinguuneéⁿ yā yeⁿ'é, 'úú ní ch'iⁿ'í maáⁿ 'úú nanááⁿ yā.

²¹Ní taachi Isaías miiⁿ ngaⁿa yā nanááⁿ 'iiⁿyāⁿ yeⁿ'e Israel, 'tíicā ngaⁿa yā: Ndyuūs ngaⁿa 'tíicā: Nguuvi nguuvi n'doó ta'á ní yaa'ví 'iiⁿyāⁿ chi nguéeⁿ n'giindiveéⁿ yā nduudu yeⁿ'é. Ní chēechi staava yeⁿ'é yā.

'Iiⁿyāⁿ yeⁿ'e Israel chí nanguáⁿai yā

11 Maaⁿ ní intínguuneéⁿ ndís'tií: ¿'Áá dífⁿ Ndyuūs chi s'neéⁿ yā 'iiⁿyāⁿ Israel yeⁿ'e ndaata yeⁿ'é yā? Nguéeⁿ dífⁿ yā 'tíicā. 'Úú Pablo maáⁿ 'iiⁿyāⁿ yeⁿ'e ndaata Israel 'úú ní yeⁿ'e ndaata yeⁿ'e Abraham 'úú, ní yeⁿ'é 'iiⁿyāⁿ yeⁿ'e ndaata Benjamín 'úú. ²Ndii cuááⁿ vmaanaⁿ Ndyuūs dífⁿ yā recibir 'iiⁿyāⁿ yeⁿ'e ndaata yeⁿ'é yā, 'iiⁿyāⁿ Israel chi ndēēve yā chi cuuvi yeⁿ'e yā 'iiⁿyāⁿ. Ní ndís'tií, ¿'áá nguéeⁿ déenu nī yeⁿ'e chi canéeⁿ nguūⁿ na libro yeⁿ'é Ndyuūs naachi profeta Elías ngaⁿ'angua'á yā ní dí'cuiitú yā Ndyuūs contra yeⁿ'é 'iiⁿyāⁿ Israel? Ní caⁿa yā 'tíicā: ³N'díf Señor Ndyuūs, 'iiⁿyāⁿ Israel s'eeⁿ ní 'niiⁿ'núⁿ yā saⁿ'ā profetas yeⁿ'é nī ní dituūví yā nátai s'eeⁿ yeⁿ'e nī, n'dii Ndyuūs chí canduuchi. Ni maaⁿ dámaāⁿ 'úú canéeⁿ ní 'tiicá ntúūⁿ neⁿ'é yā 'caaⁿ'nuⁿ yā 'úú. ⁴Naati Ndyuūs nan'guēcútaⁿa yā yeⁿ'e profeta Elías miiⁿ, 'tíicā: Canéeⁿ lado yeⁿ'é ndēēchē mil saⁿ'ā chi nguéeⁿ chiintii'yā yā nanááⁿ santo ídolo chi nguuvi Baal. ⁵Ní 'tíicā ntúūⁿ yeⁿ'e tiempo 'cūū canéeⁿ duu'ví 'iiⁿyāⁿ yeⁿ'e Israel chí i'téenu yā Ndyuūs ní Ndyuūs ndēeve yā 'iiⁿyāⁿ s'eeⁿ. Ní dífⁿ yā cosa chi n'dai taavi cáava yā. ⁶Ní nduuti chi yeⁿ'é Ndyuūs 'iiⁿyāⁿ s'eeⁿ cáávā chí Ndyuūs ní diiⁿ n'dai taavi yā ní ndēeve yā 'iiⁿyāⁿ s'eeⁿ, tuu'mi ní nguéeⁿ

cáávā cosa chí 'iiⁿyāⁿ s'eeⁿ maáⁿ yā cuuvi dífⁿ yā. Ní ndúúti chí cáávā cosa chí 'iiⁿyāⁿ s'eeⁿ cuuvi dífⁿ yā, tuu'mi ní nguéeⁿ cáávā vaadi n'dai yeⁿ'é Ndyuūs chí yeⁿ'é Ndyuūs 'iiⁿyāⁿ.

⁷¿Déε ra tuu'mi? 'Iiⁿyāⁿ Israel nguéeⁿ ndaaca yā de'ē chí in'nuúⁿ yā. Naati 'iiⁿyāⁿ chí Ndyuūs ndēeve yā, 'iiⁿyāⁿ s'eeⁿ ndaaca yā. Ní taná'ā 'iiⁿyāⁿ nguéeⁿ n'giindiveéⁿ yā nduudu yeⁿ'é Ndyuūs tí ndii chēechí maáⁿ yā 'iiⁿyāⁿ. ⁸'Tíicā canéeⁿ nguūⁿ na libro yeⁿ'é Ndyuūs: Ndyuūs dífⁿ yā chí nguéeⁿ tuumicádífnuuⁿ yā na staava yeⁿ'é yā dendu'ū yeⁿ'e Espíritu N'dai yeⁿ'é Ndyuūs; ní dífⁿ yā chí nduutinaáⁿ yā nguéeⁿ snaaⁿ yā ní veéⁿ yā nguéeⁿ 'caandiveéⁿ yā. Ní 'tíicā 'iiⁿyāⁿ Israel ndii tiempo 'cūū. ⁹'Tiicá ntúūⁿ David ngaⁿa yā:

'Viicu yeⁿ'e chí che'é yā ní nduuvi tan'dúúca tuūví cáávā 'iiⁿyāⁿ s'eeⁿ. Ní tiempo chí che'é yā ndaā enemigos yeⁿ'é yā ní nadituu'ví ya 'iiⁿyāⁿ s'eeⁿ. Ní 'tíicā Ndyuūs cuuvi dífⁿ yā castigar 'iiⁿyāⁿ s'eeⁿ.

¹⁰Ní nduutinaáⁿ yā tan'dúúca chí cuuvi nguēēe chí nguéeⁿ snaaⁿ yā. Ní dáámí yā 'áámá nūūⁿ can'díí yā cueⁿ'e daāⁿmaⁿ.

Nanguaⁿ'ai 'iiⁿyāⁿ chí nguéeⁿ 'iiⁿyāⁿ Israel

¹¹Maaⁿ ní itiinguuneéⁿ ndís'tií: Taachi 'iiⁿyāⁿ Israel s'eeⁿ candéé ca'a yā chí cundēeve yā caati nguéeⁿ i'téenu yā Ndyuūs, ¿'áá 'áámá canee chí chindēeve yā? Nguēe 'tíicā mar 'áámá naaⁿ. Naati chó'oo chuū caati 'iiⁿyāⁿ Israel chí judíos s'eeⁿ nguéeⁿ n'giindiveéⁿ yā nduudu yeⁿ'é Ndyuūs. Ní 'íicú 'iiⁿyāⁿ chí nguéeⁿ yeⁿ'e ndaata Israel cuuvi nán-guaⁿ'ai yā. Ní diiⁿ chí 'iiⁿyāⁿ yeⁿ'e ndaata Israel nngueé yā yeⁿ'e taná'ā 'iiⁿyāⁿ ní cu'téenu cá yā Ndyuūs. ¹²Ní caati 'iiⁿyāⁿ Israel s'eeⁿ nguéeⁿ ch'iindiveéⁿ yā nduudu yeⁿ'e Ndyuūs ní chó'oo chí tuneéⁿ

'iiⁿyāⁿ yeⁿe núⁿmáⁿ iⁿ'yeeⁿdī chi cuuvi cu'teenú yā Ndyuūs. Ní sta'á yā yeⁿe vaadi n'dai yeⁿ'é Ndyuūs. Ní nduuti chi 'iiⁿyāⁿ chi nguée yeⁿe ndaata Israel cuuvi cu'téenu yā caava 'iiⁿyāⁿ yeⁿe ndaata Israel nguée ch'iindiveéⁿ yā nduudu yeⁿ'é Ndyuūs, tuu'mi n'dee ca n'daacā ca yeⁿe nducyáacá 'iiⁿyāⁿ taachi 'iiⁿyāⁿ Israel s'eeⁿ nanguεcúndí yā ní cu'téenu yā nduudu yeⁿ'é Ndyuūs taama vmnéⁿ'ēe.

¹³Maaⁿ ní neⁿ'é caaⁿmáⁿ nduucú ndís'tií chi nguée 'iiⁿyāⁿ Israel ndís'tií. Maaⁿ chi Ndyuūs dicho'ó yā 'úú chi 'úú ní apóstol chi candé nduudu yeⁿ'é yā nanááⁿ 'iiⁿyāⁿ chi nguée Israel s'eeⁿ. Úú deenú chi ch'εete ntiiⁿnyuⁿ yeⁿ'é. ¹⁴Ní 'úú neⁿ'é chi 'iiⁿyāⁿ yeⁿe ndaata yeⁿ'é nguée yā yeⁿe ndís'tií niicu cu'téenu yā Ndyuūs tan'dúucā chi ndís'tií i'téenu ní Ndyuūs. Ní 'iicú cuuvi nanguaⁿ'ai n'duuvi 'iiⁿyāⁿ yeⁿe ndaata yeⁿ'é tan'dúucā ndís'tií nanguaⁿ'ai ní. ¹⁵Ní taachi Ndyuūs s'neeⁿ yā 'áámá lado 'iiⁿyāⁿ Israel s'eeⁿ diiⁿ yā 'tíicā caati nducyaaca 'iiⁿyāⁿ yeⁿe iⁿ'yeeⁿdí'cūú chi nguée yeⁿe 'iiⁿyāⁿ Israel cuuvi cunee 'diifⁿ yā ndúucū Ndyuūs. ¿Táacā cuuvi yeⁿe 'iiⁿyāⁿ Israel s'eeⁿ taachi Ndyuūs cuaāⁿ ntuúⁿ yā 'iiⁿyāⁿ Israel s'eeⁿ? Ndyuūs nca'á yā vida cueⁿe daāⁿmaⁿ yeⁿ'é yā lugar yeⁿe vaadi n'gii cueⁿe daāⁿmaⁿ. ¹⁶N'giindiveéⁿ ní yeⁿe chuū chi caaⁿmáⁿ: Nduuti chi ca'a yú Ndyuūs 'áámá taaⁿ yeⁿe masa yeⁿ'é pan cáávā ofrenda, 'tiicā ntúúⁿ nducuéⁿ'ē masa yeⁿe pan miiⁿ ní yeⁿ'é Ndyuūs. Ní nduuti chi ca'a yú Ndyuūs cáávā ofrenda diiⁿyu yeⁿe yáⁿ'á, 'tiicā ntúúⁿ nducuéⁿ'ē yáⁿ'á ní yeⁿ'é Ndyuūs. 'Tiicā ntúúⁿ Ndyuūs di'viicú yā 'iiⁿyāⁿ yeⁿe ndaata Israel caati 'āā di'viicú yā 'iiⁿyāⁿ vmnááⁿ vmnaaⁿ yeⁿe ndaata yeⁿ'é yā.

¹⁷Náⁿ'á dúuⁿnē yeⁿe yáⁿ'á olivo chi canéé na yáⁿ'āa 'iiⁿyāⁿ, ní 'iiⁿyāⁿ 'caaca yā ní sta'á yā dúuⁿnē yeⁿe yáⁿ'á olivo chi canéé icyáⁿ'ā ní diiⁿ yā chi yeⁿe yáⁿ'á olivo yeⁿ'é yā. 'Tíicā ndís'tií, 'iiⁿyāⁿ

chi nguée yeⁿ'ē ndaata Israel. Ní ndís'tií tan'dúucā dúuⁿnē yeⁿe yáⁿ'á olivo yeⁿe icyáⁿ'ā miiⁿ 'tiicā ní naati maaⁿ ní véé parte yeⁿ'é ní ndúucū 'iiⁿyāⁿ Israel chi tan'dúucā yáⁿ'á olivo chi canéé yáⁿ'āa 'iiⁿyāⁿ. Ní maaⁿ ní ndís'tií chi nguée yeⁿe ndaata Israel cuuvi yeⁿ'é ní nducuéⁿ'ē chi n'dai taavi yeⁿe 'iiⁿyāⁿ chi Israel yā. ¹⁸Maaⁿ ní ndís'tií chi nguée Israel ní, nguée caaⁿmáⁿ ní chi ch'εete maáⁿ ní ndís'tií, caati nguée 'iiⁿyāⁿ chi Israel yā chi tan'dúucā chi nguée yeⁿe yáⁿ'á. Ní 'iiⁿyāⁿ 'caaca yā dúuⁿnē miiⁿ, 'tíicā yā. Nds'tií n'gaacú ní chi ndís'tií ní tan'dúucā 'áámá dúuⁿnē 'tíicā ndís'tií. Tan'dúucā dúuⁿnē nguée ca'a fuerzas yeⁿe diiⁿyu yeⁿe yáⁿ'á naati yáⁿ'á ca'a fuerzas yeⁿe dúuⁿnē, 'tíicā ndís'tií. Cuta'á ní fuerzas yeⁿe 'iiⁿyāⁿ chi Israel yā.

¹⁹'Úú nguée deenú nduuti chi ndís'tií caaⁿmáⁿ ní 'tíicā yeⁿe chuū: 'Iiⁿyāⁿ ch'iicá yā dúuⁿnē s'eeⁿ caati 'úú cuuvi canéé lado yeⁿe dúuⁿnē chi ch'iicá yā. 'Úú chi nguée Israel 'úú canéé lado yeⁿe 'iiⁿyāⁿ chi Israel yā. ²⁰N'daacā ngaⁿ'a ní naati deenú ní chi 'iiⁿyāⁿ s'eeⁿ tan'dúucā dúuⁿnē chi ch'iicá yā, 'tiicá yā, ti nguée i'téenu yā Cristo. Ní maaⁿ ní ndís'tií tan'dúucā dúuⁿnē yeⁿe yáⁿ'á míⁿ 'tiicá ní caati i'téenu ní Cristo. Maaⁿ ní ndís'tií nguεe díⁿ nguεe ní naati cundéε ní cuidado táacā chi 'cuεetinée ní. ²¹Caati nduuti chi Ndyuūs nguée diiⁿ yā perdonar 'iiⁿyāⁿ Israel chi nguεe i'téenu chi tan'dúucā dúuⁿnē yeⁿe yáⁿ'á, nguée diiⁿ yā nadach'εecú yā nuuⁿndi yeⁿe ndís'tií chi vmnááⁿ vmnaaⁿ tan'dúucā dúuⁿnē chi yeⁿe yáⁿ'á yeⁿe icyáⁿ'ā nduuti chi nguée candéε ní cuidado táacā chi 'cuεetineé ní. ²²Cuin'diichí ní, tuu'mi Ndyuūs ní neené n'dai taavi yā ndúucū 'iiⁿyāⁿ chi i'téenu yā naati neene cheεchí ntúúⁿ yā vaa. Cheεchí yā ndúucū 'iiⁿyāⁿ ti nguée i'téenu yā. Naati Ndyuūs ní neené n'dai taavi yā ndúucu ní nduuti chi 'áámá cunee ní chi cu'téenu ní. Ní

nduuti chi nguée dífⁿ nī 'tuucā, tuu'mi 'tiicá ntúūⁿ Ndyuūs caⁿ'á yā dífⁿ yā castigar ndís'tiī tan'dúucā chi ch'iicá yā dūuⁿnē yeⁿ'e maaⁿ yáⁿ'á. ²³Ní nduuti chi 'iiⁿ'yāⁿ Israel cu'téenu yā Cristo, tuu'mi ní Ndyuūs ní cuta'á yā ní nguēcunéé dífⁿ yā chi 'iiⁿ'yāⁿ s'eeⁿ ní táamá vmeⁿ'ēe canee yā tan'dúucā 'āā dūuⁿnē yeⁿ'e maaⁿ yáⁿ'á mífⁿ 'tíicā yā. Ní véé poder yeⁿ'e Ndyuūs chi cuuvi dífⁿ yā 'tíicā. ²⁴Ní nduuti chi ndís'tiī chi nguée 'iiⁿ'yāⁿ Israel ndís'tiī, ní Ndyuūs sta'á yā ndís'tiī tan'dúucā chí n'giicá yā dūuⁿnē yeⁿ'e táamá yáⁿ'á olivo yeⁿ'e icyáⁿ'ā ní dífⁿ yā chi yeⁿ'e yáⁿ'á olivo yeⁿ'é yā, 'tíicā ndís'tiī maaⁿ. 'Tiicá ntúūⁿ n'dáacā n'dai ca dífⁿ Ndyuūs ndúucū 'iiⁿ'yāⁿ Israel chi vmnááⁿ vmnāaⁿ tan'dúucā dūuⁿnē yeⁿ'e yáⁿ'á yeⁿ'é yā, ní cuuvi dífⁿ yā chi táamá vmeⁿ'ēe ní yeⁿ'e maaⁿ yáⁿ'á miⁿ.

Yeⁿ'e chi nanguaⁿ'ai 'iiⁿ'yāⁿ Israel yeⁿ'e tiempo chi cuchii

²⁵Maaⁿ ní hermanos yeⁿ'é, neⁿ'é chi ndís'tiī cadíínúúⁿ nī chi canúúⁿ n'de'ei. Ní nguée nadicadíínuuⁿ nī chi deenu ca nī. 'Áamá tiempo nūuⁿ 'iiⁿ'yāⁿ Israel dicheechí yā staava yeⁿ'é yā dámaaⁿ 'naaⁿ tiempo taachi nducyaaca 'iiⁿ'yāⁿ chi nguée 'iiⁿ'yāⁿ Israel ní Ndyuūs ndeeve yā nducyaaca 'iiⁿ'yāⁿ s'eeⁿ chi neⁿ'é yā chi cuuvi yeⁿ'é yā. ²⁶Ní taachi cho'oo tiempo miiⁿ nducyáacá 'iiⁿ'yāⁿ Israel ní caⁿ'a yā cu'téenu yā caati 'tíicā canéé nguūⁿ na libro yeⁿ'é Ndyuūs:

'Iiⁿ'yāⁿ chi nadanguáⁿ'ai yā 'iiⁿ'yāⁿ Israel chiicá yā yeⁿ'e yáāⁿ Sión, ní divíi yā nducuéⁿ'ē nuuⁿ'ndi yeⁿ'e 'iiⁿ'yāⁿ yeⁿ'e ndaata Israel.

²⁷Ní 'úú Ndyuūs dicuaacú compromiso yeⁿ'é ndúucū 'iiⁿ'yāⁿ s'eeⁿ, taachi 'úú nadivíi nuuⁿ'ndi yeⁿ'e yā.

²⁸Ní 'iiⁿ'yāⁿ Israel nguée i'téenu yā nduudu cuaacu yeⁿ'e Ndyuūs yeⁿ'e chi nadanguáⁿ'ai yā. Ní maaⁿ ní contra yeⁿ'é

Ndyuūs 'iiⁿ'yāⁿ s'eeⁿ caati ndís'tiī chi nguée 'iiⁿ'yāⁿ Israel ndís'tiī, cuuvi yeⁿ'é Ndyuūs ndís'tiī. Ní 'áará chi 'iiⁿ'yāⁿ Israel s'eeⁿ nguée i'téenu yā Cristo, Ndyuūs dineⁿ'é yā 'iiⁿ'yāⁿ s'eeⁿ caati Ndyuūs níndeevé yā 'iiⁿ'yāⁿ s'eeⁿ chi vmnááⁿ vmnāaⁿ chi yeⁿ'e ndaata yeⁿ'é yā. ²⁹Ní Ndyuūs nguée ndaacadaamí yā yeⁿ'é 'iiⁿ'yāⁿ s'eeⁿ chi yaa'ví yā chi cuuvi yeⁿ'é yā 'iiⁿ'yāⁿ s'eeⁿ. Ní Ndyuūs di'viicú ntúūⁿ yā 'iiⁿ'yāⁿ s'eeⁿ. ³⁰Ní tiempo chi chó'oo ndis'tiī chi nguée 'iiⁿ'yāⁿ Israel ndís'tiī, nguée n'giindiveéⁿ nī nduudu cuaacu yeⁿ'é Ndyuūs naati maaⁿ ní 'iiⁿ'yāⁿ Israel s'eeⁿ nguée n'giindiveéⁿ yā nduudu yeⁿ'é Ndyuūs. Ní Ndyuūs yá'ai yā caavā ndís'tiī chi nguée i'téenu nī. ³¹Ní 'tiicá ntúūⁿ, 'iiⁿ'yāⁿ Israel s'eeⁿ nguée n'giindiveéⁿ yā nduudu cuaacu yeⁿ'é Ndyuūs ní dífⁿ yā 'tíicā caati cuayiivi Ndyuūs cuuvi ya'ái yā cáavā 'iiⁿ'yāⁿ s'eeⁿ tan'dúucā chi ya'ái yā cáavā ndís'tiī. ³²Ní Ndyuūs 'āā daamá nūuⁿ s'néeⁿ yā nducyaaca 'iiⁿ'yāⁿ chi nguée ch'iindiveéⁿ yā nduudu yeⁿ'é yā cáavā chi Ndyuūs cuuvi ya'ái yā caavā nducyaaca 'iiⁿ'yāⁿ.

³³De'ε chúucā n'dee cá vaadi n'dai yeⁿ'é Ndyuūs. De'ε chúucā n'dee cá chi tuumicadíínuuⁿ yā ndúucū chi déenu yā. S'uuúⁿ ní nguée cuuvi caaⁿ'maⁿ yú de'e cuuvi chi tuumicadiinúúⁿ yā 'tíicā; ní nguée cuuvi tuumicadiinuuⁿ yú chiiⁿ chi dífⁿ yā. ³⁴Ní 'tíicā canéé nguūⁿ na libro yeⁿ'é Ndyuūs: ¿Dú'ū cuuvi túúmíicadiinūuⁿ vaadi cadíínūuⁿ yeⁿ'e Señor Ndyuūs? ¿Du'ū cuuvi ca'a consejo Ndyuūs? ³⁵¿Du'ú 'iiⁿ'yāⁿ ca'a yā algo Ndyuūs vmnááⁿ vmnāaⁿ ní cuayiivi Ndyuūs ca'á yā tan'dúucā chi nadí'íve yā yeⁿ'é? ³⁶Tanducuéⁿ'ē dendu'ū chí véé ní Ndyuūs din'dái yā ní tee yā s'uuúⁿ tanducuéⁿ'e. Ní cucáavā 'iiⁿ'yāⁿ miiⁿ véé tanducuéⁿ'ē dendu'ū chi yeⁿ'é yā. Maaⁿ ní cueⁿ'e daāⁿ'maⁿ dich'eete yú Ndyuūs. 'Tíicā.

**Ca'a yú vida yeⁿe yú Ndyuūs ní diiⁿ
yú tanducuéⁿe chi neⁿé yā**

12 Maaⁿ ní ndís'tiī, hermanos yeⁿé, cáávā chi Ndyuūs ya'ai 'iinū yā yeⁿe ndís'tiī, di'cuíítūu ndís'tiī chi ca'á nī vida yeⁿe maáⁿ nī tan'dúúca 'áámá ofrenda chí canduuchi nanááⁿ Ndyuūs cáávā ntiīⁿnyuⁿ yeⁿé Ndyuūs. Ní diiⁿ nī ntiīⁿnyuⁿ chi neⁿé yā chí diiⁿ nī. Chuū chí diiⁿ nī ní cuaacu chí n'dai taavi chí inee yiinú Ndyuūs. Ní canéé chí diiⁿ nī 'tíicā. ²Ní nguéé diiⁿ nī tan'dúúca chí neⁿe 'iiⁿyāⁿ yeⁿe iⁿ'yeeⁿdí 'cūū naati cuaáⁿ nī lugar Ndyuūs chí n'daáⁿ yā vaanicadínūⁿ yeⁿé nī ni 'tiicá ntuūⁿ n'daáⁿ yā vida yeⁿé nī. Ní 'íicú cuuví deenú nī cheé chí Ndyuūs neⁿé yā chí diiⁿ nī, cheé chí n'daacā, cheé chí cunee yiinú Ndyuūs nī cheé chí n'dai taavi ca.

³Ní cáávā chí Ndyuūs tee yā 'úú chí n'dai taavi ntiīⁿnyuⁿ yeⁿé yā 'úú ní ngaⁿá ngii ca'áámá ca'aama ndís'tiī chí nguéé nadacádínūⁿ nī chí n'geete cá nī ngo'o ca chí canéé chí nadacádínūⁿ nī naati nadacádínūⁿ nī ní n'diichí nī yeⁿe maáⁿ nī ndúúcu chí i'téenu nī chí Ndyuūs itée yā ndís'tiī. ⁴Caati 'tíicā tan'dúúca 'áámá cuerpo yeⁿe 'iiⁿyāⁿ chí neené n'dee nááⁿ chí véé yeⁿe ní nguéé dáámá ntiīⁿnyuⁿ chí yeⁿe n'dee nááⁿ yeⁿe; ⁵'tiicá ntúūⁿ s'uúúⁿ 'áará chí néené 'yaaⁿ yú ní s'uúúⁿ ní tan'dúúca chí 'áámá cuerpo ti yeⁿe Cristo s'uúúⁿ, 'tíicā s'uúúⁿ ní s'uúúⁿ ní tan'dúúca chí nduvidaama yú 'aama yú taama yú tan'dúúca chí n'dee nááⁿ yeⁿe 'áámá cuerpo yeⁿe maaⁿ yú, 'tíicā s'uúúⁿ.

⁶Ní Ndyuūs tee yā yeⁿe vaadi n'dai yeⁿé yā ntiīⁿnyuⁿ chí n'dááⁿ ca'áámá ca'aama s'uúúⁿ tan'dúúca chí neⁿé yā diiⁿ yā. Ní canee chí diiⁿ yú n'dai ntiīⁿnyuⁿ yeⁿe yú. Ní nduuti chí Ndyuūs tee yā ntiīⁿnyuⁿ yeⁿe yú chí candee yú nduudu cuaacu yeⁿé yā chí tee yā s'uúúⁿ canéé chí caaⁿmaⁿ yú nduudu miiⁿ tan'dúúca chí i'téenu yú. ⁷Ní nduuti

chí Ndyuūs tee yā s'uúúⁿ ntiīⁿnyuⁿ chí nginee yú, tanáⁿā 'iiⁿyāⁿ canee chí cunee yú n'daacā ca. Ní s'uúúⁿ chí véé ntiīⁿnyuⁿ yeⁿe yú chí ngi'cúeeⁿ yú canéé chí ca'cúeeⁿ yú n'daacā. ⁸S'uúúⁿ chí diiⁿ ntiīⁿnyuⁿ chí yaa'vi née yú 'iiⁿyāⁿ chí cu'téenu cá yā canéé chí diiⁿ yú n'daacā ca. S'uúúⁿ chí véé ca yeⁿe yú chí cuuvi ca'a yú taama yā, canéé chí ca'a yú ndúúcu núúⁿmáⁿ staava yeⁿe yú. S'uúúⁿ chí ngaⁿa ntiīⁿnyuⁿ yeⁿe tanáⁿā s'uúúⁿ canee chí nga'a ntiīⁿnyuⁿ yú n'daacā ca. S'uúúⁿ chí ca'a yú tanáⁿā s'uúúⁿ chí nguéé véé necesidades yeⁿé yā canéé chí diiⁿ yú ní yeenu yú.

**Yeⁿe chí canéé chí diiⁿ yú
ti yeⁿe Cristo s'uúúⁿ**

⁹Canéé chí dineⁿe yú 'aama yú taama yú ndúúcu núúⁿmáⁿ staava yeⁿe yú. Ní nguéé dineⁿe yú cosa chí nguεε n'daacā naati canéé chí diiⁿ yú tanducuéⁿe chí n'daacā. ¹⁰Canéé chí dineⁿe yú 'aama yú taama yú tan'dúúca chí 'aama vi'i yú chí cuaacu chí 'áámá yuuuⁿ yú ní dineⁿe yú 'aama yú ndúúcu taama yú.

¹¹Ní n'daacā idiīⁿ ca yú ntiīⁿnyúⁿ ní nguéé 'daandí yú ní diiⁿ yú ntiīⁿnyuⁿ yeⁿe Señor ndúúcu núúⁿmáⁿ staava yeⁿe yú ti neⁿe yú Señor yeⁿe yú.

¹²Ní cáávā chí Ndyuūs caⁿá yā chí tée yā s'uúúⁿ chí cuuvi yeⁿe yú canéé chí yeenu yú. Ní taachi n'geenu yú ngii canéé chí cuchée yú ngiinū ngiinū. Ní cuéⁿé daáⁿmaⁿ canéé chí caaⁿmaⁿngua'a yú.

¹³Ní canéé chí cunee yú 'iiⁿyāⁿ chí i'téenu yā Ndyuūs ni tée yú yeⁿe necesidades chí nguéé véé yeⁿé yā. Canéé chí cuaaⁿ yú 'iiⁿyāⁿ chí diiⁿ yā visitar s'uúúⁿ.

¹⁴Canéé chí caaⁿmaⁿ yú: Dé'ε chúúca n'dai yeⁿé 'iiⁿyāⁿ chí nguéé n'daacā idiīⁿ yā ndúúcu s'uúúⁿ. Ní ngiica yú Ndyuūs chí di'viicú yā 'iiⁿyāⁿ s'eeⁿ ní nguéé taaⁿ yú nducú yā.

¹⁵ Ní canéé chí cuuvi yeenu yú ndúúcu 'iiⁿyāⁿ chí yeenú yā. Ní canéé chí cuēecu yú ndúúcu 'iiⁿyāⁿ chí ngeēcu yā.

¹⁶ Ní 'cuēetinee yú n'daacā ndúúcu 'áamá yú taama yú. Nguéé nadacádínuuⁿ yú yeⁿē maaⁿ yú chí ch'ēetē naati ndiicúúⁿ n'dai 'cuēetinee yú ní nguéé nadacádínuuⁿ yú yeⁿē maaⁿ yú chí s'uūuⁿ chí deenu yú.

¹⁷ Nguéé nanguēecundii yú ní diiⁿ yú cosa chí ngeue n'daacā ndúúcu 'iiⁿyāⁿ chí 'āā dííⁿ yā cosa chí nguéé n'daacā ndúúcu yú. Diiⁿ núúⁿ yiiⁿnuⁿ yú chí diiⁿ yú dámaāⁿ chí n'daacā ndúúcu nducyaaca 'iiⁿyāⁿ. ¹⁸ Ní diiⁿ yú nducuéⁿē chí n'daacā chí cuuvi diiⁿ yú caati 'di-ííⁿ cuuvi cunee yú nguuaⁿ nducyaaca 'iiⁿyāⁿ. ¹⁹ Ní ndís'tii hermanos yeⁿé chí neⁿé taavi, nguéé diiⁿ yú castigar 'iiⁿyāⁿ naati cu'neeⁿ yú nanááⁿ Ndyuūs ní nguéé cuuvi 'cuinaaⁿ yú. Ní 'íicú Ndyuūs cā'a yā castigo 'iiⁿyāⁿ. Canéé nguūⁿ na libro yeⁿé Ndyuūs 'tíicā: 'Úú chí Señor ní ngaⁿá chí 'úú ní dííⁿ castigar 'iiⁿyāⁿ yeⁿe 'úú ní nadíí'vē yā yeⁿe chí nguéé n'daacā chí dííⁿ yā. ²⁰ Naati s'uūúⁿ ní diiⁿ yú tan'dúúcā chí canéé nguūⁿ na libro yeⁿé Ndyuūs 'tíicā: Nduuti chí 'iiⁿyāⁿ chí taáⁿ yā yeⁿé ní nadich'ēēcú ní yeⁿe yā. Nduuti chí cuiicu yā, ca'a ní chí che'e yā. Ní nduuti chí yaaca yā, ca'á ní chí cu'u yā. Tí caati dííⁿ ní 'túúcā, tuu'mi ní dííⁿ ní chí 'cuinaáⁿ yā yeⁿe chí dííⁿ yā chí taáⁿ yā ndúúcu ní. ²¹ Maaⁿ ní cucheē yú cáávā cosa chí ngeue n'daacā chí diiⁿ yú naati cucheē yú yeⁿe tanducuéⁿē chí ngeue n'daacā cáávā chí n'daacā chí idiíⁿ yú.

13 Nducyaaca yú canee chí cu'neeⁿ veeⁿ yú yeⁿe 'iiⁿntyéⁿē caati nguéé véé mar 'áamá 'iiⁿntyéⁿē chí nguéé Ndyuūs ca'á yā 'iiⁿyāⁿ chí véé lugar yeⁿé yā chí 'iiⁿntyéⁿē. Ní Ndyuūs s'neéⁿ yā nducuéⁿē 'iiⁿntyéⁿē chí véé na lugar yeⁿe yā. ² Ní 'iiⁿyāⁿ chí nguéé idiíⁿ yā chí ngaⁿa 'iiⁿntyéⁿē 'tiicá ntúūⁿ 'iiⁿyāⁿ ní

contra yeⁿe chí Ndyuūs ngaⁿa ntiíⁿnyuⁿ yā. Ní 'iiⁿyāⁿ chí dííⁿ yā 'túúcā idinuuⁿndí yā ní cuuvi yā condenado. ³ Ní 'iiⁿyāⁿ chí n'daacā idiíⁿ yā nguéé canee chí di'va'á yā yeⁿe 'iiⁿntyéⁿē naati 'iiⁿyāⁿ chí nguéé n'daacā idiíⁿ yā 'va'á yā yeⁿe 'iiⁿntyéⁿē. ¿'Áá neⁿé ní chí nguéé 'va'á ní yeⁿe 'iiⁿntyéⁿē? Dííⁿ ní chí n'daacā ní 'iiⁿntyéⁿē miiⁿ ní cuuvi ngaⁿá yā chí n'daacā idiíⁿ ní, ⁴ caati 'iiⁿntyéⁿē chí ngaⁿa yā nti-íⁿnyuⁿ dichíí'vē Ndyuūs cáávā chí cuuvi n'daacā yeⁿé ní. Naati nduuti chí idiíⁿ ní chí nguéé n'daacā, tuu'mi ní di'va'á ní yeⁿe 'iiⁿntyéⁿē. Caati cuaacu chí 'iiⁿntyéⁿē cuuvi dííⁿ yā castigar 'iiⁿyāⁿ tíí 'iiⁿntyéⁿē ní véé poder yeⁿe yā. 'Iiⁿntyéⁿē ní dichíí'vē Ndyuūs ní canéé chí dííⁿ yā dendu'ū chí cuaacu. Ní dííⁿ yā castigar 'iiⁿyāⁿ caati Ndyuūs nguéé inee yiinú yā yeⁿe 'iiⁿyāⁿ chí nguéé n'daacā idiíⁿ yā. ⁵ Ní cáávā chuū canee chí 'caandiveéⁿ ní chí ngaⁿa 'iiⁿntyéⁿē nguéé dámaāⁿ caavā chí cuuvi ní castigo tí cáávā deenú ní chí n'daacā chí nacadiinúúⁿ ní na staava yeⁿé ní. ⁶ Ní 'tiicá ntúūⁿ caavā chúū, ca'á ní tuumí cobrador yeⁿē gobierno. 'Iiⁿntyéⁿē miiⁿ dichíí'vē Ndyuūs taachi dííⁿ yā ntiíⁿnyuⁿ yeⁿé yā.

⁷ Canee yú chí ca'a yú tuumí cobrador yeⁿe gobierno. Canee yú chí ca'a yú tuumí yeⁿe yáⁿāa yeⁿe yú cobrador miiⁿ. Canee yú chí diiⁿ yú chí cu'teenu yú 'iiⁿyāⁿ 'iiⁿntyéⁿē ní diiⁿ yú estimar 'iiⁿyāⁿ s'eeⁿ. ⁸ Nguéé cun'diicú ní yeⁿē mar 'áamá 'iiⁿyāⁿ nguéé du'ū vee. Dá-maāⁿ canee chí dineⁿe yú nducyaaca 'iiⁿyāⁿ. 'Iiⁿyāⁿ chí dineⁿé nducyaaca 'iiⁿyāⁿ dííⁿ yā tan'dúúcā chí ngaⁿa ley yeⁿe yú. ⁹ Ní mandamiento yeⁿe ley yeⁿe yú ní chuū chiiⁿ: Nguéé caⁿá ní ndúúcu n'daata o isaⁿā chí nguéé yeⁿé ní. Nguéé caaⁿnúⁿ ní 'iiⁿyāⁿ. Nguéé didu-ucú ní. Nguéé caaⁿmaⁿ ní nduudu yaadi yeⁿe mar 'áamá 'iiⁿyāⁿ. Nguéé dinéⁿe ní dendu'ū chí véé chí yeⁿe táámā yā. Ní nducuéⁿē mandamiento 'cūū ndúúcu

taná"ā mandamiento ye"ē ley ye"e yú chi véé, ní cuuví cuaacú nduudu ní tumicadínuu" yú na nduudú 'cūū: Diné"e ní 'ii"yā" nii"nuú" vaacú ní tan'dúúcā chi dine"é ní maá" ní. ¹⁰ 'Ii"yā" chi dine"é yā 'ii"yā" nii"nuú" vaacú yā nguéé cuncáá idif" yā ndúúcu yā. Ní 'tíicā. Taachi dine"é yú 'ii"yā" dii" yú tan'dúúcā chi nga"ā ley ye"e yú.

¹¹ N'deece cá ní nguéé dámaā" chūū. Nadacadínuu" yú ye"e nguuvi s'ee" chi canee yú i"yee"df' cūū. Canéé chi 'cuεt-inéé ngiinu yú caati ye"e hora chi ngua"ai yú ní 'āā snee nii"nuú" cá ye"e s'uúú" nguéé ti taachi caama i'téenu yú Cristo. ¹² Maa" ní hora mii" tan'dúúcā chi 'āā chéé cuuvi deeve ní 'āā cūchii ngu-uví taachi ndaá Cristo maa". Ní nguéé canee chi dii" yú dendu'ū chi nguεε n'daacā chi dii" yú tan'dúúcā chi na maaf", naati n'daacā 'cuεtinee yú tan'dúúcā chi canee yú na deeve ye"é Ndyuūs ní n'daacā canee cáávā s'uúú". ¹³ Ní 'cuεtinee yú n'daacā tan'dúúcā chi canéé chi dii" yú na deeve ye"é Ndyuūs. Nguéé cuuvi cuu'vi yú ní nguéé idii" yú 'viicu ye"ē chi che'e yú ndúúcu n'deece n'dáf ruidó. Ní nguéé 'cuáa" yú ca"ā yú ndúúcu n'daataá o isa"ā chi nguéé ye"e yú. Ndíí nguéé ndúú canee yú ndúúcu vicio ye"e yú. Nguéé 'caa'va yú ní nguéé nguεε yú ye"ē táámá 'ii"yā". ¹⁴ Naati 'cuεtinee yú n'daacā ní dii" yú tan'dúúcā chi Señor Jesucristo ye"e yú díf" yā. Ní nguéé dii" yú tan'dúúcā chi ne"e maa" cuerpo ye"e yú.

Nguéé caa"ma" ní ye"ē chi idii" hermano ye"é ní

14 Ndís'tií ní cuta'á ní nguaa" ndís'tií hermanos ye"e yú chí duūva yā ye"e chi i'téenu yā; ní nguéé néené n'deēe caa"má" ní nduucú yā ye"e chi nadacadínuu" yā chi nguéé itu-micadínuu" yú ye"ē. ² Ti 'tíicā, véé 'ii"yā" chi i'téenu yā Ndyuūs ní nadi-cadínuu" yā chi cuuvi che'é yā nducué"ē

chi véé. Ní ná"á 'ii"yā" chi nguéé i'téenu n'daaca yā ní nguéé cuuvi che'é yā nducué"ē. Taachi ca"á yā che'é yā ní'vεε nguéé che'e yā yuūte cáávā religión ye"e yā. ³ 'Ii"yā" chi che'é yā tanducué"ē chi véé nguéé cánéé chi caa"má" yā ye"e chi nguεε inee" yiinú yā ye"é 'ii"yā" chi nguéé nge'é yā nducué"ē. Ní 'ii"yā" chi nguéé che'é yā nducué"ē nguéé canéé chí n'diichí yā 'ii"yā" chi che'e tanducué"ē chi véé caati Ndyuūs sta'á ntúu" yā 'ii"yā" s'ee" chi cuuvi ye"é yā 'ii"yā". ⁴ Ndís'tií, ¿du'ū ndís'tií chi n'diichí ní chi dii" 'ii"yā" chi dichí'vε táámá yā? nduuti chi díf" yā chi n'daacā o chi nguéé n'daacā. Dámaā" 'iiví yā canéé chí n'diichí yā 'ii"yā" chi dichí'vε yā. Ní n'daacā cuuvi canee caavá yā, caati Señor Ndyuūs ye"e yú cuuví díf" yā chi canéé n'daacā ye"é yā caati Señor Ndyuūs véé poder ye"é yā chi inneé yā 'ii"yā" chi dichí'vε yā.

⁵ Ní 'tiicá ntúū", 'áámá 'ii"yā" nadacadínuu" yā chi 'áámá nguuvi ní ch'εete ca nguéé ti táámá nguuvi. Táámá 'ii"yā" nadacadínuu" yā chi 'āā daamá nūu" nducué"ē nguuvi. Ní ca'áámá ca'aama ní ní canéé ní tan'dúúcā chi diitu nadicadí-inúú" ní. ⁶ 'Ii"yā" chi díf" yā cuenta chi 'áámá nguuvi ní ch'εete ca nguéé ti taná"ā nguuvi, 'ii"yā" mii" nadi-cadínuu" yā 'tíicā cáávā chi dich'εeté yā Señor Ndyuūs ye"é yā. 'Ii"yā" chi nadi-cadínuu" yā dáámá nūu" nducué"ē ngu-uví 'tiicá ntúū" díf" yā cáávā chi dich'εeté yā Señor Ndyuūs ye"é yā. Ní 'ii"yā" chi nguéé che'é yā ye"e tanducué"ē chi véé díf" yā 'túúca cáávā chi i'téenu yā Señor ní ca'á yā gracias Ndyuūs cáávā chi che'e yā. Ní 'tiicá ntúū" 'ii"yā" chi che'é yā ye"e tanducué"ē chi véé díf" yā 'túúca cáávā chi i'téenu yā Señor ní 'tiicá ntúū" ca'á yā gracias Ndyuūs cáávā chi che'e yā.

⁷ Ní 'tíicā mar 'áámá s'uúú" nguéé sндуuchi yú cucáávā maa" yú ndíí nguéé ndúú 'cuuvi yú cucáávā maa" yú.

⁸Ndúúti chi sндуuchi yú, sндуuchi yú cáávā Señor. Ní nduuti chi 'cuúvi yú, 'cuúvi yú cáávā Señor. Maa" ní ndúúti chi sндуuchi yú o n'dií yú ye"e Señor s'uúú". ⁹Ní Cristo ch'ii yā ní nduuchi ntuú" yā ye"e nguaa" tiná"ā caati cuuvi yā Señor ye"e tiná"ā, ní 'tiicá ntuú" ye"ē 'ii"yā" chí sндуuchi.

¹⁰Maa" ní dii, ¿de'ē cúúví chí n'díichí nuu"ndi ye"e hermano ye"ē di? ¿O dé'ē cúúví chí nguē ne"e di hermano ye"ē di? 'Tíicā nducyaaca yú canee chi na" a yú nanáá" Cristo. Ní Cristo mii" ca"á yā n'diichí yā nuu"ndi ye"e yú. ¹¹Canéé nguú" na libro ye"é Ndyuūs 'tíicā:

Cuaacu ní"nyú" tan'dúúcā chi 'úú chí canduuchí, nga" a Señor Ndyuūs, nducyaáca 'ii"yā" canéé chi cáan-tii'yá yā nanáa" 'úú, ní nducyaaca yā canee chi caa"má" yā chi 'úú ní Ndyuūs 'úú.

¹²Ní 'tíicā vaa. Ca'áamá ca'aama s'uúu" canee chi ca' a yú cuenta nanáá" Ndyuūs ye"e chi maa" yú dii" yú.

Nguéé dii" nī chi hermano ye"é nī dinuu"ndí yā

¹³Cáávā chuū nguéé canéé chi n'diichi yú ye"e chi dii" hermanos ye"e yú. Nguéé idii" yú 'túúcā. Canéé chi nadacádínuu" nī chí nguéé idii" nī mar 'áámá naa" chí hermanos ye"é nī nguéé cūnee yiinú yā ní cuuvá yā na nuu"ndi.

¹⁴Maa" ní chí 'úú nī ye"é Jesucristo 'úú, deenú chí cuaacu chí nguéé véé mar 'áámá dendu'ú chí nguéé n'daacā ye"ē maáá". Ní nduuti chí 'ii"yā" nadacádínuu" yā chí 'áámá dendu'ú nguéé n'daacā, tuu'mi ní chuū ní cáávā 'ii"yā" mii" cuaacu chí nguéé n'daacā.

¹⁵Ní nduuti chí cáávā 'áámá dendu'ú chí che'é nī ní dii" nī chí hermano ye"é nī cuuvi ya'ái yā, tuu'mi ní nguéé dii" nī 'túúcā cáávā chí dine"é nī hermano ye"é nī. Nguéé dii" nī chí cuuvi ndai hermano ye"e nī cáávā 'áámá dendu'ú

chí che'é nī caati Cristo ní ch'ii yā cáávā 'ii"yā" mii". ¹⁶Nguéé dii" nī cosas chí 'ii"yā" cuuvi caa"má" yā ye"e chí ndís'tii chí nguéé n'daacā idii" nī ye"e chí ndís'tii deenú nī chí n'daacā.

¹⁷Naati chíi" chí ye"ē Ndyuūs chí nga" a ntii"nyu" ye"ē nguéé ye"ē chí nge'e yú ndúúcu chí ng'i'í yú. Ndyuūs chí nga" a ntii"nyu" yā ye"ē dendu'ú chí cuaacu ndúúcu vaadi 'dii" ndúúcu vaadi yeenú chí Espíritu N'dai ye"é Ndyuūs tee yā s'uúú". ¹⁸Ní 'ii"yā" chí dichí'vē Cristo ní dii" yā dendu'ú chí 'túúcā, 'ii"yā" mii" dii" yā tan'dúúcā chí ne"e Ndyuūs. 'Tiicá ntuú" 'ii"yā" ye"e i"yee"dí 'cūú nga" a yā chí n'daacā idii" 'ii"yā" mii".

¹⁹Maa" ní 'tíicā canee chí dii" yú. Canéé chí dii" yú dendu'ú cáávā chí 'ii"yā" 'cuēetinéé yā ndúúcu vaadi 'dii" ní ndúúcu chí dii" yú cunnee yú 'aama yú taama yú chí cu'téenu ca yú ye"e Ndyuūs. ²⁰Ní nguéé ndituuví nī dendu'ú ntii"nyu" chí dii" Ndyuūs cáávā 'áámá dendu'ú chí nge'é nī. Cuaacu chí tanducué"ē dendu'ú ní dēeve naati nguéé n'daacā idii" yú. Nduuti chí che'e yú 'áámá dendu'ú, ní cáávā chí che'e yú tuu'mi ní dii" yú chí táámá 'ii"yā" dinuu"ndí yā. ²¹N'daacā ca chí nguéé dii" yú mar 'áámá dendu'ú chí dii" chí hermano ye"e yú cuuvi dinuu"ndí yā o dii" chí nguéé i'téenu yā n'daacā. Nguéé che'e yú yuutē o nguéé ng'i'í yú vino o nguéé dii" yú 'áámá dendu'ú chí 'túúcā chí dii" chí hermano ye"e yú nduuví duúva yā ye"e chí i'téenu yā. ²²Ní ye"e chí ndís'tii i'téenu nī ye"e chí nga" a maá" nī canéé chí i'téenu nī ye"ē nanáá" Ndyuūs. De'e chúúca n'dai taavi 'ii"yā" chí staava ye"é yā nguéé dii" condenar maá" yā cáávā cosa chí dii" yā chí nguéé n'daacā. ²³'ii"yā" chí che'é yā 'áámá dendu'ú ní n'dee nadicadínuu" yā ye"ē nduuti chí n'daacā o chí nguéé n'daacā cuuvi yā condenado caati nguéé nge'é yā ndúúcu núú"má" staava ye"é yā. Ní nducué"ē

chi diiⁿ yú taachi nguéé deenu yú nduuti chi n'daacā o nguéé n'daacā, tuu'mi ní dinuuⁿndi yú.

Dinéⁿe yú 'iiⁿyāⁿ niiⁿnuⁿ ná vaacu yú nguéé dinéⁿe yú maāⁿ yú

15 S'uuúⁿ chi i'téenu ca yú Jesucristo canee chi cunnee yú 'iiⁿyāⁿ chi duu'vi i'téenu yā Jesucristo. Ní nguéé diiⁿ yú tan'dúúca chi neⁿe maaⁿ yú chi canee nn'daacā yú. ²Ní ca'áamá ca'aama yú canéé chi diiⁿ yú chi n'daacā ndúúcu 'iiⁿyāⁿ niiⁿnuúⁿ vaacu yú cáávā chi n'daacā canee yā ní cuuvi cu'téenu cá yā. ³Deenu yú chi ní nguéé Cristo diíⁿ yā chi neⁿe maāⁿ yā ti 'tíicā tan'dúúca chi canéé nguūⁿ na libro yeⁿ'é Ndyuūs. Cristo ngaⁿ'á yā yeⁿ'e maāⁿ yā nanááⁿ Ndyuūs: Chífⁿ chi nguεε n'daacā chi 'iiⁿyāⁿ ngaⁿ'a yeⁿ'e di ní canéé vmnaaⁿ yeⁿ'é. ⁴Ní nducuéⁿ'ē chi vmnááⁿ vmnaaⁿ canéé nguūⁿ na libro yeⁿ'é Ndyuūs ní canéé nguūⁿ caavā chi 'cueēⁿ yú; ní cáávā chi 'áámá canee yú ndúúcu chi i'téenu yú ní cáávā chi diiⁿ animar s'uuúⁿ chi cunee ngiinu yú yeⁿ'e chi cuuvi yeⁿ'e yú. 'Tíicā diiⁿ nduudu yeⁿ'é Ndyuūs cáávā s'uuúⁿ. ⁵Ndyuūs chi tee yā vaadi yeenú s'uuuⁿ ndúúcu chi cunee ngiinu yú chi cuuvi yeⁿ'e yú, Ndyuūs ní inneé yā ndís'tii chi cuuvi 'diiⁿ 'diiⁿ 'cuεetineé ní 'áámá ní ndúúcu taama ní tan'dúúca Cristo neⁿ'é yā chi diíⁿ ní. ⁶Tuu'mi ní nducyáácá ní tan'dúúca chi 'áámá ní cuuvi dich'εeté ní Ndyuūs chi chiidá Señor Jesucristo yeⁿ'e yú.

'Iiⁿyāⁿ candéé yā nduudu cuaacu yeⁿ'e Cristo nanááⁿ 'iiⁿyāⁿ chi nguéé yeⁿ'e ndaata Israel

⁷Ní 'tíicā 'cuaáⁿ ní ndúúcu núúⁿmáⁿ staava yeⁿ'é ní 'áámá ní taama ní tan'dúúca Cristo 'cuúⁿ yā s'uuúⁿ ní 'iicu cuuvi dich'εete yú Ndyuūs. ⁸Ní chuū maaⁿ ngaⁿ'á ngii ndís'tii. Cristo ndaa yā iⁿ'yeeⁿdí 'cūū chi dichí'vé yā 'iiⁿyāⁿ Is-

rael s'eeⁿ ní idicuaacú yā chi Ndyuūs caⁿ'a yā chi ca'a yā chiida yú tiempo chi 'āā chól'oo. Ní 'tíicā Cristo ch'i'í yā chi Ndyuūs ní diíⁿ yā tanducuéⁿ'ē chi caⁿ'a yā chi diíⁿ yā. ⁹Ní 'tiicá ntúūⁿ ndái yā cáávā chi tanáⁿ'ā 'iiⁿyāⁿ chi nguéé yeⁿ'e ndaata Israel cuuvi dich'εeté yā Ndyuūs caati Ndyuūs ya'ai 'iinú yā yeⁿ'e tanáⁿ'ā 'iiⁿyāⁿ dendú'ū. Ní 'tiicá ntúūⁿ canéé nguūⁿ na libro yeⁿ'é Ndyuūs:

Cáávā chuū 'úú ní dich'εeté n'dii Señor nguaaⁿ na nducyáácá nación, ní 'úú ní caatá canciones chi diíⁿ honrar n'dii.

¹⁰Ni táámá cuaaⁿ naachi canéé nguūⁿ na libro yeⁿ'e Ndyuūs ngaⁿ'a 'tíicā:

'Iiⁿyāⁿ yeⁿ'e nducyáácá nación canéé chi yeenú yā ndúúcu 'iiⁿyāⁿ chi Ndyuūs nndeεévé yā chi cuuvi yeⁿ'é yā 'iiⁿyāⁿ s'eeⁿ.

¹¹Táámá cuaaⁿ yeⁿ'e libro yeⁿ'é Ndyuūs ngaⁿ'a 'tíicā:

'Iiⁿyāⁿ yeⁿ'e nducyáácá nación canee chi dich'εeté yā Ndyuūs, ní nducyáácá yā ngaⁿ'á yā chí n'dii Ndyuūs ní ch'εete n'dai n'dii.

¹²Ní 'tiicá ntúūⁿ canéé nguūⁿ na libro yeⁿ'é Ndyuūs naachi profeta Isaías dingúuⁿ yā 'tíica yeⁿ'e 'iiⁿyāⁿ chi Ndyuūs ngaⁿ'á yā chi caⁿ'á yā chi dich'ó yā:

'Úú idiíⁿ chi ndaa 'iiⁿyāⁿ yeⁿ'e ndaata yeⁿ'e saⁿ'ā Isafas, ní 'iiⁿyāⁿ miiⁿ ncuééⁿ yā chi gobernador chi caaⁿ'maⁿ ntiíⁿnyuⁿ yā yeⁿ'ē nducuéⁿ'ē nación. Ní véé chi 'iiⁿyāⁿ s'eeⁿ ní cūnee ngiinú yā nanááⁿ yā cáávā chi caⁿ'a yā chi diiⁿ yā.

¹³Ní Ndyuūs chi ca'á yā ndís'tii chi véé chi cūnee ngiinú ní nanááⁿ yā, neⁿ'é chi tée yā ndís'tii n'dee n'dái vaadi yeenú ndúúcu vaadi 'diiⁿ, ti ndís'tii ní i'téenu ní Jesucristo. Caati cáávā poder yeⁿ'ē Espíritu N'dai yeⁿ'é Ndyuūs cuuvi cá ní cūnee ngiinu cá ní yeⁿ'e chi cuuví yeⁿ'é ní.

¹⁴ Ndís'tii hermanos ye^{ne}, 'úú ní deenú chi cuaacu chi ndís'tii ní dííⁿ nī dendu'ú chi n'dai. Ní ndís'tii ní 'iiⁿyāⁿ chi deenu ndís'tii. Ní deenú nī ca'a nī consejo 'áámá nī ndúúcu taama nī. ¹⁵ Naati maaⁿ ní na carta 'cūú 'úú diitu idinguúⁿ n'dee n'dái cá ye^{ne} é nī ye^{ne} e dendu'ú 'cūú caati ndís'tii ní cuuvi n'gaacu nī ye^{ne} ē chi 'āā deenú nī. Chuú ní dinguúⁿ cheechi caati Ndyuūs chí n'dai taavi nduucú nī tee yā 'úú ye^{ne} e chi n'dai taavi ye^{ne} é yā chí dííⁿ. ¹⁶ Ní 'úú ní dichí'vē Cristo 'úú nguaaⁿ 'iiⁿyāⁿ chi nguéé Israel yā. Ní nguaaⁿ 'iiⁿyāⁿ miiⁿ 'úú dííⁿ ntiíⁿnyuⁿ ye^{ne} ē chi ngaⁿ á nduudu cuaacu ye^{ne} e evangelio chi nduudu ngai ye^{ne} e Jesucristo chi nadanguáⁿ ai 'iiⁿyāⁿ. Ní 'tíicā cuuvi candéé 'iiⁿyāⁿ chi nguéé Israel yā nanááⁿ Ndyuūs tan'dúúcā chi ofrenda n'dai yā chi Ndyuūs 'cuaáⁿ yā 'iiⁿyāⁿ s'eeⁿ, caati Espíritu N'dai ye^{ne} é Ndyuūs s'née yā 'iiⁿyāⁿ s'eeⁿ cáávā nti-iⁿnyuⁿ ye^{ne} é Ndyuūs.

¹⁷ Ni 'úú ní cáávā chi i'teenú Jesucristo, 'úú ní yeenú chi dííⁿ ntiíⁿnyuⁿ n'dai ye^{ne} é Ndyuūs. ¹⁸ Tí 'úú ní nguéé du'ú vee ngaⁿ á, dámaāⁿ chííⁿ chi Cristo dííⁿ yā cáávā 'úú. Ní 'íicú 'iiⁿyāⁿ chi nguéé Israel yā cuuvi cu'téenu yā Ndyuūs. Ní chúú idííⁿ cáávā nduudu cuaacu chi ngaⁿ á ní cáávā nducué^{ne} ē chi dííⁿ. ¹⁹ Ni 'úú ní ngāⁿ a cuaacú tanducué^{ne} ē ye^{ne} e evangelio ye^{ne} e Cristo nducué^{ne} ē yāā taachí chō'ó ndíí yāāⁿ Jerusalén ndii yáⁿ āā Ilríco. Ni dííⁿ ntiíⁿnyuⁿ ye^{ne} é ndúúcu poder ye^{ne} e Espíritu N'dai ye^{ne} é Ndyuūs, ndúúcu señales chi inaaⁿ yú ndúúcu vaadi n'giinu. ²⁰ Ní idííⁿ ca ntiíⁿnyuⁿ caati cuuvi caaⁿ máⁿ nduudu cuaacu chi nadanguaⁿ ai 'iiⁿyāⁿ ndii nducué^{ne} ē yāā naachi 'āā cuéé 'caandivé^{ne} n yā chi duuchí Cristo, caati 'úú nguéé ne^{ne} é caaⁿ máⁿ nduudu cuaacu ye^{ne} e Cristo naachi táámá yā 'āā candéé yā nduudu miiⁿ ní dííⁿ yā ntiíⁿnyuⁿ ye^{ne} e Cristo. ²¹ Naati ne^{ne} é dííⁿ tan'dúúcā chi canéé nguūⁿ na libro ye^{ne} é Ndyuūs 'tíicā:

'iiⁿyāⁿ chi 'aa cuéé ndaa táama yā nanáaⁿ yā chi caaⁿ máⁿ yā ye^{ne} e Cristo, 'iiⁿyāⁿ s'eeⁿ cuuvi cadíínuuⁿ yā ye^{ne} é yā. Ní 'iiⁿyāⁿ chi mar 'áámá vme^{ne} ēe nguéé n'giindivé^{ne} n yā ye^{ne} e Cristo ní 'caandivé^{ne} n yā ní cuuvi tumicadíínuuⁿ yā ye^{ne} e yā.

Pablo ne^{ne} é yā caⁿ a yā na yāāⁿ Roma

²² Neené n'dee cuuvi nadicadiinúúⁿ chi ne^{ne} é chíí nanááⁿ ndís'tii naati nguéé chíí ndāa. ²³ Naati maaⁿ ní 'āā ch'iinū nti-iⁿnyuⁿ ye^{ne} é na yāāⁿ s'uuⁿ. Néené n'dee nduūyú chi ne^{ne} é ndaa n'diichí ndís'tii. ²⁴ Ní ne^{ne} é naⁿ á ndii yáⁿ āā España ní taachi caⁿ á cyúúni ne^{ne} é n'diichí ndís'tii ní cuneé nduucú nī 'áámá tiempo nūuⁿ. Ní cuayiivi chi yeenú chi canéé ndúúcu ndís'tii ne^{ne} é chí ndís'tii cunneé nī 'úú taachi naⁿ á ndii yāāⁿ Roma. ²⁵ Maaⁿ ní caⁿ á na yāāⁿ Jerusalén ní ndeé ofrenda chí cunneé hermanos Israel ye^{ne} e yú chi i'téenu yā Cristo. ²⁶ Caati hermanos ye^{ne} e yú ye^{ne} e yáⁿ āā Macedonia ndúúcu hermanos ye^{ne} e yú ye^{ne} e yáⁿ āā Acaya maáⁿ yā ne^{ne} é yā ca'á yā ofrenda ní nadacadíínuuⁿ n'daaca yā taachi sta'á yā 'aama ofrenda ye^{ne} e tuumí nguaaⁿ ye^{ne} é yā chi dichó'o yā tuumi miiⁿ ye^{ne} e hermanos ye^{ne} e yú chi snée yā na yāāⁿ Jerusalén, ye^{ne} e hermanos chí pobre yā chí nguéé véé necesidades ye^{ne} e yā. ²⁷ Ní 'tíicā dííⁿ yā naati cuaacu níⁿnyúⁿ hermanos canéé chí cunneé yā hermanos Israel s'eeⁿ chí pobre yā chí snée yā na yāāⁿ Jerusalén caati hermanos Israel s'uuⁿ ní 'āā dííⁿ yā chí hermanos chí nguéé Israel yā sta'á yā ye^{ne} e dendú'ú chí n'dai chí ye^{ne} e Espíritu N'dai ye^{ne} é Ndyuūs. Ní cáávā hermanos Israel ye^{ne} e yú 'túúcā dííⁿ yā hermanos chí nguéé Israel yā ndúúcu chí n'dee n'dái ye^{ne} é yā canéé chí cunneé yā 'iiⁿyāⁿ Israel chí i'téenu yā Cristo. ²⁸ Maaⁿ ní taachi 'cuiinū dííⁿ asunto 'cūú ní taachi nga'á ofrenda 'cūú hermanos Israel, tuu'mi ní naⁿ á na yáⁿ āā

España. Ní taachi ca"á cyúúní ní ndaá na yáá"n ye"é nī, cho'ó n'diichí ndís'tiī. ²⁹Ní deenú chi taachi ndaá nanáá"n ndís'tiī seguro chi ndaá ndúúcu tanducué"ē chi n'dai taavi chi véé chi ye"ē nduudu n'dai ye"é Cristo.

³⁰Maa" ní ndís'tiī hermanos ye"é di'cuiitú ndís'tiī cáávā Señor Jesucristo ye"e yú ní cáávā Espíritu N'dai ye"é Ndyuūs chi diné"e yā s'uúu"n chi 'tiicá ntúu"n ndís'tiī caa"ma"ngua'a cá nī cáávā 'úú. Ní 'úú nga"angua'á chi Ndyuūs cunnee yā 'úú. ³¹Caa"ma"ngua'á nī chi Ndyuūs nadanguá"ai yā 'úú ye"e ta'a 'ii"yā"n Israel chi snée yā na yá"áa Judea, 'ii"yā"n chi nguée i'téenu yā Cristo. Ní caa"ma"ngua'á nī chi ntii"nyu"n chi dí" cáávā hermanos chi snée yā na yáá"n Jerusalén, Ndyuūs inee yiinú yā nti"nyu"n chi dí". ³²Ní 'íícu nduuti chi Ndyuūs ne"é yā, 'úú ní yeenú taachi ndaá nanáá"n ndís'tiī ní cuntaavi'tuúnú ndúúcu ndís'tiī. ³³Ne"é chi Ndyuūs téé yā nducyaaca ndís'tiī vaadi 'dii"n chi 'cuetinéé dí" nī. 'Tíicá.

Pablo dicho'ó yā, N'dai ndís'tiī, hermanos ye"é yā

16 'Úú ní nga"á ngii ndís'tiī chi 'cuaá"n nī Febe chi hermana ye"e yú. N'daata mii"n dichí've yā 'ii"yā"n ye"e yáacū chi canéé na yáá"n Cencrea. ²Ní n'daacā 'cuaá"n nī n'daata mii"n ndúúcu chi duuchi Señor ye"e yú, tan'dúúca chi canéé chi 'cuaá"n nī hermanos ye"e yú chi i'téenu yā Cristo. Ní cunneé nī n'daata mii"n ye"e tanducué"ē chi ne"e tá ti n'daata mii"n neené 'yaa"n 'ii"yā"n chinnee tá 'ii"yā"n. 'Tiicá ntúu"n chinnee tá 'úú.

³Ní n'dís'tiī caa"má"n nī hermano Aquila ndúúcu n'daataá Priscila chi n'daata ye"é yā, N'dai ndís'tiī. 'Ii"yā"n s'ee"n idií"n yā ntii"nyu"n ye"e Señor Jesucristo dáamá nduucú. ⁴'Ii"yā"n s'ee"n n'geenú yā ngii cáávā 'úú ndíi chi cuuvi 'cuuvi yā cáávā chi cuuvi nadanguá"ai

yā 'úú. Ní 'úú ní ca'á 'ii"yā"n s'ee"n gracias. Ní nguée dámaa"n 'úú, 'tiicá ntúu"n dii"n nducyaaca hermanos ye"e yú chi nguée na"á yā yaacú ye"e 'ii"yā"n Israel s'ee". ⁵Ní 'ii"yā"n ye"e yaacū chi nduuvidaamá yā na vaacu tá"ā Priscila ndúúcu isá"ā ye"é yā chi Aquila: N'dai ndís'tiī, caa"má"n nī. Ní Epeneto amigo chi neené ne"é: N'dai dii, caa"má"n nī. Epeneto mii"n sa"na vmnáá"n vmnaa"n chí'teenu sá Cristo na yá"áa Acaya. ⁶Ní tá María chi neené dii"n tá ntii"nyu"n nguaa"n ndís'tiī: N'dai tá, caa"má"n nī. ⁷Ní sa"ā Andrónico ndúúcu sá"ā Junias canéé yā vácuū taachi 'úú canéé vácuū, ní sa"ā s'ee"n ní n'geete nguaa"n 'ii"yā"n chi apóstoles. Ní sa"ā s'ee"n i'téenu yā Cristo vmnaa"n cá nícu 'úú: N'dai ndís'tiī, caa"má"n nī.

⁸Ní sá"ā Amplias chi neené ne"é ti ye"e Señor sa"na mii"n: N'dai dii, caa"má"n nī. ⁹Ní sa"ā Urbano chi dáamá dii"n sa ntii"nyu"n ye"é Señor nduucú 'nū: N'dai dii, caa"má"n nī. Ní sa"na Estaquis chi neené ne"é: N'dai dii, caa"má"n nī. ¹⁰Ní sa"ā Apeles chi neené ch'eenú yā chii cáávā chi i'téenu yā Cristo: N'dai dii, caa"má"n nī. 'Tiicá ntúu"n nducyaaca 'ii"yā"n ye"e vaacu Aristóbulo: N'dai ndís'tiī, caa"má"n nī. ¹¹Ní sa"na Herodión chi ye"e yáá"n vaacú: N'dai dii, caa"má"n nī. Ní 'ii"yā"n chi i'téenu yā ye"e vaacu Narciso: N'dai ndís'tiī caa"má"n nī. ¹²Ní n'daataá Trifena ndúúcu n'daataá Trifosa chi dí"n yā ntii"nyu"n chi ntii"nyu"n ye"e Señor: N'dai ndís'tiī caa"má"n nī. Ní n'daataá Pérsida, hermana ye"é chi neené ne"é chi n'dee n'dái ntii"nyu"n dí"n tá ye"ē ntii"nyu"n ye"e Señor: N'dai tá, caa"ma"n nī. ¹³Ní sa"ā Rufo, chi sa"ā ch'εεte nguaa"n 'ii"yā"n chi i'téenu yā Cristo ndúúcu chεεcu sa chi tan'dúúca chεεcú dendúú: N'dai ndís'tiī, caa"ma"n nī. ¹⁴Ní sa"na s'ee"n Asíncrito ndúúcu Flegonte ndúúcu Hermas ndúúcu Patrobas ndúúcu Hermes ndúúcu taná"ā hermanos chi snée yā ndúúcu yā: N'dai

ndís'tiī, caa^m máⁿ nī. ¹⁵ 'Tiicá ntúūⁿ saⁿ a Filólogo ndúú^{cū} n'daataá Julia ndúú^{cū} saⁿ ā Nereo ndúú^{cū} n'daataá víⁱ yā, ndúú^{cū} saⁿ a Olimpas ndúú^{cū} nducyáácá hermanos yeⁿ e yú chí snée yā ndúú^{cū} 'iiⁿ yāⁿ s'eeⁿ: N'daí ndís'tiī, caa^m máⁿ nī.

¹⁶ Maaⁿ ní nguaaⁿ maáⁿ nī chí i'téenu nī Cristo: N'daí dii, caa^m máⁿ nī, ní ca'á nī 'áamá beso 'áamá nī ndúú^{cū} taama nī tan'dúú^{cā} costumbre yeⁿ é nī caati néⁿ e nī víⁱ. Nducyáácá 'iiⁿ yāⁿ yeⁿ e nducyáácá yaācū: N'daí ndís'tiī ngaⁿ a yā.

¹⁷ Maaⁿ ní di'cuiitú ndís'tiī hermanos yeⁿ é chí cundée nī cuidado yeⁿ é 'iiⁿ yāⁿ chí diiⁿ 'úúví vaadi cadí^{nū} nūⁿ nguaaⁿ ndís'tiī. Ní díⁿ yā chí ndís'tiī dinuⁿ dí nī. 'iiⁿ yāⁿ s'eeⁿ ní contra yeⁿ é chí 'iiⁿ yāⁿ ca'cueéⁿ yā ndís'tiī. Ní contra yeⁿ é chí ch'eeⁿ nī. Divíⁿ nī 'iiⁿ yāⁿ s'eeⁿ yeⁿ é nguaaⁿ ndís'tiī. ¹⁸ Caati 'iiⁿ yāⁿ s'eeⁿ nguéé dichí^v ve yā Señor Jesucristo yeⁿ e yú ti díⁿ yā tan'dúú^{cā} chí neⁿ e yā. Ní nginnche'él yā staava yeⁿ e 'iiⁿ yāⁿ chí ndiicúⁿ caati ngaⁿ á yā ndúú^{cū} nduⁿ du cúuⁿ nūⁿ yeⁿ é yā chí cunee ngí^{nū} yā. ¹⁹ Nducyáácá 'iiⁿ yāⁿ 'āā deenú yā tan'dúú^{cā} chí ndís'tiī n'giindiveéⁿ nī nduⁿ du yeⁿ é Ndyuūs nī cáāvā chuū 'úú ní yeenú. Neⁿ é chí ndís'tiī listo canee nī chí diiⁿ nī dendu^ū chí n'daacā. Nguéé chí díⁿ nī cosa chí nguéé n'daacā. ²⁰ Ní Ndyuūs chí véé nducuéⁿ e vaadi 'diiⁿ nduucú yā maaⁿ nch'ēēté cu'néeⁿ yā yááⁿ n'guiinūⁿ miiⁿ cuaaⁿ mááⁿ ca'á nī. Neⁿ é chí Jesucristo tée yā nducyáácá ndís'tiī nducuéⁿ e vaadi n'dai yeⁿ é yā.

²¹ Saⁿ a Timoteo chí dáamá idiⁿ sa ntiⁿ nyuⁿ nduucú ndúú^{cū} sáⁿ ā Lucio ndúú^{cū} sáⁿ ā Jasón ndúú^{cū} sáⁿ ā Sosípaⁿ ter chí sáⁿ ā s'eeⁿ yeⁿ e yááⁿ vaacú: N'daí ndís'tiī, ngaⁿ á yā.

²² Ní 'úú, sáⁿ ā chí nguuvi Tercio chí dinguúⁿ carta 'cūū cáāvā Pablo: N'daí ndís'tiī, ngaⁿ á ti yeⁿ é Cristo s'uuúⁿ.

²³ Ní 'tiicá ntúūⁿ saⁿ a Gayo: N'daí ndís'tiī, ngaⁿ a sa. 'Úú ní caneeⁿ na vaacu sa ní nduvidaamá yā 'iiⁿ yāⁿ yeⁿ e yaācū na vaacu sa. Ní sáⁿ ā Erasto ntúūⁿ chí sáⁿ ā tesorero yeⁿ e yáaⁿ 'cūū, ndúú^{cū} hermano Cuarto: N'daí ndís'tiī, ngaⁿ a yā.

²⁴ Neⁿ é chí Señor Jesucristo yeⁿ e yú di'viicú yā nducyaaca ndís'tiī. 'Tíicā.

'Cuínū carta 'cūū ndúú^{cū} chí dich'ēete yú Ndyuūs

²⁵ Maaⁿ ní dich'ēete yú Ndyuūs. Ndyuūs cuuvi diiⁿ cá yā chí díⁿ tūū canee di ndúú^{cū} chí i'téenu di tan'dúú^{cā} chí 'úú caⁿ á nduudu cuaacu chí Cristo nadanguáⁿ ai yā ndís'tiī. Ní chí'cueéⁿ ndís'tiī yeⁿ e evangelio chí nduudu ngai yeⁿ e Cristo. Chuū chí ngaⁿ á ní chíⁿ chí Ndyuūs snúúⁿ n'de'él yā ndii tiempo vmnááⁿ vmnāaⁿ chí caneeⁿ iⁿ yeeⁿ di ní Ndyuūs ch'iⁿ í yā 'úú nduudu yeⁿ e Cristo. ²⁶ Ní maaⁿ ní deenu yú chuū cáāvā chí profetas dingúⁿ yā na libro yeⁿ é Ndyuūs yeⁿ é chuū. Ní díⁿ yā tan'dúú^{cā} Ndyuūs ngaⁿ a yā yeⁿ e chuū. Ní Ndyuūs cuéⁿ é daāⁿ maⁿ caneeⁿ yā. Ní maaⁿ ní Ndyuūs ch'iⁿ í yā nduudu cuaacu yeⁿ é Cristo nanááⁿ 'iiⁿ yāⁿ yeⁿ e nducuéⁿ e naciones cáāvā chí 'caandiveéⁿ yā ní cu'téenu yā.

²⁷ Cuéⁿ é daāⁿ maⁿ canee chí dich'ēete yú Ndyuūs chí 'aama n'dyáⁿ ā Ndyuūs chí deenú yā tanducuéⁿ e dendu^ū. Ní diiⁿ yú 'tíicā cáāvā Jesucristo Señor yeⁿ e yú. 'Tíicā diiⁿ yú.

CARTA VMNÁÁⁿ VMNAAⁿ YE^{ne}E IIⁿYÁⁿ YE^{ne}E YÁÁⁿ CORINTO

**Pablo idinguúⁿ yā carta 'cūū ye^{ne}e
'iiⁿyāⁿ ye^{ne}e yaacū na yááⁿ Corinto**

1 'Úú Pablo 'úú. Dendyuūs yaa'ví yā 'úú chi cuuvi apóstol ye^{ne}e Jesucristo tan'dúúca chi Ndyuūs ne^{ne}e yā. 'Úú ndúúcu hermano Sóstenes yaa'ví nū ndís'tiī. ²'Úú idinguúⁿ carta 'cūū ye^{ne}e 'iiⁿyāⁿ chi itéenu yā Ndyuūs, 'iiⁿyāⁿ chi snée yā na yááⁿ Corinto. 'iiⁿyāⁿ s'eeⁿ, Ndyuūs yaa'ví yā 'iiⁿyāⁿ chi cuuvi ye^{ne}e yā 'iiⁿyāⁿ s'eeⁿ ti ye^{ne}e Cristo Jesús. Idinguúⁿ dendu'ū ye^{ne}e nducyaaca 'iiⁿyāⁿ ye^{ne}e nducyáácá yááⁿ, 'iiⁿyāⁿ s'eeⁿ chi ngaⁿangualá yā ndúúcu Señor Jesucristo. Señor Jesucristo miiⁿ 'iivú Ndyuūs ye^{ne}e yā ndúúcu s'uūuⁿ. ³Ndyuūs Chiida yú ndúúcu Señor Jesucristo cuuvi téé yā s'uūúⁿ cosa chí n'dáácā n'dai ye^{ne}e yā, ní 'íicú cunée vaadi 'diiíⁿ ye^{ne}e yā na staava ye^{ne}e yú.

**Pablo caaⁿmaⁿ yā gracias Ndyuūs
caava chi Ndyuūs dateé yā 'iiⁿyāⁿ**

⁴Cue^{ne}e daaⁿmaⁿ ngaⁿá gracias Ndyuūs cáávā cosa chi n'daacā n'dai ye^{ne}e Ndyuūs chi dátee yā s'uūúⁿ chi ye^{ne}e Jesucristo. ⁵Dendyuūs dateé yā tanducuéⁿe dendu'ū chi véé ye^{ne}e yā ti maaⁿ ní ndís'tiī ní ye^{ne}e Cristo ndís'tiī. Ní Ndyuūs chinnee yā ndís'tiī chi caaⁿmáⁿ nī nduudu ye^{ne}e yā, ní teé yā ndís'tiī vaadi deenu. ⁶'Tíicā chiiⁿ chí 'úú ngaⁿá nduudu cuaacu miiⁿ ye^{ne}e Jesucristo miiⁿ. Ní ndís'tiī n'giindiveéⁿ nī ní dííⁿ nī 'tíicā, ní chíⁿí nī chí nduudu miiⁿ chí cuaacu. ⁷Ní cuuvi ye^{ne}e nī nducuéⁿe chí dateé Ndyuūs, ní ndís'tiī nguéeⁿ díiⁿ faltar mar 'áámá. Ne^{ne}e chí ndís'tiī 'cuetinéé ngiinu nī Señor Jesucristo ye^{ne}e yú chí ndaa yā taama vmnéⁿee. ⁸Ní Cristo miiⁿ ní téé yā fuerzas ndís'tiī,

ní 'cuetinéé nī n'daacā ndíí nguuvi chí Jesucristo ndaa ntuúⁿ yā. Ní nguéeⁿ véé nuuⁿndi ye^{ne}e nī nguuvi chí ndaa Señor Jesucristo ye^{ne}e yú. ⁹Ndyuūs ní dííⁿ yā chí caⁿa yā chí dííⁿ yā. Ní yaa'ví yā ndís'tiī chí 'cuetinéé nī ndúúcu daiyā yā chí Señor Jesucristo ye^{ne}e yú.

**Véeⁿ divisiones nguaaⁿ 'iiⁿyāⁿ
chí caⁿá yā na yáacū**

¹⁰Ndís'tiī hermanos ye^{ne}e, 'úú ngiicá ndís'tiī cáávā chí duuchi Señor Jesucristo ye^{ne}e yú chí 'cuetinéé ngiínú nī, ní nguéeⁿ véé divisiones nguaaⁿ ndís'tiī. N'dáácā n'dai 'cuetinéé nī ní daama daamá nī ndúúcu 'aama vaanicadiinūⁿ ye^{ne}e ndís'tiī chí n'daacā ndúúcu tanducuéⁿe chí dííⁿ nī. ¹¹N'duuví 'iiⁿyāⁿ ye^{ne}e familia ye^{ne}e n'daataá Cloé yaa'ví yā 'úú ye^{ne}e ndís'tiī hermanos ye^{ne}e. Ní ngaⁿá yā chí ndís'tiī n'gæecu cheendí nī. ¹²Chuū chí ye^{ne}e chí caaⁿmáⁿ. 'Áámá 'áámá ndís'tiī ngaⁿá nī ye^{ne}e 'áámá saⁿa 'tíicā. 'Áámá yā ní ngaⁿa yā: 'Úú ye^{ne}e saⁿa Pablo; taamá yā ní ngaⁿa yā: 'Úú ye^{ne}e saⁿa Apolos; taamá yā ní ngaⁿa yā: 'Úú ye^{ne}e saⁿa Pedro; taamá yā ní ngaⁿa yā: 'Úú ye^{ne}e Cristo. ¹³¿'Áá cuaacu chí Cristo ye^{ne}e yú chí 'yaaⁿ yā? Nguéeⁿ 'tíicā. ¿'Áá ca'nee'ngá'aa Pablo cáávā nuuⁿndi ye^{ne}e ndís'tiī? Nguéeⁿ. ¿'Áá cheedinuūⁿniⁿ nī ndúúcu chí duuchi Pablo? Nguéeⁿ 'tíicā. ¹⁴'Úú cáⁿa: Gracias Dendyuūs, ti 'úú chí Pablo, nguéeⁿ cheedinuūⁿniⁿ mar 'áámá ndís'tiī. Dámaāⁿ cheedinuūⁿniⁿ saⁿa Crispo ndúúcu saⁿa Gayo. ¹⁵Maaⁿ ní mar 'áámá ndís'tiī nguéeⁿ cuuvi caaⁿmáⁿ nī chí ndeedínuūⁿniⁿ ndúúcu chí duuchí. ¹⁶Cheedinuūⁿniⁿ ntúúⁿ 'iiⁿyāⁿ ye^{ne}e familia ye^{ne}e saⁿa Estéfanas. Ní ye^{ne}e tanáⁿā 'iiⁿyāⁿ 'úú nguéeⁿ deenú chí ndeedínuūⁿniⁿ du'ū ca táámá 'iiⁿyāⁿ. ¹⁷Cristo nguéeⁿ dichó'o yā 'úú chí cheedinuūⁿniⁿ 'iiⁿyāⁿ caati dichó'o yā 'úú chí caaⁿmáⁿ nduudu ye^{ne}e evangelio chí nduudu ngai ye^{ne}e Cristo. 'Úú

nguée caaⁿ máⁿ ndúúcu nduudu deenu yeⁿe saⁿá yeⁿe iⁿ'yeeⁿdí 'cūū, ní 'iicu nducuéⁿe chí ngaⁿá ní yeⁿe poder yeⁿe Cristo chí ch'ii yā na cruz.

**Cristo miiⁿ ní poder yeⁿe
Ndyuūs ndúúcu vaadi deenu**

¹⁸Úú deenú chí taachi 'iiⁿ'yāⁿ chí nguée deenú yā du'ū chí Cristo miiⁿ ní n'giindiveéⁿ yā nduudu yeⁿe cruz, 'iiⁿ'yāⁿ miiⁿ nacadínuuⁿ yā chí 'áámá cosa chí duuchi. S'uuúⁿ chí nanguaⁿāi yú, deenu yú chí Ndyuūs ch'iⁿ'i yā poder yeⁿe yā cucáávā nduudu yeⁿe yā. ¹⁹Naati canéé nguūⁿ na libro yeⁿe Ndyuūs ndí vmnaaⁿ chí ngaⁿ'a 'tíicā:

'Úú dituūví vaadi deenu yeⁿe 'iiⁿ'yāⁿ chí deenu, ní idíⁿ chí nguée dichí'vē nduudu yeⁿe 'iiⁿ'yāⁿ chí deenu taavi.

²⁰¿De'ē dichí'vē vaadi deenu yeⁿe 'iiⁿ'yāⁿ chí deenu? ¿De'ē dichí'vē vaadi deenu yeⁿe maestro chí deenu taavi? ¿De'ē dichí'vē vaadi deenu yeⁿe 'iiⁿ'yāⁿ chí deenu taavi ní caaⁿ máⁿ yā ndúúcu compañeros yeⁿe yā yeⁿe cosas chí véé iⁿ'yeeⁿdí 'cūū? Ndyuūs ch'iⁿ'i yā chí vaadi deenu yeⁿe iⁿ'yeeⁿdí 'cūū ní dúú'vi vee ní nguée de'ē vee. ²¹'Iiⁿ'yāⁿ yeⁿe iⁿ'yeeⁿdí 'cūū nguée cuuvi n'diichí yā Dendyuūs cucáávā vaadi deenu yeⁿe iⁿ'yeeⁿdí 'cūū. Ndyuūs canee yiinú yā ní nadanguaⁿá yā 'iiⁿ'yāⁿ chí i'téenu yā nduudu cuaacu yeⁿe yā, naati tanáⁿā 'iiⁿ'yāⁿ yeⁿe iⁿ'yeeⁿdí 'cūū ngaⁿ'á yā chí nduudu cuaacu miiⁿ ní tan'dúúcā 'áámá cosa chí duuchi.

²²'Iiⁿ'yāⁿ Israel s'eeⁿ chí judíos ngiicá yā señales Ndyuūs ní 'iicu 'iiⁿ'yāⁿ griegos ní in'nuuⁿ cá yā vaadi deenu yeⁿe iⁿ'yeeⁿdí 'cūū. ²³S'uuúⁿ ní ca'cuaeⁿ yú yeⁿe Cristo chí ca'néeⁿnga'āa na cruz cáávā nuūⁿndí yeⁿe nducyáácá 'iiⁿ'yāⁿ. 'Iiⁿ'yāⁿ Israel s'eeⁿ nguée neⁿe 'caandiveéⁿ yā nduudú 'cūū, ní tanáⁿā 'iiⁿ'yāⁿ sta'á yā nduudú 'cūū tan'dúúcā 'áámá

cosa chí duuchi. ²⁴Nduuti chí 'iiⁿ'yāⁿ Israel s'eeⁿ o nduuti chí 'iiⁿ'yāⁿ griegos, Ndyuūs yaa'ví yā 'iiⁿ'yāⁿ s'eeⁿ chí cuuvi yeⁿe yā 'iiⁿ'yāⁿ. Cristo ní poder yeⁿe Ndyuūs ní Cristo miiⁿ vaadi deenu yeⁿe Ndyuūs cucááva nducyaaaca 'iiⁿ'yāⁿ. ²⁵Nduudu yeⁿe Ndyuūs chí 'iiⁿ'yāⁿ ngaⁿ'á yā chí cosa chí duuchi, nduudu miiⁿ nduudu déenu ca nguée tí nduudu yeⁿe saⁿá yeⁿe iⁿ'yeeⁿdí 'cūū. Ní cosa chí sta'á yā tan'dúúcā chí duuvā yeⁿe Dendyuūs chíⁿ chí ditiinú ca, nguée ti yeⁿe 'iiⁿ'yāⁿ yeⁿe iⁿ'yeeⁿdí 'cūū. ²⁶Ndís'tii hermanos yeⁿe, nadacádiinúⁿ ní yeⁿe maáⁿ ní. Nguée 'yaaⁿ ndís'tii 'iiⁿ'yāⁿ chí deenu taavi, nguée 'yaaⁿ ndís'tii 'iiⁿ'yāⁿ ndíí tiiⁿ, ndíí nguée 'yaaⁿ ndís'tii 'iiⁿ'yāⁿ 'cuuica. ²⁷Ndyuūs ndeevé yā 'iiⁿ'yāⁿ chí nguée deenu taavi yā ní 'íicú 'iiⁿ'yāⁿ chí deenu taavi yā cuuví 'cuináaⁿ yā. Ní Ndyuūs ndeevé yā 'iiⁿ'yāⁿ yeⁿe iⁿ'yeeⁿdí 'cūū chí véé duu'vii fuerzas yeⁿe yā ní 'íicú 'iiⁿ'yāⁿ chí véé fuerza yeⁿe yā cuuví 'cuináaⁿ yā. ²⁸Ndyuūs ndeevé yā 'iiⁿ'yāⁿ chí nguée du'ū vee nanááⁿ 'iiⁿ'yāⁿ yeⁿe iⁿ'yeeⁿdí 'cūū ní ndeevé yā 'iiⁿ'yāⁿ chí nguée inuuⁿndi ní ya'ai iinú yā 'iiⁿ'yāⁿ. Ní 'iicu Ndyuūs díⁿ yā chí nguée de'ē vee cosa chí ch'etete chí 'iiⁿ'yāⁿ yeⁿe iⁿ'yeeⁿdí 'cūū díⁿ yā. ²⁹'Tíicā Ndyuūs idíⁿ yā ti mar 'áámá 'iiⁿ'yāⁿ nguée cuuvi dich'etete yā 'iiⁿ'yāⁿ nanááⁿ Dendyuūs. ³⁰'Tíicā Dendyuūs maáⁿ yā teé yā vida cueⁿe daāⁿmaⁿ yeⁿe ndís'tii tí i'teenú ní Cristo Jesús. Ndyuūs dichó'o yā Jesucristo iⁿ'yeeⁿdí 'cūū chí cuuvi deenu yú nducuéⁿe cáávā Cristo. Ní cáávā Cristo miiⁿ nguée nuuⁿndi yeⁿe yú nanááⁿ Ndyuūs ti Cristo miiⁿ ch'ii yā na cruz cucáávā nuuⁿndi yeⁿe nducyaaaca 'iiⁿ'yāⁿ, ní 'iicu s'uuuⁿ chí cuuvi yeⁿe yā s'uuuⁿ. ³¹Cáávā chuū canéé nguūⁿ na libro yeⁿe Ndyuūs ndí vmnaaⁿ 'tíicā: 'Iiⁿ'yāⁿ chí ngaⁿ'a chí idich'etete maáⁿ yā 'iiⁿ'yāⁿ, nguée n'daacā idíⁿ yā. Dámaāⁿ canéé chí dich'etete yā iivú Ndyuūs.

Nga^a yā chí Cristo ca'neéⁿnga'á yā

2 Ndís'tiī hermanos ye^e, taachí ndāa ní caneé ndúúcu ní 'tíicā caⁿá nduudu cuaacu ye^e Dendyuūs. Nguéé caⁿá nduudu miiⁿ ndúúcu núúⁿmaⁿ vadicadínūuⁿ ye^e vaadi deenu. ²Tíicā ngaⁿá, ti nguéé ne^e caⁿmaⁿ táamá cosa nanááⁿ ndís'tiī, dámaaⁿ ne^e caⁿmaⁿ ye^e Jesucristo chi ca'neéⁿnga'á yā. ³Taachi caneé ndúúcu ndís'tiī ndii cuiⁿnūⁿ 'úú; ní 'va'a 'úú; ní néené in'duuví vaa. ⁴Nguéé ngaⁿá nduudu miiⁿ ndúúcu vaadi deenu chi cadiiuuⁿ 'iiⁿyāⁿ ye^e iⁿ'yeeⁿdí 'cūū, naati ngaⁿá nduudu cuaacu miiⁿ ndúúcu nduudu chi nguéé ngíⁿiī. Ngaⁿá chiiⁿ chi Espíritu N'dai ye^e Ndyuūs ch'iⁿyā 'úú ndúúcu poder ye^e yā chí nduudu cuaacu miiⁿ ní ye^e Dendyuūs. Níicú 'iiⁿyāⁿ cuuvi deenú yā chí nduudu cuaacu miiⁿ ní nduudu ye^e Dendyuūs. ⁵Tíicā ngaⁿá ti chíⁿ chi i'teenu yú nguéé chíicā na vaanicadiinuuⁿ ye^e 'iiⁿyāⁿ ye^e iⁿ'yeeⁿdí 'cūū ti ye^e poder ye^e Dendyuūs.

Dendyuūs díⁿ yā chi deenu 'iiⁿyāⁿ cucáavā Espíritu N'dai ye^e yā

⁶Taachi caneé 'nū nguaaⁿ 'iiⁿyāⁿ chi i'teenú yā Dendyuūs ní 'áamá caneé yā ndúúcu Dendyuūs, tuuⁿmi ní ngaⁿá 'nū ndúúcu nduudu ngiⁿiī ye^e vaanicadiinūuⁿ. Nguéé ti vaadi deenu chi nadacadiinúuⁿ 'iiⁿyāⁿ ye^e iⁿ'yeeⁿdí 'cūū, 'iiⁿyāⁿ chi nguéé i'téenu yā Dendyuūs ye^e yú. Ndí nguéé ti ye^e saⁿá chi ndii tíiⁿ ye^e iⁿ'yeeⁿdí 'cūū chi chó'oo poder ye^e yā. ⁷Naati ngaⁿá 'nū vaadi déenu ye^e Dendyuūs. Ní nguéé deenú 'iiⁿyāⁿ ye^e iⁿ'yeeⁿdí 'cūū vaadi deenu miiⁿ, ti Ndyuūs caⁿa yā vaadi deenú 'cūū chi ye^e maáⁿ yā vmaáⁿ vmaaaⁿ chi din'dái yā iⁿ'yeeⁿdí 'cūū, ní 'iicu cuuvi nadinguáⁿai yā s'uúú. ⁸Mar 'áamá 'iiⁿyāⁿ n'geete ye^e iⁿ'yeeⁿdí 'cūū déenú

yā ye^e vaadi deenú 'cūū, ti nduuti chi déenu yā, tuuⁿmi ní nguéé s'neeⁿnga'á yā Señor Jesucristo chi chíica yā ye^e va'ai cheeti nguúvi. ⁹Canéé nguúⁿ ndii cuááⁿ vmaaaⁿ ná libro ye^e Ndyuūs 'tíicā:

Nducuéⁿe chi din'dái Dendyuūs ní ye^e 'iiⁿyāⁿ chí i'teenu i'ivú Ndyuūs, tanáⁿā 'iiⁿyāⁿ ye^e iⁿ'yeeⁿdí 'cūū nguéé n'diichí yā Jesucristo, ndí nguéé n'giindiveeⁿ yā ye^e yā, ndí nguéé nadicadiinúuⁿ yā ye^e dendu'ū chuū na staava ye^e yā.

¹⁰Ndyuūs ch'iⁿyā yā nducuéⁿe s'uúúⁿ cucaavā Espíritu N'dai ye^e yā. Espíritu N'dai ye^e Dendyuūs ní deenú yā nducuéⁿe, ní deenú yā nducuéⁿe vaadi deenu ye^e Ndyuūs. ¹¹¿Du'ú 'iiⁿyāⁿ cuuvi deenú yā chi nadacadiinúuⁿ taama 'iiⁿyāⁿ? Dámaaⁿ espíritu ye^e maáⁿ yā deenu chi maáⁿ yā nadacadiinúuⁿ yā. 'Tíicā ntúūⁿ mar 'áamá 'iiⁿyāⁿ nguéé cadíinuuⁿ yā chí Ndyuūs nadicadiinúuⁿ yā, ti dámaaⁿ Espíritu N'dai ye^e Dendyuūs deenu yā ye^e Dendyuūs. ¹²S'uúúⁿ ní nguéé sta'ā yú espíritu chi ye^e iⁿ'yeeⁿdí ti sta'ā yú Espíritu N'dai chí cuchii ye^e Ndyuūs. Maaⁿ ní cuuvi deenu yú nducuéⁿe chí n'daacā n'dai ti Ndyuūs teé yā s'uúúⁿ Espíritu N'dai ye^e yā. ¹³Ngaⁿa ntúūⁿ yú ye^e nducuéⁿe chuū. Nguéé ngaⁿa yú ndúúcu nduudu chi ngí'cueeⁿ 'iiⁿyāⁿ ye^e iⁿ'yeeⁿdí 'cūū. Espíritu N'dai ye^e Ndyuūs ca'cueeⁿ yā nducyaaca 'iiⁿyāⁿ chí caneé ndúúcu Espíritu N'dai miiⁿ.

¹⁴'Iiⁿyāⁿ chi nguéé i'téenu yā Jesucristo ye^e yú nguéé ituumicadiinuuⁿ yā dendu'ū chí ye^e Espíritu N'dai ye^e Dendyuūs, ti sta'á yā nduudu miiⁿ tan'dúúcā 'áamá cosa chí duuchi. Ní nguéé cuuvi tuumicadiinúuⁿ yā nduudu miiⁿ ti caneé chi cadiiinúuⁿ yā nduudu miiⁿ cáavā Espíritu N'dai ye^e Dendyuūs. ¹⁵'Iiⁿyāⁿ chí caneé ndúúcu Espíritu N'dai ye^e Dendyuūs n'diichí yā tanducuéⁿe dendu'ū, naati 'iiⁿyāⁿ chí

nguée i'téenu yā Jesucristo nguéeé cuuvi tuumicadiinúúⁿ yā táácā idííⁿ 'iiⁿyāⁿ chí canee ndúúcu Espíritu N'dai yeⁿé Dendyuūs. ¹⁶Canée nguūⁿ na libro yeⁿé Ndyuūs ndíí vmnaaⁿ chí ngaⁿa tíícā: 'Iiⁿyāⁿ chí nguéeé i'téenu yā Jesucristo, ¿táácā cuuvi deenú yā chí nadacadiinúúⁿ 'iivú Ndyuūs? ¿Du'ú 'iiⁿyāⁿ cuuvi ca'cueéⁿ yā Ndyuūs? S'uuúⁿ chí canee yú ndúúcu Espíritu N'dai yeⁿé Dendyuūs snee yú ndúúcu vaanicadínnúuⁿ yeⁿé Cristo chí 'iivú Ndyuūs yeⁿé yú.

S'uuúⁿ ní compañeros yeⁿé yú vi'i ní diiⁿ yú ntiíⁿnyuⁿ yeⁿé Dendyuūs

3 Ndís'tií hermanos yeⁿé, nguéeé cuuvi caaⁿmáⁿ ndúúcu ndís'tií tan'dúúca chí ndís'tií ní 'iiⁿyāⁿ chí 'áámá canée ndúúcu Espíritu N'dai yeⁿé Ndyuūs, ní 'iiⁿyāⁿ chí n'giindiveéⁿ yā yeⁿe yā. Naati caⁿá nduucú ní tan'dúúca chí ndís'tií daiya yeⁿé Ndyuūs ndís'tií, tan'dúúca chí ndís'tií 'iiⁿyāⁿ chí caama i'téenu yā Cristo ndís'tií. ²Tan'dúúca da'caiyāa chí ngi'i leche ti 'āā cuéeé cuuvi che'é yā, 'tiicá ntúúⁿ ndís'tií. Ca'cueéⁿ ndís'tií ndúúcu dendu'ú nduudu chí nguéeé ngiⁿ'ií, tí nguéeé dííⁿ ní tan'dúúca chí ngaⁿa Espíritu N'dai yeⁿé Ndyuūs. ³Naati tan'dúúca 'iiⁿyāⁿ yeⁿé iⁿ'yeeⁿdí' cūú dííⁿ yā chí neⁿe maáⁿ yā, 'tíícā idííⁿ ní. Ndís'tií ní 'téé ní nguⁿ'u ní ní nguéeé nduuvidaamá ní. Nguéeé idiiⁿ n'daacá ní tan'dúúca 'iiⁿyāⁿ chí i'téenu yā 'iivú Ndyuūs chí idííⁿ yā, ti idííⁿ ní tan'dúúca 'iiⁿyāⁿ chí nguéeé i'teenú yā 'iivú Ndyuūs chí idííⁿ yā 'tíícā, ní idííⁿ 'tíícā ní. ⁴Caati náⁿā ndís'tií ngaⁿá ní: 'Úú ní i'teenú tan'dúúca chí ngaⁿa Pablo, ní táámá ní ngaⁿa ní: 'Úú i'teenú tan'dúúca chí ngaⁿa saⁿa Apolos. ¿'Áá nguéeé ngaⁿá ní tan'dúúca chí caⁿa ní tiempo chí 'āā ch'óo taachi 'āā cuéeé cu'téenu ní Jesucristo? ⁵¿Du'ú saⁿa Pablo 'úú? ¿Du'ú saⁿa Apolos miiⁿ? ¿'Áá nguéeé nús'úu 'iiⁿyāⁿ chí dichííⁿvē Dendyuūs? Ngaⁿá

'nū nduudu chí ch'iⁿi Dendyuūs nús'uu ní ndís'tií ní i'teenú ní. ⁶'Úú ngaⁿá nduudu yeⁿé Dendyuūs nanááⁿ ndís'tií ní dííⁿ tan'dúúca chí chíinú ndaata na staava yeⁿé ní. Sáⁿā Apolos miiⁿ canee sa ndúúcu ní ní ngi'cueeⁿ sá ndís'tií ní dííⁿ sa tan'dúúca chí ch'iⁿyú sa ndaata miiⁿ. Dendyuūs dííⁿ yā chí 'cuiita ndaata miiⁿ. ⁷Cááva chuū 'iiⁿyāⁿ chí ngaⁿa nduudu yeⁿé Dendyuūs o 'iiⁿyāⁿ chí ca'cueeⁿ nduudu miiⁿ nguéeé ch'ēēē yā. Dámaaⁿ Ndyuūs chí 'cuiitá yā nduudu miiⁿ ní ch'ēēē cá yā. ⁸'Iiⁿyāⁿ chí caaⁿmáⁿ yā nduudu miiⁿ ní 'iiⁿyāⁿ chí ca'cueeⁿ yā nduudu miiⁿ, 'āā daamá nūuⁿ dííⁿ yā ntiíⁿnyuⁿ yeⁿé Ndyuūs. Ndyuūs ca'á yā 'iiⁿyāⁿ miiⁿ chíiⁿ chí cuuvi yeⁿé yā caavā ntiíⁿnyuⁿ yeⁿe yā chí dííⁿ yā. ⁹Nús'uu ní daama dáámá nuúⁿ idííⁿ 'nū ntiíⁿnyúⁿ ndúúcu Dendyuūs. Ndís'tií ní tan'dúúca 'áámá campo yeⁿé Ndyuūs chí Ndyuūs chidi'cuiitá yā 'tíícā ndís'tií. Tan'dúúca 'áámá va'ai chí idin'dai Dendyuūs, 'tíícā ndís'tií. ¹⁰Ndyuūs teé yā 'úú vaadi deenú yeⁿé yā ní tan'dúúca 'áámá saⁿā deenu din'dai sa cimientu yeⁿe va'ai, 'tíícā 'úú. 'Úú ngaⁿá nduudu cuaacu chí tan'dúúca cimientu miiⁿ chí din'dai sa. Táámá 'iiⁿyāⁿ 'iicandíí yā ndúúcu va'ai miiⁿ. Ca'áámá ca'aama 'iiⁿyāⁿ chí 'iicandíí yā nduúcu canée chí 'iicandíí yā ndúúcu va'āi ndúúcu cuidado. ¹¹Mar 'áámá 'iiⁿyāⁿ nguéeé cuuvi cu'neeⁿ yā táámá cimientu chí n'daaⁿ yeⁿé chí 'úú chí'neéⁿ, ti tuúú yeⁿé cimientu miiⁿ ní Jesucristo. ¹²'Iiⁿyāⁿ s'eeⁿ chí 'iicandíí yā vmnaaⁿ cimientu miiⁿ ndúúcu 'díf'nguaaⁿ, o ndúúcu 'díf'nguee, o ndúúcu tuúu ndee cheeⁿ, o ndúúcu yáⁿá, o ndúúcu yaāta o ndúúcu 'ívoōo canée chí cadiinúúⁿ yā, ti chuū chí ngaⁿá. ¹³Nguuvi chí Jesucristo dííⁿ yā juzgar ntiíⁿnyuⁿ yeⁿé ca'áámá ca'áámá 'iiⁿyāⁿ, ní 'íicú 'iiⁿyāⁿ cádíínuuⁿ yā de'ē ntiíⁿnyuⁿ chíiⁿ yeⁿé 'áámá 'áámá yā. Ntiíⁿnyuⁿ miiⁿ ní canée chí cho'ōo naavtaⁿā ngiichí yāⁿá ní deenú yā 'iiⁿyāⁿ

yeⁿe ntiiⁿnyuⁿ yeⁿé yā. ¹⁴Nduuti chí cunee ntiiⁿnyuⁿ yeⁿe iⁿyāⁿ s'eeⁿ chí 'iicandí yā vmaaⁿ cimientó miiⁿ, ntiⁿnyuⁿ chí 'āā chó'ōo naavtaⁿā ngiichi yaⁿā ní nguēē chiichi, tuuⁿmi ní iⁿyāⁿ s'eeⁿ véé chí cuuvi yeⁿe yā. ¹⁵Ndúúti chí cuucu ntiiⁿnyuⁿ chí 'iicandí yā ndúúcu yaⁿā, tuuⁿmi ní diⁿcuiinú ntiiⁿnyuⁿ miiⁿ. 'Iiⁿyāⁿ s'eeⁿ ní nanguáⁿai yā tan'dúúca 'iiⁿyāⁿ chí chéenu yā yeⁿe va'ai yeⁿe yā taachí ngiichi va'ai yeⁿé yā.

¹⁶¿Áá nguéé déénu ndís'tií chí i'teenú nī Jesucristo chí cuerpo yeⁿe nī ní yáacū yeⁿe Dendyuūs, ní canéé Espíritu N'dai yeⁿe Ndyuūs ndúúcu ndís'tií? ¹⁷Ndúúti chí 'áámá 'iiⁿyāⁿ dituuvi yā yaacū yeⁿé Ndyuūs, Ndyuūs ní diⁿcuiinú yā 'iiⁿyāⁿ miiⁿ. Yáacū yeⁿé Ndyuūs ní deeve. Ndís'tií ní yaacū yeⁿé Ndyuūs ndís'tií.

¹⁸Mar 'áámá nī ní nguéé nginnche'éf maáⁿ nī ndís'tií. Taachi 'aamá ndís'tií nadacadiinuuⁿ nī chí nge'e taaví nī yeⁿe vaadi deenu yeⁿe iⁿyeeⁿdí 'cūū, tuuⁿmi ní canee cuuⁿmiⁿ chí díⁿ nī tan'duucā 'áámá 'iiⁿyāⁿ chí nguéé deenu. Ní cuuvi ndaācā vaadi deenu yeⁿé nī chí yeⁿe Dendyuūs. ¹⁹Vaadi déénu yeⁿé 'iiⁿyāⁿ yeⁿe iⁿyeeⁿdí 'cūū tan'dúúca 'áámá cosa chí duuchi nanááⁿ Ndyuūs. 'Āā canéé nguūⁿ na libro yeⁿé Ndyuūs ndí vmaaⁿ 't'fíca: Ndyuūs díⁿ yā chí vaadi deenu yeⁿé 'iiⁿyāⁿ yeⁿe iⁿyeeⁿdí 'cūū díⁿ chí 'cuuvi 'iiⁿyāⁿ ní 'iiⁿyāⁿ miiⁿ canee yā tan'dúúca chí cundaí yā na trampa yeⁿe maáⁿ yā. ²⁰Canéé nguūⁿ ntuuⁿ táámá chí 'tuucā: Iivú Ndyuūs déénu yā vaanⁿicadiinuuⁿ yeⁿé 'iiⁿyāⁿ chí deenu yeⁿé iⁿyeeⁿdí 'cūū. Nguéé de'ē vee dichí'vē chí nadacadiinuuⁿ 'iiⁿyāⁿ s'eeⁿ. ²¹Mar 'áámá 'iiⁿyāⁿ nguéé cuuvi caaⁿmáⁿ yā chí dich'eté yā saⁿā iⁿyeeⁿdí 'cūū. Tanducuéⁿe denduⁿú ní yeⁿe ndís'tií. ²²Nduuti chí 'úú chí Pablo, o saⁿā Apolos, o saⁿā Pedro, o nduuti chí yeⁿe iⁿyeeⁿdí, o yeⁿe vida yeⁿe yú, o yeⁿe vaadi n'gii, o yeⁿe cosa chí 'āā vee o yeⁿe denduⁿú chí caama

cuchii, tanducuéⁿe chuū ní yeⁿe ndís'tií. ²³Ní ndís'tií ní yeⁿe Cristo ndís'tií. Ní Cristo miiⁿ ní yeⁿe Dendyuūs chí cánduuchi yā cueⁿe daāⁿmaⁿ.

Ntiiⁿnyuⁿ yeⁿe apóstoles

4 Ndís'tií ní didúúché nī nús'uu tan'dúúca 'iiⁿyāⁿ chí idiⁿ ntiiⁿnyuⁿ yā yeⁿe Jesucristo. Nús'uu ní ngaⁿā 'nū nduudu cuaacu yeⁿé Ndyuūs nanaaⁿ ndís'tií. Vmnááⁿ vmaaⁿ ní nguéé chí cadíinuuⁿ nī naati maaⁿ ní cádiinuuⁿ nī nduudu cuaacu miiⁿ. ²'Iiⁿyāⁿ chí díⁿ ntiiⁿnyuⁿ yeⁿe i'ivú Ndyuūs canee cuuⁿmiⁿ chí díⁿ yā cumplir tanducuéⁿe chí caaⁿmaⁿ Ndyuūs yeⁿe ntiiⁿnyuⁿ chí díⁿ yā. ³Nguéé de'ē vee tuneé 'úú nduuti chí 'iiⁿyāⁿ díⁿ yā juzgar 'úú, o nduuti chí ndís'tií, o táámá 'iiⁿyāⁿ o 'úú maáⁿ n'diichí nuuⁿndi yeⁿé. ⁴Áará chí staava yeⁿé ngéé diiⁿ condenar 'úú cáavā chíⁿ chí díⁿ, 'úú nguéé cuuvi caaⁿmáⁿ chí nguéé nuuⁿndi yeⁿé. Dámaaⁿ Señor Jesucristo díⁿ yā juzgar 'úú, ní caaⁿmáⁿ yā nuuⁿndi yeⁿé. ⁵Ndís'tií nguéé díⁿ nī juzgar 'iiⁿyāⁿ. Taachí ndáá Señor Jesucristo yeⁿe yú taama vmnéⁿēe tuuⁿmi 'cuuⁿmiⁿ yā tanducuéⁿe chí cadíinuuⁿ yú 'aama 'aama yú ndii na staava yeⁿe yú. Tiempo miiⁿ ní i'ivú Ndyuūs téé yā s'uúú chí cuuvi yeⁿe yú caavā ntiiⁿnyuⁿ chí díⁿ yú.

⁶'Úú ngaⁿā yeⁿe chí 'úú ndúúcu saⁿā Apolos díⁿ 'nū. Ní 'íicú ndís'tií cuuvi 'cueéⁿ nī tan'dúúca chí cuuvi díⁿ nī tan'dúúca chí canéé nguūⁿ ndí vmaaⁿ na libro yeⁿe Ndyuūs. Ndís'tií nguéé n'diichí nī 'iiⁿyāⁿ. Ní nguéé caaⁿmáⁿ nī chí 'áámá 'iiⁿyāⁿ chí ch'ete ca yā nguéé ti táámá yā. ⁷¿De'ē cuuvi chí ngaⁿā nī chí naⁿā 'iiⁿyāⁿ chí ch'ete yā? ¿Áá nguéé tee Ndyuūs tanducuéⁿe chí vee yeⁿé nī? ¿De'ē cuuvi chí ngaⁿā nī chí tanducuéⁿe chí vee chí yeⁿé nī ní maáⁿ nī staⁿá nī, ní nguéé díⁿ nī cuenta yeⁿe chíⁿ chí tee Ndyuūs ndís'tií?

⁸Ndís'tií ní nadacadíínuu" nī chí deenú nī nducué"ē chí ye"e nduudu ye"e Dendyuūs. Ní díf" nī tan'dúúca 'ii"yā" chí 'cuiica. Taachi nguée ch'etinee' nū ndúúcu ndís'tií, tuu'mi ní ndís'tií díf" nī tan'dúúca chí reyes ndís'tií. Nduuti chí ndaa tiempo chí ndís'tií caa"má" nī ntií"nyu" tí rey ndís'tií, tuu'mi ní nús'uu caa"ma" ntií"nyú" nū nduucú nī. ⁹Tan'dúúca chí 'úú nadacádíinúú", nús'uu chí apóstoles ní candéé 'nū nduudu ye"e Ndyuūs. Ndyuūs s'neé" yā nus'úú lugar chí ndii na n'giínú ye"e fila. Ní nús'uu canee' nū tan'dúúca 'ii"yā" chí nī"nuú" cánee nguuvi chí 'cuúvi yā, ní nī"nuú" canee' nguuvi chí ch'ii"nú" yā nús'uu. 'Tíicā snéé nús'uu. 'Ii"yā" ye"e i"yee"dí 'cūú ndúúcu ángeles ye"ē nanguuvi n'gíinu yā nús'uu. ¹⁰'Ii"yā" ye"e i"yee"dí 'cūú nga"á yā chí nús'uu tonto 'nū tí ne"é nū Cristo, naati nga"á yā tí ndís'tií ní sa"ā deenu ndís'tií. Nga"á yā tí nús'uu ní 'va'á 'nū naati ndís'tií ní ditiínú nī. Nga"á yā chí nús'uu ní nguée n'dáaca 'nū naati ndís'tií ní n'dáaca nī. ¹¹Ndii nguuvi mii" ní cuiicu 'nū ní yaaca 'nū va. Ní 'āá ntéé n'dee catécai 'nū chí n'daacā. Ní 'iiche ye"é 'nū. Ní 'ii"yā" ch'e"é yā nús'uu. Ní díf" yā chí chéénú 'nū ndii míf" ní ndii 'múú" ní nguée vaacu 'nū. ¹²Ní díf" 'nū ntií"nyu" ndúúcu tá'á 'nū chí cuuvi ch'é 'nū. Taachi 'caa'va yā ye"é 'nū tuu'mi ní 'ii"yā" mii" dí'viicú yā nús'uu. Díf" yā chí nééné ch'eenu 'nū chí nī nús'uu ní chí chéé 'nū ye"é nducué"ē. ¹³Ca"ā yā cunncaā ye"é 'nū ní chéé 'nū ndúúcu vaadi ngiinu. Ndií nguuvi mii" 'ii"yā" nacadiínúú" yā chí nús'uu tan'dúúca deécúú ye"e i"yee"dí 'cūú 'tíica nús'uu. ¹⁴'Úú nguée idinguú" ye"e dendu'ú 'cūú ye"e ndís'tií caati chí cuuvi 'cuinaá" nī. Yaa'ví ndís'tií ye"e nducué"ē chuú tí ndís'tií tan'dúúca daiyá chí nééné ne"é, 'tíicā ndís'tií. ¹⁵'Áará chí véé ndiichi mil maestros chí ngi'cueé" yā ndís'tií

ye"e Cristo, nguée nééné 'yaa" 'ii"yā" chí snéé yā tan'dúúca chiidá nī. 'Úú ní tan'dúúca chiidá nī na ndaata ye"é Dendyuūs, tí candéé evangelio chí nduudu cuaacu chí ngai ye"é Cristo nanáá" ndís'tií. Ní ndís'tií ní chí'téenu nī ní ch'iindiyáá" ntúú" nī na ndaata ye"é Ndyuūs. ¹⁶Cáávā chíi" 'úú idi'cuíftú ndís'tií. Díf" nī tan'dúúca chí 'úú idií".

¹⁷Cáávā chuú dicho'ó Timoteo nanáá" ndís'tií. Sa"ā mii" tan'dúúca daiyá, 'tíica sa. Ní sa"ā chí ne"é. Sa"ā mii" ní 'áamá canee sa ndúúcu 'iivú Ndyuūs. Sa"ā mii" ní ca'cuee" sa ndís'tií ye"e Cristo. Ní n'gaacu nī ye"ē tanducué"ē chí cuuvi díf" nī maa" chí i'teenú nī Cristo tan'dúúca chí 'úú ngi'cuee" nduu cuaa" nducué"ē yáacu va. ¹⁸Maa" ní deenú chí ná"ā ndís'tií nga"ā nī chí n'geete ndai maa" nī. Ní nadacádíinuu" nī chí 'úú ní 'aa ntéé ndaa naachi cánéé nī. ¹⁹Ndaa nuú" ye"é ndís'tií nduuti chí Ndyuūs ne"é yā chí ndaa. Taachi ndaa tuu'mi 'úú cadiínúú" ye"e chí 'ii"yā" chí nga"ā maá" yā chí n'geete yā. Cadiínúú" nduuti chí 'ii"yā" mii" díf" yā tan'dúúca chí Ndyuūs ne"é yā chí díf" yā. ²⁰Nducué"ē ye"e naachi Ndyuūs nga"ā ntií"nyu" yā nguée dámaa" ye"e chí nga"ā yā, tí chíi" chí díf" yā tí poder ye"é Ndyuūs. ²¹De'e ne"é ndís'tií. ¿'Áá ne"e nī chí taachi ndaa ní díf" regañar ndís'tií, o taachi ndaa caa"má" nduucú ndís'tií ndúúcu vaadi né"é?

Nga"ā yā nuu"ndi ye"ē 'áamá sa"ā chí ca"á yā na yaacū

5 N'giindiveé" nū chí nguáá" ndís'tií véé 'áamá sa"ā chí díf" nuu"ndi ca tí canee sa ndúúcu n'daataá chí nguée ye"ē sa. Nguée 'tíicā nguaa" 'ii"yā" gentiles chí nguee i'téenu yā Jesucristo. N'giindiveé" 'nū chí sa"ā mii" sta'a n'daataá ye"ē chiida sa ní canee sá ndúúcu tá. ²Ní ndís'tií nga"ā maá" nī ye"e nī chí n'geete nī n'dáará chí idií" sa"ā mii" nuu"ndi

'tíicā. ¿De'ē cuuvi chi nguéé divíi nī sa^{na} miiⁿ na yaacū ye^{ne}é Ndyuūs ye^{ne}ē yú? ³N'dáará chi 'úú nguéé canee ndúúcu ndís'tiī inacádiinúúⁿ ye^{ne}é ndís'tiī. 'Úú ní caa^{na}máⁿ nuū^{na}ndi ye^{ne}e sa^{na}'ā miiⁿ ye^{ne}e dendú'u chi idiīⁿ sa tan'dúúca chi 'úú canee ndúúcu ndís'tiī. ⁴Taachí nduu-vidáámá ndís'tiī ná chi duuchi Señor Jesucristo tuu^{na}mi ní poder ye^{ne}ē Señor Jesucristo canee ndúúcu ndís'tiī. Ní diīⁿ ní tan'dúúca chi 'úú canee ndúúcu ndís'tiī. ⁵'Tíicā nadacádiinúúⁿ chi ndís'tiī canee cuu^{na}miⁿ chi diīⁿ nī. Divíi nī sa^{na}'ā miiⁿ nguaaⁿ ndís'tiī ti sa^{na}'ā miiⁿ ní canee sa ye^{ne}ē na poder ye^{ne}e yáá^{na}'nguiniūⁿ. 'Tíicā castigo ye^{ne}ē sa. Ní cuuvi cadíinuūⁿ sa ye^{ne}e alma ye^{ne}e sa. Ní cuuvi nangua^{na}'ai alma ye^{ne}ē sa nguuvi chi ndaa ntúūⁿ Señor Jesucristo ye^{ne}ē yú.

⁶Nguéé n'dáacā ndís'tiī ní nga^{na}'á nī chi n'dái ndís'tiī, ní véé 'ii^{na}'yāⁿ chí idiīⁿ yā nuu^{na}ndi nguaaⁿ ndís'tiī. ¿Áá nguéé deenú ní ti ta 'líiⁿ chuundi levadura ichéé ndúúcu tanducue^{ne}ē yaāchí? ⁷Sa^{na}'ā miiⁿ tan'dúúca levadura 'tíicā sa. Ndís'tiī divíi nī sa^{na}'ā miiⁿ ní cūnee n'dáaca nī. Cuneé nī tan'dúúca yaāchí chi nguéé levadura ye^{ne}ē, tan'dúúca pan chí che'e yā ye^{ne}ē pascua. 'Ii^{na}'yāⁿ ch'ii^{na}'núⁿ yā Cristo. Ní Cristo miiⁿ ní tan'dúúca 'iiti cuūchí chi ch'ii^{na}'núⁿ yā cáávā 'viicu pascua. Cáávā s'uúuⁿ ní Cristo miiⁿ ní sta'á yā lugar ye^{ne}ē 'iiti cuūchí ye^{ne}e 'viicu pascua ti ch'ii yā cucáávā s'uúuⁿ. ⁸Maaⁿ ní nguéé dich'ete yú 'viicu ye^{ne}e pascua miiⁿ tan'dúúca 'ii^{na}'yāⁿ chi véé nuu^{na}ndi ye^{ne}é yā ti nguéé ye^{ne}e Cristo 'ii^{na}'yāⁿ s'eeⁿ. Ní nguéé dich'ete yú ndúúcu vaadi n'giinu na staava ye^{ne}ē yú o ndúúcu cosa chi nguéé n'daacā, ti chuū ní tan'dúúca levadura 'tíicā. Dich'ete yú pascua miiⁿ dámaaⁿ ndúúcu nducue^{ne}ē chi n'dáacā na staava ye^{ne}ē yú ti tan'dúúca pan chi nguéé levadura ye^{ne}ē, 'tíicā canee yú.

⁹Áá dinguúⁿ ye^{ne}e ndís'tiī chi nguéé cá^{na}'a nī ndúúcu sa^{na}'ā chi canee sa ndúúcu

n'daataá chi nguéé ye^{ne}ē sa ndíi nguéé cá^{na}'a nī ndúúcu n'daataá miiⁿ. ¹⁰'Úú nguéé nga^{na}'á chi nguéé n'diichí nī sa^{na}'ā chi véé n'daataá ye^{ne}ē sa, o n'daataá chi véé sa^{na}'ā ye^{ne}ē tá, o 'ii^{na}'yāⁿ chi nginche'élí yā 'ii^{na}'yāⁿ, o 'ii^{na}'yāⁿ chi duúcu, o 'ii^{na}'yāⁿ chi i'teenú yā ídolos. Ndís'tiī nguéé cuuvi cuneé nī na i^{na}'yee^{na}'dí 'cūū ní nguéé n'diichí nī 'ii^{na}'yāⁿ ye^{ne}e i^{na}'yee^{na}'dí 'cūū. ¹¹Naati maaⁿ ní 'āā dinguúⁿ ye^{ne}é ndís'tiī chi nguéé cá^{na}'a nī ndúúcu 'ii^{na}'yāⁿ s'eeⁿ chi nga^{na}'á yā chi hermanos ye^{ne}é nī ní nguéé n'daacā idiīⁿ yā, ti sa^{na}'ā chi canee ndúúcu n'daataá chi nguéé ye^{ne}e sa, o n'daataa chi canee ndúúcu sa^{na}'ā chi nguéé ye^{ne}ē tá. Ndíi nguéé cá^{na}'a nī ndúúcu 'ii^{na}'yāⁿ chi i'teenú yā ídolos. Ndíi nguéé cá^{na}'a nī ndúúcu 'ii^{na}'yāⁿ chi nga^{na}'á yā nduudu yaadi, o ndúúcu 'ii^{na}'yāⁿ chi nginche'élí yā 'ii^{na}'yāⁿ, o ndúúcu 'ii^{na}'yāⁿ chi ngii cuu^{na}'vi, o ndúúcu 'ii^{na}'yāⁿ chi duucu. Ní nguéé che'é nī ndúúcu 'ii^{na}'yāⁿ s'eeⁿ. ¹²¿De'ē cúuví chí 'úú n'diichí nuu^{na}ndi ye^{ne}e 'ii^{na}'yāⁿ chi nguéé i'téenu yā Jesucristo ye^{ne}ē yú? Chuū ní nguéé ntiī^{na}'nyuⁿ ye^{ne}é ti ye^{ne}é Dendyuūs. Ndís'tiī canee chi n'diichí nī nuu^{na}ndi ye^{ne}e 'ii^{na}'yāⁿ chi ca^{na}'á yā yaacū ndúúcu nī. ¹³Jesucristo n'diichí yā nuu^{na}ndi ye^{ne}e 'ii^{na}'yāⁿ chi nguéé i'téenu yā Ndyuūs. Maaⁿ ní ndís'tiī divíi nī sa^{na}'ā miiⁿ nguaaⁿ ndís'tiī.

**'Ii^{na}'yāⁿ chi i'téenu yā Señor
Jesucristo na^{na}'á yā nanááⁿ juez
ndúúcu vaadi 'caa^{na}'va ye^{ne}é yā**

6Nduuti chi 'aama chéé ndís'tiī véé vaadi 'caa^{na}'va ndúúcu taama chéé ndís'tiī, ¿de'ē cúuví chí ca^{na}'á nī nanááⁿ juez ye^{ne}e yaāⁿ vaacú nī, ní nguéé ca^{na}'á nī nanááⁿ 'ii^{na}'yāⁿ chi chéé vmaaaⁿ ye^{ne}e yáacū ye^{ne}é nī? ²¿Áá nguéé deenu ndís'tiī ti s'uúuⁿ chi i'teenú yú Jesucristo ndáá nguuvi chi cuuvi n'diichí yú nuu^{na}ndi ye^{ne}e 'ii^{na}'yāⁿ ye^{ne}e i^{na}'yee^{na}'dí 'cūū? Nduuti chi ndís'tiī ca^{na}'á nī n'diichí nī nuu^{na}ndi chi idiīⁿ 'ii^{na}'yāⁿ ye^{ne}e i^{na}'yee^{na}'dí 'cūū,

¿'Áá nguéé cuuvi n'diichí nī ta 'lírī nu-
u"ndi ye"e nī chí nguuaa" ndís'tiī? ³ ¿'Áá
nguéé deenu ndís'tiī chí s'uúú" ca" a yú
n'diichi yú nuu"ndi ye"e ángeles? Ní
nduuti chí cuuvi diī" yú 'tíicā tuu"mi
ní cuuvi n'diichi yú dendu'ū nuu"ndi
chí véé ye"e yú i"yee"dí 'cūū. ⁴ Nduuti
chí canéé chí n'diichí nī dendu'ū vaadi
'caa'va nguuaa" ndís'tiī, n'daacā chí ca"á
nī nanáá" 'ii"yā" ye"e yaacū 'aara chí
nguéé 'ii"yā" chí duū'ví né"e yā ví'í.
⁵ Nga"á chuū chí cuuvi 'cuinaa" nī. ¿'Áá
cadiinu" nī chí nguéé véé mar 'áámá
'ii"yā" nguuaa" ndís'tiī, mar 'áámá 'ii"yā"
chí nguéé cuuvi n'diichí yā du'u hermano
chí véé nuu"ndi ye"e yā? ⁶ Nduuti chí
véé 'aama hermano chí deenu ca nguuaa"
ndís'tiī, ¿de'ē cúúví chí nge"e hermanos
ndúúú'ū vaadi 'caa'va ye"é yā nanáá"
'ii"yā" chí nguéé i'téenu yā Señor Jesu-
cristo ye"é yú?

⁷ Cuaacu ní"nyú" nguéé n'gi"i ndís'tiī
chí ye"e Ndyuūs ndís'tiī ti véé vaadi
'caa'va ye"e 'áámá nī táámá nī ndúúú'ū
ví'í. ¿De'ē cúúví chí nguéé ichéé nī nguuaa"
ndís'tiī dendu'ū chí nguéé n'daacā chí
hermano dí" yā nduucú nī? N'daacā
n'dai chí ichéé nī tanducue"ē nī nguéé
ca"á nī nanáá" 'ii"yā" cucáá'vā hermanos
chí idif" yā ndúúú'ū nī. ⁸ Nds'tiī, her-
manos, ní nguéé n'daacā idif" nī chí ngin-
che'éi nī 'áámá nī ndúúú'ū taama nī chí
hermano ye"e nī.

⁹ Nds'tiī nguéé 'caandiveé" nī chíi" chí
'ii"yā" nga" a yā chí cuaacu ní nguéé
cuaacu. ¿'Áá nguéé deenu nī chí 'ii"yā"
chí nguéé idin'daacá yā nguéé ndaa yā
naachí Ndyuūs nga" a ntiī"nyú" yā? Ní
nguéé 'ii"yā" s'ee" ndí nguéé 'ii"yā"
chí sta'á yā n'daataá ye"e taama sa, o
isa"á ye"e taama ta, ní nguéé n'daataá
chí n'diichi tá sa"á chí nguéé ye"e tá,
ní nguéé sa"á chí n'diichi sa n'daataá
chí nguéé ye"e sá, ndúúú'ū 'ii"yā" chí
i'teenu ídolos chí santos, ndúúú'ū sa"á
chí iduuchinéé" ví'í sa. ¹⁰ Tiicá ntúū"

'ii"yā" duucu, ndúúú'ū 'ii"yā" chí ne"e cá
yā dendu'ū chí véé ye"e taama 'ii"yā",
ndúúú'ū 'ii"yā" chí ngii cúú'ví, ndúúú'ū
'ii"yā" chí nga" a taá" yā ye"é taama
'ii"yā", ndúúú'ū 'ii"yā" chí itá'á yā ye"é
taama yā. Nducue"ē 'ii"yā" s'ee" nguéé
cuuvi nndaá yā naachi Ndyuūs nga" a
ntiī"nyu" yā. ¹¹ Tiicá ntúū" diiī" ndís'tiī.
Dinuu"ndí nī tiempo chí 'āá chó'oo
naati maa" ní Ndyuūs n'diichí yā ndís'tiī
tan'dúúú'ū chí 'āá ntéé véé nuu"ndi ye"é
nī cáá'vā Jesucristo. Maa" ní ndís'tiī ní
dí" nī nducue"ē chí n'daacā ti ye"é Je-
sucristo ndís'tiī. Ní Espíritu N'dai ye"é
Ndyuūs ye"é yú canéé ndúúú'ū nī.

Ye"e chí n'daacā chí diī" yú

¹² Tanducue"ē chí nguéé nuu"ndi cu-
uvi dí"n, naati nducue"ē chí n'daacā
nguéé ne"é dí"n, ti nguéé n'dai chí dí"n.
Cuuvi dí"n tanducue"ē chí ne"é chí
n'daacā, naati nguéé necio canéé ye"é
mar 'áámá dendu'ū. ¹³ Cuaacu chí yúutē
chí che'e yú ní caavā cheeti yú. Cheeti
yú ní ne"e che'e yuūtē. Naati Ndyuūs
di'cuiinú yā yuūtē chí che'e yú ndúúú'ū
cuerpo ye"e yú ndúúú'ū chí véé ye"é.
Nguéé cuuvi caa"ma" yú chí Ndyuūs teé
yā cuerpo ye"e yú chí n'daataá n'diichí
yā sa"á. Ndyuūs dí"n yā chí s'uúú" chí
cuuvi ye"é yā ní cuerpo ye"é yú ní
ye"é Dendyuūs. ¹⁴ Jesucristo chí 'iivi yú,
Ndyuūs nducueé" yā ye"é nguuaa" tiná"á.
'Tiicá ntúū" Ndyuūs nadacueé" ntúū" yā
s'uúú" ndúúú'ū poder ye"é yā.

¹⁵ ¿'Áá nguéé deenu ndís'tiī chí cuerpo
ye"é nī ní ye"e Cristo? ¿'Áá cuta'á nī
'áámá sa"á chí ye"e Cristo ní dí"n nī chí
sa"á mii" ye"é 'áámá n'dáatāa chí 'yaa"
sa"á ye"é tá? Ndyuūs nguéé 'cuáa" yā
chí 'tíicā. ¹⁶ ¿'Áá nguéé deenu ndís'tiī chí
sa"á chí ca" a sa ndúúú'ū n'daataá chí
'yaa" sa"á ye"é tá nduuvi 'aama nú yā?
'Iivú Ndyuūs nga" a yā ndii cuáá" vmnaa"
naachi canéé nguū" na libro ye"e yā 'ti-
icā: Naachí na'uuví yā ní nduuvi 'aama

cuerpo núú yā. ¹⁷ S'uuúⁿ chi i'teenu yú Jesucristo chí 'iivi yú canee yú ndúúcu dáámá espíritu chí yeⁿé Jesucristo.

¹⁸ Nds'itii n'daataá, nguée caⁿá nī ndúúcu saⁿā, o saⁿā nguée caⁿá nī ndúúcu n'daataá, chi idinuuⁿndí nī ti idiiⁿ nuuⁿndí nī ndúúcu cuerpo yeⁿe maáⁿ nī. Castigo yeⁿé nuuⁿndi miiⁿ 'áámá cūnee na cuerpo yeⁿé nī. Tanáⁿa ca nuuⁿndi chí idiiⁿ nī ní nguée contra cuerpo chí yeⁿe maáⁿ nī. ¹⁹ ¿Áá nguée deenú nds'tii chí cuerpo yeⁿé nī chííⁿ chí yaacū yeⁿe Espíritu N'dai yeⁿé Ndyuūs chí canee ndúúcu nds'tii? Ndyuūs tee yā Espíritu N'dai yeⁿe yā nds'tii. Maaⁿ nī cuerpo yeⁿe nī nguée yeⁿe maáⁿ nī ti yeⁿe Espíritu N'dai chí yeⁿe Ndyuūs. Ní Ndyuūs tee yā nds'tii Espíritu N'dai yeⁿé yā. ²⁰ Chuū ní cáávā Jesucristo cái yā nds'tii ndúúcu 'áámá precio chí néené yaⁿai chíiⁿvē. Cáávā chuū dich'eté nī Dendyuūs ndúúcu nuuⁿmáⁿ cuerpo yeⁿe nī ti nds'tii ní yeⁿé Ndyuūs nds'tii.

Pablo ca'á yā consejo 'iiⁿyāⁿ chí n'giindivaacu yā

7 Maaⁿ ní idinguúⁿ ní nan'guēcútāⁿa yeⁿe preguntas chí dingúuⁿ nī yeⁿé. N'daacā chí 'aama saⁿā nguée 'caandavaacu sa. ² Naati 'tíficā. Deenú chí saⁿā neⁿe sa cūnee sa ndúúcu n'daataá. Cáávā chuū n'dáaca chí 'caandavaacu sá ní vée n'daataá yeⁿé sa. 'Tiicá ntúūⁿ chí 'aama n'daataá 'caandavaacu tá ní vée saⁿā yeⁿé tá. 'Tíficā ní nguée dííⁿ yā nuuⁿndi. ³ Saⁿā ní canee chí cun'diití sá ndúúcu n'daataá yeⁿé sa. 'Tiicá ntúūⁿ n'daata miiⁿ canee chí cun'diití tá ndúúcu sáⁿā yeⁿé tá. ⁴ N'daataá chí n'gíindivaacu tá, cuerpo yeⁿé tá nguée yeⁿé tá dámaāⁿ tá ti yeⁿe sa ndúúcu tá. 'Tiicá ntúūⁿ saⁿā miiⁿ. Cuerpo yeⁿé sa nguée yeⁿé sa dámaāⁿ sa ti yeⁿé sa ndúúcu tá. ⁵ Dííⁿ nī cumplir ndúúcu n'daata yeⁿe nī o isaⁿā yeⁿé nī. Nduuti chí nduu 'uuví nī canee yiinú nī yeⁿé 'áámá tiempo

chí 'áámá caaⁿmaⁿngua'á nī ní ndeé nī ndúúcu 'iivú Ndyuūs, tuuⁿmi chuū ní chí dííⁿ nī cumplir tiempo 'cūū. 'Cuiinū caaⁿmaⁿngua'á nī ndúúcu 'iivú Ndyuūs, tuuⁿmi ní dííⁿ nī cumplir ndúúcu isaⁿā o n'daataá yeⁿe nī. Nduuti chí nguée dííⁿ nī 'tuucā, tuuⁿmi ní cuuvi neⁿé nī caⁿá nī ndúúcu táámá saⁿā o n'daataá. Ní yááⁿnguiinūⁿ n'diichínēē sa nds'tii neⁿe chí nguée dííⁿ nī cumplir ndúúcu isáⁿā o n'daataá yeⁿe nī. Ní cuuvi dííⁿ nī nuuⁿndi.

⁶ Úú nguée caaⁿmáⁿ nds'tii chíiⁿ chí dííⁿ nī, nds'tii chí neⁿé nī 'caandavaacu nī. Nguée teé chuū tan'dúúca 'áámá ley. ⁷ Ti neⁿé chí nducyaaca saⁿā nguée 'caandavaacu sa ní cūnee sa dámaāⁿ sa tan'dúúca chí 'úú canee, naati nguē cuuvi chí 'tíficā. 'Úú deenu chí Ndyuūs ca'á yā 'áámá 'áámá 'iiⁿyāⁿ chíiⁿ chí cuuvi dííⁿ yā.

⁸ Úú ngaⁿá ngii saⁿā n'gaiyáa o n'daataá n'gaiyáa ndúúcu n'daataá n'guá'aa chí n'daacā chí 'iiⁿyāⁿ s'eeⁿ nguée 'caandavaacu yā ní cūnee yā dámaāⁿ yā tan'dúúca chí 'úú canee. ⁹ Nduuti chí nguée cuuvi 'cuēetinēē yā damaáⁿ yā, tuuⁿmi ní 'caandavaacu yā. Ti n'daacā chí 'caandavaacu yā ní nguée cūnee yā ndúúcu deseo chí saⁿā neⁿe sa n'daataá o n'daataá neⁿe tá saⁿā.

¹⁰ Chuū ngaⁿá yeⁿé 'iiⁿyāⁿ chí n'giindivaacu yā. Saⁿā miiⁿ nguée diví sa n'daataá yeⁿé sa, o táⁿā miiⁿ nguée diví tá isáⁿā yeⁿé tá. Chuū chí ley yeⁿe Ndyuūs. ¹¹ Nduúti chí 'áámá n'daataá diví tá yeⁿe isaⁿā yeⁿé ta caati nguée yaaⁿ yiinú tá ndúúcu isaⁿā yeⁿé tá, tuuⁿmi ní 'āā ntéé 'caandavaacu tá ndúúcu taama sáⁿā. 'Tiicá ntúūⁿ saⁿā yeⁿé tá nguée cu'neeⁿ sá n'daataá yeⁿé sa cucáávā taama n'daataá.

¹² Maaⁿ ní chuū chí ngaⁿá ngii tanáⁿā 'iiⁿyāⁿ nī cosa tan'dúúca chí deenú chí n'daacā cááva yā. Ní chuū ní nguée ley yeⁿe Ndyuūs. Nduuti chí 'áámá saⁿā chí

i'teenu Ndyuūs ní n'daataá yeⁿē sa ní nguéé i'teenu tá, tuu'mi nguéé cu'neeⁿ sa n'daataá yeⁿē sa nduuti chi táⁿā miiⁿ n'daacā canee tá ndúúcu sa. ¹³ Tiicá ntúūⁿ, n'daataá chi i'teenu tá ní saⁿā yeⁿe tá nguéé i'téenu sa ni n'dáaca canee tá ndúúcu sa, tuu'mi nguéé cu'neeⁿ tá isáⁿā yeⁿē tá. ¹⁴ Sáⁿā yeⁿē tá chi nguéé i'téenu sa ní cuuvi yeⁿé Jesucristo saⁿā miiⁿ cucááavā n'daataá yeⁿē sa chi i'teenu tá. Tiicá ntúūⁿ, n'daataá chi nguéé i'teenu tá ní cuuvi yeⁿé Jesucristo n'daataá miiⁿ cucááavā isaⁿā yeⁿe tá chi i'teenu sa. Ndúúti chi nguéé tíicā, tuu'mi ní nguéé cuuví yeⁿe Jesucristo daiyá yā. Naati tíicā, tuu'mi ní cuuvi yeⁿe Jesucristo daiyá yā. ¹⁵ Naati nduuti chi saⁿā o n'daata chi nguéé i'téenu yā Señor Jesucristo nguéé cūnee n'dáaca saⁿā miiⁿ ndúúcu n'daataá yeⁿē sa, o n'daataá míⁿ ndúúcu isaⁿa yeⁿē tá chi i'téenu yā Señor Jesucristo, tuu'mi ní cuuvi diví yā yeⁿe víi. 'Iiⁿyāⁿ chi i'téenu yā Jesucristo nguéé a fuerza chi cunee yā ndúúcu 'iiⁿyāⁿ chi nguéé i'téenu yā Señor Jesucristo. Ndyuūs neⁿé yā chi 'iiⁿyāⁿ chi i'téenu yā Señor Jesucristo cunee n'dáaca yā ndúúcu vaadí 'diiⁿ. ¹⁶ Ndís'tii 'iiⁿyāⁿ chi i'téenu ní Señor Jesucristo, ¿táácā cuuvi deenú ní nduuti chi cuuvi dinguáⁿai ní isaⁿa yeⁿé ní o n'daataá yeⁿé ní? Nguéé cuuvi déenu ní chuū chi tíicā.

¹⁷ Ndyuūs yeⁿē yú yaa'ví yā s'uúúⁿ chi yeⁿé yā s'uúúⁿ. Ní tee yā 'áámá 'áámá s'uúúⁿ n'tiiⁿnyuⁿ s'uúúⁿ chí yeⁿé yā chí ituneeⁿ s'uúúⁿ. Ní 'íicú véé n'tiiⁿnyuⁿ yeⁿé Ndyuūs yeⁿē 'áámá 'áámá s'uúúⁿ. Ní canee chí 'cuætimee yú n'daacā tan'dúúca Ndyuūs neⁿe yā chí diiⁿ yú. 'Tíicā ngaⁿa n'tiiⁿnyuⁿ 'úú yeⁿē nducyáácá yáacū. ¹⁸ Nduuti chí Ndyuūs yaa'ví yā 'áámá saⁿā yeⁿē ndaata Israel chí cuuvi yeⁿe yā ní 'iiⁿyāⁿ 'āá díⁿ yā circuncidar cuerpo yeⁿe saⁿā miiⁿ ndii chí 'lírⁿ sa tan'dúúca chí ngaⁿa ley yeⁿe 'iiⁿyāⁿ ndaata Israel,

'āá canee sa 'tíicā. Ndúúti chí Ndyuūs yaa'ví yā 'áámá saⁿā chí cuuvi yeⁿé yā ní saⁿā miiⁿ nguéé yeⁿē ndaata Israel ní nguéé díⁿ yā circuncidar cuerpo yeⁿe saⁿā miiⁿ, 'āá canee sa 'tíicā. ¹⁹ Nguéé de'ē vee nanááⁿ Ndyuūs nduuti chí díⁿ yā circuncidar cuerpo yeⁿe saⁿā o nguéé. Dámaāⁿ dichí'vē nduuti chí cu'teenu yú Jesucristo ní diiⁿ yú tan'dúúca chí Ndyuūs neⁿé yā. ²⁰ Tan'dúúca chí ndís'tii 'āá canee ní taachí Ndyuūs yaa'ví yā 'áámá 'áámá ndís'tii 'tiicá ntúūⁿ cunee ní. ²¹ Taachi Ndyuūs yaa'ví yā n'dii chí cuuvi yeⁿé yā, nduuti chí n'dii canee ní tan'dúúca chí canee 'iiⁿyāⁿ chí canee caadi 'iiyu ní nguéé cuuvi naⁿa yā nguéé nacádiinúúⁿ ní de'ē vee yeⁿē chúú. Ní nduuti chí cuuvi canee libre ndís'tii, chí díⁿ ní n'tiiⁿnyuⁿ caadi 'iiyu tuu'mi ní caⁿá ní. Ní cunee ní libre. ²² Taachí Ndyuūs yaa'ví yā 'iiⁿyāⁿ chí canee caadi 'iiyu ní 'iiⁿyāⁿ miiⁿ i'téenu yā Jesucristo, 'iiⁿyāⁿ canee yā tan'dúúca chí libre, tí canee libre yā yeⁿe nuuⁿndi yeⁿé yā. 'Iiⁿyāⁿ chí canee libre taachí Ndyuūs yaa'ví yā 'iiⁿyāⁿ, 'iiⁿyāⁿ miiⁿ nguéé libre tí dichí'vē yā Ndyuūs. ²³ Iivú Ndyuūs ní cái yā ndís'tii ndúúcu 'áámá precio chí néené yaⁿai chíi'vē tí yuuúⁿ yeⁿe daiyá yā. Maaⁿ ní ndís'tii ní yeⁿé Ndyuūs ndís'tii. Ní díⁿ ní n'tiiⁿnyuⁿ yeⁿé Ndyuūs. Nguéé díⁿ ní tan'dúúca 'iiⁿyāⁿ yeⁿe iⁿyeedíⁿ 'cūú chí nguéé i'téenu yā Jesucristo ngaⁿa yā chí díⁿ ní. ²⁴ Ndís'tii hermanos yeⁿé, ca'áámá ca'áámá ndís'tii canee ní ndúúcu Ndyuūs. Naachi canee ní míⁿ canee Dendyuūs ndúúcu ní. ²⁵ 'Úú ca'á 'áámá consejo yeⁿē n'daataá chí nguéé n'giindivaacu tá. Deenú chí ngaⁿá tan'dúúca chí Dendyuūs néⁿé yā, naati chuū ní nguéé ley yeⁿé yā. 'Úú Pablo 'úú chí i'teenú Ndyuūs. Ní Ndyuūs chí'í yā 'úú chíiⁿ chí 'úú díⁿ ní ngaⁿá. ²⁶ 'Úú nadacadiinúúⁿ chí n'daacā chí saⁿā s'eeⁿ 'cuætimee sa damaāⁿ sa. Tí maaⁿ ní deenu yú chí ndaā tiempo chí

n'geenu yú ngii. ²⁷ Ndis'tií sa"á chi véé n'daataá ye"é nī, nguée cu'nee" nī tá"á. Ndis'tií sa"á chi nguée n'daataá ye"é nī nguée in'nuú" nī n'daataá chi cuuvi ye"é nī. ²⁸ Nduuti chi 'áamá sa"á ch'iindivaacu sa, nguée dinuū"ndí sa. Nduuti chi n'daataá mí"n 'caandavaacú tá, nguée dinuū"ndí tá. 'Úú nadacádi-inúú" chi 'ii"yā"n chi ch'iindivaacu yā ní 'cueenu cá yā cuuvi. Nguée ne"é chi ndís'tií 'cueenu cá ní cuuvi.

²⁹ Chuū nga"á ngii ndís'tií hermanos ye"é: Nguée 'naa" tiempo 'cuetineé yú i"yee"dí 'cūū. Sa"á chi véé n'daataá ye"é sa ndii"n sa ntií"nyu"n ye"e 'iivú Ndyuūs vmnáá"n vmnaa"n nguée ti ne"e n'daataá ye"é sa. ³⁰ Nguée dí"n nī cuenta ye"e de'ē vee chi chó'oo ye"é nī. Nduuti chi ngeecú nī ye"e 'aama tiná"á nguée 'naa" tiempo cuēcú nī. Nduuti chi yeenú nī ti véé 'áamá 'viicu nguée 'naa" tiempo cunée vaadi yeenú nanáa"n nī. Nduuti chi ngái nī tuu'mi ní ngáacú nī chi nguée 'naa tiempo cunee. ³¹ Ní ndís'tií chi véé negocio ye"é nī ye"é cosa chi véé ná i"yee"dí 'cūū, nguée 'cuetineé nī dámaā"n ye"e chuū, ti i"yee"dí ndúúcu nducue"é chi vee ye"é ní chó'oo.

³² 'Úú ne"é chi nguée nadacádíinu"n nī ye"é dendu'ū chi véé. Sa"á s'ee"n chi nguée n'giindivaacu sa ndée sa cuidado ye"e dendu'ū chi ye"é 'iivú Ndyuūs. Ní idii"n sa tan'dúúca chi ne"é Ndyuūs. ³³ Sa"á chi n'giindivaacu sa ndée sa cuidado ye"é chi véé na i"yee"dí 'cūū táacā cuuvi cunee yíinū n'daataá ye"é sa. ³⁴ 'Tiicā ntūū"n idii"n n'daataá chí n'giíndiváacu tá. 'Áamá n'daataá chí nguée n'giindivaacu tá ndée tá cuidado ye"e dendu'ū ye"e 'iivú Ndyuūs. Ní dii"n tá ndúúcu nuu"ma"n staava ye"é tá nducue"é chi ne"e Ndyuūs. Nguée 'tíicā idii"n n'daataa chí n'giíndivaacu tá. Ndée tá cuidado ye"e nducue"é ye"é vaacu tá ní táacā chi cuuvi cunee yíinū isa"á ye"é tá.

³⁵ Nga"á ngii ndís'tií chuū: Nguée chi nguée 'caandavaacú nī ti ne"é chi ndís'tií ní cuuvi cunee n'daaca cá nī. Ne"é chi ndís'tií dii"n nī ndúúcu nuu"ma"n staava ye"e nī chii"n chi cuuvi dichí'vē ca Ndyuūs. Ní cu'nee"n nī nducue"é chi véé i"yee"dí 'cūū chí cuuvi nī.

³⁶ Nduuti chi 'áamá sa"á nadacádi-inuu"n sa chi n'daacā chi daiya sa chi n'daataa cuiinu 'caandavaacu tá ti véé nduuyu ye"é tá tuu'mi ní cuuvi dii"n sa n'daacā caava tá. Ní 'caandavaacú tá. Chuū ní nguée nuu"ndi. ³⁷ Nduuti chi táamá sa"á mii"n nguée ne"e sa chi daiya sa 'caandavaacu tá ti canée ditiinú sa na staava ye"é sa chi nguée ne"e sa 'caandavaacu tá, tuu'mi ní cunee libre sa. Ní cuuvi dii"n sa chee chí ne"é sa. Ní dii"n sa cuidado tá"á daiya sa. Ní n'daacā idii"n sa. ³⁸ Sa"á chi nga"á sa chi n'giíndivaacu tá, o sa"á chi nguée ne"e sa chi 'caandavaacú tá, nduu 'uuví sa"á mii"n din'daacá sa. Naati n'daacā ca idii"n sa"á chi nguée ne"e sa chi 'caandavaacú tá.

³⁹ N'daataá chi n'gíidiváacu tá canée chi 'cuetineé tá ndúúcu isa"á ye"é tá núú"mā"n ne"e chí cándúúchi sá. Ndúúti chi 'cuūvi sa"á ye"e tá tuu'mi ní cuuvi 'caandavaacu tá ndúúcu táamá sa"á chi i'téenu sa Jesucristo. ⁴⁰ 'Úú inadacádi-inúú"n chí n'daacā ca ye"é tá chí 'aa ntée 'caandavaacu tá. Chuū chi nga"á nguée dámaā"n ye"e chí 'úú nadicádiinúú"n ti tan'dúúca chí ne"e Espíritu N'dai ye"é Ndyuūs.

Ye"e yuūtē chi 'ii"yā"n cá'a yā ye"é nátaí ye"e ídolos

8 Maa"n ní idinguú"n taama chí ye"e yuūtē ye"e 'iiti chí 'ii"yā"n 'caa"nú"n yā ní cá'a yā yuūtē mii"n ye"é nátaí cáávā ídolos. Deenu yú chí nducyaaca yú deenu yú 'tē ye"e chuū. 'Ii"yā"n chí nadacadiinúú"n yā chí deenú cá yā cuuvi dich'etē maá"n yā 'ii"yā"n. 'Ii"yā"n chí

neⁿé yā Ndyuūs ní neⁿé yā hermanos, 'iiⁿyāⁿ miiⁿ neⁿé yā chi tanáⁿā hermanos chi cuuvi déenu cá yā yeⁿe Ndyuūs. ²'Iiⁿyāⁿ chi nadacádiinúúⁿ yā chi deenu yā nguéé tanducueⁿē deenu yā tan'dúúcā chi canéé chi cuuvi deenu yā. ³Nduuti chi 'áámá 'iiⁿyāⁿ dinéⁿe yā Ndyuūs, tuuⁿmi ní Ndyuūs inaaⁿ yā 'iiⁿyāⁿ miiⁿ. ⁴Maaⁿ ní 'úú neⁿé chi cadiiinúúⁿ ni yeⁿe yuūtē chi 'iiⁿyāⁿ cá'a yā yeⁿe nátai yeⁿe ídolos. Deenu yú chí ídolos nguéé cándu-uchi. Deenu yú ti 'áámá n'dyáⁿā Ndyuūs chi vee yā ní nguéé ca táámá yā. ⁵'Iiⁿyāⁿ ngaⁿa yā chi néené véé cá ídolos na yáⁿāa 'cūú nífcú nanguuvi váá. Ní 'iiⁿyāⁿ ngaⁿá yā chi cosa s'eeⁿ ní dendyuūs s'eeⁿ. ⁶S'uúúⁿ deenu yú chi véé 'áámá nuúⁿ Ndyuūs yeⁿe yú. Ndyuūs Chiida yú chi din'dái yā tanducueⁿē dendu'ū. Ní Ndyuūs dííⁿ yā chi cuuvi yeⁿé yā s'uúúⁿ. Véé 'áámá n'dyáⁿa 'iivú Ndyuūs yeⁿe yú chi Jesucristo. Ndyuūs Chiida yú ndúúcu Jesucristo daiyá yā din'dái yā tanducueⁿē dendu'ū chi véé. Jesucristo yeⁿe yú tee yā vida yeⁿe yú cueⁿe daāⁿmaⁿ.

⁷Nguéé nducyaaca 'iiⁿyāⁿ chi i'téenu yā Jesucristo deenú yā chi 'aama n'dyáⁿā Dendyuūs vee yā. Ndii maaⁿ ní náⁿa yā ní i'téenu yā chi canduuchi ídolos. Taachi 'iiⁿyāⁿ cá'a yā yuūtē yeⁿe nátai yeⁿe ídolos, ní i'téenu yā chi ca'a yā yuūtē nátai yeⁿé dendyuūs s'eeⁿ. Ní taachi 'iiⁿyāⁿ chi duu'ví deenú yā yeⁿe Ndyuūs che'é yā yuūtē yeⁿe nátai s'eeⁿ, 'iiⁿyāⁿ miiⁿ nadacádiinuuⁿ yā chi véé nuūⁿndi yeⁿe yā. ⁸Ndyuūs nguéé diiⁿ cuenta yā yeⁿe s'uúúⁿ nduuti chi nge'e yú yuūtē miiⁿ o nguéé. Nduuti chi nge'e yú yuūtē miiⁿ nguéé idiiⁿ chi n'daacā ca yú. Nduuti chi nguéé che'e yú nguéé idiiⁿ chi nguéé n'daacā ca yú. ⁹Ndís'tii chi déenu nī chee chi Ndyuūs neⁿé yā chi diiⁿ nī, 'caandiveéⁿ nī. Nguéé diiⁿ nī de'ē vee chi 'iiⁿyāⁿ chi duu'ví deenú yā yeⁿe Jesucristo cuuvi nacádiinuuⁿ yā chi vee nuuⁿndi yeⁿe yā. ¹⁰'Úú ngaⁿá ngii ndís'tii chi canee

diituu cá nī chi i'téenu cá nī Ndyuūs. Deenú nī chi nguéé véé nuuⁿndi yeⁿe nī taachi chi snéé na mesa yeⁿe ní'vēē yeⁿe yaācū yeⁿe ídolos. Naati 'iiⁿyāⁿ chi duu'ví déenu yā yeⁿé Jesucristo cuuvi n'diichí yā ndís'tii, tuuⁿmi ní 'iiⁿyāⁿ miiⁿ chi nadacádiinúúⁿ yā chi ndís'tii 'tee 'tee i'téenu nī ídolos. 'Iiⁿyāⁿ miiⁿ cuuvi dííⁿ yā tan'dúúcā ndís'tii idííⁿ nī. Caⁿa yā che'é yā yuūtē miiⁿ ní dííⁿ yā sentir chi véé nuuⁿndi yeⁿé yā. ¹¹'Áará chi cuuvi che'é nī yuūtē 'cūú ní nguéé véé nuuⁿndi yeⁿé nī nguéé neⁿé nī chi hermanos chi duu'ví deenú yā yeⁿe Jesucristo dííⁿ yā 'tíicā, caati nguēcúndíí yā ní 'tee 'tee i'téenu yā ídolos. Ní 'tíicā idiiⁿ hermanos ní Cristo ch'ii yā na cruz ntúūⁿ caavá yā. ¹²Taachí dííⁿ nī 'tuucā 'tíicā idinuuⁿndí nī contra Cristo nífcú contra yeⁿe hermano chi duu'ví déenu yā yeⁿe Jesucristo. Caati hermanos miiⁿ 'tee 'tee i'téenu yā ídolos, ní véé nuūⁿndi yeⁿe yā. ¹³'Úú nacádiinúúⁿ yeⁿe chuū 'tíicā. Nduuti chi 'úú che'é yuūtē miiⁿ, ni 'úú dííⁿ chi hermano chi duu'ví deenú yā yeⁿe Jesucristo che'é yā ní véé nuuⁿndí yā, tuuⁿmi ní 'āā ntéé che'é yuūtē miiⁿ.

Pablo ca'á yā orden ti 'áámá apóstol yeⁿé Jesucristo

9 ¿'Áá nguéé 'úú Pablo 'áámá apóstol 'úú ní cuuvi dííⁿ nducueⁿē chi nguéé nuuⁿndi? ¿'Áá nguéé 'úú nnguaⁿā 'úú? 'Úú n'diichí Señor Jesucristo yeⁿe yú. 'Úú candéé nduudu cuaacu yeⁿe Ndyuūs. Ni ndís'tii i'téenu nī nduudu miiⁿ caavā ntiⁿnyuⁿ yeⁿé. ²Nduuti chi tanáⁿa yā nguēe i'téenu yā chi 'úú apóstol 'úú, ndís'tii i'téenu nī chi cuaacu. Ndís'tii ní tan'dúúcā sello 'tiicá nī, ti i'téenu nī Señor Jesucristo. Ní deenú nī chi 'úú 'aama apóstol yeⁿe Señor Jesucristo. Ndís'tii ní yeⁿe Jesucristo caavā chi 'úú candéé nduudu miiⁿ.

³'Iiⁿyāⁿ chi itínguuneeⁿ yā 'úú yeⁿe chi 'úú chi 'aama apóstol, 'túúcā

nan'gueécúta'á yeⁿe yā. ⁴Nús'uu chi apóstoles ¿'áá nguéé tuneéⁿ 'nū chi ché'é 'nū ní cú'ú 'nū ndúúcū ndís'tiī na vaacu nī? ⁵¿'Áá nguéé tuneéⁿ 'nū chi 'áámá 'áámá 'nū candeé 'nū n'daataá yeⁿe 'nū taachi caⁿ'a 'nū cuaaⁿ cyúúni? 'Túúcā diiⁿ tanáⁿ'ā apóstoles, ndúúcū hermano chi yeⁿe Jesucristo, ndúúcū hermano Pedro. ⁶Dámaāⁿ 'úú ndúúcū Bernabé diiⁿ 'nū ntiīⁿ'nyuⁿ cáávā chi ché'é 'nū. ⁷¿Du'ú soldado diiⁿ sa gastar tuumi caavā gastos yeⁿe sa taachi diiⁿ sa ntiīⁿ'nyuⁿ miiⁿ? ¿Du'ú saⁿ'ā ngiichi sa dí'f'yú uvas ní 'áá nguéé cuuvi ché'é sá yeⁿ'ē? ¿Du'ú 'iiⁿ'yāⁿ chi diiⁿ cuidado 'áámá taaⁿ 'iiti cuūchi ní 'áá nguéé cuuvi cu'ú yā leche yeⁿ'ē 'iiti miiⁿ? ⁸'Úú nguéé ngaⁿ'á chuū tan'dúúcā chi ngaⁿ'a saⁿ'a chi ca'a orden. Ngaⁿ'á chuū, ti 'tíicā ngaⁿ'a ley yeⁿe Moisés miiⁿ. ⁹Canee nguūⁿ na libro yeⁿ'é Ndyuūs chi ley chi Moisés dinguúⁿ yā chi 'tíicā: Nguéé cu'nuúⁿ nī yaana duutú tī chi inde'ei nuúⁿ tī nguaaⁿ trigo chi nguéé cuuvi che'é tī: ¿'Áá ndeε cuidado Ndyuūs dámaāⁿ 'iiti? Nguéé 'túúcā. ¹⁰Cáávā nús'uu, ní cuaacu níⁿ'nyúⁿ canéé nguūⁿ 'tíicā: 'iiⁿ'yāⁿ chí di'cuúndú yā 'iiti ndúúcū 'iiⁿ'yāⁿ chi yiinenaáⁿ yā 'iiti chi inde'ei nuúⁿ tī nguaaⁿ trigo, 'iiⁿ'yāⁿ s'eeⁿ ní cunee ngiinú yā cosechā yeⁿe yā. ¹¹Candeé 'nū nduudu yeⁿ'é Ndyuūs nguaaⁿ ndís'tiī taachi 'āā cuéé 'caandiveéⁿ nī nduudu miiⁿ. ¿'Áá nguéé téé nī nús'uu necesidades yeⁿ'é 'nū? ¹²Nduuti chi tanáⁿ'ā apóstoles cuuvi cuta'á yā necesidades yeⁿ'é yā yeⁿe ndís'tiī, ¿'áá nguéé cuuvi cuta'á 'nu necesidades yeⁿ'é 'nū dendú'ú? Nguéé caaⁿ'máⁿ 'nū chi ndís'tiī téé nī necesidades yeⁿ'é 'nū naatí chi cheé 'nū nducueⁿ'ē dendu'ū, caati 'iiⁿ'yāⁿ cuuvi cu'téenu yā nduudu yeⁿ'e 'iivú Ndyuūs. ¹³¿'Áá nguéé déénú ndís'tiī chuū ndii tiempo chi 'aa chó'oo yeⁿ'e 'iiⁿ'yāⁿ chi diiⁿ ntiīⁿ'nyuⁿ yeⁿ'e yaacū

templo? 'iiⁿ'yāⁿ miiⁿ che'é yā comida yeⁿ'e yaacū. 'Tiicá ntúūⁿ, 'iiⁿ'yāⁿ chi dí'f' yā ntiīⁿ'nyuⁿ yeⁿ'e nátai, 'iiⁿ'yāⁿ miiⁿ che'é ntúūⁿ yā chi véé nátai chí 'iiⁿ'yāⁿ ndée yā ndaa yā nátai. ¹⁴'Tíicā ngaⁿ'a Señor 'iivú Ndyuūs yeⁿ'é 'iiⁿ'yāⁿ chi candeé yā nduudu yeⁿ'e evangelio chí nduudu ngai yeⁿ'é Jesucristo. 'iiⁿ'yāⁿ miiⁿ 'cuéetinée yā ndúúcū 'iiⁿ'yāⁿ chi i'téenu yā Señor Jesucristo, ní ca'á yā 'iiⁿ'yāⁿ s'uuⁿ chi che'é yā. ¹⁵'Úú nguéé sta'á túumī yeⁿ'é nī, ní nguéé che'é de'ē vεε, ti teé túumī ndís'tiī. Nguéé dinguúⁿ chuū chi 'tíicā dí'f' nī nduucú. N'dáácā ca yeⁿ'é chi 'cuūví ní mar 'áámá 'iiⁿ'yāⁿ nguéé cuuvi caaⁿ'maⁿ yā chi 'úú candeé ndúúdu cuaacu yeⁿ'e Dendyuūs cáávā chi nadí'f'vε yā 'úú.

¹⁶'Áará chi ngaⁿ'á evangelio chí ndúúdu ngai yeⁿ'é Jesucristo 'úú nguéé cuuvi caaⁿ'máⁿ chí 'úú chí ch'εεt'ε. Canéé chí caaⁿ'máⁿ yeⁿ'é evangelio, ti cáávā chuū chí'f' chí Ndyuūs dicho'ó yā 'úú. Nééné 'cuenú cuuvi nduuti chí nguéé caaⁿ'máⁿ yeⁿ'ē evangelio. ¹⁷Ndúúti chí caaⁿ'máⁿ yeⁿ'e evangelio ti dí'f' buscar ntiīⁿ'nyuⁿ miiⁿ tuu'mi ní Ndyuūs nadí'f'vε yā 'úú, naati ngueε 'tíicā. Cáávā chuū canéé chí caaⁿ'máⁿ evangelio chí ndúúdu ngai yeⁿ'ē Jesucristo. ¹⁸¿De'ε ndaacā yeⁿ'ē 'úú? Nguéé de'ē vεε ndaacā yeⁿ'é. Cáávā 'úú nadí'f'vε yeⁿ'é chí'f' chí ngaⁿ'á ndúúdu ngai. 'Úú caaⁿ'máⁿ nduudu ngai yeⁿ'é Jesucristo ní yeenú taavi 'úú ti nguéé cutaⁿ'á dendú'ū yeⁿ'e nī. Nguéé caaⁿ'máⁿ chí ndís'tiī tee nī 'úú de'ē vεε cáávā ntiīⁿ'nyuⁿ yeⁿ'é 'aara chí cuaacu chí canéé chí dí'f' nī.

¹⁹N'daacā canéé 'tíicā. Nguéé du'ū vεε cuuvi caaⁿ'maⁿ ntiīⁿ'nyuⁿ yeⁿ'é, ti 'iiⁿ'yāⁿ nguéé nadí'f'vε yā 'úú. 'Úú dichí'f'vε nducyáácā 'iiⁿ'yāⁿ 'iicu cuuvi cu'téenu yā Jesucristo yeⁿ'ē yú. ²⁰'Áará chí maaⁿ nguéé costumbre yeⁿ'é chí idi'f' tan'dúúcā chí ngaⁿ'a ley yeⁿ'ē Moisés, naati taachi canéé nguaaⁿ 'iiⁿ'yāⁿ hebreo s'eeⁿ chí dí'f'

yā tan'dúúicā chi nga^{na} ley ye^{ne} Moisés, 'tíicā idiiⁿ dendu'ū. Idiiⁿ 'tiicā ní 'iicu 'ii^{nyā} hebreo s'eeⁿ cuuvi cu'téenu yā Jesucristo. ²¹ Taachi 'úú caneé ndúúicū 'ii^{nyā} chi 'āā vi'i cā ley ye^{ne} yā nguéé ti ley ye^{ne} Moisés miiⁿ, 'úú idiiⁿ tan'dúúicā 'ii^{nyā} s'eeⁿ. Naati nguéé idiiⁿ cosa chi Ndyuūs nguéé ne^{ne} yā chi 'úú dííⁿ. 'Tíicā idiiⁿ, ní 'íicú 'ii^{nyā} miiⁿ cuuvi cu'téenu yā Jesucristo. ²² Taachi caneé nguuaⁿ 'ii^{nyā} chi duūvā tuu'mi 'úú idiiⁿ tan'dúúicā 'aama chi duūvā, ní 'iicu cuuvi cu'téenu yā Jesucristo. Nduu cuaaⁿ naachi ca^{na} 'úú idiiⁿ nducué^{ne} tan'dúúicā chi idiiⁿ 'ii^{nyā} s'uuⁿ. Idiiⁿ 'tíicā ní 'iicu dííⁿ chí nanguá^{ai} ná^{na} yā. ²³ 'Úú idiiⁿ tanducué^{ne} chuū chi 'úú cuuvi caa^{na} máⁿ nduudu ye^{ne} Ndyuūs nanááⁿ 'ii^{nyā}. Ní cuuvi cuta'a yú cosa chi n'dai chi Ndyuūs téé yā s'uuúⁿ.

²⁴ ¿'Áá nguéé déenu ndís'tii ye^{ne} 'ii^{nyā} chi ngéenu yā na juego? Nducyaaca yā ngéenu yā na juego naati 'áámá núuⁿ yā chi dííⁿ yā ganar ní ndaaca regalo ye^{ne} yā. Maaⁿ ní ndís'tii dííⁿ ní tan'duucā 'aama chi ngéenu yā ní dííⁿ ní ganar. 'Tíicā dííⁿ ní chiiⁿ chi Ndyuūs ne^{ne} yā, ní tunéé ndís'tii chi cuuvi ye^{ne} ní chee chí Ndyuūs téé yā ndís'tii. ²⁵ Ca'áámá ca'aama sa^{na} 'ā chi ngeēnū sa nguéé cuuvi dííⁿ sa nducué^{ne} chi ne^{ne} sa. Dá-maāⁿ idiiⁿ sa cosas chi n'daacā caavā sa cucáavā chi ditiinū sa. 'Tíicā idiiⁿ sa ní cuuví ndaacā sa 'áámá corona ye^{ne} naāndā chi ngo'o yé^{ne}. S'uuúⁿ ní idiiⁿ cá yú tan'dúúicā chí Dendyuūs ne^{ne} yā chi dííⁿ yú, ní ndaaca yú 'áámá corona chi nguéé tuví ye^{ne} chi Dendyuūs téé yā s'uuúⁿ. ²⁶ 'Úú idiiⁿ ntii^{nyu} ye^{ne} Ndyuūs tan'dúúicā 'áámá chi ngeenu na juego ní dííⁿ yā ganar. 'Úú idiiⁿ ntii^{nyu} dítū tan'dúúicā 'ii^{nyā} chi ngu^{nu} yā ndúúicū taamá yā, nguéé tan'duucā chi ngu^{nu} yā ní ngé^{ne} yā na 'yúúné. ²⁷ 'Úú idiiⁿ sufrir cáavā ntii^{nyu} ye^{ne} Ndyuūs, ní dííⁿ n'dai cá ntii^{nyu} miiⁿ.

'Tíicā idiiⁿ, ti nguéé ne^{ne} chi cuayiivi chi caa^{na} máⁿ nduudu cuaacu miiⁿ, Ndyuūs cuuvi caa^{na} máⁿ yā ye^{ne} 'úú chi nguéé n'daacā dííⁿ ntii^{nyu} ye^{ne} yā.

Pablo ca'á yā consejo chi 'ii^{nyā} nguéé canee chi i'teenú yā ídolos

10 Ndís'tii hermanos ye^{ne}, ne^{ne} chi ndís'tii nan'gáácú ní ye^{ne} tiempo chi 'āā chó'oo. 'Ii^{nyā} hebreos dííⁿ yā seguir 'áámá meé^{ne} chí ngíicá nanguuvi. Ndyuūs dicho'ó yā meé^{ne} miiⁿ. Ní nducyaaca 'ii^{nyā} n'diichí yā tíí cue^{ne} meé^{ne} miiⁿ. Ní ngíicá yā ní cho'ó yā naavta^{na} 'ā yíicú chí nuūⁿⁱ 'yá^{na} chí nguuvi Roja naachí Ndyuūs dííⁿ yā chí nduūvi cuu^{na} máⁿ 'áámá yáanu ye^{ne} caavá yā. ² Nducyaaca 'ii^{nyā} ní cue^{ne} yā ndúúicū Moisés. Ní meé^{ne} miiⁿ ch'iⁿⁱ yúúní 'ii^{nyā} s'eeⁿ. Ní cho'ó yā naavta^{na} nuūⁿⁱ 'yá^{na} ndúúicū Moisés miiⁿ. Chuū ní tan'dúúicā chí Ndyuūs cheedínūⁿⁱ yā 'ii^{nyā} s'eeⁿ ndúúicū Moisés miiⁿ. ³ Nducyáácá yā che'é yā pan chí Ndyuūs dicho'o. Ní pan miiⁿ chí chiicā ndii nanguuvi. ⁴ Ndyuūs ca'a yā 'ii^{nyā} s'eeⁿ nuūⁿⁱ chí can'daā na tuūu, ní nducyáácá yā chí'i yā nuuⁿⁱ miiⁿ. Ní tuūu miiⁿ ní tan'dúúicā chí Cristo miiⁿ, 'tíicā. Espíritu ye^{ne} Cristo cue^{ne} ndúúicū yā naachí cue^{ne} yā. ⁵ Ndyuūs nguéé canee yiinú yā tan'dúúicā chí idiiⁿ n'deē n'daí 'ii^{nyā} ti nguéé ch'iindiveéⁿ yā ye^{ne} Ndyuūs. Ní 'ii^{nyā} s'eeⁿ ch'ii yā cuaaⁿ naachi nguéé 'ii^{nyā} na yá^{na} cuū^{na} máⁿ. ⁶ Dendú'ū chuū chí chó'oo ní 'íicú n'diichi yú, 'íicú s'uuúⁿ nguéé ne^{ne} yú ye^{ne} dendú'ū chí nguéé n'daacā tan'dúúicā 'ii^{nyā} s'eeⁿ chí idiné^{ne} yā. ⁷ Cáavā chuū nguéé idiiⁿ yú 'viicu cáavā ídolos, tan'dúúicā chí idiiⁿ taná^{na} 'ii^{nyā} tiempo chí 'āā chó'oo. Canéé nguūⁿ ndii cuááⁿ vma^{na} na libro ye^{ne} Ndyuūs 'tíicā: 'Ii^{nyā} s'eeⁿ dííⁿ yā 'viicu cáavā ídolos, ní ch'etéⁿ yā, ní che'e yā, ní chí'i yā ní ch'iinu chuū, ní nacueeⁿ yā, ní nde'ei yā.

Guayivi ní saⁿa s'eeⁿ n'diichí yā n'daataa s'eeⁿ ní dinuuⁿndí yā. ⁸Nguéé n'diichi yú 'áamá sáⁿā o 'aama n'daataá taachí 'āā cuéé 'caandavaacu yú ndúúcu yā, tan'dúúcā chi idiíiⁿ tanáⁿā 'iiⁿyāⁿ s'eeⁿ. Ní cáávā nuuⁿndí yeⁿé yā, na 'áamá ngu-uvi nūuⁿ n'diicu 'íínú mil 'iiⁿyāⁿ ch'ii yā ná yáⁿāa cuúⁿmáⁿ naachi nguéé 'iiⁿyāⁿ. ⁹Nguéé diiⁿ yú chí tuuⁿví yú Ndyuūs, ti neⁿe yú n'diichí yú nduuti chi Ndyuūs díⁿ yā castigar s'uúúⁿ tan'dúúcā chi Ndyuūs díⁿ yā ndúúcu tanáⁿā 'iiⁿyāⁿ. Ní Ndyuūs dichó'o yā cúú taaⁿ chí che'é tí 'iiⁿyāⁿ s'eeⁿ ní ch'ii yā. ¹⁰Ní nguéé caaⁿmaⁿ taaⁿ yú yeⁿe Ndyuūs tan'dúúcā chi diiⁿ tanáⁿā 'iiⁿyāⁿ s'eeⁿ. Cáávā chuū ní Ndyuūs dichó'o yā ángel yeⁿé yā ní ch'ii yā.

¹¹Tiempo chí 'āā chó'oo ndíí cuááⁿ vm-naaⁿ, chó'oo tanducueⁿē chuū ní canéé nguūⁿ na libro yeⁿé Ndyuūs. Maaⁿ ní s'uúúⁿ cuuvi deenu yú yeⁿe 'iiⁿyāⁿ s'eeⁿ ní nguéé diiⁿ yú tan'dúúcā chí díⁿ yā. ¹²Cáávā chuū 'iiⁿyāⁿ chi nadacadiinúúⁿ yā chí i'teenu diitú yā Ndyuūs canee chí nadacadiinúúⁿ yā chee chí díⁿ yā, ní nguéé 'cuúvā yā na nuuⁿndí. ¹³Ndís'tií 'caandiveéⁿ nī yeⁿé. Mar 'áamá cosa chí nguéé n'daacā nguéé ndaā nanááⁿ ndís'tií nduuti chí nguéé ndaā nanááⁿ tanáⁿā ca 'iiⁿyāⁿ. Ndyuūs ní n'dai ca yā ndúúcu ndís'tií, ní nguéé 'cuúⁿ yā chí ndaā nanááⁿ ndís'tií dendu'ū chí nguee cuuví cuchéé nī. Taachi ndaā dendu'ū chí nguéé n'daacā nanaaⁿ ndís'tií Ndyuūs teé yā fuerzas ndís'tií chí nguéé díⁿ nī dendu'ū chí nguéé n'daacā. Ní 'íícu cuuví cuchéé nī.

¹⁴Cáávā chuū ndís'tií hermanos chí neⁿé taavi, divíí nī yeⁿē nducyaaca ídolos. ¹⁵Úú ngaⁿá ngii ndís'tií chí 'iiⁿyāⁿ chí deenu, ní ndís'tií cuuvi deenú nī yeⁿē chííⁿ chí ngaⁿá nduuti chí nduudu cuaacu o nguéé. ¹⁶Taachi diiⁿ yú 'viicu ní che'e yú Santa Cena yeⁿe Señor Jesucristo ní sta'a yú taza chí cu'u yú vino,

tuuⁿmi ní caaⁿmaⁿ yú gracias Ndyuūs chí di'viicú yā vino miiⁿ. Diíⁿ yú chuū ti maaⁿ ní ch'íⁿi yú chí yeⁿé Cristo s'uúúⁿ. Ní véé vida yeⁿē yú cueⁿe daāⁿmaⁿ cucáávā yuúúⁿ yeⁿé Cristo chí n'geeⁿ. Pan yeⁿē Santa Cena chí n'dee yú, n'dee yú ti maaⁿ ní yeⁿé Cristo s'uúúⁿ. Ní cuerpo yeⁿe yā ca'nééⁿngá'āa na cruz cáávā s'uúúⁿ. ¹⁷S'uúúⁿ ní 'yaaⁿ yú ní nducyaacu yú che'e yú yeⁿē 'áamá pan nūuⁿ. 'Tíicā s'uúúⁿ ní tan'dúúcā 'áamá cuerpo nūuⁿ ti yeⁿé Cristo s'uúúⁿ.

¹⁸Cuin'diichí nī 'iiⁿyāⁿ yeⁿe ndaata Israel tiempo chí 'āā chó'oo. 'iiⁿyāⁿ s'eeⁿ 'caaⁿnúⁿ yā 'iiti ní tee yā yuútē vmnaaⁿ nátaí yeⁿe Ndyuūs. Ní i'téenu yā 'iivú Ndyuūs yeⁿe yú. Guayivi ní che'é yā yuútē miiⁿ. 'Tíicā 'iiⁿyāⁿ ch'íⁿi chí yeⁿé Ndyuūs. ¹⁹Neⁿé caāⁿmáⁿ yeⁿé yuútē chí 'iiⁿyāⁿ che'é yā maaⁿ chí yeⁿe nátaí yeⁿe ídolos. Nguéé véé poder yeⁿē ídolos. Nguéé véé poder yeⁿe yuútē miiⁿ. ²⁰Chúú ní ngaⁿá. 'iiⁿyāⁿ chí ch'iiⁿnúⁿ yā 'iiti s'eeⁿ ní tee yā yuútē nátaí yeⁿe ídolos díⁿ yā chuū cáávā yááⁿnguiinūúⁿ s'eeⁿ. Ní nguéé diiⁿ yā cáávā 'iivú Ndyuūs. 'Úú nguéé neⁿé chí che'é nī yuútē miiⁿ yeⁿe nátaí miiⁿ, nī ndís'tií ní nguéé caⁿá nī lado yeⁿe yááⁿnguiinūúⁿ. ²¹Ndís'tií nguéé cuuvi cu'ú nī vino yeⁿe taza nī yeⁿe chí véé na mesa yeⁿē Santa Cena yeⁿe Jesucristo nduuti chí cu'ú nī yeⁿē chí véé na mesa yeⁿe yááⁿnguiinūúⁿ. Nguéé cuuvi yeⁿé Ndyuūs ndís'tií nduuti chí yeⁿé yááⁿnguiinūúⁿ ndís'tií. ²²¿'Áá neⁿe nī 'cuuⁿmiⁿ nī 'iivú Ndyuūs chí ca'á nī lado yeⁿē yááⁿnguiinūúⁿ? ¿'Áá ditiinú cá ndís'tií nguéé ti 'iivú Ndyuūs ti Ndyuūs nguéé díⁿ yā castigar ndís'tií?

Yeⁿe chí 'iiⁿyāⁿ cuuvi díⁿ yā ti i'teenú yā Jesucristo ní canee yā ndúúcu vaadí neⁿe yeⁿé Ndyuūs

²³Cuuví diiⁿ yú tanducueⁿe chí n'daacā, naati nguéé diiⁿ yú cosa chí nguéé n'daacā ti nguéé véé nuuⁿndí yeⁿē

yú. Nguéé nducueⁿē chi n'daacā chi diiⁿ yú nginnee s'uúúⁿ chi yeⁿe Cristo. Ní dendu'ú miiⁿ chi n'daacā, nguéé n'daacā cá caavā s'uúúⁿ chi i'téenu yú i'ivú Ndyuūs. ²⁴Mar 'áámá 'iiⁿ'yāⁿ chi yeⁿe Cristo damaáⁿ yā nadacádínuuⁿ yā déndu'ú chi yeⁿe maáⁿ yā, naati nadacádínuuⁿ ntúuⁿ yā yeⁿe chi neⁿe tanáⁿ'ā 'iiⁿ'yāⁿ.

²⁵Yúútē chi 'iiⁿ'yāⁿ in'diicuí yā ní'vēē cuuvi che'é nī. Ní nguéé itínguuneeⁿ nī yeⁿe yuútē miiⁿ. 'Tíicā dííⁿ nī ní nguéé dinuuⁿndí nī. ²⁶Ní yáⁿ'āa ndúúcu nducueⁿē chi véé vmnaaⁿ yeⁿē ní yeⁿe i'ivú Ndyuūs.

²⁷Nduuti chi 'aama 'iiⁿ'yāⁿ chi nguéé i'téenu yā Jesucristo dííⁿ yā invitar ndís'tiiⁿ chi che'é nī ndúúcu yā, ní nduuti chi neⁿ'é nī tuu'mi ní caⁿ'á nī ndúúcu yā. Tanducueⁿē chi cun'duú yā na mesa ní che'é nī. Nguéé tiinguuneeⁿ nī de'ē vεe yeⁿe chi che'é nī. 'Tíicā nguεε dinuuⁿndí nī. ²⁸Nduuti chi 'áámá 'iiⁿ'yāⁿ ngaⁿ'a yā ngii yā ndís'tiiⁿ chuu: Yúúte 'cūū ní canéé vmnaaⁿ nátaí yeⁿe ídolos, tuu'mi ní nguéé ché'e nī yuútē miiⁿ. Ní nguéé dííⁿ nī chi 'iiⁿ'yāⁿ miiⁿ cuuvi nadacádiiinúúⁿ yā chi dinuuⁿndí nī. Ní yáⁿ'āa ndúúcu nducueⁿē chi véé vmnaaⁿ yeⁿē ní yeⁿ'é i'ivú Ndyuūs. ²⁹Úú ngaⁿ'á ngii ndís'tiiⁿ chuū. Nguéé che'é nī yuútē miiⁿ chi yeⁿ'ē nátaí taachi 'iiⁿ'yāⁿ ngaⁿ'á yā chi che'é nī yuútē miiⁿ, ti 'iiⁿ'yāⁿ nadacádiiinúúⁿ yā chi véé nuuⁿndí yeⁿ'é nī taachi che'é nī yuútē miiⁿ. 'Úú deenú chi cuuvi che'é yuútē miiⁿ ní nguéé idinuuⁿndí. 'Iiⁿ'yāⁿ chi duu'vī déenu yā yeⁿ'ē Jesucristo nguéé cuuvi ché'e yā. 'Túúca yúúte 'cūū, ní dííⁿ yā juzgar cosa chi nguéé ituneeⁿ yā. 'Úú deenú chi nguéé véé poder yeⁿ'e ídolos. 'Úú caⁿ'á, gracias Ndyuūs caava yuútē miiⁿ, ní che'é yuútē miiⁿ.

³⁰Ndúúti chi caⁿ'á, gracias Ndyuūs cáávā yuútē chi che'é, ¿de'ē cuuvi chi cunncaá ngaⁿ'a yā yeⁿ'e 'úú yeⁿ'ē chi

che'é? ³¹Dííⁿ nī tan'dúúca chi ngaⁿ'á. Ní nduuti chi nge'e nī, o ngi'i nī, o yeⁿ'ē táámá cosa chi dííⁿ nī, ndís'tiiⁿ dííⁿ nī tanducueⁿē cucáávā chi cuuvi dich'eetē n'dai ní Ndyuūs. ³²Nguéé dííⁿ nī cosa chi 'iiⁿ'yāⁿ Israel s'eeⁿ o 'iiⁿ'yāⁿ s'eeⁿ chi nguéé ndaata Israel, o 'iiⁿ'yāⁿ s'eeⁿ chi i'téenu yā Jesucristo yeⁿ'ē yú cuuvi nadacádínuuⁿ yā chi véé nuuⁿndí yeⁿ'é nī. ³³'Āā tíí nūuⁿ lugar taachi 'úú caneé, 'úú idiíⁿ tanducueⁿē chi cunéé yiinu 'iiⁿ'yāⁿ na lugar miiⁿ. Nguéé idiíⁿ cosa chi neⁿ'é maáⁿ, ti dííⁿ tanducueⁿē ní i'icu cuuvi nanguáⁿ'ai 'iiⁿ'yāⁿ.

11 Ndís'tiiⁿ ní dííⁿ nī tan'dúúca chi 'úú idiíⁿ ti 'úú idiíⁿ tan'dúúca chi Cristo chi'cueeⁿ yā 'úú.

Yeⁿ'ē n'daata s'ééⁿ chí caⁿ'á yā yaācū

²'Úú ngaⁿ'á n'daacā yeⁿ'e ndís'tiiⁿ hermanos yeⁿ'é ti n'gaacú nī yeⁿ'e 'úú, ndúúcu tanducueⁿē dendu'ú. Ní dííⁿ nī tan'dúúca chi 'úú ngi'cueeⁿ ndís'tiiⁿ. ³'Úú neⁿ'é chi cadíinūūⁿ ndís'tiiⁿ chi Cristo miiⁿ ní ngaⁿ'a ntiíⁿ'nyúⁿ yā yeⁿ'ē nducyaaca saⁿ'ā. 'Ícú saⁿ'ā ní ngaⁿ'ā ntiíⁿ'nyuⁿ sa yeⁿ'e n'daataá yéⁿ'e sa. 'Ícú Ndyuūs Chida yú ngaⁿ'ā ntiíⁿ'nyúⁿ yā yeⁿ'e Cristo miiⁿ. ⁴Nducyáácá saⁿ'ā chí ngaⁿ'ángua'a sa o ngaⁿ'a sa nduudu yeⁿ'é Ndyuūs ndúúcu sndiiⁿ yeⁿ'ē sa chi canúúⁿ tííⁿ sa, ngíí 'cuináaⁿ sa. ⁵Nducyáácá n'daataá chi ngaⁿ'ángua'a tá o ngaⁿ'a tá nduudu yeⁿ'é Ndyuūs ní nguéé ndεεcu paño yeⁿ'e tá tííⁿ tá, ngíí 'cuináaⁿ tá ti idiíⁿ tá tan'dúúca chi ndíí tííⁿ ta. ⁶Ndúúti chi nguéé ndεεcu paño yeⁿ'e tá tííⁿ tá tuu'mi ní cuū tá yuudū tííⁿ tá. Nduuti chi 'aama n'dáataá ngíí 'cuináaⁿ tá chi ndíí tííⁿ tá, tuu'mi ní canéé chi chεεcu paño yeⁿ'e tá tííⁿ tá. ⁷Saⁿ'ā ní nguéé cánéé chí caaⁿ'maⁿ sa nduudu yeⁿ'é Ndyuūs ndúúcu sndiiⁿ yeⁿ'ē sa chi canuuⁿ tííⁿ sa, ti Ndyuūs din'dái yā saⁿ'ā tan'dúúca maáⁿ yā chí caaⁿ'maⁿ ntiíⁿ'nyuⁿ sa, 'tíicā. Saⁿ'ā s'uúuⁿ, saⁿ'ā ní diiⁿ sa ntiíⁿ'nyuⁿ yeⁿ'e

Ndyuūs. N'daataá nguée 'tíicā. Idiiⁿ tá chííⁿ chí ngaⁿ'a isaⁿ'a yeⁿ'e tá, ti saⁿ'a miiⁿ caaⁿ'maⁿ ntiⁿnyuⁿ sa yeⁿ'e n'daata miiⁿ. 8 Ti Ndyuūs nguée din'dái yā saⁿ'a yeⁿ'e n'daataá naati din'dái yā n'daataá yeⁿ'e sáⁿ'a. 9 Ti Ndyuūs nguée din'dái yā saⁿ'a chí dichíí'vē sa n'daataá, naati din'dái yā n'daataá chí dichíí'vē tá saⁿ'a. 10 N'daataá ní canéé chí ndéecu paño yeⁿ'e tá tííⁿ tá ti chíí'í tá chí nguée caaⁿ'maⁿ ntiⁿnyuⁿ tá. Tiicá ntúūⁿ ángel s'eeⁿ ní chí canuúⁿ tínuú náaⁿ yā taachí canéé yā nanaáⁿ 'iivú Ndyuūs. 11 Ndyuūs dííⁿ yā chí sáⁿ'a nguée canēe sa dāmāⁿ sa, ndíí nguée n'daataá canēe tá dāmāⁿ tá. Ndyuūs dííⁿ cuenta chí saⁿ'a ní n'daataá daama daamá yā nanaáⁿ yā ti Jesucristo chíí yā cucááⁿvā nduu 'uuví 'iiⁿyāⁿ s'uuⁿ. 12 Vmnaáⁿ vmnaaⁿ n'daata miiⁿ ní yeⁿ'e saⁿ'a. Maaⁿ ní saⁿ'a chí'indiyáaⁿ sa yeⁿ'e n'daataá naati tanducueⁿ'e dendu'ū ní yeⁿ'e 'iivú Ndyuūs.

13 ¿De'ē nadacadiinúⁿ ní yeⁿ'e chuū? ¿Áá n'daacā chí n'daata caaⁿ'maⁿngua'a tá ndúúcu Ndyuūs 'aara chí nguée ndéecu paño yeⁿ'e tá tiiⁿ tá? 14 Nducyááca 'iiⁿyāⁿ deenú yā chí saⁿ'a chí n'géénūu yuūdū tííⁿ sa ti 'cuináaⁿ sa. 15 Nduuti chí n'daata n'géénūu tííⁿ tá n'daacā yeⁿ'e tá. Ní yuūdū tííⁿ tá n'daacā chí in'díí tiiⁿ tá chí tan'dúúca 'áámá paño. 16 Nduuti chí 'iiⁿyāⁿ neⁿ'e caaⁿ'maⁿ taáⁿ yā yeⁿ'e chuū, 'úú nguée cuuvi caaⁿ'maⁿ cá yeⁿ'e ti 'tíicā costumbre yeⁿ'e yú. Tiicá ntúūⁿ costumbre yeⁿ'e nducyaaca 'iiⁿyāⁿ chí i'téenu yā Jesucristo.

Cosas chí nguée n'daacā idiiⁿ yā taachí che'é yā Santa Cena yeⁿ'e Señor Jesucristo

17 Maaⁿ ní 'úú idinguúⁿ yeⁿ'e ndís'tiiⁿ ti nguée n'daacā dííⁿ ní. Taachí nduuvidaamá ní nguée n'daacā ca idiiⁿ ní ti cunncáa ca idiiⁿ ní. 18 'Úú n'giindiveéⁿ chí ndís'tiiⁿ nguée daama vaadi cadiiⁿ-

uuⁿ yeⁿ'e ní taachí nduuvidaamá ní ná yaacū. Véé 'téé chí i'teenú chí cuaacu chí chí'indiveéⁿ. 19 Canéé chí véé chí nduuvidaamá 'āá ví'í caā ndís'tiiⁿ chí i'téenu ní Jesucristo, ti cuuvi deenú ní che'é hermanos nguaaⁿ ndís'tiiⁿ chí 'áámá canee yā chí i'téenu cá yā. 20 Taachí 'āá ví'í caā nduuvidaamá ní ní che'é ní Santa Cena yeⁿ'e Señor Jesucristo nguée che'é ní Cena miiⁿ tan'dúúca chí Jesucristo caⁿ'a ntiⁿnyuⁿ yā. 21 Ndís'tiiⁿ nguée canee ngínú ní taachí ndaa nducyaaca hermanos naati ca'áámá ca'aamá ní dííⁿ núúⁿ yiinu ní ní caⁿ'a ní na yáacū ní che'é ní Cena yeⁿ'e ní. Ní taachí ndaa tiempo chí che'é ní Santa Cena náⁿ'a ní ní cuicu ní. Tanáⁿ'a ní ní cuu'vi ní. 22 ¿De'ē chuū? ¿Áá nguée véé va'ai yeⁿ'e ní naachi cuuvi che'e ní ní cu'cu ní? Nduuti chí nguée neⁿ'e ní repartir Cena yeⁿ'e ní, ¿de'ē cuuvi chí candéé ní Cena yeⁿ'e ní cheeti yaacū? Nguée n'daacā idiiⁿ ní taachí nduuvidaamá ní na yaacū yeⁿ'e 'iivú Ndyuūs. Dííⁿ ní cosa chí cuuvi 'cuináaⁿ 'iiⁿyāⁿ chí nguée véé chí che'e yā. ¿De'ē neⁿ'e ní chí 'úú caaⁿ'máⁿ ndúúcu ndís'tiiⁿ yeⁿ'e chuū? ¿Áá neⁿ'e ní chí 'úú caaⁿ'máⁿ ndúúcu ndís'tiiⁿ chí n'daacā idiiⁿ ní? Nguée cuuvi caaⁿ'máⁿ 'tiicā.

Chuū historia yeⁿ'e Santa Cena yeⁿ'e Señor Jesucristo

(Mt. 26.26-29; Mr. 14.22-25; Lc. 22.14-20)

23 'Iivú Señor Jesucristo chíí yā 'úú chííⁿ chí 'úú ca'cueéⁿ ndís'tiiⁿ. Nguuinú miiⁿ chí 'āá cuée nca'a Judas Iscariote miiⁿ Jesucristo chí ndíí yā preso na ta'á 'iiⁿntyéⁿ'e, Jesús miiⁿ ní sta'a yā pan. 24 Chíinu Jesús nca'a gracias Ndyuūs cááⁿvā pan miiⁿ, tuu'mi ní n'deé yā pan. Ní Jesús ní caⁿ'a yā chíí yā discípulos yeⁿ'e yā: Ndís'tiiⁿ cuta'á ní ní che'e ní. Pan 'cūú chí 'úú n'deé tan'dúúca cuerpo yeⁿ'e 'tíicā. Ní cuerpo yeⁿ'e ca'á chí n'deé cucááⁿvā ndís'tiiⁿ. Nadííⁿ ní chuū, ní taachí

nache'é nī pan miiⁿ ní nan'gaacú nī yeⁿé 'úú cueⁿe daāⁿmaⁿ. ²⁵ Cuayiivi chi che'é nī pan 'cūū Jesús sta'a ntúuⁿ yā taza chi s'néeⁿ vino ní ngaⁿa yā: Vino cheeti taza 'cūū ní tan'dúúca yuúúⁿ yeⁿé 'tíicā. Ndúúcu yuúúⁿ yeⁿé idiíⁿ 'áámá compromiso chí ngai. Nadiíⁿ nī chuúⁿ ní taachi nangi'í ní vino miiⁿ nan'gaacú nī yeⁿé 'úú cueⁿe daāⁿmaⁿ. ²⁶ Maaⁿ ní taachi che'é nī pan 'tíicā, ní cu'ú nī vino yeⁿe taza 'tíicā, tuu'mi ní ch'i'í nī 'iiⁿyāⁿ chi Jesucristo ch'ii yā caavā ndís'tii. Nadiíⁿ nī Cena 'cūū ndii tiempo chi ndaa Jesucristo taama vmnéⁿēe.

Yeⁿe táacā cuuvi che'e yú Santa Cena yeⁿe Señor Jesucristo

²⁷ 'Iiⁿyāⁿ chi nge'é yā pan yeⁿe Cena 'cūū ní ng'i ntúuⁿ yā vino yeⁿe taza yeⁿe Santa Cena yeⁿe Jesucristo, canéé chi canéé ndúúcu staava yeⁿe yā dēeve nanááⁿ Dendyuūs. Nduuti chi nguée dēeve staava yeⁿe yā nanááⁿ Dendyuūs taachi che'é yā Cena miiⁿ, tuu'mi ní diiⁿ nuuⁿndí yā contra cuerpo yeⁿe Señor Jesucristo ndúúcu yuúúⁿ yeⁿe yā dendu'ū, ti nguée díⁿ yā respetar Jesucristo. ²⁸ Caava chūū 'áámá 'áámá 'iiⁿyāⁿ chi neⁿé yā che'é yā yeⁿe Santa Cena yeⁿe Señor Jesucristo, canéé chi n'diichi maáⁿ yā ndúúti chí dēeve staava yeⁿe yā nanááⁿ Dendyuūs. Taachí dēeve staava yeⁿe yā nanááⁿ Dendyuūs tuu'mi ní cuuvi che'e yā pan yeⁿe Santa Cena yeⁿe Señor Jesucristo, ní cu'ú yā vino yeⁿe taza yeⁿe Cena 'cūū. ²⁹ 'Iiⁿyāⁿ chi nge'é yā ní ng'i yā yeⁿe Cena yeⁿe Señor Jesucristo ní nguée nacáadiinúúⁿ yā yeⁿe cuerpo yeⁿe Jesús chí ch'ii caava s'uúúⁿ, Dendyuūs díⁿ yā castigar 'iiⁿyāⁿ miiⁿ. Véé nuuⁿndi yeⁿe yā nanááⁿ 'iivú Ndyuūs. Maáⁿ yā dinuuⁿndí yā ní diiⁿ yā chi cuuvi castigado yā. ³⁰ Cáavā chi díⁿ nī 'túúca, 'yaaⁿ n'dái ndís'tii ní duuva nī, ní náⁿa nī ní ngíta nī, tanáⁿā nī ch'ii nī nguaaⁿ ndís'tii. ³¹ Ndúúti chi

s'uúúⁿ n'diichi maaⁿ yú chi n'daacā canee yú nanááⁿ Ndyuūs yeⁿe yú, Ndyuūs nguée díⁿ yā castigar s'uúúⁿ. ³² Taachi 'iivú Ndyuūs n'diichí yā nuuⁿndi yeⁿe yú ní nguée dēeve staava yeⁿe yú taachi che'e yú Santa Cena yeⁿe Jesucristo, tuu'mi ní teé yā 'aama castigo s'uúúⁿ. Níicú nadacadíinuuⁿ yú yeⁿe nuuⁿndi yeⁿe yú. Ní 'íicú nguée canee yú condenado tan'dúúca tanáⁿā 'iiⁿyāⁿ yeⁿe iⁿyeⁿe díⁿ 'cūū chi nguée i'téenu yā 'iivú Ndyuūs.

³³ Maaⁿ ní ndís'tii hermanos yeⁿe, taachi nduuvidaamá nī ní che'é nī Santa Cena yeⁿe Jesucristo 'cuēetinee ngiinú nī ti ndaā tanáⁿā hermanos yeⁿe nī. ³⁴ Nduuti chi 'áámá 'iiⁿyāⁿ cuiicú yā, canéé chí che'é yā na vaacú yā. Tuu'mi ní nducyaaca nī nduuvidaama nī na yaacú ní che'é nī Santa Cena yeⁿe Señor Jesucristo. 'Tíicā cuuvi che'é nī pan ní ng'i nī vino ní diiⁿ nī respetar Señor Jesucristo. Ní n'diichí Ndyuūs chi nguée véé nuuⁿndi yeⁿe nī. Tan'dúúca tanáⁿā chí véé 'úú caaⁿmáⁿ yeⁿe taachi ndaá ní cuneé ndúúcu nī.

Yeⁿe nducuéⁿe chí Espíritu N'dai yeⁿe Ndyuūs téé yā s'uúúⁿ ti yeⁿe Señor Jesucristo

12 Maaⁿ ní 'úú neⁿe idinguúⁿ yeⁿe chí nca'a Espíritu N'dai yeⁿe Ndyuūs s'uúúⁿ. Neⁿe chí cadíinuuⁿ nī chuú. ² Ndís'tii chí nguée 'iiⁿyāⁿ yeⁿe ndaata Israel ndís'tii, ti taachi 'āa cuée i'teenú nī Señor Jesucristo díⁿ nī tan'dúúca costumbre yeⁿe nī ní s'téenu nī ídolos chí nguée cuuvi caāⁿmaⁿ. ³ Neⁿe chí ndís'tii cadiinúúⁿ nī chuú. 'Iiⁿyāⁿ chí canee ndúúcu Espíritu N'dai yeⁿe Ndyuūs ní ngaⁿá yā nduudu cuaacu yeⁿe Dendyuūs, nguée cuuvi caaⁿmáⁿ yā contra yeⁿe Jesucristo. 'Iiⁿyāⁿ chí ngaⁿá yā chí Jesucristo ní 'iivú Ndyuūs yeⁿe yā, ngaⁿa yā 'túúca ti Espíritu N'dai yeⁿe Ndyuūs díⁿ yā chí 'túúca chí ngaⁿa yā.

⁴ Espíritu N'dai yeⁿé Ndyuūs tee yā nti-
iⁿnyuⁿ s'uūuⁿ chí 'āā vi'i caā ntiⁿnyuⁿ
yeⁿē 'áámá 'áámá s'uūuⁿ. Ní tee yā
poder s'uūúⁿ chi cuuvi diiⁿ yú ntiⁿnyuⁿ
miiⁿ chí 'āā vi'i caā. Niicu véé 'áámá
n'dyáⁿā Espíritu N'dai yeⁿé Ndyuūs.
⁵ Idiⁿ yú n'dee nááⁿ ntiⁿnyuⁿ chí 'āā
vi'i caā chí yeⁿe 'iivú Ndyuūs, naati
nducyaaca ntiⁿnyuⁿ miiⁿ ní yeⁿe 'áámá
n'dyáⁿā 'iivú Ndyuūs. ⁶ N'dee nááⁿ nti-
iⁿnyuⁿ yeⁿe Dendyuūs véé chí idiⁿ yú ní
Ndyuūs ngínnee yā 'áámá 'áámá s'uūúⁿ.
⁷ Ndyuūs tee yā Espíritu N'dai yeⁿé yā
s'uūúⁿ ní Espíritu miiⁿ nginnee s'uūúⁿ.
Ní s'uūúⁿ cuuvi cunnee yú nducyaaca
'iiⁿyāⁿ chí i'téenu yā Señor Jesucristo chí
'iivi yú. ⁸ Espíritu N'dai miiⁿ ní cunnee
tanáⁿā 'iiⁿyāⁿ chí ngaⁿa n'dáaca yā ndu-
udu yeⁿé Ndyuūs. Espíritu N'dai yeⁿé
Ndyuūs nginnee naⁿa 'iiⁿyāⁿ chí cuuvi
caaⁿmaⁿ yā ndúúcu vaadi deenú ca. Dá-
maāⁿ 'áámá n'dyáⁿā Espíritu N'dai miiⁿ
diiⁿ chuū. ⁹ Ní Espíritu N'dai miiⁿ ní
nginnee nducyaaca 'iiⁿyāⁿ chí i'téenu cá
yā Dendyuūs. Ní Espíritu N'dai nginnee
náⁿā 'iiⁿyāⁿ ní ca'á poder miiⁿ 'iiⁿyāⁿ
s'uūⁿ chí 'iiⁿyāⁿ s'uūⁿ cuuvi diiⁿ yā chí
nduūvā yeⁿé 'iiⁿyāⁿ chí ngiitā. ¹⁰ Es-
píritu N'dai miiⁿ ca'á naⁿa 'iiⁿyāⁿ chí
idiⁿ yā vaadi n'giinuú ní nga'a poder
náⁿā 'iiⁿyāⁿ chí cuuvi candéé yā ndu-
udu cuaacu yeⁿé Ndyuūs. Espíritu N'dai
miiⁿ ní diiⁿ chí náⁿā 'iiⁿyāⁿ cuuvi déenu
yā chee 'iiⁿyāⁿ ngaⁿá yā caavā Es-
píritu N'dai yeⁿé Ndyuūs o cáāvā es-
píritu yeⁿe yááⁿn'guinuūⁿ. Ní Espíritu
N'dai ca'a náⁿa yā poder chí caaⁿmaⁿ
yā n'dee nááⁿ davaacu, ní náⁿa yā chí
caⁿa yā chíⁿ chí neⁿe caaⁿmaⁿ ndu-
udu miiⁿ. ¹¹ 'Áámá n'dyáⁿā Espíritu N'dai
yeⁿé Ndyuūs tee yā poder 'áámá 'áámá
s'uūúⁿ chí cuuvi diiⁿ yú ntiⁿnyuⁿ yeⁿé yā
tan'dúúca chí néⁿe yā.

S'uūúⁿ ní tan'dúúca chí s'uūúⁿ ní 'áámá cuerpo nūⁿ s'uūúⁿ

¹² Tíicā véé 'áámá cuerpo yeⁿé yú
ní néené n'dee nááⁿ chí véé yeⁿé. Ní
ndúúcu n'dee nááⁿ chí véé yeⁿé, ni yeⁿé
'áámá cuerpo nūⁿ, 'túúca. Cucáāvā chí
yeⁿe Jesucristo s'uūúⁿ, tuuⁿmi s'uūúⁿ ní
tan'dúúca chí s'uūúⁿ ní 'áámá cuerpo
nūⁿ s'uūúⁿ. Ní cuerpo miiⁿ ní Jesucristo
miiⁿ. ¹³ Ti cáava Espíritu N'dai yeⁿé
Ndyuūs miiⁿ ngeēdinuūⁿniⁿ yú ní maaⁿ
ní s'uūúⁿ ní yeⁿé 'áámá cuerpo s'uūúⁿ.
Nduuti chí 'iiⁿyāⁿ Israel chí judíos s'uūúⁿ,
o 'iiⁿyāⁿ griegos s'uūúⁿ o 'iiⁿyāⁿ chí snéé
caadi 'iivy s'uūúⁿ, o 'iiⁿyāⁿ chí diiⁿ nti-
iⁿnyuⁿ cáāvā maáⁿ yā s'uūúⁿ, nducyaaca
s'uūúⁿ ní yeⁿé 'áámá Espíritu N'dai yeⁿé
Dendyuūs.

¹⁴ Tíicā cuerpo yeⁿé yú, ní nguéé
'áámá n'dyáⁿā nūⁿ ti 'yaaⁿ n'dái yeⁿé.
¹⁵ Ndúúti chí ca'a yú chí ngíi ngaⁿa ní
miiⁿ ní caaⁿmaⁿ: Caati 'úú nguéé 'áámá
ta'á 'úú nguéé yeⁿe cuerpo yeⁿe yú. ¿Áá
nadacadínuuⁿ ní chí cáāvā chíⁿ chí caⁿa
ca'a yú, ní ca'a yú nguéé yeⁿe cuerpo
yeⁿe yú? Nguéé 'tíicā. ¹⁶ Ndúúti chí veeⁿ
yú chí ngíi ngaⁿa ní miiⁿ ní caaⁿmaⁿ:
Caati 'úú ní nguéé 'áámá nduutináaⁿ 'úú
nguéé yeⁿe cuerpo yeⁿé yú. ¿Áá nada-
cadínuuⁿ ní chí cáāvā chíⁿ chí caⁿa
veeⁿ yú, ní veeⁿ yú nguéé yeⁿé cuerpo
yeⁿe yú? Nguéé 'tíicā. ¹⁷ Nduuti chí nu-
uⁿmaⁿ cuerpo yeⁿé yú ní 'áámá nduuti-
naaⁿ yú tuuⁿmi ní ζtaacā cúuvi 'caandi-
veeⁿ yú? Ní ndúúti chí nuuⁿmáⁿ cuerpo
yeⁿé yú ní veeⁿ yú tuuⁿmi ní ζtáacā cu-
uvi 'táaⁿnuⁿ yú? ¹⁸ Dendyuūs s'néeⁿ yā
ca'áámá ca'áámá chí canee yeⁿé cuerpo
yeⁿé yú na lugar naachi canee yiinú yā.
¹⁹ Nduuti chí cuerpo yeⁿé yú ní 'áámá
parte nūⁿ ¿tíi canéé nducuéⁿé cuerpo
yeⁿé yú? ²⁰ Tíicā Dendyuūs din'dái yā
'áámá cuerpo yeⁿé yú chí n'dee nááⁿ chí
vee naati véé 'áámá cuerpo yeⁿé yú.

²¹ Nduuti chi nduutinaaⁿ yú chi ngíí ngaⁿa ní miiⁿ ní caāⁿmaⁿ yeⁿe ta'ā yú 'tíicā: Dii ta'ā, nguéé dichíí'vē di. 'Ticá ntúūⁿ tiiⁿ ra yú ní caaⁿmaⁿ yeⁿe ca'ā yú 'tíicā: Díí ca'á, nguéé dichíí'vē dii. Nguéé cuuvi 'tíicā. ²² Dendu'ū chi snée na cuerpo yeⁿe yú chi duūvā ní 'lííⁿ chi nguéé diiⁿ yú cuenta yeⁿe, chííⁿ chi neené dichíí'vē s'uuúⁿ. ²³ Dendu'u chi yeⁿe cuerpo yeⁿe yú chí nacadiinuuⁿ yú chí nguéé importante, chuū ní diiⁿ yú cuidado yeⁿe tan'dúúicā chí ch'ēete ca. Dendu'ū yeⁿe cuerpo yeⁿe yú chí nguéé neⁿe yú chí 'iiⁿyāⁿ n'díichi yā chí n'díi yú ndúúicū catecai yú. ²⁴ Tanáⁿā parte yeⁿe cuerpo yeⁿe yú 'āā n'daacā canee 'āā tiiⁿ caā. Dendyuūs dííⁿ yā cuerpo yeⁿe yú ní diiⁿ yā chí cundēē ca yú cuidado yeⁿe nducuéⁿe chí nadacādiinuuⁿ yú chí nguéé importante yeⁿe cuerpo yeⁿe yú. ²⁵ Chuū ní diiⁿ Dendyuūs chí nducuéⁿe parte yeⁿe cuerpo n'daacā diiⁿ n'tiiⁿnyūⁿ yeⁿe cuerpo yeⁿe yú. Ní nducuéⁿe cuerpo yeⁿe yú diiⁿ yú cuidado 'áámá parte yeⁿe yú ndúúicū táámá parte yeⁿe yú. ²⁶ Nduuti chí diiⁿ yú cuidado yeⁿe 'áámá dendú'ū nūuⁿ yeⁿe cuerpo yeⁿe yú ti diiⁿ sufrir, tuu'mi ní nuuⁿ-maⁿ ch'ēete cuerpo yeⁿe yú diiⁿ sufrir. Nduuti chí dich'ēeté yā 'áámá dendu'ū yeⁿe cuerpo yeⁿe yú tuu'mi ní n'úú'máⁿ cuerpo yeⁿe yú ní yeenú taavi.

²⁷ Chuū chí caaⁿmaⁿ. Maaⁿ ní nducyaaca ndís'tii ní yeⁿe cuerpo yeⁿe Cristo Jesús. Ní ca'áámá ca'áámá ní véé parte yeⁿe cuerpo yeⁿe Cristo Jesús. ²⁸ Ndyuūs tee yā n'tiiⁿnyuⁿ ca'áámá ca'áámá s'uuúⁿ chí i'teenu yú Jesucristo. Vmnaáⁿ vmnaaⁿ ca'a yā n'tiiⁿnyuⁿ chí ch'ēete ca chí n'tiiⁿnyuⁿ yeⁿe apóstoles chí dich'ó Dendyuūs. Cuayiivi ní tee yā tanáⁿā yú n'tiiⁿnyuⁿ yeⁿe profetas chí ndēē yú nduudu yeⁿe 'iivú Ndyuūs. Cuayiivi ní tee yā tanáⁿā yú n'tiiⁿnyuⁿ chí maestros yeⁿe nduudu yeⁿe Ndyuūs. Ní tanáⁿā yú Ndyuūs tee

yā n'tiiⁿnyuⁿ s'uuúⁿ chí diiⁿ yú vaadī n'giinu. Tuu'mi ní tee yā tanáⁿā yú n'tiiⁿnyuⁿ chí diiⁿ yú chí induūvā yeⁿe 'iiⁿyāⁿ. Tee yā tanáⁿā yú n'tiiⁿnyuⁿ chí cunnee yú 'iiⁿyāⁿ. Tee yā tanáⁿā yú n'tiiⁿnyuⁿ chí caaⁿmaⁿ n'tiiⁿnyuⁿ yú yeⁿe 'iiⁿyāⁿ chí cunnee yā 'iiⁿyāⁿ chí dííⁿ yā n'tiiⁿnyuⁿ yeⁿe Ndyuūs. Ni teé yā n'tiiⁿnyuⁿ tanáⁿā yú chí ngaⁿa yú n'dee 'nááⁿ davaacu. ²⁹ ¿'Áá nadacadínuuⁿ ní chí nducyaaca yú apóstoles? ¿'Áá nadacadínuuⁿ ní chí nducyaaca yú profetas chí ndēē nduudu yeⁿe 'iivú Ndyuūs? ¿'Áá nadacadínuuⁿ ní chí nducyaaca yú maestros yeⁿe nduudu yeⁿe Ndyuūs? ¿'Áá nducyaaca yú diiⁿ yú vaadī n'giinu? ³⁰ ¿'Áá nducyaaca yú cuuvi diiⁿ yú chí nduuvā yeⁿe 'iiⁿyāⁿ? ¿'Áá nducyaaca yú ngaⁿa yú n'dee 'naaⁿ davaacu? ¿'Áá nducyaaca yú cuuvi caaⁿmaⁿ yú chí neⁿe caaⁿmaⁿ táámá davaacu? Nguéé 'tíicā. ³¹ Canéé chí diiⁿ yú n'tiiⁿnyuⁿ yeⁿe Dendyuūs tan'dúúicā chí Dendyuūs neⁿe yā chí diiⁿ yú. Ní caavā s'uuúⁿ ní n'tiiⁿnyuⁿ miiⁿ ní n'daacā ca. Maaⁿ ní 'úú 'cuuⁿmíⁿ ndís'tii táácā cuuvi chí diiⁿ yú chí más cā n'daacā ca.

Yeⁿe vaadī neⁿe chí ch'ēete n'dái

13 Nduuti chí s'uuúⁿ caaⁿmaⁿ yú tan'dúúicā chí ngaⁿa 'iiⁿyāⁿ chí deenu, o tan'duucā chí ngaⁿa ángeles, ní nguéé neⁿe yú nducyaaca 'iiⁿyāⁿ, tuu'mi ní nduudu yeⁿe yú tan'duucā 'áámá cūū 'lííⁿ chí n'gēecu, o tan'dúúicā 'áámá cu'u lata chí di'cuēcú yú. ² Ndúúti chí Ndyuūs tee yā n'tiiⁿnyuⁿ s'uuúⁿ chí cuuvi caaⁿmaⁿ yú dendú'ū chí cuchii, ní nduuti chí cadiinuuⁿ yú nducuéⁿe chí yeⁿe Ndyuūs chí nguēe deenu tanáⁿā yā, ní nducuéⁿe vaadī deenu chí yeⁿe iⁿ'yeeⁿdí 'cūū, ní nguéé neⁿe yú nducyaaca 'iiⁿyāⁿ, tuu'mi ní chíiⁿ chí diiⁿ yú nguéé dichíí'vē nanááⁿ Dendyuūs. Ní nduuti chí i'teenu ca yú Dendyuūs chí cuuvi caaⁿmaⁿ yú yeⁿe 'áámá yīicū 'tíicā: N'dii yīicū, di-

víi ní ye^{nē} 'muuⁿ, ní yīicū miiⁿ ca^{nā} taama lado. Ní nduuti chí nguéé ne^{nē} yú nducyaaca 'iiⁿyāⁿ, tuu'mi ní chiiⁿ chí diiⁿ yú nguéé dichíí'vē nanááⁿ Dendyuūs. ³Ndúúti chí ca'a yú nducué^{nē} chí véé ye^{nē} yú 'iiⁿyāⁿ chí nguéé ye^{nē} yā, ní 'áará chí ca'a yú maaⁿ cuerpo ye^{nē} yú chí 'iiⁿyāⁿ cuucú yā s'uuúⁿ cucáávā chí nga^{nā} yú nduudu cuaacu, ní nguéé ne^{nē} yú nducyaaca 'iiⁿyāⁿ, tuu'mi ní nguéé de'ē veé chí diiⁿ yú chí dichíí'vē nanááⁿ Dendyuūs.

⁴Ndúúti chí s'uuúⁿ ní ne^{nē} yú nducyaaca 'iiⁿyāⁿ ní nguéé caaⁿmaⁿ taaⁿ yú ndúúcu 'iiⁿyāⁿ ní cucheé yú tanducué^{nē} tuu'mi ní neene n'dai yú. Ndúúti chí s'uuúⁿ ne^{nē} yú nducyaaca 'iiⁿyāⁿ ní nguéé nguēē yú chiiⁿ chí naaⁿ yú chí véé ye^{nē} 'iiⁿyāⁿ. Ní nguéé nadacadíinuⁿ yú chí ch'ēete n'dai yú. Ní nguéé maāⁿ yú caaⁿmaⁿ yú chí ch'ēete n'dai maāⁿ yú. ⁵Ndúúti chí s'uuúⁿ ne^{nē} yú nducyaaca 'iiⁿyāⁿ nguéé a fuerza diiⁿ yú dámaāⁿ chí ne^{nē} yú. Ní nguéé nadacadíinuⁿ yú dámaāⁿ ye^{nē} maaⁿ yú, naati nginneé yú 'iiⁿyāⁿ chí di'vaachi. Ní cucheé yú taachí 'iiⁿyāⁿ s'eeⁿ dí'vaachí yā s'uuúⁿ. Ní nguéé nadacadíinuⁿ yú ye^{nē} chí nguéé n'daacā. ⁶Nduuti chí s'uuúⁿ ne^{nē} yú nducyaaca 'iiⁿyāⁿ nguéé yeenu yú taachi táamá 'iiⁿyāⁿ díⁿ yā chí nguēē n'daacā, ti yeenu yú taachi 'iiⁿyāⁿ díⁿ yā dendu'ū chí n'daacā. ⁷Nduuti chí s'uuúⁿ ne^{nē} yú nducyaaca 'iiⁿyāⁿ tuu'mi ní cuhéé yú tanducué^{nē} dendu'ū chí chó'ōo ndúúcu yú. Ní nguéé i'teenu yú tanducué^{nē} dendu'ū chí n'giindiveeⁿ yú chí 'iiⁿyāⁿ nga^{nā} ye^{nē} táamá 'iiⁿyāⁿ ye^{nē} chí nguéé n'daacā idiíⁿ yā. Ní cunee yíinu yú nducué^{nē} chí n'daacā. Ní cuhéé yú ye^{nē} tanducué^{nē} dendu'ū chí diitu n'dái taachí chó'ōo ye^{nē} yú.

⁸Nduuti chí s'uuúⁿ ne^{nē} yú nducyaaca 'iiⁿyāⁿ, tuu'mi ní 'áamá canee yú ndúúcu vaadi ne^{nē} ye^{nē} Dendyuūs chí 'áamá cūnéé ndúúcu yú. Ndaā tiempo chí pro-

fetas chí nga^{nā} nduudu ye^{nē} Dendyuūs 'āā ntéé caaⁿmaⁿ yā 'tiicā. Ní 'iiⁿyāⁿ chí nga^{nā} yā n'deeé 'nááⁿ davaacu 'āā ntéé caaⁿmáⁿ yā 'tíicā. Ní vaadi déenū ntúūⁿ chí 'iiⁿyāⁿ nga^{nā} ní cho'ōo ye^{nē}. Dámaāⁿ canee vaadi ne^{nē}. ⁹Maaⁿ ní caaⁿmaⁿ yú nduudu ye^{nē} Dendyuūs tan'dúúca chí n'gi'í yā s'uuúⁿ naati Ndyuūs nguéé chí'í yā s'uuúⁿ vaadi déenū ye^{nē} tanducué^{nē}. ¹⁰Taachí chó'ōo tanducué^{nē} dendu'ū chí canéé chí chuii tuu'mi ní deenu yú nducué^{nē}, nguéé dámaāⁿ 'téé nūⁿ.

¹¹Taachí sa^{nā} lííⁿ 'úú, nga^{nā} tan'dúúca chí nga^{nā} da'cáiyā ní nadacadíinuⁿ tan'duucā da'cáiyā. Taachí chí ch'ēete 'úú 'āā ntéé díⁿ tan'dúúca da'cáiyā. ¹²Maaⁿ ní inaaⁿ yú tanducué^{nē} tan'dúúca chí inaaⁿ yú cheeti 'áamá espejo yaāⁿ yááiⁿ, ní nguéé inaaⁿ yú n'daacā. Cuayivi miiⁿ ní n'diichi yú 'iivú Señor Jesucristo dánaaⁿ dánaaⁿ yú. Maaⁿ ní 'téé nuúⁿ deenu yú. Cuayivi miiⁿ ní snaaⁿ yú tan'dúúca 'iivu Señor Jesucristo n'diichí yā s'uuúⁿ. 'Tíicā snaaⁿ yú. ¹³Ná vida ye^{nē} s'uuúⁿ véé 'iinū chí n'daacā. Véé chí i'teenu yú Dendyuūs, ní véé chí canee ngiinu yú chí diiⁿ Dendyuūs ndúúcu yú, ní véé chí ne^{nē} yú Dendyuūs. Nduu 'iinú naaⁿ chuū ní chíiⁿ chí ch'ēetē n'dai, ní chííⁿ chí ne^{nē} yú 'iivú Dendyuūs ní ne^{nē} yú nducyaaca 'iiⁿyāⁿ.

Ye^{nē} chí 'iiⁿyāⁿ nga^{nā} yā táamá davaacu

14 Nducué^{nē} chí diiⁿ yú canéé chí diiⁿ yú chí n'daacā, ti ne^{nē} yú nducyaaca 'iiⁿyāⁿ. Véé ntiíⁿnyuⁿ ch'ēete ye^{nē} Ndyuūs. Ntiíⁿnyuⁿ miiⁿ chuū chí vnnááⁿ vnnaaⁿ chí ndís'tii cuuvi ne^{nē} ní chí díⁿ ní. Chííⁿ chí caaⁿmáⁿ ní nduudu cuaacu chí Ndyuūs chí'í yā ndís'tii. ²'Áamá hermano ye^{nē} yú chí nga^{nā} táamá davaacu chí n'dááⁿ chí nguéé déenū yú, hermano miiⁿ nguéé nga^{nā}

sa ndúúcū 'iiⁿyāⁿ ti ngaⁿa sa ndúúcū Ndyuūs. S'uuúⁿ ngueε n'giindiveeⁿ yú nduudu miiⁿ, naati Ndyuūs n'giindiveeⁿ yā, ní hermano miiⁿ ngaⁿa sa yeⁿe es-píritu yeⁿe maaⁿ sa. ³ 'Iiⁿyāⁿ chi ngaⁿa yā nduudu yeⁿe Ndyuūs na veedi dííⁿ yā chi hermanos chi i'téenu cá yā Ndyuūs. Ní ca'cueeⁿ yā hermanos. Ní cá'a yā 'viich'etfínūⁿ hermanos. ⁴ 'Iiⁿyāⁿ chi ngaⁿá yā nduudu chi n'dááⁿ chi nguéeⁿ deenu tanáⁿa 'iiⁿyāⁿ, 'iiⁿyāⁿ miiⁿ ngí'cueeⁿ maáⁿ yā. Ní 'iiⁿyāⁿ chi candéε nduudu yeⁿe Ndyuūs chí n'giindiveeⁿ tanáⁿa yā, 'iiⁿyāⁿ miiⁿ ngí'cueeⁿ yā tanáⁿa yā chi snúūⁿ yaācū.

⁵ Neⁿé chi nducyaaca ndís'tií cuuvi caaⁿmáⁿ nī tanáⁿa davaacu chi n'dááⁿ naati n'daacā ca chi caaⁿmáⁿ nī nduudu yeⁿe Ndyuūs na veedi ní n'giindiveeⁿ yā 'iiⁿyāⁿ. 'Iiⁿyāⁿ chi ngaⁿá yā tanáⁿa davaacu chi n'dááⁿ chi nguéeⁿ deenu yú, 'iiⁿyāⁿ s'eeⁿ nguéeⁿ ca'cueeⁿ yā s'uuúⁿ. Dá-maāⁿ n'giindiveeⁿ yú nduuti chi táámá yā caaⁿmáⁿ yā de'é neⁿe caaⁿmaⁿ nduudu miiⁿ. ⁶ Ndís'tií hermanos yeⁿe, ndúúti chi 'úú ndaá ní caaⁿmáⁿ ndúúcū táámá davaacu chi n'dááⁿ chi nguéeⁿ n'giindiveeⁿ nī, ¿táácā cuuvi cunnee ndís'tií? Naati nduuti chi caaⁿmáⁿ na veedi tuu'mi ní cuuví caaⁿmáⁿ yeⁿe cosas chi cuchii, o yeⁿe nduudu cuaacu chí n'dai chí yeⁿe Ndyuūs. Tuu'mi ní cuuvi 'cuetinee nī tan'dúúcā chi ngaⁿá nduudu yeⁿe Ndyuūs, ní ca'cueeⁿ ndís'tií.

⁷ Taachí 'iiⁿyāⁿ itii'ví yā 'áámá flauta, o tuu'ví yā 'áámá guitarra, ní nguéeⁿ n'daaⁿ tono chi itii'ví yā, o tuu'ví yā tuu'mi ní ¿táácā cuuvi deenu tanáⁿa 'iiⁿyāⁿ de'ε música chi itii'ví yā o tuu'ví yā? ⁸ Nduuti chi 'áámá soldado itii'ví yā trompeta yeⁿe música yeⁿe caanda, ní ngueε n'daaⁿ tono chi itii'ví yā, ¿táácā cuuvi deenu tanáⁿa soldados ní cu-undiyaáⁿ yā chi 'āā ndaá caanda? ⁹ Tí-icá ntúúⁿ. Nduuti chi ndís'tií ní caaⁿmaⁿ nī ndúúcū nduudu chi nguéeⁿ deenu

tanáⁿa yā ¿táácā tuumicadiinúúⁿ yā chi ngaⁿá nī? Ndís'tií ní dííⁿ nī tan'dúúcā chi ngaⁿá nī na 'yúúné. ¹⁰ Nééne n'dee 'nááⁿ davaacu véé iⁿ'yeeⁿdí 'cūū. Ní 'iiⁿyāⁿ cu-uvi caaⁿmáⁿ yā maaⁿ na nduudu yeⁿe yā nducuéⁿe chi neⁿe yā ní tanáⁿa 'iiⁿyāⁿ s'eeⁿ 'caandiveeⁿ yā nduudu yeⁿe yā. ¹¹ Nduuti chi 'úú ngueε n'giindiveeⁿ nduudu yeⁿe tanáⁿa 'iiⁿyāⁿ tuu'mi ní 'iiⁿyāⁿ miiⁿ canée yā tan'dúúcā 'áámá 'iiⁿyāⁿ chi canúúⁿ yúúní. 'Tííca ntúúⁿ, 'úú ní canée tan'dúúcā 'áámá 'iiⁿyāⁿ chi canúúⁿ yúúní ti nguéeⁿ n'giindiveeⁿ yā nduudu yeⁿe. ¹² Ndís'tií chi neⁿe nī dííⁿ nī ntii'nyuⁿ ch'ete yeⁿe Ndyuūs, ngiicá nī Espíritu N'dai yeⁿe Ndyuūs chi téé yā ntii'nyuⁿ ndís'tií, ntii'nyuⁿ chi cuuví ca'cueeⁿ nī nduudu yeⁿe Ndyuūs 'iiⁿyāⁿ. Ní 'íicú 'iiⁿyāⁿ cuuvi déenu ca yā yeⁿe Ndyuūs.

¹³ 'Iiⁿyāⁿ mííⁿ chi caaⁿmaⁿ yā táámá davaacu chi n'dááⁿ canée chi ngiicá yā Ndyuūs de'ε chi neⁿe caaⁿmaⁿ nduudu chí caⁿa yā. Ní cuuvi caaⁿmáⁿ yā tanáⁿa yā nduudú miiⁿ. ¹⁴ Nduuti chi 'úú caaⁿmáⁿnguaⁿá ndúúcū táámá davaacu chi n'dááⁿ ní nguéeⁿ deenu chííⁿ chí caaⁿmáⁿ tuu'mi ní dámaāⁿ espíritu yeⁿe caāⁿmaⁿ. Ní 'úú ní nguéeⁿ tuumicadiinúúⁿ de'ε vee chi caaⁿmáⁿ. ¹⁵ ¿De'ε dííⁿ tuu'mi? Caaⁿmaⁿnguaⁿá ndúúcū nduudu na veedi ní espíritu yeⁿe ní túúmícadíinúúⁿ chííⁿ chi dííⁿ. Ní caatá ndúúcū nduudu na veedi ní espíritu yeⁿe ní túúmícadíinúúⁿ chííⁿ chi caatá dendu'ū. ¹⁶ Ndúúti chi ndís'tií caaⁿmaⁿnguaⁿá nī ndúúcū táámá davaacu chi n'dááⁿ ní ngaⁿá nī 'tíicā: N'díí Ndyuūs, gracias, ní dííⁿ nī ndúúcū espíritu yeⁿe nī, tuu'mi ní ¿táácā cu-uvi caaⁿmaⁿ tanáⁿa yā chi 'tíicā chiiⁿ chi ngaⁿa nī? ¹⁷ 'Áárá chí n'daacā ngaⁿa nī, nguéeⁿ cunnee nī 'iiⁿyāⁿ chi caⁿá yā yaācū. ¹⁸ 'Úú Pablo ncaⁿá gracias Ndyuūs yeⁿe yú chi ngaⁿá cá n'dee 'nááⁿ davaacu chi n'dááⁿ ndúúcū espíritu yeⁿe ngueε ti ndís'tií. ¹⁹ Taachí ngaⁿá na yaācū n'daacā ca chí caaⁿmáⁿ nyuⁿu

nduudu na veedi chi 'úú cadiinúúⁿ ní 'iicu ca'cueéⁿ tanáⁿa yā, ti 'úú ngaⁿá ta ndiichi mil nduudu táámá naaⁿ davaacu chi n'dááⁿ chi nguéé itúúmícadíinuuⁿ tanáⁿa yā.

²⁰ Ndíst'itii hermanos yeⁿé, nguéé nadacadíinuuⁿ nī tan'dúúcā dá'caiyāā, o tan'dúúcā 'áámá dá'cuá'āa chi nguéé inadacadíinuuⁿ yā yeⁿé nuuⁿndi yeⁿe yā 'tíicā nī. Maaⁿ ní nducueⁿē chi dííⁿ nī ní nadacadíinuuⁿ nī yeⁿé tan'dúúcā saⁿā n'geete nadacadíinuuⁿ sa. ²¹ Canéé nguúⁿ na libro yeⁿé Ndyuūs ndii cuááⁿ vmnaaⁿ 'tíicā: 'Úú chi 'iivú Ndyuūs ngaⁿá chuū. 'Úú dicho'o 'iiⁿyāⁿ chi canúúⁿ yúúni chi ngaⁿá yā nduudu cuaacu yeⁿé ndúúcū táámá naaⁿ davaacu. Ndaa yā nanááⁿ 'iiⁿyāⁿ s'eeⁿ ní 'iiⁿyāⁿ s'eeⁿ nguéé neⁿé yā 'caandiveéⁿ yā nduudu yeⁿé. 'Tíicā ngaⁿa Ndyuūs. ²² Cáávā chiiⁿ ní Ndyuūs ca'á yā poder 'iiⁿyāⁿ chi caaⁿmáⁿ yā n'dee 'naaⁿ davaacu chi 'iiⁿyāⁿ nguéé tuumicadíinuuⁿ yā. Ní chííⁿ chí n'gíⁿi Ndyuūs ní 'aama seña chi poder yeⁿe yā cááva 'iiⁿyāⁿ chi nguéé i'téenu yā Ndyuūs. Nguéé caavā s'uuúⁿ chi i'téenu yú. 'Iiⁿyāⁿ chi ca'cueéⁿ yā nduudu yeⁿé Ndyuūs ní ngaⁿa yā cáávā s'uuúⁿ chi i'teenu yú nguéé ti cáávā 'iiⁿyāⁿ chi nguéé i'téenu yā Dendyuūs yeⁿé yú. ²³ Nduúti chi 'iiⁿyāⁿ chi nguéé i'téenu yā 'iivú Ndyuūs, o 'iiⁿyāⁿ chi canúúⁿ yúúni, ndaa yā na yáacū ní nduuvidaamá yā ndúúcu yú ní nducyaaca yú ngaⁿa yú davaacu chí n'dááⁿ. 'Áá nguéé caaⁿmáⁿ yā chi s'uuúⁿ ní loco yú? ²⁴ Nduúti chi nducyaaca nī ca'cueeⁿ nī nduudu yeⁿé Ndyuūs na veedi ní ndaa 'áámá 'iiⁿyāⁿ cheeti yāacū, 'iiⁿyāⁿ chi nguéé i'téenu yā 'iivú Ndyuūs o nguéé déenu yā 'iivú Ndyuūs yeⁿé yú, tuuⁿmi ní 'iiⁿyāⁿ miiⁿ cuuvi dííⁿ yā sentir nuuⁿndi yeⁿé yā. Ní nadacadiinúúⁿ yā yeⁿé nuuⁿndi yeⁿé yā na staava yeⁿé yā. ²⁵ 'Iiⁿyāⁿ miiⁿ ní cuuvi deenú yā de'ē chi maáⁿ yā nadacadiinúúⁿ yā na staava yeⁿe yā chi nguéé cuuvi

n'diichi yā. Ní 'iiⁿyāⁿ miiⁿ cundiitín'díí yā ní cu'téenu yā Ndyuūs. Ní ngaⁿá yā 'tíicā: Cuaacu nííⁿnyúⁿ Ndyuūs canéé yā ndúúcu ndís'tii.

Diiⁿ n'daacá nī tanducueⁿe ndúúcu orden

²⁶ Ndíst'itii ní 'tíicā dííⁿ nī taachi nduvidáámá nī. Naⁿa ndís'tii ní candée nī 'aama canción. Ní naⁿa nī ch'eeⁿnee listo nī chi ca'cueéⁿ nī tanáⁿa yā. Naⁿá nī ní ch'eeⁿnee listo nī chi caaⁿmáⁿ nī 'áámá nduudu cuaacu yeⁿé Ndyuūs. Naⁿá nī ní caaⁿmáⁿ nī táámá naaⁿ davaacu chi n'dááⁿ naati n'nuúⁿ nī vmnaaⁿ vmnaaⁿ 'áámá hermano chi cuuvi caaⁿmáⁿ de'ē chi neⁿe caaⁿmaⁿ nduudu s'eeⁿ chi n'dááⁿ. 'Tíicā cuuvi, ní cu'téenu cá nī yeⁿé 'iivú Ndyuūs. ²⁷ Damaāⁿ 'uuví o 'iinú nī 'aama 'aamá nī caaⁿmáⁿ nī ndúúcu naaⁿ davaacu, nduudú chí n'dááⁿ, naati táámá nī ch'eeⁿnee listo chí caaⁿmáⁿ nī de'ē neⁿé caaⁿmāⁿ nduudu s'eeⁿ chí n'dááⁿ. ²⁸ Nduuti chí nguéé véé 'áámá yā nguaaⁿ ndís'tii chí cuuvi caaⁿmaⁿ de'ē neⁿe caaⁿmāⁿ nduudu s'eeⁿ chí n'dááⁿ tuuⁿmi 'iiⁿyāⁿ nguéé cuuvi caaⁿmáⁿ yā ndúúcu davaacu chí n'dááⁿ naachi nduuvidaamá nī. Naati 'iiⁿyāⁿ miiⁿ cuuvi ndeé yā cúunú cúunú ndúúcu Dendyuūs ndúúcu davaacu chí n'dááⁿ. ²⁹ Taachí nduuvidaamá nī, 'uuví nī o 'iinú nī candée nī nduudu cuaacu yeⁿé Ndyuūs ní ca'aama ca'aama nī caaⁿmáⁿ nī nduudu na veedi ní tanaⁿá yā nadacadíinuuⁿ yā yeⁿe nduudu chí ngaⁿa nī. ³⁰ Ní nduuti Ndyuūs ní n'gíⁿi yā 'áámá ndís'tii chí véé nī 'áámá nduudu yeⁿé yā chí caaⁿmáⁿ nī, tuuⁿmi ní 'iiⁿyāⁿ chí candée yā nduudu miiⁿ canéé chí téé yā lugaⁿ chí caaⁿmáⁿ nī nduudu yeⁿé Ndyuūs. ³¹ 'Tíicā nducyaaca nī cuuvi caaⁿmáⁿ nī nduudu yeⁿé Ndyuūs ca'áámá ca'áámá nī. Tanáⁿa nī n'giindiveeⁿ nī. Ní 'tíicā ní cuuvi déenu cá nī yeⁿé Ndyuūs ní cu'téenu cá nī yeⁿé yā. ³² 'Iiⁿyāⁿ

chi caaⁿ máⁿ yā nduudu yeⁿé Ndyuūs deenu yā de'ε tiempo chi caaⁿ máⁿ yā. ³³Ndyuūs neⁿé yā chi véé orden chæti yāacū yeⁿé yā ní véé vaadi 'diiⁿ. 'Tíicā ní ch'eeⁿnéé 'diiⁿ nī dendu'ū na staava yeⁿé nī. 'Tíicā cānee tanducueⁿē yaācū yeⁿé Ndyuūs. ³⁴Taachi nduuvidáámá nī n'daataá nguéé cuuvi candæe tá nduudu yeⁿe Dendyuūs, naati 'diiⁿ 'diiⁿ nūuⁿ 'cuæetinéé cheendí tá. 'Tíicā canéé nguūⁿ na ley yeⁿé Ndyuūs. ³⁵Nduuti chi 'áámá n'daataá nguéé tuumicadíínuuⁿ tá yeⁿe nducueⁿē chi ngaⁿa yā chæti yaācū, tuu'mi taachi ndaa tá ná vaacu tá cuuvi níttínguuneeⁿ ta isaⁿā yeⁿe tá. Nduuti chi 'ááma n'daataá candæe tá nduudu yeⁿé Ndyuūs chæti yaācū, tuu'mi 'cuináⁿ tá.

³⁶¿'Áá nguéé neⁿé nī 'caandiveéⁿ nī chi dinguúⁿ yeⁿe nī? ¿Dé'ε ra tuu'mi? ¿'Áá yeⁿe ndís'tií nduudu yeⁿe Ndyuūs o ndaā dāmáāⁿ nanááⁿ ndís'tií nduudu miiⁿ? ³⁷Nduuti chi 'áámá saⁿā nguaaⁿ ndís'tií nadacadíínuuⁿ sa chi cuaacu chi ntiiⁿnyuⁿ yeⁿe sa chiiⁿ chi caaⁿmaⁿ sa nduudu cuaacu yeⁿé Ndyuūs, ní Espíritu N'dai yeⁿé Ndyuūs ca'cueéⁿ yā saⁿa miiⁿ, tuu'mi ní cuuvi deenu sa chííⁿ chi idinguúⁿ tan'dúucā chi Ndyuūs ch'lⁿí yā 'úú. ³⁸Nduuti chi saⁿā miiⁿ nguéé 'caandiveeⁿ sa nduudu yeⁿé, tuu'mi ní ndís'tií nguéé 'caandiveéⁿ nī nduudu yeⁿe sa.

³⁹'Tíicā dííⁿ nī, ndís'tií hermanos yeⁿé. Caaⁿ máⁿ nī nduudu cuaacu ní ca'á nī lugar chi 'iiⁿyāⁿ caaⁿ máⁿ yā táámá davaacu chi n'dááⁿ. ⁴⁰Diiⁿ n'daacá nī tanducueⁿē ndúucū orden.

Jesucristo 'āā nduuchi yā yeⁿe nguaaⁿ tináⁿā

15 Nds'tií hermanos yeⁿé, maaⁿ ní chuū ngaⁿa cuaācū ngíí ndís'tií nduudu yeⁿe evangelio chi ndúúúú ngai yeⁿe Jesucristo. Chííⁿ 'āā ngaⁿá, ní ngí'cueéⁿ ndís'tií. Ní ndís'tií ní n'giindiveéⁿ nī ní st'éenu nī. Ní

'aama canee n'daacá nī ná nduudu 'cūū. ²Cáāvā nduudu cuaacu yeⁿé Dendyuūs ndís'tií ní nnguáⁿai nī yeⁿé nuuⁿndi yeⁿé nī nduuti chi 'áámá cānee na staava yeⁿé nī chííⁿ chi ca'cueéⁿ ndís'tií. Nduuti chi ndís'tií nguéé i'teenú nī nguéé dichíí'vē nduudu miiⁿ cáāvā ndís'tií.

³Vmnááⁿ vmnaaⁿ ní chi'cueéⁿ ndís'tií chæe chi más ca importante tan'dúucā chi Cristo chi'cueéⁿ yā 'úú. Chuū chiiⁿ chi Cristo ní ch'ii yā cáāvā nuuⁿndi yeⁿe yú tan'dúucā chi canéé nguūⁿ ndii cuááⁿ vmnaaⁿ na libro yeⁿé Ndyuūs. ⁴'Iiⁿyāⁿ ní ch'iichi yā Cristo ní cho'ōo ndii 'íínú nguuví ní Dendyuūs nadin'duuchí yā Cristo yeⁿe nguaaⁿ tináⁿā tan'dúucā chi canéé nguūⁿ na libro yeⁿé Dendyuūs. ⁵Cuayivi chi Cristo nduuchi yā yeⁿe nguaaⁿ tináⁿā saⁿā Pedro n'diichi sá Cristo. Cuayivi chi cho'ōo chuū ní ndichuuví apóstoles n'diichí yā Cristo. ⁶Cuayivi miiⁿ ní 'áámá tiempo nūuⁿ nyuⁿu ciento hermanos nduuvidaamá yā ní n'diichí yā Cristo chi 'āā nduuchi yā yeⁿe nguaaⁿ tináⁿā. N'dee cá yā yeⁿe nyuⁿu ciento hermanos sндуuchí yā ndíí maaⁿ, naati duu'ví yā n'dii yā. ⁷Cuayivi miiⁿ ní Jacobo, apóstol chi ndeē nduudu yeⁿé Dendyuūs n'diichi ntúuⁿ yā Cristo. Ní cuayivi ní nducyaaca apóstoles n'diichí yā Cristo.

⁸Cho'ōo 'yááⁿ n'dai nguuví nī 'úú, Pablo, n'diichi ntúuⁿ Cristo, 'áárá chí 'úú nguéé intiinaáⁿ Cristo taachi cánéé yā iⁿ'yeeⁿdí 'cūū. ⁹'Úú, Pablo, nacadiinúúⁿ chí 'úú nguéé n'daacā 'úú, tan'dúucā yeⁿe tanáⁿā apóstoles chi candæe yā nduudu yeⁿé Ndyuūs. 'Úú nguéé canéé chi cuuví apóstol ti vmnááⁿ vmnaaⁿ can'daá 'iiⁿyāⁿ yeⁿe yaācū yeⁿé Dendyuūs, ti neⁿé chí 'iiⁿntyéⁿē ca'á yā orden chí 'caaⁿnúⁿ yā 'iiⁿyāⁿ chí naⁿá yā yaacū yeⁿé Ndyuūs. ¹⁰Maaⁿ ní 'úú 'aama apóstol 'úú ti Ndyuūs dííⁿ yā n'daacā n'dai nduucú. Caati Ndyuūs dííⁿ yā n'daacā

n'dai nduucú maaⁿ ní 'úú idíⁿ ntiiⁿnyuⁿ yeⁿé yā. Ní chíⁿ chi Ndyuūs díⁿ yā nduucú dichíⁿvē. Nguéé dámaāⁿ 'úú chí diiⁿ ca ntiiⁿnyuⁿ yeⁿé yā ti Ndyuūs. Ndyuūs chí díⁿ yā n'daacā n'dai nduucú ní canée yā nduucú ní nginnee yā 'úú. ¹¹Nguéé de'ē vee ndii nduuti chí 'úú o náⁿa yā chí candee nduudu yeⁿé Ndyuūs, tí nús'ūū ngaⁿa 'nū nduudu miiⁿ. Ní ndís'tii ní i'téenu nī nduudu miiⁿ.

'iiⁿyāⁿ caⁿá yā nnduuchí yā yeⁿē nguaaⁿ tináⁿā

¹²Ndís'tii ní i'téenu nī chí ngaⁿa 'nū chí Cristo nduuchí yā yeⁿē nguaaⁿ tináⁿā. ¿Táacā cuuvi chí ngaⁿá nī chí nguéé nnduuchí 'iiⁿyāⁿ s'eeⁿ yeⁿē nguaaⁿ tináⁿā? ¹³Nduuti chí nguéé nnduuchí 'iiⁿyāⁿ s'eeⁿ yeⁿē nguaaⁿ tináⁿā Cristo ntúūⁿ ní nguéé 'āā nduuchí yā yeⁿē nguaaⁿ tináⁿā. Ní cuerpo yeⁿe Cristo canee na yáinyāⁿ ndíí maaⁿ. ¹⁴Ndúúti chí Cristo nguéé 'āā nduuchí yā yeⁿe nguaaⁿ tináⁿā tuu'mi ní nduudu chí ngaⁿá 'nū nguéé dichíⁿvē. 'Tiicá ntúūⁿ nguéé dichíⁿvē chiiⁿ chí i'téenu 'nū yeⁿe Cristo. ¹⁵'Tiicá ntuūⁿ chiiⁿ chí ngaⁿá 'nū chí nduudu cuaacu yeⁿé Ndyuūs, tuu'mi ní nduudu yaadi nduuti chí nguéé 'tíicā. Naati ngaⁿa cuaacú 'nū chí Ndyuūs díⁿ yā chí 'āā nduuchi Cristo yeⁿē nguaaⁿ tináⁿā. Nduuti chí nguéé nnduuchí tanáⁿā 'iiⁿyāⁿ yeⁿē nguaaⁿ tináⁿā 'tiicá ntuūⁿ nguéé 'āā nduuchí Ndyuūs Cristo yeⁿē nguaaⁿ tinaⁿā. ¹⁶Ndúúti chí tanáⁿa 'iiⁿyāⁿ nguéé nnduuchí yā yeⁿē nguaaⁿ tináⁿā, 'tiica ntúūⁿ, Cristo nguéé 'āā nduuchí yā yeⁿē nguaaⁿ tináⁿā. ¹⁷Nduuti chí Cristo nguéé 'āā nduuchí yā yeⁿē nguaaⁿ tináⁿā nguéé dichíⁿvē chí i'téenu yú Ndyuūs. Ní s'uuúⁿ canee yú condenado ndúúcu nuuⁿndi yeⁿē yú. ¹⁸Nduuti chí 'tíicā, tuu'mi ní 'iiⁿyāⁿ chí 'āā i'téenu yā Cristo, ní maaⁿ ní 'āā n'dii yā, 'āā chindái yā ndúúcu nuuⁿndi yeⁿē yā. ¹⁹Nduuti chí nguéé nduuchi Cristo

yeⁿē nguaaⁿ tináⁿā tuu'mi ní s'uuúⁿ chí i'teenu yú Cristo, núúⁿmáⁿ neⁿe chí snée yú na iⁿ'yeeⁿdí 'cūū neenē ndaachi yínu yú nguéé ti tanáⁿā 'iiⁿyāⁿ.

²⁰Naati cuaacu chí Cristo miiⁿ 'āā nduuchi yā yeⁿe nguaaⁿ tináⁿā. Ní Cristo miiⁿ ní 'iiⁿyāⁿ vmnááⁿ vmnaaⁿ chí nduuchí yā yeⁿe nguaaⁿ tináⁿā yeⁿē nducyáacá 'iiⁿyāⁿ chí n'díí. ²¹Ti cáāvā nuuⁿndi yeⁿe 'áámá saⁿa Adán, canée chí nducyaaca yú 'cuūvi yú. Ní cáāvā chí diiⁿ 'aama saⁿā Cristo míⁿ, canée chí nduuchi yú yeⁿē nguaaⁿ tináⁿā. ²²S'uuúⁿ ní yeⁿe Adán chí diiⁿ nuuⁿndi sa. S'uuúⁿ ní 'iiⁿyāⁿ chí diiⁿ nuuⁿndi s'uuúⁿ. Taachí 'iiⁿyāⁿ diiⁿ nuuⁿndí yā tuu'mi canee chí 'cuūvi yā. S'uuúⁿ ní yeⁿe Cristo s'uuúⁿ ní 'cuēeti nduuchí yú. ²³Ti 'áámá 'áámá 'iiⁿyāⁿ caⁿá yā nnduuchi yā yeⁿe nguaaⁿ tináⁿā tan'dúúca chí itunééⁿ 'iiⁿyāⁿ. Cristo 'āā nduuchí yā vmnááⁿ vmnaaⁿ yeⁿe nguaaⁿ tináⁿā. Ní cuayiivi taachi ndaá Cristo na iⁿ'yeeⁿdí 'cūū taama vmnéⁿēe, tuu'mi ní 'iiⁿyāⁿ chí n'díí chí yeⁿe Cristo, 'iiⁿyāⁿ s'eeⁿ ní caⁿá yā nnduuchi yā yeⁿē nguaaⁿ tináⁿā. ²⁴Tuu'mi ní ndaā nguuvi chí 'cuiinū iⁿ'yeeⁿdí 'cūū cuayiivi taachi chó'oo tanducuéⁿē chí Dendyuūs Chiida yú neⁿé yā chí chó'oo. Ní Cristo caaⁿmaⁿ ntiⁿnyúⁿ yā yeⁿē nducyaaca 'iiⁿyāⁿ ndíí tiiⁿ yeⁿe iⁿ'yeeⁿdí 'cūū ndúúcu poder yeⁿē. Tuu'mi ní Cristo ncaⁿá yā Chidá yā tanducuéⁿē chí yeⁿe chí ngaⁿa ntiiⁿnyúⁿ yā. ²⁵Ti maaⁿ ní Cristo miiⁿ canée yā tan'dúúca 'áámá Rey. Ní taachi chí cuchée yā yeⁿē tanducuéⁿē enemigo yeⁿe yā, tuu'mi ní enemigos yeⁿé yā canée yā tan'dúúca chí canée yā mááⁿ ca'a Cristo; ²⁶tuu'mi ní chí 'cuiinu enemigo yeⁿe Cristo chí vaadi n'gii. Ní Cristo chichee yā yeⁿē. ²⁷Dendyuūs 'āā ca'a yā nducuéⁿē dendu'u na ta'ā Cristo ní Cristo ngaⁿa ntiiⁿnyúⁿ yā yeⁿe tanducuéⁿē. Ní nducuéⁿē canee tan'dúúca chí canee maaⁿ ca'a Cristo. Cristo miiⁿ

nguée nga^a ntiⁿnyúⁿ yā yeⁿē Chiidá yā naati Chiidá yā 'āā ca'a yā Cristo tanducuéⁿē. ²⁸ Taachí Cristo cheé yā yeⁿe tanducuéⁿē, tuu'mi ní Cristo, chi daiya Dendyuūs, ca'a yā nducuéⁿē na ca'a Dendyuūs chi Chiidá yā. Ní Cristo miiⁿ maáⁿ yā caneeé yā maaⁿ poder yeⁿē Chiidá yā.

²⁹ ¿De'e rā tuu'mi? Nduuti chi nguée nnduuchi 'iiⁿyāⁿ s'eeⁿ yeⁿe nguaaⁿ tináⁿā, ¿de'e cúuví chi díⁿ yā 'iiⁿyāⁿ chi ndéédínuūⁿniⁿ yā cáávā tanáⁿā 'iiⁿyāⁿ s'eeⁿ chi n'dii? ¿De'e cáávā idíⁿ yā 'tíicā? Nduuti chi nguée i'téenu yā chi 'iiⁿyāⁿ chi n'dii caⁿá yā nduuchi yā yeⁿē nguaaⁿ tináⁿā.

³⁰ Tiicá dendu'ū. ¿De'e cúuví chí 'úú cuneé ndúúcú cáándá chi 'iiⁿyāⁿ 'caaⁿnúⁿ yā 'úú ndii hora miiⁿ? ³¹ Cuáácú chi nguuvi nguuvi 'iiⁿyāⁿ neⁿe 'caaⁿnúⁿ yā 'úú cucáávā chi i'teenú Cristo. Cuáácú chi yeenú, ti cáávā Señor Jesucristo chi Señor yeⁿe yú ndís'tii i'téenu nī Jesucristo ti 'úú nga^a nduudu cuaacu yeⁿe Jesucristo nanááⁿ ndis'tii. ³² ¿De'e chi cuuvi yeⁿé chi cuché yeⁿé 'iiⁿyāⁿ yááⁿ Efeso chi díⁿ yā nduucú tan'dúúcā 'iiti taaⁿ nduuti chi nguée nduuchi 'iiⁿyāⁿ s'eeⁿ yeⁿe nguaaⁿ tináⁿā? Tuu'mi ní nga^a yú tiicā: Che'e yú vaa, cu'u yú vaa, ti cavyaaⁿ ní 'cuūvi yú.

³³ Nguée díⁿ nī chi 'iiⁿyāⁿ canche'éí yā ndís'tii. Nduuti chi caⁿá nī ndúúcú 'iiⁿyāⁿ chi nguée n'daacā idíⁿ yā tuu'mi ndís'tii cuuví díⁿ nī tan'dúúcā chí idiiⁿ 'iiⁿyāⁿ s'eeⁿ. Nguée n'daacā chi díⁿ nī 'tíicā. ³⁴ Nadacadíinuⁿ nī chee chi díⁿ nī. Ní díⁿ nī cosa chi n'daacā. Ní nguée dinuuⁿndí nī. Tanáⁿā 'iiⁿyāⁿ nguée deenú yā yeⁿe Dendyuūs. Chuū ní nga^a yeⁿe ndís'tii ní cuuví 'cuináaⁿ nī.

Yeⁿe tan'dúúcā chi 'iiⁿyāⁿ caⁿá yā nnduuchí yā yeⁿē nguaaⁿ tináⁿā

³⁵ Nduu'ví 'iiⁿyāⁿ ní cuuvi caaⁿmáⁿ yā chuu. ¿Táácā chí 'iiⁿyāⁿ chi 'āā tináⁿā

chi nnduuchí yā yeⁿe nguaaⁿ tináⁿā? Ní vee cuerpo ngai yeⁿé 'iiⁿyāⁿ s'eeⁿ, ¿táácā caneeé? ³⁶ Ndís'tii chi nga^a nī 'túúcā nguée nadacadíinuⁿ nī yeⁿe chí nga^a nī. Ndís'tii chi ngiinu nī ndaata deenú nī chi ndaata miiⁿ caneeé chí n'dii vmnááⁿ vmnaaⁿ chi dichí'vē ní ndeē n'gui'i yeⁿē. ³⁷ Ndaata miiⁿ chi ndís'tii ngiinu nī. ¿Áá nguée tan'dúúcā 'áámá planta chi cuchii, nduuti chi trigo, o nduuti chi niⁿnuⁿ, o de'e vee ndaata chi véé? ³⁸ Dendyuūs díⁿ yā chí 'cuiita ca'áámá ca'áámá ndaata miiⁿ tan'dúúcā chí neⁿe yā, nī 'āā vi'í cā ca'áámá ca'áámá yaata naaⁿ yeⁿē ndaata miiⁿ. ³⁹ 'Tíicā ntúūⁿ na iⁿ'yeeⁿdí 'cūū. Nguue dáámá cuerpo yeⁿe 'iiⁿyāⁿ. 'Āā vi'í caā cuerpo yeⁿe 'iiti, 'āā vi'í caā cuerpo yeⁿē 'yáádá, ní 'āā vi'í caā cuerpo yeⁿē 'yáácā. ⁴⁰ Véé cuerpo yeⁿe cosa s'eeⁿ chí véé nanguuvi. Ní véé cuerpo yeⁿe 'iiⁿyāⁿ chí caneeé na iⁿ'yeeⁿdí 'cūū. Ní cuerpo yeⁿe cosa chí véé nanguuvi ní deeve. Ní 'aa vi'í caā cuerpo chí ndeeve yeⁿe 'iiⁿyāⁿ yeⁿe iⁿ'yeeⁿdí 'cūū. ⁴¹ 'Tiicá ntúūⁿ 'yá'ā, ní 'iiyū, ní 'iiⁿnyúⁿ, nī nducyaaca ní deeve cá ní 'āā vi'í caā. Nguaaⁿ 'í'nyuⁿ s'eeⁿ chí deeveé, nguue dáámá tí 'āā vi'í caā. ⁴² 'Tiicá ntúūⁿ cuerpo yeⁿē yú, ch'ií yú ní choō cuerpo yeⁿē yú, naati taachi nnduuchi yú yeⁿe nguaaⁿ tináⁿā, 'āā ntéé nuuⁿndí yú. ⁴³ Maaⁿ ní idinuuⁿndí yú nī 'cuináaⁿ yú cáávā cuerpo yeⁿe yú. Naati taachi nnduuchi yú yeⁿē nguaaⁿ tináⁿā, tuu'mi ní cuerpo yeⁿē yú ní deeve, ní n'daacā caneeé. ⁴⁴ Maaⁿ ní cuerpo yeⁿē yú ní yeⁿe iⁿ'yeeⁿdí 'cūū nī 'cuūvi yú. Ní taachi nnduuchi yú yeⁿē nguaaⁿ tináⁿā, tuu'mi ní cuerpo yeⁿe yú ní yeⁿe espíritu. Nduuti chí véé cuerpo yeⁿē yú chí yeⁿe iⁿ'yeeⁿdí 'cūū, tuu'mi ní véé cuerpo yeⁿē yú chí yeⁿe espíritu.

⁴⁵ Caneeé nguūⁿ ndii cuááⁿ vmnaaⁿ na libro yeⁿé Dendyuūs 'tíicā: Dendyuūs din'dái yā cuerpo yeⁿe saⁿā Adán chí sáⁿā chí cunduuchi sáⁿ vmnááⁿ vmnaaⁿ. Naati táámá Adán chí cuayiivi ní ngu-

uvi yā Jesucristo. Ní Jesucristo miiⁿ ní yeⁿē vida chi espíritu chi canduuchi. Ní Jesucristo ca'á yā vida 'iiⁿyāⁿ s'eeⁿ yeⁿe iⁿ'yeeⁿdí 'cūū chi vida chi yeⁿe es- pírítu. ⁴⁶Nadacadínuuⁿ nī yeⁿe chuū. Vmnááⁿ vmaaaⁿ véé cuerpo tan'dúúcā cuerpo yeⁿe s'uuúⁿ, ní cuayiivi véé cuerpo chi yeⁿē espíritu. ⁴⁷Dendyuūs dín'dái yā Adán chi saⁿa vmnááⁿ vmaaaⁿ yeⁿe yaⁿ'á 'cūū. Naati saⁿ'ā cuayi- ivi miiⁿ chiicā sa ná va'ai chēeti nguuví ní saⁿ'ā miiⁿ chí Jesucristo. ⁴⁸Nducyáácá 'iiⁿyāⁿ yeⁿe iⁿ'yeeⁿdí 'cūū canéé ndúúcū cuerpo tan'dúúcā 'iiⁿyāⁿ yeⁿe iⁿ'yeeⁿdí 'cūū. Nducyáácá 'iiⁿyāⁿ chi yeⁿe Cristo cuuvi canéé ndúúcū cuerpo tan'dúúcā cuerpo yeⁿe Jesucristo chi yeⁿe va'ai chēeti nguuví. ⁴⁹Maaⁿ ní cuerpo yeⁿe yú tan'dúúcā cuerpo yeⁿe 'iiⁿyāⁿ yeⁿe iⁿ'yeeⁿdí 'cūū. Cuayiivi ní ndaāca yú 'áámá cuerpo yeⁿē yú tan'dúúcā chi véé na va'ai chēeti nguuví.

⁵⁰Maaⁿ ní chuū ngaⁿ'á ngii ndís'tiī her- manos yeⁿé: Ndúúcū cuerpo yeⁿē yú ndúúcū yuūtē yeⁿē ndúúcū yuūⁿ yeⁿē nguéé cuuvi ndaa yú na va'ai chēeti ngu- uvi. Ndíí nguéé véé 'áámá caaaⁿ dendú'ū chí nchoo ndúúcū chi nguéé nngoō. ⁵¹Cuin'diichí nī. 'Úú ní ngaⁿ'á n'giⁿ'í ndís'tiī yeⁿē 'áámá cosa chi 'iiⁿyāⁿ nguēe deenu yā. Nguéé nducyaaca yú 'cuūvi yú. Naati Ndyuūs téé yā nducyaaca s'uuúⁿ 'áámá cuerpo chí ngai tan'dúúcā cuerpo yeⁿé yā chi yeⁿē espíritu. ⁵²Ní 'áámá tiempo 'lífⁿ 'lífⁿ nūuⁿ tan'dúúcā chi 'áámá ingaaⁿ 'áámá in'gaadi nduutinaaⁿ yú, mááⁿ n'chēeté nūuⁿ, ní n'daaⁿ cuerpo yeⁿē yú, taachi 'cuēcú trompeta chí ndii na 'cuiinu. Ní taachi 'cuēecu trompeta miiⁿ, tuu'mi ní 'iiⁿyāⁿ chi i'téenu yā Señor Jesucristo chi maaⁿ ní 'āā tináⁿ'ā ní ndu- cuééⁿ yā yeⁿē nguaaⁿ tináⁿ'ā ndúúcū cuerpo ngai yeⁿé yā chi 'āā ntéé choo. Ní 'tiicá ntūūⁿ. S'uuúⁿ chi i'teenu yú Jesu- cristo ní canduuchi yú, ní n'daaⁿ cuerpo yeⁿe yú. ⁵³Cuerpo yeⁿe yú chí ngoō.

Ní Ndyuūs canéé chí n'daaⁿ yā cuerpo yeⁿē yú ní téé yā s'uuúⁿ táámá cuerpo chí nguéé nchoo. Cuerpo yeⁿē yú chí n'gii, Ndyuūs canéé chí téé yā s'uuúⁿ táámá cuerpo chí 'āā ntéé ndaa ngu- uvi chí 'cuūvi. ⁵⁴Taachí cuerpo yeⁿē yú chí n'gii ní ngoo, 'āā n'daaⁿ cuerpo yeⁿe chí nguéé cuuvi n'gii ndíí nguéé cuuvi chōō. Tuu'mi cuuvi cuaacu chí canéé nguūⁿ ndii cuááⁿ vmaaaⁿ na libro yeⁿe Ndyuūs 'tíicá: Vida cueⁿ'e daaⁿmaⁿ miiⁿ ní chichéé yeⁿē vaadi n'gii miiⁿ ti 'āā ntéé ch'ii 'iiⁿyāⁿ. ⁵⁵Vaadi n'gii ni 'āā ch'óō. ¿Táácā cuuvi cuchéé vaadi n'gii yeⁿe 'iiⁿyāⁿ chí nguéé cuuvi 'cuūvi yā? ¿Táácā cuuvi diiⁿ vaadi n'gii miiⁿ tan'dúúcā chí 'áámá 'iiti chí nga'a ti 'iiⁿyāⁿ ní n'gii yā? Nguéé cuuvi. ⁵⁶Nuuⁿndi miiⁿ chí diiⁿ yú, chííⁿ chí tee lugar vaadi n'gii, ní n'gii yú. Ní vaadi n'gii miiⁿ diiⁿ tan'dúúcā chí nga'a ti 'iiⁿyāⁿ ní n'gii yā. Ley miiⁿ chííⁿ chí diiⁿ chí 'iiⁿyāⁿ deenu yā chí véé nuuⁿndi yeⁿe yā. ⁵⁷Nca'a yú gracias Ndyuūs, ti nginneé yā s'uuúⁿ chí ichēe yú yeⁿe nducuéⁿ'e chí yeⁿē yáá'n'guiniūuⁿ cáávā Señor Jesucristo yeⁿē yú. ⁵⁸Cáávā chuū ndís'tiī hermanos yeⁿé chí neⁿ'e taaví, 'cuēetinééⁿ n'daaca nī ndúúcū chííⁿ chí i'téenu nī. Ní nguéé n'daaⁿ chííⁿ chí i'téenu nī. Ní cueⁿ'e daaⁿmaⁿ dííⁿ nī nti- iⁿ'nyuⁿ yeⁿe Señor Jesucristo yeⁿē yú. Ní deenú ní chí ntiⁿ'nyuⁿ miiⁿ ní véé chíi'vē.

Yeⁿe ofrenda caavā hermanos

16 Maaⁿ ní neⁿ'é caaⁿmaⁿ ndís'tiī yeⁿe ofrenda yeⁿé nī chí ca'á nī 'iiⁿyāⁿ chí i'téenu yā Jesucristo cáávā 'iiⁿyāⁿ ndaachíí snée yā ní nguéé dendu'ū yeⁿē. Dííⁿ nī tan'dúúcā chí 'úú ngaⁿ'á ngii 'iiⁿyāⁿ yeⁿe tanáⁿ'ā yáacū s'eeⁿ na yáⁿ'āa Galacia. ²'Tíicā dííⁿ nī. Nguuví vmnááⁿ vmaaaⁿ yeⁿé ndēētē chí domingo miiⁿ, ca'áámá ca'áámá ndís'tiī ní cu'néeⁿ nī 'āā víí caā parte yeⁿé nī chí tunééⁿ Ndyuūs chí yeⁿe nducuéⁿ'e chí Ndyuūs tee yā ndís'tiī. Ní ndís'tiī ca'a nī ofrenda

yeⁿé nī na ta'a 'iiⁿyāⁿ chí ngaⁿa nti-
iⁿnyuⁿ yeⁿe yáacū. Ní taachi 'úú ndaa
nguée canée chi ca'a nī ofrenda yeⁿe nī.
³Ní taachi ndaa, 'úú dicho'ó 'iiⁿyāⁿ chi
ndís'tiī ne'én nī chi candée yā ofrenda
yeⁿé nī ndíí yāāⁿ Jerusalén. 'Iiⁿyāⁿ miiⁿ
candée yā carta yeⁿé ndúúcu ofrenda
yeⁿe nī. ⁴Nduuti chi 'úú canee chí caⁿá
yāāⁿ Jerusalén tuu'mi 'iiⁿyāⁿ s'eeⁿ caⁿá
yā nduucú.

Pablo caⁿa yā chí caⁿá yā yāāⁿ s'eeⁿ

⁵Caneé chi cho'ó na yáⁿāa Macedo-
nia. Ní taachi cho'ó na yáⁿāa miiⁿ cuayi-
ivi ní ndaa na yāāⁿ Corinto ní cuneé
ndúúcu ndís'tiī. ⁶Neⁿé chi cūnēe ndúúcu
ndís'tiī tiempo chí 'iichee. Ní cuayivi ní
ndís'tiī cuuvi caⁿá nī nduucú 'téé nūuⁿ
naachi 'úú naⁿá cuaaⁿ cyúúni. ⁷Nguée
neⁿé n'diichí ndís'tiī taachi cho'ó yāāⁿ
vaacú nī, naati canee ngiinú chí ndaa
n'diichí ndís'tiī 'áamá tiempo nduuti chí
Ndyuūs téé yā lugar 'úú. ⁸Naati cuneé
na yāāⁿ Efeso ndii tiempo yeⁿe 'viicu
yeⁿe Pentecostés. ⁹Miiⁿ ní véé n'dee
ca ntiⁿnyuⁿ chí díⁿ. Ní yāāⁿ Efeso miiⁿ
tan'dúúca 'áamá cheendi va'āi chí ch'ete
n'dai ní ndeevéé n'dai caavā 'úú, ti véé cá
ntiⁿnyuⁿ chí díⁿ. Miiⁿ ntúūⁿ neene véé
'iiⁿyāⁿ chí induuví taaⁿ yā yeⁿé.

¹⁰Ndúúti chí ndaa saⁿā Timoteo
nanááⁿ ndís'tiī, canee chí díⁿ nī recibir
saⁿā miiⁿ tan'dúúca 'áamá saⁿā chí díⁿ
ntiⁿnyuⁿ sa yeⁿé Ndyuūs, ti saⁿā miiⁿ ní
idiiⁿ sa ntiⁿnyuⁿ yeⁿé Ndyuūs tan'dúúca
'úú. ¹¹Mar 'áamá ndís'tiī nguée díⁿ nī
ndúúcu Timoteo tan'dúúca chí saⁿā chí
nguee n'daacā, ní nguée deenu sa. Cuavi-
ivi taachi dicho'ó nī Timoteo miiⁿ cuaaⁿ
cyúúni, dicho'ó nī saⁿa miiⁿ ndúúcu
n'dai. Caneé ngiinú chí ndaa sa ndúúcu
tanáⁿā hermanos nanááⁿ 'úú.

¹²'Úú neⁿé chí hermano Apolos ndaa
sa nanááⁿ ndís'tiī taachi ndaa tanáⁿā her-
manos. Apolos miiⁿ nguée neⁿe sa ndaa

sa maaⁿ, naatí ndaa sa nanááⁿ ndís'tiī
taachi véé yaaⁿ sa.

Pablo díⁿ yā saludar hermanos

¹³Cueéte n'daacá nī ndúúcu cuidado.
Ní 'cuetinéé n'daacá nī ndúúcu chí
i'téenu nī chí yeⁿe Ndyuūs. Ní tan'dúúca
saⁿā n'geete díⁿ yā ní 'tíca díⁿ nī. Ní
cunee diitú nī. ¹⁴Tanducuéⁿe chí díⁿ nī,
ní díⁿ ní ti neⁿe ní Ndyuūs.

¹⁵Ndís'tiī ní deenú nī chí 'iiⁿyāⁿ yeⁿe
va'āi saⁿa Estéfanos s'téenu yā Jesu-
cristo vmaáⁿ vmaⁿ taachi snee yā
na yáⁿāa Acaya. 'Úú yaaⁿví ndís'tiī chí
'iiⁿyāⁿ s'eeⁿ neⁿé yā díⁿ yā ntiⁿnyuⁿ
chí nginneé nducyaaca 'iiⁿyāⁿ chí i'téenu
yā Señor Jesucristo yeⁿe yú. ¹⁶'Úú ngi-
icá ndís'tiī hermanos yeⁿé, chí 'caan-
diveéⁿ nī yeⁿe chí ngaⁿā 'iiⁿyāⁿ s'eeⁿ
yeⁿe va'ai Estéfanos ní cunee nī 'áamá
'áamá 'iiⁿyāⁿ chí idiiⁿ ntiⁿnyuⁿ yeⁿé
Dendyuūs. ¹⁷Yeenú chí ndaa hermano
Estéfanos ndúúcu hermano Fortunato
ndúúcu hermano Acaico. N'daacā chí
caneé yā ndúúcu nī na lugar yeⁿé.
¹⁸'Iiⁿyāⁿ s'eeⁿ ní nduūvi n'daí yā na es-
píritu yeⁿé ní caⁿá yā nduūvi n'daí yā
na espíritu yeⁿe nī dendú^u. Caneé chí
díⁿ nī aceptar tanáⁿā 'iiⁿyāⁿ chí díⁿ yā
tan'dúúca 'iiⁿyāⁿ s'eeⁿ.

¹⁹'Iiⁿyāⁿ yeⁿe yaacú yeⁿe yáⁿāa Asia
dicho'ó yā saludos yeⁿé nī: N'daí nī,
ngaⁿa yā. Saⁿa Aquila ndúúcu n'daataá
Priscila ndúúca 'iiⁿyāⁿ yeⁿe yaacú chí
snée yā ndavaacú yā dicho'ó yā saludos
yeⁿe nī: N'daí nī, ngaⁿa yā. ²⁰Nducyáacá
hermanos ní dicho'ó yā saludos yeⁿe nī:
N'daí nī, ngaⁿa yā. Ndís'tiī ní caaⁿmaⁿ
nī 'tíca yeⁿe hermanos: N'daí yā, ngaⁿa
nī. Ní ca'á nī ta'a nī taachi díⁿ nī saludar
hermanos ti ndís'tiī ní neⁿé nī Dendyuūs.

²¹'Úú Pablo dinguúⁿ carta miiⁿ ndúúcu
ta'á, ní: N'daí nī, ngaⁿá.

²²Nduuti chí 'áamá saⁿā nguée id-
inéⁿe yā Señor Jesucristo yeⁿe yú 'āa cu-
uví yā condenado. Niiⁿnuⁿ niiⁿnuⁿ canee

tiempo chi Señor Jesucristo yeⁿē yú cu-
uvi ndaa ntúuⁿ yā.

²³ Ní Señor Jesucristo yeⁿe yú tée yā
ndís'tiī nducuéⁿē chi n'daacā yeⁿe yā.

²⁴ 'Úú neⁿé ndís'tiī ti ndís'tiī ní yeⁿe
Cristo Jesús ndís'tiī. 'Tíicā.

CARTA ÇUAYIIVI YE["]E 'II["]YĀ["] CHI SNĒE YĀ YĀĀ["] CORINTO

**Pablo idinguú["] yā carta 'cūū ye["]e
'ii["]yā["] ye["]e yaacū na yāā["] Corinto**

1 'Úú Pablo 'úú. Ní Ndyuūs ne["]é yā chi 'úú cuuvi 'áámá apóstol chi can-deé nduudu cuaacu ye["]é Jesucristo. 'Úú ndúúćú Timoteo chi hermano ye["]e yú idinguú["] carta 'cūū ye["]e 'ii["]yā["] ye["]e yāā["] Corinto chi ca["]á yā yāacū ye["]e 'iivú Ndyuūs, ní ye["]é nducyaaca 'ii["]yā["] chi i'teenú yā Jesucristo, 'ii["]yā["] chi snée yā na nútú["]má["] yā["]āa ye["]e Acaya. ²Ndyuūs Chiida yú ndúúćú Señor Jesucristo cuuvi tée yā s'uuú["] cosa chi n'daacā ye["]é yā ní 'íćú cunée vaadi 'diii["] ye["]é yā na staava ye["]e yú.

Pablo ch'eenú yā chii

³Dich'ete yú Ndyuūs ti nééné n'dai Ndyuūs Chiida yú chi Chiida Señor Jesucristo ye["]é yú. Ndyuūs Chiida yú ya'ai 'iinú yā s'uuú["] ní tee yā 'viich'etínū["] s'uuú["]. ⁴Ndyuūs ye["]e yú itee yā 'viich'etínū["] nús'uu ye["]e tanducué["]é chi n'geenú 'nū ngii ti nús'uu ní cuuvi ca'á 'nū dáámá 'viich'etínū["] 'ii["]yā["] chi n'geenú yā ngii ndúúćú dáámá 'viich'etínū["] chi Ndyuūs tee yā nús'uu. ⁵Nús'uu ní n'geenú 'nū ngii n'dee ca cáavā chi idií["] 'nū ntii["]nyu["] ye["]e Señor Jesucristo. Ní Señor Jesucristo tee ca yā 'viich'etínū["] nús'uu. ⁶Maa["] ní, nduuti chi n'geenú 'nū ngii, chuu ní cáavā ndís'tií cuuvi cuta'á ní 'viich'etínū["] ye["]é Ndyuūs ní cuuvi nngua["]ai ní. Ní nduuti chi Ndyuūs tee yā nús'uu 'viich'etínū["], chuū ní cáavā ndís'tií cuuvi cuta'á ní 'viich'etínū["] ye["]é Ndyuūs, ní cuuvi nnguai["]ai ní. 'Tiicá ntúū["] ndís'tií cuuvi cuchéé ní nducué["]é chi n'geenu ní ngii tan'dúúćā chi nús'uu n'geenú 'nū ngii. ⁷Ní canee ngiinú 'nū ye["]e ndís'tií chi cunee n'daaca ní. Tí

deenú 'nū ti taachi ndís'tií n'geenu ní ngii tan'dúúćā nús'uu 'tiicá ntúū["] Ndyuūs tee yā, 'viich'etínū["] ndís'tií tan'dúúćā chí tee yā nús'uu.

⁸Ní ndís'tií hermanos ye["]é 'nū. Ne["]é 'nū chi cadiiinuu["] ní ye["]e tanduvéé vaadi caa'va chí cho'ō nuú["] 'nū na yā["]āa ye["]e Asia. Chí["] chí ch'eenu taavi 'nū chí ní nééné n'dee ca, ní nadicadiinúú["] 'nū chí nguéé fuerzas ye["]é 'nū chí cuchéé 'nū ye["]e nducué["]é ti cuuvi 'cuuvi 'nū. ⁹Nacadiinúú["] 'nū chí ca'á yā orden chí 'cuuvi 'nū naati chuū ní chí chí chí["] nús'uu chí cu'téenu cá 'nū Ndyuūs chí nadacué["]é yā 'ii["]yā["] ye["]é nguaa["] tiná["]ā. Ní nguéé i'téenu 'nū ye["]e maá["] 'nū. ¹⁰'Tíćā Ndyuūs nadanguá["]ai yā nús'uu ye["]e peligro chí 'āā chéé 'cuuvi 'nū. 'Tiicá ntúū["] cunee ngiinú 'nū Ndyuūs chí nadanguá["]ai yā nús'uu ye["]e nducué["]é chí n'geenú 'nū ngii ní ye["]é chí ch'ete n'dai. ¹¹Ní ndís'tií ní nginnee ntúū["] ní nús'uu ti nga["]angua'á ní caavā nús'uu. Caati ndúúćú chí 'yāá["] ca hermanos nga["]angua'á yā ye["]é 'nū, tuu'mi ní ca'á yā gracias Ndyuūs, ti Ndyuūs díí["] yā n'dai ca cáavā nús'uu.

**Pablo chí'naa["] yā chí ndaa["]
yā na yāā["] Corinto**

¹²Ní yeenú 'nū ti deenú 'nū na staava ye["]é 'nū chí chí["] chí idií["] 'nū ní cáavā 'ii["]yā["] ye["]e i["]yee["]dí 'cūū. Ní n'daacā díí["] 'nū. Ní n'daacā díí["] 'nū cáavā ndís'tií. Ndyuūs chí n'dai taavi chínee yā nús'uu chí 'túúćā din'daacá 'nū. Chuū nguéé cuuvi díí["] 'nū cáavā vaadi deenu ye["]e maá["] 'nū. ¹³Chí["] chí dinguú["] 'nū ye["]e ndís'tií ní ndís'tií ní cuuvi 'cueé["] ní ní intiinaa["] ní. Cunee ngiinú 'nū chí túúmíćadiinúú["] ní nducué["]é. ¹⁴Tan'dúúćā chí ndís'tií túúmíćadiinúú["] ní 'téé maa["] naati taachi ndaa Señor Jesucristo taama vmné["]éé tuu'mí ndís'tií cuuvi yeenú ní cáavā nús'uu tan'dúúćā chí cuuvi yeenú 'nū cáavā ndís'tií.

¹⁵ Caati véé confianza yeⁿé 'nū ndúúcū ndís'tiī, vmnááⁿ vmnaaⁿ nadacádiinúúⁿ chí chii ní ndaá ní canee nduucú nī 'áámá tiempo ní cuayiivi ndaá taama vmnéⁿéé ní cuneé nduucú nī chí cuuvi yeenu cá nī. ¹⁶ Nadacádiinúúⁿ chí cho'ó yaá'ví ndís'tiī taachi caⁿá na yáⁿā Macedonia. Ní cuayiivi míⁿ taachi n'daá yáⁿā Macedonia miiⁿ tuu'mi ní nandaa ntúúⁿ yaa'ví ndís'tiī ní cuneé ndúúcu nī. Ní taachi can'daá yeⁿe nī, ndís'tiī cuuvi cunnee nī 'úú ndúúcū necesidades yeⁿé caati caⁿá yáⁿā Judea. ¹⁷ 'Tíicā nadacádiinúúⁿ chí díⁿ. 'Úú nguéé díⁿ tan'dúúicā 'iiⁿyāⁿ chí díⁿ yā tan'dúúicā chí maáⁿ yā neⁿe yā. Ní ngaⁿa yā: Júūⁿ, júūⁿ chuū chí díⁿ, ní cuayiivi ngaⁿá yā chí nguéé díⁿ yā ti díⁿ yā tan'dúúicā chí neⁿé yā. ¹⁸ Naatí Ndyuūs deenú yā nduudu chí ngaⁿá 'nū chí nguéé ngaⁿá 'nū 'tíicā idiíⁿ 'nū ní cuayiivi nguéé idiíⁿ 'nū 'tíicā. ¹⁹ Ti taachi 'úú ndúúcū saⁿā Silvano ndúúcū Timoteo candeé 'nū nduudu cuaacu yeⁿe Señor Jesucristo chí Daiya Dendyuūs nguéé ngaⁿá 'nū chí Jesucristo miiⁿ ngaⁿá yā chí júūⁿ 'tíicā, ní cuayiivi nguéé 'tíicā díⁿ yā. Cristo ní ngaⁿá yā ní díⁿ yā tanducuéⁿé dendu'ū chí cuaacu. ²⁰ Ti Cristo miiⁿ ngaⁿá yā chí 'tíicā, yeⁿe nducuéⁿé chí Ndyuūs Chiida yú caⁿá yā chí tée yā 'iiⁿyāⁿ ndúúcū s'uúúⁿ chí i'téenu yú Ndyuūs. Cáávā chuū idich'ēete yú Ndyuūs ti cucáávā Cristo caⁿa yú chí 'tíicā. ²¹ Ní Chiida yú díⁿ yā chí ndís'tiī ndúúcū nús'uu cunee diitu ca yú ndúúcū chí i'teenu yú yeⁿe Cristo. Ní Ndyuūs nadidēevé yā s'uúúⁿ chí diiⁿ yú ntiíⁿnyuⁿ yeⁿé yā. ²² Ndyuūs tee yā s'uúúⁿ 'áámá sello yeⁿé yā na cuerpo yeⁿe yú ti yeⁿé yā s'uúúⁿ. Tee yā Espíritu N'dai yeⁿé yā na staava yeⁿe yú. Ní cáávā Espíritu N'dai yeⁿé yā deenu yú chí cuuvi yeⁿe yú chíiⁿ chí Ndyuūs caⁿa yā chí tée yā s'uúúⁿ.

²³ Nguéé cueⁿé yááⁿ Corinto ti neⁿé yaa'vi neⁿé ndís'tiī ní nguéé neⁿé 'caa'vá

cucáávā chí 'cuēetinéé ya'ai nī. Maaⁿ ní Ndyuūs deenú yā staava yeⁿé ní testigo yeⁿé. ²⁴ Nguéé neⁿé 'nū caaⁿmáⁿ 'nū ntiíⁿnyuⁿ yeⁿé nī yeⁿe chíiⁿ chí canee chí i'téenu nī ti 'āā canee diitú nī ndúúcū chí i'téenu nī. Naatí neⁿé 'nū cunnee 'nū ndís'tiī. Nús'uu diiⁿ 'nū ntiíⁿnyuⁿ ndúúcū ndís'tiī ní cuuvi yeenu nī. Ní ndís'tiī snéé n'daaca ní caavā chí i'teenu nī Jesucristo.

2 'Úú nadicádiinúúⁿ máaⁿ chí nguéé ndaá nanaáⁿ ndís'tiī chí cuuvi ndaachí nī. ² 'Úú nguēe neⁿé ndaá nanaáⁿ ndís'tiī nduuti chí 'úú idiíⁿ chí ngii ndaachi yiinú ndís'tiī. ¿De'ē cúví chí díⁿ chí ngii ndaachi yiinú ndís'tiī ti nguéé du'ū chí cuuvi tee yā 'úú vaadí yeenu nduuti chí ndaachi yiinú ndís'tiī? ³ Chuū idinguúⁿ yeⁿé ndís'tiī ti taachi ndaá nguéé cu'neeⁿ ndaachi nuúⁿ cucáávā ndís'tiī ti ndís'tiī cuuvi tee nī 'úú vaadí yeenu. Véé 'viich'ēetiinúúⁿ 'cúú nanaáⁿ nducyáácá ndís'tiī chí vaadí yeenu chí véé yeⁿé, maaⁿ vaadí yeenu miiⁿ cunéé ndúúcū nducyaaca nī. ⁴ Ní taachi dinguúⁿ yeⁿé ndís'tiī neené di'vaachi 'úú ndii ná staava yeⁿé ndíí tuunu cheécú. Nguéé díⁿ 'tuucā ti cu'neeⁿ ndaachi yiinú ndís'tiī ti neⁿé chí ndís'tiī cuuvi déenu nī chí neené neⁿé taavi cá ndís'tiī.

Ndyuūs nadach'ēecú yā nuuⁿndi yeⁿé 'iiⁿyāⁿ

⁵ Ndúútí chí 'aama 'iiⁿyāⁿ díⁿ yā 'aama cosa chí véé de'ē cáávā chí cu'neeⁿ ndaachi yiinú náⁿā ndís'tiī 'úú ntúúⁿ cu'neeⁿ ndaachi yiinú 'úú ndúúcū nducyáácá ndís'tiī dendu'ū 'téé nūúⁿ. 'Úú nguéé neⁿé caaⁿmáⁿ yeⁿe 'iiⁿyāⁿ miiⁿ chí véé cá nuuⁿndi yeⁿé yā yeⁿe chí dinuuⁿndí yā. ⁶ Deenú ntúúⁿ chí n'deēe cá ndís'tiī 'āā n'diichí nī nuuⁿndi yeⁿé yā ní nadacádiinúúⁿ chí 'āā véé castigo yeⁿe 'iiⁿyāⁿ miiⁿ, ní nguéé díⁿ nī más ca ndúúcū 'iiⁿyāⁿ miiⁿ. ⁷ Maaⁿ ní canéé chí nca'á nī 'vi-

ich'etínūuⁿ 'iiⁿyāⁿ 'cūū ní nadach'ēecú yā yeⁿe 'iiⁿyāⁿ 'cūū ní nguéé neené taaⁿ cu'neeⁿ ndaachi yiinú yā. ⁸Caavā chuū chi ngaⁿá chí ndís'tiī 'cuuⁿmiⁿ nī chi dinéⁿe ca nī 'iiⁿyāⁿ 'cūū. ⁹Níicu taachi idinguúⁿ chuū yeⁿe ndís'tiī yeⁿe 'iiⁿyāⁿ 'cūū neⁿe' cadiiinúúⁿ ní n'diichí nduuti chi ndís'tiī ní dííⁿ nī ndúúcu yā tan'dúúccā chi 'āā ngaⁿá ngii ndís'tiī na carta yeⁿe. ¹⁰Úú dendú'ū caⁿá inadich'ēecú nuuⁿndi yeⁿe 'āā de'é nūuⁿ 'iiⁿyāⁿ chi ndís'tiī nadich'ēecú yā nuuⁿndi yeⁿe yā. Ní taachi 'úú nadich'ēecú yeⁿe yā, ní 'túuca dííⁿ cucáávā ndís'tiī ní nanááⁿ Cristo. ¹¹Nduuti chí diiⁿ yú 'túúccā tuuⁿmi ní yááⁿ'nguiinūuⁿ nguéé cuuvi cuchéé sa yeⁿe yú ti deenu yú de'ē chi ginnche'ei sá.

Pablo nguēe yeenú yā chi ndaa yā na yááⁿ Troas

¹²Taachi cueⁿe' cuuaⁿ cyuuni ní ndaa na yááⁿ Troas chi caaⁿmaⁿ nduudu yeⁿe evangelio yeⁿe Cristo, tuuⁿmi ní Ndyuūs nn'guaáⁿ yā yááⁿ miiⁿ tan'dúúccā chi nn'guaaⁿ 'iiⁿyāⁿ 'áámá cheendi va'āi. 'Tíicā dííⁿ Ndyuūs cucaavā 'úú chi caaⁿmaⁿ nduudu yeⁿe evangelio. ¹³Ní neené nadacadiinúúⁿ na staava yeⁿe' ti nguéé ndaācá saⁿā Tito, hermano yeⁿe yú. Cáávā chuū dííⁿ despedir 'iiⁿyāⁿ yeⁿe yááⁿ miiⁿ ní chiicá ní cueⁿe' na yáⁿāa Macedonia.

Cheē yú yeⁿe nducuéⁿe ti yeⁿe Cristo s'uuúⁿ

¹⁴Úú ní ca'á gracia Ndyuūs caati Ndyuūs caⁿá yā nduucú 'nū 'āā tíí nūuⁿ lugar naachi caⁿá 'nū caati nús'uu cuuvi cheé 'nū yeⁿe nducuéⁿe cucáávā s'uuúⁿ ní yeⁿe Cristo s'uuúⁿ. Níicú Ndyuūs dííⁿ yā cáávā nús'uu chi deenu 'nū yeⁿe Cristo chi cuuvi caaⁿmaⁿ 'nū yeⁿe Cristo nanááⁿ nducyaaca 'iiⁿyāⁿ yeⁿe núúⁿmaⁿ iⁿ'yeeⁿdí. Ní 'iiⁿyāⁿ cuuvi deenú yā yeⁿe Cristo dendú'ū. Ní chuū

ní tan'dúúccā 'áámá cosa chi n'dēēvee ngééⁿ chi véé nducuéⁿe yááⁿ naachi cueⁿe' nū. ¹⁵S'uuúⁿ tan'dúúccā 'áámá cosa chi n'dēēvee ngééⁿ chi incienso nanááⁿ Dendyuūs. 'Tíicā s'uuúⁿ chi i'teenu yú Cristo. 'Tiicá ntúūⁿ s'uuúⁿ nanááⁿ 'iiⁿyāⁿ chi caⁿá yā cu'téenu yā Jesucristo ní caⁿá yā na va'ai cheeti nguuvi. Ní nanááⁿ 'iiⁿyāⁿ chi nguéé i'téenu yā ní caⁿá yā ná vaadi n'gii cueⁿe' daāⁿmaⁿ, ¹⁶s'uuúⁿ tan'dúúccā 'áámá cosa chi ngééⁿ chi n'díí chí 'āā ntee n'dáaca, 'tíicā s'uuúⁿ nanááⁿ 'iiⁿyāⁿ chi nguéé i'téenu yā Jesucristo. Ní chuū ch'iⁿi chi caⁿá yā 'cuuvi yā cueⁿe' daāⁿmaⁿ. Ní s'uuúⁿ ní tan'dúúccā 'áámá cosa chi n'dēēvee ngééⁿ ti véé vida yeⁿe. 'Tíicā s'uuúⁿ nanááⁿ 'iiⁿyāⁿ chi caⁿá yā cu'téenu yā Jesucristo ní caⁿá yā na va'ai cheeti nguuvi. ¿Dú'ū cuuvi diiⁿ yeⁿe chuū 'tuuccā? ¹⁷Nús'uu ní nguéé caaⁿmaⁿ 'nū nduudu cuaacu yeⁿe' Ndyuūs chi 'iiⁿyāⁿ nadíí've yā nús'uu, tan'dúúccā chi diiⁿ n'deēe n'dái 'iiⁿyāⁿ. Naati Ndyuūs dichó'o yā nús'uu ní nús'uu ní caaⁿmaⁿ 'nū nduudu miiⁿ ndúúccū núúⁿmaⁿ staava yeⁿe' nū. Ní Ndyuūs inaáⁿ yā nús'uu ti dííⁿ 'nū tan'dúúccā chi Cristo neⁿe' yā chí dííⁿ 'nū, ti yeⁿe' Cristo nús'uu.

Yeⁿe Nduudu Ngai yeⁿe' Ndyuūs

3 Taachi dingúúⁿ 'nū chuu, ¿'áá nada-cadiinúúⁿ nī chí nús'uu caaⁿmaⁿ cá 'nū chí n'daacā idiíⁿ 'nū? O ¿'áá canee chí ndeé 'nū taama carta chí ndéē recomendación, nanááⁿ ndís'tiī, o 'áámá carta chí dingúúⁿ nī chí ngíicá nī recomendación yeⁿe' nī tan'dúúccā chí ndeē tanáⁿā 'iiⁿyāⁿ? Nguēe 'tíicā. ²Ndís'tiī ní tan'dúúccā carta yeⁿe' 'nū 'tíicā ndís'tiī ti yeⁿe' Cristo ndís'tiī. Ní ndís'tiī tan'dúúccā chí carta yeⁿe' 'nū chí canéé nguūⁿ na staava yeⁿe' 'nū 'tíicā ndís'tiī. Ní 'íicú nducyáácá 'iiⁿyāⁿ cuuvi 'cueeⁿ yā níicú cadíinuuⁿ yā chí ndís'tiī i'téenu nī Jesucristo. ³Ní nducyáácá 'iiⁿyāⁿ deenú yā chí ndís'tiī ní tan'dúúccā 'áámá carta

chi dingúuⁿ Cristo ní tee yā nús'uu 'ti-icā ndís'tiī cáávā ntiīⁿnyuⁿ yeⁿe Cristo chi díⁿ 'nū nanááⁿ ndís'tiī. Carta miiⁿ nguéé cánéé nguūⁿ ndúúcu tinta ndíi nguéé ndúú tan'dúúca chi Ndyuūs díiⁿ nguūⁿ yā ley na tabla yeⁿe tuūu ti Espíritu N'dai yeⁿe Ndyuūs chi canduuchi dinguūⁿ carta 'cūū staava yeⁿe yú.

⁴Ní seguro chi Ndyuūs ndeeve yā ndís'tiī ní vée 'viich'etiimūⁿ yeⁿe 'nū caati Jesucristo innee yā 'úú. Ní deenú chi dichí've Ndyuūs ndúúcu ntiīⁿnyuⁿ n'daacā chi díⁿ cucááva Cristo. ⁵Nguéé nadacadiinúúⁿ 'nū chi cuuvi cundee yú cuidado yeⁿe nducueⁿē chi díiⁿ yú. Ndyuūs nginnee yā nús'uu ní tee yā poder nús'uu ní cuuvi díⁿ 'nū nducueⁿē. ⁶Ndyuūs tee yā nús'uu ntiīⁿnyuⁿ chi candéé 'nū táamá compromiso yeⁿe yā chí ngai. Ní compromiso chí ngai miiⁿ nguéé yeⁿe ley yeⁿe yú chi canéé nguūⁿ ti yeⁿe Espíritu N'dai yeⁿe Dendyuūs. Nduudu yeⁿe ley yeⁿe yú díiⁿ chi condenado s'uuúⁿ ní 'cuuvi yú naati Espíritu N'dai miiⁿ itee vida cueⁿe daāⁿmaⁿ s'uuúⁿ.

⁷Ley yeⁿe yú chi Ndyuūs dinguúⁿ yā na tabla yeⁿe tuūu nanááⁿ Moisés ní dichí've chi deenu yú chi vée nuuⁿndi yeⁿe yú, ní chīndai yú. Ní taachi ndaā ley miiⁿ chi deeve n'dai ca yeⁿe Ndyuūs tuuⁿmi ní ngii na naaⁿ Moisés miiⁿ. Ní 'iiⁿyāⁿ yeⁿe Israel nguéé cuuvi n'diichí yā naaⁿ Moisés miiⁿ cáávā chi neenē deeve ngii naáⁿ yā, naati deevé miiⁿ na naáⁿ yā 'āā ntuuvi. ⁸Taachi ndaā ley miiⁿ ní deevé cá ngii ní chó'oo deeve yeⁿe 'áá nguéé cuuvi ch'ete n'dái cá ngii ntiīⁿnyuⁿ yeⁿe Espíritu N'dai yeⁿe Ndyuūs nguéé ti ntiīⁿnyuⁿ yeⁿe ley miiⁿ? ⁹Ní nduuti chí ntiīⁿnyuⁿ yeⁿe ley miiⁿ chi deevéé n'dai ní díiⁿ condenar 'iiⁿyāⁿ chí ndai yā, tuuⁿmi ní 'áá nguéé más cā ch'ete taavi cá ngii ntiīⁿnyuⁿ yeⁿe nduudu yeⁿe Ndyuūs ndúúcu Espíritu N'dai ti díⁿ yā aceptar 'iiⁿyāⁿ nguéé ti ley miiⁿ? 'Tíicā váá. ¹⁰Caati 'aara chí deevé n'dai ley miiⁿ

nguéé deevé chiī chi cuuvi tan'dúúca chi deevé n'dai ca yeⁿe Ndyuūs. Maaⁿ ní ley miiⁿ canee tan'dúúca chi nguéé deevéé n'dai. ¹¹Caati chí ley miiⁿ chí deevéé ní cunee 'áamá tiempo nūuⁿ tuuⁿmi ní chuunee deevéé taavi cá nduudu yeⁿe Ndyuūs chíⁿ chí 'áamá cūnee.

¹²Cáávā chuū deenú 'nū chi compromiso chi ngai canéé cueⁿe daāⁿmaⁿ ní 'tíicā cuuvi. Maaⁿ ní caaⁿmaⁿ 'nū nduudu ngai yeⁿe Ndyuūs ní nguéé 'va'a 'nū mar 'áamá. ¹³Nguéé díⁿ 'nū tan'dúúca chi díiⁿ Moisés taachi sндуú yā 'áamá velo naáⁿ yā ti 'iiⁿyāⁿ Israel nguéé cuuvi snáaⁿ yā naaⁿ Moisés miiⁿ cucáávā deeve yeⁿe Ndyuūs chi canéé na náaⁿ yā. Deevé miiⁿ nguéé chíⁿ 'naaⁿ. ¹⁴Ní 'iiⁿyāⁿ Israel s'eeⁿ nguéé tuumicadiinúúⁿ yā yeⁿe deevéé chi canéé nááⁿ Moisés miiⁿ. Ndiī nguví 'cūū taachi 'iiⁿyāⁿ Israel s'eeⁿ ch'eeⁿ yā compromiso ndiicūū miiⁿ, nguēe cuuvi deenú yā caati canéé yā tan'dúúca chi canéé 'aama velo na naáⁿ yā. Velo miiⁿ Cristo díiⁿ chí chó'oo yeⁿe. ¹⁵Ndiī nguví 'cūū taachí 'iiⁿyāⁿ s'eeⁿ 'cueeⁿ yā ley yeⁿe Moisés, cunee velo miiⁿ ti nan'gaadí vaanicadiinūuⁿ yeⁿe yā. ¹⁶Ní ndiī taachi cu'téenu yā Señor Jesucristo Daiyá Dendyuūs tuuⁿmi ní velo miiⁿ ní cuavii. ¹⁷Señor miiⁿ ní Espíritu yeⁿe Cristo. Ní naachi vée Espíritu miiⁿ yeⁿe Señor miiⁿ tuuⁿmi ní 'iiⁿyāⁿ canéé libre yā. ¹⁸Maaⁿ ní cáávā chuū nducyaaca yú nguéé snee yú tan'dúúca chí vée 'áamá velo na naaⁿ yú. Maaⁿ ní 'iiⁿyāⁿ n'diichi yā deeve yeⁿe Señor Jesucristo yeⁿe yú na vida yeⁿe yú ti s'uuúⁿ tan'dúúca 'áamá espejo, 'tíicā s'uuúⁿ. Ní taachi n'diichi yú Señor Jesucristo yeⁿe yú tuuⁿmi ní n'daaⁿ vida yeⁿe yú chi cuuvi tan'dúúca vida yeⁿe Cristo. Ní cūnee ngiinu yú chí n'daaⁿ vida yeⁿe yú tan'dúúca chí ch'ete ca deeve vida yeⁿe Señor Jesucristo yeⁿe yú. Chuū chí idiíⁿ Espíritu yeⁿe Cristo cáávā s'uuúⁿ.

4 Deenu yú chi Señor Jesucristo tee yā s'uuúⁿ cosas chi n'dai ca. Cáávā chuū díⁿ 'nū ntiⁿnyuⁿ yeⁿé yā ní caaⁿmaⁿ 'nū nduudu cuaacu yeⁿé yā ní nguēe cuuvi cúunū 'nū. ²Maaⁿ ní nguēe díⁿ 'nū cosas chi nguēe n'daacā chi cuuvi snááⁿ 'iiⁿyāⁿ, cosa chi díⁿ 'nū chi 'cuináaⁿ 'nū nanááⁿ 'iiⁿyāⁿ. Ní nguēé cachiicá 'nu nginnche'éf 'nū 'iiⁿyāⁿ. Ní nguēé ndastaⁿá 'nū nduudu cuaacu yeⁿé Ndyuūs ndúúcu nduudu yaadi. 'Tíicā idifⁿ 'nū ní caaⁿmaⁿ 'nū dámaaⁿ nduudu cuaacu yeⁿé Dendyuūs ní cuuvi deenú nducyaaca 'iiⁿyāⁿ, ní Dendyuūs n'diichí yā nús'uu. ³Nduuti chi 'iiⁿyāⁿ nguēé ituumicádiinuuⁿ yā nduudu cuaacu chi ngaⁿá 'nū tuu'mí ní 'iiⁿyāⁿ miiⁿ nguēé i'téenu yā Señor Jesucristo yeⁿe yú ní cuuvi ndái yā. ⁴'Iiⁿyāⁿ nguēé i'téenu yā Señor Jesucristo caati ndyuūs yeⁿe iⁿyeēⁿdí 'cūū chi yááⁿnguiinūⁿ n'gaadi sá ná vaadi cadiinúúⁿ yeⁿe yā, caati yaaⁿnguiinūⁿ nguēé n'gúúⁿ sá chi n'diichí yā dēeve yeⁿe Dendyuūs. Maaⁿ ní 'iicu 'iiⁿyāⁿ nguēé snaaⁿ yā dēevé n'dai yeⁿe nduudu yeⁿe Cristo chí dēeve. Ní s'uuúⁿ taachí inaaⁿ yú Cristo miiⁿ inaaⁿ yú Ndyuūs. ⁵Ní taachi ngaⁿá 'nū nduudu yeⁿe Dendyuūs nguēé ngaⁿá 'nū nduudu yeⁿe maá 'nū ti ngaⁿá 'nū chi Jesucristo miiⁿ ní Señor yeⁿe yú. Tii nús'uu ní dichí've 'nū ndís'tii cucáávā chi Cristo neⁿé yā nducyaaca 'iiⁿyāⁿ. ⁶Ní taachi Ndyuūs din'dái yā iⁿyeēⁿdí ngaⁿa yā 'tíicā: Yeⁿe naachí maaiⁿ miiⁿ canéé dēeve. Maaⁿ Ndyuūs miiⁿ ní díⁿ yā chi dēeve miiⁿ canéé na staava yeⁿé 'nū. Ní ndúúcu dēeve miiⁿ cuuvi deenú 'nū vaadi deenu yeⁿé Ndyuūs chí n'dai taavi ca. Ní nús'uu n'diichí 'nū dēeve yeⁿé Ndyuūs taachi n'diichi 'nū naaⁿ Jesucristo miiⁿ.

Vida yeⁿé 'iiⁿyāⁿ chi i'téenu yā Jesucristo

⁷Ní nduudu cuaacu yeⁿe Ndyuūs chi i'téenu 'nū canéé na staava yeⁿe 'nū

tan'dúúcā tesoro 'tíicā. Ní 'áará chi cuerpo yeⁿé 'nū tan'dúúcā 'cuutí yáⁿaa chi nguēe dēevéé, nús'uu ch'iⁿí 'nū cáávā ntiⁿnyuⁿ chi díⁿ 'nū chi poder chi cānee nduucú 'nū ní ch'ēete ca ní yeⁿé Ndyuūs. Ní nguēé yeⁿe nús'uu. ⁸'Áará chi nduú cuaaⁿ n'geenú 'nū ngii mar 'áámá naáⁿ nguēé diiⁿ chi dúú'va 'nū. 'Áará chi n'dee nááⁿ inadacádiinúúⁿ 'nū deenú chee chi díⁿ 'nū. ⁹'Áará chi 'iiⁿyāⁿ ní n'daa yā chi neⁿe 'caaⁿnúⁿ yā nús'uu Dendyuūs canee yā nduucú 'nū. 'Áará chi 'iiⁿyāⁿ cun'dáa yā nús'uu na yáⁿaa nguēe 'cuuvi 'nū. ¹⁰'Áā tíí nūⁿ cuááⁿ naachi caⁿá 'nū cueⁿe daáⁿmaⁿ canee na staava yeⁿé 'nū chi cuuvi 'cuuví 'nū tan'dúúcā chi ch'i Señor Jesucristo yeⁿe yú. Ní 'íicú 'iiⁿyāⁿ cuuvi n'diichí yā chi Jesucristo nadanguáⁿai yā nús'uu. Ní cuuvi deenú yā chí Jesucristo canduuchí yā. ¹¹Ní nducuéⁿe tiempo chi sduuchí 'nū na iⁿyeēⁿdí 'cūū deenú 'nū chi cuuvi 'cuuví 'nū cucáávā chi nús'uu díⁿ 'nū ntiⁿnyuⁿ yeⁿe Cristo. Ní 'íicú 'iiⁿyāⁿ cuuvi n'diichí yā chi poder yeⁿe Cristo Jesús canéé ndúúcu nús'uu. ¹²'Tíicā ní vaadi n'gii diiⁿ ntiⁿnyuⁿ yeⁿe na vida yeⁿé 'nū 'tíicá ntúúⁿ vida cueⁿe daáⁿmaⁿ diiⁿ ntiⁿnyuⁿ yeⁿe na vida yeⁿé ndís'tii.

¹³'Tíicā canéé nguūⁿ na libro yeⁿé Ndyuūs ndii cuááⁿ vmnaaⁿ: 'Úú i'teenú, ní cáávā chiiⁿ chi ngaⁿá. Ni 'tíicá ntúúⁿ nús'uu i'téenu 'nū ní cáávā chuū ngaⁿá 'nū. Ní daama chi'téenu 'nū ndúúcu yā. ¹⁴Caati deenu yú chi 'iiⁿyāⁿ chi nadacuéⁿ yā Señor Jesucristo yeⁿe nguaaⁿ tinaⁿā, 'iiⁿyāⁿ miiⁿ nadacuéⁿ ntúúⁿ yā s'uuúⁿ yeⁿe nguaaⁿ tináⁿā. Ní Dendyuūs candéé yā nús'uu ndúúcu ndís'tii nanááⁿ Jesucristo. ¹⁵Nducuéⁿe chi díⁿ 'nū ní cucáávā chi ndís'tii cuuvi cutaⁿá ní tanducuéⁿe chí n'dai. Ní 'íicú n'dee n'ááⁿ 'iiⁿyāⁿ cuuvi cutaⁿá yā cosa chi n'dai yeⁿé Dendyuūs. Ní n'dee n'dái 'iiⁿyāⁿ cuuvi caaⁿmaⁿnguaⁿá yā, ní ca'a

yā gracia, Dendyuūs, ní cuuvi ch'εεte cá yā Dendyuūs chi deεve taavi ca.

¹⁶ Cáávā nducuéⁿē chuū nguéé ngii cúunu yú 'aara chi cuerpo yeⁿe yú n'gii nééⁿ nguuvi nguuvi naati Dendyuūs téε yā fuerzas s'uuúⁿ nguuvi nguuvi. ¹⁷ Nífcú chuū chi n'geenú yú ngii na iⁿ'yeeⁿdí 'cūū nguéé ch'εεte ní nuuⁿ nūuⁿ ch'ó'oo, ní diiⁿ cáávā s'uuúⁿ chi véé yeⁿe yú 'aama lugar chí n'dεεve n'dai ca ní n'dεēe ca chi 'áámá cunee cueⁿe daāⁿmaⁿ. ¹⁸ Maaⁿ ní nguεε diiⁿ yú cuenta yeⁿe dendu'ū chi inaaⁿ yú ti chífⁿ chí inaaⁿ yú ní ngo'o yéⁿē. Naati chífⁿ chi nguéé inaaⁿ yú cunee cueⁿe daāⁿmaⁿ.

5 Maaⁿ ní deenu yú chi cuerpo yeⁿe yú 'cuiinu ti tan'dúúcā 'áámá va'ai chi nguéé 'áámá cūnee 'tífcā cuerpo yeⁿe yú naati Ndyuūs idin'dái yā 'aama va'āi yeⁿe yú ná va'ai chεeti nguuvi chí 'áámá cūnee. Ní nguéé saⁿ'ā yeⁿe iⁿ'yeeⁿdí 'cūū din'dái sa ndúúcū ta'a sa va'ai miiⁿ. ² Maaⁿ ní chí n'dai yiinu yú ti nééné neⁿé yú n'daaⁿ yú cuerpo yeⁿe yú ní snee yú na va'ai chεeti nguūvi ndúúcū cuerpo ngai ní deεve chi yeⁿe va'ai chεeti nguuvi. ³ Nguuvi miiⁿ ní Ndyuūs ca'á yā chi téε yā 'aama cuerpo ngai yeⁿe yú chi tan'dúúcā chi 'aama vestido. Ní Ndyuūs nguéé cuuvi ndaacā yā s'uuúⁿ chi nguéé chí deεve cuerpo yeⁿe yú. ⁴ Neⁿe chi snée yú na iⁿ'yeeⁿdí 'cūū na va'ai yeⁿe yú chi cuerpo yeⁿe yú, nandái yiinu yú ti n'geenu yú ngii. Nguéé cucaavā chi neⁿe yú chi cuerpo ndiicūū yeⁿe yú 'cuūvi naati neⁿe yú chi Ndyuūs téε yā chi'caadí na cuerpo yeⁿe yú chí ngai chi tan'dúúcā chi catecai ngai yú. Ní 'iicú cuerpo ndiicūū yeⁿe yú yeⁿē iⁿ'yeeⁿdí 'cūū ní 'cuiinu ti snée yú ndúúcū cuerpo chí ngai ní véé vida cueⁿe daāⁿmaⁿ yeⁿe yú. ⁵ Ní cáávā chuū ní Ndyuūs ch'iindiyaáⁿ yā yeⁿe yú cuerpo chí ngai ní tee yā Espíritu N'dai yeⁿe yā s'uuúⁿ chi cuuvi deenu yú chi cuaacu chi tee yā chuū chi cuuvi yeⁿe yú.

⁶ 'Tífcā rā va, cueⁿe daāⁿmaⁿ véé confianza yeⁿe yú ndúúcū Dendyuūs. Deenu yú chi neⁿe chi snée yú na iⁿ'yeeⁿdí 'cūū ndúúcū cuerpo ndiicūū yeⁿe yú nguéé cuuvi cunee yú ndúúcū Señor yeⁿe yú na va'ai chεeti nguuvi. ⁷ Maaⁿ ní chiiⁿ chi diiⁿ yú, diiⁿ yú ti i'teenu yú Jesucristo ní nguéé idiⁿ yú cucáávā chi n'diichi yú cosa chi yeⁿē iⁿ'yeeⁿdí 'cūū. ⁸ 'Ífcú vεε confianza yeⁿē yú. Neⁿe yú caⁿ'a yú yeⁿē vaacu yú chi cuerpo ndiicūū yeⁿe yú ní cunee yú ndúúcū cuerpo ngai yeⁿe yú na va'ai chεeti nguuvi ndúúcū Señor yeⁿē yú. ⁹ Cáávā chuū neⁿe yú diiⁿ yú cueⁿe daāⁿmaⁿ chiiⁿ chi Ndyuūs neⁿé yā chi diiⁿ yú nduuti chi snée yú na va'āi yeⁿe yú na iⁿ'yeeⁿdí 'cūū o nduuti chi snée yú na va'āi yeⁿe yú na va'āi chεeti nguuvi ndúúcū Señor Jesucristo. ¹⁰ Ti 'tífcā nducyaaca yú canee chi naⁿ'a yú nanááⁿ juez chi Cristo ní 'ífcú ca'aama ca'aama s'uuúⁿ cuuvi cuta'ā yú chuu chi cuuvi yeⁿē yú tan'dúúcā chi diiⁿ yú ntiiⁿnyuⁿ yeⁿé yā neⁿe chi snee yú na cuerpo ndiicūū yeⁿe yú na iⁿ'yeeⁿdí 'cūū, nduuti chi ntiiⁿnyuⁿ chi n'daacā o nguεε n'daacā.

Nduudu cuaacu yeⁿe vaadi 'diiⁿ

¹¹ Nús'uu ní deenú 'nū chi Señor Jesucristo caⁿ'á yā n'diichí yā nducyaaca 'iiⁿyāⁿ. Ní neⁿé 'nū diiⁿ 'nū n'daacā. Ní cáávā chuū ní nús'uu diitu diiⁿ 'nū nducuéⁿē chi ch'iⁿ'í 'nū 'iiⁿyāⁿ chi ngaⁿ'á 'nū nduudu cuaacu yeⁿe Señor Jesucristo. Ndyuūs déenu yā chiiⁿ chi diiⁿ 'nū ní cunee ngiinú 'nū chi ndís'tiī cuuvi déenu nī chuū dendu'ū. ¹² Nguéé ngaⁿ'á 'nu taama vmnéⁿēe yeⁿe vida yeⁿé 'nū nanááⁿ ndís'tiī naati ca'á 'nū 'áámá lugar ndís'tiī ti cuuvi caaⁿ'máⁿ nī chi n'daacā idiⁿ 'nū. Ngaⁿ'á 'nū nduudu cuaacu nanááⁿ ndís'tiī. Maaⁿ ní 'iicu ndís'tiī cuuvi nan'guεεcútáⁿ'a nī yeⁿe 'iiⁿyāⁿ chi itiinguuneeⁿ nī, 'iiⁿyāⁿ chi ngaⁿ'a yā yeⁿe maáⁿ yā chi n'daacā yā tan'dúúcā chi tanáⁿ'ā 'iiⁿyāⁿ snaaⁿ

yā, ní 'iiⁿyāⁿ miiⁿ nguéé nacádiinúúⁿ yā yeⁿē chííⁿ chí vεε na staava yeⁿé yā. ¹³Ní nduuti chí nadacadiinúúⁿ ní chí nús'uu tan'dúúcā loco nús'uu, 'tíicā ngaⁿá 'nū ní dííⁿ 'nū chí Ndyuūs ní ch'εεté yā nanááⁿ ndís'tií. Ní nduuti chí nguéé loco 'nū ní cáávā chí dííⁿ 'nū ntiiⁿnyuⁿ yeⁿe Ndyuūs cucáávā ndís'tií. ¹⁴Jesu-cristo ngaⁿa ntiiⁿnyuⁿ yeⁿé 'nū tí neⁿé yā nús'uu. Deenu yú chí cuaacu chí 'áámá saⁿa chí Cristo chí'í sa, ní cucáávā saⁿa miiⁿ ní tan'dúúcā chí nducyaaca 'iiⁿyāⁿ ní chí'í. ¹⁵'Tíicā Cristo chí'í yā cucáávā nducyaaca 'iiⁿyāⁿ maaⁿ ní 'iiⁿyāⁿ chí snéé yā na iⁿ'yeeⁿdí 'cūū. 'Iiⁿyāⁿ s'eeⁿ 'áā ntéé snéé yā cucáávā vida yeⁿe maáⁿ yā caati snéé yā yeⁿe Jesucristo chí chí'í yā ní nduuchi ntuuⁿ yā yeⁿe nguaaⁿ tináⁿā cucáávā 'iiⁿyāⁿ. ¹⁶Maaⁿ ní cáávā chuū chí chó'oo nús'uu nguéé inaáⁿ 'nū 'téé yeⁿé 'iiⁿyāⁿ tan'dúúcā tanáⁿā 'iiⁿyāⁿ yeⁿé iⁿ'yeeⁿdí 'cūū. Tiempo chí 'áā chó'oo nús'uu inaáⁿ 'nū Cristo ndúúcu yeⁿé chí dííⁿ yā taachi canee yā na iⁿ'yeeⁿdí 'cūū naati maaⁿ ní nguεε inaáⁿ 'nū 'tíicā. In-ááⁿ 'nū chí Cristo ní Ndyuūs. ¹⁷'Tíicā ní 'iiⁿyāⁿ chí i'téenu yā Cristo ní yeⁿé Cristo. Ní 'iiⁿyāⁿ miiⁿ 'áámá 'iiⁿyāⁿ ngai. Cosas chí dííⁿ yā vmaaaⁿ nguéé dííⁿ yā maaⁿ tí nducueⁿé chí dííⁿ yā ní yeⁿe vida ngai yeⁿe yā.

¹⁸Ní tanducueⁿé chúū ní Ndyuūs dííⁿ yā. Cucáávā Cristo miiⁿ ní Ndyuūs dííⁿ yā chí s'uuúⁿ ní yeⁿé yā s'uuúⁿ ní nguéé con-tra yeⁿe yā s'uuúⁿ. Ní Ndyuūs ngaⁿa nti-iⁿnyúⁿ yā yeⁿé 'nū chí caaⁿ máⁿ 'nū ndu-udu yeⁿé yā chí 'iiⁿyāⁿ na iⁿ'yeeⁿdí 'cūū cuuvi yeⁿé yā 'iiⁿyāⁿ. ¹⁹'Tíicā canee chí caaⁿ máⁿ 'nū nduudu cuaacu yeⁿe Cristo chí 'iiⁿyāⁿ s'eeⁿ cuuvi yeⁿé yā 'iiⁿyāⁿ. Ní cucáávā Cristo miiⁿ Ndyuūs dííⁿ yā chí véé vaadí dííⁿ nguaaⁿ 'iiⁿyāⁿ nducú yā. Ní nguéé dííⁿ Ndyuūs cuenta yeⁿe nu-uⁿndi yeⁿe 'iiⁿyāⁿ s'eeⁿ. Níicu Ndyuūs tee yā nús'uu ntiiⁿnyuⁿ chí caaⁿ máⁿ 'nū nduudú 'cūū yeⁿé yā chí vaadí 'dííⁿ.

²⁰Maaⁿ ní 'tíicā ndaá 'nū nanááⁿ ndís'tií ndúúcu nduudu yeⁿe Cristo ní caaⁿ máⁿ 'nū nduudu miiⁿ na lado yeⁿe Ndyuūs. Ní tan'dúúcā chí Cristo ngaⁿá yā chí ndaa-cadaamí ní, cáávā chuū nús'uu ngiicá 'nū ndís'tií cááva Cristo chí ndaacadaamí ní yeⁿe nuuⁿndi yeⁿé ní ní 'íicú véé vaadí 'dííⁿ yeⁿe ndís'tií ndúúcu Ndyuūs. ²¹Cristo nguéé dinuuⁿndí yā mar 'áámá. Caati cucáávā s'uuuⁿ Ndyuūs dííⁿ cuenta yā ní dííⁿ yā tan'dúúcā chí Cristo din-uuⁿndí yā. Ní 'íicú taachi yeⁿe Cristo s'uuúⁿ Ndyuūs n'diichí yā s'uuúⁿ chí ndu-uví n'dai vida yeⁿé yú nanáaⁿ yā.

6 'Tiicá ntúúⁿ nús'uu dííⁿ 'nū ntiiⁿnyuⁿ tan'dúúcā chí ntiiⁿnyuⁿ chí neⁿe Ndyuūs. Ngaiⁿ 'nū ndís'tií chí cutaⁿá ní vaadí n'dai chí itée Ndyuūs chí vaadí n'dai chí Ndyuūs chí'í yā s'uuúⁿ. ²Caati 'tíicā Ndyuūs ngaⁿa yā. Ní canéé nguúⁿ na libro yeⁿé yā:

'Úú chí'indiveeⁿ nduudu yeⁿé ní tiempo chí n'daacā. Ní chinnee ndís'tií ngu-uvi chí nanguaⁿái ní.

Nguuvi 'cūū ní 'áámá nguuvi chí cuuvi n'dai cáávā ndís'tií, nguuvi 'cūū ní ngu-uvi chí cuuvi nanguaⁿai ní.

³Maaⁿ ní nguéé dííⁿ 'nū mar 'áámá cosa chí dí'vaachí 'iiⁿyāⁿ tí 'iiⁿyāⁿ cuuvi caaⁿ máⁿ yā chí ntiiⁿnyuⁿ yeⁿe Ndyuūs chí dííⁿ 'nū nguéé n'daacā. ⁴Naati dííⁿ 'nū nducueⁿé ntiiⁿnyuⁿ miiⁿ chí n'daacā tí neⁿé 'nū chí'í 'nū nducyáácá 'iiⁿyāⁿ chí ntiiⁿnyuⁿ chí dííⁿ 'nū ní yeⁿe Ndyuūs. Ní cucáávā ntiiⁿnyuⁿ miiⁿ chí chéé 'nū yeⁿe nducueⁿé chí ch'eenú 'nū chíi ngu-uvi nguuvi. Ní néené n'deé denduⁿú chííⁿ chí dí'vaachi nús'uu ndúúcu chí vεε necesidades yeⁿé 'nū ndúúcu vaadí 'caaⁿva. ⁵Ní chí'eⁿé yā nús'uu chí cu'nééⁿ yā nús'uu na vacūū. Ní neené 'yaaⁿ 'iiⁿyāⁿ nduuvidaamá yā yeⁿe chí neⁿe 'cueⁿe yā nús'uu. Ní dííⁿ 'nū n'deé n'dái nti-iⁿnyuⁿ chí néené díftūū. Ní cho'oo nááⁿ nguuvi chí nguéé cheetiyaadú 'nū, ní nguéé ch'e 'nū va. ⁶Níicú nducueⁿé

dendu'ū chuū ní ch'i'í 'nū 'ii'yā' chi vida ye' é 'nū ní n'daacā. Ní ch'i'í 'nū chi deenú 'nū nduudu cuaacu ye' é Ndyuūs. Ní dí' 'nū ntii'nyu' mii' ndúúcu vaadi ngiīnū ní ndúúcu vaadi n'dai. Ní dí' 'nū nducué' ē cucáāvā Espíritu N'dai ye' é Ndyuūs canee nduucú 'nū. Dí' 'nū túúca ti cuaacu ní'nyú' dine' é 'nu nducyaaca 'ii'yā'. ⁷Ní nga'á 'nū nduudu cuaacu cucáāvā poder ye' e Ndyuūs chi canee nduucú 'nū ní caavā chi n'daacā canee 'nū nanáá' Ndyuūs. 'Tíicā dí' 'nū. Ní dí' 'nū defender nús'uu ndúúcu vaadi cuaacu. Ndúúcu vaadi cuaacu mii' ní tan'dúúca chi ndéé 'nū 'áamá machete chí 'uūvi lados 'caāi' ní dí' 'nū defender nús'uu nduucú. 'Tíicā dí' 'nū. ⁸Ní ná'ā 'ii'yā' nga'á yā chí n'dái 'nū ní taná'a yā nga'á yā chi nguéé n'dái 'nū. Ní ná'ā 'ii'yā' nga'á n'daaca ye' é 'nū ní taná'a yā nguéé nga'á n'daaca ye' é 'nū. 'Áamá tiempo ní dí' yā tratar nduucú 'nū tan'dúúca chi nga'á 'nū nduudu yaadi ní taama tiempo tan'dúúca chi nga'á 'nū chi cuaacu. ⁹Ní 'áamá tiempo 'ii'yā' dí' yā tan'dúúca chi nguéé n'diichí yā nús'uu 'tíicā dí' yā, ní táamá tiempo dí' yā tan'dúúca chi nús'uu amigos ye' é yā, 'tíicā dí' yā. Ní n'dee n'dái tiempo cuuví 'cuūvi 'nū ní nguéé 'cuūvi 'nū. Ní tee yā nús'uu 'áamá castigo chi neené díftuu n'dee n'dái tiempo naati nguē caa'nú' yā nús'uu. ¹⁰'Áará chí di'vaachí yā nús'uu, nús'uu ní yeenú 'nū. 'Áará chi pobre nús'uu, dí' 'nū ntii'nyu' ní n'dee n'dái 'ii'yā' véé vaadi 'cuiica ye' é yā. 'Áará chí nguéé de'ē véé ye' é 'nū nducué' ē chí véé ní ye' é 'nū.

¹¹Ndís'tii hermanos ye' e yú ye' e yáá' Corinto, dinguú' 'nū nduudu ye' é 'nū ye' e nducué' ē chí véé tan'dúúca chí véé ca. Ní nduudu mii' cachiica ye' e staava ye' é 'nū ti ne' é 'nū ndís'tii. ¹²Nús'uu ch'i'í 'nū nducué' ē chí canee na staava ye' é 'nū naati ndís'tii nguéé dí' ní 'túúca nduucú 'nū ti nguéé ch'i'í ní nús'uu chí

ne' é ní nús'uu ndúúcu núú'má' staava ye' é ní. ¹³Nús'uu ngiica 'nū ndís'tii tan'dúúca 'áamá chiida ngiica yā daiya yā 'tíicā ngiica 'nū ndís'tii ti cuuví dine' e ní nús'uu ndúúcu núú'má' staava ye' é ní. Ní ndís'tii cuuví caa'má' ní nduudu cuaacu ye' e nducué' ē tan'dúúca chí nús'uu dí' 'nū ndúúcu ní.

Cuerpo ye' e yú mii' ní yáacū ye' é Ndyuūs chí canduuchi

¹⁴Ndís'tii, nguéé ca'á ní ndúúcu 'ii'yā' chí nguéé i'téenu yā Jesucristo ti nguéé cuuvi dí' ní dáamá ntii'nyu' ndúúcu yā. Ní dí' ní tan'dúúca 'áamá yunta chí nguē daamá tí, 'tíicā dí' ní. ¿'Áá cuuví cuuvi dáamá chí n'daacā ndúúcu chí nguē n'daacā? O ¿'áá daama canee chí deēve ndúúcu chí maāi'? Nguéé cuuvi. ¹⁵¿'Áá cuuvi nduuvidaamá Cristo ndúúcu Satanás? O ¿'áá daama véé parte ye' e 'ii'yā' chí i'téenu yā Cristo ndúúcu 'ii'yā' chí nguéé i'téenu yā Cristo? Nguéé cuuvi. ¹⁶¿'Áá nduuvidaama templo ye' e Ndyuūs ndúúcu ídolos? Nguéé cuuvi. Cuerpo ye' e ndís'tii ní yaacū ye' é Ndyuūs. Ndyuūs maá' yā nga'á yā na libro ye' é yā 'tíicā:

'Úú Ndyuūs canee nduucú 'ii'yā' ye' é ní cachiicá nguaa' 'ii'yā' ye' é. 'Úú ní cuuvi Ndyuūs ye' é yā ní 'ii'yā' cuuvi 'ii'yā' ye' é.

¹⁷Cáava chuū Ndyuūs nga'á yā ní canee nguū' 'tíicā:

Nan'dáa ní nguaa' 'ii'yā' s'ee' ní diví ní ye' e 'ii'yā' s'ee'. 'Tíicā nga'á Señor 'iivú Ndyuūs. Nguéé tuu'ví ní dendu'ū chí vaatí. Ní 'iicu 'úú Ndyuūs dí' aceptar ndís'tii.

¹⁸Ní 'úú Ndyuūs cuuví Chiidá ní. Ní ndís'tii cuuvi daiyá ndís'tii, 'tíicā nga'á 'iivú Ndyuūs caati nducué' ē poder chí véé ní ye' é yā.

7 'Tiicā ndís'tii hermanos ye' é chí neené ne' é. Nducué' ē chuū ní promesa chí Ndyuūs téé yā s'uū'. Cáava

chuū canee ntúūⁿ chi diiⁿ yú ndúúcuⁿ cuerpo yeⁿé yú ní ndúúcuⁿ espíritu yeⁿé yú nducuéⁿé chi n'daacā 'iicu ní dæve yú. Ní nguéé diiⁿ yú mar 'áámá cosa chi nguéé n'daacā ti vee nuūⁿndi yeⁿé yú. Ní néⁿé chi canduuchi yú na iⁿ'yeeⁿdí 'cūū canee chi diiⁿ yú chi dæve ca yú tan'dúúcā chi neⁿe Ndyuūs. 'Tíicā diiⁿ yú ti 'va'a yú Ndyuūs.

**'Iiⁿ'yāⁿ chi i'teenú yā
Cristo na yááⁿ Corinto
nanguεεcunée yā din'daacá yā**

²Maaⁿ ní ngiica 'nū ndís'tiī chi 'cuááⁿ nī nduudu yeⁿé 'nū na staava yeⁿé nī. Nús'uū nguεε diiⁿ daño 'nū yeⁿé mar 'áámá nī, ndíi nguéé díiⁿ 'nū chi diiⁿ nuuⁿndi nī ndíi nguéé nginnche'élí 'nū mar 'áámá 'iiⁿ'yāⁿ. ³Úú nguεε ngaⁿá chuū ti díiⁿ condenar ndís'tiī chi nguéé n'daacá nī. Naati tan'dúúcā chi ngaⁿá vmnááⁿ vmnaaⁿ, neⁿé taavi ndís'tiī. Ní canee yú tan'dúúcā chi daama snée yú. 'Tiicá ntúūⁿ ní canduuchi yú daama vida yeⁿé yú na iⁿ'yeeⁿdí 'cūū ní dáámá 'cuūvi yú. ⁴Vee 'viich'éétiinúúⁿ n'dai yeⁿé ndúúcu nī ní yeenú yeⁿe nī. Ní maaⁿ ní ndúúcuⁿ nducuéⁿé chi ch'eenú chii nguéé di'vaachi 'úú ti nééné véé vaadi yeenú yeⁿé.

⁵Ní ndíi tiempo taachi ndaá 'nū na yáⁿaa Macedonia nguéé ntaavi'tuūnuúⁿ cuerpo yeⁿé 'nū naati n'geenú 'nū ngíi nducuéⁿé cuaaⁿ. Ní nguⁿu 'iiⁿ'yāⁿ nducú 'nū ní di'va'á 'nū na staava yeⁿé 'nū. ⁶Naati Ndyuūs chi ca'a yā 'viich'εεtíinūⁿ 'iiⁿ'yāⁿ chi chicuūmú, maaⁿ Ndyuūs ní tee yā 'viich'εεtíinūⁿ nús'uu taachi ndaā saⁿā Tito hermano yeⁿé 'nū. ⁷Nguéé dámaaⁿ caavā chi ndaā saⁿā Tito miiⁿ ti cáávā chi chiiⁿ sá chi ndís'tiī ca'a nī 'viich'εεtíinūⁿ saⁿā miiⁿ. Ní saⁿā miiⁿ yaa'vi sá nús'uu chi ndís'tiī neené neⁿé nī n'diichi nī nús'uu, ní neene dindaachí nī yeⁿé 'nū ndii ná stááva yeⁿé nī. Ní neené neⁿé nī díiⁿ nī nducuéⁿé chi 'úú neⁿé chi

díiⁿ nī. Ní cucáávā chíiⁿ ní yeenú taaví ca.

⁸Vmnááⁿ vmnaaⁿ díiⁿ sentir yeⁿe carta chi dinguúⁿ yeⁿé nī. 'Aara chi s'neeⁿ ndaachi yiinu nī cáávā carta miiⁿ. Maaⁿ ní nguéé díiⁿ sentir yeⁿe chi dinguúⁿ yeⁿé nī. Vmnaaⁿ vmnaaⁿ nduuti chi s'neeⁿ ndaachi núúⁿ nī, deenú chi carta miiⁿ díiⁿ chí ch'εεtinéé ndaachí nī 'áámá tiempo nūⁿ. ⁹Maaⁿ ní véé vaadi yeenú yeⁿé. Nguéé cucáávā chi s'neeⁿ ndaachi núúⁿ nī naati s'neeⁿ ya'ai 'iinú nī taanduvéé ní ndaacadaamí nī yeⁿe nuuⁿndi chi díiⁿ nī. Ní ndís'tiī s'neeⁿ ndaachí nī tan'dúúcā chi Ndyuūs neⁿe yā chi díiⁿ nī ní 'íicú nús'uu nguéé díiⁿ 'nū mar 'áámá chi cuuvi ndái nī cucáávā nús'uu.

¹⁰Caati chíiⁿ chi díiⁿ Ndyuūs chi inee ya'ai 'iinú yú ní diiiⁿ chi ndaacadaami yú yeⁿe nuuⁿndi yeⁿe yú ní nnguaⁿ'ai yú. Ní 'íicú cáávā chuū nguéé diiⁿ yú chi cunéeé ya'āi 'íinu yú yeⁿe chi nadacadaami yú yeⁿé nuuⁿndi yeⁿe yú. 'Iiⁿ'yāⁿ chi nguéé i'téenu yā Ndyuūs ní ndaachi canee yā na iⁿ'yeeⁿdí 'cūū ní 'cuūvi yā cueⁿe daāⁿ-maⁿ. ¹¹Naati ndís'tiī cucheε nī chi inée ndaachí nī. N'diichí nī maaⁿ ntiin'nyuⁿ yeⁿe vaadi ndaachi táácā idiinⁿ na vida yeⁿé nī. ¿'Áá diiiⁿ chi nadacadiinúúⁿ nī n'daacá yeⁿe nuuⁿndi chi díiⁿ nī ní caaⁿ'máⁿ nī chi nguεε n'daacá idíiⁿ nī? ¿'Áá diiiⁿ chi ndís'tiī nguéé canee yiinú nī yeⁿe chíiⁿ chi díiⁿ nī? ¿'Áá 'va'á nī cúcááva nuuⁿndi chi díiⁿ nī? Cuayiivi ní neⁿé nī n'diichí nī 'úú ní neⁿé nī chi ca'a castigo yeⁿe 'iiⁿ'yāⁿ chi dinuuⁿndí yā. Ní yeⁿé nducueⁿé chuū ch'iⁿ'í nī ndúúcuⁿ chiiⁿ chí díiⁿ nī chi ndís'tiī díiⁿ nī chíiⁿ chí n'daacá. ¹²'Tíicā taachi dinguúⁿ carta miiⁿ yeⁿe ndís'tiī, nguéé dinguúⁿ cáávā 'iiⁿ'yāⁿ chi dinuuⁿndi o cáávā 'iiⁿ'yāⁿ chi ch'eenú yā chii caavā nuuⁿndi miiⁿ. Dinguúⁿ yeⁿe nī ti ndís'tiī cuuvi deenú nī chi nús'uu ní n'gíiⁿ'í 'nū chi véé cuidado yeⁿé 'nū ndúúcuⁿ ndís'tiī nanááⁿ Dendyuūs. ¹³Ní cáávā chuū sta'á 'nū 'viich'εεtíinūⁿ

yeⁿé ndís'tií. Nguéé dámaāⁿ chi sta'á 'nū 'viich'ættínūⁿ yeⁿé ndís'tií naati saⁿā Tito miiⁿ diiⁿ sá chi yeenú taavi 'nū taachi yaa'vi sá nús'uū yeⁿé nī tan'dúúca ndís'tií dííⁿ nī ndúúcu sa. Ní yeenú taavi sā. ¹⁴ 'Úú ngaⁿá ngii saⁿā Tito miiⁿ chi ndís'tií ní n'daacá nī ní 'caandiveéⁿ nī nduudu yeⁿe carta miiⁿ. Ní nguææ 'cuinaáⁿ cucáávā chi ngaⁿá 'tuucā yeⁿé nī ti 'tíicā dííⁿ nī. Nducuéⁿē chi ngaⁿá 'nū ndúúcu ndís'tií ní nduudu cuaacu. 'Tiicá ntuūⁿ nduudu chi ngaⁿá 'nū ngí 'nū Tito miiⁿ yeⁿé ndís'tií ní chiiⁿ chi n'giindiveéⁿ nī nduudu yeⁿe carta miiⁿ ní 'tíicā dííⁿ nī. ¹⁵ 'Tiicá ntúūⁿ Tito miiⁿ dineⁿe cá sa ndís'tií taachi nan'gaācu sa yeⁿē ndís'tií tan'dúúca ndís'tií ch'iindiveéⁿ nī nduudu yeⁿē sa ní dííⁿ nī 'tuucā. Ní ndís'tií ní 'cuúⁿ nī saⁿā miiⁿ ní din'daacā nī caatí 'va'a nī. ¹⁶ Cáávā chuū véé 'viich'ættínúⁿ yeⁿé ndúúcu ndís'tií yeⁿe tanducuéⁿē dendu'ū chi dííⁿ nī.

'Iiⁿyāⁿ ca'á yā n'dee n'dái ofrenda

8 Ndís'tií, hermanos yeⁿé, maaⁿ ní caaⁿ máⁿ 'nū ndís'tií ti deenú nī yeⁿe vaadī n'dai ch'æte yeⁿé Dendyuūs ní táácā chi dííⁿ 'nū ntiiⁿnyuⁿ yeⁿē na nducuéⁿē yaacū yeⁿé Ndyuūs chi snee na nducuéⁿē yāⁿāa yeⁿe Macedonia. ² 'Aara chi 'iiⁿyāⁿ s'eeⁿ yeⁿe yāacū s'eeⁿ diitū n'dái n'geenú yā ngii cucáávā chi chó'oo yeⁿe yā yeenú taavi cá yā. Ní 'áará chi pobre yā ca'á yā n'dee n'dái ofrenda tan'dúúca chi 'áámá 'iiⁿyāⁿ chi 'cuiica, 'tíicā dííⁿ yā caava hermanos chi snee yā na yāⁿāa Judea. ³ 'Úú ngaⁿá nduudu cuaacu yeⁿé yā. Ndúúcu núúⁿmáⁿ staava yeⁿé yā ca'á yā ofrenda, ní ca'á yā nducuéⁿē chi cuuvi yeⁿe yā. Ní ndii ca'á yā más cā chi cuuvi yeⁿe yā. ⁴ Caⁿa diitū yā ndúúcu 'nū chi 'cuaaⁿ 'nū ofrenda chi 'áámá ayuda yeⁿe chi cuuvi yeⁿe hermanos yeⁿē yú chi nguéé véé yeⁿe yā ní ca'á 'nū hermanos s'uúúⁿ. ⁵ Ní dííⁿ yā más cā chi cunee ngiinú 'nū chi dííⁿ

yā. Vmnááⁿ vmaaⁿ ca'á yā vida yeⁿe maáⁿ yā na ta'a Señor Jesucristo yeⁿē yú. Ní cuayiiⁿvi, tan'dúúca chi Ndyuūs neⁿé yā chi dííⁿ yā, 'iiⁿyāⁿ s'eeⁿ téé yā vida yeⁿé yā nús'uu chi dííⁿ yā ntiiⁿnyuⁿ cáávā nús'uu. ⁶ Nducuéⁿe chuū vmnááⁿ vmaaⁿ cuuvi 'nū Tito ní dicho'ó 'nū saⁿā chi caaⁿmaⁿ yā yeⁿé ofrenda yeⁿé ndís'tií. 'Tiicá ntúūⁿ maaⁿ ní dicho'ó 'nū Tito chi 'cuiinu ntiiⁿnyuⁿ miiⁿ ní cutá'a sa ofrenda yeⁿé nī chi ntiiⁿnyuⁿ chi n'dai taavi chi yeⁿé Ndyuūs. ⁷ Ní ndís'tií ní tan'dúúca chi 'cuiicá nī 'tiicá nī ti i'téenu cá nī Ndyuūs. Ní ngaⁿa cá nī nduudu cuaacu, ní déenu cá nī. Ní néené neⁿé nī cunneé nī nús'uu, ní neⁿé nī nús'uu. Maaⁿ ní neⁿé 'nū chi ndís'tií ní ca'a cá nī ofrenda yeⁿé nī ní din'dai ca ntiiⁿnyuⁿ 'cūū chi cunneé nī hermanos yeⁿe yú.

⁸ 'Úú nguéé ca'á orden yeⁿé chuū. Dámaāⁿ neⁿé chi deenú nī tan'dúúca chi diiⁿ tanáⁿā hermanos yeⁿe yāⁿāa yeⁿe Macedonia ní 'íicú cuuvi deenú chi cuaacu chi ndís'tií dinéⁿe nī Ndyuūs caavā ofrenda chi ca'á nī. ⁹ Ní ndís'tií ní 'āā deenú nī chéé chí vaadi n'dai taavi ca yeⁿé Señor Jesucristo yeⁿē yú. Cristo miiⁿ 'āā 'cuiicá yā naati dííⁿ yā chi pobre yā cucáávā chi néⁿe yā s'uúúⁿ. Ní 'íicú ndís'tií cuuvi cuta'á nī vaadi 'cuiica yeⁿé yā cáávā Cristo chi dííⁿ yā chi pobre yā.

¹⁰ Ní yeⁿē ofrenda 'cūū 'úú yaa'vi neⁿé ndís'tií chuū. N'daacā ca chi 'cuiinú nī chee chi dííⁿ nī nduuyu chi 'āā chó'oo. Ndís'tií ní vmnááⁿ vmaaⁿ 'iiⁿyāⁿ chi dííⁿ yā 'tuucā ní 'tíicā ní neⁿé chi di'cuiinú nī yeⁿe ofrenda miiⁿ nguuvi chi cuchii. ¹¹ Maaⁿ ní dííⁿ nī 'tiicá ní di'cuiinú nī ntiiⁿnyuⁿ yeⁿe nī chi 'āā neⁿé nī tan'dúúca chi cuchíí nī diiⁿ nī ndii cuááⁿ vmaaⁿ. Ní ca'á nī ofrenda chee chi cuuvi dííⁿ nī. ¹² Ní nduuti chi 'áámá ndís'tií cuaacu nííⁿnyúⁿ neⁿé nī ca'a nī ofrenda, tuu'mi ní Ndyuūs dííⁿ yā aceptar ofrenda yeⁿé nī ní diiⁿ cuenta yā yeⁿē chi véé yeⁿé nī nguéé yeⁿe chi nguéé véé yeⁿé nī.

¹³Úú nguéé neⁿé chi ndís'tií ca'á nī más cā ofrenda chi cuuvi nī nī 'āā ntéé véé necesidades yeⁿé nī cucáāvā chi inneé nī náⁿā hermanos. ¹⁴Maaⁿ ní véé ca yeⁿé nī ní cuuvi dííⁿ nī completar ofrenda yeⁿé nī ní ca'á nī 'iiⁿyāⁿ chi nguéé véé yeⁿé yā. Ní cunnee nī 'iiⁿyāⁿ. Ní cuuvi ca'á nī daamā nduucú yā. Cuayivi ní taachi nguéé véé yeⁿé nī ní 'iiⁿyāⁿ s'eeⁿ vee ca yeⁿé yā, 'iiⁿyāⁿ s'eeⁿ cuuvi téé yā ofrenda yeⁿé nī ní teé yā ofrenda ndís'tií. Ní nginnee yā ndís'tií. 'Tíicā ca'á nī daama ndúúcu yā. ¹⁵'Tíicā canee nguūⁿ na libro yeⁿe Ndyuūs ndii cuááⁿ vmaaaⁿ: 'iiⁿyāⁿ chi véé cá yeⁿé yā nguéé nacaāva yeⁿé yā. 'iiⁿyāⁿ chi duūⁿvi vee yeⁿé yā nguéé chii faltar yeⁿé yā.

Yeⁿé saⁿā Tito ndúúcu compañeros yeⁿé yā

¹⁶Maaⁿ ní 'úú ca'á gracias Ndyuūs ti Ndyuūs chi'neéⁿ yā na staava yeⁿe Tito chí neⁿe yā cunnee cá yā ndís'tií tan'dúúca chi nús'uū dííⁿ 'nū. ¹⁷Ní neⁿé yā dííⁿ yā tan'dúúca chi ngaⁿá 'nū nduucú yā yeⁿe ndís'tií. Ní néené neⁿé yā nginnee yā ndís'tií caati neⁿé yā n'diichí yā ndís'tií.

¹⁸Ní dicho'ó 'nū ndúúcu Tito miiⁿ táamá hermano yeⁿe yú ní nducyáácá 'iiⁿyāⁿ yeⁿe nducyáácá yaacū ngaⁿá yā chi hermano miiⁿ ní neené n'dai dííⁿ sa ntiiⁿnyuⁿ. Ní ngaⁿa sa nduudu cuaacu yeⁿe evangelio chi nduudú ngai yeⁿe Jesucristo. ¹⁹Nguéé damāⁿ chuū idiiⁿ saⁿā miiⁿ ti nducyáácá 'iiⁿyāⁿ yeⁿe nducyáácá yāacū s'eeⁿ naachi caⁿá 'iiⁿyāⁿ chi i'teenú yā Señor Jesucristo yeⁿe yú nndéévé yā saⁿā miiⁿ chi caⁿa sa ndúúcu nús'uu caati cuuvi cunnee sa nús'uu ndúúcu ofrenda chi cuuvi cunnee hermanos. Ní 'íicú hermanos chi ndís'tií neⁿé nī cunnee nī hermanos. ²⁰'Tíicā ní 'iiⁿyāⁿ nguéé cuuvi caaⁿmaⁿ neeⁿ yā nús'uū yeⁿe chi dííⁿ 'nū ndúúcu

ofrenda miiⁿ chi cuta'á 'nū yeⁿe hermanos. ²¹Ní 'tíicā neⁿé 'nū dííⁿ 'nū nducueⁿe n'daacā nanááⁿ Ndyuūs ní 'tíicā ntúúⁿ nanááⁿ nducyáácá 'iiⁿyāⁿ.

²²Maaⁿ ní dicho'ó 'nu taama hermano yeⁿe yú ndúúcu Tito miiⁿ. Ní 'āā dííⁿ 'nū probar hermano miiⁿ n'deece n'dái naaⁿ ni ch'iⁿí saⁿā miiⁿ n'deece n'dái naaⁿ chí neⁿe sa nginnee sa nús'uu. Maaⁿ ní saⁿa miiⁿ neené neⁿe sa nginnee sa ndís'tií ti vee 'viich'etiiⁿūⁿ ca yeⁿé 'nū ndúúcu ndís'tií. ²³Ní ndúúti chí 'áamá 'iiⁿyāⁿ ítiinguuneéⁿ yā yeⁿe saⁿā Tito miiⁿ tuuⁿmi ní ndís'tií caaⁿmaⁿ nī chí saⁿā miiⁿ compañero yeⁿé. Ní dííⁿ sa ntiiⁿnyuⁿ dáamá nduucú ní dííⁿ sa ntiiⁿnyuⁿ chí dichíⁿvē ndís'tií. O nduuti chí itiiinguuneéⁿ yā yeⁿe tanáⁿā hermanos chí dicho'ó tuuⁿmi ní ndís'tií caaⁿmaⁿ nī chí 'iiⁿyāⁿ yeⁿe nducyaaca yaacū s'eeⁿ dicho'ó yā hermanos s'eeⁿ. Ní hermanos ní dich'eté cá yā Cristo yeⁿe yú. ²⁴Ca'á nī ofrenda yeⁿé nī ní 'tíicā cuuvi deenú 'iiⁿyāⁿ yeⁿe yaacu s'eeⁿ chí dineⁿé nī hermanos chí dicho'ó. Ndís'tií ní 'cuuⁿmiⁿ nī nducyáácá 'iiⁿyāⁿ cáāvā ofrenda yeⁿé nī chí cuaacu niiⁿnyuⁿ neⁿé nī hermanos. Ní nús'uu deenú 'nū chí caⁿá nī dííⁿ nī 'tíicā. Ní yeenú 'nū cucáāvā ndís'tií. Ní 'iiⁿyāⁿ cuuvi deenú yā chíⁿ chí ngaⁿá yeⁿe nī ní cuaacu.

Ofrenda cáāvā hermanos yeⁿe yú

9 Ndís'tií hermanos yeⁿé nguéé canee chí dinguúⁿ yeⁿe ndís'tií yeⁿe ofrenda chí nga'a nī hermanos chí i'téenu yā Jesucristo yeⁿe yú. ²Úú tuumicadiinúⁿ chí ndís'tií neⁿé nī cunnee nī hermanos. Ní yeenú cucáāvā ndís'tií taachi 'úú yaaⁿvi 'iiⁿyāⁿ yeⁿe yáⁿāa yeⁿe Macedonia yeⁿe ndís'tií chí snée nī na yáⁿāa Acaya táácā idiiⁿ nī. Ní 'úú yaaⁿvi 'iiⁿyāⁿ s'eeⁿ chí ndís'tií canee yaaⁿ nī ndii nduuyu chí chó'oo chí nginneé nī hermanos yeⁿe yú. Ní maaⁿ ní n'deece 'nááⁿ hermanos yeⁿe yáⁿāa Macedonia neⁿé yā

nginneé yā hermanos cáávā chi ndís'tiī caⁿá nī chi ca'a nī ofrenda yeⁿé nī. ³Nī cáávā chuū dicho'ó Tito ndúúcu 'uuvi hermanos. Ní nguéeé cúví chó'oo 'áámá cosa chi nguéeé cuaacu yeⁿé nī yeⁿē chi 'úú yaa'ví 'iⁿyāⁿ s'eeⁿ yeⁿe tan'dúúca chi ndís'tiī n'daacā diíⁿ nī yeⁿē ofrenda 'cūū. Ní ndís'tiī 'cuēeti yaáⁿ nī ofrenda yeⁿe nī chi cunneé nī hermanos. ⁴Nguéeé deenū nduuti chi naⁿa 'iⁿyāⁿ yeⁿe yáⁿaa Macedonia caⁿá yā nduucú. Ní taachi ndaá 'nū nanááⁿ ndís'tiī nguéeé véé yaáⁿ nī ndúúcu ofrenda yeⁿé nī. Ní nús'uu cuuvi 'cuinaáⁿ 'nū ti yaa'ví 'nū hermanos yeⁿē yáⁿaa Macedonia ti véé 'viich'ēstínuuⁿ ch'ēete yeⁿé 'nū nduucú nī. Ní ndís'tiī cuuvi 'cuinaáⁿ nī dendú'ū. ⁵Ní caavā chíⁿ 'úú nadicadiinúúⁿ chi chiicá hermanos chi chíi yā vmnááⁿ vmnaaⁿ nanááⁿ ndís'tiī ní cuneeé yā nduucú nī. Ní 'íicú ndís'tiī ca'a nī ofrenda yeⁿe nī hermanos chi dicho'ó. Níicú cuuvi cunneé nī hermanos yeⁿe yáⁿaa Judea ndúúcu ofrenda yeⁿe nī, ofrenda miiⁿ chi ngaⁿa nī chi ca'a nī. 'Tíicā níicú 'cuēeti yaáⁿ nī ndúúcu ofrenda yeⁿe nī ní ch'iⁿyāⁿ s'eeⁿ chi cuaacu chi neⁿé nī ca'á nī ofrenda yeⁿe nī. Ní nguéeé a fuerza caneeé chi ca'á nī ofrenda.

⁶Maaⁿ ní ndís'tiī ní n'gaacú nī yeⁿē chuū chí caaⁿmaⁿ. 'Iiⁿyāⁿ chi duu'ví cá ngīnu yā cuta'á yā duū'ví ca cosecha yeⁿé yā ní 'iⁿyāⁿ chi n'deeé ca ngīnu yā cuta'á yā n'deeé cá cosecha yeⁿé yā. ⁷Ca'áámá cá'áámá nī ca'á nī ofrenda yeⁿé nī tan'duucā chi nacadiinuuⁿ nī chi diíⁿ nī na staava yeⁿe nī. Nguéeé ca'á nī nduuti chi nguéeé neⁿe nī, ní nguéeé a fuerza ca'a nī. Ndyuūs neⁿé yā 'iⁿyāⁿ chi ca'a yā ofrenda yeⁿé yā tí yeenú yā chi ca'á yā. ⁸Ní Ndyuūs ní cuuvi téé yā ndís'tiī n'deeé cá yeⁿe nducuéⁿē chi n'dai taavi ca. Ní 'tíicā ndís'tiī ní cuuvi 'cuūndi necesidades yeⁿé nī. Ní cuuvi cunneé nī hermanos ndúúcu nducuéⁿē necesidades

yeⁿé yā. ⁹Ní caneeé nguūⁿ na libro yeⁿé Ndyuūs ndii cuááⁿ vmnaaⁿ 'tíica:

Nduuti chí 'iⁿyāⁿ ca'á yā n'deeé cá yeⁿe 'iⁿyāⁿ chi pobre yā; tuu'mi ní vee ca yeⁿe maáⁿ yā chi cuuvi ca'á yā 'iⁿyāⁿ ní 'áámá caneeé yā 'tíicā.

¹⁰Ní Ndyuūs chí nga'á yā ndaata chi 'iⁿyāⁿ cuūnu yā ndaata miiⁿ, nga'a ntuūⁿ yā pan chi che'é yā. Maaⁿ ní Ndyuūs miiⁿ téé yā ndaata ndís'tiī nducuéⁿē chi cuūnu nī. Ní diíⁿ yā chi véé ca cosecha yeⁿe ntiⁿnyuⁿ chi n'daacā chi diíⁿ nī.

¹¹'Tiicá ntúūⁿ ndís'tiī cuuvi cuta'á nī yeⁿe nducuéⁿē vaadi 'cuiica ní 'íicú cuuvi ca'a cá nī ofrenda yeⁿe nī. Ní cucáávā nús'uu, ca'a yā ofrenda yeⁿé nī hermanos, tuu'mi ní hermanos ngaⁿa yā: Ndyuūs nadí'v'e n'dii cáávā ofrenda miiⁿ.

¹²Ní ndúúcu ofrenda yeⁿe nī chi ca'a nī nguéeé damāⁿ ca'á nī ti véé yeⁿē hermanos naati diíⁿ nī chi hermanos ca'a yā n'deeé cá gracias Ndyuūs. ¹³Ní 'íicú hermanos dich'ēeté yā Ndyuūs nduuti chi ndís'tiī ch'iⁿyāⁿ nī hermanos chi i'téenu nī nduudu cuaacu yeⁿe Cristo. 'Tiicá ntúūⁿ hermanos dich'ēeté yā Ndyuūs ti ndís'tiī ca'a cá nī ofrenda yeⁿé nī cáávā hermanos miiⁿ ní caavā tanáⁿa hermanos.

¹⁴'Tiicá ntúūⁿ hermanos ngaⁿangua'á yā caavā ndís'tiī. Ní dineⁿe cá yā ndís'tiī. 'Tíicā diíⁿ yā ti Ndyuūs s'neeⁿ yā na staava yeⁿé nī chi ndís'tiī diíⁿ nī cosa chi n'daacā. ¹⁵Maaⁿ ní ca'a yú gracias Ndyuūs ti tee yā s'uuūⁿ nducuéⁿē chi vaadi n'dai ca yeⁿe yā chi ch'ēete taavi cá chi nguéeé cuuvi caaⁿmaⁿ yú yeⁿē nducuéⁿē.

Pablo caaⁿmaⁿ yā chi cuaacu chi apóstol yā yeⁿe Señor Jesucristo

10 'Úú Pablo di'cuiitú ndís'tiī chuū. 'Úú ní ndiicuúⁿ ní véé cá paciencia yeⁿé ní tan'dúúca Cristo ngaⁿa yā, 'tíicā ngaⁿá. 'Iiⁿyāⁿ ngaⁿa yā yeⁿe 'úú chi 'úú 'aama saⁿa ndiicuúⁿ taachi caneeé nduucú ndís'tiī ní naati nguéeé

caneé nduucú ndís'tií tuu'mi ní cheechí yaa'ví ndís'tií. ²Úú dí'cuítú ndís'tií chí dií' n'daacá ní ti taachi ndaa' n'diichí ndís'tií nguéé canee chí caa'má' n'nduudu cheechi ndúúcu ndís'tií. Ná'a 'ii'yá' n'nga'á yá ye'e' n'ú chí nús'uu dí' n'ú ntií'nyu' ye'e' Ndyuūs tan'dúúca chí ne'e' n'ú dí' n'ú. 'Úú vee yaá' chí nandaacá 'ii'yá' n's'ee' ní caa'ma' taá' nduucú yá. ³Cuaacu chí ne'e' chí nús'uu ní 'ii'yá' ye'e' i'nyee'dí 'cūū nús'uu dí' n'ú ntií'nyu' ye'e' Ndyuūs. Nguéé dí' n'ú ntií'nyu' cucáávā chí véé chí cuuvi ye'e' n'ú na i'nyee'dí 'cūū tan'dúúca chí dií' taná'a' 'ii'yá' ye'e' i'nyee'dí 'cūū chí nguéé i'téenu yá Cristo. ⁴Caati ntií'nyu' chí dí' n'ú nguéé dí' n'ú ndúúcu vaadi deenu ye'e' i'nyee'dí 'cūū tí dí' n'ú ndúúcu poder ye'e' Ndyuūs. Ní Ndyuūs nginneé yá s'uuú' chí cuuvi dituúví 'nū dendu'ú chí ye'e' enemigo ye'e' n'ú chí yáá'n'guiniū' mii'. ⁵Tiicā chuū cuuvi dí' n'ú. Dituuví 'nū nducué'e' vaanicadínū' ye'e' 'ii'yá' chí contra ye'e' Ndyuūs. Ní 'ícu 'ii'yá' cuuví nadacadínú' yá ye'e' Cristo ní cuuví cu'téenu yá ye'e' yá. ⁶Maa' ní taachi ndís'tií n'giindive'e' n'nduudu chí nga'á tuu'mi ní nús'uu canee yaá' n'ú chí dí' n'ú castigar nducyáácá ní chí nguéé n'giindive'e' n'nduudu chí nga'á.

⁷Ndís'tií ní n'diichí ní dendu'u chí véé tan'duucā chí cánéé. Ní ndúú'tí chí 'áámá yá ye'e' ndís'tií deenú yá chí seguro chí ye'e' Cristo 'ii'yá' mii', tuu'mí canee cú' m'í yá chí nadacadínū' yá chí nús'uu ntúū' ní ye'e' Cristo nús'uu. Tan'dúúca yá 'tiicá ntúū' nús'uu. ⁸Áará chí 'úú Pablo nga'á chí 'úú ch'eté 'úú na ntií'nyu' ye'e' Señor Jesucristo nguéé 'cuinaá' cáávā chí caa'má' 'túúca. Deenú 'nū chí Señor ye'e' yú tée yá nús'uu ntií'nyu' chí dí' n'ú ndúúcu poder ye'e' yá ti ndís'tií cuuvi cu'téenu ca ní Ndyuūs, ní nguéé cáávā chí dí' n'ú chí nguéé i'téenu ní Ndyuūs. ⁹Úú nguéé

ne'e' chí ndís'tií nadacadínū' ní chí dinguú' carta ye'e' ní cucaavā chí candí ndís'tií chí 'va'á ní. ¹⁰'ii'yá' nga'a' yá chí cartas ye'e' chí nguú' ní neené ditiinu nduudu ye'e' ní taachi canee nanaá' ndís'tií ní 'úú ní duūvā 'úú. Ní nduudu chí nga'á ní nguéé de'e' véé ye'e'. ¹¹Ne'e' chí 'ii'yá' chí nga'a' yá 'túúca ye'e', cadínū' yá chuū. 'Túúca tan'dúúca chí dinguu' 'nū na cartas ti ya'ai canee' n'ú ye'e' ní, 'tiicá ntúū' taachi ndaa' n'ú nanaá' ndís'tií nga'á' n'ú ndúúcu yá ní dáámá dí' n'ú ndúúcu yá.

¹²Nguéé caa'má' n'ú chí nduuvidaamā' n'ú ndúúcu taná'a' yá chí nga'á yá chí maá' yá ní n'geetē yá. 'ii'yá' s'ee' nga'á yá tan'dúúca chí tonto yá tí dicaadi maá' yá ndúúcu 'áámá yá táámá yá hermanos. ¹³Nús'uu ní nguéé caa'má' n'ú ye'e' ndúúcu'e' chí n'geete chí nguéé candéé 'nū cuidado ye'e'. Ndyuūs chí'nyí yá nús'uu naachi cuuvi cuchii'ca' n'ú ní dí' n'ú ntií'nyu' ye'e' yá. Ní chí'nyí yá chí nús'uu cho'ó 'nū nanaá' ndís'tií chí snéé na yáá' Corinto. ¹⁴Cáávā chuū ní deenú 'nū chí nguéé cue'e' 'nū mar 'áámá yá'aa' nduuti chí Ndyuūs nguéé chí'nyí yá nús'uu chí ca'á' n'ú mii'ya. Ní cáávā chuū ndaa' 'nū nanaá' ndís'tií ní candéé 'nū nduudu cuaacu chí nduudu ngai ye'e' Señor Jesucristo ye'e' yú. ¹⁵Nguéé nga'á' n'ú chí n'geete ntií'nyu' ye'e' táámá yá tan'dúúca chí nús'uu dí' n'ú ntií'nyu' ye'e' yá. Damaā' nga'á' n'ú ye'e' ntií'nyu' chí dí' n'ú. Cuneé ngiinú' n'ú chí ndís'tií cu'téenu cá ní ní nús'uu cuuvi dí' n'ú ntií'nyu' chí más cá ch'etē ca nguaa' ndís'tií, naati damaā' dí' n'ú ntií'nyu' naachi Ndyuūs chí'nyí yá nús'uu chí dí' n'ú. ¹⁶Cuayiivi mii' ní ne'e' n'ú ca'á' n'ú táámá cuaa' chí táámá lado ye'e' ndís'tií chí cuuvi caa'má' n'ú nduudu cuaacu ye'e' Ndyuūs. Ní nguéé cánéé chí caa'má' ye'e' ntií'nyu' ye'e' táámá yá tan'dúúca chí nús'uu dí' n'ú ntií'nyu' ye'e' yá.

¹⁷ Ní nduuti chí 'áámá 'iiⁿ'yáⁿ neⁿ'é yā caaⁿ'máⁿ yā yeⁿ'e cosa chí ch'εεε ca tuuⁿ'mi ní canee chí caaⁿ'máⁿ yā chí Ndyuūs díⁿ yā chíiⁿ chí ch'εεε ca. ¹⁸ Nduuti chí Ndyuūs deenu yā chí 'áámá 'iiⁿ'yáⁿ ní n'daacā idiⁿ yā tuuⁿ'mi ní cuaacu. Nduuti chí maáⁿ yā ngaⁿ'a yā chí n'daacā chí díⁿ yā tuuⁿ'mi ní ¿duⁿ'u deenu chí cuaacu?

Pablo ndúúcu 'iiⁿ'yáⁿ chí ngaⁿ'á chí apóstoles 'iiⁿ'yáⁿ ní nguéé cuaacu

11 Neⁿ'é chí ndís'tií cuchéε nī yeⁿ'é 'aara chí nadacadiinúúⁿ nī yeⁿ'é chí duuchi ngaⁿ'á nduucú nī. ² Caati 'úú ní neⁿ'é ndís'tií tan'duucā chí Ndyuūs neⁿ'é yā ndís'tií. Ní 'úú ngaⁿ'á ngii ndís'tií chí yeⁿ'e Jesucristo yeⁿ'é yú chí ndís'tií caⁿ'á nī lado yeⁿ'é Cristo. Ní neⁿ'é chí ndís'tií cunée nī nanááⁿ Ndyuūs. Ní tan'dúúca 'áámá n'daataá chí cuínú chí caⁿ'a 'caandavaacu tá ndúúcu 'áámá saⁿ'á nuúⁿ. 'Tíicā ndís'tií nanááⁿ Ndyuūs. ³ Ní 'úú 'va'á cáávā ndís'tií. Caati tan'dúúca chí 'áámá cúú chinnche'éí tī táⁿ'ā Eva ndúúcu nduudu yaadi yeⁿ'é tī chí nduudu yeⁿ'e yááⁿ'nguiinuúⁿ, 'tiicā ntúúⁿ 'iiⁿ'yáⁿ canche'éí yā ndís'tií níicú diví yā vaadi cadiinúúⁿ yeⁿ'é nī ní nguéé dineⁿ'é nī Jesucristo ndúúcu nuuⁿ'maⁿ staava yeⁿ'é nī. ⁴ Caati ndís'tií ca'á nī lugar 'āá du'ú nuúⁿ 'iiⁿ'yáⁿ chí caaⁿ'máⁿ yā nduudu chí n'dááⁿ yeⁿ'e Jesucristo yeⁿ'é yú nguéé tan'dúúca nduudu cuaacu chí caⁿ'a 'nū nanááⁿ ndís'tií. Ní ndís'tií ní n'giindiveéⁿ nī yeⁿ'é taama espíritu chí n'dááⁿ ní nguéé n'giindiveéⁿ nī yeⁿ'e Espíritu N'dai yeⁿ'e Ndyuūs chí sta'á nī yeⁿ'e Ndyuūs taachi ngaⁿ'a 'nū nduudu cuaacu nanááⁿ ndís'tií. Ní ch'iindiveéⁿ nī nduudu chí n'dááⁿ chí ngaⁿ'á yā yeⁿ'e chí nadinguáⁿ'ai yā. Nguéé tan'dúúca nduudu cuaacu chí nús'uu caⁿ'á 'nū nguuaⁿ ndís'tií. Ní yeenú nī yeⁿ'é chuú. ⁵ 'Úú nadacadiinúúⁿ chí nguéé n'geete ca tanáⁿ'ā 'iiⁿ'yáⁿ chí ngaⁿ'á yā chí após-

toles naati nguεε 'tíicā. N'dááⁿ yā nduudu yeⁿ'e Cristo ní ndís'tií cu'teenú nī yeⁿ'e yā. ⁶ 'Áará chí nguεε caⁿ'á nduudu cuaacu yeⁿ'e Cristo ndúúcu nduudu deenu ca, deenú ca yeⁿ'é nduudu chí ngaⁿ'á. 'Tíicā chí iⁿ'í 'nū ndís'tií yeⁿ'é nducuéⁿ'é ntiⁿ'nyuⁿ chí díⁿ 'nū nguááⁿ ndís'tií.

⁷ O nguéé n'daacā díⁿ chí ngaⁿ'á nduudu cuaacu yeⁿ'é Cristo nanááⁿ ndís'tií ní nguéé nadíⁿ've nī 'úú caavā ntiⁿ'nyuⁿ chí díⁿ. Nguéé nadicádiinúúⁿ yeⁿ'é maáⁿ naati neⁿ'é chí ndís'tií cuuvi n'geete nī. ⁸ 'Úú ní nguéé chita'á tuumi yeⁿ'e 'iiⁿ'yáⁿ yeⁿ'e tanáⁿ'ā yaacū cucáávā chí cuuvi díⁿ ntiⁿ'nyuⁿ yeⁿ'é Cristo nguuaⁿ ndís'tií. ⁹ Ní neⁿ'e chí canee ndúúcu ndís'tií ní véé necesidades yeⁿ'é tuuⁿ'mi ní hermanos yeⁿ'e yú ndaá yā yeⁿ'e yáⁿ'āa Macedonia ní tee yā 'úú chíiⁿ chí nguεε veε yeⁿ'é. 'Tíicā nguéé di'vaachí mar 'áámá ndís'tií caavā necesidades yeⁿ'é ní nguéé ndaá di'vaachí ndís'tií tiempo chí cuchii. ¹⁰ Neené seguro chí nduudu cuaacu yeⁿ'e Cristo canee nduucú. Ní 'íicú mar 'áámá 'iiⁿ'yáⁿ cuuvi díⁿ yā chí nguεε cuuvi caaⁿ'máⁿ nduudu cuaacu miiⁿ na núúⁿ'máⁿ yáⁿ'āa Acaya caati nguéé sta'á tuumi cáávā ntiⁿ'nyuⁿ chí díⁿ. ¹¹ ¿De'ε cáávā chí caaⁿ'máⁿ 'túúca? ¿'Áá cáávā chí nguéé neⁿ'é ndís'tií? Nguéé 'tíicā. Ndyuūs deenu yā chí neené neⁿ'é ndís'tií.

¹² Ní ntiⁿ'nyúⁿ chí díⁿ canee chí díⁿ naati nguéé cuta'á tuuⁿ'mi yeⁿ'e ntiⁿ'nyuⁿ chí díⁿ. Ní 'íicú 'iiⁿ'yáⁿ chí neⁿ'e caaⁿ'máⁿ yā chí ntiⁿ'nyuⁿ yeⁿ'é yā chí dáámá ndúúcu ntiⁿ'nyuⁿ chí díⁿ 'nū nguéé lugar chí cuuví caaⁿ'máⁿ yā chí 'tíicā tī sta'á yā tuumi yeⁿ'e ntiⁿ'nyuⁿ chí díⁿ yā. ¹³ 'iiⁿ'yáⁿ miiⁿ nguéé apóstoles yeⁿ'e Cristo tī apóstoles chí falso yā. Ní nginche'éí yā 'iiⁿ'yáⁿ ní díⁿ yā tan'dúúca chí maáⁿ yā apóstoles yeⁿ'e Jesucristo chí candéé yā nduudu yeⁿ'é Cristo. ¹⁴ Ní nguéé nadacadiinúúⁿ yú yeⁿ'é chí veε ca apóstoles chí falso yā na iⁿ'yeeⁿ'dí cūú.

Maaⁿ yááⁿnguiniūⁿ mííⁿ ní diiⁿ sa chi maāⁿ sa ní tan'dúú^{cā} 'áámá ángel yeⁿe Ndyuūs. 'Tíicā diiⁿ sa. ¹⁵Cáá^{vā} chuū ní nguéé cosa chi ch'ete chi 'iiⁿyāⁿ dííⁿ yā ntiiⁿnyuⁿ yeⁿe yááⁿnguiniūⁿ tan'dúú^{cā} chi ntiiⁿnyuⁿ yeⁿe Ndyuūs. Taachí 'cuiinu iⁿyeeⁿdí 'cuū caⁿ'á yā cuta'a yā chi cuuvi yeⁿe yā.

Pablo néené ch'eenú yā chii cáá^{vā} chi apóstol yeⁿe Jesucristo

¹⁶Maaⁿ ní taama vmnéⁿēe neⁿé caaⁿ'máⁿ ndúú^{cū} ndís'tií ní nguéé nadacadínuuⁿ ní chi 'úú ngaⁿ'á tan'dúú^{cā} chi 'aama chi loco yā, ti ngaⁿ'á chi ch'eté maáⁿ. Ní 'aara chi nadacadínuuⁿ ní yeⁿe 'tíicā, ¿'áá 'tíicā 'caandiveéⁿ ní yeⁿe? ¹⁷'Úú nguéé caⁿ'á chuū chi Señor Jesucristo yeⁿe yú yaa'ví yā 'úú chi caⁿ'á 'tíicā. Caati caⁿ'á tan'dúú^{cā} 'aama chi loco 'tíicā caⁿ'á. Ní 'íicú máⁿ cuuvi caaⁿ'máⁿ chi dich'eté 'úú. ¹⁸Ní n'dee n'dái 'iiⁿyāⁿ ngaⁿ'á yā yeⁿe maáⁿ yā chi ch'ete yā cucáá^{vā} chiiⁿ chi dííⁿ yā na iⁿyeeⁿdí 'cūú. Ní maaⁿ ní 'úú ntúúⁿ ngaⁿ'á chi 'úú ní ch'eté maáⁿ. ¹⁹Ní ndís'tií ní nadacadínuuⁿ ní chi deenu cá ní ní chicheé ní yeⁿe 'iiⁿyāⁿ chi ngaⁿ'á yā chi maáⁿ yā ch'eté yā tan'dúú^{cā} chi loco yā, ní yeenú yā. ²⁰Ní chicheé ní yeⁿe 'iiⁿyāⁿ s'eeⁿ ní ch'iindiveéⁿ ní yeⁿe yā ní dííⁿ ní tan'dúú^{cā} chi 'iiⁿyāⁿ s'eeⁿ ngaⁿ'á yā chi a fuerza dííⁿ ní. Ní tan'dúú^{cā} chi s'neéⁿ yā 'áámá trampa 'tíicā dííⁿ yā ndúú^{cū} ndís'tií. Ní n'diichí yā ndís'tií tan'dúú^{cā} 'iiⁿyāⁿ chí nguéé du'ū vee 'tíicā ndís'tií. Ni caaⁿ'máⁿ yā chi ch'ete maáⁿ yā. Ní ch'eⁿ'é yā naaⁿ ní. Ní cuchéé ní yeⁿe nduceⁿē. ²¹Nús'uu nguéé cuuvi dííⁿ 'nū ndúú^{cū} ní 'tíicā 'aara chi nadacadiinúⁿ ní chi n'daacā dííⁿ yā ndúú^{cū} ní 'tíicā. Maaⁿ ní 'áará chí 'cuinaáⁿ yeⁿe chí caaⁿ'máⁿ, 'tíicā caaⁿ'máⁿ. Nús'uu dííⁿ 'nū chi du'ūva 'nū ní 'iicu cuuvi dííⁿ 'nū ntiiⁿnyuⁿ yeⁿe 'nū.

Maaⁿ ní caaⁿ'máⁿ tan'dúú^{cā} chi loco 'úú. Ní 'úú ní caaⁿ'máⁿ chí ch'ete maáⁿ yeⁿe ntiiⁿnyuⁿ chí dííⁿ tan'dúú^{cā} chí tanáⁿ'ā 'iiⁿyāⁿ chí ngaⁿ'a yā chí ch'eté yā maáⁿ yā cáá^{vā} ntiiⁿnyuⁿ chí dííⁿ yā. ²²¿'Áá 'iiⁿyāⁿ hebreos 'iiⁿyāⁿ s'eeⁿ? 'Tiicá ntúúⁿ 'úú. ¿'Áá 'iiⁿyāⁿ s'eeⁿ yeⁿe ndaata Israel? 'Tiicá ntúúⁿ 'úú. ¿'Áá 'iiⁿyāⁿ s'eeⁿ yeⁿe ndaataá Abraham? 'Tiicá ntúúⁿ 'úú. ²³¿'Áá 'iiⁿyāⁿ s'eeⁿ 'iiⁿyāⁿ chí idiiⁿ ntiiⁿnyuⁿ yeⁿe Cristo? Deenú chí caaⁿ'máⁿ tan'dúú^{cā} 'iiⁿyāⁿ chí loco yā taachi caaⁿ'máⁿ 'tiicā. 'Úú idiiⁿ más ca ntiiⁿnyúⁿ yeⁿe Cristo nguéé ti 'iiⁿyāⁿ s'eeⁿ. Ní canéé taavi yaātú na cuerpo yeⁿe chí ch'eⁿ'é yā 'úú. Neené n'dee cuuví cheⁿ'é vácūú. Ní neené n'dee cuuví chí 'āā cháá 'caaⁿ'núⁿ yā 'úú. ²⁴Ní cho'ó nyuⁿ'u cuuvi chí 'iiⁿyāⁿ Israel s'eeⁿ ch'eⁿ'é yā ndiicu ndíitiⁿnyuⁿ cuūⁿ vuelta 'úú ndúú^{cū} cuarta. ²⁵Ní cho'ó 'iinū tiempo chí ch'eⁿ'é yā 'uu ndúú^{cū} nduucu. Ní 'áámá cuuvi nūⁿ chíítuú yā 'úú. Ní cho'ó 'iinū cuuvi chí cheechi barco naachi cueⁿ'é na nuūⁿ'niⁿ'yáⁿ'ā. Ni 'áámá vmnéⁿēe cánéé nguaaⁿ nuūⁿ'niⁿ'yáⁿ'ā núúⁿ'máⁿ yaaⁿ núúⁿ'máⁿ nguuvi. ²⁶N'dee n'dái cuuví cachiicá ní n'diichi peligros yeⁿe, peligros yeⁿe yíicú, ndúú^{cū} peligros cáá^{vā} 'iiⁿyāⁿ chí duucu yā, ndúú^{cū} peligros nguaaⁿ 'iiⁿyāⁿ yeⁿe yááⁿ yeⁿe ní yeⁿe 'iiⁿyāⁿ yeⁿe táámá yááⁿ, ndúú^{cū} peligros taachi cánéé ná yááⁿ n'gēete, ní taachi canéé na yáⁿ'āa cuūⁿ'máⁿ naachi nguéé ch'etinéé 'iiⁿyāⁿ, ní taachí cachiicá na barco vmaⁿ nuūⁿ'niⁿ'yáⁿ'ā. Ní chó'oo peligros yeⁿe taachi canéé nguaaⁿ 'iiⁿyāⁿ chí ngaⁿ'a yā chí hermanos yeⁿe 'nū ní nguéé 'tíicā yā. ²⁷'Úú dííⁿ ntiiⁿnyuⁿ chí néené díítuú ndúú^{cū} vaadi 'caa'va ní chicuūnū 'úú. Ní n'dee taavi nguiinū nguéé chii cyaadú, ní cho'oo n'dee taavi cuuvi chí ch'eenú chí ti 'āā ntéé che'é ní 'āā ntéé chí'í nuūⁿ'niⁿ'va. Ní 'āā 'iiche yeⁿe ní nguéé catecaí.

²⁸ Ní 'aā vi'í cā yeⁿe nducuéⁿē chuū chi chó'oo na cuerpo yeⁿé, veε más cā dendu'ū ti nguuvi nguuvi candéε cuidado yeⁿé nducyáácá 'iiⁿ'yāⁿ yeⁿe nducyáácá yaācū. ²⁹ Ní nduuti chí 'áámá 'iiⁿ'yāⁿ duūvā yā ní 'úú ntúūⁿ dííⁿ tan'dúúccā chi duūva 'úú. Ní nduuti chí 'áámá 'iiⁿ'yāⁿ dííⁿ yā chí taama 'iiⁿ'yāⁿ dinuuⁿndí yā, 'úú ntúūⁿ n'geenú ngii ní 'cuináaⁿ 'úú, ní nduuví taáⁿ. ³⁰ Maaⁿ ní nduuti chí canéé chí dich'εéte yeⁿē maáⁿ, tuu'mí dich'εéte yeⁿē maáⁿ yeⁿe nducuéⁿē chí chó'oo yeⁿé níícu 'cuuⁿ'míⁿ ti duūva 'úú. ³¹ Dendyuūs chí Chiidá Señor Jesucristo yeⁿē yú ní n'dai taavi cá yā cueⁿe daāⁿmaⁿ. Ndyuūs ní deenú yā chí nguéé ngaⁿ'á nduudu yaadi. ³² Chó'oo chí taachí canéé na yáāⁿ Damasco chí gobernador chí maaⁿ poder yeⁿe rey Aretas, gobernador miiⁿ s'neeⁿ yā soldados na cheendi va'ai s'eeⁿ chí n'geete yeⁿē yáāⁿ Damasco miiⁿ caati neⁿe sa cuta'a sa 'úú ní candεε sa 'úú chí preso 'úú. ³³ Naati hermanos yeⁿē yú s'nuúⁿ yā 'úú cheeti 'áámá 'cuééteε ch'εete ní dicua'ái yā 'úú na 'áámá ventana yeⁿe ncheēti yeⁿe yáāⁿ miiⁿ ní 'tíicā ca'ái na ta'a soldado s'eeⁿ caati yáāⁿ miiⁿ ní nuuⁿmaⁿ ndiivi canéé ncheēti chí yaacū tan'dúúccā coral.

Visión yeⁿe Pablo ndúúccū chí n'diichí yā

12 Cuaacu níⁿnyúⁿ chí nguεε dε'ē veε n'daacá chí caaⁿ'máⁿ yeⁿē 'úú maáⁿ chí 'úú ch'εéte 'úú. N'dáaca ca chí 'úú caaⁿ'máⁿ yeⁿe n'deeε nááⁿ chí canéé chí snaáⁿ yeⁿe Señor Jesucristo ní yeⁿe chí canúúⁿ n'de'ei chí n'giⁿ'í yā 'úú. ² Cuayiivi chí i'teenú Cristo chó'oo ndiichi cúūⁿ nduuyúū chí n'diichí 'áámá visión tan'dúúccā chí ch'iinú. Ní 'aama 'iiⁿ'yāⁿ candéε yā 'úú ndii va'āi cheeti nguuvi. Nguéé deenú nduuti chí candεε yā cuerpo yeⁿé o nguéé. Dá-maaⁿ Ndyuūs deenú yā chuū. ³ Naati chíí ní nguεε deenú nduuti chí cueⁿé

ndúúccū cuerpo yeⁿé o nguéé ndúúccū cuerpo yeⁿé naati dámaaⁿ Ndyuūs deenú yā táácā cueⁿé. ⁴ 'Úú deenú chí candéε yā 'úú ní cueⁿé ndii paraíso chí va'ai cheeti nguuvi. Ní 'úú n'giindiveéⁿ nduudu chí nguéé tan'duuccā nduudu yeⁿe 'iiⁿ'yāⁿ yeⁿe iⁿ'yeeⁿ'dí 'cūū ti yeⁿe Ndyuūs. Nguéé véε permiso chí cuuvi caaⁿ'máⁿ yeⁿē chí n'giindiveéⁿ. ⁵ 'Úú cuuvi caaⁿ'máⁿ chí 'úú ní ch'εete maáⁿ yeⁿē chí Ndyuūs dííⁿ yā nduucú. 'Úú nguéé caaⁿ'máⁿ yeⁿe maáⁿ chí ch'εéte maáⁿ. Dámaaⁿ caaⁿ'máⁿ chí duūvā 'úú. ⁶ 'Áará chí caaⁿ'máⁿ chí 'úú ch'εéte maáⁿ nguéé caaⁿ'máⁿ tan'dúúccā chí zonzo 'úú ti caaⁿ'máⁿ nduudu cuaacu yeⁿé naati nguéé caaⁿ'máⁿ 'tíicā ti nguéé neⁿé chí mar 'áámá 'iiⁿ'yāⁿ nadacadíínuuⁿ yā chí 'úú ch'εete ca 'úú. Neⁿé chí 'iiⁿ'yāⁿ miiⁿ nadacadíínuuⁿ yā yeⁿe 'úú tan'dúúccā chí n'diichí yā 'úú, ní n'giindiveéⁿ yā nduudu yeⁿé.

⁷ Chuū chí Cristo ch'iⁿ'í yā 'úú ní 'áámá visión chí ch'εete ní dεεve taavi ca. Ní Cristo tee yā 'úú 'áámá ya'ai na cuerpo yeⁿé chí 'áámá canéé ní tan'dúúccā chí 'áámá yááⁿ chí cata'āi na cuerpo yeⁿé. Ní chíí tan'dúúccā chí yááⁿ n'guiinūūⁿ s'neeⁿ sa yááⁿ miiⁿ chí neⁿe sa chí 'cueenú cuuvi. Ní Ndyuūs tee yā permiso chí 'úú canee ndúúccū dolor míⁿ cáávā chí nguéé cuuvi caaⁿ'máⁿ yeⁿe maáⁿ chí ch'εéte 'úú. ⁸ Ní 'iinū cuuvi chíicá Señor Jesucristo yeⁿē yú chí diví yā vaadi ya'ái 'cūū yeⁿé. ⁹ Naati Señor yeⁿe yú ngaⁿ'á yā ngii yā 'úú 'tíicā: Vaadi neⁿe yeⁿé ní tūneeⁿ di ní nguéé más ca neⁿe ní ti chuū. Ní poder yeⁿé chuū chí n'giⁿ'í cá taachí 'iiⁿ'yāⁿ chí duūva cuerpo yeⁿé yā. Maaⁿ ní cucáávā chí yaa'ví Señor 'úú 'túúccā, 'úú yeenú ti 'úú duūvā 'úú ti Cristo cuuvi 'cuuⁿ'míⁿ yā poder yeⁿé yā ti canéε yā na cuerpo yeⁿé. ¹⁰ Cáávā chuū ní yeenú ti duūvā. Ní yeenú 'aara chí 'iiⁿ'yāⁿ ngaⁿ'a taaⁿ yā yeⁿé, ní nguéé véε necesidades yeⁿé, ní 'iiⁿ'yāⁿ dííⁿ yā chí n'geenú ngii.

Ní yeⁿe dendú'ū díftūu chi cho'ōo yeⁿé ní n'geenú ngii nducuéⁿe chuū cáávā Cristo. Tííca rā va. Taachi duūvā cuerpo yeⁿé tuu'mi ní más ca ditiinu 'úú.

Pablo nadacadiinuuⁿ cá yā yeⁿe 'iiⁿyāⁿ yeⁿe yaacū yeⁿe yāáⁿ Corinto

¹¹ 'Úú deenú chi ngaⁿá tan'dúúcā chi loco 'úú taachi ngaⁿá yeⁿe maáⁿ naati ndís'tiī dífⁿ ní chi a fuerza canee chi caaⁿmáⁿ yeⁿe maáⁿ ti ndís'tiī nguēe ngaⁿá ní yeⁿé 'túúcā. N'daacā ca chi ndís'tiī caaⁿmaⁿ n'dááca ní yeⁿé. 'Úú nguéé duu'ví 'úú yeⁿe tanáⁿā 'iiⁿyāⁿ chi ngaⁿá yā chi apóstoles ní nguéé 'tííca 'aara chi 'úú nguéé de'ē vee 'úú. ¹² Ní taachi canee nduucú ní ch'iⁿyí ndís'tiī chi cuaacu chi 'úú 'áámá apóstol yeⁿe Jesucristo 'úú ndúúcu vaadi n'giinu ch'ēete chi dífⁿ ní ndúúcu ntiⁿnyuⁿ ch'ēete chi dífⁿ ní nduūcū vaadi n'giinu n'dai chi dífⁿ. ¹³ De'ē vee chi nguéé dífⁿ ndúúcu ndís'tiī taachi canee ndúúcu ní tan'dúúcā chi dífⁿ ndúúcu nducyaaca 'iiⁿyāⁿ yeⁿe tanáⁿā yaacū. 'Áā daamá nūuⁿ idiíⁿ nduucú ní. Deenú chi nguéé ngiicá ndís'tiī chi cunnee ní 'úú caavā necesidades yeⁿé. Maaⁿ ní nadich'ēecú ní yeⁿé caavā falta 'cūū ti nguéé dífⁿ daamá ndúúcu ní.

¹⁴ Maaⁿ ní vee yaáⁿ chi ndaá nanááⁿ ndís'tiī ndiichi ndii 'íínú cuuvi, ní taachi ndaá nguéé dí'vaachí ndís'tiī. Ní nguéé neⁿé de'ē vée yeⁿe ní chi maáⁿ ní in'nuúⁿ ní naati 'úú neⁿé ndís'tiī. Deenu yú chi 'iiⁿyāⁿ chi chiidá yā canee chí in'nuúⁿ yā necesidades yeⁿe daiyá yā, nguéé ti daiyá yā in'nuúⁿ yā necesidades yeⁿe chiidá yā. ¹⁵ Ní 'úú dífⁿ gastar tuūmí yeⁿé chi dífⁿ ntiⁿnyuⁿ cáávā ndís'tiī ní ndíí chi cuūnū 'úú cáávā almas yeⁿe ní nífcú 'cuetineé n'daacá ní. 'Áará chí neⁿe cá ndís'tiī ní nguéé ti ndís'tiī neⁿé ní 'úú.

¹⁶ Ní 'áará chí 'úú nginneé ndís'tiī, náⁿā 'iiⁿyāⁿ nguaaⁿ ndís'tiī chi deenú yā chi nguéé sta'á tuumi yeⁿé ní, ngaⁿá yā chí 'úú nginnche'éí 'iiⁿyāⁿ s'eeⁿ. ¹⁷ ¿'Áá

nginnche'éí ndís'tiī cucáávā 'iiⁿyāⁿ s'eeⁿ chí dich'o'ó nanááⁿ ndís'tiī? Nguēe 'tííca. ¹⁸ 'Úú chiicá saⁿā Tito chí naⁿá yā. Ní dich'o'ó Tito ndúúcu táámá hermano yeⁿe yú nanááⁿ ndís'tiī. ¿'Áá cuaacu chí Tito miⁿ chinnche'éí yā ndís'tiī? Nguēe 'tííca. O ¿'Áá cuaacu chí 'úú ndúúcu 'iiⁿyāⁿ miⁿ nguéé dífⁿ 'nū dáámá ntiⁿnyuⁿ nguaaⁿ ndís'tiī ní nguéé ndúúcu dáámá sentido yeⁿé 'nū? Nguēe 'tííca.

¹⁹ Maaⁿ ní ndís'tiī, ¿'Áá nadacadiinuuⁿ ní chí ngaⁿa 'nū chí chífⁿ chí dífⁿ 'nū ní cuaacu caatí chí idiíⁿ 'nū defender ntiⁿnyuⁿ yeⁿé 'nū? Nguéé 'tííca. Ngaⁿá 'nū nanááⁿ Ndyuūs nduudú 'cūū cáávā chí nús'uu ní yeⁿé Jesucristo. Ní nducuéⁿe chí dífⁿ 'nū, dífⁿ 'nū ti ndís'tiī hermanos chí neⁿé 'nū cuuvi cu'téenu cá ní Ndyuūs. ²⁰ Ní 'úú ní 'va'á ti taachi ndaá nanááⁿ ndís'tiī 'úú nguéé ndaācá chí ndís'tiī dífⁿ ní tan'dúúcā chí 'úú neⁿé chí dífⁿ ní. Ní ndís'tiī nguéé ndaāca ní 'úú tan'dúúcā chí neⁿé ní chí 'úú idiíⁿ tí canee chí 'caa'vá ndúúcu ndís'tiī. Ní ndaācá ndís'tiī tan'dúúcā chí nguéé canee chí 'cuetineé ní. Ní ndaācá chí vée nguaaⁿ ndís'tiī 'iiⁿyāⁿ chí n'geecu cheendí yā, ndúúcu 'iiⁿyāⁿ chí neⁿé yā cosas tan'dúúcā chí vée yeⁿe taama yā ndúúcu 'iiⁿyāⁿ chí nduuvi taáⁿ yā. Ní 'iiⁿyāⁿ s'eeⁿ chí 'caa'vá yā ndúúcu táámá hermano ní maáⁿ yā divíí yā yeⁿé yā ti neⁿé yā ngaⁿa yā chí ch'ēete maáⁿ yā. Ní 'iiⁿyāⁿ ngaⁿá yā contra yeⁿe taama yā. Ní 'iiⁿyāⁿ néené neⁿe caaⁿmáⁿ yā yeⁿe chí dífⁿ taama yā. Ní 'iiⁿyāⁿ ngaⁿá yā chí maáⁿ yā ní ch'ēete yā, ní nguéé vée vaadi 'dííⁿ nguaaⁿ ndís'tiī. ²¹ Ní 'va'á chí 'cuinaaⁿ nanááⁿ Ndyuūs cáávā ndís'tiī taachi ndaá nanááⁿ ndís'tiī taama vmnéⁿēe. Ní taachi canee ndúúcu ní ngii ya'āi 'iinú yeⁿé 'yááⁿ ndís'tiī chí dinuⁿndí ní ní nguéé nadaacadaamí ní yeⁿe nuuⁿndí ní chí dífⁿ ní yeⁿe chí neⁿe cuerpo yeⁿe ní. Ní dífⁿ ní cosas chí nguēe

n'daacā. Chííⁿ ní dííⁿ nī chí sáⁿá sta'a sa n'daataa yeⁿe tááma saⁿā.

**Pablo dingúúⁿ diitú yā yeⁿe
'iiⁿyāⁿ yeⁿe yááⁿ Corinto
ní ngaⁿá yā: N'dai ndís'tií**

13 Chuū ní ndii íínú cuuvi chí caⁿá ndaá nanááⁿ ndís'tií ní taachi ndaá nduuti chí 'iiⁿyāⁿ caaⁿmaⁿ nuuⁿndi yeⁿe táámá 'iiⁿyāⁿ canéé chí véé 'uúví o 'iinū testigo ndúúcu yā. Ní cunee n'daacā nduudu miiⁿ tan'dúúcā chí canéé nguūⁿ na libro yeⁿé Ndyuūs. ²'Āā ngaⁿá cuááⁿ vmnaaⁿ taachi cānee nduucú nī ndúúcu 'iiⁿyāⁿ chí dinuuⁿndí yā ní ndúúcu nducyaacá nī. Maaⁿ ní chí canee ya'ái yeⁿe ndís'tií dingúúⁿ taama vmnéⁿēe yeⁿe chúú tan'dúúcā chí ngaⁿá cuaaⁿ vmnaaⁿ nanááⁿ ndís'tií. Taachi ndaá nanááⁿ ndís'tií taama vmnéⁿēe n'diichí nuuⁿndi yeⁿe nducyaaca hermanos. ³Ní 'úú idiíⁿ ti ndís'tií cadiinuⁿ nī nduuti chí Cristo yeⁿe yú chíⁿí yā 'úú nduudu chí ngaⁿá o nguéé. Ní Cristo yeⁿe yú nguéé duúvā taachi dííⁿ yā tratar nduucú nī. Caⁿá yā chíⁿí yā chí dítiínú yā nguéé ti ndís'tií. ⁴Cuáácú chí 'iiⁿyāⁿ chíⁿéé ngaⁿá yā Cristo tan'dúúcā chí Cristo ní 'aama 'iiⁿyāⁿ chí duuvā, naati maaⁿ ní Cristo miiⁿ canduuchí yā yeⁿe nguaaⁿ tináⁿā cucáávā poder yeⁿé Ndyuūs. 'Tiicá ntúúⁿ nús'uu ní yeⁿe Cristo. Nús'uu ní duúvā 'nū naati poder yeⁿe Ndyuūs canee ndúúcu 'nū. Ní cáávā chuū cuuví n'diichi 'nū nuuⁿndi yeⁿé nī ní dichíí'vé 'nū ndís'tií.

⁵Maaⁿ ní ndís'tií n'diichi maáⁿ nī nduuti chí ndís'tií 'āā canee diitú nī ndúúcu chí i'téenu nī yeⁿe Cristo. N'diichi maáⁿ nī chí cuaacu chí i'téenu nī. ¿'Āā nguéé déenu ndís'tií nduuti chí Cristo canee nduucú nī o nguéé? Ní nduuti chí cuaacu chí nguéé i'téenu nī cáávā nuuⁿndi yeⁿé nī tuu'mi ní nguéé yeⁿé Ndyuūs ndís'tií. ⁶Neⁿé chí ndís'tií cadiínúⁿ nī chí nús'uu ní dichíí'vé 'nū

Ndyuūs ní ti yeⁿé Ndyuūs nús'uu. Nguéé falso 'nū. ⁷Maaⁿ ní ngaⁿangua'á 'nū Ndyuūs caavā ndís'tií chí ndís'tií nguéé dinuuⁿndí nī yeⁿe mar 'áámá chí nguéé n'daacā. Neⁿé 'nū chí ndís'tií ní dííⁿ nī nducuéⁿē chí n'daacā. Nguéé ti cuuvi 'cuuⁿmíⁿ 'nū chí dííⁿ 'nū ntiíⁿnyuⁿ chí n'daacā. 'Iiⁿyāⁿ ní cuuvi n'diichí yā ntiⁿnyuⁿ yeⁿé 'nū, ní caaⁿmáⁿ yā chí nguéé n'daacā idiíⁿ 'nū. Dámaāⁿ neⁿé 'nū chí ndís'tií din'daacá nī. ⁸Nús'uu ní nguéé de'ē véé dííⁿ 'nū chí contra yeⁿe nduudu cuaacú naati nducuéⁿē chí dííⁿ 'nū ní yeⁿe nduudu cuaacu miiⁿ. ⁹Cáávā chuū nús'uu ní yeenú taaví 'nū taachi duúva 'nū ní taachi ndís'tií ditiínú nī ndúúcu chí i'téenu nī. Ní ngaⁿangua'a cá 'nū ní ngúicá 'nū Ndyuūs chí ndís'tií cuuvi dííⁿ nī chí n'daacā n'dai ní 'cuéetineé nī tan'dúúcā chí Jesucristo neⁿé yā chí dííⁿ nī. ¹⁰Idingúúⁿ 'nū yeⁿe ndís'tií vmnaaⁿ taachi 'āā cuéé ndaá 'nū nanááⁿ ndís'tií caati taachi ndáa 'nū nanááⁿ ndís'tií nguéé cheechi caaⁿmáⁿ ndúúcu nī cucáávā poder chí Señor Jesucristo tee yā 'úú. Ní Señor yeⁿe yú tee yā poder 'úú caavā chí ndís'tií ní cuuvi cu'téenu cá nī nguéé caava chí cuuvi ndái nī.

¹¹Maaⁿ ní 'cuiínú carta yeⁿé. Ní na carta yeⁿé ní ngaⁿá ti n'dai taavi ndís'tií ní dííⁿ nī chí 'cuéetinéé n'daacá nī ndúúcu vaadi 'diiíⁿ na vida yeⁿe nī. Ní'cú cunéé nī ndúúcu dáámá vaanicádiínúⁿ yeⁿé nī ní Ndyuūs chí véé vaadi 'diiíⁿ yeⁿe yā ní dinéⁿe yā ndís'tií Ndyuūs miiⁿ canee nduucú nī. ¹²Ní nguaaⁿ maáⁿ nī dííⁿ nī saludar 'áámá nī ndúúcu taamá nī. Caaⁿmáⁿ nī chí n'dai hermano yeⁿé nī ní túú'ví nī cheendi hermano yeⁿé nī tan'dúúcā costumbre yeⁿé nī ti yeⁿé Ndyuūs ndís'tií. ¹³Nducyáácá 'iiⁿyāⁿ chí i'teenú yā Jesucristo yeⁿe yú dichó'o yā saludos na carta 'cūú yeⁿé nī ní ngaⁿá yā: N'dai ndís'tií.

¹⁴Ní neⁿé chí Señor Jesucristo tee yā ndís'tií vaadi n'dai taavi yeⁿé yā. Ní

vaadi neⁿe yeⁿé Ndyuūs ní Espíritu N'dai carta chi 'úú Pablo dinguúⁿ yeⁿe nī.
yeⁿé Ndyuūs canéé nduucú nī. Chuū 'Tíicā chii.

CARTA YE[']E 'II[']YĀ['] YE[']E YĀ[']ĀA GALACIA

**Pablo idinguú['] yā carta 'cūū ye[']e
'ii[']yā['] chi ca[']á yā yaācū
s'ee['] na yā[']āa Galacia**

1 'Úú Pablo 'úú ní 'úú 'áámá após-
tol chí dichó'ó Ndyuūs. Mar 'áámá
sa[']ā nguéé dichó'ó sa 'úú chí 'úú nga[']á
nduudu ye[']e Ndyuūs, ndíí nguéé ndúú
ndæeve sá 'úú, tí Ndyuūs Chiida yú
ndúúcū Señor Jesucristo dichó'ó yā 'úú.
Ní Chiida yú nadacuée['] yā Jesucristo
ye[']e nguaa['] tiná[']ā. ²Nducyaaca vi'i yú
s'tií chí 'cuætinée yā yāā['] mii['] ndúúcū
'úú, idinguú['] carta 'cūū ye[']e ndís'tií chí
i'téenu ní Jesucristo ní ca[']á ní yaācū
s'ee['] na yā[']āa Galacia. ³Ne[']é chí Chi-
ida yú ndúúcū Señor Jesucristo ye[']e yú
tée yā s'uuú['] dendú'ū chí n'dai. Ní ndís'tií
caneé ní ndúúcū vaadí 'diii['] chí Ndyuūs
itée yā s'uuú[']. ⁴Jesucristo mii['] ca'a yā
vida ye[']e maá['] yā cucáāvā nuu[']ndí
ye[']e yú. Maa['] ní nadanguá[']ai yā s'uuú[']
ye[']e dendu'ū chí nguéé n'daacā chí véé
i[']yee[']dí 'cūū. 'Tíicā ne[']e Ndyuūs Chi-
ida yú. ⁵Cue[']e daā[']ma['] canee Ndyuūs
ndúúcū dæeve ye[']e yā. Nducyáácá 'ii[']yā[']
caneé chí dich'æete cá yā Ndyuūs chí
dæeve cue[']e daā[']ma[']. 'Tíicā.

**Nguéé véé táámá nduudu ye[']e chí
Cristo nanguá[']ai yā s'uuú[']**

⁶Neené nge'e yiinú chí ndís'tií neené
nii[']nuú['] nūu['] idivií ní ye[']e Ndyuūs
chí n'gaí yā ndís'tií, ní ye[']e cosas chí
n'dai ca chí Cristo tee yā ndís'tií. Ní
n'giindiveé['] ní nduudu chí nguéé cuaacu
ye[']e táámá 'ii[']yā['] chí nga[']a nduudu
mii['] tan'dúúcā chí táámá evangelio.
⁷Cuaacu chí nguéé véé táámá evange-
lio chí nduudu ye[']e Dendyuūs naati véé
n'dúúví yā chí idi'vaachí yā ndís'tií. Ní
ne[']e yā n'daa['] yā evangelio chí ndu-

udu ngai ye[']e Cristo. ⁸'Aara chí s'uuú[']
o 'áámá ángel chí ndaa ye[']e va'ai chēēti
nguuví nga[']a yā táámá evangelio chí
n'daa['] nguéé tan'dúúcā chí ca[']a nū chí
'nū ndís'tií, tuu[']mi 'ii[']yā['] s'ee['] cuuví yā
condenado. ⁹'Āā ca[']á chuū maa['] ní ne[']é
caa[']ma['] ntuú['] táámá vmné[']ēe: Nduuti
chí 'áámá 'ii[']yā['] caa[']ma['] yā táámá evan-
gelio chí n'daa['] nguéé tan'dúúcā chí ca[']a
'nū chí nū ndís'tií, tuu[']mi ní 'ii[']yā['] s'ee[']
cuuví yā condenado.

¹⁰Taachi nga[']á chuū, ¿dē'ē inada-
cadíinu['] ní nduucú? Nguéé ne[']é chí
cunee yiinú ní ye[']é caati ne[']é chí
Ndyuūs cunee yiinú yā ye[']é. O ¿'áá ca-
nee chí 'úú idií['] chí cunee yíínū sa[']ā
i[']yee[']dí 'cūū? Nduuti chí 'úú idií['] chíi[']
tí inee yíínū sa[']ā i[']yee[']dí 'cūū, tuu[']mi
ní nguéé idií['] ntií[']nyu['] ye[']é Cristo.

Taacā chí chí Pablo apóstol

¹¹'Úú nga[']á cuaacu ní ngii ndís'tií her-
manos ye[']é. Nduudu ngai chí evange-
lio ye[']e Jesucristo chí 'úú nga[']á, nguéé
ye[']e mar 'áámá sa[']ā ye[']e i[']yee[']dí 'cūū.
¹²Tí 'úú nguéé sta'á nduudu mii['] ye[']e
sa[']ā, ndíí nguéé ndúú ch'eeé['] ye[']e mar
'áámá sa[']ā caati Jesucristo chí i[']i yā 'úú
nduudu cuaacu ye[']é yā.

¹³Ndís'tií chí iindiveé['] ní tan'dúúcā chí
'úú i'teenú tiempo chí chó'oo ní canee
chæchí na religión ye[']e 'ii[']yā['] judíos
chí Israel. Ní deenú ní taacā chí díí['].
Ní díí['] chí dícaānú 'ii[']yā['] chí i'téenu
yā Jesucristo tí ca[']á yā na yaācū ye[']é
Ndyuūs. Ní díí['] chuū tí ne[']é can'daá
'ii[']yā['] s'ee['] ye[']e nducyáácá yaācū ye[']é
Ndyuūs tí ne[']é di'cuiínú 'ii[']yā['] s'ee['].
¹⁴Ní chí'teenú más ca ye[']e religión
ye[']e 'ii[']yā['] chí ndaata ye[']e Israel
s'ee['] nguaa['] nducyaaca yā chí dáamá
ndaata ye[']é ndúúcu yā tí ne[']é díí['] ndu-
cué[']ē tan'dúúcā chí díí['] 'ii[']yā['] ndiicū
chí 'āā n'díí. ¹⁵Naatí Ndyuūs ndæeve
yā 'úú taachi 'āā cuéé 'cuundiyaá[']. Ní
taachi ndaa tiempo chí Ndyuūs ne[']e yā,

Ndyuūs yaa'ví yā 'úú cáávā chi ne^{né} yā 'úú chi 'úú n'giindiveéⁿ nduudu ye^{né} yā ní cu'teenú Ndyuūs. ¹⁶Ní Ndyuūs yaa'ví yā 'úú ye^{né} Daiyá yā Jesucristo chi 'úú i'teenú yā, ti 'úú ní caaⁿ máⁿ nduudu ye^{né} e Cristo nguaaⁿ 'iiⁿ yāⁿ gentiles, 'iiⁿ yāⁿ chi nguεε ye^{né} e ndaata Israel. Ndíí tuu'mi nguéé tiinguuneéⁿ mar 'aama saⁿ ā ye^{né} e nduudu ye^{né} e Cristo. ¹⁷Ndíí nguéé ndúú ndaá na yāáⁿ Jerusalén chi intiinguuneéⁿ apóstoles chi dichó'ó Ndyuūs vmnaaⁿ chi dichó'o yā 'úú, naati 'úú che^{né} na yáⁿ āa Arabia. Ní cuayiivi miiⁿ ní nguεεcuneé na yāáⁿ Damasco.

¹⁸Cuayiivi chi cho'ó 'iinū nduūyū ndii tiempo chi 'āā i'teenú Jesucristo tuu'mí ní cue^{né} yāáⁿ Jerusalén tuu'mí n'diichí Pedro tí 'āā cuéé n'diichí saⁿ ā. Ní caneeé ndúú cū sa ndíí tiiⁿ yuⁿ nguuvi. ¹⁹Yāáⁿ miiⁿ nguéé n'diichí táámá apóstol chi dichó'ó Ndyuūs. Dámaāⁿ n'diichí Jacobo saⁿ ā 'diinū Jesús miiⁿ. ²⁰Chuū idinguúⁿ ye^{né} e ndís'tii. 'Cuiⁿ d'íichí ndís'tii. 'Úú nguéé ngaⁿ á nduudu yaadi ti Ndyuūs n'diichí yā 'úú ní deenú yā chi cuaacu ngaⁿ á.

²¹Cuayiivi ní ndaá na yáⁿ āa ye^{né} e Siria ndúú cū yáⁿ āa Cilicia. ²²'Iiⁿ yāⁿ ye^{né} e yáⁿ āa Judea chi cue^{né} yā na yaācū naachi nge^{né} yā ye^{né} e Cristo nguéé iitiinaáⁿ yā 'úú ti nguéé in'diichí yā 'úú. ²³'Iiⁿ yāⁿ s'eeⁿ dámaāⁿ n'giindiveéⁿ yā ye^{né} e 'úú cuááⁿ vmnaaⁿ 'tíicā, 'iiⁿ yāⁿ chi can'dáa yā s'uuúⁿ ti ne^{né} e yā di'cuiinú yā s'uuúⁿ maaⁿ ní ngaⁿ a yā nduudu cuaacu ye^{né} e Jesucristo. Cuááⁿ vmnaaⁿ nguéé ne^{né} e yā chi 'iiⁿ yāⁿ i'téenu yā nduudu cuaacu ye^{né} e Jesucristo. ²⁴Ní ye^{né} e chúū 'iiⁿ yāⁿ s'eeⁿ dich'εεtē yā Ndyuūs caavā chi maaⁿ ní 'úú i'teenú Jesucristo.

Tanáⁿ apóstoles dííⁿ yā aceptar Pablo chi 'áámá apóstol ndúú cū yā

2 Cho'oo ndiichi cúūuⁿ nduuyūú chi 'úú che^{né} e ntuúⁿ yāáⁿ Jerusalén. Che^{né} e ndúú cū saⁿ ā Bernabé chi com-

pañero ye^{né} e ndúú cū saⁿ ā Tito. ²Ní ndaá ti Ndyuūs ch'iⁿ i yā 'úú chi caneeé chi caⁿ á. Vmnaáⁿ vmnaaⁿ caⁿ á nanááⁿ apóstoles chi n'gεεte ye^{né} e yaācū miiⁿ. Ní chíí 'iiⁿ yāⁿ s'eeⁿ taacā chi ngaⁿ á nduudu ngai ye^{né} e Cristo nanááⁿ 'iiⁿ yāⁿ gentiles chi nguéé ye^{né} e ndaata Israel. Chuū dííⁿ chíí 'iiⁿ yāⁿ s'eeⁿ cu'téenu yā chí dichí'lvē ntiíⁿ nyuⁿ ye^{né} e Ndyuūs chíí dííⁿ nguaaⁿ 'iiⁿ yāⁿ gentiles. Ni apóstoles n'gεεte nguéé caⁿ a yā chí nguéé 'cuúⁿ yā 'úú. ³Ní apóstoles n'gεεte ní canee yiinú yā ndúú cū nduudu chíí ngaⁿ á. Ni saⁿ ā Tito chíí saⁿ ā griego chíí caneeé sa nduucú, nguéé canee chíí cuuví circuncidar Tito tan'dúú cā chíí ngaⁿ a ley ye^{né} e 'iiⁿ yāⁿ Israel s'eeⁿ ti nguéé ye^{né} e ndaata Israel. ⁴Chuū dííⁿ ti naachi nduuvuidaama yú chíí ndaá n'dé'élí 'iiⁿ yāⁿ chíí dííⁿ yā tan'dúú cā chíí hermanos ye^{né} e yú yā, naati nguéé 'tíicā. Ní ndaa yā chíí n'diichí yā s'uuúⁿ caati 'āā cuéé dííⁿ yú tan'dúú cā chíí ngaⁿ a ley ye^{né} e circuncisión ti s'uuúⁿ ní ye^{né} e Cristo s'uuúⁿ ní dííⁿ yú chíí ngaⁿ a Cristo. Ne^{né} e yā chíí dííⁿ yú tan'dúú cā chíí ngaⁿ a ley ye^{né} e Moisés miiⁿ. ⁵Nús'uu ní nguéé dííⁿ 'nū tan'dúú cā chíí 'iiⁿ yāⁿ s'eeⁿ ne^{né} e yā ye^{né} e ley ye^{né} e circuncisión caati ne^{né} e 'nū chíí nduudu cuaacu chíí 'āā ngaⁿ á 'nū ye^{né} e evangelio ye^{né} e Señor Jesucristo, ní 'áámá cūnee ndúú cū ndís'tii. 'Tíicā dííⁿ 'nū.

⁶Apóstoles n'gεεte ye^{né} e yaācū miiⁿ nguéé de'ē vεε más cā ca'cueéⁿ yā 'úú ye^{né} e chíí 'úú caaⁿ máⁿ. 'Áará chíí n'gεεte n'dai yā nguéé de'ē vεε tuneéⁿ 'úú ti Ndyuūs ne^{né} e yā nducyaaca 'iiⁿ yāⁿ 'āā daamá nūuⁿ. ⁷Apóstoles n'gεεte ye^{né} e yaācū 'āā deenú yā chíí Ndyuūs dicho'ó yā 'úú. 'Úú, Pablo, ngaⁿ á nduudu ngai ye^{né} e Cristo nanááⁿ 'iiⁿ yāⁿ chíí nguéé ye^{né} e ndaata Israel. 'Tiicā ntūūⁿ deenú yā chíí Ndyuūs dicho'ó yā Pedro chíí ngaⁿ á yā nduudu ngai ye^{né} e Cristo nguaaⁿ 'iiⁿ yāⁿ ye^{né} e ndaata Israel. ⁸Ti Ndyuūs ye^{né} e yú ní nginnee yā Pedro miiⁿ chíí ngaⁿ a ndu-

udu cuaacu yeⁿé yā nguaaⁿ 'iiⁿ'yāⁿ Israel s'eeⁿ chi diíⁿ yā tan'dúúccā chi ngaⁿ'ā ley yeⁿé circuncisión. Maaⁿ Señor miiⁿ nginne yā 'úú chi caaⁿ'máⁿ nduudu yeⁿé yā nguaaⁿ 'iiⁿ'yāⁿ chi nguéé yeⁿé ndaata Israel. Ní nguéé véé ley yeⁿe circuncisión yeⁿé yā.

⁹ Apóstoles n'geete yeⁿe yaacū chi Jacobo ndúúccū Pedro ndúúccū Juan ní deenu ntúuⁿ yā chi Ndyuūs din'daacá yā nduuccū chi 'úú idiiⁿ ntiiⁿ'nyuⁿ yeⁿe apóstol nguaaⁿ 'iiⁿ'yāⁿ chi nguéé yeⁿé ndaata Israel. Tuuⁿ'mi ní sta'á yā tá'ā cuaacú 'nū ní nduuvidaamaⁿ nduudu yú nanááⁿ Ndyuūs ti 'úú ndúúccū Bernabé ní caaⁿ'máⁿ 'nū nduudu cuaacu yeⁿé Jesucristo nanááⁿ 'iiⁿ'yāⁿ gentiles ní 'iiⁿ'yāⁿ s'eeⁿ nanááⁿ 'iiⁿ'yāⁿ yeⁿe ndaata Israel. ¹⁰ Ní ngaⁿ'á yā ngii yā nús'uu chi n'gáacú 'nū yeⁿé hermanos chi véé necesidades yeⁿé yā. 'Úú ntúuⁿ ní ngaⁿ'á, 'tíicā.

Pablo caⁿ'a cheechi yā ndúúccū Pedro

¹¹ Ndaá 'nū na yáāⁿ Antioquía ní taachí ndaa Pedro miiⁿ na yáāⁿ Antioquía 'úú ní caⁿ'a cheechí ndúúccū sa yáāvēnaaⁿ sa nanááⁿ 'iiⁿ'yāⁿ s'eeⁿ ti Pedro miiⁿ nguéé idiiⁿ sa tan'dúúccā chi deenu sa chi canee chi diiⁿ sa. ¹² Ti taachi 'āā cuéé ndaa saⁿ'ā s'eeⁿ chi dich'ó Jacobo yeⁿé yāāⁿ Jerusalén, Pedro miiⁿ ní che'é sa ndúúccū 'iiⁿ'yāⁿ gentiles chi hermanos yeⁿe yú. Ní taachi ndaa saⁿ'ā s'eeⁿ tuuⁿ'mi 'āā ntéé che'e sa ndúúccū 'iiⁿ'yāⁿ gentiles chi hermanos yeⁿe yú ti 'va'a sá yeⁿé 'iiⁿ'yāⁿ yeⁿé sa chi yeⁿé ndaata Israel chi diíⁿ yā tan'dúúccā chi ngaⁿ'a ley yeⁿe circuncisión. ¹³ Ní tanáⁿ'ā hermanos chi yeⁿé ndaata Israel diíⁿ yā tan'dúúccā chi idiiⁿ Pedro miiⁿ. 'Tiicā ntúuⁿ Bernabé diíⁿ yā chi maaⁿ ní 'āā ntéé che'é yā ndúúccū 'iiⁿ'yāⁿ gentiles. 'Tiicā nducyaacá yā diíⁿ yā 'áará chi deenú yā chi n'daacā chi che'é yā ndúúccū 'iiⁿ'yāⁿ gentiles. ¹⁴ Taachi n'diichí chi 'iiⁿ'yāⁿ s'eeⁿ nguéé din'daacá yā ti nguéé che'é

yā ndúúccū 'iiⁿ'yāⁿ gentiles chi hermanos yeⁿe yú tan'dúúccā chi ngaⁿ'a nduudu cuaacu yeⁿe Cristo, tuuⁿ'mi ní 'úú Pablo caⁿ'á chii Pedro miiⁿ nanááⁿ nducyaaca yā 'túúccā: Díí chi saⁿ'ā Israel, díí chí maaⁿ ní nguéé diiⁿ di tan'dúúccā chi ngaⁿ'a ley yeⁿe Israel ti maaⁿ ní i'téenu di Cristo, tááccā cúuví chí nguéé che'e di ndúúccū hermanos yeⁿe yú chi 'iiⁿ'yāⁿ gentiles ní diiⁿ di chi 'iiⁿ'yāⁿ s'eeⁿ nadacadímuuⁿ yā chí cánéé chí diíⁿ yā tan'dúúccā chi ngaⁿ'a ley yeⁿe 'iiⁿ'yāⁿ Israel chí judíos.

'iiⁿ'yāⁿ Israel s'eeⁿ dáámá yā ndúúccū tanáⁿ'ā 'iiⁿ'yāⁿ yeⁿe iⁿ'yeeⁿ'dí 'cūū nánguaⁿ'ai yā caavā chí i'téenu yā Jesucristo

¹⁵ Ní s'uuúⁿ ní 'iiⁿ'yāⁿ Israel s'uuúⁿ ti 'tíicā ch'etiyáaⁿ yú ní nguéé diiⁿ nuuⁿ'ndí yú daama tan'dúúccā chí diiⁿ tanáⁿ'ā 'iiⁿ'yāⁿ gentiles chí nguéé yeⁿe ndaata yeⁿe yú. ¹⁶ Ní s'uuúⁿ chí 'iiⁿ'yāⁿ Israel deenu yú chí Ndyuūs nguéé nadach'εεcú yā nuuⁿ'ndi yeⁿe yú ti idiiⁿ yú dámaaⁿ chí ngaⁿ'a ley yeⁿe yú. 'Tiicā ntúuⁿ Ndyuūs nguéé nadach'εεcú yā nuuⁿ'ndi yeⁿe nducyaaca 'iiⁿ'yāⁿ yeⁿe iⁿ'yeeⁿ'dí 'cūū ti diíⁿ yā dámaaⁿ tan'dúúccā chí ngaⁿ'a ley yeⁿe Moisés. Ndyuūs nadach'εεcú yā nuuⁿ'ndi yeⁿe 'iiⁿ'yāⁿ chí i'téenu yā Jesucristo. Cáávā chuú s'uuúⁿ ní i'teenu yú Jesucristo ní Ndyuūs nadach'εεcú yā nuuⁿ'ndi yeⁿe yú. Ti cucáavā ley yeⁿe yú mar 'áámá 'iiⁿ'yāⁿ chí diíⁿ yā chí ngaⁿ'a ley miiⁿ cuuví yā perdonado, ti nguéé nadach'εεcú ley miiⁿ nuuⁿ'ndi yeⁿé yā.

¹⁷ S'uuúⁿ ní i'téenu yú Jesucristo chí Jesucristo miiⁿ nadach'εεcú yā nuuⁿ'ndi yeⁿe yú. 'Tíicā s'uuúⁿ ní ch'iⁿ'i yú chí dinuuⁿ'ndi yú tan'dúúccā tanáⁿ'ā 'iiⁿ'yāⁿ yeⁿe iⁿ'yeeⁿ'dí 'cūū. Maaⁿ ní, 'áá cuaacu chí Cristo nginneé yā s'uuúⁿ ti idinuuⁿ'ndi yú? Nguéé 'tíicā. ¹⁸ Nduuti chí s'uuúⁿ nadi'tuuví yú 'áámá cosa chí ley yeⁿe yú ní cuiinuu ní nadin'dái ntuuⁿ yú ley miiⁿ chí n'giindiveeⁿ yú yeⁿ'é, tuuⁿ'mi ní

dinuuⁿndi yú. ¹⁹Vmnaáⁿ vmnaaⁿ idiiⁿ yú tan'dúúcā chi ngaⁿa ley yeⁿe yú naati nguéé ngii idiiⁿ yú nducuéⁿe yeⁿe. Ní ley miiⁿ diiⁿ condenar s'uuúⁿ. Ní canee yú tan'dúúcā 'iiⁿyāⁿ chi 'āā ví'í cā yeⁿe ley yeⁿe yú. Cáāvā chuū ní maaⁿ ní ch'εetinée yú tan'dúúcā chi neⁿe Ndyuūs. Ní Ndyuūs nadach'εécú yā yeⁿe yú yeⁿe nuuⁿndi yeⁿe yú. Ní cáāvā chuū cunduuchi yú cueⁿe daāⁿmaⁿ. ²⁰Taachi ca'neeⁿnga'á yā Cristo, tuuⁿmi ní cánéé tan'dúúcā chi 'úú ntúūⁿ ca'neeⁿnga'á nducú yā. Maaⁿ ní nguéé idifⁿ tan'dúúcā chi 'úú neⁿé ti idifⁿ chiiⁿ chi neⁿé Jesucristo ti Jesucristo chi daiya Dendyuūs canée yā na staava yeⁿé. Ní maaⁿ ní 'úú canduuchi ti i'teenú Daiyá Ndyuūs miiⁿ. Cristo miiⁿ dinéⁿe yā 'úú ní ca'a maáⁿ yā vida yeⁿe maáⁿ yā ní ch'ií yā caavā 'úú. ²¹'Uú nguéé cuta'á vaadi n'dai yeⁿe Ndyuūs tan'dúúcā 'áámá cosa chiduuchi. Nduuti chi ley miiⁿ cuuví nach'εécú nuuⁿndi yeⁿe yú tuuⁿmi ní nguéé ch'ií Cristo cucáāvā s'uuúⁿ.

¿'Áá i'teenu yú ley miiⁿ o i'teenu yú Cristo?

3 Nds'tií 'iiⁿyāⁿ yeⁿe yáⁿāa Galacia, de'ε chúúcā cheechi tiíⁿ nī. ¿Dú'ú chi nche'ei nds'tií chi maaⁿ ní nguéé n'giindiveéⁿ nī nduudu cuaacu? Ngaⁿá nduudu cuaacu nanááⁿ nds'tií ní nds'tií déénu nī chi iiⁿyāⁿ chi'neeⁿnga'á yā Jesucristo na cruz cucáāvā nuuⁿndi yeⁿe nducyaaca 'iiⁿyāⁿ. ²Chuū neⁿé chi cuuvi nī 'úú: ¿'Áá sta'á nī Espíritu N'dai yeⁿé Ndyuūs cucáāvā chi díⁿ nī tan'dúúcā chi ngaⁿā ley yeⁿé Moisés, o cucáāvā chi n'giindiveéⁿ nī nduudu cuaacu yeⁿé Ndyuūs ní i'téenu nī? ³¿De'ε chúúcā cheechi tiíⁿ nī? 'Áā i'téenu nī nduudu yeⁿé Ndyuūs ni sta'á nī Espíritu N'dai yeⁿé Ndyuūs. Maaⁿ ní neⁿé nī ndúúcū fuerzas yeⁿe maáⁿ nī díⁿ nī tan'dúúcā chi ngaⁿa ley caati Ndyuūs cuuvi n'diichí yā chi n'daacā idifⁿ nī. ⁴'Áā ch'eenu taaví nī

chií cucáāvā chi i'téenu nī Cristo. Maaⁿ ní chuū nguéé dichí'vē nds'tií, nduuti chi nadacadaamí nī yeⁿe yā. 'Áā deenú chi dichí'vē nds'tií nduuti chi 'cuetinée nī ndúúcū Cristo. ⁵Ndyuūs tee yā nds'tií Espíritu N'dai yeⁿé Ndyuūs ní díⁿ yā vaadi n'giinu nguaaⁿ nds'tií. ¿'Áá díⁿ Ndyuūs chuū caati nds'tií 'āā díⁿ nī tan'duucā chi ngaⁿa ley? Nguée 'tíicā. Ndyuūs díⁿ yā vaadi n'giinu nguaaⁿ nds'tií caati i'téenu nī nduudu cuaacu yeⁿé yā.

⁶Ndii cuááⁿ vmnaaⁿ nduudu yeⁿé Ndyuūs ngaⁿa yeⁿe Abraham chi 'āā n'dii. Abraham chi'téenu yā Ndyuūs ní Ndyuūs diiⁿ cuenta yā chi'téenu Abraham ní nadach'εécú yā nuuⁿndi yeⁿé yā. ⁷Cáāvā chuū deenu nī chi 'iiⁿyāⁿ chi i'téenu yā nduudu yeⁿé Ndyuūs, cuaacu ní'nyúⁿ ní yeⁿe ndaata Abraham, caati i'téenu yā tan'dúúcā chi'téenu Abraham miiⁿ. ⁸Ndii cuaaⁿ vmnaaⁿ canée nguúⁿ na libro yeⁿe Ndyuūs chi Ndyuūs caⁿá yā nadach'εécú yā nuuⁿndi yeⁿe 'iiⁿyāⁿ gentiles chi nguéé yeⁿe ndaata Abraham o Israel nduuti chi i'téenu yā Ndyuūs. Chuū Ndyuūs ngaⁿá yā ngii yā Abraham ndii tiempo chi 'āā chó'oo, vmnaaⁿ chi díⁿ yā. 'Tíicā ngaⁿa Ndyuūs ndúúcū Abraham: 'Úú caaⁿmáⁿ chi di'viicú 'iiⁿyāⁿ yeⁿe nuuⁿmáⁿ fⁿ'yeéⁿdi nduuti chi cu'téenu yā 'úú tan'dúúcā chi díⁿ i'téenu di 'úú. ⁹Tan'dúúcā Abraham chi'téenu yā Ndyuūs ní Ndyuūs ca'a yā Abraham vaadi n'dai yeⁿé yā ní 'tíicā ntúūⁿ Ndyuūs ca'a yā vaadi n'dai yeⁿé yā nducyáácá 'iiⁿyāⁿ chi cu'téenu yā Ndyuūs.

¹⁰Nducyáácá 'iiⁿyāⁿ chi nadacadínuuⁿ yā na staava yeⁿe yā chi Ndyuūs nadach'εécú yā nuuⁿndi yeⁿe yā ti díⁿ yā tan'dúúcā chi ngaⁿa ley miiⁿ 'iiⁿyāⁿ s'eeⁿ nan'dai yā ní cánéé yā condenado, ti mar 'áámá 'iiⁿyāⁿ cuuvi díⁿ yā nducuéⁿe chi ngaⁿa ley miiⁿ. Canée nguúⁿ ndii cuááⁿ vmnaaⁿ na libro

yeⁿé Ndyuūs 'tiicā: 'iⁿ'yāⁿ chi nguéé díⁿ yā tanducuéⁿē chi canéé nguūⁿ na ley yeⁿe Moisés chii yā condenado. ¹¹S'uuúⁿ ní deenu yú chi Ndyuūs nguéé nadach'εécú yā nuuⁿndi yeⁿé 'iⁿ'yāⁿ caava chi diiⁿ yā chi ngaⁿa ley ti 'tíicā canéé nguūⁿ na libro yeⁿé Ndyuūs: Ndyuūs nadach'εécú yā nuuⁿndi yeⁿé 'iⁿ'yāⁿ chi i'téenu yā ní ca'a yā 'iⁿ'yāⁿ s'eeⁿ vida cueⁿe daāⁿmaⁿ. ¹²Ní ley yeⁿe Moisés miiⁿ ní nguéé ngaⁿa chi 'iⁿ'yāⁿ cu'téenu yā Jesucristo caati 'tíicā canéé nguūⁿ na libro yeⁿe Dendyuūs ndii cuááⁿ vmnaaⁿ: 'iⁿ'yāⁿ chi diiⁿ tanducuéⁿē dendu^u chi ngaⁿa ley miiⁿ 'cuεetinée yā ndúucū vida cueⁿe daāⁿmaⁿ.

¹³Cucáāvā ley miiⁿ deenu yú chi diiⁿ yú nuuⁿndi ní canee yú condenado. Ní nguéé canee yú condenado cáāvā ley miiⁿ ti Jesucristo díⁿ yā tan'dúucā chí canee yā condenado. Ní sta'á yā lugar yeⁿe nducyaaca 'iⁿ'yāⁿ chi véé nuuⁿndi yeⁿé yā ní can'diicú yā na cruz. 'Tíicā canéé nguūⁿ na libro yeⁿé Ndyuūs: Condenado taanduvéé 'iⁿ'yāⁿ chi ch'iⁱ tí can'diicú yā na 'áámá yáⁿá. ¹⁴Chuū chí chii. Maaⁿ níicú 'iⁿ'yāⁿ gentiles cuuvi diiⁿ yā recibir vaadi n'dai yeⁿé Dendyuūs tan'dúucā Ndyuūs caⁿa yā ndúucū Abraham, ní chi ca'a yā nducyaaca 'iⁿ'yāⁿ gentiles chi i'téenu yā Jesucristo. 'Íicú s'uuúⁿ ndúucū 'iⁿ'yāⁿ gentiles chi i'teenu yú Jesucristo cuta'a yú Espíritu N'dai yeⁿe Ndyuūs chi Ndyuūs caⁿa yā chi ca'a yā 'iⁿ'yāⁿ.

Ley yeⁿe Moisés ndúucū compromiso chi Ndyuūs ca'a yā

¹⁵Ndís'tii hermanos yeⁿé, n'diichí nī tan'dúucā 'aama ejemplo yeⁿe 'iⁿ'yāⁿ yeⁿe iⁿ'yeeⁿdí 'cūū tan'dúucā chí idiⁿ yā taachi véé papel chí cuaacu yeⁿé 'áámá compromiso yeⁿé yā. Canee ngiinú yā ní dinguúⁿ yā 'aama papel chí cuaacu. Maaⁿ ní chi canéé nguūⁿ ní cuaacu chí

mar 'áámá 'iⁿ'yāⁿ ngueε nadvíi yā ndíi nguéé ndúú íntiinee ra yā chiiⁿ chi canéé nguūⁿ. ¹⁶'Tiicā ntúūⁿ, Ndyuūs ndii vmnááⁿ vmnaaⁿ ca'a yā promesa Abraham ndúucū nducyaaca 'iⁿ'yāⁿ ndaata yeⁿe yā chí cuchii cuayiivi. Canéé nguūⁿ na libro yeⁿe Ndyuūs 'tíicā: Nguéé ngaⁿa yeⁿé ndaata chi n'dee n'dái yeⁿe Abraham tan'dúucā chi 'yaaⁿ yā ti ngaⁿa tan'dúucā chi yeⁿe 'aama 'iⁿ'yāⁿ yeⁿe Abraham ní 'iⁿ'yāⁿ miiⁿ chí Jesucristo. ¹⁷Chuū ngaⁿá cuaacu yeⁿe compromiso chi idi'cuaacú yā cáāvā Cristo: Ndyuūs díⁿ yā 'áámá compromiso ndúucū Abraham chi canéé nguūⁿ. Cho'ōo cuūū ciento canee ndiicú ndíichí nduuyū ní Ndyuūs ca'a yā ley Moisés. Ley miiⁿ nguéé cuuví divíi 'aama lado compromiso yeⁿe Ndyuūs chi ca'a yā vmnááⁿ vmnaaⁿ ní diiⁿ chí nguéé dichí'vē compromiso yeⁿé yā. ¹⁸Ndúuti chí Ndyuūs téé yā chí cuuvi yeⁿé yú cáāvā chí diiⁿ yú tan'dúucā chí ngaⁿa ley miiⁿ tuu'mi ní 'āā ntéé téé yā chí cuuvi yeⁿé yú cáāvā compromiso. Ndyuūs ca'a yā Abraham chí cuuvi yeⁿé yā cáāvā compromiso chí díⁿ yā ndúucū yā.

¹⁹¿De'ē dichí'vē ley tuu'mi? Ndyuūs ca'a yā 'iⁿ'yāⁿ ley miiⁿ chí cuuvi deenu yú chí véé nuuⁿndi yeⁿe yú. Ní ley miiⁿ canee ndii tiempo chí ndāā Cristo Daiya Dendyuūs iⁿ'yeeⁿdí 'cūū. Cristo miiⁿ 'iⁿ'yāⁿ yeⁿe compromiso chí Ndyuūs caⁿa yā chí ca'a yā. Ndyuūs dichó'o yā ángeles chí ca'a yā ley Moisés. Moisés miiⁿ ní saⁿā chí canee naavtaⁿā yeⁿé 'iⁿ'yāⁿ ndúucū Ndyuūs. ²⁰Taachi Ndyuūs ca'á yā compromiso ndúucū Abraham, nguéé cānee 'aama saⁿā naavtaⁿā yeⁿé yā ndúucū Abraham, nguéé ti tan'dúucā Moisés miiⁿ.

Yeⁿe chí diiⁿ ley yeⁿe Moisés

²¹¿'Áá ley miiⁿ contra compromiso yeⁿe Dendyuūs? Ngueε 'tíicā. Nduuti chí Ndyuūs cuuvi ca'a yā 'áámá ley chí cuuví

ca'a vida cueⁿe daāⁿmaⁿ 'iiⁿyāⁿ, tuuⁿmi ní 'āā ntéé vε nuuⁿndi yeⁿ'é 'iiⁿyāⁿ caavā ley miiⁿ. ²²Naati canéé nguūⁿ na libro yeⁿ'é Ndyuūs chi nducyáácá 'iiⁿyāⁿ véé nuuⁿndi yeⁿ'e yā ti nguéé diiⁿ yā cumplir ley miiⁿ. Cáāvā chuū canéé chí i'téenu yú Jesucristo ní Ndyuūs cuuvi tée yā s'uúúⁿ vida cueⁿe daāⁿmaⁿ cucáāvā compromiso miiⁿ.

²³Taachi 'āā cuéé ndaā Jesucristo caavā chi cuuvi cu'téenu yú Jesucristo, tuuⁿmi ní ch'εetinée yú maaⁿ poder yeⁿ'e ley. 'Tíicā ch'εetinée yú ndíí tiempo chi Ndyuūs dichó'o yā Jesucristo na iⁿ'yeeⁿdí 'cūū ní 'íicú cuuvi cu'téenu yú Jesucristo. ²⁴Ley miiⁿ canee tan'dúúicā criada yeⁿ'e s'uúúⁿ chí diiiⁿ cuidado s'uúúⁿ ndíí tiempo chi ndaā Cristo. Maaⁿ ní cucáāvā chi i'téenu yú Jesucristo tuuⁿmi ní Ndyuūs nadich'εécú yā nuuⁿndi yeⁿ'e yú. ²⁵Ní taachi ndaā Jesucristo miiⁿ ní i'teenu yú 'yā, nguéé canee yú maaⁿ poder yeⁿ'e ley miiⁿ chi ley miiⁿ nguéé diiiⁿ cuidado s'uúúⁿ.

²⁶Maaⁿ ní nducyaaca yú ní daiya Dendyuūs s'uúúⁿ caavā chi i'teenu yú Jesucristo. ²⁷Caati nducyaaca yú chí chεēdínūⁿnī ti i'teenu yú Jesucristo, s'uúúⁿ ní canee yú tan'dúúicā chí véé vestido ngai yeⁿ'ē yú ní canee yú tan'dúúicā Jesucristo ti yeⁿ'é yā s'uúúⁿ. 'Tíicā s'uúúⁿ. ²⁸Maaⁿ ní nguéé de'ē vε ndíí nduuti chí s'uúúⁿ ní 'iiⁿyāⁿ yeⁿ'e ndaata Israel, o 'iiⁿyāⁿ yeⁿ'e ndaata griego, o criada chí yeⁿ'ē 'áámá patrón, o 'iiⁿyāⁿ chí libre yā, o saⁿ'ā o n'daataá ti nducyaaca s'uúúⁿ ní tan'dúúicā 'áámá s'uúúⁿ nūūⁿ cucáāvā chí i'teenu yú Jesucristo ní yeⁿ'é Cristo s'uúúⁿ. ²⁹Ndúúti chí s'uúúⁿ ní yeⁿ'ē Cristo s'uúúⁿ tuuⁿmi ní s'uúúⁿ ní yeⁿ'e ndaata Abraham s'uúúⁿ, ní véé chí cuuvi yeⁿ'e yú yeⁿ'ē compromiso ti 'tíicā Ndyuūs caⁿ'ā yā ndúúicū Abraham chí tée yā s'uúúⁿ.

4 Maaⁿ ní neⁿ'é caaⁿ'máⁿ chuū ndís'tii yeⁿ'e 'áámá saⁿ'ā n'gaiyāá chí véé chí

cuuvi yeⁿ'e sa. Taachi saⁿ'ā 'lííⁿ sa canee sa tan'dúúicā 'aama mozo ni idiiⁿ sa chíiⁿ chí ngaⁿ'ā 'iiⁿyāⁿ chí ch'εetinée yā ná vaacu sa. 'Áará chí vε chí cuuvi yeⁿ'e sa nducuéⁿ'ē. ²Saⁿ'ā 'lííⁿ sa canee sa ndúúicū 'iiⁿyāⁿ chí diiⁿ cuidado yeⁿ'ē sa ní ndúúicū 'iiⁿyāⁿ chí ngaⁿ'ā nti-iⁿ'nyuⁿ yeⁿ'e nducuéⁿ'ē chí yeⁿ'ē sa. 'Tíicā canee sa ndii tiempo chí ngaⁿ'ā chiida sa ní véé nduuyu yeⁿ'ē sa. Tuuⁿmi ní 'iiⁿyāⁿ ca'a yā nducuéⁿ'ē chí cuuvi yeⁿ'ē sa. ³'Tíicā ntúūⁿ s'uúúⁿ Taachi nguéé deenu yú yeⁿ'e Cristo, tuuⁿmi ní canee yú tan'dúúicā n'gaiyāá yú chí nguéé iincheenaaⁿ yú. Ní canee yú maaⁿ poder yeⁿ'e ley yeⁿ'e yú ní diiⁿ yú chí ngaⁿ'ā ley yeⁿ'e yú ndúúicū costumbre yeⁿ'e yú. ⁴Taachi snuūⁿ ca'ā nguuvi miiⁿ Ndyuūs dichó'o yā Daiya yā iⁿ'yeeⁿdí 'cūū. Ní ch'iindiyāaⁿ yā yeⁿ'ē 'áámá n'daataá chí yeⁿ'ē ndaata Israel, yeⁿ'é 'iiⁿyāⁿ chí diiⁿ yā chí ngaⁿ'ā ley yeⁿ'e Moisés. ⁵Ní saⁿ'ā miiⁿ ní ndaā sa ní nadanguáⁿ'ai sa s'uúúⁿ chí 'iiⁿyāⁿ Israel s'eeⁿ chí snée yú ndúúicū ley yeⁿ'é Ndyuūs ndúúicū 'iiⁿyāⁿ gentiles ndúúicū costumbres yeⁿ'é yā, 'iiⁿyāⁿ s'eeⁿ chí nguéé yeⁿ'ē ndaata Israel, níicú nducyaaca yú cuuvi daiya sa s'uúúⁿ.

⁶Maaⁿ ní nducyaaca s'uúúⁿ ní daiya Ndyuūs s'uúúⁿ. Ní Ndyuūs dicho'ó yā Espíritu yeⁿ'ē Daiya yā chí Cristo na staava yeⁿ'e yú. Espíritu miiⁿ chíiⁿ chí diiⁿ chí cuuvi caaⁿ'maⁿ yú 'tíicā: N'dii Ndyuūs Chiidá. ⁷Maaⁿ ní s'uúúⁿ nguéé tan'dúúicā mozos s'uúúⁿ ti daiyá Dendyuūs s'uúúⁿ. Ní ndúúti chí daiyá yā s'uúúⁿ tuuⁿmi Ndyuūs caⁿ'ā yā ca'a yā s'uúúⁿ chí cuuvi yeⁿ'e yú tan'dúúicā chí ngaⁿ'ā yā ti i'teenu yú Cristo.

Pablo idiiⁿ yā cuidado yeⁿ'e 'iiⁿyāⁿ chí i'téenu Jesucristo

⁸Vmnaáⁿ vmnaaⁿ taachi nguεε n'diichí ní Ndyuūs, ndís'tii chí nguéé yeⁿ'ē 'iiⁿyāⁿ yeⁿ'e ndaata Israel diiⁿ ní ntiⁿ'nyuⁿ caavā ídolos chí nguéé dendyuūs s'eeⁿ. ⁹Maaⁿ

ní chi n'diichí nī Ndyuūs o más cā n'daacā chi caa"má" chi Ndyuūs chi n'diichí yā ndís'tiī chi ye"é yā taacā chi maa" nī nguēcúndii ntúu" nī ní ne"é nī díf" nī dendú'ū cosas chi nguéé cuuvi nangua"ai yú. Dé'ē cuuvi chi ne"é nī cunée nī tan'duucā 'áámá mozo ye"ē cosas chi 'tíicā. ¹⁰ Ndí's'tiī ní dí'viicú nī nguuvi s'ee", ndúú'cū 'iyyū, ndúú'cū tiempo, ndúú'cū nduuyū ti ne"é nī ca"á nī favor ye"é Ndyuūs. ¹¹ Ndí's'tiī hermanos ye"é, 'va'á ye"e ndís'tiī ti nguéé dichí'vē nduudu cuaacu chi nga"á nguaa" ndís'tiī.

¹² Ndí's'tiī hermanos ye"é dí'cuiitú nī chi díf" nī tan'dúú'cā chi 'úú idí'f", ní diví'í nī ye"e ley ti 'úú diví'í ye"e ley mii" ti ne"é dí'f" tan'dúú'cā ndís'tiī chi nguéé deenú nī ley. Taachí nga"á nduudu cuaacu nguaa" ndís'tiī, ndís'tiī ní dí'n'dái nī nduucú. ¹³ Ndí's'tiī deenu nī chi vmnáá" vmnaa" chi 'cueé" ndís'tiī nduudu ye"é Ndyuūs ní ngítá 'úú. ¹⁴ Ndí's'tiī nguéé taanduvéé dí'f" nī nduucú chi nguéé ne"é nī 'úú cáávā ca'ai chi canuu" 'úú chi idí'f" sufrir. Ní 'cuu" nī 'úú ní sta'a nī 'úú tan'dúú'cā chi 'úú 'áámá ángel ye"é Dendyuūs chi ndaā nanáá" ndís'tiī. Ní sta'á nī 'úú tan'dúú'cā chi 'úú ní Cristo 'úú. ¹⁵ ¿De'ē cuuvi chi maa" ní nguéé yeenú nī nduucú ní nguéé ne"é nī 'úú? 'Úú nga"á nduudu cuaacu chi vmnáá" vmnaa" ne"é nī 'úú ti nduuti chí cuuvi tun'dáa nī nduutinaá" nī maá" nī chi tée nī 'úú. ¹⁶ Maa" ní 'áá enemigo ye"é nī 'úú ti ngii chēechí ndís'tiī nduudu cuaacu.

¹⁷ Véé 'ii"yā" chi ndaā nguaa" ndís'tiī chi nga"á yā chi ne"é yā ndís'tiī naati nguēe n'daacā idí'f" yā. Ne"é yā chi ndaacadáámí ndís'tiī ye"ē nduudu cuaacu ní 'caandiveé" nī ye"e 'ii"yā". ¹⁸ N'dáácā chi 'ii"yā" nga"á yā chi ne"e yā ndís'tiī nduuti chi dí'f" yā chi n'daacā ndúú'cū nī. Ní 'ii"yā" s'ee" ní dí'f" yā 'túú'cā nguéé dámaā" taachi 'úú caneé nguaa" ndís'tiī. ¹⁹ Ndí's'tiī her-

manos ye"é, ndís'tiī tan'dúú'cā daiyá 'tíicā ndís'tiī. Ti taachi nga"á nduudu cuaacu nanáá" ndís'tiī, 'úú dí'f" sufrir tan'dúú'cā 'aama n'daataa dí'f" tá sufrir taachi ch'iindiyāā" dacuá'āa. 'Tíicā idí'f" ndii tiempo chi i'téenu nī Jesucristo ní ye"é yā ndís'tiī. 'Tíicā idí'f" sufrir taama vmné"ēe ti ne"é chi ndís'tiī ch'i"í nī chi cuaacu ní'nyú" i'téenu nī Cristo. ²⁰ Maa" ní ne"é cunée ndúú'cū ndís'tiī ní cunneé ndís'tiī ti nguéé deenú táácā cuuvi dí'f" nduucú ndís'tiī taachi ya"ái caneé ye"e nī.

'Áámá ejemplo chi historia ye"ē n'daataa Agar ndúú'cū n'daataa Sara

²¹ Ndí's'tiī chi ne"é nī canée nī ndúú'cū ley ye"e Moisés, 'cuuvi nī 'úú: ¿'Áá nguéé déenu nī chi nga"á ley mii"? ²² Canée nguū" na libro ye"é Ndyuūs chi Abraham ní véé 'uū'vī daiya yā. 'Aama daiya yā ní ye"e tá"ā chi canée caadi 'iyyū. Ní táámá daiya yā ní ye"e n'daataa ye"e yā chi nguéé criada. ²³ Daiya yā chi ye"e tá"ā chi canée caadi 'iyyū ch'iindiyāā" sa ti Abraham ne"e yā daiya yā. Naati táámá daiya táámá n'daataa chi n'daataa ye"é yā, ch'iindiyāā" sa cucáávā compromiso chi dí'f" Ndyuūs. Ní maa" ní'cú chi compromiso chí ca"á Ndyuūs chí ca'a yā daiya Abraham. ²⁴ Chuū ní 'áámá historia ní 'áámá comparación ye"e tá"ā criada mii" ndúú'cū tá"ā chi n'daataa ye"e Abraham. Ndyuūs dí'f" yā contratar cucáávā nduu 'uuvi cosas chi Ndyuūs cānee yiinú yā chi dí'f" yā. Tá"ā criada mii" ní nguuvi tá Agar ní 'áámá seña tan'dúú'cā chi Ndyuūs cānee yiinú yā ní ca'a yā ley Moisés mii" na 'cuēti Sinaí. Nducyaca 'ii"yā" chi caneé yā maa" poder ye"e ley mii" tan'dúú'cā criada ye"e ley 'tíicā yā. Ní tan'dúú'cā criada Agar ndúú'cū daiyá yā canée caadi 'iyyū, 'tíicā yā. ²⁵ Ndyuūs ch'i"í yā s'uuú" chi Agar mii" ní 'áámá seña tan'dúú'cā chi 'cuēti Sinaí na yá"āa Arabia 'tíicā yā. 'Ti-

icá ntúūⁿ táamá seña tan'dúúcā 'iiⁿyāⁿ Israel s'eeⁿ chi ye'e yāāⁿ Jerusalén ti 'iiⁿyāⁿ yeⁿe yāāⁿ Jerusalén miiⁿ canée yā maaⁿ poder yeⁿe ley yeⁿe Moisés. Ní canée yā tan'dúúcā criados yeⁿe ley miiⁿ. ²⁶Naati Ndyuūs ch'iⁿí yā s'uuúⁿ chi n'daataá chi nguuvi Sara chi nguéé criada ní 'áamá seña tan'dúúcā chi yāāⁿ Jerusalén chí ngai chí canee na ye'ai chēeti nguuvi. Ní yāāⁿ yeⁿe nducyaaca yú chi i'teenu yú Jesucristo. ²⁷Canée nguūⁿ ndii cuááⁿ vmnaaⁿ na nduudu yeⁿe Ndyuūs, 'tiicā: Ndí's'tiī n'daata s'eeⁿ chi nguéé chiīndi daiyá nī cuuvi yeenu taaví nī. Ní 'cuai nī ní caaⁿmaⁿ nī ndúúcū vaadi yeenú 'aara chi nguéé vée daiyá nī. Ti ndí's'tiī chi libre chi nguéé daiyá nī cuuvi más ca daiyá nī nguéé ti n'daataá criada chi vée daiyá yā yeⁿe isaⁿā yeⁿe nī.

²⁸Ndí's'tiī hermanos yeⁿe, 'tíicā s'uuúⁿ tan'dúúcā daiyá chi nguuvi Isaac chi yeⁿe Abraham ndúúcū Sara 'tíicā s'uuúⁿ. Ní Ndyuūs tee yā compromiso s'uuúⁿ ti 'tiicā Ndyuūs ngaⁿa yā chi ca'a yā Abraham miiⁿ daiyá yā Isaac miiⁿ tí Isaac miiⁿ ní yeⁿe compromiso, 'tíicā s'uuúⁿ. ²⁹'Tíicā tiempo chi 'āā ch'ó'ō Ndyuūs idiíⁿ yā chi saⁿā daiyá criada chi daiyá Abraham caati neⁿe yā daiyá yā, daiyá criada miiⁿ can'dāa sa saⁿā daiyá Sara caati daiyá Sara ndúúcū Abraham ní yeⁿe compromiso chi diiⁿ Ndyuūs ndúúcū Abraham. 'Tíicā maaⁿ ní, 'iiⁿyāⁿ chi cānee yā maaⁿ poder yeⁿe ley yeⁿe Moisés ní nguéé yeⁿe Señor Jesucristo. 'Iiⁿyāⁿ s'eeⁿ can'dāa yā s'uuúⁿ ní diíⁿ yā chi diiⁿ yú sufrir ti i'teenu yú Jesucristo. Ní canée yú ndúúcū Espíritu N'dai yeⁿe Ndyuūs cáavā compromiso yeⁿe yā. ³⁰Naati canée nguūⁿ na libro yeⁿe Ndyuūs ndii cuááⁿ vmnaaⁿ 'tíicā: Cuaaⁿ chuva'āi íneeⁿ táⁿā chi canée caadi 'iiyū ndúúcū daiyá tá ti nguéé de'ē vee chi tuneⁿ daiyá táⁿā chi canée caadi 'iiyū yeⁿe chi cuuvi yeⁿe saⁿā chi daiyá táⁿā

Sara chi libre. ³¹Ndí's'tiī hermanos yeⁿe, cáavā chuū s'uuúⁿ ní nguéé tan'dúúcā chi daiyá táⁿā chi canée caadi 'iiyū s'uuúⁿ, ti s'uuúⁿ tan'dúúcā chi daiyá táⁿā chi libre 'tíicā s'uuúⁿ.

Cunée diitū yú ndúúcū chi i'teenu yú ti libre yú

5 Maaⁿ ní Cristo nadanguáⁿai yā s'uuúⁿ yeⁿe maaⁿ poder yeⁿe ley. Caavā chúū 'cuetinéé n'daaca yú caati i'teenu yú Cristo. Ní nguéé nguēecunée yú ní diiⁿ yú tan'duucā chi ngaⁿa ley. Ní nguéé canee yú tan'dúúcā 'iiⁿyāⁿ chi canée caadi 'iiyū.

²Ndí's'tiī 'caandiveéⁿ nī. 'Úú, Pablo, ngaⁿá ngii ndí's'tiī. Nduuti chi ndí's'tiī saⁿā ca'a nī lugar chí 'iiⁿyāⁿ diíⁿ yā circuncidar ndí's'tiī tuu'mi ní nguéé cuuvi cuta'á nī yeⁿe vaadi n'dai chi Cristo neⁿe yā téé yā ndí's'tiī. ³Ngaⁿá ntuūⁿ chi nducyaaca saⁿā chi canée sá circuncidado canée chi diiⁿ sa cumplir nducueⁿe chi ngaⁿa ley miiⁿ. ⁴Nduuti chi nadacadínuuⁿ nī chi ndí's'tiī nanguáⁿai ní yeⁿe nuuⁿndi yeⁿe ní cucáavā ley miiⁿ tuu'mi ní 'āā diví nī Cristo 'áamá lado. Ní Cristo miiⁿ nguéé téé yā ndí's'tiī dendú'ū chi n'dai ca yeⁿe yā cucáavā chi dineⁿe cá yā s'uuúⁿ. ⁵Ti s'uuúⁿ chi i'teenu yú Jesucristo canée yú ndúúcū Espíritu N'dai yeⁿe Ndyuūs chi nginnee s'uuúⁿ. Ní canee ngiinu yú chi nguéé vée nuuⁿndi yeⁿe yú nanááⁿ Ndyuūs. ⁶S'uuúⁿ chi saⁿā s'uuúⁿ nguéé dichí'vē nduuti chi 'iiⁿyāⁿ diíⁿ yā circuncidar s'uuúⁿ o nguéé. Chuū dichí'vē chi i'teenu yú Jesucristo. Ní cáavā chuū neⁿe yú 'iiⁿyāⁿ.

⁷Nguuvi chi ch'ó'ō ndí's'tiī n'daaca i'téenu nī Jesucristo naati maaⁿ ní nguēe 'tíicā. ¿Du'ú di'vaachi yeⁿe ní chi nguēe n'giindiveéⁿ nī nduudu cuaacu yeⁿe Cristo? ⁸Ndyuūs nguéé dí'vaachi yā ndí's'tiī ti Ndyuūs miiⁿ yaa'ví yā ndí's'tiī chi cuuvi yeⁿe yā ndí's'tiī. ⁹'Iiⁿyāⁿ chi di'vaachí yā ndí's'tiī ní tan'duucā ta 'lííⁿ

chúundí levadura chí nadicuéeⁿ tanducueⁿē yaāchí, 'tíica yā. ¹⁰Véé confianza yeⁿé ndúucū Señor Jesucristo ní 'úú ní deenú chi ndís'tiī nguéeⁿ n'giindiveéⁿ nī nduudu yeⁿe 'iiⁿyāⁿ chí di'vaachi yā ndís'tiī. Ndyuūs díiⁿ yā castigar 'āā du'ú nūⁿ 'iiⁿyāⁿ chí di'vaachi ndís'tiī.

¹¹Ndís'tiī hermanos yeⁿé, nduuti chi ndíi maaⁿ 'úú ngaⁿá chí saⁿā gentiles canee chí canée circuncidado tuuⁿmi ní 'iiⁿyāⁿ Israel chí judío s'eeⁿ nguéeⁿ can'dáa yā 'úú chí ya'āi 'úú. Nguéeⁿ 'tíicā. 'Iiⁿyāⁿ Israel s'eeⁿ can'dáa yā 'úú ti 'úú ngaⁿá chí Jesucristo nadanguáⁿai yā 'iiⁿyāⁿ ti ch'iī yā na cruz cáāvā nuuⁿndi yeⁿé yā. ¹²N'daacā chí 'iiⁿyāⁿ chí di'vaachi yā ndís'tiī divíi yā yeⁿé nguaaⁿ ndís'tiī.

¹³Ndís'tiī hermanos yeⁿé, Ndyuūs yaa'ví yā s'uuúⁿ ní nguéeⁿ canee yú maaⁿ poder yeⁿe ley ti libre yú. Maaⁿ ní chí libre yú nguéeⁿ díiⁿ yú dendu'ū chí neⁿe yú yeⁿe cosas chí véé iⁿ'yeeⁿdī, naati dineⁿe yú 'aama yú ndúucū taama yú. Ní cunnee yú vi'ī cucáāvā chí neⁿe yú vi'ī. ¹⁴S'uuúⁿ cuuvi díiⁿ yú nducueⁿē chí ngaⁿa ley ndúuti chí díiⁿ yú tan'dúucā chí ngaⁿa 'tíicā: Dineⁿe yú nducyaaca 'iiⁿyāⁿ tan'duucā chí dineⁿe yú maāⁿ yú. ¹⁵Ndúuti chí nguéeⁿ neⁿe yú 'aama yú taama yú tuuⁿmi ní díiⁿ yú tan'dúucā chí che'e yú 'aama yú taama yú; cuin'diichi yú ti cuuvi ituuvi yú 'aama yú taama yú.

Lo que chí neⁿe yú díiⁿ yú ndúucū chí neⁿe Espíritu N'dai yeⁿe Ndyuūs chí díiⁿ yú

¹⁶'Caandiveéⁿ nī chuū chí ngaⁿá: Canee yú chí 'cuēti chiicá yú tan'dúucā chí Espíritu N'dai yeⁿé Ndyuūs chí iⁿ'i s'uuúⁿ. Ní nguéeⁿ díiⁿ yú tan'dúucā chí neⁿe cuerpo yeⁿé yú. ¹⁷Ti chíiⁿ chí neⁿe cuerpo yeⁿe yú chí díiⁿ yú nguéeⁿ tan'dúucā chí neⁿe Espíritu N'dai yeⁿé Ndyuūs chí díiⁿ yú. Ní Espíritu N'dai yeⁿé Ndyuūs ndúucū chí neⁿe díiⁿ cuerpo yeⁿe yú nguéeⁿ neⁿe 'aama taama

na staava yeⁿé yú. Chíiⁿ chí nguéeⁿ cuuvi díiⁿ yú ní chíiⁿ chí neⁿe yú díiⁿ yú. ¹⁸Nduuti chí s'uuuⁿ idiⁿ yú tan'dúucā chí chíiⁿ Espíritu N'dai yeⁿé Ndyuūs s'uuuⁿ tuuⁿmi ní nguéeⁿ canee yú maaⁿ poder yeⁿe ley.

¹⁹Ti nuuⁿndi yeⁿe cuerpo chí 'iiⁿyāⁿ díiⁿ yā ní inaaⁿ yú, ní chúu: 'iiⁿyāⁿ chí n'giindivaacū yā ngaⁿá yā ndúucū n'daataá o saⁿā yeⁿe taama yā. Saⁿā da'caiyāá caⁿá sa ndúucū 'áamá n'daataá chí duuchi née sa taⁿā. 'Iiⁿyāⁿ chí díiⁿ yā dendu'ū chí nguéeⁿ n'daacā, 'iiⁿyāⁿ s'eeⁿ ní nguéeⁿ nadacadíinūⁿ yā taacā chí díiⁿ yā. ²⁰'Iiⁿyāⁿ i'teenú yā ídolos ndúucū cosas chí nguéeⁿ Ndyuūs ndúucū nducueⁿē chí díiⁿ 'iiⁿyāⁿ chí yeⁿe chín-gaatu. 'Iiⁿyāⁿ nduuvitaáⁿ yā ní n'díite yā. Ní taáⁿ yā ní in'nuúⁿ yā vaadi 'caa'va. 'Iiⁿyāⁿ 'iiⁿnuⁿ cheendí yā ní 'iiⁿyāⁿ díiⁿ yā chí véé divisiones nguaaⁿ vi'ī yā. Ní díiⁿ yā chí véé vaadi 'caa'va. ²¹'Iiⁿyāⁿ neⁿé yā cosas tan'dúucā chí véé yeⁿé tanáⁿa yā. Ní 'iiⁿyāⁿ n'giⁿnúⁿ yā 'iiⁿyāⁿ. Ní 'iiⁿyāⁿ chí cúúví ndúucū 'iiⁿyāⁿ chí n'deeé n'dái nge'e ní idiⁿ yā dendu'ū chí nguéeⁿ n'daacā chí tan'dúucā chuū. 'Úú ní ngaⁿá ngii ndís'tiī chí divíi nī yeⁿe dendu'ū chuū tan'dúucā chí 'āā ngaⁿá nguuvi chí 'āā cho'oo. 'Iiⁿyāⁿ chí idiⁿ yā s'tuucā nguéeⁿ de'ē vee cuuvi yeⁿé yā naachi Ndyuūs ngaⁿa ntiiⁿnyúⁿ yā.

²²Naati nduuti chí 'cuēti chiicá yú tan'dúucā chí chíiⁿ Espíritu N'dai yeⁿé Ndyuūs s'uuúⁿ tuuⁿmi ní dineⁿe yú 'iiⁿyāⁿ. Ni yeenú taavi yú. Ní canee vaadi 'diiⁿ na staava yeⁿe yú. Ní cuhee yú yeⁿe tanducueⁿē chí n'geenu yú ngii. Ní din'daaca yú ndúucū vi'ī ní díiⁿ yú nducueⁿē chí n'dai ndúucū vi'ī. Ní 'áamá canee yú ndúucū chí i'teenú yú. ²³Ní canee yú ndiicúⁿ. Ní díiⁿ yú cuidado chí díiⁿ yú cosas chí n'daacā. Espíritu N'dai yeⁿé Ndyuūs nginneé s'uuúⁿ chí díiⁿ yú nducueⁿē chuū chí n'daacā. Ní ley yeⁿe Moisés miiⁿ nguéeⁿ ngaⁿa chí nguéeⁿ cuuvi

diiⁿ yú s'túucā. ²⁴ S'uuúⁿ chi 'āā i'teenu yú Señor Jesucristo yeⁿe yú nguéé diiⁿ yú tan'duucā chi neⁿe cuerpo yeⁿe yú. Ní canee yú tan'dúucā chi 'āā ca'neeⁿnga'ā yú nducueⁿē chi nguéé n'daacā chi neⁿe diiiⁿ cuerpo yeⁿe yú, 'tíicā canee yú. ²⁵ Nduuti chi candúuchí yú ndúucū Espíritu N'dai yeⁿé Ndyuūs tuu'mi ní canéé chi 'cueti chiicá yú tan'dúucā chi n'giⁿi Espíritu N'dai yeⁿé Ndyuūs s'uuúⁿ.

²⁶ Nguéé canéé chi din'geete yú chi véé vaadi 'caa'va guaaⁿ s'uuúⁿ. Ní nguéé nguee yú 'aama yú taama yú.

S'uuúⁿ cunnee yú 'aama yú ndúucū taama yú

6 Ndí'stíi hermanos yeⁿé chi diíⁿ ní tan'dúucā chi ch'iⁿi Espíritu N'dai yeⁿé Ndyuūs, nduuti chi 'áámá hermano yeⁿe yú 'āā diíⁿ yā nuuⁿndi ndí'stíi canéé chí cunnee ní hermano miiⁿ. Diiⁿ n'daacá ní ndúucū yā. Ní ch'iⁿi ní hermano miiⁿ cheē nuuⁿndi chi diíⁿ yā caati cuuvi nguεεcúndii yā yeⁿe nuuⁿndi yeⁿe yā. Ndí'stíi ntúūⁿ 'cuetinée ní cáácá ní ndúucū cuidado ti nguéé dinuuⁿndí ní. ² Cunnée yú 'aama yú taama yú ní ya'āi 'iinu yú hermanos caava dendu'ū vaadi ya'āi chi yeⁿé 'aama yú taama yú. 'Tíicā ní diiⁿ yú tan'dúucā chi Cristo caⁿa nti-iⁿnyúⁿ yā s'uuúⁿ.

³ Nduuti chí 'áámá saⁿā nadacadíinuuⁿ sa chí neené ch'εete sa ní nguεε 'tíicā, saⁿā miiⁿ nginnche'éi máaⁿ sa saⁿā. ⁴ Ca'áámá ca'aama s'uuúⁿ ní canee chí tumicádíinuuⁿ yú nducuéⁿē chi diiⁿ yú. Tuu'mi ní cuuvi yeenu yú ti n'daacā cosas chi diiⁿ yú. Ní nguéé nadacadíinuuⁿ yú yeⁿé ntiⁿnyuⁿ yeⁿé taama 'iiⁿyāⁿ táácā chi diiⁿ yā. ⁵ Caati ca'áámá ca'aama s'uuúⁿ canee chi cuchee yú yeⁿe nducuéⁿē chi chó'oo yeⁿé maaⁿ yú ní diiⁿ yú cuenta yeⁿé maaⁿ yú yeⁿe chi diiⁿ yú nguéé yeⁿé taamá yā.

⁶ 'Iiⁿyāⁿ chi n'geēⁿ nduudu yeⁿé Ndyuūs canéé chí cunnee yā tanáⁿā 'iiⁿyāⁿ chi ngi'cueeⁿ nduudu miiⁿ.

⁷ Ndí'stíi nguéé canee chi canche'éi ní maaⁿ ní. Ndyuūs n'diichí yā ndí'stíi ní nguéé cuuvi canche'éi ní Ndyuūs. Nducuéⁿē cosa chi idiiⁿ saⁿā tan'dúucā chi cúunū sa, ní chiiⁿ ntúūⁿ cútá'ā sa cosecha yeⁿé sa. ⁸ Nduuti chi diiⁿ yú tan'dúucā chi neⁿe cuerpo yeⁿé yú chi dinuuⁿndi yú tuu'mi ní dindai yú ní canee yú tan'dúucā 'áámá cosecha chi ngiinū chi ngo'oo yeⁿé. Naati nduuti chi diiⁿ yú cosas chi ch'iⁿi Espíritu N'dai yeⁿé Ndyuūs s'uuúⁿ tuu'mi ní Espíritu N'dai yeⁿé Ndyuūs téé yā s'uuúⁿ vida cueⁿe daāⁿmaⁿ. Ní dendu'ū tan'dúucā cosecha yeⁿé chi diiⁿ yú téé yā s'uuúⁿ. ⁹ Cáāvā chuū nguéé canee chi cuuvi 'daāⁿdi yú chi diiⁿ yú nducueⁿē chi n'daacā. ti ndaá nguuvi yeⁿé chi cuuvi cuta'a yú cosecha yeⁿé chi n'daacā idiiⁿ yú nduuti chi nguéé cuūnu yú. ¹⁰ Tan'dúucā chi véé yaaⁿ yú din'daacā yú ndúucū nducyaaca 'iiⁿyāⁿ. 'Tiicá ntúūⁿ din'daacā ca yú ndúucū hermanos yeⁿe yú chi i'téenu yā Jesucristo.

Consejo yeⁿe Pablo ndúucū saludos yeⁿé 'iiⁿyāⁿ

¹¹ N'diichí ní 'téé cheete 'áámá caaca dinguúⁿ yeⁿé ní ndúucū ta'á. ¹² 'Iiⁿyāⁿ s'eeⁿ chí ngaⁿa yā ndí'stíi chí canéé chí cuuvi ní circuncidado, 'iiⁿyāⁿ s'eeⁿ diíⁿ yā 'túucā, ti neⁿé yā caⁿá yā favor yeⁿe 'iiⁿyāⁿ judíos chí Israel chí yeⁿe circuncisión chí canéé ndúucū ley yeⁿe yā. Ní nguéé neⁿé yā chí 'cueenu yā cuuvi cáāvā Jesucristo chí ch'ii yā na cruz. ¹³ Saⁿa Israel s'eeⁿ chí 'āā circuncidado yā ní mar 'áámá yā nguéé cuuvi diíⁿ yā tanducueⁿē chí canéé nguūⁿ na ley yeⁿé yā. Neⁿé yā chí ndí'stíi saⁿā cuuvi ní circuncidado. Ní 'iiⁿyāⁿ s'eeⁿ cuuvi yeenu yā ní ngaⁿá yā chí dich'εete yā maaⁿ yā 'iiⁿyāⁿ tí ndí'stíi

ntúūⁿ diíⁿ nī tan'duucā chi diíⁿ yā, ní can-
 deε nī marca yeⁿe circuncisión na cuerpo
 yeⁿe nī. ¹⁴Úú nguéé neⁿé caaⁿ máⁿ chi
 ch'εεte yeⁿē mar 'áámá dendu'ū yeⁿē
 iⁿ'yeeⁿdí 'cūū. Neⁿé caaⁿ máⁿ chi Jesu-
 cristo ch'iī yā na cruz caava nuuⁿndi
 yeⁿē nducyáácá 'iīⁿyāⁿ. Taachi Cristo
 ch'iī yā na cruz, 'tíicā tan'duucā chi
 cuerpo yeⁿé ch'iī ntúūⁿ. 'Tiicá ntúūⁿ ní
 caavā 'úú nducuéⁿē chi yeⁿe iⁿ'yeeⁿdí
 canee tan'duucā chi n'díí. ¹⁵Maaⁿ ní
 s'uuúⁿ saⁿā chi i'teenū yú Señor Jesu-
 cristo yeⁿe yú nguéé dichíí'vē nduuti chi
 véé marca yeⁿe circuncisión na cuerpo
 yeⁿe yú o nguéé. Chuū ni dichíí'vē chi
 'iīⁿyāⁿ ngai s'uuúⁿ ní véé vida ngai yeⁿe
 yú tan'dúúicā chi nuuⁿmaⁿ ch'iīndiyāāⁿ
 ntúūⁿ yú táámá. ¹⁶Nducyaaca yú chi

'cuεeti chiicá yú tan'dúúicā chi ch'iⁿí
 ndís'tiī tuu'mi ni Ndyuūs tée yā vaadi 'di-
 iíⁿ na staava yeⁿe yú. Ní Ndyuūs ya'ai
 'iīnū yā caavā ndís'tiī. Ní nducyaaca
 s'uuúⁿ chi i'teenū yú Jesucristo, s'uuúⁿ
 ní yeⁿé ndaata yeⁿe Ndyuūs chi cuaacu
 níⁿnyúⁿ ndaata yeⁿe 'iīⁿyāⁿ Israel chi
 judíos.

¹⁷Ndíí maaⁿ ndíí cuaaⁿ chi cuchii
 nguéé neⁿé chi mar 'áámá 'iīⁿyāⁿ dííⁿ
 mndú'u yā 'úú, caati 'úú ndeé yaātū na
 cuerpo yeⁿé naachi 'iīⁿyāⁿ ch'eⁿé yā 'úú,
 ti 'úú idííⁿ ntiiⁿnyuⁿ yeⁿē Señor Jesu-
 cristo yeⁿē yú.

¹⁸Ndís'tiī hermanos yeⁿé, Señor Jesu-
 cristo yeⁿe yú canée yā nduucú nī ní
 cueⁿe daāⁿmaⁿ itée yā ndís'tiī nducuéⁿē
 chi n'daacā n'dai yeⁿé yā. 'Tíicā cuuvi.

CARTA YEⁿE IIⁿYĀⁿ YEⁿE YĀĀⁿ EFESO

**Pablo idinguúⁿ yā carta 'cūū yeⁿe
'iiⁿyāⁿ chi naⁿá yā yaācū na yāāⁿ Efeso**

1 'Úú Pablo 'úú, ní 'úú apóstol yeⁿe Señor Jesucristo caavā chi 'tíicā neⁿe Ndyuūs chi dichó'o yā 'úú. 'Úú idinguúⁿ carta 'cūū yeⁿe nducyaaca 'iiⁿyāⁿ chi snée yā na yāāⁿ Efeso, 'iiⁿyāⁿ chi yeⁿe Ndyuūs ní i'téenu yā Señor Jesucristo. ²Ndyuūs Chiida yú ndúúcu Señor Jesucristo yeⁿe yú nginneé yā ndís'tii ní téé yā cosas chi n'daacā n'dai, ní téé yā ndís'tii vaadi 'diiⁿ yeⁿe yā.

**Yeⁿe dendu'ū chi n'daacā n'dai chi
Cristo ca'á yā 'iiⁿyāⁿ yeⁿe yā**

³Nducyaaca yú canee chi dich'etété yú Ndyuūs chi Chiidá Señor Jesucristo. Maaⁿ ní caavā chi s'uuúⁿ ní yeⁿe Cristo s'uuúⁿ, Ndyuūs téé yā s'uuúⁿ dendú'ū yeⁿe yā chi n'dai taavi ca yeⁿe nducuéⁿe chi n'dai tan'dúúicā chi s'uuúⁿ snee yú na va'ai cheeti nguuví. ⁴Ní 'tíicā Ndyuūs nadideevé yā s'uuúⁿ chi cuuvi yeⁿe yā s'uuúⁿ ní cuuvi yeⁿe Cristo s'uuúⁿ ndíí taachi 'āā 'cuéé din'dái yā iⁿyeēⁿdi. Ní nduuví n'dai yú ní i'teenu n'daāca yú Cristo ní nguéé véé nuuⁿndi yeⁿe yú nanáāⁿ yā. ⁵Ní Ndyuūs 'āā deenú yā chiiⁿ chi neⁿe yā dííⁿ yā cáávā chi neⁿe yā s'uuúⁿ. Cáávā chi neⁿe yā chi cuuvi yeⁿe yā s'uuúⁿ, sta'á yā s'uuúⁿ chi cuuvi daiyá yā s'uuúⁿ cucáávā Cristo Jesús. ⁶Cucáávā chuū cueⁿe daāⁿmaⁿ dich'etété taavi yú Ndyuūs chi itée yā s'uuúⁿ dendu'ū chi ch'etete n'dai yeⁿe yā caati maaⁿ ní s'uuúⁿ ní yeⁿe Cristo s'uuúⁿ. Ndyuūs dííⁿ yā recibir s'uuúⁿ caati neⁿe taavi cá yā Cristo. ⁷Ní cáávā Ndyuūs neⁿe taavi cá yā nducyaaca yú dichó'o yā Daiya yā chi ch'ií yā cáávā s'uuúⁿ. Ní Ndyuūs nadich'etécú yā nuuⁿndi yeⁿe

yú cáávā yuūⁿ yeⁿe Cristo. Ní cáávā chi Ndyuūs 'tíicā neⁿe yā s'uuúⁿ itée yā dendu'u chi n'daacā yeⁿe yā. ⁸Níicú Ndyuūs ch'i'í yā s'uuúⁿ chi neⁿe taavi cá yā s'uuúⁿ. Ní dííⁿ yā chi deenu yú taanduvéé vaadi n'dai yeⁿe yā ní tumicadífínuuⁿ yú nducuéⁿe. ⁹Ní Ndyuūs 'āā dííⁿ yā chiiⁿ chi neⁿe yā dííⁿ yā. Ní dííⁿ yā chí n'diichi yú chiiⁿ chi canúúⁿ n'de'ei yeⁿe yā ndii cuááⁿ vmnaaⁿ cucáávā Cristo. ¹⁰Ní chuū chi canuuⁿ n'de'ei yeⁿe Ndyuūs chi Ndyuūs caⁿa yā chi diiⁿ yā chi cuuvi taachi ndaa tiempo yeⁿe, Ndyuūs caⁿa yā chi dííⁿ yā chi Cristo ngaⁿa n'tiiⁿnyúⁿ yā yeⁿe nducuéⁿe chi snée nanguuvi ndúúcu chi snée ná yáⁿāa. Ní Ndyuūs caⁿá yā chi nduvidaamá tanducuéⁿe dendu'ū nanááⁿ Cristo.

¹¹Ndyuūs dííⁿ yā chi nducuéⁿe chi ch'ó'oo ní ch'ó'oo tan'dúúicā chi neⁿe yā. Ní Ndyuūs ndeēv yā s'uuúⁿ ndii cuááⁿ vmnaaⁿ níicú chi cuuvi yeⁿe yú cosas chi caⁿa yā chi téé yā s'uuúⁿ, caati s'uuúⁿ ní yeⁿe Cristo s'uuúⁿ. ¹²Ní Ndyuūs 'tíicā dííⁿ yā ti neⁿe yā chi nús'uu ní ch'iⁿí 'nū vaadi deēve ca yeⁿe Ndyuūs nanááⁿ 'iiⁿyāⁿ ti nús'uu ní yeⁿe 'iiⁿyāⁿ Israel nús'uu chi vmnááⁿ vmnaaⁿ i'téenu 'nū Cristo. ¹³Chuū dendú'ū ní yeⁿe ndís'tii chi nguéé yeⁿe 'iiⁿyāⁿ Israel s'eeⁿ ti taachi ch'iindiveéⁿ ní nduudu cuaacu yeⁿe evangelio chi ndúúdu ngai yeⁿe Cristo chi nadanguaⁿai ndís'tii ní s'téenu ní yeⁿe. Tuuⁿmi ní canéé 'áámá sello yeⁿe Ndyuūs ndúúcu ní. Ní sello miiⁿ ní Espíritu N'dai yeⁿe Ndyuūs chí 'áámá compromiso chi Ndyuūs caⁿa yā chi téé yā s'uuúⁿ ndíí cuááⁿ vmnaaⁿ. ¹⁴Ní Espíritu N'dai yeⁿe Ndyuūs ní 'áámá seña chi cuta'a yú chi cuuvi yeⁿe yú chiiⁿ chi Ndyuūs caⁿa yā chi téé yā chi cuuvi yeⁿe yú. Ní Ndyuūs yaaⁿvi yā s'uuúⁿ chi cuuvi yeⁿe yā s'uuúⁿ. Taachi ndaa nguuvi chi neⁿe Ndyuūs, Ndyuūs caⁿá yā dííⁿ yā chi s'uuúⁿ tan'dúúicā maáⁿ yā 'tíicā s'uuúⁿ. Ní

Espíritu N'dai yeⁿé Ndyuūs ní 'áamá seña yeⁿé chuū. Ní 'íicú nducyaaca yú ndúúcú 'iiⁿyāⁿ chi cuuvi cu'téenu yā Cristo cuuvi nadich'εete yú Ndyuūs cucáávā chi ch'εeté n'dai yā.

Pablo ngiicá yā Ndyuūs chi ca'á yā vaadi deenu 'iiⁿyāⁿ chi cu'téenu yā Cristo

¹⁵ Cucaavā chuū, taachi 'úú Pablo ch'iindiveⁿ chi ndís'tii i'téenu nī Señor Jesucristo ní dinéⁿe nī nducyaaca 'iiⁿyāⁿ chi i'téenu yā Señor Jesucristo 'iivú Ndyuūs, ¹⁶ tuu'mi ní nguéé ngí 'daandí chi ca'á gracias Ndyuūs cucáávā ndís'tii. Ni taachi in'gaacú yeⁿe ndís'tii, tuu'mi ní ngaⁿangua'á cucáávā ndís'tii. ¹⁷ Ní ngiicá Ndyuūs yeⁿe Señor Jesucristo yeⁿé yú chi Ndyuūs miiⁿ chi Chiida yú chi deeve taavi ca, ní ngiicá Ndyuūs chi téé yā ndís'tii vaadi deenu yeⁿe Espiritu N'dai yeⁿé Ndyuūs, ní 'íicú cuuvi déenu cá nī ní 'iintiinaáⁿ nī chíⁿ chí neⁿe Ndyuūs. ¹⁸ Ní ngiicá Ndyuūs chi díⁿ yā chi cuuvi déenu nī ní cadíⁿnuuⁿ nī chee chi cūnee ngiinu yú chi Ndyuūs téé yā s'uúúⁿ, ti ndeève yā s'uúúⁿ. Ní deenú nī de'ē chúúⁿcā n'dai ca ní deeve ca chi cuuvi yeⁿé nī chi Ndyuūs ca'á yā 'iiⁿyāⁿ chi yeⁿe yā. ¹⁹ Ní ngiicá Ndyuūs chi cuuvi deenú nī chi poder chi ch'εete taavi ca chi yeⁿe Ndyuūs. Ní nguéé mar 'áamá dendu'ū chi Ndyuūs nguεε cuuvi díⁿ yā. Ní Ndyuūs díⁿ yā ntiiⁿnyuⁿ caavā s'uúúⁿ chi i'teenu yú 'iiⁿyāⁿ. Maaⁿ ní díⁿ yā ntiiⁿnyuⁿ ndúúcú poder yeⁿé yā cáávā s'uúúⁿ, ní chíⁿ'í yā poder yeⁿé yā chí ch'εete ní ndúúcú fuerzas yeⁿé yā. ²⁰ 'Tíicā Ndyuūs chíⁿ'i yā maaⁿ poder yeⁿé yā taachi nadicuéeⁿ yā Cristo yeⁿe nguaaⁿ tináⁿ'ā. Ní s'néeⁿ yā Cristo na va'ai cheeti nguuvi ní Cristo ch'iindí yā lado tá cuaacu yeⁿé Ndyuūs chiidá yā chi lado yeⁿé honor. ²¹ Ní ca'á yā Cristo nducuéⁿē poder tan'dúúⁿcā 'áamá 'iiⁿntyéⁿē chi caaⁿmaⁿ ntiiⁿnyúⁿ yā yeⁿe tanáⁿ'ā

'iiⁿntyéⁿē ndúúcú yeⁿé nducyáácá 'iiⁿyāⁿ chí ngaⁿ'a ntiiⁿnyúⁿ yā ndúúcú yeⁿé nducuéⁿē poder chí véé yeⁿe nducyaaca patrón chí ngaⁿ'a ntiiⁿnyúⁿ yā. Ní Cristo ní más ca ch'εete ca yeⁿe nducuéⁿē chí véé chí cuuvi caaⁿmaⁿ yú yeⁿé, nguéé dá-maaⁿ yeⁿé chí véé mááⁿ, 'tiicā ntúúⁿ yeⁿe nducuéⁿē chí cuchii. ²² Ní Ndyuūs s'néeⁿ yā tanducuéⁿē dendu'ū maaⁿ poder yeⁿe Cristo. Ní Ndyuūs s'néeⁿ yā Cristo lugar más cā ch'εete. Ní Cristo miiⁿ tan'duucā chí tíⁿ yā yeⁿe nducyaaca 'iiⁿyāⁿ chí i'téenu yā ní cáⁿ'a yā yaacú yeⁿe Cristo, 'tíicā Cristo miiⁿ. ²³ 'Iiⁿyāⁿ chí i'téenu yā Cristo ní nducyaaca 'iiⁿyāⁿ s'eeⁿ ní tan'duucā cuerpo yeⁿé Cristo, 'tíicā yā. Ní cuaacu nducyaaca 'iiⁿyāⁿ s'eeⁿ ní yeⁿe Cristo. Ní Cristo miiⁿ ní n'daacā taaví yā ní canée yā yeⁿe tanducuéⁿē dendu'ū ndúúcú tanducuéⁿē cuaaⁿ.

Ndyuūs nadanguáⁿ'ai yā s'uúúⁿ ti neⁿé yā nducyaaca 'iiⁿyāⁿ

2 Nguuvi chí ch'ó'oo ndís'tii dinuuⁿndí nī ní sneé nī tan'dúúⁿcā 'iiⁿyāⁿ chí n'díⁿ caavā nducuéⁿē dendu'ū chí díⁿ nī chí nguεε n'daacā. Naati maaⁿ ní Ndyuūs tee yā ndís'tii vida cueⁿe daāⁿmaⁿ dáámá ndúúcú Cristo caati nadacuéeⁿ yā Cristo yeⁿe nguaaⁿ tináⁿ'ā. ² Ní nguuvi chí ch'ó'oo ndís'tii díⁿ nī nuuⁿndí ní dinuuⁿndí nī ndúúcú tanáⁿ'ā 'iiⁿyāⁿ yeⁿe iⁿ'yeeⁿdí 'cūū. Ní díⁿ nī tan'dúúⁿcā chí neⁿe espíritu chí nguéé n'dai. Espiritu miiⁿ ní yááⁿ'nguiniūⁿ ní espíritu chí canée na 'yúúné nī ngaⁿ'ā ntíⁿnyúⁿ yeⁿe iⁿ'yeeⁿdí ní ngaⁿ'ā ntíⁿnyúⁿ yeⁿe nducyaaca 'iiⁿyāⁿ chí nguéé n'giindiveⁿ yā nduudu yeⁿé Ndyuūs. ³ Ní nducyaaca s'uúúⁿ 'tíicā diiⁿ yú nguuvi chí ch'ó'oo ní diiⁿ yú tan'dúúⁿcā chí neⁿe yú ní diiⁿ yú tan'dúúⁿcā chí neⁿe cuerpo yeⁿe yú ní tan'dúúⁿcā chí nadicadiinuⁿ yú. Ní cáávā chuū nducyaaca yú canée chí cuta'a yú ndúúcú tanáⁿ'ā 'iiⁿyāⁿ castigo chí diitu n'dái chí ca'a Ndyuūs 'iiⁿyāⁿ chí dinu-

uⁿndí yā. ⁴ Naati Ndyuūs ní neéné ya'āi 'iinu cá yā nducyaaca 'iiⁿyāⁿ ní neⁿe taavi cá yā s'uuúⁿ. ⁵ Ní 'áará chí n'dii yú cucáávā chi dinuūⁿndi yú Ndyuūs itée yā vida cueⁿe daāⁿmaⁿ yeⁿe yú dáámá dáámá ndúúⁿcū Jesucristo caati nadacuéeⁿ yā Cristo yeⁿe nguaaⁿ tináⁿā. Maaⁿ ní ninnguaⁿai yú caavā chi Ndyuūs ní n'dai taavi cá yā ní neⁿe cá yā s'uuúⁿ. ⁶ Ndyuūs diíⁿ yā chi nanduuchí yā s'uuúⁿ dáámá dáámá ndúúⁿcū Cristo tí s'uuúⁿ ní yeⁿe Cristo s'uuúⁿ. Ní 'tiicā ntúūⁿ diíⁿ yā chi s'uuúⁿ tan'dúúⁿcā chí snee yú ná va'ai chēeti nguuví ndúúⁿcū Jesucristo 'tíficā s'uuúⁿ. ⁷ Ní Ndyuūs diíⁿ yā 'tuucā chi cuuvi 'cuuⁿmiⁿ cá yā s'uuúⁿ nguuví chi cuchii tan'dúúⁿcā chi dineⁿe taavi cá yā s'uuúⁿ ndúúⁿcū n'dee n'dáí dendu'ū chi n'dai taavi chí itée yā s'uuúⁿ, ti yeⁿe Cristo Jesús s'uuúⁿ. ⁸ Ní cucáávā chí Ndyuūs ní neⁿe taavi cá yā s'uuúⁿ, ndís'tii ní ninnguaⁿai ní tí itéenu ní Cristo. Nds'tii nguée diíⁿ ní mar 'áámá chí nanguaⁿai ní naati Ndyuūs chí datée yā vida cueⁿe daāⁿmaⁿ yeⁿe ní. ⁹ Ní nguée nanguaⁿai ní cucáávā ntiiⁿnyuⁿ chí diíⁿ ní caati nguée cuuvi caaⁿmáⁿ ní chí ch'ēete n'dáí ní maáⁿ ní cucáávā chí diíⁿ ní. ¹⁰ Taachi Ndyuūs nadinguáⁿai yā s'uuúⁿ diíⁿ yā chí s'uuúⁿ ní yeⁿe Jesucristo s'uuúⁿ ní cuuvi diiⁿ yú ntiiⁿnyuⁿ chí n'daacā. Ndyuūs 'āā ch'iindiyaáⁿ yā ntiiⁿnyuⁿ chí canée chí diiⁿ yú ndii cuááⁿ vmnaaⁿ.

Vée vaadi 'diiⁿ yeⁿe yú cucáávā Cristo

¹¹ Maaⁿ ní n'gaacú ní tan'dúúⁿcā chí snee ní nguuví chí 'āā chó'oo. Nds'tii ní nguée 'iiⁿyāⁿ yeⁿe ndaata Israel naati 'iiⁿyāⁿ gentiles ndís'tii. Ní 'iiⁿyāⁿ yeⁿe ndaata Israel diíⁿ yā circuncidar ca'áámá ca'áámá saⁿā ní 'caacá yā 'áámá seña na cuerpo yeⁿe saⁿā s'eeⁿ. Ní canée na cuerpo yeⁿe saⁿā s'eeⁿ seña 'cūū chí saⁿā s'eeⁿ ní yeⁿe ndaata yeⁿe Ndyuūs. Cáávā chuū 'iiⁿyāⁿ yeⁿe ndaata Israel nguuví yā

maáⁿ yā 'iiⁿyāⁿ circuncidado yā, ní caⁿa yā yeⁿe ndís'tii chí nguuví ní 'iiⁿyāⁿ chí nguée ndí ní circuncidado, ní caⁿa yā yeⁿe ní chí nguée 'iiⁿyāⁿ yeⁿe Ndyuūs ndís'tii. ¹² Ní tiempo miiⁿ ní ndís'tii nguée déenu ní yeⁿe Cristo, ní canee ní tan'dúúⁿcā 'iiⁿyāⁿ chí canúúⁿ yúúni. Ní nguée ndís'tii yeⁿe 'iiⁿyāⁿ Israel ndís'tii. Ndyuūs nndeeye yā 'iiⁿyāⁿ chí cuuvi yeⁿe yā 'iiⁿyāⁿ. Nguée vée 'áámá parte yeⁿe ní ndúúⁿcū 'iiⁿyāⁿ chí nndeévé yā ní ca'á yā compromisos ndúúⁿcū promesas nduucú yā. Nds'tii ch'ēetinée ní na iⁿ'yeeⁿdí 'cūū nguée ndúúⁿcū dē'ē vēē chí canee ngiinú ní chí cuuvi yeⁿe ní. Ní nguée ch'ēetinée ní ndúúⁿcū Ndyuūs ndís'tii. ¹³ Nds'tii chí yaⁿai canee ní yeⁿe Ndyuūs cuááⁿ vmnaaⁿ naati maaⁿ ní 'āā nduuvidaamá ní nduucú yā caavā chí ch'ii Cristo cucáávā nuuⁿndi yeⁿe yú. Ní maaⁿ ní ndís'tii ní yeⁿe Cristo ndís'tii. ¹⁴ Ní cáávā Cristo miiⁿ vée vaadi 'diiⁿ yeⁿe yú. Ní Cristo diíⁿ yā chí 'iiⁿyāⁿ yeⁿe ndaata Israel ndúúⁿcū 'iiⁿyāⁿ chí nguée yeⁿe ndaata Israel nduuvidaamá yā tan'dúúⁿcā 'áámá raza nūuⁿ. Ní Cristo miiⁿ diví yā vaadi 'caa'va chí canee nguaaⁿ 'iiⁿyāⁿ Israel s'eeⁿ ndúúⁿcū tanáⁿā 'iiⁿyāⁿ s'eeⁿ chí nguée 'iiⁿyāⁿ Israel yā. Vaadi 'caa'va ch'ēete míⁿ chí cu'neeⁿ yā ní tan'dúúⁿcā 'áámá chēeti náávtaⁿa 'iiⁿyāⁿ s'eeⁿ, 'tíficā. ¹⁵ Ní cucáávā chí Cristo maáⁿ yā chí yā tuuⁿmi ní diví yā ley yeⁿe 'iiⁿyāⁿ Israel ndúúⁿcū mandamientos yeⁿe ndúúⁿcū reglas yeⁿe. Cristo míⁿ diíⁿ yā chí naachi nduu 'uuvi clase yeⁿe 'iiⁿyāⁿ nadáámá yā ní vée 'áámá clase nūuⁿ 'iiⁿyāⁿ, ní 'iiⁿyāⁿ s'eeⁿ ní yeⁿe Cristo. 'Tíficā diiiⁿ Cristo chí vée vaadi 'diiⁿ. ¹⁶ 'Tíficā diiiⁿ Cristo taachi chí yā na cruz. Ní diíⁿ yā chí 'āā ntee vée vaadi 'caa'va nguaaⁿ 'iiⁿyāⁿ s'eeⁿ. Ní diíⁿ yā chí vée vaadi 'diiⁿ nguaaⁿ 'iiⁿyāⁿ s'eeⁿ ndúúⁿcū Ndyuūs. 'Tíficā Cristo diíⁿ yā chí vée 'áámá clase nūuⁿ 'iiⁿyāⁿ.

¹⁷ Cristo ndaá yā na iⁿ'yeeⁿdí 'cūū ní maaⁿ ní cuuvi deenú ní yeⁿe vaadi 'diiⁿ,

ndís'tiī chi nguéé 'iiⁿ'yāⁿ yeⁿe ndaata Israel chi yāⁿ'ai ch'ëetinée nī yeⁿe Cristo. 'Tiicá ntúūⁿ cuuvi deenú 'iiⁿ'yāⁿ yeⁿe ndaata Israel chi ch'ëetinée nīⁿ'nuⁿ yā. ¹⁸Ní cucáávā Cristo miiⁿ nducyaaca yú nduuti chi 'iiⁿ'yāⁿ Israel s'uuúⁿ o nguéé 'iiⁿ'yāⁿ Israel s'uuúⁿ, nducyaaca yú, cucáávā Cristo miiⁿ cuuvi cundáa yú nanááⁿ Ndyuūs Chiida yú ndúúúⁿ 'áámá Espíritu N'dai yeⁿe Ndyuūs. ¹⁹Ní ndís'tiī chi nguéé yeⁿe ndaata Israel chi ndaata yeⁿe Ndyuūs, maaⁿ ní 'āā ntéé 'iiⁿ'yāⁿ chi snúúⁿ yā yúúúⁿ ndís'tiī ní snée nī na yāⁿ'āa chi nguéé yeⁿe nī. Maaⁿ ní dáámá snée nī ndúúúⁿ 'iiⁿ'yāⁿ chi yeⁿe Ndyuūs. Ní ndís'tiī ní yeⁿe ndaata yeⁿe nducyaaca 'iiⁿ'yāⁿ chi yeⁿe Dendyuūs. ²⁰Ní ndís'tiī ní tan'dúúúⁿ 'áámá va'ai ch'ëete taavi ca chi 'iiⁿ'yāⁿ din'dái yā 'tíicā ndís'tiī. Ní yeⁿe va'ai ch'ëete miiⁿ Cristo miiⁿ ní tan'dúúúⁿ tuū ch'ëete yeⁿe esquina, 'tíica yā. Ní apóstoles chi candéé yā nduudu yeⁿe Ndyuūs ndúúúⁿ profetas chi ngaⁿ'a yā nduudu yeⁿe Ndyuūs 'iiⁿ'yāⁿ s'eeⁿ ní tan'dúúúⁿ tuū yeⁿe cimientu yeⁿe va'āi miiⁿ, 'tiicá yā. Ní ndís'tiī ní tan'dúúúⁿ tuū vmnaaⁿ tuū ch'ëeté yeⁿe esquina, 'tiicá nī. ²¹Ní vmnaaⁿ tuū ch'ëete yeⁿe esquina chi Cristo miiⁿ nducuéⁿe tuū ní yeⁿe va'āi ch'ëete chi din'dái Cristo. Ní Cristo dííⁿ yā chi n'daacā canee nducuéⁿe na lugar yeⁿe cucáávā chi dichí'vē Ndyuūs. Ní Cristo dííⁿ yā chi va'āi ch'ëete taavi ca ní 'áámá templo yeⁿe 'iivú Ndyuūs. ²²'Tiicá ntúūⁿ, ndís'tiī chi yeⁿe Cristo nduuvidaamá nī ndúúúⁿ tanáⁿ'ā 'iiⁿ'yāⁿ chi yeⁿe Cristo ní tan'dúúúⁿ 'áámá va'ai naachi Ndyuūs canee yā cucáávā Espíritu N'dai yeⁿe yā, 'tíicā nducyaaca 'iiⁿ'yāⁿ chi yeⁿe Cristo.

Ndyuūs dichó'o yā Pablo chi ngaⁿ'a yā evangelio chí nduudu ngai yeⁿe Jesucristo nanááⁿ 'iiⁿ'yāⁿ chi nguéé yeⁿe ndaata Israel

3 Cáávā chuū 'úú Pablo caneeé preso ná vácūū ti dichí'vē 'úú Jesucristo ní ngaⁿ'á nduudu cuaacu yeⁿe yā cucáávā ndís'tiī chi nguéé yeⁿe 'iiⁿ'yāⁿ yeⁿe ndaata Israel. Ní ngaⁿ'angua'á cáávā ndís'tiī. ²Cuaacu níⁿ'nyúⁿ 'āā deenú nī chi Ndyuūs chi n'dai taavi cá yā dichó'o yā 'úú chi ngaⁿ'á ngii ndís'tiī chi Ndyuūs neⁿe taavi cá yā ndís'tiī. ³Ndyuūs ch'iⁿ'í yā 'úú dendu'ū yeⁿe yā chi canúúⁿ n'de'ei ní dííⁿ yā chi deenú chi canúúⁿ n'de'ei tan'dúúúⁿ chi 'āā dinguúⁿ yeⁿe nī ndúúúⁿ duū'vī nduudu. ⁴Ní taachi ndís'tiī ch'éeⁿ nī caacá 'cūū chídinguúⁿ tuu'mi ní cuuvi deenú nī chi 'úú deenú chiiⁿ chi canúúⁿ n'de'ei yeⁿe Ndyuūs, chiiⁿ chi yeⁿe Jesucristo. ⁵Ní tiempo chi 'āā chó'oo Ndyuūs nguéé ch'iⁿ'í yā mar 'áámá 'iiⁿ'yāⁿ nduudu yeⁿe yā chi canúúⁿ n'de'ei naati tiempo miiⁿ Ndyuūs ch'iⁿ'í yā chuū apóstoles chi didéevé yā yeⁿe nuuⁿ'ndi yeⁿe yā ndúúúⁿ profetas chi ngaⁿ'a nduudu yeⁿe yā cucáávā Espíritu N'dai yeⁿe yā. ⁶Ní chuū chi canúúⁿ n'de'ei cáávā nduudu cuaacu chí nduudu ngai yeⁿe Jesucristo. 'Iiⁿ'yāⁿ chi nguéé yeⁿe ndaata Israel chi yeⁿe Jesucristo, 'iiⁿ'yāⁿ s'eeⁿ ní cuuvi yeⁿe yā dáámá dáámá ndúúúⁿ chi cuuvi 'iiⁿ'yāⁿ yeⁿe Israel. Ní dáámá caneeé yā ndúúúⁿ 'iiⁿ'yāⁿ Israel. Ní snée yā tan'dúúúⁿ 'áámá cuerpo yeⁿe Cristo. Ní véé 'áámá parte yeⁿe yā yeⁿe compromiso chi Ndyuūs dííⁿ yā. ⁷Ní 'úú nguéé n'daaca ca 'úú naatí Ndyuūs tee yā privilegio 'úú chi caaⁿ'máⁿ nduudu yeⁿe yā cucáávā poder yeⁿe yā. ⁸Ní 'úú chí lííⁿ chuundí nguaaⁿ nducyáácá 'iiⁿ'yāⁿ chi yeⁿe Ndyuūs naati Ndyuūs tee yā 'úú privilegio 'cūū chi 'úú ngaⁿ'á nduudu cuaacu yeⁿe yā nanááⁿ 'iiⁿ'yāⁿ chi nguéé yeⁿe ndaata judíos chi Israel. Ní

ngaⁿá nduudu cuaacu yeⁿē n'dee n'dái vaadi 'cuiica taavi ca yeⁿe Cristo. Ní nguéé cuuvi diiⁿ yú cuenta yeⁿe vaadi 'cuiica miiⁿ. ⁹Ní ngaⁿá nduudu cuaacu yeⁿé yā. Ní 'fícú nducyaaca 'iiⁿyāⁿ cuuvi deenu yā tan'dúúca Ndyuūs caⁿá yā díⁿ yā yeⁿe chi canúⁿ n'de'ei yeⁿé yā. Ní Ndyuūs chi din'dái yā nducuéⁿē chi véé ní chi'neeⁿ n'de'ei yā chuū nducuéⁿē tiempo chi 'āā ch'ó'oo. ¹⁰Ní 'fícá díⁿ Ndyuūs caati maaⁿ ní nducyáácá chi canée na va'ai ch'eti nguuvi chí ngaⁿā ntiiⁿnyuⁿ o chi 'iiⁿntyéⁿē cuuvi n'diichi nducuéⁿē vaadi deenu yeⁿé Ndyuūs cucáávā vaadi n'giinu yeⁿé Ndyuūs chi díⁿ yā ndúúcu 'iiⁿyāⁿ ná iⁿ'yeeⁿdí 'cūū, 'iiⁿyāⁿ chi i'téenu yā Cristo ní caⁿá yā yaacū yeⁿé yā. ¹¹Ní 'túúca diiⁿ Ndyuūs ti tan'dúúca chi neⁿé yā díⁿ yā ndii vmnááⁿ vmnaaⁿ. Ní díⁿ yā chi cuaacu yeⁿē cucáávā Jesucristo chi 'iivi yú. ¹²Ní caavā chi s'uúúⁿ ní yeⁿe Cristo s'uúúⁿ ní cáávā chi i'teenu yú Jesucristo, cuuvi ndaā yú nanááⁿ Ndyuūs ndúúcu confianza. ¹³Cáávā chuū 'úú dí'cuítúu ndís'tii chi nguéé cuuvi ngááⁿ nī cucaavā chi 'úú n'geenú ngii ti chuū chi n'geenú ngii ní cosa chi n'daacā chi cuuví ndís'tii ní canee chi yeenú nī.

Cristo neⁿé yā nducyaaca 'iiⁿyāⁿ

¹⁴Ní cucaavā chuū 'úú ca'á gracias Ndyuūs ní 'úú ní ngiintii'yá nanááⁿ Ndyuūs Chiidá Señor Jesucristo yeⁿē yú. ¹⁵Ndyuūs ní Chiida nducyaaca yú ní cuaacu Chiida nducyaaca 'iiⁿyāⁿ yeⁿé yā chi snéé nanguuvi, 'tiicá ntúūⁿ nducyaaca 'iiⁿyāⁿ yeⁿé yā chi snéé iⁿ'yeeⁿdí 'cūū. ¹⁶Caⁿ'angua'á ní ngiicá Ndyuūs Chiida yú chi yeⁿē néené n'dee n'dái chi n'daacā yeⁿé yā ní tée yā ndís'tii fuerza na staava yeⁿé nī chi ditiinú nī cucáávā Espíritu N'dai yeⁿé yā. ¹⁷Ní ngiicá Ndyuūs chi Cristo canée yā na staava yeⁿé nī cáávā chi i'téenu nī Cristo. Ní 'fícú ndís'tii snee diitú nī ndúúcu vaadi

neⁿe yeⁿe Cristo. Ní snee nī tan'dúúca chi véé dii'yú na yáⁿā yeⁿē 'áámá yáⁿá. 'Tíicā cunée vaadi neⁿe yeⁿé Cristo na staava yeⁿé nī. 'Tíicā snee nī. ¹⁸Tuu'mí ndís'tii ndúúcu nducyaaca 'iiⁿyāⁿ chi i'téenu yā Cristo n'daacā cuuvi cádiinuuⁿ nī yeⁿē chi vaadi neⁿe yeⁿé Cristo ní tan'dúúca Cristo neⁿé taavi cá yā nducyaaca 'iiⁿyāⁿ. ¹⁹Ní ngiicá Ndyuūs chi ndís'tii ní cádiinuuⁿ nī ch'ē chí vaadi neⁿe yeⁿé Cristo, 'áará chí ch'ete taavi ca chi nguéé cuuvi deenu yú nducuéⁿē yeⁿē. Ní ngiicá chi staava yeⁿe ndís'tii ní canee diitú ndúúcu nducuéⁿē chi n'daacā n'dai taavi caavā chí ndís'tii ní yeⁿe Ndyuūs ndís'tii.

²⁰Ní Ndyuūs yeⁿe yú cuuvi díⁿ yā tanducuéⁿē ní n'deē ca cuuvi díⁿ yā ní nguéé tí chi ngiica yú o chí tumicádiinuuⁿ yú. Tan'dúúca chi n'dee n'dái idifⁿ yā cucáávā poder yeⁿé yā 'tíicā idifⁿ yā ntiiⁿnyuⁿ yeⁿé yā ndúúcu s'uúúⁿ. ²¹Maaⁿ ní nducuéⁿē tiempo ní cueⁿe daāⁿmaⁿ canée Ndyuūs chi ch'ete taavi ca ní deēve taavi cá yā nanááⁿ 'iiⁿyāⁿ chi caⁿá yā yaacū yeⁿé yā. 'Tiicá ntúūⁿ nanááⁿ Cristo.

Nduuvidaama yú cucáávā Espíritu N'dai yeⁿé Ndyuūs

4 'Úú Pablo chi preso canée vácuū caati díⁿ ntiiⁿnyuⁿ yeⁿē 'iivú Ndyuūs. Ní 'úú dí'cuiitú ndís'tii chi n'daacā n'dai díⁿ nī nducuéⁿē tan'dúúca Ndyuūs neⁿé yā chi díⁿ nī caati yaa'ví yā ndís'tii chi cuuvi yeⁿe yā. ²'Úú ngiicá chi 'cuetiné nī chi maáⁿ nī ndiicúúⁿ nī. Ní díⁿ nī nducuéⁿē ndúúcu 'viich'etínūⁿ ndúúcu 'aama nī taama nī ni cucheé nī yeⁿe nducuéⁿē ti dinéⁿe nī 'áámá nī taama nī. ³Ní cucáávā Ndyuūs itée yā vaadi 'diiⁿ yeⁿé yā chi diiⁿ chi nduuvidaamá nī, 'úú ngiicá chi cueⁿe daāⁿmaⁿ díⁿ nī nducuéⁿe chi cuuví nī chi nduuvidaamá nī caati Espíritu N'dai yeⁿé Ndyuūs nginneé yā

ndís'tií. ⁴Véé 'áámá cuerpo nūuⁿ ndúúcu 'áámá nūuⁿ Espíritu N'dai yeⁿé Ndyuūs. "Tiicá ntúuⁿ Ndyuūs yaa'ví yā s'uúúⁿ chi cuuvi yú yeⁿé yā ní ndúúcu 'áámá nūuⁿ chi cunee ngiinu yeⁿe yú. ⁵Ní véé 'áámá nūuⁿ Señor Jesucristo chí 'áámá nūuⁿ 'iiⁿyāⁿ chí i'teenu yú, ní véé 'áámá nūuⁿ chí duuchi chí ngeēdfmuūⁿnⁿ 'iiⁿyāⁿ. ⁶Véé 'áámá nūuⁿ Ndyuūs chí Chiidá nducyáácá 'iiⁿyāⁿ ní 'iivú Ndyuūs miiⁿ ngaⁿa ntiíⁿnyuⁿ yā yeⁿe nducuéⁿē. Ní díⁿ yā ntiíⁿnyuⁿ cucáávā nducueⁿē, ní canee yā ndúúcu nducuéⁿē.

⁷Naati Ndyuūs tee yā ca'áámá ca'áámá s'uúúⁿ vaadi n'dai yeⁿé yā cáávā ntiíⁿnyuⁿ yeⁿe yú tan'dúúca chí deenu yā chí cuuvi díⁿ yú, ní ntiíⁿnyuⁿ miiⁿ ní chííⁿ chí tee Cristo ca'áámá ca'áámá s'uúúⁿ. ⁸Níicú canee nguūⁿ na libro yeⁿé Ndyuūs ndii cuááⁿ vmaaaⁿ tííca:

Chichee yā yeⁿe enemigos yeⁿe yā ní cuicheé yā ná va'ai cheeti nguuvi, ní candee yā n'dee n'dái 'iiⁿyāⁿ yeⁿé yā chí snúuⁿ yā vácuū, ní ca'á yā regalos 'iiⁿyāⁿ s'eeⁿ yeⁿé yā.

⁹¿Déē neⁿe caaⁿmaⁿ nduudú 'cūu chíiⁿ chí cheé yā? Nduudú 'cūu neⁿe caaⁿmaⁿ chí vmaáⁿ vmaaaⁿ 'iiⁿyāⁿ miiⁿ caⁿá yā 'áámá cuaaⁿ yáánūuⁿ ca chí cheeti yáⁿaa. ¹⁰'Iiⁿyāⁿ chí cáⁿā miiⁿ maáⁿ 'iiⁿyāⁿ miiⁿ cuheé yā cuaaⁿ naachí yaacu taavi ca chí va'ai cheeti nguuvi caati maáⁿ yā cuuvi canee yā tanducuéⁿē dendúⁿū cuaaⁿ. ¹¹Ní itee yā ca'áámá ca'áámá s'uúúⁿ ntiíⁿnyuⁿ chí cuuvi díⁿ yú. Itee yā naⁿa yú ntiíⁿnyuⁿ yeⁿe apóstoles chí candee yú nduudu yeⁿe Ndyuūs. Ní itee yā naⁿa yú ntiíⁿnyuⁿ chí caaⁿmaⁿ yú nduudu chí sta'a yú yeⁿé Ndyuūs. Ní itee yā ntiíⁿnyuⁿ naⁿa yú chí ngaⁿa yú nduudu chí nanguaⁿai 'iiⁿyāⁿ. Ní itee yā ntiíⁿnyuⁿ naⁿa yú chí candee yú nduudu yeⁿé yā na yaácū. Ní itee yā naⁿa yú ntiíⁿnyuⁿ chí maestro yeⁿe nduudu yeⁿé yā. ¹²Tíicā díⁿ Ndyuūs chí chí'cueéⁿ yā nducyaaca

'iiⁿyāⁿ chí i'teenu yā Cristo ní 'íicú 'iiⁿyāⁿ s'eeⁿ cuuvi díⁿ yā ntiíⁿnyuⁿ chí tuneeⁿ yā. Ní nducyaaca yā chí yeⁿe cuerpo yeⁿe Cristo cuuvi cu'teenu cá yā Ndyuūs. ¹³Ní nducyaaca s'uúúⁿ ní cuuvi nduuvidaama yú ti maaⁿ ní s'uúúⁿ ní tan'dúúca chí 'aama yú ndúúcu chí i'teenu yú ní ndúúcu chí deenu yú yeⁿe Cristo chí Daiya Dendyuūs. Ní nguuvi nguuvi cuuvi díitū ca yú ndúúcu chí i'teenu yú ndúúcu vaanicadiinūⁿ yeⁿe yú ndíi tiempo chí s'uúúⁿ din'daaca yú ní tan'dúúca Cristo 'tíicā s'uúúⁿ. ¹⁴Áā ntéé díⁿ yú tan'dúúca da'caiyā díⁿ yā chí ch'iindiveéⁿ yā yeⁿe 'aama yā taamá yā chí ca'cueéⁿ yā cosa chí n'dááⁿ ní díⁿ yā tan'dúúca chí 'yúúné candee 'iiⁿyāⁿ 'múúⁿ miiⁿ. Ní nguéé canee chí i'teenu yú nduudu yeⁿe 'iiⁿyāⁿ chí nginnche'í yā s'uúúⁿ. 'Iiⁿyāⁿ s'eeⁿ neⁿé yā candee yā s'uúúⁿ lado yeⁿé yā chí i'teenu yú chíiⁿ chí nguéé cuaacu. ¹⁵Nguéé díⁿ yú 'túúca naati canee chí caaⁿmaⁿ yú nduudu cuaacu yeⁿé Ndyuūs ti neⁿe yú 'iiⁿyāⁿ ndúúcu núúⁿmaⁿ staava yeⁿe yú. Ní cuuvi cu'teenu ca yú ní díⁿ yú nducueⁿē chí n'daacā tan'dúúca chí díⁿ Cristo chí tíiⁿ 'áámá cuerpo yeⁿe nducyaaca yú. Ní s'uúúⁿ tan'dúúca cuerpo yeⁿé yā, 'tíicā s'uúúⁿ. ¹⁶Ní nducyaaca yú ní canee yú maaⁿ poder yeⁿe Cristo chí tíiⁿ nducyaaca yú. Ní canee yú n'daacā na lugar chí tuneéⁿ yú ti yeⁿé Cristo s'uúúⁿ. Ní nducueⁿē coo yeⁿe cuerpo yeⁿé yā n'daacā n'dai snéé ní 'áámá 'áámá coo ní inuⁿu tan'dúúca chí canee chí díⁿ. 'Tíicā s'uúúⁿ chí yeⁿe Cristo canee chí díⁿ yú ntiíⁿnyuⁿ chí tuneéⁿ yú cáávā chí n'giita yú, ní ditiinu yú, ní dineⁿe yú nducyaaca 'iiⁿyāⁿ.

Véé vida ngai yeⁿe 'iiⁿyāⁿ chí yeⁿe Cristo

¹⁷Maaⁿ ní 'úu ngaⁿá cáávā Señor Jesucristo ní ngaⁿá chí din'daacá nī. Nguéé 'cuuetinée nī tan'duucā tanáⁿā 'iiⁿyāⁿ

chi nguεε i'téenu yā Ndyuūs. 'Iiⁿyāⁿ s'eeⁿ nadacadíínuuⁿ yā yeⁿe dendu'ū chi nguεε dichíí'vē. ¹⁸Ní chiiⁿ chi nadacadíínuuⁿ yā ní yeⁿe ná maāⁿ. 'Iiⁿyāⁿ s'eeⁿ nguéé véé vida cueⁿe daāⁿmaⁿ yeⁿé yā chi Ndyuūs ca'á yā 'iiⁿyāⁿ chi yeⁿé yā ti 'iiⁿyāⁿ s'eeⁿ caneeⁿ yā ndúúcuⁿ staava yeⁿé yā chí chεεchi. Ní cáávā chuū 'iiⁿyāⁿ s'eeⁿ caneeⁿ yā chi nguéé deenú yā Ndyuūs. ¹⁹'Iiⁿyāⁿ s'eeⁿ 'āā ntéé dííⁿ yā sentir chi cuuvi 'cuinaáⁿ yā caavā nuuⁿndi chi dííⁿ yā. Ní dííⁿ yā tan'dúúcaⁿ chi véé vicio yeⁿe yā. Ní dííⁿ yā nducuéⁿe dendu'ū chi nguεε n'daacā. Ní nguéé nadacadíínuuⁿ yā yeⁿe chi dííⁿ yā. ²⁰Naati ndís'tiiⁿ nguéé 'tiicā ch'éeⁿ nī yeⁿe Cristo. ²¹Nduuti chi cuaacu chi ch'iindiveéⁿ nī nduudu yeⁿe Cristo ní Cristo chi'cueéⁿ yā ndís'tiiⁿ ní i'téenu nī nduudu cuaacu chi yeⁿé Cristo, tuu'mi ní nduudu cuaacu yeⁿé yā cūnee ndúúcu nī. ²²Maaⁿ ní 'āā ntéé dííⁿ nī tan'dúúcaⁿ chi dííⁿ nī vmaaⁿ chi i'téenu nī. Divíi nī yeⁿe nducuéⁿe chi dííⁿ nī tiempo chi chó'oo caati chuū nginnche'éi ndís'tiiⁿ ndúúcuⁿ nducuéⁿe chi neⁿe chi dííⁿ nī chi nguéé n'daacā. ²³Ndís'tiiⁿ ní canee chi nadíngai nī espíritu yeⁿé nī ndúúcuⁿ vaanicadíínuuⁿ yeⁿe maāⁿ nī. ²⁴Ní caneeⁿ chi cuta'á nī vida ngai yeⁿe Cristo tan'dúúcaⁿ chi 'áámá vestido ngai ní cunúuⁿ nī vestido ngai. Ní dííⁿ nī nducuéⁿe tan'dúúcaⁿ chi Ndyuūs neⁿé yā chi dííⁿ nī. Ní 'tíicā vida yeⁿe maāⁿ nī ní cuaacu nííⁿnyúⁿ chí n'daacā ní dεeve.

²⁵Cáávā chuū nguéé caaⁿmáⁿ nī nduudu yaadi. Ca'áámá ca'áámá s'uúuⁿ ní caaⁿmaⁿ yú nduudu cuaacu ndúúcuⁿ nducyaaca 'iiⁿyāⁿ na níiⁿnuúⁿ va'āi. Caati s'uúuⁿ ní yeⁿe 'áámá cuerpo nūuⁿ ti yeⁿe Cristo s'uúuⁿ.

²⁶Ní nduuti chi nduuvi taáⁿ nī, nguéé ca'a nī lugar chi vaadi taaⁿ yeⁿé nī diiiiⁿ chi dinuuⁿndí nī. Ní nguéé 'naaⁿ tiempo nduuvi taáⁿ nī. ²⁷Nguéé ca'á nī

mar 'áámá lugar yááⁿn'guiinūuⁿ chi cuuvi tuu'vi sa vida yeⁿé nī.

²⁸Ní ndís'tiiⁿ chi diduucú nī 'āā ntéé diduucú nī. Dííⁿ nī ntiiⁿnyuⁿ n'daacā caati véé yeⁿe nī. Ní 'íicú cuuvi ca'á nī 'iiⁿyāⁿ chi pobre yā chi nguéé véé yeⁿé yā.

²⁹Nguéé caaⁿmáⁿ nī nduudu yaadi 'yāa, dámaāⁿ caaⁿmáⁿ nī nduudu chí n'daacā chi diiⁿ chi cu'téenu cá yā nī diiⁿ chi cunnee nī 'iiⁿyāⁿ chi 'caandiveéⁿ yā nduudu yeⁿé nī. ³⁰Ndís'tiiⁿ nguéé dííⁿ nī dendu'ū chi cuuvi ndaachíi Espíritu N'dai yeⁿé Ndyuūs ti maaⁿ Espíritu yeⁿe Ndyuūs miiⁿ chi véé yeⁿe yú ní diiiiⁿ chi sellado nī chi yeⁿé Ndyuūs s'uúuⁿ. Ní diiⁿ chi cuuvi cuaacu chi Ndyuūs nadanguáⁿai yā s'uúuⁿ.

³¹Ní ndís'tiiⁿ 'āā ntéé cunee nī ndúúcuⁿ vaadi taaⁿ, ní nguéé dííⁿ nī chi nguéé neⁿe nī 'iiⁿyāⁿ, ndíí nguéé 'cuaí taáⁿ nī, ndíí nguéé caaⁿmáⁿ nī dendu'ū chi nguεε n'daacā yeⁿe taamá yā, ndíí nguéé dííⁿ nī yeⁿe taama yā cosas chi nguεε n'daacā.

³²Caati diiⁿ n'daacá nī ní diya'ai 'íinu nī 'aamá nī taamá nī vi'i, ní nadich'εecú nī nuuⁿndi yeⁿé nī yeⁿe 'áámá nī taamá nī vi'i tan'dúúcaⁿ Ndyuūs nadāch'εecú yā nuuⁿndi yeⁿé nī ti yeⁿé Cristo ndís'tiiⁿ.

Táácā canee chi 'cuεetinéé 'iiⁿyāⁿ chi daiya Ndyuūs

5 Cuaacu chi ndís'tiiⁿ ní daiya Dendyuūs ndís'tii. Maaⁿ ní cáanu nī dííⁿ nī tan'dúúcaⁿ Ndyuūs dííⁿ yā. ²Ní dinéⁿe nī nducyaaca 'iiⁿyāⁿ tan'dúúcaⁿ Cristo dinéⁿe yā s'uúuⁿ ní ca'a maāⁿ yā vida yeⁿe maāⁿ yā cáávā s'uúuⁿ. Ní dííⁿ yā tan'dúúcaⁿ chi maāⁿ yā nī 'áámá 'íítí cuūchī chi 'iiⁿyāⁿ dííⁿ yā 'caaⁿnúⁿ yā 'iiti chi ofrenda yeⁿé yā ní ca'á yā nátai nanááⁿ Ndyuūs. Ní Cristo maāⁿ yā ofrenda chi n'dεeve ngééⁿ nanááⁿ Ndyuūs. Ní yeenú Ndyuūs ndúúcuⁿ ofrenda miiⁿ chi Cristo miiⁿ.

³Maaⁿ ní chi ndís'tií ní yeⁿé Ndyuūs ndís'tií nguéé canee chí caaⁿmaⁿ ní mar 'áamá yeⁿe nuuⁿndi chí saⁿá n'diichi sa n'daataá. Ní nguéé canee chí caaⁿmaⁿ ní yeⁿe táamá dendu'ū chí nguéé n'daacā ní nguéé dēeve, ndíí nguéé dínngueé ní yeⁿé chí véé chí yeⁿe taamá yā. ⁴Ndíí nguéé canee chí caaⁿmaⁿ ní dendu'ū chí cuuvi 'cuinaáⁿ ní, ndíí nguéé caaⁿmaⁿ ní nduudu tonto o nduudu chí nguéé n'daacā, caati nducuéⁿē chuū ní nguéé n'daacā yeⁿé ní. Naati ndís'tií ní canee chí caaⁿmaⁿ ní Ndyuūs 'tíicā: Gracias n'dií Ndyuūs. ⁵Ní ndís'tií 'āā deenú ní chí saⁿá chí caⁿa sá ndúúcu n'daataá chí nguéé yeⁿe sa o n'daataá chí caⁿa tá ndúúcu saⁿá chí nguéé yeⁿe ta, o 'iiⁿyāⁿ chí diíⁿ dendu'ū chí nguéé n'daacā o 'iiⁿyāⁿ chí dínngueé yā yeⁿé chí véé yeⁿé taama yā ti tanducuéⁿē chuū ní tan'dúúca chí i'téenu yā santos ídolos. Nducyáácá 'iiⁿyāⁿ s'eeⁿ ní nguéé véé parte yeⁿé yā naachi Cristo ndúúcu Ndyuūs ngaⁿa ntiiⁿnyúⁿ yā. ⁶Nguéé ca'á ní lugar chí caaⁿmaⁿ 'iiⁿyāⁿ chí canche'éí yā ndís'tií ndúúcu nduudu chí tonta ti ngaⁿá yā chí cuuvi diíⁿ ní nducuéⁿē chí nguéé n'daacā. Caati cáávā nducuéⁿē chuū ní Ndyuūs diíⁿ yā diituu cá castigar 'iiⁿyāⁿ s'eeⁿ chí nguéé n'giindiveéⁿ yā nduudu yeⁿe Ndyuūs. ⁷Ní ndís'tií nguéé nduuvidaamá ní ndúúcu 'iiⁿyāⁿ s'eeⁿ ní nguéé diíⁿ ní mar 'áamá chí diíⁿ yā.

⁸Ndííⁿ ní tiempo chí 'āā ch'ó'oo ch'etinéé ní ndúúcu yááⁿguinūⁿ na maāiⁿ, naati maaⁿ ní chí ndís'tií ní yeⁿé Señor Jesucristo, ndís'tií canéé ní na chidēeve yeⁿe Señor miiⁿ. Ní maaⁿ ní cuēti chiicá ní na chidēeve miiⁿ tan'dúúca chí ndís'tií ní daiyá Ndyuūs ndís'tií. ⁹Ní chuū 'iiⁿyāⁿ diíⁿ yā taachi snéé yā chidēeve yeⁿé Ndyuūs. Tanducuéⁿē chí n'daacā ndúúcu tanducuéⁿē chí cuaacu diíⁿ yā. Ní ch'iⁿí yā na vida yeⁿe maáⁿ yā chí n'daacá yā. Chuū ní tan'dúúca n'gui'i yeⁿe yáⁿá ti n'gui'i yeⁿe

chidēeve miiⁿ ní 'tíicā. ¹⁰Ní caanú ní diíⁿ ní ca'cueéⁿ ní nducuéⁿē chí Ndyuūs neⁿé yā chí diíⁿ ní. ¹¹Ní ndís'tií nguéé diíⁿ ní mar 'áamá chí nguéé dichí'vé ndúúcu 'iiⁿyāⁿ chí chiicá yā na maāiⁿ naati caaⁿmaⁿ ní 'iiⁿyāⁿ chí chiicá yā na maāiⁿ chéé chí nguéé n'daacā chí diíⁿ yā nanááⁿ Dendyuūs. ¹²S'uuúⁿ cuuvi 'cuinaaⁿ yú nduuti chí caaⁿmaⁿ yú yeⁿe dendu'ū nuuⁿndi ch'ēete chí 'iiⁿyāⁿ diíⁿ yā taachi din'dé'ei yā. ¹³Ní taachi ngaⁿá ní 'iiⁿyāⁿ s'eeⁿ yeⁿe tanducuéⁿē chí nguéé n'daacā chí diíⁿ yā tuu'mi ní canéé na chidēeve. Ní Ndyuūs ch'iⁿí yā 'iiⁿyāⁿ nducuéⁿē tan'dúúca chí diíⁿ yā, ti 'āā ntéé canúúⁿ n'de'ei. ¹⁴Canéé nguūⁿ na libro yeⁿé Ndyuūs. Cáávā chuū ní Ndyuūs ngaⁿa yā 'tíicā:

Ndííⁿ 'iiⁿyāⁿ chí ch'ií; nadacuéⁿē ní yeⁿe nguaaⁿ tináⁿá, ní 'íicú Cristo chí chidēeve ní téé yā chidēeve ndís'tií.

¹⁵Cáávā chuū ndís'tií ní nadacuínuuⁿ n'daacā ní yeⁿe chí diíⁿ ní. Nguéé diíⁿ ní tan'duucā chí ndís'tií 'iiⁿyāⁿ zonso ndís'tií naati diíⁿ ní tan'duucā chí ndís'tií 'iiⁿyāⁿ deenu ndís'tií. ¹⁶Ní diíⁿ ní aprovechar tiempo chí véé yeⁿé ní chí din'daacá ní caati tiempo 'cūú 'iiⁿyāⁿ diíⁿ yā dendu'ū chí nguéé n'daacā. ¹⁷Nguéé diíⁿ ní tan'dúúca 'iiⁿyāⁿ chí nguéé tuumicadínuuⁿ yā ti zonso yā naati diíⁿnúú yiiⁿnuⁿ ní maaⁿ níicú tuumicadínuuⁿ ní chee chí Ndyuūs neⁿé yā chí diíⁿ ní. ¹⁸Nguéé cuuvi cuu'ví ní ti diiíⁿ chí cuuvi ndái ní, naati itée ní lugar chí Espíritu N'dai yeⁿé Ndyuūs cuuvi cūnee nducú ní. ¹⁹Ní ndéé ní 'áamá ní ndúúcu taama ní ndúúcu salmos, ndúúcu himnos, ndúúcu canciones chí ngaⁿa yeⁿé Ndyuūs. Ní ngiitá ní ní dinéⁿé ní Señor Jesucristo yeⁿé yú ndúúcu núúⁿmaⁿ staava yeⁿé ní. ²⁰Ní cueⁿe daāⁿmaⁿ nca'á ní gracias Ndyuūs Chiida yú

ndúucū chi dúuchí Señor Jesucristo yeⁿē yú caava nducuéⁿē chi véé.

**Yeⁿe vida yeⁿe familia s'eeⁿ
chi yeⁿe Jesucristo**

²¹ Nguéé dich'eteté nī maáⁿ nī. Dinéⁿe nī vi'í 'áámá nī ndúucū taama nī caati 'āā díⁿ ní respetar Ndyuūs.

²² Ní ndís'tiī táⁿā chí ch'iindivaacu canee chí 'caandiveéⁿ nī yeⁿe isaⁿā yeⁿé nī tan'dúucā chí ch'iindiveéⁿ nī nduudu yeⁿé Ndyuūs ti isaⁿā yeⁿé nī tan'duucā 'iiví nī, 'tíicā sa. ²³ Caati isaⁿā yeⁿé nī ní tan'dúucā tiiⁿ yeⁿe familia, 'tíicā sa. 'Tiicá ntúūⁿ tan'dúucā Cristo ní tiiⁿ 'iiⁿyāⁿ chí i'téenu yā 'yā, Cristo ntúūⁿ 'iiⁿyāⁿ chí nadanguáⁿai yā nducyaaca 'iiⁿyāⁿ chí i'téenu yā 'yā. Ní nducyaáacá 'iiⁿyāⁿ chí i'téenu yā Cristo, 'iiⁿyāⁿ s'eeⁿ tan'duucā cuerpo yeⁿe Cristo, 'tiicá yā. ²⁴ Ní tan'duucā 'iiⁿyāⁿ chí i'téenu yā Cristo canee yā maaⁿ poder yeⁿe Cristo 'tiicá ntúūⁿ táⁿā canee tá maaⁿ poder yeⁿe isaⁿā yeⁿe tá ní canee chí 'caandiveeⁿ tá yeⁿē sa.

²⁵ Ní ndís'tiī chí isaⁿā chí ch'iindivaacu canee chí neⁿé nī n'daataá yeⁿé nī tan'duucā Cristo neⁿé yā 'iiⁿyāⁿ yeⁿe yaacu yeⁿé yā. Ní Cristo nca'a maáⁿ yā vida yeⁿe maáⁿ yā ní ch'iī yā cáávā 'iiⁿyāⁿ chí yeⁿé yā. ²⁶ Ní 'tíicā ch'iī Cristo caati s'uúúⁿ cuuvi 'iiⁿyāⁿ yeⁿé yā s'uúúⁿ caavā ntiiⁿnyuⁿ chí díⁿ yā. Ní Cristo didēvé yā 'iiⁿyāⁿ cucáávā nuūⁿnīⁿ ní cucáávā nduudu yeⁿé yā. ²⁷ Ní Cristo candēe yā 'iiⁿyāⁿ chí yeⁿé yā nanááⁿ Ndyuūs. Ní 'iiⁿyāⁿ s'eeⁿ ní ngii n'gai ní dēve yā. Ní nguéé falta yeⁿé yā, ndíí nguéé véé mar 'áámá nuuⁿndi yeⁿé yā, ndíí nguéé 'áámá dendu'ū chí nguéé cuaacu na vida yeⁿé yā, ndíí nguéé véé mar 'áámá dendu'ū chí 'túucā. Ní 'iiⁿyāⁿ chí yeⁿé yā ní núúⁿmáⁿ yā ní yeⁿé Cristo. Ní nguéé véé mar 'áámá chí nguéé n'daacā yeⁿé 'iiⁿyāⁿ s'eeⁿ. ²⁸ Ní isaⁿā chí ch'iindivaacú canéé chí dinéⁿe

sa n'daataá yeⁿē sa tan'dúucā chí neⁿe sa maaⁿ sa cuerpo yeⁿe sa, 'tíicā n'daataá yeⁿē sa. Ní saⁿa chí dinéⁿe sa n'daataá yeⁿē sa neⁿe maaⁿ sa saⁿā. ²⁹ Nguéé véé mar 'áámá 'iiⁿyāⁿ chí nguéé neⁿé maáⁿ yā cuerpo yeⁿé yā, naati nga'a maáⁿ yā chíiⁿ chí n'daacā chí cuuvi yeⁿé yā. Ní maáⁿ yā díⁿ yā cuidar cuerpo yeⁿe maáⁿ yā. 'Tiicá ntúūⁿ Cristo dinéⁿe yā ní díⁿ yā cuidar nducyaaca 'iiⁿyāⁿ chí i'téenu yā 'yā. ³⁰ 'Tíicā díⁿ Cristo ti 'iiⁿyāⁿ s'eeⁿ chí yeⁿé yā ní tan'dúucā cuerpo yeⁿé yā 'tíicā 'iiⁿyāⁿ s'eeⁿ. Ní s'uúúⁿ ní tan'dúucā 'áámá parte yeⁿe cuerpo yeⁿe Cristo 'tíicā s'uúúⁿ. ³¹ Ní 'tiicá ntúūⁿ saⁿā i'neeⁿ sa chēecu sa ndúucū chiida sa ní nduuvidaama sa ndúucū n'daataá yeⁿē sa ní nduu 'uuví yā nduuvidaamá yā ní díⁿ yā tan'dúucā chí 'áámá cuerpo nūⁿ. ³² Chuū ní 'áámá vaadi cuaacu na libro yeⁿé Ndyuūs, ní ngaⁿá ngíí ndís'tiī yeⁿe chuū. Nduudu miiⁿ ngaⁿā yeⁿe Cristo ndúucū 'iiⁿyāⁿ chí i'téenu yā Cristo ní yeⁿé yā 'iiⁿyāⁿ s'eeⁿ. ³³ Maaⁿ ní neⁿé caaⁿmáⁿ ca'áámá cā'aama ndís'tiī chí saⁿā chí 'nínívaacu, canee chí neⁿe nī n'daataá yeⁿe nī tan'dúucā chí neⁿé nī maáⁿ nī. Ní ndís'tiī n'daataá canéé chí dinéⁿe nī isaⁿā yeⁿé nī ni 'caandiveéⁿ nī yeⁿe sa.

6 Nds'tiī da'caiyá chí i'téenu nī Cristo, canee chí 'caandiveéⁿ nī yeⁿe chiidá nī caati chuū chí cosa chí n'daacā chí díⁿ nī. ² Ní mandamiento yeⁿe Ndyuūs chí vmnááⁿ vmnaaⁿ chí Ndyuūs teé yā com-promiso yeⁿē ní chuū: Cu'téenu nī chiidá nī ndúucū chēecú nī, ³ ní 'iicu nduuti chí díⁿ nī 'tíicā cuuvi yeenú nī níicú cuneé nī na iⁿ'yeeⁿdí 'cūū n'dee n'dái nduuyú.

⁴ Ní ndís'tiī saⁿā chí véé daiyá nī, nguéé díⁿ nī chí nduuvi taaⁿ daiyá nī naati di'cuuitá nī daiya nī ní yaa'ví nī daiya nī taachi nguéé din'daacā ní ca'cuéⁿ nī daiyá nī yeⁿe Señor Jesucristo caati cuuvi cu'téenu yā yeⁿé yā.

⁵Ní ndís'tií 'ii''yā''n chi dii''n ntii''nyu''n ndúúcu'' iiví''nī, 'caandiveé''n nī ye''n'e 'iiví''nī chi véé''n na i''nye''ndí'' cūū. Ní dií''n nī respetar 'iiví''nī ní 'va'á''nī ye''n'e yā. Ní dií''n nī ntii''nyu''n ye''n'e yā ndúúcu'' nūú''má''n staava ye''n'e nī. Ní dií''n nī nducué''n'e nti- i''nyu''n ye''n'é yā tan'duucā'' chí'' dií''n nī caavā'' Cristo. ⁶Ní dií''n nī n'dai'' ntii''nyu''n ye''n'é yā nguéé'' dāmáāa''n taachi 'iiví''nī inaá''n yā ndís'tií'' caati''n'daacā'' caneeé''nī ndúúcu'' yā. Naati'' dií''n nī ntii''nyu''n ye''n'é yā tan'dúúca'' chi'' ntii''nyu''n ye''n'e Cristo'' chí'' dií''n nī ní ndúúcu'' nūú''má''n staava ye''n'é nī. Chuū'' ní'' chii''n chi'' Ndyuūs'' ne''é yā'' chí'' dií''n nī. ⁷Ní'' diné''e nī'' din'daacā'' nī'' ntii''nyu''n ye''n'e yā'' tan'dúúca'' chi'' ntii''nyu''n ye''n'e Señor Je- sucristo'' chí'' dií''n nī, nguéé'' tan'dúúca'' chi'' ntii''nyu''n ye''n'e 'ii''yā''n ye''n'e i''nye''ndí'' cūū. ⁸Ní'' nducyááca'' nī'' ní'' déénu'' nī'' nduuti'' chí'' 'ii''yā''n chí'' dií''n ntii''nyu''n caadi'' 'iivu'' o'' nduuti'' chí'' 'ii''yā''n libre'' yā'' nducyááca'' yā'' cuta'á'' yā'' ye''n'e Señor Jesucristo'' chí'' 'iivi'' yú'' chí''f'' chí'' téé'' yā'' 'ii''yā''n caavā'' ntii''nyu''n n'daacā'' chí'' dií''n yā.

⁹Ní'' ndís'tií'' chí'' 'iiví'' ye''n'e 'ii''yā''n, 'ti- icá'' ntúū''n din'daacā'' nī'' ndúúcu'' 'ii''yā''n chí'' dichí''f''vé'' ndís'tií''. Nguéé'' caa''má''n nī'' chí'' ca''ná'' nī'' 'cue''é'' nī'' 'ii''yā''n chí'' dichí''f''vé'' ndís'tií''. N'gaacu'' nī'' chí'' ndís'tií'' ndúúcu'' 'ii''yā''n chí'' dichí''f''vé'' ndís'tií'' ní'' snée'' nī'' na'' poder'' ye''n'e 'iiví'' Señor Jesucristo'' chí'' caneeé'' na'' va'ai'' chæti'' nguuví''. Ní'' 'āā'' daamá'' nūu'' nducyááca'' 'ii''yā''n nanáá''n Señor Jesucristo'' ye''n'e yú''.

**Armas ye''n'e Espíritu'' N'dai''
ye''n'é Ndyuūs'' cáava'' 'ii''yā''n''
chí'' i'téenu'' yā'' Ndyuūs''**

¹⁰Maa''n ní'' ndís'tií'' hermanos'' ye''n'é'' dií''n nī'' chí'' ditiinú'' 'cuætinée'' nī'' nanáá''n Señor Jesucristo'' ye''n'e yú'' ndúúcu'' nducué''n'e poder'' chí'' véé'' ye''n'é'' Cristo. ¹¹Ní'' cu- uví'' dií''n nī'' defender'' maá''n nī'' ndúúcu'' nducué''n'e armadura'' chí'' tan'dúúca'' ar- madura'' catecai'' soldados'' chí'' Ndyuūs'' dátee'' yā'' s'uúú''n chí'' ye''n'e'' Cristo. Ní''

'íicú'' cuuvi'' cuchéé'' nī'' ye''n'e'' nducué''n'e'' dendu'u'' chí'' dii''n yáá''n'guiinūu''n taachi'' ngínnche''ei'' sa'' ndís'tií''. ¹²Nguéé'' 'cuu''mā''n yú'' contra'' 'ii''yā''n chí'' nguéé'' n'daacā'' naati'' 'cuu''mā''n yú'' ní'' contra'' fuerzas'' ye''n'e'' es- píritus'' chí'' nguéé'' n'daacā'' chí'' caneeé'' na'' 'yúúné'' ndúúcu'' espíritus'' chí'' 'ii''ntyé''n'e'' ye''n'é'' taná''n'a'' espíritus'' chí'' ca'a'' orden'' ye''n'e'' espíritus'' chí'' nguéé'' n'dai'' ndúúcu'' ndu- cué''n'e'' ye''n'e'' í''nye''ndí'' chí'' caneeé'' na'' maa''n'' chí'' ye''n'e'' yáá''n'guiinūu''n. ¹³Cáávā'' chuū'' tan'dúúca'' 'áámá'' soldado'' cuta'a'' sa'' cate- cai'' ye''n'e'' soldado'' ní'' maa''n'' ní'' cuta'á'' nī'' nducué''n'e'' armadura'' chí'' tan'dúúca'' cate- cai'' nī'' chí'' Ndyuūs'' dátee'' yā'' ndís'tií''. Ní'' 'íicú'' cuuvi'' cuchéé'' nī'' contra'' ene- migo'' nguuví'' taachi'' ndaa'' nanáa''n nī'' ndu- cué''n'e'' dendu'u'' chí'' nguæ'' n'daacā''. Ní'' taachi'' chichæ'' nī'' ye''n'e'' nducué''n'e'' chí'' nguéé'' n'daacā'' ndíí'' chí'' 'cuiinū, tuu''mi'' ní'' cuuvi'' 'cuætinée'' diitú'' nī'' ndúúcu'' chí'' i'téenu'' nī. ¹⁴Ní'' caneeé'' diitú'' nī'' ndúúcu'' ar- madura'' ye''n'é'' Ndyuūs''. Cáávā'' caandaá'' 'ti- icá'' ntúū''n ndís'tií'' cuta'á'' nī'' cinturón'' ní'' chi- ichi'' cuneeé'' cinturón'' ye''n'é'' nī'' chí'' armadura'' ye''n'e'' Ndyuūs'' chí'' vaadi'' cuaacu''. Ní'' véé'' fuerzas'' ye''n'é'' nī. Ní'' dii''n'' n'daacā'' nī'' caati'' caneeé'' diitú'' nī. 'Tiicá'' ntúū''n ndís'tií'' cuta'á'' nī'' chaleco'' cūū'' ye''n'e'' Ndyuūs'' chí'' vaadi'' cuaacu''. Ní'' caneeé'' chí'' dií''n nī'' nducué''n'e'' chí'' n'daacā'' caati'' cuuvi'' dií''n nī'' proteger'' pecho'' maá''n'' nī'' ye''n'e'' nducué''n'e'' chí'' nguæ'' n'daacā'' chí'' dardos'' ye''n'e'' enemigo. ¹⁵'Ti- icá'' ntúū''n ndís'tií'' snúú''n'' ca'a'' nī'' zapatos'' chí'' ye''n'é'' Ndyuūs'' chí'' ye''n'e'' vaadi'' 'diíí''. Ní'' 'cuætinée'' listo'' nī'' chí'' caa''mā''n'' nī'' 'ii''yā''n'' nduudu'' cuaacu'' ye''n'e'' Jesucristo'' ní'' 'íicú'' cuuvi'' cuneeé'' vaadi'' 'diíí'' ye''n'é'' yā. ¹⁶'Ti- icá'' ntúū''n ndís'tií'' sta'á'' nī'' escudo'' ye''n'é'' Ndyuūs'' chí'' vaadi'' i'teenu''. Ní'' 'íicú'' díftú'' caneeé'' nī'' ndúúcu'' chí'' i'téenu'' nī. Ní'' dií''n'' nī'' protejer'' maá''n'' nī'' ye''n'e'' dardos'' chí'' ngiichi'' ye''n'e'' yáá''n'guiinūu''n. Ní'' yáá''n'guiinūu''n'' nguéé'' cuuvi'' cuchéé'' sá'' ye''n'e'' ndís'tií'' ndúúcu'' cosas'' ye''n'e'' sa'' chí'' nguéé'' n'daacā. ¹⁷'Tiicá'' ntúū''n ndís'tií'' sta'á'' nī'' cachucha

cūu ye^{ne} Ndyuūs chí vaadī ngua^{ai} ye^{ne} nī chí diiⁿ proteger tiíⁿ nī. Ní n'gáacú nī chí Jesucristo nadanguá^{ai} yā ndís'tií ní itée yā fuerzas ndís'tií chí nguée 'va'á nī ní nguée véé 'uuvī vaanicádiinuuⁿ ye^{ne} nī. 'Tiicá ntúuⁿ ndís'tií sta'á nī espada ye^{ne} Ndyuūs chí Espíritu N'dai ye^{ne} Ndyuūs. Ní Espíritu N'dai ye^{ne} Ndyuūs ndúucū Nduudu Cuaacu ye^{ne} Ndyuūs inneé yā ndís'tií chí nguée n'giindiveéⁿ nī nduudu ye^{ne} yáá'n'guiinūuⁿ naati yáá'n'guiinūuⁿ ca^a sa caanu sa ye^{ne} nī. ¹⁸ Ní cue^e daā^{ma} caa^{ma} ngua'á nī ye^{ne} tanducué^{ne} chuū. Ní cue^e daā^{ma} di'cuiitú nī Ndyuūs cucáávā Espíritu N'dai ye^{ne} yā, ní ngiicá nī caati cuuvi cuta'á nī ye^{ne} poder ye^{ne} Ndyuūs. Ní 'íicú cuuvi diíⁿ nī nducué^{ne} chuū. Ní canee listo nī. Ní nguée cuuvi cúunu nī. Ní caa^{ma} ngua'á nī caavā nducyaaca 'iiⁿyāⁿ chí i'téenu yā Ndyuūs. ¹⁹ Ní ca^{ma} angua'á nī caavā 'úu dendu'ū ti Ndyuūs téé yā nduudu ye^{ne} yā 'úu taachi nga^á nduudu cuaacu ye^{ne} yā. Ní 'íicú 'úu cuuvi caa^{ma} nduudu miíⁿ ndúucū valor caati 'iiⁿyāⁿ cuuvi déenu yā nduudu chí nga^á táácā chí cuuvi nanguá^{ai} 'iiⁿyāⁿ, nduudu chí canée n'de'ei cuááⁿ vmaaaⁿ. ²⁰ Ndyuūs ye^{ne} yú ní dichó'o yā 'úu tan'dúucā chí 'úu emba-

jador ye^{ne} yā 'úu chí 'úu caa^{ma} nduudu cuaacu ye^{ne} yā. Ní cááva chuū ní 'úu ní preso 'úu ní maaⁿ canuúⁿ vácūu. Ní ndís'tií ní ca^{ma} angua'á nī caavā 'úu chí 'úu cuuvi caa^{ma} nduudu cuaacu miíⁿ ndúucū valor tan'dúucā chí 'úu canée chí caa^{ma}.

Saludos ye^{ne} Pablo naachi ch'iinū carta 'cuū

²¹ Hermano Tíquico, chí ne^{ne} nducyaaca s'uúuⁿ, ní n'daacā diiⁿ sa ntiiⁿnyuⁿ ye^{ne} Señor Jesucristo nduucú. Ní sa^a miíⁿ caa^{ma} sa ndúucū ndís'tií ye^{ne} 'úu ní ye^{ne} chí 'úu idiíⁿ. ²² Cáávā chuū dicho'ó hermano Tíquico nanááⁿ ndís'tií ti caa^{ma} sa táácā snée 'nū ní 'iicu diiⁿ sa chí diituu 'cuētinéeⁿ nī na staava ye^{ne} nī.

²³ Maaⁿ ní 'úu ne^{ne} chí Ndyuūs Chiida yú ndúucū Señor Jesucristo ye^{ne} yú ca'á yā nducyaaca hermanos ye^{ne} vaadī 'diíⁿ na staava ye^{ne} yā. Ní ne^{ne} chí Ndyuūs diíⁿ yā chí ndís'tií cu'téenu cá nī Ndyuūs, ní dine^e cá nī nducyaaca 'iiⁿyāⁿ. ²⁴ Ní ne^{ne} chí Ndyuūs ca'á yā vaadī n'dai ye^{ne} yā nducyaaca 'iiⁿyāⁿ chí cuaacu níⁿnyúⁿ ne^{ne} yā Señor Jesucristo ye^{ne} yú. Ní 'áamá ne^{ne} yā, ní nguée n'daáⁿ yā. 'Tiicá cuuvi.

CARTA YEⁿE IIⁿYĀⁿ YEⁿE YĀĀⁿ FILIPOS

**Taachi Pablo canúⁿ
yā vácūⁿ idingúⁿ yā yeⁿe
'iiⁿyāⁿ yeⁿe yāāⁿ Filipos,
'iiⁿyāⁿ chi i'téenu yā Jesucristo**

1 'Úú Pablo ndúúcū Timoteo ní nús'uu ní dichí'í've nū Jesucristo. Maaⁿ ní idingúúⁿ nū carta 'cūū yeⁿe nducyáácá hermanos chi i'téenu yā Jesucristo ndúúcū obispos chi saⁿā ndíí tiiⁿ yeⁿe 'iiⁿyāⁿ chi i'téenu yā Jesucristo ndúúcū diáconos chi nginneé yā obispos, nducyaaca yā chi snee yā na yāāⁿ Filipos. ²Neⁿé nū chí Ndyuūs Chiida yú ndúúcū Señor Jesucristo yeⁿe yú tée yā ndís'tií yeⁿe vaadi n'dai taavi yeⁿé yā ní 'cuætinée nī ndúúcū vaadi diiíⁿ yeⁿé Ndyuūs.

**Pablo ngaⁿangua^a yā cáávā
'iiⁿyāⁿ chi i'téenu yā Jesucristo**

³'Úú nca^a gracias Ndyuūs yeⁿe yú ca'áámá ca'áámá vuelta taachi n'gaacú yeⁿe ndís'tií. ⁴Ní taachi caⁿanguā^a, nducuéⁿe tiempo caⁿanguā^a yeⁿe nducyaaca ndís'tií ndúúcū vaadi yeenú. ⁵Caati ndís'tií ní nduucú ní dáámá diiⁿ yú ntiíⁿnyuⁿ ti inneé nī 'úú chi 'úú candéé nduudu yeⁿe evangelio chí nduudu ngai yeⁿe Cristo, ndii nguuví chi i'téenu nī Jesucristo ndíí maaⁿ. ⁶Ní deenú chi seguro canee chiiⁿ chi yeⁿe Ndyuūs ti Ndyuūs chi tuca^a yā diiⁿ yā ntiíⁿnyuⁿ n'daacā n'dai na vida yeⁿe ndís'tií ní idiíⁿ yā chi ndís'tií 'cuætinée nī dííⁿ nī ntiíⁿnyuⁿ chi n'daacā nguuví nguuví ndíí nguuví chí ndaa Jesucristo taama vmnéⁿē. ⁷Ní 'tífcā chi n'dai chí 'úú nacádiinúúⁿ chuú yeⁿe nducyaaca ndís'tií caati neⁿé taavi ndís'tií. Ní nducyaaca ndís'tií ní véé parte yeⁿé nī nduucú yeⁿe nducuéⁿe chi n'dai taavi chí Ndyuūs itée yā s'uuúⁿ. Ní

ndís'tií nginneé nī 'úú 'áará chí canuúⁿ vácūⁿ o 'áará chí canee nanááⁿ 'iiⁿyāⁿ 'iiⁿntyéⁿē 'úú ní ngaⁿá nduudu cuaacu yeⁿe nduudu ngai yeⁿé Cristo chí cuaacu chí 'tífcā. ⁸Ní Ndyuūs yeⁿe yú ní deenú yā chí 'úú neⁿé ndís'tií tan'dúúcā chí Cristo neⁿé yā s'uuúⁿ. ⁹Ní 'úú ngiicá Ndyuūs chí ndís'tií cuuvi dinéⁿe ca nī nducyaaca 'iiⁿyāⁿ. Ní cuuvi deenu cá nī yeⁿe nduudu cuaacu ní cuuvi nadacadíínuuⁿ n'daacā nī yeⁿe nducuéⁿe chí cuaacu. ¹⁰Caati cuuví ndæeve nī nducuéⁿe tiempo chéé chí n'daacā taavi ca. Ní 'tífcā cuuvi 'cuætinée nī n'daacā n'dai. Ní taachi ndaa Jesucristo taama vmnéⁿē nguéé véé mar 'áámá nuuⁿndi yeⁿé nī. ¹¹Ní neⁿé chí Jesucristo ndaacá yā ndís'tií chí 'cuætinée n'daacá nī cucáávā poder yeⁿe Cristo ní dííⁿ nī ntiíⁿnyuⁿ yeⁿe evangelio chí nduudu ngai yeⁿe Cristo. Ní 'ífcú nducyaaca 'iiⁿyāⁿ cuuvi caaⁿmá yā chí ch'æte taavi Ndyuūs. Ní dííⁿ yā honrar Ndyuūs.

Cáávā 'úú vida yeⁿé ní Cristo

¹²Maaⁿ ní ndís'tií hermanos yeⁿé, neⁿé chí cadíínuuⁿ nī chí tanducuéⁿe chí ch'eenú chíí ní diiíⁿ chí 'yaaⁿ ca 'iiⁿyāⁿ ngíí n'giindiveéⁿ yā nduudu cuaacu chí ngai yeⁿe Cristo. ¹³'Tífcā chíí chí taanduvéé soldados chí dííⁿ ntiíⁿnyuⁿ na palacio yeⁿe César ndúúcū taanduvéé 'iiⁿyāⁿ, nducyaaca yā deenu yā chí 'úú canee preso na vácūⁿ cucáávā chí dííⁿ ntiíⁿnyuⁿ yeⁿe Cristo. ¹⁴Ní néené 'yaaⁿ hermanos chí i'téenu yā Señor Jesucristo taachi cadíínuuⁿ yā chí canee vácūⁿ nguéé di'va^a yā naati neⁿé yā caaⁿmaⁿ cá yā nduudu ngai chí nduudu cuaacu yeⁿe Ndyuūs ndúúcū confianza nanááⁿ Cristo miiⁿ.

¹⁵Cuaacu chí náⁿa yā ní ngaⁿa yā nduudu ngai yeⁿe Cristo cáávā chí dingueéé yā yeⁿé ní cáávā chí neⁿe yā 'caa'va yā nduucú. Ní tanáⁿa yā ní ngaⁿá yā ndu-

udu ngai miiⁿ ti cuaacu chi neⁿé yā diíⁿ yā ní neⁿé yā cunnee yā 'úú. ¹⁶Naati 'iiⁿyāⁿ s'eeⁿ vmnaaⁿ nguεε ngaⁿa yā nduudu ngai yeⁿe Cristo ndúúⁿcū nuuⁿmaⁿ staava yeⁿé yā naati diíⁿ yā chi 'iiⁿyāⁿ caⁿa yā ndúúⁿcū yā. Diíⁿ yā ti neⁿé yā chi 'úú ní nguεéⁿ yeⁿé yā. Ní cadíⁿnuuⁿ yā chi diíⁿ yā chi 'úú n'geenuⁿ ngii ca taachi canuúⁿ váⁿcūū. ¹⁷Ní 'iiⁿyāⁿ cuayi-ivi ní ngaⁿá yā nduudu ngai miiⁿ ti neⁿé yā 'úú. Ní deenú yā chi Ndyuūs tee yā 'úú ntiíⁿnyuⁿ yeⁿé yā chi ngaⁿá nanááⁿ 'iiⁿntyéⁿē tááⁿcā chi diíⁿ ntiíⁿnyuⁿ yeⁿé Ndyuūs ní ngaⁿá nduudu cuaacu yeⁿe evangelio chí nduudu ngai yeⁿe Cristo. ¹⁸Naati ¿de'ē ituneéⁿ? 'Āā tuucá nūⁿ nduuti chi 'iiⁿyāⁿ caaⁿmáⁿ yā nduudu ngai miiⁿ ndúúⁿcū nuuⁿmáⁿ staava yeⁿé yā o cáávā chi nguéé neⁿé yā 'úú, nducyaacá yā ngaⁿa yā nduudu ngai yeⁿe Cristo. Ní cáávā chuū 'úú ní yeenuⁿ, ní yeenu taavi cá.

¹⁹Caati deenú chi yeⁿe nducueⁿē chi chó'oo yeⁿé, n'daacā cuuvi yeⁿé caati ndís'tií ní ngaⁿangua'á ní cáávā 'úú. Ní Jesucristo nginneé yā 'úú cucáávā Espíⁿritu yeⁿé yā. ²⁰Ní maaⁿ chuū chi neⁿé chi dicuaacu chi cuuvi diíⁿ. Nguéé 'cuínaáⁿ yeⁿē mar 'áámá naaⁿ naati ngaⁿá nduudu ngai yeⁿe Cristo cueⁿe daāⁿmaⁿ ndúúⁿcū nducueⁿē confianza tan'dúúⁿcā chi diíⁿ maaⁿ, 'tiicá ntúⁿ cuuvi diíⁿ cueⁿe daāⁿmaⁿ. Ní 'íⁿcú 'iiⁿyāⁿ cuuvi n'diichí cá yā Cristo chi ch'εete ca yā cucáávā 'úú, 'áará chí 'úú cunduichí o 'áará chí 'úú 'āā n'dií. ²¹Ní cucaavā 'úú, vida yeⁿé ní Cristo níⁿcú nduuti chí 'cuúví 'āā diíⁿ ganar caati 'úú caneé ndúúⁿcū Cristo. ²²Ní nduuti chí candií ca cuneé ca na iⁿyeⁿéⁿdí 'cūū ndúúⁿcū cuerpo yeⁿé, tuu'mi ní cuuvi diíⁿ ca ntiíⁿnyuⁿ yeⁿe Señor Jesucristo yeⁿē yú. Ní candéé nduudu yeⁿe yā nanááⁿ 'iiⁿyāⁿ níⁿcú 'iiⁿyāⁿ cuuvi cu'téenu yā Ndyuūs. Maaⁿ ní nguéé deenú de'ē chi n'daacā ca chi ndεévé cáávā 'úú ²³caati

'úú canuúⁿ nguaaⁿ nduu 'uuví vaanicadíⁿnūⁿ. Ní neⁿé chí 'cuúví níⁿcú caⁿá cunée ndúúⁿcū Cristo caati deenú chi neené n'daacā caavā 'úú. ²⁴Naati cáávā ndís'tií ní n'daacā ca chí 'úú cuneé ca na cuerpo yeⁿé 'tee 'téé ndúúⁿcū ndís'tií. ²⁵Seguro caneé maaⁿ yeⁿe chuū. Ní deenú ti 'úú cuneé ca 'tee 'téé ndúúⁿcū ndís'tií caati ndís'tií cuuvi 'cuaeⁿtinée ní n'daacā ca ní yeenu taaví ní caati i'téenu ní Ndyuūs. ²⁶Túúⁿcā cuneé 'tee 'téé ndúúⁿcū ndís'tií ní taachi ndaá nanááⁿ ndís'tií tuu'mi ní ndís'tií cuuvi yeenu cá ní nducú ti s'uúⁿ ní yeⁿe Cristo s'uúⁿ.

²⁷Di'cuiitú ndís'tií chí dámaaⁿ diíⁿ núú yiiⁿnuⁿ ní chí 'cuaeⁿtinée n'daacā ní taanduvéé chí n'daacā tan'dúúⁿcā chí ngaⁿa nduudu n'dai yeⁿe Cristo. Níⁿcú ndúúⁿti chí ndaá n'diichí ndís'tií o ndúúⁿti chí caneé yaⁿ'ai yeⁿé ndís'tií neⁿé 'caandiveéⁿ yeⁿé ndís'tií. Neⁿé chí 'iiⁿyāⁿ cuuví yaa'ví yā 'úú yeⁿé ndís'tií chí ndís'tií ní n'daacā sneé ní. Ní nduuvidaamá ní ndúúⁿcū 'áámá espíⁿritu nūⁿ ndúúⁿcū 'áámá vaanicadíⁿnūⁿ yeⁿé ní. Ní 'áámá diíⁿ ní ntiíⁿnyuⁿ yeⁿé Ndyuūs ní ngaⁿá ní nduudu ngai yeⁿe Cristo chí evangelio caati 'iiⁿyāⁿ cuuvi cu'téenu yā Cristo. ²⁸Neⁿé 'caandiveéⁿ yeⁿé ní chí nguéé di'va'á ní mar 'áámá yeⁿé 'iiⁿyāⁿ chí contra yeⁿe ní. Caati chuū ní 'áámá seña yeⁿé yā chí nguéé i'téenu yā Cristo ní caⁿá yā infierno. Naati chuū ní 'áámá seña yeⁿé ní chí ndís'tií ní cuuvi ninguaⁿ'ái ní yeⁿe infierno caati chuū ní yeⁿé Ndyuūs. ²⁹Ní Ndyuūs diíⁿ yā 'áámá favor ndúúⁿcū ndís'tií caati nguéé dámaaⁿ chí cu'téenu ní Cristo naati canéé chí 'cuenú ní cuuvi caavā chí i'téenu ní Cristo. ³⁰Ní ndís'tií ndúúⁿcū 'úú 'āā daamá nūⁿ sneé yú chí n'geenu yú ngii cucáávā chí ngaⁿa yú nduudu cuaacu yeⁿé Cristo. Ndís'tií 'āā n'diichí ní cuááⁿ vmnaaⁿ tan'dúúⁿcā chí diíⁿ ntiíⁿnyuⁿ ní ch'eenú chii. Ní maaⁿ ní n'giindiveéⁿ

ntúuⁿ nī tan'dúúca chi dííⁿ ntiiⁿnyuⁿ ní tan'dúúca chi n'geenú ngii.

Cristo ní ndiicúúⁿ yā ní cuayiivi chich'etée yā

2 Ndí'stíi hermanos yeⁿé, nduuti chi Cristo dííⁿ yā animar ndí'stíi ní nduuti chi Cristo tee yā 'viich'etítínuuⁿ ndí'stíi ti neⁿé yā ndí'stíi ní nduuti chi Espíritu N'dai yeⁿé Ndyuūs canée yā ndúúcu ndí'stíi ní nduuti chi neⁿé ní nducyaaca 'iiⁿyāⁿ ní ya'ai 'ífnú nī 'iiⁿyāⁿ tuuⁿmi ní 'tíicā dííⁿ nī. ²Dííⁿ nī chi cuuvi yeenú taavi cá caati snee nī 'túúca. N'dáácā 'cuēetinée nī ndúúcu 'aama vaadi cadífnuuⁿ yeⁿé nī. Ní neⁿé nī dáámá nūuⁿ 'aama nī ndúúcu taama nī tan'dúúca Cristo neⁿé yā s'uúúⁿ. Ní 'tiicá ntúúⁿ neⁿé nī v'í 'aama nī ndúúcu taama nī. Ní nduuvidaamá nī ndúúcu 'áámá espíritu yeⁿé nī ndúúcu 'áámá staava yeⁿé nī. ³Ní nguée dííⁿ nī dendu'ú chi neⁿe maáⁿ nī o caavā chi neⁿé nī ch'etee maáⁿ nī caati ndiicúúⁿ 'cuēetinée nī. Maaⁿ ní ca'áámá ca'aamá nī canée chí nadacadífnuuⁿ nī yeⁿe hermanos yeⁿé nī chi néené n'dai ca hermanos yeⁿé nī nguée ti maáⁿ nī. ⁴Ní mar 'áámá nī nguée n'nuúⁿ nī dendu'ú chi cuuvi yeⁿe maáⁿ nī caati n'nuúⁿ nī ntúuⁿ dendu'u chi n'daacā chi cuuvi yeⁿe tanáⁿā hermanos yeⁿé nī.

⁵Ní nguaaⁿ ndí'stíi ní tan'dúúca chi Cristo nadacadífnuuⁿ yā yeⁿe maáⁿ ya 'tiicá ntúúⁿ ndí'stíi canee chi nadacadífnuuⁿ nī yeⁿe maaⁿ nī. ⁶Ní n'dáá rá chí Cristo miiⁿ ti Ndyuūs 'yā, Cristo nguée 'áá fuerza dííⁿ yā chi cuuvi daamá yā ndúúcu Ndyuūs Chiidá yā. ⁷Naati Cristo s'neeⁿ yā chi ch'etee yeⁿé yā tanducuéⁿe chi canée na va'ai ch'eti nguuvi. Ní tan'dúúca s'uúúⁿ 'tiicá yā. Ní tan'dúúca 'áámá saⁿā chi dichí'vē 'iiⁿyāⁿ, 'tiicā núuⁿ yā. Ní ch'iindiyáaⁿ yā tan'dúúca 'áámá saⁿa yeⁿe iⁿ'yeeⁿdí cūū.

⁸Ní taachi canee yā tan'dúúca saⁿa na iⁿ'yeeⁿdí cūū ndiicúúⁿ n'dai dííⁿ yā ní

ch'iindiveéⁿ yā taanduvée chi ngaⁿā Chiidá yā chi canée na va'ai ch'eti nguuvi. 'Áará chí ch'íi yā na cruz, ch'iindiveéⁿ yā nduudu yeⁿe Chiidá yā ní ca'á yā lugar 'iiⁿyāⁿ s'eeⁿ chi 'caaⁿnúⁿ yā 'iiⁿyāⁿ. ⁹Ní cáavā chi dííⁿ Jesús, Ndyuūs dííⁿ yā chí Jesús ní ch'etee cundaá yā na va'ai ch'eti nguuvi. Ní Ndyuūs ca'á yā 'áámá chí duuchí yā chí ch'etee n'dai nguée ti tanáⁿā 'iiⁿyāⁿ yeⁿe iⁿ'yeeⁿdí cūū. ¹⁰Ní nducyáácá yā canée chí caánti'ya yā taachi 'caandiveéⁿ yā chí duuchi Jesús miiⁿ. 'Tiicá ntúúⁿ nducyaacá yā chí snee yā na va'ai ch'eti nguuvi. 'Tiicá ntúúⁿ nducyaaca yā chí snee yā na yáⁿāa. 'Tiicá ntúúⁿ nducyaaca yā chí snee yā na infierno. ¹¹'Tiicá ntúúⁿ canee chí caaⁿmaⁿ cuaacú yā chí Jesucristo miiⁿ ní 'iivú Ndyuūs. Ní caaⁿmaⁿ cuaacú yā chí néené ch'etee n'dai Ndyuūs chí Chiida yú.

'iiⁿyāⁿ chí i'téenu yā Cristo ní tan'duucā chí dæeve yeⁿe iⁿ'yeeⁿdí cūū 'tiicá yā

¹²Maaⁿ ní ndí'stíi hermanos yeⁿé chí neⁿe taaví, tan'dúúca chí cueⁿe daāⁿmaⁿ i'téenu nī nduudu yeⁿé Ndyuūs taachi canee ndúúcu ndí'stíi, maaⁿ ní i'téenu nī taachi 'áá yaⁿai canee yeⁿé ndí'stíi. Maaⁿ ní 'va'á nī Ndyuūs. Ní ndí'stíi dííⁿ n'daacá nī ti Ndyuūs nadinguáⁿai yā ndí'stíi ní dííⁿ n'daacá nī ndúúcu cuidado yeⁿe nducuéⁿe. ¹³Cuaacu chí Ndyuūs dííⁿ yā chí ndí'stíi neⁿé nī dííⁿ nī nducuéⁿe chí n'daacā. Ní Ndyuūs cunnee yā ndí'stíi chí dííⁿ nī. Ní 'cuiinú nī chiiⁿ chí dííⁿ nī tan'dúúca chí neⁿé yā chííⁿ chí n'daacā n'dai.

¹⁴Maaⁿ ní ndí'stíi dííⁿ nī nducuéⁿe ní nguée cueⁿdíití nī ndíí nguée 'cuuⁿmáⁿ nī. ¹⁵Ní ndúúti chí dííⁿ nī 'tuucā mar 'áámá 'iiⁿyāⁿ nguée cuuvi caaⁿmáⁿ yā nuuⁿndi yeⁿé nī o nguée n'daacā idiíⁿ nī caati deenú yā chí ndí'stíi daiyá Dendyuūs ndí'stíi. Ní nguée véé nuuⁿndi yeⁿé nī nguaaⁿ 'iiⁿyāⁿ chí nguée

i'téenu yā Ndyuūs ní nguéé n'daacā idiíⁿ yā. Ní tan'dúucā 'áamá 'ííⁿnyúⁿ ngíí yāⁿāa taachi maāiⁿ 'tiicá nī. ¹⁶Ní can-deé nī nduudu cuaacu yeⁿe Cristo nanááⁿ 'iiⁿyāⁿ ti nduudu miiⁿ diiⁿ chi 'iiⁿyāⁿ cuuvi cunduuchí yā cueⁿe daāⁿmaⁿ caati 'úú ní cuuvi yeenú taavi nguuvi chi ndaa Cristo taama vmnéⁿēe. Ní deenú chi nguéé tandii rá díⁿ ndu'ú 'úú ndíí nguéé nduu tandii rá díⁿ ntiíⁿnyuⁿ yeⁿé Ndyuūs nguaaⁿ ndís'tií. ¹⁷Ndúúti chi nca'á vida yeⁿe maáⁿ ní ch'ii caavā nti-iⁿnyuⁿ yeⁿé Ndyuūs, tuuⁿmi ní cáávā chi 'āā itéenu nī Ndyuūs ní díⁿ nī ntiíⁿnyuⁿ yeⁿé yā, tanducuéⁿē chuū ní tan'dúucā 'áamá ofrenda nanááⁿ Ndyuūs 'tíicā. Ní 'úú ní yeenú, ní cuuvi yeenú ndúúcu nī. ¹⁸'Tiicá ntúúⁿ cáávā chuū ndís'tií cuuvi yeenú nī. Ní cuuvi yeenú ntúúⁿ nī nduucú.

Yeⁿé hermano Timoteo ndúúcu hermano Epafrodito

¹⁹Nduuti chi Señor Jesucristo neⁿé yā chi 'úú idiíⁿ chiiⁿ chi nadacadíínuúⁿ chi díⁿ, tuuⁿmi ní caⁿ'á dicho'ó Timoteo nanááⁿ ndís'tií nguuvi chi cuchíi. Maaⁿ nífcú cuuvi yeenú taachi cadi-inúúⁿ ní cuuvi deenú táácā snee ndís'tií. ²⁰Ti nguéé véé táámá compañero yeⁿé chi dáámá nadacadíínuuⁿ sa nduucú tan'dúucā Timoteo miiⁿ. Ní n'daacā idiíⁿ sa cuidado yeⁿé ndís'tií. ²¹N'dee n'dái 'iiⁿyāⁿ iⁿnuúⁿ yā chi n'daacā yeⁿé maáⁿ yā ní nguéé díⁿ yā dendu'ú chi nti-iⁿnyuⁿ yeⁿe Cristo Jesús. ²²Naati ndís'tií ní deenú nī yeⁿe Timoteo chi n'daacā canee sa yeⁿe nducuéⁿē. Ní deenú nī chi saⁿ'a miiⁿ tan'dúucā daiyá chi dichíí'vē sa 'úú, 'tíicā sa taachi ngaⁿ'á 'nū evangelio chí nduudu ngai yeⁿé Cristo. ²³Sáⁿ'a 'cūū nadacadíínuúⁿ chi dicho'ó saⁿ'ā nanááⁿ ndís'tií naati neⁿé cadiinuúⁿ vmaāⁿ táácā 'cuenú asuntos yeⁿé núúⁿ niíⁿyūⁿ. ²⁴Maaⁿ ní véé confianza yeⁿé ndúúcu

Ndyuūs chi núúⁿ niíⁿyūⁿ cuuví ndaa maáⁿ ní n'diichi ndís'tií.

²⁵Ní nadacadíínuúⁿ ntúúⁿ chi dicho'ó yeⁿe ndís'tií hermano Epafrodito. Saⁿ'ā miiⁿ idiíⁿ sa ntiíⁿnyuⁿ nduucú ní diiⁿ sá luchar nduucú. Saⁿ'ā miiⁿ ndís'tií maáⁿ nī dicho'ó nī saⁿ'ā nanaáⁿ chi cuuvi cunnee sa 'úú ndúúcu necesidades yeⁿé. ²⁶Saⁿ'ā miiⁿ neenē neⁿe sa n'diichi sa nducyaaca ndís'tií ní neenē nadacadíínuuⁿ sa yeⁿe ndís'tií caati ndís'tií n'giindiveéⁿ nī chí ngíitā sa. ²⁷Cuaacu níⁿnyúⁿ chí néené ya'ai chiitā sa ti 'āā cháa 'cuūví sa. Naati Ndyuūs ní ya'āi 'iinú yā saⁿ'ā nī nguéé dá-maāⁿ saⁿ'ā miiⁿ caati ndúúcu 'úú ti 'úú nguēē cunee ndaāchí yiinú cá de'ē ca chi canéé yeⁿé. ²⁸Ní cáávā chuū neⁿe cá dicho'ó saⁿ'ā Epafrodito nanááⁿ ndís'tií ní ndís'tií cuuvi yeenú nī taachi snaaⁿ nī taama vmnéⁿēe saⁿ'ā. Ní 'tiicá ntúúⁿ 'úú nguéé nadacadíínuuⁿ ndaachí yeⁿé nī. ²⁹Ní taachi ndaa sa nanááⁿ ndís'tií, 'cuáaⁿ nī Epafrodito ndúúcu vaadi yeenú caati saⁿ'ā miiⁿ hermano yeⁿé nī ti i'téenu sa Señor Jesucristo yeⁿe yú. Ní díⁿ nī honrar tanáⁿ'a yā chi díⁿ yā nti-iⁿnyuⁿ yeⁿé Ndyuūs tan'dúucā saⁿ'ā miiⁿ. ³⁰Caati 'áará chí néené chíitā sa nī 'āā cháa 'cuūví sa cucáávā chi diiⁿ sa nti-iⁿnyuⁿ yeⁿé Cristo, nguéé nadacadíínuuⁿ sa yeⁿe vida yeⁿe maāⁿ sa ndúúcu peli-gro chi cuuvi 'cuūví sa caati dichíí'vē sa 'úú. Ní diiⁿ sa ntiíⁿnyuⁿ yeⁿé chi ndís'tií maáⁿ nī neⁿé nī díⁿ nī naati nguēē cuuvi díⁿ nī.

Pablo yaa'ví yā contra yeⁿe 'iiⁿyā Israel chi necio yeⁿe ley yeⁿé yā

3 Maaⁿ ní ndís'tií hermanos yeⁿé ngaⁿ'á ngíi ndís'tií chi canéé chi cuuvi yeenú nī ti yeⁿe Señor Jesucristo ndís'tií. Ní cáávā 'úú nguéé de'ē vee chí di'vaachi 'úú taachi dinguúⁿ yeⁿe ndís'tií táámá vmnéⁿēe chi cuuvi yeenú nī, ti canéé chí díⁿ nī cáávā chí cho'oo n'dai yeⁿé nī. ²Ndís'tií ní díⁿ nī cuidado yeⁿe

'iiⁿyāⁿ chi tan'dúúicā 'yaānā ti 'tiicá yā ti neⁿé yā circuncidar cuerpo yeⁿe saⁿa chi nguéé saⁿā Israel sa. Nguéé n'daacā dííⁿ yā chi nadacadínuuⁿ yā chi canee chi díí yā circuncidar cuerpo yeⁿe saⁿā s'eeⁿ.³ Ní cuaacu nííⁿnyúⁿ s'uuúⁿ ní tan'dúúicā chi 'āā circuncidado s'uuúⁿ caati s'uuúⁿ dich'ēete yú Ndyuūs ndúúicū espíritu yeⁿe maāⁿ yú. Ní s'uuúⁿ ní yeenu yú ti yeⁿe Señor Jesucristo s'uuúⁿ. Ní nguéé véé confianza yeⁿé yú yeⁿe tan'dúúicā chi 'āā circuncidado cuerpo yeⁿe yú.⁴ Ní 'úú dendú^u cuuví cuneé ndúúicū confianza na vida yeⁿé nanááⁿ 'iiⁿyāⁿ tí 'úú canéé circuncidado. Ní nguéé véé mar 'áámá 'iiⁿyāⁿ chi cuuvi nadacadínuuⁿ cá yā yeⁿe nducuéⁿé chuū ndúúicū confianza tan'dúúicā chi cuuvi 'úú.⁵ Caati taachi chíí nííⁿnfⁿ nguuvi chi ch'iidiyááⁿ 'iiⁿyāⁿ dííⁿ yā circuncidar 'úú ní 'caacá yā seña na cuerpo yeⁿé tan'dúúicā chi dííⁿ yā ndúúicū nducyaaca saⁿā lííⁿ yeⁿe ndaata Israel chí judíos. Ní 'úú ní yeⁿe 'iiⁿyāⁿ Benjamín 'úú. Ní 'úú ní saⁿa yeⁿe 'iiⁿyāⁿ hebreo o Israel 'úú ndíí taachi ch'iindiyaáⁿ caati chiidá ní saⁿā hebreo yā. Ní 'úú ní saⁿa fariseo 'úú ní dííⁿ ndúúicū núúⁿmáⁿ staava yeⁿé chííⁿ chi ngaⁿa ley yeⁿe 'iiⁿyāⁿ yeⁿé ndaata yeⁿé.⁶ Ní 'úú ní neené necio 'úú chí dííⁿ nti-iⁿnyuⁿ yeⁿe yaācū yeⁿe ndaata yeⁿé. Ní 'úú i'nuuⁿca'ái 'iiⁿyāⁿ chí ngeⁿe yaācū yeⁿe 'iiⁿyāⁿ chí i'téenu yā Cristo. Ní dííⁿ nducuéⁿé chí ngaⁿa ley yeⁿé yú. Ní 'iiⁿyāⁿ nguéé cuuvi caaⁿmáⁿ yā chí véé nuuⁿndí yeⁿé.⁷ Naati nducuéⁿé chuū chí nadacadínuuⁿ chí cosas chí ch'ēete chí neené dichííⁿvē caavā 'úú, ní nducuéⁿé dendu^u yeⁿé 'āā chí neéⁿ. Ní maaⁿ ní dichííⁿvē 'úú chí i'teenú Jesucristo.⁸ Ní nguéé nadacadínuuⁿ cá yeⁿe nducuéⁿé dendu^u yeⁿé chí 'úú chí neéⁿ tí dííⁿ cuenta chí dindaí nducuéⁿé dendu^u yeⁿé cáávā chí n'dai taavi ca chí maaⁿ ní i'teenú Jesucristo chí i'ivú. Ní dííⁿ cuenta chí nducuéⁿé dendu^u yeⁿé ní tan'dúúicā

yaācā, 'tíicā véé, cáávā chí n'daáⁿ nducuéⁿé dendu^u yeⁿé cáávā chí i'teenú Cristo. Ní sta'á Cristo tan'dúúicā chí i'ivú 'tíicā yā.⁹ Ní 'tíicā idiíⁿ tí maaⁿ ní 'úú ní yeⁿe Cristo 'úú. Maaⁿ ní canee n'daacā nanááⁿ Ndyuūs. Nguéé cucáávā chí neⁿé canee n'daacā nanááⁿ Ndyuūs cucáávā ley miiⁿ naati cucáávā chí i'teenú Cristo. Ní 'úú ní n'daacā ca 'úú nanááⁿ Ndyuūs caati neⁿé Jesucristo.¹⁰ Níicú 'úú ní dá-maāⁿ neⁿe chí 'úú snaáⁿ Cristo ní canee cuuⁿmiⁿ chí canee ndúúicū maaⁿ poder chí dííⁿ chí nduuchi Cristo yeⁿé nguaaⁿ tináⁿā. Níicú cuuví daamá nducú yā chí 'cuenú cuuvi tan'dúúicā chí Cristo ch'eenú yā chíí ndíí cuuví 'cuūvi tan'dúúicā Cristo ch'ií yā.¹¹ Ní 'tiicá ntúūⁿ 'úú cuuvi deenú chí 'āā cuuví nnduuchí yeⁿé nguaaⁿ tináⁿā.

Diiⁿ yú luchar cáávā premio chí Ndyuūs caⁿa yā téé yā s'uuūⁿ

¹² 'Úú nguéé neⁿé caaⁿmáⁿ ndís'tií chí 'āā tuneéⁿ tanducuéⁿe chuū caati 'āā cuéé ndaa n'daacā 'úú. Naati 'úú candíí cá cuááⁿ vmnaaⁿ ndúúicū chí i'teenú ní ngiínú ndíí taanduvéé tuneéⁿ yeⁿe premio chí cuuvi yeⁿé. Ní vmnááⁿ vmnaaⁿ Cristo miiⁿ dííⁿ yā chí 'úú ní yeⁿé yā 'úú, caati cuuvi cuta'á premio miiⁿ.¹³ Ní ndís'tií hermanos yeⁿé, 'úú maaⁿ nguéé nacadínuuⁿ chí 'āā tuneéⁿ dendú^u cūū. Naati chuū idiíⁿ chí cuuvi naáⁿ nducuéⁿé chí 'āā dííⁿ nguuvi chí chó'oo. Ní dííⁿ chí cuuvi tuneé nducuéⁿé chí cuuvi yeⁿé nguuvi chí cuchíí.¹⁴ Ní 'íicú 'úú cuuvi dííⁿ nducuéⁿé caati cuuvi dííⁿ ganar vida cueⁿe daāⁿmaⁿ chí premio chí cuuvi yeⁿé chí cūneé na va'ai chēeti nguuvi ndúúicū Ndyuūs. Ndyuūs chí canee na va'ai chēeti nguuvi yaa'ví yā s'uuúⁿ chí dátee yā s'uuúⁿ chí cuuvi yeⁿe yú vida cueⁿe daāⁿmaⁿ caati s'uuúⁿ ní yeⁿé Cristo s'uuúⁿ.

¹⁵ Ní nducyaaca yú chí n'daacā snée yú ndúúicū chí i'teenú yú, canee cuuⁿmiⁿ chí

nadacadíínuuⁿ yú 'tíicā chi nguéé tuneeⁿ yú. Ní nduuti chi tanáⁿa ndís'tií nguéé nadacadíínuuⁿ ní 'tíicā, tuu'mi ní Ndyuūs ní 'cuuⁿmiⁿ yā ndís'tií cheē chi cuaacu. ¹⁶Níicú chuū ní néené neⁿe cunéé chí dáámá nūuⁿ cadíínuuⁿ yú n'daacā ní 'cuetinee yú n'daacā ndúúcu chí 'āā deenu yú yeⁿé Ndyuūs.

¹⁷Ndís'tií hermanos yeⁿé dííⁿ ní tan'dúúca chí 'úú idiíⁿ. Ní nadacadíínuuⁿ n'dai ní yeⁿe 'iiⁿyāⁿ chí 'cuetinee n'daacā yā tan'dúúca chí ch'iⁿyí 'nū 'iiⁿyāⁿ ní 'tiicā ntūūⁿ ch'iⁿyí 'nū ndís'tií.

¹⁸Ní néené n'dee cuuví caⁿá ndís'tií chí véé 'yaaⁿ taavi 'iiⁿyāⁿ chí neⁿé yā dííⁿ yā tan'dúúca chí maáⁿ yā neⁿé yā. Ní nguéé neⁿe yā Cristo chí maáⁿ yā ch'ií yā na cruz. Maaⁿ ní ngaⁿá chuū taama vmnéⁿēe ní néené ya'āi 'iinu ndíí chí ngeecú yeⁿé. ¹⁹Ní cáávā 'iiⁿyāⁿ s'eeⁿ ndaā tiempo chí ndái yā. 'Iiⁿyāⁿ s'eeⁿ ní dámaāⁿ neⁿé yā n'nuuⁿ yā chí che'e yā ndúúcu nducuéⁿē chí neⁿe yā. Ní dich'etē maáⁿ yā 'iiⁿyāⁿ taachi canee chí 'cuinaáⁿ yā caavā chí dííⁿ yā. 'Iiⁿyāⁿ s'eeⁿ dámaāⁿ nadacadíínuuⁿ yā yeⁿe nducuéⁿē vicio chí véé iⁿ'yeeⁿdí 'cūū. ²⁰Naati s'uuúⁿ chí yeⁿe Cristo ní yāāⁿ vaacu yú ní va'ai cheeti nguuvi. Ní snéé ngiinu yú Señor Jesucristo yeⁿe va'ai cheeti nguuvi chí ndaa yā taama vmnéⁿēe ní nadinguáⁿái yā s'uuúⁿ. ²¹Ní taachi Cristo ndaa yā, tuu'mi ní n'dááⁿ yā cuerpo yeⁿe yú chí cuerpo ndúúcu nuūⁿndi ndii cuerpo ngai yeⁿe yú chí tan'dúúca cuerpo yeⁿé yā chí deeve n'dai, 'tíicā cuerpo s'uuúⁿ. Ní 'tíicā Cristo caⁿa yā chí dííⁿ yā ndúúcu dáámá poder yeⁿé maáⁿ yā chí yeⁿé chí ngaⁿa n'tiíⁿnyuⁿ yā yeⁿe taanduvéé chí véé.

Canee chí yeenu yú nducuéⁿē tiempo tí s'uuúⁿ ní yeⁿe Cristo s'uuúⁿ

4 Maaⁿ ní ndís'tií hermanos yeⁿé chí neⁿé cáávā nducuéⁿē chuū neené

neⁿé n'diichí ndís'tií. Ndís'tií ní dííⁿ ní chí 'úú ní yeenú ní véé premio yeⁿé tan'dúúca chí corona yeⁿé caati ndís'tií ní i'téenu ní Jesucristo. Canee diitú ní ndúúcu chí i'téenu ní yeⁿe 'iivu yú chí Cristo. 'Úú yaa'ví ndís'tií 'tíicā tí neⁿé taavi ndís'tií.

²'Úú dí'cuítú táⁿā Euodias ní dí'cuítú táⁿā Síntique chí dííⁿ yā chí dáámá nūuⁿ cuuví vaanicadíínuuⁿ yeⁿé yā tan'dúúca chí canee chí diíⁿ hermanos chí i'téenu yā Señor Jesucristo yeⁿé yú.

³Ní dí'cuítú n'dií, saⁿā chí 'áámá canee nduucú na n'tiíⁿnyuⁿ chí cúnnee ní n'daataá hermanas chí dííⁿ yā n'tiíⁿnyuⁿ nduucú. N'daataá s'eeⁿ ní dichí'vē yā 'úú naachi 'úú ngaⁿá nduudu ngai yeⁿé Cristo chí nadanguáⁿai yā nducyaaca 'iiⁿyāⁿ. Ní cúnnee ní saⁿā Clemente ndúúcu tanáⁿa yā chí nginneé yā 'úú ní 'iiⁿyāⁿ s'eeⁿ chí duuchí yā ní canéé nguūⁿ na libro yeⁿé Ndyuūs naachi canéé nguūⁿ chí dúúchí nducyáácá 'iiⁿyāⁿ chí canduuchí yā cueⁿe daāⁿmaⁿ.

⁴Ndís'tií canéé chí yeenú ní nducuéⁿē tiempo caati ndís'tií ní yeⁿe Señor Jesucristo ndís'tií. Ní 'tíicā caaⁿmaⁿ n'tuúⁿ taama vmnéⁿēe chí canee chí cuuví yeenú ní. ⁵Ní nducyaaca 'iiⁿyāⁿ cuuvi snaáⁿ yā ndís'tií chí 'iiⁿyāⁿ n'dái taavi ndís'tií. Ní ndís'tií deenú ní chí n'nuúⁿ canee Señor Jesucristo yeⁿé yú.

⁶Ní nguéé de'ē vee nadicadíínuuⁿ ní yeⁿe tanducuéⁿē. Ní taachi caaⁿmaⁿngua'á ní cuuví ní Ndyuūs nducuéⁿē chí neⁿé ní. Ní taachi caacá ní Ndyuūs cucáávā chiiⁿ chí neⁿé ní ní ca'a n'tuúⁿ ní gracias Ndyuūs.

⁷Tuu'mi ní Ndyuūs téē yā vaadi 'diííⁿ yeⁿé yā chí ch'etē ca chí nguéé cuuvi tuumicadíínuuⁿ ní yeⁿé. Níicú vaadi 'diííⁿ miíⁿ ní nguáín'dai ní na staava yeⁿé ní ndúúcu vaanicadíínuuⁿ yeⁿé ní caati ndís'tií ní yeⁿe Cristo ndís'tií.

**Nadacadínuuⁿ nī yeⁿe
nducuéⁿē chi n'daacā**

⁸ Ní ndís'tiī ní yeⁿe nducuéⁿē dendú'ū nadacadínuuⁿ nī yeⁿe nducuéⁿē chi nduudu cuaacu, ní yeⁿe nducuéⁿē chí n'dai chí diiⁿ yú respetar, ní yeⁿe nducuéⁿē vaadi cuaacu, ní yeⁿe nducuéⁿē chí dēve, ní yeⁿe nducuéⁿē chí neⁿe Ndyuūs chí nadacadínuuⁿ nī, ní yeⁿe nducuéⁿe chí 'iiⁿyāⁿ deenu n'dái yā chí n'daacā. Ní nadacadínuuⁿ nī yeⁿe tanducuéⁿē chí n'daacā ca chí cuuví nī caaⁿmáⁿ nī yeⁿe 'tíicā, dē'e chúucā n'daacā chuū.

⁹ Níicú díⁿ nī dendu'ū chí ch'eeⁿ nī yeⁿé tan'dúucā chí ch'iⁿyí ndís'tiī. Ní díⁿ nī tan'dúucā chí ch'iⁿdivééⁿ nī yeⁿé chí n'geéⁿ ndís'tiī ní tan'dúucā chí n'diichí nī chí 'úú idiíⁿ. Díⁿ nī nducuéⁿē chuū. Ndyuūs chí canee ndúucū vaadi 'diiíⁿ yeⁿé yā ní canéé yā ndúucū ndís'tiī ndúucū vaadi 'diiíⁿ yeⁿé yā.

**'Iiⁿyāⁿ yeⁿe yāāⁿ Filipos
ca'á yā ofrendas Pablo**

¹⁰ Úú ní yeenú taavi ti yeⁿé Señor Jesucristo ní caati ndís'tiī ní 'āā n'gaacu ntúuⁿ nī ní nadacadínuuⁿ nī yeⁿe 'úú. Deenú chí ndís'tiī 'āā n'gaacú nī yeⁿe tiempo chí ch'ó'oo naati nguéé cuuvi cunneé nī 'úú, 'áará chí neⁿé nī. ¹¹ Ní 'úú nguéé ngaⁿá ndís'tiī yeⁿe chí nguēé véé yeⁿé caati maaⁿ ní 'āā deenú chí cuuvi yeenú ndúucū de'ē chí véé yeⁿé. ¹² Ní 'āā deenú táacā chí díⁿ taachi pobre 'úú, ní 'āā deenú táacā chí díⁿ taachi véé cá yeⁿé. Ní 'āā deenú ntúuⁿ táacā chí cuneé ndúucū 'āā de'ē nūuⁿ chí cúchiⁿ yeⁿé, nduuti chí véé cá chí che'é o nduuti chí nguéé véé chí che'é, o nduuti chí véé taavi ca yeⁿé o nduuti chí nguéé de'ē veⁿe yeⁿé. Ní yeⁿe taanduvéé chuū ní deenú táacā cuuvi díⁿ. ¹³ Ní 'úú ní cuuví díⁿ tanducuéⁿē chí cho'ō yeⁿé caati Cristo itéé yā

fuerzas 'úú. ¹⁴ Ní ndís'tiī ní n'daacā idiíⁿ nī chí chinnee nī 'úú taachi n'geenú ngii.

¹⁵ Ní ndís'tiī 'iiⁿyāⁿ yeⁿe yāāⁿ Filipos deenu n'daacā nī taachi cho'ó na yāⁿāa Macedonia ní tuca'á cāⁿa nduudu yeⁿe Cristo chí nadanguáⁿai yā 'iiⁿyāⁿ na yāⁿāa Macedonia miiⁿ. Deenú nī chí taachi can'daá cueⁿé chí dámaaⁿ ndís'tiī chí yeⁿé yaācū Filipos tee nī 'úú tumi chí ofrenda yeⁿe yaācū yeⁿé nī chí nnee nī 'úú. ¹⁶ Ní taachi 'úú caneé na yāāⁿ Tesalónica, ndís'tiī ní tee nī 'áámá 'uūví cuuvi ayuda ndúucū tuumí taachi 'āā véé necesidades yeⁿé. ¹⁷ Nguéé dámaaⁿ nacadínuuⁿ yeⁿe chí cuta'á dē'e tuumí chí ndís'tiī téé nī 'úú naati neⁿé chí snāⁿ chí cuuvi véé cá yeⁿe ndís'tiī, chíiⁿ chí Ndyuūs caⁿá yā téé yā ndís'tiī cucáavā chí ndís'tiī nnee nī 'úú. ¹⁸ 'Úú ní yaa'ví ndís'tiī chí 'āā sta'á nducuéⁿē chí tee nī 'úú ní ngo'o ca cáavā necesidades yeⁿé. Ní maaⁿ ní chí sta'á yeⁿe hermano Epafrodito dendu'ū ofrenda chí dicho'o ndís'tiī. Ndúucū chuū ní véé cá yeⁿé. Ní nducuéⁿē ofrenda chí dicho'o ndís'tiī 'úú, ní chuū ní 'áámá ofrenda chí n'dai taavi nanááⁿ Dendyuūs. Ní tan'dúucā 'áámá ofrenda chí ca'á nī Ndyuūs, tíicā ofrenda yeⁿé nī. Ní ofrenda miiⁿ cosas chí Ndyuūs neⁿe taavi yā. ¹⁹ Ní maaⁿ ní Ndyuūs yeⁿe yú téé yā ndís'tiī nducuéⁿē dendu'ū chí necesidades yeⁿé nī yeⁿe vaadi 'cuiica n'dai chí véé yeⁿé yā chí n'dee taavi ca. Chuū ní Ndyuūs díⁿ yā ti s'uúuⁿ ní yeⁿé Cristo Jesús s'uúuⁿ. ²⁰ Maaⁿ ní caaⁿmaⁿ yú chí Ndyuūs Chida yú, nī ch'eete ca ní ndēvē n'dái cá caati cueⁿe daāⁿmaⁿ 'tiicā yā.

'Cuiinū carta miiⁿ ndúucū saludos

²¹ Maaⁿ ní ngaⁿá ndúucū nducyaaca ndís'tiī chí i'téenu nī Jesucristo: N'dái nī, ngaⁿá. Hermanos yeⁿe yú chí canéé nducú: N'dái ndís'tiī, ngaⁿa yā. ²² Ní nducyáacá 'iiⁿyāⁿ chí snéé yā 'muuⁿ nducú ní i'téenu yā Cristo: N'dai ndís'tiī,

ngaⁿa yā. 'Tiicá ntúūⁿ 'iiⁿyāⁿ chi snéé
na va'ai yeⁿe César chi emperador yeⁿe
Roma: N'dai ndís'tiī, ngaⁿá yā.

²³Ní Jesucristo yeⁿe yú itée yā
nducyaaca ndís'tiī nducuéⁿē chi n'dai
taavi ca yeⁿé yā. 'Tíicā cuuvi.

CARTA YEⁿE IIⁿYĀⁿ YEⁿE YĀĀⁿ COLOSAS

Pablo idinguúⁿ yā yeⁿe 'iiⁿyāⁿ chi naⁿa yāacū na yāāⁿ Colosas

1 'Úú Pablo 'úú ní 'úú apóstol yeⁿe Señor Jesucristo caati 'tíicā neⁿé Ndyuūs. ²'Úú ní ndúúcu hermano Timoteo idinguúⁿ carta 'cūu yeⁿe 'iiⁿyāⁿ chi yeⁿe Ndyuūs ní i'téenu yā Jesucristo, 'iiⁿyāⁿ chi snée yā na yāāⁿ Colosas. Neⁿé chi Ndyuūs Chiida yú téé yā ndís'tiī vaadi n'dai ca yeⁿe yā ndúúcu vaadi 'diíⁿ yeⁿe yā.

Pablo ngaⁿangua'á yā caava 'iiⁿyāⁿ chi i'téenu yā Jesucristo

³Taachi ngaⁿangua'á nū, 'úú ndúúcu Timoteo cueⁿe daāⁿmaⁿ ca'á nū gracias Ndyuūs Chiidá Señor Jesucristo yeⁿe yú caavā ndís'tiī. ⁴'Tíicā dííⁿ nū ti caati náⁿā hermanos yeⁿe yú ndaá yā nanááⁿ nús'uu 'āā yaa'ví yā yeⁿe ndís'tiī tan'dúúca chi i'téenu nī Cristo Jesús ní tan'dúúca chi dineⁿe nī nducyáácá 'iiⁿyāⁿ chi yeⁿe Ndyuūs. ⁵Chuū ní cucáāvā chí snée ngiinú nī chiiⁿ chi cuuvi yeⁿe nī chi Ndyuūs nguáin'dai yā na va'ai chēeti nguuvi cáāvā ndís'tiī. Ní 'āā ch'iindiveéⁿ nī nduudu cuaacu chi yeⁿe Cristo. Ní nduudu cuaacu miiⁿ ní cuuvi nanguaⁿ'ai 'iiⁿyāⁿ ní véé chi cuuvi yeⁿe nī. ⁶Ní nduudu miiⁿ ní 'iiⁿyāⁿ ngaⁿ'á yā nanááⁿ ndís'tiī, ní maaⁿ ní 'iiⁿyāⁿ ngaⁿ'á yā nanááⁿ 'iiⁿyāⁿ chi snee núú'máⁿ iⁿyeēⁿdī. Ní tan'dúúca 'áámá cosecha chi véé n'gui'i yeⁿe, 'tíicā nduudu miiⁿ caati n'giita nduudu miiⁿ. 'Tiicá ntúūⁿ nduudu miiⁿ 'cuiita na staava yeⁿe ndís'tiī ndii nguuvi chí ch'iindiveéⁿ nī yeⁿe. Ní tumicadínuuⁿ cá nī chēé chi cuaacu yeⁿe vaadi n'dai yeⁿe Ndyuūs yeⁿe yú chi Ndyuūs tee yā s'uuúⁿ ní taacā Ndyuūs dineⁿe yā s'uuúⁿ. ⁷Chuū ní ch'éeⁿ nī

yeⁿe saⁿā Epafras chi saⁿā chi neené neⁿe yú. Ní dáámá nginnee sa s'uuúⁿ. Ní 'áámá canee sa na ntiiⁿnyuⁿ yeⁿe Cristo. Ní dííⁿ sa ntiiⁿnyuⁿ yeⁿe Cristo nguaaⁿ ndís'tiī. ⁸Saⁿā miiⁿ ní ndaa sa nanááⁿ nús'uu ní ngaⁿ'a cuaacu sa yeⁿe ndís'tiī. Ní ngaⁿ'a sa chí ndís'tiī dineⁿe nī 'iiⁿyāⁿ caati Espíritu N'dai yeⁿe Ndyuūs canee yā ndúúcu ndís'tiī.

⁹Ní cáāvā chuū ntúūⁿ nús'uu ndii tiempo chí ch'iindiveéⁿ nū yeⁿe ndís'tiī nguéé s'neeⁿ naaⁿ 'nū ca'angua'á 'nū caavā ndís'tiī. Ngiiá 'nū chí maaⁿ Ndyuūs ch'i'í yā ndís'tiī nducueⁿe chí neⁿe yā chí dííⁿ nī. Ní ngiiá 'nū Ndyuūs chí Espíritu N'dai yeⁿe Ndyuūs téé yā ndís'tiī nducueⁿe vaadi deenu ndúúcu vaanicadínuuⁿ chí yeⁿe Ndyuūs. ¹⁰Ngaⁿangua'á 'nū chí ndís'tiī cuuvi 'cuetinéé n'daacá nī nanááⁿ Jesucristo ti yeⁿe yā s'uuúⁿ. Ní cueⁿe daāⁿmaⁿ dííⁿ nī tan'dúúca chí neⁿe Señor yeⁿe yú. Ní 'íicú véé n'gui'i yeⁿe nī yeⁿe tanducueⁿe chí n'daacá chí idiíⁿ nī. Ní cuuvi 'cueēⁿ ca nī yeⁿe vaadi deenu chí yeⁿe Dendyuūs. ¹¹Ngiiá 'nū Ndyuūs chí téé yā ndís'tiī poder yeⁿe yā chí ch'ēete ca chí cuuvi dííⁿ nī ntiiⁿnyuⁿ yeⁿe nī ndúúcu poder chí yeⁿe Ndyuūs. Ní 'íicú ndúúcu paciencia cuuvi cuchéé nī yeⁿe tanducueⁿe chí 'iiⁿyāⁿ dííⁿ yā ndúúcu nī. Ní yeenú nī. ¹²Ní ndís'tiī canee chí ca'á nī gracias Ndyuūs Chiida yú caati Ndyuūs dííⁿ yā ndúúcu yú chí véé parte yeⁿe yú naachi cuuvi yeⁿe yú ndúúcu 'iiⁿyāⁿ s'eeⁿ chí i'téenu yā Cristo. Ní caⁿ'a yā chí téé yā s'uuúⁿ chí cuuvi yeⁿe yú ndúúcu 'iiⁿyāⁿ s'eeⁿ chí yeⁿe yā taachi ndaa yú na lugar chí deēve ca naachi Ndyuūs ngaⁿ'a ntiiⁿnyuⁿ yā yeⁿe. ¹³Canee chí ca'á nī gracias Ndyuūs caati nadanguaⁿ'ai yā s'uuúⁿ yeⁿe saⁿā chí ngaⁿ'ā ntiiⁿnyuⁿ yeⁿe maaíⁿ. Ní Ndyuūs dicho'ó yā s'uuúⁿ naachi canee Jesucristo chí ngaⁿ'ā ntiiⁿnyuⁿ yā. Jesucristo ní Daiyá Ndyuūs

chi Ndyuūs neⁿe taaví yā. ¹⁴Nífcú Jesucristo cuaf yā s'uuúⁿ ndúúcuⁿ precio chi yuúúⁿ yeⁿé yā taachi ch'iⁿi yā na cruz cucáavā s'uuúⁿ. Ní cáavā chuū Ndyuūs nadach'ēecú yā s'uuúⁿ yeⁿe nuūⁿndi yeⁿe yú.

Chi nduuvidaama yú ndúúcuⁿ Ndyuūs cucáavā chi Cristo ch'iⁿi yā

¹⁵Jesucristo ní tan'dúúca Ndyuūs chi-ida yú chi nguéé inaaⁿ yú, 'tiicá yā. Ní Cristo miiⁿ 'āā canéé yā vmnááⁿ vmnaaⁿ chi din'dái yā núúⁿmáⁿ iⁿ'yeeⁿdí. ¹⁶Ní Ndyuūs yeⁿe yú ndúúcuⁿ Cristo miiⁿ din'dái yā tanducuéⁿē dendu'ū chi véé. Din'dái yā tanducuéⁿē dendu'ū chi véé nanguuvi. 'Tiicá ntúūⁿ na yáⁿāa yeⁿē chi inaaⁿ yú ndúúcuⁿ yeⁿē chi nguéé inaaⁿ yú. N'dáá rá chi véé ángeles chi yeⁿe Ndyuūs ndúúcuⁿ ángeles chi yeⁿe yááⁿ'nguiinūⁿ chi ngaⁿā ntiiⁿnyuⁿ na 'yúúné ndúúcuⁿ 'iiⁿntyéⁿē chi ngaⁿá yā ntiiⁿnyuⁿ yeⁿē naciones na iⁿ'yeeⁿdí 'cūū ndúúcuⁿ 'iiⁿntyéⁿē ndúúcuⁿ poder yeⁿe yā, tanducuéⁿē ní Cristo miiⁿ din'dái yā ní 'iivi yeⁿe tanducuéⁿē. ¹⁷Cristo miiⁿ ní ngaⁿa ntiiⁿnyuⁿ yā yeⁿe tanducuéⁿē dendu'ū. Ní Cristo miiⁿ díⁿ yā chi tanducuéⁿē dendu'ū chi véé canéé lugar yeⁿē ndúúcuⁿ orden. ¹⁸Ní Cristo miiⁿ ní tíⁿ yā yeⁿe cuerpo chi yaācū yeⁿe yā chi nducyaaca 'iiⁿyāⁿ chi i'téenu yā Cristo. Ní ca'á yā vida 'iiⁿyāⁿ chi yeⁿe cuerpo yeⁿé yā. Ní Cristo miiⁿ vmnááⁿ vmnaaⁿ 'iiⁿyāⁿ chi nduuchí yā yeⁿē nguuaaⁿ tináⁿā, caati lugar chi vmnááⁿ vmnaaⁿ cuuvi yeⁿé yā yeⁿe nducuéⁿē dendu'ū chi véé. ¹⁹Ní Ndyuūs Chiida yú neⁿé yā chi Cristo miiⁿ canéé yā ndúúcuⁿ nducuéⁿē poder chi yeⁿé Ndyuūs. ²⁰Ní cucáavā Cristo miiⁿ Ndyuūs Chiida yú neⁿé yā díⁿ yā chi cuuvi yeⁿé Cristo tanducuéⁿē dendu'ū taama vmnéⁿēe tan'dúúcaⁿ tanducuéⁿē chi véé vmnááⁿ vmnaaⁿ na va'ai chēeti nguuvi. 'Tiicá ntúūⁿ cuuvi yeⁿé yā tanducuéⁿē chi véé na iⁿ'yeeⁿdí 'cūū. Ní díⁿ

yā chi véé vaadi 'diifⁿ cáavā yuuúⁿ yeⁿē Jesucristo chi can'daā taachi ch'iⁿi yā na cruz.

²¹Ní tiempo chi 'āā chó'ōo ndís'tii ní tan'dúúcaⁿ 'iiⁿyāⁿ chi snúuⁿ yā yúúni 'tíicā ndís'tii. Ní nguēe deenú nī Ndyuūs caati díⁿ ní cosas chi nguéé n'daāca. Ní ndís'tii ní contra yeⁿe Ndyuūs ndís'tii. Ní nguéé n'daacā staava yeⁿé nī. Naati maaⁿ ní Ndyuūs nch'ēecú yā nuuⁿndi yeⁿe ndís'tii. Maaⁿ ní amigos yeⁿé Ndyuūs ndís'tii. ²²Ní díⁿ yā chi nduuvidaamá nī ndúúcuⁿ Ndyuūs cáavā chi cuerpo yeⁿe Jesucristo ch'iⁿi na cruz. Ní Jesucristo ch'iⁿi yā caavā s'uuúⁿ chi ndaa yā ndúúcuⁿ s'uuúⁿ nanááⁿ Ndyuūs Chiida yú. Ní Cristo ch'iⁿi yā chi s'uuúⁿ ní yeⁿé Ndyuūs s'uuúⁿ ní deēve vida yeⁿē yú. Nífcú 'āā ntéé caaⁿmaⁿ Ndyuūs chi véé nuuⁿndi yeⁿe yú. ²³Maaⁿ ní canee chi i'téenu n'daacā nī nduudu cuaacu ní cunee diitú nī ndúúcuⁿ chi i'téenu nī chi yeⁿe Cristo. Ní cu'téenu cá nī nduudu cuaacu yeⁿe Jesucristo chi ch'iⁿi chéé chi cuuvi yeⁿe yú ní yeⁿē chi cunee ngiinu yú. Ní nguéé diví nī yeⁿe nduudu cuaacu yeⁿe Jesucristo ti n'daacā canee nī nanááⁿ yā ní cunee ngiinu cá nī. Nduudu cuaacú 'cūū yeⁿe Jesucristo miiⁿ maaⁿ ní 'iiⁿyāⁿ s'eeⁿ cheⁿe yā candee yā chí cuuvi yeⁿē nducyáácá 'iiⁿyāⁿ chi snéé na iⁿ'yeeⁿdí 'cūū. Ní nduudu cuaacu miiⁿ chiⁿiⁿ chi 'úú Pablo ngaⁿa caati 'tíicā ntiiⁿnyuⁿ yeⁿé.

Pablo nginneé yā 'iiⁿyāⁿ chi yeⁿe Jesucristo

²⁴Maaⁿ ní yeenú taaví yeⁿē chi n'geenú ngii cucáavā ndís'tii chi i'téenu nī nduudú 'cūū. Ní 'tíicā maaⁿ ní yeenú taaví chi 'cuenú cuuvi na cuerpo yeⁿé tan'dúúcaⁿ chi ch'eenú chií Cristo na cuerpo yeⁿe yā cucáavā 'iiⁿyāⁿ chi i'téenu yā 'iiⁿyāⁿ ní yeⁿe cuerpo yeⁿe yā. Ní 'tíicā díⁿ cumplir vaadi ya'ai yeⁿe Cristo cucáavā 'iiⁿyāⁿ yeⁿe yā. ²⁵Ndyuūs tee yā ntiiⁿnyuⁿ 'cūū yeⁿé chi díⁿ nti-

iⁿnyuⁿ yeⁿe yaacū yeⁿé yā. Ní dííⁿ nti-
iⁿnyuⁿ yeⁿe Ndyuūs nguaaⁿ ndís'tií chi
nguéeⁿ yeⁿē ndaata Israel caati 'tíica cu-
uvi cuaacu nduudu yeⁿe Ndyuūs chi
ngaⁿa ndii cuááⁿ vmaaaⁿ. ²⁶Ní nduudú
'cūū nguéeⁿ deenú 'iiⁿyāⁿ caati canúúⁿ
n'de'ei ndii tiempo chi 'āā 'cuéeⁿ 'iiⁿyāⁿ
iⁿ'yeeⁿdí 'cūū, naati maaⁿ ní chuū ch'iⁿi
Cristo nanááⁿ 'iiⁿyāⁿ yeⁿé yā. ²⁷Níicú
Ndyuūs neⁿé yā chi nducyáácá 'iiⁿyāⁿ
chi yeⁿé yā, 'iiⁿyāⁿ chi Israel s'eeⁿ yā
ndúúⁿcū 'iiⁿyāⁿ chí nguéeⁿ Israel s'eeⁿ yā,
nducyaaca yā cuuvi deenú yā vaadi 'cui-
ica yeⁿē chi canúúⁿ n'de'ei. Chuū ní
secreto miiⁿ. Cristo caneeⁿ yā ndúúⁿcū
ndís'tií chi nguéeⁿ 'iiⁿyāⁿ Israel yā. Ní
ndúúⁿcū Cristo miiⁿ snee ngiinúⁿ ní chi
caⁿá ní na va'ai ch'etii nguuvii.

²⁸Nús'uu ní ngaⁿá 'nū nduudu cuaacu
yeⁿé Cristo nanááⁿ nducyaaca 'iiⁿyāⁿ. Ní
nducueⁿē ngi'cueéⁿ 'nū 'iiⁿyāⁿ ndúúⁿcū
vaadi deenu caati cuuvi deenú n'daacá
yā nduudu cuaacu yeⁿé Ndyuūs. Ní cu-
uvi yeⁿé Cristo 'iiⁿyāⁿ ní n'daacā caneeⁿ
yā nanááⁿ Jesucristo. ²⁹Ní cáávā chuū
'úú idifⁿ ntiⁿnyúⁿ 'cūū, ní dííⁿ diituú
taavi nducueⁿē tiempo ndúúⁿcū ndu-
cueⁿē poder chi Ndyuūs itée yā 'úú.

2 'Úú neⁿé chi ndís'tií cadíínuuⁿ ní chi
díítuú dííⁿ ntiⁿnyuⁿ caavā ndís'tií ní
cáávā 'iiⁿyāⁿ chi snée na yāāⁿ Laodicea,
ní cáávā 'iiⁿyāⁿ chi nguéeⁿ n'diichi tandii
yā naáⁿ. ²Neⁿé chi nducyáácá 'iiⁿyāⁿ
s'eeⁿ ndúúⁿcū ndís'tií cuuvi diitú ní
ndúúⁿcū staava yeⁿé ní. Ní nguéeⁿ 'va'á ní.
Ní dáámá nadacadíínuuⁿ ní, ní dineⁿé ní
'aamá ní taama ní. Ní deenu cá ní yeⁿe
nducueⁿē vaadi cuaacu, ní diituu caneeⁿ
ní ndúúⁿcū chi i'téenu ní. Ní 'íicú cuuvi
deenu cá ní chiiⁿ chi Ndyuūs cunuúⁿ
n'de'éeⁿ yā chi yeⁿe maaⁿ Jesucristo miiⁿ.
Ní 'íicú cuuvi diituu cá ní ndúúⁿcū chi
i'téenu ní yeⁿe Jesucristo. ³Caati ndúúⁿcū
Cristo miⁿ tanducueⁿē chi véé yeⁿeⁿ
vaadi deenu ndúúⁿcū vaadi cadiiⁿnuuⁿ
ní yeⁿé yā ndúúⁿcū nducueⁿē cosa chi

cunúúⁿ n'de'ei yeⁿe nducyáácá 'iiⁿyāⁿ.
⁴Ní nducueⁿē chuū ngaⁿá chi nguéeⁿ du'ú
vee canche'ei ndís'tií ndúúⁿcū nduudú
yaadi yeⁿé yā. ⁵Ní chuū ngaⁿá caati
'áará chi nguéeⁿ caneeⁿ ndúúⁿcū ndís'tií cu-
uvi deenú ní chi nadacadíínuuⁿ taavi
yeⁿe ndís'tií. Ní yeenú taavi 'úú taachi
n'giindiveⁿ chí n'daacā idiiⁿ ní ní dííttuu
caneé ní ndúúⁿcū nduudu cuaacu yeⁿe
Cristo chi i'téenu ní.

⁶Maaⁿ ní tan'dúúⁿcā chi i'téenu
ní Señor Jesucristo yeⁿé yú 'tiicá
ntúúⁿ ndís'tií chi yeⁿé Cristo caneeⁿ
chi n'g'etinéé n'daacá ní cáávā
Señor Jesucristo yeⁿé yú nginnee yā
ndís'tií. ⁷Ní caneeⁿ chi diiⁿ n'daacá ní
ndúúⁿcū nducueⁿē caati cu'téenu cá ní
Jesucristo. Ní cu'téenu cá ní nguuvii
nguuvii tan'dúúⁿcā chi ch'eēⁿ ndís'tií. Ní
nguéeⁿ ndaacadaamí ní yeⁿe chi i'teenú
ní. Ní cuéⁿé daāⁿmaⁿ ngaⁿá ní, gracias
Ndyuūs ti yeⁿé yā ndís'tií.

Yeⁿé vida ngai yeⁿé 'iiⁿyāⁿ chi yeⁿe Cristo

⁸Maaⁿ ní dííⁿ ní cuidado ndís'tií yeⁿe
maáⁿ ní chí mar 'aámá saⁿā nguéeⁿ cas-
taⁿa sa ndís'tií caavā vaanicadíínuuⁿ
ch'etéⁿ yeⁿē sa ndúúⁿcū nduudu yaadi
yeⁿē sa. Ní nguéeⁿ canche'ei sa ndís'tií
caati nduudu yeⁿē sa chí sta'a sa yeⁿe
vaanicadíínuuⁿ yeⁿe 'iiⁿyāⁿ ní yeⁿe cos-
tumbre yeⁿé 'iiⁿyāⁿ yeⁿé iⁿ'yeeⁿdí. Ndíí
nguéeⁿ sta'a sa yeⁿē vaanicadíínuuⁿ yeⁿe
Cristo.

⁹Caati nducueⁿē chi véé ní yeⁿe
Ndyuūs ndúúⁿcū daiya yā Jesucristo. Je-
sucristo miiⁿ ní Ndyuūs 'yā ní dáámá yā
ndúúⁿcū chiidá yā. 'Tíica yā. ¹⁰Ní ndu-
cueⁿē chi véé ní yeⁿe ndís'tií caati ndís'tií
ní yeⁿe Cristo ndís'tií. Jesucristo miiⁿ ní
ndíí tiiⁿ yā yeⁿe tanducueⁿē 'iiⁿyāⁿ ní
yeⁿe tanducueⁿē 'iiⁿntyéⁿē yeⁿe tandu-
cueⁿē nación ní yeⁿe tanducueⁿē poder
yeⁿe yááⁿnguiniūⁿ chí véé na iⁿ'yeeⁿdí
'cūū. ¹¹Ndís'tií nguéeⁿ 'iiⁿyāⁿ circunci-

dado yā na cuerpo ye"é yā. Naati cáávā chi ndís'tiī ní ye"e Jesucristo ndís'tiī, Cristo ní dí"n yā cuenta chi ndís'tiī tan'dúúcā 'ii"yā"n chí circuncidado yā ndís'tiī taachi Jesucristo nadanguá"ai yā ndís'tiī ye"e poder ye"e nuu"ndi chí véé na cuerpo ye"é nī. ¹² Ní taachi chēed-inuū"ni"n yā ndís'tiī, tuu"mi ní canee nī tan'dúúcā chí ch'ēechí nī na yáinyā"n ndúúcu Cristo ní canee nī tan'dúúcā chí nadacueé"n nī ye"ē nguaa" tiná"ā ndúúcu Cristo. "Tíica rá váá caati i'téenu nī poder ye"e Ndyuūs chí dí"n chí nacuee"n Jesucristo ye"ē nguaa" tiná"ā. ¹³ Ní tiempo chí ch'ó'oo espíritu ye"e ndís'tiī ní n'diī cucáávā nuu"ndi chí dí"n nī. Ní nguéé ndís'tiī 'ii"yā"n circuncidado yā ndís'tiī. Naati maa" ní Ndyuūs tee yā vida cue"e daā"ma"n ndís'tiī dáámá dáámá ndúúcu Cristo ti Ndyuūs nadanch'ēecú yā ye"ē tanducueé"ē nuu"ndi ye"é nī. ¹⁴ Cuáá"n vmaaa"n canee yú ndúúcu nducueé"ē cuenta ye"e nuu"ndi ye"e yú ti nguēē dí"n yú tan'dúúcā chí nga"n a ley ye"é Ndyuūs. Ní cáávā ley mii"n ní cuenta ye"e nuu"ndi ye"e yú dí"n condenar s'uuú". Naati Cristo nadí'v'e yā 'áámá vmné"ēe cuenta ye"e nuu"ndi yú taachi ch'iī yā na cruz cáávā s'uuú". Ní cáávā chí ch'iī yā cáávā s'uuú"n ní tan'dúúcā chí nadatuúví yā ley mii"n ti nguéé cuuvi condenar s'uuu". ¹⁵ Ní taachi Cristo chí ch'iī yā na cruz cuchéé yā ye"e nducueé"ē 'ii"ntyé"ē ye"e espíritu chí nguéé n'daacā ndúúcu poder ye"é yā. Ní dí"n yā chí 'cuinaa"n espíritu s'ee"n nanáá"n nducyáácá espíritus. Ní Cristo chí i"n'í yā nducyáácá 'ii"yā"n chí chéé yā ye"e espíritus.

**In'nuú"n nī nducueé"ē
chí ye"ē va'ai chēeti nguuvi**

¹⁶ Maa" ní nguéé nacadínuu"n nī ye"e 'ii"yā"n chí dí"n yā condenar ndís'tiī caavā dendu'u chí nguéé chí nge'é nī ndúúcu chí ng'i nī o ndúúcu ye"ē chí dí"n nī taachi véé 'viicu s'ee"n ndúúcu 'viicu ye"e

'iiyū ngai ndúúcu 'viicu ye"e sábado chí nguuvi chí ntaaví'tuunú"n 'ii"yā"n. ¹⁷ Nducueé"ē 'viicu ndúúcu chí dí"n 'ii"yā"n ní chí i"n'í ye"e Cristo chí cuchii, naati nducueé"ē chuū cuaacu ní"nyú"n nga"n a chí ye"e Cristo mii"n. ¹⁸ Nguéé nadacadínuu"n nī ye"e 'ii"yā"n chí dí"n yā condenar ndís'tiī caati nga"n a yā chí n'diichí yā visiones. 'Ii"yā"n s'ee"n nadacadínuu"n yā chí n'gēete maá"n yā caavā cosas chí n'diichí yā. 'Ii"yā"n s'ee"n nga"n a yā chí canee chí ndiicuú"n nī maá"n nī ní dich'ēeté nī ángeles. 'Ii"yā"n s'ee"n dí"n yā cosas chí nguéé deenú yā ye"ē ní n'gēete maá"n yā caavā chí nadacadínuu"n yā ye"e cosas chí candē ye"ē maa"n tí"n yā. ¹⁹ 'Ii"yā"n s'ee"n nguéé canee yā ndúúcu nduudu cuaacu ye"é Jesucristo. Cristo mii"n ní ti-i"n ye"e cuerpo ye"é yā chí 'ii"yā"n chí i'téenu yā 'yā. Ní Cristo mii"n ní dí"n yā chí nducueé"ē 'ii"yā"n ye"é yā ní n'giita yā caati i'téenu cá yā ye"é yā. Ní Cristo mii"n dí"n yā chí nducyaa ca 'ii"yā"n ye"é yā canee yā tan'dúúcā chí nduuvi daamá yā tan'dúúcā cuerpo ye"e yú nduuvidaama ye"ē ndúúcu 'iini ndíi nduū. "Tíica dí"n Cristo tan'dúúcā chí ne"e Ndyuūs.

²⁰ Maa" ní ndís'tiī 'āā chí ch'iī nī taachi chí ch'iī Jesucristo. Ní canee nī libre ye"e reglas ye"e i"nyee"dí 'cūū. Maa" ní, ¿d'éē cuuvi chí n'gēetinéé ndís'tiī tan'dúúcā chí ye"e i"nyee"dí 'cūū ndís'tiī? ¿D'éē cuuvi chí i'téenu nī reglas ye"e i"nyee"dí 'cūū chí nga"n a 'tíicā? ²¹ Nguéé tuu"ví nī chuū, nguéé che'é nī cosa 'cūū, ní nguéé cuta'á nī cosa 'cūū na ta'á nī. ²² Ní reglas mii"n chí"n chí 'ii"yā"n din'dái yā ní chí"n chí ca'cuee"n yā 'ii"yā"n. Nducueé"ē reglas 'cūū nguéé dichí'v'e caati Ndyuūs ca'á yā 'ii"yā"n cosas caati cuuvi che'é yā ye"ē. ²³ Cuaacu chí 'ii"yā"n sta'á yā reglas mii"n tan'dúúcā chí chí i"n'í chí ye"ē vaadi deenu ye"é 'ii"yā"n. Reglas mii"n chí i"n'í chí ye"ē religión chí nga"n a chí 'ii"yā"n canee chí dich'ēeté yā ángeles. Ní reglas mii"n chí i"n'í chí 'ii"yā"n canee chí ndiicuú"n yā maá"n

yā ní ch'i'ni chi 'ii'nyāⁿ canéé chí 'cuenú yā cuuvi na cuerpo ye"ⁿe yā. Naati nguéeé dichí'vē mar 'áámá regla ye"ⁿe chí diiⁿ ayudar 'ii'nyāⁿ caati nguēē dinuuⁿndí yā tan'dúúca chí ne"ⁿe diiⁿ cuerpo ye"ⁿe yā.

3 Maaⁿ ní chi ndís'tií ní 'āā nduuchí nī ye"ⁿe nguāaⁿ tiná"ⁿā dáámá ndúúcu Jesucristo, ndís'tií in'nuúⁿ nī dendu'ú chi ye"ⁿe va'ai cheeti nguuvi naachi Cristo véé yā lado ye"ⁿe honor ye"ⁿe Ndyuūs chí lado tá cuaacú yā. ²Ní nadacadífnuuⁿ nī ye"ⁿe nducué"ⁿe chí ye"ⁿe Ndyuūs ní nguéeé ye"ⁿe nducué"ⁿe chí véé i"ⁿye"ⁿdí 'cūú. ³Tíicā ndís'tií ní ch'ií nī dáámá ndúúcu Cristo ní canéé nī tan'duucā chí ch'ií cuerpo ye"ⁿe nī. Maaⁿ ní canúúⁿ n'de'ei vida ye"ⁿe nī ndúúcu Cristo nanááⁿ Ndyuūs. ⁴Maaⁿ vida ye"ⁿe yú ní cuaacu chí Cristo. Ní taachi ndaa Cristo taama vmné"ⁿēē tuu'mi ní s'uúúⁿ ndaa yú nducú yā ní véé parte ye"ⁿe yú nduucú yā na va'ai cheeti nguuvi.

Ye"ⁿe vida ndiicúú ye"ⁿe yú ní ye"ⁿe vidā ngai ye"ⁿe yú

⁵Maaⁿ ní diiⁿ yú cuenta chí ch'ií cuerpo ye"ⁿe yú ní 'āā ntéé diiⁿ yú nuuⁿndi. N'diichí nī, véé nuuⁿndi nguāáⁿ nī. Ne"ⁿe nī 'áámá sa"ⁿā o 'aama n'daataá chí nguéeé ye"ⁿe nī. Ní ne"ⁿe nī díⁿ nī cosa chí nguéeé ye"ⁿe Ndyuūs. Ní ne"ⁿe nī n'diichí nī 'áámá n'daataá o 'áámá sá"ⁿā chí nguéeé ye"ⁿe nī. Ní ne"ⁿe nī dendu'ú chí nguéeé ye"ⁿe nī. 'Tiicā nī. Ní canee nī tan'dúúca chí i'téenu nī ídolos chí imágenes. ⁶Nducué"ⁿe chíu ní nuuⁿndi. Ní Ndyuūs díⁿ yā castigar nducyáácá 'ii'nyāⁿ chí nguéeé díⁿ yā tan'dúúca chí nga"ⁿa yā. ⁷Tíicā 'āā dinuuⁿndí ndís'tií tiempo chí 'āā ch'ó'oo. ⁸Maaⁿ ní 'āā ntéé díⁿ nī nuuⁿndi. Nguéeé ditaáⁿ nī, nguéeé caa"ⁿmaⁿ taáⁿ nī. Nguéeé díⁿ nī cosas chí nguēē n'daacā 'aamá nī ndúúcu taamá nī. Nguéeé caa"ⁿmáⁿ nī 'ii'nyāⁿ chíⁿ chí nguéeé n'daacā chí maáⁿ yā díⁿ yā. Nguéeé caa"ⁿmáⁿ nī mar 'áámá nduudu chí

nguéeé n'daacā. ⁹Nguéeé caa"ⁿmáⁿ nī nduudu yaadi 'aama nī ndúúcu taama nī. Nguéeé díⁿ nī 'túúca caati 'āā dicuenta nī tan'dúúca chí 'āā ch'ií cuerpo ye"ⁿe nī ndúúcu nducué"ⁿe chí nguéeé n'dááca chí 'āā díⁿ nī. ¹⁰Ní maaⁿ ní cuerpo ye"ⁿe nī ní tan'dúúca cuerpo chí ngai chí Ndyuūs din'dái yā. Ní nguuvi nguuvi díⁿ yā chí ndís'tií cuuvi nī tan'dúúca Ndyuūs, 'tiicā nī. Ní 'íicú Ndyuūs díⁿ yā chí cuuvi deenu cá nī ye"ⁿe Ndyuūs. ¹¹Caati nanááⁿ Jesucristo miiⁿ nguéeé de'ē véē nduuti chí 'ii'nyāⁿ nguéeé ye"ⁿe ndaata 'ii'nyāⁿ Israel o 'ii'nyāⁿ chí ye"ⁿe ndaata 'ii'nyāⁿ Israel. Nguéeé de'ē véē nduuti chí 'ii'nyāⁿ ní circuncidado yā o nguéeé circuncidado yā. Nguéeé de'ē véē nduuti chí 'ii'nyāⁿ tan'dúúca chí snéé yúúni, o nduuti chí 'ii'nyāⁿ tan'dúúca chí 'iiti 'cueti. Nguéeé de'ē véē nduuti chí 'ii'nyāⁿ chí dichí'vē 'iivi ye"ⁿe yā, o 'ii'nyāⁿ chí snéé libre yā. Dámaāⁿ dichí'vē chí 'ii'nyāⁿ s'eeⁿ ní ye"ⁿe Cristo ní Cristo canéé yā nduucú yā.

¹²Ndís'tií ní ye"ⁿe Ndyuūs ndís'tií. Ní Ndyuūs dine"ⁿe yā ndís'tií ní ndeēve yā ndís'tií chí cuuvi ye"ⁿe yā ndís'tií. Maaⁿ ní ndís'tií canee chí diya'ái nī 'ii'nyāⁿ ní din'daacā cá nī. Nguéeé dich'eté nī maáⁿ nī naati díⁿ nī nducué"ⁿe ndúúcu vaadi ndiicúúⁿ. ¹³Ní nginneé nī 'aamá nī taama nī. Ní cuchéé nī ye"ⁿe nducué"ⁿe. Ní nadach'ēecú nī 'ii'nyāⁿ chí díⁿ yā 'áámá falta ndúúcu nī. Ní tan'dúúca chí Cristo nadach'ēecú yā nuuⁿndi ye"ⁿe nī, 'tiicā ntúúⁿ nadach'ēecú nī ye"ⁿe 'aama nī ndúúcu taama nī. ¹⁴Nguāaⁿ nducué"ⁿe chí díⁿ nī, dine"ⁿe taavi cá nī 'ii'nyāⁿ ti taachi díⁿ nī 'túúca canéé nī tan'dúúca chí nduuvidaamá nī ye"ⁿe nducué"ⁿe chí véé. Ní díⁿ nī cumplir nducué"ⁿe dendu'ú. ¹⁵Ní vaadi 'diiⁿ chí Ndyuūs itee yā ndís'tií na staava ye"ⁿe nī canee chí ch'i'ni ndís'tií nducué"ⁿe chí díⁿ nī caati Ndyuūs yaa'ví yā nducyáácá ndís'tií chí cuuvi ye"ⁿe nī vaadi 'diiiⁿ miiⁿ. Ní nducyáácá nī ní canéé nī tan'dúúca

'áamá cuerpo nūn, 'tiicá nī. Maaⁿ ní ca'á nī gracias Ndyuūs caavā chuū.

¹⁶ Ní 'áamá canéé n'daacā na staava yeⁿé nī nducuéⁿē nduudu cuaacu chí n'daacā taavi ní yeⁿe Ndyuūs. Ca'cueéⁿ nī ní chíⁿí nī 'áamá ní taama nī ndúúcu nducuéⁿē vaadi deenu. Ngiitá nī salmos ndúúcu himnos ndúúcu canciónes chí ngaⁿā yeⁿé Ndyuūs. Ní ndúúcu nūⁿ máⁿ staava yeⁿé nī nca'á nī gracias Ndyuūs. ¹⁷ Nífcú nducuéⁿē cosa chí diiⁿ nī 'áará chí caaⁿ máⁿ nī o díⁿ nī ntiⁿnyuⁿ, díⁿ nī nducuéⁿē caavā Señor Jesús ní nca'á nī gracias Ndyuūs Chiida yú cáávā Cristo.

Tan'dúúca chí canee chí diiⁿ yú ti yeⁿe Cristo s'uuúⁿ

¹⁸ Ndís'tii n'daataá chí 'nínívaacu, cu'teenú nī yeⁿe isaⁿā yeⁿé nī caati 'tíicā canee chí díⁿ nī ti yeⁿé Ndyuūs ndís'tii. ¹⁹ 'Tiicá ntúūⁿ isaⁿa yeⁿé yā, dinéⁿe nī n'daataa yeⁿé nī ní nguéé nduuvi taáⁿ nī ndúúcu n'daataa yeⁿé nī. ²⁰ Ndís'tii daiyá yā chí yeⁿe Cristo 'caandiveéⁿ nī yeⁿe chiidá nī ní cheecu nī yeⁿe tanducuéⁿē caati 'tíicā neⁿe Ndyuūs. ²¹ Ní ndís'tii chí véé daiyá nī, nguéé díⁿ nī chí ndu- uvi táaⁿ daiyá nī caati cuayiivi ní nguéé cu'téenu yā chee chí caaⁿ máⁿ nī yeⁿe yā. ²² Ndís'tii chí dichíⁿvē 'iiⁿyāⁿ, 'caandiveéⁿ nī yeⁿe tanducuéⁿē chí ngaⁿā 'iiví nī yeⁿe iⁿyeéⁿdí 'cūū. Nguéé díⁿ nī tan'dúúca chí neⁿé yā dámaaⁿ taachi nanáaⁿ yā ndís'tii. Ní 'iiví nī cuuvi deenú yā chí n'daacā idiⁿ nī, naati díⁿ nī nducuéⁿē ntiⁿnyuⁿ ndúúcu nūⁿ máⁿ staava yeⁿé nī. Ní 'va'á nī Ndyuūs. ²³ Ní tanducuéⁿē chí díⁿ nī, díⁿ nī ndúúcu nūⁿ máⁿ staava yeⁿé nī. Ní díⁿ nī ntiⁿnyuⁿ miiⁿ tan'dúúca chí ntiⁿnyuⁿ yeⁿé Ndyuūs ní nguéé ntiⁿnyuⁿ yeⁿé 'iiví nī. ²⁴ Ní ndís'tii deenú nī chí cuuvi cuta'á nī yeⁿe chí véé yeⁿé nī chíⁿ chí téé Cristo ndís'tii. Cuaacu chí ndís'tii dichíⁿve nī Jesucristo ní cuaacu níⁿnyúⁿ Cristo ní 'iiví nī. ²⁵ Ní 'iiⁿyāⁿ chí nguéé n'daacā idiⁿ yā caⁿá yā

cuta'á yā ná díⁿve yā yeⁿe chí díⁿ yā chí nguéé n'daacā. Ndyuūs 'āā daamá nūn diiⁿ yā tratar ndúúcu nducyáácá 'iiⁿyāⁿ.

4 Ndís'tii patrones chí véé mozos yeⁿé nī, díⁿ nī chí cuaacu ndúúcu chí n'daacā ndúúcu mozos yeⁿé nī. N'gaacú nī chí véé 'iiví nī chí canéé na va'ai cheeti nguuvi.

² Nducuéⁿē tiempo caaⁿmaⁿngua'á nī ní 'cueti nduuchí nī. Ní ca'á nī gracias Ndyuūs. ³ Caaⁿmaⁿngua'á ntuúⁿ nī yeⁿe nús'uu ti Ndyuūs téé yā lugar nús'uu chí cuuvi caaⁿ máⁿ nūⁿ nduudu cuaacu yeⁿé yā. Ní nduudu miiⁿ ní yeⁿe Cristo. Ní nguéé déenu 'iiⁿyāⁿ naati maaⁿ ní ngaⁿa nūⁿ nduudu miiⁿ. Ní cucáávā nduudu miiⁿ maaⁿ 'úú canuúⁿ vácūū ndúúcu cadena 'cūū. ⁴ Caaⁿmaⁿngua'á nī cáávā 'úú chí cuuvi caaⁿ máⁿ n'daacā nduudu miiⁿ tan'dúúca chí canéé chí caaⁿ máⁿ.

⁵ Maaⁿ ní ndís'tii 'cuetinéé n'daacā nī ndúúcu 'iiⁿyāⁿ chí nguéé i'téenu yā Ndyuūs. Díⁿ nī n'daacā nducuéⁿē tiempo. ⁶ Cuéⁿé daaⁿmaⁿ caaⁿ máⁿ nī chí n'daacā ndúúcu nduudu n'dai. Ní canéé chí déenu nī táácā chí cuuvi nan'gueecuta'á nī ca'áamá ca'áamá 'iiⁿyāⁿ.

'Cuūnu carta miiⁿ ndúúcu saludos

⁷ Hermano Tíquico chí neⁿe yú, 'áamá canee sa chí diiⁿ sa ntiⁿnyuⁿ yeⁿé Jesucristo ní diiⁿ sa dáámā ntiⁿnyuⁿ ndu- ucú. Saⁿā miiⁿ cuuvi sa ndís'tii tan'dúúca chí 'úú canee ní díⁿ. ⁸ Ní cáávā chíⁿ di- cho'o Tíquico nanááⁿ ndís'tii caati cuuvi sa ndís'tii táácā n'geetineé nū. Ní téé sa 'viich'etínūⁿ na stava yeⁿé nī. ⁹ Ní di- cho'o ntúūⁿ hermano Onésimo, saⁿā chí neⁿe yú, ní 'áamá canee sa chí diiⁿ nti- iⁿnyuⁿ yeⁿé Ndyuūs. Ní yeⁿe 'áamá chee ndís'tii. Hermanos s'eeⁿ yaa'ví yā ndís'tii tanducuéⁿē chí díⁿ nūⁿ 'muuⁿ.

¹⁰ Saⁿā Aristarco chí canúⁿ vácūū nducú idichó'o sa: N'dai ndís'tii. 'Ti- icá ntúūⁿ dicho'o saⁿā Marcos chí dácūū

saⁿā Bernabé. Ní ndís'tiī 'āā sta'á nī or-
den chi 'cuaaⁿ nī hermano Marcos miiⁿ
nduuti chi ndaa sa nanááⁿ ndís'tiī. ¹¹ Ti-
icá ntúūⁿ Jesús chi nguuvi Justo di-
cho'o sa: N'dai ndís'tiī. Dámaāⁿ saⁿā s'uuⁿ
chi yeⁿē ndaata 'iiⁿyāⁿ Israel ní i'téenu
yā Jesucristo díⁿ yā ntiiⁿnyuⁿ nduucú
yeⁿē naachi Ndyuūs ngaⁿa ntiiⁿnyúⁿ yā.
Saⁿā s'uuⁿ ntée ca yā 'viich'etínūūⁿ 'úú.
¹² Saⁿā Epafras ntúūⁿ chi diiⁿ ntiiⁿnyuⁿ
yeⁿe Cristo ní yeⁿe 'áámá chεε ndís'tiī di-
cho'o sa: N'dai ndís'tiī. Saⁿā miiⁿ neené
ngaⁿangua'ā sa yeⁿe ndís'tiī chi ndís'tiī
'áámá caneé nī ndúúcū chi i'téenu nī
nífcú chi dámaāⁿ neⁿé nī díⁿ nī tandu-
cuéⁿē tan'dúúcā chi Ndyuūs neⁿe yā chi
diiⁿ nī. ¹³ 'Úú ní ngaⁿá nduudu cuaacu
yeⁿe Epafras miiⁿ. Neené inadacadíinuūⁿ
sa yeⁿé ndís'tiī ndúúcū 'iiⁿyāⁿ chi snée yā
na yáāⁿ Laodicea ndúúcū yáāⁿ Hierápo-
lis. ¹⁴ Saⁿā Lucas chi doctor chi neⁿe
yú ndúúcū saⁿā Demas dicho'ó yā: N'dai
ndís'tiī, ngaⁿá yā.

¹⁵ Maaⁿ ní ndís'tiī dicho'ó nī: N'dai
ndís'tiī, nga'á nī hermanos chi snée
na yáāⁿ Laodicea. Dicho'ó nī: N'dai
ndís'tiī, n'daataá Ninfas ndúúcū 'iiⁿyāⁿ
chi i'téenu yā Jesucristo ní nduuidaamá
yā na vaacu tá chi yaácū yeⁿé yā. ¹⁶ Ní
taachi 'cuiinū n'geéⁿ nī carta 'cūū nguaaⁿ
ndís'tiī dicho'ó nī carta 'cūū 'iiⁿyāⁿ yeⁿe
yáāⁿ Laodicea chi 'cueéⁿ yā na yaacū
yeⁿé yā. Ní canee chi 'cueéⁿ nī ntúūⁿ
'áámá carta chi dicho'ó 'iiⁿyāⁿ yeⁿe yáāⁿ
Laodicea. ¹⁷ Ní ndís'tiī cuuvi nī saⁿā Ar-
quipo chi 'úú caaⁿmáⁿ 'tífcā: Díí Arquipo,
diiⁿ di cuidado chi diiⁿ n'daacā di ní 'cui-
inu di ntiiⁿnyuⁿ yeⁿe Señor chi Señor tee
yā díí.

¹⁸ 'Úú, Pablo, dingúúⁿ saludos 'cūū
ndúúcū ta'á ndúúcū letras yeⁿé. N'gaacú
nī yeⁿé chi canuúⁿ vácūū. Neⁿé chi
Ndyuūs itée yā vaadī n'dai yeⁿé yā. 'Tífcā
cuuvi.

CARTA VMNÁÁⁿ VMNAAⁿ YE^mE II^mYÁⁿ YE^mE YÁÁⁿ TESALÓNICA

Pablo ndúúcū compañeros ye^mé yā idinguúⁿ yā carta 'cūū ye^me 'ii^m'yāⁿ ye^me yaācū na yāáⁿ Tesalónica

1 'Úú, Pablo, idinguúⁿ carta 'cūū ndúúcū saⁿa Silvano ndúúcū saⁿā Timoteo ye^me hermanos ye^me yú chi caⁿá yā na yaācū ye^me yāáⁿ Tesalónica, 'ii^m'yāⁿ chi ye^mé Ndyuūs Chiida yú nífcú ye^mé Señor Jesucristo. Ne^mé 'nū chi Ndyuūs Chiida yú ndúúcū Señor Jesucristo tée yā ndís'tiī nducue^mē vaadī n'dai ye^mé yā, ní vaadī 'diīⁿ ye^mé yā canee na staava ye^mé nī.

'ii^m'yāⁿ ye^me yāáⁿ Tesalónica din'daacá yā ní diitu i'téenu yā Jesucristo

²Ca'á 'nū gracias nanááⁿ Ndyuūs cáāvā nducyaaca ndís'tiī ní taachi caaⁿ'maⁿngua'á 'nū inin'gáácú 'nū ye^me ndís'tiī. ³Ní taachi ngaⁿ'angua'á 'nū nanááⁿ Ndyuūs Chiida yú, ngaⁿ'angua'á 'nū ye^me ntiiⁿ'nyuⁿ chi díⁿ nī caati i'téenu cá nī ní chí ne^me cá nī nducyaaca 'ii^m'yāⁿ ní chí nginnee yā 'ii^m'yāⁿ. Ní cuchée nī ye^me tanducue^mē. Ní 'áámá canee nī ndúúcū chi i'téenu nī caati cūnee ngiinú nī chi Señor Jesucristo ye^mé yú caⁿá yā tée yā chiiⁿ chi cuuvi ye^mé nī. ⁴Ndís'tiī, hermanos ye^mé 'nū, Ndyuūs ne^mé yā ndís'tiī. Ní deenú 'nū chi Ndyuūs ndēeve yā ndís'tiī chi ndís'tiī cuuvi ye^mé yā ndís'tiī. ⁵Taachi ngaⁿ'a 'nū nduudu cuaacu ye^mé Ndyuūs nanááⁿ ndís'tiī nguēe dámaaⁿ ngaⁿ'á 'nū nduudu miiⁿ ndúúcū nduudu ye^mé 'nū ti ndúúcū poder ye^mé Espíritu N'dai ye^mé Ndyuūs. Ní deenú 'nū chi nduudu cuaacu miiⁿ ní cuaacu. Ndís'tiī ní deenú nī du'u saⁿā nús'uu taachi canee 'nū ndúúcū ndís'tiī nī táácā díⁿ 'nū caati maáⁿ nī cuuvi 'cuetinéé n'daacā nī.

⁶Ni ndís'tiī ní 'āā diiⁿ nī tan'dúúcā chi nús'uu díⁿ 'nū ní tan'dúúcā chi diiⁿ Señor Jesucristo ye^mé yú. Ní i'téenu nī nduudu cuaacu ye^mé Ndyuūs. Ní yeenú nī ndúúcū vaadī yeenú chi Espíritu N'dai ye^mé Ndyuūs tee yā ndís'tiī 'áará chí ch'eenú nī chí cucáāvā chi i'téenu nī. ⁷Ní cucáāvā chi diiⁿ nī 'tuucā nducyaáácá 'ii^m'yāⁿ chi i'téenu yā Señor Jesucristo, 'ii^m'yāⁿ ye^me nūú'máⁿ yáⁿāa Macedonia ndúúcū nūú'máⁿ yáⁿāa Acaya cuuvi cuta'á ndís'tiī tan'dúúcā 'áámá ejemplo ní díⁿ yā tan'dúúcā chi díⁿ nī. ⁸Ní ndís'tiī diiⁿ nī chi tanáⁿā 'ii^m'yāⁿ cuuvi déenu yā nduudu cuaacu ye^me Señor. Nguēe dámaaⁿ 'ii^m'yāⁿ ye^me yáⁿāa Macedonia ndúúcū 'ii^m'yāⁿ ye^me yáⁿāa Acaya naati 'ii^m'yāⁿ ye^me nducue^mē cuaāⁿ 'āā deenú yā chi ndís'tiī i'téenu nī Ndyuūs. Ní nguēe canee chi caaⁿ'maⁿ cá 'nū de'ē vee ye^me nī ti n'daacā i'téenu nī. ⁹Ní nducyaaca 'ii^m'yāⁿ ngaⁿ'a yā nús'uu ye^me visita ye^mé 'nu taachi canee 'nū nguāⁿ ndís'tiī. Ní ngaⁿ'a yā tan'dúúcā chi ndís'tiī s'néeⁿ nī ídolos caavā chi cu'téenu nī Ndyuūs chí canduuchi, Ndyuūs chí cuáácú chi Ndyuūs. Ní tuca'á nī díⁿ nī ntiiⁿ'nyuⁿ ye^mé Ndyuūs. ¹⁰'Tiicá ntúūⁿ ngaⁿ'a yā chi ndís'tiī cūnee ngiinú nī chi Jesucristo chi Daiya Ndyuūs ní ndaa yā taama vmne^mēe ye^mé va'ai cheeti nguuvi. Ndyuūs nada'cueeⁿ yā Jesús miiⁿ ye^mé nguāⁿ tináⁿā. Nífcú Jesucristo miiⁿ ní 'ii^m'yāⁿ chi nadanguáⁿ'ai yā s'uuúⁿ ye^mé castigo chi neené díftūu ye^me tiempo chi cuchii.

Ntiiⁿ'nyuⁿ chi diiⁿ Pablo naachi canee yā na yāáⁿ Tesalónica

2 Ndís'tiī, hermanos ye^me yú, deenú nī chi tiempo chi canee 'nū nguāⁿ ndís'tiī chi nguēe tandii rá díⁿ 'nū ntiiⁿ'nyuⁿ ye^mé Ndyuūs. ²'Āā deenú nī chi 'āā cueⁿé 'nū yāáⁿ Filipos vmnaaⁿ chi ndaa 'nū nanááⁿ ndís'tiī. Ní deenú nī chi 'ii^m'yāⁿ miiⁿ'ya nguēe n'daacā díⁿ yā nducú 'nū. Ní ngaⁿ'a taáⁿ yā ye^mé 'nū

chi ch'eenú 'nū chii. Níicú taachi ndaá 'nū nanáá' ndís'tií, nguεε 'va'á 'nū chi caa'má' 'nū nduudu cuaacu chí ngai ye'e Cristo 'áará chí deenú 'nū chi vεε cá 'ii'yā' chi contra ye'e nús'uu, 'ii'yā' chi nguéé n'daacā dí' yā nduucú 'nū. ³ Caati deenú 'nū chi nga'á 'nū nduudu cuaacu mii' nguéé ndúúcu vaanicadínuu' ye' é 'nū chí nguéé n'daacā ndíí nguéé ndúú nginnche'élí 'nū 'ii'yā'. ⁴ Naati Ndyuūs n'diichí ya vida ye' é 'nū chi n'daacā n'geetineé 'nū. Ní tee yā ntií'nyu' nús'uu chí caa'má' 'nū nduudu cuaacu ye' é chí cuuvi nanguá' ai 'ii'yā' ye' e nuu'ndi ye' é yā. Ní nguεε dí' 'nū ntií'nyu' mii' chí cūnee yínū 'ii'yā' naati dí' 'nū chii' chí ne' e Ndyuūs chí snaa' yā nducué' é chí vεε na staava ye' e yú. ⁵ Ní ndís'tií deenú nī chí nguéé nga'á 'nū nduudu cuaacu mii' ndúúcu n'dee n'dái nduudu chí n'dai taavi chí cūnee yiinú nī ye' é 'nū. Ní nguéé nga'á 'nū cáávā chí dí' 'nū ganar tuūmī. Ndyuūs ní deenú yā ye' é 'nū ye' e chí dí' 'nū. ⁶ Mar 'áámá vmné' ee dí' 'nū ntií'nyu' ye' é Ndyuūs caavā chí 'ii'yā' cuuvi caa'má' yā chí n'geeté 'nū. Ní nguéé nanáá' ndís'tií, ndíí nguεε nduu nanáá' taná'a yā. Ní deenú 'nū chí cuuvi ch'i'f 'nū 'ii'yā' chí ch'εete maá' 'nū caati Cristo dichó'o yā nús'uu chí dí' 'nū ntií'nyu' ye' e apóstoles ní candéé 'nū nduudu ye' é yā. ⁷ Naati 'tíicā dí' 'nū ndúúcu nī tan'dúúca chí ndís'tií da'caiyā daiyá 'nū. Niicu tan'dúúca chí dii' 'áámá n'daataá ndúúcu daiyá yā taachi idi'cuiitá yā ní dí' yā cuidado daiyá yā, 'tíicā dí' 'nū ndúúcu nī. Ní n'daacā nga'á 'nū ndúúcu nī ndúúcu vaadi n'giinu. ⁸ Ní 'tíicā ne' e cá 'nū ndís'tií chí ne' é 'nū tee 'nū ndís'tií nguéé dámaā' nduudu cuaacu ye' é Ndyuūs, naati 'tiicā ntuū' ne' é 'nū 'cuuví 'nū cáávā ndís'tií caati 'āā ne' e taavi cá 'nū ndís'tií. ⁹ Ndís'tií hermanos ye' e yú, n'gaacu nī ye' é ntií'nyu' chí dii' cá 'nū nī nga'á 'nū nduudu cuaacu ye' é

Ndyuūs nanáá' ndís'tií. Ní dí' 'nū ntií'nyu' ndúúcu ta'á 'nū ndíí nguuvi ndíí n'gaa' cáávā chí vεé necesidades ye' é 'nū. Ní nguéé di'vaachí 'nū ndís'tií ye' é dé'ε vεε. ¹⁰ Ní ndís'tií ní testigos ye' é 'nū. 'Tiicā ntúū' Ndyuūs ní testigo ye' é 'nū tan'dúúca chí 'cuεetinee n'daacā 'nū ní dí' 'nū dendu'ú chí cuaacu taachi caneé 'nū nguaa' ndís'tií chí i'téenu nī Señor Jesucristo. Ní nguéé mar 'áámá 'ii'yā' cuuvi caa'ma' yā chí nguéé n'daacā dí' 'nū. ¹¹ Ní 'tiicā ntúū' ndís'tií deenú nī tan'dúúca chí dí' 'nū ndúúcu ca'áámá ca'áámá ndís'tií. Ní dí' 'nū tan'dúúca chí nús'uu ní chiidá nī nī ndís'tií ní daiyá 'nū ní tee 'nū consejo ndís'tií ndúúcu 'viich'εetínū. ¹² Ní ch'i' 'nū ndís'tií tan'dúúca chí cuuvi n'geetinee n'daacā nī nanáá' Ndyuūs caati ndís'tií ní ye' é Ndyuūs ndís'tií. Ní Ndyuūs ní yaa'ví yā ndís'tií chí cuuvi ndaa nī naachi Ndyuūs nga'a ntií'nyú' yā. Ní vεé nducué' é cosas chí n'dai ye' é nī. ¹³ Níicú cáávā nducué' é chuū cue' e daā'ma' ní ca'á 'nū gracias Ndyuūs caati taachi ndís'tií ní ch'iinniveé' nī nduudu ye' é Ndyuūs chí nga'á 'nū nanáá' ndís'tií, chí'téenu nī nduudu mii' chí nduudu ye' é Ndyuūs ní nguéé nduudu chí ye' e 'ii'yā'. Ní cuaacu chí nduudu mii' ní ye' é Ndyuūs caati dii' ntií'nyu' na vida ye' é ndís'tií chí i'téenu nī. ¹⁴ Ndís'tií, hermanos ye' é 'nū. Dáámá cho'o ye' e ndís'tií taachi n'geenú nī ngii cucáávā chí dii' 'ii'yā' Israel chí paisanos ye' é nī ndúúcu nī. Chó'oo ntúū' ye' e 'ii'yā' chí na'á yā yaācu naachi 'ii'yā' i'téenu yā Jesucristo na yá'āa Judea caati 'tíicā dii' 'ii'yā' Israel chí paisanos ye' é yā ndúúcu yā. ¹⁵ Maa' 'ii'yā' paisanos chí 'ii'yā' Israel chí'ii'nu' yā Señor Jesucristo ye' é yú tan'dúúca chí dí' yā ndúúcu profetas chí nga'á yā nduudu cuaacu ye' é Ndyuūs tiempo chí 'āā chó'oo. Ní 'ii'yā' s'ee' n can'dáa yā s'uuú' ní dii' chí n'geenu yú ngii. Ní nguéé dí' yā chii' chí

Ndyuūs neⁿé yā chi diíⁿ yā ní contra yā nducyaaca 'iiⁿyāⁿ. ¹⁶Ní taachi neⁿé 'nū ngaⁿá 'nū nduudu cuaacu nanááⁿ 'iiⁿyāⁿ chi nguéé yeⁿe ndaata yeⁿé yā caati cuuví nnguaⁿai yā, 'iiⁿyāⁿ s'eeⁿ chi paisanos yeⁿé nī nguéé n'guúⁿ yā chi ngaⁿá 'nū. 'Tíicā ní véé cá nuuⁿndi yeⁿé yā. 'Tíicā diíⁿ yā maaⁿ naati cuayiivi Ndyuūs caⁿá yā chi ca'a yā 'iiⁿyāⁿ s'eeⁿ 'áamá castigo chi neené diitūu ca.

**Pablo neⁿé yā caⁿá yā taama
vmnéⁿēe ní n'diichí yā 'iiⁿyāⁿ
yeⁿe yááⁿ Tesalónica**

¹⁷Ndís'tií hermanos yeⁿe yú 'áará chí maaⁿ ní yaⁿai snée 'nū yeⁿe ndís'tií ní nguéé cuuvi naáⁿ 'nū ndís'tií nadacadi-inúúⁿ 'nū yeⁿe ndís'tií. Néené neⁿé 'nū cunée 'nū ndúúcu ndís'tií ní n'diichí 'nū ndís'tií. ¹⁸Ní diíⁿ 'nū nducueⁿēe chí cuuví 'nū ti cuuvi ndaá 'nū nanááⁿ ndís'tií. Ní 'úú Pablo 'naaⁿ tiempo canee listo chí naⁿá naati yááⁿn'guiinūuⁿ diiⁿ sa chí nguεε cuuvi ndaá. ¹⁹¿De'ē cáávā chí snée ngiinu 'nū ní yeenú 'nū? Snée ngiinu 'nū ní yeenú 'nū ti cuuvi candéé 'nū ndís'tií nanááⁿ Jesucristo taachi ndaa yā taama vmnéⁿēe. ²⁰Cuaacu níⁿnyúⁿ chí ndís'tií chí i'téenu nī ní diiⁿ chí neené yeenú 'nū cáávā chí diíⁿ 'nū ntiíⁿnyuⁿ yeⁿé Ndyuūs nguuaⁿ ndís'tií.

3 Ní taachi 'āā ntéé cuhéé 'nū chí nguéé ndaa 'nū nanááⁿ ndís'tií, tuuⁿmi ní nadicadínuuⁿ 'nū chí n'daacā chí maáⁿ 'nū n'geetineé 'nū na yááⁿ Atenas. ²Ní dicho'ó 'nū Timoteo chí hermano yeⁿēe yú chí cuuvi n'diichi sa ndís'tií taacā snée nī. Saⁿā miiⁿ 'āā diiⁿ sa ntiíⁿnyuⁿ yeⁿé Ndyuūs daama nduucú 'nū ní ngaⁿa sa nduudu cuaacu yeⁿé Cristo chí diiⁿ chí nadinguáⁿai 'iiⁿyāⁿ. Saⁿā miiⁿ ní cuuví cūnee sa ndís'tií ní tée sa 'viich'etífnūuⁿ ndís'tií. Ní cuuví cūnee diitu cá nī ndúúcu chí i'téenu nī. Cáávā chuū dich'ó 'nū Timoteo. ³Ngueε neⁿé 'nū chí ndís'tií

ndaacadaamí nī yeⁿe Jesucristo chí nguεε i'téenu nī Jesucristo cucáávā chí n'geenú nī ngii. 'Āā deenú nī chí canee chí 'cuenú nī cuuvi caati i'téenu nī Jesucristo. ⁴Ní cuaacú taachí ch'εetineé 'nū ndúúcu ndís'tií chí 'nū ndís'tií chí ndaa tiempo chí canéé chí 'cuenú yú cuuvi tan'dúúca chí chó'oo yeⁿé nī. Chuū ní ndís'tií déenu nī. ⁵Ní cáávā chuū taachi 'āā ntéé chéé chí nguéé n'giindiveéⁿ yeⁿé ndís'tií chó'ó hermano Timoteo chí 'úú cuuvi deenú táacā snée nī ndúúcu chí i'téenu nī. Caati 'úú 'va'á chí yááⁿn'guiinūuⁿ diiⁿ chí nguéé i'téenu nī ní maaⁿ ní nguéé dichí'vē ntiíⁿnyuⁿ chí 'āā diiⁿ 'nū nguuaⁿ ndís'tií.

⁶Naati maaⁿ ní Timoteo chí chíica sá yeⁿe ndís'tií chí snee na yááⁿ Tesalónica ndaā sa nanaáⁿ 'nū. Ní yaaⁿvi sa nús'uuⁿ chí n'daacā n'dai snee nī ti i'téenu nī Ndyuūs. Ní ngaⁿa ntúūⁿ sā chí neⁿe nī nducyaaca 'iiⁿyāⁿ. Ní yaaⁿvi sa nús'uu chí cueⁿe daāⁿmaⁿ n'gaacu nī yeⁿé 'nū ní neⁿé nī nús'uu. Ní neené neⁿé nī n'diichí nī nús'uu. Ní nús'uu neⁿe ntúūⁿ 'nū n'diichi 'nū ndís'tií. ⁷Ní ndís'tií hermanos yeⁿé 'nū cucáávā chí n'giindiveéⁿ 'nū yeⁿé ndís'tií chí díftū canee nī ndúúcu chí i'téenu nī yeⁿe Señor Jesucristo yeⁿe yú maaⁿ ní véé 'viich'etífnūuⁿ yeⁿé 'nū yeⁿé tanducueⁿēe chí ch'eenú 'nū chí. ⁸Ní snée 'nū tan'dúúca chí véé vida ngai yeⁿé 'nū ti n'giindiveéⁿ 'nū chí n'daacā n'dai canee nī maaⁿ chí ndís'tií ní yeⁿe Señor Jesucristo ndís'tií. ⁹Maaⁿ ní gracias cuuvi nca'á 'nū Ndyuūs Chiida yú cucáávā ndís'tií ní cucáávā chí ndís'tií diíⁿ nī chí yeenu taaví 'nū taachi ngaⁿangua'á 'nū caavā ndís'tií ndúúcu Ndyuūs Chiida yú. ¹⁰Ní ngaⁿangua'á 'nū ndíí nguuvi ndii n'gaaⁿ chí Ndyuūs diíⁿ yā chí ndaá 'nū naachi snée nī. Níicú cūnee 'nū ndís'tií níicú cuuvi cu'téenu cá nī yeⁿe Señor Jesucristo yeⁿe yú.

¹¹Neⁿé 'nū chí Ndyuūs Chiida yú ndúúcu Señor Jesucristo yeⁿe yú cūnee

yā nús'uu caati cuuvi ndaa 'nū nanááⁿ ndís'tiī. ¹²Ní Señor Jesucristo yeⁿe yú cūnee yā ndís'tiī caati cuuvi neⁿe cá nī nducyáácá 'iiⁿyāⁿ. Ní dineⁿe taavi cá nī tan'dúúćā nús'uu neⁿe taavi cá 'nū ndís'tiī. ¹³Ní Ndyuūs cuuvi cūnee yā ndís'tiī chí 'áámá canéé vaadi neⁿe yeⁿe yā na staava yeⁿe nī. Ní nguéé véé nu-ⁿndi yeⁿe nī. Ní canéé deeve staava yeⁿe nī nanááⁿ Ndyuūs Chiida yú taachi ndaa Señor Jesucristo yeⁿe yú ndúúćū nducyáácá 'iiⁿyāⁿ chí i'téenu yā 'yā.

Yeⁿe tan'dúúćā chí Ndyuūs neⁿe yā chí 'cuetinee yú

4 Maaⁿ ní di'cuítu ca 'nū ndís'tiī her-
manos yeⁿe yú ní ngiicá 'nū ndís'tiī
nanááⁿ Jesucristo chí dííⁿ nī chuū.
Tan'dúúćā chí ca'cueéⁿ 'nū ndís'tiī táácā
chí cuuvi n'geetineé nī tan'dúúćā Ndyuūs
neⁿe yā, 'tíícā 'āā dííⁿ nī. Ní 'tiicá ntúúⁿ
diiⁿ cá nī cueⁿe daāⁿmaⁿ ní ngo'o cá dííⁿ
nī.

²Ndís'tiī ní deenú nī tan'dúúćā chí
chí'cueeⁿ 'nū nanááⁿ ndís'tiī caati Ndyuūs
dicho'ó yā nús'uu. ³Ní Ndyuūs neⁿe yā
chí ndís'tiī n'geetineé n'daacá nī. Ní ndu-
cueⁿe chí dííⁿ nī, dííⁿ nī ti yeⁿe Ndyuūs
ndís'tiī. Ní nguéé caⁿa nī ndúúćū 'iiⁿyāⁿ
chí nguéé isaⁿa o n'daataá yeⁿe nī. ⁴Ní
ca'áámá ca'aama ndís'tiī chí saⁿa canee
chí déenu nī tan'dúúćā chí cuuvi cuta'á
nī n'daataá yeⁿe nī ní 'caandavaacú nī.
Ní canee n'daacá nī ndúúćū n'daataá
yeⁿe nī. Ní dinéⁿe nī n'daataá yeⁿe nī.
⁵Nguéé diiⁿ nī cosa chí nguéé n'daacā
ndúúćū cuerpo yeⁿe tá tan'dúúćā chí
diiⁿ tanáⁿā 'iiⁿyāⁿ chí nguéé yeⁿe ndaata
'iiⁿyāⁿ Israel, 'iiⁿyāⁿ chí nguéé déenu
yā Ndyuūs. ⁶Ní mar 'áámá yú chí sáⁿā
nguéé caⁿa sa ndúúćū n'daataá chí nguéé
yeⁿe sa o n'daataá nguéé caⁿa tá ndúúćū
'áámá isáⁿā chí nguéé yeⁿe tá caati
Señor Jesucristo yeⁿe yú ca'á yā 'iiⁿyāⁿ
miiⁿ 'áámá castigo chí ch'ete caavā nu-
uⁿndi chí 'tíícā yeⁿe yā. Ní yeⁿe chuū

'āā n'diichi yú na vida yeⁿe hermanos
yeⁿe yú chí dííⁿ yā 'túúćā chí nginnche'él
yā hermano yeⁿe yā. Ní nguéé n'daacā
chuū. ⁷'Tíícā Ndyuūs yaa'ví yā s'uúúⁿ chí
cuuvi yeⁿe yā s'uúúⁿ cáávā chí diiⁿ yú
nducuéⁿe chí n'daacā nguéé caavā chí
diiⁿ yú cosas chí nguéé n'daacā. ⁸'Tíícā
'iiⁿyāⁿ chí nguéé dííⁿ yā tan'dúúćā chí
ngi'cueéⁿ 'nū. Ndís'tiī nguéé idi'vaachí
yā mar 'áámá 'iiⁿyāⁿ. Dámaāⁿ di'vaachí
yā Ndyuūs caati Ndyuūs téé yā Espíritu
N'dai yeⁿe yā s'uúúⁿ. ⁹Úú nguéé canee
chí dinguúⁿ yeⁿe ndís'tiī tan'dúúćā chí
caneé chí neⁿe nī nducyaaca 'iiⁿyāⁿ
chí yeⁿe Cristo chí hermanos yeⁿe yú.
Deenú chí Ndyuūs maáⁿ yā ngi'cueéⁿ yā
ndís'tiī tan'duucā chí canee chí dineⁿe
nī 'áámá nī ndúúćū taama nī. ¹⁰Cuáácú
chí neⁿe nī nducyaaca hermanos yeⁿe
yú chí snéé na yáⁿā Macedonia naati
maaⁿ ní di'cuítu caⁿa 'nū chí dineⁿe ca
nī hermanos yeⁿe nī. ¹¹Ngiiicá 'nū chí
ch'etineé n'daacá nī nguaaⁿ nducyaaca
nī ndúúćū vaadi 'diiíⁿ. Ní dííⁿ nī n'tiīⁿnyuⁿ
yeⁿe maáⁿ nī ndúúćū ta'á nī tan'dúúćā
chí n'giⁿi 'nū ndís'tiī. ¹²Ní dííⁿ nī 'tu-
ucā caati 'iiⁿyāⁿ chí nguéé i'téenu yā Je-
sucristo yeⁿe yú cuuvi dííⁿ yā respetar
ndís'tiī ní véé necesidades yeⁿe nī.

Yeⁿe chí ndaa Jesucristo taama vmnéⁿeē

¹³Ndís'tiī hermanos yeⁿe 'nū, nguéé
neⁿe 'nū chí nguéé cadíínuuⁿ nī yeⁿe
chí cuchii yeⁿe 'iiⁿyāⁿ chí n'díí caati
nguéé cuuvi ndaachii nuuⁿ nī tan'dúúćā
tanáⁿā 'iiⁿyāⁿ chí nguéé cunee ngiinú
yā chí ndaa Jesucristo taama vmnéⁿeē.
¹⁴Ní 'tíícā tan'duucā chí i'teenu yú chí
Jesucristo chí yā ní nduuchí yā yeⁿe
nguaaⁿ tináⁿā, 'tiicá ntúúⁿ i'teenu yú
chí taachi Ndyuūs dicho'ó yā Jesucristo
taama vmnéⁿeē, Cristo miiⁿ ní ndee yā
ndúúćū yā nducyaaca 'iiⁿyāⁿ chí 'āā n'díí
ní 'āā i'téenu yā Señor Jesucristo yeⁿe yú.
¹⁵Ní cáávā chuū yaa'ví 'nū ndís'tiī chuū

tan'dúúca chi Señor chi'cueéⁿ yā nús'uu. S'uuúⁿ chi canduuchi yú ní canee yú na iⁿ'yeeⁿdí 'cūū ndíí ndaa Señor yeⁿ'ē yú nguéé can'dáanaaⁿ yú yeⁿ'e 'iiⁿ'yāⁿ chi 'āā n'díí. ¹⁶Caati maaⁿ Señor Jesucristo yeⁿ'e yú nch'éeⁿ yā yeⁿ'ē va'ai chēeti nguuvi taachí Ndyuūs ca'á yā orden. Ní ángel chí ch'ēete ca ní caa^m'máⁿ yā ní di'cuēcú yā trompeta yeⁿ'é Ndyuūs. Ní 'iiⁿ'yāⁿ s'eeⁿ chi 'āā n'díí chí chí'téenu yā Jesucristo taachi 'iiⁿ'yāⁿ s'eeⁿ snée yā iⁿ'yeeⁿdí 'cūū ní snuuⁿ yā maaⁿ yáⁿ'āa, 'iiⁿ'yāⁿ s'eeⁿ vmnááⁿ vmnaaⁿ nduuchí yā yeⁿ'ē nguaaⁿ tináⁿ'ā. ¹⁷Tuu'mi ní s'uuúⁿ chi sндуuchi yú chi snee yú na iⁿ'yeeⁿdí 'cūū, Cristo míⁿ cuta'á yā s'uuúⁿ na 'yúúné. Ní ndaa yú na meēⁿ ndúúcu tanáⁿ'a yā chí 'āā n'díí, ní nducyaaca yú ní dáámá ndaa yú nanááⁿ Jesucristo na 'yúúné. 'Tíicā ní 'áámá cūnee yú ndúúcu Señor yeⁿ'ē yú. ¹⁸Níicú cáávā chííⁿ chí nca'a ní 'viich'ētíínūuⁿ 'áámá ní taama ní ndúúcu nduudu 'cūū.

5 Ndí'stíi hermanos yeⁿ'é 'nū, nguéé canee chí dinguúⁿ 'nū yeⁿ'e ndí'stíi yeⁿ'e chēē fecha o de'ē tiempo nduuti chí tiempo 'iiche o 'íí'nūuⁿ taachi ndaa Señor Jesucristo taama vmnéⁿ'ēe. ²'Āā deenu n'daacá ní chí nguuvi chí ndaa Señor Jesucristo ní nguuvi chí nguéé du'ū vee deenu. Hora miiⁿ tan'dúúca hora yeⁿ'e n'gaaⁿ chí ndaa 'áámá duucu chí 'iiⁿ'yāⁿ nguéé déenu yā. ³Níicú taachi 'tíicā ngaⁿ'a 'iiⁿ'yāⁿ: Maaⁿ ní véé vaadi 'di-ííⁿ ndúúcu yú ní seguro chí n'daacā canee yú tuu'mi dácanaaⁿ ní ndaa nanááⁿ yeⁿ'é 'iiⁿ'yāⁿ s'eeⁿ tiempo chí d'cuiinú yā 'iiⁿ'yāⁿ. Ní tiempo miiⁿ ndaa tan'dúúca chí ndaa vaadi ya'āi ngii yeⁿ'e 'áámá n'daataa taachi 'cuundiyaāⁿ daiya tá. Ní yeⁿ'e tiempo miiⁿ 'iiⁿ'yāⁿ s'eeⁿ ní nguéé cuuvi nánguaⁿ'ai yā yeⁿ'ē. ⁴Naati ndí'stíi hermanos yeⁿ'é nguéé canee ní tan'duucā chí nguéé deenu ní yeⁿ'e chuū, ní ndaa tiempo miiⁿ tan'dúúca tiempo chí ndaa 'áámá chí duucu. ⁵Ní nducyaaca s'uuúⁿ

ní yeⁿ'e dēeve s'uuúⁿ ní s'uuúⁿ yeⁿ'e ngu-
uvi s'uuúⁿ. Nguéé yeⁿ'e n'gaaⁿ s'uuúⁿ ndíí
nguéé yeⁿ'e na maāiⁿ s'uuúⁿ. ⁶Ní cáávā
chuū nguéé ch'ēetinee yú tan'dúúca chí
'cuēeti yaadu yú tan'dúúca tanáⁿ'ā 'iiⁿ'yāⁿ
chí nguēē cūnee ngiinú yā Señor Jesu-
cristo yeⁿ'e yú naati 'cuēeti nduuchi yú,
níicú cadiinuuⁿ yú. ⁷'Iiⁿ'yāⁿ chí cyaadu
ní cyaadu yā n'gaaⁿ. Ní 'iiⁿ'yāⁿ chí ngii
cúú'ví, ní cuuvi cúú'ví yā n'gaaⁿ. ⁸Naati
s'uuúⁿ chí yeⁿ'e nguuvi s'uuúⁿ ní 'cuēet-
inéé yaaⁿ yú nguuvi chí ndaa Señor yeⁿ'e
yú. Ní diiⁿ yú cuidado s'uuúⁿ chí 'aama
canee yú lado yeⁿ'é Ndyuūs cucáávā
chí 't'eenú yú. Ní canee chí neⁿ'e yú
nducyaaca 'iiⁿ'yāⁿ. Ní diiⁿ yú tan'dúúca
'áámá soldado diíⁿ yā defender maáⁿ
yā ndúúcu armadura yeⁿ'é yā. Ní canee
yú cūnee ngiinú yú nguuvi chí Ndyuūs
nadanguáⁿ'ai yā s'uuúⁿ yeⁿ'e castigo. Ní
chuū ní tan'dúúca 'aama soldado sta'á yā
cachucha yeⁿ'e cūū yeⁿ'é yā ní diíⁿ yā de-
fender tííⁿ yā nduūcū. ⁹Ní Ndyuūs nguéé
yaa'ví yā s'uuúⁿ chí cuuvi yeⁿ'é yā s'uuúⁿ
caati téē yā s'uuúⁿ castigo chí díitūu
naati caati nadanguáⁿ'ai yā s'uuúⁿ yeⁿ'e
castigo cucáávā Señor Jesucristo yeⁿ'e
yú. ¹⁰Níicú Jesucristo chííⁿ yā na cruz
cucááva s'uuúⁿ caati maaⁿ ní cuuvi caⁿ'a
yú 'cuēetinée yú nduucú yā taachi ndaa
yā 'áará chí n'gēetinée yú na iⁿ'yeeⁿdí 'cūū
o 'áará chí 'āā chííⁿ yú. ¹¹Ní cáávā chuū
ndí'stíi ní nca'á ní 'viich'ētíínūuⁿ ndí'stíi
ní d'cuíftu ní 'aamá ní ndúúcu taamá ní
tan'dúúca chí maaⁿ 'āā idiíⁿ ní 'aamá ní
ndúúcu taamá ní.

Pablo nca'á yā consejo hermanos chí yeⁿ'e yāāⁿ Tesalónica

¹²Ní d'cuiitú 'nū ndí'stíi chí 'caandi-
veéⁿ ní yeⁿ'e 'iiⁿ'yāⁿ chí diiⁿ ntiiⁿ'nyuⁿ
yeⁿ'é Ndyuūs nguaaⁿ ndí'stíi caati 'iiⁿ'yāⁿ
miiⁿ ngaⁿ'a ntiiⁿ'nyúⁿ yā ní itée yā consejo
ndí'stíi. 'Iiⁿ'yāⁿ s'eeⁿ ní 'iiⁿ'yāⁿ chí Ndyuūs
dichó'o yā nanááⁿ ndí'stíi. ¹³Ní canee
chí n'giindiveéⁿ ní ní dineⁿ'e cá ní 'iiⁿ'yāⁿ

s'eeⁿ cucáāvā chi diíⁿ yā ntiiⁿnyuⁿ yeⁿé Ndyuūs. Maaⁿ ní 'cuetinéé n'daacá nī 'aamá nī ndúúcū taama nī ndúúcū vaadi 'diiíⁿ.

¹⁴ Ní di'cuiitu cá 'nū ndís'tií hermanos yeⁿe yú chi diíⁿ nī chuū tan'dúúcā chi idinguúⁿ 'nū. Caaⁿ máⁿ nī cuuvi nī 'iiⁿyāⁿ chi nguéé neⁿe diiⁿ ntiiⁿnyuⁿ ní cunnee nī 'iiⁿyāⁿ chi 'va'a. Ní ca'á nī 'viich'etíínūⁿ yeⁿe 'iiⁿyāⁿ chi duúvā yā. Ní canéé chi véé paciencia yeⁿé nī ndúúcū nducyaaca 'iiⁿyāⁿ.

¹⁵ Ní n'diichí nī chi din'daacá nī ndúúcū 'iiⁿyāⁿ chi nguéé din'daacá yā nduucú nī. Naati 'tíicā diiⁿ núⁿú yiiⁿnuⁿ nī chi din'daacá nī 'áamá nī ndúúcū taamá nī ndúúcū nducyaaca 'iiⁿyāⁿ.

¹⁶ Nducuéⁿe tiempo ní yeenú nī.

¹⁷ Cueⁿe daāⁿmaⁿ ngaⁿangua'á nī.

¹⁸ Níicú ca'á nī gracias Ndyuūs caava nducuéⁿe chi cho'ō nuúⁿ nī caati 'tíicā neⁿé Ndyuūs yeⁿe yú chi diíⁿ nī ti maaⁿ ní i'téenu nī Cristo Jesús.

¹⁹ Nguεε diíⁿ nī chi nguéé n'giindiveéⁿ nī nduudu yeⁿe Espíritu N'dai yeⁿé Ndyuūs. ²⁰ Ní nguéé diíⁿ nī despreciar nduudu yeⁿé Ndyuūs chi ngaⁿa 'iiⁿyāⁿ, nduudu chi Espíritu N'dai yeⁿé Ndyuūs ca'a yā 'iiⁿyāⁿ. ²¹ N'diichínee nī nducuéⁿe dendu'ū nduuti chi n'daacā o nguéé. Níicú cuta'á nī yeⁿe nducuéⁿe chi n'daacā ní din'daacá nī. ²² Ní diví nī yeⁿe nducuéⁿe chi n'diichi nī chi nguéé n'daacā.

²³ Ní maaⁿ ní Ndyuūs yeⁿe yú tee yā vaadi 'diiíⁿ s'uuúⁿ ní didεevé n'daacá yā ndís'tií. Ní candée yā cuidado ndís'tií ndúúcū espíritu yeⁿé nī ndúúcū alma yeⁿé nī ndúúcū cuerpo yeⁿé nī ndúúcū nducuéⁿe vida yeⁿé nī. Ní 'íicú 'iiⁿyāⁿ cuuvi caaⁿ máⁿ yā chi nguεε véé mar 'áamá nuuⁿndi yeⁿé nī taachi ndaa Señor Jesucristo yeⁿe yú taama vmnéⁿεe na iⁿyééⁿdi 'cūū. ²⁴ Níicú Ndyuūs chi yaa'ví yā ndís'tií chi cuuvi yeⁿé yā ndís'tií diíⁿ yā chi véé confianza yeⁿe yú ndúúcū yā. Ní Cristo miiⁿ ntúūⁿ diíⁿ yā cumplir nducuéⁿe chi ngaⁿa yā chi cuuvi diiⁿ yā.

Pablo ca'a yā saludos 'iiⁿyāⁿ nī neⁿé yā chi Ndyuūs ca'a yā cosas n'dai yeⁿé yā

²⁵ Ndís'tií hermanos yeⁿe yú ngaⁿangua'a ndís'tií cáāvā nús'uu.

²⁶ Caaⁿ máⁿ nī nducyaaca hermanos yeⁿe yú: N'dai ndís'tií. Ní ituu'ví nī cheendi yā taachi diíⁿ nī saldar hermanos yeⁿe yú tan'dúúcā costumbre yeⁿe yú ti yeⁿe yú Ndyuūs.

²⁷ 'Úú ndúúcū poder yeⁿe Señor ngaⁿá ngii chi 'cueéⁿ nī carta 'cūū nanááⁿ nducyaaca hermanos yeⁿe yú.

²⁸ Neⁿé chi Señor Jesucristo yeⁿe yú tée yā ndís'tií nducueⁿe cosas chí n'daacā taavi ca yeⁿé yā. 'Tíicā cuuvi.

CARTA CUAYIIVI YEⁿE 'IIⁿYĀⁿ YEⁿE YĀĀⁿ TESALÓNICA

**Pablo ndúúcū compañeros yeⁿé yā
idinguúⁿ yā carta 'cūū yeⁿe
'iiⁿ'yāⁿ yeⁿe yāāⁿ Tesalónica,
'iiⁿ'yāⁿ chi i'téenu yā Ndyuūs**

1 'Úú Pablo idinguúⁿ carta 'cūū ndúúcū hermano Silvano ndúúcū hermano Timoteo. Ní idinguúⁿ yeⁿe hermanos chi caⁿ'á yā na yaācū yeⁿe yāāⁿ Tesalónica. Ní hermanos ní yeⁿe Ndyuūs Chiida yú ní yeⁿe Señor Jesucristo yeⁿe yú. ²Neⁿé chi Ndyuūs Chiida yú ndúúcū Señor Jesucristo cuuví téé yā ndís'tiī cosas chí n'daacā n'dai yeⁿé yā ndúúcū vaadī 'diiⁿ yeⁿe yā.

**Ndyuus caⁿ'á yā díⁿ yā juzgar 'iiⁿ'yāⁿ
chi véé nuuⁿndi yeⁿé yā taachi
ndaa Cristo taama vmnéⁿéé**

³Ndís'tiī hermanos yeⁿe yú, cueⁿe daāⁿmaⁿ canéé chi ca'á 'nū gracias Ndyuūs cucáāvā ndís'tiī caati n'daacā chi díⁿ 'nū 'tíicā. Caati deenú 'nū chi nguuvī nguuvī ca'áámá ca'áámá ndís'tiī ní i'téenu ca nī ní neⁿe cá nī nducyaaca nī 'aamá nī ndúúcū taama nī. ⁴Níicū taachi ngaⁿ'á 'nū ngii 'nū hermanos yeⁿe yú yeⁿe ndís'tiī, tuu'mi ngaⁿ'á 'nū chi yeenú 'nū caati ch'etinéé n'daacā nī nducyaaca nī chi caⁿ'á nī na yaācū yeⁿé Ndyuūs yeⁿe yú, ní cáāvā chi ndís'tiī ní ch'iⁿ'í nī ndúúcū nducuéⁿé chi n'geenú nī ngii ní ndúúcū cosas chi díⁿtū chi chó'oo yeⁿé nī chi véé paciencia yeⁿé nī. Ní n'daacā i'teenú nī. ⁵Ní chuū ní cuaacu ch'iⁿ'i chi Ndyuūs ní díⁿ yā juzgar 'iiⁿ'yāⁿ ndúúcū vaadī cuaacu caati Ndyuūs díⁿ yā chi ndís'tiī ch'iⁿ'í nī chi n'dai taaví nī chi cuuvī ndaa nī naachi Ndyuūs ngaⁿ'a ntiⁿ'nyúⁿ yā. Ní cáāvā chuū chíⁿ chi ndís'tiī ní n'geenú nī ngii.

⁶Caati n'daacā nducú Ndyuūs chi Ndyuūs nadíⁿvē 'iiⁿ'yāⁿ chi idiⁿ chí ndís'tiī n'geenú nī ngii ndúúcū chi 'cuenú yā cuuvi. ⁷Tiempo taachi Señor Jesucristo miiⁿ ngiicá yā yeⁿé va'ai cheeti nguuvī ndúúcū ángeles yeⁿé yā ndúúcū poder yeⁿe yā, tuu'mi ní 'iiⁿ'yāⁿ s'eeⁿ ndaa yā ná nguuchi yaⁿ'ā. Ní tiempo miiⁿ Ndyuūs téé yā ndís'tiī chí 'āā ntéé 'cuenú nī cuuvi. 'Tiicá ntúⁿ ní téé ya nús'uu chí 'āā ntéé 'cuenú 'nū cuuvi. ⁸Ní ndaa yā chí ca'a yā castigo 'iiⁿ'yāⁿ chí nguéé n'diichí yā Ndyuūs ndúúcū 'iiⁿ'yāⁿ chí nguéé n'giindiveéⁿ yā ndudu cuaacu yeⁿe evangelio yeⁿe Señor Jesucristo yeⁿe yú chí nadanguáⁿ'ai yā 'iiⁿ'yāⁿ. ⁹'Iiⁿ'yāⁿ s'eeⁿ ní cuuví yā castigados ní cueⁿe daāⁿmaⁿ Ndyuūs di'cuinú yā 'iiⁿ'yāⁿ s'eeⁿ ní Ndyuūs s'neeⁿ yā 'iiⁿ'yāⁿ s'eeⁿ yaⁿ'ai yeⁿé yā. Ní nguéé cuuvi n'diichí yā naaⁿ Ndyuūs. Ndí nguéé ndúú cuuvi n'diichí yā dæeve taavi ca yeⁿé yā ndúúcū poder yeⁿé yā. ¹⁰Ní tiempo chí ndaa Jesucristo miiⁿ nducyaaca 'iiⁿ'yāⁿ chí 'āā i'téenu yā Jesucristo ní caⁿ'a yā dich'eté yā Ndyuūs. Ní 'iiⁿ'yāⁿ s'eeⁿ ntúⁿ caⁿ'a yā dich'eté yā Ndyuūs caati i'téenu nī nduudu cuaacu yeⁿé Ndyuūs chí ngaⁿ'a 'nū nanááⁿ nī. Ní 'iiⁿ'yāⁿ s'eeⁿ ngeⁿe yiiⁿ'nuⁿ yā.

¹¹Ní cáāvā chuū cueⁿe daāⁿmaⁿ ngaⁿ'angua'á 'nū caavā ndís'tiī. Ní ngiicá 'nū Ndyuūs yeⁿe yú chí diiⁿ cuenta yā chí ndís'tiī ní n'daacā ti yaaⁿ'ví yā ndís'tiī chí cuuvi yeⁿé yā ndís'tiī. Ní ngiicá 'nū Ndyuūs chí díⁿ yā ndúúcū ndís'tiī ndúúcū poder yeⁿé yā chí ndís'tiī ní cuuvi díⁿ nī nducuéⁿé chí n'daacā. Ní cuuvi díⁿ nī cumplir ntiⁿ'nyuⁿ n'dai chí díⁿ nī cáāvā chí i'téenu nī Jesucristo. ¹²Ní 'iicu 'iiⁿ'yāⁿ cuuvi dich'eté yā Señor Jesucristo yeⁿé yú cáāvā chiiⁿ chí diiⁿ ndís'tiī. Ní 'iiⁿ'yāⁿ s'eeⁿ dich'eté yā ndís'tiī caati Ndyuūs yeⁿé yú ndúúcū Señor Jesucristo nginneé yā ndís'tiī.

Ye"é 'áámá 'ii"yā" chi dinuu"ndi yā

2 Maa" ní hermanos ye"é di'cuiitú nū ndís'tií chi cūnee ngiinú nī ye"e tiempo chí nindaa Señor Jesucristo ní ye"e taachi nduuvidaama yú ndúucu yā. ² Di'cuiitú nū chi nguéé na'daa" nī chíf" chi nadacádfínuu" nī. Nguéé dii" 'va'á nī ye"e chi 'ii"yā" nga"á yā chi Cristo 'āā ndaa yā taama vmné"ēe ti nga"á yā tan'dúucā chi cáāvā Espiritu N'dai ye"é Ndyuūs, naati nguéé 'tíicā. Ndíí nguéé ndúú 'va'a nī ye"ē táámá nduudu chi n'giindiveé" nī ye"e chuū. Ndíí nguéé ndúú caavā carta chi sta'á nī chi tan'dúucā chi dinguí" nū ye"e nī naati nguéé 'tíicā. Ní ye"e nducué"ē chuū ní chíi" chi nga"ā chí 'āā ndaa Señor Jesucristo ye"ē yú, nguéé 'va'á nī. ³ Nguéé ca'á nī lugar 'ii"yā" chi cuuvi canche'éí yā ndís'tií mar 'áámá vmné"ēe. Vmnaa" chi ndaa tiempo chi cuuvi nindaa Jesucristo taama vmné"ēe, 'ii"yā" na i"yee"dí 'cūū canéé chi ndaa-cadaamí yā ye"e Señor ní canee yā contra ye"e Señor. Tuu'mi ní ndaa 'áámá Sa"ā Nuun"ndi, sa"ā chi Ndyuūs nga"á yā chí 'āā condenado sa ní ca"sa sa infierno. ⁴ Sa"ā mii" ní caaca taa" sa ní contra nducué"ē chi ye"é Ndyuūs ndúucū nducué"ē chi 'ii"yā" i'téenu yā. Sa"ā mii" ní dich'etete sa maa" sa nguéé tan'dúucā taná"ā 'ii"yā". Ní ndaa sa cuua" cheeti yaacū templo ye"é Ndyuūs ní 'cuúndi sa. Ní máa" sa sta'a sa lugar ye"é Ndyuūs. Ní dii" sa máa" sa chí cu'téenu 'ii"yā" sa"ā. Ní dii" sa tan'dúucā Ndyuūs sa"ā.

⁵ ¿Áá nguéé n'gaacú nī ndís'tií ye"e tiempo chí canee nducú nī ní ca"á chíi ndís'tií nduudú 'cūū? ⁶ Maa" ní 'āā deenú nī de'ē idiíi" chí 'āā 'cuéé ndaa sa"ā mii" caati cuuvi ndaa sa"ā mii" taachi ndaa tiempo ye"ē sa chí ndaa sa. ⁷ Niicu maa" poder ye"e nuun"ndi chí idiíi" chí 'ii"yā" dinuu"ndí yā ní 'āā ngii. Chíf" chí dii" chí Sa"ā Nuun"ndi

nguéé cuuvi 'cuu"mi" sa maa" sa chí Sa"ā Nuun"ndi. 'Tíica rā vaa ndii tiempo chí 'ii"yā" chí dii" chí nguéé cuuvi 'cuu"mi" Sa"ā Nuun"ndi, 'ii"yā" mii" ca"á yā táámá lado. ⁸ Tuu'mi ní ndaa Sa"ā Nuun"ndi ní 'ii"yā" cuuvi n'diichí yā sa"ā níicú Señor Jesucristo ca"á yā 'caa"nú" yā Sa"ā Nuun"ndi ndúucú 'yúúné chí can-daā ye"e cheendí yā ní di'cuiinú yā Sa"ā Nuun"ndi mii" ndúucú deevé ye"é yā taachi ndaa yā. ⁹ Ní Sa"ā Nuun"ndi mii" ndaa sa ndúucú n'dee n'dái poder ye"e Satanás chí yáá'n'guinūu". Ní dii" sa vaadi n'giinu ndúucú milagros chí nguéé vaadi cuaacu. ¹⁰ Ní ndúucú nducué"ē chí nguéé n'daacā idií" sa ntii"nyu" ye"ē sa ní nginnche'ei sa 'ii"yā" caati cuuvi dii" sa ganar 'ii"yā" lado ye"é yā, 'ii"yā" chí ca"á yā infierno. Ní chó'oo nducué"ē chuū caati 'ii"yā" nguéé ne"é yā 'caandiveé" yā nduudu cuaacu ye"é Ndyuūs, nduudu chí dii" chí ninguá"ai yā. ¹¹ Níicú cucáāvā chí dii" yā 'túucā, Ndyuūs ca"á yā dii" yā ndúucú 'ii"yā" s'ee" chí cu'téenu yā nduudu yaadi ye"e Sa"ā Nuun"ndi. ¹² Ní nducyáacá 'ii"yā" chí nguéé ne"é yā cu'téenu yā nduudu cuaacu caati ne"e ca yā cosas chí nguéé n'daacá ní cuuví yā condenado.

Ndyuūs ndeévé yā nducyaaca 'ii"yā" chí nadanguá"ai yā 'ii"yā"

¹³ Níicú ndís'tií hermanos ye"e yú, Señor ne"é yā ndís'tií. Ní nús'uu ní cué"é daā"ma" ca'á 'nū gracias Ndyuūs cucáāvā ndís'tií caati Ndyuūs ndeévé yā ndís'tií vmnāá" vmnaa" chí cuuvi nadanguá"ai yā ndís'tií cucáāvā Espiritu N'dai ye"é yā. Espiritu N'dai ye"é Ndyuūs mii" ní cuuvi dideeve ndís'tií caati ndís'tií cuuvi cu'téenu nī nduudu cuaacu ye"é Ndyuūs. ¹⁴ Ní Ndyuūs yaa'ví yā ndís'tií chí cuuvi ye"é yā ndís'tií cucáāvā nduudu cuaacu ye"é yā chí n'giindiveé" nī ní dii" chí cuuví nanguá"ai nī. Ní nduudu cuaacu mii" nús'uu nga"á 'nū nanáá" ndís'tií. Ní

Ndyuūs neⁿé yā chi ndís'tiī tunéeⁿ nī chi cuuví canee nī tan'dúúcā Señor Jesucristo yeⁿe yú.

¹⁵ Tíicā maaⁿ ní 'cuɛɛtinéé n'daacá nī ndúúcu chi i'téenu nī. N'gaacú nī yeⁿe chi ngi'cueéⁿ 'nū ndís'tiī taachi sneé 'nū nduucú nī ní yeⁿe chi idinguúⁿ 'nū yeⁿe nī. ¹⁶ Maaⁿ Señor Jesucristo yeⁿe yú ndúúcu Ndyuūs Chiida yú dinéⁿe yā s'uuúⁿ caati Ndyuūs ní n'dai taavi. Ní cueⁿe daāⁿmaⁿ itée yā s'uuúⁿ 'viich'ɛɛtífnūⁿ ní cānee ngiinu yú vaadi n'dai taavi yeⁿe Ndyuūs chi Ndyuūs caⁿa yā chi tée yā s'uuúⁿ. ¹⁷ Neⁿé chi Ndyuūs ní tée yā 'viich'ɛɛtífnūⁿ ndís'tiī na staava yeⁿe nī ní tée yā fuerzas n'dís'tiī caati ndís'tiī ní cuuvi díⁿ nī nducuéⁿe chi n'daacā ní caaⁿmáⁿ nī dámaaⁿ nduudu chi n'daacā.

Caaⁿmaⁿngua^a nī caavā nús'uu

3 Maaⁿ ní yeⁿe nducuéⁿe, ndís'tiī hermanos yeⁿe 'nū caaⁿmaⁿngua^a nī cucáavā nús'uu chi nīⁿnúúⁿ nūⁿ cuuvi candéé 'nū nduudu cuaacu yeⁿe Ndyuūs na núúⁿmáⁿ cuaaⁿ. Ní 'iⁿyāⁿ cuuvi cu'téenu yā nduudu cuaacu miⁿ ní cuuvi din'daacá yā ní díⁿ yā chiⁿ chi Ndyuūs neⁿé yā tan'dúúcā chi ndís'tiī díⁿ nī. ² Caaⁿmaⁿngua^a nī ntúúⁿ chi cuuví nadanguáⁿai 'nū yeⁿe 'iⁿyāⁿ chi nguéé n'daacā idiⁿ yā chi perverso yā caati nguéé nducyaaca 'iⁿyāⁿ itéenu yā Señor Jesucristo. ³ Naati Señor Jesucristo ní dámaaⁿ n'daacā díⁿ yā ní nducuéⁿe tiempo nginneé yā ndís'tiī chi 'áamá canee nī ndúúcu chi i'téenu nī. Ní candee yā cuidado ndís'tiī yeⁿe dendu^u chi nguɛɛ n'daacā. ⁴ Ní véé 'viich'ɛɛtífnūⁿ yeⁿe 'nū ndúúcu Señor ndúúcu ndís'tiī caati ndís'tiī ní idiⁿ nī nducuéⁿe chi caⁿa 'nū nduucú nī chi canee chi díⁿ nī ní 'tíicā caⁿá nī díⁿ nī. ⁵ Neⁿé 'nū chi Señor Jesucristo cunnee yā ndís'tiī chi cuuvi deenú nī na staava yeⁿe nī deⁿe chi vaadi neⁿe yeⁿe Ndyuūs. Ní cuuvi yeⁿe

nī maāⁿ 'viich'ɛɛtífnūⁿ chi yeⁿe Cristo. Ní cuuvi cucheé nī yeⁿe tanducuéⁿe chi cuchii.

Canee chi diiⁿ yú ntiⁿnyuⁿ

⁶ Maaⁿ ní ndís'tiī hermanos yeⁿe yú, itée 'nū orden ndís'tiī ndúúcu chi dúúchí Señor Jesucristo chi diví nī yeⁿe hermanos yeⁿe yú chi nguéé neⁿé yā díⁿ yā ntiⁿnyuⁿ ní nguéé díⁿ yā tan'dúúcā chi nús'uu chi'cueéⁿ 'nū 'iⁿyāⁿ. ⁷ Ndís'tiī ní deenú nī tan'dúúcā chi cánée chi ch'ɛɛtineé nī. Ní díⁿ nī ntiⁿnyuⁿ tan'dúúcā chi díⁿ 'nū taachi sneé 'nū ndúúcu nī ní díⁿ 'nū ntiⁿnyuⁿ. ⁸ Ní nguéé sta'á 'nū pan yeⁿe mar 'áamá ndís'tiī chi nguéé cáⁿ 'nū. Naati 'tíicā díⁿ 'nū. Díⁿ 'nū ntiⁿnyuⁿ ndii nguuvi ndíⁿ gaaⁿ chi nguéé di'vaachí 'nū mar 'áamá ndís'tiī. ⁹ Ní 'áará chí cuuvi ngiicá ndís'tiī chi tée nī necesidades yeⁿe 'nū nguɛɛ díⁿ 'nū 'tíicā. Idiⁿ 'nū ntiⁿnyuⁿ chi neⁿe 'nū cu'neeⁿ 'nū cáávā 'áamá ejemplo nanááⁿ ndís'tiī caati cuuvi díⁿ nī tan'dúúcā chi díⁿ 'nū. ¹⁰ Ní taachi ch'ɛɛtineé 'nū ndúúcu ndís'tiī caⁿa 'nū nduucú nī nduudú 'cūú. 'iⁿyāⁿ chi nguéé neⁿé yā díⁿ yā ntiⁿnyuⁿ nguéé cheⁿe yā. ¹¹ Ch'iindiveéⁿ 'nū chi duu'vi 'iⁿyāⁿ chiicá yā nguaaⁿ ndís'tiī nguéé chiicá n'daaca yā ti nguéé idiⁿ yā ntiⁿnyuⁿ ní neené n'dee n'dái díⁿ yā cosas chi nguéé dichí'vɛ. ¹² 'iⁿyāⁿ chi diiⁿ 'tíicā, ca'á 'nū orden ní di'cuíⁿtu 'nū 'iⁿyāⁿ ndúúcu chi duuchi Señor Jesucristo yeⁿe yú chi díⁿ yā ntiⁿnyuⁿ ndúúcu vaadi yeenú. Níicú díⁿ yā ganar cáávā gastos yeⁿe yā.

¹³ Ndís'tiī hermanos yeⁿe 'nū nguéé cánée chi cuuvi 'daan'dí nī chi díⁿ nī dendu^u chi n'daacā. ¹⁴ Ndúúⁿtí chi 'áamá 'iⁿyāⁿ nguéé cu'neeⁿveéⁿ yā nduudu chí idinguúⁿ 'nū na carta 'cūú, n'diichí nī du'u chí 'iⁿyāⁿ miⁿ ní nguéé díⁿ nī deⁿe vɛ ndúúcu yā. 'Tíicā ní cuuvi 'cuináaⁿ yā. ¹⁵ Ní nguéé díⁿ nī ndúúcu yā tan'dúúcā chi contra yeⁿe nī naati ca'á nī

consejo 'iiⁿ'yāⁿ miiⁿ tan'dúú^{cā} chi 'díí^{nu}
nī 'iiⁿ'yāⁿ.

Yeⁿe vaadi n'dai yeⁿé Ndyuūs

¹⁶ Neⁿé chi maaⁿ Señor Jesucristo chi
veε vaadi 'diiiⁿ yeⁿé yā cueⁿ'e daāⁿ-
maⁿ itée yā ndís'tiī vaadi 'diiiⁿ nducuéⁿē
tiempo ní nducuéⁿē cuaaⁿ. Señor miiⁿ ní
cunée yā ndúú^{cū} nducyaaca ndís'tiī.

¹⁷ 'Úú Pablo idinguúⁿ nduudu 'cūū
yeⁿe carta 'cūū ndúú^{cū} ta'á ní canée letra
yeⁿé. 'Tíicā dinguúⁿ ní 'tíicā dííⁿ firmar
nducuéⁿē cartas yeⁿé. ¹⁸ Neⁿé chi Señor
Jesucristo yeⁿe yú tée yā nducyáácá
ndís'tiī nducuéⁿē vaadi n'dai yeⁿé yā.
'Tíicā cuuvi.

CARTA VMNÁÁⁿ VMNAAⁿ YEⁿE SAⁿĀ TIMOTEO

1 'Úú Pablo 'úú. Ní 'úú apóstol yeⁿe Señor Jesucristo caati Ndyuūs ndúúću Señor Jesucristo dich'ó yā 'úú. Ní snéé ngiinu yú 'iiⁿyāⁿ miiⁿ yeⁿe yú chi nadanguáⁿai yā s'uúúⁿ. ²'Úú ngiicá compañero yeⁿe chi idingúuⁿ yā carta 'cūú yeⁿe dii Timoteo chi saⁿā chi cuaacu níⁿnyúⁿ i'téenu sa Señor Jesucristo yeⁿe yú. Ní alumno yeⁿe. Ní tan'dúúćā chi daiyā 'tífcā di. Neⁿé chi Ndyuūs chiida yú ndúúću Señor Jesucristo yeⁿe yú tée yā dii vaadi n'dai yeⁿe yā ndúúću vaadi ya'ai 'iinú yeⁿe yā. Ní tée yā dii vaadi 'diiⁿ yeⁿe yā.

Ngaⁿá yā yeⁿe 'iiⁿyāⁿ chi nguée n'daācā ngi'cueeⁿ yā

³Dii, Timoteo, 'úú neⁿé chi cūnee di yāā Efesio tan'dúúćā chi 'āā yaa'ví dii taachi cueⁿé yāⁿāa Macedonia ti véé 'iiⁿyāⁿ chi chi'cueeⁿ doctrina chi n'dááⁿ. Yaa'vi di 'iiⁿyāⁿ s'eeⁿ chi nguée ngi'cueeⁿ doctrina chi n'dááⁿ. ⁴Ní yaa'vi di 'iiⁿyāⁿ yeⁿe yāā miiⁿ chi nguée 'caandiveeⁿ yā yeⁿe cuentos yeⁿe yā chi falsos. Ndí nguée ndúú 'caandiveeⁿ yā nduudu chi chi'cueeⁿ 'iiⁿyāⁿ ndiicúú. Nduudu miⁿ ní nguée dichí'vē. Dámaāⁿ diiⁿ chi 'iiⁿyāⁿ ch'ēcu cheendí yā ní nguée nginne 'iiⁿyāⁿ tan'dúúćā chi Ndyuūs neⁿé yā. Caati Ndyuūs dich'ó yā orden chi 'iiⁿyāⁿ ngi'cueeⁿ yā cáāvā chi tanáⁿā 'iiⁿyāⁿ cuuvi cu'téenu cá yā Ndyuūs.

⁵Ní ngaⁿa yú tan'dúúćā Ndyuūs neⁿé yā taachi ngi'cueeⁿ yú ndúúću vaadi neⁿe chí ngífcā ná staava yeⁿe yú chi Ndyuūs 'āā didēvé yā. Tanducueⁿē ní diiⁿ yú ndúúću vaanicadíinuⁿ yeⁿe yú chi ndēve. Ní i'teenu yú Ndyuūs ndúúću núⁿmáⁿ staava yeⁿe yú. ⁶Naⁿa 'iiⁿyāⁿ ndaacadaamí yā yeⁿe nduudu yeⁿe Ndyuūs ní ngiindiveeⁿ yā nduudu

chi nguée dichí'vē. Ní n'gēcu cheendí yā. Ní cuuvi ndái yā. ⁷'Iiⁿyāⁿ s'eeⁿ ní neⁿé yā ca'cueeⁿ yā ley yeⁿe Ndyuūs naati nguée tuumicadíinuⁿ yā nduudu chi ngaⁿa yā, ndí nguée ndúú nduudu chi ca'cueeⁿ yā 'áará chí diⁿ yā tan'dúúćā chí déenu yā tanducueⁿē.

⁸S'uúúⁿ ní deenu yú chi ley yeⁿe Moisés ní n'dai ndúúti chí cu'téenu n'daāca yú yeⁿe. ⁹Deenu yú chí ley miiⁿ nguée dámaāⁿ caavā 'iiⁿyāⁿ chí din'daacá yā naati caavā 'iiⁿyāⁿ chí nguée diiⁿ yā tan'dúúćā chí ngaⁿā ley, caavā 'iiⁿyāⁿ chí nguée n'giindiveeⁿ yā chíiⁿ chí ngaⁿā ley, nífcú caavā 'iiⁿyāⁿ chí nguée n'daacā, caavā 'iiⁿyāⁿ chí idinuⁿndi, caavā 'iiⁿyāⁿ chí nguée diⁿ yā respetar Ndyuūs ndí nguée diⁿ yā respetar religión, ní caavā 'iiⁿyāⁿ chí n'giiⁿnúⁿ yā cheecú yā o chiidá yā, ní cáāvā 'iiⁿyāⁿ chí n'giiⁿnúⁿ yā 'iiⁿyāⁿ. ¹⁰Ley miⁿ ní caavā saⁿā chí caⁿa sa ndúúću n'daataá o n'daataá chí caⁿa tá ndúúću saⁿā ní nguée yeⁿe yā viⁿ ní cáāvā saⁿā chí caⁿa sa ndúúću saⁿa chí duuchineeⁿ sa ndúúću sa chí viⁿ, ní cáāvā 'iiⁿyāⁿ chí duucú yā 'iiⁿyāⁿ caati cuuvi dichí'vē yā táámá 'iiⁿyāⁿ ní cáāvā 'iiⁿyāⁿ chí indee ndúúću yaadi, ní caavā 'iiⁿyāⁿ chí ngaⁿa yā chí cuaacu chíiⁿ chí ngaⁿa yā ní n'gai yā: “Por Dios”, chí 'tífcā, ní nguée 'tífcā. Ní ley miiⁿ ní caavā 'iiⁿyāⁿ chí ngi'cueeⁿ yā nducueⁿē chí nguée n'daācā ní nguée tan'dúúćā Ndyuūs chí'cueeⁿ yā 'iiⁿyāⁿ. ¹¹Naati chuú chí ngi'cueeⁿ chí nduudu n'dai yeⁿe evangelio ní n'dēve n'dai chí nanguaⁿāi 'iiⁿyāⁿ, ní yeⁿe Ndyuūs chí n'dai taavi. Ní Ndyuūs dich'ó yā 'úú chí caaⁿmáⁿ nduudu miiⁿ.

Caaⁿmaⁿ yú, gracias Ndyuūs ti ya'ai 'iinú yā s'uúúⁿ

¹²'Úú ní caⁿá gracias Señor Jesucristo yeⁿe yú chí itee yā fuerzas 'úú chí diⁿ n'tiiⁿnyuⁿ yeⁿe yā. Ní s'neeⁿ yā 'úú tan'dúúćā 'áámá 'iiⁿyāⁿ chí véé valor

yeⁿé yā. Ní s'neéⁿ yā 'úú na ntiiⁿnyuⁿ yeⁿé yā. ¹³Ní vmnááⁿ vmnaaⁿ chi Jesucristo yaa'ví yā 'úú chi cuuvi yeⁿé yā, 'úú ní neené caaⁿmaⁿ taáⁿ yeⁿe Jesucristo ní cachiicá can'daá 'iiⁿyāⁿ chi i'téenu yā Jesucristo ti neⁿé i'nuuⁿ cá'ai 'iiⁿyāⁿ. Ní caneeⁿ taaⁿ contra Jesucristo. Naati Ndyuūs ya'ai 'iinú yā 'úú 'áará chi díiⁿ 'túúca taachi 'áá cuéé cu'teenú 'iiⁿyāⁿ, ní nguéé deenú de'ē cáávā chi díiⁿ 'tífca. ¹⁴Ní Señor díiⁿ n'dai cá yā nduucú, ní 'úú i'teenú Jesucristo, ní neⁿé Jesucristo caati maaⁿ ní 'úú ní yeⁿé Jesucristo 'úú.

¹⁵Ní nduudu 'cūú ní nduudu cuaacu chi Cristo Jesús ndaá yā iⁿyééⁿdi 'cūú chi nadanguáⁿai yā nducyaaca 'iiⁿyāⁿ caati idinuuⁿndí yā, ní n'dái taavi chi nducyaaca 'iiⁿyāⁿ cu'téenu yā nduudú 'cūú. Ní deenú chi 'úú ní ch'ēete cá nuuⁿndi yeⁿé nguéé ti tanáⁿa yā. ¹⁶Naati cucáávā chi véé nuuⁿndi yeⁿe 'úú Ndyuūs ya'ai 'iinú yā 'úú caati Señor Jesucristo ch'iⁿí yā 'úú tanducuéⁿē vaadi n'dái taavi yeⁿé yā, 'úú chi ch'ēete cá nuuⁿndi yeⁿé. 'Tífca ní Ndyuūs véé paciencia yeⁿé yā nduucú vmnááⁿ vmnaaⁿ ní s'neéⁿ yā 'úú chi 'úú tan'dúúca 'áamá ejemplo yeⁿe tanáⁿa 'iiⁿyāⁿ chi cuayivi caⁿá yā cu'téenu yā Cristo ní véé vida cueⁿe daāⁿmaⁿ yeⁿe yā. ¹⁷Cáávā nducuéⁿē chuū cueⁿe daāⁿmaⁿ ca'a yú Ndyuūs honra ní dich'ēete ca yú Ndyuūs chi rey chi 'áamá canee cueⁿe daāⁿmaⁿ ní nguéé n'gii yā. Ní maaⁿ ní nguéé cuuvi snaaⁿ yú Ndyuūs chi 'áamá n'dyáⁿā Dendyuūs yeⁿe yú. 'Tífca rā vaa.

¹⁸Maaⁿ ní, díi Timoteo chi tan'dúúca daiyá, i'neéⁿ encargo 'cūú ndúúcu díi. Ní encargo 'cūú chíiⁿ chi tiempo chi 'āá chó'ōo 'iiⁿyāⁿ profetas caⁿa yā yeⁿé di yeⁿé chi caⁿá di díiⁿ di. Maaⁿ ní cuchéé di yeⁿé tanducuéⁿē ní díiⁿ di tan'dúúca chi díiⁿ 'áamá soldado chi nguⁿu n'daacā sa. 'Tífca díiⁿ di tan'dúúca chi profetas caⁿa yā yeⁿé di tiempo chi 'āá chó'ōo. ¹⁹Dii ní cu'téenu n'daacā di

ní díiⁿ n'daacā di ndúúcu vaanicadíinūⁿ yeⁿé di chí n'dai. Náⁿā 'iiⁿyāⁿ ní nguéé díiⁿ n'daacā yā caati vaanicadíinūⁿ yeⁿé yā ní nguéé n'dai. Ní cáávā chuū nguéé i'téenu yā Señor Jesucristo maaⁿ ní caneeⁿ yā tan'dúúca chi ya'ai yeⁿe Ndyuūs. ²⁰'Túúca chó'ōo yeⁿe saⁿā Himeneo ndúúcu saⁿā Alejandro ní 'úú deenú chí caneeⁿ yā a cuenta yeⁿe yááⁿnguiinūⁿ maaⁿ. Ní 'ícuⁿ cuuvi deenú yā chí 'āá ntéé cuuvi caaⁿmáⁿ yā ní nguéé díiⁿ yā ofender Ndyuūs yeⁿe yú.

Yeⁿe chí cuuvi caaⁿmaⁿngua'a yú

2 Vmnááⁿ vmnaaⁿ ngiicá díi Timoteo chi caaⁿmaⁿngua'a di cáávā nducyáácá 'iiⁿyāⁿ ní ca'a di gracias Ndyuūs cáávā nducyáácá 'iiⁿyāⁿ. ²Ní canee cuuⁿmiⁿ chi caaⁿmaⁿngua'a di cáávā saⁿā reyes nícuⁿ cáávā nducyáácá 'iiⁿyāⁿ 'iiⁿntyéⁿē caati cuuvi 'cuēetinee yú n'daacā ní nguéé ndúúcu vaadi 'caa'va ti 'cuēetinee yú ndúúcu vaadi 'diiⁿ. Ní díiⁿ yú tanducuéⁿē tan'dúúca chi Ndyuūs neⁿé yā chí díiⁿ yú. Ní 'cuēetinee yú n'daacā yeⁿe nducuéⁿē ndúúcu 'iiⁿyāⁿ. ³Ti chuū ní n'daacā nanááⁿ Ndyuūs ní inéé yiinūu taavi yā taachí díiⁿ yú 'tífca. Ndyuūs yeⁿé yú nadanguáⁿai yā s'uuúⁿ. ⁴Ní neⁿé yā chí nducyaaca 'iiⁿyāⁿ ninguaⁿai yā ní tuumicadíinūⁿ yā chéé chí nduudu cuaacu yeⁿé Ndyuūs. ⁵Deenu yú chí véé 'áamá Ndyuūs. Ní véé 'áamá 'iiⁿyāⁿ chí caaⁿmáⁿ yā na lugar yeⁿé yú nanááⁿ Ndyuūs. Ní 'iiⁿyāⁿ miiⁿ ní Saⁿā chí Daiyá yā chí Señor Jesucristo yeⁿé yú. ⁶Ní Jesucristo caⁿá yā vida yeⁿe maáⁿ yā chí ch'iⁿí yā cáávā chí nadí'íve yā nuuⁿndi yeⁿé nducyáácá 'iiⁿyāⁿ ní 'iicu cuuvi nadinguáⁿai yā nducyaaca 'iiⁿyāⁿ. Chuū ní Cristo díiⁿ yā tiempo chí n'daacā 'ícuⁿ 'cuuⁿmiⁿ yā chí Ndyuūs neⁿé yā chí nducyaaca 'iiⁿyāⁿ cuuvi ninguaⁿāi. ⁷Ní cáávā chuū Ndyuūs dich'óo yā 'úú chí 'úú cuuvi apóstol yeⁿé yā. Ní 'úú ca'cueéⁿ 'iiⁿyāⁿ ndu-

udu cuaacu yeⁿé Ndyuūs nanááⁿ 'iiⁿyāⁿ gentiles chi nguéé yeⁿé ndaata 'iiⁿyāⁿ Israel. 'Úú ngaⁿá nduudu cuaacu yeⁿé Ndyuūs ní 'íicú 'iiⁿyāⁿ cuuvi cu'téenu yā. Nguéé ngaⁿá nduudu yaadi.

⁸Neⁿé chi ndii nducuéⁿé cuaaⁿ nducyáácá 'iiⁿyāⁿ cááⁿmáⁿngua'a yā ndúúcu nuuⁿmaⁿ staava yeⁿé yā chi deeve. Ní nguéé nduuvi taáⁿ yā, ndíf nguéé ndúú 'cuuⁿmaⁿ yā. ⁹Ní 'tiicá ntúúⁿ n'daataá canéé chí cunúu yā catecai yā chi n'daacā chi nguéé yaⁿāi ca chiiⁿve ní nguéé neené n'dæveé. Ní nguéé canéé chí dich'eete yā máⁿ yā. Ní nguéé díⁿ yā 'aama peinada tíⁿ yā chi nguéé n'daacā. Ní nguéé snuuⁿ yā vmnaaⁿ cuerpo yeⁿé yā n'dee n'dái 'díⁿnguāⁿ ndí nguéé ndúú perlas. Ní nguéé cunúuⁿ yā tiinūⁿ chi yaⁿai chíⁿvē. ¹⁰Naati n'daata s'eeⁿ canee chi din'daaca yā nanááⁿ 'iiⁿyāⁿ tan'dúúca chi Ndyuūs neⁿe yā ní tan'dúúca chi canee chi diiⁿ nducyaaca n'daataá chi cuaacu chi i'téenu yā 'iivú Ndyuūs. ¹¹Ní n'daataá s'eeⁿ canee chi n'geeⁿ yā chíⁿ chi n'giindiveeⁿ yā ní cunee yā chi ndiicúⁿ yā. ¹²Nguéé neⁿé chi n'daataá ca'cueeⁿ yā saⁿā cheeti yaacū ní nguéé cunee yā lado yeⁿe 'iiⁿntyéⁿé chi caaⁿmaⁿ n'tiiⁿnyuⁿ yā yeⁿe saⁿā. Ní nguéé canéé chí caaⁿmaⁿ n'daataá s'eeⁿ cheeti yaacū. ¹³Caati Ndyuūs vmnááⁿ vmnaaⁿ din'dái yā saⁿā Adán ní cuayiivi miiⁿ ní din'dái yā n'daataá Eva. ¹⁴Ní yááⁿn'giinūⁿ nguéé chinnche'ei sa Adán miiⁿ naati chinnche'ei sa n'daataá Eva miiⁿ ní dinuuⁿndi tá. ¹⁵Deⁿé chúúca n'dai 'áámá n'daataá chí véé daiyá tá. Cuuvi nguáⁿai tá nduuti chí 'áámá cunee tá ndúúcu chí i'teenu tá, ní nduuti chí dinéⁿe tá nducyaaca 'iiⁿyāⁿ. Ní chíⁿi tá chí yeⁿe Ndyuūs, ní diiⁿ ta cosas chí seria.

Yeⁿe tan'dúúca chí canee chí diiⁿ saⁿā chí obispo

3 Chuū chí ngaⁿá maaⁿ ní cuaacu. 'Āā du'ú nūⁿ saⁿā chí neⁿe sa cuuvi sa obispo ní cundee sa cuidado yeⁿe 'iiⁿyāⁿ yeⁿe yaacū canee sa chí diiⁿ sa n'tiiⁿnyuⁿ chí n'daacā. ²Ní cáávā chuū saⁿā chí diiⁿ sa n'tiiⁿnyuⁿ yeⁿe obispo canee chí 'cuetinee sa n'daacā caati 'iiⁿyāⁿ s'eeⁿ nguéé cuuvi caaⁿmáⁿ yā chí véé nuuⁿndi yeⁿé yā. Ní saⁿā miiⁿ, sáⁿā chí 'áámá nūⁿ n'daataá yeⁿé sa. Ní saⁿā miiⁿ canéé cuuⁿmiⁿ chí serio sa ní diiⁿ sa cueⁿe daāⁿmaⁿ n'tiiⁿnyuⁿ chí n'daacā ndúúcu orden. Saⁿā miiⁿ canee chí 'cuaaⁿ sa na vaacu sa 'iiⁿyāⁿ chí canúúⁿ yúúni. Ní canee chí ca'cueeⁿ sa n'dai. ³Saⁿā miiⁿ nguéé cuuvi 'cúúví sá ní nguéé in'nuuⁿ sa vaadi 'caa'va chí 'caa'va sa. Ndíf nguéé ndúú neⁿe sa diiⁿ sa ganar tuūmī manera chí nguéé n'daacā cáávā vicio yeⁿe sa. Sáⁿā obispo miiⁿ canee chí diiⁿ sa 'tíicā. Canee chí manso sa ní nguéé neⁿe sa 'cuuⁿmaⁿ sa ndúúcu 'iiⁿyāⁿ, ndíf nguéé ndee sa 'aama vicio yeⁿe tuūmī. ⁴Saⁿā miiⁿ canee chí ngaⁿā n'tiiⁿnyuⁿ sa chí n'daacā na vaacu sa ní diiⁿ sa chí daiya sa 'caandiveeⁿ yā yeⁿe sa ní daiya sa díⁿ yā respetar chiidá yā. ⁵Ní ndúúti chí 'áámá saⁿā nguéé déenu sa caaⁿmaⁿ n'tiiⁿnyuⁿ sa na vaacu sa tuuⁿmi ní 'táácā cuuvi diiⁿ sa cuidado yeⁿe denduū chí yeⁿe yáacū yeⁿé Ndyuūs? ⁶Saⁿā obispo miiⁿ nguéé canee sa tan'dúúca 'áámá saⁿā chí caama i'téenu sa Jesucristo caati cuuvi nacáadínuuⁿ sa chí ch'eete maaⁿ sa tí nguéé dinuuⁿndi sa tan'dúúca chí diiⁿ yááⁿn'guiniūⁿ. ⁷Ní saⁿā obispo miiⁿ canee ntúūⁿ chí din'daacā sa nanááⁿ 'iiⁿyāⁿ chí nguēe i'téenu yā Señor Jesucristo yeⁿe yú caati 'iiⁿyāⁿ s'eeⁿ diiⁿ yā honrar saⁿā miiⁿ. Ní 'íicú saⁿā obispo miiⁿ nguéé cúúví cunee sa ndúúcu vaadi 'cuiinuú chí ca'a sa lugar chí ginnche'ei yááⁿn'guiniūⁿ saⁿā miiⁿ.

**Yeⁿē chi canéé chi
diiⁿ saⁿā chi diáconos**

⁸Maaⁿ ní ngaⁿá yeⁿe saⁿā diáconos chi cūnee sa ndúúcū ntiiⁿnyuⁿ yeⁿe yáacū. 'Tiicá ntúūⁿ saⁿa sa diáconos canee chí diiⁿ sa ntiiⁿnyuⁿ chi n'daacā ndúúcū orden. Ní canéé cuuⁿmiⁿ chí saⁿā serio sa. Ní canéé chí diiⁿ sa cumplir chiiⁿ chí ngaⁿā sa. Saⁿā miiⁿ ní nguéé cuuvi 'cúúví sá. Ndíí nguéé ndúú neⁿe sa diiⁿ sa ganar tuúmi manera chí nguéé n'daacā cáávā vicio yeⁿē sa. ⁹Saⁿā diácono canéé chí deenu sa n'daacā n'dai nducuéⁿē enseñanza yeⁿē chí i'teenu sa yeⁿe chí Ndyuūs chí'cueéⁿ yā s'uuúⁿ. Ní canee sa ndúúcū vaanicadínūuⁿ yeⁿē sa chí deeve. ¹⁰Saⁿā diácono ní saⁿā chí 'iiⁿyāⁿ 'āā n'diichí yā chí n'daacā chí diiⁿ sa. Ní nduuti chí nguéé véé falta yeⁿē sa tuuⁿmi ní cuuvi diiⁿ sa ntiiⁿnyuⁿ yeⁿe saⁿā diáconos. ¹¹Níícú 'tiicá ntúúⁿ n'daataá yeⁿe saⁿā diácono canee chí táⁿā seria ta ní din'daacā tá. Nguéé canee chí caaⁿmaⁿ tá yeⁿe 'iiⁿyāⁿ. Ní canee chí din'daacā tá yeⁿe tanducuéⁿē chí diiⁿ tá. ¹²Níícú saⁿā diácono miiⁿ ní saⁿā chí 'áámá nūuⁿ n'daataá yeⁿē sa. Ní canee chí ngaⁿā ntiiⁿnyuⁿ sá chí n'daacā na vaacu sa ní diiⁿ sa chí daiya sa n'giindiveéⁿ yā yeⁿē sa. ¹³Caati saⁿā miiⁿ chí diiⁿ n'daacā ntiiⁿnyuⁿ yeⁿe diácono, saⁿā miiⁿ diiⁿ sa ganar lugar yeⁿe 'iiⁿyāⁿ chí honrado yā. Ní véé cá confianza yeⁿē sa chí cuuvi caaⁿmaⁿ sa yeⁿe Señor Jesucristo tan'dúúcā chí i'téenu sa yeⁿē nduudu yeⁿé yā.

**Yeⁿe chí 'iiⁿyāⁿ nguéé deenú
yā chí yeⁿe Ndyuūs**

¹⁴Cunee ngiinú chí ndaa nuúⁿ n'diichí dii naati maaⁿ ní chuū idinguúⁿ yeⁿē di. ¹⁵Ní nduuti chí nguéé nndaa nuúⁿ tuuⁿmi cuuvi tuumicádínūuⁿ di táácā chí cuuvi 'cuetinéé 'iiⁿyāⁿ s'eeⁿ taachi i'téenu yā ní yeⁿé Ndyuūs 'iiⁿyāⁿ s'eeⁿ.

Caati nducyaaca s'uuúⁿ chí i'teenu yú Señor Jesucristo ní yeⁿé Ndyuūs s'uuúⁿ. Ní s'uuúⁿ ní yáacū yeⁿe Ndyuūs chí canduuchi, 'tíicá s'uuúⁿ. Ní s'uuúⁿ tan'dúúcā cimientu ndúúcū pilar yeⁿe yáacū, 'tíicá s'uuúⁿ ti ngaⁿa yú nduudu cuaacu yeⁿé Ndyuūs nanááⁿ nducyáácá 'iiⁿyāⁿ. ¹⁶Níícú mar 'áámá 'iiⁿyāⁿ nguéé cuuvi caaⁿmaⁿ yā yeⁿe enseñanzas yeⁿé Ndyuūs yeⁿē yú chí nguéé ch'ete taavi ca, enseñanzas chí Ndyuūs chí'cueéⁿ yā s'uuúⁿ.

Ndyuūs yeⁿe yú ndaá yā na iⁿ'yeeⁿdi 'cūū ndúúcū cuerpo tan'dúúcā s'uuúⁿ. Ní chí iⁿ'i Espíritu N'dai yeⁿé Ndyuūs chí Cristo ní cuaacu yā. Ní ángeles yeⁿē va'ai ch'eti nguuvi n'diichí yā Cristo. Ní 'iiⁿyāⁿ candéé yā nduudu cuaacu yeⁿé Cristo nanááⁿ 'iiⁿyāⁿ yeⁿe tanducuéⁿē país yeⁿé iⁿ'yeeⁿdí 'cūū. Ní 'iiⁿyāⁿ yeⁿe tanducuéⁿē cuaaⁿ yeⁿe iⁿ'yeeⁿdí 'cūū ní chí'téenu yā Cristo. Ní Cristo cunaⁿa ntuúⁿ yā na va'ai ch'eti nguuvi.

**Yeⁿe 'iiⁿyāⁿ chí nguéé 'áámá cunee
yā ndúúcū chí i'téenu yā**

4 Espíritu N'dai yeⁿé Ndyuūs ngaⁿa cuaacu yeⁿē nguuvi chí cuchí taachi ngaⁿa chí naⁿa 'iiⁿyāⁿ caⁿa yā ndaacadaamí yā yeⁿē nduudu cuaacu ní cu'nee'veéⁿ yā nduudu yeⁿe espíritus chí nginnche'ei 'iiⁿyāⁿ, espíritus chí ngi'cueeⁿ cosas chí nguéé cuaacu. Ní yáá'n'guiniūuⁿ dich'ó sa espíritus. ²Ní 'iiⁿyāⁿ s'eeⁿ 'caandiveéⁿ yā nduudu yeⁿe 'iiⁿyāⁿ chí ngaⁿá yā chí i'téenu yā Ndyuūs yeⁿē yú, ní nguéé cuaacu. Ní caⁿá yā n'giindiveéⁿ yā nduudu yeⁿe 'iiⁿyāⁿ chí ngaⁿa nduudu yaadi. Níícú 'iiⁿyāⁿ chí nguéé n'daacā idíⁿ yā canee yā ndúúcū vaanicadínūuⁿ yeⁿé yā chí nguéé n'daacā. Ní nguéé ya'ái yā yeⁿe chí diíⁿ yā taachi diíⁿ yā cosas chí nguéé n'daacā. ³'Iiⁿyāⁿ s'eeⁿ nguéé n'guuⁿ yā chí chí'indivaacu 'iiⁿyāⁿ. Ní nguéé n'guuⁿ

yā chi nge'e 'iiⁿyāⁿ tanducueⁿē chi nge'e yú. Deenu yú chi Ndyuūs din'dái yā tanducueⁿē chi nge'e yú. Cáávā chi nducyáácá 'iiⁿyāⁿ chi i'téenu yā Ndyuūs ndúúcu 'iiⁿyāⁿ chi deenú yā nduudu cuaacu yeⁿé yā cuuvi che'é yā tanducueⁿē. Ní nducyaaca 'iiⁿyāⁿ chi che'é yā canee chi caaⁿmaⁿ yā gracias Ndyuūs cáávā chí che'e yā. ⁴Deenu yú chi nducueⁿē chi din'dái Ndyuūs chi che'e yú ní n'daacā. Ní 'iiⁿyāⁿ nguéé canee chi cu'neeⁿ yā 'áámá lado mar 'áámá caati canéé chi cuta'á yā ní caaⁿmaⁿ yā gracias Ndyuūs. ⁵Caati tanducueⁿē dendu'ú 'cūū ní n'daacā ní 'iiⁿyāⁿ cuuvi che'é yā chuū ti Dendyuūs ngaⁿá yā 'tíicā yeⁿē na libro yeⁿé yā. Maaⁿ ní ngiica yú Ndyuūs chi Ndyuūs dííⁿ yā bendecir chuū chi che'e yú.

'Iiⁿyāⁿ idiiⁿ ntiiⁿnyuⁿ yā chí n'dai yeⁿe Jesucristo

⁶Nduuti chi dii, Timoteo, ca'cueeⁿ dí dendu'ú 'cūū nanááⁿ 'iiⁿyāⁿ chi i'téenu Señor Jesucristo tuu'mi ní dichí'vē ca di Señor Jesucristo. Ní taachi ca'cueeⁿ di nduudu n'dái 'cūū yeⁿe Jesucristo ní 'cuetínee di tan'dúúicā chi ngaⁿa nduudú 'cūū tuu'mi ní idiiⁿ di chi dii maaⁿ di chi n'giindiveeⁿ di nduudu yeⁿe di ní cu'téenu ca di yeⁿé Ndyuūs. ⁷Nguéé cu'neeⁿveeⁿ di yeⁿe cuentos zonzos chi yeⁿe íⁿyeedí, cuentos chi nguéé ngíicá yeⁿé Ndyuūs caati nguéé dichí'vē chi caaⁿmaⁿ yú chuū nanááⁿ 'iiⁿyāⁿ. Ní tanducueⁿē chi diiⁿ di, cueⁿe daaⁿmaⁿ diiⁿ di tan'dúúicā Ndyuūs neⁿé yā chi diiⁿ di. ⁸Deenu yú chi taachi diiⁿ yú ejercicios cáávā cuerpo yeⁿe yú taaⁿ 'lífⁿ chuundi dichí'vē s'uuúⁿ. Níicú taachí diiⁿ yú chííⁿ chí neⁿe Ndyuūs tanducueⁿē dichí'vē yú caati diiⁿ yú chi n'daacā cáávā s'uuúⁿ nguuvi s'eeⁿ chi canee yú iⁿyeedí 'cūū níicú cucáávā nguuvi chi cuchíi. ⁹Ndu-

udú 'cūū ní cuaacu chí cuaacu, níicú nducyáácá 'iiⁿyāⁿ canéé chi cu'téenu yā nduudú 'cūū. ¹⁰Ní cáávā nduudú 'cūū ní diiⁿ yú ntiiⁿnyuⁿ. Ní n'geenu yú ngii ti 'iiⁿyāⁿ ngaⁿa taáⁿ yā yeⁿē yú. 'Tíicā chó'oo yeⁿē yú caati i'teenu yú Jesucristo ní canéé ngiinu yú Ndyuūs chi canduuchi chí cuuvi nadanguáⁿai yā nducyaaca 'iiⁿyāⁿ ní nadanguáⁿai yā nducyaaca 'iiⁿyāⁿ chi i'téenu yā 'yā.

¹¹Níicú dííⁿ, Timoteo, 'úú ngaⁿá chi canee chi ca'cueeⁿ di nduudú 'cūū. ¹²Nguéé 'cuaaⁿ di lugar chi 'iiⁿyāⁿ nguéé neⁿe yā dii cucáávā chi duu'vi nguuví yeⁿē di. Din'daacā di ndúúcu tanducueⁿē chi diiⁿ di, yeⁿē chi ngaⁿa di, yeⁿē chi diiⁿ di. Ní dine'e di nducyáácá 'iiⁿyāⁿ. Ní diitu canee di ndúúcu chi i'téenu di. Ní diiⁿ di chi vida yeⁿē di ní n'daacā nanááⁿ nducyáácá 'iiⁿyāⁿ. Ní vida yeⁿē di canee tan'dúúicā 'áámá ejemplo. ¹³Níicú 'naaⁿ tiempo chi 'āā cuéé ndaá nanááⁿ di 'cueeⁿ di libro yeⁿé Ndyuūs nanááⁿ 'iiⁿyāⁿ. Ní yaa'vi di 'iiⁿyāⁿ chi 'caandiveeⁿ yā nduudu yeⁿé Ndyuūs. Ní ca'cueeⁿ di 'iiⁿyāⁿ tanducueⁿē chi yeⁿé Ndyuūs neⁿe chi ndaá. ¹⁴Ní diiⁿ di tanducueⁿē chi cuuvi di yeⁿē ntiiⁿnyuⁿ chi Ndyuūs tee yā dii taachi saⁿā chi 'cueeⁿ nduudu yeⁿe Ndyuūs ngaⁿá yā yeⁿē chi diiⁿ di. Ní saⁿā chi ngaⁿa ntiiⁿnyuⁿ yeⁿe yáacú s'núúⁿ yā ta'a yā ná tiiⁿ di cáávā chí cho'ó yā dii chí diiⁿ di ntiiⁿnyuⁿ yeⁿé Ndyuūs.

¹⁵Canéé chí diiⁿ di nducueⁿē chi ngaⁿá dii ní diiⁿ di tan'dúúicā chí 'āā 'cueeⁿ di. Ní 'íicú 'iiⁿyāⁿ cuuvi deenú yā chí cu'téenu ca di nguuvi nguuvi. ¹⁶Ní díí, Timoteo, cundéε di cuidado yeⁿē maaⁿ di, ní yeⁿē tanducueⁿē chí diiⁿ di, ní yeⁿē chí ca'cueeⁿ di 'iiⁿyāⁿ. Caati nduuti chí diiⁿ di 'túúicā nadinguáⁿai maāⁿ di dii ndúúcu 'iiⁿyāⁿ chí n'giindiveeⁿ yā nduudu yeⁿē di.

Yeⁿe tan'dúúcā chi cuuvi diiⁿ di ndúúcū 'iiⁿyāⁿ chi i'téenu yā Ndyuūs

5 Nguéé diiⁿ di repretter mar 'áámá saⁿā ndiicúū naati ca'a di consejo saⁿā miiⁿ tan'dúúcā chi chiida di. Ní diiⁿ di tratar ndúúcū saⁿā da'caiyāa tan'dúúcā chi saⁿā s'eeⁿ ní 'dínū di. Ní canéé chí diiⁿ di nducuéⁿē chi n'daacā. ²Ní diiⁿ di tratar ndúúcū n'daataá ndiicúū tan'dúúcā chi chεεcu di. Ní diiⁿ di tratar ndúúcū taⁿā dá'caiyāa tan'dúúcā chi víⁿ di. Ní canéé chí diiⁿ di tanducuéⁿē n'daacā ndúúcū 'iiⁿyāⁿ.

³Ní innee di n'daataá nguá'āa chi cuaacu níⁿnyúⁿ véé necesidades yeⁿe yā. ⁴Naati nduuti chi n'daataá nguá'āa véé daiya tá o daiya yiinu tá da'caiyāa s'ééⁿ canéé chí din'daacá yā ní canéé chí diiⁿ cumplir obligaciones yeⁿé yā ndúúcū 'iiⁿyāⁿ yeⁿe familia yeⁿé yā. Ní da'caiyāa s'ééⁿ ní canéé chí diiⁿ yā cosas chi n'daacā cáávā chεεcú yā ndúúcū chiidá yā ní cáávā chi neⁿe ca yā chiidá yā ndúúcū chεεcú yā caati chuū ní cosa chi n'daacā, ní cosa chi Ndyuūs neⁿé yā chí da'caiyāa s'ééⁿ diiⁿ yā. ⁵Ní nduuti chi cuaacu níⁿnyuⁿ chi n'daataá nguá'āa ní dámaāⁿ ta, canéé chí i'téenu tá Ndyuūs ndúúcū confianza ní caaⁿmaⁿngua'a tá nanááⁿ Ndyuūs ndii nguuvi ndii n'gaaⁿ. ⁶Ní nduuti chi n'daataá nguá'āa diiⁿ tá tan'dúúcā chi maāⁿ tá neⁿe tá, 'áará chi canduūchi tá caneē tá tan'dúúcā chi n'dii tá nanááⁿ Ndyuūs. ⁷Tiicá ntúūⁿ ca'cueeⁿ di nducuéⁿē chuū nanááⁿ 'iiⁿyāⁿ yeⁿe yaacū ni tanáⁿā 'iiⁿyāⁿ nguéé cuuvi caaⁿmáⁿ yā chí véé nuuⁿndi yeⁿé yā. ⁸Nduuti chí 'iiⁿyāⁿ s'eeⁿ nguéé candεε yā cuidado yeⁿe 'iiⁿyāⁿ yeⁿe familia yeⁿé yā ndúúcū chεεcú yā ndúúcū chiidá yā tuuⁿmi ní 'iiⁿyāⁿ s'eeⁿ ndaacadaami yā yeⁿe chí i'téenu yā ní ndii cunncaā cā nguéé tí 'iiⁿyāⁿ chí nguεε i'téenu yā.

⁹Cuuvi dingúūⁿ di na lista yeⁿe n'daataá nguá'āa ca'áámá n'daataá

nguá'āa chí 'āā ngii tá 'iinu ngeecu 'áámá nduūyū ní 'áámá nūuⁿ isaⁿā nduūcū ta. ¹⁰Ní n'daataá nguá'āa miiⁿ canee chí 'āā ch'εetinee n'daacā tá ní taaví n'daacā tá daiya tá. Ní canéé chí n'guuⁿ tá na vaacu tá 'iiⁿyāⁿ chí snúuⁿ yā yúúní, ní 'āā naaⁿnu tá ca'ā 'iiⁿyāⁿ chí i'téenu yā Ndyuūs tan'dúúcā costumebre yeⁿé 'iiⁿyāⁿ yeⁿe ndaata yeⁿe yā. Ní chinnee ta'ā tá 'iiⁿyāⁿ chí ngiitá, ní diiⁿ tá 'āā de'é nūuⁿ ntiíⁿnyuⁿ chí n'daacā.

¹¹Nguéé dingúūⁿ di na lista yeⁿe n'daataá nguá'āa 'áámá n'daataá nguá'āa naⁿa chí nguéé nduuyu yeⁿe tá caati cuuvi neⁿe ta 'caandavaacu tá ní nguéé neⁿe tá diiⁿ tá ntiíⁿnyuⁿ yeⁿe Cristo. ¹²Ní cuayivi miiⁿ ní n'daataá nguá'āa miiⁿ véé culpa yeⁿe tá chí nguéé diiⁿ tá cumplir compromiso yeⁿe tá chí diiⁿ tá ntiíⁿnyuⁿ yeⁿe Cristo. ¹³Ní más cā cuuvi diiⁿ n'daataá nguá'āa s'eeⁿ. 'Ícú cuuvi 'daān'di ntúūⁿ ta taachi ngeⁿē tá 'áámá va'ai táámá va'ai. Níicú nguéé dámaāⁿ chí 'daān'di tá ti neené neⁿe nandē tá yeⁿe 'iiⁿyāⁿ ndúúcū nduudu chí nguéé cánéé chí caaⁿmaⁿ tá ní diyaādí ta. Ní caⁿa tá miiⁿ caⁿa tá 'muuⁿ ní diiⁿ tá cosas chí nguéé ituneeⁿ táⁿā. ¹⁴Cáávā chuū neⁿé chí n'daataá nguá'āa chí da'caiyā ta 'caandivaacu tá ni taavi tá daiya tá ní caaⁿmaⁿ ntiíⁿnyuⁿ tá na vaacu tá. 'Tíicā ní 'iiⁿyāⁿ chí nguéé i'téenu yā Ndyuūs nguéé caaⁿmaⁿ cúnnaa yā yeⁿē tá. ¹⁵Caati n'duuví n'daataá nguá'āa chí da'caiyā tá 'āā ndaacadaami tá yeⁿē Cristo ní cueⁿe tá lado yeⁿe yááⁿn'guiniūⁿ.

¹⁶Ní nduuti chí 'áámá n'daataá o saⁿā chí i'téenu yā Jesucristo yeⁿē yú ní vεε n'daataá nguá'āa chí 'iiⁿyāⁿ yeⁿé yā, canéé chí ca'á yā n'daataá nguá'āa de'ē chí neⁿe tá. 'Tíicā ní nguéé canéé chí ca'a 'iiⁿyāⁿ yeⁿe yaacū n'daataa nguá'áa miiⁿ. 'Tíicā ní cúví ca'a 'iiⁿyāⁿ yeⁿe yaacū tanáⁿā n'daataá nguá'āa chí

cuaacu níⁿnyúⁿ chi véé necesidades yeⁿe tá.

¹⁷ Maaⁿ ní saⁿā s'eeⁿ chi ngaⁿa ntiⁿnyuⁿ n'dai yeⁿe yaācū ndúú^c saⁿā chi ca'cueeⁿ nduudu yeⁿe Ndyuūs ndúú^c saⁿā chi candēe nduudu yeⁿe Ndyuūs cuuvi cuta'a sa honor chi doble yeⁿe 'iⁿyāⁿ s'eeⁿ yeⁿe yaācū. ¹⁸ Tíicā canéé nguūⁿ na libro yeⁿe Ndyuūs ndii cuááⁿ vmaaⁿ. Nguéé cu'nūu di yaānā duutu 'yúú^dūu o 'itiindu chí inde'ei nuúⁿ ti nguuaⁿ trigo ní 'íicú cuuvi che'é tī yeⁿe. Ní canéé nguūⁿ táámá. Saⁿā chi níⁿdiiⁿ ntiⁿnyuⁿ cuuvi cuta'ā sa chiⁿvē yeⁿe sa.

¹⁹ Nguéé cu'téenu di 'iⁿyāⁿ chi ngaⁿa yā yeⁿe saⁿā chi ngaⁿa ntiⁿnyuⁿ yeⁿe yaācū nduuti chi nguéé véé 'uuvī ndúú 'iinu testigos yeⁿe yā. ²⁰ Naati canee chi diiⁿ di repretter nanááⁿ nducyáácá 'iⁿyāⁿ yeⁿe yaācū 'iⁿyāⁿ chi nadinuⁿndí yā. Ní 'íicú tanáⁿā 'iⁿyāⁿ ní dí'va'á yā. ²¹ Maaⁿ ní 'úú Pablo ngaⁿá ngii dii Timoteo chuū nanááⁿ Dendyuūs ní nanááⁿ Señor Jesucristo ní nanááⁿ ángeles chí Ndyuūs ndēeve yā. Diiⁿ di nducueⁿē chuū ní nguéé nadacadíⁿnuuⁿ di chi 'áámá yā chi ch'ēete cá yā nguéé ti táámá yā. Ní 'āā daamá nūuⁿ diiⁿ di ndúú^c nducyaaca 'iⁿyāⁿ. ²² Nguéé ndēeve nuuⁿ di 'áámá saⁿā chi caaⁿmaⁿ ntiⁿnyuⁿ sa yeⁿe yaācū nduuti chi nguéé n'diichi di saⁿā miiⁿ 'naaⁿ tiempo. Ní nguéé véé 'áámá parte yeⁿe di ndúú^c saⁿā miiⁿ taachi dinuuⁿndi sa. Diví di yeⁿe nducueⁿē chi nguéé n'daacā ní nguéé dinuuⁿndí maāⁿ di.

²³ Maaⁿ ní taachi ya'āi cheeti di nguéé cu'u di dámaaⁿ nuūⁿniⁿ caati cuuvi cu'u di 'téé vino. Ní taama vmnéⁿēe chi ya'āi cuerpo yeⁿe di cu'u di 'téé vino.

²⁴ Ní nuuⁿndi chi diiⁿ náⁿā 'iⁿyāⁿ, ní deenu yú ti n'diichi yú vmaaⁿ chi ndāa nguuvi chi Ndyuūs n'diichi yā nuuⁿndi yeⁿe yú. Níicú nguéé deenu yú nuuⁿndi chi diiⁿ tanáⁿā 'iⁿyāⁿ naati cuayiivi míⁿ taachi n'diichi Ndyuūs nuuⁿndi yeⁿe yú

tuuⁿmi ní snaaⁿ yú nuuⁿndi yeⁿe yā. ²⁵ Tiicā ntúūⁿ snaaⁿ yú nducueⁿē chi n'daacā chi diiⁿ 'iⁿyāⁿ. Ní 'áárá chí nguéé inaaⁿ yú maaⁿ chiiⁿ chi n'daacā chi díⁿ yā cuayiivi ní Ndyuūs idiiⁿ yā chi cadiinuⁿ yú táácá yeⁿe 'iⁿyāⁿ s'eeⁿ.

6 Nducyaaca 'iⁿyāⁿ chi i'téenu yā Jesucristo chi diiⁿ ntiⁿnyuⁿ yeⁿe criado o criada ní 'áámá canee yā na ntiⁿnyuⁿ yeⁿe 'iiví yā chi esclavo yā, canee yā tan'dúú^cā chí véé 'áámá yugo na daandú yā. Ní 'iⁿyāⁿ esclavos canee chí diiⁿ ca yā respetar 'iivi yā. Níicú 'iivi yā nguéé cuuvi cunncaá caaⁿmaⁿ yā yeⁿe Señor Jesucristo yeⁿe yú ndí nguéé ndúú yeⁿe chí ca'cueeⁿ yú. ² Ní saⁿā esclavos chí i'téenu sa ní véé 'iivi sa chí 'tíicá ntúūⁿ i'téenu yā, canee chí diiⁿ ca sa respetar 'iivi sa tan'dúú^cā chí 'aama 'iivi sa chí nguéé i'téenu yā. Naati canee chí diiⁿ sa servir más cā 'iivi sa chí i'téenu yā caati 'iivi sa ní hermano ndúú^c sa caati yeⁿe Ndyuūs nduu 'uuví yā. Ní hermanos neⁿe sa 'iivi sa. Tanducueⁿē dendu'ū dii, Timoteo, ngi'cueeⁿ di ní ngaⁿa di.

'iⁿyāⁿ chí i'téenu yā Jesucristo ní véé vaadi yeenu yeⁿe yā

³ Níicú nduuti chí 'áámá 'iⁿyāⁿ ngi'cueeⁿ yā táámá nduudu chí n'dááⁿ ní nguéé tan'dúú^cā nduudu n'dai yeⁿe Señor Jesucristo, ndí nguéé ndúú tan'dúú^cā nduudu yeⁿe Ndyuūs chí ngi'cueeⁿ yú yeⁿe chí 'cuetinee yú n'daacā tan'dúú^cā chí Ndyuūs neⁿe yā chí diiⁿ yú, ⁴ tuuⁿmi ní 'iⁿyāⁿ miiⁿ ní nadacadíⁿnuuⁿ yā chí maaⁿ yā ch'ēete yā, ní nguéé de'ē veē deenu yā. 'iⁿyāⁿ miiⁿ ní ch'ēecu cheendí yā. Ní díⁿ yā chí náⁿā 'iⁿyāⁿ nguⁿu yā ní ngue'í yā ní 'caa'vá yā ní ngaⁿa taáⁿ yā yeⁿe 'iⁿyāⁿ. Ní 'iⁿyāⁿ miiⁿ díⁿ yā chí náⁿā 'iⁿyāⁿ nguéé véé 'viich'etíⁿūuⁿ ndúú^cā tanáⁿā 'iⁿyāⁿ. ⁵ Ní 'iⁿyāⁿ miiⁿ díⁿ yā chí nducyaaca 'iⁿyāⁿ dámaaⁿ n'gēecu cheendí yā, ní nguéé n'daacā

nadacadínuuⁿ yā. Ní nguéé deenu yā nduudu yeⁿe Cristo. 'Iiⁿyāⁿ miiⁿ nadacadínuuⁿ yā chi díⁿ yā ganar tuumí caati ch'itéenu yā ní ngaⁿa yā nduudu yeⁿe Cristo. Diví di yeⁿe tanducuéⁿe 'iiⁿyāⁿ chi 'tífca. ⁶Deenu yú chi 'iiⁿyāⁿ chi i'téenu yā Jesucristo canee n'daacá yā ndúúcū chi vee yeⁿe yā ní yeenu yā. Chiiⁿ chi i'téenu yā ní tan'dúúcā vaadi 'cuiica ca yeⁿe yā. 'Tífca rā vaa. ⁷Deenu yú chi nguéé deⁿe vee ndeē yú taachi ch'iindiyaāⁿ yú iⁿ'yeeⁿdí 'cūū. Ní nguéé deⁿe vee ntúūⁿ candee yú yeⁿe iⁿ'yeeⁿdí 'cūū taachi 'cuūvi yú. ⁸Neⁿe chí snee yú iⁿ'yeeⁿdí 'cūū nduuti chi véé chi nge'e yú ndúúcū catecai yú, ní ndúúcū chuū nūⁿ cānee chi yeenu yú. ⁹Caati 'iiⁿyāⁿ chi neⁿe yā 'cuiicá yā taachi yáá'n'guiniūⁿ n'diichi neeⁿ sa 'yā cuuvi díⁿ yā dendú'ū chi nguēe n'daacā. Ní canee yā ndúúcū vicio zonzo yeⁿe yā chi nguēe n'daacā. Ní nguéé dichí'vē. Ní díⁿ chi dinuuⁿndí yā níícú díⁿ chi caⁿá yā infierno. ¹⁰Chíⁿ chí díⁿ chi 'iiⁿyāⁿ dinuuⁿndí yā ní chuū. 'Iiⁿyāⁿ neⁿe cá yā tuūmí. Ní in'nuuⁿ cá yā tuūmí chi 'āā ntéé véé tiempo chi cu'téenu yā. Ní maáⁿ yā díⁿ yā chi ya'āi n'geenu taaví yā ngii.

Yeⁿe chi cuuvi din'daacá yú maaⁿ chi i'teenu yú

¹¹Maaⁿ ní díⁿ, Timoteo, saⁿā chi yeⁿe Ndyuūs díⁿ, diví di yeⁿe nducuéⁿe chuū chi nguēe n'daacā. Ní díⁿ di nducuéⁿe chi n'daacā. Dich'ete di Ndyuūs ní cu'téenu ca di. Diné'e ca di nducyaaca 'iiⁿyāⁿ ní díⁿ di nducuéⁿe ndúúcū paciencia. Ní canee di ndúúcū staava yeⁿe di chi n'dai. ¹²Ní taachi 'cueenu di cuuvi cáavā chi i'téenu di Ndyuūs canee di-itu di ndúúcū chi i'téenu di yeⁿe Ndyuūs yeⁿe yú. Ní diitu díⁿ di caati chi cuuvi yeⁿe di vida cueⁿe daāⁿmaⁿ chi cuuvi cuta'a di yeⁿe Ndyuūs ti Ndyuūs yaa'ví yā díⁿ chi cuuvi yeⁿe yā díⁿ. Ní díⁿ 'āā ngaⁿa di chi i'téenu di Ndyuūs

nanááⁿ 'yaaⁿ n'dái 'iiⁿyāⁿ. ¹³Maaⁿ ní 'úú yaa'ví díⁿ nanááⁿ Ndyuūs chi tés-tigo yeⁿe yú, Ndyuūs chi itée yā vida yeⁿe nducuéⁿe chi véé, ní nanááⁿ Jesucristo chi 'āā ngaⁿa yā nduudu cuaacu yeⁿe Ndyuūs chiidá yā nanááⁿ gobernador Poncio Pilato. ¹⁴Úú yaa'ví díⁿ chi 'caandiveeⁿ di ní díⁿ di nducuéⁿe chi ca'á orden yeⁿe di. Ni nguéé n'daaⁿ orden yeⁿe caati nguéé neⁿe chi 'iiⁿyāⁿ caaⁿmaⁿ yā contra yeⁿe di caavā cosa chi díⁿ di. Díⁿ di 'tífca ndii tiempo chi ndaa Señor Jesucristo yeⁿe yú táámá vmnéⁿēe. ¹⁵Níícú tiempo taachi Ndyuūs neⁿe yā, Ndyuūs caⁿá yā dicho'ó yā Jesucristo chí n'dai taavi nanááⁿ 'iiⁿyāⁿ taama vmnéⁿēe. Ní Cristo miiⁿ maáⁿ yā ní 'áámá n'dyáⁿā 'iiⁿyāⁿ nūⁿ chi ngaⁿa ntiⁿ'nyuⁿ yā yeⁿe nducueⁿe chi véé, ní Rey chi ch'ete taavi ca nguéé ti tanáⁿā reyes. Ní 'iivi yú chi ch'ete taavi ca nguéé ti tanáⁿā saⁿā chi 'iivi. ¹⁶Dámaaⁿ Ndyuūs miiⁿ ní 'áámá canduuchí yā cueⁿe daāⁿmaⁿ. Ní canduuchí yā ná chidēeve chi nguéé cuuvi indaa mar 'áámá 'iiⁿyāⁿ. Ní nguéé n'diichi mar 'áámá 'iiⁿyāⁿ Ndyuūs miiⁿ ndíí nguéé cuuvi snaaⁿ ra yā. Maaⁿ ní cuéⁿe daāⁿmaⁿ canee cuuⁿmiⁿ yú dich'ete yú Ndyuūs ti tanducuéⁿe poder chi véé ní yeⁿe yā. 'Tífca rā vaa.

¹⁷Maaⁿ ní díⁿ, Timoteo, cuuvi di 'iiⁿyāⁿ 'cuiica chi nguéé nadacadínuuⁿ yā chi ch'ete n'dái yā. Ní nguéé cunee ngiinú yā yeⁿe chi véé yeⁿe yā caati cosa chi nguéé seguro chi 'áámá cūnee ndúúcū yā. N'daacā ca nduuti chi 'iiⁿyāⁿ s'eeⁿ cu'téenu yā Ndyuūs chi canduuchi ní Ndyuūs ca'á yā n'dee n'dái dendu'ū yeⁿe nducuéⁿe chi vee caati cuuvi cuta'a yú ní yeenu yú. ¹⁸Níícú díⁿ yaa'ví di 'iiⁿyāⁿ 'cuiica chi din'daacá yā ní díⁿ yā n'dee tááví ntiⁿ'nyuⁿ chi n'daacā. 'Íícú canee listo yā chi cuuvi ca'a yā tanáⁿā 'iiⁿyāⁿ chi nguéé véé yeⁿe yā ní innee yā 'iiⁿyāⁿ s'eeⁿ. ¹⁹'Tífca cuuvi yeⁿe 'iiⁿyāⁿ s'eeⁿ

vaadi 'cuiica ye"é yā chi vida cue"e daā"ma" chi Ndyuūs ca"á yā chi ca'a yā 'ii"yā" ye"é yā.

**Pablo ca'á yā últimas órdenes
Timoteo ti 'cuiinū carta maa"**

²⁰ Dí", Timoteo, cundée di n'daacā cuidado ye"e encargo chi 'ii"yā" 'āā tee yā dii. Nguéé cu'nee"vee" di n'dee n'dái

nduudu chi nga"a 'ii"yā" ye"e cosa ye"ē i"yee"dí 'cūū o ye"ē nduudu chi nguéé dichíí'vē o ye"ē chi nga"a 'ii"yā" chi nduudu deenu ní nguéé 'tíicā. ²¹ 'Ii"yā" s'ee" ndáácadaami yā ye"ē nduudu cuaacu ye"é Ndyuūs ní maá" yā ní nguéé i'téenu yā nduudu cuaacu ye"e Ndyuūs. Maa" ní 'úú ne"é chi Ndyuūs téé yā dii tandu-cué"ē chi n'daāca. 'Tíicā cuuvi.

CARTA CUAYIIVI YEⁿE TIMOTEO

1 'Úú Pablo 'úú ni 'úú apóstol yeⁿe Je-
sucristo caati Ndyuūs neⁿé yā chi 'úú
cuuvi apóstol yeⁿé yā, ní dich'ó'o yā 'úú.
Ní chuū chi Ndyuūs dífⁿ yā ní tan'dúúcā
chi ngaⁿa yā chi ca'a yā vida cueⁿe daāⁿ-
maⁿ nducyaaca 'iiⁿyāⁿ chi yeⁿe Jesu-
cristo. ²'Úú dinguúⁿ carta 'cūū yeⁿe di,
Timoteo, chi tan'dúúcā daiyá 'tífcā dii
caati neⁿé taavi dii. Neⁿé chi Ndyuūs
chiida yú ndúúcū Señor Jesucristo yeⁿe
yú téé yā dii cosas chi n'dai, ní ya'āi 'iinú
yā dii, ní téé yā dii vaadi 'diiⁿ na staava
yeⁿe di.

Caaⁿmaⁿ di nduudu yeⁿe Cristo nanááⁿ 'iiⁿyāⁿ

³Maaⁿ ní ca'á Ndyuūs gracias caavā
chi 'úú dichii'vé Ndyuūs ndúúcū vaan-
icadínūuⁿ yeⁿé chi n'daacā tan'dúúcā
chi diiⁿ 'iiⁿyāⁿ yeⁿe yú tiempo chi 'āā
chó'oo. Ní ndii nguuvi ndii n'gaaⁿ taachi
ngaⁿanguā'a, 'úú ca'á Ndyuūs gracias, ní
cueⁿe daāⁿmaⁿ 'úú ngaⁿanguā'a caavā
dii, Timoteo. ⁴Nééné neⁿé snaáⁿ dii,
Timoteo, taachi n'gaacú yeⁿe nuūⁿniⁿ
nduutinááⁿ di taachi caneé 'áámá lado
yeⁿe di. Ní taachi cuuvi n'diichí dii
tuuⁿmi ní yeenú taaví. ⁵Ní n'gaacú
chi i'téenu di Ndyuūs ndúúcū núúⁿmáⁿ
staava yeⁿe di. Vmnaaⁿ chi i'teenú di Je-
sucristo táⁿā Loida chi chicuⁿu di ní táⁿā
Eunice cheacu di i'téenu yā Jesucristo.
Maaⁿ ní seguro caneé chi cuaacu chi dii
ntúūⁿ i'téenu di.

⁶Cáāvā chi i'téenu di Ndyuūs neⁿé
chi n'gaacu di chi cueⁿé daāⁿmaⁿ diiⁿ
di ntiiⁿnyuⁿ chi Ndyuūs 'āā teé yā dii
ndíí tiempo chi 'úú sn'duū ta'á vmnaaⁿ
tiiⁿ di. ⁷Ndyuūs nguéé 'āā teé yā s'uuúⁿ
'áámá staava yeⁿe yú chi 'va'ā yú naati
'āā teé yā s'uuúⁿ 'áámá staava yeⁿe yú
chi véé poder yeⁿe yú. Ní 'ífcú cu-

uví dinéⁿe yú nducyaaca 'iiⁿyāⁿ. Ní cu-
uvi nadicadínūuⁿ yú n'daacā. ⁸Maaⁿ ní
nguéé 'cuinaáⁿ di chi caaⁿmaⁿ di nduudu
cuaacu yeⁿe Señor Jesucristo yeⁿe yú
nanááⁿ 'iiⁿyāⁿ. Ndíí nguéé ndúú 'cuinaáⁿ
di yeⁿe 'úú caati canuúⁿ vácūū cáāvā chi
ngaⁿ'á nduudu cuaacu yeⁿe Cristo. Naati
n'daacā ca diiⁿ di chi cuheé di yeⁿe
nducueⁿé chi 'cueenu di cuuvi ntúūⁿ
cáāvā chí ngaⁿ'a di nduudu yeⁿe Cristo
chí nadanguáⁿ'āi 'iiⁿyāⁿ chi n'giindiveéⁿ
yā yeⁿe di. Diiⁿ di tanducueⁿé ndúúcū
fuerzas chi Ndyuūs itée yā dii. ⁹Ndyuūs
nadinguáⁿ'ai yā s'uuúⁿ ní yaa'ví yā s'uuúⁿ
chi diiⁿ yú ntiiⁿnyuⁿ yeⁿe yā chí n'daacā.
Nguéé nadinguáⁿ'ai yā s'uuúⁿ cáāvā nti-
iⁿnyuⁿ chi diiⁿ yú chí n'daacā. Naati
Ndyuūs dífⁿ yā 'túúcā ndúúcū s'uuúⁿ ti
'tífcā neⁿé yā diiⁿ yā. Nífcú neené neⁿe
yā s'uuúⁿ. Ní maaⁿ ní s'uuúⁿ 'āā ndu-
uvi daama yú ndúúcū Cristo Jesus. Nífcú
Ndyuūs neⁿe yā s'uuúⁿ cuááⁿ vmnaaⁿ
chi 'āā cuéé iⁿ'yeeⁿdi. ¹⁰Maaⁿ ní Ndyuūs
ch'iⁿí yā chí neⁿe taaví yā nducyaaca
'iiⁿyāⁿ taachi dich'ó'o yā Jesucristo yeⁿe
yú iⁿ'yeeⁿdí 'cūū. Jesucristo ní 'iiⁿyāⁿ
miiⁿ chi nadanguáⁿ'ai yā s'uuúⁿ. Ní ndu-
udu cuaacu yeⁿe evangelio chi yeⁿe vida
yeⁿe Cristo ch'iⁿ'i s'uuúⁿ chi nguéé 'aama
'cuūvi yú. Nífcú cáāvā chi nadanguáⁿ'ai
yā s'uuúⁿ cuuvi cunduuchi yú cueⁿe
daāⁿmaⁿ.

¹¹Nífcú Ndyuūs nidéevé yā 'úú chí
caaⁿmáⁿ nduudu cuaacu yeⁿé yā ní
dich'ó'o yā 'úú lado yeⁿe apóstol yeⁿé yā
chi 'úú caaⁿmáⁿ nduudu cuaacu yeⁿé yā
nanááⁿ 'iiⁿyāⁿ chi nguéé yeⁿe ndaata Is-
rael. ¹²Nífcú cáāvā chi 'úú apóstol yeⁿé
yā tanducueⁿé n'geenú ngii chi canuúⁿ
vácūū. Ní nguéé ngii 'cuinaáⁿ caati deenú
du'ū chi Cristo chi i'teenú. Ní deenú chi
cuaacu chi Cristo miiⁿ ní véé poder yeⁿé
yā chi diiⁿ cuenta yā yeⁿe nducueⁿé nti-
iⁿnyuⁿ chi tee yā 'úú ndíí nguuvi chi dífⁿ
yā juzgar nducyaaca 'iiⁿyāⁿ.

¹³ Dii, Timoteo, diiⁿ di ndúúcū nduudu chi serio nducuéⁿē tan'dúúcā chi 'úú chi'cueéⁿ dii. Ní cunée di n'daacā ndúúcū chi i'teenu di Dinéⁿe di nducyaaca 'iiⁿyāⁿ caati mááⁿ ní s'uuúⁿ ní yeⁿe Jesucristo s'uuúⁿ. ¹⁴ Ní cundee di cuidado chi diiⁿ di ntiⁿnyuⁿ chí Ndyuús teé yā dii. Ní tee di lugar chí Espíritu N'dai yeⁿe Ndyuús chi canee ndúúcu yú cunnee yā dii.

¹⁵ Dii ní deenu di chi nducyaaca 'iiⁿyāⁿ chi i'téenu yā Jesucristo chí yeⁿe yāⁿāa Asia, 'iiⁿyāⁿ s'eeⁿ chí canee yā nduucú nguuví chí ch'óo, maaⁿ ní ndaacadaamí yā yeⁿe 'úú. Ní nguaaⁿ 'iiⁿyāⁿ s'eeⁿ canéé saⁿā Figelo ndúúcū saⁿa Hermógenes. ¹⁶ Naati 'iiⁿyāⁿ yeⁿe familia yeⁿe saⁿā Onesíforo nguéé 'cuināaⁿ yā 'úú yeⁿe chí canuúⁿ vácūū. Saⁿā miiⁿ ndaa sa n'diichi sa 'úú chí nnee sa 'úú. Neⁿé chí Señor Jesucristo ca'á yā vaadí ya'ai yeⁿe yā saⁿā miiⁿ ndúúcū 'iiⁿyāⁿ yeⁿe familia yeⁿe sa. ¹⁷ Nguéé diiⁿ saⁿā Onesíforo tan'dúúcā chí diiⁿ tanáⁿa yā caati taachi canéé sa na yāāⁿ Roma neené na'nuūⁿ sa 'úú ndíí taachi ndaācā sa 'úú. ¹⁸ Neⁿé chí Ndyuús ya'ai 'iinú yā saⁿā miiⁿ nguuví chí Señor Jesucristo yeⁿe yú dííⁿ yā juzgar 'iiⁿyāⁿ yeⁿe iⁿ'yeeⁿdí 'cūū. Ní dii ní neené n'dai deenū di tan'dúúcā chí chinnee sa s'uuúⁿ taachi snée yú na yāāⁿ Efeso.

'Aámá soldado yeⁿe Señor Jesucristo chí din'dáaca sa

2 Díí, Timoteo, chí tan'dúúcā daiyá, cuta'a di fuerzas yeⁿe nducuéⁿē vaadí n'dai chí cuuvi yeⁿe yú caati maaⁿ ní yeⁿe Jesucristo s'uuúⁿ. ² Ní tanducuéⁿē chí n'giindiveeⁿ di yeⁿe 'úú chí ngaⁿá nanááⁿ n'dee n'dái 'iiⁿyāⁿ, chuū ní ca'cueeⁿ di saⁿā s'eeⁿ chí i'téenu sa chí 'áámá cūnee sa n'daacā ndúúcū chí i'téenu sa, ní saⁿā s'eeⁿ ní cuuvi ca'cueeⁿ sa tanáⁿā 'iiⁿyāⁿ.

³ Ní taachi canee chí 'cueenu dí cuuvi tuu'mi ní n'geenu di ngii tan'dúúcā 'áámá

soldado chí n'daacā sa. 'Tíicā diiⁿ di caati dii ní 'áámá soldado yeⁿe Señor Jesucristo. ⁴ Deenu di tan'dúúcā chí 'áámá soldado chí canéé na servicio nguéé diiⁿ sa tan'dúúcā tanáⁿā saⁿā chí nguéé canee na servicio caati canee sa diiⁿ sa cumplir tanducuéⁿē chí ngaⁿa comandante yeⁿe sa. ⁵ 'Tiicá ntúúⁿ. 'Iiⁿyāⁿ chí caⁿá na cancha nguéé cuuvi cuta'a yā mar 'áámá premio nduuti chí nguéé dííⁿ yā cumplir reglas yeⁿe. ⁶ 'Tiicá ntúúⁿ. 'Iiⁿyāⁿ chí diiⁿ ntiⁿnyuⁿ na campo yeⁿe yā cuuvi cuta'á yā caavā maáⁿ yā cosecha yeⁿe yā chí vmnááⁿ vmnāaⁿ. ⁷ Dii, Timoteo, nadacádíínnūⁿ di yeⁿe chí ngaⁿá níícú Señor yeⁿe yú dííⁿ yā chí cadíínnuⁿ di tanducuéⁿē.

⁸ N'gáácú dí ti Jesucristo yeⁿe yú ní yeⁿe ndaata yeⁿe David 'iiⁿyāⁿ, ní nnduuchi yā yeⁿe nguaaⁿ tináⁿā. 'Túúcā ngaⁿā nduudu cuaacu chí nadinguáⁿāi 'iiⁿyāⁿ. ⁹ Níícú cáávā chí ngaⁿá nduudu cuaacu yeⁿe yā neene n'geenú ngii ní canuúⁿ vácūū ndúúcū cadenas tan'dúúcā chí 'niiⁿnúⁿ 'iiⁿyāⁿ naati nduudu yeⁿe Ndyuús nguéé cuuvi 'cueé chíichí ndúúcū cadenas. ¹⁰ Ní cáávā nducuéⁿē chuū 'úú cuheé yeⁿe tanducuéⁿē chí n'geenú ngii caavā 'iiⁿyāⁿ chí Ndyuús nndeeve yā chí cuuvi yeⁿe yā 'iiⁿyāⁿ. Ní 'íícú 'iiⁿyāⁿ s'eeⁿ cuuvi cu'téenu yā Ndyuús. Ní Ndyuús cuuvi nadanguaⁿai yā 'iiⁿyāⁿ yeⁿe nuⁿndi yeⁿe yā cáávā Jesucristo. Ní 'iiⁿyāⁿ s'eeⁿ cuuvi ndaaca yā vida n'dai chí vida cueⁿe daáⁿmaⁿ.

¹¹ Nduudú 'cūū ní cuaacu chí ngaⁿá 'iiⁿyāⁿ:

Nduuti chí diiⁿ yú cuenta chí 'āā n'dií yú ndúúcū Cristo tuu'mi ní diiⁿ yú cuenta chí cunduuchi ntuūⁿ yú ndúúcu yā.

¹² 'Tiicá ntúúⁿ. Nduuti chí n'geenū yú ngii cááva yā ndúúcū nducuéⁿē dendu'ū tuu'mi ní caaⁿmaⁿ ntiⁿnyuⁿ yú ndúúcu yā. Ní nduuti chí cueeⁿdiitu yú yeⁿe Cristo tuu'mi ní

Cristo caⁿá yā caaⁿmaⁿ yā chi s'uuúⁿ nguéé yeⁿé yā s'uuúⁿ.

¹³Nduuti chi n'daaⁿ yú ní nguéé 'aama canee yú ndúúcu chi i'teenu yú yeⁿe Jesucristo tuuⁿmi ní Jesucristo nguéé n'daaⁿ yā ti 'tíica yā ní 'áamá canee yā caati Cristo miiⁿ nguéé cuuvi cueeⁿdiitú yā yeⁿe maáⁿ yā.

¹⁴Maaⁿ ní dii, Timoteo, n'gaacú di yeⁿe nducueⁿé denduⁿ. Yaaⁿvi di 'iiⁿyāⁿ s'eeⁿ nanááⁿ 'iivú Ndyuūs yeⁿe yú chi canéé chi díiⁿ yā 'túúca. Yaaⁿvi di 'iiⁿyāⁿ s'eeⁿ chi nguéé cuuvi 'cuuⁿmáⁿ yā ndúúcu cheendí yā caati nduudu yeⁿé yā nguéé dichíⁿvē. Nduudu s'eeⁿ dámaāⁿ diiⁿ chi tanáⁿā 'iiⁿyāⁿ nadacadíinuⁿ ca yā yeⁿe chi ch'iindiveéⁿ yā yeⁿe nduudu yeⁿé yā. ¹⁵Ní díiⁿ diiⁿ di tanducueⁿé chi n'daacā chi cuuvi di caati taachi ndaa di nanááⁿ Dendyuūs cuuvi di 'cuuⁿmiⁿ di chi n'daacā diiⁿ di ntiⁿnyuⁿ yeⁿé yā. Ní n'daacā ngi'cueeⁿ di nduudu cuaacu yeⁿé Ndyuūs nanááⁿ 'iiⁿyāⁿ. Ní nguéé cuuvi 'cuiináⁿ di nanááⁿ Ndyuūs. ¹⁶Divíi di yeⁿe 'iiⁿyāⁿ chi ngaⁿa n'dee n'dái nduudu chi nguéé dáamá ndúúcu nduudu cuaacu yeⁿé Ndyuūs caati nguéé dichíⁿvē. 'Iiⁿyāⁿ chi ngaⁿa yā 'túúca diiⁿ cá yā nuuⁿndi. ¹⁷Níicú nduudu chi nguéé n'daacā chi 'iiⁿyāⁿ s'eeⁿ ca'cueeⁿ yā 'iiⁿyāⁿ ní ngéenu tan'dúúca chi ca'ai gangrena ní tan'dúúca chi nge'e 'áamá n'daa. 'Tíicā diiⁿ nduudu yeⁿe saⁿā Himeneo ndúúcu saⁿā Fileto. ¹⁸Sáⁿā s'eeⁿ ní divíi yā yeⁿe nduudu cuaacu ní ngaⁿa yā chi 'iiⁿyāⁿ nguéé nnduuchi yā yeⁿe nguaaⁿ tináⁿā. Ní náⁿā 'iiⁿyāⁿ 'āā ntéé i'téenu yā nducueⁿé nduudu cuaacu. ¹⁹Naati chíiⁿ chi Ndyuūs 'āā díiⁿ yā mar 'áamá 'āā ntéé cuuvi nadin'núⁿu yā. Ní 'āā canéé nguⁿ na libro yeⁿé yā ní chichi canéé tan'dúúca 'áamá sello. 'Tíicā nduudu miiⁿ: Señor Jesucristo yeⁿe yú deenú yā du'u 'iiⁿyāⁿ chi yeⁿé yā. Níicú nducyaaca 'iiⁿyāⁿ chi ngaⁿa yā chi yeⁿe

Señor yeⁿe yú canéé chi divíi yā yeⁿe nuuⁿndi.

²⁰Taachi caⁿa yú cuaaⁿ cheeti va'ai chí ch'ete taavi ca n'diichi yú nguéé dámaāⁿ platos ndúúcu 'cuútu yeⁿe 'díiⁿnguaaⁿ o 'díiⁿnguee naati n'diichi yú ntúúⁿ 'cuútu yeⁿe yáⁿá ní yeⁿe íncheetí. N'duuvi 'cuútu 'iiⁿyāⁿ cutaⁿá yā cáāvā ntiⁿnyuⁿ especiales ní náⁿā 'cuútu ní 'iiⁿyāⁿ staⁿá yā chí 'cuíi yā cosas chi nguéé dichíⁿvē. ²¹Ní taachi 'aama yú neⁿe yú diiⁿ yú ntiⁿnyuⁿ yeⁿe Señor Jesucristo yeⁿe yú canee chí 'cuetinéé n'daacā yú ní divíi yú yeⁿe tanducueⁿé chí nguéé dichíⁿvē. 'Tíicā diiⁿ yú maaⁿ níicú cuuvi diiⁿ yú 'āā de'é nūuⁿ ntiⁿnyuⁿ chí n'daacā.

²²'Tiicá ntúúⁿ. Dii, Timoteo, divíi di yeⁿe vicios yeⁿe saⁿā n'gaiyāā. Cunée di n'daacā ní diiⁿ di tanducueⁿé chí n'daacā. Cu'téenu ca di Ndyuūs, dinéⁿe di nducyaaca 'iiⁿyāⁿ, ní cunée di ndúúcu vaādí 'diiⁿ ndúúcu nducyaáacá 'iiⁿyāⁿ chí Ndyuūs nadideevé yā yeⁿe nuuⁿndi yeⁿé yā. Ní maaⁿ ní ngaⁿ'anguaⁿá yā ndúúcu 'iiⁿyāⁿ chí yeⁿe Señor Jesucristo yeⁿe yú. ²³Ní dii, Timoteo, nguéé diiⁿ di cuenta yeⁿe 'iiⁿyāⁿ chí n'dee n'dái neⁿé yā caaⁿmáⁿ yā ndúúcu diiⁿ ndúúcu nduudu chí zonga caati nguee déenu yā. 'Āā déenu di chí naachi 'cuiinū nduudu miiⁿ ní ndaacā vaadi 'caaⁿva. ²⁴Deenu di chí mar 'áamá 'iiⁿyāⁿ chí dichíⁿvē Señor Jesucristo yeⁿe yú nguéé cánéé chí 'cuuⁿmáⁿ yā ndúúcu 'iiⁿyāⁿ naati canéé chí ndíicúⁿ yā ndúúcu nducyaaca 'iiⁿyāⁿ. Ní canee chí ngi'cueeⁿ n'daacá yā. Ní canee chí diiⁿ yā tanducueⁿé ndúúcu paciencia. ²⁵Ní canee chí díiⁿ di componer 'iiⁿyāⁿ chí yáadi'yāā ndúúcu núúⁿmáⁿ staava yeⁿe di. Ní 'iiⁿyāⁿ miiⁿ canee chí cūnee ngiinú yā chí Ndyuūs n'daaⁿ yā vida yeⁿe 'iiⁿyāⁿ rebelde caati cuuvi deenú yā nduudu chí cuaacu. ²⁶'Tíicā ní 'iiⁿyāⁿ s'eeⁿ canéé yā tan'dúúca chí cyaadú yā níicú cuuyiivi ní canduuchi yā ní 'íicú cuuvi ngeenu yā tan'duucá

chi diíⁿ yā cuáⁿai yā yeⁿe trampa yeⁿe yááⁿn'guiinūⁿ. Ní nguéé preso yā yeⁿe yááⁿn'guiinūⁿ chi yááⁿn'guiinūⁿ cuuvi diiⁿ sa chiiⁿ chi neⁿe sa nduucú yā. Ní maaⁿ ní 'iiⁿyāⁿ cuuvi diíⁿ yā chííⁿ chí neⁿe Ndyuūs.

Tan'dúucā chi 'iiⁿyāⁿ caⁿá yā diíⁿ yā nguuvi chí cúchii

3 Dii, Timoteo canee chi déenu ntúúⁿ di chuū. Nguuvi chi cuchii véé cosas chi ngíⁿii. ²'iiⁿyāⁿ ní neⁿé yā maáⁿ yā 'iiⁿyāⁿ ní dinéⁿe taavi yā tuūmī. Ní caaⁿmaⁿ yā chi neené n'geete maaⁿ yā ní nacádíínuuⁿ yā chi neené n'daacā maáⁿ yā, ní nguéé n'daacā dináaⁿ yā yeⁿe tanáⁿā 'iiⁿyāⁿ. Ní ngii taaⁿ yā contra yeⁿe Ndyuūs. Ní nguéé n'giindiveéⁿ yā yeⁿe chiidá yā ndúucū cheecú yā. Ní nguéé ngaⁿa yā 'tíicā: N'dii Ndyuūs, gracias. Ní nguéé n'giindiveéⁿ yā yeⁿe nduudu cuaacu yeⁿe Ndyuūs. ³Ní nguéé dinéⁿe yā 'iiⁿyāⁿ tan'dúucā chi canéé chi dineⁿé yā 'iiⁿyāⁿ, ndíí nguéé ndúú ya'ai 'iinú yā 'iiⁿyāⁿ. Caaⁿmaⁿ yā nuuⁿndi yeⁿe 'iiⁿyāⁿ ní nguéé 'tíicā. Ní nguéé diíⁿ yā chi n'daacā caati neⁿe yā caⁿá yā ndúucū n'daataa ó saⁿā chi nguéé yeⁿe yā. Ní neené taaⁿ yā. Ní nguéé cuuvi n'diichí yā cosa chi n'daacā. ⁴Nééné neⁿe yā vaadi 'caaⁿva ndúucū 'iiⁿyāⁿ. Nguéé 'vaⁿa yā 'āā de'é nūuⁿ chi diíⁿ yā ndúucū 'iiⁿyāⁿ Ní neené nadacadíínuuⁿ yā chi n'deeve maáⁿ yā. Nééné neⁿe yā diiⁿ yā taanduvéé vicio chi véé iⁿ'yeeⁿdí 'cūū. Ní nguéé nadacadíínuuⁿ yā yeⁿe Ndyuūs. ⁵Nééné n'giⁿi yā chi i'téenu yā Ndyuūs naati nguéé diíⁿ yā chiiⁿ chi ngaⁿa nduudu cuaacu yeⁿe Ndyuūs. Díí, Timoteo, diví di yeⁿe 'iiⁿyāⁿ chi 'tíicā.

⁶Caati náⁿā saⁿā s'eeⁿ ní ngeⁿe yā ndúú va'ai nduu va'ai yeⁿe n'daataa chi nguéé diiⁿ n'daacá yā. Ní caⁿ'cueeⁿ sa nduudu chi nguéé n'daacā. Ní n'daataa s'ééⁿ nguéé cuuvi ndaacadaamí yā yeⁿe nuuⁿndi yeⁿe yā. ⁷N'daataa s'eeⁿ ní ngu-

uvi nguuvi n'geeⁿ yā nduudu miiⁿ naati nguéé cuuvi tuumicadíínuuⁿ yā nduudu miiⁿ. ⁸Ní 'iiⁿyāⁿ s'eeⁿ chi diiⁿ 'tíicā ní contra yeⁿe nduudu cuaacu yeⁿe Ndyuūs. Ní tan'dúucā chi diiⁿ saⁿā ngaatúū Janes ndúucū Jambres taachi contra yeⁿe Moisés tiempo chi 'āā chó'ōo, 'tíicā maaⁿ ní 'iiⁿyāⁿ s'eeⁿ nguéé n'daacā nadicadíínuuⁿ yā. Ní nguéé cuaacu chi i'téenu yā Ndyuūs. ⁹Ní 'iiⁿyāⁿ s'eeⁿ nguéé cuuvi 'cueeⁿ cá yā caati nducyaaca 'iiⁿyāⁿ deenú yā táacā idiiⁿ 'iiⁿyāⁿ s'eeⁿ chi tonto yā tan'dúucā chi 'tiicā ntúúⁿ deenú nducyaaca 'iiⁿyāⁿ taacā chi diiⁿ ngaatúū Janes ndúucū Jambres tiempo chi 'āā chó'ōo.

Cuááⁿ ná ch'iinu ní Pablo dingúúⁿ yā carta 'cūū yeⁿe Timoteo

¹⁰Díí, Timoteo, 'āā diiⁿ di nducueⁿé tan'dúucā chi chi'cueeⁿ dii. Ní tan'dúucā chi 'úú canee n'daacā, 'tiicā ntúúⁿ cunee di n'daacā. Ní diiⁿ di tanducueⁿé tan'dúucā chi 'úú diíⁿ nducueⁿé cáávā chi i'teenu yú Ndyuūs. 'Tíicā diiⁿ di. Ní i'téenu di tan'dúucā chi 'úú i'teenú. Ní ya'ai 'iinu di 'iiⁿyāⁿ ní dineⁿe di nducyaaca 'iiⁿyāⁿ. Ní cuchee di yeⁿe nducueⁿé. Tan'dúucā chi diíⁿ 'tiicā ntúúⁿ diiⁿ di. ¹¹Ní deenu di tanducueⁿé chi ch'eenú chii cáávā chi diiⁿ 'iiⁿyāⁿ nduucú ní táacā chi ch'eenú na yáā Antioquía ndúucú yáā Iconio ndúucú yáā Lистра. Ní chicheé tanducueⁿé chi ch'eenú chii naati Señor Jesucristo yeⁿe yú ní nadanguáⁿai yā 'úú yeⁿe nducueⁿé chúū. ¹²'Tíicā ní cuaacu. Nducyaaca 'iiⁿyāⁿ chi neⁿe yā 'cuetinéé n'daacā vida yeⁿe yā cááva Jesucristo ní caⁿá yā 'cuenú yā cuuvi. ¹³Naati 'iiⁿyāⁿ chi nguéé n'daacā ní nginnche'éei yā 'iiⁿyāⁿ. Dach'ete dach'ete cá diíⁿ yā. Ní nginnche'éei yā tanáⁿā 'iiⁿyāⁿ ní ndíí maáⁿ yā nginnche'éei yā 'iiⁿyāⁿ.

¹⁴Naati dii, Timoteo, canee n'daacā di yeⁿe chi ch'eeⁿ di caati cuaacu

níⁿnyúⁿ chí deenu di chi cuaacu ní deenu di du'ú 'iiⁿyāⁿ s'eeⁿ chí chi'cueeⁿ di 'túúca. ¹⁵Ndíⁿ taachi 'línⁿ dii chicadínúⁿ di yeⁿē nduudu yeⁿé Ndyuūs. Ní cáávā nduudu miíⁿ chí ca'cueeⁿ di cuuvi cadínúⁿ di táácā cuuvi ninguaⁿāi di cáávā chí i'téenu di Señor Jesucristo. ¹⁶Ní nducuéⁿē chí canéé nguūⁿ na libro yeⁿé Ndyuūs cucáávā Espíritu N'dai yeⁿe Ndyuūs ní dichí'vē chí ca'cueeⁿ yú 'iiⁿyāⁿ ní cuuvi yú 'iiⁿyāⁿ chee chí nguéé n'daacā chí díⁿ yā. Ní cuuvi yú 'iiⁿyāⁿ táácā chí cuuvi din'daacá yā. Ní ca'cueeⁿ yú táácā chí 'iiⁿyāⁿ cuuvi 'cuēt-inéé n'daacá yā nanááⁿ Ndyuūs. ¹⁷Caati 'iiⁿyāⁿ chí yeⁿéⁿ Ndyuūs ní dichí'vē yā Ndyuūs ní cuuvi díⁿ yā nducuéⁿē nti-ⁿnyuⁿ chí n'daacā.

4 'Úú yaa'ví dii nanááⁿ Ndyuūs ní nanááⁿ Señor Jesucristo. 'Iiⁿyāⁿ miíⁿ caⁿá yā chí ndaa yā taama vmnéⁿēe tan'dúúca rey. Ní ndaa yā ní díⁿ yā juzgar 'iiⁿyāⁿ chí sндуuchí ndúúcu 'iiⁿyāⁿ chí 'āā n'dii caatí ngaⁿa ntiⁿnyúⁿ yā yeⁿe nducuéⁿē naachi ngaⁿa ntiⁿnyúⁿ yā. ²Ní 'úú yaa'ví dii chí ngaⁿa di nduudu cuaacu yeⁿe Cristo nanááⁿ 'iiⁿyāⁿ. Ní caaⁿmaⁿ di nducuéⁿē tiempo chí cuuví diiⁿ di ní 'aara chí tiempo chí nguéé cuuvi diiⁿ di ní diiⁿ di. Caaⁿmaⁿ yuudu di caati 'iiⁿyāⁿ cuuvi cu'téenu yā. Ní caaⁿmaⁿ dí nanááⁿ 'iiⁿyāⁿ chí dinuunⁿdí yā chí 'āā ntéé dinuunⁿdí yā 'tíicā. Ní ca'a di consejo 'iiⁿyāⁿ, ní ca'cueeⁿ di 'iiⁿyāⁿ. Ní diiⁿ di tanducuéⁿē ndúúcu n'dai, ní ca'cueeⁿ di nduú 'cuaaⁿ. ³'Tíicā diiⁿ di caati ndaa tiempo chí 'iiⁿyāⁿ nguéé 'caandiveéⁿ yā nduudu chí n'dai. Naati caⁿá yā in'nuúⁿ yā n'dee n'dái maestros chí ca'cueeⁿ yā 'iiⁿyāⁿ tan'dúúca chí neⁿé yā 'caandiveéⁿ yā. Ní tan'dúúca vaanicadínúⁿ yeⁿe maáⁿ yā 'tíicā neⁿe yā chí ca'cueeⁿ yā. ⁴Ní ndaacadaamí yā yeⁿē nduudu cuaacu ní nguéé 'caandiveéⁿ yā yeⁿē. Ní 'caandiveéⁿ yā cuentos chí nguéé n'daacā. ⁵Naati dii ní ca-

nee chí candéé di cuidado yeⁿé tanducuéⁿē dendu'ú tanducuéⁿē tiempo. Ní cuchéé di yeⁿe nducuéⁿē chí 'cueenu di cuuvi. Diiⁿ di ntiⁿnyuⁿ yeⁿé Ndyuūs ní caaⁿmaⁿ di nduudu yeⁿé Ndyuūs chí diiⁿ chí nguaⁿāi 'iiⁿyāⁿ. Canéé chí diiⁿ di cumplir ntiⁿnyuⁿ chí Ndyuūs tee yā dii.

⁶'Úú deenú chí ca'a vida yeⁿé cáávā Cristo ní 'iiⁿyāⁿ caⁿá yā 'caaⁿnuⁿ yā 'úú. 'Āā canéé niⁿnuuⁿ nguuvi chí 'cuúví. ⁷Naati deenú chí díⁿ ntiⁿnyuⁿ yeⁿé tan'dúúca 'áamá soldado chí idiiⁿ sa caandaá n'daacā. 'Tíicā díⁿ. Ch'íinú nti-ⁿnyuⁿ yeⁿé ní 'áamá canéé n'daacā ndúúcu chí i'teenú yeⁿe Ndyuūs. ⁸Cáávā chuú cunee ngiinú 'aama corona chí Señor Jesucristo chí juez chí diiⁿ nducuéⁿē chí cuaacu, caⁿá yā chí téé yā 'úú ndúúcu 'iiⁿyāⁿ chí yeⁿe yā, 'iiⁿyāⁿ s'eeⁿ chí n'daacā idiiⁿ yā. 'Tíicā cuuvi nguuvi chí Cristo ndaa yā taama vmnéⁿēe. Ní nguéé téé yā corona dámaāⁿ 'úú naati ca'a yā corona nducyáácā 'iiⁿyāⁿ chí neⁿé yā Jesucristo ní cūnee ngiinú yā Jesucristo ní neⁿé yā chí ndaa Jesucristo taama vmnéⁿēe.

Pablo ca'a yā instrucciones ca'áamá ca'aama 'iiⁿyāⁿ

⁹Dii, Timoteo, diiⁿ núúⁿ yiiⁿnu di chí chíi di n'diichi di 'úú. ¹⁰Saⁿā Demas miíⁿ ní ndaacadaamí sá yeⁿe 'úú caati neⁿe ca sa cosas chí véé iⁿyeéⁿdí 'cūú ní cheⁿē sa yáāⁿ Tesalónica. Saⁿā Cresente cheⁿē sa yáāⁿ Galacia ní saⁿā Tito cheⁿē sa yáāⁿ Dalmacia. ¹¹Dámaāⁿ Lucas canee sa nducú maaⁿ. Ní yaa'vi di Marcos chí caⁿa sa ndúúcu dii. Ní candéé di sáⁿā ndúúcu di caati Marcos cuuvi cunnee ca sá 'úú na ntiⁿnyuⁿ chí díⁿ. ¹²'Úú 'āā dicho'o saⁿā Tíquico na yáāⁿ Efeso. ¹³Ní taachi cuchii di, nandéé di cotón yeⁿé chí s'neéⁿ na vaacu saⁿā Carpo na yáāⁿ Troas. Nandéé di ntúúⁿ libros yeⁿé ndúúcu caaca chí neⁿe niⁿnyúⁿ.

¹⁴ Saⁿā Alejandro chí 'viichi cūū ní neéné n'deeé cosas chí nguéé n'daacā diiⁿ sa nduucú. Ndyuūs caⁿá yā nadíí'vè yā saⁿā caavā tanducuéⁿē chí nguèe n'daacā diiⁿ sa nduucú. ¹⁵ Cundée di cuidado yeⁿe saⁿā miⁿ caati neené taaⁿ ngaⁿa sa yeⁿe chí ngi'cueeⁿ yú ti contra yeⁿe chí ngi'cueeⁿ yú.

¹⁶ Vmnááⁿ vmnaaⁿ taachi 'úú cheⁿé nanaaⁿ juez mar 'áámá 'iiⁿyāⁿ nguéé cheⁿe yā nduucú naati nducyaaca 'iiⁿyāⁿ divíi yā yeⁿe 'úú. 'Úú ngiicá nanááⁿ Ndyuūs chí nadach'εécú yā nuuⁿndi yeⁿe 'iis'tií. ¹⁷ Naati Señor nginneé yā 'úú ní teé yā fuerzas 'úú cáávā chí 'úú ngii ngaⁿá nduudu cuaacu yeⁿé yā nanááⁿ 'iiⁿyāⁿ chí nguéé yeⁿe ndaata 'iiⁿyāⁿ Israel, nduudu chí diiⁿ chí nnguaⁿāi 'iiⁿyāⁿ. Ní 'íicú nducuéⁿē 'iiⁿyāⁿ s'eeⁿ cuuvi 'caandiveéⁿ yā nduudu cuaacu yeⁿé Ndyuūs. Ní 'tíicā Señor yeⁿe yú nadanguáⁿai yā 'úú yeⁿe 'iiⁿyāⁿ s'eeⁿ. Ní chuū ní tan'dúúicā chí ninguáⁿai yā 'úú yeⁿe cheendi 'yáíⁿyāaⁿ cuá'āa. 'Tíicā diiⁿ yā nduucú. ¹⁸ Níicú Señor Jesucristo ní nadanguaⁿai yā 'úú yeⁿe tanducuéⁿē

cosas chí nguèe n'daacā chí 'iiⁿyāⁿ neⁿé yā diiⁿ yā nduucú. Ní Señor Jesucristo candee yā cuidado yeⁿe vida yeⁿé chí cuuvi naⁿá na va'ai cheeti nguuvi naachi ngaⁿa ntiiⁿnyúⁿ yā. Señor Jesucristo miⁿ ní dich'εete yú 'iiⁿyāⁿ cueⁿe daāⁿmaⁿ. 'Tíicā.

'Cuiinū carta ndúúicū saludos ndúúicū vaadi n'dai yeⁿe Ndyuūs

¹⁹ Lado yeⁿé: N'dáí yā ngaⁿá, caaⁿmaⁿ di taⁿā Prisca ndúúicū isaⁿā tá chí Aquila ndúúicū 'iiⁿyāⁿ yeⁿe familia yeⁿe saⁿā Onesíforo. ²⁰ Saⁿā Erasto canee sá na yāā Corinto. Ní saⁿā Tróximo chí ngi-itā sa, 'úú s'neéⁿ saⁿā na yāā Mileto. ²¹ Maaⁿ ní diiⁿ núúⁿ yiiⁿnu di cuchii dí n'diichi di 'úú taachi 'āā 'cuéé ndaa tiempo chí 'iiche. Saⁿā Eubulo ndúúicū saⁿā Pudente ndúúicū saⁿā Lino n'dúúicū n'daataá Claudia ndúúicū nducyaaca vi'i yú: N'dai ndís'tií ngaⁿá yā.

²² Neⁿé chí Señor Jesucristo yeⁿe yú canee yā ndúúicū dii hermano yeⁿé níicú Ndyuūs téé yā dii yeⁿe nducuéⁿē chí n'dai yeⁿé yā. 'Tíicā cuuvi.

CARTA YEⁿE SAⁿĀ TITO

1 'Úú Pablo chi apóstol yeⁿé Señor Jesucristo ní díiⁿ ntiíⁿnyuⁿ yeⁿé Ndyuūs. Ndyuūs dich'ó yā 'úú chi cuuvi inneé 'iiⁿyāⁿ s'eeⁿ chi Ndyuūs ndeēve yā chi cuuvi yeⁿé yā 'iiⁿyāⁿ s'eeⁿ caati cu'teenu cá yā yeⁿe religión yeⁿe yú. ²Ní cūnee ngiinú yā ndúúcu s'uuúⁿ chi Ndyuūs tée yā vida cueⁿe daāⁿmaⁿ s'uuúⁿ chi Ndyuūs caⁿa yā chi ca'a yā 'iiⁿyāⁿ chi yeⁿe yā vmnááⁿ vmaⁿaⁿ chi 'āa cuéé cūnee iⁿyeeⁿdí 'cūū. Ndyuūs miiⁿ ní nguéé cuuvi caaⁿmáⁿ yā nduudu yaadi. ³Ní taachi ndaa tiempo chi neⁿe Ndyuūs, Ndyuūs chiⁿi yā nduudu cuaacu yeⁿé yā cucááⁿvā 'iiⁿyāⁿ chi ngaⁿa nduudu cuaacu yeⁿé yā. Maaⁿ ní Ndyuūs yeⁿe yú chi nadanguáⁿai yā s'uuúⁿ dich'ó yā 'úú chi ngaⁿá nduudu cuaacu yeⁿé yā. ⁴Maaⁿ ní dingúⁿ carta 'cūū yeⁿe dii, Tito. Ni cuaacu níⁿnyúⁿ díi ní tan'dúúca daiyá chi ngaⁿá nduudu cuaacu nanááⁿ dii, nduudu chi i'teenu yú. Neⁿé chi Ndyuūs chiida yú ndúúcu Señor Jesucristo yeⁿe yú chi nadanguáⁿai yā s'uuúⁿ itée yā dii nducueⁿé chi n'dai taavi yeⁿé yā ní ya'ai iinu yā dii. Ní tan'dúúca chi ya'ai iinú Ndyuūs 'iiⁿyāⁿ 'tiicá ntúūⁿ diiⁿ di. Ní Ndyuūs tée yā dii vaadi diiⁿ yeⁿé yā.

Ntiíⁿnyuⁿ yeⁿe Tito na yáⁿāa Creta

⁵Ní cááⁿvā ntiíⁿnyuⁿ chi canee chi diiⁿ di 'úú chiⁿneéⁿ dii na isla Creta. Canéé chi dicuaacú di cosas chi nguεε n'daacā. Ní cu'neeⁿ dí 'iiⁿyāⁿ n'gεεε chi ngaⁿa ntiíⁿnyúⁿ yā yeⁿe nducueⁿé yaācū na 'áámá 'áámá ciudad. 'Úú dich'ó dii chi diiⁿ di ntiíⁿnyuⁿ 'cūū. ⁶Ní 'iiⁿyāⁿ chi ndeēve dí canee chi 'cuεetinéé n'daacā yā manera chi nguéé cuuvi caaⁿmaⁿ tanáⁿā 'iiⁿyāⁿ chi véé nuuⁿndi yeⁿé yā. Ní véé 'áámá nūūⁿ n'daataa yeⁿe yā. Ní daiyá yā canéé chí i'téenu yā Ndyuūs, ní nguéé da'caiyāa

chi travieso yā chi nguéé n'daacā idiiⁿ yā, ní nguéé da'caiyāa chí yaadí'yāa. ⁷'Iiⁿyāⁿ chí díiⁿ yā ntiíⁿnyuⁿ yeⁿé Ndyuūs canee chí candéé yā cuidado yeⁿe ntiíⁿnyuⁿ yeⁿé Ndyuūs. Ní cááⁿvā chuū 'iiⁿyāⁿ s'eeⁿ canee chí 'cuεetinéé n'daacā yā. Nguéé cuuvi 'iiⁿyāⁿ chí necio yā, ní nguéé 'iiⁿyāⁿ chí nduuvi taáⁿ yā, ndíi nguéé ndúú 'iiⁿyāⁿ chí ngii cuu'ví yā va ní in'nuuⁿ yā vaadi 'caa'va. Ní nguéé cuuvi 'iiⁿyāⁿ chí neⁿé yā diiⁿ yā ganar tuūmī cááⁿvā ntiíⁿnyuⁿ chí díiⁿ yā chí nguéé n'daacā. ⁸Naati 'tíicā canee chí díiⁿ yā. Canéé chí díiⁿ yā recibir na vaacú yā 'iiⁿyāⁿ chí canúúⁿ yúúni. Canéé chí neⁿe yā chí din'daacā yā ní n'daacā nadacadíinuⁿ yā yeⁿe nducueⁿé chí caⁿá yā diiⁿ yā, ní díiⁿ yā chíiⁿ chí cuaacu. Ní deēve vida yeⁿe yā, ní nguéé canee chí taamá yā ca'a yā consejo 'iiⁿyāⁿ. ⁹Ní cundéé n'daacā yā nduudu cuaacu yeⁿé Ndyuūs chí ch'éeⁿ yā ní 'tíicā cuuvi ca'cueéⁿ yā nduudu cuaacu miiⁿ. Ní cuuvi díiⁿ yā cuhéé yā ndúúcu 'iiⁿyāⁿ chí contra yeⁿe nduudu cuaacu ní cuuvi chíⁿi yā 'iiⁿyāⁿ s'eeⁿ chí nduudu cuaacu miiⁿ ní cuaacu.

¹⁰Neene n'dái 'iiⁿyāⁿ nguaaⁿ 'iiⁿyāⁿ judíos s'eeⁿ nguéé neⁿe yā cu'téenu yā nduudu cuaacu miiⁿ. 'Iiⁿyāⁿ s'eeⁿ ngaⁿá yā cosas chí nguéé dichí'vē ní nginche'éi yā 'iiⁿyāⁿ. ¹¹Canee chí diiⁿ yú chí 'iiⁿyāⁿ s'eeⁿ nguéé cuuvi candéε yā nduudu yeⁿé yā caati ndástaⁿá yā vaadi cadíinūūⁿ yeⁿé 'iiⁿyāⁿ. Ní díiⁿ yā chí nducyaaca 'iiⁿyāⁿ yeⁿe 'áámá va'āi yeⁿe táámá va'āi cu'téenu yā nduudu yeⁿé yā. Ní ngi'cueéⁿ yā cosas chí nguéé n'daacā cucááⁿvā chí neⁿé yā diiⁿ yā ganar tuūmī manera chí nguéé n'daacā.

¹²Ní 'áámá saⁿā yeⁿe isla Creta chí profeta yeⁿe yāāⁿ miiⁿ ngaⁿa sa 'túúca yeⁿe 'iiⁿyāⁿ yeⁿe yāāⁿ vaacú sa. Ngaⁿa sa chí 'iiⁿyāⁿ yeⁿe yáⁿāa Creta ní nééné yaadí yā, ní nééné tááⁿ yā, ní nééné 'daan'dí yā, ní nééné n'deēε nge'e yā. ¹³Ní saⁿā miiⁿ ní ngaⁿa sa nduudu

cuaacu yeⁿe 'iiⁿ'yāⁿ. Níícú cáávā chuū canee chi yaa'vi dí 'iiⁿ'yāⁿ s'eeⁿ ndúúcu nduudu chæechi caati cuuvi cu'téenu n'daacá yā nduudu cuaacu miⁿ. ¹⁴Ní nguéé díⁿ yā cuenta yeⁿe nduudu yeⁿe 'iiⁿ'yāⁿ judíos chi nginnche'él yā 'iiⁿ'yāⁿ ndúúcu nduudu chi maáⁿ yā nadacadíínuuⁿ yā ní ngaⁿ'a yā. Ndíí nguéé n'giindiveéⁿ yā orden chi ngaⁿ'a 'iiⁿ'yāⁿ s'eeⁿ chi ndaacadaamí yā yeⁿe nduudu cuaacu yeⁿe Ndyuūs.

¹⁵Ní 'iiⁿ'yāⁿ chi Ndyuūs didæevé yā staava yeⁿe yā chí dæve nacadíínuuⁿ yā dámaāⁿ yeⁿe dendu'ū chi dæve ní sta'á yā nducuéⁿe tan'dúúca chi dæve. Naati 'iiⁿ'yāⁿ chi nguéé i'téenu yā Ndyuūs nadacadíínuuⁿ yā yeⁿe cosas chi nguéé n'daacā. Ní mar 'áamá cosa ní nguéé dæve yeⁿe 'iiⁿ'yāⁿ miⁿ. 'Tiicá ntúuⁿ ní vaanicadíínuuⁿ yeⁿe yā ní nguéé dæve. Ní nducuéⁿe chi véé na staava yeⁿe yā ní nguéé dæve. Ndíí nguéé ndúú chi inadacadíínuuⁿ yā chí dæve. ¹⁶'iiⁿ'yāⁿ s'eeⁿ ngaⁿ'a yā chi n'diichí yā Ndyuūs naati dendu'ū chi díⁿ yā ch'iⁿ'í chi nguéé cuaacu. 'iiⁿ'yāⁿ s'eeⁿ nguéé neⁿ'é yā 'iiⁿ'yāⁿ ní nguéé neⁿ'é yā díⁿ yā chi ngaⁿ'a 'iiⁿ'yāⁿ. Nguéé n'daacā yā. Ní nguéé dichí'vê chi díⁿ yā mar 'áamá cosa chi n'daacā.

Canéé chi ca'cueeⁿ di dendú'ū chi cuaacu

2 Díí, Tito, nducuéⁿe chi caaⁿ'maⁿ di canee chi caaⁿ'maⁿ di ndúúcu nduudu cuaacu yeⁿe Ndyuūs. ²Yaa'vi di saⁿ'ā ndiicúú chi ngaⁿ'a ntiⁿ'nyuⁿ yeⁿe yaacū naachi 'iiⁿ'yāⁿ i'téenu yā Jesucristo chi canéé chí serio yā. Ní canéé chí nadacadíínuuⁿ yā n'dai ní nguéé díⁿ yā dendu'ū chi nguæ n'daacā. Canéé chi cu'téenu yā dámaāⁿ nduudu cuaacu yeⁿe Ndyuūs ní dinéⁿ'e yā nducyaaca 'iiⁿ'yāⁿ. Ní canéé chi cuchéé yā yeⁿe nducuéⁿe ndúúcu paciencia. ³Tiicá ntúuⁿ yaa'vi di n'daataa s'eeⁿ chi ngeⁿ'e yā na yaacū yeⁿe 'iiⁿ'yā chí i'téenu yā Jesucristo chi

'cuætinéé n'daaca yā tan'dúúca 'iiⁿ'yāⁿ dæve chi yeⁿe Ndyuūs. Nguéé caaⁿ'maⁿ yā yeⁿe mar 'áamá 'iiⁿ'yāⁿ chí nduudu yaadi ní nguéé cuu'ví yā va. Ní canee chí díⁿ n'daacá yā caati tanáⁿ'ā 'iiⁿ'yāⁿ cuuvi cuta'á yā ejemplo yeⁿe n'daataá s'eeⁿ. ⁴Ní 'íícú cuuvi ca'cueéⁿ yā tanáⁿ'ā n'daataá da'cáiyāa tan'dúúca chí canéé chí dinéⁿ'e yā isaⁿ'ā yeⁿe yā ní dinéⁿ'e ntúuⁿ yā daiya yā. ⁵Ní n'daataa s'eeⁿ cuuvi nadacadíínuuⁿ yā chæe chí n'daacā ní díⁿ yā chuū. Ní díⁿ yā nducuéⁿe chí neⁿ'e Ndyuūs. Ní din'dai cá yā na vaacú yā ní n'giindiveéⁿ yā isaⁿ'ā yeⁿe yā. 'Tíicá ní mar 'áamá 'iiⁿ'yāⁿ nguéé cuuvi cunncaá caaⁿ'maⁿ yā yeⁿe nduudu yeⁿe Ndyuūs.

⁶Tiicá ntúuⁿ yaa'vi di saⁿ'ā n'gaiyāá chí nadacadíínuuⁿ yā n'daacā vmaⁿ'ā chí díⁿ yā de'ê væ. ⁷Ní díí, Tito, díⁿ di n'daacā nducuéⁿe chí díⁿ di ní 'íícú 'iiⁿ'yāⁿ cuuvi cuta'á yā vida yeⁿe di tan'dúúca 'áamá ejemplo. Ní taachi ca'cueeⁿ di 'iiⁿ'yāⁿ, díⁿ di ndúúcu núúⁿ'máⁿ staava yeⁿe di ní canee di serio di. ⁸Ní ca'cueeⁿ di ndúúcu nduudu chí n'daacā ní 'iicu mar 'áamá 'iiⁿ'yāⁿ nguéé cuuvi caaⁿ'maⁿ yā de'ê væ yeⁿe chí ngaⁿ'a di. Ní 'iiⁿ'yāⁿ chí contra yeⁿe di cuuvi 'cuinaáⁿ yā caati nguéé cuuvi caaⁿ'maⁿ yā mar 'áamá contra yeⁿe di.

⁹Ní yaa'vi dí 'iiⁿ'yāⁿ chí 'áamá canee chí díⁿ yā ntiⁿ'nyuⁿ, canéé chí n'giindiveéⁿ yā nducuéⁿe yeⁿe 'iiví yā. Ní cunee yiinú yā yeⁿe nducuéⁿe yeⁿe 'iiví yā. Ní nguéé canee chí nguæcútaⁿ'á yā yeⁿe 'iiví yā. ¹⁰Ní nguéé canéé chí diduucú yā yeⁿe 'iiví yā naati canee chí díⁿ n'daacá yā ndúúcu 'iiví yā ní ch'iⁿ'í yā chí dámaāⁿ díⁿ yā cosas chí n'daacā cáávā 'iiví yā. Ní 'íícú ndúúcu nducuéⁿe chí díⁿ yā cuuvi ch'iⁿ'í yā 'iiví yā ní 'iiví yā cuuvi caaⁿ'maⁿ n'daacá yā yeⁿe nduudu cuaacu yeⁿe Ndyuūs chí nanguaⁿ'āi yú.

¹¹Ndyuūs ch'iⁿ'í yā chí díneⁿ'e yā nducyaaca 'iiⁿ'yāⁿ. Ní ch'iⁿ'í yā vaadi n'dai taavi yeⁿe yā caati cuuvi nadan-

guáⁿai yā nducyaaca 'iiⁿyāⁿ. ¹²Nífcú vaadi n'dai taavi yeⁿé Ndyuūs ngi'cueeⁿ s'uúúⁿ chi canee chi divíi yú yeⁿe nducuéⁿē chi nguēē n'daacā ndúúcu nducuéⁿē vicio chi véé iⁿ'yeeⁿdí 'cūū chi neⁿe yú diiⁿ yú. Ní canee chi nadacadiinuⁿ yú n'daacā yeⁿe nducuéⁿē vniááⁿ chi diiⁿ yú. Ní 'cuetinéé n'daacā yú ní diiⁿ yú tanducuéⁿē chi neⁿe Ndyuūs 'naaⁿ chi canee yú iⁿ'yeeⁿdí 'cūū. ¹³Ní vaadi n'dai taavi yeⁿé Ndyuūs ngi'cueeⁿ s'uúúⁿ chi 'cuetinéé n'giiⁿnu yú nguuvi ch'ēete taachi Cristo diiⁿ yā cumplir nduudu chí ngaⁿa yā. Ní taama vniéⁿē ndaa ntúūⁿ Jesucristo yeⁿe yú chi Ndyuūs chí ch'ēete taavi ca chi nadanguáⁿai yā s'uúúⁿ. ¹⁴Ní ca'á yā vida yeⁿe maáⁿ yā chi ch'ii yā cáávā s'uúúⁿ chi nadanguáⁿai yā s'uúúⁿ yeⁿe nducuéⁿē nuuⁿndi yeⁿē yú. Ní nadidēevé yā s'uúúⁿ yeⁿe nducuéⁿē nuuⁿndi chí diiⁿ yú chi cuuvi yeⁿé yā s'uúúⁿ. Ní 'ífcú 'áámá cunee yú diiⁿ yú ntiiⁿnyuⁿ chí n'daacā.

¹⁵Nducuéⁿē chuū ní canee chi ca'cueeⁿ di. Ní ca'a di orden ti dii tan'dúúca 'iiⁿntyéⁿē dii. Cunnee di 'iiⁿyāⁿ chí d'vaachí yā. Ca'a di consejo 'iiⁿyāⁿ chí nguēē n'daacā idiiⁿ yā. Din'daacá di yeⁿe nducuéⁿē caati mar 'áámá 'iiⁿyāⁿ cuuvi cunncā caaⁿmáⁿ yā yeⁿē di.

Yeⁿe chi canéé chí diiⁿ 'iiⁿyāⁿ chí i'téenu yā Señor Jesucristo yeⁿe yú

3 Cúúví dí 'iiⁿyāⁿ chí i'téenu yā Señor Jesucristo chí n'gaacu yā chí canéé maaⁿ poder yeⁿe gobernador ndúúcu tanáⁿā 'iiⁿntyéⁿē ní canee chí n'giindiveéⁿ yā yeⁿe yā. Ní 'āā vee yaáⁿ yā chí diiⁿ yā nducuéⁿē ntiiⁿnyuⁿ chí n'daacā. ²Ní nguéé canéé chí caaⁿmaⁿ taaⁿ yā yeⁿe mar 'áámá 'iiⁿyāⁿ. 'Tíicā canee chí 'cuetinéé 'diiⁿ yā ndúúcu 'iiⁿyāⁿ ní din'dai yā ndúúcu yā. Ní canéé chí ch'iⁿi yā tanáⁿā 'iiⁿyāⁿ ndúúcu tandu-

cuéⁿē chí diiⁿ yā ndúúcu yā chí maaⁿ yā ndiicuuⁿ yā.

³'Tíicā ntúūⁿ s'uúúⁿ tiempo chí chó'oo taachi tonto yú ní nguéé n'giindiveeⁿ yú nduudu yeⁿé Ndyuūs ní nguéé n'daacā idiiⁿ yú. Ní canee yú tan'dúúca saⁿa esclavo caati yeⁿe chí neⁿe cuerpo yeⁿe yú ní diiⁿ yú ndúúcu nducuéⁿē vicio yeⁿe chí véé, 'tíicā diiⁿ yú. Ní diiⁿ taáⁿ yú, ní neⁿe ca yú cosas tan'dúúca chí véé yeⁿē tanáⁿā 'iiⁿyāⁿ. Ní nguéé neⁿe yú 'iiⁿyāⁿ. Ndíi nguéé ndúú neⁿé yā s'uúúⁿ. Ní nguéé neⁿe yú 'aama yú taama yú. ⁴Naati taachi Cristo chí n'dai taavi yā ní neⁿé yā nducyaaca 'iiⁿyāⁿ ndaa yā nanáaⁿ yú, Cristo chí nadanguáⁿai yā s'uúúⁿ, ⁵tuu'mi ní nadanguáⁿai yā s'uúúⁿ. Nguéé nadanguáⁿai yā s'uúúⁿ cáávā chí diiⁿ yú cosas chí n'daacā naati caati ya'āi 'iinú yā s'uúúⁿ ní nadanguáⁿai yā s'uúúⁿ caavā chí naaⁿnú yā s'uúúⁿ. Ní chuū neⁿe caaⁿmaⁿ chí ch'iindiyaaⁿ yú ndúúcu vida ngai cucáávā Espíritu N'dai yeⁿé Ndyuūs. Ní Espíritu miiⁿ tee yā s'uúúⁿ 'áámá vida chí ngāi. ⁶Ní 'tíicā cuuvi cucáávā Señor Jesucristo yeⁿe yú chí nadanguáⁿai yā s'uúúⁿ, Ndyuūs tee yā núúⁿmáⁿ ch'ēete Espíritu N'dai yeⁿe yā s'uúúⁿ. ⁷Ní cucáávā Ndyuūs ca'á yā nducuéⁿē chí n'dai yeⁿé yā, diiⁿ yā chí s'uúúⁿ nguēē 'iiⁿyāⁿ nuuⁿndi yú nanáaⁿ yā ti didēevé yā s'uúúⁿ. Ní maaⁿ ní diiⁿ yā aceptar s'uúúⁿ ní ca'á yā chí téé yā s'uúúⁿ vida cueⁿe daaⁿmaⁿ chí cuuvi yeⁿe yú. Ní cunee ngiiⁿnuⁿ yú vida 'cūū chí cuuvi yeⁿe yú.

⁸Nduudú 'cūū chí ngaⁿá ní nduudu cuaacu ní 'áámá cūnee. Neⁿé chí di-itú cunee di ndúúcu nduudu 'cūū ní di-itú caaⁿmaⁿ di va. Ní 'ífcú nduudú 'cūū cūnee 'iiⁿyāⁿ chí i'téenu yā Ndyuūs, ní 'iiⁿyāⁿ s'eeⁿ ca'á yā diiⁿ yā ntiiⁿnyuⁿ chí n'daacā. Nduudú 'cūū ní n'daacā ní dichíí'vē 'iiⁿyāⁿ. ⁹Nguéé cu'nee'veeⁿ di nduudu chí nguéé dichíí'vē chí n'dee n'dái chí n'gucēcútaⁿā 'iiⁿyāⁿ. Ní nguéé

cu'neeⁿveeⁿ ca di nduudu chi canéé nguūⁿ yeⁿe 'iiⁿ'yāⁿ yeⁿe ndaata yeⁿe di. Ndíí nguéé ndúú cu'neeⁿveeⁿ di yeⁿe 'iiⁿ'yāⁿ chi nguúⁿ yā yeⁿe nduudu yeⁿe ley. Nduudú cūū nguéé de'ē vεε ní nguéé dichí'vē. Naati cu'neeⁿveeⁿ cá di nduudu cuaacu yeⁿe Ndyuūs.

¹⁰Nduuti chi 'áamá 'iiⁿ'yāⁿ dííⁿ yā chi véé divisiones nguaaⁿ 'iiⁿ'yāⁿ yeⁿe yaācū yeⁿe 'iiⁿ'yāⁿ chi i'téenu yā Cristo, yaa'vi di 'iiⁿ'yāⁿ miiⁿ 'áamá cuuvi o 'uūvi cuuvi. Ní ndúúti chi nguéé n'giindiveéⁿ yā yeⁿe di tuu'mi ní tun'dáa di 'iiⁿ'yāⁿ miiⁿ yeⁿe yaācū. ¹¹Deenu di chi 'iiⁿ'yāⁿ miiⁿ nguéé n'daacā vaanicadínūuⁿ yeⁿe yā ní dinuuⁿndí yā. Ní nuuⁿndi chi dííⁿ yā ní caaⁿ'maⁿ chi condenado yā.

**Pablo ca'cueéⁿ yā Tito yeⁿe
chi canee chi dííⁿ yā**

¹²Taachi dicho'ó hermano Artemas o hermano Tíquico nanááⁿ di, dííⁿ di chi dííⁿnúúⁿ yiiⁿnu di chíi di naachi canéé

na yāāⁿ Nicópolis caati neⁿ'é cūneé yāāⁿ miiⁿ tiempo chi 'iiche. ¹³Cunnee di Zenas chi abogado ndúúcū Apolos chi caⁿ'á yā na yúúni. Ní ca'a di 'iiⁿ'yāⁿ s'uuⁿ nducuéⁿe necesidades yeⁿ'é yā cáávā viaje yeⁿ'é yā caati nguéé dííⁿ yā falta mar 'áamá. ¹⁴Ní yaa'vi di hermanos yeⁿe yú chi i'téenu yā Jesucristo chí 'cueeⁿ yā taacā chi canee chi din'daacā yā nducuéⁿe tiempo ní cunneé yā 'iiⁿ'yāⁿ chi véé necesidades yeⁿe yā caati 'tíicā dichí'vē vida yeⁿe yā.

**'Cuiinū carta ndúúcū saludos ndúúcū
vaadí n'dai yeⁿ'é Ndyuūs**

¹⁵Nducyaaca hermanos chi snée yā nduucú: N'dai díi, ngāⁿ'a yā. Ní díí ngāⁿ'a dí: N'dai yā, nducyaaca 'iiⁿ'yāⁿ chi i'téenu yā Ndyuūs, hermanos chi dineⁿ'e yú 'iiⁿ'yāⁿ. Neⁿ'é chi Ndyuūs téé yā ndís'tií nducuéⁿe chi n'dai taavi yeⁿ'é yā. 'Tíicā cuuvi.

CARTA YEⁿE SAⁿĀ FILEMÓN

1 'Úú Pablo, saⁿā chi canuúⁿ vácūū cáávā chi diíⁿ ntiíⁿnyuⁿ yeⁿē Jesucristo. 'Úú ndúúccū hermano Timoteo idingúūⁿ 'nū carta 'cūū yeⁿē dii Filemón chi néené neⁿe 'nū dii compañero yeⁿe yú viíⁿ chi dáámá idiiⁿ yú ntiíⁿnyuⁿ ndúúccū ví'i. ²Ní idinguúⁿ yeⁿe 'iiⁿyāⁿ chi yeⁿe yaácū chi nduuvidaamā yā ná vaacu di ní yeⁿē hermana Apia ní yeⁿē hermano Arquipo chi diiⁿ sa luchar nduucú 'nū na ntiíⁿnyuⁿ chi diiⁿ 'nū. ³Neⁿé chi Ndyuūs chiida yú ndúúccū Señor Jesucristo téé yā ndís'tii nducuéⁿē denduū chi n'dai taavi yeⁿé yā ndúúccū vaadi 'diiiⁿ.

Filemón dinéⁿe yā 'iiⁿyāⁿ ní i'téenu yā Ndyuūs

⁴Cueⁿe daāⁿmaⁿ 'úú ca'á gracias Ndyuūs taachi n'gaacu yeⁿe di 'naaⁿ chi ngaⁿāngua'á. ⁵Caati hermanos yeⁿe yú ngaⁿa yā yeⁿe di tan'dúúccā chi neⁿe di Señor Jesucristo yeⁿe yú ndúúccū nducyaaca 'iiⁿyāⁿ chi yeⁿé Jesucristo, ní tan'dúúccā chi i'téenu di Señor Jesucristo. ⁶'Úú ngiicá Ndyuūs caava 'iiⁿyāⁿ chi i'téenu yā caati candē di nduudu cuaacu yeⁿé Jesucristo nanáaⁿ yā. Ní ngiicá chi cuuvi tuumicadíínuuⁿ yā yeⁿe tanducuéⁿē chi n'daacā chi Jesucristo itée yā s'uuúⁿ. ⁷Ní 'úú yeenu taaví ní véé 'viich'eetínūūⁿ yeⁿé caati dinéⁿe di nducyaaca 'iiⁿyāⁿ. Ní ca'a di consuelo 'iiⁿyāⁿ chi i'téenu yā Ndyuūs.

Pablo ngiicá yā 'áámá favor caavā esclavo Onésimo

⁸Áará chí cuuví dicho'ó orden yeⁿē di caati 'úú apóstol 'úú chí candēé nduudu yeⁿé Ndyuūs, ⁹naati neⁿé di'cuiitú dii cucáavā chi neⁿe yú Cristo. 'Úú Pablo 'āā ndiicúú maaⁿ ní canuúⁿ vácūū cucáavā chi diíⁿ ntiíⁿnyuⁿ yeⁿe Cristo.

¹⁰Ní ngiicá 'áámá favor caavā Onésimo chi tan'dúúccā daiyá cucáavā chi i'téenu sa nduudu cuaacu yeⁿé Ndyuūs chi 'úú ngaⁿá taachi canuúⁿ vácūū.

¹¹Tiempo chi chó'oo sáⁿa 'cūū 'áámá esclavo yeⁿē di. Ní chéenu sa yeⁿē di. Ní nguéé de'ē vee dichíí'vē sa dii naati maaⁿ ní dichíí'vē sa dii tan'dúúccā chi dichíí'vē sa 'úú. ¹²'Úú dicho'ó sáⁿa 'cūū nanáaⁿ dii. Dii ní 'cuáaⁿ di sáⁿa 'cūū tan'dúúccā chi maáⁿ 'úú. ¹³'Úú neⁿé chi cunee sa nduucú caati cuuvi sa dichíí'vē sa 'úú lado yeⁿē di neⁿe chi canuúⁿ vácūū cucáavā chi idiiⁿ ntiíⁿnyuⁿ yeⁿé Ndyuūs. ¹⁴Naati nguéé de'ē vee neⁿé chi a fuerza canee chi diiⁿ di nduuti chi nguéé neⁿe di. Naati neⁿé chi dii cunee yiinū di. Neⁿé chi diiⁿ di 'áámá favor nduucú, nguéé 'aama cosa chi di'cuiitú dii naati cosa chí maaⁿ di neⁿe di diiⁿ di. ¹⁵Néené dīvii sa yeⁿe di 'áámá tiempo nūūⁿ caati cuuvi cuta'a di saⁿá 'cūū chi dichíí'vē sa dii cueⁿe daāⁿmaⁿ. ¹⁶Naati maaⁿ ní nguéé cuta'a di saⁿá 'cūū tan'dúúccā esclavo chi 'áámá cānee sa dichíí'vē sa dii naati tan'dúúccā chi 'aama saⁿā n'daacā ca, nguéé ti 'aama esclavo caati maaⁿ ní Onésimo 'cūū 'áámá hermano yeⁿe yú chi neené neⁿé 'nū. 'Úú neⁿé taavi hermano Onésimo naati dii canee chi dinéⁿe taavi ca di saⁿā. Nguéé dámaāⁿ chi saⁿā esclavo naati chi hermano yeⁿe yú ti saⁿā miiⁿ ntúūⁿ ní yeⁿe Señor Jesucristo yeⁿe yú.

¹⁷Maaⁿ ní nduuti chi dii sta'a di 'úú chi compañero yeⁿe di tuu'mi ní 'cuaaⁿ di Onésimo tan'dúúccā chi 'úú nūūⁿ. ¹⁸Ní nduuti chi vee chi nguēe n'daacā idiiⁿ sa ndúúccū di o nduuti chi can'díicu sa yeⁿe di tuu'mi ní cu'neeⁿ dí cuenta yeⁿē 'úú. ¹⁹'Úú maáⁿ idinguúⁿ carta yeⁿe di ndúúccū ta'á ní ndúúccū letra yeⁿé. 'Úú nadií'vē yeⁿē di. Nguéé canee chi 'cuuví dii ti maaⁿ vida yeⁿē di can'díicu di yeⁿé cáavā chi caⁿá nduudu cuaacu yeⁿē di. ²⁰Maaⁿ ní dii Filemón, di'cuiitú ca dii

chi diiⁿ di favor 'cūū nduucú chi 'cuaaⁿ di Onésimo caati s'uuúⁿ hermanos yeⁿe yú vi'i cucáavā chi i'téenu yú Señor Jesucristo. Tée di 'viich'etínūⁿ na staava yeⁿé tan'dúúcā hermano yeⁿe yú vi'i chi yeⁿe Cristo.

²¹ Maaⁿ ní idinguúⁿ yeⁿe di ti seguro cāneé chi n'giindiveeⁿ di nduudu yeⁿé. 'Úú ní deenú chi idiiⁿ di ní n'daacā ca idiiⁿ di nguéé ti chi ngiicá dii. ²² Ní taachi 'úú ndaá cu'neeⁿ yaaⁿ di 'aama cuarto yeⁿé. Cunee ngiinú chi Ndyuūs caⁿá yā dííⁿ yā chiiⁿ chi ngaⁿangua'á ní cáávā 'úú ní Ndyuūs neⁿe yā chi chíí ní n'diichí ndís'tii.

'Cuiinū carta ndúúcū saludos ndúúcū vaadi n'dai yeⁿe Jesucristo

²³ Saⁿā Epafras chi yeⁿe Jesucristo ní compañero yeⁿé ní canee sa vácūū nduucú: N'dai di, ngaⁿa sa. ²⁴ 'Tíicā ntúūⁿ hermanos Marcos ndúúcū Aristarco ndúúcū Demas ndúúcū Lucas, hermanos chi diíⁿ yā dáámá ntiiⁿnyuⁿ nduucú: N'dai di, ngaⁿá yā.

²⁵ Neⁿé chi Señor Jesucristo yeⁿe yú tée yā vaadi n'dai yeⁿé yā nducyaaca ndís'tii. 'Tíicā cuuvi.

CARTA YEⁿE 'IIⁿYĀⁿ HEBREOS

Ndyuūs dichó'o yā daiyá yā chi caaⁿmaⁿ yā lado yeⁿé yā

1 Tiempo chi 'āā ch'ó'ō, Ndyuūs caⁿa yā n'deeē cūūví tiempo ndúúcu neené n'deeē nááⁿ taachi profetas chi candéé yā nduudu yeⁿe Ndyuūs ngaⁿá yā lado yeⁿé yā. ²Ní maaⁿ ní tiempo 'cūū Ndyuūs dichó'o yā daiyá yā Jesucristo chi ngaⁿá yā ndúúcu s'uuúⁿ. Ní Ndyuūs ndúúcu daiyá yā din'dái yā tanducuéⁿē chi véé ní Ndyuūs ca'á yā tanducuéⁿē chi yeⁿē daiyá yā. ³Ní daiyá Dendyuūs miiⁿ ní ngí n'gai yā yeⁿē chidēvé n'dai yeⁿé Ndyuūs. Ní tan'dúúca Ndyuūs miiⁿ 'āā 'tiicá nūⁿ daiyá yā. Daiyá yā ní ndúúcu nduudu chi ngaⁿa yā, díⁿ yā chi tanducuéⁿē dendu'ū snéé na lugar yeⁿē. Ní cuayiivi chi daiyá yā díⁿ yā chi nadach'ēcú yā yeⁿe 'iiⁿyāⁿ yeⁿe nuⁿndi yeⁿé yā tuu'mi ní ch'iindí yā ná va'ai chēeti nguuvi na lado tá cuaacú chidá yā chi lado yeⁿe honor. Ndyuūs miiⁿ ní poder chi ch'ēete ca yeⁿē tanducuéⁿē poder.

Daiya Ndyuūs ní ch'ēete ca nguéé ti ángeles

⁴Ní daiya Dendyuūs ní neené ch'ēete ca nguéé ti ángeles. Ní chi duuchí yā ndúúcu chi véé yeⁿé yā ní neené ch'ēete ca nguéé ti ángeles. ⁵Caati mar 'áámá vmnéⁿēe nguéé caⁿa Ndyuūs ndúúcu mar 'áámá ángel tan'dúúca chi ngaⁿa yā ndúúcu daiyá yā Jesucristo:

Díⁿ ní daiyá; maaⁿ ca'á vida yeⁿé nī. Ní nguéé caⁿa yā ndúúcu mar 'áámá ángel 'tíicā:

'Úú ní chiida di 'úú; niicu díⁿ ní daiyá dii. ⁶Ní taachi Ndyuūs dichó'o yā 'áámá n'dyaⁿā daiyá yā iⁿyeⁿé díⁿ cūū ngaⁿa yā 'tíicā:

Nducyaaca ángeles yeⁿé Ndyuūs canéé chi dich'ēeté yā daiya Ndyuūs. ⁷Ní Ndyuūs ngaⁿa yā yeⁿe ángeles yeⁿe yā 'tíicā:

'Úú díⁿ chi ángeles yeⁿé ní tan'dúúca espíritu s'eeⁿ, 'tiicá yā. Ní díⁿ chi ángeles dichí'vé yā 'úú. Ní tan'dúúca 'áámá nguuchi yaⁿā 'tíicā ángeles yeⁿé. ⁸Naati Ndyuūs ngaⁿá yā yeⁿe daiya yā Jesucristo 'tíicā:

Dii Ndyuūs, trono yeⁿe di ní 'áámá cūnee. Ní ngaⁿa ntiⁿnyuⁿ di yeⁿē tanducuéⁿē ndúúcu vaadi cuaacu.

⁹Dii ní neⁿe di cosas chi cuaacu, ní nguéé neⁿe di chēe chi nguéé cuaacu. Cucáāvā chuū Ndyuūs yeⁿe di chi chiida di ní tee yā dii vaadi yeenu taavi nguéé ti ca'a yā 'iiⁿyāⁿ chi yeⁿé nī. ¹⁰'Tiicá ntúūⁿ Ndyuūs ngaⁿa yā yeⁿē daiyá yā Jesucristo:

Díⁿ, Señor, ndii cuááⁿ vmnaaⁿ s'núuⁿ di cimientu yeⁿe iⁿyeⁿé díⁿ cūū, ní din'dái di nanguuvi ndúúcu ta'a di.

¹¹Iⁿyeⁿé ndúúcu nánguuví ní dí'cuiinu naati díⁿ 'áámá cūnee di. Ní tanducuéⁿē chuū cuuvi ndiicúū tan'dúúca catecai yú, 'tíicā ndiicúū.

¹²Ní díⁿ nī n'cánnduu nī nducuéⁿē tan'dúúca 'iiⁿyāⁿ díⁿ yā chí n'cánnduu yā catecaí yā. Ní n'daaⁿ di nducuéⁿē tan'dúúca 'iiⁿyāⁿ n'daaⁿ yā catecaí yā. Naati dii Jesucristo daiyá Ndyuūs 'āā daamá nūⁿ canee di nduuyu nduuyu. Ní 'áámá cūnee di cueⁿe daāⁿmaⁿ. ¹³Ndyuūs nguéé caⁿá yā mar 'áámá ángel mar 'áámá vmnéⁿēe tan'dúúca chi ngii yā daiyá yā Jesucristo 'tíicā:

'Cuūndi di lado ta cuaacú ndíⁿ 'úú díⁿ chi nducyaacá yā chi taáⁿ yā yeⁿē di canéé yā maaⁿ ca'a di tan'dúúca 'áámá banco 'líⁿ 'tíicā yā chí chéé díⁿ yeⁿé yā. ¹⁴Nducyáacá ángeles ní espíritu s'eeⁿ chi díⁿ yā ntiⁿnyuⁿ yeⁿé Ndyuūs. Ní Ndyuūs dichó'o yā ánge-

les chí innee yā 'iiⁿyāⁿ na iⁿ'yeeⁿdí
'cūū chi Ndyuūs nadinguáⁿai yā.

**Canéé chí diiⁿ yú cuidado yeⁿe chí
Ndyuūs nadanguáⁿai yā s'uuúⁿ**

2 Ní cucáāvā chí Cristo nadanguáⁿai
s'uuúⁿ canéé chí candee yú
cuidado yeⁿe nduudu cuaacu chí
n'giindiveeⁿ yú ti nguéé i'neeⁿ yú
cucáāvā nduudu chí n'daaⁿ ní maaⁿ ní
nguéé caⁿa yú táámá yúúfí. ²Nduudu
cuaacu chí 'āā ngaⁿa ángeles ní nduudu
chí ch'iⁿi nanááⁿ 'iiⁿyāⁿ chí cuaacu
níⁿnyúⁿ chí nduudu cuaacu. Ní 'iiⁿyāⁿ
chí nguéé n'giindiveeⁿ yā nduudu
cuaacu miiⁿ ní véé nuuⁿndi yeⁿe yā 'āā
cūneé yā na castigo caati 'tíicā cuuvi.
³Ní maaⁿ ní ¿táácā cuuví nanguaⁿāi
s'uuúⁿ yeⁿe castigo nduuti chí nguéé
diiⁿ yú cuidado yeⁿe chí nadanguáⁿai
yā s'uuúⁿ? Vmnááⁿ vmnaaⁿ Señor
Jesucristo ngaⁿá yā chí nadanguáⁿai
yā 'iiⁿyāⁿ. Cuayiivi miiⁿ ní 'iiⁿyāⁿ chí
ch'iindiveeⁿ yā nduudu miiⁿ díⁿ yā
ch'iⁿyí yā s'uuúⁿ ndúúcu pruebas chí
nduudu miiⁿ ní nduudu cuaacu. ⁴Tiicá
ntúúⁿ tiempo maaⁿ Ndyuūs ch'iⁿyí yā
s'uuúⁿ chí cuaacu chí nduudu miiⁿ ní
cuaacu caati díⁿ yā señas ndúúcu vaadi
n'giinu chí ch'eeⁿ. Ní ch'iⁿyí yā poder
yeⁿe yā ní díⁿ yā milagros. Ní ca'a yā
n'deeⁿ n'dái ntiⁿnyuⁿ yeⁿe Espíritu
N'dai yeⁿe yā 'iiⁿyāⁿ chí yeⁿe yā caati
'tíicā neⁿe yā diiⁿ yā.

**Jesucristo ch'iindiyáaⁿ yā tan'dúúca
'áámá saⁿā yeⁿe iⁿ'yeeⁿdí**

⁵Ndyuūs nguéé cuuvi s'neéⁿ yā chí
ángeles miiⁿ ngaⁿá yā ntiⁿnyuⁿ yeⁿe
iⁿ'yeeⁿdí chí cuayiivi caⁿá yā din'dái yā.
Ní yeⁿe iⁿ'yeeⁿdí miiⁿ chíⁿ chí ngaⁿa
yú. ⁶Nguéé díⁿ yā 'tíicā. Ná libro yeⁿe
Ndyuūs chí canéé nguūⁿ ní 'áámá yā
ngaⁿa yā 'tíicā:

N'dii, Ndyuūs, ¿d'éⁿ chí saⁿā s'eeⁿ chí
snéé na iⁿ'yeeⁿdí 'cūū chí nan'gaacu

ní yeⁿe sa? ¿D'éⁿ chí saⁿā s'eeⁿ chí
snéé na iⁿ'yeeⁿdí 'cūū chí díⁿ ní
cuidado yeⁿe saⁿā s'eeⁿ?

⁷Ta 'líⁿ tiempo nūuⁿ n'dii, Ndyuūs,
s'neéⁿ ní saⁿā Daiyá ní chí nguéé
ch'eeⁿ cá yā tan'dúúca ángeles. Ní
teé ní saⁿā daiyá ní chí ch'eeⁿ yā
ndúúcu honra yeⁿe yā tan'dúúca chí
saⁿā rey 'tíicā yā. Ní chí'neéⁿ ní saⁿa
miiⁿ chí caaⁿmaⁿ ntiⁿnyuⁿ yā yeⁿe
tanducuéⁿe chí nadin'dái ní.

⁸Ní s'neéⁿ ní tanducuéⁿe denduⁿū maaⁿ
ta'a yā.

Ní 'tíicā rā va ti Ndyuūs s'neéⁿ yā tan-
ducuéⁿe denduⁿū chí saⁿā miiⁿ caaⁿmaⁿ
yā ntiⁿnyuⁿ yeⁿe. Maaⁿ ní nguéé in-
aaⁿ yú chí saⁿā miiⁿ ngaⁿa ntiⁿnyúⁿ yā
yeⁿe tanducuéⁿe. ⁹Naati maaⁿ ní snaaⁿ
yú chí Ndyuūs díⁿ yā chí Jesucristo
nguéé ch'eeⁿ yā tan'dúúca ángeles dúúví
tiempo nūuⁿ. Ní Ndyuūs neene ya'ai i'inú
yā 'iiⁿyāⁿ yeⁿe iⁿ'yeeⁿdí 'cūū chí neⁿe
yā chí Jesucristo ch'iⁿ yā lugar yeⁿe
nducyaaca yú. Maaⁿ ní véé deevé yeⁿe
Jesucristo ní véé honra yeⁿe yā cucáāvā
chí ch'iⁿ yā na cruz.

¹⁰Ní Ndyuūs din'dái yā tanducuéⁿe
denduⁿū ní díⁿ yā cuidado yeⁿe. Ní
n'daacá diiⁿ Ndyuūs taachi diiⁿ chí Je-
sucristo miiⁿ ní saⁿā perfecto yā chí
chichéé yā yeⁿe nducuéⁿe chí n'geenu yā
ngii. Ní Ndyuūs n'diichí yā chí n'daacá
idiíⁿ yā. 'Tíicā diiⁿ Ndyuūs caati cuuvi
yeⁿe yā n'deeⁿ n'dái daiyá yā. Ní cu-
uvi ca'a yā 'iiⁿyāⁿ s'eeⁿ parte chí cu-
uvi yeⁿe yā ndúúcu vaadi deevé n'dai
yeⁿe yā. Jesucristo ní saⁿā chí nadan-
guáⁿai yā 'iiⁿyāⁿ yeⁿe iⁿ'yeeⁿdí 'cūū.
¹¹Ní Jesucristo ní dideevé yā 'iiⁿyāⁿ yeⁿe
nuuⁿndi yeⁿe yā ní 'iiⁿyāⁿ chí ndúúví
deevé yā ní tan'dúúca Jesucristo miiⁿ.
Véé 'áámá nūuⁿ chiida nducyaaca 'iiⁿyā.
Cáāvā chuū Jesucristo nguéé 'cuinaáⁿ yā
chí caaⁿmaⁿ yā chí 'iiⁿyāⁿ s'eeⁿ ní víⁿ yā.
¹²Ní 'tíicā Jesucristo ngaⁿá yā ngii yā
'iiⁿyāⁿ s'eeⁿ ní canéé nguūⁿ:

N'dií Ndyuūs, 'úú caaⁿmaⁿ yeⁿé n'dií nanááⁿ hermanos yeⁿé ní caatá himnos chi cantos chi ngaⁿā chi ch'εεté ní nanááⁿ 'iiⁿyāⁿ yeⁿé ní taachi nduvidaamá yā. ¹³ Taama vmnéⁿēe Jesucristo caⁿa yā 'tiicā:

'Úú ní canéé confianza yeⁿé ndúúcu Ndyuūs.

Ní táamá caⁿa yā:

'Muuⁿ caneé ndúúcu daiyá chi Ndyuūs tee yā 'úú.

¹⁴ 'Tíicā, 'iiⁿyāⁿ yeⁿe 'áámá familia ní 'áámá yuūtē yeⁿé yā ní 'áámá yuūuⁿ ntúuⁿ va. Ní 'tiicā ntúuⁿ Jesucristo miiⁿ ch'iindiyáaⁿ yā ndúúcu cuerpo ndúúcu yuūuⁿ tan'dúúca s'uuúⁿ. Ní 'tiicā ntúuⁿ Jesucristo ch'ií yā caati cuuvi di'cuuinú yā yááⁿ'nguiniūⁿ caavā chi diiⁿ sa chi nducyaaca yú ní n'gii yú. ¹⁵ 'Tiicā ntúuⁿ Jesucristo diíⁿ yā chi nguéé 'va'a yú yeⁿe tiempo chí 'cuūvi yú. ¹⁶ Cuaacu chi Jesucristo nguéé ndaá yā nanááⁿ ángeles chi chinnee yā ángeles naati nanááⁿ 'iiⁿyāⁿ yeⁿe ndaata yeⁿe Abraham cáávā chi nadanguáⁿ'ai yā 'iiⁿyāⁿ. ¹⁷ Cáávā chuū Jesucristo canéé chi ch'iindiyáaⁿ yā tan'dúúca nducyaaca hermanos yeⁿé yā ní 'íicú maáⁿ yā cuuvi cūneé yā chiiduú ch'εεte ca chi 'áámá cānee yeⁿe ntiíⁿ'nyuⁿ yeⁿe Ndyuūs. Ní ya'ai 'iinú yā 'iiⁿyāⁿ. Ní 'íicú cuuví nadach'εēcú yā nuuⁿndi yeⁿe 'iiⁿyāⁿ ti nadíⁿ've yā nducuéⁿē nuuⁿndi yeⁿe 'iiⁿyāⁿ. ¹⁸ Ní Jesucristo maáⁿ yā ch'eenú yā chií ní chicheε yā taachi ndaá yááⁿ'nguiniūⁿ chí n'diichineeⁿ sa 'yā. Ní cáávā chuū maaⁿ ní Jesucristo cuuvi cūnee yā 'iiⁿyāⁿ s'eeⁿ taachi n'geenú yā ngii ní nadanguáⁿ'ai yā 'iiⁿyāⁿ s'eeⁿ yeⁿe yááⁿ'nguiniūⁿ taachi ndaa sa n'diichineeⁿ sa 'iiⁿyāⁿ s'eeⁿ.

Jesucristo ní ch'εεte taavi cá yā nguéé ti Moisés

3 Ndís'tií, hermanos yeⁿé yú chi Cristo didéevé yā ní ndís'tií ntúuⁿ Ndyuūs yaa'ví yā ndís'tií chi cuuvi yeⁿé yā.

Maaⁿ ní nadicádíinuⁿ n'dai ní yeⁿe Jesucristo chi apóstol chi dichó'o Ndyuūs ti Jesucristo miiⁿ ní chiiduú ch'εεte cá yeⁿé 'iiⁿyāⁿ chi i'téenu yā Jesucristo tan'dúúca s'uuúⁿ. ² Jesucristo miiⁿ 'áámá caneé yā ndúúcu Ndyuūs ní diíⁿ yā tanducuéⁿē dendu'ū. Ní diíⁿ yā tanducuéⁿē dendu'ū chi Ndyuūs dineⁿé yā. Ní tan'dúúca Moisés din'daacá yā ntiíⁿ'nyuⁿ chi Ndyuūs ca'a yā, 'tiicā ntúuⁿ Jesucristo din'daacá yā tanducuéⁿē ntiíⁿ'nyuⁿ yeⁿé va'ai yeⁿé Ndyuūs chi Ndyuūs ca'a yā. ³ Ní 'áámá 'iiⁿyāⁿ chi din'dái yā 'aama va'āi ní ch'εεte cá yā nguéé ti va'āi miiⁿ. 'Tíicā Jesucristo ní ch'εεte taavi cá yā nguéé ti Moisés. ⁴ Deenu yú chi véé 'iiⁿyāⁿ chi din'dái yā ca'áámá cā'aama va'āi naati Ndyuūs din'dái yā nducuéⁿē dendu'ū chi véé. ⁵ Moisés miiⁿ dichíⁿ've yā Ndyuūs ní n'dáaca taavi idiíⁿ sa ntiíⁿ'nyuⁿ yeⁿé vaacu Ndyuūs. Ní Moisés diíⁿ yā ntiíⁿ'nyuⁿ chi ngaⁿ'a yā nduudu yeⁿé Ndyuūs chi Ndyuūs caⁿa yā chi caaⁿmaⁿ yā cuayiivi. ⁶ Naati Cristo chi daiyá Dendyuūs ní 'áámá diiⁿ yā ntiíⁿ'nyuⁿ ti 'iiⁿyāⁿ ndií tíⁿ yā yeⁿe vaacu Dendyuūs. Ní s'uuúⁿ tan'dúúca vaacu Ndyuūs 'tíicā s'uuúⁿ nduuti chi canéé di-ítu yú ndúúcu chi i'teenu yú. Ní yeenu yú ndúúcu chi cuuvi yeⁿe yú ndíí tiempo chí 'cuūvi yú.

Véé tiempo chi ntaavi'tuunúuⁿ 'iiⁿyāⁿ chi yeⁿé Ndyuūs

⁷ Ní chuū Espíritu N'dai yeⁿé Ndyuūs ngaⁿ'a yā 'túúca naachi canéé nguūⁿ na libro yeⁿé Ndyuūs:

Maaⁿnguovi miiⁿ nduuti chi ndís'tií 'caandiveéⁿ ní nduudu yeⁿé Ndyuūs:

⁸ Nguéé dicheεchí ní staava yeⁿé ní chí ditaáⁿ ní tan'dúúca chi diíⁿ 'iiⁿyāⁿ tiempo chí 'āā chó'oo taachi 'iiⁿyāⁿ s'eeⁿ diíⁿ yā n'diichineeⁿ yā Ndyuūs ndúúcu nuuⁿndi chi diíⁿ yā na yáⁿ'āa cuuⁿmaⁿ naachi nguéé ch'εεtinéé

'iiⁿyāⁿ. ⁹ Ní Ndyuūs ngaⁿá yā ngii yā 'iiⁿyāⁿ:

Tiempo chi ch'ó'oo na yáⁿáa cuuⁿmáⁿ naachi nguéé ch'ëetinéé 'iiⁿyāⁿ, 'iiⁿyāⁿ s'eeⁿ yeⁿē ndaata yeⁿé nī n'diichinééⁿ ntúuⁿ yā 'úú 'áará chí n'diichí yā nducuéⁿē chí 'úú diíⁿ ndúucu yā 'naaⁿ chí 'uūvi ngeecu nduuyū.

¹⁰ Ní cáāvā chuū 'úú, Ndyuūs, ditaáⁿ ndúúcū 'iiⁿyāⁿ s'eeⁿ. Ní 'túúcā ngaⁿá ngii 'iiⁿyāⁿ s'eeⁿ: Ndis'tii, nducuéⁿē tiempo nguéé n'daacā nadacadínuuⁿ nī na staava yeⁿé nī. Ní nguéé n'diichí nī yúúní yeⁿé.

¹¹ Ní cáāvā chí diiⁿ 'iiⁿyāⁿ s'eeⁿ 'úú ní nguéé canee yiinú yeⁿe yā ní caⁿ'a 'túúcā: Cuáácú chí 'iiⁿyāⁿ s'eeⁿ nguéé cuuví ndaa yā naachi canéé chí ntaavi'tuunúūⁿ 'iiⁿyāⁿ yeⁿe ndaata yeⁿé nī.

¹² Maaⁿ ní ndís'tii, hermanos yeⁿé, cundéé nī cuidado chí nguéé 'áámá ndís'tii chí nguéé n'daacā staava yeⁿé nī chí nguéé i'téenu nī ní nguéé diví nī yeⁿé Ndyuūs chí canduuchi. ¹³ Ní ndís'tii ní yaa'ví nī v'í nī 'áámá nī taama nī nguuví nguuví taachi maaⁿnguuví ní 'íicú mar 'áámá ndís'tii nguéé dicheéché nī staava yeⁿé nī cáāvā nuuⁿndi chí nginnche'ēi ndís'tii. ¹⁴ Ní véé 'áámá cuaaⁿ yeⁿē yú ndúúcū Cristo nduuti chí s'uuúⁿ ní 'áámá canee yú ndúúcū chí i'téenu yú vmnááⁿ vmaaaⁿ yeⁿe Cristo ndíí tiempo chí 'cuūvi yú.

¹⁵ 'Tífcā canéé nguūⁿ na libro yeⁿé Ndyuūs:

Nguéé dicheéché nī staava yeⁿé nī chí ditaáⁿ nī tan'dúúcā chí diiⁿ 'iiⁿyāⁿ na yáⁿáa cuūⁿmáⁿ naachi nguéé ch'ëetinéé 'iiⁿyāⁿ tiempo chí ch'ó'oo taachi n'diichineeⁿ yā 'úú chí Ndyuūs. ¹⁶ ¿Du'ú 'iiⁿyāⁿ chí ch'iindiveéⁿ yā nduudu yeⁿé Ndyuūs ní cuayiivi nduuvitaáⁿ yā? 'Túúcā diiⁿ nducyaaca 'iiⁿyāⁿ chí

cueⁿé yā ndúúcū Moisés yeⁿe yáⁿáa Egipto. Nducyaaca yā nduuvitaáⁿ yā. ¹⁷ ¿Du'ú 'iiⁿyāⁿ chí Ndyuūs nguéé yiinú yā nduucú yā 'uūvi ngeecu nduuyū? 'Túúcā ngeue yiinú yā ndúúcū 'iiⁿyāⁿ chí dinuuⁿndí yā ní ch'ií yā na yáⁿáa cuūⁿmáⁿ naachi nguéé ch'ëetinéé 'iiⁿyāⁿ. ¹⁸ ¿Du'ú 'iiⁿyāⁿ chí Ndyuūs ngaⁿá yā caavā maaⁿ chí duuchí yā chí 'iiⁿyāⁿ s'eeⁿ nguéé cuuví cundaa yā lugar naachi ntaavi'tuunúūⁿ 'iiⁿyāⁿ yeⁿe yā? 'Túúcā ngaⁿá yā yeⁿe 'iiⁿyāⁿ chí nguéé n'giindiveéⁿ yā nduudu yeⁿe yā. ¹⁹ Maaⁿ ní deenu yú ti 'iiⁿyāⁿ s'eeⁿ nguéé cuuvi cundaa yā lugar yeⁿe Ndyuūs ti nguéé i'téenu yā Ndyuūs.

4 Maaⁿ ní Ndyuūs tee yā promesa s'uuúⁿ chí cuuvi cundaa yú lugar yeⁿé yā ní cuuvi ntaavi'tuunúūⁿ yú ndúúcū Ndyuūs. Canéé chí candéé yú cuidado caati 'aatii 'aama chéé ndis'tii nguéé cuheé nī tanducuéⁿē dendu'ú ní nguéé cuuvi cundaa nī lugar miiⁿ. ² Caati 'iiⁿyāⁿ yeⁿé Jesucristo ndéé yā nduudu cuaacu yeⁿé Jesucristo nanááⁿ s'uuúⁿ, 'tiicá ntúūⁿ nanááⁿ 'iiⁿyāⁿ s'eeⁿ chí ch'ií yā na yáⁿáa cuuⁿmáⁿ naachi nguéé ch'ëetinéé 'iiⁿyāⁿ. Ní nguéé dichí'vē nduudu cuaacu yeⁿé Ndyuūs nguaaⁿ 'iiⁿyāⁿ s'eeⁿ ti taachi ch'iindiveéⁿ yā nduudu miiⁿ nguéé s'téenu yā yeⁿē. ³ Naati s'uuúⁿ chí i'teenu yú nduudu miiⁿ, s'uuúⁿ ní cuuvi ndaa yú naachi caⁿ'a Ndyuūs chí ntaavi'tuunúūⁿ yú ndúúcū yā. 'Tífcā ngaⁿ'a Ndyuūs na libro yeⁿé yā naachi canéé nguūⁿ:

Cáāvā chí diíⁿ 'iiⁿyāⁿ s'eeⁿ 'úú nguéé yiinú yeⁿe yā. Ní cuaacú ngaⁿá nduudu ndúúcū maááⁿ chí duuchí. Nguéé cuuvi ndaa yā nduucú na lugar yeⁿé naachi ntaavi'tuunúūⁿ.

Ní Ndyuūs di'cuiinú yā ntiiⁿnyuⁿ yeⁿé yā taachi din'dái yā iⁿ'yeeⁿdí 'cūū. ⁴ Ní 'áámá cuaaⁿ yeⁿē libro yeⁿé Ndyuūs

naachi canéé nguūⁿ ní ngaⁿa yeⁿē ndíí chí ndēēchē nguuvi chí ntaavi'tuunúⁿ 'iiⁿyāⁿ:

Ndyuūs ní ndíí chí ndēēchē nguuvi ntaavi'tuunúⁿ yā yeⁿē tanducuéⁿē ntiiⁿnyuⁿ yeⁿé yā. ⁵Ní canee táamá vmnéⁿēe na libro yeⁿe Ndyuūs 'tíicā:

'Iiⁿyāⁿ s'eeⁿ nguéé cuuvi cūndaa yā ní ntaavi'tuunúⁿ yā nduucú. ⁶Maaⁿ ní véé n'duuví 'iiⁿyāⁿ chí canéé chí cūndaa yā na lugar naachi ntaavi'tuunúⁿ 'iiⁿyāⁿ. Naati 'iiⁿyāⁿ chí vmnááⁿ vmaaaⁿ n'giindiveéⁿ yā nduudu cuaacu miiⁿ nguéé s'ndaa yā ti nguéé s'téenu yā Ndyuūs. ⁷Taama vmnéⁿēe Ndyuūs s'neéⁿ yā 'áamá nguuvi ní ngaⁿa yā chí nguuvi ní maaⁿnguuví. Ní Ndyuūs ngaⁿa yā yeⁿē nduudu miiⁿ cuayiivi taachí 'āā chó'ōo chuū. 'Āā 'naaⁿ tiempo nguuví chí David ngaⁿa sa yeⁿē. Ní 'tíicā canéé nguūⁿ na libro yeⁿé Ndyuūs yeⁿē nguuvi miiⁿ:

Maaⁿnguuví nduuti chí ndís'tíi 'caandiveéⁿ ní nduudu chí Ndyuūs ngaⁿá yā: Nguéé dicheechí ní staava yeⁿé ní. ⁸Ní nduuti chí saⁿā Josué chí saⁿā ndíí tiiⁿ yeⁿe 'iiⁿyāⁿ Israel s'eeⁿ cuuvi sa ca'a sa 'iiⁿyāⁿ Israel s'eeⁿ chí ntaavi'tuunúⁿ yā tuu'mí ní Ndyuūs nguéé canee chí caaⁿ máⁿ yā taama vmnéⁿēe yeⁿē táamá nguuví. ⁹Maaⁿ ní cáávā chuū véé chí ntaavi'tuunúⁿ 'iiⁿyāⁿ chí yeⁿé Ndyuūs. ¹⁰Ní 'iiⁿyāⁿ chí s'ndaa yā naachi Ndyuūs ntaavi'tuunúⁿ yā 'āā ntéé idiíⁿ yā ntiiⁿnyuⁿ tan'dúúicā chí Ndyuūs 'āā ntéé idiíⁿ yā ntiiⁿnyuⁿ. ¹¹Maaⁿ ní canéé chí di'cuíftu yú chí cuuvi cūndaā yú lugar naachi ntaavi'tuunúⁿ yú ní 'aatiī tanáⁿā yú diiⁿ yú chí nguéé i'téenu yú tan'dúúicā 'iiⁿyāⁿ s'eeⁿ chí nguéé chí'téenu yā.

¹²Ní nduudu cuaacu yeⁿé Ndyuūs ní canduuchi ní neené ditiinú. Ní vee ca 'caāiⁿ yeⁿē nguéé ti 'áamá machete chí 'caāiⁿ nduu 'uuví lados. 'Tíicā nduudu cuaacu yeⁿé Ndyuūs. Ndaā na coo yeⁿe cuerpo yeⁿe yú naachi canee alma yeⁿe yú ndúúicū espíritu yeⁿe yú ndíí túútē yeⁿe yú. Ní déenu chee chí tumicadífínuuⁿ yú ndúúicū chee chí neⁿe yú diiⁿ yú chí ngiicā yeⁿe staava yeⁿe yú. ¹³Nguéé de'ē vee chí véé chí cuuvi cunúúⁿ n'de'ei yeⁿé Ndyuūs. Ndyuūs din'dái yā tanducuéⁿē dendu'ū chí véé ní inaáⁿ yā nducuéⁿē tan'dúúicā chí canee nanáaⁿ yā. Ní canéé chí ca'a yú cuenta yeⁿe vida yeⁿe yú taachi ndaa yú nanáaⁿ yā.

Jesús ni chiiduú ch'ete taavi ca yeⁿe yú

¹⁴Jesús chí daiyá Dendyuūs ní chiiduú ch'ete taavi ca yeⁿe yú. Ní cunaⁿa yā va'ai cheeti nguuví ní ndaa yā nanáaⁿ Ndyuūs. Ní cáávā chuū canee chí 'áamá canee yú ndúúicū chí i'teenu yú Ndyuūs. ¹⁵Ní chiiduú ch'ete taavi ca yeⁿe yú ya'ai 'iinú yā s'uúúⁿ taachi n'geenu yú ngii caati Jesús miiⁿ ní ch'eenú yā chí tanducuéⁿē tan'dúúicā s'uúúⁿ naati nguéé dinuuⁿndí yā mar 'áamá vmnéⁿēe. ¹⁶Ní cáávā chuū cuuvi ndaa yú nanáaⁿ trono yeⁿé Ndyuūs yeⁿe yú ndúúicū confianza ti dineⁿé yā s'uúúⁿ. Ní 'íicū Ndyuūs cuuvi ya'ai 'iinú yā yeⁿe s'uúúⁿ ní cunnee yā s'uúúⁿ taachi, véé necesidades yeⁿe yú. Ní itée yā s'uúúⁿ denduⁿū chí n'daacā n'dai yeⁿé yā.

5 Tiempo chí chó'ōo 'iiⁿyāⁿ chí snée yā iⁿ'yeeⁿdí 'cūū ndeévé yā ca'áamá cā'aama chiiduú ch'ete chí canéé chí dííⁿ yā ntiiⁿnyuⁿ yeⁿé Ndyuūs cucáávā 'iiⁿyāⁿ s'eeⁿ. Ní ca'á yā ofrendas ní 'caaⁿnúⁿ yā 'iiti chí candee 'iiⁿyāⁿ s'eeⁿ ti ofrenda caavā nuuⁿndi yeⁿé yā. ²Ní chiiduú ch'ete ca ní dinuuⁿndí yā tan'dúúicā nducyáácā 'iiⁿyāⁿ. Ní cáávā chuū véé pa-

ciencia yeⁿé yā ndúúcū 'iiⁿyāⁿ chi tonto ní ndúúcū 'iiⁿyāⁿ chi dinuuⁿndí yā. ³Ní chiidúú ch'ete ca cáávā chi dinuuⁿndi yā canéé chí 'caaⁿnúⁿ yā 'iiti chi ofrenda yeⁿe maáⁿ yā cáávā nuuⁿndi yeⁿe maáⁿ yā tan'dúúcā chi díⁿ tanáⁿā 'iiⁿyāⁿ cáávā nuuⁿndi yeⁿé yā.

⁴Ní mar 'áámá saⁿā cuuví díⁿ sa nombrar maaⁿ sa lado yeⁿē chiidúú ch'ete ca cáávā chi maáⁿ sa neⁿe sa ti Ndyuūs yaaⁿví yā saⁿā chi cuuvi chiidúú ch'ete ca chi díⁿ sa ntiⁿnyuⁿ yeⁿé yā tan'dúúcā chi yaaⁿví yā saⁿā Aarón chi cuuvi chiidúú ch'ete ca tiempo chi 'āā ch'ó'ō. ⁵Tiicá ntúūⁿ ch'ó'ō yeⁿe Cristo. Cristo miiⁿ nguéé díⁿ yā nombrar maáⁿ yā chi cuuvi chiidúú ch'ete ca. Ndyuūs yaaⁿví yā Cristo chi cuuvi chiidúú ch'ete ca. Ní 'tíicā canéé nguūⁿ na libro yeⁿé Ndyuūs: Dii ní daiyá, 'úú ní chiida di ní cuaacu chí díⁿ ní daiyá. ⁶Ngaⁿa ntúūⁿ táámá ní canéé nguūⁿ na libro yeⁿé Ndyuūs 'tíicā:

Díⁿ ní daiyá ní cuéⁿé daāⁿmaⁿ canee di chiidúú ch'ete ca. Tan'dúúcā chi tiempo chi 'āā ch'ó'ō chiidúú ch'ete ca chi nguuvi Melquisedec 'tiicā ní ti yeⁿē ndaata yeⁿé yā. ⁷Ní taachi Jesús canee yā iⁿ'yeeⁿdí 'cūū caⁿanguaⁿá yā nanááⁿ Ndyuūs chiidá yā ní ngaⁿa yā: N'díⁿ Ndyuūs díⁿ ní chiiⁿ chi neⁿé ní. Ní 'caí diitú yā neⁿe chi cheécú yā: N'díⁿ, Ndyuūs, cuuvi nadanguáⁿai ní 'úú chi nguéé 'cuuví nduuti chi neⁿé ní díⁿ ní 'tíicā. Ní Ndyuūs ch'iindiveéⁿ yā nduudu yeⁿe Jesús taachi ngaⁿanguaⁿá yā ti dich'eté yā Ndyuūs. Ní Ndyuūs caⁿá yā fuerzas Jesús. ⁸Ní 'áará chí Jesús miiⁿ ní daiyá Dendyuūs ch'eeⁿ yā cáávā dendúⁿū chi canéé chí ch'eenú yā chií ní ch'iindiveéⁿ yā yeⁿe nducuéⁿē. ⁹Ní taachi Ndyuūs n'diichineéⁿ yā Jesús, Jesús miiⁿ ní díⁿ yā nducuéⁿē chi neⁿe

Ndyuūs. Ní 'íicú Jesús miiⁿ cuuví yā nadanguáⁿai yā nducyaaca s'uuúⁿ chi n'giindiveeⁿ yú yeⁿe yā. ¹⁰Ní Ndyuūs díⁿ yā chí Jesús cuuvi chiidúú ch'ete ca tan'dúúcā tiempo chí ch'ó'ō chiidúú ch'ete ca chí nguuvi Melquisedec, 'tiicá yā.

Véé peligro yeⁿe yú chi ngaⁿa yú chi 'āā ntéé i'teenu yú Jesucristo

¹¹Maaⁿ ní véé cá chí neⁿé 'nū caaⁿmaⁿ 'nū yeⁿe Melquisedec chí chiidúú ch'ete ca naati ngii n'dái caaⁿmaⁿ 'nū yeⁿē ti ndís'tií ní nguéé ituumicadiinuuⁿ ní. ¹²'Āā ch'ó'ō tiempo chí ndís'tií 'āā s'téenu ní ní maaⁿ ní ndís'tií canéé chí ca'cueéⁿ ní 'iiⁿyāⁿ naati ndíⁿ maaⁿ 'āā neⁿé ní taama vmnéⁿēe chí 'áámá 'iiⁿyāⁿ ca'cueéⁿ yā ndís'tií denduⁿū chí vmnááⁿ vmnaaⁿ yeⁿé Ndyuūs. Ní ndís'tií ní 'āā débil ní. Ní tan'dúúcā dacuáⁿāa chí neⁿe leche ní nguéé neⁿe comida chí ditiinú, 'tiicá ní. ¹³Ní 'iiⁿyāⁿ chí dámaaⁿ ng'i leche ní tan'dúúcā dacuáⁿāa 'tiicá yā. Ní nguéé deenú yā de'ē chí n'daacā o de'ē chí nguéé n'daacā. ¹⁴Ní comida chí ditiinú ní che'é 'iiⁿyāⁿ n'geēté chí 'āā deenú yā in'nuú yā chéé chí n'daacā o chéé chí nguéé n'daacā caati 'tíicā costumbre yeⁿé yā chí díⁿ yā.

6 Maaⁿ ní i'téenu ca yú ní 'caandiveeⁿ ca yú cosas chí cheechi chí 'iiⁿyāⁿ ca'cueéⁿ yā s'uuúⁿ. Ní nguéé neⁿe yú 'caandiveeⁿ yú taama vmnéⁿēe tan'dúúcā chí ng'i'cueéⁿ yā s'uuúⁿ ndii vmnááⁿ vmnaaⁿ taachi cáamá i'teenu yú nduudu cuaacu yeⁿé Cristo. Ní nguéé ngaⁿa yú táámá vmnéⁿēe chí s'neeⁿ yú ntiⁿnyuⁿ yeⁿe yú chí nguéé n'daacā chí díⁿ chí 'cuuvi yú ti maaⁿ ní i'teenu yú Jesucristo. ²Ní nguéé ca'cueeⁿ ca yú yeⁿē chí ngeedínuⁿní, ní nguéé yeⁿē chí s'nuuⁿ yú ta'a yú nanááⁿ tíⁿ 'iiⁿyāⁿ, ní nguéé yeⁿē chí nnduuchí 'iiⁿyāⁿ chí yeⁿe Cristo yeⁿē nguaaⁿ tináⁿā, ní nguéé yeⁿē nguuvi chí Cristo díⁿ yā juzgar

nducyaaca 'iiⁿyāⁿ. ³Ca'cueeⁿ ca yú más cā yeⁿe chi i'téenu yú yeⁿe Cristo. Ní chuū ní díiⁿ yú nduuti chi Ndyuūs neⁿe yā.

⁴Ní ¿de'ē yeⁿe 'iiⁿyāⁿ chi 'āā sta'á yā deeve chi Cristo, ní sta'á yā cosas chi n'dai taavi chi Cristo ca'a yā, ní 'āā sta'á yā Espíritu N'dai yeⁿe Cristo, ⁵ní deēnū yā nduudu cuaacu chí n'dai chí yeⁿe Ndyuūs ndúúcu poder chi yeⁿe táámá iⁿ'yeeⁿdi chi cuchii? ⁶Ní nduuti chi 'iiⁿyāⁿ s'eeⁿ ndaacadaamí yā yeⁿe Cristo ní dinuuⁿndí yā, nguéé cuuvi díiⁿ yā ndaa yā nanááⁿ Cristo chi nadach'ecú yā nuuⁿndi yeⁿe yā, tí 'iiⁿyāⁿ s'eeⁿ díiⁿ yā tan'dúúcā chi s'nééⁿnga'á yā daiyá Ndyuūs miiⁿ taama vmnéⁿēe. Ní díiⁿ yā chi Cristo miiⁿ 'cuináaⁿ yā nguaaⁿ 'yááⁿ n'dái 'iiⁿyāⁿ. ⁷Ndyuūs díiⁿ yā ndúúcu 'iiⁿyāⁿ s'eeⁿ tan'dúúcā chi díiⁿ yā ndúúcu yáⁿā taachi n'dee cuuví ngeeⁿ cuūvi vmnááⁿ yáⁿā ni yáⁿā sta'ā nuūⁿníⁿ miiⁿ 'áámá 'áámá vmnéⁿēe chi ngeeⁿ cúúvi. Ndyuūs ca'á yā yáⁿā miiⁿ cosecha chi n'dai 'iiⁿyāⁿ chí ngiinú yā ndaataá. ⁸Naati nduuti chi yáⁿā miiⁿ ní ngii yááⁿ yeⁿe ndúúcu yaata chi nguéé dichí'vē tuu'mi ní nguéé dichí'vē. Ní Ndyuūs nguéé ca'á yā cosecha n'dai yeⁿe nífcú cuayiivi 'iiⁿyāⁿ ní 'neeⁿ yáⁿa yā yáⁿā miiⁿ.

Véé chi cuuvi yeⁿe yú chi nnee s'uuúⁿ chi 'áámá cunee yú

⁹Maaⁿ ní 'áará chi ngaⁿá nū 'tíicā yeⁿe ndís'tií, hermanos, deenu nū chi véé cosas chi n'dai taavi ca yeⁿe ní ti yeⁿe Cristo ndís'tií ní Ndyuūs nadanguáⁿai yā ndís'tií. ¹⁰Ndyuūs dámaāⁿ díiⁿ yā dendu'ū chí cuaacu. Nn'gaacú yā yeⁿe ntiíⁿnyuⁿ chi díiⁿ ní ní táácā nneé ní hermanos yeⁿe yú caati dineⁿé ní hermanos chi i'téenu yā Jesucristo. Ní 'tíicā ní díiⁿ ní nguuvi nguuvi. ¹¹Maaⁿ ní neⁿe nū chi ca'áámá ca'áámá ndís'tií daamá nūⁿ idíiⁿ ní ndúúcu núúⁿmáⁿ staava yeⁿe ní

tan'dúúcā chi díiⁿ ní taachi cáámá i'téenu ní. Ní díiⁿ ní ndíi tiempo chi ch'ií ní. Ní 'tíicā cuuvi cuaacu chi véé chi cuuvi yeⁿe ní. ¹²Nguéé neⁿe nū chi nduuví 'daan'di ní naati neⁿe nū chi din'daacá ní tan'dúúcā tanáⁿa cā 'iiⁿyāⁿ chi i'téenu yā. Ní cunee ngiinú yā yeⁿe vaadi n'dai chí Ndyuūs ca'á yā 'iiⁿyāⁿ s'eeⁿ chi Ndyuūs ngaⁿá yā chi cuuvi yeⁿe yā 'iiⁿyāⁿ s'eeⁿ.

¹³'Āā 'nááⁿ tiempo chi chó'oo Ndyuūs díiⁿ yā 'áámá compromiso ndúúcu Abraham ní Ndyuūs ngaⁿá yā cáávā chi duuchi maáⁿ yā chi 'tíicā caⁿá yā díiⁿ yā caati nguéé cá táámá 'iiⁿyāⁿ chi ch'ete cá yā ti Ndyuūs. ¹⁴Ní caⁿa yā: Díi, Abraham, cuaacu níⁿnyúⁿ di'viicú dii ní díiⁿ chi cuuvi n'dee n'dái daiyá 'iiⁿyāⁿ yeⁿe di cuaaⁿ naachi cuchii. ¹⁵Abraham cūnee ngiinú yā compromiso yeⁿe Ndyuūs ndúúcu vaadi ngiinú ní tunée yā compromiso chi Ndyuūs caⁿa yā chi ca'á yā Abraham miiⁿ. ¹⁶Maaⁿ ní taachi 'iiⁿyāⁿ yeⁿe iⁿ'yeeⁿdí 'cūú ngaⁿá yā chi cuaacu níⁿnyúⁿ caⁿá yā diiⁿ yā, ngaⁿá yā “Por Dios” cucáávā 'áámá yā chi ch'ete cá yā nguéé ti 'iiⁿyāⁿ s'eeⁿ. Nífcú taachi 'iiⁿyāⁿ s'eeⁿ ngaⁿá yā chi 'tíicā caⁿá yā díiⁿ yā cáávā 'iiⁿyāⁿ miiⁿ chí ch'ete ca tuu'mi ní nguéé véé más cā chi cuuvi caaⁿmáⁿ yā yeⁿe. ¹⁷Ní 'tíicā Ndyuūs neⁿe yā ch'i'í yā 'iiⁿyāⁿ s'eeⁿ yeⁿe Abraham chí cuaacu níⁿnyúⁿ díiⁿ yā cumplir compromiso yeⁿe yā. Ní nguéé n'daaⁿ mar 'áámá nduudu yeⁿe yā. Ní cáávā chuū ngaⁿá yā cucáávā chi duuchi maáⁿ yā. ¹⁸Ní cáávā chuū véé 'úúví dendu'ū chí nguéé cuuvi n'daaⁿ. Ndyuūs ní nguéé cuuvi cu'neéⁿ yā táámá cosa lugar yeⁿe 'uuví compromiso yeⁿe Ndyuūs ndúúcu chí ngaⁿá yā chí caⁿá yā díiⁿ yā cáávā chí duuchi maáⁿ yā. Ndyuūs nguéé cuuvi caaⁿmáⁿ yā nduudu yaadi. Ní ndúúcu compromiso yeⁿe yā, Ndyuūs tee yā s'uuúⁿ 'viich'etíinūⁿ ch'ete yeⁿe yú caati s'uuúⁿ n'nuuⁿ yú Ndyuūs ní i'téenu yú 'yā ní yeⁿe chí Ndyuūs téé yā chí cu-

uvi yeⁿē yú. ¹⁹ Chífⁿ chí i'téenu yú cáávā alma yeⁿe yú ní tan'dúúcā 'áámá ancla yeⁿe barco ti i'nēēⁿ dífⁿ barco chí 'āā ntéé ínuⁿ. 'Tíicā s'uúúⁿ ndúúcū chí i'téenu yú cuuvi ndáá níⁿnuⁿ yú nanááⁿ Ndyuūs. ²⁰ Jesucristo 'āā ndáá yā nanááⁿ Ndyuūs vmnááⁿ vmnaaⁿ yeⁿē s'uúúⁿ. Ní maaⁿ ní cááva yā cuuvi ndaa yú nanááⁿ Ndyuūs. Ní maaⁿ ní Jesucristo miiⁿ ní chiiduú ch'ēete ca yeⁿe yú chí 'áámá cūnee ná nti-iⁿnyuⁿ miiⁿ. Ní tan'dúúcā chiiduú ch'ēete ca Melquisedec chí 'áámá cūnee na nti-iⁿnyuⁿ 'āā tiicā nūuⁿ Jesucristo.

**Yeⁿe Jesús chí chiiduú ch'ēete
ca tan'dúúcā Melquisedec
chí chiiduú ch'ēete ca**

7 'Iiⁿyāⁿ Melquisedec ní rey yeⁿé yāāⁿ Salem ní chiiduú ch'ēete ca yeⁿe Ndyuūs chí ch'ēete n'dai. Tiempo chí 'āā 'nááⁿ ch'ó'oo, saⁿā Abraham ní taachi cuchí sa chí cheⁿe sa ná caandaá naachi ch'iⁿnuⁿ sa reyes, saⁿā Abraham miiⁿ ndaaca sa nanááⁿ chiiduú ch'ēete ca Melquisedec ní Melquisedec di'viicú yā Abraham. ² Ní Abraham miiⁿ ní ca'ā sa Melquisedec 'áámá ndiichí parte yeⁿē nducuéⁿē chí divíi yā yeⁿe 'iiⁿyāⁿ yeⁿe reyes cucáávā caāndāa. Ní chí duuchi chí Melquisedec vmnááⁿ vmnaaⁿ neⁿē caaⁿmáⁿ rey chí yeⁿe vaadī cuaacu. Ní cuayiivi ní neⁿe caaⁿmáⁿ rey yeⁿe yāāⁿ Salem, ní chí duuchí yā neⁿe caāⁿmaⁿ rey yeⁿē vaadī d'iiⁿ. ³ Nguéé canee nguūⁿ chē chí ch'ēcú Melquisedec, ch'ē chí chiidá yā ndíi nguéé ndúú yeⁿe 'iiⁿyāⁿ yeⁿé yā yeⁿe chí chiicá yā. Nguéé canee nguūⁿ yeⁿe tiempo chí ch'iindiyáaⁿ yā ndíi nguéé ndúú yeⁿe tiempo chí ch'ii yā. Ní cucáávā chuū Melquisedec miiⁿ tan'dúúcā daiyá Ndyuūs 'tiicá yā ti 'áámá chiiduú ch'ēete ca chí 'áámá cūneeⁿ na ntiⁿnyuⁿ cueⁿe daāⁿmaⁿ.

⁴ Maaⁿ ní nadacádíínuuⁿ ní chí ch'ēete n'dai saⁿā Abraham 'cūū. Abraham ca'a

yā 'áámá ndiichi parte yeⁿē nducuéⁿē chí divíi yā yeⁿe reyes taachi cuⁿu yā na caāndaá. ⁵ 'Tíicā ngaⁿā ley yeⁿe Ndyuūs chí Moisés dingúuⁿ yā: Nducyaaca chiiduú chí yeⁿe ndaata yeⁿē 'iiⁿyāⁿ Leví canéé chí cuta'á yā ndíichí parte yeⁿe nducuéⁿē chí véé yeⁿe nducyáácá 'iiⁿyāⁿ chí yeⁿe Abraham ní yeⁿe 'iiⁿyāⁿ yeⁿe ndaata yeⁿé yā, ti 'iiⁿyāⁿ Leví miiⁿ ní yeⁿē ndaata Abraham. ⁶ Naati chiiduú ch'ēete ca Melquisedec miiⁿ ní nguéé yeⁿe 'iiⁿyāⁿ Leví naati sta'á yā ndíichí parte yeⁿe Abraham. Ní Abraham miiⁿ ní saⁿā chí Ndyuūs dífⁿ yā compromiso ndúúcū sa chí véé chí cuuvi yeⁿe sa. Ní chiiduú ch'ēete ca Melquisedec di'viicú yā Abraham. ⁷ Maaⁿ ní Melquisedec chí di'viicú yā Abraham ní ch'ēete cá yā nguéé ti Abraham chí di'viicú yā 'yā. ⁸ Maaⁿ ní 'iiⁿyāⁿ Leví chí ita'á yā chí ndiichí parte yeⁿe nducuéⁿē chí véé yeⁿe yú, ní 'iiⁿyāⁿ chí caⁿá yā 'cuuvi yā. Naati canéé nguūⁿ na libro yeⁿé Dendyuūs 'tíicā chí chiiduú ch'ēete ca Melquisedec chí sta'á yā ndiichi parte yeⁿé 'iiⁿyāⁿ ní nguéé ngaⁿā chí n'díi yā. ⁹ Ní chuū ní neⁿe caaⁿmāⁿ chí taachi Abraham ca'á yā ndiichi parte yeⁿé yā chiiduú ch'ēete ca Melquisedec, maaⁿ tiempo nūuⁿ 'iiⁿyāⁿ yeⁿe Leví chí yeⁿē ndaata Abraham ní 'iiⁿyāⁿ chí sta'á yā ntúūⁿ chí ndiichi parte yeⁿé yā. 'Tiicá ntúūⁿ ca'a yā chí ndiichi parte yeⁿé yā chiiduú ch'ēete ca Melquisedec. ¹⁰ Ní 'áará chí saⁿā Leví miiⁿ 'āā cuéé 'cuundiyaāⁿ sa, Abraham miiⁿ dífⁿ yā chuū cáávā 'iiⁿyāⁿ yeⁿé yā chí 'āā cuéé 'cuundiyaāⁿ yā taachi ndaācā sa chiiduú ch'ēete ca Melquisedec cuaaⁿ na yúúni, ní ca'á yā chí ndiichi parte miiⁿ.

¹¹ Maaⁿ ní 'iiⁿyāⁿ s'eeⁿ yeⁿe ndaata Israel sta'á yā ley yeⁿé yā yeⁿē chiiduú s'eeⁿ chí yeⁿē ndaata Leví. Ní 'iiⁿyāⁿ Leví s'eeⁿ ní yeⁿe ndaata Aarón. Ní nduuti chí 'iiⁿyāⁿ Leví s'eeⁿ cuuvi dífⁿ yā chí nducyaaca 'iiⁿyāⁿ cu-

uvi 'cuētínéé n'daacá yā ní nguéé nuuⁿndi yeⁿé yā, ¿de'ē cáávā chi neⁿé yā táámá chiiduú ch'ēete ca chí 'āā vi'í cā ní nguéé yeⁿē ndaata chiiduú Aaron? Naati tan'dúúccā chiiduú ch'ēete ca Melquisedec, 'tíicá yā. ¹² Caati naachi n'daaⁿ yā chiiduú ch'ēete ca yeⁿē táámá ndaata yeⁿe 'iiⁿyāⁿ Israel 'tíicá ntúúⁿ canee chí n'daa yā ley. ¹³ Ná libro yeⁿé Ndyuūs 'tíicā canéé nguūⁿ yeⁿe Señor yeⁿe yú. Señor ní yeⁿé táámá 'iiⁿyāⁿ chi nguéé dííⁿ yā ntiiⁿnyuⁿ yeⁿe chiiduú chí dííⁿ ntiiⁿnyuⁿ yeⁿē nátaí naachi 'caaⁿnúⁿ yā 'iiti cáávā yeⁿe ofrenda yeⁿe Ndyuūs. ¹⁴ Nducyaaca 'iiⁿyāⁿ ní déenu yā chí Señor Jesucristo yeⁿē yú ch'iindiyáaⁿ yā yeⁿē 'iiⁿyāⁿ yeⁿe Judá. Ní Moisés nguéé ngaⁿa yā de'ē vee yeⁿe 'iiⁿyāⁿ yeⁿe Judá taachi cāⁿa yā yeⁿe chiiduú yeⁿe ndaata yeⁿé yā.

¹⁵ Ní neené cuaacu ca canee taachi ndaā táámá chiiduú chí tan'dúúccā chiiduú ch'ēete ca Melquisedec, 'tíicā yā. ¹⁶ Ní táámá chiiduú miiⁿ nguéé dííⁿ yā ntiiⁿnyuⁿ yeⁿē chiiduú cáávā ley chí ngaⁿa chí chiiduú miiⁿ canee chí cuuvi yeⁿe 'iiⁿyāⁿ yeⁿe ndaata yeⁿe chiiduú. Naati táámá chiiduú miiⁿ dííⁿ yā ntiiⁿnyuⁿ yeⁿē chiiduú cáávā chí véé vida cueⁿe daāⁿmaⁿ yeⁿé yā ní véé poder yeⁿé yā. ¹⁷ 'Tíicā canee nguūⁿ na libro yeⁿé Ndyuūs naachi Ndyuūs ngaⁿá yā yeⁿe yā 'tíicā:

Díí ní 'áámá chiiduú chí cueⁿé daāⁿmaⁿ 'áámá cūnee na ntiiⁿnyuⁿ. Tan'dúúccā chiiduú ch'ēete ca Melquisedec 'tíicā ní. ¹⁸ Maaⁿ ní ley yeⁿe Moisés ní nguéé ley yeⁿē maaⁿ caati nguéé dichíí'vē. ¹⁹ Ley yeⁿe Moisés nguéé cuuvi dííⁿ chí 'iiⁿyāⁿ 'cuētínéé n'daacā yā chí nguéé nuuⁿndi yeⁿé yā. Naati maaⁿ ná lugar yeⁿē ley miiⁿ véé 'viich'etífínūⁿ chí n'daacā ca chí cuuvi yeⁿē yú chí Ndyuūs tee yā s'uúúⁿ. Ní cáávā chuū ndaa yú nanááⁿ Ndyuūs.

²⁰ Ní Ndyuūs, cáávā chí duuchi maáⁿ yā, caⁿa yā chí dííⁿ yā chí Jesucristo chíiduú ch'ēete ca. Tanáⁿā ca chíiduú dííⁿ yā ntiiⁿnyuⁿ tan'dúúccā chí ngaⁿa reglas yeⁿe 'iiⁿyāⁿ nguéé cáávā mar 'áámá nombre yeⁿé Ndyuūs. Naati yeⁿē táámá chíiduú ch'ēete ca chí Jesucristo, Ndyuūs ngaⁿá yā yeⁿe Jesucristo ndúúccū chí duuchi maáⁿ yā chí canéé yā 'áámá chíiduú ch'ēete ca. ²¹ 'Tíicā canéé nguūⁿ na libro yeⁿé Ndyuūs naachi Ndyuūs ngaⁿa yā yeⁿē taama yā:

Señor Ndyuūs ngaⁿá yā ndúúccū chí duuchi maáⁿ yā ní nguéé n'daaⁿ yā chí ngaⁿa yā. Díí ní cueⁿé daāⁿmaⁿ canéé dí chí díí ní 'áámá chíiduú chí tan'dúúccā chíiduú ch'ēete ca Melquisedec 'tíicā dí. ²² Maaⁿ ní cucáávā chí Ndyuūs dííⁿ yā chuū, Jesús ní dííⁿ yā chí seguro canee compromiso yeⁿé Ndyuūs. Ní n'daacā ca nguéé tí chí vmnááⁿ vmnaaⁿ chí yeⁿé 'iiⁿyāⁿ s'eeⁿ. ²³ 'Tíicā dendú'ú neené 'yaaⁿ chíiduú vee naati nguéé ch'ēetinéé yā ndúúccū ntiiⁿnyuⁿ caati chí yā. ²⁴ Naati Jesucristo miiⁿ nguéé chí yā tí 'áámá canee yā. Ní nguéé ca'á yā táámá 'iiⁿyāⁿ ntiiⁿnyuⁿ chí yeⁿé yā. ²⁵ Maaⁿ ní Jesucristo cuuvi nadanguáⁿai yā cueⁿe daāⁿmaⁿ nducyáácá 'iiⁿyāⁿ chí ndaa yā nanááⁿ Ndyuūs cáávā Jesucristo miiⁿ. Níicú Jesucristo miiⁿ canduuchí yā cueⁿe daāⁿmaⁿ ní ngaⁿangua'á yā cáávā 'iiⁿyāⁿ s'eeⁿ chí yeⁿé yā.

²⁶ 'Tíicā Jesús miiⁿ ní chíiduú ch'ēete ca chí itée yā necesidades yeⁿe yú. Ní deeve yā. Ní nguéé dííⁿ yā cosas chí nguéé n'daacā. Ní nguéé dííⁿ yā mar 'áámá nuuⁿndi. Jesucristo miiⁿ 'āā vi'í ca yā yeⁿe 'iiⁿyāⁿ chí dinuuⁿndí yā. Ní cueⁿé yā yaācu cá nguéé tí nanguuvi. ²⁷ Ní Jesucristo chí chíiduú ch'ēete ca nguéé canéé chí dííⁿ yā tan'dúúccā tanáⁿā chíiduú n'geete ca chí 'caaⁿnúⁿ yā 'iiti ngu-

uvi nguuvi cáávā nuuⁿndi yeⁿe maáⁿ yā ní cuayiivi cáávā nuuⁿndi yeⁿe tanáⁿā ca 'iiⁿyāⁿ. Jesús miiⁿ 'áámá vmnéⁿ'ēe díⁿ yā chuū taachi nca'a vida yeⁿe maáⁿ yā taachi ch'iⁿ yā cáávā nuuⁿndi yeⁿe yú. ²⁸ Cáávā ley yeⁿe Moisés 'iiⁿyāⁿ i'néeⁿ yā chiiduú n'geete ca chi 'iiⁿyāⁿ chi véé nuuⁿndi yeⁿé yā. Chó'ōo 'naaⁿ tiempo ní cuayiivi ní Ndyuūs ngaⁿá yā cáávā chi duuchi maáⁿ yā chi daiyā yā ní chiiduú ch'ēete ca chi díⁿ yā chiiⁿ chi Ndyuūs neⁿ'é yā chi díⁿ yā. Ní 'áámá cūnee yā cueⁿe daáⁿmaⁿ.

Jesucristo ní abogado yeⁿē táámá compromiso

8 Chuū chi caⁿa nū ní ch'ēete ca yeⁿe tanducuéⁿ'ē chi ngaⁿá nū chi 'tíicā. Chiiduú ch'ēete ca yeⁿe yú chi Jesucristo ní véé yā ná va'ai chēeti nguuvi na lado yeⁿē honor yeⁿe trono yeⁿ'é Ndyuūs chí canéé na va'ai chēeti nguuvi. ² Ní Jesucristo díⁿ yā ntiiⁿnyuⁿ yeⁿē chiiduú ch'ēete ca na yaacū na va'ai ch'ēete nguuvi chi cuaacu níⁿnyúⁿ chí yeⁿ'é Ndyuūs. Ní 'iiⁿyāⁿ s'eeⁿ nguéé din'dái yā yaacū miiⁿ ti Señor Jesucristo maáⁿ yā din'dái yā. ³ 'Iiⁿyāⁿ s'neéⁿ yā ca'áámá cáaama chiiduú ch'ēete ca chi canéé chí ca'á yā ofrenda ní 'caaⁿnúⁿ yā 'iiti cáávā nuuⁿndi yeⁿ'é 'iiⁿyāⁿ. Cáávā chuū Jesucristo canéé chi véé yeⁿ'é yā chi cuuví ca'a yā chi vida yeⁿe maáⁿ yā. ⁴ Ní ndúútí chi Cristo miiⁿ cunéé yā iⁿ'yeeⁿ'dí cūū nguéé cuuvi chiidúú yā caati véé chiiduú s'eeⁿ chi nga'a yā ofrendas nanááⁿ Ndyuūs tan'dúúcā chi ngaⁿa ley yeⁿe Moisés. ⁵ Ní chiiduú s'eeⁿ ní díⁿ yā ntiiⁿnyuⁿ yeⁿ'é yā ní díⁿ yā tan'dúúcā ntiiⁿnyuⁿ yeⁿ'e yaacū chi canéé na va'ai ch'ēeti nguuvi. Deenú 'nū chi díⁿ yā copiar ntiiⁿnyuⁿ yeⁿ'é Ndyuūs ti taachi Moisés neⁿ'é yā din'dái yā yaacū chi va'ai tীনūⁿ, Ndyuūs caⁿa yā chii yā Moisés ní ngaⁿa yā:

Dii, Moisés, candée nī cuidado yeⁿē tanducuéⁿ'ē chi díⁿ di. Ní díⁿ di

tan'dúúcā chi ch'iⁿ'í dii taachi canee di na cuéétí. ⁶ Naati Cristo chi chiiduú ch'ēete ca yeⁿe yú díⁿ yā ntiiⁿnyuⁿ chí ch'ēete taavi ca nguéé ti yeⁿ'e chiiduú n'geete ca yeⁿ'ē iⁿ'yeeⁿ'dí cūū caati Ndyuūs díⁿ yā compromiso chi Cristo canéé yā naavtaⁿ'ā yeⁿ'e 'iiⁿyāⁿ yeⁿ'e iⁿ'yeeⁿ'dí cūū ndúúcū Ndyuūs. Maaⁿ ní s'uuúⁿ cuuvi ndaa yú nanááⁿ Ndyuūs cáávā Cristo miiⁿ. Ní compromiso miiⁿ ní ch'ēete ca tí yeⁿ'e tanducuéⁿ'ē chi n'daacā taavi ca.

⁷ Ní nduuti chí compromiso chi vmnááⁿ vmnaaⁿ chi yeⁿ'é Ndyuūs ní n'daacā taavi ca tuuⁿmi ní nguéé canee chi díⁿ yā ndiichí ndii 'úúví compromiso. ⁸ Naati Ndyuūs n'diichi yā chi nguéé n'daacā díⁿ 'iiⁿyāⁿ tiempo chí 'āā chó'ōo. Ní ngaⁿá yā ngii yā 'iiⁿyāⁿ s'eeⁿ tan'dúúcā chi canéé nguūⁿ na libro yeⁿ'é yā 'tíicā:

'Tíicā ngaⁿa Señor: Tiempo chí cuchii 'úú ní díⁿ 'áámá compromiso ngai ndúúcū 'iiⁿyāⁿ yeⁿ'e ndaata Israel ní ndúúcū 'iiⁿyāⁿ yeⁿ'e ndaata Judá.

⁹ Nguéé idiíⁿ tan'dúúcā chí díⁿ ndúúcū chiidá yā taachi divíi 'iiⁿyāⁿ yeⁿ'e yáⁿ'āa Egipto. 'Iiⁿyāⁿ s'uuⁿ nguéé díⁿ yā tan'dúúcā chí 'úú yaa'ví 'iiⁿyāⁿ s'uuⁿ. Ní cáávā chuū nguéé díⁿ cuenta yeⁿ'é yā.

¹⁰ Cuayiivi chí chó'ōo nguuvi s'eeⁿ ní maaⁿ ní chuū chí compromiso ngai chí caⁿá díⁿ ndúúcū 'iiⁿyāⁿ yeⁿ'e nación Israel. Ngaⁿa Señor: Cu'neéⁿ leyes yeⁿ'é na vaanicadínūⁿ yeⁿ'é yā ní dinguúⁿ leyes yeⁿ'é na staava yeⁿ'é yā. Ní 'úú cuuvi Ndyuūs yeⁿ'é yā, ní 'iiⁿyāⁿ s'eeⁿ cuuvi 'iiⁿyāⁿ yeⁿ'é.

¹¹ Ní mar 'áámá yā canee chí ca'cueéⁿ yā 'iiⁿyāⁿ yeⁿ'e nación yeⁿ'é yā 'tíicā. Ndís'tii n'diichí nī Señor miiⁿ, caati nducyáácá yā ní n'diichí yā 'úú ndíi 'iiⁿyāⁿ chí ngaⁿ'ā ntiiⁿnyúⁿ yā ndii tanáⁿ'ā 'iiⁿyāⁿ.

¹² Ní 'úú ní nadach'èecú nuuⁿndi chi diíⁿ yā ní 'āā ntéé nn'gaacú nuuⁿndi yeⁿé yā. ¹³ Ní Ndyuūs ngaⁿa yā yeⁿé com-promiso chi ngai ti caati compro-miso chi vmnááⁿ vmnáaⁿ ní 'āā ndi-cúú tuuⁿmi ní deenu yú chi dendúⁿú chi 'āā ndiicúú ní 'āā nuúⁿ 'cuiinu.

Yeⁿe yáacū na iⁿ'yeeⁿdí 'cūū ní yeⁿé yáacū na va'ai cheeti nguuví

9 Cuáácú chi véé reglas yeⁿe com-promiso chi vmnááⁿ vmnáaⁿ ndúúⁿcū yáacū chi 'iiⁿyāⁿ s'eeⁿ din'dái yā naachi dich'èete yā Ndyuūs. ² Din'dái yā yáacū yeⁿe tífínūⁿ ndúúⁿcū 'uuví cuartos. Cuarto chi vmnááⁿ vmnáaⁿ ní nguuví Lugar Dæeve. Ní cheeti cuarto miiⁿ véé 'áámá candelero ndúúⁿcū 'áámá mesa, ní vmnáaⁿ mesa véé pan chi ofrenda yeⁿé Ndyuūs. ³ Ná cuarto chi yaānūⁿ táámá lado yeⁿe cortina yeⁿe tífínūⁿ nguuví Lugar Dæeve N'dai Ca Yeⁿé Ndyuūs. ⁴ Na cuarto miiⁿ véé 'áámá nátaí yeⁿe 'diiⁿ-nguāⁿ naachi chiiduú ch'èete ca ngíⁿí yā cúⁿúyaa. Ní míⁿ canéé 'áámá caja chi yeⁿé compromiso. Nducuéⁿé lados yeⁿe caja miiⁿ ní candúúⁿ 'diiⁿnguāⁿ vmnááⁿ yeⁿé. Cheeti caja miiⁿ véé chíⁿté yeⁿé 'diiⁿnguāⁿ ní miiⁿ snúⁿ pan chi ngu-uví maná. Ní cheeti caja ntúⁿ canéé nduucu chi nanguaaⁿnu chi yeⁿe Aarón ndúúⁿcū 'úúví tablas yeⁿé tuúu naachi canéé nguūⁿ ley chi diíⁿ Ndyuūs. ⁵ Vm-naaⁿ caja miiⁿ canéé 'uúví querubines tan'dúúⁿcā ángeles ndúúⁿcū ngeéchi yā. Ní miiⁿ Ndyuūs canéé yā. Ní canéé 'cu-tíⁿ yeⁿe ngeéchi yā yeⁿé vmnáaⁿ cuaaⁿ naachi Ndyuūs nadich'èecú yā nuuⁿndi yeⁿé nducyaaca 'iiⁿyāⁿ. Maaⁿ ní yeⁿé chuū nguéé cuuvi caaⁿmáⁿ yeⁿé tandu-cuéⁿé maaⁿ.

⁶ 'Tíicā chiiduú s'eeⁿ idiíⁿ yā nducuéⁿé. Nguuví nguuví chiiduú s'eeⁿ ngéⁿe yā na cuarto vmnááⁿ vmnáaⁿ ní diíⁿ yā nti-iⁿnyuⁿ yeⁿé yáacū yeⁿé Ndyuūs. ⁷ Ní na cuarto chi yaānūⁿ miiⁿ chi ndii

'úúví dámaāⁿ chiiduú ch'èete ca indaá yā 'áámá vmneⁿéé nūⁿ ca'áámá ca'áámá nduuyū. Ní canéé chí candéé yā yuúⁿ yeⁿe 'iiti chi ca'a yā ofrenda Ndyuūs cáávā nuuⁿndi yeⁿé yā ní cáávā nuuⁿndi yeⁿé tanáⁿā 'iiⁿyāⁿ. ⁸ Espíritu N'dai yeⁿé Ndyuūs ch'íⁿí yā s'uuúⁿ chi nguéé cu-uvi ndaa yú nanááⁿ Ndyuūs neⁿé chi canéé yáacū yeⁿe tífínūⁿ caati yaacu tífínūⁿ miiⁿ ní yeⁿe compromiso chi vmnááⁿ vmnáaⁿ. ⁹ Ní nducuéⁿé chuū chi diíⁿ chiiduú s'eeⁿ ní canee tan'dúúⁿcā 'áámá ejemplo yeⁿé tiempo yeⁿe yú. Chiiduú s'eeⁿ ní ca'a yā ofrendas nanááⁿ Ndyuūs ndúúⁿcū 'iiti chi n'giiⁿnúⁿ yā cáávā ofren-das yeⁿé nuuⁿndi yeⁿé yā. Chuū ní neⁿé caaⁿmaⁿ chi ofrendas ndúúⁿcū 'iiti chi n'giiⁿnúⁿ yā ní ca'a yā Ndyuūs nguéé cuuvi diíⁿ chi staava yeⁿe 'iiⁿyāⁿ s'eeⁿ ní dæeve neⁿe chi 'tíicā chí nga'a yā ofrendas nanááⁿ Ndyuūs. ¹⁰ 'Iiⁿyāⁿ s'eeⁿ dich'èeté yā Ndyuūs dámaāⁿ ndúúⁿcū cosas chi che'é yā ndúúⁿcū cosas chi cu'u yā ndúúⁿcū chiiⁿ chi diíⁿ yā chi cuuvi dæevé yā staava yeⁿé yā. Nducuéⁿé chuū ní reglas chi diíⁿ yā ní canee chi diíⁿ yā 'tíicā ndii tiempo chi Ndyuūs n'daaⁿ yā dendu'ú yeⁿé.

¹¹ Cristo ní 'āā ndāa yā iⁿ'yeeⁿdí 'cūū. Ní maaⁿ ní Cristo miiⁿ ní chiiduú ch'èete ca yeⁿe dendúⁿú chi n'dai taavi ca. Ní yáacū naachi Cristo diíⁿ yā ntiⁿnyuⁿ ní ch'èete taavi ca ní n'daacā ca nguéé ti yáacū yeⁿe tífínūⁿ chi yeⁿé iⁿ'yeeⁿdí 'cūū. Ní 'iiⁿyāⁿ s'eeⁿ nguéé n'dái yā yáacū chí ch'èete ca. ¹² Ní Cristo ndāa yā cheeti yáacū ndí cuarto yaānūⁿ chí nguuví Lugar Dæeve N'dai Ca Yeⁿé Ndyuūs. Nguéé sndéé yā ndúúⁿcū yuuúⁿ yeⁿe 'iiti chi chivo o daiyā vaca chi n'giiⁿnuⁿ yā naati ndúúⁿcū yuuúⁿ yeⁿe maáⁿ yā. Ní 'tíicā sndāa yā dámaāⁿ 'aama vmnéⁿé na Lugar Dæeve N'dai Ca Yeⁿé Ndyuūs cáávā nducyaaca 'iiⁿyāⁿ. Ní maaⁿ ní nadanguáⁿ'ai yā s'uuúⁿ chi cuuvi yeⁿé yā s'uuúⁿ cueⁿe daāⁿmaⁿ. ¹³ Cuáácú chí

yuūuⁿ yeⁿe itiindu ndúúcu yuūuⁿ yeⁿe chivo ndúúcu yaiyáa yeⁿe daiya vaca chi 'āa ngiichi vmnaaⁿ nátaí ní chiiduú s'eeⁿ ch'eeⁿ ndái yā vmnaaⁿ 'iiⁿyāⁿ chi véé nuuⁿndi yeⁿé yā ti yuūúⁿ cuuvi nadivéeve 'iiⁿyāⁿ cáávā ley yeⁿé yā. ¹⁴Ní chuū ní cuaacu. Maaⁿ ní nééné n'daacā ca chi cuuvi diiⁿ yuūúⁿ yeⁿe Cristo nguéé ti yuūúⁿ yeⁿé 'iiti. Cucáávā Espíritu N'dai yeⁿé Ndyuūs chi canduuchi cueⁿé daāⁿ-maⁿ, Cristo díⁿ yā ofrecer cuerpo yeⁿe maáⁿ yā chi 'iiⁿyāⁿ s'eeⁿ 'caaⁿnúⁿ yā 'yā cáávā ofrenda yeⁿé Ndyuūs, ofrenda chi n'daacā yeⁿé. Ní yuūúⁿ yeⁿe Cristo ní cuuvi didéeve staava yeⁿé yú yeⁿe nducueⁿé chi nadacadínuuⁿ yú chi nguéé n'daacā. Ní 'íicú cuuvi s'uúúⁿ ní dichí'vē yú Ndyuūs chi canduuchi.

¹⁵Cáávā chi Jesucristo díⁿ yā 'áámá compromiso chi ngai, Jesucristo canéé yā naavtáⁿā yeⁿe 'iiⁿyāⁿ yeⁿe iⁿ'yeeⁿdí 'cūū ndúúcu Ndyuūs. Ní maaⁿ ní cuuvi ndaa yú nanááⁿ Ndyuūs. Ní cáávā chi ch'ií Cristo, Cristo ní cuuvi nadach'ēcú yā nuuⁿndi yeⁿe 'iiⁿyāⁿ chi cuneé yā mááⁿ compromiso chi vmnááⁿ vmnaaⁿ. Ní 'iiⁿyāⁿ chi Ndyuūs yaaⁿví yā chi cuuvi yeⁿé yā, 'iiⁿyāⁿ s'eeⁿ cuuvi cuta'a yā chi cuuvi yeⁿé yā chi 'áámá cūnee chi Ndyuūs ca'á yā 'iiⁿyāⁿ cucáávā Cristo.

¹⁶Taachí 'iiⁿyāⁿ s'neeⁿ yā escrito yeⁿe herencia yeⁿé yā chi caⁿa yā ca'a yā taamá yā, 'iiⁿyāⁿ miiⁿ canee chi 'cuūvi yā vmnááⁿ vmnaaⁿ chi dichí'vē chiiⁿ chi canéé nguūⁿ. Chuū ní tan'dúúca 'áámá compromiso chi díⁿ yā. ¹⁷'Iiⁿyāⁿ chi s'neeⁿ escrito yeⁿe herencia yeⁿé yā chi caⁿá yā ca'a yā taama yā, nguéé dichí'vē escrito yeⁿé yā neⁿe tiempo chi canduuchí yā. Naati taachi 'āa n'dií yā tuuⁿ'mi ní dichí'vē chuū. Ní tan'dúúca 'áámá compromiso chi díⁿ yā 'tíicā escrito miiⁿ.

¹⁸Ní 'tíicā chíⁿ chi dichí'vē compromiso chi diiⁿ Ndyuūs vmnááⁿ vmnaaⁿ nduuti chi véé yuūúⁿ ti ch'iíⁿnúⁿ yā 'iiti.

¹⁹Moisés caⁿa sa chii sá nducyaaca man-

damiento yeⁿe ley. Cuayiivi ní 'iiⁿyāⁿ caaⁿnúⁿ yā 'iiti ní Moisés sta'a sa yuūúⁿ yeⁿé daiya vaca ndúúcu yuūúⁿ yeⁿé chivo ní ndástaⁿa sa nuūⁿniⁿ ndúúcu yuūúⁿ. Cuayiivi ní sta'á sa yuūúⁿ ndúúcu duūdú 'iiti cuūchí ndúúcu 'áámá yaatā chi duuchi hisopo. Ní s'neéⁿ yā yuūúⁿ vmnaaⁿ libro yeⁿe ley ní vmnaaⁿ yeⁿé nducyaaca 'iiⁿyāⁿ dendú'ú. ²⁰Ní ngaⁿá Moisés 'tíicā: Chuū ní yuūúⁿ chi 'áámá sello yeⁿe chí cuuvi cuaacu compromiso chi Ndyuūs ca'a yā orden chí ndí's'tií canee chí díⁿ ní 'tíicā. ²¹'Tiicá ntúūⁿ Moisés s'neeⁿ sa yuūúⁿ miiⁿ vmnaaⁿ yeⁿe yaācū yeⁿe tীনúⁿ ní vmnaaⁿ yeⁿe tanducueⁿé dendu'ú chí ituneeⁿ na ntiiⁿ'nyuⁿ yeⁿé Ndyuūs. ²²Cuaacu chí tan'dúúca chí ngaⁿá ley 'téé 'téé nguéé nducueⁿé ní yuūúⁿ diiⁿ chí canéé deeve nducueⁿé. Ní Ndyuūs nguéé nadich'ēcú yā 'iiⁿyāⁿ yeⁿe nuuⁿndi yeⁿé yā nduuti chí nguéé ndúúcu yuūúⁿ yeⁿé 'iiti chí 'caaⁿnúⁿ chí iduú s'eeⁿ.

**Jesucristo ca'á yā maaⁿ cuerpo yeⁿé
yā chí 'iiⁿyāⁿ s'eeⁿ 'caaⁿnúⁿ
yā 'yā lado yeⁿe ofrenda**

²³'Tíicā nducueⁿé dendú'ú yeⁿe iⁿ'yeeⁿdí 'cūū canéé chí ndúúví deeve ndúúcu yuūúⁿ yeⁿe 'iiti. 'Téé 'téé nduuvi deeve tan'dúúca deeve na va'ai cheeti nguuvi. 'Tiicá ntúūⁿ cuuvi ndaa yú na va'ai cheeti nguuvi nduuti chí deeve yú ndúúcu yuūúⁿ yeⁿe táamá yā chí Cristo chí ch'ete taavi ca nguéé ti ndúúcu yuūúⁿ yeⁿe 'iiti. ²⁴Cristo nguéé cueⁿé yā sndaa yā na 'áámá yaacū chí deeve taavi ca chí nin'dái saⁿā yeⁿe iⁿ'yeeⁿdí 'cūū. Yaacū yeⁿe iⁿ'yeeⁿdí 'cūū 'tēe 'téé tan'dúúca yaacū chí deeve taavi ca chí cuaacu níⁿ'nyúⁿ chí yaacū yeⁿé Ndyuūs. Cristo cueⁿé yā sndaa yā na va'ai cheeti nguuvi ní miiⁿ canee yā nanááⁿ Ndyuūs lado yeⁿe s'uúúⁿ. ²⁵Saⁿā chiiduú ch'ete ca yeⁿé iⁿ'yeeⁿdí 'cūū chí yeⁿe ndaata judíos chí Israel nduuyu nduuyu ndáá

yā na Lugar Deeve N'dai Ca ndí ná yaānūⁿ yeⁿe yaācū yeⁿe Ndyuūs ní ca'á yā Ndyuūs ofrenda chi yuūⁿ yeⁿe 'iiti, ní nguéé yuūⁿ yeⁿé yā chi ca'a yā. Naati Cristo ca'á yā vida yeⁿe maáⁿ yā caavā ofrenda 'áamá vmneⁿéé nūⁿ. ²⁶Nduuti chi Cristo canee chi díⁿ yā tan'dúúccā chi idiiⁿ chiiduú ch'ete ca tuu'mi ní canéé chi 'cuūvi yā n'deeé ndái cuuvi ndí tiempo chi Ndyuūs din'dái yā iⁿ'yeeⁿdí 'cūū ndí chi 'cuūnū iⁿ'yeeⁿdí. Naati nguéé díⁿ Cristo 'tíicā. Caati tiempo chi Ndyuūs s'neéⁿ yā ní Jesucristo 'áamá vmneⁿéé nūⁿ ch'i yā ní ndāa yā nanááⁿ Ndyuūs chi nadach'ecú yā nuuⁿndi yeⁿe nducyaaca 'iiⁿ'yāⁿ cucáávā chi ca'a maáⁿ yā cuerpo yeⁿé yā chi 'iiⁿ'yāⁿ s'eeⁿ n'giiⁿ'núⁿ yā 'yā cáávā ofrenda. ²⁷'Tiicā ntúūⁿ nducyaaca 'iiⁿ'yāⁿ yeⁿe iⁿ'yeeⁿdí 'cūū canee chi 'cuūvi yā 'áamá vmnéⁿ'ee. Níicú cuayiivi ní Cristo ca'á yā n'diichí yā nuuⁿndi yeⁿe 'iiⁿ'yāⁿ s'eeⁿ. ²⁸Ní 'tíicā Cristo 'áamá vmnéⁿ'ee ca'á yā cuerpo yeⁿe maáⁿ yā cáávā ofrenda chi nadich'ecú yā nuuⁿndi yeⁿe nducyaaca 'iiⁿ'yāⁿ. Ní taachi ca'á yā ndaa yā taama vmnéⁿ'ee nguéé ndaa yā cucáávā chi ca'á yā nadí've yā nuuⁿndi yeⁿe nducyaaca 'iiⁿ'yāⁿ. Naati ca'á yā nadanguáⁿ'ai yā nducyaaca s'uuúⁿ chi canéé ngiinu yú chi ndaa yā ndiichi ndii 'úúví cuuvi. Ndaa yā chi nadanguáⁿ'ai yā s'uuúⁿ.

10 Ní ley yeⁿe Moisés ní tan'dúúccā 'daa'nú nūⁿ 'tíicā ti nguéé 'áamá cūnee. Ní nguéé dáámá dáámá ndúúccū nducuéⁿ'ē vaadi cuaacu chi n'daacā chi cuchii. Ti cáávā chi ngaⁿ'a ley miiⁿ 'iiⁿ'yāⁿ s'eeⁿ nduuyu nduuyu 'caaⁿ'núⁿ yā 'iiti cáávā ofrenda cucáávā nuuⁿndi yeⁿé yā. Ní cáávā chuū, ζtáácā cuuvi ley miiⁿ diiⁿ chi 'iiⁿ'yāⁿ s'eeⁿ canéé n'daaca yā nanááⁿ Ndyuūs? ²Ti nduuti chi ley miiⁿ diiⁿ chi 'iiⁿ'yāⁿ s'eeⁿ canee n'daaca yā nanááⁿ Ndyuūs ní nguéé nuuⁿndi yeⁿé yā nanááⁿ Ndyuūs, tuu'mi ní 'āā ntéé 'caaⁿ'núⁿ yā

'iiti cáávā nuuⁿndi yeⁿé yā. Ní nguéé nadacadínuuⁿ yā yeⁿe chí chideevé yā yeⁿe nuuⁿndi yeⁿé yā. ³Ní 'tíicā diiⁿ ley miiⁿ. Taachi n'giiⁿ'núⁿ yā 'iiti nduuyu nduuyu tuu'mi ní nan'gáácú yā yeⁿe nuuⁿndi yeⁿé yā. ⁴Ti ndúúccū yuūⁿ yeⁿe 'itííndú ndúúccū yuūⁿ yeⁿe chivo 'iiⁿ'yāⁿ s'eeⁿ nguéé cuuvi dideevé yā yeⁿe nuuⁿndi yeⁿé yā.

⁵Ní cucáávā chuū taachi ndaá Cristo na iⁿ'yeeⁿdí 'cūū ngaⁿ'á yā ngii yā yeⁿe nduudu yeⁿé Ndyuūs chi canéé nguūⁿ 'tíicā:

Díí, Ndyuūs, nguéé neⁿe di chi 'iiⁿ'yāⁿ 'caaⁿ'núⁿ yā 'iiti lado yeⁿe ofrenda ndí nguéé ndúú chi ca'á yā 'iiti cáávā ofrenda yeⁿe di naati din'dái di 'áamá cuerpo yeⁿé chi ch'iindiyaáⁿ.

⁶Ní nguéé neⁿe di ofrendas yeⁿe chi nguuchí yā cuerpo yeⁿe 'iiti nátaí, ní nguéé yeⁿe chí 'caaⁿ'núⁿ yā 'iiti cáávā chi Ndyuūs nadach'ecú yā nuuⁿndi yeⁿé yā.

⁷Dii Ndyuūs, 'úú ndaá iⁿ'yeeⁿdí 'cūū chi cuuvi díⁿ chēē chi neⁿe di chí díⁿ caati 'tíicā canéé nguūⁿ yeⁿe 'úú na libro yeⁿe Ndyuūs naachi canéé nguūⁿ ley. ⁸Vmnááⁿ vmaaaⁿ ngaⁿ'a Cristo: Dii Ndyuūs nguéé neⁿe di ní nguéé yeenú di ndúúccū ofrendas yeⁿe chí n'giiⁿ'núⁿ yā 'iiti, ní nguéé yeⁿe 'iiti chí tee yā dii. Ndí nguéé ndúú yeⁿe chí n'giiⁿ'núⁿ yā 'iiti ní ngiichí yā yuūtē yeⁿe 'iiti cáávā chí nadach'ecú di nuuⁿndi yeⁿé yā. 'Tíicā ngaⁿ'a Cristo 'áará chí 'iiⁿ'yāⁿ s'eeⁿ díⁿ yā tan'dúúccā chí ngaⁿ'a ley miiⁿ yeⁿe ofrenda chí canéé chí ca'á yā Ndyuūs. ⁹Ní cuayiivi ngaⁿ'á Cristo: Dii, Ndyuūs, 'úú ndaá na iⁿ'yeeⁿdí 'cūū chí cuuvi díⁿ chēē chí neⁿe di chí díⁿ. Maaⁿ ní nducuéⁿ'ē chuū neⁿe caaⁿ'maⁿ 'tíicā. Ndyuūs divíi yā 'áamá lado ofrenda yeⁿe 'iiti chí 'iiⁿ'yāⁿ s'eeⁿ ch'i'iiⁿ'núⁿ

yā. Ní na lugar yeⁿe ofrenda miiⁿ Ndyuūs ca'á yā Cristo chí ch'iī yā. ¹⁰Maaⁿ ní Ndyuūs didēevé yā s'uuúⁿ cáávā Jesucristo díⁿ yā nducuéⁿē chí Ndyuūs neⁿé yā chí diiⁿ yā. Ní 'áámá vmnéⁿee nūⁿ Jesucristo ca'á yā cuerpo yeⁿe maáⁿ yā cáávā ofrenda chí 'iiⁿyāⁿ s'eeⁿ n'giiⁿnúⁿ yā 'yā cáávā nuuⁿndi yeⁿe nducyáácá 'iiⁿyāⁿ.

¹¹Ca'áámá cā'aama chiidúú judío chí Israel nguuví nguuví díⁿ yā ntiiⁿnyuⁿ ní cheendii yā ní nga'á yā ofrenda dáámá daama nūⁿ nééné n'deēe cuūví 'áará chí ofrenda miiⁿ chí n'giiⁿnúⁿ yā 'iiti nguéé cuuvi diví nuuⁿndi yeⁿe 'iiⁿyāⁿ mar 'áámá vmnéⁿee. ¹²Naati Jesucristo 'áámá vmnéⁿee nūⁿ ca'á yā maaⁿ cuerpo yeⁿé yā chí 'iiⁿyāⁿ s'eeⁿ n'giiⁿnúⁿ yā 'yā caavā ofrenda yeⁿe nuuⁿndi yeⁿe nducyáácú 'iiⁿyāⁿ. Ní cuayiivi cueⁿé yā na va'ai cheeti nguuví ní ch'iindí yā na lado yeⁿe honor yeⁿé Ndyuūs chí lado tá cuaacu. ¹³Maaⁿ ní Jesucristo canee ngiinú yā chí ndaa tiempo chí Ndyuūs idifⁿ yā chí nducyaaca 'iiⁿyāⁿ chí contra yeⁿé yā canée yā maaⁿ ca'á Jesucristo tan'dúúicā chí 'áámá banco 'lífⁿ 'ticá yā chí Jesucristo cuchée yā yeⁿe yā. ¹⁴Ní cáávā chí Cristo ca'á yā cuerpo yeⁿe maáⁿ yā chí 'iiⁿyāⁿ s'eeⁿ n'giiⁿnúⁿ yā 'yā 'áámá vmnéⁿee nūⁿ cáávā ofrenda tuuⁿmi ní Cristo díⁿ yā chí dáámá cuuvi dēevé 'iiⁿyāⁿ ti nadach'ēecú yā nuuⁿndi yeⁿé yā. Ní 'iiⁿyāⁿ s'eeⁿ ní yeⁿe Ndyuūs cueⁿe daāⁿmaⁿ. ¹⁵Ní Espíritu N'dai yeⁿé Ndyuūs ngaⁿa ndúúcu yú chí nducuéⁿē chuū ní cuaacu. Vmnááⁿ vmaⁿa ngaⁿa Ndyuūs chuū:

¹⁶Chuū chí díⁿ prometer chí díⁿ caavá yā cuayiivi chí ch'ó'oo nguuví s'eeⁿ, ngaⁿa Ndyuūs. Cu'neéⁿ ley yeⁿé na staava yeⁿé yā. Ní dinguúⁿ ley yeⁿé na vaanicadíínūⁿ yeⁿé yā. ¹⁷Ní cuayiivi ngaⁿá yā:

'Āā ntéé nan'gaacú nuuⁿndi yeⁿé yā ní nguéé nducuéⁿē chí díⁿ yā chí nguéé n'daacā. ¹⁸Níicú taachi Ndyuūs nadich'ēecú yā nuuⁿndi yeⁿé 'iiⁿyāⁿ s'eeⁿ tuuⁿmi ní 'āā ntéé canée chí ca'á yā ofrendas chí 'caaⁿnúⁿ yā 'iiti cáávā nuuⁿndi yeⁿe yā.

Canée chí nan'gaacu yú yeⁿe Ndyuūs yeⁿe yú

¹⁹Tíficā ní hermanos yeⁿé maaⁿ ní cuuvi nandaa yú nanááⁿ Ndyuūs na cuarto chí Dēeve N'dai Ca na yaácū yeⁿé Ndyuūs ti véé 'viich'ētíínūⁿ yeⁿé yú nanááⁿ Ndyuūs cáávā yuúúⁿ yeⁿe Señor Jesucristo. ²⁰Ní Jesucristo nn'guaaⁿ yā 'áámá yúúni chí n'dai ní canduuchi taachi chí nteeⁿ yā tíínūⁿ yeⁿe yaácū. Tíínūⁿ miiⁿ ní neⁿe caaⁿmaⁿ chí tan'dúúicā cuerpo yeⁿe maáⁿ Cristo taachí ch'iī yā, 'tíficā va. Maaⁿ ní cuuvi ndaa yú na cuarto chí yaānūⁿ nanááⁿ Ndyuūs caavá yā. ²¹Ní Jesucristo ní chiidúú ch'ēete ca yeⁿe yú ní díⁿ yā ntiiⁿnyuⁿ yeⁿe yaácū yeⁿe Ndyuūs. ²²Maaⁿ ní canée chí indaa yú nanááⁿ Ndyuūs ndúúcu núúⁿmáⁿ staava yeⁿe yú ní 'áámá canee yú ndúúcu chí i'téenu yú. Cristo miiⁿ 'āā didēevé yā staava yeⁿe yú yeⁿe nuuⁿndi yeⁿe yú caati nguéé nadacadíínūⁿ ca yú yeⁿe castigo yeⁿe nuuⁿndi chí diiⁿ yú. Ní nadidēeve yā cuerpo yeⁿé yú ndúúcu nuūⁿniⁿ dēeve. ²³Maaⁿ ní diiⁿ yú chí 'áámá canee yú ndúúcu chí ngaⁿa yú chí i'téenu yú caati deenu yú chí Ndyuūs caⁿá yā díⁿ yā cumplir compromiso yeⁿe chí caⁿa yā chí tée yā s'uuúⁿ. ²⁴Ní s'uuúⁿ canée chí inadicadíínūⁿ yú táácā cuuvi cunnee yú 'aama yú taama yú ní dineⁿe yú 'aama yú taama yú ní diiⁿ yú dendu'ū chí n'daacā. ²⁵Ní nguéé diiⁿ yú chí nguéé nduuvidaama yú cheeti yaácū tan'dúúicā chí diiⁿ náⁿa yā. Naati ca'a yú consejo 'aama yú taama yú caati deenu yú chí nguuví chí ndaa Cristo taama vmnéⁿee 'āā snee niiⁿnuúⁿ.

²⁶ Ní nduuti chi idiiⁿ yú nuuⁿndi caati maaⁿ yú neⁿe yú cuayiivi chi 'āā deenu yú nduudu cuaacu yeⁿ'é Ndyuūs tuuⁿmi ní 'āā nteε véé taama ofrenda chi cuuvi ca'a yú Ndyuūs cáāvā nuuⁿndi yeⁿ'e yú chi Ndyuūs divíi yā nuuⁿndi yeⁿ'e yú. ²⁷ Dámaaⁿ 'va'a yú neⁿ'e chi cunee ngiinu yú yeⁿ'e chi cuchii. Cristo caⁿ'á yā n'diichi yā nuuⁿndi yeⁿ'ē yú ní ndúúcu yaⁿ'ā íngiichi chi cuucu tanducuéⁿ'ē 'iiⁿ'yāⁿ chi contra yeⁿ'é Ndyuūs. ²⁸ Deenu yú yeⁿ'e 'iiⁿ'yāⁿ chi nguéé díⁿ yā cuenta yeⁿ'e ley yeⁿ'e Moisés. Nduuti chi véé 'uuví o 'iinū 'iiⁿ'yāⁿ chi ngaⁿ'ā nduudu cuaacu yeⁿ'e falta yeⁿ'é yā tuuⁿmi ní ch'ii 'iiⁿ'yāⁿ miiⁿ. Ní nguéé ya'ai 'iiⁿ'yāⁿ s'eeⁿ taachi ch'ii yā.

²⁹ Maaⁿ ní nadacadíinuunⁿ yú yeⁿ'e 'iiⁿ'yāⁿ s'eeⁿ chi nguéé díⁿ yā cuenta yeⁿ'e yuúúⁿ yeⁿ'e Cristo chí cuuví dεεve 'iiⁿ'yāⁿ s'eeⁿ. 'Iiⁿ'yāⁿ s'eeⁿ ngaⁿ'a taánⁿ yā yeⁿ'e Espíritu N'dai yeⁿ'é Ndyuūs. ¿De'ē chúúca n'dee ca castigo véé yeⁿ'é 'iiⁿ'yāⁿ s'eeⁿ? ³⁰ Deenu yú chi Señor ní ngaⁿ'a yā 'tíicā: 'Úú canéé chí ca'á castigo 'iiⁿ'yāⁿ. 'Úú idiiⁿ chi 'iiⁿ'yāⁿ nadí'íve yā chiiⁿ chi díⁿ yā chi nguéé n'daacā. Chuū dendú'ū ngaⁿ'a Señor miiⁿ: Señor miiⁿ caⁿ'á yā n'diichi yā nuuⁿndi yeⁿ'e 'iiⁿ'yāⁿ yeⁿ'é yā. ³¹ De'ē chúúca ya'ái yeⁿ'e yú. Néené 'va'a yú chi ndaa yú nanááⁿ Ndyuūs chi cānduuchi chi díⁿ yā castigar s'uuúⁿ nduuti chi nguéé n'daacā idiiⁿ yú.

³² Maaⁿ ní n'gaacú nī yeⁿ'ē nguuví s'eeⁿ chi 'āā chó'oo chi caama n'diichi nī ní s'téenu nī Jesucristo, ní cuayiivi chi chéé nī ch'eenu nī chiiⁿ yeⁿ'e tanducuéⁿ'ē dendu'ū cucáāvā chi díⁿ nī luchar yeⁿ'ē chi i'téenu nī. ³³ Náⁿ'a nī ch'eenú nī chiiⁿ ní 'cuiináⁿ nī taachi 'iiⁿ'yāⁿ sta'á yā ndís'tii ní ngaⁿ'a taánⁿ yā yeⁿ'e ndís'tii ní ch'eⁿ'é yā ndís'tii nanááⁿ n'dee n'dái 'iiⁿ'yāⁿ. Ní taachi 'tíicā díⁿ yā ndúúcu náⁿ'ā hermanos yeⁿ'e yú neⁿ'é nī 'cuenú nī cuuvi nduucú yā. ³⁴ Ní taachi náⁿ'ā hermanos ch'eenú yā chiiⁿ chi canéé yā

vácū, ndís'tii ní ya'ái nī hermanos s'eeⁿ. Ní taachí 'iiⁿ'yāⁿ sta'á yā nducuéⁿ'ē chi véé yeⁿ'e nī ndís'tii ní chicheε nī yeⁿ'e nducuéⁿ'ē. Ní yeenú nī caati deenú nī chi véé chi cuuvi yeⁿ'é nī chi n'dai taavi ca ná va'ai chéeti nguuví chí cueⁿ'e daāⁿ-maⁿ 'áámá cūnee yeⁿ'e nī. ³⁵ Maaⁿ ní nguéé dí'vaachi nī ti nguéé véé confianza yeⁿ'é nī ndúúcu Ndyuūs caati ndúúcu chi i'téenu nī cuuvi díⁿ nī ganar cosas chi n'daacā taavi ca. ³⁶ Ní ndís'tii ní canéé chi cucéé nī yeⁿ'e nducuéⁿ'ē ní díⁿ nī nducuéⁿ'ē chi Ndyuūs neⁿ'é yā chí díⁿ nī. Ní 'íicú cuuvi cuta'á nī yeⁿ'e chí véé yeⁿ'é nī chí Ndyuūs caⁿ'a yā chí téé yā ndís'tii. ³⁷ Canéé nguūⁿ na libro yeⁿ'é Ndyuūs 'tíicā:

'Āā nteε 'nááⁿ tiempo ní Señor chí canéé chí ndaa ní nndaa yā. Ní 'āā ntéé cuuvi 'nááⁿ yā. ³⁸ Ní ngaⁿ'a yā 'tíicā: 'Iiⁿ'yāⁿ chí yeⁿ'é ní dεεvé yā tí i'téenu yā 'úú ní canduuchi yā cueⁿ'e daāⁿ-maⁿ. Ní nduuti chí 'aama yā ndaacadaamí yā yeⁿ'é tuuⁿmi ní 'úú nguéé yeenú yeⁿ'e yā. ³⁹ Maaⁿ ní s'uuúⁿ ní nguéé tan'dúúca 'iiⁿ'yāⁿ chí ndaacadaamí yā yeⁿ'e Cristo ní chindai yā. Nguéé 'tíicā s'uuúⁿ. S'uuúⁿ ní i'téenu yú Cristo ní Cristo nadanguáⁿ ai yā s'uuúⁿ.

Yeⁿ'e chí i'teenu yú Jesucristo

11 Cáāvā chí i'teenu yú Ndyuūs deenu yú chí seguro chí cuta'a yú yeⁿ'ē chí canee ngiinu yú. Ní deenu yú chí cuuvi cuaacu yeⁿ'e dendu'ū chí nguéé inaaⁿ yú. ² Ní tiempo chí 'āā chó'oo 'iiⁿ'yāⁿ ngaⁿ'á yā chí 'iiⁿ'yāⁿ chí díⁿ yā nti-ⁿnyuⁿ yeⁿ'e Ndyuūs ní n'dáaca yā nanááⁿ Ndyuūs ti i'téenu yā Ndyuūs.

³ Ní deenu yú cucáāvā chí i'teenu yú Ndyuūs, chí chiiⁿ chí inaaⁿ yú ní cáāvā chí Ndyuūs din'dái yā íⁿ'yeeⁿ dī ní nguéé de'ē vεε.

⁴ Ní cáāvā chí saⁿ'ā Abel ní i'téenu sa Ndyuūs, ca'a sa 'áámá ofrenda chí

n'daacā ca nguéé ti saⁿa Caín miiⁿ. Ní Ndyuūs n'diichí yā chi ofrenda yeⁿe Abel miiⁿ ní n'daacā ca ní sta^a yā ofrenda miiⁿ. Ní Ndyuūs n'diichí yā chi Abel ní n'daacā sa. Ní cáávā chi Abel i'téenu sa Ndyuūs 'áará chí ch'i'i saⁿā miiⁿ ndíí maaⁿ ní ngaⁿa 'iiⁿyāⁿ yeⁿe vaadi i'téenu yeⁿe sa.

⁵ Cáávā chi saⁿā Enoc i'téenu sa Ndyuūs, nguéé ch'i'i sa ti Ndyuūs candéé yā saⁿā miiⁿ na va'ai cheeti nguuví. 'iiⁿyāⁿ yeⁿe yā 'āā ntéé ndaacá yā saⁿā miiⁿ ti Ndyuūs candéé yā saⁿā miiⁿ nduucú yā. Canéé nguūⁿ na libro yeⁿe Ndyuūs 'tíicā: Taachi 'āā cuéé candéé Ndyuūs saⁿā miiⁿ, Ndyuūs canee yiinú yā chí idiíⁿ sa. ⁶ Mar 'áámá 'iiⁿyāⁿ nduuti chi nguéé i'téenu yā Ndyuūs, Ndyuūs nguéé cunee yiinú yā 'iiⁿyāⁿ. Nduuti chi 'iiⁿyāⁿ neⁿé yā ndaa yā nanááⁿ Ndyuūs canee chi cu'téenu yā chi véé Ndyuūs. Ní Ndyuūs caⁿa yā chi ca'a yā chi véé chi cuuvi yeⁿe 'iiⁿyāⁿ chi n'nuúⁿ yā Ndyuūs.

⁷ Ní cáávā saⁿā Noé i'téenu sa Ndyuūs ní n'giindiveeⁿ sa nduudu yeⁿe Ndyuūs taachi Ndyuūs yaa'ví yā cosas chi caⁿá yā dííⁿ yā. 'Áará chi nguéé inaaⁿ sa cosas miiⁿ n'giindiveeⁿ sa nduudu yeⁿe Ndyuūs ní din'dái sa 'áámá arca chi barco ch'eete ní 'íicú cuuví nanguáⁿāi 'iiⁿyāⁿ yeⁿe sa na vaacú sa. 'Túucā Noé dííⁿ sa condenar 'iiⁿyāⁿ yeⁿe iⁿ'yeeⁿdíⁿ 'cūū caati i'téenu sa Ndyuūs. Ní Ndyuūs didéevé yā Noé chi cuuvi yeⁿe yā caati i'téenu sa Ndyuūs.

⁸ Ní cáávā saⁿā Abraham i'téenu sa Ndyuūs, ch'iindiveeⁿ sa nduudu yeⁿe Ndyuūs taachi Ndyuūs yaa'ví yā Abraham. Ní yaa'ví yā saⁿā chi canéé chí caⁿa sa táámá yāⁿāa chi caⁿa Ndyuūs chi cuuvi yeⁿe sa. Ní s'neeⁿ sa yāāⁿ vaacú sa ní cuéⁿe sa. Ní nguéé déenu sá tíí ndíí caⁿa sa. ⁹ Ní cáávā chi Abraham i'téenu sa Ndyuūs, canee sa na yāⁿāa chi Ndyuūs caⁿa yā chi ca'a yā. Ní miiⁿ canee sa tan'dúucā 'iiⁿyāⁿ chi canúⁿ yúúní. Ní canúⁿ sá va'āi tíínūⁿ ndúucú daiya

sa chi Isaac ndúucú Jacob. Ní 'āā daamá nūⁿ cuuvi yeⁿe yā yeⁿe chí cuuvi yeⁿe Abraham miiⁿ. ¹⁰ Abraham miiⁿ ní cūnee ngíinu sa yāāⁿ chi Ndyuūs 'āā din'dái yā tan'dúucā chi Ndyuūs nadacádíinuⁿ yā. Yāāⁿ miiⁿ chi 'áámá cūnee cimientó yeⁿe ní va'ai cheeti nguuví.

¹¹ Ní cáávā chi Sara i'téenu tá Ndyuūs, ní díitiinú ca tá chi taavi tá daiya tá. Sta'a tá poder yeⁿe Ndyuūs ní ch'iindí daiya tá taachi 'āā ndiicúū ta ti i'téenu tá chi Ndyuūs dííⁿ yā cumplir nduudu chi ngaⁿa yā. ¹² Ní 'tíicā Abraham miiⁿ 'āā ndiicúū ca yā chi cuuvi chidá yeⁿe daiyá yā. Ní n'daataá yeⁿe yā chi Sara miiⁿ 'āā ndiicúū ca ntúuⁿ tá. Naati ná 'iiⁿyāⁿ yeⁿe yā ichii n'dee n'daí 'iiⁿyāⁿ tan'dúucā 'ííⁿnyúⁿ yeⁿe nanguuvi ní tan'dúucā yāⁿāa ndúutií chi véé cuaaⁿ 'diituú yíicú chi s'uuúⁿ nguéé ngii iduuche yú.

¹³ Nducyaa ca 'iiⁿyāⁿ s'eeⁿ ch'i'i yā naati i'téenu yā Ndyuūs. Nguéé sta^a yā cosas chi Ndyuūs caⁿa yā chi ca'a yā naati i'téenu yā ní n'diichi chi yaⁿái yā cosas chi Ndyuūs caⁿa yā chí ca'a yā. Ní yeenú yā. Ní 'iiⁿyāⁿ s'eeⁿ ngaⁿa yā chíi yā nducyáácá 'iiⁿyāⁿ chi tan'dúucā 'iiⁿyāⁿ chí snúúⁿ yúúní, 'tiicá yā 'naaⁿ tiempo chí snéé yā iⁿ'yeeⁿdíⁿ 'cūū. ¹⁴ Ní nducyaa ca 'iiⁿyāⁿ chí ngaⁿá yā 'tíicā ch'iⁿi yā chí in'nuúⁿ yā táámá nación chí n'dai chí cuuvi yeⁿe yā. ¹⁵ Ní nduuti chí nn'gaacú yā yeⁿe yāⁿāa naachi chíicá yā tuu'mi ní cuuvi nguεεcunée yā ní ndaa yā na yāāⁿ miiⁿ. ¹⁶ Naati 'iiⁿyāⁿ s'eeⁿ neⁿé yā táámá nación chí n'daacā ca chí yeⁿe va'ai cheeti nguuví. Ní cáávā chuū Ndyuūs nguéé 'cuināaⁿ yā taachi 'iiⁿyāⁿ s'eeⁿ ngaⁿa yā 'tíicā: N'dií Ndyuūs ní Ndyuūs yeⁿe yú. Ndyuūs 'āā véé yaáⁿ yā 'áámá yāāⁿ chí cuuvi yeⁿe 'iiⁿyāⁿ s'eeⁿ.

¹⁷ Ní cáávā chi Abraham miiⁿ i'téenu yā Ndyuūs, n'giindiveeⁿ yā yeⁿe Ndyuūs taachi Ndyuūs n'diichineeⁿ yā Abraham. Ní Abraham ní caⁿá yā ca'á yā daiyá

yā Isaac cáāvā lado yeⁿe ofrenda chi 'caaⁿnúⁿ yā daiyá yā. Ní canee listo yā chi ca'á yā 'áámá n'dyaⁿā daiyá yā lado yeⁿe ofrenda miiⁿ 'áará chí Ndyuūs ca'á yā 'áámá compromiso chi 'tíicā: 18 Díi, Abraham, cáāvā daiya di Isaac 'úú ní teé dii n'deeē n'dái taavi cuuvi ndaata yeⁿe di. 19 Ní Abraham miiⁿ tuumicádíinuⁿ yā chi Ndyuūs cuuvi nadacuéeⁿ yā 'iiⁿyāⁿ s'eeⁿ yeⁿe nguuaⁿ tináⁿā. Ní Abraham déenu sa chi Ndyuūs cuuvi nadacuéeⁿ yā daiya sa yeⁿe nguuaⁿ tináⁿā, naati nguéeⁿ ch'iī sa. Abraham miiⁿ candée sa daiya sa na vaacú sa.

20 Ní cáāvā chi Isaac i'téenu sa Ndyuūs, ngaⁿa sa chi caⁿa sa di'viicú sa daiya sa Jacob ndúúcu saⁿā Esau. Ní ngaⁿā sa yeⁿe cosas n'dai chi cuchii. 21 Ní cáāvā chi Jacob i'téenu sa Ndyuūs, taachi 'āā cháā 'cuuvi sa di'viicú sa ca'áámá ca'áámá daiya yeⁿe daiya José. Ní cuayi-ivi ní dich'εεε sá Ndyuūs neⁿe chí sta'ā sa in'daacúu yeⁿe sa. Ní yiin'diicúneeⁿ sa na in'daacúu yeⁿe sa. 22 Ní cáāvā chi José i'téenu sa Ndyuūs taachi 'āā cháā 'cuuvi sa ngaⁿa sa yeⁿe tiempo chí 'iiⁿyāⁿ yeⁿe ndaata Israel nan'dáa yā ná yāⁿāa Egipto. Ní yaa'vi sa 'iiⁿyāⁿ yeⁿe chí canée chí diiⁿ yā ndúúcu 'iini yeⁿe sa taachi tináⁿā sa.

23 Ní cáāvā chí i'téenu yā Ndyuūs chiida sa ní cheεcu sa Moisés, taachi ch'iindiyaāⁿ Moisés miiⁿ chinuun'dé'ei yā saⁿā 'lífⁿ miiⁿ na 'iinu 'iiyū. N'diichi yā daiyá yā chí Moisés miiⁿ saⁿā 'lífⁿ sa neenē n'dεεvé sa. Nguéeⁿ di'vá'a yā yeⁿe orden yeⁿe rey chí canée chí 'caaⁿnúⁿ yā saⁿā 'lífⁿ miiⁿ. 24 Cáāvā chí Moisés i'téenu sa Ndyuūs, ní tááchí ch'εētē sa nguéeⁿ 'cuūⁿ sa chí 'iiⁿyāⁿ ngaⁿā yā chí Moisés ní daiya n'daataa daiyá rey yeⁿe yāⁿāa Egipto. 25 Naati Moisés miiⁿ neⁿe sa 'cueenu ca sá cuuvi ndúúcu 'iiⁿyāⁿ chí yeⁿe Ndyuūs. Ní nguéeⁿ 'cuūⁿ sa chí yeenú sa 'áámá tiempo ndúúcu vaadi yeenú chí dinuun'di sa. 26 Ní Moisés

miiⁿ nadacádíinuⁿ sa chí n'daacā ca chí 'cueenu sa cuuvi tan'dúúca chí ch'eenú Cristo chíi na yáⁿāa 'cúú ní nguéeⁿ ti chí cuuvi yeⁿe sa tanducuéⁿe vaadi 'cuiica chí véé na yáⁿāa Egipto. Ní 'tíicā nacádíinuⁿ sa caati deenu sa chí Ndyuūs caⁿa yā ca'a yā chí véé chí cuuvi yeⁿe sa. 27 Ní cáāvā chí Moisés i'téenu sa Ndyuūs, nan'dáa sa yeⁿe yāⁿāa Egipto ní nguéeⁿ 'va'a sa chí nduuvi taaⁿ rey. Ní díftu canee sa chí i'téenu sa Ndyuūs tan'dúúca chí n'diichi sa Ndyuūs 'áará chí nguéeⁿ inaaⁿ sa Ndyuūs.

28 Ní cáāvā chí Moisés i'téenu sa Ndyuūs s'neeⁿ sa orden yeⁿe 'viicu pas-cua chí 'iiⁿyāⁿ canée chí s'neéⁿ yā yuūúⁿ yeⁿe 'iiti cuūchī na cheendī va'ai yeⁿe yā caati taachi ndaa ángel chí n'giiⁿnuⁿ yā nducyaaca da'caiyā saⁿā chí vm-nááⁿ vmnaaⁿ, nguéeⁿ cuuvi 'caaⁿnúⁿ yā da'caiyā chí yeⁿe ndaata yeⁿe Israel. 29 Ní cáāvā 'iiⁿyāⁿ yeⁿe ndaata Israel i'téenu yā Ndyuūs, chicho'ó yā naav-taⁿā yeⁿe mar chí nguuvi Rojo ní ngi-icá yā ndii yáⁿāa cuūⁿmáⁿ. Ní cuayiivi ní taachi cho'o 'iiⁿyāⁿ s'eeⁿ yeⁿe yáⁿāa Egipto tuu'mi ní chí'i nuūⁿnīⁿ 'iiⁿyāⁿ ní nducyaaca yā chíi yā ti nduuvidaāⁿmáⁿ nuūⁿnīⁿ.

30 Ní cáāvā 'iiⁿyāⁿ yeⁿe ndaata Israel i'téenu yā Ndyuūs, cheⁿe yā nu-uⁿmaⁿ ndiivi cheētī yeⁿe yāāⁿ Jericó ndeēchē nguuvi. Tuu'mi ní chí'iiu miiⁿ ní chíndeeve cheētī yeⁿe yāāⁿ miiⁿ. 31 Ní cáāvā chí Rahab i'téenu tá Ndyuūs, ní 'áará chí cueⁿe tá ndúúcu saⁿā s'eeⁿ, nguéeⁿ chíi tá ndúúcu 'iiⁿyāⁿ s'eeⁿ yeⁿe yāāⁿ yeⁿe tá chí nguéeⁿ i'téenu yā Ndyuūs; ti n'daata miiⁿ ní sta'a tá saⁿā s'eeⁿ yeⁿe Israel. Ní n'daacā idiīⁿ tá ndúúcu saⁿā s'eeⁿ chí díííⁿ díííⁿ ndaa yā nguuaⁿ 'iiⁿyāⁿ yeⁿe tá chí cuuvi deenú yā táácā canee 'iiⁿyāⁿ yeⁿe tá.

32 Maaⁿ ní ¿de'ē cá cuuvi caaⁿmáⁿ ndís'tii? Nguéeⁿ véé tiempo chí cuuvi ndís'tii yeⁿe saⁿā Gedeón ní yeⁿe saⁿā

Barac, ní yeⁿe saⁿá Sansón, ní yeⁿe saⁿá Jefe^t, ní yeⁿe saⁿá David, ní yeⁿe saⁿá Samuel, ní yeⁿe saⁿá profetas chi candee nduudu yeⁿe Ndyuūs. ³³Nducyaaca 'iiⁿyāⁿ s'eeⁿ ní cáávā chi i'téenu yā Ndyuūs idiiⁿ caandá yā ní cuché yā yeⁿe náⁿā países. Ní n'daacā ngaⁿa nti-inyuⁿ yā yeⁿe tanáⁿā yáāⁿ. Ní tuneéⁿ yā chí Ndyuūs ngaⁿa yā chíⁿ chí ca'a yā. Ní díⁿ yā chi nduúdi cheendi 'yáⁿyāⁿ cuáⁿá. ³⁴Ní yaⁿā chi diitu n'dái ngiichi nguéé cuuvi 'tuuví 'iiⁿyāⁿ s'eeⁿ chi i'téenu yā Ndyuūs. Ní n'géenu yā yeⁿe 'iiⁿyāⁿ chi neⁿé yā 'caaⁿnúⁿ yā yā ndúúcu machete chi 'caāiⁿ ndúú 'uuvi lados. Ní 'áará chi duuvá yā ditiinú yā. Ní taachi diiⁿ caandá yā ní ditiinú yā chí 'caaⁿnúⁿ yā. Ní chē yā yeⁿe n'dee n'dái soldados yeⁿe enemigos yeⁿe yā. ³⁵Ní cáávā chi n'daataa s'eeⁿ i'téenu yā Ndyuūs, nta'á yā tináⁿā chi n'dii yeⁿe familia yeⁿe yā taachi 'āā nduuchí yā yeⁿe nguaⁿ tináⁿā. Ní náⁿā 'iiⁿyāⁿ ch'éenu yā chii ní ch'i yā. Ní nguéé 'cūuⁿ yā chi nnguaⁿai yā ti neⁿé yā n'diichí yā táámá vida chi n'daacā ca. ³⁶Náⁿa yā ní 'iiⁿyāⁿ s'eeⁿ duuchí yā yeⁿe yā ní ch'eⁿé yā 'iiⁿyāⁿ. Ní náⁿa yā ní 'iiⁿyāⁿ s'eeⁿ ch'ēé chiichí yā ndúúcu cadenas ní cheⁿé yā vácuū. ³⁷Ní náⁿa yā ní 'iiⁿyāⁿ s'eeⁿ ca'a tuúú yā 'iiⁿyāⁿ ní ch'i yā. Ní náⁿa yā ní 'iiⁿyāⁿ s'eeⁿ n'deé yā nduu 'uuvi taaⁿ yā ndúúcu cierra. Ní náⁿa yā 'iiⁿyāⁿ s'eeⁿ n'giiⁿnuⁿ yā 'iiⁿyāⁿ ndúúcu machete chi 'úuvi lados 'caāiⁿ. Náⁿa yā ní ch'ēé ch-icá yā ndíⁿ 'muuⁿ ndíⁿ miiⁿ ndúúcu catecai yā yeⁿe 'iiti cuúchi ní yeⁿe diiⁿmaⁿ chivo. Ní pobre yā ní ch'eenú yā chí. Ní nguéé din'daacá 'iiⁿyāⁿ s'eeⁿ ndúúcu yā. ³⁸Ní 'iiⁿyāⁿ chi ch'eenú yā chí cáávā chi i'téenu yā Ndyuūs, 'iiⁿyāⁿ yeⁿe íⁿyeedí nguéé n'daacā ca chi cuuvi cūneé yā ndúúcu yā. 'iiⁿyāⁿ chi i'téenu yā ngeⁿé yā 'muuⁿ ngeⁿé yā miiⁿ ní tan'dúúca 'iiⁿyāⁿ chi nguéé vaacú yā, 'tiicá yā. Chiicá yā yáⁿāa cuuⁿmaⁿ naachi nguéé

ch'etinéé 'iiⁿyāⁿ. Ní chíicá yā na cuééti ní ná yiivi yáávā yeⁿe 'iiti o yiivi yáⁿāa naachi 'cuéetinéé yā. ³⁹Cáávā chi 'iiⁿyāⁿ s'eeⁿ chi i'téenu yā Ndyuūs, n'dai yā ndúúcu nducuéⁿe chi Ndyuūs 'cūuⁿ yā chí n'geenu yā ngii ndíⁿ tiempo chí ch'i yā. 'Áā cuéé cuta'a yā chí cuuvi yeⁿe yā chí Ndyuūs caⁿa yā chí ca'a yā, ⁴⁰caati Ndyuūs nadacádínuuⁿ yā chí caⁿá yā diiⁿ yā chí n'daacā ca cááva yā ní cáávā s'uúú. 'iiⁿyāⁿ s'eeⁿ nguéé cuuvi cuta'á yā chí cuuvi yeⁿe yā ndíⁿ tiempo chí s'uúú cuuvi cuta'a yú chí cuuvi yeⁿe yú.

Cueⁿe daāⁿmaⁿ snaaⁿ yú yeⁿe Jesús

12 Maaⁿ ní deenu yú cáávā vida yeⁿe n'dee n'dái 'iiⁿyāⁿ chí ch'i yā ti ch'iⁿí yā s'uúúⁿ táácā cuuvi cu'teenu ca yú Ndyuūs. Ní cáávā chuú canee chí cūⁿneeⁿ yú tanducuéⁿe dendu'ū chí di'vaachi s'uúúⁿ ndúúcu nuuⁿndi chí diiⁿ yú caati nuuⁿndi míⁿ diiⁿ chí cuuvi ndai yú. Ní caānu yú ndúúcu ngiinū car- rera yeⁿe vida yeⁿe yú chí Ndyuūs itée yā s'uúúⁿ. ²Ní cueⁿe daāⁿmāⁿ snaaⁿ yú Jesús ti díⁿ yā chí cuuvi i'téenu yú yā. Ní díⁿ yā chí n'daacā ca cuuvi cu'teenu yú. Jesucristo ní ch'eenú yā chí taachi ch'i yā na cruz. Ní nguéé díⁿ yā cuenta chí 'cuinaáⁿ yā cucáávā chí ch'i yā tan'dúúca chí n'giiⁿnuⁿ yā 'iiⁿyāⁿ caati deenú yā chí yeenú yā cuayiivi ti cuuví nadanguáⁿai yā 'iiⁿyāⁿ. Maaⁿ ní veé yā na lado yeⁿe honor yeⁿe trono yeⁿe Ndyuūs.

³Ndíⁿtii, nadacádínuuⁿ nī tan'dúúca Jesucristo chí ejemplo yeⁿe yú. Ch'eenú yā chí cucáávā 'iiⁿyāⁿ s'eeⁿ chí din- uuⁿndí yā. Ní 'íicú ndíⁿtii nguéé cu- uvi 'daandí nī ní nguéé s'neéⁿ nī chíⁿ chí i'téenu nī. ⁴Ndíⁿtii ní 'āā chiche nī ndúúcu nuuⁿndi ní nguéé ch'eenú nī chí ndíⁿ chí 'āā n'dii nī. ⁵¿Áā nguéé n'gaacú ndíⁿtii consejo chí Ndyuūs ca'á yā ndíⁿtii chí daiyá yā? Canéé nguūⁿ na libro yeⁿe Ndyuūs 'tíicā:

Díí, daiyá, nguée nadacadíínuuⁿ nī chi nguée de'ē vee taachi Ndyuūs dííⁿ yā castigar ndís'tiī caati cuuvi deenú nī chi nguée n'daacā idííⁿ nī. Ní nguée ndaacadáámí nī yeⁿé yā taachi dííⁿ yā castigar ndís'tiī.

⁶ Señor yeⁿe yú yaa'vineéⁿ yā nducyáácá 'iiⁿyāⁿ chi neⁿé yā ní dííⁿ yā castigar nducyaaca 'iiⁿyāⁿ chi sta'á yā chi cuuvi daiyá yā. ⁷ Maaⁿ ní cuchée nī castigo chi Ndyuūs itée yā ndís'tiī ti Ndyuūs ní chiidá nī. Taachi n'geenú nī ngū tuu'mi ní deenú nī chi dííⁿ yā ndúúcu ndís'tiī tan'dúúca chi ndís'tiī ní daiyá yā. 'Tíicā dííⁿ yā. ¿Dú'u daiyá yā vee chi chiidá yā nguée idííⁿ yā castigar? ⁸ Nduuti chi Ndyuūs nguée dííⁿ yā castigar ndís'tiī tan'dúúca chi dííⁿ yā castigar nducuéⁿé daiyá yā, tuu'mi ní ndís'tiī nguée maaⁿ daiyá yā ti ndís'tiī ní daiyá yeⁿe táamá yā. Ní nguée daiya Dendyuūs ndís'tiī. ⁹ Ní 'tiicá ntúúⁿ chiida yú chi yeⁿe iⁿ'yeeⁿdí 'cūú dííⁿ yā castigar s'uuúⁿ tan'dúúca chi neⁿé yā. Ní s'uuúⁿ ní dinéⁿe yú chiida yú. N'daacā ca chi diiⁿ yú chiiⁿ chi neⁿe Ndyuūs chi canée na va'ai cheeti nguuví ní s'nduuchi yú. ¹⁰ Chiida yú chi yeⁿé iⁿ'yeeⁿdí 'cūú dííⁿ yā castigar s'uuúⁿ dúu'vi nduuyū nūuⁿ tan'dúúca chi tumicadíínuuⁿ yā chi n'daacā caavā s'uuúⁿ. Ndyuūs yeⁿe yú ní dííⁿ yā castigar s'uuúⁿ ti cuáacú chí n'dai caavā s'uuúⁿ ti s'uuúⁿ ní cuuvi din'dai ca yú tan'dúúca chi Ndyuūs ní n'dai cá yā. ¹¹ Cuaacu chi nguée yeenu yú taachi téé yā castigo s'uuúⁿ naati yá'ai yú. Cuayiivi ní 'iiⁿyāⁿ chi tumicadíínuuⁿ yā yeⁿe castigo yeⁿé yā ní véé chi n'daacā yeⁿe castigo. 'Iiⁿyāⁿ s'eeⁿ din'daacā cá yā ní canée 'diiiⁿ vida yeⁿé yā.

Vée peligro yeⁿe yú nduuti chi nguée n'giindiveeⁿ yú nduudu yeⁿé Ndyuūs

¹² Maaⁿ ní Ndyuūs 'āā tee yā castigo ndís'tiī ní maaⁿ ní cuta'á nī fuerzas ndúúcu ta'á nī ní dicuaacú nī duuⁿntií'yá nī chi ndicuūnū. ¹³ Cachiicá nī ná yúúni cuaacu maaⁿ ní 'ífcú cuuvi nanduūvā yeⁿé nī ca'a nī chi ndíí dúúvā yeⁿe nī.

¹⁴ Maaⁿ ndís'tiī ní dííⁿ nī chi 'diiíⁿ 'cuētinée nī ndúúcu nducyaaca 'iiⁿyāⁿ. Ní dííⁿ nī nducuéⁿé chi n'daacā ca caati deeve canée vida yeⁿé nī. 'Iiⁿyāⁿ chi nguée deeve vida yeⁿé yā nguée cuuvi n'diichi yā Señor Ndyuūs. ¹⁵ Cundée nī cuidado chi mar 'áamá ndís'tiī nguée diví nī yeⁿe Ndyuūs ti nguée cuuvi inee yā ndís'tiī. Ní nguée cúúvī cunee 'aamá nī nguaaⁿ ndís'tiī chi tan'dúúca 'áamá dii'yu yaātā yaāa chi diiⁿ daño yeⁿe nducuéⁿé dii'yu yaātā. 'Tíicā cuuvi diiⁿ daño 'áamá nī tan'dúúca chi veneno nguaaⁿ ndís'tiī. ¹⁶ Candée nī cuidado chi mar 'áamá ndís'tiī nguée ca'á nī ndúúcu n'daataá o saⁿā chi nguée yeⁿe nī. Ní nguée dííⁿ nī cuenta yeⁿe nducuéⁿé chi yeⁿé Ndyuūs. 'Tíicā diiⁿ saⁿā Esaú ti cáávā 'áamá comida nūuⁿ n'diicuí sá chi cuuvi yeⁿe sa ti saⁿā vmaaⁿ. ¹⁷ Ní ndís'tiī deenú nī yeⁿe saⁿā Esaú taachi neⁿe sa cuta'a sa yeⁿe chiidá sa chi cuuvi yeⁿé sa ti saⁿā daiya vmaaⁿ, naati nguée 'cuūⁿ chiida sa. Ní Esaú cheēcū taavi sá ní n'nuuⁿ sa manera chi nduuví n'daacā chi 'āā diiⁿ sa naati nguée ndaacā n'daacā sa.

¹⁸ Maaⁿ ní ndís'tiī nguée ndāa nī na yīicū chi ngiichi chi dííⁿ nī sentir ngiichi miiⁿ, tan'dúúcu chi diiⁿ 'iiⁿyāⁿ Israel tiempo chi 'āā chó'oo. Ndíí nguée dííⁿ nī sentir maāiⁿ, ndíí nguée ndúú meēeⁿ, ndíí nguée ndúú 'áamá cheeⁿ cúúvī díítūu. ¹⁹ Ní nguée n'giindiveeⁿ nī chi ch'eēcū trompeta miiⁿ ní nguée nduudu yeⁿé Ndyuūs chi ca'a yā ndúúcu 'iiⁿyāⁿ

s'ee". Taachí 'iiⁿyāⁿ s'eeⁿ ch'iindiveéⁿ yā nduudu yeⁿe Ndyuūs chiica yā Ndyuūs chi 'āā ntéé caaⁿmaⁿ cá yā 'iiⁿyāⁿ s'eeⁿ.
 20 'Tíicā ngaⁿa yā ti nguéé cuuvi chēē yā chi Ndyuūs ngaⁿa ntiⁿnyuⁿ yā ti 'tíicā: Ndúúti chi 'áámá 'iiti nindaá tī na yiicu 'cūū canee chi cuiitúú yā 'iiti ní 'caaⁿnúⁿ yā 'iiti. 21 Ní maaⁿ Moisés miiⁿ ní taachi n'diichí yā yiicu 'cūū ní ch'iindiveéⁿ yā nducuéⁿē, 'tíicā ngaⁿa yā: Nééné 'vaⁿá ní yiinⁿduuvi 'úú.

22 Maaⁿ ní nguéé 'tíicā ti ndís'tiī ndaa nī 'áámá yiicū chi nguuvi Sión chi yáāⁿ yeⁿe Ndyuūs chi cánduuchi chí yáāⁿ Jerusalén chí va'ai chēeti nguuvi naachi n'deeē n'dái miles ángeles snée yā. 23 Ní nduuvidaamá yā chi dich'ēetē yā Ndyuūs. Ní miiⁿ canee nducyaaca 'iiⁿyāⁿ chi daiyá Ndyuūs. Ní chi duuchí yā canéé nguūⁿ na libro yeⁿē va'ai chēeti nguuvi. Nducyaaca nī ndaa nī nanááⁿ Ndyuūs chi dííⁿ yā juzgar nducyáácá 'iiⁿyāⁿ. Ní ndís'tiī chi yeⁿē iⁿ'yeeⁿdí 'cūū ní ndaa nī nanááⁿ espíritu s'eeⁿ yeⁿe 'iiⁿyāⁿ chi dēēve ca chi Ndyuūs dííⁿ yā chi nguéé nuuⁿndi yeⁿé yā. 24 Ní ndaa nī nanááⁿ Jesucristo chi abogado chi canúⁿ yā naavtaⁿā compromiso chí ngai chí yeⁿé Ndyuūs ndúúcu 'iiⁿyāⁿ. Ní ndaa nī nanááⁿ Cristo chi chingée yā yuúúⁿ yeⁿé yā cucáávā s'uuúⁿ. Yuúúⁿ yeⁿe Cristo ní n'daacā ca nguéé ti yuúúⁿ yeⁿe Abel. Ndúúcu yuúúⁿ yeⁿe Cristo, Ndyuūs nadich'ēecú yā nuuⁿndi yeⁿe 'iiⁿyāⁿ. Naati cáávā 'díínu Abel ch'iⁿnúⁿ Abel tuuⁿmi ní Ndyuūs ca'a yā castigo 'díínu Abel.

25 Ní cáávā nducuéⁿē chuū candéé nī cuidado chi n'giindiveéⁿ nī nduudu yeⁿe Ndyuūs chi ngaⁿa yā ngūi yā ndís'tiī. 'Iiⁿyāⁿ s'eeⁿ chi nguéé ch'iindiveéⁿ yā nduudu yeⁿe Cristo taachí snée yā iⁿ'yeeⁿdí 'cūū nguéé nguaⁿái yā yeⁿē nuuⁿndi yeⁿé yā. Ní 'tēē cá s'uuúⁿ chi cuuvi nguaⁿái yú nduuti chi ndaacadaami yú yeⁿé Cristo chi canee na va'ai chēeti

nguuvi ní ngaⁿa yā ndúúcu s'uuúⁿ yeⁿe chi cuchii. 26 Tiempo chi chó'ōo taachi Ndyuūs ngaⁿa yā yeⁿe yiicū nuⁿu yáⁿāa. Maaⁿ ní Ndyuūs ngaⁿa yā 'tíicā: Taama vmnéⁿēē inuⁿú yáⁿāa ndúúcu nanguuvi. 27 Maaⁿ ní taachi ngaⁿa Ndyuūs taama vmnéⁿēē nūuⁿ deenu yú chi nducuéⁿē chí din'dái Ndyuūs ní caⁿá yā dinⁿúⁿu yā ní diví yā. Ní nducuéⁿē chí nguéé dinⁿúⁿu yā ní cūnee. 28 Canéé chí ca'a yú gracias Ndyuūs caati véé yáāⁿ yeⁿe yú, lugar naachi Ndyuūs ngaⁿa ntiⁿnyuⁿ yā. Ní nguéé cuuvi nuⁿu lugar miiⁿ. Canee chí dich'ēete yú Ndyuūs ní i'teenu yú Ndyuūs. Ní 'va'a yú yeⁿé yā ní diiⁿ yú tan'dúúca chí neⁿe yā. 29 Ndyuūs yeⁿe yú tan'dúúca 'áámá nguuchi yáⁿā chí dituúví nducuéⁿē chí nguéé n'daacā. Tiicá yā.

Yeⁿé chí diiⁿ yú chí cunee yiinuú Ndyuūs

13 Canéé chí dineⁿe yú 'aama yú taama yú caati hermanos s'uuúⁿ ní yeⁿe Cristo s'uuúⁿ. 2 Nan'gaacu yú chí canee chí ca'a yú va'ái yeⁿe yú 'iiⁿyāⁿ chí canúⁿ yúúni. N'duuvi yā ní diiⁿ yā 'túúca ní staⁿá yā va'ai yā ángeles ní nguéé déenu yā chí ángeles.

3 Nan'gaacu yú yeⁿe 'iiⁿyāⁿ chí snúúⁿ yā vácúu. Diiⁿ yú cuenta chí s'uuúⁿ snuúⁿ yú vácúu nduucú yā. Nan'gaacu yú yeⁿe 'iiⁿyāⁿ chí n'geenú yā ngii na cuerpo yeⁿé yā ní diiⁿ yú cuenta chí s'uuúⁿ ní n'geenu yú ngii na cuerpo yeⁿe yú nduucú yā.

4 Diiⁿ yú respetar 'iiⁿyāⁿ chí n'giindivaacú yā ti nguéé dinuuⁿndí yā. 'Iiⁿyāⁿ chí n'giindivaacú yā canee chí caⁿá yā dámaaⁿ ndúúcu isaⁿā o n'daataá yeⁿé yā. Ndyuūs ní n'diichí yā nuuⁿndi yeⁿe 'iiⁿyāⁿ chí véé nuuⁿndi yeⁿé yā ndúúcu 'iiⁿyāⁿ chí n'giindivaacú yā ní caⁿá yā ndúúcu táámá n'daataá o saⁿā.

5 Nguéé dineⁿe yú tuúmi naati yeenú yú ndúúcu chí véé chí yeⁿe yú ti Ndyuūs ngaⁿa yā 'tíicā: 'Úú nguéé cuⁿeeⁿ ndís'tiī

ní nguée dífⁿ abandonar ndís'tii. ⁶Ní 'tíicā cuuvi caaⁿmaⁿ cuaacu yú ndúúcū confianza:

Señor ní nginnee yā 'úú. 'Úú nguée 'va'á yeⁿe chi 'iiⁿyāⁿ cuuvi dífⁿ yā nduucú.

⁷Nan'gaacú ní yeⁿe 'iiⁿyāⁿ n'geete yeⁿe yaácū chi ngaⁿa ntiⁿnyúⁿ yā nanááⁿ ndís'tii ní ngaⁿá yā ngii yā ndís'tii nduudu cuaacu yeⁿé Ndyuūs. Nada-cadífnuuⁿ ní táaca 'iiⁿyāⁿ s'eeⁿ dífⁿ yā ní n'geetineé yā ní ch'ii yā. Maaⁿ ní candée ní cuidado chi dífⁿ ní tan'dúúcā 'iiⁿyāⁿ n'geete chi i'téenu yā Ndyuūs dífⁿ yā ti 'iiⁿyāⁿ s'eeⁿ ejemplo yeⁿé ní.

⁸Jesucristo miiⁿ ní 'āā 'tiicā nūuⁿ tan'duucá yā 'iicu, 'tiicā ntúuⁿ yā maaⁿ-guuvi. 'Āā 'tiica nuúⁿ yā cueⁿe daāⁿmaⁿ. ⁹Cuin'diichí ní ndís'tii. Nguée 'caandiveéⁿ ní ndúúú 'naⁿa chi n'dááⁿ ndúúcū yeⁿé chi che'e yú. N'daacā ca chi staava yeⁿé ní canéé n'daacā chi cuuvi cuta'á ní fuerzas yeⁿé nducueⁿé chi n'dai taavi chi Ndyuūs itée yā ndís'tii. Staava yeⁿé 'iiⁿyāⁿ nguée diiⁿ aprovechar nduuti chi chiindiveéⁿ yā nduudu n'dááⁿ ndúúcū yeⁿe chi che'e yú.

¹⁰Deenu yú chi chiiduú s'eeⁿ chi dífⁿ yā ntiⁿnyuⁿ yeⁿe yaácū yeⁿé yā nguée cuuvi che'é yā yuūtē yeⁿe nátaí yeⁿe 'iiti chi ch'iiⁿnúⁿ yā cáávā ofrenda yeⁿe yú ti ofrenda yeⁿe yú ní 'āā ví'í caā ti i'teenu yú Jesucristo. Ní Jesucristo miiⁿ ní ch'ii yā chi lado yeⁿe ofrenda yeⁿe yú.

¹¹Chiiduú ch'ēete ca yeⁿe judíos chi Israel s'eeⁿ taachi ch'iiⁿnúⁿ yā 'iiti cáávā ofrenda yeⁿe nuūⁿndi candée yā yuūúⁿ yeⁿé 'iiti ch'ēeti cuarto chi nguuvi Dēeve naati cuerpo yeⁿé 'iiti miiⁿ ní ngiichí yā 'áámá lado yeⁿé yāāⁿ yeⁿé yā. ¹²Ní 'tiicā ntúuⁿ Jesucristo ch'ii yā cuaaⁿ dáámí cheendi va'āi yeⁿe yāāⁿ Jerusalén ní 'íicú cuuvi dēevē yā 'iiⁿyāⁿ yeⁿe nuuⁿndi yeⁿé yā ndúúcū yuūúⁿ yeⁿe maáⁿ yā. ¹³Maaⁿ ní caⁿa yú tan'dúúcā chi cueⁿe Jesús 'áámá lado yeⁿé yāāⁿ ní 'cuenú yú cu-

uvi tan'dúúcā chi ch'eenú yā chií ní cuuvi 'cuinaaⁿ yú tan'dúúcā chi 'cuinaáⁿ yā. ¹⁴Caati nguée véé 'áámá yāāⁿ chi 'áámá cūnee cáávā s'uuúⁿ naati in'nuuⁿ yú 'áámá yāāⁿ ch'ēete chi 'áámá cūnee chi véé tiempo chi cuchii. ¹⁵Ní cáávā chuū canee yú chi dich'ēete yú Ndyuūs cucáávā Jesucristo. Ní taachi dich'ēete yú Ndyuūs chuū ní ofrenda chi canee chi ca'a yú Ndyuūs. Ní canéé chi ca'a yú gracias Ndyuūs cáávā Jesucristo ndúúcū nduudu yeⁿé yú. ¹⁶Nguée cuuvi 'náaⁿ ní chi din'daacā ní ní nnee ní 'aamá ní taamá ní caati chuū ní ofrenda yeⁿé ní chi 'túúcā Ndyuūs neⁿe yā.

¹⁷Cu'nee'veéⁿ ní nduudu yeⁿé 'iiⁿyāⁿ chi ngaⁿa ntiⁿnyuⁿ yeⁿé ní. Cu'téenu ní yeⁿé yā chi ngaⁿa yā caati 'iiⁿyāⁿ s'eeⁿ dífⁿ yā cuidado yeⁿé staava yeⁿé ní. 'Iiⁿyāⁿ s'eeⁿ canéé chi nca'á yā cuenta nanááⁿ Ndyuūs yeⁿé ntiⁿnyuⁿ chi dífⁿ yā. Diiⁿ núúⁿ yiiⁿnu ní chi ngaⁿa yā caati yeenú yā dífⁿ yā ntiⁿnyuⁿ yeⁿé yā. Ti nduuti chi nguée dífⁿ ní 'túúcā nguée yeenú yā ní nguée dífⁿ ní aprovechar yeⁿé ntiⁿnyuⁿ chi dífⁿ yā cáávā ndís'tii.

¹⁸Maaⁿ ní caaⁿmaⁿngua'á ní cáávā nús'uu ti nadacadiinúúⁿ 'nū n'daacā na staava yeⁿé 'nū ní neⁿé 'nū 'cuēetinéé n'daacā 'nū yeⁿe nducueⁿé dendu'ū. ¹⁹'Úú ngiicá ndís'tii chi taachi ngaⁿangua'á ní, ngiicá ní Ndyuūs chi téé yā lugar 'nū chi niiⁿnuúⁿ nūuⁿ cuuvi nandaá ní cuneé ndúúcū ndís'tii.

Di'viicú yā ndís'tii ní dicho'ó yā, n'dai ndís'tii

²⁰Maaⁿ ní Ndyuūs ní yeⁿé vaadi 'diiⁿ, maaⁿ Ndyuūs miiⁿ nadin'duuchí yā Jesucristo yeⁿé yú yeⁿé nguaaⁿ tináⁿā chi Jesucristo miiⁿ Pastor chi ch'ēete n'dai chi dífⁿ yā cuidado s'uuúⁿ chi tan'dúúcā 'iiti cuūchí yeⁿé yā. Ní Jesucristo yeⁿé yú ndúúcū yuūúⁿ yeⁿé yā dífⁿ yā chi 'áámá cūnee compromiso chi Ndyuūs dífⁿ yā ndúúcū 'iiⁿyāⁿ. ²¹Neⁿé chi Ndyuūs yeⁿe

vaadi 'diiiⁿ téé yā ndís'tiī nducué^{mē} chi n'dai ye^{né} yā chi nguéé ye^{né} nī. Ní cuuvi n'dai nī ti ndís'tiī cuuvi díⁿ nī chiiⁿ chi ne^{né} Ndyuūs chi díⁿ nī. Ní ne^{né} chi Ndyuūs díⁿ yā cáávā nducyaaca yú nducué^{mē} chi ne^{né} yā díⁿ yā cáávā Jesucristo. Caⁿa yú chi ch'ete ca canéé Cristo ní n'deévé ngii yā cué^{mé} daāⁿmaⁿ cueⁿe daāⁿmaⁿ. 'Tíicā. ²²Ndís'tiī hermanos ye^{né} ngiicā ndís'tiī chí cuheé nī ndúúcu nduudu chi ngi'cueéⁿ ti nguéé 'yaaⁿ idinguúⁿ na carta miiⁿ ye^{né} ndís'tiī. ²³Yaa'ví ndís'tiī chi cadiinúúⁿ nī chi Tim-

oteo hermano ye^{né} yú 'āā ntéé canee sa vácūū. Ní ndúúti chi niiⁿnuⁿ niiⁿnuⁿ ndaa sa nanáaⁿ 'úú tuu'mi 'úú ní candeé saⁿā taachi ndaa nanááⁿ ndís'tiī ní n'diichí ndís'tiī.

²⁴Maaⁿ ní caaⁿmaⁿ nī 'iiⁿyāⁿ chi ngaⁿa ntiiⁿnyuⁿ ye^{né} nī ndúúcu nducyaaca 'iiⁿyāⁿ chi i'téenu yā Jesucristo: N'dai ndís'tiī, caaⁿmaⁿ nī. 'Iiⁿyāⁿ yeⁿe país Italia: N'dai ndís'tiī, ngaⁿa yā.

²⁵Ne^{né} chi Ndyuūs téé yā nducyaaca ndís'tiī nducué^{mē} vaadi n'dai ye^{né} yā. 'Tíicā cuuvi.

CARTA YEⁿE SANTIAGO

Santiago idingúuⁿ yā yeⁿe 'iiⁿ'yāⁿ chi s'nééⁿ 'muuⁿ s'nééⁿ miiⁿ

1 'Úú Santiago 'úú ní 'úú idifⁿ ntiⁿ'nyuⁿ yeⁿe Ndyuūs ní yeⁿe Señor Jesucristo. Idingúuⁿ carta 'cūū ní dicho'ó: Ndaí ndís'tiī ndúúcu 'iiⁿ'yāⁿ yeⁿe ndu'ū ndiichúúví tribus chi familias chi yeⁿe ndaata Israel chi s'nééⁿ 'muuⁿ chi s'nééⁿ miiⁿ ndii núúⁿ máⁿ fⁿ'yeéⁿ dī.

Ndyuūs ca'á yā vaadi deenu 'iiⁿ'yāⁿ s'eeⁿ chi i'téenu yā 'yā

² Ndis'tiī hermanos yeⁿé, canéé chi yeenú nī taachi ndaā n'dee n'dái chi idi'vaachí yeⁿe nī. ³ Caati déenu nī chuū chi taachi ndaā n'dee n'dái chi idi'vaachí yeⁿe nī ní n'daacá idifⁿ nī, ch'iⁿ'í nī chi i'téenu nī Jesucristo ní ch'iⁿ'i ntúuⁿ nī chi cuuvi cuhéé nī yeⁿe tanducuéⁿé ndúúcu paciencia. ⁴ Ní canéé chi candéé nī cuidado chi cuhéé nī yeⁿe nducuéⁿé chi di'vaachi ndís'tiī ní cuuvi 'cuetinéé n'daacá nī ní diiⁿ cá chí n'daaca nī. Ní 'āā véé nducuéⁿé necesidades yeⁿé nī. Ní Ndyuūs téé yā ndís'tiī cosas chi n'dai yeⁿé yā.

⁵ Ndúúti chi 'áamá ndís'tiī deenú nī chi nguéé deenú nī tuu'mi ní canéé chí caacá nī Ndyuūs chi itée yā vaadi deenu. Ndyuūs ca'a yā n'dee n'dái vaadi deenu yeⁿé yā nducyáácá 'iiⁿ'yāⁿ. Ní nguéé n'gaa'vá yā ndúúcu 'iiⁿ'yāⁿ yeⁿé chi n'deé vueltas caaca yā Ndyuūs. ⁶ Canéé chí caacá nī Ndyuūs ní cu'téenu nī Ndyuūs chi caⁿ'á yā téé yā ndís'tiī. Taachi nguéé cu'téenu nī chi Ndyuūs nguéé caⁿ'á yā ca'a yā chiiⁿ chi ngiicá nī tuu'mi ní ndís'tiī tan'dúúca nuⁿ'nī'yáⁿ'ā taachi olas yeⁿé indéé yaacū chi candéé 'yúúné cuaaⁿ lácūū cuaaⁿ lácāā, 'tíicā ndís'tiī. ⁷ 'Áamá 'iiⁿ'yāⁿ chi ngiica yā Ndyuūs ní nguéé cu'téenu yā chi Ndyuūs caⁿ'á yā téé

yā de'ē véé, tuu'mi ní 'iiⁿ'yāⁿ miiⁿ nguéé cūnee ngínú yā chi Ndyuūs caⁿ'á yā téé yā 'iiⁿ'yāⁿ de'ē véé. ⁸ 'Iiⁿ'yāⁿ miiⁿ véé 'uūví vaanicadínūuⁿ yeⁿé yā. Maaⁿ ní neⁿ'é yā diiⁿ yā 'áamá cosa, cuayiivi ní taama cosa. 'Iiⁿ'yāⁿ miiⁿ nguéé canée yā ndúúcu 'áamá vaanicadínūuⁿ yeⁿé yā.

⁹ Ní hermano yeⁿé yú chi nguéé ch'ete ca ní canéé chi yeenú yā taachi Ndyuūs nginneé yā 'iiⁿ'yāⁿ. ¹⁰ 'Iiⁿ'yāⁿ chi 'cuiicá yā canéé chi yeenú yā taachí Ndyuūs díⁿ yā chi nguéé 'cuiicá yā. 'Iiⁿ'yāⁿ chi 'cuiica miiⁿ ní tan'dúúca naānda yeⁿe yaātā chi 'cuiinu, 'tiicá yā. ¹¹ Taachi can'dāā 'yāⁿ'ā ní 'áamá 'iⁿ'nūuⁿ tuu'mi ní tíí yaatā ní naānda yeⁿé chingééⁿ ní 'āā ntee véé naandā ti ch'iinu. 'Tiicá ntúuⁿ 'iiⁿ'yāⁿ chi 'cuiica ní 'cuiinú yā ndúúcu vaadi 'cuiica yeⁿé yā.

Canéé chí cuhéé yú yeⁿe nducuéⁿé

¹² De'ē chúúca yeenu 'iiⁿ'yāⁿ chi ichéé yā tanducuéⁿé taachi n'geenu yā ngii. Taachi chéé yā yeⁿé tanducuéⁿé tuu'mi ní Ndyuūs téé yā 'iiⁿ'yāⁿ chi canduuchí yā cueⁿe daāⁿmaⁿ. 'Tíicā Ndyuūs ngaⁿ'á yā chí caⁿ'á yā ca'a yā 'iiⁿ'yāⁿ vida cueⁿe daāⁿmaⁿ tan'dúúca chí 'aama corona yeⁿe 'iiⁿ'yāⁿ chí dinéⁿe yā Ndyuūs. ¹³ Taachi ndaā nanáⁿ ndís'tiī cosa chí diiⁿ chí di'vaachí ndís'tiī chí neⁿ'é nī diiⁿ nī chí nguéé n'daacā, nguéé canéé chí nadacadínūuⁿ nī chí Ndyuūs díⁿ yā chuū caati mar 'áamá 'iiⁿ'yāⁿ cuuvi di'vaachí yā yeⁿe Ndyuūs chí Ndyuūs díⁿ yā cosa chí nguéé n'daacā. Ndí nguéé ndúú cuuvi dinuuⁿndí Ndyuūs. Ndí nguéé ndúú Ndyuūs di'vaachí yā yeⁿe 'iiⁿ'yāⁿ chí díⁿ yā cosa chí nguéé n'daacā. ¹⁴ Taachi 'iiⁿ'yāⁿ inadacadínūuⁿ yā chí maáⁿ yā neⁿ'é yā diiⁿ yā cosa chí nguéé n'daacā tuu'mi ní véé nuuⁿndi yeⁿe yā ní díⁿ yā chí nguéé n'daacā. ¹⁵ Ní taachi díⁿ yā chiiⁿ chí neⁿ'é yā diiⁿ yā chí nguéé n'daacā tuu'mi ní dinuuⁿndí yā. Ní taachi ch'ete ca nuuⁿndi miiⁿ tuu'mi

ní 'cuiinū ní diií chi 'cuūvi yā cue^{ne}e daā^{ma}".

¹⁶Ndís'tií hermanos ye^{ne}'é chi ne^{ne}e taaví. Nguéé ca'a nī lugar 'ii^{nyā} chi canche'éf yā ndís'tií chi dinuu^{ndí} nī.

¹⁷Nducue^{ne}é chi n'daacā ní dēeve chi Ndyuūs itée yā s'uuúⁿ chiiⁿ ní ngíicá cuaaⁿ 'ni^{nu}'. Chiiⁿ ní ye^{ne}e Ndyuūs. Ndyuūs din'dái yā tanducue^{ne}é dēeve ye^{ne}e nanguuvi. Ndyuūs nguéé n'daaⁿ yā tan'dúucā 'áamá daa^{nu}'nū chí n'daaⁿ.

¹⁸Ní Ndyuūs tee yā vida s'uuúⁿ cáávā chi i'teenu yú nduudu cuaacu ye^{ne}'é yā. Ní díⁿ yā tan'dúucā chi maáⁿ yā ne^{ne}e yā diiⁿ yā. Ní 'íicú s'uuúⁿ chi i'teenu yú, tan'dúucā 'áamá cosecha chi vnnááⁿ vnnaaⁿ ye^{ne}e nducue^{ne}é chi din'dái yā 'tíicā s'uuúⁿ.

Ye^{ne}e vaadi cuaacu ye^{ne}'é Ndyuūs

¹⁹Maaⁿ ní ndís'tií hermanos chi ne^{ne}e taaví 'aama 'aamá nī canee chi 'cuētinéé yaáⁿ ní chi 'caandiveéⁿ nī naati nguéé maaⁿ n'cheeté caaⁿ'máⁿ nī. Ní nguéé maaⁿ n'cheete nūⁿ nduuvi taáⁿ nī. ²⁰'Ii^{nyā} chí induuvi taáⁿ yā nguéé n'daacā díⁿ yā ye^{ne}e chi vaadi cuaacu ye^{ne}'é Ndyuūs.

²¹Ní cáávā nducue^{ne}é chuū canee chí diví nī ye^{ne}'é tanducue^{ne}é chi nguēe n'daacā chi nadacádínuuⁿ nī. Ní nguéé díⁿ nī cosa chi nguēe ndaacā. Ní 'caandiveéⁿ nī nduudu cuaacu chí i'téenu nī ní canee na staava ye^{ne}'é nī. Ní ndiicuuⁿ nī. Ní véé poder ye^{ne}e nduudu cuaacú 'cūū chi cuuvi dinguáⁿai alma ye^{ne}'é nī.

²²Naati canéé chí díⁿ nī chiiⁿ chi nga^{na} nduudu cuaacu miiⁿ. Nguéé dá-maaⁿ chi 'caandiveéⁿ nī ni nguēe diiⁿ nī. Ní nguéé canche'éf maáⁿ nī ndís'tií. ²³Nduuti chi 'áamá 'ii^{nyā} n'giindiveéⁿ yā nduudu cuaacu miiⁿ ní nguéé díⁿ yā chiiⁿ chí nga^{na} tuu^{mi} ní 'ii^{nyā} miiⁿ tan'dúucā 'áamá 'ii^{nyā} chí inaáⁿ yā maáⁿ yā na 'aama espejo, 'tiicā yā. ²⁴Inaáⁿ yā maáⁿ yā tan'duucā yā 'tíicā. Ní cuayi-ivi nguéé nn'gaacu yā tan'duucā yā 'áará

chi n'diichí yā maáⁿ yā na 'áamá espejo. ²⁵Naati 'ii^{nyā} chí nn'gaacu yā chiiⁿ chí n'giindiveéⁿ yā ní nadacádínuuⁿ n'daacā yā ye^{ne}e ley chí nduudu cuaacu miiⁿ ye^{ne}'é Ndyuūs, tuu^{mi} ní nduudu cuaacu miiⁿ cuuvi nadinguáⁿai 'ii^{nyā}. Ní 'ii^{nyā} miiⁿ canéé chí 'caandiveeⁿ cá yā nguuvi ngu-uvi. Ní nguéé dá-maaⁿ n'giindiveeⁿ yā naati díⁿ yā chiiⁿ chí nga^{na}, tuu^{mi} ní cuuvi yeenú yā ndúucú chí díⁿ yā.

²⁶Ní nduuti chí 'aama ndís'tií nga^{na} ní chí i'téenu nī Ndyuūs ní nguéé candéé nī cuidado ye^{ne}e chí nga^{na} nī tuu^{mi} ní nginnche'ei maáⁿ nī ndís'tií. Ní nguéé dichíⁿvē chí nga^{na} nī chí i'téenu nī Ndyuūs. ²⁷'Ii^{nyā} chí neené i'téenu yā ní didēeve staava ye^{ne}'é yā ní nguéé véé nuu^{ndi} ye^{ne}'é yā nanááⁿ Ndyuūs chiida yú ní 'tíicā díⁿ yā. Nginnéé yā da'cáiyāa nguá^{aa} ndúucú n'daataa nguá^{aa} taachi n'geenu yā ngii. Ní 'ii^{nyā} miiⁿ ní nguéé díⁿ yā cosas ye^{ne}'é iⁿ'yeeⁿdí 'cūū chí nguéé n'daacā.

'Cuaáⁿ nī nducyaaca 'ii^{nyā} chí daama daamá nūⁿ 'ii^{nyā}

2Ndís'tií hermanos ye^{ne}'é chí maaⁿ ní i'téenu nī Señor Jesucristo ye^{ne}e yú chí dēevé ngii ye^{ne}'é yā, ndís'tií canéé chí díⁿ nī chí 'āā dáámá daamá nūⁿ nducyaaca 'ii^{nyā} nanááⁿ nī. ²N'diichí nī. Taachi ndaá 'áamá 'ii^{nyā} nguaaⁿ ndís'tií taachi nduuvidaamā nī ní 'ii^{nyā} miiⁿ canúúⁿ nduu tá'a yā 'áamá chí ntá^{aa} ye^{ne}e 'díⁿnguāaⁿ ní n'daacā catecai yā, ní 'tiicā ntúūⁿ ndaá táámá 'ii^{nyā} chí ndaachíⁿ yā ní ndiicúū catecai yā, ³ní ne^{ne}e cá nī 'ii^{nyā} chí n'daacā catecaí yā, ní nga^{na} nī ngii nī 'ii^{nyā} miiⁿ: N'dií cun'díⁿ nī lugar chí n'daacā ca; ní nga^{na} nī ngii nī sa^{na} chí ndaachíⁿ: N'dií cuéendiinú nī cuaaⁿ la'tií o 'cundií nī na yiive, ⁴tuu^{mi} ní nguéé díⁿ nī chí dáámá daamá nūⁿ 'ii^{nyā} nguaaⁿ ndís'tií. Ní n'diichí nī 'ii^{nyā} s'eeⁿ chee chí n'daacā,

ní nguée n'daācā chiiⁿ chi nadacadíínuuⁿ nī.

⁵Ndís'tiī hermanos yeⁿé chi neⁿé taavi, 'caandiveéⁿ nī chiiⁿ chi ngaⁿá. Ndyuūs ndeēvé yā 'iiⁿyāⁿ yeⁿe iⁿ'yeeⁿdí 'cūū chi pobre yā chi cuuvi 'cuiicá yā ndúúcu chi i'téenu yā. Ní véé chi cuuvi yeⁿé yā naachi Ndyuūs caaⁿmáⁿ ntiⁿnyúⁿ yā ti chuū Ndyuūs ngaⁿá yā chi ca'á yā nducyaaca 'iiⁿyāⁿ chi neⁿé yā Ndyuūs. ⁶Maaⁿ ní ndís'tiī maáⁿ nī s'néeⁿ nī 'iiⁿyāⁿ chi ndaachíí yā chi nguée véé yeⁿe yā ná lugar chi nguée n'daācā. ¿Áá nguée 'iiⁿyāⁿ 'cuiica chí idi'vaachí yā ndís'tiī ní icandéé yā ndís'tiī nanááⁿ 'iiⁿntyéⁿe? ⁷¿Áá nguée 'iiⁿyāⁿ s'eeⁿ chi cunncaā ngaⁿa yā yeⁿé chi duuchi yeⁿe Cristo chí n'daācā? Ní Cristo yeⁿe yú yaa'ví yā ndís'tiī chi cuuvi yeⁿé yā ndís'tiī.

⁸Nduuti chi ndís'tiī cuaacu níⁿnyúⁿ dííⁿ nī tanducueⁿē chi ngaⁿa ley yeⁿé Ndyuūs chi 'tíicā canéé nguūⁿ na libro yeⁿé yā: Dinéⁿe di 'iiⁿyāⁿ niiⁿnuuⁿ vaacu di tan'dúúca chi neⁿe di maaⁿ di, tuu'mi ní n'daācā idiiⁿ di. ⁹Ní ndúúti chi ndís'tiī nguée dáámá daamá nūuⁿ dinéⁿe nī nducyaaca 'iiⁿyāⁿ tuu'mi ní dinuuⁿndi nī. Ní nguée dííⁿ nī tan'dúúca chi ngaⁿa ley yeⁿé Ndyuūs. Ley miiⁿ n'giⁿi chí ndís'tiī ní véé nuuⁿndi yeⁿé nī. ¹⁰Ní ndúúti chí 'áámá 'iiⁿyāⁿ nguée dííⁿ yā chí ngaⁿa 'áámá 'lííⁿ chuundi yeⁿe ley yeⁿé Ndyuūs tuu'mi ní canéé yā tan'dúúca chí nguée dííⁿ yā mar 'áámá chí ngaⁿa ley miiⁿ. ¹¹Ndyuūs chí ngaⁿa yā 'tíicā: Nguée caⁿá di ndúúcu n'daataá o sáⁿa chí nguée yeⁿe di, Ndyuūs miiⁿ 'tiicá ntúúⁿ ngaⁿa yā: Nguée 'caaⁿnuⁿ di 'iiⁿyāⁿ. Maaⁿ ní nduuti chí 'aama 'iiⁿyāⁿ nguée caⁿá yā ndúúcu n'daataá o saⁿa chí nguée yeⁿe yā naati chíⁿnyúⁿ yā 'iiⁿyāⁿ 'āā nguée dííⁿ yā chí ngaⁿa ley yeⁿé Ndyuūs. ¹²Ní ndís'tiī ní canee chí caaⁿmáⁿ nī n'daācā ní din'daācā nī tan'dúúca chí ngaⁿa ley yeⁿé Ndyuūs ti

ley miiⁿ n'diichi s'uuúⁿ. Ní ley miiⁿ dííⁿ chí cuuvi nanguáⁿāi s'uuúⁿ. ¹³'Iiⁿyāⁿ chí nguée neⁿe ya'ai iinú yā 'iiⁿyāⁿ 'tiicá ntúúⁿ Ndyuūs nguée neⁿe ya'ai iinú yā 'iiⁿyāⁿ s'eeⁿ taachi n'diichí yā nuuⁿndi yeⁿé yā. 'Iiⁿyāⁿ chí ya'ai iinú yā 'iiⁿyāⁿ ichée yā taachi Ndyuūs n'diichí yā nuuⁿndi yeⁿé nducyaaca 'iiⁿyāⁿ.

'Iiⁿyāⁿ chí i'téenu yā Ndyuūs dííⁿ yā ntiⁿnyuⁿ yeⁿé Ndyuūs

¹⁴Ndís'tiī hermanos yeⁿé, ¿de'ē dichíí'vē 'áámá 'iiⁿyāⁿ chí ngaⁿá yā chí i'téenu yā Jesucristo ní nguée dííⁿ yā cosas chí n'daācā? ¿Áá cuuvi nanguaⁿai yā nduuti chí ngaⁿá yā chí i'téenu yā 'tíicā? ¹⁵Maaⁿ ní nadacadíínuuⁿ yú yeⁿe 'áámá hermano o hermana yeⁿe yú chí nguée véé catecai yā ní nguée véé chí che'e yā. ¹⁶Nduuti chí n'diichi yú hermano o hermana miiⁿ ní ngaⁿa yú ngii yú 'yā: Dii cueⁿe di ndúúcu vaadí 'dííⁿ. Nan'gueecundii di ní che'e di. Ní nguée ca'a yú hermano o hermana miiⁿ yeⁿe yú chí che'é yā o catecai caavā chí dííⁿ yā tapar, tuu'mi ní, ¿de'ē chíí'vē chí ngaⁿa yú ngii yú hermano o hermana yeⁿe yú 'tíicā? ¹⁷Ní 'tiicá ntúúⁿ yeⁿe chíⁿ chí i'teenu yú Ndyuūs. Nduuti chí 'áámá 'iiⁿyāⁿ nguée din'daācā yā cáāvā chí i'téenu yā Cristo tuu'mi ní chííⁿ chí i'téenu yā tan'duucā chí cosa chí n'díí.

¹⁸Nduuti chí 'áámá yā ngaⁿá yā ngii yā s'uuúⁿ 'tíicā: Díí ngaⁿa di chí i'téenu di Ndyuūs naati 'úú idiiⁿ nducueⁿē chí n'daācā. 'Úu ngaⁿá ngii 'iiⁿyāⁿ miiⁿ: Dii chíⁿi di 'úú tan'dúúca chí cuuvi cu'téenu yú Ndyuūs ní nguée n'daācā cuuvi dííⁿ yú. 'Úú chíⁿi díí chí i'teenu Ndyuūs caavā chí n'daācā idiiⁿ. ¹⁹'Āā i'téenu di chí véé 'áámá n'dyáⁿā Ndyuūs. N'daācā chí i'téenu di 'tíicā. 'Tiicá ntúúⁿ 'yáá'n'guiniūⁿ i'téenu sa ní n'duuví sa ti 'va'a sa. ²⁰Díí 'iiⁿyāⁿ chí cheechí tiiⁿ chí nguée neⁿe di cu'téenu di. Nduuti chí 'áámá 'iiⁿyāⁿ i'téenu yā Ndyuūs ní nguée

din'daacá yā tuu'mi ní díiⁿ yā tan'dúucā chi nguée^é i'téenu yā. Ní vaadi i'teenu yeⁿé yā cūnee tan'dúucā chi n'díi 'tíicā cunée. ²¹ Maaⁿ ní nadacadíinuⁿ ní yeⁿe tiempo chi 'āā chó'oo yeⁿe chiida yú chi nguuvi Abraham chi yeⁿe ndaata yeⁿe yú. Ndyuūs inadach'ēecú yā nuⁿ-uⁿndi yeⁿé yā cáāvā ntiiⁿnyuⁿ chi díiⁿ yā taachi ca'á yā daiyá yā Isaac lado yeⁿe ofrenda nanááⁿ na nátaí cáāvā chi 'caaⁿnúⁿ yā daiyá yā naati nguée^é ch'ií sa. ²² ¿'Áá nguée^é deenú ní chi Abraham i'téenu yā Ndyuūs ní ch'iⁿí yā 'iiⁿyāⁿ chi i'téenu yā caavā chiiⁿ chi díiⁿ yā? Ní Abraham néené i'téenu yā Ndyuūs caavā chi díiⁿ yā. ²³ Ní chiiⁿ cuaacu chi canée nguúⁿ na libro yeⁿé Ndyuūs 'tíicā: Abraham s'téenu yā Ndyuūs ní Ndyuūs ní díiⁿ yā cuenta chi Abraham ní n'daaca yā. Ní Ndyuūs sta'á yā Abraham chi cuuvi yeⁿé yā cáāvā chi i'téenu yā Ndyuūs. Ní 'iiⁿyāⁿ s'eeⁿ ngaⁿá yā chi Abraham miiⁿ ní amigo yeⁿé Ndyuūs.

²⁴ Maaⁿ ní cuuvi n'diichí ní chi Ndyuūs cuta'á yā 'iiⁿyāⁿ chi cuuvi yeⁿé yā nguée^é dámaāⁿ caava chi i'téenu yā yā naati 'tíicā ntúūⁿ caavā chi din'daacā yā. ²⁵ 'Tíicā ntúūⁿ táⁿā Rahab chi ndúucu tá 'yaaⁿ saⁿā, Ndyuūs ní díiⁿ yā cuenta yeⁿe tá chi n'daacā tá. Ní Ndyuūs sta'á yā táⁿā chi cuuvi yeⁿé yā caava chi n'daacā díiⁿ tá. N'daata miiⁿ 'cuuⁿ tá saⁿā s'eeⁿ chi ndāā n'de'ei n'de'ei saⁿā chi Ndyuūs dichó'o yā. Ní táⁿā miiⁿ dicho'o tá saⁿā s'eeⁿ táámá yúuní taachi véé peligro yeⁿe sa. ²⁶ Ní tan'dúucā cuerpo yeⁿe yú taachi nguée^é canée espíritu yeⁿe yú ndúucū ní n'díi, 'tiicā ntúūⁿ taachi i'téenu yú Ndyuūs ní nguée^é n'daacā idiⁿ yú, chiiⁿ chi i'téenu yú cunée tan'dúucā chi n'díi.

Yeⁿe chiiya yú

3 Nds'tií hermanos yeⁿé nguée^é canée^é chi cuuví 'yaaⁿ maestros yeⁿe yaacú nguuaⁿ nds'tií. Deenú ní chi Ndyuūs diⁿ-itu n'diichí yā nuuⁿndi yeⁿe maestros

miiⁿ nguée^é ti nds'tií. ² Nducyaacu yú idiⁿ yú n'dee n'dái faltas. Ní nduuti chi 'áámá 'iiⁿyāⁿ nguée^é caaⁿmáⁿ yā mar 'áámá falta tuu'mi ní 'iiⁿyāⁿ miiⁿ ní neené n'daacā. Ní cuuvi ngaⁿá ntiiⁿnyuⁿ yā yeⁿe nuuⁿmaⁿ cuerpo yeⁿe maáⁿ yā. ³ Cuin'diichí ní. Cuⁿnuūⁿ yú frenos naaⁿ 'yúúúú ní cu'téenu tí yeⁿe yú. Ní nuuⁿ-maⁿ cuerpo yeⁿe tí cuuvi díiⁿ tan'dúucā chi neⁿe yú. ⁴ Maaⁿ ní nadacadíinuⁿ yú yeⁿe barco. 'Áará chí ch'ēete ní 'yúúné taaⁿ ngéenu ní 'iiⁿyāⁿ cuuvi díiⁿ yā manejar barco miiⁿ cáāvā 'áámá yáⁿá 'lífⁿ yeⁿe barco miiⁿ chi canúúⁿ chēeti nuūⁿniⁿyáⁿā. Ní barco miiⁿ ngiicā naachi neⁿé yā. ⁵ 'Tiicā ntúūⁿ chiiya yú. 'Áará chí 'áámá chí 'lífⁿ chí yeⁿe cuerpo yeⁿe yú naati ngaⁿa yú yeⁿe n'dee n'dái cosas chí n'gēete ndúucū chiiya yú. Ní cuin'diichí ní ta 'lífⁿ chuundí yaⁿā cuuvi caacyáⁿā 'áámá icyáⁿā ch'ēete. ⁶ Ní chiiya yú tan'dúucā 'áámá nguuchi yaⁿā 'tíicā chiiya yú. Ní tanducueⁿé tan'dúucā 'áámá iⁿyeⁿé di chí ndiituú ndúucū nducueⁿé chí nguēe n'daacā, 'tíicā cuerpo yeⁿe yú cáāvā chiiya yú. Ní díiⁿ chí núúⁿmáⁿ cuerpo yeⁿe yú véé nuuⁿndi yeⁿe. Ní tan'dúucā infierno chí ngiichi yaⁿā 'tíicā díiⁿ chiiya yú. Ní yaⁿā miiⁿ ní díiⁿ tan'dúucā chí ngiichi nducueⁿé vida yeⁿe yú 'naaⁿ chí canee yú iⁿyeⁿé dí 'cūū. ⁷ Ca'áámá ca'áámá naaⁿ 'iiti chí véé iⁿyeⁿé dí 'cūū yeⁿe 'iiti 'yúúúú, yeⁿe 'yaada, yeⁿe cúú, 'iiti chí snúūⁿ chēeti nuūⁿniⁿyáⁿā ní nducyaaca tí saⁿā cuuvi díiⁿ sa amansar ní 'āā díiⁿ sa amansar 'iiti s'eeⁿ. ⁸ Naati mar 'áámá 'iiⁿyāⁿ nguée^é cuuvi díiⁿ yā chí amansar chiiya maáⁿ yā. Ngaⁿa yú cosas chí nguée^é n'daacā 'aara chí nguée^é neⁿe yú. Ní ndúucū chiⁿ-iya yú ngaⁿa yú n'dee n'dái chí nguée^é n'daacā yeⁿe 'iiⁿyāⁿ. Ní díiⁿ yú chí cuuvi 'cuúvi yā. ⁹ Ní ndúucū maaⁿ chiiya yú dich'ēete yú Ndyuūs chiida yú ní ngaⁿa taaⁿ yú yeⁿe 'iiⁿyāⁿ chí Ndyuūs din'dái yā chí tan'dúucā maáⁿ Ndyuūs 'tiicā din'dái

yā 'iiⁿyāⁿ. ¹⁰Yeⁿe maaⁿ cheendi ntúuⁿ yú ngaⁿa yú chi Ndyuūs n'daācā yā ní ngaⁿa taaⁿ yú ndúúcu 'iiⁿyāⁿ. Ndís'tii hermanos yeⁿé, nguée canéé chi cuuvi 'tíicā. ¹¹¿'Áá yeⁿé 'áámá nduutinaaⁿ nuūⁿnīⁿ can'dáā nuūⁿnī yaāa ndúúcu nuūⁿnī yaādi? Nguée cuuvi. ¹²Ndís'tii hermanos yeⁿé, ¿'áá cúúví 'áámá yáⁿá yeⁿe n'guiidii yááⁿ nguuvi cuuvi aceitunas yeⁿé? Nguée cuuvi. O 'aama yáⁿá 'lírⁿ yeⁿe uvas ¿'áá cuuvi n'guiidii yááⁿ nguuvi cuuvi yeⁿé? Nguée cuuvi. 'Tiicá ntúuⁿ yeⁿé 'aama ndúútinaaⁿ nuūⁿnīⁿ nguée cuuvi can'dáā nuūⁿnīⁿ diini ndúúcu nuūⁿnīⁿ yaadi.

Yeⁿe vaadi deenu chi cuaacu níⁿnyúⁿ chi vaadi deenu

¹³Nduuti chi véé saⁿā chi cadiinuuⁿ sa ní chi deenu nguaaⁿ ndís'tii canéé chí cuuⁿmiⁿ sa 'iiⁿyāⁿ chi cuaacu chi deenu sa ní ndiicuuⁿ sa cáávā nduudu n'dai yeⁿé sa ndúúcu ntiiⁿnyuⁿ n'daāca chi diiⁿ sa. ¹⁴Naati nduuti chi véé vaadi ngueēe chi ch'ēete ndúúcu vaadi 'caaⁿva na staava yeⁿé ní ndís'tii ní nadacádíinuuⁿ ní na staava yeⁿé ní chi caⁿá ní diiⁿ ní nducuéⁿē caavā maáⁿ ní díⁿ ní aprovechar, tuuⁿmi ní nguée cuuvi nadacádíinuuⁿ ní chi n'geete ní. Ndíⁿ nguée cuuvi caaⁿmáⁿ ní nduudu yaadi chi contra yeⁿé nduudu cuaacu. ¹⁵Ní vaadi deenú 'cūū yeⁿé ní nguée vaadi deenu chi yeⁿé Ndyuūs naati vaadi deenú 'cūū ní yeⁿe iⁿyeedí 'cūū ní yeⁿe chi nadacádíinuuⁿ yā ní yeⁿé yááⁿn'guiinuuⁿ. ¹⁶Naachi 'iiⁿyāⁿ chí dín-gueé yā ní díⁿ yā nducuéⁿē caava maáⁿ yā neⁿé yā díⁿ yā aprovechar, tuuⁿmi ní miiⁿ canéé 'iiⁿyāⁿ chi nguée véé orden yeⁿé yā. Ní díⁿ yā tanducuéⁿē denduⁿ chi nguée n'daacā. ¹⁷Naati 'iiⁿyāⁿ chi véé vaadi deenu yeⁿé yā chi yeⁿe Ndyuūs, tuuⁿmi ní vmnááⁿ vmaaⁿ canéé chí ch'ēetinéé n'daaca yā ndúúcu vida yeⁿé yā chi deeve. Cuayiivi ní díⁿ yā chi véé

vaadi 'diiⁿ. Ní ndiicúuⁿ yā, ní amigo yā. Ní ya'ai 'iinú yā ndúúcu 'iiⁿyāⁿ ní dá-maāⁿ díⁿ yā tanducuéⁿē chi n'daacā. 'Áā daamá nūuⁿ 'cuaaⁿ yā nducyaaca 'iiⁿyāⁿ. Ní nguée nadacádíinuuⁿ yā yeⁿé chi nguée ndaacā, ní nguée díⁿ yā denduⁿ chi nguée n'daacā. ¹⁸Ní 'iiⁿyāⁿ chí díⁿ yā chí véé vaadi 'diiⁿ ní díⁿ yā tan'dúúcā chí cuuⁿnú yā ndaata yeⁿe nducuéⁿē chi cuaacu. 'Tíicā díⁿ yā. Ní n'guiⁿi yeⁿé nducuéⁿē chí cuaacu ní vaadi cuaacu.

Yeⁿe ndís'tii amigos yeⁿe 'iiⁿyāⁿ chí nguée i'téenu yā Jesucristo

4 ¿Tíí ngiica cosas chi caandaá chí 'tíica nguⁿú ní nguaaⁿ maáⁿ ní? Ngicā yeⁿe ná vaanicadíinuuⁿ yeⁿe maáⁿ ní ti neⁿe ní diiⁿ ní cosas chí nguée n'daacā. ²Ndís'tii neⁿé ní cosas ní nguée véé yeⁿe ní. Ní cáávā chuū neⁿé ní 'caaⁿnúⁿ ní 'iiⁿyāⁿ. Neⁿé ní denduⁿ chí inaáⁿ ní ní nguée cuuvi cutaⁿá ní. Ní cáávā chuū nguⁿú ní ní díⁿ ní caandaá. Ní nguée ndaaca ní chiiⁿ chí neⁿé ní ti nguée ngicā ní Ndyuūs deⁿē chí neⁿe ní. ³Ní taachi ndís'tii ngiicá ní Ndyuūs deⁿē chí neⁿe ní, Ndyuūs nguée téé yā chiiⁿ chí neⁿe ní ti ngiicá ní dámaāⁿ caavā maáⁿ ní caati cuuvi yeenú ní. Ní nguée n'daacā chí ngiica ní 'tíicā. ⁴Ndís'tii 'iiⁿyāⁿ chí nguée 'áámá cunee ní ndúúcu chí i'téenu ní, ¿'áá nguée deenu ndís'tii chí taachi caⁿá ní ndúúcu 'iiⁿyāⁿ chí nguée i'téenu yā Jesucristo ní díⁿ ní denduⁿ chí yeⁿe iⁿyeedí 'cūū tuuⁿmi ní canéé ní enemigos yeⁿé Ndyuūs? 'Tiicá ní. ⁵¿'Áá nadacádíinuuⁿ ndís'tii chí díⁿ ní chí nguée dichíⁿvē nduudu yeⁿe libro yeⁿé Ndyuūs naachi canéé nguūⁿ 'tíicā?: Ndyuūs s'neeⁿ yā Espíritu N'dai yeⁿé yā ch'ēeti staava yeⁿe yú. Ní Espíritu miiⁿ ní neⁿe ca chí s'uuúⁿ canee yú dámaāⁿ yeⁿe Ndyuūs s'uuúⁿ. ⁶Naati Ndyuūs nginnéé yā s'uuúⁿ ní itéé yā s'uuúⁿ vaadi n'dai yeⁿé yā s'uuúⁿ. Canéé nguūⁿ na libro yeⁿé Ndyuūs 'tíicā: Ndyuūs nguée caⁿá yā lado yeⁿe 'iiⁿyāⁿ

chi idin'gæete maáⁿ yā naati ca'a yā vaadi n'dai yeⁿé yā 'iiⁿyāⁿ ndiicúⁿ. ⁷Tíicā canee chi s'neéⁿ nī vida yeⁿe maáⁿ nī na ta'á Ndyuūs. Nguéé ca'á nī lugar yááⁿ'nguiinūⁿ chi ngaⁿa ntiⁿ'nyuⁿ sa yeⁿe ndís'tiī ní yááⁿ'nguiinūⁿ ní cueevii sá yeⁿé nanááⁿ ndís'tiī. ⁸Ndaá nī nanááⁿ Ndyuūs ní Ndyuūs ní chí ndaa ntúūⁿ yā nanááⁿ ndís'tiī. Ndís'tiī 'iiⁿyāⁿ nuuⁿndfí nadideevé nī vida yeⁿé nī. Ndís'tiī chi véé 'uūvi vaanicadifíⁿūⁿ yeⁿé nī, nadideevé nī staava yeⁿé nī. ⁹Ndís'tiī 'iiⁿyāⁿ nuuⁿndfí di'vaachi maáⁿ nī ní cuēcú nī ní ya'āi 'iinú nī yeⁿé chi diiⁿ nī. Nguéé canee chi n'gíⁿ'nyuⁿ nī naati canee chi cuēcú nī. Nguéé canéé chi yeenú nī naati canee chi di'vaachi maaⁿ nī. ¹⁰Ní 'cuæt-inéé ndiicuuⁿ nī nanááⁿ Señor yeⁿe yú ní Señor yeⁿé yú ní díⁿ yā chi n'gæete nī.

Yeⁿé chi n'diichi yú nuūⁿndi yeⁿe hermanos yeⁿe yú

¹¹Ndís'tiī hermanos yeⁿé, nguéé caaⁿ'maⁿ cúnnaa nī yeⁿé 'aama nī taama nī hermanos yeⁿe yú. 'Āā du'ú ndís'tiī chí ngaⁿa contra 'áámá hermano yeⁿe yú o n'diichi nī nuuⁿndi yeⁿe hermano yeⁿe yú, ndís'tiī ngaⁿa ntúūⁿ cúnnaa nī contra ley yeⁿé Ndyuūs ní n'diichi nī yeⁿe ley miiⁿ. Ní naachi n'diichí nī yeⁿe ley miiⁿ tuuⁿ'mi ní díⁿ nī ntiⁿ'nyuⁿ yeⁿe juez ní nguéé díⁿ nī chí ngaⁿa ley miiⁿ. ¹²Dámaaⁿ vee 'áámá n'dyáⁿ'ā chi Ndyuūs chí ca'á yā ley miiⁿ ní 'tiicá ntúūⁿ Ndyuūs ní juez. Maáⁿ yā cuuvi nadinguáⁿ'ai yā 'iiⁿyāⁿ o cuuvi di'cuiinú yā 'iiⁿyāⁿ. Maaⁿ ní ndís'tiī, ¿du'u ndís'tiī chí n'diichí nī de'ē idiⁿ' táámá 'iiⁿyāⁿ?

Nguéé deenu yú de'e chi cuuvi ndúúcu yú ndii cavyaaⁿ

¹³Maaⁿ ní 'caandiveeⁿ nī nduudu chí ngaⁿ'á ngii ndís'tiī chí ngaⁿa nī 'tíicā. Maaⁿ'nguuvi o cavyaaⁿ caⁿ'á táámá yāāⁿ nī canéé miiⁿ 'áámá nduūyū, ní díⁿ ne-

gocio ní díⁿ ganar. ¹⁴Ndís'tiī ní nguéé de'ē vee déenu nī chí de'ē cuuvi cavyaaⁿ. ¿De'ē vida yeⁿe ndís'tiī? Vida yeⁿé nī ní tan'dúúca 'áámá meéⁿ chí ngo'óo 'áámá nch'ēté ní n'giinu. ¹⁵Ndís'tiī ní canéé chí caaⁿ'máⁿ nī 'tíicā. Nduuti chí Ndyuūs neⁿ'é yā chí cunduūchi tuuⁿ'mi ní díⁿ chí chuū o díⁿ cháā. ¹⁶Naati nguéé díⁿ nī 'tíicā. Ndís'tiī ngaⁿ'á nī yeⁿe cosas n'gæete chí díⁿ nī. Ní yeenú nī yeⁿe nducuéⁿ e 'cūū chí ngaⁿ'a nī chí n'gæete. Ní nguéé n'daacā chí díⁿ nī 'tíicā. ¹⁷'Iiⁿyāⁿ chí déenu yā yeⁿé chí cuuvi díⁿ yā chí n'daacā ní nguéé idiⁿ' yā chí tuuⁿ'mi ní dinuuⁿ'ndí yā.

Yaa'ví 'iiⁿyāⁿ chí 'cuiica chí candéé yā cuidado

5 'Caandiveeⁿ ndís'tiī 'iiⁿyāⁿ chí 'cuiica. Cuēcú nī ní 'cuāi nī caati 'cuenú nī cuuvi dendu'ū chí díftūū chí cuchii nanááⁿ yeⁿe ndís'tiī. ²Vaadi 'cuiica yeⁿé nī ní nchōō ní catecai n'daí nī n'dáá ní che'é tī. ³Ní 'díⁿ'nguāāⁿ ndúúcu 'díⁿ'nguee yeⁿé nī ní che'e yá'āa. Ní chiiⁿ chí nche'e yá'āa miiⁿ ní canéé tan'dúúca 'áámá lado yeⁿé testigo chí caaⁿ'maⁿ contra yeⁿé nī. Ní chiiⁿ chí diiⁿ tan'dúúca chí cacyáⁿ'ā cuerpo yeⁿé nī nduucú yaⁿ'ā. Ní vaadi 'cuiica yeⁿé nī ní nguáin'daí nī ní maaⁿ ní tiempo chí cuuví 'cuiinu íⁿ'yeēⁿ'dī. ⁴N'diichí nī. 'Āā cuéé nadíⁿ've nī 'iiⁿyāⁿ chí díⁿ yā ntiⁿ'nyuⁿ ní sta'á yā cosecha yeⁿé nī. Ní chíⁿ'vē miiⁿ canéé tan'dúúca 'áámá testigo contra yeⁿe ndís'tiī. 'Iiⁿyāⁿ s'eeⁿ ní 'caí yā contra yeⁿe ndís'tiī ní Señor chí ngaⁿ'a ntiⁿ'nyúⁿ yā yeⁿé nducyáácá 'iiⁿyāⁿ 'āā n'giindiveeⁿ yā chiiⁿ chí 'caí yā. ⁵Ndís'tiī 'iiⁿyāⁿ 'cuiica, maáⁿ nī ch'ætineeⁿ nī ndúúcu tanducuéⁿ'ē chí neⁿ'é nī ní yeenú nī. Ní dicheeⁿé nī cáāvā nguuvi chí 'cuuví nī tan'dúúca chí díⁿ nī ndúúcu 'áámá cuuchi chí cuuvi 'viiché tī níicú ndaa 'áámá nguuvi chí 'caaⁿ'núⁿ nī 'iiti miiⁿ. ⁶Ní ndís'tiī 'āā díⁿ nī condenar saⁿ'ā chí n'dai ní 'iiⁿyāⁿ s'eeⁿ

n'giiⁿnúⁿ yā saⁿā. Ní nguéé diiⁿ sa mar 'áamá chi nadanguáⁿai sa maaⁿ sa.

Yeⁿe 'viich'etítínūⁿ yeⁿe yú ní yeⁿe chi ngaⁿangua'a yú

⁷Ní cáávā nducuéⁿē ngaⁿá ndís'tiī hermanos yeⁿé canéé chí dííⁿ nī nducuéⁿē ndúúcu vaadi 'diiⁿ nanáaⁿ nī ní nanááⁿ Señor yeⁿē yú ndii tiempo chi ndaa yā taama vmnéⁿēe. Cuin'diichí ní. 'Iiⁿyāⁿ chí dííⁿ yā ntiⁿnyuⁿ yeⁿe campo canee chí cūnee ngínú yā chí ndaācā n'daācā cosecha yeⁿe yā. Ní cūnee ngínú n'dai yā chí cueeⁿ cuuvi vmnááⁿ vmaaaⁿ. Ní taachi cho'ōo chí cueeⁿ cúuvi cuayivi tuuⁿmi ní cuta'á yā cosecha yeⁿe yā. ⁸'Tiicā ntúūⁿ ndís'tiī véé paciencia yeⁿé nī ní canee diitú nī ndúúcu chí i'téenu nī na staava yeⁿé nī caati tiempo chí ndaa Señor yeⁿe yú 'āā snee niiⁿnuúⁿ. ⁹Ní ndís'tiī hermanos yeⁿé nguéé caaca nuuⁿndi nī 'aama nī contra taama nī ní nguéé cuuvi n'diichi Ndyuūs nuuⁿndi 'cūū chí yeⁿe nī. Ndyuūs chí juez ní niiⁿnuúⁿ nūūⁿ ndaa yā. ¹⁰Maaⁿ ní hermanos yeⁿé nadacadíínuuⁿ nī yeⁿe tiempo chí 'āā chó'ōo tan'dúúca chí diiⁿ profetas chí candēe yā nduudu yeⁿé Ndyuūs ní n'dee n'dái ch'eenú yā chíi. Ní véé paciencia yeⁿé yā. Tan'dúúca chí dííⁿ yā 'tiicā ntúūⁿ canee chí dííⁿ nī. ¹¹Deenu yú chí yeenú profetas s'eeⁿ taachi ch'eenú yā chíi. Ndís'tiī ní ch'iindiveéⁿ nī yeⁿe saⁿā Job ní tan'dúúca chí véé ca paciencia yeⁿē sa taachi ch'eenu sa chíi. 'Āā n'diichí nī ntúūⁿ tan'dúúca Señor yeⁿe yú dííⁿ yā cáávā saⁿā Job miiⁿ taachi ch'iinu ch'eenu sa chíi. Maaⁿ ní Señor yeⁿe yú ní néené neⁿé yā s'uuúⁿ ní néené ya'ai yā s'uuúⁿ.

¹²Ní yeⁿe tanducuéⁿē hermanos yeⁿé, nguéé caaⁿmaⁿ nī de'ē chí neⁿe dííⁿ nī ndúúcu nduudu “por Dios” chí caⁿá nī dííⁿ nī 'tíicā o nguéé caⁿá nī dííⁿ nī 'tíicā. Ní nguéé caaⁿmáⁿ nī “caavā nanguuvi”,

ndíi nguéé ndúú cáávā “iⁿyeeⁿdí 'cūū”, ndíi nguéé ndúú caavā táámá naaⁿ. Dá-maaⁿ caaⁿmáⁿ nī, “'tíicā idiiⁿ” o “nguéé 'tíicā idiiⁿ” caati Ndyuūs nguéé cuuvi dííⁿ yā condenar ndís'tiī.

¹³Ndúúti chí 'áamá chee ndís'tiī chí n'geenu nī ngii, canéé chí caaⁿmaⁿngua'á nī Ndyuūs. Nduuti chí canee 'áamá 'iiⁿyāⁿ chí diyeenu, cánéé chí caatá yā chí Ndyuūs ní ch'eté yā. ¹⁴Nduuti chí 'áamá chee ndís'tiī ní ngíta nī canéé chí yaa'ví ní 'iiⁿntyéⁿē yeⁿe yaācū chí cuchíi yā ní 'cūendāa yā aceite na cuerpo yeⁿé 'iiⁿyāⁿ miiⁿ chí ngíta yā ní caaⁿmaⁿngua'á yā nanááⁿ Señor Jesucristo yeⁿe yú cáávā 'iiⁿyāⁿ miiⁿ chí ngíta yā. ¹⁵Ní taachi ngaⁿangua'á nī, i'téenu nī chí Jesucristo cuuvi dííⁿ yā chí nduūvā yeⁿe 'iiⁿyāⁿ chí ngiitā, ní Señor Jesucristo miiⁿ ní nadicuééⁿ yā 'iiⁿyāⁿ chí ngiitā ní nduūvā yeⁿé yā. Ní nduuti chí véé nuuⁿndi yeⁿé yā Señor Jesucristo nadach'ecú yā nuuⁿndi yeⁿe yā. ¹⁶Cáávā chuū ní caaⁿmáⁿ nī nuuⁿndi chí dííⁿ nī contra hermanos yeⁿé nī ní cuuvi nī hermanos. Ní caaⁿmaⁿngua'á nī 'áamá nī táámá nī ní cuuvi nduūvā yeⁿé nī. 'Iiⁿyāⁿ chí n'dai taavi taachi caaⁿmaⁿngua'á yā véé poder yeⁿe Ndyuūs na staava yeⁿé yā taachi caaⁿmaⁿngua'á yā. ¹⁷Deenu yú chí saⁿā Elías chí profeta ní 'áamá saⁿā tan'dúúca s'uuúⁿ 'tíicā sa. Taachi caⁿangua'a sa chí chíica sa Ndyuūs chí dííⁿ yā chí nguéé cueeⁿ cuūvi tuuⁿmi ní nguéé cheeⁿ cuūvi vmaaaⁿ yáⁿā 'iinu nduūyū canéé maⁿā. ¹⁸Ní cuayivi miiⁿ ní caⁿangua'a ntúūⁿ sa táámá vmnéⁿēe chí cueeⁿ cuūvi ní cheeⁿ cuūvi vmaaaⁿ yáⁿā ní chíi taavi cosecha yeⁿē.

¹⁹Maaⁿ ní ndís'tiī hermanos yeⁿé, nduuti chí 'áamá ndís'tiī ngíi divíi nī yeⁿē nduudu cuaacu ní táámá yā idiiⁿ yā chí 'iiⁿyāⁿ miiⁿ nanguēcunéé yā ní i'téenu yā nduudu cuaacu, ²⁰tuumi ní canéé chí cadíínuuⁿ nī chuū. 'Áámá

'iiⁿyāⁿ chi diíⁿ yā chi táámá 'iiⁿyāⁿ chi
 dinuuⁿndí yā nacueεcúndii yā ní cu-
 víi yā yeⁿ'ē nuuⁿndi yeⁿ'é yā, tuuⁿ'mi
 ní 'iiⁿyāⁿ vmnaaⁿ nadanguáⁿ'ai yā alma

chi n'dií yeⁿ'ē taamá yā. Ní diiⁿ chi
 Ndyuūs nadach'εεcú yā n'deee n'dái nu-
 uⁿndi yeⁿ'é yā. 'Tíicā cuuvi.

CARTA VMNÁÁⁿ VMNAAⁿ YEⁿE SAN PEDRO

**Pedro idingúⁿ yā carta 'cūū
yeⁿē hermanos chi i'téenu
yā Jesucristo hermanos chi
s'nééⁿ 'muuⁿ chi s'nééⁿ miⁿ**

1 'Úú Pedro 'úú ni 'úú 'áamá apóstol yeⁿe Jesucristo. Ní Cristo dichó'o yā 'úú chi 'úú candéé nduudu cuaacu yeⁿe Ndyuūs. 'Úú idingúⁿ carta 'cūū yeⁿe 'iiⁿ'yāⁿ chi i'téenu yā Señor Jesucristo ní nguéé chiⁿ ch'etinéé yā na yááⁿ yeⁿe yā tí cheⁿe 'nééⁿ 'múúⁿ cheⁿe 'nééⁿ miⁿ yā ndii yáⁿ'āa yeⁿe Ponto, yeⁿe Galacia, yeⁿe Capadocia, yeⁿe Asia, ndúúcu Bitinia. ²Ní idingúⁿ yeⁿe ndís'tiⁿ, 'iiⁿ'yāⁿ chi Ndyuūs ndæve yā tan'dúúca chi Ndyuūs deenú yā chi caⁿ'a yā diiⁿ yā ndíí vmnááⁿ vmnaaⁿ. Ní Espíritu N'dai yeⁿe Ndyuūs ní nadidævé yā ndís'tiⁿ cáávā chi n'giindiveéⁿ ni yeⁿe yā ní cáávā yuuúⁿ yeⁿe Señor Jesucristo chi nadidævé yā ndís'tiⁿ. Neⁿ'é chi Ndyuūs téé yā ndís'tiⁿ n'dee n'dái vaadi n'dai yeⁿ'é yā ní vaadi 'diiⁿ cuuvi ch'ete nguaaⁿ ndís'tiⁿ.

³Dich'ete ca yú Ndyuūs chi chiida Señor Jesucristo caati néené ya'ai 'iinú yā s'uuúⁿ chi diiⁿ yā chi ch'iindiyāāⁿ ngai yú. Chuū díⁿ yā caati nadacuééⁿ yā Jesucristo yeⁿ'ē nguaaⁿ tináⁿ'ā. Maaⁿ ní cucáávā Ndyuūs tee yā s'uuúⁿ 'áamá vida ngai yeⁿe yú ní véé esperanza yeⁿe yú. ⁴Ní cūnee ngiinú yú yeⁿe tanducuéⁿ'ē vaadi n'dai yeⁿ'é Ndyuūs chi Ndyuūs ngaⁿ'á yā chi téé yā s'uuúⁿ chi cuuvi yeⁿe yú. Ní Ndyuūs nanguáin'dai yā cáávā s'uuúⁿ chiiⁿ chi cuuvi yeⁿe yú na va'ai chæti nguuvi naachi nguéé cuuvi chōō. Ní nguéé cuuvi 'cūee, ndíí nguéé cúúv'í ch'ó'oo yeⁿ'ē. ⁵Ní chuū chi Ndyuūs nguáin'dai yā ní cáávā ndís'tiⁿ ti ndís'tiⁿ i'téenu ni Jesucristo. Ní Ndyuūs díⁿ yā cuidado ndís'tiⁿ ndúúcu poder yeⁿ'é yā

'naaⁿ chi cūnee ngiinú ni chi nadanguáⁿ'ai yā ndís'tiⁿ chi cuuvi déenu ni yeⁿ'e chuū tiempo chi cuchii.

⁶Ní canee chi yeenu ni yeⁿ'e chuū 'aara chi dindaachí ni duu'vi tiempo nūuⁿ 'naaⁿ chi n'geenu ni ngii n'dee n'dái cosas chí ngíí. ⁷Cáávā chi i'téenu ni Jesucristo vaadi i'téenu yeⁿ'é ni ní tan'dúúca 'díí'nguāⁿ, 'tíicā. Ní 'iiⁿ'yāⁿ canéé chi n'diichineeⁿ 'díí'nguāⁿ ndúúcu yaⁿ'ā caati cuuvi deenú yā chi dámaāⁿ 'díí'nguāⁿ. Ní 'tiicā ntúūⁿ vaadi i'téenu yeⁿ'é ni 'iiⁿ'yāⁿ canéé chí n'diichineeⁿ yā. Ní vaadi i'téenu yeⁿ'é ni nduuti chi ichéé yeⁿ'e tanducuéⁿ'ē taachi 'iiⁿ'yāⁿ n'diichineeⁿ yā yeⁿ'ē, tuu'mi ní cuaacu chi i'téenu ni ní 'áamá cūnee vaadi i'téenu yeⁿ'é ni nguéé ti 'díí'nguāⁿ chí n'giinu. Cuayiivi taachi ndaá Jesucristo tuu'mi ní dich'etéé yā ndís'tiⁿ ní diiⁿ yā honrar ndís'tiⁿ ní diiⁿ yā chi n'dævé ngii ndís'tiⁿ cáávā chi n'daacā ca i'téenu ni Jesucristo.

⁸'Áará chi nguéé n'diichí yā Jesucristo dineⁿ'é ni 'iiⁿ'yāⁿ. Ní i'téenu ni 'iiⁿ'yāⁿ 'áará chi nguéé inaaⁿ ni 'iiⁿ'yāⁿ. Maaⁿ ní neené yeenu ni ndúúcu vaadi yeenu chi ch'ete taavi ca. Ní nguéé véé nduudu yeⁿ'é ni chi cuuvi caaⁿ'māⁿ ni yeⁿ'ē. ⁹Ní neⁿ'é ni tunéé ni nguuvi chi Ndyuūs nadanguáⁿ'ai yā almas yeⁿ'e ni. Ní cáávā chuū chi i'téenu ca ni Ndyuūs.

¹⁰Tiempo chi 'āá ch'ó'oo 'iiⁿ'yāⁿ profetas chi candéé yā nduudu yeⁿ'é Ndyuūs neené n'dai n'nuuⁿ yā yeⁿ'e chi Ndyuūs nadanguáⁿ'ai yā 'iiⁿ'yāⁿ. Ní itínguuneeⁿ yā yeⁿ'e chuū. Profetas ní 'iiⁿ'yāⁿ chi ngaⁿ'á yā yeⁿ'e chi Ndyuūs caⁿ'á yā chi téé yā ndís'tiⁿ yeⁿ'e chi n'dai taavi ca yeⁿ'é yā. ¹¹Ní profetas ní neⁿ'é yā deenu yā yeⁿ'e tiempo 'cūū ni táacā cuuvi ch'ó'oo yeⁿ'e tiempo 'cūū taachi Cristo 'cūeeⁿ yā cuuvi ní cūcheé yā. Ní cuayiivi cuchii chi dævé ngii yeⁿ'é Cristo caati Espíritu yeⁿ'e Cristo chi canee ndúúcu profetas 'āá ch'iⁿ'í yā profetas yeⁿ'e chuū. ¹²Naati

Ndyuūs ch'i'í yā profetas chi tiempo ye'e Cristo ye'e chi nga'a yā nguéé cuuvi n'diichí profetas naati ndís'tií ní 'āā n'diichí nī. Profetas nga'á yā nduudu cuaacu ye'e chi cuchii naati ndís'tií 'āā n'giindiveé nī chi 'āā chó'oo chí'í chí ca'a yā. Ní cáāvā 'ii'yā' n chi nga'á yā ngii yā ndís'tií nduudu cuaacu chi Jesús nadanguá'ai yā 'ii'yā' ndúúcu poder ye'e Espíritu N'dai ye'é Ndyuūs. Ní Ndyuūs dichó'o yā Espíritu N'dai ye'é yā ye'e va'ai cheeti nguuvi nanáá' s'uúú'. Ní nducué'e chuū ní ángeles maá' yā ne'e yā snaa' yā dendu'u.

Ndyuūs yaa'ví yā 'ii'yā' n chi cuuvi ye'é yā ní n'daacā ca cuuví yā

¹³ Maa' ní cáāvā nducué'e chuū nadacá'ínuu' nī n'daacā ye'e chi ca'a' nī dii' nī ní 'cuēetinéé n'daacá nī. Ní cunee ngiinú nī dámaā' ye'e nducué'e chi n'dai taavi chi Señor Jesucristo ca'a' yā téé yā ndís'tií taachi ndaa yā taama vmné'ē. ¹⁴ Ndís'tií ní 'caandiveé' nī nduudu ye'é Ndyuūs ti daiya Ndyuūs ndís'tií. Ní nguéé dii' nī tan'dúúca chí dí' nī nducué'e chí ne'e maá' nī taachi 'āā cuéé n'diichí nī Ndyuūs. ¹⁵ Maa' ní 'cuēetinéé n'daacā nī chi nguéé véé nuu'ndi ye'é nī caati Ndyuūs chi yaa'ví yā ndís'tií chi cuuvi ye'é yā ndís'tií ní dēeve yā. ¹⁶ Canéé nguū' na libro ye'é Ndyuūs 'tífcā: Canéé chí dii' n'daacá nī chi dēeve nī caati 'úú, Ndyuūs, ní dēeve 'úú.

¹⁷ Nduuti chi ndís'tií ní nga'á nī chi Ndyuūs ní chiidá nī ní caacá nī Ndyuūs chi cunee yā ndís'tií, canéé chí 'cuēetinéé n'daacá nī ní 'va'á nī Ndyuūs ne'e chí cunee nī i'ye'e'dí' cūú. Ndyuūs ye'e yú 'āā daamá nūu' n'guú' yā nducyaaca 'ii'yā'. Ní n'diichí yā ca'áámá cā'aama yā tan'dúúca chí ch'ēetineé yā ndúúcu nti-i'nyu' chí dí' yā. ¹⁸ Deenú nī chí Ndyuūs nadanguá'ai yā ndís'tií ye'e vida chí nguéé n'daacā chí sta'á nī ye'e 'ii'yā' n ye'e ndaata ye'e nī. Ní n'dáácā ca deenú

nī chí nadí'vē ye'e chí nadanguá'ai yā ndís'tií. Nguéé cuái yā ndúúcu dendu'u chí nchōō tan'duucā 'dí'nguāa' o 'dí'n-guēē. ¹⁹ Naati Ndyuūs nadanguá'ai yā ndís'tií ndúúcu yuúú' chí ya'ai chí'í'vē ti yuúú' ye'e Cristo. Cristo ní ca'a yā maá' yā cuerpo caavā ofrenda chí 'ii'yā' n s'ee' 'caa'nú' ya 'yā. Ní Cristo mii' tan'dúúca 'áámá 'iiti cuúchí chí nguéé n'gai ti ní nguéé dē'ē vee ndí' ye'e ti, 'tífcā yā. ²⁰ Ní Ndyuūs ndēevé yā Cristo chí maá' yā cuerpo ye'é yā cuuvi ofrenda ndí' vmnáá' vmnaa' taachi 'āā cuéé din'dái yā i'ye'e'dí' cūú. Naati maa' ní nguuvi s'ee' Ndyuūs ch'i'í yā Cristo nanáá' ndís'tií ní caavā ndís'tií. ²¹ Ní cucáāvā Cristo mii' ní ndís'tií i'téenu nī Ndyuūs chí nadacué'e yā Cristo ye'e nguaa' tiná'ā. Ní Ndyuūs dich'ēeté yā Cristo ndúúcu honor. Ní ndís'tií 'āā i'téenu nī Ndyuūs ní cūnee ngiinú nī ye'e chí Ndyuūs ca'a yā chí téé yā ndís'tií chí cuuvi ye'é nī.

²² Maa' ní chí 'āā i'téenu nī nduudu cuaacu ye'é Cristo cucáāvā Espíritu N'dai ye'é Ndyuūs 'āā didēevé nī staava ye'é nī chí dine'é nī hermanos ye'e yú. Canéé chí dine'é taavi cá nī 'aama nī taama nī hermanos ndúúcu staava ye'é nī chí dēeve. ²³ Ndís'tií ní 'āā ch'i'ndiyáa' nī taama vmné'ēe nguéé ye'e 'ii'yā' ye'e i'ye'e'dí' cūú chí 'cuuvi yā naati ye'e nduudu ye'é Ndyuūs, nduudu chí canduuchi ní 'áámá cūnee cue'e daā'ma'. ²⁴ Caati canéé nguū' na libro ye'é Ndyuūs 'tífcā:

Tanducué'e 'ii'yā' ye'e i'ye'e'dí' cūú ní tan'dúúca yaātā ní tanducué'e chí n'geete ca ye'é 'ii'yā' ní tan'dúúca naāndā ye'e yaātā, 'tífcā yā. Yaātā mii' ní t'i' ní naandā mii' ní n'gee', ²⁵ naati nduudu cuaacu ye'é Ndyuūs ní 'áámá cūnee cue'e daā'ma'.

Ní nduudu cuaacú' cūú ye'e evangelio chí'í chí candéé 'ii'yā' n nanáá' ndís'tií.

2 Maa' ní cáāvā chuū diví' nī 'áámá lado nducué'e chí dí' nī chí nguéé

n'daācā ní nguéé canche'éfí nī. Ndíí nguéé caaⁿmáⁿ nī dendu^u chi nguee cuaacu. Ndíí nguéé ndúú dííⁿ nguéé nī yeⁿē taama 'iiⁿyāⁿ. Ndíí nguéé ndúú ngaⁿa nī nduudu yaadí yeⁿé 'iiⁿyāⁿ. ²Ní ndís'tií tan'dúúca chi dacua'aá chi caama 'niindiyááⁿ ní neⁿe leche, 'tíicā ndís'tií. Dííⁿ nī ní neⁿe nī leche chi nduudu n'dai yeⁿē nduudu cuaacu. Ní cuuvi cu'téenu cá nī ndúúcu nduudú 'cūú tan'dúúca dacua'aá cuuvi 'cuiitá yā ndúúcu leche n'dai. ³'Tíicā cuuvi dííⁿ nī nduuti chi cuaacu níⁿnyúⁿ n'diichíneeⁿ nī Señor Jesucristo chí n'dai yā.

Jesucristo ní tan'dúúca tuū ch'ēete chí canduuchi

⁴Ndís'tií canéé chi ndaa niiⁿnuúⁿ nī nanááⁿ Señor Jesucristo ti tan'dúúca 'áamá tuū ch'ēete chí canduuchi 'tiicá nī. 'Iiⁿyāⁿ yeⁿe iⁿyeeⁿdí 'cūú nguéé 'cuúⁿ yā tuuú miiⁿ ti nadacadíínuuⁿ yā chi nguéé dichí'vē naati Ndyuūs ndeēve yā tuū miiⁿ chi yaⁿai chí'vē chi Cristo. ⁵Ní ndís'tií ntúúⁿ tan'dúúca tuū canduuchi 'tiicá nī ti Ndyuūs 'āā teé yā ndís'tií vida ngai. Ca'a nī lugar Ndyuūs chí cuta'á yā vida yeⁿe ndís'tií ní din'dái yā yeⁿe cuerpo yeⁿe ndís'tií 'áamá yaācū yeⁿe Espíritu N'dai yeⁿé Ndyuūs. Ní ndís'tií canéé chi dííⁿ nī ntiiⁿnyuⁿ yeⁿe chi-iduú yeⁿe yaacú 'cūú ní ca'á nī ofrendas nanááⁿ Ndyuūs ndúúcu chi duuchi Jesucristo, ofrendas chi Ndyuūs cuuvi 'cuáaⁿ yā. ⁶Ní 'tíicā canéé nguūⁿ na libro yeⁿé Ndyuūs cáāvā chuū:

Cuín'diichí nī. 'Úú Ndyuūs cu'neéⁿ yāáⁿ Sión 'áamá tuū ch'ēete yeⁿe cimientu yeⁿe esquina yeⁿe yaācū. Tuū miiⁿ n'deēvé ní yaⁿai chí'vē. 'Iiⁿyāⁿ chi i'téenu yā Señor yeⁿe yú chí tuū ch'ēete miiⁿ nguéé cuuvi 'cuinaáⁿ yā yeⁿe Señor yeⁿe yú.

⁷Ní tuū miiⁿ ní neené véé chii'vē cucáāvā ndis'tií chí i'téenu nī Cristo naati nguéé 'tíicā tuū miiⁿ nanááⁿ 'iiⁿyāⁿ chi

nguéé i'téenu yā. 'Tíicā canéé nguūⁿ na libro yeⁿé Ndyuūs:

Tuū míⁿ nūⁿ chi 'iiⁿyāⁿ chí din'dái yā yaācū nguéé 'cūúⁿ yā ti nada-cadíínuuⁿ yā chí nguéé dichí'vē. Tuuú 'cūú nūⁿ ní tuū cheete yeⁿé cimientu yeⁿe esquina.

⁸Ní canéé nguūⁿ na libro yeⁿé Ndyuūs táamá chí 'tíicā:

Tuuú 'cūú ní dííⁿ chí cuundí ca'a 'iiⁿyāⁿ nī tuū míⁿ chíiⁿ chí cundeeve 'iiⁿyāⁿ. Cuaacu chí indéé ca'a yā ti nguéé n'giindiveéⁿ yā nduudu cuaacu ní Ndyuūs dííⁿ yā chí 'tíicā canee chí dííⁿ 'iiⁿyāⁿ s'eeⁿ.

Yeⁿe 'iiⁿyāⁿ chí yeⁿe Ndyuūs

⁹Ndís'tií ní yeⁿe 'iiⁿyāⁿ chí Ndyuūs ndeēvé yā. Ndís'tií ní chiiduú yeⁿe Ndyuūs chí Rey. Ndís'tií ní yeⁿe ndaata deēvé. Ndís'tií ní yeⁿe Ndyuūs ndís'tií. 'Tíicā dííⁿ Ndyuūs caati ndís'tií cuuvi caaⁿmáⁿ nī chí ch'ēete n'dai chí dííⁿ Ndyuūs. Ndyuūs n'gai yā ndís'tií yeⁿe na maaiⁿ ní ndaá nī nanááⁿ yā ná déévé chí n'deēvé n'dai yeⁿe maáⁿ yā. ¹⁰Ndís'tií ní tiempo chí chó'oo ní nguéé yeⁿe Ndyuūs ndís'tií naati maaⁿ ní 'tiicá nī. Tiempo chí chó'oo Ndyuūs nguéé ya'ai 'iinú yā ndís'tií naati maaⁿ ní 'tíicā déenu nī chí Ndyuūs ya'ai 'iinú yā ndís'tií ti yeⁿé Ndyuūs ndís'tií.

'Iiⁿyāⁿ chí 'áamá dííⁿ yā ntiiⁿnyuⁿ yeⁿe Ndyuūs

¹¹Ndís'tií hermanos yeⁿé chí neⁿé taavi, 'úú idi'cuiitú ndís'tií chí tan'dúúca 'iiⁿyāⁿ chí snúúⁿ yúúni 'tiicá nī neⁿe chí snéé nī iⁿyeeⁿdí 'cūú ndís'tií. Nguéé dííⁿ nī nuuⁿndi tan'dúúca chí neⁿe cuerpo yeⁿé nī chí dííⁿ nī caati chíiⁿ chí neⁿe cuerpo yeⁿé nī ní cueⁿe daāⁿmaⁿ contra yeⁿē chí neⁿe staava yeⁿé nī. ¹²Cuēet-inéé n'daaca nī nguaaⁿ 'iiⁿyāⁿ chí nguéé i'téenu yā nduudu cuaacu yeⁿé Ndyuūs. Ní 'áará chí ngaⁿ'á 'iiⁿyāⁿ s'eeⁿ contra

yeⁿe ndís'tiī tan'dúúca chi ndís'tiī ní 'iiⁿyāⁿ chi nguéé n'daacā, 'iiⁿyāⁿ s'eeⁿ ní cuuvi snaaⁿ yā ntiīⁿnyuⁿ chi n'daacā ca chi idifⁿ nī. Ní cuuvi 'caaⁿmáⁿ yā chi ch'ēete ca Ndyuūs nguuvi chi Ndyuūs ndaa yā taama vmnéⁿēe ní nnguaī yā cuenta yeⁿe nuūⁿndi yeⁿe yú.

¹³ Canéé chi diīⁿ nī tan'dúúca chi ngaⁿā 'iiⁿntyéⁿē 'āā du'ú nuūⁿ chi véé nduuti chi saⁿā rey o chí 'iiⁿntyéⁿē ch'ēete. Ní n'daacā canee nī nanáaⁿ yā caavā chi ndís'tiī ní yeⁿē Señor Ndyuūs yeⁿe yú ndís'tiī. ¹⁴ Ní díⁿ nī chi ngaⁿā 'iiⁿyāⁿ 'iiⁿntyéⁿē chi Ndyuūs s'neéⁿ yā miiⁿ caati 'iiⁿntyéⁿē cuuvi ca'a yā castigo 'iiⁿyāⁿ chi nguéé n'daacā idifⁿ yā ní cuuvi caaⁿmáⁿ yā chi ch'ēeté 'iiⁿyāⁿ chi n'daacā idifⁿ yā. ¹⁵ Ti chuū ní chiiⁿ chi Ndyuūs neⁿé yā chi díⁿ nī. Ní cáāvā chi ndís'tiī din'daacā nī, 'iiⁿyāⁿ chi zonzo yā ní nguéé deenu yā nguéé cuuvi caaⁿmáⁿ yā de'ē vee contra yeⁿe ndís'tiī.

¹⁶ Ní 'cuētinée nī tan'dúúca 'iiⁿyāⁿ chi canéé libre yā. Nguéé díⁿ nī chiiⁿ chi nguēe n'daacā cucáāvā chi canéé libre nī, ní ngaⁿā nī chi cuuvi díⁿ nī 'túúca. N'daacā ca chi 'cuētinée n'daacā nī ti ndís'tiī 'iiⁿyāⁿ chi 'áámá canee chi dichí'vē Ndyuūs. ¹⁷ Ní diīⁿ nī honrar nducyaaca 'iiⁿyāⁿ. Ní dinéⁿe nī nducyaaca hermanos yeⁿe yú. 'Va'á nī Ndyuūs ní díⁿ nī honrar emperador chi 'iiⁿntyéⁿē.

Yeⁿe chi Cristo n'geenu yā ngii chi ejemplo yeⁿe yú

¹⁸ Ndís'tiī 'iiⁿyāⁿ criados chi chí'vē, díⁿ nī respetar patrón yeⁿé nī ní díⁿ nī tan'dúúca chi ngaⁿā patrón yeⁿe nī, nguéé dámaaⁿ patrón yeⁿé nī chi din'daacā ní n'dai yā naati patrón yeⁿé nī chi nguéé din'daacā yā ní taaⁿ yā. ¹⁹ Caati n'daacā ca chi cuchee nī taachi n'geenu nī ngii cáāvā cosas chi nguéé n'daacā chi diīⁿ 'iiⁿyāⁿ chi contra yeⁿé nī. Ní cuchee nī ti deenu nī chi n'daacā

idiiⁿ nī. 'Tíicā Ndyuūs neⁿe yā chi diīⁿ nī. ²⁰ ¿De'ē ch'ēete chuū nduuti chi n'geenu nī ngii ti véé nuuⁿndi yeⁿé nī nī 'tíicā castigo yeⁿé nī, ní ichéé nī? Nguéé ch'ēete chuū. Naati nduuti chi n'geenu nī ngii ti n'daacā idifⁿ nī nī ngiinū ngiinū cuchee nī tuuⁿmi ní Ndyuūs nadi'viicú yā ndís'tiī.

²¹ Ní yaa'ví yā ndís'tiī caavā chi díⁿ nī 'tíicā. Cristo 'āā ch'eenú yā chii cáāvā s'uúúⁿ ní s'neéⁿ yā 'áámá ejemplo yeⁿe yú. Ní s'uúúⁿ canéé chi 'tíicā nuūⁿ diīⁿ yú tan'dúúca chi díⁿ yā. ²² Cristo miiⁿ nguéé díⁿ yā mar 'áámá chuundi 'liiⁿ nuuⁿndi ní nguéé chinnche'éi yā mar 'áámá. ²³ Ní taachí 'iiⁿyāⁿ s'eeⁿ ngaⁿā taáⁿ yā yeⁿe Cristo, Cristo miiⁿ nguéé ngaⁿā taáⁿ yā yeⁿe yā. Ní taachi 'iiⁿyāⁿ s'eeⁿ díⁿ yā chi Cristo ya'ai ch'eenú yā chii nguéé caⁿā cúnnaa yā yeⁿe yā. Naati cūnee ngiinú yā nanááⁿ Ndyuūs chi cuaacu chí Ndyuūs caⁿā yā n'diichi yā nuuⁿndi yeⁿe 'iiⁿyāⁿ s'eeⁿ. Ní Ndyuūs díⁿ yā cosa chi cuaacu. ²⁴ Cristo maáⁿ yā candee yā nuuⁿndi yeⁿe yú na cuerpo yeⁿe maáⁿ yā taachi ch'ii yā na cruz. Ní 'íicú s'uúúⁿ ní cuuvi diīⁿ yú tan'dúúca chi n'dii yú yeⁿe nuuⁿndi yeⁿe yú. Ní maaⁿ ní 'cuētinée yú yeⁿe nducuéⁿē chi n'daacā. Ní 'āā nduuvá yeⁿē yú yeⁿe castigo yeⁿe nuuⁿndi yeⁿe yú cáāvā chi Cristo naca'ái yā cáāvā nuuⁿndi yeⁿe yú. ²⁵ Tiempo chi chó'oo s'uúúⁿ ní tan'dúúca 'iiti cuūchī chi nindai ti 'tíicā s'uúúⁿ naati maaⁿ ní ndaa yú nanááⁿ Cristo chi candee yā cuidado s'uúúⁿ tan'duucā 'áámá pastor. Cristo ní candee yā cuidado alma yeⁿe yú.

Yeⁿé 'iiⁿyāⁿ chí níndívaacu chi canéé chí 'caandiveéⁿ yā yeⁿē víí

3 'Tiicā ntūūⁿ ndís'tiī n'daataá chi níndívaacu tá, canéé chi díⁿ nī chi ngaⁿā isaⁿā yeⁿé nī. Ní nduuti chi isaⁿā yeⁿé nī nguéé it'éenu sa Cristo, cuuvi cu'téenu sa Cristo cáāvā n'daataá yeⁿe sa tí n'daacā n'geetinée tá. 'Áará chi nguéé ngaⁿā ta mar 'áámá nduudu yeⁿe Cristo

tuu'mi ní cuuvi cu'téenu sa Cristo. ²Caati n'diichi sa chi n'daataá yéⁿe sa yeⁿe nducuéⁿe chí idiiⁿ tá ní n'daacā ní diiⁿ tá respetar isaⁿā tá. ³Ní n'daataá chi n'dai tá chí véé isaⁿā yeⁿe tá nguéé canéé chí sta'a tá cosas ní s'nuuⁿ tá cosas miiⁿ na cuerpo yeⁿe tá chí diiⁿ chi n'dævæe maaⁿ tá. Ní nguéé neené n'dævæé diiⁿ tá tiiⁿ tá o sta'a tá cosas yeⁿe 'diiⁿnguāāⁿ o catecai chí ya'ai chíf'vè chí snee tá chí cuuvi dich'æté maaⁿ tá táⁿā. ⁴Naati n'dævæé chí yeⁿe tá canee chí cūnee yeⁿe maaⁿ tá ní canéé chí n'dævæe tá ndúúcu espíritu yeⁿe tá chí ndiicúúⁿ. Ní canee 'diiiⁿ tá. Chuū ní dichí'vè nanááⁿ Ndyuūs. ⁵Caati tiempo chí ch'óo 'tíicā idiiⁿ n'daataa s'eeⁿ chí yeⁿe Ndyuūs, n'daataa chí i'téenu ca Ndyuūs ní s'teenu tá chí ngaⁿā isaⁿā yeⁿe tá. ⁶Ní táⁿā Sara 'tiicā ntúūⁿ diiⁿ tá. S'teenu tá isaⁿā yeⁿe tá chí nguuvi Abraham. Ní ngaⁿā tá isaⁿā yeⁿe tá: N'dii ní señor yeⁿé. Maaⁿ ní ndís'tii cuuvi diiⁿ ní tan'dúúca chí ndís'tii daiya Sara ndís'tii nduuti chí n'daacā idiiⁿ ní ní nguéé 'va'á ní yeⁿe mar 'áámá.

⁷Ní 'tiicā ntúūⁿ ndís'tii saⁿā chí véé n'daataa yeⁿé ní. 'Cuætinéé ní ndúúcu tá ní diiⁿ ní respetar n'daataa yeⁿé ní. Ní diiⁿ ní honrar n'daataa yeⁿe ní tan'dúúca chí deenu ní chí n'daacā tí n'daataa mífⁿ nguéé véé fuerzas yeⁿe tá tan'dúúca 'áámá saⁿā. Ní 'tiicā ntúūⁿ Ndyuūs yeⁿe vaadi n'dai yeⁿé yā ca'a yā vida yeⁿe tá daama daama tan'dúúca chí tee yā ndís'tii saⁿā. Ní ndís'tii saⁿā diiⁿ ní 'túúca ní nguéé du'ū væe chí di'vaachí ndís'tii yeⁿe chí diiⁿ ní taachi ngaⁿangua'á ní.

**Yeⁿe chí n'geenu yú ngii
caavā chí n'daacā idiiⁿ yú.**

⁸Ní yeⁿe nducuéⁿe canéé chí dáámá nūuⁿ nadacadínuuⁿ ní nducyaaca ndís'tii ní dáámá nūuⁿ nadacadínuuⁿ ní na staava yeⁿé ní. Dinéⁿe ní 'aama ní taama ní tan'dúúca chí cuáácú chí ví

ní. Ní ya'ai 'iinú ní 'aamá ní taama ní. Ní diiⁿ chí ndiicúúⁿ ní 'aamá ní ndúúcu taama ní. ⁹Taachi 'iiⁿyāⁿ nguéé n'daacā idiiⁿ yā ndúúcu ní nguéé idiiⁿ ní chí nguéé ndaacā ndúúcu yā. Ní taachi 'iiⁿyāⁿ nguéé n'daacā caaⁿmáⁿ yā yeⁿé ní nguéé cunncāā caaⁿmáⁿ ní yeⁿe yā. Ndaacā ca diiⁿ ní ní caaⁿmáⁿ ní ndúúcu 'iiⁿyāⁿ s'tii ní di'viicú ní 'iiⁿyāⁿ s'tii. 'Tíicā Ndyuūs cuuvi di'viicú yā ndís'tii. Ndyuūs yaa'ví yā ndís'tii chí cuuvi yeⁿé yā tí diiⁿ yā 'tíicā nduucú ní. ¹⁰Canéé nguūⁿ na libro yeⁿé Ndyuūs 'tíicā:

'Iiⁿyāⁿ chí neⁿe chí yeenú yā ndúúcu vida yeⁿé yā ní neⁿé yā chí véé nduuyu yeⁿé yā, 'āā ntéé canéé chí caaⁿmáⁿ yā dendu'ū chí nguéé n'daacā. Ní nguéé caaⁿmáⁿ yā nduudu yaadi. ¹¹Canéé chí divi yā yeⁿe nducueⁿe chí nguéé n'daacā ní dá-maāⁿ diiⁿ yā chí n'daacā. Canéé chí neⁿé yā vaadi 'diiiⁿ ní diiⁿ yā nducueⁿe chí véé vaadi 'diiiⁿ yeⁿe yā. ¹²Señor Ndyuūs yeⁿe yú maáⁿ yā 'iiⁿyāⁿ chí din'daacá yā. Ní cueⁿe daaⁿmaⁿ n'giindiveéⁿ yā chí 'iiⁿyāⁿ s'eeⁿ ngaⁿangua'á yā. Ní Señor yeⁿe yú ní contra yeⁿe 'iiⁿyāⁿ chí nguéé n'daacā idiiⁿ yā.

¹³¿Du'ú 'iiⁿyāⁿ chí nuucá'ai yā ndís'tii nduuti chí ndís'tii nducueⁿe tiempo diiⁿ ní chí n'daacā? Nguéé diiⁿ yā 'tíicā. ¹⁴Ní nduuti chí ndís'tii n'geenu ní ngii cáavā chí n'daacā idiiⁿ ní tuu'mi ní yeenú ní. Nguéé diiⁿ 'va'a ní yeⁿe mar 'áámá 'iiⁿyāⁿ ní nguéé di'yáá ní cuuvi. ¹⁵Canéé chí dich'æté ní Cristo na staava yeⁿé ní ní 'cuaáⁿ ní lugar Cristo chí 'iiví ní. Ní canéé listo ní chí cuuvi nan'guæcútaⁿá ní 'āā du'ú nūuⁿ 'iiⁿyāⁿ chí intiinguuneeⁿ ndís'tii 'tíicā: Nds'tii de'è cáavā chí cūnee ngíínú ní yeⁿe Ndyuūs yeⁿé ní. Ní taachi nan'guæcútaⁿá ní yeⁿe yā diiⁿ ní chí ndiicúúⁿ n'dai ní. Ní diiⁿ ní respetar 'iiⁿyāⁿ. ¹⁶'Cuætinéé n'daacā ní chí nguéé véé chí nadacadínuuⁿ ní yeⁿe chí nguéé n'daacā

chi dífⁿ nī. Ní 'iiⁿyāⁿ chi cunncaā ngaⁿa yā yeⁿe chi n'daacā chi dífⁿ nī caavā chi i'téenu nī Cristo, cuuvi 'cuināaⁿ yā cáávā chi ngaⁿá yā. ¹⁷N'dáácā ca chi 'cueenu yú cuuvi cáávā cosas chi n'daacā idiiⁿ yú nduuti chi Ndyuūs neⁿé yā 'tíicā, nguéé ti cáávā cosas chi nguéé n'daacā idiiⁿ yú.

¹⁸Cristo miiⁿ maáⁿ yā ch'eenú yā chií chi ch'ií yā cáávā nuuⁿndi yeⁿe yú ní 'áámá vmnéⁿéé ch'ií Cristo cáávā nuuⁿndi yeⁿe nducyaaca 'iiⁿyāⁿ, ní nguéé nuuⁿndi yeⁿé yā. Ní ch'ií yā caati cuuvi candéé ya s'uúúⁿ nanááⁿ Ndyuūs. Cuáácú ch'ií cuerpo yeⁿé yā naati espíritu yeⁿé yā nduuchi. ¹⁹Ní espíritu yeⁿe Cristo cuayiivi chi ch'ií yā cheⁿe yā ní caⁿa yā nduudu cuaacu yeⁿé Ndyuūs nanááⁿ espíritu s'eeⁿ yeⁿe 'iiⁿyāⁿ s'eeⁿ chi n'dií. Ní espíritu s'eeⁿ ní preso yā na lugar yeⁿe espíritu s'eeⁿ. ²⁰Espíritu s'eeⁿ ní yeⁿe 'iiⁿyāⁿ chi nguéé ch'iindiveéⁿ yā Ndyuūs 'áámá tiempo chi 'āā chó'ōo. Ní Ndyuūs canee ngíínu yā ní 'diiíⁿ canéé yā chi 'iiⁿyāⁿ s'eeⁿ ndaacadaamí yā yeⁿe nuuⁿndi yeⁿe yā 'naaⁿ tiempo chi saⁿá Noé din'dái sa 'áámá arco chí barco ch'ete. Ní cheeti barco miiⁿ n'duuví 'iiⁿyāⁿ, dámaāⁿ niní yā, ní nguaⁿai yā yeⁿe nuuⁿniⁿ. ²¹Ní nuuⁿniⁿ miiⁿ ní tan'dúúicā nuuⁿniⁿ chi ngeedínuuⁿniⁿ yú chi nanguaⁿāi s'uúúⁿ. "Tíicā nuuⁿniⁿ miiⁿ". Taachi ngeedínuuⁿniⁿ yú nguéé caavā chi naaⁿnu cuerpo yeⁿe yú naati cáávā chi 'áámá compromiso yeⁿe yú nanááⁿ Ndyuūs. Ní n'daacā diiⁿ yú chuū ndúúicū n'úúⁿmáⁿ staava yeⁿe yú. Ní Ndyuūs nadanguáⁿai yā s'uúúⁿ chi i'teenu yú Cristo cáávā Cristo nducueeⁿ yā yeⁿe nguaaⁿ tináⁿā. ²²Ní Cristo miiⁿ cunaⁿá yā na va'ai cheeti nguuví ní maaⁿ canee yā lado yeⁿe honor yeⁿe Ndyuūs chi lado tá cuaacu. Ní Cristo ngaⁿa ntiⁿnyúⁿ yā yeⁿé ángeles ndúúicū 'iiⁿntyéⁿé ní yeⁿe poderes chi véé.

Canee chi dichí've yú Ndyuūs tan'dúúicā chi Ndyuūs tee yā fuerzas s'uúúⁿ

4 Tan'dúúicā Cristo ch'eenú yā chií ní dífⁿ yā sentir na cuerpo yeⁿé yā 'tiicá ntúúⁿ ndíⁿstii canéé chi cutaⁿá ní fuerzas yeⁿé ní cáávā tiempo chi caⁿá ní 'cueenú ní cuuvi. Maaⁿ ní 'iiⁿyāⁿ s'eeⁿ chí ch'eenú yā chií ní dífⁿ yā sentir na cuerpo yeⁿé yā 'āā ntéé neⁿé yā dinuuⁿndi yā. ²Ní ndíⁿ maaⁿ ndíⁿstii canee chi dífⁿ ní tanducueⁿé chi neⁿe Ndyuūs chi dífⁿ ní tanducueⁿé nguuví yeⁿe ní. Ní nguéé dífⁿ ní tan'dúúicā chi maaⁿ cuerpo yeⁿé ní neⁿe chi dífⁿ ní. ³Tiempo chi 'āā chó'ōo ní diiⁿ yú tan'dúúicā 'iiⁿyāⁿ chi nguéé yeⁿe ndaata Israel chi nguéé i'téenu yā Ndyuūs. Tiempo miiⁿ ní diiⁿ yú cosas chi nguéé n'daacā. Ní diiⁿ yú nuuⁿndi tan'dúúicā chi neⁿe cuerpo yeⁿe yú chi diiⁿ yú. Ní 'cuú'vi yú ní cho'o nee che'e yú taachi véé fiesta yeⁿe chí che'e yú. Ní cu'u ca yú vino. Ní s'teenu yú santo s'eeⁿ chí ídolo s'eeⁿ. ⁴'Iiⁿyāⁿ s'eeⁿ chí nguéé i'téenu yā Cristo, ¿De'e cáávā chí nadacadíínuuⁿ yā chí ndíⁿstii nguéé nduuvidaamá ní ndúúicu yā, ní nguéé idíⁿ ní ndúúicu yā cosas chí nguéé n'daacā? Ní chíⁿ chí 'iiⁿyāⁿ s'eeⁿ ní cunncaā ngaⁿa yā yeⁿé ní. ⁵'Iiⁿyāⁿ s'eeⁿ canéé chí nga'a yā cuenta yeⁿe vida yeⁿe maáⁿ yā nanááⁿ Cristo chí dífⁿ yā juzgar nducyaaca 'iiⁿyāⁿ, 'iiⁿyāⁿ chí canduuchi ndúúicū 'iiⁿyāⁿ chí n'díⁿ. ⁶Ní cáávā chuū Cristo ngaⁿá yā nduudu cuaacu yeⁿe maáⁿ yā nanááⁿ espíritus yeⁿe 'iiⁿyāⁿ chí n'díⁿ caati espíritus yeⁿé yā cuuvi canduuchi tan'dúúicā chí Ndyuūs canduuchí yā. Ní Ndyuūs n'diichí yā nuuⁿndi yeⁿé 'iiⁿyāⁿ s'eeⁿ taachi ch'etinee yā iⁿ'yeeⁿdí'cūú tan'dúúicā chí n'diichí yā nuuⁿndi yeⁿe nducyáácá 'iiⁿyāⁿ chí snee yā iⁿ'yeeⁿdi'cūú.

⁷Áā cháā snee niiⁿnuúⁿ nguuví chí 'cuiinu tanducueⁿé dendu'ú. Ní cáávā

chuū 'cuɛtinee n'daaca nī ní 'āā de'é ora nūuⁿ ní cuuvi caaⁿmaⁿngua'á nī. ⁸Ní yeⁿē tanducuéⁿē dineⁿe cá nī 'aama nī taama nī caati taachi dineⁿe cá nī tuu'mi ní inadich'ɛcú nī nuuⁿndi yeⁿē 'áámá nī taama nī. ⁹'Cuaáⁿ nī 'áámá nī taama nī na vaacu nī ní nguéé 'cuɛcu cheendí nī. ¹⁰Ní ca'áámá ca'aama nī ní díⁿ nī servir taamá nī ndúúcu ntiⁿnyuⁿ chi Ndyuūs itée yā chi díⁿ nī. Ní canéé chi diiⁿ n'daaca nī ntiⁿnyuⁿ yeⁿé nī chi Ndyuūs itée yā ca'aama ca'aamá nī ti Ndyuūs itée yā ndís'tiī nducuéⁿē chi n'dai taavi yeⁿe yā. ¹¹Nduuti chi 'áámá nī candɛɛ nī nduudu cuaacu canéé chí ngaⁿá yā nduudu cuaacu yeⁿé Ndyuūs. Nduuti chi 'aamá nī díⁿ nī ntiⁿnyuⁿ yeⁿe yaācū canéé chi díⁿ yā ndúúcu nducuéⁿē fuerzas yeⁿé yā chi Ndyuūs ca'a yā 'iiⁿyāⁿ miiⁿ. Ní yeⁿe tanducuéⁿē chi ndís'tiī díⁿ nī canéé chi díⁿ nī chi cuuvi dich'ɛeté nī Ndyuūs cucáāvā Jesucristo. Ní yeⁿé Ndyuūs chí ngí deɛve yeⁿe yā ní vɛɛ poder yeⁿé yā tanducuéⁿē tiempo. 'Tííca yā.

Canéé chi n'geenu yú ngii ti yeⁿe Cristo s'uuúⁿ

¹²Ndís'tiī hermanos chi neⁿé taavi nguéé nadicadínuuⁿ nī chi cosa chi díftuu nguéé canéé chí chó'oo yeⁿé nī taachi 'iiⁿyāⁿ n'diichineeⁿ cá yā ndís'tiī chi ya'ai n'geenu nī ngii ti canéé chí chó'oo yeⁿé nī 'tííca. ¹³Naati canéé chí cuuvi yeenú nī taachí n'geenu nī ngii tan'dúúca Cristo ch'eenú yā chii. Ní cuayiivi cuuvi yeenu cá nī taachi Cristo ndaa yā taama vmnéⁿēe ní 'cuuⁿmíⁿ yā chi ch'ɛete n'dai ngiichí yā tan'dúúca deɛve ngiichí ch'ɛete. ¹⁴Nduuti chi 'iiⁿyāⁿ n'gaa'vá yā ndúúcu nī cucáāvā chi i'téenu nī Cristo tuu'mi ní yeenú nī. Espíritu N'dai yeⁿé Ndyuūs chí deɛvé ngii canéé ndúúcu ndís'tiī. 'Áará chí 'iiⁿyāⁿ s'eeⁿ cunncaā ngaⁿa yā yeⁿe Cristo, ndís'tiī ní díⁿ nī honrar Cristo. ¹⁵Ní nduuti chi 'áámá chéé

ndís'tiī n'geenu nī ngii 'úú nguéé neⁿé chi 'cuenú nī cuuvi caati ch'iiⁿnúⁿ nī 'iiⁿyāⁿ o ididuucú nī o nguéé díⁿ nī tan'dúúca chí ngaⁿá ley yeⁿé Ndyuūs chí ch'ɛete ca. ¹⁶Ní nduuti chí 'áámá cheɛ ndís'tiī n'geenu nī ngii cáāvā chí i'téenu nī Cristo nguéé cuuvi 'cuinaáⁿ nī naati canee chí dich'ɛeté nī Ndyuūs caati 'iiⁿyāⁿ ngaⁿa yā chí díⁿ ní yeⁿe Cristo dii.

¹⁷'Āā ndaa tiempo chí Cristo caⁿá yā n'diichi yā nuuⁿndi yeⁿe 'iiⁿyāⁿ ní vmnááⁿ vmnaaⁿ caⁿá yā n'diichí yā nuuⁿndi yeⁿe 'iiⁿyāⁿ chí i'téenu yā 'iiⁿyāⁿ. Ní nduuti chí vmnááⁿ vmnaaⁿ n'diichí yā nuuⁿndi yeⁿe yú, ¿táácā cuuvi yeⁿé 'iiⁿyāⁿ chí nguéé i'téenu yā nduudu cuaacu yeⁿé Ndyuūs cuayiivi taachi n'diichí Cristo nuuⁿndi yeⁿe yā? ¹⁸Ní nduuti chí ngíⁿi chí 'iiⁿyāⁿ chí n'dai cuuvi nanguaⁿai yā, ¿d'éɛ cuuví ndúúcu 'iiⁿyāⁿ chí nguéé n'daacā díⁿ yā ní ndúúcu 'iiⁿyāⁿ chí dinuuⁿndí yā ní nguéé i'téenu yā? ¹⁹Ní 'tííca canee chí diiⁿ yú. Taachi n'geenu yú ngii caavā chí Ndyuūs neⁿé yā chí diiⁿ yú 'tííca, canéé chí diiⁿ yú nducuéⁿē chí n'daacā. Ní canéé chí nga'a yú vida yeⁿe yú na ta'a Ndyuūs caati Ndyuūs din'dái yā s'uuúⁿ ní 'indeɛ yā cuidado s'uuúⁿ. Ndyuūs ní díⁿ yā chíⁿ chí ngaⁿa yā chí caⁿa yā diiⁿ yā.

Yeⁿé 'iiⁿyāⁿ chí i'téenu yā Ndyuūs

5 'Úú Pedro ca'á consejo 'iiⁿntyéⁿē yeⁿe yaācū chí snéé nguaaⁿ ndís'tiī. 'Úú 'tiicá ntúūⁿ 'iiⁿntyéⁿē 'úú. 'Úú ngaⁿá yeⁿe Cristo tan'dúúca chí ch'eenú yā chí ti n'diichí nduucú nduutinaáⁿ maáⁿ. Ní 'tiicá ntúūⁿ véé parte yeⁿé vaadi deɛve ngii chí Ndyuūs 'cuuⁿmíⁿ yā s'uuúⁿ cuayiivi. ²Ndís'tiī 'iiⁿntyéⁿē yeⁿe yaācū, idiíⁿ nī ntiⁿnyuⁿ yeⁿé nī tan'dúúca 'áámá pastor chí indeɛ yā cuidado yeⁿe 'iiti cuūchī. 'Tííca díⁿ nī ndúúcu 'iiⁿyāⁿ chí yeⁿé Ndyuūs chí caⁿá yā yaācū naachi ndís'tiī ní 'iiⁿntyéⁿē. Nguéé díⁿ nī ntiⁿnyuⁿ yeⁿe nī chí canéé chí díⁿ nī naati

diíⁿ nī ti maáⁿ nī neⁿe nī diiⁿ nī caati 'tíicā neⁿe Ndyuūs. Nguéé diíⁿ nī caavā chi cuta'á nī tuūmī naati diíⁿ nī ndúúcu nuuⁿmaⁿ staava yeⁿ'é nī chi n'dai. ³Nguéé diíⁿ nī ndúúcu 'iiⁿyāⁿ chi maaⁿ cuidado yeⁿ'é nī tan'dúúca chi ndís'tiī ní 'iiví yeⁿ'é yā naati 'cuētinéé n'daacá nī níscú 'iiⁿyāⁿ cuuvi n'diichí yā ndís'tiī ní diíⁿ yā tan'dúúca chi ndís'tiī diíⁿ nī. ⁴Ní 'íicú taachi ndaa Jesucristo chi 'iiⁿyāⁿ chí ndíí tiiⁿ chí ícandē yā cuidado yeⁿ'e 'iiⁿyāⁿ yeⁿ'é yā tan'dúúca 'áamá pastor chi ndii tiiⁿ chí ícandē yā cuidado 'iiti yeⁿ'é yā, tuuⁿmi ní ndís'tiī cuuvi cuta'á nī 'áamá corona chi nguéé 'cuīnu dēevé yeⁿ'ē. Nguéé corona yeⁿ'e yaātā chi ituuvíí.

⁵'Tiicá ntúūⁿ ndís'tiī saⁿ'ā da'caiyāā canéé chí diíⁿ nī tan'dúúca chi ngaⁿ'a 'iiⁿntyēⁿē yeⁿ'e yaācū. Nducyaa ca nī canéé chí ndiicuuⁿ nī ní cunnee nī 'aama nī taama nī caati canéé nguūⁿ na libro yeⁿ'é Ndyuūs 'tíicā:

Ndyuūs nguéé neⁿ'e yā 'iiⁿyāⁿ chi nacadiīnuuⁿ yā chi maáⁿ yā ch'ēete yā naati ca'á yā nducuéⁿē chi n'dai yeⁿ'e yā 'iiⁿyāⁿ chi ndiicúúⁿ.

⁶Maaⁿ ní nducyaaca ndís'tiī ndiicúúⁿ n'dai 'cuētinéé nī maaⁿ poder yeⁿ'é Ndyuūs ti Ndyuūs cuuvi dich'ēetē yā ndís'tiī tiempo chi neⁿ'é yā. ⁷Ca'á nī nducueⁿē cuidado chi díftūu yeⁿ'e nī na ta'a Cristo caati Cristo candéé yā cuidado yeⁿ'e ndís'tiī.

⁸Canéé listo nī ní nguéé 'cuētiyaadú nī. Cundéé nī cuidado chi n'daacā 'cuētinéé nī ti yááⁿ'nguiniūⁿ miiⁿ chí contra yeⁿ'e nī chíicá sá ní n'diichi sa ndii 'muuⁿ ní ndii miiⁿ. Ní tan'dúúca 'áamá 'yááⁿyāⁿ cuá'áá n'gai tī ní cachiicá tī ní i'nuúⁿ tī du'u chi cuuvi che'é tī 'tíicā diiⁿ yááⁿ'nguiniūⁿ miiⁿ. ⁹Nguéé ca'a nī lugar yááⁿ'nguiniúⁿ 'cūū naati 'áamá cūnee nī

ndúúcu chi i'téenu nī. Ní déenu nī chi 'āā daamá nūuⁿ n'geenu yú ngii tan'dúúca nducyaaca hermanos chi s'néeⁿ yā na núúⁿmaⁿ íⁿ'yeeⁿdī ti i'téenu yā Cristo. ¹⁰Ní cuayiivi chi ch'eenú nī chiī duuⁿ'vi tiempo nūuⁿ tuuⁿ'mi ní Ndyuūs diíⁿ yā chi ndēeve canéé vida yeⁿ'e nī. Ní diituú canéé nī ndúúcu chi i'téenu nī Ndyuūs. Ní Ndyuūs ca'á yā fuerzas yeⁿ'e nī ní diíⁿ yā chi seguro canéé nī ndúúcu chi i'téenu nī. Maaⁿ Ndyuūs miiⁿ ní teé yā nducuéⁿē chi n'dai. Ní maáⁿ yā yaa'ví yā s'uuúⁿ chi cuuvi yeⁿ'é yā s'uuúⁿ cáávā chi véé parte yeⁿ'e yú ndúúcu dēeve ngii ch'ēete yeⁿ'é yā caati s'uuúⁿ ní yeⁿ'e Cristo s'uuúⁿ. ¹¹Caaⁿ'maⁿ yú chi Ndyuūs ní ch'ēete n'dai yā ní yeⁿ'é yā véé nducuéⁿē poder chi véé ní cueⁿ'e daāⁿ'maⁿ cueⁿ'e daāⁿ'maⁿ 'tíicā.

'Cuīnu carta miiⁿ ní yaa'ví yā 'iiⁿyāⁿ chi n'daí ndís'tiī

¹²'Téé nūuⁿ idinguúⁿ carta 'cūū yeⁿ'ē ndís'tiī ní hermano Silvano nginnee sa 'úú. Nadicádiinúúⁿ chi Silvano miiⁿ ní hermano chi n'dai taavi. 'Úú teé consejo ndís'tiī chi seguro canee ndís'tiī chi nducuéⁿē chi Ndyuūs itée yā ndís'tiī yeⁿ'e vaadi n'dai yeⁿ'é yā ní yeⁿ'é nī ti neⁿ'é yā ndís'tiī. Maaⁿ ní 'cuētinéé n'daacā nī ní diituu canee nī ní cuchéé nī yeⁿ'e tanducuéⁿē chuū.

¹³'Iiⁿyāⁿ yeⁿ'e yaācū chi canéé na yāā Babilonia chi Ndyuūs didēevé yā tan'dúúca s'uuúⁿ: N'daí ndís'tiī, ngaⁿ'a yā. 'Tiicá ntúūⁿ Marcos chi tan'dúúca daiyā: N'daí ndís'tiī, ngaⁿ'a sa. ¹⁴Ndís'tiī hermanos: N'daí nī, ngaⁿ'a nī 'aama nī taama nī ti neⁿ'é nī 'aama nī taama nī ti yeⁿ'é Cristo ndís'tiī. Ní Ndyuūs téé yā vaadi 'diíⁿ yeⁿ'é yā nducyaacá ndís'tiī chi yeⁿ'e Cristo. 'Tíicā cuuvi.

CARTA CUAYIIVI YEⁿE SAN PEDRO

Pedro idinguúⁿ yā carta 'cūū yeⁿe 'iiⁿyāⁿ chi i'téenu yā Cristo

1 'Úú Simón Pedro 'úú ní 'úú ní após-
tol yeⁿe Jesucristo. Ní candéé ndu-
udu yeⁿé Ndyuūs ti Ndyuūs dichó'o yā
'úú. Ní 'úú dichí'vē Jesucristo. Dinguúⁿ
carta 'cūū yeⁿe 'iiⁿyāⁿ chi 'āā i'téenu n'dai
yā Jesucristo tan'dúúcā núsuu. 'Tífcā diiⁿ
Ndyuūs ndúúcū Salvador chi Jesucristo
ti cuaacu yā. ²'Úú neⁿé chi ndís'tiī cuta'á
nī nducueⁿē vaadi n'dai ndúúcū vaadi
'diiⁿ chi Ndyuūs téé yā ndís'tiī, ní cáávā
chi deenū n'daacá nī yeⁿé Ndyuūs chiida
yú ndúúcū Jesucristo yeⁿe yú.

Yeⁿe vida yeⁿe 'iiⁿyāⁿ chi i'téenu yā Jesucristo

³Ndyuūs cáávā poder yeⁿé yā 'āā tee
yā s'uúúⁿ tanducueⁿē caati cuuvi 'cuēt-
inéé n'daacā yú ní cuuvi dich'eete yú
Ndyuūs. Ní 'tífcā cuuvi diiⁿ yú ti deenu
yú Jesucristo chi ch'eete maáⁿ yā ní dííⁿ
yā vaadi n'giinu. Ní Jesucristo yaa'ví
yā s'uúúⁿ chi cuuvi yeⁿé yā s'uúúⁿ. ⁴Ní
Cristo 'āā tee yā s'uúúⁿ promesas chí
n'deēvéé n'dai ní ng'eete ca. Ní cucáávā
promesas miiⁿ ndís'tiī ní cuuví cuta'á nī
yeⁿe vida ngai chí yeⁿe Ndyuūs. Ní cuuvi
nnguaⁿai nī yeⁿe nuuⁿndi yeⁿé iⁿyeeⁿdí
'cūū, nuuⁿndi chi maaⁿ cuerpo yeⁿe yú
neⁿe chi diiⁿ yú. ⁵Maaⁿ chi i'téenu nī Je-
sucristo candéé nī cuidado chi n'daacā
ca 'cuētineé nī. Ní taachi n'daacā ca
'cuētineé nī tuu'mi ní ca'cueéⁿ nī caati
cuuvi deenu cá nī. ⁶Ní taachi déénú
cá nī tuu'mi ní ngaⁿa ntiⁿnyuⁿ nī yeⁿe
maaⁿ cuerpo yeⁿé nī. Ní taachi dííⁿ nī
chi ngaⁿa ntiⁿnyuⁿ nī yeⁿe maaⁿ cuerpo
yeⁿé nī tuu'mi ní cuchéé nī yeⁿe maaⁿ
cuerpo yeⁿe nī. Ní taachi cuchéé nī yeⁿe
maaⁿ cuerpo yeⁿé nī tuu'mi ní dííⁿ nī

tan'dúúcā chi Ndyuūs neⁿé yā chí dííⁿ
nī. ⁷Ní taachi 'āā dííⁿ nī tan'dúúcā chí
Ndyuūs neⁿé yā chí dííⁿ nī tuu'mi ní
dineⁿé nī 'áámá nī taama nī. Ní taachi
dineⁿé nī 'áámá nī taama nī tuu'mi ní
'áámá dineⁿe nī 'iiⁿyāⁿ.

⁸Ní yeⁿe tanducueⁿē chuū, nduuti chí
ndís'tiī dííⁿ nī nī n'dai n'dai dííⁿ nī tuu'mi
ní cuuvi dííⁿ nī ntiⁿnyuⁿ yeⁿe Señor Je-
sucristo yeⁿe yú. Ní dichí'vē nī Señor
yeⁿe yú. Ní chuū diiⁿ chí dichí'vē chí
deenu n'daacā cá nī Señor Jesucristo
yeⁿe yú. ⁹Ní nduuti chí 'áámá nī nguéé
dííⁿ nī tanducueⁿē chuū tuu'mi ní ndís'tiī
ní tan'dúúcā 'áámá 'iiⁿyāⁿ chí ngeenááⁿ
'tiicá nī ti nguéé cuuvi snaaⁿ nī chí
yaⁿai. Ní nguéé n'gaacu nī chí nduuví
deēve nī yeⁿe nuuⁿndi yeⁿe nī chí dííⁿ
nī cuááⁿ vmaaaⁿ taachi caama i'téenu nī
Jesucristo. ¹⁰Maaⁿ ní ndís'tiī hermanos
yeⁿé cáávā nducueⁿē chuū candéé cá
nī cuidado chí 'aama canéé n'daacā nī
ndúúcū chí i'téenu nī. Ní canee nī se-
guro chí Ndyuūs yaa'ví yā ndís'tiī chí cu-
uvi yeⁿé yā ndís'tiī. Ní ndeēvéé yā ndís'tiī.
Ní nduuti chí dííⁿ nī dendu'ū chí 'túúcā
tuu'mi ní 'āā ntéé de'ē cáávā chí dííⁿ nī
nuuⁿndi. ¹¹Ní taachi dííⁿ nī 'túúcā Jesu-
cristo téé yā lugar ndís'tiī chí cuuvi ndaa
nī naachi canee Señor Jesucristo chí
nadanguaⁿai yā s'uúúⁿ ní naachi cueⁿé
daāⁿmaⁿ ngaⁿa ntiⁿnyuⁿ yā yeⁿé.

¹²Ní cáávā chuū 'úú cueⁿe daāⁿmaⁿ
idííⁿ chí ndís'tiī n'gaacu nī yeⁿe tandu-
cúéⁿē chuū 'áará chí deenú n'dai nī yeⁿé.
Ní n'geetinéé n'daacā nī ní n'giindivééⁿ
n'daacā nī nduudu cuaacu yeⁿé Ndyuūs.
¹³'Úú nadacádiinúúⁿ chí n'daacā ca neⁿe
chí canduuchi cá chí 'tífcā dííⁿ chí ndís'tiī
cuuvi nan'gaacu nī yeⁿe tanducueⁿē
chuū. ¹⁴Señor Jesucristo yeⁿe yú 'āā
ch'iⁿí yā 'úú, Pedro, 'tífcā. 'Āā ntéé 'nááⁿ
canduuchí ní 'cuúví. ¹⁵Tiicá ntúūⁿ idííⁿ
chí ndís'tiī n'gaacu nī cueⁿé daāⁿmaⁿ
yeⁿe dendu'u 'cūū taachi 'āā n'díí.

**Iiⁿyāⁿ n'diichí yā deeve
ngii yeⁿe Cristo**

¹⁶ Chínⁿ chi nús'uu ca'cueéⁿ nū ndís'tiī yeⁿe Señor Jesucristo yeⁿe yú chi ndaa ntuúⁿ yā ndúúcu poder yeⁿe yā nguéeⁿ yeⁿe vaanicadínūⁿ yeⁿe iⁿ'yāⁿ yeⁿe iⁿ'yeeⁿdí 'cūū. 'Tíicā nús'uu 'āā n'diichí 'nū ndúúcu nduutinaáⁿ maáⁿ 'nū Señor Jesucristo yeⁿe yú chi neené ch'ēete. ¹⁷ Ní n'diichí 'nū chi Cristo ní neené ch'ēete yā taachi Ndyuūs chiida yú dich'ēeté yā Jesucristo ní ca'a yā Cristo chi deevé taavi ngii yā. Caati Ndyuūs chi deeve ngii ca ngaⁿá yā yeⁿe Cristo ní n'giindiveéⁿ 'nū nduudú 'cūū. Chuū caⁿa Ndyuūs: Sán'a 'cūū chi daiyá chi neⁿe taavi ní 'úú néené yeenú yeⁿe daiyá. ¹⁸ Ní nús'ūū maáⁿ 'nū ch'iindiveéⁿ 'nū nduudu 'cūū chi chiica yeⁿe va'ai chēeti nguuvi taachi cueⁿé 'nū ndúúcu Jesucristo na yiicū chi duuchi N'deévé N'dai.

¹⁹ Maaⁿ ní cu'téenu cá 'nū chi nduudu cuaacu chi 'iiⁿyāⁿ profetas candée yā tiempo chi 'āā ch'ó'oo ní cuaacu. N'daacā ca chi ndís'tiī i'neeⁿveéⁿ nī nduudú 'cūū. Nduudú 'cūū tan'dúúcā 'áámá chideeve chi ngii yaⁿā na 'áámá cuaaⁿ chí maaiⁿ. 'Tíicā yeⁿe, ní chideeve ní ngii ndii tiempo chi ndaá nguuvi ní can'daā 'íⁿnyúⁿ chi nguuvi 'yuudi chí nduudu cuaacu ní canee na staava yeⁿe nī. ²⁰ Neⁿé chi ndís'tiī vmnááⁿ vmaāⁿ nadacadíinuⁿ nī yeⁿe chuū. Mar 'áámá nduudu yeⁿe libro yeⁿe Ndyuūs chi ngaⁿā yeⁿe 'áámá dendu'ū chi cuchii ndís'tiī nguéeⁿ dámaaⁿ maáⁿ nī cuuvi deenú nī yeⁿe. ²¹ Ní nduudu cuaacu chi ngaⁿa profetas tiempo chi ch'ó'oo nguéeⁿ ngaⁿa yā yeⁿe chi nadacadíinuⁿ yā maáⁿ yā naati Espíritu N'dai yeⁿe Ndyuūs yaa'ví yā profetas nduudu cuaacu chí caⁿa yā. Ní nduudu yeⁿe yā ngiica yeⁿe Ndyuūs ti 'áámá díⁿ yā ntiⁿnyuⁿ yeⁿe Ndyuūs.

**Yeⁿé 'iiⁿyāⁿ chi nguéeⁿ ca'cueéⁿ yā
nduudu cuaacu yeⁿe Ndyuūs**

2 Tiempo chi ch'ó'oo nguaaⁿ 'iiⁿyāⁿ Israel véé 'iiⁿyāⁿ profetas chi nguéeⁿ ngaⁿa yā nduudu cuaacu yeⁿe Ndyuūs. 'Tiicá ntúūⁿ tiempo maaⁿ caⁿa n'dai maestros yeⁿe yaacū nguaaⁿ ndís'tiī chi nguéeⁿ caaⁿmáⁿ yā nduudu cuaacu yeⁿe Ndyuūs. Ní candée n'de'ei yā nduudu chi nguéeⁿ cuaacu chi diiⁿ chi nguéeⁿ i'téenu nī Cristo. Ní 'iiⁿyāⁿ s'eeⁿ caaⁿmáⁿ yā contra yeⁿe Jesucristo chi nadanguáⁿai yā 'iiⁿyāⁿ. Ní chíⁿ chi díⁿ yā diiⁿ chi 'iiⁿyāⁿ s'eeⁿ niiⁿnuuⁿ niiⁿnuúⁿ nūⁿ 'cuiinú maáⁿ yā. ² 'Áará chi nguéeⁿ 'tíicā chiiⁿ chi ngaⁿa 'iiⁿyāⁿ s'eeⁿ 'yaaⁿ 'iiⁿyāⁿ ní 'caandiveéⁿ yā yeⁿe 'iiⁿyāⁿ s'eeⁿ. Ní díⁿ yā chi nguéeⁿ n'daacā tan'dúúcā chi diiⁿ 'iiⁿyāⁿ s'eeⁿ. Ní nguéeⁿ n'daacā ngaⁿa 'iiⁿyāⁿ s'eeⁿ yeⁿe yúúⁿí cuaacu chi evangelio chi nduudu ngai yeⁿe Jesucristo. ³ Ní 'iiⁿyāⁿ s'eeⁿ ca'cueéⁿ yā nduudu chi ngiica yeⁿe chi maáⁿ yā nadacadíinuⁿ yā ti neⁿé yā tumi chi ndís'tiī ca'á nī 'iiⁿyāⁿ s'eeⁿ. 'Áā 'naaⁿ tiempo chi Ndyuūs 'āā n'diichí yā nuuⁿndi yeⁿe yā ní 'āā ngaⁿá yā chi 'iiⁿyāⁿ s'eeⁿ 'āā condenado yā.

⁴ Deenu yú chi Ndyuūs nguéeⁿ nadich'ēcú yā yeⁿe ángeles chi dinuuⁿndí yā naati s'neéⁿ yā cuaaⁿ chuva'ai na infierno ní s'neéⁿ yā naachi maaiⁿ. Ní dichiihí yā ángeles ndúúcu cadenas. Ní ángeles cūnee yā miiⁿ ndii nguuvi chi Cristo caⁿá yā n'diichi yā nuuⁿndi. ⁵ Ní deenu yú chi Ndyuūs 'āā idi'cuiinú yā iⁿ'yeeⁿdí 'cūū ndúúcu 'iiⁿyāⁿ yeⁿe taachi díⁿ yā chi chee cúúvī vmnááⁿ iⁿ'yeeⁿdí ndúúcu 'iiⁿyāⁿ chi nguéeⁿ n'daacā idiⁿ yā. Ndyuūs dámaaⁿ nadinguaⁿai yā saⁿa Noé chi candée sa nduudu cuaacu yeⁿe Ndyuūs ndúúcu táámá ndeēchē 'iiⁿyāⁿ. Tanaⁿa cá yā ní ch'iī yā. ⁶ 'Tiicá ntúūⁿ Ndyuūs díⁿ yā condenar 'iiⁿyāⁿ yeⁿe yááⁿ Sodoma ndúúcu yaáⁿ Gomorra. Ní di'cuiinú yā

yáaⁿ s'eeⁿ chi nduuví yāiyāá cáávā chi dichó'ó yā nguuchi yáⁿā vmnaaⁿ yáaⁿ s'eeⁿ. Ní 'íicú Ndyuūs s'neeⁿ yā ejemplo 'cūū chi 'iiⁿyāⁿ chi cuchii cuayiivi, ní nguéé n'daācā idifⁿ yā, cuuvi deenú yā táacā cuuvi chó'oo yeⁿe yā. ⁷Naati Ndyuūs nadanguaⁿai yā yeⁿe yáaⁿ s'eeⁿ saⁿa Lot chi saⁿā n'dai, saⁿā chi ch'eenu sa chiī caavā chi diiⁿ 'iiⁿyāⁿ chi nguéé n'daācā. ⁸Ní Lot miiⁿ chi n'dai sa canéé sá nguuaⁿ 'iiⁿyāⁿ s'eeⁿ. Ní nguuvi nguuvi n'diichi sa ní n'giindiveeⁿ sa nducuéⁿē chi difⁿ yā chi nguéé n'daacā. Ní n'geenu sa ngii na staava yeⁿe sa. ⁹Ní nduuti chi Ndyuūs difⁿ yā 'túucā tiempo chi 'āā chó'oo 'tiicā ntúūⁿ Ndyuūs deenú yā táacā chi nadanguáⁿai yā 'iiⁿyāⁿ chi i'téenu yā Ndyuūs yeⁿe 'iiⁿyāⁿ chi nguéé n'daacā idifⁿ yā chí n'diichineeⁿ yā 'iiⁿyāⁿ yeⁿe yā. 'Tiicā ntúūⁿ Ndyuūs deenú yā táacā ca'á yā testigo 'iiⁿyāⁿ chi nguéé n'daācā ndíi taachi ndaa nguuvi chi n'diichí yā nuuⁿndi yeⁿe nducyaaca 'iiⁿyāⁿ.

¹⁰'Tiicā Ndyuūs ca'a yā castigo 'iiⁿyāⁿ chi difⁿ yā nuuⁿndi tan'dúucā chi neⁿe cuerpo yeⁿe yā. Ní nguéé n'giindiveeⁿ yā nduudu cuaacu yeⁿe 'iivú Ndyuūs. 'Iiⁿyāⁿ s'eeⁿ ní nguéé 'va'á yā chi caaⁿmaⁿ yā cosas chi nguεε ndaacā yeⁿe 'iiⁿntyéⁿē. Ní nguéé 'va'á yā yeⁿe mar 'áámá. Ní difⁿ yā nducuéⁿē nuuⁿndi chi neⁿe yā. ¹¹Ní ángeles nguéé 'tífca yā. 'Áará chi ditiinu cá yā nguéé ti 'iiⁿntyéⁿē s'eeⁿ ti taachi ndaá yā nanááⁿ Señor Jesucristo yeⁿe yú nguéé cuncnáā ngaⁿa ángeles contra yeⁿe 'iiⁿntyéⁿē s'eeⁿ. ¹²'Iiⁿyāⁿ s'eeⁿ difⁿ yā tan'dúucā 'yúudu taáⁿ difⁿ ti ní nguéé nadacadíinuⁿ ti. 'Tífca difⁿ yā. Ní tan'dúucā 'iiti taaⁿ chi 'iiⁿyāⁿ n'nuúⁿ yā ní n'giiⁿnúⁿ yā 'iiti, 'tífca 'iiⁿyāⁿ s'eeⁿ. Ní cuncnáā ngaⁿa yā yeⁿe dendu'ū chi nguéé ituumicadíinuⁿ yā. Ní 'cuūví yā tan'dúucā 'áámá 'iiti taaⁿ. ¹³Ní 'iiⁿyāⁿ s'eeⁿ ní ch'leenú yā chii caati 'āā difⁿ yā chi tanáⁿa yā ch'leenú yā chii. Maaⁿ

ní yeenú yā chi dinuuⁿndí yā tan'dúucā chi neⁿe cuerpo yeⁿe yā. Ní nduuti chi 'iiⁿyāⁿ s'eeⁿ caⁿá yā ndúucu ní ní che'é yā ndúucu ní taachi véé 'viicu yeⁿe ní tuuⁿmi ní nadacadíinuⁿ yā chi nginnche'éi yā ndíⁿti. Ní chuū ni cosa chi cuuvi 'cuinaaⁿ yā yeⁿe.

¹⁴'Iiⁿyāⁿ s'eeⁿ taachi n'diichí yā 'áámá n'daataá neⁿe yā caⁿá yā ndúucū n'daataá miiⁿ. Dámaāⁿ neⁿe yā dinuuⁿndi yā ní nginnche'éi yā 'iiⁿyāⁿ chi debil staava yeⁿe yā chi dinuuⁿndí yā. 'Iiⁿyāⁿ s'eeⁿ deenu n'dai yā na staava yeⁿe yā chi neⁿe yā dendu'ū chi nguéé n'daacā. Ní Ndyuūs ngaⁿa yā yeⁿe yā 'tífca: Dε'e chúú cá ya'ai yeⁿe yā ti condenado yā. ¹⁵'Iiⁿyāⁿ s'eeⁿ divíi yā yeⁿe yúúni cuaacu yeⁿe Ndyuūs ní chiicā yā yúúni chí neⁿe maáⁿ yā. Difⁿ yā tan'dúucā chi diiⁿ profeta Balaam chi daiya saⁿā Beor. Tiempo chi chó'oo Balaam miiⁿ neⁿe sa diiⁿ sa ganar tuumí yeⁿe chi nguéé n'daacā chi diiⁿ sa. ¹⁶Ní taachi cueⁿe sa ndúucū burro yeⁿe sa, burro yeⁿe sa ngaⁿá tī ndúucū nduudu yeⁿe 'iiⁿyāⁿ ní difⁿ tī reponder saⁿā Balaam miiⁿ yeⁿe nuuⁿndi chi diiⁿ sa. Ní 'āā ntéé diiⁿ sa nuuⁿndi miiⁿ tiempo miiⁿ.

¹⁷Ní 'iiⁿyāⁿ s'eeⁿ ní tan'dúucā vaacu nuūⁿní díyaai 'tiicā yā. Tan'dúucā meēeⁿ chi candéε 'yúúné taaⁿ 'tiicā yā. 'Iiⁿyāⁿ s'eeⁿ ní condenado yā ní caⁿá yā chó'ó yā naachi diituu n'dái maáⁿ. Ní miiⁿ canee yā cueⁿe daāⁿmaⁿ. ¹⁸'Iiⁿyāⁿ s'eeⁿ ní ngaⁿa yā nduudu n'gεete chi nguéé dichíⁿvē. Ní ndúucū vicio yeⁿe yā, ndúucū nducuéⁿē nuuⁿndi chi neⁿe cuerpo yeⁿe yā, 'iiⁿyāⁿ s'eeⁿ ní neⁿe yā difⁿ yā chi tanáⁿa 'iiⁿyāⁿ chi 'āā nduuvideεé yā ní 'āā ntéé caⁿá yā ndúucū 'iiⁿyāⁿ chi dinuuⁿndi yā ní tanáⁿa yā neⁿe yā nanguεεcúndii ntuúⁿ yā ní dinuuⁿndi yā taama vmnéⁿē. ¹⁹'Iiⁿyāⁿ s'eeⁿ chi nginnche'éi yā 'iiⁿyāⁿ ngaⁿá yā chi ca'á yā 'iiⁿyāⁿ s'eeⁿ chi libre yā. 'Iiⁿyāⁿ s'eeⁿ maáⁿ yā ní canéé yā prisioneros

yeⁿe nuuⁿndi chi diíⁿ yā. Ní ca'áámá ca'aama 'iiⁿ'yāⁿ chi nguéé libre yā ní canéé yā maaⁿ poder nuuⁿndi ní nguéé cuuvi cuchee yā yeⁿe. ²⁰Ní 'iiⁿ'yāⁿ chi i'téenu yā Señor Jesucristo yeⁿe yú ní yeⁿe yā, ní Cristo 'āā nadanguáⁿ'ai yā 'iiⁿ'yāⁿ yeⁿe nducuéⁿe chi nguéé n'daacā yeⁿe iⁿ'yeeⁿdí 'cūū. Ní cuayiivi miiⁿ nduuti chi 'iiⁿ'yāⁿ nanguεεcunée yā taama vmnéⁿ'ee ní díⁿ yā dendúú nuuⁿndi chi yeⁿe iⁿ'yeeⁿdí 'cūū tuuⁿ'mi ní cunncaā ca canee yā nguéé ti tiempo chi 'āā cuéé i'téenu yā Jesucristo. ²¹N'dáácā ca chi 'iiⁿ'yāⁿ s'eeⁿ nguéé n'diichí yā yúúni cuaacu yeⁿe Ndyuūs ti taachi 'āā n'diichí yā yúúni cuaacu tuuⁿ'mi ní ndaācādaamí yā yeⁿe ley yeⁿe Ndyuūs chi Ndyuūs ca'a yā 'iiⁿ'yāⁿ s'eeⁿ. ²²Ní cho'oó yeⁿe 'iiⁿ'yāⁿ s'eeⁿ tan'dúúca chi ngaⁿ'a 'áámá nduudu cuaacu 'tíicā: 'Yāānā nguεεcunée tī che'e tī chí ndaāchi tī ní cuuchí chi 'iiⁿ'yāⁿ naaⁿ'nú yā chi dεεve tī ní nguεεcunée tī ngeⁿe tī nguεεcundāa tī nguaaⁿ nuūⁿ'nīⁿ ncheētí.

Jesucristo ndaá yā taama vmnéⁿ'ee

3 Ndís'tiī hermanos yeⁿe chi neⁿe taaví, carta 'cūū ní ndii chíⁿ ndii 'úúví chi idinguúⁿ yeⁿe nī. Ní na 'uuví carta chi idinguúⁿ yeⁿe ndís'tiī, neⁿe díⁿ chi nadacadíⁿnuuⁿ nī yeⁿe nducuéⁿe chi dεεv' n'dai. Ní teé consejo ndís'tiī chi n'gaacú nī yeⁿe nducuéⁿe chi idinguúⁿ. ²Neⁿe chi n'gaacu nī yeⁿe tiempo chi chó'oo yeⁿe profetas chi dεεve ní ngaⁿ'a yā nduudu cuaacu. Ní n'gaacú nī yeⁿe tiempo maaⁿ yeⁿe mandamiento yeⁿe Señor chi nadanguáⁿ'ai yā s'uúúⁿ. Mandamiento yeⁿe yā ní apóstoles chi'cueeⁿ yā ndís'tiī.

³Ní vmnááⁿ vmnaaⁿ nadacadíⁿnuuⁿ nī yeⁿe chuū chí nguuvi s'eeⁿ chi 'cuiinū iⁿ'yeeⁿdí 'cūū. Véé 'iiⁿ'yāⁿ chi duuchinéⁿ yā yeⁿe nducuéⁿe chi yeⁿe Ndyuūs. Ní 'iiⁿ'yāⁿ s'eeⁿ díⁿ yā nuuⁿndi tan'duucā chi maáⁿ yā neⁿe yā. ⁴Ní ngaⁿ'á yā:

¿Tíí cánéé promesa chi ngaⁿ'a chi Cristo canéé chi ndaa yā táámá vmnéⁿ'ee? Ndií tiempo chi 'āā chó'oo taachi ch'iī 'iiⁿ'yāⁿ yeⁿe ndaata yeⁿe yú. 'Āā daamá nūuⁿ canéé tanducuéⁿe ndíí taachi Ndyuūs din'dái yā iⁿ'yeeⁿdí. ⁵'Iiⁿ'yāⁿ chi ngaⁿ'á yā 'tíicā nguéé neⁿe yā díⁿ yā cuenta yeⁿe tiempo chi 'naaⁿ tiempo chi chó'oo. Tiempo miiⁿ Ndyuūs ngaⁿ'á yā ní ndúúcu nduudu yeⁿe yā din'dái yā nánguuvi ndúúcu iⁿ'yeeⁿdí 'cūū. Ní iⁿ'yeeⁿdí 'cūū can'daā ná nuūⁿ'nīⁿ. Ní iⁿ'yeeⁿdí 'cūū canee na lugar yeⁿe cáávā nduudu yeⁿe Ndyuūs. ⁶Ní iⁿ'yeeⁿdí yeⁿe tiempo chi chó'oo ní chiituú nuūⁿ'nīⁿ ní ndai naāaⁿ yeⁿe cáávā chi cheeⁿ taaⁿ cúúvi. ⁷Ní nanguuvi ndúúcu yāⁿ'āa chi véé maaⁿ Ndyuūs ca'á yā orden yeⁿe chi canéé chí candéé yā cuidado yeⁿe ndii tiempo chi cuucu ndúúcu yaⁿ'ā. Ní taachi ngiichi yāⁿ'āa miiⁿ tuuⁿ'mi ní Ndyuūs n'diichí yā nuuⁿndi yeⁿe 'iiⁿ'yāⁿ. Ní Ndyuūs díⁿ yā chi 'cuiinū 'iiⁿ'yāⁿ chi nguéé n'daacā.

⁸Maaⁿ ní ndís'tiī hermanos yeⁿe chi neⁿe taavi, nguéé cuuvi naáⁿ nī chi nanááⁿ Ndyuūs 'áámá nguuvi ní tan'dúúca chi 'áámá mil nduūyū ní 'áámá mil nduūyū ní tan'dúúca chi 'áámá nguuvi. 'Tíicā canéé nanááⁿ Ndyuūs. ⁹Ní Señor Jesucristo yeⁿe yú nguéé cuuvi 'naa yā yeⁿe chi ngaⁿ'a yā chí díⁿ yā tan'dúúca chi nadacadíⁿnuuⁿ tanáⁿ'ā saⁿ'ā. Naati Ndyuūs ní véé paciencia yeⁿe yā ndúúcu s'uúúⁿ caati nguéé neⁿe yā chí 'aama yú cuuvi ndai yú tī neⁿe yā chí nducyaaca s'uúúⁿ ní ndaacadaami yú yeⁿe nuuⁿndi yeⁿe yú.

¹⁰Ní nguuvi chi ndaa Señor Jesucristo taama vmnéⁿ'ee, nguuvi miiⁿ ndaā tan'dúúca chí 'áama duucu chí indáá n'gaaⁿ. Ní nguéé canéé ngiinu yú yeⁿe nguuvi 'cūū taachi Ndyuūs nadi'tuúví yā nanguuvi yuudu n'dái 'cuεεcú. Ní tanducuéⁿe chí véé nanguuvi ní cuūcū ní 'cuiinū ndúúcu ngiichi yaⁿ'ā chí 'iiⁿ'nuⁿ

taa". Ní yáⁿaa ntúūⁿ va ndúúcu tanducuéⁿē dendu'ū ní cuūcū.

¹¹ Deenu yú chi tanducuéⁿē dendu'ū chí 'túúca 'cuiinu tuví. Ní ḡtáácā cuuvi 'cuēetineé nī? Ndís'tiī canee chí ca'á nī núúⁿmáⁿ staava yeⁿé nī na ta'a Ndyuūs ní dich'etē nī Ndyuūs. Ní 'cuēetineé nī dámaāⁿ tan'dúúca chí Ndyuūs neⁿé yā.

¹² 'Tífcā 'cuēetineé nī 'naaⁿ chí canee ngiinu yú ndii nguuvi chí ndaa Señor Jesucristo taama vmnéⁿēe. Ní diiⁿ yú nducuéⁿē ntiⁿnyuⁿ yeⁿe Señor caati ni-iⁿnuúⁿ niiⁿnuuⁿ cuuvi ndaa yā. Nguuvi chí ndaa yā nánguui ní cuūcū ní 'cuiinu ndúúcu tanducuéⁿē chí véé yeⁿē. Ní 'cuiinu ntuví cáávā nguuchi yaⁿā. ¹³ Naati s'uuúⁿ ní canéé ngiinu yú chí snaaⁿ yú 'áamá nanguuvi chí ngai ndúúcu 'áamá iⁿyeēⁿdī chí ngai naachi véé dámaāⁿ nducuéⁿē chí cuaacu ní nducuéⁿē ní n'daacā n'dai. 'Tífcā Ndyuūs ngaⁿá yā chí téé yā s'uuúⁿ.

¹⁴ Ní cáávā chuū ndís'tiī hermanos chí neⁿé taavi, 'naaⁿ tiempo chí cunee ngi-inú nī dendu'ú 'cūú candēe cá nī cuidado chí 'diiⁿ 'diiⁿ 'cuēetineé nī ní nguéé din-uuⁿndí nī. Ní 'tífcā nguéé véé culpa yeⁿe nī nanááⁿ Ndyuūs taachi Cristo ndaa yā. ¹⁵ Diiⁿ nī cuenta chí Señor Jesucristo yeⁿe yú ndúúcu ngiinū n'dái diíⁿ yā ndúúcu yú caati neⁿé yā chí nan-

guaⁿai yú. 'Tiicá ntúūⁿ Pablo, hermano yeⁿe yú chí neené neⁿe yú, 'āā dinguúⁿ yā yeⁿé ndís'tiī 'áamá carta ndúúcu vaadi deenu chí Ndyuūs nca'á yā Pablo miiⁿ.

¹⁶ Ní Pablo miiⁿ ngaⁿá yā yeⁿe nducuéⁿe 'cūú ndúúcu vaadi deenu yeⁿé Ndyuūs na nducyáácā carta chí dinguúⁿ yā. Ní naⁿa carta yeⁿé yā duū'vi dendu'ū ní n'gíⁿi n'dái chí cuuvi déenu yú. Ní 'iiⁿyāⁿ chí nguéé deenu yā ndúúcu 'iiⁿyāⁿ chí duu'vi i'téenu yā nguéé ngaⁿá yā nduudu cuaacu yeⁿe dendu'ú chí ngii ní yeⁿe 'tēe chí canéé nguūⁿ. Ní caavā chí ngaⁿá yā chí nguéé cuaacu ní diíⁿ yā chí canéé chí ntuuví maáⁿ yā.

¹⁷ Naati ndís'tiī hermanos yeⁿé chí neⁿé taavi, 'āā deenú nī dendu'ú 'cūú. Cundēe nī cuidado chí nguéé 'caandiveéⁿ nī nduudu yeⁿe 'iiⁿyāⁿ chí nguéé diíⁿ yā chí ngaⁿa ley yeⁿé Ndyuūs iiⁿyāⁿ chí candēe yā ndís'tiī lado yeⁿé yā ti ndís'tiī nguéé 'cuēetineé n'daacā ndúúcu chí i'téenu nī. ¹⁸ Maaⁿ ní ndís'tiī cu'téenu cá nī Señor Jesucristo yeⁿe yú chí nadanguáⁿai yā s'uuúⁿ. Ní itée yā s'uuúⁿ nducuéⁿē chí n'dai taavi yeⁿé yā ndúúcu vaadi deenu yeⁿé yā. Ngaⁿa yú chí Jesucristo miiⁿ ní ch'etēe cá yā maaⁿ ndúúcu nguuvi chí cúchií ní cueⁿe daāⁿmaⁿ. 'Tífcā cuuvi.

CARTA VMNÁÁⁿ VMNAAⁿ YEⁿE SAN JUAN

Nduudu cuaacu yeⁿe vida cueⁿe daāⁿmaⁿ

1 Chiiⁿ chí ndii vmnaaⁿ, chiiⁿ chí ch'iindiveéⁿ 'nū, chiiⁿ chí n'diichí 'nū ndúúcu nduutináaⁿ 'nū, chiiⁿ chí n'gínú 'nū, nífcú chiiⁿ chí tuuⁿ'vi 'nū ndúúcu ta'á 'nū chiiⁿ ní Nduudu yeⁿe vida cueⁿe daāⁿmaⁿ. ²Ch'iⁿ'i yā ní naáⁿ 'nū chiiⁿ chí vida cueⁿe daāⁿmaⁿ. Nífcú n'diichí 'nū ní caaⁿmaⁿ cuaacu 'nū, ní yaaⁿ'ví 'nū yeⁿe vida cueⁿe daāⁿmaⁿ chí canéé ndúúcu chiidá yā. Ní chiidá yā ch'iⁿ'i yā nús'uu vida cueⁿe daāⁿmaⁿ miiⁿ. ³Chiiⁿ chí n'diichí 'nū ní ch'iindiveéⁿ 'nū, chíⁿ chí n'gaⁿ'á 'nū yeⁿe vida caati ndis'tíi ní canee cúúⁿ'miⁿ nī chí nduuvidaama nī ndúúcu nús'uu. Nífcú cuaacu níⁿ'nyúⁿ nduuvidaama yú ndúúcu chiida yú ní ndúúcu daiya yā Jesucristo. ⁴Cosa chuu ní dingúuⁿ 'nū yeⁿe ndis'tíi caati vaadi yeenú yeⁿe nī cuuvi cuaacu cá.

Dendyuūs ní dæeve ngii

⁵Chuū ní nduudu chí ch'iindiveéⁿ 'nū yeⁿe yā. Chíⁿ chí n'gaⁿ'a 'nū chí Dendyuūs ní chideeve. Nífcú mar 'áámá maāⁿ nguéé ndúúcu yā. ⁶Ndúúti chí s'uuúⁿ n'gaⁿ'ā yú chí ndiidaama yú ndúúcu yā nífcú na maāⁿ cachiica yú tuuⁿ'mí nduudu yaadi n'gaⁿ'ā yú, nífcú nguéé idiiⁿ yú chí n'gaⁿ'a nduudu cuaacu. ⁷Nduuti chí cachiica yú na chideeve tan'dúúca chí Jesucristo canéé yā na chideeve tuuⁿ'mí ní nduuvidaama yú 'aama yú ndúúcu taama yú. Yuuúⁿ yeⁿe Jesucristo daiya Dendyuūs inaaⁿ'nu yā s'uuúⁿ yeⁿe tanducuéⁿ'ē nuuⁿ'ndi yeⁿe yú. ⁸Nduuti chí n'gaⁿ'ā yú chí nguéé nuuⁿ'ndi yú maāⁿ yú nginncheⁿ'ei yú s'uuúⁿ ní nguéé canee nduudu cuaacu ndúúcu yú. ⁹Nduuti chí natúmiiⁿ'nu yú nuuⁿ'ndi

yeⁿe yú tuuⁿ'mí Jesucristo miiⁿ ní n'dai yā ní díⁿ yā dácaā chí caaⁿ'máⁿ yā ní nguéé n'daāⁿ yā caati nadach'æécú yā nuuⁿ'ndi yeⁿe yú. Nífcú naaⁿ'nú yā s'uuúⁿ yeⁿe tanducuéⁿ'ē nuuⁿ'ndi yeⁿe yú. ¹⁰Nduuti chí n'gaⁿ'ā yú chí nguéé nuuⁿ'ndi yú tuuⁿ'mí ní idiiⁿ yú chí Jesucristo n'gaⁿ'a yā nduudu yaadi, nífcú nduudu yeⁿe yā nguéé canéé ndúúcu yú.

Cristo ní caaⁿ'máⁿ yā lado yeⁿe yú

2 Ndís'tíi daiya n'gaiyáá, chuū dinguúⁿ yeⁿe ndís'tíi caati nguéé idiiⁿ nī nuuⁿ'ndi. Nífcú nduuti chí 'áámá yā díⁿ yā nuuⁿ'ndi véé táámá yā chí Jesucristo chí neené n'dai chí caaⁿ'maⁿ yā yeⁿe yú ndúúcu Nduuūs chiida yú. ²Nífcú Jesucristo ca'á maāⁿ yā vida yeⁿe maaⁿ yā ní ch'iⁿ'i yā cucáávā nuuⁿ'ndi yeⁿe yú. 'Iicu nguéé dámaaⁿ yeⁿe s'uuúⁿ naati cucáávā nuuⁿ'ndi yeⁿe 'iiⁿ'yāⁿ yeⁿe núúⁿ'máⁿ iⁿ'yeēⁿdī.

³Chuū chí deenu nús'uuⁿ chí n'diichí 'nū 'yā ndúúti chí díⁿ 'nū tan'dúúca chí n'gaⁿ'a ley yeⁿe yā. ⁴Du'ū chí n'gaⁿ'a chí n'diichí yā 'iiⁿ'yāⁿ ní nguéé díⁿ yā tan'dúúca chí n'gaⁿ'a ley yeⁿe yā tuuⁿ'mí ní nduudu yaadi chí n'gaⁿ'a yā. Nífcú nguéé cánéé nduudu cuaacu ndúúcu yā. ⁵Du'ū chí n'giindiveeⁿ nduudu yeⁿe yā cuaacu níⁿ'nyúⁿ cánéé n'dai vaadi neⁿ'e yeⁿe Dendyuūs ndúúcu yā. Chiiⁿ chí deenu yú chí canee yú nduucú yā. ⁶Du'ū chí n'gaⁿ'ā chí canee nduucú yā, cánéé chí cuchiica tan'dúúca chí cáchiica yā.

Ley chí ngai

⁷Ndís'tíi ví'í, nguéé dinguúⁿ mar 'áámá ley chí ngai, tíi ley ndiicúú chí 'āā canee ndíí cuaaⁿ vmnaaⁿ, ley ndiicúú ní ndúúdu chí ch'iindiveéⁿ nī ndíí cuaaⁿ vmnaaⁿ. ⁸Dinguúⁿ táámá vmnéⁿ'ēe ley ngai yeⁿe ndís'tíi chí cuaacu chí nduucú yā ní nduucú nī. Caati maāⁿ míⁿ 'āā cho'ōo nífcú chideeve míⁿ ní cuaacu ní ngiichi.

⁹Du'ū chí nga^a chí cachiica na chídeevé ní nguéé ngíí n'diichi vi'í, tuu'mi ní 'iiⁿyāⁿ miiⁿ cáchiica núúⁿ yā na maāiⁿ ndíí maaⁿ. ¹⁰Du'ū chí neⁿe vi'í cánéé ná chídeevé ní nguéé idííⁿ yā chí cundee ca'a yā yeⁿe taamá yā. ¹¹Naati du'ū chí nguéé ngii n'diichi yā vi'í cánéé ná maāiⁿ nícu cáchiica ná maāiⁿ, ní nguéé deenú yā tíí cuaaⁿ cachiicá yā caati chí maāiⁿ miiⁿ ní nguéé diiⁿ chí inaaⁿ yā.

¹²Dinguúⁿ yeⁿe ndís'tií daiya n'gaiyáa, caati nuuⁿndí yeⁿé ní ních'ecucu cáávā chí dúúchí Jesucristo. ¹³Dinguúⁿ yeⁿe ndís'tií chiida s'ééⁿ caati 'āā n'diichi ní 'iiⁿyāⁿ ndii cuááⁿ vmnaaⁿ. Dinguúⁿ yeⁿe ndís'tií saⁿā ngaiyáa caati cucché ní ndúúcu chí nguéé n'daacā. Dinguúⁿ yeⁿe ndís'tií daiya n'gaiyáa caati 'āā n'diichi ní chiida yú. ¹⁴Úú dinguúⁿ yeⁿe ndís'tií chiida s'ééⁿ caati 'āā n'diichi ní 'iiⁿyāⁿ chí canee ndíí cuaaⁿ vmnaaⁿ. Dinguúⁿ yeⁿe ndís'tií saⁿā ngaiyáa caati ditiinú ní. Níicu nduudu yeⁿe Dendyuūs chí cánéé nduucú ní nícu cucché ní ndúúcu chí nguéé n'daacā.

¹⁵Nguéé dinéⁿe ní iⁿyééⁿdí ndíí nguéé dendu'ū chí véé na iⁿyééⁿdí. Du'u chí dineⁿe iⁿyééⁿdí vaadī neⁿe yeⁿe Dendyuūs nguéé canéé nduucú yā. ¹⁶Caati tánducuéⁿe chí véé na iⁿyééⁿdí chí neⁿe cuerpo yeⁿe yú ndúúcu chí neⁿe nduutináaⁿ yú, nícu vaadī ingueé yeⁿe vida yeⁿe iⁿyééⁿdí ní nguéé yeⁿe chiida yú, tií ní yeⁿe iⁿyééⁿdí. ¹⁷Iⁿyééⁿdí nínch'ó'oo ndúúcu taanduvéé yeⁿe ndúúcu vaadī neⁿe chí nguéé n'daacā. Naati du'u 'iiⁿyāⁿ chí dííⁿ yā chí neⁿe Dendyuūs, 'iiⁿyāⁿ miiⁿ cunee yā cueⁿe daāⁿmaⁿ.

Yeⁿe nduudu cuaacu ní yeⁿe nduudu yaadī

¹⁸Ndís'tií daiya n'gaiyáa, 'āā chéé 'cuiinu hora tan'dúúca chí ndís'tií chíiindiveéⁿ ní yeⁿe chí anticristo miiⁿ ní ndaa yā. 'Tiicá ntúūⁿ chí caama véé

chí n'dee n'dái 'iiⁿyāⁿ ní ngaⁿá yā chí anticristo yā. Tii ní cucáávā chí s'uuúⁿ deenu yú chí 'āā chéé 'cuiinu hora. ¹⁹'Iiⁿyāⁿ s'eeⁿ can'dáa yā yeⁿe yú naati nguéé yeⁿe yú 'yā. Nduuti chí yeⁿe yú 'áamá canee yā nduucú yú naati can'dáa yā ní cueⁿé yā. Ní chííⁿ ní cuuⁿmiⁿ chí 'iiⁿyāⁿ s'eeⁿ ní nguéé yeⁿe yú 'yā.

²⁰Naati ndís'tií ní véé yeⁿé ní chí ca'ā Espíritu N'dai yeⁿé Ndyuūs. Ní ndís'tií nin'diichi ní tanducuéⁿe dendu'ū. ²¹Nguéé idinguúⁿ yeⁿe ndís'tií tan'dúúca chí nguéé deenú ní nduudu cuaacu, ti idinguúⁿ tan'dúúca chí 'āā deenú ní ti nguéé véé ndii 'áamá nduudu yaadī chí yeⁿe nduudu cuaacu.

²²¿Du'ū chí yaadī míí? 'Iiⁿyāⁿ chí ngaⁿá yā chí nguéé Jesús chí Cristo ní yaadī yā. 'Iiⁿyāⁿ s'eeⁿ chí anticristo chí caaⁿmáⁿ yā chí nguéé i'téenu yā Dendyuūs chíida yú ndúúcu daiyá yā. ²³Du'ū chí nguéé i'téenu yā daiyá yā ní nguéé canee yā ndúúcu chíidá yā. Du'ū chí i'téenu yā daiyá yā canee yā ndúúcu chíidá yā.

²⁴Tuu'mi ní chííⁿ chí chíiindiveéⁿ ní ndíí vmnaaⁿ 'tíicā canee cúúⁿmíⁿ chí canee ndúúcu ndís'tií. 'Tiicá ntúūⁿ ndís'tií ní yeⁿe daiyá yā ní yeⁿe chíida yú cueⁿe daāⁿmaⁿ. ²⁵Chuū compromiso chí dííⁿ yā ndúúcu nús'uu chí cunee yú ndúúcu vida cueⁿe daāⁿmaⁿ.

²⁶Dinguúⁿ chuū yeⁿe ndís'tií chí yeⁿé 'iiⁿyāⁿ chí nginnche'í yā ndís'tií. ²⁷Naati chííⁿ chí yeⁿe Espíritu N'dai yeⁿé Ndyuūs chí ndís'tií sta'á ní yeⁿé yā, chuū canee ndúúcu ndís'tií. Nguéé canee cúúⁿmíⁿ chí du'ū véé 'iiⁿyāⁿ ca'cueeⁿ yā ndís'tií, naati Espíritu N'dai yeⁿé Ndyuūs maáⁿ yā ngi'cuéeⁿ yā ndís'tií nducuéⁿe dendu'ū. 'Tíicā chuū ní nduudu cuaacu, nguéé nduudu yaadī. Tan'dúúca chí chí'cueéⁿ yā ndís'tií, 'túúca canee diitú ní ndúúcu nduudu miiⁿ.

²⁸Maaⁿ ndís'tií daiya n'gaiyáa, cunee ní chí yeⁿé ní caatí taachi Cristo ndaa yā

vée nduudu yeⁿē yú nduucú yā. Ní nguéeé 'cuináaⁿ yú nanáaⁿ yā taachi ndaa yā. ²⁹Ndúúti chí ndís'tií déenu nī chí Cristo miiⁿ ní n'dai yā, 'tíicā ntúūⁿ deenu ndís'tií chí du'ū chí diiⁿ chí n'daacā ch'iindiyáaⁿ táamá yeⁿé yā.

'Iiⁿyāⁿ s'eeⁿ chí daiyá Dendyuūs

3 Cun'díichí ndís'tií vaadi néⁿe chí tee chiida yú s'uuúⁿ chí yaa'vi yā s'uuúⁿ chí daiyá Dendyuūs s'uuúⁿ. Cáávā chuū chí iⁿyéeⁿdi nguéeé in'diichi s'uuúⁿ caati nguéeé in'diichi Cristo. ²Ndís'tií chí neⁿe taaví, maaⁿ ní daiya Dendyuūs s'uuúⁿ. Ní nguéeé ngii yā s'uuúⁿ táácā chí cūnee yú. Caati deenu yú taachi ndaa yā 'iiⁿyāⁿ miiⁿ ní tan'dúuca yā 'tíicā ntúūⁿ s'uuúⁿ, caati n'diichi yú 'iiⁿyāⁿ taacá yā. ³Du'ū chí canee ngíínū yā chuū ní nadeevé yā tan'dúucā chí Ndyuūs miiⁿ ní deevé yā.

⁴Du'ū chí idiiⁿ nuuⁿndi nguéeé dííⁿ yā tanducueⁿē chí ngaⁿa ley. Níicú nuuⁿndi ní chíiⁿ chí nguéeé diiⁿ yā chí ngaⁿa ley. ⁵Ndís'tií déenu nī chí Dendyuūs ní ndaa yā chí divíi yā nuuⁿndi yeⁿē yú. Níicú nguéeé vée nuuⁿndi yeⁿé yā. ⁶Du'ū chí yeⁿé yā nguéeé idiiⁿ nuuⁿndi. Du'ū chí idiiⁿ nuuⁿndi nguéeé n'diichí yā 'iiⁿyāⁿ. ⁷Ndís'tií daiya n'gaiyáa nguéeé canche'éf nī mar 'áámá 'iiⁿyāⁿ. Du'ū chí idiiⁿ dendu'ū chí n'daacā tuuⁿmi ní n'dai tan'dúucā 'iiⁿyāⁿ miiⁿ ní n'daf yā. ⁸Du'ū chí idiiⁿ nuuⁿndi ní yeⁿe yááⁿ'nguinūⁿ caati yááⁿ'nguinūⁿ diiⁿ nuuⁿndi sa ndii vmnaaⁿ. Cáávā chuū ndaa daiya Dendyuūs cucáávā chí nadi-tuuví yā chí diiⁿ yááⁿ'nguinūⁿ.

⁹Du'ū chí ch'iindiyáaⁿ yā taama vmnéⁿēe ní yeⁿe Dendyuūs ní nguéeé idiiⁿ yā nuuⁿndi caati ndaata yeⁿé Ndyuūs canée ndúucu yā. Ní nguéeé ngii dííⁿ yā nuuⁿndi caati ch'iindiyáaⁿ yā taama vmnéⁿēe ní yeⁿé Dendyuūs. ¹⁰Níicú chuū chí n'giⁿi chee chí daiya Dendyuūs. Níicú n'giⁿi chee chí daiya yááⁿ'nguinūⁿ. Du'ū chí

nguéeé idiiⁿ n'daacā ní nguéeé neⁿe vi'í, ní nguéeé yeⁿe Dendyuūs.

Dineⁿe yú 'aama yú taama yú

¹¹Chuū ní nduudu cuaacu yeⁿé Ndyuūs chí ndís'tií ch'iindiveéⁿ nī ndii vmnaaⁿ, chí dineⁿe yú 'aama yú ndúucu taama yú. ¹²Nguéeé tan'dúucā saⁿā Caín chí yeⁿē yááⁿ'nguinūⁿ. Saⁿā ch'iiⁿ'nuⁿ sá 'diinū sa. ¿'Íicú de'ē cáávā chí ch'iiⁿ'nuⁿ sá 'diinū sa? 'Tíicā diiⁿ sa caati chííⁿ chí maaⁿ sa diiⁿ sa ní nguéeé n'daacā. Níicú chíiⁿ chí diiⁿ 'diinū sa ní n'daacā.

¹³Ndís'tií vi'í, 'áá nguéeé n'diichí nī chí 'iiⁿyāⁿ yeⁿe iⁿyeeⁿdi nguéeé neⁿé yā ndís'tií. ¹⁴'Áā cho'ō yú vaadi n'gii ní 'áā n'geetinéeⁿ yú ndúucu vida cueⁿe daāⁿ-maⁿ. S'uuúⁿ déenu yú ti neⁿe yú vi'í yú. Du'ū chí nguéeé neⁿe vi'í, 'iiⁿyāⁿ miiⁿ cánée vaadi n'gii ndúucu yā. ¹⁵Du'ū chí nguéeé n'diichi vi'í 'caaⁿ'núⁿ yā 'iiⁿyāⁿ. Níicú deenu yú chí 'iiⁿyāⁿ chí n'giiⁿ'nūⁿ 'iiⁿyāⁿ nguéeé canée vida cueⁿe daāⁿ'maⁿ ndúucu yā. ¹⁶Ní ndúucu chuū n'diichi yú vaadi néⁿe, caati ch'ii Jesús cáávā s'uuúⁿ. 'Tiicá ntúūⁿ s'uuúⁿ canee chí 'cuūvi yú lado yeⁿē vi'í yú. ¹⁷Naati du'ū chí vée yeⁿē tanducueⁿē chí vee yeⁿe iⁿyeeⁿdi 'cūū níicú naáⁿ yā vi'í yā chí nguéeé yeⁿé yā, ní nguéeé neⁿe yā ca'á yā 'iiⁿyāⁿ, ¿táácā cūnee vaadi neⁿe yeⁿe Dendyuūs nduucú yā? ¹⁸Ndís'tií daiya n'gaiyáa, nguéeé dineⁿe yú ndúucu nduudu yeⁿe yú ndúucu chí caaⁿ'maⁿ yú naati ndúucu ntiⁿ'nyuⁿ chí diiⁿ yú ndúucu vaadi cuaacu.

Vée confianza yeⁿe yú nanáaⁿ Ndyuūs

¹⁹Ndúucu chuū ní deenu yú chí vaadi cuaacu ní ndúucu yú. Níicú staava yeⁿe yú seguro canée nanáaⁿ yā. ²⁰Ndúúti chí staava yeⁿe yú caaⁿ'maⁿ nuuⁿndi yeⁿe yú, ch'eeⁿe cá Dendyuūs nguéeé ti staava yeⁿe yú. Níicú déenu yā nducueⁿē dendu'ū. ²¹Ndís'tií chí neⁿé, ndúúti chí

staava yeⁿe yú nguéé caaⁿmaⁿ nuuⁿndi yeⁿe yú tuuⁿmi ní véé confianza yeⁿe yú ndúúcu Dendyuūs. ²²Nducuéⁿē chi caaca yú Ndyuūs, itée yā yeⁿe yú caati diiⁿ yú chi ngaⁿa ley yeⁿé yā nífcú idiiⁿ yú cosa chi n'daacā nanáaⁿ yā. ²³Chúu chi ley yeⁿé yā, chi i'teenu yú chi duuchi daiyá yā Jesucristo, ní dineⁿē yú 'aama yú ndúúcu taama yú, tan'dúúca chí ngaⁿá yā nduucú yú. ²⁴Du'ū chí diiⁿ chi ngaⁿa ley yeⁿé yā canéé ndúúcu Ndyuūs, nífcú Dendyuūs canee yā ndúúcu. Ní chuū chi deenu yú chi 'áamá cūneé yā ndúúcu yú cáávā Espíritu N'dai yeⁿé yā chi tee yā s'uuúⁿ.

Yeⁿe Espíritu N'dai yeⁿé Ndyuūs ní yeⁿe espíritu chi contra yeⁿe Cristo

4 Ndís'tiī chi neⁿé, nguéé cu'téenu nī tanducuéⁿē espíritu naati n'díichineeⁿ nī tanducuéⁿē espíritu cheé chi yeⁿe Dendyuūs caati néené 'yaaⁿ 'iiⁿyāⁿ nguéé ngaⁿa yā nduudu cuaacu yeⁿe Dendyuūs. ²Caati 'tíicā ní cuuvi deenú nī Espíritu chi yeⁿe Dendyuūs 'yā. Tanducuéⁿē espíritu chí ntúmiiⁿnuⁿ chí Jesucristo ní ndaá yā iⁿ'yeeⁿdí 'cūū ní yeⁿe Dendyuūs. ³Niicu tanducuéⁿē espíritu chi nguéé ntúmiiⁿnuⁿ chí Jesucristo ní ndaá yā iⁿ'yeeⁿdí tan'dúúca s'uuúⁿ nguéé yeⁿe Dendyuūs 'yā. Chíⁿ chí espíritu yeⁿē anticristo. 'Āā ch'iindiveéⁿ nī yeⁿē espíritu yeⁿe anticristo chí cánéé chi ndaa ní maaⁿ 'āā canéé iⁿ'yeeⁿdí 'cūū.

⁴Ndís'tiī ní daiyá yeⁿe Dendyuūs ndís'tiī. Nífcú 'āā chicheé nī yeⁿe espíritu chí canéé iⁿ'yeeⁿdí 'cūū chí espíritu yeⁿe anticristo caati 'iiⁿyāⁿ chí canéé ndúúcu nī ch'εεtē cá yā nguéé ti espíritu chí canéé iⁿ'yeeⁿdí 'cūū. ⁵Ní espíritus ní yeⁿe iⁿ'yeeⁿdí 'cūū, caavā chíⁿ chí ngaⁿá yā yeⁿe iⁿ'yeeⁿdí. Ní 'iiⁿyāⁿ yeⁿe iⁿ'yeeⁿdí n'giindiveéⁿ yā yeⁿē. ⁶S'uuúⁿ ní yeⁿé Dendyuūs s'uuúⁿ. Du'u chí n'diichí Dendyuūs n'giindiveéⁿ yā yeⁿe

yú. Du'u chí nguéé yeⁿe Dendyuūs, nguéé n'giindiveéⁿ yā yeⁿe yú. Caati ndúúcu chúu ní n'diichi yú Espíritu yeⁿe nduudu cuaacu ní espíritu chí nguéé yeⁿe nduudu cuaacu.

Ndyuūs ní vaadi neⁿe

⁷Ndís'tiī chí neⁿe taaví, dineⁿē yú 'aama yú taama yú caati vaadi neⁿe ní yeⁿe Dendyuūs. Nducyáácá 'iiⁿyāⁿ chí ya'āi 'ínú yā 'iiⁿyāⁿ ní yeⁿe Dendyuūs 'iiⁿyāⁿ miiⁿ, ní n'diichi yā Dendyuūs. ⁸Du'u chí nguéé idinéⁿe yā 'iiⁿyāⁿ nguéé in'diichí yā Dendyuūs, ti Dendyuūs ní vaadi neⁿe. ⁹Nífcú chuū chí ch'iⁿí yā nanáaⁿ yú ní vaadi neⁿe yeⁿe Dendyuūs. Nífcú chuū chí Dendyuūs dichó'o yā 'áamá n'dyáⁿā daiya yā iⁿ'yeeⁿdí 'cūū caati cuuvi 'cuεeti nduuchi yú cáávā 'iiⁿyāⁿ mífⁿ. ¹⁰Nífcú chuū ní chíⁿ chí canéé vaadi neⁿe. Nguéé chí s'uuúⁿ chí dinéⁿe yú Dendyuūs miiⁿ, ti Dendyuūs mífⁿ chí idinéⁿe yā s'uuúⁿ, nífcú dichó'o yā daiyá yā chí ch'iⁿí yā lado yeⁿe yú cucáávā nuuⁿndi yeⁿe yú.

¹¹Ndís'tiī chí neⁿé, ndúúti chí 'tíicā neⁿe Dendyuūs s'uuúⁿ 'tíicā ntúūⁿ s'uuúⁿ canéé chí dinéⁿe yú 'aama yú taama yú. ¹²Mar 'áamá 'iiⁿyāⁿ nguéé n'diichí yā Dendyuūs. Ndúúti chí idinéⁿe yú 'aama yú taama yú, Dendyuūs ní canéé yā ndúúcu yú. Nífcú vaadi neⁿe n'daacā n'dai canéé ndúúcu yú. ¹³Ndúúcu chuū ní deenu yú chí canee yú nduucú yā ní 'iiⁿyāⁿ miiⁿ nduucú yā s'uuúⁿ cáávā chí tee yā Espíritu N'dai yeⁿé Ndyuūs s'uuúⁿ. ¹⁴S'uuúⁿ in'diichí yú ní ngaⁿa yú nduudu cuaacu chí chiida yú dichó'o yā daiya yā. Ní daiya yā nadangáⁿai yā 'iiⁿyāⁿ yeⁿe tanducuéⁿē nuuⁿndi chí véé yeⁿe yā yeⁿē iⁿ'yeeⁿdí 'cūū. ¹⁵Du'ū chí intúmiiⁿnuⁿ chí Jesús ní daiyá Dendyuūs 'yā, Dendyuūs canéé yā nduucú yā, ní 'iiⁿyāⁿ miiⁿ canéé yā ndúúcu Dendyuūs.

¹⁶Nífcú s'uuúⁿ nin'diichi yú ní i'teenu yú chéé chí vaadi neⁿe chí Dendyuūs

dineⁿé yā s'uuúⁿ. Vaadī neⁿē míⁿ ní Dendyuūs. Níícú 'iiⁿyāⁿ chí neⁿé yā nducyaaca 'iiⁿyāⁿ ní yeⁿe Dendyuūs 'iiⁿyāⁿ. Níícú Dendyuūs canéé yā nducú yā. ¹⁷Ní chuū ní vaadī neⁿe chí n'dai taavi chí vée yeⁿe yú. Níícú vée nduudu yeⁿe yú nduucú yā nguuvi chí ndaa juicio. Tan'dúú^{cā} 'iiⁿyāⁿ miiⁿ 'túú^{cā} ntúúⁿ s'uuúⁿ canéé yú iⁿ'yeēⁿdī. ¹⁸Vaadī neⁿé ní nguée vaadī 'va'ā. Naati chíⁿ chí n'daacā taavi yeⁿe vaadī neⁿe i'neéⁿ 'áámá lado vaadī 'va'ā ti vaadī 'va'a ngíí chí 'cuináaⁿ yú. Du'ū chí 'va'a nguée canéé vaadī neⁿē n'daacā ndúú^{cū}.

¹⁹S'uuúⁿ ní idinéⁿe yú 'yā ti 'iiⁿyāⁿ miiⁿ dinéⁿe yā s'uuúⁿ vmaaaⁿ. ²⁰Du'ū chí ngaⁿa: 'Úú idineⁿé Dendyuūs, níícú nguée in'diichí yā vi'í yā, ní yaadī yā. Caati dú'u chí nguée idinéⁿe yā vi'í chí n'diichí yā, ¿táácā cuuvi dinéⁿe yā Dendyuūs chí nguée in'diichí yā? ²¹Níicu s'uuúⁿ ní canee yú ndúú^{cū} ley yeⁿé yā. Du'u chí idinéⁿe Dendyuūs, 'tiicá ntúúⁿ idinéⁿe yā vi'í yā.

S'uuúⁿ cuuvi cuchéé yú yeⁿe iⁿ'yeēⁿdī

5 Nducyáácá yā chí i'téenu yā chí Jesús chí Cristo miiⁿ tuu'mi ní ch'iindiyáaⁿ yā táámá yeⁿé Dendyuūs. Nducyáácá yā chí dinéⁿe yā chiida yú, idinéⁿe ntúúⁿ yā 'iiⁿyāⁿ chí daiyá yā. ²Ndúú^{cū} chuū ní deenu yú chí idinéⁿe yú 'iiⁿyāⁿ s'eeⁿ chí daiya Dendyuūs miiⁿ taachi idinéⁿe yú Dendyuūs ní diiⁿ yú chí ngaⁿa ley yeⁿe yā. ³Caati chuū chí vaadī neⁿe yeⁿe Dendyuūs chí s'uuúⁿ ní diiⁿ yú chí ngaⁿa ley yeⁿe yā. Ní ley yeⁿe yā nguée cosa chí 'cuinaaⁿ yú yeⁿé. ⁴Nducyáácá yā chí ch'iindiyáaⁿ táámá ní yeⁿé Dendyuūs ní cuuvi cuchéé yā yeⁿe iⁿ'yeēⁿdī. Ní chuū chí diiiⁿ chí cuchéé yú yeⁿe iⁿ'yeēⁿdī, ní chuū chí i'teenu yú Dendyuūs. ⁵¿Du'ū chí cuuvi cuchéé yeⁿe iⁿ'yeēⁿdī? 'Iiⁿyāⁿ chí i'téenu yā chí Jesús ní daiyá Dendyuūs 'yā ní cuchéé yā.

Nduudu cuaacu yeⁿe Daiyá Ndyuūs

⁶Ní chuū ní Jesucristo chí ndaā ndúú^{cū} nuūⁿnīⁿ ndúú^{cū} yuuúⁿ. Nguée dámaāⁿ ndúú^{cū} nuūⁿnīⁿ caati ndúú^{cū} nuūⁿnīⁿ ndúú^{cū} yuuúⁿ. Ní Espíritu N'dai yeⁿé Ndyuūs ngaⁿā nduudu cuaacu yeⁿe yā caati Espíritu miiⁿ ní vaadī cuaacu. ⁷Caati 'iinu yā ngaⁿa yā nduudu cuaacu na va'ai chéeti nguuvi, Dendyuūs chí ida yú ndúú^{cū} Nduudu ndúú^{cū} Espíritu N'dai yeⁿé Ndyuūs. Níícú naachi ndii 'iinú yā veé 'áámá ntúúⁿ yā. ⁸Vée 'iinu yā chí ngaⁿa yā nduudu cuaacu ná iⁿ'yeēⁿdī 'cūú ní Espíritu N'dai yeⁿé Ndyuūs ndúú^{cū} nuūⁿnīⁿ ndúú^{cū} yuuúⁿ. Ní naachi ndúú 'iinu yā ní vée 'áámá ntúúⁿ yā. ⁹Ndúú^{tí} chí cu'teenu yú nduudu cuaacu yeⁿé 'iiⁿyāⁿ yeⁿe iⁿ'yeēⁿdí 'cūú ch'ete ca nduudu cuaacu yeⁿé Dendyuūs nguée ti 'iiⁿyāⁿ miiⁿ. Caati chúú chíⁿ chí nduudu cuaacu yeⁿé Dendyuūs, Ndyuūs ngaⁿá yā nduudu cuaacu yeⁿe daiyá yā. ¹⁰Du'ū chí i'teenu daiyá Dendyuūs vée nduudu cuaacu ndúú^{cū} maāⁿ. Du'ū chí nguée i'teenu Dendyuūs, diíⁿ yā chí Dendyuūs ní yaadī yā caati nguée i'téenu yā nduudu cuaacu chí Dendyuūs chiida yú ngaⁿá yā yeⁿé Daiyá yā. ¹¹Níícú chuū chí nduudu cuaacu ní chuū chí Dendyuūs téé yā vida cueⁿe daāⁿmaⁿ s'uuúⁿ. Níícú vida cueⁿe daaⁿmáⁿ 'cūú ní yeⁿé daiya yā. ¹²Du'ū chí i'teenu daiya yā vée vida cueⁿe daāⁿmaⁿ yeⁿe yā. Du'ū chí nguée yeⁿe daiya yā nguée vée vida cueⁿe daāⁿmaⁿ yeⁿé yā.

Ch'iinū carta ndúú^{cū} consejos

¹³Chuū ní dinguúⁿ yeⁿe ndís'tií chí i'téenu ní chí Cristo ní daiyá Dendyuūs caati maaⁿ ní cuuvi cádíinuⁿ ní chí vée vida cueⁿe daāⁿmaⁿ yeⁿé ní. Níícú cu'téenu ní chí Cristo ní daiyá Dendyuūs miiⁿ.

¹⁴ Ní chuū ní confianza chi véé yeⁿe yú ndúúcu yā. Nduuti chi s'uuúⁿ caaca yú 'yā tan'dúúcā chi neⁿé yā chí caaca yú 'yā 'iiⁿ'yāⁿ miiⁿ n'giindiveéⁿ yā yeⁿ'ē yú. ¹⁵ Nduuti chi deenu yú chi n'giindiveéⁿ yā yeⁿ'e yú yeⁿ'e tanducuéⁿ'ē chi caaca yú 'yā, tuu'mi ní 'āā deenu yú chi itée yā s'uuúⁿ chiiⁿ chi 'āā chiica yú 'yā.

¹⁶ Du'ū chí n'diichi chi dinuuⁿndí vi'i nuuⁿndi chi nguéeⁿ yeⁿ'e vaadi n'gii, canéé chí caacá yā Dendyuūs chi Dendyuūs ca'á yā vida cueⁿ'e daāⁿmaⁿ yeⁿ'é yā. Ngaⁿ'á yeⁿ'e 'iiⁿ'yāⁿ chi nguéeⁿ dinuuⁿndí yā yeⁿ'e vaadi n'gii. Véé nuuⁿndi chi yeⁿ'e vaadi n'gii. Ní yeⁿ'e chuū nguéeⁿ caacá chi caacá nī yeⁿ'e 'iiⁿ'yāⁿ chi diiⁿ nuuⁿndí yeⁿ'e vaadi n'gii. ¹⁷ Tanducuéⁿ'ē chi nguéeⁿ yeⁿ'e nduudu cuaacu ní nuuⁿndi, naati véé nuuⁿndi míⁿ chí nguéeⁿ yeⁿ'e vaadi n'gii.

¹⁸ 'Āā deenu yú du'u 'iiⁿ'yāⁿ chi ch'iindiyáaⁿ yā táámá ní yeⁿ'e Dendyuūs ní nguéeⁿ idinuuⁿndí yā. 'Iiⁿ'yāⁿ miiⁿ candéε yā cuidado yeⁿ'e maáⁿ yā. Ní yááⁿ'guinūuⁿ nguéeⁿ cuuvi tuneⁿ' 'iiⁿ'yāⁿ miiⁿ.

¹⁹ Déenu yú ti yeⁿ'e Dendyuūs s'uuúⁿ, ní tanáⁿ'ā 'iiⁿ'yāⁿ yeⁿ'e iⁿ'yeēⁿdī caneé yā lado yeⁿ'e yááⁿ'guinūuⁿ.

²⁰ Déenu yú ti daiya Dendyuūs miiⁿ ní ndaá yā. Ní tee yā chí cadiinuuⁿ yú, ní 'ífcú n'diichi yú 'iiⁿ'yāⁿ chi cuaacu yā. Ní s'uuúⁿ ní yeⁿ'é 'iiⁿ'yāⁿ chi cuaacu yā ní yeⁿ'e daiya Dendyuūs chi Jesucristo. Dendyuūs miiⁿ ní 'iiⁿ'yāⁿ chi cuaacu, 'iiⁿ'yāⁿ chi véé vida cueⁿ'e daāⁿmaⁿ yeⁿ'é yā. ²¹ Ndís'tiī daiyá cundéε nī cuidado ti nguéeⁿ cu'téenu nī santos ídolos. 'Tíicā cuuvi.

CARTA CUAYIIVI YEⁿE SAN JUAN

Yeⁿe nduudu cuaacu ní yeⁿe vaadi neⁿe

1 'Úú Juan chi saⁿā chi ngaⁿa ntiiⁿnyuⁿ yeⁿe yaacū idinguúⁿ yeⁿe n'daataá chí Ndyuūs ndeēve yā ndúúcu daiya yā chi cuaacu níⁿnyúⁿ neⁿé. Ní nguéé 'úú dámaáⁿ neⁿé ti 'tiicá ntúúⁿ nducyáácá yā chi n'diichí yā nduudu cuaacu. ²Ní cáávā chí véé vaadi cuaacu yeⁿe yú ní caavā nduudu cuaacu chí canéé ndúúcu yú, 'áamá cūnee tandíí ndúúcu yú. ³Neⁿé chí canéé ndúúcu ndís'tií vaadi n'dai yeⁿé Ndyuūs ndúúcu vaadi ya'ai 'iinu yeⁿe yā ndúúcu 'diiⁿ yeⁿe Dendyuūs chiida yú ndúúcu Señor Jesucristo chí daiya Dendyuūs chí chiida yú. Tanducuéⁿe chuū canéé ndúúcu ní ndúúcu nduudu cuaacu ndúúcu vaadi neⁿe.

⁴'Āā 'áamá yeenú caati chí nindaācā daiya dí chí díⁿ yā chiiⁿ chí cuaacu tan'dúúcā s'uuúⁿ chí sta'a yú ley yeⁿe chiida yú. ⁵Maaⁿ ní idi'cuítú n'dií n'daatāa chí dinéⁿe yú 'áamá yú táamá yú. Chuū nguéé tan'dúúcā chí idinguúⁿ 'áamá ley ngāi caati ley yeⁿe yú chíⁿ chí canee ndíí cuaaⁿ vmnaaⁿ. ⁶Níícu chuū chí vaadi neⁿe ní chiiⁿ chí cachiiica yú tan'dúúcā chí caaⁿmaⁿ ley yeⁿe yā. Ley yeⁿe yā ní chuū chí cachiiicá ní ndúúcu vaadi neⁿe tan'dúúcā chí n'giindiveéⁿ ní ndíí cuaaⁿ vmnaaⁿ.

'Iiⁿyāⁿ chí nginnche'éí yā 'iiⁿyāⁿ

⁷N'dee n'dái 'iiⁿyāⁿ 'āā nginnche'éí yā 'iiⁿyāⁿ na iⁿ'yeeⁿdí 'cūū. Nguéé na-

tumiiⁿnúⁿ yā chí Jesucristo ní ndaá yā tan'dúúcā s'uuúⁿ. 'Iiⁿyāⁿ chí 'tíicā nginnche'éí yā, 'tiicá ntúúⁿ anticristo yā. ⁸Cundéé ní cuidado yeⁿe maáⁿ ní ní nguéé dindai yú tanducuéⁿe ntiiⁿnyuⁿ chí diiⁿ yú ti s'uuúⁿ ní cuuvi cuta'a yú tanducuéⁿe chí yeⁿe yú.

⁹Du'ū chí díⁿ nuuⁿndi ní nguéé 'áamá canéé yā ndúúcu nduudu cuaacu yeⁿe Cristo, nguéé yeⁿe Dendyuūs 'iiⁿyāⁿ. Du'ū chí 'aama canéé ndúúcu nduudu cuaacu yeⁿe Cristo, tuu'mí 'iiⁿyāⁿ miiⁿ ní yeⁿe chiida yú Dendyuūs ndúúcu daiyá yā. ¹⁰Du'ū chí ndaa vaacú ní chí nguéé ngaⁿa nduudu cuaacú 'cūū nguéé 'cuaáⁿ ní chí cunéé yā na vaacú ní. Ní nguéé caaⁿmaⁿ ní, n'daacā chí ndaá yā va'āi yeⁿe ní. ¹¹Du'ú 'iiⁿyāⁿ chí ngaⁿá yā 'iiⁿyāⁿ miiⁿ chí n'daacā chí ndaá yā va'āi yeⁿé yā tuu'mi ní induuvidáamá yā ndúúcu 'iiⁿyāⁿ chí idiⁿ chí nguéé n'daacā.

Ch'iinu carta maaⁿ

¹²'Áamá véé cá yeⁿé chí neⁿé dinguúⁿ yeⁿe ndís'tií ní nguéé neⁿé dinguúⁿ na caaca 'cūū ndúúcu tinta, caati neⁿé chí n'diichí ndís'tií ní caaⁿmáⁿ ndúúcu ní ní ndís'tií nduucú. Níícu vaadi yeenú yeⁿe yú ní cúúví cuaacu.

¹³Véé daiya tá yeⁿe n'daataá chí Ndyuūs indēevé yā táⁿā. Daiya tá idi-chó'ó yā: N'dai n'dií, ngaⁿa yā. 'Tíicā cuuvi.

CARTA NDÍÍ 'IINŪ YEⁿE SAN JUAN

Yeⁿe saⁿā Gayo chi n'dai

1 'Úú Juan, saⁿā chi ngaⁿa ntiⁿnyuⁿ yeⁿe yáacū idinguúⁿ carta 'cūū yeⁿe saⁿā Gayo chi cuaacu níⁿyúⁿ neⁿe taavi saⁿā.

²Díí saⁿā Gayo chi neⁿé, 'úú neⁿé chi cáávā maaⁿ di tanducuéⁿe chi véé yeⁿe di ní n'dai taavi. Nífcú véé vaadi 'viicheé yeⁿe di tan'dúúccā chi alma yeⁿe di véé vaadi 'viicheé yeⁿe. ³Nduudu cuaacu chi neene yeenú taachi ndaā vi^l yú chi caⁿa yā nduudu cuaacu yeⁿe di chi n'daacā diiⁿ di, tan'dúúccā chi 'áámá idiiⁿ di chiiⁿ chi cuaacu. ⁴Nguéé ch'etete ca vaadi yeenu yeⁿé chi ch'iindiveéⁿ chí daiyá díⁿ yā chiiⁿ chi cuaacu.

⁵Dii chi neⁿé, tanducuéⁿe chi diiⁿ di, n'daacā n'dai diiⁿ di ndúúccū vi^l yú ndúúccū 'iiⁿyāⁿ chi ngiica ná yúúní.

⁶'Iiⁿyāⁿ miiⁿ ngaⁿá yā nduudu cuaacú yeⁿe vaadi neⁿe yeⁿe di nanááⁿ 'iiⁿyāⁿ chi snúūⁿ yaācū. Nduuti chi cunnéé dí 'iiⁿyāⁿ tan'dúúccā chi canéé chi diiⁿ di ní tan'dúúccā chi neⁿe Dendyuūs chi diiⁿ di, tuuⁿmi ní n'daacā idiiⁿ di. ⁷Caati 'iiⁿyāⁿ cueⁿé yā 'muuⁿ cueⁿé yā miiⁿ cucáávā chi neⁿé yā caaⁿmáⁿ yā yeⁿe Cristo. Nguéé deⁿe vεε staⁿá yā yeⁿe 'iiⁿyāⁿ chi nguéé yeⁿe ndaata yeⁿé yā. ⁸S'uuúⁿ ní canee chi 'cuaaⁿ yú 'iiⁿyāⁿ s'tíí. Nífcú cuuvi cunée yā ndúúccū yú 'iiⁿyāⁿ chí idiíⁿ yā ntiⁿnyuⁿ yeⁿe vaadi cuaacu.

Saⁿa Diótfefes nguéé n'daacā diiⁿ sa

⁹'Úú nidinguúⁿ yeⁿe 'iiⁿyāⁿ yeⁿe yaācū caati Diótfefes nguéé 'cuaaⁿ sa nús'uu ti

neⁿé sa caaⁿmaⁿ ntiⁿnyuⁿ sá yeⁿé yā. ¹⁰Cáávā chuū taachi 'úú chi ndaá tuuⁿmi ní nin'gaacú tanducuéⁿe chi diiⁿ sáⁿā miiⁿ. Taatii caⁿā sa yeⁿe s'uuúⁿ ndúúccū nduudu taaⁿ chi nguéé n'daacā taatii 'caā'vā sa contra yeⁿe s'uuúⁿ. Ní nguéé yeenú sá ndúúccū dendu'ū. Nguéé n'guuⁿ sa vi^l yú. Ní nguéé neⁿe sa chi tanáⁿa yā chí 'cuaaⁿ yā vi^l yā. Nífcú tun'dáa sa 'yā cheeti yaācū.

¹¹Díí chi neⁿé, nguéé diiⁿ di chiiⁿ chi n'diichi di chi nguéé n'daacā. Diiⁿ di chi n'daacā. Du'ū chi din'daacā ní yeⁿe Dendyuūs. Du'ū chi nguéé n'daacā nidiiⁿ ní nguéé n'dííchí Dendyuūs.

Saⁿa Demetrio, n'daacā idiiⁿ sa

¹²Nducyáácá yā ngaⁿá yā nduudu cuaacu yeⁿe saⁿā Demetrio. 'Áā 'tiicá nūūⁿ nduudu cuaacu n'giⁿi vida yeⁿé yā. 'Tiicá ntúūⁿ s'uuúⁿ ngaⁿa yú ndúúccū cuaacu yeⁿe yā. Ní ndís'tií deenú ní chí ngaⁿá yú nduudu cuaacu yeⁿé yā.

Ch'iinū carta maaⁿ

¹³Nééné véé yeⁿé chi neⁿé dinguúⁿ yeⁿe ndís'tií naati nguéé neⁿé dinguúⁿ ndúúccū tinta ndúúccū pluma.

¹⁴Caati neⁿé n'diichí ndís'tií núúⁿ níⁿyūⁿ ní caaⁿmáⁿ ndúúccū di ní ndís'tií nduucú.

¹⁵'Diiⁿ canéé ndúúccū di. Amigos yeⁿe s'uuúⁿ dichó'o yā: N'daí n'dií, ngaⁿa yā. Dii dichó'o di: N'daí ndís'tií, yeⁿe amigos yeⁿe s'uuúⁿ taachi yaa'vi di 'iiⁿyāⁿ ca'áámá ca'áámá yā caavā chi duuchí Cristo. 'Tífcā cuuvi.

CARTA YEⁿE JUDAS

Judas idinguúⁿ carta 'cūu yeⁿe 'iiⁿyāⁿ chi Ndyuūs yaa'ví yā chi cuuvi yeⁿé yā

1 'Úú saⁿā Judas ní saⁿā chi dichí'vē Jesucristo. 'Úú 'diinú Jacobo ní 'úú idinguúⁿ carta 'cūu yeⁿe 'iiⁿyāⁿ s'eeⁿ chi Ndyuūs chiida yú dinéⁿe yā ní didēevé yā. Ní Cristo yaa'ví yā 'iiⁿyāⁿ s'eeⁿ chi cuuvi yeⁿé yā. Ní Cristo candéé yā cuidado 'iiⁿyāⁿ s'eeⁿ cáávā chi yeⁿé yā 'iiⁿyāⁿ s'eeⁿ. ²Neⁿé chi Ndyuūs téé yā ndís'tií n'deeé cá yeⁿé yā yeⁿe vaadi ya'ai ní yeⁿé vaadi 'diifⁿ ní yeⁿé vaadi neⁿe caati cuuvi 'yaaⁿ nducuéⁿē chuū nguaaⁿ ndís'tií.

Yeⁿé 'iiⁿyāⁿ chi nguéé ngaⁿā nduudu cuaacu

³Ndís'tií hermanos yeⁿé chi neⁿe taaví, neené neⁿé idinguúⁿ yeⁿe ndís'tií yeⁿé chi Ndyuūs nadanguáⁿai yā s'uuúⁿ. Maaⁿ ní cadiinuúⁿ chi canee chi idinguúⁿ carta 'cūu yeⁿe ní caati cuuvi yaa'ví ch'ēechi ndís'tií chi canéé chi diifⁿ ní luchar n'dai cáávā chiiⁿ chi i'téenu ní Ndyuūs. Ndyuūs 'áámá vmnēⁿēe ca'á yā vaadi i'téenu yeⁿé yā 'iiⁿyāⁿ chi yeⁿé yā. ⁴Náⁿā 'iiⁿyāⁿ chi nguéé yeⁿé Ndyuūs ní nduuvidaamá yā ndúúcu ní. Ndífⁿ nguéé deenú ní chuū. 'Iiⁿyāⁿ s'eeⁿ ní nguéé n'daacā. Ní canéé nguūⁿ na libro yeⁿé Ndyuūs ndii cuááⁿ vmaaaⁿ yeⁿé yā 'tíicā: Condenado yā ní 'cuūvi yā. Ní 'iiⁿyāⁿ s'eeⁿ dámaāⁿ sta'á yā nduudu cuaacu yeⁿé Ndyuūs chi tanáⁿā 'iiⁿyāⁿ nguéé cuuvi tuumicádifínuuⁿ yā yeⁿe chi maáⁿ yā diifⁿ yā chi nguéé n'daacā. 'Iiⁿyāⁿ s'eeⁿ ngaⁿá yā contra yeⁿe Ndyuūs yeⁿe yú chi 'áámá n'dyáⁿā Ndyuūs chi 'iivu yú, ní contra yeⁿe Señor Jesucristo yeⁿe yú dendú'ū.

⁵'Áará chi 'āā deenú ní yeⁿé Señor 'iivú Ndyuūs taachi nadanguáⁿai yā

'iiⁿyāⁿ Israel ní divíi yā 'iiⁿyāⁿ s'eeⁿ yeⁿe yáⁿāa Egipto, neⁿé chi ndís'tií n'gaacú ní chuū. Cuayivi mífⁿ Ndyuūs di'cuiinú yā 'iiⁿyāⁿ na yáⁿāa miiⁿ, 'iiⁿyāⁿ chi nguéé s'téenu yā 'yā. ⁶Ní n'gaacú ní yeⁿe ángeles chi nguéé diifⁿ yā tan'dúúca chi Ndyuūs ngaⁿa n'tiiⁿnyuⁿ yā ángeles miiⁿ. Ní Ndyuūs canéé chí divíi yā yeⁿe luga yeⁿé yā. Maaⁿ ní Ndyuūs s'néeⁿ yā ángeles chi presos yeⁿé yā na maaiⁿ chí yáanuⁿ. Miiⁿ canee yā ndífⁿ chichi yā ndúúcu cadenas chí 'áámá canee ndii tiempo chí Ndyuūs n'diichí yā nuuⁿndi yeⁿe ángeles miiⁿ. ⁷Ní n'gaacú ní yeⁿe yáāⁿ Sodoma ndúúcu yáāⁿ Gomorra ndúúcu yáāⁿ chí snéé cuaaⁿ 'diituú. 'Tiicá ntúuⁿ nguéé n'daacā idiifⁿ 'iiⁿyāⁿ yeⁿe yáāⁿ s'eeⁿ tan'dúúca chí diifⁿ ángeles. 'Iiⁿyāⁿ s'eeⁿ ní cueⁿé yā ndúúcu n'daataa o isaⁿā chí nguéé yeⁿé yā. Ní n'daataa nguaaⁿ n'daataá yā induuchineeⁿ tá n'daataa ndúúcu ví'i. Ní saⁿā nguaaⁿ saⁿā yā induuchinéeⁿ sa saⁿā ndúúcu ví'i. 'Iiⁿyāⁿ s'eeⁿ cáávā castigo yeⁿe yā 'áámá cunée yā cueⁿe daāⁿmaⁿ na nguuchi yaⁿā. Ní chuū ní ch'iⁿi s'uuúⁿ chí cuuvi chó'oo yeⁿe yú nduuti chí diifⁿ yú chí nguéé n'daacā.

⁸'Tiicá ntúuⁿ nguuvi nguuvi saⁿā s'eeⁿ n'gíinu sa tan'dúúca chí taachi cyaadu sa yeⁿe dendú'ū chí cuuvi diifⁿ sa chí dinuuⁿndi sa ndúúcu maaⁿ cuerpo yeⁿe sa. Ní nguéé neⁿe sa chí Ndyuūs ngaⁿa n'tiiⁿnyuⁿ yā yeⁿe sa. Ní cunncaā ngaⁿa yā yeⁿe 'iiⁿntyéⁿē chí diifⁿ n'tiiⁿnyuⁿ yeⁿé Ndyuūs. ⁹Ní nguéé 'tíicā diifⁿ ángel Miguel chí ndífⁿ tiiifⁿ taachi diifⁿ caandaá ndúúcu yáāⁿnguiniūⁿ ní ngaⁿa yā yeⁿe cuerpo yeⁿe Moisés. Ángel Miguel miiⁿ nguéé diifⁿ yā condenar yáāⁿnguiniūⁿ miiⁿ ní nguéé cuuvi ngaⁿa taáⁿ yā chí yáāⁿnguiniūⁿ chí cuuvi condenado yā. Dámaāⁿ ngaⁿa yā 'túúca. Señor ní diifⁿ yā repprender diifⁿ yeⁿe nuuⁿndi chí diifⁿ di. ¹⁰Saⁿā s'eeⁿ ní nguéé n'daacā ngaⁿa sa yeⁿe dendú'ū chí nguéé deenu sa. Ní

taachi saⁿā s'eeⁿ yeⁿe chi maaⁿ sa deenu sa ngaⁿa sa tuu^mi ní canee sa tan'dúúca chi 'iiti s'eeⁿ chi maaⁿ tī deenu tī. 'Tíicā saⁿā s'eeⁿ. Dendú'ū miiⁿ ní diiiⁿ chi dituuví maáⁿ saⁿā s'eeⁿ.

¹¹ De'ε chúuca ya'ai yeⁿe saⁿā s'eeⁿ caati dámaāⁿ chi neⁿē sa diiⁿ sa tan'dúúca chi diiⁿ saⁿā Caín. Ní saⁿā s'eeⁿ cáávā chi neⁿe sa tuúmi, dinuuⁿndi sa tan'dúúca chi diiⁿ saⁿā Balaam. Ní ch'i sa caati nguéé diiⁿ sa chi ngaⁿa Ndyuūs, tan'dúúca saⁿā Coré chi nguéé diiⁿ sa chi ngaⁿa Ndyuūs taachi nguéé ch'iindiveeⁿ sa chi ngaⁿa Moisés. ¹² Maaⁿ ní 'iiⁿyāⁿ chi 'tíicā, taachi nduuvidaamá yā ní che'é yā ní cu'ú yā ndúúcu ndís'tii taachi véé 'viicu ná va'ai yeⁿé ní yeⁿe chi dineⁿé ní 'áamá ní taama ní, tuu^mi ní chuū ní cosa chi cuuvi 'cuináⁿ ní. 'Iiⁿyāⁿ s'eeⁿ nguéé 'va'á yā yeⁿē mar 'áamá. Dámaāⁿ candεε yā cuidado yeⁿe maáⁿ yā. 'Iiⁿyāⁿ s'eeⁿ tan'dúúca meēⁿ chi nguéé nuūⁿiⁿ yeⁿē chi cueeⁿ cuuvi ní tan'dúúca 'yúúné candεε 'muuⁿ ní candεε miiⁿ 'tíicā yā. 'Iiⁿyāⁿ s'eeⁿ tan'dúúca yáⁿá chi nguéé véé n'gui'i yeⁿē 'tíicā yā. Ní yáⁿá miiⁿ ní nguéé dichí'vē caati nguéé n'gui'i yeⁿē ní n'dii tan'dúúca tiempo yeⁿē 'iicheε. Ní 'iiⁿyāⁿ tiicú yā yáⁿá miiⁿ ndii dí'íyú. 'Tíicā 'iiⁿyāⁿ s'eeⁿ. ¹³ 'Iiⁿyāⁿ s'eeⁿ ní tan'dúúca nuūⁿiⁿyáⁿā chi ngii yú yaacu ndúúcu ngii yáíⁿ inaaⁿ cucáávā 'yúúné taaⁿ. Ní nducuéⁿē chi nguéé n'daacā chi diiⁿ yā yeⁿe chi cuuvi 'cuináⁿ yā ní tan'dúúca ngii yáíⁿ inaaⁿ yeⁿe nuūⁿiⁿ miiⁿ chi inaaⁿ yú 'táácā idiíⁿ yā. 'Iiⁿyāⁿ s'eeⁿ ní tan'dúúca 'ííⁿnyúⁿ chi ngíicā, 'tíicā yā. Ndyuūs nguáin'dai yā 'áamá lugar yeⁿe 'iiⁿyāⁿ s'eeⁿ chi dí-tuu taavi ca maáiⁿ ndii yaānūⁿ naachi canéé yā cueⁿe daāⁿmaⁿ.

¹⁴ 'Tiicā ntúúⁿ, saⁿa Enoc chí ndíí ná ndεēchē ngiini familia yeⁿe saⁿa Adán, ní Enoc miiⁿ cáávā Espíritu N'dai yeⁿé Ndyuūs caⁿa sa chii sa 'iiⁿyāⁿ yeⁿe dendu'ū chi cuchíi yeⁿé yā. Ní caⁿa sa

'tíicā: Cuin'diichí ní Señor Jesucristo miiⁿ ní cuchii yā ndúúcu n'dee n'dái mil 'iiⁿyāⁿ chi i'téenu yā 'yā. ¹⁵ Señor Jesucristo ndaa yā chi n'diichí yā nuuⁿndi yeⁿe nducyaaca 'iiⁿyāⁿ. Ní caaⁿmaⁿ yā chi condenado yā nducyaaca 'iiⁿyāⁿ nuuⁿndi chi nguéé i'téenu yā 'yā caavā nducuéⁿē nuuⁿndi chi díⁿ yā ndúúcu nduudu chi ngaⁿa yā chi nguéé n'daacā chi contra Ndyuūs. ¹⁶ 'Iiⁿyāⁿ s'eeⁿ ní néené n'gεecu cheendí yā tan'dúúca chi 'téé nuuⁿ taáⁿ yā ní ngaⁿá yā yeⁿe chi nguéé neⁿé yā yeⁿē chi táámá yā idiíⁿ yā. Ní díⁿ yā chi nguε n'daacā caati maáⁿ yā neⁿe yā. Ní ndúúcu nduudu chi n'gεete ngaⁿá yā yeⁿe taamá yā chi ch'εeté yā taachi 'iiⁿyāⁿ s'eeⁿ neⁿé yā diiⁿ yā aprovechar dendu'ū cáávā maáⁿ yā.

Judas ngaⁿa yā yeⁿe chi 'iiⁿyāⁿ chi yeⁿe Cristo canéé chí dííⁿ yā

¹⁷ Ndís'tii, hermanos chi neene neⁿé, maaⁿ ní neⁿé chi ndís'tii ní n'gaacú ní yeⁿe nduudu chi apóstoles yeⁿe Señor Jesucristo yeⁿe yú taacā chi caⁿa yā. ¹⁸ 'Tíicā caⁿa yā chii yā ndís'tii: Taachí 'āā canéé niiⁿnuúⁿ nguuvi chí ndaa Señor Jesucristo taama vmnéⁿēe tuu^mi ní 'iiⁿyāⁿ s'eeⁿ ní diduuchineéⁿ yā yeⁿe ní ndúúcu tanducuéⁿē chi yeⁿe Ndyuūs. Ní nducuéⁿē chi 'iiⁿyāⁿ s'eeⁿ neⁿé yā díⁿ yā chi nguε n'daacā, chuū ní díⁿ yā. ¹⁹ 'Iiⁿyāⁿ s'eeⁿ ní divíi yā yeⁿē nguaaⁿ ndís'tii. 'Iiⁿyāⁿ s'eeⁿ ní dinuuⁿndí yā tan'dúúca chi neⁿe yā ní nguéé canéé Espíritu N'dai yeⁿé Ndyuūs ndúúcu yā.

²⁰ Maaⁿ ní ndís'tii hermanos yeⁿé chi neene neⁿé, cu'téenu cá ní nguuvi nguuvi yeⁿē vaadi i'teenu chi Ndyuūs itée yā ndís'tii. Taachi caaⁿmaⁿnguaⁿá ní díⁿ ní ndúúcu poder yeⁿē Espíritu N'dai yeⁿé Ndyuūs. ²¹ 'Cuεetineé ní ní díⁿ ní nducuéⁿē ndúúcu vaadi neⁿe chi Ndyuūs itée yā ndís'tii 'naaⁿ chi cūnee ngiinú ní nguuvi chi Señor Jesucristo yeⁿe yú chí

n'dai taavi caⁿá yā téé yā vida cueⁿe daāⁿmaⁿ ndís'tiī.

²²Ndís'tiī n'deeé cá ngaⁿa nī ndúúcu 'iiⁿyāⁿ chi nguéé n'daacā i'téenu yā. ²³Ní 'tíicā nadanguáⁿai nī 'iiⁿyāⁿ s'eeⁿ yeⁿe chi nguéé i'téenu yā tan'dúúca chi tun'dáa nī 'iiⁿyāⁿ nguááⁿ nguuchi yaⁿā, 'tíicā díⁿ nī. Ya'ai 'iinú nī yeⁿe tanáⁿā 'iiⁿyāⁿ naati díⁿ nī ndúúcu cuidado, ndíí nguéé cuuvi caⁿa nī ndúúcu yā chi dinuⁿndí nī.

**Judas ngaⁿangua'á yā ní
dich'eté yā Ndyuūs**

²⁴Maaⁿ ní 'úú chi'neéⁿ ndís'tiī na ta'a Ndyuūs chi cuuvi candæ yā cuidado

yeⁿe ndís'tiī chi nguéé dinuuⁿndí nī. Ní Jesucristo cuuvi 'cuuⁿmíⁿ yā nanááⁿ Ndyuūs chi deeve ngii n'dai ndís'tiī chi nguéé nuuⁿndi yeⁿe nī. Ní neené yeenu nī. ²⁵Dich'etete yú Ndyuūs chi 'áamá n'dyáⁿā Ndyuūs chi deenu nducueⁿe ní nadanguáⁿai yā s'uuúⁿ cáávā Señor Jesucristo chi 'iivi yú. Caati yeⁿe yā ní véé deevé ngii n'dai ndúúcu n'geete n'dai ndúúcu poder ch'etete n'dai ndúúcu poder yeⁿe 'iiⁿntyéⁿe yeⁿe yā nguuvi chi chó'oo ndúúcu nguuvi maaⁿ ní cuéⁿe daāⁿmaⁿ. 'Tíicā cuuvi.

APOCALIPSIS, NDUUDU CHÍ CH'Í'I NDUYŪS YEⁿE JESUCRISTO

Yeⁿe chi Jesucristo ch'í'i yā

1 Na libro 'cūū canéé nguūⁿ chuū chi ch'í'i Jesucristo. Ní Ndyuūs ch'í'i yā Jesucristo chuū caati 'cuuⁿmíⁿ yā 'iiⁿyāⁿ chi dichí'vē Ndyuūs dendú'ū chi 'āā ntéé 'nááⁿ chi ndaa yeⁿé. Ní Jesucristo ch'í'i yā chuū Juan chi dichí'vē Ndyuūs cáávā 'áámá ángel chi dichó'o yā nanááⁿ yā. ² Juan miiⁿ caⁿa cuaacú yā nduudu cuaacu yeⁿe tanducuéⁿē chi n'diichí yā. Chuū ní nduudu cuaacu yeⁿe Ndyuūs. Ní chuū ní nduudu cuaacu chí Jesucristo ch'í'i yā Juan miiⁿ.

³ De'e chúúcā yeenú 'iiⁿyāⁿ chi n'geeⁿ yā libro 'cūū chi yeⁿé Ndyuūs. Ní de'e chúúcā yeenú 'iiⁿyāⁿ s'uuuⁿ chi n'giindiveeⁿ yā nduudu yeⁿe libro 'cūū ní i'téenu yā yeⁿe chí ngaⁿā, ti ngaⁿā yeⁿe dendu'ū chí cuchii ti tiempo miiⁿ chi canee chi chó'oo 'āā snee niiⁿnuúⁿ.

Juan idingúuⁿ yā yeⁿe 'iiⁿyāⁿ yeⁿe ndu'u ndéechē yaacū.

⁴ 'Úú Juan idinguúⁿ cartas yeⁿe 'iiⁿyāⁿ yeⁿe ndéechē yaacū chi snéé na yáⁿāa Asia. Neⁿé chi Ndyuūs téé yā ndís'tii dendú'ū chi n'dai yeⁿé yā ndúúcū vaadí 'diifⁿ yeⁿé yā. Ní Ndyuūs ní 'áámá canee yā tiempo chi chó'oo, ní maaⁿ ní 'tíca yā, ní caⁿá yā ndaa yā. Maaⁿ ní neⁿé chi yeⁿe ndu'u ndéechē espíritus chi snéé yā nanááⁿ trono yeⁿé Ndyuūs, espíritus téé yā ndís'tii vaadí n'dai yeⁿe Ndyuūs. ⁵ Ní 'tíicā ntúūⁿ neⁿé chi Cristo téé yā ndís'tii vaadí n'dai yeⁿé yā, Jesucristo chi cuéⁿé daāⁿmaⁿ ngaⁿa cuaacú yā. Ní Cristo miiⁿ ní daiyá Ndyuūs ní 'iiⁿyāⁿ chi vmnááⁿ vmnaaⁿ nacueeⁿ yā yeⁿe nguuaⁿ tináⁿā. Ní ngaⁿa ntiíⁿnyúⁿ yā yeⁿe nducyáácá reyes chi véé iⁿyeedí 'cūū. Ní Cristo

dinéⁿe yā s'uuúⁿ ní nadeēvé yā s'uuúⁿ yeⁿe nuuⁿndi yeⁿe yú ndúúcū yuuúⁿ yeⁿe maáⁿ yā. ⁶ Ní Cristo díⁿ yā chi s'uuúⁿ reyes s'uuúⁿ ní chiiduú s'uuúⁿ chi dichiiⁿvē yú Ndyuūs chi chiidá yā. Maaⁿ ní vaadí deeve ngii ní yeⁿé yā ndúúcū nducuéⁿē poder chí yeⁿé yā cuuvi yeⁿé yā cueⁿe daāⁿmaⁿ. 'Tíicā.

⁷ Cuin'diichí ní. Cristo miiⁿ cuchii yā nguááⁿ meēeⁿ ní nducyáácá 'iiⁿyāⁿ cuuvi snaaⁿ yā ndúúcū 'iiⁿyāⁿ s'eeⁿ chi dichó'oo tíicūā Cristo ndúúcū machete chí 'uūvi lados 'caāiⁿ. Ní nducyaaca 'iiⁿyāⁿ yeⁿe nducyaaca yāāⁿ yeⁿe iⁿyeedí 'cūū cuēcú yā taachi n'diichí yā Cristo. 'Tíicā rā va. Cuaacu níⁿnyúⁿ chí 'tíicā.

⁸ Señor Ndyuūs chi véé tanducuéⁿē poder dendu'ū yeⁿé yā chí 'áámá canee yā tiempo chí chó'oo, ní maaⁿ ní 'tíca yā, ní caⁿá yā ndaa yā, Señor miiⁿ ngaⁿa yā: 'Úú chí 'iiⁿyāⁿ vmnááⁿ vmnaaⁿ 'úú, ní 'úú ndíí cuááⁿ naachí 'cuiinu 'úú. Tan'dúúcā letras A ndii Z yeⁿe alfabeto 'tíicā 'úú.

Yeⁿe chi Juan n'diichí yā Cristo chí deeve n'dai taavi yā ndii túúⁿnúⁿ ngii 'yáⁿa yā

⁹ 'Úú apóstol Juan 'úú ní hermano yeⁿe ndís'tii. Ní caati 'úú ní yeⁿe Jesús 'úú, 'úú dáámá ch'eenú chii ndúúcū ndís'tii ní dáámá nduucú ní yeⁿe naachi Ndyuūs ngaⁿa ntiíⁿnyúⁿ yā, ní dáámá nduucú ní yeⁿe vaadí 'diifⁿ chí Jesucristo itée yā s'uuúⁿ. 'Úú canéé preso 'úú na isla Patmos cáávā chí candéé nduudu cuaacu yeⁿé Ndyuūs ní ngaⁿá nduudu cuaacu yeⁿé Jesucristo. ¹⁰ Ní taachi 'úú canéé miiⁿ 'áámá domingo chó'oo chí 'úú ní canéé maaⁿ poder yeⁿe Espiritu N'dai yeⁿe Ndyuūs. Ní ch'iindiveeⁿ 'áámá nduudu ch'ete cuaaⁿ daamí tan'dúúcā chí n'geécú 'áámá trompeta. ¹¹ Ní 'tíicā ngaⁿā ngii 'úú: 'Úú 'iiⁿyāⁿ chí vmnááⁿ vmnaaⁿ 'úú, 'úú ndíí cuááⁿ naachí 'cuiinu 'úú. Tan'dúúcā letras A ndii Z yeⁿe alfabeto 'tíicā 'úú. Dii, Juan, idingúuⁿ di na

'áamá libro cosa chi inaaⁿ di ní dichó'o di libro miiⁿ nanááⁿ 'iiⁿyāⁿ yeⁿe ndu'u ndeēchē yaacū chi sneē na yáⁿāa Asia. Yáacū s'eeⁿ ní yeⁿe yáāⁿ Efeso, ní yeⁿe yáāⁿ Esmirna, ní yeⁿe yáāⁿ Pérgamo, ní yeⁿe yáāⁿ Tiatira, ní yeⁿe yáāⁿ Sardis, ní yeⁿe yáāⁿ Filadelfia, ndúúcū yeⁿe yáāⁿ Laodicea.

¹²Tuuⁿmi ní 'úú nan'guaacúndií ní n'diichí du'ū chi yaá'vi 'úú. Taachi n'diichi cuaaⁿ daamí n'diichí ndeēchē candeleros yeⁿe 'díⁿnguāaⁿ. ¹³Ní nááv-taⁿa yeⁿe ndu'u candeleros miiⁿ 'áamá yā cheendii yā tan'dúúcā 'aama saⁿā daiyá 'iiⁿyāⁿ iⁿ'yeeⁿdí 'cūū. Canúuⁿ yā 'áamá catecai chi ngeē yā chi ndaa ndii ná daandu ca'a yā. Ní ndéé chiichí 'áamá cinta yeⁿe 'díⁿnguāaⁿ cuaaⁿ 'níⁿíⁿúⁿ yā. ¹⁴Ní tíⁿ yā ndúúcū yundutiⁿ yā ní cuéē tan'dúúcā duudū 'iiti cuūchí cuéé, ní 'tiicá ntúūⁿ cuéē tan'dúúcā yaāⁿ. Ní nduutináaⁿ yā tan'dúúcā 'áamá nguuchi yaⁿā. ¹⁵Ní ca'a yā tan'dúúcā cūū cuááⁿ chi ndís'tiū 'āā ngiichí nī cheeti 'áamá horno ní deevé diiⁿ nī. Ní nduudu yeⁿe yā ní tan'dúúcā chí n'geecú 'yaa n'dái yíícú. ¹⁶Ní ndeē yā na ta'a cuaacú yā ndeēchē 'íⁿnyúⁿ. Ní na cheendí yā miiⁿ canéé 'áamá machete chi 'caāⁿ nduu 'uuví lados. Ní n'úⁿúⁿ máⁿ naaⁿ yā ngíⁿ n'gāi tan'dúúcā chi n'gāi 'yáⁿā taachi nééné ínguaaⁿ nááⁿ.

¹⁷Ní taachi 'úú snaáⁿ 'iiⁿyāⁿ miiⁿ sndeévé na ca'a yā tan'dúúcā chi ch'í. Ní 'iiⁿyāⁿ miiⁿ s'neéⁿ yā ta'a cuaacú yā vmnaaⁿ yeⁿe 'úú ní caⁿa yā chíi yā 'úú: Nguéé 'va'a di. 'Úú chí vmnááⁿ vmnaaⁿ, 'úú ndíⁿ cuaaⁿ naachí 'cuiinu 'úú. ¹⁸'Úú 'áamá canduuchí. Cuáácú ch'ii naati cuin'diichí nī maaⁿ ní 'úú canduuchí cueⁿe daāⁿmaⁿ 'tíicā. 'Úú ní ndéé llaves yeⁿe vaadi n'gii chi yeⁿe lugar naachi snéé 'iiⁿyāⁿ chi n'díⁿ ní nguéé chí'téenu yā Ndyuūs. ¹⁹Maaⁿ ní dii dingúuⁿ di dendu'ū chi 'túúcā chi n'diichi di ndúúcū dendu'ū chi 'tíicā ndúúcū dendu'ū chi

ndaa cuayiivi. ²⁰Maaⁿ ní 'úú n'giⁿí dii de'e neⁿe caaⁿmaⁿ ndeēchē 'iiⁿnyúⁿ miiⁿ chi n'diichi di na ta'a cuaacú ní yeⁿe chi ndeēchē candeleros yeⁿe 'diiⁿnguāáⁿ miiⁿ. Ndu'u ndeēché 'iiⁿnyúⁿ miiⁿ chíⁿ chí du'ū ndeēchē 'iiⁿyāⁿ chí ndíⁿ tiiⁿ yeⁿe ndu'ū ndeēchē yaacū miiⁿ. Ní ndu'ū ndeēchē candeleros chí n'diichi di chíⁿ chí ndeēchē yaacū miiⁿ.

Juan idingúuⁿ yā carta 'cūū yeⁿe 'iiⁿyāⁿ yeⁿe yáāⁿ Efeso

2 Díⁿ, Juan idingúuⁿ di chuū yeⁿe 'iiⁿyāⁿ chí ndíⁿ tiiⁿ yeⁿe yáacū yeⁿe yáāⁿ Efeso. 'Iiⁿyāⁿ chí ndeē yā ndu'u ndeēchē 'íⁿnyúⁿ na tá'a cuaacú yā ní chíicá yā nguaaⁿ ndeēchē candeleros yeⁿe 'díⁿnguāaⁿ, 'iiⁿyāⁿ miiⁿ ngaⁿá yā dendu'ū chí 'túúcā: ²'Úú ní deenú ntiⁿnyuⁿ chí diiⁿ di. Deenú chí díftūu n'dái diiⁿ dí ntiⁿnyuⁿ ní véé paciencia nanáaⁿ di. Ní deenú chí ichē di yeⁿe 'iiⁿyāⁿ chí nguēe n'daācā idiíⁿ yā. Ní deenú ntúūⁿ chí ndeē di cuidado yeⁿe 'iiⁿyāⁿ chí ngaⁿa chí apóstoles ní nguéé 'tiicá yā. Ní dii deenu di chí 'iiⁿyāⁿ s'eeⁿ nguéé apóstoles 'iiⁿyāⁿ. Ní deenu di chí yaadi yā. ³Ní dii véé paciencia nanáaⁿ di ní n'geenu di ngii. Ní diiⁿ di n'dee n'dái ntiⁿnyuⁿ cáávā 'úú. Ní nguéé chicúuⁿnuⁿ di yeⁿe dendu'ū. ⁴Naati véé 'téé contra yeⁿe di. Nguéé dineⁿe di 'úú tan'dúúcā chí vmnááⁿ vmnaaⁿ dineⁿe ca di. ⁵Ní cáávā chuū nn'gáácú dí yeⁿe chí diiⁿ di chí nguéé dineⁿe ca di 'úú ní ndaa-cadaami di yeⁿe. Ní dineⁿe ca di 'úú tan'dúúcā chí diiⁿ di vmnááⁿ vmnaaⁿ. Ní nduuti chí nguéé 'túúcā diiⁿ di, 'úú ní ndāa niiⁿnuúⁿ ní divíⁿ candelero yeⁿe di yeⁿe naachi snéé. ⁶Ní chuū chí véé favor yeⁿe di. Nguéé inee yiinu di ntiⁿnyuⁿ chí diiⁿ 'iiⁿyāⁿ yeⁿe grupo yeⁿe Nicolaítas. Ní 'úú ntúūⁿ nguēe neⁿe chí díⁿ yā. ⁷'Iiⁿyāⁿ chí véé veéⁿ yā 'caandiveéⁿ yā chí ngaⁿā Espíritu N'dai yeⁿe Ndyuūs ngii 'iiⁿyāⁿ yeⁿe yáacū s'eeⁿ. 'Úú ngaⁿá

chi 'ii''yāⁿ chi cuchée yā ye''e dendu'ū, 'úú ca'á 'ii''yāⁿ s'eeⁿ chi che'é yā n'gui'i ye''e yá''á ye''e vida cue''e daā''maⁿ chí cánée naavta''ā ye''e paraíso chi jardín ye''e Ndyuūs.

Juan idingúu''n yā carta 'cūū ye''e 'ii''yā''n ye''e yáā''n Esmirna

⁸Díí, Juan, idingúu''n di ye''e 'ii''yā''n chi ndíí tii''n ye''e 'ii''yā''n ye''e yáacū ye''e yáā''n Esmirna. Dendu'u chi 'túúca nga''á 'ii''yā''n chi vmnáá''n vmnā''n ndii chí 'cui-inu, 'ii''yā''n chi 'āā n'dii yā ní maa''n ní 'āā canduuchi ntuú''n yā. ⁹'Úú deenú nti-''nyu''n chi dii''n di. Deenú chi n'geenu di ngii ndúúcu dendu'ū chi chēchí n'dai ye''e di. Deenú chi nguée dé'ē vee ye''e di naati cuaacu ní''nyú''n chi 'cuiica di. 'Úú deenú ye''ē chi 'ii''yā''n chi nga''á yā chi judíos yā chi Israel ya ní nguée díí''n yā tan'dúúca chí 'ii''yā''n judíos yā. Ní deenú chi 'ii''yā''n s'ee''n nguée n'daacā nga''á yā ye''e di. Ní 'ii''yā''n s'ee''n ní ye''e yáá''n'guiinū''n. ¹⁰Nguée 'va'a di ye''ē dendú'ū chi canee chi 'cuenú di cuuvi. 'Caandivee''n di ye''é. Yáá''n'guiinū''n cutá'a sa ná''ā ndís'tii''n ní cu'nuu''n sa 'ii''yā''n vácūū caati n'diichinee''n sa nducyaaca ndís'tii. Ní canee chi 'cuenú nī cuuvi ndiichí nguuvi. Naati 'áámá canee nī ndúúcu chí i'téenu nī ndii chí 'cuūvi nī ní 'úú teé ndís'tii 'áámá corona chi vida cue''e daā''ma''. ¹¹'Ii''yā''n chí véé veé''n yā 'caandiveé''n yā chí nga''ā Espíritu N'dai ye''é Ndyuūs ngii 'ii''yā''n s'ee''n ye''e yáacū s'ee''. 'Ii''yā''n chí cuchée yā ye''e tanducué''ē dendu'ū nguée cuuvi 'cuenú yā cuuvi ye''ē ndii 'úúvī vaadi n'gii chí infierno.

Juan idingúu''n yā carta 'cūū ye''e 'ii''yā''n ye''e yáā''n Pérgamo

¹²Díí, Juan, idingúu''n di ntúū''n 'ii''yā''n ndíí tii''n chí ye''e 'ii''yā''n ye''e yáacū ye''e yáā''n Pérgamo: Chuū nga''á 'ii''yā''n

chí véé machete chí 'uūvī lados 'caāi''n. ¹³Chuū nga''a yā. 'Úú ní deenú tanducué''ē chí dii''n di. Deenú chí canee di naachi yáá''n'guiinū''n nga''a ntii''nyu''n sa. Ní 'áará chí 'tíicā 'áámá canee di lado ye''é nguée ndaacádaami di ye''e chí i'téenu di 'úú. Ní 'tiicá ntúū''n dii''n di nguuvi chí ch'ó'oo taachi nguaa''n ndís'tii 'ii''yā''n s'ee''n chí 'ii''n'nú''n yā sa''ā Antipas chí 'áámá ca''ā sa nduudu cuaacu ye''é na yáā''n naachi canee yáá''n'guiinū''n. ¹⁴Naati véé n'duuvi dendu'ū ye''e chí contra ye''ē di. Na yáā''n Pérgamo chí yáā''n ye''e di véé nguaa''n ndís'tii ná''ā 'ii''yā''n chí nguée ne''é yā s'nee''n yā ye''e chí i'téenu yā chí 'cuee''n Balaam. Ní Balaam mii''n 'ii''yā''n chí chí 'cuee''n yā sa''ā Balac táacā cuuvi dii''n sa chí 'ii''yā''n ye''e Israel dinu-''ndí yā. Ní 'ii''yā''n s'ee''n ye''e Israel dinu-''ndí yā taachi che'é yā dendu'ū ye''e chí 'ii''yā''n cáávā ofrenda ca'a yā nátai ye''e santos chí ídolos, ní taachi ca''á yā ndúúcu 'aama n'daataá o 'aama isá''ā chí nguée ye''é yā. ¹⁵Ní 'tiicá ntúū''n véé nguaa''n ndís'tii 'ii''yā''n chí nguée ne''é yā s'nee''n yā ye''e chí i'téenu yā chí ca'cuee''n yā ye''e 'ii''yā''n ye''e grupo ye''e nicolaí-''tas. Ní 'úú nguée inee yiinú ye''e chuū. ¹⁶Ndaacadáámí dí ye''e nducué''ē chuū. Nduuti chí nguée dii''n di 'túúca ndaa nuú''n naachi canee di ní 'cuu''má''n ndúúcu 'ii''yā''n s'ee''n ndúúcu machete chí 'uūvī lados 'caāi''n chí cánée cheendí. ¹⁷'Ii''yā''n chí véé veé''n yā 'caandiveé''n yā chí nga''ā Espíritu N'dai ye''é Ndyuūs ngii 'ii''yā''n s'ee''n ye''e yáacū s'ee''. 'Ii''yā''n chí cuchē yā ye''e tanducué''ē 'úú ní ca'á 'ii''yā''n s'ee''n pan chí duuchi maná chí canúú''n n'de'ei. Ní ca'á 'ii''yā''n s'ee''n 'áámá tuūu cuéē naachi cánée nguū''n 'áámá chí duuchi chí ngai. Mar 'áámá 'ii''yā''n nguée deenú yā chí duuchi mii''n, dámaā''n 'ii''yā''n chí cutá'a yā tuūu cuéē mii''n deenú yā chí duuchi mii''n.

**Juan idingúuⁿ yā carta 'cūū
yeⁿe 'iiⁿyāⁿ yeⁿe yāāⁿ Tiatira**

¹⁸ Díí, Juan, idingúuⁿ di yeⁿe 'iiⁿyāⁿ ndíí tiiⁿ yeⁿe 'iiⁿyāⁿ yeⁿe yāacū yeⁿe yāāⁿ Tiatira: Daiyá Ndyuūs chi vée nduutináaⁿ yā tan'dúúca nguuchi yaⁿā ni ca'a yā tan'dúúca cūū cuaaaⁿ chi deevé n'dai ngaⁿā yā 'tíicā. ¹⁹ Úú deenú nducuéⁿē chi diiⁿ di. Deenú chi dineⁿe di 'úú, chi i'téenu di 'úú, ní dichiiⁿve di 'úú. Ní vée paciencia nanáaⁿ di. Deenú chi maaⁿ diíⁿ ní ntiiⁿnyuⁿ chi n'dee n'dái nguéeⁿ ti ntiiⁿnyuⁿ yeⁿe ní chi vmnaaⁿ. ²⁰ Naati vée duúⁿví dendúⁿú contra yeⁿe di. Ndís'tii ní 'cuaaⁿ ní táⁿā Jezabel chi ngaⁿa tá chi chííⁿ chi ngaⁿa tá ní nduudu cuaacu yeⁿe Ndyuūs. Nginnche'ei tá 'iiⁿyāⁿ chi dichííⁿvē 'úú ndúúcu chí ngí'cueeⁿ tá. Ní ngaⁿa tá chí 'iiⁿyāⁿ cuuvi caⁿá yā ndúúcu n'daataa o isaⁿā chi nguéeⁿ yeⁿe yā ní cuuvi chéⁿe yā denduⁿú chi 'iiⁿyāⁿ s'eeⁿ cáávā ofrenda ca'a yā nátaí yeⁿe santos chi ídolos. ²¹ Úú ní ca'á lugar táⁿā miiⁿ chi ndaacadaami tá yeⁿe chi diiⁿ tá chí nguéeⁿ n'daacā naati nguéeⁿ 'cuūⁿ ta ndaacadaami tá yeⁿe nducuéⁿē chí diiⁿ tá chí nguéeⁿ n'daacā. Ní neⁿe tá chí tanáⁿā 'iiⁿyāⁿ dinuuⁿndí yā ndúúcu tá. ²² Maaⁿ ní 'úú diíⁿ chí neéné ngiitā tá miiⁿ ní nducyáácá isaⁿā chí diíⁿ yā tan'dúúca chí ngí'cueeⁿ tá neenē 'cueenu yā cuuvi. 'Tíicā maaⁿ ní diíⁿ ndúúcu nducyáácá yā nduuti chí nguéeⁿ ndaacadáámí yā yeⁿe chí ngí'cueeⁿ n'daataá mííⁿ. ²³ Tíicā ntúūⁿ 'úú ní 'caāⁿnúⁿ nducyaaca 'iiⁿyāⁿ chí diíⁿ yā tan'dúúca chí chí'cueeⁿ tá. Ní nducyaaca 'iiⁿyāⁿ yeⁿe nducyáácá yāacū caⁿá yā cadíínuuⁿ yā chí 'úú chí n'diichí de'ē vee chí 'iiⁿyāⁿ nadicadíínuuⁿ yā ndii na staava yeⁿe yā. Ní 'úú nadiiⁿvé ndís'tii tuunu tuunu ca denduⁿú chí diíⁿ ní. ²⁴ Chuū ngaⁿá ngii ndís'tii ndúúcu tanáⁿā 'iiⁿyāⁿ chí i'téenu yā Ndyuūs ní chí snée yā na yāāⁿ Tiatira chí nguéeⁿ

diíⁿ yā tan'dúúca chí ngí'cueeⁿ táⁿā miiⁿ. Ní nguéeⁿ déenu ní de'ē chí nuuⁿndi s'eeⁿ chí ch'etete chí yeⁿe yááⁿn'guiinūⁿ. Tan'dúúca chí ngaⁿa náⁿā 'iiⁿyāⁿ 'úú ngaⁿá chí nguéeⁿ cu'neéⁿ táamá dendúⁿú chí díttuu nanááⁿ ndís'tii. ²⁵ Naati chííⁿ chí 'āā véeⁿ yeⁿe ní cundéé ní cuidado yeⁿe ndii 'úú nindaá nanáaⁿ ní. ²⁶ 'Iiⁿyāⁿ chí cuchée yā yeⁿe tanducuéⁿē denduⁿú ní nguuvi nguuvi diíⁿ yā tan'dúúca 'úú neⁿe ndíí cuaaⁿ ná n'giinu, 'úú ní ca'á ntiiⁿnyuⁿ 'iiⁿyāⁿ s'eeⁿ chí 'iiⁿntyéⁿē yeⁿe nducuéⁿē naciones. ²⁷ Ní caⁿa ntiiⁿnyúⁿ yā yeⁿe 'iiⁿyāⁿ s'eeⁿ tan'dúúca chíidá tee yā poder 'úú chí 'úú ngaⁿa ntiiⁿnyúⁿ yeⁿe nducuéⁿē naciones ndúúcu 'áamá nduucu cūū yeⁿe. Ní ndúúcu nduucu cūū miiⁿ 'cueⁿē naciones chí chicheiyei tan'dúúca chí naciones ní 'aama vaso yeⁿe yāⁿāa chí 'cueeⁿ. ²⁸ Ní 'iiⁿyāⁿ chí cuchee yā yeⁿe tanducuéⁿē 'úú ní ca'á 'iiⁿyāⁿ miiⁿ 'ííⁿnyúⁿ yeⁿe nguetiyyaaⁿ. ²⁹ 'Iiⁿyāⁿ chí vée veéⁿ yā 'caandiveeⁿ yā chí ngaⁿá Espíritu N'dai yeⁿe Ndyuūs ngii 'iiⁿyāⁿ s'eeⁿ yeⁿe yaacū s'eeⁿ.

**Juan idingúuⁿ yā carta 'cūū
yeⁿe 'iiⁿyāⁿ yeⁿe yāāⁿ Sardis**

3 Díí Juan, idingúuⁿ di yeⁿe 'iiⁿyāⁿ ndíí tiiⁿ yeⁿe 'iiⁿyāⁿ yeⁿe yāacū yeⁿe yāāⁿ Sardis: Chuū ngaⁿa Cristo chí vée ndēchē espíritus yeⁿe Ndyuūs ndúúcu ndēchē 'ííⁿnyúⁿ s'eeⁿ. 'Úú deenú chííⁿ chí diiⁿ di. Ní deenú chí 'áará chí 'iiⁿyāⁿ s'eeⁿ deenú yā dii cáávā cosas chí diiⁿ di ti cánduuchi di naati nanááⁿ 'úú dii canée dí tan'dúúca chí n'díí di cucáávā nuuⁿndi yeⁿe di. ² Nandúúchí dí. Cunée diitū di ní cu'téenu ca di yeⁿe cosas chí vée caati vmnááⁿ vmnaaⁿ nguéeⁿ diiⁿ di cuidado yeⁿe nducuéⁿē. Cu'téenu ca di ní nguéeⁿ cuuvi cho'ōo yeⁿe chí vée chí yeⁿe di. Ní 'úú n'diichí ntiiⁿnyuⁿ chí diiⁿ di. Ní nguéeⁿ n'daacā ca nanááⁿ Ndyuūs. ³ N'gaacú di yeⁿe chí n'giindiveeⁿ di chí 'iiⁿyāⁿ chí'cueeⁿ yā dii. Maaⁿ ní diiⁿ di

tan'dúúcā chi 'cueeⁿ di ní ndaacadaami di yeⁿe chi diiⁿ di chi nguéé n'daacā. Ní nduuti chi nguéé diiⁿ di cuidado tuu'mi ní 'úú ndaá tan'dúúcā 'áámá chi duucu ní nguéé cadíínuuⁿ di hora chí ndaá nanááⁿ dii. ⁴Véé duu'vi 'iiⁿyāⁿ nguuaaⁿ ndí's'tiī chi snée yā na yāāⁿ Sardis, 'iiⁿyāⁿ chi nguéé dinuuⁿndí yā tan'dúúcā tanáⁿā 'iiⁿyāⁿ chi dinuuⁿndí yā. 'Iiⁿyāⁿ s'eeⁿ caⁿá yā nduucú ndúúúú catecai cuéé yā ti 'iiⁿyāⁿ s'eeⁿ ní n'dai taaví yā chí cuuvi 'tífcā ndúúúú yā. ⁵'Iiⁿyāⁿ chi cuchéé yā yeⁿe tanducuéⁿē nndaāca yā catecai cuéé yā. Ní 'úú nguéé nadatuúví chi duuchi yā naachi canéé nguūⁿ na libro yeⁿe vida cueⁿe daāⁿmaⁿ. Ní 'úú ní caaⁿmáⁿ chi duuchí yā nanááⁿ chiidá ní nanááⁿ ángeles dendú'ú. ⁶'Iiⁿyāⁿ chi véé veéⁿ yā 'caandiveéⁿ yā chífⁿ chi ngaⁿā Espíritu N'dai yeⁿé Ndyuūs ngii 'iiⁿyāⁿ s'eeⁿ yeⁿe yaācū s'eeⁿ.

Juan idingúúⁿ yā carta 'cūú yeⁿe 'iiⁿyāⁿ yeⁿe yāāⁿ Filadelfia

⁷Díí, Juan, idingúúⁿ ntúúⁿ di yeⁿe 'iiⁿyāⁿ ndii tiiⁿ yeⁿe 'iiⁿyāⁿ yeⁿe yaācū yeⁿe yāāⁿ Filadelfia. Dendu'ú chí 'túúúca ngaⁿá 'iiⁿyāⁿ chí deeve taavi ca yā ní cuaacu yā. 'Iiⁿyāⁿ miiⁿ chí ndéé yā llave yeⁿe David, 'iiⁿyāⁿ miiⁿ taachi nn'guaaⁿ yā puerta mar 'áámá 'iiⁿyāⁿ nguéé cuuvi nn'gaadí yā. Ní taachi nn'gaadí yā 'tíicá ntúúⁿ mar 'áámá 'iiⁿyāⁿ nguéé cuuvi nn'guaaⁿ yā. ⁸Úú n'diichí tanducuéⁿē chí diiⁿ di. 'Úú n'neéⁿ cucáávā di 'áámá cheendi va'āi chí maaⁿ ní cánda'āi ní mar 'áámá 'iiⁿyāⁿ nguéé cuuvi nn'gaadí yā cheendi va'āi miiⁿ. 'Áará chí véé duu'vi fuerzas yeⁿe di ch'iindiveeⁿ di nduudu cuaacu yeⁿé ní nguéé ndaacadaami di yeⁿé. ⁹Caandiveeⁿ di yeⁿé. 'Iiⁿyāⁿ s'eeⁿ ní yeⁿe yááⁿn'guinūuⁿ ti ngaⁿá yā nduudu yaadi. Ngaⁿá yā chí 'iiⁿyāⁿ judíos yā chí Israel yā ní nguéé 'túúúca dífⁿ yā tan'dúúcā 'iiⁿyāⁿ judíos yā. Cuin'diichi di. 'Úú idiíⁿ chí 'iiⁿyāⁿ s'eeⁿ ní ndaá yā

nanaaⁿ di ní caantií'yá yā nanááⁿ ca'a di ní cu'téenu yā dii. Ní 'iiⁿyāⁿ s'eeⁿ cuuvi cadíínuuⁿ yā chí 'úú ní neⁿé dii. ¹⁰Dii ní ndee di cuidado yeⁿe nuuⁿndi chí ngaⁿá yeⁿe chí cuchéé di, ní cuhéé di. Ní cáávā chuú 'úú ndéé cuidado yeⁿe dii yeⁿe tiempo chí cuchii chí caaⁿmaⁿ ndaá cosas chí n'diichineeⁿ yā dii. Ní cosas miiⁿ ndaa yeⁿe 'iiⁿyāⁿ chí snée yā núúⁿmáⁿ iⁿ'yeeⁿdí. Ní n'diichineeⁿ nducyaaca 'iiⁿyāⁿ chí s'neeⁿ yā na iⁿ'yeeⁿdí 'cūú. ¹¹Cuin'diichi di. Niiⁿnuⁿ ndaá nanááⁿ dii. Cundéé ca di cuidado yeⁿe chí véé yeⁿe di ní mar 'áámá 'iiⁿyāⁿ cuuvi cuta'á yā corona chí cuuvi yeⁿe di. ¹²'Iiⁿyāⁿ chí cuchéé yā yeⁿe tanducuéⁿē, 'úú idiíⁿ chí 'iiⁿyāⁿ s'eeⁿ 'áámá canéé yā na yaācū yeⁿé tan'dúúúca 'áámá pilar yeⁿe yaācū yeⁿe Ndyuūs, 'tífcā yā. Ní 'āā ntéé can'daa yā yeⁿe yaācū miiⁿ. Ní 'úú idingúúⁿ ncheeté yā chí dúúúchí Ndyuūs yeⁿé ndúúúú chí duuchi yeⁿe yáāⁿ yeⁿe Ndyuūs yeⁿé. Ní yáāⁿ miiⁿ nguuvi Jerusalén chí ngai chí ndaā yeⁿe va'ai cheeti nguuvi ní yeⁿe Ndyuūs yeⁿé. ¹³'Iiⁿyāⁿ chí véé veéⁿ yā 'caandiveeⁿ yā chí ngaⁿā Espíritu N'dai yeⁿé Ndyuūs ngii 'iiⁿyāⁿ s'eeⁿ yeⁿe yaācū s'eeⁿ.

Juan idingúúⁿ yā carta 'cūú yeⁿe 'iiⁿyāⁿ yeⁿe yāāⁿ Laodicea

¹⁴Díí, Juan, idingúúⁿ di yeⁿe 'iiⁿyāⁿ ndii tiiⁿ yeⁿe 'iiⁿyāⁿ yeⁿe yaācū yeⁿe yāāⁿ Laodicea: Nduudú 'cūú ní yeⁿe 'iiⁿyāⁿ chí nguuví yā Amén chí neⁿe caaⁿmaⁿ chí cuaacu yā. 'Iiⁿyāⁿ miiⁿ chí testigo yā ní ngaⁿa cuaacu yā cueⁿe daāⁿmaⁿ. 'Iiⁿyāⁿ miiⁿ ní yeⁿé yā tanducuéⁿē chí Ndyuūs din'dái yā. ¹⁵Úú deenú tanducuéⁿē chí diiⁿ di. Ní díí canee di tan'dúúúca chí nguéé ndúú 'iiⁿnūⁿ di ndíí nguéé ndúú 'iiche di. De'e chúúca n'daacā cáávā dii ndúúúti chí 'iiⁿnūⁿ di o 'iiche di. ¹⁶Cáávā chí dii ní cuútú di, ní nguéé 'iiⁿnūⁿ di, ndíí nguéé ndúú 'iichē di, 'úú ní dífⁿ ndúúúú di tan'dúúúca

chi caachí dii yeⁿē na cheendí ti dii tan'dúúcā chi nuūⁿnīⁿ daaíⁿ dii, ní 'tíicā dííⁿ. ¹⁷Díí ní 'túúcā ngaⁿa di chi 'cui-ica di ní nguéé de'ē vee neⁿe di ti neenē n'deēe dendu'ū yeⁿe di véé. Naati díí nguéé deenu di chi nguéé de'ē vee yeⁿe di. Ní ndaachí cané di caati cané di tan'dúúcā chi díí ní pobre di ní nguéé catecai di, ní ngeenāaⁿ di. 'Tíicā cané di. ¹⁸'Úú ní teé consejo dii. Cuai di yeⁿe 'úú 'díí'nguāaⁿ chi 'iiⁿ'yāⁿ din'dái yā cáāvā nguuchi yaⁿá ní 'íicú cuuvi cuaacu chi 'cuiica di. Ní cuai di catecai cuéé chi cu'nuuⁿ di cuerpo yeⁿe maaⁿ di ní nguéé cuuvi 'cuiináⁿ di caavā chi nguéé catecai di. Ní cuai di yíicū ní cu'neeⁿ di na nduutināaⁿ di ní 'íicú cuuvi snaaⁿ di. ¹⁹'Úú yaa'vineé nducyaaca 'iiⁿ'yāⁿ chi idineⁿé ní dííⁿ castigar 'iiⁿ'yāⁿ s'eeⁿ. Maaⁿ ní canéé chi nndáacádáámí dí yeⁿe chi diiⁿ di chi nguéé n'daacā. Ní serio canee di ndii staava yeⁿe di. ²⁰Cuin'diichi di. 'Úú ní canéé cheendi va'āi ní 'cuai 'iiⁿ'yāⁿ. Nduuti chi 'áámá 'iiⁿ'yāⁿ 'caandiveéⁿ yā nduudu yeⁿé ní nn'guaaⁿ yā cheendi va'āi caavā 'úú, tuu'mi ní 'úú cho'ó cuaaⁿ cheeti va'āi ní n'diichí 'iiⁿ'yāⁿ miiⁿ. Ní che'é ndúúcu yā ní 'iiⁿ'yāⁿ miiⁿ che'é yā nduucú. ²¹'Iiⁿ'yāⁿ chi cucheé yā yeⁿe tanducuéⁿē dendu'ū 'úú ní ca'á lugar yeⁿe yā chi 'cuūndí yā ndúúcu 'úú na trono yeⁿé tan'dúúcā chí 'úú chicheé yeⁿe tanducuéⁿē dendu'ū ní ch'iindí ndúúcu chidá na trono yeⁿé yā. ²²'Iiⁿ'yāⁿ chi véé veéⁿ yā 'caandiveéⁿ yā chi ngaⁿá Espíritu N'dai yeⁿé Ndyuūs ngii nducyaaca 'iiⁿ'yāⁿ yeⁿe yaacū s'eeⁿ.

Nducyáácá yā chi snée yā na va'ai cheeti nguuvi dich'ee'té yā Ndyuūs

4 Chó'oo dendu'ū chi 'túúcā ní cuayi-ivi ní 'úú n'diichí cuaaⁿ 'níⁿ'núⁿ ní miiⁿ canéé 'áámá cheendi va'āi yeⁿe va'ai cheeti nguuvi chi canéé candá'āi. Ní ch'iindiveéⁿ 'áámá nduudu chi tan'dúúcā chi n'geecu trompeta. Ní nduudu miiⁿ

dáámá ndúúcu nduudu chi ch'iindiveéⁿ vmnááⁿ vmnaaⁿ. Ní nduudu miiⁿ ní caⁿa nduucú 'tíicā: Dii cūchee dí 'múúⁿ ní 'úú ní 'cuuⁿ'míⁿ dii dendu'ū chi cuchii cuayiivi.

²Hora míⁿ nūuⁿ 'úú caneé maaⁿ poder Espíritu N'dai yeⁿé Ndyuūs ní n'diichí 'áámá trono na va'ai cheeti nguuvi. Ní Ndyuūs véé yā na trono miiⁿ. ³'Iiⁿ'yāⁿ chí véé yā na trono miiⁿ ní núúⁿ'máⁿ cuerpo yeⁿé yā naáⁿ yā tan'dúúcā 'áámá tuūu chi 'áámá ngíⁿ n'gai tan'dúúcā tuūu jaspe ndúúcu tuūu sardio. 'Tíicā cuerpo yeⁿé yā. Ní nuuⁿ'maⁿ ndiivíⁿ cuaaⁿ 'diituú trono miiⁿ canee 'áámá cun'gúúⁿ'n'dí tan'dúúcā color yeⁿe tuūu esmeralda. ⁴Ní nuuⁿ'maⁿ ndiivíⁿ cuááⁿ 'diituú trono miiⁿ n'diichí ndiicu cuūuⁿ tronos yeⁿe 'iiⁿ'ntyéⁿē s'eeⁿ naachi véé yā. Ní nducyáácá yā véé catecai yā chi cuéé. Ní nducyáácá yā snúúⁿ tííⁿ yā 'áámá corona yeⁿe 'díí'nguāaⁿ. ⁵Ní yeⁿe trono chi naavtaⁿ'ā can'dáá 'cuai ndúúcu deeve ndúúcu nduudu. Ní nanááⁿ trono miiⁿ canéé ndúúcu ndeēchē yaⁿá ngi-ichi chi ndeēchē espíritus yeⁿe Ndyuūs. ⁶Ní canéé ntúúⁿ nanááⁿ trono miiⁿ 'áámá cosa tan'dúúcā nuūⁿ'n'iyáⁿ'ā tan'dúúcā 'áámá vidrio chi ngii deeve n'dai. Ní naavtaⁿ'ā yeⁿe trono miiⁿ ní nuuⁿ'maⁿ ndiivíⁿ cuaaⁿ 'diituú yeⁿe trono miiⁿ snée cuūuⁿ 'iiⁿ'yāⁿ yeⁿē va'ai cheeti nguuvi chí snée 'yaaⁿ n'dái nduutināaⁿ yā ndii cuááⁿ vmnaaⁿ yā ndii cuááⁿ daamí yā. Ní ndiituú nduutināaⁿ yā núúⁿ'máⁿ ch'ee'te cuerpo yeⁿé yā. ⁷'Iiⁿ'yāⁿ yeⁿe va'ai cheeti nguuvi chí vmnááⁿ vmnaaⁿ tan'dúúcā 'áámá 'yáíⁿ'yāaⁿ cuáⁿ'áá 'tiicá yā. Ndií chííⁿ ndii 'uuví yā tan'dúúcā 'áámá itiindu 'lífⁿ 'tiicá yā. Ní 'iiⁿ'yāⁿ ndii chííⁿ ndii 'iinū miiⁿ vee naáⁿ yā tan'dúúcā naáⁿ 'iiⁿ'yāⁿ 'tíicā yā. Ní ndii chííⁿ ndii cuūúⁿ 'iiⁿ'yāⁿ ní tan'dúúcā í'yāa chí nge'e tī na 'yúúné 'tiicá yā. ⁸Ní nduu cuūuⁿ 'iiⁿ'yāⁿ s'eeⁿ ní véé niyaaⁿ ngeechi yā 'áámá 'aamaⁿ yā ní núúⁿ'máⁿ cuááⁿ 'diituú yā ní cuaaⁿ

naáⁿ ngeechi yā ní ndiitūu nduuti náaⁿ yā. Nguéé intaavi'tuunuúⁿ yā ndíí nguéé ndúú nguuvi ndíí nguéé ndúú n'gaaⁿ chi caⁿa yā:

De'ē chúúcā dēeve yā, de'ē chúúcā dēeve yā, de'ē chúúcā dēeve yā, Señor Ndyuūs, chi véé tanducuéⁿē poder yeⁿé yā. 'Iiⁿyāⁿ chi canéé ndii vmaáⁿ vmaaaⁿ 'iiⁿyāⁿ chi maaⁿ canéé yā, ní 'iiⁿyāⁿ chí canéé chí ndaa yā.

⁹Ní ca'áámá ca'áámá vmaáⁿēe chi 'iiⁿyāⁿ s'eeⁿ dich'eté yā 'iiⁿyāⁿ miiⁿ chí véé yā na trono miiⁿ ní dííⁿ yā honrar 'iiⁿyāⁿ miiⁿ ní ca'á yā gracias 'iiⁿyāⁿ miiⁿ chí candúúchí yā cueⁿe daāⁿmaⁿ 'tíicā dííⁿ yā. ¹⁰Ndu'u ndiicú cuūuⁿ 'iiⁿntyéⁿē candiitín'díí yā nanááⁿ 'iiⁿyāⁿ miiⁿ chí véé yā na trono miiⁿ ní dich'eté yā 'iiⁿyāⁿ chí 'áámá canéé yā cueⁿe daāⁿmaⁿ. Ní 'iiⁿyāⁿ s'eeⁿ s'neeⁿ yā coronas yeⁿe yā nanááⁿ trono miiⁿ ní caⁿa yā 'túúcā:

¹¹Díí Señor chí Ndyuūs yeⁿe yú, díí ní n'dai taavi di chí dich'eté yā díí, ní dííⁿ yā honrar díí, ní ngaⁿá yā chí tanducuéⁿē poder ní yeⁿe di caati díí ní din'dái di tanducuéⁿē dendu'ū chí véé. Ní caávā chí maaⁿ di neⁿe di din'dái di tanducuéⁿē dendu'ū, 'tíicā dííⁿ di.

Libro ndúúcū 'iiti cuūchí

5 Ní n'diichí na ta'a cuaacú yā 'iiⁿyāⁿ chí véé yā na trono miiⁿ 'áámá libro chí tan'dúúcā 'áámá rollo caaca naachi canéé nguūⁿ cuááⁿ cheeti ndii cuaaⁿ dáámí. Ní libro miiⁿ nduudi ndúúcū ndēēchē sellos. ²Ní n'diichí 'áámá ángel chí véé poder yeⁿé yā. Ní yuudu n'dái 'cai yā ní caⁿa yā 'túúcā. ¿Dú'ū chí n'dai taavi ca chí cuuvi nn'guaaⁿ libro 'cūū ní ndiví sellos chí nduudí?

³Naati mar 'áámá 'iiⁿyāⁿ yeⁿe va'ai cheeti nguuvi ndíí nguéé mar 'áámá 'iiⁿyāⁿ yeⁿe iⁿyeedí 'cūū ndíí nguéé ndúú mar 'áámá 'iiⁿyāⁿ chí canúúⁿ maaⁿ yáⁿaa cuuvi nan'guaáⁿ yā libro miiⁿ ndíí

nguéé ndúú cuuvi n'diichí yā libro miiⁿ.

⁴Ní 'úú Juan neené cheēcu taaví ti nguéé ndaaca yā mar 'áámá 'iiⁿyāⁿ chí n'dai taavi cá yā chí cuuvi nan'guaaⁿ yā libro miiⁿ ní 'cueeⁿ yā yeⁿé. Ndíí nguéé ndúú cuuvi snaaⁿ yā libro miiⁿ. ⁵Tuu'mi ní 'áámá 'iiⁿntyéⁿē caⁿa yā chíi yā 'úú: Díí nguéé cuēecu di. Cuin'díichí dí. Jesucristo chí duuchi 'yáí'yāaⁿ cuá'aa, chí yeⁿe ndaata yeⁿe 'iiⁿyāⁿ Judá chí yeⁿe 'iiⁿyāⁿ yeⁿe ndaata David, 'iiⁿyāⁿ miiⁿ chicheé yā yeⁿe tanducuéⁿē ní cuuvi nan'guaáⁿ yā libro miiⁿ ní cuuvi cáanteéⁿ yā ndu'u ndēēchē sellos.

⁶Tuu'mi ní n'diichí chí naavtaⁿā yeⁿe trono miiⁿ ní naavtaⁿā yeⁿe ndu'u cuūuⁿ 'iiⁿyāⁿ miiⁿ ní naavtaⁿā yeⁿe 'iiⁿntyéⁿē s'eeⁿ n'diichí 'áámá 'iiⁿyāⁿ chí nguuvi 'iiti cuūchí chí chééndii yā. Ní n'diichí chí véé seña na cuerpo yeⁿe yā chí 'iiⁿyāⁿ ch'iiⁿnúⁿ yā yā. Ní 'iiⁿyāⁿ chí nguuvi 'iiti cuūchí miiⁿ véé ndēēchē duuⁿníⁿnⁿ yā ní ndēēchē nduutináaⁿ yā chí ndēēchē espíritu yeⁿé Ndyuūs chí Ndyuūs dicho'ó yā núúⁿmáⁿ iⁿyeedí. ⁷'Iiⁿyāⁿ miiⁿ ní cueⁿé yā ní ndaa yā ní sta'á yā libro miiⁿ yeⁿe ta'ā cuaacú yā 'iiⁿyāⁿ chí véé yā na trono miiⁿ. ⁸Ní taachi sta'á yā libro miiⁿ ní ndúú cuūuⁿ 'iiⁿyāⁿ miiⁿ ndúúcū ndiicú cuūuⁿ 'iiⁿntyéⁿē chintí'yá yā nanááⁿ 'iiⁿyāⁿ chí nguuvi 'iiti cuūchí miiⁿ. Ní ca'áámá ca'áámá 'iiⁿntyéⁿē s'eeⁿ candēe yā arpas yeⁿe yā. Ní ndēé yā chíite yeⁿe 'dííⁿnguāaⁿ ndiitūu ndúúcū cúⁿúyaa. Ní 'yaaⁿmiⁿ yeⁿe cúⁿúyaa miiⁿ chííⁿ chí ngaⁿanguá'aa 'iiⁿyāⁿ na iⁿyeedí 'cūū, 'iiⁿyāⁿ chí yeⁿe Ndyuūs. ⁹Ní chíitá yā 'áámá canto chí ngai chí 'tíicā:

Díí ní n'dai taavi di chí cuta'a di libro miiⁿ ní cáanteéⁿ di sellos yeⁿé caati 'iiⁿyāⁿ ch'iiⁿnúⁿ yā díí. Ní díí caávā yuūúⁿ yeⁿe di cáí di nús'ūū chí cuuvi 'nū yeⁿe Ndyuūs nús'uu. Ní nús'uu ní yeⁿe nducyáacá raza yeⁿe 'iiⁿyāⁿ, ní yeⁿé tanducuéⁿē idioma

ní yeⁿe tanducuéⁿe yááⁿ, ní yeⁿe tanducuéⁿe nación. Tíicā nús'uu.

¹⁰Ní dii ní din'dái di nús'uu ní diiⁿ di chi reyes nús'uu, ní diiⁿ di chi chiduú nús'uu cucáávā Ndyuús yeⁿe yú. Ní 'iicú cuuvi caaⁿmaⁿ ntiiⁿnyuⁿ 'nū nanááⁿ 'iiⁿyāⁿ yeⁿe iⁿ'yeeⁿdí 'cūū.

¹¹Ní cuaaⁿ 'nífⁿnúⁿ n'diichí ní ch'iindiveéⁿ nduudu yeⁿe 'yaaⁿ n'dáf ángeles chi snéé yā cuaaⁿ 'diitúú yeⁿe trono miiⁿ ní yeⁿe nduu cuūuⁿ 'iiⁿyāⁿ miiⁿ, ní yeⁿe 'iiⁿntyéⁿe s'eeⁿ. Ní ángeles ní n'dee n'dáf yā chi ngii yā ndiichi millares ndii chíⁿ cuuvi millares ndúúⁿcū millares ndúúⁿcū millares. ¹²Ní yuudu n'dai caⁿ'a nducyaaca s'eeⁿ:

'Iiⁿyāⁿ chi nguuvi 'iiti cuūchí chi 'iiⁿyāⁿ ch'iⁿnúⁿ yā ní n'dai taavi cá yā chi nducyaaca 'iiⁿyāⁿ dich'etéⁿ yā. 'Iiⁿyāⁿ miiⁿ sta'á yā tanducuéⁿe dendu'ú poder ndúúⁿcū tanducuéⁿe vaadi 'cuiica ndúúⁿcū tanducuéⁿe vaadi deenu ndúúⁿcū tanducuéⁿe fuerzas ndúúⁿcū tanducuéⁿe honra ndúúⁿcū tanducuéⁿe vaadi dēve ngí ndúúⁿcū chi nducyaaca 'iiⁿyāⁿ dich'etéⁿ yā 'iiⁿyāⁿ miiⁿ.

¹³Ní ch'iindiveéⁿ ntuúⁿ nduudu yeⁿe nducyaaca chi snéé na va'ai cheeti nguuví ndúúⁿcū nducyaaca chi snéé vmaaⁿ yáⁿaa 'cūū ndúúⁿcū nducyaaca chi snéé maaⁿ yáⁿaa ndúúⁿcū nducyaaca chi snéé ná nuūⁿníⁿyáⁿā, nducyaaca chi véé yeⁿe nducueⁿe chi véé ní ngiita yā 'tíicā:

Cueⁿe daāⁿmaⁿ cueⁿe daāⁿmaⁿ dich'etéⁿ 'nū dii ní díⁿ 'nū honrar dii. Ní caⁿ'a 'nū chi vaadi dēve ngii ndúúⁿcū poder ní yeⁿe 'iiⁿyāⁿ chi véé yā na trono miiⁿ ní yeⁿe 'iiⁿyāⁿ chi nguuví 'iiti cuūchí.

¹⁴Ní ndu'u cuūuⁿ 'iiⁿyāⁿ s'eeⁿ ní caⁿ'a yā: Tíicā cuuvi. Ní ndu'u ndiichi cuūuⁿ 'iiⁿntyéⁿe chintii'yá yā ní s'téenu yā 'iiⁿyāⁿ chi 'áámá canéé yā cueⁿe daāⁿmaⁿ.

Yeⁿe ndēechē sellos

6 Cuayiivi ní n'diichí taachi 'iiⁿyāⁿ chi nguuví 'iiti cuūchí nan'guáaⁿ yā 'áámá chéé sello yeⁿe chi naachi ndēechē sello yeⁿe libro miiⁿ. Ní ch'iindiveéⁿ nduudu yeⁿe 'áámá chéé 'iiⁿyāⁿ yeⁿe chi cuuúⁿ yā chi canduuchi. Ní neené ditūu n'gai yā tan'dúúⁿcā daavi ní caⁿ'a yā: Cuchí di ní n'diichi di.

²Úú ní n'diichí ní míⁿ canéé 'yúudūu cuéé ndúúⁿcū 'áámá saⁿ'ā candúu sa 'iiti miiⁿ. Ní ndēe sa 'áámá arco na ta'a sa. Ní ca'a yā 'áámá corona saⁿ'ā miiⁿ ní can'daā sa chí 'cuuⁿmiⁿ sa. Ní diiⁿ sa chí cuche sa yeⁿe enemigo yeⁿe sa.

³Ní taachi 'iiⁿyāⁿ chi nguuví 'iiti cuūchí nan'guaaⁿ yā ndii chíⁿ ndii 'úúví sello yeⁿe libro miiⁿ ch'iindiveéⁿ nduudu yeⁿe ndii chíⁿ ndii 'uuví 'iiⁿyāⁿ chí naachi cuuúⁿ yā, ní caⁿ'a yā: Cuchí di ní n'diichi di.

⁴Tuu'mi ní n'diichí. Can'daā táámá 'yúúⁿdūu chi cuá'a tí ndúúⁿcū 'áámá saⁿ'ā candúu sa 'iiti miiⁿ. Ní saⁿ'ā miiⁿ sta'a sa 'áámá machete chí ch'ete chí 'uúví lados 'caāiⁿ chí táámá yā ca'a sa. Ní saⁿ'ā miiⁿ ndēe sa poder chí diitínú miiⁿ chí diví sa vaadi 'diiⁿ yeⁿe iⁿ'yeeⁿdí 'cūū ní 'íicú 'iiⁿyāⁿ yeⁿe iⁿ'yeeⁿdí 'cūū caⁿ'á yā 'caaⁿnúⁿ yā 'áámá yā taama yā.

⁵Ní taachi 'iiⁿyāⁿ chi nguuví 'iiti cuūchí nan'guaaⁿ yā ndii chíⁿ ndii 'ínú sello ch'iindiveéⁿ nduudu yeⁿe ndii chíⁿ ndii 'ínú 'iiⁿyāⁿ miiⁿ chí caⁿ'a yā 'túúⁿcā: Cuchí di ní n'diichi di. Ní n'diichí 'áámá 'yuúⁿdūu cuáⁿ. Ní saⁿ'ā chí candúu sa 'yuúⁿdūu miiⁿ ndēe sa 'áámá cūū caadi na ta'a sa. ⁶Ní ch'iindiveéⁿ nduudu naavtáⁿ'ā yeⁿe na cuūuⁿ 'iiⁿyāⁿ s'eeⁿ chí caⁿ'a 'tíicā: 'Áámá kilo yeⁿe trigo ní nditiⁿ'yuⁿ caadi, ní 'iiⁿnū kilos yeⁿe cebada ní nditiⁿ'yuⁿ caadi. Nguéé diiⁿ di daño yeⁿe aceite, ndí nguéé ndúú yeⁿe vino tí nduu 'uuví naaⁿ ní nduuví n'dee n'dái.

⁷Ní taachi 'iiⁿyāⁿ chi nguuvi 'iiti cuūchī miiⁿ nan'guaaⁿ yā ndii chííⁿ ndíí cúūⁿ sello miiⁿ ch'iindiveéⁿ nduudu yeⁿe 'iiⁿyāⁿ chi ndii chííⁿ ndíí cúūⁿ 'iiti miiⁿ chi caⁿa 'túúcā: Cuchíí di ní n'diichi dí.

⁸N'diichí ní snaáⁿ 'áámá 'yúúdūu cuaaaⁿ dēevé ndúúcū saⁿā chi cundúu sa 'yúúdūu miiⁿ. Saⁿā miiⁿ ní nguuvi sa vaadi n'gii. Ní cuaaⁿ daami sa cuchii taama saⁿā chi mensajero yeⁿe vaadi n'gíí chí t'áā ní nguain'dai almas yeⁿe 'iiⁿyāⁿ chi n'díí. Tuu'mi ní 'iiⁿyāⁿ ca'á yā poder saⁿā s'eeⁿ yeⁿe 'áámá cuarto parte yeⁿe yáⁿāa yeⁿe iⁿ'yeeⁿdí 'cūū chi saⁿā s'eeⁿ diiⁿ sa caandaá s'eeⁿ. Ní 'íicú ch'iⁿnūⁿ sa 'iiⁿyāⁿ ndúúcū machete chi 'uūvi lados 'caāiⁿ ní ndúúcū 'áámá vaadi cuiicu ní ndúúcū ca'ai ní ndúúcū 'iiti taaⁿ. Ní 'tíicā saⁿā s'eeⁿ ch'iⁿnūⁿ sa 'iiⁿyāⁿ.

⁹Ní taachi 'iiⁿyāⁿ chi nguuvi 'iiti cuūchī nan'guaaⁿ yā ndii chííⁿ ndii nyuⁿu sello miiⁿ, n'diichí mááⁿ nátaí ní n'diichí almas yeⁿe 'iiⁿyāⁿ chi n'díí. Ní 'iiⁿyāⁿ ch'iⁿnūⁿ yā 'iiⁿyāⁿ s'eeⁿ cáávā chi ngaⁿá yā nduudu cuaacu yeⁿe Ndyuūs ní cáávā chi ngaⁿa cuaacu yā yeⁿe Ndyuūs. ¹⁰Ní almas yeⁿe 'iiⁿyāⁿ s'eeⁿ yuudu n'dái 'caí yā ní caⁿa yā: N'dii Señor chi véé tandu-cuéⁿe poder yeⁿe nī, n'dii chi dēevé ní ní cuaacú nī, ¿ndíí de'ē tiempo caⁿá ní n'diichí nī nuuⁿndí yeⁿe 'iiⁿyāⁿ chi snéé yā iⁿ'yeeⁿdí 'cūū ní dííⁿ ní castigar 'iiⁿyāⁿ s'eeⁿ cáávā chi ch'iⁿnūⁿ yā núsuu?

¹¹Ní 'iiⁿyāⁿ miiⁿ ca'á yā 'áámá 'áámá yā catecai cuéé yā. Ní 'iiⁿyāⁿ miiⁿ ngaⁿá yā 'tíicā: Ndís'tii ní ntaavi'tuunúúⁿ ní 'tee 'téé cá ndíí taachi 'iiⁿyāⁿ yeⁿe iⁿ'yeeⁿdí 'cūū 'caaⁿnúⁿ yā tanáⁿā ca 'iiⁿyāⁿ chi diiⁿ ntiⁿnyúⁿ yeⁿe Cristo, 'iiⁿyāⁿ chi hermanos yeⁿe nī. Ní canéé chi 'cuūvi yā tan'dúúcā ndís'tii chíí nī.

¹²Ní n'diichí 'iiⁿyāⁿ chi nguuvi 'iiti cuūchī taachi nan'guaaⁿ yā ndii chííⁿ ndii niyaaⁿ sello miiⁿ. Ní n'diichí chi

díítūu n'dái nuⁿu yáⁿāa yeⁿe iⁿ'yeeⁿdí 'cūū. N'diichí 'yáⁿā miiⁿ chíí tan'dúúcā chi cuáíⁿ catecai yā chi cuáíⁿ yeⁿe luto. Ní 'iiyū miiⁿ ní nduuví cua'āa tan'dúúcā yuūúⁿ. ¹³Ní 'íínyúⁿ s'eeⁿ yeⁿe nanguuvi ní sn'daā ndii na yáⁿāa. Ní tan'dúúcā chi ingéé tá'ā n'gui'i yáⁿá yeⁿe n'guíídií taachi ndaā 'áámá 'yúúné tááⁿ 'tíicā sn'daā 'íínyúⁿ s'eeⁿ. ¹⁴Ní nanguuvi ní ch'iinu yeⁿe ní nduuvi 'lííⁿ tan'dúúcā chi n'gēecu yú 'áámá caaca. Ní 'áámá 'áámá yíicū ndúúcū 'áámá 'áámá isla ní nuⁿu yeⁿe na lugar yeⁿe. ¹⁵Ní 'iiⁿyāⁿ yeⁿe iⁿ'yeeⁿdí 'cūū, reyes ndúúcū 'iiⁿyāⁿ chí ch'ēete ndúúcū 'iiⁿyāⁿ 'cuiica ndúúcū 'iiⁿyāⁿ comandantes ndúúcū 'iiⁿyāⁿ chí véé poder yeⁿe yā ndúúcū 'iiⁿyāⁿ chí 'áámá diiⁿ yā ntiⁿnyuⁿ yeⁿe 'iiví yā ndúúcū 'iiⁿyāⁿ chí libre yā, nducyáácá yā cheeti núúⁿ n'de'ei yā na yiivi yáává ní nguááⁿ na tuūu yeⁿe yíicū. ¹⁶Ní 'iiⁿyāⁿ s'eeⁿ caⁿa yā chíi yā icyáⁿā ndúúcū tuūu: Ndís'tii icyáⁿā ndúúcū tuūu, cun'dáá nduú ní vmnaaⁿ yeⁿe nús'uu ní cunūūⁿ n'dé'ei ní nús'uu yeⁿe nanaáⁿ Ndyuūs chí véé yā na trono miiⁿ ní yeⁿe castigo chí neené diitūu n'dai chí Jesucristo chí nguuvi 'iiti cuūchí téé yā nús'uu.

¹⁷Caati 'āā ndaā nguuvi ch'ēete miiⁿ taachi Ndyuūs ca'a yā castigo 'iiⁿyāⁿ s'eeⁿ ní ¿Du'ū cuuvi cuchéé castigo 'cūū?

Yeⁿe 'iiⁿyāⁿ chi señalado yā yeⁿe tribus yeⁿe 'iiⁿyāⁿ Israel

7 N'diichí dendú'ū chi 'túúcā, ní cuayi-ivi 'úú n'diichí cuūuⁿ ángeles chí chéendii yā ndu'u cuuúⁿ esquinas yeⁿe iⁿ'yeeⁿdí 'cūū. Ní ángeles s'eeⁿ índēenee yā ndii chííⁿ ndii cuuúⁿ 'yúúné yeⁿe yáⁿāa 'cūū. Ní 'íicú 'yúúné s'eeⁿ nguéé chéenū diituu na yáⁿāa ndíí nguéé ndúú vmnaaⁿ mar 'áámá nuūⁿnī'yáⁿā, ndíí nguéé ndúú vmnaaⁿ mar 'áámá yáⁿá. ²Ní n'diichí ntuúⁿ táámá ángel chí cuchii yā naachi can'daa 'yáⁿā. Ní ndēe yā na ta'a yā 'áámá sello yeⁿe Ndyuūs chí candu-

uchi. Ní ángel miiⁿ yúúúú n'dáí ngaⁿa yā ndu'u cuūuⁿ ángeles chi sta'á yā poder chi ditiínú yā chi dííⁿ yā dañó na yáⁿ'áa 'cūū ndúúúú ná nuuⁿ'níⁿ'yáⁿ'á.

³ Ní ángel miiⁿ ngaⁿ'á yā 'túúúú: Ndís'tií ángeles, nguéé dííⁿ ní dañó yeⁿe yáⁿ'áa 'cūū, ndíí nguéé ndúú yeⁿe nuuⁿ'níⁿ'yáⁿ'á, ndíí nguéé ndúú yeⁿe yáⁿ'á ndíí taachi s'nuúⁿ 'nū 'áámá sello yeⁿe Ndyuūs na nchééte 'iiⁿ'yāⁿ chi dichíí'vē Ndyuūs yeⁿe yú.

⁴ Ní ch'iindiveéⁿ chi duuchi 'iiⁿ'yāⁿ chi chií sellado yā ní ngii yā 'áámá ciento 'uūví ngeécú cuūuⁿ mil 'iiⁿ'yāⁿ chi 'iiⁿ'yāⁿ yeⁿe nducuéⁿ'ē tribus yeⁿe ndaata yeⁿe 'iiⁿ'yāⁿ Israel. ⁵ 'Iiⁿ'yāⁿ yeⁿe tribu yeⁿe ndaata saⁿ'ā Judá ní ndíí yā sellado yā ndiichúúví mil. 'Iiⁿ'yāⁿ yeⁿe tribu yeⁿe ndaata saⁿ'ā Rubén ní ndíí yā sellado yā ndiichúúví mil. 'Iiⁿ'yāⁿ yeⁿe tribu yeⁿe ndaata saⁿ'ā Gad ní ndíí yā sellado yā ndiichúúví mil. ⁶ 'Iiⁿ'yāⁿ yeⁿe tribu yeⁿe ndaata saⁿ'ā Aser ní ndíí yā sellado yā ndiichúúví mil. 'Iiⁿ'yāⁿ yeⁿe tribu yeⁿe ndaata saⁿ'ā Neftalí ní ndíí yā sellado yā ndiichúúví mil. 'Iiⁿ'yāⁿ yeⁿe tribu yeⁿe ndaata saⁿ'ā Manasés ní ndíí yā sellado yā ndiichúúví mil. ⁷ 'Iiⁿ'yāⁿ yeⁿe tribu yeⁿe ndaata saⁿ'ā Simeón ní ndíí yā sellado yā ndiichúúví mil. 'Iiⁿ'yāⁿ yeⁿe tribu yeⁿe ndaata saⁿ'ā Leví ní ndíí yā sellado yā ndiichúúví mil. 'Iiⁿ'yāⁿ yeⁿe tribu yeⁿe ndaata saⁿ'ā Isacar ní ndíí yā sellado yā ndiichúúví mil. ⁸ 'Iiⁿ'yāⁿ yeⁿe tribu yeⁿe ndaata saⁿ'ā Zabulón ní ndíí yā sellado yā ndiichúúví mil. 'Iiⁿ'yāⁿ yeⁿe tribu yeⁿe ndaata saⁿ'ā José ní ndíí yā sellado yā ndiichúúví mil. 'Iiⁿ'yāⁿ yeⁿe tribu yeⁿe ndaata saⁿ'ā Benjamín ní ndíí yā sellado yā ndiichúúví mil.

Nducyáácá 'iiⁿ'yāⁿ chi véé catecai cuéé yā

⁹ Cuayiiví ní n'diichí n'dee n'dáí 'iiⁿ'yāⁿ yeⁿe tanducuéⁿ'ē nación, yeⁿe tanducuéⁿ'ē raza, yeⁿe 'iiⁿ'yāⁿ yeⁿe tan-

ducuéⁿ'ē daveedi ndúúúú tanducuéⁿ'ē davaacu chi n'dááⁿ, yeⁿe tanducuéⁿ'ē yááⁿ yeⁿe tanducuéⁿ'ē 'iiⁿ'yāⁿ chi véé na iⁿ'yeeⁿ'dí 'cūū. Ní nducyaaca 'iiⁿ'yāⁿ s'eeⁿ chééndii yā nanááⁿ trono miiⁿ ní nanááⁿ 'iiⁿ'yāⁿ chi nguuvi 'iiti cuúchí. Ní mar 'áámá 'iiⁿ'yāⁿ nguéé cuuvi didúúché yā. Nducyáácá yā véé catecai yā cuéé ní ndée yā yiiⁿ'nyúⁿ na ta'á yā. ¹⁰ Ní nducyáácá yā 'cai yā yiiúú yā ní caⁿ'a yā 'tííca:

Ndyuūs chi véé yā na trono miiⁿ ndúúúú Cristo chi nguuvi 'iiti cuúchí nadanguáⁿ'ai yā s'uúúⁿ. ¹¹ Ní nducyaaca ángeles s'eeⁿ ní ch'éete yā núúⁿ'máⁿ 'diitúú yeⁿe trono miiⁿ ndúúúú ndu'ú ndiicú cuūuⁿ 'iiⁿ'ntyéⁿ'ē ndúúúú ndu'u cuūuⁿ 'iiⁿ'yāⁿ s'eeⁿ. Ní nducyaaca yā candiítín'dii yā nanááⁿ 'iiⁿ'yāⁿ chi véé yā na trono miiⁿ ní dich'éete yā Ndyuūs. ¹² Ní 'tííca caⁿ'a yā:

'Tííca va. Di'cheete yú Ndyuūs chi deeve ngii yā chí deenu yā tanducuéⁿ'ē dendu'ú chi véé. Caⁿ'a yú gracias Ndyuūs. Ní diiⁿ yú honrar 'iiⁿ'yāⁿ. Ní nducuéⁿ'ē poder ndúúúú nducuéⁿ'ē fuerzas ní yeⁿe yā. Ní 'tííca canéé Ndyuūs yeⁿe yú cueⁿ'e daāⁿ-maⁿ cueⁿ'e daāⁿ'maⁿ. 'Tííca.

¹³ Cuayiiví ní 'áámá 'iiⁿ'ntyéⁿ'ē nan'gueécútaⁿ'a yā ní itiinguuneeⁿ yā 'úú: ¿Dúú rá 'iiⁿ'yāⁿ chi véé catecai cuéé yā ní tíí chiicá yā?

¹⁴ Ní 'úú ní ngaⁿ'á: N'dii, Señor, deenú ní yeⁿe yā. Tuu'mi ní 'iiⁿ'ntyéⁿ'ē miiⁿ caⁿ'a yā: 'Iiⁿ'yāⁿ s'eeⁿ ní chiica yā yeⁿ'ē chi ch'eenu taaví yā chií ní 'áá deévé yā catecai yā ndúúúú yuuúⁿ yeⁿe Cristo chi nguuvi 'iiti cuúchí. ¹⁵ Ní cáává chuú 'iiⁿ'yāⁿ s'eeⁿ snée yā nanááⁿ Ndyuūs chi véé yā na trono yeⁿ'é yā. Ní dichíí'vē yā Ndyuūs ndii nguuvi ndii n'gaaⁿ na yáacú yeⁿ'e yā. Ní 'iiⁿ'yāⁿ chi véé yā na trono miiⁿ ní canéé yā miiⁿ ní candéé yā cuidado nducyaaca 'iiⁿ'yāⁿ s'eeⁿ. ¹⁶ Ní 'iiⁿ'yāⁿ s'eeⁿ 'áá ntéé cuuvi cuicú yā, ní 'áá ntéé cu-

uvi yaacá yā. Ní 'āā ntéé cundāā yaⁿā
vmnaaⁿ yeⁿe yā ndíí nguéé ndúú cu-
uvi cuucu 'iiⁿyāⁿ ndúúcu yaⁿā. ¹⁷Caati
'iiⁿyāⁿ chi nguuvi 'iiti cuūchi chi véé yā
na trono miiⁿ ní dííⁿ yā cuidado 'iiⁿyāⁿ
s'eeⁿ tan'dúúca chi 'iiⁿyāⁿ s'eeⁿ ní 'iiti
cuūchi yeⁿe yā. 'Tífcā dííⁿ yā. Ní can'dáá
naaⁿ yā ní 'cuuⁿmíⁿ yā 'iiⁿyāⁿ s'eeⁿ naachí
candaā nuūⁿniⁿ yeⁿe vida cueⁿe daāⁿ-
maⁿ. Ní Ndyuūs nadideévē yā tandu-
cuéⁿe nuūⁿniⁿ nduutināⁿ yā.

Sello chi ndii chíⁿ ndíí ndeēchē ndúúcu incensario yeⁿe 'dííⁿnguāⁿ

8 Ní taachi 'iiⁿyāⁿ chi nguuvi 'iiti
cuūchi nan'guaaⁿ yā ní divíi yā ndii
chííⁿ ndíí ndeēchē sellos miiⁿ yeⁿe li-
bro miiⁿ tuuⁿmi ní ch'ó'oo tan'dúúca
maⁿa hora chí chií 'diííⁿ canéé na va'ai
cheeti nguuvi. ²Tuuⁿmi ní n'diichí chi
ndu'u ndeēchē ángeles chi chéendii yā
nanááⁿ Ndyuūs. Ní ángeles sta'á yā 'áámá
trompeta 'áámá 'aamá yā yeⁿe 'iiⁿyāⁿ
miiⁿ chi ca'á yā trompetas. ³Ní cuayi-
ivi táámá ángel chi ndeē yā 'áámá incen-
sario yeⁿe 'dííⁿnguāⁿ ní ndaa yā nanááⁿ
nátaí yeⁿe 'dííⁿnguāⁿ ní chéendii yā
miiⁿ. Ní ángel miiⁿ ní sta'á yā n'dee n'dái
cúⁿúyaa. Ní ca'á yā cáávā ofrenda dáámá
ndúúcu chi ngaⁿangua'á yā 'iiⁿyāⁿ chi
yeⁿe Ndyuūs. Ní s'néeⁿ yā incienso
nanááⁿ nátaí yeⁿe 'dííⁿnguāⁿ chi canéé
nanááⁿ trono miiⁿ. ⁴Ní 'yááⁿmíⁿ yeⁿe
cúⁿúyaa chí canéé na ta'a ángel miiⁿ
ndúúcu yeⁿe chi ngaⁿangua'a 'iiⁿyāⁿ
yeⁿe iⁿyeēⁿdí 'cūū chi yeⁿe Ndyuūs ní
dáámá cucheē nanááⁿ Ndyuūs. ⁵Tuuⁿmi
ní ángel miiⁿ sta'á yā incensario yeⁿe
'dííⁿnguāⁿ chiitú yā ndúúcu nduucyaⁿā
yeⁿe nátaí miiⁿ. Ní chingée yā vmnaaⁿ
yāⁿā yeⁿe iⁿyeēⁿdí 'cūū. Ní ndaa daavi
chi diituu n'geecúú ndúúcu dēve yeⁿe
'cuai ndúúcu chi 'nuⁿu yāⁿā.

Yeⁿe trompetas

⁶Ní ndu'u ndeēchē ángeles chi ndée
yā trompetas ch'etinéé yaáⁿ yā chi
di'cuēcú yā trompetas yeⁿe yā.

⁷Ní ángel chi vmnááⁿ vmnaaⁿ
di'cuēcú yā trompeta yeⁿe yā ní
chingéē vmnaaⁿ yáⁿā yuūuⁿ ndúúcu
nguuchi yaⁿā ndístaⁿā ndúúcu yuūúⁿ.
Ní chiichi 'iinū parte yeⁿe yáⁿā yeⁿe
iⁿyeēⁿdí 'cūū ndúúcu 'iinū parte yeⁿe
yáⁿā chí véé. Dáámá chiichi ndúúcu
'iinū parte yeⁿe yáⁿā ndúúcu nducuéⁿe
yaātā cueēé yéⁿe.

⁸Tuuⁿmi ní ndii chííⁿ ndii 'úúví ángel
di'cuēcú yā trompeta yeⁿe yā ní n'diichí
'áámá cosa tan'dúúca 'áámá yīcū ch'eté
chí ngiichi chí 'áámá 'iiⁿyāⁿ cheecú yā
yeⁿe va'ai cheeti nguūvi. Ní sndaā vm-
naaⁿ yeⁿe nuūⁿniⁿyáⁿā. Ní yeⁿe iⁿyeēⁿdí
'cūū ná 'iinū parte yeⁿe nuūⁿniⁿyáⁿā
nduuvi yuūúⁿ. ⁹Ní ch'ii 'áámá 'iinū parte
yeⁿe 'iiti chí véé cheeti nuūⁿniⁿyáⁿā miiⁿ
ndúúcu 'iinū parte yeⁿe nducuéⁿe bar-
cos chí chiica vmnaaⁿ nuūⁿniⁿyáⁿā ní
ntuūví.

¹⁰Tuuⁿmi ní ángel ndii chííⁿ ndii 'iinū
miiⁿ di'cuēcú yā trompeta yeⁿe yā ní
sndaā 'áámá 'ííⁿnyúⁿ ch'ete ca yeⁿe nan-
guuvi tan'dúúca 'áámá tááⁿ yáácá chí
ngiichi. Ní sndaā vmnaaⁿ yeⁿe 'iinū
parte yeⁿe yífcú s'eeⁿ ndúúcu nuūⁿniⁿ
chí can'daā chí véé na iⁿyeēⁿdí 'cūū.
¹¹Ní 'ííⁿnyúⁿ ch'ete ca miiⁿ ní chí du-
uchi Ajenjo chí neⁿe caaⁿmaⁿ chí yaaá.
Ní 'iinū parte yeⁿe nuūⁿniⁿ yeⁿe yīcū
ndúúcu nuūⁿniⁿ chí can'daā ní nduūvi
Ajenjo chí yaaá. Ní neené 'yaaⁿ 'iiⁿyāⁿ
ch'ii yā chí chí'í yā nuūⁿniⁿ miiⁿ ti neené
yaaá nuūⁿniⁿ miiⁿ.

¹²Tuuⁿmi ní ángel ndii chííⁿ ndii cuūuⁿ
di'cuēcú yā trompeta yeⁿe yā ní 'iinū
parte yeⁿe 'yáⁿā nca'ái ndúúcu 'iinū
parte yeⁿe 'iīyū ndúúcu 'iinū parte yeⁿe
'ííⁿnyúⁿ. Ní 'ífcú 'iinū parte yeⁿe denduⁿ
chí 'túuca ní chíí maāiⁿ. Ní nguéé canuuⁿ

deewe yeⁿe na 'iinū parte yeⁿe nguuvi. 'Tiicá ntūⁿ n'gaaⁿ.

¹³Tuu'mi ní n'diichí 'áámá ángel tan'dúúcā 'í'ýāa ní n'giindiveéⁿ chi n'gaí yā naachi cueⁿe yā naavtaⁿā nanguuvi. Ní ngaⁿa yuudú yā 'tíicā: De'ē chúúcā ya'āi, de'ē chúúcā ya'āi, de'ē chúúcā ya'āi yeⁿe 'iiⁿyāⁿ chi snée yā na yáⁿāa yeⁿe chi cuuvi taachi tá'inū ángeles caⁿá yā dí'cuēcú yā trompetas yeⁿe yā.

9 Cuayiivi ní n'diichí ndíí nyuⁿu ángel miiⁿ dí'cuēcú yā trompeta yeⁿe yā ní n'diichí 'áámá 'í'nyúⁿ chi chiicā nanguuvi ní chiya na yáⁿāa. Ní 'áámá 'iiⁿyāⁿ ndéé yā llave yeⁿe abismo chi 'áámá yiive yáⁿāa ch'eté chí nan'guāⁿ yāaⁿnūⁿ n'dái. Ní 'áámá ángel chi nguéé n'daacā ca'a yā llave miiⁿ na ta'a 'í'nyúⁿ miiⁿ. ²Ní ángel miiⁿ n'guaaⁿ yā yiive yáⁿāa ní can'dáá 'yaaⁿmiⁿ yeⁿe tan'dúúcā 'yaaⁿmiⁿ chi can'daā yeⁿe 'áámá horno ch'ete. Ní 'yaaⁿmiⁿ miiⁿ chi can'daā yeⁿe yiivé miiⁿ ní diiiⁿ chi nduuví maāⁿ na 'yáⁿā ndúúcū 'yúúné. ³Ní yeⁿe 'yaaⁿmiⁿ miiⁿ can'daā langostas na yáⁿāa. Ní 'iiti s'eeⁿ ní taáⁿ tī, ní chingáá tī. Ní tan'dúúcā 'iiti dáⁿāi díⁿ tī, 'tíicā cuuvi díⁿ tī. ⁴Ní 'iiⁿyāⁿ dichó'o yā langostas chi nguéé díⁿ tī daño yeⁿe yaātā chi véé na yáⁿāa ndúúcū mar 'áámá naaⁿ chi yaātā cueeé ndíí mar 'áámá yáⁿá, naati dámaāⁿ cuuvi díⁿ tī daño 'iiⁿyāⁿ chi nguéé ndeé yā sello yeⁿe Ndyuūs ná ncheeté yā. ⁵Naati caⁿá yā chii yā langostas chi nguéé cuuvi caaⁿnúⁿ tī 'iiⁿyāⁿ s'eeⁿ naati cuuvi díⁿ tī chí 'cueenu yā cuuvi chí ya'ai cá yā cheeti nyúⁿú 'í'ýú. Ní díⁿ tī chí ya'ai cá yā tan'dúúcā chí ya'ai ca 'iiⁿyāⁿ taachi cā'a 'iiti daⁿāi 'iiⁿyāⁿ. ⁶Ní nguuvi s'eeⁿ ní 'iiⁿyāⁿ yeⁿe iⁿ'yeeⁿdí 'cūū in'nuúⁿ yā taacā chí cuuvi 'cuūví yā tī neⁿe yā chí 'cuūví yā, naati nguéé cuuvi 'cuūví yā.

⁷Ní langostas miiⁿ ní tan'dúúcā 'aama 'yúúduu chí canee listo tī chí 'cuuⁿmáⁿ tī 'tíicā langostas miiⁿ. Na tiiⁿ tī cánduū

cosa tan'dúúcā corona yeⁿe 'díí'nguāⁿ. Ní naáⁿ tī ní tan'dúúcā nááⁿ 'iiⁿyāⁿ. ⁸Ní yuúduu tiiⁿ tī tan'dúúcā yuúduu tiiⁿ n'daataá. Ní 'diiⁿyuⁿ tī tan'dúúcā 'diiⁿyuⁿ 'yáiⁿyāⁿ cuáⁿáá. ⁹Ní snúuⁿ cuerpo yeⁿe tī catecai tan'dúúcā catecai cūū chí armadura cūū yeⁿe soldado. Ní n'géécú ngeechi tī tan'dúúcā chí n'geecu 'yaaⁿ n'dái carros ndúúcū 'yaaⁿ n'dái 'yúúduu chí ngéenu tī ndeé tī carro yeⁿe tī tan'dúúcā chí ngéenu tī cueⁿe tī neⁿe chí 'cuuⁿmáⁿ yā. ¹⁰Ní véé nduucudaⁿai tī tan'dúúcā nduucudaⁿai 'iiti daⁿāi ní veé 'iini ch'ete na nduucudaⁿai tī. Ní ndúúcū 'iini ch'ete yeⁿe nduucudaⁿai tī chí díⁿ tī daño chí cheenu yā chí cheeti nyúⁿú 'í'ýú. ¹¹Ní canéé 'áámá ángel ndíí tiiⁿ yeⁿe 'iiti s'eeⁿ, chíⁿ chí ángel yeⁿe yiive yáⁿāa miiⁿ. Ní ángel miiⁿ chí duuchi Abadón na nduudu hebreo, ní Apolión ná nduudu griego chí neⁿe caaⁿmaⁿ 'iiⁿyāⁿ chí nada'tuúví tanducueⁿé.

¹²Maaⁿ ní chó'oo 'áámá vaadi ya'āi chí canéé chí chó'oo naati véé na 'uúví vaadi ya'āi chí canéé chí cho'oo.

¹³Tuu'mi ní ndii chíⁿ ndii niyaaⁿ ángel miiⁿ idi'cuēcú yā trompeta yeⁿe yā ní ch'iindiveéⁿ 'áámá nduudu chí cuchii naavtaⁿā yeⁿe chí cuūuⁿ níⁿniⁿ tī chí adorno yeⁿe nátaí yeⁿe 'diiⁿnguāⁿ chí canéé nanááⁿ Ndyuūs naachi dich'eté yā Ndyuūs. ¹⁴Ní nduudu miiⁿ caⁿa chí ndii niyaaⁿ ángel miiⁿ chí ndéé yā trompeta yeⁿe yā: Dii, ángel, n'daatí di ndu'u cuūuⁿ ángeles chí snée i'yúú yā niiⁿnuúⁿ na yíicú ch'ete chí nguuvi Eufrates.

¹⁵Ní nín'daatí yā ndú'ú cuūuⁿ ángeles s'eeⁿ caati cuuvi 'caāⁿnuⁿ yā 'iinū parte yeⁿe 'iiⁿyāⁿ yeⁿe iⁿ'yeeⁿdí 'cūū. Ní canéé listo yā hora yeⁿe. ¹⁶Ní ch'iindiveéⁿ chí cheé dúúché yā soldados chí sndúu sa 'yuúduu chí ngii sa tan'dúúcā 'uuví ciento millones.

¹⁷Ní 'tíicā n'diichí 'yuúduu s'eeⁿ taachi 'úú, Juan, cueⁿé ndúúcū espíritu yeⁿe.

Ní 'ii'yāⁿ chi sndúu yā 'yúúdüu s'ééⁿ véé catecaí yā chi armadura yeⁿe pecho yeⁿe yā ní color cuá^a tan'dúúcaⁿ chi nguuchi yaⁿā ndúúcu color cueéé nanguuvi ndúúcu color cuaaáⁿ. Ní 'yúúdüu s'eeⁿ ní tíⁿ tī tan'dúúcaⁿ tíⁿ 'yáí'yāaⁿ cuá^aá. Ní na cheendí tī ican'daā nguuchi yaⁿā ndúúcu 'yaaⁿmiⁿ ndúúcu azufre. ¹⁸Ní yeⁿe iinū naaⁿ dendu'ū s'túúcaⁿ chi can'daā yeⁿe cheendí tī ní 'áamá 'iinū parte yeⁿe 'ii'yāⁿ yeⁿe iⁿ'yeeⁿdí cūū ch'ii yā ndúúcu nguuchi yáⁿā miiⁿ ndúúcu 'yaaⁿmiⁿ miiⁿ ndúúcu azufre miiⁿ. ¹⁹Ní chi ditiinū yeⁿe 'yúúdüu s'ééⁿ canúúⁿ cheendí tī ndúúcu nduucudaⁿai tī tī nduucudaⁿai tī miiⁿ ní yaaⁿ ní tan'dúúcaⁿ tíⁿ cúú, 'tíicā nduucudaⁿai tī. Ní ndúúcu cheendí tī ndúúcu nduucudaⁿai tī díⁿ tī daño 'ii'yāⁿ s'eeⁿ.

²⁰Tanáⁿā 'ii'yāⁿ yeⁿe iⁿ'yeeⁿdí cūū chi nguéé ch'ii yā yeⁿe daños nguéé ndaācā-daamí yā yeⁿe dendu'ū chi díⁿ yā chi nguéé n'daacā. Ní i'téenu yā espíritu yeⁿe yááⁿnguiniūⁿ ndúúcu santos ídolos yeⁿe 'díⁿnguāⁿ ndúúcu santos ídolos yeⁿe 'díⁿnguee ndúúcu santos ídolos yeⁿe cúú cuaaáⁿ ndúúcu santos ídolos yeⁿe tuū ndúúcu santos ídolos yeⁿe yáⁿá. Dendú'ū santos ídolos nguéé cuuvi inaaⁿ, ní nguéé cuuvi n'giindiveéⁿ, ndíí nguéé cuuvi ngiicá. ²¹Ní 'ii'yāⁿ s'eeⁿ 'tíicá ntúūⁿ nguéé ndaācādaamí yā yeⁿe chí n'giiⁿnúⁿ yā 'ii'yāⁿ, ndíí nguéé ndúú yeⁿe ngaatu chi díⁿ yā, ndíí nguéé ndúú yeⁿe chí caⁿá yā ndúúcu isaⁿā o n'daataá chi nguéé yeⁿe yā, ndíí nguéé ndúú yeⁿe chí duucu yā.

Yeⁿe ángel ndúúcu libro 'lírⁿ

10 Cuayiivi ní n'diichí 'áamá ángel chi véé n'dee n'dái poder yeⁿe yā. Ní chiicá yā yeⁿe va'ai cheeti nguuví ní chihiyá yā. Ní véé catecaí yā yeⁿe meéⁿ. Ní vmnaaⁿ tíⁿ yā canéé cuuⁿ'n'gúúⁿndí yeⁿe nanguuvi. Ní naáⁿ yā tan'dúúcaⁿ deeve yeⁿe 'yáⁿā, 'tíicā ngii

naáⁿ yā. Ní caⁿá yā ní tan'dúúcaⁿ columnas chi nguuchi yaⁿā. ²Ní na taⁿá yā ndee yā 'áamá libro 'lírⁿ chi candaⁿāi. Ní ángel miiⁿ s'neeⁿ yā caⁿá yā lado ta cuaacú yā vmnaaⁿ na nuūⁿniⁿ'yáⁿā. Ní s'neeⁿ yā caⁿá yā lado tá 'cuee yā vmnaaⁿ na yáⁿā. ³Tuuⁿmi ní yuudu n'dái 'caí yā tan'dúúcaⁿ chí n'gai 'áamá 'yáí'yāⁿ cuá^aá. Ní ch'íinū 'cai yā ní ndeēchē daavi ní caⁿā ndúúcu nduudu yeⁿe. ⁴Taachi ch'íinū ngaⁿā ndu'ū ndeēchē daavi míⁿ 'úú ní canéé listo chí dinguúⁿ chíⁿ chí n'diichí taachi ch'iindiveéⁿ 'áamá nduudu yeⁿe ná va'ai cheeti nguuví chí caⁿā chí 'úú: Nguéé dinguuⁿ di nduudu chí ngaⁿā ndu'ū ndeēche daavi miiⁿ naati canúúⁿ n'de'ei di na staaava yeⁿe di nduudu miiⁿ.

⁵Ní ángel miiⁿ chí n'diichí chí chééndii vmnaaⁿ na nuūⁿniⁿ'yáⁿā ndúúcu vmnaaⁿ na yáⁿā ch'eeⁿ yā ta'a yā lado ta cuaacú yā ndíí nanguuvi. ⁶Ní díⁿ yā 'áamá compromiso ní ngaⁿā yā: “Por Dios”, Ndyuūs chí canduuchi cueⁿe daāⁿmaⁿ, Ndyuūs chí din'dái yā nānguuví ndúúcu tanducueⁿē dendu'ū chí vee yeⁿe, ndúúcu yáⁿā ndúúcu tanducueⁿē dendu'ū chí vee yeⁿe, ndúúcu nuuⁿniⁿ'yáⁿā ndúúcu tanducueⁿē dendu'ū chí vee yeⁿe. Ní ángel miiⁿ caⁿā yā: 'Áā ntéé tiempo chí cuuvi naaⁿ. ⁷Ti nguuví taachi ndii chíⁿ ndii ndeēchē ángeles ní tucá'a yā 'cuēcú yā trompetas yeⁿe yā tuuⁿmi ní chíⁿ chí Ndyuūs cunee n'de'ei yā ní 'cuiinu. Ní Ndyuūs tucá'a yā díⁿ yā tanducueⁿē chí ngaⁿā yā ngii yā 'ii'yāⁿ profetas chí dichíⁿve yā Ndyuūs.

⁸Tuuⁿmi ní nduudu chí ch'iindiveéⁿ ndii nanguuvi caⁿā ntúūⁿ yā ndúúcu 'úú táamá vmneⁿē ní caⁿā 'tíicā: Dii, Juan, cueⁿe di ní cuta'a di libro 'lírⁿ chí ngaadi chí ángel miiⁿ ndee yā na taⁿá yā, ángel chí chééndii yā vmnaaⁿ na nuūⁿniⁿ'yáⁿā ndúúcu vmnaaⁿ na yáⁿā.

⁹Ní cheⁿé nanááⁿ ángel miiⁿ ní caⁿā chíí ángel: Díí, ángel, tee di libro 'lírⁿ

'úú. Ní teé yā libro 'lír' 'úú. Ní ángel mii' ca''a yā chiiyā 'úú: Cuta'a di ní ché'é dí libro 'lír'. Ní cuuvi yaadi na cheendi di tan'dúúca n̄di'i naati nduūvi yaáá ná cheēti di.

¹⁰ Tuu'mi ní sta'á libro 'lír' mí' chi canéé na ta'a ángel mii' ní che'é. Ní chii yaadi cheendí tan'dúúca n̄di'i. Taachi 'āā ch'íínú che'é ní nduūvi yaáá ye''e cheēti.

¹¹ Angel mii' ní n̄í'núú' n̄úu' nga''a yā ngii yā 'úú: Dí, Juan, taama vmné''ēe canéé chí caa''ma' di nduudu cuaacu ye''é Ndyuūs ye''ē n'dee n'dáí 'ii''yā' ndúúcu 'yaa' n'dáí naciones ndúúcu 'yaa' taavi 'ii''yā' chi nga''a davaacu s'ee' chi n̄'dáá' ní ndúúcu reyes.

'Uuvi 'ii''yā' chi nga''a yā nduudu cuaacu

11 Tuu'mi ní ángel mii' tee yā 'aama taa' nduu 'úú ti tan'dúúca 'áámá nduucu chi dicaadí yā, 'tíicā. Ní ángel mii' nga''a yā ngii yā 'úú: Cuéendii di ní dicaadí dí yáacū ye''e Ndyuūs ndúúcu nátaí. Ní diduuche di cheeti yaacū 'ii''yā' chi i'téenu yā Ndyuūs. ² Naati ch'uvā'āi ye''e yáacū na patio mii' nguéé dí-caadí dí mii' ti chii' ní ca''á 'ii''yā' chi nguéé i'téenu yā Ndyuūs. 'Ii''yā' s'ee' ní 'caanca'a yā nducué''ē yáá' mii' chi ye''é Ndyuūs 'uūvi ngēecú 'uūvi 'iiyū. ³ Ní nga''á yā 'tíicā. 'Úú ní dicho'ó 'uūvi 'ii''yā' chi nga''a cuaacú yā ye''é, chi caa''má' yā nduudu cuaacu ye''é 'áámá mil canee 'uūvi ciento ndúúcu 'iinu ngēecu nguuvi. Ní catecai yā ní 'ii''yā' chi luto yā.

⁴ Ná 'uūvi 'ii''yā' s'ee' chi nga''a cuaacu ye''é, 'ii''yā' s'ee' ní tan'dúúca 'uūvi yá''á ye''e olivas ndúúcu 'uūvi candeleros chi snéé nanáá' Señor chi 'iivi ye''e yá''ā. ⁵ Ní nduuti chi 'áámá 'ii''yā' ne''e yā dí' yā daño 'uuvi 'ii''yā' chi nga''a cuaacu ye''é tuu'mi ní can'dáá nguuchi ya''ā na cheendi 'uūvi 'ii''yā' ní ch'iinū 'ii''yā' chi contra ye''e yā. Ní 'tíicā

cuuvi 'ii''yā' chi ne''é yā dí' yā daño 'uuvi 'ii''yā' s'ee', canéé chi 'cuūvi yā ndúúcu nguuchi ya''ā. ⁶ 'Uuvi 'ii''yā' chi caa''ma' cuaacu ye''é ní véé poder ye''e yā chi cuuvi nn'gaadí yā nanguuvi ní 'íicú nguéé cuee' cúúvi 'naa' tiempo chi nga''á yā nduudu cuaacu ye''é Ndyuūs. Ní cuuvi yā dí' ntúu' yā chi nuu'n̄' nduuvi yuúú'. Ní dí' yā chi ndáá n'dee n'dáí ca'ai ye''e 'ii''yā' ye''e i''yee'dí 'cūú, ní dí' yā chuū 'āā dé'é nūu' tiempo taachi ne''e yā. ⁷ Ní cuayiivi taachi 'cui-inu caa''má' yā nduudu cuaacu ye''é Ndyuūs tuu'mí 'iiti taa' chi nguuvi mon-struo ní can'dáa tī ye''e yiive yá''ā ní dí' caandaá tī ndúúcu 'uuvi 'ii''yā' s'ee'. Ní cuhēē tī ye''e yā ní 'caa''nú' tī 'uuvi 'ii''yā' s'ee'. ⁸ Ní cuerpo ye''e 'uūvi tiná''ā s'ee' cunéé na yúúní ye''e yáá' ch'ēete mii' chi dáámá yáá' mii' naachi 'ii''yā' ca'néé'nga'á yā Señor Jesucristo ye''e yú na cruz. Ní ndúúcu táámá nduudu yáá' ch'ēete mii' tan'dúúca yáá' Sodoma o yá''ā Egipto ti 'ii''yā' chi nguéé n'daacā ch'ēetinée yā mii'. ⁹ Ní 'ii''yā' ye''e yáá' s'ee' ndúúcu 'ii''yā' ndaataa s'ee' ndúúcu 'ii''yā' ye''e n'dee n'dáí davaacu chi n̄'dáá' ndúúcu 'ii''yā' ye''e 'naa' naciones ca''á yā n'diichi yā 'uūvi cuerpo chi tiná''ā ye''e 'ii''yā' chi n'diī chēeti na 'íínú nguuvi canéé ma''a. Ní 'ii''yā' s'ee' nguéé 'cuaá' yā chi 'ii''yā' 'cuēchi yā cuerpos ye''e tiná''ā ye''e 'ii''yā' chi n'dí' mii'. ¹⁰ Ní 'ii''yā' chi ch'ēetinée yā na yá''ā ní neené cuuvi yeenú yā chi n'dí' nduu 'uūvi profetas. Ní dí' yā 'vi-icu. Ní dicho'ó yā regalos ye''e 'aamá yā taama yā caati 'uuvi profetas chi nga''a nduudu cuaacu ye''é Ndyuūs dí' yā chi 'ii''yā' s'ee' néené ch'eenu yā chii. ¹¹ Naati cuayiivi chi chó'ō 'iinu nguuvi canéé ma''a Ndyuūs nadacuéé' yā nduu 'uuvi 'ii''yā' s'ee' ye''e nguaa' tiná''ā. Ní nducyaaca 'ii''yā' di'va'a yā ye''e chi n'diichi yā. ¹² Ní cuayiivi mí' 'uuvi 'ii''yā' s'ee' ch'iindiveé' yā 'áámá ndu-

udu yuudu n'dái yeⁿe ná va'ai cheeti ngu-
uvi chi caⁿá: Ndís'tii, cuchée nī 'muuⁿ. Ní
'iiⁿyāⁿ s'eeⁿ ní cuchée yā na va'ai cheeti
nguuvī na 'áámá meēⁿ. Ní 'iiⁿyāⁿ s'eeⁿ
chi taaⁿ yā yeⁿe yā n'diichí yā chuū. ¹³Ní
hora mífⁿ nūuⁿ 'nuⁿ'u taaⁿ yáⁿāa ní 'áámá
ndiichi parte yeⁿe yááⁿ miiⁿ chi n'daā ní
ndeēchē mil 'iiⁿyāⁿ ch'li yā taachi n'nuⁿ'u
yáⁿāa miiⁿ. Tanáⁿ'a yā ní d'vá'a yā ní
dich'etē yā Ndyuūs chi canéé na va'ai
cheeti nguuvī.

¹⁴Chó'ōo ndii 'uuvī vaadī yá'āi naati ní
ndii chíⁿ ndii 'iinu miiⁿ ndaa núúⁿ.

Yeⁿe ángel chí d'cucēcú yā ndíí ndēēchē trompeta

¹⁵Ní ndii chíⁿ ndii ndēēchē ángel
miiⁿ d'cucēcú yā trompetas yeⁿe yā ní
ch'iindiveéⁿ 'naaⁿ nduudu yuudu na va'ai
cheeti nguuvī chi ngaⁿá:

Maaⁿ ní Señor Ndyuūs yeⁿe yú ndúú^c
Cristo ní vee poder yeⁿe yā tiempo
maaⁿ chi caaⁿ'maⁿ ntiⁿ'nyuⁿ yā cueⁿe
daāⁿ'maⁿ yeⁿe nducuéⁿ'ē 'iiⁿ'ntyéⁿ'ē
yeⁿe íⁿ'yeeⁿ'dī ndúú^c naachi ngaⁿ'a
ntiⁿ'nyuⁿ yā ti nducuéⁿ'ē ní yeⁿe
Cristo maaⁿ. ¹⁶Tuuⁿ'mi ní nduⁿ'u ndi-
icú cuūⁿ 'iiⁿ'ntyéⁿ'ē chi vee yā na
trono yeⁿe yā nanááⁿ Ndyuūs ch'etē
ndiitin'díi yā ndúú^c naaⁿ yā na
yáⁿāa nanááⁿ Ndyuūs ní dich'etē yā
Ndyuūs. ¹⁷Ní ngaⁿ'a yā:

N'dii Señor Ndyuūs chí vee tanducuéⁿ'ē
denduⁿ'ū poder yeⁿe nī, n'dii chí
canée nī tiempo maaⁿ ní canée nī
tiempo ndíí vmaaaⁿ ní canée nī ndíí
tiempo chí cuchii. Teé 'nū gracia
n'dii, Ndyuūs, ti n'dii ní staⁿ'á nī
poder chí yeⁿe nī chí ch'etē n'dai.
Ní n'dii ngaⁿ'a ntiⁿ'nyúⁿ nī maaⁿ.

¹⁸Ní maaⁿ ní ndaa tiempo chí di-
tuúví nī 'iiⁿ'yāⁿ s'eeⁿ chí idituuví yā
íⁿ'yeeⁿ'dī. 'Iiⁿ'yāⁿ yeⁿe naciones chí
nguée í'téenu yā ní nduuvī taáⁿ yā
ti ndaa nguuvī chí caⁿ'á nī castigo
yeⁿe 'iiⁿ'yāⁿ s'eeⁿ ní hora chí cu-

uvi n'diichí nī nuuⁿ'ndi yeⁿe tináⁿ'ā
s'ee. Ní caⁿ'á nī premio 'iiⁿ'yāⁿ pro-
fetas chí dich'í'vē n'dii ní ngaⁿ'á
yā nduudu cuaacu yeⁿ'é nī. Ní caⁿ'á
nī nducyáácá 'iiⁿ'yāⁿ chí neⁿe yā
n'dii ndúú^c 'iiⁿ'yāⁿ chí dich'etē yā
n'dii, 'iiⁿ'yāⁿ chí ngaⁿ'a ntiⁿ'nyúⁿ yā
ndúú^c tanáⁿ'ā 'iiⁿ'yāⁿ, nducyáácá
'iiⁿ'yāⁿ chí í'téenu yā Ndyuūs.

¹⁹Tuuⁿ'mi ní 'áámá yā n'guaaⁿ yā
cheendi va'āi yeⁿe yáacū yeⁿe Ndyuūs,
yáacū chí canée na va'ai cheeti ngu-
uvi. Ní mífⁿ canée arca chí caja naachi
canée compromiso yeⁿe Ndyuūs. Ní
canée cheeti yáacū miiⁿ. Ní n'diichí 'cuāi
ndúú^c n'dee n'dái ruido ndúú^c daavi
n'nuⁿ'u na yáⁿ'āa ndúú^c 'aama cúúví
yuūⁿ.

N'daataá ndúú^c 'iiti dragón

12 Tuuⁿ'mi ní vee 'áámá seña chí
néené ch'etē chí ch'iⁿ'i na va'ai
cheeti nguuvī. N'diichí 'áámá n'daataá
chí canuuⁿ tá catecai tan'dúú^cá 'yáⁿ'ā.
Ní 'iiⁿ'nyuⁿ miiⁿ ní canée maaⁿ ca'a tá.
Ní canúⁿ'ū tiiⁿ tá 'áámá corona ndúú^c
ndichuuvī 'iiⁿ'nyuⁿ. ²Ní hora mífⁿ nūuⁿ ní
cuuvī 'cuundiyááⁿ daiya tá ní 'cāi yiicu tá
ndúú^c vaadī ya'ai chí cuuvī 'cuundiyááⁿ
daiya tá. Neené ch'eenu tá chíi ní 'āā
'cuée 'cuundiyááⁿ daiya tá. ³Ní níⁿ'nuúⁿ
nūuⁿ vee táámá seña chí néené ch'etē
chí ch'iⁿ'i nanguuvī. N'diichí 'áámá 'iiti
cuá'āa chí ch'etē ca chí nguuvī dragón.
Ní vee ndēēchē tíⁿ ti ní ndiichí duuⁿ'ni-
iⁿ'níⁿ ti. Ní canduu tíⁿ ti ndēēchē coro-
nas 'áámá 'áámá ca'áámá cā'aama tíⁿ ti.
⁴Ní dragón miiⁿ ndúú^c ndúú^cudaⁿ'ai
tí díⁿ ti chín'daā na 'iinu parte yeⁿe
'iiⁿ'nyúⁿ yeⁿe nanguuvī ní chíiya ndii
na yáⁿ'āa. 'Iiti dragón miiⁿ chéendii tí
nanááⁿ n'daataá chí 'cuundiyááⁿ daiya tá
ní 'íicú cuuvī che'ē tí daiya tá miiⁿ taachi
'cuundiyááⁿ. ⁵Tuuⁿ'mi ní n'daataá miiⁿ
ní ch'iiⁿ'ndiyááⁿ 'áámá saⁿ'ā lííⁿ. Saⁿ'ā
lííⁿ miiⁿ canée chí diituu caaⁿ'maⁿ nti-

iⁿnyuⁿ sa yeⁿe tanducuéⁿe naciones yeⁿe iⁿyeéⁿdí ndúú^cú 'áámá nduucu cū. Ní níⁿnuúⁿ nūⁿ 'áámá yā sta'a yā saⁿā 'líⁿ míⁿ ni cunaⁿá yā ndúú^cú dacuáⁿāa miiⁿ na va'ai cheeti nguuvu naachi canéé Ndyuūs chi véé yā na trono yeⁿe yā. ⁶N'daata miiⁿ ní chéénū ta na yāⁿāa cuūⁿmaⁿ naachi nguéé ch'etinéé 'iiⁿyāⁿ ní miiⁿ nūⁿ Ndyuūs din'dái yā 'áámá lugar cáávā táⁿā miiⁿ. Ní miiⁿ Ndyuūs ca'á yā chi che'e tá 'áámá mil canee 'uūví ciento nduuyu canéé 'iinū ngeecu nguuvu.

⁷Cuayivi ní véé 'aama caandaá ch'ete na va'ai cheeti nguuvu. Angel Miguel chi ngaⁿa ntiⁿnyuⁿ ndúú^cú ángeles yeⁿé yā 'cuⁿu yā contra yeⁿe 'iiti dragón. Ní 'iiti dragón miiⁿ ndúú^cú ángeles yeⁿé tī 'cuⁿu tī ndúú^cú ángel Miguel miiⁿ. ⁸Naati 'iiti dragón miiⁿ nguéé díⁿ tī ganar caandaá ch'ete miiⁿ. Ní 'āā ntéé véé lugar cááva tī na va'ai cheeti nguuvu. ⁹'Áámá 'iiⁿyāⁿ ch'ecú yā 'iiti dragón miiⁿ ndúú^cú nducyaaca ángeles yeⁿé tī ndíí iⁿyeéⁿdí cū. 'Iiti dragón miiⁿ chi ch'ete ní 'iiti cúu miiⁿ ndíí vmnāáⁿ vmnaaⁿ chi yááⁿn'guinūⁿ chi Satanás. 'Iiti cúu miiⁿ ní chinnche'éí tī núúⁿmáⁿ iⁿyeéⁿdí.

¹⁰Tuu'mi ní ch'iindiveéⁿ 'áámá nduudu chí diitūⁿ n'dai yeⁿe na va'ai cheeti nguuvu chí ngaⁿa 'tíicā: Maaⁿ ní ndaā tiempo chí Ndyuūs yeⁿe yú nadanguáⁿai yā 'iiⁿyāⁿ yeⁿé yā. Ní ch'iⁿyā yā poder yeⁿé yā chí rey yā. Ní ngaⁿa ntiⁿnyúⁿ yā yeⁿe tanducuéⁿe denduⁿū yeⁿe yā. Ní Cristo ch'iⁿyā yā chí 'iiⁿntyéⁿe yā caati saⁿā miiⁿ chí Satanás chí ca'a sa nuuⁿndi yeⁿe hermanos yeⁿe yú ndíí ngúúví ndíí n'gááⁿ nanááⁿ Ndyuūs, 'iiⁿyāⁿ ch'ecú yā saⁿā miiⁿ ndii va'ai cheeti nguuvu ndii na yāⁿā. ¹¹Ní hermanos yeⁿe yú chicheé yā yeⁿe yááⁿn'guinūⁿ cáávā yuūⁿ yeⁿe Cristo chí nguuvu 'iiti cuūchī, ní cáávā chí ngaⁿá yā nduudu cuaacu yeⁿe Ndyuūs, ni cáávā chí nguéé 'va'á yā yeⁿe vida yeⁿe maáⁿ yā chí ch'ii

ya cáávā Señor Jesucristo yeⁿe yú. ¹²Ndís'tiⁿ chí canéé na va'ai cheeti nguuvu yeenú nī, naati de'ē chúú^cā ya'āi yeⁿé nducyaaca chí snéé na yāⁿā 'cúú ndúú^cú nducyaaca chí snéé na nuūⁿnīⁿyāⁿā caati yááⁿn'guinūⁿ ndaa sa nanáaⁿ yā. Ní neené taaⁿ sa ti deenu sa chí 'āā ntéé cuuvi 'naaⁿ sa na iⁿyeéⁿdí.

¹³Taachi 'iiti dragón miiⁿ ní chicadínuuⁿ tī chí 'āā candiití tī ndíí na yāⁿā, cheⁿe tī can'dáa tī n'daataá chí ch'iiⁿndiyááⁿ daiya tá chí 'cueenu tá cuuvi. ¹⁴Naati 'áámá yā ca'a yā n'daata miiⁿ 'uūví ngeechi tá tan'dúú^cā ngeechi 'íí'yāa chí ch'ete ca. Ní 'iicú cuuvi caavā tá nanguuvi ní caⁿa tá lugar yeⁿe tá naachi nguéé 'iiⁿyāⁿ. Ní yaⁿai canee tá yeⁿe 'iiti cúu chí yááⁿn'guinūⁿ. Ní 'iiⁿyāⁿ ca'á yā chí che'e tá 'iinū ndúúyū canéé maⁿa. ¹⁵Ní cúu miiⁿ tun'dáa tī na cheendi tī n'dee n'dái nuūⁿnīⁿ tan'dúú^cā nuūⁿnīⁿ yeⁿe 'áámá yíicú. Ní nuūⁿnīⁿ miiⁿ ní nduuvu yíicú chí cuuvi candeē táⁿā miiⁿ tī 'tíicā neⁿe cúu miiⁿ. ¹⁶Naati yāⁿā miiⁿ chinnee n'daataá míⁿ tī n'da'ai tan'dúú^cā 'iiⁿyāⁿ n'da'ái yā cheendí yā ní yāⁿā míⁿ chí 'i nuūⁿnīⁿ miiⁿ ní cheēnū nuūⁿnīⁿ miiⁿ cheeti yāⁿā, nuūⁿnīⁿ chí 'iiti dragón miiⁿ tun'dáa tī ndúú^cú cheendí tī. ¹⁷Ní ndúú^cú chuū 'iiti dragón miiⁿ neené taaⁿ n'dái tī ndúú^cú n'daataa míⁿ ní chéⁿe tī cuⁿú tī ndúú^cú tanáⁿā 'iiⁿyāⁿ ndaata yeⁿe n'daataa miiⁿ, 'iiⁿyāⁿ chí dííⁿ yā chí ngaⁿa mandamiento yeⁿé Ndyuūs. Ní 'áámá canéé yā ndúú^cú nduudu cuaacu yeⁿe Jesucristo.

Yeⁿe 'uūví 'iiti taaⁿ chí nguuvu monstruo

13 Tuu'mi ní taachi chéendíí vmnaaⁿ yāⁿā ndúútíi yeⁿe nuūⁿnīⁿyāⁿā miiⁿ n'diichí chí can'daa 'áámá 'iiti chí ch'ete taavi ca yeⁿe nuūⁿnīⁿyāⁿā. 'Iiti miiⁿ ní nguuvu monstruo ní véé ndeēchē tííⁿ tī ndúú^cú ndiichi duuⁿniiⁿníⁿ tī. Ní vmnaaⁿ 'áámá 'aama duuⁿniiⁿníⁿ tī

sndúūn 'áámá corona. Ní canéé nguūn ca'áámá cā'aama tífn tī chi duuchi chi nguéé inee yífnū Ndyuūs. ² 'iiti chí monstruo chí ch'εete mífn chí n'diichí ní tan'dúúca 'iiti chí leopardo, 'tiicá tī. Ca'a tī ní tan'dúúca ca'a oso, 'tíicā ca'a tī. Cheendí tī ní tan'dúúca cheendi 'yáíⁿyāaⁿ cuá'áá, 'tíicā cheendí tī. 'iiti dragón miiⁿ ca'á tī poder yeⁿé tī ndúúcu trono yeⁿé tī na ta'a 'iiti monstruo chí ch'εete miiⁿ chí ngaⁿa ntiíⁿnyúⁿ tī. ³ Ní n'diichí chí 'áámá chéé tífn 'iiti monstruo chí ch'εete taavi ca ní tan'dúúca chí nca'āi 'áámá 'iiti chí n'díí ní nduūvā yeⁿé tī, 'tíicā 'áámá tífn tī. Ní nducyáácá 'iiⁿyāⁿ yeⁿe iⁿyeeⁿdí 'cūū nééné cheⁿe yiinú yā yeⁿe chuū. Ní cueⁿé yā ndúúcu 'iiti monstruo miiⁿ. ⁴ Ní nducyaaⁿ yā s'téenu yā 'iiti dragón miiⁿ cáávā chí ca'á tī poder yeⁿé tī táámá 'iiti chí monstruo chí ch'εete taavi ca. Ní 'iiⁿyāⁿ 'tiicá ntúūⁿ chí'téenu yā 'iiti monstruo miiⁿ. Tuuⁿmi ní caⁿa yā: ¿Du'u véé poder yeⁿé tan'dúúca 'iiti monstruo 'cūū? ¿Du'u cúúví 'cuuⁿmaⁿ ndúúcu 'iiti monstruo 'cūū ní cuheε ndúúcu 'iiti 'cūū?

⁵ Ní 'iiti dragón ca'á tī poder 'iiti monstruo miiⁿ chí caaⁿmáⁿ tī denduū chí ch'εete. Ní cunncaā ngaⁿa tī contra yeⁿe Ndyuūs. Ní diⁿtiinuú tī chí ngaⁿa ntiⁿnyuⁿ tī 'túúca chééti 'uūví ngeεcu 'uūví 'iiyū. ⁶ Ní 'tíicā idiiⁿ 'iiti monstruo. Ní cunncaā ngaⁿa tī contra yeⁿe Ndyuūs ní ngaⁿa tī cunncaā contra yeⁿe chí duuchi Ndyuūs ní contra yeⁿe va'ai chεeti nguuvi naachi Ndyuūs ch'εetinée yā ní contra yeⁿe 'iiⁿyāⁿ chí snée yā ndúúcu Ndyuūs. ⁷ Ní 'tiicá ntúūⁿ 'iiti dragón ca'á tī poder 'iiti monstruo miiⁿ chí dífn tī vaadi 'caaⁿva ndúúcu 'iiⁿyāⁿ chí yeⁿé Ndyuūs ndífn chí chεε tī ndúúcu 'iiⁿyāⁿ s'eeⁿ. Ní ca'á tī poder 'iiti monstruo chí ngaⁿa ntiíⁿnyúⁿ tī yeⁿe tanducuéⁿé raza yeⁿe 'iiⁿyāⁿ yeⁿe tanducuéⁿé yáán ndúúcu yeⁿe tanducuéⁿé davaacu ndúúcu yeⁿe tanducuéⁿé nación. ⁸ Ní nducyáácá 'iiⁿyāⁿ chí snée yā na yáⁿāa

cu'téenu yā 'iiti monstruo miiⁿ. 'Tíicā néⁿe Ndyuūs. Ní nguéé canéé nguūn chí duuchi 'iiⁿyāⁿ s'eeⁿ na libro yeⁿe vida cueⁿe daāⁿmaⁿ chí yeⁿe 'iiⁿyāⁿ chí duuchi 'iiti cuūchī. Ní 'iiⁿyāⁿ s'eeⁿ chí 'iiⁿnúⁿ yā Cristo ndii tiempo chí Ndyuūs din'dái yā iⁿyeeⁿdí.

⁹ Nduuti chí 'áámá 'iiⁿyāⁿ véé veéⁿ yā 'caandiveéⁿ yā nduudu 'cūū. ¹⁰ 'iiⁿyāⁿ chí can'daa yā 'iiⁿyāⁿ chí cuuvi preso yā, 'tiicá ntúūⁿ maáⁿ yā canéé chí cuuvi preso yā. 'iiⁿyāⁿ chí n'giiⁿnuⁿ yā 'iiⁿyāⁿ ndúúcu machete 'uūví lados 'caāiⁿ canéé chí 'cuuvi ntúūⁿ yā 'tíicā. Ní cáávā chuū 'iiⁿyāⁿ chí yeⁿé Ndyuūs canéé chí véé 'viicheε'tífnūⁿ ndúúcu yā ní canéé chí i'téenu yā Ndyuūs.

¹¹ Cuayiiⁿ ní n'diichí táámá 'iiti monstruo chí ch'εete ca chí can'daa tī nguaaⁿ yáⁿāa miiⁿ. Véé 'uūví duuⁿniíⁿniⁿ tī tan'dúúca 'áámá duuⁿniíⁿniⁿ 'iiti cuūchī 'tiicá tī. Ní 'iiti monstruo ndii 'uūví indeé tī tan'dúúca 'áámá 'iiti dragón. ¹² Ní véé tanducuéⁿé poder yeⁿe 'iiti monstruo chí ndii 'uūví chí ch'εete taavi ca tan'dúúca poder yeⁿe 'iiti monstruo ch'εete ca chí vmnaaⁿ. Ní dífn tī chí 'iiⁿyāⁿ yeⁿe iⁿyeeⁿdí 'cūū ní cu'téenu yā 'iiti vmnááⁿ vmnaaⁿ chí 'iiti monstruo chí naca'ái tī ní nduūvā yeⁿé tī. ¹³ Ní 'iiti chí monstruo chí ndii 'uūví dífn tī vaadi n'giinu ch'εete n'dai. Dífn tī chí can'daa yaⁿā yeⁿe nanguuvi ndífn vmnaaⁿ yáⁿā 'cūū ní n'deeé n'dái 'iiⁿyāⁿ n'diichí yā chuū. ¹⁴ Ní caavā vaadi n'giinu chí dífn tī taachi cheendí tī nanááⁿ 'iiti monstruo chí vmnááⁿ vmnaaⁿ chí teé tī lugar chí dífn tī 'túúca, tuuⁿmi ní chinnche'ée tī 'iiⁿyāⁿ chí ch'εetinée yā iⁿyeeⁿdí 'cūū. Ní ca'a tī orden 'iiⁿyāⁿ s'eeⁿ chí din'dái yā 'áámá santo ídolo tan'dúúca 'iiti monstruo chí nca'ái tī ndúúcu machete 'uūví lados 'caāiⁿ ní cunduuchi tī chí cuuvi santo yeⁿe yā. ¹⁵ Ní 'iiti monstruo chí vmnááⁿ vmnaaⁿ ní ca'á tī poder 'iiti monstruo chí iⁿyeeⁿdí 'uūví tī chí ca'á tī vida

santo 'iiti ídolo miiⁿ. Ní 'íicú 'iiti santo tī cuuvi 'caaⁿ máⁿ tī ní dííⁿ tī chí 'cuūvi nducyáacá 'iiⁿ yāⁿ chí nguéé 'i'téenu yā 'iiti santo miiⁿ. ¹⁶ Ní cuayiivi ní 'iiti monstuo chí ndii 'uūvi ní dííⁿ tī ntúuⁿ chí nducyaaca 'iiⁿ yāⁿ chí ngaⁿ a ntiiⁿ nyúⁿ yā ndúúcu tanáⁿ a 'iiⁿ yāⁿ ndúúcu 'iiⁿ yāⁿ chí 'cuiica ndúúcu 'iiⁿ yāⁿ pobre yā ndúúcu 'iiⁿ yāⁿ chí libre yā ní ndúúcu 'iiⁿ yāⁿ chí 'áámá dichí've yā 'iivi yā, 'iiti monstuo miiⁿ dííⁿ tī chí nducyaaca yā canéé chí ndeé yā 'áámá sello na ta'a cuaacú yā o ncheeté yā. ¹⁷ Ní dííⁿ ntúuⁿ tī 'tíicā. Mar 'áámá 'iiⁿ yāⁿ nguéé cuuvi cuái yā o n'diicui yā nduuti chí nguéé ndeé yā sello yeⁿ e 'iiti monstuo ndii 'uūvi o chí duuchí tī o número yeⁿ e chí duuchí tī. ¹⁸ Ní chuū ní 'iiⁿ yāⁿ chí déenu yā cuuvi dííⁿ yā. 'iiⁿ yāⁿ chí déenu yā caⁿ á yā ngaⁿ a duuchi yā chí dúuchí 'iiti monstuo ndíí 'uūvi miiⁿ tī número miiⁿ ní lado yeⁿ e chí duuchi 'áámá saⁿ a. Ní número miiⁿ ní ngii jaáⁿ ciento canduū 'iinu ngeecu jaaⁿ.

Ngiitá 'iiⁿ yāⁿ chí 'áámá ciento canéé 'uūvi ngeecu cuūuⁿ mil yeⁿ e chí nanguaⁿ ai yā

14 Cuayiivi ní n'diichí 'iiⁿ yāⁿ chí nguuvi 'iiti cuūchí chí chééndii yā ná yīicū chí nguuvi Sión. Ní nduucú yā canéé 'áámá ciento 'uūvi ngeecu cuūuⁿ mil 'iiⁿ yāⁿ chí ndeé yā chí duuchí yā ndúúcu chí duuchi chiidá yā chí canee nguūⁿ ncheeté yā. ² Ní ch'iindiveéⁿ 'áámá nduudu chí ngeⁿ e na va'ai cheeti nguuvi. Ní nduudu miiⁿ tan'dúúca chí yuūdūu n'geete chí chíí yā n'dai nuūⁿ niⁿ o tan'dúúca chí n'geecu 'áámá daavi ch'ete; ní nduudu miiⁿ ní tan'dúúca chí n'geecu n'dee n'dái arpas chí idi'cueécú 'iiⁿ yāⁿ. 'Tíicā nduudu miiⁿ. ³ Ní 'iiⁿ yāⁿ chí n'dee n'dái miiⁿ chí snée yā nanááⁿ trono miiⁿ ní nanááⁿ ndu'u cuūⁿ 'iiⁿ yāⁿ miiⁿ ní nanááⁿ 'iiⁿ ntyéⁿ e miiⁿ ní ngiitá yā 'áámá canto chí ngai. Ní mar 'áámá

'iiⁿ yāⁿ nguéé ngii n'geeⁿ yā canto miiⁿ, dámaāⁿ ndu'u chí 'áámá ciento 'uūvi ngeecu cuūuⁿ mil 'iiⁿ yāⁿ chí Ndyuūs nadangúⁿ ai yā nguaaⁿ 'iiⁿ yāⁿ yeⁿ e iⁿ yeeⁿ dí 'cūū. ⁴ Ní 'iiⁿ yāⁿ s'eeⁿ chí saⁿ a chí nguéé ngaⁿ á yā ndúúcu mar 'áámá n'daataá ní nguéé n'giindivaacu yā. Ní caⁿ a yā ndúúcu 'iiⁿ yāⁿ chí nguui 'iiti cuūchí 'āā tíí nūuⁿ cuaaⁿ naachi caⁿ á yā. Ní 'iiⁿ yāⁿ s'eeⁿ Ndyuūs yaaⁿ ví yā chí cuuvi yeⁿ e yā yeⁿ e nducyaaca 'iiⁿ yāⁿ. Ní 'iiⁿ yāⁿ s'eeⁿ 'iiⁿ yāⁿ chí vmnááⁿ vmaaaⁿ chí ch'íi yā cáávā chí dííⁿ yā ntiiⁿ nyuⁿ yeⁿ e Ndyuūs ní yeⁿ e 'iiⁿ yāⁿ chí duuchi 'iiti cuūchí. ⁵ 'iiⁿ yāⁿ s'eeⁿ nguéé ngaⁿ á yā mar 'áámá nduudu yaadi ní nguéé véé nuuⁿ ndi yeⁿ e yā nanááⁿ trono yeⁿ e Ndyuūs.

Yeⁿ e chí ngaⁿ a 'iinū ángeles

⁶ Tuuⁿ mi ní n'diichí táama ángel ngaá yā naavtaⁿ a nanguuvi. Ní ángel miiⁿ ní ndeé yā nduudu chí canéé cueⁿ e daāⁿ maⁿ chí nduudu ngai chí nanguaⁿ ai 'iiⁿ yāⁿ. Ní ngaⁿ á yā nduudu ngai miiⁿ nanááⁿ nducyaaca 'iiⁿ yāⁿ yeⁿ e iⁿ yeeⁿ dí 'cūū, nanááⁿ nducueⁿ e naciones ndúúcu nducueⁿ e tribus yeⁿ e 'iiⁿ yāⁿ ndúúcu nducyaaca davaacu yeⁿ e tanducueⁿ e 'iiⁿ yāⁿ ndúúcu nducyaaca 'iiⁿ yāⁿ chí snée yā na yáⁿ aa 'cūū. ⁷ Ní ángel miiⁿ caⁿ á yā ndúúcu 'áámá nduudu díftiu: Ndís'tii 'va'á ní Ndyuūs, dich'eté ní 'iiⁿ yāⁿ tī 'āā ndaa hora chí dííⁿ yā juzgar nducyaaca 'iiⁿ yāⁿ. Dich'eté ní 'iiⁿ yāⁿ chí din'dái yā nanguuvi ndúúcu yáⁿ aa ndúúcu nuūⁿ niⁿ yáⁿ a ndúúcu naachí icāⁿ daa nuūⁿ niⁿ.

⁸ Ní n'diichí taama ángel can'dáa yā ángel miiⁿ ní ngaⁿ á yā: Yáāⁿ Babilonia 'āā ntuūvii. Yáāⁿ Babilonia chí yáāⁿ ch'ete miiⁿ 'āā ntuūvii tī 'iiⁿ yāⁿ yeⁿ e yáāⁿ miiⁿ ní dííⁿ yā chí tanáⁿ a 'iiⁿ yāⁿ yeⁿ e nducueⁿ e nación dinuuⁿ ndi cá yā ní caⁿ á yā ndúúcu n'daataa ó isaⁿ a

chi nguéé yeⁿé yā ti diíⁿ yā nuuⁿndi tan'dúúcā chi diíⁿ 'iiⁿyāⁿ s'eeⁿ.

⁹ Ní Cuayiivi ní n'diichí ndii 'línú ángel miiⁿ can'dáa yā ángel s'eeⁿ ní caⁿ'a yuudu yā: Nduuti chi 'áámá 'iiⁿyāⁿ cu'téenu yā 'iiti monstroo miiⁿ ndúúcu 'iiti santo chi dáámá ndúúcu 'iiti miiⁿ ní 'iiⁿyāⁿ ndée yā sello yeⁿé tí ncheeté yā o na ta'á yā, ¹⁰ canéé chi cuta'á yā neené taaⁿ castigo chi Ndyuūs caⁿ'á yā ca'a yā 'iiⁿyāⁿ miiⁿ. Ní castigo miiⁿ tan'dúúcā 'áámá copa di-ituu ndúúcu vaadi taaⁿ yeⁿe Ndyuūs. 'Tíicā va. Ní castigo miiⁿ ní chiiⁿ chi 'iiⁿyāⁿ s'eeⁿ cuuvi yá'ái yeⁿé yā ndúúcu nguuchi yá'ā ní ndúúcu tuúu chi ngu-uví azufre chi nguuchi yaⁿā ní cuuvi chó'oo chuū nanááⁿ ángeles yeⁿé Ndyuūs ní nanááⁿ 'iiⁿyāⁿ chi duuchi 'iiti cuúchí. ¹¹ Ní 'yááⁿmiⁿ yeⁿe nguuchi yá'ā miiⁿ chi castigo miiⁿ ngeε cueⁿe daāⁿmaⁿ yeⁿe lugar chi n'geenu yā ngii. Ní 'iiⁿyāⁿ s'eeⁿ chi n'geenu yā ngii ní i'téenu yā 'iiti monstroo miiⁿ chí ch'εete taavi ca ndúúcu 'iiti chi santo yeⁿé tí. Ní ndeé yā seña yeⁿé chi duuchí tí na cuerpo yeⁿé yā. 'Iiⁿyāⁿ s'eeⁿ nguéé ntaavi'tuunuúⁿ yā yeⁿe chi ya'ái yā ndíí nguéé nguuvi ndíí nguéé n'gaaⁿ. ¹² Ní cáávā chuū 'iiⁿyāⁿ chi yeⁿe Ndyuūs ní n'giindiveéⁿ yā mandamiento yeⁿé yā ní 'áámá canéé yā chi i'téenu yā Cristo ní canéé chi vεe paciencia yeⁿe yā.

¹³ Cuayiivi ní 'úú ch'iindiveéⁿ 'áámá nduudu yeⁿe va'ai chεeti nguuvi chi ngaⁿ'a ngii 'úú 'tíicā: Díí, Juan, dingúuⁿ di chuū. De'ē chúúca yeenu 'iiⁿyāⁿ chi caⁿ'á yā 'cuuvi yā tiempo 'cūú ndíí tiempo chi cuchí, 'iiⁿyāⁿ chi i'téenu yā Señor. Ní 'tíicā cuuvi ngaⁿ'a Espíritu N'dai yeⁿe Ndyuūs. Ní 'iiⁿyāⁿ s'eeⁿ ntaavi'tuunuúⁿ yā yeⁿe ntiⁿ'nyuⁿ yeⁿé yā ní candéé yā ndúúcu yā yeⁿe chi diíⁿ yā.

Cosecha yeⁿe yá'āa 'cūú

¹⁴ Cuayiivi miiⁿ ní n'diichí 'áámá meēⁿ cuéé. Ní 'áámá 'iiⁿyāⁿ vεe yā

vmnaaⁿ meēⁿ miiⁿ ní tandúúcā Jesu-cristo chi duuchi Sáⁿā chi Daiya 'Iiⁿyāⁿ yeⁿe iⁿ'yeeⁿdí 'cūú. Canduu tííⁿ yā 'áámá corona yeⁿe 'dííⁿnguāⁿ ní na ca'á yā ní ndée yā 'áámá hoz chi 'caāiⁿ. ¹⁵ Ní n'diichí táámá ángel can'dáa yā yeⁿe yaācu miiⁿ yeⁿe Ndyuūs ní yuudu caⁿ'a yā ndúúcu 'iiⁿyāⁿ chi vεe yā na meēⁿ miiⁿ. 'Cáácá dí cosecha ndúúcu hoz yeⁿe di ti maaⁿ ní 'āa tiempo yeⁿe chi diíⁿ di cosechar tí cosecha yeⁿe yá'āa miiⁿ 'āa n'daacā.

¹⁶ Nííⁿnuúⁿ nūuⁿ 'iiⁿyāⁿ chi vεe yā na meēⁿ miiⁿ ch'iicá yā cosecha yeⁿe yā chi canéé na yá'āa ní nta'á yā.

¹⁷ Tuuⁿmi ní táámá ángel can'dáa yā yeⁿe yaācu miiⁿ chiiⁿ canéé na va'ai chεeti nguuvi. Ní 'tíicā ntúūⁿ ángel miiⁿ ndée yā 'áámá hoz chi 'caāiⁿ. ¹⁸ Ní táámá ángel chi candéé yā cuidado yeⁿe nguuchi yaⁿā vmnaaⁿ nátaí yeⁿe yaācu miiⁿ can'dáa yā yeⁿe nátaí ní caⁿ'a yuudu yā ángel chi ndeε yā hoz chí 'caāiⁿ. Dii 'caaca di ndúúcu hoz 'caāiⁿ yeⁿe di du-uⁿnē 'lírⁿ yeⁿe yá'á 'lírⁿ miiⁿ ndúúcu n'gui'i chi uvas chi canéé na yá'āa ní cuta'a di uvas miiⁿ ti n'gu'í yeⁿe 'āa n'daacā maaⁿ.

¹⁹ Tuuⁿmi ní ángel miiⁿ ndúúcu hoz 'caāiⁿ yeⁿé yā ch'iica yā duuⁿ'ne 'lírⁿ yeⁿe yá'á chi snéé ndúúcu n'gui'i uvas yeⁿe chi canee vmnaaⁿ yá'á. Ní nta'á yā n'gui'i uvas ní s'néε yā n'gui'i uvas miiⁿ na trapiche naachi cuta'á yā nuūⁿníⁿ uvas miiⁿ chi vino. Ní trujal miiⁿ ní tan'dúúcā castigo chi ch'εete n'dai chi Ndyuūs caⁿ'a yā chí ca'a yā 'iiⁿyāⁿ. ²⁰ Ní trapiche naachi cuta'á yā nuūⁿníⁿ yeⁿe uvas miiⁿ canéé 'áámá lado yeⁿe yáaⁿ miiⁿ. Ní yeⁿe trapiche can'dāa n'deεe n'dái yuūuⁿ chí yaacu. Ní yuūuⁿ miiⁿ tan'dúúcā 'áámá yíicú ch'εete yuūuⁿ chi ngii caadi 'iinū ciento kilómetros yeⁿe. Ní yaacu n'dái indáá ndii na freno yeⁿe 'yúudūu.

Angeles ndúúcu tá ndeēchē yá'āi

15 Cuayivi ní n'diichí táamá señal na va'ai cheeti nguuví chí ch'ēete n'dai ní che"e yiinú ye"ē. Ní véé ndeēchē ángeles ndúúcu ndeēchē chí cuuvi 'nuucá'ai chí 'cuiinu. Ní ndúúcu ndeēchē chí cuuvi 'nuucá'ai chí 'cuiinu, ndúúcu chúu nūu" 'cuiinú tiempo chí Ndyuūs nduuví taá" yā.

²Tuu'mi n'diichí 'áamá nuū'ní"yá"ā chí tan'dúúca vidrio ndísta"á ndúúcu nguūchí yá"ā. Ní 'ii"yā" s'ee" chí ch'ēé yā cu"u yā ndúúcu 'iiti monstruo mii" ndúúcu 'iiti chí santo ye"é tí ndúúcu 'ii"yā" chí canéé chí duuchí tí ní número ye"é tí na cuerpo ye"e yā, 'ii"yā" chí ich'ēé yā ye"e 'ii"yā" s'ee" ch'ēendii yā ní i"nuú" ná nuū'ní"yá"ā chí vidrio mii", ní ndeē yā arpas chí Ndyuūs ca'á yā 'ii"yā" s'ee". ³Ní chiitá yā canto ye"e Moisés, chí sa"ā chí dichí've sa Ndyuūs. Ní ch'itá yā canto ye"e 'ii"yā" chí nguuví 'iiti cuūchí. Ní 'tíicā nduudu chí chiitá yā:

Dii Señor Ndyuūs chí véé tanducué"ē dendu'ú poder ndúúcu di. N'gēete taavi ca dii ní nge"e yiinú yú ye"e tanducué"ē dendu'ú chí dii" di. Dii rey ye"e tanducué"ē nación ní yúúní ye"e di ní cuaacu.

⁴Dí, Señor, ¿du'ú nguéé 'va'á dii? ¿Du'ú nguéé caa"ma" chí dii ní neené ch'ēete dii tí dámaa" dii chí d'eeve di? Ní ndaa 'ii"yā" ye"e tanducué"ē naciones nanáá" dii chí dich'ēeté yā dii caati nducyáacá 'ii"yā" n'diichí yā chí dii" di tanducué"ē dendu'ú chí cuaacu ní n'daacá n'dai.

⁵Ní cuayivi ní n'diichí chí nanguaa" cheendi va'āi ye"e yāacū chí canéé na va'ai cheeti nguuví, ní cheeti yaacū mii", mii" canéé cuarto chí yaānūu naachi canéé tuūu ch'ēeté chí canéé nguū" ley ye"e Moisés. ⁶Ní ye"e yaacū mii" can'dáa ndeēchē ángeles. Ní ndeē yā ndu'u ndeēchē chí n'nuu cá'ai yā. Ní

véé catecai yā ye"e tiinūu" chí nguuví lino chí cuéé ní d'eeve. Ní n'deē chíichí nii"nu" yā ndúúcu cinta ye"e 'díí"nguāa". ⁷Núú"má" cheetí nūu" 'áamá 'ii"yā" naachi na cuuú" yā ní ca'a yā ndu'u ndeēchē ángeles ndeēchē 'cuutií ye"e 'díí"nguāa" ca'áamá ca'áamá yā 'áamá 'cuutií chí ndiituú ye"ē castigo chí neene taa" chí ye"e Ndyuūs chí canduuchi cue"e daā"ma". ⁸Ní yaacū mii" ndiituú 'yaa"mi" chí can'daā ye"e vaadi ch'ēete taavi ca ye"e Ndyuūs ní ye"e poder ye"e yā. Ní mar 'áamá 'ii"yā" cuuví cundaa yā na yaacū mii" ndí taachi ch'ó'oo ndeēchē vaadi ya'ai chí ndéé ndu'u ndeēchē ángeles.

Ndeēchē 'cuutií ye"e vaadi ya'ai

16 Tuu'mi ní ch'iindiveé" 'áamá nduudu neene díftūu chí can'daā ye"e yaacu mii" ní nga"á ngii ndu'u ndeēchē ángeles mii": Ndís'tii ángeles, cue"é ní ní n'daaviyái ní vmnaa" yá"āa ye"ē chí snúū" cheeti 'cuutií ye"e ní chí castigo chí neené díftūu chí Ndyuūs ca'á yā 'ii"yā".

²Ní ángel vmnáá" vmnaa" che"e yā n'daaviyái yā chí snúū" 'cuutií ye"e yā vmnaa" yá"āa ní vmnaa" nducyaca 'ii"yā" chí ndéé yā sello ye"e 'iiti monstruo na cuerpo ye"e yā, 'ii"yā" chí i'téenu yā 'iiti santo ye"é tí. Ní can'dáa n'dúú'ví n'gēete chí neené ya'ai na cuerpo 'ii"yā" s'ee".

³Tuu'mi ní ndii chíf" ndii 'uūví ángel mii" n'daaviyái yā 'cuutií ye"e yā vmnaa" nuū'ní"yá"ā ní nduuví yuuú" tan'dúúca yuuú" ye"ē 'aama tiná"ā. Ní tanducué"ē 'iiti chí sндуuchí cheeti nuū'ní"yá"ā mii" ch'ií tí.

⁴Ní ndii chíf" ndii 'íínú ángel mii" n'daaviyái yā 'cuutií ye"e yā vmnaa" ye"e yíicú ní vmnaa" ye"ē naachi can'daā nuū'ní" mii". Ní nducué"ē nuū'ní" mii" nduuví yuuú". ⁵Ní nii"nuú" nūu" ch'iindiveé" ángel ye"e nuū'ní"

miiⁿ chi ngaⁿa yā: Dii Señor, 'āā canéé dí cuááⁿ vmnaaⁿ, ní canee di maaⁿ. Dii ní cuaacu di ti n'diichi di nuuⁿndi 'iiⁿyāⁿ s'eeⁿ. ⁶Ní 'tíicā diiⁿ di caati 'iiⁿyāⁿ s'eeⁿ ní ch'iiⁿnūⁿ yā 'iiⁿyāⁿ yeⁿe di ndúúcu 'iiⁿyāⁿ chi 'áámá díiⁿ yā ntiⁿnyuⁿ yeⁿe di ndúúcu 'iiⁿyāⁿ chí caⁿa nduudu cuaacu yeⁿe di. Ní maaⁿ ní dii ncaⁿa di yuuúⁿ yeⁿe nuuⁿnīⁿ miiⁿ chí cu'ú yā caati 'tíicā chi n'daacā chí cu'ú yā yuuúⁿ miiⁿ cucáāvā chí diiⁿ yā chí nguéé n'daacā.

⁷Ní ch'iindiveéⁿ nduudu yeⁿe 'áámá yeⁿe nátai chí ngaⁿa ngii Ndyuūs, ní ngaⁿa: Dii, Ndyuūs, chí véé tanducuéⁿe dendu'ú poder ndúúcu di, cuaacu níⁿnyúⁿ n'diichi di nuuⁿndi yeⁿe 'iiⁿyāⁿ. Ní diiⁿ di chí cuaacu ní n'dai taavi.

⁸Ní n'diichí ndíí cuūⁿ ángel miiⁿ n'daaviyái yā 'cuutíí yeⁿe yā vmnaaⁿ yeⁿe 'yáⁿā. Ní ca'á yā poder 'yáⁿā miiⁿ chí 'neeⁿ 'yáⁿā 'iiⁿyāⁿ ndúúcu 'yáⁿā yeⁿe. ⁹Ní nducyaaca 'iiⁿyāⁿ ní chiichi yā ndúúcu 'iiⁿnūⁿ taáⁿ yeⁿe 'yáⁿā miiⁿ. Ní neené taaⁿ ya'ai yeⁿe yā. Ní cunncáā caⁿa yā yeⁿe chí duuchi Ndyuūs chí véé poder yeⁿe yā yeⁿe ndeēchē cá'ai 'cūū. Naati 'iiⁿyāⁿ s'eeⁿ nguéé ndaacadaamí yā yeⁿe nuuⁿndi yeⁿe yā ní nguéé dich'eté yā Ndyuūs.

¹⁰Ní n'diichí ndii nyuⁿu ángel miiⁿ n'daaviyái yā 'cuutíí yeⁿe yā vmnaaⁿ yeⁿe trono yeⁿe 'iiti monstroo miiⁿ ní vmnaaⁿ yeⁿe tanducuéⁿe chí ngaⁿá ti ntiⁿnyuⁿ yeⁿe ní canéé ná 'áámá maāiⁿ. Ní 'iiⁿyāⁿ s'eeⁿ ní cheⁿenée yā chiia yā cáāvā chí ya'ai yā. ¹¹Ní 'iiⁿyāⁿ s'eeⁿ cunncáā caⁿa yā yeⁿe Ndyuūs chí canée yā na va'ai cheeti nguuví cucáāvā chí ya'ai yeⁿe yā ndúúcu n'duu'vi yeⁿe yā. Ní nguéé nandaacadaamí yā yeⁿe nuuⁿndi yeⁿe yā.

¹²Tuu'mi ní ndii chííⁿ ndii niyaaⁿ ángel miiⁿ n'daaviyái yā 'cuutíí yeⁿe yā vmnaaⁿ yíicú ch'etete chí nguuví Eufraates ní nuuⁿnīⁿ yeⁿe yíicú ch'etete miiⁿ ntiⁿ. Ní

n'guaāⁿ 'aama yúúni ní 'iicu 'iiⁿyāⁿ reyes cuuvi cuchii yā cuaaⁿ naachi can'daā 'yáⁿā na yúúni miiⁿ.

¹³Tuu'mi ní n'diichí chí can'daā 'iinū espíritus yeⁿe yááⁿnguiinūⁿ chí tan'dúúca sapo, 'tíicā espíritus. Ní can'daā yeⁿe cheendi 'iiti dragón miiⁿ ní yeⁿe cheendi 'iiti monstroo chí ch'etete taavi cá ti ní yeⁿe cheendi profeta chí ngaⁿa yā chí yeⁿe Ndyuūs 'yā, ní nguéé ngaⁿa yā nduudu cuaacu yeⁿe maáⁿ yā. ¹⁴Espíritus ndúúcu espíritus yeⁿe yááⁿnguiinūⁿ ní díiⁿ yā señas yeⁿe vaadi n'giinu. Ní cueⁿe yā nanááⁿ nducyáácá reyes yeⁿe núúⁿ máⁿ iⁿ'yeeⁿdí 'cūū chí nadaama yā 'iiⁿyāⁿ s'eeⁿ chí cuuvi 'cuuⁿmaⁿ yā nguuví chí ch'etete chí yeⁿe Ndyuūs chí véé nducuéⁿe dendu'u poder yeⁿe yā. ¹⁵Ní Cristo ngaⁿá yā. Cuin'diichí ní. 'Úú ní cuchíí tan'dúúca 'áámá chíduucu. De'ē chúúca n'dai 'iiⁿyāⁿ chí sндуuchí yā ní snúuⁿ yā catecai yā ní nguéé 'cuetinée yā chí chiica yā chí yuucú yā chí 'iiⁿyāⁿ s'eeⁿ inaáⁿ yā ní 'íicú cuuvi 'cuināaⁿ yā. ¹⁶Ní espíritus nduuvídaami yā reyes yeⁿe yáⁿā na 'áámá lugar chí nguuví Armagedón na davaacu hebreo.

¹⁷Tuu'mi ní ndii chííⁿ ndii ndeēchē ángel miiⁿ n'daaviyái yā 'cuutíí yeⁿe yā na 'yúúné. Ní yeⁿe yáacú miiⁿ chí canéé na va'ai cheeti nguuví mííⁿ can'daā 'áámá nduudu neene díítuu lado yeⁿe trono miiⁿ chí ngaⁿá 'túúca: Āā tunééⁿ nducuéⁿe.

¹⁸Tuu'mi ní véé 'cuaí ndúúcu nduudu s'eeⁿ ndúúcu daavi ndúúcu chí diituu n'dái n'nuⁿu yáⁿā. Ní ch'etete ca nguéé ti tan'dúúca chí cunee ndii tiempo chí 'iiⁿyāⁿ canée yā iⁿ'yeeⁿdí 'cūū. ¹⁹Ní yáāⁿ ch'etete chí yáāⁿ Babilonia miiⁿ chí 'iinū taaⁿ ní nducuéⁿe yáāⁿ yeⁿe iⁿ'yeeⁿdí 'cūū ní sndeeve. Ní Ndyuūs nn'gáacú yā yeⁿe yáāⁿ ch'etete chí yáāⁿ Babilonia miiⁿ. Ní ca'á yā 'iiⁿyāⁿ chí canéé na yáāⁿ s'eeⁿ chí cu'ú yā vino yeⁿe yā chí vino yeⁿe

vaadi taaⁿ ye^{'é} Ndyuūs. Ní vino miiⁿ chi ca'á yā ní castigo chi neené díítū. ²⁰Ní tanducue^{'ē} yá^{'ā} islas ndúúcu tanducue^{'ē} yīcū n'gēete ní ndáá inaaaⁿ. ²¹Ní ye^{'e} nanguuvi ní ndēeve n'dee n'dái yuúúⁿ chi neené diituú vmnaaⁿ 'ii^{'yā} ye^{'e} i^{'yee}dī. 'Áámá áámá yuúúⁿ miiⁿ n'gii tan'dúúca 'uūvi ngeecu kilos. Ní 'ii^{'yā} ye^{'e} i^{'yee}dī caa^{'ma} taáⁿ yā ye^{'é} Ndyuūs cáávā ye^{'e} vaadi ya'ai miiⁿ ye^{'e} yuúúⁿ ti castigo ye^{'ē} vaadi ya'ai miiⁿ ní néené díítū.

Nuu^{'ndi} taavi ye^{'e} 'áámá n'daataá chi néené ca^{'a} tá ndúúcu sa^{'ā} s'eeⁿ

17 Tuu'mi ní 'áámá ángel naachi ndēēche yā chi ndēe yā ndu'u ndēēchē 'cuutií ndáa yā nanááⁿ 'úú, ní ca^{'a} yā chii yā 'úú: Dii, Juan cuchí di nduucú ní 'úú ní 'cuu^{'mí} dii castigo chi ch'ēete ca chi cuchii vmnaaⁿ 'áámá ndaataá chi véé cá sa^{'ā} ye^{'ē} ta. N'daataá miiⁿ ní véé yā vmnaaⁿ nuūⁿni^{'yā}'ā s'eeⁿ. ²Sa^{'ā} reyes ye^{'e} i^{'yee}dí 'cūu cue^{'é} yā ndúúcu n'daataá miiⁿ ní n'gēetinēe yā ndúúcu n'daataá miiⁿ. Ní nducyaaca 'ii^{'yā} chi snēe yā na yá^{'ā} cue^{'é} yā ndúúcu n'daataá ó isa^{'ā} chi nguéé ye^{'e} yā tan'dúúca chi cuu'ví yā ndúúcu vino ye^{'e} tá ye^{'ē} chi dinuu^{'ndi} cá yā 'tíca.

³Ní 'úú canéé maáⁿ poder Espíritu N'dai ye^{'é} Ndyuūs ní ángel miiⁿ candēe yā 'úú na yááⁿ cuu^{'má} naachi nguéé ch'ēetinēe 'ii^{'yā}. Ní miiⁿ n'diichí 'áámá n'daataá candúu tá 'áámá monstruo cuá'a tī chi ch'ēete ca. Ní néené n'dēe chi duuchi chi contra ye^{'e} Ndyuūs s'nééⁿ nguūⁿ na cuerpo ye^{'e} 'iiti miiⁿ. Ní véé ndēēche tí^{'n} tī ní véé ndiichi duu^{'nii}'ní^{'n} tī. ⁴Ní n'daataá chi candúu ta monstruo cuá'a tī ní canuuⁿ tá vestido chi morado ndúúcu cuá'a. Ní véé adorno ye^{'ē} tá chi 'díí^{'nguā} ndúúcu tuūu chi néené ya'ai chíí^{'vē} ndúúcu perlas. Ní ndēe tá ná ta'a tá 'aama taza ye^{'e} 'díí^{'nguā} chi diituú ndúúcu dendu'ú chi nguēe n'daacā chi

nuū^{'ndi} vaatii ndúúcu chi dendu'ú ye^{'e} chi cue^{'e} tá ndúúcu sa^{'ā} s'eeⁿ chi nguéé ye^{'e} tá. ⁵Ní canéé nguūⁿ 'áámá chi duuchi ná nchēetē tá chi canúúⁿ n'de'ei chi ne^{'e} caa^{'ma} chi 'túúca. Yááⁿ Babilonia ch'ēete chi chēecuú nducyaaca n'daataá chi ca^{'á} yā ndúúcu sa^{'ā} chi nguéé ye^{'e} yā ndúúcu nducue^{'ē} cosas chí nguéé n'daacā na i^{'yee}dí 'cūu chi diiⁿ 'ii^{'yā} s'eeⁿ. ⁶Ní 'úú chicadiinúúⁿ chi n'daata miiⁿ ní cuu'vi tá caati cu'u ta yuúúⁿ ye^{'e} 'ii^{'yā} chi n'dí yā ti ye^{'e} Ndyuūs ní ye^{'e} 'ii^{'yā} chí nga^{'á} yā nduudu cuaacu ye^{'e} Cristo. Ní taachi n'diichí chuú cue^{'e} yīnú ye^{'ē}. ⁷Tuu'mi ní ángel chi ndēe yā 'úú nga^{'a} yā ngii yā 'úú: ¿De'ē cúuví chí nge^{'e} yīnu dí ye^{'e} chuú? 'Úú ní cuuví dii chi canúúⁿ n'de'ei ye^{'ē} n'daataá miiⁿ ndúúcu ye^{'e} monstruo ch'ēete chi ndēé tī ndaataá miiⁿ, monstruo miiⁿ chi véé ndēēchē tí^{'n} tī ní ndiichi duu^{'nii}'ní^{'n} tī. ⁸Iiti monstruo chi n'diichí di ní 'áámá tī chi ndii tiempo vmnaaⁿ canduuchí tī naati maaⁿ ní 'āā ntéé tī, naati 'iiti miiⁿ cáámá canéé chí can'daá tī na yīivēe ye^{'e} yá^{'ā} vmnááⁿ vmnaaⁿ chi ca^{'á} ti di'cuiinú tī. Ní 'ii^{'yā} chi snēe yā na yá^{'ā} ní nguéé snēé chi duuchí yā na libro ye^{'e} vida cue^{'e} daā^{'ma} ndí taachi Ndyuūs din'dái yā i^{'yee}dī. 'Ii^{'yā} s'eeⁿ ní nge^{'e} yīnú yā taachi n'diichí yā 'iiti miiⁿ chi vmnaaⁿ canduuchí tī naati maaⁿ ní 'āā ntéé tī. 'Āā chíí tī naati nnguaacunēe tī ndaá tī.

⁹Ní ye^{'ē} chúu véé cá chi cuuvi déenu 'ii^{'yā}. Ndu'u ndēēchē tí^{'n} tī ní chííⁿ tan'dúúca chí ndēēchē yīcū ch'ēete naachi n'daataá miiⁿ ní véé yā vmnaaⁿ ye^{'ē}. ¹⁰Ní véé ndēēchē reyes. Nyu^{'u} reyes ní chí yā. Maaⁿ ní 'áámá rey miiⁿ ní nga^{'a} nti^{'nyu} yā ye^{'e} 'ii^{'yā} chi véé maaⁿ. Ní táámá rey ní canéé chi ndaá yā. Ní taachi ndaá rey miiⁿ chi ndu'u chi ndēēchē nguéé 'naaⁿ tiempo canéé yā i^{'yee}dī. ¹¹Ní táámá 'iiti monstruo chi vmnaaⁿ canduuchí tī ní maaⁿ ní 'āā ntéé

tī ti ch'íí tī ní 'iiti miiⁿ chi rey miiⁿ ní nduuvidáámá tī ndúúcu ta ndeēché tī. Ní cuayiivi ní rey miiⁿ caⁿá yā cuuvi ndai yā chi vaadi n'gii yeⁿe ndii 'uūví cuuvi chi inferno.

¹² Ní ndu'u ndiichi duuⁿniiⁿ ní tī chi n'diichi di chííⁿ chí ndu^u ndiichi reyes chi 'āā cuéé cuta'á yā poder yeⁿé yā naachi ngaⁿā ntiⁿnyúⁿ yā. Taachi cuta'á yā poder ní chi cuuvi reyes ndúúcu 'iiti monstroo miiⁿ 'áámá hora nūuⁿ. ¹³ Ní reyes s'eeⁿ ní dáámá nūuⁿ vaanicadínūuⁿ yeⁿé yā. Ní ca'a yā poder yeⁿé yā ndúúcu fuerzas yeⁿe yā na ta'a 'iiti monstroo miiⁿ. ¹⁴ Ní reyes ní 'cuuⁿmaⁿ yā ndúúcu 'iiⁿyāⁿ chí nguuvi 'iiti cuūchí naati 'iiⁿyāⁿ miiⁿ chí nguuvi 'iiti cuūchí cuchée yā yeⁿe reyes. Ní Señor ch'ēete ca ní 'iivi nducyaaca 'iiⁿyāⁿ señores ní rey ch'ēete ca yeⁿé nducyaaca reyes. Ní 'iiⁿyāⁿ s'eeⁿ chí canée yā ndúúcu 'iiⁿyāⁿ miiⁿ ní Ndyuūs yaa'ví yā 'iiⁿyāⁿ s'eeⁿ chí cuuvi yeⁿé yā. Ní Ndyuūs ndeēvé yā 'iiⁿyāⁿ s'eeⁿ chí yeⁿé yā. Ní 'iiⁿyāⁿ s'eeⁿ ní 'aama canee yā ndúúcu chí i'téenu yā Ndyuūs.

¹⁵ Ní ángel miiⁿ caⁿa yā chii yā 'úú: Nuūⁿníⁿyáⁿā s'eeⁿ chí n'diichi di naachi véé n'daataá chí caⁿa tá ndúúcu saⁿa s'eeⁿ, nuūⁿníⁿyáⁿā s'eeⁿ ní chííⁿ chí yāāⁿ s'eeⁿ ndúúcu n'dee n'dái 'iiⁿyāⁿ ndúúcu 'iiⁿyāⁿ chí ngaⁿa n'dee n'dái davaacu chí n'dááⁿ ndúúcu naciones. ¹⁶ Ní ndu'u ndiichí duuⁿniiⁿ ní tī chí véé yeⁿe monstroo miiⁿ, nguéé neⁿe n'daataa mífⁿ. Ní cuta'a tī nducuéⁿe yeⁿe n'daataa miiⁿ. Ní diví tī catecai n'daataa miiⁿ ní s'neeⁿ táⁿā chí yuucúú tá. Ní che'é tī yuūtē yeⁿe tá. Ní 'neeⁿ yaⁿā n'daataa miiⁿ ndúúcu nguuchi yaⁿā. ¹⁷ Caati Ndyuūs s'neeⁿ yā na staava yeⁿe reyes chí dííⁿ yā 'túúca tan'dúúca chí Ndyuūs neⁿé yā chí dííⁿ yā. Ní ndiichi duuⁿniiⁿ ní tī nduuvidaamí tī ní ca'á tī poder yeⁿé tī na ta'a 'iiti monstroo miiⁿ chí caaⁿmaⁿ ntiⁿnyúⁿ tī. Ní 'túúca dííⁿ tī chí cuuví cuaacu nduudu chí ngaⁿa Ndyuūs. ¹⁸ Ní n'daataá chí n'diichi

di chííⁿ chí yāāⁿ ch'ēete chí caaⁿmaⁿ ntiⁿnyuⁿ yeⁿe nducyaaca reyes chí snée yā ná iⁿyeēⁿdí.

Yáāⁿ Babilonia ntuūvii

18 Ní cuayiivi miiⁿ ní n'diichí táámá ángel chí ngiicá yā yeⁿe na va'ai cheeti nguuvi ní véé poder ch'ēete yeⁿé yā. Ní yáⁿā miiⁿ canée deēve ndúúcu deēve yeⁿe ángel miiⁿ. ² Ní 'cai yiicú yā ní caⁿa yā: Yáāⁿ chí ch'ēete nituūvii, yáāⁿ Babilonia chí ch'ēete ní ntuūvii. Ní maaⁿ ní ch'ēetinee espíritus yeⁿe yááⁿ n'giinūuⁿ ndúúcu espíritus chí nguéé n'daacā. Ní n'dee n'dái 'yaada chí vaatí snée tī yáāⁿ miiⁿ, 'yaada chí ní nguéé 'iinée yiinú yā 'iiti. ³ Caati n'daataa miiⁿ chí yáāⁿ Babilonia miiⁿ ní ca'a tá vino chí vaadi taaⁿ yeⁿe tá nducyaaca 'iiⁿyāⁿ ní cu'ú yā vino miiⁿ chííⁿ chí yeⁿe chí dinuuⁿndí tá. Ní reyes yeⁿe iⁿyeēⁿdí 'cūú cueⁿé yā na yáāⁿ miiⁿ ní dinuuⁿndí yā. Ní 'iiⁿyāⁿ yeⁿe iⁿyeēⁿdí 'cūú dííⁿ yā negocios chí 'cuiica yā cucáávā poder yeⁿe vaadi 'cuiica yeⁿe tá.

⁴ Tuuⁿmi ní ch'iindiveéⁿ táámá nduudu yeⁿe va'ai cheeti nguuvi chí ngaⁿa 'túúca: Ndís'tií, 'iiⁿyāⁿ yeⁿé, nan'daa ní yeⁿe yáāⁿ miiⁿ caati nguéé dííⁿ ní nuuⁿndí ndúúcu tá. Ní nguéé cuta'á ní yeⁿe vaadi yá'ái yeⁿe tá. ⁵ Tí núúⁿndí yeⁿe tá n'dee n'dái chí ndaā ndii na va'ai cheeti nguuvi. Ní Ndyuūs nin'gaacu yā yeⁿe chí dííⁿ tá chí nguéé n'daacā. ⁶ Ní ndís'tií dííⁿ ní ndúúcu tá tan'dúúca chí dííⁿ tá nduucú ní. Ní ca'á ní táⁿā miiⁿ 'uūví vueltas yeⁿe chí tee tá ndís'tií. Ní didiitú ní ndúúcu vino yeⁿe taza yeⁿe tá ndúúcu vino chí 'uūví veces ditiinúú yeⁿe chí tee tá ndís'tií. ⁷ Ní dííⁿ ní chí 'cuenu taavi tá cuuvi ní cuuvi yá'ai yeⁿe tá n'dee cá tan'dúúca chí maaⁿ tá dich'ēete maaⁿ ta táⁿā ndúúcu chí véé cá chí sta'a tá cáávā maaⁿ tá. Ní 'túúca nacadiinuuⁿ tá maaⁿ tá na staava yeⁿe tá. 'Muuⁿ canee ní 'úú véé tan'dúúca 'aama reina véé yā. Nguéé

n'daata nguá'āa 'úú. Ní nguεε 'cueenú cuuvi. ⁸ Ní yáāⁿ Babilonia, cáāvā chi diiⁿ tá 'túúccā, n'deeε n'dái vaadi yá'āi ní ndaā vmnaaⁿ yeⁿe tá na 'áámá nguuvi nūⁿ, chííⁿ chi cuuvi yá'ai yeⁿe 'iiⁿyāⁿ s'eeⁿ. Ní 'cuūvi yā ní cheεcu yā chi ya'ai yā. Ní cuiicu yā ní cuūcu 'iiⁿyāⁿ s'eeⁿ ndúúccū nguuchi yá'āi ti Señor Ndyuūs miiⁿ ní véé poder yeⁿe yā chi ch'εete taavi ca ní ngaⁿá yā chi condenado yā.

⁹ Ní reyes yeⁿe yáāⁿ 'cūú chi cueⁿé yā ndúúcu tá ní dinuuⁿndí yā ndúúcu tá, ní n'deeε n'dái véé yeⁿe yā ti dííⁿ yā tan'dúúccā chi diiⁿ tá. Reyes miiⁿ cuéécú yā ní yuudu n'dái cuεécú yā taachi snaaⁿ yā tá'ā miiⁿ chi cuūcu tá ní snaaⁿ yā 'yaaⁿmiⁿ yeⁿe tá. ¹⁰ Ní 'va'á yā yeⁿe tá cáāvā castigo yeⁿe tá ní cuééndii yā ya'ai yeⁿe tá ní caaⁿmáⁿ yā: De'e chúúccā ya'ai díí, de'e chúúca ya'ai díí n'daataá chi yáāⁿ Babilonia chi ch'εete chi véé poder ch'εete yeⁿe, ti cheeti 'áámá miníⁿyúⁿ nūⁿ ndaā castigo yeⁿe di.

¹¹ Ní 'iiⁿyāⁿ chi dííⁿ yā negocio na iⁿ'yeeⁿdí 'cūú cuεécú yā ní yuudu n'dái cuεécú yā cáāvā yáāⁿ Babilonia miiⁿ. Ní ya'ai yā cáāvā yáāⁿ miiⁿ ti nguéé véé mar 'áámá 'iiⁿyāⁿ chi cuuvi cuái yā yeⁿe mercancia chi ndee yā. ¹² Mar 'áámá 'iiⁿyāⁿ nguéé cuái yā yeⁿe chi ndee yā chi 'dííⁿnguāⁿ ndúúccū 'dííⁿnguεε, ndúúccū tuūu chi ya'ai chíí'vε, ndúúccū perlas ndúúccū tiinūⁿ n'dai ca chi nguuvi lino, ndúúccū tiinūⁿ seda, ndúúccū tiinūⁿ n'dai ca chi cuá'ā ndúúccū tíinūⁿ n'dai ca chi morado, ndúúccū tanducuéⁿē clase yeⁿe yá'á chi yuūdū ngééⁿ, ndúúccū cosas yeⁿe marfil, ndúúccū nducuéⁿē cosas yeⁿe yá'á chi ya'ai chíí'vε ndúúccū cūú cuááⁿ, ndúúccū cūú, ndúúccū tuūu mármol, ¹³ ndúúccū canela, ndúúccū especias chi yuudu ngééⁿ, ndúúccū cúⁿúyaa, ndúúccū unguento chi nguuvi mirra ndúúccū perfumes chi dεεve ngééⁿ, ndúúccū vino, ndúúccū aceite, ndúúccū harina fino,

ndúúccū trigo. Ní ndéε yā ntúūⁿ 'iiti s'eeⁿ yeⁿe carga ndúúccū 'iiti cuūchí s'eeⁿ, ndúúccū 'yuūdūu s'eeⁿ, ndúúccū carros, ndúúccū 'iiⁿyāⁿ chi esclavos. ¹⁴ Ní 'iiⁿyāⁿ s'eeⁿ chi dííⁿ yā negocios miiⁿ ngaⁿá yā yeⁿe yáāⁿ ch'εete miiⁿ: Tanducuéⁿē cosas yeⁿe chi nguéé n'daacā n'dai chi neⁿe 'iiⁿyāⁿ yeⁿe yáāⁿ 'āā ntéé véé. Ní nducuéⁿē chi vaadi 'cuiica ndúúccū cosas chi n'dai taavi yeⁿe yáāⁿ miiⁿ 'āā ntéé véé. Ní 'āā ntéé cuuvi ndaāca yā tanducuéⁿē dendu'u yeⁿe.

¹⁵ Ní 'iiⁿyāⁿ chi dííⁿ yā negocios ndúúccū 'iiⁿyāⁿ yeⁿe yáāⁿ ch'εete miiⁿ, chííⁿ chi diiⁿ chi 'cuiicá yā. 'iiⁿyāⁿ s'eeⁿ cuεetindíí ya'ái yā ti 'va'a yā yeⁿe castigo yeⁿe yáāⁿ miiⁿ. Ní cuεécú yā ní yuudu n'dai 'cuai yā. ¹⁶ Ní ngaⁿa yā: De'e chúúccā ya'ai yeⁿe yáāⁿ Babilonia ch'εete ti tan'dúúccā 'áámá n'daataá chi véé vestido yeⁿe tiinūⁿ lino chi ya'ai chíí'vε ndúúccū tíinūⁿ chi cuá'ā ndúúccū morado. Ní véé adorno yeⁿe tá chi 'dííⁿnguāⁿ ndúúccū tuūu chi ya'ai chíí'vε ndúúccū perlas. ¹⁷ Ní cheeti 'áámá hora nūⁿ tanducuéⁿē vaadi 'cuiica yeⁿe yáāⁿ miiⁿ ní ch'iinu. Ní nducyaaca 'iiⁿyāⁿ capitanes chi ngaⁿa ntiiⁿnyuⁿ yeⁿe barcos ti dííⁿ yā negocios cucáāvā barcos yeⁿe yā ní ndúúccū nducyaaca 'iiⁿyāⁿ chi caⁿá yā na barcos, ndúúccū nducyaaca 'iiⁿyāⁿ chi dííⁿ yā ntiiⁿnyuⁿ yeⁿe barcos, nducyaaca 'iiⁿyāⁿ miiⁿ ní cheetindii ya'ai yā. ¹⁸ Ní taachi n'diichí yā 'yaaⁿmiⁿ yeⁿe nguuchi ya'ā yeⁿe yáāⁿ miiⁿ 'cai yiicú yā: ¿Cheε táámá yáāⁿ tan'dúúccā yáāⁿ 'cūú?

¹⁹ Ní 'iiⁿyāⁿ s'eeⁿ ní s'neéⁿ yā iyaācá vmnaaⁿ tííⁿ yā ní cheεcú yā. Ní yuudu n'dai cheεcú yā. Ní 'cai yā: De'ε chúúccā ya'ai, de'ε chúúccā ya'ai yeⁿe yáāⁿ ch'εete miiⁿ. Ní nducyaaca 'iiⁿyāⁿ chi véé barco yeⁿe yā vmnaaⁿ nuūⁿníⁿyáⁿá ní 'cuiíca yā cáāvā vaadi 'cuiica yeⁿe yáāⁿ miiⁿ, cheeti 'áámá hora nūⁿ ch'iinu yáāⁿ ch'εete miiⁿ ndúúccū chi véé yeⁿe.

²⁰Naati ndís'tiī chi canéé na va'ai cheeti nguuvi ndúúcū ndís'tiī chí apóstoles, ndúúcū ndís'tiī chi ngaⁿa nduudu yeⁿé Ndyuūs ní ndúúcū nducyaaca 'iiⁿyāⁿ chi yeⁿé Ndyuūs, nducyáácá nī yeenú nī yeⁿe yáāⁿ miiⁿ ti Ndyuūs caⁿa yā chi condenado yáāⁿ miiⁿ. Ní Ndyuūs díⁿ yā justicia yeⁿe ndís'tiī.

²¹Tuu'mi ní ángel chi neené ditiinú yā sta'á yā 'áámá tuūu ch'ēete chi tan'dúúcā 'áámá tuūu ch'ēete yeⁿe molino. Ní canuúⁿ yā tuūu miiⁿ na nuūⁿnīⁿyāⁿá ní ngaⁿá yā. 'Tíicā: Ní diitu dituuví yā yáāⁿ Babilonia chi yáāⁿ ch'ēete miiⁿ ní 'āā ntéé cuuvi n'diichí yā yáāⁿ miiⁿ. ²²Ní 'āā ntéé n'giindiveeⁿ yā na yúúní yeⁿe yáāⁿ miiⁿ música yeⁿe 'iiⁿyāⁿ chi dí'cuēecú yā arpas, ndúúcū música yeⁿe 'iiⁿyāⁿ músicos, ndúúcū música yeⁿe 'iiⁿyāⁿ chi i'tiiví yā flautas, ndúúcū 'iiⁿyāⁿ chi dí'cuēecú yā trompetas. Ní nguéé véé 'iiⁿyāⁿ chi idiiⁿ ntiiⁿnyuⁿ na yáāⁿ miiⁿ. Ní nguéé n'giindiveeⁿ yā chi 'cuēecu tuūu yeⁿe molino na yáāⁿ miiⁿ. ²³'Āā ntéé n'diichí yā chideeve yeⁿe lámparas yeⁿe yáāⁿ miiⁿ. 'Āā ntéé n'giindiveeⁿ yā ruido yeⁿe 'viicú chi diiⁿ 'iiⁿyāⁿ chi n'giindivaacú yā. 'Áárá chi 'iiⁿyāⁿ yeⁿe yáāⁿ miiⁿ ní díⁿ yā negocios ní ch'ēete n'dai ca poder yeⁿé yā nguéé ti tanáⁿa yā yeⁿe iⁿyeeⁿdí 'cūū, ní 'iiⁿyāⁿ yeⁿe yáāⁿ miiⁿ ní chinnche'éf yā 'iiⁿyāⁿ yeⁿe tanáⁿā naciones ndúúcū dendu'ū yeⁿe vaadi ngaatu chi díⁿ yā.

²⁴Ní na yáāⁿ ch'ēete miiⁿ 'iiⁿyāⁿ ndaāca yā yuūuⁿ yeⁿé 'iiⁿyāⁿ chi ngaⁿá yā nduudu cuaacu yeⁿé Ndyuūs ndúúcū yuūuⁿ yeⁿé 'iiⁿyāⁿ chí yeⁿé Ndyuūs ndúúcū yuūuⁿ yeⁿe nducyáácá 'iiⁿyāⁿ yeⁿe iⁿyeeⁿdí 'cūū chi ch'ii yā.

19 Cuayiivi miiⁿ ní ch'iindiveeⁿ 'áámá nduudu chi ch'ēete n'dai yeⁿe na va'ai cheeti nguuvi chi yeⁿe neéené 'yaaⁿ n'dai 'iiⁿyāⁿ. Ní ngaⁿa yā: Aleluya. Dich'ēete yú Ndyuūs ti nadanguáⁿai yā s'uuúⁿ. Ní vaadi deeve n'gii

ndúúcū tanducuéⁿē poder ní yeⁿe Ndyuūs yeⁿe yú.

²Caati Ndyuūs n'diichí yā nuuⁿndi yeⁿe 'iiⁿyāⁿ ndúúcū nduudu cuaacu chí n'dai. Ngaⁿá yā chí n'daataá chí cueⁿe tá ndúúcū saⁿā s'eeⁿ ní condenado tá ti n'daataa míⁿ ní diiⁿ tá chí 'iiⁿyāⁿ yeⁿe yáⁿā 'cūū ní dinuuⁿndi yā cáāvā chí neéené dinuuⁿndi tá. Ndyuūs ca'a yā castigo táⁿā miiⁿ caati ngéé tá yuūuⁿ yeⁿe 'iiⁿyāⁿ chí dichíⁿve yā Cristo taachi ch'iiⁿnuⁿ tá 'iiⁿyāⁿ s'eeⁿ.

³Ní n'dee n'dái 'iiⁿyāⁿ ngaⁿa ntúuⁿ yā: Aleluya. Dich'ēete yú Ndyuūs. 'Yaaⁿmiⁿ yeⁿe n'daataá miiⁿ chí cuucu yaⁿā táⁿā 'áámá chee 'yaaⁿmiⁿ yeⁿe tá chí castigo yeⁿe tá cueⁿe daāⁿmaⁿ.

⁴Ní ndu'u ndiicú cuūuⁿ 'iiⁿntyéⁿē ndúúcū ndu'u cuūuⁿ 'iiⁿyāⁿ ch'eēndiitín'dii yā nanááⁿ Ndyuūs chí véé yā na trono yeⁿé yā ní nducyaaca yā ndúúcū naáⁿ yā na yáⁿā chí'téenu yā Ndyuūs ní caⁿa yā 'tíicā: Aleluya. Dích'ēete yú Ndyuūs.

⁵Ní ch'iindiveeⁿ 'áámá nduudu yeⁿe trono miiⁿ chí ngaⁿa 'tíicā: Nducyáácá nī canéé chí dich'ēeté nī Ndyuūs yeⁿe yú. Nds'tiī chí ngaⁿa ntiiⁿnyúⁿ nī ndúúcū tanáⁿa nī, nducyaaca nī chí dichíⁿve nī Ndyuūs ní 'va'á nī yeⁿe yā.

'Viicu yeⁿē chí ch'iindivaacú 'iiⁿyāⁿ chí nguuvi 'iiti cuūchi

⁶Ní táámá vmnéⁿēe ch'iindiveeⁿ 'áámá nduudu yeⁿē n'dee n'dái 'iiⁿyāⁿ tan'dúúcā chí n'gēecú naachí 'yaaⁿ n'dái nuūⁿnīⁿ ní tan'dúúcā chí n'gēecu diituu n'dái daavi. Ní ngaⁿa yā:

Aleluya. Dich'ēete yú Ndyuūs ti Señor yeⁿe yú, Ndyuūs yeⁿe yú chí véé tanducuéⁿē dendu'ū poder nduucú yā 'āā ngaⁿa ntiiⁿnyúⁿ yā yeⁿe tanducuéⁿē dendu'ū.

⁷Maaⁿ ní yeenu taavi yú ní véé vaadí yeenú nanáaⁿ yú ní caⁿa yú chi ch'εete taavi ca Ndyuūs ti ndaā tiempo chi 'iiⁿyāⁿ chi nguuvi 'iiti cuūchī ní 'caandavaacú yā. Ní n'daataá yeⁿe yā 'āā véé yaaⁿ tá. N'daataá miiⁿ ní nducyaaca 'iiⁿyāⁿ chi it'éénu yā Cristo.

⁸Ní ca'á yā n'daataa yeⁿe yā 'áámá vestido chi yeⁿe lino chi yaⁿai chí'vē chi dēve ní cuéē.

Ní tiinūⁿ lino miiⁿ ní chí'f chi vida chi n'dai taavi yeⁿe 'iiⁿyāⁿ chi yeⁿe Ndyuūs.

⁹Tuu'mi ní ángel chi candée yā 'úú caⁿa yā chíi yā 'úú. Díi, Juan, dingúuⁿ di 'tíicā: Dē'ε chúucā n'dai cáāvā 'iiⁿyāⁿ s'eeⁿ chi 'áámá 'caí yā 'iiⁿyāⁿ s'eeⁿ chi cuchíi yā naachi 'iiⁿyāⁿ chi nguuvi 'iiti cuūchī 'caandavaacú yā ní 'iiⁿyāⁿ s'eeⁿ che'e nguiniú yā yeⁿe 'viicu miiⁿ. Ní ángel miiⁿ caⁿa yā chíi yā 'úú: Nduudú 'cūū ní yeⁿe Ndyuūs ní cuaacu.

¹⁰Ní 'úú chiinti'yá na ca'a ángel miiⁿ chi dich'εetē ángel miiⁿ. Ní caⁿa yā: Nguéé 'tíicā diiⁿ di. 'Úú ntūūⁿ dichii'vé Ndyuūs tan'dúucā díi ndúucū hermanos yeⁿe di dichí'vē ní Ndyuūs ní ngaⁿa ní nduudu cuaacu yeⁿe Jesucristo. Dii, cu'téenu di Ndyuūs. Ní 'iiⁿyāⁿ chi ngaⁿa yā nduudu cuaacu yeⁿe Cristo ní ngaⁿá yā cáāvā chi Ndyuūs chí'i'í yā 'iiⁿyāⁿ s'eeⁿ chíiⁿ chi ngaⁿá yā.

Yeⁿe 'áámá 'iiⁿyāⁿ chi canduú yā 'yuūdūu cuéē

¹¹Tuu'mi ní n'diichí chi canda'āi va'ai cheeti nguuvi ní can'dāā 'áámá 'yuūdūu cuéē. Ní Cristo chi canduú yā 'yuūdūu miiⁿ chi duuchí yā ní 'Áámá N'daacā N'dai yā ní Cuaacú yā. Ní 'iiⁿyāⁿ miiⁿ ní díiⁿ yā tanducuéⁿe chi cuaacu taachi díiⁿ yā caandaá ní n'diichí yā nuuⁿndi yeⁿe 'iiⁿyāⁿ s'eeⁿ. ¹²Ní nduutinaáⁿ yā miiⁿ ní tan'dúucā nguuchi yaⁿā, 'tíicā nduuti-naáⁿ yā. Ní canéé n'deeé n'dái coronas na tíiⁿ yā. Ní canéé nguūⁿ 'áámá chi duuchi

yā chi mar 'áámá 'iiⁿyāⁿ nguéé n'diichí yā. Dámaaⁿ 'iiⁿyāⁿ miiⁿ deenú yā de'ē chi duuchí yā. ¹³Ní catecaí yā chi canuuⁿ yā ndiituuⁿ yúuúⁿ. Ní chi duuchí yā ní Nduudu yeⁿe Ndyuūs. ¹⁴Ní cuaaⁿ daami yā ní n'dáa n'deeé n'dái soldados yeⁿe va'ai cheeti nguuvi ndúucū catecaí yā chi lino chí yaⁿai chí'f'vē chi cuéē ní dēve. Ní soldado candúu ntúuⁿ yā 'yuūdūu cuéē yeⁿe yā. ¹⁵Ní na cheendí Cristo can'dāā 'áámá machete nduu 'uūvi lados 'caāiⁿ. Ní ndúucū chuū n'nuū cá'ai yā 'iiⁿyāⁿ yeⁿe naciones. Tuu'mi ní caaⁿmaⁿ nti-iⁿnyúⁿ yā diituuⁿ yeⁿe naciones ndúucū 'áámá nduucu cūū. Ní ngii ca'a yā lugar chí 'iiⁿyāⁿ s'eeⁿ sta'á yā vino chí nuūⁿnīⁿ yeⁿe n'gui'i uvas chí 'iiⁿyāⁿ dinde'éi yā ndúucū ca'á yā. Ní Cristo ca'a yā 'iiⁿyāⁿ s'eeⁿ chí cu'u yā vino miiⁿ chí castigo yeⁿe vaadi taaⁿ yeⁿe Ndyuūs chí véé tanducuéⁿe poder chí véé ní yeⁿe yā. ¹⁶Ní canéé nguūⁿ na vestido yeⁿe yā ní na 'diiⁿmá yā chí duuchí 'cūū: Rey ch'εete yeⁿe nducuéⁿe reyes chí véé, Señor 'iivi yā ch'εete yeⁿe nducyaaca señores 'iivi chí véé.

¹⁷Ní cuayiviⁿ nūuⁿ n'diichí 'aama ángel cheendii yā vmaaaⁿ 'yáⁿā. Ní ángel miiⁿ yuudu n'dái n'gai yā ní caⁿa yā chíi yā nducyaaca 'iiti chí ngaá ti nángu-uvi: Ndís'tii 'iiti s'eeⁿ cuchíi ní ní nduuvidaamá ní chí cheⁿe nguiniú ní chí yeⁿe 'viicu yeⁿe Ndyuūs chí ch'εete. ¹⁸Cuchíi ní ní cheⁿe ní yuute yeⁿe reyes ndúucū yuute yeⁿe capitanes ndúucū yuute yeⁿe saⁿā chí véé ca fuerzas yeⁿe yā ndúucū yuute yeⁿe 'yuūdūu ní yeⁿe nducyaaca 'iiⁿyāⁿ chí sндуú yā 'yuūdūu ndúucū yutē yeⁿe nducyáácá 'iiⁿyāⁿ, 'iiⁿyāⁿ chí libre yā ní 'iiⁿyāⁿ chí esclavo yā, 'iiⁿyāⁿ chí ngaⁿa ntiⁿnyuⁿ ndúucū tanáⁿā 'iiⁿyāⁿ.

¹⁹Tuu'mi ní n'diichí 'iiti monstruo chí ch'εete ca ndúucū reyes yeⁿe iⁿ'yeeⁿdí 'cūū ndúucū soldados yeⁿe yā chí nduuvidaamá yā ndúucū 'iiti miiⁿ chí díiⁿ yā caandaá ndúucū 'iiⁿyāⁿ chí canduú

yā 'yuūdūu cuéē miiⁿ ndúúcu soldados yeⁿé yā. ²⁰Ní 'iiⁿyāⁿ miiⁿ chi canduú yā 'yuūdūu cuéē miiⁿ sta'á yā monstroo miiⁿ chi 'iiti preso tī. 'Tiicá ntúuⁿ sta'á yā chi preso sa 'áámá saⁿā chi ngaⁿa sa chi profeta sa, ní nguéé profeta sa. Naati saⁿā miiⁿ diiⁿ sa señas ndúúcu vaadi n'gínūu ní chinnche'éi yā 'iiⁿyāⁿ chi canéé ndúúcu sello yeⁿé tī na cuerpo yeⁿé yā. Ní 'itéenu yā 'iiti santo yeⁿé tī. Níúcu nduu 'uuví sa chi preso sa, 'iiⁿyāⁿ miiⁿ sta'á yā nduu 'uuví sa neⁿe chi canduuchi sa ní chin'dáá nuúⁿ yā nduu 'uuví sa na nuúⁿní'yáⁿā yeⁿe ngiichi yaⁿā chi ngiichi ndúúcu tuúu chi azufre. ²¹'Áámá yā ndúúcu machete 'uuvi lados 'caāiⁿ chi canéé na cheendí yā chi canduú yā na 'yuūdūu cuéē ch'iiⁿnúⁿ yā tanáⁿā soldados yeⁿe 'iiti monstroo. Ní nducyaaca 'yáádá che'é tī nducuéⁿē yuútē yeⁿe soldados ní chiitu 'yáádá s'éeⁿ yeⁿe yúútē yeⁿe yā.

Yeⁿe mil nduūyū

20 Cuayiivi ní n'diichí 'áámá ángel chi cuch'éeⁿ yā yeⁿe va'ai cheeti nguuví ní ndéé yā na ta'a yā llave yeⁿe yiive yáⁿāa ndúúcu 'áámá cadena ch'eeⁿ ca. ²Ní ángel miiⁿ sta'á yā 'iiti dragón chi cúu miiⁿ chi canéé tī ndii tiempo chi ch'ó'oo chi nguuví diablo o yááⁿ'nguiinūuⁿ chi Satanás. Ní ángel miiⁿ dichiiichí yā 'iiti dragón miiⁿ ndúúcu cadena ch'eeⁿ ca. Ní canéé tī 'tíicá cheeti 'áámá mil nduūyū. ³Ní ángel miiⁿ chin'dáá nuúⁿ yā 'iiti dragón miiⁿ na yiive yáⁿāa naachi canee chiichí tī. Ní nan'gaadí yā cheendi va'ai yeⁿē. Ní s'neéⁿ yā 'áámá sello vmnaaⁿ cheendi va'ai miiⁿ. Ní 'iiti dragón miiⁿ 'āā ntéé cuuvi canche'éi tī 'iiⁿyāⁿ yeⁿe naciones ndíí 'cuiinu 'áámá mil nduūyū. Ní cuayiivi ní canéé chi n'daatíí yā 'iiti dragón miiⁿ 'áámá tiempo 'lííⁿ nūuⁿ.

⁴Ní cuayiivi ní n'diichí tronos ní 'iiⁿyāⁿ véé yā na tronos. Ní 'áámá 'iiⁿyāⁿ

ca'á yā poder 'iiⁿyāⁿ s'eeⁿ chi dííⁿ yā juzgar 'iiⁿyāⁿ. Ní n'diichí almas yeⁿe 'iiⁿyāⁿ ndiitaá daandu yā tī caⁿa cuaacu yā yeⁿe Jesucristo. Ní caⁿa ntúuⁿ yā nduudu cuaacu yeⁿé Ndyuūs. 'Iiⁿyāⁿ s'eeⁿ nguéé ch'i'téenu yā 'iiti monstroo miiⁿ, ní nguéé ch'i'téenu yā 'iiti santo yeⁿé tī. Ndíí nguéé ndúú ca'a yā lugar 'iiti monstroo miiⁿ chi s'neéⁿ tī sello yeⁿé tī ncheetē yā o ta'á yā. Ní 'iiⁿyāⁿ s'eeⁿ ch'etinduuchi ntuuⁿ yā ní ngaⁿa ntiⁿ'nyúⁿ yā dáámá ndúúcu Cristo cheeti 'áámá mil nduūyū. ⁵Chuū miiⁿ ní vmnááⁿ vmnaaⁿ chi 'iiⁿyāⁿ s'eeⁿ nanduuchi ntuuⁿ yā naati tanáⁿā 'iiⁿyāⁿ chi n'díí yā nguéé nduuchi ntúuⁿ yā ndíí chi ch'ó'oo 'áámá mil nduūyū miiⁿ. ⁶De'e chúucā yeenú 'iiⁿyāⁿ chí yeⁿé Ndyuūs, 'iiⁿyāⁿ chi vmnááⁿ vmnaaⁿ caⁿá yā ch'etinduuchi ntuuⁿ yā yeⁿē nguaaⁿ tináⁿā. Maaⁿ ní ndii chííⁿ ndii 'úúví cuuvi 'cuūvi 'iiⁿyāⁿ nguéé véé poder yeⁿe chi tuneⁿ 'iiⁿyāⁿ s'eeⁿ chi 'cuūvi yā. Ní 'iiⁿyāⁿ s'eeⁿ ní cuuvi chiiduú s'eeⁿ yeⁿe Ndyuūs ní yeⁿe Cristo ní caaⁿ'maⁿ ntiⁿ'nyúⁿ yā dáámá ndúúcu Cristo cheeti 'áámá mil nduūyū.

⁷Ní taachi ch'iinu 'áámá mil nduūyū miiⁿ n'daatíí yā yááⁿ'nguiinūuⁿ chí ndíchiichi sa ní cuchee sá yeⁿe yiivéé chi vácuū naachi canéé sa. ⁸Ní caⁿa sa chiica sa chi canche'ei sa 'iiⁿyāⁿ yeⁿe naciones yeⁿe núúⁿmáⁿ íⁿ'yeeⁿdí chí 'iiⁿyāⁿ s'eeⁿ caⁿá yā lado yeⁿē sa. Ní canche'ei sa rey Gog ndúúcu yááⁿ Magog chí yááⁿ yeⁿe yā. Ní nadidáámá sá nducyaaca 'iiⁿyāⁿ chí diiⁿ sa caandaá. Ní 'iiⁿyāⁿ s'eeⁿ ndúúcu sa ní n'deeⁿ n'dái yā tan'dúucā yaⁿā ndúútii yeⁿē yíicú. ⁹Ní 'iiⁿyāⁿ s'eeⁿ cueⁿé yā nuuⁿ'maⁿ íⁿ'yeeⁿdí ní cuaaⁿ diituu ní nuuⁿ'maⁿ ndiivi yeⁿe campamento yeⁿe 'iiⁿyāⁿ chí yeⁿé Ndyuūs ní yeⁿe yááⁿ Jerusalén chí Ndyuūs neené neⁿe. Ní Ndyuūs dicho'ó yā chí chingéé nguuchi yaⁿā yeⁿē na va'ai cheeti nguuví. Ní 'iiⁿyāⁿ s'eeⁿ ngiichi ndúúcu nguuchi yaⁿā miiⁿ

ní di'cuiinú yā. ¹⁰ Ní yáá'n'guiinūuⁿ miiⁿ chi diablo chi chinnche'ei sá 'iiⁿyāⁿ, 'áámá yā chin'dáánuúⁿ yā saⁿ'a miiⁿ ndii nuūⁿniⁿyáⁿ'ā chi ngiichi ndúúcuⁿ tuūu azufre naachi 'āā chin'dáánuúⁿ yā 'iiti monstuo miiⁿ ndúúcuⁿ profeta chi nguéé caⁿ'a yā nduudu cuaacu. Ní 'cuenú yā cuuvi na lugar miiⁿ ndii nguuví ndíí n'gaaⁿ. Ní cueⁿ'e daāⁿmaⁿ ní 'cuenú yā cuuvi.

Cristo n'diichí yā nuuⁿndi yeⁿ'e 'iiⁿyāⁿ taachi ch'iindí yā na trono cuéé yeⁿ'e yā

¹¹ Cuayiivi ní n'diichí 'áámá trono chi ch'ete ní cuéé ní 'áámá 'iiⁿyāⁿ véé yā na trono miiⁿ. Ní na yāⁿ'āa ndúúcuⁿ nanguuvi cueⁿ'e yeⁿ'ē nanáaⁿ yā. 'Āā ntéé mar táámá lugar naachí cuuví cuéetineē na yāⁿ'āa ndúúcuⁿ nanguuvi. ¹² Ní n'diichí 'iiⁿyāⁿ s'eeⁿ chí n'dii yā, tináⁿ'ā chi n'geete yā chi ngaⁿ'a ntiⁿ'nyuⁿ yā ndúúcuⁿ tanáⁿ'ā tináⁿ'ā. Nducyaa ca yā ní cheetíndii yā nanááⁿ Ndyuūs. Ní Ndyuūs nan'guaáⁿ yā libros yeⁿ'e yā. Ní nan'guaáⁿ yā táámá libro chí libro yeⁿ'e vida cueⁿ'e daāⁿ-maⁿ. Ní Ndyuūs n'diichí yā nuuⁿndi yeⁿ'e tináⁿ'ā s'eeⁿ yeⁿ'é denduⁿ'ū chi canéé nguūⁿ na libro s'eeⁿ tan'dúúcaⁿ chí dííⁿ yā. ¹³ Ní 'iiⁿyāⁿ chí ch'ii yā nguaaⁿ nuūⁿniⁿyáⁿ'ā ní nan'dáa yā. Ní tanáⁿ'ā chí snuú yā na lugar yeⁿ'e 'iiⁿyāⁿ chí n'díí ní nan'dáa yā. Ní Cristo n'diichí yā nuuⁿndi yeⁿ'e ca'áámá ca'aamá yā tan'dúúcaⁿ chí dííⁿ yā. ¹⁴ Tuu'mi ní vaadi n'gii ndúúcuⁿ lugar yeⁿ'ē ndúúcuⁿ 'iiⁿyāⁿ chí n'díí yeⁿ'e 'áámá yā cannuúⁿ yā ná nuūⁿniⁿyáⁿ'ā chí ngiichi. Ní nuūⁿniⁿyáⁿ'ā chí ngiichi miiⁿ, chííⁿ chí ndíí 'úúví vaadi n'gii ní yeⁿ'é 'iiⁿyāⁿ chí n'díí yā. ¹⁵ 'Áámá 'iiⁿyāⁿ chin'dáa nuuⁿ yā na nuūⁿniⁿyáⁿ'ā chí ngiichi miiⁿ nducyáácaⁿ 'iiⁿyāⁿ chí nguéé canee n'guūⁿ chí duuchi yeⁿ'e yā na libro yeⁿ'e vida cueⁿ'e daāⁿmaⁿ.

Yeⁿ'e va'ai cheeti nguuvi ngai ndúúcuⁿ iⁿ'yeeⁿ'dī ngai

21 Maaⁿ ní n'diichí táámá va'ai cheeti nguuvi chí ngai ndúúcuⁿ 'áámá yāⁿ'āa chí ngai ti va'ai cheeti nguuvi chí vmnááⁿ vmnaaⁿ miiⁿ ndúúcuⁿ yáⁿ'āa chí vmnááⁿ vmnaaⁿ miiⁿ ní chó'oo yeⁿ'ē. Ní 'tiicá ntúúⁿ 'āā ntéé véé nuūⁿniⁿyáⁿ'ā. ² Ní 'úú, Juan, n'diichí yááⁿ chí ðeeve chí yááⁿ Jerusalén chí ngai chí chíicá yeⁿ'e na va'ai cheeti nguuvi naachi canéé Ndyuūs. Ní yááⁿ miiⁿ ní yeve taaví tan'dúúcaⁿ 'aama n'daataá chí caama 'caandavaacu tá ní ðeeve idiíⁿ tá ndúúcuⁿ tá cáávā novio yeⁿ'e tá. ³ Ní ch'iindiveéⁿ 'áámá nduudu ch'ete yeⁿ'e na va'ai cheeti nguuvi chí caⁿ'a 'túúcaⁿ: Cuin'diichí ní maaⁿ. Va'ai yeⁿ'e Ndyuūs ní canee ndúúcuⁿ 'iiⁿyāⁿ s'eeⁿ ní Ndyuūs canéé yā nguaaⁿ 'iiⁿyāⁿ s'eeⁿ. Ní Ndyuūs canéé yā ndúúcuⁿ 'iiⁿyāⁿ s'eeⁿ. Ní 'iiⁿyāⁿ s'eeⁿ ní cuuvi 'iiⁿyāⁿ yeⁿ'é yā. Ní maááⁿ Ndyuūs miiⁿ ní cuuvi Ndyuūs yeⁿ'é yā. ⁴ Ndyuūs dideevé yā nuūⁿniⁿ nduutinaáⁿ yā yeⁿ'e nduutinaáⁿ 'iiⁿyāⁿ s'eeⁿ. 'Āā ntéé cuuvi 'cuúvi yā. 'Āā ntéé cuuvi ya'ai ca yā ní 'āā ntéé cuéecu yā. 'Āā ntéé cuuvi 'cuenú yā cuuvi ti dendú'ū yeⁿ'e cuááⁿ vmnaaⁿ 'āā chó'oo.

⁵ Tuu'mi ní 'iiⁿyāⁿ chí véé yā na trono miiⁿ ní caⁿ'a yā: Ndís'tii n'diichí ní. 'Úú ní dííⁿ tanducuéⁿ'ē denduⁿ'ū chí nduuví ngai. Ní 'iiⁿyāⁿ miiⁿ caⁿ'a yā chíi yā 'úú: Dii, Juan, dingúuⁿ di nduudu s'eeⁿ ti nduudu s'eeⁿ ní nduudu cuaacu. Ní nducyaa ca 'iiⁿyāⁿ cuuvi cu'téenu yā nduudu s'eeⁿ.

⁶ Cuayiivi caⁿ'a yā chíi yā 'úú 'tíicá: 'Úú dín'daí nducuéⁿ'ē. 'Úú ní yeⁿ'e cuaaⁿ naachi íngaⁿ'ā ní ndíí cuaaⁿ ná 'cuiinu tan'dúúcaⁿ letras A ndíí Z yeⁿ'e alfabeto. 'Iiⁿyāⁿ chí yaaca yā 'úú ní ca'á nuūⁿniⁿ chí cu'u yā tanducuéⁿ'ē chí neⁿ'é yā ní nguéé nadí'íve yā cáávā nuūⁿniⁿ miiⁿ chí vida cueⁿ'e daāⁿmaⁿ. ⁷ 'Iiⁿyāⁿ chí cuchéé yā

yeⁿē tanducueⁿē 'úú ní ca'á tanducueⁿē chuū chi cuuvi yeⁿé yā. Ní 'úú cuuvi Ndyuūs yeⁿe yā ní 'iiⁿyāⁿ s'eeⁿ ní cuuvi daiyá. ⁸Naati 'iiⁿyāⁿ chí 'va'a yā ndúúcu 'iiⁿyāⁿ chí nguéé i'téenu yā o 'iiⁿyāⁿ chí nguéé neⁿe yā 'iiⁿyāⁿ, ndúúcu 'iiⁿyāⁿ chí n'giiⁿnúⁿ yā 'iiⁿyāⁿ, ndúúcu 'iiⁿyāⁿ chí ca'á yā ndúúcu n'daataá o isaⁿā chí nguéé yeⁿe yā, ndúúcu 'iiⁿyāⁿ chí nadiiⁿ denduū yeⁿe ngaatu, ndúúcu 'iiⁿyāⁿ chí i'téenu yā santos chí ídolos, ndúúcu 'iiⁿyāⁿ chí yaadí yā, nducyaaca 'iiⁿyāⁿ s'eeⁿ ní canéé chí ca'á yā nuūⁿnīⁿyáⁿā chí ngiichi ndúúcu yaⁿā ní ndúúcu tuūu azufre. Chuū ní chiiⁿ chii ndii 'uūví cúúví 'cuūví yā.

Yeⁿe yāā Jerusalén chí ngai

⁹Tuuⁿmi ní ndaā nanááⁿ 'úú 'áámá chee ángel naachi ndeēche yā chí véé 'cuūtif yeⁿé yā, 'cuūtif s'eeⁿ ndúúcu ndeēchē vaadi ya'ai yeⁿe cuuaⁿ na 'cuiinu. Ní caⁿa yā chii yā 'úú: Díí, Juan, cuchíí di 'muuⁿ ni 'úú 'cuuⁿmíⁿ dii du'u chí novia chí n'daataá yeⁿe 'iiⁿyāⁿ chí nguuvi 'iiti cuūchí.

¹⁰Ní chuū ní yeⁿe chí n'diichí taachi canéé maaⁿ poder yeⁿe Espíritu N'dai yeⁿé Ndyuūs. Angel candéé yā 'úú naachi véé 'áámá yiicū ch'ete ní yaacu. Ní chí'íyá yā 'úú yāāⁿ ch'ete ní dēve chí nguuvi Jerusalén chí cuch'éeⁿ yeⁿe na va'ai cheeti nguuvi yeⁿe nanááⁿ Ndyuūs. ¹¹Yāāⁿ miiⁿ ní dēvé ngii ndúúcu yeⁿé Ndyuūs chí dēvé ngii. Ní dēvé ngii yeⁿe yāāⁿ miiⁿ ní tan'dúúca 'áámá tuūu chí yaⁿai chí'vē chí tan'dúúca tuūu jaspe chí dēvé tan'dúúca cristal. ¹²Ní véé 'áámá ncheēti nuuⁿmaⁿ ndiivi na yāāⁿ miiⁿ ndúúcu ndichúúví cheendi va'āi ch'ete yeⁿé. Ní véé ndichúúví ángeles 'áámá 'áámá yā ní nguaindaí yā 'áámá 'áámá cheendi va'āi ch'ete miiⁿ. Ní chí duuchi chí canéé nguūⁿ vmaaaⁿ ca'áámá ca'áámá cheendi va'ai ch'ete miiⁿ ní 'áámá yeⁿe chí duuchi yeⁿe chí ndu'u

ndichúúví tribus yeⁿe 'iiⁿyāⁿ chí Israel chí judíos. ¹³Ní véé 'iinū cheendi va'āi n'geete 'áámá 'áámá lado yeⁿé yāāⁿ miiⁿ. Cuuaⁿ naachí can'daā 'yáⁿā veē 'iinū cheendi va'āi. Ní cuuaⁿ na 'niiⁿnuⁿ véé 'iinū cheendi va'āi, ní cuuaⁿ ndiiyā véé 'iinū cheendi va'āi, ní cuuááⁿ na ngi-ya 'yáⁿā véé 'iinū cheendi va'āi. ¹⁴Ní cimientu yeⁿe yāāⁿ miiⁿ véé ndichúúví tuūu chí cimientu yeⁿé. Ní chí duuchi yeⁿe nduū ndichuuví apóstoles yeⁿe 'iiⁿyāⁿ chí duuchi 'iiti cuūchí, 'áámá 'áámá chí duuchí yā canéé nguūⁿ vmaaaⁿ 'áámá 'áámá tuūu miiⁿ.

¹⁵Ní ángel miiⁿ chí ngāⁿa yā ndúúcu 'úú ndéé yā 'áámá tááⁿ ndúú yeⁿe 'díⁿnguāⁿ chí dicaadí yā yāāⁿ miiⁿ ndúúcu cheendi va'āi ch'ete miiⁿ yeⁿé ndúúcu ncheēti miiⁿ yeⁿé. ¹⁶Ní yāāⁿ miiⁿ ní cuadrada ní chí ch'ee'nuu dáámá nūuⁿ ndúúcu chí ch'eēnūu. Ní ángel miiⁿ ní dicaadí yā yāāⁿ miiⁿ ndúúcu nduu yeⁿe 'díⁿnguāⁿ. Ní caadi yeⁿe yāāⁿ miiⁿ ní 'uūví mil canéé 'uūví cientos kilómetros yeⁿé. Ní chí ch'ee'nuu miiⁿ ní chí ch'eēnūu ní chí yaacu yeⁿe yāāⁿ miiⁿ 'āā daamá nūuⁿ. ¹⁷Ní ángel miiⁿ dicaadí yā nancheēti miiⁿ. Ní ngíí 'iinū ngeecu cuūuⁿ metros chí ángel miiⁿ dicaadí yā. Ní caadí miiⁿ ní dáámá ndúúcu caadí yeⁿe chí caadí 'iiⁿyāⁿ chí snee iⁿ'yeeⁿdí 'cūu.

¹⁸Ní ncheēti miiⁿ ní chin'dai ndúúcu tuūu jaspe. Ní yāāⁿ miiⁿ ní chin'dai yeⁿe dámaāⁿ 'díⁿnguāⁿ puro. Ní tan'dúúca chí 'nááⁿ vidrio dēve, 'tíicā yāāⁿ miiⁿ. ¹⁹Cimiento yeⁿe ncheēti miiⁿ ndíí adornado ndúúcu tanducueⁿē tuūu chí yaⁿai chí'vē. Cimiento chí vmaāáⁿ vmaaaⁿ miiⁿ ní yeⁿe tuūu jaspe, ndii chíⁿ ndii 'uūví miiⁿ ní yeⁿe tuūu zafiro, ndii chíⁿ ndii 'ínú miiⁿ ní yeⁿe tuūu ágata ní ndii chíⁿ ndii cuūuⁿ miiⁿ ní yeⁿe tuūu esmeralda. ²⁰Ndii chíⁿ ndii nyuⁿu miiⁿ ní yeⁿé tuūu ónice, ní ndii chíⁿ ndii niyaaⁿ miiⁿ ní yeⁿé tuūu cornalina, ní

ndii chííⁿ ndii ndeēchē ní yeⁿe tuūu crisólito, ní ndii chííⁿ ndii niiⁿniⁿ ní yeⁿe tuūu berilo, ní ndii chííⁿ ndii nuuⁿ ní yeⁿe tuūu topacio, ní ndii chííⁿ ndii ndiichi ní yeⁿe tuūu crisoprasa, ní ndii chííⁿ ndicháámá ní yeⁿe tuūu jacinto, ní ndii chííⁿ ndichúúví ní yeⁿe tuūu amatista. ²¹ Ní ndu'u ndichúúví cheendi va'āi n'geete miíⁿ ní ndiichúúví perlas. Ní ca'áámá ca'áámá cheendi va'āi ch'ēete miíⁿ ní 'áámá perla nūuⁿ. Ní yúúni ch'ēete yeⁿe yááⁿ miíⁿ dámaāⁿ 'dí'nguāⁿ puro ní dinááⁿ tan'dúúca vidrio deēve.

²² Ní 'úú nguéé n'diichi mar 'áámá yaācū na yááⁿ miíⁿ ti Señor chi Ndyuūs chi véé tanducuéⁿē dendu'ū poder yeⁿe yā ndúúcu 'iiⁿyāⁿ chi nguuvi 'iiti cuūchi miíⁿ, 'iiⁿyāⁿ s'uuuⁿ chi Ndyuūs chi yaācū yeⁿe yááⁿ miíⁿ. ²³ Ní yááⁿ miíⁿ nguéé neⁿe 'yá'ā ndí nguéé ndúú 'iiyū chi deēve yeⁿe ti Ndyuūs chi deēve ngii ní deēve yeⁿe yááⁿ miíⁿ, ní 'iiⁿyāⁿ chi duuchi 'iiti cuūchi ní deēve yeⁿe yááⁿ miíⁿ. ²⁴ Ní 'iiⁿyāⁿ chi nadanguaⁿai yā yeⁿe naciones chiicá yā ná deēve yeⁿe yááⁿ miíⁿ. Ní reyes yeⁿe yá'āa 'cūú ndéé yā ch'ēete yeⁿe maáⁿ yā ndúúcu honra yeⁿe maáⁿ yā nduucú yā ndii yááⁿ miíⁿ. ²⁵ Ní cheendi va'ai n'geete yeⁿe yááⁿ miíⁿ nguéé nduudi núúⁿmaⁿ nguuvi. Ní 'āā ntéé véé n'gaaⁿ miíⁿ. ²⁶ Ní 'iiⁿyāⁿ s'eeⁿ yeⁿe naciones yeⁿe iⁿ'yeeⁿdí 'cūú ní ndéé yā yeⁿe chi ch'ēete ndúúcu honor yeⁿe naciones yeⁿe yā. ²⁷ Nguéé cuuvi cundaā na yááⁿ miíⁿ dendu'ū chi nguéé deēve, ndúúcu 'iiⁿyāⁿ chi diiⁿ yā chi nguéé n'daaca, ndúúcu 'iiⁿyāⁿ chi ngaⁿa yā nduudu yaadi. Dámaāⁿ cundaā 'iiⁿyāⁿ chi canéé nguūⁿ chi duuchi yā na libro yeⁿe vida cueⁿe daāⁿmaⁿ chi ndéé 'iiⁿyāⁿ chi nguuvi 'iiti cuūchi.

22 Tuuⁿmi ní ángel miíⁿ ch'iⁿi yā 'úú 'áámá yícu deēve naachi canéé nuūⁿniⁿ yeⁿe vida cueⁿe daāⁿmaⁿ. Nuūⁿniⁿ miíⁿ ní deēvé tan'dúúca cristal ní ican'daā yeⁿe trono yeⁿe Ndyuūs

ndúúcu trono yeⁿe 'iiⁿyāⁿ chi nguuvi 'iiti cuūchi. ² Ní náavtaⁿa yeⁿe yúúni ch'ēete yeⁿe yááⁿ miíⁿ ní nduu 'úúví lado yeⁿe yícu míⁿ cáta'ai yáⁿá yeⁿe vida cueⁿe daāⁿmaⁿ chi ngii ndu'ū ndichúúví naaⁿ n'gui'i. Ni ca'aama 'íyú ní ngii 'áámá 'áámá naaⁿ n'gui'i yeⁿe. Ní tá'a yáⁿá miíⁿ chííⁿ chi diiⁿ chi nduūva yeⁿe vaadi ya'ai yeⁿe naciones. ³ 'Āā ntéé véé mar 'áámá dendu'ū miíⁿ chi Ndyuūs caⁿa yā chi condenado chi canéé na yááⁿ miíⁿ. Trono yeⁿe Ndyuūs ndúúcu trono yeⁿe 'iiⁿyāⁿ chi nguuvi 'iiti cuūchi canéé na yááⁿ miíⁿ. Ní 'iiⁿyāⁿ chi dichíⁿvē Ndyuūs canéé yā miíⁿ. ⁴ Ní 'iiⁿyāⁿ s'eeⁿ ní snaáⁿ yā naáⁿ Ndyuūs ní canéé nguūⁿ chi duuchi Ndyuūs nchēete yā. ⁵ Ní nguéé cuuvi n'gaaⁿ yááⁿ miíⁿ. 'Iiⁿyāⁿ s'eeⁿ chi n'geetinée yā miíⁿ nguéé neⁿe yā mar 'áámá deēve yeⁿe lámpara ní nguéé deēve yeⁿe 'yá'ā caati 'iivú Ndyuūs ngii deēve yā. Ní 'iiⁿyāⁿ s'eeⁿ caaⁿmaⁿ ntiíⁿnyuⁿ yā cueⁿe daāⁿmaⁿ cueⁿe daāⁿmaⁿ tan'dúúca reyes.

Tiempo taachi cuchíí Jesucristo ní 'āā canéé niiⁿnuúⁿ

⁶ Cuayiivi miíⁿ ní ángel caⁿá yā chii yā 'úú: Nduudú 'cūú ní nduudu cuaacu. Ní 'iiⁿyāⁿ cuuvi cu'téenu yā nduudu miíⁿ. Señor chi maaⁿ Ndyuūs yeⁿe espíritus yeⁿe 'iiⁿyāⁿ profetas chi Ndyuūs ndéevé yā, maáⁿ yā dicho'ó yā ángel yeⁿe yā chí ángel 'cuuⁿmíⁿ yā 'iiⁿyāⁿ chí dichíⁿvē Ndyuūs dendu'ū chí 'āā canéé chí chó'ó ní 'āā snee niiⁿnuúⁿ.

⁷ Jesús ngaⁿá yā ngii yā ndís'tii. 'Caandiveéⁿ ni. 'Úú ní ndaaⁿ nuuⁿ. De'e chúúca yeenu 'iiⁿyāⁿ chí 'caandiveéⁿ yā nduudu cuaacu yeⁿe Ndyuūs, nduudu chí canéé nguūⁿ na libro 'cūú.

⁸ 'Úú, chí Juan, chíindiveéⁿ ní n'diichi dendú'ū chí 'túúca. Ní cuayiivi chí n'diichi ní chíindiveéⁿ chuū, candiitin'díí ná ca'a ángel chí ch'iⁿi yā 'úú dendu'ū chí 'túúca chí neⁿe i'teenú án-

gel mii". ⁹Naati ángel mii" ca"na yā chii yā 'úú: Nguéé dii" di 'tíicā. 'Úú ntúú" dichii'vé Ndyuūs tan'dúúca dii ndúúcu hermanos ye"e di chi nga"á yā nduudu cuaacu ye"é Ndyuūs ndúúcu nducyáácá yā chí 'caandiveé" yā nduudu cuaacu chi canéé nguū" na libro 'cūū. Díí, cu'téenu di Ndyuūs.

¹⁰Ní ángel mii" ní ca"na ntúú" yā chii yā 'úú: Nguéé cunuu" n'dé'ei di nduudu cuaacu ye"é Ndyuūs chi canéé nguū" na libro 'cūū caati tiempo ye"e dendúú chi 'túúca 'āā snee nii"nuú". ¹¹Maa" ní cu'née" nī 'ii"yā" chi nguεε n'daacā idif" yā chí 'tíicā díf" yā. 'Tiicá ntúú" 'ii"yā" chi nadacadiinúú" yā ye"e dendu'ú chi nguεε n'daacā, cu'née" nī chí 'tíicā díf" yā. 'Ii"yā" chí din'daacá yā, cu'née" nī chí díf" yā 'tíicā. 'Ii"yā" chí 'áámá díf" yā nti-i"nyu" ye"e Ndyuūs cu'née" nī chí 'aama díf" yā 'tíicā.

¹²'Caandiveé" nī chii" chí ca"na Jesús. 'Úú ní núú" nūu" ndaá. Ní ndeé premios chí ca"á ca'á 'áámá 'áámá 'ii"yā" premios chí tuneé yā ye"e nti"nyu" chí ye"e yā. ¹³'Úú ní 'ii"yā" vmnáá" vmnaa" ndíí naachi 'cuiinu. 'Úú ní canéé naachi chinga'ā ndíí cuayiivi chí 'cuiinū tan'dúúca letras ye"e alfabeto A ndíí Z, 'tíicā 'úú, nga"na Jesús.

¹⁴De'ε chúúca yeenu 'ii"yā" s'ee" chí nandεεvé yā catecai yā caati cuuvi cuta'á yā n'gui'i ye"ē yá"á ye"e vida, ní cuuvi cundaa yā cheendi va'ai ye"e yáā" mii" ní cho'ó yā cuaa" cheēti va'ai cheēti nguuvi. ¹⁵Naati cuaa" daami yáā" mii" ch'εetinée 'ii"yā" chí nguéé chí'téenu yā Ndyuūs ndúúcu 'ii"yā" chí ngaatu, ndúúcu 'ii"yā" chí ca"á yā ndúúcu ndaataa o isa"ā chí nguéé ye"é yā, ndúúcu 'ii"yā" chí n'gii"nú" yā 'ii"yā", ndúúcu 'ii"yā" chí i'téenu yā santos o ídolos ndúúcu nducyáácá 'ii"yā" chí ne"é yā nginnche'éi yā 'ii"yā" ní nga"na yā nduudu yaadi.

¹⁶'Úú Jesús idicho'ó ángel ye"é chí caa"ma" cuaacú yā ye"e nducué"e cosas chí 'túúca nanáá" ndís'tii chí 'ii"yā" ye"e yaacú s'ee". 'Úú ní 'ii"yā" vmnáá" vmnaa" ye"e ndaata ye"e David 'úú. 'Úú ní 'íi"nyú" chí ngíí dεεve nguεetiyya".

¹⁷Espíritu N'dai ye"é Ndyuūs ndúúcu 'ii"yā" s'ee" chí ye"é Ndyuūs nga"na yā 'tíicā: Ndís'tii cuchíí nī. Ní 'āā du'ú nūu" 'ii"yā" chí n'giindiveé" yā nduudu ye"é ní canéé chí caa"má" yā: Cuchíí nī. Ní n'dii chí yaaca nī cuchíí nī. Cuchíí nī ndúúcu 'āā du'ú nūu" 'ii"yā" chí ne"é yā. Cuchíí nī ní cu'u nī ye"e nuū"nī" ye"e vida cue"e daā"ma". Ní nguéé de'ε vεε cūndi'i ye"é nī nuū"nī" ye"e vida cue"e daā"ma".

¹⁸'Úú nga"á ngíí nduudu cuaacu ca'áámá ca'áámá 'ii"yā" chí n'giindiveé" yā nduudu ye"e dendúú chí canéé chí cuchii chí canéé nguū" na libro 'cūū. Nduuti chí 'áámá yā cu'nee" ca n'deēe nduudú nguéé ti chí canéé nguū" na libro 'cūū Ndyuūs ca'á yā 'ii"yā" mii" castigo ye"e yā ye"e nducué"ē vaadi ya'ai chí canéé nguū" na libro 'cūū. ¹⁹Ní nduuti chí 'áámá 'ii"yā" divíí yā na"na nduudu ye"é Ndyuūs ye"e dendúú chí cuchii chí canéé nguū" na libro 'cūū, 'tiicá ntúú" Ndyuūs nadivíí yā parte chí cuuvi ye"e yā ye"e libro ye"ē vida cue"e daā"ma" ndúúcu parte chí cuuvi ye"é yā ye"e yáā" chí dεεve ye"e chí canéé nguū" na libro 'cūū.

²⁰'Ii"yā" chí nga"na cuaacú yā dendu'ú chí 'túúca, 'ii"yā" mii" nga"na yā: Cuaacu ní"nyu" chí 'āā cuchii nuú". 'Tíicā cuuvi. Cuchíí nī Señor Jesucristo.

²¹Ní maa" ní Señor Jesucristo ye"e yú tée yā ndís'tii nducué"ē chí n'daacā ye"é yā, ní canéé yā ndúúcu ndís'tii. 'Tíicā cuuvi.